


Tnúhu ní cáháⁿ yă
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yǎ ndiǒxí xito cùu uú

New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
872f7754-0986-5ecd-a059-925a708a6939

Contents

SAN MATEO	1
SAN MARCOS	79
SAN LUCAS	127
SAN JUAN	202
LOS HECHOS	253
ROMANOS	321
1 CORINTIOS	353
2 CORINTIOS	385
GÁLATAS	405
EFESIOS	416
FILIPENSES	427
COLOSENSES	434
1 TESALONICENSES	441
2 TESALONICENSES	447
1 TIMOTEO	451
2 TIMOTEO	460
TITO	466
FILEMÓN	470
HEBREOS	472
SANTIAGO	497
1 PEDRO	504
2 PEDRO	513
1 JUAN	519
2 JUAN	526
3 JUAN	527
JÚDAS	528
APOCALIPSIS	531

TNÚHU NÍ CHÍDÓ TNÜNÍ TÉ MÀTEÚ

Nchaa cue téé ní xíndecu ndéé sanaha cùtnàhá vátá quíxí-gá Xítóhó Jesucristú

(Lc. 3:23-38)

¹ Te ñaní tnáhá Xítóhó Jesucristú ní cuu ndíi Dàvíí ndíhi ndíi Àbráhám, cue téé ní xíndecu ndéé sanaha vihi-gá ñuyíú-a. Te duha ndùu cuendá dava-gá cue téé ní cuu ñaní tnáhá-gá ní xíndecu ndéé sanaha.

² Ndíi Àbráhám ní xóo ìⁿ déhe ndíi, te ndíi-án ní xínani ndíi Isàác. Te déhe ndíi Isàác-án ní cuu ndíi Jàcób, te déhe ndíi Jàcób-án ní cuu ndíi Jùdá, te diu-ni ndíi Jàcób-án ní cuu tātá dava-gá cue ñaní ndíi Jùdá-án. ³ Te déhe ndíi Jùdá-án ndíhi ñadìhí ndíi, ndíi Tàmár ní cuu ndíi Fàrés ndíhi ndíi Zàrá. Te déhe ndíi Fàrés-án ní cuu ndíi Èsróm, te déhe ndíi Èsróm-án ní cuu ndíi Àrám. ⁴ Te déhe ndíi Àrám-án ní cuu ndíi Aminàdáb, te déhe ndíi Aminàdáb-án ní cuu ndíi Nàsón, te déhe ndíi Nàsón-án ní cuu ndíi Sàlmón. ⁵ Te ñadìhí ndíi Sàlmón-án ní xínani-aⁿ Ràháb, te ní xóo ìⁿ déhe-yu ní xínani-dě Bòóz. Te ñadìhí ndíi Bòóz-án ní xínani-aⁿ Rùt, te ní xóo ìⁿ déhe-yu ní xínani-dě Òbéd, te déhe ndíi Òbéd-án ní cuu ndíi Isàí. ⁶ Te déhe ndíi Isàí-án ní cuu ndíi Dàvíí téé ní xíndaha ñaha xii cue ñáyíu isràél, Te déhe ndíi Dàvíí-án ndíhi ñadìhí ndíi ní cuu ndíi Salòmón. Te díhna-gá ndíi Ùriás ní cándeca ndíi ñadìhí-án te dàtnùní ní naqueheⁿ ñaha ndíi Dàvíí-án.

⁷ Te déhe ndíi Salòmón ní cuu ndíi Ròboám, te déhe ndíi Ròboám-án ní cuu ndíi Àbíás, te déhe ndíi Àbíás-án ní cuu ndíi Àsá. ⁸ Te déhe ndíi Àsá-án ní cuu ndíi Josàfát, te déhe ndíi Josàfát-án ní cuu ndíi Jòrám, te déhe ndíi Jòrám-án ní cuu ndíi Ùziás.

⁹ Te déhe ndíi Ùziás-án ní cuu ndíi Jótám, te déhe ndíi Jótám-án ní cuu ndíi Àcáz, te déhe ndíi Àcáz-án ní cuu ndíi Ezèquiás. ¹⁰ Te déhe ndíi Ezèquiás-án ní cuu ndíi Manàsés, te déhe ndíi Manàsés-án ní cuu ndíi Àmón, te déhe ndíi Àmón-án ní cuu ndíi Jòsiás. ¹¹ Te déhe ndíi Jòsiás-án ní cuu ndíi Jecònias. Te diu-ni ndíi Jòsiás-án ní cuu tātá nchaa dava-gá cue ñaní ndíi Jecònias-án. Te dàv-á-án ní quide yica cue téé ñúú Babiloniá ndécá-güedé ñáyíu isràél cuáháⁿ ñúú-güedé cuendá yàcáⁿ cundecú-yu.

¹² Te sátá ní yáha ducaⁿ ní cuu, te ndíi Jecònias ní xóo ìⁿ déhe ndíi ndíhi ñadìhí ndíi, te téé-án ní xínani-dě Salàtiél. Te déhe ndíi Salàtiél-án ní cuu ndíi Zorobàbél. ¹³ Te déhe ndíi Zorobàbél-án ní cuu ndíi Àbíúd, te déhe ndíi Àbíúd-án ní cuu ndíi Eliàquím, te déhe ndíi Eliàquím-án ní cuu ndíi Àzór. ¹⁴ Te déhe ndíi Àzór-án ní cuu ndíi Sádóc, te déhe ndíi Sádóc-án ní cuu ndíi Àquím, te déhe ndíi Àquím-án ní cuu ndíi Èliúd. ¹⁵ Te déhe ndíi Èliúd-án ní cuu ndíi Eleàzár, te déhe ndíi Eleàzár-án ní cuu ndíi Mátán, te déhe ndíi Mátán-án ní cuu ndíi Jàcób. ¹⁶ Te déhe ndíi Jàcób-án ní cuu ndíi Chèé téé ní cuu yíi tá Màriá xíchí ní cuu nàná Jesús Yáá ní tendaha Dútú Ndiòxí ní quixi ñuyíú-a.

¹⁷ Te sa ní cuu úxúú tnàhá cue téé cùu ñaní tnáhá ndíi Àbráhám ndécú dàv-á-án, te dàtnùní ní cacu ndíi Dàvíí diu-ni ñaní tnáhá ndíi. Te núú tnàhá méé ndíi Àbráhám ndíhi ndíi Dàvíí ní cuu úxícúmí tnàhá-güedé. Te ducaⁿ te sa ní xínu úxícúmí-gá tucu-güedé ní cacu, te dàtnùní ní tñí ñaha cue téé ñúú Babiloniá xii ñáyíu isràél ndécá ñaha-güedé xii-yu cuáháⁿ ñúú-güedé cuendá yàcáⁿ cundecú-yu. Te sátá ní yáha sá dúcáⁿ ní cuu, te ní cacu úxúní tucu cue téé ní cuu ñaní tnáhá ndíi Àbráhám ndíhi ndíi Dàvíí, te dàtnùní ní cacu Xítóhó Jesucristú ñuyíú-a. Te núú tnàhá méé-gá ní

cuu úxícúmí tnàhá-güedé.

*Ní cacu Jèsús
(Lc. 2:1-7)*

¹⁸ Te duha ní cuu cúnàhá ní cacu Xítoho Jesucristú, chi dává-án ní xindecu ìn xíchí cuéchi ní xínani Màriá. Te xíchí-án sa ní cundáá tnúhu sá tnándaha-xi ndihi ìn téé nàni Cheé. Te cùmání-gá tnándaha-xi ndihi téé-án te Espíritú Yá Ndiöxí ní guide ní ngúhuⁿ déhe-xi. ¹⁹ Te té Chèè téé cuení candeca ñaha xii xíchí-án ní cutnùní iní-dé sá ñúhú déhe-xi. Te cùu-dé ìn téé guide ndáá, núu xiáⁿ duuⁿ duuⁿ ní sani iní-dé sá vā tnándaha-gá-dé ndihi-xi, te dicó-ni sá ñà túú ní cāháⁿ dé chi ní cuení-dé sá vā cāháⁿ cuèhé cāháⁿ duha ñáyiú cuendá-xi. ²⁰ Te sáta dúcáⁿ ní sani iní-dé te ní ngáva-dé ní xidí-dé, te núú sání-dé ní sáháⁿ ìn espíritú xínú cuèchi núú Yá Ndiöxí ní xáhaⁿ-xi xii-dé:

—Yóho té Chèè téé cùu ñani tnàhá ndii Dávíí, yúhú cāchí tnúhu-í xii-n sá ñà túú nā cani iní-n, tnándaha nahi-ni-n ndihi tá Màriá cuéi ñúhu déhe-xi, chi mee Espíritú Yá Ndiöxí ní guide-xi ducaⁿ ní ngúhuⁿ déhe-xi. ²¹ Te na càcu déhe-xi-án te danàni-n-dé Jèsús. Te ducaⁿ cùnani-dé, chi téé-án cada-dé cuendá sá vā cundècu-gá cue ñani tnàhá-dé ñáyiú isràél ichi cuèhé ichi duha —duha ní xáhaⁿ espíritú-án xii té Chèè-án núú sání-dé.

²² Te ducaⁿ ní cuu chi ní quee ndáá-xi nācuáa ní xáhaⁿ Yá Ndiöxí xii ìn téé ní cāháⁿ tnúhu-gá ndéé sanaha. Te téé-án ní chídó tnùní-dé núú tütú-gá nācuáa ní xáhaⁿ-gá xii-dé, te duha ní xáhaⁿ-gá:

²³ Cundecu ìn xíchí cuéchi ndéé cuéé-gá.

Te òré ndécú íi-xi vátá ñihí-gá yii-xi te ngúhuⁿ déhe-xi.

Te òré ná cācú déhe-xi te danàni ñahá-yu Emànuél.

Duha ní xáhaⁿ-gá xii téé-án ní chídó tnùní-dé núú tütú-gá. Te tnúhu Emànuél-án quée-xí: Yá Ndiöxí ndécú ndihi-o. Núu xiáⁿ ducaⁿ ní cuu vitna.

²⁴ Te òré ní ndiquíú iní té Chèè-án te ní guide-dé nācuáa ní xáhaⁿ espíritú-án xii-dé chi ní tnándaha-dé ndihi tá Màriá. ²⁵ Dico ndi dííⁿ ní xindecú-yu ndéé ní sáá nduu ní cacu déhe-xi. Te òré ní cacu déhe-xi-án te ní danàni ñaha-dé Jèsús.

2

Cue téé cuángoto ñaha xii Jèsús

¹ Te Jèsús ní cacu-gá ìn ñúú nání Bèlén, te ñúú-án yíndèhu-xi distritú Júdeá. Te dává-án cùnùu té Hèrodés yíndàha-dé ñáyiú. Te ñúú Jerusalén ní quexio cue téé véxi ndàa xio nācuáa quène nchíanchii, cue téé túha dàcuaha cuendá nchaa sá ndéé andiú. ² Te ndúcu tnúhu-güedé núú ñáyiú ñúú-án, te xáhaⁿ-güedé:

—¿Vá cündèe iní-ndó cāchí tnúhu-ndo ndéé ndécú téé quindaha ñaha xii ñáyiú isràél-án? Chi ní xíní-ndí ní quene chódíní-dé ndàa xio nācuáa quène nchíanchii, núu xiáⁿ véxi-ndí chi cuení-ndí quini-ndí-dé te chiñuhu-ndí-dé —cāchí-güedé xáhaⁿ-güedé xii-yu.

³ Te òré ní níhí téé cùnùu nani Herodés tnúhu sá ndúcu tnúhu cue téé-án ndéé ndécú téé quindaha ñaha xii ñáyiú isràél, te ñá túú tnàhí ni cùu váha iní-dé, te diu-ni ducaⁿ ñà túú ní cùu váha iní tnàhá nchaa ñáyiú ñúú-án. ⁴ Te ní cana-dé cue téé cùu dütú cùnùu, ndihi cue téé dàcuaha ñaha xii ñáyiú nchaa tnúhu ní chídó tnùní ndii Moisés, te ní xicáⁿ tnúhú-dé núú-güedé núu xíní-güedé ndéé cacu Crístú téé tendaha Yá Ndiöxí quixi ñuyú-a. ⁵ Te ní xáhaⁿ-güedé xii-dé:

—Ín ñúú yíndèhu distritú Júdeá cacu-dé, te ñúú-án nání-xí Bèlén, chi quee ndáá-xi nācuáa ní xáhaⁿ Yá Ndiöxí xii ìn téé ní xóo cāháⁿ tnúhu-gá ndéé sanaha. Te duha ndùu tnúhu ní chídó tnùní-dé núú tütú-gá:

⁶ Ñúú Bèlén cúu-xí ìn ñúú líhli yíndèhu distritú Júdeá,

te ío-gá cúnùu-xi dacúúxi
dàva-gá ñúú cúnùu yindehu
distrítú-áⁿ,

chi ñu ñúú-áⁿ quee ñⁿ téé ío cúnúu.

Te téé cunuú-áⁿ quindaha-dě ñáyiú
cùu cuendá-í ñáyiú isráél.

Duha ní xáhaⁿ-gã xii téé ní xóo
cáháⁿ tnúhu-gá, te ducaⁿ ñí chídó
tnùnì-dé núú tütú-gá —càchí-güedé
xáhaⁿ-güedé xii té Hèrodés.

⁷ Te sáta dúcáⁿ te té Hèrodés
dayuhu ñí cana-dé cue téé ndücu
tnúhu núu ndéé ní cacu téé
quindaha ñaha xii ñáyiú isráél, te
ní xícáⁿ tnúhú-dě núú-güedé ná
nduu cùu-xi nduu díhna nuu ñí
xiní-güedé chódíní. ⁸ Te sáta dúcáⁿ
te ní xáhaⁿ-dě xii-güedé:

—Chí cuáháⁿ ñúú Bèlén te nducu
tnúhu váha-ndo núu ndéé ní cacu
téé ducaⁿ quindaha ñaha xii ñáyiú
isráél. Te òré ná nàníhí-ndó-dě te
quixi-ndo càchí tnúhu-ndo cuendá
quíhíⁿ-í tnàhá-í chiñuhu-í-dé —
càchí-dé xáhaⁿ-dě xii-güedé.

⁹ Te sáta dúcáⁿ ñí xáhaⁿ tē
Hèrodés-áⁿ te ní xica-güedé
cuáháⁿ-güedé. Te chódíní ñí
xiní-güedé ní quene ndáa xio
nacuáa quène nchícanhii-áⁿ yòdo
nuu-di núú-güedé cuáháⁿ. Te
ní ngüíñí chódíní-áⁿ, te núú ñí
ngüíñí-di-áⁿ yíndáá núú ndécú
Jesús. ¹⁰ Te òré ní xiní cue téé-áⁿ
ñí ngüíñí chódíní-áⁿ núú yíndáá
ndécú-gã, te ní cudíí víhí ñí-güedé.

¹¹ Te ducaⁿ te ní quexìo-güedé
ndéé núú cáá vèhe ndecu Jesús.
Te òré cuánguihu-güedé xití vehe
te ní xiní-güedé Jesús ndécú-gã
ndihí náná-gã Màriá. Te ní ngüíñí
xití-güedé, te ní ngüíta-güedé ní
cachí-güedé sá ío càhnu cuu Jesús.
Te dàtnùnì ní nacaáⁿ-güedé càjá
xínehe-güedé, te ní tava-güedé
díhúⁿ cuááⁿ, ndihí dúsa sá ío
váha sàháⁿ tnámí nàni insiensú,
ndihí yúcu sá nání mírriá ní taxi
ndecu-güedé núú Jesús cuendá
cuu-xi ñí táhú sá cúu-xí-gã.

¹² Te Yá Ndióxi ní cáháⁿ-gá núú
sàni-güedé, te xáhaⁿ-gã xii-güedé
sá vã náyáha-gã-güedé cáháⁿ
ndihí-güedé té Hèrodés. Núu xááⁿ
cue téé-áⁿ cuánuhú-güedé ingá ichi,
te ñá túú-gã ní náyáha-güedé núú
ndécú tē Hèrodés.

*Cuáháⁿ-yu ndihí Jesús nàcióⁿ
Ègiptú*

¹³ Te sáta ñí yáha cuánuhú cue
téé ní sángoto ñaha xii Jesús, te ní
quexìo ñí espíritu xínú cuèchi núú
Yá Ndióxi núú sàni té Chèé, te
xáhaⁿ-xi xii-dé:

—Véxi-í càchí tnúhu-í xii-n sã
ndácóo-n, te ndee-n ñúú-a ndihí
Jesús, ndihí náná-gã cunu-ndo
quíhíⁿ-ndó nàcióⁿ Ègiptú, chi té
Hèrodés tendaha-dě cue téé quixi
nanducu ñaha xii Jesús cuendá
cahni ñaha-güedé. Te yàcáⁿ cun-
decu-ndo ndéé cachí tnúhu-í xii-n
nduu ndixi-ndo —cachí espíritu-áⁿ
xáhaⁿ-xi xii té Chèé núú sàni-dé.

¹⁴ Te té Chèé-áⁿ ñí ndácóo-dé,
te niú ní xica-dé ndihí tá Màriá
ndécá-yu Jesús cuáháⁿ nàcióⁿ
Ègiptú. ¹⁵ Te nàcióⁿ Ègiptú-áⁿ
ndécú-yu ní xihí té Hèrodés. Te
ducaⁿ ñí cuu chi ní quee ndáá-xi
nacuáa ní cachí ñí téé ní xóo cáháⁿ
tnúhu Yá Ndióxi ndéé sanaha
ñí quide-dé núú-gã ní cáháⁿ-dé
yuhu-gá, te duha ní xáhaⁿ-gã ní
cáháⁿ-dé: “Nàcióⁿ Ègiptú ndécú
Dèhe-í ní cùu, te ní xáhaⁿ-í xii-dé sã
ndéé-dě ñúú-áⁿ vã cündecu-gã-dé”,
duha ní xáhaⁿ-gã xii téé ní cáháⁿ
tnúhu-gã ní quide-dé núú-gã.

*Té Hèrodés ní táuchúⁿ-dě
cahni-güedé cue landú*

¹⁶ Te cue téé ní sángoto ñaha
xii Jesús ní dándàhú-güedé té
Hèrodés, chi ñá túú ní náyáha-güedé
cúñaha-güedé sá ñí naníhí-güedé
Jesús. Te sáta ñí cutnùnì iní té
Hèrodés sá ñí dándàhú ñáhá-güedé
xii-dé te ní cudééⁿ víhí-dě, te ní
tendaha-dě cue téé cuáháⁿ ñúú
Bèlén, ndihí nchaa dava-gã ñúú
cáá yàtni xíáⁿ cuendá cahni-güedé

mee-ni cuè landú té. Te ndéé cue landú íchí ní cacu, ndíhi ndéé cue landú sa ní núnahá úú cuíá-xi nchaa-güexi cahni-güedé ní xáhaⁿ-dè. Te ducaⁿ ní quide-dé chi ní quide cuèndá-dé nàcuáa ndùu tnúhu ní xáhaⁿ cuè téé ní sángoto ñaha xii Jesús nduu ní xini-güedé chódíní, núu xíáⁿ ducaⁿ ní táuchíúⁿ-dè ní quide cue téé-áⁿ. ¹⁷ Te ducaⁿ ní cuu chi ní quee ndáá-xi nàcuáa ní cachí ndí Jeremías téé ní xóo cáháⁿ tnúhu Yá Ndióxi ndéé sanaha, te duha ní cachí ndí:

¹⁸ Ní tecú ndáhí víhí ñáyiú ñúú Rámá sá ndìhú iní-yu, te ñáyiú xíndáhyú-áⁿ cúú-yu ñaní tnáhá tá Ràquél, te ndàhyú-yu cuèndá sá ní xíhí déhe-yu.

Te ñáyiú-áⁿ ñà túú ní cuíní-yu dàñá-yu sá ndìhú iní-yu cuèndá sá ní xíhí déhe-yu.

Duha ní cachí ndí Jeremías.

¹⁹ Te sátá ní xíhí té Hèrodés te ní sáháⁿ tucu espíritú xínú cuèchi núú Yá Ndióxi núú sàní té Chèé òré ndécú-dè nacióⁿ Egiptú, te ní xáhaⁿ-xi xii-dé:

²⁰ —Véxi tucu-í càchí tnúhu-í xii-n sá ndácóo-n, te núhú-n ndíhi Jesús ndíhi náná-gá ñúú cue ñaní tnáhá-n ñáyiú isràél cundecu-ndo, chi sa ní xíhí cue téé cuíní cahni ñaha xii Jesús ní cùu —cachí espíritú-áⁿ xáhaⁿ-xi xii té Chèé núú sàní-dé.

²¹ Te té Chèé-áⁿ ní ndacóo-dé, te ní ndee-dé ndíhi Jesús ndíhi náná-gá cuánuhú-yu ñúú cue ñáyiú isràél ñáyiú cùu ñaní tnáhá-yu.

²² Te té Chèé ní níhí-dè tnúhu sá tè Arquèlaú ní nucúnutnì-dé núú tátá-dè té Hèrodés distritú Jùdeá yíndàha-dé ñáyiú. Te ní yùhú té Chèé-áⁿ, te ñà túú ní cuíní-dé quíhíⁿ-dé cundecu-dé distritú-áⁿ. Te Yá Ndióxi ní cáháⁿ-gá núú sàní-dé, te ní xáhaⁿ-gá xii-dé sá quíhíⁿ-dé distritú Galileá, núu xíáⁿ yácáⁿ cuáháⁿ-yu. ²³ Te òré ní quexió-yu distritú Galileá, te ní

sáháⁿ-yu ìⁿ ñúú nání Nàzarét ní xíndecú-yu. Te ducaⁿ ní cuu chi ní quee ndáá-xi nàcuáa ní cachí cue téé ní xóo cáháⁿ tnúhu Yá Ndióxi ndéé sanaha sá Jèsús cuu-gá téé ñúú Nazàrét.

3

Té Juàá téé dàcuandute ñaha xii ñáyiú càháⁿ-dé tnúhu Yá Ndióxi xití yucu

(Mr. 1:1-8; Lc. 3:1-9, 15-17; Jn. 1:19-28)

¹ Te ní xica nduu sá dúcáⁿ ní cuu, te téé nàni Juàá téé dacuandute ñaha xii ñáyiú ní quexió-dé yucu distritú Jùdeá càháⁿ-dé tnúhu Yá Ndióxi núú ñáyiú xití yucu-áⁿ. ² Te xáhaⁿ-dè xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha, chi sa ní cuyatni nduu ndíhu ndaha ñaha Yá Ndióxi xii-ndo —càchí-dé xáhaⁿ-dè xii-yu.

³ Te diu cuèndá té Juàá-áⁿ ní chídó tnùní ndí Chàiaⁿ téé ní xóo cáháⁿ tnúhu Yá Ndióxi ndéé sanaha, te duha ndùu tnúhu ní chídó tnùní ndí cuèndá-dé:

Tècú càháⁿ níhi ìⁿ téé yìhi xití yucu, te càchí-dé:

“Chí dañá nchàa ichi cuehé ichi duha ndècu-ndo, te tnì-ndo ichi váha,

Te ducaⁿ càda-ndo cuendá cundecu túha-ndo chi véxi Yaá ío cùnuu”, duha quesaha tée-áⁿ.

Duha ndùu tnúhu ní chídó tnùní ndí Chàiaⁿ-áⁿ cuèndá té Juàá.

⁴ Te té Juàá-áⁿ ní xóo cuíhnu-dé dóo idi càméyu, te ìⁿ ñì ní cuu pañú xití-dé, te ní xóo caxi-dé tíca làngóstá ndíhi ndudí ñúñú cuéchi.

⁵ Te ñáyiú ñúú Jerusálén, ndíhi ñáyiú nchaa ñúú yíndèhu distritú Jùdeá, ndíhi ñáyiú nchaa ñúú cáa yàtni yúte Jòrdán ní sáháⁿ-yu ní xíndedóho-yu nàcuáa ní cáháⁿ té Juàá. ⁶ Te ní nguíta-yu ní náhmá-yu nchaa cuéchi-yu núú Yá Ndióxi. Te òré ducaⁿ ní náhmá-yu te ní

dacuándute ñaha té Juáa xii-yu yúte Jordán.

⁷ Te vâi cue tée cùu fariséu ndihî cue tée cùu saducéu cuáhá-güedé núú ndécú tè Juáa cuñí-güedé dacuándute ñaha-dé xii-güedé. Te òré ní quexìo-güedé núú ndécú-dé, te ní xáha-dé xii-güedé:

—¡Nchaa nchòhó cúu-ndó dàtná ìñⁿ cóó dèéⁿ chi ío cuihna ìní-ndó! ¿Te nása ní cuu núu tnàhá nchòhó ndúcú-ndó ñacuáa cada-ndo càcu nihnu-ndo núú tnùndòho cahnu vihi ta cuyatni ñaha xii-ndo véxi-i?

⁸ Te chí cáda vâha vitna cundecu-ndo cuendá ducaⁿ cùtnuní sá ní dáñá-ndó ncháa ichi cuehé ichi duha ndècu-ndo. ⁹ Te vá càchí-ndó sá ío càhnu cuu-ndo cuendá sá cúu-ndó ñàní tnáhá ndii Abrahám, Chí cuéi ndéé yúú te ndacu Yá Ndiòxí ndada-gá ñâyiu te cuú-yu ñaní tnáhá ndii Abrahám. ¹⁰ Te caá chí ndècu túha-xi sá quehndé-xi nchaa yutnu sá dúcáⁿ ñà túú càvâha sávidí-xi-áⁿ, chí nchaa yutnu-áⁿ tēhndé-xi te cuángēe-xi núú ñuhú càyú-xi. Te duha sätnahá-xi ndoho nchaa ñâyiu ñá túú quide váha-áⁿ chí nchaa ñâyiu ñá túú quide váha cùu-yu dàtná nchaa yutnu sá ñà túú càvâha sávidí-xi. ¹¹ Te ña càchí tnúhu ndáá-í xii-ndo sá yúhú dacuándute-í mee-ni ñâyiu ní dáñá ncháa ichi cuehé ichi duha. Dico nchícúⁿ tucu ingá tée véxi, te tée-áⁿ taxi-dé Espiritú Yá Ndiòxí cundecu ndihî-ndo. Te cùu-xi datná ìñⁿ ñuhú, chí ndada ndoo ndada nine-xi iní-ndó. Te tée-áⁿ ío-gá cùnùu-dé dàcúúxi yúhú, chí yúhú cùu-í ìñⁿ tée duuⁿ duuⁿ ñá túú tau cuita nehe ni chàu-dé dico quide-í chiùⁿ-dé. ¹² Te tée-áⁿ sa véxi túha-dé sá cáda ñiñⁿ ñaha-dé xii-o dàtná quidé ñâyiu ndada ndoo triú, chí ñâyiu-áⁿ sa nèhe túha-ná-yu yaxíⁿ-yu òré náñani cuendá ndada ndoó-yu. Te òré ndádá ndoó-yu triú-áⁿ te dàquee ñiñⁿ-yu mihi-xi, te tãxúha-yu mee-nã triú-áⁿ te sãhmí-yu mihi-xi-áⁿ. Te dàtná quidé-yu mihi triú-áⁿ ducaⁿ

sätnahá-xi cada ñaha tée-áⁿ xii nchaa ñâyiu ñá túú quide váha, chí daquihíⁿ ñáhá-dé xii-yu núú ñuhú núú càyú, te ñuhú-áⁿ ñà túú tnàhí ndàhvã —càchí-dé xáha-dé xii-güedé.

Sàndute Jesús

(Mr. 1:9-11; Lc. 3:21-22)

¹³ Te Jèsús ní quee-gá distritú Galilea cuáhá-gá yúte Jordán núú ndécú tè Juáa cuendá dacuándute ñaha-dé xii-gá. ¹⁴ Te òré ní quexio Jesús núú ndécú tè Juáa, te ñá cuñí-dé dacuándute ñaha-dé xii-gá ní cùu, te ní xáha-dé xii-gá:

—Yúhú tau-í sá dacuándute ñaha-n xii-í, te ñá díú dà yúhú dacuándute ñaha-í xii-n —càchí-dé xáha-dé xii-gá.

¹⁵ Te Jèsús ní xáha-gã xii-dé:

—Queheⁿ dañá, chí dacuitíí xini ñuhu-xi ducaⁿ cada-o ñacuáa cundáá-ó núú Yá Ndiòxí —càchí-gá xáha-gã xii-dé.

Te té Juáa-áⁿ ñi sáháⁿ uu-dé tnúhu ní xáhaⁿ Jèsús xii-dé. ¹⁶ Te ní dacuándute-dé Jèsús. Te òré ní nene-gá xití ndute te ní xiní-gá nchii andiú, te ní quee Espiritú Yá Ndiòxí véxi cuu-xi ngúndecu ndihî ñaha-xi xii-gá, te dàtná cáá ìñⁿ lómá cáá Espiritú-áⁿ véxi cuu-xi. ¹⁷ Te òré-áⁿ ñi tecu ní cáhãⁿ Yá Ndiòxí ndéé andiú, te xáha-gã xii Jèsús:

—Yòhó cúu-n Dēhe-í tée ío cùu iní-í te ío cùdíí ñi ñáhà-í xii-n —càchí-gá xáha-gã xii Jèsús.

4

Sáculhná quidé yica-xi cada Jesús sá ñà túú tau-gá cada-gá ní cùu

(Mr. 1:12-13; Lc. 4:1-13)

¹ Te Espiritú Yá Ndiòxí ndécá-xi Jèsús cuáháⁿ ìñⁿ xití yucu cuendá yacáⁿ cundecu tnaa-gá, te yacáⁿ quexio sáculhná coto ndéé ñáhá-xi xii-gá te núu ndisa sá vá cáda-gã ìñⁿ sá ñà túú tau-gá cada-gã.

² Te Jèsús ñá ní xèxi-gá údico nduu údico niú, te ducaⁿ te dàtnuní ní

xicáⁿ iní-gá caxi-gá. ³ Te sátá dúcáⁿ te ní quexio sácúhná quidé yica-xi cada Jesús ^h sá ñà túú tau-gá cada-gá, te xáhaⁿ-xi xii-gá:

—Te núu ndisa sá cúu-n Déhe Yá Ndióxi te cúñaha xii yúu-a na nduu-xi paá —càchí-xi xáhaⁿ-xi xii-gá.

⁴ Te Jèsús ní xáhaⁿ-gá xii-xi:

—Núú tütú Yá Ndióxi càchí-xi: “Ñá díú mèe-ni paá candeca-xi iní ñáyiú ñuyúú, chi tñahá nchaa tñuhu càháⁿ Yá Ndióxi candeca-xi iní-yu”, duha càchí-xi núú tütú-gá —càchí-gá xáhaⁿ-gá xii-xi.

⁵ Te dätñuní sácúhná-áⁿ ndécá ñaha-xi xii-gá cuáháⁿ ñuú Jerusálén, te yacáⁿ ní xáhaⁿ-xi xii-gá cuásaá-gá díquí véñuhu càhnu sá ïo cùnnu núú ñáyiú isràél, ⁶ te dätñuní ní xáhaⁿ tucu-xi xii-gá:

—Te núu ndisa cúu-n Déhe Yá Ndióxi te cuandèe ndaya núú ñúhú cuendá quee ndáá-xi nàcuáa càháⁿ-xi núú tütú-gá núú càchí-xi: “Yá Ndióxi tendaha-gá cue espíritu xínú cuèchi núú-gá quixi-xi cuendá coto ñaha-xi xii-n, te núú ndáhá-xí càundodo-n cuendá sá vá dánícuèhé yúú sáháⁿ”, duha càchí-xi núú tütú-gá —càchí sácúhná-áⁿ xáhaⁿ-xi xii Jesús.

⁷ Te Jèsús ní xáhaⁿ-gá xii-xi:

—Te càchí tucu-xi núú tütú Yá Ndióxi: “Vá cáni iní-n còto ndeé-n Dütú Ndióxi Yaá cúú Ndióxi-n cuendá-ni sá cuní-n sá dácacu nihnu ñaha-gá xii-n ^h sá sání iní-n cada-n”, duha càchí-xi núú tütú-gá —càchí-gá xáhaⁿ-gá xii-xi.

⁸ Te sácúhná ndécá tucu-xi Jesús cuáháⁿ ^h núú tündúú dúcúⁿ, te uuⁿ ní dánèhé núú ñáhá-xí xii-gá nchaandi tühú nacióⁿ cáá ñuyúú, ndihi nchaa sá vaha ïo ^h nacióⁿ-áⁿ. ⁹ Te ní xáhaⁿ-xi xii-gá:

—Te núu yòhó ngúñí xítí-n núu-í chiñuhu ñaha-n xii-í ñá, te taxi cuendá-í nchaa sá ní dánèhé ñáhá-í-a cuu cuendá-n —càchí-xi xáhaⁿ-xi xii-gá.

¹⁰ Te Jèsús ní xáhaⁿ-gá xii-xi:

—Xocuñí yòhó sácúhná núu ndécú-í-a, chi vá cúú càda-í nàcuáa càchí-n, chi núú tütú Yá Ndióxi càchí-xi: “Chiñuhu-ndo Dütú Ndióxi Yaá cúú Ndióxi-ndó, te ñiu-ni-gá cada-ndo nchaa nacuáa càháⁿ-gá”, duha càchí-xi núú tütú-gá —càchí-gá xáhaⁿ-gá xii-xi.

¹¹ Te dätñuní sácúhná ní dáñá-xí Jesús ní xica-xi cuáháⁿ-xi. Te sátá dúcáⁿ te ní quexio cue espíritu xínú cuèchi núú Yá Ndióxi ní xinu cuechi-xi núú Jesús.

Distritú Galileá ní chisaha Jèsús chiúⁿ ní táhú Tátá-gá Dütú Ndióxi cada-gá

(Mr. 1:14-15; Lc. 4:14-15)

¹² Te òré ní níhí Jesús tñuhu sá ní ngava té Juáá tée dàcuandute ñaha xii ñáyiú vecea, te ní xica-gá cuáháⁿ-gá distritú Galileá. ¹³ Te ní ñà túú ní xindecu-gá ñuú Nazàrét, chi ní yáha-gá cuáháⁿ-gá ndéé ñuú Capernaúm yacáⁿ ní xindecu-gá, te ñuú-áⁿ cáá yatni yuhu lagúná, te yatni xíaⁿ cáá ñuhu nani Zabulón, ndihi ñuhu nani Neftalí. ¹⁴ Te ducaⁿ ní cuu chi ní quee ndáá-xi nàcuáa ní chídó tñuní ndí Chaiá tée ní xóo càháⁿ tñuhu Yá Ndióxi ndéé sanaha núú tütú-gá núú càchí-xi:

¹⁵ Ñuhu nani Zabulón, ndihi ñuhu nani Neftalí, ñuhu-áⁿ yíndèhu-xi distritú Galileá, te xíaⁿ xindecu cue ñáyiú ñá túú cùu ñáyiú isràél,

te càa-xi yatni yuhu lagúná te ndaa ingá xio yúte Jòrdán cúú-xí.

¹⁶ Te cue ñáyiú-áⁿ ndécú-yu ^h núú nées chi ndécú-yu ichi cuèhé ichi duha,

te sáa nduu te cada iní-ndó sá ñáyiú-áⁿ quee-yu núú ditó chí vá cündècu-gá-yu ichi cuèhé ichi duha.

Te ñiu-ni ñáyiú-áⁿ cúu-yu ñáyiú ta xita nihnu duuⁿ cuáháⁿ, dico sáa nduu te vá cuíta nihnu-gá-yu.

Duha ní chídó tñuní ndí núú tütú-gá.

17 Te dàvá-áⁿ ní ngúíta Jèsús ní dánèhé-gá ñáyiú, te ní xáhaⁿ-gá xii-yu:

—Chí dándixi túu iní sá ñà túú quide váha-ndo ndècu-ndo te dañà-ndo ncháa ichi cuehé ichi duha, chi sa ní cuyatni nduu ndíhu ndaha ñàha Yá Ndióxí xii-ndo — càchí-gá xáhaⁿ-gá xii-yu.

Jèsús càháⁿ-gá cúmí tnháá cue téé tñhí chácá

(Mr. 1:16-20; Lc. 5:1-11)

18 Te Jèsús ñúhú-gá ichi cuáháⁿ-gá tá yáha-gá yuhu làgúná Galiléa, te ní xiní-gá úú tnháá cue téé xídáquèe-güedé ñunu-güedé xití ndute tñhí-güedé chácá, chi quití tnháá-án cúú chùuⁿ-güedé tñhí-güedé-di. Te ñⁿ-dé nání-dé Xímú, àdi Pelú chi úú òu-dé, te ñání-dé cúú ìngá téé ndihí-dé te téé-án nání-dé Ndríxí. 19 Te Jèsús ní xáhaⁿ-gá xii-güedé:

—Chí dáñá chùuⁿ quide-ndo-án te quixi-ndo chítnahá ñáhá-ndó xii-í, te taxi-í ìngá núú chùuⁿ cada-ndo chi quíhíⁿ-ndó dàcáháⁿ-ndó ñáyiú cuendá tuha ñáhá-yu xii-í — càchí-gá xáhaⁿ-gá xii-güedé.

20 Te òré-ni-án ní dáñá cuè téé-án ñunu-güedé, te ní tuha-güedé Jèsús.

21 Te ní xica tucu Jèsús cuáháⁿ-gá luha-gá, te ní xiní tucu-gá úú-gá tnháá cue téé tñhí chácá. Te ñⁿ téé-án nání-dé Jàcobó, te ñání-dé cúú ìngá téé ndihí-dé te téé-án nání-dé Juáá, te ndi ndúú-güedé cúú-güedé déhe té Zebèdeú. Te xixínucóo-güedé ndihí tātá-güedé xití bàrcú xinatícu-güedé ñunu-güedé, te Jèsús ní cana ñàha-gá xii-güedé.

22 Te òré-ni-án ní dándóo-güedé bàrcú-güedé, ndihí tātá-güedé, te ní tuha ñàha-güedé xii-gá.

Jèsús dánèhé-gá cuéhé víhí ñáyiú
(Lc. 6:17-19)

23 Te Jèsús tá xica ndodo-gá ñihí distritú Galiléa cuáháⁿ tá

dànehé-gá ñáyiú tñúhu váha tñúhu sá sánú ichi ñàha xii-yu nàcuáa ndíhu ndaha ñàha Yá Ndióxí xii-yu. Te ndi tnháá ñⁿ ñⁿ ñúú sàá-gá te ducaⁿ cuànguihu-gá xití veñúhu dànehé-gá ñáyiú tñúhu-án. Te ndi dííⁿ ndí dííⁿ núú cuéhé tnháá ñⁿ ñⁿ ñáyiú dico ncháa-ni-yu ta quide tátna-gá cuáháⁿ. 24 Te ndéé ncháa ñáyiú yìndehu distritú Siríá ní ñihí-yu tñúhu ncháa nàcuáa quide Jèsús. Te ní queé-yu ñúú-yu te ndécá-yu ncháa ñáyiú tnháá ndi dííⁿ núú cuéhé cuáháⁿ núú ndécú Jèsús. Te cuéí ñáyiú xiyihí, ndihí ñáyiú ñá túú-gá càndá ñihnu, ndihí ñáyiú yìhí ñàha espíritú cùndihí yucu ñávàha ndécá-yu cuáháⁿ núú-gá, te ncháa-yu ní quide tátna ñàha-gá xii-yu. 25 Te ío vài ñáyiú ní chinchícúⁿ ñáhá xii Jèsús, chi ní chinchícúⁿ ñáhá ñáyiú distritú Galiléa, ndihí ñáyiú ncháa ñúú xíndáa Dècápolis, ndihí ñáyiú ñúú Jerusálen, ndihí cue ñáyiú ncháa ñúú yìndèhu distritú Jùdeá, ndihí ñáyiú xíndecu yatni yúte Jordán ndàa xio quene nchícanhii.

5

Jèsús núcòo-gá ñⁿ núú tìndúú
dánèhé-gá ñáyiú

1 Te sáta ní xiní Jèsús sá cuéhé víhí ñáyiú nchícúⁿ ñáhá xii-gá, te ní xica-gá cuásaá-gá ñⁿ núú tìndúú te xiáⁿ ní ngóo-gá, te cue téé xica cuu ndihí-gá ní nadúcúⁿ ndéé ñáhá-güedé xii-gá. 2 Te ní ngúíta-gá dánèhé ñáhá-gá xii-güedé ndihí cue ñáyiú-án, te xáhaⁿ-gá:

Cuendá ñáyiú ío váha táhú-xi
(Lc. 6:20-23)

3 —Váha táhú ncháa ñáyiú cùtnuní iní-xi sá ío-gá cúmāñi-yu cudúu-yu núú Yá Ndióxí, chi ñáyiú-án nduu táhú-yu ndíhu ndaha ñàha-gá xii-yu.

⁴ Váha táhú nchaa ñáyiú ndàhyú sá ndìhú iní-yu, chi Yá Ndiòxí cuañaha-gã tnúhu ndee iní cundecu ndihí-yu.

⁵ Váha táhú nchaa ñáyiú ndàhú iní-xi, chi ñáyiú-áⁿ nduu táhú-yu cundecú-yu ñⁿ xichi núú cuañaha Yá Ndiòxí xií-yu.

⁶ Váha táhú nchaa ñáyiú ío cuini cada nchaa nàcuáa càháⁿ Yá Ndiòxí, chi ñáyiú-áⁿ ío nduu vétú iní-yu.

⁷ Váha táhú nchaa ñáyiú cùndahú iní tnàha ñáyiú-xi, chi ñáyiú-áⁿ ñu-ni ducaⁿ càda ñaha Yá Ndiòxí xií-yu cundàhú iní ñáhá-gã.

⁸ Váha táhú nchaa ñáyiú ní nduu ndoo ní nduu nine iní-xi, chi cue ñáyiú-áⁿ nduu táhú-yu cundecú-yu ndihí Yá Ndiòxí.

⁹ Váha táhú nchaa ñáyiú càháⁿ dóho tnàha ñáyiú-xi nàcuáa cundecu ndihí váha tnàhá-yu, chi cùtnuní sá ñáyiú-áⁿ cuú-yu déhe Yá Ndiòxí.

¹⁰ Váha táhú nchaa ñáyiú ío ndòho ndecu ñuyúú-a sá cuendá sá quidé-yu nàcuáa càháⁿ Yá Ndiòxí, chi ñáyiú-áⁿ nduu táhú-yu ndìhu ndaha ñaha-gã xií-yu.

¹¹ Te cùu-ndo ñáyiú ío váha táhú-xi te núu na cùcùehé ñáhá ñáyiú, àdi cada úhú ñáhá-yu xii-ndo, àdi daciaa díquí ñáhá-yu nándi cuéchi neñúú xii-ndo sá cuendá-í. ¹² Te òré ducaⁿ na càda ñahá-yu xii-ndo te cudíí víhí-ní iní-ndó cùndecu-ndo, chi ío váha càa sá ndécú àndiú nduu táhú-ndó cùndecu ndihí-ndo nduu na saá-ndó yacáⁿ cundecu-ndo, chi ñu-ni ducaⁿ ní xóo cada ñaha cue ñani tnàhá-yu xii cue téé ní xóo càháⁿ tnúhu Yá Ndiòxí ní xíndecu ndéé sanaha.

Cuendá ñíí ndihí cuendá ñuhú
(Mr. 9:50; Lc. 14:34-35)

¹³ Te nchòhó cada iní-ndó sá cúu-ndó dàtná ñíí cuendá ñuyúú-a. Te ñíí chi nàndihí-xi dico núu na ndùu víxiⁿ-xi, te ñá túú-gã nándihí-xi chi dǎngoyo-ná-ó, te

yáha ñáyiú xènhnú-yu. Te ducaⁿ sátnahá-xi cùu nchòhó chi cùu-ndo dàtná ñíí váha te núu na càda váha-ndo, te núu vá càdá váha-ndo te quee tíhú-ndó.

¹⁴ Te nchòhó cada iní-ndó sá cúu-ndó dàtná ñⁿ sá dayèhé ndécú ñuyúú-a, chi sànu ichi-ndo ñáyiú ichi váha. Te nchòhó xini-ndo sá núu ñⁿ ñuú cáá ñⁿ núú tìndúú te vá cúu càchí-ó sá nguiváha-xi. ¹⁵ Te ñá túú xini-ó ñⁿ ñáyiú teñuhú-yu ñⁿ lìntèrná te chiváha-yu xití ñⁿ càjá, chi tàxi ndecú-yu núú ññu cuendá cutnùni núú nchaa ñáyiú ndècu vehe. ¹⁶ Te ducaⁿ càda nchòhó cada váha-ndo dàtná quidé ñⁿ ñuhú dayèhe-xi núú ñáyiú, te ducaⁿ quini ñáyiú nàcuáa quide-ndo ndecu-ndo, te tnàhá-yu cachí-yu sá ío càhnu cuu Dútú Ndiòxí Yaá cúú Tàtá-ndó ndècu andiú chi quini-yu sá quidé váha-ndo ndècu-ndo.

Cuendá tnúhu ní chidó tnùni ndii Moisés

¹⁷ Te vá cáni iní-ndó sá yùhú véxi-í xocàni-í tnúhu ní chidó tnùni ndii Moisés, te ní vá cáni iní-ndó sá véxi-í xocàni-í tnúhu ní chidó tnùni cue téé ní xóo càháⁿ tnúhu Yá Ndiòxí ndéé sanaha, chi yùhú véxi-í sá càdá-í nàcuáa càháⁿ nchaa tnúhu-áⁿ. ¹⁸ Te na càchí tnúhu ndáá-í xii-ndo sá tnúhu ní chidó tnùni ndii Moisés ío ndáá càháⁿ-xi, chi dacuítí cùu nchaa nacuáa càháⁿ-xi. Te yáchí-gã naa andiú ndihí ñuyúú dàcúúxí sá quèe cáva ñⁿ tnúhu-áⁿ. ¹⁹ Núu xíáⁿ nchaa ñáyiú na càchí sá dáva tnúhu ní chidó tnùni ndii Moisés ñá túú xini ñuhú-xi chi ñá túú cùnuu-xi, te ñáyiú-áⁿ ñu-ni ducaⁿ dànehé-yu nchaa dava-gã tnàha ñáyiú-yu, te sá dúcáⁿ quidé-yu te vá cùnùu vihi-yu núú ndécú Yá Ndiòxí táxi tnùni-gã, chi cuú-yu dàtná ñⁿ ñáyiú nchìcúⁿ cuí-ná. Dico nchaa ñáyiú nchìcúⁿ nihnu quide nchaa nacuáa càháⁿ nchaa tnúhu-áⁿ, te ñu-ni ducaⁿ dànehé-yu nchaa dava-gã tnàha ñáyiú-yu, te ñáyiú-áⁿ ío cunúú-yu núú ndécú Yá

Ndiõxí táxí tnùnì-gá. ²⁰ Te na càchí tnúhu-í xii-ndo sã ïo xini ñuhu-xi cada-ndo nchaa nacuaa cáháⁿ Yã Ndiõxí, te vã cadá-ndó dàtná xiquide cue tée dānehé ñáhá xii ñáyi u nchaa tnúhu ní chidó tnùnì ndí Moisés, ndihí dàtná xiquide cue tée cùu fariséu, chi núu na càda-ndo datná xiquide cue tée-áⁿ ñá, te vã ndúú tǎhú-ndó ndíhu ndaha ñaha Yã Ndiõxí xii-ndo.

Jèsús càháⁿ-gá cuèndá ñáyi u cùdéeⁿ

(Lc. 12:57-59)

²¹ Te nchòhó sa xini-ndó sã ncháá ñáyi u ní cuu ñani tnáhá-ndó ñí xindecu ndéé sanaha ñí ñihí-yu tnúhu sá vã cúú càhni-yu tnàha ñáyi u-yu, chi núu ducaⁿ na cadá-yu te nacháhu-yu cuéchi-yu. ²² Dico vitna na càchí tnúhu-í xii-ndo sã núu ndédani càa-ndo na cudééⁿ-ndó núú tnàha ñáyi u-ndo, te nacháhu-ndo sã dúcáⁿ quide-ndo, àdi núu na cùcuhé-ndó-yu te núú chítú núú tàcá cundáá cuéchi-ndo te núu ducaⁿ na càda-ndo, àdi núu nà cùu-ndo tnàha ñáyi u-ndo ñⁿ tnúhu vée vihi, te cucuéchi vihi xii-ndo chi quihíⁿ-ndó núú ùhú núú ndàhú.

²³ Te xíãⁿ núu nchòhó òré ndécú ndihí-ndo ñⁿ sá cùnì-ndó cuàha-ndo Yã Ndiõxí nduu tǎhú-gã, te òré cuáháⁿ-ndó cuañaha-ndo xii-gá, te òré ní quexio-ndo núú dúcáⁿ cuañaha-ndo xii-gá sá ndúú tǎhú-gã, te ní ndacu iní-ndó sã ndécú ñáyi u ñá túú cùu váha iní ñáhá xii-ndo cuèndá ñⁿ sá ñí cumáni núú tnáhá-ndó. ²⁴ Te dàndóo-ndo sã dúcáⁿ nèhe-ndo cuáháⁿ nduu tǎhú Yã Ndiõxí, te díhna-gá quihíⁿ-ndó nàcáháⁿ cáhnú iní tnáhá-ndó ndihí ñáyi u ñá túú cùu váha iní ñáhá xii-ndo-áⁿ, te dàtnùnì ducaⁿ te quihíⁿ-ndó cuàha-ndo Yã Ndiõxí sá ndúú tǎhú-gã.

²⁵ Te núu ïó ñⁿ-ndo ñí sáháⁿ ñáyi u núú tée cùchiuⁿ ní sacáⁿ cuéchi-yu cuèndá-ndó cuèndá ñⁿ sá ñí quide-ndo, te òré ní naníhí

tnáhá-ndó ndihí-yu cuáháⁿ-ndó núú tée cùchiuⁿ-áⁿ, te nacáháⁿ cáhnú iní tnáhá-ndó ndihí-yu cuèndá sá vã cuàha cuèndá ñáhá-gã-yu xii-ndo núú tée cùchiuⁿ, chi núu ducaⁿ na cadá-yu te tée cùchiuⁿ-áⁿ cuàha cuèndá ñáhá-dě xii-ndo núú cuè tée cùu poleciá, te cue tée-áⁿ chihi ñaha-güedě vecaá xii-ndo. ²⁶ Te na càchí tnúhu ndáá-í xii-ndo sã vã càcu-ndo te núu na ngáva-ndo vecaá ndéé nacháhu-ndo nchaa sá tàú-ndó.

Cuèndá cue ñáyi u ñá túú quide váha

²⁷ Te nchòhó sa xini-ndó nacuaa nduu tnúhu ní cáháⁿ cue tée ní xindecu ndéé sanaha, te duha ní cachi-güedé: “Nchaa cue tée vã cúú cáháⁿ ndihí-güedé ñadihí te núu ñá díú ñadihí-güedé cúu-yu, te díu-ni ducaⁿ tucu nchaa cue ñáyi u ñíhí vã cúú cáháⁿ ndihí-yu tée te núu ñá díú yí-yu cùu-güedé”, duha ní cachi-güedé. ²⁸ Dico yúhú càchí tnúhu-í xii-ndo sã ndéda-ni càa cue tée na cundehe ñⁿ ñadihí te núu na càni iní-güedé cundecu dí iní-güedé ndihí-yu te cada iní-ndó sã dàtná sá sá ní cáháⁿ ndihí ñaha-güedě xií-yu sá dúcáⁿ ñí sani iní-güedé.

²⁹ Te núu ñⁿ xio tinu-ndo quide-xi quide-ndo nándi sá cuèhé sá dúhá te tava-ndo, chi váha-gá sá ná cuíta te ñá díú ñihí ní ndúú yiqui cuñú-ndó quihíⁿ-xi núú ùhú núú ndàhú. ³⁰ Te núu ñⁿ xio ndaha-ndo quide-xi quide-ndo nándi sá cuèhé sá dúhá te quehdé-ndó, chi váha-gá sá ná cuíta ñⁿ xio ndaha-ndo te ñá díú sã ñihí ní ndúú yiqui cuñú-ndó quihíⁿ-xi núú ùhú núú ndàhú.

Jèsús càháⁿ-gá cuèndá cue ñáyi u dàña tnaha

(Mt. 19:9; Mr. 10:11-12; Lc. 16:18)

³¹ Te nchòhó sa nàha tucu-ndo nacuaa ní cáháⁿ tucu cue tée ní xindecu ndéé sanaha, te duha ní cachi-güedé: “Te núu ñⁿ tée na

dãña tnaha-dé ndihî ñadîhî-dé, te xîni ñûhu-xî cadûha-dé ìⁿ tutú cuãñaha-dé núú cãháⁿ-xî sá ñî dãñã ñaha-dé”, duha ní cachî-güedé.

³² Dico yúhú cãchî tnúhu-í xii-ndo sã cúú dãña ìⁿ téé ñadîhî-dé, te núú cutnuni ndáá iní-dé sá cãháⁿ ndihî-aⁿ ingá téé. Dico núú ñã túú dùcaⁿ quide-aⁿ te ñã túú ndùu váha-xî dãña ñaha-dé. Te núú ñã túú dùcaⁿ quide ñadîhî-dé, te cada iní-ó sã méé-dé ní sanu ichi ñaha-dé xii-aⁿ cãháⁿ ndihî-aⁿ ingá téé te núú na dãña ñaha-dé. Te téé na nàqueheⁿ ñaha xii ñaha ní dãñã ñaha yî-xi-áⁿ, te ñu-ni ñã túú ní quide váha-dé sã dúcãⁿ ñî nàqueheⁿ-dé ñaha-áⁿ.

Ñáyiu cãcunehe ñaha xii Yá Ndiõxí cuendá cutnuni iní tnaha ñáyíu-yu sá ndáá cada-yu ìⁿ sá sání iní-yu cada-yu

³³ Te sa naha tucu-ndo nacuaáa ní cãháⁿ tucu cue téé ní xîndecu ndéé sanaha, chi cue téé-áⁿ ñî cachî-güedé: “Te núú cãcunehe-ndo Yá Ndiõxí núú tnaha ñáyiu-ndo nãcuáa cutnuni iní-yu sá ndáá cada-ndo ìⁿ sá sání iní-ndó cada-ndo, te cada-ndo”, duha ní cãháⁿ dóho tnaha-güedé. ³⁴ Dico yúhú cãchî tnúhu-í xii-ndo sã ñã túú ñã cacunehe-ndo sã ndáá cada-ndo ìⁿ sá sání iní-ndó cada-ndo. Te ñî vã cãcú nêhe-ndo andiu chi yacáⁿ cúú-xî núú núcõo Yá Ndiõxí táxî tnuni-gá. ³⁵ Te ñî vã cãcú nêhe-ndo ñuyíu-a, chi tnãhá ñuyíu-a ndècu-gá, te ñî vã cãcú nêhe-ndo ñuú Jerusálén chi ñuú-áⁿ cúú cuendá-gá, te ñu-gá cúú-gã Yaá ío cunu. ³⁶ Te ñî vã cãcú nêhe-ndo díquí-ndó chi naha-ndo sá ñî ìⁿ idi díquí-ndó ñã ndácú-ndó ndàda cuixíⁿ-ndó ãdi ndada tnuu-ndo. ³⁷ Te váha-gá sá núu ìⁿ sá sání iní-ndó cada-ndo, te cachî-ni-ndo: “Cuu cada-ndí, ãdi vá cúú cada-ndí”, cachî-ni-ndo. Chi nchaa dava-gá sá chidó-ndó cãháⁿ-ndó òré ducaⁿ sãni iní-ndó cada-ndo ìⁿ sá cãdá-ndó cùu-xî sã dácãhu iní ñãhá yùcu ñávãha.

Cuendá ñáyiu nãchinaa sá quidé ñaha tnaha ñáyíu-xi
(Lc. 6:29-30)

³⁸ Te sa naha tucu-ndo nacuaáa ní cãháⁿ tucu cue téé ní xîndecu ndéé sanaha, chi cue téé-áⁿ ñî cachî-güedé: “Ñáyiu na cãda ñaha tnaha ñáyíu-xi ìⁿ sá ñã túú vãha, te nanchòcava-yu nachinaá-yu sá ñî quide ñaha tnaha ñáyíu-yu”, duha ní cachî-güedé. ³⁹ Dico yúhú cãchî tnúhu-í xii-ndo sã ñã túú ñã cada-ndo nchãa cue ñáyíu cuìhna iní-xi te núú quide ñahá-yu ìⁿ sá ñã túú vãha xii-ndo. Te núú ní canihá-yu ìⁿ xito te cuìní tucú-yu canihá-yu ingá xito te dãña-ndo na canihá-yu. ⁴⁰ ãdi ní sacáⁿ cuéchi-yu núú cuè téé cùchiuⁿ cuendá-ndó, te cuìní-yu quendeé-yu dúhnú-ndó te dãña-ndo na cãnehé-yu quíhîⁿ, te tnãhá-ni dóó ndíxí ndòdo-ndo dãña-ndo na canehé-yu quíhîⁿ. ⁴¹ Te núú quide yicá-yu caca-ndo dàtná úú kilómetrú cuido-ndo ndãchiúⁿ-yu ñã, te chido-ndo úú-gá tucu kilómetrú cuido-ndo ndãchiúⁿ-yu. ⁴² Te núú ío ìⁿ sá xicáⁿ-yu núú-ndó te cuãñaha-ndo, ãdi ío ìⁿ sá sãnúu-yu núú-ndó te cuãñaha núu-ndo.

Cuu iní-ó nchãa ñáyiu cùu úhú iní ñãhá xii-o
(Lc. 6:27-28, 32-36)

⁴³ Te sa naha tucu-ndo nacuaáa ní cachî tucu cue téé ní xîndecu ndéé sanaha, chi cue téé-áⁿ ñî cachî-güedé: “Cuu iní-ndó cuè ñáyíu ndècu ndihî váha-ndo, te cuu úhú iní-ndó cuè ñáyíu cùu úhú iní ñãhá xii-ndo”, duha ní cachî-güedé. ⁴⁴ Dico yúhú cãchî tnúhu-í xii-ndo sã cúú iní-ndó cuè ñáyíu cùu úhú iní ñãhá xii-ndo, te cãháⁿ váha-ndo cuendá cue ñáyíu cãháⁿ úhú ñãhá xii-ndo, te cada-ndo sã vãha sá cúú-xî cuè ñáyíu cùu úhú iní ñãhá xii-ndo, te cãháⁿ ndihî-ndo Yã Ndiõxí cuendá cue ñáyíu xicuehé ñãhá xii-ndo, ndihî cuendá cue ñáyíu quide úhú ñãhá xii-ndo. ⁴⁵ Te núú na cãda-ndo

nchaa nacuaa cãháⁿ-í-a, te ducaⁿ te cutnùni sã cúu-ndó dèhe Tãtã-ndó Dütú Ndiõxí Yaa ndécú àndiu. Te ðiu-gã cúu-gã Yaa quidé quène nchíanchii, te ðiu-ni-gã cúu-gã Yaa dácuuⁿ dáu ñuyúⁿ-a, te ducaⁿ quide-gã cuendá cuu-xi sã vãha sã cúu-xí cuè ñáyiú quide vãha, ndihi sã cúu-xí cuè ñáyiú ñã túú quide vãha. ⁴⁶ Te núu nchòhó ná cúu iní-ndó mèe-ni ñáyiú na cùu iní ñáhã xii-ndo, te vã càchí-ndó sã Yã Ndiõxí taxi-gã sã ndúú tãhú-ndó sã dúcãⁿ quide-ndo, chi cuèi cue tée cuihna iní-xi quide cobrá ñáhã xii cue ñáyiú cuendá impuèstú ducaⁿ xíquide-güedé. ⁴⁷ Te núu mee-ni ñáyiú ndècu ndihi vãha-ndo ïo vãha cãháⁿ ndihi-ndõ-yu, te vã càchí-ndó sã ïo vãha quide-ndo sã dúcãⁿ quide-ndo, chi cuèi ndéé nchaa ñáyiú ñã túú xini dana cuendá Yã Ndiõxí ducaⁿ xíquide-yu. ⁴⁸ Te duha ndùu tnúhu cãháⁿ-í cuendá sã nchòhó cada ndãã-ndó cùndecu-ndo datná quidé ndãã mée Tãtã-ndó Dütú Ndiõxí Yaa ndécú àndiu —duha ní dánèhè ñáhã Jesús xii cue tée xica cuu ndihi-gã ndihi nchaa ñáyiú.

6

Jèsús dánèhè-gã ñáyiú nàcuáa cada-yu sã vãha

¹ Te Jèsús ndécú-ni-gã dánèhè-gã cue tée xica cuu ndihi-gã ndihi nchaa ñáyiú, te xãhaⁿ-gã:

—Te òré quidé-ndó sã vãha te vã cáda-ndó núú ñáyiú cuendá-ni sã cuini-ndó cãháⁿ vãha-yu cuendá-ndó, chi núu núú ñáyiú ducaⁿ na càda-ndo te Dütú Ndiõxí Yaa cúu Tãtã-ndó vã táxi-gã sã ndúú tãhú-ndó. ² Te xíãⁿ núu nchòhó òré chindèe-ndo ñáyiú ndàhú, te vã cũñaha-ndo xii cue ñáyiú sã chindèe-ndo cue ñáyiú ndàhú-ãⁿ datná xíquide cue ñáyiú dandahú mée-xí sã quidé ndãã te ñã ndãã sã quidé ndãã-yu, chi ñáyiú-ãⁿ ducaⁿ xíquide-yu òré sãháⁿ-yu veñúhu, chi dàtecú

tnúhu-yu nchaa ñáyiú òré ducaⁿ chindee-yu ñáyiú ndàhú. Te ðiu-ni ducaⁿ quide-yu xãháⁿ-yu xii cue ñáyiú sã chindèe-yu cue ñáyiú ndàhú-ãⁿ nchaa núú xicã cúu-yu, te ducaⁿ xíquide-yu cuendá cuini-yu cãháⁿ vãha ñáyiú cuendá-yu. Te yúhú na càchí tnúhu ndãã-í xii-ndo sã ñã túú ñã nduu tãhú ñáyiú-ãⁿ núú Yã Ndiõxí sã dúcãⁿ quide-yu chi mee-ni núú tnãha ñáyiú-yu cùdiú-yu. ³ Te nchòhó òré chindèe-ndo ñáyiú ndàhú, te cuèi ñáyiú ïo-gã vãha ndècu ndihi-ndo dico vã cũñaha-ndo sã dúcãⁿ chindee-ndo cue ñáyiú ndàhú-ãⁿ, te ni cuèi dava-gã ñáyiú vã cũñaha-ndo. ⁴ Chi vãha-gã sã iní mée-ni-ndó ná cùhuⁿ sã dúcãⁿ chindee-ndo cue ñáyiú ndàhú-ãⁿ. Te núu ducaⁿ na càda-ndo ñã, te Dütú Ndiõxí Yaa cúu Tãtã-ndó táxi-gã sã ndúú tãhú-ndó chi ðiu-ni mee-gã ndéhé-gã nàcuáa quide-ndo ndecu-ndo.

Jèsús dánèhè-gã ñáyiú nàcuáa cãháⁿ ndihi-yu Yã Ndiõxí

(Lc. 11:2-4)

⁵ Te nchòhó òré cãháⁿ ndihi-ndo Yã Ndiõxí, te vã cáda-ndó datná xíquide cue ñáyiú dandahú mée-xí càchí sã quidé ndãã te ñã ndãã sã quidé ndãã-yu, chi ñáyiú-ãⁿ tnãhá iní-yu cunutni-yu cãháⁿ ndihi-yu Yã Ndiõxí òré yíhí-yu veñúhu. Te ðiu-ni ducaⁿ xíquide-yu nchaa núú xicã cúu-yu, te ducaⁿ quide-yu cuendá sã cuini-yu quini ñáyiú nàcuáa xíquide-yu. Te na càchí tnúhu ndãã-í xii-ndo sã ñã túú ñã nduu tãhú ñáyiú-ãⁿ núú Yã Ndiõxí sã dúcãⁿ quide-yu chi mee-ni núú tnãha ñáyiú-yu cùdiú-yu. ⁶ Te nchòhó òré cuini-ndó cãháⁿ ndihi-ndo Yã Ndiõxí, te ndíhu ndedí nihnu-ndo xití vehe-ndo, chi ðiu-gã cúu Tãtã-ndó te ndècu ndihi ñaha-gã xii-ndo, te ðiu-ni mee-gã ndéhé ñaha-gã xii-ndo nàcuáa quide-ndo, te núu ducaⁿ

na càda-ndo te taxi-gá sá ndúú tǎhú-ndó.

⁷ Te òré càháⁿ ndihì-ndo Yǎ Ndiǒxí te vǎ sùúni cuèndá-ni dacáá-ndó tnúhu càháⁿ ndihì-ndo-gǎ dàtná xǐquide cue ñáyiú ñá túú xìnì tnúhu-gá, chí ñáyiú-áⁿ sání iní-yu sá tédòho ñaha vǐhi-gá Yǎ Ndiǒxí xii-yu sá dúcáⁿ sùúni dàcaá-yu tnúhu càháⁿ ndihì ñàhá-yu xii-gá dico ñàhá. ⁸ Dico nchòhó, vǎ càdá-ndó dàtná xǐquide cue ñáyiú-áⁿ, chí mee Tǎtá-ndó Dǔtú Ndiǒxí sa nàha-gá ná cúú nchàa sá xìnì ñùhu-ndo cuéi òré vǎtá càcáⁿ-gá-ndó núú-gá.

⁹ Te duha càháⁿ-ndó òré càháⁿ ndihì-ndo Yǎ Ndiǒxí:

Yòhó Tǎtá-ndí Dǔtú Ndiǒxí Yáá ndécú àndiú,
nchaa ñáyiú na càháⁿ-yu sá cúú-n
Yáá ío yǐñùhu.

¹⁰ Te xicáⁿ tǎhú-ndí núú-n sǎ ná sàà nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndiú.

¹¹ Te xicáⁿ tǎhú-ndí núú-n sǎ táxí-n sǎ cóhó-ndí sá cǎxí-ndí ñⁿ nduu ñⁿ nduu.

¹² Te cada càhnu iní-n nchàa yícá cuèchi-ndí, chí tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

¹³ Te vǎ dáñá-n dàcàháⁿ ñàhá yècu ñávǎha xii-ndí cada-ndí sǎ ñá túú vǎha, chí coto ñaha-n xii-ndí cuèndá sá vǎ dúcáⁿ càda ñaha-xi.

Te diu-n cùu-n Yáá ío cùnnu nchaa nduu nchaa quíú, te ío càhnu cuu-n, te diu-ni-n quìndaha ñaha-n xii-ndí ni caa ni quíhíⁿ. Te ducaⁿ na cùnduu.

Duha dànehé ñàhá-í xii-ndo càháⁿ ndihì-ndo Yǎ Ndiǒxí.

¹⁴ Te núú nchòhó quidé càhnu iní-ndó nchàa sá quidé ñàha tnaha ñáyiú-ndo, te ducaⁿ te Tǎtá-ndó Dǔtú Ndiǒxí Yáá ndécú àndiú cada cahnu iní-gá nchaa sá ñá túú vǎha quide-ndo tucu. ¹⁵ Dico núú nchòhó vǎ càdá càhnu iní-ndó nchàa sá quidé ñàha tnaha ñáyiú-ndo ña, te

ni Dǔtú Ndiǒxí Yáá cúú Tǎtá-ndó vǎ càdá càhnu iní-gá nchaa sá quidé-ndó tucu.

Cuèndá ñáyiú ñá túú tnàhí ná xéxí ãma càháⁿ ndihì-yu Yá Ndiǒxí

¹⁶ Te nchòhó, nduu ñá túú tnàhí ná xéxí-ndó càháⁿ ndihì-ndo Yǎ Ndiǒxí, te vǎ cùndiyí-ndó dàtná xǐquide nchaa ñáyiú dándahú méé-xí càchí sá quidé ndáá te ñá ndáá sá quidé ndáá-yu, chí ñáyiú-áⁿ ducaⁿ xǐquidé-yu cuèndá sá cuínì-yu cutnùnì iní ñáyiú sá ñá túú tnàhí ná xéxí-yu càháⁿ ndihì-yu Yá Ndiǒxí. Te yúhú càchí tnúhu-í xii-ndo sǎ sá dúcáⁿ quidé-yu te ñá túú nǎ chindee ñàha-xi xii-yu cuèndá ñihì-yu ñⁿ sá ndúú tǎhú-yu núú Yǎ Ndiǒxí. ¹⁷ Dico nchòhó, nduu dùcaⁿ quide-ndo ñá túú tnàhí ná xéxí-ndó càháⁿ ndihì-ndo Yǎ Ndiǒxí, te vǎha vǎha naquete-ndo núú-ndó, te vǎha vǎha chíhi-ndo cǔcǎ ¹⁸ cuèndá sá vǎ cùtnùnì iní ñáyiú sá ñá túú nǎ xéxí-ndó nduu ducaⁿ càháⁿ ndihì-ndo Yǎ Ndiǒxí. Te Dǔtú Ndiǒxí Yáá cúú Tǎtá-ndó ndécú ndihì-ndo diu-ni mee-gá ndéhé-gá nàcuáa quide-ndo ndecu-ndo, te diu-gá taxi-gá sá ndúú tǎhú-ndó.

Cuèndá nchaa sá vǎha nduu tǎhú-ó

(Lc. 12:33-34)

¹⁹ Te vǎ cání iní-ndó cùu-ndo ñáyiú cuica nǎndí sá cùndècu ndihì-ndo ñuyíú-a chí vǎ cùdii-xi, chí dava quee tíquidi, te dava caxi cudí ñùhu, àdi quíhu ñadúhú vehe-ndo te duhu-güedé. ²⁰ Te vǎha-gá chí ndúcú nàcuáa cada-ndo cuèndá ducaⁿ ngündecu sá ndúú tǎhú-ndó àndiú, te xǐáⁿ cudii-xi cundecu ndihì-ndo ni caa ni quíhíⁿ, chí yàcáⁿ vǎ quée-gǎ tíquidi, te ni vǎ cǎxí-gǎ cudí ñùhu, te ni vǎ quínì-gá-ndó ñadúhú duhu-güedé ndachluⁿ-ndo. ²¹ Te núú cùu-ndo ñáyiú cuica ndècu ñuyíú-a, te diu-ni nchaa sá ndécú ndihì-ndo ñuyíú-a ñùhu iní-ndó. Àdi cuu-ndo ñáyiú

quide nacuáa ngúndecu sá ndúú tãhú-ndó àndiu, te diu-ni sá ndúú tãhú-ndó ndècu andiu-án ñuhú iní-ndó.

Núú-ó cùu-xi datná ìñ ñuhú
(Lc. 11:34-36)

²² Te cada iní-ndó sã núú-ndó cùu-xi datná ìñ ñuhú. Te núú núú-ndó càvãha te cùtnuní iní-ndó nã cúú sã ndécú núú-ndó. ²³ Dico núú cùhú núú-ndó ñã túú cùtnuní cundehe-ndo ñã, te ñã túú cùtnuní iní-ndó nã cúú sã ndécú núú-ndó. Te sã dúcáⁿ cùhú núú-ndó te cada iní-ndó sã ndécú-ndó datná ìñ núú néé. Te duha nduu tnúhu càháⁿ-í chi núú sãni váha iní-ndó cuëndá Yã Ndiõxí ñã, te cùu vii cuu váha iní-ndó ndècu-ndo. Áⁿ te núú ñã túú sãni váha iní-ndó cuëndá-gã ñã, te ñã túú tnãhí cùu váha iní-ndó ndècu-ndo. Te sã dúcáⁿ ñã túú sãni váha iní-ndó cuëndá-gã te cada iní-ndó sã ndécú-ndó datná ìñ núú néé.

Vã ndácú ìñ tée cunu cuechi-dé núú úú patróóⁿ
(Lc. 16:13)

²⁴ Te ni ìñ tée xìnu cuechi vá ndácú-dé cunu cuechi-dé núú úú patróóⁿ, chi tée-án cuu váha iní-dé núú ìñ patróóⁿ-dè te tní-dé nchaa tnúhu càháⁿ patróóⁿ tée cùu váha iní-dé núú-xi-án. Te núú ingá tucu patróóⁿ-dè vá cúú váha iní-dé, te ni vá tní-dé tnúhu càháⁿ ingá tée-án. Te duca sãtnahá-xi cùu nchòhó chi vá ndácú-ndó cunu cuechi-ndo núú Yã Ndiõxí te cuhuⁿ iní-ndó nchãa sã ío ñuyú-a.

Yã Ndiõxí xító-gã nchaa ñáyiu cùu déhe-gã
(Lc. 12:22-31)

²⁵ Te na càchí tnúhu-í xii-ndo sã vã ío cani iní-ndó núu nãsa níhí-ndó sã cóhó sã cáxi-ndó, te ni vã ío cani iní-ndó núu nãsa níhí-ndó dõó cuihnu-ndo, chi cunu-gã méé-ndó dàcúúxí sã nchító-ndó, te ducaⁿ cunu-gã yiqui cùñú-ndó dàcúúxí dõó sácuihnu-ndo. ²⁶ Te chí cádá cuëndá sã ncháá quiti ndava ñã túú tnãhí ná xítú-güedi, te ni ñã túú ndéé cuáhãⁿ-güedi nãtahu-güedi, te

ni ñã túú nã nãtãxúha-güedi, te ni ñã túú ndéé cáá yácã-güedi, chi mee Tãtã-ó Dütú Ndiõxí Yã ndécú andiu xito ñaha-gã xii-güedi ñihí-güedi sã xéxi-güedi. Te núu cue quiti-án ducaⁿ xito ñaha-gã xii-güedi, ìte uuⁿ-gã xító ñaha-gã xii nchòhó, chi nchòhó ío-gã cùnùu-ndo dacúúxí cuè quiti-án! ²⁷ Te cuèi nãndi sã sãní vñhi iní-ndó ndècu-ndo, dico ñã ndácú-ndó càda-ndo nacuáa cuehnu-ndo cuèdicó ìñ yiqui-gã.

²⁸ Te vã ío cani iní-ndó núu nãsa níhí-ndó dõó cuihnu-ndo. Te chí cádá cuëndã nãcuáa sãhnu nchaa itã ío yucu, chi nchaa itã-án ñã túú quide chiuⁿ-xi, te ni ñã túú quèheⁿ-xi idi. ²⁹ Te na càchí tnúhu-í xii-ndo sã ndíi Salòmón cuèi ío vii ní xínduu dõó ní xóo cuihnu ndíi, dico ñã túú nãtnahá-xi nãcuáa càa nchaa itã, chi ío-gã vii càa nchaa itã. ³⁰ Te nchaa itã ío yucu tnaa-ni cùdii-xi, te yìchí-xi te sãhmi ñáyiu. Te cuèi ducaⁿ dico mee Yã Ndiõxí quidé-gã ío vii sãcúnduu-xi. Te núu nchaa itã-án ducaⁿ quide-gã xító-gã sãcúnduu vii-xi, te xiãⁿ cùtnuní sã ío-gã coto ñaha-gã xii-ndo, dicó-ni sã ñã túú sãndãá váha iní-ndó-gã. ³¹ Te xiãⁿ núu ñã túú xìni ñuhú vñhi-xi cani iní-ndó núu nãsa níhí-ndó sã cóhó sã cáxi-ndó, àdi nãsa níhí-ndó dõó cuihnu-ndo. ³² Chi nchaa ñáyiu ñã túú xìni nãcuáa càháⁿ tnúhu Yã Ndiõxí mee-ni nchãa xiãⁿ ñuhú iní-yu. Dico nchòhó chi mee Tãtã-ndó Dütú Ndiõxí sa nãha-gã ná cúú sã xìni ñuhú-ndo. ³³ Te xiãⁿ núu ío xìni ñuhú-xi sã cùhúⁿ iní-ndó sã Yã Ndiõxí yíndãha ñaha-gã xii-ndo, te ducaⁿ càda-ndo nchaa nacuáa cuní-gã, te ducaⁿ te taxi-gã nchaa sã xìni ñuhú-ndo. ³⁴ Núu xiãⁿ vã ío cani iní-ndó nãsa cundece-ndo nduu tneé, chi cani iní-ndó nãcuáa cada-ndo cundece-ndo vitna, chi nduu tnéé-án te òré-nã te cutnùní núu nãsa cada-ndo cundece-ndo. Chi nchòhó sa nãha-ndo sã ío titní núu sã quidé-xi ìñ nduu ìñ duu — duha ní dãnèhé ñãhá Jèsús xii cue tée xica cuu ndihi-gã ndihi nchaa

ñáiyu.

7

Vá càháⁿ cuèhé-ó cuendá tnàha ñáiyu-o

(Lc. 6:37-38, 41-42)

¹ Te Jèsús ndéccu-ni-gá dánèhé-gá cue téé xica cuu ndihi-gá ndihi nchaa ñáiyu, te xàhaⁿ-gã:

—Vá càháⁿ cuèhé-ndó cuendá tnàha ñáiyu-ndo, te ducaⁿ te Yá Ndiòxí ñá túú ná tnúhu cúñaha-gã xii-ndo. ² Chi núu na càháⁿ cuèhé-ndó cuendá tnàha ñáiyu-ndo,

te Yá Ndiòxí íó ìⁿ sá cádá ñàha-gá xii-ndo. Te núu nchòhó ná càháⁿ cuèhé víhí-ndó cuendá tnàha ñáiyu-ndo te Yá Ndiòxí ío-gá dandòho ñàha-gá xii-ndo. ³ Te

ná cuendá ndéhé-ndó ìⁿ sá ñá túú vâha quide tnaha ñáiyu-ndo te mee-ndo víhi-gá quidé-ndó-í? Te sá dúcáⁿ quide-ndo te cada iní-ndó sá ndéhé-ndó dàtná ìⁿ mihi líhli ñùhu núú tnàha ñáiyu-ndo te mee-ndo ñùhu ìⁿ mihi cahnu-gá núú-ndó te ñá túú quide cuendá-ndó. ⁴ Te

núu na nàcanu ichi-ndo tnaha ñáiyu-ndo cuendá sá ñá túú quide váha-yu ndécú-yu, te mee-ndo víhi-gá quidé-ndó ñá, te cada iní-ndó sá xàhaⁿ-ndo xii tnaha ñáiyu-ndo sá nátava-ndo mihi líhli ñùhu núú-yu sá dúcáⁿ quide-ndo, te mihi cahnu ñùhu núú méé-ndó ñá túú quide cuendá-ndó. ⁵ Te sá dúcáⁿ quide-ndo te ío dandahú-ndó mèe-ndo sá quidé ndáá-ndó te ñá ndáá sá quidé ndáá-ndó, te ñini ñùhu-xi díhna-gá ãña-ndo nchaa sá ñá túú vâha quide-ndo, te dàtnúni ducaⁿ te cuu nàcanu ichi-ndo tnàha ñáiyu-ndo cuendá nchaa sá ñá túú vâha quidé-yu.

⁶ Te nchaa ñáiyu ío sáá iní-xi, te vá cádá yica-ndó-yu cundedóho-yu tnúhu Yá Ndiòxí, chi núu na càda yica-ndó-yu te ngóo-yu cuu úhú iní ñáhâ-yu xii-ndo. Te ñáiyu-áⁿ cúú-yu dàtná iná chi quiti-áⁿ núu na cuñaha-o ìⁿ sá cuñaha-o, te núu ñá túú cùtnuní iní-dí ná cúú

xǎⁿ te tñi ñaha-dí xii-o. Te cùu tucú-yu dàtná cùchí chi quiti-áⁿ núu na chùcu-o núú-dí yúú vâha sá ío víi càa nani pérlá, te dicó-ni cùnu sáhâ-dí chi ñá túú cùtnuní iní-dí sá cúú-xí yúú vâha.

Cácáⁿ-ó núú Yá Ndiòxí núu ná cuini-ó

(Lc. 11:9-13; 6:31)

⁷ Te na càchí tnúhu-í xii-ndo sá cácaⁿ-ndó núú Yá Ndiòxí te núu ná cuini-ndó te taxi-gá, te vá ãña ndéé-ndó cácaⁿ-ndó núú-gã núu ná cuini-ndó te ducaⁿ te níhí-ndó. Te cada iní-ndó sá ní quexio-ndo vehe ìⁿ tnaha ñáiyu-ndo te ní càháⁿ-ndó, te ñáiyu-áⁿ ní tedóho ñáhâ-yu xii-ndo te ní nacaⁿ-yu yuyèhe. Te ducaⁿ càda iní-ndó chi Yá Ndiòxí tedóho ñaha-gã xii-ndo, te taxi-gá sá ná cácaⁿ-ndó núú-gã. ⁸ Chi nchaa ñáiyu ducaⁿ xiquide,

te Yá Ndiòxí tedóho ñaha-gã xii-yu te níhí-yu sá cuini-yu. Te ãiu-ni ducaⁿ tucu nchaa ñáiyu na càcáⁿ núú-gã ìⁿ sá cuini-yu, chi sãñaha-gã sá xicáⁿ-yu núú-gã. Te ãiu-ni ducaⁿ tucu nchaa ñáiyu ñá túú ãña ndéé xicáⁿ núú Yá Ndiòxí sá cuini-yu chi níhí-yu.

⁹ Te nchòhó cue téé cùu tátá, ñá túú cùndee iní-ndó cuñaha-ndo xii cue déhe-ndo ìⁿ yúú caxi-güexi òré xicáⁿ-güexi ìⁿ paá núú-ndó càxi-güexi. ¹⁰ Te ní ñá túú cùndee iní-ndó cuñaha-ndo ìⁿ cóo caxi-güexi òré xicáⁿ-güexi ìⁿ chácá núú-ndó càxi-güexi. ¹¹ Te nchòhó cuéi ndéé dau-na sáá iní-ndó dico sãha-ndo cué déhe-ndo sá vâha xèxi-güexi òré ná cúú sá xicáⁿ-güexi núú-ndó càxi-güexi. Te núu nchòhó ducaⁿ quide-ndo, ãte uuⁿ-gá ducaⁿ quide Tátá-ndó Dütú Ndiòxí Yá ndécú àndiu, chi taxi-gá sá vâha sá cúú-xí-ndó te núu na càcáⁿ-ndó núú-gã!

¹² Te nchaa sá vâha cuini-ndó càda tnaha ñáiyu-ndo, te cada-ndo tnàhá-ndó ndíhí-yu, chi ducaⁿ sànu ichi ñaha tnúhu ní chídó tnúni ndí Moisés, te ãiu-ni ducaⁿ sànu ichi

ñaha tucu nchaa tnúhu ní chídó
tnùnì cue téé ní xóo cáháⁿ tnúhu Yá
Ndiòxí ndéé sanaha.

Yuyèhe cuiñi

(Lc. 13:24)

13-14 'Te xini ñuhu-xi nducu-ndo
nacuáa cada-ndo tnii-ndo ichi Yá
Ndiòxí. Te ichi-gá-áⁿ cúu-xí dàtná
iiⁿ ichi cuiñi, àdi datná iiⁿ yuyèhe
cuiñi. Te duha càháⁿ-í chi ío úhú
xínu iní-ndó tnii-ndo ichi Yá Ndiòxí,
te sacú-ni nchòhó cue ñáyiú ndècu
ñuyúú-a tnii-ndo ichi-gá. Te nchaa
ñáyiú ndècu ichi cuehé ichi duha
ta xíta nihnú-yu cuáháⁿ. Te ichi
ndécú-yu-áⁿ cada iní-ndó sá cúu-xí
iiⁿ ichi cahnu ichi quehéⁿ, àdi iiⁿ
yuyehe quehéⁿ. Te duha càháⁿ-í chi
íó vai ñáyiú ndécú-yu ichi-áⁿ.

*Ndi ðiiⁿ núú yutnu xini-ó nã yutnu
cùu-xi cuendá sá sávidí-xi*

(Lc. 6:43-44)

15 'Te cächí tnúhu-í xii-ndo sã ío
quihí iní-ndó cundecu-ndo cuendá
sã vã dándahú ñáhá cue téé cächí
sã càháⁿ tnúhu Yá Ndiòxí te ñã
ndáá sã càháⁿ-güedé tnúhu-gá. Chi
cue téé-áⁿ sãnuu sã quidé-güedé
dàtná quidé mbéé quiti ío váha
iní-xi, dico ñã ndáá chi ñã túú ñùhu
váha iní-güedé, chi quide-güedé
dàtná quidé quiti dééⁿ quiti nàni
yíhí. 16 Te òré quexio-güedé núú
ndécú-ndó te cada cuendá-ndó
nacuáa quide-güedé cuendá ducaⁿ
cùtnuní iní-ndó nã ñáyiú cùu-güedé.
Te nchòhó xini-ndó sã ñã túú cùuⁿ
ndéhé yoho yàha stilé tnu ñnu, te
ni ñã túú xini-ndó cùuⁿ ngúxí iiⁿ
tnu ñnu. 17-18 Te xini tucu-ndo sã
ncháá yutnu váha cùuⁿ sávidí váha,
te nchaa yutnu váha-áⁿ ñã túú cùuⁿ
sávidí sã ñã túú váha. Te nchaa
yutnu sã ñã túú váha ñã túú cùuⁿ
sávidí váha, chi mee-ni sávidí sã
ñã túú váha cùuⁿ. 19 Te nchaa
yutnu sã ñã túú cùuⁿ sávidí váha
xèhndé-güedé, te cuánguee-xi núú
ñùhú càyú-xi. Te ducaⁿ sãtnahá-xi
yáha nchaa cue téé dándahú ñáhá
cächí sã càháⁿ tnúhu Yá Ndiòxí te ñã
ndáá sã càháⁿ-güedé tnúhu-gá, chi

quihíⁿ-güedé núú ñùhú núú càyú.
20 Te nchòhó cùtnuní iní-ndó nã
ñáyiú cùu cue téé-áⁿ cuendá nchaa
sã quidé-güedé.

*Ñã ncháá ñáyiú ngündecú-yu núú
ndécú Yá Ndiòxí táxi tnùnì-gá*
(Lc. 13:25-27)

21 'Te na cächí tnúhu-í xii-ndo sã
íó vai ñáyiú cächí-yu sã yùhú cùu-í
Xítóhó-yu, dico ñã ncháá-yu nduu
táhú-yu cundecú-yu núú ndécú
Tãtã-í Dútú Ndiòxí táxi tnùnì-gá, chi
mee-ni ncháa ñáyiú na càda nchaa
nacuáa càháⁿ-gá ñáyiú-áⁿ nduu
táhú-yu cundecú-yu núú ndécú-gã
táxi tnùnì-gá. 22 Te na sãá nduu
càda ndáá Yá Ndiòxí cuèchi nchaa
ñáyiú, te vai-yu cúñahá-yu xii-í:
“Yòhó Xítóhó Jesucristú nchúhú
cúu-ndí ñáyiú ní càháⁿ tnúhu-n
nacuáa ní cächí-n, te ðiu-ni-n ní
cacunehe-ndí te ní sãndáá iní ñáhá
ncháa espíritu cùndiñi yucu ñãvãha
xii-ndí ní quee-xi yiqui cùñú
ñáyiú, te ðiu-ni yòhó ní chindee
ñàha-n xii-ndí ní ndacu-ndí ní
quide-ndí titni núú sã vã yòo tnàhí
ndàcu cada”, duha cúñahá-yu xii-í
dávã-áⁿ. 23 Dico yúhú cúñaha-í
xii-yu: “Ñã túú tnàhí xini ñáhã-í xii
nchòhó nnu ndéé ñáyiú cùu-ndo,
te chí xócuñi nchaa nchòhó ñáyiú
quide nchaa sã cuèhé sã dúhá núú
ndécú-í-a”, duha cúñaha-í xii-yu.

*Hⁿ vehe ndècu cimientú-xi ndihi iiⁿ
vehe ñã túú cimientú-xi*
(Mr. 1:22; Lc. 6:47-49)

24 'Te nchaa ñáyiú sãcúndedóho
tnúhu càháⁿ-í te núu na tnii-yu,
te ñáyiú-áⁿ cúu-yu dàtná iiⁿ téé ío
váha cùtnuní iní-xi. Chi téé-áⁿ ní
dácáá-dé iiⁿ vehe, dico díhna-gá ní
xete-dé ndéé ní tnahá-dé yúú cáxiⁿ
te dàtnuní ní tava-dé cimientú-xi.
25 Te òré ní cuuⁿ dáu te ní ndee
ndute ñuhu, te ní dándáá-xi ndéé
núú cáá vehe-áⁿ, dico ñã túú ní
ndàcu-xi cuido-xi. Te ní quene
tucu táhí ñihi dico ñã túú ní
ndàcu-xi cuido-xi vehe-áⁿ, te ducaⁿ

chi téé ní dácáá vehe-áⁿ ní tava-dé cimiéntú-xi núú yúú caxíⁿ. Duha sãtnahá-xi cùu nchaa ñáiyu tñi tñúhu cãháⁿ-í. ²⁶ Dico nchaa ñáiyu sãcúndedóho tñúhu cãháⁿ-í te ñã túú cuíní-yu tñi-yu, ñáiyu-áⁿ cúy-yu dàtná ìⁿ téé ñã túú tñàhí cùtnuní iní-xi. Chi téé-áⁿ ní dácáá-dé ìⁿ vehe núú yúú mèe-ni ñuhu cúchí. ²⁷ Te òré ní cuuⁿ dáú te ní ndee ndute ñuhu, te ní dándáá-xi ndéé núú cáá vehe-áⁿ, te ní quene táchí ñhi te íi-ni ní xido-xi vehe-áⁿ cuendá sã núú ñuhu cúchí ní sãá. Duha sãtnahá-xi cùu nchaa ñáiyu sãcúndedóho tñúhu cãháⁿ-í te ñã túú cuíní-yu tñi-yu —duha ní dánèhé ñháá Jèsús xii cue téé xica cuu ndihí-gá ndihí nchaa ñáiyu.

²⁸ Te òré ní ndihí Jèsús sá dúcáⁿ ní cáháⁿ-gá, te nchaa ñáiyu ní xíndedóho nchaa tñúhu ní cáháⁿ-gá ío ní cuñúhu-yu nãcuáa ní dánèhé ñháá-gã xii-yu. ²⁹ Chi ní cáháⁿ-gá dàtná cãháⁿ cue téé cùnuu, te cùnuu ndisa-gá, te ñã túú ní cáháⁿ-gá dàtná cãháⁿ nchaa cue téé dàcuaha ñaha xii ñáiyu nchaa tñúhu ní chidó tñuní ndí Moisés.

8

Jèsús quidé tãtna-gá ìⁿ téé tñàhá cuhé sã dátèhyú nihnu-xi yiqui cùñú-ó

(Mr. 1:40-45; Lc. 5:12-16)

¹ Te Jèsús ní xica-gá cuánuu-gá dñi tñdúú núú dúcáⁿ ní xíndecu-gá ní dánèhé-gá ñáiyu-áⁿ, te cuhéé víhí ñáiyu nchicúⁿ ñháá xii-gá cuánuu. ² Te ní quexío ìⁿ téé tñàhá cuhéé sã dátèhyú nihnu-xi yiqui cùñú-ó núú Jèsús, te ní ngúñí xití-dé núú-gã, te xãhaⁿ-dè xii-gá:

—Mèstrú, véxi-í cãháⁿ ndàhú-í núú-n núú vá cùndèe iní-n cãda tãtna ñaha-n xii-í, chi cùtnuní iní-í sã ndácú-n —cãchí-dé xãhaⁿ-dè xii-gá.

³ Te Jèsús ní dácáá-gá ndaha-gá ní tendaha ñaha-gá xii-dé, te xãhaⁿ-gã:

—Cuu cada tãtna ñaha-í xii-n, te vitna ndúha-n —cãchí-gá xãhaⁿ-gã xii-dé.

Te òré-ni-áⁿ ní xócuñí cuhéé tñàhá-dé. ⁴ Te Jèsús ní xãhaⁿ tucu-gá xii-dé:

—Te vitna cuanùhú te vá yóo ìⁿ cùñaha-n sã yùhú ní quide tãtna ñaha-í xii-n, núú dùtú-ni cuaháⁿ cuendá sã ná quini ñãhá-dè xii-n sã ní ndúha-n, te cuãñaha-n sã ndúú tãhú Yã Ndiöxi dàtná ní cachí ndí Moisés. Te ducaⁿ cãda-n cuendá cutnuni iní ñáiyu sã ní ndúha-n —cãchí-gá xãhaⁿ-gã xii téé ní quide tãtna-gá-áⁿ.

Jèsús quidé tãtna-gá ìⁿ téé xinu cuechi núú ìⁿ téé cùu capitáⁿ

(Lc. 7:1-10)

⁵ Te Jèsús ní xica-gá cuaháⁿ-gá ñuú Capèrnaúm. Te òré cuánguñu-gá ñuú-áⁿ te ní quexío ìⁿ téé cùu capitáⁿ cãháⁿ ndàhú-dé núú-gã, ⁶ te xãhaⁿ-dè xii-gá:

—Mèstrú, véxi-í cãháⁿ ndàhú-í núú-n núú vá cùndèe iní-n cãda tãtna-n ìⁿ téé xinu cuechi núú-í, chi cùhú-dé te cãhú víhí tñàhá-dé, te ío ndòho-dé te ní ñã cùndèe-gá-dé candá nihnu-dé —cãchí-dé xãhaⁿ-dè xii-gá.

⁷ Te Jèsús ní xãhaⁿ-gã xii-dé:

—Te na quihíⁿ-ó cãda tãtna-í-dé —cãchí-gá xãhaⁿ-gã xii-dé.

⁸ Te téé cùu capitáⁿ-áⁿ ní xãhaⁿ-dè xii-gá:

—Mèstrú, ñã túú tàú-í sã quñu-n ndéé xití vehe-í, chi cùu-í ìⁿ téé cùtèxínu sã cúú-xí-n, te cáháⁿ-ni sã ndúha téé xinu cuechi núú-í te ndúha-dé. ⁹ Chi yùhú ndècu cue téé tàxi tñuní ñháá xii-í, te ducaⁿ yùhú tucu ndècu cue sandadú táxi tñuní-í. Te òré xãhaⁿ-í xii ìⁿ-dè quihíⁿ-dè ìⁿ chiúⁿ te cuaháⁿ-dè, te òré xãhaⁿ-í xii ingá-dé quixi-dé te véxi-dé, te òré xãhaⁿ-í xii ìⁿ téé xinu cuechi núú-í cada-dé ìⁿ chiúⁿ te quide-dé. Núu xiáⁿ yòhó cáháⁿ-ni sã ndúha téé xinu cuechi núú-í te ndúha-dé —cãchí-dé xãhaⁿ-dè xii Jèsús.

¹⁰ Te Jèsús ío ní cuñúhu-gá sã dúcáⁿ ní cáháⁿ téé cùu capitáⁿ-áⁿ, te

ní xáhaⁿ-gã xii nchaa ñáyiú nchícúⁿ ñáhá xii-gá:

—Na cächí tnúhu ndáá-í xii-ndo sã vátá quíni-gá-í ní ñⁿ ñáyiú isràél, ñáyiú súúni ño váha sàndáá iní ñáhá xii Yá Ndióxi dätiná sàndáá iní ñáhá tée-a xii-gá. ¹¹ Te na cächí tnúhu ndáá tucú-í xii-ndo sã ño cuéhé ñáyiú quixi ndáa xio nacuaa quène nchíanchii, te ñu-ni ducaⁿ ño cuéhé tucú-yu quixi ndáa xio nacuaa quée tucú nchíanchii. Te nchaa ñáyiú-áⁿ naníhí tnáhã-yu ndihi té Àbrahám, ndihi té Isàac, ndihi té Jácób núú ndécú Yá Ndióxi táxi tnùni-gá te yàcáⁿ cundecu ndihi ñáhã-yu xii-güedé. ¹² Te nchaa ñáyiú tàú nduu táhú cundecu núú ndécú Yá Ndióxi táxi tnùni-gá ní cùu, ñáyiú-áⁿ quee tihü-yu, chi quíhíⁿ-yu ñⁿ xichi núú néé núú ño ndohó-yu cundecu-yu, te yàcáⁿ ño ndáhí-yu, te dicó rúhñú-nã cuu núhu-yu sã sätú iní-yu cuèndá sã ndohó-yu — cächí-gá xáhaⁿ-gã xii-yu.

¹³ Te Jèsús ní xáhaⁿ tucú-gá xii tée cùu capitáⁿ-áⁿ:

—Yòhó tée ndècu ndihi tée cùhú cuanùhú vehe-ñ vitna chi ndúha-dé chi ní sàndáá iní-n Yá Ndióxi — cächí-gá xáhaⁿ-gã xii-dé.

Te ñu-ni òré ducaⁿ ñi xáhaⁿ Jèsús xii tée cùu capitáⁿ-áⁿ ñi ndúha tée xinu cuechi núú-dé.

Jèsús quidé tãtna-gã nãná ñadhí té Pèlú

(Mr. 1:29-31; Lc. 4:38-39)

¹⁴ Te Jèsús ní xica-gá cuáhãⁿ-gã vehe té Pèlú, te òré ní quexio-gã vehe-dé te ní xiní-gá cáá nãná ñadhí-dé cùhú-áⁿ ñùhu vihi-áⁿ cahni. ¹⁵ Te Jèsús ní tñi-gã ndaha ñaha cùhú-áⁿ, te òré-ni-áⁿ ñi nchíco-áⁿ cahni te ní ndacóo-áⁿ ní xinu cuechi-áⁿ núú-güedé ndihi-gá.

Jèsús quidé tãtna-gã vãi ñáyiú cùhú

(Mr. 1:32-34; Lc. 4:40-41)

¹⁶ Te òré ní dáhu nchíanchii te ní quexio ñáyiú núú ndécú Jèsús, te ndècã-yu vãi ñáyiú yìhi ñaha

espíritú cündihí yucu ñávãha ní sáa núú-gã te ndèca tucú-yu vãi ñáyiú tnáhã dava-gã núú cuéhé. Te ñⁿ-ni tnúhu ní cáháⁿ Jèsús ní tenãã-gã nchaa espíritú cündihí yucu ñávãha yìhi ñaha xii nchaa ñáyiú-áⁿ, te ní quee-xi yiqui cùñú-yu cuáhãⁿ-xi. Te tnáhã nchaa dava-gã ñáyiú cùhú-áⁿ ñi quide tãtna-gã. ¹⁷ Te ducaⁿ ñi cuu chi ní quee ndáá-xi nacuaa ní cáháⁿ ndíi Chãíá tée ní xóo cáháⁿ tnúhu Yá Ndióxi ndéé sanaha, te duha ní cachí ndíi: “Mee-gã cada tãtna ñaha-gã xii-o, chi ñu-ni-gã xocani-gã nchaa sã quidé ùhú yiqui cùñú-ó”, duha ní cachí ndíi.

Ñáyiú cuíni tuha ñaha xii Jèsús
(Lc. 9:57-62)

¹⁸ Te òré ní xiní Jèsús sã ño cuéhé ñáyiú xixúcu núú ndécú-gã, te ní xáhaⁿ-gã xii cue tée xica cuu ndihi-gã sã quée-gã ndihi-güedé bãrcú cuèndá téhndé-gã ndihi-güedé ndáa ingã xio yuhu làgúnã. ¹⁹ Te mei òré-áⁿ ñi quexio ñⁿ tée dàcuaha ñaha xii cue ñáyiú nchaa tnúhu ní chídó tnùni ndíi Moisés, te xáhaⁿ-dè xii-gá:

—Mèstrú, cuíni-í canchicúⁿ ñáhã-í xii-n ndèni ní cuu na quíhíⁿ-n — cächí-dé xáhaⁿ-dè xii-gá.

²⁰ Te Jèsús ní xáhaⁿ-gã xii-dé:

—Nchaa ñucuii chi ndècu yaú cùu vèhe-güedi saquíhi-güedi, te nchaa cue quiti ndáva caa tacã-güedi diquí yutnu. Dico yúhú Tée cùu ñaní tnáhã-ndó nchãa-ndo chi ñã túú ndéé cáá vèhe-í ñuyúú-a ndetátú-í — cächí-gã xáhaⁿ-gã xii-dé.

²¹ Te ñⁿ tée ní chitnahá ñáhã xii Jèsús ní xáhaⁿ-dè xii-gá:

—Jèsús, dañã na nùhú-í cundetú-í cuú tãtã-í te chindúxi-í-dé dätñuní quixi-í chitnahá ñáhã dùcaⁿ-ná-í xii-n — cächí-dé xáhaⁿ-dè xii-gã.

²² Te Jèsús ní xáhaⁿ-gã xii-dé:

—Dañã ñáyiú ñã túú sàndáá iní ñáhã xii-í ná chindúxi tnáhã

meé-yu, chi ñáiyu-án cúŷ-yu dàtná ñáiyu ní xihí cuéi ndècu-ní-yu núú ñuyú-a, te yòhó canchicún ñáhá-ní xii-í —càchí-gá xáhaⁿ-gá xii-dé.

Jèsús ngáni-gã táchí ndihi ndute làgúná

(Mr. 4:35-41; Lc. 8:22-25)

²³ Te sátá dúcáⁿ te Jèsús cuánguee-gá bàrcú ndihi cue téé xica cuu ndihi-gá, te ní xica bàrcú-án cuáháⁿ-xi. ²⁴ Te ñini ñùhu bàrcú-án ichi cuáháⁿ-xi núú ndute ní xidí Jèsús, te ní ngúíta-xi níhi vihi quene táchí, te ta nàdachitú-xi ndute xití bàrcú cuáháⁿ. ²⁵ Te cue téé xica cuu ndihi-gá cuáháⁿ-güedé núú cáá-gã xidí-gá, te xáhaⁿ-güedé xii-gá:

—jMèstrú, ndiquúí iní chi dàcácu ñaha-n xii-o chí quée naa-o cuini-xi! —càchí-güedé xáhaⁿ-güedé xii-gá.

²⁶ Te Jèsús ní xáhaⁿ-gã xii-güedé:

—¿Ná cuendá ndéé ducaⁿ ïo yùhú-ndó? ¿Náa ñá túú sàndáá iní ñáhá ndisa-ndo xii-í-án? —càchí-gá xáhaⁿ-gã xii-güedé.

Te Jèsús ní ndacóo-gá te ní tenáa-gá táchí-án ndihi ndute-án, te ní ngúíñí táchí-án te ní nucúndecu nahi-ná ndute làgúná-án. ²⁷ Te nchaa cue téé ñùhu xití bàrcú-án ní cuñúhu-güedé sá dúcáⁿ ní quide-gá ní xiní-güedé, te ní xitnáha-güedé:

—¿Te ná téé cùu téé-a núú duha ní cáháⁿ-ni-dé te ní ngúíñí táchí te ní nucúndecu nahi-ni ndute làgúná-a-í? —càchí-güedé xitnáha-güedé.

Cue téé ñuú Gàdará cue téé yìhi ñaha espíritú cúndihi yucu ñávãha

(Mr. 5:1-20; Lc. 8:26-39)

²⁸ Te òré ní quèxio Jèsús ndàa ingá xio yuhu làgúná yucu cue téé ñuú Gàdará, te úú tnahá cue téé quide vehe núú yíndüxi ndíyí ní quee-güedé cuáháⁿ-güedé núú ndécú Jèsús, te ndi ndüü-güedé yíhi ñaha espíritú cúndihi yucu ñávãha xii-güedé, te ïo mãñá-güedé chí vá yòo tnahí dàña-güedé yáha yatni

núú ndécú-güedé. ²⁹ Te cue espíritú yíhi ñaha xii-güedé-án ní quide-xi níhi ní cáháⁿ-güedé, te xáhaⁿ-güedé xii-gá:

—¿Ná cuendá véxi-ò Jèsús Déhe Dútú Ndiõxí chidácá ñáhá-n xii-ndí? ¿Áⁿ sàma véxi-n dàndoho ñaha-n xii-ndí? Te vátá sàá-gá nduu dùcaⁿ cada-n —càchí-güedé xáhaⁿ-güedé xii-gá.

³⁰ Te yatni xíaⁿ xixica cuu vãi cuchí xixexi-güedi. ³¹ Te cue espíritú cúndihi yucu ñávãha yìhi ñaha xii cue téé-án ní cáháⁿ ndàhú-xi núú Jèsús, te xáhaⁿ-xi:

—Te núu vá dàñá-gã-n quìhi-ndí yiqui cuñú cue téé-a, te cáháⁿ ndàhú-ndí núú-n sã dàña-n na quíhíⁿ-ndí quíhu-ndí yiqui cuñú nchaa cùchí-án —càchí cue espíritú-án xáhaⁿ-xi xii-gá.

³² Te Jèsús ní xáhaⁿ-gã xii cue espíritú cúndihi yucu ñávãha-án:

—Chí táquèe yiqui cuñú cue téé-án te quíhíⁿ-ndó núu ndéé ichi quíhíⁿ-ndó —càchí-gá xáhaⁿ-gã xii nchaa espíritú-án.

Te cue espíritú cúndihi yucu ñávãha-án ní quee-xi yiqui cuñú cue téé-án, te cuáháⁿ-xi cuánguihu-xi nchaa cùchí-án. Te cue quití-án ní xinu-güedi duha ní quée-güedi ndàa núú dèhvã yuhu làgúná-án, te ní ngaunihnu-güedi xití ndute, te ní ndihi-güedi ní cáhá.

³³ Te cue téé xito ñaha xii nchaa cuchí-án ní yùhú-güedé te ní xinu-güedé, te ní sáháⁿ-güedé ní caní-güedé cuendú núú cué ñáiyu ndècu xití ñuú nchaa nàcuáa ní cuu cuendá cue téé ní xihí ñaha nchaa espíritú cúndihi yucu ñávãha-án. ³⁴ Te nchaa ñáiyu ñuú-án ní queé-yu cuáháⁿ-yu núú ndécú Jèsús. Te òré ní quexiò-yu núú ndécú-gã te ní cáháⁿ ndàhú-yu núú-gã sá ná quèe-gá yucu ñuú-yu núhú-gá.

9

Jèsús quidé tãtãna-gá ìªn tée cùhú ñã cùú-gá candá nihnu

(Mr. 2:1-12; Lc. 5:17-26)

¹ Te sãtã dúcãªn nĩ cuu te Jèsús cuãndee-gã bãrcú cuáhãªn-gã ní natehndé-gã ndãa ingã xio yuhu làgúnã. Te xiãªn nĩ ndexio-gã ñũú núú quidé ñũú-gã. ² Te xiãªn ndécú-gã ní quexio cue tée nchìdo-güedé ìªn tée cùhú ñã cùú-gã candá nihnu ñũhu-dé xito, te Jèsús ní cutnùnĩ iní-gã sã sãndãã ndisa iní ñãhá-güedé xii-gã nõu ní xãháªn-gã xii tée cùhú-ãªn:

—Yòhó tée cùhú vá ndìhú-gã iní-n, chi sa ní quide càhnu iní-í nchaa cuèchi-n —càchí-gã xãháªn-gã xii-dé.

³ Te sã dúcãªn nĩ cãháªn-gã nõu xiãªn cue tée dàcuaha ñaha xii ñãyiu nchaa tnũhu ní chídó tnùnĩ ndĩi Moisés ní sani iní-güedé: “Tée-a cãháªn cuèhé-dé cuendã Yã Ndiõxí”, duha ní sani iní-güedé. ⁴ Te Jèsús ní cutnùnĩ iní-gã nõcuãa sãni iní-güedé nõu ní xãháªn-gã xii-güedé:

—¿Nã cuendã ducaªn sãni cuèhé sãni dùha iní-ndó? ⁵ Te sã dúcãªn nĩ xãháªn-í xii tée cùhú-a sã nĩ quide càhnu iní-í nchaa yíca cuèchi-dé, te xiãªn nchòhó ñã túú cutnùnĩ iní-ndó nõu ndãã cãháªn-í ãdi ñã ndãã. Dico nõu cùú-í-dé sã ndãcõo-dé te caca-dé, te cutnùnĩ ndãã iní-ndó nõu ndãã cãháªn-í ãdi ñã ndãã, chi cundehe nõú-ndó nõcuãa cada-í. ⁶ Te vitna na càda-í nõcuãa cutnùnĩ iní-ndó nchãa-ndo sã yùhú Tée cùu ñãni tnãhá-ndó nchãa-ndo ndecu ndìhĩ-í tnũhu ndee ìni ñuyú-a sã cáda càhnu iní-í nchaa cuèchi ñãyiu —càchí-gã xãháªn-gã xii-güedé.

Te sãtã dúcãªn te ní xãháªn-gã xii tée cùhú-ãªn:

—Ndacõo, te ndocani-n xito ñũhu-n véxi-ãªn te núhú-n vèhe-n —cachí-gã xãháªn-gã xii-dé.

⁷ Te òré-ni-ãªn nĩ ndũha tée cùhú-ãªn te ní ndacõo-dé te ní ndocani-dé xito ñũhu-dé ní quexio-ãªn te ní xica-dé cuãnuhú-dé vehe-dé. ⁸ Te nchaa ñãyiu xĩndecu-ãªn ìo ní

cuñũhu-yu sã dúcãªn nĩ quide Jèsús ní xiní-yu, te ní cachí-yu sã ìo càhnu cuu Yã Ndiõxí cuendã sã nĩ sãñaha-gã xii Jèsús tnũhu ndee ìni cada-gã nchaa sã vã yõo tnãhĩ ndãcu cada.

Jèsús cãháªn-gã ìªn tée nãni Mateú chitnahã ñãhá-dé xii-gã

(Mr. 2:13-17; Lc. 5:27-32)

⁹ Te Jèsús ní nucũhuªn tucu-gã ichi cuáhãªn-gã, te ichi ñũhu-gã ní xiní-gã nõcõo ìªn tée nãni Mateú quidé cõbrã-dé ñãyiu chi cõbrãdõr impuèstú cùú-dé, te ní xãháªn-gã xii-dé:

—Mãteú, néhé chitnahã ñãhá-n xii-í —cãchí-gã xãháªn-gã xii-dé.

Te té Mãteú-ãªn nĩ ndacuñĩ-dé ní chitnahã ñãhá-dé xii-gã.

¹⁰ Te ìªn xito ndècu Jesús ìªn vehe, te yìhĩ-gã mèsã ndìhĩ cue tée xica cuu ndìhĩ-gã xéxi ndìhĩ ñaha-gã xii-güedé. Te tnãhá cue tée cuihna ìni-xi quide cõbrã ñãhá xii ñãyiu cuendã impuèstú yìhĩ ndìhĩ-gã mèsã, te tnãhá tucu dava-gã cue tée ndècu ichi cuehé ichi duha yìhĩ ndìhĩ-gã mèsã. ¹¹ Te sã nĩ xiní cue tée cùu farisèú xéxi Jèsús ndìhĩ nchaa cue tée-ãªn, te ní xicãªn tnũhú-güedé nõú cuè tée xica cuu ndìhĩ-gã, te xãháªn-güedé:

—¿Nã cuendã ducaªn quide tée cùu mestrú-ndó xèxi-dé ndìhĩ cue tée cuihna ìni-xi quide cõbrã ñãhá xii ñãyiu cuendã impuèstú, ndìhĩ nchaa dava-gã cue tée ndècu ichi cuehé ichi duha-í? —càchí-güedé xãháªn-güedé.

¹²⁻¹³ Te Jèsús ní tecú dóho-gã nõcuãa ndũu tnũhu ní xãháªn-güedé xii cue tée xica cuu ndìhĩ-gã, nõu ní xãháªn-gã xii-güedé:

—Nchaa ñãyiu ñã túú cùhú chi ñã túú xiní ñuhú-yu ñãtãtnã, dico nchaa ñãyiu cùhú chi xiní ñuhú-yu ñãtãtnã. Te yùhú véxi-í cãháªn-í ñãyiu cutnùnĩ iní-xi sã ndécú cuèchi-xi cuendã dãñã-yu nchaa sã cuèhé sã dúhá quidé-yu, te ñã

túú vëxi-í cáháⁿ-í ñáiyu cächí sá ñà túú ndëcu cuéchi-xi. Te chí cádá cuëndá váha nàcuáa cáháⁿ Yá Ndióxi núú tütú-gá núú cächí-xi: “Yúhú cuíni-í sá cündáhú iní-ndó cuè tnaha ñáiyu-ndo, te ñà díú mèè-ni sá cáhni-ndó quitì nduu táhù-í”, duha cächí-gá núú tütú-gá —cächí Jèsús xáhaⁿ-gá xii-güedé.

Cue téé ndücu tnúhu núú Jèsús cuëndá ñáiyu ñà túú tnàhí ná xéxi áma cáháⁿ ndihí-yu Yá Ndióxi

(Mr. 2:18-22; Lc. 5:33-39)

14 Te cue téé xica cuu ndihí té Juáá téé dācuandute ñaha xii ñáiyu ní sáháⁿ-güedé núú ndécú Jèsús, te xicáⁿ tnúhú-güedé núú-gá, te xáhaⁿ-güedé:

—Cuíni-ndí cachí tnúhu-n ñà cuëndá nchúhú, ndihí cue téé cùu fariséu ñà túú tnàhí ná xéxi-ndí áma cáháⁿ ndihí-ndí Yá Ndióxi, te cue téé xica cuu ndihí-n ñà túú dùcaⁿ quide-güedé —cächí-güedé xáhaⁿ-güedé xii-gá.

15 Te Jèsús ní xáhaⁿ-gá xii-güedé:

—Nchòhó xiní-ndó sã vã cúú cñaha-o xii ñáiyu ñuhu vico tnándaha sá vã cúú caxí-yu nini ndëcu ndihí ñaha téé tnándaha xii-yu, dico sáá nduu vã cündëcu ndihí ñaha-gá téé tnándaha-án xii-yu, te dāvá-án te cahni iní-yu vã caxí-yu cuëndá sá ndihú iní-yu.

16 Te ni vã yõ dāndée luha dóó sáá ñⁿ dóó sa ní cuu tühú víhí, chí dóó sáá-ñⁿ nāndiyi-xi te uuⁿ-gá ndata-xi dóó sã ñⁿ cuu tühú-án. 17 Te ni vã yõ chíhi ndidí sáá xití ñⁿ lamba sa ní cuu tühú víhí, chí núu yoo ducaⁿ na càda te ndava lamba sa ní cuu tühú-án chí ío níhi yócó ndidí-án, te cuíta-ni ndidí-án te cuíta-ni lamba-án te núu ducaⁿ na càdá-yu, núu xiáⁿ xini ñuhu-xi queé ndidí sáá-ñⁿ xití ñⁿ lamba saa cuëndá ducaⁿ ñà túú ñà cuu cováha-xi —cächí-gá xáhaⁿ-gá xii-güedé.

Cuëndá déhe yoco té Jàirú ndihí cuëndá ñⁿ ñaha ní tnāndéé dóó Jèsús
(Mr. 5:21-43; Lc. 8:40-56)

18 Te cáháⁿ dúcáⁿ-ní Jèsús ní quexio ñⁿ téé cūnuu núú ndécú-gá, ñⁿ téé taxi tñuní veñúhu, te ní ngüñí xití-dé núú-gá cáháⁿ ndáhú-dé, te xáhaⁿ-dè xii-gá:

—Véxi-í cáháⁿ ndàhú-í núú-n núu vã cündèe iní-n quíhíⁿ-ó vèhe-í dandòto-n déhe yoco-í chí ní xihí-xi tnàví, te yúhú cūtnùnì iní-í sá núu quíhíⁿ-n tēndaha-n yiqui cuñú-xi te ndoto-xi —cächí-dé xáhaⁿ-dè xii-gá.

19 Te Jèsús ní xica-gá cuáháⁿ-gá ndihí-dé ndihí cue téé xica cuu ndihí-gá. 20 Te ichi ñuhu-gá

cuáháⁿ-gá ní sáháⁿ ñⁿ ñadìhí ní tnāndéé-aⁿ yuhu dóó-gã ndàa sátá-gã, te ñaha-áⁿ sa ní cuu úxúú cuíá sã cùhú-aⁿ ngòyo ñaha ñíhí xii-aⁿ. 21 Te ducaⁿ ñⁿ quide-aⁿ chí ní sani iní-aⁿ sá núu ndacu-aⁿ tnāndéé-aⁿ cuèdicó luha yuhu dóó Jèsús te ndúha-aⁿ ní sani iní-aⁿ. 22 Te Jèsús ní nchócótó-gã ndàa sátá-gã te ní xiní-gá ñadìhí-áⁿ, te ní xáhaⁿ-gá:

—Yòhó ñaha cùhú, vã ndihú-gá iní-n vitna chí sa ní ndúha-n, chí ní sándáá iní ñáhá-n xii-í —cächí-gá xáhaⁿ-gá xii-aⁿ.

Te òré-ni-áⁿ ñⁿ ndúha ñaha cùhú-áⁿ.

23 Te òré ní quexio Jèsús vehe téé cūnuu taxi tñuní veñúhu-áⁿ, te ní xiní-gá xīndáhí víhí ñáiyu, te xīndecu mūsicú. 24 Te ní xáhaⁿ-gá xii-yu:

—Chí táquèe xití vehe-a, chí xíchí-a ñà túú ní xihí-xi chí dicó xidí-xi —cächí-gá xáhaⁿ-gá xii-yu.

Te ní sácú ndéé ñáhá-yu xii-gá sá dúcáⁿ ñⁿ cáháⁿ-gá, chí sá cúú-xí mèè-yu te ní xihí ndisa xíchí-áⁿ. 25 Te ñáiyu-áⁿ ñⁿ queé-yu te cuánguñu Jèsús núú cāndòdo xíchí ñⁿ xihí-áⁿ, te ní tñⁿ-gá ndaha-xi te òré-ni-áⁿ ñⁿ ndacóo-xi. 26 Te nchaa ñuú cáá yātñi xiáⁿ ñⁿ níhi ñáiyu tnúhu nàcuáa ní quide Jèsús.

Jèsús quidé tātna-gá núú úú tnàhá cue téé cuàá

²⁷ Te sáta dúcáⁿ ní cuu te ní xica Jèsús cuánuhú-gá, te ichi ñùhu-gá ní chinchicúⁿ ñáhá úú tnàhá cue téé cuàá xii-gá, te níhi cáháⁿ-güedé, te xáhaⁿ-güedé xii-gá:

—Yòhó Jèsús, téé cùu ñaní tnàhá ndíi Dàvíi, cundàhú iní ñáhá xii-ndí —càchí-güedé xáhaⁿ-güedé xii-gá.

²⁸ Te òré ní nasáá Jèsús núú quidé vèhe-gá, te cue téé cuàá-áⁿ ní quexìo-güedé ndéé núú-gá, te ní xicáⁿ tnùhú-gá núú-güedé, te xáhaⁿ-gá:

—¿Sàndáá iní-ndó sá yùhú ndacu-í cada tātna-í núú-ndó-áⁿ? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Sàndáá iní-ndí sá díú yòhó Jèsús ndacu-n càda tātna-n núú-ndí —càchí-güedé xáhaⁿ-güedé xii-gá.

²⁹ Te Jèsús ní dácàá-gá ndaha-gá ní tendaha-gá núú-güedé, te ní xáhaⁿ-gá xii-güedé:

—Te vitna, ndúha núú-ndó chi ní sàndáá iní-ndó sá díú yùhú ndacu-í cada tātna-í núú-ndó —càchí-gá xáhaⁿ-gá xii-güedé.

³⁰ Te òré-ni-áⁿ ní ndúha núú-güedé, te Jèsús ní cáháⁿ víhí-gá dóho-güedé cuendá sá vā cáháⁿ-güedé nàcuáa ní cuu ní ndúha núú-güedé.

³¹ Te cue téé-áⁿ òré ní ndee-güedé núú ndécú Jèsús, te ní ngúita-ni-güedé ní cani-güedé cuendú núú ñáyiú nàcuáa ní quide ñaha-gá xii-güedé. Te nchaa dava-gá ñuu cáá yàtni xíaⁿ ní sáháⁿ-güedé ní cani-güedé cuendú núú ñáyiú nàcuáa ní quide ñaha Jèsús xii-güedé.

Jèsús quidé tātna-gá ñⁿ téé ñíhí

³² Te íchí ní ndee cue téé ní ndúha núú-xi-áⁿ núú ndécú Jèsús, te ní quexìo ñⁿ úú ñáyiú ndécá-yu ñⁿ téé ñíhí yíhí ñaha espíritú cundíhi yucu ñávaha. ³³ Te Jèsús ní queñuhu-gá espíritú cundíhi yucu ñávaha yíhi

ñaha xii téé-áⁿ, te òré-ni-áⁿ ní cuu ní nacáháⁿ-dé. Te nchaa ñáyiú xindecu-áⁿ ño ní cuñúhu-yu, te ní xitnàhá-yu:

—Ñá túú tnàhí xini-ó ñⁿ téé duha cada ñuu nchoo cue ñáyiú israél ní cùu —cachí-yu xitnàhá-yu.

³⁴ Te cue téé cùu fariséú ní ngúita-güedé xitnàha-güedé:

—Téé-a chi sáculháⁿ chindèe ñaha-xi xii-dé queñúhu-dé nchaa espíritú yíhí ñaha xii ñáyiú te diu-ni sáculháⁿ-áⁿ táxí tnùn-í-xi nchaa espíritú-áⁿ —càchí-güedé xitnàha-güedé.

Jèsús cundàhú iní-gá ñáyiú

³⁵ Te Jèsús cuáháⁿ-gá nchaa ñuu náhnú ndíhi nchaa ñuu líhli, te ndí tnàhá ñⁿ ñⁿ ñuu sàá-gá te ducaⁿ cuanguíhu-gá ñⁿ ñⁿ veñúhu càa nchaa ñuu-áⁿ dánèhé-gá ñáyiú tnúhu váha, tnúhu sá sánú ichi ñaha xii-yu nàcuáa ndíhu ndaha ñaha Yá Ndióxi xii-yu. Te ducaⁿ-ni ta quide tātna-gá nchaa ñáyiú cùhú cuáháⁿ cuéi ndí dííⁿ ndí dííⁿ núú cuéhé tnàhá-yu ñⁿ ñⁿ-yu. ³⁶ Te sá ní xiní Jèsús sá ño vāi ñáyiú nchicúⁿ ñáhá xii-gá, te ní cundàhú iní ñáhá-gá xii-yu chi ño ndíhú iní-yu, te vā yòo nèhe cuendá ñáhá xii-yu, te cùu-yu dàtná cue mbéé cue quiti ñá túú tòli-xi. ³⁷ Te Jèsús ní xáhaⁿ-gá xii cue téé xica cuu ndíhi-gá:

—Nchòhó xini-ndó sá òré ná sàá nduu cùu nchaa sá xítú ñáyiú te ío vāi cuu. Te na cāchí tnúhu ndáá-í xii-ndo sá dàtná ño vāi sá xítú ñáyiú cùu, ducaⁿ ño vāi ñáyiú cùmání cundedóho tnúhu-í, te ío sacú ñáyiú dàcuaha ñaha xii-yu. ³⁸ Núú xíaⁿ xiní ñùhu-xi cācáⁿ-ndó núú Yá Ndióxi Yaá cúú Xitohó-ndó ndíhi-yu cuendá sá ná dàcaháⁿ-gá iní-yu cáháⁿ-yu tnúhu-gá núú nchaa dava-gá tnàha ñáyiú-yu cùmání cundedóho tnúhu-gá —càchí-gá xáhaⁿ-gá xii-güedé.

10

Jèsús sãñaha-gã tnúhu ndee iní xii ndi ùxúú cue tée xica cuu ndihi-gá

(Mr. 3:13-19; Lc. 6:12-16)

¹ Te Jèsús ní cana-gá ndi ùxúú cue tée xica cuu ndihi-gá, te ní sãñaha-gã xii-güedé tnúhu ndee iní cundecu ndihi-güedé cuendá queñuhu-güedé nchaa espíritu cündihi yucu ñávãha yíhi ñaha xii ñáyiu, ndihi cuendá sá cáda tãtna-güedé nchaa dava-gá ñáyiu cùhú cuèi nãndi núú cuéhé tnàhá-yu.

² Te duha xñani ndi ùxúú cue tée-án: tée cunu-gá nãní-dé Ximú, àdi Pelú chi úú ñi-dé, te ñani-dé cúú té Ndríxí, te tnàhá tée-án cúú-dé tée xica cuu ndihi Jesús, ndihi té Jãcobó ndihi ñani té Jãcobó-án tãe nãni Juaá, te ndi ndúú cue tée-án cúú-güedé déhe té Zebèdeú. ³ Te tnàhá té Lipé xíca cùu ndihi-gá, ndihi té Bartolomé, ndihi té Mãxí, ndihi té Mãteú té cùu cobradór impuèstú ní cùu, ndihi té Jãcobó déhe té Àlfeú, ndihi té Lèbeú tée dãnani-güedé Tãdeú, ⁴ ndihi té Ximú tée ní cundihi cue tée cananístã, ndihi té Jüdás Iscarioté tée ní sáã nduu ní sãha cuendá ñãhá xii Jesús núú cuè tée cùu úhú iní ñãhá xii-gá.

Jèsús téndãha-gá ndi ùxúú cue tée xica cuu ndihi-gá quíhí-güedé cáhá-güedé tnúhu-gá núú ñáyiu

(Mr. 6:7-13; Lc. 9:1-6)

⁵⁻⁶ Te Jèsús ní xáha-gã xii ndi ùxúú cue tée xica cuu ndihi-gá sá quíhí-güedé cáhá-güedé tnúhu-gá núú ñáyiu, te cùmãní-gã caca-güedé quíhí-güedé, te ní xáha-gã xii-güedé:

—Na cãchí tnúhu-í xii-ndo sã mée-ní ñúú núú xĩndecu cue ñáyiu isràél quíhí-ndó cáhá-ndó tnúhu-í, te vã quíhí-ndó ñi ñi ñúú yĩndèhu distritú Sãmariã, te ñi vã quíhí-ndó dàva-gá ñúú núú xĩndecu ñáyiu ñã túú cùu ñáyiu

isràél. Te cue ñáyiu isràél-án cúú-yu dàtnã cue mbéé cue quiti ní xita chi ta xita nihnú-yu cuáhã. ⁷ Te cúñaha-ndo xii-yu sã sã ní cuyatni nduu ndíhu ndaha ñãha Yã Ndiõxí xii-yu. ⁸ Te cada tãtna-ndo nchãa ñáyiu cùhú cuèi ñáyiu tnàhá cuéhé sã dátèhyú nihnu-xi yiqui cũñú-yu, te queñuhu-ndo nchãa espíritu cündihi yucu ñávãha yíhi ñaha xii ñáyiu, te dandòto-ndo cue ñáyiu sa ní xíhí, te vã càcã-ndó yãhu-ndo núú ñáyiu òré cada-ndo nchãa chiu-án, chi sa nãha-ndo sã dicó duca ñi taxi-í tnúhu ndee iní ndécú ndihi-ndo.

⁹ Te vã cãnehẽ-ndo díhú cuu ichi-ndo, ¹⁰ te ñi vã cãnehẽ-ndo ñunu cuhu ndachiu-ndo, te ñi vã cãnehẽ-ndo ingã ichi dóó-ndó nãdãma-ndo, te ñi vã cãnehẽ-ndo úú-gã chàu-ndó chi ñi-ñi chàu yíhi-ndó-ã xíã-ñi quíhi-ndo, te ñi vã cãnehẽ-ndo tatnu, te duca cãda-ndo chi nchòhó sa nãha-ndo sã nchãã ñáyiu quide chiu ñi-ñi cuendá chi quide-yu ñihí-yu sã xéxi-yu.

¹¹ Te ndi tnãhá ñúú ná quèxio-ndo te nducu-ndo ñáyiu cùtnuní iní-ndó sã cúú-yu ñáyiu vãha, te vehe ñáyiu-án cundecu-ndo ndèé sãã nduu ndèe-ndo ñúú-án. ¹² Te òré quèxio-ndo vehé-yu te cúñaha-ndo xii-yu: “Yã Ndiõxí chĩndèe chitúu ñaha-gã xii-ndo ndècu-ndo”, duha cúñaha-ndo xii-yu. ¹³ Te núú ní cáhá vãha ndihi ñãhá-yu xii-ndo, te cuu-xi sã vãha sã cúú-xi-yu cuendá tnúhu ní xáha-ndo-ã, dico núú ñã túú ní cáhá vãha ndihi ñãhá-yu xii-ndo, te cúñaha-ndo xii-yu sã vã cúú-xi sã vãha xii-yu tnúhu ní xáha-ndo-ã. ¹⁴ Te núú ní sãã-ndó ñi ñúú àdi ñi vehe, te núú ñã túú ní cáhá ndihi ñaha vãha-yu xii-ndo te ñi ñã túú ní cuini-yu cundedóho-yu tnúhu cáhá-ndó te ndee-ndo ñúú-án àdi vehe-án, te naquidi-ndo tãcã chũhmã ñi tñi

sáhá-ndó cuendá ná cùtnuní iní-yu sá ñà túú quide váha-yu. ¹⁵ Te na cächí tnúhu ndáá-í xii-ndo sá sàá nduu te ío-gá dandòho ñaha Yá Ndiöxí xii ñáiyu ducaⁿ na càda ñaha xii-ndo-áⁿ dàcúxí ñáiyu ní xíndecu ñúú Sòdomá ndihí ñúú Gòmorrá.

Ndoho tnahá-ó cùndecu-o ichi Xítoho Jesucristú

¹⁶ Te cada iní-ndó sá cúu-ndó dàtná cue mbéé cue quití cuháⁿ núú ío yíhí. Te ducaⁿ sátnahá-xi cùu-ndo chi yúhú tendaha ñaha-í xii-ndo quíhíⁿ-ndó núú xíndecu cue ñáiyu cuihna iní-xi, te ío váha cuáha-ndo cuendá nàcuáa cada-ndo dàtná quidé còó, dico cunduu váha iní-ndó ñà túú nà cada-ndo dàtná quidé lómá. ¹⁷ Te quíhí iní-ndó chi cue ñáiyu na cùu úhú iní ñáhá xii-ndo, te cuáha cuendá ñáhá-yu xii-ndo núú cuè téé cùchiuⁿ, te caniha-güedé xii-ndo xítí veñúhu-güedé. ¹⁸ Te dava tucu ñáiyu cuu úhú iní ñáhá xii-ndo candeca ñáhá-yu xii-ndo quíhíⁿ núú cuè téé cùnuu yindaha nacióⁿ, àdi núú dàva-gá cue téé cùnuu sá cuendá-í. Te nchòhó níhí-ndó nàcuáa cada-ndo cáháⁿ váha-ndo cuendá-í núú-güedé ndihí núú cuè ñáiyu ñà túú cùu ñáiyu isràél. ¹⁹⁻²⁰ Dico òré cuáha cuendá ñáhá-yu xii-ndo núú nchàa cue téé-áⁿ, te vá cáni iní-ndó núu nàsa cunduu tnúhu cáháⁿ-ndó núú-güedé, chi òré-ná te níhí-ndó tnúhu cáháⁿ-ndó. Te ñà díú mèe-ndo cahu iní-ndó tnúhu cáháⁿ-ndó, chi mee Espíritú Yá Ndiöxí Yáá cúú Tátá-ndó dàcahú iní ñáhá-xí xii-ndo nacuáa cunduu tnúhu cáháⁿ-ndó.

²¹ Te dava cue téé cuáha cuendá-güedé ñani-güedé núú cuè téé cùchiuⁿ cuendá cahni ñaha-güedé, te dava cue téé cùu tátá díu-ni ducaⁿ càda-güedé déhe-güedé, te díu-ni ducaⁿ càda ñaha dava cue ñáiyu cùu déhe xii tátá-yu ndihí náná-yu, chi cuáha cuendá ñáhá-yu núú cuè téé cùchiuⁿ cuendá cahni ñaha-güedé xií-yu.

²² Te nchòhó chi nchaa ñáiyu ngúíta-yu cuu úhú iní ñáhá-yu xii-ndo sá cuendá-í. Te núu na càda ndee-ni iní-ndó càncicúⁿ nihnu-ni-ndo ichi-í cuèi nándi sá ná càda ñáhá-yu xii-ndo ndéé ná sàá nduu vā cùndecu-gá-ndó ñùyíú-a ña, te nduu táhú-ndó cùndecu-ndo ni caa ni quíhíⁿ ndihí Yá Ndiöxí. ²³ Te núu ñúú cùni-güedé tñi ñaha-güedé xii-ndo càda úhú ñáhá-güedé sá cuendá-í, te cunu-ndo núú-güedé quíhíⁿ-ndó ìngá ñúú. Te na cächí tnúhu ndáá-í xii-ndo sá cùmání-gá quíhíⁿ-ndó nchàa dava-gá ñúú núú xíndecu ñáiyu isràél cáháⁿ-ndó tnúhu-í, te sa quixi tucu yúhú, Téé cùu ñani tnahá-ndó nchàa-ndo ñuyíú-a.

²⁴⁻²⁵ Te nchòhó xini-ndó sá ni ñiⁿ téé dàcuaha ñà túú cùnuu-dé dàcúxí mèstrú-dé, te núu mèstrú téé-áⁿ nándi yáha-dé ndécú-dé te tàú-dé nduu vétú iní-dé te núu tnahá-dé yáha-dé dàtná yáha mèstrú-dé-áⁿ. Te díu-ni ducaⁿ sátnahá tucu-xi cùu ñiⁿ téé xínu cuechi, chi ñà túú cùnuu-dé dàcúxí pàtróóⁿ-dè, te nchaa sá yáha pàtróóⁿ-dè-áⁿ te tàú-dé nduu vétú iní-dé te núu tnahá-dé yáha-dé dàtná yáha pàtróóⁿ-dè-áⁿ. Te núu yúhú Yáá táxi tnùnì ñáhá xii-ndo cachí-yu sá cúu-í sáculhá, te uuⁿ-gá ducaⁿ cùñáhá-yu xii nchòhó cue téé cùndihí-í.

Vá yùhú-ó cuendá nchaa sá càdá ñàha ñáiyu xii-o

(Lc. 12:2-7)

²⁶ Te nchòhó vá yùhú-ndó núú ñáiyu. Chi nchaa tnúhu sá cúú yùhu ni cuu vá cúú yùhu-gá, chi nchaa dacuití sá quéé tñu-xi núú ñáiyu. ²⁷ Te nchaa tnúhu sá cächí tnúhu-í xii-ndo núú méé núú ñiⁿ-ó, cùu-xi tnúhu sá ndúú yùhu ni cuu datúu-ndo núú cuè ñáiyu cuèi núú chítú núú tàcá. ²⁸ Te xini ñuñu-xi sá vá yùhú-ndó cuè ñáiyu cuèi na càhni ñáhá-yu xii-ndo, chi díu-ni yiqui cùñú-ndó ndàcú-yu cahni-yu,

dico ñá túú nǎgá ndacú-yu cada ñáhá-yu xii-ndo. Te tàú-ndó sǎ Yá Ndiǒxí yùhú-ndó chi Yaá-áⁿ ndacu-gá danǎa-gá yiqui cùñú-ndó, te ndacu-gá daquihíⁿ ñáhá-gǎ xii-ndo núú úhú núú ndàhú.

²⁹ Te nchòhó xini-ndó sǎ ndéé úú tnàhá tǎláá cùyáhu-di núú ìⁿ-ní dǐhúⁿ, te ni ìⁿ-di ñá túú xihí cùtexinu-di chi ndéé núú mee Yá Ndiǒxí Yaá cúú Tǎtá-ndó ná cǎchí-gǎ te xihí-di. ³⁰ Dico nchòhó chi ío-gǎ néhé cuendá ñáhá Yá Ndiǒxí xii-ndo chi ndéé idi díquí-ndó yindehu. ³¹ Núú xǎⁿ cǎchí-í sǎ vǎ yùhú-ndó chi cùnuu-gǎ-ndó dàcúúxí tǎláá cuéi vǎi vihi-güedi.

Nchaa ñáyiu dàtúu núú tnàha ñáyiu-xi sǎ ndécú ndihí-yu Xitohó Jesucristú

(Lc. 12:8-9)

³² Te na cǎchí tnúhu-í xii-ndo sǎ ncháá ñáyiu na dàtúu núú tnàha ñáyiu-xi sǎ ndécú ndihí ñáhá-yu xii-í, te ducaⁿ te tnàhá yúhú dàtúu-í núú Tǎtá-í Dútú Ndiǒxí Yaá ndécú àndiu sǎ ndécú ndihí-í-yu. ³³ Dico nchaa ñáyiu na cùñaha xii tnaha ñáyiu-xi sǎ ñà túú ndécu ndihí ñáhá-yu xii-í, te ñiu-ni ducaⁿ càda yúhú tucu chi cùñaha-í xii Tǎtá-í Dútú Ndiǒxí Yaá ndécú àndiu sǎ ñà túú ndécu ndihí-í-yu.

Ñá túú cùu ìⁿnuu ñáyiu

(Lc. 12:51-53; 14:26-27)

³⁴ Te na cǎchí tnúhu-í xii-ndo sǎ vǎ cáni ìni-ndó sǎ yùhú véxi-í ñuyú-a te cuu ìⁿnuu-gǎ ñáyiu cundecú-yu, chi da ngüita-yu vǎ cúú ìⁿnuu-gǎ-yu cundecú-yu, te ducaⁿ chi nchaa ñáyiu vǎ quindáá ìni ñáhá xii-í ñáyiu-áⁿ ngóo-yu cuu úhú ìni-yu nchaa ñáyiu quindáá ìni ñáhá xii-í. ³⁵ Te ñava cue téé xindecu tǎtá-xi te ngóo-güedé cuu úhú ìni-güedé tǎtá-güedé, te ñiu-ni ducaⁿ càda cue ñáyiu díhí xindecu nǎná-xi, chi ngóo-yu cuu úhú ìni-yu nǎná-yu, te ñiu-ni ducaⁿ càda tucu

cue ñáyiu cùu sǎnu, chi ngóo-yu cuu úhú ìni-yu nǎná yí-yu. ³⁶ Te ndi mée-yu vehé-yu ngóo-yu vǎ cúú ìⁿnuu-gǎ-yu cundecú-yu.

³⁷ Te na cǎchí tnúhu tucu-í xii-ndo sǎ ncháá ñáyiu ío-gǎ ná cùu ìni tǎtá-xi àdi nǎná-xi dàcúúxí yùhú, te ñáyiu-áⁿ ñà túú tàú-yu cundecu ndihí ñáhá-yu xii-í, te nchaa ñáyiu ío-gǎ ná cùu ìni déhe ducu-xi, àdi déhe yoco-xi dàcúúxí yùhú, te ñiu-ni ducaⁿ ñà túú tàú-yu cundecu ndihí ñáhá-yu xii-í. ³⁸ Te nchaa ñáyiu vǎ cǎnchícúⁿ nihnu ñaha xii-í cuendá sǎ yùhú-yu ndohó-yu dàtná ndoho-í ñáyiu-áⁿ ñà túú tàú-yu cundecu ndihí ñáhá-yu xii-í. ³⁹ Te cue ñáyiu na yùhú cuú sǎ cuendá-í te ñáyiu-áⁿ cuíta nihnú-yu, dico nchaa ñáyiu vǎ yùhú cuú sǎ cuendá-í, te ñáyiu-áⁿ nduu tǎhú-yu cundecú-yu ni caa ni quihíⁿ ndihí Yá Ndiǒxí.

Cuendá sǎ ndúú tǎhú-ó
(Mr. 9:41)

⁴⁰ Te nchaa ñáyiu na quèheⁿ cuendá ñáhá xii-ndo te cada ìni-yu sǎ tnàhá yúhú ní queheⁿ cuendá-yu. Te nchaa ñáyiu na quèheⁿ cuendá ñáhá xii-í, te cada ìni-yu sǎ tnàhá Tǎtá-í Dútú Ndiǒxí Yaá ní tendaha ñaha xii-í véxi-í ñuyú-a ní queheⁿ cuendá-yu. ⁴¹ Te nchaa ñáyiu na quèheⁿ cuendá ìⁿ téé cǎháⁿ tnúhu Yá Ndiǒxí cuendá sǎ quidé-dé chùⁿ-gǎ, te dàtná-ni càa tǎhú cuǎñaha-gǎ nduu tǎhú tée ducaⁿ cǎháⁿ tnúhu-gǎ-áⁿ, ñiu-ni ducaⁿ cùnduu tǎhú cuǎñaha-gǎ nduu tǎhú ñáyiu ducaⁿ na quèheⁿ cuendá ñáhá xii-dé. Te nchaa ñáyiu na quèheⁿ cuendá ìⁿ téé quidé váha cuendá sǎ dúcáⁿ quidé váha-dé, te dàtná-ni càa tǎhú nduu tǎhú tée-áⁿ ñiu-ni ducaⁿ cùnduu tǎhú nduu tǎhú ñáyiu na quèheⁿ cuendá ñáhá xii-dé. ⁴² Te nchaa ñáyiu na cuǎñaha ìⁿ yaxiⁿ ndute coho ìⁿ ñáyiu cùu cuendá-í cuendá sǎ ñi tuha ñáhá-yu xii-í cuéi ñá túú cùnuu vihi-yu, te ñáyiu

ducaⁿ na cuãñaha ndüte-áⁿ nihĩ-yu sá ndúú tãhũ-yu núú Yã Ndiõxí — càchí Jësús xãhaⁿ-gã xii-güedé.

11

Jësús càháⁿ ndihí-gá cue téé xica cuu ndihí té Juàá

(Lc. 7:18-35)

¹ Te sátá ní yáha ducaⁿ ní xáhaⁿ Jësús xii ndi ùxúú cue téé xica cuu ndihí-gá, te ní xica-gá cuáháⁿ-gá nchaa ñúú cáá yàtni xiáⁿ dánèhé-gá ñáyíu tnúhu-gá.

² Te té Juàá yihí-dé vecaá te ní níhí-dé tnúhu nchaa nàcuáa quide Xítohó Jesucristú. Te sátá dúcáⁿ te ní tendaha-dé ìⁿ úú cue téé xica cuu ndihí-dé cuáháⁿ-güedé núú ndécú Jësús. ³ Te òré ní quexìo-güedé núú ndécú-gã, te xicáⁿ tnúhú-güedé núú-gã nàcuáa ní xáhaⁿ tã Juàá xii-güedé, te xãhaⁿ-güedé xii-gá:

—Véxi-ndí xicáⁿ tnúhú-ndí núú-n nũu sá díu-n cùu-n Cristú Yaá ní tendaha Yã Ndiõxí véxi ñuyíú-a, àdi sá cündètu nahí-ni-ndí mei Yáá-áⁿ —càchí-güedé xãhaⁿ-güedé xii-gá.

⁴ Te Jësús ní xáhaⁿ-gã xii-güedé:

—Chí cuánùhú te cani-ndo cuèndú núú tã Juàá nchaa sá ní xiní-ndó quide-í, ndihí nchaa nàcuáa ndúu tnúhu ní càháⁿ-í ní xíndedóho-ndo. ⁵ Te cùñaha-ndo xii-dé sá quidé tãtna-í núú cuè ñáyíu cuàá, te quide tãtna-í cue ñáyíu yacua, ndihí cue ñáyíu tnàhá cuéhé sá dátèhyú nihnu-xi yiqui cùñú-yu, ndihí cue ñáyíu doho, nchaa ñáyíu-áⁿ quidé tãtna-í, te ndúha-yu, te ndéé tnàhá cue ñáyíu sa ní xihí dándòto-í cùñaha-ndo. Te cùñaha tucu-ndo xii-dé sá ndécuu-í dánèhé-í nchaa ñáyíu ndàhú, tnúhu sá sánú ìchi ñaha xii-yu nàcuáa naníhí tãhú-yu. ⁶ Te cùñaha tucu-ndo xii-dé sá ïo vãha tãhú nchaa ñáyíu ñã túú quide sáá iní-xi nchaa tnúhu càháⁿ-í, duha cùñaha-ndo xii-dé —càchí-gã xãhaⁿ-gã xii-güedé.

⁷ Te sátá ní yáha-güedé cuánuhú-güedé te ní ngúíta Jësús ní

càháⁿ-gá núú ñáyíu cuèndá té Juàá, te xãhaⁿ-gã xii-yu:

—Nchòhó ní sáháⁿ ndéhé-ndó ìⁿ téé ndècu xití yucu, te téé-áⁿ ñã túú sàni ìⁿ saní úú iní-dé, chí ñã túú quide-dé dàtná quidé nchaa ité náhnú cuáháⁿ-xi duha cuáháⁿ-xi dàcáⁿ òré quéné tãchí. ⁸ Te ní ñã túú ní sáháⁿ ndéhé-ndó ìⁿ téé nihnu dóó vãha dóó vii cãa. Te nchòhó xiní-ndó sã nchãá ñáyíu nihnu dóó vãha dóó vii cãa xíndecú-yu vehe cue téé cùnúu yíndaha ñáyíu. ⁹ Dico nchòhó chí ní sándéhé-ndó ìⁿ téé càháⁿ tnúhu Yã Ndiõxí, te ndáá sá díú ìⁿ téé càháⁿ tnúhu-gá cúú-dé, te cùnúu-gá-dé dàcúúxí dàva-gá cue téé càháⁿ tnúhu-gá. ¹⁰ Te díu cuèndá té Juàá-áⁿ càháⁿ-xi núú tütú Yã Ndiõxí nàcuáa ní xáhaⁿ-gã xii Cristú, te duha ní xáhaⁿ-gã:

Tendaha-í ìⁿ téé càháⁿ-dé tnúhu-í codonú-dé núú-n,

cuèndá dàtúha-dé ñáyíu cuèndá quíndáá iní-yu tnúhu-n.

Duha ní xáhaⁿ-gã, te ducaⁿ ní ngódó tnùní núú tütú-gá. ¹¹ Te na càchí tnúhu ndáá-í xii-ndo sã ní ìⁿ cue téé ñuyíú-a ñã túú cùnúu-güedé dàtná cùnúu té Juàá téé dàcuandute ñaha xii ñáyíu. Te nchaa ñáyíu sa ta ndíhu ndaha ñaha Yã Ndiõxí vitna cuáháⁿ cùnúu-gá-ni tucú-yu dàcúúxí té Juàá cuèi cùú-yu ñáyíu ñã túú cùnúu dacúúxí dàva-gá ñáyíu yíndaha-gá.

¹² Te ndéé cùtnàhá ní ngúíta té Juàá téé dàcuandute ñaha xii ñáyíu càháⁿ-dé tnúhu Yã Ndiõxí ñuyíú-a, ndéé dàvá-áⁿ ní ngúíta ñáyíu cuíní-yu sá ndíhu ndaha ñaha Yã Ndiõxí xii-yu te ndècu ndéé-yu quidé-yu nàcuáa ndíhu ndaha ñaha-gã xii-yu. ¹³ Te nchaa cue téé ní xóo càháⁿ tnúhu Yã Ndiõxí ndéé sanaha ní càháⁿ-güedé sá díú-gã ndíhu ndaha-gã cue ñáyíu, te díu-ni ducaⁿ ní càháⁿ tucu ndíi Moisés ní ngódó tnùní núú tütú ndíi. Te díu-ni ducaⁿ cùnúu nchaa tnúhu-áⁿ càháⁿ-xi nàcuáa ndíhu

ndaha Yá Ndióxi ñáyi ndéé ní sáá nduu ní nguíta té Juàá càháⁿ-dé tnúhu-gá ñuyíú-a. ¹⁴ Te na càchí tnúhu-í xii-ndo sá cáda cuendá-ndó, chí núú tútú Yá Ndióxi càchí-xi sá ndíxí tē Èliás, te ñuú tē Èliás-án ní quide té Juàá. ¹⁵ Te nchaa nchòhó ñáyi ndèdóho nchaa tnúhu càháⁿ-í-a te ío váha chí cuáha cuendá.

¹⁶ Te na càchí tnúhu tucu-í xii-ndo nàcuáa sàtnahá-xi cùu ñáyi ndècu vitna. Chí ñáyi-án cúu-yu dàtná cue landú sácóo núú yáhu dàdiqui-güexi te níhi càháⁿ-güexi, te xitnáha-güexi ndi mee landú-güexi: ¹⁷ “Ní tíú-ndí yaá ndíhi vílu te ñá túú ní cuíní-ndó càta-ndo, Te ío yica ínì ní xita yuhu-ndí te ñá túú ní ndáhyú-ndó”, càchí-güexi xitnáha-güexi. Te ducaⁿ sàtnahá-xi cùu ñáyi ndècu vitna, ¹⁸ chí té Juàá ío ndàhú ní xóo caxi-dé, te ní ñá túú ní xóo cohó-dé ndudí ndéhé yoho yáha stíle sá ní nduu-xi ndidí, te sá dúcáⁿ ní xóo cada-dé te ní cachí-yu sá ní xíndecu ndíhi-dé espíritú cúndíhi yucu ñáváha. ¹⁹ Te sáta ní quexío yúhú Tée cùu ñaní tnáhá-ndó ncháa-ndo, te xèxi-í xíhi-í quidè-í, te càchí-yu sá yúhú cúu-í ñⁿ tée xèxi vihi te xíhi vihi, te càchí tucú-yu sá cúu-í tée xíca cuu ndíhi cue tée cuíhna ínì-xi quide cobrá ñáhá xii-yu cuendá impuèstú ndíhi nchaa dava-gá cue tée ndècu ichi cuehé ichi duha, duha càchí-yu. Te ñáyi ní tnahá tnúhu ndíhi Yá Ndióxi, ñáyi-án quidè-yu sá váha nàcuáa cutnùnì sá méé-gá ío ndècu ndíhi-gá sá xínì tnùnì-gá —càchí-gá xáhaⁿ-gá xii-yu.

Cuendá ñáyi dava ñuú ñá túú sàndáá ínì tnúhu Xitohó Jesucrístú
(Lc. 10:13-15)

²⁰ Te Jèsús ní nguíta-gá càháⁿ-gá dóho nchaa ñáyi ñuú núú ío-gá vai núú sá vá yóo tnàhí ndàcu cada ní quide-gá, chí nchaa ñáyi ñuú-án ñá túú cuíní-yu ndixi túu ínì-yu sá

ñá túú quide váha-yu ndècú-yu, te xáhaⁿ-gá xii-yu:

²¹ —ñDàhú nchòhó cue ñáyi ñuú Coràzín! jTe ndàhú nchòhó cue ñáyi ñuú Bètsaidá! Chí núú dícó ñuú Tírú ndíhi ñuú Sìdón ní quide-í nchaa sá vá yóo tnàhí ndàcu cada datná ní quide-í ñuú-ndó-á ní xínì-ndó ñá, te sá ndéé ama-gá cuíhnú-yu dóo ndàhú te cunu cóo-yu núú yaá cuendá sá ndíxí cuèchi ínì-yu sá ñá túú quide váha-yu ní cùu. ²² Dico sáá nduu te ío-gá dandòho ñaha Yá Ndióxi xii-ndo dàcúxí ñáyi ñuú Tírú ndíhi ñáyi ñuú Sìdón. ²³ Te nchòhó cue ñáyi ñuú Capèrnaúm ío quide cahnu-ndo mee-ndo, te quide ínì-ndó sá sá cuándaa-ná-ndó àndíu, dico ñáhá chí núú ùhú núú ndàhú nduu táhú-ndó cùndecu-ndo. Te núu dícó ñuú Sodomá ní quide-í nchaa sá vá yóo tnàhí ndàcu cada datná ní quide-í ñuú-ndó ní xínì-ndó ñá, te ñáyi-án vá náá-yu chí cundecu-ní-yu ndéé vitna ní cùu. ²⁴ Te na càchí tnúhu-í xii-ndo sá sáá nduu te ío-gá dandòho ñaha Yá Ndióxi xii-ndo dàcúxí ñáyi ñuú Sodomá —càchí-gá xáhaⁿ-gá xii nchaa ñáyi ñuú-án.

Jèsús cuíní-gá sá túhá ñaha ñáyi xii-gá

(Lc. 10:21-22)

²⁵ Te sáta xíáⁿ te Jèsús ní nguíta-gá càháⁿ ndíhi-gá Tàtá-gá Dútú Ndióxi, te xáhaⁿ-gá:

—Yòhó Tàtá-í Dútú Ndióxi, ío chíñu ñaha-í xii-n chí ñuú-n tàxi tnùnì-n àndíu ndíhi ñuyíú-a, te dànehé-n cuè ñáyi nchaa tnúhu váha, te ñuú-ñáyi-án cúu-yu ñáyi ñá túú cutnùnì ínì-xi nchaa tnúhu càháⁿ cue tée càchí sá ío túha, te nchaa tnúhu váha-án ñá túú dàtúu-n núú ñáyi càchí sá ío túha te ío váha sáá díquí-xi. ²⁶ Chí ducaⁿ cuínì-n cùnduu —cachí-gá xáhaⁿ-gá xii Tàtá-gá.

²⁷ Te xáhaⁿ-gá xii nchaa ñáyi xíndecu-án:

—Mee Tātà-í Dútú Ndiöxí ní cachi-gá sá cùnùu-í núú nchàandi tùhú sá íó. Te vá yõo ìⁿ-gá xìní nàcuáa sàni iní yúhú Déhe Dútú Ndiöxí, chi ìⁿdií díí-ni mee-gã xìní-gá nàcuáa sàni iní-í, te mee-í xìní-í nàcuáa sàni iní meé-gã. Te nchaa ñáyiú cächí iní-í sá quíní-yu nàcuáa sàni iní Tātà-í Dútú Ndiöxí te xĩtnùhu-í-yu, te vá yõo ìⁿ-gá xìní chi ñi-yu-ni ñáyiú ducaⁿ xĩtnùhu-í-áⁿ xìní-yu. ²⁸ Te nchaa nchòhó ñáyiú ñá túú ndècu váha, ñáyiú ñá túú ñihí nàcuáa cada cundecu váha iní-xi quixi-ndo tùha ñaha-ndo xii-í nàcuáa ducaⁿ cundecu váha iní-ndó. ²⁹ Te cuu vii cuu váha iní-ndó tnì-ndo nchaa tnùhu càháⁿ-í, te ío dacuàha-ndo, te ducaⁿ càda-ndo chi yúhú ío càhnu iní-í, te ío ndàhú iní-í. Te núu ducaⁿ na càda-ndo te ío váha cuu iní-ndó cundecu-ndo. ³⁰ Te tnì-ndo nchaa tnùhu càháⁿ-í chi ñá túú cùu-xi ìⁿ sá vée, chi cada iní-ndó sá cúú-xí dàtná ìⁿ chiuⁿ ñamá —cächí-gá xàhaⁿ-gã xii-yu.

12

Cue tée xica cuu ndihi Jesús sahñú-güedé yoco triú nduu ndètatú ñáyiú

(Mr. 2:23-28; Lc. 6:1-5)

¹ Te ìⁿ nduu cùu-xi nduu ndetatú ñáyiú ñùhu Jesús ichi ndihi cue tée xica cuu ndihi-gá, te ta yàha-gá ndihi-güedé ìⁿ xi-chi núú cáá triú te xixíhí-güedé docó núu xiáⁿ ní ngüíta-güedé sahñú-güedé yoco triú-áⁿ, te ndihi ndaha-güedé quíⁿ-güedé quéé triú-áⁿ tá xèxi-güedé cuáháⁿ. ² Te cue tée cùu fariséu ní xini-güedé nàcuáa quide cue tée xica cuu ndihi Jesús, núu ní xáhaⁿ-güedé xii-gá:

—¿Ná cuèndá ducaⁿ quide cue tée xica cuu ndihi-n sahñú-güedé yoco triú, te vitna cùu-xi nduu ndetatú-í? Te ñá túú tau-güedé ducaⁿ càda-güedé —cächí-güedé xàhaⁿ-güedé xii-gá.

³ Te Jesús ní xáhaⁿ-gã xii-güedé:

—¿Náa ñá túú dacuaha-ndo núú tütú Yá Ndiöxí núú càháⁿ-xi nàcuáa ní quide ndii Dàvíí cùtnàhá ní xihí ndii docó ndihi cue tée ní xica cuu ndihi ndii-áⁿ? ⁴ Chi ndii-áⁿ ní quíhu ndii vehe Yá Ndiöxí ní queheⁿ ndii pàá ní cuu íí ndécú-áⁿ ní xexi ndii ndihi cue tée ní xica cuu ndihi ndii, te ñá túú tau ndii sá dúcáⁿ càda ndii ndihi cue tée-áⁿ ní cùu, chi mee-ni cuè dútú tau-güedé caxi-güedé pàá-áⁿ ní cùu. ⁵ ¿Te náa ñá túú xini-ndo nàcuáa càháⁿ-xi núú tütú ndii Moisés sá ncháá cuè dütú vá ndètatú-güedé nduu cùu-xi nduu ndetatú-áⁿ? Te ñá díú ìⁿ cuéchi cùu-xi sá dúcáⁿ ñá túú ndètatú-güedé nduu cùu-xi nduu ndetatú. ⁶ Te na cächí tnùhu-í xii-ndo sá yúhú cùu-í téé ío-gá cúnuu ndecu ndihi-ndo dacúxí veñùhu sá ío cúnuu. ⁷ Dico nchòhó chi ñá tècú tnùnì-ndo nàcuáa càháⁿ Yá Ndiöxí núú tütú-gá núú cächí-xi: “Yúhú cuiní-í sá cundàhú iní-ndo cuè tnaha ñáyiú-ndo te ñá díú mèe-ni sá cáhni-ndo quiti nduu táhù-í”, duha cächí-gá núú tütú-gá. Te núu dicó nchòhó tècú tnùnì-ndo ñá, te vá càháⁿ cuèhé-ndo cuèndá nchaa ñáyiú ñá túú ndècu cuéchi-xi. ⁸ Te yúhú Téé cùu ñanì tnàhá-ndo nchaa-ndo, tnàhá-í ndécú ndihi-í tnùhu ndee ìní sá cùu-í nchaa ñáyiú nàcuáa cada-yu nduu ndètatú-ó-á —cächí-gá xàhaⁿ-gã xii-güedé.

Íⁿ téé ní yíhí ìⁿ xio ndaha-xi

(Mr. 3:1-6; Lc. 6:6-11)

⁹ Te Jesús ní xica-gá cuáháⁿ-gá, te cuánguihu-gá xiti ìⁿ veñùhu. ¹⁰ Te xiáⁿ ndécú ìⁿ téé ní yíhí ìⁿ xio ndaha-dé. Te ñáyiú cue téé xindecu-áⁿ ndúcú-güedé nàcuáa cada-güedé cacáⁿ cuéchi-güedé cuèndá-gá núú cuè téé cúnuu, te ní xicáⁿ tnùhú-güedé núú-gã, te xáhaⁿ-güedé:

—Cächí tnùhu xii-ndí núu cuu cada tátna-o ìⁿ téé cùhú nduu cùu-xi nduu ndetatú-ó ñá ñàhá —cächí-güedé xáhaⁿ-güedé xii-gá.

¹¹ Te Jesús ní xáhaⁿ-gã xii-güedé:

—Te nchòhó òré ná ngàunihnu ìḡ mbéé-ndó ìḡ déhva cùnú te nàtava-ndo-di cuéi cùu-xi nduu ndetatú-ó. ¹² Te ìḡ ñáiyu ío-gá cùnùú-yu dàcúxí ìḡ mbéé, núu xíá táú-ó sá cádá-ó sá vâha sá cùú-xi-yu cuéi cùu-xi nduu ndetatú-ó —càchí-gá xâhaⁿ-gá xii-güedé.

¹³ Te dàtnùní ní xâhaⁿ-gá xii téé cùhú ndaha-xi-á:

—Ndacani ndaha-n —càchí-gá xâhaⁿ-gá xii-dé.

Te téé-áⁿ ñí ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé. ¹⁴ Te cue téé cùu fariséú ní ndee-güedé xití veñúhu, te ní ngúíta-güedé ndátnúhu-güedé núu nása cada-güedé cahni-güedé Jèsús.

Nàcuáa sa ndéé tnuní cuèndá Jèsús

¹⁵ Te sáta ñí cutnùní iní Jèsús nàcuáa cuèni-güedé cada ñaha-güedé xii-gá te ní xica-gá cuáháⁿ-gá, te ío vâi ñáiyu nchìcúⁿ ñáhá xii-gá cuáháⁿ, te tnàhá cue ñáiyu cùhú nchìcúⁿ ñáhá xii-gá cuáháⁿ, te ní quide tátna-gá cue ñáiyu-áⁿ. ¹⁶ Te ní xâhaⁿ-gá xii-yu sá vâ càháⁿ-yu yoo cùu-gá. ¹⁷ Te ducaⁿ ñí cuu chi ní quee ndáá-xi nàcuáa ní xâhaⁿ Yâ Ndióxi xii ndíi Chàia téé ní xóo cáháⁿ tnúhu-gá ndéé sanaha ní chídó tnùní ndíi núú tütú-gá, te duha ndúu tnúhu ní xâhaⁿ-gá:

¹⁸ Téé-a cùu-dé téé ní sani iní-í sá cùnú cuèchi-dé núu-í,

te ío cùu iní-í-dé, te cùdìí iní-í-dé.

Te yùhú cuáñaha-í Espiritú-í cun-decu ndíi-dé,

te diu-dé cùñaha-dé xii nchaa ñáiyu ñuyú sá yùhú ío ndáá quidé-í.

¹⁹ Te vâ dácáá-dé tnúhu cáháⁿ-dé ndíi ñáiyu, te ni vâ cáná sâa-dé òré cáháⁿ-dé,

te ni vâ yôo níhí tnúhu nása cáháⁿ-dé cuhuⁿ-dé ichi.

²⁰ Te ní ñá tùú ná cada-dé cue ñáiyu cùu dàtná ìḡ tnu ndóó sá cuèni-xi tnáhnú, te diu-ni

ñáiyu-áⁿ cùú tütú-yu dàtná ìḡ mèchá càndíl sá ío quène ñúhmá te cuèni-xi ndahvá.

Te ducaⁿ sátnahá-xi cùu ñáiyu-áⁿ chi ñá tùú níhí ndéé-yu cundecú-yu sá cùú-xi-í, te mee-ni sá vâha cada ñaha-dé xii-yu,

te diu-ni ducaⁿ càda-dé ndéé sáá nduu cutnùní iní nchaa ñáiyu sá ío ndáá quidé-dé.

²¹ Te nchaa ñáiyu níhí ñuyú ío cundee cùu cahnu iní ñáhâ-yu xii-dé.

Duha ní xâhaⁿ-gá xii ndíi Chàia ní chídó tnùní ndíi núú tütú-gá.

Càchí-güedé sá ndécú ndíi Jèsús espíritú cùndíi yucu ñávâha

(Mr. 3:20-30; Lc. 11:14-23; 12:10)

²² Te ní quexío ìḡ úú cue téé núú ndécú Jèsús, te ndéca-güedé ìḡ téé ñíhí te cuáá-dé, te yíhí ñaha espíritú cùndíi yucu ñávâha xii-dé, te Jèsús ní queñuhu-gá espíritú cùndíi yucu ñávâha yíhí ñaha xii-dé, te òré-ni-áⁿ ñí cuu ní nacáháⁿ-dé te ní ndúha núú-dé. ²³ Te nchaa ñáiyu xíndecu-áⁿ ío ní cuñúhu-yu sá dúcáⁿ ñí quide-gá, te ní xítnahá-yu:

—Váa téé-a cùu-dé ñani tnáhá ndíi Dávíí téé tendaha Yâ Ndióxi quixi ñuyú-a —càchí-yu xítnahá-yu.

²⁴ Te cue téé cùu fariséú ní tecú dóho-güedé nàcuáa ndúu tnúhu xítnahá-yu, núu xíáⁿ ní xítnaha-güedé:

—Téé-a ndèñuhu-dé nchaa espíritú cùndíi sácuíhná yíhí ñaha xii ñáiyu, chi diu-ni sácuíhná-áⁿ chíndèe ñaha-xi xii-dé te diu-ni-xi tàxi tnuní-xi nchaa espíritú-áⁿ —duha ní xítnaha-güedé.

²⁵ Te Jèsús ní cutnùní iní-gá nàcuáa ndúu tnúhu ní xítnaha-güedé, núu ní xâhaⁿ-gá xii-güedé:

—Te nchòhó ximí-ndó sá núu ìḡ téé yíndaha ìḡ nacióⁿ vâ cùú ìḡ nuu-dé ndíi cue téé cùndíi-dé, te vâ cùdìí-dé cunuu-dé. Te diu-ni

ducaⁿ sãtnahá tucu-xi cùu tucu cue tée cùchiuⁿ ìⁿ ñúú, chi núu vá cúú ìⁿnuu-güedé cundecu-güedé, te vá cùdĩ-güedé cundecu-güedé taxi tnùnı-güedé. Te ñi-ni ducaⁿ sãtnahá tucu-xi cùu cue ñáyıu xĩndecu ìⁿ-ni vèhe, chi núu vá cúú ìⁿnuú-yu cundecú-yu te vá cùdĩ-yu cundecu càhnú-yu.

26 Te núu sácúihná ducaⁿ quide-xi queñuhu-xi cue espíritú cùndĩhi-xi yihı ñaha xii ñáyıu ña, te ñá túú cùu ìⁿnuu-xi ndecu-xi te núu ducaⁿ, te vá cùdĩ sácúihná-ãⁿ cundecu-xi taxi tnùnı-xi te núu ducaⁿ quide-xi.

27 Te duha càháⁿ-ı chi nchòhó càchı-ndó sã chĩndèe ñaha sácúihná xii-ı queñuhu-ı nchaa espíritú

cùndĩhi-xi yihı ñaha xii ñáyıu. Te núu yúhú quidé cuendá-ndó sã sácúihná chĩndèe ñaha-xi xii-ı, te xini ñuhu-xi cada cuendá-ndó yòo chĩndee ñaha xii cue tée xıca cuu ndĩhi-ndo queñuhu-güedé nchaa espíritú cùndĩhi yucu ñávaha yihı ñaha xii ñáyıu. Te mee-güedé càchı-güedé sã nchòhó ñá túú càháⁿ ndáá-ndó sã dúcáⁿ càháⁿ-ndó.

28 Dico yúhú chi Espíritú Yá Ndiòxı chĩndèe ñaha-xi xii-ı queñuhu-ı nchaa espíritú cùndĩhi sácúihná yihı ñaha xii ñáyıu, te sã dúcáⁿ chĩndee ñaha Espíritú-gá xii-ı, xĩⁿ cùtnunı sã sã ní sáá nduu cuını-gá ndıhu ndaha ñaha-gá xii-ndo.

29 'Te nchòhó xini-ndó sã cue ñaduhú chi vá ndácú-güedé cuendá-ni quıhu-güedé duhu-güedé vehe ìⁿ tée ío ndee, chi díhna-gá xini ñuhu-xi tnı-güedé tée-án dacutu ñaha-güedé xii-dé dãtnunı ducaⁿ te ndacu-güedé duhu-güedé nchaa sã ndécú ndĩhi-dé.

30 'Te nchaa ñáyıu ñá túú cùndĩhi ñaha xii-ı, te cùu úhú inı ñáhã-yu. Te nchaa ñáyıu ñá túú chĩndee ñaha xii-ı, te dàquee tíhũ-yu chiunⁿ quide-ı.

31 'Te na càchı tnúhu-ı xii-ndo sã ncháá ñáyıu quide nchaa sã cuèhé sã dúhá cuu cada càhnu inı ñáhã Yá Ndiòxı xii-yu, te ñi-ni ducaⁿ

cùu cada cahnu inı-gá nchaa tnúhu cuèhé tnúhu duha càháⁿ-yu. Dico cue ñáyıu na càháⁿ úhú cuendá Espíritú-gá, te ñáyıu-án vá cádá càhnu inı ñáhã tnàhı-gá xii-yu.

32 Te nchaa ñáyıu na càháⁿ úhú cuendá yúhú Téee cùu ñanı tnáhã-yu ncháa-yu, te cuu cada càhnu inı ñáhã Yá Ndiòxı xii-yu. Dico cue ñáyıu na càháⁿ úhú cuendá Espíritú-gá te vá cádá càhnu inı ñáhã tnàhı-gá xii-yu cuèi vitna ndècu vívũ-yu, te cuèi na cùu-yu.

Ndi ñıⁿ núu yutnu xini-ó nã yutnu cùu-xi cuendá sã sãvidı-xi (Lc. 6:43-45)

33 'Te nchòhó xini-ndó sã ndı ñıⁿ núu yutnu xini-ó nã yutnu cùu-xi cuendá sã sãvidı-xi, te xini-ó sã ncháá yutnu váha cùuⁿ mee-ni sãvidı váha, dico nchaa yutnu sã ña túú váha te cùuⁿ mee-ni sãvidı sã ña túú váha. Te duha càháⁿ-ı cuendá cada cuendá váha-ndo nãcuáa nduu chiunⁿ quide-ndo ìⁿ ìⁿ-ndo cuendá ducaⁿ cùtnunı ná ñáyıu cùu-ndo.

34 Dico nchòhó cúu-ndó dàtná ìⁿ cóo déeⁿ chi ío cuihna inı-ndó, te vá canı inı-ndó sã ndácú-ndó càháⁿ-ndó ìⁿ tnúhu váha, chi ío cuihna inı-ndó. Te nchòhó xini-ndó sã ncháá ñáyıu càháⁿ-yu nani véxi inı-yu.

35 Te nchaa ñáyıu váha inı-xi càháⁿ-yu tnúhu váha, chi ñi-ni tnúhu váha-án ñúhú inı-yu. Te nchaa ñáyıu cuihna inı-xi càháⁿ-yu tnúhu cuèhé tnúhu duha, chi ñi-ni tnúhu cuèhé tnúhu duha-án ñúhú inı-yu.

36 Te na càchı tnúhu-ı xii-ndo sã ná sáá nduu càda ndáá Yá Ndiòxı cuèchi nchaa nchòhó ñáyıu ndècu ñuyú-a, te nchaa tnúhu cuèhé tnúhu duha càháⁿ-ndó càháⁿ-gá sã ña túú ní quide váha-ndo sã dúcáⁿ nı càháⁿ-ndó tnúhu-án.

37 Te nãcuáa nduu tnúhu ní càháⁿ-ndó ìⁿ ìⁿ-ndo, te ducaⁿ càháⁿ Yá Ndiòxı te núu ndècu cuèchi-ndo àdi ñá túú ndècu cuèchi-ndo. Te núu ñá túú cuèchi-ndo te cácu-ndo, dico núu ndècu cuèchi-ndo te vá cácu-ndo

—càchí-gá xăhaⁿ-gă xii cue tée cùu fariséú-áⁿ.

Cue tée cuiní sá cádá Jèsús ìⁿ sá vă yôo tnăhí ndăcu cada

(Mr. 8:12; Lc. 11:29-32)

³⁸ Te cue tée cùu fariséú, ndihî cue tée dăcuaha ñaha xii ñáyiú nchaa tnúhu ní chídó tnùnî ndîi Moisés xăhaⁿ-güedê xii Jèsús:

—Mèstrú, cuiní-ndí cada-n ìⁿ sá vă yôo tnăhí ndăcu cada cuendá ducaⁿ cùtnunî iní-ndí sá Yă Ndiôxí chindêe ñaha-gá xii-n —càchí-güedê xăhaⁿ-güedê xii-gá.

³⁹ Te Jèsús ní xăhaⁿ-gă xii-güedê:

—Ñáyiú ndècu ichi cuehé ichi duha ñă túú cuiní-yu tnî-yu tnúhu càháⁿ Yă Ndiôxí, te ñáyiú-áⁿ cuiní-yu cada-í ìⁿ sá vă yôo tnăhí ndăcu cada nacuáa cutnùnî iní-yu núu ndáá sá Yă Ndiôxí chindêe ñaha-gá xii-í. Dico yúhú chi ñă túú năgá cada-í quini-yu, chi sa nihí-yu tnúhu năcuáa ní yáha ndîi Jónás tée ní xóo cáháⁿ tnúhu Yă Ndiôxí ndéé sanaha, te ñu-ni ducaⁿ yăha yúhú tucu. ⁴⁰ Chi ndîi Jónás-áⁿ ní xúhuⁿ ndîi únî nduu únî niú xitî ìⁿ chácá cáhnú vîhi nanî ballená. Te ñu-ni ducaⁿ yăha yúhú Tée cùu ñanî tnăhá-ndó nchàa-ndo, chi únî nduu únî niú cuhuⁿ-í xitî ñuhu. ⁴¹ Te na sáa nduu càda ndáá Yă Ndiôxí cuéchi nchaa ñáyiú ndècu ñuyíú-a, te dává-áⁿ cachí nchaa ñáyiú ñuu Nînivé sá ñà túú ní quide ndáá nchaa ñáyiú ndècu vitna, te ducaⁿ căháⁿ-yu chi mèe-yu ní dăñă-yu ichi cuehé ichi duha cùtnăhá ní sáháⁿ ndîi Jónás ñuu-yu ní căháⁿ ndîi tnúhu Yă Ndiôxí núu-yu. Dico vitna iha ndècu ndihî ñaha-ndo xii yúhú, te ñu-í ío-gá cùnûu-í dăcúúxí ndîi Jónás. ⁴² Te nduu càda ndáá Yă Ndiôxí cuéchi nchaa ñáyiú, te dává-áⁿ quini-ndó ìⁿ ñadîhî ñaha ní xîndaha ìⁿ nacióⁿ cáá ndàa xio datni núú quéné nchîcanchii, te ñaha-áⁿ ío xica ní xîndecu-aⁿ te ní sáháⁿ-aⁿ ní xîndedóho-aⁿ nchaa tnúhu ní căháⁿ ndîi Salómón, chi ndîi-áⁿ ío ní sáá sá xîni tnùnî ndîi.

Te tnăhá ñaha-áⁿ căháⁿ-aⁿ sá ñà túú ní quide ndáá nchaa ñáyiú ndècu vitna. Dico vitna iha ndècu ndihî ñaha-ndo xii yúhú, te ñu-í ío-gá cùnûu-í dăcúúxí ndîi Salómón.

Espíritú cündihî yucu ñávăha sá nánchòcáva xito cùu uu

(Lc. 11:24-26)

⁴³ Te òré ná queé ñaha ìⁿ espíritú cündihî yucu ñávăha xii ìⁿ ñáyiú, te cuáháⁿ-xî ndècu-xî ìⁿ xichi núú cündècu-xî te ñă nihí-xî te ní sani iní-xî: ⁴⁴ “Văha-gá núhú tucu-í núú nî xîndecu-í”, duha ní sani iní-xî. Te cuánuhú-xî, te òré ní nasáá-xî, te ní xîni-xî sá cáá iní ñáyiú-áⁿ dătná cáá-nă ìⁿ vehe ní natîhú ní nduu vii-ná te vă yôo-gá ndécú. ⁴⁵ Te sátá dúcáⁿ te ní xica-xî cuáháⁿ-xî cuándúcú-xî ũsá tnăhá espíritú cündihî-xî sá nèhê víhî-gă xîquide. Te òré ní nihí-xî cue espíritú-áⁿ te ndèca ñaha-xî cuáháⁿ cuendá ngúndecu ndihî-xî ñáyiú-áⁿ. Te ñáyiú-áⁿ uuⁿ-gá nândi yáha-yu dăcúúxí ndèé dîhna. Te ñu-ni ducaⁿ sâtnahá-xî yáha nchaa ñáyiú cuihna iní-xî ndècu ñuyíú-a vitna —càchí-gá xăhaⁿ-gă xii-güedê.

Cue ñanî Jèsús ndihî năná-gă

(Mr. 3:31-35; Lc. 8:19-21)

⁴⁶ Te căháⁿ dúcáⁿ-ní Jèsús ní quexîo náná-gă ndihî cue ñanî-gá cuiní-yu căháⁿ ndihî ñăhá-yu xii-gá, te ní ngúnu tnî-yu ndàa quehé vehe núú ndécú-gă. ⁴⁷ Te ìⁿ cue ñáyiú xîndecu-áⁿ ní xáhăⁿ-yu xii-gá:

—Ní quexîo náná-n ndihî cue ñanî-n xînutnî-yu quehé, te cuiní-yu căháⁿ ndihî ñăhá-yu xii-n —càchí ñáyiú-áⁿ xáhăⁿ-yu xii-gá.

⁴⁸ Te ní xăhaⁿ-gă xii ñáyiú ducaⁿ xăhaⁿ xî-gá-áⁿ:

—Te cachí tnúhu yóndi-gá ñáyiú cùu datná nănà-í ndihî dătná cue ñanî-í —càchí-gá xăhaⁿ-gă xii ñáyiú-áⁿ.

⁴⁹ Te ní dănèhé ñăhá-gă nchaa cue tée xica cuu ndihî-gá, te ní xăhaⁿ-gă xii ñáyiú-áⁿ:

—Cue té-a cùu-güedé dàtná nǎnà-í, ndihí dàtná cue ñaní-í.
 50 Te nchaa ñáyiú na càda nchaa nacuáa càháⁿ Tǎtǎ-í Dútú Ndiöxí Yaa ndécú àndiú, te ñáyiú-án cùu-yu dàtná nǎnà-í, ndihí dàtná cue ñaní-í, ndihí dàtná cue cúha-í —càchí-gá xǎhaⁿ-gǎ xii ñáyiú ducaⁿ ní dáyǎha tnúhu núu-gǎ-án.

13

Nàcuáa quide téé cuángacáⁿ triú
 (Mr. 4:1-9; Lc. 8:4-8)

¹ Te ñiú-ni nduu-án ní quee Jèsús vehe núu ndécú-gǎ, te ní xica-gá cuáhán-gá ní ngóo-gá yuhu làgúná.
² Te ío cuéhé ñáyiú ní tacá núu ndécú-gǎ. Te sá dúcán ío cuéhé ñáyiú núu ní quee-gá xití ñⁿ bàrcú nútñ^ñ xití ndute làgúná-án, te núu xǎⁿ ní ngóo-gá, te nchaa ñáyiú-án xǎxúcu-yu yuhu làgúná-án.
³ Te Jèsús ní ngúita-gá ní caní-gá titní cuendú núu-yu nàcuáa tecú tnùní-yu nchaa nàcuáa ndùu tnúhu-gá, te xǎhaⁿ-gǎ xii-yu:

—Ñⁿ téé cuángacáⁿ-dé triú, ⁴ te òré ní ngúita-dé dǎngoyo-dé triú-án, te dava ní quene ndava ní ngava ndéé ichi, te ní xiní cue tǎláá te ní nadatàcá-güedi.
⁵ Te dava ní ngava ñuhu yadi núu yíhí vǐhi yúú, te ndihí-ni ní xínu-xi chí ñá túú cǎvǐhi ñuhu.
⁶ Dico òré ní nayahé te ñá túú ní cùndee iní-xi chí ní yíchí-xi, chí ñá túú ní ñhí quǐhíⁿ cùnú yóho-xi.
⁷ Te dava ní ngava núu yúcu ndǐquⁿ tnu ññu, te ñⁿnuu-ni ní xínu-xi ndihí tnu ññu. Te tnu ññu-án ní sahnu-xi te ní dánáá-xí nchǎa triú sá ní xínu-án.
⁸ Dico dava-gá triú ní ngava núu ndécú ññu cocoⁿ te xǎⁿ ío váha ní cuu, chí núu ñⁿ-ní triú-án te dava yoco-xi ní ngúihí ócú úxí triú-xi, te dava yoco-xi ní ngúihí únídico triú-xi, te dava yoco-xi ní ngúihí ñⁿ ciendú triú-xi.
⁹ Te vitna nchaa nchòhó ñáyiú ní xǐndedóho tnúhu ní cáháⁿ-i-a, te ío váha chí

cuáha cuendá —càchí-gá xǎhaⁿ-gǎ xii-yu.

Cue téé xica cuu ndihí Jesús ndúcú tnúhu-güedé núu-gǎ ná cuendá caní-gǎ cuendú núu ñáyiú
 (Mr. 4:10-12; Lc. 8:9-10)

¹⁰ Te cue téé xica cuu ndihí Jesús ní sǎháⁿ-güedé ndéé núu-gǎ, te xǎhaⁿ-güedé xii-gǎ:

—Ndúcu tnúhu-ndí núu-n ññu ná cuendá ducaⁿ mee-ni cuendú caní-n núu ñáyiú —càchí-güedé xǎhaⁿ-güedé xii-gǎ.

¹¹ Te ní xǎhaⁿ-gǎ xii-güedé:

—Nchòhó chí sa càchí tnúhu Yá Ndiöxí xii-ndo ñⁿ sá vǎtá quǐní-gǎ-ndó, chí càchí tnúhu-gá nàcuáa quide-gá ndíhu ndaha-gǎ ñáyiú, dico dava-gá ñáyiú chí ñá túú ná xǎhaⁿ-gǎ xii-yu.
¹² Te nchaa ñáyiú sa tècú tnùní te uuⁿ-gá cuita tecú tnùní-yu quǐhíⁿ, te nchaa ñáyiú ñá túú tècú tnùní te uuⁿ-gá vá tècú tnùní-yu.
¹³ Te xǎⁿ núu duha cǎni-í mee-ni cuendú núu-yu, chí cuéi na quǐní-yu nchaa nàcuáa cuu dico ní vǎ cùtnùní iní-yu ná cuendá ducaⁿ cùu, te cuéi na cùndedóho-yu dico ní vǎ tècú tnùní-yu.
¹⁴ Te ñiú cuendá ñáyiú-án ní xǎhaⁿ Yá Ndiöxí xii ndíi Chàíá téé ní xóo cáháⁿ tnúhu-gá ndéé sanaha ñí chídó tnùní ndíi núu tütú-gá núu càchí-xi:

Nchaa nchòhó cùndedóho-ndo tnúhu càháⁿ-í, dico ní vǎ tècú tnùní-ndó,

te cuéi na quǐní-ndó nchàa nacuáa cada-xi, dico ní vǎ cùtnùní iní-ndó ná cuendá ducaⁿ quide-xi.

¹⁵ Te ducaⁿ chí cùu-ndo ñáyiú ío sǎá iní-xi,

te cùu-ndo ñáyiú ñá túú tècú tnùní tnúhu càháⁿ-í,

te cùu tucau-ndo datná cue ñáyiú cuáa chí ñá túú cuǐní-ndó càda cuendá-ndó tnúhu-í,

te ní ñá túú cuǐní-ndó cùndedóho-ndo, te ní ñá túú cuǐní-ndó tècú tnùní-ndó,

te ní ñá túú cuǐní-ndó nàtuha ñaha-ndo xii-í cuendá cada

càhnu iní-í nchaa yíca
cuèchi-ndo nàcuáa ío váha
cuu iní-ndó cùndecu-ndo.

Duha ní xáhaⁿ Yá Ndióxi xii ndíi
Cháia ní chídó tnúni ndíi núu
tútú-gá.

¹⁶ Dico nchòhó chi ío váha
táhú-ndó chi cùtnuní iní-ndó nchàa
nacuáa quide-i, te cùtnuní tucu
iní-ndó nchàa nacuáa ndùu tnúhu
càháⁿ-í. ¹⁷ Te na cächí tnúhu
ndáá-í xii-ndo sá ío vâi cue tée ní
xóo càháⁿ tnúhu Yá Ndióxi ndéé
sanaha ndíhi nchaa dava-gá ñáyi
váha iní-xi ní cuiní-yu cundehé-yu
nchaa sá ndéhé-ndó vitna quide-í
dico ñá túú ní xini-yu, te ní
cuiní tucú-yu cundedóho-yu nchaa
tnúhu ndèdóho-ndo vitna càháⁿ-í te
ñá túú ní xindedóho-yu.

*Jesús càháⁿ-gá nàcuáa quèe-xi
cuendá tée cuángacáⁿ triú*

(Mr. 4:13-20; Lc. 8:11-15)

¹⁸ Te vitna cundedóho váha-ndo
na cächí tnúhu-í xii-ndo nàcuáa
quèe-xi cuendú tée cuángacáⁿ triú
ní cani-í núu-ndó. ¹⁹ Te triú sá
ní quene ndava ní ngava ndéé
ichi, xiáⁿ cúu-xí dàtná ñáyi ní
xindedóho tnúhu sá càháⁿ nàcuáa
ndíhu ndaha ñaha Yá Ndióxi xii-yu,
dico ñá túú ní cuiní-yu tñí-yu,
chi sácúihná cuáháⁿ-xi nàdatuhú-xi
iní-yu cuendá sá vâ cànchicúⁿ
nihnú-yu nàcuáa càháⁿ tnúhu-áⁿ.
²⁰ Te triú sá ní ngava ñuhu yadi
núu yíhi vîhi yúú-áⁿ, xiáⁿ cúu-xí
dàtná ñáyi ní xindedóho tnúhu Yá
Ndióxi te díí iní ní tñí-yu tnúhu-gá,
²¹ dico òré ná ngüita ñáyi cúcuèhé
ñáhâ-yu xii-yu àdi nándi-gá sá
yâha-yu sá cuendá tnúhu-gá, te ñá
cúndèe iní-yu chi dàñá-yu tnúhu-gá
cuendá sá ñá túú nihí ndéé-yu. ²² Te
triú sá ní ngava núu yúcu ndíquíⁿ
tnu iñu-áⁿ, xiáⁿ cúu-xí dàtná ñáyi
ní tecú dóho-xi tnúhu Yá Ndióxi
dico cuéé cuéé ní nacuaaná-yu
tnúhu-gá, chi cuendá mee-ni sá ío
ñuyúú-a ñuhu iní-yu, ndíhi cuendá
sá ío sâni iní-yu cuu cuicá-yu, te
mee-ni nchàa xiáⁿ ñúhú iní-yu

te ñá túú ñuhu iní-yu tnúhu sá
ní xindedóho-yu-áⁿ nàcuáa cada
váha-yu cundecú-yu. ²³ Dico triú sá
ní ngava núu ndécú ñuhu cocoⁿ-áⁿ,
xiáⁿ cúu-xí dàtná ñáyi ní xindedóho
tnúhu Yá Ndióxi te quidé-yu nàcuáa
càháⁿ tnúhu-gá. Te cada iní-ndó
sá ñáyi-áⁿ cúu-yu dàtná triú sá
ní nguíhi yoco-xi ócú úxí triú-xi,
ndíhi triú sá ní nguíhi yoco-xi
únídico triú-xi, ndíhi triú sá ní
nguíhi yoco-xi ìⁿ ciendú triú-xi.
Ducaⁿ sâtnahá-xi cúu-yu chi ío
váha quidé-yu —cächí-gá xáhaⁿ-gá
xii-güedé.

*Cuendá nchaa cúhú sá ñá túú
vâha xínu xití triú*

²⁴ Te Jèsús ní cani-gá ìⁿ cuendú
núu ñáyi nàcuáa tecú tnúni-yu
tnúhu-gá, te xáhaⁿ-gá xii-yu:

—Te vitna na cani-í ìⁿ cuendú
núu-ndó nàcuáa tecú tnúni-ndó
nàcuáa cada-xi òré ndíhu ndaha
ñaha Yá Ndióxi xii ñáyi. ìⁿ tée ío
váha triú ní sacáⁿ-dé núu ñúhú-dé.
²⁵ Dico xití niú ní sáháⁿ ìⁿ tée cùu
úhú iní ñáhâ xii-dé, te ní dangoyo-dé
ndíquíⁿ yúcu sá ñá túú vâha núu
ní sacáⁿ-dé triú-áⁿ. ²⁶ Te òré vitna
váha váha ní ngüita-xi quèe yoco
nchaa triú-áⁿ, te ní xínu coyo nchaa
yúcu sá ñá túú vâha-áⁿ. ²⁷ Te cue
tée xínu cuèchi núu tée ní sacáⁿ
triú-áⁿ ní xitnúhu ñaha-güedé xii-dé
sá dúcáⁿ ní xínu cúhú sá ñá túú
vâha-áⁿ núu triú-dé, te xáhaⁿ-güedé:
“Pàtróón, ñása ní cuu núu ní xínu
cúhú sá ñá túú vâha núu triú-n,
te ío váha càa triú ní sacáⁿ-n ní
cúu?”, cächí-güedé xáhaⁿ-güedé.
²⁸ Te tée cùu patróón-güedé-áⁿ ní
xáhaⁿ-dé xii-güedé: “Ìⁿ tée cùu
úhú iní ñáhâ ñahi xii-í ducaⁿ ní
quide-dé ní sáhâⁿ-dé ní dangoyo-dé
ndíquíⁿ cùhú sá ñá túú vâha-áⁿ núu
triú-í núu ducaⁿ ní xínu coyo-xi”,
cächí-dé xáhaⁿ-dé xii-güedé. Te
cue tée xínu cuèchi núu-dé ní
xáhaⁿ-güedé xii-dé: “Te núu cuiní-n
te quíhíⁿ-ndí tnuhu-ndí nchaa
cúhú sá ñá túú vâha ní xínu núu

triú-n", cächí-güedé xähaⁿ-güedé xii-dé. ²⁹ Te téé cùu xitohó triú-án ní xähaⁿ-dé xii cue téé xinu cuechi núú-dé-án: "Ñähá, vá quihíⁿ-ndó tñuhu-ndo, chi òré tñuhu-ndo te tñähá-ni triú quene chi cäa vihi cühú-án. ³⁰ Vähá-gá chí dáñá ná cùhnu nahí ndéé ná cùu triú, te dàtnüni nducu-í cue téé quihíⁿ-güedé tñuhu-güedé nchaa cühú sã ñà túú vaha-án, te dacùtu nuhní-güedé te cahmi-güedé, te dàtnüni nàquehndé-güedé triú nacani-güedé te nataxüha-güedé xití yacá-í", cächí-dé xähaⁿ-dé xii-güedé —duha ní cani Jèsús cuendú núú-yu.

Cuendá ndíquíⁿ yutnu nàni mostázá

(Mr. 4:30-32; Lc. 13:18-19)

³¹ Te Jèsús ní cani tucu-gá ingá cuendú núú ñäyiu nàcuáa tecú tñüni-yu tñuhu-gá, te xähaⁿ-gã xii-yu:

—Na càni-í ìⁿ cuendú núú-ndó nàcuáa tecú tñüni-ndó nàcuáa cada-xi òré ndíhu ndaha ñaha Yá Ndiöxi xii ñäyiu. ìⁿ téé ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñühú-dé. ³² Te ndíquíⁿ yutnu-án ïo chàhu, dico òré ná xinu-xi te sähmu-gá-xi dàcúxí nchaa cühú, te cue quití ndàva núú tàchí cädüha-güedi tacá-güedi núú dité-xi —cächí-gá xähaⁿ-gã xii-yu.

Nàcuáa quide levadurá

(Lc. 13:20-21)

³³ Te Jèsús ní xähaⁿ tucu-gá xii ñäyiu:

—Te na cächí tñuhu tucu-í xii-ndo nàcuáa cada-xi òré ndíhu ndaha ñaha Yá Ndiöxi xii ñäyiu. ìⁿ ñadíhí ní chíhi-aⁿ levadurá úní arróbá yuchi triú, te levadurá-án ní quide-xi ní ndaa nihíi yusaⁿ-án —cächí-gá xähaⁿ-gã xii-yu.

Mee-ni cuendú ní cani Jèsús núú ñäyiu

(Mr. 4:33-34)

³⁴ Te mee-ni cuendú ní cani Jèsús núú ñäyiu ndí tñähá òré ní dánèhé ñähá-gã xii-yu tñuhu-gá.

³⁵ Te ducaⁿ ní quide-gá chi ní quee ndáá-xi nàcuáa ní chidó tñüni ìⁿ téé ní xóo cáháⁿ tñuhu Yá Ndiöxi ndéé sanaha núú tütú-gá núú cächí-xi:

Mee-ni cuendú cani-í núú ñäyiu òré danèhé-í-yu tñuhu-í cuendá tecú tñüni-yu,

te nchaa tñuhu sã vátá yóo-gá cund-edóho danèhé-í-yu, te nchaa tñuhu-án ndúú yuhu-xi ndéé cútñähá ní ngáva ñuyú.

Duha ní chidó tñüni téé-án núú tütú-gá.

Jèsús cäháⁿ-gá nàcuáa quèe-xi cuendá cühú sã ñà túú vaha cäa xití triú

³⁶ Te Jèsús ní dándácá-gã ñäyiu te cuánuhú-gá vehe, te cue téé xica cuu ndíhi-gá ní xähaⁿ-güedé xii-gá:

—Cächí tñuhu xii-ndí nása quèe-xi cuendá cühú sã ñà túú vaha cäa xití triú —cächí-güedé xähaⁿ-güedé xii-gá.

³⁷ Te Jèsús ní xähaⁿ-gã xii-güedé:

—Téé cächí-í ní sacáⁿ triú cävähá-án cúú yühú Téé cùu ñani tñähá-ndó nchaa-ndo. ³⁸ Te nchaa núú ní sacáⁿ téé-án triú cúú-xi ñùyú. Te tatá vaha-án cúú-xi cué ñäyiu yindaha ñaha Yá Ndiöxi. Te nchaa cühú sã ñà túú vaha-án cúú-xi ñäyiu yindaha ñaha sácüíhná.

³⁹ Te téé ní dängoyo ndíquíⁿ cühú sã ñà túú vaha núú triú-án cúú-dé mee sácüíhná. Te nduu nàtehndé-ná triú-án cúú-xi nduu ndíhi nihnu-ná nchaa sã ío ñuyú-a. Te nchaa ñäyiu nàquehndé triú-án cúú-yu mee-ni cué espíritú xínú cuèchi núú Yá Ndiöxi. ⁴⁰ Te dàtná cada cue téé quihíⁿ tñuhu nchaa cühú sã ñà túú vaha-án dacùtu nuhní-güedé te cahmi-güedé, ducaⁿ sätñähá-xi yáha nchaa ñäyiu cündíhi yucu ñávaha na sãa nduu. ⁴¹ Te yühú Téé cùu ñani tñähá-ndó nchaa-ndo tendaha-í nchaa espíritú xínú cuèchi núú-í quihíⁿ-xi nadatácá-xi

nchaa ñáyiú sànu ichi cue tnaha ñáyiú-xi ichi cuèhé ichi duha, ndihí nchaa dava-gá ñáyiú ñá túú quide váha, te nchaa ñáyiú-áⁿ xĩndecú-yu nchaa núú ndécú cuè ñáyiú yĩndaha-í. ⁴² Te cue espíritú-áⁿ daquihíⁿ-xi cue ñáyiú-áⁿ núú ñùhú núú càyú, te yàcáⁿ ío ndáhyú-yu te dicó rúhñú-ná cuu núhu-yu sá sàtú iní-yu sá ndóhó-yu. ⁴³ Te nchaa ñáyiú quide nchaa nacuaá cuiní Tátá-yu Dútú Ndióxi, ñáyiú-áⁿ ío cunúú-yu cundecú-yu núú ndécú-gá táxi tñuní-gá, chi cuú-yu dàtná nchíanchii dayèhé-yu cundecú-yu núú ndécú-gá. Te nchaa nchòhó ñáyiú ndédóho nchaa tñúhu càháⁿ-í-a, te ío váha chí cuáha cuèndá —càchí-gá xáhaⁿ-gá xii-güedé.

Cuèndá ñⁿ sá ïo ndèyáhu

⁴⁴ Te Jèsús xáhaⁿ tucu-gá xii-güedé:

—Na càni tucu-í ingá cuèndú núú-ndó nàcuáa tecú tñuní-ndó nàcuáa cada-xi òré ndíhu ndaha ñàha Yá Ndióxi xii ñáyiú. ñⁿ téé ní naníhí-dè ñⁿ sá ïo ndèyáhu yĩndúxi ñⁿ xichi, te ní nachindúxi tucu-dé diu-ní núú ní naníhí-dè-áⁿ, te ío ní cudíí iní-dé sá dúcáⁿ ñí naníhí-dè xíáⁿ. Te ní xica-dé cuánuhú-dé te ní nadico-dè nchaa sá ndécú ndihí-dé, te ní nacuaaⁿ-dé ñuhu núú dúcáⁿ ñí naníhí-dè xíáⁿ.

Cuèndá ñⁿ sá ïo ndèyáhu nàni pèrlá

⁴⁵ Te na càni tucu-í ingá cuèndú núú-ndó nàcuáa tecú tñuní-ndó nàcuáa cada-xi òré ndíhu ndaha ñàha Yá Ndióxi xii ñáyiú. ñⁿ téé quide ndáhú ndúcú-dè sá nání pèrlá sá ïo ndèyáhu. ⁴⁶ Te ní naníhí-dè ñáyiú ndècu ndihí ñⁿ pèrlá sá ïo-gá ndèyáhu, te ní xica-dé cuánuhú-dé te ní nadico-dè nchaa sá ndécú ndihí-dé, te ní sáháⁿ-dé ní saaⁿ-dé pèrlá sá ïo-gá ndèyáhu-áⁿ.

Cuèndá ñunu tñi-güedé chácá

⁴⁷ Te na càni tucu-í ingá cuèndú núú-ndó nàcuáa tecú tñuní-ndó

nàcuáa cada-xi òré ndíhu ndaha ñàha Yá Ndióxi xii ñáyiú. Cue téé tñi chácá ñí dàquèe-güedé ñunu-güedé xití ndute làmár tñi-güedé chácá, te dácá nuu dácá ñihnu chácá cuànguee-güedi xití ñunu-áⁿ. ⁴⁸ Te òré ní cutnùní iní-güedé sá ñí chítú ñunu-güedé, te ní natava-güedé ní nene yuhu làmár, te ní ngüita-güedé nácáxi-güedé nchaa chácá-áⁿ. Te nchaa chácá váha dàquèe-güedé-di xití tídihi, te nchaa chácá nèhé dāngoyo-güedé-di. ⁴⁹ Te dàtná ní quide cue téé-áⁿ ducaⁿ càda cue espíritú xínú cuèchi núú Yá Ndióxi ná sáa nduu vā cundècu-gá nchaa sá ío ñuyíú-a, chi cue espíritú-áⁿ daquèe diⁿ-xi nchaa ñáyiú ní quide váha tnuu nchaa ñáyiú ñá túú ní quide váha. ⁵⁰ Te nchaa ñáyiú ñá túú ní quide váha-áⁿ daquihíⁿ ñáhá-xí xii-yu núú ñùhú núú càyú, te yàcáⁿ ío ndáhyú-yu, te dicó rúhñú-ná cuu núhu-yu sá sàtú iní-yu cuèndá sá ndóhó-yu —càchí-gá xáhaⁿ-gá xii cue téé xica cuu ndihí-gá.

Cuèndá cue téé ndècu ndihí sá ñí quee túu díhna ndihí sá ñí quee túu saa

⁵¹ Te Jèsús ní xícáⁿ tñuhú-gá núú-güedé, te xáhaⁿ-gá xii-güedé:

—¿Ní tecú tñuní-ndó nàcuáa nduu nchaa tñúhu ní càháⁿ-í-áⁿ? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Ní tecú tñuní-ndí —càchí-güedé xáhaⁿ-güedé xii-gá.

⁵² Te ní xáhaⁿ tucu Jèsús xii-güedé:

—Te núú ñⁿ téé dàcuaha ñàha xii ñáyiú nchaa tñúhu ní chídó tñuní ndí Moisés ná cùtnuní iní-dé nàcuáa quide Yá Ndióxi ndíhu ndaha-gá ñáyiú, te téé-áⁿ cúú-dè dàtná ñⁿ téé cùu xítóhó vehe. Te téé cùu xítóhó vehe-áⁿ ñí queñuhu-dé nchaa sá ñí quee túu díhna ndècu ndihí-dé, ndihí nchaa sá ñí quee túu saa. Te ducaⁿ sàtnahá-xi cùu téé-áⁿ te núu na cùtnuní iní-dé nàcuáa quide Yá Ndióxi ndíhu ndaha-gá ñáyiú —càchí-gá xáhaⁿ-gá xii-güedé.

Jèsús ndécú-gǎ ñúú núú nǐ sahanu-gá

(Mr. 6:1-6; Lc. 4:16-30)

⁵³ Te sátá nǐ yáha ducaⁿ nǐ cani Jèsús cuèndú núú-güedě, te ní xica-gá cuánuhú-gá. ⁵⁴ Te ní ndexìo-gá ñúú núú cúú ñùú-gá, te cuánguìhu-gá xití veñúhu càa ñúú-án te ní ngüíta-gá dánèhé-gá ñáyiu. Te nchaa ñáyiu ndedóho nchaa tnúhu càháⁿ-gá xǐcuñúhu-yu, te xitnàhá-yu:

—¿Nása ní cuu núú ío váha cùtnuní iní té-a nàcuáa cunduu tnúhu càháⁿ-dé, te quide-dé nchaa sá vǎ yóo tnàhí ndàcu cada-i? ⁵⁵ Te dícó déhe tée cùu carpinterú ndihí tá Màriá cúú-dě, te ñaní-dé cúú tǎ Jàcobó, ndihí té Chèé, ndihí té Xímú, ndihí té Jüdás. ⁵⁶ Te cue cúha-dé ndécú ndihí ñahá-yu xii-o ñúú-a. ¿Te nása ní quide-dé ñúu ndéé dàcáⁿ ío váha cùtnuní iní-dé nàcuáa cunduu tnúhu càháⁿ-dé-i? —càchí-yu xitnàhá-yu.

⁵⁷ Te ñá túú ní cuiní-yu càháⁿ ndihí váha-yu Jèsús, dico mee-gǎ ní xáhaⁿ-gǎ xii-yu:

—Te núu ñⁿ tée càháⁿ tnúhu Yá Ndióxi ná nàsáá-dé ñúú-dě, te nchaa ñáyiu ñúú-dé-án ndihí nchaa ñáyiu cùu ndimee-dé ñá túú nèhé-yu sá yíñúhu núú-dě, dico cue ñáyiu nchaa dava-gá ñúu chi nèhé-yu sá yíñúhu núú-dě —càchí-gá xáhaⁿ-gǎ xii-yu.

⁵⁸ Te ñá túú ní quide Jesús titní núú sǎ vǎ yóo tnàhí ndàcu cada ñúú-án, chi ñá túú ní cuiní-yu quindáá iní ñáhá-yu xii-gá.

14

Nàcuáa ní cuu ní xihí té Juàá tée dàcuandute ñaha xii ñáyiu

(Mr. 6:14-29; Lc. 9:7-9)

¹ Te ñu-ni dàvá-án nǐ níhí tǎ Hèrodés tnúhu nchaa nàcuáa quide Jesús, te té Hèrodés-án cúú-dě tée tàxi tnuñí distrítu Galiléa. ² Te ní xáhaⁿ-dě xii nchaa cue tée ndècu ndihí-dé:

—Tée dii cuèndú-xi ñihí-ó-án cùu-dé té Juàá tée dàcuandute ñaha xii ñáyiu, tée ní xihí ní cùu te ní ndoto-dé ñúu dàcáⁿ ndácú-dě quide-dé nchaa sá vǎ yóo tnàhí ndàcu cada —càchí-dé xáhaⁿ-dě xii-güedě.

³ Te ducaⁿ nǐ càháⁿ té Hèrodés chi mee-dé ní taúchíúⁿ-dě ní tnii ñaha-güedě xii té Juàá, te ní dácútú ñaha-güedě xii-dé, te ní chihi ñaha-güedě vecaá. Te ducaⁿ nǐ quide té Hèrodés-án sǎ cuèndá ñaha nàni Herodiás, ñaha ní càndeca ñaní-dé té Lìpé, te ní naqueheⁿ ñaha-dě xii-aⁿ ndèca ñaha-dé. ⁴ Te té Juàá ní xáhaⁿ-dě xii té Hèrodés:

—Ñá túú ní quide váha-n dùha ní naqueheⁿ-n ñaha ní càndeca ñaní-n —duha ní xáhaⁿ té Juàá xii té Hèrodés.

⁵ Te sá dúcáⁿ nǐ xáhaⁿ tǎ Juàá-án xii té Hèrodés, te ní cuiní té Hèrodés-án cahni-dé té Juàá-án, dico ñá túú ní cùyí-dé chi ní yuhú-dé núú cuè ñáyiu, chi nchaá-yu ní cutnùní iní-yu sá tǎ Juàá cúú-dě ñⁿ tée càháⁿ tnúhu Yá Ndióxi. ⁶ Te ñⁿ nduu ní quide té Hèrodés vico vehe-dé ní quide càhnu-dé nduu nǐ cacu-dé. Te ndècu ñⁿ déhe yoco ñaha nani Herodiás-án, te xíchí-án nǐ quíhu-xi xití vehe núú cúú vico-án nǐ xita saha-xi. Te nùcáo té Hèrodés ndihí cue tée ní càháⁿ-dé ndéhé-güedě, te ío ní cudí iní-dé nàcuáa ní xita xíchí-án. ⁷ Te té Hèrodés-án nǐ cacunehe-dé ndéé Yá Ndióxi nàcuáa cutnùní iní xíchí-án sǎ ndàá cuañaha-dé ñúu ná cúú sǎ ná càcáⁿ-xi núú-dě. ⁸ Te xíchí-án nǐ dácáhu iní ñáhá nǎná-xi xii-xi ná cúú sǎ càcáⁿ-xi núú tǎ Hèrodés, núu xíáⁿ ní xáhaⁿ-xi xii-dé:

—Cuiní-í quehndé-n ñiquí tǎ Juàá tée dàcuandute ñaha xii ñáyiu te taxi-n, dico na cùhuⁿ ñⁿ xití cóhó taxi-n —càchí-xi xáhaⁿ-xi xii-dé.

⁹ Te sá dúcáⁿ nǐ xáhaⁿ-xi, te ní cundiyí té Hèrodés, dico ñá túú ní níhí-dé nása cada-dé, chi ndedóho ñáyiu òré ní cacunehe-dé Yá Ndióxi sá ndàá cuañaha-dé

ɨ̃n sá ná càcáⁿ-xi núú-dě. Te ní quide-dé nàcuáa ní xáhaⁿ-xi. ¹⁰ Chi ní táuchíúⁿ-dě ní sáháⁿ cue téé ní xehndé-güedé díquí tē Juáa òré yíhí-dě vecaá. ¹¹ Te ní chihi-güedé díquí-dě ɨ̃n xití cóhó te nèhe-güedé cuánuhú ní sáñaha-güedé xii xíchí-ǎⁿ, te xíchí-ǎⁿ nǐ nacuáñaha-xi xii náná-xi.

¹² Te cue téé xica cuu ndihi té Juáa-áⁿ nǐ sáháⁿ-güedé ní naqueheⁿ-güedé yíquí cùñú-dé ní chindúxi-güedé, te dàtnùní ní sáháⁿ-güedé ní xáhaⁿ-güedé xii Jèsús nàcuáa ní cuu.

Jèsús dácàxi-gá úhúⁿ mǐl cue téé te d̃ɨ̃n ñáyiu d̃ihí ndihi landú

(Mr. 6:30-44; Lc. 9:10-17; Jn. 6:1-14)

¹³ Te Jèsús ní níhí-gǎ tnúhu nàcuáa ní cuu ní xihí té Juáa. Te sátá xǎⁿ te cuánguee-gá ɨ̃n bàrcú cuáháⁿ-gá ɨ̃n xichi núú ñà túú ñáyiu ndécu, dico nchaa ñáyiu x̃ndécu nchaa ñuú cáa yàtni xíaⁿ nǐ níhí-yu tnúhu sá cuáháⁿ-gá, te ní quee-yu ñuú-yu xica sahá-yu cuáháⁿ núú quidè-yu cuendá quexio Jèsús. ¹⁴ Te òré ní quexio Jèsús núú cuáháⁿ-gá, te ní quene-gá bàrcú, te ní xiní-gá cuéhé víhí ñáyiu x̃xúcu-yu xíaⁿ, te ní cundàhú iní ñáhá-gǎ xii-yu, te ní quide tátna-gá nchaa ñáyiu cùhú ndihí-yu. ¹⁵ Te sátá nǐ cuaa te ní sáháⁿ cue téé xica cuu ndihi Jèsús núú-gǎ, te xáhaⁿ-güedé xii-gá:

—Sa ní cuu dandàca-n nchaa ñáyiu-a chi sa ní cuaa, te na quihíⁿ-yu nchaa ñuú cáa yàtni iha cuaáⁿ-yu sá cáxi-yu, chi núú ndécú-ó ìha ñà túú tnàhí ná ió —càchí-güedé xáhaⁿ-güedé xii-gá.

¹⁶ Te Jèsús ní xáhaⁿ-gǎ xii-güedé:

—Ñáhá, vá dandàca-í-yu, váha-gá mee-ndo chí cuñaha sǎ ná càxi-yu —càchí-gá xáhaⁿ-gǎ xii-güedé.

¹⁷ Te ní xáhaⁿ-güedé xii-gá:

—Ñá túú nǎgá ndécú ndihí-ndí, chi úhúⁿ duha-ná pàa ndihi

úú-nǎ chácá ndécú ndihí-ndí —càchí-güedé xáhaⁿ-güedé xii-gá.

¹⁸ Te Jèsús ní xáhaⁿ-gǎ xii-güedé:

—Chí cànèhe paá-áⁿ ndihi chácá-áⁿ táquixi iha —cachí-gá xáhaⁿ-gǎ xii-güedé.

¹⁹ Te Jèsús ní xáhaⁿ-gǎ xii nchaa ñáyiu sá ná ngõo-yu nchaa-yu núú ité cuíí càa xíaⁿ, te ní queheⁿ-gá ndi úhúⁿ pàa-áⁿ ndihi ndi nduú chácá-áⁿ te ní ndacoto-gá andiu, te ní ndacáⁿ táhú-gǎ núú Yǎ Ndiõxí, te dàtnùní ní táhú cuèchi-gá pàa-áⁿ te ní sáñaha-gǎ xii cue téé xica cuu ndihi-gá ní dácãhñu-güedé cue ñáyiu ní xexí-yu. ²⁰ Te nchaa-yu ní xexí-yu ní ndahá xití-yu. Te sátá nǐ túhú cóhõ-yu te ní nàdatàcá-güedé nchaa sá nǐ quendóo, te ní chítú ùxúú tnàhá tídihí mee-ni sá nǐ quendóo. ²¹ Te nchaa ñáyiu ní xexí-áⁿ nǐ xínu úhúⁿ mǐl mee-ni cuè téé chi mee-ni cuè téé-áⁿ nǐ quíúndehu, te d̃ɨ̃n cue ñáyiu d̃ihí ndihi cue landú.

Jèsús xicá-gǎ núú ndute

(Mr. 6:45-52; Jn. 6:16-21)

²² Te òré-ni-áⁿ nǐ xáhaⁿ Jèsús xii cue téé xica cuu ndihi-gá sá quèe-güedé bàrcú téhndé-güedé ndàa ingá xio yuhu làgúná, te mee-gá quendóo-gá cada ndee iní tnàhá-gǎ ndihi cue ñáyiu. ²³ Te sátá nǐ yáha ní quide ndee iní tnàhá-gǎ ndihi cue ñáyiu, te medi-gá ní xica-gá cuása-gá ɨ̃n t̃indúú cáa yàtni xíaⁿ cuendá cáháⁿ ndihí-gá Yǎ Ndiõxí, te diu-ni medi-gá ndécú xíaⁿ nǐ cundiquíⁿ. ²⁴ Te bàrcú sá ñúhú cuè téé xica cuu ndihi-gá-áⁿ sa cuáháⁿ-xi ndéé cuádava xití làgúná-áⁿ, te níhí víhí quene táchí ndàa ichi cuáháⁿ-xi, te dàcandau ndeé-xi ndute nchaa d̃ihí-xi. ²⁵ Te tàcuíhndá váhi-gá tá xica Jèsús núú ndute cuáháⁿ tá cùyatni-gá bàrcú-áⁿ. ²⁶ Te cue téé xica cuu ndihi-gá ní xiní ñáhá-güedé xii-gá tá xica-gá núú ndute cuáháⁿ, te ní

yùhú-güedé te níhi ní cáháⁿ-güedé te xítñaha-güedé:

—j^h àlmá! —càchí-güedé xítñaha-güedé.

²⁷ Te Jèsús ní cáháⁿ-gá, te xáhaⁿ-gá xii-güedé:

—Ñíí cunduu-ndo vǎ yùhú-ndó, chi yùhú cùu-í —càchí-gá xáhaⁿ-gá xii-güedé.

²⁸ Te té Pèlú ní xáhaⁿ-dè xii-gá:

—Mèstrú, te núu diu-n te tauchìuⁿ sá tnàhá-í ná càca-í núú ndute quixi tnahá ñàhá-í xii-n —càchí-dé xáhaⁿ-dè xii-gá.

²⁹ Te Jèsús ní xáhaⁿ-gá xii-dé:

—Taquixi —cachí-gá xáhaⁿ-gá xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáháⁿ cuátnahá ñáhá-dè xii-gá.

³⁰ Te ní cutnùní iní-dé sá ïo níhi xico táchí, te ní ngüíta-dé yùhú-dé. Te òré-ni-áⁿ tá quèe naa-dé xití ndute cuáháⁿ ní cùu, te níhi ní cáháⁿ-dè xáhaⁿ-dè xii Jèsús:

—jMèstrú, vǎ dáñá-n quèe naa-í xití ndute! —càchí-dé xáhaⁿ-dè xii-gá.

³¹ Te òré-ni-áⁿ nǐ tñi Jèsús ndaha-dé, te ní xáhaⁿ-gá xii-dé:

—¿Ná cuendá ñá túú sàndáá ndisa iní ñáhá-n xii-í sàni j^h sàni úú iní-n-í? —càchí-gá xáhaⁿ-gá xii-dé.

³² Te òré cuánguee Jèsús ndihi té Pèlú xití bàrcú, te òré-ni-áⁿ nǐ ngüíñí táchí. ³³ Te cue tée ñuhu xití bàrcú-áⁿ nǐ ngüíñí xití-güedé núú-gá, te xáhaⁿ-güedé xii-gá:

—Sá ndáá sá cuítí sǎ díú yòhó cùu-n Dèhe Dútú Ndiöxí —càchí-güedé xáhaⁿ-güedé xii-gá.

Jèsús quidé tǎtna-gá ñáiyu cùhú j^h xichi núú nání Gènesarét
(Mr. 6:53-56)

³⁴ Te ní quexio Jèsús ndihi cue tée xica cuu ndihi-gá ndàa ingá xio yuhu làgúná, te núú nǐ quexio-gá ndihi-güedé-áⁿ nání-xí Gènesarét.

³⁵ Te nchaa ñáiyu xindecu xíaⁿ nǐ cutnùní iní-yu sá díú-gá ní

quexio, te ní dátècú tnúhu-yu nchaa dava-gá ñáiyu xindecu yatni xíaⁿ sǎ nǐ quexio-gá. Te ndecá-yu nchaa ñáiyu cùhú ndécú ndihí-yu cáháⁿ núú ndécú Jèsús. ³⁶ Te nchaa ñáiyu cùhú-áⁿ nǐ ngüíta-yu cáháⁿ ndàhú-yu núú Jèsús sá ná dàña-gá tnándeé-yu cuèdicó luha yuhu dǒo-gǎ cuendá ndúha-yu, te cue ñáiyu cùhú, ñáiyu ní tnándeé yuhu dǒo-gǎ ní ndúha-yu.

15

Cuendá nchaa sá quidé-xí ngüindecu cuèchi ñáiyu

(Mr. 7:1-23)

¹ Te sáta dúcáⁿ te j^h úú cue tée cùu fariséu ní quee-güedé ñuu Jerusàlén, ndihi cue tée dàcuaha ñaha xii ñáiyu nchaa tnúhu ní chídó tnùní ndíi Moisés ní quexio-güedé núú ndécú Jèsús, te xáhaⁿ-güedé xii-gá:

² —¿Ná cuendá cue tée xica cuu ndihi-n ñá túú nàquete-güedé ndaha-güedé òré caxi-güedé nàcuáa ní cachí cue ñani tnahá-ó nǐ xindecu ndéé sanaha-í? —càchí-güedé xáhaⁿ-güedé xii-gá.

³ Te Jèsús ní xáhaⁿ-gá xii-güedé:

—Te nchòhó tucu, ¿ná cuendá ñá túú quide-ndo nacuaa ní cachí Yǎ Ndiöxí cada-ndo, núu da nàcuáa ta quide cue tée ñuyú-a quide-ndo-í?

⁴ Te Yǎ Ndiöxí càchí-gá núú tütú-gá: “Canehe-ndo sǎ yíñuhu núú tǎtá-ndó ndihi núú náná-ndó”, càchí-gá. Te càchí tucu-gá ingá xichi núú tütú-gá: “Nchaa ñáiyu na cáháⁿ úhú tǎtá-xi ãdi náná-xi te cahni ñaha-güedé xii-yu”, duha càchí-gá núú tütú-gá. ⁵ Dico nchòhó càchí-ndó sǎ cuè ñáiyu chi cuu cùñahá-yu xii tǎtá-yu ãdi náná-yu: “Vǎ cùú chindee ñaha-ndí xii-n, chi sǎ táxi-ndí xii-n ni cùu, xíaⁿ ní nduu cuendá Yǎ Ndiöxí”, cuu duha cùñaha ñáiyu xii tǎtá-yu ãdi náná-yu càchí-ndó. ⁶ Te càchí-ndó sǎ cuè ñáiyu ducaⁿ na cùñaha xii tǎtá-xi ãdi náná-xi te ñá túú-gá tàu-yu

chindèé-yu ni tātā-yu ni nānā-yu. Te ducaⁿ quide-ndo chi ní dáquée tihú-ndó nācuáa ní cachí Yá Ndiōxí cada-ndo, te mee-ni nācuáa ta quide cue tée ñuyú-a véxi nchicúⁿ nihnu-ndo quide-ndo. ⁷ Te nchòhó cúú-ndó ñāyiu ío dāndahú méé-xí, chi cāchí-ndó sá quidé ndāá-ndó te ñā ndāá sá quidé ndāá-ndó! Te ní quee ndāá-xí nācuáa ní chídó tñuní ndí Chàíá tée ní xóo cāhánⁿ tñúhu Yá Ndiōxí ndéé sanaha núú tütú-gá núú cāhán-xí nācuáa ní cāhán-gá cuendá-ndó, te duha ní cachí-gá:

⁸ Ñāyiu-a cāchí-yu sá ío cāhnu cuu-í dico dicó-ni yuhu cāhán-yu, chi duuⁿ duuⁿ ñā túú ñúhu iní ñāhā-yu xii-í.

⁹ Te áúⁿ nā cuu chiñuhu ñahá-yu xii-í chi ñā túú vēdana ndéé nāndihí-xí,

chi cue ñāyiu-a dācuahá-yu cue tñaha ñāyíú-yu nācuáa cundecú-yu, dico mee-ni tñúhu sá ní cahu iní cue ñāyiu ñuyú-a cāhán-yu.

Duha ní chídó tñuní ndí Chàíá núú tütú Yá Ndiōxí nācuáa ní cāhán-gá cuendá-ndó —cāchí-gá xāhán-gā xii-güedé.

¹⁰ Te ní xāhán-gā xii cue ñāyiu:

—Chí táquixi ndehe iha, te cundedóho váha-ndo tñúhu na cāhán-í, te ío váha cuáha-ndo cuendá. ¹¹ Nchaa sá xéxi-ndó chi ñā túú nā quidé-xí iní-ndó, dico nchaa sá cuèhé sá dúhá sàni iní-ndó cāhán-ndó nchàa xíáⁿ quidé-xí ndècu cuéchi-ndo —cāchí-gá xāhán-gā xii-yu.

¹² Te cue tée xica cuu ndihí-gá ní sáhán-güedé ndéé núú-gā, te xāhán-güedé xii-gá:

—Véxi-ndí cāchí tñúhu-ndí xii-n sá cuè tée cùu fariséú ñā túú cùu váha iní-güedé cuendá tñúhu ní cāhán-n —cāchí-güedé xāhán-güedé xii-gá.

¹³ Te ní xāhán-gā xii-güedé:

—Nchaa ñāyiu ñā túú cùu cuendá Tātā-í Dútú Ndiōxí cuita nihnú-yu, chi ñāyiu-ánⁿ cúú-yu dàtná nchaa

cúhú sá ñā túú nāndihí te tñúhu ñāyiu. ¹⁴ Te vá cáda cuendá-ndó nācuáa cāhánⁿ cue tée-ánⁿ, chi cùu-güedé dàtná cue ñāyiu cuáa sácuíta nehe tñaha. Te nchòhó xini-ndó sá núu íiⁿ ñāyiu cuáa ná cuítá nehe tucú-yu ingá ñāyiu cuáa, te ndi ndúú-yu quée-yu déhva —cāchí-gá xāhán-gā xii-güedé.

¹⁵ Te té Pélú ní xāhán-dé xii-gá:

—Cachí tñúhu xii-ndí nācuáa quée-xi tñúhu ní cāhán-n-ánⁿ —cāchí-dé xāhán-dé xii-gá.

¹⁶ Te Jèsús ní xāhán-gā:

—¿Nāa tñaha nchòhó ñā túú ní tēcú tñuní-ndó nācuáa ndúu tñúhu ní cāhán-í núú ñāyiu-ánⁿ ñā? ¹⁷ Nchaa sá xéxi-yu cuánguee-xi xití-yu, te dàtnuní náyāha ñaha-xí xii-yu.

¹⁸ Dico nchaa tñúhu cuèhé tñúhu duha cāhán-yu xíáⁿ véxi quene-xi iní-yu, te diu nchaa xíáⁿ quidé-xí ndècu cuéchi-yu. ¹⁹ Te iní-yu-ánⁿ cācú nihnu nchaa sá cuèhé sá dúhá, chi sàni cuèhé sàni dùha iní-yu,

te sàhni-yu tñaha ñāyíú-yu, te cue tée cāhánⁿ ndihí-güedé ñāyiu dñí te ñā díú ñāndihí-güedé cúú-yu. Te diu-ni ducaⁿ quide cue ñāyiu dñí cāhánⁿ ndihí-yu cue tée te ñā díú yíⁿ-yu cùu-güedé, te cuéi tée te cuéi ñāndihí mee-ni ichi díí iní cúdí iní-yu cundecú-yu, te dùhu ndachiuⁿ tñahá-yu, te dācuandehndé-yu,

te cāhánⁿ cuèhé-yu cuendá tñaha ñāyíú-yu. ²⁰ Te nchaa xíáⁿ quidé-xí ndècu cuéchi-yu, dico ñā díú sá ñā túú ndahá-yu dàtná ní cachí cue tée ndéé sanaha, chi xíáⁿ ñā túú quide-xi cuendá ngúndecu cuéchi-yu —cāchí-gá xāhán-gā xii-güedé.

—Véxi-ndí cāchí tñúhu-ndí xii-n sá cuè tée cùu fariséú ñā túú cùu váha iní-güedé cuendá tñúhu ní cāhán-n —cāchí-güedé xāhán-güedé xii-gá.

—Véxi-ndí cāchí tñúhu-ndí xii-n sá cuè tée cùu fariséú ñā túú cùu váha iní-güedé cuendá tñúhu ní cāhán-n —cāchí-güedé xāhán-güedé xii-gá.

—Véxi-ndí cāchí tñúhu-ndí xii-n sá cuè tée cùu fariséú ñā túú cùu váha iní-güedé cuendá tñúhu ní cāhán-n —cāchí-güedé xāhán-güedé xii-gá.

Híⁿ ñāndihí ñaha cùu ñāni tñahá ñāyiu canànea ní sándáa iní-aⁿ Jèsús

(Mr. 7:24-30)

²¹ Te Jèsús ní xica-gá cuáhán-gá ní sáa-gá yucu cue tée ñúú Tírú, ndihí yucu cue tée ñúú Sídón. ²² Te íiⁿ ñāndihí ñaha cùu ñāni tñahá ñāyiu

canànea ndécú yàtni-aⁿ xíáⁿ, te níhi ta càháⁿ-aⁿ ní quexío núú ndécú Jèsús, te xáhaⁿ-aⁿ xii-gá:

—jMèstrú, ñaní tnáhá ndí Dàvíí, cundàhú iní ñháá xii-í cada tátna-n dèhe yoco-í! Chi yíhi ñaha espíritú cundíhi yucu ñáváha xii-xi te ío dándoho ñaha-xi —cachí-aⁿ xáhaⁿ xii-gá.

23 Dico Jèsús ñá túú tnàhí ní càháⁿ-gá, te cue tée xica cuu ndíhi-gá ní sáháⁿ-güedé núú-gá, te xáhaⁿ-güedé xii-gá:

—Cúñaha xii ñaha-án ná nùhú-aⁿ, chí ío níhi càháⁿ-aⁿ nchícúⁿ ñháá-án xii-o —cachí-güedé xáhaⁿ-güedé xii-gá.

24 Te Jèsús ní xáhaⁿ-gá xii-güedé:

—Yá Ndióxí ní tendaha ñaha-gá xii-í véxi-í mee-ní ñúú núú xindecu cue ñáyíu isràél, chí ñáyíu-án cúú-yu dàtná cue mbéé cue quití ní xíta, chí ta xíta nihnú-yu cuáháⁿ —càchí-gá xáhaⁿ-gá xii-güedé.

25 Te ñadíhí-án ní sáháⁿ-aⁿ ndéé núú Jèsús ní ngúíñí xítí-án, te xáhaⁿ-aⁿ xii-gá:

—jMèstrú, chindee ñaha xii-í! —càchí-aⁿ xáhaⁿ-aⁿ xii-gá.

26 Te Jèsús ní xáhaⁿ-gá xii-aⁿ:

—Vá cúú chindee-í cue ñáyíu ñá túú cùu ñáyíu isràél, chí ñ-ní cùu-xi núu na quèheⁿ-o paá cúú cuèndá cue landú te cuáha-o iná caxi-di —càchí-gá xáhaⁿ-gá xii-aⁿ.

27 Dico ñaha-án ní xáhaⁿ-aⁿ xii-gá:

—Ndáá càháⁿ-n, dico cue iná chí nàdatacá-güedi sá ngóyó yúhu cóhó xitohó-güedi —càchí-aⁿ xáhaⁿ-aⁿ xii-gá.

28 Te Jèsús ní xáhaⁿ-gá xii-aⁿ:

—jYòhó ñaha cùhú dèhe-xi, ío váha sàndáá iní ñháá-n xii-í! Te na càda-í nàcuáa cuíni-n —càchí-gá xáhaⁿ-gá xii-aⁿ.

Te òré-ni-án ní ndúha dèhe-aⁿ.

Jèsús quidé tátna-gá vài ñáyíu cùhú

29 Te sáta dúcáⁿ ní cuu te Jèsús ní xica-gá cuáháⁿ-gá ní yáha-gá yuhu làgúná distrítú Galileá, te cuásaá-gá

ñⁿ tindúú te xíáⁿ ní ngóo-gá. 30 Te xíáⁿ núcòo-gá ní quexío cuéhé víhí ñáyíu, te ndecá-yu ñáyíu yacua, ndíhi ñáyíu ní yíchí ñⁿ xio ndaha-xi, ndíhi ñáyíu cuáá, ndíhi ñáyíu ñíhí, te vài dava-gá cue ñáyíu cùhú tnàhá dava-gá núú cuéhé ndecá-yu ní quexío núú ndécú-gá. Te ní taxi ndecu ñháá-yu núú Jèsús te ní quide tátna ñaha-gá xii-yu te ní ndúha-yu. 31 Te nchaa ñáyíu xindecu-án ío ní cuñúhu-yu sá dúcáⁿ ní xini-yu ní cuu ní nacáháⁿ nchaa ñáyíu ñíhí, ndíhi cuèndá sá ní ndúha nchaa cue ñáyíu yacua, ndíhi cuèndá sá ní ndúha cue ñáyíu ní yíchí ñⁿ xio ndaha-xi, ndíhi cuèndá sá ní ndúha núú cuè ñáyíu cuáá. Te nchaa-yu ní cachí-yu sá ío càhnu cuu Yá Ndióxí Yáá cúú Ndióxí cue ñáyíu isràél.

Jèsús dácàxi-gá cúmí mìl cue tée te dñⁿ ñáyíu dñí ndíhi landú
(Mr. 8:1-10)

32 Te Jèsús ní cana-gá cue tée xica cuu ndíhi-gá, te ní xáhaⁿ-gá xii-güedé:

—Yúhú cundàhú iní-í nchaa ñáyíu-a, chí sa ní cuu úní nduu ndècu ndíhi ñháá-yu xii-o ìha, te ñá túú tnàhí-gá sá cáxi-yu, te ñá túú cuíni-í natendaha-í-yu núhú tnámá-yu vehé-yu, chí ná ndéé cuáháⁿ cuneé-yu docó ichi —càchí-gá xáhaⁿ-gá xii-güedé.

33 Te ní xáhaⁿ-güedé xii-gá:

—¿Te ndéé níhí-ó sá cuñaha-o càxi nchaa ñáyíu-a, te ío cuéhé-yu te ñá túú nã ío ìha chí cùu-xi xití yucu-i? —càchí-güedé xáhaⁿ-güedé xii-gá.

34 Te Jèsús ní xícáⁿ tnúhú-gá núú-güedé, te xáhaⁿ-gá:

—¿Ná daha-gá paá ndécú ndíhi-ndo-i? —cachí-gá xáhaⁿ-gá xii-güedé.

Te ní xáhaⁿ-güedé xii-gá:

—Ndècu ndihi-ndí úsá-gá tñàhá pàá ndihi ìñ úú-gá chácá — cächí-güedé xàhaⁿ-güedé xii-gá.

³⁵ Te Jèsús ní xàhaⁿ-gá xii nchaa ñáyiu sá ná ngóo-yu nchaa-yu, te ní ngóo-yu. ³⁶ Te ní queheⁿ-gá ndi úsá pàá-áⁿ ndi ìñ úú-gá chácá-áⁿ, te ní ndacáⁿ táhú-gá núú Yá Ndiöxí, te dàtnùní ní táhú cuèchi-gá pàá-áⁿ ndihi chácá-áⁿ te ní sãñaha-gá xii cue téé xica cuu ndihi-gá ní dácãhñu-güedé nchaa ñáyiu-áⁿ. ³⁷ Te nchaa-yu ní xexí-yu ní ndahá xití-yu. Te sátá ní túhú cóhó-yu te ní nadatácá-güedé nchaa sá ní quendóo, te ní chítú úsá tñàhá tídihi mee-ni sã ní quendóo-áⁿ. ³⁸ Te núú ncháá ñáyiu ní xexi te ní xínu cúmí mĩ mee-ni cuè téé chi diu-ni cue téé-áⁿ ní quiúndehu, te dìñ cue ñáyiu dìhí ndihi cue landú. ³⁹ Te sátá dúcáⁿ te Jèsús ní dándácá ñàha-gá xii-yu, te cuánguee-gá bàrcú cuáháⁿ-gá yucu cue téé ñuú Màgdalá.

16

Cue téé cùu fariséú ndihi cue téé cùu saducéú xàhaⁿ-güedé xii Jèsús cada-gá ìñ sá vã yõo tñàhí ndàcu cada

(Mr. 8:11-13; Lc. 12:54-56)

¹ Te cue téé cùu fariséú ndihi cue téé cùu saducéú ní sáá-güedé núú ndécú Jèsús xító ndèè ñàhá-güedé xii-gá, te xàhaⁿ-güedé sá ná cádá-gá ìñ sá vã yõo tñàhí ndàcu cada cundehe-güedé nàcuáa cutnùní iní-güedé núu ndáá sá Yá Ndiöxí ní tendaha ñàha-gá xii-gá véxi-gá ñuyúú-a. ² Te Jèsús ní xàhaⁿ-gá xii-güedé:

—Nchòhó chi òré tá cuàa cuáháⁿ te ndàcoto-ndo andiu, te cächí-ndó: “Ío vaha cada-xi tneé chi càa vícò tícuèhé andiu”, duha cächí-ndó. ³ Te òré dátneé ndàcòto tucu-ndo andiu, te cächí-ndó: “Vã cádá vaha-xi nduu vitna chi tícuèhé andiu, te càa vícò”, duha cächí-ndó. ¡Dico nchòhó cúú-ndó ñáyiu ío

dàndahú mée-xí sã quidé ndáá te ñá ndáá sã quidé ndáá-ndó! Te cùtnuní iní-ndó nàcuáa quide-xi andiu, dico ñá túú cùtnuní iní-ndó nàcuáa quèe-xi nchaa sá quidé Yá Ndiöxí vitna. ⁴ Dico nchaa nchòhó ñáyiu ndècu ñuyúú vitna ío cuihna iní-ndó, te ñá túú cuini-ndó càda ndáá-ndó núú Yá Ndiöxí, te cuini-ndó càda-í ìñ sá vã yõo tñàhí ndàcu cada dico ñá túú nãgá cada-í, chi diu-ni nàcuáa ní quide Yá Ndiöxí ndí Jònás diu-ni ducaⁿ càda tucu-gá vitna —cächí-gá xàhaⁿ-gá xii-güedé.

Te ducaⁿ te ní xica-gá cuáháⁿ-gá ndihi cue téé xica cuu ndihi-gá.

Cuèndá cue téé cùu fariséú ndihi cuèndá cue téé cùu saducéú
(Mr. 8:14-21)

⁵ Te òré ní quexìo ndihi ñaha-gá xii-güedé ndáa ingá xio yuhu làgúná, te ní ndacu iní-güedé sá ní cunaa-güedé canehe-güedé pàá quíhíⁿ caxi-güedé. ⁶ Te Jèsús ní cáháⁿ-gá dóho-güedé, te xàhaⁿ-gá xii-güedé:

—Na cächí tñuhu-í xii-ndo sã ío quíhí iní-ndó cùndecu-ndo, te vã cádá cuèndá tñàhí-ndo lèvadurá cue téé cùu fariséú ndihi cue téé cùu saducéú —cächí-gá xàhaⁿ-gá xii-güedé.

⁷ Te ní ngúíta-güedé xitnàha-güedé:

—Cuèndá sá ñá túú ní cànehe-o pàá quixi xíáⁿ duha càháⁿ-gá —cächí-güedé xitnàha-güedé.

⁸ Te Jèsús ní cutnùní iní-gá nàcuáa nduu tñuhu xitnàha-güedé, núu ní xàhaⁿ-gá xii-güedé:

—Nchòhó chi ñá túú sàndáá iní ñàhá vaha-ndo xii-í núu xíáⁿ da sá ñá túú ní cànehe-ndo pàá quixi càháⁿ-ndó. ⁹ ¿Te náa ñá ndácú iní-ndó sã núú ùhúⁿ-ni pàá, te ní taxi-í ní dácãhñu-ndo ní xexi ùhúⁿ mĩ cue téé, chi diu-ni cue téé-áⁿ ní quiúndehu, te sátá ní túhú cóhó-güedé te ní chítú títní tídihi mee-ni sã ní quendóo-áⁿ? Te ñá tècú tñuní-ndó nàcuáa quèe-xi nàcuáa ní quide-í. ¹⁰ ¿Te náa

ñá ndácú tucu iní-ndó sá nũú ùsá-ni pàá te ní taxi-í ní dácãhũu tucu-ndo nĩ xexi cúmí mĩl cue téé, chi ñu-ni cue téé-áⁿ nĩ quíundehu, te sátá nĩ túhú cóhó-güedě te ní nadatácá-ndó nchàa sá nĩ quendóo, te ní chítú tĩtĩ tĩdihĩ mee-ni sá nĩ quendóo-áⁿ? ¹¹ Dico nchòhó chi ñá túú ní quide cuendá-ndó nàcuáa ndũu tñũhu càháⁿ-í òré ní cachí-í sá vã quéhéⁿ cuendá-ndó lèvadurá cue téé cùu fariséú ndihĩ cue téé cùu saducéú, chi ñá díú cuendá pàá ní càháⁿ-í —càchí-gá xãhaⁿ-gã xii-güedě.

¹² Te sátá dúcáⁿ nĩ xãhaⁿ Jèsús xii cue téé xica cuu ndihĩ-gá, te ní tecú tñũnĩ-güedě sá xãhaⁿ-gã xii-güedě sá vã tñĩ-güedě tñũhu càháⁿ cue téé cùu fariséú ndihĩ cue téé cùu saducéú, te ñá díú cuendá levadurá sá quĩhu yuchi cuãha pàá ní càháⁿ-gã.

Té Pèlú xãhaⁿ-dě xii Jèsús sá díú-gã cúú-gã Cristú
(Mr. 8:27-30; Lc. 9:18-21)

¹³ Te Jèsús ní quexio-gá yucu cue téé ñuú Cèsareá Filipú, te ní xícáⁿ tñũhú-gã núú cuè téé xica cuu ndihĩ-gá, te xãhaⁿ-gã xii-güedě:

—¿Yoo cùu yúhú Téé cùu ñaní tñáhá-ndó nchàa-ndo cachí cue ñáyiu-va? —càchí-gá xãhaⁿ-gã xii-güedě.

¹⁴ Te ní xãhaⁿ-güedě xii-gá:

—Davá-yu càchí-yu sá cúú-n ndĩ Juáá téé ní xóo dacuandute ñaha xii ñáyiu, te davá-yu càchí-yu sá cúú-n tẽ Èliás, te davá-yu càchí-yu sá cúú-n ndĩ Jeremiás téé ní xóo càháⁿ tñũhu Yá Ndiõxí ndéé sanaha, àdi cuu-n ingá téé ní xóo càháⁿ tñũhu-gá ndéé sanaha, duha càchí-yu —càchí-güedě xãhaⁿ-güedě xii-gá.

¹⁵ Te Jèsús ní xícáⁿ tñũhú tucu-gá núú-güedě, te xãhaⁿ-gã xii-güedě:

—Te nchòhó, ¿yoo sàni iní-ndó cùu-í-i? —càchí-gá xãhaⁿ-gã xii-güedě.

¹⁶ Te té Ximú, àdi Pelú chi úú ñu-dé, ní xãhaⁿ-dě xii-gá:

—Yòhó cúú-n Cristú Yáá ní tendaha Yá Ndiõxí véxi ñuyiú-a, te ñu Yá Ndiõxí cúú-gã Yáá ndécú nchàa nduu nchaa quíú, te yòhó cúú-n Dèhe-gá —càchí-dé xãhaⁿ-dě xii-gá.

¹⁷ Te Jèsús ní xãhaⁿ-gã xii-dé:

—Yòhó té Ximú déhe té Jónás, ío váha táhú-n chi mee Tãtã-í Dútú Ndiõxí ní dácáhú iní ñáhá-gã xii-n nàcuáa cunduu tñũhu càháⁿ-n, te ñá díú ñĩ ñáyiu ñuyiú-a ducaⁿ ní dácahu iní ñáhã-yu xii-n tñũhu-án.

¹⁸ Te yúhú xãhaⁿ-í Pèlú xii-n, te tñũhu-án quée-xí yúú, chi quèe ndáá-xi nàcuáa nani-n, chi cuu-n ñĩn téé vã cáni ñĩn cani úú iní-xi canu ichi-n cuè ñáyiu nàcuáa cundecu ndihĩ ñáhã-yu xii-í. Te nchaa ñáyiu cùu cuendá-í vã ndácú yucu ñávãha dacuĩta nihnu ñaha-xi xii-yu. ¹⁹ Te yúhú taxi-í tñũhu ndee iní cundecu ndihĩ-n cuendá cunuu-n nũú cuè ñáyiu yindaha ñaha Yá Ndiõxí, te nchaa sá ná càháⁿ-n sá cúú-xí sá vãha, te ñu-ni ducaⁿ càháⁿ Yá Ndiõxí, te nchaa sá ná càháⁿ-n sá ñá túú cùu-xi sá vãha, te ñu-ni ducaⁿ càháⁿ tucu-gá, chi quide-n nacuáa cuinĩ-gá —càchí-gá xãhaⁿ-gã xii-dé.

²⁰ Te sátá dúcáⁿ te ní xãhaⁿ Jèsús xii cue téé xica cuu ndihĩ-gá sá vã yóo cúñaha-güedě sá díú-gã cúú-gã Cristú Yáá ní tendaha Yá Ndiõxí véxi ñuyiú-a.

Jèsús càháⁿ-gá sá cáhni ñaha-güedě xii-gá

(Mr. 8:31-9:1; Lc. 9:22-27)

²¹ Te ndéé davá-áⁿ nĩ ngúĩta Jèsús xãhaⁿ-gã xii cue téé xica cuu ndihĩ-gá:

—Dacuĩtĩ sá quihĩ-í ñuú Jerusálén, te yácáⁿ cue téé cùu sacuéhé nũú ñáyiu isráel, ndihĩ cue téé dácuaaha ñaha xii ñáyiu nchaa tñũhu ní chídó tñũnĩ ndĩ Moisés, nchaa cue téé-áⁿ ío dandòho ñaha-güedě xii-í, te cahni ñaha-güedě, dico nduu únĩ sá

cùu-í te ndoto-í —càchí-gá xáhaⁿ-gã xii-güedé.

²² Te té Pèlú ní cana-dé Jèsús ìⁿ xio, te ní ngüita-dé ténää ñáhá-dě xii-gá, te xáhaⁿ-dě:

—¡Sá vã càchí Ndiöxí sá dúcáⁿ ndòho-n chi ñá túú tàù-n sã dúcáⁿ ndòho-n! —cachí-dé xáhaⁿ-dě xii-gá.

²³ Te ndàa sátá Jèsús nútñí té Pèlú òré ducaⁿ xáhaⁿ-dě xii-gá ñuu ní nchócuñhu-gá, te xáhaⁿ-gã xii-dé:

—¡Xocuñí yòhò yucu ñvãha núu-í-a chi dico quidé tñèñu-n! Chi ñá túú sàni iní-ò dàtná sání ìní Yã Ndiöxí chi ìⁿ-ni sàni iní-ò ndihi dava-gá cue ñáyiú ndècu ñuyúú-a —càchí-gá xáhaⁿ-gã xii-dé.

²⁴ Te sátá dúcáⁿ te ní xáhaⁿ-gã xii nchaa cue téé xica cuu ndihi-gá:

—Nchaa ñáyiú cuini chitnahá ñáhá xii-í, te xini ñuhu-xi dañá-yu vá cáda-gá-yu sá sání ìní mée-yu, te ío cada ndee ìní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í.

²⁵ Te nchaa ñáyiú cuini sá ñá túú tñàhí ná yáha cundecu ñuyúú-a cuíta nihnú-yu, dico nchaa ñáyiú ñá túú tñàhí yùhú cuèi nándí sá ná yáha-yu cundecú-yu ñuyúú-a sá cuendá-í, te ñáyiú-áⁿ nanihí tàhú-yu. ²⁶ Te cuèi nchaandi túhú sá ío ñuyúú-a na nihí ñáyiú cundecu ndihi-yu, dico núu ñu nchaa xíáⁿ ná càda cuíta nihnú-yu te ñá túú vèdàna nàndíhi-xi sá dúcáⁿ ndècu ndihi-yu nchaa xíáⁿ. Te ni ìⁿ sá ío ñuyúú-a vá chindée ñaha-xi xií-yu cuendá nanihí tàhú-yu. ²⁷ Te ndáá quéé-xí tñuhu càháⁿ-í, chi na quixi tucu yùhú Téé cùu ñani tñáhá-yu nchaa-yu, te dàvá-áⁿ quini-yu sá ío càhnu cuu-í dàtná càhnu cuu Tàtá-í Dútú Ndiöxí, te quixi-í ndihi cue espíritú xínú cuèchi núú-gã, te dàvá-áⁿ cuáha-í nchaa ñáyiú sá ndúú tãhú-yu nàcuáa nduu sá ní quidé-yu ìⁿ ìⁿ-yu. ²⁸ Te na càchí tñuhu ndáá-í xii-ndo sã ío dava nchòhó ñáyiú ndècu iha vitna vá

cùu-ni-ndo, chi cundecu-ni-ndo ndéé quini-ndó quixi tucu yùhú Téé cùu ñani tñáhá-ndó nchaa-ndo taxi tñuni-í nchaa ñáyiú —càchí-gá xáhaⁿ-gã xii-güedé.

17

Ní nadáma dóo Jèsús ndihi núú-gã (Mr. 9:2-13; Lc. 9:28-36)

¹ Te núú ìñú nduu sá dúcáⁿ ñí cáháⁿ Jèsús, te ní xica-gá cuásaá-gá ìⁿ yucu dùcúⁿ, te ndèca-gá té Pèlú, ndihi té Jàcobó, ndihi té Juáa ñani té Jàcobó-áⁿ cuásaá. Te úní tñàhí-ni cue téé-áⁿ ndécá-gã cuásaá.

² Te yucu-áⁿ ndécú-gã ní nadáma núú-gã ndihi dóo-gã, te núú-gã súúni dàtásaⁿ-xi dàtná quidé-xí núú nchíanchii, te dóo-gã súúni ñí nduu cuixíⁿ dàtná cáá ñùhú cuixíⁿ. ³ Te òré-ni-áⁿ ñí xini-güedé ndii Moisés ndihi té Èliás nútñí-güedé ndihi-gá ndátnùhu ndihi ñaha-güedé xii-gã. ⁴ Te té Pèlú ní xáhaⁿ-dě xii Jèsús:

—Mèstrú, ¡váha ní cuu sá ndécú-ó iha vitna! Te núu cuini-n, te na dàcaa-ndí úní tñáhá vehe tñuvixiⁿ, te ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Èliás —càchí-dé xáhaⁿ-dě xii-gã.

⁵ Te nini dùcaⁿ caháⁿ té Pèlú ní quexio ìⁿ vícó núú ndécú-güedé ní dádáhu ñaha-xi xii-güedé te súúni chàhñhí. Te xití vícó-áⁿ ñí tecú ní cáháⁿ Yã Ndiöxí, te xáhaⁿ-gã xii-güedé:

—Téé-a cùu-dé Déhe-í téé ío cùu ìní-í, te ío cùdí ìní-í-dé, te cund-edóho-ndo nchaa tñuhu càháⁿ-dé —duha ní xáhaⁿ-gã xii-güedé.

⁶ Te sá dúcáⁿ ñí cáháⁿ Yã Ndiöxí ní tecú dóho cue téé xica cuu ndihi Jesús te ío ní yùhú-güedé, te ní ngüñí xití-güedé te ní nuu núú-güedé ndaa núú ñùhú. ⁷ Te Jèsús cuáháⁿ-gã núú xíndecu cue téé xica cuu ndihi-gã, te ní tendaha ñaha-gã, te xáhaⁿ-gã xii-güedé:

—Chí ndácuñí, vá yùhú-ndó —càchí-gá xáhaⁿ-gã xii-güedé.

⁸ Te òré ní ndanehe núú-güedé, te ñá túú-gá ní xìní-güedé cue téé úú-áⁿ chi mee-nă Jèsús. ⁹ Te òré cuánuu ndíhi ñaha Jèsús xii-güedé tindúú-áⁿ, te ní xáhaⁿ-gă xii-güedé:

—Vá yóo cúñaha-ndo ni ìⁿ sá ní xìní-ndó núú nì sáá-ó-á, te cuu cáháⁿ-ndó dico ndéé ná yáha ndoto yúhú Téé cùu ñaní tnáhá-ndó nchàa-ndo sá cùu-í —càchí-gá xáhaⁿ-gă xii-güedé.

¹⁰ Te cue téé xica cuu ndíhi-gá ní xáhaⁿ-güedé xii-gá:

—Cuíní-ndí cachí tnúhu-n nă cuendá cue téé dàcuaha ñaha xii ñáiyu nchaa tnúhu ní chídó tnúni ndíi Moisés càchí-güedé sá díhna-gá té Èliás quixi, te dàtnúni quixi Yaá tendaha Yă Ndiôxí quixi ñuyúú-a —càchí-güedé xáhaⁿ-güedé xii-gá.

¹¹ Te Jèsús ní xáhaⁿ-gă xii-güedé:

—Ndáá sá códó núu ìⁿ téé quixi-dé te cada-dé dàtná ní quide té Èliás te téé-áⁿ cada ndáá-dé nchaa năcuáa cùu. ¹² Te na càchí tnúhu-í xii-ndo vitna sá sà ní quixi téé ní quide dàtná ní xóo cada té Èliás, te cue ñáiyu ñá túú ní cùtnúni iní-yu sá díú-dě, te ní quide ñahá-yu xii-dé nchaa năcuáa ní quixi iní mée-yu, te ðu-ni ducaⁿ càda ñaha tucú-yu xii yúhú Téé cùu ñaní tnáhá-yu nchaá-yu, chí dandòho ñahá-yu xii-í —càchí-gá xáhaⁿ-gă xii-güedé.

¹³ Te cue téé xica cuu ndíhi-gá ní cutnúni iní-güedé sá cuendá ndíi Juáá téé ní xóo dacuandute ñaha xii ñáiyu ní cáháⁿ-gá.

Jèsús quidé tătna-gá ìⁿ téé cuechi tnáhá cuéhé xiyíhí

(Mr. 9:14-29; Lc. 9:37-43)

¹⁴ Te Jèsús ní nasáá-gá ndíhi cue téé ní sáá ndíhi-gá tindúú-áⁿ núú xĩndecu vai ñáiyu, te ní quexio ìⁿ téé núú-gă ní ngúíñí xítí-dě, te xáhaⁿ-dě xii-gá:

¹⁵ —Mèstrú, cundàhú iní déhe-í chí tnáhá-dé cuéhé xiyíhí, te ío dándoho ñaha-xi xii-dé, te ní cuu

vai xito daquée ñaha-xi núú ñùhú xii-dé, te ní cuu vai tucu xito dangaunihnu ñaha-xi ndute xii-dé. ¹⁶ Te sa ndèca-í-dé ní quixi núú cuè téé xica cuu ndíhi-n dico ñá túú ní ndàcu-güedé cada tătna ñaha-güedé xii-dé —càchí-dé xáhaⁿ-dě xii-gá.

¹⁷ Te Jèsús ní xáhaⁿ-gă xii nchaa ñáiyu xĩndecu-áⁿ:

—Nchaa nchòhó ñáiyu ndècu ñuyúú-a, ío sáá iní-ndó chí ñá túú cuíní-ndó quĩndáá iní-ndó Yă Ndiôxí, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcáⁿ-gă cada-ndo-í? Te chí cándèca téé cùhú-áⁿ táquixi iha —cachí-gá xáhaⁿ-gă xii-yu.

¹⁸ Te Jèsús ní tenáá-gá espíritú cundíhi yucu ñávaha yíhi ñaha xii téé-áⁿ, te ní quee ñaha-xi xii-dé, te òré-ni-áⁿ ní ndúha-dé.

¹⁹ Te sátá dúcáⁿ te òré ndécú mée Jèsús ndíhi cue téé xica cuu ndíhi-gá, te ní xicáⁿ tnúhú-güedé núú-gă, te xáhaⁿ-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cundíhi yucu ñávaha yíhi ñaha xii téé-áⁿ —càchí-güedé xáhaⁿ-güedé xii-gá.

²⁰ Te Jèsús ní xáhaⁿ-gă xii-güedé:

—Te ñá túú ní ndàcu-ndo, chí ñá túú sàndáá ndisa iní-ndó Yă Ndiôxí, Te na càchí tnúhu ndáá-í xii-ndo sá núu nchòhó quĩndáá ndisa iní-ndó Yă Ndiôxí cuèdicó luha líi dàtná líhli ndiquíⁿ yutnu nàni mostázá, te ducaⁿ te cuu cúñaha-ndo xii ìⁿ tindúú xocuiñí-xi núú ndécú-xi te xocuiñí-xi. Te nchaa núú sá vaha ndacu-ndo càda-ndo te núu na quĩndáá iní ndisa-ndo Yă Ndiôxí.

²¹ Te xìní ñuhu-xi sá ío cáháⁿ ndíhi-ndo-gă te ñá túú tnàhí ná caxi-ndo cáháⁿ ndíhi-ndo-gă, te ducaⁿ te ndacu-ndo queñuhu-ndo espíritú cundíhi yucu ñávaha yíhi ñaha xii ñáiyu, dàtná cúu espíritú sá yíhí ñaha xii téé-áⁿ ní cùu —cachí-gá xáhaⁿ-gă xii-güedé.

Jesús cáháⁿ tucu-gá sá cáhni ñáha-güedé xii-gá

(Mr. 9:30-32; Lc. 9:43-45)

²² Te nini xica cuu Jesús ndihi cue té xica cuu ndihi-gá distritú Galileá, te ní xáhaⁿ-gã xii-güedé:

—Yúhú Tée cùu ñani tnáhá-ndó ncháa-ndo sáá ìⁿ nduu te cuáha cuendá ñáhá-güedé xii-í núú cué té cùu úhú iní ñáhá, ²³ te cahni ñaha-güedé xii-í dico nduu úní sá cùú-í te ndoto-í —càchí-gá xáhaⁿ-gã xii-güedé.

Te sá dúcáⁿ ñí xáhaⁿ-gã xii-güedé, te ío ní ndíhú iní-güedé.

Díhúⁿ cuendá veñúhu

²⁴ Te òré ní quexio Jesús ndihi cue té xica cuu ndihi-gá ñúú Capèrnaúm, te cue té xica quide cobrá díhúⁿ cuendá veñúhu ní sáháⁿ-güedé ní cáháⁿ ndihi-güedé té Pèlú, te xáhaⁿ-güedé:

—¿Cháhu mèstrú-ndó úú díhúⁿ sã nání drácmá cuendá veñúhu ãⁿ ñáhá? —càchí-güedé xáhaⁿ-güedé xii-dé.

²⁵ Te té Pèlú ní xáhaⁿ-dë:

—Cháhu-dé —càchí-dé xáhaⁿ-dë xii-güedé.

Te té Pèlú cuánguihu-dé xití vehe núú ndécú Jesús, te díhna-gá ní cáháⁿ-gá, te xáhaⁿ-gã xii-dé:

—Xímú, ¿nása sáni iní-n, ná cúú ñáyiú quide cobrá ñáhá cué té yíndaha ñáyiú ndècu ñuyíú-a cuendá nchaa sá ndúú yáhu ñúú-güedé ndihi cuendá nchaa díhúⁿ sã ngáútnàha, cue ñáyiú ñúú-güedé ãⁿ cué ñáyiú véxi xica quide cobrá-güedé? —càchí-gá xáhaⁿ-gã xii-dé.

²⁶ Te té Pèlú ní xáhaⁿ-dë xii-gá:

—Cue ñáyiú véxi xica quide cobrá-güedé —càchí-dé xáhaⁿ-dë xii-gá.

Te Jesús ní xáhaⁿ-gã xii-dé:

—Te núú ducaⁿ te cue ñáyiú ñúú-güedé ñá túú ná cháhu-yu te núú ducaⁿ. ²⁷ Dico cuendá sá vã yõo dasátú-ó iní-xi, te cuáháⁿ làgúná te dàquée-n sã tñíⁿ chácá xití ndute,

te chácá díhnanuu na tàva-n te cundehe-n yùhu-dí, chí yíhi ìⁿ díhúⁿ cuixíⁿ. Te díhúⁿ-ãⁿ canehe-n quíhíⁿ cháhu-n cuendá-í ndihi cuendá-n, chí díhúⁿ-ãⁿ sa tnáhá quéyáhu cuendá-ó ndí ndúú-ó —càchí-gá xáhaⁿ-gã xii-dé.

18

Cue té xica ndúcu tnúhu núú Jesús yoo ío-gá cúnúu

(Mr. 9:33-37; Lc. 9:46-48)

¹ Te sáta dúcáⁿ te cue té xica cuu ndihi Jesús ní sáháⁿ-güedé núú-gá, te xáhaⁿ-güedé xii-gá:

—Cachí tnúhu xii-ndí, yoo ío-gá cúnúu núú cué ñáyiú yíndaha ñaha Yá Ndiõxí —càchí-güedé xáhaⁿ-güedé xii-gá.

² Te Jesús ní cana-gá ìⁿ té líhli te ní sanutñí ñaha-gã xii-dé cuádava tnuú-güedé. ³ Te xáhaⁿ-gã xii-güedé:

—Na càchí tnúhu ndáá-í xii-ndo sã ñúú vã dáñá-ndó ncháa sá ñá túú váha quide-ndo, te nduu ndáhú iní-ndó dátñá ndáhú iní té líhli-a, te vã ndúú táhú-ndó ndíhu ndaha ñaha Yá Ndiõxí xii-ndo. ⁴ Te ñáyiú quide datñá quidé tẽ líhli-a ndáhú iní-yu, te ñá túú quide cahnú-yu mée-yu, ñáyiú-án ío cunúú-yu núú ndécú Yá Ndiõxí táxi tnúú-gá. ⁵ Te nchaa ñáyiú na quèheⁿ cuendá ìⁿ landú dátñá té líhli-a cuendá sá cúú iní ñáhá-yu xii-í ñá, te cada iní-yu sá yúhú ní queheⁿ cuendá-yu —càchí-gá xáhaⁿ-gã xii-güedé.

Quihi iní-ó vã cundècu-o ichi cuehé ichi duha

(Mr. 9:42-48; Lc. 17:1-2)

⁶ Te Jesús xáhaⁿ tùcu-gá xii-güedé:

—Te núú ìⁿ té na dàcaháⁿ-dë cue ñáyiú sãndáá iní ñáhá xii-í cadá-yu nándi sá cuéhé sá dúhá, te váha-gá sá ná dàcutu ndeé-güedé ìⁿ yúú yõdó dücúⁿ-dë, te dàquée ñaha-güedé xii-dé xití ndute làmár, te ñá díú sã cundècu-dé ducaⁿ càda-dé. ⁷ Te ndáhú ní cuu nchaa ñáyiú xíndecu ñuyíú-a, chí coo cue

tée dacáháⁿ ñáhá xii-yu cadá-yu nándi sá cuèhé sá dúhá te dacuití sá dúcáⁿ càda-xi! ;Dico ndàhú ní cuu cue tée ducaⁿ na dàcaháⁿ ñáhá xii-yu cadá-yu nándi sá cuèhé sá dúhá!

⁸ Te núu ìⁿ xio ndaha-ndo àdi ìⁿ xio sáhá-ndó quide-xi quide-ndo nándi sá cuèhé sá dúhá, te quehndé-ndó ná cuíta, chi váha-gá sá nánihí tãhú-ndó cuèi na cuíta ìⁿ xio ndaha-ndo àdi ìⁿ xio sáhá-ndó, te ñá díú sã quihíⁿ-ndó ñihí ní ndúú-ndó núú ñùhú núú càyú. ⁹ Te núu ìⁿ xio tinuu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chi váha-gá sá nánihí tãhú-ndó cuèi na cuíta ìⁿ xio tinuu-ndo, te ñá díú sã ndì ndúú xio núú-ndó quihíⁿ-ndó núú ñùhú núú càyú.

*Cuèndá ìⁿ mbéé quiti ní xíta
(Lc. 15:3-7)*

¹⁰ Te vá dáquèe tihú-ndó cuè ñáyiu cùu cuendá-í cuèi cùu-yu ñáyiu ío ndàhú iní-xi. Te na càchí tnúhu-í xii-ndo sã cue espíritu xínú cuèchi núú Yã Ndiòxí, cue espíritu néhé cuèndá ñáhá xii-yu ñuyú-a, ncha-a-ni nduu ncha-a-ni òré ndécú-xí núú Tãtà-í Dútú Ndiòxí Yáá ndécú àndiú. ¹¹ Te ducaⁿ chi yúhú Tée cùu ñani tnáhá-ndó nchaa-ndo véxi-í ñuyú-a dàcácu nihnu-í ñáyiu núú ùhú núú ndàhú, ñáyiu ta xíta nihnu cuáháⁿ.

¹² Te nása sàni iní-ndó cuèndá ìⁿ tée ndècu ìⁿ ciendú mbéé-xi?, chi núu na cuíta ìⁿ-di te dándóo-dé cúmídíco sãhúⁿ cúmí-di cundecu-di ìⁿ yucu te quihíⁿ-dé cúnúndúcú-dé quiti ní xíta-áⁿ. ¹³ Te núu na nánihí-dě-di, te nchòhó sa cùtnuní iní-ndó sã ìo-gá cudíí iní-dé cuèndá quiti ní xíta-áⁿ òré naníhí-dě-di dàcúxí cúmídíco sãhúⁿ cúmí quiti ñá túú ní xíta-áⁿ. ¹⁴ Te ducaⁿ sãtnahá-xi quide Tãtà-ó Dútú Ndiòxí Yáá ndécú àndiú, chi cuiní-gá sá vã cuíta ni ìⁿ cue ñáyiu cùu cuendá-gá.

*Cada càhnu iní-ó sã quidé ñàhã
tnaha ñáyiu-o
(Lc. 17:3)*

¹⁵ Te núu ìⁿ ñáyiu ndècu ndihí-ndo ní quidé-yu ìⁿ sá ñà túú tàú-yu cadá-yu sá cúu-xí-ndó, te cáháⁿ-ndó dõho-yu núú méé núú ìⁿ-ndó ndihí-yu cuèndá sá ná ndixi cuèchi iní-yu sá ñà túú quide váha-yu. Te núu ní tní-yu tnúhu ní xáhaⁿ-ndo xii-yu, te ní ndacu-ndo ñi nacanu ichi-ndõ-yu.

¹⁶ Te núu ñá túú ní cuiní-yu tní-yu tnúhu xãhaⁿ-ndo xii-yu, te nducu-ndo ìⁿ àdi úú tnàhá cue tée canehe núú-güedé cuèndá cundedõho-güedé nãcuáa nduu tnúhu ndãtnúhu-ndo ndihí-yu.

¹⁷ Te tnàhá cue tée-áⁿ cãháⁿ-güedé dõho-yu, dico núu ni tnúhu cãháⁿ cue tée-áⁿ ñà túú ní cuiní-yu tní-yu, te dàtúu-ndo núú dàva-gá ñáyiu ndècu ndihí-ndo ichi Xítóhó Jesucristú cuèndá cutnùní iní-yu nãcuáa quide ñáyiu-áⁿ. Te núu ñáyiu ndècuéchi-áⁿ ñà túú ní cuiní-yu tní-yu tnúhu sã ñi xáhaⁿ dàva-gá cue ñáyiu ndècu ichi-gá, te cada-ná iní-ndó sã cúu-yu ñáyiu ñá túú ndècu ichi Yã Ndiòxí dàtná cue tée cuihna iní-xi quide cobrá ñáhá xii ñáyiu cuèndá impuèstú.

¹⁸ Te na càchí tnúhu ndáá-í xii-ndo sã núu nchòhó ná càchí-ndó sã ndécú cuèchi ñáyiu, te ñiu-ni ducaⁿ cãháⁿ Yã Ndiòxí, àdi cachí-ndó sã ñà túú cuèchi-yu te ñiu-ni ducaⁿ cãháⁿ tucu-gá, te ducaⁿ chi nchòhó quidé-ndó nãcuáa cãháⁿ-gá.

¹⁹ Te na càchí tnúhu-í xii-ndo sã núu úú tnàhá-ndó cùu ìⁿ nuu-ndo cãháⁿ ndihí-ndo Tãtà-í Dútú Ndiòxí Yáá ndécú àndiú xicáⁿ-ndó núú-gã núu ná cúu sã cuiní-ndó, te taxi-gá núu ná cúu sã xicáⁿ-ndó núú-gã. ²⁰ Te núu úú tnàhá-ndó àdi úní tnàhá-ndó ñi natacá-ndó ìⁿ xichi cuèndá sã ñùhú iní ñáhá-ndó xii-í, te xíáⁿ ndécú ndihí ñaha-í xii-ndo — càchí-gá xãhaⁿ-gã xii-güedé.

21 Te té Pèlù ní sáháⁿ ndehe yatni-dé núú Jèsús, te xǎhaⁿ-dè xii-gá:

—Mèstrú, cachí tnúhu xii-í ná daha xito cada càhnu iní-í tǎha ñáyiú-i te núú ìⁿ sá ná cada ñahá-yu xii-í. ¿Cuèdicò úsá xito-ǎⁿ? — cǎchí-dé xǎhaⁿ-dè xii-gá.

22 Te Jèsús ní xǎhaⁿ-gǎ xii-dé:

—Yúhú cǎchí-í sá ñà díú-ní úsá xito cada càhnu iní-n-yu, chí ùnídico úxí xito ndíhi úsá ndíhi úsá xito cada càhnu iní-n-yu —cǎchí-gá xǎhaⁿ-gǎ xii-dé.

Cuèndá téé ñá túú quide cahnu iní tǎha ñáyiú-xi

23 Te xǎhaⁿ tùcu-gá xii-güedé:

—Na càni-í ìⁿ cuèndú núú-ndó nàcuáa tecú tǎníní-ndó nàcuáa cada-xi òré ndíhu ndaha ñàha Yá Ndiòxí xii ñáyiú. ìⁿ téé yíndaha ñàha xii ñáyiú ní sani iní-dé sá cada ndǎá-dé ndíhi cue téé xínu cuechi núú-dé cuèndá nchaa sá tàú-güedé núú-dé. 24 Te òré sa ní ngúndecu túha-dé te ní quexìo ìⁿ téé xínu cuechi núú-dé. Te téé-ǎⁿ tàú-dé cuéhé víhí díhúⁿ núú-dé, chí tàú-dé úxí mìl díhúⁿ sá nání tàlentú. 25 Te téé xínu cuechi-ǎⁿ ñà túú díhúⁿ ndécú ndíhi-dé nacháhu-dé sá tàú-dé núú patróóⁿ-dè-ǎⁿ, núú xiǎⁿ ní táúchíúⁿ tée cùu patróóⁿ-dè-ǎⁿ dico ñàha-güedé xii-dé ndíhi ñàdihí-dé ndíhi cue déhe-dé ndíhi nchaa sá ndécú ndíhi-dé cuèndá ncháa-yu cuú-yu ñáyiú ñá túú tǎhí dàñá quee núú chíúⁿ patróóⁿ-xi, te ducaⁿ te ndéyáhu sá tàú-dé núú patróóⁿ-dè. 26 Te téé xínu cuechi-ǎⁿ ní ngüíñí xítí-dé núú patróóⁿ-dè, te xǎhaⁿ-dè: “Patróóⁿ, cǎháⁿ ndàhú-í núú-n sǎ ìo ndee ìo càhnu cada iní-n sá dúhá tàú-í núú-n, te ñá túú ná caní iní-n chí nacháhu-í nchaa sá tàú-í núú-n”, cǎchí-dé xǎhaⁿ-dè xii patróóⁿ-dè. 27 Te téé cùu patróóⁿ-dè-ǎⁿ ní cundàhú iní ñáhá-dè xii-dé, te ní quide càhnu iní ñáhá-dè, te ní dàñá ñàha-dé cuánuhú-dé. 28 Te téé xínu cuechi-ǎⁿ ní naníhí-dè ìⁿ téé xínu cuechi

ndíhi-dé ichi cuánuhú-dé, te téé ní naníhí-dè-ǎⁿ tàú-dé sacú-ní díhúⁿ núú-dé chí ìⁿ cièndú-ní díhúⁿ denàriú tàú-dé. Te ní tǎnì-dé téé tàú núú-dè-ǎⁿ dǎcuèhné ñáhá-dè xii-dé, te xǎhaⁿ-dè: “Nacháhu sá tàú-n núú-í”, cǎchí-dé xǎhaⁿ-dè.

29 Te téé tàú-ǎⁿ ní ngüíñí xítí-dé núú tée dii núú-xi tàú-dè-ǎⁿ, te xǎhaⁿ-dè: “Cǎháⁿ ndàhú-í núú-n sǎ cada càhnu iní ñáhá-n xii-í sá tàú-í núú-n, te nacháhu cuéé-í nchaa sá tàú-í núú-n”, cǎchí-dé xǎhaⁿ-dè.

30 Dico téé dii núú-xi tàú-dè-ǎⁿ ñà túú ní cuíñí-dé cada ndee iní-dé cundetu-dé nacháhu cuéé téé-ǎⁿ sá tàú-dé, chí ní chíhi ñàha-dé vecaá cuèndá yàcǎⁿ quíhi-dé ndée nacháhu-dé nchaa sá tàú-dé. 31 Te dava-gá cue téé xínu cuechi ní xiní-güedé nàcuáa ní quide téé-ǎⁿ, te ní cudééⁿ-güedé núú-dé, te ní sáháⁿ-güedé ní xítñúhu-güedé téé cùu patróóⁿ-güedé sá dúcǎⁿ ní quide-dé. 32 Te téé cùu patróóⁿ-güedé-ǎⁿ ní cana-dé téé ducaⁿ ní quide-ǎⁿ, te ní xǎhaⁿ-dè: “Yòhó cúú-n ìⁿ téé ìo cuíhna iní-xi xínu cuechi núú-í, chí yúhú ní quide càhnu iní ñàhà-í xii-n cuèndá nchaa sá tàú-n núú-í òré ní cǎháⁿ ndàhú-n. 33 Te tǎhà yòhó tàú-n dúcaⁿ cada-n cada cahnu iní-n tée xínu cuechi ndíhi-n núú-í cuèndá nchaa sá tàú-dé núú-n dàtná ní quide ñàha-í xii-n ní quide càhnu iní-í cuèndá nchaa sá tàú-n”, cǎchí téé cùu patróóⁿ-ǎⁿ xǎhaⁿ-dè xii téé ducaⁿ ní quide-ǎⁿ. 34 Te téé cùu patróóⁿ-ǎⁿ ní cudééⁿ víhí-dè sá dúcǎⁿ ní quide téé-ǎⁿ, te ní táúchíúⁿ-dè dandòho ñàha-güedé xii-dé ndée nacháhu-dé nchaa sá tàú-dé —duha ní caní Jèsús cuèndú núú-güedé.

35 Te xǎhaⁿ tùcu-gá xii-güedé:

—Dàtná ní quide téé cùu patróóⁿ-ǎⁿ ní dándóhó-dè téé tàú núú-dè-ǎⁿ ducaⁿ cada ñàha Tàtá-í Dútú Ndiòxí Yáa ndécú àndíu xii-ndo, te núú vá ní yúhu ní iní-ndó cada cahnu iní-ndó sá quidé ñàha tǎha ñáyiú-ndo xii-ndo —cachí-gá xǎhaⁿ-gǎ xii-güedé.

19

*Jèsús càháⁿ-gá cuendá cue ñáyi
dàña tnah*

(Mr. 10:1-12; Lc. 16:18)

¹ Te sáta ní yáha ducaⁿ ñí cáháⁿ Jèsús, te ní ndee-gá distritú Galileá cuáháⁿ-gá ndàa ingá xio yúte Jòrdán yucu distritú Jùdeá. ² Te ío cuéhé ñáyi nchicúⁿ ñáhá xii-gá cuáháⁿ, te yàcáⁿ ní quide tátna-gá ncha ñáyi cùhú.

³ Te ní quexio ñí úú cue tée cùu fariséu núú ndécú Jèsús xitó ndéé ñáhá-güedé xii-gá ñuu nása cundu tñuhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tñuhú-ndí núú-n, ¿cuu daña ñí tée ñadihí-dé ñuu ndèdani càa ñí sá ñà túú cundáa-yu-áⁿ? —càchí-güedé xáhaⁿ-güedé xii-gá.

⁴ Te Jèsús ní xáhaⁿ-gá xii-güedé:

—Te nchòhó, ¿náa ñà túú dàcuaha-ndo núú tütú Yá Ndiòxí, te diu núú tütú-gá càháⁿ-xi sá cùtnáhá ní cadúha-gá ñáyi, te tée ñadihí ní cadúha-gá-áⁿ? ⁵ Te duha càchí tucu-xi núú tütú Yá Ndiòxí nàcuáa ní cáháⁿ-gá: “Cue tée na ñihí ñadihí-xi te ñí-ná cada-güedé tátá-güedé ndihí náná-güedé, chi ñadihí-ñá-güedé cuu cuu ndihí-güedé, te cada iní-ndó sá ñí-ná yiqui cùnú cuú-yu cundecú-yu”, duha càchí Yá Ndiòxí núú tütú-gá. ⁶ Te xiáⁿ ñuu cada iní-ndó sá cué ñáyi úú-áⁿ ñí-ná yiqui cùnú cúu-yu, te ñà túú-gá ndí ñíⁿ ndí ñíⁿ yiqui cùnú cúu-yu. Núú xiáⁿ ñà túú ndùu váha-xi daña cué tée ñadihí-güedé, chi mee Yá Ndiòxí ní cachí-gá sá cúú úu-yu cundecú-yu —càchí Jèsús xáhaⁿ-gá xii-güedé.

⁷ Te ní xáhaⁿ-güedé xii Jèsús:

—Te núu ducaⁿ, ¿te ná cuendá ndí Moisés ní cachí ndí sá ñuu ñí tée cuiní-dé daña-dé ñadihí-dé, te cuu cadúha-dé ñí tütú núú cáháⁿ-xi sá ñí dáñá-dé ñadihí-dé, te ducaⁿ te

cuu daña ñàha-dé ní cachí ndí vāⁿ? —càchí-güedé xáhaⁿ-güedé xii-gá.

⁸ Te Jèsús ní xáhaⁿ-gá xii-güedé:

—Te ducaⁿ ñí cachí ndí Moisés sá cúú dàña-ndo ñadihí-ndó, chi nchòhó ío sáa iní-ndó, dico ndéé díhna chi ní tecú tñuhu ncha cue tée sá vā dáñá-güedé ñadihí-güedé. ⁹ Dico yúhú càchí tñuhu-í xii-ndo sá ñuu ñí tée na dàña-dé ñadihí-dé te naqueheⁿ-dé ingá ñadihí te ío nèhé quidé-dé, te núu ñà díú cuendá sá cáháⁿ ndihí-aⁿ ingá tée ducaⁿ na dàña ñaha-dé. Te sá dúcáⁿ cuendá-ni na dàña ñí tée ñadihí-dé, te ñí-ni cuéchi cùu-xi ndihí cuéchi quide tée ndéca ñadihí te cáháⁿ ndihí-dé ingá ñadihí —càchí-gá xáhaⁿ-gá xii-güedé.

¹⁰ Te cue tée xica cuu ndihí-gá ní xáhaⁿ-güedé xii-gá:

—Te núu ducaⁿ cùu cuendá cue tée ndihí ñadihí-güedé, te váha-gá sá vā cándeca cue tée ñadihí —càchí-güedé xáhaⁿ-güedé xii-gá.

¹¹ Te Jèsús ní xáhaⁿ-gá xii-güedé:

—Ñà ncháá ñáyi ducaⁿ ndùu táhú-yu cundecú-yu, chi mee-ni ñáyi ní cachí Yá Ndiòxí sá dúcáⁿ tñahí nduu táhú cundecu mee. ¹² Te ío cue tée ducaⁿ tñahí ní nduu táhú-güedé ndéé òré ní cacu-güedé sá vā cándeca-güedé ñadihí. Te ío cue tée ñà ndácú-güedé candeca-güedé ñadihí cuendá sá ñí quide ñaha dàva-gá cue tñaha tée-güedé xii-güedé. Te dava-güedé ñà túú cándeca-güedé ñadihí chi cuiní-güedé sá vā dáñá ndéé-güedé cunu cuéchi-güedé núú Yá Ndiòxí. Te ncha cue tée ducaⁿ ní nduu táhú ñuu Yá Ndiòxí cundecu mee, te váha-ni te núu na cundecu mee-güedé —càchí-gá xáhaⁿ-gá xii-güedé.

*Jèsús xicáⁿ táhú-gá núú Yá Ndiòxí
cuendá landú*

(Mr. 10:13-16; Lc. 18:15-17)

¹³ Te ñíⁿ úú ñáyi ndéca-yu landú líhli cuáháⁿ núú Jèsús, chi cuiní-yu sá téndàha ñaha-gá xii-güexi, te

cácáⁿ táhú-gă núú Yă Ndiöxí cuendá-güexi. Te cue tée xica cuu ndihi-gă ní ngüíta-güedé ténáá ñáhá-güedé xii-yu, te xáhaⁿ-güedé sá vâ dúcáⁿ càdá-yu. ¹⁴ Te Jèsús ní xáhaⁿ-gă xii-güedé:

—Chí dáñá ná quèxi nahi cue landú lihli-áⁿ núù-í-a, te vâ càdí-ndó ìchi-güexi, chi dàtná cúú vâha iní cue landú lihli-áⁿ ducaⁿ cùu vâha iní cue ñáyi yindaha ñaha Yă Ndiöxí—càchí-gă xáhaⁿ-gă xii-güedé.

¹⁵ Te ní tendaha ñàha-gă xii-güexi, te ní xicáⁿ táhú-gă núú Yă Ndiöxí cuendá-güexi, te sátá dúcáⁿ nî quide-gă te ní xica-gă cuáháⁿ-gă.

*Hⁿ tée cuica càháⁿ ndihi-dé Jèsús
(Mr. 10:17-31; Lc. 18:18-30)*

¹⁶ Te ìⁿ tée cuechi nî quexìo-dé núú ndécú Jèsús, te xicáⁿ tnúhú-dé núú-gă, te xáhaⁿ-dê xii-gă:

—Yöhó Mèstrú, cùu-n tée ío vâha iní-xi, te cuíní-í núu vâ cündèe iní-n càchí tnúhu-n nâ cúú sâ vâha cada-í cuendá nduu táhú-í cundecu-í ndihi Yă Ndiöxí ní caa ní quíhíⁿ—càchí-dé xáhaⁿ-dê xii-gă.

¹⁷ Te Jèsús ní xáhaⁿ-gă xii-dé:

—¿Te cùtnuní iní-n nàcuáa ndùu tnúhu càháⁿ-n sâ yúhú vâha iní-áⁿ?, chi ìⁿndii díí-ni Yă Ndiöxí ío vâha iní-gă. Te núu cuíní-n naníhí táhú-n te tnî-n nchàa tnúhu càháⁿ Yă Ndiöxí, tnúhu sá sánú ìchi ñaha xii ñáyi nàcuáa cadá-yu cundecú-yu—càchí-gă xáhaⁿ-gă xii-dé.

¹⁸ Te tée cuechi-áⁿ ní xáhaⁿ-dê xii-gă:

—¿Te ndëndida càa tnúhu càháⁿ Yă Ndiöxí cada-í-i? —càchí-dé xáhaⁿ-dê xii-gă.

Te Jèsús ní xáhaⁿ-gă xii-dé:

—Te duha ní cachí Yă Ndiöxí cada ñáyi: “Vâ cáhni-ndó tnàha ñáyi-ndo, vâ càháⁿ ndihi-ndo ñàdihí te núu ñá díú ñàdihí-ndó cúu-yu, te ducaⁿ-nì nchòhò cue ñáyi díhí tucu vâ càháⁿ ndihi-ndo tée te núu ñá díú yì-ndo cuu-güedé, te vâ dúhú-ndó sâ ndécú ndihi tnaha ñáyi-ndo, vâ dácàcu-ndo

cuèchi neñúú sá cúú-xí tnàha ñáyi-ndo. ¹⁹ Te canehe-ndo sâ yíñùhu núú tâtá-ndó ndihi núú náná-ndó, te cundàhú iní-ndó tnàha ñáyi-ndo dàtná cundàhú iní-ndó mèe-ndo”, duha ní cachí Yă Ndiöxí cada ñáyi —càchí-gă xáhaⁿ-gă xii-dé.

²⁰ Te tée cuechi-áⁿ ní xáhaⁿ-dê xii-gă:

—Nchaa xíáⁿ ní ngüíta-í quidè-í ndéé cùtnàhá cúú lândú-í, ¿te vitna nágá cúmání cada-í-i? —càchí-dé xáhaⁿ-dê xii-gă.

²¹ Te Jèsús ní xáhaⁿ-gă xii-dé:

—Te núu cuíní-n cùu-n ìⁿ tée ío vâha cada ndáá, te cuáháⁿ dico-n nchàa sá ndécú ndihi-n, te díhú-n cuáha táhú-n cuè ñáyi ndàhú, te ducaⁿ te nduu táhú-n ngündecu vâha-n núú ndécú Yă Ndiöxí táxí tnúni-gă. Te sátá ná yâha ducaⁿ càda-n te quixi-n chìtnahá ñáhá-n xii-í—càchí-gă xáhaⁿ-gă xii-dé.

²² Te sá dúcáⁿ nî xáhaⁿ Jèsús xii-dé te ío ní cundiyí-dé, chi ío cuica-dé, te ní xica-dé cuáháⁿ-dê.

²³ Te Jèsús ní xáhaⁿ-gă xii cue tée xica cuu ndihi-gă:

—Na càchí tnúhu ndáá-í xii-ndo sâ ío úhú quindáá iní ñaha cuè ñáyi cuica xii Yă Ndiöxí cuendá ndíhu ndaha ñàha-gă xii-yu. ²⁴ Te na càchí tnúhu tucu-í xii-ndo sâ yáchí-gă yâha ìⁿ càméyu yaú ìⁿ yiqui ticú dácúxí sâ quindáá iní ìⁿ ñáyi cuica Yă Ndiöxí cuendá ndíhu ndaha ñàha-gă xii-yu —càchí-gă xáhaⁿ-gă xii-güedé.

²⁵ Te sá dúcáⁿ nî cáháⁿ Jèsús, xíáⁿ ío ní cuñúhu cue tée xica cuu ndihi-gă, te ní ngüíta-güedé xítnàha-güedé:

—¿Yoo naníhí táhú te núu ducaⁿ vâⁿ? —càchí-güedé xítnàha-güedé.

²⁶ Te Jèsús ní ndacoto-gă núú-güedé, te xáhaⁿ-gă xii-güedé:

—Nchaa ñáyi ñuyú-a chi vâ ndácú-yu ná cadá-yu nàcuáa ndíhu ndaha ñàha Yă Ndiöxí xii-yu, dico mee-gă chi ndacu-gă ndíhu ndaha

ñaha-gá xii-yu chi nchaandi túhú sá vâha ndâcu-gá quidé-gă —câchí-gá xâhaⁿ-gă xii-güedé.

²⁷ Te té Pèlú ní xâhaⁿ-dê xii-gá:

—Nchúhú ní dândõ-ndí nchaa sá ndécú ndihí-ndí, te ní tuha ñaha-ndí xii-n, ¿te ná cúú sã nihí-ndí nduu táhú-ndí sá dúcáⁿ ní quide-ndí-i? —câchí-dé xâhaⁿ-dê xii-gá.

²⁸ Te Jèsús ní xâhaⁿ-gă xii-güedé:

—Na câchí tnúhu ndáá-í xii-ndo sã ná sãá nduu, ndùu saa nchaa sá ío andiú ndihí ñuyíú-a, te dàvá-áⁿ cunucóo yúhú Tée cùu ñaní tnáhá-ndó nchâa-ndo ñⁿ núú xilé váha, te nchaa ñáyiu quini-yu sá ío câhnu cuu-í, te nchòhó cue tée ní tuha ñaha xii-í tnáhá-ndó cùnucóo-ndo núú ñⁿ caa xilé váha ndí úxúú tnáhá-ndó, te xíáⁿ cunucóo-ndo cada ndáá-ndó cuéchi ndí úxúú xichí cue ñáyiu isrâél. ²⁹ Te nchaa ñáyiu na dândóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu ducaⁿ na cada-yu sá cuëndá-í te ío-gá cuéhé sã cuãñaha Yá Ndiõxí cundecu ndihí-yu, te ñá díú-ní xíãⁿ chi tnáhá nduu táhú-yu cundecú-yu ndihí-gá ni caa ni quíhíⁿ. ³⁰ Te dava ñáyiu cùnnu ndecu ichi Yá Ndiõxí vitna, ñáyiu-áⁿ sãá nduu te vá ío-gá cunúú-yu dàtná cúnúú-yu vitna, te dava ñáyiu nchícúⁿ ñá túú cùnnu vitna, ñáyiu-áⁿ sãá nduu te ío cunúú-yu —câchí-gá xâhaⁿ-gă xii-güedé.

20

Cuëndá cue tée quide chiuⁿ

¹ Te xâhaⁿ tucu Jesús xii cue tée xica cuu ndihí-gá:

—Na càni-í ñⁿ cuëndú núú-ndó cuëndá tecú tnúni-ndó nâcuáa cada-xi òré ndihu ndaha ñaha Yá Ndiõxí xii ñáyiu. ñⁿ tée ní xitu-dé yoho yâha stilé, te ñⁿ nduu ní queue-dé nehé-ni cuándúcú-dé cue tée cada chiuⁿ núú dúcáⁿ ní xitu-dé

yoho yâha stilé-áⁿ. ² Te òré ní nihí-dé cue tée cada chiuⁿ-áⁿ, te ní quide ndáá-dé ndihí-güedé sá châhu ñaha-dê xii-güedé ñⁿ díhúⁿ denariú ñⁿ nduu. Te sáta dúcáⁿ te ní tendaha ñaha-dé xii-güedé cuáháⁿ-güedé cada chiuⁿ-güedé núú dúcáⁿ ní xitu-dé yoho yâha stilé-áⁿ. ³ Te dàtnúni ní xica tucu-dé cuáháⁿ-dê dàtná òré caá ñⁿ dàtnéé cuándúcú-gă-dé cue tée cada chiuⁿ núú ní xitu-dé yoho yâha stilé-áⁿ, te ní xiní-dé xínutnii ñⁿ úú cue tée núú yâhu te ñá túú nã chiuⁿ xíquide-güedé.

⁴ Te ní xâhaⁿ-dê xii-güedé: “Ñá túú cùdana cuyáchí-ndó cada-ndo chiuⁿ-í te châhu ñaha-í xii-ndo nâcuáa tàú-xi cunduu-ãⁿ”, câchí-dé xâhaⁿ-dê xii-güedé. Te cue tée-áⁿ ní sâha-güedé tnúhu cada chiuⁿ-güedé te ní xica-güedé cuáháⁿ-güedé. ⁵ Te tée ní xitu yoho yâha stilé-áⁿ ní xica tucu-dé dàtná òré caúxúú nduu cuándúcú-gă-dé cue tée cada chiuⁿ-dê, te ní nihí tucu-dé cue tée cada chiuⁿ. Te ní queue tucu-dé dàtná òré caá úní sacuaa, te diu-ni ducaⁿ ní quide tucu-dé. ⁶ Te ní queue tucu-dé dàtná òré caá úhúⁿ sacuaa cuándúcú-gă-dé cue tée cada chiuⁿ-dê, te ní xiní-dé xínutnii ñⁿ úú cue tée diu-ni núú yâhu-áⁿ te ñá túú nã chiuⁿ quide-güedé, te ní xâhaⁿ-dê xii-güedé: “Sânuu sá nchòhó ní cuu nchâca vitna ñá túú nihí-ndó chiuⁿ cada-ndo”, câchí-dé xâhaⁿ-dê xii-güedé. ⁷ Te cue tée-áⁿ ní xâhaⁿ-güedé xii-dé: “Ñá túú nihí-ndí chiuⁿ cada-ndí chi vá yõ ndúcu ñaha xii-ndí”, câchí-güedé xâhaⁿ-güedé xii-dé. Te ní xâhaⁿ-dê xii-güedé: “Yúhú taxi-í chiuⁿ cada-ndo, te quíhíⁿ-ndó núú ní xitu-í yoho yâha stilé yacáⁿ cada chiuⁿ-ndo, te châhu ñaha-í xii-ndo nâcuáa tàú-xi cunduu”, câchí-dé xâhaⁿ-dê xii-güedé. ⁸ Te sáta ní dáhu nchíanchii, te tée dii chiuⁿ-xi-áⁿ ní xâhaⁿ-dê xii tée tàxi tnuní ñáhá xii cue tée quide chiuⁿ-áⁿ: “Cúñaha xii nchaa cue

tée quide chiuⁿ-áⁿ ná quíxí-güedé te cháhu-n-güedé, te díhna-gá cue tée nchicúⁿ cuiⁿ-ná cuánguihu núú chíúⁿ ngüita-n cháhu-n, te ndéé núú ní ndihi-ná cháhu-n cuè tée cuánguihu díhna nuu-gã núú chíúⁿ”, cächí-dé xáhaⁿ-dè xii tée tàxi tnuní ñáhá xii cue tée quide chiuⁿ-áⁿ. ⁹ Te díhna-gá cue tée cuánguihu caá úhúⁿ sacuaa ní quexio-güedé cuendá cháhu ñaha-dè, te ní cháhu ñaha-dè ñⁿ caa díhúⁿ denàriú xii ñⁿ ñⁿ-güedé. ¹⁰ Te sáta ní cháhu-dé dava-gá cue tée ní quide chiuⁿ. Te ndéé núú ní ndihi-ná ní cháhu-dé cue tée cuánguihu díhna nuu-gã núú chíúⁿ. Te cue tée-áⁿ ní sani iní-güedé sá vái-gã cháhu ñaha-dè xii-güedé, dico ñáhá chi ñⁿ caa-ni díhúⁿ denàriú ní cháhu ñaha-dè xii ñⁿ ñⁿ-güedé. ¹¹ Te cue tée-áⁿ ní queheⁿ cuendá-güedé díhúⁿ-güedé dico ñá túú ní quide váha-xi iní-güedé. ¹² Te ní xáhaⁿ-güedé xii tée dii chiuⁿ-xi ní quide-güedé: “¿Ná cuendá cue tée nchicúⁿ cuiⁿ-ná cuánguihu núú chíúⁿ ñⁿ-ni ní cháhu ñaha-n xii-ndí ndihi-güedé, te ñⁿdii oré duha ní quide chiuⁿ-güedé? Te nchúhú nchàca nchaa ní sahani iní-ndí ní quide chiuⁿ-ndí, te ní ndoho-ndí cahni, te ñⁿ-ni ní cháhu ñaha-n xii-ndí ndihi-güedé”, cächí-güedé xáhaⁿ-güedé xii tée dii chiuⁿ-xi ní quide-güedé. ¹³ Te tée dii chiuⁿ-xi ní quide-güedé-áⁿ ní xáhaⁿ-dè xii ñⁿ tée-áⁿ: “Yòhó, ñá túú quide-í ñⁿ sá ñá túú tàu-í cada-í sá cúu-xí-n, chi ní quide ndáá-ó sã díú-ni ñⁿ díhúⁿ denàriú cháhu ñaha-í xii-n ñⁿ nduu. ¹⁴ Te vitna queheⁿ díhúⁿ cuendá nduu-n te núhú-n, chi yúhú cuiⁿ-í sá ñⁿ-ni cháhu ñaha-í xii-n ndihi cue tée nchicúⁿ cuiⁿ-ná cuánguihu núú chíúⁿ. ¹⁵ Chi yúhú cuu-ni cada-í náni cuiⁿ-í ndihi díhúⁿ-í, ¿àdi dico ñá túú quide váha-xi iní-n sã dúhá cundahú iní-í cue tée-áⁿ ducaⁿ cháhu-í-güedé?”, cächí tée cùu patrón-áⁿ xáhaⁿ-dè

xii tée-áⁿ. Duha ndùu cuendú cání-í núú-ndó. ¹⁶ Te duha càháⁿ-í chí dava ñáiyu cùnuyu ndecu ichi Yá Ndiòxí vitna sáá nduu te vá cùnuyu vihi-gá-yu dàtná cùnùu-yu vitna, te dava ñáiyu ñá túú cùnuyu vitna sáá nduu ño cùnùu-yu. Te ío cuéhé ñáiyu càháⁿ ñáhá Yá Ndiòxí xii-yu dico sacú-ni-yu nduu táhù-yu cundecú-yu ndihi-gá —cächí-gá xáhaⁿ-gã xii-güedé.

Jèsús càháⁿ tucu-gá sá cáhni ñaha-güedé xii-gá

(Mr. 10:32-34; Lc. 18:31-34)

¹⁷ Te ñuhu Jesús ichi cuásaá-gá ñuú Jerusalén ndihi cue tée xica cuu ndihi-gá, te ní cana ñaha-gã xii-güedé ní naníhí tnáhá-güedé ndihi-gá, te ta ndàtnúhu ndihi ñaha-gã xii-güedé cuáháⁿ, te xáhaⁿ-gã xii-güedé:

¹⁸ —Vitna ñuhu-o ichi cuásaá-ó ñuú Jerusalén, te yacáⁿ cuáha cuendá ñáhá-güedé xii yúhú Tée cùu ñani tnáhá-ndó nchàa-ndo núú cuè tée cùu dútú cùnuyu, ndihi núú cuè tée dàcuaha ñaha xii ñáiyu nchaa tnúhu ní chídó tnùní ndíi Moisés. Te diu cue tée-áⁿ cùñaha-güedé xii dava-gá cue tée sá cáhni ñaha-güedé xii-í. ¹⁹ Te cuáha cuendá ñáhá-güedé xii-í núú cuè tée ñá túú cùu cue tée israhél, te cue tée-áⁿ cudíquí ndéé ñáhá-güedé xii-í, te caniha-güedé ndihi ñⁿ, te dàtnùní cata caa ñaha-güedé xii-í núú cùrúxí te núú cùrúxí-áⁿ cuú-í, dico nduu úní sá cùu-í te ndoto-í —cächí-gá xáhaⁿ-gã xii-güedé.

Náná tẽ Jácobó ndihi té Juáa cuiⁿ-aⁿ sá cùnuyu-güedé ndihi Jèsús

(Mr. 10:35-45)

²⁰ Te cue déhe té Zebèdeú té Jácobó ndihi té Juáa ndéca ñaha náná-güedé xii-güedé cuáháⁿ núú ndécú Jèsús, te òré ní quexio-aⁿ ndihi-güedé núú ndécú-gã te ní ngüñí xítí-áⁿ nùú-gã cuendá cuiⁿ-aⁿ ndàtnúhu ndihi ñaha-aⁿ xii-gá cuendá sá cúu-xí cuè déhe-aⁿ.

21 Te cùmání-gǎ cáháⁿ-aⁿ te ní xícáⁿ tnúhú Jèsús núú-aⁿ, te xáhaⁿ-gǎ:

—¿Ná cuíní-n? —cǎchí-gǎ xáhaⁿ-gǎ xii-aⁿ.

Te ní xáhaⁿ-aⁿ xii-gǎ:

—Véxi-í cǎháⁿ ndáhú-í núú-n núu vá cundee iní-n cùnucóo ⁱⁱn déhe-í-a xio cuha-n, te ingá-dé cùnucóo-dé xio dàtni-n na saá nduu cùnucóo-n núú táxi tnùnì-n —cǎchí-áⁿ xáhaⁿ-aⁿ xii-gǎ.

22 Te Jèsús ní xáhaⁿ-gǎ xii úú cue tée-áⁿ:

—Nchòhó, ñá túú cùtnuní váha iní-ndó nàcuáa ndùu sá xícáⁿ-ndó núú-í. ¿Te náa cundee iní-ndó dàndoho ñaha ñáyiú xii-ndo dàtná dandòho ñahá-yu xii-í, te cundee tùcu iní-ndó cǎhni ñahá-yu xii-ndo dàtná cǎhni ñahá-yu xii-í-ǎⁿ? —cǎchí-gǎ xáhaⁿ-gǎ xii-güedé.

Te ní xáhaⁿ-güedé xii-gǎ:

—Cundee iní-ndí yáha-ndí nchaa nàcuáa cǎháⁿ-n-ǎⁿ —cǎchí-güedé xáhaⁿ-güedé xii-gǎ.

23 Te Jèsús ní xáhaⁿ-gǎ xii-güedé:

—Ndáá sá cundee iní-ndó ndòho-ndo nchaa nàcuáa ndòho-í, dïcò sá dúcáⁿ cuíní-ndó sǎ ⁱⁱn-ndó cùnucóo-ndo xio cuha-í, te ⁱⁱn-ndo cùnucóo-ndo xio datni-í, te xíǎⁿ chi ñá díú yúhú tàù-í cachí-í núu sá cúú cùnucóo-ndo àdì sá vǎ cúú cùnucóo-ndo, chi mee Tàtá-í Dútú Ndiòxí cachí-gǎ te núu ná cúú ñáyiú nduu táhú cùnucóo dǎñi-í dàvá-áⁿ —cǎchí-gǎ xáhaⁿ-gǎ xii-güedé.

24 Te òré ní níhí ùxi-gǎ cue tée xica cuu ndihi-gǎ tnúhu nàcuáa ndùu sá cuíní cue tée úú-áⁿ, te ní cudééⁿ-güedé núú cuè tée úú-áⁿ.

25 Te Jèsús ní cana-gǎ nchaa cue tée xica cuu ndihi-gǎ, te ní xáhaⁿ-gǎ xii-güedé:

—Nchòhó xini-ndó sǎ cuè tée yindaha nacióⁿ quidé-güedé sá ìo cùnucóo-güedé, te nchaa dava-gǎ cue tée cùnucóo ndihi-güedé quidé-güedé tnáhá-güedé sá ìo cùnucóo-güedé. 26 Dico nchòhó chi vá dúcáⁿ càda-ndo, chi núu dava-ndo cuíní-ndó cùnucóo-ndo,

te xini ñuhu-xi cuu cuechi núú tnáhá-ndó te vá cáda-ndó sǎ cùnucóo-ndo. 27 Te núu dava-ndo cuíní-ndó quène cáva-ndo, te cuu-ndo dàtná cue ñáyiú ñá túú tnáhí dàñá quee núú chíúⁿ patróoⁿ-xi cuu cuechi núú tnáhá-ndó. 28 Te cada-ndo dàtná quidé yúhú Tée cuu ñani tnáhá-ndó nchaa-ndo, chi yúhú véxi-í ñuyúú-a

dico ñá díú sǎ cùnucóo cuèchi ñáyiú núú-í chi véxi-í sǎ cùnucóo cuèchi-í núú-yu. Te cuú-í ñuyúú-a cuendá vai-yu cácu nihnú-yu núú ùhú núú ndáhú —cǎchí-gǎ xáhaⁿ-gǎ xii-güedé.

Jèsús quidé tǎtna-gǎ núú úú tnáhá cue tée cuáá

(Mr. 10:46-52; Lc. 18:35-43)

29 Te òré ní quee Jèsús ñuú Jericó ndihi cue tée xica cuu ndihi-gǎ, te cuéhé víhí ñáyiú nchicúⁿ ñahá xii-gǎ cuáháⁿ. 30 Te yuhu ìchi cuáháⁿ-gǎ xìnucóo úú tnáhá cue tée cuáá, te cue tée-áⁿ ñi cutnùnì iní-güedé sǎ Jèsús ñuhú-gǎ ichi-áⁿ te ní ngúíta-güedé níhi cǎháⁿ-güedé, te xáhaⁿ-güedé xii-gǎ:

—¿Yòhó Mèstrú, ñani tnáhá ndíi Dàvíí, cundáhú iní ñahá xii-ndí! —cǎchí-güedé xáhaⁿ-güedé xii-gǎ.

31 Te cue ñáyiú tènaá ñahá-yu xii-güedé, te xáháⁿ-yu sá ná càdì-güedé yuhu-güedé, dico uuⁿ-gǎ níhi ní cáháⁿ-güedé, te xáhaⁿ-güedé xii-gǎ:

—¿Yòhó Mèstrú, ñani tnáhá ndíi Dàvíí, cundáhú iní ñahá xii-ndí! —cǎchí-güedé xáhaⁿ-güedé xii-gǎ.

32 Te ní ngúíñi Jèsús te ní cana ñaha-gǎ xii-güedé, te ní xícáⁿ tnúhú-gǎ núú-güedé, te xáhaⁿ-gǎ:

—¿Ná cuíní-ndó càda ñaha-í xii-ndo-í? —cǎchí-gǎ xáhaⁿ-gǎ xii-güedé.

33 Te ní xáhaⁿ-güedé xii-gǎ:

—Mèstrú, cuíní-ndí sǎ cáda tǎtna-n núú-ndí cuendá cundehe-ndí —cǎchí-güedé xáhaⁿ-güedé xii-gǎ.

³⁴ Te Jèsús ní cundàhú iní ñàhá-gǎ xii-güedé, te ní tendaha-gǎ núú-güedé. Te òré-ni ní ndúha núú-güedé, te nchicúⁿ ñàhá-güedé xii-gǎ cuáháⁿ.

21

Jèsús cuánguihu-gǎ ñúú Jerusalén
(Mr. 11:1-11; Lc. 19:28-40; Jn. 12:12-19)

¹ Te òré sa ta cùyatni Jèsús ndihí cue téé xica cuu ndihí-gǎ ñúú Jerusalén, te ní quexio-gǎ ndihí-güedé yatni vií-nǎ ñúú Bèttagé, te xíáⁿ cáá yùcu nani Olivú. Te ní ndatnúhu-gǎ ndihí úú cue téé xica cuu ndihí-gǎ, ² te ní xáhaⁿ-gǎ xii-güedé:

—Chí cuáháⁿ ñúú cáá yàtni yacáⁿ, te òré quexio-ndo yacáⁿ te nanihí-ndó ìⁿ búrru ðíhí ndètníi-di ndihí déhe-di, te nandaxi-ndo-güèdi te candeca-ndo-güèdi quixi. ³ Te núú ió ñáiyu dàdahaⁿ ñaha xii-güedi, te cúñaha-ndo xii-yu sá yǎhú Yaá xicá cùu ndihí-ndo xini ñuhu-í-güedi, te ndihí-ni natendaha-í-güedi núhú-güedi cúñaha-ndo —càchí-gǎ xáhaⁿ-gǎ xii-güedé.

⁴ Te ducaⁿ ní cuu chi ní quee ndáá-xi nàcuáa ní chídó tnùní ìⁿ téé ní xóo cáháⁿ tnúhu Yá Ndiòxí ndéé sanaha núú tütú-gǎ núú càchí-xi:

⁵ Chí cǔñaha cuè ñáiyu ñúú Sión ná cáá cuèndá-yu, chi véxi téé yindaha ñaha xii-yu yòdo-dé ìⁿ búrru líhli déhe ìⁿ búrru quiti sa xido,

te cùu-dé ìⁿ téé ió ndàhú iní-xi. Duha ní chídó tnùní ìⁿ téé ní xóo cáháⁿ tnúhu Yá Ndiòxí ndéé sanaha núú tütú-gǎ.

⁶ Te cue téé xica cuu ndihí-gǎ ní xica-güedé cuáháⁿ-güedé, te ní quide-güedé nàcuáa ní xáhaⁿ-gǎ xii-güedé cada-güedé. ⁷ Te ní ndexio-güedé ndécá-güedé ìⁿ búrru ðíhí ndihí déhe-di, te ní sacáⁿ ndodo-güedé dóo-güedé sátá-güedi, te dàtnúní cuásáá Jèsús sátá ìⁿ-di

ní ngódó ñàha-gǎ xii-di. ⁸ Te ió cuéhé ñáiyu ta sàcáⁿ-yu dóo-yu ichi cuáháⁿ-gǎ cuèndá núú dóo-yu-áⁿ yáha-gǎ ndihí quiti yòdo-gǎ. Te davá-yu xèhndé-yu ndaha yùtnu ñúú tá sàcáⁿ-yu cuáháⁿ. ⁹ Te nchaa ñáiyu yòdonuu núú-gǎ ndihí nchaa ñáiyu nchicúⁿ ndàa sátá-gǎ ní ngüíta-yu níhi càháⁿ-yu, te càchí-yu:

—Ío càhnu cuu Yaá cúú ñàní tnáhá ndíi Dàvií! ¡Te Yá Ndiòxí ió na chindee ñaha-gǎ chí cùu-gǎ Yaá ní tendaha Yá Ndiòxí véxi quide núú-gǎ! ¡Te ndéé nchaa sá ió andíu na càchí-xi sá ío càhnu cuu-gǎ! —duha càchí-yu.

¹⁰ Te òré cuánguihu Jèsús ñúú Jerusalén, te nchaa ñáiyu ñúú-áⁿ ní ngüíta-yu xicuáá-yu, te davá-yu ní ngüíta-yu xitnàhá-yu:

—¿Yoo cùu téé-ǎⁿ? —càchí-yu xitnàhá-yu.

¹¹ Te davá-yu xitnàhá-yu:

—Téé-ǎⁿ cúú-dé Jèsús téé càháⁿ tnúhu Yá Ndiòxí, te cùu-dé téé ñúú Nazàrét ñúú yindèhu distritú Galileá —càchí-yu xitnàhá-yu.

Jèsús ñá túú tnàhá iní-gǎ nàcuáa
xíquide ñáiyu xití veñúhu

(Mr. 11:15-19; Lc. 19:45-48; Jn. 2:13-22)

¹² Te Jèsús cuánguihu-gǎ xití veñúhu càhnu sá ío cùnuu, te xití veñúhu-áⁿ xindecu ñáiyu quide ndáhú nádicó-yu, ndihí ñáiyu xisaaⁿ, te ncháa-yu ní queñuhu ñaha Jèsús xii-yu quehé, te ní dándüá-gǎ mèsá nchaa ñáiyu dàma díhúⁿ, ndihí nchaa xilé sácóo nchihí ñáiyu dico lómá xindecu xití veñúhu-áⁿ. ¹³ Te ní xáhaⁿ-gǎ xii-yu:

—Núú tütú Yá Ndiòxí càháⁿ-xi nàcuáa ní càháⁿ-gǎ, te ní cachí-gǎ: “Vehe-í cúú-xí núú càháⁿ ndihí ñaha ñáiyu xii-í”, duha ní càháⁿ-gǎ càchí-xi núú tütú-gǎ. Dico nchòhó quidé-ndó vehe-gǎ vehe ñadúhú —càchí-gǎ xáhaⁿ-gǎ xii-yu.

¹⁴ Te xíáⁿ ndécú Jèsús ní quexio cue téé cuáá ndihí cue téé yacua,

te ní quide tátna ñaha-gã xii-güedé te ní ndúha-güedé. ¹⁵ Te cue dútú cúnúu ndíhi cue téé dàcuaha ñaha xii ñáyiú nchaa tnúhu ní chídó tnúni ndíi Moisés ní xiní-güedé ní quide Jèsús sá vã yõ tnàhí ndàcu cada, te ndèdóho tucu-güedé níhi xicáháⁿ cue landú xití veñúhu càhnu sá ïo cúnúu-áⁿ, te càchí-güexi: “Ïo càhnu cuu Yaá cúú ñàní tnáhá ndíi Dàvíí”, càchí-güexi. Te ní cudééⁿ-güedé, ¹⁶ te ní xáhaⁿ-güedé xii Jèsús:

—¿Ndèdóho-n nàcuáa càhán cue landú-án ñã? —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Ndèdóho-í, te nchòhó náa ñã túú dàcuaha-ndo núú tütú Yã Ndiõxí núú càháⁿ-xi cuendá cue landú-án, te duha càchí-xi:

Yòhó ní quide-n sã cuè landú vitna sàdi, ndíhi cue dava-gá landú,

chiñuhu ñaha-güexi xii-n nàcuáa tàú-xi cunduu.

Duha càchí-xi núú tütú-gá — càchí-gá xáhaⁿ-gã xii-güedé.

¹⁷ Te xíaⁿ ní dándóo ñaha Jèsús xii-güedé, te ní xica-gá cuáháⁿ-gã ñuú Bètaniá, yàcáⁿ ní xíndecu-gá niú-án.

Jèsús xáhaⁿ-gã xii yutnu ngüxí sá vã cúúⁿ-gã sávidí-xi

(Mr. 11:12-14, 20-26)

¹⁸ Te nduu tnéé-án nehé-ni cuáháⁿ tucu Jèsús ñuú Jerusalén, te ichi ñuhu-gá ní xihí-gá docó. ¹⁹ Te ní xiní-gá ñⁿ yutnu ngüxí núnñi ñⁿ xio yuhu ichi, te ní xica-gá cuáháⁿ ndéhé-gã núu ndèé sávidí-xi, dico ñã túú ñã ndèé chi mee-ni ndàha-xi ndéé. Te ní xáhaⁿ-gã xii yutnu ngüxí-án:

—¡Vitna te vã ñⁿ ndúu-gá cuuⁿ sávidí-n! —càchí-gá xáhaⁿ-gã xii-xi.

Te òré-ni-án ní yíchí yutnu ngüxí-án. ²⁰ Te sá dúcáⁿ ní cuu ní xiní cue téé xica cuu ndíhi Jèsús, te ïo ní cuñúhu-güedé, te ní xicáⁿ tnúhu-güedé núú-gã, te xáhaⁿ-güedé:

—¿Ná cuendá ndéé dàcáⁿ ïo ndíhi ní yíchí yutnu ngüxí-án-i? — càchí-güedé xáhaⁿ-güedé xii-gá.

²¹ Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sã núu nchòhó quindáá ndisa iní-ndó Yã Ndiõxí, te vã caní ñⁿ caní úú iní-ndó, te ñã díú-ní sã ní quide-í-a ní xiní-ndó ndàcu-ndo cada-ndo, chi ndéé tündúú-a xocuñí-xi núú ndécú-xí te núú cūñaha-ndo sã xocuñí-xi te quihíⁿ-xi quée-xi xití lámár. Te díu ducaⁿ càda-xi te núu na quindáá iní-ndó. ²² Te nchaa sá ná càcáⁿ-ndó núú Yã Ndiõxí òré càháⁿ ndíhi-ndo-gã te taxi-gá te núu sàndáá ndisa iní-ndó sã táxi-gã sá xicáⁿ-ndó núú-gã —càchí-gá xáhaⁿ-gã xii-güedé.

Jèsús ndécú ndíhi-gá tnúhu ndee ñí

(Mr. 11:27-33; Lc. 20:1-8)

²³ Te Jèsús cuánguihu-gá xití veñúhu càhnu sá ïo cúnúu danehé-gã ñáyiú, te xíaⁿ ndécú-gã ní quexio cue dútú cúnúu ndíhi cue téé cùu sacuéhé núú ñáyiú isràél, te xáhaⁿ-güedé xii-gá:

—Cuñí-ndí cachí tnúhu-n xì-ndí nása ndúu tnúhu ndee ñí ndécú ndíhi-n núu quide-n nándi sá quidé-n, ¿te yoo ducaⁿ ní taxi tnúhu ndee ñí-án xii-n-i? —càchí-güedé xáhaⁿ-güedé xii-gá.

²⁴ Te Jèsús ní xáhaⁿ-gã xii-güedé:

—Yúhu tnàhá-í cuñí-í càcáⁿ tnúhu-í ñⁿ sã càcáⁿ tnúhu-í núú-ndó, te núu na càchí tnúhu-ndo te cachí tnúhu-í xii-ndo yòo ní taxi tnúhu ndee ñí duha quide-í. ²⁵ Te chí càchí tnúhu xii-í yoo ní táuchíúⁿ ní dácúándüte ndíi Juáá ñáyiú, ¿Yá Ndiõxí ñã cuè téé ñuyúú-a ní táuchíúⁿ dùcaⁿ ní quide ndíi?, te chí càchí tnúhu —càchí-gá xáhaⁿ-gã xii-güedé.

Te ní ngúita-güedé xitnàha-güedé:

—¿Nása cúñaha-o? Chi núu na cúñaha-o sã Yã Ndiõxí ní táuchíúⁿ

dùcaⁿ ní quide ndí Juàá ñá, te que-saha-dé: “¿Ná cuèdá ñá túú ní sàndáá iní-ndó tnúhu ní cáháⁿ ndíí vaiⁿ?”, quesaha-dé. ²⁶ Te núu na cùñaha-o sá cuè ñáyiú ñuyíú-a ní táúchíúⁿ dùcaⁿ ní quide ndíí ñá, te cudééⁿ ñáyiú núú-ó, chi nchaá-yu càchí-yu sá Yá Ndióxi ní xáhaⁿ-gã xii ndíí sá càháⁿ ndíí tnúhu-gá núú ñáyiú —càchí-güedé xitnàha-güedé.

²⁷ Te ní xáhaⁿ-güedé xii Jèsús:

—Ñá túú xìní-ndí yoo ní táúchíúⁿ dùcaⁿ ní dácuándute ndíí Juàá ñáyiú —càchí-güedé xáhaⁿ-güedé xii-gá.

Te ní xáhaⁿ-gã xii-güedé:

—Te núu ducaⁿ te ni yùhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gã xáhaⁿ-gã xii-güedé.

Cuèdá ñá tée ndíhi úú déhe-dé

²⁸ Te Jèsús ní xáhaⁿ tucu-gá xii-güedé:

—Na càni-í ñá cuèndú núú-ndó nàcuáa tecú tnùní-ndó tnúhu càháⁿ-í. ñá tée ndècu úú déhe-dé, te ní xáhaⁿ-dè xii déhe-dé tée sacuéhé-gã: “Yòhó déhe-í, véxi-í càháⁿ ndàhú-í núú-n núu vá cùndèe iní-n cuànùndaha ñaha-n xii-í cada chiuⁿ-o núú ní xitu-í yoho yàha stilé”, càchí-dé xáhaⁿ-dè. ²⁹ Te ní xáhaⁿ déhe-dé xii-dé: “Vá quíhíⁿ-í cada chiuⁿ-í núú chíúⁿ-n”, càchí-dé xáhaⁿ-dè xii tátá-dé. Dico cuèé ní nacani iní-dé te ní sáháⁿ-dé ní quide chiuⁿ-dé núú chíúⁿ tátá-dé.

³⁰ Te tée-án ñá sáháⁿ tucu-dé ní xáhaⁿ-dè xii déhe-dé té líhli-gá núu vá cùndèe iní-dé cuànùndaha ñaha-dé, te ní xáhaⁿ déhe-dé-án xii-dé: “Cuu cuànùndaha ñaha-í xii-n”, càchí-dé xáhaⁿ-dè. Dico ñá túú ní sáháⁿ-dé cada chiuⁿ-dé. ³¹ Te vitna chí càháⁿ núu ndédacáa cue tée úú-án ní quide-güedé sá cuìní tátá-güedé —càchí-gã xáhaⁿ-gã xii-güedé.

Te ní xáhaⁿ-güedé xii-gá:

—Tée cùu sacuéhé-gã, tée ní cáháⁿ ndíhi-dé díhna —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sá ncháá cuè tée cuihna iní-xi quide cobrá ñáhá xii ñáyiú cuèndá impuèstú, ndíhi cue ñáyiú díhí xíndecu ichi díí iní yáchí-gá ndíhu ndaha ñàha Yá Ndióxi xii cue tée-án ndíhi cue ñáyiú díhí-án dàcuúxí nchòhó. ³² Chi ndíí Juàá tée ní xóo dacuàndute ñaha xii ñáyiú ní cáháⁿ ndíí nàcuáa cadá-yu cundecú-yu, dico nchòhó chi ñá túú cuìní-ndó quíndáá iní-ndó nàcuáa ní cáháⁿ ndíí, dico cue tée cuihna iní-xi quide cobrá ñáhá xii ñáyiú cuèndá impuèstú, ndíhi cue ñáyiú díhí xíndecu ichi díí iní, chi sàndáá iní-güedé ndíhi-yu tnúhu ní cáháⁿ ndíí. Te nchòhó cuèi ndèhe-ndo sá sàndáá iní cue ñáyiú-án nchaa tnúhu ní cáháⁿ ndíí, dico ñá túú cuìní-ndó ndíxi cuèchi iní-ndó cuèndá nchaa sá cuèhé sá dúhá quide-ndo cuèndá tñi-ndo tnúhu ní cáháⁿ ndíí —càchí-gã xáhaⁿ-gã xii-güedé.

Cuèdá cue tée cuihna iní-xi
(Mr. 12:1-12; Lc. 20:9-19)

³³ Te xáhaⁿ tucu Jèsús xii-güedé:

—Cundedóho-ndo na càni tucu-í ingá cuèndú núú-ndó cuèndá tecú tnùní-ndó tnúhu càháⁿ-í. ñá tée ní nacúxi-dé mee-ni yoho yàha stilé núú ñúhú-dé, te ní chidoco-dé cuèndá sá vá cúú dàñú, te ní cadúha-dé núú quíhí-dé ndéhé yoho yàha stilé-án òré ná cùu, te ní cadúha-dé ñá xító dùcúⁿ núú cáúndódo cue tée coto nchaa yoho yàha stilé-án.

Te ní sáá ñá nduu quèe-dé quíngaca cuu xica-dé te ní dándóo ndaha-dé sá ñá xitu-dé-án xii ñá úú cue tée xìní tnáhá ndíhi-dé cuèndá cada chiuⁿ-güedé, te ní ndatnúhu-güedé sá òré ná cúú te cuu cuèndá dava-güedé, te ducaⁿ te ní quee-dé cuáháⁿ-dé. ³⁴ Te sáta ñá sáá nduu ñá cuu ndéhé nchaa yoho yàha stilé sá ñá xitu-dé-án, te ní xáhaⁿ-dè xii ñá úú cue tée xìnu cuechi núú-dé: “Chí cuáháⁿ cácaⁿ-ndó sá cúú cuèndá-í núú cuè

tée ní dándõo ndàha-í nchaa yoho yàha stilé sá nǐ xitu-í”, càchí-dé xàhaⁿ-dè xii-güedé. ³⁵ Te cue tée ní dándõo ndaha-dè nchaa yoho yàha stilé sá nǐ xitu-dé-áⁿ nǐ tñi-güedé cue tée xinu cuechi núú-dé-áⁿ, te ìⁿ-dé ní cani-güedé, te ìⁿ-dé ní sahní ñaha-güedé, te ingá-dé ní sáñaha-güedé yúú. ³⁶ Te tée ní xitu yoho yàha stilé-áⁿ nǐ tendaha-dè titní-gá tucu cue tée xinu cuechi núú-dè cuáháⁿ-güedé cuángacáⁿ-güedé sá cúú cuendá-dé núú cue tée ní dándõo ndaha-dè sá nǐ xitu-dé-áⁿ, dico ñi-ni ducaⁿ nǐ quide ñaha cue tée-áⁿ xii cue tée xinu cuechi núú-dé-áⁿ.

³⁷ Te tée cùu xitohó nchaa yoho yàha stilé-áⁿ nǐ sani iní-dé: “Váha-gá nõu tendaha-í déhe-í-a núhú-dé, chi òré quini ñáhá-güedé xii-dé te canehe-güedé sá yíñuhu núú-dé”, duha ní sani iní-dé. Te ní tendaha-dè déhe-dé cuánuhú-dé. ³⁸ Dico òré ní xiní cue tée quide chiⁿ-áⁿ déhe tée cùu xitohó nchaa yoho yàha stilé-áⁿ, te ní xitnáha-güedé: “Tée-áⁿ tée véxi nduu táhú ñuhu-a ndihi nchaa sá cáá núú-xi, dico cahni-o-dé te mee-o nduu táhú-ó sá ndúú táhú-dé”, càchí-güedé xitnáha-güedé. ³⁹ Te ní tñi-güedé tée-áⁿ te ndéca ñaha-güedé cuáháⁿ ìⁿ xio yuhu ñuhu-áⁿ, te ní sahní ñaha-güedé xii-dé —duha cuáháⁿ cuendú ní cani Jèsús núú-güedé.

⁴⁰ Te ní xáhaⁿ tucu Jèsús xii-güedé:

—¿Te nchòhó sa cutnuni iní-ndó nàsa cada ñaha xitohó ñuhu-áⁿ xii cue tée-áⁿ ñá? —càchí-gá xáhaⁿ-gá xii-güedé.

⁴¹ Te cue tée-áⁿ nǐ xáhaⁿ-güedé xii-gá:

—Tée cùu xitohó ñuhu-áⁿ núhú-dé, te vá cundáhú iní-dé cue tée cuihna iní-xi-áⁿ chi cahni ñaha-dé xii-güedé, te dándõo ndaha-dé ñuhu-dé xii cue tée cutnuni iní-dé cada ndáá cuendá ndi tnahá cúúⁿ ndéhé nchaa yoho yàha stilé sá nǐ xitu-dé-áⁿ te cuáñaha-güedé xii-dé

sá cúú cuendá-dé —càchí-güedé xáhaⁿ-güedé xii-gá.

⁴² Te Jèsús ní xáhaⁿ-gá xii-güedé:

—Te nchòhó, náa ñá túú dàcuaha-ndo núú tütú Yá Ndióxi núú càchí-xi:

Yúú sá nǐ dáquéé tihú cue tée dàcaa vehe, ní cuu-xi yúú cúnuu vitna.

Chi mee Dütú Ndióxi ducaⁿ nǐ cachi-gá cunduu, te cùu-xi ìⁿ sá ò cùñúhu-o vitna.

Duha càchí-xi núú tütú-gá. ⁴³ Te duha càháⁿ-í chi Yá Ndióxi cada-gá te vá ñihí-ndó tñuhu ndee iní cundecu ndihi-ndo cuendá ndihi ndaha ñaha-gá xii-ndo, chi tñuhu ndee iní-áⁿ cundecu ndihi cue ñáyiú cada ndáá cuendá ndihi ndaha ñaha Yá Ndióxi xii-yu. ⁴⁴ Te yúú sá cúnuu-áⁿ cúú-xi yñhú, te nchaa ñáyiú ñá túú tñi tñuhu-í cùu-yu dátá ìⁿ ñáyiú ndúá núú yúú-áⁿ te tñahnú duúⁿ-yu, àdi núu na tàú ñáhá-xi xii-yu, te dacàchi duuⁿ ñaha-xi —càchí-gá xáhaⁿ-gá xii-güedé.

⁴⁵ Te sá dúcáⁿ nduu cuendú ní cani Jèsús te cue tée cùu dütú cúnuu-áⁿ, ndihi cue tée cùu fariséú ní cutnuni iní-güedé sá cuendá-güedé ní cáháⁿ-gá. ⁴⁶ Te ní cuini-güedé tñi ñaha-güedé xii-gá òré-áⁿ dico ñá túú ní cùyi-güedé, chi ní yùhú-güedé cue ñáyiú, chi ní cutnuni iní-yu sá cúú-gá ìⁿ tée cáháⁿ tñuhu Yá Ndióxi.

22

Cuendá ìⁿ vico tñándaha

¹ Te Jèsús ní ngüita tucu-gá caní-gá ingá cuendú núú-güedé, te xáhaⁿ-gá:

² —Na caní tucu-í ingá cuendú núú-ndó cuendá tecu tñuni-ndó nàcuáa cada-xi òré ndihi ndaha ñaha Yá Ndióxi xii ñáyiú. ìⁿ tée yíndaha ñaha xii ñáyiú ní quide-dé ìⁿ vico ní dátñándaha-dé déhe ducuⁿ-dé. ³ Te ní tendaha-dé cue tée xinu cuechi núú-dé cuáháⁿ-güedé cuángana-güedé cue

ñáyiú sa ní cáháⁿ-dé cuhuⁿ vico, dico ñáyiú-án ñà túú ní cuíní-yu quíhíⁿ-yu. ⁴ Te ní xáhaⁿ tùcu-dé xii dava-gá cue téé xínu cuechi núú-dé: “Quíhíⁿ-ndó cũñaha-ndo xii cue ñáyiú sa ní cáháⁿ-í cuhuⁿ vico sá sà ní quide túha-í sá cáxi-yu, te sa ní sahni-í ndicutu ndíhi nchaa dava-gá quití ní dánucũhnu-í, te nchaa sa ní quide túha-í, te na quixí-yu cuhúⁿ-yu vico cächí-í cũñaha-ndo”, cächí-dé xáhaⁿ-dë xii cue téé xínu cuechi núú-dë-án. ⁵ Dico ní ìⁿ ñáyiú ní cáháⁿ-dë-án ñà túú ní cuíní-yu quíhíⁿ-yu cuhúⁿ-yu vico. Chi ìⁿ-yu ní sáháⁿ-yu ní quide chiúⁿ-yu núú ñühü-yu, te ingá-yu ní sáháⁿ-yu ní nadicó-yu núú nándi cùu ndáhú quidë-yu. ⁶ Te dava-gá-yu ní tñíⁿ-yu dava cue téé xínu cuechi núú tée quide vico-án, te ní canihá-yu ndéé ní sahni ñàhá-yu xii-güedé. ⁷ Te téé yindaha ñaha xii ñáyiú quide vico-án ñi cudééⁿ víhí-dë sá dúcáⁿ ñi quidë-yu, te ní tendaha-dë cue sandadú-dé ní sáháⁿ-güedé ní sahni-güedé cue ñáyiú ducaⁿ ñi quide-án, te ní sahmi-güedé nchaa vehe càa ñuú-yu. ⁸ Te sátá dúcáⁿ te ní xáhaⁿ-dë xii dava-gá cue téé xínu cuechi núú-dë: “Nchaa sa ndëcu túha, te cue ñáyiú ní cáháⁿ-í cuhuⁿ vico-a ní cùu ñà túú-gã táu-yu sá cühüⁿ-yu. ⁹ Te chí cuáháⁿ ndëni ní cuu te cáháⁿ-ndó nchaa ñáyiú na naníhí-ndó ichi na quixí-yu cuhúⁿ-yu vico-a”, cächí-dé xáhaⁿ-dë xii-güedé. ¹⁰ Te cue téé xínu cuechi-án ñi quee-güedé cuáháⁿ-güedé, te ní cáháⁿ-güedé nchaa ñáyiú ní naníhí-güedé ichi, te cuëi ñáyiú váha iní-xi, te cuëi ñáyiú cuihna iní-xi, te ní chítü-yu núú cúú vico-án.

¹¹ Te sátá dúcáⁿ te téé yindaha ñáyiú quide vico-án ñi quíhu-dé xití vehe ní xindéhé-dë cue ñáyiú ñuhu vico-án, te ní xini-dé ìⁿ tée ñùtnahá tnuú-yu te ñà túú càa dóó-dë dàtná

cáa dóó níhnú cuè ñáyiú ñuhu vico-án. ¹² Te ní xáhaⁿ-dë xii tée-án: “¿Táta, nása ní cuu cuánguñhu-ó ìha, te ñà túú càa dóó-n dàtná cáa dóó níhnú cuè ñáyiú ñuhu vico tnándaha-i?”, cächí-dé xáhaⁿ-dë xii tée-án. Dico tée-án ñà túú ní níhí-dë tñuhu cáháⁿ-dë. ¹³ Te téé yindaha ñáyiú quide vico-án ñi xáhaⁿ-dë xii cue ñáyiú xínu cuechi núú mësá: “Chí tñíⁿ tée-án te dacutu-ndo-dé, te queñuhu-ndo-dë ná quíhíⁿ-dë cundecu-dé ìⁿ xichi núú néé núú ìo ndoho-dé, te yacáⁿ ìo ndáhyú-dé te dicó rúhñú-nã cuu núhu-dé sá sätú iní-dé sá ndóhó-dë”, cächí-dé xáhaⁿ-dë xii cue ñáyiú xínu cuechi núú mësá-án. ¹⁴ Te duha ndüu cuendú cáháⁿ-í chí ìo cuéhé ñáyiú cáháⁿ ñháⁿ Yã Ndióxi xii-yu, dico sacú-ni-yu nduu táhü-yu cundecú-yu ndíhi-gá — cächí-gá xáhaⁿ-gã xii-güedé.

Cuendá impuèstú

(Mr. 12:13-17; Lc. 20:20-26)

¹⁵ Te cue téé cùu fariséú ní sáháⁿ-güedé ìⁿ xichi ní ndatnúhu-güedé ñàcuáa cada-güedé daticánuu-güedé Jësús núú tñuhu cáháⁿ-gá cuendá ducaⁿ ñíhí-güedë ñàcuáa cada-güedé cacáⁿ cuéchi-güedé cuendá-gã. ¹⁶ Te ní tendaha-güedë ìⁿ üú cue téé cündíhi-güedé, ndíhi cue téé cündíhi té Hèrodés cuáháⁿ-güedé núú ndécú Jësús. Te òré ní quexlo-güedé núú ndécú-gã, te ní xáhaⁿ-güedë xii-gá:

—Mèstrú, níhí-ndí tñuhu sá ìo ndáá cáháⁿ-n, te cáháⁿ ndáá-n ñàcuáa cáháⁿ Yã Ndióxi cundecu-o ñüyíú-a, te cuëi ndëda-ni càa ñáyiú ìⁿ-ni cáháⁿ-n ndíhi-yu chí ñà túú quide cuendá-n cuëi ná ñáyiú cùú-yu. ¹⁷ Te cachí tñuhu xii-ndí, núú váha-ni quide-ndí sá cháhu-ndí té Cèsár téé ìo cùnuu cuendá impuèstú án ñhá —cächí-güedé xáhaⁿ-güedë xii-gá.

¹⁸ Dico Jësús ní cutnùni iní-gá sá xító ndéé ñáhá-güedë xii-gá, núú ní xáhaⁿ-gã xii-güedé:

—Nchòhó cue téé dándahú méé-xí sá quidé ndáá te ñá ndáá sá quidé ndáá-ndó, ¿ná cuèndá xító ndèè ñáhá-ndó xii-í? ¹⁹ Chí dánèhé ñáhá xii-í ìⁿ díhúⁿ sá cháhu-ndo cuèndá impuèstú núu nása cāa — cachí-gá xáhaⁿ-gǎ xii-güedé.

Te ní dánèhé ñáhá-güedé xii-gá ìⁿ díhúⁿ sá nání dènaríú. ²⁰ Te òré ní xíní-gá díhúⁿ-áⁿ te ní xicáⁿ tñuhú-gǎ núu-güedé, te xáhaⁿ-gǎ:

—Chí cǎchí tñuhu yoo núu-xi ndèè ndíhi yoo ðíu-xi ndeé — cǎchí-gá xáhaⁿ-gǎ xii-güedé.

²¹ Te ní xáhaⁿ-güedé xii-gǎ:

—Núú tǎ Cèsár ndèè ndíhi ðíu-dé — cǎchí-güedé xáhaⁿ-güedé xii-gǎ.

Te Jèsús ní xáhaⁿ-gǎ xii-güedé:

—Te núu ducaⁿ te chí nácuaáha té Cèsár sá cúu cuèndá-dé, te sá cúu cuèndá méé Yá Ndiòxí te xíáⁿ nácuaáha-ndo-gǎ — cǎchí-gá xáhaⁿ-gǎ xii-güedé.

²² Te cue téé-áⁿ ío ní cuñúhu-güedé sá dúcáⁿ ní cáháⁿ-gǎ, te ní natniⁿ-güedé ichi cuánuhú-güedé.

Cuèndá cue ñáyíu ndoto

(Mr. 12:18-27; Lc. 20:27-40)

²³ Te ðíu-ni nduu-áⁿ ní quexío ìⁿ úú cue téé cùu saducéú núu ndécú Jèsús. Te cue téé-áⁿ ñá túu sàndáá iní-güedé sá ndótó cue ñáyíu ní xíhí, te ní xáhaⁿ-güedé xii-gǎ:

²⁴ —Mèstrú, ndí Moisés ní cachí ndíi sá núu ìⁿ téé ndècu ñadihí-xi cuú-dé te quendóo ñadihí-dé, te núu ñá túu dǎhe-dé ní xǒ ndíhi-aⁿ te téé cùu ñaní-dé naqueheⁿ-dé ñaha ní quendóo quèé-áⁿ cuèndá coo déhe-dé ndíhi-aⁿ cuèndá ñaní-dé téé ní xíhí-áⁿ. ²⁵ Te ñúú-ndí-a ní xíndecu úsá tñahá cue téé mee-ni ndí ñaní-güedé. Te téé díhna ní níhí ñadihí-dé te ñá túu ní cùdí-dé cundecu-dé chí ní xíhí-dé, te ní ìⁿ dǎhe-dé ñá túu ní xǒ ndíhi ñadihí-dé-áⁿ. Te téé cùu uú ní nàqueheⁿ-dé ñaha ní quendóo quèé-áⁿ. ²⁶ Dico ní xíhí tucu-dé, te ní ìⁿ tucu déhe-dé ñá túu ní xǒ ndíhi ñaha-áⁿ, te ðíu-ni ducaⁿ ní yáha téé cùu uní, te ní xínu ndí

úsá-güedé ní cándeca ñaha-güedé xii ñaha-áⁿ dícó ðíu-ni ducaⁿ ní xíhí-güedé. ²⁷ Te ndeé núu ní

ndíhi-ná te ní xíhí tñahá ñadihí-áⁿ. ²⁸ Te na sáá nduu ndòto-güedé ndíhi ñaha-áⁿ, ¿te ndèdacāa-güedé ñadihí-güedé cuu-aⁿ-í? Chí ndí òré òré ní cándeca ñaha-güedé xii-aⁿ — cǎchí-güedé xáhaⁿ-güedé xii-gǎ.

²⁹ Te Jèsús ní xáhaⁿ-gǎ xii-güedé:

—Ní xíta nchòhó tñuhu cāháⁿ-ndó, chí ñá túu xíní-ndó nácuaá cāháⁿ Yá Ndiòxí núu tütú-gǎ, te ní ñá túu cùtnuní iní-ndó sá díú-gǎ ndácú-gǎ quidé-gǎ nchaandi tñuhú sá váha. ³⁰ Te na cǎchí tñuhu-í xii-ndo sá òré ná sáá nduu ndòto nchaa ñáyíu ní xíhí, te dàvá-áⁿ vá yǒo-gǎ dasaⁿ dǎhe yoco-xi chí vá yǒo-gǎ candeca tñaha, chí cuu-ná-yu dàtná cue espíritú xínu cuèchi núu Yá Ndiòxí.

³¹ ¿Te náa ñá túu quíde cuèndá-ndó nácuaá cāháⁿ Yá Ndiòxí núu tütú-gǎ núu cāháⁿ-gǎ cuèndá cue ñáyíu ní xíhí-áⁿ? Te duha cǎchí-gǎ: ³² “Yúhú cùu-í Ndiòxí tǎ Àbrahám, ndíhi té Isáac, ndíhi té Jácób”, duha cǎchí-gǎ núu tütú-gǎ. Te cue téé-áⁿ chí cuèí ní xíhí-güedé núu ñúyíú-a, dícó sá cúu-xí Yá Ndiòxí chí ndècu vívú-ní-güedé. Chí ðíu-gǎ cúu-gǎ Ndiòxí mee-ni cue ñáyíu xíndecu vívú, te ñá túu cùu-gǎ Ndiòxí cue ñáyíu ñá túu ndècu vívú — cǎchí-gǎ xáhaⁿ-gǎ xii-güedé.

³³ Te sá dúcáⁿ ní cáháⁿ-gǎ ní xí-gǎ cue téé-áⁿ, te ío ní cuñúhu nchaa ñáyíu cuèndá sá ío váha ndùu tñuhu ní cáháⁿ-gǎ.

Tñuhu sá ío-gǎ cùnùu

(Mr. 12:28-34)

³⁴ Te cue téé cùu fariséú ní xíní-güedé ní sadí Jèsús yuhu cue téé cùu saducéú, chí ñá túu ní níhí-gǎ-güedé tñuhu cùñaha-güedé xii-gǎ, te cue téé cùu fariséú-áⁿ ní natacá-güedé te cuáháⁿ-güedé núu ndécú Jèsús. ³⁵ Te ìⁿ téé cùu fariséú-áⁿ ío váha cùtnuní iní-dé

nàcuáa ndùu nchaa tnúhu ní chídó tnùní ndíi Moisés te xito ndeé-dé Jèsús, te xáhaⁿ-dê xii-gá:

³⁶ —Mèstrú, cachí tnúhu ndédacáa tnúhu sá ní chídó tnùní ndíi Moisés io-gá cúnùu cada-o —cachí-dé xáhaⁿ-dê xii-gá.

³⁷ Te Jèsús ní xáhaⁿ-gã xii-dé:

—Duha càháⁿ tnúhu sá io-gá cúnùu: “Cuu iní-ndó Dütú Ndióxi Yáa cúu Ndióxi-ndó ní yuhu ní iní-ndó, te caní iní-ndó càda-ndo datná cùini mée-gã, te mee-ni tnúhu váha caní iní-ndó nàcuáa cuu vii cuu váha-ndo núu-gã”, ³⁸ duha càháⁿ tnúhu sá io-gá cúnùu. ³⁹ Te duha càháⁿ tucu ingá tnúhu cùu uú sá io cúnùu, te sa yatni ìⁿ-ni cùu-xi ndíi tnúhu díhna nuu, te càchí-xi: “Cuu iní-ndó tnàha ñáyi-ndo datná cúu iní-ndó mée-ndo”, duha càháⁿ tnúhu cùu uú-án. ⁴⁰ Te cuèndá úú tnúhu-a ní cáá nchaa tnúhu ní càháⁿ ndíi Moisés nàcuáa cada ñáyi, te diu-ni cuèndá úú tnúhu-a ní cáá tnúhu ní càháⁿ nchaa cue téé ní xóo càháⁿ tnúhu Yá Ndióxi ndéé sanaha —càchí-gá xáhaⁿ-gã xii-güedé.

Yoo cùu Xítohó Jesucristú

(Mr. 12:35-37; Lc. 20:41-44)

⁴¹ Te ndècu ducaⁿ-ni cue téé cùu fariséú núu ndécú Jèsús. ⁴² Te ní xicáⁿ tnúhú-gã núu-güedé, te xáhaⁿ-gã:

—Cuíní-í cachí tnúhu-ndo yòo déhe-xi cùu Cristú Yáa tendaha Yá Ndióxi quixi ñuyú-a —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Déhe ndíi Dàvií cúu Yáa-án —càchí-güedé xáhaⁿ-güedé xii-gá.

⁴³ Te Jèsús ní xáhaⁿ-gã xii-güedé:

—¿Te nása càchí-tu-ndo sã dèhe ndíi Dàvií cúu Cristú Yáa tendaha Yá Ndióxi quixi ñuyú-a, te mee ndíi Dàvií-án ní dácáhu iní ñáhá Espiritú Yá Ndióxi xii ndíi, te ní cachí ndíi sá Cristú Yáa tendaha Yá Ndióxi quixi ñuyú-a cùu-gá Xítohó ndíi? Te duha ní cachí ndíi:

⁴⁴ Dútú Ndióxi ní xáhaⁿ-gã xii Yáa cúu Xítohó-í:

“Ngóo xio cùha-í, te yúhú cada-í te nchaa sá cúu úhú iní ñáhá xii-n canehe-xi sá yíñuhu núu-n.”

Duha ní xáhaⁿ Dütú Ndióxi xii Yáa cúu Xítohó-í, càchí ndíi. ⁴⁵ ¿Te nása cùu Cristú déhe ndíi Dàvií, te mee ndíi ní cachí ndíi sá cúu-gã Xítohó ndíi? —càchí Jèsús xáhaⁿ-gã xii-güedé.

⁴⁶ Te ní ìⁿ-güedé ñá túu-gã ní níhí-güedé tnúhu cùñaha-güedé xii-gá. Te ndéé nduu-án ñà túu-gã ní cùyi-güedé ná tnúhu cacáⁿ tnúhú-güedé núu-gã.

23

Jèsús càháⁿ-gá cuèndá cue téé cùu fariséú ndíi cuèndá cue téé dàcuaha ñaha xii ñáyi

(Mr. 12:38-40; Lc. 11:37-54; 20:45-47)

¹ Te Jèsús ní càháⁿ ndodo-gá núu nchaa ñáyi, ndíi núu cuè téé xica cuu ndíi-gã, te xáhaⁿ-gã:

² —Cue téé dàcuaha ñaha xii ñáyi nchaa tnúhu ní chídó tnùní ndíi Moisés, ndíi cue téé cùu fariséú ndécú ndíi-güedé tnúhu ndee iní càháⁿ-güedé nchaa tnúhu sá ní chídó tnùní ndíi Moisés-án.

³ Te cada-ndo nàcuáa dànehé ñáhá-güedé xii-ndo, dico vá cáda-ndó datná xíquide-güedé, chi tucu ndùu tnúhu càháⁿ-güedé, te tucu quide-güedé. ⁴ Te quide-güedé datná quidé ñáyi dàcuído ìⁿ tnaha ñáyi-xi ìⁿ sá io véé, te mée-yu ní lùha ñá túu cuíní-yu cuidó-yu. Te ducaⁿ sãtnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ní lùha ñá túu cuíní-güedé cada-güedé nàcuáa dànehé ñáhá-güedé xii-ndo.

⁵ Te mee-ni ndùcu-güedé nàcuáa quide-güedé cuèndá quini ñáyi sá io cùu cahnu-güedé. Te ndéé xindá sá ndéé ìⁿ úú tnúhu Yá Ndióxi tneé-güedé ndíi ndaha-güedé, te tnàhá iní-güedé sá io-gá cunduu quèhéⁿ xindá-án dàcuúxi xindá

dava-gá ñáyiu. Te tnàhá tucu iní-güedé sá ío-gá cunduu nàni núú dǒó sácuiñnu-güedé dàcúúxí dǒó sácuiñnu dava-gá-yu. ⁶ Te ndi tnahá òré sácǒo vico, òré quiñu-güedé mèsá caxi-güedé te ío-gá cǔdǎ iní-güedé cunucóo-güedé núú xilé núú sácǒo cue téé cǔnuu-gá, te ðiu-ni ducaⁿ quide tucu-güedé cuéi xití veñúhu. ⁷ Te nchaa núú xicá cǔu-güedé cuiní-güedé sá ndiñi tnúhu yíñúhu cáháⁿ ndiñi ñaha ñáyiu xii-güedé, te cuiní tucu-güedé sá cǔñahá-yu xii-güedé mèstrú.

⁸ Dico nchòhó vá cǔñaha-ndo xii ñáyiu sá cǔñahá-yu mèstrú xii-ndo, chi nchòhó ñⁿ-ni cǔu-ndo ndecu-ndo, chi ducaⁿ ñⁿdii-ni yúhú Yaá ní tendaha Yá Ndiǒxí véxi ñuyíú-a cǔu-í Mèstrú ndécú ndiñi ñaha-í xii-ndo. ⁹ Te ñⁿdii-ni Dútú Ndiǒxí Yaá ndécú àndiñu cuu-gá Tátá-ndó, núú xǎⁿ vá cáháⁿ-ndó sá dǎva cue téé ñuyíú-a cǔu-güedé tátá-ndó. ¹⁰ Te ni vá cání iní-ndó càda-ndo nacuáa cáháⁿ ñáyiu sá cǔnùu-ndo, chi ñⁿdii-ni yúhú Crístú Yaá ní tendaha Yá Ndiǒxí véxi ñuyíú-a cǔnuu-í. ¹¹ Te ñáyiu ío-gá cǔnùu ndecu ndiñi-ndo, ñáyiu-áⁿ cǔú-yu ñáyiu xinu cuechi núú-ndó. ¹² Te nchaa ñáyiu quide cahnu mee-xi ñáyiu-áⁿ vá cǔú-yu ñáyiu cǔnuu, te nchaa ñáyiu ñá túú quide cahnu mee-xi ñáyiu-áⁿ cunùu-yu.

¹³ Te nchòhó cue téé dàcuaha ñaha xii ñáyiu nchaa tnúhu ní chidó tnùní ndíi Moisés, ndiñi nchòhó cue téé cǔu fariséú, cǔu-ndo cue téé ío dǎndahú méé-xí sá quidé ndǎá te ñá ndǎá sá quidé ndǎá-ndó, te ndàhú ní cuu-ndo chi sǎdí-ndó ichi ñáyiu ñá dǎñá-ndó ndiñu ndaha ñaha Yá Ndiǒxí xii-yu, te ni mèe-ndo ñá túú quide-ndo nacuáa ndiñu ndaha ñaha-gá xii-ndo, te ni dǎva-gá cue ñáyiu cuiní sá ndiñu ndaha ñaha-gá xii-yu ñá dǎñá-ndó.

¹⁴ Te nchòhó cue téé dàcuaha ñaha xii ñáyiu nchaa tnúhu ní chidó tnùní ndíi Moisés, ndiñi nchòhó cue

tée cǔu fariséú, cǔu-ndó cuè téé ío dǎndahú méé-xí sá quidé ndǎá te ñá ndǎá sá quidé ndǎá-ndó, te ndàhú ní cuu-ndo chi quèndeé-ndó vèhe cue ñáyiu quèé, te ío naha cáháⁿ ndiñi-ndo Yá Ndiǒxí cuèndá cuiní-ndó sá vá yǒo cutnùní iní-xi nǎcuáa quide-ndo. Te sá dúcáⁿ quide-ndo te ío-gá ndoho-ndo núú ùhú núú ndàhú dàcúúxí dǎva-gá ñáyiu.

¹⁵ Te nchòhó cue téé dàcuaha ñaha xii ñáyiu nchaa tnúhu ní chidó tnùní ndíi Moisés, ndiñi nchòhó cue téé cǔu fariséú, cǔu-ndó cuè téé ío dǎndahú méé-xí sá quidé ndǎá te ñá ndǎá sá quidé ndǎá-ndó, te ndàhú ní cuu-ndo chi sǎhni iní-ndó cuáháⁿ-ndó ndèñi ní cuu dàcaháⁿ-ndó ñáyiu cuèndá cuiní-ndó tníⁿ-yu ichi ndècu-ndo. Te òré ná xǎnu iní-yu tníⁿ-yu ichi ndècu-ndo-áⁿ te uuⁿ-gá cuíta niñnú-yu dàcúúxí mèe-ndo.

¹⁶ Te nchòhó cǔú-ndó dǎtná cue ñáyiu cuáá, chi ñá cǔtnùní iní-ndó nǎcuáa canu ichi-ndo ñáyiu, te ndàhú ní cuu-ndo chi càchí-ndó: “Ñⁿ ñáyiu na càcunehe veñúhu càhnu sá ío cǔnuu òré cuiní-yu cutnùní iní tnàha ñáyíú-yu sá ndǎá cadá-yu ñⁿ sá sání iní-yu cadá-yu, te vá cǔú cuèchi xii-yu cuéi vá cadǎ-yu. Dico núu na càcu nehé-yu díhúⁿ cuááⁿ yíhí xití veñúhu-áⁿ te cuu cuèchi xii-yu te núu vá cadǎ-yu sá ní cachí-yu cadá-yu”, duha càchí-ndó.

¹⁷ Nchòhó cǔú-ndó cuè téé ío ñⁿ díquí-xi, te cǔu-ndo datná cue ñáyiu cuáá chi ñá tècú tnùní-ndó! Te vá càchí-ndó sá ío-gá cǔnùu díhúⁿ cuááⁿ dàcúúxí veñúhu, chi ðiu cuèndá veñúhu-áⁿ ní cuu í díhúⁿ cuááⁿ-áⁿ. ¹⁸ Te càchí tucu-ndo: “Ñⁿ ñáyiu na càcunehe xito núú sácǒó sá ndúú tǎhú Yá Ndiǒxí òré cuiní-yu cutnùní iní tnàha ñáyíú-yu sá ndǎá cadá-yu ñⁿ sá sání iní-yu cadá-yu, te vá cǔú cuèchi xii-yu cuéi vá cadǎ-yu, dico núu na càcu nehé-yu sá ndúú tǎhú Yá Ndiǒxí yódó núú

xíto-áⁿ te cuu cuéchi xií-yu te núu vá cáda-yu sá ní sani iní-yu cada-yu”, duha cáchi-ndó. ¹⁹ ¡Te cùu-ndo cue téé ío ñi díquí-xi, te cùu-ndo datná cue ñáyiú cuàá chi ñá təcú tnùní-ndó! Te vá cáni iní-ndó sá ío-gá nándihi sá ndúú tǎhú Yá Ndiǒxí sácódó núú xíto núú sácódó tnàhí sá ndúú tǎhú-gá-áⁿ dácúúxí mèè xíto-áⁿ. ²⁰ Chi nchaa ñáyiú ducaⁿ càcunehe xíto-áⁿ, te tnàhá-ni sá yódó núú-xi càcu nehé-yu òré ducaⁿ càháⁿ-yu. ²¹ Te nchaa ñáyiú ducaⁿ càcunehe veñúhu càhnu sá ío cùnuu te ñá díú mèè-ni veñúhu càcu nehé-yu òré ducaⁿ càháⁿ-yu, chi tnàhá-ni Yá Ndiǒxí Yaá cúú cuendá veñúhu-áⁿ cácu nèhé-yu òré ducaⁿ càháⁿ-yu. ²² Te nchaa ñáyiú càcunehe andiú cuendá cutnùní iní tnàha ñáyiú-yu sá ndàá cada-yu ñⁿ sá sání iní-yu cada-yu, te ñá díú mèè-ni andiú cacu nehé-yu chi tnàhá-ni núú núcõo Yá Ndiǒxí táxi tnùní-gá cácu nehé-yu òré ducaⁿ càháⁿ-yu, te tnàhá méé-gá cácu nèhé-yu òré ducaⁿ càháⁿ-yu.

²³ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue téé cùu fariséú, cúú-ndó cuè téé ío dándahú méé-xí sá quidé ndáá te ñá ndáá sá quidé ndáá-ndó. Te cuèi núú úxi xichi yúcú mენტá nihí-ndó, te sáñaha-ndo ñⁿ xichi xii Yá Ndiǒxí, te díu-ni ducaⁿ quíde-ndo yúcú nání ànis, ndihi yúcú nání còminú, dico ndàhú ní cuu-ndo chi ñá túú quíde cuendá-ndó nàcuáa càháⁿ nchaa tnúhu sá ío-gá cúnúu sanu ichi ñaha xii-ndo, te tnúhu-áⁿ càchí-xi sá ío xini ñuhu-xi cada ndáá-ndó cùndecu-ndo, te cundàhú iní-ndó cuè tnaha ñáyiú-ndo, te quíndáá iní-ndó Yá Ndiǒxí, te cada-ndo nchaa nacuáa ndúu tnúhu càháⁿ-ndó, te nchaa tnúhu-áⁿ cúú-xí tnúhu sá ío cùnuu xini ñuhu-xi cada-ndo nacuáa càháⁿ-xi, dico vá dáñá ndèé-ndó càda-ndo nchaa dava-gá nacuáa càháⁿ tnúhu sá sánú ichi ñaha xii-ndo. ²⁴ ¡Te nchòhó cúú-ndó dàtná cue ñáyiú

cuàá, chi ñá túú cùtnuní iní-ndó nàcuáa canu ichi-ndo ñáyiú, chi quíde cuendá-ndó mèè-ni nchaa tnúhu sá ñá túú ío cùnuu, dico nchaa tnúhu sá ío-gá cúnúu xini ñuhu-xi cada cuendá-ndó ñá túú quíde cuendá-ndó!

²⁵ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue téé cùu fariséú, cùu-ndo cue téé ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná cue ñáyiú nàquete sátá-ni tásáⁿ ndihi sátá-ni còhó te xití-xi càndehe caduha-ni. Te ducaⁿ sátnahá-xi cùu-ndo chi mee-ni sá ndécú ndihi tnaha ñáyiú-ndo ñuhu iní-ndó, te nándi dándahú-ndó-yu te quèhe-ndo sá ndécú ndihi-yu. ²⁶ Te nchòhó cue téé cùu fariséú, cúú-ndó dàtná cue ñáyiú cuàá, chi ñá túú cùtnuní iní-ndó nàcuáa ndúu sá quidé-ndó. Te ío xini ñuhu-xi sá cáda-ndó nàcuáa ndúu ndoo nduu nine iní-ndó cuendá ndacu-ndo càda-ndo sá vaha, te xíáⁿ núu chí cáda dàtná xíquide ñáyiú nàquete ndaa xití tásáⁿ ndihi ndaa xití còhó.

²⁷ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue téé cùu fariséú, cùu-ndo cue téé ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná núú yíndúxi ndíyi núú ñi cuáha vii te ní nacáhyú sá cuixíⁿ, dico xití yaú-áⁿ chi càndehe caduha chi mee-ni yíqui ndíyi ñuhu. ²⁸ Te ducaⁿ sátnahá-xi cùu-ndo chi sanu sá cúú-ndó cuè téé vaha dico iní-ndó chi mee-ni sá cuèhé sá dúhá ñuhu, te ío dándahú-ndó mèè-ndo sá quidé ndáá-ndó te ñá ndáá sá quidé ndáá-ndó.

²⁹ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue téé cùu fariséú, cúú-ndó cuè téé ío dándahú méé-xí sá quidé ndáá te ñá ndáá sá quidé ndáá-ndó. Te ndàhú

ní cuu-ndo chi càduhá-ndo nchàa núú nĩ nguĩndũxi cue tée ní xóo cáháⁿ tnúhu Yá Ndiõxí ndéé sanaha, te ío vii quide-ndo nchaa núú sã nĩ cuáha núú yĩndũxi cue ñáyiú ní quide váha ní xĩndecu ñuyiú-a. ³⁰ Te cãchĩ-ndó: “Te núú dícó nchoo ní xĩndecu-o cũtnhá ní xĩndecu cue ñaní tnáhá-ó ndéé sanaha, te vá chítnhá-ó-güedé cahni-o cue tée ní xóo cáháⁿ tnúhu Yá Ndiõxí dává-áⁿ ní cùu”, duha cãchĩ-ndó. ³¹ Te sã dúcáⁿ cãháⁿ-ndó, te xiãⁿ cũtnúni sã ñĩ-nĩ cùu-ndo ndihĩ cue ñaní tnáhá-ndó cue tée ní xĩndecu ndéé sanaha, cue tée ní sahani ñaha xii cue tée ní cáháⁿ tnúhu Yá Ndiõxí dává-áⁿ. ³² Te núú ducaⁿ te chí dãxĩnu cava chiúⁿ ní tausaha-güedé.

³³ Te nchòhó cúú-ndó cue tée ío cuihna iní-xi, chi cùu-ndo datná cóó dééⁿ! Te nchòhó vá nihĩ-ndó nãcuáa cada-ndo cãcu nihnu-ndo núú úhú núú ndàhú. ³⁴ Te cuendá xiãⁿ núú tendaha-ĩ cue tée cãháⁿ tnúhu Yá Ndiõxí quixi núú-ndó, ndihĩ cue tée cùu mestrú danèhé ñáhá xii-ndo tnúhu-gá, ndihĩ cue tée ío váha cũtnúni iní-xi cuendá cáháⁿ-güedé tnúhu-gá núú-ndó. Dico nchòhó chí da cùu úhú iní-ndó-güedé, chí dava-güedé cahni-ndo-güedé, te dava-güedé cata caa-ndo-güedé núú cùrúxi, te dava-güedé cani-ndo-güedé xiti veñúhu, te ndi tnahá ñuú ndi tnahá ñuú quĩhĩⁿ-ndó nãnducu-ndo-güedé cuendá cada úhú iní-ndó-güedé.

³⁵ Te sã dúcáⁿ ná càda-ndo, te ndadĩquí-ndó cue tée ní quide ndáá ní xĩndecu ní xihĩ ní sahani ñaha cue ñaní tnáhá-ndó. Te ndéé ndíi Abél tée ío váha ní quide ndáá ní xĩndecu ní sahani-güedé ndadĩquí-ndó, ndihĩ nchaa dava-gá cue tée ní sahani-güedé, ndihĩ ndéé ndíi Zacàriá déhe ndíi Berèquiás tée ní sahani-güedé ndéé núú nĩ ndihĩ-ná ndadĩquí-ndó, te ndíi-áⁿ nĩ sahani-güedé mei tnúú veñúhu càhnu sã ío cùnuu ndihĩ xito núú sácóó sã ndúú táhú Yá Ndiõxí, te nchaa cue tée-áⁿ ndadĩquí-ndó

chí datná tnúhu mee-ndo nĩ sahani-ndo cue tée-áⁿ, chí diu-ni ñaní tnáhá mèe-ndo ducaⁿ ní sahani ñaha xii-güedé. ³⁶ Te na cãchĩ tnúhu ndáá-ĩ xii-ndo sã nchàa cue tée ní quide ndáá ní xĩndecu ní sahani-güedé, nchaa cue tée-áⁿ ndadĩquí nchaa ñáyiú ndècu vitna —cãchĩ-gá xãhaⁿ-gã xii-güedé.

Jèsús cãháⁿ-gá cuendá ñáyiú ñuú Jerusàlén

(Lc. 13:34-35)

³⁷ Te xãhaⁿ Jèsús xii ñáyiú ñuú Jerusàlén:

—Nchòhó ñáyiú ñuú Jerusàlén sãhni-ndo cue tée ní tendaha Yá Ndiõxí véxi cãháⁿ tnúhu-gá núú-ndó, te mee-ni ndihĩ yúú sãhni-ndó dává-güedé. Te yúhú titní xito ní cuini-ĩ coto ñaha-ĩ xii-ndo datná quidé nchũxi xito-güedi déhe-güedi sãquíhi-güedi xiti ndíxiⁿ-güedi, dico nchòhó ñá túú ní cuini-ndó, te diu-ni ducaⁿ sãni iní-ĩ ndéé vitna! ³⁸ Te na cãchĩ tnúhu ndáá-ĩ xii-ndo sã sã nduu te ío ndàhú yãha ñuú-ndó, te vá cùndecu-gá-ndó. ³⁹ Te na cãchĩ tnúhu tucu-ĩ xii-ndo sã vã quini ñáhá-gá-ndó xii-ĩ, dico sãá nduu quini ñáhá tucu-ndo, te dává-áⁿ cãchĩ-ndó: “Ío càhnu cuu Yáá ní tendaha Dütú Ndiõxí véxi”, duha cãchĩ-ndó —cãchĩ-gá xãhaⁿ-gã xii-yu.

24

Jèsús cãchĩ-gá sã ngóyo veñúhu
(Mr. 13:1-2; Lc. 21:5-6)

¹ Te Jèsús ní quee-gá veñúhu càhnu sã ío cùnuu, te mei òré ní queheⁿ-gá ichi quĩhĩⁿ-gá ñĩ xichi, te ní sãndehe yatni cue tée xica cuu ndihĩ-gá dñĩ-gá, te xãhaⁿ-güedé xii-gá:

—Cundehe veñúhu-a ñã ío váha ní sãá —cãchĩ-güedé xãhaⁿ-güedé xii-gá.

² Te Jèsús ní xãhaⁿ-gã xii-güedé:

—Na cãchĩ tnúhu ndáá-ĩ xii-ndo sã nchãá sã ndéhé-ndó-ã vitna sãá

nduu te vá cùndùu-gá-xi dàtná cáá-xí vitna, chi ni ìⁿ-gá yúú vǎ códó nchìhi tnaha-xi chi ndìhi ngoyo — cǎchí-gá xǎhaⁿ-gǎ xii-güedé.

Nàcuáa cada-xi nduu ta cùyatni naa ñuyúú-a
(Mr. 13:3-23; Lc. 21:7-24; 17:22-24)

³ Te Jèsús ní sǎá-gá ndìhi cue téé xìca cuu ndìhi-gá yucu Òlívú, te xíáⁿ nǐ ngóo-gá te núú núcòo-gá-áⁿ nǐ sǎháⁿ cue téé xìca cuu ndìhi-gá, te dayuhu nǐ xǎhaⁿ-güedé xii-gá:

—Cuìní-ndí cachí tnúhu-n nǎ nduu dùcaⁿ cada-xi ngoyo veñúhu cǎhnu sǎ Ìo cùnuu, ndìhi nándi cùu sǎ cádá-xí òré sa ta cùyatni nduu quixi tucu-n ñuyúú-a, ndìhi òré sa ta cùyatni naa-xi —cachí-güedé xǎhaⁿ-güedé xii-gá.

⁴ Te Jèsús ní xǎhaⁿ-gǎ xii-güedé:

—Ío quihi iní-ndó cùndecu-ndo cuendá sǎ vǎ yòo dandàhú ñáhá xii-ndo. ⁵ Chi ío cuéhé cue téé coo ñuyúú, te danàni-güedé méé-güedé dàtná nǎmì-í, te cachí-güedé: “Yúhú cùu-í Crístú Yaá ní tendaha Yǎ Ndiòxí véxi ñuyúú-a”, duha cachí-güedé. Te sǎ dúcáⁿ cǎháⁿ-güedé te ío vǎi ñáyíu dandàhú-güedé. ⁶ Te níhí-ndó tnúhu nǎa-güedé nděni ní cuu, dico vá yùhú-ndó chi dacuítí sǎ dúcáⁿ càda-xi, dico vátá sǎá-gá nduu nǎa ñuyúú òré ducaⁿ càda-xi. ⁷ Chi cue téé ìⁿ nàcióⁿ nǎa-güedé ndìhi cue téé ìngá nàcióⁿ, te titní ñuú ngúíta-güedé nǎa-güedé, te titní xichi ñuyúú coo tnamá, te titní tucu xichi ñuyúú quixi cuéhé, te titní tucu xichi ñuyúú Ìo níhi tnáa. ⁸ Te nchaa xǎⁿ cuu-xi tnúndòho sǎ vitná vǎha vǎha quèsaha sǎ cúú-xí cuè ñáyíu xǐndecu ñuyúú.

⁹ Te cue ñáyíu na cùu úhú iní ñáhá xii-ndo cuáha cuèndá ñáhǎ-yu núú cuè téé cùchiuⁿ cuendá caniha-güedé xii-ndo, te dava-ndo cǎhni ñaha-güedé, te nchaa ñáyíu cuu úhú iní ñáhǎ-yu

xii-ndo sǎ cuèndá-í. ¹⁰ Te dàvá-áⁿ Ìo vǎi ñáyíu dàñá-yu sǎ sǎndáá iní-yu Yǎ Ndiòxí, te ngóo-yu cuu úhú iní tnáhǎ-yu, te cuáha cuèndá tnáhǎ-yu núú cuè téé cùchiuⁿ. ¹¹ Te ío vǎi cue téé cachí-güedé sǎ cǎháⁿ-güedé tnúhu Yǎ Ndiòxí te ñǎ ndáá sǎ cǎháⁿ-güedé tnúhu-gá, te ducaⁿ Ìo vǎi ñáyíu dandàhú-güedé. ¹² Te dàvá-áⁿ cunuu mēe-ni nchaa sǎ cuéhé sǎ dúhá càdá-yu, te vǎi-yu vá cúú ìní-gá-yu tnàha ñáyíu-yu. ¹³ Dico nchaa ñáyíu na càda ndee-ni iní canchicúⁿ nihnu ñaha-ni xii-í, ñáyíu-áⁿ naníhí tǎhú-yu. ¹⁴ Te nihí ñuyúú quíhíⁿ ñáyíu cǎháⁿ-yu tnúhu vǎha, tnúhu sǎ cǎháⁿ nàcuáa ndíhu ndaha ñàha Yǎ Ndiòxí xii ñáyíu, te sǎtá ná nihí nchaa ñáyíu tnúhu-áⁿ te naa ñuyúú.

¹⁵ Te ndíi Dániél téé ní xóo cǎháⁿ tnúhu Yǎ Ndiòxí ndéé sanaha nǐ chídó tnúni ndíi cuèndá ìⁿ sǎ dáquèe tihú Yǎ Ndiòxí cundecu ìⁿ xichi núú nǐ cuu íí, te xǎⁿ cada-xi sǎ vǎ cùndecu-gá ni ìⁿ ñáyíu xíáⁿ. Te cada cuèndá vǎha-ndo nàcuáa ní cǎháⁿ ndíi, chi nduu na quìní-ndó xǎⁿ cundecu-xi núú dúcáⁿ nǐ cuu íí, ¹⁶ te dàvá-áⁿ nchaa ñáyíu xǐndecu distritú Júdeá xini ñùhu-xi cunú-yu quíhíⁿ-yu xití yucu. ¹⁷ Te nchaa ñáyíu ndáa ndódó ñiquí véhé-xí vǎ ndíhu-gá-yu vehé-yu quehéⁿ-yu ìⁿ ndachíuⁿ-yu canehé-yu quíhíⁿ. ¹⁸ Te nchaa ñáyíu cuáháⁿ yucu vá nùhú-gá-yu vehé-yu cúnúquehéⁿ-yu dóo-yu. ¹⁹ Te ndàhú ní cuu nchaa ñáyíu ñíhí ñúhú dēhe-xi, ndìhi cue ñáyíu ñíhí xǐndeca déhe vitna sǎdi na sǎá nduu dùcaⁿ cada-xi! ²⁰ Te nchòhó, chí cǎcáⁿ tǎhú núú Yǎ Ndiòxí cuèndá sǎ vǎ dúcáⁿ ndòho-ndo yóo quidé víxiⁿ-xi, te ni vǎ dúcáⁿ ndòho-ndo nduu cuu-xi nduu ndetatú-ndó. ²¹ Chi dàvá-áⁿ coo tnúndòho cǎhnu vihi ñuyúú, te vátá ìⁿ ndúu-gá coo tnúndòho cǎhnu vihi-áⁿ ndéé cùtnáhá ní ngáva ñuyúú, chi ñíu-ni dàvá-áⁿ coo tnúndòho cǎhnu vihi-áⁿ, te ni núú cuáháⁿ núú véxi

vá cóo-gă tnúndòho-án. ²² Te Yá Ndiöxí cächí-gá sá vâ ïo vâi nduu coo tnúndòho cahnu vihi-án sâ cuendá nchaa ñáyiú ní cáháⁿ-gá cundecu ndihí-gá. Chi núu vâi nduu na coo tnúndòho-án te vâ yôo cácu nihnu.

²³ Te núu ió ñáyiú cächí-yu xii-ndo: “Chí cündèhe iha, chi iha ní quexìo Cristú Yáá ní tendaha Yá Ndiöxí véxi ñuyíú-a”, àdi cächí-yu: “Chí cündèhe yacáⁿ chi yacáⁿ ndécú-gă”, cächí-yu ña. Te vâ quëndáá iní-ndó tnúhu càháⁿ-yu.

²⁴ Chi coo cue tée cächí-güedé sá cúu-güedé Yáá ní tendaha Yá Ndiöxí véxi ñuyíú-a, te dava-güedé cächí-güedé sá cúu-güedé cue tée càháⁿ tnúhu Yá Ndiöxí dico ñá ndáá sá cúu-güedé cue tée càháⁿ tnúhu-gá, te cada-güedé titní núu sâ vâ yôo tnàhí ndàcu cada cuendá dandáhú-güedé ñáyiú. Te caní iní-güedé dandáhú-güedé ndéé cue ñáyiú ní cáháⁿ Yá Ndiöxí cundecu ndihí-gá. ²⁵ Te duha nduu tnúhu càháⁿ-í dátúha ñaha-í xii-ndo. ²⁶ Te núu cächí-yu xii-ndo: “Xití yucu-án ní quexìo Yáá ní tendaha Yá Ndiöxí véxi ñuyíú-a”, cächí-yu. Te vâ quëndáá iní-ndó quihíⁿ-ndó, àdi cächí-yu: “Vehe-án ndécú Yáá ní tendaha Yá Ndiöxí véxi ñuyíú-a”, cächí-yu. Te vâ quëndáá iní-ndó tnúhu càháⁿ-yu. ²⁷ Chi dàtná xini nchaa ñáyiú quide-xi oré sâá ndúté dáyehé-xi ní càa xico ñuyíú ducaⁿ càda-xi oré quixi tucu yúhú Tée cùu ñani tnáhá-ndó nchaa-ndo chi nchaa-yu quini ñáhá-yu xii-í. ²⁸ Te nchòhó xini-ndó sâ ncháá núu yúcu yiqui cunú ní xihí te yacáⁿ tàcá nchaa ndixíí xéxi-güedí.

Nàcuáa cada-xi òré quixi tucu Tée cùu ñani tnáhá cuè ñáyiú

(Mr. 13:24-37; Lc. 21:25-33; 17:26-30, 34-36)

²⁹ Te na yâha-ni coo tnúndòho cahnu vihi-án, te vâ dáyehé-gá nchícanhii, te ni vâ dáyehé-gá yóó,

te ngoyo nchaa chódini ndéé andiú, te quidi-xi andiú ³⁰ nàcuáa cutnuni iní ñáyiú sâ sâ véxi yúhú Tée cùu ñani tnáhá-yu nchaa-yu. Te cue ñáyiú nihí ñuyíú ndáhyú-yu sâ ndihú iní-yu òré ducaⁿ càda-xi, te nchaa-yu quini ñáhá-yu xii-í quee-í andiú quixi-í ichi xití vícò, te quini-yu sâ ïo càhnu cuu-í, te quide-í nchaa sâ vâha. ³¹ Te tauchiuⁿ-í cue espíritu xínú cuèchi núu-í níhi tiú-xi cútú nadatácá-xi nchaa ñáyiú ní cáháⁿ-í chitnahá ñáhá xii-í xindecu ní càa xico ñuyíú.

³² Te nchòhó sa xini-ndó nàcuáa quide yutnu nguxí, chi yutnu-án ndúú yùte núu dité-xi te nàtáhú ndaha-xi. Te òré ducaⁿ quide-xi te cächí-ndó sâ sâ ní cuyatni nuu cahni. ³³ Te ñu-ni ducaⁿ sàtnahá-xi cada-xi ñuyíú-a òré ná quini-ndó càda-xi nchaa nàcuáa ní cáháⁿ-í, te cutnuni iní-ndó sâ sâ ní cuyatni vii-nâ nduu nâ ñuyíú. ³⁴ Te na cächí tnúhu ndáá-í xii-ndo sâ òré vátá cúu-gá nchaa ñáyiú xindecu ñuyíú-a vitna, te cada-xi nchaa nàcuáa ní cáháⁿ-í. ³⁵ Te andiú ndihí ñuyíú-a chi ndihí nihnu-xi, dico tnúhu-í chi vâ ndihí nihnu-xi chi cùu-xi tnúhu ndáá cuiti.

³⁶ Dico ñá túú cutnuni ná nduu quixi tucu-í, te ní ñá túú cutnuni ná òré chi vâ yôo xini, te ni cuè espíritu xínú cuèchi núu Yá Ndiöxí ñá túú xini-xi ná nduu quixi-í, te ní mee yúhú Tée cùu Déhe Dútú Ndiöxí ñá túú xini-í ná nduu quixi tucu-í, chi ñndií díni mee-gă xini-gá núu ná nduu quixi-í.

³⁷ Te nduu na quixi tucu yúhú Tée cùu ñani tnáhá-ndó nchaa-ndo ñuyíú-a te cada-xi dàtná ní quide-xi cútñahá ní xindecu ndií Nöé. ³⁸ Chi nchaa ñáyiú ní xindecu dàvá-án òré vátá ndáá-gă ndute ñuyíú, te xéxi-yu xihí-yu quidé-yu, te davá-yu ió-yu vico tnândaha, te davá-yu dásáⁿ-yu déhe yòcò-yu candeca ñaha téé, te ducaⁿ-ni xíquidé-yu ndéé ní sáá nduu cuanguee té Nöé xití bàrcú. ³⁹ Te ñá

túu ní cùtnuní iní-yu nàcuáa cada-xi ñuyú ndéé ní sáa nduu ní ngúita-xi ní cuuⁿ dáu ní ndaa ndute ñuyú ní dánáa ñaha-xi xii-yu. Te ñu-ni ducaⁿ sãtnahá tucu-xi cada-xi nduu na quixi tucu yúhú Tée cùu ñaní tnáhã-yu nchaá-yu ñuyú-a, chi nduu ñà túu nã yíhí iní-yu te quixi tucu-í. ⁴⁰ Te dàvã-án nũu úu tnáhã cue tée yíhí-güedé xití yucu, te ñⁿ-dé ndanchita te ñⁿ-dé quendóo. ⁴¹ Adi úu ñáyiu ñíhí nchicõ-yu ñⁿ-ni vehe, te ñⁿ-yu ndanchita te ñⁿ-yu quendóo.

⁴² Te duha ndũu tnúhu càháⁿ-í cuendá nchòhò cundecu túha-ndo, chi ñà túu xini-ndó nã òré quixi tucu yúhú Yaá cúu Xitohó-ndó. ⁴³ Te nchòhò xini-ndó sã nũu ñⁿ tée cùu xitohó vehe xini-dé ná òré cúu-xi niú quihu ñadúhú vehe-dé duhu-güedé, te quíhi iní-dé cundecu-dé cuendá sã vã dáñã-dé quihu ñadúhú-ãⁿ vehe-dé duhu-güedé, dico ñà túu xini-dé. ⁴⁴ Te duha càháⁿ-í chi nchòhò xini ñũhu-xi cundecu túha-ndo, chi na cuáhãⁿ òré ñà túu nã yíhí iní-ndó quexio yúhú Tée cùu ñaní tnáhã-ndó nchãa-ndo.

*Cuendá ñⁿ tée xinu cuechi
(Lc. 12:41-48)*

⁴⁵ Te na caní-í ñⁿ cuendú núu-ndó. ñⁿ tée xinu cuechi núu ñⁿ patróoⁿ cúu-dé ñⁿ tée ío váha tecú tnúni, te quide ndáá-dé ndécú-dé. Te ñⁿ xito ní dándõo ndaha ñaha patróoⁿ-dè xii-dé nchaa cue ñáyiu ndècu vehe-dé cuendá coto ñaha-dè xii-yu cuãñaha-dè sã cáxi-yu òré tàu-xi caxi-yu, te tée cùu patróoⁿ-án nĩ quee-dé cuáhãⁿ-dè. ⁴⁶ Te váha táhú tée xinu cuechi-án te núu ndècuu-dé quidé-dé nchaa nàcuáa ní xãhãⁿ patróoⁿ-dè cada-dé mei òré ní nasáa patróoⁿ-dè-án. ⁴⁷ Te na cãchí tnúhu ndáá-í xii-ndo sã tée cùu patróoⁿ-dè-án cuñaha-dè xii-dé sã quindãha-dé nchaa sã ndécú ndíhi-dé. ⁴⁸ Dico núu tée xinu cuechi-án ní cùu-dé ñⁿ tée cuíhna iní-xi, te ngóo-dé cani

iní-dé sã cùyãa patróoⁿ-dè vá nasáa ndíhi-dé. ⁴⁹ Te ngúita-dé cani-dé nchaa dava-gã cue ñáyiu xinu cuechi ndíhi-dé, te ngóo-dé caxi-dé coho-dé cada-dé ndíhi nchaa cue tée quihu. ⁵⁰ Te ñⁿ nduu òré ñà túu yíhi iní-dé nasáa patróoⁿ-dè, ⁵¹ te ío dandõho ñaha patróoⁿ-dè xii-dé, chi daquihíⁿ ñáhã-dè xii-dé núu xindecu cue ñáyiu ní cachí sã nĩ quide ndáá te ñà ndáá sã nĩ quide ndáá-yu. Te ducaⁿ sãtnahã-xi dandõho ñaha Yá Ndiõxí xii ñáyiu, chi daquihíⁿ ñáhã-gã xii-yu ñⁿ xichi núu ío ndohó-yu te yácãⁿ ío ndáhyú-yu, te dicó rúhñú-nã cuu núhu-yu sã sätú iní-yu sã ndóhõ-yu —cãchí-gã xãhãⁿ-gã xii-güedé.

25

Cuendá úxí ñáyiu ñíhí

¹ Te xãhãⁿ tucu Jesús xii-güedé:

—Na caní-í ñⁿ cuendú núu-ndó nàcuáa tecú tnúni-ndó nàcuáa cada-xi òré ndíhu ndaha ñaha Yá Ndiõxí xii ñáyiu. Te úxí tnáhã ñáyiu ñíhí ñáyiu cuechi nĩ quehéⁿ-yu lintèrnã-yu, te cuáhãⁿ-yu ñⁿ xichi núu cóo vico tnãndaha cuendá cundetú-yu quexio tée tnãndaha.

² Te úhúⁿ ñáyiu cuechi-ãⁿ ío váha cùtnuní iní-yu, te úhúⁿ-yu ñáhã.

³ Te ndi úhúⁿ ñáyiu cuechi dùcaⁿ ñà túu cùtnuní iní-xi-áⁿ ñà túu ní cãnehé-yu sã ndèe lintèrnã-yu.

⁴ Dico ndi úhúⁿ ñáyiu cuechi cùtnuní iní-xi-áⁿ nèhé-yu sã ndèe lintèrnã-yu. ⁵ Te tée tnãndaha-ãⁿ cùyãa-dé quexio-dé núu ndétú ñáhã-yu-ãⁿ, te nini dùcaⁿ cuyaa-dé ní tnã ñaha sãní xii-yu ní xidí-yu.

⁶ Te cùu-xi datná dava niú níhi ní cáhãⁿ dava-gã ñáyiu, te cãchí-yu: “Sa véxi tée tnãndaha, chí táquèe quehé queheⁿ cuendã-ndó-dè”, cãchí-yu. ⁷ Te ndi úxí ñáyiu cuechi-ãⁿ nĩ ndacóo-yu quide túha-yu lintèrnã-yu. ⁸ Te ndi úhúⁿ ñáyiu cuechi ñà túu cùtnuní iní-xi-áⁿ nĩ xãhãⁿ-yu xii cue ndi

ùhúⁿ ñáyiu cùtnuní iní-xi-áⁿ: “Chí táxi nùu luha sá ndëe lintérná-ndó ná ndëe lintérná-ndí chí ñá cuíní-xi cáyú mee-ni ndàhvá”, cächí-yu xähãⁿ-yu. ⁹ Te cue ñáyiu cuechi cùtnuní iní-xi-áⁿ ñí xähãⁿ-yu: “Vá táxi nùu-ndí chí vá tnàhá canehe chiùⁿ mee-ndí, te váha-gá chí cuàháⁿ cuaaⁿ-ndo nùú cuè ñáyiu xídícó cuèndá sá vã cúmãní xii-ndo, te vá cúmãní xii nchúhú tucu”, cächí-yu xähãⁿ-yu. ¹⁰ Te ñini cuàháⁿ ndí ùhúⁿ ñáyiu ducaⁿ ñà túú cùtnuní iní-xi-áⁿ cuãguaáⁿ-yu sá ndëe lintérnã-yu ní quexìo téé tnándaha. Te ndí ùhúⁿ ñáyiu cuechi cùtnuní iní-xi-áⁿ ñí queheⁿ cuèndá ñáhã-yu xii-dé, te cuãnguìhu ndìhi ñàhá-yu xii-dé núú cóo víco tnándaha, te sátá dúcáⁿ te ní nandedí yuyèhe. ¹¹ Te òré ní nasáá cue ñáyiu cuechi ñáyiu ní sãnguaaⁿ sá ndëe lintérná-xi-áⁿ, te ní ngúíta-yu càháⁿ-yu xñutnii-yu ndaa sátá yuyèhe ndaa quehé, te xähãⁿ-yu xii téé tnándaha-áⁿ: “¡Tãta, nacaáⁿ yuyèhe na quìhu-ndí!”, cächí-yu xähãⁿ-yu xii-dé. ¹² Te téé tnándaha-áⁿ ñí xáhaⁿ-dë xii-yu: “Na cächí tnúhu ndáá-í xii-ndo sá nchòhò ñá túú tau-ndó quìhu-ndo víco-a, chí ñá túú tnàhá tnúhu ndìhi ñàha-ndo xii-í”, cächí-dé xáhaⁿ-dë xii-yu —cächí Jèsús xáhaⁿ-gã xii-güedé.

¹³ Te xáhaⁿ tucu Jèsús xii-güedé:

—Ío quìhi iní-ndó cùndecu-ndo, chí ñá túú xìní-ndó nã nduu, te ñí ñà túú xìní-ndó nã òré quixi tucu yúhú Téé cùu ñaní tnàhá-ndó nchàa-ndo —cachí-gá xáhaⁿ-gã xii-güedé.

Cuèndá cue téé ní ndóo ndaha dñhúⁿ

(Lc. 19:11-27)

¹⁴ Te xáhaⁿ tucu Jèsús xii-güedé:

—Na càni tucu-í ingá cuèndú núú-ndó nàcuáa tecú tnùní-ndó nàcuáa cada-xi òré ndìhu ndaha ñàha Yá Ndióxi xii ñáyiu. ñíⁿ téé sa ñùhu ichi-ná-dé sá cáca-dé quingaca cuu xica-dë, te ní cana-dé

cue téé xinu cuechi núú-dë cuèndá dándóo ndaha ñàha-dé dñhúⁿ-dë xii-güedé.

¹⁵ Te nàcuáa ndùu chiuⁿ guide ñíⁿ ñíⁿ-güedé te ducaⁿ dñhúⁿ ñí sãñaha-dë xii-güedé, te ñíⁿ-dé ní sãñaha-dë ùhúⁿ tnàhá dñhúⁿ sã ío yahu nani talentú, te ingá-dé ní sãñaha-dë úú tnàhá dñhúⁿ-ãⁿ, te ingá-dé ní sãñaha-dë ñíⁿ dñhúⁿ-ãⁿ, te dãtnuní ní quee-dé cuàháⁿ-dë. ¹⁶ Te téé ní queheⁿ cuèndá ùhúⁿ tnàhá dñhúⁿ sã nani talentú ní guide-dé ndáhú ndìhi-xi te ní ñíhi tucu-dé ùhúⁿ-gá tucu tnàhá dñhúⁿ-ãⁿ. ¹⁷ Te dñu-ñí ducaⁿ ñí guide tucu téé ní ñíhi úú dñhúⁿ sã nani talentú-áⁿ, chí ní guide-dé ndáhú te ní ñíhi tucu-dé úú-gá tucu tnàhá. ¹⁸ Dico téé ní ñíhi ñíⁿ-ñí dñhúⁿ-ãⁿ chí da ní chiváha-dé dñhúⁿ patróoⁿ-dë, chí ní xete-dé ñíⁿ yaú te ní chindúxi-dé.

¹⁹ Te ní cuu cuéhé nduu sá ñí quee patróoⁿ-güedé-áⁿ ní sãngaca cuu-dé, te ní nasáá-dé te ní ngúíta-dé quídé ndáá-dé ndìhi-güedé cuèndá dñhúⁿ sã ñí dándóo ndaha ñàha-dé xii-güedé. ²⁰ Te téé ní quendóo ndaha ùhúⁿ tnàhá dñhúⁿ-ãⁿ ñí xáhaⁿ-dë xii patróoⁿ-dë: “Patróoⁿ, náu ùhúⁿ tnàhá dñhúⁿ sã ñí dándóo ndaha ñàha-n xii-í-a, te ní sãháⁿ-í ní guide-í ndìhi-xi ndáhú te ní chídó-xí ùhúⁿ-gá tucu tnàhá, te náu-a naqueheⁿ cuèndá-n”, cächí-dé xáhaⁿ-dë xii patróoⁿ-dë. ²¹ Te téé cùu patróoⁿ-dë-áⁿ ñí xáhaⁿ-dë xii-dé: “Ío váha ní guide-n, te vitna quide ñàha-í xii-n ñíⁿ téé váha téé quide ndáá, te sá sàcú dñhúⁿ ñí dándóo ndaha ñàha-í xii-n te ní guide ndáá-n, te sá dúcáⁿ ñí guide-n te vai-gá taxi cuèndá ñàhá-í xii-n. Te vitna cuu cundecu-n nùú ndécù-í, te ío cudíi ñíⁿ-ó cùndecu ndìhi tnaha-o”, cachí téé cùu patróoⁿ-dë-áⁿ xáhaⁿ-dë xii-dé. ²² Te sátá dúcáⁿ te téé ní quendóo ndaha úú tnàhá dñhúⁿ sã nani talentú-áⁿ ñí xáhaⁿ-dë xii patróoⁿ-güedé: “Patróoⁿ, náu úú

tnàhá díhú sã ní dándõ ndaha ñaha-n-a, te ní sáháⁿ-í ní quide-í ndihi-xi ndáhú, te ní chídó-xí ùú-gá tucu tnàhá, te náu-a naqueheⁿ cuendá-n”, cächí-dé xãhaⁿ-dë xii patróonⁿ-güedë. ²³ Te ní xáhaⁿ tõe cùu patróonⁿ-án xii-dé: “Ío váha ní quide-n, te vitna quide ñaha-í xii-n ìⁿ tõe váha tõe quide ndáá, te sá sàcú díhúⁿ ní dándõ ndaha ñaha-í xii-n te ní quide ndáá-n, te sá dúcáⁿ ní quide-n te vãi-gá taxi cuendá-í. Te vitna cuu cundecu-n núú ndécú-í, te ío cudíⁿ iní-ó cundecu ndihi tñaha-o”, cächí tõe cùu patróonⁿ-án xãhaⁿ-dë xii-dé. ²⁴ Te tõe ní ndóo ndaha ìⁿ-ni díhúⁿ-án ní xáhaⁿ-dë xii tõe cùu patróonⁿ-dë-án: “Patróon”, yúhú sa nàha-í sá yòhó cúu-n ìⁿ tõe ndücu mee-ni sá cúu-xí mèe-xi te tàhu-n chiuⁿ cuáháⁿ nchúhú cue tõe xinu cuechi núu-n sácáⁿ-ndí triú, te òré ná nàtaxi tñaha-ndí, te yòhó dícó-nã náqueheⁿ cuendá-n tàxúha-n. ²⁵ Te núu xíãⁿ ní yùhú-í cada-í ndáhú ndihi díhúⁿ-n, te ní sáháⁿ-í ní xete-í ìⁿ yaú te ní chindúxi-í, te náu díhúⁿ-n-án naqueheⁿ cuendá-n”, cächí-dé xãhaⁿ-dë xii tõe cùu patróonⁿ-án. ²⁶ Te tõe cùu patróonⁿ-án ní xáhaⁿ-dë: “Yòhó cúu-n ìⁿ tõe cuihna iní-xi xinu cuechi núu-í te cuhndu-n, te núu yòhó sání iní-n sã cùu-í ìⁿ tõe tàuchiuⁿ cuáháⁿ-ndó sácáⁿ-ndó triú te òré nàtaxi tñaha-ndo, te yúhú dícó-nã náqueheⁿ cuendá-í nãtàxúha-í. ²⁷ Te núu sání iní-n sã dúcáⁿ quide-í, te dasaⁿ núu-n díhúⁿ-í te cúñaha-n chãhu-yu díquí-xi ni cùu, te òré ndexio-í te sa ngódó lùha-gá díquí-xi naqueheⁿ-í ní cùu”, cächí-dé xãhaⁿ-dë xii tõe xinu cuechi-án. ²⁸ Te tõe cùu patróonⁿ-án ní xáhaⁿ-dë xii dava-gá cue tõe ndècu ndihi-dé: “Chí quéndèe ìⁿ díhúⁿ sã nání tàlentú nèhé tõe-án, te cuáha-ndo tõe nèhe úxí tnàhá ñu-ni díhúⁿ-án. ²⁹ Chí cue tõe sa ndècu ndihi te níhí-gã-güedé cundecu ndihi-güedé, te ní vã níhí-gã-güedé ndèe cundecu ncha

sá cùndècu ndihi-güedé. Te cue tõe ñá túu nã ndécú ndihi vai, te ncha sá ndécú ndihi-güedé vá cùndècu ndihi-gã-güedé. ³⁰ Te tõe xinu cuechi ñá túu vèdana nàndihi-án, chí tníⁿ-dë te daquihíⁿ-ndó-dë ìⁿ xichi núu née núú ío ndoho-dé, te yácáⁿ ndáhyú-dé, te dícó rúhñú-nã cuu núhu-dé sá sàtú iní-dé sá ndóhó-dë”, cächí tõe cùu patróonⁿ-án xãhaⁿ-dë xii-güedé. Duha sãtnahá-xi ndoho ncha ñáyiú ñá túu quide váha —cächí-gá xãhaⁿ-gã xii-güedé.

Cuendá cue ñáyiú ní quide váha ndihi cuendá cue ñáyiú ñá túu ní quide váha

³¹ Te xãhaⁿ tucu Jesús xii-güedé:

—Te nduu na quixi tucu yúhú Tõe cùu ñani tnàhá-ndó nchà-ndo, te quixi-í ndihi ncha cue espíritú xínú cuèhi núu-í, te ncha ñáyiú quini-yu sá ío càhnu cuu-í, te ðavá-án cunucóo-í núú táxí tnùní-í, te ío cuñúhu ñáyiú sá ío càhnu cuu-í. ³² Te ðavá-án natacá ncha ñáyiú xíndecu ní càa xico ñuyíú cundecú-yu núu-í, te cada-í-yu ðatná quidé ìⁿ toli oré táú ðìⁿ-dé ncha mbéé ndihi ncha chivá chí ðìⁿ taxi ndecu-dé ncha mbéé, te ðìⁿ taxi ndecu-dé ncha chivá, ³³ Te ducaⁿ sãtnahá-xi cada-í chí ncha ñáyiú ní quide ndáá núu-í ñáyiú-án taxi ndecu-í-yu xio cùha-í, te ncha ñáyiú cuihna iní-xi ñá túu ní cuini cada ndáá núu-í ñáyiú-án taxi ndecu-í-yu xio ðatni-í. ³⁴ Te ducaⁿ te yúhú tõe ío cùnuu cúñaha-í xii ñáyiú na cundecu xio cùha-í: “Ncha nchòhó ñáyiú ní quide váha ñaha Tãtã-í Dútú Ndiõxí, chí nèhé chí vitna ní sáá nduu cundecu-ndo núú ndécú-gã táxí tnùní-gá, chí ndéé cútnàhá ní ngáva ñuyíú sa ndècu túha tnàhí núú ndécú-gã-án sã nchòhó nduu táhú-ndó cundecu-ndo. ³⁵ Te ducaⁿ chí òré xihí-í docó te ní taxi-ndo sã ní xexi-í, te òré yichí-í ndute te ní taxi-ndo ndute ní xihí-í, te òré

ñùhu-í ichi te ní taxi-ndo vèhe ní ndetatú-í. ³⁶ Te òré xíní ñùhu-í dóó cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xíhi-í vecaá te ní quixi tucu-ndo ní quixi coto ñaha-ndo xii-í”, duha cúñaha-í xii nchaa ñáyi-áⁿ. ³⁷ Te nchaa ñáyi-á ducaⁿ ní quide ndáá-áⁿ cùñahá-yu xii-í: “Yòhó Yaá cúú Xìtohó-ndí, ni ñⁿ xito ñá túú ní tàxi-ndí sá cáxi-n òré xihí-n dòcò, te ni ñⁿ xito ñá túú ní tàxi-ndí ndute coho-n òré yìchí-n. ³⁸ Te ni ñá túú ní tàxi-ndí vehe ndetatú-n òré ñùhú-n ìchi, te ni ñá túú ní tàxi-ndí dóó cuihnu-n òré xíní ñùhu-n. ³⁹ Te ni ñá túú ní quixi coto ñaha-ndí xii-n òré ní cuhú-n, te ni ñá túú ní quixi coto ñaha-ndí xii-n òré ní xíhi-n vècaá”, duha quesàhá-yu cúñahá-yu xii-í. ⁴⁰ Te yúhú téé cùnnu cúñaha-í xii-yu: “Na càchí tñúhu ndáá-í xii-ndo sã sã cuendá sã ñá túú ní quide-ndo ñⁿ sã vãha sã cúú-xí cuè ñáyi-á ndècu ichi-í cuèi ío ndàhú xìndáa-yu, te sã dúcáⁿ ní quide-ndo sã vãha sã cúú-xí-yu, te cada iní-ndó sã mèe-í ducaⁿ ní quide-ndo ní xito ñaha-ndo xii-í”, duha cúñaha-í xii-yu.

⁴¹ Te dàtnùní cúñaha-í xii ñáyi-á na cùndecu xio datni-í: “Nchaa nchòhó ñáyi-á ní xíta nihnu chí xócuiñí núú ndécú-í-a, chí nchòhó ní nduu táhú-ndó cùndecu-ndo núú ñùhú núú càyú, ñiu-ni núú ní quide túha-í cundecu sácuihná ndihí nchaa espíritú cùndihí-xi, te yàcáⁿ cundecu-ndo ní caa ni quíhíⁿ. ⁴² Chi yúhú òré xihí-í docò te ñá túú ní tàxi-ndo sá cáxi-í, te ni òré yìchí-í ndute te ñá túú ní tàxi-ndo ndute coho-í. ⁴³ Te ni òré ní xúhu-í ichi ñá túú ní tàxi-ndo vehe ndetatú-í, te ni òré xíní ñùhu-í dóó cuihnu-í te ñá túú ní tàxi-ndo, te ni òré ní cuhú-í te ñá túú ní quixi-ndo quixi coto ñaha-ndo xii-í, te ni òré ní xíhi-í vecaá te ñiu-ni ducaⁿ ní quide-ndo ñá túú ní quixi-ndo quixi coto ñaha-ndo xii-í”, duha cúñaha-í

xii-yu. ⁴⁴ Te ñáyi-áⁿ cùñahá-yu xii-í: “Yòhó Yaá cúú Xìtohó-ndí ni ñⁿ xito ñá túú ní xíní-ndí òré xihí-n dòcò cuendá taxi-ndí sá cáxi-n, te ni ñⁿ xito ñá túú ní xíní-ndí òré yìchí-n ndute cuendá taxi-ndí ndute coho-n, te ni ñⁿ xito ñá túú ní xíní-ndí cuhu-n ìchi cuendá taxi-ndí vehe ndetatú-n, te ni ñⁿ xito ñá túú ní xíní-ndí òré xíní ñùhu-n dóó cuendá taxi-ndí dóó cuihnu-n, te ni ñⁿ xito ñá túú ní xíní-ndí òré cùhú-n cuendá quixi coto ñaha-ndí xii-n, te ni ñⁿ xito ñá túú ní xíní-ndí quihí-n vècaá cuendá quixi coto ñaha-ndí xii-n”, duha quesàhá-yu cúñahá-yu xii-í. ⁴⁵ Te yúhú cúñaha-í xii-yu: “Na càchí tñúhu ndáá-í xii-ndo sã sã cuendá sã ñá túú ní quide-ndo ñⁿ sã vãha sã cúú-xí cuè ñáyi-á ndècu ichi-í cuèi ío ndàhú xìndáa-yu, te sã dúcáⁿ ní quide-ndo ñá túú ní quide-ndo sã vãha sã cúú-xí-yu, te cada iní-ndó sã mèe-í ducaⁿ ní quide-ndo ñá túú ní quide-ndo sã vãha sã cúú-xí-í”, duha cúñaha-í xii-yu. ⁴⁶ Te nchaa ñáyi-áⁿ quíhíⁿ-yu núú ùhú núú ndàhú ni caa ni quíhíⁿ. Te nchaa ñáyi-á ní quide ndáá núú-í ní xìndecu ñuyúú-a, ñáyi-áⁿ nduu táhú-yu ío vãha cundecú-yu ni caa ni quíhíⁿ —càchí-gá xãhaⁿ-gã xii-güedé.

26

Cue téé cùu úhú iní ñáhá xii Jesús ndúcú-güedé nàcuáa cada-güedé tñi ñaha-güedé xii-gá

(Mr. 14:1-2; Lc. 22:1-2; Jn. 11:45-53)

¹ Te sáta ní yáha ducaⁿ ní cáhán Jèsús, te ní xáhaⁿ-gã xii cue téé xica cuu ndihí-gá:

² —Nchòhó sa xíní-ndó sã cùmání úú-gá nduu te coo vico pàscuá, te càchí tñúhu-í xii-ndo sã yúhú Téé cùu ñani tñáhá-ndó nchàa-ndo tñi ñaha-güedé xii-í, te cuáha cuendá ñáhá-güedé núú cuè téé cùu úhú iní

ñáhá xii-í, te cata caa ñaha-güedé núú cùrúxí te núú cùrúxí-án cuú-í — cächí-gá xáhaⁿ-gá xii-güedé.

³ Te ñu-ni òré càháⁿ ndihi Jèsús cue téé xica cuu ndihi-gá ní nataká cue téé cùu dútú cùnùu, ndihi cue téé dàcuaha ñaha xii ñáyiú nchaa tnúhu ní chidó tnùní ndíi Moisés, ndihi cue téé cùu sacuéhé núú ñáyiú israhél. Te mei quéhé vehe núú cúú vèchiuⁿ té Caifás téé cùu dútú ño-gá cùnùu ní nataká-güedé. ⁴ Te xíaⁿ ní ndatnúhu-güedé nàcuáa cada-güedé dandàhú-güedé Jèsús cuendá tñii ñaha-güedé xii-gá, te cahni ñaha-güedé. ⁵ Te ní xitnàha-güedé:

—Váha-gá sá vǎ tñii-ó Jèsús mei ndùu vico, chi núu ducaⁿ na càda-o te ío dusaⁿ càda ñáyiú — cächí-güedé xitnàha-güedé.

Íⁿ ñadihí chíhí-án àciti díqui Jèsús
(Mr. 14:3-9; Jn. 12:1-8)

⁶ Te ndècu Jèsús ñuú Bètaniá vehe ñⁿ téé nàni Xímú, téé ní tnahá cuéhé sǎ dátèhyú nihnu-xi yiqui cùñú-ó. ⁷ Te xíaⁿ ndécú-gǎ ní quexìo ñⁿ ñadihí néhé-án ñⁿ sá ní cuáha yúú vǎha nàni alabastrú, te xití xíaⁿ ñúhú àciti sàháⁿ tnámí sǎ ño ndèyáhu. Te yíhi Jèsús mèsá xéxí-gǎ, te ñaha-án ní sàháⁿ-aⁿ ní sódo-aⁿ àciti ñúhú xití xíaⁿ díqui-gǎ. ⁸ Te òré ní xini cue téé xica cuu ndihi Jèsús sá dúcáⁿ ní quide ñaha-án te ní cudééⁿ-güedé, te ní ngúita-güedé xitnàha-güedé:

—Ñá túú quide váha ñaha-án dàcáⁿ quidé-án dacuíta-aⁿ aciti-án. ⁹ Chi váha-gá núu cuyáhu aciti-án ní cùu chi ío ndèyáhu, te díhúⁿ cuyáhu aciti-án cuu cuendá cue ñáyiú ndàhú ní cùu — cächí-güedé xitnàha-güedé.

¹⁰ Te Jèsús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gǎ xii-güedé:

—Vá dásatú-ndó iní ñadihí-a, chi sá ní quide ñaha-aⁿ xii-í cúú-xí ñⁿ sá vǎha. ¹¹ Chi cue ñáyiú

ndàhú ducaⁿ-ni cùtnahá ñáyiú-án tnuú-ndó, dico yúhu chi vá ncháa ndùu cundecu ndihi ñaha-í xii-ndo ñuúyú-a. ¹² Te sá dúhá ní quide ñaha ñadihí-a xii-í ní sódo-aⁿ àciti díqui-í, te xíaⁿ cada iní-ndó sǎ sǎ quide túha-aⁿ yiqui cùñú-í cuendá nguíndúxi-xi. ¹³ Te na cächí tnúhu ndáá-í xii-ndo sǎ ndèni ní cuu nihí ñuúyú ná càháⁿ ñáyiú tnúhu-í, te càháⁿ-yu tnàhá cuendá ñadihí-a cuendá quini nchaa ñáyiú nàcuáa ní quide-aⁿ te ducaⁿ vǎ nàcuánaá-yu — cächí-gá xáhaⁿ-gǎ xii-güedé.

Té Jüdás ndúcú-dé nàcuáa cada-dé cuáha cuendá-dé Jèsús núú cué téé cùu úhú iní ñáhá xii-gá

(Mr. 14:10-11; Lc. 22:3-6)

¹⁴ Te sátá dúcáⁿ te té Jüdás Iscarioté ní sàháⁿ-dé ní ndatnúhu-dé ndihi cue téé cùu dútú cùnùu. Te núú tnàhá té Jüdás-án cúú úxúú cue téé xica cuu ndihi Jèsús. ¹⁵ Te ní xáhaⁿ-dè xii cue téé cùu dútú cùnùu-án:

—¿Ndédau cháhu ñaha-ndo xii-í te taxi cuendá-í Jèsús xii-ndo-i? — cächí-dé xáhaⁿ-dè xii-güedé.

Te cue dútú-ǎⁿ ní xáhaⁿ-güedé xii-dé sǎ cuañaha-güedé óco úxí díhúⁿ cuixíⁿ, te ñu-ni ducaⁿ ní sáñaha-güedé xii-dé. ¹⁶ Te ndéé òré ní queheⁿ cuendá té Jüdás-án díhúⁿ, te ní ngúita-dé ndúcú-dé nàcuáa cada-dé cuáha cuendá-dé Jèsús núú-güedé.

Cùdini Jèsús ndihi cue téé xica cuu ndihi-gá

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Te ní sáá nduu ní quesaha vico xexi ñáyiú pǎá sǎ ña túú yíhi levadurá ñu-ni vico pàscuá, te cue téé xica cuu ndihi Jèsús ní sàndehe yatni-güedé ñiñi-gǎ, te xáhaⁿ-güedé xii-gǎ:

—Mèstrú, véxi-ndí xicáⁿ tnúhú-ndí núú-n núu ndéé cuini-n càda túha-ndí cuendá cudini-o

sacuaa nduu vico pascuá —
càchí-güedé xáhaⁿ-güedé xii-gá.

18 Te Jèsús ní xáhaⁿ-gá xii-güedé:

—Chí cuáháⁿ xití ñúú-ãⁿ, te yàcáⁿ
naníhí-ndó ñⁿ té cùtnuní iní-ndó sá
sá xini ñáhá-dé xii-o, te cúñaha-ndo
xii-dé: “Yaá cúú Mèstrú càchí-gá sá
sà ní cuyatni nduu vā cündecu-gá
ñuyú-u, te vehe-n cuini-gá cada-gá
vico pascuá ndihi cue téé xica cuu
ndihi-gá”, duha cúñaha-ndo xii
téé-áⁿ —càchí-gá xáhaⁿ-gá xii-güedé.

19 Te cue téé xica cuu ndihi-gá-áⁿ
ní xica-güedé cuáháⁿ-güedé, te ní
quide-güedé nacuáa ní xáhaⁿ-gá
xii-güedé, te ní quide túha-güedé
sá cùdini-güedé ndihi-gá sacuaa
nduu vico pascuá-áⁿ. 20 Te òré sa ní
cundi^{qu} te cuánguihu Jèsús ndihi
ndí ùxúú cue téé xica cuu ndihi-gá
mèsá cuèndá cudini-gá ndihi-güedé.
21 Te ñini xèxi-gá ndihi-güedé ní
xáhaⁿ-gá xii-güedé:

—Na càchí tnúhu ndáá-í xii-ndo
sá díú ñⁿ nchohó cue téé xica cuu
ndihi-í cuáha cuèndá ñáhá-ndó xii-í
núú cuè téé cùu úhú iní ñáhá —
càchí-gá xáhaⁿ-gá xii-güedé.

22 Te sá dúcáⁿ ní xáhaⁿ-gá
xii-güedé te nchaa-güedé ní
ngúita-güedé cündiyí-güedé, te da
ñⁿ da ñⁿ-güedé ní ngúita-güedé
xáhaⁿ-güedé xii-gá:

—Mèstrú, ¿ñá díú yúhú ducaⁿ
sàni iní-n càda-í-u? —càchí-güedé
xáhaⁿ-güedé xii-gá.

23 Te ní xáhaⁿ-gá xii-güedé:

—Téé nacaxi ndihi-í ñⁿ-ni cóhó
caxi-ndí, téé-áⁿ cuáha cuèndá
ñáhá-dé xii-í núú cuè téé cùu úhú
iní ñáhá. 24 Te yúhú Téé cùu ñani
tnáhá-ndó nchaa-ndo ñuhu ichi-í
cuáhá-í yáha-í nacuáa càháⁿ-xi
núú tütú Yá Ndióxi, dico ndàhú
ní cuu téé ducaⁿ na cuáha cuèndá
ñáhá xii-í núú cuè téé cùu úhú iní
ñáhá, chí váha-gá sá vā cácu téé-áⁿ
cundecu-dé ní cùu, te ñá díú sá ní
cacu-dé te ducaⁿ càda-dé —càchí-gá
xáhaⁿ-gá xii-güedé.

25 Te sáta dúcáⁿ te ní cáháⁿ té
Júdás téé cuáha cuèndá ñáhá xii-gá,
te xáhaⁿ-dè:

—Mèstrú, ¿te náa sàni iní-n sá
yúhú cuáha cuèndá ñáhá-í xii-n núú
cuè téé cùu úhú iní ñáhá xii-n-áⁿ? —
càchí-dé xáhaⁿ-dè xii-gá.

Te Jèsús ní xáhaⁿ-gá xii-dé:

—Diu-n —càchí-gá xáhaⁿ-gá
xii-dé.

26 Te ñini cùdini cue téé xica cuu
ndihi Jesús ní queheⁿ-gá pàá, te
ní ndacáⁿ táhú-gá núú Yá Ndióxi,
te dàtnuní ní táhú cuèchi-gá te
ní ngúita-gá dácãhñu-gá cue téé
xica cuu ndihi-gá-áⁿ, te xáhaⁿ-gá
xii-güedé:

—Chí quéhéⁿ pàá-a caxi-ndo, te
cada iní-ndó sá yiqui cuñú-í cúu-xí
—càchí-gá xáhaⁿ-gá xii-güedé.

27 Te ní queheⁿ-gá vàsú ñúhú
ndùdí ndéhé yoho yàha stilé, te
ní ndacáⁿ táhú-gá núú Yá Ndióxi,
te dàtnuní ní ngúita-gá sãñaha-gá
xii-güedé cuèndá coho-güedé luha
luha sá ñúhú xití-xi, te xáhaⁿ-gá
xii-güedé:

—Chí cóhó nchaa nchohó ndudí
ndéhé yoho yàha stilé ñúhú xití
vàsú-a. 28 Te cada iní-ndó sá
cúu-xí dàtná ññi-í sá catí òré cahni
ñaha-güedé xii-í, te sá dúcáⁿ catí
ññi-í xiãⁿ cutnùní ndáá sá Yá
Ndióxi cada-gá ingá núú sá váha sá
cúu-xí vai ñáyiú dàtná ní cachí-gá
cada-gá, te ío vai ñáyiú cada càhnu
iní-gá cuèchi-yu. 29 Te na càchí
tnúhu-í xii-ndo sá vítná-nã duha
xihí ndihi ñaha-í xii-ndo ndùdí
ndéhé yoho yàha stilé-a, te vā cóhó
ndihi ñaha-gá-í xii-ndo, dico na sáa
nduu nanihí tnáhá-ó núú ndécú
Tátá-í Dútú Ndióxi táxi tnùní-gá te
dává-áⁿ cada iní-ndó sá dàtná sá
cóhó ndihi ñaha tucu-í xii-ndo chí
íó cudí iní-ó —càchí-gá xáhaⁿ-gá
xii-güedé.

*Té Pèlú cúñaha-dé xii ñáyiú sá ñã
túu xini-dé Jèsús*

(Mr. 14:26-31; Lc. 22:31-34; Jn.
13:36-38)

30 Te Jèsús ní xita-gá ìᵐ ndudú ndìhì cue téé xìca cuu ndìhì-gá, te dàtnùní ní xica-gá cuáhán-gá ndìhì-güedé yucu Olívú. 31 Te yàcáⁿ ní xáhaⁿ-gá xii-güedé:

—Na càchí tñúhu-í xii-ndo sã ncháá-ndó dándóo ñaha-ndo xii-í niú vitna, chí quee ndáá-xi nàcuáa càháⁿ-xi núú tütú Yã Ndiõxí núú càchí-xi: “Yúhú cuáha-í tñúhu cahni-güedé téé cùu toli, te nchaa mbéé-dě ndìhì-güedi cuténuu”, duha càchí-xi núú tütú-gá. 32 Dico na ndòto-í te codonùu-í núú-ndó quíhìⁿ distritú Galileá —càchí-gá xáhaⁿ-gá xii-güedé.

33 Te té Pèlú ní xáhaⁿ-dě xii-gá:

—Te cuèi nchaa-güedé ná dándóo ñaha-güedé xii-n, dico yúhú chí vá dándóo ñaha-í xii-n —càchí-dé xáhaⁿ-dě xii-gá.

34 Te Jèsús ní xáhaⁿ-gá xii-dé:

—Na càchí tñúhu ndáá-í xii-n sã niú vitna cùmání-gá cana ìᵐ líhì, te únì xito cáháⁿ-n núú ñyiu sá ñà túú xìnì ñáhá-n xii-í —càchí-gá xáhaⁿ-gá xii-dé.

35 Te té Pèlú ní xáhaⁿ-dě xii-gá:

—Cuèi na cùú ndìhì ñaha-í xii-n dico vá càháⁿ-í núú ñyiu sá ñà túú xìnì ñáhà-í xii-n —càchí-dé xáhaⁿ-dě xii-gá.

Te nchaa dava-gá cue téé xìca cuu ndìhì-gá ñu-ni ducaⁿ ní xáhaⁿ-güedé xii-gá.

Jèsús càháⁿ ndìhì-gá Yã Ndiõxí ìᵐ xichi núú nání Gètsemaní (Mr. 14:32-42; Lc. 22:39-46)

36 Te Jèsús ní quexìo-gá ndìhì cue téé xìca cuu ndìhì-gá ìᵐ xichi núú nání Gètsemaní, te xíáⁿ ní xáhaⁿ-gá xii-güedé:

—Chí cùnúcòo iha cundetun-ndo na quíhìⁿ-í yàcáⁿ cáháⁿ ndìhì-í Yã Ndiõxí —càchí-gá xáhaⁿ-gá xii-güedé.

37 Te ndèca-gá té Pèlú, ndìhì ndì ndúú déhe té Zebèdeu cuáhánⁿ, te ní ngüíta-xi súúní ndìhú iní-gá. 38 Te ní xáhaⁿ-gá xii cue téé únì-áⁿ:

—Súúní ndìhú iní-í dàtná sá cùú-í, te chí quèndóo nchòhò iha

te vá cùdú-ndó chí yúhú vá cùdú-í —càchí-gá xáhaⁿ-gá xii-güedé.

39 Te sa ñùnchí luha ní xica ndehe Jèsús núú ndécú-güedé, te ní ngüíñí xítí-gá te ní nuu núú-gá ndàa núú ñúhú, te ní ngüíta-gá càháⁿ ndìhì-gá Tãtá-gá Dútú Ndiõxí, te xáhaⁿ-gá:

—Yòhó Tãtá mée-í, càháⁿ ndàhú-í núú-n núú vá cùndèe iní-n tàunihnu ñaha-n xii-í cuèndá sá vá ndòhò-í ná sáá òré, dico vá cádá-n nàcuáa càchí iní mée-í, chí cada-n nàcuáa càchí iní mée-n —càchí-gá xáhaⁿ-gá xii Tãtá-gá Dútú Ndiõxí.

40 Te sãtá ñí yáha ní cáháⁿ ndìhì-gá Tãtá-gá Dútú Ndiõxí, te cuánuhú-gá núú ñí dándóo-gá cue téé únì-áⁿ te xixídí-güedé òré ní nasáá-gá, te ní xáhaⁿ-gá xii té Pèlú:

—¿Náa ñá cùndèe iní-ndó vá cùdú-ni-ndo cuèdicó ìᵐ òré ñini càháⁿ ndìhì-í Yã Ndiõxí-áⁿ? 41 Te chí quèndóo tucu te cuhuⁿ iní-ndó vá cùdú-ndó, te cáháⁿ ndìhì-ndo Yã Ndiõxí cuèndá sá vá dácàháⁿ ñáhá yùcu ñáváha xii-ndo càda-ndo sá ñà túú tàun-ndó càda-ndo. Te xìnì ndáá-í sá nchòhò cuìni-ndó càda-ndo nchaa nacúáa càháⁿ-í dícò-ni sá ñà túú ñihí ndéé-ndó —càchí-gá xáhaⁿ-gá xii-güedé.

42 Te xito cùu uú cuáhánⁿ tucu Jèsús cáháⁿ ndìhì-gá Tãtá-gá Dútú Ndiõxí, te xáhaⁿ-gá:

—Yòhó Tãtá mée-í, te núú vá cùndèe iní-n tàunihnu ñaha-n xii-í cuèndá sá vá ndòhò-í, te cada nàcuáa càchí iní mée-n —càchí-gá xáhaⁿ-gá xii Tãtá-gá Dútú Ndiõxí.

43 Te òré ní yáha ní cáháⁿ ndìhì-gá Tãtá-gá Dútú Ndiõxí, te cuánuhú tucu-gá núú xíndecu cue téé únì xíca cùu ndìhì-gá-áⁿ, te xidí-ni tucu-güedé òré ní nasáá-gá, te ducaⁿ ní quide-güedé chí súúní ñúhu saní núú-güedé. 44 Te ní dándóo ñaha tucu Jèsús xii-güedé xíáⁿ, te cuáhánⁿ tucu-gá xito cùu únì cáháⁿ ndìhì tucu-gá Tãtá-gá Dútú Ndiõxí, te ñu-ni tñúhu sá sá ní xáhaⁿ-gá xii Tãtá-gá Dútú Ndiõxí, ñu-ni tñúhu-áⁿ ní xáhaⁿ tucu-gá.

45 Te sáta nǐ yáha ní cáháⁿ ndihi-gá Tátá-gá Dútú Ndióxi, te cuánuhú tucu-gá núú ndécú cuè téé xica cuu ndihi-gá-áⁿ, te òré ní nasáá-gá, te ní xáhaⁿ-gá xii-güedé:

—¿Te náa xidí-ni tucu-ndo? Te sa ní sáá òré cuáha cuèndá ñáhá-güedé xii-í núú cuè téé ndécú ichi cuehé ichi duha. 46 Dico vitna chí ndácóo na quíhíⁿ-ó, chí sa véxi téé cuáha cuèndá ñáhá xii-í núú cuè téé cùú úhú iní ñáhá —càchí-gá xáhaⁿ-gá xii-güedé.

Ní tñi-güedé Jèsús ndécá ñaha-güedé xii-gá cuáháⁿ

(Mr. 14:43-50; Lc. 22:47-53; Jn. 18:2-11)

47 Te càháⁿ dúcáⁿ-ní Jèsús ní quexìo té Jùdás. Te núú tñàhá téé-áⁿ cùú ùxúú tñàhá cue téé xica cuu ndihi-gá ní cùu te ducaⁿ nǐ quide-dé. Te ndihi-dé vai cue téé ní quexìo te dava-güedé xínehe-güedé machití, te dava-güedé xínehe-güedé carrutí. Te cue téé-áⁿ nǐ tendaha ñaha cue dútú cúnúu, ndihi cue téé cùu sacuéhé núú ñáyiú isràél. 48 Te té Jùdás téé cuáha cuèndá ñáhá xii-gá-áⁿ sa ní xitnúhu-dé cue téé-áⁿ nàcuáa cada-dé cuáha cuèndá-dé Jèsús núú-güedé, te duha ní xáhaⁿ-dè xii-güedé:

—Cundehe-ndo téé na tèyuhu-í te téé-áⁿ tñi-ndo-dè chí téé-áⁿ cùú-dè téé ndéé iní-ndó —duha ní xáhaⁿ-dè xii-güedé.

49 Te sáta dúcáⁿ nǐ xáhaⁿ-dè xii-güedé, te ní sàndehe yatni-dé núú Jèsús, te ní xáhaⁿ-dè xii-gá:

—¡Ràcióⁿ Mèstrú! —càchí-dé xáhaⁿ-dè xii-gá.

Te ní teyuhu ñaha-dé xii-gá. 50 Te Jèsús ní xáhaⁿ-gá xii-dé:

—Yòhó téé ní chitnahá ñáhá xii-í, ¿ná cuíni-n núú véxi-n núú-í? —càchí-gá xáhaⁿ-gá xii-dé.

Te òré-ni-áⁿ nǐ tñi ñaha cuè téé ndihi té Jùdás-áⁿ xii Jèsús, te ndéca ñaha-güedé xii-gá cuáháⁿ.

51 Te ñiⁿ cue téé ndihi Jèsús ní tava-dé machití-dé, te ní

xehndé-ni-dé ñiⁿ xio lóho ñiⁿ téé xinu cuechi núú dútú cúnúu te ní quendeé duuⁿ lóho-dé. 52 Te Jèsús ní xáhaⁿ-gá xii téé ducaⁿ nǐ xehndé lóho téé-áⁿ:

—Nachihí machití-n ñiⁿ-xi, chí nchaa cue téé na nàá ndihi machití cahni-güedé tñaha ñáyiú-güedé te diu-ni ndihi machití cuú méé-güedé tucu. 53 Te na càchí tñuhu-í xii-ndo sá núú yúhú cuíni-í cacu-í te cáháⁿ ndihi-í Tátá-í Dútú Ndióxi, te tendaha-gá cuéhé víhí espíritú xínú cuèchi núú-gá quixi-xi dàcácu ñaha-xi xii-í. 54 Dico núú ducaⁿ na càda-í te vá queé ndáa-xi nàcuáa cáháⁿ-xi núú tütú Tátá-í Dútú Ndióxi núú ndéé tñuni sá dàcuítí xini ñuhu-xi nándi ndoho-í —càchí-gá xáhaⁿ-gá xii-dé.

55 Te Jèsús ní xáhaⁿ-gá xii cue téé ducaⁿ nǐ tñi ñaha xii-gá-áⁿ:

—Nchaa-ni nduu ní xini-ndó nǐ xóo cunucóo-í xití veñúhu càhnu sá ìo cúnúu ní xóo danèhé-í ñáyiú, te ñá túú ní tñi ñaha-ndo xii-í, ¿te ná cuèndá vitna quide ñaha-ná-ndó xii-í dàtná quidé-ndó ñiⁿ ñadúhú, nèhe-ná-ndó màchití nèhe-ná-ndó carrutí ní quexìo ní tñi ñaha-ndo xii-í-i? 56 Dico dacuítí sá dúhá càda-xi nacuáa quee ndáa-xi nàcuáa ní cáháⁿ cue téé ní xóo cáháⁿ tñuhu Yá Ndióxi ndéé sanaha ní ngódó tñuni núú tütú-gá —càchí-gá xáhaⁿ-gá xii-güedé.

Te nchaa cue téé xica cuu ndihi-gá ní xinu-güedé ní dándóo ñaha-güedé xii-gá.

Jèsús ndécú-gá jùndá

(Mr. 14:53-65; Lc. 22:54-55, 63-71; Jn. 18:12-14, 19-24)

57 Te cue téé ní tñi ñaha xii Jèsús ndécá ñaha-güedé xii-gá cuáháⁿ núú tē Caifás téé cùu dútú cúnúu-gá. Te núú ndécú dútú cúnúu-gá-áⁿ sa ní tacá cue téé dàcuaha ñaha xii ñáyiú nchaa tñuhu ní chídó tñuni ndí Moisés, ndihi cue téé cùu sacuéhé núú ñáyiú isràél cuèndá cada-güedé jùndá. 58 Te té Pèlú xica xica-ni nchicúⁿ ñáhá-dè xii-gá cuáháⁿ ní sáa-dé

ndéé quehé vehe núú ndécú tēe cùu dútú cúnùu-gá-án, te xián ní ngóo-dé ndihi cue tēe cùu poleciá cuendá cuní-dé quini-dé nása cada ñaha-güedē xii Jèsús.

⁵⁹ Te cue tēe cùu dútú cúnùu, ndihi cue tēe cùu sacuéhé núú ñáiyu israhél, ndihi nchaa dava-gá cue tēe xíndecu jündá ndúcú-güedē nàcuáa cada-güedé dacàa-güedé ìn cuéchi díquí Jèsús cuēi cùu-xi ìn sá ñá ndáa cuendá níhí-güedē nàcuáa cada-güedé cahni ñaha-güedē xii-gá. ⁶⁰ Te vài cue tēe ní ngúita-güedé dacàa-güedé cuéchi díquí-gá, dico ñá túú ní cùndee tnúhu-güedé chi mee-ni tnúhu ndehnde cùu-xi. Te sátá dúcán te ní quexìo tucu úú tnàhá cue tēe dācuandehnde-güedé, ⁶¹ te xáhaⁿ-güedē xii nchaa cue tēe xíndecu jündá:

—Véxi-ndí cāchí tnúhu-ndí xii-ndo sá tēe-a cāchí-dé sá dāngóyo-dé veñúhu cāhnu sá ìo cūnuu núú chíñúhu-o Yá Ndióxi, te dandāa-dé ingá veñúhu saa, ñu-ni núú cáá tnàhí veñúhu-án, te xití úní-ni nduu sa nadaxínu-dé, duha cāchí-dé —cāchí-güedé xáhaⁿ-güedé.

⁶² Te tēe cùu dútú cúnùu-gá-án ní ndacuíní-dé, te xáhaⁿ-dē xii Jèsús:

—¿Ná cuendá duha ndùu tnúhu cāháⁿ cue tēe-a cuendá-n? Te cāháⁿ núu nása cunduú tnúhu cāháⁿ-n —cāchí-dé xáhaⁿ-dē xii-gá.

⁶³ Dico Jèsús ñá túú tnàhí ni cāháⁿ-gá. Te tēe cùu dútú cúnùu-gá-án ní xáhaⁿ tucu-dé xii-gá:

—Yúhú, cācú nēhe-í Yá Ndióxi chi cuní-í sá cāchí tnúhu ndáa-n xii-ndí núu sá díú Crístú Déhe Yá Ndióxi Yaa ní tendaha-gá véxi ñuyíu-a cùu-n —cāchí-dé xáhaⁿ-dē xii-gá.

⁶⁴ Te Jèsús ní xáhaⁿ-gá xii-dé:

—Ñu Yaa-án cùu-í dātná cāchí-n-án, te na cāchí tnúhu-í xii-ndo sá sáa nduu te quini-ndó yúhú Tēe cùu ñaní tnàhá-ndó nchaa-ndo cunucóo-í xio cùha Dútú Ndióxi Yaa ndácú quide nchaandi

túhú sá vāha. Te dāvá-án quini ñáhá-ndó xii-í quee-í andiu quixi-í ichi xití vícò —cāchí-gá xáhaⁿ-gá xii-dé.

⁶⁵ Te dútú cúnùu-gá-án ní ndátá-dē dóo níhnu-dē cuendá sá ñá túú ní tnàhá iní-dé nàcuáa ní cāháⁿ Jèsús, te ní xáhaⁿ-dē xii nchaa cue tēe xíndecu jündá:

—Tēe-a cāháⁿ úhú-dé cuendá Yá Ndióxi, te vitna ñá túú-gá xini ñúhu-xi cue tēe cāháⁿ ndáa núu ndáa sá ndécuechi-dé àdi ñá túú ndécuechi-dé, chi sa ní tecú dóho-o nàcuáa ndùu tnúhu ní cāháⁿ-dē ní cāháⁿ úhú-dé cuendá Yá Ndióxi. ⁶⁶ Te nchaa-ndo chí cāháⁿ vitna núu nása sàni iní-ndó cunduú cuendá tēe-a —cāchí-dé xáhaⁿ-dē xii nchaa cue tēe-án.

Te cue tēe-án ní xáhaⁿ-güedé:

—Nchúhú cāchí-ndí sá tàú-xi cuú-dé chí ndécuechi-dé —cāchí-güedé xáhaⁿ-güedé.

⁶⁷ Te ní ngúita-güedé ní tíu díí ñáhá-güedé xii-gá te ní caniha-güedé, te tnàhá núú-gá ní cani-güedé. ⁶⁸ Te ní cudíquí ndeé ñáhá-güedé xii-gá, te xáhaⁿ-güedé:

—Yòhó Tēe cāchí sá cúú Crístú Yaa ní tendaha Yá Ndióxi véxi ñuyíu-a, cāháⁿ ná còto yoo ní caniha xii-n —cāchí-güedé xáhaⁿ-güedé xii-gá.

Té Pèlú xáhaⁿ-dē xii ñáiyu sá ñá túú xini-dé Jèsús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Te ñini núcòo té Pèlú quehé, te ní sáháⁿ ìn xíchí xínú cuéchi vehe-án núu-dé, te xáhaⁿ-xi xii-dé:

—Yòhó tnàhá-n cùu-n tēe xica cuu ndihi Jèsús tēe distritú Galileá —cāchí-xi xáhaⁿ-xi xii-dé.

⁷⁰ Te té Pèlú ñá túú ní nūnuu-dé, te ndedóho nchaa ñáiyu xíndecu-án ní xáhaⁿ-dē xii xíchí-án:

—Yúhú, ñá túú cùtnuní iní-í nása ndùu tnúhu cāháⁿ-n —cāchí-dé xáhaⁿ-dē xii-xi.

⁷¹ Te ní xica té Pèlú cuáhá-dé ndaa nacuáa nchií yuyèhe vehe-án, te ní xini ñáhá tucu ingá xíchí xínú

cuèchi vehe-án, te xáhaⁿ-xi xii nchaa ñáyiú xíndecu-án:

—Tée-a tñahá-dé xicá cùu-dé ndihí Jèsús tée ñuú Nazàrét — càchí-xi xáhaⁿ-xi xii-yu.

⁷² Te té Pèlú ní xáhaⁿ-dè:

—Nchàcuiñi Yá Ndiòxí sá ñà túú xini-í tée càcunehe-ndo-án — càchí-dé xáhaⁿ-dè xii-yu.

⁷³ Te tna tnaa-ni ní cuu, te dava ñáyiú xíndecu xíán ñí xáhaⁿ tùcú-yu xii té Pèlú:

—Ndáá sá tñahá-n xica cuu-n ndihí tée ndèca-güedé cuànguihu-án, chí ñáyúhú cáháⁿ-n —càchí-yu xáhãⁿ-yu xii-dé.

⁷⁴ Te té Pèlú ní xáhaⁿ-dè xii-yu:

—Nchàcuiñi Yá Ndiòxí sá yúhú cáháⁿ ndáá-í sá ñà túú xini-í tée càcunehe-ndo-án —càchí-dé xáhaⁿ-dè xii-yu.

Te òré-ni-án ñí cana ñí lihi, ⁷⁵ Te ní ndacu iní té Pèlú nàcuáa ní xáhaⁿ Jèsús xii-dé sá cùmání-gá cana ñí lihi te úní xito cáháⁿ-dé sá ñà túú xini ñahá-dè xii-gá. Te ní quee-dé tnuú ñáyiú-án cuáháⁿ-dé ñí xio ní ndáhyú víhí-dè ní ndixi cuéchi iní-dé.

27

Ndèca-güedé Jèsús cuáháⁿ núú tẽ Pilatú

(Mr. 15:1; Lc. 23:1-2; Jn. 18:28-32)

¹ Te sátá ñí túndaá te nchaa cue tée cùu dútú cùnùu, ndihí cue tée cùu sacuéhé núú ñáyiú isràél ní ndatnúhu-güedé nàcuáa cada-güedé cahni-güedé Jèsús. ² Te ní dácútú ñaha-güedé xii-gá, te ndèca ñaha-güedé cuáháⁿ núú tẽ Pilatú tée cùu gobiernú.

Ní xihí té Jüdás

³ Te té Jüdás tée ní sáha cuendá ñahá xii Jèsús ní cutnùní iní-dé sá cáhni ñaha-güedé xii-gá, te ní ndixi cuéchi iní-dé sá ñà túú ní quide váha-dé sá dúcáⁿ ñí quide-dé ní sáha cuendá ñahá-dè xii-gá núú cuè tée cùu úhú iní ñahá, te ní xica-dé cuáháⁿ-dé danchòcáva-dé ócò úxí díhúⁿ cuixíⁿ núú cuè dútú cùnùu-án,

ndihí núú cuè tée cùu sacuéhé núú ñáyiú isràél, chí diu cue tée-án ñí sáñaha-güedé díhúⁿ xii-dé. ⁴ Te òré ní quexio té Jüdás-án núú ndécú-güedé, te xáhaⁿ-dè xii-güedé:

—Yúhú, ñà túú ní quide váha-í sá dúcáⁿ ñí quide-í ní taxi cuendá-í ñí tée ñà túú tñahí cuéchi-xi cahni-ndo-dé —càchí-dé xáhaⁿ-dè xii-güedé.

Te cue tée-án ñí xáhaⁿ-güedé xii-dé:

—Nchúhú, ñà túú nágá cuendú cuini-ndí cáháⁿ ndihí ñaha-ndí xii-n, te mee-n ñaha núu nása sàni iní-n cada-n —cachí-güedé xáhaⁿ-güedé xii-dé.

⁵ Te té Jüdás ní dängoyo-dé díhúⁿ-án xití veñúhu càhnu sá ño cùnùu, te ní xica-dé cuáháⁿ-dé ní dácuehné-dé méé-dé.

⁶ Te cue dútú cùnùu ní naqueheⁿ-güedé díhúⁿ-án, te ní xitñaha-güedé:

—Díhúⁿ-a ní quéyáhu cuendá sá cùu ñí ñáyiú, núu xíán vá cúu nàchihi-o xití cajúá núú ñúhú sá cúu cuendá Yá Ndiòxí —càchí-güedé xitñaha-güedé.

⁷ Te ní ndatnúhu-güedé te ní cuu ñí nnuu-güedé cuendá nacuaaⁿ-güedé ñí xichi núú cáá ñúhu danani-güedé Núú Cuáha Nchaa Sá Cuáha Ñuhu, te xíán ñí saaⁿ-güedé cuendá xíán nguñdúxi nchaa ñáyiú véxi xica. ⁸ Te ní nadáma diu ñuhu-án, te vitna dñani-güedé Ñuhu Yáhu Níñí, duha dñani-güedé.

⁹ Te ducaⁿ ñí cuu chí ní quee ndáá-xi nàcuáa ní cáháⁿ ndí Jeremiás tée ní xóo cáháⁿ tñuhu Yá Ndiòxí ndéé sanaha, te duha ní cachí ndí: “Cue tée isràél ní cachí-güedé sá ócò úxí díhúⁿ cuixíⁿ cháhu-güedé cuendá ñí tée queheⁿ cuendá-güedé. Te díhúⁿ-án nàqueheⁿ-güedé, ¹⁰ te cuaaⁿ-güedé ñí xichi núú nání Núú Cuáha Nchaa Sá Cuáha Ñuhu, te ducaⁿ cada-xi chí ducaⁿ ñí cachí Yá Ndiòxí cunduu”, duha ní cachí ndí Jeremiás-án.

Jèsús ndécú-gã núú tẽ Pilatú

(Mr. 15:2-5; Lc. 23:3-5; Jn. 18:33-38)

¹¹ Te Jèsús ndécú-gã núú tẽ Pilatú tée cùu gobiernú, te tée-án nĩ xícáⁿ tnúhú-dẽ núú-gã, te xãhaⁿ-dẽ xii-gá:

—¿Ndáá sá díú-n cùu-n tée yìndaha ñaha xii ñáyiú isràél-ãⁿ? — càchí-dé xãhaⁿ-dẽ xii-gá.

Te Jèsús ní xãhaⁿ-gã xii-dé:

—Diu-í yìndaha-í-yu —càchí-gã xãhaⁿ-gã xii-dé.

¹² Te cue dútú cúnùu ndihí cue tée cùu sacuéhé núú ñáyiú isràél sácáⁿ cuéchi-güedé núú tẽ Pilatú cuendá Jèsús, dico mee-gã ní ñⁿ tnúhu ñá túú ní cãháⁿ-gá. ¹³ Te té Pilatú ní xãhaⁿ-dẽ xii-gá:

—Cáháⁿ, ná cuendá ñá túú cãháⁿ-n, te cundehe nã ndéé duha titní cuéchi dàcaa cue tée-a díquí-n —càchí-dé xãhaⁿ-dẽ xii-gá.

¹⁴ Dico Jèsús ñá túú tnàhí ní cãháⁿ-gá, te té Pilatú tée cùu gobiernú-án ño ní cuñúhu-dé sá dúcáⁿ ñá túú tnàhí ní cãháⁿ-gá.

Ní quide ndáá-güedé sá cãhni-güedé Jèsús

(Mr. 15:6-20; Lc. 23:13-25; Jn. 18:38-19:16)

¹⁵ Te ndi tnahá nduu vico pascuá dácácu té Pilatú tée cùu gobiernú-án ñⁿ tée yìhi vecaá chi ducaⁿ tnàhí quide-dé, te mee ñáyiú cãháⁿ-yu te núu ndëdacáa tée yìhi vecaá-án cãcu-dé te tée-án dácácu-dé. ¹⁶ Te dàvá-án yìhí ñⁿ tée nàni Barrabás vecaá, te tée-án ió cuendú-dé sá ño nèhé ní quide-dé. ¹⁷ Te ní natacá nchaa ñáyiú, te té Pilatú ní xícáⁿ tnúhú-dẽ núú-yu, te xãhaⁿ-dẽ:

—¿Ndëdacáa núú ùú cue tée-a cuini-ndó dácácu-í-güedé-í? ¿Té Barrabás ãⁿ Jèsús tée nàni Cristú? — càchí-dé xãhaⁿ-dẽ xii-yu.

¹⁸ Te ducaⁿ nĩ cãháⁿ té Pilatú, chi ní cutnùni iní-dé sá dicó sá cuèdú iní-güedé ducaⁿ nĩ quide-güedé ní sáha cuendá ñáhá-güedé xii Jèsús núú-dẽ.

¹⁹ Te nini nùcúo té Pilatú núú xèhndé-dé cuéchi ní tendaha ñàdihí-dé tnúhu cuáháⁿ núú-dẽ, te duha ndùu tnúhu ní tendaha-aⁿ: “Vá cãní iní-n nã cada-n tée ní taxi cuendá ñáhá-güedé xii-n, tée ñá túú tnàhí cuéchi-xi, chi icuini ío nèhé ní dácóto ñaha saní-í cuendá-dé”, duha ndùu tnúhu ní xãhaⁿ-aⁿ xii té Pilatú.

²⁰ Dico cue tée cùu dútú cúnùu, ndihí cue tée cùu sacuéhé núú ñáyiú isràél ní xãhaⁿ-güedé xii ñáyiú sá ná cuñáhá-yu xii té Pilatú dácácu-dé té Barrabás te cahni-dé Jèsús, te ní quidé-yu nàcuáa ní xãhaⁿ-güedé.

²¹ Te té Pilatú-án nĩ xãhaⁿ tucu-dé xii-yu:

—¿Ndëdacáa núú ùú cue tée-a cuini-ndó dácácu-í? —càchí-dé xãhaⁿ-dẽ xii-yu.

Te ní xãháⁿ-yu xii-dé:

—Té Barrabás dácácu-n — càchí-yu xãháⁿ-yu xii-dé.

²² Te té Pilatú ní xícáⁿ tnúhú-dẽ núú-yu, te xãhaⁿ-dẽ:

—¿Te ná cuini-ndó cada-í Jèsús tée nàni Cristú tée càchí sá Yã Ndiöxí ní tendaha ñaha xii-dé véxi-dé ñuyíú-a-í? —càchí-dé xãhaⁿ-dẽ xii-yu.

Te nchaá-yu ní cãháⁿ-yu, te xãháⁿ-yu:

—Cata caa-dé núú cùrúxí — càchí-yu xãháⁿ-yu xii-dé.

²³ Te té Pilatú ní xãhaⁿ tucu-dé xii-yu:

—¿Te ná cúú cuéchi ní quide-dé núu ducaⁿ cuini-ndó cada-í-dé-í? — càchí-dé xãhaⁿ-dẽ xii-yu.

Dico nchaá-yu uuⁿ-gá níhi ní cãháⁿ-yu, te xãháⁿ-yu xii-dé:

—¡Cata caa-dé núú cùrúxí! — càchí-yu xãháⁿ-yu xii-dé.

²⁴ Te té Pilatú ní cutnùni iní-dé sá vá nihí-dé nàcuáa cada-dé, chi uuⁿ-gá ní nguíta ñáyiú xícuaá-yu, te xíãⁿ ní xícáⁿ-dé ndute ní ndáhá-dé núú nchaa ñáyiú, te ní xãhaⁿ-dẽ xii-yu:

—Tée-a cùu-dé ñⁿ tée ñá túú tnàhí cuéchi-xi, te nchòhó cuini-ndó sá cùú-dé, dico diu-ni mee-ndo cùdo yáhu-ndo-dẽ chi yúhú vá

cuidó yáhu-í-dé —càchí-dé xáhaⁿ-dë xii-yu.

²⁵ Te nchaá-yu ní xáhãⁿ-yu xii-dé:

—jDiu nchúhú ndihí cue déhe-ndí cuido yáhu-ndí-dé! —càchí-yu xáhãⁿ-yu.

²⁶ Te sátá dúcáⁿ te té Pilatú ní dácácu-dé té Barrábás, te ní táuchíúⁿ-dë ní cani-güedé Jèsús. Te sátá dúcáⁿ ní quide ñaha-güedë xii-gá, te ní táuchíúⁿ-dë candeca ñaha-güedë xii-gá quihíⁿ cata caa ñaha-güedë xii-gá núú cùrúxí.

²⁷ Te cue téé cùu sandadú té Pilatú ndécá-güedë Jèsús cuánguihu xiti vehe càhnu cuu cuendá-dé, te cue téé cùu sandadú-áⁿ ní cana-güedé dava-gá cue sandadú núú dúcáⁿ ndèca-güedé Jèsús cuánguihu-áⁿ.

²⁸ Te xiáⁿ ní taunuu-güedé dóó-gã, te ní dácúihnú ñaha-güedé xii-gá ñⁿ dóó tícuèhé víhí. ²⁹ Te ní cadúha-güedé ñⁿ coróná iñu ní chihi-güedé díquí-gã, te ní chitnii-güedé ñⁿ carrutí ndaha cùha-gá, te ní nguñí xítí-güedé núú-gã cúdíquí ndeé ñáhá-güedë xii-gá, te xáhãⁿ-güedë:

—jÍo càhnu cuu yohó téé yíndaha ñaha xii ñáyiú isráél! —càchí-güedé xáhãⁿ-güedé xii-gá.

³⁰ Te ní tiú díí ñáhá-güedë xii-gá, te ní queheⁿ-güedé carrutí sá ní sáñaha-güedë xii-gá te ní ducuⁿ-güedé díquí-gã. ³¹ Te sátá ní yáha ní cudíquí ndeé ñáhá-güedë xii-gá, te ní nataunuu ñaha-güedë xii-gá dóó tícuèhé víhí sá ní dácúihnú ñaha-güedé xii-gá, te ní dándíúnuu ñaha-güedë xii-gá dóó méé-gã, te dätñuní ndécá ñaha-güedé cuáháⁿ núú cáta càa ñaha-güedé xii-gá núú cùrúxí.

Sàta caa-güedé Jèsús núú cùrúxí

(Mr. 15:21-32; Lc. 23:26-43; Jn. 19:17-27)

³² Te ñuhu-güedé ndihí-gá ichi, te ní naníhí-güedé ñⁿ téé ñuú Cirené

nání-dë Xímú, te téé-áⁿ ní quide yica-güedé ní xido-dé cùrúxí sá nchídó Jèsús.

³³ Te ní sáá-güedé ndihí-gá ñⁿ xichi núú nání Gólgotá, te tnúhu-áⁿ quée-xí: Núú nání yìqui díquí ndíyi, duha quèe-xi tnúhu-áⁿ. ³⁴ Te xiáⁿ sáñaha-güedë ndudí úá coho-gá ní cùu, te ñá túú ní xihí-gá chi dico-ni ní xito ndeé-gá.

³⁵ Te ní sata caa ñaha-güedë xii-gá núú cùrúxí, te sátá dúcáⁿ te cue téé cùu sandadú-áⁿ ní xito ndeé-güedé núu ndèdacàa-güedé cuu cuendá-güedé dóó-gã. Te ducaⁿ ní cuu chi ní quee ndáá-xi nàcuáa ní cáháⁿ ñⁿ téé ní xóo cáháⁿ tnúhu Yá Ndióxi ndeé sanaha yòdo tnuní núú tütú-gá, te duha càchí-xi: “Ní xito ndeé-güedé núu ndèdacàa-güedé cuu cuendá-güedé dóó-gã”, duha ní cachí téé-áⁿ te ducaⁿ ní ngódó tnuní núú tütú-gá.

³⁶ Te sátá dúcáⁿ ní quide-güedé, te ní ngóo-güedé ndeé ñáhá-güedë xii-gá. ³⁷ Te ní taxi ndecu-güedé ñⁿ sá ndeé lètrá ndàa díquí-gã. Te lètrá-áⁿ càháⁿ-xi ná cuendá ducaⁿ ní quide ñaha-güedë xii-gá, te duha càháⁿ lètrá-áⁿ: “Téé-a cùu-dé téé yíndaha ñaha xii ñáyiú isráél”, duha càchí-xi. ³⁸ Te tnáhá úú cue téé cùu ñadúhú ní sata caa-güedé diu-ni núú cùrúxí tucu, te ñⁿ-dé ní sata caa-güedé xio cùha-gá, te ingá-dé ní sata caa-güedé xio dätñi-gá.

³⁹ Te nchaa ñáyiú yáha yatni núú tácàa-gá-áⁿ, te dàcuicó-yu díquí-yu ndèhe ñáhá-yu xii-gá, te xícuèhé ñáhá-yu.

⁴⁰ Te xáhãⁿ-yu xii-gá:

—Yòhó càchí-n sá dàngoyo-n veñúhu càhnu sá ïo cùnuu, te dandàa-n ingá veñúhu saa, te xiti úní-ni nduu sa nadaxinu-n, te vitna tanuu núú cùrúxí-áⁿ dácácu-n mée-n te núu ndisa sá Dèhe Yá Ndióxi cúu-n —càchí-yu xáhãⁿ-yu xii-gá.

⁴¹ Te diu-ni ducaⁿ cùdíquí ndeé ñáhá cuè téé cùu dútú cúnúu xii-gá, ndihí cue téé dàcuaha ñaha xii ñáyiú

nchaa tnúhu ní chídó tnùní ndíi Moisés, ndíhi cue tée cùu fariséú, ndíhi cue tée cùu sacuéhé núú ñáyiú israél, te xítñaha-güedé:

42 —Tée-a ní ndacu-dé ní dácácu-dé dava ñáyiú, te mee-dé ñá ndácú-dé dácácu nihnu-dé mée-dé. Te núu ndisa sá cúú-dé tée yíndaha ñaha xii ñáyiú israél, te na cundehe-o nuu-dé núú cùrúxí-a cuendá quíndáá iní-ó-dé. 43 Te càchí-dé sá sándáá iní-dé Yá Ndiöxí, te mee-gá ná dácácu ñaha-gá xii-dé te núu cùndahú iní ñáhá-gá, chi mee-dé càchí-dé sá Dèhe-gá cúú-dé —càchí-güedé xítñaha-güedé.

44 Te ndéé tnàhá cue tée cùu ñadúhú táca xio xio diñi-gá xícüehé ñáhá-güedé xii-gá.

Ní xíhí Jèsús

(Mr. 15:33-41; Lc. 23:44-49; Jn. 19:28-30)

45 Te òré ní cuu cuádava nduu te ní cunee nihíi ñuyíú, te ducaⁿ-ní càa ní cuu caá úní sacuaa. 46 Te òré sa ta cüyatni cuu caá úní sacuaa-án, te níhi ní cáháⁿ Jèsús, te càchí-gá:

—Èlí, Èlí, ¿láma sabàctani? —càchí-gá.

Te tnúhu-án quée-xí: Ndiöxí mée-í, Ndiöxí mée-í, ¿ná cuendá ní dáñá ñaha-n xii-í?, duha quèe-xi tnúhu-án.

47 Te dava cue tée xíndecu yatni núú táca-gá-án ní tecú dóho-güedé nàcuáa ní cáháⁿ-gá, te ní xítñaha-güedé:

—Tée-a càna-dé té Èliás —càchí-güedé xítñaha-güedé.

48 Te òré-ni-án ñí quene cunu ñí cue tée xíndecu-án ñí queheⁿ-dé luha cáchí, te ní chindóyo-dé xití ndudí íá, te ní chinenu-dé díqui ñí yutnu càni te ní ndocani-dé ní chihi-dé yuhu-gá. 49 Te dava-güedé ní xáhaⁿ-güedé xii téé-án:

—Cundetú tnaa na cundehe-o nacoto núu quixí té Èliás dácácu ñaha-dé xii-dé —càchí-güedé xáhaⁿ-güedé xii téé-án.

50 Te Jèsús níhi ní cana saa-gá, te ní xíhí-ni-gá. 51 Te sáta dúcáⁿ te ní ndátá dõó cúú còrtiná xití veñúhu càhnu sá ño cùnuu ní quée dava ndáá, te ndàa núú ñnu ní ngúíta-xi ní ndátá, te ní tnáa, te dava cava nahnu ní táhú. 52 Te dava yaú núú yíndüxi ñáyiú ní xíhí ní sándáá iní ñáhá xii Yá Ndiöxí ní naçaáⁿ te ní ndotó-yu. 53 Te sáta ñí yáha ní ndoto Jèsús, te cue ñáyiú ní ndoto-án cuàngüihú-yu xití ñuú Jerusálén, te cue ñáyiú ñuú-án ño vai-yu ní xiní-yu cue ñáyiú ducaⁿ ñí ndoto-án.

54 Te sá dúcáⁿ nãndi ní guide-xi, ndíhi sá dúcáⁿ ñí tnáa xíáⁿ ño ní yuhú tée cùu capitáⁿ ndíhi ichaa dava-gá cue tée ndècu ndíhi-dé ndèé-güedé yiqui cùñú Jèsús, te ní xítñaha-güedé:

—Sá ndáá ndisa sá díú tée-a cùu-dé Dèhe Yá Ndiöxí ní cùu —cachí-güedé xítñaha-güedé.

55 Te xica xínutñí vai ñáyiú diñí ndéhè-yu nchaa nàcuáa ní guide ñaha-güedé xii Jèsús, te ñáyiú-án cúú-yu ñáyiú ní chindèé-yu Jèsús, te ndéé distritú Galilea ní chinchícúⁿ ñáhá-yu xii-gá. 56 Te tnúú ñáyiú-án tnàhá tá Màriá Magdalèna, ndíhi tá Màriá nãná tẽ Jàcobó ndíhi té Chèé, ndíhi nãná cue déhe té Zebèdeú.

Chìndúxi-güedé Jèsús

(Mr. 15:42-47; Lc. 23:50-56; Jn. 19:38-42)

57 Te ndècu ñí tée cuica nàni-dé Chèé te cùu-dé tée ñuú Arimàtea, te tnàhá-dé ní tnahá tnúhu-dé ndíhi Jèsús. Te òré sa ní cuaa, 58 te ní sáháⁿ-dé núú tẽ Pilatú, te xáhaⁿ-dè núu vá cùndèe iní-dé daña-dé chindúxi-dé yiqui cùñú Jèsús. Te té Pilatú-án ñí sáha-dé tnúhu, te ní táuchíúⁿ-dè sá cuáha cuendá-güedé té Chèé-án yiqui cùñú-gá. 59 Te té Chèé-án ñí queheⁿ cuendá-dé yiqui cùñú-gá, te ní chidúcúⁿ-nuu-dé ñí dóó cùxíⁿ dóó cándò. 60 Te sa nchí ñí yaú sáá ní caáⁿ té Chèé-án ñí yiqui naha càva te xíáⁿ cúú cuendá-dé, te yaú-án ñí chihi-dé yiqui cùñú

Jèsús, te dàtnùní ní sadí-dé ìᵀn yúú cáhnú yúú quèhéᵀn yuhu yaú-áᵀn, te ní xica-dé cuánuhú-dé. ⁶¹ Te tnàhá tá Màriá Magdalèná, ndihì ingá xíchí nání Màriá ní quexió-yu ní ngóo-yu yatni núú nchìi yaú-áᵀn.

Cue téé ndèé yaú núú yíhí yìqui cuñú Jèsús

⁶² Te sátá nǐ yáha ní quide túha ñáyiu nchaá sá nándihì-yu nduu tnèé nduu ndètatú-yu-áᵀn, te ìiu-ni nduu ndètatú-yu-áᵀn nǐ sáháᵀn cue dútú cúnùu, ndihì cue téé cùu fariséú ní cáháᵀn ndihì-güedé té Pìlatú. ⁶³ Te xáhaᵀn-güedé xii-dé:

—Yòhó téé cùnùu, véxi-ndí càchí tnúhu-ndí sá nǐ ndacu iní-ndí sá tée ndehnde nǐ xíhí-áᵀn càchí-dé òré ndécú-gá-dé sá ndùu úní sá cùú-dé, te ndoto-dé. ⁶⁴ Te tendaha-n cuè téé na quíhíᵀn-güedé cundeé-güedé yuhu yaú núú nǐ chihi-güedé yìqui cùñú-dé, chi na cuáháᵀn quíhíᵀn cue téé ní xica cuu ndihì-dé duhu-güedé yìqui cùñú-dé, te cuñaha-güedé xii ñáyiu sá nǐ ndoto-dé. Chi núu ducaᵀn na càda-güedé te ío-gá dandàhú-güedé cue ñáyiu dàcúxí dàtná ní quide mee tée ní xíhí-áᵀn —càchí-güedé xáhaᵀn-güedé.

⁶⁵ Te té Pìlatú ní xáhaᵀn-dé xii-güedé:

—Náu cue sandàdú-a can-deca-ndo-güedé quíhíᵀn, te cadí váha-ndo ndihì-güedé yuhu yaú-áᵀn nàcuáa tàú-xi cunduu, te na cundeé-güedé nàcuáa sàni iní-ndó cùnduu —cachí-dé xáhaᵀn-dé xii-güedé.

⁶⁶ Te cue téé-áᵀn nǐ xica-güedé cuáháᵀn-güedé, te ní tee-güedé ìᵀn sèñá yúú ndèdí yèhe yaú-áᵀn, te ní dándòo-güedé cue sandàdú-áᵀn ndèé-güedé yaú-áᵀn, te ducaᵀn nǐ quide-güedé cuèndá sá vǎ yòo quíhíᵀn nacaáᵀn yaú-áᵀn.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

¹ Te sátá nǐ yáha nduu ndètatú ñáyiu, te ndumíngú nehé víhí-ní nǐ xica tá Màriá Magdalèná ndihì ingá xíchí nání Màriá cuángotó-yu yaú núú nǐ chihi-güedé yìqui cùñú Jèsús. ² Te uuᵀn nihi víhí ní tnáa, te òré ducaᵀn nǐ quide-xi chi ìᵀn espíritú xínú cuèchi núú Yá Ndiòxí ní quexio-xi núú dúcáᵀn nchìi yaú núú nǐ chihi-güedé yìqui cùñú Jèsús, te ní xócání espíritú-áᵀn yúú ndèdí yèhe yaú-áᵀn te ní ngóo-xi núú yúú-áᵀn. ³ Te dàtná dátásaᵀn-xi òré sáa nduté dùcaᵀn datásaᵀn-xi núú espíritú-áᵀn, te dóo níhnú-xí cuixíᵀn quiyí. ⁴ Te òré ducaᵀn nǐ quide-xi te cue sandàdú ndèé yaú-áᵀn nǐ quidi ñaha-xi xì-güedé sá nǐ yùhú-güedé, te ní nduá-güedé, te ní xíta sá xíní tnùnì-güedé. ⁵ Te espíritú-áᵀn nǐ xáhaᵀn-xi xii cue ñáyiu ìhí cuángoto yaú-áᵀn:

—Nchòhó ñáyiu ìhí véxi coto yaú-a, vá yùhú-ndó chi yùhú cùtnùní iní-í sá nchòhó véxi-ndo nànducun-do yìqui cuñú Jèsús Yaá ní xíhí núú cùrúxí. ⁶ Dico Yaá-áᵀn chí ñá túú-gǎ ndécú yìqui cuñú-gá iha, chí sa ní ndoto-gá, te ìiu ducaᵀn nǐ cachí-gá sá ndótó-gǎ cùtnàhá vátá cùú-gá, te chí táquixi cundehe-ndo núú nǐ sacáᵀn-güedé yìqui cùñú-gá ní cùu te quini-ndó nǎ ñá túú-gǎ. ⁷ Te vitna ío ndihì chí cuáháᵀn núú xíndecu cue téé ní xica cuu ndihì-gá, te duha cuñaha-ndo xì-güedé: “Ní ndoto Jèsús Yaá ní xíhí ní cùu, te codonùu-gá núú-ndó quíhíᵀn distritú Galiléa te yácaᵀn quini-ndó-gǎ”, duha cuñaha-ndo xì-güedé. Duha ndùu tnúhu ní cachí tnúhu-í xii-ndo —càchí espíritú-áᵀn xáhaᵀn-xi xii cue ñáyiu ìhí-áᵀn.

⁸ Te cue ñáyiu ìhí-áᵀn nǐ natnái-yu ichi, te súúní ndihì cuánuhú-yu

núú xĩndecu cue téé ní xica cuu ndihí Jèsús cuèndá nacani tnúhu-yu núú-güedé nàcuáa ní xáhaⁿ espíritú-áⁿ xii-yu, te cuèi ní yùhú-yu dico súúni cùdíí ìní-yu. ⁹ Te ichi ñùhú-yu cuánuhú-yu, te na ìní-yu ní quexio Jèsús núú-yu ní dándácõo váha ñaha-gã xii-yu. Te ñáyiu-áⁿ nĩ ngüíñí xitĩ-yu núú-gã, te ní numi ñahá-yu xii-gá, te ní chiñuhu ñahá-yu. ¹⁰ Te ní xáhaⁿ-gã xii-yu:

—Vá yùhú-ndó, chí cuáháⁿ cúñaha-ndo xii cue téé ní xica cuu ndihí-í sá ná quihíⁿ-güedé distritú Galileá, te yacáⁿ quini ñahá-güedé xii-í —càchí-gá xáhaⁿ-gã xii-yu.

Nàcuáa ndùu tnúhu ní nacani cue sandàdú

¹¹ Te nini ñùhu cue ñáyiu dìhí-áⁿ ichi cuánuhú-yu, te dava cue sandàdú cue téé ndéé yaú-áⁿ ní cùu ní xica-güedé cuánuhú-güedé ñuú cuèndá nacani tnúhu-güedé núú cuè téé cùu dútú cùnùu nacuáa ní cuu. ¹² Te cue téé cùu dútú cùnùu-áⁿ nĩ quide-güedé jundá ndihí cue téé cùu sacuéhé nũú ñáyiu israél, te ní ndatnúhu-güedé nàcuáa cada-güedé, te ní quide ndáá-güedé ndihí cue sandàdú-áⁿ sá cuañaha-güedé vai díhúⁿ cuèndá dacuàndehnde-güedé. ¹³ Te ní xáhaⁿ-güedé xii cue sandàdú-áⁿ:

—Cuíni-ndí sá vã càháⁿ ndáá-ndó nũú ñáyiu nàcuáa ní cuu, chí cúñaha-ndo xii-yu sá òré xidí-ndó nĩ quixi cue téé ní xica cuu ndihí-dé ní dúhú-güedé yiqui cùñú-dé néhé-güedé cuáháⁿ, duha cúñaha-ndo xii-yu. ¹⁴ Te núu na nihí té Pilatú téé cùu gobiernú tnúhu nàcuáa cúñaha-ndo xii ñáyiu, te nchúhú cada ndáá-ndí ndihí-dé cuèndá sá ñà túú ná cada ñaha-dé xii-ndo —càchí-güedé xáhaⁿ-güedé xii cue sandàdú-áⁿ.

¹⁵ Te cue sandàdú-áⁿ nĩ queheⁿ cuèndá-güedé díhúⁿ, te ní xica-güedé cuáháⁿ-güedé te ní cáháⁿ-güedé nàcuáa ní xáhaⁿ cuè

téé-áⁿ cãháⁿ-güedé. Te nchaa ñáyiu israél ní nihí-yu tnúhu ní cáháⁿ-güedé-áⁿ, te ñiu-ni tnúhu-áⁿ càháⁿ-yu ndéé vitna.

Jèsús xáhaⁿ-gã xii cue téé ní xica cuu ndihí-gá nàcuáa ndùu chiuⁿ cada-güedé

(Mr. 16:14-18; Lc. 24:36-49; Jn. 20:19-23)

¹⁶ Te ndi ùxí ñⁿ cue téé ní xica cuu ndihí Jèsús ní xica-güedé cuáháⁿ-güedé ñⁿ yucu càa distritú Galileá núú nĩ xáhaⁿ-gã naníhí tnáhá-güedé ndihí-gá. ¹⁷ Te òré ní xiní-güedé Jèsús te ní chiñuhu ñaha-güedé xii-gá, dico dava-güedé sãni ñⁿ sani úú ìní-güedé nũu ñiu-gá àdi ñá díú-gã. ¹⁸ Te Jèsús ní sãndehe yatni-gá ndéé núú-güedé, te ní xáhaⁿ-gã xii-güedé:

—Yúhú ndécú ndihí-í tnúhu ndee ìní táxí tnùni-í cuèi andiú te cuèi ñuyíú-a. ¹⁹ Te vitna tàuchiuⁿ-í sá quihíⁿ-ndó nihíí ñuyíú cáháⁿ-ndó tnúhu-í núú ñáyiu cuèndá tuha ñahá-yu xii-í, te dacuàndute-ndó-yu. Te òré ducaⁿ càda-ndo, te cacunehe-ndo tátá-ó Dútú Ndióxi ndihí yúhú Yaá cùú Dèhe-gá ndihí Espiritú-gá. ²⁰ Te cúñaha-ndo xii-yu sá ná càdá-yu nchaa nàcuáa sa ní dánèhé ñahá-í xii-ndo càda-ndo. Te na càchí tnúhu-í sá cùndècu ndihí ñaha-ni-í xii-ndo ñuyíú-a ndéé ná sãa nduu nãa-xi —cachí-gá xáhaⁿ-gã xii-güedé. Te ducaⁿ na cùnduu.

TNÚHU NÍ CHÍDÓ TNÚNÍ TĒ MĂCÚ

Té Juáá tée dàcuandute ñaha xii ñáyiú càháⁿ-dé tnúhu Yá Ndióxi xití yucu

(Mt. 3:1-12; Lc. 3:1-9, 15-17; Jn. 1:19-28)

¹ Duha ní quesaha tnúhu sá càháⁿ nàcuáa naníhí tǎhú-ó tnúhu Xítoho Jesucristú Déhe Yá Ndióxi.

² Te ndí Chàíá tée ní xóo cáháⁿ tnúhu Yá Ndióxi ndéé sanaha ní chídó tnùní ndíi nàcuáa ní xáhaⁿ Yá Ndióxi xii Déhe-gá, te duha ní xáhaⁿ-gǎ:

Tendaha-ǎ ñⁿ tée codonùu-dé núú-n,

te dàtúha-dé ñáyiú cuendá tñi-yu tnúhu-n.

³ Te tée-áⁿ quihi-dé xití yucu te níhi cáháⁿ-dé cúñaha-dě xii ñáyiú: “Chí dáñá nchàa ichi cuehé ichi duha ndècu-ndo, te tñi-ndo ichi váha, te ducaⁿ càda-ndo cuendá cundecu túha-ndo, chí véxi Yáá ío cùnùu”, duha cúñaha-dě xii-yu.

Duha ndùu tnúhu ní chídó tnùní ndí Chàíá nàcuáa ní xáhaⁿ Yá Ndióxi xii Déhe-gá. ⁴ Te tée ñi cuendá-xi ní ngódó tnùní-áⁿ nání-dě Juáá, te tée-áⁿ ní xíhi-dé xití yucu ní cáháⁿ-dé tnúhu Yá Ndióxi, te ní xóo dacuandute-dé ñáyiú, te duha ní xáhaⁿ-dě xii-yu:

—Chí dándixi túu ñí sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te ducaⁿ te Yá Ndióxi cada càhnu ñí-gá nchaa yíca cuèchi-ndo —duha ní xáhaⁿ-dě xii-yu.

⁵ Te nchaa ñáyiú distritú Jùdeá, ndíhi ñáyiú ñúú Jerusálén ní sáháⁿ-yu ndéé yúte Jòrdán núú ndécú tē Juáá ní xíndedóho-yu nchaa tnúhu ní cáháⁿ-dé. Te cue ñáyiú ní náhmá nchaa yíca cuèchi-xi te ní dácuañdute ñaha-dé xii-yu.

⁶ Te tē Juáá-áⁿ ní xíhnu-dé dóó idi caméyu, te ñⁿ ñí ní cuu pǎñú xití-dé, te ní xóo caxi-dé tíca lǎngóstá ndíhi ndudí ñúñú cuéchi. ⁷ Te ní xáhaⁿ tucu-dé xii ñáyiú:

—Nchícúⁿ ñⁿ tée véxi, te tée-áⁿ ío-gá cúnùu-dé dàcúúxi yúhú, chí yúhú cùu-í ñⁿ tée duuⁿ duuⁿ ñá túú tàu-í ngúnundeyi-í nandaxi cuèdicó ñíhi ñihnu chàu-dé dico quide-í chiúⁿ-dé. ⁸ Te yúhú dácuañdute ñaha-í xii-ndo, dico mee-dé taxi-dé Espiritú Yá Ndióxi cundecu ndíhi-ndo —càchí-dé xáhaⁿ-dě xii-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-áⁿ ní quee Jèsús ñúú Nazàrét ñⁿ ñúú yíndèhu distritú Galileá cuáháⁿ-gá yúte Jòrdán. Te yàcáⁿ ní dácuañdute ñaha tē Juáá xii-gá. ¹⁰ Te òré ní nene-gá xití ndute, te ní xini-gá nchii andiu, te ní quee Espiritú Yá Ndióxi véxi cuuⁿ-xi ngúndecu ndíhi ñaha-xi xii-gá, te dàtná cáá ñⁿ lómá cáá Espiritú-áⁿ véxi cuuⁿ-xi. ¹¹ Te òré-áⁿ ní tecú ní cáháⁿ Yá Ndióxi ndéé andiu, te xáhaⁿ-gá xii Jèsús:

—Yòhó cùu-ñ Déhe-í tée ío cùu ñí-í te ío cùdí ñí ñáhà-í xii-n —càchí-gá xáhaⁿ-gá.

Sácuñhá quidé yíca-xi cada Jesús sá ñà túú tàú-gá cada-gá dico ñá túú ní quide-gá

(Mt. 4:1-11; Lc. 4:1-13)

¹² Te Espiritú Yá Ndióxi ndécá-xi Jèsús cuáháⁿ ñⁿ xití yucu. ¹³ Te xití yucu-áⁿ ío víhi quiti dééⁿ, te xíaⁿ ndécú Jèsús ní ngúita sácuñhá quidé yíca-xi cada-gá ñⁿ sá ñà túú tàú-gá cada-gá dico ñá túú ní sàndáá ñí-gá. Te cue espíritú xínú cuèchi núú Yá Ndióxi ní xinu cuèchi-xi núú-gá. Te ní xíndecu-gá údico nduu xití yucu-áⁿ.

Distritú Galileá ní chisaha Jèsús chiuⁿ ní tǎhú Tǎtǎ-gǎ Dúrtú Ndiǒxí cada-gá

(Mt. 4:12-17; Lc. 4:14-15)

14 Te sátá nǐ ngava té Juàá vecaá, te Jèsús cuáháⁿ-gá distritú Galileá dǎnehé-gá ñáyiú tnúhu váha, tnúhu sá càháⁿ nàcuáa ndíhu ndaha ñaha Yá Ndiǒxí xii-yu. 15 Te xǎhaⁿ-gá xii-yu:

—Vitna sa ní cuyatni nduu ndíhu ndaha ñaha Yá Ndiǒxí xii-ndo, te chí dáñá nchàa ichi cuehé ichi duha ndècu-ndo, te quindáá iní-ndó tnúhu váha, tnúhu sá càháⁿ nàcuáa naníhí tǎhú-ndó —càchí-gá xǎhaⁿ-gá xii-yu.

Jèsús càháⁿ-gá cúmí tnahá cue téé tñì chácá

(Mt. 4:18-22; Lc. 5:1-11)

16 Te Jèsús ñúhú-gǎ ichi cuáháⁿ-gá tá yǎha-gá yuhu làgúná Galileá, te ní xiní-gá té Xímú ndíhi ñaní-dé té Ndríxí xídáquèe-güedé ñunu-güedé xití ndute tñì-güedé chácá, chí quiti tnahí-án cúú chiuⁿ-güedé tñí-güedě-di. 17 Te Jèsús ní xǎhaⁿ-gá xii-güedé:

—Chí dáñá chiuⁿ quide-ndo-án, te quixi-ndo chitnahá ñáhá-ndó xii-í te taxi-í ingá núú chiuⁿ cada-ndo chí quíhíⁿ-ndó càháⁿ-ndó ñáyiú cuendá dacuáhá-yu tnúhu-í —càchí-gá xǎhaⁿ-gá xii-güedé.

18 Te oré-ni-án nǐ dáñá cuè téé-án ñunu-güedé te ní tuha ñaha-güedě xii-gá.

19 Te cuáháⁿ-gá luha-gá, te ní xiní-gá té Jàcobó ndíhi ñaní-dé té Juàá ñúhú-güedé xití bàrcú-güedé nátcu-güedé ñunu-güedé, te ndí ndúú-güedé cúú-güedé déhe té Zebèdeú. 20 Te ní cana ñaha-gá xii-güedé, te ní dándõo-güedé tǎtǎ-güedé ndíhi cue téé xinu cuechi núú-güedé xití bàrcú, te ní tuha ñaha-güedé xii-gá.

Íⁿ téé yíhi ñaha espíritú cúndíhi yucu ñávaha

(Lc. 4:31-37)

21 Te ní quexio Jèsús ndíhi cue téé-án ìⁿ ñúú nání Càpernaúm, te yàcáⁿ ndécú-gǎ ní tnahá nduu ndètatú ñáyiú, te cuánguihu-gá veñúhu ñáyiú isràél dǎnehé ñáhá-gǎ xii-yu. 22 Te xicuñúhu vǐhí-yu nchaa tnúhu càháⁿ-gá, chí quide-gá sá cúú-gǎ ìⁿ Yaá táxí tñuní vǐhí, te ñá túú dàcuaha ñaha-gá xii-yu dàtná dácuaàhà ñaha cue téé dàcuaha ñaha xii-yu nchaa tnúhu ní chidó tñuní ndí Moisés. 23 Te xití veñúhu-án ndécú tnahá ìⁿ téé yíhi ñaha ìⁿ espíritú cúndíhi yucu ñávaha, te espíritú-án nǐ quide-xi níhi ní càháⁿ téé-án, te xǎhaⁿ-dě xii Jèsús:

24 —¿Te ná cuíní yòhó Jèsús téé ñúú Nazàrét cada ñaha-n xii-ndí núu véxi-n núú ndécú-ndí-i? ¿Áⁿ véxi-n dànaa ñaha-n xii-ndí? Chí yúhú xiní ñáhà-í xii-n sǎ cúú-n ìⁿ téé ñá túú tnahí cuèchi-xi, chí núú Yá Ndiǒxí ní quee-n véxi-n ñuyúú-a —càchí-dé xǎhaⁿ-dě xii-gá.

25 Dico Jèsús ní tenàá-gá espíritú cúndíhi yucu ñávaha-án, te xǎhaⁿ-gá:

—¿Cadí yuhu-n, te taquèe yiqui cuñú téé-án! —càchí-gá xǎhaⁿ-gá xii espíritú-án.

26 Te espíritú cúndíhi yucu ñávaha-án nǐ dácüyíhí ñáhá-xí xii téé-án, te ní dácáná sàa ñaha-xi, te ní quee-xi yiqui cuñú-dé cuáháⁿ-xi. 27 Te nchaa ñáyiú xíndecu-án ío ní cuñúhu-yu, te ní xitnahá-yu:

—¿Te nása nduu-tu sá quidé tée-a? ¿Nduú sáá càháⁿ-tu-dé sánúu? Te quide-dé dàtná quidé ìⁿ téé cùnuu vihi, chí càháⁿ-ni-dé te sàndáá iní ñáhá nchàa espíritú cúndíhi yucu ñávaha —càchí-yu xitnahá-yu.

28 Te ío ndíhi ní níhi nchaa ñáyiú dava-gá ñúú yíndèhu distritú Galileá tnúhu nchaa nàcuáa càháⁿ Jèsús ndíhi nchaa sá quidé-gá.

Jèsús quidé tātna-gá náná ñadhí té Xímú
(Mt. 8:14-15; Lc. 4:38-39)

²⁹ Te òré ní ndee Jèsús veñúhu cue ñáyiú isràèl, te cuáháⁿ-gá ndihí té Jàcobó ndihí té Juàà vehe té Xímú ndihí té Ndríxí. ³⁰ Te náná ñadhí té Xímú cùhú-aⁿ ñùhu vihi-aⁿ cahni, te ndihí-ni ní xáhaⁿ-güedé xii Jèsús sá cùhú-aⁿ. ³¹ Te ní sáháⁿ-gá núú cáá ñàha cùhú-áⁿ te ní tñi-gá ndaha-aⁿ ní ndocani ñaha-gã xii-aⁿ. Te òré-ni-áⁿ ñi nchíco-aⁿ cahni, te ní ngüíta-aⁿ xínu cuechi-aⁿ núú-güedé ndihí-gá.

Jèsús quidé tātna-gá vai ñáyiú cùhú
(Mt. 8:16-17; Lc. 4:40-41)

³² Te òré sa cuñí-xi cundiⁿⁱ te ní quexio ñáyiú núú ndécú Jèsús, te nchaa ñáyiú cùhú ní dátacá-yu ndecá-yu ní sáá núú-gã, te tñahá cue ñáyiú yìhi ñaha espíritú cùndihí yucu ñávãha ndecá-yu ní sáá núú-gã. ³³ Te nchaa ñáyiú ñuú-áⁿ ñi chítú ñihñú-yu yuyèhe vehe núú ñi quexio Jèsús. ³⁴ Te Jèsús ní quide tātna-gá nchaa ñáyiú cùhú cuèi ndi díⁿ ndi díⁿ núú cuèhé tñahá-yu ñi ñi-yu, te ní queñuhu-gá nchaa espíritú cùndihí yucu ñávãha yìhi ñaha xii ñáyiú, te ñá túú ní dañá-gá cáháⁿ cue espíritú cùndihí yucu ñávãha-áⁿ ni ñi tñúhu, te ducaⁿ ñi quide-gá chi cue espíritú-áⁿ sa ximí-xi yoo cùu-gá.

Jèsús càháⁿ-gá tñúhu Yá Ndiòxí distritú Galiléa
(Lc. 4:42-44)

³⁵ Te òré vátá tñndaá váha-gá ní ndacóo Jèsús cuáháⁿ-gá ñi xio yuhu ñuú núú ñà túú ñáyiú ndècu cuendá yàcáⁿ cáháⁿ ndihí-gá Yá Ndiòxí. ³⁶ Te té Xímú ndihí cue té cùndihí-dé nánducu ñaha-güedé xii-gá. ³⁷ Te òré ní naníhí ñáhá-güedé xii-gá, te ní xáhaⁿ-güedé:

—Nchaa ñáyiú nánducu ñáhá-yu xii-n —càchí-güedé xáhaⁿ-güedé xii-gá.

³⁸ Te ní xáhaⁿ-gã xii-güedé:

—Chí ná quihíⁿ-ó nchaa ñuú xíndáa yatni-a, chi danèhé-í ñáyiú tñúhu Yá Ndiòxí chi ñuú cùhú-áⁿ vèxi-í —càchí-gá xáhaⁿ-gã xii-güedé.

³⁹ Te Jèsús tá xica ndodo-gá cuáháⁿ nchaa ñuú yíndèhu distritú Galiléa dánèhé-gá ñáyiú, te ndi tñahá ñi ñi ñuú sáa-gá te ducaⁿ cuànguihu-gá veñúhu-yu dānehé ñáhá-gã xii-yu tñúhu Yá Ndiòxí, te cue ñáyiú yìhi ñaha espíritú cùndihí yucu ñávãha ta queñuhu-gá nchaa espíritú-áⁿ yiqui cùñú-yu cuáháⁿ.

Jèsús quidé tātna-gá ñi tée tñahá cuèhé sá dátèhyú nihnu-xi yiqui cùñú-ó

(Mt. 8:1-4; Lc. 5:12-16)

⁴⁰ Te ní quexio ñi tée tñahá cuèhé sá dátèhyú nihnu-xi yiqui cùñú-ó núú Jèsús, te ní ngüíñi xití-dé núú-gã càháⁿ ndáhú-dé, te xáhaⁿ-dè xii-gá:

—Vèxi-í càháⁿ ndáhú-í núú-n núú vá cùndèe iní-n càda tātna ñaha-n xii-í chi cùtñuní iní-í sá ndácú-n —càchí-dé xáhaⁿ-dè xii-gá.

⁴¹ Te Jèsús ní cundáhú iní ñáhá-gã xii-dé te ní dácaá-gá ndaha-gá ní tendaha ñaha-gá xii-dé, te xáhaⁿ-gã:

—Cuu cada tātna ñaha-í xii-n, te vitna ndúha-n —càchí-gá xáhaⁿ-gã xii-dé.

⁴² Te òré-ni-áⁿ ñi xócuíñi cuèhé tñahá-dé. ⁴³⁻⁴⁴ Te Jèsús ní cáháⁿ víhi-gã dóho-dé, te xáhaⁿ-gã xii-dé:

—Vitna cuanùhú-na, dico vá yoo ñi cùñaha-n sá ní quide tātna ñaha-í xii-n, te núú dütú-ni cuáháⁿ cuendá sá ná quíñi ñáhá-dé xii-n sá ní ndúha-n te cuáhá-n-dè sá ndúú táhú Yá Ndiòxí dátñá ní cachí ndí Moisés cuendá ná quíñi ñáyiú sá ndáá ní ndúha-n —càchí-gá xáhaⁿ-gã xii-dé.

⁴⁵ Te tée ní cùhú-áⁿ ñi xica-dé cuáháⁿ-dè, te ní ngüíta-dé xáhaⁿ-dè xii nchaa ñáyiú ta naníhí-dè nàcuáa

ní quide Jèsús ní quide tátna ñaha-gã xii-dé. Te sá dúcáⁿ ní xíté nuu tée-áⁿ cuëndú nàcuáa ní quide ñaha Jèsús xii-dé ní quide tátna ñaha-gã ní ndúha-dé, te xiáⁿ núu dayuhu ní xóo quihu-gá dava ñúú núú ío vài ñáiyu ndèhe ñaha xii-gá, te ní xóo cundecu-gá xiti yucu núú ñà túú ñáiyu ndècu. Te nchaa ñúú ní quee ñáiyu ní sáháⁿ-yu núú ndécú-gã ní cáháⁿ ndihi ñàhá-yu xii-gá.

2

Jèsús quidé tátna-gá ñⁿ tée cùhú ñá cùú-gã candá nihnu

(Mt. 9:1-8; Lc. 5:17-26)

¹ Te sátá ní cuu ñⁿ úú nduu sá ní quee Jèsús ñúú Capèrnaúm te ní nasáá tucu-gá, te cue ñáiyu ní níhí-yu tnúhu sá ní ndexìo-gá núú quidé vèhe-gá. ² Te ndíhi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tnàhá-gá-yu. Te ní ngúíta-gá ní dánèhé ñàhá-gã xii-yu tnúhu Yá Ndiöxí. ³ Te òré-áⁿ ní quexìo cúmí tnàhá cue tée núú ndécú-gã nchídó-güedé ñⁿ tée cùhú ñá cùú-gã candá nihnu-dé. ⁴ Dico ñá túú ní ndàcu-güedé sáá-güedé ndéé núú-gã chí ío cuéhé ñáiyu ndècu. Te xiáⁿ núu ní sáá-güedé díquí véhé núú yíhí-gã-áⁿ ní caáⁿ-güedé, te ichi ndàa díquí véhé-áⁿ ní dáquèe-güedé tée cùhú-áⁿ, te ñùhu-dé ñⁿ xító ní dáquèe ñaha-güedé ndéé núú-gã. ⁵ Te Jèsús sa ní cutnùnì iní-gá sá sàndáá iní ñàhá-güedé xii-gá núu ní xáhaⁿ-gã xii tée cùhú-áⁿ:

—Yòhó tée cùhú, sa ní quide càhnu iní-í nchaa cuèchi-n — càchí-gá xáhaⁿ-gã xii-dé.

⁶ Te xiáⁿ xñucóo ñⁿ úú cue tée dàcuaha ñaha xii ñáiyu nchaa tnúhu ní chídó tnùnì ndíí Moisés, te sá dúcáⁿ ní cáháⁿ Jèsús núú cue tée-áⁿ ní sani iní-güedé: ⁷ “Tée-a càháⁿ cuéhé-dé cuëndá Yá Ndiöxí duha càháⁿ-dé, chí vá yòo ñⁿ

ndàcu cada cahnu iní nchaa yicá cuèchi ñáiyu chí ñⁿ dli díí-ni Yá Ndiöxí quidé càhnu iní-gá”, duha ní sani iní-güedé. ⁸ Dico òré-ni-áⁿ ní cutnùnì iní Jèsús nàcuáa sàni iní-güedé, núu ní xáhaⁿ-gã xii-güedé:

—¿Te ná cuëndá ducaⁿ sàni iní-ndó-í? ⁹ Te sá dúhá ní xáhaⁿ-í xii tée cùhú-a sá ní quide càhnu iní-í nchaa yicá cuèchi-dé, te xiáⁿ nchòhó ñá túú cutnùnì iní-ndó núu ndáá càháⁿ-í àdi ñá ndáá. Dico núu cùu-í-dé sá ndácóo-dé, te ndocani-dé xito ñùhu-dé véxi, te caca-dé, te cutnùnì ndáá iní-ndó núu ndáá càháⁿ-í àdi ñá ndáá cada-í. ¹⁰ Te vitna na càda-í nàcuáa cutnùnì iní-ndó nchaa-ndo sá yùhú Tée cùu ñani tnàhá-ndó nchaa-ndo ndecu ndihi-í tnúhu ndee iní sá càdá càhnu iní-í nchaa cuèchi ñáiyu ñuyíú-a — càchí-gá xáhaⁿ-gã xii-güedé.

Te sátá dúcáⁿ te ní xáhaⁿ-gã xii tée cùhú-áⁿ:

¹¹ —Ndacóo te ndocani-n xito ñùhu-n véxi-áⁿ, te núhú-n vèhe-n — cachí-gá xáhaⁿ-gã xii-dé.

¹² Te òré-ni-áⁿ ní ndacóo-dé, te ní ndocani-dé xito ñùhu-dé ní quexìo-áⁿ, te ndèhe nchaa ñáiyu xñdecu-áⁿ ní ndee-dé tnuú-yu cuáháⁿ-dé. Te sá dúcáⁿ ní quide Jèsús ní quide tátna-gá tée-áⁿ, xiáⁿ ío ní cuñúhu nchaa ñáiyu, te ní xítnahá-yu:

—Càhnu vihi cuu Yá Ndiöxí, chí ñá ñⁿ ndùu quini-ó dùha cuu datná ní cuu vitna —càchí-yu xítnahá-yu.

Jèsús càháⁿ-gá ñⁿ tée nàni Leví

(Mt. 9:9-13; Lc. 5:27-32)

¹³ Te Jèsús cuáháⁿ tucu-gá yuhu làgúná, te ío cuéhé ñáiyu ní sátnàhá ñàhá xii-gá, te ní dánèhé ñàhá-gã xii-yu tnúhu Yá Ndiöxí. ¹⁴ Te òré ní yáha ní dánèhé ñàhá-gã xii-yu, te ní naqueheⁿ-gá ichi, te ní yáha yatni-gá ñⁿ xichì núú núcóo ñⁿ tée nàni Leví déhe ñⁿ tée nàni Alfeú quidé còbrá-dé ñáiyu cuëndá impuèstú chí còbrádór cùú-dé. Te

òré ní xini ñáhá-gǎ xii-dé, te ní xáhaⁿ-gǎ:

—Néhé chitnahá ñáhá-n xii-í — cǎchí-gǎ xáhaⁿ-gǎ xii-dé.

Te té Lèví-án ñí ndacuíñí-dé, te ní tuha ñaha-dě xii-gǎ.

¹⁵ Te té Lèví-án cuǎháⁿ-dé ndihí Jèsús vehe-dé. Te yihí Jèsús mèsá xéxí-gǎ ndihí cue téé xica cuu ndihí-gǎ, te tnàhá vǎi cue téé cuihna iní-xi quide cobrá ñáhá xii ñáyíu cuendá impuèstú, ndihí dava-gǎ cue téé ndècu ichi cuehé ichi duha núcóo ndihí ñaha-güedé xii-gǎ xéxí ndihí ñaha-güedé, te ducaⁿ chí ío vǎi ñáyíu nchicúⁿ ñáhá xii-gǎ.

¹⁶ Te sá ñí xini cue téé dàcuáha ñaha xii-yu nchaa tnúhu ní chídó tnùní ndíi Moisés, ndihí cue téé cuu fariséú xéxí Jèsús ndihí nchaa cue téé-án nǔu ní xicáⁿ tnúhú-güedé núú cuè téé xica cuu ndihí-gǎ, te xáhaⁿ-güedé:

—¿Ná cuendá ducaⁿ quide téé cuu mestrú-ndó xéxí-dé ndihí cue téé cuihna iní-xi quide cobrá ñáhá xii ñáyíu cuendá impuèstú, ndihí nchaa dava-gǎ cue téé ndècu ichi cuehé ichi duha-i? —cǎchí-güedé xáhaⁿ-güedé.

¹⁷ Te Jèsús ní tecú dóho-gǎ nàcuáa ndúu tnúhu ní xáhaⁿ-güedé xii cue téé xica cuu ndihí-gǎ, núú ní xáhaⁿ-gǎ xii-güedé:

—Nchaa ñáyíu ñá túú cùhú chí ñá túú xini ñuhú-yu ñátátná, dico nchaa ñáyíu cùhú chí xini ñuhú-yu ñátátná. Te yúhú véxi-í cǎháⁿ-í ñáyíu cùtnuní iní-xi sá ndécú cuèchi-xi te ñá túú véxi-í cǎháⁿ-í ñáyíu cǎchí sá ñá túú ndècu cuèchi-xi —cǎchí-gǎ xáhaⁿ-gǎ xii-güedé.

Cuendá cue ñáyíu ñá túú tnàhí ná xéxí áma cǎháⁿ ndihí-yu Yá Ndiöxí

(Mt. 9:14-17; Lc. 5:33-39)

¹⁸ Te cue téé xica cuu ndihí té Juáá, ndihí cue téé xica cuu ndihí cue téé cuu fariséú ñá túú tnàhí ná xéxí-güedé áma cǎháⁿ ndihí-güedé Yá Ndiöxí. Te ñí nduu ducaⁿ

xíquide-güedé, te ní sáháⁿ ñáyíu ní xicáⁿ tnúhú-yu núú Jèsús, te xáhaⁿ-yu xii-gǎ:

—Cuini-ndí cǎchí tnúhu-n ná cuendá cue téé xica cuu ndihí té Juáá, ndihí cue téé xica cuu ndihí cue téé cuu fariséú ñá túú tnàhí ná xéxí-güedé áma cǎháⁿ ndihí-güedé Yá Ndiöxí, te cue téé xica cuu ndihí-n ñá túú ducaⁿ quide-güedé —cǎchí-yu xáhaⁿ-yu xii-gǎ.

¹⁹ Te Jèsús ní xáhaⁿ-gǎ xii-yu:

—Nchóhó xini-ndó sǎ vǎ cúú cǎháha-o xii ñáyíu ñúhu vico tnándaha sǎ vǎ cúú cǎxí-yu nini ndècu ndihí ñaha téé tnándaha xii-yu. ²⁰ Dico sǎá nduu te vǎ cúndècu ndihí ñaha-gǎ téé tnándaha-án xii-yu, te dàvá-án te cahni iní-yu vǎ cǎxí-yu cuendá sǎ ndihí iní-yu.

²¹ Te vǎ yóo ñí dándée luha dóo sǎá ñí dóo sa ní cuu tùhú vihí, chí dóo sǎá-án nàndiyi-xi te uuⁿ-gǎ ndata-xi dóo sǎ ní cuu tùhú-án. ²² Te ní vǎ yóo ñí chihí ndidí sǎá xití ñí lamba sa ní cuu tùhú vihí, chí núu yoo ducaⁿ na cǎda te ndava lamba sa ní cuu tùhú-án, chí ío níhi yócó ndidí-án, te cuíta-ni ndidí-án te cuíta-ni lamba-án te núu ducaⁿ na cǎdá-yu. Núu xiǎⁿ xini ñúhu-xi quée ndidí sǎá-án xití ñí lamba saa —cǎchí-gǎ xáhaⁿ-gǎ xii-yu.

Cue téé xica cuu ndihí Jèsús sǎhnú-güedé yoco triú nduu ndetatú ñáyíu

(Mt. 12:1-8; Lc. 6:1-5)

²³ Te ñí nduu cuu-xi nduu ndetatú ñáyíu ñúhu Jèsús ichi ndihí cue téé xica cuu ndihí-gǎ, te ta yǎha-gǎ ndihí-güedé ñí xichí núú cǎá triú, te ní ngúíta-güedé sǎhnú-güedé yoco triú-án. ²⁴ Te cue téé cuu fariséú ní xáhaⁿ-güedé xii-gǎ:

—¿Ná cuendá ducaⁿ quide cue téé xica cuu ndihí-n sǎhnú-güedé yoco triú vitna cuu-xi nduu ndetatú-i? Te ñá túú tau-güedé ducaⁿ cǎda-güedé —cǎchí-güedé xáhaⁿ-güedé xii-gǎ.

25 Te ní xáhaⁿ-gã xii-güedé:

—¿Te náa vátá dácuàha tnahi-gá-ndó núu tütú Yá Ndiöxí núú cáháⁿ-xi nàcuáa ní quide ndíi Dàvíí cútñàhá ní xihí ndíi docó ndíhi cue téé ní xica cuu ndíhi ndíi-áⁿ? 26 Te dàvã-áⁿ nĩ xíndecu ìⁿ téé ní xínani Abiàtár ní cuu-dé dütú cúnùu, te ndíi Dàvíí ní quíhu ndíi xití vehe Yá Ndiöxí ní queheⁿ ndíi pàá ní cuu íí ndécú-áⁿ nĩ dácãhñu ndíi cue téé ní xica cuu ndíhi ndíi ní xexi ndíi ndíhi-güedé, te mee-ni cuè dütú tàú-güedé caxi-güedé pàá-áⁿ ní cùu —cachí-gá xãhaⁿ-gã xii-güedé.

27 Te ní xáhaⁿ tucu Jesús xii-güedé:

—Mee Yá Ndiöxí ní taxi ndecu-gá nduu ndètátú ñáyiu, te ñá túú ní cãchí-gá sá meè-yu náandi cani iní-yu cadá-yu canehe ñ-yu nduu ndètátú-yu-áⁿ. 28 Te yúhú Téé cùu ñaní tnáhã-ndó nchãa-ndo, tnáhã-í ndécú ndíhi-í tnúhu ndee iní sã cùu-í nchaa ñáyiu nàcuáa cadá-yu nduu ndètátú-ó-áⁿ — cãchí-gá xãhaⁿ-gã xii-güedé.

3

Ìⁿ téé ní yíchí ìⁿ xio ndaha-xi (Mt. 12:9-14; Lc. 6:6-11)

1 Te Jesús cuànguihu tucu-gá xití veñúhu, te xití veñúhu-áⁿ ndécú ìⁿ téé ní yíchí ìⁿ xio ndaha-dé. 2 Te xíáⁿ ndécú cuè téé xito dayuhu ñaha xii-gá, te núu cada tãtna-gá téé cùhú-áⁿ nduu cùu-xi nduu ndetátú-güedé ndíhi ñáyiu, cuèndá ducaⁿ te níhi-güedé nàcuáa cada-güedé cacáⁿ cuèchi-güedé cuèndá-gá. 3 Te ní xáhaⁿ-gã xii téé cùhú ndaha-xi-áⁿ:

—Ndacuíñí te ngúnutñí-n cuãdava iha —cãchí-gá xãhaⁿ-gã xii-dé.

4 Te ní xicáⁿ tnúhú-gã núú-güedé, te xãhaⁿ-gã:

—Chí cãchí tnúhu ná cúú sã cúú càda-o nduu ndetátú-ó. ¿Sã vãha ñã sã cuèhé? ¿Sã cadá tãtna-o ñáyiu

cùhú ñã sã cáhni-ó-yu? —cãchí-gá xãhaⁿ-gã xii-güedé.

Dico ní ìⁿ-güedé ñã túú tnàhí ní cáháⁿ-güedé. 5 Te Jesús ní xíndéhé vãha-gá núú nchãa-güedé te ní cudééⁿ-gã, te ní ndíhú iní-gá chí ío sãá iní-güedé, te ní xáhaⁿ-gã xii téé cùhú ndaha-xi-áⁿ:

—Ndocani ndaha-n —cãchí-gá xãhaⁿ-gã xii-dé.

Te ní ndocani-dé ndaha-dé, te òré-ni-áⁿ nĩ ndúha. 6 Te cue téé cùu fariséú ní xica-güedé cuáhãⁿ-güedé ìⁿ xichi núú nĩ naníhí tnáhã-güedé ndíhi cue téé cùndíhi té Hèrodés cuèndá ndatnúhu-güedé nása cada-güedé cahni-güedé Jesús.

Cuéhé víhí ñáyiu ní quexio yuhu lagúná

7 Te Jesús ní xica-gá cuáhãⁿ-gã ndíhi cue téé xica cuu ndíhi-gá yuhu làgúná distritú Galileá, te ío cuéhé ñáyiu distritú-áⁿ nchícúⁿ ñáhã-yu xii-gá cuáhãⁿ. 8 Te núú nĩ quexio-gá-áⁿ nĩ sáhãⁿ ñáyiu distritú Jùdeá, ñáyiu ñuú Jerusálén, ñáyiu distritú Idùmeá, ñáyiu xíndecu ndãa ñngá xio yúte Jòrdán, ndíhi ñáyiu xíndecu yatni ñuú Tirú ndíhi ñuú Sídón, te ducaⁿ ío vãi-yu ní sáhãⁿ núú ndécú-gã chí ní níhi-yu tnúhu nchaa nàcuáa quide-gá. 9 Te Jesús ní xáhaⁿ-gã xii cue téé xica cuu ndíhi-gá sã cadá tũha-güedé ìⁿ bàrcú cuèndá caa-gá núú-xi cuèndá sã vã dádèhnde ñáhã-yu xii-gá chí ío cuèhé-yu. 10 Te sã dúcãⁿ nĩ níhi-yu tnúhu sã quidé tãtna-gã ñáyiu cùhú, núu xíãⁿ nchaa dava-gã ñáyiu cùhú súúni dicó ngõnchíhi tnáhã-yu cuáhãⁿ-yu núú ndécú-gã cuñi-yu tnãndeé ñáhã-yu xii-gã cuèndá sã cuñi-yu ndúha-yu. 11 Te cue ñáyiu yìhi ñaha espíritú cùndíhi yucu ñávãha ní sanu xití ñaha-xi xií-yu núú Jesús òré ní xini ñáhã-xí xì-gá, te xíãⁿ ní quide níhi ní cáháⁿ-yu, te xãhãⁿ-yu xii Jesús:

—¿Yòhó cúú-n Dèhe Yá Ndiöxí! — cãchí-yu xãhãⁿ-yu xii-gá.

12 Te Jèsús ní tenàá-gá nchaa espíritú cùndìhì yucu ñávãha-án, te ní xáhaⁿ-gã xii nchaa ñáyui ní xíhì-xi-áⁿ sã vã càháⁿ-yu núú ñáyui yoo cùu-gá.

Jèsús cãxi-gá úxúú tnàhá cue tée dacuàha ñaha xii ñáyui tnúhu-gá
(Mt. 10:1-4; Lc. 6:12-16)

13 Te sátá dúcáⁿ ní cuu te Jèsús ní sáa-gá ìⁿ yucu, te xíaⁿ ndécú-gã ní cana-gá nchaa cue tée càhí iní-gá. Te òré ní quexìo nchaa cue tée-áⁿ núú-gã, 14 te ní cáxi-gá úxúú tnàhá cue tée caca cuu ndìhi-gá, te ñu-ni cue tée-áⁿ tendaha-gã quíhìⁿ-güedé cáháⁿ-güedé tnúhu-gá núú ñáyui. 15 Te ní sãñaha-gã xii-güedé tnúhu ndee iní cundecu ndìhi-güedé cuendá cada tátna-güedé ñáyui cùhú, ndìhi cuendá queñuhu-güedé nchaa espíritú cùndìhì yucu ñávãha yìhì ñaha xii ñáyui. 16 Te duha xìnani ndi úxúú cue tée-áⁿ: Ìⁿ-dé nání-dě Xímú, te mee-gã ní taudìu ñaha-gá xii-dé sá cúnàni-dé Pèlú. 17 Te ingá-dé nání-dě Jàcobó, te ingá-dé nání-dě Juàá, te ñani té Jàcobó-áⁿ cúú té Juàá te ndi ndúu-güedé cúu-güedé déhe té Zebèdé, te ndi ndúú cue tée-áⁿ ní dánání ñaha Jèsús xii-güedé Boànergés, te tnúhu-áⁿ quée-xí: Cue tée ío yáchí cúdèéⁿ, duha quèe-xi tnúhu-áⁿ. 18 Te duha xìnani dàva-gá-güedé: Té Ndríxí, té Lípé, té Bartolómé, té Mâteú, té Mǎxí, té Jàcobó déhe té Àlféú, té Tàdeú, té Xímú tée ní cundìhì cue tée canànistá ní cùu, 19 ndìhì té Jüdás Iscàrioté tée ní sáa nduu ní sáha cuendá ñáhá xii Jèsús núú cue tée cùu ìhú iní ñáhá xii-gá, duha xìnani cuè tée ní cáxi Jèsús ní xica cuu ndìhi-gá.

Càhí-güedé sá ndécú ndìhi Jèsús yucu ñávãha dico ñá ndàá
(Mt. 12:22-32; Lc. 11:14-23; 12:10)

Te sátá dúcáⁿ te cuáháⁿ-gá ndìhi-güedé núú quídé vèhe-gá.

20 Te ío vài ñáyui ní tacá-ni tucú-yu xíaⁿ, te ni ñá ní ñíhí-gã nása cada-gá caxi-gá ndìhi cue tée xica cuu ndìhi-gá cuendá sã ío vài-yu. 21 Te cue ñáyui cùu ndi mee Jèsús ní ñíhí-yu tnúhu nchaa nàcuáa cùu, te nchaa ñáyui ñá cùtnuní váha iní-xi ní cachí-yu sá ní nduu lùcú-gá núu xíaⁿ cuáháⁿ ñáyui cùu ndi mee Jèsús núú ndécú-gã cuendá candeca ñàhá-yu xii-gá núhú ní cùu.

22 Te cue tée dàcuaha ñaha xii ñáyui nchaa tnúhu ní chídó tnùnì ndí Moisés véxi ndéé ñuu Jerusálén ní cáháⁿ cuèhé-güedé cuendá Jèsús, chí ní xítñaha-güedé:

—Tée-a ndècu ndìhi-dé sácúíhná, te ñu xíaⁿ chíndèé ñaha-xi xii-dé queñuhu-dé nchaa espíritú cùndìhì-xi yìhì ñaha xii ñáyui, te ñu-ni-xi tàxi tnùnì-xi nchaa espíritú-áⁿ—duha ní xítñaha-güedé.

23 Te Jèsús ní cana ñaha-gã xii-güedé, te ní cani-gá ìⁿ cuendú núu-güedé nàcuáa tecú tnùnì-güedé tnúhu-gá, te xáhaⁿ-gã xii-güedé:

—¿Te nása cada sácúíhná queñuhu-xi cue espíritú cùndìhì-xi yìhì ñaha xii ñáyui-i? 24 Te nchòhó xìnì-ndó sã núu ìⁿ té yìndaha ìⁿ nacióⁿ vá cúú ìⁿnuu-dé ndìhi cue tée cùndìhì-dé, te vá cúdí-dé cunu-dé. 25 Te ñu-ni ducaⁿ sãtnhá-xi cùu tucu ñáyui xìndecu ìⁿ-ni vèhe, chí núu vá cúú ìⁿnuú-yu, te vá cúdí-yu cundecu càhnú-yu. 26 Te núu sácúíhná ñá túú cùu ìⁿnuu-xi ndìhi cue espíritú cùndìhì-xi, te vá cúdí-xi cundecu-xi taxi tnùnì-xi te núu ducaⁿ quíde-xi.

27 Te nchòhó xìnì-ndó sã cuè ñadúhú chí vá ndácú-güedé cuendá-ni quíhu-güedé duhu-güedé vèhe ìⁿ tée ío ndee, chí díhna-gá xínì ñuhu-xi tñi-güedé tée-áⁿ dacùtu ñaha-güedé xii-dé dàtnùnì ducaⁿ te ndacu-güedé duhu-güedé nchaa sá ndécú ndìhi-dé.

28 Te na càhí tnúhu ndáá-í xii-ndo sã ncháá sã cuèhé sá dúhá quíde ñáyui, ndìhi nchaa tnúhu

cuèhé tnúhu duha càháⁿ-yu cuèndá Yá Ndiõxí cuu cada càhnu iní-gá. ²⁹ Dico cue ñáyiú na càháⁿ cuèhé cuèndá Espiritú Yá Ndiõxí, ñáyiú-áⁿ vǎ cáda càhnu iní ñáhá tnáhí-gá xií-yu, chi cundecu-ni cuéchi-yu núú-gǎ ni caa ni quíhíⁿ —càchí-gá xǎhaⁿ-gǎ xii-güedé.

³⁰ Te ducaⁿ ñǎ cáháⁿ-gá chi càchí-güedé sá ndécú ndíhi-gá espíritú cündíhi yucu ñávaha.

Ñaná Jèsús ndíhi cue ñaní-gá

(Mt. 12:46-50; Lc. 8:19-21)

³¹ Te ní quexio náná Jèsús ndíhi cue ñaní-gá núú ndécú-gǎ xǎnutnǎi-yu quehé, te ní xáhǎⁿ-yu xii ñáyiú xǎndecu-áⁿ sǎ dáyáha-yu tnúhu núú-gǎ cuèndá quee-gá ndatnúhu ndíhi ñaha-gǎ xií-yu. ³² Te cue ñáyiú xǎnucóo ni càndéé dǎñi-gá ní xáhǎⁿ-yu xii-gá:

—Ñaná-n ndíhi cue ñaní-n ndécú-yu quehé nándúcu ñáhá-yu xii-n —càchí-yu xáhǎⁿ-yu xii-gá.

³³ Te Jèsús ní xáhǎⁿ-gǎ xií-yu:

—Te cachí tnúhu-ndo yǎndi-gá ñáyiú cùu datná nǎnà-í ndíhi dàtná cue ñaní-í —càchí-gá xǎhaⁿ-gǎ xii-yu.

³⁴ Te dàtnúní ní xǎndéhé vǎha-gá núú nchaa ñáyiú xǎnucóo ni càndéé dǎñi-gá-áⁿ, te ní xáhǎⁿ-gǎ xií-yu:

—Nchaa ñáyiú-a cúú-yu dàtná nǎnà-í ndíhi dàtná cue ñaní-í. ³⁵ Chi nchaa ñáyiú quide nacuaá càháⁿ Yá Ndiõxí, ñáyiú-áⁿ cúú-yu dàtná cue ñaní-í, ndíhi dàtná cue cùha-í, ndíhi dàtná nǎnà-í —càchí-gá xǎhaⁿ-gǎ xii-yu.

4

Nàcuáa quide téé cuángacáⁿ triú

(Mt. 13:1-9; Lc. 8:4-8)

¹ Te Jèsús ní ngüíta-gá dácuaàha tucu-gá ñáyiú yuhu làgúná. Te cuéhé víhí-yu ní tacá xíaⁿ nǎu cuásaá-gá núú ñǎ bàrcú nǎtnǎi xití ndute làgúná-áⁿ, te núú xǎáⁿ ní ngóo-gá te ní ngüíta-gá

dánèhé ñáhá-gǎ xií-yu, te nchaá-yu xǎxúcu-yu yuhu làgúná-áⁿ. ² Te ní ngüíta-gá ní cani-gá titní cuèndú núú-yu nàcuáa tecú tnúní-yu tnúhu-gá, te xǎhaⁿ-gǎ xií-yu:

³ —Chí cündèdóho vǎha ñǎ cuèndú ná càni-í-a. ñǎ téé cuángacáⁿ-dé triú.

⁴ Te òré ní ngüíta-dé dǎngoyo-dé triú-áⁿ, te dava ní quene ndava ní ngava ndéé ichi, te ní xiní cue tílaá te ní nadatácá-güedi.

⁵ Te dava ní ngava ñuhu yadi núú yíhí víhi yúú, te ndíhi-ni ní xínu-xi cuèndá sǎ ñà túú càvivi ñuhu. ⁶ Dico òré ní nayehé ñǎ túú ní cündee iní-xi chi ní yíchí-xi, chi ñǎ túú ní ñíhí quíhíⁿ cùnú yóho-xi. ⁷ Te dava ní ngava núú yúcu ndíquíⁿ tnu ñhu, te ñǎnuu-ni ní xínu-xi ndíhi tnu ñhu, te tnu ñhu-áⁿ ní sahnu-xi te ní dánáá-xi nchaa triú sǎ ní xínu-áⁿ.

⁸ Dico dava triú-áⁿ ní ngava-xi núú ndécú ñuhu cocoⁿ, te xíaⁿ ní xínu-xi te ní sahnu-xi te ío vǎha ní cuu, chi núú ñǎ-ní triú-áⁿ te dava yoco-xi ní nguíhi ócò úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ñǎ cièndú triú-xi —càchí-gá xǎhaⁿ-gǎ xií-yu.

⁹ Te xǎhaⁿ tùcu-gá xií-yu:

—Nchaa nchòhó ñáyiú ní xǎndédoho nchaa tnúhu ní càháⁿ-í-a, te ío vǎha chí cuáha cuèndá —càchí-gá xǎhaⁿ-gǎ xií-yu.

Jèsús càháⁿ-gá ná cuèndá ducaⁿ càni-gá cuèndú

(Mt. 13:10-17; Lc. 8:9-10)

¹⁰ Te sátá ní ndaca ñáyiú-áⁿ te ní quendóo mee-nǎ Jèsús ndíhi cue téé xíca cuu ndíhi-gá, ndíhi ñǎ úú-nǎ ñáyiú. Te ñáyiú-áⁿ ndíhi cue téé-áⁿ ní xícáⁿ tnúhǎ-yu ndíhi-güedé núú-gǎ, núú nása quee-xi cuèndú ní cani-gá núú-yu ndíhi-güedé. ¹¹ Te ní xáhǎⁿ-gǎ:

—Nchòhó chi sa càchí tnúhu Yá Ndiõxí xii-ndo ñǎ sǎ vǎtá quíní-gá-ndó, chí càchí tnúhu-gá nàcuáa cada-gá ndíhu ndaha-gǎ ñáyiú, dico dava-gá ñáyiú càni-í

mee-ni cuèndú núŭ-yu. ¹² Chi cuèi na quini-yu nchaa nàcuáa cuu dico ni vǎ cútnùni iní-yu ná cuèndá ducaⁿ cùu, àdi cuèi na cùndedóho-yu dico ni vǎ tècú tnùnì-yu. Te ducaⁿ ndòhó-yu cuèndá sá vǎ quìndáá iní-yu Yá Ndiòxí, ndihi cuèndá sá vǎ cáda càhnu iní-gá nchaa yíca cuèchi-yu —càchí-gá xǎhaⁿ-gǎ xii-yu ndihi-güedé.

Jèsús càháⁿ-gá nàcuáa quèe-xi cuèndá téé cuángacáⁿ triú

(Mt. 13:18-23; Lc. 8:11-15)

¹³ Te ní xáhaⁿ tùcu Jèsús xii cue téé xica cuu ndihi-gá, ndihi cue ñáiyu-áⁿ:

—Nchòhó, ñá túú ní tècú tnùnì-ndó cuèndú ní cani-í núú-ndó, te núu ducaⁿ, ÷te nása tecú tnùnì-ndó dàva-gá cuèndú cani-í núú-ndó-í? Te ña càchí tnúhu-í xii-ndo nàcuáa quèe-xi cuèndú ní cani-í núú-ndó. ¹⁴ Te téé cuángacáⁿ triú-áⁿ cúu-dě dàtná ñⁿ téé cuáháⁿ càháⁿ tnúhu Yá Ndiòxí núú ñáiyu. ¹⁵ Te triú-áⁿ cúu-xí dàtná tnúhu Yá Ndiòxí, te triú sá ñi quene ndava ní ngava ndéé ichi, xǎⁿ cúu-xí dàtná ñáiyu ní tnahá iní-xi tnúhu Yá Ndiòxí, dico sácuihná cuáháⁿ-xi xòcani-xi tnúhu-gá iní-yu cuèndá sá vǎ cǎnchícúⁿ nihnú-yu nàcuáa càháⁿ tnúhu-áⁿ. ¹⁶ Te triú sá ñi ngava ñuhu yadi núú yíhí vîhi yúú, xǎⁿ cúu-xí dàtná ñáiyu ní xíndedóho tnúhu Yá Ndiòxí te díí iní ní tní-yu tnúhu-gá. ¹⁷ Dico òré ná ngüita ñáiyu cúcuèhé ñáhǎ-yu xii-yu àdi nándi-gá sá yǎha-yu sá cuèndá tnúhu-gá, te ñá cùndèe iní-yu chí dàñǎ-yu tnúhu-gá cuèndá sá ñá túú nihí ndéè-yu. ¹⁸ Te triú sá ñi ngava núú yúcu ndíquíⁿ tnu iñu xǎⁿ cúu-xí dàtná ñáiyu ní tecú dóho-xi tnúhu Yá Ndiòxí, ¹⁹ dico cuèé cuèé ní nacuanaá-yu tnúhu-gá, chí cuèndá mee-ni sá cúu-xí mèe-yu ñuhu iní-yu, ndihi cuèndá sá ño sàni iní-yu cuu cuicá-yu, ndihi cuèndá sá ño cùdíí iní-yu nchaa sá ío

ñuyíu-a, te ñá túú ñuhu iní-yu tnúhu sá ñi xíndedóho-yu-áⁿ nàcuáa cada váha-yu cundecú-yu. ²⁰ Dico triú sá ñi ngava núú ndécú ñuhu cocoⁿ, xǎⁿ cúu-xí dàtná ñáiyu ní xíndedóho tnúhu Yá Ndiòxí te quidè-yu nchaa nàcuáa càháⁿ tnúhu-áⁿ. Te cada iní-ndó sá ñáiyu-áⁿ cúu-yu dàtná triú sá ñi nguihi yoco-xi ócó úxi triú-xi, ndihi triú sá ñi nguihi yoco-xi únídico triú-xi, ndihi triú sá ñi nguihi yoco-xi ñⁿ cièndú triú-xi. Te ducaⁿ sátnahá-xi cúu-yu chí ío váha quidè-yu —càchí-gá xǎhaⁿ-gǎ xii cue téé xica cuu ndihi-gá ndihi cue ñáiyu-áⁿ.

Cuèndá iti

(Lc. 8:16-18)

²¹ Te xǎhaⁿ-gǎ xii nchaa ñáiyu:

—Ñá túú ñi ñⁿ ñáiyu tèñuhú iti te chiváha-yu ñⁿ xití quídi, àdi chiváha-yu ñⁿ caha càamá, chí tàxi ndecú-yu ñⁿ núú dùcúⁿ cuèndá cutnùní núú nchaa ñáiyu. ²² Te ñi ñⁿ tnúhu sá ñǎ tècú tnùnì ñáiyu vitna cachí-ó sǎ vǎ tècú tnùnì-yu chí dacuití sǎ tècú tnùnì-yu, te ñi ñⁿ tnúhu sá càchí-ó cùu yuhu vitna vá cúu yùhu chí dacuití sǎ quèé tũ-xi núú ñáiyu. ²³ Te nchòhó cue ñáiyu ní xíndedóho nchaa tnúhu ní càháⁿ-í-a, te ío váha chí ná cuáha cuèndá —càchí-gá xǎhaⁿ-gǎ xii-yu.

²⁴ Te ní xáhaⁿ tùcu-gá:

—Ío váha chí cùndedóho tnúhu na càháⁿ-í-a. Te nàcuáa-ni quide-ndo danehé-ndó ñáiyu tnúhu Yá Ndiòxí, te ñu-ni ducaⁿ càda ñaha-gá xii-ndo, te uuⁿ-gá ducaⁿ càda-gá sá cúu-xí-ndó. ²⁵ Te nchaa nchòhó ñáiyu tècú tnùnì tnúhu Yá Ndiòxí, uuⁿ-gá cuita tecú tnùnì-ndó tnúhu-gá quíhíⁿ. Te nchaa nchòhó ñáiyu ñá túú tècú tnùnì tnúhu-gá, te uuⁿ-gá vá tècú tnùnì-ndó —càchí-gá xǎhaⁿ-gǎ xii-yu.

Nàcuáa sàhnu triú

²⁶ Te Jèsús xǎhaⁿ tùcu-gá:

—Na càni-í ìⁿ cuendú núú-ndó cuendá tecú tñuní-ndó nàcuáa cada-xi òré ndíhu ndaha ñàha Yá Ndióxi xii ñáyiú. Ìⁿ téé cuángacáⁿ-dé triú. 27-28 Te sátá nǐ yáha ní sacáⁿ-dé triú-áⁿ, te cuánuhúⁿ-dé vehe-dé ndétátúⁿ-dé. Te ducaⁿ-ni ta xica nduu cuáháⁿ te ní xínu triú-áⁿ, te nàcuáa ta sàhnu-xi cuáháⁿ te ta quèe ndaha-xi, te ducaⁿ-ni cùu ní sáá nduu nǐ quene yoco-xi te ní nguíhi triú-xi, dico téé ní sacáⁿ triú-áⁿ ñà túú xini-dé nása ní sàhnu-xi, chi mee ñùhu ní quide-xi ní sàhnu triú-áⁿ. 29 Te òré sa ní ndihi ní cuaaⁿ te ní nguíta téé ní sacáⁿ-áⁿ náquèhndé-dé nátàxi tnahá-dé —càchi-gá xàhaⁿ-gá xii-yu.

Cuendá ndiquíⁿ yutnu nàni mostázá

(Mt. 13:31-32; Lc. 13:18-19)

30 Te xàhaⁿ tucu Jesús xii-yu:

—Na càni tucu-í ingá cuendú núú-ndó cuendá tecú tñuní-ndó nàcuáa cada-xi òré ndíhu ndaha ñàha Yá Ndióxi xii ñáyiú. 31 Ìⁿ yutnu nàni mostázá cúú-xi ìⁿ yutnu sá lìhli vìhi-gá ndiquíⁿ-xi dàcúúxi ndiquíⁿ nchaa cúhú, 32 dico òré ná càcáⁿ-güedé núú ñùhú-güedé, te na xínu-xi te sàhnu-gá-xi dàcúúxi nchaa cúhú, te nchaa dité-xi ío cùu cahnu-xi, te ndéé cue quití ndàva núú tàchí sácõo-güedi nchaa núú dité-xi xínu ndeti-güedi —cachí-gá xàhaⁿ-gá xii-yu.

Ío titní cuendú ní caní Jèsús núú ñáyiú

(Mt. 13:34-35)

33 Te ío-gá vai cuendú ní caní Jèsús núú ñáyiú cuendá tecú tñuní-yu tñúhu Yá Ndióxi, dico dava cuendú ñà túú ní càni-gá núú-yu, chi ní cutnùní iní-gá sá vǎ tècú tñuní-yu nchaa. 34 Te mee-ni cuendú ní caní Jèsús núú ñáyiú ndi tnahá òré ní dánèhé ñàhá-gá xii-yu tñúhu-gá. Te òré ndécú mée Jesús ndihi cue téé xica cuu ndihi-gá, te ní

xàhaⁿ-gá xii-güedé nàcuáa quèe-xi ìⁿ ìⁿ cuendú ní caní-gá núú ñáyiú.

Jèsús ngání-gǎ táchí ndihi ndute làgúná

(Mt. 8:23-27; Lc. 8:22-25)

35 Te diu-ni nduu-áⁿ òré sa ta cùndiquíⁿ cuáháⁿ ní xàhaⁿ Jèsús xii cue téé xica cuu ndihi-gá:

—Chí ná quíhíⁿ-ó ndàa ingá xio yuhu làgúná —càchi-gá xàhaⁿ-gá xii-güedé.

36 Te ní quide ndee ìní-gá nchaa ñáyiú xixúcu-áⁿ, te diu-ni bàrcú sá ñùhú-gá òré ní dánèhé-gá ñáyiú tñúhu-gá diu-ni xíáⁿ ní dácácá cuè téé xica cuu ndihi-gá ndécá ñàha-güedé xii-gá cuáháⁿ, te tnahá ìⁿ ùú-gá bàrcú ní xica-xi nchicúⁿ-xi bàrcú ñùhú-gá-áⁿ cuáháⁿ. 37 Te ñùhu bàrcú ñùhú-gá-áⁿ ichi cuáháⁿ-xi núú ndute, te ní quexío ìⁿ táchí nǐhi, te ta nàdachitúⁿ-xi ndute xití bàrcú-áⁿ cuáháⁿ, te sa cuíní-nǎ-xi quèe naa bàrcú-áⁿ xití ndute ni cùu. 38 Te Jèsús cáá-gǎ xidí-gá ìⁿ xichi ndàa sátá bàrcú-áⁿ, te yìnchihi ìⁿ dóo díquíⁿ-gǎ. Te sá dúcáⁿ cuíní-xi quèe naa bàrcú-áⁿ núu ní sáháⁿ-güedé ní ndocani ñàha-güedé xii-gá, te xàhaⁿ-güedé:

—ìMèstrú, ndiquíú ìní! ¿Náa ñà túú ndihú iní-n sǎ tá quèe naa-o cuáháⁿ-áⁿ? —càchi-güedé xàhaⁿ-güedé xii-gá.

39 Te Jèsús ní ndiquíú ìní-gá te ní ndacóo-gá, te ní tenàá-gá táchí-áⁿ, te ní xàhaⁿ-gá xii ndute làgúná:

—ìTnavíí-nǎ cuhuⁿ, chi ío dusaⁿ! —càchi-gá xàhaⁿ-gá xii ndute-áⁿ.

Te òré-ni ní nguíñí táchí-áⁿ te ní núcúndecu nahi-nǎ ndute làgúná-áⁿ. 40 Te Jèsús ní xàhaⁿ-gá xii-güedé:

—¿Ná cuendá ndéé dúcáⁿ yùhú-ndó-í? ¿Náa ñà túú sàndáá iní ñàhá ndisa-ndo xii-í-áⁿ? —càchi-gá xàhaⁿ-gá xii-güedé.

41 Dico mee-güedë chi ío ní yuhú-güedé sá ducaⁿ ní quide-gá ní xini-güedé, te ní xitnàha-güedé:

—¿Te ná tée cùu téa-núu ní cáháⁿ-ni-dé, te ní ngüíñí táchí te ní nucúndecu nahí ndúte lagúná-a-i? —càchí-güedé xitnàha-güedé.

5

Íⁿ tée yìhi ñaha espíritú cúndìhi yucu ñávàha

(Mt. 8:28-34; Lc. 8:26-39)

1 Te ní sáá Jèsús ndìhi cue tée xica cuu ndìhi-gá ndàa ingá xio yuhu làgúná yucu cue tée ñuú Gàdará.

2 Te òré ní quene-gá xití bàrcú te ìⁿ tée yìhi ñaha espíritú cúndìhi yucu ñávàha ní quee-dé núú yíndüxi ndíyí cuáhán-dé núú-gã.

3 Te mee-ni núú yíndüxi ndíyí-áⁿ quidé vèhe-dé, te cuèi dàcutu ñaha-güedé cadená xii-dé dico ñá túú tnàhí ndàcu-güedé núú-dë.

4 Te ío títní xito ní dácútú-güedé cadená sáhá-dë ndìhi ndaha-dé dico ní dándává-ni-dë, te ní xóo dacàchi-gá-dé nchaa cadená-áⁿ, te ñá túú tnàhí ní ndàcu-güedé núú-dë. 5 Te cuèi nduu cuèi niú ní xóo cana saa-dé, te váha-ni núú xití yucu ndècu-dé àdi núú yíndüxi ndíyí dico càna saa nahí-ni-dé, te ío ní xóo dánícuèhé-dé méé-dë ndìhi yúú. 6 Te òré ní xini-dé Jèsús te xinu-dé ní sáhán núú-gã, te ní ngüíñí xití-dë, 7 te espíritú yìhi ñaha xii-dé-áⁿ ní quide-xi níhi ní cáháⁿ-dé, te xàhaⁿ-dë xii-gá:

—¿Ná cuendá véxi yòhó Jèsús Déhe Dútú Ndióxi sàdí-n ìchi-í? Te càháⁿ ndàhú-í núú Ndióxi yuhu núú-n sã vã dándòho ñaha-n xii-í —càchí-dé xàhaⁿ-dë xii-gá.

8 Te ducaⁿ ní cáháⁿ-dé cuendá sá Jèsús ní xàhaⁿ-gã xii espíritú cúndìhi yucu ñávàha yìhi ñaha xii-dé-áⁿ sã queé ñaha-xi xii-dé.

9 Te Jèsús ní xicáⁿ tnúhú-gã núú-dë, te xàhaⁿ-gã:

—¿Nása nàni-n-i? —cachí-gá xàhaⁿ-gã xii-dé.

Te ní xàhaⁿ-dë:

—Vài Sandadú, duha nàni-í chi ío cuèhé-ndí —càchí-dé xàhaⁿ-dë xii-gá.

10 Te cue espíritú cúndìhi yucu ñávàha-áⁿ ní cáháⁿ ndàhú-xi núú Jèsús sá vã téndàha ñaha-gá xii-xi quíhíⁿ-xi ingá xichi. 11 Te diu-ni yatni yucu núú ndécú Jèsús-áⁿ yìhi vài cuchí xixexi-güedi. 12 Te nchaa cue espíritú-áⁿ ní cáháⁿ ndàhú-xi núú-gã, te xàhaⁿ-xi xii-gá:

—Càháⁿ ndàhú-ndí núú-n sã dáñá-n quíhu-ndí yiqui cùñú nchaa cùchí-áⁿ —càchí-xi xàhaⁿ-xi xii-gá.

13 Te Jèsús ní xàhaⁿ-gã sá cúú quíhu-xi yiqui cùñú-güedi, te xínu dàtná úú mĩ-güedi yìhi yucu-áⁿ. Te nchaa espíritú cúndìhi yucu ñávàha yìhi ñaha xii tée-áⁿ ní quee ñaha-xi xii-dé, te cuánguìhu-xi yiqui cùñú nchaa cùchí-áⁿ, te nchaa-güedi ní xinu-güedi duha ní quee-güedi ndàa núú dèhvá yuhu làgúná-áⁿ, te ní ngaunihnu-güedi xití ndute te ní ndìhi-güedi ní cáhá.

14 Te òré ní xini cue tée xito cuchí-áⁿ nàcuáa ní cuu te ní xinu-güedé, te ní sáhán-güedé ní caní-güedé cuendú núú cuè ñáyiú ndècu xití ñuú, ndìhi núú cuè ñáyiú ndècu xití yucu. Te nchaa ñáyiú ní níhí tnúhu ní xicá-yu cuáhán ndéhë-yu nàcuáa ní cuu. 15 Te òré ní quexió-yu núú ndécú Jèsús te ní xini-yu tée ní xìhi ñaha cuè espíritú cúndìhi yucu ñávàha-áⁿ núcòo-dé núú sáhá Jèsús, te nihnu-ná-dé dóó-dë te núcòo-ná-dé dàtná ìⁿ ñáyiú váha, te ní yuhú-yu òré ní xini ñáhá-yu xii-dé. 16 Te nchaa ñáyiú ní xini nàcuáa ní cuu ní ndúha tée yìhi ñaha cue espíritú cúndìhi yucu ñávàha-áⁿ ní cùu ní caní-yu cuendú núú nchaa ñáyiú ní quexio-áⁿ nàcuáa ní cuu ní ndúha tée-áⁿ ndìhi nàcuáa ní cuu cuendá

nchaa cùhí-án. ¹⁷ Te sá dúcáⁿ ní níhí ñáyiú-án tñúhu nàcuáa ní cuu núu nchaa-yu ní ngüita-yu càháⁿ ndàhú-yu núú Jèsús sá ná quèe-gá yucu ñuú-yu núhú-gá.

¹⁸ Te ní xica-gá cuáháⁿ-gá núú ndécú bàrcú, te òré ndée-gá bàrcú-án nùhú-gá ní ngüita téé ní xíhi ñaha cuè espíritú cúndíhi yucu ñávaha-án càháⁿ ndàhú-dé núú-gá nùu vá cúndèe iní-gá quíhíⁿ ndíhi ñaha-gá xii-dé. ¹⁹ Dico ñá túú ní sáha-gá tñúhu quíhíⁿ ndíhi ñaha-gá xii-dé, te ní xáhaⁿ-gá xii-dé:

—Cuanùhú vehe-n, te cani-n cuendú núú cuè ñáyiú sá Yá Ndiòxí ní cundàhú iní ñáhá-gá xii-n, te ío càhnu cuu nchaa sá vaha ní quide-gá sá cúu-xi-n —càchí-gá xáhaⁿ-gá xii-dé.

²⁰ Te téé-án ní xica-dé cuánuhú-dé, te ní sáháⁿ-dé ndí ùxí ñuú nání Dècápolis, te ní cani-dé cuendú núú nchaa ñáyiú sá ío càhnu cuu nchaa sá vaha ní quide ñaha Jèsús xii-dé, te nchaa-yu ío ní cuñúhu-yu.

Cuendá déhe yoco té Jàirú ndíhi cuendá ñá ñadíhi ní tnándeé dóó Jèsús (Mt. 9:18-26; Lc. 8:40-56)

²¹ Te Jèsús cuándeé-gá bàrcú, te ní natehdé-gá ndàa íngá xio yuhu làgúná, te ío vai ñáyiú ní tacá núú ní quexio-gá-án, te xíaⁿ ndécú-gá ²² ní quexio ñá téé tàxi tñuní veñúhu núú-gá, te téé-án nání-dé Jàirú, te ní ngüíñí xítí-dé núú-gá. ²³ Te ní ngüita-dé càháⁿ ndàhú-dé núú-gá, te xáhaⁿ-dé xii-gá:

—Ío càhú tñahá déhe yoco-í cùhú-xi, te ndècu-ná-xi sá cúu-xi, te véxi-í càháⁿ ndàhú-í núú-n nùu vá cúndèe iní-n quíhíⁿ-ó vèhe-í tendaha-n-xi cuendá ndúha-xi, te cundecu-xi —càchí-dé xáhaⁿ-dé xii-gá.

²⁴ Te Jèsús ní xica-gá cuáháⁿ-gá ndíhi téé-án, te ío vai ñáyiú nchícúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu. ²⁵ Te tnuú nchaa ñáyiú-án ñútnàhá ñá

ñaha cùhú, te ñaha-án sa ní cuu úxúú cuía sá cùhú-aⁿ ngóyo ñaha níñí xii-aⁿ. ²⁶ Te ío ta ndòho-aⁿ véxi, te ío cuéhé ñátátná ní cuu ta quide tátna ñaha xii-aⁿ, te sa ní ndíhi nchaa sá ndécú ndíhi-aⁿ ní nadico-aⁿ cuendá ní níhi-aⁿ díhúⁿ ní queheⁿ nchaa ñáyiú ní quide tátna ñaha xii-aⁿ dico ní ñá-yu ñá túú ní ndàcú-yu ndúha-aⁿ, chi da uuⁿ-gá tá cùu cahú-aⁿ cuáháⁿ. ²⁷ Te òré ní níhi-aⁿ tñúhu cuendá Jèsús, te ní xica-aⁿ cuáháⁿ-aⁿ núú ndécú-gá. Te òré ní quexio-aⁿ núú ndécú-gá te ní sáháⁿ ndehe yatni-aⁿ ndàa sátá-gá ní tnándeé-aⁿ dóó-gá. ²⁸ Te ducaⁿ ní quide-aⁿ chi ní sani iní-aⁿ sá nùu ndacu-aⁿ tnándeé-aⁿ cuèdicó luha yuhu dóó Jèsús te ndúha-aⁿ ní sani iní-aⁿ. ²⁹ Te òré ducaⁿ ní quide-aⁿ te ñá túú-gá ní ngóyo ñaha-gá níñí xii-aⁿ, te òré-án ní cutnùní iní-aⁿ sá ní ndúha-aⁿ cuéhé tñahá-aⁿ. ³⁰ Te Jèsús ní cutnùní iní-gá sá ñá-yu ní ndúha sá cuendá-gá, núu ní nchócótó-gá ndàa sátá-gá te ní xicáⁿ tñúhú-gá núú nchaa ñáyiú nchícúⁿ ñáhá xii-gá, te xáhaⁿ-gá xii-yu:

—¿Ndèdacàa-ndo ní tnándeé ñáhá xii-í? —càchí-gá xáhaⁿ-gá xii-yu.

³¹ Te cue téé xica cuu ndíhi-gá ní xáhaⁿ-güedé xii-gá:

—Mèstrú, ndèhe-n sá vái ñáyiú nchícúⁿ ñáhá xii-n, te texio texio dàdehnde ñahá-yu xii-n te xicáⁿ tñúhú-gá-n yòo ní tnándeé ñáhá xii-n —cachí-güedé xáhaⁿ-güedé xii-gá.

³² Te Jèsús ní xíndéhé vaha-gá xio xio díñí-gá nùu ndèdacàa ñáyiú ní tnándeé ñáhá xii-gá. ³³ Te sá dúcáⁿ ní cutnùní iní ñadíhi-án nàcuáa ní cuu, núu yùhú yùhú-aⁿ ní sáháⁿ-aⁿ ní ngüíñí xítí-án nùu Jèsús, te ní xáhaⁿ ndáa-aⁿ xii-gá nàcuáa ndùu cuendá-aⁿ. ³⁴ Te Jèsús ní xáhaⁿ-gá xii-aⁿ:

—Yòhó ñaha cùhú ní cùu, ní sándáa iní ñáhá-n xii-í, núu ní ndúha-n, te vitna cuanùhú te vá

ndìhú-gá iní-n, chi vá dúcáⁿ-gã ndoho-n —càchí-gá xãhaⁿ-gã xii-aⁿ.

35 Te cãháⁿ dúcáⁿ-ní Jèsús ní sáá cue tée xinu cuechi vehe té Jàirú tée tàxi tnuní veñúhu-áⁿ, te xãhaⁿ-güedé xii-dé:

—Sa ní xihí déhe-n, vá chíchìuⁿ-gá-n Mèstrú —càchí-güedé xãhaⁿ-güedé xii-dé.

36 Dico Jèsús ñá túú ní quide cuendá-gá nãcuáa nduu tñúhu ní cãháⁿ cue tée-án, te ní xãhaⁿ-gã xii tée tàxi tnuní veñúhu-áⁿ:

—Ñá túú nã caní iní-n, quindáá iní ñáhá-ní-n xii-í —càchí-gá xãhaⁿ-gã xii-dé.

37 Te Jèsús vá yõo-gá ní cuñí-gá canchicúⁿ ñáhá xii-gá quihíⁿ, chi té Pèlú-ni, ndihí té Jãcobó-ni, ndihí ñaní-ni-dé té Juáa cuáháⁿ ndihí ñaha-gã xii-güedé. 38 Te òré ní quexio-gá ndihí-güedé vehe tée tàxi tnuní veñúhu-áⁿ, te ní xiní-gá sá ïo vai ñáyiú xĩndecu, te súúni dùsaⁿ quidé-yu te níhi xicãháⁿ-yu te xĩndáhí-yu. 39 Te òré cuãnguìhu-gá xití vehe, te ní xãhaⁿ-gã xii-yu:

—¿Ná cuendá ndéé dúcáⁿ ïo dusaⁿ quide-ndo, te ndãhyú-ndó? Te xíchí-a ñá túú ní xihí-xi chi dicó xidí-xi —càchí-gá xãhaⁿ-gã xii-yu.

40 Te ní sácú ndéé ñáhã-yu xii-gá sá dúcáⁿ ní cãháⁿ-gã, chi sá cúú-xí mèe-yu chi ní xihí ndisa xíchí-ãⁿ. Te òré-áⁿ ní queñuhu-gá nchaá-yu quehé, te cuãnguìhu-gá núú cándodo yiqui cuñú xíchí ní xihí-áⁿ. Te ndeca-gá tãtã xíchí ní xihí-áⁿ ndihí nãná-xi cuãnguìhu, te tñahá cue tée úní ndihí-gá-áⁿ cuãnguìhu ndihí-gá. 41 Te ní tñi-gá ndaha xíchí ní xihí-áⁿ, te ní xãhaⁿ-gã:

—Tálita, cúmí —càchí-gá xãhaⁿ-gã.

Te tñúhu-áⁿ quée-xí: Yohó xíchí cuéchí yúhú càchí-í sá ndácõo-n, duha quèe-xi tñúhu-áⁿ.

42 Te òré-ni-áⁿ ní ndoto xíchí cuéchí-ãⁿ ní ndacõo-xi ní nacaca cuu-xi, te ndecu-xi úxúú cuíá-xi.

Te ïo ní cuñúhu nchaa ñáyiú sá dúcáⁿ ní dándótó ñaha Jèsús xii-xi.

43 Te Jèsús ní cãháⁿ víhí-gã dóho tãtã-xi ndihí nãná-xi sá vá yõo ïⁿ cuñàhá-yu sá ní dándótó ñaha-gã xii-xi. Te sátá dúcáⁿ te ní xãhaⁿ-gã xii-yu sá cuñàhá-yu xii-xi sá cáxi-xí.

6

Jèsús ndécú-gã ñuú Nazàrét
(Mt. 13:53-58; Lc. 4:16-30)

1 Te Jèsús ní ndee-gã ñuú núú ní dándótó-gã xíchí ní xihí-áⁿ, te cuánuhú-gá núú cúú ñuú-gã, te tñahá cue tée xica cuu ndihí-gã cuánuhú ndihí-gã. 2 Te ndecu Jèsús ñuú-gã ní tnahá nduu ndetátú ñáyiú. Te nduu-ãⁿ cuãnguìhu-gã xití veñúhu dàcuaha ñaha-gã xii-yu. Te vai ñáyiú ndedóho nchaa tñúhu càháⁿ-gã, te xicũñúhu víhí-yu, te xitnãhá-yu:

—¿Ndéé ní sáháⁿ dácuahá tẽ-a núú ndéé duha váha càháⁿ-dé, nása ní quide-dé núú ndéé duha ïo váha cùtnuní iní-dé, te ndàcu-dé quidé-dé nchaa sá vá yõo tñahí ndàcu cada-i?

3 Te dicó carpintèrú cúú-dé, dicó déhe tá Màriá cúú-dé, te ñaní-dé cúú tẽ Jãcobó, ndihí té Chèé, ndihí té Jüdás, ndihí té Ximú, te ñuú-ni cue cúa-dé cúú ñáyiú ndecu ndihí-o ñuú-a —càchí-yu xitnãhá-yu.

Te ñá túú ní cuñí-gã-yu cãháⁿ ndihí váha ñàhá-yu xii-gã. 4 Te Jèsús ní xãhaⁿ-gã xii-yu:

—Te núú ïⁿ té cãháⁿ tñúhu Yá Ndiõxí ná nãsãá-dé ñuú-dé dacuaha-dé ñáyiú tñúhu-gã, te nchaa ñáyiú ñuú-dé-áⁿ, ndihí nchaa ñáyiú ndecu ndihí-dé vehe-dé, ndihí nchaa ñáyiú cùu ndi mee-dé ñá túú nèhé-yu sá yĩñùhu núú-dé, dico cue ñáyiú nchaa dava-gã ñuú chi nèhé-yu sá yĩñùhu núú-dé —càchí-gã xãhaⁿ-gã xii-yu.

5 Te ñá túú ní quide tãtã Jèsús vai ñáyiú cuendá sá ñá túú ní sãndáá iní ñáhã-yu xii-gã, dico ní quide

tátna-gá ìⁿ úú ñáyiú cùhú ní sándáá iní ñáhá xii-gá. Te ní tendaha ñaha-ni-gá xii-yu te ní ndúha-yu. ⁶ Te ío ní cuñúhu-gá sá dúcáⁿ ñà túú ní cuñí-yu quindáá iní ñáhã-yu xii-gá. Te sátá dúcáⁿ te ní xica-gá cuáhãⁿ-gá nchaa dava-gá ñuú lihli càa yatni xíaⁿ cuendá dacuàha-gá ñáyiú tnúhu-gá.

Jèsús táuchìuⁿ-gá quíhíⁿ cue téé xica cuu ndíhi-gá cáháⁿ-güedé tnúhu Yá Ndiöxí núú ñáyiú

(Mt. 10:5-15; Lc. 9:1-6)

⁷ Te Jèsús ní cana-gá ndi ùxúú cue téé xica cuu ndíhi-gá, te ní sáñaha-gã xii-güedé tnúhu ndee iní cundecu ndíhi-güedé cuendá queñuhu-güedé nchaa espíritú cündíhi yucu ñávãha yíhi ñaha xii ñáyiú. Te ní xáhaⁿ-gã xii-güedé sá ndi ndúú ndi ndúú-güedé quíhíⁿ-güedé cáháⁿ-güedé tnúhu Yá Ndiöxí núú ñáyiú. ⁸⁻⁹ Te cùmání-gã caca-güedé quíhíⁿ-güedé, te ní xáhaⁿ-gã xii-güedé:

—Vã canèhe-ndo ñunu cuhuⁿ ndachiuⁿ-ndo, te ní vã canèhe-ndo sá cáxi-ndó, te ní vã canèhe-ndo díhúⁿ, chí ìⁿ caa-ni tátnu canehe-ndo, te chàu yíhí-ni-ndó-ãⁿ xíaⁿ-ni quíhi-ndo, te vã canèhe-gá-ndó ìngá ichi dóo-ndó chí ðiu-ni dóo níhnú-ndó-ãⁿ xíaⁿ tnàhí-ni cuihnu-ndo te ñá túú tnàhí-gá ná canehe-ndo —càchí-gá xáhaⁿ-gã xii-güedé.

¹⁰ Te xáhaⁿ tùcu-gá:

—Te òré ná sàá-ndó ìⁿ ñuú, te ío ñáyiú cáháⁿ ñáhã-yu xii-ndo vèhé-yu, te xíaⁿ-ni cundecu-ndo ndéé ná sàá nduu ndèe-ndo ñuú-ãⁿ. ¹¹ Te núu ío dava ñuú ñá túú cuñí-yu cáháⁿ ndíhi ñaha váha-yu xii-ndo, te ní ñà túú cuñí-yu cundedóho-yu tnúhu càháⁿ-ndó, te ndee-ni-ndo ñuú-ãⁿ te naquidi-ndo ticáchúhmã ní tní sáhã-ndó cuendá ná cùtnuní iní-yu sá ñà túú quide váha-yu. Te ná càchí tnúhu ndáá-í xii-ndo sã ná sàá nduu càda

ndáá Yá Ndiöxí cuéchi nchaa ñáyiú, te cue ñáyiú ducaⁿ na càda ñaha xii-ndo-ãⁿ ïo-gá ndohó-yu dàvã-ãⁿ dàcúúxí dàtnã ndoho cue ñáyiú ñuú Sòdomá ndíhi cue ñáyiú ñuú Gòmorrá —càchí-gá xáhaⁿ-gã xii-güedé.

¹² Te cue téé-ãⁿ ní xica-güedé cuáhãⁿ-güedé te ní ngúita-güedé dacuàha-güedé cue ñáyiú tnúhu Yá Ndiöxí, te xáhaⁿ-güedé xii-yu:

—Chí dándixi túu iní sá ñà túú quide váha-ndo ndècu-ndo, te dañã-ndo nchãa ichi cuehé ichi duha ndècu-ndo. —càchí-güedé xáhaⁿ-güedé xii-yu.

¹³ Te vãi espíritú cündíhi yucu ñávãha yíhi ñaha xii ñáyiú ta queñuhu-güedé yiqui cùnú-yu cuáhãⁿ, te vãi tucu ñáyiú cùhú tá quide tátna-güedé cuáhãⁿ chíhí ñaha-güedé acití xii-yu te ndúha-yu.

Nàcuãa ní cuu ní xíhí té Juãá téé dàcuandute ñaha xii ñáyiú

(Mt. 14:1-12; Lc. 9:7-9)

¹⁴ Te nchaa xichi ní níhí ñáyiú tnúhu nchaa nàcuãa quide Jèsús, te tnàhá té Hèrodés téé yindaha ñaha xii ñáyiú ní níhí-dé tnúhu nchaa nàcuãa quide-gá, te ní cachí-dé:

—Té Juãá téé ní xóo dacuandute ñaha xii ñáyiú ní ndoto núu dàcãⁿ ndácú-dé quidé-dé nchaa sá vã yõo tnàhí ndàcu cada —duha ní cachí-dé.

¹⁵ Te dava ñáyiú càchí-yu sá té Eliás téé ní xóo cáháⁿ tnúhu Yá Ndiöxí ndéé sanaha ní nasáá-dé.

Te davã-yu càchí-yu sá cúú-gã dàtnã ìⁿ téé ní xóo cáháⁿ tnúhu Yá Ndiöxí ndéé sanaha. ¹⁶ Te té Hèrodés ní níhí-dé tnúhu nchaa nàcuãa càháⁿ-yu, te ní cachí-dé:

—Ðiu té Juãá téé ní táuchìuⁿ-í ní xehndé-güedé díquí-xi ní ndoto —càchí-dé.

¹⁷⁻¹⁸ Te duha ní cuu cùtnàhá ní sahní té Hèrodés téé Juãá, chí dàvã-ãⁿ ní naqueheⁿ té Hèrodés-ãⁿ ìⁿ ñaha nani Herodiás ndéca-dé, te ñaha-ãⁿ sã ní cãndeca ñaha ñàní-dé té Lípé.

Te té Juáá ní xáhaⁿ-dë xii té Hèrodés sá ñà túú ní quide vâha-dé sá dúcáⁿ ñi naqueheⁿ-dé ñaha ní cándeca ñani-dé, núú sá cuëndá ñaha-áⁿ ñi táuchíúⁿ tē Hèrodés ní tñii-güedé té Juáá ní chihi ñaha-güedé vecaá, te ní dácútú ñaha-güedé xii-dé, te ducaⁿ ñi quide-dé cuëndá sá ndécá ñaha-dé xii-aⁿ.

¹⁹ Te ñaha ñani Herodiás ndécá tē Hèrodés-áⁿ io ní cuu úhú iní-aⁿ té Juáá, te ní cuini-aⁿ cahni-aⁿ-dé, dico ñá túú ní ñihí-aⁿ nâcuáa cada-aⁿ. ²⁰ Te mee tē Hèrodés chi ní cutnùní ndáá iní-dé sá tē Juáá cúú-dé ñiⁿ tēe quide mee-ni sá vâha, te quide ndáá-dé núú Yá Ndióxi, te ní xóo yùhú ñáhá-dé núú xiáⁿ ñá túú ní dàña-dé ná cada ñaha ñaha ndeca-dé-áⁿ xii té Juáá. Te té Hèrodés-áⁿ io ní cudíí iní-dé ní xindedóho-dé nchaa tñúhu ní xáhaⁿ tē Juáá xii-dé, dico ñá túú ní sàni iní-dé duuⁿ duuⁿ tñii-dé tñúhu-áⁿ. ²¹ Te ñiⁿ nduu ní xóo vico vehe tē Hèrodés ní quide cãhnu-dé nduu ní cacu-dé. Te nduu-áⁿ ñi ñihí ñaha ñani Herodiás-áⁿ nâcuáa cada-aⁿ cuëndá cuú tē Juáá. Te nduu-áⁿ ní cáháⁿ té Hèrodés nchaa cue tēe cùchiuⁿ, ndihi nchaa cue tēe tàxi tñuní ñáhá xii cue sandadú, ndihi nchaa cue tēe cuica ndëcu distritú Galiléa cuëndá cudini ndihi ñaha-dé xii-güedé nduu-áⁿ. ²² Te ndëcu ñiⁿ déhe yoco ñaha nani Herodiás-áⁿ, te xíchí-áⁿ ñi quíhu-xi vehe núú cúú vico-áⁿ ñi xita saha-xi mèi oré yíhi tē Hèrodés mèsá ndihi nchaa cue tēe ní cáháⁿ-dé, te io ní cudíí iní-dé ndihi nchaa cue tēe-áⁿ nâcuáa ní xita xíchí-áⁿ. Te té Hèrodés ní xáhaⁿ-dë xii-xi:

—Cácaⁿ núú-í núú ná cuini-n te taxi-í —càchí-dé xáhaⁿ-dë xii-xi.

²³ Te ní cacunehe-dé ndéé Yá Ndióxi nâcuáa cutnùní iní xíchí-áⁿ sá ndáá cuãñaha-dé núú ná cúú sá ná càcáⁿ-xi núú-dé cuéi ndéé cuádava nchaa sá ndécú ndihi-dé, te núú na càcáⁿ-xi. ²⁴ Te sá dúcáⁿ ñi xáhaⁿ-dë xii-xi núú ní quee-xi quehé ní xáhaⁿ-xi xii náná-xi:

—Náá, ¿ná cúú sá càcáⁿ-í núú tē Hèrodés? —càchí-xi xáhaⁿ-xi xii-aⁿ.

Te náná-xi-áⁿ ñi xáhaⁿ-aⁿ xii-xi:

—Cuáháⁿ cácaⁿ-n díqui tē Juáá tēe dàcuandute ñaha xii ñáyiú —càchí-aⁿ xáhaⁿ-aⁿ.

²⁵ Te ndíhi-ni cuándihu xíchí-áⁿ xití vehe núú yíhi tē Hèrodés-áⁿ, te xáhaⁿ-xi xii-dé:

—Cuini-í sá mèi nduu vitna quehndé-n díqui tē Juáá tēe dàcuandute ñaha xii ñáyiú te taxi-n, díco na cùhuⁿ ñiⁿ xití cóhó taxi-n —càchí-xi xáhaⁿ-xi xii-dé.

²⁶ Te té Hèrodés ní ngüita-dé ndíhú víhí iní-dé sá dúcáⁿ ñi xáhaⁿ-xi xii-dé, dico ñá túú ní cùyi-dé cuãñaha-dé xii-xi sá vâ cúú cuãñaha-dé sá xicáⁿ-xi, chi cuëndá sá núú nchaa ñáyiú ní xáhaⁿ-dë sá cúú cuãñaha-dé núú ná cúú sá ná càcáⁿ-xi, te ní cacunehe-dé ndéé Yá Ndióxi nâcuáa cutnùní iní-xi sá ndáá cuãñaha-dé sá ná càcáⁿ-xi núú-dé. ²⁷ Te té Hèrodés-áⁿ ndíhi-ni ní xáhaⁿ-dë xii ñiⁿ sandadú sá quíhiⁿ-dë quehndé-dé díqui tē Juáá. ²⁸ Te sandadú-áⁿ ñi xica-dé cuáháⁿ-dë vecaá núú yíhi tē Juáá-áⁿ, te ní quexio-dé te ní xehndé-ni-dé díqui tē Juáá, te ní chihi-dé ñiⁿ xití cóhó te nèhe-dé cuánuhú ní sáha-dé xíchí xicáⁿ-áⁿ, te xíchí-áⁿ ñi nâcuáha-xi náná-xi. ²⁹ Te oré ní ñihí nchaa cue tēe ní xica cuu ndíhi ndíi Juáá-áⁿ tñúhu sá dúcáⁿ ñi sahni ñaha-güedé xii ndíi, te ní sáháⁿ-güedé ní ndocani-güedé yiqui cùnú ndíi te ní chindúxi-güedé.

Jésús dácàxi-gá úhúⁿ mîl cue tēe te ñiⁿ ñáyiú ñihí ndihi landú

(Mt. 14:13-21; Lc. 9:10-17; Jn. 6:1-14)

³⁰ Te nchaa cue tēe ní táuchíúⁿ Jésús cuáháⁿ cáháⁿ tñúhu Yá Ndióxi núú ñáyiú ní ndexio-güedé núú-gã te ní ngüita-güedé nácani tñúhu-güedé nchaa nâcuáa ní quide-güedé ndihi nchaa nâcuáa ní dánéhé ñáhá-güedé xii-yu. ³¹ Te Jésús ní xáhaⁿ-gã xii-güedé:

—Chí nèhé ná quíhíⁿ-ó ìíⁿ xi-chi núú ñà túú ñáyíu ndetatú-ó —càchí-gá xáhaⁿ-gá xii-güedé.

Te ducaⁿ ní xáhaⁿ-gá xii-güedé, chí ío cuéhé ñáyíu cuáháⁿ véxi-yu cùú-yu núú ndécú-gá. Te ní ñà ñihí-gá nása cada-gá caxi-gá ndihí cue téé xíca cuu ndihí-gá. ³² Te Jèsús cuánguee-gá bàrcú ndihí mee-ni cuè téé ní táuchíúⁿ-gá cáháⁿ tnúhu-gá, te cuáháⁿ-gá ndihí-güedé ìíⁿ xichi núú ñà túú ñáyíu ndècu. ³³ Dico vai ñáyíu ní cutnùníní iní-yu sá díú-gá ñúhú bàrcú-áⁿ cuáháⁿ ndihí cue téé xíca cuu ndihí-gá, te nchaa ñúú cáá yatni xíáⁿ ní quee ñáyíu xíxinú-yu cuáháⁿ núú ní quidè-yu cuèndá quexìo Jesús, te sa ndècu-yu xíáⁿ ní quexìo-gá. ³⁴ Te òré ní quene Jèsús xití bàrcú, te ní xiní-gá cuéhé víhí ñáyíu xíxúcu núú ní quexìo-gá-áⁿ, te ní cundàhú iní ñáhá-gá xii-yu chí ndècu-yu dàtná xíndecu cue mbéé cue quítí ñà túú tòli-xi, te ío vai núú sá ní ngúíta-gá ní dácuháⁿ ñàha-gá xii-yu. ³⁵ Te sátá tá cuáa cuáháⁿ te ní sáháⁿ cue téé xíca cuu ndihí Jesús núú-gá, te xáhaⁿ-güedé xii-gá:

—Sa ní cuaa te ñà túú ñáyíu ndècu yatni iha. ³⁶ Váha-gá dandàca nchaa ñáyíu-a chí na quíhíⁿ-yu nchaa vehe càa xití yucu-a, ndihí nchaa ñúú cáá ncháa yatni iha cuaáⁿ-yu sá cáxí-yu —càchí-güedé xáhaⁿ-güedé xii-gá.

³⁷ Te Jèsús ní xáhaⁿ-gá:

—Mee-ndo chí cuañaha sá ná cáxí-yu —càchí-gá xáhaⁿ-gá xii-güedé.

Te xáhaⁿ-güedé xii-gá:

—¿Te nása cada-ndí, chí xìni ñúhu-xi datná úú cièndú díhúⁿ denàriú cuèndá cuaaⁿ-ndí sá cáxí-yu? —càchí-güedé xáhaⁿ-güedé xii-gá.

³⁸ Te Jèsús ní xáhaⁿ-gá xii-güedé:

—Chí cuáháⁿ cundehe-ndo núu ná daha pàá ndécú ndihí-ndo te cachí tnúhu-ndo —càchí-gá xáhaⁿ-gá xii-güedé.

Te ní sáháⁿ ndéhé-güedé núu ná daha pàá ndécú, te ní xáhaⁿ-güedé xii-gá:

—Úhúⁿ duha-ná pàá ndihí úú-nà chácá ndécú —càchí-güedé xáhaⁿ-güedé xii-gá.

³⁹ Te Jèsús ní xáhaⁿ-gá xii nchaa ñáyíu sá ná ñihí tnáhá-yu cuu titní xichí-yu, te ngóo-yu nchaa núú cùhú cuí cáa xíáⁿ. ⁴⁰ Te nchaa-yu ní ngóo-yu, te dava xichí-yu ní ngóo ìíⁿ cièndú-yu, te dava xichí-yu ní ngóo údico úxí-yu. ⁴¹ Te sátá ní ndihí-yu ní ngóo, te ní queheⁿ Jèsús ndí ùhúⁿ pàá ndí úú chácá-áⁿ, te ní ndacoto-gá andíu te ní ndacáⁿ táhú-gá núú Yá Ndióxí, te dàtnùníní ní táhú cuèchi-gá pàá-áⁿ te ní sáñaha-gá xii cue téé xíca cuu ndihí-gá ní dácáhñu-güedé nchaa ñáyíu-áⁿ ní xexí-yu. Te díu-ni ducaⁿ ní quide tucu-gá úú chácá-áⁿ. ⁴² Te nchaa-yu ní xexí-yu ní ndahá xití-yu. ⁴³ Te sátá ní túhú cohó-yu te ní ndatàcá-güedé nchaa sá ní quèndóo, te ní chítú ùxúú tnàhá tídihí mee-ni sá ní quèndóo núú ùhúⁿ-ni pàá, ndihí núú ùú-ni chácá. ⁴⁴ Te nchaa ñáyíu ní xexí-áⁿ chí xínu úhúⁿ míl mee-ni cuè téé chí díu-ni cue téé-áⁿ ní quíundehu, te dííⁿ ñáyíu díhí ndihí cue landú.

Jèsús xíca-gá núú ndute

(Mt. 14:22-27; Jn. 6:16-21)

⁴⁵ Te òré-ni-áⁿ ní xáhaⁿ Jèsús xii cue téé xíca cuu ndihí-gá sá quèe-güedé bàrcú codonùu-güedé quíhíⁿ-güedé ìíⁿ ñúú nání Bètsaidá cáá ndàa ingá xio yuhu làgúná núú ndécú-güedé-áⁿ, te mee-gá quèndóo-gá cada ndee ìní tnáhá-gá ndihí cue ñáyíu. ⁴⁶ Te sátá ní yáha ní quide ndee ìní tnáhá-gá ndihí-yu, te ní xica-gá cuáháⁿ-gá ìíⁿ tindúú cáá yatni xíáⁿ cuèndá cáháⁿ ndihí-gá Yá Ndióxí. ⁴⁷ Te òré sa ní cundiⁿ te bàrcú sá ñúhú cuè téé xíca cuu ndihí-gá sa cuáháⁿ-xì ndéé cuádava xití làgúná-áⁿ, te mee-gá ndécú-gá

ɛ̃ⁿ núú tɛ̃ndúú. ⁴⁸ Te túu ndèhe-gá sá sũúni ndòho-güedé tá dàcaca-güedé bàrcú-áⁿ cuáháⁿ, chi cuèndá ndàa nacuáa cuáháⁿ-xi-áⁿ duha véxi táchí te nàtúndaha-xi. Te ingá nduu-áⁿ tàcuíhndá-gá sa ní cuyatni vií-nã Jèsús bàrcú ñúhú-güedé-áⁿ, dico núú ndute tá xìca-gá cuáháⁿ te luha-ná te yáha ñaha-gã xii-güedé ní cùu. ⁴⁹⁻⁵⁰ Te òré ní xini ñáhá cuè téè ñùhu bàrcú-áⁿ xii-gá te ní yùhú-güedé ní cana saa-güedé, chi ní sani iní-güedé sá ñⁿ almá cúu-gã. Te ní xáhaⁿ-gã xii-güedé:

—jÑí cunduu-ndo, vá yùhú-ndó, chi yùhú cúu-í! —càchí-gá xáhaⁿ-gã xii-güedé.

⁵¹ Te Jèsús cuánguee-gá xití bàrcú ñúhú-güedé-áⁿ, te sáta cuánguee-gá te òré-ni ní ngũíñí táchí, te ní cuñúhu vihi-güedé. ⁵² Te ducaⁿ chi cue téé-áⁿ ñà túú ní cùtnuní iní-güedé nása quide-gá, chi ñá túú ní cùtnuní váha iní-güedé nàcuáa ndùu sá ní quide-gá òré ní nadacàyá-gá pàá, chi ío ñí ñíquí-güedé.

Jèsús quidé tãtma-gá ñáyiu cùhú ñúú Genesàrét
(Mt. 14:34-36)

⁵³ Te ní yáha-güedé ndihi-gá ndàa ingá xio yuhu làgúná, te ní sáa-güedé ndihi-gá yucu cue téè ñúú Genesàrét. Te yàcáⁿ ní dácútú ndèé-güedé bàrcú-güedé yuhu làgúná. ⁵⁴ Te òré ní quene Jèsús ndihi cue téè xìca cuu ndihi-gá xití bàrcú, te nchaa ñáyiu xĩndecu-áⁿ ñí cutnùní iní-yu sá díú-gã. ⁵⁵ Te ñáyiu-áⁿ ndihi-ni ní sáháⁿ-yu nchaa núú xĩndecu cue ñáyiu cùhú, te cue ñáyiu cùhú-áⁿ ñí quée-yu xító nchido ñahá-yu cuáháⁿ ndi tnahá ñⁿ xichi núú ñihí-yu tñúhu quèxio Jèsús. ⁵⁶ Te nchaa ñúú náhnú ndihi nchaa ñúú líhli núú cuáháⁿ Jèsús, ducaⁿ xĩndecá-yu nchaa ñáyiu cùhú cuáháⁿ xití ñúú sàcáⁿ ñáhã-yu núú-gã cuèndá cada tãtma

ñaha-gã xii-yu. Te diu-ni ducaⁿ xĩquidé-yu nchaa dava-gá xichi núú cuáháⁿ-gá núú xĩndecu cue ñáyiu, te càháⁿ ndàhú-yu núú-gã sá ná dáñá-gã tnàndéé cue ñáyiu cùhú-áⁿ cuèdicó luha yuhu dõó-gã cuèndá ndúha-yu. Te nchaa ñáyiu cùhú ní tnàndéé yuhu dõó-gã ní ndúha-yu.

7

Cuèndá nchaa sá quidé-xi ngũndecu cuèchi ñáyiu
(Mt. 15:1-20)

¹ Te ñúú Jerusàlén ní quee cue téè dàcuaha ñaha xii ñáyiu nchaa tñúhu ní chídó tñùní ndíú Moisés, te ní quexio-güedé núú ndécú Jèsús, te tnahá cue téè cùu fariséú ní quexio ndihi-güedé. ² Te cue téé-áⁿ ñí xini-güedé sá dàva cue téè xìca cuu ndihi Jèsús ñá túú ndàha-güedé dàtná ndáhá mèe cue téè cùu fariséú-áⁿ òré caxi-güedé. Te xiãⁿ núu cue téè ní quexio-áⁿ ñí càháⁿ cuèhé-güedé cuèndá cue téè xìca cuu ndihi-gá. ³ Te ducaⁿ chi nchaa cue téè cùu fariséú-áⁿ ndihi nchaa ñáyiu isràél nchicúⁿ nihnú-yu quidé-yu dàtná ní xóo cada nchaa cue ñani tnahã-yu ní xĩndecu ndéé sanaha, chi nchaa ñáyiu-áⁿ và caxi-yu te núu và ndáhã-yu dàtná ní xóo ndaha nchaa cue ñani tnahã-yu ní xĩndecu ndéé sanaha-ãⁿ. ⁴ Te ñáyiu-áⁿ ndi tnahá òré cuáháⁿ-yu núú yãhu te nàsáá-yu, te ndáhã-yu nàcuáa sàni iní-yu ndùvétú iní Yã Ndiõxí, te núu và dúcáⁿ cadá-yu te và caxi-yu. Te tnahá náquèté-yu vàsú sá sácũhuⁿ sá xíhí-yu, ndihi lítu, ndihi cóhó càá, ndihi càamá. Te nchaa xéhé náquèté-yu nàcuáa sàni iní-yu ndùvétú iní Yã Ndiõxí. Te ío-gá titní sá ñí xóo cada nchaa ñáyiu ní xĩndecu ndéé sanaha-ãⁿ nchicúⁿ nihnú-yu quidé-yu. ⁵ Te cue téè cùu fariséú-áⁿ, ndihi cue téè dàcuaha ñaha xii ñáyiu nchaa tñúhu ní chídó tñùní ndíú Moisés-áⁿ ní xáhaⁿ-güedé xii Jèsús:

—¿Ná cuendá cue tée xica cuu ndihi-n ñá túú nàquete-güedé ndaha-güedé òré caxi-güedé dátá ní cachí nchaa cue tée ní xíndecu ndéé sanaha-i? —càchí-güedé xáhaⁿ-güedé xii-gá.

⁶ Te Jèsús ní xáhaⁿ-gá xii-güedé:

—Nchòhó cúú-ndó cuè tée ío dándahú mée-xí chi càchí-ndó sá ío quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tnùní ndíi Chàjá tée ní xóo cáháⁿ tnúhu Yá Ndiòxí ndéé sanaha núú tütú-gá núú cáháⁿ-xi nàcuáa ní cáháⁿ-gá cuendá-ndó, te duha ní cachí-gá:

Ñáyi-u-a càchí-yu sá ío càhnu cuu-í, dico dicó-ni yuhu càháⁿ-yu, chi ñá túú ñuhu iní ñáhã-yu xii-í.

⁷ Te àúⁿ nã cuu chiñuhu ñahã-yu xii-í, chi ñá túú vèdana ndèé nándihi-xi,

chi cue ñáyi-u-a dàcuahã-yu cue tnàha ñáyiú-yu nàcuáa cundecú-yu, dico mee-ni tnúhu sá ñi cahu iní cue ñáyi-u ñuyíú-a càháⁿ-yu.

Duha ní chídó tnùní ndíi Chàjá núú tütú Yá Ndiòxí nàcuáa ní cáháⁿ-gá cuendá-ndó. ⁸ Te nchòhó ní dañá-ndó nàcuáa ní cachí Yá Ndiòxí cada-ndo, te nchicúⁿ nihnu-ndo quide-ndo nàcuáa ní cahu iní cue ñáyi-u ñuyíú-a, chi nàquete-ni-ndo lítu, te nàquete-ni-ndo vasú sácũhuⁿ sá xihí-ndó nàtava-ndo nàcuáa ní xóo cada ñáyi-u-áⁿ ní xóo na-queté-yu nchaa xiãⁿ, te nándi-gá nchaa núú sá quidé-ndó —càchí Jèsús xáhaⁿ-gá xii-güedé.

⁹ Te ní xáhaⁿ tùcu-gá xii-güedé:

—Te nchòhó, ñá túú cuiní-ndó cada-ndo nàcuáa cuiní Yá Ndiòxí, chi mee-ni nàcuáa ní cachí cue tée ní xíndecu ndéé sanaha nchicúⁿ nihnu-ndo quide-ndo. ¹⁰ Te ndíi Moisés ní cachí ndíi sá ncháá ñáyi-u canehé-yu sá yíñuhu núú tãtã-yu ndihi núú nãñã-yu. Te nchaa ñáyi-u na càháⁿ úhú cuendá tãtã-yu ãdi cuendá nãñã-yu te cahni ñaha-güedé xii-yu ní cachí

ndíi. ¹¹ Te nchòhó càchí-ndó sá nũu ïⁿ tée na cũñaha-dé xii tãtã-dé ndihi nãñã-dé sá sá ñi sani ini-dé cuãñaha-dé xii-yu cùu-xi Corbán, te ñá túú-gã xini ñuhu-xi sá cuãñaha-dé xii-yu, te tnúhu Còrbán-áⁿ queé-xí: Sá cúú cuendá Yá Ndiòxí. ¹² Te sá dúcáⁿ nã càháⁿ ïⁿ tée-áⁿ te nchòhó chindèe tnúhu-ndo-dé cuendá sá vã chindèe-gã-dé tãtã-dé ndihi nãñã-dé. ¹³ Te ducaⁿ quide-ndo chi ní dáqueé tihú-ndó nàcuáa ní cachí Yá Ndiòxí cada-ndo, te mee-ni nàcuáa ta quide cue tée ñuyíú-a véxi nchicúⁿ nihnu-ndo quide-ndo, te diu-ni ducaⁿ ta sãnu ichi tnaha-ndo véxi, te nándi-gá nchaa sá cáhú iní-ndó quide-ndo —cachí-gá xáhaⁿ-gá xii-güedé.

¹⁴ Te Jèsús ní xáhaⁿ tùcu-gá xii cue ñáyi-u xíndecu-áⁿ:

—Chí táquixi ndehe iha, te cundedóho váha-ndo tnúhu na càháⁿ-i-a te ío váha cuáha-ndo cuendá. ¹⁵ Nchaa sá xéxi-ndó chi ñá túú nã quidé-xí iní-ndó, dico nchaa sá cuéhé sá dúhá sani iní-ndó quide-ndo, nchaa xiãⁿ quidé-xí ndècu cuéchi-ndo. ¹⁶ Te nchaa nchòhó ñáyi-u ndédóho nchaa tnúhu càháⁿ-i-a ío váha chí cuãha cuendá —càchí-gá xáhaⁿ-gá xii-yu.

¹⁷ Te Jèsús ní dándõ-gá nchaa ñáyi-u núú xixúcu-yu-áⁿ te cuándihu-gá xití vehe. Te cue tée xica cuu ndihi-gá ní xicáⁿ tnúhú-güedé núú-gã nũu nása quee-xi cuendú ní cani-gá núú ñáyi-u-áⁿ. ¹⁸ Te ní xáhaⁿ-gá xii-güedé:

—¿Te náa tnàhá nchòhó ñá túú ní təcú tnùní-ndó cuendú ní cani-í núú ñáyi-u-áⁿ? Nchaa sá xéxi-yu cuánguee xití-yu ñá túú quide-xi iní-yu nàcuáa ngúndecu cuéchi-yu. ¹⁹ Chi ñá díú iní-yu cuánguee-xi chi cuánguee ndáá-xi xití-yu, te nàyáha ñaha-xi xii-yu —càchí-gá xáhaⁿ-gá xii-güedé.

Te sá dúcáⁿ ñi cáháⁿ-gá te ní dátũu-gá sá cúú càxi-o nchaa núú

sá cúú càxi-o. ²⁰ Te ní xáhaⁿ tùcu-gá xii-güedé:

—Nchaa sá cuèhé sá dúhá quide ñáyiú xiáⁿ cáciu ñihnu-xi iní-yu, te nchaa xiáⁿ quidé-xi ndècu cuéchi-yu. ²¹ Te iní-yu-áⁿ cáciu ñihnu nchaa sá cuèhé sá dúhá, chi sàni cuehé sání dùha iní-yu. Te cue téé càháⁿ ndihí-güedé ñadihí te ñá díú ñadihí-güedé cúú-yu, te diu-ni ducaⁿ quide cue ñáyiú dihí càháⁿ ndihí-yu téé te ñá díú yíi-yu cùu-güedé. Te sàhni-yu cue tnàha ñáyiú-yu, te mee-ni lchi díú ìni cúdí ñi-yu cundecú-yu. ²² Te dùhu ndachiuⁿ tnahá-yu, te xihó-yu cundecu ndihí-yu sá ndécú ndihí tnaha ñáyiú-yu, te ío quide úhú iní-yu sá cúú-xi tnàha ñáyiú-yu, te ío dándahú tnáhá-yu, te mee-ni nchàa sá cuèhé sá dúhá cùdí ñi-yu quidé-yu, te ío cuédú ñi-yu, te ío yiti yùhú-yu, te ío quide cahnú-yu mée-yu, te quidé-yu nándi-gá sá ñà túú tàú-yu cadá-yu. ²³ Te nchaa sá cuèhé sá dúhá-áⁿ cáciu ñihnu-xi iní-yu, te nchaa xiáⁿ quidé-xi ndècu cuéchi-yu, te ñá túú cùu-xi sá vaha sá cúú-xi iní-yu.

Èⁿ ñadihí véxi ñuú xicá ñi sándáá iní-aⁿ Jèsús

(Mt. 15:21-28)

²⁴ Te ní xica Jèsús cuáháⁿ-gá ndéé yucu cue téé ñuú Tìrú, ndihí yucu cue téé ñuú Sidón. Te òré ní quexìo-gá xiáⁿ te cuánguihu-gá èⁿ vehe te xiáⁿ cundecu-gá, te cuìní-gá sá vā quìní ñáyiú sá xiáⁿ ndécú-gá ní cùu, dico dai ní ñihí-yu tnúhu. ²⁵ Te èⁿ ñadihí ndécú èⁿ déhe yoco-aⁿ, te yíhi ñaha espíritú cùndihí yucu ñávaha xii-xi, te ñaha-áⁿ ìo ndihí ní ñihí-aⁿ tnúhu sá ní quexìo Jèsús xiáⁿ nùu ní sáháⁿ-aⁿ núú ndécú-gá, te ní ngúíñi xítí-áⁿ nùú-gá. ²⁶ Te ní ngúíta-aⁿ càháⁿ ndàhú-aⁿ núú-gá, te xàhaⁿ-aⁿ sá nùu vá cùndèe iní-gá queñuhu-gá espíritú cùndihí yucu

ñávaha yíhi ñaha xii déhe-aⁿ. Dico ñá díú ñaha israél cúú-áⁿ chi ñaha ñuú Sirofeniciá cúú-áⁿ te tnúhu griégú cúú tnúhu-aⁿ. ²⁷ Te xiáⁿ nùu ní xáhaⁿ Jèsús xii-aⁿ:

—Daña na càxi tnaa nchaa landú chítú xiti-güexi, te dàtnùnì caxi cue iná, chi ñá túú ndùu váha-xi queheⁿ-o sá xéxi lándú te cuáha-o ìná —càchí-gá xàhaⁿ-gá xii-aⁿ.

²⁸ Te ní xáhaⁿ-aⁿ xii-gá:

—Mèstrú, ndáá-ni càháⁿ-n, dico iná chi nàdatacá-güedi sá ngóyó yùhu cóhó lándú —càchí-aⁿ xàhaⁿ-aⁿ xii-gá.

²⁹ Te Jèsús ní xáhaⁿ-gá xii-aⁿ:

—Ío váha ní càháⁿ-n, te cuanùhú te ñá túú-gá ná canì iní-n, chi sa ní quee espíritú cùndihí yucu ñávaha yíhi ñaha xii déhe-n —càchí-gá xàhaⁿ-gá xii-aⁿ.

³⁰ Te ñaha-áⁿ ñi nasáá-aⁿ vehe-aⁿ te cāa déhe-aⁿ núú cāmá, dico ñá túú-gá espíritú cùndihí yucu ñávaha yíhi ñaha xii-xi chi sa ní quee ñaha-xi.

Jèsús quidé tātna-gá èⁿ téé ñá cúú càháⁿ váha te doho-dé

³¹ Te Jèsús ní ndee-gá yucu cue téé ñuú Tìrú te ní yáha-gá yucu cue téé ñuú Sidón, ndihí yucu ndi ùxi ñuú nání Dècápolis, te ní sáá-gá ndéé yuhu làgúná distritú Galileá.

³² Te xiáⁿ ndécú-gá ní quexìo ñáyiú ndéé núú-gá ndécá-yu èⁿ téé ñá cúú càháⁿ váha-dé te doho-dé. Te càháⁿ ndàhú-yu núú-gá sá ná tëndaha ñaha-gá xii-dé cuéndá ndúha-dé.

³³ Te Jèsús ní queñuhu ñaha-gá xii-dé tnuú-yu, te ndèca ñaha-gá cuáháⁿ èⁿ xio, te ní dáquihu-gá díquí ndáhá-gá yaú lóho-dé, te ní dácànùu-gá díí-gá díquí ndáhá-gá, te ní tendaha-gá yàa-dé. ³⁴ Te ní ndacoto-gá andiu te ní sánuu iní-gá, te ní càháⁿ-gá tnúhu mee-gá, te xàhaⁿ-gá:

—jÉfatá! —càchí-gá xàhaⁿ-gá xii-dé.

Te tnúhu-án quée-xí: Nacaán yòhó lóho. ³⁵ Te òré-ni-án nĩ nacaán lóho-dé, te ní nduu váha yaa-dé, te ní cuu cáháⁿ váha-dé. ³⁶ Te Jèsús ní cáháⁿ víhi-gă dóho ñáyi ndihĩ ñaha xii téé ní quide tátna-gă-án sã vã yòo ìⁿ cùñahá-yu sá nĩ quide tátna ñaha-gă xii-dé, dico uuⁿ-gă ní quidé-yu ní cáháⁿ-yu núú ñáyi sá nĩ quide tátna-gă téé-án. ³⁷ Te nchaá-yu ío ní cuñúhu-yu, te ní xitnàhá-yu:

—Váha víhi quide-dé, chi nchaá-ni ndàcu-dé quidé-dé, chi quide tátna-ni-dé ñáyi doho, te quide tátna-ni-dé ñáyi ñihĩ — cächí-yu xitnàhá-yu.

8

Jèsús dácàxi-gă cùmí mĩ ñáyi
(Mt. 15:32-39)

¹ Te ìⁿ nduu tucu ío cuéhé ñáyi ní tacá núú ndécú Jèsús, te ñã túú tnàhí sá cáxi-yu. Te ní cana-gă cue téé xica cuu ndihí-gă, te ní xáhaⁿ-gă xii-güedé:

² —Yúhú, cùndahú iní-í nchaá ñáyi-a chi sa ní cuu úní nduu ndècu ndihí ñahá-yu xii-o ìha, te ñã túú tnàhí ná sá cáxi-yu. ³ Te núú na nàtendaha-í-yu núú tnámă-yu vehé-yu, te cuneé-yu docó ichi, chi davá-yu ío xica ndécú-yu — cächí-gă xáhaⁿ-gă xii-güedé.

⁴ Te ní xáhaⁿ-güedé xii-gă:

—¿Te ndèé níhí-ó sã cuañaha-o càxi nchaá ñáyi-a, te iha ñã túú nã ío chi cùu-xi xití yucu-i? — cächí-güedé xáhaⁿ-güedé xii-gă.

⁵ Te Jèsús ní xícáⁿ tnúhú-gă núú-güedé, te xáhaⁿ-gă:

—¿Ná daha-gă pàá ndécú ndihí-ndo-i? —cachí-gă xáhaⁿ-gă xii-güedé.

Te ní xáhaⁿ-güedé xii-gă:

—Ndècu ndihí-ndí úsá-gă tnàhá —cächí-güedé xáhaⁿ-güedé xii-gă.

⁶ Te Jèsús ní xáhaⁿ-gă xii nchaá ñáyi sá ngòo-yu nchaá-yu, te ní ngóo-yu, te ní queheⁿ-gă ndi úsá

pàá-án, te ní ndacáⁿ táhú-gă núú Yã Ndiòxí. Te dătnùní ní táhú cuèchi-gă te ní sãñaha-gă xii cue téé xica cuu ndihí-gă ní dácãhñu-güedé nchaá ñáyi-án. ⁷ Te ndècu ndihí-güedé ìⁿ úú chácá ìhli, te ðiu-ni ducaⁿ nĩ quide-gă ní ndacáⁿ táhú-gă núú Yã Ndiòxí. Te dătnùní ní táúchíúⁿ-gă ní dácãhñu ñaha-güedé xii-yu. ⁸ Te nchaá-yu ní xexí-yu ní ndahá xití-yu. Te sátá nĩ túhú còhò-yu te ní nadatàcá-güedé nchaá sá nĩ quendóo, te ní chítú úsá tnàhá tídihi mee-ni sã nĩ quendóo-án. ⁹ Te núú ncháá ñáyi ní xexi-án xĩnu dătná cùmí mĩ-yu. Te sátá nĩ yáha ní dácáxí ñaha Jèsús xii-yu te ní dándácá ñaha-gă. ¹⁰ Te dătnùní cuánguee-gă bàrcú ndihí cue téé xica cuu ndihí-gă cuáháⁿ-gă ndihí-güedé yucu cue téé ñuú Dalmànutá.

Cue téé cùu fariséú xáhaⁿ-güedé xii Jèsús cada-gă ìⁿ sã vã yòo tnàhí ndàcu cada

(Mt. 16:1-4; Lc. 12:54-56)

¹¹ Te núú nĩ quexìo Jèsús xíaⁿ nĩ sáá cue téé cùu fariséú, te ní ngüíta-güedé nándi tnúhu xáhaⁿ-güedé xii-gă xitó ndéé ñahá-güedé. Te xáhaⁿ-güedé sá ná cádá-gă ìⁿ sã vã yòo tnàhí ndàcu cada cundehe-güedé nàcuáa cutnùní iní-güedé nũ ndáá sá Yã Ndiòxí ní tendaha ñaha-gă xii-gă véxi-gă ñuyíú-a. ¹² Te ní sánuu iní-gă te ní xáhaⁿ-gă xii-güedé:

—Nchaá nchòhó ñáyi ndècu ñuyíú-a cuní-ndó cada-í ìⁿ sã vã yòo tnàhí ndàcu cada nacúáa cutnùní iní-ndó nũ ndáá sá Yã Ndiòxí chindéé ñaha-gă xii-í. Dico na cächí tnúhu ndáá-í xii-ndo sã vã cádá-í sá cuní-ndó —cächí-gă xáhaⁿ-gă xii-güedé.

¹³ Te ní dándòo-gă ñáyi xĩndecu-án, te cuánde-gă bàrcú ndihí cue téé xica cuu ndihí-gă te cuáháⁿ-gă ndihí-güedé ndáa ingá xio yuhu làgúná.

Nàcuáa quide cue tée cùu fariséu
(Mt. 16:5-12)

14 Te ní cunaa-güedé canehe-güedé sá cáxi-güedé quihí, te ìndi-ni paá ndécú xití bàrcú-án nì naníhí-güedé.

15 Te Jèsús ní cáháⁿ-gá dóho-güedé, te xáhaⁿ-gá xii-güedé:

—Na càchí tnúhu-í xii-ndo sã ìo quihí iní-ndó cùndecu-ndo te vá cáda cuendá tnáhi-ndo lèvadurá cue tée cùu fariséu, ndihí levadurá cue tée cùndihí té Hèrodés —càchí-gá xáhaⁿ-gá xii-güedé.

16 Te ní ngúíta-güedé xitnàha-güedé:

—Cuendá sã ñà túú ní cãnehe-o paá quixi núu xíáⁿ duha càháⁿ-gá —càchí-güedé xitnàha-güedé.

17 Te Jèsús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gá xii-güedé:

—¿Ná cuendá da sã ñà túú ní cãnehe-ndo paá quixi càháⁿ-ndó? Te ñà díú cuendá paá-án ní cáháⁿ-í, te dícó-ni sã mée-ndó ñà túú quide cuendá váha-ndo nàcuáa ndùu tnúhu càháⁿ-í, te ni ñã tècú tnùní-ndó chi ío ñi díquí-ndó. 18 Te cuèi ndèhe-ndo dico ñã túú cùtnuní iní-ndó nã cúú nchàa sã quidè-í, te cuèi ndèdóho-ndo nchàa tnúhu càháⁿ-í dico ñã cùtnuní iní-ndó nãsa ndùu-xi, te ni ñã ndécú iní-ndó nchàa sã tá quide-í véxi. 19 Te chí dándacu iní cùtnáhá ní táhú cuèchi-í úhú-ni paá te ní xexi úhúⁿ míl mee-ni cuè tée chi diu-ni cue tée-án ñi quíundehu. Te chí càchí tnúhu ná daha tídihi ní chítú mee-ni sã ní quendóo òré ní nadatácá-ndó —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Úxúú tnàhá tídihi ní chítú mee-ni sã ñi quendóo —càchí-güedé xáhaⁿ-güedé xii-gá.

Te xáhaⁿ tùcu-gá:

20 —Te cùtnáhá ní táhú cuèchi tucu-í úsá tnàhá paá ní xexi cúmí míl ñáyiú, te chí càchí tnúhu ná daha tucu tídihi ní chítú mee-ni sã ní quendóo —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Úsá tnàhá tídihi ní chítú mee-ni sã ñi quendóo —càchí-güedé xáhaⁿ-güedé xii-gá.

21 Te Jèsús ní xáhaⁿ tùcu-gá xii-güedé:

—Vitna, ¿te sa ní tecú tnùní-ndó tnúhu ní cáháⁿ-í ãñ ñãhá? —càchí-gá xáhaⁿ-gá xii-güedé.

Jèsús quidé tátna-gá ñi tée cuáá ñuú Bètsaidá

22 Te Jèsús ní sáa-gá ndihí cue tée xica cuu ndihí-gá ñuú Bètsaidá. Te ñuú-án ndécú-gá ní quexio ñáyiú núú-gá tánèhé-yu ñi tée cuáá, te càháⁿ ndàhú-yu núú-gá ñuú vá cùndèe iní-gá tendaha ñaha-gá xii-dé cuendá ndúha núú-dé. 23 Te Jèsús ní tni-gá ndaha tée cuáá-án, te ní queñuhu ñaha-gá tnuú-yu, te ndèca ñaha-gá cuáhán ñi xio yuhu ñuú. Te yacáⁿ ní dácànùu-gá díi-gá núú-dé te ní tendaha ñaha-gá xii-dé, te dàtnùní ní xicáⁿ tnúhú-gá núú-dé, te xáhaⁿ-gá:

—¿Cùtnuní núú-n-ãñ? —càchí-gá xáhaⁿ-gá xii-dé.

24 Te tée cuáá-án ñi ndonehe núú-dé, te xáhaⁿ-dè xii-gá:

—Cùtnuní núú-í ndèhé-í nchaa cue tée-ãñ, dico dà ndáa yutnu cùí ndáa-güedé te xica-güedé —càchí-dé xáhaⁿ-dè xii-gá.

25 Te Jèsús ní tendaha tùcu-gá núú-dé te ní cuu ní ndacoto váha-gá-dé, te òré-án ñi ndúha núú-dé. Te nchaandi túhú sã ndèhé-dé ní cutnùní váha núú-dé nándi cùu nchaa xíáⁿ. 26 Te ní xáhaⁿ Jèsús xii-dé:

—Vitna te núhú-n, dico ndáa ichi vehe-n ñuhú-n te ñã díú dà xití ñuú quihíⁿ-n, te vá yõ ñi cùñaha-n sã yúhú ní quide tátna-í núú-n ñi ndúha —càchí-gá xáhaⁿ-gá xii-dé.

Té Pèlú xáhaⁿ-dè xii Jèsús sã díú-gá cúú-gá Cristú

(Mt. 16:13-20; Lc. 9:18-21)

27 Te Jèsús ní xica-gá cuáhán-gá ndihí cue tée xica cuu ndihí-gá nchaa ñuú líhli càa ñuú Cèsareá Filipú, te òré ñuhú-gá ndihí-güedé

ichi te ní xícáⁿ tnúhú-gă núú-güedě, te xăhaⁿ-gă xii-güedě:

—Chí cächí tnúhu nása cãháⁿ ñáyiu cuëndá-í. ¿Yoo cùu-í cächí-yu-va? —cächí-gă xăhaⁿ-gă xii-güedě.

²⁸ Te ní xăhaⁿ-güedě xii-gă:

—Davá-yu cächí-yu sá cùú-n ndii Juáá tée ní xóo dacuandute ñaha xii ñáyiu, te davá-yu cächí-yu sá cùú-n té Èliás, te dava tucú-yu cächí-yu sá cùú-n ìⁿ tée ní xóo cáháⁿ tnúhu Yá Ndióxi ndéé sanaha, duha cächí-yu —cächí-güedě xăhaⁿ-güedě xii-gă.

²⁹ Te ní xícáⁿ tnúhú tucu-gă núú-güedě, te xăhaⁿ-gă xii-güedě:

—Te nchòhó, ¿yoo sàni iní-ndó cùu-í-í? —cächí-gă xăhaⁿ-gă xii-güedě.

Te té Pelú ní xăhaⁿ-dě xii-gă:

—Yòhó cùú-n Cristú Yáá ní ten-daha Yá Ndióxi véxi ñuyíú-a —cächí-dé xăhaⁿ-dě xii-gă.

³⁰ Te Jèsús ní cáháⁿ-gă dóho-güedě, te xăhaⁿ-gă:

—Vá yóo ìⁿ cúñaha-ndo yòo cuu-í —cächí-gă xăhaⁿ-gă xii-güedě.

Jèsús cãháⁿ-gă sá cáhni ñaha-güedě xii-gă

(Mt. 16:21-28; Lc. 9:22-27)

³¹ Te Jèsús ní ngúita-gă xitnũhu-gă cue tée xica cuu ndihi-gă năcuáa yáha-gă, te xăhaⁿ-gă xii-güedě:

—Yúhú Tée cùu ñani tnáhá-ndó nchàa-ndo chi ío ndoho-í, chi daquèe tihú ñáhá nchàa cue tée cùu sacuéhé nũ ñáyiu isráel, ndihi cue dútú cúnũu, ndihi cue tée dàcuaha ñaha xii ñáyiu nchaa tnúhu ní chídó tnùní ní chídó tnùní ndii Moisés, nchaa cue tée-áⁿ dàquee tihú ñáhá-güedě xii-í. Te sáá nduu te cahni ñaha-güedě xii-í, dico nduu úní sá cùu-í te ndoto-í —cächí-gă xăhaⁿ-gă xii-güedě.

³² Te ducaⁿ ñí cáháⁿ Jèsús núú cuè tée xica cuu ndihi-gă năcuáa tecú tnùní váha-güedě tnúhu cãháⁿ-gă. Te té Pelú ní cana ñaha-dě xii-gă ìⁿ xio, te ní ngúita-dé ténàá ñáhá-dě

xii-gă ní cùu. ³³ Dico Jèsús ndihi-ni ní nchócuĩhmu-gă ní ndàcoto-gă núú nchàa-güedě chi ndàa sátá-gă xindecu-güedě, te ní ngúita-gă ténàá-gă té Pelú, te xăhaⁿ-gă xii-dé:

—¿Xocuiñi yòhó núu-í-a, chi dàtná cãháⁿ yucu ñávaha cãháⁿ-n! Chi ñá túú sàni iní-ò dàtná sání iní Yá Ndióxi, chi ìⁿ-ni sàni iní-ò ndihi dava-gă cue ñáyiu ndecu ñuyíú-a —cächí-gă xăhaⁿ-gă xii-dé.

³⁴ Te Jèsús ní cana-gă nchaa cue tée xica cuu ndihi-gă, ndihi nchaa ñáyiu xindecu-áⁿ, te ní xăhaⁿ-gă:

—Nchaa ñáyiu cuini chitnahá ñáhá xii-í, te xini ñuhu-xi vá cádá-gă-yu sá sání iní méè-yu, te ío cada ndee iní-yu cundecu túha-yu ndohó-yu cuëndá-í, te cuèi na ndòhó-yu dàtná ndoho-í. ³⁵ Te nchaa ñáyiu cuini sá ñá túú tnàhí ná yáha cundecu ñuyíú-a cuita nihnú-yu, dico nchaa ñáyiu ñá túú tnàhí yùhú cuèi nándi sá ná yáha-yu cundecú-yu ñuyíú-a sá cuëndá-í, ndihi sá cuëndá tnúhu-í, te ñáyiu-áⁿ naníhí tàhú-yu. ³⁶ Te cuèi nchaandi túhú sá ío ñuyíú-a na nihí ñáyiu cundecu ndihi-yu, dico núu ñuu nchaa xiáⁿ ná cada cuita nihnú-yu te ñá túú vèdana nándihi-xi sá dúcáⁿ ndecu ndihi-yu nchaa xiáⁿ. ³⁷ Te ni ìⁿ sá ío ñuyíú-a vá chindèe-xi ñáyiu cuëndá naníhí tàhú-yu. ³⁸ Te nchaa ñáyiu na cùcahaⁿ núu-xi cáháⁿ váha cuëndá-í, ndihi cuëndá tnúhu-í núú nchàa ñáyiu dàquee tihú ñáhá xii Yá Ndióxi, ñáyiu xindecu ichi cuèhé ichi duha, te tnáhá yúhú Tée cùu ñani tnáhã-yu ncháa-yu cucahaⁿ núu-í núu-yu òré ná quixi tucu-í ndihi cue espíritú xínú cuèchi núú Tàtá-í Dútú Ndióxi. Te mee-gă cada cutnùní iní nchaa ñáyiu sá yùhú ío cãhnu cuu-í.

9

¹ Te na cächí tnúhu ndáá-í xii-ndo sá ío dava nchòhó ñáyiu xindecu iha vitna vá cùu-ni-ndo, chi cundecu-ni-ndo ndèè quini-ndó

sáá nduu ndíhu ndaha ñaha Yá Ndióxi xii ñáyiú, te dává-án quini-ndó sá ndácú-gã quidé-gã nchaandi túhú sá vaha —càchí-gã xáhaⁿ-gã xii cue téé xica cuu ndihi-gã ndihi cue ñáyiú-án.

Jèsús ní nadama dóó-gã ndihi núú-gã

(Mt. 17:1-13; Lc. 9:28-36)

² Te núú ñnú nduu sá dúcáⁿ ní cáháⁿ Jèsús te ní xica-gã cuásaá-gã ñⁿ yucu dúcúⁿ, te ndèca-gã té Pèlú, ndihi té Jàcobó, ndihi té Juáá cuásaá, te úní tñahí-ni cue téé-án ndécá-gã cuásaá. Te yucu-án ndécú-gã ní nadama núú-gã, ³ te ní nadama dóó-gã. Te dóó-gã-án sùúni ní nduu cuixíⁿ quiyí te tásaⁿ, te ní ñⁿ ñáyiú ñuyíú-a ñá túú ndácú-yu naqueté-yu ñⁿ dóó nduu cuixíⁿ dàtná ní nduu dóó-gã. ⁴ Te ní xini-güedé té Moisés ndihi té Èliás nútñi-güedé ndihi-gã ndátnúhu ndihi ñaha-güedé xii-gã. ⁵ Te té Pèlú ní xáhaⁿ-dè xii Jèsús:

—Mèstrú, jváha ní cuu sá ndécú-ó ìha vitna! Te na dàcaa-ndí úní tñahá vehe tnuvixíⁿ, te ñⁿ cuu cuèndá-n te ñⁿ cuu cuèndá té Moisés te ñⁿ cuu cuèndá té Èliás —càchí-dé xáhaⁿ-dè xii-gã.

⁶ Te ducaⁿ ní cáháⁿ-dé chí ío ní yùhú-güedé, te cuèndá-ni ní cuu yáchí-dé ní cáháⁿ-dé, te ní mèe-dé ñá túú ní cùtnuní iní-dé nása ndùu tñúhu ní cáháⁿ-dé. ⁷ Te òré-án ní quexìo ñⁿ vícò núú ndécú-güedé ndihi Jèsús ní dádáhu ñaha-xi xii-güedé ndihi-gã, te xití vícò-án ní cáháⁿ Yá Ndióxi ní tecú dóho-güedé, te xáhaⁿ-gã xii-güedé:

—Tée-a cùu-dé Déhe-í téé ío cùu iní-í, te cundedóho-ndo nchàa tñúhu càháⁿ-dé —càchí-gã xáhaⁿ-gã xii-güedé.

⁸ Te òré ní quide cuèndá-güedé, te ñá túú-gã ní xini-güedé cue téé úú-án chí mee-ná Jèsús ndécú.

⁹ Te òré cuánuu ndihi ñaha-gã xii-güedé yucu-án, te ní cáháⁿ-gã dóho-güedé, te xáhaⁿ-gã:

—Vá yõ ñⁿ cúñaha-ndo nchàa sá ní xini-ndó núú ní sáá-ó-á, te cuu cáháⁿ-ndó dico ndéé ná yáha ndoto yúhú Tée cùu ñaní tñahá-ndó nchàa-ndo sá cùú-í —càchí-gã xáhaⁿ-gã xii-güedé.

¹⁰ Núú xiáⁿ cue téé-án ní xúhuⁿ nahi-ni iní-güedé nchaa sá ní xini-güedé núú ní sáháⁿ-güedé ndihi Jèsús te ñá túú tñahí ní cáháⁿ-güedé, dico ní ndúcú tñúhu núú tñahá-güedé ná cuèndá ducaⁿ ní cáháⁿ-gã sá ndèé ná yáha ndoto-gã sá cùú-gã te dàtnuní cáháⁿ-güedé nàcuáa nduu nchaa sá ní xini-güedé. ¹¹ Te ní xicáⁿ tñúhú-güedé núú Jèsús, te xáhaⁿ-güedé xii-gã:

—¿Cuèni-ndí cachí tñúhu-n ná cuèndá càchí cue téé dàcuaha ñaha xii ñáyiú nchaa tñúhu ní chidó tñuní ndí Moisés sá ñhna-gã té Èliás ndixi-dé te dàtnuní quixi Yáa tendaha Yá Ndióxi quixi ñuyíú-a? —càchí-güedé xáhaⁿ-güedé xii-gã.

¹² Te Jèsús ní xáhaⁿ-gã:

—Ndáá sá códó núu ñⁿ téé quixi-dé te cada-dé dàtná ní quide té Èliás, te téé-án cada ndáá-dé nchaa nàcuáa cùu. Dico núú tütú Yá Ndióxi cáháⁿ-xi cuèndá yúhú Tée cùu ñaní tñahá-ndó nchàa-ndo sá ío ndoho-í, te daquée tihú ñahá ñáyiú xii-í. ¹³ Te na càchí tñúhu-í xii-ndo vitna sá sá ní quixi ñⁿ téé ní quide dàtná ní xóo cada té Èliás, te cue ñáyiú ñá túú ní cànehé-yu sá yíñúhu núú-dé, te ní quide ñahá-yu xii-dé nchaa nàcuáa ní quixi iní mèé-yu. Te núú tütú Yá Ndióxi sa ndèé tñuní nchaa nàcuáa yáha-dé, te nchaa xiáⁿ sa ní quide ñaha ñáyiú xii-dé —càchí-gã xáhaⁿ-gã xii-güedé.

Jèsús quidé tātna-gã ñⁿ téé cuechi yíhi ñaha espíritu cundíhi yucu ñávaha
(Mt. 17:14-21; Lc. 9:37-43)

¹⁴ Te Jèsús ní ndexìo-gã ndihi cue téé úní-án núú xíndecu ñava-gã cue téé xica cuu ndihi-gã, te vai vihi ñáyiú ndècu núú ndécú-güedé-án, te

tnúhá cue tée dàcuaha ñaha xii-yu nchaa tnúhu ní chídó tnùní ndíi Moisés xĩndecu, te cue té-áⁿ nãndi tnúhu xãhaⁿ-güedé xii cue té-áⁿ xica cuu ndihí Jesús. ¹⁵ Te òré ní xiní-yu ní ndexio-gá, te nchaá-yu ío ní cuñúhu-yu, te xinú-yu ní sáháⁿ ní cáháⁿ ndihí ñáhá-yu xii-gá. ¹⁶ Te ní xicáⁿ tnúhú-gã núú cuè té-áⁿ xica cuu ndihí-gã nõu ná tnúhu ndãtnúhu-güedé ndihí cue té-áⁿ. ¹⁷ Te ñⁿ ñáyiu xĩndecu xiáⁿ ñi xãháⁿ-yu xii-gá:

—Mèstrú, ndèca-í déhe-í véxi nãnducu ñaha-í xii-n, chi yihí ñaha espíritú cündihí yucu ñávãha xii-dé, te diu xiáⁿ ní quide ní cuu ñihí-dé. ¹⁸ Te ío ndòho-dé chi súuní ndèni ní cuu ngótnii ñaha-xi xii-dé, te òré ducaⁿ quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú nõu-dé, te ndàda ruúⁿ ñáhá-xí xii-dé. Te sa ní xãháⁿ-í xii cue té-áⁿ xica cuu ndihí-n sã queñúhu-güedé espíritú cündihí yucu ñávãha yihí ñaha xii-dé dico ñá túú ní ndacu-güedé queñúhu-güedé-xi —cächí ñáyiu-áⁿ xãháⁿ-yu xii-gá.

¹⁹ Te Jèsús ní xãháⁿ-gã:

—¡Nchaa nchòhó ñáyiu ndècu ñuyú-a ío sãá iní-ndó, chi ñá túú cuiní-ndó quĩndáá iní-ndó Yã Ndiõxí, te ní cuu vai nduu quide ndee iní-í nchaa sã quidè-ndó! ¿Te ná ndéé ama vá dúcáⁿ-gã cada-ndo-i? Te chí cándèca té-áⁿ cùhú-áⁿ táquixi iha —cächí-gã xãháⁿ-gã xii-yu.

²⁰ Te ñáyiu ndihí ñaha xii té-áⁿ yihí ñaha espíritú cündihí yucu ñávãha-áⁿ ndécá ñáhá-yu xii-dé cuháⁿ ndéé núú Jèsús, te òré ní xiní ñáhá espíritú cündihí yucu ñávãha-áⁿ xii-gã, te ní ngüita-ni-xi sãhni yihí ñáhá tùcu-xi xii-dé, te ní dãnduá ñáhá-xí xii-dé, te ní ngüita-dé xíchí ñùhu-dé, te quène tíñú yuhu-dé. ²¹ Te Jèsús ní xicáⁿ

tnúhú-gã núú tãtã-dé, te xãháⁿ-gã xii-dé:

—¿Ná ndéé ama ní ngüita-xi duha ndòho déhe-n? —cächí-gã xãháⁿ-gã xii-dé.

Te té-áⁿ ñi xãháⁿ-dè xii-gã:

—Ndéé cùtnáhá cúú lihli-dé ní ngüita espíritú cündihí yucu ñávãha duha quide ñaha-xi xii-dé. ²² Te ní cùtĩtní xito dãngaunihnu ñaha-xi xii-dé núú ñùhú, te ní cutĩtní tucu xito dãngaunihnu ñaha-xi xii-dé ndute cuiní-xi cahni ñaha-xi xii-dé. Te ndèca-í-dé véxi núú-n te núu ndacu-n càda tãtna-n-dé, te cundàhú iní ñáhá-n xii-ndí chĩndee ñaha-n —cächí-dé xãháⁿ-dè xii-gã.

²³ Te Jèsús ní xãháⁿ-gã:

—Te ná cuendá cächí-n nõu ndacu-í cada tãtna-í déhe-n, chi nchaa ñáyiu na quĩndáá iní ñáhá xii-í te nihí-yu sã ná càcãⁿ-yu núu-í —cächí-gã xãháⁿ-gã xii-dé.

²⁴ Te tãtã té-áⁿ cuechi-áⁿ ñihí ní cáháⁿ-dè xãháⁿ-dè xii-gã:

—Sãndáá iní ñáhá-í xii-n, dico chĩndee ñaha xii-í cuendá ná quĩndáá iní ñáhá-gã-í xii-n —cächí-dé xãháⁿ-dè xii-gã.

²⁵ Te Jèsús ndéhé-gã sã ïo vai ñáyiu ta tàcá núú ndécú-gã-áⁿ. Te ní tenáá-gã espíritú cündihí yucu ñávãha-áⁿ, te xãháⁿ-gã xii-xi:

—Yòhó espíritú cündihí yucu ñávãha, ní quide ñihí-n ñi quide doho-n té-áⁿ, dico vitna yúhú cächí-í sã quèe-n yiqui cuñú-dé te vá ndihu-gã-n —cächí-gã xãháⁿ-gã xii espíritú cündihí yucu ñávãha-áⁿ.

²⁶ Te espíritú cündihí yucu ñávãha-áⁿ ñi dácáná sã ñaha-xi xii té-áⁿ, te ní sãhni yihí ñáhá tùcu-xi xii-dé, te dãtnùní ní quee ñaha-xi xii-dé cuháⁿ-xi, dico té-áⁿ chí dacãa-ni ndíyí càa-dé cãtùu-dé. Te nchaa ñáyiu xĩndecu xiáⁿ cächí-yu sã ñi xihí-dé ní cùu. ²⁷ Te Jèsús ní tñi-gã ndaha-dé ní ndocani ñaha-gã xii-dé, te ní ndacóo-dé ní nucúnutñi-dé.

28 Te Jèsús cuándihu-gá xití vehe ndihi cue téé xica cuu ndihi-gá, te òré ndéhé-güedé ñá túú-gá ñáyiú, te ní xicáⁿ tnúhú-güedé núú-gá, te xáhaⁿ-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cündihí yucu ñávãha yìhi ñaha xii téé-ãⁿ —cächí-güedé xáhaⁿ-güedé xii-gá.

29 Te Jèsús ní xáhaⁿ-gã xii-güedé:

—Na cächí tnúhu-í xii-ndo sã núú òré cuíní-ndó queñuhu-ndo espíritú cündihí yucu ñávãha yìhi ñaha xii ñáyiú dàtná cúú espíritú cündihí-xi yìhi ñaha xii téé-ãⁿ ní cùu ña, te xìni ñuhu-xi sá ìo cãháⁿ ndihi-ndo Yã Ndiòxi te ñá túú tnàhí ná caxi-ndo cãháⁿ ndihi-ndo-gã, te ducaⁿ te ndacu-ndo queñuhu-ndo espíritú cündihí yucu ñávãha yìhi ñaha xii ñáyiú —cächí-gã xáhaⁿ-gã xii-güedé.

Jèsús cãháⁿ tucu-gá sá cãhni ñãha-güedé xii-gá

(Mt. 17:22-23; Lc. 9:43-45)

30 Te Jèsús ní quee-gá núú ndécú-gã-ãⁿ ndihi cue téé xica cuu ndihi-gã cuáhãⁿ-gã ndihi-güedé distritú Galileá, te cuíní-gã sá vã quini ñáyiú ndéé ichi cuáhãⁿ-gã. 31 Te ducaⁿ ñí sani iní-gã, chi mee-gã sa nãha-gã sá ndãá cada-xi nãcuáa xáhaⁿ-gã xii cue téé xica cuu ndihi-gã, te duha xáhaⁿ-gã xii-güedé:

—Yúhú Téé cùu ñani tnáhã-ndó nchãa-ndo sáá ìⁿ nduy te cuáha cuendá ñáhã-güedé xii-í núú cue téé cùu úhú iní ñáhã, te cahni ñaha-güedé xii-í, dico nduu úní sá cùú-í te ndoto-í —cächí-gã xáhaⁿ-gã xii-güedé.

32 Dico ñá túú tnàhí ñi tècú tnùní-güedé nása ndùu tnúhu ní cãháⁿ-gã, te ñi ñá túú ní cùyi-güedé cãcãⁿ tnúhú-güedé núú-gã.

Cue téé ndùcu tnúhu núú tnáhã núú ndédacãa-güedé io-gã cùnùu
(Mt. 18:1-5; Lc. 9:46-48)

33 Te Jèsús ní quexìo-gã ndihí cue téé xica cuu ndihi-gã ñuú Capernaúm, te òré sa ndècu-gã ìⁿ vehe te ní xicáⁿ tnúhú-gã núú-güedé, te xáhaⁿ-gã xii-güedé:

—¿Nándi cùu tnúhu ta xitnãha-ndo véxi? —cächí-gã xáhaⁿ-gã xii-güedé.

34 Dico ñá túú tnàhí ñi cãháⁿ-güedé cùnãha-güedé xii-gã núú ná tnúhu xitnãha-güedé òré ñúhú-güedé ichi. Te ducaⁿ ñí guide-güedé chi cuendá tá ndãtnúhu-güedé núú ndédacãa-güedé io-gã cùnùu. 35 Te Jèsús ní ngóo-gã, te ní xáhaⁿ-gã xii ndi ùxúú cue téé xica cuu ndihi-gã:

—Chí táquixi iha te cund-edóho-ndo tnúhu na cãháⁿ-i-a. Te núú ió dava-ndo cuíní-ndó cùnùu-ndo, te cada-ndo sã cùú-ndó ñáyiú nchicúⁿ cuí-ñã, te cunu cuechi-ndo núú tnãha ñáyiú-ndo —cächí-gã xáhaⁿ-gã xii-güedé.

36 Te Jèsús ní sanutñi-gã ìⁿ té lihli cuádava tnuú-güedé, te dàtnùní ní nguídèhé ñáhã-gã xii-dé, te xáhaⁿ-gã xii-güedé:

37 —Nchaa ñáyiú na quèheⁿ cuendá ìⁿ té lihli dàtnã té lihli-a cuendá sã ñúhú ñi ñáhã-yu xii-í ñã, te cada iní-yu sã yúhú ní quèheⁿ cuendá-yu. Te nchaa ñáyiú na quèheⁿ cuendá ñáhã xii-í te ñá díú-ní mèe-í ní quèheⁿ cuendá-yu, chi tnáhã Tãtã-í Dútú Ndiòxi Yáá ní tendaha ñaha xii-í véxi-í ñuyiú-a ní quèheⁿ cuendá-yu —cächí-gã xáhaⁿ-gã xii-güedé.

Nchaa ñáyiú ñá túú cùu úhú iní ñáhã xii-o te cündihí ñáhã-yu

(Mt. 10:42; Lc. 9:49-50)

38 Te té Juáa ñiú-ñi ìⁿ téé xica cuu ndihi-gã ní xáhaⁿ-dè xii-gã:

—Mèstrú, ní xiní-ndí ìⁿ téé càcunehe ñaha-dé xii-n, te queñuhu-dé espíritú cündihí yucu ñávãha yìhi ñaha xii ñáyiú, te nchúhú ñá túú ní dàña-gã-ndí ducaⁿ càda-dé, chi ñá túú xica

cuu ndihi ñaha-dé xii-o —càchí-dé xáhaⁿ-dé xii-gá.

³⁹ Te Jèsús ní xáhaⁿ-gá xii-güedé:

—Daña-ndo na cada nahi-dé ní cuu, chi ñá túú ní ñáiyu ndihi ndihi-ni ndacu cáháⁿ cuèhé cuendá-í te núu càcunehe ñahá-yu xii-í, te quidé-yu sá vã yõo tnàhí ndàcu cada. ⁴⁰ Te nchaa ñáiyu ñá túú cuu úhú iní ñáhá xii-o te cündihi ñahá-yu. ⁴¹ Te na càchí tnúhu-í xii-ndo sã cuè ñáiyu na tàxi ñáiyuⁿ ndute coho-ndo cuendá sã cúu-ndó cuè téé xica cuu ndihi-í, te ñáiyu-áⁿ sãá nduu te dacuèí sá nihí-yu sá ndúú tãhú-yu —càchí-gá xáhaⁿ-gá xii-güedé.

Cada cuendá-ó vã cündecu-o ichi cuèhé ichi duha

(Mt. 18:6-9; Lc. 17:1-2)

⁴² Te xáhaⁿ tucu Jesús xii-güedé:

—Te núu ñáiyu sãndáá iní ñáhá xii-í cada-yu nándi sá cuèhé sá dúhá, te váha-gá sá núu na dàcutu ndeé-güedé ñáiyu yóó dúcúⁿ-dè, te dàquée ñaha-güedé xii-dé xití ndute lámár, te ñá díú sã cündecu-dé ducaⁿ cada-dé. ⁴³ Te núu ñáiyu xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèí na cuíta ñáiyu xio ndaha-ndo te ñá díú sã quihíⁿ-ndó nihí ní ndúú-ndó núú ùhú núú ndàhú núú dícó sãá ndáhá itá ñuhú ní caa ní quihíⁿ. ⁴⁴ Chi yacáⁿ cúu-xí núú ñá túú tnàhí ndàhvã ñuhú, te ío ndoho-ndo cündecu-ndo xíáⁿ ní caa ní quihíⁿ. ⁴⁵ Te núu ñáiyu xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèí na cuíta ñáiyu xio sáhá-ndó, te ñá díú sã quihíⁿ-ndó nihí ní ndúú-ndó núú ùhú núú ndàhú núú dícó sãá ndáhá itá ñuhú ní caa ní quihíⁿ. ⁴⁶ Chi yacáⁿ ñá túú tnàhí ndàhvã ñuhú, te ío ndoho-ndo cündecu-ndo xíáⁿ ní caa ní quihíⁿ. ⁴⁷ Te núu ñáiyu xio tinùu-ndo quide-xi quide-ndo

nándi sá cuèhé sá dúhá, te tava-ndo cuíta-xi, chi váha-gá sá cündecu-ndo núú ndécú Yã Ndiõxí táxí tnùní-gá cuèí na cuíta ñáiyu xio tinùu-ndo, te ñá díú sã ndi nduú xio núú-ndó quihíⁿ-ndó núú ùhú núú ndàhú. ⁴⁸ Chi yacáⁿ ñá túú tnàhí ndàhvã ñuhú, te ío ndoho-ndo cündecu-ndo xíáⁿ ní caa ní quihíⁿ.

⁴⁹ Te dàtná quidé-güedé quiti sãhni-güedé chihí-güedé cuñú-dí ñáiyu te dàquée-güedé núú ñuhú, ducaⁿ sãtnahá-xi ndoho cue ñáiyu chi ío ndohó-yu. ⁵⁰ Te ñáiyu chí ío váha nándihí-xi, dico núu na nduu víxiⁿ-xi te ñá túú-gá nándihí-xi te ní ñá túú-gá nása cada-o nduu úhá tucu-xi. Te ío váha cada cuendá-ndó nãcuáa cundecu-ndo cuendá cuu-ndo ñáiyu váha, te ducaⁿ te cuu-ndo dàtná ñáiyu sã ñá túú nduu víxiⁿ, te ío váha cundecu ndihi tnàha-ndo —càchí-gá xáhaⁿ-gá xii-güedé.

10

Jèsús càháⁿ-gá cuendá cue ñáiyu dàña tnaha

(Mt. 19:1-12; Lc. 16:18)

¹ Te Jèsús ní xica-gá cuáháⁿ-gá ní yáha-gá yucu distritú Júdeá ní téhndé-gá ndáa ingá xio yúte Jórdán. Te yacáⁿ ndécú-gá ní tacá tucu cuèhé víhí ñáiyu, te ní ngüita-ni tucu-gá dánèhé ñáhá-gá xii-yu tnúhu-gá chi ducaⁿ tnàhí quide-gá. ² Te ní quèxio ñáiyu úú cue téé cuu fariséú núú ndécú Jèsús xito ndéé ñáhá-güedé xii-gá núu nása cunduu tnúhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tnúhú-ndí núu-n núu cuu dàña ñáiyu téé ñándihí-dé ñáiyu ñáhá —càchí-güedé xáhaⁿ-güedé xii-gá.

³ Te Jèsús ní xáhaⁿ-gá xii-güedé:

—Te nchòhó, ¿nása ní cachí ndí Moisés cada-ndo-í? —càchí-gá xáhaⁿ-gá xii-güedé.

⁴ Te ní xáhaⁿ-güedé xii-gá:

—Ndii Moisés ní cachí ndii sá cúú dàña ìⁿ téé ñadihí-dé dicó-ni sá cadúha-dé ìⁿ tutú cuañaha-dé, te núú tütú-áⁿ codo tnùní sá ní dáñá ñaha-dé, te ducaⁿ te cuu daña-dé ñadihí-dé —càchí-güedé xáhaⁿ-güedé xii-gá.

⁵ Te Jèsús ní xáhaⁿ-gá xii-güedé:

—Te ducaⁿ ní chídó tnùní ndii Moisés cada-ndo cuendá sá ío sáá iní-ndó. ⁶ Dico Yá Ndióxi cútñahá ní cadúha-gá ñuyíú ndihi nchaa sá ío, chi téé ñadihí ní cadúha-gá. ⁷ Te xíáⁿ núu nchaa cue téé na nihí ñadihí-xi, te dñⁿ-ná cada-güedé tátá-güedé ndihi náná-güedé, chi mee-ná ñadihí-güedé cuu cuu ndihi-güedé. ⁸ Te cue ñáyíu úú-áⁿ ñá túú-gá ndí dñⁿ ndí dñⁿ yìqui cuñú cúú-yu, chi cada iní-ndó sá ííⁿ-ná yìqui cuñú cúú-yu. ⁹ Te xíáⁿ núu ñá túú ndùu váha-xi dàña cuè téé ñadihí-güedé, chi mee Yá Ndióxi ní cachí-gá sá cúú úú-yu cundecú-yu ndéé naa ndéé cuú-yu —càchí-gá xáhaⁿ-gá xii-güedé.

¹⁰ Te òré yíhí Jèsús ndihi cue téé xíca cuu ndihi-gá vehe, te ní xícáⁿ tnúhú-güedé núú-gá nása ndùu tnúhu ní cáháⁿ-gá cuendá cue ñáyíu dàña tnaha. ¹¹ Te Jèsús ní xáhaⁿ-gá xii-güedé:

—Te núu ìⁿ téé na dàña-dé ñadihí-dé te naqueheⁿ-dé ingá ñadihí, te ío nèhé quidé-dé, te ìⁿ-ni cuèchi cùu-xi ndihi cuèchi quide téé ndèca ñadihí te càháⁿ ndihi-dé ingá ñadihí. ¹² Te ñíu-ni ducaⁿ sátnahá-xi cùu tucu ñáyíu ñíhí te núu na dàñá-yu yíⁿ-yu te naquehéⁿ-yu ingá téé, chi ìⁿ-ni cuèchi cùu-xi sá quidé-yu ndihi sá quidé cuè ñáyíu ñíhí ndécú yíⁿ-xi, te càháⁿ ndihi-yu ingá téé —càchí-gá xáhaⁿ-gá xii-yu.

Jèsús xícáⁿ táhú-gá núú Yá Ndióxi cuendá landú
(Mt. 19:13-15; Lc. 18:15-17)

¹³ Te ìⁿ úú ñáyíu ndècá-yu landú líhli cuaháⁿ núú Jèsús, chi cuini-yu

sá téndaha ñaha-gá xii-güexi. Te cue téé xíca cuu ndihi-gá ní ngúíta-güedé ténáá ñahá-güedé xii-yu, te xáhaⁿ-güedé sá vá dúcáⁿ cadá-yu. ¹⁴ Te òré ní xini-gá sá dúcáⁿ quide-güedé, te ní cudééⁿ-gá núú-güedé, te xáhaⁿ-gá xii-güedé:

—Chí dáñá ná quixi nahi cue landú líhli-áⁿ núú-í-a te vá càdí-ndó íchi-güexi, chí dàtná cúú váha iní cue landú líhli-áⁿ ducaⁿ cùu váha iní cue ñáyíu yíndaha Yá Ndióxi. ¹⁵ Te na càchí tnúhu ndáá-í xii-ndo sá núu vá quindáá iní ñahá-ndó dàtná quidé cuè landú líhli sàndáá iní ñahá xii-í, te vá ndíhu ndaha ñaha Yá Ndióxi xii-ndo —càchí-gá xáhaⁿ-gá xii-güedé.

¹⁶ Te sáta dúcáⁿ ní xáhaⁿ-gá te ní nguídèhé-gá cue landú-áⁿ te ní tendaha ñaha-gá xii-güexi, te ní xícáⁿ táhú-gá núú Yá Ndióxi cuendá-güexi.

Íⁿ téé cuica càháⁿ ndihi-dé Jèsús
(Mt. 19:16-30; Lc. 18:18-30)

¹⁷ Te òré sa ñúhu ichi Jesús caca-gá quíhíⁿ-gá ingá xichi ni cùu ní quexio cunu ìⁿ téé ní ngúíñí xítí-dé núú-gá, te xáhaⁿ-dè xii-gá:

—Yòhó Mèstrú, cùu-n téé ío váha iní-xi, te cuini-í núu vá cündèe iní-n càchí tnúhu-n ná cúú sá cadá-í cuendá nduu táhú-í cundecu-í ndihi Yá Ndióxi ní caa ni quíhíⁿ —càchí-dé xáhaⁿ-dè xii-gá.

¹⁸ Te Jèsús ní xáhaⁿ-gá xii-dé:

—¿Te cùtnuní iní-n nàcuáa ndùu tnúhu càháⁿ-n sá yúhú váha iní-áⁿ? Chí ìⁿndí díí-ni Yá Ndióxi ío váha iní-gá. ¹⁹ Te yòhó xini-n nàcuáa ní cachí Yá Ndióxi cada ñáyíu, te duha ní cachí-gá: “Nchòhó cue téé vá càháⁿ ndihi-ndo ñadihí te núu ñá díú ñadihí-ndó cùu-yu, te ducaⁿ-ni nchòhó cue ñáyíu ñíhí tucu vá càháⁿ ndihi-ndo téé te núu ñá díú yíⁿ-ndo cuu-güedé, te vá cáhni-ndó tnàha ñáyíu-ndo, te ní vá dúhú-ndó sá ndécú ndihi-yu, te ní vá dácàcu-ndo cuèchi neñúu

sá cúú-xí tnàha ñáyiú-ndo, te ni vǎ dácuañdehnde-ndo, te canehe-ndo sǎ yíñuhu núú tǎtá-ndó ndíhi núú nǎná-ndó”, duha ní cachí Yǎ Ndiǒxí cada ñáyiú —cǎchí-gǎ xǎhaⁿ-gǎ xii-dé.

²⁰ Te tée-áⁿ ní xǎhaⁿ-dě xii-gǎ:

—Mèstrú, nchaa xiǎⁿ ní ngúíta-í quídé-í ndéé cúnáhá cúú lándú-í —cǎchí-dé xǎhaⁿ-dě xii-gǎ.

²¹ Te Jèsús ní xíndéhé ñàha váha-gǎ xii-dé, te ní cuu váha iní ñáhá-gǎ, te ní xǎhaⁿ-gǎ xii-dé:

—Dico cùmání ìngǎ núú sǎ cǎdá-n. Vitna te quíhíⁿ-n te dico-n nchàa sǎ ndécú ndíhi-n, te díhúⁿ-n cuǎha táhú-n cué ñáyiú ndàhú. Te ducaⁿ, te nduu táhú-n núcúndecu váha-n núú ndécú Yǎ Ndiǒxí táxí tnúni-gǎ, te sǎtá ná yǎha ducaⁿ cǎda-n, te quixi-n chítnahá ñáhá-n xii-í cuéi na ndòho-n datná ndoho-í —cǎchí-gǎ xǎhaⁿ-gǎ xii-dé.

²² Te sǎ dúcáⁿ ní xǎhaⁿ Jèsús xii-dé te ío ní cundiýí-dé chi ío cuica-dě, te ní xica-dé cuánuhú-dé.

²³ Te ní ndacoto-gǎ ni cǎndéé dìñi-gǎ, te ní xǎhaⁿ-gǎ xii cue tée xica cuu ndíhi-gǎ:

—Cue ñáyiú cuica chi ío úhú quíndáá iní-yu Yǎ Ndiǒxí cuéndá ndíhu ndaha ñàha-gǎ xií-yu —cǎchí-gǎ xǎhaⁿ-gǎ xii-güedé.

²⁴ Te cue tée xica cuu ndíhi-gǎ-áⁿ ío ní cuñúhu-güedé nàcuáa ní cǎháⁿ-gǎ, te ní xǎhaⁿ tucu-gǎ xii-güedé:

—Nchòhó cue tée xica cuu ndíhi-í cǎchí tnúhu tucu-í xii-ndo sǎ ío úhú quíndáá iní cue ñáyiú cuica Yǎ Ndiǒxí cuéndá ndíhu ndaha ñàha-gǎ xií-yu, chi sǎni iní-yu sǎ ncháá sǎ ndécú ndíhi-yu dǎcácu nihnu ñaha-xi xií-yu núú ùhú núú ndàhú. ²⁵ Te yáchí-gǎ yǎha ñⁿ

cáméyu yaú ñⁿ yiqui ticú dǎcúúxí sǎ quíndáá iní ñⁿ ñáyiú cuica Yǎ Ndiǒxí cuéndá ndíhu ndaha ñàha-gǎ xií-yu —cǎchí-gǎ xǎhaⁿ-gǎ xii-güedé.

²⁶ Te cue tée xica cuu ndíhi-gǎ ní cuñúhu víhi-gǎ-güedé sǎ dúcáⁿ ní cǎháⁿ-gǎ, te ní ngúíta-güedé xítnàha-güedé:

—¿Te yoo sa ndacu naníhí tàhú te núu ducaⁿ vǎiⁿ? —cǎchí-güedé xítnàha-güedé.

²⁷ Te Jèsús ní xíndéhé vǎha ñaha-gǎ xii-güedé, te ní xǎhaⁿ-gǎ:

—Nchaa ñáyiú ñuyíú-a chi vá ndácú-yu ná cadá-yu nàcuáa ndíhu ndaha ñàha Yǎ Ndiǒxí xií-yu, dico mee-gǎ chi ndacu-gǎ ndíhu ndaha ñàha-gǎ xií-yu, chi nchaandi túhú sǎ váha ndàcu-gǎ quídé-gǎ —cǎchí-gǎ xǎhaⁿ-gǎ xii-güedé.

²⁸ Te té Pèlú ní xǎhaⁿ-dě xii-gǎ:

—Nchúhú ní dándóo-ndí nchaandi túhú sǎ ndécú ndíhi-ndí te ní tuha ñaha-ndí xii-n —cǎchí-dé xǎhaⁿ-dě xii-gǎ.

²⁹ Te Jèsús ní xǎhaⁿ-gǎ xii-dé:

—Na cǎchí tnúhu ndáá-í xii-ndo sǎ ncháá ñáyiú na dándóo vehe-xi, àdi ñaní-xi, cúha-xi, tǎtá-xi, nǎná-xi, déhe-xi, àdi ñuhu-xi, te núu ducaⁿ na cadá-yu sǎ cuéndá-í ndíhi sǎ cuéndá tnúhu-í, ³⁰ te ío-gǎ cuéhé sǎ cuǎñaha Yǎ Ndiǒxí cundecu ndíhi-yu, chi níhí-yu vehé-yu, ñuhú-yu, ñaní-yu, cúha-yu, nǎná-yu, déhe-yu, te ñá díú-ní sǎ nchàa xiǎⁿ níhí-yu cundecu ndíhi-yu, chi tnàhá nduu táhú-yu cundecu ndíhi ñáhá-yu xii-í ni caa ni quíhíⁿ ná sǎá nduu. Dico díhna-gǎ ndoho tnahá-yu núú ñuyíú-a sǎ cuéndá-í. ³¹ Te dava ñáyiú cunuu ndecu ichi Yǎ Ndiǒxí vitna, ñáyiú-áⁿ sǎá nduu te vá ío-gǎ cunúú-yu dǎtná cunúú-yu vitna, te dava ñáyiú nchìcúⁿ ñá túú cunuu vitna ñáyiú-áⁿ sǎá nduu te ío cunúú-yu —cǎchí-gǎ xǎhaⁿ-gǎ xii-güedé.

Jèsús cǎháⁿ tucu-gǎ sǎ cǎhní ñàha-güedé xii-gǎ

(Mt. 20:17-19; Lc. 18:31-34)

³² Te ñúhu Jèsús ichi ndíhi cue tée xica cuu ndíhi-gǎ cuásaá ndíhi

ñaha-gã xii-güedé ñuú Jerusálén, te yòdo nuu-gá núú-güedé cuásaá. Te cue téé-áⁿ xicuñúhu-güedé sá dúcáⁿ cuáháⁿ-gá ñuú Jerusálén, te dava cue ñáyiú xínchícúⁿ xiyùhú-yu. Te ní taudìⁿ-gá ndì ùxúú cue téé xica cuu ndihi-gá, te ní ngúíta-gá cání-gã cuèndú núú-güedé nchaa nàcuáa yáha-gá. ³³ Te xáhaⁿ-gã xii-güedé:

—Vitna ñuhu-o ichi cuásaá-ó ñuú Jerusálén, te yacáⁿ cuáha cuèndá ñáhá-güedé xii yúhú Tée cùu ñaní tñhá-ndó nchaa-ndo núú cuè téé cùu dútú cùnùu, ndihi núú cuè téé dàcuaha ñaha xii ñáyiú nchaa tñúhu ní chídó tñùnì ndí Moisés. Te diu cue téé-áⁿ cuñaha-güedé xii dava-gá cue téé sá cáhni ñaha-güedé xii-í, te cuáha cuèndá ñáhá-güedé xii-í núú cuè téé ñá túú cùu cue téé isràél. ³⁴ Te cue téé-áⁿ cudiquí ndeé ñáhá-güedé xii-í, te caniha-güedé ndihi ñii, te tiú díí ñáhá-güedé, te cahni ñaha-güedé xii-í dico nduu únì sá cùú-í te ndoto-í —càchí-gá xáhaⁿ-gã xii-güedé.

Té Jàcobó ndihi té Juàá càháⁿ ndàhú-güedé núú Jèsús sá cádá-gã ñⁿ sá cuíní-güedé

(Mt. 20:20-28)

³⁵ Te cue déhe té Zebèdeú té Jàcobó ndihi té Juàá ní quexio-güedé núú Jèsús, te xáhaⁿ-güedé xii-gá:

—Mèstrú, véxi-ndí càháⁿ ndàhú-ndí núú-n nùu vá cündèe iní-n càda-n ñⁿ sá cuíní-ndí —càchí-güedé xáhaⁿ-güedé xii-gá.

³⁶ Te Jèsús ní xicáⁿ tñúhú-gã núú-güedé, te xáhaⁿ-gã:

—¿Ná cùú sã cuíní-ndó càda-í-í? —càchí-gá xáhaⁿ-gã xii-güedé.

³⁷ Te ní xáhaⁿ-güedé xii-gá:

—Cuíní-ndí sá òré ná sàà nduu cùndecu-n núú táxí tñúmì-n, te ñⁿ-ndí cunucóo-ndí xio cùha-n te ñⁿ-ndí cunucóo-ndí xio dàtni-n —càchí-güedé xáhaⁿ-güedé xii-gá.

³⁸ Te Jèsús ní xáhaⁿ-gã xii-güedé:

—Nchòhó, ñá túú cùnnumì iní-ndó nàcuáa ndùu sá xicáⁿ-ndó nùú-í.

¿Te náa cundee iní-ndó dàndoho ñaha ñáyiú xii-ndo dàtná dandòho ñahá-yu xii-í, te cundee tucu iní-ndó càhni ñahá-yu xii-ndo dàtná cahni ñahá-yu xii-í-á? —càchí-gá xáhaⁿ-gã xii-güedé.

³⁹ Te ní xáhaⁿ-güedé xii-gá:

—Cundee iní-ndí yáha-ndí nchaa nàcuáa càháⁿ-n-áⁿ —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Ndáá sá cündèe iní-ndó ndòho-ndo nchaa nacuáa ndòho-í, te cundee tucu iní-ndó càhni ñahá-yu xii-ndo, chi yúhú cahni ñahá-yu xii-í. ⁴⁰ Dico sá dúcáⁿ cuíní-ndó, sã ñⁿ-ndó cùnucóo-ndo xio cuha-í te ñⁿ-ndo cùnucóo-ndo xio datni-í, te xíáⁿ chi ñá díú yúhú tàú-í cachí-í te núu sá cùú cùnucóo-ndo àdi sá vá cùú cùnucóo-ndo, chi mee Tàtà-í Dútú Ndióxi cachí-gá te núu ná cùú ñáyiú nduu táhú cunucóo dñi-í dàvá-áⁿ —càchí-gá xáhaⁿ-gã xii-güedé.

⁴¹ Te òré ní níhí ùxí-gá cue téé xica cuu ndihi-gá tñúhu nàcuáa ndùu sá cuíní té Jàcobó ndihi ñaní-dé té Juàá, te ní cudéáⁿ-güedé núú cuè téé úú-áⁿ. ⁴² Te Jèsús ní cana-gá nchaa cue téé xica cuu ndihi-gá-áⁿ, te ní xáhaⁿ-gã xii-güedé:

—Nchòhó xini-ndó sã cuè téé yìndaha ñⁿ nacióⁿ quide-güedé sá ïo cùnucóo-güedé, te nchaa dava-gá cue téé cùndihi-güedé tñáhá-güedé quide-güedé sã ïo cùnucóo-güedé.

⁴³ Dico nchòhó chi vá dúcáⁿ càda-ndo. Chi núu dava-ndo cuíní-ndó cùnucóo-ndo te xini ñuhu-xi cunu cuechi núú tñáhá-ndó te vá cádá-ndó sã cùnucóo-ndo. ⁴⁴ Te núu dava-ndo cuíní-ndó quène cáva-ndo, te cuu-ndo dàtná cue ñáyiú ñá túú tñáhí dàná quee núú chíúⁿ pàtróoⁿ-xi cunu cuechi núú tñáhá-ndó. ⁴⁵ Te yúhú Tée cùu ñaní tñáhá-ndó nchaa-ndo, chi ñá túú véxi-í sá cúnú cuèchi ñáyiú nùú-í, chi véxi-í sá cúnú cuèchi-í núú-yu. Te cuú-í ñuyúú-a cuèndá vài-yu

cácu nihnu núú ùhú núú ndàhú —
càchí-gá xáhaⁿ-gá xii-güedé.

*Jèsús quidé tátna-gá ìⁿ téé cuàá
nání-dě Bartimeú*

(Mt. 20:29-34; Lc. 18:35-43)

46 Te Jèsús ní quexio-gá ñuú Jericó
ndihí cue téé xica cuu ndihí-gá, te ní
yáha-gá ndihí-güedé ichi xiti ñuú-áⁿ,
te ío cuéhé ñáyiú nchicúⁿ ñáhá
xii-gá cuáháⁿ te ìⁿ xio yuhu ichi
sá ñí quee xiti ñuú-áⁿ núcõo ìⁿ téé
cuàá nání-dě Bartimeú, te tátá-dě
nání-dě Tímeú, te téé-áⁿ núcõo-dé
yuhu ichi-áⁿ xicáⁿ ndàhú-dé. 47 Te
téé-áⁿ ní cutnùní iní-dé sá Jèsús téé
ñuú Nazàrét ñúhú-dě ichi, te ní
ngüíta-dé níhi càháⁿ-dé, te xáhaⁿ-dě
xii-gá:

—Jèsús, ñaní tnáhá ndíi Dàvíí,
cundàhú iní ñáhá xii-í! —càchí-dé
xáhaⁿ-dě xii-gá.

48 Te vài ñáyiú tènaá ñáhá-yu
xii-dé, te xáháⁿ-yu sá ná càdí-dé
yuhu-dé dico uuⁿ-gá níhi ní
cáháⁿ-dé xáhaⁿ-dě xii-gá:

—Jèsús, ñaní tnáhá ndíi Dàvíí
cundàhú iní ñáhá xii-í! —càchí-dé
xáhaⁿ-dě xii-gá.

49 Te Jèsús ní ngüíñí-gá te ní
xáhaⁿ-gá xii cue téé ndihí-gá:

—Chí cuànguaca téé cuàá-áⁿ can-
deca-ndo-dě quixi iha —càchí-gá
xáhaⁿ-gá.

Te cue téé-áⁿ ñí xica-güedé
cuànguaca-güedé téé cuàá-áⁿ, te
òré ní quexio-güedé núú-dě te ní
xáhaⁿ-güedé xii-dé:

—Ndacuñí te vá ndíhú-gá iní-n,
na quíhíⁿ-ó chi càna ñaha Jèsús xii-n
—càchí-güedé xáhaⁿ-güedé xii-dé.

50 Te téé-áⁿ ñí xócání-dě dóó
ndíxí-dě, te ndíhí-ni ní ndacuñí-dé
te ní xica-dé cuáháⁿ-dé núú Jèsús.

51 Te òré ní quexio-dé te ní xicáⁿ
tnúhú-gá núú-dě, te xáhaⁿ-gá xii-dé:

—¿Ná cuení-n càda ñaha-í xii-n-í?
—càchí-gá xáhaⁿ-gá xii-dé.

Te téé cuàá-áⁿ ñí xáhaⁿ-dě xii-gá:

—Mèstrú, cuení-í cada tátna-n
núú-í cuèndá cundehe-í —càchí-dé
xáhaⁿ-dě xii-gá.

52 Te Jèsús ní xáhaⁿ-gá xii-dé:

—Cuanùhú vitna, chi sa ní ndúha
núú-n chi ní sándáá iní-n Yá Ndiòxí
—càchí-gá xáhaⁿ-gá xii-dé.

Te òré-ni-áⁿ ñí ndúha núú-dě te
nchicúⁿ-dě Jèsús cuáháⁿ.

11

Jèsús cuànguihu-gá ñuú Jerusàlén
(Mt. 21:1-11; Lc. 19:28-40; Jn.
12:12-19)

1 Te Jèsús ní cuyatni-gá ndihí cue
téé xica cuu ndihí-gá ñuú Bètaniá,
ndihí ñuú Bètfaqé, te xiáⁿ cáá yucu
nani Olivú, te yatni vii-ná xiáⁿ
cáá ñuú Jerusàlén. Te Jèsús ní
cana-gá úú-ni tnáhá cue téé xica
cuu ndihí-gá. 2 Te ní xáhaⁿ-gá
xii-güedé:

—Chí cuáháⁿ ñuú cáá yàtni
yacáⁿ, te òré quexio-ndo yacáⁿ te
naníhí-ndó ìⁿ búrru ndètníⁿ-dí, te
vátá yóo ìⁿ-gá codo ñaha xii-dí, te
nandaxi-ndo-dí te candeca-ndo-dí
quixi. 3 Te núú yoo na càcáⁿ tnúhú
núú-ndó ná cuèndá nándaxi-ndo-dí,
te cúñaha-ndo sá yùhú Yaá xicá
cúu ndihí-ndo xini ñuhu-í-dí, te na
yáha canehe chiúⁿ-í-dí te ndíhí-ni
natendaha-í-dí, duha cúñaha-ndo
—càchí-gá xáhaⁿ-gá xii-güedé.

4 Te cue téé-áⁿ ñí xica-güedé
cuáháⁿ-güedé, te òré ní quexio-güedé
ñuú-áⁿ te ní naníhí-güedé ìⁿ búrru
ndètníⁿ-dí ìⁿ yutnu nihnu yatni ìⁿ
yuyehe vehe caa yatni yuhu ichi, te
ní ngüíta-güedé nándaxi-güedé-dí.

5 Te mei òré nándaxi-güedé-dí ní
quexio ñáyiú xáháⁿ-yu xii-güedé:

—¿Ná cuèndá nándaxi-ndo
búrru-áⁿ-í? —càchí-yu xáháⁿ-yu
xii-güedé.

6 Te cue téé-áⁿ ñí xáhaⁿ-güedé
xii-yu nàcuáa ní xáhaⁿ Jèsús
cúñaha-güedé. Te sátá dúcáⁿ te
ní dáñá-yu ndèca-güedé búrru-áⁿ
cuáháⁿ núú ndécú Jèsús. 7 Te
òré ní quexio-güedé ndihí-dí núú

ndécú-gã, te ní sacáⁿ ndodo-güedé dóo-güedé sátá-di, ní ngódó ñaha Jesús xii-di. ⁸ Te ío cuéhé ñáyi ta sácáⁿ-yu dóo-yu ichi cuáháⁿ-gã cuendá núú dǒo-yu-án yãha-gã ndihi quití yòdo-gã, te davá-yu xèhndé-yu ndaha yùtnu ta sacáⁿ-yu cuáháⁿ.

⁹ Te nchaa ñáyi yòdo nuu núú-gã ndihi nchaa ñáyi nchicúⁿ ndaa sátá-gã ní nguíta-yu níhi càháⁿ-yu, te càchí-yu:

—jÍo càhnu cuu Yaá-a! jTe Yá Ndióxi ná chindee ñaha-gã, chi ñu-gã cúú-gã Yaá ní tendaha-gã véxi quide núú-gã! ¹⁰ jTe ñu-ni Yaá-á cúú-gã Yaá véxi quindaha ñaha xii-o datná ní xóo cada ndí Daví! jTe ndéé nchaa sá ío andíu na càchí-xi sá ío càhnu cuu-gã! — duha càchí-yu.

¹¹ Te Jesús ní quexio-gã ñuú Jerusálén, te cuánguihu-gã xití veñúhu càhnu sá ío cunu, te ní xíndéhé vãha-gã nchaa sá ndécú xití veñúhu-án. Te sátá dúcáⁿ te ní ndee-gã cuáháⁿ-gã ñuú Bètaniá ndihi ndi ùxúú cue téé xica cuu ndihi-gã chi sa ní cuaa.

Jèsús xãhaⁿ-gã xii yutnu ngüxí sá vã cúúⁿ-gã sávidí-xi

(Mt. 21:18-19)

¹² Te nduu tnéé-án ní quee Jesús ñuú Bètaniá ndihi cue téé xica cuu ndihi-gã, te ichi ñuhu-gã ní xihí-gã docó. ¹³ Te xica ní xiní-gã nútñi ñⁿ yutnu ngüxí, te ní xica-gã cuándéhé-gã núu ndéé sávidí-xi te ñá túú ná ndéé, chi mee-ni ndãha-xi ndéé chi ñá díú yóo sácũndéé sávidí-xi. ¹⁴ Te Jesús ní xãhaⁿ-gã xii yutnu ngüxí-án:

—Vitna te vá yóo ñⁿ-gã caxi sávidí-n, chi vá cúúⁿ-gã —càchí-gã xãhaⁿ-gã xii yutnu ngüxí-án.

Te cue téé xica cuu ndihi-gã ní tecú dóho-güedé nãcuáa ní xãhaⁿ-gã xii yutnu ngüxí-án.

Jèsús ñá túú tnãhá iní-gã nãcuáa quide ñáyi xití veñúhu

(Mt. 21:12-17; Lc. 19:45-48; Jn. 2:13-22)

¹⁵ Te Jesús ní quexio tucu-gã ndihi cue téé xica cuu ndihi-gã ñuú Jerusálén, te cuánguihu tucu-gã xití veñúhu càhnu sá ío cunu, te xití veñúhu-án xíndecu cue ñáyi quide ndáhú nãdicó-yu, ndihi cue ñáyi xísaaⁿ. Te nchaaⁿ-yu ní queñuhu ñaha Jesús xii-yu quehé, te ní dándüá-gã mèsá cue ñáyi dàma díhúⁿ, ndihi nchaa xilé sácóo nchihi cue ñáyi dico lómá xíndecu xití veñúhu-án. ¹⁶ Te ñá túú tnãhí-gã ní dàña-gã yãha cue ñáyi ndihi nchaa sá nchidó-yu ichi xití veñúhu-án. ¹⁷ Te ní xãhaⁿ-gã xii-yu:

—Núú tütú Yá Ndióxi càháⁿ-xi nãcuáa ní càháⁿ-gã, te ní càchí-gã: “Vehe-í cúú-xi vèhe núú tàcá ñáyi nihí ñuyú càháⁿ ndihi ñãhá-yu xii-í”, duha ní càháⁿ-gã càchí-xi núú tütú-gã. Dico nchóhó quidé-ndó vèhe-gã vehe ñadúhú —càchí-gã xãhaⁿ-gã xii-yu.

¹⁸ Te nchaa dútú cúnú, ndihi nchaa cue téé dàcuaha ñaha xii-yu nchaa tnúhu ní chidó tnùní ndí Moisés ní tecú dóho-güedé nãcuáa ní càháⁿ-gã te ní nguíta-güedé ndúcú-güedé nãcuáa cada-güedé cahni ñaha-güedé xii-gã, chi yuhú-güedé sá ío cunu-gã, te ducaⁿ chi nchaa ñáyi ío cunúhu-yu nchaa tnúhu càháⁿ-gã. ¹⁹ Te òré sa ní cuaa cuí-nã, te ní quee tucu Jesús ndihi cue téé xica cuu ndihi-gã ñuú Jerusálén cuáháⁿ-gã ndihi-güedé ingá xichi.

Ní yichí yutnu ngüxí

(Mt. 21:20-22)

²⁰ Te nduu tnéé nehé-ni ní yãha tucu Jesús ndihi cue téé xica cuu ndihi-gã núú níhnú yùtnu ngüxí, te ní xiní-güedé sa ní yichí nihí ndéé yóho-xi. ²¹ Te té Pelú ní ndacu iní-dé nãcuáa ní xãhaⁿ Jesús

xii yutnu ngüxí-án, te ní xáhaⁿ-dë xii-gá:

—Mèstrú, cundehe nã ní yíhí yutnu ngüxí sá ní xáhaⁿ-n sã vá cúúⁿ-gã sávidí-xi —càchí-dé xãhaⁿ-dë xii-gá.

²² Te Jèsús ní xáhaⁿ-gã xii-güedé:

—Quindáá ndisa iní-ndó Yã Ndiöxí. ²³ Te na càchí tnúhu ndáá-í xii-ndo sã nũu nchòhó cũñaha-ndo xii tindúú-a xocuiñí-xi núú ndécú-xí, te quíhíⁿ-xi quée-xi xití lámár. Te ðiu ducaⁿ càda-xi te núu nchòhó vá cání ìⁿ caní úú iní-ndó, te quindáá iní-ndó sã dúcáⁿ càda-xi. ²⁴ Te xiãⁿ nũu càchí tnúhu-í xii-ndo sã nchàa sã ná càcáⁿ-ndó núú Yã Ndiöxí òré càháⁿ ndíhi-ndo-gã, te taxi-gá te núu nchòhó sàndáá ndisa iní-ndó sã táxi-gá sã xicáⁿ-ndó núú-gã. ²⁵ Te òré càháⁿ ndíhi-ndo Yã Ndiöxí te dandacu iní-ndó te núu ndècu ñáiyu ñã túú cùu vaha iní ñáhã xii-ndo, te cada càhnu iní-ndó-yu cuendá ducaⁿ càda cahnu iní ñáhã Tãtá-ndó Dútú Ndiöxí Yáá ndécú àndiu xii-ndo cuendá nchaa sã ñã túú vaha quide-ndo. ²⁶ Dico núu nchòhó vá cáda càhnu iní-ndó sã quidé ñaha tnahã ñáiyu-ndo xii-ndo, te ní Tãtá-ndó Dútú Ndiöxí vá cáda càhnu iní ñáhã-gã xii-ndo cuendá nchaa sã ñã túú vaha quide-ndo —cachí-gá xãhaⁿ-gã xii-güedé.

Jèsús ndécú ndíhi-gá tnúhu ndee iní
(Mt. 21:23-27; Lc. 20:1-8)

²⁷ Te Jèsús ní ndexio tucu-gá ñúú Jerusálén ndíhi cue téé xica cuu ndíhi-gá, te cuánguihu tucu-gá xití veñúhu càhnu sã ïo cùnuu ndíhi-güedé. Te xití veñúhu-áⁿ yíhí-gã ní quexio cue dútú cúnùu ndíhi cue téé dàcuaha ñaha xii ñáiyu nchaa tnúhu ní chídó tnùnì ndíi Moisés, ndíhi cue téé cùu sacuéhé nũú ñáiyu isráél. ²⁸ Te xãhaⁿ-güedé xii-gá:

—Cuínì-ndí cachí tnúhu-n xii-ndí nása ndùu tnúhu ndee iní ndécú

ndíhi-n núu quide-n nándi sá quidé-n, ¿te yoo ducaⁿ ní taxi tnúhu ndee iní-án xii-n-i? —càchí-güedé xãhaⁿ-güedé xii-gá.

²⁹ Te Jèsús ní xáhaⁿ-gã xii-güedé:

—Yúhú tnàhá-í cuínì-í càcáⁿ tnúhu-í ìⁿ sã càcáⁿ tnúhu-í núú-ndó te núu na càchí tnúhu-ndo, te cachí tnúhu-í xii-ndo yòo ní taxi tnúhu ndee iní xii-í duha quide-í. ³⁰ Te chí càchí tnúhu xii-í yoo ní táuchíúⁿ ní dácuanđute ndíi Juáá ñáiyu, ¿Yá Ndiöxí áⁿ cuè téé ñuyúú-a ní táuchíúⁿ dùcaⁿ ní quide ndíi? Te chí càchí tnúhu —càchí-gá xãhaⁿ-gã xii-güedé.

³¹ Te ní ngüíta-güedé xitnàha-güedé:

—¿Nása cũñaha-o? Chi núu na cũñaha-o sã Yã Ndiöxí ní táuchíúⁿ dùcaⁿ ní quide ndíi Juáá ñã, te quesaha-dë: “¿Ná cuendá ñã túú ní sàndáá iní-ndó tnúhu ní càháⁿ ndíi vãⁿ?”, quesaha-dë. ³² Te ní vá cúú cũñaha-o sã cuè ñáiyu ñuyúú-a ní táuchíúⁿ dùcaⁿ ní quide ndíi Juáá —càchí-güedé xitnàha-güedé.

Te ducaⁿ ní xitnàha-güedé chí ñã túú ní cùtnunì iní-güedé nása cũñaha-güedé xii-gá, chí xiyùhú-güedé cue ñáiyu chí nchaa ñáiyu-áⁿ ní cutnùnì ndáá iní-yu sã Yã Ndiöxí ní táuchíúⁿ-gã ducaⁿ ní quide ndíi Juáá. ³³ Te ní xáhaⁿ-güedé xii Jèsús:

—Ñã túú xìnì-ndí yoo ní táuchíúⁿ dùcaⁿ ní dácuanđute ndíi Juáá ñáiyu —càchí-güedé xãhaⁿ-güedé xii-gá.

Te Jèsús ní xáhaⁿ-gã xii-güedé:

—Te núu ducaⁿ te ní yùhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xãhaⁿ-gã xii-güedé.

12

Cuendá cue téé cuihna iní-xi
(Mt. 21:33-46; Lc. 20:9-19)

¹ Te Jèsús ní ngüíta-gã cánì-gã ìⁿ cuendú núú ñáiyu nàcuáa tecú tnùnì-yu tnúhu-gã, te xãhaⁿ-gã xii-yu:

—#n tée ní nacúxi-dé mee-ni yòho yaha stilé núú ñhú-dě, te ní chidoco-dě cuèndá sá vâ cúú dâñú, te ní cadúha-dé núú quíhni-dě ndéhé yoho yàha stilé-án òré ná cùu, te ní cadúha-dé #n xító dùcúⁿ núú cáundòdo cue tée coto yoho yàha stilé-án.

'Te ní sáá #n nduu quèe-dé quíngaca cuu xica-dě vâi nduu, te ní dándòo ndaha-dě sá nǐ xitu-dé-án xii #n úú cue tée càháⁿ ndihi-dě cuèndá cada chiùⁿ-güedé, te ní ndatnúhu-güedé sá òré ná cúú te cuu cuèndá dava-güedé te ducaⁿ te ní quee-dé cuáháⁿ-dé. ² Te sáta nǐ sáá nduu nǐ cuu ndéhé yoho yàha stilé sá nǐ xitu-dé-án, te ní xáhaⁿ-dě xii #n tée xínu cuechi núú-dé: “Cuáháⁿ cácaⁿ-n sá cúú cuèndá-í núú cuè tée ní dándòo ndàha-í nchaa yoho yàha stilé sá nǐ xitu-í-án”, càchí-dé xáhaⁿ-dě. Te tée xínu cuechi-án nǐ xica-dé cuáháⁿ-dé. ³ Te cue tée-án nǐ tniⁿ-güedé tée xínu cuechi-án, te ní caniha-güedé xii-dé, te dâtnúni ní nacúicúⁿ ñáhá-güedé, te ñá túú tñahí ná ní sãñaha-güedé. ⁴ Te tée cùu xítóhó yoho yàha stilé-án nǐ tendaha tùcu-dé ingá tée xínu cuechi núú-dé cuáháⁿ-dé. Te òré ní quexìo tée xínu cuechi-án te cue tée-án nǐ sáha ñaha-güedé yúú xii-dé, te ní táhú-güedé díquí-dě, te ní xícuèhé ñáhá-güedé xii-dé. ⁵ Te tée cùu xítóhó nchaa yoho yàha stilé-án nǐ tendaha tùcu-dé ingá tée xínu cuechi núú-dé cuáháⁿ-dé núú cuè tée-án, dico tée-án òré ní quexìo-dé te ní sahní ñaha-güedé xii-dé. Te tée cùu xítóhó nchaa yoho yàha stilé-án nǐ tendaha-dě vâi-gá cue tée xínu cuechi núú-dé cuáháⁿ ngácáⁿ-güedé sá cúú cuèndá-dé ní cùu dico diu-ní ducaⁿ nǐ quide ñaha tùcu cue tée ndèè nchaa yoho yàha stilé-án xii-güedé, chi dava-güedé ní caniha-güedé te dava-güedé ní sahní ñaha-güedé.

⁶ Te tée cùu xítóhó nchaa yoho yàha stilé-án ndécú #ndii-ná tée tendaha-dě quíhíⁿ núú cuè tée ní

dándòo ndaha-dě sá nǐ xitu-dé-án, te tée tendaha-dé-án cúú-dě déhe ducuⁿ-dé, te ío cùu iní ñáhá-dě. Te ní sani iní-dé: “Váha-gá núu tendaha-í déhe-í-a núhú-dé, chi òré quini ñáhá-güedé xii-dé te cànehe-güedé sá yíñuhu núú-dě”, duha ní sani iní-dé. Te ducaⁿ te ní xáhaⁿ-dě xii déhe-dé-án sã núhú-dé, te tée-án cuànuhú-dé cuáháⁿ ngácáⁿ-dé sá cúú cuèndá tãtã-dé núú cuè tée-án. ⁷ Dico òré ní xini cue tée quide chiùⁿ-án déhe tée cùu xítóhó nchaa yoho yàha stilé-án, te ní xítñaha-güedé: “Tée-án tée véxi nduu táhú ñuhu-a ndihi sá cáá núú-xi, dico cahni-o-dé te mee-o nduu táhú-ó sã ndúú táhú-dě”, duha ní xítñaha-güedé. ⁸ Te ní tniⁿ-güedé tée-án, te ní sahní ñaha-güedé, te ní dàquéné-güedé yiqui cùñú-dé #n xio yuhu ñuhu núú cáá yòho yaha stilé-án —duha cuáháⁿ cuèndú ní caní Jèsús núú-yu.

⁹ Te Jèsús ní xáhaⁿ tùcu-gá xií-yu:

—¿Te nchòhó sa cùtnuní iní-ndó nàcuáa cada xítóhó ñuhu-án ãⁿ? Chi núhú-dé te cahni-dé cue tée-án te dándòo ndaha-dě ñuhu-dé xii cue tée cùtnuní iní-dé cada ndáá —càchí-gá xáhaⁿ-gá xií-yu.

¹⁰ Te xáhaⁿ tùcu-gá xií-yu:

—Te nchòhó, náa ñá túú dàcuaha-ndo núú tütú Yã Ndióxi núú càchí-xi:

Yúú sã ní dàquée tñhú cue tée dàcaa vehe,

ní cuu-xi yúú cúnú vitna.

¹¹ Chi mee Yã Ndióxi ducaⁿ nǐ cachí-gá cunduu, te cùu-xi #n sá ío cùñuhu-o vitna.

Duha càchí-xi núú tütú-gá —càchí Jèsús xáhaⁿ-gá xií-yu.

¹² Te cue tée ní xíndedóho nàcuáa nduu tñuhu ní cáháⁿ-gá ní cuini-güedé tniⁿ ñaha-güedé xii-gá ní cùu, chi ní cutnùní iní-güedé sá cuèndá-güedé ní cáháⁿ-gá, dico ní yùhú-güedé tniⁿ ñaha-güedé xii-gá cuèndá sá ío vâi ñáyiú, te ná ío ná cada ñáhá-yu xii-güedé ní sani iní-güedé, te ní xica-güedé cuáháⁿ-güedé.

*Cuendá impuèstú**(Mt. 22:15-22; Lc. 20:20-26)*

13 Te sáta ñi xica-güedé cuáhán-güedé, te ní tendaha-güedé ñi úú cue téé cùu fariséú, ndihi ñi úú cue téé cùndihi té Hèrodés cuáhán-güedé núú ndécú Jèsús ndúcú-güedé nàcuáa cada-güedé datícanuu ñaha-güedé xii-gá núú tnúhu càháⁿ-gá. 14 Te cue téé-án ñi quexio-güedé núú Jèsús, te xáhaⁿ-güedé xii-gá:

—Mèstrú, cùtnuní iní-ndí sá ío ndáá càháⁿ-n, te ñá túú quide cuendá-n nàcuáa càháⁿ ñáiyu, te cuèi ndédani càá-yu ñi-ni càháⁿ-n ndihí-yu chi ñá túú quide cuendá-n cuèi ná ñáiyu cùu-yu, te càháⁿ ndáá-n nàcuáa càháⁿ Yá Ndióxi cundecu-o ñuyíú-a. Te cachí tnúhu xii-ndí núu váha-ni quide-ndí sá cháhu-ndí té Cèsár téé ío cùnuu cuendá impuèstú áⁿ ñhá —càchí-güedé xáhaⁿ-güedé xii-gá.

15 Dico Jèsús ní cutnúní iní-gá sá xító ndéé ñhá-güedé xii-gá, núú ní xáhaⁿ-gá xii-güedé:

—¿Ná cuendá ducaⁿ xito ndéé ñhá-ndó xii-í? Chí dánèhé ñhá xii-í ñi díhúⁿ sá cháhu-ndo cuendá impuèstú te núu nása càa —cachí-gá xáhaⁿ-gá xii-güedé.

16 Te cue téé-án ñi dánèhé ñhá-güedé xii-gá ñi díhúⁿ sá cháhu-güedé cuendá impuèstú. Te Jèsús ní xáhaⁿ-gá xii-güedé:

—Chí cachí tnúhu xii-í núu yoo núú-xi ndéé ndihi yoo díu-xi ndéé —cachí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tē Cèsár ndéé ndihi díu-dé —cachí-güedé xáhaⁿ-güedé xii-gá.

17 Te Jèsús ní xáhaⁿ-gá xii-güedé:

—Te núu ducaⁿ te chí nàcuáha té Cèsár sá cùu cuendá-dé, te sá cùu cuendá méé Yá Ndióxi te xáⁿ nàcuáha-ndo-gá —cachí-gá xáhaⁿ-gá xii-güedé.

Te cue téé-án ío ní cuñúhu-güedé sá dúcáⁿ ñi càháⁿ-gá.

*Cuendá cue ñáiyu ndoto**(Mt. 22:23-33; Lc. 20:27-40)*

18 Te sáta dúcáⁿ te ní quexio ñi úú cue téé cùu saducéú núú ndécú Jèsús, te cue téé-án ñá túú sàndáa iní-güedé sá ndótó cue ñáiyu ní xihí, te ní xáhaⁿ-güedé xii-gá:

19 —Mèstrú, ndíi Moisés càchí ndíi núú tütú ndíi ndècu vitna sá núu ñi téé na cùu-dé te quendóo ñadhí-dé, te núu ñá túú ní xóo déhe-dé ndihi ñadhí-dé-án, te téé cùu ñaní-dé naqueheⁿ-dé ñaha ní quendóo quèé-án cuendá coo déhe-dé ndihi-án cuendá téé ní xihí-án. 20 Te ní xíndecu úsá tnàhá cue téé mee-ni ndí ñaní-güedé. Te téé díhna ní níhí ñadhí-dé, te ñá túú ní cùdí-dé cundecu-dé chi ní xihí-dé, te ní ñi déhe-dé ñá túú ní xóo ndihi ñadhí-dé. 21 Te téé cùu úú ní naqueheⁿ-dé ñaha ní quendóo quèé-án, dico ní xihí tucu-dé, te ní ñi tucu déhe-dé ñá túú ní xóo ndihi ñaha-án. Te díu-ni ducaⁿ ñi xihí téé cùu uní. 22 Te ní xínu ndí úsá-güedé ní cándeca ñaha-güedé xii ñaha-án, dico ní ñi-güedé ñá túú ní xóo déhe-güedé ndihi-án, te ní ndihi-güedé ní xihí te ndéé núú ñi ndihi-ná ní xihí tnàhá ñadhí-án. 23 Te na sáa nduu ndóto-güedé ndihi ñaha-án, ¿te ndédacàa-güedé ñadhí-güedé cuu-aⁿ-í? Chí ndí úsá-güedé ní cándeca ñaha-güedé xii-aⁿ —cachí-güedé xáhaⁿ-güedé xii-gá.

24 Te Jèsús ní xáhaⁿ-gá xii-güedé:

—Ní xíta nchòhó tnúhu càháⁿ-ndó, chi ñá túú xini-ndó nàcuáa càháⁿ Yá Ndióxi núú tütú-gá, te ní ñá túú xini-ndó sá díú-gá ndácú-gá quidé-gá nchaandi tühú sá váha. 25 Te ña cachí tnúhu-í xii-ndo sá òré ná sáa nduu ndóto nchaa ñáiyu ní xihí, te dàvá-án vǎ yóo-gá dasaⁿ déhe yoco-xi chi vǎ yóo-gá candeca tnàha, chi na ndótó-yu te cuu-ná-yu dàtná cue espíritú xínú cuèchi núú Yá Ndióxi. 26 Te núu nchòhó cuini-ndó càháⁿ-ndó cuendá nchaa ñáiyu

ndoto, te díhna-gá dachuaha-ndo nacuaá ní chidó tnùní ndíi Moisés núú tütú ndíi ní cùu. Chì diu núú tütú ndíi càháⁿ-xì nàcuáa ní xáhaⁿ Yá Ndióxi xii ndíi cútnàhá ní càháⁿ ndíi ñaha-gã ñⁿ xichi núú níhnú tnútaú nchìcúⁿ ñuhú. Te duha ní xáhaⁿ-gã xii ndíi: “Yúhú cùu-í Ndióxi tẽ Àbrahám, ndíi tẽ Isàác, ndíi tẽ Jácób”, duha ní xáhaⁿ Yá Ndióxi xii ndíi cãchí-xì núú tütú ndíi. ²⁷ Te Yá Ndióxi ñá tuú cùu-gã Ndióxi cue ñáyiú ní xíhí, chí cùu-gã Ndióxi cue ñáyiú xĩndecu vívú, núú xíáⁿ nchòhó ío xíta-ndo tnúhu càháⁿ-ndó. Te sá dúcáⁿ ní càháⁿ-gã cuendá cue tée-áⁿ, te xíáⁿ cútnùní sá cuèi ní xíhí-güedé sá cúu-xí tnàha ñáyiú-güedé, dico ndècu vívú-güedé sá cúu-xí-gã —cãchí-gã xáhaⁿ-gã xii-güedé.

Tnúhu sá ïo-gã cùnùu
(Mt. 22:34-40)

²⁸ Te tnàhá ñⁿ tée dàcuaha ñaha xii ñáyiú nchaa tnúhu ní chidó tnùní ndíi Moisés ndèdóho-dé nchaa tnúhu càháⁿ Jèsús ndíi cue tée cùu saducéú-áⁿ, te ndèdóho-dé sá sùúní vaha ñíhí-gã tnúhu nàdanchocáva-gã. Te ní sãndehe yatni-dé núú-gã, te xáhaⁿ-dẽ xii-gã:

—Cachí tnúhu xii-í ndèdaçaa tnúhu sá ní càháⁿ Yá Ndióxi ío-gã cùnùu cuu díhma —cãchí-dé xáhaⁿ-dẽ xii-gã.

²⁹ Te Jèsús ní xáhaⁿ-gã xii-dé:

—Duha càháⁿ tnúhu sá ïo-gã cùnùu: “Nchòhó ñáyiú isràél ío vaha chí cundèdóho tnúhu-a. ñⁿdíi díi-ni Yá Ndióxi ndécú, te diu-ni-gã cúu-gã Ndióxi-ó. ³⁰ Te cuu iní-ndó Dütú Ndióxi Yaá cúu Ndióxi-ndó ñⁿ yuhu ñⁿ iní-ndó, te caní iní-ndó càda-ndo datná cuiní mée-gã, te mee-ñⁿ tnúhu vaha caní iní-ndó cuendá cuu víi cuu vaha-ndo núú-gã, te coo iní-ndó càda-ndo nacuaá cuu vaha iní-gã”, duha càháⁿ tnúhu sá ïo-gã cùnùu. ³¹ Te duha càháⁿ tucu ingá tnúhu cùu uú sá ïo cùnùu: “Cuu iní-ndó tnàha ñáyiú-ndo datná cúu iní-ndó mèe-ndo”, duha càháⁿ tnúhu cùu

uú-áⁿ. Te úú duha-ni tnúhu-a cùu-xi tnúhu sá ïo-gã cùnùu —cachí-gã xáhaⁿ-gã xii-dé.

³² Te tée dàcuaha ñaha xii ñáyiú nchaa tnúhu ní chidó tnùní ndíi Moisés ní xáhaⁿ-dẽ xii-gã:

—Mèstrú, vaha-ni càháⁿ-n chí ndáá sá ñⁿdii-ni Yá Ndióxi ndécú, te ñá tuú-gã ndèé ndécú ingá ndiòxi.

³³ Te datná ní cachí-n sã ñⁿ yuhu ñⁿ iní-ó cùu iní-ó Yá Ndióxi, te caní iní-ó càda-o nacuaá cuu víi cuu vaha iní-gã te ío víi ío vaha cuu iní-ó datná cuiní mée-gã, te coo iní-ó càda-o nacuaá cuu vaha iní-gã, te cuu iní-ó cuè tnaha ñáyiú-ndo datná cúu iní-ó mèe-o. Te nchaa xíáⁿ ío-gã xíní ñùhu-xi cada-o dacúúxi sã cuãñaha-o quiti cahni-güedé te cáyú-di nduu táhú ñáhá Yá Ndióxi, ndíi dàcúúxi nchaa dava-gã sá sãñaha-o nduu táhú-gã —cãchí-dé xáhaⁿ-dẽ xii-gã.

³⁴ Te sá dúcáⁿ ïo vaha ndùu tnúhu ní càháⁿ tée-áⁿ, núú ní xáhaⁿ Jèsús xii-dé:

—Luha-ná cúmãní xii-n te ndíhu ndaha ñaha Yá Ndióxi —cãchí-gã xáhaⁿ-gã xii-dé.

Te sá dúcáⁿ ñⁿ xáhaⁿ-gã xii tée-áⁿ, núú vá yõo ñⁿ-gã ní cùyⁿ ñágá tnúhu nducu tnúhu-yu núú-gã.

Yoo cùu Xítohó Jesucristú
(Mt. 22:41-46; Lc. 20:41-44)

³⁵ Te Jèsús yíhí-gã xití veñúhu càhnu sá ïo cùnùu danehé-gã ñáyiú, te xáhaⁿ-gã xii-yu:

—Cue tée dàcuaha ñaha xii ñáyiú nchaa tnúhu ní chidó tnùní ndíi Moisés cãchí-güedé sá Cristú Yaá tendaha Yá Ndióxi quixi ñuyúú-a cùu-gã déhe ndíi Dàvíí, te ndíi-áⁿ ñⁿ cunaha víhi ní xíhí ndíi. ¿Te ná cuendá ducaⁿ càháⁿ-güedé? ³⁶ Te mee ndíi Dàvíí-áⁿ ñⁿ dácáhú iní ñáhá Espíritú Yá Ndióxi xii ndíi nàcuáa càháⁿ ndíi, te duha ní cachí ndíi: Dütú Ndióxi ní xáhaⁿ-gã xii Yaá cúu

Xítohó-í:
“Ngóo xio cùha-í,

te yúhú cada-í te nchaa sá cúu úhú
iní ñháá xii-n canehe-xi sá
yiñùhu núú-n.”

Duha ní xáhaⁿ Dütú Ndiöxí xii Yaa
cúu Xítohó-í.

Duha ní cachí ndíi. ³⁷ ¿Te nása cùu
Cristú déhe ndíi Dàvíí, te mee ndíi ní
cachí ndíi sá cúu-gã Xítohó ndíi? —
cachí Jèsús xáhaⁿ-gã xii-yu.

Te ío cuéhé ñáyiú ní xíndedóho
nchaa tnúhu ní cáháⁿ-gã, te ío ní
cudíí ìní-yu ní xíndedóho ñháá-yu
xii-gã.

*Jèsús cáháⁿ-gã cuendá cue téé
dàcuaha ñaha xii ñáyiú nchaa tnúhu
ní chídó tnùní ndíi Moisés*

(Mt. 23:1-36; Lc. 11:37-54;
20:45-47)

³⁸ Te òré dánèhé ñháá Jèsús xii
cue ñáyiú, te xáhaⁿ-gã xii-yu:

—Cada cuendá-ndó vã cádá-ndó
dàtná quidé cue téé dàcuaha
ñaha xii ñáyiú nchaa tnúhu ní
chídó tnùní ndíi Moisés, chi
cue téé-áⁿ tnàhá ìní-güedé cui-
hnu-güedé dóó nání sá sácúihnu
cue téé cùnúu-gã te cuíni-güedé
sá méé-ní ndíi tnúhu yiñùhu
cáháⁿ ndíi ñaha ñáyiú xii-güedé
nchaa núú xícá cùu-güedé. ³⁹ Te
nàcáxi-güedé xilé sácóo nchihi
cue téé cùnúu-gã xití veñúhu
sácóo nchihi-güedé. Te ducaⁿ-ni
quide-güedé cuéi òré quíhu-güedé
mèsá caxi-güedé òré ndécú-güedé
íⁿ vico, chi mee-ni núú sácóo
cue téé cùnúu cuíni-güedé
coo-güedé. ⁴⁰ Te quèndeé-güedé
vehe nchaa ñáyiú quèé, te ío
naha cáháⁿ ndíi-güedé Yã Ndiöxí
dàndahú-güedé méé-güedé sá
ío quide ndáá-güedé cuendá sá
cuíni-güedé cáháⁿ váha ñáyiú
cuendá-güedé. Te sá dúcáⁿ
quide-güedé te ío-gã ndoho-güedé
núú úhú núú ndàhú dácúúxí
dàva-gã ñáyiú —cachí-gã xáhaⁿ-gã
xii-yu.

*Díhúⁿ nduu táhú Yã Ndiöxí ní
dáquée íⁿ ñaha ndàhú ñaha quéeé
(Lc. 21:1-4)*

⁴¹ Te núcóo Jèsús xití veñúhu
yatni núú ndécú àlcanciá te
ndèhe-gã xídáquée ñáyiú díhúⁿ xití
alcanciá-áⁿ, te tnàhá cue ñáyiú
cuica xídáquée-yu vài díhúⁿ. ⁴² Te
ní quexío íⁿ ñaha ndahú ñaha quéeé,
te ndèhe-gã ní dáquée-aⁿ úú tnàhá
díhúⁿ còbrí xití alcanciá, te díhúⁿ-áⁿ
ío sacú yáhu-xi. ⁴³ Te Jèsús ní
cana-gã cue téé xica cuu ndíi-gã,
te ní xáhaⁿ-gã xii-güedé:

—Na cachí tnúhu ndáá-í xii-ndo
sá ñaha ndahú ñaha quéeé-a ío-gã
nándíi díhúⁿ ní dáquée-aⁿ xití al-
canciá dácúúxí díhúⁿ ní dáquée
dava-gã-yu. ⁴⁴ Chi nchaa ñáyiú-áⁿ
ní dáquée-yu mee-nã díhúⁿ sã ní
quendóo-ná, dico ñaha quéeé-a cuéi
ndàhú-aⁿ dico ní dáquée-aⁿ ñíhí
díhúⁿ sã cuááⁿ sã cáxí-áⁿ ní cùu —
cachí-gã xáhaⁿ-gã xii-güedé.

13

*Jèsús cachí-gã sá ngóyó veñúhu
(Mt. 24:1-2; Lc. 21:5-6)*

¹ Te òré ní ndee Jèsús xití veñúhu
càhnu sá ío cùnúu, te íⁿ téé xica cuu
ndíi-gã ní xáhaⁿ-dẽ xii-gã:

—¡Mèstrú, cundehe nã ío víi
ní sáá veñúhu-aⁿ ndíi nchaa
vehe nèhe tnaha ndíi-xi, te ío víi
ndãa nchaa yúú yíhí! —cachí-dé
xáhaⁿ-dẽ xii-gã.

² Te Jèsús ní xáhaⁿ-gã xii-dé:

—Nchaa nàcuáa càa nchaa vehe
sá cúnúhu-n-a vítna sáá nduu
te vã cündúu-gã-xi dàtná cáá-xí
vítna, chi ní íⁿ-gã yúú vã códó
nchihi tnaha-xi, chi ndíi ngoyo —
cachí-gã xáhaⁿ-gã xii-dé.

*Nàcuáa cada-xi nduu ta cùyatni
naa ñuyúú*

(Mt. 24:3-28; Lc. 21:7-24; 17:22-
24)

³ Te Jèsús ní xica-gã ndíi cue
téé xica cuu ndíi-gã cuáháⁿ ndíi
ñaha-gã xii-güedé yucu nàni Olívú,

te yucu Òlívú-áⁿ tũu ndáá núú cáá veñúhu càhnu sá ïo cùnuu. Te Jèsús ní quexio-gá ndihi-güedé yucu Òlívú-áⁿ, te xíaⁿ ní ngóo-gá te núú núcõo-gá-áⁿ ní sáháⁿ té Pèlú ndihi té Jàcobó ndihi té Juáá ndihi té Ndrìxí, te dayuhu ní xáhaⁿ-güedé xii-gá:

4 —Cùní-ndí cachí tnúhu-n nã nduu dùcaⁿ cada-xi ngoyo veñúhu càhnu sá ïo cùnuu, àdi nãndí cùu sá cáda-xí cuendá cutnùní iní-ndí sá sà ta cuyatni nduu ducaⁿ cada-xi — cachí-güedé xáhaⁿ-güedé xii-gá.

5 Te Jèsús ní xáhaⁿ-gá xii-güedé:

—Ïo quihi iní-ndó cùndecu-ndo cuendá sá vã yõo dandáhú ñáhá xii-ndo. ⁶ Chi ïo cuéhé cue tée coo ñuyíú te danãni-güedé méé-güedé dàtná nãni-í, te cachí-güedé: “Yúhú cùu-í Cristú Yaá ní tendaha Yã Ndiõxí véxi ñuyíú-a”, duha cachí-güedé. Te sá dúcáⁿ cáháⁿ-güedé te ïo vai ñáyiu dandáhú-güedé.

7 Te òré ná ñihí-ndó tnúhu sá nãá-güedé ndèni ní cuu, te vã yùhú-ndó chi dacuití sã dúcáⁿ càda-xi, dico vátá sàá-gá nduu nãa ñuyíú òré ducaⁿ càda-xi. ⁸ Chi cue tée ìⁿ nacióⁿ nãá-güedé ndihi cue tée ìngá nacióⁿ, te titní ñuú ngúita-güedé nãá-güedé, te titní xichi ñuyíú ñihi vihi tnáa, te titní tucu xichi ñuyíú coo tnamá, te ïo-gá cuéhé sã yãha ñáyiu. Te nchaa sá dúcáⁿ càda-xi-áⁿ cùu-xí tnúndõho sá vítná vãha vãha quèsaha-xi sácúu-xí cue ñáyiu ndècu ñuyíú-a.

9 Dico nchòhó ïo quihi iní-ndó cùndecu-ndo, chi nchaa ñáyiu na cùu úhú iní ñáhá xii-ndo cuáha cuendá ñáhã-yu xii dava-ndo núú cuè tée cùchiuⁿ, te candeca ñaha-güedé xii-ndo quíhíⁿ xití veñúhu-güedé, te yácáⁿ caniha-güedé xii-ndo. Te quíhíⁿ-ndó núú cuè tée yìndaha nacióⁿ àdi núú dàva-gá cue tée cùnuu sá cuendá-í, te nchòhó ñihí-ndó nãcuáa cada-ndo cáháⁿ

vãha-ndo cuendá-í núú-güedé. ¹⁰ Te cùmání-gã sãá nduu nãa ñuyíú-a te sa cutènuu tnúhu-í ní càa xico ñuyíú-a, te tnúhu-áⁿ càháⁿ-xi nãcuáa naníhí tãhú ñáyiu. ¹¹ Te òré ná candeca ñaha ñáyiu xii-ndo quíhíⁿ núú cuè tée cùchiuⁿ cuáha cuendá ñáhã-yu, te òré vátá sãá-gã-ndó núú-güedé te vã cáni iní-ndó nũu nãsa cunduu tnúhu cùñaha-ndo xii-güedé. Chi òré-nã te Yã Ndiõxí dacàhu iní ñáhã-gã xii-ndo nãsa ducuu tnúhu cùñaha-ndo xii-güedé, te diu-ni tnúhu sá dácàhu iní ñáhã-gã-áⁿ cùñaha-ndo xii-güedé. Te ñã díú mèe-ndo cáháⁿ-ndó chi Espiritú Yã Ndiõxí cáháⁿ-xi yuhu-ndo. ¹² Te dava cue tée cuáha cuendá-güedé ñani-güedé núú cuè tée cùchiuⁿ cuendá cahni ñaha-güedé. Te dava cue tée cùu tátã diu-ni ducaⁿ càda-güedé cuáha cuendá-güedé déhe-güedé núú cuè tée cùchiuⁿ. Te dava cue tée cùu déhe cuu úhú iní-güedé tátã-güedé ndihi nãná-güedé, te cuáha cuendá ñáhã-güedé xii-yu núú cuè tée cùchiuⁿ cuendá cahni ñaha-güedé xii-yu. ¹³ Te ïo cuéhé ñáyiu cuu úhú iní ñáhã-yu xii-ndo sã cuendá-í, dico nchaa nchòhó ñáyiu na càda ndee-ni iní canchicúⁿ nihnu ñaha-ni xii-í te naníhí tãhú-ndó.

14 Te ndí Dànìel téé ní xóo cáháⁿ tnúhu Yã Ndiõxí ndéé sanaha ní chídó tnùní ndíi núú tütú ndíi cuendá ìⁿ sã dáquèe tihú Yã Ndiõxí cundecu ìⁿ xichi núú ñã túú tàu-xi cundecu-xi, te xíãⁿ cada-xi sã vã cùndècu-gá ni ìⁿ ñáyiu xíaⁿ. Te càda cuendá vãha-ndo nãcuáa ní cáháⁿ ndíi, chi nduu na quini-ndó xíãⁿ cundecu-xi ìⁿ xichi núú ñã túú tàu-xi cundecu-xi, te dàvã-áⁿ nchaa ñáyiu xìndecu distritú Jùdeá xíní ñùhu-xi cunú-yu quíhíⁿ-yu xití yucu. ¹⁵ Te nchaa ñáyiu ndáa ndódó dìquí véhé-xí vã ndíhu-gá-yu vehé-yu quehéⁿ-yu ìⁿ ndachìuⁿ-yu canehé-yu quíhíⁿ. ¹⁶ Te nchaa ñáyiu cuáháⁿ yucu ni vã nùhú-gá-yu vehé-yu cúnúquehéⁿ-yu dóó-yu.

17 ꞑTe ndàhú ní cuu nchaa ñáyiú ðìhí ñùhú ðèhe-xi, ndìhí cue ñáyiú ðìhí xĩndeca ðèhe vitna sàdi na saá nduu ðucaⁿ cada-xi! 18 Te nchòhó ío chí càcáⁿ táhú núú Yá Ndiòxí cuendá sá vâ ðúcáⁿ ndòho-ndo yóó quidé víxiⁿ-xi. 19 Chi ðavá-áⁿ coo tnúndòho cahnu vihi ñuyíú, te vátá ìíⁿ ndùu-gá coo tnúndòho cahnu vihi-áⁿ ndéé cútnàhá ní cadúha Yá Ndiòxí ñuyíú, chi ðiu-ni ðavá-áⁿ coo tnúndòho cahnu vihi-áⁿ, te ni núú cuàháⁿ núú véxi vâ cóo-gâ tnúndòho-áⁿ. 20 Te Yá Ndiòxí càchí-gá sá vâ ío vâi nduu coo tnúndòho cahnu vihi-áⁿ ñuyíú sâ cuendá nchaa ñáyiú ní cáháⁿ-gá cundecu ndìhí-gá. Te núu vâi nduu na coo tnúndòho-áⁿ, te vâ yóo cácu nihnu.

21 'Te ðavá-áⁿ cũñaha ñáyiú xii-ndo: "Chí cundèhe iha, chí iha ní quexìo Cristú Yaa ní tendaha Yá Ndiòxí véxi ñuyíú-a", duha cũñàhá-yu xii-ndo. Àdi quesahá-yu: "Chí cundèhe yacáⁿ chí yacáⁿ ndécú-gâ", quesahá-yu. Te vâ quĩndáá iní-ndó tnúhu càháⁿ-yu. 22 Te coo cue tée danàni-güedé mée-güedé ðàtná nání-í te cachí-güedé sá cúú-güedé Yaa ní tendaha Yá Ndiòxí véxi ñuyíú-a. Te dava-güedé cachí-güedé sá cúú-güedé cue tée càháⁿ tnúhu Yá Ndiòxí dico ñá ndáá sá cúú-güedé cue tée càháⁿ tnúhu-gá, te cada-güedé titní núú sâ vâ yóo tnàhí ndàcu cada cuendá dandàhú-güedé ñáyiú, te caní iní-güedé dandàhú-güedé ndéé cue ñáyiú ní cáháⁿ Yá Ndiòxí cundecu ndìhí-gá. 23 Te vitna ío váha cuáha-ndo cuendá, te quìhí iní-ndó cundecu-ndo, chí nchaa sa ní dátúha ñaha-í xii-ndo.

Nàcuáa cada-xi òré quixi tucu Tée cùu ñani tnáhá nchaa ñáyiú

(Mt. 24:29-35,42-44; Lc. 21:25-36)

24 'Te nà yáha-ni coo tnúndòho cahnu vihi-áⁿ, te vâ ðáyèhé-gá

nchíanchii te ni vâ ðáyèhé-gá yóó. 25 Te ngoyo nchaa chódíní ndéé andiu, te quidi-xi andiu. 26 Te ðavá-áⁿ quini ñáhá nchaa ñáyiú xii yúhú Tée cùu ñani tnáhá-yu nchaa-yu quee-í andiu quixi-í ichi xití vícò, te quini-yu sá ío càhnu cuu-í, te quide-í nchaa sá vâha. 27 Te tendaha-í cue espíritú xínú cuèchi núú-í quíhíⁿ-xi nadatácá-xi nchaa ñáyiú ní cáháⁿ-í chitnahá ñáhá xii-í xĩndecu ní càa xico ñuyíú.

28 'Te cundehe-ndo nàcuáa quide yutnu ngúxí, chí yutnu-áⁿ ndúú yùte núú ðité-xi te nàtahú ndaha-xi, te òré ducaⁿ quide-xi te càchí-ndó sâ sâ ní cuyatni nuu cahni. 29 Te ducaⁿ sâtnahá-xi cada-xi òré ná quini-ndó càda-xi nchaa nacúaa ní cáháⁿ-í, te cutnùní iní-ndó sâ sâ ní cuyatni vií-nâ nduu nàa ñuyíú. 30 Te na càchí tnúhu ndáá-í xii-ndo sâ òré vátá cùú-gá cue ñáyiú xĩndecu ñuyíú-a vitna, te cada-xi nchaa nàcuáa ní cáháⁿ-í. 31 Te andiu ndìhí ñuyíú-a chí ndìhí nihnu-xi, dico tnúhu-í chí vâ ndíhí nihnu-xi chí cùu-xi tnúhu ndáa.

32 'Dico ñá túú cùtnuní ná nduu quixi tucu-í, te ni ñá túú cùtnuní ná òré chí vâ yóo xini, te ni cuè espíritú xínú cuèchi núú Yá Ndiòxí ñá túú xini-xi ná nduu quixi-í, te ni mée yúhú tée cùu Déhe Dútú Ndiòxí ñá túú xini-í ná nduu quixi tucu-í, chí ìíⁿ ðii-ni mee Tàtá-í Dútú Ndiòxí xini-gá núu ná nduu quixi-í.

33 'Te nchòhó xini ñùhu-xi sá ío quìhí iní-ndó cundecu-ndo, te càháⁿ ndìhí-ndo Yá Ndiòxí, chí ñá túú xini-ndó ná nduu quixi tucu-í. 34 Te na càchí tnúhu-í xii-ndo cuendá ìíⁿ tée cuini quíngaca cuu xica. Te tée-áⁿ cùmání-gâ quee-dé vehe-dé te ní xáhaⁿ-dè xii cue tée xinu cuechi núú-dè sá ná cáda cuendá-güedé vehe-dé. Te ní sáñaha-dè xii-güedé ndí ðííⁿ núú-güedé chiúⁿ cada-güedé. Te ní xáhaⁿ-dè xii tée ndéé yuyèhe sá ná cundecu túha-ni-dé yuyèhe ndéé

nàsáá-dé. ³⁵ Te duha ndùu tnúhu càháⁿ-í cuèndá nchòhó cundecu túha-ndo, chi ñá túú xini-ndó nã nduu te ni ñá túú xini-ndó nã òré quixi tucu yúhú Yaa cúú Xitohó-ndó, núu òré sa ní cundiⁿquiⁿ, àdi dava niú, àdi oré sa ní cana uuⁿ lihi, àdi oré sa ta cùditó cuáháⁿ, núu xiáⁿ ío chí cùndècu túha. ³⁶ Te duha càháⁿ-í chí na cuáháⁿ òré ñá túú nã yihí iní-ndó quèxio-í, te ñá túú ndècu túha-ndo. ³⁷ Te dàtná-ni xáhaⁿ-í xii nchòhó sá cùndècu túha-ndo, te diu-ni ducaⁿ xáhaⁿ-í xii nchaa dava-gá ñáyiú sá cùndècu túha-yu —càchí-gá xáhaⁿ-gã xii-güedé.

14

Ndùcu-güedé nàcuáa cada-güedé cahni-güedé Jèsús

(Mt. 26:1-5; Lc. 22:1-2; Jn. 11:45-53)

¹ Te cùmání úú-gá nduu te que-saha vico pascuá, vico xèxi ñáyiú pàá sá ñá túú yihí levadurá. Te cue dútú cùnùu, ndihi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés ndúcú-güedé nàcuáa cada-güedé dandàhú-güedé Jèsús cuèndá tni ñaha-güedé xii-gá te cahni ñaha-güedé. ² Te ní xitnàha-güedé:

—Váha-gá sá vã tñí-ó Jèsús mei ndùu vico, chí núu ducaⁿ na càda-o te ío dusaⁿ càda ñáyiú —càchí-güedé xitnàha-güedé.

Íi ñadìhí chíhí-áⁿ àciti díquí Jèsús
(Mt. 26:6-13; Jn. 12:1-8)

³ Te Jèsús ndécú-gã ñuú Bètania vehe ìiⁿ tée nàni Xímú, tée ní tnahá cuéhé sá dátèhyú nihnu-xi yiqui cùñú-ó. Te yihí Jèsús mèsá xéxi-gã ní quexìo ìiⁿ ñadìhí néhé-áⁿ ìiⁿ sá ñi cuáha yúú vãha yúú nání àlabastrú, te xití xiáⁿ ñúhú àciti sàháⁿ tnámí sá nání nãrdú sá ío ndèyáhu, te ní tãhú-áⁿ xiáⁿ te àciti ñúhú xití-xi-áⁿ ñi sódó-aⁿ díquí Jèsús. ⁴ Te ìiⁿ úú cue tée xíndecu-áⁿ ñi

cudééⁿ-güedé sá dúcáⁿ ñi quide-aⁿ, te ní xitnàha-güedé:

—Ñá túú quide váha ñaha-áⁿ dàcáⁿ quidé-áⁿ, chí íi ñi dácuíta-aⁿ àciti váha-áⁿ. ⁵ Chí váha-gá ñuú cuyáhu àciti-áⁿ sá ùní cièndú díhúⁿ denariú, te díhúⁿ sá cùyáhu àciti-áⁿ cuu cuèndá ñáyiú ndàhú ní cùu —càchí-güedé xitnàha-güedé.

Te ní tenáa-güedé ñaha-áⁿ sá dúcáⁿ ñi quide-aⁿ.

⁶ Te Jèsús ní xáhaⁿ-gã xii-güedé:

—Chí dáñá, vá dásatú-ndó iní ñadìhí-a, chí sá ñi quide ñaha-aⁿ xii-í cúú-xí ìiⁿ sá vãha. ⁷ Chí cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, te nání òré càchí iní-ndó te chindee-ndó-yu. Dico yúhú chí vá nchaa ndùu cundecu ndihi ñaha-í xii-ndo ñùyíú-a. ⁸ Te ñadìhí-a ní quide-aⁿ ìiⁿ sá vãha ndéé neni ní ndacu-aⁿ, chí sá dúhá ñi quide ñaha-aⁿ xii-í ní chihi ñaha-aⁿ àciti, te xiáⁿ cada iní-ndó sã sã quide túha-aⁿ yiqui cùñú-í cuèndá quíndúxi-xi. ⁹ Te na càchí tnúhu ndáá-í xii-ndo sã ndèni ní cuu nihí ñuyíú ná càháⁿ ñáyiú tnúhu-í, te càháⁿ-yu tnahá cuèndá ñadìhí-a cuèndá quiní nchaa ñáyiú nàcuáa ní quide-aⁿ, te ducaⁿ vã nàcuána-yu —càchí-gá xáhaⁿ-gã xii-güedé.

Té Jùdás ndúcú-dě nàcuáa cada-dé cuáha cuèndá-dé Jèsús núú cuè tée cùu úhú iní ñáhá xii-gá
(Mt. 26:14-16; Lc. 22:3-6)

¹⁰ Te té Jùdás Iscarioté ní sáháⁿ-dé ní ndatnúhu-dé ndihi cue tée cùu dútú cùnùu sá cuáha cuèndá-dé Jèsús núú-güedé, te núu tnahá té Jùdás-áⁿ cúú ùxúú tnahá cue tée xica cuu ndihi-gá ní cùu. ¹¹ Te òré ducaⁿ ñi ndatnúhu-dé ndihi-güedé, te ío ní cudí iní-güedé, te ní xáhaⁿ-güedé xii-dé sá cuáñaha-güedé díhúⁿ xii-dé. Te té Jùdás-áⁿ ñi ngüíta-dé ndúcú-dě nàcuáa cada-dé cuáha cuèndá-dé Jèsús núú-güedé.

Cùdini Jesús ndihi cue téé xica cuu ndihi-gá

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Te ní sáá nduu nĩ quesaha vico pascuá, vico ñá túú xèxi ñáyiú pàá sá ñà túú yìhi levadurá, te ñu-ni nduu-áⁿ sáhní-güedé ñⁿ mbéé lĩhli xèxi-yu nduu vico pascuá-áⁿ. Te cue téé xica cuu ndihi Jesús ní xicáⁿ tnúhú-güedé núú-gá, te xáhaⁿ-güedé xii-gá:

—Mèstrú, véxi-ndí xicáⁿ tnúhú-ndí núú-n nũu ndéé cáá vèhe cuiní-n càda túha-ndí sá cùdini-o sacuaa nduu vico pascuá —cächí-güedé xáhaⁿ-güedé xii-gá.

¹³ Te Jesús ní xáhaⁿ-gá xii úú-ni tnáhá cue téé xica cuu ndihi-gá:

—Chí cuáháⁿ xití ñuú-áⁿ, te yàcáⁿ naníhí-ndó ñⁿ téé tànehe yóó ndute, te téé-áⁿ cándèndaha-ndo-dé quíhíⁿ. ¹⁴ Te núu ndèdacàa vehe na ndíhu-dé te xíáⁿ quíhu-ndo. Te cúñaha-ndo xii xitohó vehe-áⁿ: “Yáa cúú Mèstrú cächí-gá sá nũu ndèdacàa xichi xití vehe-n cuáñaha nũu-n xii-gá cudini-gá ndihi cue téé xica cuu ndihi-gá sacuaa nduu pascuá”, duha cúñaha-ndo. ¹⁵ Te dàtnùní danéhé ñáhá-dé xii-ndo ñⁿ cuartú cáhnú càa núú ñũu, chí vehe yòdo tnaha cuu-xi, te sa ní quide túha-dé nchaa sá nándíhi, te nchòhò dìcò-ná comidá cada túha-ndo cùdini-o —cächí-gá xáhaⁿ-gá xii-güedé.

¹⁶ Te cue téé-áⁿ nĩ xica-güedé cuáháⁿ-güedé xití ñuú-áⁿ, te nchaa-ni nàcuáa ní xáhaⁿ Jesús ní cuu. Te ní quide túha-güedé sá cùdini-güedé ndihi-gá sacuaa nduu vico pascuá-áⁿ.

¹⁷ Te sáta nĩ cundiⁿ te ní quexio Jesús ndihi ndi ùxúú cue téé xica cuu ndihi-gá. ¹⁸ Te cuánguihu-gá mèsá ndihi-güedé cuèndá cudini ndihi ñaha-gá xii-güedé, te òré yíhí-gá mèsá ndihi-güedé, te xáhaⁿ-gá xii-güedé:

—Na cächí tnúhu ndáá-í xii-ndo sá ñⁿ nchòhó cue téé xèxi ndihi ñaha xii-í cuáha cuèndá ñáhá-ndó núú cuè téé cùu úhú iní ñáhá xii-í —cächí-gá xáhaⁿ-gá xii-güedé.

¹⁹ Te sá dúcáⁿ nĩ xáhaⁿ-gá xii-güedé, te nchaa-güedé ní ngúita-güedé cundiⁿ-güedé. Te da ñⁿ da ñⁿ-güedé ní ngúita-güedé xicáⁿ tnúhú-güedé núú-gá, te xáhaⁿ-güedé xii-gá:

—¿Ñá díú yúhu ducaⁿ sàni iní-n càda-í-u? —cächí-güedé xáhaⁿ-güedé xii-gá.

²⁰ Te Jesús ní xáhaⁿ-gá xii-güedé:

—Ñu-ni ñⁿ nchòhó cue téé ùxúú xicá cùu ndihi-í, téé na dàquèndaha còhò òré dàquèndaha-í, téé-áⁿ cuáha cuèndá ñáhá-dé xii-í núú cuè téé cùu úhú iní ñáhá. ²¹ Te yúhu Téé cùu ñani tnáhá-ndo nchaa-ndo ñuhu ichi-í cuáháⁿ-í ndoho-í nàcuáa càháⁿ-xi núú tütú Yá Ndióxi. Dico ndáhú ní cuu tée ducaⁿ na cuáha cuèndá ñáhá xii-í núú cuè téé cùu úhú iní ñáhá, chí váha-gá sá vá cáci tée-áⁿ cundecu-dé ní cùu, te ñá díú sá nĩ cacu-dé te ducaⁿ càda-dé —cächí-gá xáhaⁿ-gá xii-güedé.

²² Te nini cùdini cue téé xica cuu ndihi Jesús ní queheⁿ-gá pàá, te ní ndacáⁿ táhú-gá núú Yá Ndióxi, te dàtnùní ní táhú cuèchi-gá, te ní ngúita-gá dácáhnũ ñaha-gá xii-güedé, te xáhaⁿ-gá:

—Chí quéhéⁿ pàá-a caxi-ndo, te cada iní-ndó sá cúú-xí dàtná yiqui cùñú-í —cächí-gá xáhaⁿ-gá xii-güedé.

²³ Te ní queheⁿ-gá vàsú ñũhú ndudí ndéhé yoho yàha stilé, te ní ndacáⁿ táhú-gá núú Yá Ndióxi, te dàtnùní ní ngúita-gá sáñaha-gá xii-güedé cuèndá coho-güedé luha luha sá ñúhú xití-xi, te nchaa-güedé ní xihí. ²⁴ Te ní xáhaⁿ-gá xii-güedé:

—Ndudí ndéhé yoho yàha stilé-a cada iní-ndó sá cúú-xí dàtná ñĩñ-í sá cáci òré cahni ñaha-güedé xii-í. Te sá dúcáⁿ càti ñĩñ-í xíáⁿ cutnùní ndáá sá Yá Ndióxi cada-gá ingá núú sá váha sá cúú-xí vai ñáyiú

dàtná ní cachí-gá cada-gá. ²⁵ Te na cächí tnúhu ndáá-í xii-ndo sã vitná-nã duha xíhi-í ndudí ndéhé yoho yáha stilé-a te vá cóhó-gã-í, dico na sãá nduu cundeçu-í núú ndécú Yã Ndiõxí táxí tnúni-gá, te dàvá-án cada iní-í sã dàtná sã cóhó tùcu-í chí ío cudí iní-í —cächí-gá xãhaⁿ-gã xii-güedé.

Jèsús càháⁿ-gá sá tẽ Pèlú cúñaha-dẽ xii ñáyiú sá ñà túú xìní ñáhá-dẽ xii-gá

(Mt. 26:30-35; Lc. 22:31-34; Jn. 13:36-38)

²⁶ Te Jèsús ní xita-gá ñⁿ ndudú ndíhi cue tée xica cuu ndíhi-gá, te dàtnúni ní xica-gá cuáháⁿ-gá ndíhi-güedé yucu Òlívú. ²⁷ Te yàcáⁿ ní xáhaⁿ-gã xii-güedé:

—Na cächí tnúhu-í xii-ndo sã ncháá-ndó dàña nihnu ñaha-ndo xii-í niú vitna, chí quee ndáá-xi nàcuáa càháⁿ-xi núú tùtú Yã Ndiõxí núú cächí-xi: “Yúhú cuáha-í tnúhu cahni-güedé tée cùu toli, te nchaa mbéé-dẽ ndíhi-güedé cuténuu”, duha cächí-xi núú tùtú-gá. ²⁸ Dico na cùú-í te ndoto-í te codonù-í núú-ndó quíhíⁿ distritú Galiléa —cächí-gá xáhaⁿ-gã xii-güedé.

²⁹ Te té Pèlú ní xáhaⁿ-dẽ xii-gá:

—Te cuéi nchaa-güedé ná dándóo ñaha-güedé xii-í, dico yúhú chí vá dándóo ñaha-í xii-n —cächí-dé xáhaⁿ-dẽ xii-gá.

³⁰ Te Jèsús ní xáhaⁿ-gã xii-dé:

—Na cächí tnúhu ndáá-í xii-n sã niú vitna cùmání-gá cana líhi úú xito, te úní xito càháⁿ-n núú ñáyiú sã ñà túú xìní ñáhà-n xii-í —cächí-gá xáhaⁿ-gã xii-dé.

³¹ Dico té Pèlú ní càháⁿ ñí-dé, te xáhaⁿ-dẽ xii-gá:

—Cuéi na cùú ndíhi ñaha-í xii-n dico vá càháⁿ-í núú ñáyiú sã ñà túú xìní ñáhà-í xii-n —cächí-dé xáhaⁿ-dẽ xii-gá.

Te nchaa dava-gá cue tée xica cuu ndíhi-gá diu-ni ducaⁿ ní xáhaⁿ-güedé xii-gá.

Jèsús càháⁿ ndíhi-gá Yã Ndiõxí ñⁿ xichi núú nání Gètsemaní
(Mt. 26:36-46; Lc. 22:39-46)

³² Te Jèsús cuáháⁿ-gá ndíhi cue tée xica cuu ndíhi-gá ñⁿ xichi núú nání Gètsemaní. Te òré ní quexìo-gá ndíhi-güedé xiáⁿ, te ní xáhaⁿ-gã xii-güedé:

—Chí cúnúcoo iha cundetun-do na quíhíⁿ-í yàcáⁿ càháⁿ ndíhi-í Yã Ndiõxí —cächí-gá xáhaⁿ-gã xii-güedé.

³³ Te ndèca-gá té Pèlú, ndíhi té Jàcobó, ndíhi té Juàá cuáháⁿ, te ñà túú tñahí-gá cùú vãha iní-gá te ní ngúíta-xi súúni ndíhú iní-gá. ³⁴ Te ní xáhaⁿ-gã xii cue tée úní-án:

—Súúni ndíhú iní-í dàtná sã cùú-í, te chí quéndóo iha te vá cùdú-ndó —cächí-gá xáhaⁿ-gã xii-güedé.

³⁵ Te sã ñùnchí luha ní xica ndehe Jèsús núú ndécú-güedé, te ní ngáundeyi-gá ndéé ñuhu càháⁿ ndíhi-gá Tátá-gã Dútú Ndiõxí sã núu vá cündèe iní-gá taunihnu ñaha-gã xii-gá cuendá nchaa nàcuáa yáha-gá. ³⁶ Te òré càháⁿ ndíhi Jèsús Tátá-gã Dútú Ndiõxí, te xáhaⁿ-gã:

—Yòhó tátá mèe-í, nchaandi túhú sã vãha ndàcu-n quide-n, te càháⁿ ndàhú-í núú-n núu vá cündèe iní-n taunihnu ñaha-n xii-í cuendá sã vá ndóhò-í ná sãá òré, dico vá cáda-n nàcuáa cächí iní mèe-í chí cada-n nàcuáa cächí mee-n —cächí-gá xáhaⁿ-gã xii Tátá-gã Dútú Ndiõxí.

³⁷ Te sátá ñí yáha ní càháⁿ ndíhi-gã Tátá-gã Dútú Ndiõxí, te cuánuhú-gá núú ní dándóo-gá cue tée úní-án, te xixidí-güedé òré ní nasáá-gá, te ní xáhaⁿ-gã xii té Pèlú:

—Xímú, ¿náa sama xidí-n? ¿Náa ñà cündèe tñahi núú-n vã cùdú-ni-n cuédicó ñⁿ òré-án? —cächí-gã xáhaⁿ-gã xii-dé.

Te ní xáhaⁿ tùcu-gá xii-güedé:

³⁸ —Te chí quéndóo tuçu, te cuhúⁿ iní-ndó vã cùdú-ndó, te càháⁿ ndíhi-ndo Yã Ndiõxí cuendá sã vá dácàháⁿ ñáhà yùcu ñávãha

xii-ndo càda-ndo sá ñà túú tàú-ndó càda-ndo. Te na cächí tnúhu ndáá-í xii-ndo sá nchòhó cuíní-ndó càda-ndo nchaa nacuaá cáhá-í dícó-ni sá ñà túú ñihí ndéé-ndó — cächí-gá xáhaⁿ-gá xii-güedé.

³⁹ Te Jèsús ní xica tucu-gá cuáháⁿ-gá cáháⁿ ndihi-gá Tátá-gá Dútú Ndiöxí, te diu-ni nàcuáa ní xáhaⁿ-gá díhna xáhaⁿ tùcu-gá. ⁴⁰ Te òré ní yáha ní cáháⁿ ndihi-gá Tátá-gá Dútú Ndiöxí, te cuánuhú tucu-gá núú xindecu cue téé úní xicá cùu ndihi-gá-áⁿ, te xidí-ni tucu-güedé òré ní nasáá-gá, te ducaⁿ ní quide-güedé chi súúni ñúhu saní núú-güedé, te ñá ní ñihí-güedé tnúhu cúnaha-güedé xii-gá òré ní nasáá-gá. ⁴¹ Te ní sáháⁿ tucu-gá xito cùu úní ní cáháⁿ ndihi-gá Tátá-gá Dútú Ndiöxí, te òré ní nasáá tucu-gá núú xindecu-güedé, te xáhaⁿ-gá xii-güedé:

—¿Te náa xidí-ni tucu-ndo?, te vitna vá cùdú-gá-ndó chi sa ní sáá òré cuáha cuendá ñáhá-güedé xii yúhú Téé cùu ñani tnáhá-ndó nchaa-ndo núú cuè téé ndècu ichi cuehé ichi duha. ⁴² Te vitna chí ndácóo na quihíⁿ-ó chi sa véxi téé cuáha cuendá ñáhá xii-í núú cuè téé cùu úhú iní ñáhá —cächí-gá xáhaⁿ-gá xii-güedé.

Ní tñi-güedé Jèsús ndécá ñaha-güedé xii-gá cuáháⁿ

(Mt. 26:47-56; Lc. 22:47-53; Jn. 18:2-11)

⁴³ Te cáháⁿ dúcáⁿ-ní Jèsús ní quexio té Júdás. Te núú tnáhá téé-áⁿ cùú ùxúú tnáhá cue téé xica cuu ndihi-gá. Te ndihi-dé vai cue téé ní quexio, te dava-güedé xínehe-güedé machiti te dava-güedé xínehe-güedé carrutí. Te cue téé-áⁿ ní tendaha ñaha cue dútú cúnúu ndihi cue téé dàcuaha ñaha xii ñayiu nchaa tnúhu ní chídó tnùní ndíi Moisés, ndihi cue téé cùu sacuéhé núú ñayiu isráel. ⁴⁴ Te té Júdás téé cuáha cuendá ñáhá xii Jesús sa ní xitnúhu-dé cue téé-áⁿ nacuaá cada-dé cuáha cuendá

ñáhá-dé xii Jèsús núú-güedé. Te duha ní xáhaⁿ-dé xii-güedé:

—Cundehe-ndo téé na tøyuhu-í, te téé-áⁿ tñi-ndo-dé chi téé-áⁿ cùú-dé téé ndéé iní-ndó, te ío quihí iní-ndó càneca-ndo-dé quihíⁿ — duha ní xáhaⁿ-dé xii-güedé.

⁴⁵ Te òré ní quexio té Júdás ndihi cue téé-áⁿ núú ndécú Jèsús, te ní xáhaⁿ-dé xii-gá:

—Mèstrú —cächí-dé xáhaⁿ-dé xii-gá.

Te ní tøyuhu ñaha-dé. ⁴⁶ Te nchaa cue téé ndihi-dé-áⁿ ní tñi-güedé Jèsús cuendá candeca ñaha-güedé xii-gá quihíⁿ. ⁴⁷ Te ìⁿ cue téé cündihi Jesús ní tava-dé machiti-dé, te ní xehndé-ni-dé ìⁿ xio lóho ìⁿ téé xinu cuechi núú dútú cúnúu, te ní quen-deé duuⁿ lóho téé-áⁿ. ⁴⁸ Te Jèsús ní xáhaⁿ-gá xii cue téé ní tñi ñaha xii-gá-áⁿ:

—Nchòhó, nèhe-ná-ndó màchiti, nèhe-ná-ndó càrrutí véxi ní tñi ñaha-ndo xii-í, dàtná quidé-ndó ìⁿ ñadúhú quidé ñaha-ndo xii-í. ⁴⁹ Te nchaa-ni nduu ní xini-ndó ní xindecu-í xití veñúhu càhnu sá ío cúnúu ní xóo danèhé-í ñayiu, te ñá túú ní tñi ñaha-ndo xii-í. Dico dàcuítí sá dúhá yáha-í cuendá quee ndáá-xi nàcuáa cáháⁿ-xi núú tütú Yá Ndiöxí —cächí-gá xáhaⁿ-gá xii-güedé.

⁵⁰ Te nchaa cue téé xica cuu ndihi-gá ní xinu-güedé ní dándóo ñaha-güedé xii-gá.

Ìⁿ téé cuechi ní xinu-dé

⁵¹ Te ìⁿ téé cuechi ndëndaha-dé Jèsús cuáháⁿ, te lavichi-dé, ìⁿ-ni dóo yadí yidúcúⁿ nuu-dé ñihí-dé, te ní tñi ñaha-güedé xii-dé, ⁵² dico ní ndacu-dé ní quenuñi-dé te ní dándóo-dé dóo yidúcúⁿ nuu-dé-áⁿ ní xinu-dé.

Jèsús ndécú-gá jündá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Te cue téé ní tñi ñaha xii Jesús ndécá ñaha-güedé xii-gá cuáháⁿ

núu tée cùu dútú cúnùu-gá. Te xiáⁿ nĩ tacá nchaa dava-gá cue tée cùu dútú cúnùu, ndihĩ cue tée cùu sacuéhé núu ñáyiũ isràél, ndihĩ cue tée dàcuaha ñaha xií-yu nchaa tnúhu ní chídó tnùnĩ ndjĩ Moisés cuendá cada-güedé jündá. ⁵⁴ Te té Pèlú xica xica-ni nchicúⁿ ñáhá-dé xii-gá cuáháⁿ ní sáá-dé ndéé quehé vehe núu ndécú tée cùu dútú cúnùu-gá-án, te xiáⁿ nĩ ngóo teté-dé yuhu nùhú ndihĩ cue tée cùu poleciá.

⁵⁵ Te cue tée cùu dútú cúnùu ndihĩ nchaa dava-gá cue tée xĩndecu jündá ndúcú-güedé ñáyiũ dacàa ìⁿ cuéchi díquí Jèsús cuendá ducaⁿ nĩhĩ-güedé nàcuáa cada-güedé cahni ñaha-güedé xii-gá, dico ñá túú ní ndàcu-güedé. ⁵⁶ Te cuèi vai ñáyiũ dàcaá-yu cuéchi díquí-gá dico mee-ni sã nĩ cahu iní mée-yu ní cãháⁿ-yu, chí tucu cãháⁿ ìⁿ tucu cãháⁿ ìⁿ-yu. ⁵⁷ Te davá-yu ní ndacuíñi-yu te ní ngüíta-yu dàcaá-yu ìⁿ cuéchi neñúú díquí-gá, te xãháⁿ-yu xii nchaa cue tée cùnùu:

⁵⁸ —Nchúhú ní tecú dóho-ndí cãchĩ-dé sã dãngòyo-dé veñúhu cãhnu sã ïo cùnùu sã nĩ dácáa cuè tée ñuyíú-a, te dandaa tucu-dé ìngá veñúhu saa, ñu-ni núu cáá tnahĩ veñúhu-án te xitĩ únĩ-ni nduu sa nadaxĩnu-dé, te vá cúu-gã-xi veñúhu sã nĩ dácáa cuè tée ñuyíú-a, ñuha cãchĩ-dé ní tecú dóho-ndí —cãchĩ-yu xãháⁿ-yu xii-güedé.

⁵⁹ Dico ni ñucaⁿ ñá túú ní cùu ìⁿnuú-yu nchaa tnúhu ní cãháⁿ-yu.

⁶⁰ Te tée cùu dútú cúnùu-gá ní ndacuíñi-dé tnuú nchaa ñáyiũ, te xãháⁿ-dè xii Jèsús:

—¿Ná cuendá ñaha ndùu tnúhu cãháⁿ ñáyiũ-a cuendá-n? Te cãháⁿ nũ ñasa ndùu tnúhu cãháⁿ-n —cãchĩ-dé xãháⁿ-dè xii-gá.

⁶¹ Dico Jèsús ñá túú tnahĩ ní cãháⁿ-gá. Te tée cùu dútú cúnùu-gá-án nĩ xãháⁿ tùcu-dé xii-gá:

—Cuìnĩ cachĩ tnúhu-n xii-ndí núu sã díú Cristú Déhe Yá Ndiòxí Yáá ní tendaha-gã véxi ñuyíú-a cùu-n. Te ñu Yá Ndiòxí cúu-gã Yáá quidé cãhnu-ndí —cãchĩ-dé xãháⁿ-dè xii-gá.

⁶² Te Jèsús ní xãháⁿ-gã xii-dé:

—Ñu Yáá-án cúu-í, te na cãchĩ tnúhu-í xii-ndo sã sãá nduu te quini-ndo yúhú Tée cùu ñani tnahá-ndo nchaa-ndo cuucóo-í xio cùha Dútú Ndiòxí Yáá ndácú quide nchaandi túhú sã vãha. Te davá-án quini ñáhá-ndo xii-í quee-í andiũ quixi-í ichi xitĩ vícò —cãchĩ-gá xãháⁿ-gã xii-dé.

⁶³ Te dútú cúnùu-gá-án nĩ ndátá-dè dóó canĩ nihnu-dé cuendá sã ñá túú ní tnahá iní-dé nàcuáa ní cãháⁿ Jèsús, te ní xãháⁿ-dè xii nchaa cue tée xĩndecu jündá:

—Ñá túú-gã xini ñuhu-xi cue tée cãháⁿ nũ ndáá sã ndècuéchi-dé àdi ñá túú ndècuéchi-dé. ⁶⁴ Chí sa ní xĩndedóho-o nàcuáa ndùu tnúhu ní cãháⁿ-dè ní cãháⁿ úhú-dé cuendá Yá Ndiòxí, te nchaa-ndo chí cãháⁿ vitna núu ñasa sãni iní-ndo cùnduu cuendá tée-a —cãchĩ-dé xãháⁿ-dè xii-í-güedé.

Te nchaa-güedé ní cachĩ-güedé sã ná cúu-dé.

⁶⁵ Te dava-güedé ní ngüíta-güedé ní tíú ñi ñáhá-güedé xii-gá, te ní dádãhu-güedé núu-gã, te ní ngüíta-güedé canĩha-güedé xii-gá, te xãháⁿ-güedé:

—¿Cãháⁿ ná cótó ñá cúu tée ní canĩha xii-n! —cãchĩ-güedé xãháⁿ-güedé xii-gá.

Te cue tée cùu poleciá ní canĩ-güedé núu-gã.

Té Pèlú cãháⁿ-dé núu ñáyiũ sã ñá túú xini-dé Jèsús

(Mt. 26:69-75; Lc. 22:56-62; Jn. 18:15-18, 25-27)

⁶⁶ Te ndéé xitĩ vehe cãa núu ñinu quide-güedé jündá, chí vehe yòdo tnahã cuu-xi, te té Pèlú núcóo-dé quehé vehe-án. Te ìⁿ xíchĩ xínú cuèchi núu dútú cúnùu-án nĩ quexio-xi núu núcóo té Pèlú. ⁶⁷ Te

òré ní xini ñáhá-xí xii-dé núcõo teté-dé yuhu nùhú, te ní xindéhé ñaha váha-xi xii-dé, te xáhaⁿ-xi:

—Yohó tnahá-n cùu-n téé xica cuu ndihi Jèsús téé ñuú Nazàrét — càchí-xi xáhaⁿ-xi xii-dé.

⁶⁸ Te té Pèlú ní xáhaⁿ-dè xii-xi:

—Yúhú ñà túú xini-í téé-áⁿ, te ní ñà túú cùtnuní iní-í nása ndùu tñúhu càháⁿ-n — càchí-dé xáhaⁿ-dè xii-xi.

Te té Pèlú ní xica-dé cuáháⁿ-dè ndàa nacúaa nchiì yuyèhe vehe-áⁿ, te ní cana ìⁿ líhi. ⁶⁹ Te xíchí xínú cuèchi-áⁿ ní xini ñáhá tucu-xi xii-dé, te xáhaⁿ-xi xii nchaa ñáyiú xĩndecu-áⁿ:

—Diu téé-áⁿ tnahá-dé xicá cùu-dé ndihi téé ndèca-güedé cuánguihu-a — càchí-xi xáhaⁿ-xi xii-yu.

⁷⁰ Dico té Pèlú ñà túú ní nñuu tucu-dé sá xicá cùu-dé ndihi Jèsús. Te tna tnaa-ni ní cuu sá dúcáⁿ ní xáhaⁿ xíchí-áⁿ xii-dé, te ní xáhaⁿ tucu dava cue ñáyiú xĩndecu-áⁿ xii-dé:

—Ndáá sá tnahá-n cùu-n téé xica cuu ndihi téé ndèca-güedé cuánguihu-áⁿ chi cùu-n téé distritú Galileá, te càháⁿ-n dàtná càháⁿ-güedé — càchí-yu xáháⁿ-yu xii-dé.

⁷¹ Te té Pèlú ní xáhaⁿ-dè xii-yu:

—Nchàcuii Yá Ndiõxí sá yúhú càháⁿ ndáá-í sá ñà túú xini-í téé càcunehé-ndo-áⁿ — càchí-dé xáhaⁿ-dè xii-yu.

⁷² Te òré-ni-áⁿ ní cana tucu líhi xito cùu úú, te òré-áⁿ ní ndacu iní té Pèlú nàcuáa ní xáhaⁿ Jèsús xii-dé sá cùmání-gá cana ìⁿ líhi úú xito te úní xito càháⁿ-dè núú ñáyiú sá ñà túú xini ñáhá-dè xii-gá. Te òré ducaⁿ ní ndacu iní-dé nàcuáa ní xáhaⁿ Jèsús xii-dé, te ní ndáhyú-dé ní ndixi cuéchi iní-dé.

15

Jèsús ndécú-gá núú tē Pilatú

(Mt. 27:1-2, 11-14; Lc. 23:1-5; Jn. 18:28-38)

¹ Te sáta ní túnadaa te cue téé cùu dútú cùnùu, ndihi cue téé cùu sacuéhé núú ñáyiú isràél, ndihi cue téé dàcuaha ñaha xii ñáyiú nchaa tñúhu ní chídó tñuní ndíi Moisés, ndihi nchaa dava-gá cue téé cùnùu

ní xĩndecu jundá ní nataká-güedé, te ní dácútú-güedé Jèsús te ndèca ñaha-güedé xii-gá cuáháⁿ núú tē Pilatú. ² Te té Pilatú ní xicáⁿ tñúhú-dè núú Jèsús, te xáhaⁿ-dè xii-gá:

—¿Ndáá sá díú-n cùu-n téé yĩndaha ñaha xii ñáyiú isràél-áⁿ? — càchí-dé xáhaⁿ-dè xii-gá.

Te Jèsús ní xáhaⁿ-gá xii-dé:

—Diu-í yĩndaha-í-yu — càchí-gá xáhaⁿ-gá xii-dé.

³ Te cue téé cùu dútú cùnùu da-caa-güedé vai cuéchi díquí-gá. ⁴ Te té Pilatú ní xicáⁿ tñúhú tucu-dé núú-gá, te xáhaⁿ-dè xii-gá:

—Cáháⁿ, ná cuendá ñà càháⁿ-n te cundehe nã ndéé duha titní cuéchi dàcaa díquí ñáhá cue téé-a xii-n — càchí-dé xáhaⁿ-dè xii-gá.

⁵ Dico Jèsús ñà túú tnahí ní càháⁿ-gá te té Pilatú ío ní cuñúhu-dé sá dúcáⁿ ñà túú tnahí ní càháⁿ-gá.

Cue ñáyiú xáháⁿ-yu xii té Pilatú sá cáhni-dè Jèsús

(Mt. 27:15-31; Lc. 23:13-25; Jn. 18:38-19:16)

⁶ Te ndi tnahá nduu víco pas-cuá dácácu té Pilatú ìⁿ téé yìhi ve-caá chi ducaⁿ tnahí quide-dé, te mee ñáyiú càháⁿ-yu te núu ndèdacaà téé yìhi vecaá-áⁿ cãcu-dé, te téé-áⁿ dácácu-dé. ⁷ Te yìhi ìⁿ téé nani Barrabás vecaá ndihi dava-gá cue téé cùndihi-dé. Te té Barrabás-áⁿ ní sanu ichi-dé ñáyiú ñuú ingá ichi, te ní ngúita-yu ndihi-dé ní cuu úhú iní-yu cue téé cùchiuⁿ, te ní sahani-dé ndiyi núu xíáⁿ ní chihí ñaha-güedé vecaá xii-dé. ⁸ Te nchaa ñáyiú ní sáháⁿ-yu núú tē Pilatú, te càháⁿ ndáhú-yu núú-dè sá ná cáda nahi-ni-dé dàtná quidé-dè. ⁹ Te té Pilatú ní xáhaⁿ-dè xii-yu:

—¿Cuini-ndó sá dácácu-í téé yĩndaha ñaha xii ñáyiú isràél-áⁿ? — càchí-dé xáhaⁿ-dè xii-yu.

¹⁰ Te ducaⁿ ní càháⁿ té Pilatú, chi ní cutnuni iní-dé sá dícó sá cuèdú

íní cuè dútú cúnùu núu xíáⁿ ducaⁿ ní quide-güedé ní sáha cuèndá ñáhá-güedé xii Jèsús núu-dě. ¹¹ Te cue dútú cúnùu ní xáhaⁿ-güedé xii nchaa ñáyiú sá ná cùñáhá-yu xii té Pilatú dácácu-dé té Barrábás, te ní quide-yu nàcuáa ní xáhaⁿ-güedé. ¹² Te té Pilatú ní xícaⁿ tnúhú-dě núu-yu, te xáháⁿ-dě xií-yu:

—¿Ná cuíni-ndó càda-í tée càchí-ndó yìndaha ñaha xii ñáyiú isràel-i? —càchí-dé xáháⁿ-dě xií-yu.

¹³ Te ncháá-yu níhi ní cáháⁿ-yu, te xáháⁿ-yu xii-dé:

—¿Cata caa-dé núu cùrúxí! — càchí-yu xáháⁿ-yu xii-dé.

¹⁴ Te té Pilatú ní xáhaⁿ-dě xií-yu:

—¿Te ná cúu cuèchi ní quide-dé te núu ducaⁿ cuíni-ndó càda-í-dé-i? — càchí-dé xáháⁿ-dě xií-yu.

Dico ncháá-yu uuⁿ-gá níhi ní cáháⁿ-yu, te xáháⁿ-yu xii-dé:

—¿Cata caa-dé núu cùrúxí! — càchí-yu xáháⁿ-yu xii-dé.

¹⁵ Te té Pilatú ní quide-dé nàcuáa ní xáháⁿ-yu xii-dé cuèndá sá cúdiu-dé núu-yu, te ní dácácu-dé té Barrábás, te ní táuchíuⁿ-dě ní cani-güedé Jèsús ndíhi ñíi. Te sáta dúcáⁿ ní quide ñaha-güedé xii-gá, te ní táuchíuⁿ-dě candeca ñaha-güedé quíhíⁿ cata caa ñaha-güedé xii-gá núu cùrúxí.

¹⁶ Te cue tée cùu sandadú ndéca ñaha-güedé xii-gá cuáháⁿ vechíuⁿ, te diu-ni xíáⁿ cúu vèhe tée cùu gobiernú. Te xíáⁿ ní tacá nchaa dava-gá cue tée cùu sandadú.

¹⁷ Te xíáⁿ ní dácúíhnú ñaha-güedé xii-gá ñí dóo tìcuèhé víhí, te ní cadúha-güedé ñí coróná íñu ní chihi-güedé díquí-gá. ¹⁸ Te ní ngúíta-güedé níhi càháⁿ-güedé cúdíquí ndeé ñáhá-güedé xii-gá, te xáháⁿ-güedé:

—¿Ío càhnu cuu yohó tée yìndaha ñaha xii ñáyiú isràel! —càchí-güedé xáháⁿ-güedé xii-gá.

¹⁹ Te càni-güedé díquí-gá ndíhi ñí carrútí, te tíu díí ñáhá-güedé

xii-gá, te ngüíñí xítí-güedé núu-gá quidé-güedé sá néhé-güedé sá yíñuhu núu-gá dico ñá ndáa chi díco cúdíquí ndeé ñáhá-güedé xii-gá. ²⁰ Te sáta dúcáⁿ ní

cúdíquí ndeé ñáhá-güedé xii-gá, te ní nataunuu ñaha-güedé xii-gá dóo tìcuèhé víhí sá ní dácúíhnú ñaha-güedé, te ní dándíunuu ñaha-güedé xii-gá dóo méé-gá. Te dātñuní ndéca ñaha-güedé cuáháⁿ núu cáta càa ñaha-güedé xii-gá núu cùrúxí.

Sàta caa-güedé Jèsús núu cùrúxí

(Mt. 27:32-44; Lc. 23:26-43; Jn. 19:17-27)

²¹ Te ichi cuáháⁿ-güedé ndíhi Jèsús ní naníhí-güedé ñí tée ñuú Cìrené nání-dě Xímú, te déhe-dé cúu ñí tée nàni Lijandré, ndíhi ingá tée nàni Rúfú. Te té Xímú-áⁿ ñúhú-dě ichi duha cuándixi-dé ní sáháⁿ-dé yucu, te ní quide yica-güedé ní xido-dé cùrúxí sá nchídó Jèsús.

²² Te ndéca-güedé Jèsús cuáháⁿ ñí xichi núu nání Gólgotá, te tnúhu-áⁿ quée-xí: ñí xichi núu nání yìquí díquí ndíyi, duha quèe-xi tnúhu-áⁿ.

²³ Te ní sáñaha-güedé xii-gá ndudí sá ní quée yúcu nání mìrrá coho-gá ní cùu dico ñá túu ní xìhi-gá. ²⁴ Te ní sata caa ñaha-güedé xii-gá núu cùrúxí. Te sáta dúcáⁿ te cue tée cùu sandadú-áⁿ ní xito ndeé-güedé núu ndédacàa-güedé cuu cuèndá-güedé dóo-gá.

²⁵ Te cùu-xi caá ñí dātñéé òré ní sata caa ñaha-güedé xii-gá núu cùrúxí. ²⁶ Te ní taxi ndecu-güedé ñí sá ndeé lètrá núu tácaà-gá. Te lètrá-áⁿ càháⁿ-xi ná cuèndá ducaⁿ ní quide ñaha-güedé xii-gá. Te duha càháⁿ lètrá-áⁿ: “Tée yìndaha ñaha xii ñáyiú isràel”, duha càchí-xi. ²⁷ Te tnàhá úu cue tée cùu ñadúhú ní sata caa-güedé diu-ni núu cùrúxí tucu. Te ñí-dé ní sata caa-güedé xio cùha-gá, te ingá-dé ní sata caa-güedé xio dātñi-gá. ²⁸ Te ducaⁿ ní cuu chi ní quée ndáa-xi

nàcuáa càháⁿ-xi núú tütú Yá Ndiöxí núú càchí-xi: “Hⁿ-ni ní quide ñaha-güedě xii-gá ndihi cue téé ndècu cuéchi-xi”, duha càchí-xi núú tütú-gá.

²⁹ Te nchaa ñáyi yáha yatni núú táca-gá dácuicó-yu díquí-yu te xícuèhé ñáhã-yu xii-gá, te xáhãⁿ-yu:

—Te ná cuendá ducaⁿ càa-n taca-n xiáⁿ, te càchí-n sá dàngoyo-n veñúhu cànhu sá ìo cùnūu te dandãa-n ingá veñúhu saa, te xití úní-ni nduu sa nadaxínu-n càchí-n. ³⁰ Te vitna tanūu núú cùrúxí-áⁿ dácácu-n mée-n — cachí-yu xáhãⁿ-yu xii-gá.

³¹ Te ñu-ni ducaⁿ ñi quide cue téé cùu dütú cùnūu, ndihi cue téé dàcuaha ñaha xii ñáyi nchaa tnúhu ní chídó tnùnì ndíi Moisés, chí ní cudíquí ndeé ñáhã-güedě xii-gá, te ní xitnáha-güedě:

—Tée-a ní ndacu-dé ní dácácu nihnu-dé ñáyi, ÷te ná cuendá ñá ndácú-dě dácácu nihnu-dé mée-dě-i? ³² Te núu ndáá sá diú-dě cúú-dě Crístú Yáá ní tendaha Yá Ndiöxí véxi ñuyíú-a quindaha ñaha xii ñáyi israhél, te na cundehe-o nuu-dé núú cùrúxí, cuendá quíndáá iní-ó-dě —càchí-güedě xitnáha-güedě.

Te ndeé tnáhã cue téé tàcaa xio xio ñiñi-gá xícuèhé ñáhã-güedě xii-gá.

Ní xihí Jèsús

(Mt. 27:45-56; Lc. 23:44-49; Jn. 19:28-30)

³³ Te òré ní cuu cuádava nduu, te ní cunee nihíi ñuyíú, te ducaⁿ-ni càa ní cuu ndeé caá úní sacuaa. ³⁴ Te ñu-ni òré caá úní sacuaa-áⁿ ñihi ní càháⁿ Jèsús, te xáhãⁿ-gá xii Tátã-gá Dütú Ndiöxí:

—Elói, Elói, láma sabàctaní — càchí-gá xáhãⁿ-gá.

Te tnúhu-áⁿ quée-xí: Ndiöxí mée-í, Ndiöxí mée-í, ná cuendá ní dánã ñaha-n xii-í, duha quèe-xi tnúhu-áⁿ.

³⁵ Te dava cue téé xíndecu yatni núú táca-gá-áⁿ ñi tecú

dóho-güedé nàcuáa ní càháⁿ-gá, te ní xitnáha-güedé:

—Chí cùndédóho chí càna-dé té Eliás —càchí-güedé xitnáha-güedé.

³⁶ Te ñiⁿ cue téé xíndecu-áⁿ xínú-dě ní sáhãⁿ ní chindóyo-dé luha càchí xití ndudí íá, te ní chinenu-dé díquí ñiⁿ yutnu càni te ní ndocani-dé chíhí-dě yuhu-gá cuendá coho-gá. Te ní xáhãⁿ cuè téé xíndecu-áⁿ xii téé-áⁿ:

—Cundetū tnaa na cundehe-o nacoto núu quixi té Eliás nunehe ñaha-dě xii-dé núú cùrúxí — càchí-güedé xáhãⁿ-güedě xii-dé.

³⁷ Te Jèsús ñihi ní canasaa-gá te ní xihí-ni-gá. ³⁸ Te sátá dúcãⁿ te ní ndátá dđó cúú còrtinã xití veñúhu cànhu sá ìo cùnūu ní quée dava ndáá, te ndàa núú ñinu ní ngüíta-xi ní ndátá. ³⁹ Te téé cùu capitãⁿ nútñi-dé ndàa núú Jèsús, te ndèhe-dé nàcuáa ní quide-gá òré ní xihí-gá, te ní cachí-dé:

—Sá ndáá ndisa sá diú tée-a cùu-dé Déhe Yá Ndiöxí ní cùu — duha ní cachí-dé.

⁴⁰ Te xica xitnutñiⁿ ñiⁿ úú ñáyi ñihí ndéhě-yu nchaa nàcuáa ní quide ñaha-güedě xii Jèsús, te tnáhã tá Màriã Magdalènã, ndihi tá Salòmé, ndihi tá Màriã nãná tẽ Chèè ndihi té Jàcobó téé càchí-güedé cúú lihli-gá.

⁴¹ Te cue ñáyi ñihí-áⁿ ñi xica cuú-yu ndihi Jèsús distritú Galileá ní xinu cuèchi-yu núú-gá. Te cue ñáyi ñihí-áⁿ nchicúⁿ ñáhã-yu xii-gá ní quexio ndeé ñuú Jerusalén ndihi dava-gá ñáyi ñihí nchicúⁿ ñáhã xii-gá cuáhãⁿ.

Chínduxi-güedě Jèsús

(Mt. 27:57-61; Lc. 23:50-56; Jn. 19:38-42)

⁴² Te cùu-xi nduu vispré nduu ndètátú ñáyi. Te nduu-áⁿ xíquide túha-yu sá cúú ñngá nduu nduu ndètátú-yu-áⁿ, te ñu-ni nduu-áⁿ sa ní cuaa vihi, ⁴³ te ñiⁿ téé nàni Chèé téé ñuú Arimãtéã ní cuyi-dě ní sáhãⁿ-dè núú tẽ Pilatú, te ní

xáhaⁿ-dë sá nõu vá cündèe iní-dé daña-dé chindúxi-dé yiqui cùñú Jèsús. Te tnàhá té Chèé-án cúu-dë ìⁿ tée cùnnu cundihí-dé cue tée quide jundá, te tnàhá-dé ndétú-dë sáá nduu ndíhu ndaha ñàha Yá Ndiöxí xii-dé ndihí cue ñáyiu. ⁴⁴ Te té Pilatú ío ní cuñúhu-dé sá dúcáⁿ ío ndíhi ní xíhí Jèsús, te ní cana-dé tée cùu capitáⁿ ní xícáⁿ tnúhú-dë núú-dë nõu ndisa sá sà ní xíhí-gá. ⁴⁵ Te tée cùu capitáⁿ-án ñí xáhaⁿ-dë xii té Pilatú sá ndàá ní xíhí Jèsús, núu xíáⁿ té Pilatú-án ñí sáha-dé tnúhu chindúxi té Chèé-án yiqui cùñú-gá. ⁴⁶ Te té Chèé-án ñí saaⁿ-dë ìⁿ dóó vâha, te ní sáháⁿ-dë ní nunehe-dé yiqui cùñú Jèsús núu cùrúxí, te ní chidúcúⁿnuu-dé yiqui cùñú-gá dóó vâha sá ñí saaⁿ-dë-án, te dàtnùní nehé-dé yiqui cùñú-gá cuáháⁿ ní chihi-dé ìⁿ yaú nchú yiqui naha càva, te ní sadí-dé yuhu yaú-án ndihí ìⁿ yúu quèhéⁿ. ⁴⁷ Te tá Màriá Magdaléná, ndihí tá Màriá náná tē Chèé ní xiní-yu núu ñí chihi-dé yiqui cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

¹ Te sátá ñí cundiquiⁿ nduu ndètatú ñáyiu, te tá Màriá Magdaléná, ndihí tá Salómé, ndihí tá Màriá náná tē Jàcobó ní saáⁿ-yu acítí sàháⁿ tnámí cuèndá canehé-yu quíhíⁿ chihí-yu yiqui cùñú Jèsús. ² Te ndumìngú nehé-ni òré vitna vâha vâha ní xínu coṭo núú nchicanchii ní quexió-yu núu nchú yaú yíhí yiqui cùñú Jèsús. ³ Te ní xítnàhá-yu:

—Yoo cùñaha-o xòcani yúu ndèdí yuhu yaú-a, chi vá yõ tnàhí ndècu iha —cachí-yu xítnàhá-yu.

⁴ Te òré ní xíndéhé vâha-yu te ní xiní-yu sá yúu cáhnú ndèdí yuhu yaú-án ìⁿ xio-ná ndécú. ⁵ Te cuánguìhú-yu xítí yaú-án, te ní

xiní-yu nùcòo ìⁿ espíritú xínu cuèchi núu Yá Ndiöxí ndàa xio cuhá-yu, te càa-xi datná cáá ìⁿ tée cuechi, te ñihnu-xi ìⁿ dóó cuixíⁿ dóó cání, te ní yùhú-yu òré ní xiní-yu espíritú-án. ⁶ Te espíritú-án ñí xáhaⁿ-xi xii-yu:

—Vá yùhú-ndó, chi yùhú sa cùtnuní iní-í sá nchòhó véxi-ndo nànducu-ndo yiqui cùñú Jèsús tée ñuu Nazàrét tée ní sahani-güedé núu cùrúxí, dico ñá túú-gá yiqui cùñú-dé ndécú iha chi sa ní ndoto-dé, te chí cündèhe núu ñí sacáⁿ-güedé yiqui cùñú-dé te quini-ndó nã ñá túú-gá-dé. ⁷ Te chí cuáháⁿ núu ndécú tē Pèlú ndihí dava-gá cue tée ní xica cuu ndihí-dé, te duha cùñaha-ndo xii-güedé: “Jèsús codonuu-gá núu-ndó quíhíⁿ distritú Galiléa, te yácaⁿ quini-ndó-gá dàtná ní cachí-gá xii-ndo”, duha cùñaha-ndo xii-güedé —càchí espíritú-án xáhaⁿ-xi xii-yu.

⁸ Te cue ñáyiu dìhí-án ío ní yùhú-yu, te ní quene cunú-yu cuánuhú-yu, te quidi ñaha-ná-xi xii-yu sá ío ní yùhú-yu, te ñá túú tnàhí ná tnúhu ní xáhãⁿ-yu xii cue ñáyiu ní naníhí-yu ichi cuèndá sá ío ní yùhú-yu.

Tá Màriá Magdaléná ní xiní-xi Jèsús

(Jn. 20:11-18)

⁹ Te sátá dúcáⁿ ñí ndoto Jèsús ndumìngú nehé-ni-án, te díhna nuu-gá tá Màriá Magdaléná ní quee túu-gá núu-xi, te ñiu tá Màriá-án cúu-xi xíchí ñí xíhí ñaha úsá espíritú cündihí yucu ñávâha ní cùu, te Jèsús ní queñuhu-gá nchaa espíritú-án yiqui cùñú-xi. ¹⁰ Te xíchí-án ñí sáháⁿ-xi ní xítnúhu-xi cue tée ní xica cuu ndihí Jèsús nàcuáa ní cuu, te xíndáhí-güedé sá ndíhu iní-güedé òré ní quexio-xi núu ndécú-güedé. ¹¹ Te òré ní xáhaⁿ tá Màriá xii-güedé sá ñí ndoto Jèsús ndihí sá ní xiní

ñáhá-xí xì-gá, te ñá túú ní sàndáá iní-güedé.

Jèsús ní quee túu-gá núú úú cue téé ní xica cuu ndihi-gá

(Lc. 24:13-35)

¹² Te úú tñhá cue téé ní xica cuu ndihi Jèsús ñúhú-güedé ichi cuáhá-güedé yucu, te uuⁿi ní quee túu-gá núú-güedé, te ní dácótó ñàha-xi xii-güedé sá ñà túú-gá cáá-gá dàtná cáá-gá. ¹³ Te cue téé úú-áⁿ ñi xica-güedé cuáhá-güedé ní xitnúhu-güedé nchaa dava-gá cue téé ní xica cuu ndihi-gá sá ñi xiní ñáhá-güedé xii-gá, dico ñi-ndi ducaⁿ ñà túú ní sàndáá iní cue téé-áⁿ tñúhu ní cáhá-güedé.

Jèsús xáhaⁿ-gá xii cue téé ní xica cuu ndihi-gá nàcuáa ndiúu chiúuⁿ cada-güedé

(Mt. 28:16-20; Lc. 24:36-49; Jn. 20:19-23)

¹⁴ Te ndi ùxí ñⁿ cue téé ní xica cuu ndihi Jèsús yíhi-güedé mèsá xéxí-güedé, te ní quee túu-gá núú-güedé te ní tenáá ñáhá-gá xii-güedé cuèndá sá ño sàá iní-güedé ñá túú sàndáá iní ñáhá vâha-güedé xii-gá, chi ñá túú ní cuini-güedé quíndáá iní-güedé nàcuáa ní xáhaⁿ ñáyiú ní xiní ñáhá xì-gá sá tá ní yáha ní ndoto-gá. ¹⁵ Te ní xáhaⁿ-gá xii-güedé:

—Quíhíⁿ-ndó ñihí ñuyíú cãháⁿ-ndó núú nchaa ñáyiú tñúhu váha tñúhu sá cãháⁿ nàcuáa naníhí tãhú-yu. ¹⁶ Te nchaa ñáyiú na quíndáá iní tñúhu-áⁿ te cuanduté-yu, te naníhí tãhú-yu, dico nchaa ñáyiú vá quíndáá iní tñúhu-áⁿ te cuíta ñihnú-yu. ¹⁷ Te nchaa ñáyiú na quíndáá iní ñáhá xì-í te cadá-yu sá vâ yõ tñáhi ndàcu cada, te cacunehe ñáhá-yu xii-í, te queñuhú-yu nchaa espíritú cúndíhi yucu ñávâha yíhi ñaha xii ñáyiú. Te uuⁿi ndacú-yu cáháⁿ-yu ingá núú tñúhu sá vâ tá dácúàha-gá-yu. ¹⁸ Te cuéi na tñá-yu

cóo dééⁿ dico ñá túú ñà cada ñaha-di xì-yu, te cuéi venenú ná cáxí-yu dico ñá túú ñà tñahá-yu, te tendáhá-yu cue ñáyiú cùhú te ndúha-yu —càchí-gá xáhaⁿ-gá xii-güedé.

Jèsús cuánda-gá andiú

(Lc. 24:50-53)

¹⁹ Te sá tá ní yáha ducaⁿ ñi xáhaⁿ Jèsús xii cue téé ní xica cuu ndihi-gá, te ní ndanchita-gá cuánda-gá andiú te ní ngóo-gá xio cùhú Dútú Ndiõxí. ²⁰ Te cue téé-áⁿ ñi xica-güedé cuáhá-güedé, te ní ngúíta-güedé cãháⁿ-güedé tñúhu Xítóhó Jesucristú nchaa xichi. Te mee-gá ní chindee ñàha-gá xii-güedé ní quide-güedé nchaa sá vâ yõ tñáhi ndàcu cada cuendá cutnùní iní ñáyiú sá ndáá cãháⁿ-güedé tñúhu-gá. Duha ní cuu dàvâ-áⁿ.

TNÚHU NÍ CHÌDÓ TNÛNÍ TÈ LÛCÁ

Nàcuáa ní ngódó tnùnì tnúhu Yá Ndiòxí

¹ Te vài ñáiyu chido tnuní-yu nchaa nàcuáa nduu tnúhu ñihí-yu nàcuáa ní cuu, te nchoo tnàhá-ó sà naha-o nàcuáa ní cuu. ² Te ñu-ni nchaa tnúhu chido tnuní-yu-án cúú-xí tnúhu ní cáháⁿ nchaa cue tée ní xíní ndáá nàcuáa ní cuu ndéé díhna, cue tée ní cáháⁿ tnúhu Yá Ndiòxí. ³ Te yúhú sa ní cuu nduu quide cuendá-í nchaa nàcuáa ní cuu, núu xíáⁿ ní sani iní-í tee váha-í nchaa tnúhu-a núu tütú sá cúú-xí yòhó té Tèofilú chí ío váha cùu iní-í sá cúú-xí-n, ⁴ te tètè-í cuendá cutnùnì iní-n sã sã ndáá cúú-xí nchaa sá ñí dàmèhé ñàhá-güedé xii-n.

Íⁿ espíritú xínú cuèchi núú Yá Ndiòxí càchí-xi sá cáci íⁿ tée cunani Juáá

⁵ Te cútñàhá ní xíndaha té Hèrodés ñáiyu distritú Júdeá dàvá-án ñí xíndecu íⁿ dútú ñí xínani-dé Zacàriá, te ní cundihi-dé cue dútú Àbiás. Te ñadihí-dé ní xínani-aⁿ Elisabét, te ñaha-án ñí cuu-aⁿ ñani tnàhá ndíi Àrón. ⁶ Te ndí nduu-yu ío ní quide ndáá-yu núu Dütú Ndiòxí, chí ní tñí-yu nchaa tnúhu ní cáháⁿ-gá. ⁷ Te ñá túú ñí ñí déhe-yu, chí ducaⁿ tãhú tá Elisabét sá vã cóó déhe-aⁿ, te ducaⁿ ndí nduu-yu ío ní sahnú-yu.

⁸ Te íⁿ nduu xínu cuechi tucu té Zacàriá ndíhi nchaa cue tée cundihi-dé núú Yá Ndiòxí xití veñúhu. ⁹ Te dàvá-án ñí xito ndeé-güedé cuendá cutnùnì iní-güedé núu ndédacáa-güedé quíhu núu nàá xití veñúhu-án cahmi-güedé sá sàháⁿ tnámí, te ní cutnùnì sá té Zacàriá quíhu-dé. Te ducaⁿ ñí quide-güedé, chí ducaⁿ tnàhí ní xóo cada nchaa cue dútú

dàvá-án. ¹⁰ Te ñini sàhmi té Zacàriá sá sàháⁿ tnámí núu nàá, te vài vihi ñáiyu xíndecu quehé veñúhu-án càháⁿ ndihí-yu Yá Ndiòxí. ¹¹ Te ní xíní té Zacàriá íⁿ espíritú xínú cuèchi núú Yá Ndiòxí nútní-xi xio cùha núu nàá núu càyú sá sàháⁿ tnámí-án. ¹² Te òré ní xíní té Zacàriá espíritú-án te ñá ní cùtnunì iní-dé nása cada-dé chí ío ní yúhú-dé. ¹³ Te espíritú-án ñí xáhaⁿ-xi:

—Zacàriá, vá yúhú-n chí Yá Ndiòxí ní tedóho-gá tnúhu ní cáháⁿ-n, te vitna coo íⁿ déhe ñadihí-n tá Elisabét te danani-n-dé Juáá. ¹⁴ Te ío cudíí ñini-n, te ducaⁿ ío vài ñáiyu cudíí ñini-yu na càcu-dé. ¹⁵ Te ío cudíu-dé núú Yá Ndiòxí, te ñí vã cóhó-dé ndidí te ñí vã cóhó-dé ndudí sá ñí natiu, te sa cundecu ndihí-dé Espíritú Yá Ndiòxí òré càcu-dé. ¹⁶ Te ñu-dé cada te ío vài ñáiyu isráel natuhá-yu ichi Dütú Ndiòxí Yaá cúú Ndiòxí-ó. ¹⁷ Te té Juáá-án codonuu-dé núú-gã, te cundecu ndihí-dé Espíritú-gá, te taxi tnùnì-dé dàtná ní quide té Èliás. Te nacanú ichi-dé cue tée cùu sacuéhé cuendá cada-güedé sá vãha sá cúú-xí cuè tée cuechi, te cuèi cue tée ío sàá iní-xi, te ñu-dé cada te tñí-güedé tnúhu váha, tnúhu càháⁿ ñáiyu quide ndáá. Te ducaⁿ càda-dé cada túha-dé ñáiyu cuendá cunu cuèchí-yu núú Dütú Ndiòxí — càchí-xi xáhaⁿ-xi xii-dé.

¹⁸ Te té Zacàriá ní ndúcú tnúhu-dé núú espíritú-án, te xáhaⁿ-dè:

—¿Te nása cutnùnì ndáá iní-í tnúhu càháⁿ-n-í? Chí yúhú ío ní sahnú-í ndíhi ñadihí-í —càchí-dé xáhaⁿ-dè xii-xi.

¹⁹ Te espíritú-án ñí xáhaⁿ-xi:

—Yúhú cùu-í espíritú nání Gàbriél, te xínu cuechí-í núú Yá Ndiòxí, te mee-gã ní táuchíuⁿ-gã náha-í tnúhu-gá véxi cuendá cutnùnì iní-n nàcuáa cada ñaha-gã xii-ndo. ²⁰ Te vitna cuu ñíhi-n te vá cáháⁿ-gá-n ndéé ná sãá nduu càcu déhe ñadihí-n, chí ñá túú ní sàndáá-ni iní-n tnúhu ní cáháⁿ-í. Te

dacutíí sǎá nduu càda-xi nacúaá ní cáháⁿ-í-a —càchí espíritú-áⁿ xǎhaⁿ-xi xii-dé.

²¹ Te nchaa ñáyiú xĩndecu quehé ndétú-yu té Zacàriá, te xĩcuñúhu-yu sá ío cùyaa-dé xití veñúhu. ²² Te òré ní ndee té Zacàriá, te ñá ní cùu-gá cáháⁿ ndíhi ñaha-dé xii-yu, te òré-áⁿ nĩ cutnùnì iní-yu sá ní xiní-dé ìⁿ espíritú xínú cuèchi núú Yǎ Ndiòxí xití veñúhu. Te mee-nǎ ndaha-dé ní quide-dé núú-yu chi ñá ní cùu-gá cáháⁿ-dé.

²³ Te ní xínu nduu nĩ xinu cuechi tē Zacàriá núú Yǎ Ndiòxí xití veñúhu, te cuánuhú-dé vehe-dé. ²⁴ Te sátá dúcáⁿ nĩ cuu te ñadhí-dé tá Elisàbét ní ngúhuⁿ déhe-aⁿ, te úhúⁿ yóó ñà túú tnàhí-gá ní quèe-aⁿ caca cuu-aⁿ, te ní cachí-aⁿ: ²⁵ “Mee Dútú Ndiòxí duha ní cundàhú iní ñáhá-gǎ sá cóó ìⁿ déhe-í cuèndá sá vǎ cúú yíchí iní ñáhá ñáyiú xii-í”, duha ní cachí-aⁿ.

Ìⁿ espíritú xínú cuèchi núú Yǎ Ndiòxí càchí-xi sá cacú Jèsús

²⁶⁻²⁷ Te núú ìñú yóó sǎ nĩ ngúhuⁿ déhe tá Elisàbét, te ní tendaha tùcu Yǎ Ndiòxí espíritú nání Gábriél cuáháⁿ-xi ìⁿ ñúu nání Nàzarét cuáháⁿ ngoto-xi ìⁿ xíchí cuéchí nání Mariá. Te ñúú-áⁿ yíndèhu-xi distritú Galiléa. Te xíchí-áⁿ sa ní cundáá tnúhu sá tnándaha-xi ndíhi ìⁿ téé nání Cheé ñaní tnáhá ndíi Dàvíí. ²⁸ Te espíritú-áⁿ nĩ quíhu-xi ndéé xití vehe núú ndécú tá Màriá, te ní xáhaⁿ-xi:

—jCóvǎha-n-aⁿ! Dútú Ndiòxí ío cùu iní ñáhá-gǎ xii-n te ndècu ndíhi ñaha-gá, te ío-gá xitó ñaha-gá xii-n dàcúxí dàva-gá ñáyiú dìhí —càchí espíritú-áⁿ xǎhaⁿ-xi.

²⁹ Dìco òré ní xiní tá Màriá espíritú-áⁿ, te ní quiyùhú iní-xi sá dúcáⁿ nĩ cáháⁿ espíritú-áⁿ. Te ní sani iní-xi: “¿Ná cuèndá duha càháⁿ-tu espíritú-a-í?”, duha ní sani iní-xi. ³⁰ Te espíritú-áⁿ nĩ xáhaⁿ-xi:

—Màriá, vǎ yùhú-n chi ducaⁿ ní nduu táhú-n núu Yǎ Ndiòxí. ³¹ Te vitna ngúhuⁿ déhe-n, te na

càcu-dé te danàni-n-dé Jèsús. ³² Te ío cunuu-dé, chi Dútú Ndiòxí Yáá ío cunuu cachí-gá sá Déhe-gá cúú-dé, te diu-gá cada te cuu-dé ìⁿ téé cunuu núú ñáyiú isràél dàtná ní quide-gá ndíi Dàvíí. ³³ Te taxi tnùnì-dé ñáyiú isràél, te ducaⁿ-ni cunuu-dé ni caa ni quíhíⁿ —càchí-xi xǎhaⁿ-xi.

³⁴ Te tá Màriá ní xáhaⁿ-xi xii espíritú-áⁿ:

—¿Te nása cuu tnúhu càháⁿ-n te ñá túú yii-í-i? —càchí-xi xǎhaⁿ-xi.

³⁵ Te ní xáhaⁿ espíritú-áⁿ:

—Espíritú Yǎ Ndiòxí quixi cundecu ndíhi-n, te ducaⁿ Yǎ Ndiòxí cada-gá ìⁿ sá vǎha sá cúú-xi-n ná càcu déhe-n. Te Yǎ Ndiòxí càchí-gá sá ío cundecu yíñúhu-dé núú-gǎ, chi Déhe-gá cúú-dé. ³⁶ Te tnàhá didí-n tá Elisàbét ñúhú déhe-aⁿ cuèj ío ní sahnú-aⁿ, te diu-aⁿ càchí-yu sá vǎ cóó déhe-aⁿ ni cùu, te vitna sa ní cuu ìñú yóó ñúhú déhe-aⁿ. ³⁷ Chi Yǎ Ndiòxí ndácú-gǎ quidé-gǎ nchaa sá vǎ yóo tnàhí ndàcu cada —cachí-xi xǎhaⁿ-xi.

³⁸ Te tá Màriá ní xáhaⁿ-xi:

—Yúhú ná cúnú cuèchi-í núú Dútú Ndiòxí, te mee-gǎ ná cadá ñaha-gá xii-í nàcuáa ní cachí-n —càchí-xi xǎhaⁿ-xi xii espíritú-áⁿ.

Te sátá dúcáⁿ te espíritú-áⁿ nĩ xica-xi cuáháⁿ-xi.

Tá Màriá cuáháⁿ ngoto-xi tá Elisàbét

³⁹ Te tá Màriá ío ndíhi cuáháⁿ-xi ìⁿ ñúu cáá xití yucu distritú Júdeá.

⁴⁰ Te ní sáá-xi vehe té Zacàriá, te cuánguihu-xi ní dándácõ vǎha-xi tá Elisàbét. ⁴¹ Te òré ní tecú dóho tá Elisàbét ní cáháⁿ tá Màriá, te ní candá déhe-aⁿ xití-aⁿ, te òré-áⁿ nĩ ngúndecu ndíhi-aⁿ Espíritú Yǎ Ndiòxí. ⁴² Te níhi ní cáháⁿ-aⁿ, te xáhaⁿ-aⁿ xii tá Màriá:

—Yǎ Ndiòxí ío xitò ñaha-gá xii-n dàcúxí dàva-gá tnàha dìhí-ó, te ducaⁿ-ni xito-gá cuèi déhe-n. ⁴³ ¿Te ná cúú yùhú núu véxi coto ñaha yòhó náná Yáá cúú Xitohó-í-i? ⁴⁴ Chi òré-ni ní tecú dóho-í ní cáháⁿ-n te

ní candá-ni dehe-í xití-í sá cudíí iní-dé. ⁴⁵ Te váha táhu yohó sá ní sándáá iní-n, chí dacuitíí sá cádá Dútú Ndiöxí nàcuáa ní cáháⁿ espíritú ní tendaha-gã ní quixi ní cachí tnúhu xii-n nàcuáa cada-gá — cächí-aⁿ xáhaⁿ-aⁿ xii tá Màriá.

⁴⁶ Te ní xáhaⁿ tá Màriá:

Ío cànhu cuu Dútú Ndiöxí,

⁴⁷ Ío cudíí iní-í chí diu-gá taunihnu ñaha-gã xii-í núú ùhú núú ndàhú.

⁴⁸ Chí ní ndacu iní ñáhá-gã xii yúhú, te dicó ñⁿ xíchí xínú cuèchi núú-gã cúú-í,

te vitna te nchaandi túhú ñáyiú cachí-yu sá ío váha táhú-í.

⁴⁹ Te Yá Ndiöxí cándò caa nine iní-gá, te ío cànhu ñⁿ sá váha ní quide-gá sá cúú-xi-í.

⁵⁰ Te cùndahú iní-gá nchaa ñáyiú nèhe sá yíñùhu núú-gã.

Te ducaⁿ-ni cuèi ñáyiú sa ndècu ñuyíú-a ndihí ñáyiú vitna véxi.

⁵¹ Chí ta quide-gá nchaa sá vã yõ tnahí ndàcu cada véxi, te ta dàndóo canúú-gã cue ñáyiú quide cahnu mee-xi.

⁵² Te cue ñáyiú tàxi tnuní ñá túú-gã dáñá-gã taxi tnùní-yu, te cue ñáyiú ndàhú ní quide nínu ñaha-gã xií-yu.

⁵³ Te cue ñáyiú ndècu ndihí tnúndòho tnúhu ndàhú ní quide váha ñaha-gã xií-yu, te cue ñáyiú cuica ñà túú nã ní ñihí-gã-yu cundecu ndihí-yu.

⁵⁴ Te chindee-gá ñáyiú isràél, ñáyiú xínu cuechi núú-gã, te ñá túú dáña nihnu ñaha-gã xií-yu, chí cùndahú iní ñáhá-gã.

⁵⁵ Chí ducaⁿ ní xáhaⁿ-gã xii ndíi Àbrahám, ndihí cue ñani tnáhá ndíi.

Duha ní xáhaⁿ tá Màriá xii tá Elisábét.

⁵⁶ Te ní xindecu tá Màriá dàtná úní yóó ndihí tá Elisábét te dàtnùni cuánuhú-xi vehe-xi.

Ní cacu té Juàá tée dacuàndute ñaha xii ñáyiú

⁵⁷ Te ní sáá nduu ní cacu ñⁿ dehe tée tá Elisábét. ⁵⁸ Te nchaa ñáyiú ndècu yatni ndihí-aⁿ, ndihí nchaa ñani tnáhá-áⁿ ní ñihí-yu tnúhu nàcuáa ní chindee ñaha Yá Ndiöxí xii-aⁿ. Te ío ní cudíí iní-yu cuendá-aⁿ. ⁵⁹ Te núú ùná nduu sá ní cacu dehe-aⁿ, te ní sáháⁿ ñáyiú núú ndécú-áⁿ cuendá cuáhá-yu señá ñii dehe-aⁿ. Te cuini-yu cunani dehe-áⁿ Zacàriá dàtná nání tãtá ní cuu. ⁶⁰ Te ní xáhaⁿ nãná dehe-áⁿ:

—Ñáhá, chí Juàá cunani-dé — cächí-aⁿ xáhaⁿ-aⁿ xii-yu.

⁶¹ Te ní xáháⁿ-yu:

—¿Te ná cuendá te ñá túú ní ñⁿ ñani tnáhá-ndó dùcaⁿ nani-i? — cachí-yu xáháⁿ-yu.

⁶² Te ní quide-yu ndàhá-yu núú tãtá dehe-áⁿ cuendá cuini-yu núú nása cuini méé-dé cunani dehe-dé. ⁶³ Te ní xicáⁿ-dé ñⁿ tutú ní chídó tnùní-dé nàcuáa cunani dehe-dé, te duha ní chídó tnùní-dé: “Juàá cunani-dé”, cächí-xi núú tutú ní tee-dé-áⁿ. Te nchaa ñáyiú xindecu-áⁿ ní cuñúhu-yu nàcuáa ní cuu. ⁶⁴ Te òré-áⁿ ní nacáháⁿ té Zacàriá sá ní cuu ñihí-dé ní cuu, te ní ngúita-dé ní cachí-dé sá ío cànhu cuu Yá Ndiöxí. ⁶⁵ Te nchaa ñáyiú xindecu yatni ndihí-dé ní cuñúhu-yu, te nchaa ñáyiú xindecu ñihí xití yucu distritú Júdeá ní ñihí-yu tnúhu nàcuáa ní cuu. ⁶⁶ Te nchaa ñáyiú-áⁿ ío vãi ní sani iní-yu, te ní xitnàhá-yu:

—¿Ná cúú sã cádá tẽe-ãⁿ ndéé idá-gá ná cuèhnu-dé? —cächí-yu xitnàhá-yu.

Te ducaⁿ ní xitnàhá-yu chí Dútú Ndiöxí ndécú ndihí ñaha-gã xii-dé.

Té Zacàriá cächí-dé sá ío cànhu cuu Yá Ndiöxí

⁶⁷ Te té Zacàriá tãtá tẽ lihli-áⁿ ní ngúndecu ndihí-dé Espíritú Yá Ndiöxí te ní cáháⁿ-dé nchaa tnúhu sá ní dánéhé ñáhá-gã, te ní cachí-dé:

⁶⁸ Ío cànhu cuu Dútú Ndiöxí nchoo ñáyiú isràél,

chi ní quixi coto ñaha-gã xii-o, te cùu-o ñáyiú cùu cuendá-gá, chi dàcácu nihnu ñaha-gã xii-o vitna.

69 Chi ní tendaha-gã ìᵐ tée véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñaní tnáhá ndíi Dàvíí tée ní xinu cuechi núú-gã ndée sanaha.

70 Te ñu-ni tnúhu ní cáháⁿ Yá Ndiòxí ní cáháⁿ cue tée ní quide ndáá ní xíndecu núú-gã ñuyúú-a ndée sanaha.

71 Te ní cachí-güedé sá táúnihnu ñaha-gá xii-o núú nchàa ñáyiú cùu ùhú iní ñáhá, ndihí núú nchàa ñáyiú ñá túú cùu quini ndee ñáhá.

72 Te ní xáhaⁿ-gã sá cùndàhú iní ñáhá-gã xii-o, te ducaⁿ càda-gá chi vá nácuaⁿ-gã tnúhu ní cáháⁿ-gã ndihí-güedé.

73 Te ñu ducaⁿ ndúu tnúhu ní xáhaⁿ-gã xii ndíi Ábrahám sá

74 táúnihnu ñaha-gá xii-o núú nchàa ñáyiú cùu ùhú iní ñáhá, cuendá sá vã yùhú-ó cùnu cuechi-o núú-gã.

75 Te cada ndáá-ó, te cundecu yíñuhu-o núú-gã ndi nchàa nduu cundecu-o ñuyúú-a.

Duha ní cachí té Zacàriá.

76 Te xáhaⁿ-dě xii té líhli-án:

Te yòhó té líhli, cáháⁿ ñáyiú cuendá-n sá cúú-n ìᵐ tée çáháⁿ tnúhu Dútú Ndiòxí Yáá ío cùnuu,

chi quíhíⁿ-n còdonuu-n núú Yáá cúú Xitohó-ó dàtúha-n ñáyiú cuendá cundecu túha-yu óré quexio-gã.

77 Te cúñaha-n xii ñáyiú isràél sá cùní-gã cada càhnu iní-gã nchaa cuéchi-yu,

te naníhí tàhú-yu.

78 Te ducaⁿ càda-gá chi ío cùu iní ñáhá-gã xii-o, chi ndée andíu ní tendaha-gã ìᵐ tée véxi

cuuⁿ-dé dandixi túu-dé iní-ó cuendá cutnùní iní-ó nácuaⁿ nduu cuendá Yá Ndiòxí.

79 Te ducaⁿ dandixi túu-dé iní nchaa ñáyiú ndècu ichi cuehé ichi duha ta xíta nihnu cuáháⁿ cuendá nucúnu ichi-yu ìᵐ ichi váha.

Duha ní xáhaⁿ tẽ Zacàriá xii déhe-dé.

80 Te té líhli-án tá sàhnu-dé, te ta chindee chitúu ñaha Yá Ndiòxí xii-dé cuáháⁿ, te ní xíndecu-dé xití yucu ndée ní sáá nduu ní ngúíta-dé ní cáháⁿ-dé núú cuè ñáyiú isràél tnúhu Yá Ndiòxí.

2

Ní cacu Jèsús

(Mt. 1:18-25)

1 Te dàvá-án nĩ táúchíúⁿ tẽ Àugustú Césár nucódó tnùní nchaa ñáyiú nacióⁿ yíndàha-dé. 2 Te xéhe sã díhnanuu nĩ nucódó tnùní ñáyiú, te ñu-ni dàvá-án nĩ cunuu té Cìreniú distritú Siriá. 3 Te nchaa ñáyiú ní natacá-yu ñuu núú nĩ cacú-yu cuendá nucódó tnùní-yu. 4 Núu xíáⁿ ní quee té Chèé ñuu Nazàrét ìᵐ ñuu yíndèhu distritú Galileá, te cuáháⁿ-dé ñuu Bèlén ìᵐ ñuu yíndèhu distritú Jùdeá, chi xíáⁿ nĩ cuu ñuu ndíi Dàvíí, te ñu-ni ñaní tnáhá tẽ Chèé-án nĩ cuu ndíi. 5 Núu xíáⁿ cuáháⁿ-dé ndée ñuu Bèlén nucódó tnùní-dé, te tnáhá tá Màriá xíchí nĩ cundáá tnúhu sá tnàndaha ndihí-dé cuáháⁿ ndihí ñaha-dé, te sa ñuhu déhe-xi. 6 Te nini cùyaá-yu ñuu Bèlén-án nĩ sáá òré cacu déhe-xi. 7 Te ní cacu déhe díhna-xi, te ní chidúcúⁿ-nuu-xi dóó, te ní sacáⁿ ñáhá-xí ìᵐ vehe núú cúú vèhe quití, chi ñá túú ní nĩhí-yu vehe coó-yu.

Cue espíritú xínú cuèchi núú Yá Ndiòxí ndihí cue toli.

8 Te yatni ñuu-án xíndecu ìᵐ úú toli ndée-güedé mbèé-güedé ndécú-güedé majadá niú-án. 9 Te uuⁿ ní quexio ìᵐ espíritú xínú cuèchi núú Yá Ndiòxí, te Yá Ndiòxí ní quide-gã ní dáyhé-xi ní càndée núú xíndecu-güedé, te

ní yùhú víhí-güedě. ¹⁰ Te ní xáhaⁿ espíritú-áⁿ:

—Vá yùhú-ndó, chi nàha-í ⁱⁱn tnúhu váha véxi sá cúu-xí-ndó, te ío cudíí iní-ndó ndìhi nchaa ñáyiu. ¹¹ Chi vitna ní cacu ⁱⁱn tée dàcácu nihnu ñaha xii-ndo núú ùhú núú ndàhú ñuú ndíi Dàvií, te tée-áⁿ cúu-dě Xítohó Jesucristú. ¹² Te dàtná ⁱⁱn sèñá te naníhí-ndó tē lihli-áⁿ yídúcúⁿ nuu-dé dóó cáá-dě ⁱⁱn vehe quití —càchí-xi xáhaⁿ-xi xii-güedě.

¹³ Te òré-áⁿ ní quexìo cuéhé víhí espíritú véxi cuuⁿ andiu ní naníhí tnáhá-xí ndìhi espíritú-áⁿ, te ní ngúíta-xi ní chiñuhu-xi Yá Ndiöxí, te càchí-xi:

¹⁴ ¡Ío càhnu cuu Yá Ndiöxí Yá ndécú àndiu, te na cùndecu váha-ni nchaa ñáyiu cùu iní méé-gá!
Duha càchí cue espíritú-áⁿ.

¹⁵ Te òré cuánda cue espíritú-áⁿ andiu, te ní ngúíta cue toli-áⁿ xitnàha-güedě:

—Na quihíⁿ-ó ñuú Belén quini-ó nàcuáa ní cuu, chi Dútú Ndiöxí sa ní cachí tnúhu-gá —càchí-güedě xitnàha-güedě.

¹⁶ Te ní tñii-güedě ichi súúni ndìhi cuáháⁿ-güedě, te ní naníhí-güedě tá Màriá ndìhi té Chéé, ndìhi té lihli-áⁿ cáá-dě xití ⁱⁱn vehe quití.

¹⁷ Te òré ní xiní ñáhá-güedě te ní xáhaⁿ-güedě xii-yu nàcuáa ní xáhaⁿ espíritú-áⁿ xii-güedě cuèndá té lihli-áⁿ. ¹⁸ Te nchaa ñáyiu ní tecú dóho-xi ní cuñuhu-yu nàcuáa ní cáháⁿ-güedě. ¹⁹ Dico tá Màriá chi ñuhu nahi-ni iní-xi, te dicó-ni sàni iní-xi cuèndá nchaa tnúhu-áⁿ. ²⁰ Te cue toli-áⁿ ní natñii-güedě ichi, te ta xitnàha-güedě cuánuhú sá ío càhnu cuu Yá Ndiöxí cuèndá nchaa tnúhu ní xindedóho-güedě, ndìhi cuèndá nchaa sá ní xiní-güedě, chi cuèndá sá ndáá ní cuu nchaa nàcuáa ní tecú tnúhu-güedě.

Ndècá-yu Jesús cuáháⁿ veñúhu

²¹ Te núú ùná nduu sá ní cacu té lihli-áⁿ, te ní sáha-güedě seña ñii-dé, te ní dánání ñàha-güedě Jesús xii-dé, diu-ni nàcuáa ní xáhaⁿ espíritú xínú cuèchi núú Yá Ndiöxí xii tá Màriá ndéé cùtnàhá vátá ngùhuⁿ-gá-dé xití-xi.

²² Te sátá ní tnahá nduu, nduu ñi-yu nàcuáa càháⁿ nchaa tnúhu ní chídó tnùnì ndíi Moisés, te ndècá-yu té lihli-áⁿ cuáháⁿ ñuú Jerusálén cuèndá quee túu-dé núú Dútú Ndiöxí. ²³ Te ducaⁿ ní quidè-yu, chi ducaⁿ càháⁿ-xi núú tütú Yá Ndiöxí sá ncháá làndú té na càcu díhna quetúu-güexi núú-gá cuèndá cundecu-ná-güexi cuèndá-gá. ²⁴ Te ní quidè-yu nàcuáa càháⁿ Yá Ndiöxí núú tütú-gá núú càchí-xi: “Canehe-ndo úú lómá àdi úú cùcu quihíⁿ nduu táhú ñáhá Yá Ndiöxí”, duha càháⁿ-gá núú tütú-gá.

²⁵ Te dàvá-áⁿ ndécú ⁱⁱn tée nàni Mió ñuú Jerusálén. Te ío váha iní-dé, te chiñuhu-dé Yá Ndiöxí, te ndètu-dé sáá nduu chindee ñaha Yá Ndiöxí xii ñáyiu isràèl. Te ndècu ndìhi té Mió-áⁿ Espíritú Yá Ndiöxí.

²⁶ Te sa ní xáhaⁿ-xi xii-dé sá vā cùu-ni-dé, chi dacuití quini-dé Crístú Yá tendaha Yá Ndiöxí quixi ñuyíu-a. ²⁷ Te tée-áⁿ ndécá ñàha Espíritú Yá Ndiöxí xii-dé cuáháⁿ veñúhu càhnu sá ío cùnuu. Te cuáháⁿ-yu ndìhi Jesús veñúhu-áⁿ cuèndá cadá-yu ndìhi-gá nàcuáa càháⁿ tnúhu ní chídó tnùnì ndíi Moisés. ²⁸ Te òré ní sáa-yu, te té Mió-áⁿ ní nguídèhé-dé Jesús, te ní cáháⁿ-dé sá ío càhnu cuu Yá Ndiöxí, te ní xáhaⁿ-dè xii-gá:

²⁹ Yòhó Dútú Ndiöxí sa ní cuu daña-n cùu-í vitna,

chi sa ní quide-n nàcuáa ní cachí-n xii yùhú té xínu cuechi núu-n.

³⁰ Chi sa ní xiní núu-í Yá dàcácu nihnu ñaha xii ñáyiu núú ùhú núú ndàhú vitna.

³¹ Te Yá ní tendaha-n vèxi núú ndécú ncháa ñáyiu ñuyíu-a.

32 Te cùu-gá dàtná ìⁿ ñuhú, chi dandìxi túu-gá iní ñáiyu cuendá cutnùnì iní-yu cuendá Yá Ndiòxí cuèí ñá díú ñáiyu isràél cùu-yu.

Te ñu-gá cada, te canehe ñáiyu dava-gá ñuú sá yíñuhu núú ñáiyu isràél chi ñu ñáiyu isràél cùu-yu ñáiyu cùu cuendá-n.

Duha ní xáhaⁿ tē Mió xii Yá Ndiòxí.

33 Te té Chèé ndihi náná Jèsús ní cuñuhu-yu tnúhu ní cáháⁿ té Mió cuendá-gá. 34 Te dàtnùnì té Mió ní xícáⁿ táhú-dē núú Yá Ndiòxí cuendá-yu, te xáhaⁿ-dē xii tá Màriá náná Jèsús:

—Cundedóho tnúhu na càháⁿ-í-a, té lĩhli-a ní nduu táhú-dē nacanu ichi-dē dava ñáiyu isràél ichi Yá Ndiòxí, te davá-yu vá tnĩ-yu tnúhu cáháⁿ-dē, te ñáiyu-áⁿ cuíta ni-hnú-yu, te cada-dē nàcuáa cutnùnì iní ñáiyu sá Yá Ndiòxí ní tendaha ñaha-gá xii-dē, dico vá quèndáá iní-yu, chi daquèe tíhú ñáhã-yu xii-dē. 35 Te ducaⁿ te cutnùnì nàcuáa sãni iní ìⁿ ìⁿ ñáiyu. Dico sá cúu-xí yohó chi ío cada ndàhú-xi iní-n, chi súúni dàtná sá ñí nícuèhé iní-n càda-xi —cachí-dē xáhaⁿ-dē xii tá Màriá.

36 Te xíaⁿ ndécú tnàhá ìⁿ ñaha càháⁿ tnúhu Yá Ndiòxí nání-áⁿ Aná, te tátá-aⁿ ní xínani-dē Fãnuél ñani tnáhá ndíi Asér. Te ñaha-áⁿ sa ní sahnu vihi-aⁿ, te cuechi-ni-aⁿ ní tnándaha-aⁿ te úsá-ni cuíá ní xíndecu-aⁿ ndihi yíi-aⁿ, 37 te ní quendóo quèé-aⁿ, te sa ñuhu-aⁿ cúmídícó cúmí cuíá-aⁿ. Te ñá túú ní xóo quee-aⁿ veñuhu càhnu sá ío cùnuu, chi nduu niú ní xóo chiñuhu-aⁿ Dútú Ndiòxí, te áma ñá túú tnàhí ná ní xóo caxi-aⁿ ní xóo cáháⁿ ndihi-aⁿ Yá Ndiòxí. 38 Te ñu-ni òré ndécú-yu ndihi Jèsús ní quexìo-aⁿ núu-yu, te ní ndacáⁿ táhú-áⁿ núú Yá Ndiòxí cuendá sá ní xíní-aⁿ Jèsús, te dàtnùnì ní ngúita-aⁿ cáháⁿ vãha-aⁿ cuendá-gá núú nchãa ñáiyu, ñáiyu ndètu quíní sáá nduu

dàcácu Yá Ndiòxí ñáiyu Jerusàlén núú tnündòho tnúhu ndàhú.

Cuánuhú-yu ñuú Nazàrét

39 Te sátá ñí quidé-yu nchaa nàcuáa càháⁿ tnúhu Yá Ndiòxí, te cuánuhú-yu ñuú Nazàrét núú ndécú tnàhí-yu, te ñuú-áⁿ yíndèhu-xi distritú Galileá. 40 Te té lĩhli nãni Jèsús-áⁿ tá sãhnu-dē, te ta ñihí ndéé-dē cuáhãⁿ, te ducaⁿ ío vãha ta sãá sá xíní tnùnì-dē cuáhãⁿ, chi Yá Ndiòxí ndécú ndihi ñaha-gá xii-dē.

Jèsús ndécú-gã veñuhu

41 Te ndi tnahá cuíá ñí xóo quíhíⁿ té Chèé ndihi náná Jèsús vico pãscuá ñuú Jerusàlén. 42 Te cútñahá ní chítú Jèsús úxúú cuíá-gã, te cuáhãⁿ-yu ndihi-gã ñuú Jerusàlén vico pãscuá, chi ducaⁿ tnàhí quidé-yu. 43 Te òré ní yãha vico, te ní natnií-yu ichi cuánuhú-yu, te ní quendóo-gã ñuú Jerusàlén, te ní náná-gã, te ní tē Chèé ñá túú ní xíní ní quendóo-gã. 44 Chi ní sani iní-yu sá ñútnahã-gã tnuú nchaa ñáiyu ní sáhãⁿ vico cuánuhú. Te ní xúhuⁿ-yu ìⁿ nduu ichi ta ndùcu tnúhu-yu-gã núú nchãa ñani tnáhã-yu, ndihi núú nchãa ñáiyu xíní tnáhã ndihí-yu, 45 te ñá túú ní nãníhí ñáhã-yu xii-gã. Núu ní nacucó-yu cuánuhú tucú-yu ñuú Jerusàlén cuendá yàcãⁿ nanducu ñahã-yu xii-gã.

46 Te núú ùní nduu sá ñí dana núú ñáhã-yu xii-gã, te ní naníhí ñáhã-yu núcòo-gã xití veñuhu càhnu sá ío cùnuu tnuú cue tée dàcuaha ñaha xii-yu nchaa tnúhu ní chídó tnùnì ndíi Moisés, te ndédóho ñaha-gã xii-güedé, te nãndí sá ndúcú tnúhu-gã núú-güedé. 47 Te nchaa cue tée xíndedóho ñaha xii-gã xícuñuhu-güedé sá ío vãha sãá sá xíní tnùnì-gã, te ío vãha ñihí-gã tnúhu nãdanchocáva-gã. 48 Te òré ní xíní ñáhã té Chèé ndihi náná-gã xii-gã, te ío ní cuñuhu-yu, te ní xáhaⁿ náná-gã xii-gã:

—Yòhó déhe-í, ¿ná cuendá ducaⁿ nĩ quide ñaha-n xii-ndí? Te tātá-n ndihí yúhú ndihú iní-ndí xicá nànducu ñaha-ndí xii-n —càchí-xi xáhaⁿ-xi xii-gá.

⁴⁹ Te ní xáhaⁿ Jèsús xii-yu:

—¿Ná cuendá nánducu ñaha-ndo? ¿Náa ñá túú xini-ndo sá núú chíúⁿ Tātá-í tàú-í caça cuu-í-ãⁿ? —càchí-gá xáhaⁿ-gá xii-yu.

⁵⁰ Dico meé-yu ñá túú ní tècu tnùnì-yu nàcuáa ní xáhaⁿ-gá.

⁵¹ Te sátá dúcáⁿ te cuánuhú ndihí ñáhá-yu xii-gá ñuu Nazàrét, te ío ní sándáa iní ñáhá-gá xii-yu. Te nchaa sá nĩ quide-gá-án nĩ xúhuⁿ nahi-ni iní náná-gá. ⁵² Te Jèsús ducaⁿ-ni ta sàhmu-gá cuáháⁿ, te ta sàá-gá sá xini tnùnì-gá cuáháⁿ, te ducaⁿ cùdìu-gá núú Yá Ndiòxí, ndihí núú nchaa ñáyiu.

3

Té Juáa tée dàcuandute ñaha xii ñáyiu càhàⁿ-dé tnúhu Yá Ndiòxí xití yucu

(Mt. 3:1-12; Mr. 1:1-8; Jn. 1:19-28)

¹ Te ní cuu sáhúⁿ cuía sá yíndàha té Tiberiú cuéhé nacióⁿ, te dàvá-án nĩ cunuu té Pilatú distritú Júdeá, te té Herodés ní cunuu-dé distritú Galileá, te ñaní-dé té Lipé ní cunuu-dé distritú Itureá ndihí ingá distritú nání Tráconité, te té Lisaniás ní cunuu-dé distritú Abiliniá. ² Te té Anás ndihí té Caifás ní cuu-güedé dútú cùnùu. Te dàvá-án nĩ càháⁿ ndihí ñaha Yá Ndiòxí xii té Juáa déhe té Zacària xití yucu sá quihíⁿ-dé càháⁿ-dé tnúhu-gá núú ñáyiu. ³ Te té Juáa ní yáha-dé nchaa ñuu cáa yàtni yúte Jòrdán, te xáhaⁿ-dè xii nchaa ñáyiu:

—Chí dándixi túu iní sá ñà túú quide váha-ndo, te dañá-ndo nchaa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yá Ndiòxí nchaa yicá cuèchi-ndo —duha ní xáhaⁿ-dè xii-yu.

⁴ Te ducaⁿ nĩ quide-dé chi ní quee ndáa-xi nàcuáa ní chídó tnùnì ndí Chàiaa téé ní xoo càháⁿ tnúhu Yá Ndiòxí ndéé sanaha núú tütú ndí núú càchí-xi:

Tècu càháⁿ níhi ìⁿ téé yìhi xití yucu, te xáhaⁿ-dè xii ñáyiu:

“Chí dáña nchaa ichi cuehé ichi duha ndècu-ndo, te tniⁿ-ndo ichi váha, te ducaⁿ càda-ndo cuendá cundecu túha-ndo, chí véxi Yáa ío cùnùu.

⁵ Te nchaa núú cùnú nachítú, te nchaa tindúú ndihí nchaa yucu ngoyo nihnu cuendá nduu ndáa,

te nchaa ichi ñá túú cuáháⁿ ndáa nduu ndáa,

te nchaa ichi ñá túú càváha nduu váha.

⁶ Te nchaa ñáyiu ñuyú-a níhí-yu tnúhu sá Yá Ndiòxí véxi-gá dàcácu nihnu ñaha-gá xii-yu núú ùhú núú ndàhú.”

Duha ní chídó tnùnì ndí Chàiaa núú tütú ndí.

⁷ Te òré ní xica ñáyiu cuáháⁿ-yu cuendá dacuandute ñaha té Juáa xii-yu, te ní xáhaⁿ-dè:

—¿Nchaa nchòhó cúú-ndó dàtná ìⁿ cóó dèéⁿ chí ío cuihna iní-ndó! ¿Te nása ní cuu núu tnáhá nchòhó ndúcú-ndó nàcuáa cácu nihnu-ndo núú tnündòho càhnu vihi sá tá cùyatni ñaha xii-ndo véxi-í? ⁸ Te chí cadá váha vitna cuendá ducaⁿ cùnuni sá nĩ dáña-ndó nchaa ichi cuehé ichi duha ndècu-ndo. Te vá càchí-ndó sá ío càhnu cuu-ndo cuendá sá cúú-ndó ñaní tnáhá ndí Abrahám, chí cuèi ndéé yúú te ndacu Yá Ndiòxí ndada-gá ñáyiu te cuú-yu ñaní tnáhá ndí Abrahám. ⁹ Te caá chi ndècu túha-xi sá quèhndé-xi nchaa yutnu sá ñà túú càváha sávidí-xi, chí nchaa yutnu-án tèhndé-xi te cuánguee-xi núú ñùhú càyú-xi. Te duha sàtnahá-xi ndoho nchaa ñáyiu ñá túú quide váha, chí nchaa ñáyiu ducaⁿ ñà túú quide váha cùnú-yu dàtná nchaa yutnu sá ñà túú càváha sávidí-xi. —càchí-dé xáhaⁿ-dè xii-yu.

¹⁰ Te ní xícáⁿ tnúhu-yu núú-dě, te xǎháⁿ-yu:

—¿Te nása cada-ndí váín? — cǎchí-yu xǎháⁿ-yu xii-dě.

¹¹ Te xǎháⁿ-dě:

—Te núu ndědacàa-ndo ndecu ndihí-ndo úú dóó te cuǎñaha-ndo ìⁿ xii ñáiyu ñá túú ndècu ndihí, àdi núu ndècu ndihí-ndo sá nchító-ó te cuáha-ndó-yu na cǎxí-yu —cǎchí-dé xǎháⁿ-dě xii-yu.

¹² Te ní quexìo ìⁿ úú cue tée cuihna iní-xi quide cobrá ñáhá xii ñáiyu cuendá impuèstú cuendá cuàndute-güedé, te ní xícáⁿ tnúhu-güedé núú tē Juáá, te xǎháⁿ-güedé:

—Mèstrú, ¿te nása cada-ndí cuendá cuu váha iní Yǎ Ndiòxí-i? —cǎchí-güedé xǎháⁿ-güedé xii-dě.

¹³ Te té Juáá ní xǎháⁿ-dě:

—Vá cuídó-ndó càda cobrá-ndó ñáiyu —cǎchí-dé xǎháⁿ-dě xii-güedé.

¹⁴ Te tnàhá ìⁿ úú cue tée cùu sandadú xíndecu-áⁿ nǐ xícáⁿ tnúhú-güedé núú tē Juáá, te xǎháⁿ-güedé:

—Te nchúhú ¿nása cada-ndí cuendá cuu váha iní Yǎ Ndiòxí-i? —cǎchí-güedé xǎháⁿ-güedé xii-dě.

Te ní xǎháⁿ tē Juáá:

—Vá quéndèe-ndó sǎ néhé tnàha ñáiyu-ndo, te ni vǎ dácàa díquí-ndó-yu ìⁿ sá ñà túú nǎ quidè-yu, te nduu vétú iní-ndó nàcuáa ñùhu yáhu-ndo —cǎchí-dé xǎháⁿ-dè xii-güedé.

¹⁵ Te nchaa ñáiyu xíndetu sá quíxí Crìstú sàni ìⁿ sàni úú iní-yu núu sá díú Crìstú Yáá tendaha Yǎ Ndiòxí quíxí ñuyú-a cùu te Juáá àdi ñáhá. ¹⁶ Dico té Juáá ní cǎháⁿ ndodo-dé núú-yu nchaa-yu, te xǎháⁿ-dè:

—Na cǎchí tnúhu ndáá-í xii-ndo sǎ yùhú véxi-í sǎ cuendá-ni dacuàndute ñaha-í xii-ndo dàtná ní cachí Yǎ Ndiòxí, dico nchìcúⁿ ingá té véxi, te té-áⁿ taxi-dé Espiritú Yǎ Ndiòxí cundecu ndihí-ndo, te cùu-xi datná ìⁿ ñuhú, chi ndada ndoo ndada nine-xi iní-ndó. Te té-áⁿ lo-gá cùnùu-dé dácúxí yùhú,

chi yùhú cùu-í ìⁿ té duuⁿ duuⁿ ñá túú tàú-í nandaxi-í cuèdicó ñii chàú-dé dico quide-í chiùⁿ-dè.

¹⁷ Te té-áⁿ sa véxi túha-dé sá cáda díⁿ ñaha-dé xii-o dàtná quidé ñáiyu ndàda ndoo triú, chi ñáiyu-áⁿ sa nèhe túha-ná-yu yaxíⁿ-yu òré náñani cuendá ndada ndoo-yu, te òré ndádá ndòó-yu triú-áⁿ te dàquee díⁿ-yu mihi-xi, te tàxúha-yu mee-nǎ triú-áⁿ, te mihi-xi-áⁿ sǎhmí-yu. Te dàtná quidé-yu mihi triú-áⁿ ducaⁿ sǎtnahá-xi càda ñaha té-áⁿ xii nchaa ñáiyu ñá túú quide váha, chi daquìhíⁿ ñáhá-dé xii-yu núú ñùhú núú càyú, te ñuhú-áⁿ ñà túú tnàhí ndàhvá —cǎchí-dé xǎháⁿ-dè xii-yu.

¹⁸ Te titní vǐhí-gǎ tnúhu váha ní xǎháⁿ tē Juáá xii-yu òré ní dásàhú ñáhá-dé. ¹⁹ Te ní cǎháⁿ-dè dóho té Hèrodés cuendá sǎ ndécá-dè ìⁿ ñaha nani Herodiás ñaha ní cǎndeca ñani-dé té Lipé, te ní xǎháⁿ-dè cuendá nchaa dava-gá sá cuèhé sá dúhá quide-dé. ²⁰ Dico té Hèrodés ñá túú ní quide cuendá-dé tnúhu ní cǎháⁿ té Juáá, chi nèhé-gá tucu ní quide-dé, chi da vecaá ní chihí-dé té Juáá.

Sàndute Jesús

(Mt. 3:13-17; Mr. 1:9-11)

²¹ Te òré dácuaàndute té Juáá nchaa ñáiyu, te tnàhá Jèsús ní dácuaàndute ñaha-dé xii-gá. Te nini cǎháⁿ ndihí-gá Dútú Ndiòxí ní nacaáⁿ andiu, ²² te ní quee Espiritú Yǎ Ndiòxí véxi cuuⁿ túu-xi, te càa-xi datná cáá ìⁿ lómá, te òré-áⁿ nǐ tecú ní cǎháⁿ Yǎ Ndiòxí ndéé andiu, te xǎháⁿ-gǎ xii Jèsús:

—Yòhó cùu-n Dèhe-í téé ío cùu iní-í, te ío cùdí iní ñàhà-í xii-n —cǎchí-gá xǎháⁿ-gǎ xii Jèsús.

Cue téé ní xíndecu díhna-gá ñuyú-a dácúxí Xìtohó Jesucristú

(Mt. 1:1-17)

²³ Te ndècu Jèsús dàtná ócó úxí cuía-gá cùtnàhá ní chisaha-gǎ chiùⁿ ní táhú Tǎtá-gǎ Dútú Ndiòxí

cada-gá. Te ní cuu-gá déhe té Chèé chi ducaⁿ sàni iní ñāyiu ñuyíú-a. Te té Chèé-án nǐ cuu-dé déhe té Èlí,²⁴ te té-án nǐ cuu-dé déhe té Mátát. Te té Mátát-án nǐ cuu-dé déhe té Lèví, te té-án nǐ cuu-dé déhe té Mèlquí. Te té Mèlquí-án nǐ cuu-dé déhe té Jáná, te té-án nǐ cuu-dé déhe té Chèé,²⁵ Te té Chèé-án nǐ cuu-dé déhe té Matatías, te té-án nǐ cuu-dé déhe té Àmós. Te té Àmós-án nǐ cuu-dé déhe té Nàhúm, te té-án nǐ cuu-dé déhe té Èslí. Te té Èslí-án nǐ cuu-dé déhe té Nagàí,²⁶ te té-án nǐ cuu-dé déhe té Maaát. Te té Maaát-án nǐ cuu-dé déhe té Matatías, te té-án nǐ cuu-dé déhe té Semèí. Te té Semèí-án nǐ cuu-dé déhe té Chèé, te té-án nǐ cuu-dé déhe té Jùdá.²⁷ Te té Jùdá-án nǐ cuu-dé déhe té Jóná, te té-án nǐ cuu-dé déhe té Rèsá. Te té Rèsá-án nǐ cuu-dé déhe té Zorobàbél, te té-án nǐ cuu-dé déhe té Salàtiél. Te té Salàtiél-án nǐ cuu-dé déhe té Nèrí,²⁸ te té-án nǐ cuu-dé déhe té Mèlquí. Te té Mèlquí-án nǐ cuu-dé déhe té Àdí, te té-án nǐ cuu-dé déhe té Còsám. Te té Còsám-án nǐ cuu-dé déhe té Elmòdám, te té-án nǐ cuu-dé déhe té Ęr.²⁹ Te té Ęr-án nǐ cuu-dé déhe té Jòsué, te té-án nǐ cuu-dé déhe té Elièzér. Te té Elièzér-án nǐ cuu-dé déhe té Jòrím, te té-án nǐ cuu-dé déhe té Mátát.³⁰ Te té Mátát-án nǐ cuu-dé déhe té Lèví, te té-án nǐ cuu-dé déhe té Mió. Te té Mió-án nǐ cuu-dé déhe té Jùdá, te té-án nǐ cuu-dé déhe té Chèé. Te té Chèé-án nǐ cuu-dé déhe té Jónán, te té-án nǐ cuu-dé déhe té Eliàquím.³¹ Te té Eliàquím-án nǐ cuu-dé déhe té Mèleá, te té-án nǐ cuu-dé déhe té Mainán. Te té Mainán-án nǐ cuu-dé déhe té Mátatá, te té-án nǐ cuu-dé déhe té Nàtán,³² Te té Nàtán-án nǐ cuu-dé déhe té Dàvíí, te té-án nǐ cuu-dé déhe té Isàí. Te té Isàí-án nǐ cuu-dé déhe té Obéd, te té-án nǐ cuu-dé déhe té Bòóz. Te té Bòóz-án nǐ cuu-dé déhe té Salmón, te té-án nǐ cuu-dé déhe té Naàson.³³ Te té Naàson-án nǐ cuu-dé déhe té Aminadáb, te té-án nǐ cuu-dé déhe té Àrám. Te té Àrám-án nǐ cuu-dé déhe té Èsróm,

te té-án nǐ cuu-dé déhe té Fàrés, Te té Fàrés-án nǐ cuu-dé déhe té Jùdá,³⁴ te té-án nǐ cuu-dé déhe té Jàcób. Te té Jàcób-án nǐ cuu-dé déhe té Isàác, te té-án nǐ cuu-dé déhe té Àbrahám. Te té Àbrahám-án nǐ cuu-dé déhe té Tàré, te té-án nǐ cuu-dé déhe té Nàcór.³⁵ Te té Nàcór-án nǐ cuu-dé déhe té Sèrúg, te té-án nǐ cuu-dé déhe té Ragàú. Te té Ragàú-án nǐ cuu-dé déhe té Pèlég, te té-án nǐ cuu-dé déhe té Hèbèr. Te té Hèbèr-án nǐ cuu-dé déhe té Salá,³⁶ te té-án nǐ cuu-dé déhe té Cainán. Te té Cainán-án nǐ cuu-dé déhe té Arfàxád, te té-án nǐ cuu-dé déhe té Sèm. Te té Sèm-án nǐ cuu-dé déhe té Nòé, te té-án nǐ cuu-dé déhe té Làméc.³⁷ Te té Làméc-án nǐ cuu-dé déhe té Matusalén, te té-án nǐ cuu-dé déhe té Ènóc. Te té Ènóc-án nǐ cuu-dé déhe té Jàréd, te té-án nǐ cuu-dé déhe té Mahalaleél. Te té Mahalaleél-án nǐ cuu-dé déhe té Cainán,³⁸ te té-án nǐ cuu-dé déhe té Ènós. Te té Ènós-án nǐ cuu-dé déhe té Sèt, te té-án nǐ cuu-dé déhe té Àdán. Te té Àdán-án chi mee Yà Ndiòxi ní cadúha ndaha ñaha-gá xii-dé.

4

Sácuíhná quidé yica-xi cada Jesús sá ñà túú tàú-gá cada-gá ní cùu (Mt. 4:1-11; Mr. 1:12-13)

¹ Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndi^h-gá Espiritú Yà Ndiòxi, te Espiritú-án ndéca ñaha-xi xii-gá cuáhán ìⁿ xití yucu. ² Te yàcán ní xindecu-gá údico nduu, te sácuíhná nǐ cuini-xi coto ndéé ñáhá-xí xii-gá te núu ndisa sá vǎ cádá-gǎ ìⁿ sá ñà túú tàú-gá cada-gá. Te ñà túú tnàhí ná ní xèxi-gá ndi ùdico nduu-án, te sátá dúcán te ní xícán iní-gá caxi-gá. ³ Te sácuíhná-ǎn nǐ xáha-xi xii-gá:

—Te núu ndisa sá cúú-n Dèhe Yà Ndiòxi, te cúñaha xii yúú-a na ndùu-xi paá —càchí-xi xǎhaⁿ-xi xii-gá.

⁴ Te Jèsús ní xáhaⁿ-gǎ xii-xi:

—Núú tütú Yà Ndiòxi càchí-xi: “Ñá diú mèè-ni paá candeca-xi iní

ñáiyu, chi tnàhá nchaa tnúhu càháⁿ Yá Ndiöxí candeca-xi iní-yu”, duha càchí-xi núú tütú-gá —càchí-gá xáhaⁿ-gá xii-xi.

⁵ Te dàtnùní sácúíhná ndécá ñàha-xi xii-gá cuáháⁿ ìⁿ núú tìndúú dùcúⁿ, te uuⁿni ní dánèhé núú ñáhá-xí xii-gá nchaandi túhú nàcióⁿ cáá ñùyú. ⁶ Te ní xáhaⁿ-xi xii-gá:

—Yúhú cada-í, te taxi tnùnín nchaa-ndi túhú nàcióⁿ-a ndihi nchaa sá vâha ío ñu-ni nchaa nàcióⁿ-a, te cachí ñáiyu sá ío cùnuu-n, chi yúhú cúú cuèndá-í nchaa sá ío nchaa nàcióⁿ-a, te ndédani càa ñáiyu cùu iní-í te cúñaha-í xii-yu taxi tnùnín-yu. ⁷ Te núú ní yùhu ní iní-n chiñuhu ñaha-n xii-í ñá, te nchaa taxi-í cuu cuèndá-n —càchí-xi xáhaⁿ-xi xii-gá.

⁸ Te Jèsús ní xáhaⁿ-gá xii-xi:

—Xocuíñi yòhó sácúíhná núú ndécú-í-a, chi vá cúú càda-í nàcuáa càchí-n chi núú tütú Yá Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ìⁿdii díí-ni-gá cada-ndo nchaa nacuáa càháⁿ-gá”, duha càchí-xi núú tütú-gá —càchí-gá xáhaⁿ-gá xii-xi.

⁹ Te sácúíhná ndécá ñàha tucu-xi xii-gá cuáháⁿ ñuú Jerusálén, te ní xáhaⁿ-xi xii-gá cuásaá-gá díquí veñúhu càhnu sá ío cùnuu, te ní xáhaⁿ tucu-xi:

—Te núú ndisa cùu-n Déhe Yá Ndiöxí te cuandèe ndava ndée núú ñúhú ¹⁰ cuèndá quee ndáá-xi nàcuáa càháⁿ-xi núú tütú Yá Ndiöxí núú càchí-xi:

Yá Ndiöxí tendaha-gã cue espíritu xínú cuèchi núú-gã quixi-xi coto ñaha-xi xii-n.

¹¹ Te núú ndáhá-xí càundodo-n cuendá sá vá dânicuèhé yúú sáhá-n,

duha càchí-xi núú tütú-gá —càchí sácúíhná xáhaⁿ-xi xii-gá.

¹² Te Jèsús ní xáhaⁿ-gá xii-xi:

—Te càchí tucu-xi núú tütú Yá Ndiöxí: “Vá câni iní-n coto ndeé-n Dütú Ndiöxí Yaá cúú Ndiöxí-n ñuú ndisa sá dâcâcu nihnu ñaha-gã xii-n

cuèndá ìⁿ sá sâni iní-n càda-n sá cúú-xí mée-n”, duha càchí-xi núú tütú-gá —càchí-gá xáhaⁿ-gá xii-xi.

¹³ Te sâta dúcáⁿ te sácúíhná ñà tütú-gá ní cùtnuní iní-xi nása cada-xi Jèsús, núú xíáⁿ ní xica-xi cuáháⁿ-xi ní sanaa tnaa-xi.

Distritú Galileá ní chisaha Jèsús chiúⁿ ní táhú Tâtá-gã Dütú Ndiöxí cada-gá

(Mt. 4:12-17; Mr. 1:14-15)

¹⁴ Te Jèsús cuáháⁿ tucu-gá distritú Galileá, dico sa ndècu ndihi-gá Espiritú Yá Ndiöxí, te ní càa xico xíáⁿ ní níhí-yu tnúhu nchaa nàcuáa quide-gá. ¹⁵ Te ndi tnáhá ñuú cuáháⁿ-gá ducaⁿ cuânguñu-gá veñúhu-yu dânehé ñáhá-gã xii-yu, te ncháá-yu càchí-yu sá ío càhnu cuu-gá.

Jèsús ndécú-gã ñuú Nazàrét

(Mt. 13:53-58; Mr. 6:1-6)

¹⁶ Te Jèsús ní sáháⁿ-gá ñuú Nazàrét ñuú núú ní sahnu-gá. Te nduu ndetátú ñáiyu ní quíhu-gá veñúhu, chi ducaⁿ tnáhi quide-gá, te ní ngúnutñi-gá dâcuàha-gá tutú ndèe tnúhu Yá Ndiöxí. ¹⁷ Te ní sáñaha-güedé xii-gá tutú ndèe tnúhu ní càháⁿ ndii Chàiaⁿ téé ní xóo càháⁿ tnúhu Yá Ndiöxí ndée sanaha, te òré ní nandica-gá núú tütú-án te ní naníhí-gá núú càchí-xi:

¹⁸ Espiritú Yá Ndiöxí ndécú ndihi ñaha-xi xii-í,

chi ní cachí-gá sá càháⁿ-í tnúhu-gá sá cúú-xí ñáiyu ndáhú, ñáiyu vátá cündedóho tnáhi-gá.

Te véxi-í cuèndá vá ndihú-gá iní ñáiyu ñá túú ndècu váha iní-xi,

te cue ñáiyu sa nèhe váha ñaha-nã yucu ñávãha dâcâcu nihnu-í-yu.

Te cue ñáiyu cuáa nacaáⁿ-í núú-yu, te ñáiyu ndòho dandoho ñaha tnaha ñáiyu-xi taunihnu-í-yu.

¹⁹ Te cúñaha-í xii ñáiyu sá sâá nduu càda Yá Ndiöxí ìⁿ sá vâha sá cúú-xí-yu.

Duha càchí-xi núú tütú dáciuàha-gá.

²⁰ Te Jèsús ní nacadí-gá núú tütú-án, te ní nacuáha-gá ìⁿ téé xìnu cuechi veñúhu-án, te ní ngóo-gá. Te nchaa ñáyiú yìhi veñúhu ñá núú nũ-yu ndèhe ñahá-yu xii-gá. ²¹ Te xáhaⁿ-gá xii-yu:

—Mei vitna ní quee ndáá-xi náciuá càháⁿ-xi núú tütú Yá Ndiòxí —càchí-gá xáhaⁿ-gá xii-yu.

²² Te nchaá-yu ní cáháⁿ váha-yu cuendá-gá, te ní cuñúhu-yu tnúhu váha càháⁿ-gá, te xitnàhá-yu:

—¿Te náa ñá díú téé-a cùu-dé déhe té Chèé-áⁿ? —càchí-yu xitnàhá-yu.

²³ Te Jèsús ní xáhaⁿ-gá:

—Na càchí tnúhu ndáá-í xii-ndo sã ñúhú ìní-ndó cùñaha-ndo xii-í ìⁿ tnúhu cùtexínu sá càháⁿ méé-ndó, te quesaha-ndo: “Ñátátná cada tátna mee-n”, duha quesaha-ndo. Te cùñaha tucu-ndo xii-í: “Sa ní níhí-ndí tnúhu náciuá ní quide-n ñúú Capèrnaúm, te cada-n tnàhá ñúú núú ní sahnu-n”, duha quesaha-ndo —càchí-gá xáhaⁿ-gá xii-yu.

²⁴ Te ní xáhaⁿ tucu-gá:

—Na càchí tnúhu ndáá-í xii-ndo sã ní ìⁿ téé càháⁿ tnúhu Yá Ndiòxí ñá túú tnàhá ìní ñahá ñáyiú ñúú-dé.

²⁵ Te na càchí tnúhu ndáá tucu-í xii-ndo sã ìo vãi ñáyiú dìhí ñáyiú quèé ní xíndecu nàcióⁿ Isràél cùtnàhá ní xíndecu té Èliás cùtnàhá ñá túú ní cùuⁿ dáú ùní cuiá dava, te dàvá-áⁿ ìo ní ndoho ñáyiú docó nitùhú nàcióⁿ. ²⁶ Dico Yá Ndiòxí ñá túú ní tëndaha-gá té Èliás quihíⁿ-dé vehe ndédani càa ñáyiú dìhí-áⁿ, chi vehe ìⁿ ñaha ñúú Sàreptá ní xáhaⁿ-gá ní sáháⁿ-dé, te ñúú-áⁿ cáá yàtni-xi ñúú Sìdón. ²⁷ Te ní xíndecu tucu ingá téé ní xóo cáháⁿ tnúhu Yá Ndiòxí ndéé sanaha, te téé-áⁿ ní xínani-dě Eliseú, te diu-ni dàvá-áⁿ ní xíndecu tucu vãi ñáyiú cùhú nàcióⁿ Isràél, ñáyiú ní tnàhá cuéhé sã dátèhyú nihnu-xi yiqui cùñú-yu dico ñá túú ní ndúha-yu, chi ìⁿ dìi-ni té Nàamán téé distrìtú Siríá

ní ndúha-dé —càchí-gá xáhaⁿ-gá xii-yu.

²⁸ Te sá dúcáⁿ ní cáháⁿ-gá te xíáⁿ ní cudééⁿ víhí nchaa ñáyiú yìhi veñúhu-áⁿ núú-gá. ²⁹ Te ní queñuhú-yu Jèsús yuhu dèhvá tìndúú núú cáá ñúú-yu-áⁿ cuendá yácáⁿ dàquée-yu-gá dèhvá ní cùu. ³⁰ Dico Jèsús vii-ni ní quee-gá tnuú-yu cuáháⁿ-gá.

Ìⁿ téé yìhi ñaha espíritú cùndìhi yucu ñávaha

(Mr. 1:21-28)

³¹ Te Jèsús cuáháⁿ-gá ñúú Capèrnaúm, te ñúú-áⁿ yíndèhu-xi distritú Galileá. Te yácáⁿ ndécú-gá ní tnàhá nduu ndètatú ñáyiú, te ní ngúita-gá dáciuàha-gá ñáyiú. ³² Te xicuñúhu-yu nchaa náciuá dènehé ñahá-gá xii-yu, chi càháⁿ-gá dàtná càháⁿ ìⁿ téé cùnuu, te cùnuu ndisa-gá.

³³ Te xití veñúhu yìhi ìⁿ téé yìhi ñaha ìⁿ espíritú cùndìhi yucu ñávaha, te espíritú-áⁿ ní quide-xi níhi ní cáháⁿ téé-áⁿ, te xáhaⁿ-dè xii Jèsús:

³⁴ —¿Te ná cùní yòhó Jèsús téé ñúú Nazàrèt cada ñaha-n xii-ndí nũu véxi-n núú ndécú-ndí-i? ¿Áⁿ vèxi-n dànaa ñaha-n xii-ndí? Chi yúhú xini ñahá-í xii-n sã cúu-n ìⁿ téé ñá túú tnàhá cuéchi-xi chi núú Yá Ndiòxí ní quee-n véxi-n ñùyíú-a —càchí-dé xáhaⁿ-dè xii-gá.

³⁵ Te Jèsús ní tenàá-gá espíritú cùndìhi yucu ñávaha-áⁿ, te xáhaⁿ-gá:

—¿Cadí yuhu-n, te taquèe yiqui cuñú téé-áⁿ! —càchí-gá xáhaⁿ-gá.

Te espíritú cùndìhi yucu ñávaha-áⁿ ní dándùá-xi téé-áⁿ ndéé ñuhu tnuú ñáyiú xíndecu-áⁿ, te ñá túú-gá ná ní quide ñaha-xi, te ní quee ñaha-xi xii-dé. ³⁶ Te nchaa ñáyiú xíndecu-áⁿ ní cuñúhu-yu, te ní xitnàhá-yu:

—¿Te nása nduu-tu tnúhu càháⁿ téé-áⁿ ñá? ¿Te càháⁿ-dè dàtná càháⁿ ìⁿ téé tàxi tnuuní víhí, chi càháⁿ-ni-dé

te nchaa espíritú cúndìhi yucu ñávàha quèe-ni-xi yiqui cuñú-yu! —càchí-yu xĩtnàhá-yu.

³⁷ Te nchaa xichi ní níhĩ-yu tnúhu nàcuáa quide Jèsús.

Jèsús quidé tātna-gá náná ñadìhĩ té Xímú

(Mt. 8:14-15; Mr. 1:29-31)

³⁸ Te Jèsús ní ndee-gá xití veñúhu, te cuáháⁿ-gá vehe té Xímú. Te náná ñadìhĩ té Xímú-áⁿ cùhú-aⁿ ñùhu vihi-aⁿ cahni, te ní cáháⁿ ndàhú-yu núú Jèsús cuendá-aⁿ. ³⁹ Te Jèsús ní sáháⁿ-gá núú ndécú-áⁿ, te ní ngúnundeyi-gá te ní xáhaⁿ-gá xii cahni-áⁿ sã ná xòcuñĩ-xi, te ní xòcuñĩ-ni-xi, te òré-ni-áⁿ ñí ndúha ñaha cùhú-áⁿ te ní ndacóo-aⁿ ní xinu cuechi-aⁿ núú-güedé ndihĩ-gá.

Jèsús quidé tātna-gá vài ñáyiú cùhú

(Mt. 8:16-17; Mr. 1:32-34)

⁴⁰ Te òré ní ngódó tnúú nchíanchii, te nchaa ñáyiú xĩndecu ndihĩ ñáyiú cùhú vehe-xi ndéca ñahá-yu cuáháⁿ núú Jèsús. Te Jèsús ní sacáⁿ ndodo-gá ndaha-gá díquí ìⁿ ìⁿ ñáyiú cùhú-áⁿ, te ducaⁿ ñí quide-gá te ní ndúha-yu. Te ndi dííⁿ núú cuéhé tnàhá-yu ìⁿ ìⁿ-yu ni cùu. ⁴¹ Te tnàhá dava ñáyiú cùhú-áⁿ yíhĩ ñaha espíritú cúndìhi yucu ñávàha xii-yu ní cùu, te òré ní quée ñaha-xi xii-yu, te xíáⁿ ní quide-xi níhi ní cáháⁿ-yu, te xáhãⁿ-yu xii Jèsús:

—Yòhó cúú-ñ Dèhe Dútú Ndiòxí —càchí-yu xáhãⁿ-yu xii-gá.

Dico Jèsús níhi ní cáháⁿ-gá ní tenáá-gá nchaa espíritú cúndìhi yucu ñávàha-áⁿ, te xáhaⁿ-gá sá vã dúcáⁿ-gá cada-xi, chi sa xini-xi sá díú-gá cúú-gã Crístú Yaa ní tendaha Yã Ndiòxí véxi ñuyíú-a.

Jèsús dánèhé-gá ñáyiú distritú Galiléa

(Mr. 1:35-39)

⁴² Te ìⁿ nduu ní túndaá-ni ní quée Jèsús ñuu núú ndécú-gá-áⁿ cuáháⁿ-gá ìⁿ xichi núú ñã túú ñáyiú

ndècu. Te cue ñáyiú ní ngúita-yu nànducu ñahá-yu xii-gá te ní nanihí ñáhã-yu, te cuini-yu ngani ñahá-yu xii-gá cuendá sã ñã túú-gã ndéé quihĩⁿ-gá ní cùu. ⁴³ Dico ní xáhaⁿ-gá xii-yu:

—Dacuití quihĩⁿ-í cúñaha-ĩ xii nchaa ñáyiú dava-gá ñuu tnúhu sá cáháⁿ nàcuáa ndíhu ndaha ñaha Yã Ndiòxí xii-yu, chi chiúⁿ tnahi-áⁿ véxi-í —càchí-gá xáhaⁿ-gã xii-yu.

⁴⁴ Te ní xica cuu Jèsús ní dánèhé-gá ñáyiú tnúhu-gá nchaa xití veñúhu ndaa distritú Galiléa.

5

Jèsús ní quide-gá ní níhĩ-güedé chácá

(Mt. 4:18-22; Mr. 1:16-20)

¹ Te ìⁿ xito ndècu Jèsús yuhu làgúná Genesàrét, te ío cuéhé ñáyiú ní sáá, te ta dàdehnde ñaha-ná-yu xii-gá cuáháⁿ sá cuini-yu cund-edóho-yu nchaa tnúhu cáháⁿ-gá. ² Te Jèsús ní xiní-gá úú bàrcú cue téé tnì chácá xĩnutnì-xi yatni yuhu làgúná-áⁿ, te sa ní quene cue téé ñùhu xití-xi-áⁿ xĩnaquete-güedé ñunu-güedé. ³ Te Jèsús cuásaá-gá núú ìⁿ bàrcú-áⁿ, te bàrcú-áⁿ cúú-xí bàrcú té Xímú, te ní xáhaⁿ-gã xii té Xímú-áⁿ sá dánundehe-dé-xi luha-gá xití ndute. Te dátñùní ní ngóo-gá núú bàrcú-áⁿ, te xíáⁿ núcóo-gá ní ngúita-gá dánèhé-gá ñáyiú. ⁴ Te òré ní túhú ní dánèhé ñahá-gã xii-yu, te ní xáhaⁿ-gã xii té Xímú:

—Daquihĩⁿ bàrcú-a xití làgúná mei núú cùnú-gá, te dàquée-ndo ñunu-ndo tñi-ndo chácá —càchí-gá xáhaⁿ-gã xii-dé.

⁵ Te té Xímú ní xáhaⁿ-dè:

—Mèstrú, ni niú ní quide chiúⁿ-ndí te ni ìⁿ chácá ñã túú ní níhĩ-ndí, dico vitna cuendá-ni sá yòhó táuchiuⁿ-n te na dàquée-ndí ñunu-ndí váⁿ —càchí-dé xáhaⁿ-dè xii-gá.

6 Te òré ní dáquèe-güedé ñunu-güedé te súúni vâi chácá ní níhí-güedé, te ta ndátá-nâ ñunu-güedé cuáháⁿ ní cùu. 7 Núu ní quide-güedé ndaha-güedé núu dàva-gá cue tée cùndihí-güedé xixúhuⁿ ingá bàrcú cuèndá quíhíⁿ-güedé chindee ñaha-güedé. Te cue tée-áⁿ ní sáháⁿ-güedé ní chindee tnàha-güedé ní dächítú-güedé ndi ndúú bàrcú mee-ni chácá, te súúni ní cuu véé núu cuíni-na-xi quée naa-güedé ndihí bàrcú ní cùu. 8 Te sá dúcáⁿ cuíni-xi quée naa bàrcú ní cùu, núu té Xímú, àdi Pelú chi úú ìu-dé, ní ngúíñí xítí-dé núú Jèsús, te xàhaⁿ-dè:

—Xocuíñí yòhó Jèsús núú ndécú-í-a, chi yúhú cùú-í ìⁿ téé ío ndècu cuéchi-xi —càchí-dé xàhaⁿ-dè xii-gá.

9 Te ducaⁿ ní cáháⁿ-dé chi ní yùhú-dé, te ní cuñúhu-dé ndihí nchaa cue téé ndihí-dé-áⁿ cuèndá sá ío vâi chácá ní níhí-güedé. 10 Te tnàhá té Jàcobó ndihí té Juáa cue déhe té Zebèdeú ío ní cuñúhu-güedé, te ìu-ni cue téé cùndihí té Xímú-áⁿ cùú-güedé tnàhá-güedé. Te Jèsús ní xàhaⁿ-gá xii té Xímú:

—Vá yùhú-n, chi není vitna quíhíⁿ-n dàcaháⁿ-n ñáyiú cuèndá tuha ñahá-yu xii-í —càchí-gá xàhaⁿ-gá xii-dé.

11 Te ní quene-güedé ndihí bàrcú ndéé ñuhu yìchí yuhu làgúná-áⁿ. Te òré-áⁿ ní dándõo-güedé nchaandi túhú sá ndécú ndihí-güedé, te ní tuha-güedé Jèsús.

Jèsús quidé tâtna-gá ìⁿ téé tnàhá cuéhé sã dátèhyú nihnu-xi yiqui cùñú-ó

(Mt. 8:1-4; Mr. 1:40-45)

12 Te òré ní quexio Jèsús ìⁿ ñuú, te ní quexio ìⁿ téé cùhú tnàhá-dé cuéhé sã dátèhyú nihnu-xi yiqui cùñú-ó, te òré ní xiní-dé Jèsús te ní sáháⁿ-dé núú ndécú-gã, te ní ngúíñí xítí-dé núú-gã te ní nuu núú-dé

ndàa núú ñúhú te càháⁿ ndàhú-dé, te xàhaⁿ-dè xii-gá:

—Mèstrú, véxi-í càháⁿ ndàhú-í núú-n núu vá cùndèe iní-n càda tâtna ñaha-n xii-í, chi cùtnuní iní-í sá ndácú-n —càchí-dé xàhaⁿ-dè xii-gá.

13 Te Jèsús ní dácáa-gá ndaha-gá ní tendaha ñaha-gá xii-dé, te xàhaⁿ-gã:

—Cuu cada tâtna ñaha-í xii-n, te vitna te ndúha-n —càchí-gá xàhaⁿ-gã xii-dé.

Te òré-ni ní xócuíñí cuéhé tnàhá-dé. 14 Te dátñuní ní xàhaⁿ tucu Jèsús xii-dé:

—Vá yõ ìⁿ cùñaha-n sã ní quide tâtna ñaha-í xii-n, núú dùtú-ni cuáháⁿ cuèndá sá ná quíni ñahá-dé xii-n sã ní ndúha-n te cuáha-n-dé sá ndúú tãhú Yã Ndiõxí dátñá ní cachí ndíi Moisés cuèndá ná quíni ñáyiú sá ndáa ní ndúha-n —càchí-gá xàhaⁿ-gã xii-dé.

15 Te ducaⁿ ta xíté nuu-gá tnúhu nchaa nàcuáa quide Jèsús, te ío cuéhé ñáyiú ní xóo tacá nchaa núu ní xindecu-gá cuèndá sá cuíni-yu cundedóho-yu tnúhu càháⁿ-gá, ndihí cuèndá sá cuíni-yu cada tâtna ñaha-gã xii-yu. 16 Dico Jèsús ní xóo quee nihni-gá tnuú-yu ní xóo quíhíⁿ-gá núú ñà túú ñáyiú ndècu ní xóo cáháⁿ ndihí-gá Yã Ndiõxí.

Jèsús quidé tâtna-gá ìⁿ téé cùhú ñã cùú-gã candá nihnu

(Mt. 9:1-8; Mr. 2:1-12)

17 Te ìⁿ nduu dànehé-gá ñáyiú, te xìnucóo ìⁿ úú cue téé cùu fariséú, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés. Te cue téé-áⁿ ní quee-güedé nchaa ñuú yíndèhu distritú Galiléa, ndihí distritú Júdeá, ndihí ñuú Jerusálén, te nchaa ñuú-áⁿ ní quee-güedé cuáháⁿ-güedé núú ndécú-gã. Te Yã Ndiõxí chindèe ñaha-gá quidé tâtna-gá ñáyiú cùhú. 18 Te ìⁿ úú cue téé nchido-güedé ìⁿ téé cùhú ñã cùú-gã candá nihnu ñuhu-dé xító ní quexio ndihí ñaha-güedé, te

cuíní-güedé quíhu ndíhi ñaha-güedé ndéé xítí vehe, sáá-güedé ndéé núú Jèsús ndíhi téé cùhú-án. ¹⁹ Dico ñá túú ní ñíhí-güedé ndéé ichi quíhu-güedé, chi cuendá ío cuhé ñáiyu ndècu, núú xiáⁿ ní sáá-güedé díquí véhé-án ní caáⁿ-güedé te ndáa díquí véhé-án ní dáquëe-güedé téé cùhú-án, te ñùhu-ni-dé xító ní dáquëe ñaha-güedé tnuú ñáiyu ní sáá ndéé núú Jèsús. ²⁰ Te Jèsús ní cutnùní iní-gá sá ní yuhu ní iní-güedé sàndáá iní ñáhá-güedé xii-gá, núú ní xáhaⁿ-gá xii téé cùhú-án:

—Yòhó téé cùhú, sa ní quide càhnu iní-í nchaa cuéchi-n — cächí-gá xáhaⁿ-gá xii-dé.

²¹ Te cue téé dàcuaha ñaha xii-yu nchaa tñuhu ní chidó tñuní ndíi Moisés ndíhi cue téé cùu fariséú ní sani iní-güedé: “¿Ná cúú tée-a núú càháⁿ cuhé-dé cuendá Yá Ndiòxí-i? Te vá yòo ìⁿ ndàcu cada cahnu iní nchaa yíca cuéchi ñáiyu, chi ìⁿ dèi díi-ni Yá Ndiòxí quídé càhnu iní-gá”, duha ní sani iní-güedé.

²² Dico Jèsús sa ní cutnùní iní-gá nàcuáa sàni iní-güedé núú ní xáhaⁿ-gá xii-güedé:

—¿Te ná cuendá ducaⁿ sàni iní-ndó-i? ²³ Te sá dúhá ní xáhaⁿ-í xii téé cùhú-a sá cáda càhnu iní-í nchaa yíca cuéchi-dé, te xiáⁿ nchòhó ñá túú cùtnuní iní-ndó núú ndáá càháⁿ-í àdi ñá ndáa. Dico núú cúu-í-dé sá ndácoo-dé, te caca-dé te cutnùní ndáá iní-ndó núú ndáá càháⁿ-í àdi ñá ndáa, chi cundehe núú-ndó nàcuáa cada-í. ²⁴ Te vitna na cáda-í nàcuáa cutnùní iní-ndó nchaa-ndo sá yùhú Téé cùu ñaní tñáhá-ndó nchaa-ndo ndecu ndíhi-í tñuhu ndee iní sá cáda càhnu iní-í nchaa cuéchi ñáiyu ñuyú-a — cächí-gá xáhaⁿ-gá xii-güedé.

Te sáta dúcáⁿ te ní xáhaⁿ-gá xii téé cùhú-án:

—Ndacóo, te ndocani-n xító ñùhu-n véxi-án, te ñùhú-n véhe-n — cachí-gá xáhaⁿ-gá xii-dé.

²⁵ Te òré-ni-án ní ndúha téé cùhú-án te ní ndacóo-dé, te ní ndocani-dé xító ñùhu-dé ní quexìo-án, te ní natnù-dé ichi ta càháⁿ-dé cuánuhú sá ío càhnu cuu Yá Ndiòxí. ²⁶ Te nchaa ñáiyu xíndecu-án ní cuñùhu-yu, te tñáhá-yu ní cachí-yu sá ío càhnu cuu Yá Ndiòxí, te ducaⁿ ío ní yùhú-yu, te ní xitnàhá-yu:

—Vitna ní xiní-ó ìⁿ sá ñá túú tñáhí xiní-ó ní cùu —cachí-yu xitnàhá-yu.

Jèsús cáná-gá té Lèví

(Mt. 9:9-13; Mr. 2:13-17)

²⁷ Te sáta dúcáⁿ ní cuu te ní quee Jèsús xiáⁿ, te ní xiní-gá ìⁿ téé nàni Leví núcòo-dé ìⁿ xichí quide cobrá-dé ñáiyu cuendá impuèstú, chi cobradór cúu-dé, te ní xáhaⁿ-gá xii-dé:

—Néhe chitnàhá ñáhá-n xii-í — cächí-gá xáhaⁿ-gá xii-dé.

²⁸ Te té Lèví-án ní ndacuíñí-dé te ní dándoo-dé nchaa sá ndécú ndíhi-dé núú núcòo-dé-án, te ní tuha-dé Jèsús.

²⁹ Te sáta dúcáⁿ te té Lèví-án ní quide-dé ìⁿ vico càhnu vehe-dé sá cúu-xí Jèsús, te ní tacá vai cue téé quide chiuⁿ quide-dé, te nchaa-güedé cuánguñu-güedé mèsá ní ngóo-güedé ndíhi dava-gá ñáiyu ní quexìo cuendá caxi-güedé ndíhi-yu. ³⁰ Dico cue téé cùu fariséú ndíhi cue téé dàcuaha ñaha xii-yu nchaa tñuhu ní chidó tñuní ndíi Moisés ní ngúita-güedé xícuéhe-güedé cue téé xica cuu ndíhi-gá, te xáhaⁿ-güedé:

—¿Ná cuendá xéxi-ndó xihí-ndo ndíhi cue téé cuihna iní-xi quide cobrá ñáhá xii ñáiyu cuendá impuèstú, ndíhi nchaa dava-gá cue téé ndècu ichi cuéhe ichi duha-i? — cächí-güedé xáhaⁿ-güedé.

³¹ Te Jèsús ní xáhaⁿ-gá xii-güedé:

—Nchaa ñáiyu ñá túú cùhú chi ñá túú xiní ñuhú-yu ñátátná, dico nchaa ñáiyu cùhú chi xiní ñuhu ñáhá-yu. ³² Te yùhú véxi-í càháⁿ-í ñáiyu cùtnuní iní-xi sá ndécú cuéchi-xi cuendá dàñá-yu nchaa sá

cuèhé sá dúhá quidé-yu, te ñá túú vëxi-í càháⁿ-í ñáyiú cächí sá ñá túú ndècu cuéchi-xi —cächí-gá xáhaⁿ-gá xii-güedé.

Cue téé ndücu tnúhu núú Jèsús cuèndá ñáyiú ñá túú tnàhí ná xéxí áma càháⁿ ndihí-yu Yá Ndiöxí

(Mt. 9:14-17; Mr. 2:18-22)

³³ Te ní xáhaⁿ-güedé xii Jèsús:

—Te áma ñá túú tnàhí ná xéxí cue téé xica cuu ndihí té Juáa càháⁿ ndihí-güedé Yá Ndiöxí, te ñu-ni ducaⁿ quide cue téé xica cuu ndihí nchúhú cue téé cùu fariséú. ¿Te ná cuèndá cue téé xica cuu ndihí-n ñá túú dùcaⁿ quide-güedé nùu nchaa-ni nduu xèxi-güedé xihí-güedé quidé-güedé-i? —cächí-güedé xáhaⁿ-güedé xii-gá.

³⁴ Te Jèsús ní xáhaⁿ-gá xii-güedé:

—Nchòhó xini-ndó sá vã cúú cñaha-o xii cue ñáyiú ñùhu vico tnándaha sá vã cúú caxí-yu ñini ndècu ndihí ñaha téé tnándaha-áⁿ xii-yu. ³⁵ Dico sáá nduu te vá cündècu ndihí ñaha-gá téé tnándaha-áⁿ xii-yu, te dàvá-áⁿ te cahni iní-yu vá caxí-yu sá ndihú iní-yu —cächí-gá xáhaⁿ-gá xii-güedé.

³⁶ Te ní cani-gá ñⁿ cuèndú núú ñáyiú nàcuáa tecú tnùní-yu tnúhu-gá, te xáhaⁿ-gá:

—Vã yõo ñⁿ dándée luha dóó sáá ñⁿ dóó sa ní cuu tühú víhí, chi núu yoo ducaⁿ na càda, te dóó sáá-áⁿ nàndiyi-xi te uuⁿ-gá ndata-xi dóó sá ní cuu tühú-áⁿ, te luha dóó sáá-áⁿ ñá túú nàtau-xi ndée dóó sá ní cuu tühú-áⁿ. ³⁷ Te ní vá yõo ñⁿ chihí ndidí sáá xití ñⁿ lamba sa ní cuu tühú víhí, chi núu yoo ducaⁿ na càda, te ndava lamba sa ní cuu tühú-áⁿ chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ. ³⁸ Núu xíáⁿ xini ñùhu-xi quée ndidí sáá-áⁿ xití ñⁿ lamba saa cuèndá ducaⁿ ñá túú ñá cuu cováha-xi. ³⁹ Te ní ñⁿ ñáyiú ñá túú tnàhí iní-yu cohó-yu ndidí sáá, te núu díhna-gá ná còhó-yu ndidí

sá ní quene díhna-gá, chi cächí-yu sá xihí vãha-gá ndidí sá ní quene díhna-gá-áⁿ dàcüúxí ndidí sáá —cächí-gá xáhaⁿ-gá xii-yu.

6

Cue téé xica cuu ndihí Jesús sàhnú-güedé yoco triú nduu ndetátú ñáyiú

(Mt. 12:1-8; Mr. 2:23-28)

¹ Te ñⁿ nduu cùu-xi nduu ndetátú ñáyiú ñùhu Jesús ichi ndihí cue téé xica cuu ndihí-gá, te ta yãha-gá ndihí-güedé ñⁿ xichi núú cáá triú, te ní ngüíta-güedé sàhnú-güedé yoco triú-áⁿ te ndihí ndaha-güedé quíⁿ-güedé quée triú tá xèxi-güedé cuáháⁿ. ² Te ñⁿ úú cue téé cùu fariséú ní xáhaⁿ-güedé xii cue téé xica cuu ndihí-gá:

—¿Te ná cuèndá ducaⁿ quide nchòhó ñⁿ sá ñá túú tau-ó càda-o vitna cuu-xi nduu ndetátú-ó-i? —cächí-güedé xáhaⁿ-güedé.

³ Te Jèsús ní xáhaⁿ-gá xii-güedé:

—¿Te náa ñá túú dàcuaha-ndo núú tutú Yá Ndiöxí núú càháⁿ-xi nàcuáa ní quide ndí Dávíí cùnàhá ní xihí ndí docó ndihí cue téé ní xica cuu ndihí ndí-áⁿ? ⁴ Chi ní quíhu ndí vehe Yá Ndiöxí, te ní queheⁿ ndí páá ní cuu íí ndécú-áⁿ ní dácãhñu ndí cue téé xica cuu ndihí ndí ní xexi ndí ndihí-güedé, te ñá túú tau ndí sá dúcáⁿ càda ndí ní cùu, chi mee-ni cuè dütú tau-güedé caxi-güedé páa-áⁿ ní cùu —cächí-gá xáhaⁿ-gá xii-güedé.

⁵ Te ní xáhaⁿ tucu-gá:

—Te yúhú Téé cùu ñaní tnàhá-ndó nchaa-ndo, tnàhá-í ndécú ndihí-í tnúhu ndee iní sá cùu-í nchaa ñáyiú nàcuáa cadá-yu nduu ndetátú-ó-á —cächí-gá xáhaⁿ-gá xii-güedé.

Ñⁿ téé ní yichí ñⁿ xio ndaha-xi

(Mt. 12:9-14; Mr. 3:1-6)

⁶ Te ingá nduu ñu-ni nduu ndetátú ñáyiú cuanguíhu Jesús xití veñúhu dànehé-gá ñáyiú. Te xíáⁿ ndécú ñⁿ téé cùhú ní yichí nihnu ñⁿ xio ndaha cùha-dé. ⁷ Te cue téé

dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi cue tée cùu fariséú ndéhé-güedé nùu cada tátna ñaha Jèsús xii tée cùhú-áⁿ nduu ndetátú-güedé-áⁿ cuèndá níhí-güedé nàcuáa cada-güedé cacáⁿ cuéchi-güedé cuèndá-gá. ⁸ Dico Jèsús sa ní cutnùní iní-gá nàcuáa sàni iní-güedé, te ní xáhaⁿ-gá xii tée cùhú ndaha-xi-áⁿ:

—Ndacuiñí te ngúnutnii-n cuádava tnuú-ndí-a —càchí-gá xáhaⁿ-gá xii-dé.

Te tée-áⁿ ñí ndacuiñí-dé te ní ngúnutnii-dé cuádava tnuú-güedé ndíhi-gá. ⁹ Te dàtnùní Jèsús ní xíacáⁿ tnúhú-gá núu cuè ñáyiú xíndecu-áⁿ, te xáhaⁿ-gá xii-yu:

—Cuini-í cachí tnúhu-ndo ñá cùú sá váha cada-o ndúu ndetátú-ó. ¿Híⁿ chiúⁿ váha àdi híⁿ chiúⁿ cuehé, sá cáda tátna-o ñáyiú cùhú àdi sá cáhí-ó-yu? —càchí-gá xáhaⁿ-gá xii-yu.

¹⁰ Te dàtnùní ní ndacoto-gá núu-yu nchaá-yu, te ní xáhaⁿ-gá xii tée cùhú ndaha-xi-áⁿ:

—Ndocani ndaha-n —càchí-gá xáhaⁿ-gá xii-dé.

Te ní ndocani-dé ndaha-dé, te òré-ni ní ndúha. ¹¹ Te cue tée xíndecu-áⁿ súmí ñí cudééⁿ-güedé sá dúcáⁿ ñí quide tátna Jèsús tée cùhú-áⁿ, te ní ngúíta-güedé ndátnúhu-güedé nùu nása cada ñaha-güedé xii-gá.

Jèsús caxi-gá úxúú tnàhá cue tée dacuaha ñaha xii ñáyiú tnúhu-gá

(Mt. 10:1-4; Mr. 3:13-19)

¹² Te sáta dúcáⁿ ñí cuu te ní xica Jèsús cuáháⁿ-gá xiti yucu cuèndá yacáⁿ cáháⁿ ndíhi-gá Tátá-gá Dútú Ndióxi, te ni niú ní cáháⁿ ndíhi ñaha-gá. ¹³ Te sáta ní tundaá, te ní cana-gá nchaa cue tée xica cuu ndíhi-gá, te ní caxi-gá úxúú tnàhá-güedé, te cue tée-áⁿ ñí xáhaⁿ-gá sá díú-güedé cuu-güedé cue tée quíhíⁿ cáháⁿ tnúhu-gá núu ñáyiú. ¹⁴ Te duha xínani ndí úxúú

cue tée-áⁿ. Té Xímú, àdi Pelú chi úú díu-dé, ndíhi ñani-dé té Ndríxi, ndíhi té Jácobó, ndíhi té Juáa, ndíhi té Lipé, ndíhi té Bartolomé, ¹⁵ ndíhi té Mäteú, ndíhi té Mäxi, ndíhi té Jácobó déhe té Alféu, ndíhi ingá té Xímú té ní cundihi cue tée cananistá, ¹⁶ ndíhi té Júdás ñani té Jácobó, ndíhi té Júdás Iscarioté té ní sáá nduu ñí sáha cuèndá ñáhá xii Jèsús núu cuè tée cùu úhú iní ñáhá xii-gá, duha xínani cuè tée ní caxi Jèsús ní xica cuu ndíhi-gá.

Jèsús dánèhé-gá cuéhé víhi ñáyiú
(Mt. 4:23-25)

¹⁷ Te Jèsús cuánuu-gá yucu núu ñí sáá-gá-áⁿ, te ní ngava-gá híⁿ núu ndáa ndíhi cue tée xica cuu ndíhi-gá, te xiáⁿ ñí ngúnutnii-gá. Te xiáⁿ ndécú dàva-gá cue tée xica cuu ndíhi-gá ndíhi vai ñáyiú ndètu ñahá-yu xii-gá, te ñáyiú-áⁿ vèxi-yu nchaa ñúú cáá dístrítú Júdeá, ndíhi ñúú Jerusálén, te ndècu ñáyiú vèxi ndaa yuhu lamár yatni ñúú Tirú, ndíhi ñúú Sidón. Te nchaa ñáyiú-áⁿ ñí quexió-yu cuini-yu cundedóho-yu nchaa tnúhu cáháⁿ Jèsús, ndíhi cuèndá sá cuini-yu ndúha-yu nchaa cuéhé tnàhá-yu. ¹⁸ Te tnàhá ñáyiú yíhi ñaha espíritú cundihi yucu ñávaha. ¹⁹ Te nchaá-yu cuini-yu dacáa-yu ndahá-yu tendahá-yu Jèsús ní cùu cuèndá sá ñí níhi-yu tnúhu sá ndècu ndíhi-gá tnúhu ndee iní quidé tátna-gá nchaa ñáyiú cùhú.

Cuèndá ñáyiú ío váha táhú-xi
(Mt. 5:1-12)

²⁰ Te Jèsús ní ndacoto-gá núu cuè tée xica cuu ndíhi-gá, te ní xáhaⁿ-gá: —Váha táhú nchaa nchòhó cue ñáyiú ndàhú, chí nduu táhú-ndo cùndecu-ndo núu táxi tnùní Yá Ndióxi.

²¹ Váha táhú nchaa nchòhó ñáyiú ío cuini cundedóho tnúhu Yá Ndióxi chí ío víi ío váha cuu iní-ndó.

Váha táhú nchaa nchòhó ñáyiú ndàhyú sá ndíhú iní-ndó, chí sáa

nduu te cudíí iní-ndó nì caa ni quíhíⁿ.

²² Váha táhú nchaa nchòhó ñáiyu na cùu úhú iní ñáhá tnàha ñáiyu-xi, chi sáá nduu te vá dáñá-gã-yu quíhu-ndo vèñúhu, te cúcuèhé ñáhã-yu xii-ndo, te cachí-yu sá ñà díú ñáiyu váha cùu-ndo, te ducaⁿ càda ñahá-yu xii-ndo sã cuendá yúhú Tée cùu ñaní tnáhá-ndó nchàa-ndo. ²³ Te òré ducaⁿ na càda ñahá-yu xii-ndo te cudíí víhí-ní iní-ndó cùndecu-ndo, chi sáá nduu ndùu táhú-ndó sã ïo váha càa ndecu andu cundecu ndíhi-ndo nduu na nasaá-ndó yacáⁿ cundecu-ndo, chi ñu-ndu ducaⁿ nì xóo cada ñaha cue ñaní tnáhã-yu xii cue tée ní xóo cáháⁿ tnúhu Yá Ndióxi ní xíndecu ndéé sanaha.

²⁴ Te ndàhú ní cuu nchaa ñáiyu cuica ñà túú sàndáá iní ñáhá xii Yá Ndióxi, chi vitna ío váha ndècú-yu, dico sáá nduu te nduu ndàhú-yu.

²⁵ Te ndàhú ní cuu tucu nchaa ñáiyu ñã túú tnàhí ná cúmãní xii-xi vitna, chi sáá nduu quini-yu tnúndòho tnúhu ndàhú.

Te ndàhú ní cuu nchaa ñáiyu cùdíí iní-xi ndècu ichi cuehé ichi duha vitna, chi sáá nduu te ndáhyú-yu sá ndíhú iní-yu.

²⁶ Te ndàhú ní cuu nchaa ñáiyu na càháⁿ váha dava-gã ñáiyu cuendá-xi, chi ducaⁿ nì xóo cáháⁿ váha-yu cuendá nchaa cue tée ní xóo dandàhú ñáhá xii ñáiyu ndéé sanaha, chi ní cachí-güedé sá càháⁿ-güedé tnúhu Yá Ndióxi te ñã ndáá —càchí-gã xãhaⁿ-gã xii-güedé.

Cuu iní-ó nchàa ñáiyu cùu úhú iní ñáhá xii-ó

(Mt. 5:38-48; 7:12)

²⁷ Te Jèsús ní xáhaⁿ-gã xii nchaa ñáiyu xíndecu-áⁿ:

—Nchaa nchòhó ñáiyu xíndedóho ñaha càchí tnúhu-í xii-ndo sã cúú iní-ndó ñáiyu cùu úhú iní ñáhá xii-ndo, te cada-ndo sã váha sã cúú-xí-yu cueí nándí sá ná cádá ñahá-yu xii-ndo. ²⁸ Te cácaⁿ táhú-ndó núú Yá Ndióxi

cuendá ñáiyu càháⁿ úhú ñáhá xii-ndo, ndíhi cuendá ñáiyu tée ñaha cuechi neñúú xii-ndo. ²⁹ Te núu ní canihá-yu xii-ndo ñⁿ xito te cuini tucú-yu canihá-yu, te dañã-ndo na cànihá-yu, àdi núu na quèndeé-yu dóó ndíxí ndòdo-ndo, ndíhi dúhnú-ndó, te dañã-ndo na cànehé-yu quíhíⁿ. ³⁰ Te núu xicáⁿ-yu ñⁿ sá nándíhi-yu núu-ndó te cuañaha-ndo, àdi quèndeé-yu ñⁿ ndachíu-ndo, te vá nándacáⁿ-ndó núú-yu. ³¹ Te nchaa sá váha cuini-ndó càda tnaha ñáiyu-ndo, te cada-ndo tnáhá-ndó ndíhi-yu.

³² Chi núu nchòhó ná cùu iní-ndó mée-ni ñáiyu cùu iní ñáhá xii-ndo, te vá càchí-ndó sã ïo váha quide-ndo, chi tnáhá nchaa ñáiyu ndècu ichi cuehé ichi duha ducaⁿ xíquidé-yu. ³³ Àdi mee-ni ñáiyu quide ñaha sá váha xii-ndo quide váha-ndó-yu, te vá càchí-ndó sã ïo váha quide-ndo, chi tnáhá nchaa ñáiyu ndècu ichi cuehé ichi duha ducaⁿ xíquidé-yu. ³⁴ Àdi mee-ni ñáiyu sàni iní-ndó nàcoto ñaha xii-ndo cuañaha-ndo ñⁿ sá xicáⁿ-yu núu-ndó, te vá cáni iní-ndó sã ïo quide váha-ndo, chi tnáhá ñáiyu ndècu ichi cuehé ichi duha dàsaⁿ nuú-yu ñⁿ sá néhé váha-yu, te ndètu cahnu-ná-yu nacoto ñaha ñáiyu ní sáha núu-yu-áⁿ. ³⁵ Dico nchòhó xini ñúhu-xi cuu iní-ndó ñáiyu cùu úhú iní ñáhá xii-ndo, te cada-ndo sã váha sá cúú-xí-yu, te cuañaha núu-ndo ñⁿ sá ná ndíhi-yu te núu xicáⁿ-yu núu-ndó, te vá cùndètu-ndo nacoto ñahá-yu xii-ndo. Te ducaⁿ te ío-gã cuehé níhí-ndó cùndecu ndíhi-ndo, te cuu ndisa-ndo dèhe Dútú Ndióxi, chi ío càhnu iní-gã sá cúú-xí nchàa ñáiyu ñã túú ndacáⁿ táhú núú-gã cuendá nchaa sá váha quide-gã, ndíhi sá cúú-xí nchàa ñáiyu ndècu ichi cuehé ichi duha. ³⁶ Te cunduu càhnu iní nchòhó tuçu dàtná càhnu iní Tãtã-ó Dútú Ndióxi.

Vá càháⁿ cuehé-ó cuendá tnàha

ñáiyu-o

(Mt. 7:1-5)

³⁷ Te vá càháⁿ cuèhé-ndó cuèndá sá quidé tnàha ñáiyu-ndo, te ducaⁿ te Yá Ndiöxí ñá túú nà tnúhu cùñaha-gã xii-ndo. Te vá cùñaha-ndo xii ñáiyu sá quihíⁿ-yu ìⁿ xichi núú ùhú núú ndàhú ndohó-yu cuèndá nchaa sá ñà túú vâha quidé-yu, te ducaⁿ te Yá Ndiöxí vá cùñaha-gã xii-ndo sá tnàhá-ndó quihíⁿ-ndó ìⁿ xichi núú ùhú núú ndàhú ndoho-ndo. Te chí cáda càhnu iní nchaa sá quidé-yu, te ducaⁿ te Yá Ndiöxí cada càhnu iní ñàhá-gã xii-ndo tùcu. ³⁸ Te chí cuñaha xii ñáiyu núu ná cúú sá xíní ñùhú-yu, te dàtná chitu ìⁿ yicá súúni xidó coyo-ná, ducaⁿ tàxi Yá Ndiöxí xii-ndo. Te nánicuáa na càda-ndo cada vâha-ndo sá cúú-xí tnàha ñáiyu-ndo, te ñu-ni ducaⁿ càda ñaha Yá Ndiöxí xii-ndo —càchí Jèsús xâhaⁿ-gã xii-yu.

³⁹ Te dàtnùní ní cani-gã ìⁿ cuèndú núú-yu nàcuáa tecú tnùnì-yu tnúhu-gã, te xâhaⁿ-gã:

—Ìⁿ tée cuáá chi ñà ndácú-dě cuita nehe-dé ingá tée cuáá, chi núu ducaⁿ na càda-güedé te ndì ndùú-güedé ngaunihnu-güedé déhvá. ⁴⁰ Te ni ìⁿ landú yíhí scuèlá ñà túú cùnuu-gã-güexi dàcúúxí mèstrú-güexi, te ndéé núu na cùtúha vâha-güexi, te dàtnùní nùtnahá-güexi tée dànehé ñàhá xii-güexi.

⁴¹ Te na càchí tnúhu-í xii-ndo sá nchàa cuéchi quide ñáiyu cùu-xi datná ìⁿ mihi líhli. ¿Te ná cuèndá ndéhé-ndó ìⁿ sá ñà túú vâha quide tnaha ñáiyu-ndo, te mee-ndo vihi-gã quidé-ndó-í? Te sá dúcáⁿ quide-ndo te cada iní-ndó sá ndéhé-ndó dàtná ìⁿ mihi líhli ñùhu núú tnàha ñáiyu-ndo, te mee-ndo ñùhu ìⁿ mihi cahnu-gã núú-ndó. ⁴² Te núu na nàcanu ichi-ndo tnaha ñáiyu-ndo cuèndá sá ñà túú quide vâha-yu ndécú-yu te mee-ndo vihi-gã quidé-ndó ñà, te cada iní-ndó sá xâhaⁿ-ndo xii-yu sá

nátava-ndo mihi líhli ñùhu núú-yu, te mihi càhnu ñùhu núú méé-ndó ñà túú quide cuèndá-ndó. ¿Te sá dúcáⁿ quide-ndo te ío dândahú-ndó mèe-ndo sá quidé ndáá-ndó te ñà ndáá sá quidé ndáá-ndó! Te xini ñùhu-xi díhna-gã daña-ndo nchàa sá ñà túú vâha quide-ndo, te dàtnùní ducaⁿ te cutnùní vâha iní-ndó nàcuáa nàcanu ichi-ndo tnàha ñáiyu-ndo.

Ndi ñáiyu núú yutnu xini-ó nã yutnu cùu-xi cuèndá sá sãvidí-xi
(Mt. 7:17-20; 12:34-35)

⁴³ Te ñà túú ni ìⁿ yutnu vâha te quiní-ó cùuⁿ sãvidí sá ñà túú vâha, te ni ìⁿ yutnu sá ñà túú vâha, te quiní-ó cùuⁿ sãvidí vâha, chi mee-ni sãvidí sá ñà túú vâha cùuⁿ. ⁴⁴ Te ndi ñáiyu núú yutnu xini-ó nã yutnu cùu-xi cuèndá sá sãvidí-xi, chi ñà túú xini-ó cùuⁿ ngúxí ìⁿ tnu iñu, te ni ñà túú xini-ó cùuⁿ ndéhé yoho yâha stilé díquí ìⁿ yoho yâha cutexínu. ⁴⁵ Te nchaa ñáiyu vâha iní-xi càháⁿ-yu tnúhu vâha, chi ñu-ni tnúhu vâha tnàhí-án ñùhú iní-yu, te nchaa ñáiyu ñà túú vâha iní-xi càháⁿ cuèhé-yu, chi ñu-ni tnúhu cuèhé tnàhí-án ñùhú iní-yu, chi nchaa sá ñùhú iní-yu te xíáⁿ càháⁿ-yu.

Ìⁿ vehe ndécú cimientú-xi ndihí ìⁿ vehe ñà túú cimientú-xi
(Mt. 7:24-27)

⁴⁶ ¿Te ná cuèndá càchí-ndó sá yùhú cùu-í Yaá cúú Xitohó-ndó te ñà túú quide-ndo nchaa nacuáa càháⁿ-í-í? ⁴⁷ Te na càchí tnúhu-í xii-ndo cuèndá ñáiyu tûha ñaha xii-í, chi ñáiyu-án sácündedóho-yu nchaa tnúhu càháⁿ-í te tníⁿ-yu. ⁴⁸ Te ñáiyu-án cúú-yu dàtná ìⁿ tée ní dácáá ìⁿ vehe, chi téé-án díhna-gã ní xete-dé ndéé ní tnahá-dé yúú cáxíⁿ te dàtnùní ní tava-dé cimientú-xi, te òré ní cuuⁿ dáú, te ní ndee ndute ñùhu, te ní ndacáⁿ-xi ndéé núú cáá vèhe-án, dico ñà túú ní ndàcu-xi cuido-xi, te ducaⁿ chí téé ní dácáá vèhe-án ní tava-dé cimientú-xi núú

yúú cáxiⁿ. Duha sátnahá-xi cùu nchaa ñáyiú sácúndedóho tnúhu cáhán-í te tñí-yu. ⁴⁹ Te ñáyiú sácúndedóho tnúhu cáhán-í te ñá túú tñí-yu, ñáyiú-áⁿ cúú-yu dàtná ìⁿ téé ní dácáá ìⁿ vehe, te ñá túú ní tàva-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vehe-áⁿ, te í-ni ní xido-xi vehe-áⁿ cuèndá sá ñá túú ní quène cimientú-xi. Duha sátnahá-xi cùu nchaa ñáyiú sácúndedóho tnúhu-í te ñá túú cuúni-yu tñí-yu —càchí-gá xáhaⁿ-gá xii-yu.

7

Jèsús quidé tātna-gá ìⁿ téé xinu cuechi núú ìⁿ téé cùu capitáⁿ
(Mt. 8:5-13)

¹ Te sáta ní yáha ní cáhán Jèsús ndíhi ñáyiú, te cuáhán-gá ñúú Capèrnaúm. ² Te yacáⁿ ndécú ìⁿ téé cùu capitáⁿ, te cùhú ìⁿ téé xinu cuechi núú-dé téé ío-gá cúú iní-dé, te sa ndècu-ná-dé sá cúú-dé. ³ Te òré ní níhi téé cùu capitáⁿ-áⁿ tnúhu cuèndá Jèsús, te ní tendaha-dé ìⁿ úú cue téé cùu sacuéhé núú ñáyiú isràél cuáhán-güedé cáhán ndàhú-güedé núú-gá núu vá cündèe iní-gá quíhíⁿ-gá cada tātna-gá téé xinu cuechi núú-dé-áⁿ. ⁴ Te ní quexìo-güedé núú ndécú Jèsús, te ní ngúita-güedé cáhán ndàhú víhí-güedé núú-gá, te xáhaⁿ-güedé:

—Téé cùu capitáⁿ ní cachí-dé véxi-ndí núu vá cündèe iní-n quíhíⁿ-n càda tātna-n ìⁿ téé xinu cuechi núú-dé chi cùhú-dé, te tàú ndisa-n càda-n ñacuáa cáhán capitáⁿ-áⁿ, ⁵ chi téé-áⁿ ío cùu iní ñáhá-dé xii nchaa nchúhú ñáyiú isràél te diu-dé ní táuchíúⁿ-dè ní sáá veñuhu-ndí —càchí-güedé xáhaⁿ-güedé xii-gá.

⁶ Te sáta dúcáⁿ te Jèsús ní xica-gá cuáhán-gá ndíhi-güedé, te òré tá cùyatni-gá vehe núú ndécú téé cùhú-áⁿ cuáhán, te téé cùu capitáⁿ-áⁿ

ní xáhaⁿ-dè xii ìⁿ úú cue téé cáhán ndíhi-dé:

—Quíhíⁿ-ndó cūñaha-ndo xii Yaá cúú Mèstrú sá càchí-í sá ñà túú nã caní iní-gá, chí ñá túú tàú-í sá quíhu-gá ndéé xití vehe-í, ⁷ chí ní sá cùnú ndúcú mèe-í-gá ñá túú ní cùyí-í. Núu xiáⁿ cūñaha-ndo xii-gá sá ná cáhán-ni-gá sá ndúha téé xinu cuechi núú-í-a te ndúha-dé, ⁸ Chí yúhú ndécú cue téé tàxi tnuní ñáhá xii-í, te ducaⁿ yúhú tucu ndècu cue sandadú táxi tnuní-í. Te òré xáhaⁿ-í xii ìⁿ-dé quíhíⁿ-dé ìⁿ chiuⁿ te cuáhán-dé, te òré xáhaⁿ-í xii ingá-dé quixi-dé te véxi-dé, te òré xáhaⁿ-í xii téé xinu cuechi núú-í cada-dé ìⁿ chiuⁿ te quide-dé. Duha càchí-í cūñaha-ndo xii-gá —càchí-dé xáhaⁿ-dè xii cue téé cáhán ndíhi-dé-áⁿ.

⁹ Te sáta dúcáⁿ ní xáhaⁿ-güedé xii Jèsús, te ní cuñúhu-gá nchaa tnúhu ní cáhán téé cùu capitáⁿ-áⁿ, te ní nchócótó-gá núú nchaa ñáyiú nchícúⁿ ñáhá xii-gá cuáhán, te ní xáhaⁿ-gá:

—Na càchí tnúhu ndáá-í xii-ndo sá vātá quíní-gá-í ní ìⁿ ñáyiú isràél, ñáyiú ío vaha sandáá iní-xi Yá Ndiòxi dàtná sandáá iní ñáhá tée-áⁿ xii-gá —càchí-gá xáhaⁿ-gá xii-yu.

¹⁰ Te òré ní ndexìo cue téé nèhe tnúhu-áⁿ ní sáhán núú Jèsús, te sa ní ndúha téé cùhú-áⁿ.

Jèsús dándòto-gá déhe ìⁿ ñaha quèé

¹¹ Te sáta dúcáⁿ ní cuu te ní xica Jèsús cuáhán-gá ìⁿ ñúú nání Nàin, ndíhi cue téé xica cuu ndíhi-gá, ndíhi vài ñáyiú. ¹² Te òré ní sáá-gá yuhu ñúú-áⁿ, te ní xiní-gá nchídó-güedé ìⁿ ndíyi cuáhán chindúxi ñaha-güedé, te ndíyi-áⁿ cúú déhe ìⁿ ñaha quèé, te ìⁿndí ducaⁿ-ni déhe-aⁿ ndècu ní cuu te ní xihí-dé. Te ío cuéhé ñáyiú cuáhán chindúxi ñaha. ¹³ Te òré ní xiní ñáhá Jèsús xii-aⁿ ndàhyú-aⁿ te ní cundáhú iní ñáhá-gá, te ní xáhaⁿ-gá: —Vá ndàhyú-n —càchí-gá xáhaⁿ-gá xii-aⁿ.

14 Te ní dáyátní-gã càjá ñúhú ndíyí-án te ní dácàá-gá ndaha-gá te ní tendaha-gã càjà-án, te ní ngüñí cue téé nchìdo ñaha-án. Te ní xáhaⁿ-gã xii ndíyí-án:

—Tée cuechi, yúhú càchí-í sá ndácõo-n —càchí-gã xáhaⁿ-gã xii ndíyí-án.

15 Te téé ní xíhí-án nǐ nucúnucõo-dé te ní ngüita-dé càháⁿ-dé, te Jèsús ní nacuáha cuèndá ñáhá-gã xii-dé ndaha náná-dě. 16 Te sá dúcáⁿ nǐ quide Jèsús ní xiní-yu te ío ní yùhú-yu, te ní xítñàhá-yu:

—Ío càhnu cuu Yá Ndiõxí chi ñⁿ téé càháⁿ tnúhu-gá ní quexio núú ndécú-ó —càchí-yu xítñàhá-yu.

Te ní xítñàha tucú-yu:

—Yá Ndiõxí véxi-gã chindee ñàha-gã xii nchaa nchoo ñáyiu cùu cuendá-gã —càchí-yu xítñàhá-yu.

17 Te nchaa ñúu distritú Jùdeá, ndihi dava-gã ñúu ní níhí-yu tnúhu nàcuáa ní quide Jèsús.

Cue téé ní tendaha té Juàá cuáhán núú ndécú Jèsús

(Mt. 11:2-19)

18 Te cue téé xica cuu ndihi té Juàá ní xáhaⁿ-güedé xii-dé nchaa sá nǐ quide-gã, núu ní cana-dé úú tnàhá-güedé 19 cuèndá cúñaha-dě quíhíⁿ-güedé nducu tnúhu-güedé núú Jèsús, te núu sá díú-gã cúú-gã Crístú Yáá ní tendaha Yá Ndiõxí véxi ñuyú-a àdi sá cùndètu nahi-ni-güedé mei Yàá-án. 20 Te òré ní quexio cue téé ní tendaha tẽ Juàá núú ndécú Jèsús, te xáhaⁿ-güedé xii-gã:

—Té Juàá téé dàcuandute ñaha xii ñáyiu ní tendaha ñàha-dé xii-ndí véxi-ndí cácáⁿ tnúhú-ndí núú-n, núu sá díú-n cùu Crístú Yáá quixi ñuyú-a, àdi sá cùndètu-ndí mei Crístú càchí-dé —càchí-güedé xáhaⁿ-güedé xii-gã.

21 Te mei òré ní quexio-güedé-án nǐ quide tátna Jèsús vai ñáyiu cùhú, te davá-yu càhú víhí tnàhá-yu,

te ndi dííⁿ ndí dííⁿ núú cuèhé tnàhá-yu ñⁿ ñⁿ-yu, te cue ñáyiu yíhi ñaha espíritú cùndíhi yucu ñávàha ní queñuhu-gã espíritú-án yiqui cùñú-yu, te ío vai ñáyiu cuáá ní nacaáⁿ-gã núú-yu. 22 Te Jèsús ní xáhaⁿ-gã xii-güedé:

—Chí cuánùhú te cani-ndo cuèndú núú tẽ Juàá nchaa sá nǐ xiní-ndó quide-í, ndihi nchaa nàcuáa ndùu tnúhu ní cáháⁿ-í ní xíndedóho-ndo. Te cúñaha-ndo xii-dé sá quidé tátna-í núú cue ñáyiu cuáá, te quide tátna-í cue ñáyiu yacua, ndihi cue ñáyiu tnàhá cuèhé sã dátèhyú nihnu-xi yiqui cùñú-yu, ndihi cue ñáyiu doho, nchaa ñáyiu-án quide tátna-í te ndúha-yu, te ndéé cue ñáyiu sa ní xíhí dándòto-í cúñaha-ndo xii-dé, te cúñaha tùcu-ndo xii-dé sá ndécuu-í dánèhé-í nchaa ñáyiu ndàhú tnúhu sá sánú ìchi ñaha xii-yu nàcuáa naníhí tãhú-yu. 23 Te cúñaha tùcu-ndo xii-dé sá ío váha tãhú nchaa ñáyiu ñã túú quide sáá iní nchaa tnúhu càháⁿ-í, ùha cúñaha-ndo xii-dé —càchí-gã xáhaⁿ-gã xii-güedé.

24 Te sáta nǐ yáha-güedé cuánuhú-güedé, te ní ngüita Jèsús ní cáháⁿ-gã núú ñáyiu cuèndá té Juàá, te xáhaⁿ-gã xii-yu:

—Nchòhó ní sándéhé-ndó ñⁿ téé ndècu xití yucu, te téé-án ñã túú sàni ñⁿ sàni úú iní-dé, chi ñã túú quide-dé dàtná quidé nchaa ité náhnú cuáhán-xi ùha cuáhán-xi dácáⁿ òré quèné tãchí. 25 Te ní ñã túú ní sándéhé-ndó ñⁿ téé nihnu dóó vaha dóó vii càa. Te nchòhó xíní-ndó sã ñáyiu sàcúhnu dóó vaha dóó vii càa ñã túú nã cúmání xii-yu, te nchaa ñáyiu-án ndécú-yu vehe cue téé cùnuu yindaha ñaha xii ñáyiu. 26 Dico nchòhó chi ní sándéhé-ndó ñⁿ téé càháⁿ tnúhu Yá Ndiõxí. Te ndáá sá díú tẽ càháⁿ tnúhu-gã cúú-dé dico cùnuu-gã-dé dàcúxí dává-gã cue téé càháⁿ tnúhu-gã. 27 Te diu cuèndá té Juàá-án càháⁿ-xi núú tütú Yá Ndiõxí

nàcuáa ní xáhaⁿ-gã xii Crístú, te duha ní xáhaⁿ-gã:

Tendaha-í ìⁿ tée cáháⁿ tnúhu-í codonúu-dé núú-n cuendá dātúha-dé ñáyiú cuendá quíndáá iní-yu tnúhu-n.

Duha ní xáhaⁿ-gã, te ducaⁿ nǐ ngódó tnúní núú tūtú-gá. ²⁸ Te na cächí tnúhu-í xii-ndo sã ñi ìⁿ cue tée ñuyú-a ñá túú cūnuu-güedé dātá cūnuu té Juáá tée dàcuandute ñaha xii ñáyiú. Te nchaa ñáyiú sa ta ndihu ndaha ñaha Yá Ndiöxí vitna cuáháⁿ cūnuu-gá-ni tucú-yu dácúxí té Juáá cuéi cūu-yu ñáyiú ñá túú cūnuu dácúxí dāva-gá ñáyiú yíndaha-gá —cächí Jèsús xáhaⁿ-gã xii-yu.

²⁹ Te sá dúcáⁿ nǐ cáháⁿ Jèsús, núu nchaa ñáyiú ní dācuándute té Juáá ní cachí-yu sá ño váha quide Yá Ndiöxí, te diu-ni ducaⁿ nǐ cáháⁿ cue tée cuihna iní-xi quide cobrá ñáhá xii ñáyiú cuendá impuéstú, cue tée ní dācuándute-dé. ³⁰ Dico cue tée cūu fariséú, ndihi cue tée dàcuaha ñaha xii ñáyiú nchaa tnúhu ní chidó tnúni ndíi Moisés, cue tée ñá túú ní dàcuandute té Juáá ñá túú ní tnàhá iní-güedé cada-güedé nchaa sá váha cuíni Yá Ndiöxí. ³¹ Te Xítoho Jesu-crístú ní xáhaⁿ-gã xii-yu:

—Na cächí tnúhu-í xii-ndo nàcuáa sãtnahá-xi cūu ñáyiú ndècu vitna. ³² Chi ñáyiú-áⁿ cūu-yu dātá cue landú sácóo núú yáhu dàdiqui-güexi te níhi cáháⁿ-güexi, te xítnaha-güexi: “Ní túú-ndí yaá ndihi vlu te ñá túú ní cuíni-ndó càta-ndo. Te ño yica iní ní xita yuhu-ndí te ñá túú ní ndähyú-ndó”, cächí-güexi xítnaha-güexi. Te ducaⁿ sãtnahá-xi cūu ñáyiú ndècu vitna. ³³ Te té Juáá tée ní xóo dacuandute ñaha xii ñáyiú ño ndàhú ní xóo caxi-dé, te ñi ñá túú ní xóo coho-dé ndudí ndéhé yoho yaha stilé sá sá ní nduu-xi ndidí, te ní cachí-ndó sã ní xíndecu ndihi-dé espíritu cūndihi yucu ñávaha. ³⁴ Te sáta nǐ quexio yúhú Tée cūu ñani tnàhá-ndó

nchaa-ndo, te xèxi-í xihí-í ndécú-í te cächí-ndó sã cūu-í tée xèxi vihi te xihí vihi-í. Te cächí tucu-ndo sã cūu-í tée xica cuu ndihi cue tée cuihna iní-xi quide cobrá ñáhá xii ñáyiú cuendá impuéstú, ndihi nchaa dāva-gá cue tée ndècu ichi cuehé ichi duha, duha cächí-ndó. ³⁵ Te ñáyiú ní tnàhá tnúhu ndihi Yá Ndiöxí, ñáyiú-áⁿ quidè-yu nàcuáa cutnùní sá mée-gã ño ndècu ndihi-gá sá xini tnúni-gá —cächí-gá xáhaⁿ-gã xii-yu.

Jèsús ndécú-gã vehe ìⁿ tée cūu fariséú tée nani Xímú

³⁶ Te ìⁿ tée cūu fariséú ní cáháⁿ-dé Jèsús vehe-dé caxi-gá, te òré ní quexio-gá te cuanguihu-gá mèsá. ³⁷ Te xiáⁿ núcõo-gá ní sáá ìⁿ ñadìhí te diu-ni ñaha ñuú-áⁿ cūu-áⁿ, te ndècu-aⁿ ichi díi iní, te sá ñi níhi-aⁿ tnúhu sá cuängaxi Jèsús vehe tée cūu fariséú-áⁿ, núu nèhe-aⁿ ìⁿ yoó chitu àciti sàháⁿ tnámí. ³⁸ Te ní ngóo-aⁿ ìⁿ xio díi Jesús, te ní ngüita-aⁿ ndähyú-aⁿ te ndihi ndute núu-aⁿ ní naquete-aⁿ sàhá-gã. Te dātñúni ní nadayichí-aⁿ ndihi idi díqui-aⁿ, te ní teyuhu-aⁿ sàhá-gã, te ní chihi ñaha-aⁿ àciti sàháⁿ tnámí-áⁿ. ³⁹ Te sá dúcáⁿ nǐ quide-aⁿ ní xini tée cūu fariséú tée ní cáháⁿ ñáhá xii-gá-áⁿ núu ní sani iní-dé: “Te núu dicó ndisa tée cáháⁿ tnúhu Yá Ndiöxí cūu tée-a ña, te sa cutnùní iní-dé yoo cūu ñaha tnándeé ñáhá xii-dé, àdi ná ñáyiú cūu-aⁿ, te dicó ìⁿ ñaha ndècu ichi díi iní cūu-áⁿ”, duha ní sani iní-dé. ⁴⁰ Te Jèsús ní xáhaⁿ-gã xii-dé:

—Xímú, ndècu ìⁿ tnúhu cachí tnúhu-í xii-n —cächí-gá xáhaⁿ-gã xii-dé.

Te tée cūu fariséú-áⁿ xáhaⁿ-dè xii-gá:

—Cächí tnúhu, Mèstrú —cächí-dé xáhaⁿ-dè xii-gá.

⁴¹ Te Jèsús ní xáhaⁿ-gã:
—Ní xíndecu ìⁿ tée ní xóo dasaⁿ núu díhúⁿ, te ní xítaú úú tnàhá-güedé núu-dé. Te ìⁿ-dé ní sàhá-dé úhúⁿ cièndú díhúⁿ denáriú, te ingá-dé ní sàhá-dé údico úxí. ⁴² Te

ñá ní ñhí-güedě nacháhu-güedé núú-dě, te téé ní sánùu ñaha-áⁿ ñi quide càhnu iní-dé ndi ndúú-güedé. Te vitna cachí-ò tucu te núu ndéda càa-güedé cúú iní ñhá-gá-güedé xii-dé —càchí-gá xáhaⁿ-gá xii-dé.

⁴³ Te ní xáhaⁿ tē Ximú-áⁿ:

—Sànuu sá tēe tàù vài-gá díhúⁿ ïo-gá cúú iní-dé téé ní sánùu ñaha díhúⁿ-áⁿ —càchí-dé xáhaⁿ-dē xii-gá.

Te ní xáhaⁿ Jèsús:

—Sá ndàá càháⁿ-n —càchí-gá xáhaⁿ-gá xii-dé.

⁴⁴⁻⁴⁶ Te Jèsús ní ndacoto-gá núú ñadìhí-áⁿ, te ní xáhaⁿ-gá xii té Ximú-áⁿ:

—¿Ndèhe-n nacuaá quide ñadìhí-a ñã? Chi cuánguihu-í vehe-n, dico ñá túú ní tàxi-n ndute ndoo sáhà-í, te ní ñà túú ní tēyuhu ñaha-n, te ní ñà túú ní chìhi-n acití díquí-í, dico ñadìhí-a ní naquete-aⁿ ndihi ndute núú-aⁿ sáhà-í, te ní nadayichí-aⁿ ndihi idi díquí-aⁿ, te nuu núu teyuhu-aⁿ sáhà-í, te ní chìhi-aⁿ acití sáháⁿ tnámí sáhà-í. ⁴⁷ Te na càchí tnúhu-í xii-n sã ïo cùu iní ñhá-áⁿ xii-í, te núu xiáⁿ cùtnúni iní-ó sã cuéi ïo vài sã cuèhé sã dúhá ñi quide-aⁿ, dico Yá Ndióxi sa ní quide càhnu iní ñhá-gá xii-aⁿ. Chi Yá Ndióxi quidé càhnu iní-gá ñáyiú cuéi vài àdi sacú cuéchi-yu, te núu sacú cuéchi-yu te sacú cúú iní ñhá-yu xii-í —càchí-gá xáhaⁿ-gá xii-dé.

⁴⁸ Te ní xáhaⁿ-gá xii ñadìhí-áⁿ:

—Sa ní quide càhnu iní-í nchaa cuéchi-n —càchí-gá xáhaⁿ-gá xii-aⁿ.

⁴⁹ Te cue tēe xñucóo ndihi-gá xñnàha-güedé:

—¿Ná tēe cùu tēe-a núu nándi sá quidé-dē, te ndéé nchaa yíca cuéchi ñáyiú quide cahnu iní-dé-i? —càchí-güedé xñnàha-güedé.

⁵⁰ Te Jèsús ní xáhaⁿ tucu-gá xii ñadìhí-áⁿ:

—Sa ní cácu nihnu-n núú ùhú núú ndàhú vitna chì ní sàndáá iní ñhá-n xii-í, te vitna cuanùhú te ñá túú-gá ná cani iní-n —càchí-gá xáhaⁿ-gá xii-aⁿ.

8

Ñáyiú díhí ní chindee ñàha xii Jèsús

¹ Te sáta dúcáⁿ ñi cuu te Jèsús ní xica-gá cuáháⁿ-gá titní víhí ñúú náhnú, ndihi ñúú líhli dānehé-gá ñáyiú nàcuáa ndíhu ndaha ñàha Yá Ndióxi xii-yu. Te cuáháⁿ ndihi-gá ndi ùxúú tnàhá cue tēe xica cuu ndihi-gá, ² ndihi ñiⁿ úú ñáyiú díhí ní quide tátna-gá ní xíhi ñaha espíritú cùndihi yucu ñávàha, ndihi ñáyiú tnàhá dāva-gá cuéhé ùhú ní cùu. Te xíaⁿ tnàhá tucu ñiⁿ ñaha nàni Mariá Magdalená, te ñaha-áⁿ ñi xíhi ñaha ùsá espíritú cùndihi yucu ñávàha xii-aⁿ ní cùu, te ní quee ñaha-xi. ³ Te tnàhá ñiⁿ ñaha nàni Juáná ñadìhí ñiⁿ tēe nàni Chúza tēe ní cunuu ñi xinu cuechi vehe té Hérodés, ndihi ingá ñaha nàni Susaná nchaa ñáyiú-áⁿ ñi chindee ñàhá-yu xii-gá ndihi nchaa sá ndécú ndihí-yu, te diu-ni ducaⁿ ñi quide vài-gá tucu ñáyiú nchicúⁿ ñhá xii-gá cuáháⁿ.

Nàcuáa quide tēe cuángacáⁿ triú (Mt. 13:1-9; Mr. 4:1-9)

⁴ Te ïo vài ñáyiú ndaa ñúú ní tacá-yu núú ndécú Jèsús, te ní ngúita-gá ní cani-gá ñiⁿ cuèndú núú-yu cuèndá tecú tnùni-yu tnúhu-gá, te xáhaⁿ-gá xii-yu:

⁵ —Ñiⁿ tēe cuángacáⁿ-dé triú. Te òré ní ngúita-dé dāngoyo-dé triú-áⁿ te dāva ní quene ndāva ní ngava ndéé ichi, te ní xénihnu ñáyiú, te ní xini tílaá te ní nadatàcá-güedi.

⁶ Te dāva ní ngava ñuhu yadi núú yíhí víhi yúú, te ní xinu-xi dico núú sàcú-ni nduu te ní yíhí-xi, chì ñá túú cōhyo yíhi. ⁷ Te dāva ní ngava núú yúcu ndíquíⁿ tnu ññu, te ññu-ni ní xinu-xi ndihi tnu ññu-áⁿ, te tnu ññu-áⁿ ñi dānāá-xi nchaa triú sá ñi xinu-áⁿ. ⁸ Dico dāva triú-áⁿ ñi ngava-xi núú ndécú ññu cocoⁿ, te xiáⁿ ní xinu-xi te ní sahnú-xi, te ïo váha ní cuu, chì núú ñiⁿ-ní triú te ní

nguíhi yoco-xi ìn ciendú triú-xi —
càchí-gá xáhaⁿ-gã xií-yu.

Te níhi ní cáháⁿ-gá ní xáhaⁿ
tùcu-gá xií-yu:

—Nchaa nchòhó ñáiyu ní
xíndedóho tnúhu ní cáháⁿ-í-a, te ío
váha chí cuáha cuendá —càchí-gá
xáhaⁿ-gã xií-yu.

*Nàcuáa quèe-xi tnúhu ní cáháⁿ
Jèsús*

(Mt. 13:10-17; Mr. 4:10-12)

⁹ Te cue tée xica cuu ndihi Jèsús
ní xícáⁿ tnúhú-güedé núú-gã nõu
nása quèe-xi cuendú ní caní-gá núú
ñáiyu. ¹⁰ Te ní xáhaⁿ-gã xii-güedé:

—Nchòhó chí sa càchí tnúhu
Yá Ndióxi xii-ndo ìn sá vátá
quíní-gá-ndó, chí càchí tnúhu-gá
nàcuáa cada-gá ndihu ndaha-gã
ñáiyu, dico dava-gá ñáiyu caní-í
mee-ni cuendú núú-yu, chí cuéi na
quíní-yu nchaa nàcuáa cuu dico
ní vá cútnúni iní-yu ná cuendá
ducaⁿ cùu, àdi cuéi na cùndedóho-yu
dico ní vá tècú tnùní-yu —càchí-gá
xáhaⁿ-gã xii-güedé.

*Jèsús cáháⁿ-gá nàcuáa quèe-xi
tnúhu cuendá tée cuángacáⁿ triú*

(Mt. 13:18-23; Mr. 4:13-20)

¹¹ Te xáhaⁿ tùcu-gá xii-güedé:

—Duha quèe-xi cuendú ní caní-í
núú-ndó, chí triú ní sacáⁿ tée-áⁿ
cúú-xí dàtná tnúhu Yá Ndióxi,
¹² Te triú sá ní quene ndava ní
ngava ndéé ichi-áⁿ, xíáⁿ cúú-xí
dàtná ñáiyu ní quée iní-xi tnúhu
Yá Ndióxi, dico sácuíhná cuáháⁿ-xi
xòcani-xi tnúhu-gá iní-yu cuendá
sá vã quíndáá iní-yu, te vá nánihí
tàhú-yu. ¹³ Te triú sá ní ngava
ñuhu yadi nõu yíhí vîhi yúú, xíáⁿ
cúú-xí dàtná ñáiyu ní xíndedóho
tnúhu Yá Ndióxi te díí iní ní tní-yu
tnúhu-gá, dico òré ná dàcáháⁿ ñáhá
yücu ñáváha xií-yu nándi cadá-yu,
te dàña nihnú-yu tnúhu-gá chí ñá
nihí ndéé-yu canchicúⁿ nihnú-yu
nàcuáa cáháⁿ tnúhu-gá. ¹⁴ Te triú
sá ní ngava núú yúcu ndíquíⁿ

tnu iñu-áⁿ, xíáⁿ cúú-xí dàtná ñáiyu
ní tecú dóho-xi tnúhu Yá Ndióxi,
dico cuéé cuèé ní nacuaaá-yu
tnúhu-gá, chí cuendá mee-ni sã
cúú-xí mèè-yu ñùhu iní-yu, ndihi
cuendá sã ío sàni iní-yu cuu
cuicá-yu, ndihi cuendá sã ío cùdíí
iní-yu nchaa sã ío ñuyú-a núu
xíáⁿ àúⁿ nã cuu ní xíndedóho-yu
tnúhu-gá. ¹⁵ Dico triú sá ní ngava
núú ndécú ñùhu cocoⁿ, xíáⁿ cúú-xí
dàtná ñáiyu váha iní-xi ní xíndedóho
tnúhu Yá Ndióxi chí ñá túú dàña
nihnú-yu, te ní yùhu ní iní-yu
quidé-yu nchaa nàcuáa cáháⁿ
tnúhu-gá.

Nàcuáa quidé-yu iti

(Mr. 4:21-25)

¹⁶ Te ñá túú ní ìn ñáiyu tèñuhú-yu
ìn iti te dàdáhu-yu, àdi chiváha-yu ìn
caha camá, chí tàxi ndecú-yu núú
ñinu cuendá cutnúni núú nchaa
ñáiyu ndècu vehe. ¹⁷ Te ní ìn
tnúhu sã ñã tècú tnùní ñáiyu vitna
vá càchí-ó sã vã tècú tnùní-yu chí
dacuéi sã tècú tnùní-yu, te ní ìn
tnúhu sã càchí-ó cùu yuhu vitna vá
cúú yùhu chí dacuití sã quée tũu-xi
núú ñáiyu.

¹⁸ Te chí cùndedóho váha tnúhu
na cáháⁿ-í-a. Nchaa ñáiyu sàndáá
iní ñáhá xii Yá Ndióxi ío-gá cuita
quíndáá-gá iní ñáhá-yu xii-gá
quíhíⁿ, te nchaa ñáiyu ñá túú
sàndáá iní ñáhá xii-gá uuⁿ-gá cuita
cuu sàá-gá iní-yu núú-gã quíhíⁿ —
càchí-gá xáhaⁿ-gã xii-güedé.

Cue ñani Jèsús ndihi náná-gã

(Mt. 12:46-50; Mr. 3:31-35)

¹⁹ Te ní quexìo náná Jèsús ndihi
cue ñani-gã vehe núú ndécú-gã, te
ñá ndácú-yu cáháⁿ ndihi ñáhá-yu
xii-gá chí ío cuéhé ñáiyu ndècu núú
ndécú-gã. ²⁰ Te ìn ñáiyu xíndecu-áⁿ
ní dáyaáha-yu tnúhu núú-gã, te
xáháⁿ-yu:

—Ní quexìo náná-n ndihi cue
ñani-n xínutní-yu quehé, te

cuini-yu cahaⁿ ndihi nahá-yu xii-n
—cachi-yu xaháⁿ-yu xii-gá.

²¹ Te ní xahaⁿ-gá:

—Nchaa ñayiu sácúndedóho
tnúhu Yá Ndióxi te quidé-yu nchaa
nacuáa cahaⁿ tnúhu-gá, ñayiu-áⁿ
cúu-yu dátá ná ná-í ndihi dátá cue
ñani-í —cachi-gá xahaⁿ-gá xii ñayiu
ní dáyáha tnúhu núu-gá-áⁿ.

*Jésus ngáni-gá táchi ndihi ndute
làgúná*

(Mt. 8:23-27; Mr. 4:35-41)

²² Te ñⁿ nduu ní quée Jesús bàrcú
ndihi cue téé xica cuu ndihi-gá, te ní
xahaⁿ-gá:

—Chí ná quihíⁿ-ó ndaa ingá xio
yuhu làgúná —cachi-gá xahaⁿ-gá
xii-güedé.

Te cuaháⁿ-güedé ndihi-gá. ²³ Te
nini ñuhu bàrcú ichi cuaháⁿ-xi
núu ndute ní xidi Jesús. Te ní
ngüita-xi níhi vihi quene táchi te
ta nàdachitú-xi ndute xiti bàrcú-áⁿ
cuaháⁿ, te sa cuini-ná-xi quée naa
bàrcú-áⁿ xiti ndute ni cùu. ²⁴ Te ní
saháⁿ-güedé núu cáa Jesús xidi-gá,
te ní xahaⁿ-güedé xii-gá:

—¡Mèstrú, ndiquíú iní chi tà
quée naa-o cuaháⁿ! —cachi-güedé
xahaⁿ-güedé xii-gá.

Te Jesús ní ndiquíú iní-gá te ní
ndacóo-gá te ní tenáa-gá táchi-áⁿ
ndihi ndute làgúná-áⁿ, te ní
ngüíñi-ni táchi-áⁿ te ní nucúndecu
nahi-ná ndute làgúná-áⁿ. ²⁵ Te ní
xahaⁿ-gá xii-güedé:

—¿Náa ña túu sándáa iní ñáha
ndisa-ndo xii-í áⁿ? —cachi-gá
xahaⁿ-gá xii-güedé.

Te ní cuñuhu-güedé sá dúcáⁿ
ní quide-gá ní xini-güedé, te ní
yuhú-güedé, te ní xitnáha-güedé:

—¿Te ná téé cùu téé-a núu
ní cahaⁿ-ni-dé te ní ngüíñi
táchi te ní nucúndecu nahí-ni
ndute làgúná-a-í? —cachi-güedé
xitnáha-güedé.

*Tée yíhi ñaha cue espíritu cúndihi
yucu ñávaha*

(Mt. 8:28-34; Mr. 5:1-20)

²⁶ Te ní sáa-gá ndihi-güedé yucu
cue téé ñuu Gàdará, te yíhi ndáa-ni
ndaa ingá xio làgúná-áⁿ cáa distritú
Galileá. ²⁷ Te òré ní quene Jesús
xiti bàrcú te ní dáyatni ñaha ñⁿ
téé ñuu-áⁿ xii-gá, te yíhi ñaha
titni espíritu cúndihi yucu ñávaha
xii-dé. Te ní cunaha ña túu-gá
sacúñnu-dé dóo-dé, te ni ña túu-gá
sacúndecu-dé vehe-dé, chi da nchaa
núu yínduxi ndíyi quide vehe-dé.

²⁸ Te òré ní xini-dé Jesús te ní ngüíñi
xiti-dé núu-gá, te cue espíritu yíhi
ñaha xii-dé-áⁿ ní quide-xi níhi ní
cahaⁿ-dé, te xahaⁿ-dè xii-gá:

—¿Ná cuendá véxi-ó Jesús Déhe
Dútú Ndióxi sadi-n ichi-í-i? Te
cahaⁿ ndahú-í núu-n sá vā dāndòho
ñaha-n xii-í —cachi-dé xahaⁿ-dè
xii-gá.

²⁹ Te ducaⁿ ní cahaⁿ-dé cuendá sá
Jesús ní xahaⁿ-gá xii nchaa espíritu
cúndihi yucu ñávaha yíhi ñaha sá ná
quée ñaha-xi xii-dé. Te nchaa xiáⁿ
ní xóo dacaháⁿ-xi iní-dé nándi sá
ní xóo cada-dé ñuu ní xóo dacutu
ñaha-güedé cadená xii-dé cuendá
sá ña túu-gá ná cada-dé, te ní
xóo cundeé ñahá-güedé, dico cuéi
ducaⁿ dico ní xóo dandava-ni-dé
cadená, te cue espíritu cúndihi yucu
ñávaha-áⁿ ní xóo dacunu ñaha-xi
xii-dé ní xóo quihíⁿ-dé xiti yucu.
³⁰ Te Jesús ní xicáⁿ tnúhú-gá núu-dé,
te xahaⁿ-gá:

—¿Nása nani-n-í? —cachi-gá
xahaⁿ-gá.

Te ní xahaⁿ-dè:

—Vai Sandadú nani-í —cachi-dé
xahaⁿ-dè xii-gá.

Te ducaⁿ ní xahaⁿ-dè xii-gá
cuendá sá ño cuéhe espíritu cúndihi
yucu ñávaha yíhi ñaha xii-dé. ³¹ Te
nchaa espíritu-áⁿ ní cahaⁿ ndahú-xi
núu Jesús sá vā téndaha ñaha-gá
xii-xi quihíⁿ-xi núu ùhú núu ndahú.
³² Te diu-ni yatni yucu núu ndécú

Jèsús-án yíhí vai cuchí xixexi-güedi, te nchaa espíritú-án ní cáháⁿ ndàhú-xi núú-gã sá ná dàña-gá quíhu-xi yiqui cùnú nchaa cùchí-án, te Jèsús ní xáhaⁿ-gã sá cúú quíhu-xi yiqui cùnú-güedi. ³³ Te ní quee ñaha nchaa espíritú-án xii téé-án, te ní quíhu-xi nchaa cùchí-án, te cùchí-án ní xinu-güedi duha ní quee-güedi ndaa núú dèhvá yuhu làgúná-án, te ní ngaunihnu-güedi xití ndute te ní ndihí-güedi ní cáhá.

³⁴ Te òré ní xiní cue téé xito cuchí-án nàcuáa ní cuu te ní yùhú-güedé ní xinu-güedé, te ní sáháⁿ-güedé ní cani-güedé cuèndú núú cuè ñáyiú ndècu xití ñuú, ndihí núú cuè ñáyiú ndècu xití yucu. ³⁵ Te nchaa ñáyiú ní níhí tnùhu ní queé-yu cuáháⁿ ndéhé-yu nàcuáa ní cuu. Te òré ní quexió-yu núú ndécú Jèsús, te ní xiní-yu téé ní xíhí ñaha cuè espíritú cùndihí yucu ñávãha-án núcõo-dé núú sáhá Jèsús, te nihnu-ná-dé dóó-dě, te núcõo-dé dàtná ñáyiú váha, te ní yùhú-yu òré ní xiní ñãhá-yu xii-dé. ³⁶ Te nchaa ñáyiú ní xiní nàcuáa ní cuu ní ndúha téé yíhí ñaha cue espíritú cùndihí yucu ñávãha-án ní cùu ní caní-yu cuèndú núú nchaa ñáyiú ní quexió-án nàcuáa ní cuu ní ndúha téé-án ndihí nàcuáa ní cuu cuèndá nchaa cùchí-án. ³⁷ Te sá dúcáⁿ ní níhí-yu tnúhu nàcuáa ní cuu, núú nchaa ñáyiú ñuú Gàdará ío ní yùhú-yu te ní ngüíta-yu càháⁿ ndàhú-yu núú Jèsús sá ná nùhú-gá núú ndéé ichi véxi-gá. Te sá dúcáⁿ ní cáháⁿ-yu núú cuáháⁿ-gá núú ndécú bàrcú. Te òré ndéé-gá bàrcú-án nùhú-gá ³⁸ ní ngüíta téé ní xíhí ñaha cuè espíritú cùndihí yucu ñávãha càháⁿ ndàhú-dé núú-gã núú vá cùndèe iní-gá quíhíⁿ ndihí ñaha-gã xii-dé, dico Jèsús ní quide ndee iní ñáhá-ni-gã xii-dé, te ní xáhaⁿ-gã:

³⁹ —Cuanùhú vehe-n, te cani-n

cuèndú núú nchaa ñáyiú sá ío càhnu cuu nchaa sá váha ní quide ñaha Yã Ndiõxí xii-n —càchí-gá xáhaⁿ-gã xii-dé.

Te téé-án ní xica-dé cuánuhú-dé te ní ngüíta-dé ní cani-dé cuèndú núú nchaa ñáyiú xíndecu nihí ñuú sá ío càhnu cuu nchaa sá váha ní quide ñaha Jèsús xii-dé.

Cuèndá déhe yoco tẽ Jàirú, ndihí cuèndá ññ ñadìhí ní tnándeé dóó Jèsús (Mt. 9:18-26; Mr. 5:21-43)

⁴⁰ Te òré ní ndexìo Jèsús ndaa ingá xio yuhu làgúná, te ñáyiú xíndecu xíáⁿ sa ndètu cahnu ñaha-ná-yu, te ío váha ní cáháⁿ ndihí ñàhá-yu xii-gá òré ní nasáá-gá. ⁴¹ Te ññ téé tàxi tnuú yèñúhu ní quexió-dé núú ndécú Jèsús, te téé-án nání-dě Jàirú, te ní ngüíñí xití-dě núú-gã càháⁿ ndàhú-dé, te xáhaⁿ-dě xii-gá:

—Véxi-í càháⁿ ndàhú-í núú-n núú vá cùndèe iní-n quíhíⁿ-ó vèhe-í cada tátna-n déhe yoco-í —càchí-dé xáhaⁿ-dě xii-gá.

⁴² Te ducaⁿ ní xáhaⁿ-dě chi ndècu ññ dii-ni déhe yoco-dě, te ndècu-xí datná úxúú cuiá-xi, te càhú víhí tnàhá-xi cùhú-xi te cùlní-xi cuú-xi. Te Jèsús ní xica-gá cuáháⁿ-gá ndihí téé-án, te ío vai ñáyiú nchìcúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu.

⁴³ Te tnuú nchaa ñáyiú-án ñútnàhá ññ ñaha cùhú, te ñaha-án sá ní cuu úxúú cuiá sã cùhú-aⁿ ngòyo ñaha ññí xii-aⁿ, te ío cuéhé díhúⁿ ní cuu dândoñuhu-aⁿ chí ní nadico-aⁿ nchaa sã ndécú ndihí-aⁿ cuèndá ní níhí-aⁿ díhúⁿ ní queheⁿ nchaa ñáyiú ní quide tátna ñaha xii-aⁿ, dico ní ññ-yu ñá túú ní ndàcú-yu ndúha-aⁿ. ⁴⁴ Te ní sáháⁿ ndehe yatni-aⁿ ndaa sátá Jèsús, te ní tnándeé-aⁿ luha yuhu dóó-gã te òré-ni-án ní ndúha-aⁿ.

⁴⁵ Te Jèsús ní xicáⁿ tnúhú-gã núú-yu, te xáhaⁿ-gã:

—¿Ndèdacàa-ndo ní tnándeé ñáhá xii-í? —càchí-gá xáhaⁿ-gã xii-yu.

Te nchaá-yu ní xáhã-n-yu sá nĩ ñⁿ-yu ñá túú ní tnãndeé ñáhá xii-gá. Te té Pèlú ndihi cue tée cundihí-dé ní xáhaⁿ-güedé xii-gá:

—Mèstrú, ndèhe-n sá vái ñáiyu nchicúⁿ ñáhá xii-n, te xio xio dàdehnde ñáhá-yu, te xicáⁿ tnúhú-gã-n yõo ní tnãndeé ñáhá xii-n —cachí-güedé xáhaⁿ-güedé xii-gá.

⁴⁶ Dico Jèsús ní xáhaⁿ-gã xii-yu:

—Dico ñu ñⁿ-ndo nĩ tnãndeé ñáhá xii-í, chi ní cutnùnì iní-í sá ñⁿ ñáiyu cùhú ní tnãndeé ñáhá xii-í te ní ndúha-yu —cachí-gá xáhaⁿ-gã xii-yu.

⁴⁷ Te sátá nĩ xiní ñaha-áⁿ sã nĩ cutnùnì iní Jèsús sá nĩ tnãndeé ñáhá-áⁿ xii-gá, te yùhú yùhú-aⁿ ní sáhá-aⁿ ní ngüñí xití-áⁿ núú-gã, te ní náhmá-aⁿ núú-gã, ndihi núú nchaa ñáiyu ná cuendá ducaⁿ nĩ quide-aⁿ ní tnãndeé-aⁿ-gá, ndihi cuendá sá òré-ni-áⁿ nĩ ndúha-aⁿ.
⁴⁸ Te Jèsús ní xáhaⁿ-gã xii-aⁿ:

—Yòhó ñaha cùhú, ní sãndáá iní ñáhá-n xii-í nũu ní ndúha-n, te cuanùhú vitna te ñá túú-gã ná cani iní-n —cachí-gá xáhaⁿ-gã xii-aⁿ.

⁴⁹ Te càháⁿ dúcáⁿ-ní Jèsús ní sáá ñⁿ té xinu cuechi vehe té Jàirú té tãxi tnuní veñúhu, te xáhaⁿ té xinu cuechi-áⁿ xii-dé:

—Sa ní xihí déhe-n, vá chíchiuⁿ-gã-n Mèstrú —cachí-dé xáhaⁿ-dè.

⁵⁰ Te sá dúcáⁿ xáhaⁿ tõe xinu cuechi-áⁿ xii té Jàirú ní tecu dóho Jèsús, núu ní xáhaⁿ-gã xii-dé:

—Vá ndihú iní-n, quindáá iní ñáhá-ní-n xii-í te ndúha déhe-n —cachí-gá xáhaⁿ-gã xii-dé.

⁵¹ Te òré ní sáá-gá vehe té Jàirú te ñá ní dàña-gá quihu ñáiyu cùtexínu, núu té Pèlú-ni ndihi té Jácobó-ni, ndihi té Juáá-ni, ndihi tátá ndihi nãná-ni xichí ní xihí-áⁿ cuãnguïhu ndihi-gá xití vehe. ⁵² Te nchaa ñáiyu sa xindecu vehe-dé-áⁿ xindáhyú-yu sá ndihú iní-yu cuendá sá nĩ xihí-xi. Te Jèsús ní xáhaⁿ-gã xii-yu:

—Vá ndàhyú-ndó, chi dicó-ni xidí-xi ñá túú ní xihí-xi —cachí-gá xáhaⁿ-gã xii-yu.

⁵³ Te ní sácú ndeé ñáhã-yu xii-gá, chi sá cùú-xí mèe-yu chi ní xihí ndisa xichí-áⁿ. ⁵⁴ Te Jèsús ní tni-gá ndaha xichí nĩ xihí-áⁿ, te níhi ní cáháⁿ-gá, te xáhaⁿ-gã:

—Xichí cuéchí, ndacóo —cachí-gá xáhaⁿ-gã.

⁵⁵ Te xichí-áⁿ nĩ ndoto-xi, te òré-ni ní ndacóo-xi, te Jèsús ní xáhaⁿ-gã sá ná cuãñáhã-yu sá cáxi-xí. ⁵⁶ Te tátá-xi ndihi nãná-xi súúnì nĩ cuñúhu-yu sá dúcáⁿ nĩ dándótó ñaha Jèsús xii-xi, te ní xáhaⁿ-gã xii-yu sá vã yõo ñⁿ cuñáhã-yu sá dúcáⁿ nĩ quide-gá.

9

Jèsús téndàha-gá ndi ùxúú cue té xica cuu ndihi-gá quihíⁿ-güedé cáháⁿ-güedé tnúhu-gá

(Mt. 10:5-15; Mr. 6:7-13)

¹ Te Jèsús ní cana-gá ndi ùxúú cue té xica cuu ndihi-gá, te ní sãñaha-gã xii-güedé tnúhu ndee iní cundecu ndihi-güedé cuendá queñuhu-güedé nchaa espíritu cundihí yucu ñávãha yihí ñaha xii ñáiyu, ndihi cuendá sá cádá tátna-güedé nchaa ñáiyu cùhú.

² Te ní xáhaⁿ-gã xii-güedé sá quihíⁿ-güedé danèhé-güedé ñáiyu nàcuáa cada Yá Ndiõxí ndihu ndaha ñaha-gá xii-yu, te ducaⁿ cada tátna-güedé cue ñáiyu cùhú. ³ Te cùmánì-gã caca-güedé quihíⁿ-güedé, te ní xáhaⁿ-gã xii-güedé:

—Ñá túú tnàhí ná canehe-ndo cùu ichi-ndo, ni tátnu, ni ñunu, ni sá cáxi-ndó, ni dihúⁿ. Te ni vã canèhe-ndo ingá ichi dóo-ndó, chi ñu-ni dóo ñihnú-ndó-áⁿ xiáⁿ tnàhí-ni. ⁴ Te ndédani cãa vehe na saá-ndó, te xiáⁿ cundecu-ndo ndeé ná sã nduu ndeè-ndo. ⁵ Te núu ñá túú cuini-yu queheⁿ cuendá ñáhã-yu xii-ndo, te ndee-ndo ñùú-áⁿ, te naquidi-ndo ticá

chúhmá nǐ tñí sáhá-ndó cuendá sá ná cùtnuní iní-yu sá ñà túú quide váha-yu —càchí-gá xáhaⁿ-gã xii-güedé.

⁶ Te sátá dúcáⁿ nǐ xáhaⁿ Jèsús xii-güedé, te ní quee-güedé cuáháⁿ-güedé nchaa ñúú dácuaⁿha-güedé ñáyiú tñúhu Yá Ndiõxí, tñúhu sá càháⁿ nàcuáa naníhí tãhú-yu, te ducaⁿ ta quide tátna-güedé nchaa ñáyiú cùhú cuáháⁿ.

Nàcuáa ní cuu ní xíhí té Juáá té dácuaⁿdute ñaha xii ñáyiú

(Mt. 14:1-12; Mr. 6:14-29)

⁷ Te té Hèrodés téé cùu gobiernú ní níhí-dé tñúhu nchaa nàcuáa quide Jèsús, te quíyuhú iní-dé te sàni iní-dé yoo cùu-gá. Te ducaⁿ nǐ sani iní-dé chi dava ñáyiú càchí-yu sá tẽ Juáá téé ní xóo dácuaⁿdute ñaha xii ñáyiú ní ndoto cùu-gá. ⁸ Te davá-yu càchí-yu sá tẽ Èliás cúu-gã, te davá-yu càchí-yu sá ñⁿ téé ní xóo càháⁿ tñúhu Yá Ndiõxí ndéé sanaha víhi ní ndoto cùu-gá, càchí-yu. ⁹ Dico té Hèrodés ní cachí-dé:

—Yúhú ní táuchíúⁿ-í ní xehndé-güedé díquí tẽ Juáá. ¿Te yoo cùu téé dii cuendú-xi níhí-a sá sũúni cuèhé núú sã quidé-dé váiⁿ? —duha ní cachí-dé.

Te té Hèrodés ndúcú-dé nàcuáa cada-dé cuendá quini-dé Jèsús.

Jèsús dácàxi-gá úhúⁿ mǐl cue téé te dǐⁿ ñáyiú dǐhí ndihí landú

(Mt. 14:13-21; Mr. 6:30-44; Jn. 6:1-14)

¹⁰ Te nchaa cue téé ní táuchíúⁿ Jèsús cuáháⁿ càháⁿ tñúhu Yá Ndiõxí núú ñáyiú ní ndexìo-güedé núú-gã te ní ngüíta-güedé nácàni tñúhu-güedé nchaa nàcuáa ní quide-güedé. Te dàtnùní ní xica-gá medi-ni-gá ndécá ñaha-gá xii-güedé cuáháⁿ ñⁿ xichi núú ñà túú ñáyiú ndècu, yatni núú cáá ñúú Bètsaidá. ¹¹ Dico òré ní níhí ñáyiú tñúhu sá cuáháⁿ Jèsús, te nchìcúⁿ-yu-gá cuáháⁿ, te òré ní quexìo-yu núú-gã, te ní queheⁿ

cuendá ñáhá-gã xií-yu, te ní dánèhé ñáhá-gã xií-yu nàcuáa ndíhu ndaha ñaha Yá Ndiõxí xií-yu, te ní quide tátna-gá nchaa ñáyiú cùhú.

¹² Te òré sa ní cuaa te ní nataká ndi ùxúú cue téé xica cuu ndihí-gá ñúú-gã, te ní xáhaⁿ-güedé xii-gá:

—Sa ní cuu dandàca-n nchaa ñáyiú-a, chi sa ní cuaa, te na quíhíⁿ-yu nchaa vehe càa yatni iha, ndihí nchaa xití ñúú cáá yàtni iha cuaáⁿ-yu sá cáxí-yu, te diu-ni yacáⁿ ndetatú-yu, chi núú ndécú-ó iha ñá túú tñahí ná ió —càchí-güedé xáhaⁿ-güedé xii-gá.

¹³ Te Jèsús ní xáhaⁿ-gã xii-güedé:

—Mee-ndo chí cuñaha sã ná cáxí-yu —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Ñá túú nãgá ndécú ndihí-ndí, chi úhúⁿ duha-ná pàá, ndihí úú-nã chácá ndécú ndihí-ndí, te diu-ni núú quíhíⁿ-ndí cuaaⁿ-ndí sá cáxí-yu —càchí-güedé xáhaⁿ-güedé xii-gá.

¹⁴ Te xínu dàtná úhúⁿ mǐl mee-ni cuè téé, te dǐⁿ ñáyiú dǐhí ndihí landú. Te Jèsús ní xáhaⁿ-gã xii cue téé xica cuu ndihí-gá:

—Chí cñaha na ngõ ndi údico úxí ndi údico úxí-yu ñⁿ ñⁿ xichi —càchí-gá xáhaⁿ-gã xii-güedé.

¹⁵ Te ducaⁿ nǐ quide-güedé, te ní ngóo-yu nchaá-yu. ¹⁶ Te dàtnùní ní queheⁿ-gá ndi úhúⁿ pàá-án, ndihí ndi ndúú chácá-ãⁿ. Te ní ndacoto-gá andíu, te ní ndacáⁿ tãhú-gã núú Yá Ndiõxí, te dàtnùní ní tãhú cuèchi-gá pàá-án ndihí chácá-ãⁿ, te ní sãha-gá nchaa cue téé xica cuu ndihí-gá ní dácãhñu ñaha-güedé xií-yu. ¹⁷ Te nchaá-yu ní xexí-yu ní ndahá xití-yu. Te sátá nǐ túhú cohõ-yu te ní nadatácá-güedé nchaa sá nǐ quendóo, te ní chítú ùxúú tñahá tídihi mee-ni sã nǐ quendóo.

Té Pèlú xǎhaⁿ-dě xii Jèsús sá díú-gǎ cúú-gǎ Crìstú

(Mt. 16:13-19; Mr. 8:27-29)

¹⁸ Te ìⁿ nduu ndècu mee Jèsús ndihi cue tée xica cuu ndihi-gá, te càháⁿ ndihi-gá Yǎ Ndiǒxí, te sáta nǐ yáha ní cáháⁿ ndihi-gá Yǎ Ndiǒxí, te ní xícáⁿ tnúhú-gǎ núú-güedé, te xáhaⁿ-gǎ xii-güedé:

—¿Yoo cùu yúhú càchí ñáyiú-va?
—càchí-gǎ xáhaⁿ-gǎ xii-güedé.

¹⁹ Te ní xáhaⁿ-güedé xii-gǎ:

—Davá-yu càchí-yu sá cúú-n ndǐ Juáá tée ní xóo dacuàndute ñaha xii ñáyiú, te davá-yu càchí-yu sá cúú-n tē Èliás, te davá-yu càchí-yu sá ìⁿ tée ní xóo cáháⁿ tnúhu Yǎ Ndiǒxí ndéé sanaha nǐ ndoto cùu-n, duha càchí-yu —càchí-güedé xǎhaⁿ-güedé xii-gǎ.

²⁰ Te ní xícáⁿ tnúhú tucu-gǎ núú-güedé, te xáhaⁿ-gǎ xii-güedé:

—Te nchòhó, ¿yoo sàni iní-ndó cùu-í-í? —càchí-gǎ xáhaⁿ-gǎ xii-güedé.

Te té Pèlú ní xáhaⁿ-dě xii-gǎ:

—Yòhó cúú-n Crìstú Déhe Dútú Ndiǒxí —càchí-dé xáhaⁿ-dě xii-gǎ.

Jèsús càháⁿ-gǎ sá cáhní ñaha-güedé xii-gǎ

(Mt. 16:20-28; Mr. 8:30-9:1)

²¹ Te ní xáhaⁿ-gǎ xii-güedé sá vǎ yóo ìⁿ cúñaha-güedé yoo cùu-gǎ.

²² Te ní xáhaⁿ-gǎ xii-güedé:

—Yúhú Tée cùu ñani tnáhá-ndó nchàa-ndo ío cuéhé sǎ ndòhò-í, chi daquèe tihú ñáhá cuè tée cùu sacuéhé nùú ñáyiú isràél, ndihi cue dútú cúnù, ndihi cue tée dàcuaha ñaha xii ñáyiú nchaa tnúhu ní chídó tnùnǐ ndǐ Moisés, te sáá nduu te cahni ñaha-güedé xii-í, dico nduu úní sá cùu-í te ndoto-í —càchí-gǎ xáhaⁿ-gǎ xii-güedé.

²³ Te dàtnùnǐ ní xáhaⁿ-gǎ xii nchaa ñáyiú:

—Nchaa ñáyiú cuení chitnahá ñáhá xì-í, te xìni ñuhu-xi vǎ cádá-gǎ-yu sá sání iní méè-yu, te ìⁿ nduu ìⁿ nduu cada ndee iní-yu cundecu túha-yu ndohó-yu

cuendá-í, te cuèi na ndòhò-yu dàtná ndoho-í. ²⁴ Te nchaa ñáyiú cuení sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyiú ñà túú yúhú cuèi nándí sá ná yáha-yu cundecú-yu ñuyíú-a sá cuendá-í, te ñáyiú-áⁿ naníhí tǎhú-yu. ²⁵ Te cuèi nchaandi túhú sá ío ñuyíú-a na nihí ñáyiú cundecu ndihí-yu, dico núu ðu nchaa xǎⁿ ná càda cuíta nihnú-yu te ñà túú vèdapa nàndíhi-xi sá dúcáⁿ ndècu ndihí-yu nchaa xǎⁿ.

²⁶ Te nchaa ñáyiú na cùcahaⁿ núú-xi cáháⁿ váha cuendá-í ndihi cuendá nchaa tnúhu-í, te tnáhá yúhú Tée cùu ñani tnáhá-ndó nchaa-ndo cùcahaⁿ núú-í núu-yu òré quixi tucu-í ndihi cue espíritú xínú cuèchi núú Tǎtà-í Dútú Ndiǒxí, te mee-gǎ cada cutnùnǐ iní nchaa ñáyiú sá ío càhnu cuu-í. ²⁷ Te na càchí tnúhu ndáá-í xii-ndo sǎ ío dava nchòhó ñáyiú ndècu iha vitna vǎ cùu-ni-ndo, chi cundecu-ni-ndo ndéé quini-ndó sáá nduu ndíhu ndaha ñaha Yǎ Ndiǒxí xii ñáyiú —càchí-gǎ xáhaⁿ-gǎ xii-yu.

Ní nadáma dóo Jèsús ndihi núú-gǎ (Mt. 17:1-8; Mr. 9:2-8)

²⁸ Te ní cuu dàtná úná nduu sá dúcáⁿ nǐ cáháⁿ Jèsús, te cuásaá-gǎ ìⁿ yucu cáháⁿ ndihi-gǎ Yǎ Ndiǒxí, te ndèca-gǎ té Pèlú, ndihi té Jàcobó, ndihi té Juáá cuásaá. ²⁹ Te nini càháⁿ ndihi-gǎ Yǎ Ndiǒxí ní nadáma núú-gǎ ndihi dóo-gǎ, te dóo-gǎ-áⁿ sùúni nǐ nduu cuixíⁿ víhí, te sùúni dàtásaⁿ-xi. ³⁰ Te òré-ni-áⁿ nǐ xini-güedé úú tnáhá cue tée càháⁿ ndihi-gǎ, te ìⁿ-dé cúú-dé té Moisés, te ingá-dé cúú-dé té Èliás, ³¹ te sùúni dàtásaⁿ-xi ni càndéé núú ndécú cuè tée úú-áⁿ ndihi-gǎ, te xǐndatnúhu-güedé nàcuáa ndoho Jèsús cuú-gǎ ñuu Jerusálén dàtná ní cachí méé-gǎ. ³² Te té Pèlú ndihi úú-gǎ-güedé cuení víhí-güedé cúdú-güedé, dico ní sahni iní-güedé ñà túú ní xidí-güedé, te ní dánèhé núú ñáhá-xí xì-güedé sá sùúni

vãha cãa núú ndécú Jèsús, ndihi úú cue tée càháⁿ ndihi-gá-áⁿ. ³³ Te òré sa ndùcu ndee cue tée úú-áⁿ caca-güedé núhú-güedé, te ní xáhaⁿ tẽ Pèlú xii-gá:

—Mèstrú, ¡vãha ní cuu sã ndécú-ó ìha vitna! Te na dàcaa-ndí úní tnhá vehe tnuvixiⁿ, ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Èlías —càchí-dé xáhaⁿ-dẽ xii-gá.

Dico té Pèlú chi ni mèe-dé ñã túú ní cùtnuní iní-dé nása ndùu tñúhu ní cáháⁿ-dé. ³⁴ Te nini cáháⁿ-dé ní quexìo ìⁿ vicó núú ndécú-güedé-áⁿ ñĩ dádãhu ñaha-xi xii-güedé, te ní yùhú-güedé sã dúcáⁿ ñĩ quexìo vicó-ãⁿ ñĩ dádãhu ñaha-xi. ³⁵ Te xití vicó-ãⁿ ñĩ tecú ní cáháⁿ Yã Ndiõxí, te xáhaⁿ-gã xii-güedé:

—Tée-a cùu-dé Déhe-í, tée ío cùu iní-í, te tñi-ndo nchãa tñúhu càháⁿ-dé —duha ní xáhaⁿ-gã xii-güedé.

³⁶ Te sãtã dúcáⁿ ñĩ cáháⁿ Yã Ndiõxí, te ní quide cuendá-güedé sã mèdii-nã Jèsús ndécú-gã xiãⁿ. Te vã yõo ìⁿ ñĩ xáhaⁿ-güedé nãcuãa ndùu nchaa sã ñĩ xiní-güedé-áⁿ.

Jèsús quidé tãtna-gã ìⁿ tée cuechi yìhi ñaha espíritú cùndihi yucu ñãvãha (Mt. 17:14-21; Mr. 9:14-29)

³⁷ Te ingã nduu-ãⁿ cuãnuu-gã yucu-ãⁿ ndihi-güedé, te ío cuéhé ñãyiu cuáhãⁿ tnhá ñáhã xii-gã. ³⁸ Te ìⁿ tée ñùhu tnhá tnuú-yu-ãⁿ ñĩ cáháⁿ níhi-dé, te xáhaⁿ-dẽ xii-gã:

—Mèstrú, ío càháⁿ ndàhú-í núú-n nũu vã cùndèe iní-n càda tãtna-n dèhe-í, chi ìⁿdii duha-dé ndécú, ³⁹ te yìhi ñaha espíritú cùndihi yucu ñãvãha xii-dé, te òré ná nãtni ñaha-xi xii-dé, te dàcana saa ñaha-xi, te ndàda ruúⁿ ñáhã-xí xii-dé, te tàva-xi tíñú yuhu-dé. Te ío dãndoho ñaha-xi xii-dé, chi ndéé núú ñã cúú-gã, te dàña ñaha tnaa-xi xii-dé.

⁴⁰ Te sa ní cáháⁿ ndàhú-í núú cuè tée xica cuu ndihi-n queñuhu-güedé-xi, dico ñã túú ní ndàcu-güedé —càchí-dé xáhaⁿ-dẽ xii-gã.

⁴¹ Te Jèsús ní xáhaⁿ-gã xii nchaa ñãyiu:

—¡Nchaa nchòhó ñãyiu ndècu ñuyíú-a ío sãã iní-ndó, chi ñã túú cuini-ndó quindãã iní-ndó Yã Ndiõxí! Te ní cuu vãi nduu quide ndee iní-í nchaa sã quidé-ndó, ¿te ná ndéé ama vã dúcãⁿ-gã cada-ndo-i? —càchí-gã xáhaⁿ-gã xii-yu.

Te ní xáhaⁿ-gã xii tée cùhú déhe-xi-áⁿ:

—Taxi déhe-n ìha —cachí-gã xáhaⁿ-gã xii-dé.

⁴² Te òré cuáhãⁿ tée cuechi-ãⁿ núú-gã, te espíritú cùndihi yucu ñãvãha-áⁿ ñĩ dãndùã ñáhã-xí xii-dé, te sãhni yìhi ñáhã tucu-xi xii-dé ní cùu, dico Jèsús níhi ní cáháⁿ-gã ní tenãã-gã espíritú-áⁿ, te ní quee ñaha-xi xii-dé, te ní nacuãha cuendã ñáhã-gã xii-dé tãtã-dẽ. ⁴³ Te nchaa-yu ní cuñuhu-yu sã dúcãⁿ ñĩ cuu, te ní cachí-yu sã ío càhnu cuu Yã Ndiõxí.

Jèsús càháⁿ tucu-gã sã cùú-gã (Mt. 17:22-23; Mr. 9:30-32)

Te nini xicunúhu-yu nãcuãa ní quide Jèsús, te ní xáhaⁿ-gã xii cue tée xica cuu ndihi-gã:

⁴⁴ —Nchòhó cundedóho vãha-ndo tñúhu na càháⁿ-í-a, te vã ná cuãnaa-ndo, chi yùhú Tée cùu ñani tnhã-ndó nchãa-ndo sãã ìⁿ nduu te cuãha cuendã ñáhã-güedé xii-í núú cuè tée cùu úhú iní ñáhã —càchí-gã xáhaⁿ-gã xii-güedé.

⁴⁵ Dico cue tée-ãⁿ ñã túú ní tècú tñuní-güedé nãcuãa ndùu tñúhu ní xáhaⁿ-gã xii-güedé, te ducaⁿ ñĩ yãha-güedé, chi ducaⁿ tnhá ní cachí-gã sã vã tècú tñuní-güedé, te ní yùhú-güedé cácaⁿ tñuhú-güedé núú-gã nása ndùu tñúhu ní xáhaⁿ-gã xii-güedé.

Cue tée ndùcu tñúhu núú tnhã nũu ndèdaca-güedé ío-gã cùnùu

(Mt. 18:1-5; Mr. 9:33-37)

⁴⁶ Te cue tée xica cuu ndihi-gã ní ngüita-güedé ndãtnùhu-güedé núu ndèdaca-güedé ío-gã cùnùu, ⁴⁷ dico

Jèsús ní cutnùní iní-gá nàcuáa sàni iní-güedé nùu ní cana-gá #ⁿ té lĩhli, te ní sanu tní ñaha-gã #ⁿ xio dñi-gã. ⁴⁸ Te ní xáhaⁿ-gã xii-güedé:

—Nchaa ñáyiú na queheⁿ cuendá #ⁿ té lĩhli dātá té lĩhli-a cuendá sá ñuhú iní ñáhá-yu xii-í ñá, te cada iní-yu sá yúhú ní queheⁿ cuendá-yu, te nchaa ñáyiú na queheⁿ cuendá ñáhá xii yúhú, te cada iní-yu sá tnáhá Tātá-í Dútú Ndiöxí Yaá ní tendaha ñaha xii-í véxi-í ñuyiú-a ní queheⁿ cuendá-yu. Te nchaa ñáyiú ño ndáhú iní-xi mee-ni xinu cuechí-yu, ñáyiú-áⁿ ño-gá cúnúú-yu —cächí-gã xáhaⁿ-gã xii-güedé.

Ñáyiú ñá túú cùu úhú iní ñáhá cùndihí ñahá-yu xii-o

(Mr. 9:38-40)

⁴⁹ Te té Juàá dñu-ni #ⁿ téé xica cuu ndihí-gã ní xáhaⁿ-dẽ xii-gã:

—Mèstrú, ní xiní-ndí #ⁿ téé càcunehe ñaha-dé xii-n, te ndèñuhu-dé espíritú cùndihí yucu ñávaha yìhí ñaha xii ñáyiú, te nchúhú ñá túú ní dàña-gã-ndí ducaⁿ càda-dé, chí ñá túú xica cuu ndihí ñaha-dé xii-o —cächí-dé xáhaⁿ-dẽ xii-gã.

⁵⁰ Te Jèsús ní xáhaⁿ-gã xii-dé:

—Daña-ndo na càda nahi-dé ní cùu, chí ñáyiú ñá túú cùu úhú iní ñáhá xii-o te cùndihí ñahá-yu —cächí-gã xáhaⁿ-gã xii-dé.

Jèsús càháⁿ-gã dóho té Jacobó ndihí té Juàá

⁵¹ Te òré sa ta cùyatni ndaa Jesús andiú, te ní xica-gã cuáháⁿ-gã ñuú Jerusalén, chí duuⁿ duuⁿ ní sani iní-gã sá quihíⁿ-gã. ⁵² Te ní tendaha-gã cue téé yòdo nuu cuáháⁿ, te ní quexio-güedé #ⁿ ñuú, te ñuú-án yíndèhu-xi distritú Sámariá, te ndücu-güedé #ⁿ vehe cada túha-güedé òré quexio-gã. ⁵³ Dico ñáyiú Sámariá ñá túú ní cuíni-yu cuáñaha núu-yu vehe, chí cuendá sá ní cutnùní iní-yu sá ìchi

yáha-ni-gã quihíⁿ-gã ñuú Jerusalén. ⁵⁴ Te sá dúcáⁿ ní quidé-yu ñá túú ní cuíni-yu cuáñaha núu-yu vehe ndetatú-gã, núu ní xáhaⁿ té Jacobó ndihí té Juàá cue téé xica cuu ndihí-gã xii-gã:

—Mèstrú, ¿cuíni-n càcáⁿ táhú-ó núú Yã Ndiöxí cuendá dangáva-gã ñuhú danáa-gã ñáyiú ñuú-a dātá ní quide té Eliás téé ní xóo cáháⁿ tnúhu Yá Ndiöxí ndéé sanaha-ãⁿ? —cächí-güedé xáhaⁿ-güedé xii-gã.

⁵⁵ Te Jèsús ní nchócótó-gã núu-güedé, te níhi ní cáháⁿ-gã dóho-güedé, te xáhaⁿ-gã:

—Nchòhó, chí ñá túú vaha iní-ndó te núu ducaⁿ càháⁿ-ndó. ⁵⁶ Chí yúhú Téé cùu ñaní tnáhá-ndó nchàa-ndo véxi-í sá dácacu nihnu-í ñáyiú, te ñá díú véxi-í sá dácúta nihnu-í-yu —cächí-gã xáhaⁿ-gã xii-güedé.

Te sátá dúcáⁿ ní xáhaⁿ-gã, te ní xica-gã cuáháⁿ-gã ndihí-güedé ingá ñuú.

Ñáyiú cuíni chitnahá ñáhá xii Jesús ní cùu

(Mt. 8:19-22)

⁵⁷ Te ñuhu Jesús ichi ndihí-güedé, te #ⁿ téé ní xáhaⁿ-dẽ xii-gã:

—Mèstrú, cuíni-í canchicúⁿ ñáhá-í xii-n ndèni ní cuu na quihíⁿ-n —cächí-dé xáhaⁿ-dẽ xii-gã.

⁵⁸ Te Jèsús ní xáhaⁿ-gã xii-dé:

—Nchaa ñucui chí ndècu yaú cúu vèhe-güedi saquihí-güedi, te nchaa quiti ndàva caa tacá-güedi díquí yutnu, dico yúhú Téé cùu ñaní tnáhá-ndó nchàa-ndo chí ñá túú ndéé cáá véhe-í ñuyiú-a ndetatú-í —cächí-gã xáhaⁿ-gã xii-dé.

⁵⁹ Te dātñùní ní xáhaⁿ tùcu-gã xii ingá-dé:

—Yòhó taquixi chitnahá ñáhá-n xii-í —cächí-gã xáhaⁿ-gã xii-dé.

Dico téé-án ní xáhaⁿ-dẽ xii-gã:

—Mèstrú, daña na nùhú-í cundetú-í cuú tātá-í te chindúxi-í-dé, te dātñùní quixi-í chitnahá ñáhá dùcaⁿ-ná-í xii-n —cächí-dé xáhaⁿ-dẽ xii-gã.

60 Te Jèsús ní xáhaⁿ-gá xii-dé:

—Daña ñáyiú ñá túú sándáá iní ñáhá xii-í ná chindúxi tñaha meé-yu, chí ñáyiú-áⁿ cúú-yu dàtná ñáyiú ní xíhí cuèi ndècu-ní-yu núú ñuyúú-a. Te yòhó taquixi, chí quihíⁿ-n dànehé-n ñáyiú nàcuáa cada Yá Ndiòxí ndíhu ndaha ñàha-gá xii-yu —càchí-gá xáhaⁿ-gá xii-dé.

61 Te ní xáhaⁿ tùcu ingá-dé xii-gá:

—Mèstrú, cuiní-í chitnahá ñàhà-í xii-n, dico díhna-gá daña na nùhú-í cada ndee iní-í nchaa ñáyiú ndècu vehe-í, te dàtnùní quixi-í —càchí-dé xáhaⁿ-dè xii-gá.

62 Te Jèsús ní xáhaⁿ-gá:

—Nchaa ñáyiú ní sándáá iní ñáhá xii-í, te núú vá cànchícúⁿ nihnu ñáhá-yu ni yùhu ni iní-yu, te cúú-yu dàtná ìⁿ téé ní tñii ndaha látú cutu-dé, chí téé-áⁿ nùu na ndàcoto-dé ndàa sàtá-dé òré xítú-dé, te vá quihíⁿ ndáá látú-dé ducaⁿ sàtnahá-xi cúú-yu. Te cue ñáyiú chí vá cúú ndáá-yu nàcuáa ndíhu ndaha-gá dava-gá ñáyiú—càchí-gá xáhaⁿ-gá xii-dé.

10

Jèsús téndàha-gá únídico úxí cue téé quihíⁿ cáhánⁿ tnúhu-gá núú ñáyiú

1 Te sàtá dúcáⁿ ñí cuu, te ní cáxi tucu Xítóhó Jesucristú únídico úxí cue téé codonù-güedé quihíⁿ-güedé cáhánⁿ-güedé tnúhu-gá nchaa ñuú, ndihí nchaa dava-gá xichi núú quihíⁿ-gá, te ndi ndúú ndi ndúú-güedé tendaha ñàha-gá xii-güedé quihíⁿ-güedé. 2 Te cùmání-gá caca-güedé, te ní xáhaⁿ-gá xii-güedé:

—Nchòhó xiniⁿ-ndó sã òré ná sàá yóó cuu nchaa sã xítú ñáyiú, te ío vài cuu. Te na càchí tnúhu ndáá-í xii-ndo sã dàtná vài sã xítú ñáyiú cùu, ducaⁿ ío vài ñáyiú cùmání cundedóho tnúhu Yá Ndiòxí te ío sacú ñáyiú dàcuaha ñaha xii-yu tnúhu-gá, núú xiáⁿ xiniⁿ ñùhu-xi cácaⁿ-ndó núú Yá Ndiòxí cuèndá

sá ná dàcaháⁿ-gá iní ñáyiú cáhánⁿ-yu tnúhu-gá núú ñáyiú cùmání cundedóho tnúhu-gá. 3 Te nchòhó cúú-ndó dàtná cue mbéé cue quiti cuaháⁿ núú yíhí cue quiti déé. Chí tendaha ñaha-í xii-ndo quihíⁿ-ndó núú xíndecu nchaa ñáyiú cuihna iní-xi. 4 Te vá cànèhe-ndo ñunu cuhuⁿ ndachiuⁿ-ndo, ni núú cúhúⁿ díhúⁿ-ndó, te ni vá cáda túha-gá-ndó chàú-ndó chí diu-ni chàú yíhí-ndó-áⁿ xiáⁿ-ni quihí-ndo, te vá ío cuyaa-ndo cáhánⁿ ndihí-ndo ñáyiú ñùhu ichi. 5 Te òré ná quèxio-ndo ìⁿ vehe, te duha cúñaha-ndo xii ñáyiú dii vèhe-xi-áⁿ: “Yá Ndiòxí chindee ñàha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu. 6 Te núú ñáyiú-áⁿ ñí nduu táhú-yu sá cùndècu váha iní-yu núú Yá Ndiòxí, te cuu-xi sá vaha sá cúú-xi-yu tnúhu cúñaha-ndo-áⁿ, dico núú ñá túú ní cáhánⁿ váha ndihí ñáhá-yu xii-ndo, te cúñaha-ndo sã vá cúú-xi sã vaha sá cúú-xi-yu. Dico núú ní cáhánⁿ váha ndihí ñáhá-yu xii-ndo, 7 te diu-ni vehe-áⁿ cada vehe tnaa-ndo, te ñá túú-gá ndéé nducu-ndo vèhe cùndecu-ndo, te caxi-ndo nchaa sá ná tàxi-yu, chí nchaa cue téé quide chiuⁿ dacutíí tàú-güedé sá nihí-güedé sá cáxi-güedé cuèndá nchaa chiuⁿ quide-güedé. 8 Te núú ní sáá-ndó ìⁿ ñuú núú ñí queheⁿ cuèndá ñáhá-yu xii-ndo, te caxi-ndo nchaa sá ná tàxi-yu. 9 Te cada tátna-ndo cuè ñáyiú cùhú xíndecu ñuú-áⁿ, te cúñaha-ndo xii-yu sã ní sáá nduu ndíhu ndaha ñàha Yá Ndiòxí xii-yu. 10 Dico núú ní sáá-ndó ìⁿ ñuú núú ñá túú ní quèheⁿ cuèndá ñáhá-yu xii-ndo, te tñii-ndo ichi cuita cáhánⁿ-ndó cuaháⁿ, te cúñaha-ndo xii-yu: 11 “Ndéé tíca chúhmá ñí tñii sáhá-ndí ñuú-ndó nàquidi-ndí, te duha quide-ndí cuèndá cutnùní iní-ndó sã ñá túú quide váha-ndo ndècu-ndo. Dico cunaha-ndo sã

sà ní sáá nduu ndíhu ndaha ñaha Yá Ndióxi xii-ndo ní cùu”, duha cùñaha-ndo xii-yu. ¹² Te na càchí tnúhu-í xii-ndo sá ná sáá nduu càda ndáá Yá Ndióxi cuéchi nchaa ñáyi, te ñáyi ñuú-áⁿ ïo-gá ndohó-yu dàvá-áⁿ dàcúxí ñáyi ñuú Sòdomá —càchí-gá xáhaⁿ-gá xii-güedé.

Cuèndá ñáyi dava ñuú ñá túú sàndáá iní tnúhu Xitohó Jesucristú
(Mt. 11:20-24)

¹³ Te Jèsús xáhaⁿ-gá xii ñáyi dava ñuú ñá túú sàndáá iní tnúhu-gá:

—¡Ndàhú nchòhó cue ñáyi ñuú Coràzín! ¡Te ndàhú nchòhó cue ñáyi ñuú Bètsaidá! Chi núu dícó ñuú Tírú, ndíhi ñuú Sídón ní quide-í nchaa sá vā yòo tnàhí ndàcu cada datná ní quide-í ñuú-ndó-áⁿ ní xiní-ndó ñá, te sá ndéé ama-gá cuihnú-yu dóo ndàhú, te cunucóo-yu núu yàá cuèndá sá ndíxí cuéchi iní-yu sá ñá túú quide váha-yu ní cùu. ¹⁴ Dico sáá nduu te ío-gá dandòho ñaha Yá Ndióxi xii-ndo dàcúxí ñáyi ñuú Tírú, ndíhi ñáyi ñuú Sídón. ¹⁵ Te nchòhó ñáyi ñuú Capèrnaúm quide iní-ndó sá sà cuándaa-ndo àndiu, dico ñáhá chi núu úhú núu ndàhú cundecu-ndo —duha ní xáhaⁿ-gá xii nchaa ñáyi ñuú-áⁿ.

¹⁶ Te xáhaⁿ tùcu-gá xii cue tée tendaha-gá quíhíⁿ cáháⁿ tnúhu-gá-áⁿ:

—Nchaa ñáyi na cùndedóho nchaa tnúhu cáháⁿ-ndó, te cada iní-yu sá yúhú cáháⁿ-í ndedóho-yu, te nchaa ñáyi na dàquee tihú ñáhá xii-ndo, te tnàhá yúhú daquèe tihú-yu, te nchaa ñáyi ducaⁿ na dàquee tihú ñáhá xii-í, te tnàhá Tàtá-í Dútú Ndióxi Yáá ní tendaha ñaha xii-í véxi-í ñuyú-a dàquee tihú-yu —càchí-gá xáhaⁿ-gá xii-güedé.

Te ducaⁿ te ní xica-güedé cuáháⁿ-güedé.

Ní nasáá cue tée únídico úxí ní tendaha Jèsús ní sáháⁿ ní cáháⁿ tnúhu-gá núu ñáyi

¹⁷ Te cue tée únídico úxí-áⁿ ní nasáá-güedé te súuní cudíí iní-güedé, te xáhaⁿ-güedé xii Jèsús:

—Mèstrú, ndéé espíritú cùndíhi yucu ñávaha sàndáá iní ñáhá-xí xii-ndí òré cáciu nèhe ñaha-ndí xii-n —càchí-güedé xáhaⁿ-güedé xii-gá.

¹⁸ Te Jèsús ní xáhaⁿ-gá:

—Ndáá cáháⁿ-ndó chi yúhú ní xiní-í cùtnàhá ní xíta nihnu yucu ñávaha, chi dàtná ní ngava ìⁿ tasaⁿ ní ngava-xi ñuyú-a. ¹⁹ Te dàtná quidé-ndó òré xènihnu-ndo ìⁿ cóó, àdi ìⁿ nchacua ducaⁿ cada-ndo daquee tihú-ndó yucu ñávaha, te ñá túú nà cada ñaha-xi xii-ndo, chi ní taxi-í tnúhu ndee iní ndécú ndíhi-ndo. ²⁰ Dico vá cudíí iní-ndó cuèndá sá sàndáá iní ñáhá cuè espíritú cùndíhi yucu ñávaha xii-ndo, chi cudíí iní-ndó cuèndá sá sà yodo tnuní-ndó núu tütú Yá Ndióxi Yáá ndécú àndiu —cachí-gá xáhaⁿ-gá xii-güedé.

Jèsús cudíí iní-gá

(Mt. 11:25-27; 13:16-17)

²¹ Te òré-áⁿ súuní ní quide díí iní ñáhá Espíritú Yá Ndióxi xii Jèsús, te ní xáhaⁿ-gá xii Yá Ndióxi:

—Yòhó Tàtá-í Dútú Ndióxi, ío chíñuhu ñaha-í xii-n chí ñu-n taxi tnuní-n àndiu ndíhi ñuyú-a, te dànehé-n cuè ñáyi nchaa tnúhu váha, te ñu-ni ñáyi-áⁿ cúu-yu ñáyi ñá túú cùtnuní iní-xi nchaa tnúhu cáháⁿ cue tée túha, te nchaa tnúhu cáháⁿ-n-áⁿ ñá túú ní dátúu-n núu ñáyi càchí sá ïo túha, te ío váha sáá díquí-xi. Te ducaⁿ quide-n, chi ducaⁿ cuíní-n cùnduu —cachí-gá xáhaⁿ-gá xii Yá Ndióxi.

²² Te xáhaⁿ tùcu-gá xii cue tée ní nasáá-áⁿ:

—Mee Tàtá-í Dútú Ndióxi ní cachí-gá sá cùnùu-í núu nchaa-ndí túhú sá ío. Te vá yòo ìⁿ xini nàcuáa sàni iní yúhú Déhe Dútú Ndióxi, chí ìⁿ dli díí-ni mee-gá xini-gá nàcuáa sàni iní-í. Te ducaⁿ ìⁿ dli-ni yúhú xini-í nàcuáa sàni iní mée-gá, te

nchaa ñáyu càchí iní-í sá quini-yu nàcuáa sàni iní Tàtá-í Dútú Ndiõxí te xitnúhu-í-yu, te wá yõo ñⁿ-gã xini nàcuáa sàni iní-gá chi diu-ni ñáyu ducaⁿ xitnúhu-í-áⁿ xini-yu — càchí-gá xáhaⁿ-gã xii-güedé.

²³ Te ní nchócótó-gã núú xĩndecu mee-ni cuè téé xica cuu ndihi-gá, te ní xáhaⁿ-gã xii-güedé:

—Váha táhú nchòhó ndihi nchaa ñáyu ndèhe nchaa nacuáa quide-í vitna. ²⁴ Chi ío cuéhé cue téé ní xóo cáháⁿ tnúhu Yá Ndiõxí ndéé sanaha, ndihi cue téé ní xindaha ñaha xii ñáyu ní cuini-güedé cundehe-güedé nchaa sá ndéhé-ndó quide-í vitna, te ñá túú ní xini-güedé, te ní cuini-güedé cundedóho-güedé nchaa tnúhu càháⁿ-í ndédóho-ndo vitna, te ñá túú ní xĩndedóho-güedé —càchí-gá xáhaⁿ-gã xii-güedé.

Nàcuáa ní quide ñⁿ téé distritú Sámariá

²⁵ Te ñⁿ téé dàcuaha ñaha xii ñáyu nchaa tnúhu ní chidó tnúni ndíi Moisés ní ndacuñí-dé xító ndéé-dé Jèsús núu nása cunduu tnúhu cáháⁿ-gá, te xáhaⁿ-dẽ xii-gá:

—Mèstrú, ¿ná cúú sã cadà-í cuendá nduu táhú-í cundecu-í ndihi Yá Ndiõxí ni caa ni quihíⁿ-í? —càchí-dé xáhaⁿ-dẽ xii-gá.

²⁶ Te Jèsús ní xáhaⁿ-gã xii-dé:

—Cuini-í cachí tnúhu-n nása càháⁿ-xi núú tütú ndíi Moisés —càchí-gá xáhaⁿ-gã xii-dé.

²⁷ Te xáhaⁿ-dẽ xii-gá:

—Ndíi Moisés càchí ndíi núú tütú ndíi: “Cuu iní-ndó Dútú Ndiõxí Yáa cúú Ndiõxí-ndó ni yuhu ni iní-ndó, te cani iní-ndó cada-ndo datná cuini mée-gã, te mee-ni tnúhu váha cani iní-ndó nàcuáa cuu vii cuu váha-ndo núú-gã, te coo iní-ndó cùu iní-ndó-gã. Te cuu iní-ndó tnàha ñáyu-ndo datná cúú iní-ndó mée-ndo”, duha càchí ndíi núú tütú ndíi —càchí-dé xáhaⁿ-dẽ xii-gá.

²⁸ Te Jèsús ní xáhaⁿ-gã:

—Váha-ni cáháⁿ-n, te núu cada-n nàcuáa cáháⁿ-n áⁿ, te nduu táhú-n

cũndecu-n ndihi Yá Ndiõxí ni caa ni quihíⁿ —càchí-gá xáhaⁿ-gã xii-dé.

²⁹ Te sá dúcáⁿ ní xáhaⁿ Jèsús xii-dé núu ndũcu-dé nàcuáa cada-dé cácu nihnu-dé núu tnúhu ní cáháⁿ-dé, te ní xicáⁿ tnúhú-dẽ núú-gã, te xáhaⁿ-dẽ:

—¿Yoo cùu tnaha ñáyu-í-í? —càchí-dé xáhaⁿ-dẽ xii-gá.

³⁰ Te Jèsús ní cani-gá ñⁿ cuendú núú-dẽ nàcuáa tecú tnúni-dé tnúhu-gá, te xáhaⁿ-gã:

—Ñⁿ téé ní ndee-dé ñuú Jerusalén ñúhú-dẽ ichi cuánuu-dé cuáháⁿ-dé ñuú Jericó, te ní quee ñadúhú ichi-dé ní dúhú-güedé dóo níhnu-dẽ, ndihi nchaa sá néhé-dé, te ní caniha vihi-güedé, te nchito diu-ná-dé ní daña ñaha-güedé te cuáháⁿ-güedé. ³¹ Te mei òré

cátuu-dé-áⁿ ñúhú ñⁿ dútú ichi-áⁿ, te òré ní xini ñáhá dütú-áⁿ xii-dé, te ñⁿ xio-ni ní xócõo ndee-dé ní yáha-dé. ³² Te ñúhu tucu ñⁿ téé

cùu levitá ichi-áⁿ, te òré ní xini-dé téé-áⁿ cátuu-dé, te diu-ni ducaⁿ ní quide-dé ñⁿ xio-ni ní xócõo ndee-dé ní yáha-dé. ³³ Dico ñⁿ téé distritú Sámariá ñúhú tucu-dé ichi-áⁿ te

òré ní xini-dé téé-áⁿ cátuu-dé, te ní cundáhú iní ñáhá-dé. ³⁴ Te ní sáháⁿ-dé núú cátuu téé-áⁿ, te ní quide tátna-dé nchaa núú ní nícuéhé xii téé-áⁿ ní chihi-dé yúcu,

te ní dácútú-dé. Te dàtnúni ní dácáa ñaha-dé sáta quiti-dé, te ndéca ñaha-dé cuáháⁿ ñⁿ vehe núú sácõo cue ñáyu sácúhuⁿ ichi, te yacáⁿ ní

xito ñaha-dé. ³⁵ Te ingá nduu òré ní nucúhuⁿ téé Samaritanú-áⁿ ichi, te ní tava-dé úú díhúⁿ denariú, te ní sáha-dé téé cùu xitohó vehe-áⁿ, te ní xáhaⁿ-dé: “Coto saú-n tée-a, te núu ñá ní tnàhá díhúⁿ sá ní taxi-í, te cuéi na dàndoñuhu-gá-n díhúⁿ-n cuendá-dé, te òré ná quixi tucu-í te nacháhu-í”, duha ní xáhaⁿ tée Samaritanú-áⁿ xii téé dii vehe xíáⁿ.

³⁶ Te vitna cáháⁿ, te núu ndédacáa cue téé úní-áⁿ cúú-güedé téé váha cùu iní-güedé tnàha ñáyu-güedé —càchí-gá xáhaⁿ-gã xii téé dàcuaha

ñaha xii-í ñáyi-u-áⁿ nchaa tnúhu ní chídó tnúni ndíi Moisés.

³⁷ Te té-e-áⁿ ní xáhaⁿ-dë xii-gá:

—Té-e ní cundàhú iní ñáhá xii té-e ní dánicuehé ñáhá cue ñadúhú-áⁿ, té-e-áⁿ cúú-dë té-e cùu iní tnàha ñáyi-u-xi —càchí-dé xáhaⁿ-dë xii-gá.

Te Jèsús ní xáhaⁿ-gá:

—Cuàháⁿ te ñu-ni ducaⁿ càda-n tnahá-n —càchí-gá xáhaⁿ-gá xii-dé.

Jèsús ndécú-gá vehe tá Mārta ndíi tá Mária

³⁸ Te Jèsús ñúhú-ni-gá ichi cuáháⁿ-gá ndíi cue té-e xica cuu ndíi-gá, te ní sáá-gá ìⁿ ñúú líhli, te xíáⁿ ní quee ìⁿ xíchí nání Mārta ní cáháⁿ ñáhá-xí xii-gá vehe-xi.

³⁹ Te tá Mārta ndècu ìⁿ cùhú-xi nàni-xi Mariá, te xíchí-áⁿ ní ngóo-xi núú Jèsús ndèdóho-xi nchaa tnúhu càháⁿ-gá. ⁴⁰ Te tá Mārta-áⁿ ndíi vihi-ni iní-xi quide-xi chiuⁿ-xi, te ní sáháⁿ-xi núú Jèsús, te ní xáhaⁿ-xi:

—Mèstrú, ¿náa ñá túú tnàhí sàni iní-n sá ní dándóo ndaha ñàha cùhú-í nchaa chiuⁿ-áⁿ? Cúñaha sàù ná quixi-xi chindee ñaha-xi —cachí-xi xáhaⁿ-xi xii-gá.

⁴¹ Dico Jèsús ní xáhaⁿ-gá:

—Yòhó Mārta, ñúhu tneñu vihi-n, te ndíhú iní-n sá ìo vài chiuⁿ-n ñuhu, ⁴² dico xini ñuhu vihi-gá-xi cundedóho-n tnúhu càháⁿ-í, chi tá Mária-a sa ndèdóho-xi tnúhu-í, te vá yòo ìⁿ ndacu xocàni tnúhu-í sá ní ngúndecu ndíi-xi —càchí-gá xáhaⁿ-gá xii-xi.

11

Jèsús dánèhé-gá cue té-e xica cuu ndíi-gá nàcuáa cáháⁿ ndíi-güedé Yá Ndiöxí

(Mt. 6:9-15, 7:7-11)

¹ Te ìⁿ nduu càháⁿ ndíi Jèsús Yá Ndiöxí ìⁿ xichí, te sátá ní yáha ní cáháⁿ ndíi-gá Yá Ndiöxí, te ní xáhaⁿ ìⁿ té-e xica cuu ndíi-gá xii-gá:

—Mèstrú, danèhé ñáhá xii-ndí nása cáháⁿ ndíi-ndí Yá Ndiöxí dàtná ní quide ndíi Juáá ní dánèhé ndíi cue té-e ní xica cuu ndíi ndíi —càchí-dé xáhaⁿ-dë xii-gá.

² Te Jèsús ní xáhaⁿ-gá:

—Òré cáháⁿ ndíi-ndo Yá Ndiöxí, te cachí-ndó:

Yòhó tátá-ndí Dútú Ndiöxí Yaá ndécú àndiu,

nchaa ñáyi-u na càháⁿ-yu sá cúú-n Yáá ìo yíñúhu.

Te xicáⁿ táhú-ndí núú-n sá ná sáá nduu ndíhu ndàhá-n-yu.

Te cada-n dàtná càchí iní-n ñùyú-u-a dàtná quidé-n àndiu.

³ Te xicáⁿ táhú-ndí núú-n sá táxi-n sá cándèca iní-ndí ìⁿ nduu ìⁿ nduu.

⁴ Te cada càhnu iní-n nchàa yíca cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyi-u-ndí.

Te vá dáñá-n dàcaháⁿ ñáhá yùcu ñávàha xii-ndí cada-ndí sá ñà túú vàha, chi coto ñàha-n xii-ndí cuèndá sá vã dúcáⁿ càda ñaha-xi,

duha cáháⁿ-ndó

—càchí-gá xáhaⁿ-gá xii-güedé.

⁵ Te Jèsús ní xáhaⁿ tùcu-gá:

—Te núu ndèdacàa nchóhó ndécú ìⁿ té-e tnàha tnúhu ndíi-ndo, te daya niú cuáháⁿ-ndó vehe-dé, te òré ní quexio-ndo, te xáhaⁿ-ndo xii-dé: “Véxi-í núu vá cùndèe iní-n tàxi nuu-n úní tnàhá pàá, ⁶ chi ìⁿ té-e xini tnàhá ndíi-í ñúhú-dë ichi ní quexio-dé vehe-í, te ñá túú tnàhí ná cuáñaha-í caxi-dé”, quesaha-ndo cùñaha-ndo. ⁷ Te

té-e-áⁿ càháⁿ-dë ndéé xití vehe-dé, te cúñaha-dë xii-ndo: “Vá dásàtú nihá-n chi ndèdí yuyèhe-í, te càa-í ndíi cue landú-í, te vá cúú ndàcòo-í taxi-í sá cuìní-n”, quesaha-dë cúñaha-dë xii-ndo.

⁸ Te na càchí tnúhu-í xii-ndo sá cuèi cùu-dé té-e tnàha tnúhu ndíi-ndo, dico ducaⁿ cúñaha-dë xii-ndo, dico dacuítí sá ndácòo-dé taxi-dé sá cuìní-ndó cuèndá sá vã dásàtú-gá-ndó iní-dé. ⁹ Te yúhú càchí-í xii-ndo sá cãcáⁿ-ndó núu ná cuìní-ndó núu Yá Ndiöxí te taxi-gá. Te vá dáñá ndéé-ndó cãcáⁿ-ndó núú-gá núu ná cuìní-ndó,

te ducaⁿ te níhí-ndó. Te cada iní-ndó sã ní quexio-ndo vehe ìⁿ tñaha ñáyi-ndo te ní cáháⁿ-ndó, te ñáyi-áⁿ ní tedóho ñàhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndiöxí tedóho ñaha-gã xii-ndo, te taxi-gã sã ná càcáⁿ-ndó nõú-gã. ¹⁰ Chi nchaa ñáyi ducaⁿ xiquide te Yá Ndiöxí tedóho ñaha-gã xi-yu nihí-yu sã cuíní-yu. Te ñu-ni ducaⁿ tùcu nchaa ñáyi na càcáⁿ nõú-gã ìⁿ sã cuíní-yu, chi sãñaha-gã sã xicáⁿ-yu nõú-gã. Te ñu-ni ducaⁿ tùcu níhí nchaa ñáyi ñá túú dàña ndeé xicáⁿ nõú Yá Ndiöxí sã cuíní-yu, chi nihí-yu.

¹¹ Te nchòhó cue téé cùu tátá ñá túú cùndee iní-ndó cuãha-ndo cuè déhe-ndo ìⁿ yúú caxi-güexi òré xicáⁿ-güexi ìⁿ pàá nõú-ndó càxi-güexi, te ni ñá túú cùndee iní-ndó cuãñaha-ndo ìⁿ cóó caxi-güexi òré xicáⁿ-güexi ìⁿ chácá nõú-ndó càxi-güexi. ¹² Te ni ñá túú cùndee iní-ndó cuãñaha-ndo ìⁿ nchacua caxi-güexi òré xicáⁿ-güexi ìⁿ ndíú nõú-ndó càxi-güexi. ¹³ Te nchòhó cuèi ndeé dau sãá iní-ndó, dico sãha-ndo cuè déhe-ndo sã vãha xèxi-güexi òré xicáⁿ-güexi nõú-ndó. Te nõu nchòhó ducaⁿ quide-ndo, jte uuⁿ-gã ducaⁿ quide Tátá-ndó Dùtú Ndiöxí Yá ndécú àndiu, chi taxi-gã Espiritú-gã cundecu ndihi-ndo te nõu na càcáⁿ-ndó nõú-gã! — càchí-gã xáhaⁿ-gã xii-güedé.

Càchí-güedé sã ndécú ndíhi Jesús yucu ñávãha

(Mt. 12:22-30; Mr. 3:20-27)

¹⁴ Te Jèsús ndéñuhu-gã espíritú cùndíhi yucu ñávãha yíhi ñaha xii ìⁿ téé ní quide ñíhí-xi, te òré ní ndee ñaha espíritú-áⁿ xii téé-áⁿ, te ní nacáháⁿ-dé. Te ío ní cuñuhu ñáyi sã dúcáⁿ ní quide-gã. ¹⁵ Te davá-yu ní xitnãhá-yu:

—Téé-a ndéñuhu-dé nchaa espíritú cùndíhi sácúíhná yíhi ñaha xii ñáyi, chi ñu-ni sácúíhná-ãⁿ

chíndèe ñaha-xi xii-dé, te ñu-ni-xi tàxi tnuní-xi nchaa espíritú-áⁿ — càchí-yu xitnãhá-yu.

¹⁶ Te davá-yu xito ndeé ñãhá-yu xii-gã, te xãháⁿ-yu sã ná cádá-gã ìⁿ sã vã yòo tñahí ndácu cada ñuyúú-a cundèhé-yu nãcuáa cutnùní iní-yu nõu ndáá sã Yá Ndiöxí ní tendaha ñaha-gã xii-gã véxi-gã ñuyúú-a. ¹⁷ Dico mee-gã sa ní cutnùní iní-gã nchaa nãcuáa sãni iní-yu, nõu ní xáhaⁿ-gã xi-yu:

—Te nchòhó xini-ndó sã nõu ìⁿ téé yíndaha ìⁿ nacióⁿ vã cúú ìⁿnuu-dé ndíhi cue téé cùndíhi-dé, te vã cùdíi-dé cunuu-dé. Te ñu-ni ducaⁿ sãtnahá tucú-xi cùu cue ñáyi xindecu ìⁿ-ni vèhe, chi nõu vã cúú ìⁿnuú-yu cundecu-yu, te vã cùdíi-yu cundecu càhnú-yu. ¹⁸ Te ducaⁿ sãtnahá-xi cùu sácúíhná, chi nõu vã cúú ìⁿnuu-xi ndíhi nchaa espíritú cùndíhi-xi te vã cùdíi-xi cundecu-xi taxi tnùní-xi. Te ñu-ni cáháⁿ-í chi nchòhó càchí-ndó sã sácúíhná chíndèe ñaha-xi xii-í queñuhu-í nchaa espíritú cùndíhi-xi yíhi ñaha xii ñáyi. ¹⁹ Te nõu yúhú quidé cuendá-ndó sã sácúíhná chíndèe ñaha-xi xii-í, te xini ñuhu-xi cada cuendá-ndó yòo chindee ñaha xii cue téé xica cuu ndíhi-ndo queñuhu-güedé nchaa espíritú cùndíhi-xi yíhi ñaha xii ñáyi. Te mee-güedé càchí-güedé sã nchòhó ñá túú càháⁿ ndáá-ndó sã dúcáⁿ càháⁿ-ndó. ²⁰ Te ndáá sã Yá Ndiöxí chíndèe ñaha-gã xii-í queñuhu-í nchaa espíritú cùndíhi sácúíhná yíhi ñaha xii ñáyi, te xíãⁿ cutnùní iní-ndó sã sã ní sãá nduu ndíhu ndaha ñaha Yá Ndiöxí xii-ndo.

²¹ Te nõu ìⁿ téé ío ndee, te súúní ñíí cáá-dé, te ndeé-dé vehe-dé cuendá sã vã cuíta, te ní quide túha-dé titní sã dèéⁿ, te ío vãha nèhe vãha-dé nchaa ndachíuⁿ-dé. ²² Dico nõu quexio ingá téé ío-gã ñíí cáá te ndee-gã-dé, te ngüíta-dé nãá-dé ndíhi téé ndeé vehe-xi-áⁿ,

te cada cànarí ñáhá t̃e-án xii téé ndéé vehe-xi-á, te quendeé-dé nchaa sá d̃ééⁿ cùndèe iní-dé, te taxi t̃nùní-na-dé nchaa xiãⁿ, ndihí nchaa sá ndécú ndihí-dé, te dàcáhñu-dé nchaa cue t̃e cùndihí-dé nchaa sá ná nihí-dé.

²³ Te nchaa ñáyiú ñá túú cùndihí ñaha xii-í, te cùu úhú iní ñáhà-yu, te nchaa ñáyiú ñá túú chindee ñaha xii-í, te dàquee tíhũ-yu chiúⁿ quide-í.

Espiritú cùndihí yucu ñávãha sã nánchòcãva xito cùu uú
(Mt. 12:43-45)

²⁴ Te òrè ná quèe ñaha ìⁿ espíritú cùndihí yucu ñávãha xii ìⁿ ñáyiú, te cuáhã-xi ndũcu-xi ìⁿ xichi núú cùndècu-xi te ñá nihí-xi, te ní sani iní-xi: “Vãha-gã núhú tucu-í núú ñí xíndecu-í”, duha ní sani iní-xi. ²⁵ Te cuãnuhú-xi, te òrè ní nasáá-xi, te ní xiní-xi sá cáá iní ñáyiú-áⁿ dàtná cáá-nã ìⁿ vehe ní natíhú, chi ní nduu vii-ná, vá yõ-gã ndécú. ²⁶ Te sãtã dúcãⁿ te ní xica-xi cuáhã-xi cuãndúcú-xi úsã tñáhã espíritú cùndihí-xi sá nèhé víhí-gã xiquide, te òrè ní nihí-xi cue espíritú-áⁿ te ndèca ñaha-xi cuáhãⁿ cuendã ngúndecu ndihí-xi ñáyiú-áⁿ, te ñáyiú-áⁿ uuⁿ-gã nándi yãha-yu dàcúúxí ndèé díhna — càchí-gã xáhaⁿ-gã xii-yu.

Cuendã ñáyiú cùu váha ndisa iní-xi

²⁷ Te nini càháⁿ Jèsús tñúhu-áⁿ núú ñáyiú ní cáháⁿ níhi ìⁿ ñadhí tnuú-yu, te xáhaⁿ-aⁿ xii Jèsús:

—jSã váha táhú ñadhí ní dácácú ñaha xii-n, te ní dácuéhnú ñaha-aⁿ! —cachí-aⁿ xáhaⁿ-aⁿ xii-gã.

²⁸ Te Jèsús ní xáhaⁿ-gã:

—jVãha-gã táhú nchãa ñáyiú sãcúndedóho nchaa tñúhu càháⁿ Yã Ndiõxí te sãndáá iní-yu! —càchí-gã xáhaⁿ-gã xii-aⁿ.

Ñáyiú ñá túú sãndáá iní ñáhã xii Jèsús cuiní-yu cada-gã ìⁿ sã vã yõ tñáhí ndàcu cada

(Mt. 12:38-42; Mr. 8:12)

²⁹ Te ta tàcã vai ñáyiú te dàdehnde tñaha-ná-yu, te ní ngúita Jèsús xáhaⁿ-gã xii-yu:

—Nchòhó ñáyiú ndècu ñuyúú vitna, chi ío sãá iní-ndó, te cuiní-ndó càda-í ìⁿ sã vã yõ tñáhí ndàcu cada cuendã cuiní-ndó cùtnuní iní-ndó núu ndisa sã Yã Ndiõxí ní tendaha ñaha-gã xii-í véxi-í. Dico ñá túú nãgã cada-í quini-ndó, chi sa nihí-ndó tñúhu nàcuáa ní yãha ndíi Jònás téé ní xóo cáháⁿ tñúhu Yã Ndiõxí ndéé sanaha, te ñiu-ni ducaⁿ yãha yúhú tucu. ³⁰ Chi nchaa ñáyiú ñúú Nñivé ní cutnùní iní-yu sã Yã Ndiõxí ní tendaha ñaha-gã xii ndíi Jònás ní sáhãⁿ ndíi ñuu-yu. Te ducaⁿ sãtnahã-xi cùu yúhú Téé cùu ñani tñáhã-ndó nchãa-ndo, chi sãá nduu te cutnùní iní-ndó sã Yã Ndiõxí ní tendaha ñaha-gã xii-í véxi-í ñuyúú-a. ³¹ Te na sãá nduu càda ndáá Yã Ndiõxí cuéchi nchaa nchòhó ñáyiú ndècu ñuyúú-a, te dàvã-áⁿ quini-ndó ìⁿ ñadhí ñaha ní xíndaña ìⁿ nacióⁿ cáá ndãa xio cuha núú quèné nchíanchii. Te ñaha-áⁿ ío xica ní xíndecu-aⁿ, te ní sáhã-aⁿ ní xíndedóho-aⁿ nchaa tñúhu ní cáháⁿ ndíi Salómón, chi ndíi-áⁿ ío ní sãá sã xiní tñùní ndíi. Te ñaha-áⁿ càháⁿ-aⁿ dàvã-áⁿ sã nchòhó ñáyiú ndècu vitna ñá túú ní quide ndáá-ndó. Dico vitna iha ndècu ndihí ñaha-ndo xii yúhú, te ñiu-í ío-gã cùnũu-í dàcúúxí ndíi Salómón.

³² Te ñiu-ni nduu càda ndáá Yã Ndiõxí cuéchi nchaa nchòhó ñáyiú ndècu ñuyúú-a vitna, dàvã-áⁿ tñáhã cue ñáyiú ní xíndecu ñúú Nñivé cundecú-yu núú Yã Ndiõxí, te tñáhã-yu cachí-yu sã ñá túú ní quide ndáá-ndó. Chi ñáyiú ñúú Nñivé-áⁿ ní ndixi túu iní-yu sã ñá túú quide váha-yu ndécú-yu te ní natuhã-yu ichi Yã Ndiõxí cùtnáhã ní cáháⁿ ndihí ñaha ndíi Jònás tñúhu-gã xii-yu. Dico vitna iha ndècu ndihí ñaha-ndo xii yúhú téé càháⁿ tucu tñúhu Yã Ndiõxí, te ñiu-í ío-gã cùnũu-í dàcúúxí ndíi

Jónás.

*Núú-ó cùu-xi datná ìⁿ ñuhú
(Mt. 5:15; 6:22-23)*

³³ Te ñá túú ní ìⁿ ñáiyu tēñuhú ìⁿ lintérná, te taxi ndecú-yu ìⁿ núú yídāhu, àdi chiváha-yu xití ìⁿ tídihi, chi tàxi ndecú-yu ìⁿ núú ñnu cuendá nchaa ñáiyu quíhu vehe cutnùní núú-yu. ³⁴ Te núú-ndó cùu-xi datná ìⁿ ñuhú, chi ìⁿ sá ná quíní-ndó te ndìxi túú iní-ndó ñá cúú xǎⁿ, te núu cāváha núú-ndó, te ducaⁿ cùtnuní iní-ndó ñá cúú sá ndécú núú-ndó, áⁿ te núu cùhú, te vā cùtnuní iní-ndó ñá cúú sá ndécú núú-ndó. Te sá dūcāⁿ cùhú núú-ndó te cada iní-ndó sá ndécú-ndó datná ìⁿ núú néé. ³⁵ Te ío cada cuendá-ndó vā cāní cuèhé iní-ndó cuendá tnúhu Yá Ndióxi cuendá cutnùní iní-ndó nācuāa cundecu-ndo, chi núu na cāni cuèhé iní-ndó cuendá tnúhu-gá, te cùu-ndo datná ìⁿ ñáiyu ñá túú cùtnuní núú-xí. ³⁶ Te núu cāndo canine iní-ndó, te mee-ní sá vāha ñuhu iní-ndó, te cùtnuní vāha iní-ndó tnúhu ndáá datná cùtnuní vāha núú-ndó òré càyú ñuhú, ducaⁿ cùtnuní iní-ndó —cāhí-gá xáhaⁿ-gá xii-yu.

Jèsús cāháⁿ-gá cuendá cue téé cùu fariséú ndihi cue téé dācuaha ñaha xii-í ñáiyu

(Mt. 23:1-36; Mr. 12:38-40; Lc. 20:45-47)

³⁷ Te òré ní ndihi tnúhu ní cāháⁿ Jèsús, te ìⁿ téé cùu fariséú ní cāháⁿ ñáhá-dé xii-gá vehe-dé caxi-gá, te cuānguihu-gá vehe-dé, te ní ngóo-gá mèsá. ³⁸ Te téé cùu fariséú-áⁿ ío ní cuñúhu-dé, chi Jèsús ñá túú ní ndāha-gá nācuāa sàni iní-güedé nduu vétú iní Yá Ndióxi òré ní ngóo-gá caxi-gá datná quidé mēe-güedé. ³⁹ Te Jèsús ní xáhaⁿ-gá xii-dé:

—Nchòhó cue téé cùu fariséú xini-ndó sá ío ñáiyu nāquete sātá-ni tāsáⁿ ndihi sātá-ni còhó, te xití-xi cāndehe caduha-ni. Te ducaⁿ sātahá-xi cùu nchòhó,

chi ndaha-ni-ndo nāquete-ndo, te iní-ndó ñá túú nduu ndoo, te nándi dāndahú-ndó tnāha ñáiyu-ndo, te quèheⁿ-ndo sá ndécú ndihí-yu, te nándi-gá nchaa sá cuèhé sá dúhá ñuhu iní-ndó quide-ndo. ⁴⁰ Te nchòhó cúu-ndó cué téé ío ñá iní-xi! Te ná ñá túú cùtnuní iní-ndó sá Yá Ndióxi Yá ní cadúha yiqui cùñú-ó diu-ni-gá ní chihi-gá iní-ó-áⁿ? ⁴¹ Te nchaa sá vāha ndècu ndihi-ndo cuáha-ndo nchāa ñáiyu xini ñuhu na cundecu ndihí-yu, te núu ducaⁿ na càda-ndo, te cuu-ndo ñáiyu sa ní nduu ndoo ní nduu nine iní-xi.

⁴² Te ndāhú ní cuu nchaa nchòhó cue téé cùu fariséú! Chi sāha-ndo Yá Ndióxi núú ùxi xichi yúcú nāní mēntá, ndihi yúcú rúdá, ndihi nchaa dava-gá núú yúcú quèe comidá, dico ñá túú quide ndáá-ndó, te ní ñá túú ñuhu iní-ndó Yá Ndióxi. Dico tnúhu cāháⁿ-í-a tǎu-ndó càda-ndo, te ní vā dáñá ndèé-ndó càda-ndo nchaa dava-gá sá vāha.

⁴³ Te ndāhú ní cuu nchòhó cue téé cùu fariséú! Chi cuini-ndó cūncóo-ndo núú sácóo cue téé ío cūnuu xití veñúhu, te cuini-ndó mēe-ni ndihi tnúhu yíñuhu cāháⁿ ndihi ñaha ñáiyu xii-ndo nchāa núú xicá cùu-ndo.

⁴⁴ Te ndāhú ní cuu nchòhó cue téé dācuaha ñaha xii ñáiyu nchaa tnúhu ní chidó tnùní ndíi Moisés, ndihi nchòhó cue téé cùu fariséú chi ío dāndahú-ndó mēe-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ìⁿ ñáiyu ní xihí te ní nguindūxi, te ñá túú cùtnuní-gá ndèé yíndūxi-yu, te cuéi nā yāha ñáiyu dico ñá túú cùtnuní sá yíndūxi ndíyi. Te ducaⁿ sātahá-xi cùu nchòhó, chi nchaa ñáiyu ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —cāhí-gá xáhaⁿ-gá xii-güedé.

⁴⁵ Te ní xáhaⁿ ìⁿ téé dācuaha ñaha xii-yu nchaa tnúhu ní chidó tnùní ndíi Moisés xii-gá:

—Mèstrú, te sá dúcáⁿ càháⁿ-n te tnàhá nchúhú xícuèhé-n àⁿ — cächí-dé xáhaⁿ-dè xii-gá.

46 Te Jèsús ní xáhaⁿ-gá:

—jNdàhú ní cuu tnàhá nchaa nchòhó cue téè dàcuaha ñaha xii ñáyiú nchaa tnúhu ní chídó tnùnì ndíi Moisés! Chi quíde-ndo datná quidé ñáyiú dàcuído ìⁿ tnaha ñáyiú-xi ìⁿ sá ïo véé, te mèè-yu ni lùha ñá túú cuínì-yu cuidó-yu. Te ducaⁿ sàtnahá-xi quíde nchohó chi dānehé-ndó ñáyiú nācuāa cadá-yu, dīco mee-ndo chi ni lùha ñá túú cuínì-ndó cāda-ndo nācuāa dānehé-ndó-yu.

47 'jTe ndàhú ní cuu tucu-ndo! Chi cādúha-ndo nūú nī nguindūxi cue téè ní xóo cāháⁿ tnúhu Yá Ndiōxí ndéé sanaha cuéndá sá cúnàha-ndo núú yindūxi cue ndíi, te dīu-ni cue ñanì tnáhá-ndó nī sahnì-güedé cue ndíi. 48 Te nchòhó sa nàha-ndo nācuāa ní quíde cue ñanì tnáhá-ndó, te cächí-ndó sá nī quíde váha-güedé sá dúcáⁿ nī sahnì-güedé cue ndíi-áⁿ, te vitna cādúha-ndo nūú nī nguindūxi cue ndíi.

49 'Te Yá Ndiōxí ïo sàá nchaa sá xínì tnùnì-gá, te ní cächí-gá sá dācāháⁿ-gá iní cue téè cuéndá cāháⁿ-güedé tnúhu-gá núú ñáyiú, te cada-güedé nchaa nācuāa cuínì-gá, te dāva-güedé cahni ñahá-yu xii-güedé, te dāva-güedé ïo dandòho ñahá-yu xii-güedé ñaha ní cächí-gá. 50 Te nchaa ñáyiú ñuyíú vitna tnàhá-yu nacháhu-yu núú Yá Ndiōxí cuéndá sá nī sahnì-güedé cue téè ní cāháⁿ tnúhu-gá ndéé cúnàhá ní ngáva ñuyíú. 51 Te ndéé ndíi Àbél téè ní sahnì-güedé ndéé díhna nuu, ndihì ndéé ndíi Zacariá téè ní sahnì-güedé ndéé núú nī ndihì-ná ndácáⁿ cuéndá ñahá Yá Ndiōxí núú ñáyiú ndéu ñuyíú vitna, te dīu ndíi-áⁿ nī sahnì-güedé mei tnúú veñúhu càhnu sá ïo cūnuu, ndihì xító núú sácódó sá ndúú tǎhú Yá Ndiōxí.

52 'jTe ndàhú ní cuu tucu nchaa nchòhó cue téè dācuaha ñaha xii ñáyiú nchaa tnúhu ní chídó tnùnì ndíi Moisés! Chi quíde-ndo datná quidé ìⁿ téè tàxi tnùnì ìⁿ vehe, chi nacadí-dé te ñá dáñá-dé quíhu ñáyiú te ni mèè-dé ñá túú quíhu-dé. Te ducaⁿ sàtnahá-xi quíde-ndo, chi dācuaha-ndo tnúhu Yá Ndiōxí te ñá túú cuínì-ndó quindáá iní-ndó te ni ñá túú dānehé-ndó ñáyiú cuínì tníi tnúhu-gá nācuāa tàú-xi cunduu cuéndá naníhì tǎhú-yu —cächí-gá xáhaⁿ-gá xii-dé.

53 Te òré ní ndee Jèsús vehe téè cūu fariséú-áⁿ, te cue téè dācuaha ñaha xii ñáyiú nchaa tnúhu ní chídó tnùnì ndíi Moisés, ndihì cue téè cūu fariséú ní cudééⁿ-güedé núú-gá, te ní ngüíta-güedé nāndi sá xicáⁿ tnúhú-güedé núú-gá cuéndá cuínì-güedé nūu vá cuíta-gá ìⁿ tnúhu càháⁿ-gá 54 cuéndá ducaⁿ nihì-güedé nācuāa cada-güedé cacáⁿ cuéchi-güedé cuéndá-gá.

12

Jèsús càháⁿ-gá cuéndá cue téè dāndahú mée-xi

1 Te òré-áⁿ nī taçá titní mīl ñáyiú núú ndécú Jèsús, te súunì dicó ngōnchihì tnàha-ná-yu. Te ndèdòho-yu ní xáhaⁿ Jèsús xii cue téè xica cuu ndihì-gá:

—Cada cuéndá-ndó vǎ cānchícúⁿ nihnu-ndo nācuāa quíde cue téè cūu fariséú, chi cue téè-áⁿ ïo dāndahú-güedé mée-güedé sá quidé ndáá-güedé dico ñá ndáá sá quidé ndáá-güedé. 2 Te nchaa tnúhu sá cúu yúhu ni cuu vá cúu yúhu-gá, chi nchaa dacuitíi sǎ quée tūu-xi núú ñáyiú. 3 Chi nchaa tnúhu càháⁿ dayuhu-ndo quée túu-xi núú chítú núú taçá, te nchaa tnúhu càháⁿ mée-ndó vèhe-ndo dacuitíi sǎ nihì ñáyiú tnúhu.

Yá Ndiōxí xínì ñúhu-xi yuhú-ó-gǎ (Mt. 10:26-31)

4 'Te nchòhó cue tée ío váha tnáhá tnúhu ndihí-í ná càchí tnúhu-í xii-ndo sá vâ yùhú-ndó cuè ñáyiú cuèi na càhni ñahá-yu xii-ndo, chi ðiu-ni yiqui cùñú-ndó ndacú-yu cahní-yu, te ñá túú nâgá ndacú-yu cada ñahá-yu xii-ndo. 5 Te na càchí tnúhu-í xii-ndo sá Yá Ndiòxí tàú-ndó yùhú-ndó-gá, chi mee-gá ío cùnuu-gá, te ðiu-gá quidé-gá sá vâ cùndecu-gá ñáyiú ñuyíú, te daquihíⁿ ñahá-gá xii-yu núú úhú núú ndàhú, núú xiáⁿ càchí tnúhu-í xii-ndo sá Yáá-áⁿ tàú-ndó yùhú-ndó-gá.

6 'Te nchòhó xini-ndó sá ndèé úhúⁿ tnáhá tiláá cùyáhu-ði núú úú díhúⁿ, dico Yá Ndiòxí ñá túú cùnaa-gá ni ñⁿ-güedi, chi nèhe cuendá ñahá-gá xii-güedi. 7 Te nchòhó ndéé ñⁿ ñⁿ idi díquí-ndó yìndehu, núú xiáⁿ càchí-í sá vâ yùhú-ndó, chi cùnuu-gá-ndó dàcúxí tiláá cuèi vâi vihi-güedi.

Ñáyiú na dàtúu núú dàva-gá ñáyiú sá ndécú ndihí-yu Xitohó Jesucristú (Mt. 10:32-33; 12:32; 10:19-20)

8 'Te na càchí tnúhu-í xii-ndo sá núu na dàtúu-ndo núú dàva-gá ñáyiú sá ndécú ndihí ñaha-í xii-ndo. Te ducaⁿ te tnáhá yùhú Tée cùu ñani tnáhá-ndó nchàa-ndo datúu-í núú nchàa cue espíritú xínú cuèchi núú Yá Ndiòxí sá nchòhó ndécú ndihí ñaha-ndo xii-í. 9 Dico núu na cùñaha-ndo xii ñáyiú sá ñà túú ndècu ndihí ñaha-ndo xii-í, te ðiu-ni ducaⁿ càda yùhú Tée cùu ñani tnáhá-ndó nchàa-ndo, chi cùñaha-í xii cue espíritú xínú cuèchi núú Yá Ndiòxí sá ñà túú ndècu ndihí ñaha-í xii-ndo.

10 'Te ndèdani càa ñáyiú na càháⁿ cuèhé cuendá yùhú Tée cùu ñani tnáhá-ndó nchàa-ndo, te cada càhnu iní ñahá Yá Ndiòxí xií-yu. Dico ñáyiú na càháⁿ cuèhé cuendá Espíritú Yá Ndiòxí, te ñáyiú-áⁿ vâ cáda càhnu iní ñahá-gá xií-yu.

11 'Te òré ná càndeca ñaha-güedé xii-ndo quihíⁿ veñúhu, àdi núú cuè tée cùchiuⁿ, te ni vâ cáni iní-ndó

núu nása cunduu tnúhu cùñaha-ndo xii-güedé, te ni vâ cáni iní-ndó núu ná tnúhu nadànchocáva-ndo núu ná tnúhu na cùñaha-güedé xii-ndo, 12 chi òré-nâ te mee Espíritú Yá Ndiòxí dacàhu iní ñahá-xí xii-ndo tnúhu cùñaha-ndo xii-güedé — càchí-gá xáhaⁿ-gá xii-güedé.

Cuendá ñⁿ tée cuica

13 Te ñⁿ tée ñùhu tnáhá tnuú ñáyiú-áⁿ ní xáhaⁿ-dè xii Jèsús:

—Mèstrú, cùñaha xii ñani-í sá ná chidava-dé sá ní dándõ tâtá-ndí cuu cuendá-ndí —càchí-dé xáhaⁿ-dè xii-gá.

14 Te Jèsús ní xáhaⁿ-gá xii-dé:

—¿Te ná cuendá ducaⁿ càháⁿ-n?

Te ñá díú chiúⁿ-áⁿ vèxi-í cada-í, chi ñá díú tée cùchiuⁿ cuu-í —càchí-gá xáhaⁿ-gá xii-dé.

15 Te xáhaⁿ-gá xii nchaa ñáyiú xìndecu-áⁿ:

—Nchaa nchòhó ñáyiú ndèdòho nchaa tnúhu càháⁿ-í ío váha cada cuendá-ndó, te vâ cáni iní-ndó nândi nducu-ndo cùndecu ndihí-ndo, chi cuèi vâi vihi na nihí-ndó cùndecu ndihí-ndo, dico vâ chindèe ñaha-xi cudíi-ndo cùndecu-ndo ñuyíú-a —càchí-gá xáhaⁿ-gá xií-yu.

16 Te dàtnùni ní ngüita-gá cáni-gá ñⁿ cuendú núu-yu cuendá tecú tnùni-yu tnúhu-gá, te xáhaⁿ-gá:

—Ñⁿ tée cuica sùúni ní cuu nchaa tâtá ní xitu-dé núú ñúhú-dè.

17 Te ní ngüita-dé sani iní-dé: “¿Te nása cada-í? Te ñá túú ndèe nataxúha-í nchaa sá ní xitu-í”, duha ní sani iní-dé. 18 Te dàtnùni ní sáha váha tucu-dé cuendá nacuáa cada-dé, te ní cachí-dé: “Duha na cunduu, dangòyo-í yacá-í, te ndada càhnu-gá-í, te xití-xi nataxúha-í nchaandi túhú sá ní xitu-í, ndihí nchaa dava-gá sá ndécú ndihí-í.

19 Te sátá dúcán, te cachí-í: Ío vâi sá ndécú ndihí-í, te cudíi-xi cuèhé cuiá, te vitna ndetatú-í, te coho-í te caxi-í cada-í, te nândi-gá cada-í cuendá cudíi iní-í ndecu-í, duha quesaha-í”, càchí-dé. 20 Dico Yá

Ndiöxí ní xáhaⁿ-gã xii-dé: “Yòhó, ñá túú nàndíhi sá sání iní-n, chi yúhú càchí-í sá niú vitna cuú-n, te nchaa sá ndécú ndíhi-n ʒyoo cuu sá vâha xii-aⁿ-i?”, càchí-gá xáhaⁿ-gã xii-dé. ²¹ Duha yâha nchaa ñâyiu nândi sâni iní-xi cundecu ndíhi-xi ñuyíú-a, dico ñâyiu-áⁿ ío ndâhú-yu chi ñá túú ná nduu táhú-yu núú Yâ Ndiöxí cundecu ndíhi-yu —càchí Jèsús xáhaⁿ-gã xii-yu.

Yâ Ndiöxí xító-gã nchaa ñâyiu sândáá iní ñáhá xii-gá
(Mt. 6:25-34)

²² Te ní xáhaⁿ Jèsús xii cue téé xica cuu ndíhi-gá:

—Te na càchí tnúhu-í xii-ndo sã vã ío cani iní-ndó nõu nása cundecu-ndo, àdi nása níhi-ndó sã cáxi-ndó, àdi nása níhi-ndó dõó cuihnu-ndo. ²³ Chi cunu-gá mée-ndó dàcúxí sã nchító-ndó, te ducaⁿ yiqui cuú-ndó cunu-gá-xi dàcúxí dõó sãcuihnu-ndo. ²⁴ Te chí cuâha cuendá nãcuáa quide cue tícacá, chi ni ñá túú chihí-güedi tatá cuu itú natahu-güedi te ni ñá túú ndéé nútñi yacá-güedi, te níhi-güedi xèxi-güedi, chi Yâ Ndiöxí xító ñâha-gá xii-güedi. ¡Te nchòhó cúnú-gá-ndó dàcúxí nchâa cue quití ndava! ²⁵ Te cuèi nândi sá sání vîhi iní-ndó ndècu-ndo, dico ñá ndácú-ndó càda-ndo nacuáa cuehnu-ndo cuédicó ñⁿ yiqui-gã. ²⁶ Te núu ni sã lúhá xíáⁿ ñá ndácú-ndó càda-ndo, ʒte ná cuendá ío sâni iní-ndó cuendá nchaa sã cuíní-ndó níhi-ndó cundecu ndíhi-ndo?

²⁷ Te chí cãdá cuendá nãcuáa sãhnu ñⁿ tnu itá, chi ni ñá túú quide chiuⁿ-xi, te ni ñá túú quèheⁿ-xi idi. Te na càchí tnúhu-í xii-ndo sã ndíi Salòmón ío vii ní cãa nchaa sã ní xindecu ndíhi ndíi, dico vii-gá tucu càa nchaa itá dàcúxí nchâa sã ní xindecu ndíhi ndíi. ²⁸ Te cùhú sã ío vitna tnaa-ni cùdí-xi te sãhmí-yu, te cuèi ducaⁿ dico ío vii càdúha Yâ Ndiöxí nchaa cùhú-ãⁿ. ¡Te nchòhó ío

cunu-ndo dacúxí nchâa cùhú-ãⁿ, núu xíáⁿ ío xito ñâha-gá xii-ndo, te dicó yica cuu iní-ndó sândáá iní-ndó-gã! ²⁹ Te vã ío canchicúⁿ nihnu-ndo sã cóhó sã cáxi-ndó, te ni vã dândíhú-ndó iní-ndó nõu nása cada-ndo níhi-ndó. ³⁰ Chi nchaa ñâyiu ñá túú sândáá iní ñáhá xii Yâ Ndiöxí ducaⁿ mée-ni sã cóhó sã cáxi-yu xica nchicúⁿ nihnú-yu. Dico mee Tãtá-ó Dütú Ndiöxí sa nâha-gá nândi cuu sá xíní ñùhu-ndo, te taxi-gá. ³¹ Te cada-ndo nchâa nacuáa càháⁿ Yâ Ndiöxí Yaa yindâha ñaha xii-ndo, te ducaⁿ te taxi-gá nchaa sã xíní ñùhu-ndo.

Cuendá sã vâha nduu táhú-ó nõú Yâ Ndiöxí
(Mt. 6:19-21)

³² Te vã yùhú nchòhó cue téé ndècu ndíhi-í cuèi ío sacú-ndó, chi Tãtá-ó Dütú Ndiöxí ní cachí-gá sã ndúú táhú-ndó cundecu-ndo núú ndécú-gã taxi tnúni-ndó tnâhá-ndó. ³³ Te chí dicó nchâa sã ndécú ndíhi-ndo, te chí cuâha nchaa ñâyiu ndâhú díhúⁿ-ndó ñâyiu xini ñuhu, te cada vâha-ndo cundecu-ndo, te ducaⁿ te nduu táhú-ndó sã ío-gã vâha núú Yâ Ndiöxí cundecu ndíhi-ndo, te xíáⁿ vã cúú tûhú tnâhí-gá-xi, te ni vã ndíhí nihnu-gá-xi, te ni ñadúhú vã ndácú-güedé duhu-güedé, te ni tiquidi vã quée-dí. ³⁴ Te núu xíáⁿ cúú cuendá-ndó ñá, te diu-ni xíáⁿ ñúhú iní-ndó, áⁿ te núu mee-ni sã ndécú ñuyíú-a ndècu ndíhi-ndo, te diu-ni nchaa xíáⁿ ñúhú iní-ndó.

Xini ñuhu-xi quíhi iní-ó cundecu-o

³⁵⁻³⁶ Te ío quíhi iní-ndó cundecu-ndo, te cada-ndo dàtná quidé dàva cue téé xinu cuechi sacúndecu túha-güedé cuèi nãni òré-ãⁿ ndétú-güedé pãtróóⁿ-güedé ná òré nasáá-dé sã cuahãⁿ-dé vico tnãndaḥa. Te núu niú te sa cúú cãyú-ni ñuhú-güedé sã cundetu ñaha-güedé, chi òré ná nasáá-dé dacãsaⁿ-dé yuyèhe, te ndíhi-ni nacaáⁿ-güedé ndíhu-dé. ³⁷ Te

váha táhu nchaa cue té xínu cuechi-áⁿ, chí ndécu túha-ni-güedé ndétú-güedé ndéé òré ní nasáá patróóⁿ-güedé, te na càchí tnúhu ndáá-í xii-ndo sá òré ná násáá patróóⁿ-güedé-áⁿ te chíhi ñaha-dé mèsá xii-güedé, te ndacáⁿ ndee-dé dóó níhnú-dé núú yíquí-dé, te ngúíta-dé cani-dé cóhó-güedé cuendá caxi-güedé. ³⁸ Te ñíu-ni ducaⁿ càda-dé cuèi dava niú, àdi tacuíhnda-gá, te núú ñá túú xidí-güedé òré nasáá-dé, te cue té xínu cuechi-áⁿ ò váha tnahá-güedé. ³⁹ Te núú dicó ñⁿ té cùu xitohó ñⁿ vehe xini-dé ná òré quíhu ñadúhú vehe-dé ñá, te quíhi iní-dé te vá cùdú-dé, te vá dáñá-dé nacaáⁿ-güedé yuyèhe-dé quíhu-güedé duhu-güedé. ⁴⁰ Te nchòhó tucu nchaa-ni nduu quíhi iní-ndó cùndecu túha-ndo, chí na cuáháⁿ nduu ñá túú yíhi iní-ndó, te quixi tucu yúhú Té cùu ñani tnahá-ndó nchaa-ndo —cachí-gá xáhaⁿ-gá xii-güedé.

Cue té quide ndáá ndíhi cue té ñá túú quide ndáá

(Mt. 24:45-51)

⁴¹ Te té Pélú ní xicáⁿ tnúhú-dé núú Jèsús, te xáhaⁿ-dé:

—Mèstrú, ¿te tnúhu ní cáháⁿ-n-áⁿ cùu-xi mee-ni cuendá nchúhú áⁿ cuendá nchaa ñáiyu? —càchí-dé xáhaⁿ-dé xii-gá.

⁴² Te Jèsús ní xáhaⁿ-gá:

—Cáháⁿ-í cuendá ñáiyu quide váha dàtná quidé ñⁿ té táxi tnuní ñáhá xii cue ñáiyu xínu cuechi ndecu vehe patróóⁿ-xi, chí té-áⁿ ò váha təcú tnùn-dé, te quide-dé nchaa nàcuáa càháⁿ patróóⁿ-dé, te dàcaxi-dé cue ñáiyu xínu cuechi òré tàú-xi caxí-yu. ⁴³ Te núú ducaⁿ quide váha té táxi tnuní ñáhá xii cue ñáiyu xínu cuechi-áⁿ ñá, te ò váha tnahá-dé òré násáá patróóⁿ-dé núú ndéé cuáháⁿ-dé. ⁴⁴ Te na càchí tnúhu ndáá-í xii-ndo sá té quide ndáá táxi tnùní ñáhá xii cue ñáiyu xínu

cuechi-áⁿ cūñaha-ñá patróóⁿ-dé xii-dé sá ncháándí túhú-ñá sá ndécú ndíhi-dé quindaha-dé. ⁴⁵ Dico núú té táxi tnuní ñáhá xii cue ñáiyu xínu cuechi-áⁿ ná cani iní-dé sá cùyàa patróóⁿ-dé vá násáá ndíhi-ni-dé ñá, te ngúíta-dé cani-dé nchaa ñáiyu xínu cuechi, cuèi té cuèi ñadíhi, te ngúíta-dé caxi-dé coho-dé, te dàxini-dé méé-dé, ⁴⁶ te nduu ñá túú yíhi iní-dé te násáá patróóⁿ-dé, te dandòho ñaha patróóⁿ-dé-áⁿ xii-dé, te daquíhiⁿ ñáhá-dé xii-dé núú ndécú ñáiyu ñá túú ní quide ndáá.

⁴⁷ Te dava cue té xínu cuechi xini-güedé nàcuáa cuíni patróóⁿ-güedé cada-güedé te ñá túú quide-güedé, te ní ñá túú cuíni-güedé cundecu túha-güedé cundetu-güedé patróóⁿ-güedé, te nchaa cue té ducaⁿ xiquide dandòho ñaha patróóⁿ-güedé, chí ñani víhi-güedé. ⁴⁸ Te dava cue té xínu cuechi ñá túú xini-güedé nàcuáa cuíni patróóⁿ-güedé cada-güedé, te ní quide-güedé sá neñúu-güedé ñⁿ sá ñá túú tàú-güedé cada-güedé ñá, te cue té-áⁿ sacú-gá dandòho ñaha patróóⁿ-güedé, chí sacú-gá ñani-güedé. Te ñáiyu cùtnuní iní-xi nàcuáa cuíni Yá Ndióxi cadá-yu, te ñíu-ni ducaⁿ tàú-yu cadá-yu nàcuáa cuíni-gá. Te ñáiyu vai-gá təcú tnùní nàcuáa càháⁿ-gá, te ñíu-ni ducaⁿ vai nchaa sá càháⁿ-gá tàú-yu cadá-yu.

Ñá túú cùu ñⁿnuu ñáiyu

(Mt. 10:34-36)

⁴⁹ Te yúhú véxi-í ñuyú-a cuendá cutnùní iní ñáiyu nàcuáa cada ñaha Yá Ndióxi xií-yu, ¿te cuíni-í sá ndíhi-ni cada-gá nàcuáa sàni iní-gá! ⁵⁰ Te yúhú ò vai tnúhu sàni iní-í, ¿chí sáá nduu te ò ndoho-í, te ñíu-ni xiáⁿ cuhuⁿ iní-í ndéé ná sáá nduu dūcaⁿ yáha-í! ⁵¹ Te nchòhó vá caní iní-ndó sá yúhú véxi-í ñuyú-a te cundecu ndíhi tnahá váha-ni ñáiyu, te ñáhá chí da ngúíta-yu vá cùu

ñⁿnuú-yu cundecú-yu. ⁵² Te ndéé není vitna ngúita ñáiyu vá cúú ñⁿnuú-yu cundecú-yu, te na càda-o cuendá te núu úhúⁿ ñáiyu xĩndecu ñⁿ-ni vèhe, te vá cúú ñⁿnuu-gá-yu, chí úní-yu ndatnúhu-yu te nàá-yu ndihí úú-gá-yu, ádi ñáiyu úú-áⁿ ndatnúhu-yu te nàá-yu ndihí ñáiyu úní-áⁿ. ⁵³ Te dava cue téé cùu tátá vá cúú ñⁿnuu-gá-güedé ndihí déhe ducuⁿ-güedé, te ni dàva cue ñáiyu cùu náná vá cúú ñⁿnuu-gá-yu ndihí déhe yòcò-yu, te ni sánu-yu vá cúú ñⁿnuu ndihí-gá-yu. Te ducaⁿ cadá-yu chí davá-yu quindáá iní ñáhã-yu xii-í, te davá-yu vá quindáá iní ñáhã-yu —càchí-gá xáhaⁿ-gã xii-güedé.

Ñáiyu cùtnuní iní-xi nàcuáa quide-xi ñuyúú ndihí andiu

(Mt. 16:1-4; Mr. 8:11-13)

⁵⁴ Te Jèsús ní xáhaⁿ-gã xii nchaa ñáiyu xĩndecu-áⁿ:

—Te nchòhó òré ndéhé-ndó ndànchita vícò ndaa xio quée nchíanchii, te càchí-ndó sã cúúⁿ dǎú, te diu ducaⁿ ndisa quide-xi. ⁵⁵ Te òré ná quène táchí ndaa xio datni nacuáa quène nchíanchii, te càchí-ndó sã ïo cada ihni-xi, te diu ducaⁿ ndisa quide-xi. ⁵⁶ Te nchòhó ïo váha cùtnuní iní-ndó nàcuáa quide-xi andiu ndihí ñuyúú, ¿te ná cuendá quidé-ní-ndó sã ñã tècú tnúní-ndó nàcuáa quide Yá Ndiõxí vitna? Te sá dúcáⁿ quide-ndo-áⁿ ïo dàndahú-ndó mèe-ndo sá ïo váha cùtnuní iní-ndó, chí ñã ndaa sá cùtnuní iní-ndó.

Nducu-o nàcuáa nucúndecu ndihí váha-o ñáiyu cùu úhú iní ñáhã

(Mt. 5:25-26)

⁵⁷ Te nchòhó, ¿ná cuendá ñã túú dàndixi túu-ndo iní-ndó càda-ndo mee-ni sá váha sá táu-ndó càda-ndo-i? ⁵⁸ Te núu ïó ñⁿ-ndo ní sacáⁿ cuéchi ñáiyu cuendá-ndó cuendá ñⁿ sá ní quide-ndo, te cuáhã-ndó ndihí-yu núu tée cùchiuⁿ, te nini ñùhu-ndo ndihí-yu

ichi, te nducu-ndo nàcuáa cada-ndo nàcáhãⁿ cáhmú iní tnáhã-ndó ndihí-yu cuendá sá vá càndeca ñaha-gá-yu quihíⁿ núu tée cùchiuⁿ, chí núu ducaⁿ na càdá-yu te tée cùchiuⁿ-áⁿ nachihí ñaha-dě ndaha cue téé cùu poleciá, te cue téé-áⁿ chíhi ñaha-güedé vecaá xii-ndo. ⁵⁹ Te na càchí tnúhu-í xii-ndo sã núu na ngáva-ndo vecaá, te vá càcu-ndo te núu vá náchãhu-ndo nchãa sá táu-ndó —càchí-gá xáhaⁿ-gã xii-yu.

13

Xini ñuhu-xi natuha-o ichi Yá Ndiõxí

¹ Te diu-ni òré-áⁿ ní ngúnutnii ñⁿ úú ñáiyu núu Jèsús cáni-yu cuendú núu-gã nàcuáa ní quide ñaha té Pilatú xii cue téé distritú Galileá cue téé ní sahani quiti nduu táhú Yá Ndiõxí, te mei òré ní sahani-güedé cue quiti-áⁿ ní táuchíuⁿ tè Pilatú cue sandadú-dé ní sahani-güedé cue téé Galileá-áⁿ, te ní xica ñiñi-güedé núu ñúhú ndihí níñi cue quiti-áⁿ, te ní nadácánuu-xi. ² Te Jèsús ní xáhaⁿ-gã xii-yu:

—Te núu nchòhó sání iní-ndó sã sá dúcáⁿ ní yáha cue téé distritú Galileá-áⁿ te cùu-güedé cue ndecu vihi-gá cuéchi-xi dàcúúxí cùe téé ñuú-güedé ñã. ³ Te na càchí tnúhu-í xii-ndo sã ñáhã. Te núu nchòhó vá ndíxí cuéchi iní-ndó cuendá nchaa sá cuéhé sá dúhá quide-ndo ndecu-ndo ñã, te tnáhã nchaa nchòhó cuíta nihnu-ndo te núu vá nátnii-ndo ichi Yá Ndiõxí. ⁴ Te núu nchòhó sání iní-ndó sã ñáiyu sáhúⁿ uní ní xihí ní táu ñáhã vèhe ducúⁿ Silóé ïo-gá ndécú cuéchi-yu dàcúúxí nchaa ñáiyu xĩndecu ñuú Jerusalén ñã, ⁵ te na càchí tnúhu tucu-í xii-ndo sã ñáhã. Te núu nchòhó vá ndíxí cuéchi iní-ndó cuendá nchaa sá cuéhé sá dúhá quide-ndo ndecu-ndo ñã, te tnáhã nchaa nchòhó cuíta nihnu-ndo te núu vá nátnii-ndo ichi Yá Ndiõxí —càchí-gá xáhaⁿ-gã xii-yu.

Yutnu ngüxi ñá túú cùuⁿ sávidí-xi

⁶ Te Jèsús ní cani tucu-gá ìⁿ cuèndú núŭ-yu nàcuáa tecú tñuní-yu tñuhu-gá, te xáhaⁿ-gã:

— Ìⁿ téé nùtní ìⁿ yutnu ngüxi núú ñúhú-dé, te cuáháⁿ ndéhé-dé núú ní cuuⁿ sávidí-xi ní cùu, te ní ìⁿ ñá túú ní cùuⁿ. ⁷ Te ní xáhaⁿ tée-áⁿ xii téé ndéé ñuhu-dé; “Nàha-n sá vitna ní cuu úní cuíá quíxi còto-i yutnu ngüxi-a te ñá túú xini-í ní ìⁿ sávidí-xi. Te quehndé-n vitna, chí àúⁿ nã cuu nùtní-xi quide tneñu-xi núú ñuhu-áⁿ”, cächí-dé xáhaⁿ-dë xii téé ndéé ñuhu-dé-áⁿ. ⁸ Te téé ndéé ñuhu-áⁿ ní xáhaⁿ-dë: “Pàtróóⁿ, daña na cùhnu-xi cuíá vitna-ná, te na nàdatayá-í ñuhu núú sàhá-xi, te chihi-í saháⁿ. ⁹ Te ducaⁿ te cudana cuuⁿ sávidí-xi, àdi núú ñá túú ní cùuⁿ sávidí-xi ña te téhndé-nã-xi”, cächí-dé xáhaⁿ-dë xii pàtróóⁿ-dë — cächí-gá xáhaⁿ-gã xii-yu.

Jèsús quidé tátna-gá ìⁿ ñadìhí ní nduu cueyi sàtá-xi nduu ndetátú ñáyiu

¹⁰ Te ìⁿ xito cùu-xi nduu ndetátú ñáyiu, te yìhi Jèsús ìⁿ veñúhu dànehé-gá ñáyiu. ¹¹ Te xíaⁿ ndécú ìⁿ ñadìhí ní cuu sáhúⁿ úní cuíá sã cùhú-aⁿ yìhi ñaha espíritú cùndìhi yucu ñávãha xii-aⁿ, te xíaⁿ ní ndada cueyi-xi sàtá-aⁿ, te ñá dáñá-gã-xi nucúnutnì ndáá-aⁿ. ¹² Te òré ní xini ñáhá Jèsús xii-aⁿ te ní cana ñaha-gã, te xáhaⁿ-gã:

— Yòhó ñaha cùhú, ndúha-n cuèhé tñáhá-n — cächí-gá xáhaⁿ-gã xii-aⁿ.

¹³ Te ní dácàà-gá ndaha-gá ní tendaha ñaha-gá xii-aⁿ, te òré-ni-áⁿ ní ndúha-aⁿ te ní nucúnutnì ndáá-aⁿ, te ní ngüíta-aⁿ ní cachí-aⁿ sá ìo càhnu cuu Yá Ndióxi. ¹⁴ Dico téé tàxi tñuní veñúhu ní cudééⁿ-dë sá dúcáⁿ ní quide Jèsús ní quide tátna-gá ñaha cùhú-áⁿ nduu ndetátú-yu, te ní xáhaⁿ-dë xii-yu:

— Ìó ìñú nduu tàú-ó càda chiuⁿ-o, te ndédani càa nduu-áⁿ quixi-ndo cùtátna-ndo, dico ñá díú ndùu

cuu-xi nduu ndetátú-ó — cächí-dé xáhaⁿ-dë xii-yu.

¹⁵ Te ní xáhaⁿ Jèsús:

— Nchòhó chí ìo dándahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó áⁿ? ¹⁶ Te ñadìhí-a cùu-aⁿ ñaní tñáhá ndíi Àbrahám, te dicó-ni sá yucu ñávãha quide duha cùhú-aⁿ ní cuu sáhúⁿ úní cuíá, ¿te náa ñá túú xini ñuhu-xi cutátna-aⁿ cuéi cùu-xi nduu ndetátú-ó áⁿ? — cächí-gá xáhaⁿ-gã xii-dë.

¹⁷ Te sá dúcáⁿ ní cáháⁿ Jèsús, núu nchaa cue téé cùu úhú ìní ñáhá xii-gá ní cucahaⁿ núú-güedé, dico nchaa dava-gá ñáyiu chí xicúdí ìní-yu xindéhé-yu nchaa sá vã yòo tñáhí ndàcu cada quide-gá.

Cuèndá ndíquíⁿ yutnu nàni mostázá

(Mt. 13:31-32; Mr. 4:30-32)

¹⁸ Te ní xáhaⁿ-gã xii-yu:

— Na càni-í ìⁿ cuèndú núú-ndó nàcuáa tecú tñuní-ndó nàcuáa cada-xi òré ndíhu ndaha ñàha Yá Ndióxi xii-ndo. ¹⁹ Ìⁿ téé ní queheⁿ-dë ndíquíⁿ yutnu nàni mostázá te nèhe-dé cuáháⁿ ní sacáⁿ-dë núú ñúhú-dé te ní xínu-xi, te ní sahnú-xi ní cuu dúcúⁿ-xi, te cue quiti ndáva núú tàchí cádúha-güedi tacá-güedi núú dìté-xi — cächí-gá xáhaⁿ-gã xii-yu.

Nàcuáa quide levadurá

(Mt. 13:33)

²⁰ Te ní xáhaⁿ tucu Jèsús xii-yu:

— Te na cächí tñuhu tucu-í xii-ndo nàcuáa cada tucu Yá Ndióxi òré ndíhu ndaha ñaha-gá xii-ndo. ²¹ Ìⁿ ñadìhí ní queheⁿ-aⁿ levadurá ní chihi-aⁿ úní arròbá yuchi triú, te levadurá-áⁿ ní quide-xi ní ndaa nihí yusaⁿ-áⁿ — cächí-gá xáhaⁿ-gã xii-yu.

Yuyèhe cuiñi

(Mt. 7:13-14, 21-23)

²² Te ichi ñuhu Jèsús cuáháⁿ-gá ñúú Jerusàlén, te nchaa ñúú náhnú,

ndihí nchaa ñuú lĩhli ta yãha-gá ducaⁿ ta dānehé-gá ñáyiú tnúhu-gá cuaháⁿ. ²³ Te ñⁿ ñuú-áⁿ ní xáhaⁿ ñⁿ téé xii-gá:

—Mèstrú, cuiní-í cacáⁿ tnúhu-í ñⁿ tnúhu núú-n, ¿ndáá sá ïo sacú ñáyiú nānĩhí tǎhú-ǎⁿ? —cāchí-dé xáhaⁿ-dē xii-gá.

Te Jèsús ní xáhaⁿ-gǎ xii-dé ndihí nchaa ñáyiú:

²⁴ —Cada-ndo sǎ nānĩhí tǎhú-ndó, te tñi-ndo ïchi Yá Ndióxi, te ïchi-gá-áⁿ cúú-xí dátǎná ñⁿ yuyèhe cuiñi, te cāchí tnúhu-í xii-ndo sǎ ïo cuéhé ñáyiú cachí iní-yu quihu-yu yuyèhe cuiñi-áⁿ dico vá ndácú-yu. ²⁵ Te na cāni tucu-í ingá cuéndú núú-ndó nācuáa tecú tñmí-ndó tñhu cǎháⁿ-í. Te òré ná ndācuñi téé cūu xitohó vehe, te nacadi-dé yuyèhe, te nchaa nchòhó ñáyiú na quèndó quehé dacāsaⁿ-ndo yuyèhe, te quesaha-ndo cūñaha-ndo xii-dé: “Tátá, nacaáⁿ yuyèhe na quihu-ndí”, quesaha-ndo cūñaha-ndo xii-dé. Dico téé cūu xitohó vehe-áⁿ cūñaha-dē xii-ndo: “Ná túú xini-í nchòhó ndéé ñáyiú cūu-ndo”, duha cūñaha-dē xii-ndo. ²⁶ Te dátñuní ngúita nchòhó cūñaha-ndo xii-dé: “Nchúhú ní xexi ndihí ñaha-ndí, te ní xihí ndihí ñaha-ndí xii-n, te nchaa ïchi ní xóo dacuáha ñaha-n xii-ndí”, quesaha-ndo cūñaha-ndo xii-dé. ²⁷ Dico cāchí tucu téé cūu xitohó vehe-áⁿ cūñaha-dē xii-ndo: “Sa ní cachí-í sá ñā túú xini-í ndéé ñáyiú cūu-ndo. Te chí xócuñi nchòhó ñáyiú ndècu ïchi cuehé ïchi duha núú ndècu-í”, quesaha-dé cūñaha-dē xii-ndo. ²⁸ Te na sáa nduu dūcaⁿ cada-xi te quini-ndó tē Àbrahám, ndihí té Isàác, ndihí té Jácób, ndihí nchaa cue téé ní xóo cǎháⁿ tnúhu Yá Ndióxi, te nchaa cue téé-áⁿ ndécú-güedé núú ndécú-gǎ táxi tñmí-gǎ, te nchòhó quee tihú-ndó núú-gǎ sá tñhu ñā túú ní cuini cada ndáá, te dāvá-áⁿ ndāhyú-ndó te cuu rúhñú-nǎ núhu-ndo sǎ sātú

iní-ndó cuèndá sá ndóhó-ndó. ²⁹ Te dāvá-áⁿ quihu nchaa ñáyiú ndi cūmí xio ñuyúú núú ndécú Yá Ndióxi táxi tñmí-gǎ caxí-yu ndihí-gǎ, te cundécú-yu ndihí-gǎ. ³⁰ Te dava ñáyiú nchícúⁿ ñā túú cūnuu ndecu ïchi Yá Ndióxi vitna, ñáyiú-áⁿ sǎá nduu te ïo cunúú-yu. Te dava ñáyiú cūnuu ndecu ïchi-gǎ vitna, ñáyiú-áⁿ sǎá nduu te vá ïo-gǎ cunúú-yu — cāchí-gǎ xáhaⁿ-gǎ xii-yu.

Jèsús ndāhyú-gǎ cuèndá ñáyiú ñuú Jerusálén

(Mt. 23:37-39)

³¹ Te diu-ni nduu-ǎⁿ ní quexio ñⁿ úú cue téé cūu farisèú núú ndécú-gǎ, te xáhaⁿ-güedé xii-gǎ:

—Quee-n ïha quihíⁿ-n núu ndéé quihíⁿ-n, chí téé cūu Herodés cuini-dé cǎhni ñaha-dē xii-n — cāchí-güedé xáhaⁿ-güedé xii-gǎ.

³² Te Jèsús ní xáhaⁿ-gǎ:

—Chí cuaháⁿ te cūñaha-ndo xii téé nèhe maña-áⁿ sǎ cāchí-í sá ná cūndedóho váha-dé ñⁿ tnúhu cǎháⁿ-í, chí cūmání ñⁿ úú-gǎ nduu cundecu-í xocāni-í nchaa espíritu cūndihí yucu ñávāha yihí ñaha xii ñáyiú, te cada tátǎna-í nchaa dava-gǎ ñáyiú cūhú, te ducaⁿ te ndihí chiúⁿ-í, duha cūñaha-ndo xii-dé. ³³ Dico dacuítí sǎ cūhúⁿ-í ïchi ñⁿ úú-gǎ nduu, te ducaⁿ te sáa-í núú quihíⁿ-í, chí vá cúú tñhí cuú ñⁿ téé cǎháⁿ tnúhu Yá Ndióxi ingá ñuú, chí mei ñuú Jerusálén cuú-güedé — cāchí-gǎ xáhaⁿ-gǎ xii-güedé.

³⁴ Te ní xáhaⁿ-gǎ xii ñáyiú ñuú Jerusálén:

—Nchòhó chí sǎhni-ndo nchaa cue téé cǎháⁿ tnúhu Yá Ndióxi, cue téé ní tendaha-gǎ véxi, te mee-ni ndihí yúú sǎhni-ndó-güedé. ¡Te titní xito ní cuini-í nadatǎcǎ ñáhà-í xii-ndo dátǎná ñadátacǎ ñⁿ nchuxi cuè déhe-di sǎquihi-güedi xití ndíxiⁿ-di, dico ñā ní cuini-ndó, te ducaⁿ-ni sǎni iní-í ndéé vitna! ³⁵ Te chí cūndedóho tucu ingá tnúhu na cǎháⁿ-í-a: Yá Ndióxi dañā ñaha-gǎ xii-ndo. Te na cāchí

tnúhu tucu-í xii-ndo sã vã quini ñáhá-gã-ndó xii-í, dico sáá nduu te quini ñáhá tucu-ndo, te nduu-án cachi-ndó sã ïo càhmu cuu yúhú Yaá ní tendaha Dütú Ndiöxi véxi ñuyú-a —càchí-gã xáhaⁿ-gã xií-yu.

14

Jèsús quidé tátna-gá ìⁿ téé ñùhu cuiñu

¹ Te duha ní cuu ìⁿ nduu, nduu ndetátú ñáyiú chi ìⁿ téé cùu fariséú cùnùu ní cáháⁿ-dé Jèsús vehe-dé caxi-gá, te cue téé ndècu vehe-dé ndéhé-güedé nùu nása cada-gá. ² Te xiáⁿ ndécú tnhá ìⁿ téé cùhú ñùhú-dé cuiñu. ³ Te Jèsús ní xicáⁿ tnúhú-gã núú cuè téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi núú cuè téé cùu fariséú, te xáhaⁿ-gã:

—¿Cuu cada tátna-o ìⁿ ñáyiú cùhú nduu ndetátú-ó ãⁿ ñáhá? —càchí-gã xáhaⁿ-gã xii-güedé.

⁴ Dico cue téé-áⁿ ñà túú tnhá ní cáháⁿ-güedé. Te ní dácàá-gã ndaha-gá ní tendaha-gã téé cùhú-áⁿ ñi quide tátna ñaha-gã xii-dé, te ní xáhaⁿ-gã sá ná nùhú-dé vehe-dé. ⁵ Te ní xicáⁿ tnúhú-gã núú nchaa cue téé-áⁿ, te xáhaⁿ-gã:

—¿Te núu nchòhó ná ngáúnìhmu ìⁿ búrru-ndo àdi ìⁿ ndicutu-ndo déhvá, te vá ná tàva ndihi-ni-ndo-di cuèi cùu-xi nduu ndetátú-ndó-áⁿ? —càchí-gã xáhaⁿ-gã xii-güedé.

⁶ Te ñá túú ní ñihí-güedé tnúhu na dànocháva-güedé.

Ñáyiú càháⁿ-yu quíhíⁿ vico tnándaha

⁷ Te ndèhe Jèsús nàcuáa xíquide nchaa ñáyiú ndècu vico sá súúni ñi nacáxi-yu xilé sácõo nchihí cue téé cùnuu-gã conchihí-yu òré cuánguìhú-yu mèsá caxí-yu, núu ní xáhaⁿ-gã xií-yu:

⁸ —Òré ná càháⁿ ñáhá ìⁿ ñáyiú xii-ndo ìⁿ vico tnándaha, te vá cóó-ndó nùú xilé sácõo cue téé cùnuu-gã, chí núu ducaⁿ na càda-ndo, te cudana quexìo

dava-gá ñáyiú cùnuu-gã dàcúxí nchòhó. ⁹ Te ñáyiú ní cáháⁿ ñáhá xii-ndo-áⁿ quixí-yu te cùñáhá-yu xii-ndo: “Chí cuãñaha xilé núcõo nchihí-ndo-áⁿ ná cõnchihí ñáyiú ní quexìo-a”, quesáhá-yu cùñáhá-yu xii-ndo. Te cuini-ndó ñáhá cuèi cùcahaⁿ núú-ndó ndàcuñí-ndó quíhíⁿ-ndó ngõo-ndo núú xilé xìnutnì ndéé núú ñi ndihi-ná ndàa sátá-xi. ¹⁰ Te yúhú càchí-í sá òré ná càháⁿ ñáhá-yu xii-ndo, te ngóo-ndo núú xilé xìnutnì ndéé núú ñi ndihi-ná ndàa sátá-xi chí cuendá òré ná quèxio ñáyiú ní cáháⁿ ñáhá xii-ndo, te cùñáhá-yu xii-ndo: “Nchòhó cue ñáyiú càháⁿ ndihi-í, chí yáha núú xilé sácõo cue téé cùnuu-gã coo-ndo”, duha cùñáhá-yu xii-ndo. Te ducaⁿ te cada nínu ñaha nchaa ñáyiú yìhi ndihi-ndo mesá. ¹¹ Te nchaa ñáyiú na càda nínu mee-xi, te ñáyiú-áⁿ ñà túú cùu nínu-yu, te nchaa ñáyiú ñà túú quide nínu mee-xi, ñáyiú-áⁿ cúu nínu-yu —càchí-gã xáhaⁿ-gã xií-yu.

¹² Te dàtnùnì ní xáhaⁿ-gã xii téé ní cáháⁿ ñáhá xii-gã:

—Te yòhó òré cuini-n càda-n ìⁿ vico, te vá càháⁿ-n mée-ni cue téé càháⁿ ndihi-n, ní cuè ñani-n, ní cuè ñáyiú cùu ñani tnháⁿ-n, ní cuè ñáyiú cuica ndècu yatni ndihi-n, chí ñáyiú-áⁿ ducaⁿ càdá-yu ìⁿ nduu càháⁿ ñáhá-yu xii-n te ndéyáhu-ni sá ní quidé-n-yu. ¹³ Te ñáhá chí òré ná càda-n ìⁿ vico, te cáháⁿ-n ñáyiú ndàhú, ndihi ñáyiú ñà cúu càca, ndihi ñáyiú yacua, ndihi ñáyiú cuáá. ¹⁴ Te núu ducaⁿ na càda-n, te cuu-xi ìⁿ sá vaha xii-n, chí ñáyiú-áⁿ vã ñihí-yu nacoto ñáhá-yu xii-n, dico na cùu-n te sáá nduu ndòto-n ndihi nchaa ñáyiú ní quide ndáá ní xíndecu ichi Yá Ndiöxi, te dàvá-áⁿ taxi-gã sá ndúú tàhú-n —càchí-gã xáhaⁿ-gã xii-dé.

Nàcuáa xíquide ñáyiú òré càháⁿ ñáhá ìⁿ téé cada vico
(Mt. 22:1-10)

15 Te sá dúcáⁿ ní cáháⁿ Jèsús ní tecú dóho cue tée yìhi mesá-áⁿ, núu ní xáhaⁿ ìⁿ-dé xii-gá:

—Ío váha táhú nchaa ñáiyu na càxi nchaa sá cuàha ñaha Yã Ndiòxí nduu na sáa-yu cundecú-yu núu ndécú-gã táxi tnùnì-gá —càchì-dé xáhaⁿ-dè xii-gá.

16 Te Jèsús ní xáhaⁿ-gã xii-dé:

—Ìⁿ tée quide-dé vico, te ní dátècú tnúhu-dé cuéhé víhí ñáiyu quíhíⁿ-yu caxí-yu. 17 Te òré sa ní cuu-ná sá cáxi-yu, te ní xáhaⁿ-dè xii tée xínu cuechi núú-dè sá quíhíⁿ-dé cúñaha-dè quíhíⁿ-yu caxí-yu, chi sa ndècu túha nchaa sá cáxi-yu. 18 Dico nchaaⁿ ní xáháⁿ-yu xii-dé sá ná cadá càhnu iní tée càháⁿ ñáhá-áⁿ, chí ñá túú cùyáchi-yu quíhíⁿ-yu vico-áⁿ. Te tée ní cáháⁿ ndìhi tée xínu cuechi-áⁿ dǐhna ní xáhaⁿ-dè: “Íchí ní saaⁿ-í ìⁿ pedású ñuhu, te quíhíⁿ ndéhè-í tnavíí, núu xiáⁿ càháⁿ ndàhú-í núú-n sã cùñaha-n xii tée càháⁿ ñáhá-áⁿ xii-í sá ná cadá càhnu iní-dé chí ñá túú cùyáchi-í”, càchì-dé xáhaⁿ-dè. 19 Te ingá-dé ní xáhaⁿ-dè: “Ní saaⁿ-í úhúⁿ yúndá ndicutu sa xítu, te cue quiti-áⁿ quíhíⁿ-í coto ndeé-í-güedi vitna, núu xiáⁿ càháⁿ ndàhú-í núú-n sã cùñaha-n xii tée càháⁿ ñáhá-áⁿ xii-í sá ná cadá càhnu iní-dé chí ñá túú cùyáchi-í”, càchì-dé xáhaⁿ-dè. 20 Te ingá tucu-dé ní xáhaⁿ-dè: “Íchí ní tnándaha-í núu xiáⁿ vá cùyáchi-í quíhíⁿ-í”, càchì-dé xáhaⁿ-dè. 21 Te òré ní nasáá tée xínu cuechi-áⁿ, te ní nacani tnúhu-dé núu patróóⁿ-dè nchaa nàcuáa ní xáháⁿ-yu. Te ní cudééⁿ tée cùu patróóⁿ-áⁿ, te ní xáhaⁿ-dè xii tée xínu cuechi núú-dè-áⁿ: “Yáchi cuàháⁿ nanducu-n nchaa ñáiyu ndàhú, ndìhi nchaa ñáiyu ñá cúú càca, ndìhi nchaa ñáiyu yacua, ndìhi nchaa ñáiyu cuáa, te ndèni ní cuu na nàníhí-n-yu te candècá-n-yu quixi”, càchì-dé xáhaⁿ-dè. 22 Te sáta ní nasáá tée xínu cuechi-áⁿ, te ní xáhaⁿ-dè xii patróóⁿ-dè: “Patróóⁿ,

sa ní quide-í chiúⁿ ní táhú-n, dico ndècu-gá núú cóo-yu”, càchì-dé xáhaⁿ-dè. 23 Te tée cùu patróóⁿ-dè-áⁿ ní xáhaⁿ-dè: “Cuàháⁿ tucu ndèni ní cuu te cada yica-n na quíxí-yu quíhu-yu cuendá ná chítú vehe-í. 24 Te na càchí tnúhu-í xii-n sã nì ìⁿ ñáiyu ní cáháⁿ-í dǐhna vá cúú-gã caxí-yu sá sà ní quide túha-í caxí-yu ní cùu”, cachí tée-áⁿ xáhaⁿ-dè xii tée xínu cuechi núú-dè —càchì-gá xáhaⁿ-gã xii tée-áⁿ.

Ndoho-o cùndecu-o ichi Xítóhó Je-sucrístú

(Mt. 10:37-38)

25 Te ío cuéhé ñáiyu nchìcúⁿ-yu Jèsús, te ní xáhaⁿ-gã xii-yu:

26 —Te núu dava nchòhó cuíní-ndó chitnahá ñáhá-ndó xii-í, te cuu iní ñáhá ndisa-ndo. Te cuèi na dándóo-ndo tátá-ndó, ndìhi náná-ndó, ndìhi ñadihí-ndó, ndìhi déhe-ndo, ndìhi ñani-ndó, ndìhi cúha-ndo, te cani iní-ndó sã cuèi na cúú-ndó sã cuendá-í, te ducaⁿ te cuu ndisa-ndo cuè ñáiyu tnàhá tnúhu ndìhi-í. 27 Te nchaa ñáiyu vá cãncǐcúⁿ nihnu ñaha xii-í cuendá sá yùhú-yu ndohó-yu dàtná ndoho-í, ñáiyu-áⁿ vá cúú-yu ñáiyu tnahá tnúhu ndìhi-í. 28 Te núu ìⁿ nchòhó ná cani iní-ndó dàcaa-ndo ìⁿ vehe ducúⁿ, ¿te náa ñá díú dǐhna-gá cada cuendá-ndó núu ndédau díhúⁿ cuu, ducaⁿ te cutnùnì iní-ndó núu tnahá díhúⁿ-ndó càa vehe-áⁿ àdi ñáhá? 29 Chi núu vá dúcáⁿ càda-ndo, te na ngüita-ndo tàusaha-ndo te vá xínu cada-ndo, te nchaa ñáiyu na cùndehe ñaha xii-ndo, te cáháⁿ cuéhé-yu cuendá-ndó. 30 Te cachí-yu: “Tée-áⁿ ní ngüita-dé dácàa-dé ìⁿ vehe te ñá ní ndàcu-dé xínu”, cachí-yu. 31 Àdi te núu ìⁿ tée yìndaha ñaha xii ñáiyu cuíní-dé nàá-dé ndìhi ingá tucu tée yìndaha ñaha xii ñáiyu, ¿te náa ñá díú dǐhna-gá cada cuendá-dé te núu ndacu-dé ndìhi úxí mǐl cue sandàdú-dé nàá-güedé, ndìhi ócò mǐl cue sandàdú ingá tucu tée

yíndaha ñaha xii ñáyiú cùú úhú iní tñáhá ndìhi-dé-áⁿ? ³² Àdi te núú xító-dé sá vǎ ndácú-dé ñá, te òré vátá cùyàtñi ñaha-gá tée cùú úhú iní tñáhá ndìhi-dé-áⁿ, te tendaha-dě ìⁿ tée quíhíⁿ-dé quíhu-dé tñúhu ndàhú núú tée-áⁿ cuendá sá vǎ nàá-güedé. ³³ Te duha càháⁿ-í chi núú nchòhó vǎ cadá ndèe iní-ndó dàña-ndo nchaa sá ndécú ndìhi-ndo cuendá chitnahá ñáhá-ndó xii-í, te vǎ cùú-ndó cuè ñáyiú tñáhá tñúhu ndìhi-í.

Ñí nǎ nduu víxiⁿ
(Mt. 5:13; Mr. 9:50)

³⁴ Te ñí chi ío váha, dico núú na ndùu víxiⁿ-xi, ¿te nása-gá cada-o nàndíhi-o te núú ducaⁿ-í? ³⁵ Chi ñá túú-gǎ nàndíhi-xi nì sá dàcá ñuhu, te nì sá dàcá saháⁿ, chi cuendá-nǎ dǎngoyo-o. Te nchaa nchòhó ñáyiú ní xíndedóho tñúhu ní càháⁿ-í-a xini ñuhu-xi ío váha cuáha-ndo cuendá —càchí-gǎ xáhaⁿ-gǎ xii-yu.

15

Cuendá ìⁿ mbéé quiti ní xíta
(Mt. 18:10-14)

¹ Te cue tée cuihna iní-xi quide cobrá ñáhá xii ñáyiú cuendá impuèstú ndìhi cue dava-gǎ ñáyiú ndècu ichi cuehé ichi duha ní quexió-yu núú ndécú Jèsús cuendá cundedóho-yu tñúhu càháⁿ-gǎ. ² Te ní ngúíta cue tée cùú fariséú, ndìhi cue tée dàcuaha ñaha xii ñáyiú nchaa tñúhu ní chídó tñùnì ndí Moisés xicáháⁿ cuèhé-güedé cuendá-gǎ, te càchí-güedé:

—Tée-a quèheⁿ cuendá-dé ñáyiú ndècu ichi cuehé ichi duha, te xèxi ndìhi ñaha-dé xií-yu —càchí-güedé xitnaha-güedé.

³ Te Jèsús ní cani-gǎ ìⁿ cuendú nàcuáa tecú tñùnì-güedé tñúhu-gǎ, te xáhaⁿ-gǎ xii-güedé:

⁴ —Ìⁿ tée ndècu ìⁿ ciendú mbéé-dé, te ní xíta ìⁿ-di, te nchòhó sa cùtñuní iní-ndó nàcuáa cada tée-áⁿ, chi dándóo-dé cùmídíco sǎhúⁿ cùmí-di ìⁿ yucu, te cúnúndúcú-dé quiti ní xíta xíáⁿ

ndèé ndéé naníhí-dé-di. ⁵ Te òré ní naníhí-dé-di te ní dácáá-dé-di chíó-dé ní docó-dé-di sá cùdíⁿ iní-dé. ⁶ Te òré ní nasáá-dé vehe-dé, te ní dátacá-dé nchaa cue tée càháⁿ ndìhi-dé, ndìhi nchaa ñáyiú ndècu yatni ndìhi-dé, te ní xáhaⁿ-dè: “Chí ná cùdíⁿ iní-ó vitna, chi ní naníhí-í mbéé-í quiti ní xíta ní cùú”, cachí-dé xáhaⁿ-dè xií-yu. ⁷ Te yúhú càchí-í sá ío-gǎ cùdíⁿ iní Yǎ Ndióxi ndìhi cue espíritú xínú cuèchi núú-gǎ núu ìⁿ ñáyiú ndècu ichi cuehé ichi duha na ndìxi cuèchi iní-yu cuendá nchaa sá ñà túú váha quidé-yu ndécú-yu te tñí-yu ichi-gǎ, dàcúúxí cùmídíco sǎhúⁿ cùmí ñáyiú sa ní tuha ichi-gǎ, chi ñá túú-gǎ xini ñuhu-xi ndixi cuèchi iní-yu chi sa ndécú-yu ichi-gǎ —càchí-gǎ xáhaⁿ-gǎ xii-güedé.

Cuendá díhúⁿ ní xíta

⁸ Te ní cani Jèsús ingá cuendú núú-güedé, te xáhaⁿ-gǎ:

—Ìⁿ ñadíhí ndécú ndìhi-aⁿ úxí díhúⁿ cuixíⁿ, te ní dácúíta-aⁿ ìⁿ te ní teñuhú-aⁿ iti, te ní ngúíta-aⁿ nàtihu-aⁿ vehe, te súní váha váha ní nanducu-aⁿ ndéé ní naníhí-aⁿ. ⁹ Te òré ní naníhí-aⁿ, te ní dátacá-aⁿ nchaa ñáyiú díhí càháⁿ ndìhi-aⁿ ndìhi nchaa ñáyiú ndècu yatni ndìhi-aⁿ, te ní xáhaⁿ-aⁿ: “Chí ná cùdíⁿ iní-ó vitna chi ní naníhí-í díhúⁿ-í sá ní xíta ní cùú”, cachí-aⁿ xáhaⁿ-aⁿ xií-yu. ¹⁰ Te yúhú càchí-í sá dúcáⁿ ío cùdíⁿ iní nchaa espíritú xínú cuèchi núú Yǎ Ndióxi, núu ìⁿ ñáyiú ndècu ichi cuehé ichi duha na ndìxi cuèchi iní-yu cuendá nchaa sá ñà túú váha quidé-yu, te tñí-yu ichi-gǎ —càchí-gǎ xáhaⁿ-gǎ xii-güedé.

Cuendá ìⁿ tée ñà túú ní quide váha

¹¹ Te ní cani tucu Jèsús ingá cuendú núú-güedé, te xáhaⁿ-gǎ:

—Ìⁿ tée ndècu úú déhe ducuⁿ-dé, ¹² te tée líhli-gǎ ní xáhaⁿ-dè xii tǎtá-dé: “Táu, taxi-n tǎhú sǎ cùú cuendá-í”, càchí-dé xáhaⁿ-dè. Te

tátá-dě-án nĩ sáñaha-dě ndĩ dǐíⁿ núú-güedě sá cúú cuendá-güedě. ¹³ Te núú sàcú-ni nduu, te déhe-dé téé lihli-gá-án nĩ nadico-dé nchaa sá nĩ sáñaha tátá-dě, te ní xica-dé cuáháⁿ-dé ìⁿ ñuú xícá, te yácáⁿ ní tñí-dé ìⁿ ichi cuéhé ichi duha, te ní ndihĩ dǐhúⁿ-dě ní dándóñùhu-dé ndihĩ cue téé càháⁿ ndihĩ-dé, ndihĩ nchaa ñáyiu dǐhĩ xǐndecu ichi dǐí ìní. ¹⁴ Te ní ndihĩ ndoo dǐhúⁿ-dě ní dándóñùhu-dé, te núú sàcú-ni nduu ní sáá tnamá ñuú núú ndécú-dě-án, te ñá nihí-gá-dé sá caxí-dě, te xihí-dé docó. ¹⁵ Núú ní xica-dé cuáháⁿ ndúcú chiúⁿ-dé núú ìⁿ téé diu-ni ñuú xiáⁿ, te téé-án nĩ sáha chiúⁿ ñaha-dé ìⁿ xichi núú ñhúhú-dě coto-dé cùchí. ¹⁶ Te súúní xihí-dé docó te cunĩ-dé caxi-dé nchaa sá sáha-yu cùchí-án ní cùu, dico ñá túú ní sáñahá-yu xii-dé. ¹⁷ Te uuⁿni ní sani váha iní-dé, te ní cachí-dé: “Ío cuéhé cue téé xǐnu cuechi vehe tátá-í te ío cuéhé sá xéxi-güedě ndécú, te yúhú duha ndòho-í docó iha! ¹⁸ Te ndacuñí-í te núhú-í vehe tátá-í, te cùñaha-í xii-dé: Táu, ñá túú ní quide váha-í núú Yá Ndióxi te ní ñá túú ní quide váha-í núú-n, ¹⁹ te ñá túú-gǎ tǎu-í sá cúú-í déhe-n vitna, te cada ñaha-nǎ-n xii-í dǎtná ìⁿ téé xǐnu cuechi núú-n”, duha ní sani iní-dé cùñaha-dě xii tátá-dě. ²⁰ Te sǎtá dúcáⁿ ní sani iní-dé, te ní natñí-dé ichi cuánuhú-dé vehe tátá-dě, te xica-gǎ cuánuhú-dé ní xiní ñáhá tátá-dě xii-dé te ní cundáhú iní ñáhá-dě. Te xǐnu tátá-dě-án nĩ sáháⁿ nútñahá ñáhá-dě, te ní numi ñaha-dě, te ío váha ní cáháⁿ ndihĩ ñaha-dě. ²¹ Te ní xáhaⁿ déhe-dé-án xii-dé: “Táu, ñá túú ní quide váha-í núú Yá Ndióxi te ní ñá túú ní quide váha-í núú-n, te ñá túú-gǎ tǎu-í sá cúú-í déhe-n vitna”, cachí-dé xáhaⁿ-dě.

²² Dico tátá-dě-án nĩ xáhaⁿ-dě xii cue téé xǐnu cuechi núú-dě: “Chí quéñùhu ndihĩ-ni dóó váha-gá cuáha-ndo déhe-í-a na cuñhu-dé, ndihĩ ìⁿ dehé ná quíhĩ díquí ndáhá-dě, ndihĩ chàu váha na

quíhĩ-dé. ²³ Te quíhĩⁿ ngueheⁿ-ndo ìⁿ ndicutu numa quiti caváha-gá, te cahni-ndo-di, te na càda-o vico, te na cǎxi-o-di. ²⁴ Chí déhe-í-a ní sani iní-í sá nĩ xihí-dé ní cùu, te ñáhá chi ndècu vívú-dě, te ní sani tucu iní-í sá ní xita-dé ní cùu te ní nasáá méé-dě”, cǎchí-dé xáhaⁿ-dě xii cue téé xǐnu cuechi núú-dě-án. Te ní ngúita-güedě ní quide-güedě vico.

²⁵ Te déhe-dé téé sàcuéhé-gǎ cuáháⁿ-dé yucu, te òrè cuándixi-dé tá ndùu yatni-dé vehe, te ní tecú dóho-dé ío yaá cúú vico. ²⁶ Te ní cana-dé ìⁿ téé xǐnu cuechi, te ní xícáⁿ tñhúhú-dě núú-dě ná cuendá ducaⁿ ío yaá. ²⁷ Te téé xǐnu cuechi-án nĩ xáhaⁿ-dě: “Ñaní-n tée cuáháⁿ ní cùu ní nasáá-dě, te tátá-n nĩ táuchíúⁿ-dě ní xihí ìⁿ ndicutu numa quiti caváha-gá cuendá sá ní nasáá váha-dé”, cǎchí-dé xáhaⁿ-dě.

²⁸ Dico ñaní-dé téé sàcuéhé-án nĩ cudééⁿ-dě, te ní cachí-dé sá vá ndǐhu-dé vehe cundecu-dé vico-án ní cùu, dico ní quee tátá-güedě ní cáháⁿ ndáhú-dé núú-dě cuendá ndǐhu-dé. ²⁹ Te ní xáhaⁿ-dě xii tátá-dě: “Táu, cundedóho váha saú-n tñùhu na càháⁿ-í-a, yúhú ío cuéhé cuíá ní cuu xǐnu cuechi-í núú-n, te ní ìⁿ xito ñá túú quide sáa iní-í núú-n, te ní ìⁿ chivá lihli ñá túú tàxi-n-di caxi dǐí ìní-í-di ndihĩ cue téé càháⁿ ndihĩ-í. ³⁰ Te vitna ní nasáá déhe-n tée ní sáháⁿ ní dándóñùhu dǐhúⁿ-n ndihĩ nchaa ñáyiu xǐndecu ichi dǐí ìní. Te ní sahani-n ìⁿ ndicutu numa quiti caváha-gá sá cuendá-dé”, cǎchí-dé xáhaⁿ-dě xii tátá-dě. ³¹ Te ní xáhaⁿ tátá-dě xii-dé: “Yóhó déhe-í ducaⁿ-ni ndècu ndihĩ ñaha-n xii-í, te nchaa sá ndécú ndihĩ-í cúú-xí cuendá-n. ³² Te vitna dacuití tǎu-xi sá cáda-ó vico, te cudǐí ìní-ó, chí ñaní-n-án nĩ quide-í cuendá sá ní xihí-dé ní cùu, te ñáhá chí ndècu vívú-dě, te sa ní xita-dé ní cùu, te ní nasáá méé-dě”, cǎchí-dé xáhaⁿ-dě xii déhe-dé téé sàcuéhé-gǎ-án — duha cuáháⁿ cuendá ní cani Jèsús

núu-güedé.

16

Nàcuáa ní quide ìn tée tàxi tnuní ñáhá xii cue tée xinu cuechi

¹ Te Jèsús xáhaⁿ-gá xii cue tée xica cuu ndihi-gá:

—Ní xindecu ìn tée cuica, te ducaⁿ ní xindecu ìn tée ní taxi tnuní ñáhá xii cue tée ní xinu cuechi núu-dé. Te tée-án ní xini ñáhá ñáyiù dùhu-dé díhúⁿ tée cùu patróóⁿ-dè, te cuáháⁿ-dé dándòñuhu-dé, te ní xáháⁿ-yu xii tée cùu patróóⁿ-dè sá dúcáⁿ quide-dé. ² Te tée cùu patróóⁿ-dè-án ní cana ñaha-dé xii-dé, te ní xáhaⁿ-dè: “¿Ná cuendá duha càháⁿ ñáyiù cuendá-n? Yáchi chi na tàxi cuendá-n nchaa chiuⁿ ní quide-n, chi vitna te vá táxi tnuní-gá-n cuè tée xinu cuechi núu-í?”, càchí-dé xáhaⁿ-dè. ³ Te tée tàxi tnuní ñáhá xii cue tée xinu cuechi-án ní sani iní-dé: “¿Te nása cada-í vitna na quèhndé patróóⁿ-í chiùⁿ-í? Chi ñá cùndè-gá-í cada-í chiùⁿ vée, te cùcahaⁿ núu-í cácaⁿ ndàhú-í. ⁴ Dico duha cada-í cuendá queheⁿ cuendá ñáhá ñáyiù vehé-yu òré ná quèhndé duuⁿ-ná patróóⁿ-í chiùⁿ-í”, duha ní sani iní-dé. ⁵ Te sátá dúcáⁿ te ní cana-dé ìn ìn cue tée tau núu patróóⁿ-güedé. Te tée díhna ní xicáⁿ tnúhú-dè núu-dé, te xáhaⁿ-dè: “¿Ndèé dau tau-n núu patróóⁿ-í?”, càchí-dé xáhaⁿ-dè. ⁶ Te tée-án ní xáhaⁿ-dè: “Tau-í ìn cièndú bàrril acití”, càchí-dé xáhaⁿ-dè. Te tée tàxi tnuní ñáhá xii cue tée xinu cuechi-án ní xáhaⁿ-dè: “Iha náu reciù-n-á, te ndadúha ingá sá ùdico úxí taxi-n”, càchí-dé xáhaⁿ-dè. ⁷ Te dàtnuní ní xicáⁿ tnúhú tucu-dé núu ingá-dé, te xáhaⁿ-dè: “Te yòhó, ¿ndèé dau tau-n-í?”, càchí-dé xáhaⁿ-dè. Te tée tau-án ní xáhaⁿ-dè: “Ìn cièndú ngohnchi triù tau-í”, càchí-dé xáhaⁿ-dè. Te tée tàxi tnuní ñáhá xii cue tée xinu cuechi-án ní xáhaⁿ-dè: “Iha náu reciù-n-á, te cadúha ingá sá cùmídícó-ná taxi-n”, càchí-dé xáhaⁿ-dè. ⁸ Te tée cùu patróóⁿ-án ní cachí-dé sá ò váha ñuhu

díquí tée dùhu-án nàcuáa cada-dé cundecu váha-dé. Te nchaa ñáyiù xindecu ichi cuèhé ichi duha, ío-gá váha ñuhu díquí-yu nàcuáa cada-yu cundecu váha-yu ndihi nchaa ñáyiù cùndihí-yu dàcúxí ñáyiù ndècu ichi Yá Ndiòxí.

⁹ Te yúhú càchí-í sá cadá-ndó sá váha ndihi nchaa sá ndécú ndihi-ndo ní cuáha ñuyúú yíca cuèchi-a, te ducaⁿ te coo cue tée ío váha tnahá tnúhu ndihi-ndo, te òré ná ndihi nchaa sá ío ñuyúú-a, te Yá Ndiòxí queheⁿ cuendá ñáhá-gá xii-ndo, te cundecu-ndo ndihi-gá ní caa ní quíhíⁿ.

¹⁰ Te núu ìn tée quide ndáá cuèi ìn chiùⁿ líhli na càda-dé, te òu-ni ducaⁿ quide ndáá-dé cuèi ìn chiùⁿ cahnu na cada-dé. Dico tée ñá túú quide ndáá, chi cuèi chiùⁿ líhli àdi chiuⁿ cahnu na cada-dé dico ìn-ni quide-dé. ¹¹ Te núu nchòhó vá cadá-ndó sá váha ndihi nchaa sá ní cuáha ñuyúú yíca cuèchi-a ña, te Yá Ndiòxí vá táxi-gá sá váha ndècu ndihi-gá xii-ndo. ¹² Te núu vá cadá ndáá-ndó còto-ndo nchaa sá táxi núu tnahá ñáyiù-ndo, te vá yò taxi sá ndúú tàhú-ndó.

¹³ Te ni ìn tée xinu cuechi vá ndácú-dé cunu cuechi-dé núu úú patróóⁿ, chi tée-án cuu váha iní-dé núu ìn patróóⁿ-dè te tñí-dé nchaa tnúhu càháⁿ patróóⁿ tée cùu váha iní-dé núu-xi-án. Te núu ingá tucu patróóⁿ-dè vá cúu váha iní-dé, te ni vá tñí-dé tnúhu càháⁿ patróóⁿ-dè-án. Te ducaⁿ sàtnahá-xi cùu nchòhó chi vá ndácú-ndó cunu cuechi-ndo núu Yá Ndiòxí te cuhuⁿ iní-ndó nchaa sá ío ñuyúú-a — càchí-gá xáhaⁿ-gá xii-güedé.

¹⁴ Te nchaa cue tée cùu fariséú ío ñuhu iní-güedé nchaa sá ío ñuyúú-a, te xindedóho-güedé nchaa tnúhu càháⁿ Jèsús, te ní càháⁿ yíchí-güedé cuendá-gá. ¹⁵ Te Jèsús ní xáhaⁿ-gá xii-güedé:

—Nchòhó cùú-ndó cuè tée ío váha càháⁿ núu ñáyiù cuendá-ni sá cuini-ndó càháⁿ váha-yu

cuendá-ndó, dico Yá Ndiöxí xini ndáá-gá nàcuáa càa iní-ndó ìⁿ ìⁿ-ndo, te nchaa sá cächí cue ñáyiú ñuyíú-a sá ïo nàndíhi, Yá Ndiöxí dáquèe tíhú-gă.

Cuendá nchaa tnúhu ní chídó tnùní ndíi Moisés

¹⁶Te nchaa tnúhu ní chídó tnùní ndíi Moisés cúnù-xi ní cuu, ndíhi nchaa tnúhu ní chídó tnùní cue tée ní xóo cáháⁿ tnúhu Yá Ndiöxí ndéé sanaha. Dico cútñáhá ní ngúíta té Juáá tée ní xóo dacuàndute ñaha xii ñáyiú ní cáháⁿ-dé tnúhu-í, ndéé dàvá-áⁿ ñà túú-gă ní cùnùu nchaa tnúhu ní chídó tnùní ndíi Moisés ndíhi nchaa tnúhu ní chídó tnùní cue tée ní xóo cáháⁿ tnúhu Yá Ndiöxí ndéé sanaha. Te ñu-ni ndéé dàvá-áⁿ ní quesaha ta təcú tnùní ñáyiú nàcuáa ndíhu ndaha ñaha Yá Ndiöxí xii-yu, te vai ñáyiú ïo sàni iní-yu vitna nàcuáa cadá-yu ndíhu ndaha ñaha Yá Ndiöxí xii-yu. ¹⁷Te nchaa tnúhu ní chídó tnùní ndíi Moisés ïo ndáá cáháⁿ-xi, te ndíhi-gá naa andiu ndíhi ñuyíú dàcúúxí sá ndíhi ìⁿ ìⁿ tnúhu-áⁿ cada-xi nàcuáa cáháⁿ-xi.

Jésús càháⁿ-gá cuendá ñáyiú dàña tnaha

(Mt. 19:1-12; Mr. 10:1-12)

¹⁸Te núu ìⁿ tée na dàña tnaha-dé, ndíhi ñadíhi-dé, te tnándaha tucu-dé ndíhi ingá-yu, te nèhé víhi quide-dé te núu ducaⁿ na càda-dé, te tée na tnándaha ndíhi ñaha ní dáñá yè-xi, te ñu-ni ducaⁿ ñà túú cùu-xi sá vaha te núu ducaⁿ na cadá-yu — cächí-gá xáhaⁿ-gă xii-güedé.

Cuendá ìⁿ tée nàni Lázaru ndíhi cuendá ìⁿ tée cuica

¹⁹Te xáhaⁿ tucu-gă xii-güedé:

—Ní xindecu ìⁿ tée cuica, te ní xóo cuihnu-dé mee-ni dóó vaha dóó víi càa, te nchaa nduu súúni vaha ní xóo cada-dé vico vehe-dé. ²⁰Te ní xindecu tucu ìⁿ tée ndàhú ní xínani-dé Lázaru, te tée-áⁿ ní cuhú-dé ní xindeé-dé nitùhú-dé ndíhiyí, te ìⁿ nduu ìⁿ nduu ní xóo taxinucóo ñaha-güedé xii-dé yuyèhe

tée cuica-áⁿ. ²¹Te tée ndàhú-áⁿ ní xóo cuú-dé docó, te ní xóo cuini-dé caxi-dé nchaa sá ñà túú-gă ní xóo yáha caxi tée cuica-áⁿ, te ñà túú ní xóo níhi-dé. Te cuèi iná ní xóo quihíⁿ-di ní xóo nayuu-di nchaa núu ndíhiyí ndéé-dé-áⁿ. ²²Te ní sáá ìⁿ nduu te ní xíhi tée ndàhú-áⁿ, te cue espíritú xínú cuèchi núu Yá Ndiöxí ndécá ñaha-xi xii-dé cuánda núu ndécú té Àbrahám cundecu-dé. Te ní sáá nduu ní xíhi tée cuica-áⁿ tnàhá-dé, te ní chindúxi ñaha-güedé xii-dé. ²³Te ní sáá-dé núu xindecu nchaa ñáyiú ní xíhi ñà túú ní quide ndáá núu Yá Ndiöxí te xíáⁿ ïo ndòho-dé ndécú-dé, te ní ndonehe núu-dé te xica ní xini-dé té Àbrahám ndíhi té Lázaru-áⁿ xindecu-güedé. ²⁴Te níhi ní cáháⁿ-dé, te xáhaⁿ-dè: “Yòhó tātá Àbrahám, cundàhú iní ñáhá xii-í, te cùñaha xii té Lázaru ná dandaxiⁿ-dé díqui ndáhá-dé, te na quixi-dé dandaxiⁿ-dé yàa-í, chi ïo ndòho-í ñùhù-í núu ñùhú núu càyú-a”, cächí-dé xáhaⁿ-dè xii té Àbrahám.

²⁵Dico té Àbrahám ní xáhaⁿ-dè: “Ndàhú yòhó ñani tnàhá-í, dandacu iní sá ïo vaha ní xindecu-n ñuyíú, te té Lázaru ïo ndàhú ní ndòho-dé ní xindecu-dé. Te vitna ní nucundeçu váha-dé iha, te yòhó ndòhó-n vitna. ²⁶Te ñà díu-ní sá xíáⁿ tucu, chi cuádava ndècu ìⁿ dhévé cùnú ñùhú ñèhu-xi núu ndécú-ó, te cuèi nchaa ñáyiú xindecu iha na cächí iní-yu quixí-yu núu ndécú-ndó dico vá ndácú-yu, te ni nchòhó vá ndácú-ndó quixi-ndo núu ndécú-ndí”, cächí-dé xáhaⁿ-dè. ²⁷Te ní xáhaⁿ tée cuica-áⁿ: “Te núu ducaⁿ te càháⁿ ndàhú-í núu yòhó tātá Àbrahám vitna sá tendàha-n té Lázaru ná quihíⁿ-dé vehe tātá-í, ²⁸chi ndècu úhúⁿ-gă ñani-í, te na cùñaha-dé xii-güedé sá vā cadá-güedé dàtná ní quide-í cuendá sá vā quixí-güedé tnàhá-güedé núu ndécú-í ndòhó-í-a”, cächí-dé xáhaⁿ-dè. ²⁹Te té Àbrahám ní xáhaⁿ-dè: “Mee-güedé ndécú

ndìhi-güedé nchaa tnúhu ní chídó tnùnì ndíi Moisés, ndìhi nchaa tnúhu ní chídó tnùnì cue tée ní xóo cáháⁿ tnúhu Yá Ndióxí ndéé sanaha, te nchaa tnúhu-áⁿ ná tnì-güedé nàcuáa càháⁿ-xi”, càchí-dé xáhaⁿ-dè xii-dé. ³⁰ Te ní xáhaⁿ tùcu tée cuica-áⁿ: “Tátá Àbrahám, dico vá cáda cuendá-güedé nchaa tnúhu-áⁿ, dico núu ìⁿ ñáyiú ñá túú-gá ndécú ñùyíú ìⁿ ñáyiú ndècu ndìhi-n quíhíⁿ-yu cáháⁿ ndìhi ñàhá-yu xii-güedé nàcuáa ndùu tnúhu váha, te ndíxi cuéchi iní-güedé nchaa sá ñà túú quide váha-güedé ndécú-güedé, te cada váha-güedé”, càchí-dé xáhaⁿ-dè xii-dé. ³¹ Dico té Àbrahám ní xáhaⁿ-dè: “Te núu ñá túú cùnì-güedé tnì-güedé tnúhu ní cáháⁿ ndíi Moisés, ndìhi tnúhu ní cáháⁿ cue tée ní xóo cáháⁿ tnúhu Yá Ndióxí ndéé sanaha ña, te ñu-ni ducaⁿ càda-güedé cuéi ìⁿ ñáyiú ní xíhí ná ndótó-yu cùñàhá-yu nàcuáa ndùu tnúhu váha, chi vá quíndáá iní-güedé”, càchí té Àbrahám xáhaⁿ-dè xii tée cuica-áⁿ — càchí Jèsús xáhaⁿ-gá xii cue tée cùu fariséú.

17

Quihi iní-ó vǎ cùndècu-o ichi cuehé ichi duha

(Mt. 18:6-7, 21-22; Mr. 9:42)

¹ Te Jèsús ní xáhaⁿ-gá xii cue tée xica cuu ndìhi-gá:

—Dacuítíi sǎ cóo cuè tée dacàháⁿ-güedé ñáyiú cadá-yu nándi sá cuèhé sá dúhá, ìdico ndàhú ní cuu cue tée ducaⁿ na dacàháⁿ ñàhá xii-yu cadá-yu nándi sá cuèhé sá dúhá! ² Chi váha-gá sá núu na dàcutu ndéé ñáyiú ìⁿ yúú yódó dúcúⁿ-güedé te dàquée ñàhá-yu xii-güedé xití ndute làmár, te ñá díú sǎ cùndècu-güedé dacàháⁿ-güedé ñáyiú cadá-yu nándi sá cuèhé sá dúhá, cuéi ñáyiú ndàhú iní-xi dandàhú-güedé. ³ Te ío quihi iní-ndó cùndècu-ndo.

⁴ Te núu ìⁿ ñaní tnàhá-ndó quide-dé ìⁿ sá ñà túú tàú-dé

çada-dé sá cúu-xí-ndó te cáháⁿ-ndó dõho-dé, te núu ní ndíxi cuéchi iní-dé sá ñà túú ní quide váha-dé, te cada càhnu iní-ndó sǎ ní quide-dé. ⁴ Te cuéi úsá xito na càda-dé nándi sá ñà túú tàú-dé cada-dé sá cúu-xí-ndó ìⁿ nduu, te núu na quixi-dé úsá xito núu-ndó, te cachi-dé sá vǎ dúcáⁿ-gá cada-dé, te xini ñuhu-xi cada cahnu iní-ndó-dé —càchí-gá xáhaⁿ-gá xii-güedé.

Ñáyiú sàndáá ndisa iní-xi

⁵ Te ní xáhaⁿ cuè tée xica cuu ndìhi Jèsús xii-gá:

—Chindee ñàha xii-ndí cuendá ducaⁿ te quíndáá-gá iní-ndí sá Yá Ndióxí ndácú-gá quidé-gǎ nchaa sá váha —càchí-güedé xáhaⁿ-güedé xii-gá.

⁶ Te ní xáhaⁿ Jèsús:

—Te núu nchòhó quíndáá ndisa iní-ndó sùúnì cuèdicó luha líj dǎtná cùnì-ndó càa ìⁿ ndíquiⁿ yutnu nàni mostázá, te ducaⁿ te cuu cùñaha-ndo xii ìⁿ yutnu: “Quene-n ìha te quíhíⁿ-n cuìhnu-n xití làmár”, duha cùñaha-ndo. Te ducaⁿ càda-xi te núu na quíndáá ndisa iní ñàhá-ndó xii-í —càchí-gá xáhaⁿ-gá xii-güedé.

Nàcuáa tàú ìⁿ tée xinu cuechi cada-dé

⁷ Te xáhaⁿ tùcu-gá xii-güedé:

—Te núu ìⁿ nchòhó ndécú ìⁿ tée xinu cuechi núu-ndó, te cuáháⁿ-dé yucu cuángada chiúⁿ-dé, àdi cuáháⁿ-dé yucu coto-dé quiⁿti, te òré ní nasáá-dé vehe sá ní sáháⁿ-dé yucu, te vá cùñaha nchòhó cue tée cùu patróoⁿ-dè xii-dé: “Yáchí nehé caxi-n díta”, vá dúhá cùñaha-ndo. ⁸ Chi nchòhó cue tée cùu patróoⁿ-dè cùñaha-ndo xii-dé: “Cundihí iní cada túha sá cùdini-í, te díhna-gá-í caxi-í díta te dǎtnùnì caxi-n”, duha cùñaha nchòhó cue tée cùu patróoⁿ xii-dé. ⁹ Te òré ná ndíhí chiúⁿ ní táhú nchòhó cue tée cùu patróoⁿ cada tée xinu cuechi núu-ndó, te ñá túú tàú-ndó ndàcáⁿ táhú-ndó núú tée xinu cuechi núu-ndó. ¹⁰ Te

duha càháⁿ-í chi núu òré ná ndìhì nchaa chiuⁿ ní tǎhú Yá Ndiòxí cada-ndo, te cachí-ndó: “Nchúhú cúú-ndí cue téé xínu cuechi núú Yá Ndiòxí, dico ñá túú tǎu-gá ndacáⁿ tǎhú-gǎ núú-ndí, chi mee-ni chiuⁿ ní tǎhú-gǎ ní quide-ndí”, duha cachí-ndó —càchí-gǎ xáhaⁿ-gǎ xii-güedé.

Jèsús quidé tǎtna-gǎ úxí cue téé tnàhá cuéhé sǎ dátèhyú nihnu-xi yiqui cùñú ñáyiú

¹¹ Te ñùhu Jèsús ichi cuáháⁿ-gǎ ñúú Jerusálén, te ní yáha-gǎ núú ràyá distritú Sámariá ndìhì distritú Galileá. ¹² Te ta cùyatni-gǎ ìⁿ ñúú líhli cuáháⁿ, te ní sǎtnahá ñáhá úxí tnàhá cue téé cùhú xii-gǎ, te tnàhá-güedé cuéhé sǎ dátèhyú nihnu-xi yiqui cùñú-ó dico xica lùha ní ngúnu tní-güedé, ¹³ te níhì ní cáháⁿ-güedé, te xáhaⁿ-güedé xii Jèsús:

—¡Mèstrú, cundáhú iní ñáhá xii-ndí! —càchí-güedé xáhaⁿ-güedé xii-gǎ.

¹⁴ Te òré ní xiní ñáhá Jèsús xii-güedé, te ní xáhaⁿ-gǎ:

—Chí cuáháⁿ núú dǔtú ná cùndehe ñaha-dé xii-ndo —càchí-gǎ xáhaⁿ-gǎ xii-güedé.

Te ní xica-güedé cuáháⁿ-güedé, te ichi-ni ñùhu-güedé cuáháⁿ-güedé ní ndúha-güedé cuéhé tnàhá-güedé. ¹⁵ Te nchaa-güedé ní cutnùní iní-güedé sǎ ní ndúha-güedé, dico ìⁿ-ni-dé ní nacuico-dé, te ní ngúita-dé níhì ní cáháⁿ-dé, te ní cachí-dé sǎ ìo càhnu cuu Yá Ndiòxí. ¹⁶ Te ní ngúíñí xítí-dé núú Jèsús, te ní nuu núú-dé ndàa núú ñúhú ndacáⁿ tǎhú-dé núú-gǎ. Te téé-áⁿ cúú-dé téé distritú Sámariá. ¹⁷ Te Jèsús ní cachí-gǎ:

—Úxí tnàhá-güedé ní ndúha cuéhé tnàhá-güedé. ¿Te ndéé ndécú dàva-gǎ-güedé-í? ¹⁸ ¿Te náa ìⁿdii-ni téé ingá ñúú-a ní nacuico-dé ndacáⁿ tǎhú-dé núú Yá Ndiòxí, te cachí-dé sǎ ìo càhnu cuu-gǎ ñá? —càchí-gǎ.

¹⁹ Te ní xáhaⁿ-gǎ xii téé-áⁿ:

—Ndacuíñí te núhú-n, chi sa ní ndúha-n cuéhé tnàhá-n, chi ní sándáá iní-n Yá Ndiòxí —càchí-gǎ xáhaⁿ-gǎ xii-dé.

Nàcuáa yìndaha ñaha Yá Ndiòxí (Mt. 24:23-28, 36-41)

²⁰ Te cue téé cùu fariséú ní xicáⁿ tnúhú-güedé núú Jèsús núu ná ama ngúita Yá Ndiòxí ndìhu ndaha-gǎ ñáyiú. Te ní xáhaⁿ-gǎ:

—Ñá túú ñá cada-xi ñuyúú quini-ndó cuèndá cutnùní iní-ndó sǎ ndìhu ndaha ñàha Yá Ndiòxí xii-ndo. ²¹ Te ní vǎ yóo cachí: “Tha ndècu-gǎ táxí tnùní-gǎ, àdi yacáⁿ ndècu-gǎ táxí tnùní-gǎ”, chi tnuú-ndó sǎ ndècu-gǎ ndìhì nchaa ñáyiú yìndaha-gǎ —càchí-gǎ xáhaⁿ-gǎ xii-güedé.

²² Te ní xáhaⁿ-gǎ xii cue téé xica cuu ndìhì-gǎ:

—Te nchòhò chi sǎá nduu, te cachí iní-ndó sǎ sùúni cuèdicó ìⁿ nduu quini ñáhá-ndó xii yúhú Téé cùu ñaní tnàhá-ndó nchàa-ndo, dico vǎ quini ñáhá-gǎ-ndó xii-í. ²³ Te coo ñáyiú cùñàhá-yu xii-ndo: “Tha ndècu-gǎ, áⁿ yacáⁿ ndécú-gǎ”, quesàhá-yu cùñàhá-yu xii-ndo. Dico vǎ quindáá iní-ndó quíhíⁿ-ndó ndìhì-yu núú càchí-yu, te ní vǎ cání iní-ndó quíhíⁿ méé-ndó. ²⁴ Chi dàtná cuíni-ndó quide-xi òré sǎá ndúté àndiú, chi uuⁿi dàyehé-xi nihíi ñuyúú, ducaⁿ càda-xi nduu na quixi tucu yúhú Téé cùu ñaní tnàhá-ndó nchàa-ndo, te dàvá-áⁿ quini ñáhá nchàa-ndi túhú ñáyiú xii-í. ²⁵ Dico díhna-gǎ ndoho vihi-í, te daquèe tíhú ñáhá ñáyiú ñuyúú-a xii-í. ²⁶ Te cadá-yu dàtná ní quide ñáyiú ní xíndecu cùtnàhá ní xíndecu té Nòé, te diu-ni ducaⁿ sǎtnahá-xi cada nchaa ñáyiú ndècu vitna ndéé sǎá nduu quixi tucu yúhú Téé cùu ñaní tnàhá-ndó nchàa-ndo. ²⁷ Chi caxi-ni-yu, coho-ni-yu, te caca cuu-ni cue téé xica ndáhú, te tnàndaha-ni-yu, chí ducaⁿ ní

quidé-yu dàvá-án ndéé ní sáá nduu cuãnguee té Nôé xítí bàrcú, te ní ngúita-xi ní cuuⁿ dáú ní ndaa ndute ñuyíú, te nchaá-yu ní xíhí ní cáhá-yu dàvá-án. ²⁸ Te ñu-ni ducaⁿ ní quide tucu ñáyíu cútnàhá ní xíndecu té Löt, chi xèxí-yu xihí-yu, te sàáⁿ-yu te nàdicó-yu, te xíxitú-yu nándi sá xíxitú-yu, te nchaa cue téé xídacáá-güedé vehe. ²⁹ Te òré ní quee té Löt ñuú Sòdomá, te ní ngoyo ñuhú andíu, te dàcá yúú súúni dicó ní nduu ñuhú-ñá-xi, te ní xíhí nchaandi túhú ñáyíu ñuú-án. ³⁰ Te ñu-ni ducaⁿ sãtnahá-xi cada ñáyíu na sáá nduu quixi tucu yúhú Téé cùu ñaní tnáhá-ndó nchàa-ndo ñuyíú-a.

³¹ Te núu ñuú ñáyíu càndodó-yu díquí véhë-yu nduu-án, te ní vá ndíhu-gá-yu quehéⁿ-yu ñuú ndachíuⁿ-yu canehé-yu quíhíⁿ, te ñáyíu cuáháⁿ yucu, te ní vá nùhú-gá-yu vehé-yu. ³² Te chí dándàcu iní nàcuáa ní yáha ñadíhí té Löt. ³³ Te nchaa ñáyíu cuíni dàcácu nihnu mee-xi ñuyíú-a ña, te cuíta nihnú-yu, te nchaa ñáyíu na cùú sá cuendá-í, te naníhí tãhú-yu.

³⁴ Te na càchí tnúhu tucu-í xii-ndo sã nduu-án, te núu úú-yu càa ñuú núú xito, te ñuú-yu ndanchitá-yu ndaá-yu andíu, te ñuú-yu quendóo. ³⁵ Te núu úú ñáyíu ñíhí nchícó-yu ñuú-ni véhe, te ñuú-yu ndanchitá-yu ndaá-yu andíu, te ñuú-yu quendóo. ³⁶ Te núu úú cue téé yíhí-güedé yucu, te ñuú-dé ndanchita-dé ndaa-dé andíu, te ñuú-dé quendóo —càchí-gá xáhaⁿ-gã xii-güedé.

³⁷ Te sá dúcáⁿ ní cáháⁿ-gá ñuú ní xicáⁿ tnúhú-güedé núu-gã, te xáhaⁿ-güedé xii-gã:

—Mèstrú, ¿te ndéé ducaⁿ càda-xi-i? —cachí-güedé xáhaⁿ-güedé xii-gã.

Te ní xáhaⁿ-gã:

—Te nchòhó xini-ndó sã ncháá núú yúcu yiqui cuñú ní xíhí, te

yàcáⁿ tàcá cue ndixíí xéxí-güedi —cachí-gá xáhaⁿ-gã xii-güedé.

18

Jèsús càháⁿ-gá cuendá ñuú juéxí ndíhi cuendá ñuú ñaha quèé

¹ Te Jèsús ní cani-gá ñuú cuendú núu-güedé cuendá sá vã ná tũhú iní-güedé cáháⁿ ndíhi-güedé Yã Ndióxi nchaa-ni òré. ² Te xáhaⁿ-gã:

—Ñuú ñuú ndécú ñuú juéxí, te ní ña túú sãndáá iní-dé Yã Ndióxi, te ní ñuú tnúhu xáhaⁿ ñáyíu ñá túú cuíni-dé cada cuendá-dé. ³ Te ñuú-ni ñuú-án ndécú tucu ñuú ñadíhí ñaha quèé, te ní sáháⁿ-aⁿ càháⁿ ndàhú-aⁿ núú juéxí-án cuendá cada ndaá-dé ñuú cuéchi. ⁴ Te tĩtní xito ní cuu sáháⁿ-aⁿ càháⁿ ndàhú-aⁿ núú-dé te ñá túú cuíni-dé cada cuendá-dé tnúhu càháⁿ-aⁿ ní cùu, te ndéé núú ña cúú-gã te ní sani iní-dé: “Te cuéi ñá túú sãndáá iní-í Yã Ndióxi, te ní ña túú quide cuendá-í nchaa tnúhu càháⁿ ñáyíu cada-í, ⁵ dico na càda ndaá-í cuendá ñaha quèé-a ndíhi ñáyíu cùu úhú iní tnáhá ndíhi-aⁿ, chi vá cùndèe-gá iní-í nuu núu quixi-aⁿ dasatú iní ñáhá xii-í”, duha ní sani iní téé cùu juéxí-án —càchí-gá xáhaⁿ-gã xii-güedé.

⁶ Te ní xáhaⁿ tucu-gá xii-güedé:

—Cada cuendá-ndó nàcuáa ní sani iní juéxí téé cuíhna iní-xi-án.

⁷ Te Yã Ndióxi ío chĩndee-gá nchaa ñáyíu ní cáháⁿ-gá cundecu ndíhi-gá, chí cuéi nduu cuéi niú càháⁿ ndíhi ñáhá-yu xii-gã, te vá cùyaa-gã nachinaa-gá nchaa sá quidé ñaha nchaa ñáyíu cùu úhú iní ñáhá xii-yu. ⁸ Te ío ndíhi ducaⁿ càda-gã. Te òré ná quixi yúhú Téé cùu ñaní tnáhá-ndó nchàa-ndo, ¿te náa naníhí-gã-í ñáyíu sãndáá ndisa iní Yã Ndióxi-án? —càchí-gá xáhaⁿ-gã xii-güedé.

Nàcuáa quide ñuú téé cùu fariséú ndíhi ñuú téé cùu cobradór

⁹ Te Jèsús ní cáháⁿ-gá núú ñáyíu nàcuáa quide ñáyíu sãni iní sá ío

quide ndáá te dàquee tǎhǔ-yu tnàha ñáyíu-yu, te xáhaⁿ-gǎ xií-yu:

10 —Úú cue tée cuáháⁿ-güedé veñúhu càhnu sá ío cùnuu cáháⁿ ndihí-güedé Yá Ndiòxí, te ìⁿ-dé cúú-dé tée cùu fariséú, te ingá-dé cúú-dé tée cuihna iní-xi quide cobrá ñáhá xii ñáyíu cuendá impuèstú.

11 Te tée cùu fariséú-áⁿ nǔtnǎ-dé cáháⁿ ndihí-dé Yá Ndiòxí, te xáhaⁿ-dé xii-gá: “Yòhó Dútú Ndiòxí ndàcáⁿ tǎhǔ-í núú-n, chi ñá túú quide-í dàtná quidé dàva-gá-güedé, chi dùhu-güedé, cáháⁿ ndihí-güedé ñadihí te ñá díú ñadihí-güedé cúú-yu, te nándi-gá nchaa sá cuèhé sá dúhá quide-güedé, te ni ñà túú quide-í dàtná quidé tée cuihna iní-xi quide cobrá ñáhá xii ñáyíu cuendá impuèstú ndécú ìha. 12 Chi yúhú ñá túú tnàhí ná xéxi-í úú nduu xití samàná cuendá sá cáháⁿ ndihí ñaha-í xii-n, te nchaa sá ñihí-í te càhu-í úxi xichi, te ìⁿ xichi tàxi-í xii-n”, càchí-dé xáhaⁿ-dè xii Yá Ndiòxí. 13 Dico tée cuihna iní-xi quide cobrá ñáhá xii ñáyíu cuendá impuèstú-áⁿ chi xica lùha nutnǎ-dé, te ni lùha ñá túú cùyǎ-dé ndonehe núú-dé andiu cuendá sá ndíxi cuèchi iní-dé nchaa sá ñà túú váha quide-dé, te ndèdí ndaha-dé pèchú-dé sá ndihú iní-dé, te xáhaⁿ-dè xii Yá Ndiòxí: “ìYòhó Dútú Ndiòxí cundàhú iní ñáhá xii-í, chi ío cuèhé sá ñà túú váha quide-í núú-n!”, càchí-dé xáhaⁿ-dè xii Yá Ndiòxí. 14 Te na càchí tnúhu-í xii-ndo sá tée cuihna iní-xi quide cobrá ñáhá xii ñáyíu-áⁿ ñí tedóho Yá Ndiòxí nchaa tnúhu ní cáháⁿ-dé, te ní quide càhnu iní-gá nchaa sá ñà túú váha ní quide-dé, te cuánuhú-dé vehe-dé. Te tée cùu fariséú-áⁿ ñà túú ní tedóho ñaha Yá Ndiòxí xii-dé. Chi nchaa ñáyíu na càda cahnu mee-xi ñuyíu-a te vá cúú-yu ñáyíu cùnuu, te nchaa ñáyíu ñá túú quide cahnu mee-xi, ñáyíu-áⁿ cunúú-yu —càchí Jèsús xáhaⁿ-gǎ xií-yu.

Jèsús quidé ì-gǎ landú

(Mt. 19:13-15; Mr. 10:13-16)

15 Te ìⁿ úú ñáyíu ndécá-yu landú ìhli cuáháⁿ núú Jèsús chi cuiní-yu sá téndàha ñaha-gá xii-güexi, te òré ní xiní cue tée xica cuu ndihí-gá sá ndécá-yu landú-áⁿ cuáháⁿ núú-gǎ, te ní ngüíta-güedé ténàá ñáhá-güedé xií-yu, te xáhaⁿ-güedé sá vá dúcáⁿ càdá-yu. 16 Dico Jèsús ní cana ñaha-gǎ xii-güedé, te ní xáhaⁿ-gǎ:

—Chí dǎná ná quixi nahi landú ìhli-áⁿ núú-í-a, te vá càdí-ndó ìchi-güexi, chi dàtná cúú váha iní cue landú ìhli-áⁿ ducaⁿ cùu váha iní cue ñáyíu yindaha ñaha Yá Ndiòxí. 17 Te na càchí tnúhu ndáá-í xii-ndo sá núu vá quindáá iní ñáhá-ndó dàtná quidé dàva landú ìhli sàndáá iní ñáhá xii-í, te vá ndǎhu ndaha ñaha Yá Ndiòxí xii-ndo, te vá ndúú tǎhǔ-ndó cùndecu-ndo ndihí-gá ni caa ni quíhíⁿ —càchí-gá xáhaⁿ-gǎ xii-güedé.

Ìⁿ tée cuica cáháⁿ ndihí-dé Jèsús

(Mt. 19:16-30; Mr. 10:17-31)

18 Te ìⁿ tée cùnuu ní xicáⁿ tnúhú-dé núú Jèsús, te xáhaⁿ-dè xii-gá:

—Yòhó Mèstrú, cùu-n tée ío váha iní-xi, te cuiní-í núu vá cùndèe iní-n càchí tnúhu-n ñà cúú sá váha càda-í cuendá nduu tǎhǔ-í cundecu-í ndihí Yá Ndiòxí ni caa ni quíhíⁿ —càchí-dé xáhaⁿ-dè xii-gá.

19 Te Jèsús ní xáhaⁿ-gǎ xii-dé:

—¿Te cùtnuní iní-n nàcuáa nduu tnúhu cáháⁿ-n sá yǎhú váha iní-ǎⁿ? Chi ìⁿ dǎí díú-ni Yá Ndiòxí váha iní-gá. 20 Te yòhó xini-n nàcuáa ní cachí Yá Ndiòxí cada ñáyíu, te duha ní cachí-gá: “Nchòhó cue tée vá cáháⁿ ndihí-ndo ñadihí te núu ñá díú ñadihí-ndó cùú-yu, te ducaⁿ-ni nchòhó cue ñáyíu ñihí tucu vá cáháⁿ ndihí-ndo tée te núu ñá díú yǎ-ndo cuu-güedé, te vá cáhni-ndó tnàha ñáyíu-ndo, te ni vá dúhú-ndó sá ndécú ndihí-yu, te ni vá dácàcu-ndo

cuéchi neñúu sá cúu-xí tnàha ñáiyu-ndo, te canehe-ndo sá yíñùhu núu tátá-ndó ndìhi núu náná-ndó”, duha ní cachí Yá Ndiòxí cada ñáiyu —càchí Jèsús xáhaⁿ-gã xii-dé.

²¹ Te té-e-áⁿ ñí xáhaⁿ-dë xii-gá:

—Nchaa xíãⁿ ní ngüíta-í quidè-í ndéé cútñàhá cúu làndú-í —càchí-dé xáhaⁿ-dë xii-gá.

²² Te Jèsús ní xáhaⁿ-gã xii-dé:

—Dico cùmání ìngá núu sá cádá-n, vitna te quíhíⁿ-n te dico-n nchàa sá ndécú ndìhi-n, te díhúⁿ-n cuáha táhú-n cuè ñáiyu ndàhú, te ducaⁿ te nduu táhú-n cundecu váha-n núu ndécú Yá Ndiòxí táxi tnùnì-gá, te na yáha ducaⁿ càda-n te quixi-n chitnahá ñáhá-n xii-í —càchí-gá xáhaⁿ-gã xii-dé.

²³ Te sá dúcáⁿ ñí xáhaⁿ Jèsús xii-dé, te ío ní cundiyí-dé, chi ío cuica-dë. ²⁴ Te sá ñí xiní ñáhá Jèsús xii-dé cundiyí-dé, núu ní cachí-gá:

—Ío úhú quíndáá iní ñáiyu cuica Yá Ndiòxí cuèndá ndíhu ndaha ñàha-gá xii-yu! ²⁵ Te yáchì-gá yáha ìⁿ càméyu yaú ìⁿ yiqui ticú dàcúuxí sá quíndáá iní ìⁿ ñáiyu cuica Yá Ndiòxí cuèndá ndíhu ndaha ñàha-gá xii-yu —duha ní cachí-gá.

²⁶ Te nchaa ñáiyu ní tecú dóho-xi tnúhu ní cáháⁿ-gá ní xáhãⁿ-yu xii-gá:

—¿Te yoo naníhí tàhú te núu ducaⁿ vâiⁿ? —càchí-yu xáhãⁿ-yu xii-gá.

²⁷ Te Jèsús ní xáhaⁿ-gã xii-yu:

—Cue ñáiyu ñuyíú-a chi vá ndácü-yu ná cadá-yu nàcuáa ndíhu ndaha ñàha Yá Ndiòxí xii-yu, dico mee-gã chi ndacu-gá ndíhu ndaha ñàha-gá xii-yu chi nchaa sá vâha ndacu-gá quidé-gã —càchí-gá xáhaⁿ-gã xii-yu.

²⁸ Te té Pèlú ní xáhaⁿ-dë xii-gá:

—Nchúhú ní dándö-ndí nchaa sá ndécú ndìhi-ndí, te ní tuha ñàha-ndí xii-n —càchí-dé xáhaⁿ-dë xii-gá.

²⁹ Te ní xáhaⁿ-gã xii ñáiyu:

—Na càchí tnúhu ndáá-í xii-ndo sá ncháá ñáiyu na dándöo vehe-xi, àdi tátá-xi, náná-xi, ñaní-xi, cúha-xi, ñadihí-xi, déhe-xi cuèndá sá cuínì-yu ndíhu ndaha ñàha Yá Ndiòxí xii-yu, ³⁰ te ío-gá cuéhé sá cuáñaha-gã xii-yu cundecu ndìhí-yu, te ñá díú-ní xíãⁿ, chi tnàhá nduu táhú-yu cundecu ndìhi ñàhá-yu xii-í ni caa ni quíhíⁿ ná sàa nduu —càchí-gá xáhaⁿ-gã xii-yu.

Jèsús càháⁿ tucu-gá sá cáhni ñàha-güedé xii-gá

(Mt. 20:17-19; Mr. 10:32-34)

³¹ Te Jèsús ní taudìⁿ-gá ndi ùxúú cue tée xica cuu ndìhi-gá tnuú ñáiyu, te ní xáhaⁿ-gã xii-güedé:

—Vitna te quíhíⁿ-ó ñúú Jerusàlén, chi yàcáⁿ cada-xi nchaa nàcuáa sa ní chidó tnùnì cue tée ní xóo cáháⁿ tnúhu Yá Ndiòxí ndéé sanaha nàcuáa yáha yúhú Téé cùu ñaní tnáhá-ndó nchàa-ndo. ³² Chi cuáha cuèndá ñàha-güedé xii-í núu cuè téé ñá túú cùu cue téé isràél, te cudíquí ndeé ñàhá-güedé xii-í, te cúcuèhé ñàhá-güedé, te tiú díí ñàhá-güedé xii-í. ³³ Te caniha-güedé ndìhi ñíi, te dàtnùnì cahni ñàha-güedé xii-í, dico nduu únì sá cùú-í te ndoto-í —càchí-gá xáhaⁿ-gã xii-güedé.

³⁴ Dico ní ìⁿ tnúhu ní cáháⁿ-gá ñá túú ní tècú tnùnì-güedé, chi ío yidáhu tnúhu ní cáháⁿ-gá núu xíãⁿ ni ìⁿ ñá túú ní tècú tnùnì-güedé.

Jèsús quidé tãtna-gá núu ìⁿ téé cuàá ñúú Jericó

(Mt. 20:29-34; Mr. 10:46-52)

³⁵ Te òré tá cùyatni Jesús ñúú Jericó cuáháⁿ, te yuhu ìchi cuáháⁿ-gá-áⁿ núcöo ìⁿ téé cuàá xicáⁿ ndàhú-dé. ³⁶ Te òré ní tecú dóho-dé xicáháⁿ vâi ñáiyu xiyáha-yu, te ní xicáⁿ tnúhú-dé núu ñáiyu ndècu ndìhi-dé ná cuèndá ducaⁿ vâi-yu yáha. ³⁷ Te ní xáhãⁿ-yu sá Jèsús téé ñúú Nazàrét ñúhú-dé ìchi. ³⁸ Te níhi ní cáháⁿ-dë, te xáhaⁿ-dë xii-gá:

—Jèsús ñani tnáhá ndíi Dàvíi, cundàhú iní ñáhá xii-í! —càchí-dé xáhaⁿ-dē xii-gá.

³⁹ Te ñáyiú xixódó núú núú Jèsús ní tenáá ñáhá-yu xii-dé, te xáháⁿ-yu sá ná càdí-dé yuhu-dé dico uuⁿ-gá níhi ní cáháⁿ-dē xáhaⁿ-dē xii-gá:

—jYòhó téé cùu ñani tnáhá ndíi Dàvíi, cundàhú iní ñáhá xii-í! —càchí-dé xáhaⁿ-dē xii-gá.

⁴⁰ Te Jèsús ní ngüñí-gá, te ní táuchíuⁿ-gá ní sángueheⁿ ñaha cué téé ndíhi-gá. Te òré ní quexìo-dé núú-gá, te ní xicáⁿ tnúhú-gá núú-dé, te xáhaⁿ-gá:

⁴¹ —¿Ná cuñí-n càda ñaha-í xii-n-í? —càchí-gá xáhaⁿ-gá xii-dé.

Te téé cuáá-áⁿ ní xáhaⁿ-dē:
—Mèstrú, cuñí-í cada tátna-n núú-í cuendá cundehe-í —càchí-dé xáhaⁿ-dē xii-gá.

⁴² Te Jèsús ní xáhaⁿ-gá:
—Sa ní ndúha núú-n chi ní sándáá iní-n Yá Ndiòxi —càchí-gá xáhaⁿ-gá xii-dé.

⁴³ Te òré-ni-áⁿ ní ndúha núú-dé, te ní chinchícúⁿ-dē Jèsús, te ní cachí-dé sá ïo càhnu cuu Yá Ndiòxi, Te nchaa ñáyiú ní xiní nàcuáa ní cuu ní ndúha núú-dé tnàhá-yu ní cachí-yu sá ïo càhnu cuu Yá Ndiòxi.

19

Jèsús ndíhi ñⁿ téé nàni Zaqueú

¹ Te Jèsús ní sáá-gá ñuú Jericó, te ta yáha-gá xití ñuú-áⁿ cuáháⁿ.

² Te ñuú-áⁿ ndécú ñⁿ téé cuica nàni-dé Zaqueú, te cùnnu-dé táxi tnúni-dé cue téé cündíhi-dé, cue téé cuihna iní-xi quide cobrá ñáhá xii ñáyiú cuendá impuèstú. ³ Te téé-áⁿ cuñí-dé quini-dé Jèsús òré-áⁿ ní cùu te ñá ní ndàcu-dé, chi ïo cuéhé ñáyiú, te ñá túú dùcúⁿ-dē. ⁴ Te xinu-dé ní ngódó núú-dé te ní sáá-dé díquí ñⁿ yutnu sicómorú nùtní yatni yuhu ichi núú yáha Jèsús cuendá cuñí-dé quini ñáhá-dé xii-gá.

⁵ Te òré tá yáha Jèsús xiáⁿ, te ní ndonehe núú-gá díquí yutnu núú cándodo-dé-áⁿ, te ní xáhaⁿ-gá xii-dé:

—Zaqueú, tanùu ndíhi díquí yutnu-áⁿ, chi tnavíi quexìo-í vehe-n ndétatú-í —càchí-gá xáhaⁿ-gá xii-dé.

⁶ Te té Zaqueú-áⁿ ní nuu ndíhi-dé díquí yutnu-áⁿ, te ïo ní cudíi iní-dé ní queheⁿ cuendá-dé Jèsús vehe-dé.

⁷ Te sá ní xiní ñáyiú ní quexìo Jèsús vehe-dé, te nchaa-yu ní ngüita-yu cáháⁿ cuéhé-yu cuendá-gá, te xitnàhá-yu:

—Téé-a cuánguihu-dé vehe ñⁿ téé ndècu ichi cuehé ichi duha —càchí-yu xitnàhá-yu.

⁸ Te té Zaqueú-áⁿ ní ndacuíñí-dé tnuú-yu, te xáhaⁿ-dē xii Jèsús:

—Yòhó Mèstrú, na cuáha-í ñáyiú ndàhú cuádava nchaa sá ndécú ndíhi-í. Te núu yoo ní dándàhú-í ní dúhù-í, te codo ùni-gá tnàhá sá ní dúhù-í-yu nacuañaha-í xii-yu —càchí-dé xáhaⁿ-dē xii-gá.

⁹ Te Jèsús ní xáhaⁿ-gá xii té Zaqueú:

—Vitna ní naníhi tàhú-n ndíhi nchaa ñáyiú xindecu vehe-n, chi tnàhá-n cùu-n ñani tnáhá ndíi Abrahám. ¹⁰ Te yúhú Téé cùu ñani tnàhá-ndó nchàa-ndo véxi-í nándücu-í ñáyiú ní xita nihnu cuendá dácacu nihnu-í-yu núú ùhú núú ndàhú —càchí-gá xáhaⁿ-gá xii-dé.

Nàcuáa ní quide-güedé ndíhi díhúⁿ cuááⁿ

(Mt. 25:14-30)

¹¹ Te nchaa ñáyiú-áⁿ ní sani iní-yu sá ndíhi-ni ndíhu ndaha ñaha Yá Ndiòxi xii-yu cuendá sá ní cuyatni Jèsús ñuú Jerusalén, te xiáⁿ núu ní ngüita Jèsús ní caní-gá ñⁿ cuendú núú-yu cuendá tecú tnúni váha-yu tnúhu-gá. ¹² Te xáhaⁿ-gá xií-yu:

—Ní xindecu ñⁿ téé cùu ñani tnàhá ñáyiú cùnnu, te cuáháⁿ-dē ingá ñuú xicá cuendá yacáⁿ cuáha ñaha-güedé chiúⁿ coo-dé, te dátñúni ndixi-dé quindaha-dé titní ñuú.

¹³ Te cùmání-gá quee-dé quíhíⁿ-dē, te ní cana-dé úxi cue téé xinu cuechi núú-dé, te ní sáñaha-dé

ndí díhⁿ núú-güedé ìⁿ caa ìⁿ caa díhúⁿ cuàáⁿ, te ní xáhaⁿ-dè: “Chí cádá ndáhú ndìhì díhúⁿ-áⁿ ndèé ná sàà nduu nàsáá-í”, càchí-dé xáhaⁿ-dè xii-güedé. ¹⁴ Dico nchaa ñáyiú ñuú quindaha-dè-áⁿ ñà túú tnàhá iní-yu sá quindaha ñaha-dé, núú ní tendàhá-yu cue téé nèhe tnúhu cuáháⁿ núú cuè téé cuáñaah chiuⁿ coo-dé-áⁿ, te ní xáháⁿ-yu sá cūñaha-güedé sá ñà túú tnàhá iní-yu sá tēe-áⁿ quindaha ñaha-dé xií-yu. ¹⁵ Dico dacuítí sá ñí sáha-güedé téé-áⁿ chiuⁿ coo-dé sá díú-dé quindaha-dé ñáyiú nchaa ñuú-áⁿ, te ní nacuico-dé cuánuhú-dé ñuú-dé. Te òré ní nasáá-dé vehe-dé, te ní tendaha-dé ìⁿ téé ní sánúcana ñaha xii cue téé xinu cuechi núú-dé, cue téé ní dándó ndaha-dé díhúⁿ cuendá cácaⁿ tnúhú-dé núú-güedé ìⁿ ìⁿ-güedé núu ndèé dau ní chídó-xí díquí díhúⁿ sá ñí dándó ndaha ñaha-dé-áⁿ. ¹⁶ Te téé ní ndèxio díhna xáhaⁿ-dè: “Pàtróóⁿ, ní quide-í ndáhú ndìhì díhúⁿ-n sá ñí dándó ndaha ñaha-n xii-í, te sá ìⁿ ní taxi-n te ní chídó-xí úxi-gá tnàhá te ná-u naqueheⁿ cuendá-n”, càchí-dé xáhaⁿ-dè. ¹⁷ Te téé cùu patróóⁿ-dè-áⁿ ñí xáhaⁿ-dè: “Ío váha téé xinu cuechi cuu-n chí ío váha ní quide-n, te sá ñí quide váha-n ndìhì sacú díhúⁿ sá ñí dándó ndaha ñaha-í xii-n, te xiáⁿ núu yúhú càchí-í sá táxí tnúni-n úxí ñuú vitna”, càchí-dé xáhaⁿ-dè. ¹⁸ Te ní ndexìo ingá-dé, te ní xáhaⁿ-dè: “Pàtróóⁿ, ní quide-í ndáhú ndìhì díhúⁿ-n sá ñí dándó ndaha ñaha-n xii-í, te sá ìⁿ ní taxi-n te ní chídó-xí úhúⁿ-gá tnàhá te ná-u naqueheⁿ cuendá-n”, càchí-dé xáhaⁿ-dè. ¹⁹ Te ní xáhaⁿ téé cùu patróóⁿ-dè-áⁿ xii-dé: “Te yòhó taxi tnúni-n úhúⁿ ñuú”, càchí-dé xáhaⁿ-dè xii téé xinu cuechi-áⁿ. ²⁰ Te dátñuní ní ndexìo tucu ingá-dé, te xáhaⁿ-dè: “Pàtróóⁿ, náu díhúⁿ-n-á, te naqueheⁿ cuendá-n chí ní taxúha-í ní chidúcuⁿnuu-í ìⁿ pàñú te ñà túú ní quide-í

ndáhú ndìhì díhúⁿ-n, ²¹ chí ní yùhú ñàhà-í xii-n, chí cùu-n ìⁿ téé díí, te nàqueheⁿ-n ìⁿ sá ñà túú ní tàxi ndecu-n, te nàtahu-n ìⁿ xichi núú ñà túú ní chíhi-n tatá”, càchí-dé xáhaⁿ-dè xii patróóⁿ-dè. ²² Te ní xáhaⁿ patróóⁿ-dè xii-dé: “Yòhó cùu-n ìⁿ téé cuihna iní-xi xinu cuechi núú-í, te díu-ní nchaa tnúhu càháⁿ-n-áⁿ càchí tnúni-xi nàcuáa cuu ndáá cuéchi-n. Te núu sàni iní-n sá cùu-í ìⁿ téé díí, te nàqueheⁿ-í ìⁿ sá ñà túú ní tàxi ndecu-í, te nàtahu-í ìⁿ xichi núú ñà túú ñí chíhi-í tatá, ²³ te núu ducaⁿ ña, ¿te ná cuendá ñà túú ní càhu iní-n dàsaⁿ nuu-n díhúⁿ ñí taxi-í, te cūñaha-n chàhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naqueheⁿ cuendá-í ní cùu-í?”, càchí-dé xáhaⁿ-dè xii téé xinu cuechi-áⁿ. ²⁴ Te ní xáhaⁿ téé cùu patróóⁿ-áⁿ xii cue téé xindecu xiáⁿ: “Chí quendéé díhúⁿ cuàáⁿ néhé téé-a, te cuáha-ndo téé nèhe úxí tucu díhúⁿ cuàáⁿ-áⁿ”, càchí-dé xáhaⁿ-dè xii-güedé. ²⁵ Te ní xáhaⁿ-güedé: “Pàtróóⁿ, dico sa nèhe-dé úxí díhúⁿ cuàáⁿ”, càchí-güedé xáhaⁿ-güedé. ²⁶ Te ní xáhaⁿ téé cùu patróóⁿ-áⁿ: “Na càchí tnúhu-í xii-ndo sá cuè ñáyiú ío xii-xi te níhí-gá-yu cundecu ndìhì-yu, te cue ñáyiú sacú ndécú ndìhì cuita ndìhì nihnu nchaa sá ndécú ndìhì-yu”, càchí téé cùu patróóⁿ-áⁿ xáhaⁿ-dè xii-güedé. ²⁷ Te xáhaⁿ tucu-dé xii-güedé: “Nchaa ñáyiú cùu úhú iní ñàhá xii-í ñà tnàhá iní-yu quindaha-í-yu, te chí cándécá-yu taquixi iha, te cahni-ndó-yu núú-í-a”, càchí téé cùu patróóⁿ-áⁿ xáhaⁿ-dè xii-güedé —duha cuáháⁿ cuendú ní cani Jèsús núú ñáyiú.

Jèsús cuánguihu-gá ñuú Jerusalén (Mt. 21:1-11; Mr. 11:1-11; Jn. 12:12-19)

²⁸ Te sátá dúcáⁿ ñí cáháⁿ-gá, te ní nucúhuⁿ ichi-gá cuáháⁿ-gá ñuú Jerusalén. ²⁹ Te òré sa ní cuyatni-gá ñuú Bètfaqé, ndìhì ñuú Bètaniá te

xíáⁿ cáá yùcu nani Olívú, te ní xáhaⁿ-gã xii úú cue téé xìca cuu ndihi-gá:

30 —Chí cuáháⁿ ñuú cáá yàtni yacáⁿ, te òré quexìo-ndo yacáⁿ, te naníhí-ndó ìⁿ búrru ndètñíⁿ-di, te vátá yõ ìⁿ-gá codo ñàha xii-di, te nandaxi-ndo-di te candeca-ndo-di quìxi. 31 Te núu yoo na càcáⁿ tnúhu núú-ndó nã cuèndá nándàxi-ndo-di, te cùñaha-ndo xii-yu sá yùhú Yaa xícá cùu ndihi-ndo xini ñuhu-í-di —càchí-gá xáhaⁿ-gã xii-güedé.

32 Te cue téé-áⁿ ñí xica-güedé cuáháⁿ-güedé, te nchaa-ni nãcuáa ní xáhaⁿ Jèsús ducaⁿ ní cuu, 33 chí meí òré nándàxi-güedé búrru-áⁿ ñí quexìo cue ñáyiú cùu xítóhó-di xicáⁿ tnúhu-yu núú-güedé, te xähãⁿ-yu:

—¿Ná cuèndá nándàxi-ndo búrru-ndí-i? —càchí-yu xähãⁿ-yu.

34 Te ní xáhaⁿ-güedé xii-yu:

—Nà ndaxi-ndí-di chí Yaa xícá cùu ndihi-ndí xíní ñùhu ñaha-gá xii-di —càchí-güedé xáhaⁿ-güedé xii-yu.

35 Te ndèca-güedé-di cuáháⁿ núú ndécú Jèsús, te òré ní quexìo-güedé ndihi-di núú ndécú-gã te ní sacáⁿ ndodo-güedé dóo-güedé sátá-di, te ní ngódó ñáhá-gã xii-di. 36 Te ío cuéhé ñáyiú ta sàcáⁿ-yu dóo-yu ichi cuáháⁿ-gã cuèndá núú dóo-yu-áⁿ yàha-gá ndihi quiti yòdo-gá. 37 Te ní nucuíta nuu-gá ichi tìndúú yucu Òlívú tá cùyatni-gá ñuú Jerusalén cuáháⁿ, te nchaa ñáyiú sãndáá iní ñáhá xii-gá nchìcúⁿ ñähãⁿ-yu te ní ngúita-yu níhi càháⁿ-yu sá cúdñí ìní-yu, te càchí-yu sá ìo càhnu cuu Yá Ndiõxí cuèndá sá ñí xini-yu nchaa sá vã yõ tnàhí ndàcu cada ní quide-gá. 38 Te càchí-yu:

—Ío càhnu cuu Yaa véxi quindaha ñàha xii-o, te ñu-gá cúú-gã Yaa ní tendaha Yá Ndiõxí véxi quide núú-gã! ¡Te ío càhnu cuu mee-gá! ¡Te andiu ñà túú tnàhí ná cúú! —duha càchí-yu.

39 Te ìⁿ úú cue téé cùu fariséú ñùhú tnàhá tnuú ñáyiú-áⁿ ñí xáhaⁿ-güedé xii Jèsús:

—Mèstrú, cùñaha nchaa ñáyiú ndihi-n na càdí-yu yuhú-yu —càchí-güedé xáhaⁿ-güedé xii-gá.

40 Dico Jèsús ní xáhaⁿ-gã xii-güedé:

—Te na càchí tnúhu-í xii-ndo sã nùu ñáyiú-a na càdí-yu yuhú-yu ña, te nchaa yúú càháⁿ níhi-xi dàtná ìⁿ ñáyiú —càchí-gá xáhaⁿ-gã xii-güedé.

41 Te òré ní cuyatni-gá ñuú Jerusalén te ní xini-gá, te ní ndáhyú-gá cuèndá nchaa ñáyiú ñí ñúú-xi-áⁿ sã ndihú iní-gá. 42 Te ní xáhaⁿ-gã xii cue ñáyiú-áⁿ:

—Ío cuu váha iní-í te núu dicó nchóhó tecú tnùní-ndó vïtna ìⁿ tnúhu sá cadá vãha ñàha xii-ndo, chí ñá túú-gã ná cuu cundecu-ndo, te núu na tècú tnùní-ndó. Dico ñá tècú tnùní-ndó, chí ío yidáhu tnúhu-a.

43 Te sáá nduu tnùndóho tnúhu ndàhú sá cúú-xi-ndó, te nchaa cue téé dava-gá ñuú cúú ùhú iní tnàhá ndihi-ndo quixi-güedé chidoco ñàha-güedé xii-ndo, te ni càndéé núú ndécú-ndó-áⁿ dacàa-güedé ndóho cuèndá xíáⁿ quihí váha-güedé nàa ndihi ñàha-güedé xii-ndo, te vá dáñá-güedé cunu-ndo. 44 Te cahni ñàha-güedé xii-ndo, te ndihi nchaa vehe-ndo dàngoyo-güedé ndéé cimièntú-xi, chí ñá túú ní cùní-ndó nãcuáha-ndo cuèndá òré ní quixi coto ñàha Yá Ndiõxí xii-ndo —duha ní xáhaⁿ-gã xii ñáyiú ñuú-áⁿ.

Jèsús ñá túú tnàhá iní-gá nãcuáa quidé-yu veñúhu

(Mt. 21:12-17; Mr. 11:15-19; Jn. 2:13-22)

45 Te Jèsús cuànguihu-gá xití veñúhu càhnu sá ìo cùnuu, te xití veñúhu-áⁿ xìndecu cue ñáyiú quide ndáhu ndihi cue ñáyiú xísaaⁿ. Te ní queñuhu ñàha Jèsús xii-yu quehé. 46 Te ní xáhaⁿ-gã xii-yu:

—Núú tütú Yá Ndiõxí càháⁿ-xi nãcuáa ní càháⁿ-gã, te duha ní

cachí-gá: “Vehe-í cúú-xí núú càháⁿ ndíhi ñaha ñáyi xii-í”, duha ní càháⁿ-gá cachí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáhaⁿ-gá xii-yu.

⁴⁷ Te Jèsús nchaa nduu dànehé-gá ñáyi xití veñúhu, dico cue tée cùu dútú cùnùu, ndíhi cue tée dàcuaha ñaha xii ñáyi nchaa tnúhu ní chídó tnùní ndíi Moisés, ndíhi cue tée cùnùu ñuú-áⁿ ndúcú-güedé nàcuáa cada-güedé cahni ñaha-güedé xii-gá. ⁴⁸ Dico ñá ñihí-güedé nàcuáa cada-güedé, chí cuendá nchaa ñáyi ío cùdíí ñí-yu ndèdòho-yu nchaa tnúhu càháⁿ-gá.

20

Jèsús ndécú ndíhi-gá tnúhu ndee ñí

(Mt. 21:23-27; Mr. 11:27-33)

¹ Te ñⁿ nduu yíhi Jèsús xití veñúhu càhnu sá ío cùnùu danehé-gá ñáyi tnúhu sá càháⁿ nàcuáa naníhí tàhú-yu. Te ní quexìo cue tée cùu dútú cùnùu ndíhi cue tée dàcuaha ñaha xii ñáyi nchaa tnúhu ní chídó tnùní ndíi Moisés, ndíhi cue tée cùu sacuéhé núú ñáyi isráel, ² te ní xáhaⁿ-güedé xii-gá:

—Cuíní-ndí cachí tnúhu-ñ xii-ndí nása ndúu tnúhu ndee ñí ndécú ndíhi-n núu quide-n nándí sá quidé-n. ¿Te yoo ducaⁿ ñí taxi tnúhu ndee ñí-áⁿ xii-n? —càchí-güedé xáhaⁿ-güedé xii-gá.

³ Te Jèsús ní xáhaⁿ-gá:

—Yúhú tnàhá-í cuíní-í cácaⁿ tnúhu-í ñⁿ sá cácaⁿ tnúhu-í núú-ndó, te cachí tnúhu-ndo. ⁴ Te chí cachí tnúhu xii-í yoo ní táuchíúⁿ ñí dácúandüte ndíi Juáá ñáyi. ¿Yá Ndióxi áⁿ cuè tée ñuyú-a ní táuchíúⁿ dùcaⁿ ní quide ndíi? —càchí-gá xáhaⁿ-gá xii-güedé.

⁵ Te ní ngüíta-güedé xitnàha-güedé:

—¿Nása cúñaha-o? Chí núu nà cúñaha-o sá Yá Ndióxi ní táuchíúⁿ dùcaⁿ ní quide ndíi Juáá ñá, te quesaha-dé: “¿Ná cuendá ñá túú ní sàndáá ñí-ndó tnúhu ní cáháⁿ ndíi

vái?”; quesaha-dé. ⁶ Ádi te núu nà cúñaha-o sá cuè ñáyi ñuyú-a ní táuchíúⁿ dùcaⁿ ní quide ndíi ñá, te nchaa ñáyi cuáha ñàhá-yu yúu xii-o, te cahni ñàhá-yu, chí cachí-yu sá ndàá sá Yá Ndióxi ní táuchíúⁿ-gá ní cáháⁿ ndíi Juáá tnúhu-gá núú ñáyi —càchí-güedé xitnàha-güedé.

⁷ Te ní xáhaⁿ-güedé xii-gá sá ñá túú xini-güedé yoo ní táuchíúⁿ dùcaⁿ ní dácúandüte ndíi Juáá ñáyi. ⁸ Te ní xáhaⁿ Jèsús xii-güedé:

—Te núu ducaⁿ te ní yúhú vá cachí tnúhu-í xii-ndo yòo ní taxi tnúhu ndee ñí duha quide-í —càchí-gá xáhaⁿ-gá xii-güedé.

Cuendá cue tée cuihna ñí-xi
(Mt. 21:33-44; Mr. 12:1-11)

⁹ Te sátá dúcaⁿ te ní ngüíta Jèsús ní caní-gá ñⁿ cuendú núú ñáyi nàcuáa tecú tnùní-yu tnúhu-gá, te xáhaⁿ-gá xii-yu:

—Ñⁿ tée ní xitu-dé mee-ni yòho yaha stilé núú ñúhú-dé. Te ní sáá ñⁿ nduu quingaca cuu xica-dé vài nduu te ní dándòo ndaha-dé sá ñí xitu-dé-áⁿ xii ñⁿ úu cue tée càháⁿ ndíhi-dé cuendá cada chiúⁿ-güedé, te ní ndatnúhu-güedé sá òré ná cùu te cuu cuendá dava-güedé te ducaⁿ te ní quee-dé cuáháⁿ-dé. ¹⁰ Te sátá ñí sáá nduu ñí cuu nchaa ndéhe yoho yaha stilé sá ñí xitu-dé-áⁿ, te ní xáhaⁿ-dè xii ñⁿ tée xinu cuechi núú-dé; “Cuáháⁿ cácaⁿ-ñ sá cúu cuendá-í núu cuè tée ní dándòo ndàha-í nchaa yoho yaha stilé sá ñí xitu-í”, cachí-dé xáhaⁿ-dè. Te tée xinu cuechi-áⁿ ñí xica-dé cuáháⁿ-dè, dico cue tée ndéé nchaa yoho yaha stilé-áⁿ ñí tñi-güedé tée xinu cuechi-áⁿ te ní caniha-güedé, te ní nacuícúⁿ ñàhá-güedé xii-dé, te ñá túú tnàhí ná ní sáñaha-güedé. ¹¹ Te dàtnúí tée cùu xitohó nchaa yoho yaha stilé-áⁿ ñí tendaha tucu-dé ingá tée xinu cuechi núú-dé cuáháⁿ-dè, dico diu-ni ducaⁿ ní quide ñaha-güedé xii-dé, chí ní xicüehé ñàhá-güedé, te ní caniha-güedé te ñí nacuícúⁿ

ñáhá-güedě, te ñá túú tñahí ná ní sãñaha-güedě. ¹² Te tée cùu xítóhó nchaa yoho yàha stilé-án ní tendaha tùcu-dé ingá-dé cuáhán-dé, te ñiu-ni ducaⁿ ní quide ñaha tùcu-güedé, chi ní dánicüehè ñáhá-güedě, te ní nacuícúⁿ ñáhá-güedě.

¹³ Te tée cùu xítóhó nchaa yoho yàha stilé-án ní sani iní-dé: “¿Nása cada-í vitna? Váha-gá tendaha-í déhe-í tée ío cùu iní-a núhú-dé, chi cudana te òré quini ñáhá-güedé xii-dé, te canehe-güedé sá yíñùhu núú-dě”, duha ní sani iní-dé. ¹⁴ Dico òré ní xiní cue tée quide chiuⁿ-án dèhe xítóhó nchaa yoho yàha stilé-án, te ní xítñaha-güedé: “Tée-án tée véxi nduu tãhú ñuhu-a ndihí nchaa sá cáá núú-xi, dico cahni-o-dé te mee-o ndùu tãhú-ó sá ndúú tãhú-dě”, cächí-güedé xítñaha-güedé. ¹⁵ Te ní queñuhu ñaha-güedé ñⁿ xio yuhu ñuhu-án, te ní sahani ñaha-güedé xii-dé —duha cuáhán cuendú ní cani Jesús núú-yu.

Te dátñuní ní xáhaⁿ tùcu-gá xii-yu:

—¿Te nchòhó sa cùtñuní iní-ndó nàcuáa cada ñaha xítóhó ñuhu-án xii cue tée-án ñá? ¹⁶ Chi núhú-dé te cahni-dé cue tée-án, te dándóo ndaha-dé ñuhu-dé xii cue tée cùtñuní iní-dé cada ndáá —cächí-gá xáhaⁿ-gá xii-yu.

Te sá dúcáⁿ ní cáháⁿ-gá, núu ní cachí-yu:

—¡Sá vã cächí Ndiõxí sá dúcáⁿ yàha-o! —cächí-yu.

¹⁷ Te Jesús ní ndacoto-gá núú-yu, te ní xáhaⁿ-gá:

—Chí cächí tñuhu nása quèe-xi nacuáa cáháⁿ-xi núú tütú Yã Ndiõxí, núú cächí-xi:

Yúú sã ní dáquée tñhú cue tée dàcaa vehe ní saa-xi cùu-xi yúú cùnùu vitna.

Duha cächí-xi núú tütú-gá. ¹⁸ Te nchaa ñáyiú ñá túú cuíni tñi tñuhu-í, te ndohó-yu dátñá ñⁿ ñáyiú tñahnú duuⁿ òré ndúá-yu núú yúú, àdi núu na tàú ñáhá-xí te dàcachi

duuⁿ ñaha-xi —cachí-gá xáhaⁿ-gá xii-yu.

Cuendá impuèstú

(Mt. 21:45-46; 22:15-22; Mr. 12:12-17)

¹⁹ Te cue tée cùu dútú cùnùu, ndihí cue tée dàcuaha ñaha xii ñáyiú nchaa tñuhu ní chídó tñuní ndí Moisés ní cuíni-güedé tñi-güedé Jesús òré-ni-á ní cùu, chi ní cutñuní iní-güedé sá cuendá-güedé ní cáháⁿ-gá, dico ní yùhú-güedé cuendá sá ío vãi ñáyiú. ²⁰ Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue tée cuáhán ngoto dayuhu ñaha xii-gá, te cuáhán-güedé dátñá cue tée váha iní-xi, te ndùcu-güedé nàcuáa cada-güedé núu cáháⁿ-gá ñⁿ tñuhu sá ñà túú tàú-gá cáháⁿ-gá cuendá ducaⁿ te candeca ñaha-güedé xii-gá quíhíⁿ cuáha cuendá ñáhá-güedé núú tée cùnùu. ²¹ Te ní xáhaⁿ-güedé xii Jesús:

—Mèstrú, nihí-ndí tñuhu sá dánèhé-n ñáyiú mee-ni tñuhu váha, te cuéi ndédani cáa ñáyiú ñⁿ-ni cáháⁿ-n ndihí-yu, te cáháⁿ ndáá-n nàcuáa cáháⁿ Yã Ndiõxí cundecu-o ñùyú-a. ²² Te cachí tñuhu xii-ndí núu váha-ni cháhu-ndí té Cèsár tée ío cùnùu cuendá impuèstú ñⁿ ñáhá —cächí-güedé xáhaⁿ-güedé xii-gá.

²³ Dico Jesús ní cutñuní iní-gá sá xító ndèe ñáhá-güedé xii-gá, núu ní xáhaⁿ-gá xii-güedé:

²⁴—Chí dánèhé ñáhá xii-í ñⁿ díhún cuixíⁿ te cachí tñuhu-ndo núu yoo núú-xi ndèe, ndihí yoo ñiú-xi ndèe —cächí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tẽ Cèsár ndèe ndihí ñiú-dé —cächí-güedé xáhaⁿ-güedé xii-gá.

²⁵ Te ní xáhaⁿ tùcu-gá xii-güedé:

—Te núu ducaⁿ te chí nacuáha té Cèsár sá cùu cuendá-dé, te sá cùu cuendá méé Yã Ndiõxí, te xáⁿ nacuáha-ndo-gá —cächí-gá xáhaⁿ-gá xii-güedé.

26 Te ñá ní ndàcu tnahí-güedé daticánuu ñaha-güedé xii-gá núú tñuhu càháⁿ-gá, chi òré ní càháⁿ-gá, te da ní cuñuhu-güedé nchaa tñuhu ní càháⁿ-gá, te váha-gá ní sadí-güedé yuhu-güedé.

Cuèndá nchaa ñáyiú ndoto
(Mt. 22:23-33; Mr. 12:18-27)

27 Te sátá dúcáⁿ te ní sáá ìⁿ ùú cue téé cùu saducéú núú ndécú Jèsús. Te cue téé-áⁿ ñá túú sàndáá ìni-güedé sá ndótó cuè ñáyiú ní xihí, te ní xáhaⁿ-güedé xii-gá:

28—Mèstrú, ndíi Moisés càchí ndíi núú tütú ndècu vitna sá núu ìⁿ téé na cùú, te quendóo ñadìhí-dé te ñá túú déhe-dé ní xõ ndìhi-aⁿ, te téé cùu ñaní-dé naqueheⁿ-dé ñaha ní quendóo quèé-áⁿ cuèndá coo déhe-dé ndìhi-aⁿ cuèndá ñaní-dé téé ní xihí-áⁿ. 29 Te ní xindecu ùsá tñàhá cue téé mee-ni ndí ñaní-güedé. Te téé díhna ní níhí ñadìhí-dé, dico ñá túú ní cùdíi-dé cundecu-dé chi ní xihí-dé, te ni ìⁿ déhe-dé ñá túú ní xõ ndìhi ñadìhí-dé-áⁿ. 30 Te téé cùu uú ní naqueheⁿ-dé ñaha ní quendóo quèé-áⁿ dico ní xihí tucu-dé, te ni ìⁿ tucu déhe-dé ñá túú ní xõ ndìhi ñaha-áⁿ. 31 Te téé cùu uní ní naqueheⁿ tucu-dé ñaha ní quendóo quèé-áⁿ, te diu-ni ducaⁿ ní xihí-dé, te ní xínu ndí ùsá-güedé ní cándeca ñaha-güedé xii ñaha-áⁿ, dico ni ìⁿ-güedé ñá túú ní xõ déhe-güedé ndìhi-aⁿ, te ní ndìhi-güedé ní xihí. 32 Te ndéé núú ní ndìhi-ná ní xihí tñàhá ñadìhí-áⁿ. 33 Te na sáá nduu ndòto-güedé ndìhi ñaha-áⁿ ¿Te ndédacàa-güedé ñadìhí-güedé cuu-aⁿ-i? Chi ndí ùsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

34 Te Jèsús ní xáhaⁿ-gá xii-güedé:

—Nchaa ñáyiú ñuyíú-a tñandahá-yu. 35 Dico nchaa ñáyiú ní nduu táhú ndoto díhna nuu ñáyiú-áⁿ cundecú-yu ndìhi Yá Ndióxi ní caa ní quíhíⁿ, te yàcáⁿ ñá túú-gá sá

cándeca tnahá-yu. 36 Te ni ñà túú-gá tñuhu xihí, chi cuu-ná-yu dàtná cue espíritu xínu cuèchi núú Yá Ndióxi cuèndá sá ní ndotó-yu, chi cùu-yu déhe-gá. 37 Te ndéé ndíi Moisés ní chídó tñùnì ndíi núú tütú ndíi sá ncháá ñáyiú ní xihí ndotó-yu, te diu-ni xíaⁿ càháⁿ-xi cuèndá tnutàú nchicúⁿ ñuhú, te diu-ni xíaⁿ càchí tucu-xi sá Yá Ndióxi cùú-gá Ndióxi ndíi Ábrahám, ndíi Isàác, ndìhi ndíi Jàcób. 38 Te cue téé-áⁿ chi cuèi ní xihí-güedé sá cùú-xí nchòhó, díjo sá cùú-xí Yá Ndióxi chi ndècu vívú-ni-güedé. Chi cùtnunì ìni-ó sá Yá Ndióxi cùú-gá Ndióxi mee-ni cuè ñáyiú xindecu vívú, te ñá túú cùu-gá Ndióxi cue ñáyiú ñá túú ndècu vívú. Te sá cùú-xí mèe-gá chi nchaa ñáyiú ndècu ndìhi-gá ndécú vívú-yu cuèi sa ní xihí-yu núú ñuyíú-a —càchí-gá xáhaⁿ-gá xii-güedé.

39 Te ìⁿ téé dàcuaha ñaha xii ñáyiú nchaa tñuhu ní chídó tñùnì ndíi Moisés ní xáhaⁿ-dè xii Jèsús:

—Mèstrú, váha-ni càháⁿ-n —càchí-dé xáhaⁿ-dè xii-gá. 40 Te ñá túú-gá ní cùyii-güedé cácáⁿ tñuhú-güedé ni ìⁿ tñuhu núú-gá.

Yoo déhe-xi cùu Cristú
(Mt. 22:41-46; Mr. 12:35-37)

41 Te Jèsús ní xáhaⁿ-gá xii-güedé:

—¿Te nása càchí-tu-yu sá Cristú Yaá tendaha Yá Ndióxi quixi ñuyíú-a cùu-gá déhe ndíi Dàví? 42 Te mee ndíi Dàví-áⁿ ní cachí ndíi núú librú Sàlmú:

Dútú Ndióxi ní xáhaⁿ-gá xii Yaá cùú Xitohó-í:

“Ngóo xio cùha-í,

43 te yúhú cada-í te nchaa sá cùú ùhú ìni ñáhá xii-n canehe-xi sá yíñuhu núú-n.”

Duha ní xáhaⁿ Dútú Ndióxi xii Yaá cùú Xitohó-í càchí ndíi núú librú Sàlmú. 44 ¿Te nása cùu Cristú déhe ndíi Dàví, te mee ndíi ní cachí ndíi sá cùú-gá Xitohó ndíi-i? —càchí Jèsús xáhaⁿ-gá xii-güedé.

Jèsús càháⁿ-gá cuendá cue té dâcuaha ñaha xii ñáyiú nchaa tnúhu ní chídó tnùní ndí Moisés

(Mt. 23:1-36; Mr. 12:38-40; Lc. 11:37-54)

⁴⁵ Te òré ndátnúhu Jèsús ndihi cue téé xica cuu ndihi-gá xîndedóho ñaha ñáyiú, te xáhaⁿ-gã xii-güedé:

⁴⁶ —Cada cuendá-ndó vã cádá-ndó nâcuáa quide cue téé dâcuaha ñaha xii ñáyiú nchaa tnúhu ní chídó tnùní ndí Moisés, chi tnàhá iní-güedé cuihnu-güedé dóó nání sã sâcuíhnu cue téé cûnuu. Te nchaa núú tàcá ñáyiú cuiní-güedé sã ndihi tnúhu yîñúhu cáháⁿ ndihi ñàhá-yu xii-güedé, te nâcáxi-güedé xilé sácõo nchihi cue téé cûnuu-gá xití veñúhu conchihi-güedé, te ducaⁿ-ni quide-güedé cuèi òré quíhu-güedé mèsá caxi-güedé òré ndécú-güedé ìⁿ vico, chi mee-ni núú sácõo cue téé cûnuu-gá cuiní-güedé coo-güedé. ⁴⁷ Te quèndeé-güedé vehe nchaa ñáyiú dihí ñáyiú quèé, te ío naha càháⁿ ndihi-güedé Yã Ndiõxí cuendá cuiní-güedé cáháⁿ váha-yu cuendá-güedé. Te sã dúcáⁿ quide-güedé te sáá nduu te ío-gá ndoho-güedé núú ùhú núú ndàhú dàcúúxí dàva-gá ñáyiú —câchí-gá xáhaⁿ-gã xii-güedé.

21

Díhúⁿ nduu táhú Yã Ndiõxí ní dáquèe ìⁿ ñaha ndàhú ñaha quèé

(Mr. 12:41-44)

¹ Te Jèsús ní xiní-gá xití veñúhu xidáquèe cue téé cuica díhúⁿ nduu táhú Yã Ndiõxí xití alcanciá. ² Te ní xiní-gá tnàhá ìⁿ ñaha ndàhú ñaha quèé ní dáquèe-aⁿ úú díhúⁿ còbrí, ³ te ní xáhaⁿ Jèsús xii cue ñáyiú xîndecu-áⁿ:

—Na câchí tnúhu ndáá-í xii-ndo sã ñaha ndahú ñaha quèe-a ío-gá nândíhi díhúⁿ ñí dáquèe-aⁿ xití alcanciá nduu táhú Yã Ndiõxí dàcúúxí díhúⁿ ñí dáquèe dàva-gá-yu. ⁴ Chi nchaa ñáyiú-áⁿ ñí dáquèe-yu mee-nã sã ñí ndóo-ná,

dico ñaha quèe-a cuèi ndàhú-aⁿ dico ní dáquèe-aⁿ ñihí díhúⁿ sã cuááⁿ-áⁿ sã cãxí-áⁿ ní cûu —cachí-gá xáhaⁿ-gã xii-yu.

Jèsús câchí-gá sã ngóyó veñúhu
(Mt. 24:1-2; Mr. 13:1-2)

⁵ Te ìⁿ úú ñáyiú xicáháⁿ-yu cuendá veñúhu càhnu sã ío cûnuu sã ío vii càa nchaa yúú yíhí, ndihi cuendá nchaa sã ñí sãñaha táhú ñáyiú yíhí xití-xi. Te Jèsús ní xáhaⁿ-gã xii-yu:

⁶ —Sáá nduu te nchaa sã cúñúhu-ndo-a vã cûndúu-gá-xi dàtná cáá-xí vitna, chi ñí ìⁿ-gá yúú vã códó nchihi tnaha-gá-xi chi ndihi ngoyo —câchí-gá xáhaⁿ-gã xii-yu.

Nâcuáa cada-xi nduu ta cûyatni naa ñuyúú

(Mt. 24:3-28; Mr. 13:3-23)

⁷ Te cue téé xîndecu-áⁿ ñí xicáⁿ tnúhú-güedé núú Jèsús, te xáhaⁿ-güedé xii-gá:

—Mèstrú, ¿te ná nduu dùcaⁿ cada-xi ngoyo veñúhu, àdi nándi cûu sã cádá-xí cuendá cutnùní iní-ndí sã sã ta cuyatni nduu ducaⁿ cada-xi-i? —cachí-güedé xáhaⁿ-güedé xii-gá.

⁸ Te Jèsús ní xáhaⁿ-gã xii-güedé:

—Ío quíhi iní-ndó cûndecu-ndo, te vá dáñá-ndó mée-ndo dan-dahú ñàhá ñáyiú xii-ndo. Chi ío cuèhé cue téé coo ñuyúú-a, te danàni-güedé mée-güedé dàtná nání-í te cachí-güedé: “Yúhú cúú-í Cristú Yáá ní tendaha Yã Ndiõxí véxi ñuyúú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuáa ní cáháⁿ-í”, duha cachí-güedé. Dico vá quindáá iní-ndó, te ñí vá túhá-ndó-güedé.

⁹ Te òré ñá ñihí-ndó tnúhu sã titní nâcióⁿ xînáá-güedé te dàva ñúú xînáá-güedé ndi mée-güedé, te vá yùhú-ndó chi dacuítí sã dúcáⁿ càda-xi, dico vátá sáá-gá nduu nãa ñuyúú òré ducaⁿ càda-xi —cachí-gá xáhaⁿ-gã xii-güedé.

10 Te xǎhaⁿ tùcu-gá xii-güedé:

—Nchaa cue téé ìⁿ nàcióⁿ nàá-güedé ndìhi cue téé ingá nàcióⁿ, te titní ñúú ngüíta-güedé nàá-güedé.

11 Te titní xichi ñuyúú ñìhi vìhi tnáa, te titní tucu xichi ñuyúú coo tnamá, te titní tucu xichi ñuyúú quixi cuéhé, te titní núú sǎ cáda-xí àndiù, te yùhú ñáiyu.

12 Te òré cúmǎní-gǎ cada-xi nchaa nàcuáa càháⁿ-i-a, te cue téé cùu úhú iní ñáhá xii-ndo. tñi ñaha-güedé, te candeca ñaha-güedé xii-ndo quíhíⁿ xití veñùhu-güedé cada ndáá-güedé cuéchi-ndo, te chihi ñaha-güedé vecaá xii-ndo, te candeca ñaha-güedé quíhíⁿ núú cuè téé cùnuu yindaha nacióⁿ àdi núú dàva-gá cue téé cùnuu sǎ cuendá-í.

13 Te òré ducaⁿ na càda ñaha-güedé xii-ndo, te òré-ánⁿ tàù-xi cáháⁿ váha-ndo cuendá-í núú-güedé. 14 Te vá cání ñní-ndó nùu nása cunduu tnùhu cúñaha-ndo xii-güedé cuendá cácu nihnu-ndo. 15 Chi yùhú dacàhu iní ñáhà-í xii-ndo tnùhu cúñaha-ndo xii-güedé, te taxi-í sǎ vǎtá quíni tnùnì-gá-ndó, te ni ìⁿ ñáiyu cùu úhú iní ñáhá xii-ndo vá ñìhí-gá-yu tnùhu cúñáhá-yu xii-ndo. 16 Te ndéé tǎtá-ndó,

ndìhi ñanì-ndó, ndìhi cue ñáiyu cùu ñanì tnáhá-ndó, ndìhi cue ñáiyu càháⁿ ndìhi váha-ndo cuàha cuendá ñáhá-yu xii-ndo nùú cuè téé cùchiuⁿ, te dava-ndo càhni ñaha-güedé xii-ndo. 17 Te ío cuéhé ñáiyu cuu úhú iní ñáhá-yu xii-ndo sǎ cuendá-í. 18 Dico Yá Ndióxi ío coto ñaha-gǎ xii-ndo chi ndéé idi díquí-ndó còto-gá. 19 Te núu na càda ndee iní-ndó càncicúⁿ nihnu ñaha-ndo xii-í, te nduu táhú-ndó cùndecu-ndo ndìhi Yá Ndióxi ñi caa ni quíhíⁿ.

20 Te nduu na quíni-ndó ñùhu doco sandadú ñi càndéé yuhu ñùú Jerusálén, te sa cutnùnì iní-ndó sǎ sǎ ní cuyatni nduu dànaa-güedé ñúú-án. 21 Te dàvá-ánⁿ nchaa

ñáiyu xíndecu distrítu Jùdeá xínì ñùhu-xi cunú-yu quíhíⁿ-yu xití yucu, te nchaa ñáiyu xíndecu ñúú Jerusálén queé-yu xití ñúú-án, te ñáiyu ñá túú xíndecu ñúú-án vǎ ndìhu-gá-yu. 22 Chi dàvá-ánⁿ cuu-xi nduu tnùndòho tnùhu ndàhú, te ducaⁿ càda-xi chi ducaⁿ ndéé tnùnì núú tütú Yá Ndióxi nàcuáa dandòho ñaha-gá xii-yu. 23 Te ndàhú ní cuu nchaa ñáiyu ñìhí ñùhú dèhe-xi, ndìhi nchaa ñáiyu ndéca déhe vitna sàdi na sáa nduu dùcaⁿ cada-xi! Chi ío cuéhé tnùndòho tnùhu ndàhú coo núú ndécú-yu dàvá-ánⁿ, te xǎⁿ cuu-xi ìⁿ tnùndòho tendaha Yá Ndióxi quixi sǎ cúu-xi-yu. 24 Te dava cue téé cuú-güedé cahni ñaha-güedé, te dava-güedé tñi ñaha-güedé candeca ñaha-güedé quíhíⁿ nchaa ñúú xícá, te cue téé dava-gá ñúú cunuu-güedé ñúú Jerusálén, te mee Yá Ndióxi cachí-gá te núu ná daha nduu cunuu-güedé ñúú-án.

Nàcuáa cada-xi òré quixi tucu Téé cùu ñanì tnáhá cuè ñáiyu

(Mt. 24:29-35, 42-44; Mr. 13:24-37)

25 Te cada-xi ìⁿ sǎ vǎtá quíni-gá ñáiyu núú nchìcanchii, ndìhi núú yóó, ndìhi núú nchàa chódínì, te ñuyúú-a coo tnùhu ndìhú iní-xi te vá cutnùnì iní-yu nása cáda-yu cuendá sǎ ío dusaⁿ càda ndute lamár òré candaundéé tnáhá-xi. 26 Te nchaa ñáiyu cuneé-yu sǎ yùhú-yu, ndìhi sǎ ndìhú iní-yu cuendá nchaa sǎ cáda-xi ñuyúú-a, te quidi-xi andiù. 27 Te sǎtá dúcáⁿ te quíni-ndó yùhú Téé cùu ñanì tnáhá-ndó nchàa-ndo quee-í andiù quíxi-í ichi xití vícò, te dàvá-ánⁿ quíni ñáhá nchàa ñáiyu sǎ ío cùnuu-í te ndàcu-í quide-í nchaa sǎ vǎha. 28 Te òré ná ngüíta-xi ducaⁿ càda-xi, te cuíta cundee-gǎ iní-ndó quíhíⁿ, te quíhí iní-ndó chi sa ní cuyatni víi-nà nduu cácu nihnu-ndo vǎ cùndecu-gá-ndó

núú ñuyíú yíca cuěchi-a —càchí-gá xáhaⁿ-gã xii-güedé.

²⁹ Te ní cani-gá ñⁿ cuëndú núú-güedé nàcuáa tecú tnúni váha-güedé tnúhu-gá, te xáhaⁿ-gã xii-güedé:

—Chí cündèhe yutnu ngúxí ndihi nchaa dava-gá yutnu. ³⁰ Chi nàtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni. ³¹ Te ñⁿ ducaⁿ sãtnahá-xi cùu oré ná quini-ndó càda-xi nchaa nacuáa càháⁿ-í, te sã dúcáⁿ te cutnúni iní-ndó sã sã ní cuyatni nduu ndíhu ndaha ñaha Yá Ndiõxí xii-ndo.

³² Te na càchí tnúhu ndáa-í xii-ndo sã òré vátá cùú-gá cue ñáyiú xíndecu ñuyíú-a vitna, te cada-xi nchaa nàcuáa ní cáháⁿ-í. ³³ Te andiú ndihi ñuyíú-a chi ndihi nihnu-xi, dico tnúhu-í chi vá ndíhí nihnu-xi, chi cùu-xi tnúhu ndáa.

³⁴ Te quihí iní-ndó vã cündècu-ndo íchi cuehé ichi duha, te vá cùú-ndó ñáyiú quihu, te vá cùhúⁿ iní-ndó mèe-ni nchaa sã ío ñuyíú-a, chi núu ducaⁿ na càda-ndo te nacuaana-ndo sã sãá nduu càda-xi nacuáa ní cáháⁿ-í. Te uuⁿni sãá nduu-ãⁿ, ³⁵ te cada-xi ñatná cuini-ndó quide ñⁿ trampá chi uuⁿni ngáva-xi, te ducaⁿ càda-xi nchaa ñáyiú xíndecu ñuyíú-a, chi uuⁿni sãá nduu-ãⁿ. ³⁶ Te nchòhó cundecu túha-ndo te ío cáháⁿ ndihi-ndo Yá Ndiõxí cuëndá ndacu-ndo yáha-ndo nchàa tnúndòho quixi ñuyíú-a, te ducaⁿ te nasáa-ndó cündecu-ndo núú ndécú yúhu Té cùu ñani tnáhá-ndó nchàa-ndo —cachí-gá xáhaⁿ-gã xii-güedé.

³⁷ Te nduu ndúu ní xóo danèhé Jèsús ñáyiú tnúhu-gá xití veñúhu càhnu sã ío cùnuu, te niú niú ní xóo quihíⁿ ngúdú-gá xití yucu Olívú. ³⁸ Te nehé nehé ní xóo quihíⁿ nchaa ñáyiú veñúhu-ãⁿ ní xóo cundedóho-yu nchaa tnúhu càháⁿ-gã.

22

Ndúcu-güedé nàcuáa cada-güedé cahni-güedé Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnàhá vico pásuá, te vico-áⁿ xexí ñáyiú pàá sã ñã túú yíhi levadurá. ² Te cue té cùu dútú cúnúu, ndihi cue tée dàcuaha ñaha xii ñáyiú nchaa tnúhu ní chídó tnúni ndí Moisés ndúcú-güedé nàcuáa cada-güedé cahni-güedé Jèsús, te dicó-ni sã xiyúhú-güedé ñáyiú.

³ Te yucu ñávaha ní dácáhu iní ñáhá-xí xití té Júdás déhe té Iscarioté, te núú tnàhá té-áⁿ cùú ùxúú tnàhá cue tée xica cuu ndihi-gá ní cùu.

⁴ Te té Júdás-áⁿ ñí sáháⁿ-dé ní ndatnúhu-dé ndihi cue té cùu dútú cúnúu, ndihi cue tée tàxi tnuni ñáhá xii cue té cùu quide cuendá veñúhu nàcuáa cada-dé cuáha cuendá-dé Jèsús núú-güedé. ⁵ Te ío ní cudíí iní-güedé, te ní xáhaⁿ-güedé xii-dé sã cuãñaha-güedé díhúⁿ, ⁶ te ní xáhaⁿ-dé sã cùú quèheⁿ-dé díhúⁿ-ãⁿ, te ní ngúita-dé ndúcú-dé nàcuáa cada-dé cuáha cuendá-dé Jèsús núú-güedé òré ñã túú ñáyiú.

Cùdini Jèsús ndihi cue té xica cuu ndihi-gá

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sãá nduu ñí quesaha vico xexí-yu pàá sã ñã túú yíhi levadurá, te ñⁿ ducaⁿ ñⁿ sáhní-güedé ñⁿ mbéé líhli xexí-yu. ⁸ Te Jèsús ní xáhaⁿ-gã xii té Pélú ndihi té Juáa:

—Chí cuaháⁿ chi cada túha-ndo núú cùdini-o sacuaa nduu vico pásuá —càchí-gá xáhaⁿ-gã xii-güedé.

⁹ Te ní xicáⁿ tnúhú-güedé núú-gã, te xáhaⁿ-güedé xii-gã:

—¿Te ndéé cáá vèhe cuini-n càda túha-ndí-í? —càchí-güedé xáhaⁿ-güedé xii-gã.

¹⁰ Te ní xáhaⁿ Jèsús xii-güedé:

—Chí cündedóho na càchí tnúhu-í xii-ndo nàcuáa cada-ndo. Òré

quihu-ndo xití ñuú núú quíhíⁿ-ndó, te naníhí-ndó ñⁿ téé tãnehe ñⁿ yoó ndute, te téé-án candéndaha-ndo-dé quíhíⁿ, te núú ndédacãa vehe na ndíhu-dé te xíáⁿ quíhu-ndo. ¹¹ Te cúñaha-ndo xii xitohó vehe-án: “Yaá cúú Mèstrú càchí-gã núu ndédacãa xichi xití vehe-n cuñaha núu-n xii-gã cudini-gã ndíhi cue téé xica cuu ndíhi-gã sacuaa nduu víco pascuá”, duha cúñaha-ndo. ¹² Te dàtnùnì danèhé ñáhá-dé xii-ndo ñⁿ cuartú càhnú càa núú ñínu, chi vehe yòdo tñaha cuu-xi, te sa ní quide túha-dé nchaa sá ná ndíhi, te nchòhó dícó-nã sá cúdini-o cada túha-ndo —càchí-gã xáhaⁿ-gã xii-güedé.

¹³ Te ní xica-güedé cuáháⁿ-güedé, te nchaa-ni nãcuáa ní xáhaⁿ Jèsús xii-güedé ní cuu, chi nchaa sa ndècu túha, te ní quide túha-güedé sá cúdini-güedé ndíhi-gã sacuaa nduu víco pascuá-áⁿ.

¹⁴ Te sáta ní tñahá òré cudini Jèsús ndíhi cue téé ní táuchíúⁿ-gã cáhãⁿ tnúhu-gã núú ñáyiú, te cuánguihu ndíhi ñaha-gã xii-güedé mèsá. ¹⁵ Te xáhaⁿ-gã xii-güedé:

—¡Ducaⁿ-ní ño sãni iní-í sá cúdini ndíhi ñaha-í xii-ndo sãcuua nduu víco pascuá òré cúmãní-gã sáa nduu ndòho-í te cuú-í! ¹⁶ Te na càchí tnúhu-í xii-ndo sã vã dúhá-gã caxi ndíhi ñaha-í xii-ndo nduu víco pascuá, chi ndéé òré ná sãa nduu nàsáa-ndó núú táxí tnùnì Yã Ndiòxí cundecu-o, te dàvá-áⁿ cada iní-ndó sã dàtná sá cãxí tucu-o chi ío vãha cuu iní-ó cundecu-o —cachí-gã xáhaⁿ-gã xii-güedé.

¹⁷ Te ní queheⁿ-gã ñⁿ vãsú ñúhú ndùdí ndéhé yoho yãha stilé, te ní ndacáⁿ táhú-gã núú Yã Ndiòxí, te dàtnùnì ní xáhaⁿ-gã xii-güedé:

—Chí quéhéⁿ vãsú ñúhú ndùdí ndéhé yoho yãha stilé-a, te coho-ndo lùha luha nchaa-ndo. ¹⁸ Te na càchí tnúhu tucu-í xii-ndo sã vítñá-nã duha xihí ndíhi ñaha-í xii-ndo ndùdí ndéhé yoho yãha stilé-a te vá cóhó ndíhi ñaha-gã-í,

dico na sãa nduu nãníhí tñahá-ó núú ndécú Tãtà-í Dútú Ndiòxí táxí tnùnì-gã, te dàvá-áⁿ cada iní-ó sã dàtná sá cóhó ndíhi ñaha tucu-í xii-ndo, chi ío cudí iní-ó —càchí-gã xáhaⁿ-gã xii-güedé.

¹⁹ Te sáta ní túhú cóhó-güedé ní cudini-güedé, te ní queheⁿ-gã pãa te ní ndacáⁿ táhú tucu-gã núú Yã Ndiòxí, te dàtnùnì ní táhú cuèchi-gã, te ní dácãhñu ñaha-gã xii-güedé, te xáhaⁿ-gã:

—Pãa-a cùu-xi datná yiquí cùñú-í, chi cahni ñaha-güedé xii-í sã cuendá-ndó, te ducaⁿ-ni càxi-ndo paá-a cuendá ndacu iní ñáhá-ndó xii-í —càchí-gã xáhaⁿ-gã xii-güedé.

²⁰ Te ñu-ni ducaⁿ ní quide-gã ndíhi vãsú ñúhú ndùdí ndéhé yoho yãha stilé, chi ní queheⁿ-gã te òré sãñaha-gã xii-güedé coho-güedé, te ní xáhaⁿ-gã:

—Ndudí ñúhú vãsú-a cada iní-ndó sã cúu-xí dàtná ñíñí-í sã càtí òré cahni ñaha-güedé xii-í. Te sã dúcáⁿ càtí ñíñí-í xíáⁿ cutnùnì ndáá sã Yã Ndiòxí cada-gã ñgã núú sã vãha sã cúu-xí-ndó.

²¹ ‘Dico vitna chi iha tñahá téé cuáha cuendá ñáhá xii-í núú cue téé cùu úhú iní ñáhá yihí-dé mèsá. ²² Te yúhú Téé cùu ñanì tñahá-ndó nchaa-ndo ñuhu ichi-í cuáháⁿ-í cuú-í dàtná ní cachí Yã Ndiòxí. ¡Dico ndàhú ní cuu téé ducaⁿ na cuáha cuendá ñáhá xii-í núú cue téé cùu úhú iní ñáhá! —càchí-gã xáhaⁿ-gã xii-güedé.

²³ Te ní ngüita-güedé ndúcú tnúhu núú tñahá-güedé núu ndéda càa-güedé ducaⁿ cada cuáha cuendá ñáhá xii-gã núú cue téé cùu úhú iní ñáhá.

Xíndatnúhu-güedé ndédacãa-güedé cunuu-gã

²⁴ Te sáta dúcáⁿ te ní ngüita-güedé xíndatnúhu-güedé núu ndédacãa-güedé táu-güedé cunuu-güedé. ²⁵ Dico Jèsús ní xáhaⁿ-gã xii-güedé:

—Nchaa cue téé yíndaha ñaha xii ñáyiú ío tàxi tnùnì-güedé, te

mee-güedé cuíní-güedé sá cáháⁿ váha ñáyiú cuendá-güedé. ²⁶ Dico nchòhó vá dúcáⁿ càda-ndo, chi núú ìⁿ-ndo cùnúú te cada-ni-ndo sá ñà túú cùnúú-ndo, àdi cuu-ndo ìⁿ téé tàxi tñuní ñáhá xii cue téé xínu cuechi, te cada-ni-ndo sá cúú-ndó ìⁿ téé xínu cuechi-án; ²⁷ Te vá càchí-ó sá téé xínu cuechi cùnúú-gá-dé, chi téé quíhu mèsá cùnùú-gá-dé. Dico yúhú ndécú ndìhi ñaha-í xii-ndo dàtná ìⁿ téé xínu cuechi.

²⁸ Te nchòhó ducaⁿ-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaá sá táyáha-í véxi. ²⁹ Te Tātà-í Dútú Ndiòxí ní càchí-gá sá táxi tñuní-í, te yúhú càchí-í xii-ndo sá sàá nduu te tñáhá-ndó tàxi tñuní-ndó. ³⁰ Te dàvá-án caxi-o coho-o càda-o núú tàxi tñuní-í, te yacáⁿ nguíta-ndo càda ndáá-ndó cuèchi ndì ùxúú xi-chi ñáyiú isràél —càchí-gá xáhaⁿ-gá xii-güedé.

Jèsús càháⁿ-gá sá tē Pèlú cúñaha-dě xii ñáyiú sá ñà túú xini ñáhá-dě xii-gá

(Mt. 26:31-35; Mr. 14:27-31; Jn. 13:36-38)

³¹ Te Xítohó Jesucristú ní xáhaⁿ-gá xii té Ximú:

—Yòhó Ximú, cundedóho váha ìⁿ tñúhu na càháⁿ-í-a, chi dàtná cuíní-n quide táchí triú sàcáⁿ-xi duha sàcáⁿ-xi dàcáⁿ, ducaⁿ quèsaha yucu ñáváha cada ñaha-xi xii-ndo. Chi coto ndeé ñáhá-xí xii-ndo te núú ndisa sàndáá iní ñáhá-ndó xii-í. ³² Dico yúhú xicáⁿ táhù-í núú Yá Ndiòxí cuendá-n, cuendá sá vā dáñá ndeé-n quindáá iní ñáhá-n xii-í. Te òré ndixi túú iní-n sá ñà túú ní quide váha-n, te quihíⁿ-n cuáha-n cuè téé cùndihí-n tñúhu ndee ìní cuendá canchicúⁿ nihnu-ni-güedé ichi Yá Ndiòxí —càchí-gá xáhaⁿ-gá xii-dé.

³³ Te ní xáhaⁿ-dě xii-gá:

—Mèstrú, sa ndècu túha-í sá quihíⁿ ndìhi ñaha-í xii-n vècaá, àdi cuéi na cùú ndìhi ñaha-í xii-n —càchí-dé xáhaⁿ-dě xii-gá.

³⁴ Te Jèsús ní xáhaⁿ-gă:

—Pèlú, na càchí tñúhu-í xii-n sá cùmání-gá cana ìⁿ líhi te úní xito càháⁿ-n núú ñáyiú sá ñà túú xini ñáhá-n xii-í —càchí-gá xáhaⁿ-gá xii-dé.

Sa ní cuyatni ndoho Jèsús

³⁵ Te Jèsús ní xáhaⁿ-gá xii-güedé:

—Te cùtnáhá ní tendaha ñaha-í xii-ndo ní sáháⁿ-ndó chiuⁿ-í, chi ñá túú ní cànehe-ndó ní ìⁿ sá cúhúⁿ dîhúⁿ-ndó, te ní ìⁿ sá cúhúⁿ ndàchîuⁿ-ndo ñá túú ní cànehe-ndo. Te chí càchí tñúhu núú ió ìⁿ sá ní cùmání xii-ndo —càchí-gá xáhaⁿ-gá xii-güedé.

Te ní xáhaⁿ-güedé:

—Ñáhá, chi ní ìⁿ sá ñà túú ní cùmání xii-ndí —càchí-güedé xáhaⁿ-güedé xii-gá.

³⁶ Te ní xáhaⁿ-gă:

—Te vitna núú ndècu ndìhi-ndo sá sácúhuⁿ dîhúⁿ-ndó, àdi sá sácúhuⁿ ndachîuⁿ-ndo te canehe-ndo. Te núú ñá túú ndècu ndìhi-ndó machití, te nadico-ndo dóó tîcachi nihnu-ndo te cuaaⁿ-ndo. ³⁷ Te na càchí tñúhu-í xii-ndo sá dàcuítí sá yáha-í nàcuáa càháⁿ-xi núú tütú Yá Ndiòxí núú càchí-xi: “Íⁿ-ni ní quide ñaha-güedé xii-gá, ndìhi cue téé ndècu cuèchi-xi”, duha càchí-xi núú tütú-gá. Te ñá díú-ní xîáⁿ yáha-í chi nchaandi túhú nàcuáa càháⁿ-xi núú tütú-gá yáha-í —càchí-gá xáhaⁿ-gá xii-güedé.

³⁸ Te xáhaⁿ-güedé:

—Mèstrú, iha ndècu úú machití —càchí-güedé xáhaⁿ-güedé xii-gá.

Te ní xáhaⁿ-gă:

—Chí návii-nă yuhu-ndo, vá càháⁿ-gá-ndó —càchí-gá xáhaⁿ-gá xii-güedé.

Jèsús càháⁿ ndihí-gá Yá Ndiòxí yucu Òlívú

(Mt. 26:36-46; Mr. 14:32-42)

³⁹ Te Jèsús ní quee-gá cuáháⁿ-gá yucu Òlívú, chí ducaⁿ tñáhí quide-gá. Te cue téé xîca cuu ndìhi-gá nchicúⁿ ñáhá-güedé xii-gá

cuáhá. 40 Te òré ní quexìo-gá xián, te ní xáhaⁿ-gã xii-güedé:

—Chí càháⁿ ndihi Yá Ndiöxí cuendá sá vã dácàháⁿ ñáhá yücu ñáyáha xii-ndo càda-ndo sá ñà túú tàù-ndó càda-ndo —cachí-gá xáhaⁿ-gã xii-güedé.

41 Te sátá dúcáⁿ te ní quee diⁿ-gá tnuú-güedé cuáhá-gá ìⁿ xio, te sa ñünchií luha ní xica ndehe-gá núú ndécú-güedé, te xián nĩ ngüñí xítí-gã càháⁿ ndihi-gá Tátá-gã Dútú Ndiöxí. 42 Te xáhaⁿ-gã:

—Táu, te núú dicó cachí-n te tau-nihnu ñaha-n xii-í cuendá sá vã ndóhò-í ná sáá òré, dico vã cadá-n nàcuáa càchí iní mée-í, chi cada-n nàcuáa càchí iní mée-n —cachí-gá xáhaⁿ-gã xii Tátá-gã Dútú Ndiöxí.

43 Te sátá dúcáⁿ te ní quexìo ìⁿ espíritú xínú cuèchi núú Yá Ndiöxí ní sáñaha-gã-xi tnúhu ndee iní xii-gá. 44 Te òré súúni ndihú iní-gá, te uuⁿ-gá súúni nì yuhu ní iní-gá càháⁿ ndihi-gá Dútú Ndiöxí, te tnée-gã cáá dàtná cáá ñíí te ngóyó núú ñúhú.

45 Te sátá nĩ yáha ní càháⁿ ndihi-gá Tátá-gã Dútú Ndiöxí, te ní ndacuíñí-gá cuánuhú-gá núú nĩ dándòo-gá cue téé-áⁿ, te òré ní nasáá-gá te xixidí-güedé cuendá sá ìo cuéhé tnúhu sàni iní-güedé cuendá-gá. 46 Te xáhaⁿ-gã xii-güedé:

—¿Ná cuendá xidí-ndó? Chí ndácòo, te càháⁿ ndihi-ndo Yá Ndiöxí cuendá sá vã dácàháⁿ ñáhá yücu ñáyáha xii-ndo càda-ndo sá ñà túú tàù-ndó càda-ndo —cachí-gá xáhaⁿ-gã xii-güedé.

Ní tñi-güedé Jèsús ndécá ñaha-güedé cuáháⁿ

(Mt. 26:47-56; Mr. 14:43-50; Jn. 18:2-11)

47 Te càháⁿ dúcáⁿ-ní Jèsús ní quexìo vai cue téé, te ìⁿ téé xica cuu ndihi-gá nání Jüdás cúnüu-dé yódó nüu-dé núú-güedé ní quexìo ndée núú-gã, te ní teyuhu ñaha-dé xii-gá, te núú tnàhá téé-áⁿ cúú ùxúú cue

tée xica cuu ndihi-gá. 48 Te ní xáhaⁿ Jèsús xii-dé:

—Jüdás, ¿te yòhó cuáha cuendá ñáhá-n xii yúhú Tée cùu ñani tnàhá-ndó nchaa-ndo núú cuè téé cùu úhú iní ñáhá xii-í càháⁿ-n núu duha tàyuhu ñaha-n-áⁿ? —cachí-gá xáhaⁿ-gã xii-dé.

49 Te sátá nĩ xiní nchaa cue téé cündihí Jèsús nàcuáa cùu cue téé ní quexìo-áⁿ, núú ní xicáⁿ tnúhú-güedé núú-gã, te xáhaⁿ-güedé xii-gá:

—Mèstrú, ¿cùu nàá-ndí ndihi-güedé ndihi machití-a ñã? —cachí-güedé xáhaⁿ-güedé xii-gá.

50 Te ìⁿ-dé ní xehndé-ni-dé lóho xio cùha ìⁿ cue téé ní quexìo-áⁿ, te téé-áⁿ xínú cuèchi-dé núú dütú cúnüu-gá, te ní quendéé duuⁿ lóho-dé. 51 Te Jèsús ní xáhaⁿ-gã xii-güedé:

—Chí dáñá-güedé, vá dúcáⁿ càda-ndo —cachí-gá xáhaⁿ-gã xii-güedé.

Te ní dácàá-gá ndaha-gá ní tendaha-gã núú nĩ xindeé lóho téé-áⁿ, te ní nduu váha dàtná-ni càa. 52 Te nchaa cue téé cùu dütú cúnüu, ndihi cue téé tàxi tnuni nchaa cue téé quide cuendá veñúhu sá ìo cúnüu, ndihi cue téé cùu sacuéhé núú ñáyüu isràél, nchaa cue téé-áⁿ vèxi tñi ñaha-güedé xii-gá, te ní xáhaⁿ-gã xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécú-í, dàtná quidé-ndó ìⁿ ñadúhú quidé ñaha-ndo xii-í. 53 Te ducaⁿ-ni nĩ xiní-ndó nĩ xindecu-í xítí veñúhu càhnu sá ìo cúnüu ní xóo danèhé-í ñáyüu, te ní lùha ñá túú ní cùu tnàndéé ñáhá-ndó xii-í òré-áⁿ, te vitna ní sáá òré ducaⁿ càda-ndo, te cada sácuihná nàcuáa cùu iní-xi —cachí-gá xáhaⁿ-gã xii-güedé.

Té Pèlú càháⁿ-dé núú ñáyüu sá ñà túú xiní-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Te ní tñi-güedé Jèsús, te ndèca ñaha-güedé xii-gá cuáháⁿ vehe téé cùu dütú cúnüu-gá, te té Pèlú

xica xica-ni nchicúⁿ ñáhá-dě xii-gá cuáháⁿ. ⁵⁵ Te òré ní quexio-güedé xíaⁿ te ní dátñáhá-güedé ñuhú quehé vehe-áⁿ, te ní càndéé yuhu nùhú-áⁿ nǐ ngóo teté-güedé, chi quèide víxiⁿ-xi, te tñáhá té Pèlú ní ngóo teté ndihi ñaha-dě xii-güedé.

⁵⁶ Te xíaⁿ ndécú ñⁿ xíchí xínú cuèchi vehe-áⁿ, te òré ní xini-xi nùcòo teté tñáhá té Pèlú, te ní ndacoto-xi núú-dě, te ní xáhaⁿ-xi xii-güedé:

—Tñáhá té-a xica cuu ndihi-dé té ndèca-güedé cuànguihu-áⁿ — càchí-xi xáhaⁿ-xi xii-güedé.

⁵⁷ Dico té Pèlú ñá túú ní nǎnuu-dé, te xáhaⁿ-dě xii-xi:

—Yúhú ñá túú xini-í té-áⁿ — càchí-dé xáhaⁿ-dě xii-xi.

⁵⁸ Te tna tnaa-ní ní cuu, te ní xini ñáhá tucu ñⁿ-dé, te xáhaⁿ-dě:

—Yòhó tñáhá-n xica cuu ndihi-n té ndèca-güedé cuànguihu-áⁿ — càchí-dé xáhaⁿ-dě xii-dé.

Dico té Pèlú ní xáhaⁿ-dě:

—Ñáhá, ñá díú yúhú xicá cùu ndihi-í-dé —càchí-dé xáhaⁿ-dě.

⁵⁹ Te sa ní cuu dátñá ñⁿ òré te càchí tucu ingá-dé:

—Ndáá sá tée-a xica cuu ndihi-dé té ndèca-güedé cuànguihu-áⁿ, chi tñáhá-dé cúú-dě té distritù Galilea —càchí-dé xáhaⁿ-dě xii-güedé.

⁶⁰ Te té Pèlú ní xáhaⁿ-dě xii té-áⁿ:

—Yúhú ñá túú cùtnuní iní-í nása ndùu tñuhu càháⁿ-n —càchí-dé xáhaⁿ-dě.

Te ní vátá xǐnu ducaⁿ-gǎ tñuhu càháⁿ-dé ní cana-ni ñⁿ líhi. ⁶¹ Te Xítóhó Jesucristú ní nchócótó-gǎ núú-dě, te òré-ni-áⁿ nǐ ndacu iní-dé tñuhu ní xáhaⁿ-gǎ xii-dé sá cùmání-gǎ cana ñⁿ líhi, te úní xito càháⁿ-dé sá ñá túú xini ñáhá-dě xii-gá. ⁶² Te té Pèlú ní quee-dé tnuú-güedé cuáháⁿ-dé ñⁿ xio, te ní ndáhyú víhí-dě ní ndixi cuèchi iní-dé.

Cùdíquí ndeé-güedé Jèsús

(Mt. 26:67-68; Mr. 14:65)

⁶³⁻⁶⁴ Te cue té ndeé ñáhá xii Jèsús ní cudíquí ndeé ñáhá-güedé xii-gá, te ní dádáhu-güedé núú-gǎ, te ní caniha-güedé xii-gá, te xáhaⁿ-güedé:

—¡Cáháⁿ ná cótó yòo ní caniha xii-n! —càchí-güedé xáhaⁿ-güedé xii-gá.

⁶⁵ Te cuéhé víhí-gǎ tñuhu cuéhé ní xáhaⁿ-güedé xii-gá.

Jèsús ndécú-gǎ jùndá

(Mt. 26:59-66; Mr. 14:55-64; Jn. 18:19-24)

⁶⁶ Te sátá nǐ túndaá, te ní tacá cue tée cùu sacuéhé núú ñǎyiu isràél, ndihi cue tée cùu dútú cùnùu, ndihi cue tée dàcuaha ñaha xii-yu nchaa tñuhu ní chídó tñuní ndíi Moisés, te ndèca-güedé Jèsús cuáháⁿ núú càdá-güedé jùndá, te òré ní quexio-güedé ndihi-gǎ núú càdá-güedé jùndá-áⁿ, te ní xáhaⁿ-güedé xii-gá:

⁶⁷ —Cùiní-ndí càchí tñuhu-n xii-ndí nùu diu-n cùu-n Cristú Yaá ní tendaha Yá Ndióxi véxi ñuyú-a —càchí-güedé xáhaⁿ-güedé xii-gá.

Te ní xáhaⁿ-gǎ xii-güedé:

—Te núu na càchí-í sá díú-í cùu Cristú ñá, te ní vá quindáá iní-ndó, ⁶⁸ àdi te núu ñⁿ sá ná càcáⁿ tñuhu-í núú-ndó, te ní vá càchí tñuhu-ndo, te ní vǎ dáñá ñaha-ndo. ⁶⁹ Dico vitna ní cuyatni nduu ngóo yúhú Tée cùu ñani tñáhá-ndó nchàa-ndo xio cuha Dútú Ndióxi Yaá io cùnùu —càchí-gǎ xáhaⁿ-gǎ xii-güedé.

⁷⁰ Te dǎtnuní nchaa-güedé ní xicáⁿ tñuhú-güedé núú-gǎ, te xáhaⁿ-güedé xii-gá:

—¿Te yòhó cúu-n Dèhe Yá Ndióxi te núu ducaⁿ vání? —càchí-güedé xáhaⁿ-güedé xii-gá.

Te ní xáhaⁿ Jèsús:

—Ndáá sá díú Dèhe-gǎ cúu-í dátñá càchí méé-ndó-áⁿ —càchí-gǎ xáhaⁿ-gǎ xii-güedé.

⁷¹ Te ní xítñaha-güedé:

—Ñá túú-gǎ xini ñuhu-xi cue tée càháⁿ nùu ndáá sá ndécuéchi-dé àdi ñá túú ndécuéchi-dé chi yuhu mee-dé ní càháⁿ-dé vitna ní xíndedóho-o —càchí-güedé xítñaha-güedé.

23

Jèsús ndécú-gã núú tẽ Pilatú

(Mt. 27:1-2, 11-14; Mr. 15:1-5; Jn. 18:28-38)

¹Te nchaa-güedé ní ndacuíñí-güedé, te ndëca-güedé Jèsús cuáháⁿ núú tẽ Pilatú, ²te núú tẽe-áⁿ nĩ ngüíta-güedé sácáⁿ cuéchi-güedé cuëndá-gá, te xáhaⁿ-güedé:

—Ní naníhí-ndĩ tẽe-a dándahú-dé ñáyiu ñuú-ó, chi xáhaⁿ-dẽ xii-yu sá vã chãhu-gá-yu impuèstú xii tẽ Cêsár tẽe ío cùnuu, te cächí-dé sá díú-dẽ cúú-dẽ Cristú Yaa ní tendaha Yã Ndióxi véxi ñuyú-a te yíndaha-dé ñáyiu cächí-dé — cächí-güedé xáhaⁿ-güedé xii-dé.

³Te tẽ Pilatú ní xícáⁿ tnúhu-dé núú-gã, te xáhaⁿ-dẽ xii-gã:

—¿Ndáá sá díú-n cùu-n tẽe yíndaha ñaha xii ñáyiu israél-ã? — cächí-dé xáhaⁿ-dẽ xii-gã.

Te Jèsús ní xáhaⁿ-gã xii-dé:

—Diu-í yíndaha-í-yu —cächí-gã xáhaⁿ-gã xii-dé.

⁴Te tẽ Pilatú ní xáhaⁿ-dẽ xii nchaa ñáyiu, ndihi cue tẽe cùu dútú cùnùu:

—Yúhú cútñuní iní-í sá ñà túú nĩ ñⁿ cuéchi tẽe-a —cächí-dé xáhaⁿ-dẽ xii-yu.

⁵Dico níhi-gá ní cáháⁿ-güedé, te xáhaⁿ-güedé:

—Cächí-ndí sá ío dusaⁿ xíquide ñáyiu cuëndá nchaa sá dánèhé ñáhá-dẽ xii-yu, te ní quesaha-dẽ ndéé distritú Galiléa, te ní yáha-dé nihí distritú Júdeá dánèhé-dé ñáyiu, te vitna ní sáá-ni-tu-dé ndéé ndíha dánhé-dé-yu —cächí-güedé xáhaⁿ-güedé xii tẽ Pilatú.

Jèsús ndécú-gã núú tẽ Hèrodés

⁶Te sá dúcáⁿ nĩ tecú dóho tẽ Pilatú ní cacu nehé-yu distritú Galiléa, núu xiáⁿ ní xícáⁿ tnúhú-dẽ núu-yu núu tẽe Galiléa cúú-gã.

⁷Te ní xáhãⁿ-yu sá díú tẽe yácáⁿ cúú-gã, núu xiáⁿ ní na dayáha ñaha-dẽ xii-gã ndaha tẽ Hèrodés tẽe cùu gobiernú distritú Galiléa chi nduu-áⁿ ndécú-dẽ tnáhá-dé ñuú

Jerusalén-áⁿ. ⁸Te òré ní xiní tẽ Hèrodés-áⁿ Jèsús te ío ní cudíí iní-dé, chi ní cunaha dùcaⁿ-ni cuiní-dé quini ñáhá-dẽ xii-gã te ñà túú tnáhí xiní ñáhá-dẽ xii-gã ní cùu, chi cuëndá-ni tnúhu nihí-dé cuëndá-gá, te ndetu-dé sáá ñⁿ nduu quini ñáhá-dẽ xii-gã, te cada-gá ñⁿ sá vã yõo tnáhí ndácu cada cundehe-dé ní sani iní-dé. ⁹Te vãi sá ní xícáⁿ tnúhú-dẽ núú Jèsús, dico ní ñⁿ tnúhu ñà túú ní cáháⁿ-gã. ¹⁰Te xiáⁿ xíndecu tnáhá cue tẽe cùu dútú cùnùu, ndihi cue tẽe dàcuaha ñaha xii ñáyiu nchaa tnúhu ní chídó tnùní ndíi Moisés, te cue tẽe-áⁿ sùuní ío iní-güedé sácáⁿ cuéchi-güedé cuëndá-gã. ¹¹Te tẽ Hèrodés ndihi cue tẽe cùu sandadú-dé ñà túú ní cùu váha iní-güedé núú Jèsús, te ní cudíquí ndeé ñáhá-güedé xii-gã, te ní dácuihnú ñaha-güedé dóo váha xii-gã dàtná cáá dóo sácuihnu cue tẽe saquíndaha ñaha xii ñáyiu. Te dàtnuní tẽ Hèrodés ní dánùhú ñáhá tucu-dé xii-gã ndaha tẽ Pilatú. ¹²Te nduu-áⁿ nĩ tnáhá tnúhu tẽ Pilatú ndihi tẽ Hèrodés, chi cùu úhú iní tnáhá-güedé ní cùu.

Cächí-güedé sá cáhni-güedé Jèsús

(Mt. 27:15-26; Mr. 15:6-15; Jn. 18:39-19:16)

¹³Te tẽ Pilatú ní nadatácá-dé nchaa cue tẽe cùu dútú cùnùu ndihi dava-gã cue tẽe cùnùu, ndihi nchaa ñáyiu ñuú-áⁿ, ¹⁴te ní xáhaⁿ-dẽ:

—Nchòhò ndécá-ndó tẽe-a véxi ní taxí cuëndá-ndó-dé iha, te cächí-ndó sã ío dusaⁿ quide ñáyiu cuëndá nchaa sá dánèhé ñáhá-dẽ xii-yu, te núu-ndó ndúcu tnúhu-í núú-dé núu ná ní quide-dé. Dico yúhú cútñuní iní-í sá ñà túú nĩ ñⁿ cuéchi-dé dàtná cáháⁿ-ndó-áⁿ. ¹⁵Te cuéi tẽ Hèrodés diu-ni ducaⁿ cáháⁿ-dẽ sá ñà túú cuéchi-dé núu ní techiuⁿ ñaha tucu-dé cuándixi-dé iha. Te vitna sa ní cutñuní iní-ó sã ñà túú táu-xi cahni-o-dé chi ñà túú cuéchi ní quide-dé. ¹⁶Te na dándoho-ni-í-dé te dàcácu-í-dé — cächí-dé xáhaⁿ-dẽ xii-yu.

17 Te ndi tnahá nduu víco pas-cuá te dacuití sã dácácu té Pilatú-án ìñ cue tée yíhi vecaá, chi ducañ tnahí quide-dé. 18 Dico nchaá-yu ní cuáá-yu, te xãhãñ-yu xii-dé:

—¡Queñuhu tée nãni Jesús-án, te cahni-n-dé! ¡Te dácácu-n té Barrábás! —càchí-yu xãhãñ-yu xii-dé.

19 Te té Barrábás-án ñi sanu ichi-dé ñáyiu ñuú ingá ichi, te ní ngüita-yu ndihi-dé ní cuu úhú iní-yu cue tée cùchiuñ, te ní sahani-dé ndíyi núu xíãñ ní chihí ñaha-güedé vecaá xii-dé. 20 Te té Pilatú cuini-dé dácácu-dé Jesús núu xíãñ cãháñ ndihi ñaha tucu-dé xii-yu ni cùu, 21 dico uuñ-gá ñihi ní cuáá-yu, te ní xãhãñ-yu xii-dé úu xito:

—¡Cata caá-dé núu cùrúxí! ¡Cata caá-dé núu cùrúxí! —càchí-yu xãhãñ-yu xii-dé.

22 Te xito cuu úní ní xãhãñ té Pilatú:

—¿Te ná cúu cuéchi ní quide-dé te núu ducañ cuini-ndó cada-í-dé-i? Te yúhú cùtnúni iní-í sã ñã túu cuéchi ní quide-dé núu xíãñ ñã túu tàú-xi cahni-o-dé, te na dândoho-ni-í-dé te dácácu-í-dé —càchí-dé xãhãñ-dé xii-yu.

23 Dico ñihi-ni cãháñ-yu xãhãñ-yu sã ná càta caa ñaha-dé xii-gá núu cùrúxí, te ñáyiu-án ndihi nchaa cue tée cùu dútú cùnùu xicãháñ ñihi-güedé ndihí-yu ndéé ní xínu iní té Pilatú cada-dé nãcuáa càchí iní-yu. 24 Te ní xãhãñ-dé xii-yu sã cúu cada-dé nãcuáa xãhãñ-yu. 25 Te ducañ te ní dácácu-dé té Barrábás tée ní sanu ichi ñáyiu ñuú ingá ichi, te ñiu-ni-dé ní sahani-dé ndíyi núu xíãñ ní xíhi-dé vecaá, te dãtnúni ní táuchíuñ-dé cada-güedé Jesús nãcuáa xãhãñ-yu.

Sãta caa-güedé Jesús núu cùrúxí
(Mt. 27:32-44; Mr. 15:21-32; Jn. 19:17-27)

26 Te ndèca-güedé Jesús cuáhãñ núu cáta caa ñaha-güedé xii-gá, te ichi cuáhãñ-güedé ndihi-gá

ní tñii-güedé ìñ tée ñuú Cirené nání-dé Xímú ñúhú-dé ichi duha cuándixi-dé ní sãháñ-dé yucu, te ní dácúidó ñaha-güedé xii-dé cùrúxí nchídó Jesús, te ní ngüita nchicúñ-dé sátã-gã.

27 Te ío cuéhé ñáyiu nchicúñ ñáhã xii-gá cuáhãñ, te vai ñáyiu ñíhi ío ñihi ndàhí-yu sã ndíhú iní-yu cuendá Jesús. 28 Te Jesús ní nchócótó-gã núu-yu, te ní xãháñ-gã:

—Nchòhó ñáyiu ñíhi ñuú Jerusálén, vá ndàhyú-ndó cuendá-í chí ndàhyú cuendá méé-ndó ndihi cuendá déhe-ndo. 29 Chi sáá nduu quésaha ñáyiu: “Sã vãha tãhú nchaa ñáyiu ñã túu càcu déhe-xi, ndihi nchaa ñáyiu vátã quini-gã cuhuñ déhe-xi, chi ni ñã túu xini-yu dacadí-yu”, duha quésahã-yu. 30 Te dàvã-án cùñaha ñáyiu xii nchaa tìndúu ndihi nchaa núu xìquí: “Chí tácuñ ngónchihi ñaha-ndo xii-ndí”, duha cùñahã-yu. 31 Te núu yúhú tée quide ndáa duha quide ñaha-güedé xii-í vitna, te ndéé-gã cada-güedé nchaa ñáyiu ndècu ichi cuéhé ichi duha —càchí-gã xãháñ-gã xii-yu.

32 Te ndèca tucu-güedé úu tnahá cue tée ndècu ndisa cuéchi-xi cuáhãñ cuendá cahni ñaha-güedé xii-güedé ndihi Jesús. 33 Te òré ní quexìo-güedé ndihi-gã ìñ xichi núu nání Yiqui Díquí Ndíyi, te xíãñ ñi sata caa ñaha-güedé xii-gá núu cùrúxí, ndihi úu cue tée ndècu ndisa cuéchi-xi-án, te ìñ-dé ní sata caa-güedé xio cùha-gã te ingá-dé ní sata caa-güedé xio dãtni-gã ñiu-ni núu cùrúxí tucu. 34 Te ní xãháñ-gã xii Tãtã-gã Dútú Ndiòxi:

—Táu, cada càhnu iní sã quidé-güedé, chí ñã túu cùtnúni iní-güedé ná cúu sã quidé-güedé —càchí-gã xãháñ-gã.

Te cue tée cùu sandadú ní xito ndéé-güedé núu ndèdaca-güedé cuu cuendá-güedé dóo-gã. 35 Te nchaa ñáyiu xìndecu-án ndéhë-yu nãcuáa quide-güedé Jesús, te

nchaa cue tée cùnuu ní cudíquí ndeé ñáhá-güedé xii-gá, te ní xítñaha-güedé:

—Te dava ñáyiú ní ndacu-dé ní dácácu nihnu-dé, te vitna na dácácu nihnu-dé méé-dé, te núu ndisa sá Crístú Yáá ní tendaha Yá Ndiöxí véxi ñuyíú-a cùu-dé —cächí-güedé xítñaha-güedé.

³⁶ Te tñahá cue tée cùu sandadú ní cudíquí ndeé ñáhá-güedé xii-gá, chi ní sándehe yatni-güedé núu táca-a-gá sáñaha-güedé ndudí íá còho-gá ní cùu, ³⁷ te ní xáhaⁿ-güedé xii-gá:

—Te núu yòhó cúu-n tée yìndaha ñaha xii ñáyiú isràél, te dácácu nihnu mee-n —cächí-güedé xáhaⁿ-güedé xii-gá.

³⁸ Te ní taxi ndecu-güedé ìⁿ sá ndeé lètrá ndàa díquí-gá te ndeé úní núu tñùhu, tñúhu griègú, ndìhi tñúhu làtín, ndìhi tñúhu hèbreú, te duha quèe-xi ndì nuní núu tñùhu-áⁿ “Tée-a cùu-dé tée yìndaha ñaha xii ñáyiú isràél”, duha quèe-xi.

³⁹ Te ìⁿ tée ndècu ndisa cuèchi-xi, tée ní sata caa-güedé dñi-gá xícüehé ñáhá-dé xii-gá, te xáhaⁿ-dè:

—Te núu yòhó cúu-n Crístú Yáá ní tendaha Yá Ndiöxí véxi ñuyíú-a, te dácácu nihnu mee-n, te dácácu nihnu ñaha xii nchúhú tñahá-ndí tucu —cächí-dé xáhaⁿ-dè xii-gá.

⁴⁰ Dico íngá tée cùndìhi-dé tée tàcaa íngá xio dñi-gá ní tenàá ñáhá-dé xii-dé, te xáhaⁿ-dè:

—¿Te náa ñá túú ndàcu iní-n Yá Ndiöxí vitna duha cãa-o ndoho-o ndìhi tée nàni Jesús-a ñã? ⁴¹ Chi nchoo tàu ndisa-o sã dúhá ndòho-o nacháhu-o cuèchi-o, dico Jesús-a chi ñá túú cuèchi-dé —cächí-dé xáhaⁿ-dè xii tée tàcaa ndìhi-dé-áⁿ.

⁴² Te dàtnùní ní xáhaⁿ-dè xii-gá:

—Jèsús, ndacu iní ñáhá-n xii-í òré ná quèxi-n taxi tñuní-n ñuyíú-a —cächí-dé xáhaⁿ-dè xii-gá.

⁴³ Te Jèsús ní xáhaⁿ-gá:

—Na cächí tñúhu ndáá-í xii-n sã méi ndùu vitna cundecu ndìhi

ñaha-í xii-n núú ní nduu táhù-í cundecu-í —cächí-gá xáhaⁿ-gá xii-dé.

Ní xihí Jèsús

(Mt. 27:45-56; Mr. 15:33-41; Jn. 19:28-30)

⁴⁴ Te òré ní cuu cuádava nduu. Te ní cunee nihíi ñuyíú, te ducaⁿ-ní cãa ní cuu ndeé caá úní sacuaa. ⁴⁵ Chi ñá túú-gá ní dàyehé nchícanhii te ní ndátá dđó cúú còrtiná veñúhu càhnu sá ío cùnuu ní quèe dava ndáá. ⁴⁶ Te níhi ní cáháⁿ Jèsús, te xáhaⁿ-gá xii Tátá-gá Dútú Ndiöxí:

—Táu, naqueheⁿ cuendá-n espíritú-í —cächí-gá xáhaⁿ-gá xii Tátá-gá.

Te tñúhu-ná-áⁿ ní cáháⁿ-gá te ní xihí-ni-gá.

⁴⁷ Te òré ní xiní tée cùu capitáⁿ sá dúcáⁿ ní cuu, te ní ndacu iní-dé Yá Ndiöxí, te ní cachí-dé:

—Sá ndáá ndisa sá tēe-a cùu-dé ìⁿ tée ío quide ndáá ndécú ñuyíú-a ní cùu —duha ní cachí-dé.

⁴⁸ Te chitu ñáyiú ní tacá xiáⁿ chi cuíní-yu cundéhé-yu nása cada-güedé Jèsús. Te sátá ní yáha ní xiní-yu nàcuáa ní quide ñaha-güedé xii-gá, te ní ndìhi-yu ní ndaca ta càni-yu pèchú-yu cuánuhú sá ndìhú iní-yu. ⁴⁹ Dico ndècu tñahá cue ñáyiú xiní tñahá ndìhi Jesús, ndìhi ñáyiú dñí ní chinchícúⁿ ñáhá xii-gá ndeé distritú Galileá, te ñáyiú-áⁿ xica-ni xíxínutnii-yu xíndéhè-yu nchaa nàcuáa ní quide ñaha-güedé xii-gá.

Chìndúxi-güedé Jèsús

(Mt. 27:57-61; Mr. 15:42-47; Jn. 19:38-42)

⁵⁰ Te ndècu ìⁿ tée ñuú Arimateá nání-dé Chèé, te ñuú-áⁿ yìndèhu-xi distritú Jùdeá, te ío váha iní-dé te quide ndáá-dé núú Yá Ndiöxí, te tñahá-dé cúú-dé chiúⁿ te ní xíndecu-dé jùndá cue tée isràél.

⁵¹ Te ñá ní tñahá tñahí iní-dé nàcuáa ní cáháⁿ-güedé núú jùndá nàcuáa cada-güedé Jèsús. Te tée-áⁿ ndétú-dé sáá nduu ndìhu ndaha

ñaha Yá Ndióxi xii-dé ndihi ñáyi. ⁵² Te té-án ní sáháⁿ-dé núú tē Pilatú te ní xáhaⁿ-dē sá ñuú vá cúndēe iní-dé dañá-dé chindúxi-dé yiqui cùñú Jèsús. Te té Pilatú-án ní sáha-dé tnúhu. ⁵³ Te ní nunehe-dé yiqui cùñú-gá núú cùrúxí, te ní chidúcúⁿnuu-dé ñⁿ dóó cuixíⁿ, te ní chihi-dé ñⁿ yaú nchìi yiqui naha càva, te vátá yõ ñⁿ-gá nguindúxi yaú-án. ⁵⁴ Te cùu-xi nduu vispré nduu ndètatú ñáyi, núu xíquide túha-ná-yu sá cúu ìngá nduu.

⁵⁵ Te nchaa ñáyi dñí ní chinchícúⁿ ñáhá xii Jèsús ndéé distritú Galileá ndëndàhá-yu té Chèé ní sáháⁿ núú nchìi yaú-án, núu ní xiní-yu nàcuáa ní sacáⁿ-dé yiqui cùñú-gá xití yaú-án. ⁵⁶ Te ducaⁿ te cuánuhú-yu vehé-yu, te ní quide túha-yu acití sáháⁿ tnámí, ndihi pomàdá, te ní ndetatú-yu ìngá nduu-án ní quidé-yu nàcuáa càháⁿ tnúhu Yá Ndióxi.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

¹ Te ndumìngú nehé víhí-ní cuáháⁿ tucu ñáyi dñí núú nchìi yaú ní chihi-güedé yiqui cùñú Jèsús, te nèhé-yu nchaa sá sáháⁿ tnámí ní quide túha-yu-án cuáháⁿ, te tnàhá tucu ñⁿ úú-gá tnàha dñí-yu nchícúⁿ ñáhá xii-yu cuáháⁿ. ² Te òré ní quexió-yu yuhu yaú-án te ní xiní-yu sá yúú ndèdí ñⁿ xio-ná ndécú, ³ te ní quíhu-yu xití yaú-án, dico ñá túú-gã yiqui cùñú Jèsús yíhí. ⁴ Te ñá ní cùtnuní tnàhí iní-yu ndéé ichi cuáháⁿ yiqui cùñú-gá, te ní xiní-yu úú espíritú xínú cuèchi núú Yá Ndióxi xñutnñ-xi dñí-yu te xixíhnu-xi dóó chàhñchí. ⁵ Te ní yùhú-yu te ñá túú ní cùyí-yu cundèhé-yu cue espíritú-án, te cue espíritú-án ñí xáhaⁿ-xi xii-yu:

—¿Ná cuendá nándücu-ndo Jèsús Yaá ndécú vívú núú yíndúxi ñáyi ní xíhí-i? ⁶ Te ñá túú-gã yiqui cùñú-gá ndécú iha chi sa ní ndoto-gá, te chí dándacu iní nàcuáa ní càháⁿ-gá cùtnàhá ní xíndecu-ndo ndihi-gá distritú Galileá, ⁷ chi ní cachí-gá sá méé-gã cúú-gã ñaní tnàhá-ndó nchàa-ndo, te dacuití cuàha cuendá ñáhá-güedé xii-gá núú cuè téé ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-án cuú-gá dico nduu úní sá cúú-gá te ndoto-gá, duha ní cachí-gá xii-ndo.

⁸ Te òré-án ní ndacu iní-yu tnúhu ní càháⁿ Jèsús. ⁹ Te sátá dúcáⁿ te ní naquehéⁿ-yu ichi cuánuhú-yu, te ní caní-yu cuèndú núú ndí úxí ñⁿ cue téé ní táuchíúⁿ Jèsús càháⁿ tnúhu-gá, ndihi núú dàva-gã ñáyi. ¹⁰ Te ñáyi ducaⁿ ñaha tnúhu cuánuhú núú-güedé-án cúú tá Màriá Magdalèná, ndihi tá Juáná, ndihi tá Màriá náná tē Jàcobó, ndihi dàva-gã ñáyi dñí. ¹¹ Dico cue téé-án ní sani iní-güedé sá dìcò càhú ìní-yu tnúhu xáháⁿ-yu xii-güedé ñuú ñá túú ní sàndáá iní-güedé nàcuáa ní xáháⁿ-yu.

¹² Dico té Pèlú ní quee-dé xínú-dé cuáháⁿ cuándéhé-dé yaú núú ñí chihi-güedé yiqui cùñú Jèsús, te ní sáa-dé te ní ngáundeyi-dé xitó ñhni-dé xití yaú-án te ní xiní-dé sá méé-nã dóó ñí xiducúⁿ nuu-gá yúcu ñⁿ xio, te ío ní cuñúhu-dé sá dúcáⁿ ñí cuu, te ní natnñ-dé ichi cuánuhú-dé vehe núú xíndecu-güedé.

Ichi ñuú Emàús (Mr. 16:12-13)

¹³ Te ñu-ni nduu-án ñúhú úú cue téé ní xica cuu ndihi Jèsús ichi cuáháⁿ-güedé ñⁿ ñuú nání Emàús, te sàcúhuⁿ-güedé dàtná úú òré ichi ndéé ñuú Jerusálén, te ndéé ñuú Emàús. ¹⁴ Te ta ndàtnúhu-güedé cuáháⁿ nchaa nàcuáa ní cuu, ¹⁵ te ñini dùcaⁿ xicáháⁿ-güedé, te Jèsús ní

natnahá ñáhá-gǎ xii-güedé te ndèca tnaha-gá ndihi-güedé cuáháⁿ. ¹⁶ Te cuèi ndèhe ñaha-güedé xii-gá dico dàtná ìⁿ sá ndédí núú-güedé, chi ñá ná quíni ñáhá-güedé xii-gá ní cùu. ¹⁷ Te Jèsús ní xicáⁿ tnúhú-gá núú-güedé, te xáhaⁿ-gǎ:

—¿Ná tnúhu xicáháⁿ-ndó ñùhu-ndo ichi núu ducaⁿ ìo cùu ndiyí-ndó-í? —càchí-gá xáhaⁿ-gǎ xii-güedé.

¹⁸ Te ìⁿ téé nàni Cleofás ní xáhaⁿ-dè xii-gá:

—¿Te ná cuendá nchaa ñáyiú íchí ní sáá ñúú Jerusalén xiní-yu nchaa nàcuáa ní cuu, te ìⁿ dii-ná yòhó ñá túú xiní-n-í? —càchí-dé xáhaⁿ-dè xii-gá.

¹⁹ Te ní xáhaⁿ-gǎ xii-güedé:

—¿Te ná ní cuu-í? —càchí-gá xáhaⁿ-gǎ xii-güedé.

Te ní xáhaⁿ-güedé xii-gá:

—Cuendá Jèsús téé ñúú Nazàrét càháⁿ-ndí, chi téé-án cúú-dè ìⁿ téé càháⁿ tnúhu Yá Ndiòxí, te ìo váha ndùu tnúhu càháⁿ-dè ní cùu, te quide-dé sá vǎ yòo tnàhí ndàcu cada nacuáa cudíí ìní Yá Ndiòxí ndihi ñáyiú ní cùu. ²⁰ Te cue téé cùu dútú cùnùu, ndihi cue téé cùnùu taxi tnuní ñáhá xii-ndí ní sáha cuendá ñáhá-güedé xii-dé núú tē Pilatú te ní sata caa ñaha-güedé te núú cùrúxí-án ní xihí-dé. ²¹ Dico vitna sa ní cuu úní nduu sá ní xihí-dé, te nchúhú ní sani ìní-ndí sá tē-án dàcácu nihnu ñaha-dè xii nchúhú ñáyiú isràél núú nchaa tnúndòho tnúhu ndàhú ndécú-ndí. ²² Dico ìo cùñúhu-ndí cúú, chi ìⁿ úú ñáyiú dihí ní tuha ñaha xii-dé ndécú ndihi-ndí ní sáháⁿ ngotó-yu ndéxuehe tàcuíhndá-gá yaú núú ní chihi-güedé yiqui cùñú-dé, ²³ te ní nasáa-yu càchí-yu xii-ndí sá ñá túú-gǎ yiqui cùñú-dé yihí xití yaú-án. Te ní xiní-yu espíritu xínú cuèchi núú Yá Ndiòxí, te ní xáhaⁿ-xi xii-yu sá ndécú vívú-dé.

²⁴ Te sáta dúcáⁿ te ìⁿ úú cue téé cùndihí-ndí ní sáháⁿ ndéhé-güedé

yaú-án, te ní xiní-güedé sá ndáa cúú-xí nchaa tnúhu ní càháⁿ ñáyiú dihí-án, dico ñá túú ní xiní-güedé téé-án —càchí-güedé xáhaⁿ-güedé xii-gá.

²⁵ Te Jèsús ní xáhaⁿ-gǎ xii-güedé:

—¿Ío cùmání sǎ xiní tnùní-ndó, chi ìo cuèé sàndáá ìní-ndó tnúhu ní càháⁿ cue téé ní xóo càháⁿ tnúhu Yá Ndiòxí ndéé sanaha! ²⁶ ¿Te náa ñá túú tàú-xi sá ndóhó Cristú òré cùmání-gǎ sáa nduu ndaa-gá andiú núú ndécú Dütú Ndiòxí cundecu-gǎ-án? —càchí-gá xáhaⁿ-gǎ xii-güedé.

²⁷ Te ní ngúta-gǎ xáhaⁿ-gǎ nàcuáa quèe-xi nchaa tnúhu càháⁿ-xi núú tütú Yá Ndiòxí cuendá-gǎ, te díhna-gǎ ní càháⁿ-gǎ nàcuáa ndùu nchaa tnúhu yòdo tnuní núú tütú ndíi Moisés, te dàtnùní ní càháⁿ-gǎ nàcuáa ndùu nchaa tnúhu yòdo tnuní núú tütú nchaa cue téé ní xóo càháⁿ tnúhu Yá Ndiòxí ndéé sanaha.

²⁸ Te òré ní quexio-güedé yuhu ñúú núú cuáháⁿ-güedé-án, te Jèsús ní quide-ni-gǎ sá yáha-gǎ quíhíⁿ-gǎ ingá xichi ní cùu. ²⁹ Dico ní càháⁿ ndàhú-güedé núú-gǎ sá quéndòo-gǎ xíaⁿ ndetatú-gǎ ndihi-güedé, te xáhaⁿ-güedé xii-gá:

—Quendóo ndihi ñaha xii-ndí iha ndetatú-n chi sa ní cuaa, te tnavíi cundiquiⁿ —càchí-güedé xáhaⁿ-güedé xii-gá.

Te xíaⁿ cáá ìⁿ vehe cuánguihu-güedé ndetatú-güedé ndihi-gǎ. ³⁰ Te òré sa yihí-güedé mèsá ndihi-gǎ cùdini ndihi ñaha-güedé, te ní queheⁿ-gǎ pàa te ní ndacáⁿ táhú-gǎ núú Yá Ndiòxí, te ní táhú cuèchi-gǎ te dàtnùní ní dácàhñu ñaha-gǎ xii-güedé. ³¹ Te òré-án ní naquiní ñáhá-güedé xii-gǎ ní cùu, dico uuⁿ ní ndóñhúhú-gǎ. ³² Te ní xítnàha-güedé:

—Te ndáa sá sùúní cùdíí ìní-ó òré tá ndàtnúhu-o ndihi Jèsús véxi ichi, te ta dānehé ñáhá-gǎ xii-o nchaa nacuáa quèe-xi tnúhu càháⁿ-xi

núú tütú Yá Ndióxi —càchí-güedé xĩtnàha-güedé.

³³ Te ñá túú-gã ní xĩndetu-güedé chi ndihi-ni ní natnii-güedé ichi cuánuhú-güedé ñúú Jerusalén, te ní nasáá-güedé núú xĩndecu ndi úxi ñⁿ cue téé ní táuchíúⁿ Jèsús cáháⁿ tnúhu-gã, ndihi dava-gã ñáyiú. ³⁴ Te cue téé xĩndecu-áⁿ xáhaⁿ-güedé:

—Ndáá sá ñi ndoto Yaá cúú Mèstrú, chi ní xini ñáhá tè Ximú —càchí-güedé xáhaⁿ-güedé.

³⁵ Te cue téé ní nasáá-áⁿ ñi cani-güedé cuendú nàcuáa ní cuu ichi, ndihi nàcuáa ní cuu ní naquini-güedé Jèsús òré ní táhú-gã páá ní dácãñu ñaha-gã xii-güedé.

Jèsús ní quexio-gã núú xĩndecu cue téé ní xica cuu ndihi-gã

(Mt. 28:16-20; Mr. 16:14-18; Jn. 20:19-23)

³⁶ Te càháⁿ dúcáⁿ-ní-güedé nàcuáa ní cuu ní quexio Jèsús ní ngúnutnii-gã ndéé tnuú-güedé, te xáhaⁿ-gã xii-güedé:

—Yá Ndióxi chindèe ñaha-gã xii-ndo ío váha cùu iní-ndó ndècu-ndo —cachí-gã xáhaⁿ-gã xii-güedé.

³⁷ Te da ní yùhú-güedé, te ní sani iní-güedé sá dícó ñⁿ espíritú cúú sá ndéhé-güedé ní cùu. ³⁸ Dico Jèsús ní xáhaⁿ-gã xii-güedé:

—¿Ná cuendá yùhú-ndó, te sàni ñⁿ sani úú iní-ndó-í? ³⁹ Chí cündèhe ndaha-í ndihi sáhá-í te quini-ndo nã diu-ni-í. Te chí téndàha ñaha xii-í te cundehe-ndo, te núú ñⁿ espíritú ndécú yiqui cuñú-xi dàtná ndécú ndihi yùhú —càchí-gã xáhaⁿ-gã xii-güedé.

⁴⁰ Te sáta dúcáⁿ ñi xáhaⁿ-gã te ní dánèhé ñáhá-gã xii-güedé ndaha-gã ndihi sáhá-gã. ⁴¹ Te ío ní cuñuhu-güedé, te ní cudíⁿ iní-güedé sá ndécú-gã tnuú-güedé dico sàni ñⁿ sani úú iní-güedé, te ní xáhaⁿ Jèsús xii-güedé:

—¿Ndècu ndihi-ndo luha sá cáxi-ó ìha ñá? —càchí-gã xáhaⁿ-gã xii-güedé.

⁴² Te ní sãñaha-güedé xii-gã luha chácá ñi chíhó, ndihi dítá ñũñú ñúhú ndùdí, ⁴³ te ní queheⁿ-gã te ndèhe-güedé ní xexi-gã. ⁴⁴ Te dàtnùní ní xáhaⁿ-gã:

—Nchaa sá ñi yáha-í-a cùu-xi sá ñi cachí tnúhu-í xii-ndo cùtnàhá ndécú ndihi ñaha-gã-í xii-ndo, chi ní cachí-í sá dàcuiⁿí càda-xi nchaa nacuáa cáháⁿ-xi núú tütú ndí Moisés, ndihi núú tütú ndéé tnúhu ní cáháⁿ cue téé ní xóo cáháⁿ tnúhu Yá Ndióxi ndéé sanaha, ndihi núú libré Sãlmú —càchí-gã xáhaⁿ-gã xii-güedé.

⁴⁵ Te òré-áⁿ ñi sãñaha-gã sá xini tnùní-güedé, te ní tecú tnùní-güedé nchaa tnúhu cáháⁿ-xi núú tütú Yá Ndióxi. ⁴⁶ Te ní xáhaⁿ-gã xii-güedé:

—Ducaⁿ ndéé tnuú núú tütú Yá Ndióxi sá dàcuiⁿí sá yùhú Cristú cuú-í, te nduu úní ndoto-í. ⁴⁷ Te nihí ñuyíú cùténuu tnúhu ní cáháⁿ-í, dico díhna nuu-gã ñúú Jerusalén ngüita-yu cacunehe ñáhá-yu xii-í, te cáháⁿ-yu nàcuáa ní dánèhé-í-yu, te cùñáhá-yu xii cue ñáyiú sá ná dándixi túu-yu iní-yu sá ñà túú quide váha-yu, te dàñá-yu nchaa ichi cuèhé ichi duha ndécú-yu, te natnii-yu ichi Yá Ndióxi, te ducaⁿ te cada càhnu iní-gã nchaa yíca cuèchi-yu. ⁴⁸ Te vitna nchòhó cuu-ndo cuè téé cáháⁿ ndáá nchaa nàcuáa ní cuu chi ní xini núú-ndó. ⁴⁹ Te yùhú tendaha-í Espíritú Yá Ndióxi quixi cundecu ndihi-ndo, chi ducaⁿ ñi cachí-gã. Dico chí cündècu-ni ñúú Jerusalén-áⁿ ndéé ná quèxio Espíritú Yá Ndióxi ngúndecu ndihi-ndo cuendá chindee ñaha-xi xii-ndo cada-ndo nchaa nacuáa ní cáháⁿ-í —càchí-gã xáhaⁿ-gã xii-güedé.

Jèsús cuánda-gã andiu

(Mr. 16:19-20)

⁵⁰ Te Jèsús ní queñuhu ñaha-gã xii-güedé ñúú Jerusalén ndéca

ñàha-gá cuáháⁿ ñuú Bètaniá, te xíáⁿ nĩ ndonehe-gá ndaha-gá núú nĩnu, te ní xí cáⁿ táhú ñàha-gá xii-güedé núú Yă Ndiöxí. ⁵¹ Te sátá nĩ xí cáⁿ táhú ñàha-gá xii-güedé núú Yă Ndiöxí, te ní quee-gá tnuú-güedé cuándaa-gá andiü. ⁵² Te ní ngüíta-güedé ní cachí-güedé sá ïo càhnu cuu Jesús, te ní natnii-güedé ichi cuánuhú-güedé ñuú Jerusálén, te súú ní cùdí iní-güedé ñúhú-güedé ichi. ⁵³ Te nchaa nduu ní xíndecu-güedé veñúhu càhnu sá ïo cùnuu ní ndacáⁿ táhú-güedé núú Yă Ndiöxí, te ní cachí-güedé sá ïo càhnu cuu-gá. Duha ní cuu dàvá-áⁿ.

TNÚHU NÍ CHÍDÓ TNÛNÍ TÉ JUÁÁ

Déhe Yá Ndióxi ní cuu-gá ññáiyu

¹ Cùmání-gã ngáva ñuyíú, te sa ndècu ndihí Yá Ndióxi Déhe-gá. Te ññ-ni xícuu-gá. Te Déhe-gá-án ní cuu-gá dàtná ññ tnúhu, chí ní cachí tnúhu-gá nàcuáa càa Tátá-gã Dútú Ndióxi. ² Te sa ndècu-gá ndihí Dútú Ndióxi te ní ngáva ñuyíú. ³ Te ññ-ni tnúhu mee Dútú Ndióxi ní cuu ní cadúha Déhe-gá nchaa sá ío ñuyíú. Te núu ñá túú Déhe-gá ñá, te ñá túú ná coo ñuyíú-a ní cùu. ⁴ Te ññ-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o. ⁵ Te tnúhu-gá ní xité nuu-xi núú ndécú nchaa ñáiyu ññhu ichi cuehé ichi duha. Te ñáiyu-án cúú-yu dàtná cue ñáiyu ndècu ññ núú née, te ññ-ni-yu cachí iní-yu xocàni-yu tnúhu-gá dico vá ndácú-yu.

⁶⁻⁷ Te ní xíndecu ññ tée ní xínani-dé Juáá, te tée-án ní táuchíúñ Yá Ndióxi sá càháⁿ-dé tnúhu-gá núú ñáiyu. Te ní xáhaⁿ-dè xii-yu sá véxi Déhe-gá ñuyíú-a, te dandixi túu-gá iní-yu cuendá cutnùni iní-yu nàcuáa ndùu cuendá Yá Ndióxi cuendá quíndáá iní-yu tnúhu-gá. ⁸ Te ñá díú mèe té Juáá ní dándixi túu-dé iní-yu cuendá cutnùni iní-yu nàcuáa ndùu cuendá Yá Ndióxi, chí cuendá-ni ní xica cuu-dé ní càháⁿ-dé sá Dèhe Yá Ndióxi véxi-gá dandixi túu-gá iní-yu. ⁹ Te ndáá ndisa sá mée-gã dándixi túu-gá iní ñáiyu ñuyíú-a cuendá cutnùni iní-yu nàcuáa ndùu cuendá Yá Ndióxi.

¹⁰ Te ní xíndecu-gá ñuyíú-a, te ñáiyu ñuyíú-a ñá ní cùtnuní iní-yu yoo cùu-gá, te ññ-ni mee-gã ní cadúha-gã ñuyíú-a ní quíde-gá chùuⁿ ní táhú Dútú Ndióxi. ¹¹ Te ní quixi-gá ñuyíú ní cadúha mee-gã, dico cue ñáiyu ñuyíú-a ñá ní cùu váha iní-yu núú-gã. ¹² Dico davá-yu

ní sándáá iní ñáhã-yu xii-gá, te ní nduu táhũ-yu ní nduu déhe ñaha Yá Ndióxi xii-yu. ¹³ Te ñá túú ní nduu déhe ñaha-gã xii-yu sá cúú-yu déhe ñáiyu ñuyíú-a, àdi sá ndécú tãtã-yu, nãñã-yu chí mee Yá Ndióxi ducaⁿ ní cuini-gá cunduu sá ndúú dèhe ñaha-gã xii-yu.

¹⁴ Te Déhe-gá ní quixi túu-gá ñuyíú-a, te ní cuu-gá ññ yiqui cùñú ní xíndecu ndihí ñaha-gã xii nchoo cuè ñáiyu ní xica cuu túu ndihí-gã. Te ní xini-ó sá ío càhnu cuu-gá cuendá sá ññ ññ díí-ni-gã cúú-gã Déhe Yá Ndióxi, te ío cùndahú iní ñáhã-gã chindèe ñaha-gã xii nchoo ñáiyu ndècu ñuyíú-a, te ío ndáá càháⁿ-gã. ¹⁵ Te duha ní càháⁿ té Juáá cuendá Déhe Yá Ndióxi ní xáhaⁿ-dè xii ñáiyu:

—Cuendá tée iha ní càháⁿ-í ndée càni-gá ní cachí-í sá quíxí ññ tée quixi. Te tée-án cùnùu-gá-dé, chí díhna-gá-dé sa ndècu-dé dàcúúxí yùhú —duha ní xáhaⁿ-dè xii-yu.

¹⁶ Te ío váha iní Yaa-án chí xìto ñaha-gã xii-o nchaa-o ññ nduu ññ nduu. ¹⁷ Te ndíi Moisés ní cachí tnúhu ndíi tnúhu Yá Ndióxi tnúhu sá sánú ichi ñaha xii-o nacuáa cundecu-o, dico Déhe-gá Xítóhó Jesucristú ní cachí-gá sá ío cùu iní ñáhã Yá Ndióxi xii-o. Te ní càháⁿ-gá nchaa dava-gá tnúhu ndáá. ¹⁸ Te ñá ññ ñáiyu xini túu-yu Yá Ndióxi. Dico ññ díí-ni Déhe-gá Yaa ndécú ndihí-gá càchí tnúhu-gá nàcuáa cà-gã.

Té Juáá tée dàcuandute ñaha xii ñáiyu càháⁿ váha-dé cuendá Xítóhó Jesucristú

(Mt. 3:11-12; Mr. 1:7-8; Lc. 3:15-17)

¹⁹ Te cue tée israél ndécú ññú Jerusalén ní tendaha-güedé cue dútú ndihí cue tée cùu levitá cuáhãⁿ-güedé núú ndécú tã Juáá ndúcú tnúhu-güedé núú-dè ññú ná tée cùu-dé. ²⁰ Te ní càháⁿ ndáá-dé ní xáhaⁿ-dè xii-güedé:

—Yúhú, ñá díú Crístú Yaa ní tendaha Yá Ndiöxí véxi ñuyíú-a cùu-í — cächí-dé xáhaⁿ-dë.

²¹ Te ní xáhaⁿ tùcu-güedé:

—¿Te yoo cùu yohó váíⁿ? ¿Á yòhó cúu-n tē Èliás? —cächí-güedé xáhaⁿ-güedé xii-dé.

Te ní xáhaⁿ tē Juàá:

—Yúhú, ñá díú tē Èliás cúu-í — cächí-dé xáhaⁿ-dë.

Te xáhaⁿ tùcu-güedé:

—¿Te yòhó cúu-n tē ní cachi cue tēe ndéé sanaha quixi cáháⁿ tnúhu Yá Ndiöxí-áⁿ? —cächí-güedé xáhaⁿ-güedé xii-dé.

Te ní xáhaⁿ-dë:

—Ni ñá díú tēe-áⁿ cúu-í — cächí-dé xáhaⁿ-dë xii-güedé.

²² Te ní xáhaⁿ tùcu-güedé:

—¿Te ná tēe cùu yohó váíⁿ?, cuendá ducaⁿ nàcani tnúhu-ndí núú cuè tēe ní tendaha ñàha xii-ndí véxi-ndí, te cáháⁿ duuⁿ-n núu ná tēe cùu-n —cachí-güedé xáhaⁿ-güedé xii-dé.

²³ Te ní xáhaⁿ tē Juàá:

—Yúhú cúu-í tēe xica cáháⁿ xití yucu nàcuáa ní cáháⁿ ndí Chaiá, chi ndí-áⁿ ní cachí ndí: “Chí dáñá ichi cuehé ichi duha ndècu-ndo te tní-ndo ichi váha, chi véxi Yaa ío cùnuu”, duha ní cachí ndí —cächí tē Juàá xáhaⁿ-dë xii-güedé.

²⁴ Te cue tēe ndùcu tnúhu núú tē Juàá núu ná tēe cùu-dé, cue tēe-áⁿ ní tendaha ñàha cue tēe cùu fariséú xii-güedé. ²⁵ Te ní xáhaⁿ tùcu-güedé xii tē Juàá:

—¿Ná cuendá dáciuandute-n ñáyiu te núu ñá díú Crístú cúu-n, te ni ñá díú tē Èliás, te ni ñá díú tēe véxi cáháⁿ tnúhu Yá Ndiöxí cúu-n váíⁿ? —cächí-güedé xáhaⁿ-güedé xii-dé.

²⁶⁻²⁷ Te ní xáhaⁿ tē Juàá:

—Yúhú ní ngódó núu-í dáciuandute-í ñáyiu. Dico nchícúⁿ ñí tēe véxi, te tēe-áⁿ cúnùu-gá-dé dáciuúxí yùhú, chi yùhú cúu-í ñí tēe duuⁿ duuⁿ ñá túú tau nandaxi cuèdicó ñí chàu-dé dico quide-í chluⁿ-dë. Te tēe-áⁿ sa ñùhu tnahá-dé tnuú-ndó dícó-ni

sá ñá túú xini-ndó-dë —cächí-dé xáhaⁿ-dë.

²⁸ Duha ní cuu ñuú Bètábará ñuú cáá ndaa ingá xio yúte Jordán, yacáⁿ ní xindecu tē Juàá ní dáciuandute-dé ñáyiu.

Jèsús quidé càhnu iní-gá nchaa yíca cuèchi ñáyiu

²⁹ Te nduu tnéé ní xini tē Juàá Jèsús véxi yatni-gá núú ndécú-dé ndihi ñáyiu. Te ní xáhaⁿ-dë xii-yu:

—Chí cündèhe tēe-áⁿ, chi tēe-áⁿ cúu-dé Crístú Yaa ní tendaha Yá Ndiöxí véxi ñuyíú-a, te véxi-dé cada càhnu iní-dé nchaa yíca cuèchi ñáyiu ñuyíú. Te cùu-dé dàtná ñí mbéé quití ío váha iní-xi. ³⁰ Te ñuú tēe-áⁿ ní cachí-í sá cánchezúⁿ-dë quixi. Te cúnuu-gá-dé dáciuúxí yùhú, chi díhna-gá-dé sa ndècu ní cachí-í xii-ndo. ³¹ Te ni yùhú ñá túú xini-í-dé ní cùu, dico xica cuu-í dáciuandute-í ñáyiu cuendá nchaa ñáyiu israél quini ñàhá-yu xii-dé —cächí-dé xáhaⁿ-dë xii-yu.

³² Te ní xáhaⁿ tùcu-dé:

—Ní xini-í Espiritú Yá Ndiöxí ní quee-xi andíu véxi cuuⁿ-xi ngúndecu ndíhi ñaha-xi xii-dé, te dàtná cáá lõmá cáá Espiritú-áⁿ véxi cuuⁿ-xi. ³³ Te yùhú ñá túú xini-í-dé ní cùu, dico Yá Ndiöxí Yaa ní tendaha ñàha xii-í xíca cùu-í dáciuandute-í ñáyiu, Yaa-áⁿ ní cachí tnúhu-gá sá tēe na quini-í ngúndecu ndíhi Espiritú-gá sá véxi cuuⁿ andíu, te tēe-áⁿ taxi-dé Espiritú-gá cundecu ndíhi-o. ³⁴ Te yùhú ní xini-í-dé te xini ndáá-í sá Dèhe Dútú Ndiöxí cúu-dé. Te xíáⁿ cächí tnúhu-í xii-ndo —cächí tē Juàá xáhaⁿ-dë xii-yu.

Cue tēe díhna nuu xica cuu ndíhi Jèsús

³⁵ Te nduu tnéé-áⁿ ñuú-ni xíáⁿ ndécú tē Juàá ndíhi úú cue tēe xica cuu ndíhi-dé. ³⁶ Te ní xini-dé Jèsús ñúhú-gá ichi, te ní xáhaⁿ-dë xii cue tēe xica cuu ndíhi-dé-áⁿ:

—Chí cündèhe tēe-áⁿ, chi tēe-áⁿ cúu-dé Crístú Yaa ní tendaha Yá Ndiöxí véxi ñuyíú-a. Te cùu-dé

dàtná ìⁿ mbéé quiti ío váha iní-xi —
càchí-dé xáhaⁿ-dë.

³⁷ Te sá dúcáⁿ ní cáháⁿ té Juàá
núú cuè téé úú ndíhi-dé-áⁿ núú
ní chinchícúⁿ-güedé Jèsús. ³⁸ Te
ní nchócótó-gã ndàa sátá-gã, te
ní xiní-gá sá nchícúⁿ ñáhá-güedé
xii-gá. Te ní xáhaⁿ-gã xii-güedé:

—¿Ná nándücu-ndo? —cachí-gá
xáhaⁿ-gã xii-güedé.

Te ní xáhaⁿ-güedé:

—¿Ndèé ndécú-n, Ràbíí? —
càchí-güedé xáhaⁿ-güedé xii-gá.

Te Ràbíí-áⁿ quée-xí Mèstrú tnúhu
mee-güedé. ³⁹ Te ní xáhaⁿ Jèsús
xii-güedé:

—Chí nèhé te quini-ndó —
càchí-gá xáhaⁿ-gã.

Te ní xica-güedé cuáháⁿ-güedé, te
ní quexio-güedé núú quidé vèhe-gá.
Te ndëcu-ni-güedé ndíhi-gá ní cuaa,
chí dàtná òré caa cúmí sacuaa ní
sáa-güedé.

⁴⁰ Te úú cue téé-áⁿ ní tñi-güedé
tnúhu ní cáháⁿ té Juàá, te ní
chinchícúⁿ-güedé Jèsús. Te núú úú
cue téé-áⁿ, ìⁿ-dé nání-dé Ndríxí,
te ñaní-dé cúú tã Xímú, àdi Pelú
chí úú diù-dé. ⁴¹ Te té Ndríxí-áⁿ
ní nandücu-ni-dé ñaní-dé te ní
xáhaⁿ-dë:

—Ní naníhi-ndí téé cùu Mesías —
càchí-dé xáhaⁿ-dë.

Te Mèsiás-áⁿ quée-xí Cristú tnúhu
mee-güedé, Yaá ní tendaha Yã
Ndiöxí véxi ñuyíú-a. ⁴² Te ndëca té
Ndríxí ñaní-dé cuáháⁿ núú ndécú
Jèsús. Te òré ní xiní ñáhá Jèsús xii
té Xímú, te ní xáhaⁿ-gã:

—Yòhó cúú-n tã Xímú déhe té
Jónás, te vitna danàni ñaha-í Céfás
xii-n —càchí-gá xáhaⁿ-gã.

Te Céfás-áⁿ quée-xí Pèlú tnúhu
mee-güedé.

*Jèsús ní cáháⁿ-gá té Lìpé ndíhi té
Natanàél*

⁴³ Te nduu tnéé ní sani iní-gá
quíhíⁿ-gá distritú Galileá. Te ní
naníhi-gã ìⁿ téé nàni Lìpé, te ní
xáhaⁿ-gã xii-dé:

—Néhé ná quíhíⁿ-ó núú quíhíⁿ-í-a
—càchí-gá xáhaⁿ-gã.

⁴⁴ Te té Lìpé-áⁿ cúú-dë téé ñúú
Bètsaidá. Te diu-ni ñúú yacáⁿ cúú
ñúú té Ndríxí ndíhi té Pèlú. ⁴⁵ Te
té Lìpé ní naníhi tnáhá-dé ndíhi té
Natanàél, te ní xáhaⁿ-dë:

—Ní naníhi-ndí téé dii cuendú-xi
ní chídó tnúni ndíi Moisés ndíhi
dava-gá cue téé ní xóo cáháⁿ tnúhu
Yã Ndiöxí ndéé sanaha. Te téé-áⁿ
nání-dé Jèsús déhe té Chéé, téé ñúú
Nazàrét —càchí-dé xáhaⁿ-dë.

⁴⁶ Te ní xáhaⁿ tã Natanàél xii té
Lìpé:

—¿Te náa ío váha càa ñúú Nazàrét
núú da yacáⁿ quée téé cáháⁿ tnúhu
Yã Ndiöxí? —càchí-dé xáhaⁿ-dë.

Te ní xáhaⁿ tã Lìpé:

—Néhé ná quíhíⁿ-ó te quini-n —
càchí-dé xáhaⁿ-dë.

⁴⁷ Te òré ní xiní Jèsús té Natanàél
tá cùyatni-dé cuáháⁿ, te ní cáháⁿ-gá
cuendá-dé te ní cachí-gá:

—Téé véxi-áⁿ cúú-dë mei tã is-
ràèl, te ñã ìⁿ ndúu dandahú-dé
ñáyú —càchí-gá xáhaⁿ-gã.

⁴⁸ Te ní xáhaⁿ tã Natanàél xii
Jèsús:

—¿Te nása náquini ñáhá-n? —
càchí-dé xáhaⁿ-dë.

Te ní xáhaⁿ Jèsús:

—Yúhú sa ní xiní ñàhà-í xii-n òré
ndécú-gá-n càha yutnu ngúxí-áⁿ te
ni tã Lìpé vátá cáná ñàha-gá-dé xii-n
òré-áⁿ —càchí-gá xáhaⁿ-gã xii-dë.

⁴⁹ Te sá dúcáⁿ ní cáháⁿ-gá, núú ní
xáhaⁿ tã Natanàél xii-gá:

—Mèstrú, yòhó cúú-n Dèhe Dútú
Ndiöxí yíndàha-n ñáyú isràèl —
càchí-dé xáhaⁿ-dë xii-gá.

⁵⁰ Te Jèsús ní xáhaⁿ-gã:

—Cuendá sá ní xiní ñàhà-í xii-n
càha yutnu ngúxí xíáⁿ iní ñáhá-n,
dico cuéhé-gã núú sã quini-n —
càchí-gá xáhaⁿ-gã xii-dé.

⁵¹ Te ní xáhaⁿ tùcu-gá:

—Na càchí tnúhu ndáá-í sá sáa
nduu, te quini-ndó nàcaáⁿ andú.
Te quini-ndó cuè espíritu xínú
cuèchí núú Yã Ndiöxí sá ndàa
nuu-xi quide-xi núú cündëcu yúhú

Tée cùu ñaní tnàhá-ndó nchàa-ndo —cachí-gá xáhaⁿ-gã xii-güedé.

2

Vico tnãndaha ió ñuú Cànaá

¹ Te nduu úní sá dúcáⁿ nĩ cuu te ní xóo ìⁿ vico tnãndaha ñuú Cànaá, ìⁿ ñuú yíndèhu distritú Galileá. Te yacáⁿ ní xíndecu nãná Jèsús. ² Te tnàhá Jèsús ndihí cue tée xica cuu ndihí-gá ní cáháⁿ-yu cuáháⁿ-gá ndihí-güedé vico-áⁿ. ³ Te òré ní ndihí vinú, te ní xáhaⁿ nãná Jèsús xii-gá:

—Ñá túú-gã vinú ndécú ndihí-yu —cächí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Nãá, ñá túú xìni ñuhu-xi da yúhú cúñaha-n cuendá vinú-áⁿ, chi vátá tnàhá-gá òré quini-yu yoo cùu yúhú —cächí-gá xáhaⁿ-gã xii-aⁿ.

⁵ Te ní xáhaⁿ-aⁿ xii ñáiyu xìnu cuechi:

—Cada-ndo nchàa nacuaá na càháⁿ Jèsús —cächí-aⁿ xáhaⁿ-aⁿ.

⁶ Te yacáⁿ nútñi ìñú quídi yúú te queé dàtná ìⁿ cièndú lítrú ndute ìⁿ ìⁿ quídi-áⁿ. Te ndute-áⁿ nãndĩhi ñáiyu isràél ndáhã-yu te nàqueté-yu cóhõ-yu chi ducaⁿ tnàhí quidé-yu nàcuáa sãndáá iní-yu Yá Ndìòxí. ⁷ Te ní xáhaⁿ Jèsús xii nchaa cue tée xìnu cuechi:

—Nadachitú-ndó ndùte ndi nchaa quídi-áⁿ —cächí-gá xáhaⁿ-gã xii-güedé.

Te ní nadachitú-güedé. ⁸ Te ní xáhaⁿ-gã:

—Vitna te tava-ndo lùha, te canehe-ndo quĩhíⁿ cuáha-ndo tée quide vico —cachí-gá xáhaⁿ-gã xii-güedé.

Te ducaⁿ nĩ quide-güedé ní tava-güedé luha nèhe-güedé cuáháⁿ ní sáha-güedé tée quide vico. ⁹ Te ní xito ndéé tée quide vico-áⁿ, te sa ní nduu-xi vinú, te ñá túú ní xìní-dé ndéé véxi-xi, dico mee cuè tée xìnu cuechi sa naha-güedé núú nĩ tava-güedé. Ducaⁿ te tée quide

vico-áⁿ nĩ cana-dé tée tnãndaha. ¹⁰ Te ní xáhaⁿ-dè:

—Nchaa ñáiyu quide vico queñuhú-yu díhna-gá vinú váha. Te sa vãi vinú váha xihí-yu, te dàtnúni queñuhú-yu vinú ndáhú. Te yòhó díhna-gá vinú ndáhú ní queñuhu-n, te ndéé núú ní ndihí-ná ní queñuhu-n vinú váha —cächí tée quide vico-áⁿ xáhaⁿ-dè xii tée tnãndaha-áⁿ.

¹¹ Te sá nĩ nadatiu Jèsús ndute-áⁿ nĩ nduu-xi vinú cúú-xí ìⁿ chiuⁿ díhna nuu sã vã yoo tnàhí ndacu cada ní quide-gá ñuú Cànaá, ìⁿ ñuú yíndèhu distritú Galileá, te chiⁿ ní quide-gá-áⁿ cúú-xí ìⁿ chiuⁿ cahnu vihi, núu xiáⁿ ní cutnùni iní-yu sá ìo cahnu cuu-gá, te ní sãndáá iní ñhá nchàa cue tée xica cuu ndihí-gá.

¹² Te sátá nĩ yáha vico, te ní xica Jèsús ndihí nãná-gã, ndihí cue ñaní-gá, ndihí nchaa cue tée xica cuu ndihí-gá cuáháⁿ-yu ñuú Capernaúm. Te yacáⁿ ní xíndecú-yu ìⁿ úú nduu ndihí-gá.

Jèsús ñá túú tnàhá iní-gá nàcuáa quide ñáiyu xití veñúhu

(Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáiyu isràél vico pascuá, te ní xica Jèsús cuáháⁿ-gá ñuú Jerusalén. ¹⁴ Te sátá nĩ sáa-gá yacáⁿ, te ní xica-gá cuáháⁿ-gá veñuhu càhnu sá ìo cùnuu, te xití veñuhu-áⁿ nĩ xiní-gá ndécú ñáiyu dicó-yu ndicutu, mbéé ndihí lómá, te tnàhá ñáiyu dàma díhúⁿ núcõo-yu ní xiní-gá. ¹⁵ Te ní queheⁿ-gá ìⁿ úú yoho, te ní cáunuu tnàha-gá, te ní dáyuhu-gá ñáiyu ní queé-yu quehé veñúhu, ndihí ndicutú-yu ndihí mbéë-yu. Te cue ñáiyu dàma díhúⁿ-ãⁿ ní dãngõyo-gá díhúⁿ-yu, te ní dándúá-gá mèsá-yu. ¹⁶ Te ní xáhaⁿ-gã xii cue ñáiyu dico lómá:

—¡Queñuhu-ndo nchàa quití-a xití veñuhu-a! ¡Vá cáda-ndó vèhe núú

yáhu núu cúu vèhe Tàtá-í Dútú Ndiöxí! —càchí-gá xáhaⁿ-gã xií-yu.

¹⁷ Te xiáⁿ ní ndacu iní cue téé xica cuu ndihi-gá sá dúcáⁿ yòdo tñuní núu tütú-gá, te càchí-xi: “Ío cùyica iní-í chí ñá cuiní-yu canehe ñí-yu vehe Tàtá-í”, duha càchí-xi núu tütú-gá.

¹⁸ Te ní xáhaⁿ cuè téé isràél xii-gá:

—¿Ná cúu sã vã yõo tñàhí ndàcu cada, cada-n cuendá cutnùní iní-ndí sá cúu dùha taxi tñuní ñáhá-n xii-ndí-í? —càchí-güedé xáhaⁿ-güedé xii-gá.

¹⁹ Te ní xáhaⁿ Jèsús:

—Chí dängöyo veñúhu-a, te není xití úní nduu te sa nadáxínu-í —càchí-gá xáhaⁿ-gã xii-güedé.

²⁰ Te ní xáhaⁿ tucu cue téé isràél:

—Údico íñú cuía ní xindecuu-güedé ní sáá veñúhu-a, te yòhò cuiní-n nadáxínu-n xití úní-ndí nduu —càchí-güedé xáhaⁿ-güedé xii-gá.

²¹ Dico sá ní cáháⁿ-gá chí ñá díú cuendá veñúhu ní cáháⁿ-gá chí cuendá yiqui cùñú-gá ní cáháⁿ-gá. ²² Núu sáta ní xihí-gá, te ní ndoto-gá, te òré-áⁿ ní ndacu iní cue téé ní xica cuu ndihi-gá nàcuáa ní cáháⁿ-gá, núu xiáⁿ ní sándáá iní-güedé tñúhu yòdo tñuní núu tütú-gá. Te ducaⁿ te ní sándáá iní-güedé tñúhu ní cáháⁿ-gá.

Jèsús xiní-gá nàcuáa càa iní nchaa ñáyíu

²³ Te òré ndécú Jèsús vico pàscuá, te ío vai ñáyíu ní sándáá iní ñáhá xii-gá cuendá ío titní sá vã yõo tñàhí ndàcu cada ní quide-gá ní xiní-yu. ²⁴ Dico Jèsús ñá ní cáháⁿ-gá nchaa tñúhu ñúhu iní-gá, chí sa ní cutnùní iní-gá sá ñá túú cùu váha iní-yu. ²⁵ Te ñá túú xini ñúhu-gá ñí ñáyíu cùñaha nàcuáa càa iní nchaa tñàha ñáyíu-yu, chí mee-gá sa nàha ndáá-gá nàcuáa càa iní-yu nchaa-yu.

3

Jèsús ndihi té Nicòdemú

¹ Ní xindecu ñíⁿ téé cùu fariséu ní xínani-dé Nicòdemú, te ní cuu-dé ñíⁿ téé cùnno núu ñáyíu isràél. ² Te téé-áⁿ ñí sáháⁿ-dé niú ní cáháⁿ ndihi-dé Jèsús, te ní xáhaⁿ-dé:

—Mèstrú, yúhú ndihi dava-gá-güedé sa nàha-ndí sá Yá Ndiöxí ní tendarha ñàha-gá xii-n vèxi-n dànehé ñáhá-n xii-ndí, chí núu ñá túú Yá Ndiöxí ndécú ndihi-n, te vá ndácú-n càda-n nchaa sá vã yõo tñàhí ndàcu cada guide-n —cachí-dé xáhaⁿ-dè.

³ Te ní xáhaⁿ Jèsús:

—Na càchí tñúhu ndáá-í xii-n sá ncháá ñáyíu vá ná càcu saa tucu, te vá ndíhu ndaha ñàha Yá Ndiöxí xií-yu —càchí-gá xáhaⁿ-gã xii-dé.

⁴ Te ní xáhaⁿ tè Nicòdemú:

—¿Te nása cada ñíⁿ ñáyíu sa ní yí te cacu-ni tucú-yu? ¿Náa ndíhu tucú-yu xití nãñá-yu te cacu tucú-yu xito cùu uú-ãⁿ? —càchí-dé xáhaⁿ-dè xii-gá.

⁵ Te ní xáhaⁿ Jèsús:

—Na càchí tñúhu ndáá-í xii-n sá ncháa ñáyíu na ndúu ndoo nduu nine iní-xi cuú-yu ñáyíu ní na càcu saa ndihi ndute ndíhi Espiritú Yá Ndiöxí, ñáyíu-áⁿ ndíhu ndaha ñàha-gá xií-yu. ⁶ Te nchaa ñáyíu càcu ñuyíú-a, chí déhe ñáyíu ñuyíú-a cùú-yu. Te ñáyíu ní nduu ndoo ní nduu nine iní-xi, ñáyíu-áⁿ ní nduu tãhú-yu Espiritú Yá Ndiöxí te tàxi tñuní ñáhá-nã Espiritú-gá xií-yu. ⁷ Te vá cùñúhu-n tñúhu ní cáháⁿ-í-a, chí nchaa ñáyíu ní sándáá iní ñáhá xii-í ní nduu ndoo ní nduu nine iní-yu, te ñáyíu-áⁿ cùú-yu dàtná ñáyíu ní nacacu saa. ⁸ Táchí ndèni xiáⁿ tècú dóho-o xico-xi, dico ñá túú xiní-ó ndèè ichi vèxi-xi, te ní ñá túú xiní-ó ndèè ichi cuáháⁿ-xi. Ducaⁿ sãtnahá-xi cùu Espiritú-gá ndécú ndíhi ñáyíu ní nduu ndoo ní nduu nine iní-xi —càchí-gá xáhaⁿ-gã xii-dé.

⁹ Te dātñuní ní xí cáⁿ tnúhú tucu té Nicodemú núú-gá, te xáhaⁿ-dě xii-gá:

—¿Te nása ndùu tnúhu càháⁿ-n dùcaⁿ caháⁿ-n? —càchí-dé xáhaⁿ-dě xii-gá.

¹⁰ Te ní xáhaⁿ Jèsús:

—Yòhó cúu-n ìⁿ tée cùtnuní iní-xi, chi dàcuaha-n ñá yiu isràél, ¿te ñá tècú tnùní-n tnúhu càháⁿ-í-u? ¹¹ Te na càchí tnúhu ndáá-í xii-n sá nchúhú càháⁿ-ndí ìⁿ sá ní tecú tnùní-ndí, te càháⁿ ndáá-ndí cuendá ìⁿ sá ní xiní-ndí. Dico nchòhó ñá tècú tnùní-ndó tnúhu càháⁿ-ndí. ¹² Te ñá sàndáá iní-ndó tnúhu càháⁿ-í cuendá nchaa nàcuáa cùu ñuyúú-a, te uuⁿ-gá cada-ndo núu càháⁿ-í cuendá nchaa nàcuáa cùu andiu.

¹³ Vá yò ìⁿ sàá andiu, te cani-xi cuendú nàcuáa càa. Chi ìⁿ dñi díi-ni yúhú véxi cuuⁿ-í andiu, te cùu-í ñaní tnáhá-ndó nchàa-ndo ìⁿ nduu, ¹⁵ te ducaⁿ yáha-í cuendá nchaa ñá yiu na quindáá iní ñáhá xii-í te nduu táhú-yu cundecú-yu ndihi Yá Ndiòxí ni caa ni quíhíⁿ —càchí-gá xáhaⁿ-gá xii-dé.

Yá Ndiòxí ío cùu iní-gá ñá yiu ñuyúú-a

¹⁶ Te Yá Ndiòxí ío cùu iní-gá ñá yiu ñuyúú-a. Te ìⁿ dñi-ni Déhe-gá ndécú, te ní tendaha ñaha-gá ní quixi-gá ñuyúú-a, te núu na quindáá iní ñáhá ñá yiu, te vá cuíta nihnú-yu, chi nduu táhú-yu cundecú-yu ndihi-gá ni caa ni quíhíⁿ. ¹⁷ Te Yá Ndiòxí ñá túú ní tendaha-gá Déhe-gá quixi-gá ñuyúú-a dacuíta nihnu-gá ñá yiu, chi ní tendaha-gá Déhe-gá ní quixi-gá sá dáccu nihnu-gá ñá yiu ñuyúú-a núú ùhú núú ndàhú.

¹⁸ Nchaa ñá yiu sàndáá iní ñáhá xii Déhe-gá, te vá cuíta nihnú-yu. Te

nchaa ñá yiu ñá túú sàndáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sàndáá iní-yu Déhe Dútú Ndiòxí. ¹⁹ Chi ní quixi Déhe-gá ñuyúú-a ní dándíxí tùu-gá iní-yu cuendá cutnùní iní-yu nàcuáa ndùu cuendá Yá Ndiòxí te tníⁿ-yu ìⁿ ichi váha ni cùu, te ñá ní tnáhá iní-yu, chi ní cudíí-gá iní-yu nchaa sá cuèhé sá dúhá dàcúúxí sá vâha, núu xíáⁿ tá xíta nihnú-yu cuáháⁿ. ²⁰ Te nchaa ñá yiu quide nchaa sá cuèhé sá dúhá ñá tnáhá iní-yu cutnùní iní-yu nàcuáa ndùu cuendá Yá Ndiòxí, te ñá tníⁿ-yu tnúhu-gá cuendá yùhú-yu nduu tnùní nchaa sá quidè-yu. ²¹ Te nchaa ñá yiu ñùhu ichi ndáá cùiní-yu cutnùní iní-yu nàcuáa ndùu cuendá Yá Ndiòxí, te cùtnuní sá chindèe ñaha-gá xii-yu, chi quide váha-yu.

Té Juáá tée dàcuandute ñaha xii ñá yiu càháⁿ váha tucu-dé cuendá Jèsús

²² Te sátá dúcáⁿ ní cuu, te ní quee Jèsús cuáháⁿ-gá ndihi cue tée xica cuu ndihi-gá distritú Júdeá. Te yàcáⁿ ní xíndecu tnaa-gá ndihi-güedé ní xóo dacuandute-güedé ñá yiu. ²³ Te ndècu té Juáá ìⁿ xichi núú nání Ènón yatni ñuú Sàlém dacuandute-dé ñá yiu, chi yàcáⁿ ío váha ñùhu ndute, núu xíáⁿ ní xóo quíhíⁿ ñá yiu yàcáⁿ ní xóo cuandutè-yu. ²⁴ Duha ní cuu cùtnàhá vátá ngává-gá té Juáá vecaá.

²⁵ Te ní cacu ìⁿ cuendú ní càháⁿ cue tée xica cuu ndihi té Juáá ndihi ìⁿ ùú cue tée isràél, núu ndèdacàa sá vâha-gá cada ñá yiu cuendá nduu ìⁿ-yu. ²⁶ Te ní sáháⁿ-güedé núú ndécú tè Juáá ní xáhaⁿ-güedé:

—Mèstrú, tée ní quixi núú ní xíndecu-n ndàa ingá xio yúte Jòrdán, tée dñi cuendú-xi ní càháⁿ-n, tée-ãⁿ dacuandute-dé tnáhá-dé ñá yiu. Te ío

vài ñáiyu ní chinchícúⁿ ñáhá xii-dé
—càchí-güedé xáhaⁿ-güedé xii-dé.

²⁷ Te ní xáhaⁿ tē Juáa:

—Te vá yõo ñⁿ ndàcu cada ñⁿ chiuⁿ nacuáa cuu váha iní Yá Ndiõxí, te núu ñá túú mée-gá chindèe ñaha-gá xií-yu. ²⁸ Te nchòhó sa ñaha-ndo sá yúhú ní cáháⁿ ndáá-í sá ñà díú Crístú cúu-í, dico mee Yá Ndiõxí ní tendaha ñaha-gá yódó núu-í véxi núú Yáa-áⁿ. ²⁹ Te nchòhó xiní-ndó sá ñⁿ tée tnándaha te xíchí tnándaha ndihí-ná-dé cúndihí-dé. Te tée ní xica ndáhu ío cùdíí iní-dé ndédóho-dé nchaa tnúhu càháⁿ tée tnándaha-áⁿ. Te ducaⁿ sátnahá-xi cúu yúhú, chi ío cùdíí iní-í sá vái ñáiyu ta chinchícúⁿ ñáhá xii Jesús cuáháⁿ. ³⁰ Te uuⁿ-gá cuita cuu vai ñáiyu cutnùní iní-xi sá ío cùnuu-gá, te yúhú cuita ndóo ndee-í quíhíⁿ —càchí-dé xáhaⁿ-dé xii-güedé.

Crístú véxi cuuⁿ-gá andiu

³¹ Te ñⁿndii díí-ni Crístú Yáá véxi cuuⁿ andiu cùnuu-gá núú ñuyíu-a. Te nchaa ñáiyu ndècu ñuyíu-a cúu-yu ñáiyu ñuyíu iha, te càháⁿ-yu sá cúu-xí ñuyíu-a. Dico Crístú Yáá véxi cuuⁿ andiu ³² càháⁿ-gá ñⁿ sá ní xiní-gá, te càháⁿ-gá ñⁿ sá ní tecu dóho-gá. Te ñá túú cuíní-yu quindáá iní-yu tnúhu càháⁿ-gá. ³³ Te nchaa ñáiyu tnèi tnúhu càháⁿ Yáá véxi cuuⁿ andiu-áⁿ càháⁿ-yu sá tnúhu Yá Ndiõxí cúu-xí ñⁿ sá ndáa. ³⁴ Te Déhe-gá Yáá véxi cuuⁿ andiu càháⁿ-gá mee-ni tnúhu-gá. Te ñá ùhú iní-gá ní sáñaha-gá Espíritú-gá ndécú ndihí Déhe-gá. ³⁵ Te Dútú Ndiõxí ío cúu iní-gá Déhe-gá, núu ní xáhaⁿ-gá sá mée-gá taxi tnùní-gá nchaandi túhú sá ío. ³⁶ Te nchaa ñáiyu na quindáá iní ñáhá xii Déhe-gá, ñáiyu-áⁿ cundecú-yu ndihí-gá ní caa ní quíhíⁿ. Te nchaa ñáiyu vá quindáá iní ñáhá xii Déhe Yá Ndiõxí ío dandòho ñaha-gá xií-yu.

4

Jèsús ndihí ñⁿ ñaha Sàmariá

¹ Te ní níhí cue tée cúu fariséú tnúhu sá vai-gá ñáiyu ta chinchícúⁿ ñáhá xii Jesús. Te ducaⁿ vai-gá-yu ta dàcuandute-gá cuáháⁿ dàcúúxí tē Juáa. ² Te cuēi ñá díú mée-gá dācuandute ñaha-gá xií-yu, dico cue tēe xica cuu ndihí-gá dācuandute ñaha-güedé xií-yu. ³ Te ní níhí Jèsús tnúhu nācuáa càháⁿ cue tēe cúu fariséú, núu ní ndee-gá distritú Jùdeá cuánuhú tucu-gá distritú Galileá.

⁴ Te ichi ñùhu-gá ní nayáha-gá distritú Sàmariá. ⁵ Te ní sáá-gá ñⁿ ñuu nání Sicár te ñuu-áⁿ yíndèhu-xi distritú Sàmariá. Te xíaⁿ cáá yàtni ñuhu núú ní sáha táhú ndii Jàcób déhe ndii ndii Chéé. ⁶ Te yàcáⁿ cáá dòco ní cuu cuendá ndii Jàcób. Te cúu-xi datná cuádava nduu ñùhu Jesús ichi, te ío ní xáú-gá núu ní sáá-gá yuhu dòco-áⁿ ní ngóo-gá ndétátú-gá. ⁷⁻⁸ Te ní xica cue tēe xica cuu ndihí-gá cuáháⁿ-güedé xití ñuu Sicár cuánguuaⁿ-güedé sá cáxí-güedé. Te yuhu dòco-áⁿ núcõo-gá ní sáá ñⁿ ñadihí ñaha distritú Sàmariá véxi quéhnu-aⁿ ndute, te ní xáhaⁿ Jèsús:

—Taxi táhú luha ndute na cohó-í —càchí-gá xáhaⁿ-gá.

⁹ Te ní xáhaⁿ ñādihí-áⁿ:

—¿Ná cuendá da núu-í xicáⁿ-n ndute cohó-n? Te yòhó cúu-n tēe israél, te yúhú cúu-í ñaha Sàmariá —càchí-aⁿ xáhaⁿ-aⁿ xii-gá.

Te ducaⁿ ní xáhaⁿ-aⁿ, chi ñá túú ndècu váha ñáiyu israél ndihí ñáiyu distritú Sàmariá. ¹⁰ Te ní xáhaⁿ Jesús xii-aⁿ:

—Ñá cútñuní iní-n nã taxi Yá Ndiõxí xii-n, te ní ñá cútñuní iní-n yòo xicáⁿ ndute núu-n. Te núu dicó xini-n yòo cuu yúhú á, te da mee-n cācáⁿ-n ndute núu-í cohó-n, te yúhú taxi-í ndute cundecu ndihí-n núu cuáháⁿ núú véxi —càchí-gá xáhaⁿ-gá.

11 Te ní xáhaⁿ tùcu ñadihí-án:

—Tátá, ñí sá quéhnu-n ndùte ñá túú nèhe-n, te doco-a cùnú víhí, te ñá túú ndèe quínguehe-n ndùte taxi-n coho-í. 12 Ndíi Jàcób ñaní tñáhá-ndí ní xíndecu ndèe sanaha ñí cadúha ndíi doco-a ñí tóo ndute ní xihí ndíi, ndihí nchaa déhe ndíi, ndihí nchaa quití ndíi, te ní ndóo cùu cuendá-ndí. ¿Te násai, te yòhó cùnù-gá-n dàcúúxí ndíi-án? — cächí-aⁿ xáhaⁿ-aⁿ xì-gá.

13 Te ní xáhaⁿ Jèsús:

—Nchaa ñáyiu xihí ndute doco-a, te vâ cúú vétú dúcáⁿ iní-yu chí dayìchí ñáhá-ní tùcu-xi ndute-a. 14 Dico nchaa ñáyiu na còho ndute na cuáñaha-í, te vâ ñíⁿ ndùu-gá dayìchí ñáhá-xí ndùte-áⁿ xii-yu, chí ndute cuáñaha-í cúú-xí ndùte váha-gá. Te dàtná quée ñihni ndute xití doco-a, nchaa-ni nduu ñùhu ñá túú yìchí, ducaⁿ sàtnahá-xi cada-xi chí candeca-xi iní-yu ñí caa ñí quíhíⁿ, te núu na còhó-yu ndute cuáñaha yùhú —cächí-gá xáhaⁿ-gá xii-aⁿ.

15 Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vâ dáyichí ñáhá tñáhí-gá-xi ndute. Te vâ quíxí-gá-í quixí quéhnu-í ndute doco-a — cächí-aⁿ xáhaⁿ-aⁿ xì-gá.

16 Te ní xáhaⁿ Jèsús:

—Cuáháⁿ cuángàna yìi-n, te quixi-ndo iha —cachí-gá xáhaⁿ-gá xii-aⁿ.

17 Te ní xáhaⁿ-aⁿ:

—Ñá túú yìi-í —cächí-aⁿ xáhaⁿ-aⁿ xì-gá.

Te ní xáhaⁿ tùcu Jèsús:

—Ndáá càháⁿ-n sã ñà túú yìi-n.

18 Dico ní cuu úhúⁿ tée càndeca-n, te tée ndèca-n vitna chí ñá díú yìi-n cuu-dé, te ndáá càháⁿ-n sã ñà túú yìi-n —cachí-gá xáhaⁿ-gá xii-aⁿ.

19 Te sá dúcáⁿ ñí xáhaⁿ-gá núu ní xáhaⁿ tùcu-aⁿ:

—Tátá, yúhú sání iní-í sá yòhó cúú-n ñíⁿ tée càháⁿ tnúhu Yá Ndiòxí. 20 Te cue ñaní tñáhá-ndí ní xíndecu

ndéé sanaha ñí xóo cada càhnú-yu Yá Ndiòxí tindúú-a, dico nchòhó ñáyiu isràél cächí-ndó sã ndéé ñuú Jerusàlén cada càhnu-o-gá — cächí-aⁿ xáhaⁿ-aⁿ xì-gá.

21 Te ní xáhaⁿ Jèsús xii-aⁿ:

—Ñíⁿ tnúhu na càháⁿ-í-a, te quíndáá iní-n. Sa ta cùyatni sáá nduu sá ñà díú-gã mee-ni tindúú-a, te ñí ñà díú-gã mee-ni ñuú Jerusàlén cada càhnu-ndo Tátá-ó Dütú Ndiòxí, chí ndèni ní cuu cada càhnu-ndo-gá. 22 Te nchòhó cue ñáyiu Sàmariá chí ñá cùtnuní iní-ndó ñá cúú sã quidé càhnu-ndo, dico nchúhú ñáyiu isràél, chí cùtnuní iní-ndí ná cúú sã quidé càhnu-ndí. Chí ñíⁿ tée isràél véxi-dé dàcácu nihnu-dé ñáyiu cuendá vâ quíhíⁿ-yu núú ùhú núú ndàhú. 23 Te není vitna ngüita-yu cada càhnu ndisá-yu Tátá-ó Dütú Ndiòxí, te cadá-yu ñí yùhu ñí iní-yu sá cúú-xí-gã, chí mee-gã ducaⁿ cuíni-gá cadá-yu cada càhnú-yu-gá.

24 Te Yá Ndiòxí chí ñíⁿ espíritu cúú-gã. Te nchaa ñáyiu na càda cahnu ñaha, te cadá-yu ñí yùhu ñí iní-yu sá cúú-xí-gã te cadá-yu dàtná càháⁿ tnúhu-gá —cächí-gá xáhaⁿ-gá xii-aⁿ.

25 Te ní xáhaⁿ ñàdihí-án:

—Xini-í sá quíxí tée cùu Mesías, tée cächí-güedé nání Cristú. Te tée-án ná sàa-dé, te cachí tnúhu ndáá-dé nàcuáa cuu —cächí-aⁿ xáhaⁿ-aⁿ xì-gá.

26 Te ní xáhaⁿ Jèsús:

—Díu tée-án cúú yùhú tée ndàtnúhu ndihí-n —cächí-gá xáhaⁿ-gá xii-aⁿ.

27 Te òrè-áⁿ ñí ndexio cue tée xica cuu ndihí-gá, te ní cuñúhu-güedé sã ndàtnúhu-gá ndihí ñadihí-án. Dico ñí ñíⁿ-güedé ñá ní xicáⁿ tnúhú-güedé núú-gá núu ná cuendú ndàtnúhu-gá ndihí ñadihí-án. 28 Ducaⁿ te ní dándóo ñadihí-án yoó ndute-aⁿ xíaⁿ, te ní xica-aⁿ cuánuhú-aⁿ ñuú

cútnũhu-aⁿ ñáyiu cuèndá Jèsús. ²⁹ Te ní xáhaⁿ-aⁿ:

—Chí nèhé ná quihíⁿ-ó, chi quini-ndó ná cúú ñⁿ téé nùcúo yuhu dòco-ánⁿ nũú ñá díú Crìstú Yáá ní tendaha Yá Ndiòxí véxi ñuyíú-a cùu-dé nũú ní cáháⁿ ndáá-dé nàcuáa cùu ndecu-í —càchí-aⁿ xáhaⁿ-aⁿ xii-yu.

³⁰ Te sá ñí níhí ñáyiu ñuú-ánⁿ tnũhu, xíáⁿ ní xicá-yu cuáháⁿ-yu. ³¹ Te òré vátá sáá-gá-yu xíáⁿ ní xáhaⁿ cuè téé xica cuu ndihi-gá xii-gá:

—Mèstrú, cudèhñu na cudehñu-o —cachí-güedé xáhaⁿ-güedé xii-gá.

³² Te ní xáhaⁿ-gá:

—Ndècu ñⁿ sá cáxi-í, ñⁿ sá ñà túú xini nchòhó —càchí-gá xáhaⁿ-gá xii-güedé.

³³ Te cue téé xica cuu ndihi-gá xitnaha-güedé:

—Váa íó ñáyiu ní quixi nehe sá ñí xexi-gá nũú duha càháⁿ-gá —càchí-güedé xitnaha-güedé.

³⁴ Te ní xáhaⁿ-gá:

—Dàtná cùnì-ndó cùu vétú iní-ó òré xéxi-ó, ducaⁿ cùu vétú iní-í quidè-í nchaa nàcuáa ní cáháⁿ Yá Ndiòxí Yáá ní tendaha ñaha xii-í véxi-í ñuyíú-a, te chiⁿ-gá ío cùdí iní-í dandihí-í. ³⁵ Te nchòhó càchí-ndó sá cùmání cùmí-gá yóó te cuu itú. Dico yúhú càchí-í sá cùndehe-ndo ñáyiu-áⁿ, chi sa ndècu túha-yu, dàtná cúú-ná itú sá sà ní cuu-ná natahu-o cùu-yu, chi sa ndècu túha-ná-yu cundedóho-yu tnúhu-í. ³⁶ Te dàtná cúú ñáyiu nàtahu itú chi sa cúhuⁿ yáhu-yu, ducaⁿ sàtnahá-xi cùu ñáyiu na càháⁿ tnúhu-í, chi cuáhaha-í sá ndúú tãhú-yu na sáá nduu. Te nchaa ñáyiu na tnè tnúhu-í te nduu tãhú-yu cundecu-í ndihí-yu ni caa ni quihíⁿ. Te dàtná cúú ñáyiu ní chíhi tatá-xi, ndihí ñáyiu ní natahu itú-xi cùdí-ná iní-yu. Ducaⁿ sàtnahá-xi cùu ñáyiu na càháⁿ tnúhu-í. ³⁷ Chi ndáá quéé-xí nàcuáa cuáháⁿ ñⁿ cuèndú sá càchí-xi: “Tucu téé ní chíhi tatá, te tucu téé ní

natahu”, duha cuáháⁿ cuèndú-án. ³⁸ Te yúhú tendaha ñaha-í xii-ndo quihíⁿ-ndó cáháⁿ-ndó tnúhu-í núú sá ní yáha-güedé ní cáháⁿ-güedé tnúhu-í. Te nchòhó quihíⁿ-ndó dicó-ná nduu cuèndá-ndó chiⁿ-án —càchí-gá xáhaⁿ-gá xii-güedé.

³⁹ Te ío cuéhé ñáyiu ñuú-ánⁿ ñí xindèdóho-yu cuèndú ní cani ñadihí-ánⁿ nũú-yu sá Jèsús ní xáhaⁿ-gá nchaa nàcuáa quide-aⁿ, te xíáⁿ ío vài-yu ní sándáá iní-yu Jèsús. ⁴⁰ Te ní quexió-yu núú ndécú-gá, te ní cáháⁿ ndàhú-yu núú-gá sá quèndó-gá ñuú-yu, núú xíáⁿ ní xindecu-gá ndihí-yu úú nduu. ⁴¹ Te ío cuéhé-gá-yu ní sándáá iní-yu tnúhu ní cáháⁿ mée-gá. ⁴² Te ní xáhãⁿ-yu xii ñadihí-ánⁿ:

—Vitna te ñá díú mèe-ni tnúhu ní cáháⁿ-n ní sándáá iní-ndí-gá, chi ní cáháⁿ mée-gá ní xindèdóho-ndí vitna núú ní sándáá ndisa iní-ndí sá díú-gá cúú-gá Crìstú Yáá ní tendaha Yá Ndiòxí véxi ñuyíú-a dàcácu nihnu-gá ñáyiu núú ùhú núú ndàhú —càchí-yu xáhãⁿ-yu xii-aⁿ.

Jèsús quidè tãtna-gá déhe ñⁿ téé ndèé chíúⁿ nũú gobièrnú

⁴³ Te nduu úní ní nucúhuⁿ Jèsús ichi cuáháⁿ-gá distritú Galiléa. ⁴⁴ Te cuáháⁿ-gá yàcáⁿ, chi mee-gá ní cachí-gá sá nũú ñⁿ téé na càháⁿ-dé tnúhu Yá Ndiòxí ñuú núú ní cacu-dé, te ñá túú nèhé-yu sá yíñùhu núú-dé. ⁴⁵ Te òré ní sáá-gá distritú Galiléa, te ío váha ní cuu iní ñáhãⁿ-yu xii-gá, chi cuèndá tnàhá-yu ní xindecu ndihi-gá vico pascuá ñuú Jerusalén. Te yàcáⁿ ní xini-yu nchaa sá ñí quide-gá.

⁴⁶ Te ní sáháⁿ tucu-gá ñuú Cànaá ñⁿ ñuú yíndèhu distritú Galiléa, núú ñí nadatiu-gá ndute ní nduu-xi vñú. Te ñuú Capèrnaúm ndécú ñⁿ téé ndèé chíúⁿ nũú tée cùu gobièrnú, te téé-ánⁿ cùhú ñⁿ déhe-dé. ⁴⁷ Te ní níhí-dé tnúhu sá ñí ndee Jèsús distritú Júdeá ní ndexio-gá

distritú Galileá, núu ní sáháⁿ-dé núu ndécú-gá, te ní cáháⁿ ndáhú-dé núu-gá sá quihíⁿ-gá cada tátna-gá déhe-dé, chi sá ndècu-na-dé sá cúú-dé. ⁴⁸ Te ní xáhaⁿ Jèsús xii-dé:

—Nchòhó, chi vá quìndáá ini ñáhá-ndó xii-í te núu vá cáda-í ìⁿ sá vâ yòo tnahí ndàcu cada quini-ndó —càchí-gá xáhaⁿ-gá xii-dé.

⁴⁹ Te ní xáhaⁿ tùcu téé cùhú déhe-xi-áⁿ xii-gá:

—Tátá, cundee ìní-n ná quihíⁿ-ni-o càda tátna-n dèhe-í ná cuu-dé, chi càhú víhí tnahá-dé —càchí-dé xáhaⁿ-dè xii-gá.

⁵⁰ Te ní xáhaⁿ Jèsús:

—Cuanùhú te quini-n nã ní ndúha déhe-n —càchí-gá xáhaⁿ-gá xii-dé.

Te ní sándáá iní-dé tñúhu ní cáháⁿ Jèsús, te cuánuhú-dé. ⁵¹ Te ñúhu-dé ichi cuánuhú-dé ní sánú tnahá ñáhá cuè téé xinu cuechi núú-dé. Te ní xáhaⁿ-güedé sá sá ta ndúha déhe-dé cuáháⁿ.

⁵² Te ní xicáⁿ tñúhú-dé núu-güedé ná òré cúú-xí ní ngüíta-xi ta quètaú cuéhé-dé. Te ní xáhaⁿ-güedé:

—Icu dàtná òré caá ìⁿ sacuaa ní nchíco-dé cahni —càchí-güedé xáhaⁿ-güedé xii-dé.

⁵³ Te tátá téé cùhú-áⁿ ní ndacu iní-dé sá díú òré ní quètaú cuéhé-dé ní cáháⁿ ndihí-dé Jèsús ní xáhaⁿ-gá sá ndúha déhe-dé. Te xiáⁿ núu ndi nchaa téé-áⁿ vehe-dé ní sándáá ini-yu Jèsús.

⁵⁴ Te sá ní quide-gá-áⁿ cúú ùú xito quide-gá sá vâ yòo tnahí ndàcu cada. Te sá ní quide-gá xito cùu uú-áⁿ cúú-xí sá ní quide-gá cútnáhá ní ndee-gá distritú Jüdeá cuánuhú-gá distritú Galileá.

5

Jèsús quidé tátna-gá ìⁿ téé cùhú ìⁿ xichi núú nání Bètesdá

¹ Te sáta dúcáⁿ ní cuu, te ní tnahá nduu ní quide ñáyiú israhél ìⁿ vico. Te ní sáháⁿ Jèsús ñúú Jerusalén. ² Te ní càa xico yuhu ñúú-áⁿ ñúhú dòco, te titní yèhe-xi ndecu. Te

ìⁿ yèhe-xi-áⁿ nání Yùyehe Mbéé, te yatni xiáⁿ caá ìⁿ tanquí ndute dàna-ni-yu Bètesdá tñúhu mèe-yu tñúhu hèbreú, te yuhu tànquí-áⁿ caá ùhúⁿ corrèdór, ³ Te xití corrèdór-áⁿ xindecu cuéhé ñáyiú cùhú, ñáyiú cuáá, ñáyiú yacua, ñáyiú ñá cúú-gá candá nihnu, ndètú-yu candá ndute-áⁿ. ⁴ Chi nihí-yu tñúhu sá áma nihnu cùuⁿ ìⁿ espíritú xínú cuèchi núú Yã Ndiòxí, te dàcandá-xi ndute ñúhu tanquí-áⁿ. Te ñáyiú díhna nuu nà quée xití ndute-áⁿ, te òré-ni ndúha-yu. ⁵ Te yacáⁿ ñútnáhá ìⁿ téé ní cuu ócò sáhúⁿ úní cuíá sã cùhú-dé. ⁶ Te ní xini Jèsús caá-dé, te ní cutnùní ini-gá sá ní cuu cuéhé cuíá cùhú-dé, te ní xáhaⁿ-gá:

—¿Cuíní-n ndúha-n-áⁿ? —càchí-gá xáhaⁿ-gá xii-dé.

⁷ Te ní xáhaⁿ téé cùhú-áⁿ:

—Táta, vá yòo nihí-í dàquée ñaha xii-í xití tànquí-a òré càndá ndute, chi òré cuíní-í quée-í, te ingá-ni tucú-yu quèndúú-yu núú-í cuángueé-yu —càchí-dé xáhaⁿ-dè xii-gá.

⁸ Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gá xáhaⁿ-gá xii-dé.

⁹ Te òré-ni-áⁿ ní ndúha téé cùhú-áⁿ, te ní ndaca-ni-dé yuu-dé, te ní xica-dé cuáháⁿ-dé. Te nduu-áⁿ cúú-xí nduu ndetatú ñáyiú, ¹⁰ núu ní xáhaⁿ cuè téé israhél xii téé ní cuhu-áⁿ:

—Vitna cùu-xi nduu ndetatú-ó núu vá cúú cuído-n yuu-n —cachí-güedé xáhaⁿ-güedé xii-dé.

¹¹ Te ní xáhaⁿ-dè:

—Mee téé ní quide tátna ñaha xii-í ní cachí-dé sá ndácàni-í yuu-í, te caca-í —càchí-dé xáhaⁿ-dè xii-güedé.

¹² Te ní xáhaⁿ-güedé:

—¿Te ná cúú téé ducaⁿ ní cachí sá ndácàni-n yuu-n te caca-n-í? —càchí-güedé xáhaⁿ-güedé xii-dé.

¹³ Dico téé ní cuhú-áⁿ ñã túú ní cutnùní iní-dé ná cúú téé ní quide tátna ñaha xii-dé, chi Jèsús òré-ni ní xica-gá cuáháⁿ-gá tnuú nchaa ñáyiú

chitu xĩndecu xíaⁿ. ¹⁴ Te sáta dúcáⁿ te ní naníhí tnáhá Jèsús ndíhi téé ní quide tátna-gá-áⁿ xití veñũhu càhnu sá ïo cũnuu, te ní xáhaⁿ-gã xii-dé:

—Ní xiní-n nã ní ndũha-n-va. Te vitna vá cáda-gã-n nãndi sá cuèhé sá dúhá, chi núu na cáda-ni-n ña, te quixi ingá cuèhé, te vihi-gã ndoho-n —càchí-gá xáhaⁿ-gã xii-dé.

¹⁵ Ducaⁿ te ní xica téé ní cuhú-áⁿ cuãngũñaha-dé xii cue téé isràél sá Jèsús ní quide tátna ñaha-gã xii-dé. ¹⁶ Núu sáta ní níhí cue téé isràél tnũhu, te ní cuu úhú iní-güedé Jèsús. Te ní cuiní-güedé cahni ñaha-güedé xii-gá cuendá sá dúcáⁿ ní quide tátna-gá nduu ndètatú-güedé. ¹⁷ Te ní xáhaⁿ Jèsús xii-güedé:

—Tãtà-í Dútú Ndiõxí quidé chiũⁿ-ni-gá nõu xíaⁿ quidé chiũⁿ-í tnàhá-í —càchí-gá xáhaⁿ-gã xii-güedé.

¹⁸ Te ní cudééⁿ-güedé sá ñã ní cãnehe íi-gã nduu ndètatú-güedé, te ní cuiní-güedé cahni ñaha-güedé, te uuⁿ-gá ní cuiní-güedé cahni ñaha-güedé xii-gá sá ní cachí-gá sá Tãtá-gã cúu Dútú Ndiõxí, chi ní sani iní-güedé sá cuiní-gá nútnahá-gá Yã Ndiõxí nõu xíaⁿ ïo ní cudééⁿ-güedé.

Jèsús Déhe Yã Ndiõxí táxi tnùní-gá

¹⁹ Te ní xáhaⁿ tùcu Jèsús xii-güedé:

—Na càchí tnũhu ndáá-í xii-ndo sá yũhú chi ni ñⁿ sá ñã ndácù-í cada mee-í nõu ñã túú mèe Tãtà-í dánèhé ñáhá-gã xii-í nàcuáa cada-í, chi nchaa sá quidé Tãtà-í quidè-í tnàhá-í. ²⁰ Te Tãtà-í ïo cũu iní ñáhá-gã xii-í nõu dánèhé ñáhá-gã nchaa nàcuáa quide-gá. Te vitna ndècu vai-gá chiũⁿ tahu-gá cada-í, chiũⁿ sá vátá quiní-gá-ndó cáda-í nàcuáa cuñũhu vihi-ndo. ²¹ Chi Tãtà-í dandòto-gã ñáyiu ní xihí. Te yúhú cada-í te nduu táhú nchaa ñáyiu càchí iní-í cundecu ndíhi ñáhá-yu xii-í ni caa ni quihíⁿ.

²² Te na sáa nduu te ñã díú Tãtà-í cada ndáá-gã cuèchi ñáyiu, chi ní cachí-gá sá yũhú cada ndáá-í ²³ cuendá nchaa ñáyiu canehé-yu

sá yĩñũhu núu-í dàtná nèhẽ-yu sá yĩñũhu núu Tãtà-í Yáá ní tendaha ñaha xii-í véxi-í ñuyiú-a. Te nchaa ñáyiu ñã túú nèhe sá yĩñũhu núu yũhú, te ni nõú Tãtà-í ñã túú nèhé-yu sá yĩñũhu.

²⁴ Te na càchí tnũhu ndáá-í xii-ndo sá nchaa ñáyiu na cundedóho tnũhu na càháⁿ-í, te núu na quindáá iní-yu Dútú Ndiõxí Yáá ní tendaha ñaha xii-í véxi-í ñuyiú-a ña, te vá cuíta nihnú-yu chi nduu táhũ-yu cundecú-yu ndíhi-gá ni caa ni quihíⁿ. ²⁵ Te vitna na càchí tnũhu ndáá-í xii-ndo sá nchaa ñáyiu ndècu ichi cuèhé ichi duha cùu-yu dàtná ñⁿ ñáyiu ní xihí, te vitna ní sáa nduu cundedóho-yu tnũhu càháⁿ yúhú Déhe Dútú Ndiõxí, te nchaa ñáyiu na quindáá iní-xi, te naníhí tàhú-yu. ²⁶ Te dàtná quidé mèe Tãtà-í dácãcu nihnu-gã ñáyiu, ducaⁿ ní cachí-gá cada-í dácãcu nihnu-í-yu. ²⁷ Te ní cachí-tucu-gá sá sáa ñⁿ nduu, te cada ndáá-í cuèchi nchaa ñáyiu ñã túú quide ndáá, chi yúhú táxi tnùní-í, te cùu-í ñani tnáhá-ndó nchaa-ndo. ²⁸ Te ni vã cũñũhu-ndo tnũhu càháⁿ-í, chi sáa nduu te nchaa ñáyiu ní xihí tecú dóho-yu tnũhu càháⁿ-í. ²⁹ Te ndoto nchaa ñáyiu ní quide váha cundecu ndíhi-í-yu ni caa ni quihíⁿ, te ndoto tnàhá nchaa ñáyiu ní quide cuèhé ní quide duha, te ñáyiu-áⁿ quihíⁿ-yu núu ùhú núu ndàhú.

Yã Ndiõxí chindèe tnũhu-gá Jèsús

³⁰ Te yúhú, chi ni ñⁿ sá ñã ndácù-í cada mee-í nõu ñã díú mèe Yã Ndiõxí táuchiuⁿ-gã nàcuáa cada-í. Te quide ndáá-í cuèchi ñáyiu nàcuáa tàxi tnuní-gá cada-í, te yúhú ñã túú quide-í sá cúu iní mèe-í chi Tãtà-í ní táuchiuⁿ-gã nàcuáa cada-í. ³¹ Te núu na càháⁿ-í sá mèe-í táxi tnùní-í, te vá quindáá iní-ndó. ³² Chi Yã Ndiõxí chindèe tnũhu ñaha-gã xii-í, te yúhú xini-í sá tnũhu càháⁿ-gã cuendá-í cúu-xí ñⁿ sá ndáá. ³³ Te

nchòhó ní téchíúⁿ-ndó cuè téé ní sáháⁿ ní ndúcuⁿ tnùhu-güedé núú tē Juàá nùu ná tnùhu cáháⁿ-dé cuendá-í, te téé-ǎⁿ ní cáháⁿ ndáá-dé nàcuáa ndùu cuendá-í. ³⁴ Dico yúhú, chí ñá túú xini ñuhu-í ìⁿ ñáyiú ñuyíú-a chindee tnùhu ñáhá-yu xii-í, dico té Juàá ní cáháⁿ váha-dé cuendá-í, te xiǎⁿ càchí tnùhu tucu-í cuendá quindáá iní-ndó, te naníhí tǎhú-ndó. ³⁵ Te dàtná cuiní-ndó cùu ìⁿ ití ndéñuhú te dǎyehé-xi, ducaⁿ sǎtnahá-xi ní cuu té Juàá, chí sacú-ni nduu ío ní cudíⁿ iní-ndó tnùhu ní cáháⁿ-dé. ³⁶ Te váha-ni ní cáháⁿ té Juàá, dico yúhú chí ndècu nchaa sá tá quide-í véxi nàcuáa ní táuchíúⁿ Yǎ Ndiòxí cada-í, te nchaa xiǎⁿ cúu-xi ìⁿ sá cùtnùní iní-ndó sá méé Yǎ Ndiòxí ní tendaha ñaha-gá xii-í véxi-í ñuyíú-a. ³⁷ Te ñu-ni-gá chindèe tnùhu ñaha-gá xii-í, dicó-ni sá méé-ndó ñá túú cuiní-ndó cada cuendá-ndó tnùhu cáháⁿ-gá, te ní ñá túú xini-ndó nàcuáa cǎa-gá. ³⁸ Te ñá túú quèe iní nchòhó tnùhu cáháⁿ-gá, chí ñá túú sàndáá iní ñáhá-ndó xii yúhú Déhe-gá. ³⁹ Te dàcuaha vihi-ndo tutú ndèe tnùhu-gá, chí sàni iní-ndó sǎ xiǎⁿ-ni dacuàha-ndo te naníhí tǎhú-ndó. Te váha-ni quide-ndo, chí ñu tutú-ánⁿ cáháⁿ-xi cuendá-í. ⁴⁰ Te nchòhó ñá túú cuiní-ndó quindáá iní ñáhá-ndó xii-í cuendá naníhí tǎhú-ndó.

⁴¹ Te yúhú, ñá túú xini ñuhu-í sá cáda cǎhnu ñaha-ndo xii-í. ⁴² Dico sá xini-í nàcuáa sàni iní-ndó chí ñá túú cùu iní-ndó Yǎ Ndiòxí. ⁴³ Te yúhú véxi-í ñuyíú-a chí Tǎtà-í ní tendaha ñaha-gá, te nchòhó ñá túú cuiní-ndó tnè-ndo tnùhu cáháⁿ-í, dico núu quixi ìⁿ tée cáháⁿ cuendá méé-xi, chí quindáá iní-ndó. ⁴⁴ Te ná váha nchòhó ná tnè-ndó tnùhu cáháⁿ-í, te xio xio-ni quide cǎhnu tnaha-ndo, te ñá túú quide cuendá-ndó sǎ tnùhu váha cáháⁿ Yǎ Ndiòxí cuu xii-ndo. ⁴⁵ Te vá cání iní-ndó sǎ yúhú ndàcáⁿ cuèchí-í núú Tǎtà-í nàcuáa quide-ndo, chí ndí Moisés

ní chídó tnùní ndíi núú tütú Yǎ Ndiòxí nàcuáa quide-ndo sá ñá túú quide váha-ndo, te mee-ndo sàni iní-ndó sǎ naníhí tǎhú-ndó cuendá tnùhu ní cáháⁿ ndíi. ⁴⁶ Chí núu nchòhó sàndáá ndisa iní-ndó tnùhu ní cáháⁿ ndíi Moisés ñá, te ducaⁿ te quindáá iní-ndó yúhú ní cùu, chí ndíi-ǎⁿ ní chídó tnùní ndíi nàcuáa cada-í ñuyíú-a vitna. ⁴⁷ Te núu ñá túú sàndáá iní-ndó tnùhu ní chídó tnùní ndíi, te ñu-ni ducaⁿ cǎda ñaha-ndo xii-í vá quindáá iní-ndó tnùhu cáháⁿ-í —càchí-gá xáhaⁿ-gá xii-güedé.

6

Jèsús dǎcǎxi-gá úhúⁿ mǐ ñáyiú

(Mt. 14:13-21; Mr. 6:30-44; Lc. 9:10-17)

¹ Te sáta dúcáⁿ ñi cuu, te ní quee Jèsús cuáháⁿ-gá ingá xio yuhu làgúná Galileá, àdi Tiberiás chí úu ñu-xi. ² Te ío cuéhé ñáyiú nchícúⁿ ñáhá xii-gá cuáháⁿ cuendá sá ñi xini-yu nchaa sá vǎ yòo tnàhí ndàcu cada ní quide-gá, chí ní quide tátna-gá nchaa ñáyiú cùhú. ³ Te ní sáa Jèsús ndíhi cue téé xica cuu ndíhi-gá ìⁿ núú tìndúú, te xiǎⁿ ñi ngóo-gá ndíhi-güedé. ⁴ Te ta cùyatni coo vico pascuá, vico quide ñáyiú isràél. ⁵ Te ní xini-gá sá ío vǎi ñáyiú nchícúⁿ ñáhá xii-gá cuáháⁿ, te ní xáhaⁿ-gá xii té Lìpé:

—¿Ndèe quíhíⁿ-ó quǐnguaaⁿ-o sǎ cǎxi nchàa ñáyiú-a? —càchí-gá xáhaⁿ-gá xii-dé.

⁶ Te ducaⁿ ñi xáhaⁿ-gá xii-dé cuendá sá cuiní-gá quini-gá nása cunduu tnùhu cáháⁿ-dé, dico mee-gá sá xini-gá nàcuáa cada-gá. ⁷ Te ní xáhaⁿ té Lìpé xii-gá:

—Te cuéi úú cièndú díhúⁿ denariú ná dǎndoñuhu-o cuaaⁿ-o paá, te ní vǎ tnàhá cǎxi-yu luha luha —càchí-dé xáhaⁿ-dè xii-gá.

⁸ Te té Ndríxí ingá téé xica cuu ndíhi-gá, ñani té Ximú, àdi Pelú chí úú ñu-dé, ní xáhaⁿ-dè:

⁹ —Iha ndècu ìⁿ té líhli nèhe-dé úhúⁿ pǎa cebadá te úú chácá, dico

ndéé tnahá xéhé, te cuéhé víhí ñáyi
—càchí-dé xáhaⁿ-dè xii-gá.

¹⁰ Te ní xáhaⁿ Jèsús xii-güedé:

—Chí cūñaha nà ngóo-yu
nchaá-yu —càchí-gá xáhaⁿ-gá.

Te ñáyi-áⁿ ní ngóo-yu, te cãa vihi
ité núú ní ngóo-yu-áⁿ, te xínu dàtná
úhúⁿ mĩ mee-ni cuè téé, te ðìⁿ ñáyi
dihí ndihí landú. ¹¹ Te ní queheⁿ
Jèsús pãá, te ní ndacáⁿ táhú-gã
núú Yã Ndiõxí, te ní sãñaha-gã
pãá-áⁿ xii cue téé xica cuu ndihí-gá,
te cue téé-áⁿ ní dácãñu-güedé ní
xexi nchaá ñáyi xixúcu-áⁿ. Te
diu-ni ducaⁿ ní quide-gá chácá, te
ní dácãñu tucu-güedé-di ní xexi
ñáyi ní ndahá xití-yu. ¹² Te òré
ní túhú cóhó-yu, te ní xáhaⁿ Jèsús
xii cue téé xica cuu ndihí-gá sá
ná nãqueheⁿ-güedé nchaá sá ní
quendóo cuendá sá vã quihíⁿ-xi núú
mihí.

¹³ Te cue téé-ãⁿ ní naqueheⁿ-güedé
nchaá sá ní quendóo, te ní chítú
ùxúú tídihí núú úhúⁿ-ni pãá
cebádá. ¹⁴ Te sá ní xiní-yu ní
nadacáyá-gá sá ní xexi-yu, xiãⁿ ní
ngúita-yu ní xitnãhá-yu:

—Ndáá sá tẽ-a sa ió cuendú sá
quixí-dé ñuyú-a cáhãⁿ-dé tnúhu Yã
Ndiõxí —càchí-yu xitnãhá-yu.

¹⁵ Te ní cutnùní iní Jèsús sá
cádá yicá-yu candeca ñahá-yu
xii-gá quihíⁿ cuendá cundecu-gá
quindaha ñaha-gá xií-yu ni cùu,
núú xiãⁿ ní xica tucu-gá cuáhãⁿ-gá
xití yucu mee ði chícuú-gá.

Jèsús xicá-gã núú ndute

(Mt. 14:22-27; Mr. 6:45-52)

¹⁶ Te òré ní cuu ndiquiⁿ, te cuáhãⁿ
cue téé xica cuu ndihí-gá yuhu
làgúná. ¹⁷ Te ní queé-güedé bàrcú
cuáhãⁿ-güedé ñuú Capernaúm cáá
ndãa ingá xio yuhu làgúná, te sa ní
cuu ndiquiⁿ, te ñã túú Jèsús quexio
queé-gá bàrcú ñuhú-güedé-áⁿ. ¹⁸ Te
ní ngúita-xi quène táchí ñihí, te
níhí dàcandau ndéé tnahá ndùte
làgúná-áⁿ. ¹⁹ Te sa ní cuu dàtná

úhúⁿ kilómetrú cuáhãⁿ-güedé, te ní
xiní-güedé Jèsús tá cùyatni-gá bàrcú
ñuhú-güedé véxi-gá núú nduté, te
ní yùhú-güedé. ²⁰ Te ní xáhaⁿ Jèsús
xii-güedé:

—Yúhú véxi-í, vá yùhú-ndó —
càchí-gá xáhaⁿ-gã xii-güedé.

²¹ Te ío ní cudíí iní-güedé sá ní
quexio-gá cuánguee-gã bàrcú, te
òré-ni ní quexio-güedé ndihí-gá
ndéé ingá xio yuhu làgúná núú
cuáhãⁿ-güedé.

Ñáyi nãnducu ñaha xii Jèsús

²² Te ingá nduu-ãⁿ xĩndecu-ni
nchaá ñáyi ní quendóo yuhu
làgúná. Te ní quide cuendá-yu
sá ñⁿ ði-nã bàrcú nũñ-áⁿ ní cùu
ñã túú-gã, chí cue téé xica cuu
ndihí Jèsús ní queé-güedé bàrcú-áⁿ
cuáhãⁿ-güedé. Te ní níhí-yu tnúhu
sá ñã túú ní queé tnahá Jèsús.
²³ Te diu-ni nduu-ãⁿ ní quee ñⁿ úú
bàrcú ñuú Tiberiás ní sãá-xi yatni
núú ní xexi-yu pãá sá ní ndacáⁿ
táhu Jèsús núú Yã Ndiõxí. ²⁴ Te ní
xiní-yu sá ñã túú Jèsús ndihí cue téé
xica cuu ndihí-gá, núu ní queé-yu
bàrcú-áⁿ cuáhãⁿ-yu ñuú Capernaúm
cuánúndúcú ñahã-yu xii-gá.

Jèsús cúu-gã dàtná ñⁿ sã nchító-ó

²⁵ Te ní sãá-yu ingá xio yuhu
làgúná, xiãⁿ ní naníhí-yu Jèsús, te ní
xahãⁿ-yu xii-gá:

—Mèstrú, ¿ná òré ní sãá-n ìha? —
cachí-yu xahãⁿ-yu xii-gá.

²⁶ Te ní xáhaⁿ Jèsús:

—Na càchí tnúhu ndãá-í sá
nchòhó nãnducu ñaha-ndo xii-í
cuendá-ni sá ní xexi-ndo ní ndahá
xití-ndó, dico ñã díú cuendá sá
ní quide-í sá vã yõo tnahí ndàcu
cada nanducu ñaha-ndo. ²⁷ Te
vá cáda cuendá-ndó sá mée-ní sá
cãxi-ndó cáda chiuⁿ-ndo chí xiãⁿ
vá cúdi-xi. Chí ío-gã xiní ñuhu-xi
cada cuendá-ndó tnúhu Yã Ndiõxí
te tní-ndo, te naníhí táhú-ndó. Te
tnúhu-áⁿ cachí tnúhu yúhú Téé cùu
ñani tnahã-ndó nchãa-ndo, te xiãⁿ
candeca-xi iní-ndó nì caa ní quihíⁿ,

chi mee Dütú Ndiöxí ní cachí-gá sá dúcáⁿ cada-í —càchí-gá xáhaⁿ-gá xii-yu.

²⁸ Te ní xáhãⁿ-yu:

—¿Nása cada-ndí cuendá ngúnu ichi-ndí nàcuáa cuení Yã Ndiöxí cundu-í? —càchí-yu xáhãⁿ-yu xii-gá.

²⁹ Te ní xáhaⁿ Jèsús xii-yu:

—Yá Ndiöxí cuení-gá sá quindáá iní ñáhã-ndó xii yúhú, téé ní tendaha-gã véxi ñuyú-a —càchí-gá xáhaⁿ-gá xii-yu.

³⁰ Te ní xáhaⁿ tùcú-yu xii-gá:

—¿Ná cúu sã vã yõo tnàhí ndàcu cada, cada-n cùndehe-ndí cuendá quindáá iní ñáhã-ndí xii-n-í? ¿Ádi nágá cúu sã cáda-n cuendá cutnùní iní-ndí sá ndàà càháⁿ-n-í? ³¹ Chi cue ñaní tnàhá-ó ní xindecu ndéé sanaha ñí xexí-yu pàa nání mánáá xití yucu dàtná yódó tnùní núú tùtú Yã Ndiöxí núú càchí-xi: “Yá Ndiöxí ní sáñaha-gã sá ñí xexí-yu, te ní cuuⁿ tùu-xi andiu”, duha càchí-xi núú tùtú-gá —càchí-yu xáhãⁿ-yu xii-gá.

³² Te ní xáhaⁿ Jèsús:

—Na càchí tnúhu ndáá-í xii-ndo sã ñà díú ndíi Moisés ní sáñaha ndíi pàa ní cuuⁿ andiu ní xexí-yu, chi mee Tãtã-í ní sáñaha-gã sá ñí xexí-yu. Te sá táxí-gã vitna cùu-xi ³³ datná pàa véxi cuuⁿ andiu càndeca-xi iní-ndó ñí caa ñí quíhíⁿ —càchí-gá xáhaⁿ-gã xii-yu.

³⁴ Te ní xáhãⁿ-yu xii-gá:

—Tãtã, mee-ñí pàa-áⁿ taxi-n càxi-ndí —càchí-yu xáhãⁿ-yu xii-gá.

³⁵ Te ní xáhaⁿ Jèsús:

—Yúhú cúu-í dàtnáⁿ sá xexí-ndó càndeca-xi iní-ndó. Te duha ndúu tnúhu càháⁿ-í, chi nchaa ñáyiu na quindáá iní ñáhã xii-í, te vá ndóhó-gã-yu docó te vá ndóhó-gã-yu ndute. ³⁶ Dicó-ñí sá nchòhó ñá túú sàndáá iní ñáhã-ndó cueí xini ñáhã-ndó xii-í. ³⁷ Te nchaa ñáyiu na càchí Tãtã-í nduu cuendá-í nasaá-yu núu-í, te ñáyiu-áⁿ vã dáquèè tíhù-í-yu. ³⁸ Te ñá díú

yúhú sá véxi cuuⁿ-í andiu te quide-í nchaa sá cúu iní mee-í, chi véxi cuuⁿ-í sá cáda-í nchaa nàcuáa ní táuchíuⁿ mee Tãtã-í Dütú Ndiöxí Yáa ní tendaha ñàha xii-í véxi-í ñuyú-a. ³⁹ Te cuení-gá sá ncháá ñáyiu ní cachí-gá nduu cuendá-í vá dáñã-í-yu cuíta nihnú-yu, te na sáá nduu te ñiu-ñí dandòto-í-yu. ⁴⁰ Chi ducaⁿ ñí cachí Dütú Ndiöxí cunduu sá ncháá ñáyiu na tnèi tnúhu càháⁿ-í, te quindáá ndisa iní ñáhã-yu xii yúhú Déhe-gá, te nduu táhù-yu cundecú-yu ndihi Yá Ndiöxí ñí caa ñí quíhíⁿ, te yúhú dandòto-í-yu na sáá nduu —càchí-gá xáhaⁿ-gá xii-yu.

⁴¹ Te ñá ñí tnàhá iní ñáyiu isràel tnúhu ní càháⁿ Jèsús nñu ní ngúita-yu ní càháⁿ cuèhé-yu cuendá-gá cuendá sá ñí xáhaⁿ-gã sá mee-gã cúu-gã dàtná sá xexí-ó véxi cuuⁿ andiu. ⁴² Te ní xitnàhá-yu:

—¿Náa ñá díú tée-a cùu-dé Jèsús déhe té Chèé? Nchoo xini-ó tãtã-dé, te xini-ó nãná-dé, ñá cachí-tu tée-a sá andiu véxi cuuⁿ-dé! —càchí-yu xitnàhá-yu.

⁴³ Te ní xáhaⁿ Jèsús xii-yu:

—Vá càháⁿ cuèhé-gá-ndó cuendá-í, chí dáñá. ⁴⁴ Vá yõo quindáá iní ñáhã xii yúhú nñu ñá túú mee Tãtã-í táxí cuendá ñáhã-gã xii-yu. Te ñiu-gá ní tendaha ñàha-gã xii-í véxi-í, te yúhú dandòto-í-yu na sáá nduu. ⁴⁵ Te núú tùtú cue tée ní xóo càháⁿ tnúhu Yá Ndiöxí ndéé sanaha càchí-xi: “Yá Ndiöxí danèhé ñáhã-gã xii-yu tnúhu-gá”, duha càchí-xi. Te nchaa ñáyiu na cùndedóho nchaa tnúhu càháⁿ Dütú Ndiöxí, te cutúha-yu nàcuáa càháⁿ-gá, te ñáyiu-áⁿ quindáá iní ñáhã-yu xii yúhú.

⁴⁶ Te vá yõo xini ñáhã xii Dütú Ndiöxí chi ñndi-ñí yúhú xini-í-gá, chi núú ndécú-gã ní quee-í véxi cuuⁿ-í —càchí-gá xáhaⁿ-gã xii-yu.

⁴⁷ Te xáhaⁿ tùcú-gá:

—Na càchí tnúhu ndáá-í xii-ndo sã nchaa ñáyiu na quindáá iní

ñáhá xii-í, te naníhí tǎhú-yu. ⁴⁸ Te yúhú cùu-í dàtná ìⁿ sá xéxí-ndó càndeca-xi iní-ndó, te ducaⁿ sǎtnahá-xi cùu-í chi yúhú cada-í te nduu tǎhú-ndó cùndecu-ndo ndihí Yá Ndióxi ní caa ní quíhíⁿ. ⁴⁹ Te cue ñaní tñáhá-ó ní xíndecu ndéé sanaha ní xexí-yu pǎá ñaní mànáá xití yucu, dico ní sáá nduu te dacuítí ní xíhí-yu. ⁵⁰⁻⁵¹ Te yúhú càháⁿ-í cuendá mèè-í, chi véxi cuuⁿ-í andiu. Te cùu-í dàtná ìⁿ sá nchító-ndó, te nchaa ñáyiu na càxi te candeca-xi iní-yu ní caa ní quíhíⁿ te vá cuíta nihnu-gá-yu. Te sá táxi-í xii-ndo xǎⁿ cúu-xí yiqui cuñú-í, te cùu-xi cuendá nchaa ñáyiu nihí ñuyíu cuendá nduu tǎhú-yu cundecú-yu ndihí Yá Ndióxi ní caa ní quíhíⁿ —càchí-gá xáhaⁿ-gǎ xii-yu.

⁵² Te ní nguíta ñáyiu israhél xitnàhá-yu:

—¿Nása cada-tu tée-a núu càchí-tu-dé sá yiqui cuñú-dé taxi-dé caxi-o-í? —càchí-yu xitnàhá-yu.

⁵³ Te ní xáhaⁿ Jèsús:

—Na càchí tñúhu ndáá-í xii-ndo sǎ núu na càda iní-ndó sǎ dàtná sá cǎxí-ndó yiqui cuñú yúhú Téé cùu ñaní tñáhá-ndó nchàa-ndo, te cada tuu iní-ndó sǎ dàtná sá cóhó-ndó níñi-í ñá, te xǎⁿ quéé-xí sǎ quíndáá iní ñáhá-ndó ní yuhu ní iní-ndó te naníhí tǎhú-ndó, te núu ñáhá te cuíta nihnu-ndo. ⁵⁴ Nchaa ñáyiu na càda iní-xi sá dàtná sá cǎxí-yu yiqui cuñú-í te cohó-yu níñi-í, ñáyiu-án naníhí tǎhú-yu te yúhú dandòto-í-yu na sáá nduu. ⁵⁵ Chi yiqui cuñú-í ndihí níñi-í cúu-xí mèè-í. ⁵⁶ Te nchaa ñáyiu na càda iní-xi sá dàtná sá cǎxí-yu yiqui cuñú-í te cohó-yu níñi-í, te ñáyiu-án ìⁿ-nǎ cuu-í ndihí-yu chi cundecu ndihí-í-yu. ⁵⁷ Te yúhú nchító-í chi ducaⁿ nchító Tǎtá-í Yáá ní tendaha ñaha xii-í véxi-í ñuyíu-a. Te diu-ni ducaⁿ nchàa ñáyiu na quíndáá iní ñáhá xii-í te cundecu

ndihí-í-yu ní caa ní quíhíⁿ. ⁵⁸ Te yúhú cùu-í dàtná ìⁿ sá nchító-ndó véxi cuuⁿ andiu, dico ñá diú pǎá sá ñaní mànáá ní véxi cue ñaní tñáhá-ó ní xíndecu ndéé sanaha, chi ní xexí-yu pǎá te dacuéi ní xíhí-yu. Te nchaa ñáyiu na quíndáá iní ñáhá xii yúhú Yáá véxi cuuⁿ andiu, te cundecu ndihí-í-yu ní caa ní quíhíⁿ —càchí-gá xáhaⁿ-gǎ xii-yu.

⁵⁹ Nchaa tñúhu-a ní càháⁿ-gǎ xití veñúhu ñáyiu ñuú Capernaúm.

Jèsús càchí tñúhu-gǎ nàcuáa naníhí tǎhú-ó

⁶⁰ Te sá dúcǎⁿ ní càháⁿ-gǎ núu vai ñáyiu nchicúⁿ ñáhá xii-gǎ ní xitnàhá-yu:

—Vá tñí cuíti-o tñúhu càháⁿ-dé chi ñá diú tñúhu sá cúu vǎha iní-ó càháⁿ-dé —càchí-yu xitnàhá-yu.

⁶¹ Te ní cutnùni iní Jèsús sá ñà túu càháⁿ vǎha-yu cuendá tñúhu ní càháⁿ-gǎ, núu ní xáhaⁿ-gǎ xii-yu:

—¿Náa ñá tñáhá iní-ndó nàcuáa càháⁿ-í-a? ⁶² Te uuⁿ-gǎ cada nchòhó núu quini-ndó yúhú Téé cùu ñaní tñáhá-ndó nchàa-ndo ndaa-í núu ní xíndecu-í dihna. ⁶³ Te espíritú ndécú ndihí yiqui cuñú-ó, xǎⁿ ndécá ñaha-xi xii-o, te núu ñá túu xǎⁿ, te yiqui cuñú-ó ñà túu nàndíhi-xi. Dico núu nchaa tñúhu càháⁿ-í-a quéé-xi iní-ndó ñá, te quini-ndó nǎ xéhé candeca ñaha-xi xii-ndo núu cuàháⁿ núu véxi. ⁶⁴ Te dava nchòhó chi ñá túu sàndáá iní-ndó —càchí-gǎ xáhaⁿ-gǎ xii-yu.

Te ducaⁿ ní xáhaⁿ-gǎ chi sa nàha-gǎ nándi cùu ñáyiu vá quíndáá iní ñáhá xii-gǎ. Te ducaⁿ sǎ naha-gǎ ndédacáa téé cuáha cuendá ñáhá xii-gǎ núu cué téé cùu úhú iní ñáhá. ⁶⁵ Te ní xáhaⁿ tucu Jesús xii-yu:

—Te duha càháⁿ-í chi sa ní cachí tñúhu-í xii-ndo sǎ vǎ yòo ìⁿ cuini tñi tñúhu-í te núu ñá túu Tǎtá-í Dútú Ndióxi sánú ichi ñaha-gǎ xii-yu —càchí-gǎ xáhaⁿ-gǎ xii-yu.

⁶⁶ Te òré-án ío vai ñáyiu nchicúⁿ ñáhá xii-gǎ ní xócòo-yu ñá ní xica cuu-gǎ-yu ndihí-gǎ. ⁶⁷ Te xǎⁿ ní

xáhaⁿ Jèsús xii ndi ùxúú cue téé xica cuu ndihi-gá:

—¿Cuini-ndó dándóo ñaha-ndo tñhá-ndó-áⁿ? —cächí-gá xáhaⁿ-gá xii-güedé.

⁶⁸ Te ní xáhaⁿ tē Ximú, àdi Pelú chi úú ñiú-dé:

—Mèstrú, ñá túú-gã ndéé quihíⁿ-ndí, chi nchúhú náhá-ndí sá tñhu mee-n, cùu-xi sá vãha candeca-xi iní-ndí ni caa ni quihíⁿ.

⁶⁹ Chi nchúhú sa ní sándáá iní ñhá-ndí xii-n chi náha-ndí sá yòhó cúú-n Crístú Déhe Dútú Ndióxi yaá ndécú àndiu —cachí-dé xáhaⁿ-dē xii-gá.

⁷⁰ Te ní xáhaⁿ Jèsús:

—Naha-ndo sá yúhú ní cáháⁿ ñhá-í xii ndi ùxúú-ndó xica cuu ndihi ñaha-í xii-ndo, dico ñⁿ-ndo quihu ñaha yècu ñávãha xii-ndo —cächí-gá xáhaⁿ-gã xii-güedé.

⁷¹ Duha ní cáháⁿ Jèsús cuendá té Jüdás déhe té Ximú Iscarioté ñⁿ téé ñútnhá núú ùxí ñⁿ cue téé xica cuu ndihi-gá, chi sa náha-gá sá téé-áⁿ cuãha cuendá ñhá-dē xii-gá ñⁿ nduu núú cuè téé cùu úhú iní ñhá.

7

Cue ñaní Jèsús ñá túú sándáá iní-güedé nãcuãa ndiú tñhu cãháⁿ-gá

¹ Te sátá dúcáⁿ ñí cuu, te ní xica cuu Jèsús distritú Galileá, te ñá ní sãháⁿ-gá distritú Júdeá, chi yacáⁿ cuini cue téé israhél cahni ñaha-güedé xii-gá ní cùu. ² Te ní cuyatni nduu cãdá-yu vico, vico sá dánani-yu Vico Vehe Tnuvixiⁿ. ³ Te ní xáhaⁿ cuè ñaní Jèsús xii-gá:

—Vãha-gá quihíⁿ-n distritú Júdeá te vá cündecu-n iha, chi yacáⁿ cada-n nchã sá quidé-n iha cuendá quini nchã ñáyiú cündihi ñaha xii-n ndecu yacáⁿ. ⁴ Chi núú cuini-ó quini nchã ñáyiú ná chiúⁿ cada-o te vá cãdá ñáyiú-o. Te yòhó cuéhé núú sã quidé-n, te cada-n

na quini nchã ñáyiú —cächí-güedé xáhaⁿ-güedé xii-gá.

⁵ Ducaⁿ ñí cáháⁿ cue ñaní-gá, chi ni mée-güedé ñá túú sándáá iní-güedé nãcuãa ndiú tñhu cãháⁿ-gá. ⁶ Te ní xáhaⁿ Jèsús xii-güedé:

—Vátã tñhá-gã òré quihíⁿ-í dico nchòhó ndédani cãa òré cuu quihíⁿ-ndó. ⁷ Chi nchã ñáyiú ññhu ichi cuéhé ichi duha chi ñá túú cùu úhú iní ñhá-yu xii nchòhó. Dico yúhú chi cùu úhú iní ñhá-yu xii-í cuendá sã cãháⁿ-í sã quidé-yu nchã sã cuéhé sã dúhá. ⁸ Te chí cuãháⁿ nchòhó vico chi yúhú vá quihíⁿ-ni-í chi vátã tñhá-gã òré quihíⁿ-í —cächí-gã xáhaⁿ-gã xii-güedé.

⁹ Te ducaⁿ ñí xáhaⁿ-gã te ní ndóo-gã Galileá, te cue téé-áⁿ cuãháⁿ-güedé.

Jèsús ndécú-gã ñⁿ vico chiñuhú-yu Yá Ndióxi

¹⁰ Dico sátã cuãháⁿ cue ñaní-gá, te ní xica-gã cuãháⁿ-gã tñhá-gã dicó-ni sã ñáyiú cuãháⁿ-gã. ¹¹ Te ñáyiú israhél ñáyiú xñdecu vico nãnducú-yu Jèsús, te xñtnhá-yu:

—¿Ndéé ndécú Jèsús? —cächí-yu xñtnhá-yu.

¹² Te nchã ñáyiú xñdecu vico xñdatnúhu-yu cuendá-gã. Te ñá-yu xñtnhá-yu sã ño váha iní-gá, te ñá-yu xñtnhá-yu sã ñá ñá ñá téé váha cùu-gã, chi dãndahú-gã ñáyiú.

¹³ Dico mee-ni xicãháⁿ náñi-yu, chi xiyúhú-yu cue téé cùnúu núú-yu.

¹⁴ Te ta ngúhuⁿ ñá-yu vico, te cuãnguihu Jèsús veñúhu cãhnu sã ño cùnúu, te ní ngúita-gã ñácuãha-gã ñáyiú. ¹⁵ Te ñáyiú israhél ní cuñúhu viñi-yu sã ño váha cãháⁿ-gã, te ní xñtnhá-yu:

—¿Nã cuendá ño váha ññhu-tu ñáyiú téé-a tñhu cáháⁿ-dé te ñá túú ní ñácuãha-dé-í? —cächí-yu xñtnhá-yu.

16 Te ní xáhaⁿ Jèsús:

—Ñá díú cuendá mée-í cúu-xí sá dánéhé ñàhà-í xii-ndo, chi cuendá Dútú Ndiòxí Yáá ní tendaha ñàha xii-í véxi-í cúu-xí. 17 Te núu ío dava-ndo ní yuhu ní iní-ndó cuini-ndó càda-ndo nacuaa cuini Yá Ndiòxí cunduu, te cutnùní ndáá iní-ndó sá tnùhu dàcuaha ñàha-í xii-ndo cùu-xi cuenda mée Dútú Ndiòxí, te ñá díú cuendá mée-í cúu-xí. 18 Te téé cuini sá cáda càhnu ñàha ñáyiu xii-dé, téé-áⁿ càhàⁿ-dé nàcuáa véxi iní mée-dé. Dico yúhú cuini-í sá cáda càhnú-yu Dútú Ndiòxí Yáá ní tendaha ñàha xii-í véxi-í ñuyiú-a, te càhàⁿ ndáá-í te ñá túú dàcuandehnde-í.

19 'Te ndíi Moisés ní taxi ndíi tnùhu sá sánú ichi ñàha xii-ndo nacuaa cundecu-ndo, te ni òucaⁿ ñá túú sàndáá iní-ndó nàcuáa càhàⁿ tnùhu-áⁿ. ¿Te ná cuendá cuini-ndó càhni ñàha-ndo xii-í? —càchí-gá xáhaⁿ-gá xii-yu.

20 Te ní xáhàⁿ-yu xii-gá:

—Yucu ñávàha dàcoto ñàha xii-ó, chi vá yòo ìⁿ cuini cahni ñàha xii-n —càchí-yu xàhàⁿ-yu xii-gá.

21 Te ní xáhaⁿ Jèsús xii-yu:

—Sá ní quide-í ìⁿ sá vã yòo tnàhí ndàcu cada nduu cuu-xi nduu ndetátú-ó, xiãⁿ ío ní cuñúhu ñàha-ndo xii-í. 22 Te ndíi Moisés ní càchí ndíi sá cuàha-yu seña ñiⁿ cue landú téé, dico ñá díú mée ndíi ní càhu iní ndíi chi òucaⁿ tnàhí ní xóo cada cue ñàní tnàhá-ó dàvá-áⁿ, núu xiãⁿ nchòhó sàha-ndo seña ñiⁿ landú téé cuéi cùu-xi nduu ndetátú-ó. 23 Te òucaⁿ quide-ndo cuendá sá ñà túú nã cumání-ndó núu tnùhu sá sánú ichi ñàha xii-ndo ní dándòo ndíi Moisés. ¿Te ná cuendá cúdeéⁿ-ndó núu-í sá ní quide tátna-í téé cùhú nduu ndetátú-ó-í? 24 Te váha váha cada cuendá-ndó, te vá cuendá-ni càhàⁿ-ndó sá yúhú ndècuéchi-í chi ñá túú xini-ndó —càchí-gá xáhaⁿ-gá xii-yu.

Jèsús xáhaⁿ-gá xii-yu núu véxi-gá

25 Te dava ñáyiu ñuú Jerusalén ní ngúita-yu xitnàhá-yu:

—¿Náa ñá díú téé-áⁿ nánducu-güedé cahni-güedé?, 26 núu náí-dé nùtnⁿ núu chítú núu tàcá-áⁿ càhàⁿ-dé, te vá yòo cùyⁿ cùñaha xii-dé ìⁿ tnùhu. Cudana te cue téé cùchiuⁿ sandáá iní-güedé sá díú-dé cúu-dé Cristú Yáá ní tendaha Yá Ndiòxí véxi ñuyiú-a. 27 Dico nchoo xini-ó ndèé ichi véxi téé-áⁿ, dico Crìstú ná quixi-gá chi vá yòo ìⁿ quini ndèé ichi quixi Yáa-áⁿ —càchí-yu xitnàhá-yu.

28 Te yìhi Jèsús xití veñúhu càhnu sá ío cùnuu danehe-gá ñáyiu, te ní tecú dóho-gá tnùhu càhàⁿ-yu. Te níhi ní càhàⁿ-gá, te xáhaⁿ-gá xii-yu:

—¡Ná quini-tu nchòhó ndèé ichi véxi yúhú! Yúhú véxi-í dico ñá díú sá cúu iní mée-í, chi Yá Ndiòxí Yáá quidé nchàa-ndi túhú sá váha ní tendaha ñàha-gá xii-í véxi-í, te nchòhó ñá túú xini-ndó-gã. 29 Te yúhú xini-í-gá chi núu ndécú-gã ní quee-í véxi-í, te diu mee-gã ní tendaha ñàha-gá véxi-í —càchí-gá xáhaⁿ-gá xii-yu.

30 Te sá dúcáⁿ ní càhàⁿ-gá, núu cuini-güedé tniⁿ ñàha-güedé xii-gá quihíⁿ-gá vecaá ní cùu, dico vá yòo ìⁿ ní cùyⁿ tniⁿ ñàha xii-gá chi vátá sàá-gá òré tniⁿ ñàha-güedé. 31 Dico vài-yu ní sàndáá iní ñàhà-yu xii-gá, te ní xitnàhá-yu:

—¿Nágá cúu sá cáda Crìstú ná quixi-gá-í?, te téé-a ío cuéhé núu sá tá quide-dé véxi. Váa diu téé-a cùu-dé Cristú Yáá ní tendaha Yá Ndiòxí véxi ñuyiú-a —càchí-yu xitnàhá-yu.

Cue téé cùu fariséu cuini-güedé quihíⁿ Jèsús vecaá

32 Te ní níhi cue téé cùu fariséu tnùhu nàcuáa càhàⁿ ñáyiu cuendá Jèsús, núu ní ndatnúhu-güedé ndíhi cue dútú cùnùu, te ní techiùⁿ-güedé cue téé quide cuendá veñúhu cuáhàⁿ-güedé cuátniⁿ ñàha-güedé xii-gá ní cùu. 33 Te ní xáhaⁿ-gá xii-güedé:

—Sacú duha nduu cundecu ndihí ñaha-í xii-ndo, te núhú tucu-í núú ndécú tãtã-í Yaá ní tendaha ñaha xii-í véxi-í ñuyíú-a. ³⁴ Te cuèi na nãnducu ñaha-ndo dico vá ná nihí ñáhá-ndó chí vá sãa-ndó núú cundecu-í —cãchí-gá xãhaⁿ-gã xii-güedé.

³⁵ Te ní ngüíta ñáyiú isrãél xitnãhá-yu:

—¿Ndéé quihíⁿ-tu téa te vá ná nihí-ó-dé-i? ¿Àdi quihíⁿ-dé na chitnãhá-dé ñáyiú isrãél ñáyiú nchiténuu nchaa ñuú xicá cuendá danèhé-dé ñáyiú griégú? ³⁶ ¿Nãsa cãháⁿ-tu-dé duha cãháⁿ-dé: “Nãnducu ñaha-ndo te vá nãnihí ñáhá-ndó chí vá sãa-ndó núú cundecu-í”, cãchí-tu-dé? —cãchí-yu xitnãhá-yu.

Nãcuáa cada Espiritú Yã Ndiõxí iní-ó

³⁷ Te nduu ñí yãha-ná vico cùu-xi nduu cahnu vihi, te nduu-ãⁿ ñí ngúnu tñi Jèsús tnuú ñáyiú, te níhi ní cãháⁿ-gã, te xãhaⁿ-gã xii-yu:

—Núu ió dava-ndo yichí-ndó ndüte, te quixi-ndo núú-í, te coho-ndo. ³⁸ Duha cãháⁿ-í chí nchaa ñáyiú na quindáá iní ñáhá xii-í, te cada-xi iní-yu dàtná ñí núú xicá ndüte, nchaa-ni nduu xica ñá túú yichí, ducaⁿ càda-xi iní-yu núú cuaháⁿ núú véxi dàtná cãháⁿ-xi núú tütú Yã Ndiõxí —cãchí-gá xãhaⁿ-gã xii-yu.

³⁹ Te ducaⁿ ñí cãháⁿ-gã cuendá sá quixí Espiritú Yã Ndiõxí ngúndecu ndihí nchaa ñáyiú na quindáá iní ñáhá xii-gã, chí sáá nduu ndaa-gã andiú càda cahnu ñaha Tátã-gã xii-gã, te davá-ãⁿ te quixi Espiritú Yã Ndiõxí cundecu ndihí-yu.

Ñá ní cùu ñí nuú-yu cuendá tñuhu ní cãháⁿ Jèsús

⁴⁰ Te dava ñáyiú ní xindedóho tñuhu ní cãháⁿ Jèsús ní xitnãhá-yu:

—Ndáá sá tãe-a cùu-dé téa cãchí-yu quixí cãháⁿ tñuhu Yã Ndiõxí —cãchí-yu xitnãhá-yu.

⁴¹ Te dava tucú-yu xitnãhá-yu:

—Téa-a cùu-dé Cristú Yaá ní tendaha Yã Ndiõxí véxi ñuyíú-a —cãchí-yu xitnãhá-yu.

Te dava-gá tucú-yu xitnãhá-yu:

—¿Nãa ndaa distritú Galileá quixi Cristú Yaá tendaha Yã Ndiõxí quixi ñuyíú-a? ⁴² Chí núú tütú Yã Ndiõxí cãchí-xi sá Cristú Yaá tendaha Yã Ndiõxí quixi ñuyíú-a cuu-gã ñí ñani tñhá ndii Dãvií, te quee-gã ñuú Bèlén ñuú méé ndii Dãvií, duha cãháⁿ-xi núú tütú Yã Ndiõxí —cãchí-yu xitnãhá-yu.

⁴³ Te xiaⁿ núu ñá ní cùu ñí nuú-yu cuendá Jèsús. ⁴⁴ Te davá-yu cuini-yu tñi-yu Jèsús quihíⁿ-gã vecaá ní cùu, dico ni ñí-yu ñá túú ní cùyí-yu tñi ñáhá-yu xii-gã.

Cue téa cùchiuⁿ ñá túú sãndáá iní-güedé Jèsús

⁴⁵ Te cue téa cuaháⁿ tñi ñaha xii Jèsús ní cùu ní ndexio-güedé núú cue téa cùu fariséu ndihí núú cue dütú cùnùu. Te xãhaⁿ cue téa cùnuu-ãⁿ:

—¿Ná cuendá ñá ní cãndeca-ndo tãe-ãⁿ quixi? —cãchí-güedé xãhaⁿ-güedé.

⁴⁶ Te cue téa ní sãháⁿ chiúⁿ ní xãhaⁿ-güedé:

—Ni ñí téa ñá túú xini-ndí cãháⁿ dàtná cãháⁿ téa-ãⁿ —cãchí-güedé xãhaⁿ-güedé.

⁴⁷ Te ní xãhaⁿ cue téa cùu fariséu:

—¿Nãa tñhá nchòhó ní sãndáá iní-ndó tñuhu ndehnde cãháⁿ téa-ãⁿ? ⁴⁸ ¿Nãa ñá túú xini-ndó sã ní ñí cue téa tãxi tnuní nchúhú, te ní ñí nchúhú cue téa cùu fariséu ñá túú sãndáá iní-ndí téa-ãⁿ ñã? ⁴⁹ Nchaa ñáyiú tñha ñaha xii téa-ãⁿ ñá túú sãndáá iní-yu nãcuáa cãháⁿ tñuhu sá sãnú ichi ñaha xii-o, dico cuíta nihnú-yu sá dúcãⁿ quidé-yu —cãchí-güedé xãhaⁿ-güedé xii cue téa-ãⁿ.

⁵⁰ Te té Nicòdemú téa ní sãháⁿ niú ní ndatnùhu-dé ndihí Jèsús cúu-dé tñhá-dé ñí téa fariséu, te ní xãhaⁿ-dè xii-güedé:

⁵¹ —Tñuhu sá sãnú ichi ñaha xii-o nacuáa cundecu-o cãchí-xi sá ndéé cundedóho-o nãsa cãháⁿ téa

tàú cuéchi cuèndá cutnùní iní-ó nã ní quide-dé, te dàtnùní cáháⁿ-ó nũ ndisa ndècuéchi-dé àdi ñá túú ndècuéchi-dé —càchí-dé xáhaⁿ-dè.

⁵² Te ní xáhaⁿ-güedé:

—Cùu ní cachí sá tnàhá-ò cúú-n tée distritú Galilea nũu ducaⁿ càháⁿ-n. Dacuàha tutú yódó tnùní tnúhu Yá Ndiòxí te quiní-n nàcuáa càháⁿ-xi sá nì ìⁿ tée véxi distritú Galilea ñá túú càháⁿ-dé tnúhu Yá Ndiòxí —càchí-güedé xáhaⁿ-güedé.

⁵³ Ducaⁿ te ndi díⁿ cañnuhú-güedé vehe-güedé.

8

Èⁿ ñadìhí ndécú vihi cuéchi-xi

¹ Te Jèsús cuáháⁿ-gá yucu Òlívú.

² Te sátá nì túndaá nduu tnée, te cuáháⁿ tucu-gá veñúhu càhnu sá ìo cùnuu. Te ío cuéhé ñáyiu ní chítú níhnũ-yu núú-gã, te ní ngóo-gá ní dánèhé ñáhá-gã xií-yu. ³ Te ní quexìo cue tée dàcuaha ñaha xií-yu nchaa tnúhu ní chídó tnùní ndíi Moisés, ndihi cue tée cùu fariséú, te ndèca-güedé ìⁿ ñadìhí ní sáá, te ñaha-áⁿ nì xiní ñáhã-yu càháⁿ ndihi-aⁿ ìⁿ tée dico ñá díú yìi-aⁿ cuu-dé, te ní sanutnì ñaha-güedé xii-aⁿ tnuú nchaa ñáyiu xĩndecu núú Jèsús. ⁴ Te ní xáhaⁿ-güedé xii Jèsús:

—Mèstrú, ñadìhí-a ní xiní ñáhã ñáyiu xii-aⁿ càháⁿ ndihi-aⁿ ìⁿ tée dico ñá díú yìi-aⁿ cuu-dé. ⁵ Te tnúhu ní chídó tnùní ndíi Moisés càchí-xi sá yúú cahni-o nchaa ñáyiu dìhí duha quide. Te yòhó, ¿nása càchí-n cùnduu-ì? —cachí-güedé xáhaⁿ-güedé xii-gá.

⁶ Duha ní càháⁿ-güedé chi cuèndá sá cuìní-güedé coto ndeé ñáhã-güedé xii-gá nũu nása càháⁿ-gá cuèndá nùcòo nchihi ñaha-güedé xii-gá ní càháⁿ-güedé. Te ní ngúnu ndeyi-gá te ní ngúita-gá tée-gã ndihi díquí ndáhã-gã lètrá núú ñúhú. ⁷ Te xìcáⁿ tnúhú-ní tucu-güedé núú-gã nũu ní ndonehe núú-gã, te ní xáhaⁿ-gã:

—Ndédani càa nchohó te núu ñá túú nã cuéchi quide-ndo te díhna nuu-gã-ndó chí cuàha-aⁿ yúú —càchí-gã xáhaⁿ-gã xii-güedé.

⁸ Te ní ngúnu ndeyi tucu-gá tée tucu-gá lètrá núú ñúhú. ⁹ Te sá dúcáⁿ nì xáhaⁿ-gã xii-güedé te ní ndixi túu iní-güedé sá ñá túú quide váha mee-güedé tnàhá-güedé, núu da ìⁿ da ìⁿ-güedé ní ndee, te díhna-gá cue tée cùu sacuéhé nì ndee te ní ngúita nchicúⁿ dava-gã-güedé. Te sátá nì ndihi-güedé ní ndee, te ní quendóo mee-nã Jèsús ndihi ñadìhí-áⁿ. ¹⁰ Te ní ndonehe núú Jèsús te ní xiní-gá sá nì ndihi-güedé cuáháⁿ te mee-nã ñadìhí-áⁿ nì ndóo-aⁿ, te ní xáhaⁿ-gã xii-aⁿ:

—¿Ndèndi cuáháⁿ cue tée càchí sá nì quide-n cuéchi? ¿Ni ìⁿ-güedé ñá ní cùndee tnúhu-güedé quíhíⁿ-n càstiú-va? —càchí-gã xáhaⁿ-gã xii-aⁿ.

¹¹ Te ní xáhaⁿ-aⁿ xii Jèsús:

—Ñáhã, chi ni ìⁿ-güedé ñá ní ndàcu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ni yúhú vá dáquihíⁿ ñáhã-ì castiú xii-n. Te vitna te núhú-n te vá cádá-gã-n nãndi sá cuéhé sá dúhá —càchí-gã xáhaⁿ-gã xii-aⁿ.

Jèsús dándixi túu-gá iní-ó

¹² Te ní càháⁿ tucu Jèsús núú ñáyiu, te xáhaⁿ-gã xií-yu:

—Yúhú cúú-í dàtná ìⁿ ñúhú dáyèhe-ì ñuyiú-a, te nchaa ñáyiu na chìtnahá ñáhã xii-ì, te vá cùndecu-gá-yu ichi cuéhé ichi duha, chi yúhú dándixi túu-ì iní-yu cuèndá cutnùní iní-yu nàcuáa nduu cuèndá Yã Ndiòxí, te cundecu-ì ndihi-yu ni caa ni quíhíⁿ —càchí-gã xáhaⁿ-gã xií-yu.

¹³ Te ní xáhaⁿ cuè tée cùu fariséú xii-gá:

—Medii-n caháⁿ-n sã cúú-n tée váha, te vá yòo ìⁿ-gã chindèe tnúhu ñaha xii-n núu ná tée cùu-n, dico

xíáⁿ ñá túú nándíhi-xi —càchí-güedé xáhaⁿ-güedé xii-gá.

¹⁴ Te ní xáhaⁿ Jèsús:

—Cuéi càháⁿ-í cuendá mée-í dico nándíhi tnúhu càháⁿ-í. Chi yúhú ñaha-í ndèé ichi véxi-í, te xìní-í ndèé ichi núhú-í, dico nchòhó chi ñá túú xìní-ndó ndèé ichi véxi-í, te ñi ñá túú xìní-ndó ndèé ichi quíhíⁿ-í. ¹⁵ Te nchòhó chi cuendá-ni càháⁿ-ndó cuendá ñáyiú núu quide váha-yu àdi ñá túú quide váha-yu. Te yúhú ñá túú càháⁿ-í cuendá ñáyiú núu quide váha-yu àdi ñá túú quide váha-yu. ¹⁶ Àdi núu càháⁿ-í dico ìⁿ tnúhu ndáá càháⁿ-í chi ñá díú-ní mée-í càháⁿ, chi tnàhá Tàtá-í Yaá ní tendaha ñaha xii-í véxi-í ñuyíú-a càháⁿ-gá chindée tnúhu ñaha-gá xii-í. ¹⁷ Te tnúhu sá sánú ichi ñaha xii-ndo cachí-xi sá núu ña cundecu úu cue téé càháⁿ ndáá-güedé nacuáa cùu ìⁿ sá cundáá, te núu ìⁿ-ni tnúhu na càháⁿ-güedé ndi ndúú-güedé te xíáⁿ nándíhi-xi, duha càchí tnúhu-áⁿ. ¹⁸ Te diu-ni ducaⁿ cùu-xi yúhú chi càháⁿ-í ìⁿ tnúhu ndáá sá cúú-xí mée-í, te diu-ni dátá càháⁿ-í càháⁿ Tàtá-í Yaá ní tendaha ñaha xii-í véxi-í ñuyíú-a —càchí-gá xáhaⁿ-gá xii-güedé.

¹⁹ Te ní xáhaⁿ-güedé xii-gá:

—¿Te ndèé ndécú Tàtá-n-í? — càchí-güedé xáhaⁿ-güedé.

Te ní xáhaⁿ Jèsús:

—Te núu dico xìní-ndó yòo cuu yúhú-á te ducaⁿ te quiní-ndó Tàtá-í. Te ni yúhú ñá túú xìní-ndó yòo cuu-í núu xíáⁿ ñá túú xìní-ndó Tàtá-í —càchí-gá xáhaⁿ-gá xii-güedé.

²⁰ Duha ní càháⁿ Jèsús ñini dàcuaha-gá ñáyiú xití veñúhu núu ndécú àlcanciá díhúⁿ. Te vá yòo ìⁿ ni cùyiⁿ tñiⁿ ñaha xii-gá chi vátá sàá-gá òré tñiⁿ ñaha-güedé.

Ñáyiú ñá túú sàndáá iní ñáhá xii Jèsús vá ndácú-yu quíhíⁿ-yu núu núhú-gá cundecu-gá

²¹ Te ní xáhaⁿ tùcu Jèsús xii-güedé:

—Yúhú núhú-í te nanducu ñaha-ndo te vá náníhí ñáhá-ndó, te cuú-ndó núu yíca cuéchi-ndo, chi vá ndácú-ndó sáá-ndó núu núhú-í cundecu-í —càchí-gá xáhaⁿ-gá xii-güedé.

²² Te ní xítñaha cue téé isràél:

—¿Te náa cahni-dé mée-dé núu càchí-dé sá vá ndácú-ó sàá-ó núu quíhíⁿ-dé-áⁿ? —càchí-güedé xítñaha-güedé.

²³ Te ní xáhaⁿ Jèsús xii-güedé:

—Nchòhó chi cue téé ñuyíú-a cùu-ndo, núu ío ñúhu iní-ndó sá ío ñuyíú-a. Te yúhú chi téé núu ñinu cùu-í núu xíáⁿ ñá túú sá ío ñuyíú-a ñúhu iní-í. ²⁴ Te xíáⁿ núu càchí-í sá cuú-ndó núu yíca cuéchi-ndo, chi ñá cuíní-ndó quíndáá iní-ndó sá yúhú véxi cuuⁿ-í andiⁿ, te núu xíáⁿ diu-ni núu yíca cuéchi-ndo cùu-ndó —càchí-gá xáhaⁿ-gá xii-güedé.

²⁵ Te ní xicáⁿ tnúhú-güedé núu-gá, te xáhaⁿ-güedé:

—¿Te ná cúú yòhó núu ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gá:

—Sa ní cachí tnúhu-í xii-ndo ndèé díhna —càchí-gá xáhaⁿ-gá xii-güedé.

²⁶ Te xáhaⁿ tùcu-gá:

—Ndècu cuéhé tnúhu càháⁿ-í cada ndáá-í cuendá nchòhó. Te Tàtá-í Yaá ní tendaha ñaha xii-í véxi-í ñuyíú-a càháⁿ-gá tnúhu ndáá, te tnúhu càháⁿ yúhú ñuyíú-a cùu-xi tnúhu ní càháⁿ-gá ní xíndedóho-í —càchí-gá xáhaⁿ-gá xii-güedé.

²⁷ Te mee-güedé ñá túú ní tècú tnùnì-güedé sá cuendá Dútú Ndiòxi ní càháⁿ Jèsús. ²⁸ Te ní xáhaⁿ-gá xii-güedé:

—Òré ná catá càa ñaha-ndo xii yúhú Téé cùu ñani tnáhá-ndó nchàa-ndo núu cùrúxí cahni ñaha-ndo, te òré-áⁿ cutnùnì iní-ndó yòo cuu-í, te ñá túú quide-í sá cúú iní mée-í, chi yúhú càháⁿ-í nacuáa ní dánèhé ñáhá Tàtá-í ²⁹ Yaá ní tendaha ñaha xii-í véxi-í. Te diu-gá ndécú ndíhi ñaha-gá xii-í, te ñá

túu dàña nihnu ñaha-gá chi quide-í nchaa nàcuáa cùu iní-gá —càchí-gá xáhaⁿ-gá xii-güedé.

³⁰ Te sá dúcáⁿ ní cáháⁿ-gá nùu ío vai ñáyiú ní sándáá iní ñáhá xii-gá.

Ñáyiú sándáá iní ñáhá xii Yá Ndiöxí ndihi ñáyiú ndècu ichi cuehé ichi duha

³¹ Te ní xáhaⁿ Jèsús xii ñáyiú isràél ñáyiú ní sándáá iní ñáhá xii-gá:

—Te nùu vá dáñá ndèé-ndó càda-ndo nchaa nacúáa cáháⁿ-í, te cuu ndisa-ndo cuè tée tñahá tñuhu ndihi-í, ³² te tecú tñuni-gá-ndó tñuhu ndáá, te ducaⁿ te cácu nihnu-ndo —càchí-gá xáhaⁿ-gá xii-yu.

³³ Te ní xáháⁿ-yu:

—Nchúhú cúu-ndí cue ñani tñahá ndíi Abrahám, te ní ñⁿ nduu ñá túú ndèé sácündedí nihnu-ndí ndoho tñahá-ndí nùu cáchí-ö sá dàcácu nihnu ñaha-n xii-ndí —càchí-yu xáháⁿ-yu xii-gá.

³⁴ Te ní xáhaⁿ Jèsús xii-yu:

—Na càchí tñuhu ndáá-í xii-ndo sá ncháa ñáyiú quide nchaa sá cuèhé sá dúhá tàxi tñuni ñáhá-ná-xi xii-yu. ³⁵ Te cue ñáyiú xinu cuechi te vá cúu ñⁿ-ná cuú-yu ndihi ñáyiú dii vèhe-xi xinu cuechi-yu, dico cue déhe ñáyiú dii vèhe-xi-án chi ñⁿ-ni cùu ndihi ñaha-güexi xii-yu. ³⁶ Te nùu yúhú Yaa cúu Dèhe Yá Ndiöxí dàcácu nihnu ñaha-í xii-ndo nùu ncháa yícá cuèchi-ndo, te ndáá sá nchòhó cácu nihnu ndisa-ndo. ³⁷ Te yúhú sa xini-í sá nchòhó cúu-ndó ñani tñahá ndíi Abrahám, te dicó-ní sá ñá tñahá iní-ndó tñuhu cáháⁿ-í nùu xiáⁿ cuini-ndó càhni ñaha-ndo. ³⁸ Te yúhú cáháⁿ-í nàcuáa ní dánèhé ñáhá Tàtà-í, te nchòhó quidé-ndó nàcuáa cáháⁿ tātá-ndó —càchí-gá xáhaⁿ-gá xii-yu.

³⁹ Te ní xáháⁿ-yu:

—Ndíi Abrahám cúu tātá-ndí —càchí-yu xáháⁿ-yu xii-gá.

Te ní xáhaⁿ Jèsús:

—Núu ndisa ñani tñahá ndíi Abrahám cúu-ndó, te cada-ndo

nàcuáa ní xóo cada ndíi ní cùu. ⁴⁰ Te yúhú cuèi cáháⁿ-í ñⁿ tñuhu ndáá nàcuáa cáháⁿ Yá Ndiöxí càchí tñuhu-gá xii-í, te cuini-ndó càhni ñaha-ndo. ¡Dico ndíi Abrahám chi ñá túu dùcaⁿ ni quide ndíi! ⁴¹ Te nchòhó quidé-ndó nàcuáa quide tātá-ndó —càchí-gá xáhaⁿ-gá xii-yu.

Te ní xáháⁿ-yu:

—Nchúhú, ñá túu yàyacáⁿ ndécú tātá-ndí, chi ñⁿ dii Yá Ndiöxí cúu tātá-ndí —càchí-yu xáháⁿ-yu xii-gá.

⁴² Te ní xáhaⁿ Jèsús:

—Núu dicó Yá Ndiöxí ndisa cùu Tātá-ndó te cuu iní ñáhá-ndó xii-í ní cùu chi yúhú ní quee-í núu ndécú-gá véxi-í ñuyúú-a. Te ñá túu véxi-í sá cúu iní mee-í, chi mee-gá ní tendaha ñaha-gá véxi-í. ⁴³ Te ñá túu tècú tñuni-ndó tñuhu cáháⁿ-í chi ñá túu tñahá iní-ndó. ⁴⁴ Te nchòhó chí tātá-ndó cùu yucu ñávaha núu cùdí iní-ndó quide-ndo nchaa nacúáa cùu iní-xi, chi ndéé öre ní ngáva ñuyúú ducaⁿ-ni ndècu-xi dacáháⁿ-xi iní-ndó sàhni tñaha-ndo. Te ñá ñⁿ ndúu cáháⁿ-xi ñⁿ tñuhu ndáá chi ñá túu xica-xi ichi ndáá, chi mee-ni ichi tñuhu ndehnde xica-xi chi ducaⁿ iní-xi. Te ñⁿ xii dàcahu-xi iní-ndó dàcuandehnde-ndo. ⁴⁵ Te yúhú cáháⁿ-í tñuhu ndáá te ñá túu cuini-ndó quindáá iní ñáhá-ndó. ⁴⁶ ¿Te ndèdacáa nchòhó xini-ndó sá quidè-í ñⁿ sá cuèhé sá dúhá-í?, te yúhú ñá túu ná quidè-í chí cáháⁿ ndáá-í, ¿te ná cuendá ñá túu cuini-ndó quindáá iní-ndó tñuhu cáháⁿ-í? ⁴⁷ Te nchaa ñáyiú ndècu ichi Yá Ndiöxí, ñáyiú-án sácündedóho-yu nchaa tñuhu cáháⁿ-gá. Te nchòhó chí ñá díú ichi Yá Ndiöxí ndécú-ndó nùu ñá túu sácündedóho-ndo tñuhu cáháⁿ-gá —càchí-gá xáhaⁿ-gá xii-yu.

Díhna-gá Crístú sa ndècu dacúúxi ndíi Abrahám

⁴⁸ Te ní xáhaⁿ ñáyiú isràél:

—Váha-ni cáháⁿ-ndí sá tée samaritánú cúu-n, te yucu ñávaha ndècu ndihi-n —cachí-yu xáháⁿ-yu xii-gá.

49 Te ní xáhaⁿ Jèsús:

—Yúhú, ñá túú yùcu ñávãha ndècu ndihí-í, chí Tãtã-í quidé càhnu-í, te nchòhó da cùu úhú iní ñáhá-ndó xii-í —càchí-gá xáhaⁿ-gá xii-yu.

50 Te xáhaⁿ tùcu-gá:

—Yúhú, ñá túú càchí-í sá cádá càhnu ñaha-ndo, dico Dútú Ndióxi cuiní-gá sá cádá càhnu ñaha-ndo xii-í. Te mee-gã cáháⁿ-gá nõu ndédacãa-ndo guide váha, te ndédacãa-ndo ñá túú quide váha.

51 Te na càchí tnúhu ndáá-í xii-ndo sã nchãa ñáyiu na tnã tnúhu càháⁿ-í te vá cuíta nihnú-yu —càchí-gá xáhaⁿ-gã xii-yu.

52 Te ní xáhaⁿ tùcu ñáyiu isràél:

—Vitna te ní xiní ndáá-ndí sá yùcu ñávãha ndècu ndihí-n, chí ndíi Abrahám ndihí nchãa cue téé ní xóo cáháⁿ tnúhu Yá Ndióxi ndéé sanaha ní xihí-güedé, te yòhó càchí-tu-n sã ncháá ñáyiu na tnã tnúhu càháⁿ-n te vá cùu-gá-yu. 53 ¿Náa ío-gá càhnu çuu-ó dàcúuxí ñàní tnáhá-ndí ndíi Abrahám-ãⁿ? Téé-ãⁿ dai ní xihí-dé ndihí cue téé ní xóo cáháⁿ tnúhu Yá Ndióxi ndéé sanaha. ¿Te yòhó nágá-tu cùu-n te vá cùu-n càháⁿ-n-i? —cachí-yu xãháⁿ-yu.

54 Te ní xáhaⁿ Jèsús:

—Te núu dìcò mée-í quidé càhnu-í mée-í ñã, te ñá túú nãndihí sá quidé-í nõu ducaⁿ. Dico Tãtã-í quidé càhnu ñaha-gá xii-í, te diu-ni Yáá-ãⁿ càchí-ndó cùu Ndióxi-ndó. 55 Te nchòhó chí ñá túú xiní-ndó-gã. Te yúhú chí xiní-í-gá. Te núu na càchí-í sá ñá túú xiní-í-gá te dàcuandehnde-í dàtná ndehnde mée-ndo. Te yúhú chí xiní ndisa-í-gá te tnã-í nchãa tnúhu càháⁿ-gá. 56 Te ndíi Abrahám ñaní tnáhá-ndó ní xindecu ndéé sanaha ío ní cudíi iní ndíi sá quini ñáhá ndíi xii-í, te ní sáá nduu ní xiní ñáhá ndíi xii-í nõu ío ní cudíi iní ndíi —càchí-gá xáhaⁿ-gã xii-yu.

57 Te ní xáhaⁿ ñáyiu isràél xii Jèsús:

—Ni vãtã cúhúⁿ-gã-n ùdico úxí cuiá-n te càchí-n sã ní xiní-n ndíi Abrahám, te ní cunaha vñhi ní xihí ndíi-ãⁿ —càchí-yu xãháⁿ-yu xii-gá.

58 Te ní xáhaⁿ Jèsús:

—Te na càchí tnúhu ndáá-í xii-ndo sã cùmání-gã cundecu ndíi-ãⁿ ñuyú-a te yúhú sa ndècu-gá-í —càchí-gá xáhaⁿ-gã xii-yu.

59 Te sá dúcãⁿ ní cáháⁿ-gã nõu xiãⁿ ní quehéⁿ-yu yúu cuãha ñáhá-yu xii-gá ní cùu, te ní nguivãha-gá nõu-yu te ní quee-gá xití veñúhu cuáhãⁿ-gã.

9

Jèsús quidé tãtna-gã ñã téé cuáá

1 Te núu xicã cùu Jesús ní nanihí-gã ñã téé cuáá, te sa ducaⁿ tnãhí cãa núu-dé ní cacu-dé. 2 Te ní xáhaⁿ cué téé xica cuu ndihí-gã xii-gã:

—Mèstrú, ¿ná cuendá dàcãⁿ cuáá téé-ãⁿ ní cacu-dé? ¿Sã cuendá nchãa yicã cuèchi tãtã-dé, ãⁿ sã cuendá nchãa yicã cuèchi nãná-dé, ãⁿ sã cuendá nchãa yicã cuèchi mee-dé dàcãⁿ cáá-dé ní cacu-dé? —càchí-güedé xãháⁿ-güedé xii-gã.

3 Te ní xáhaⁿ Jèsús:

—Ni ñã díú sã cuendá nchãa yicã cuèchi mee-dé, te ni ñã díú sã cuendá nchãa yicã cuèchi tãtã-dé, te ni ñã díú sã cuendá nchãa yicã cuèchi nãná-dé, chí mee Yá Ndióxi ní cuiní-gá sá dúcãⁿ cùnduu-dé sáá-dé ñuyú-a cuendá sã ñuyú-a quini ñáyiu nása cada ñaha Yá Ndióxi xii-dé ndúha núu-dé. 4 Te vitna ío-gá nduu cùyica sã cádá-í nchãa chiúⁿ ní táhú Yáá ní tendaha ñaha xii-í véxi-í ñuyú-a, chí sáá nduu te vá ndácú-gã-í cada-í chiúⁿ-gã. 5 Te nini ndècu-gá-í ñuyú-a te dàndixi túu-í iní nchãa ñáyiu cuendá cutnùni iní-yu nãcuáa nduu cuendá Yá Ndióxi —càchí-gã xáhaⁿ-gã xii-güedé.

6 Te sátá dúcáⁿ ní cáháⁿ-gá, te ní sati-gá dí-gá núú ñhú te ní dácá-gã luha ñuhu ní cuáha ndéhyú, te ndéhyú-ãⁿ ní dácánù-gá ndúú xio núú tée cuáá-áⁿ. 7 Te ní xáhaⁿ-gã xii-dé:

—Quíhíⁿ-n nàquete-n núú-n ndùte tanquí Silòé —càchí-gá xáhaⁿ-gã xii-dé. Te Silòé-áⁿ quéé-xí tñuhu mèe-yu: Tée xica chiúⁿ.

Te ní sáháⁿ tée cuáá-áⁿ ní naquete-dé núú-dé, te òré ní ndexì-dé te sa ndèhe-dé. 8 Te nchaa ñáyiú ndècu yatni núú ndécú-dé ndíhi nchaa ñáyiú xìní ñáhá xii-dé núú xicáⁿ ndàhú-dé ní xítñahá-yu:

—¿Náa ñá díú tée-ãⁿ ní xóo cácaⁿ ndàhú-dé? —càchí-yu xítñahá-yu.

9 Te davá-yu càchí-yu sá díú-dé, te davá-yu càchí-yu sá ñá díú-dé, dico ducaⁿ càa-dé, càchí-yu xítñahá-yu.

Dico mee-dé ní xáhaⁿ-dè xii-yu sá díú-dé.

10 Te ní xicáⁿ tñuhú-yu núú-dé, te xáhãⁿ-yu:

—¿Náa ní cuu núu ní ndúha núú-n ndèhe-n vitna? —cachí-yu xáhãⁿ-yu xii-dé.

11 Te ní xáhaⁿ-dè:

—Tée nàni Jesús-ãⁿ ní cadúha-dé luha ndéhyú te ní dácánù-dé núú-í, te ní táuchíuⁿ-dè ní sáháⁿ-í tànquí Silòé ní naquete-í núú-í, te òré-áⁿ ñí cju cundehe-í —càchí-dé xáhaⁿ-dè xii-yu.

12 Te ní xicáⁿ tñuhú tùcú-yu núú-dé, te xáhãⁿ-yu:

—¿Te ndèé ndécú tée-áⁿ? —càchí-yu xáhãⁿ-yu xii-dé.

Te ní xáhaⁿ-dè:

—Ñá túú xìní-í —càchí-dé xáhaⁿ-dè xii-yu.

Cue tée cùu fariséú ndátñuhu-güedé ndíhi tée ní ndúha núú-xi

13 Te ndèca-güedé tée ní ndúha núú-xi-áⁿ cuáhãⁿ núú cuè tée cùu fariséú. 14 Te cuèndá sá ndùu ndetátú-yu ní cadúha Jesús ndéhyú ní dácánù-gá núú tée-áⁿ te ní ndúha,

15 xíãⁿ núu ní xicáⁿ tñuhú cuè tée cùu fariséú núú-dé, te xáhaⁿ-güedé:

—¿Náa ní cuu ní ndúha núú-n? —càchí-güedé xáhaⁿ-güedé xii-dé.

Te ní xáhaⁿ-dè xii-güedé:

—Íⁿ tée ní dácánù-dé ndéhyú núú-í te ní sáháⁿ-í ní naquete-í, te ní cuu ndèhe-í vitna —càchí-dé xáhaⁿ-dè xii-güedé.

16 Te dava cue tée cùu fariséú ní xítñaha-güedé:

—Ñá díú Yã Ndiòxí ní tèndaha ñaha-gá xii tée-ãⁿ véxi-dé núu duha quide-dé nchaa sá vã yõ tñahí ndàcu cada, te ñá túú sàndáá iní-dé canehe í-í-dé nduu ndetátú-ó —càchí-güedé xítñaha-güedé.

Te dava-güedé ní xítñaha-güedé:

—¿Náa ndacu-dé cada-dé sá vã yõ tñahí ndàcu cada te núu cùu-dé tée yíca cuèchi? —càchí-güedé xítñaha-güedé.

Te ñá túú ní cùu ñⁿnuu-güedé tñuhu ní cáháⁿ-güedé. 17 Te ní xicáⁿ tñuhú tùcu-güedé núú tée ní ndúha núú-xi-áⁿ, te xáhaⁿ-güedé:

—Te yòhó, ¿náa càchí-n cuèndá tée ní quide tátna núú-n te ní ndúha? —càchí-güedé xáhaⁿ-güedé xii-dé.

Te ní xáhaⁿ-dè:

—Yúhú càchí-í sá íⁿ tée càháⁿ tñuhu Yã Ndiòxí cúú-dé —càchí-dé xáhaⁿ-dè xii-güedé.

18 Dico cue tée isràel ñá ní sàndáá iní-güedé sá cuáá-dé ní cùu, chí cuèndá sa ní ndúha núú-dé ní xìní ñáhá-güedé, te xíãⁿ núu ní cana-güedé tátá-dé ndíhi nãná-dé, 19 te ní xicáⁿ tñuhú-güedé núú-yu, te xáhaⁿ-güedé:

—¿Diu tée-a déhe-ndo tée càchí-ndó cuáá-dé ní cacu-dé-ãⁿ? ¿Te náa ní cuu ní ndúha núú-dé? —càchí-güedé xáhaⁿ-güedé xii-yu.

20 Te ní xáhaⁿ tátá-dé ndíhi nãná-dé:

—Diu déhe-ndí cúú-dé te sa cuáá ndisa-dé ní cacu-dé, 21 dico ñá túú xìní-ndí náa ní cuu ní ndúha núú-dé, te ní ñá túú xìní-ndí yoo ní quide tátna. Chí cacáⁿ tñuhú núú méé-dé xíãⁿ núu sa sàcuéhé-dé,

te na cãháⁿ-dé nõu nása ní cuu ní ndúha núú-dě —cãchí-yu xãháⁿ-yu xii-güedé.

²² Duha ní cãháⁿ tãtã-dě ndihi nãná-dě ní xãháⁿ-yu xii-güedé cuendá sã yùhú-yu cue tée cùnũu núú ñãyiũ isrãél, chi cue tée-ãⁿ sa ní ndatnúhu-güedé ní cuu ñⁿnuu-güedé sã nõu ndédacãa ñãyiũ na cãháⁿ sã Jèsús cúu-gã Crístú Yaa ní tendaha Yã Ndiõxí véxi ñuyiú-a, te vá daña-gã-güedé quíhu-yu veñúhu. ²³ Núu xiãⁿ ní xãháⁿ tãtã-dě ndihi nãná-dě sã ná cãcãⁿ tnúhú-güedé núú méé-dě chi sa sacuéhé-dě.

²⁴ Te xiãⁿ nõu ní cana tucu-güedé tée ní ndúha núú-xi-ãⁿ, te ní xãháⁿ-güedé:

—Cãháⁿ-n ñⁿ tnúhu ndáá chi Yã Ndiõxí ndéhé ndi-gã nãcuãa ní cuu ní ndúha núú-n, chi nchúhú xini-ndí sã dícó ñⁿ tée ndècu yicã cuèchi-xi cùu tée cãchí-n ní quide tátna núú-n —cãchí-güedé xãháⁿ-güedé xii-dé.

²⁵ Te ní xãháⁿ-dë:

—Yúhú, ñã túú xini-í te núu tée ndècu yicã cuèchi-xi cùu-dé àdi ñãhá. Dico-ni sã xini-í sã cuãã-í ní cùu te vitna ní cuu cundehe-í —cãchí-dé xãháⁿ-dë xii-güedé.

²⁶ Te ní xicãⁿ tnúhú tucu-güedé núú-dë, te xãháⁿ-güedé:

—¿Nãsa ní quide ñaha-dë xii-n te ní ndúha núú-n-í? —cãchí-güedé xãháⁿ-güedé xii-dé.

²⁷ Te ní xãháⁿ-dë:

—Yúhú sa ní cãháⁿ-í te ñã túú quide cuendã-ndó. ¿Te ná cuendã cuini-ndó cãchí tnúhu-ni tucu-í? ¿Á tnãhá-ndó cuini-ndó quindãá ini-ndó tnúhu cãháⁿ-dé? —cãchí-dé xãháⁿ-dë xii-güedé.

²⁸ Te ní cudéãⁿ-güedé núú-dë, te ní xãháⁿ-güedé xii-dé:

—Te núu yohó cuini-n chinchicúⁿ-n tée-ãⁿ te cuãháⁿ, dico nchúhú chi canchicúⁿ niñnu nahi-ni-ndí nãcuãa ní cãháⁿ ndí Moisés. ²⁹ Te nchúhú chi ñaha-ndí sã Yã Ndiõxí ní cãháⁿ ndihi-gã ndí Moisés, dico

tée cãchí-n-ãⁿ chi ní ñã túú xini-ndí ndéé tée cùu-dé —cãchí-güedé xãháⁿ-güedé xii-dé.

³⁰ Te ní xãháⁿ tée ní ndúha núú-xi-ãⁿ:

—¿Te nãa ñã díú nchòhó cãchí-ndó sã ño túha-ndo? Te núu ducaⁿ cãháⁿ-ndó sã ñã túú xini-ndó ndéé tée cùu-dé, te diu-dé ní quide tátna-dé núú-í ní ndúha —cãchí-dé xãháⁿ-dë xii-güedé.

Te xãháⁿ tucu-dé:

³¹ —Xini-ó sã Yã Ndiõxí ñã túú tédòho-gã tnúhu cãháⁿ ñãyiũ quide nchaa sã cuèhé sã dúhá, chi nchaa ñãyiũ quide cahnu ñaha xii-gã te quidé-yu nchaa nãcuãa cùu ini-gã, te ñãyiũ-ãⁿ tédòho-gã tnúhu cãháⁿ-yu. ³² Te ñã ñⁿ ndũu cãháⁿ ñãyiũ cuendã ñⁿ tée cada tátna núú ñⁿ ñãyiũ cuãã ndéé ní cacu-xi te ndúha. ³³ Te núu ñã díú mée Yã Ndiõxí ní tendaha ñaha-gã xii tée-ãⁿ véxi-dé ñã, te vá ndácú-dë cada tátna-dé núú-í ní cùu —cãchí-dé xãháⁿ-dë xii-güedé.

³⁴ Te ní xãháⁿ-güedé:

—Dico yohó ndéé yatni vai cuèchi sa ta quide-n véxi, ¿te vitna nacanu ichi ñaha-n xii-ndí cãháⁿ-n-ãⁿ? —cãchí-güedé xãháⁿ-güedé xii-dé.

Te ní queñuhu ñaha-güedé xii-dé tnuú-güedé ñã túú ní daña-gã-güedé nihi tnãhá ndihi ñaha-dé xii-güedé.

Ñãyiũ ñã túú ndixi túu ini cuendã nchaa sã cuèhé sã dúhá quidé-yu

³⁵ Te ní nihi Jèsús tnúhu sã ñⁿ queñuhu-güedé tée ní cuhú núú-xi-ãⁿ tnuú-güedé cuendã sã vã tnãhá tnúhu ndihi ñaha-gã-dé xii-güedé, te ní naníhi ñãhá-gã xii-dé te ní xãháⁿ-gã:

—¿Sãndãá ini-n Dëhe Yã Ndiõxí-ãⁿ? —cãchí-gã xãháⁿ-gã.

³⁶ Te ní xãháⁿ tée ní cuhú núú-xi-ãⁿ:

—Mèstrú, cachí tnúhu núu ndéé ndécú tée-ãⁿ cuendã quindãá ini-í-dé —cãchí-dé xãháⁿ-dë xii-gã.

³⁷ Te ní xãháⁿ Jèsús:

—Sa xini-n-dě chi diu-dé cúu yúhú tée ndàtnúhu ndíhi-n — càchí-gá xáhaⁿ-gã xii-dé.

³⁸ Te ní ngúíñí xítí-dě núu-gã, te ní xáhaⁿ-dě:

—Xítohó Jesucrístú, sàndáá iní ñáhà-í xii-n —càchí-dé xáhaⁿ-dë xii-gã.

³⁹ Te ní xáhaⁿ tùcu Jesús:

—Yúhú véxi-í ñuyíú-a cada ndáá-í cuéchi ñáyíu. Te nchaa ñáyíu ñá túú quide váha cúu-yu dàtná ìⁿ ñáyíu cuàá, dico nchaa ñáyíu cùnuní iní-xi sá ñà túú quide váha, te núu na quindáá iní-yu tnúhu càháⁿ-í, te cada iní-ndó sã dàtná sá ñí nacaáⁿ núu-yu chi tní-yu tnúhu càháⁿ-í. Te ñáyíu càchí sá quidé váha vá núu núu-yu cuéchi-yu chi quesàhá-yu sá ïo ndáá quidë-yu, ñáyíu-áⁿ cúu-yu dàtná ìⁿ ñáyíu cuàá, chi vá ndíxí túu iní-yu sá ñà túú quide váha-yu ndècú-yu, te vá tní-yu tnúhu càháⁿ-í —càchí-gá xáhaⁿ-gã xii-dé.

⁴⁰ Te sá dúcáⁿ ñí càháⁿ-gá, núu ní càháⁿ ìⁿ úú cue tée cùu fariséú, te xáhaⁿ-güedë:

—¿Te náa tnàhá nchúhú cuàá-ndí càháⁿ-n-áⁿ? —càchí-güedë xáhaⁿ-güedë xii-gá.

⁴¹ Te ní xáhaⁿ Jèsús:

—Te núu dico nchòhó cuàá-ndó ñá, te vá cündëcu cuéchi-ndo ni cùu, dico càchí-ndó sã ndéhé-ndó ìⁿ sá quidé-ndó te ñà ndáá, núu xíáⁿ ïo ndëcu cuéchi-ndo.

10

Jèsús càháⁿ-gá cuèndá cùrrálí mbëé

¹ Te na càchí tnúhu ndáá-í xii-ndo sã ìⁿ tée ñà túú quíhu ndàa yuyehe ìⁿ currálí mbëé, te cùtexínu-ni na cuidó-dé, tée-áⁿ cúu-dë ñádúhú. ² Dico tée quíhu ichi yèhe currálí-güedi, tée-áⁿ cúu-dë xítohó-güedi. ³ Te tée ndë yèhe currálí-güedi nacaáⁿ-dé te cuánguihu xítohó-güedi te ní càháⁿ-dé, te ní nucúhuⁿ ndudú

ñáhá-güedi xii-dé. Te ní càháⁿ díú-dë-güedi te ní queñuhu-dë-güedi cùrrálí. ⁴ Te sátá ñí quee-güedi cùrrálí, te ní ngódó núu-dë núu-güedi, te ní ngüita nchicúⁿ ñáhá-güedi xii-dé chi ní nucúhuⁿ ndudú ñáhá-güedi. ⁵ Te ñá túú chinchícúⁿ-güedi ìⁿ tée tàtú, chi nucúhuⁿ ndudú-güedi sá ñà díú xítohó-güedi cùu-dé, núu xíáⁿ xínú-güedi núu-dë —càchí-gá xáhaⁿ-gã xii-güedë.

⁶ Duha ní càháⁿ Jèsús cuèndá sá cuiní-gá dacuahá-yu tnúhu-gá ní cùu, dico ñá ní tècú tnùní-yu nása nduu tnúhu ní càháⁿ-gá.

Jèsús cúu-gã dàtná ìⁿ toli

⁷ Te ní xáhaⁿ tùcu Jesús xii-güedë:

—Na càchí tnúhu ndáá-í xii-ndo sã yúhú cúu-í dàtná ìⁿ yèhe currálí núu ndíhu cue mbëé. ⁸ Te nchaa cue tée sa yòdo nuu-gá ní quixi ní dándàhú-güedë ñáyíu cùu-güedë dàtná ñádúhú dùhu-güedë cue mbëé ní cùu, dico ñá ní quide cuèndá ñáhá-güedi xii-güedë, chi ní cutnùní iní-güedi sá ñà díú xítohó-güedi cùu-güedë. ⁹ Te yúhú cúu-í dàtná yuyèhe currálí cue mbëé. Te ducaⁿ sàtnahá-xi cùu-í chi nchaa ñáyíu na túha ñaha xii-í te naníhí tàhú-yu. Te cúu-yu dàtná cue mbëé quiti xíquee cùrrálí-xi cuáháⁿ-güedi núu cáá ité caxi-güedi, te dàtnùní cuándihu-ná-güedi cùrrálí, ducaⁿ sàtnahá-xi cúu-yu.

¹⁰ Ñádúhú òré véxi-dé chi dùhu-dé, sàhni-dé te dànaa-dé mbëé, dico yúhú chi véxi-í cuèndá sá naníhí tàhú-ndó te ïo cudíⁿ iní-ndó cùnu cuechi-ndo núu Dútú Ndióxi ní caa ní quíhíⁿ. ¹¹ Te yúhú cúu-í dàtná ìⁿ toli tée ïo nèhe cuèndá mbëé-xi, chi tée-áⁿ cuéi na cúu-dé sá cúu-xi mbëé-dë cuèndá-nà sá ná cäcu-güedi. ¹² Te núu ìⁿ tée na còto ñaha xii-güedi, te tée-áⁿ cuèndá-ni sá ñúhú yáhu-dé xító-dë-güedi. Te núu na quíní-dé sáá ìⁿ quiti

déⁿ te dàña-dé-güedi xínu-dé, te ndìhi-güedi xité nuu ñaha quiti dééⁿ-ãⁿ, chi ñá díú mèi xítóhó-güedi cùu-dé. ¹³ Chi cuendá-ni sá ñúhú yáhu-dé xító-dé-güedi núu ñá túú ná ndìhú iní-dé cuèi na dândìhi ñaha quiti cuìhna. ¹⁴ Te yúhú cùu-í dàtná ìⁿ téé ío váha xító mbéé-xi, chi téé-áⁿ da ìⁿ da ìⁿ-di xíní-í-dé nàcuáa ndáa-di, te ducaⁿ xíní ñáhá-güedi xii-dé. Te ducaⁿ sãtnahá-xi cùu yúhú ndìhi nchaa ñáyiu sãndáá iní ñáhá xii-í, chi yúhú xíní-í-yu te ducaⁿ mèé-yu xíní ñáhá-yu xii-í.

¹⁵ Te ñu-ni ducaⁿ cùu-í ndìhi Tãtà-í, chi xíní ñáhá-gã xii-í te xíní-í-gã. Te sáá nduu cùu-í cuendá nchaa ñáyiu sãndáá iní ñáhá xii-í.

¹⁶ Te ndècu-gã ñáyiu vátá quindáá iní ñáhá-gã xii-í. Te xíní ñuhu-xi cundedóho-yu tnúhu-í te quindáá iní ñáhá-yu cuendá ìⁿ-ná ichi cuú-yu, te ducaⁿ cùndecu ìⁿ-ná téé coto ñaha xií-yu cuu-dé dàtná ìⁿ tòlí-yu, te téé coto ñaha xií-yu-áⁿ cùú yúhú.

¹⁷ Te Tãtà-í ío cùdíí ìní ñáhá-gã xii-í cuendá sá sáá ìⁿ nduu te cuú-í, te cuú-í chi ducaⁿ càchí iní-í, te ñá díú sã cùú ìní ñáyiu ñuyúú-a cuú-í, te cuú-í dico ndoto-í. ¹⁸ Te vá yõ ìⁿ te ndacu cahni ñaha xii-í, te núu ñá díú sã cùú ìní mèé-í cuú-í. Te dàtná-ni cùu iní-í sã cùu-í te ñu-ni ducaⁿ ndoto-í chi ducaⁿ ni càchí Tãtà-í Dútú Ndióxi cunduu — càchí-gã xáhaⁿ-gã xii-güedé.

¹⁹ Te sá dúcáⁿ ní cáháⁿ-gã te ñá ní cùu ìⁿnuu tucu ñáyiu isràél. ²⁰ Te davá-yu ní xítñahá-yu:

—¿Ná cuendá sãndáá-tu iní-ndó tnúhu càháⁿ téé-ãⁿ, te yucu ñávãha ndècu ndìhi-dé, lúcú téé-ãⁿ? — càchí-yu xítñahá-yu.

²¹ Te davá-yu ní xítñahá-yu:

—¿Náa xíní-ndó ìⁿ téé ndècu ndìhi yucu ñávãha duha váha cáháⁿ-dé? ¿Náa xíní-ndó núu ndacu yucu ñávãha cada tátña-xi núu ìⁿ téé cuàá te ndúha? —càchí-yu xítñahá-yu.

Ñáyiu isràél dáquèe tíhú-yu Jèsús

²² Te ndi tnahá cuía ndádá càhnú-yu vico veñúhu càhnu sá ío cùnnu ñuú Jerusalén, te mei yõo quidé víxiⁿ-xi quidé-yu vico-áⁿ.

²³ Te corrèdór veñúhu-áⁿ nání-xí Salomón, te xiáⁿ xicá cùu Jèsús. ²⁴ Te ní chítú ñíhnú ñáyiu isràél núú-gã, te ní xáháⁿ-yu:

—¿Ná ndéé òré cachí tnúhu ndáá-n, te núu sá Cristú Yaá ní tendaha Yã Ndióxi véxi ñuyúú-a cùu-n, àdi ná téé cùu-n?, cáháⁿ-ni-n —càchí-yu xáháⁿ-yu xii-gã.

²⁵ Te ní xáhaⁿ Jèsús:

—Sa ní cachí tnúhu-í te ñá sãndáá iní-ndó, te ndèhe-ndo sá vái núú sá quidé-í sá ní táuchíúⁿ Tãtà-í cada-í, te cùu-xi ìⁿ sã cútñuní iní-ndó ná téé cùu-í. ²⁶ Dico nchòhó ñá sãndáá iní-ndó, chi ñá túú cùu-ndo ñáyiu ní chitnahá ñáhá xii-í. ²⁷ Chi nchaa ñáyiu ní chitnahá ñáhá xii-í cùu-yu dàtná cue mbéé quiti xíndecu ndìhi xítóhó-xi chi nùcúhuⁿ ndudú-güedi xítóhó-güedi, te ducaⁿ nàquiní ñáhá-ní xítóhó-güedi xii-güedi. Ducaⁿ sãtnahá-xi cùu nchaa ñáyiu ní chitnahá ñáhá xii-í. ²⁸ Te yúhú cada-í te nduu táhú-yu cundecu ndìhi ñáhá-yu xii-í ni caa ni quíhíⁿ te vá ìⁿ ndùu-gã cuíta nihnú-yu, te ni vá yõ ìⁿ ndacu naquendeé ñáhá xií-yu ndaha-í. ²⁹ Chi Tãtà-í ní taxi cuendá ñáhá-gã xií-yu. Te ío cùnnu-gã núu xiáⁿ vá yõ ìⁿ ndacu naquendeé ñáhá xii-yu ndaha-gã. ³⁰ Yúhú ndìhi Tãtà-í Dútú Ndióxi ìⁿ-ni cùu-ndí —càchí-gã xáhaⁿ-gã xií-yu.

³¹ Te ní queheⁿ tucu ñáyiu isràél yúú cuãha ñáhá-yu xii-gã ní cùu.

³² Te ní xáhaⁿ-gã xií-yu:

—Ío cuéhé sã vãha ní quide-í núú-ndó ní chindee ñaha Tãtà-í Dútú Ndióxi. ¿Te ndédacáa sá ñá tnahá iní-ndó núu cuíní-ndó cuãha ñaha-ndo yúú xii-í-í? —càchí-gã xáhaⁿ-gã xií-yu.

³³ Te ní xáhaⁿ ñáyiu isràél:

—Ñá díú cuendá nchaa sá vǎha ní quide-n cuini-ndí cuáha ñaha-ndí yúú xii-n, chí ìⁿ òi-ní sá ío cáháⁿ úhú-n cuendá Yǎ Ndiòxí. Te dicó ìⁿ téé ñuyíú-a cùu-n te càchí-n sá cúú-n Ndiòxí —càchí-yu xǎhǎⁿ-yu xii-gá.

³⁴ Te ní xáhaⁿ Jèsús:

—Núú tütú Yǎ Ndiòxí sá ndécú ndíhi-ndo cáháⁿ-xi nàcuáa ní cáháⁿ-gá, te duha ní cachí-gá: “Nchòhó quidé-ndó ñù-í”, duha ní cachí-gá. ³⁵ Te nàha-o sá vǎ cúú quèhndé nihnu-o tnúhu yòdo tñuní núú tütú Yǎ Ndiòxí, chí mee-gǎ ní cachí-gá sá cádá-yu núú-gǎ, te vǎ càchí-ó sǎ ñǎ ndáá. ³⁶ Te núú ducaⁿ ní cáháⁿ-gá sá núú-gǎ quidé nchàa ñáiyu ní sándáá iní ñáhá xii-gá ñǎ, ¿te ná cuendá cúdèéⁿ-ndó núú yúhú sá càchí-í sá cúú-í Déhe-gá? Te mee Yǎ Ndiòxí ní tendaha ñaha-gá xii-í véxi-í ñuyíú-a sá cádá-í chiúⁿ-gá. ³⁷ Te núú ñǎ túú quide-í nàcuáa ní táuchíúⁿ Tǎtà-í cada-í ñǎ, te vǎ quindáá iní ñáhá-ndó. ³⁸ Te núú quide-í ñǎ, te cuèi vǎ quindáá iní ñáhá-ndó xii mee-í dico quindáá iní-ndó nchàa chiúⁿ quide-í. Ducaⁿ te cutnùní ndáá iní-ndó sǎ Yǎ Ndiòxí ndécú ndíhi-í te ìⁿ-ní cùu-ndí —càchí-gá xáhaⁿ-gǎ xii-yu.

³⁹ Te ní cuini-güedé tñi ñaha tucu-güedé xii-gá quíhíⁿ-gá vecaá ní cùu, dico ní xinu núú ñáhá-gǎ xii-güedé.

⁴⁰ Te ní xica-gá cuáháⁿ-gǎ ndàa ingá xio yúte Jórdán núú ní xóo dacuàndute ndí Juáá ñáiyu ndéé díhna, yàcáⁿ ní xindecu-gá. ⁴¹ Te yàcáⁿ ío vǎi ñáiyu ní sáháⁿ ní cáháⁿ ndíhi ñaha xii-gá, te ní xitnàhá-yu:

—Ndí Juáá, cuèi ñǎ túú ní quide ndí sá vǎ yóo tnàhí ndàcu cada dico ndáá ní cáháⁿ ndí, chí dàtná-ní ní cáháⁿ ndí quide téé-a —càchí-yu xitnàhá-yu.

⁴² Te yàcáⁿ ío vǎi-yu ní sándáá iní ñáhá-yu xii-gá.

11

Ní xíhí té Lǎzarú

¹ Núú Bètaniá ní xindecu ìⁿ téé ní xínani-dé Lǎzarú. Te càhú víhí ní tnàhá-dé ní cuhú-dé, te ní xindecu ndíhi-dé cue cúha-dé tá Màriá ndíhi tá Màrta chí xiáⁿ ñúú-yu. ² Te tá Màriá-áⁿ cúú-xí xíchí ní sódo àcítí sáháⁿ tnámí sáhá Jèsús, te ní nadayichí-xi sáhá-gǎ ndíhi idi díquí-xi. Te cuendá sá cùhú cúha-yu té Lǎzarú, ³ núú ní tendàhá-yu ñáiyu nàha tnúhu cuáháⁿ núú Jèsús, te xǎhǎⁿ-yu xii-gá:

—Mèstrú, téé ío cùu iní-n ío càhú tnàhá-dé cùhú-dé —càchí-yu xǎhǎⁿ-yu xii-gá.

⁴ Te sá dúcáⁿ càa tnúhu ní sáá, núú ní xáhaⁿ Jèsús xii-yu:

—Dico cuhéé-ǎⁿ chí vǎ cùú-dé sá cúú dúcáⁿ-dé, chí Yǎ Ndiòxí cuini-gá sá quini-yu nchaa sá cádá-gǎ cuendá chiñuhu ñáhá-yu xii-gá, te díu-ni ducaⁿ chiñuhu ñáhá-yu xii yúhú Déhe-gá —càchí-gá xáhaⁿ-gǎ xii-yu.

⁵ Te cuèi ío cùu iní ñáhá Jèsús xii té Lǎzarú ndíhi cue cúha-dé ⁶ dico òré ní níhí-gǎ tnúhu, te ní cuyaa-gǎ úú-gá nduu núú ndécú-gǎ. ⁷ Te ní xáhaⁿ-gǎ xii cue téé xica cuu ndíhi-gá:

—Na quíhíⁿ tucu-o distritú Jüdeá —càchí-gá xáhaⁿ-gǎ xii-güedé.

⁸ Te ní xáhaⁿ cuè téé xica cuu ndíhi-gá xii-gá:

—Mèstrú, vitna-ni cuini cue téé isràél xindecu yàcáⁿ cuáha ñaha-güedé xii-n yúú ní cùu, ¿te cuini-ni tucu-n quíhíⁿ-n-ú? —càchí-güedé xáhaⁿ-güedé xii-gá.

⁹ Te ní xáhaⁿ Jèsús:

—Úxúú òré cúú ìⁿ nduu, te núú nduu na càca cuu-o, te ñǎ túú ná candaundeé-ó chí cutnùní núú-ó chí dìtó. ¹⁰ Dico núú niú ná càca cuu-o, te ío ná candaundeé-ó chí vǎ cutnùní núú-ó —càchí-gá xáhaⁿ-gǎ xii-güedé.

¹¹ Te ní xáhaⁿ Jèsús:

—Té Lǎzarú téé ío váha tnàhá tnúhu ndíhi-o ní xídí-dé dico

quihíⁿ-ó chi ndocani-o-dě —
càchí-gá xáhaⁿ-gã xii-güedé.

¹² Te ní xáhaⁿ-güedé xii-gá:

—Mèstrú, te núu xidí-dé te váa sa ta ndúha-dé cuáháⁿ —càchí-güedé xáhaⁿ-güedé xii-gá.

¹³ Duha ní cáháⁿ Jèsús, chi té Lázará sa ní xihí-dé te cue téa xica cuu ndihi-gá ní sani iní-güedé sá ní xidí ndisa-dé. ¹⁴ Te Jèsús ní xáhaⁿ ndáá-gá xii-güedé:

—Sa ní xihí té Lázará. ¹⁵ Váha-gá sá ñã ní sáháⁿ-í quíngoto-í-dé, chi ndècu ingá chiúⁿ cada-í quini-ndó, te quindáá iní ñáhá-gã-ndó xii-í, te vitna na quihíⁿ-ó núu ndécú yiqui cuñú ndíi —càchí-gá xáhaⁿ-gã xii-güedé.

¹⁶ Te té Mǎxí téa xáhaⁿ-güedé cuáchí ní xáhaⁿ-dè xii dava-gá-güedé:

—Na quihíⁿ-ó ncháa-o chi yacáⁿ cuú-ó ndihi-dé —càchí-dé xáhaⁿ-dè xii-güedé.

Jèsús cáháⁿ-gá sá cuèi na cuú ñáyiu dico ndotó-yu cundecú-yu ndihi-gá

¹⁷ Te òré ní sáá Jèsús ñuú Bètaniá, te ní xáháⁿ-yu sá sà ní cuu cúmi nduu ní xihí té Lázará. ¹⁸ Te ñuú-áⁿ cáa yatni-ní-gá ñuu Jerusàlén, dátá cuádava-ná òré cuhuⁿ-o ichi te saá-ó. ¹⁹ Núu xiáⁿ vai ñáyiu israhél ní sáháⁿ-yu ní cáháⁿ ndihi-yu tá Mǎrta ndihi cúhú-xi tá Màriá, te ní sáñáhá-yu tnúhu ndee iní sá dúcáⁿ ní xihí cúha-yu. ²⁰ Te ní níhí tá Mǎrta tnúhu sá ñúhú Jèsús ichi cuáháⁿ-gá núu ndécú-yu núu ní sáháⁿ-xi ní sátnahá-xi-gá, te cúhú-xi tá Màriá ní ndóo-xi vehe. ²¹ Te òré ní naníhí tá Mǎrta Jèsús, te ní xáhaⁿ-xi xii-gá:

—Mèstrú, te núu dicó ní xíndecu-n ìha te vá cuú cúha-ndí ní cuú. ²² Te cuèi vitna te núu ná sá ná cacáⁿ-n núu Yá Ndióxi te taxi-gá xii-n —càchí-xi xáhaⁿ-xi xii-gá.

²³ Te ní xáhaⁿ Jèsús:

—Vá ndihú iní-n chi ndoto cúha-n —càchí-gá xáhaⁿ-gã xii-xi.

²⁴ Te ní xáhaⁿ tá Mǎrta:

—Ndáá chi sa xini-í sá ndotó-dè ná quítnahá nduu ndoto nchaa ñáyiu ní xihí —càchí-xi xáhaⁿ-xi xii-gá.

²⁵ Te ní xáhaⁿ Jèsús:

—Yúhú dandòto-í-yu cuendá cundecú-yu ni caa ni quihíⁿ ná sáa nduu. Te nchaa ñáyiu na quindáá iní ñáhá xii-í, te cuèi na cuú-yu dico ndotó-yu cundecu-í ndihi-yu ni caa ni quihíⁿ. ²⁶ Te nchaa ñáyiu ndècu vívú ñuyú-a te núu na quindáá iní ñáhá-yu xii-í, te cundecu ndihi-í-yu ni caa ni quihíⁿ. ¿Sàndáá iní-n tnúhu-a ñã? —càchí-gá xáhaⁿ-gã xii tá Mǎrta.

²⁷ Te xáhaⁿ-xi:

—Mèstrú, sàndáá iní-í, te sàndáá tucu iní-í sá diú-n cuu-n Cristú Déhe Yá Ndióxi, Yaá ní tendaha-gã vèxi ñuyú-a —càchí-xi xáhaⁿ-xi xii-gá.

Jèsús ndáhí-gá núu ní nguíndüxi té Lázará

²⁸ Sátá dúcáⁿ ní cáháⁿ-xi te ní sáháⁿ ngana-xi cúhú-xi tá Màriá, te dayuhu ní xáhaⁿ-xi:

—Yacáⁿ ní quexio Mèstrú, te càna ñaha-dé xii-n —càchí-xi xáhaⁿ-xi.

²⁹ Te sá dúcáⁿ xáhaⁿ cúhú tá Màriá sá cáná ñaha Jèsús xii-xi, núu ndihi-ni ní xica-xi cuáháⁿ-xi núu ndécú-gá. ³⁰ Te Jèsús vátá quihu-gá xiti ñuú, chi ndècu-ni-gá núu ní sáháⁿ tnahá ñáhá tá Mǎrta. ³¹ Te ñáyiu israhél ndécú sáñaha tnúhu ndee iní xii tá Màriá ndihi cúhú-xi ní sani iní-yu sá cuáháⁿ-xi núu yíndüxi cúha-xi ndáhyú-xi ní cáháⁿ-yu, núu nchicúⁿ-yu-xi cuáháⁿ.

³² Te ní sáá tá Màriá núu ndécú Jèsús te ní nguíñi xiti-xi núu-gá, te xáhaⁿ-xi xii-gá:

—Mèstrú, te núu dicó ní xíndecu-n ìha te vá cuú cúha-ndí ní cuú —càchí-xi xáhaⁿ-xi xii-gá.

³³ Te sá ní xini Jèsús ndáhyú tá Màriá ndihi ñáyiu israhél nchicúⁿ ñáhá cuáháⁿ, xiáⁿ ío ní cuyica iní-gá.

³⁴ Te ní xáhaⁿ-gã xii-yu:

—¿Ndèé ní taxi ndecu-ndo yìqui cuñú-dé-í? —càchí-gá xáhaⁿ-gã xii-yu.

Te ní xáhãⁿ-yu:

—Mèstrú, néhé ná quihíⁿ-ó te quini-n —càchí-yu xáhãⁿ-yu xii-gá.

³⁵ Te ní ndáhyú-gá tñahá-gá. ³⁶ Te ní xítñaha ñáyiu isràél:

—Súúni cùu iní-dé ndíi ni cùu —cachí-yu xítñahá-yu.

³⁷ Te davá-yu xítñahá-yu:

—Tée-a ní quide tátna-dé núu tée cuáá te ní ndúha. ¿Te nása ní cuu núu ñá túú ní quide tátna-dé té Lázaru cuendá sá vã cuú-dé ní cùu-í? —cachí-yu xítñahá-yu.

Jèsús dándoto-gá té Lázaru

³⁸ Te ío ní cuyica tucu iní Jèsús òré ní quexio-gá yuhu yàú núú ní chihi-güedé yiqui cuñú té Lázaru. Te yuhu yàú-án ndedí ñⁿ yúú. ³⁹ Te ní xáhaⁿ Jèsús xii-yu:

—Chí xócàni yúú-ãⁿ —càchí-gá xáhaⁿ-gã xii-yu.

Te ní xáhaⁿ tã Mårta cúha tée ní xihí-áⁿ:

—Mèstrú, sa tucu sàháⁿ-dé chi sa ní cuu cúmi nduu sá ní xihí-dé —càchí-xi xáhaⁿ-xi xii-gá.

⁴⁰ Te ní xáhaⁿ Jèsús:

—¿Náa ñá díú ní cachí-í sá núu na quindáá iní-n, te quini-n sá ño càhnu cuu Yá Ndióxi? —càchí-gá xáhaⁿ-gã xii-xi.

⁴¹ Te ní xócàni-yu yúú ndedí yuhu yàú-án. Te ní ndacoto-gá andiu, te ní xáhaⁿ-gã xii Tátá-gã Dútú Ndióxi:

—Táu, ndacáⁿ tãhú-í núu-n sá ní tédoho-n tñúhu ní cáháⁿ-í. ⁴² Te yúú sa náha-í sá ncháá-ni òré ndèdóho ñaha-n xii-í, dico duha cáháⁿ-í cuendá sá ná təcú dóho nchaa ñáyiu ndecu iha cuendá quindáá iní-yu sá díú-n ní tendaha ñaha-n xii-í véxi-í ñuyú-a —càchí-gá xáhaⁿ-gã xii Dútú Ndióxi.

⁴³ Te sátá ducáⁿ ní cáháⁿ-gá ndihí Yá Ndióxi, te níhi ní cáháⁿ-gá xáhaⁿ-gã xii tée ní xihí-áⁿ:

—¡Lázaru, tandèe xíaⁿ! —càchí-gá xáhaⁿ-gã xii-dé.

⁴⁴ Te ní ndee tée ní xihí-án yaú-án, te ndütu dóo cuñí ndàha-dé ndihí sàhá-dé, te dàhu tucu ñⁿ dóo núú-dé. Te ní xáhaⁿ Jèsús xii-yu:

—Chí nándàxi-dé te dañà-ndo-dé ná cáca-dé —càchí-gá xáhaⁿ-gã xii-yu.

Ndücu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

⁴⁵ Te nchaa ñáyiu nchicúⁿ ñáhá xii tá Måría cuáháⁿ ío vai-yu ní sándáá iní-yu Jèsús sá ní xini-yu nàcuáa ní quide-gá. ⁴⁶ Dico davá-yu ní sáháⁿ-yu núú cuè tée cùu fariséú, te ní caní-yu cuèndú núú-güedé nàcuáa ní quide Jèsús. ⁴⁷ Te cue tée cùu fariséú ndihí cue dútú cùnùu ní nataká-güedé ní xóo-güedé jundá, te ní xítñaha-güedé:

—¿Náa cada-o?, chi tée-ãⁿ ío vai sá vã yõ tñahí ndacu cada quide-dé. ⁴⁸ Te núu na dàña ío te nchaa ñáyiu quindáá iní ñáhã-yu xii-dé, te quixi cue tée ñúú Rómá dangòyo-güedé veñúhu-o te danàa-güedé nchaa ñúú-ó —càchí-güedé xítñaha-güedé.

⁴⁹ Te ñⁿ cue tée-ãⁿ nání-dé Caifás, te cùnùu-gá-dé núú dàva-gá cue dútú cuíá-ãⁿ, te ní xáhaⁿ-dè xii-güedé:

—Nchòhó ni lùha ñá túú cùtñuní iní-ndó. ⁵⁰ Te ní ñá sàha-ndo cuendá sá vaha-gá tñahá-ó, te núu na cùú ñⁿ-ni tée cuendá nchaa ñáyiu isràél, te ñá díú sá dánàa ñaha-güedé xii-yu —càchí-dé xáhaⁿ-dè xii-güedé.

⁵¹ Dico té Caifás chi ñá díú sá cúú iní mée-dé ní cáháⁿ-dè, chi cuendá sá cuíá-ãⁿ ní cùnùu-dé núú cuè dútú, núu xiáⁿ Yá Ndióxi ní dácáhu iní ñáhã-gã nàcuáa cáháⁿ-dè sá Jèsús cuú-gá sá cúú-xi nchaa ñáyiu isràél.

⁵² Te ñá díú cuendá mee-ni ñáyiu-án cuú-gá, chi cuú-gá tñahá cuendá nchaa ñáyiu ní sándáá iní ñáhá xii-gá, ñáyiu nchitènuu nihí ñuyúú, te ñⁿ-nà cuú-yu ndihí-gá. ⁵³ Núu ndéé nduu-ãⁿ ní ndatnúhu cue

tée cùnno núú ñáyiu israhél nàcuáa cada-güedé cahni-güedé Jèsús.

⁵⁴ Te xiáⁿ núú ñá ní xica cuu-gá Jèsús quini ñáhá ñáyiu israhél, te ní quee-gá cuáháⁿ-gá ñúú Efraín, ñⁿ ñúú cáá yàtni yucu, yàcáⁿ ní ngüíñi-gá ndihi cue tée xica cuu ndihi-gá.

⁵⁵ Te ta cùyatni nduu cadá-yu vico páscaú. Te cuéhé ñáyiu ní quee-yu ñúú-yu cuáháⁿ-yu ñúú Jerusalén cuendá sá sà ndihí-yu nchaá-yu nduu íí, te tnahá nduu vico páscaú.

⁵⁶ Te yàcáⁿ nánducú-yu Jèsús ní cùu te ñá túú-gá òré-áⁿ, te ní naníhí tnahá-yu xití veñúhu, te xitnahá-yu:

—¿Nása sàni iní-ndó-í? ¿Quixi Jèsús vico ãⁿ ñhá? —càchí-yu xitnahá-yu.

⁵⁷ Te cue tée cùu fariséú ndihí cue dútú cúnno sa ní xáhaⁿ-güedé xii ñáyiu sá núú ndéda-ni cáá-yu xini-yu núú ndécú Jèsús te na càháⁿ-ni-yu cuendá tñi ñaha-güedé xii-gá.

12

*Íⁿ ñadihí chíhí-áⁿ Jèsús acití
(Mt. 26:6-13; Mr. 14:3-9)*

¹ Íñú-gá nduu cùmání tnahá vico páscaú, te ní sáháⁿ Jèsús ñúú Bètania, ñúú té Lázaru tée ní dándótó-gá. ² Te xiáⁿ ní cadúha-yu sá ñi cudini Jesús. Te tá Márta ní sani-xi cóho, te té Lázaru yíhí-dé mésá ndihi Jèsús, ndihi dava-gá-güedé xéxi-güedé. ³ Te tá Mariá néhé-xi cuádava lítrú acití sáháⁿ tnámí sá ío ndeyáhu, te acití-áⁿ ñi cuáha mee-ni yúcu nárdú, te ní sódo-xi sáhá Jèsús, te ní nadayichí-xi ndihí idi díquí-xi sáhá-gá. Te nihí xití vehe ní xité nuu dicó acití-áⁿ. ⁴ Te té Jüdás déhe té Ximú Iscarioté ñu-ni ñⁿ tée xica cuu ndihí-gá, tée cuáha cuendá ñáhá xii-gá núú cué tée cùu úhu iní ñhá ní xáhaⁿ-dè xii-gá:

⁵ —¿Ná cuendá ñá ní cùyáhu acití-a sá ùni cièndú díhúⁿ denàriu

cuu cuendá ñáyiu ndàhú? —càchí-dé xáhaⁿ-dè xii-gá.

⁶ Dico sá dúcáⁿ ñi cáháⁿ té Jüdás chi ñá díú sá ndísá ñuhu iní-dé ñáyiu ndàhú chi dicó-ni ñⁿ ñádúhú cúú-dé, chi ñu-dé néhé cuendá-dé díhúⁿ-güedé ncha-güedé te ní xóo duhu ñáha-dé xii-güedé. ⁷ Te ní xáhaⁿ Jèsús:

—Daña, vá dásatú-n iní xichí-a na tàxúha nahi-xi àciti-a, chi nándihí ndéé òré ná nguñdúxi-í. ⁸ Chi nchòhó chi cuhúⁿ tnahá-ni ñáyiu ndàhú tnuú-ndó, dico yúhú chi vá ncháá nduu cundecu ndihí ñaha-í xii-ndo —càchí-gá xáhaⁿ-gá xii-dé.

*Tnahá té Lázaru cuini-güedé
cahni ñaha-güedé xii-dé*

⁹ Te vài ñáyiu israhél ní nihí-yu tñúhu sá ndécú Jèsús ñúú Bètania. Te ní sáháⁿ-yu cuendá quini-yu-gá, te quini-yu tnahá té Lázaru tée ní dándótó-gá. ¹⁰ Te cue dútú cúnno ní ndatnúhu-güedé ní cuu ñⁿnuu-güedé cuendá sá cáhni-güedé tnahá té Lázaru ní cùu, ¹¹ chi ñu cuendá tée-áⁿ ñi cuu cuéhé ñáyiu israhél tá daña nihnú-yu-güedé cuáháⁿ cuendá sá ñi sándáá iní-yu Jèsús.

*Jèsús cuánguihu-gá ñúú Jerusalén
(Mt. 21:1-11; Mr. 11:1-11; Lc. 19:28-40)*

¹² Te nduu tnée-áⁿ vài ñáyiu ní quexìo ñúú Jerusalén cuendá cundecu-yu vico, te ní nihí-yu tñúhu sá Jèsús sáá-gá tnahá-gá cundecu-gá vico-áⁿ, ¹³ núu ní xehndé-yu ndaha yùtnu ñúú, te néhé-yu ní sáháⁿ ní sátnahá ñáhá-yu xii-gá. Te nihí ní cáháⁿ-yu, te càchí-yu:

—Ío càhnu cuu Yá Ndióxi! Te ducaⁿ-ñi ío càhnu cuu Yaá ní tendaha-gá véxi quindaha ñaha xii-o —duha ní cachí-yu.

¹⁴ Te Jèsús ní nihí-gá ñⁿ búrru, te yòdo-gá-di cuáháⁿ. Te ducaⁿ ñi cuu chi ní quee ndáá-xi nàcuáa càháⁿ-xi núú tütú Yá Ndióxi núú càchí-xi:

¹⁵ Vá yúhu nchòhó cue ñáyiu ndécu ñúú Siòn,

chi iha véxi téé yíndaha ñaha xii-ndo yodo-dé ñⁿ búrru.

Duha càchí-xi núú tütú-gá. ¹⁶ Dico cue téé xica cuu ndihi Jesús ñá ní ndacu iní-güedé nàcuáa càháⁿ-xi núú tütú Yá Ndiöxí nàcuáa cada Jèsús. Dico sáta cuándaa-gá andiu cada cahnu ñaha Tátá-gá xii-gá, te ní ndacu iní-güedé sá dúcáⁿ yòdo tnuni nàcuáa cada-gá, te ducaⁿ ní cuu.

¹⁷ Nchaa ñáyiú ní xíndecu ndihi Jèsús òré ní dándótó-gá té Lázaru, ya yacáⁿ ní caní-yu cuéndú núú ñáyiú nàcuáa ní quide ñaha-gá xii-dé.

¹⁸ Te vai-yu ní sáháⁿ-yu núú ndécú Jèsús cuéndá sá ní níhí-yu tnúhu ní quide-gá sá vá yòo tnáhi ndacu cada. ¹⁹ Te cue téé cùu fariséú ní xítñaha-güedé:

—Ní xito-ndo nã ñá túú nàndihi sá quidé-ó-vá, chi nchaa ñáyiú ní chinchícúⁿ ñáhã-yu xii-dé — càchí-güedé xítñaha-güedé.

Ñáyiú ñá túú cùu ñáyiú isràel nándicú-yu Jèsús

²⁰ Te tnáhá ñáyiú ñá túú cùu ñáyiú isràel ní sáháⁿ-yu vico ñúú Jerusalén ní quide càhnú-yu Yá Ndiöxí. ²¹ Te ñáyiú-áⁿ ní sáháⁿ-yu núú tè Lipé téé ñúú Betsaidá, te ñúú-áⁿ yíndèhu-xi distritú Galiléa. Te ní xáhãⁿ-yu xii-dé:

—Tátá, vá cündèe iní-n càchí tnúhu-n núú ndéé ndécú Jèsús, chi cùníní-ndí càháⁿ ndihi-ndí-gá — càchí-yu xáhãⁿ-yu xii-dé.

²² Te té Lipé ní naníhí-dé té Ndríxí te ní xáhaⁿ-dè nàcuáa càháⁿ-yu, te ndi nduú-güedé ní sáháⁿ-güedé ní xáhaⁿ-güedé xii Jèsús nàcuáa càháⁿ-yu. ²³ Te ní xáhaⁿ Jèsús xii-güedé:

—Vitna ní cuyatni òré cada càhnu ñaha Tátá-í xii-í, te quini-yu sá ïo càhnu cuu yúhú Téé cùu ñaní tnáhã-yu nchaá-yu. ²⁴ Te na càchí tnúhu ndáá-í xii-ndo sá núú ñⁿ tatá vá ngává-xí núú ñúhú tēhyú-xi ña, te diu-ni ducaⁿ

cúnduu-xi cundecu-xi. Dico ñⁿ tatá ná ngává núú ñúhú xínu déhe-xi, te xáⁿ nádàcayá tnáhá-xí, te mee-xi tēhyú-xi. ²⁵ Te nchaa ñáyiú ío ñúhu iní-xi cundecu ñuyúú-a ñá túú ñúhu iní-yu Yá Ndiöxí, te ñáyiú-áⁿ cuíta nihnú-yu. Te nchaa ñáyiú ío ñúhu iní ñáhá xii Yá Ndiöxí, ñáyiú-áⁿ cundecú-yu ndihi-gá ní caa ní quíhíⁿ. ²⁶ Te nchaa ñáyiú cùníní cunu cuechi núú-í xini ñuhu-xi natuha ñahá-yu xii-í, te nduu táhú-yu cundecú-yu núú ñúhú-í cundecu-í. Te nchaa ñáyiú na cunu cuechi núú-í, te cada càhnu ñaha Tátá-í xii-yu —càchí-gá xáhaⁿ-gá xii-güedé.

Jèsús càháⁿ-gá sá cáhni ñaha-güedé xii-gá

²⁷ Te ní xáhaⁿ tucu-gá:

—Ío ndihú iní-í. Te cúñaha-í xii Tátá-í taunihnu ñaha-gá núú dicó sá cúú, dico vá cúú chi cuéndá tnáhi-a véxi-í —càchí-gá xáhaⁿ-gá xii-güedé.

²⁸ Te ní xáhaⁿ-gá xii Tátá-gá Dútú Ndiöxí:

—Táu, cada nàcuáa ní sani iní-n cunduu cuéndá sá ná cadá càhnu ñaha ñáyiú xii-n —càchí-gá xáhaⁿ-gá.

Te ducaⁿ te ní tecú ní càháⁿ Yá Ndiöxí ndéé andiu, te càchí-gá:

—Sa ní quide-í nàcuáa cachí ñáyiú sá ïo càhnu cuu-í. Te cada tucu-í cuéndá cada càhnu ñaha-gá-yu xii-í —càchí Yá Ndiöxí xáhaⁿ-gá xii Déhe-gá.

²⁹ Te nchaa ñáyiú xíndecu ní tecú dóho-yu ní càháⁿ-gá, dico ñá túú ní sàni iní-yu sá mée-gá ní càháⁿ, chi davá-yu ní xítñahá-yu sá ñúhu ní càháⁿ, te davá-yu ní xítñahá-yu sá ñⁿ espíritú xínú cuèchi núú Yá Ndiöxí ní càháⁿ. ³⁰ Te ní xáhaⁿ Jèsús xii-yu:

—Ñá díú cuéndá yúhú ní càháⁿ Yá Ndiöxí, chi ní càháⁿ-gá cuéndá sá nchòhó cundedóho-ndo. ³¹ Te vitna ní sáa nduu càda ndáá Yá Ndiöxí cuèchi nchaa ñáyiú ñuyúú-a, te ducaⁿ te vá cúnú-gá yucu ñávaha.

³² Te na càta caa ñaha-güedé xii-í núú cùrúxí, te xiáⁿ cuú-í te nihí-yu tnúhu ni caa xico ñuyíú, te quindáá iní-yu tnúhu-í —càchí-gá xáhaⁿ-gá xii-yu.

³³ Duha ní cáháⁿ-gá cuendá cutnùní iní-yu nàcuáa ndoho-gá òré cuú-gá. ³⁴ Te ní xáháⁿ-yu xii-gá:

—Nihí-ndí tnúhu sá núú tütú yódó tnùní tnúhu Yá Ndióxi cáháⁿ-xi sá Cristú Yaá tendaha-gá quixí ñuyíú-a cundecu-gá ni caa ni quíhíⁿ. ¿Te yòhó nása cáháⁿ-tu-n sá ìⁿ téé cùu ñani tnáhá ncháa ñáyiú ñuyíú-a cahni ñaha-güedé núú cùrúxí? Te cachí tnúhu-n ná cúú tée-áⁿ —càchí-yu xáháⁿ-yu xii-gá.

³⁵ Te ní xáháⁿ Jèsús:

—Yúhú cùu-í dàtná ìⁿ ñuhú dáyehé ñuyíú-a, dico sacú-ni nduu ndècu ndíhi ñaha-í xii-ndo. Te caca-ndo ichi ndáá vitna dáyehé-gá-í núú-ndó chi na cùnee te vá cùtnùní-gá núú-ndó ndèé ichi quíhíⁿ-ndó. ³⁶ Quindáá iní ñáhá-ndó xii-í vitna ndècu ndíhi ñaha-gá-í xii-ndo dándixi túu-í iní-ndó, cuendá cutnùní iní-ndó nàcuáa ndùu cuendá Yá Ndióxi, te cuu-ndo dèhe-í —càchí-gá xáhaⁿ-gá xii-yu.

Te sátá dúcáⁿ ñí cáháⁿ Jèsús, te ní quee-gá cuáháⁿ-gá ìⁿ núú vā ná nihí ñáhā-yu xii-gá.

Ñáyiú isráel ñá cuini-yu quindáá iní-yu Jèsús

³⁷ Te cuéi ío vāi sá vā yōo tnáhi ndàcu cada ní quide Jèsús ní xiní-yu, dico ni dūcaⁿ ñá túú ní sàndáá iní-yu-gá. ³⁸ Te ducaⁿ ñí quidé-yu chi dacuítí ñí quee ndáá-xi nàcuáa ní chídó tnùní ndí Chàia ndí ní cáháⁿ tnúhu Yá Ndióxi ndéé sanaha núú tütú-gá núú càchí-xi:

Yòhó Yaá cúú Xitohó-í, vā yōo ìⁿ sàndáá iní tnúhu cáháⁿ-ndí. Te vā yōo ìⁿ cùtnuní iní-xi sá ío càhnu cuu-n. Duha ní chídó tnùní ndí Chàia núú tütú-gá. ³⁹ Te ñá ní sàndáá iní-yu

chi ní quee ndáá-xi nàcuáa ní chídó tnùní tucu ndí Chàia núú tütú Yá Ndióxi nàcuáa cáháⁿ Jèsús:

⁴⁰ Mee Yá Ndióxi ní quide-gá sá vā tècú tnùní-yu,

chi ní dádáhu ndodo iní ñáhá-gá xii-yu,

chi ío sáá iní-yu núu ñá ní cuini-gá-yu quindáá iní ñáhā-yu xii-gá.

Te ni vā túhá ñáhā-yu xii yúhú cuendá dacācu nihnu-í-yu.

⁴¹ Duha ní chídó tnùní ndí Chàia nàcuáa cáháⁿ Jèsús chi ní xiní ndí sá ío càhnu cuu-gá.

⁴² Te cuéi ducaⁿ ñí cuu dico titní cue téé cūnuu núú ñáyiú isráel ní sàndáá iní ñáhá-güedé xii-gá. Dico ñá túú ní xōo cáháⁿ ndáá-güedé chi ní xōo yúhú-güedé sá vā dáñā-gá cue téé cūu fariséú quíhu-güedé veñúhu. ⁴³ Chi ní xōo cudí-gá iní-güedé sá cáháⁿ ñáyiú dàcúxí tnúhu cáháⁿ Yá Ndióxi.

Ñáyiú ñá túú sàndáá iní tnúhu Jèsús cuita nihnú-yu

⁴⁴ Jèsús níhi ní cáháⁿ-gá, te càchí-gá:

—Nchaa ñáyiú na quindáá iní ñáhá xii-í, te ñá díú-ní mèe-í quindáá iní-yu, chi tnáhá Tàtā-í Yaá ní tendaha ñaha xii-í véxi-í ñuyíú-a quindáá iní-yu. ⁴⁵ Te ñáyiú xiní ñáhá xii yúhú xiní-yu tnáhá Tàtā-í.

⁴⁶ Te yúhú véxi-í dándixi túu-í iní ñáyiú ñuyíú-a cuendá cutnùní iní-yu nàcuáa ndùu cuendá Yá Ndióxi, te nchaa ñáyiú na quindáá iní ñáhá xii-í te vā cùndècu-gá-yu ichi cuèhé ichi duha. ⁴⁷ Te núu ío davá-yu ndèdòho-yu nàcuáa cáháⁿ-í te ñá túú tní-yu tnúhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dācuíta nihnu-í-yu, chi véxi-í sá dācācu nihnu-í-yu. ⁴⁸ Te nchaa ñáyiú na cūyíhí iní ñáhá xii-í te ñá túú quide cuendá-yu nàcuáa cáháⁿ-í, te ñáyiú-áⁿ ná sáá nduu te cuita

nihnú-yu chi ñá ní tñí-yu tnúhu ní cáháⁿ-í. ⁴⁹ Te yúhú ñá túú cáháⁿ-í tnúhu véxi iní meé-í, chi mee Tātá-í Yaá ní tendaha ñaha xii-í véxi-í ñuyú-a ní cachí tnúhu-gá nàcuáa cunduu tnúhu cáháⁿ-í danèhé-í ñáyiú. ⁵⁰ Te yúhú xini-í sá tñúhu ní táuchíúⁿ Tātá-í cáháⁿ-í cúú-xí ñⁿ sá vāha sá cúú xii-ndo chi nduu táhú-ndó cundecu-ndo ndihí-gá ni caa ni quíhíⁿ, núu xiáⁿ cáháⁿ-í nchaa nàcuáa ní táuchíúⁿ-gá —càchí-gá xáhaⁿ-gá xii-yu.

13

Jesús naquete-gá sáhá cuè téé xica cuu ndihí-gá

¹ Te cùmání-gá tnahá vico pascuá, te Jèsús sa nàha-gá sá sà ní cuyatni òré dándóo-gá ñuyú-a, te ndaa-gá núú ndécú Tātá-gá. Te ío ní cuu iní-gá nchaa ñáyiú ní sándáá iní ñáhá xii-gá, te ní quide ndisa-gá sá ní cuu iní ñáhá-gá xii-yu.

²⁻⁴ Te ní quíhu yucu ñávāha díquí tē Jūdás déhe té Xímú Iscarioté, te ní saní iní-dé nàcuáa cada-dé cuáha cuèndá-dé Jèsús núú cuè téé cùu úhú iní ñáhá xii-gá. Te Jèsús sa nàha-gá sá meé Yā Ndiōxí Yaá cúú Tātá-gá ní sáñaha-gá tnúhu ndee iní xii-gá sá cádá-gá núú-gá, te nàha-gá sá díú núú Tātá-gá ní quee-gá véxi-gá ñuyú-a. Te sáá nduu nàsáá tucu-gá núú Tātá-gá. Te cùdini Jesús ndihí cue téé xica cuu ndihí-gá ní cùu, te ní ndacuñí-gá yuhu mèsá, te ní taunuu-gá ñⁿ dóo níhnú-gá, te ní queheⁿ-gá ñⁿ dóo ní dácútú-gá núú yíquí-gá. ⁵ Te ní chihi-gá ndute ñⁿ tñá, te xiáⁿ ní naquete-gá sáhá cuè téé xica cuu ndihí-gá, te ndihí dóo ndútú núú yíquí-gá-áⁿ ní nadayichí-gá sáhá-güedē.

⁶ Te òré naquete-gá sáhá tē Xímú, àdi Pelú, ní cùu ní xáhaⁿ-dē xii-gá:

—Mèstrú, ¿te yòhó naquete-n sáhà-í-u? —càchí-dé xáhaⁿ-dē xii-gá.

⁷ Te ní xáhaⁿ Jèsús:

—Vitna ñá cutnùnì iní-n sá quidè-i-a dico sáá nduu te cutnùnì iní-n —càchí-gá xáhaⁿ-gá xii-dé.

⁸ Te ní xáhaⁿ tē Pèlú:

—Yúhú chi vá ñⁿ nduu te naquete-n sáhà-í —càchí-dé xáhaⁿ-dē xii-gá.

Te ní xáhaⁿ Jèsús:

—Te núu vá náquète-í sáhá-n áⁿ, te vá cádá-gá-n cuèndá sá ndécú ndihí ñaha-í xii-n —càchí-gá xáhaⁿ-gá xii-dé.

⁹ Te ní xáhaⁿ tē Pèlú:

—Te núu ducaⁿ te vá meé-ní sáhà-í naquete-n, chi naquete-n tnahá ndaha-í ndihí díquí-í —càchí-dé xáhaⁿ-dē xii-gá.

¹⁰ Te ní xáhaⁿ Jèsús xii-dé:

—Téé íchí ní xichí chi xini ñuhu-xi sá sáhá-na-dē ndoo, te ducaⁿ te nduu ndoo-dé nihí-dé. Te nchòhó sa càndoo-ndo cuéí ñá ncháá-ndó càndoo —cachí-gá xáhaⁿ-gá xii-dé.

¹¹ Te ducaⁿ ní cáháⁿ Jèsús chi sa nàha-gá sá ñⁿ cuè téé-áⁿ cuáha cuèndá ñáhá-güedē xii-gá núú cuè téé cùu úhú iní ñáhá, xiáⁿ núu ní xáhaⁿ-gá sá ñá túú càndoo-güedē nchaa-güedē.

¹² Te sátá ní naquete-gá sáhá-güedē, te ní ndécúñmu-gá dóo-gá, te ní nucóo-gá yuhu mèsá, te ní xáhaⁿ-gá xii-güedē:

—¿Te ní cutnùnì iní-ndó sá ní quide ñaha-í xii-ndo-áⁿ? ¹³ Te

nchòhó váha-ni cáháⁿ-ndó sá cùnùu-í, te òdanani ñaha tucu-ndo Mèstrú xii-í, te ndáá cáháⁿ-ndó.

¹⁴ Te núu yúhú cùu-í Mèstrú, te cùu tucu-í téé cùnuu te náquète-í sáhá-ndó, te díu-ni ducaⁿ càda nchòhó tucu naquete sáhá tnahá-ndó.

¹⁵ Yúhú sànu ichi ñaha-í xii-ndo nàcuáa cada-ndo. ¹⁶ Te na

càchí tnúhu ndáá-í xii-ndo sá ní ñⁿ téé xinu cuechi ñá túú cùnuu-dé dácúxí pàtróoⁿ-dē, te ní ñⁿ téé

xica chiúⁿ ñá túú cùnuu-dé dácúxí téé tēndaha ñaha xii-dé cuáháⁿ-dé chiúⁿ.

Te ducaⁿ sàtnahá-xi cùu yúhú ndihí nchòhó. ¹⁷ Te núu ní cutnùnì iní-ndó nàcuáa ní quide

ñaha-ĩ xii-ndo ña, te ducaⁿ cada tñaha-ndo te cuu váha iní ñáhá Yá Ndióxi xii-ndo.

¹⁸ Yúhú, ñá túú cáháⁿ-í cuendá-ndó nchaa-ndo, chi yúhú sa nàha-í nàcuáa sàni iní ìⁿ ìⁿ nchòhó cue té^e ní nanducu nìnhu-í tnuú nchaa ñáyiú ñuhu ichi cuehé ichi duha ní cachí-í chitnahá ñáhá-ndó xii-í. Chi dacuití sá queé ndáá-xi nàcuáa cáháⁿ-xi núú tütú Yá Ndióxi núú cáhí-xi: “Téé xèxi ndìhi ñaha xii-í ngóo-dé cuu úhú iní ñáhá-dé”, duha cáhí-xi núú tütú-gá. ¹⁹ Te cùmání-gá sáá nduu cada ñaha-dé sá sání iní-dé, núú xíáⁿ cáhí tñuhu-í xii-ndo nàcuáa cada-dé, chi na sáá nduu-áⁿ te cutnùní iní-ndó sá yúhú cúu-í Cristú Yaá ní tendaha Yá Ndióxi véxi ñuyú-a. ²⁰ Te na cáhí tñuhu ndáá-í xii-ndo sá nchaa ñáyiú na queheⁿ cuendá ñáhá xii cue té^e tendaha-ĩ cáháⁿ tñuhu-í, te cada iní-yu sá tñáhá yúhú ní queheⁿ cuendá-yu. Te nchaa ñáyiú na queheⁿ cuendá ñáhá xii-í, te cada iní-yu sá tñáhá Tàtá-í Dútú Ndióxi Yaá ní tendaha ñaha xii-í véxi-í ñuyú-a ní queheⁿ cuendá-yu —cáhí-gá xáhaⁿ-gá xii-güedé.

Jèsús cáhí-gá sá té Júdás cuáha cuendá ñáhá-dé xii-gá núú cué té^e cùu úhú iní ñáhá

(Mt. 26:20-25; Mr. 14:17-21; Lc. 22:21-23)

²¹ Te sátá dúcáⁿ ñí cáháⁿ Jèsús te ío ní ndìhú iní-gá, te ní xáhaⁿ-gá xii-güedé:

—Na cáhí tñuhu ndáá-í xii-ndo sá ñíu-ní ìⁿ nchohó cuáha cuendá ñáhá-ndó xii-í núú cué té^e cùu úhú iní ñáhá —cáhí-gá xáhaⁿ-gá xii-güedé.

²² Te ní ngúita cue té^e xica cuu ndìhi-gá ndéhé ìⁿ ndehe ìⁿ núú tñáhá-güedé, chi ñá ní cùtnùní iní-güedé ndédacàa-güedé cuendá-güedé ní cáháⁿ-gá. ²³ Te ìⁿ té^e-áⁿ ío cùdìí iní ñáhá Jèsús, te ndècu yatni-dé ñíhi-gá cùdìni-dé ndìhi-gá. ²⁴ Te té Ximú, àdi Pelú chi úu ñíu-dé, ní quide-dé seña

núú té^e ndècu yatni ñíhi-gá-áⁿ sá càcáⁿ tñuhú-dé núú-gá ñuu ndédacàa-güedé cuendá-güedé ní cáháⁿ-gá. ²⁵ Te té^e-áⁿ ní sáháⁿ ndehe yatni-gá-dé ñíhi Jèsús, te ní xáhaⁿ-dé xii-gá:

—Mèstrú, ¿ndédacàa-ndí cuendá-ndí ní cáháⁿ-n-í? —cáhí-dé xáhaⁿ-dé xii-gá.

²⁶ Te ní xáhaⁿ Jèsús:

—Na chindóyo-í luha pàá, te té^e na cuáha-í te té^e-áⁿ cúu-dé —cáhí-gá xáhaⁿ-gá xii-dé.

Te ní chindóyo-gá luha pàá, te ní sáha-gá té Júdás déhe té Ximú Iscarioté. ²⁷ Te òré ní queheⁿ-dé pàá, te ní ngúndecu ndìhi ñaha ñuuⁿ-ná yucu ñávaha xii-dé. Te ní xáhaⁿ Jèsús:

—Sá ñí sani iní-n càda-n te cada ndìhi-ni-n —cáhí-gá xáhaⁿ-gá xii-dé.

²⁸ Te ní ìⁿ cue té^e cùdini ndìhi-gá ñá ní tècú tñumí-güedé nása nduu tñuhu ní xáhaⁿ-gá xii té Júdás. ²⁹ Te dava-güedé ní sani iní-güedé sá sá cuendá sá ndécú ndìhi-dé sá ñuhú ñíhúⁿ, te váa ío ìⁿ sá cuááⁿ-dè nàndìhi-güedé vico, àdi ñíhúⁿ cuáha-dé ñáyiú ndáhú xáhaⁿ-gá ní cáháⁿ-güedé. ³⁰ Te sa ní cundiquiⁿ ní queheⁿ cuendá té Júdás pàá caxi-dé, te òré ní ñíhi-dé pàá-áⁿ te ní quee-dé cuáháⁿ-dé.

Jèsús cáhí tñuhu-gá nàcuáa cada-o

³¹ Te sátá ñí quee té Júdás cuáháⁿ-dé, te ní xáhaⁿ Jèsús xii dava-gá-güedé:

—Vitna te quiní-ndó ndìhi nchaa ñáyiú sá ío càhnu cuu yúhú Té^e cùu ñaní tñáhá-ndó nchaa-ndo, te òré-áⁿ cutnùní iní-ndó sá ío càhnu cuu tucu mee Yá Ndióxi. ³² Te núu yúhú quidé càhnu-í Yá Ndióxi, te ñíu-ní ducaⁿ cada cahnu ñaha-gá xii yúhú, te ñá túú-gá titní nduu te ducaⁿ càda-gá. ³³ Te nchòhó cue déhe-í na cáhí tñuhu-í sá sàcú duha-ná nduu ndècu ndìhi ñaha-í xii-ndo.

Te nchòhó nanducu ñàha-ndo xii-í dico vá ná ñihí ñáhá-ndó dàtná ní xáhaⁿ-í xii ñáyiú isràél, te ðiu-ni ducaⁿ càháⁿ-í núú-ndó sã vã ndácú-ndó quíhíⁿ-ndó núú quíhíⁿ-í. ³⁴ Te duha sànu ichi ñaha tucu-í xii-ndo nàcuáa cada-ndo sã cúú iní tnáhá-ndó ìⁿ ìⁿ-ndo datná yúhú cúú iní ñáhà-í xii-ndo. ³⁵ Te núu na cùu iní tnáhá-ndó ìⁿ ìⁿ-ndo ña, te ducaⁿ te cutnùní iní nchaa ñáyiú sã cúú-ndó cuè téé ní chitnahá ñáhá xii-í —càchí-gá xáhaⁿ-gã xii-güedé.

Jèsús càháⁿ-gá sá tẽ Pelú vá nũnuu-dé sá xicá cùu ndihí ñaha-dé xii-gá

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tẽ Xímú, àdi Pelú chi úú ðiu-dé, xii Jèsús:

—Mèstrú, ¿ndéé quíhíⁿ-n-í? —càchí-dé xáhaⁿ-dẽ xii-gá.

Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quíhíⁿ núú quíhíⁿ-í, dico na sãá nduu te dai sãá-n nũú cündecu-í —càchí-gá xáhaⁿ-gã xii-dé.

³⁷ Te ní xáhaⁿ tẽ Pelú xii-gá:

—Mèstrú, ¿te ná cuendá nũu vá ndácú-í canchicúⁿ ñáhà-í xii-n quíhíⁿ vitna-í? Chi yúhú ñá túú tnàhí yúhú-í cuèi na cùú-í sã cuendá-n —càchí-dé xáhaⁿ-dẽ xii-gá.

³⁸ Te ní xáhaⁿ Jèsús:

—¿Te ndáá sã xèhndé iní-n sã cuèi na cùú-n cuendá-í-u? Te na càchí tnúhu ndáá-í xii-n sã cùmání-gã cana líhi, te úní xito cáháⁿ-n sã ñá túú xini ñáhá-n xii-í —càchí-gá xáhaⁿ-gã xii-dé.

14

Jèsús dánèhé ñáhá-gã nàcuáa cada-o nàsáá-ó nũú ndécú Yã Ndiõxí

¹ Te ní xáhaⁿ-gã xii-güedé:

—Te ñá túú nã cani iní-ndó. Quindáá iní-ndó Yã Ndiõxí, te quindáá iní-ndó yúhú. ² Chi núú ndécú Tãtà-í ío nũne núú cündecu-o, chi núú ñáhá ñá te sa cachí tnúhu-í xii-ndo ni cùu. Te vitna na nùhú-í

te cada túha-í núú cündecu-ndo. ³ Te dàtnùní quixi tucu-í te candeca ñaha-í xii-ndo quíhíⁿ cuendá ìⁿ-ni xichi cundecu-o. ⁴ Te sa ñaha-ndo ndéé quíhíⁿ-í te sa xini-ndó ìchi —cachí-gá xáhaⁿ-gã xii-güedé.

⁵ Te ní xáhaⁿ tẽ Mǎxí xii-gá:

—Mèstrú, ñá túú xini-ndí ndéé quíhíⁿ-n te da ichi-ná quini-ndí —càchí-dé xáhaⁿ-dẽ xii-gá.

⁶ Te ní xáhaⁿ Jèsús:

—Yúhú cùú-í dàtná ìⁿ ichi te càháⁿ-í tnúhu ndáá, te yúhú cada-í te naníhí tǎhú-ndó, Te ìⁿ ðií ðií-ni yúhú cada-í te sãá-ndó nũú Yã Ndiõxí cundecu-ndo te núu na quindáá iní ñáhá-ndó xii-í. ⁷ Te núú ðicó cutnùní ndisa iní-ndó yòo cuu-í-áⁿ, ducaⁿ te cutnùní iní-ndó yòo cuu Tãtà-í ní cùu. Dico vitna dàtná sã ñá xini núú-ndó Dútú Ndiõxí Yáá cúú Tãtà-í cada iní-ndó, chi ní xini-ndó yúhú —càchí-gá xáhaⁿ-gã xii-dé.

⁸ Te ní xáhaⁿ tẽ Lìpé xii-gá:

—Mèstrú, dánèhé ñáhá xii-ndí Dútú Ndiõxí chi na cùu váha iní-ndí —càchí-dé xáhaⁿ-dẽ xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túú xini ñáhá-n xii-í? Te sa ní cuu vai nduu ndecu ndihí ñaha-í xii-ndo, chi ñáyiú xini ñáhá xii-í te xini-yu tnàhá Tãtà-í. ¿Te ná cuendá yòhó càchí-n sã dánèhé ñáhà-í xii-ndo Tãtà-í?

¹⁰ ¿Náa ñá túú sãndáá iní-ndó sã yúhú ndécú-í ndihí Tãtà-í? Te mee-gã ndécú ndihí ñaha-gá xii-í. Te nchaa tnúhu càháⁿ-í núú-ndó ñá túú càháⁿ-í sã véxi iní mée-í, chi Tãtà-í Yáá ndécú ndihí ñaha xii-í chindée ñaha-gã quidé-í chiuⁿ-gã.

¹¹ Te quindáá iní-ndó sã yúhú ndécú-í ndihí Tãtà-í, te ducaⁿ mée-gã ndécú ndihí ñaha-gá xii-í. Te núu ñá túú sãndáá iní-ndó tnúhu càháⁿ-í-a, te dandacu iní-ndó nchaa chiuⁿ ta quide-í véxi, te quindáá iní ñáhá-ndó. ¹² Te na càchí tnúhu ndáá-í xii-ndo sã nchaa ñáyiú na quindáá iní ñáhá xii-í, te

cadá-yu chiùⁿ quide-í te càhnu-gá chiùⁿ cadá-yu chi yúhú nùhú-í núú ndécú Tàtá-í cundecu-í nàcuáa níhí ndéé-gá-yu cundecu-yu. ¹³ Te nchaa sá ná càcáⁿ-ndó te taxi-í te núu na quindáá iní ñáhá-ndó xii-í, te nchaa cada-í cuendá cutnùní iní ñáiyu sá ío càhnu cuu Tàtá-í Dútú Ndiöxí. ¹⁴ Te yúhú cada-í nchaa sá cuíní-ndó càcáⁿ táhú-ndó núu-í, te núu na quindáá iní ñáhá ndisa-ndo xii-í.

Jesús càchí-gá sá téndàha-gá Espiritú Yá Ndiöxí quixi cundecu ndihí-o

¹⁵ Te núu nchòhó cúú iní ñáhá-ndó xii-í te tñii-ndo nchaa tnúhu càháⁿ-í. ¹⁶ Te yúhú cacáⁿ táhú-í núú Tàtá-í sá téndàha-gá Espiritú-gá quixi cundecu ndihí-ndo cànu ichi ñaha-xi xii-ndo nacuaa cundecu-ndo, te chindee ñaha-xi xii-ndo ni caa ni quihíⁿ. ¹⁷ Te nchaa ñáiyu ndècu ichi cuehé ichi duha ñá túú xiní-yu Espiritú Yá Ndiöxí te ni vā cúú cundecu ndihí-yu. Dico nchòhó sa xiní-ndó Espiritú-gá te ndècu ndihí ñaha-xi xii-ndo. Te sáá ìⁿ nduu te cunuu Espiritú-gá iní-ndó. ¹⁸ Te yúhú vā dáñá ñihnu ñaha-í xii-ndo, chi quixi tucu-í cundecu ndihí ñaha-í xii-ndo. ¹⁹ Te sácú duha-ná nduu ndècu-í te vā quini ñáhá-gá ñáiyu xii-í, dico nchòhó chi quini ñáhá-ní-ndó xii-í. Te ducaⁿ-ni cundecu-ndo ichi váha chi cundecu ndihí ñaha-í xii-ndo ni caa ni quihíⁿ. ²⁰ Te dàvá-áⁿ cutnùní iní-ndó sá ndécú-í ndihí Tàtá-í, te ducaⁿ nchòhó cundecu ndihí ñaha-ni-ndo xii-í. ²¹ Te nchaa ñáiyu dàcuaha tnúhu-í te tñii-yu, ñáiyu-áⁿ quidé ndisá-yu sá cúú iní ñáhá-yu xii-í. Te ducaⁿ Tàtá-í cúú iní ñáhá-gá xii-yu, te ducaⁿ-ni yúhú cúú iní-í-yu tucu, te ducaⁿ te cutnùní iní-yu sá ndécú ndihí-í-yu —càchí-gá xáhaⁿ-gá xii-dé.

²² Te ní cáháⁿ ìⁿ téé nàni Judás dico ñá díú tē Júdás déhe té Xímú

Iscarioté ní càháⁿ, chi ingá té Júdás ní xáhaⁿ-dē xii-gá:

—Mèstrú, ¿nása cada-n cuendá cutnùní iní-ndí sá cundècu ndihí ñaha-n xii-ndí, te ñáiyu ñúhu ichi cuehé ichi duha vā cundècu ndihí-n-yu-í? —càchí-dé xáhaⁿ-dē xii-gá.

²³ Te ní xáhaⁿ Jèsús xii-güedé:

—Nchaa ñáiyu cùu iní ñáhá xii-í te tñii-yu tnúhu càháⁿ-í, te ñáiyu-áⁿ cúú iní ñáhá Tàtá-í xii-yu, te yúhú ndihí Tàtá-í ndécú-ndí ndihí-yu. ²⁴ Te nchaa ñáiyu ñá túú cùu iní ñáhá xii-í te ñá túú tñii-yu tnúhu càháⁿ-í. Te nchaa tnúhu ní cáháⁿ-í ní xindédóho-ndo chi Tàtá-í Yáá ní tendaha ñaha xii-í véxi-í ñuyúu-a ní dácáhu iní ñáhá-gá xii-í, te ñá díú mèe-í ní càhu iní-í tnúhu cáháⁿ-í.

²⁵ Duha nduu tnúhu càháⁿ-í núú-ndó vitna ndecu ndihí ñaha-gá-í xii-ndo. ²⁶ Dico Yá Ndiöxí tendaha-gá Espiritú-gá quixi-xi cada-xi núú-í taxi-xi tnúhu ndee iní xii-ndo, te díu-xi chindee ñaha-xi xii-ndo te danèhé ñáhá-xí xii-ndo nchaa sá cúmáni quini-ndó, te díu-ni-xi dandàcu iní ñáhá-xí xii-ndo nchaa nacuaa ní cáháⁿ-í.

²⁷ Te yúhú chindee chítuu ñaha-í xii-ndo ío váha cuu iní-ndó cundecu-ndo datná yúhú ío váha cùu iní-í ndécú-í, chi sa ta cùyatni nduu núhú-í. Te yúhú càchí tnúhu ndáá-í sá chindèe ñaha-í xii-ndo, te vā cadà-í datná quidé ñáiyu ñúhu ichi cuehé ichi duha. Te ni vā ndihú iní-ndó, te ni vā yúhú-ndó. ²⁸ Te sa ní xindédóho-ndo ní cáháⁿ-í sá núhú-í, te quixi tucu-í cundecu ndihí ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnúhu sá núhú-í núú ndécú Tàtá-í, te cudí iní-ndó ní cùu, chi ío càhnu cuu-gá dàcúúxí yúhú. ²⁹ Te sa ní cachí tnúhu-í sá núhú-í, te na sáá òré núhú-í núú ndécú Tàtá-í, te quindáá iní ñáhá-ndó xii-í.

³⁰ Te ñá túú-gá vāi tnúhu ndatnúhu ndihí ñaha-í xii-ndo chi sa véxi yucu ñávaha sá táxi tnùní

ñuyú-a, dico vá táxi tnùní ñáhá-xí xii yúhú. ³¹ Te cada-í nchaa nàcuáa ní táuchíúⁿ Tàtá-í cuèndá cutnùní iní nchaa ñáyiú ñuyúú-a sá yúhú ío cùu iní-í-gá. Te vitna chí ndácuñí ná quíhíⁿ-ó —càchí-gá xáhaⁿ-gá xii-güedé.

15

Cuèndá yoho yàha stilé ndihi nchaa dité-xi

¹ Te ní xáhaⁿ tùcu-gá xii-güedé:

—Yúhú cùu-í dàtná yoho yàha stilé, te Tàtá-í cùu-gá dàtná ìⁿ téé xito yoho yaha stilé-áⁿ. ² Te nchaa ñáyiú ní sándáá iní ñáhá xii-í cùú-yu dàtná dité nchaa yoho yàha stilé-áⁿ. Te téé xito yoho yaha stilé-áⁿ xèhndé-dé nchaa dité-xi sá ñà cùní-gá-xi cuuⁿ ndéhé-xi, te ndàda ndoo-dé nchaa dité-xi sá cùuⁿ cuèndá cuuⁿ-gá. ³ Te ducaⁿ sàtnahá-xi cùu nchohó, chí sa ní xócuñí nchaa sá cuèhé sá dúhá ndècu ndihi-ndo, chí ní sándáá iní-ndó tnúhu ní cáháⁿ-í. ⁴ Te cuu ìⁿnuu-ndo cundecu ndihi ñaha-ndo xii-í, te núu ducaⁿ na càda-ndo, te cundecu ndihi ñaha-í xii-ndo. Chí núu ìⁿ yutnu vídí ná quèndé dité-xi, te dité-xi sá ní quèndé-áⁿ vá cùuⁿ-gá sávidí-xi chí duuⁿ duuⁿ ní xíta-xi. Ducaⁿ sàtnahá-xi cùu nchohó chí vá ndácu-ndó càda-ndo chiúⁿ-í, te núu vá cundecu ndihi ñaha-í xii-ndo.

⁵ Chí yúhú cùu-í dàtná yutnu vídí-áⁿ, te nchòhó cùu-ndó dàtná nchaa dité-xi. Te nchaa ñáyiú cùu ìⁿnuu ndihi ñaha xii-í, te ndècu ndihi-í-yu, te ndácu-yu quidè-yu chiúⁿ-í. Te núu vá cùu ìⁿnuu ndihi ñahá-yu xii-í, te vá ndácu-yu cadá-yu chiúⁿ-í. ⁶ Te nchaa ñáyiú vá cùu ìⁿnuu ndihi ñaha xii-í, te yáha-yu dàtná yàha ìⁿ dité yutnu vídí sá ñà túú cùuⁿ sávidí-xi, chí xèhndé-güedé yìchí-xi, te sàhmi-güedé.

⁷ 'Cuu ìⁿnuu ndihi ñaha-ndo xii-í, te vá nàcuána-ndo nacuáa ní cáháⁿ-í. Te núu ducaⁿ na càda-ndo,

te nání cuíní-ndó cǎcáⁿ-ndó nùu-í te taxi-í. ⁸ Te núu nchòhó ná cadá vǎha-ndo cundecu-ndo, te ío cada càhnu-ndo Tàtá-í, te ducaⁿ cutnùní sá ndísá cùu-ndo cue téé ní chitnahá ñáhá xii-í. ⁹ Te yúhú ío cùu iní ñáhá-í xii-ndo dàtná cùu iní ñáhá Yá Ndióxi xii-í. Te cada-ni-ndo mèe-ni sá vǎha cuèndá cudí iní ñáhá-gá-í xii-ndo. ¹⁰ Te núu na quèndáá iní-ndó càda-ndo nchaa nacuáa ní cáháⁿ-í, te ío cuu iní ñáhá-í xii-ndo, chí yúhú ducaⁿ ìo sándáá iní-í Tàtá-í quidè-í nchaa nàcuáa ní cáháⁿ-gá, te xǎⁿ nùu ío cùu iní ñáhá-gá xii-í.

¹¹ 'Duha cáháⁿ-í núu-ndó cuèndá cudí ndísá iní-ndó dàtná cudí iní mèe-í. ¹² Te duha ndùu tnúhu cáháⁿ-í cuèndá sá cùu iní tnáhá-ndó ìⁿ ìⁿ-ndo datná cùu iní ñáhá-í xii-ndo. ¹³ Te núu ní xihó sá cùu-xi ìⁿ téé ío vǎha tnáhá tnúhu ndihi-o, te xǎⁿ cutnùní iní ñáyiú sá ío cùu iní-ó-dé. ¹⁴ Te nchòhó cuu-ndo cuè téé ío vǎha tnáhá tnúhu ndihi-í te núu na càda-ndo nchaa nacuáa cáháⁿ-í. ¹⁵ Te vá cùhaha-gá-í xii-ndo sá cùu-ndó cuè téé xinu cuechi núu-í, chí ní ìⁿ téé xinu cuechi ñà túú xini-dé ná quidé pàtróⁿ-dé. Te yúhú càchí-í xii-ndo sá cùu-ndó cuè téé ío vǎha tnáhá tnúhu ndihi-í, chí ní cachí tnúhu-í nchaa nacuáa ní cáháⁿ Tàtá-í. ¹⁶ Te ñà díú nchòhó ní cáháⁿ ñáhá-ndó xii yúhú, chí yúhú ní cáháⁿ ñáhá-í xii-ndo. Te yúhú tauchiúⁿ-í quíhíⁿ-ndó càda-ndo nchaa nacuáa ní cáháⁿ-í, chí tnúhu-áⁿ vá ndíhí ñhnu-xi. Te ducaⁿ nchaa sá ná cǎcáⁿ-ndó nùu Tàtá-í Yá Ndióxi te taxi-gá, te núu na quèndáá iní ñáhá-ndó xii-í. ¹⁷ Te yúhú cáháⁿ-í dóho-ndo sá cùu iní tnáhá-ndó ìⁿ ìⁿ-ndo.

Ñáyiú ndècu ichi cuehé ichi duha cùu úhú iní-yu Jèsús ndihi nchaa ñáyiú sándáá iní tnúhu-gá

¹⁸ 'Te nchaa ñáyiú ndècu ichi cuehé ichi duha ñà cùu quíní ñáhá-yu xii-ndo, te sa nàha-ndo sá díhna-gá yúhú ní ngúíta-yu ducaⁿ ñà cùu quíní ñáhá-yu xii-í. ¹⁹ Te

núu dicó tnàhá nchòhó ndécú-ndó ichi cuehé ichi duha ña, te cuu iní ñáhã-yu xii-ndo dàtná cúú iní tnáhã-yu ndi mèé-yu ni cùu. Te yúhú ní nanducu ñihnu ñaha-í xii-ndo tnúú ñáyiu ndècu ichi cuehé ichi duha, núu xiãⁿ ío cùu úhú iní ñáhã-yu xii-ndo cuendá sá ñà túú-gã chítñahá-ndó-yu. ²⁰ Te dandácu iní-ndó nàcuáa ní cãháⁿ-í sá ni ñⁿ tée xinu cuechi ñá túú cùnuu-dé dàcúúxi pàtróóⁿ-dè. Te yúhú cúú úhú iní ñáhã-yu, te ñiu-ni ducaⁿ càda ñahá-yu xii nchòhó. Te núu dicó ní tnã-yu tnúhu ní cãháⁿ-í ñá, te ñiu-ni ducaⁿ tnã-yu tnúhu cãháⁿ-ndó nũ-yu ni cùu. ²¹ Te ducaⁿ càda ñahá-yu xii-ndo sá cuendá-í, chi ñá xini-yu Tãtà-í Yáá ní tendaha ñàha xii-í véxi-í ñuyú-a.

²² Te váa vá cùndècu cuèchi-yu ni cùu, te núu ñá túú yúhú ní cãháⁿ-í nũ-yu, te vitna vá cúú tnàhí cachí-yu sá ñà túú cuèchi-yu. ²³ Chi nchaa ñáyiu cùu úhú iní ñáhá xii-í, te cùu úhú iní-yu tnàhá Tãtà-í. ²⁴ Te váa ni ñⁿ cuèchi-yu vá cùndècu ni cuu, te núu dicó ñá túú ní xini-yu nchaa sá ní quide-í sá vá yòo tnàhí ndàcu cada. Te cuèi ní xini-yu dico dai cùu úhú iní ñáhã-yu xii-í ndihí Tãtà-í. ²⁵ Te duha quidè-yu chi dacuítí quèe ndáá-xi nàcuáa yòdo tnuní núú tütú Yã Ndiõxi sá dácuahá-yu, chi càchí-xi sá ñà túú nã cuèchi-í te cuu úhú iní ñáhã-yu xii-í.

²⁶ Te Espiritú Tãtà-í Dútú Ndiõxi sá ndécú nũú-gã tendaha-í quixi chindee ñàha-xi xii-ndo, te canu ichi ñaha-xi nàcuáa cundecu-ndo, te Espiritú-áⁿ cãháⁿ ndáá-xi cuendá cutnùní iní nchaa ñáyiu yoo cùu-í. ²⁷ Te nchòhó tnàhá-ndó cãháⁿ váha-ndo cuendá-í cuendá cutnùní iní-yu yoo cùu-í, chi ñaha-ndo sá ndéé òré ní nguíta-í quidè-í chiúⁿ Tãtà-í ní chitnahá ñáhã-ndó xii-í — càchí-gã xáhaⁿ-gã xii-güedé.

16

¹ Te ní xáhaⁿ tùcu-gá xii-güedé:

—Duha cãháⁿ-í cuendá ná nanchòcáva iní-ndó nũhú-ndó ichi cuehé ichi duha. ² Chi vá dáñá-gã-güedé quihu-ndo vèñuhu, te ní vá cúú-gá quiní ndéé ñáhã-güedé xii-ndo. Te sáá ñⁿ nduu te cahni ñaha-güedé xii-ndo, te xiãⁿ cuu cahaⁿ-güedé sá quidè-güedé chiúⁿ Yã Ndiõxi. ³ Te ducaⁿ càda-güedé chi ñá túú xini-güedé Tãtà-í, te ní ñà túú xini ñáhã-güedé xii yúhú. ⁴ Te duha nduu tnúhu cãháⁿ-í núú-ndó, chi na sáá òré te ndacu iní-ndó nchaa tnúhu sá sá ní cachí tnúhu-í xii-ndo nàcuáa cada ñaha-güedé xii-í.

Nchaa chiúⁿ quide Espiritú Yã Ndiõxi

⁵ Te ñá túú ní càchí tnúhu-í xii-ndo ndéé díhna chi ndècu ndihí ñaha-í xii-ndo. ⁶ Dico vitna sa ta cüyatni nduu nũhú-í núú ndécú Tãtà-í Yáá ní tendaha ñàha xii-í véxi-í ñuyú-a. Te ní ñⁿ nchohó ñá túú xicáⁿ tnúhú-ndó nũú-í nũu ndéé quihíⁿ-í. ⁷ Chi mee-ni sá ndihú iní-ndó sá dúcáⁿ ní cãháⁿ-í. ⁸ Te na càchí tnúhu ndáá-í xii-ndo sá váha-gã sá cúú-xi-ndó nũu nũhú-í, chi tendaha-í Espiritú Yã Ndiõxi quixi cundecu ndihí-ndo chindee ñaha-xi, chi núu vá nũhú-í te vá quixí Espiritú-gá cundecu ndihí-ndo chindee ñaha-xi xii-ndo. ⁹ Te na quixi Espiritú-gá te dandixi túu-xi iní nchaa ñáyiu ndècu ichi cuehé ichi duha sá ñà túú quide váha-yu. Te dacàhu iní ñáhã-xi sá ndécú ñⁿ ichi váha ichi ndáá. Te Espiritú-gá-áⁿ cada-xi nàcuáa cutnùní iní-yu sá Yã Ndiõxi cada ndáá-gã cuèchi-yu. ¹⁰ Te ducaⁿ te cutnùní iní-yu sá ndécú cuèchi-yu, chi ñá túú sàndáá iní ñáhã-yu xii-í. ¹¹ Te ducaⁿ te cutnùní iní-yu nàcuáa nduu cuendá ichi váha ichi ndáá, chi yúhú nũhú-í núú ndécú Tãtà-í, te nchòhó vá quiní ñáhã-gã-ndó. ¹² Te ducaⁿ te cutnùní iní-yu sá Yã Ndiõxi cada ndáá-gã cuèchi-yu, chi

sa ní cáháⁿ-gá sá yúcu ñávãha sá táxí tnùnì ñuyíú-a quíhíⁿ-xi núú ùhú núú ndàhú.

¹² Te vãi-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchàa vitna. ¹³ Te na quixi Espiritú Yã Ndiõxí, Espiritú càháⁿ ndáá cuiti, te Espiritú-áⁿ danèhé ñáhá-xí nchàa tnúhu vãha tnúhu ndáa. Te vá dácãhu iní ñáhá-xí xii-ndo sã vèxi iní mée-xí chi dacãhu iní ñáhá-xí nchàa sã càháⁿ Yã Ndiõxí, te cachí tnúhu-xi nchaa ñacuáa cada-xi ndée núú cuáháⁿ núú vèxi-gá. ¹⁴ Te Espiritú-gá-áⁿ cada càhu ñaha-xi xii yúhú chi ndècu ndihí-xi tnúhu-í, te danèhé ñáhá-xí xii-ndo. ¹⁵ Te nchaa sã ndécú ndihí Tãtã-í ndécú ndihí-í tnàhá-í, núú xíáⁿ càchí-í sã Espiritú-gá danèhé ñáhá-xí nchàa tnúhu-í xii-ndo.

Nchaa ñáyiu ndìhú iní-xi nduu dǎi iní-yu na quixi tucu Jesús

¹⁶ Te ìⁿ úú-nã nduu ndècu-í te vá quini ñáhá-gã-ndó xii-í, dico núú sàcú-ni nduu te quini ñáhá tucu-ndo xii-í, te ducaⁿ chi núhú-í núú ndécú Tãtã-í —càchí-gá xãháⁿ-gã xii-güedé.

¹⁷ Te sã dúcãⁿ ñí cáháⁿ-gã nõu ní ngúita ìⁿ úú cue tée xica cuu ndihí-gã xitnãha-güedé:

—¿Nãsa ndùu-tu tnúhu càháⁿ-gá sã càchí-gá sã ìⁿ úú-nã nduu ndècu-gá te vá quini-gã-ó-gã, dico núú sàcú-ni nduu te quini tucu-o-gã-i?, chi núhú-gá núú ndécú Tãtã-gã —càchí-güedé xitnãha-güedé.

¹⁸ Te xitnãha tucu-güedé:

—¿Nãsa cuáhãⁿ-tu tnúhu-ãⁿ sã sàcú-ni nduu? Te ñã tècú tnùnì-ó nãsa ndùu tnúhu càháⁿ-gã —càchí-güedé xitnãha-güedé.

¹⁹ Te Jësús ní cutnùnì iní-gá sã cuini-güedé cácaⁿ tnúhú-güedé núú-gã nãsa ndùu tnúhu ní cáháⁿ-gã, núú ní xãháⁿ-gã:

—Cuendã sã ñí cachí-í sã ìⁿ úú-nã nduu ndècu-í te vá quini

ñáhá-gã-ndó xii-í, dico núú sàcú-ni nduu te quini ñáhá tucu-ndo xii-í ní cachí-í, ¿xíáⁿ ndúcú tnúhu núú tnáhá-ndó-ãⁿ? —càchí-gá xãháⁿ-gã xii-güedé.

²⁰ Te ní xãháⁿ tucu-gá:

—Te na càchí tnúhu ndáá-í xii-ndo sã nchòhó ndihú vihí iní-ndó te ndáhyú-ndó, dico nchaa ñáyiu ndècu ichi cuehé ichi duha chi da cudǎi iní-yu. Dico nchòhó ñáyiu ndáhyú chi sáa nduu te nduu dǎi iní-ndó. ²¹ Chi dàtnã cuini-ndó cùu ìⁿ ñadihí ñaha ní tnáhá nduu cacu déhe-xi vãi sani iní-aⁿ sã quidé ùhú ñáhá-xí. Dico na yãha cacu déhe-aⁿ, te ñã túú-gã ndácú iní-aⁿ sã ñí quide ùhú ñáhá-xí xii-aⁿ chi mee-nã sã cudǎi iní-aⁿ déhe-aⁿ. ²² Ducaⁿ sãtnahã-xi cùu nchohó vitna chi ndihú iní-ndó sã nõhú-í, dico quixi tucu-í quixi coto ñaha-í xii-ndo, te òrè-áⁿ te cudǎi ndisa iní-ndó, te vá yõo ìⁿ-gã dandihú iní ñáhá xii-ndo davã-áⁿ.

²³ Te davã-áⁿ ñã túú-gã ná nducu tnúhu-ndo nõu-í. Te na càchí tnúhu ndáá-í xii-ndo sã Tãtã-í taxi-gã nchaa sã ná cácaⁿ-ndó núú-gã nõu na quindáa iní ñáhá-ndó xii-í. ²⁴ Te ndée vitna vátã dúcãⁿ-gã cada-ndo cácaⁿ-ndó. Dico cácaⁿ-ndó nõu-gã nõu ná cuini-ndó te taxi-gã cuendã cudǎi ndisa iní-ndó —càchí-gã xãháⁿ-gã xii-güedé.

Xitohó Jesucristú ní cunuu tnúhu-gá núú yucu ñávãha

²⁵ Te xãháⁿ tucu-gá xii-güedé:

—Mee-ni ñí chidãhu ndodo-í tnúhu ní cáháⁿ-í núú-ndó, dico sáa nduu te vá chidãhu-gã-í tnúhu cáháⁿ-í, chi cáháⁿ ndáá-na-í cuendã Tãtã-í. ²⁶ Te davã-áⁿ cácaⁿ-ndó nõu Tãtã-í nõu ná cuini-ndó te taxi-gã, te nõu na quindáa iní ñáhá-ndó xii yúhú Déhe-gã. Te ñã túú-gã xini ñúhu-xi sã yúhú cácaⁿ-í núú-gã cuendã-ndó chi cácaⁿ mée-nã-ndó. ²⁷ Chi mee Tãtã-í ío cùu iní ñáhá-gã xii-ndo cuendã cúú iní ñáhá-ndó xii-í, te sãndáa iní-ndó sã nõu-gã

ní quee-í véxi-í. ²⁸ Te yúhú ní quee-í núú Tàtá-í véxi-í ñuyú-a, te vitna dándóo-í ñuyú-a te núhú-í núú ndécú-gá —càchí-gá xáhaⁿ-gá xii-güedé.

²⁹ Te ní xáhaⁿ cuè téé xica cuu ndihí-gá:

—Vitna chi càháⁿ ndáá-ná-n, ñá túú-gá chídáhu-n tnúhu càhá-n.

³⁰ Te vitna ní xiní-ndí sá ïo váha cùtnuní iní-n ncháa nacuaa cùu, te cùtnuní iní-n ncháa nacuaa sàni iní ncháa ñáyiú. Te ñá túú xiní ñuhu-xi nágá nducu tnúhu-yu núú-n chi ncháa sa ní dátúu-n nũ-yu. Te xiáⁿ nũu sándáá iní-ndí sá nũú Yá Ndiöxí ní quee-n véxi-n —càchí-güedé xáhaⁿ-güedé xii-gá.

³¹ Te ní xáhaⁿ Jèsús:

—¿Te vitna sándáá iní-ndó-ãⁿ?

³² Vitna ní sáá nduu ní sáá òré sá ncháá nchòhò cuténuu-ndo caa ïⁿ caa úú cuu-ndo, te dándóo mee ñaha-ndo xii-í. Dico ñá díú mèe dii-í quendóo chi ndècu ndihí-í Tàtá-í.

³³ Duha càháⁿ-í cuendá cuu váha iní-ndó cündecu-ndo, chi ñuyú-a cuu úhú iní ñáhã-yu xii-ndo, dico ni vã yùhú-ndó chi yúhú sa ní dáqueé tñhù-í ncháa sá cuèhé sá dúhá ïó ñuyú-a —càchí-gá xáhaⁿ-gá xii-güedé.

17

Jèsús xicáⁿ tãhú-gã núú Tàtá-gã Dútú Ndiöxí cuendá cue téé xica cuu ndihí-gá

¹ Te sáta dúcáⁿ ní cáháⁿ Jèsús te ní ndacoto-gá andú, te ní xáhaⁿ-gã xii Tàtá-gã Dútú Ndiöxí:

—Táu, vitna ní sáá nduu càda cahnu ñaha-n xii-í cuendá ducaⁿ càda cahnu ñaha-í xii-n. ² Chi mee-n ní cachí-n sá táxi tnúni-í ncháa ñáyiú ñuyú-a, te dácacu nihnu-í ncháa ñáyiú ní cachí-n nàníhí tãhú.

³ Te cundecu ndihí-ö-yu ni caa ni quíhⁿ, chi sándáá iní ñáhã-yu sá ïⁿ díi-ni yòhó cúú-n Ndiöxí ndisa, te ducaⁿ xiní ñáhã-yu xii yúhú Jesu-crístú téé ní tendaha-n véxi ñuyú-a.

⁴ Te yúhú ní chiñuhu ñaha-í xii-n ñuyú-a, te ní xínu chiúⁿ ní cachí-n càda-í. ⁵ Táu, vitna na nàsáá-í núú-n te cada cahnu ñaha-n xii-í dàtná ní xóo cada cahnu ñaha-n xii-í ndéé cùtnáhá vátá ngáva-gá ñuyú.

⁶ Te ncháa ñáyiú ní nanducu nihnu-n tnuú ncháa ñáyiú ndècu ichi cuehé ichi duha, ní taxi cuendá-n-yu, te ní xáhaⁿ-í xii-yu yoo cùu-n. Te cuendá-n cùu-yu, te ní taxi cuendá-n-yu, te ní sándáá iní-yu tnúhu-n. ⁷ Te vitna ní cutnúni iní-yu sá ncháá tnúhu ndècu ndihí-í díu-ni mee-n ní taxi-n. ⁸ Te ní dánèhé-í-yu ncháa tnúhu sá ní dánèhé ñáhã-n xii-í, te ní sándáá iní-yu. Te ní cutnúni iní-yu sá nũú-n ní quee-í véxi-í, te ní sándáá iní-yu sá yòhó ní tendaha ñaha-n xii-í véxi-í ñuyú-a.

⁹ Te yúhú càháⁿ ndàhú-í núú-n cuendá ncháa ñáyiú ní taxi cuendá-n. Te ñá túú càháⁿ ndàhú-í núú-n cuendá ñáyiú ndècu ichi cuehé ichi duha, chi cuendá ncháa ñáyiú ní taxi cuendá-n càháⁿ-í, chi cuendá-n cùu-yu. ¹⁰ Te ncháa sá cúú cuendá-í cúú-xí cuendá-n, te ncháa sá cúú cuendá-n cùu-xi cuendá-í tnáhã-í. Te xiquide cahnu ñahã-yu xii-í.

¹¹ Te yúhú vá cündècu-gá-í ñuyú-a, dico mèe-yu chi cundecu-ni-yu, te yúhú ndixi-í núú ndécú-n. Táu, yòhó ïo yíñuhu ndecu-n, te yúhú càháⁿ ndàhú-í núú-n sã ní yùhu ni iní-n còto-n ncháa ñáyiú ní taxi cuendá-n, ñáyiú ní sándáá iní tnúhu-í cuendá sá ïⁿ-ní ichi cuú-yu cundecú-yu dàtná ïⁿ-ni cùu nchoo. ¹² Chi òré ndécú-í ndihí-yu ñuyú-a ní xito-í-yu nàcuáa cùu iní-n, te ni ïⁿ-yu ñá túú ní xíta nihnu, chi ïⁿ-dii-ni té Jüdás ní xíta nihnu tnàhí-dé, te ducaⁿ ní cuu cuendá sá ní quee ndáá-xi nàcuáa yòdo tnuní núú tütú-n.

¹³ Te vitna sa ndixi-í núú ndécú-n, dico nini ndècu-gá-í ñuyú-a duha càháⁿ-í cuendá

sá cúdĩĩ iní-yu dàtná cúdĩĩ iní mée-í. ¹⁴ Te yúhú ní dánèhé-í-yu tnúhu-n, dico nchaa ñáyiú ndècu ichi cuehé ichi duha cùu úhú iní ñáhà-yu xii-yu cuèndá sá ñà túú-gã ndécũ-yu ichi cuehé ichi duha-áⁿ dàtná yúhú ñà túú ndècu-í ichi-áⁿ. ¹⁵ Te ñà túú càchí-í sá xócàní-n-yu ñuyíú-a, dico càháⁿ ndàhú-í núú-n sã dáçacu nihnú-n-yu núú yucu ñãvãha. ¹⁶ Te yúhú ñà túú ndècu-í ichi cuehé ichi duha, te ducaⁿ mée-yu ñà túú-gã ndécũ-yu ichi cuehé ichi duha. ¹⁷ Te ío na cùndecu yihí ñuhu-gá-yu núú-n dàcuahá-yu tnúhu-n, chi cùu-xi ìⁿ tnúhu ndáá. ¹⁸ Te dàtná ní tendaha ñaha-n xii yúhú véxi-í tnuú nchaa ñáyiú ndècu ichi cuehé ichi duha, ducaⁿ càda-í tendaha-í-yu quíhíⁿ-yu cáháⁿ-yu tnúhu-í tnuú nchaa ñáyiú ndècu ichi cuehé ichi duha. ¹⁹ Te yúhú ndécú yíñuhu-í núú-n, te cada ñaha-n xii-í nàcuáa cùu iní-n sã cuèndá-yu, te ducaⁿ te cundecu yíñuhú-yu núú-n dàcuahá-yu tnúhu-n.

²⁰ Te ñà díú cuèndá mee-ni ñáyiú sa ní sándáá iní-xi càháⁿ ndàhú-í núú-n, chi tnáhà cuèndá nchaa ñáyiú na quíndáá iní ñáhà xii-í ndéé idá-gá ñuu na cùndedóho-yu tnúhu cáháⁿ ñáyiú na tendaha-í. ²¹ Te xicáⁿ táhú-í núú-n sã ncháá-yu ìⁿ-nã ichi na cùu-yu, te ìⁿ-nã caní iní ndihí ñáhà-yu xii-o dàtná cúu nchòo ìⁿ-ni cuu-o. Te ducaⁿ ìⁿ-ná cuu-o ndihí-yu cuèndá sá ná quíndáá iní nchaa ñáyiú ndècu ichi cuehé ichi duha sá díú-n ñi tendaha ñaha-n xii-í véxi-í ñuyíú-a. ²² Te nchaa sã vãha ní taxi-n ndècu ndihí-í ní dánèhé-í-yu cuèndá sá ìⁿ-nã cuú-yu cundecú-yu dàtná ndécú nchòo. ²³ Te yúhú cundecu ndihí-í-yu, te yòhó cundecu ndihí ñaha-n xii yúhú cuèndá ìⁿ-nã cuu ndisá-yu cundecú-yu. Te ducaⁿ te cutnúní iní nchaa ñáyiú ndècu ichi cuehé ichi duha sá díú mée-n ní tendaha

ñaha-n xii-í véxi-í ñuyíú-a, te cùu iní-n-yu dàtná cúu iní ñáhà-n xii yúhú.

²⁴ Táu, mee-n ñi taxi cuèndá-n-yu, te cuní-í sá cùndecú-yu núú cùndecú-í cuèndá quini-yu sá quidé càhnu ñaha-n xii-í chi ducaⁿ-ni cùu iní ñáhà-n xii yúhú ndéé cùtnáhà vátá ngáva-gã ñuyíú. ²⁵ Táu, yòhó ío yíñuhu ndecu-n. Te ñáyiú ndècu ichi cuehé ichi duha ñà túú xini ñáhà-yu xii-n, dico yúhú chi xini ñáhà-í xii-n, dico ñáyiú ní sándáá iní ñáhà xii-í sa xini-yu sá díú-n ñi tendaha ñaha-n xii-í véxi-í ñuyíú-a. ²⁶ Te sa xáhaⁿ-í xii-yu yoo cùu-n, te díu-ni ducaⁿ càda-í cuèndá cuu iní tnáhà-yu dàtná cúu iní ñáhà-n xii-í, te ducaⁿ cùndecu-í ndihí-yu — càchí-gã xáhaⁿ-gã xii Tátá-gã Dútú Ndiõxí.

18

Ní tñi-güedé Jèsús ndécá ñaha-güedé cuáháⁿ

(Mt. 26:47-56; Mr. 14:43-50; Lc. 22:47-53)

¹ Te sátá dúcáⁿ ñi cáháⁿ Jèsús, te ní quee-gã ndihí cue téé xica cuu ndihí-gã cuáháⁿ-güedé ndàa ingá xio yuhu yúu Cèdrón. Te yàcáⁿ cáá ìⁿ lahuertá, te xití lahuertá-áⁿ cuãnguihu Jèsús ndihí cue téé xica cuu ndihí-gã. ² Te té Jüdás déhe té Ximú Iscarioté téé ní sáha cuèndá ñáhà xii-gã núú cuè téé cùu úhú iní ñáhà sa xini-dé lahuertá-áⁿ chi titní xito ní sáháⁿ Jèsús ndihí-güedé xíaⁿ. ³ Núu ndáá ichi xíaⁿ ñi sáá té Jüdás ndihí vãi sandadú, ndihí cue téé quide cuèndá veñúhu ní techíuⁿ ñaha cue dútú cúnúu, ndihí cue téé cùu fariséú. Te xinehe-güedé machití ndihí ìⁿ úú-gã sá dééⁿ, te yòtnúú-güedé linterná ndihí iti ní sáá. ⁴ Te Jèsús sa nàha-gã nchaa nàcuáa cada ñaha-güedé xii-gã ñuu ní sáháⁿ tuha ñaha-gã xii-güedé, te ní xáhaⁿ-gã:

—¿Yoo nànducu-ndo? —cachí-gã xáhaⁿ-gã xii-güedé.

⁵ Te ní xáhaⁿ-güedë:
—Jèsús tée ñuú Nazàrét
nándücu-ndí—càchí-güedé xáhaⁿ-güedé
xii-gá.

Te ní xáhaⁿ Jèsús:
—Yúhú ducaⁿ nàni-í, te náu-í
ndécú-á te núu yúhú nándücu-ndo
—cachí-gá xáhaⁿ-gã xii-güedé.

Te tnàhá té Jüdás tée ní sáha
cuendá ñháá xii-gá ndihi-güedé. ⁶ Te
òré ní xáhaⁿ Jèsús sá díú-gã cúú
tée nándücu-güedé, te ní nacaca
dùma-güedé te ní nduá-güedé ndéé
ñuhu. ⁷ Te ní xicáⁿ tnúhú tucu Jesús
núú-güedé yoo nándücu-güedé. Te
ní xáhaⁿ tucu-güedé sá Jèsús tée ñuú
Nazàrét nándücu-güedé, ⁸ núu ní
xáhaⁿ-nã Jèsús:

—Sa ní cáháⁿ-í sá díú yúhú ducaⁿ
nàni-í, te núu yúhú nándücu-ndo,
te dañà-ndo nchàa cue tée iha na
núhú-güedé —càchí-gá xáhaⁿ-gã
xii-güedé.

⁹ Duha ní cuu chi ní quee ndáá-xi
nàcuáa ní cáháⁿ méé Jèsús chi ní
cachí-gá sá ncháá ñáyüu ní sáha
cuendá ñháá Yã Ndiòxi cundecu
ndihi-gá vá cuíta niñnú-yu. ¹⁰ Te
té Xímú, àdi Pelú chi úú diu-dé,
néhé-dë ñⁿ machití, te ní tava-dé
machití-áⁿ ñⁿ-xi te ní xehndé-dé
lóho xio cùha ñⁿ tée nàni Malcú
ní quéndéé duuⁿ. Te tée-áⁿ xínú
cuèchi-dé núú dùtú cúnüu-gá. ¹¹ Te
ní xáhaⁿ Jèsús xii té Pelú:

—Nataxúha machití-áⁿ núú
ñúhú-xí, chi dacuitíí sã ndòhò-í
nàcuáa ní cachí Tàtà-í cunduu —
càchí-gá xáhaⁿ-gã xii-dé.

*Jèsús ndécú-gã núú dùtú
cúnüu-gá*

(Mt. 26:57-58; Mr. 14:53-54; Lc.
22:54)

¹² Te cue sandàdú ndihi cue tée
cúnüu-gá núú-güedé, ndihi cue tée
quide cuendá veñúhu ní tñi-güedé
Jèsús, te ní dácútú ñháa-güedé. ¹³ Te
ndèca ñháa-güedé xii-gá cuáhánⁿ núú
ndécú té Ànás, te té Ànás-ánⁿ cúú-dé
tátá ñadiñí té Caifás. Te té Caifás-ánⁿ
ní cuu-dé dùtú cúnüu-gá cuíá-áⁿ.

¹⁴ Te diu-ni tée-ánⁿ ñí xáhaⁿ-dë xii
ñáyüu isràél sá vaha-gá sá ñⁿ-ní tée
na cúú-dé sá cuendá-yu nchaa-yu.

*Té Pelú càháⁿ-dé núú ñáyüu sá ñà
túú xini-dé Jèsús*

(Mt. 26:69-70; Mr. 14:66-68; Lc.
22:55-57)

¹⁵ Te té Pelú, àdi Xímú chi úú
diu-dé, ndihi ingá tucu-dé nàcuáa
xica cuu ndihi-güedé Jèsús nchicúⁿ
ñháa-güedé xii-gá cuáhánⁿ. Te ñⁿ
tée-ánⁿ xini tnàhá-dë ndihi dùtú
cúnüu-ánⁿ núu nchicúⁿ-dé tnàhá-dé
Jèsús cuánguihu ndéé núú cáá vèhe
tée cúnüu-ánⁿ. ¹⁶ Dico té Pelú ní
ndóo-dé yuyèhe ndaa quehé, núu
ní ndee tée ndihi té Pelú-ánⁿ ñí
cáháⁿ ndihi-dé ñháa ndéé yuyèhe,
te ndèca-dé té Pelú cuánguihu. ¹⁷ Te
ní xáhaⁿ ñháa ndéé yuyèhe-ánⁿ xii té
Pelú:

—¿Náa ñá díú yòhó tnàhá-n
xica cuu ndihi-n tée ndèca-güedé
cuánguihu-a? —càchí-aⁿ xáhaⁿ-aⁿ
xii-dé.

Te ní xáhaⁿ tē Pelú:

—Ñháa, ñá túú tée-áⁿ xicá cùu
ndihi-ú —càchí-dé xáhaⁿ-dë xii-aⁿ.

¹⁸ Te ío víxiⁿ quide-xi núu cue
tée xinu cuechi, ndihi cue tée quide
cuendá veñúhu ní dátñhá-güedé
ñuhú, te xínutñi teté-güedé ndihi té
Pelú.

*Dútú cúnüu nducu tnúhu-dé núú
Jèsús*

(Mt. 26:59-66; Mr. 14:55-64; Lc.
22:66-71)

¹⁹ Te dùtú cúnüu ní xicáⁿ
tnúhú-dë núú Jèsús núu nándi cùu
cue tée xica cuu ndihi-gá, te nándi
sá dánèhé ñháa-gã xii-güedé. ²⁰ Te
ní xáhaⁿ-gã:

—Yúhú càháⁿ ndodo-í núú nchàa
ñáyüu cuéi xití veñúhu càhnu sá ío
cúnüu, te cuéi xití nchaa dava-gá
veñúhu núú tàcá nchaa ñáyüu isràél
ducaⁿ-ni dānehé-í-yu, te ñá túú
dàyuhu cáháⁿ-í. ²¹ Núu vá càcáⁿ
tnúhú-n núu-í. Càcáⁿ tnúhú núú
nchàa ñáyüu sácúndedóho tnúhu
càháⁿ-í, te na càháⁿ-yu núu nása

ndùu tnúhu càháⁿ-í chi xini-yu —
càchí-gá xáhaⁿ-gã xii-dé.

²² Te sá dúcáⁿ nĩ cáháⁿ Jèsús
núu ìⁿ tée quide cuendá veñúhu
nútnĩ-dé tnàhá-dé te ní caní-dé ìⁿ
déhndé núu-gã. Te ní xáhaⁿ-dè:

—¿Ná cuendá ducaⁿ càháⁿ-n núu
dütú cúnùu-i? —cachí-dé xáhaⁿ-dè
xii-gã.

²³ Te ní xáhaⁿ Jèsús xii-dé:

—Te núu nèhè ní cáháⁿ-í te
cáháⁿ-n nãsa ndùu tnúhu ní cáháⁿ-í,
te yúhu càháⁿ váha-í te ducaⁿ
càniha-n —cachí-gá xáhaⁿ-gã xii-dé.

²⁴ Te ndùtu yoho-ni Jèsús ní
dánùhú ñháá tẽ Anás xii-gã ndaha
té Caifás dütú cúnùu-gã.

*Té Pèlú càháⁿ tucu-dé núu ñáyiu
sá ñà túú xini-dé Jèsús*

(Mt. 26:71-75; Mr. 14:69-72; Lc.
22:58-62)

²⁵ Te té Pèlú nútnĩ teté-ni-dé, te ní
xáhaⁿ-güedé xii-dé:

—¿Náa ñá díú tnàhá yòhó xíca
cùu ndìhi tée ndèca-ndí véxi-ãⁿ? —
càchí-güedé xáhaⁿ-güedé xii-dé.

Te ní xáhaⁿ tẽ Pèlú:

—Ñáhá, ñá túú tẽe-áⁿ xíca
cùu ndìhi-ú —càchí-dé xáhaⁿ-dè
xii-güedé.

²⁶ Te ìⁿ ñaní tnáhá tẽe ní xehndé
té Pèlú lóho-xi-áⁿ xínú cuèchi-dé
tnàhá-dé núu dütú cúnùu. Te tée-áⁿ
ní xáhaⁿ-dè xii té Pèlú:

—¿Náa ñá díú tnàhá-n ndìhi-n-dé
ní xini ñháá-í òré ní tnĩ-ndí-dé
xiti lahuertá? —càchí-dé xáhaⁿ-dè
xii-dé.

²⁷ Te té Pèlú ní xáhaⁿ tùcu-dé sá ñà
díú-dè, te òré-áⁿ nĩ cana ìⁿ líhi.

Jèsús ndécú-gã núu tẽ Pilatú

(Mt. 27:1-2, 11-14; Mr. 15:1-5;
Lc. 23:1-5)

²⁸ Te ní ndeñuhu-güedé Jèsús vehe
té Caifás, te ndèca ñaha-güedé xii-gã
cuáháⁿ vechiùⁿ tée cùu gobiernú. Te
sa ta cùditó-ni-gã cuáháⁿ núu ñá ní
cùiní cue tée isràél quíhu-güedé xiti
vechiùⁿ tée cùu gobiernú-áⁿ. Te núu
ní quíhu-güedé vechiùⁿ-áⁿ ñá, te vá
cúu-gã quíhu-güedé cudini-güedé

vico pàscuá ní cùu chi ducaⁿ tnàhí
quide-güedé. ²⁹ Núu té Pilatú tée cùu
gobiernú ní quee-dé vechiùⁿ-dé ní
cáháⁿ ndìhi ñaha-dè xii-güedé, te ní
xáhaⁿ-dè:

—¿Ná cuèchi ní quide tée-a núu
ndèca-ndo-dé véxi? —càchí-dé
xáhaⁿ-dè xii-güedé.

³⁰ Te ní xáhaⁿ-güedé:

—Te núu dicó ñá túú cuèchi-dé-áⁿ
te vá cándèca-ndí-dé quixi núu-n
ní cùu —cachí-güedé xáhaⁿ-güedé
xii-dé.

³¹ Te ní xáhaⁿ tùcu té Pilatú
xii-güedé:

—Chí cándèca-dé cuánùhú, te
cada ndáá-ndó cuèchi-dé nàcuáa
cãa leí méé-ndó —càchí-dé xáhaⁿ-dè
xii-güedé.

Te ní xáhaⁿ-güedé:

—Dico nchúhú ñáyiu isràél chi ñá
túú dùcaⁿ taxi tnuní leí sá cáhni-ndí
—càchí-güedé xáhaⁿ-güedé xii-dé.

³² Te ducaⁿ nĩ cuu chi dacuití nĩ
quee ndáá-xi nàcuáa ní cáháⁿ méé
Jèsús cada-xi cuú-gã. ³³ Te cuándihu
té Pilatú vechiùⁿ-dé, te ní cana-dé
Jèsús ní xicáⁿ tnúhú-dè núu-gã, te
xáhaⁿ-dè:

—¿Yòhó yindàha-n ñáyiu is-
ràél-áⁿ? —càchí-dé xáhaⁿ-dè xii-gã.

³⁴ Te ní xáhaⁿ Jèsús:

—¿Te xiãⁿ càháⁿ-n sã véxi iní
méé-n, àdi ió ìⁿ ñáyiu ní cachí tnúhu
xii-n cuendá-í? —càchí-gã xáhaⁿ-gã
xii-dé.

³⁵ Te ní xáhaⁿ tẽ Pilatú xii-gã:

—Ñá díú tẽe isràél cùu-í núu
ducaⁿ càháⁿ-n, chi cue ñaní tnáhá-n
cuè tée isràél ndìhi cue dütú cúnùu
ní taxi cuendá ñháá-güedé xii-n
iha. ¿Te ná ní quide-n? —càchí-dé
xáhaⁿ-dè xii-gã.

³⁶ Te ní xáhaⁿ Jèsús:

—Ñá díú tẽe ñuyiú-a cùu-í te ní
ñà túú véxi-í taxi tnuní-í ñuyiú-a,
chi núu dicó iha taxi tnuní-í áⁿ te
cue tée xica cuu ndìhi-í nàá-güedé
ndìhi cue tée isràél cuendá sã vá
tní ñaha-güedé xii-í ní cùu, dico ñá
túú véxi-í sã táxi tnuní-í ñuyiú-a —
càchí-gã xáhaⁿ-gã xii-dé.

37 Te ní xáhaⁿ tẽ Pilatú:

—¿Te tée yìndaha ñáiyu cùu-ó vání? —càchí-dé xáhaⁿ-dẽ xii-gá.

Te ní xáhaⁿ Jèsús:

—Te dàtná càchí-n-ãⁿ yìndaha ndisa-í ñáiyu, chi yúhú véxi-í ñuyíú-a te iha ní cacu-í te càháⁿ-í mee-ni tnùhu ndáá. Te nchaa ñáiyu na cùdíí iní-xi tnùhu ndáá, te tedóho-yu nchaa tnùhu càháⁿ-í —càchí-gá xáhaⁿ-gã xii-dé.

38 Te ní xáhaⁿ tẽ Pilatú:

—¿Te ná cuú-tu tnùhu ndáá-áiⁿ? —càchí-dé xáhaⁿ-dẽ xii-gá.

Càchí-güedé sá cáhni-güedẽ Jèsús

(Mt. 27:15-31; Mr. 15:6-20; Lc. 23:13-25)

Te sátá ñi yáha ní xicáⁿ tnúhú tẽ Pilatú núu Jèsús, te ní quee tucu-dé quehé, te xáhaⁿ-dẽ xii cue tée isràél:

—Ñá túú nã cuèchi tée-a. 39 Te váha-ni chi ducaⁿ tnàhi quide nchohó sá ndi tnahá nduu víco pascuá cuini-ndó sã dácácu-í ñⁿ tée yìhi vecaá. Te núu cuini-ndó te na dácácu-í tée yìndaha ñaha xii-ndo —càchí-dé xáhaⁿ-dẽ xii-güedé.

40 Te sá dúcáⁿ ñi cáháⁿ-dé, núu nchaa-güedé níhi ní cáháⁿ-güedé, te xáhaⁿ-güedé:

—¡Vá dácácu-n tẽe-áⁿ, té Barrábás dácácu-n! —càchí-güedé xáhaⁿ-güedé xii-dé.

Te té Barrábás-áⁿ ñi cuu-dé ñⁿ ñadúhú.

19

1 Te té Pilatú ní táuchíuⁿ-dẽ ní tniñ ñaha cuè sandadú xii Jèsús, te ní caniha-güedé xii-gá ndehi ñi. 2 Te ñu-ni cue tée-áⁿ ñi cadúha-güedé ñⁿ coroná iñu ní chihi-güedé díquí-gã, te ní dáquíu nuu ñaha-güedé xii-gá ñⁿ dóo tícuèhé víhí. 3 Te ní sáháⁿ ndehe yatni-gá-güedé núu-gã, te ní xáhaⁿ-güedé:

—¡Ío càhnu cuu yohó tée yìndaha ñaha xii ñáiyu isràél! —càchí-güedé xáhaⁿ-güedé cúdíquí ndéé ñáhá-güedé xii-gá.

Te ní cani-güedé déhndé núu-gã.

4 Te ní quee tucu té Pilatú quehé te ní xáhaⁿ-dẽ xii nchaa ñáiyu xindecu quehé:

—Te cundehe-ndo-dẽ ná ndéé ñùhu-í-dé iha, chi yúhú sáha-í cuendá sã ñà túú cuèchi-dé —càchí-dé xáhaⁿ-dẽ xii-yu.

5 Te ní ndeñuhu ñaha té Pilatú xii Jèsús xití vechiùⁿ-dé te ñùhu ñⁿ coroná iñu díquí-gã, te ñihnu-gá dóo tícuèhé víhí-ãⁿ. Te ní xáhaⁿ tẽ Pilatú xii-yu:

—¡Nái-dé-a! —càchí-dé xáhaⁿ-dẽ xii-yu.

6 Te ní xiní ñáhá cuè dútú cúnùu ndiñi cue tée quide cuendá veñuhu. Te ní cuáá-güedé, te xáhaⁿ-güedé:

—¡Cata caa-dé! ¡Cata caa-dé núu cùrúxí! —càchí-güedé xáhaⁿ-güedé xii-dé.

Te ní xáhaⁿ tẽ Pilatú:

—Váha-gá núu candeca mee-ndo-dẽ quíhíⁿ cata caa-ndo-dẽ núu cùrúxí, chi yúhú cútnùní iní-í sã ñà túú na cuèchi-dé —càchí-dé xáhaⁿ-dẽ xii-güedé.

7 Te ní xáhaⁿ cuè tée isràél:

—Lèi ndécú ndiñi nchúhú càchí-xi sã dài cuú-dé, chi càchí-dé sã Déhe Yá Ndióxi cúu-dé —càchí-güedé xáhaⁿ-güedé xii-dé.

8 Te sá dúcáⁿ ñi xáhaⁿ-güedé xii té Pilatú, te vaa-gá ní yùhú-dé. 9 Núu cuándihu tucu-dé vechiùⁿ-dé, te ní xáhaⁿ tucu-dé xii Jèsús:

—¿Te yohó ndéé tée cùu-n-i? —càchí-dé xáhaⁿ-dẽ xii-gá.

Dico Jèsús ñà túú ní cáháⁿ-gá.

10 Núu ní xáhaⁿ tẽ Pilatú xii-gá:

—¿Te vá càchí tnùhu-n núu ndéé tée cùu-n-u? ¿Náa ñà túú xiní-n sã yúhú táxi tnùní-í, te cuu-ni tauchiùⁿ-í cata caa ñaha-güedé xii-n núu cùrúxí cuú-n, te cuu-ni dácácu ñaha-í xii-n-ãⁿ? —càchí-dé xáhaⁿ-dẽ xii-gá.

11 Te ní xáhaⁿ Jèsús:

—Yohó ñà túú sã táxi tnùní ñáhá-n xii yúhú ní cùu núu ñà túú Yá Ndióxi ní cuini-gá sã dúcáⁿ cùnduu, te tée ní taxi cuendá ñáhá

xii-í núú-n tēe-áⁿ ño-gá ndècuéchi-dé dácúxí yòhó —càchí-gá xáhaⁿ-gá xii-dé.

¹² Te òré-áⁿ ñí ngüita té Pilatú ndúcú-dě nàcuáa cada-dé dácácu-dé Jèsús ní cùu, dico cue tée israhél ní ngüita-güedé ní cuáá-güedé, te xáhaⁿ-güedé:

—Te núu na dácácu-n tēe-áⁿ, te ñá díú tēe tnàhá tnúhu ndihi té Cèsár cùu-n. Chì ndéda-ni caa tēe na cachi sá cùú-dě tēe yindaha ñaha xii ñáiyu cùu úhú iní-dé té Cèsár. Te té Jèsús-áⁿ càchí-dé sá táxí tnùní-dé —càchí-güedé xáhaⁿ-güedé xii-dé.

¹³ Te sá dúcáⁿ ñí xáhaⁿ-güedé xii té Pilatú núu ní quee-dé ndihi Jèsús cuáháⁿ ndihi ñaha-dě corrèdór núu ñí quee mee-ni yúú váha núú ñúhú, te xíaⁿ nání-xí Gábatá tnúhu hēbreú. Te xíaⁿ ndécú xilé sácóo nchihi té Pilatú xèhndé-dé cuéchi ñáiyu, núu ní nucóo-dé núu xilé-dé òré ní quexio-dé ndihi Jèsús. ¹⁴ Te cùu-xi datná cuádava nduu, nduu vispré vico pascuá. Te ní xáhaⁿ tē Pilatú xii ñáiyu israhél:

—¡Nái tēe yindaha ñaha xii-ndo-a! —càchí-dé xáhaⁿ-dē xii-yu.

¹⁵ Te ní cuáá-yu, te xáháⁿ-yu:

—¡Cahni-dé! ¡Cahni-dé! ¡Cata caa-dé núu cùrúxí! —càchí-yu xáháⁿ-yu.

Te ní xáhaⁿ tē Pilatú:

—¿Te yúhú cata caa-í tēe yindaha ñaha xii-ndo-u? —càchí-dé xáhaⁿ-dē xii-yu.

Te cue dútú cúnúu ní xáhaⁿ-güedé:

—Nchúhú ñá túú-gá tēe yindaha ñaha xii-ndí, chí ñⁿdii-ni té Cèsár yindaha ñaha-dé xii-ndí —càchí-güedé xáhaⁿ-güedé xii-dé.

¹⁶ Te té Pilatú ní xáhaⁿ-dē ní queheⁿ cuëndá-güedé Jèsús ndécá ñaha-güedé cuáháⁿ cata caa ñaha-güedé núu cùrúxí.

Sata caa-güedé Jèsús núu cùrúxí

(Mt. 27:32-44; Mr. 15:21-32; Lc. 23:26-43)

¹⁷ Te ní quee Jèsús nchídó-gá cùrúxí cuáháⁿ ñⁿ xichi núu nání Yiqui Diqui Ndiyi. Te tnúhu hēbreú queé-xí Gōlgotá. ¹⁸ Te yacáⁿ ní sata caa ñaha-güedé xii-gá núu cùrúxí-áⁿ. Te xio xio ñiñi-gá ní sata caa-güedé úu cue tēe ndècu ndisa cuéchi-xi ñiñi-ni núu cùrúxí tucu. ¹⁹ Te ní táuchíúⁿ tē Pilatú ní taxi ndecu-güedé ñⁿ sá ndéè lètrá núu cùrúxí tá caa-gá, te duha càchí lètrá-áⁿ: “Jèsús tēe ñúú Nazàrét, tēe yindaha ñaha xii ñáiyu israhél”, duha càchí-xi. ²⁰ Te vài ñáiyu israhél ní xiní-yu nàcuáa càháⁿ lètrá-áⁿ, chí yatni-ni yuhu ñúú ní sata caa ñaha-güedé xii-gá núu cùrúxí. Te lètrá-áⁿ càháⁿ-xi tnúhu hēbreú, te càháⁿ-xi tnúhu griégú, te càháⁿ-xi tnúhu làtín. ²¹ Te ní xáhaⁿ cuè dútú cúnúu xii té Pilatú:

—Vá táuchíuⁿ-n tee-güedé lètrá càháⁿ-xi “Tēe yindaha ñaha xii ñáiyu israhél” ní cùu, váha-gá tauchíuⁿ-n tee-güedé lètrá càháⁿ-xi “Tēe càchí yindaha ñaha xii ñáiyu israhél ní cùu” —càchí-güedé xáhaⁿ-güedé xii-dé.

²² Te ní xáhaⁿ tē Pilatú:

—Nàcuáa ní táuchíuⁿ-í ní tee-güedé te ducaⁿ quèndóo-xi —càchí-dé xáhaⁿ-dē xii-güedé.

²³ Te sata ñí sata caa ñaha cue sandadú xii Jèsús núu cùrúxí, te cùmí xichi ní quide-güedé dóó-gá, te ñⁿ ñⁿ xichi dóó-gá ní cáhñu cue sandadú-áⁿ. Te ndècu ñⁿ dóó-gá dóó cáni ñà túú ní tucu. ²⁴ Te cuëndá dóó-áⁿ ñí xitnaha cue sandadú-áⁿ:

—Vá ndátá-ó dóó-a, váha-gá núu na còto ndéé-ó cuëndá quini-ó ndèdacàa-o cuu cuendá-ó —càchí-güedé xitnaha-güedé.

Te ducaⁿ ñí quide-güedé chí ní quee ndáá-xi nàcuáa càháⁿ-xi núu tütú Yá Ndióxi núu càchí-xi: “Titni xichi ní cáhñu-güedé dóó-í. Te ní xito ndéé-güedé cuëndá cutnùní iní-güedé ndèdacàa-güedé níhí-güedé dóó-í”, duha càchí-xi núu tütú-gá. Te sá dúcáⁿ càháⁿ-xi núu tütú Yá Ndióxi núu xíaⁿ ducaⁿ ñí quide cue sandadú-áⁿ.

25 Te yatni ñiñi curúxi núu tácaà Jesús nútñi ñaná-gã, ndihi cùhu-xi, ndihi tá Màriá ñadihi té Clèofás, ndihi tá Màriá Magdalená. 26 Te ní xiní Jèsús ñaná-gã nútñi-aⁿ ñiñi ìⁿ téé ní xica cuu ndihi-gá, téé ío cùu iní-gá, te ní xáhaⁿ-gã xii ñaná-gã:

—Ñáá, téé nútñi-áⁿ nduu-dé ðàtná ðéhe mee-n —càchí-gá xáhaⁿ-gã xii-aⁿ.

27 Te ní xáhaⁿ-gã xii téé ní xica cuu ndihi-gá-áⁿ:

—Ñaha-áⁿ nduu-aⁿ ðàtná ñaná mee-n —càchí-gá xáhaⁿ-gã xii-dé.

Núu ndéé ðává-áⁿ ñi nduu ñaná ñáhá téé-áⁿ xii ñaná-gã.

Ní xihí Jèsús

(Mt. 27:45-56; Mr. 15:33-41; Lc. 23:44-49)

28 Te ní cutnùní iní Jèsús sá ní ndihi chiⁿ ní táhú Tátá-gã Dútú Ndiòxi ní quide-gá núu ní cachí-gá:

—Yichí-í ndute —càchí-gá.

Te duha ní cáháⁿ-gá chi ní quee ndáá-xi ñàcuáa càháⁿ-xi núu tùtú Yá Ndiòxi.

29 Te ndècu ìⁿ lítu ñùhu ndudí íá. Te sá dúcáⁿ ní cáháⁿ-gá sá yichí-gá ndute, núu xiáⁿ ní queheⁿ-güedé cáchí te ní chindóyo-güedé xití ndudí íá-áⁿ, te ní chinenu-güedé díquí ìⁿ dité yutnu ñàní hisópó, te ní ndocani-güedé ní chihí-güedé yuhu-gá. 30 Te sátá ñi xihí-gá ndudí íá-áⁿ, te càchí-gá:

—Vitna ní dáxiⁿu cava-í nchaa chiⁿ ní cachí Tátá-í cada-í —duha ní cachí-gá.

Te ní xócuíta dúcúⁿ-gã ndàa núu-gã, te ní xihí-ni-gá.

Íⁿ sandàdú ní caáⁿ-dé yiqui naha Jèsús ndihi ìⁿ pùyá yihí caá núu-xi

31 Te cuendá sá ndùu vispré vico pàscuá cúu-xí núu ñá ní cuñí cue téé isràél cundecu-ni yiqui cùñú-gá núu cùrúxi ndihi yiqui cùñú cue téé ní sata caa-güedé ñiñi-gá, chi cuendá nduu tñé-áⁿ cúu-xí ndùu ndetátá ñáyiⁿu, te ío quide cahnú-yu nduu-áⁿ, núu ní xáhaⁿ-güedé xii

té Pilatú sá táuchiuⁿ-dé quihíⁿ cue téé cahnú-güedé ñiñi Jèsús ndihi ñiñi cue téé tácaa ndihi-gá, te xocani-güedé yiqui cùñú-gá ndihi yiqui cùñú-güedé yacáⁿ. 32 Te sátá dúcáⁿ te ní sáháⁿ cue sandàdú ní sáhnú-güedé ñiñi cue téé tácaa xio xio ñiñi Jèsús. 33 Te òré ní cuyatni-güedé núu-gã, te ní xiní-güedé sá sà ní xihí-gá núu ñá ní sáhnú-güedé ñiñi-gá.

34 Dico ìⁿ sandàdú-áⁿ ñi cúxi-dé pùyá néhé-dé ìⁿ xio yiqui naha-gã, te yihí caá núu-xi núu ní caáⁿ-xi yiqui naha-gã ní quee ñiñi ndihi ndute cuií. 35 Te yúhú té Juáá téé ní cadúha tutú-a ní xiní-í ñàcuáa ní cuu ní xihí Jèsús, te xiáⁿ núu càháⁿ ndáá-í cuendá quindáá iní-ndó. 36 Te ducaⁿ ñi cuu ñá ní sáhnú-güedé ñiñi Jèsús, chi ní quee ndáá-xi ñàcuáa càháⁿ-xi núu tùtú Yá Ndiòxi núu càchí-xi: “Vá cahnú-güedé ñi ìⁿ yiqui-gá”, duha càchí-xi. 37 Te ducaⁿ ñi quide-güedé Jèsús ní caáⁿ-güedé yiqui naha-gã, chi ingá xichi núu tùtú Yá Ndiòxi càchí-xi: “Sáá nduu te quiní-güedé ìⁿ téé ní dánicuèhé-güedé”, duha càchí-xi.

Chindúxi-güedé Jèsús

(Mt. 27:57-61; Mr. 15:42-47; Lc. 23:50-56)

38 Te sátá dúcáⁿ ñi cuu, te té Chèé téé ñuú Arimàtea tñahá-dé ní sándáá iní-dé tñuhu Jèsús dico dayuhu, chi ní xóo yùhú-dé cue téé cùnnu núu ñáyiⁿu isràél. Te téé-áⁿ ñi xáhaⁿ-dè xii té Pilatú núu vá dáñá-dé canehe-dé yiqui cùñú Jèsús quihíⁿ chindúxi-dé, te té Pilatú ní xáhaⁿ-dè xii-dé sá cúu cànehe-dé yiqui cùñú Jèsús quihíⁿ, núu ní sáháⁿ-dè ní nuu nehe-dé yiqui cùñú-gá núu cùrúxi nchídó-dé cuáháⁿ. 39 Te té Nicòdemú téé ní sáháⁿ niú ní cáháⁿ ndihi-dé Jèsús ndéé ðihna, téé-áⁿ néhé-dé ócò úxí kilú yuchi ní cuáha mee-ni yúcú sá ñání mìrrá ndihi yúcú sá ñání

àloés. Te ío váha tnàmi sahán. ⁴⁰ Te ní naníhí tnáhá-dě ndíhi té Chéé, te ní chidúcúⁿ nuu-güedé yiqui cùñú Jèsús mee-ni dǒo vâha, te nàcuáa ta dùcuⁿ nuu-güedé yiqui cùñú-gá dǒo-án, te ducaⁿ ta chido-güedé yuchi sàháⁿ tnámí-án nùú dǒo-án chi ducaⁿ tnàhí quide ñáyiú isràél òrè chindüxi tnàhá-yu. ⁴¹ Te yatni núú ní sata caa-güedé Jèsús cáa ñⁿ lahuertá. Te xití lahuertá-án nchíi ñⁿ yaú cava duha cuáháⁿ ndáá-xi, te vátá yǒo ñⁿ-gá nguindüxi xián. ⁴² Te cuendá sá ní cuyatni tnahá nduu ndetatu ñáyiú isràél nùu xián yaú cava nchíi yatni-ni xián ní chihi-güedé yiqui cùñú Jèsús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumíngú tacuñhdá-gá cuáháⁿ tá Màriá Magdalèná cuáháⁿ ngoto-xi yaú núú ní chihi-güedé yiqui cùñú Jèsús, te ní sáá-xi ní xiní-xi sá ñà túú-gã ndedí yúú yèhe yaú-án. ² Nùu xínu-xi cuánuhú núú ndécú tǎ Ximú, àdi Pelú chi úú diu-dé, ndíhi ingá téé ní xica cuu ndíhi-gá téé ío cùu iní-gá, te ní xáhaⁿ-xi xii-güedé:

—Nèhe-güedé yiqui cùñú Jèsús cuáháⁿ, te ñá xiní-ó ndèé ní taxi ndecu-güedé —càchí-xi xáhaⁿ-xi xii-güedé.

³ Te ní quee té Pelú ndíhi ingá téé-án cuáháⁿ ndéhe-güedé yaú núú ní chihi-güedé yiqui cùñú-gá.

⁴ Te ndúú-güedé xínú-güedé cuáháⁿ ní cùu, dico ingá téé-án ní cuu níhi-gá sáhá-dě cuáháⁿ-dé nùu díhna-gá-dé ní sáá-dé yuhu yaú núú ní chihi-güedé yiqui cùñú Jèsús ní cùu. ⁵ Te ní ngáundeyi-dé xití níhmi-dé xití yaú-án, te ní xiní-dé mee-ná dǒo vâha sá ní xidúcúⁿ nuu-gá yúcu, dico ñá ní quíhu-dé. ⁶ Te sátá ní sáá té Pelú te cuánguihu-dé xití yaú-án,

núu tnàhá-dé ní xiní-dé nchaa dǒo ní xidúcúⁿ nuu-gá yúcu-án. ⁷ Te ní xiní-dé sá dǒo ní xindútú dǐquí-gã ñá túú càtuu jundú-xi ndíhi dǒo ní xidúcúⁿ nuu-gá chi ní nadúcúⁿ nuu-ná càtùu ñⁿ xio. ⁸ Te nchicúⁿ tucu téé ní sáá díhna-gá-án cuánguihu xití yaú-án, te ní xiní-dé sá dǒo-ná yúcu, te ñá túú-gã yiqui cùñú Jèsús nùu ní sándáá iní-dé sá ní ndoto-gá. ⁹ Chi vátá tècú tnùní-gá-güedé nàcuáa càháⁿ-xi núu tütú Yá Ndiǒxí núu càchí-xi sá Jèsús ndoto-gá. ¹⁰ Te ní xícó ndí ndúú cue téé ní sángoto yaú núú ní chihi-güedé yiqui cùñú Jèsús ní cùu cuánuhú-güedé vehe-güedé.

Jèsús ní naníhí tnáhá-gã ndíhi tá Màriá Magdalèná

(Mr. 16:9-11)

¹¹ Te ní sáá tucu tá Màriá yuhu yaú núú ní chihi-güedé yiqui cùñú Jèsús te ní ngúita-xi ndàhyú-xi, te ní ngáundeyi-xi xití nihni-xi xití yaú-án. ¹² Te xití yaú-án ní xiní-xi úú espíritú xínú cuèchi núú Yá Ndiǒxí xixíhnu-xi mee-ni dǒo cuxíⁿ xindecu-xi núú ní cáa yiqui cùñú-gá. Te ñⁿ-xi núcóo núú ní cáa díquí-gã, te ñⁿ-xi núcóo núú ní cáa sáhá-gã. ¹³ Te espíritú-án ní xáhaⁿ-xi xii tá Màriá:

—¿Ná cuendá ndàhyú-n? — càchí-xi xáhaⁿ-xi.

Te ní xáhaⁿ tá Màriá:

—Ndàhyú-í chi nèhe-güedé yiqui cùñú Yaá cúú Xitohó-í cuáháⁿ, te ñá túú xiní-í ndèé ní taxi ndecu-güedé —càchí-xi xáhaⁿ-xi xii cue espíritú-án.

¹⁴ Te tnúhu-ni-án ní cáhá-xi te ní nchócótó-xí ñⁿ xio, te ní xiní-xi Jèsús núnñi-gá dico ñá túú ní cùtnuní iní-xi sá díú mèe-gá. ¹⁵ Te ní xáhaⁿ Jèsús xii-xi:

—¿Ná cuendá ndàhyú-n? ¿Yoo nànducu-n? —cachí-gá xáhaⁿ-gã xii-xi.

Te mee-xi ní sani iní-xi sá tèe xití lahuertá-án cúú téé-án, núu ní xáhaⁿ-xi:

—Tàta, te núu yòhó néhé-n yìqui cuñú Jèsús cuáháⁿ, te cáháⁿ-n ndéé ní taxi ndecu-n chi cuèndá naqueheⁿ-í canehe-í núhú — cächí-xi xáhaⁿ-xi.

16 Te ní cáháⁿ díú ñàha-gá xii-xi, te xáhaⁿ-gá:

—¡Màriá! —cächí-gá xáhaⁿ-gá xii-xi.

Te ní ndacoto-xi núú-gá, te ní cáháⁿ-xi tnúhu hèbreú, te xáhaⁿ-xi:

—¡Rabòní! —cächí-xi xáhaⁿ-xi. Te tnúhu-áⁿ quéé-xi Mèstrú.

17 Te ní xáhaⁿ Jèsús:

—Daña vá ngání ñàha-n chi vátá ndáá-gá-í núú ndécú Tàtá-í. Te núhú-n cùñaha-n xii cue téé ío váha ní tnahá tnúhu ndihí-í sá ndáá-í núú ndécú Tàtá-í Dútú Ndiòxi, te ñu-gá cúú Tàtá-ndó nchàa-ndo, te ñu-ni-gá cúú Ndiòxi-ndó — cächí-gá xáhaⁿ-gá xii-xi.

18 Te ní natnii tá Màriá Magdalèná ichi cuánuhú-xi cùñaha-xi xii cue téé ní xica cuu ndihí-gá sá ní xiní-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gá xii-xi.

Ní quexìo Jèsús núú xíndecu cue téé ní xica cuu ndihí-gá

(Mt. 28:16-20; Mr. 16:14-18; Lc. 24:36-49)

19 Te ñu-ni ndumìngú sandiquiⁿ ní natacá cue téé ní xica cuu ndihí-gá, te xíndedí nihnu-güedé vehe sá xiyùhú-güedé cue téé cùnuu núú ñàyü isràél. Te ní quíhu Jèsús ndéé tnuú-güedé ní ngúnutnii-gá, te ní xáhaⁿ-gá:

—Yá Ndiòxi chíndèe ñàha-gá xii-ndo ío váha cùu iní-ndó ndècu-ndo —cachí-gá xáhaⁿ-gá xii-güedé.

20 Te ní dánèhè ñàhá-gá ndaha-gá ndihí yiqui naha-gá xii-güedé. Te ío ní cudíí iní-güedé sá díú ndìsa-gá ní xiní ñàhá-güedé. 21 Te ní xáhaⁿ tùcu Jèsús xii-güedé:

—Yá Ndiòxi chíndèe ñàha-gá xii-ndo ío váha cùu iní-ndó ndècu-ndo. Te dátá ní tendaha ñàha Tàtá-í Dútú Ndiòxi xii-í véxi-í ñuyíú-a, te ducaⁿ tendaha

ñàha-í xii-ndo quíhíⁿ-ndó cáháⁿ-ndó tnúhu-í núú ñàyü —cächí-gá xáhaⁿ-gá xii-güedé.

22 Te ní chiyóco-gá núú-güedé, te ní xáhaⁿ-gá:

—Chí ndúú tàhú Espiritú Yá Ndiòxi cundecu ndihí-ndo. 23 Te nchaa ñàyü na quíndáá iní-xi tnúhu-í te cùñaha-ndo xii-yu sá ní quide càhnu iní Yá Ndiòxi nchaa cuèchi-yu. Te nchaa ñàyü vá quíndáá iní tnúhu-í te cùñaha-ndo xii-yu sá vâ cadá càhnu iní-gá cuèchi-yu —cächí-gá xáhaⁿ-gá xii-güedé.

Té Mǎxí cáháⁿ ndihí-dé Jèsús

24 Te núú ùxúú cue téé ní xica cuu ndihí-gá, te ñu-dé nání-dé Mǎxí téé ní xóo danàni-güedé Cuächí, te téé-án ñà túú-dé ndécú ndihí-güedé òré ní sáháⁿ Jèsús. 25 Te dava-gá cue téé ní xica cuu ndihí-gá ní xáhaⁿ-güedé xii-dé:

—Ní xiní-ndí Jèsús —cächí-güedé xáhaⁿ-güedé.

Te ní xáhaⁿ tǎ Mǎxí:

—Te vá quíndáá iní-í, chi ndéé quíni-í ndaha-gá núú ñí quéé nduyú, te dàquíhu-í díquí ndáhà-í núú ñí caáⁿ nduyú-án, te dàquíhu ndàha-í yiqui naha-gá núú ñí caáⁿ, ducaⁿ te quíndáá iní-í —cächí-dé xáhaⁿ-dè xii-güedé.

26 Te núú ùná tucu nduu ní natacá tucu cue téé ní xica cuu ndihí Jèsús ñu vehe, te nduu-án tnahá té Mǎxí ndécú ndihí-güedé. Te cuèi ndedí nihnu-güedé vehe-án, te ní quíhu Jèsús ndéé tnuú-güedé, te ní xáhaⁿ-gá:

—Yá Ndiòxi chíndèe ñàha-gá xii-ndo ío váha cùu iní-ndó ndècu-ndo —cachí-gá xáhaⁿ-gá xii-güedé.

27 Te ní xáhaⁿ-gá xii té Mǎxí:

—Cundehe ndàha-í te dàquíhu-n díquí ndáhá-n núú ñí quéé nduyú, te dàquíhu-n ndàha-n yiqui naha-í-a cuèndá quíndáá iní-n te vá cání ñu

cani úú iní-n —càchí-gá xáhaⁿ-gã xii-dé.

²⁸ Te ní xáhaⁿ tē Mǎxí xii-gá:

—¡Yòhó cúú-n Xítohó-í! ¡Yòhó cúú-n Ndiõxí-í! —càchí-dé xáhaⁿ-dē xii-gá.

²⁹ Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdí-gá iní nchaa ñáyiú ñá túú ní xiní núú ñáhá xii-í, te ní sándáá iní-yu —càchí-gá xáhaⁿ-gã xii-dé.

Quindáá iní-ó tnũhu yòdo tnuní núú tütú-a

³⁰ Te vâi-gá sá vǎ yõ tñàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndihí-gá. ³¹ Dico dava-gá ní ngódó tnũní núú tütú-a cuendá sá quindáá iní-ndó sǎ Jèsús cúú-gá Cristú Déhe Dútú Ndiõxí, te naníhí tǎhú-ndó te núu na quindáá iní-ndó-gá.

21

Úsá cue téé ní xica cuu ndihí Jèsús ní xiní ñáhá-güedē xii-gá

¹ Te ingá nduu tucu xĩndecu cue téé ní xica cuu ndihí Jèsús yuhu làgúná ñuú Tiberiás, te ní sáháⁿ-gá núú xĩndecu-güedē-áⁿ. Te duha ní cuu ní xiní ñáhá-güedē xii-gá. ² Te ndécú té Xímú, ãdi Pelú chi úú diu-dé, ndihí té Mǎxí téé ní xóo cúñaha-güedē Cuǎchí, ndihí té Natanàel téé ñuú Cànaá, te ñuú-áⁿ yíndèhu-xi distritú Galileá, te tñàhá ndi ndúú déhe té Zebèdeú, ndihí úú-gá tucu cue téé ní xica cuu ndihí-gá. ³ Te ní xáhaⁿ tē Pelú xii-güedé:

—Quíhíⁿ-í quítní-í chácá —càchí-dé xáhaⁿ-dē xii-güedé.

Te ní xáhaⁿ-güedé:

—Tñáhá nchúhú canchicúⁿ ñáhá-ndí xii-n quíhíⁿ tucu —càchí-güedé xáhaⁿ-güedé xii-dé.

Te ní xica-güedé cuáháⁿ-güedé ní sáá-güedé núú ndécú bàrcú,

te ní quée-güedé xití bàrcú-áⁿ cuáháⁿ-güedé. Te niú-áⁿ ñǎ ní ñihí tñàhí-güedé chácá. ⁴ Te sa ta cùditó-nǎ cuáháⁿ ní xiní-güedé Jèsús yuhu làgúná, dico ñá ní cùtnuní iní-güedé sá díú-gá. ⁵ Te ní xáhaⁿ-gã xii-güedé:

—Cue téé cuechi, ¿ní ñihí-ndó chácá caxi-o ñǎ? —càchí-gá xáhaⁿ-gã xii-güedé.

Te ní xáhaⁿ-güedé:

—Védana chácá ñá túú ní ñihí-ndí —càchí-güedé xáhaⁿ-güedé xii-gá.

⁶ Te ní xáhaⁿ Jèsús:

—Chí dáquēe ñunu-ndo ndáa xio cuha bàrcú chi ñihí-ndó-dí —càchí-gá xáhaⁿ-gã xii-güedé.

Te ducaⁿ ñí quide-güedé, te òré nǎtáva-güedé ñunu xití ndute, te ñá cùndèe-gá-güedé natava-güedé cuendá sá ñí chítú chácá xití-xi. ⁷ Te téé ní xica cuu ndihí-gá téé ío cùu iní-gá ní xáhaⁿ-dē xii té Pelú:

—¡Díu Xítohó Jesucristú! —càchí-dé xáhaⁿ-dē xii-dé.

Te sá ñí tecú dóho té Pelú sá dúcáⁿ càháⁿ-dé ñuu ní ndíúnuu-dé dóo-dé, chi dóo sǎ yimáa-ni-dé ñihnú-dé ní cùu. Ducaⁿ te ní nuu ndava-dé bàrcú ní ngaunihnu-dé ndute, te cuáháⁿ-dé núú ndute-áⁿ ñí quene-dé ndéé ñuhu yichí. ⁸ Te dava-gá cue téé ndihí té Pelú diu-ni cue téé ní xica cuu ndihí Jèsús ní quendóo-güedé dàtná ñⁿ ciendú-gá mètrú te quene-güedé yuhu ndùte. Te tǎñuhu-ni-güedé ñunu-güedé chitu chácá ñí quene-güedé ndéé yuhu ndùte. ⁹ Te òré ní quene-güedé ñuhu yichí, te ní xiní-güedé càyú ñuhú, te núú ñùhú-áⁿ ñùhú ñⁿ chácá ndihí ñⁿ pàá. ¹⁰ Te ní xáhaⁿ Jèsús xii-güedé:

—Quíhíⁿ ngheheⁿ-ndo ñⁿ úú chácá quití íchí ñí tní-ndo —càchí-gá xáhaⁿ-gã xii-güedé.

¹¹ Núu té Pelú ní sáháⁿ-dé núú ndécú bàrcú, te ní quée-dé xití-xi ní cándéé-dé ñunu ñùhu chácá tǎñuhu-dé ní quene ndéé ñuhu

yìchí, te chitu chácá náhnú, te ñuhu ìⁿ ciendú údicu úxí úní-dí xití ñunu-áⁿ, te cuèi ducaⁿ vài-dí ñuhu dico ñá ní ndátá ñunu-áⁿ. ¹² Te ní xáhaⁿ Jèsús:

—Chí nèhé cadí iní-ndó — cächí-gá xáhaⁿ-gã xii-güedé.

Dico ni ìⁿ cue téé ní xica cuu ndihi-gá-áⁿ ñã ní xicáⁿ tnúhú-güedé núú-gã nõu yoo cùu-gá, chi sa ní cutnùní iní-güedé sá díú Jèsús cúu-gá. ¹³ Te Jèsús ní sáháⁿ-gá ní queheⁿ-gá pãá ní sãñaha-gã xii-güedé caxi-güedé, te dàtnùní ní queheⁿ tucu-gá chácá ní sãñaha-gã xii-güedé.

¹⁴ Vitna cùu úní xito sá xini ñáhá cue téé ní xica cuu ndihi-gá sátá ní ndoto-gá.

Jèsús cãháⁿ ndihi-gá té Pèlú

¹⁵ Te sátá ní túhú cóhó-güedé ní sadí iní-güedé te ní xicáⁿ tnúhú Jèsús núú tẽ Xímú, àdi Pelú chi úú dìu-dé, te xáhaⁿ-gã:

—Xímú, déhe té Jònás, ¿cùu iní-gá-n yùhú dàcúúxí dàva-gá cue téé-a ñã? —cächí-gá xáhaⁿ-gã xii-dé.

Te ní xáhaⁿ tẽ Pèlú:

—Mèstrú, cùu iní ñáhà-í, yòhó sa nãha-n —cachí-dé xáhaⁿ-dẽ xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéé líhli-í —cächí-gá xáhaⁿ-gã xii-dé.

Te cue mbéé-áⁿ cúu-güedí ñáiyu cùu cuendá-gá.

¹⁶ Te ní xáhaⁿ tucu-gá xii té Pèlú:

—Xímú, déhe té Jònás, ¿cùu iní ñáhá-n xii-í-u? —cächí-gá xáhaⁿ-gã xii-dé.

Te ní xáhaⁿ tucu té Pèlú:

—Mèstrú, cùu iní ñáhà-í, yòhó sa nãha-n —cachí-dé xáhaⁿ-dẽ xii-gá.

Te ní xáhaⁿ-gã:

—Te núu ducaⁿ, te coto-n cuè mbéé-í —cächí-gá xáhaⁿ-gã xii-dé.

¹⁷ Te xito cùu úní ní xáhaⁿ tucu-gá xii té Pèlú:

—Xímú, déhe té Jònás, ¿cùu iní ñáhá-n-ãⁿ? —cächí-gá xáhaⁿ-gã xii-dé.

Te té Pèlú ío ní cundiýí-dé sá dúcáⁿ ní cuu úní xito xicáⁿ tnúhú-gã núú-dẽ nõu ndisa sá cúu iní ñáhá-dẽ xii-gá, te ní xáhaⁿ-dẽ:

—Mèstrú, yòhó nchaa sa xini-n, te sa cùtnuní iní-n sã cúu iní ñáhà-í xii-n —cächí-dé xáhaⁿ-dẽ xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéé-í. ¹⁸ Te na cächí tnúhu ndáá-í xii-n sã cùtnáhá cuechi-gã-n ní xóo ndécuihnu mee-n dõó-n, te ní xóo quihíⁿ-n ndèni ní xóo cachí iní-n, dico na yìi-n te dacáa-n ndãha-n, te ingá téé dacuihnu ñaha xii-n dóó-n te cada yica-dẽ candeca ñaha-dẽ xii-n quihíⁿ ìⁿ núú ñà túú tnàhá iní-n —cächí-gá xáhaⁿ-gã xii-dé.

¹⁹ Te sá dúcáⁿ ní cáháⁿ Jèsús cúu-xí sã ní dátècú tnúhu ñaha-gã xii té Pèlú nãcuáa cada-xi cuú-dé, te ducaⁿ càda cahnu-dé Yã Ndióxi, te ní xáhaⁿ-gã xii-dé:

—¿Canchicúⁿ ñáhá-n xii-í! — cächí-gá xáhaⁿ-gã xii-dé.

Téé ío cùu iní-gá

²⁰ Te ní nchócótó tẽ Pèlú ndaa sátá-dẽ, te ní xini-dé sá nchicúⁿ ñáhá ingá téé xica cuu ndihi-gá cuáháⁿ, téé ío cùu iní-gá téé ní xínucóo diñi-gá òré ní cudini ndihi ñaha-gã xii-güedé, te diu-ni téé-áⁿ ní xicáⁿ tnúhú-dé núú-gã dàvá-áⁿ nõu ndèda cãa téé cuáha cuendá ñáhá xii-gá núú cuè téé cùu úhú iní ñáhá.

²¹ Te òré ní xini té Pèlú sá nchicúⁿ ñáhá tẽ-áⁿ, te ní xicáⁿ tnúhú-dé núú Jèsús, te xáhaⁿ-dẽ:

—Mèstrú, te téé-ãⁿ, ¿ná cúu sã yãha-dé-í? —cächí-dé xáhaⁿ-dẽ xii-gá.

²² Te ní xáhaⁿ Jèsús:

—Te núu yúhú cuini-í sá cundècu-ni-dé ndéé ná quixi tucu-í ñuyú-a, ¿te yòhó ná cuendá-n nõu xicáⁿ tnúhú-n? Yòhó canchicúⁿ ñáhá-ni xii-í —cächí-gá xáhaⁿ-gã xii-dé.

²³ Te ní xinu tnúhu núú nchãa ñáiyu sãndáá iní tnúhu-gá sã téé-ãⁿ vã cùu-dé. Dico Jèsús ñá túú

dùcaⁿ ní xáhaⁿ-gǎ sá vǎ cùú-dé,
 chi ní xáhaⁿ-gǎ: “Núu yúhú cuìní-í
 sá tēe-ǎⁿ cundecu-ni-dé ndéé ná
 quìxi tucu-í ñuyíú-a, ¿te yòhó ná
 cuèndá-n?”, duha ní xáhaⁿ-gǎ xii té
 Pèlú.

²⁴ Te diu-ni yúhú té Juàá tée ní
 sani iní-yu sá vǎ cùú càháⁿ ndáá-í
 nchaa nàcuáa ní cuu, te ducaⁿ ñí
 tee-í núú tütú-a, te cùtnuní iní-ndó
 sǎ tñúhu ndáá cúú-xí.

²⁵ Te ndècu vai-gǎ núú sǎ ñí quide
 Jèsús. Te núu òicó ní ngǔndee
 nchaandi túhú ñǎ, te vǎa ni te ñihí
 ñuyíú te vǎ tñàhá núú-xi cundecu
 librú, te núu òicó ní ngǔndee nchaa.
 Te ducaⁿ ña cùnduu. Te ío chí cádá
 ndée ini-nǎ vitna.

NCHAA NÀCUÁA NÍ QUIDE CUE TÉE NÍ TÁÚCHÍÚⁿ JÈSÚS DACUÀHA ÑAHA XII ÑÁYIU TNÚHU-GÁ

Jèsús ní cachí tnúhu ndáá-gá sá quixí Espíritú Yá Ndióxi cundecu ndihi ñáyiú

¹ Te duha ní cáháⁿ té Lùcá ní xii-dé té Tèofilú: Yúhú sa ní chidó tnúni-í núú libré ndéé díhna nchaa sá ní quide Jèsús, ndihi nchaa sá ní dácuáhá-gã ñáyiú. Te ní chidó tnúni-í nchaa sá ní quide-gá ndéé nduu ní quesaha-gã quidé chiúⁿ-gá, ² ndihi nchaa sá ní quide-gá ndéé òré cuándaa-gá andiú. Te sa ta cùyatni nduu ndaa-gá andiú, te ní ndatnúhu-gá ndihi cue tée ní cáháⁿ-gá dacuàha ñaha xii ñáyiú tnúhu-gá, te mee Espíritú Yá Ndióxi ní chindee ñaha-xi xii-gá ní xáhaⁿ-gã nàcuáa cada-güedé. ³ Te sáta ní xihí-gá te ní ndoto-gá, te ní xindecu-gá údico nduu. Te titní xito ní sáháⁿ-gá núú ní xindecu-güedé, te ducaⁿ ní quide-gá cuèndá quini-güedé sá ndáá ní ndoto-gá, te ní xáhaⁿ-gã nàcuáa quide Yá Ndióxi ndihu ndaha-gã ñáyiú.

⁴ Te ñiⁿ nduu ndècu ndihi ñaha-gá xii-güedé, te ní xáhaⁿ-gã:

—Vá quéé-ní-ndó ñúú Jerusalén, chi cundetú-ndo quixi Espíritú Yá Ndióxi cundecu ndihi-ndo, chi sa ní cachí tnúhu-í sá dúcáⁿ ní cáháⁿ Tátá-ó Dütú Ndióxi Yaa ndécú andiú nacuáa cunduu. ⁵ Te ndáá sá ndii Juáá ní dácuándute ñaha ndii xii-ndo, dico vitna ñá túú-gã cuéhé nduu, te quexio Espíritú Yá Ndióxi cundecu ndihi-ndo —càchí-gá xáhaⁿ-gã xii-güedé.

Jèsús cuándaa-gá andiú

⁶ Te òré ní xindecu-güedé ndihi Jèsús, te ní xáhaⁿ-güedé xii-gá:

—Mèstrú, cuíni-ndí cachí tnúhu-n núu sa ta cùyatni nduu chindee-n ñáyiú ñuú Isráel cuèndá taxi tnúni tucú-yu ñuú-yu —càchí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

—Ñá túú xini ñuhu-xi cunaha nchohó xiáⁿ, chi Tátá-ó Dütú Ndióxi náhá-gã ná nduu cada-gá nchaa sá ní cáháⁿ-gá. ⁸ Te òré quexio Espíritú Yá Ndióxi cundecu ndihi-ndo, te cuyi-ndo ní yuhu ní iní-ndó quihíⁿ-ndó cáháⁿ-ndó tnúhu-í núú ñáyiú ñuú Jerusalén ndihi núú ñáyiú distritú Júdeá ndihi núú ñáyiú distritú Sàmaría. Te ducaⁿ-ni cáháⁿ-ndó quihíⁿ-ndó ní caxico ñuyú —càchí-gá xáhaⁿ-gã xii-güedé.

⁹ Te sáta dúcáⁿ ní cáháⁿ-gá, te ndèhe-güedé ní ndanchita-gá cuándaa-gá andiú cuándihu-gá xiti vico, te ñá túú-gã ní xini náhá-güedé xii-gá. ¹⁰ Te ndèhe vihi-güedé andiú núu ndéé quini náhá-güedé xii-gá yòtnúhu, te ní quexio cunu úú cue tée ñihnu dóó cuixiⁿ núú ndécú-güedé. ¹¹ Te xáhaⁿ-güedé:

—Nchòhó cue tée Galiléa, ¿ná cuèndá ndéhé-ndó andiú? Te dàtná-ni càa Jesús cuándaa-gá andiú vitna, te ducaⁿ-ni cunduu-gá quixi tucu-gá —càchí cue tée ñihnu dóó cuixiⁿ-án xáhaⁿ-güedé.

Cuèndá sá ñà túú-gã ndii Judás núu ní nanducu-güedé té Màtiá ní nucúnutni-dé núú ndii

¹² Te ní ndee-güedé yucu Olívú cuánuhú-güedé ñuú Jerusalén, te ní xúhuⁿ-güedé cuèdicó cuádava òré ichi. ¹³ Te òré ní ndexio-güedé ñuú-án, te cuándaa-güedé cuártú ndéé núú ñinu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pélú, té Jacobó, té Juáá, té Ndrixí, té Lípé, té Mǎxí, té Bartolómé, té Mǎteú, té

Jacobó déhe té Àlfeú, ndihi té Ximú téé ní cundihi cue téé canànistá, ndihi té Jùdás ñaní té Jacobó. ¹⁴ Te ní naníhí tnáhá-güedě nchaa-güedé yacáⁿ ndihi tá Màriá náná Jèsús, ndihi cue ñaní-gá ndihi dava-gá cue ñáyiu dīhí. Te ñⁿ-ni ní cuú-yu ní cáháⁿ ndihí-yu Yá Ndiöxí.

¹⁵ Te ñⁿ nduu ní xíndecu dàtná ñⁿ ciendú óco mee-ni ñáyiu sàndáá iní tnúhu Jèsús, te ní ngúnutnī té Pèlú núu-yu, te ní xáhaⁿ-dē xií-yu:

¹⁶⁻¹⁷ —Nchòhó cue ñáyiu ndècu ndihí-í ichi Xítohó Jesucristú, na càn-í cuendú núu-ndó nàcuáa ní chídó tnùní ndii Dàvií téé ní xíndecu ndéé sanaha nàcuáa ní cáháⁿ Espiritú Yá Ndiöxí cuendá té Jùdás. Te dacuití dùcaⁿ ní cuu, chi tnàhá té Jùdás ní xíndecu ndihí-o, te ní xinu cuechi-o ndihí-dé núu-gá sá dīhna, te ducaⁿ ñ quide-dé ní sáha cuendá-dé Jèsús núu cuè téé cùu úhú iní ñáhá xii-gá. ¹⁸ Te ní cháhu ñaha-güedé xii-dé cuendá sá ñ sáha cuendá ñáhá-dē xii-gá. Te ní sáháⁿ-dé ñⁿ xichi ní sata caa-dé méé-dē, te ní ngava-dé, te ní cahndí duuⁿ xití-dé te xiáⁿ ñ xihí-dé. Te ní naqueheⁿ-güedé díhúⁿ sá ñ cháhu-güedé ndii, te ní nacuaaⁿ-güedé ñuhu núu ñ ngava ndii-áⁿ. ¹⁹ Te nchaa ñáyiu Jerusálén ní níhí-yu tnúhu, te ní dánání-yu ñuhu-áⁿ Acèldamá. Te tnúhu mèé-yu quèe-xi: Ñuhu núu ñ sati ññí. ²⁰ Te duha ní cáháⁿ ndii Dàvií ní chídó tnùní ndii núu librí Sálmú ní dándóo ndii: “Nà ndóo nahi vèhe-dé, vá yóo ñⁿ quihíⁿ cundecu”, duha ní cáháⁿ ndii. Te ingá tucu tnúhu ní cachí ndii: “Na nànducu-güedé ingá téé nucúnutnī núu ndii”, duha ní cáháⁿ ndii Dàvií —cachí té Pèlú xáhaⁿ-dē xií-yu.

²¹⁻²² Te ní xáhaⁿ tùcu-dé:

—Te ducaⁿ ñ cáháⁿ ndii Dàvií, te vitna xini ñuhu-xi nanducu-o ñⁿ téé nucúnutnī-dé núu ndii Jùdás, te xini ñuhu-xi diu-ni ñⁿ téé ní xica cuu ndihí Xítohó Jesucristú

cútnàhá ní xica cuu-o ndihí-gá, ñⁿ téé ní xini ndéé òré ní dácuañdùte ñaha ndii Juáá xii-gá, te ndéé òré cuánda-gá andiu. Te téé nanducu-o cùndecu-dé cáháⁿ-dé nàcuáa ní cuu ní ndoto-gá —cachí té Pèlú xáhaⁿ-dē xií-yu.

²³ Te ní cacunehe-güedé úu tnàhá-güedé ñuu ndédacàa-güedé nduu táhú-güedé nucúnutnī-güedé núu ndii. Te ñⁿ-dé nání-dē Chèé Barsábás, àdi Justú chi úu diu-dé, te ingá-dé nání-dē Mátia. ²⁴ Te ní cáháⁿ ndihí-güedé Yá Ndiöxí, te xáhaⁿ-güedé xii-gá:

—Yohó Dútú Ndiöxí xini-n iní nchaa ñáyiu, te mee-n ñaha-n núu ndéda caa núu úu cue téé-a tnàhá iní-n ²⁵ cáháⁿ-güedé tnúhu-n núu ñáyiu, te téé-áⁿ nucúnutnī-dé núu ndii Jùdás, chi cuáháⁿ ndii núu ùhú núu ndàhú núu tàú-xi quihíⁿ ndii —cachí-güedé xáhaⁿ-güedé xii-gá.

²⁶ Te ní xito ndéé-güedé, te ní cutnùní sá tée nani Matia quendóo-dé ndihí úxí ñⁿ cue téé ní táuchíúⁿ-gá dácuaña ñaha xii ñáyiu tnúhu-gá.

2

Ní quexio Espiritú Yá Ndiöxí cundecu ndihí ñáyiu

¹ Te ní sáá nduu còo vico Pentecostés te xíndecu nchaa ñáyiu ñⁿ-ni xichi. ² Te ní tecú dóho-yu uuⁿni ní níhi andiu, dàtná quidé ñⁿ táchí níhi vīhi ní quide-xi, te ducaⁿ ñ cuu ndéé xití vehe núu ndécú-yu nchaá-yu. ³ Te ní xini-yu dàtná cáá itá ñuhú cáá sá ndécú xití vehe, te ní xité nuu-xi ní ngoyo ndodo-xi díquí-yu nchaá-yu. ⁴ Te ducaⁿ ñ quide-xi òré ní quexio Espiritú Yá Ndiöxí ní ngúndecu ndihí-yu nchaá-yu. Te ní nguíta-yu ní cáháⁿ-yu tnúhu cue ñáyiu ñá túu cùu ñáyiu isràel, te nchaa xiáⁿ ní quide Espiritú Yá Ndiöxí.

⁵ Te vai ñáyiu isràel xíndecu nchaa dava-gá ñuu ní tacá-yu ñuu

Jerusalén, te ñáiyu-áⁿ ïo ndücu ndeé-yu dâcuahá-yu nchaa ndudú sá dâcuàha tnahí-yu. ⁶ Te òré ní tecú dóho-yu ñíhi, te ní sáháⁿ-yu ní xindedóho-yu tnúhu càháⁿ mēž-yu ñⁿ ñⁿ ñuú-yu, chi ndi díⁿ ndi díⁿ tnúhu càháⁿ ñáiyu ndècu-áⁿ. ⁷ Te xíáⁿ ïo ní cuñúhu ñáiyu véxi dava-gá ñuú, te ní xítnahá-yu:

—Ñáiyu ducaⁿ xicáháⁿ cúy-yu ñáiyu ñáiyu ñáiyu ñáiyu distritú Galileá. ⁸ ¿Te nása ní guidé-yu ní cutúha-yu nâcuáa càháⁿ-ó ñⁿ ñⁿ-o ndeé líhli-o? ⁹ Te ïha véxi ñáiyu dava nâcióⁿ, chi véxi ñáiyu Pàrtiá, véxi ñáiyu Mediá, véxi ñáiyu Èlám, véxi ñáiyu Mesopòtamiá, véxi ñáiyu Jùdeá, véxi ñáiyu Capàdociá, véxi ñáiyu Pòntó, véxi ñáiyu Àsiá, ¹⁰ véxi ñáiyu Frìgiá, véxi ñáiyu Pànfilíá, véxi ñáiyu Ègiptú, véxi ñáiyu Áfricá ñáiyu ndècu ndeé núú-gá-xi ñuú Cìrené. Te tnàhá ñáiyu ñuú Ròmá véxi, te ñáiyu-áⁿ chi ñá díú mèe-ni ñáiyu isrâél cúy-yu nchaaⁿ-yu, dico ñⁿ-ni cùu sá dâcuahá-yu. ¹¹ Te véxi ñáiyu Crètá, véxi ñáiyu Àrabiá. Te nchaa-o sa ndedóho-o càháⁿ-yu nâcuáa cuáháⁿ tnúhu mee-o ñⁿ ñⁿ-o. Te nchaa ñáiyu xicáháⁿ tnúhu-o càháⁿ-yu cuèndá nchaa sá vâ yõ tnàhí ndâcu cada ní quide Yá Ndiõxí —câchí-yu xítnahá-yu.

¹² Te ní cuñúhu vîhí-yu, te ñá ná sáá ïní-yu nása ní cuu, te xítnahá-yu:

—¿Nása ní cuu duha càháⁿ-yu tnúhu-o? —câchí-yu xítnahá-yu.

¹³ Te davá-yu ní sâcú ndeé yíchi ñáhã-yu, te xítnahá-yu:

—Xíxíni ñáiyu-áⁿ nõu ñá náhã-yu tnúhu càháⁿ-yu —câchí-yu xítnahá-yu.

Tnúhu ní xáhaⁿ tē Pèlú xii cue ñáiyu

¹⁴ Te ní ngúnutnîi té Pèlú ndihî úxí ñⁿ cue tée ní táuchíúⁿ Jèsús dacuàha ñaha xii ñáiyu tnúhu-gá, te níhi ní càháⁿ-dé, te xáhaⁿ-dē xii-yu:

—Nchaa nchòhó ñáiyu distritú Jùdeá ndihî nchòhó ñáiyu ñuú Jerusalén, cundedóho váha-ndo tnúhu na càháⁿ-í-a. ¹⁵ Ñá ndáá tnúhu càháⁿ-ndó, chi ñá túú xîni-ndí te ducaⁿ càháⁿ-ndó, chi davitna cùu-xi caá ñⁿ dátneé, vátá tnàhá-gá òré coho ñáiyu ndidí. ¹⁶ Te yúhú ná câchí tnúhu-í xii-ndo vitna nâcuáa ní xáhaⁿ Yá Ndiõxí xii ndi Jòél tée ní xóo càháⁿ tnúhu-gá ndeé sanaha nâcuáa cada ñaha-gá xii ñáiyu, te ndi-áⁿ ní chídó tnùnî ndi nâcuáa ní càháⁿ-gá. ¹⁷ Te duha ní xáhaⁿ-gá xii ndi:

Cumání-gã sáá nduu nâa ñuyúú, te cuñaha-í Espiritú-í cundecu ndihî nchaa ñáiyu na quíndáá ïní ñáhã xii-í.

Te cue déhe-yu càháⁿ-yu tnúhu-í, te cue tée cuechi dacòto núú ñáhã-xi xii-güedé,

te ducaⁿ-ni cuè tée ni sâhnu càháⁿ saní-güedé,

te ñu-ni cuèndá nchaa sá quidè-í ducaⁿ dâcoto núú ñáhã-xi xii-güedé.

¹⁸ Te nchaa ñáiyu xínu cuechi núú-í càháⁿ-yu tnúhu-í, te cuñaha-í Espiritú-í cundecu ndihî-yu.

¹⁹ Te ndeé andiú, yàcáⁿ vâi sá cadà-í nâcuáa cuñúhu vîhí-yu, te núú ñuyúú-a cada-í ñⁿ sá vátá quíni tnàhí-gá-yu,

te ngoyo ñíí te ngoyo ñuhú te quene vîhi ñúhmá.

²⁰ Te vâ dáyèhé-gá nchichanhi, cuu nee ñuyúú te cuu ticuèhé núú yõ dátiná ticuèhé nííí.

Te davá-áⁿ sáá nduu quixi Yáá cúú Xitohó-yu,

te nduu-ãⁿ cuu-xi ñⁿ nduu càhnu vîhi, chi cada-gá nchaa sá ñá túú xîni-yu, te cuñúhu vîhí-yu.

²¹ Te òré xíáⁿ te nchaa ñáiyu càháⁿ ndihî ñaha xii Yáá cúú Xitohó-yu-áⁿ naníhí tãhú-yu. Duha ní xáhaⁿ Yá Ndiõxí xii ndi Jòél ní chídó tnùnî ndi.

22 "Te nchòhó ñáyiú isràél, cund-edóho váha-ndo tnúhu na càháⁿ-í-a cuèndá Jèsús téé ñuú Nazàrét. Te Jèsús ní quide-gá chiúⁿ Yá Ndiöxí, chi mee Yá Ndiöxí ní chindee ñàha-gá ní quide Jèsús ná daha núú chiúⁿ, núú xiáⁿ ní ndacu-gá ní quide-gá nchaa sá vǎ yǒ tñàhí ndàcu cada, te xiáⁿ ní cuñúhu vihi-ndo. Te sa nàha-ndo nacuáa ní quide-gá cútñàhá ní xica cuu-gá ñuyíú. 23 Te ndíi Jùdás ní taxi cuèndá ñàhá ndíi Jèsús xii nchòhó cue téé ní cuu úhú iní ñàhá xii-gá, te ní ndúcú-ndó cuè téé úhú iní-xi ní tñi ñaha-güedé xii-gá te ní sata caa ñaha-güedé núú cùrúxí, te núú cùrúxí-áⁿ ní xihí-gá. Dico sa ní cutnùní iní Yá Ndiöxí sá dúcáⁿ càda-ndo Jèsús, te mee Yá Ndiöxí ní cachí-gá sá dúcáⁿ ndòho Jèsús. 24 Te ñuú-ni mee Yá Ndiöxí ní dándótó-gǎ Jèsús, chi sa ní càháⁿ-gá sá òré cuú-gá te vǎ cùú dúcáⁿ-gǎ. 25 Te ndíi Dàvií téé ní xindaha ñàha xii cue ñaní tñàhá-ó ní xindecu ndéé sanaha ní chídó tñùní ndíi nàcuáa ní càháⁿ Jèsús, te duha ní càháⁿ-gá: Cùtnuní iní-í sá ncháá ndùu ndecu ndíhi-í Yá Ndiöxí, te ío chindee ñaha-gá xii-í,

te ñá túu tñàhí sá yùhú-í.

26 Te ío ndàcáⁿ tǎhù-í núú Yá Ndiöxí chi cùdǎí iní-í, chi sa nàha-í sá cùú-í dico ndoto-í,

27 chi vǎ dáñá-gǎ quíhíⁿ dúcáⁿ àlmá-í núú ndécú ñáyiú ní xihí,

te vǎ dáñá-gǎ téhyú yiqui cùñú-í chi cùu-í Déhe-gá, te yùhú sa nàha-í sá cùú iní ñàhá-gǎ xii-í.

28 Te sa ní cachí tñúhu-gá nàcuáa cada-í cundecu-í ichi váha, te cuèndá sá ndécú ndíhi ñàha-gá xii-í núú ío cùdǎí iní-í. Duha ní càháⁿ Jèsús, te ducaⁿ ní chídó tñùní ndíi Dàvií.

29 "Te nchòhó cue ñaní tñàhá-í, na càchí tñúhu ndáá-í xii-ndo cuèndá ndíi Dàvií téé ní xindecu ndéé sanaha vihi, chi ní xihí-dé, te ní chindúxi ñaha-güedé, te nàha-o

tnavíí núú ní chindúxi ñaha-güedé.

30 Te ndíi Dàvií ní xóo càháⁿ ndíi tñúhu Yá Ndiöxí, te sa nàha ndíi sá Yá Ndiöxí ní càháⁿ ndáá cuiti-gá sá díú-ní ñⁿ tñaha ndíi taxi tñùní-dé ñáyiú isràél ndéé cuèè-gá dàtná ní xóo taxi tñùní méé ndíi cùtnàhá ní xindecu ndíi, te téé taxi tñùní-áⁿ cùú Crìstú chi cùu-gá ñⁿ tñaha ndíi.

31 Te sa ní cutnùní iní ndíi sá ndótó Crìstú, núú xiáⁿ ní chídó tñùní ndíi sá vǎ dáñá Yá Ndiöxí sá quíhíⁿ dúcáⁿ àlmá-gá cundecu-xi núú ndécú ñáyiú ní xihí, te vǎ dáñá-gǎ téhyú yiqui cùñú-gá.

32 "Te ndáá chi Yá Ndiöxí ní dándótó-gǎ Jèsús, te nchúhú ní xiní-ndí sá ní ndoto-gá. 33 Te ní xáhaⁿ Yá Ndiöxí xii Jèsús sá cundecu ndíhi ñaha-gá, te taxi tñùní Jèsús ni caa ni quíhíⁿ. Te Yá Ndiöxí ní sáñaha-gǎ Espiritú-gá ní ngúndecu ndíhi-gá nàcuáa ní xáhaⁿ-gǎ, te ñuú Jèsús ní quide-gá nchaa sá ní xiní-ndó vitna ndíhi nchaa sá ní xindedóho-ndo. 34 Te ndíi Dàvií ñá túu ní ndàa túu ndíi andíu ndíhi yiqui cùñú ndíi, te òré ndécú-gá ndíi ñuyíú-a ní cachí ndíi:

Dútú Ndiöxí ní xáhaⁿ-gǎ xii Yáa cùú Xitohó-í:

"Ngóo xio cùha-í,

35 te yùhú cada-í te nchaa sá cùú úhú iní ñàhá xii-n canehe-xi sá yíñùhu núu-n."

Duha ní xáhaⁿ Dütú Ndiöxí xii Yáa cùú Xitohó-í càchí ndíi.

36 "Te nchòhó ñáyiú isràél cùu-ndo ndí mee-í, te cuíní-í cundedóho váha-ndo ñⁿ tñúhu na càháⁿ-í-a. Jèsús ní sata caa-ndo-gǎ núú cùrúxí, dico Yá Ndiöxí ní cachí-gá sá Jèsús dacácu nihnu-gá ñáyiú, te vǎ cání ñⁿ caní úú iní-ndó, chi ñuú-gá cùnùu-gá núú nchàa ñáyiú —càchí té Pèlú xáhaⁿ-dé xii-yu.

37 Te ñáyiú ní xindedóho tñúhu ní càháⁿ té Pèlú ní ndixi túu iní-yu nàcuáa quidé-yu ndécú-yu, te ní xáhǎⁿ-yu xii-dé ndíhi dava-gá cue

tée ní táuchíúⁿ Jèsús dacuàha ñaha xii-yu tnúhu-gá:

—Nchaa nchòhó cue ñaní tnáhá-ndí, ¿nása cachí-ndó cùnduu, nása cada-ndí vitna? —càchí-yu xáhãⁿ-yu xii-güedé.

³⁸ Te ní xáhaⁿ tẽ Pèlú xii-yu:

—Daña-ndo nchàa sá cuèhé sá dúhá quide-ndo, te cada càhnu iní Yá Ndiòxí nchaa yíca cuèchi-ndo. Te cuandute-ndo cuèndá quini-yu sá ñí natuha-ndo ichi Jesús, te ducaⁿ te taxi Yá Ndiòxí Espiritú-gá cundecu ndihí-ndo, ³⁹ chi cuini-gá taxi-gá Espiritú-gá xii mee-ndo ndihí déhe-ndo, te cuañaha-gã Espiritú-gá xii nchaa ñáyiu ní càa xico ñuyú, ñáyiu cáhãⁿ-gá cundecu ichi-gá ndéé idá-gá —càchí té Pèlú xáhãⁿ-dẽ xii-yu.

⁴⁰ Te titní-gá tnúhu ní xáhaⁿ-dẽ nàcuáa cadá-yu, te xáhãⁿ tùcu-dé:

—Daña-ndo nchàa sá cuèhé sá dúhá quide-ndo, vá cadá-ndó sá quidé dâva-gá-yu —càchí-dé xáhãⁿ-dẽ.

⁴¹ Te nchaa ñáyiu ní sándáá iní-xi tnúhu ní cáhãⁿ té Pèlú ní sandutè-yu, te diu-ní nduu-ãⁿ ñí cuu dàtná úní mĩ ñáyiu ní sándáá iní-xi ní xíndecu ndihí ñáyiu xídacuáhã tnúhu Yá Ndiòxí.

⁴² Te ío ní xíndedóho-yu tnúhu ní cáhãⁿ cue tée ní táuchíúⁿ Jèsús dacuàha ñaha xii-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá náhã-yu sá dúcãⁿ ñí quide Jèsús cútnáhã vátã cáhni ñaha-gá-güedé xii-gá, te ní xóo cáhãⁿ ndihí-yu Yá Ndiòxí.

Nàcuáa ní quide nchaa ñáyiu ní sándáá iní tnúhu Jèsús ndéé díhna nuu

⁴³ Te nchaá-yu ní cuñúhu vihí-yu, chi cue tée ní táuchíúⁿ-gã dacuàha ñaha xii-yu tnúhu-gá ní quide-güedé titní núú sã vã yõo tnàhí ndàcu cada, te xíãⁿ ní cutnùni iní-yu sá méé Yá Ndiòxí chíndèe ñaha-gá xii-güedé. ⁴⁴ Te nchaa ñáyiu sándáá

iní tnúhu Jèsús càhãⁿ ndihí tnàha váha-yu, te cuèi-ni nchaa ndachíuⁿ nandihí-yu ndècu cahnu. ⁴⁵ Te ní dícõ-yu nchaa ndachíuⁿ sá ñà túú xìni ñuhú-yu, te ní níhí-yu díhúⁿ te ní sáñhãⁿ-yu xii nchaa ñáyiu ñá ñihí, ⁴⁶ Te ñíⁿ nduu ñíⁿ nduu ní xóo quíhíⁿ ndihí tnàhã-yu veñúhu càhnu sá ío cùnuu. Te ní xexi ndihí tnàhã-yu vehé-yu. Te ío ní cudíí iní-yu chi ñíⁿ-ní ní cuú-yu nchaá-yu. ⁴⁷ Te ío ní ndacãⁿ táhũ-yu núú Yá Ndiòxí, te nchaa dâva-gá ñáyiu ní cáhãⁿ váha-yu cuèndá ñáyiu-ãⁿ. Te mee Yá Ndiòxí ní quide-gá ní sándáá iní vâi-gá ñáyiu, te ní xíndecú-yu ndihí dâva-gá ñáyiu xídacuáhã tnúhu-gá.

3

Quide tátã-güedé ñíⁿ tée yacua

¹ Te ñíⁿ nduu òrè caá úní sacuaa, òrè xícáhãⁿ-yu ndihí Yá Ndiòxí cuáhãⁿ té Pèlú ndihí té Juáa veñúhu càhnu sá ío cùnuu sácúú-xí ñáyiu isràél. ² Te ndècu ñíⁿ tée yacua, te ducaⁿ-ni càa-dé ní cacu-dé. Te sáhãⁿ ndihí ñáhãⁿ-yu veñúhu càhnu sá ío cùnuu, te sácóo-dé ñíⁿ xio yuyèhe veñúhu sá nání Yèhe Vii Caa, chi ducaⁿ nàni-xi, te xicãⁿ ndàhú-dé núú nchàa ñáyiu sáhãⁿ veñúhu. ³ Te ñí xini-dé té Pèlú ndihí té Juáa cuánguihu-güedé veñúhu, te xicãⁿ ndàhú-dé núú-güedé. ⁴ Te ní ndacoto-güedé núú-dé, te ní xáhaⁿ té Pèlú xii tée yacua-ãⁿ:

—Cundehe ñahã xii-ndí —càchí té Pèlú xáhãⁿ-dẽ xii-dé.

⁵ Te ní xíndéhé ñaha-dé xii-güedé, chi ní cáhãⁿ-dẽ sã ío ñíⁿ sã cuañaha-güedé. ⁶ Te ní xáhaⁿ té Pèlú:

—Ñá túú tnàhí díhúⁿ néhè-í dico chindee ñaha-í xii-n, te Xítóhó Jesucristú Yáa ní xíndecu ñuuú Nazàrèt, ndacu-gá cada tátã ñaha-gã xii-n, ndacuñí te caca-n —càchí-dé xáhãⁿ-dẽ.

⁷ Te té Pèlú ní tnú-dé ndaha cùha tée yacua-ãⁿ, te ní ngúita-dé ndácàni ñaha-dé, te òrè xíãⁿ ñí

naníhí ndéé-dě, te ní ndúha sáhá-dě. ⁸ Te ní ndacuñí cunu mee-dě te ní xica-dé, te ní cachí-dé sá ïo càhnu cuu Yá Ndiöxí cuendá sá ní ndúha-dé, te ta sãndava-dé cuanguihu ndihi ñaha-güedě veñúhu. ⁹ Te nchaa ñáyiú xĩndecu-áⁿ ní xiní-yu sá ní nduu váha-dé, te ndéhé-yu ndácáⁿ táhú-dě núú Yá Ndiöxí. ¹⁰ Te ní naquini ñáhã-yu xii-dé sá díú tée xicáⁿ ndàhú tée ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vihi-yu sá ní ndúha-dé.

Té Pèlú ní cáháⁿ-dé corredór sá néhé ñuu ndí Salòmón

¹¹ Te sãtã veñúhu càa corredór sá néhé ñuu ndí Salòmón. Yacáⁿ ndécú té Pèlú ndihi té Juáá ndihi tée ní ndúha sáhã-xi, te ñã cuini tée ní ndúha sáhã-xi-áⁿ dañã-dě quihíⁿ-güedé dandõ ñaha-güedě xii-dé. Te chitú-yu ní quexio coyó-yu núú ndécú-güedě, te ní cuñúhu vihi-yu sá ní ndúha sáhã tée cùhú-áⁿ. ¹² Te té Pèlú ní xiní-dé ní quexio coyó-yu, te ní xáhaⁿ-dě xii-yu:

—Nchòhó ñáyiú isràél, ¿ná cuendá ndéé dúcáⁿ ndèhe ñaha-ndo xii-ndí te cùñúhu-ndo sã ní ndúha tée yacua-áⁿ? Nchòhó cáháⁿ-ndó sã méé-ndí ní quide tátna-ndí-dé sá ïo váha iní-ndí, dico ñáhã chi ñã díú mèe-ndí ní quide tátna-ndí-dé. ¹³ Chi Yá Ndiöxí ní ndadúha ñaha-gã xii-dé, chi ñuu-gã cúú Ndiöxí ndíi Àbrahám ndihi ndíi Isàác ndihi ndíi Jácób, te ñuu-ni cue tée-áⁿ cúú ñani tnáhã-ó ní xĩndecu ndéé sanaha vihi. Te ñuu-ni Ndiöxí-áⁿ ní xáhaⁿ-gã xii Déhe-gã Jèsús sá táxí tnúni-gã nchaa sá ïo andíu ndíi nchaa ñáyiú ndècu ñuyú-a, dico mee-ndo ní sãha cuendá-ndó Jèsús núú tée cùchiuⁿ. Te té Pilatú ní cuini-dé dacãcu-dé Jèsús ní cùu, te mee-ndo ñã ní cuini-ndó. ¹⁴ Te Yá Ndiöxí ní cachí-gã sá ïo váha iní Jèsús te ñã túú tnàhí cuéchi-gã. Te mee-ndo ñã túú ní

cuini-ndó cãcu-gã núu ní xáhaⁿ-ndo xii té Pilatú sá váha-gã dacãcu-dé ñⁿ tée ndècu vihi cuéchi-xi, te vá dacãcu-dé Jèsús. ¹⁵ Te ní xáhaⁿ-ndo sã cáhni-güedě Jèsús Yáá quidé nchito-o ndecu-o, dico Yá Ndiöxí ní dándótó ñaha-gã, te ní xiní-ndí sá ndãá ní ndoto-gã. ¹⁶ Te nchúhú sa ñaha-ndí sá díú Xitohó Jesucristú ní ndadúha-gã tée yacua, te náí-dé nútñi-a. Te ducaⁿ ní quide-gã chi ní sãndãá iní ñáhã-dě xii-gã, te vitna ní xiní-ndó sã ndãá ní ndúha-dé.

¹⁷ Te nchòhó ndíi cue tée cùnuu ní sañni-ndo Xitohó Jesucristú, chi ñã ní cùtnuni iní-ndó sã ní quide-ndo. ¹⁸ Te cue tée ní xóo cáháⁿ tnúhu Yá Ndiöxí ndéé sanaha ní chidó tnúni-güedě nãcuãa ní xáhaⁿ Yá Ndiöxí xii-güedé sá Cristú quixi-gã ñuyú-a, te ndoho vihi-gã, te xiãⁿ núu ducaⁿ ní cuu ïo ní ndoho-gã. ¹⁹ Te vitna te dañã-ndo nchã sã cuéhé sá dúhá quide-ndo. Te quindãá iní-ndó Yá Ndiöxí, te ducaⁿ te cada càhnu iní-gã nchaa sã ñã túú váha ní quide-ndo ñuyú-a, te canu ichi ñaha-gã xii-ndo ñⁿ ichi váha. ²⁰ Te ní tendaha-gã Cristú ní quixi-gã ñuyú-a, chi mee Yá Ndiöxí ní cachí-gã sá díú Cristú taunihnu ñaha-gã xii-ndo. ²¹ Te dacuití cùndecu-gã andíu ndéé ná sãá nduu nãtaxi ndecu-gã nchaa sã ndécú ñuyú nãcuãa sãni iní méé-gã. Te ñuu ducaⁿ ní cáháⁿ Yá Ndiöxí núu ducaⁿ ní chidó tnúni cue tée ní xóo cáháⁿ tnúhu-gã ndéé sanaha. ²² Te ndíi Moisés ní xáhaⁿ ndíi xii cue ñani tnáhã-ó ní xĩndecu ndéé sanaha: “Yá Ndiöxí tendaha-gã ñⁿ tée quixi-dé cáháⁿ-dé tnúhu-gã dàtnã cuini-ndó ní quide ñaha-gã xii yúhú, te tée-áⁿ cuu-dé ñⁿ ñani tnáhã-ndó. Te cundedóho váha-ndo nchãa tnúhu cáháⁿ-dé. ²³ Te nchaa ñáyiú vá quindãá iní tnúhu cáháⁿ-dé, te cuíta niñnú-yu chi vá quihíⁿ-yu núú quihíⁿ ñáyiú sãndãá iní tnúhu Yá Ndiöxí”, duha ní xáhaⁿ ndíi Moisés xii-yu —càhí

té Pèlú xăhaⁿ-dê xii-yu.

²⁴ Te ní xăhaⁿ tùcu té Pèlú xii-yu:

—Ndií Sămuélⁱ ndihî nchaa cue tée nchîcúⁿ-gá ní xóo cáhâⁿ tnúhu Yá Ndiöxí ndéé sanaha ní cáhâⁿ-güedé năcuăa cada-xi vitna. ²⁵ Te Yá Ndiöxí ní cáhâⁿ-gá ndihî cue tée ní cáhâⁿ tnúhu-gá ndéé sanaha. Te ní quide ndăá-gá ndihî nchaa ñanı tnáhâ-ó ní xindecu ndéé sanaha năcuăa cada-gá nanihî tăhú-ó. Te duha ní xăhaⁿ-gá xii ndíi Àbrahâm: “Ío nduu cacu ìⁿ tnàha-n, te tée-áⁿ cada-dé te nanihî tăhú ñăyiu ñuyúú-a”, duha ní xăhaⁿ-gă xii ndíi Àbrahâm. ²⁶ Núu xîăⁿ ní tendaha-gă Déhe-gá ní quixi-gá núu ndécú-ndó cuendá daña-ndo nchăa sá cuèhé sá dúhá quide-ndo, te nanihî tăhú-ndó —căchî té Pèlú xăhaⁿ-dê xii-yu.

4

Té Pèlú ndihî té Juăá ndécú-güedé ndaha tée cùchiuⁿ

¹ Te té Pèlú ndihî té Juăá cāhāⁿ dúcāⁿ-ni-güedé ndihî ñăyiu, ní quexio cue dútú ndihî tée tàxi tnunî ñáhâ xîi cue tée quide cuendá veñúhu cāhnu sá ïo cūnuu, ndihî cue tée cūu saducéú. ² Te ní cudééⁿ-güedé nchaa-güedé núu tē Pèlú ndihî té Juăá sá xăhaⁿ-güedé xii ñăyiu sá ndótó ñăyiu ní xîhî dātná ní ndoto Jêsús. ³ Te ní tñî ñaha-güedé ní chihî ñaha-güedé vecaá xii-güedé, te ñă ní quide ndăá tée cùchiuⁿ cuéchi-güedé nduu-ăⁿ chi sa ní cuaa. ⁴ Te ío vâi ñăyiu ní sândăá inî-yu tnúhu ní cáhâⁿ-güedé, te ñăyiu-ăⁿ ndihî ñăyiu sa ní sândăá inî-xî ndéé cāni-gá ní xînu dātná úhúⁿ mîl mee-ni cuè tée, te dîⁿ ñăyiu dîhî ndihî landú.

⁵ Te nduu tněé-ăⁿ diu-nî ñuú Jerusălén-ăⁿ ní tacá cue tée yîndaha veñúhu, ndihî cue tée cūu sacuéhé núu ñăyiu isrăél ndihî cue tée dăcuaha ñaha xii-yu nchaa tnúhu ní chídó tnunî ndíi Moisés. ⁶ Te tnàhâ dútú cūnuu-gá tée nani Anás ndécú ndihî té Caifás, ndihî té Juăá, ndihî

té Lijandrú ndihî dava-gá ñanı tnáhâ dútú cūnuu-gá-ăⁿ ndécú. ⁷ Te ní xăhaⁿ-güedé xii cue tée xînu cuechi núu-güedé:

—Chî cuahāⁿ queñuhu-ndo tē Pèlú ndihî té Juăá vecaá, te na quixi-güedé iha —căchî-güedé xăhaⁿ-güedé.

Te ní quexio té Pèlú ndihî té Juăá núu cuè tée cūnuu, te cue tée cūnuu-ăⁿ ní xicāⁿ tnúhú-güedé núu-güedé, te xăhaⁿ-güedé:

—¿Năsa ní quide-ndo cuendá tée yacua-ăⁿ? ¿Yoo ní táuchíuⁿ dūcaⁿ cada-ndo? —căchî-güedé xăhaⁿ-güedé.

⁸ Te ndécú ndihî té Pèlú Espiritú Yă Ndiöxí, núu xîăⁿ ní xăhaⁿ-dê xii-güedé:

—Nchòhó cue tée cùchiuⁿ ndihî nchòhó cue tée cūu sacuéhé núu ñăyiu isrăél, ⁹ te núu cuinî-ndó quinî-ndó năsa ní quide-ndí ní ndúha tée yacua-ăⁿ, ¹⁰ te cund-edóho-ndo ìⁿ tnúhu na cāhāⁿ-í-a. Xîni ñuhu-xî cundedóho nchaa ñăyiu isrăél cuendá quini-yu năcuăa ní cuu ní ndúha tée-ăⁿ. Xítóhó Jesucristú Yăá ní xindecu ñuú Nazàrét ní quide tátna-gá sáhâ tēe yacua ní ndúha, te diu-nî-gá ní sata çaa-ndo núu cùrúxi te núu cùrúxi-ăⁿ ní xihî-gá, te ní dāndótó ñaha Yá Ndiöxí xii-gá. ¹¹ Te núu tütú Yă Ndiöxí căchî-xi: “Crîstú cūú-gă dātná ìⁿ yúu ndécú xiquí ìⁿ vehe. Te yúu căchî-yu sá ñă túu nāndîhî, te diu xîăⁿ ní nāndîhî-xî ní ngūnutnî-xî xiquí véhé”, duha căchî-xî núu tütú-gá. Te ducaⁿ sātnahâ-xî cūu Jêsús, chi căchî-ndó să ñă túu nāndîhî-gá, ¹² dico Yá Ndiöxí ñă túu ndéé ní tàxi ndecu-gá ingá tée dăcācu nihnu ñaha xîi-o núu úhú núu ndāhú, chi ìⁿ dîi dîi-nî Déhe-gá Xítóhó Jesucristú dacācu nihnu ñaha-gă xii-o —căchî té Pèlú xăhaⁿ-dê xii-güedé.

¹³ Te tē Pèlú ndihî té Juăá ñă túu tūha-güedé, te cūñúhu cue tée cùchiuⁿ sá ïo ñîi xîndăa-güedé. Te

ní cutnùni iní cue tée cùchiuⁿ-áⁿ sá Jèsús ní xica cuu ndihi-güedé, núu xíáⁿ ñá túú tñahí yùhú-güedé càháⁿ-güedé. ¹⁴ Te cuendá ndécú ndihi té Pèlú ndihi té Juáá tée ní ndúha sáhá-xi, núu xíáⁿ ñá ní ñihí cue tée cùchiuⁿ tñúhu càháⁿ-güedé. ¹⁵ Te ní xáhaⁿ-güedé xii té Pèlú ndihi té Juáá sá queé-güedé quehé cuendá ndóo mee-güedé ndatnúhu-güedé. ¹⁶ Te ní xítnàha-güedé:

—¿Nása cada-o úú cue tée-áⁿ?, chi nchaa ñáyiú ñuu Jerusálén nahá-yu sá ní quide tátna-güedé ñⁿ tée yacua, te xíáⁿ xícuñúhu vihi ñáyiú. Te vá cúú càchí-ó sá ñá ndàá, chi vai ñáyiú ní xiní nàcuáa ní cuu. ¹⁷ Te dayùhú-ó-güedé te cúñaha-o sá vǎ càháⁿ-gá-güedé tñúhu Jèsús, chi núu ñáhá te quindáá-gá iní-yu — càchí-güedé xítnàha-güedé.

¹⁸ Te ní cana tucu-güedé té Pèlú ndihi té Juáá, te xáhaⁿ-güedé sá vǎ dácuaⁿha-gá-güedé ñáyiú tñúhu Jèsús. ¹⁹ Te té Pèlú ndihi té Juáá ní xáhaⁿ-güedé:

—Chí cuáha cuendá, te núu sá càchí nchòhó cada-ndí àdi sá càháⁿ Yǎ Ndiòxí cada-ndí. Te cada càhnu iní-ndó chí vá cúú càda-ndí sá càchí-ndó, chí cada nahi-ni-ndí sá càchí Yǎ Ndiòxí. ²⁰ Chi dacuití càháⁿ-ndí nàcuáa ní càháⁿ Jèsús, te càháⁿ-ndí nchaa sá ní xiní-ndí ní quide-gá —càchí-güedé xáhaⁿ-güedé.

²¹ Te cue tée cùchiuⁿ níhi-gá ní càháⁿ-güedé xáhaⁿ-güedé sá cáda càstiú ñáhá-güedé núu vá dáñá-güedé sá dácuaⁿha-güedé ñáyiú. Te ducaⁿ te ní dáñá ñàha-güedé cuánuhú-güedé, chí ñá ní ñihí-güedé nása cada-güedé cada castiú ñáhá-güedé, chí nchaa-yu ndàcáⁿ táhú-yu núu Yǎ Ndiòxí sá ní ndúha tée yacua. ²² Te tée ní quide tátna-güedé-áⁿ ndécú-dé vihi-gá údico cuiá-dé, te ío ní cuñúhu-yu sá ní ndúha-dé.

Ñáyiú sàndáá iní tñúhu Jèsús xicáⁿ táhú-yu núu-gǎ sá vǎ yùhú-yu càháⁿ-yu tñúhu-gá

²³ Te ní ndee té Pèlú ndihi té Juáá cuánuhú-güedé núu ndécú cuè tée cùndihi-güedé, te ní nacani tñúhu-güedé nàcuáa ní xáhaⁿ cuè dútú cùnùu ndihi cue tée cùu sacuéhé núu ñáyiú isràél. ²⁴ Te sátá ñí xíndedóho-yu tñúhu ní càháⁿ-güedé, te ñⁿ-ni tñúhu ní càháⁿ-yu nchaa-yu ndihi Yǎ Ndiòxí, te ní xáháⁿ-yu xii-gá:

—Yòhó Dútú Ndiòxí, ní cadúha-n àndiú, ní cadúha-n ñùyíú, ní cadúha-n lámár, ní cadúha-n nchàandi túhú sá ío ñuyíú. ²⁵ Te ndí Dávíí ní sàndáá iní ndí tñúhu ní càháⁿ-n, te ní chídó tñùní ndí nàcuáa ní xáhaⁿ-n càháⁿ ndí, te ñiú-ni Espiritú-n ní chindee ñàha-xi xii ndí ní chídó tñùní ndí, te duha ní chídó tñùní ndí:

Ñáyiú ñá túú cùu ñáyiú isràél ío cùdèéⁿ-yu núu Yǎ Ndiòxí, te cuini-yu nàá-yu ndihi-gá, dico vá ndácú-yu chí mee-gǎ cùnùu-gá.

²⁶ Te cue tée yìndaha nacióⁿ ndihi cue tée cùchiuⁿ tacá-güedé nàá-güedé ndihi Dútú Ndiòxí ndihi Crístú Yaá ní quixi ñuyíú-a.

Duha ní chídó tñùní ndí Dávíí nàcuáa ndùu tñúhu ní càháⁿ-n — càchí-yu xáháⁿ-yu xii Yǎ Ndiòxí.

²⁷ Te xáhaⁿ tucú-yu xii-gá:

—Ndáá ní càháⁿ ndí Dávíí chí ñiú-ni ñuu íha ní tacá té Hèrodés ndihi té Pònciú Pilatú ndihi ñáyiú ñá túú cùu ñáyiú isràél ndihi ñáyiú isràél ní càháⁿ cuèhé-yu cuendá Jèsús. Te Yòhó Dútú Ndiòxí, Déhe-n cùu Jesús núu ío váha iní-gá, te ní sáha chiúⁿ-n-gá, te ío úhú ní cuu iní ñáhá ñáyiú xii-gá. ²⁸ Te ní quidé-yu nàcuáa ní saní iní-n càdá-yu ndéé sanaha, ndéé cùtnàhá ní ngáva ñuyíú. ²⁹ Te Yòhó Dútú Ndiòxí sa ñàha-n nása càháⁿ cue tée cuini cada úhú ñáhá xii-ndí. Te quide-ndí chiúⁿ tahu-n, te vitna chindee ñàha-n

xii-ndí cuendá sá vă yùhú-ndí cáháⁿ-ndí tnúhu-n. ³⁰ Te cada tátna-n ñáyi cuhú, te chindee ñaha-n xii-ndí, te cada-ndí nchaa sá vă yòo tnàhí ndàcu cada nacuáa cuñúhu vîhî-yu. Te xini-ndí sá méé Jèsús chindee ñaha-gá xii-ndí, chi quide-gá chiⁿ tahu-n —cachí-yu xăhăⁿ-yu xii Yá Ndiôxí.

³¹ Te sátá nî yáha ní cáháⁿ-yu ndihî Yá Ndiôxí, te ní quidi-xi vehe núú xindecú-yu, te òré-áⁿ nî cutáhú tucú-yu nchaa-yu Espiritú-gá. Te ní cáháⁿ-yu tnúhu Yá Ndiôxí, te ñá túú tnàhí ní yùhú-yu.

Cuendá nchaa ndachîⁿ cánehe chiúⁿ-yu

³² Te nchaa ñáyi ní sándáá iní tnúhu Yá Ndiôxí ìⁿ-ní tnúhu ní cáháⁿ-yu nchaa-yu. ìⁿ-ní tnúhu ní sani iní-yu, te ní xóo chindee tnàhá-yu chi ní xóo cuáha táhú tnăhă-yu nchaa sá xini ñuhú-yu, te ní ìⁿ-yu ñá túú ní cáháⁿ-yu sá ndachîúⁿ-yu ìⁿdi-ní-yu cùu nchaa sá ndécú ndihî-yu. ³³ Te cue téé ní táuchíúⁿ Jèsús dacuàha ñaha xií-yu tnúhu-gá ío yáha ní cáháⁿ-güedé nàcuáa ní cuu ní ndoho Xitohó Jesucristú. Te ío ní chindee ñaha Yá Ndiôxí ní cáháⁿ-yu tnúhu-gá, te ñá túú ní cáháⁿ cuèhé dava-gá-yu cuendá ñáyi dacuaha tnúhu-gá. ³⁴ Te ñá túú tnàhí ní cùndahú-yu díhúⁿ, chi nchaa ñáyi ndècu ndihî ñuhu-xi, ndihî nchaa ñáyi càa vehe-xi ní nadicó-yu, te da ìⁿ da ìⁿ ndachîúⁿ-yu ní nadicó-yu òré xini ñuhú-yu díhúⁿ. ³⁵ Te ní sãñaha-yu xii cue téé ní táuchíúⁿ Jèsús dacuàha ñaha xií-yu tnúhu-gá, te cue téé-áⁿ nî dácăhñu-güedé nchaa ñáyi xini ñuhu. ³⁶ Te distritú Chìpré ndécú ìⁿ téé nani-dé Chèè ñani tnàhá ndîj Léví, te ní xóo cunu cuechi-dé veñúhu ñáyi isràél. Te cuendá sá sãñaha-dé tnúhu ndee iní xií-yu, xíáⁿ nñu ní dánáni ñaha-güedé Vée xii-dé. ³⁷ Te téé-áⁿ nî nadico-dé luha ñuhu-dé, te nêhe-dé díhúⁿ cuáháⁿ

núú cuè téé ní táuchíúⁿ-gă dacuàha ñaha xií-yu tnúhu-gá.

5

Té Ananiás ndihî tá Sàfirá ñá túú ní quide ndáá-yu

¹ Te ndècu ìⁿ téé nani Ananiás, te ñadihî-dé nani-áⁿ Sàfirá, te ñáyi-áⁿ nî nadicó-yu luha ñuhú-yu. ² Te ní taxúha-dé sacú díhúⁿ, te sacú-gá néhé-dé cuáháⁿ ní sãñaha-dé xii cue téé ní táuchíúⁿ Jèsús dacuàha ñaha xii ñáyi tnúhu-gá, te ní dándahú ñáhá-dé xii-güedé, chi ní xáhaⁿ-dè sá ñihî ní sãñaha-dé, te ñaha ñadihî-dé sá dúcáⁿ ní quide-dé. ³ Te ní xáhaⁿ tè Pèlú xii-dé:

—Ananiás, çná cuendá ducaⁿ ní quide-n ní dáñá-n ní quíhu sácúíhná ñni-n? Te ní dácúándèhnde-n núú Espiritú Yá Ndiôxí, te ní taxúha-n sácú díhúⁿ ní níhî-n cuendá ñuhu-n. ⁴ ¿Te ñuhu-áⁿ cuendá sá ñuhú mée-n, àdi díhúⁿ-áⁿ cuendá sá díhúⁿ méé-n cùu-xi, te cuu-ni cada-n nàcuáa càchí iní-n càhaⁿ-n ñá? ¿Ná cuendá ducaⁿ ní quide-n? ¿Ná ní quide-xi iní-n nñu ní dácúándèhnde-n núú Yá Ndiôxí? Chi ñá díú-ní mée-ni ñáyi ní dándahú-n —càchí tè Pèlú xáhaⁿ-dè xii-dé.

⁵ Te òré ní ndihî tnúhu ní xáhaⁿ tè Pèlú, te uuⁿ ní nduá-dé te ní xihî-ni-dé. Te nchaa ñáyi ní níhî tnúhu sá ní xihî-dé, te ní yùhú vîhî-yu. ⁶ Te ní quixi ìⁿ úú cue téé cuechi, te ní ndanehe ñaha-güedé ní sacáⁿ ñáhá-güedé núú yuu, te ní ducuⁿ nuu ñaha-güedé yuu-áⁿ, te ní xido ñaha-güedé néhé ñaha-güedé cuáháⁿ chindúxi ñaha-güedé xii-dé.

⁷ Te ní cuu úú uní òré, te ní quexìo ñadihî téé ní xihî-áⁿ, te vátá quini-gá-aⁿ sá ní xihî yîi-aⁿ. ⁸ Te ní xáhaⁿ tè Pèlú xii-aⁿ:

—Cuini-í cachí tnúhu ndáá-n, ¿Ndèdau ní dícó-ndó ñuhu, ní dícó-ndó nàcuáa ní cachí yîi-n àⁿ? —càchí tè Pèlú xáhaⁿ-dè xii-aⁿ.

Te ní xáhaⁿ-aⁿ:

—Ndáá sá díú-ní dùcaⁿ—cachí-aⁿ xáhaⁿ-aⁿ.

⁹ Te ní xáhaⁿ tē Pèlú:

—¿Ná cuèndá ducaⁿ nǐ chitnàha tnúhu-ndo dùcaⁿ ní quide-ndo nǐ cuiní-ndó dàndahú-ndó Espiritú Yá Ndiòxí? Quiní-n, chi sa cuándixi cue tée ní sáháⁿ ní chindúxi yíi-n, te yòhó tnàhá-n càndeca ñaha tucu-güedé xii-n quíhíⁿ vitna —càchí-dé xáhaⁿ-dē xii-aⁿ.

¹⁰ Te òrē-áⁿ ní nduá-aⁿ núú tē Pèlú, te ní xihí-ni-aⁿ. Te cuándihu cue tée cuechi-áⁿ xití vehe, te ní xiní-güedé sá sà ní xihí-aⁿ, núú ní xido ñaha tùcu-güedé cuáháⁿ chindúxi-güedé-aⁿ diñi yíi-aⁿ. ¹¹ Te ní yùhú víhí ñáyiú ní sándáá iní tnúhu Yá Ndiòxí, ndihi dava-gá ñáyiú ní níhí tnúhu nàcuáa ní cuu.

Ní quide-güedé titní núú sǎ vǎ yǎo tnàhí ndàcu cada te ío ní cuñúhu ñáyiú

¹² Te cue tée ní táuchíúⁿ Jèsús dacuàha ñaha xii-yu tnúhu-gá titní víhí sǎ vǎ yǎo tnàhí ndàcu cada ní quide-güedé, te ní cuñúhu víhí-yu. Te nchaa ñáyiú ní sándáá iní-xi tnúhu Jèsús ní xóo tacá-yu corrèdór néhé diú ndí Salòmón. ¹³ Te nchaa ñáyiú ñá túú dacuaha tnúhu-gá ñá ní cùyí-yu chitnahá-yu ñáyiú ní sándáá iní-xi tnúhu-gá, díco nchaá-yu ní cáháⁿ váha-yu cuèndá ñáyiú ní sándáá iní-xi tnúhu-gá.

¹⁴ Te vǎi tée, vǎi ñadihí ní sándáá iní-yu tnúhu-gá. ¹⁵ Te cuèndá sá nǐ níhí-yu tnúhu sá quidé tǎtna cue tée ní xica cuu ndihi Jèsús, núú xiǎⁿ ní queñuhú-yu nchaa ñáyiú cùhú ichí, te davá-yu ní quide túha-yu camá te davá-yu ní quide túha-yu yuu, núú núú ncháa xiǎⁿ tá sàcáⁿ-yu cue ñáyiú cùhú-áⁿ cuáháⁿ, te xiǎⁿ cáǎ-yu ndetú-yu, chi ní sani iní-yu sá òrē yáha tē Pèlú te cuèdicó cuándáhú-dē yáha ndodo ñaha-xi xii-yu te ndúha-yu. ¹⁶ Te ní quixi ñáyiú ñúú yatni Jerusàlén ndécá-yu ñáyiú cùhú, ndihi ñáyiú yíhi ñaha

espíritú cündihí yucu ñávàha ní quixi, te nchaá-yu ní ndúha.

Ío ní quide úhú-güedé té Pèlú ndihi té Juàá

¹⁷⁻¹⁸ Te dútú cúnúu-gá ndihí cue tée cùu saducéú cue tée cündihí-dé ní cudééⁿ-güedé sá ío chitú-yu dàcuaha tnúhu Jèsús, núú xiǎⁿ ní tñi-güedé cue tée ní táuchíúⁿ Jèsús dacuàha ñaha xii-yu tnúhu-gá ní chihí ñaha-güedé vecaá. ¹⁹ Te xití niú-áⁿ ní quexio íiⁿ espíritú xínú cuèchi núú Yá Ndiòxí ní nacaáⁿ-xi yèhe vecaá ní quee-güedé, te ní xáhaⁿ-xi xii-güedé:

²⁰ —Quíhíⁿ-ndó veñúhu càhnu sá ío cúnúu te cuñaha-ndo xii ñáyiú nàcuáa cadá-yu nanihí tǎhú-yu —càchí espíritú-áⁿ xáhaⁿ-xi xii-güedé.

²¹ Te sá dúcáⁿ ní xáhaⁿ-xi núú sáta nǐ tundaá, te ní sáháⁿ-güedé veñúhu càhnu sá ío cúnúu sá cúu-xí ñáyiú isràel ní dacuáha ñaha-güedé xii-yu.

Te dútú cúnúu-gá ndihí cue tée cündihí-dé ní nadatàcá tnàhá-güedé ndihí nchaa cue tée cùu sacuéhé núú ñáyiú isràel ndihí cue tée cùchiuⁿ, te ní tendaha-güedé sandàdú cuáháⁿ queñuhu-güedé cue tée yíhi vecaá ní cùu. ²² Te ní quexio-güedé yèhe vecaá, te ní xiní-güedé sá nǐ íiⁿ-gá cue tée dacuaha ñaha xii ñáyiú tnúhu Jèsús ñá túú-gǎ-güedé yíhi. Te cuánuhú-güedé ²³ ní xitnùhu-güedé cue tée cùchiuⁿ, te xáhaⁿ-güedé:

—Ní sáháⁿ-ndí ní sándéhé-ndí vecaá, te ndéé chóo-ni, te xindecu-ní sandàdú cue tée xindeé yèhe vecaá. Te ní nacaáⁿ-ndí vecaá, te vá yǎo íiⁿ-gá yíhí —càchí-güedé xáhaⁿ-güedé.

²⁴ Te sá dúcáⁿ ní xáhaⁿ-güedé, te cuáháⁿ iní cue dútú cúnúu ndihí tée tàxi tñuní cue tée xindeé veñúhu càhnu sá ío cúnúu, te ní xitnàha-güedé:

—¿Nása cada-xi vitna duha càa ní cuu ní xinu cue tée yíhi vecaá-i? —càchí-güedé xitnàha-güedé.

25 Te ní quexìo ìⁿ téé ní xáhaⁿ-dè:
—Cundedóho-ndo na càchí
tnúhu-í ìⁿ tnúhu. Cue téé ní
chihi-ndo vècaá ndécú-güedé
veñúhu càhnu sá ïo cúnuu
dacuaha-güedé ñáyiú —càchí-dé
xáhaⁿ-dè.

26 Te cue téé ndèé veñúhu
ndihí téé tàxi tnuní ñáhá xii-güedé
cuánguaca ñaha-güedé, te ñá túú
ní quide úhú ñáhá-güedé, chi ní
yuhú-güedé cuáha yúú ñáhá ñáyiú
dii ñúú-xi-áⁿ. 27 Te ní ndexìo ndihí
ñaha-güedé núú cuè téé cùu sacuéhé
ndihí núú cuè téé cùchiuⁿ. Te
dútú cúnùu-gá ní ngúita-dé ténàá
ñáhá-dé xii-güedé, te xáhaⁿ-dè:

28 —Te náá ñá díú ní cachí-ndí
sá vǎ dacuaha-gá-ndó ñáyiú tnúhu
Jèsús te dàcuaha-ni-ndó-yu, te vitna
nchaa ñáyiú ñúú Jerusálén ní
níhi-yu tnúhu nàcuáa càháⁿ-ndó.
¿Te ná cuendá ducaⁿ quide-ndo, te
càchí-ndó sǎ nchúhú ndècuéchi-ndí
ní sahani-ndí Jèsús-i? —càchí dútú
cúnùu-gá xáhaⁿ-dè xii-güedé.

29 Te té Pèlú ndihí dava-gá cue
téé ní táuchíúⁿ Jèsús dacuáha ñaha
xii-yu ní xáhaⁿ-güedé xii cue téé
cùchiuⁿ:

—Nchúhú, Yá Ndiòxí cúnùu-gá
sándáá iní-ndí tnúhu càháⁿ-gá
dàcúúxí tnúhu càháⁿ ñáyiú. 30 Te
nchòhó ní sata caa-ndo Jèsús núú
cùrúxí te núú cùrúxí-áⁿ ní xihí-gá,
dico ní dándótó ñaha Yá Ndiòxí
xii-gá. Te Yá Ndiòxí ní sándáá
iní cue ñani tnáhá-ndí ní xindecu
ndéé sana. 31 Te Yá Ndiòxí
ní xáhaⁿ-gá sá cündecu Jèsús xio
cùha-gá cuendá taxi tnùní-gá te
dacăcu nihnu-gá ñáyiú isràél núú
ùhú núú ndàhú. Te ducaⁿ-ni dacăcu
nihnu-gá nchaa ñáyiú na dañá
nchaa sá cuèhé sá dúhá, te cada
càhnu iní-gá nchaa yíca cuèchi-yu.

32 Te ní xiní-ndí nàcuáa ní quide-gá,
núú xǎⁿ cání-ndí cuendú núú nchaa
ñáyiú, te Espíritú Yá Ndiòxí chindèe
ñaha-xi xii-ndí càháⁿ-ndí tnúhu-gá.
Te diu-ni Espíritú-gá ní sáñaha-gá
xii nchaa ñáyiú ní sándáá iní-xi

tnúhu-gá —càchí té Pèlú ndihí
dava-gá-güedé xáhaⁿ-güedé xii cue
téé cùchiuⁿ.

33 Te sátá dúcáⁿ ní xáhaⁿ-güedé xii
cue téé cùchiuⁿ, te ní cudééⁿ-güedé,
te ní ndatnúhu-güedé sá cáhni
ñaha-güedé. 34 Te ìⁿ téé cùu
fariséú tnàha-dé cúú-dé chiúⁿ, te
nàni-dé Gamaliél, te cùu-dé mèstrú
dacuáha-dé ñáyiú nàcuáa ní chídó
tnùní ndí Moisés, te ío yǎñúhu
caháⁿ ndihí ñáhá-yu xii-dé. Te
ní ngúnutnǎi-dé, te ní xáhaⁿ-dè
sá ná quèe tnaa té Pèlú ndihí
dava-gá-güedé quehé. 35 Te ní
xáhaⁿ-dè xii cue téé cùchiuⁿ:

—Nchòhó cue téé isràél, xini
ñuhu-xi sá cání vàha iní-ndó nàsa
cada-ndo ndihí cue téé-áⁿ. 36 Chi
ní cunaha ní xindecu ìⁿ téé ní
xinani Tèudás, te ní cachí-dé sá
cúnùu-dé, te ní cundihí-dé dàtná
cúmi cièndú cue téé, te ñá ní
cuini-güedé cuu ìⁿ-nuu-güedé ndihí
cue téé cùchiuⁿ. Te ní sahani ñaha
cuè téé cùchiuⁿ-áⁿ xii téé Tèudás, te
ní ndihí cue téé ní xica cuu ndihí-dé
ní xité nuu-güedé, te ñá túú-gá
ní quide-güedé nàcuáa ní sani
iní-güedé cada-güedé. 37 Te sátá ní
xihí téé-áⁿ, te ní tnahá nduu núcódó
tnùní ñáyiú. Te dàvá-áⁿ ní xindecu
ìⁿ téé distritú Galiléa ní xinani-dé
Júdás. Te titnǎi-güedé ní chitnahá
ñáhá-güedé xii-dé. Te tnáhá-dé ní
sahni ñaha tucu cue téé cùchiuⁿ, te
nchaa cue téé ní xica cuu ndihí-dé
ní xité nuu-güedé. 38 Te na càchí
tnúhu-í sá dañá-ndó cuè téé-áⁿ, te
ní ñá túú nǎgá tnúhu cúñaha-ndo
xii-güedé, chi núú chiúⁿ mee-güedé
quidé-güedé te cuíta-güedé, 39 dico
núú chiúⁿ Yá Ndiòxí quidé-güedé, te
vá ndáñihnu chiúⁿ quide-güedé. Te
núú quide-güedé chiúⁿ Yá Ndiòxí,
te vá nàá-ndó ndihí-güedé, chi
Yá Ndiòxí nàá ndihí-ndo sá dúcáⁿ
xǎquide-ndo —càchí té Gamaliél
xáhaⁿ-dè xii cue téé cùchiuⁿ.

40 Te nchaa-güedé ní cáháⁿ
sá tnúhu ndáá càháⁿ-dè. Te
dàtnùní ní nacana tucu-güedé

té Pelù ndihi dava-gá-güedé te ní caniha-güedé, te ní cáháⁿ níhi-güedé, te xáhaⁿ-güedé sá vâ cáháⁿ-gá-güedé tnúhu Jësús, te dâtnùní ní dáñá ñaha-güedé cuánuhú-güedé. ⁴¹ Te ío ní cudíí ìní-güedé, chi mee Yá Ndiöxí ní cachí-gá sá dúcáⁿ ndòho-güedé dacuàha-güedé ñáyiú tnúhu Jësús. ⁴² Te ìⁿ nduu ìⁿ nduu ní dâcuáhá-güedé ñáyiú xití veñúhu càhnu sá ío cùnuu ndihi nchaa vehé-yu. Te ní xáhaⁿ-güedé xií-yu sá Jësús cuú-gá Crístú Yáá ní quixi ñuyúú-a.

6

Ní ndúcú-güedé úsá cue tée cundecu dacáhñu sá cáxí ñáyiú

¹ Te ñu-ní dâvâ-áⁿ ñí sândáá ìní vâi ñáyiú tnúhu Jësús. Te cue ñáyiú grìégú ní cáháⁿ cuèhé-yu cuèndá ñáyiú isràél, sá ñáyiú ñíhi ñáyiú queé ñáyiú càháⁿ tnúhu grìégú ñá túú tnáhá sá cáxí-yu, chi ñá túú sãñaha ìⁿnuu-güedé. ² Te cue téé úxúú ní táúchíúⁿ Jësús dacuàha ñaha xií-yu tnúhu-gá, cue téé-áⁿ ñí cana-güedé nchaa ñáyiú sândáá ìní tnúhu Jësús. Te ní xáhaⁿ-güedé xií-yu:

—Nchúhú chi vá cuú dacáhñu-ndí sá cáxí-yu, chi mee-ní tnúhu Yá Ndiöxí càháⁿ-ndí. ³ Te nchòhó cue téé ndècu ndihi-ndí ichi Xítohó Jesucristú cáháⁿ ndihi-ndo úsá cue téé xíndecu iha, cue téé càháⁿ ndihi ñahá-yu mee-ní tnúhu yíñùhu, cue téé ndècu ndihi Espíritú Yá Ndiöxí, mee-ní cuè téé cùtnuní váha ìní-xi. Te cue téé-áⁿ cuàha-ndí-güedé chìuⁿ cada-güedé dacáhñu-güedé sá cáxí-yu. ⁴ Te nchúhú mee-ní Yá Ndiöxí cáháⁿ ndihi-ndí, te mee-ní tnúhu-gá dacuàha-ndí-yu —càhí-güedé xáhaⁿ-güedé xií-yu.

⁵ Te nchaá-yu ní tñí-yu tnúhu ní cáháⁿ-güedé, núu ní ndúcú-yu cue téé cada chìuⁿ-áⁿ. Te ìⁿ-dè nání-dé Tévá, te ío váha sândáá ìní-dé Yá Ndiöxí, te ndècu ndihi-dé

Espíritú-gá. Te duha ní xínani dâva-gá-güedé: té Lìpé, té Pröcoró, té Nicánór, té Tímón, té Pàrmenás, té Lãxí téé ñuú Antiòquia téé ní sândáá ìní-xi sá dâcuàha ñáyiú isràél te vitna ní sândáá ìní-dé tnúhu Jësús. ⁶ Te úsá cue téé-áⁿ ñí sáháⁿ-güedé núu cuè téé úxúú ní táúchíúⁿ Jësús dacuàha ñaha xií-yu tnúhu-gá, te cue téé úxúú-áⁿ ñí cáháⁿ ndihi-güedé Yá Ndiöxí, te ní sacáⁿ ndodo-güedé ndaha-güedé díquí cuè téé úsá-áⁿ.

⁷ Te ñáyiú ní sândáá ìní tnúhu Jësús cuáháⁿ-yu titní xichi càháⁿ-yu tnúhu-gá. Te vâi-gá ñáyiú ta sândáá ìní-yu tnúhu-gá cuáháⁿ, te ní xíndecú-yu ndihi dava-gá ñáyiú dâcuaha tnúhu-gá ñuú Jerusàlén. Te titní dútú ní sândáá ìní-güedé tnúhu-gá.

Ní tñí-güedé té Tévá

⁸ Te té Tévá ní quide-dé titní núu sá vâ yòo tnàhí ndàcu cada, te ní cuñúhu vihí-yu sá dúcáⁿ ñí quide-dé, te ducaⁿ ñí quide-dé chi ndècu ndihi-dé Yá Ndiöxí chíndee ñaha-gá. ⁹ Te ní xíndecu cue téé ní xóo cunu cuechi núu ìⁿ téé tàxi tñuní, te téé tàxi tñuní-áⁿ ñã ní xóo dañá tnàhí-dé quee-güedé núu chíúⁿ-dè, te ní xinu-ná-güedé. Te sátá xãⁿ, te ní dâcáá-güedé veñúhu-güedé, te veñúhu-áⁿ sáháⁿ ñáyiú ñuú Cirené, ñáyiú ñuú Alejándriá, ñáyiú ñuú Ciliciá, ndihi ñáyiú distrítú Asiá. Te nchaa ñáyiú-áⁿ ñí nàá ndihí-yu té Tévá. ¹⁰ Te ñá ní ñíhi-yu tnúhu cáháⁿ-yu, chi ío váha ní sáá díquí-dé nâcuáa ní xáhaⁿ-dè xií-yu, chi Espíritú Yá Ndiöxí ní chindee ñaha-xi xii-dé. ¹¹ Te ní cháhu-yu cue téé ní dâcuándèhnde tnúhu ní cáháⁿ té Tévá núu-yu. Te ní xáhaⁿ-güedé sá càháⁿ cuèhé-dé cuèndá ndíi Moisés ndihi cuèndá Yá Ndiöxí. ¹² Te cuèndá sá dúcáⁿ ñí dâcuándèhnde-güedé núu ní sândáá ìní-yu, te ní cudéñ-yu núu té

Těvá. Te ní cudééⁿ cue tée cùu sacuéhé, te tnàhá cue tée dàcuaha ñaha xii-yu nchaa tnúhu ní chídó tnùní ndíi Moisés ní cudééⁿ-güedě. Te ní sáháⁿ-güedě ní tñi-güedě té Těvá ndécá ñaha-güedě cuáháⁿ núú quidé cuè tée cùchiuⁿ jundá, ndihi cue tée cùu sacuéhé. ¹³ Te ndécá-yu cue tée dàcuandehnde cuáháⁿ núú quidé-güedě jundá, te ní quesaha-ni tùcu-güedě cáháⁿ cuèhé-güedě, te xáhaⁿ-güedě:

—Tée-a mee-ni cáháⁿ cuèhé-dé cuendá veñúhu sá ïo cùnuu, veñúhu ní cuu í, te cáháⁿ cuèhé-dé cuendá nchaa sá ñi chídó tnùní ndíi Moisés. ¹⁴ Te ní tecú dóho-ndí cächí-dé sá Jèsús tée ñuú Nazàrèt dangoyo-dé veñúhu cànu sá ïo cùnuu te vá dáñá-gá-dé cada-ndí nàcuáa ní cachí ndíi Moisés cada-ndí — cächí-güedě xáhaⁿ-güedě.

¹⁵ Te nchaa cue tée ndècu jundá ní ndacoto váha-güedě núú tē Těvá. Te ní dáyehé-xi núú-dě dàtná quidé-xí núú espíritú xínú cuèchi núú Yá Ndiöxí.

7

Té Těvá xáhaⁿ-dě sá ñà túú cuèchi-dé

¹ Te ní xáhaⁿ dütú cùnùu-gá xii-dé:

—¿Ndáá tnúhu cáháⁿ-güedě cuendá-n-ã? —cächí-dé xáhaⁿ-dē.

² Te té Těvá ní xáhaⁿ-dē xii-güedě:

—Nchòhó cue ñani tnáhà-í ndihi nchòhó cue tée cùu sacuéhé, cundedóho-ndo ñi tnúhu na cáháⁿ-í-a. Yá Ndiöxí ïo cùnuu-gá, te ní cáháⁿ ndihi-gá ndíi Àbrahám nacióⁿ Mesopotamiá cùtnáhá vátá quihíⁿ-gá ndíi cundecu ndíi ñuú Hàrán. ³ Te ní xáhaⁿ-gá xii ndíi: “Daña-n nchaa ñani tnáhà-n, te daña-n ñuhu-n, te quihíⁿ-n ñi xichi núú dánéhé ñáhà-í cundecu-n”, duha ní xáhaⁿ Yá Ndiöxí xii ndíi Àbrahám. ⁴ Te sátá dúcáⁿ ñi xáhaⁿ Yá Ndiöxí xii ndíi Àbrahám, te ní ndee ndíi ñuú Càldeá, te cuáháⁿ ndíi cundecu ndíi ñuú Hàrán. Te sátá ñi xihí tātá ndíi, te ní xáhaⁿ

Yá Ndiöxí quixi ndíi cundecu ndíi núú ndécú-ó vitna. ⁵ Te Yá Ndiöxí ña túú ní sãñaha-gã ñi lùha ñuhu cuu cuendá ndíi núú ñi xindecu ndíi. Te ní xáhaⁿ ndáá Yá Ndiöxí xii ndíi sá cuãñaha-gã ñuhu cuu cuendá ndíi, te na cùu ndíi, te ndóo ndihi nchaa ñani tnáhá ndíi cacu túu ndéé cuèé-gá. Te ducaⁿ ñi xáhaⁿ-gã cuèi vátá cündècu-gá ñi ñi déhe ndíi. ⁶ Te ní xáhaⁿ tùcu Yá Ndiöxí xii ndíi Àbrahám sá diú-ní ñani tnáhá ndíi quihíⁿ-yu núú xicá cündecú-yu cúmi ciendú cuíá, te vá dáñá-yu queé-yu núú chíuⁿ-yu, te ïo dandòho ñaha-güedě núú cündecú-yu. Duha ní xáhaⁿ Yá Ndiöxí xii ndíi, te ndáá ducaⁿ ñi cuu. ⁷ Te ní xáhaⁿ tùcu Yá Ndiöxí xii ndíi Àbrahám: “Yúhú dandòho-í nchaa ñayiu na dandòho ñaha xii cue ñani tnáhà-n. Te dàvá-áⁿ tē ndee cue ñani tnáhà-n núú cündecú-yu, te quixi-yu chíñuhu ñáhà-yu xii-í iha”, duha ní xáhaⁿ

Yá Ndiöxí xii ndíi Àbrahám, te ndáá ducaⁿ ñi cuu. ⁸ Te Yá Ndiöxí ní quide ndáá-gá ndihi ndíi Àbrahám, te ní xáhaⁿ-gã xii ndíi sá cuãha-güedě seña ñi nchaa landú tée cuendá cunáhá-yu nàcuáa ndùu sá ñi quide ndáá-gá ndihi ndíi Àbrahám. Núu xiáⁿ núú ùná nduu sá ñi cacu té Isàác déhe ndíi Àbrahám, te ní sáha ndíi seña tñi-dé. Te diu-ni ducaⁿ ñi quide tñi té Isàác déhe-dé té Jàcób, te diu-ni ducaⁿ ñi quide té Jàcób, chi úxúú déhe-dé ní xindecu, te nchaa-güedě ducaⁿ ñi quide-dé. Te ndíi úxúú cue tée-áⁿ ñi cuu-güedě ñani tnáhà-ó.

⁹ Te ñi déhe té Jàcób ní xínani-dē Chèé. Te ñá ní cùu váha ñni cue ñani-dé núú-dē, núu ní dicó ñaha-güedě ní queheⁿ ñaha cuè tée cuáháⁿ nacióⁿ Ègiptú, te Yá Ndiöxí ña ní dàña ñaha-gá xii-dé cuíta ñihnu-dé. ¹⁰ Te ní chindee ñaha-gá xii-dé ní cacu-dé cùtnáhá ní ndoho vihi-dé. Te tée yindaha Egiptú ïo ní cudíi ñni-dé té Chèé, te ní cutnùní ñni-dé sá ïo váha túha té

Chèé, te ducaⁿ nĩ cutnùnĩ iní-dé, chi Yá Ndiõxí ní chindee ñaha-gá xii té Chèé. Te ní xáhaⁿ tõe yĩndaha Egiptú xii té Chèé sá díú tẽ Chèé coo-dé gobiernú Ègiptú, te taxi tnùnĩ-dé nchaa ñáyiú xĩnu cuechi núú tõe yĩndaha Egiptú-áⁿ.

11 'Te ní quíhu tnamá nihii nacióⁿ Ègiptú ndihi nacióⁿ Cànaá, te ío ní ndohó-yu. Te nchaa ñaní tnáhá-ó nĩ xĩndecu ndéé sanaha ñã ní xõo níhĩ-gã-yu sá cáxi-yu. 12 Te ní níhĩ tẽ Jácób tnúhu sá ío triú Ègiptú, núu ní tendaha-dẽ cue dẽhe-dé ní sáháⁿ-güedé ní sãnguuaⁿ-güedé triú-áⁿ, te dàvá-áⁿ nĩ sáháⁿ cue ñaní tnáhá-ó xito díhna nuu nacióⁿ Ègiptú. 13 Te xito cùu uú cuáháⁿ-güedé, te ní xáhaⁿ tẽ Chèé sá ñaní-dé cúú-güedé. Te tõe yĩndaha Egiptú ní cutnùnĩ iní-dé sá díú-nĩ ñaní té Chèé cúú-güedé. 14-15 Te ní cana té Chèé tãtã-dẽ té Jácób ndihi nchaa ñaní tnáhá-dẽ. Te cùu-xi datná únídico sáhúⁿ-yu ndèca té Jácób cuáháⁿ nacióⁿ Ègiptú núú ndécú tẽ Chèé, te xiáⁿ nĩ quexiò-yu ní ngóo-yu. Te yacáⁿ ní xihí té Jácób ndihi nchaa dẽhe-dé cue ñaní tnáhá-ó. 16 Te sáta ní cuu titní cuía, te ní natava-güedé yiqui ndii Jácób ndihi nchaa dẽhe ndii nchido-güedé cuáháⁿ ñuu Sìquém. Te ndii Àbrahám sa ní cuu titní-gá cuía sã nĩ nacuaaⁿ ndii ñuhu núú cuè dẽhe ndii Hãmór. Te xiáⁿ nchii yaú ní nachindúxi-güedé yiqui-áⁿ.

17 'Te cútñahá vátá natáva-gá-güedé yiqui cue ndii, te sa ta tnáhá yatni cada Yá Ndiõxí nãcuáa ní xáhaⁿ-gã xii ndii Àbrahám cada-gá sá cúú-xí ñãyiú isràel ndécú Ègiptú, te ta cãyá víhĩ-yu cuáháⁿ. 18 Te dàvá-áⁿ chi ingá tõe yĩndaha nacióⁿ Ègiptú, te ñã túú-gã ní xini-dé nása ní xõo cada ndii Chèé. 19 Te tõe yĩndaha Egiptú ñã ní quide ndáá-dé, chi ío ní dándóhó-dẽ ñaní tnáhá-ó nĩ xĩndecu dàvá-áⁿ. Te ní táuchíúⁿ-dẽ

sá xõcuñi-yu dándóo-yu dẽhe yiquiⁿ cuendá ndihi-güexi cuú. 20 Te dàvá-áⁿ ní cacu té Moisés, te ío ní cudii iní ñahá Yá Ndiõxí xii-dé. Te ní xĩndecu ndihi ñaha nãná-dé ndihi tãtã-dé únĩ-nĩ yóó. 21 Te ndèca ñahá-yu cuáháⁿ ingá xichi, te yacáⁿ ní dándóo ñahá-yu xii-dé, te ní naníhĩ ñahá dẽhe yoco tõe yĩndaha Egiptú, te ní xito-xi-dé datná xitó-xí ñⁿ dẽhe mee-xi nĩ xito-xi-dé ndéé ní sahnú-dé. 22 Te ní cutúha-dé nchaa sá xini cue tõe ègiptú, te ío váha ní sáá díqui-dẽ tnúhu cáháⁿ-dé ndihi nchaa sá cadá-dẽ.

23 'Te cútñahá ndécú-dẽ údico cuía-dẽ, te ní cachí-dé sá quihĩⁿ-dé cáháⁿ ndihi-dé cue ñaní tnáhá-dẽ ñãyiú isràel. 24 Te ní xini-dé ní caniha ñⁿ tõe ègiptú xii ñⁿ tõe isràel, te ñã ní cundee iní-dé cundehe-dé nüu ní sáháⁿ-dé ní chindee-dé tõe isràel, te ní sahnĩ-dé tõe ègiptú, 25 chi ní cachí Yá Ndiõxí sá díú-dẽ dacãcu-dé ñaní tnáhá-dẽ ñãyiú isràel núú cuè tõe ègiptú. Te ní sani iní-dé sá cútñunĩ iní-yu nãcuáa ní xáhaⁿ Yá Ndiõxí xii-dé, dico ñã túú ní cútñunĩ iní-yu. 26 Te nduu tnéé ní xini-dé nãá úú cue tõe isràel, te ñã túú ní tnáhá iní-dé nãá-güedé nüu ní xáhaⁿ-dẽ xii-güedé: "¿Ná cuendá ducaⁿ xĩnãá-ndó? ¿Nãa ñã díú ndimee-ndo núu ducaⁿ xĩnãá-ndó?" Duha ní xáhaⁿ tõe Moisés xii-güedé. 27 Te tõe ndècuéchi ní sáháⁿ-dé ní chindaha ñihnu-dé té Moisés ñⁿ xio, te ní xáhaⁿ-dẽ: "¿Ná cúú yohó nüu véxi-n tàxi tnunĩ ñahá-n? 28 Te tnáhá-ni tucu yúhu cahni-n datná ní sahnĩ-n tõe ègiptú icu cãhaⁿ-n á", duha ní xáhaⁿ-dẽ xii té Moisés. 29 Te sá dúcãⁿ nĩ cáháⁿ tõe isràel nüu ní yuhú té Moisés ní xinu-dé cuáháⁿ-dé ní sáá-dé nacióⁿ Mèdián. Yacáⁿ ní ngóo-dé, te yacáⁿ ní tnándaha-dé, te ní cacu úú dẽhe tõe-dé.

30 'Te sáta nĩ xĩnu údico cuía, te ní sáháⁿ té Moisés ñⁿ xio yucu Siná. Te yacáⁿ ní xini-dé ñⁿ tnutãú nchicúⁿ ñuhú, te xití itá ñuhú-áⁿ nĩ xini-dé

yíhí ìᵇn espíritú xínú cuèchi núú Yá Ndiòxí. ³¹ Te òré ní xini-dé sá yíhí-xí xití itá ñuhú-án, te ní cuñúhu vîhî-dé sá nî xini-dé espíritú-án xití itá ñuhú-án, te ní sândehe-gá-dé, te ní xindéhé vâha-dé. Te ní tecú dóho-dé ní cáháⁿ Yá Ndiòxí, te xáhaⁿ-gã xii-dé: ³² “Yúhú cúu-í Ndiòxí ní cáháⁿ ndihî cue ñani tnáhá-n ndéé sanaha, ndíi Ábrahám ndihî ndíi Isáac ndihî ndíi Jácób, ndihî dava-gá cue ñani tnáhá-n. Nchaa cue ndíi-án nî xóo cáháⁿ ndihî-i.” Duha ní xáhaⁿ-gã xii té Moisés. Te ní quidi ñaha-xi xii té Moisés sá nî yùhú-dé, te ñá ní cùyî-gá-dé cundehe-dé tnutáú nchîcúⁿ ñuhú-án. ³³ Te Yá Ndiòxí ní xáhaⁿ-gã xii-dé: “Queñuhu chàú-n, chi núú ñuhú nî cuu íi nùtnî-n. ³⁴ Te yùhú ndéhé-í sá ío ndóho nchaa ñáyiu cùu cuendá-í, ñáyiu ndècu nacióⁿ Ègiptú. Te ní tecú dóho-í sá ío ndáhú xîcáháⁿ-yu, núu xíáⁿ véxi-í càchî tnúhu-í sá ñuhú-n nacióⁿ Ègiptú cuendá ndeñùhú-n-yu yàcáⁿ.” Duha ní xáhaⁿ Yá Ndiòxí xii té Moisés.

³⁵ Te ñá ní sândáá iní-yu té Moisés ndéé díhna, chi ní xáháⁿ-yu: “¿Ná cuendá véxi-n tàxi tnuni ñáhá-n xii-ndí?” Duha ní xáháⁿ-yu xii té Moisés. Te ñu-ni té Moisés ní tendaha ñaha Yá Ndiòxí ní sáháⁿ-dé dacâcu-dé ñáyiu isràél nacióⁿ Ègiptú cuèi ñá ní sândáá iní ñáhâ-yu xii-dé. Dico ní taxi tnùnî-dé-yu, chi ducaⁿ nî xáhaⁿ-gã òré ní xini-dé espíritú xínú cuèchi núú-gã xití tnutáú nchîcúⁿ ñuhú. ³⁶ Te té Moisés ní ngúita-dé ní quide-dé sá vâ yôo tnàhî ndàcu cada, te ní cuñúhu vîhî-yu sá dúcáⁿ nî quide-dé, te ducaⁿ nî quide-dé Ègiptú ndihî Lámár Tícuèhé. Te ní ngódó núú-dé núu-yu ní queé-yu Ègiptú cuáháⁿ-yu ìᵇn ichi xití yucu núú vâ yôo tnàhî ndècu, te ní xîhi-yu údico cuíá xití yucu-án, te xíáⁿ nî xóo cada-dé sá vâ yôo tnàhî ndàcu cada.

³⁷ Te ñu-ni té Moisés ní xáhaⁿ-dê xii cue ñani tnáhá-dê dàvâ-án; “Yá Ndiòxí cada-gá te coo ìᵇn ñani tnáhá-ndó ndéé cuèé-gá, te téé-án cáháⁿ-dé tnúhu-gá núú-ndó dàtná cuinî-ndó nî cachî-gá quidé yùhú, te ío xini ñuhu-xi cundedóho-ndo tnúhu cáháⁿ-dé”, duha ní xáhaⁿ té Moisés xii-yu dàvâ-án. ³⁸ Te ñu-ni té Moisés ní xindecu ndihî-dé ñáyiu isràél xití yucu, te ní sáá-dé yucu Sináí, te xíáⁿ nî quixi ìᵇn espíritú xínú cuèchi núú Yá Ndiòxí ní cáháⁿ ndihî ñaha-xi xii-dé, te yàcáⁿ ní dâcuáhá ñaha-xi tnúhu-gá, te ñu-ni tnúhu-án nî ndóo dàcuaha-o.

³⁹ Te cue ñani tnáhá-ó nî xindecu ndéé sanaha ñá ní sândáá iní-yu té Moisés, te ñá ní ndéé iní ñáhâ-yu xii-dé, chi ní cuinî-yu nuhú tucú-yu ñuú Ègiptú cundecú-yu. ⁴⁰ Te òré ndécú té Moisés yucu ní xáháⁿ-yu xii ñani-dé té Àrón: “Cadúha-n ìᵇn úú ndiòxí díhúⁿ cuááⁿ codonùu núú-ó cùhuⁿ-o ichi, chi ñá túú cùtnunî iní-ó ndéé ichi cuáháⁿ té Moisés, téé yòdo nuu núú-ó ndùu ní quee-o Ègiptú”, duha ní xii-yu té Àrón. ⁴¹ Te dàvâ-án nî cadúha-güedé ìᵇn chèhlu mee-ni díhúⁿ cuááⁿ, te ní sahni-güedé ìᵇn úú quitî nchito ní quide càhnu-güedé chèhlu-án. Te ío ní cudíi iní-yu quitî-án, chi ní cachî-yu sá díú-ní ndiòxí cúú-dí. ⁴² Te sá dúcáⁿ nî quidé-yu, xíáⁿ ní dáñá ñaha Yá Ndiòxí xii-yu. Te ní dáñá-gã ní xóo cada càhnú-yu nchîcanchii, ndihî yóó, ndihî nchaa chódínî. Te duha ní chídó tnùnî ìᵇn téé ní xóo cáháⁿ tnúhu Yá Ndiòxí ndéé sanaha nâcuáa ní xáhaⁿ-gã xii ñáyiu dàvâ-án:

Nchòhò ñáyiu isràél, ní cuu údico cuíá yíhî-ndó yùcu,

te ní sahni-ndo quitî-ndo ní quide càhnu ñaha-ndo xii-í cáháⁿ-ndó, dico ñáhá chi ní sahni-ndo-güèdî ní quide càhnu-ndo sá nî cadúha mee-ndo.

⁴³ Te ní cadúha-ndo ìᵇn veñúhu líhli,

te ní sanutñi-ndo Mòlóc sá cächí-ndó cùu ndiòxi-ndó xìca nchido-ndo xití yucu,

te ní cadúha-ndo ìñ chódíní, te quití-ãñ cächí-ndó sã cúu-dí ndiòxi Rènfan,

te ndi ndùú sá ñí cadúha-ndo-ãñ ñí quide càhnu-ndo.

Te cuendá sá dúcáñ ñí quide-ndo te yúhú queñuhu ñaha-í xii-ndo quiññ-ndó cùndecu-ndo ingá xio nacióñ Babiloniá.

Duha ní xáhañ Yã Ndiòxi xii-yu, te ducañ ñí chídó tñuní téé ní xóo cáháñ tñuhu-gá.

⁴⁴ Te xití yucu-áñ ñí dácáá-güedé ñí veñuhu vehe dóó. Te vehe-áñ ñí cuu-xi ñí sá cùtñuní iní-yu sá Yã Ndiòxi ndécú ndiñi ñaha-gá xii-yu. Te vehe-áñ ñí dácáá-güedé nàcuáa ní xáhañ Yã Ndiòxi xii té Moisés, chi ní dánèhé ñahá-gá xii-dé nàcuáa dacàa-güedé. ⁴⁵ Te sátá ñí xihí nchaa cue téé-áñ, te ní ndóo ndiñi nchaa déhe-güedé veñuhu-áñ. Te ní xido tucu-güedé veñuhu-güedé cuáháñ-güedé, te cuáháñ ndiñi-güedé té Jòsué núu cùndécú-yu. Te sátá ñí quexió-yu, te ní dácùnñ-yu ñáyiu dii ñùú-xi-áñ chi mee Yã Ndiòxi ní chindee ñaha-gá xii-yu. Te sátá ñí ndiñi nchaa ñáyiu ní xica nchido veñuhu dóó-ãñ ñí xihí, te ní ndóo ndiñi dava-gá-yu. Te ducañ-ndi ndècu-xi ní cacu té Dàvií, téé ní xindaha ñaha xii-yu. ⁴⁶ Te Yã Ndiòxi ní cudíí víhí iní-gá té Dàvií. Te ní xicáñ tñuhú-dé núu-gá núu cuu dacàa-dé veñuhu cuu cuendá-gá, chi ñí-ndi Yã Ndiòxi ní xóo cada càhnu té Dàvií ndiñi té Jácób, ñaní tñahá-ó ñí xindecu ndéé sanaha víhi-gá. ⁴⁷ Te Yã Ndiòxi ñá ní dàña-gá dacàa té Dàvií veñuhu-gá dico déhe-dé té Salómón, chi ní dáñá-gã ní dácáá-dé veñuhu cuu cuendá-gá ⁴⁸ cuéí ñá túu sácùndecu-gá veñuhu dàcaa cue téé ñuyúú-a, chi ndèni xii-ndécú-gá chi espíritú cúu-gá. Te duha ní chídó tñuní téé ní xóo

cáháñ tñuhu Yã Ndiòxi ndéé sanaha nàcuáa ní cáháñ-gá:

⁴⁹ Yúhú táxi tñuní-í andiñu ndiñi ñuyúú,

te xii-ñ núu nchòhó vá ndácú-ndó chihí ñaha-ndo xití veñuhu dàtná quidè-yu sá cächí-yu cùu ndiòxi-yu ní cadúha-yu.

Te ñá túu xini ñuhu-í núu ndétátú-í, ⁵⁰ chi yúhú ní cadúha-í nchaa sá ío ñuyúú-a.

Duha ní cáháñ Yã Ndiòxi, te ñi-ndi ducañ ñí chídó tñuní téé ní xóo cáháñ tñuhu-gá —duha nduñ nchaa tñuhu ní xáhañ té Tèvá xii-güedé.

⁵¹ Te ní xáhañ tñucu-dé:

—Nchòhó, ío sáa iní-ndó chi quide-ndo datná quidé ñáyiu ñá túu cùu ñáyiu isráel chi ñá túu tédòho-ndo tñuhu cáháñ Yã Ndiòxi, chi ñá cuini-ndó quindáa iní-ndó tñuhu-gá, mee-ni cùu úhú iní-ndó Espiritú-gá dàtná ní xóo cada cue ñaní tñahá-ndó ñí xindecu ndéé sanaha. ⁵² Chi cue téé-áñ ío ní xóo dandòho-güedé nchaa cue téé ní xóo cáháñ tñuhu Yã Ndiòxi ndéé sanaha. Te ní sañni-güedé nchaa cue téé ní cáháñ sá quixí Crìstú ñuyúú-a, te Yaá-áñ ñá túu cuèchi-gá. Te ñi-ndi ducañ ñí quide-ndo Crìstú cùtñahá ní quixi-gá ñuyúú-a, chi ní sáha cuendá-ndó-gã núu cué téé ní cuu úhú iní ñahá xii-gá ní sañni ñaha-güedé. ⁵³ Te ndècu ndiñi-ndo tñuhu ní chídó tñuní ndí Moisés nàcuáa ní xáhañ espíritú xínú cuèchi núu Yã Ndiòxi xii ndíí, te ní dùcañ ñá túu sàndáa iní-ndó tñuhu-áñ núu ní sañni-ndo Jèsús. Te ñi-ndi tñuhu-áñ ndécú ndiñi-ndo ndéé vitna —cächí té Tèvá xáhañ-dé xii-güedé.

Ní sañni-güedé té Tèvá

⁵⁴ Te sá dúcáñ ñí xáhañ té Tèvá xii-güedé, te ní cudééñ víhí-güedé núu-dé, núu ní quide rúhñu-güedé núu-güedé sá sátú iní-güedé. ⁵⁵ Te té Tèvá ndécú ndiñi-dé Espíritú Yã Ndiòxi, te ní ndacoto váha-dé andiñu, te ní xini-dé suúni dàtásañ-xi núu ndécú Yã Ndiòxi, te ní xini-dé

Xítóhó Jesucristú nǔtnǎi-gá xio cùha Yá Ndiǒxí. ⁵⁶ Te ní xáhaⁿ tē Těvá xii-güedé:

—Chí cǔndèhe andǔu chi yúhu ndéhé-í Xítóhó Jesucristú nǔtnǎi-gá xio cùha Yá Ndiǒxí, te diu-gá cúú-gǎ ñani tnáhá-ndó nchàa-ndo —cachí-dé xǎhaⁿ-dē.

⁵⁷ Te ní sadí-güedé dóho-güedé cuendá sá ñǎ ní tnáhá iní-güedé cundedóho-güedé tnúhu cǎháⁿ-dé, te uuⁿ ní cuáá-güedé, te ní taxi ndaha ñaha-güedé xii-dé ⁵⁸ ndécá ñaha-güedé cuáháⁿ ndéé ìⁿ xio yuhu ñúú, te yàcáⁿ ní sǎñaha-güedé yúú xii-dé. Te ndècu ìⁿ tée cuechi nàni-dé Sàulú, te tée-áⁿ ñǎ quide cuendá-dé dóó-güedé cuendá ní nune ndaha-güedé ní sǎñaha-güedé yúú xii té Těvá. ⁵⁹ Te òré sǎñaha-güedé yúú, te ní cǎháⁿ ndihí-dé Xítóhó Jesucristú te xǎhaⁿ-dē:

—Yòhó Xítóhó Jesucristú, naqueheⁿ-n iní-í —cachí-dé xǎhaⁿ-dē xii-gá.

⁶⁰ Te ní ngúñǎi xítí-dē, te níhi ní cǎháⁿ-dé, te xǎhaⁿ-dē:

—Yòhó Xítóhó Jesucristú, vá tēcüechi-n cuè tée-a sá dúhá quide ñaha-güedé xii-í —cachí-dé xǎhaⁿ-dē xii-gá.

Te xǎⁿ-nǎ ní cǎháⁿ-dé, te ní xihí-dé.

8

Té Sàulú chíhí-dē ñáyíu sándáá iní-xi tnúhu Jèsús vecaá

¹ Te té Sàulú ní nduu yétú iní-dé sá ñǎ sañni-güedé té Těvá.

Te diu-ni nduu-áⁿ ñǎ cuu níhi cuendá nchaa ñáyíu sándáá iní-xi tnúhu Jèsús ñúú Jerusalén. Te ní ndihí-yu ní xité nuu cuáháⁿ-yu distritú Júdeá ndihí distritú Sámariá. Te cue tée ní táuchíúⁿ Jèsús dácuàha ñaha xii-yu tnúhu-gá ní ndóo-güedé ñúú Jerusalén. ² Te nchaa cue tée cǎháⁿ ndihí Yá Ndiǒxí ní chindúxi-güedé ndí Těvá. Te ío ní ndáhyú ñáyíu ní sándáá iní tnúhu

Jèsús sá ñǎ xihí ndí. ³ Te té Sàulú ío dándoho-dé-yu, chí ndí vehe ndí vehe cuáháⁿ-dé cuatni-dé cuèi tée cuèi ñadihi ndécá-dé cuáháⁿ vecaá.

Cǎháⁿ-yu tnúhu Yá Ndiǒxí distritú Sámariá

⁴ Te nchaa ñáyíu ní xité nuu cuáháⁿ-yu cǎháⁿ-yu tnúhu Jèsús nchaa núú quexió-yu. ⁵ Te té Lìpé cuáháⁿ-dé distritú Sámariá cǎháⁿ-dé tnúhu Xítóhó Jesucristú Yáá ní tendaha Yá Ndiǒxí ní quixi ñuyíú-a. ⁶ Te ío vai núú sǎ vá yǒ tnáhí ndàcu cada ní quide-dé, te ní cuñúhu vihí-yu, te ní xindedóho váha-yu nchaa tnúhu ní cǎháⁿ-dé.

⁷ Te vai ñáyíu yìhi ñaha espíritú cǔndihí yucu ñáváha ní queñuhu-dé nchaa espíritú-áⁿ yiqui cǔñú-yu, te ní cana saa-xi òré ní ndee-xi yiqui cǔñú-yu cuáháⁿ-xi, te ní ndúha-yu. Te vai ñáyíu cǔhú ñá cúú-gǎ candá nihnú-yu ndihí ñáyíu yacua ní quide tátna-dé, te ní ndúha-yu. ⁸ Te sá dúcáⁿ ñǎ cǎháⁿ-dé tnúhu Jèsús te ní quide tátna-dé-yu, xǎⁿ ío ní cudíí iní ñáyíu ñúú-áⁿ.

⁹ Te diu-ni ñúú-áⁿ ndécú ìⁿ tée nàni Xímú, te tée-áⁿ xini-dé cada ndúu-dé, te ní cuu naha dùcaⁿ quide-dé, te ní xóo cuñúhu ñáyíu distritú Sámariá sá dúcáⁿ quide-dé, te ní cachí-dé sá díú-ní-dē cúnúu. ¹⁰ Te nchaa ñáyíu cuèi ñáyíu cuica te cuèi ñáyíu ndàhú ío nēhé-yu sá yíñúhu núú-dē, te xitnàhá-yu:

—Tée-áⁿ ío chindee ñaha Yá Ndiǒxí xii-dé núu vai núú sǎ quidé-dé —cachí-yu xitnàhá-yu.

¹¹ Te ní sándáá iní-yu nàcuáa ní xóo cada ndúu-dé, te ní xóo cuñúhu vihí-yu, te ní cuu naha dùcaⁿ-ni dandahú ñáhá-dē xii-yu. ¹² Te té Lìpé ní cǎháⁿ-dé tnúhu Xítóhó Jesucristú, te ní xáhaⁿ-dē xii-yu sá Yá Ndiǒxí cuini-gá ndíhu ndaha ñaha-gá xii-yu. Te cuèi tée cuèi ñadihi ní sándáá iní-yu tnúhu-gá, te ní sanduté-yu. ¹³ Te tnáhá té Xímú

ní sándáá iní-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chi titní núú sá vâ yôo tnâhí ndâcu cada ní quide té Lìpé, te ní cuñúhu vihi nchaa ñâyiu.

14 Te dava-gá cue tée ní táuchíúⁿ Jèsús dacuàha ñaha xii ñâyiu tnúhu-gá ní níhí-güedé tnúhu sá ñâyiu distritú Sàmariá ní sándáá iní-yu tnúhu Yá Ndiòxí. Te ní tendaha-güedé té Pèlú ndihí té Juàá cuáhán-güedé distritú Sàmariá. 15 Te ní quexio-güedé, te ní cáháⁿ ndihí-güedé Yá Ndiòxí ní xicán-güedé Espiritú-gá quixi cundecu ndihí-yu. 16 Chi ní ñⁿ-yu vátá sàá-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. 17 Te òré ní sacáⁿ ndodo-güedé ndaha-güedé díquí-yu, te ní quexio Espiritú-gá ní ngúndecu ndihí-yu.

18 Te ní xiní té Xímú nâcuáa ní quide-güedé ní quexio Espiritú-gá ní ngúndecu ndihí-yu, te cuíní-dé cuáñaha-dé díhúⁿ xii té Pèlú ndihí té Juàá ní cùu. 19 Te ní xáhaⁿ-dê:

—Chindee ñaha-ndo cuendá ndêda-ni cáa-yu cacáⁿ ndodo-í ndaha-í díquí-yu, te níhí-yu Espiritú Yá Ndiòxí cundecu ndihí-yu —câchí-dé xáhaⁿ-dê xii-güedé.

20 Te té Pèlú ní xáhaⁿ-dê xii-dé:

—Yôhó cuíta nihnu-n ndihí díhúⁿ-n, chi cuíní-n cuáaⁿ-n sá vâha quide Yá Ndiòxí. 21 Yôhó vá cúú càda-n chiúⁿ quide-ndí, chi ñá túú ndècu vâha iní-n núú Yá Ndiòxí. 22 Te vá dúcáⁿ cáháⁿ-n, chi ío nèhé cáháⁿ-n sá dúcáⁿ cáháⁿ-n. Te cáháⁿ ndâhú-n núú Yá Ndiòxí sá ná cádá càhnu iní-gá tnúhu ní cáháⁿ-n. 23 Te yúhú sa xiní-í sá ío úhú iní-n, chi mee-ni sá cuèhé sá dúhá chido nuu-n quide-n —cachí té Pèlú xáhaⁿ-dê xii té Xímú.

24 Te ní xáhaⁿ tè Xímú xii-güedé:

—Cáháⁿ ndâhú-ndó núú Yá Ndiòxí sá ñâ túú nâ tnahá-í sá dúcáⁿ ní cáháⁿ-í —câchí-dé xáhaⁿ-dê.

25 Te té Pèlú ndihí té Juàá ní cáháⁿ-güedé tnúhu Yá Ndiòxí núú ñâyiu ñuú-áⁿ. Te ní xáhaⁿ-güedé nchaa nâcuáa ní quide Jèsús ní xiní-güedé òré ní xica cuu-gá ñuyíú-a. Te ní tñii-güedé ichi cuánuhú-güedé ñuú Jerusalén, te ní yâha-güedé titní ñuú yíndèhu distritú Sàmariá, te ní cáháⁿ-güedé tnúhu-gá.

Té Lìpé ndihí ñⁿ tée ñuú Etiòpiá

26 Te ñⁿ espíritú xínú cuèchi núú Yá Ndiòxí ní quexio-xi ñuú Jerusalén ní xáhaⁿ-xi xii té Lìpé:

—Cada túha-n chi quée nuu-n ñuú Gázá, dico mee-ni xití yucu cuáhán ichi —câchí-xi xáhaⁿ-xi xii-dé.

27 Te ní xica-dé cuáhán-dé, te ní natnahá-dé ñⁿ tée nacióⁿ Etiòpiá ñúhú-dê ichi. Te cùu-dé tesorerú xínú cuèchi-dé núú ñⁿ ñadihí ñaha yíndaha nacióⁿ Etiòpiá, te ñaha-áⁿ nání-áⁿ Cándacé. 28 Te tée etiòpiá-áⁿ ní sáhán-dé ñuú Jerusalén ní cáháⁿ ndihí-dé Yá Ndiòxí, te ñúhu-dé ichi cuánuhú-dé ñuú-dé ñúhú-dê carrétá, te dâcuaha-dé tnúhu ní chídó tnúni ndí Chaiá tée ní xóo cáháⁿ tnúhu Yá Ndiòxí ndéé sanaha. 29 Te ní xáhaⁿ Espiritú Yá Ndiòxí xii té Lìpé:

—Quíhíⁿ tuha-n carrétá-áⁿ —câchí Espiritú-gá xáhaⁿ-xi xii-dé.

30 Te té Lìpé ní sâtuha-dé carrétá-áⁿ, te ní tecú dóho-dé nâcuáa cáháⁿ tée etiòpiá-áⁿ, tée ñúhu carrétá-áⁿ dâcuaha-dé nâcuáa ní chídó tnúni ndí Chaiá. Te ní xáhaⁿ tè Lìpé xii tée etiòpiá-áⁿ:

—¿Técú tnúni-n nchâa tnúhu dâcuaha-n-áⁿ? —câchí té Lìpé xáhaⁿ-dê xii-dé.

31 Te ní xáhaⁿ tée etiòpiá:

—¿Nâsa tecú tnúni-í te vá yôo dànehé ñáhá xii-í? Ta quène iha çoo-n chi danèhé ñáhá-n —câchí-dé xáhaⁿ-dê xii té Lìpé.

Te cuásaá té Lipé núú carrètá ní ngóo-dé. ³² Te ndédóho-dé nàcuáa dàcuaha téte etiópíá-áⁿ nàcuáa ní chídó tñuní ndí Chàíá núú tútú Yá Ndióxí núú càchí-xi:

Dàtná quidé ìⁿ mbéé cada-dé òré candeca ñaha-güedé xii-dé quíhíⁿ cahni ñaha-güedé chi ñá túú nã cada-dé,

dàtná cuini-ndó quide mbéé òré dètè-di ñá túú ndàhí-di ducaⁿ càda-dé òré cahni ñaha-güedé chi ni vã càháⁿ-dé.

³³ Te mee-ni cùdiquí ndeé ñáhá-güedé xii-dé, te ni vã ndúcú tñuhu-güedé núú-dé nũu ndáá ndècuéchi-dé.

Te ío cuu nduu cuihna iní cue ñaní tñáhá-dé, chi cahni ñaha-güedé xii-dé ñuyú-a.

Duha càháⁿ tutú ní dácuháá tée etiópíá ní xíndéóho té Lipé.

³⁴ Te ní xáhaⁿ tucu téte Etiópíá xii té Lipé:

—Cundee iní-n càchí tñuhu-n yòo cacunehe téte ní càháⁿ tñuhu Yá Ndióxí ndeé sanaha, núú càháⁿ-dé cuendá méé-dé àdi càháⁿ-dé cuendá ingá ñáiyu —càchí téte etiópíá-áⁿ xáhaⁿ-dé xii té Lipé.

³⁵ Te té Lipé ní cani-dé cuendú núú tée etiópíá nàcuáa ní càháⁿ ndí Chàíá nàcuáa cada Jèsús òré quixi-gá ñuyú-a. Te ní xáhaⁿ-dè nàcuáa nduu tñuhu Jèsús ndíhí nàcuáa ní quide-gá. ³⁶ Te ñuhu-güedé ichi cuáháⁿ-güedé ní naníhí-güedé ìⁿ xichí núú ñuhú ndute, te ní xáhaⁿ tée etiópíá:

—Iha ñuhu ndute, ¿te vã cúu cuàndute-í iha-ãⁿ? —càchí-dé xáhaⁿ-dè xii té Lipé.

³⁷ Te xáhaⁿ té Lipé:

—Te núu sàndáá ndisa iní-n Jèsús, te cuu cuandute-n —càchí-dé xáhaⁿ-dè.

Te ní xáhaⁿ tée etiópíá:

—Sàndáá ndisa iní-í sá Dèhe Yá Ndióxí cúu Xítoho Jesucristú —càchí-dé xáhaⁿ-dè.

³⁸ Te ní ngani-dé carrètá, te ní nuu-güedé ndi ndúú-güedé, te

cuánguee-güedé xití ndute, te ní dácuañdute ñaha té Lipé xii-dé. ³⁹ Te òré ní nene-güedé xití ndute, te ndèca ñaha Espiritú Yá Ndióxí xii té Lipé cuáháⁿ. Te ñá túú ní xini tée ní sandute-áⁿ ndeé ichi cuáháⁿ té Lipé.

Te ío ní cudí iní-dé sá ní natuha-dé ichi Yá Ndióxí, te cuàndaa-dé núú carrètá-dé cuánuhú-dé. ⁴⁰ Te ní quexio té Lipé ñuu Azotó, te ndi tñahá ñuu ndi tñahá ñuu cuáháⁿ-dé càháⁿ-dé tñuhu Yá Ndióxí, te ní yáha-dé cuáháⁿ-dé ní quexio-dé ndeé ñuu Cèsareá.

9

Té Sàulú ní tuha-dé ichi Xítoho Jesucristú

(Hch. 22:6-16; 26:12-18)

¹ Te té Sàulú mee-ni càháⁿ cuèhé-dé cuendá ñáiyu ní sàndáá iní tñuhu Jèsús, te cuini-dé cahni ñaha-dé xií-yu. Te ní sáháⁿ-dé núú dütú cúnú-gá, ² te ní xáhaⁿ-dè sá cádũha dütú-ãⁿ ìⁿ tutú canehe-dé quíhíⁿ cuáha-dé cue tée xíndeé nchito veñuhu ñuu Dámascú, chi cuini-dé tñi-dé nchaa ñáiyu dàcuaha tñuhu Xítoho Jesucristú candeca ñaha-dé quíhíⁿ ñuu Jerusálén. ³ Te ní xica-dé cuáháⁿ-dé tá cùyatni-dé ñuu Dámascú, te uuⁿni ní quee ñuhú andi, te ní dáyèhé-xi ndeé núú nùtnñ-dé. ⁴ Te ní nduá-dé ndeé ñuhu, te ní tecú dóho-dé càháⁿ ìⁿ sá càháⁿ núú ñinu, te xáhaⁿ-xi xii-dé:

—Yòho Sàulú, ¿ná cuendá cúu ùhú iní ñáhá-n xii-í te dàndoho ñaha-n? —càchí sá càháⁿ-áⁿ xáhaⁿ-xi xii-dé.

⁵ Te ni xáhaⁿ-dè:

—¿Ná cúu yòho sá càháⁿ-áⁿ-i? —càchí-dé xáhaⁿ-dè.

Te ní xáhaⁿ sá càháⁿ xii-dé:

—Yúhú cúu-í Jèsús tée cuu úhú iní-n. Te ío dàndoho-n mee-n, chi dàtná quidé ndicutu quide-n, chi quiti-áⁿ nũu na cuxi-güedé-di pùyá te sáha-di patadá núú-xi, te quide úhú-di mee-di. Te ducaⁿ sãtñahá-xi cuu yòho chi ñá túú sàndáá iní

ñáhá-n xii-í —càchí sá cáháⁿ-án xáhaⁿ-xi xii-dé.

⁶ Te té Sàulú ní quidi ñaha-xi xii-dé sá ñi yùhú-dé, te ní xáhaⁿ-dë:

—Xítóhó Jesucristú, ¿te ná cuíni-n cada-í-í? —càchí-dé xáhaⁿ-dë.

Te Jèsús ní xáhaⁿ-gã xii-dé:

—Ndacóo, te quíhíⁿ-n ñùú-ãⁿ, te yàcáⁿ tecú tnúhu-n nã cúú sã cadá-n —càchí-gã xáhaⁿ-gã xii-dé.

⁷ Te cue té cuáháⁿ ndihi té Sàulú ní tecú dóho-güedé cáháⁿ ñⁿ sá cáháⁿ, dico vá yõo tñahí ni xini-güedé, te ní yùhú víhí-güedé, te ñá túú tñahí ni cáháⁿ-güedé.

⁸ Te ní ndacóo té Sàulú, te ñá ní cùu-gã cundehe-dé, chi ní cuaa-dé, te ní tñi-güedé ndaha-dé ndécá ñaha-güedé cuáháⁿ ñuú Dàmascú.

⁹ Te yàcáⁿ ní xindecu-dé úní nduu, te ñá ní cùu tñahí cundehe-dé, te ñá túú nã ní xexi-dé, te ñá túú ní xihí-dé ndute.

¹⁰ Te ndècu té sàndáá iní tnúhu Jèsús ñuú Dàmascú, nání-dé Ananiás, te ní sáháⁿ Jèsús núú sàní-dé, te ní xáhaⁿ-gã xii-dé:

—¡Ananiás! —càchí-gã xáhaⁿ-gã.

Te ní xáhaⁿ-dë:

—¿Yúhú cáháⁿ ndihi-n-ãⁿ? —càchí-dé xáhaⁿ-dë.

¹¹ Te ní xáhaⁿ-gã:

—Ndacuíñí, te quíhíⁿ-n ñⁿ chiun ichi núú dánani-güedé Ichi Ndáá, te yàcáⁿ nanducu-n vehe té Jüdás, chi vehe té-án ndécú ñⁿ té-ã ñuú Tàrsú nání-dé Sàulú, te té-ãⁿ sa cáháⁿ ndihi ñaha-dé xii-í. ¹² Te té-ãⁿ ñi dácótó ñaha-xi sá ñi xini ñáhá-dé xii-n ñi quexio-n núú ndécú-dé, te ní sacáⁿ ndodo-n ndaha-n díqui-dé, te ducaⁿ te ní nacaáⁿ núú-dé ní dácótó ñaha-xi xii-dé —càchí-gã xáhaⁿ-gã.

¹³ Te té Ananiás ní xáhaⁿ-dë:

—Yòhó Xítóhó Jesucristú, càchí tnúhu-í xii-n sã ñi ñihí-í tnúhu nàcuáa quide-dé sá io quide úhú-dé ñáyiu cáháⁿ ndihi-n ñuú Jerusálén.

¹⁴ Chi nèhe-dé tutú ní sañaha cue dútú cùnùu cuendá ñihí-dé nàcuáa cada-dé tñi-dé nchaa ñáyiu sàndáá

iní ñáhá xii-n —cachí-dé xáhaⁿ-dë xii-gã.

¹⁵ Te Jèsús ní xáhaⁿ-gã xii-dé:

—Quíhíⁿ-n ndàtnúhu-n ndihi-dé, chi cuíni-í cada-dé chiun-í, quíhíⁿ-dë cáháⁿ-dë tnúhu-í núú cue ñáyiu isràél, ndihi núú cue ñáyiu ñá túú cùu ñáyiu isràél, ndihi núú cue té-ã yìndaha ñaha xii-yu. ¹⁶ Te yúhú cúñaha-í xii-dé sá ndóhó víhi-dé cuendá-í —càchí-gã xáhaⁿ-gã xii té Ananiás.

¹⁷ Te cuáháⁿ té Ananiás vehe núú ndécú té Sàulú te ní sacáⁿ ndodo-dé ndaha-dé díqui té Sàulú, te ní xáhaⁿ-dë:

—Yòhó té Sàulú té-ã ndècu ndihi-í ichi Xítóhó Jesucristú, ñu-ni Xítóhó Jesucristú Yaá ní cáháⁿ ndihi ñaha xii-n ichi ní tendaha ñaha-gã véxi-í cuendá cacáⁿ tãhú-í núú-gã cuendá-n te ndúha núú-n, te dàtnùni quixi Espiritú-gã cundecu ndihi-n —càchí-dé xáhaⁿ-dë.

¹⁸ Te dàtná sá ñi xócání-ó ñⁿ sá ndèdí núú-dé ní quide ñaha-xi xii-dé, te ní nacaáⁿ núú-dé, te ní sandute-dé. ¹⁹ Te ní xexi-dé, te ní naníhí ndéé-dé, te titní nduu ní xindecu ndihi-dé ñáyiu ní sàndáá iní tnúhu-gã ñuú Dàmascú.

¹⁹ Te ní xexi-dé, te ní naníhí ndéé-dé, te titní nduu ní xindecu ndihi-dé ñáyiu ní sàndáá iní tnúhu-gã ñuú Dàmascú.

Té Sàulú dácùaha-dé ñáyiu tnúhu Yá Ndiõxi ñuú Dàmascú

²⁰ Te sátá ñi ndúha núú-dé, te ní sáháⁿ-dë veñúhu cue ñáyiu isràél ní xáhaⁿ-dë sá Jèsús cúu-gã Déhe Yá Ndiõxi. ²¹ Te nchaa ñáyiu ní xíndedóho tnúhu ní cáháⁿ-dë, te ní cuñúhu víhí-yu, te ní xitnàhã-yu:

—Ñu té-ãⁿ ní sañhi-dé ñáyiu ní xóo chiñuhu ñaha xii Jèsús ñuú Jerusálén. Te ní quixi-dé iha ní cuíni-dé tñi ñaha-dé xii-yu candeca ñaha-dé quíhíⁿ núú cue dútú cùnùu ni cuu —cachí-yu xitnàhã-yu.

²² Te ió iní-gã té Sàulú xáhaⁿ-dë xii-yu sá díú Jèsús cúu-gã Cristú Yaá ní tendaha Yá Ndiõxi ní quixi ñuyíú-a, te xíãⁿ ñá ní ñihí ñáyiu isràél ndécú ñuú Dàmascú tnúhu cáháⁿ-yu, te ní cuñúhu víhí-yu.

Té Sàulú ní dáxíó-dě núú ñàyiú isràél

²³ Te sátá ní cuu títí nduu, te ní ndatnúhu cue téé isràél sá cáhí-güedé té Sàulú. ²⁴ Te té Sàulú ní níhí-dě tnúhu nàcuáa cáhá-güedé cada ñaha-güedé xii-dé, te cuèi nduu cuèi níú néhé cuèndá-güedé yuyèhe núú ñúdòco ndóho yuhu ñúú cuèndá cuíni-güedé tñi ñaha-güedé xii-dé te cahni ñaha-güedé. ²⁵ Te ìⁿ níú ndécá ñaha cue téé ní sándáá iní-xi tnúhu Jèsús cuáháⁿ ndéé núú ñúdòco ndóho yuhu ñúú. Te ní sáá-güedé núú ndóho, te ní chihí ñaha-güedé xii-dé xití tídihi te ní dándéé ñaha-güedé núú ñúhú, te ní quene-dé cuáháⁿ-dé.

Te Sàulú ndécú-dě ñúú Jerusàlén

²⁶ Te té Sàulú ní nasáá-dé ñúú Jerusàlén, te cuíni-dé chitnahá-dé ñáyiú sándáá iní tnúhu Jèsús, te ní yùhú-yu chi ní cáhán-yu sá dándàhú ñáhá-dé sá sándáá iní-dé Jèsús. ²⁷ Te té Bèé ndécá-dé té Sàulú cuáháⁿ núú ndécú cuè téé ní táúchíúⁿ Jèsús dacuàha ñaha xií-yu tnúhu-gá. Te ní cani té Bèé cuèndú núú-güedé nàcuáa ní cuu ní naníhí tñáhá tē Sàulú ndihí Jèsús ichi, te ní cáháⁿ ndihí ñaha-gá xii-dé. Te ní xáhaⁿ tucu té Bèé nàcuáa ní cáháⁿ té Sàulú tnúhu Jèsús núú ñáyiú Dàmascú, te ñá túú tñáhí ní yùhú-dé ní cáháⁿ-dé, cächí té Bèé xáhaⁿ-dē xii-güedé. ²⁸ Te ní xíndecu té Sàulú ndihí ñáyiú xídacuáhá tnúhu-gá ñúú Jerusàlén. Te ní ndicuu ndicuu-dé ní cáháⁿ-dé tnúhu Jèsús, te ñá túú tñáhí ní yùhú-dé ²⁹ ní cáháⁿ ndihí-dé ñáyiú isràél ñáyiú cáháⁿ tnúhu griégú. Te ñáyiú-áⁿ ní ngúíta-yu ndatnúhu-yu sá cáhí ñáhá-yu xii-dé. ³⁰ Te ñáyiú sándáá iní tnúhu-gá ní níhí-yu tnúhu nàcuáa cuíni ñáyiú cáháⁿ tnúhu griégú cada ñáhá-yu xii té Sàulú, núú ní sándeca ñáhá-yu xii-dé ñúú Cèsareá, te yàcáⁿ ní tendaha ñáhá-yu cuánuhú-dé ñúú Tàrsú.

³¹ Te sátá xíáⁿ te ní sanaá-yu ñá túú-gá ní xóo cada úhú-yu nchaa ñáyiú sándáá iní tnúhu Jèsús níhí distritú Júdeá, ndihí distritú Galileá, ndihí distritú Sàmariá. Te ní níhí ndéé-yu ní quidé-yu nàcuáa ní xáhaⁿ Yá Ndióxi cadá-yu, te ío ní xíndecu yíñuhú-yu núú-gá, te Espíritú-gá ní chindee ñaha-xi xií-yu, te vai-gá ñáyiú ní sándáá iní-yu tnúhu-gá.

Té Pèlú ní quide tátna-dé té Èneás

³² Títí xichi ní sáháⁿ té Pèlú ní cáháⁿ-dē tnúhu Yá Ndióxi. Te ìⁿ nduu ní sáháⁿ-dē ñúú Lidá ní cáháⁿ ndihí-dē ñáyiú sándáá iní ñáhá xii Jèsús. ³³ Te yàcáⁿ ní naníhí-dē ìⁿ téé nàni Eneás, te ní cuu úná cuía cùhú-dé, te ní lùha ñá cuú-gá candá nihnu-dé. ³⁴ Te ní xáhaⁿ tē Pèlú xii-dé:

—Èneás, Xítoho Jesucristú cada tátna ñaha-gá xii-n tñavíi. Ndacóo te ndocani-n yùu-n —cachí-dé xáhaⁿ-dē.

Te òré-ni ní ndacóo-dé. ³⁵ Te nchaa ñáyiú ñúú Lidá ndihí ñáyiú ñúú Sàrón ní xiní-yu sá ní ndúha-dé, te ní sándáá víhí iní-yu Xítoho Jesucristú.

Ní ndoto tá Dòrcás

³⁶ Te ñúú Jòpé ndécú ìⁿ ñadihí sándáá iní-aⁿ tnúhu Jèsús, te nàni-aⁿ Tabitá, te tnúhu griégú xáháⁿ-yu Dòrcás, te ío váha ní xóo cada-aⁿ chí ío váha iní-aⁿ, te ní xóo chindee-aⁿ ñáyiú ndáhú. ³⁷ Te váha-ni ndécú-aⁿ ní cuu, te ní tñi ñaha cuèhé ní xíhí-aⁿ, te ní nadacúchi ñahá-yu, te ní chihí ñáhá-yu ìⁿ cuártú ndécú ndéé núú ñinu. ³⁸ Te ñáyiú ní sándáá iní tnúhu Jèsús ñúú Jòpé ní níhí-yu tnúhu sá ndécú tē Pèlú ñúú Lidá. Te yatni-ni càa ñúú-áⁿ, te ní tendàhà-yu úú cue téé cuáháⁿ-güedé núú ndécú-dé cuèndá cúñaha-güedé candeca ñaha-güedé xii-dé quíhíⁿ núú ndécú-yu. Te ní xáhaⁿ-güedé xii té Pèlú:

—Yáchí ná quihíⁿ-ó ñúú-ndí, chi yacáⁿ cáná ñàhá-yu quihíⁿ-n tnàvíí —càchí-güedé xāhaⁿ-güedē xii té Pèlú.

³⁹ Te té Pèlú ní xica-dé cuáháⁿ-dé ndihí cue téé-áⁿ ñúú Jòpé, te òré ní quexio-güedé ndihí-dé, te cuásaá ndihí ñaha-güedé cuártú ndéé núú ñnu. Te nchaa ñáyiú dìhí ñáyiú quèé ní tacá ndèé ñáhá xii ndíyi-áⁿ xíndáhyú-yu, te ní dánèhé ñáhá-yu nchaa dóó ní cadúha ñaha ní xihí-áⁿ. Chi ní xóo cadúha-aⁿ dícúⁿ, te ní xóo cadúha-aⁿ díó òré ní xíndecu-aⁿ ñuyíú-a, te nchaa xíáⁿ ní dánèhé ñáhá-yu xii té Pèlú. ⁴⁰ Te té Pèlú ní xāhaⁿ-dē sá quèé-yu nchaá-yu quehé, te ní queé-yu. Te ní ngüíñí xítí-dé te ní cáháⁿ ndihí-dé Yá Ndiöxí, te dātnùní ní ndacoto-dé núú cándòdo ndíyi-áⁿ, te ní xāhaⁿ-dē:

—Tàbitá, ndacóo —càchí-dé xāhaⁿ-dē.

Te ní ndacoto-aⁿ núú tē Pèlú te ní ndacóo-aⁿ. ⁴¹ Te ní tñii-dé ndaha-aⁿ ní nacanutñii ñaha-dē. Te ní cana-dé nchaa ñáyiú dìhí ñáyiú quèé ndihí nchaa ñáyiú sàndáá iní tñuhu Jèsús cuendá quiní-yu sá ní ndoto-aⁿ. ⁴² Te nchaa ñáyiú ñúú Jòpé ní níhí-yu tñuhu nācuáa ní quide té Pèlú ní ndoto ñaha ní xihí-áⁿ, te vāi-yu ní sàndáá iní-yu Xítóhó Jesucristú. ⁴³ Te titñí nduu ní xíndecu té Pèlú vehe té Xímú té dācuitá ñii.

10

Té Pèlú ndihí té Còrneliú

¹ Te ndècu ñⁿ téé nāñi-dé Còrneliú ñúú Césareá té cūé-dé capitáⁿ, te ndècu ndihí-dé ñⁿ cièndú sandàdú. Te cue téé-áⁿ nání-güedé Sandàdú Itàlianú. ² Te téé cūu capitáⁿ ío váha iní-dé, te mee-dē ndihí ñadihí-dé ndihí nchaa landú-dé ío nèhé-yu sá yíñùhu núú Yá Ndiöxí, te sáha-dé ñáyiú ndàhú ñáyiú isràél díhúⁿ, te ío càháⁿ ndihí-dé Yá Ndiöxí. ³ Te ñⁿ nduu dātná òré caá úní sacuaa ní dācótó núú ñáhá-xí xii-dé sá ní

sáháⁿ ñⁿ espíritú xínú cuèchi núú Yá Ndiöxí núú-dē, te ní xāhaⁿ-xi:

—Còrneliú —càchí-xi xāhaⁿ-xi xii-dé.

⁴ Te ní xiní-dé ndi ndùú xio núú-dé espíritú-áⁿ. Te ío ní yùhú-dé. Te ní xāhaⁿ-dē:

—¿Ná chíúⁿ vèxi-n? —càchí-dé xāhaⁿ-dē.

Te xāhaⁿ-xi:

—Ío càháⁿ ndihí-n Yá Ndiöxí, te ñáyiú ndàhú sáñaha-n díhúⁿ-n, te nchaa xíáⁿ sa nàha-gá. ⁵ Te vitna tendaha-n cuè téé na quihíⁿ-güedé ñúú Jòpé quíngana-güedé ñⁿ téé nàni Xímú, àdi Pelú chi úú diu-dé, te candeca ñaha-güedé quixi. ⁶ Te òré quexio-dé te cachí tñuhu-dé nchaa ñava-gá sá cuini Yá Ndiöxí cada-n. Te ndècu-dé vehe íngá tucu téé nàni Xímú téé dācuitá ñii, te vehe téé-áⁿ caá ñⁿ xio yuhu lamár —càchí-xi xāhaⁿ-xi xii-dé.

⁷ Te sáta cuáháⁿ espíritú-áⁿ, te té Còrneliú ní cana-dé úú tñàhá cue téé xínu cuechi núú-dē ndihí ñⁿ sandàdú xínú cuèchi tucu núú-dē, te tñàhá sandàdú-áⁿ ío càháⁿ ndihí-dé Yá Ndiöxí. ⁸ Te té Còrneliú ní cani-dé cuèndú núú-güedé nācuáa ní cáháⁿ espíritú xínú cuèchi núú Yá Ndiöxí. Te ní tendaha ñaha-dé xii-güedé cuáháⁿ-güedé ñúú Jòpé.

⁹ Te nduu tñéé-áⁿ ñúhú-ní-güedé ichi cuáháⁿ-güedé, te cūu-xi datná òré caúxúú nduu ta cūyatni-güedé ñúú-áⁿ, te òré-áⁿ ní sáá té Pèlú díquí vèhé càháⁿ ndihí-dé Yá Ndiöxí. ¹⁰ Te òré-áⁿ sa xihí-dé docó cuini-dé caxi-dé, te nini cadúha-yu sá cáxi-dé ní dācótó núú ñáhá-xí ¹¹ sá ní xiní-dé ñⁿ sá ndécú àndiu, te cāa datná caá ñⁿ dóó cáhnú nchicúⁿ yoho ndi cūmí xiquí-xi véxi cuuⁿ núú ñúhú. ¹² Te núú dōó-áⁿ yódó cōó ndihí quiti ndàva ndihí nchaa núú quiti ndéé cūmí sáhá-xi. ¹³ Te ní tecú dóho-dé càháⁿ ñⁿ sá càháⁿ, te xāhaⁿ sá càháⁿ-áⁿ xii-dé:

—Pèlú, ndacuíñí cahni-n ndèda-ni càa quitia-caxi-n-di — cachí sá càháⁿ-áⁿ xáhaⁿ-xi xii-dé.

¹⁴ Te té Pèlú ní xáhaⁿ-dè;

—Vá cáhni-í-di chí càchí tnúhu sá sánú ìchi ñaha xii nchúhú ñáyi israél sá vǎ cúú càxi-ndí nchaa quitia-chi cuu cuéchi, te vátá cáxí-gǎ-í-di ni ñⁿ xito —cachí-dé xáhaⁿ-dè.

¹⁵ Te ní cáháⁿ tucu sá ní cáháⁿ-áⁿ, te xáhaⁿ-xi:

—Vá cúú càchí-n sǎ vǎ cúú càxi-n-di, chí mee Yá Ndióxi ní cachí-gá sá díú nchaa quitia-cuu caxi-o vitna —cachí sá ní cáháⁿ-áⁿ xáhaⁿ-xi xii-dé.

¹⁶ Te ducaⁿ ñí cáháⁿ sá ní cáháⁿ-áⁿ ũní xito, te dǎtnúni cuánda tucu dóó-ǎⁿ andiu.

¹⁷ Te té Pèlú ñá ní cùtnúni iní-dé ná cuènda ducaⁿ ní dácótó núú ñáhá-xí xii-dé, núú xíǎⁿ ío cuéhé ní sani iní-dé. Te òré-áⁿ ní quexio cue téé ní tendaha té Còrneliú ndéé yuyèhe, chí ndi vehe ndi vehe cuáháⁿ-güedé ndúcú tnúhu-güedé ndéé cáá vehe té Xímú téé dii vehe-xi ndecu té Pèlú.

¹⁸ Te ní cáháⁿ ñihi-güedé, te xáhaⁿ-güedé: —Ñá túú cùdana iha ndecu ñⁿ téé nànducu-ndí nání-dě Xímú, àdi Pelú chí úú ñiú-dé —càchí-güedé xáhaⁿ-güedé.

¹⁹ Te té Pèlú vǎi sani iní-dé sá ní dácótó núú ñáhá-xí xii-dé. Te òré-áⁿ ní xáhaⁿ Espiritú Yá Ndióxi xii-dé:

—Cundedóho-n ñⁿ tnúhu na càháⁿ-í-a. Ní quexio ũní cue téé nànducu ñaha xii-n. ²⁰ Yáchí, cuandèe chí quíhíⁿ-n ndihi-güedé, te vá yùhú-n chí yùhú ní xáhaⁿ-í véxi cuaca ñaha-güedé xii-n —càchí Espiritú-gá xáhaⁿ-xi xii té Pèlú.

²¹ Te ní xica-dé cuánde-dé núú ndécú cuè téé xica nanducu ñaha xii-dé, te xáhaⁿ-dè xii-güedé:

—Yúhú cúú téé nànducu-ndo-áⁿ. Náu-í-a núú ná chíúⁿ cuñí ñáhá-ndó —càchí-dé xáhaⁿ-dè xii-güedé.

²² Te xáhaⁿ-güedé:

—Téé cùu capitáⁿ téé nàni Corneliú ní tendaha ñaha-dé véxi-ndí, te téé-áⁿ ío váha iní-dé, chí ío sàndáá iní-dé Yá Ndióxi, te nchaa ñáyi

israél ío váha càháⁿ-yu cuènda-dé. Te ñⁿ espíritú xínú cuèchi núú Yá Ndióxi ní xáhaⁿ-xi xii-dé sá cáná ñaha-dé xii-n quíhíⁿ-n vèhe-dé dacuaha-n-dé tnúhu Yá Ndióxi —càchí cue téé ní tendaha té Còrneliú xáhaⁿ-güedé xii té Pèlú.

²³ Te ní xáhaⁿ tǎ Pèlú sá quíhu-güedé vehe-dé, te candeca tnàha-güedé ndihi-dé quíhíⁿ ndéé nduu tnéé. Te nduu tnéé-áⁿ ní xica-güedé ndécá tnàha-güedé ndihi té Pèlú cuáháⁿ, te tnàhá ñⁿ úú cue téé sàndáá iní tnúhu Jesús ñúú Jòpé cuáháⁿ ndihi ñaha-güedé xii-dé.

²⁴ Te ndéé ingá nduu ní quexio-güedé ñúú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndihi ñadihí-dé ndihi nchaa landú-dé ndihi cue téé ío váha tnàhá tnúhu ndihi-dé, chí ní cana ñaha-dé ní nítnáhá-yu ndihi-dé cundetu-yu té Pèlú. ²⁵ Te sátá ñí quèxio té Pèlú vehe té Còrneliú, te ní quee-dé quehé, te ní ngüíñí xítí-dé núú tǎ Pèlú chíñùhu ñaha-dé ní cùu. ²⁶ Te té Pèlú ní xáhaⁿ-dè:

—Ndacuíñí vá ngüíñí xítí-n núu-í chí ñá díú Ndióxi cúu-í, dícó ñⁿ téé ñuyiú-a cùu-í —càchí té Pèlú xáhaⁿ-dè xii-dé.

²⁷ Te ta cáháⁿ té Pèlú ndihi té Còrneliú cuánguihu-güedé xítí vehe, te chitu ñáyiú xixíhi xítí vehe. ²⁸ Te ní xáhaⁿ tǎ Pèlú xii-yu:

—Sa nàha-ndo sá càchí tnúhu sá sánú ìchi ñaha xii nchúhú ñáyiú israél sá vǎ cúú quíxi-ndí vehe ni ñⁿ nchóhó ñáyiú ñá túú cùu ñáyiú israél te ní vǎ cúú tnàhá tnúhu ndihi ñaha-ndí xii-ndo. Díco Yá Ndióxi ní cachí-gá sá vǎ cúú cáháⁿ-í sá vǎ cúú cáháⁿ ndihi-í ñáyiú ñá túú cùu ñáyiú israél, chí cuu cuéchi.

²⁹ Núú xíǎⁿ ndihi-ni véxi-í òré ní quexio tnúhu sá cáná ñaha-ndo. Te cachí tnúhu-ndo nǎ cuènda cáná ñaha-ndo —cachí té Pèlú xáhaⁿ-dè xii-yu.

³⁰ Te té Còrneliú ní xáhaⁿ-dè:

—Ní cuu cúmí nduu, te ñiu-ni ðatná òrè iha cùu-xi, te yúhú ndècu-í ñiu-ni vehe-í, te ñá túú tnàhí ná xéxi-í cáháⁿ ndihi-í Yá Ndiöxí, te òrè-áⁿ nì quexio ìⁿ espíritú xínú cuèchi núú-gá nínhú-xí dǒó cuixíⁿ dóó chàhchí, ³¹ Te cächí-xi: “Còrneliú, nì xíndedóho Yá Ndiöxí tnúhu nì cáháⁿ-n ndihi-gá, te xíní-gá sá sáñaha-n ðihúⁿ xii ñáyiú ndàhú. ³² Te ñuú Jòpé ndécú ìⁿ téè nàni Xímú, àdi Pelú chi úú ñiu-dé, te ndècu-dé vehe ìⁿ téè nàni tucu Xímú téè ðacuitá ñii, te càa vehe-dé ìⁿ xio yuhu làmár, te cana-n-dé ná quixi-dé ndatnúhu-n ndihi-dé”, duha nì cáháⁿ espíritú xínú cuèchi núú Yá Ndiöxí. ³³ Núu xíáⁿ ndihi-ni nì cana ñaha-í xii-n. Te táxáhu xii-n sá vèxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiöxí, te cuiní-ndí cachí tnúhu-n nchàa tnúhu nì cachí Yá Ndiöxí cáháⁿ-n —cächí té Còrneliú xáhaⁿ-dè.

Té Pèlú nì ndatnúhu-dé ndihi ñáyiú nì tacá vehe té Còrneliú

³⁴ Te té Pèlú xáhaⁿ-dè xii-yu:

—Vitna nì xíní-í sá Yá Ndiöxí cáháⁿ ndihi-gá ñáyiú cuèi ndèda-ni càa ñuú, te ìⁿ-nì quide-gá ndihi nchaa-yu. ³⁵ Te nchaa ñáyiú nèhe sá yíñùhu núú Yá Ndiöxí, te xíquide váha-yu, te nchaa-yu cùu váha iní ñáhá-gá xii-yu. Te ñá túú quide cuendá-gá cuèi ná ñáyiú ñuú cùu-yu. ³⁶ Te Yá Ndiöxí nì tendaha-gá Xítoho Jesucristú nì sáháⁿ-gá nì xíndecu-gá nàcióⁿ Isràél, te nì xáhaⁿ-gá xii-yu ìⁿ tnúhu váha nàcuáa cuu váha iní-yu. Te ñiu-ni mee Jèsús cùnùu-gá núú ñáyiú nì càa xico ñuyíú. ³⁷ Te nàha-ndo sá ðihna-gá ndíi Juáá nì cáháⁿ ndíi tnúhu Yá Ndiöxí núú ñáyiú, te nì ðacuándüte ñaha ndíi xii-yu. Te ðatnùní nì ngúita Jèsús nì cáháⁿ-gá tnúhu-gá ðistritú Galiléa, te ðatnùní nì sáháⁿ-gá nihíi nàcióⁿ Isràél nì cáháⁿ-gá tnúhu-gá núú

ñáyiú. ³⁸ Te sa nàha-ndo sá Yá Ndiöxí nì sáñaha-gá Espíritú-gá xii Jèsús téè ñuú Nazàrè ndécú ndihi-dé chíndèe ñaha-xi xii-dé. Te nàha-ndo sá nì xica cuu Jèsús nì quide tátna-gá nchaa ñáyiú yíhi ñaha espíritú cùndihi yucu ñáváha. Te ío vài-gá sá váha nì quide ñaha-gá xii-yu, te ducaⁿ nì quide-gá, chi Yá Ndiöxí nì chindee ñaha-gá. ³⁹ Te mee-ndí nì xíní-ndí nàcuáa nì quide Jèsús ñuú Jerusalén ndihi nihíi nàcióⁿ Isràél. Te nì sata caa ñaha-güedé xii-gá núú cùrúxí te yàcáⁿ nì xíhí-gá. ⁴⁰ Te núú úní nduu nì ðándótó ñaha Yá Ndiöxí xii-gá. Te nì cuiní-gá sá cùndecu Xítoho Jesucristú titní nduu sáta nì ndoto-gá cuendá cáháⁿ ndihi ñaha-gá xii-ndí nchaa-ndí nàcuáa nì xica cuu-ndí ndihi-gá. ⁴¹ Te ñá ncháá ñáyiú nì xíní ñáhá xii-gá, chi mee-ni nchùhú cue téè nì cachí-gá sá càháⁿ ndáá-ndí sá nì ndoto-gá, chi nì xíndecu ndihi-ndí-gá, te nì xihí nì xexi-ndí ndihi-gá, núu càháⁿ ndáá-ndí sá nì ndoto-gá. ⁴² Te nì cachí-gá sá nchùhú quihíⁿ-ndí cúñaha-ndí xii ñáyiú sá mée Yá Ndiöxí nì táuchíúⁿ-gá sá Jèsús cada ndáá-gá cuèchi nchaa ñáyiú ndècu vívú ndihi cuèchi nchaa ñáyiú nì xíhí. Te ducaⁿ nì xáhaⁿ Yá Ndiöxí xii Jèsús, te ñiu-ni ducaⁿ nì cachí Jèsús cáháⁿ-ndí. ⁴³ Te cue téè nì cáháⁿ tnúhu Yá Ndiöxí ndéé sanaha nì cáháⁿ-güedé sá quixí Jèsús, te nì cachí-güedé sá ncháá ñáyiú na quíndáá iní ñáhá xii Jèsús, te cada càhnu iní-gá nchaa cuèchi-yu —cächí té Pèlú xáhaⁿ-dè xii-yu.

Nì quexio Espíritú Yá Ndiöxí nì ngúndecu ndihi cue ñáyiú ñá túú cùu ñáyiú isràél

⁴⁴ Te mei òrè càháⁿ-dè ndèdóho-yu nì quexio Espíritú Yá Ndiöxí nì ngúndecu ndihi nchaa ñáyiú-áⁿ. ⁴⁵ Te cue téè isràél cuáháⁿ ndihi té Pèlú, cue téè nì sándáá iní

tnúhu Jèsús ní cuñúhu vîhi-güedé sá ñí quexio Espíritú Yá Ndiöxí ní ngúndecu ndihí-yu, chi cuendá sá ñà díú ñâyü isrâél cúu-yu núu xiãⁿ ní cuñúhu-güedé. ⁴⁶ Te ní cutnùní sá ñí quexio Espíritú Yá Ndiöxí ní ngúndecu ndihí-yu, chi ní ngúita-yu càháⁿ-yu tnúhu sá dácàhu iní ñáhá Espíritú-gá, tnúhu sá ñà túú xini-yu càháⁿ-yu. Te ní ndacáⁿ táhü-yu núú Yá Ndiöxí cuendá nchaa sá ñí quide-gá. ⁴⁷ Te dàtnùní ní xáhaⁿ tē Pèlú:

—Vitna te cuandute ñâyü ní natuha ichi Xítohó Jesucristú chi sa ndècu ndihí-yu Espíritú Yá Ndiöxí dàtná cuiní-ndó ndècu ndihí nchoo, núu xiãⁿ vá cúú càchí dava-gá ñâyü sá vā cúú cuanduté-yu —càchí-dé xāhaⁿ-dē xii-yu.

⁴⁸ Te dàtnùní ní xáhaⁿ-dē xii ñâyü:

—Vitna te cuandute-ndo, te òré-áⁿ te cacunehe-ndo Xítohó Jesucristú —càchí-dé xāhaⁿ-dē xii-yu.

Te dàtnùní ní càháⁿ ndàhú-yu núú tē Pèlú cundecu ndihí ñaha-dē xii-yu ñú nduu.

11

Té Pèlú ní cani-dé cuendú núú ñâyü sándáá iní tnúhu Jèsús ñuú Jerusalén

¹ Te cue téé ní táuchíúⁿ Jèsús dacuàha ñaha xii ñâyü tnúhu-gá, ndihí cue ñâyü ní sándáá iní tnúhu-gá, ñâyü ndècu distritú Júdeá ní níhí-yu tnúhu sá ñâyü ñà túú cúú ñâyü isrâél ní sándáá iní-yu tnúhu Yá Ndiöxí. ² Te òré ní ndexio té Pèlú ñuú Jerusalén, te ñâyü isrâél ñâyü ní cachí sá cáda nchaa nacuáa ní càháⁿ ndí Moisés ní şatnuhu ñáhá-yu xii-dé. ³ Te ní xáhaⁿ-yu xii té Pèlú:

—¿Ná cuendá ní sáháⁿ-n ndéé ndiácaⁿ ní càháⁿ ndihí-n ñâyü-áⁿ, te ñà túú quide-yu dàtná quidé nchò-i? Te ní sáháⁿ-n yàcáⁿ

ní xexi-n ndihí-yu —càchí-yu xāhaⁿ-yu xii-dé.

⁴ Te té Pèlú ní cani-dé cuendú nacuáa ní cuu núú ní sáháⁿ-dē, te xāhaⁿ-dē:

⁵ —Ní xíndecu-í ñuú Jòpé. Te òré càháⁿ ndihí-í Yá Ndiöxí, te ní dácótó ñàha-xi xii-í sá vèxi cuuⁿ ñⁿ dóó càhnú àndü, te ndùtu ndi cumí xiquí-xi, te ní ngava-xi núú ndécü-í.

⁶ Te ní xíndéhé vāha-í, te ní xiní-í nchaa quiti yòdo núú-xi. Te ñⁿ xichi yòdo quiti cúmí sáhá-xi, te ñⁿ xichi yòdo quiti dééⁿ, te ñⁿ xichi yòdo cóó, te ñⁿ xichi yòdo quiti ndava. ⁷ Te ní tecú dóho-í càháⁿ ñⁿ sá càháⁿ, te càchí-xi: “Pèlú, ndacuñí cahni-n ndéda-ni càa quití-a caxi-n-dí”,

cachí sá ñí càháⁿ-áⁿ. ⁸ Te ní xáhaⁿ-í: “Vá càhni-í-dí chi càchí tnúhu sá sánú ichi ñaha xii nchúhú ñâyü isrâél sá vā cúú càxi-ndí nchaa quití-a”, xāhaⁿ-í. ⁹ Te ní tecú dóho-í càháⁿ-ni tucu núú ñinu, te càchí sá càháⁿ-áⁿ: “Vá cúú càchí-n sá vā cúú càxi-n-dí, chi mee Yá Ndiöxí ní cachí-gá sá díú nchaa quití-áⁿ

cuu caxi-o”, càchí sá càháⁿ-áⁿ. ¹⁰ Te ducaⁿ ñí càháⁿ sá ñí càháⁿ-áⁿ ùní xito, te dàtnùní cuándaá dóó-áⁿ ndihí nchaa quití-áⁿ andü. ¹¹ Te òré-ni ní quexio úmí cue téé vehe núú ndécü-í. Te cue téé-áⁿ ní tendaha ñaha ñⁿ téé ñuú Césareá nándücu ñaha-güedé xii-í. ¹² Te mee Espíritú Yá Ndiöxí ní cachí-xi sá quihíⁿ-í ndihí-güedé, te ní cachí-xi sá ñà túú ñà cani iní-í. Te tnàhá ñú cue téé ndècu iha ní sáháⁿ ndihí ñaha-güedé xii-í, te nchaa-ndí ní sáháⁿ-ndí vehe té Còrneliú ñuú Césareá. ¹³ Te ní cani-dé cuendú nacuáa ní cuu ní sáháⁿ ñⁿ espíritú xínú cuèchi núú Yá Ndiöxí vehe-dé,

te ní quíhu-xi ndéé xití vehe-dé, te ní xáhaⁿ-xi xii-dé: “Tendaha-n cué téé na quihíⁿ-güedé ñuú Jòpé quíngana-güedé ñⁿ téé nàni Xímú,

àdi Pelú chi úú diù-dé. Te candeca ñaha-güedé quixi. ¹⁴ Te téé-áⁿ cachí tnúhu-dé nāsa cada-n nāñihí tãhú-n ndihí ñadihí-n, ndihí landú-n, ndihí

nchaa ñáyu xínu cuechi vehe-n”, duha ní xáhaⁿ espíritú-áⁿ xii té Còrneliú. ¹⁵ Te òré ní ngúíta-í cáháⁿ ndihí-í-yu ní quexio Espíritú Yá Ndiöxí ní ngúndecu ndihí-yu dàtná ní quide-xi cùtnàhá ní taxi Yá Ndiöxí Espíritú-gá ndéé díhna ní ngúndecu ndihí nchoo. ¹⁶ Te ní ndacu iní-í nàcuáa ní cáháⁿ Xítóhó Jesucristú, te duha ní cachí-gá: “Té Juáa ní xóo dacuàndute-dé ñáyu, dico yúhú sãñaha-í Espíritú Yá Ndiöxí cundecu ndihí-yu”, duha ní cachí-gá. ¹⁷ Te Yá Ndiöxí ní sãñaha-gã Espíritú-gá cundecu ndihí ñáyu ñá túú cùu ñáyu isràél dàtná ní quide-gá cùtnàhá ní sándáa iní-ó tñúhu Jèsús, núu xíãⁿ vã càchí-í sá vã cúú càda-í ìⁿ sá cuìní Yá Ndiöxí cada-í —càchí té Pèlú xáhaⁿ-dè xii-yu.

¹⁸ Te sátá dúcáⁿ ñí xáhaⁿ tẽ Pèlú, te ñá túú-gã ná tñúhu ní cãháⁿ-yu, te ío ní cudíí iní-yu nchaa nàcuáa ní quide Yá Ndiöxí, te ní xitnàhá-yu:

—Tnàhá nchaa ñáyu ñá túú cùu ñáyu isràél naníhí tãhú-yu núu na dàñá-yu nchaa sá cuèhé sá dúhá quidé-yu, chi ducaⁿ cuìní Yá Ndiöxí cunduu —càchí-yu xitnàhá-yu.

Ñáyu sàndáa iní tñúhu Jèsús ñúú Antiòquiá

¹⁹ Te sátá ñí sahani-güedé té Tèvá, te ní cuìní-güedé cada úhú-güedé nchaa ñáyu ní sándáa iní-xi tñúhu Jèsús, te ní xíté nuú-yu ndi tnahá ìⁿ ìⁿ ñúú. Te davá-yu cuáháⁿ-yu ndéé distritú Fènicia ndihí distritú Chìpré ndihí ñúú Antiòquiá. Te ní cáháⁿ-yu tñúhu Jèsús núu mee-ni ñáyu isràél, te ñá ní xitnàhú-yu dava-gá-yu. ²⁰ Te dava-gá ñáyu distritú Chìpré ndihí ñáyu ñúú Cirené ní sáháⁿ-yu ñúú Antiòquiá. Te ñá díú mèe-ni ñáyu isràél ní cáháⁿ ndihí-yu, chi tnahá ñáyu ñá túú cùu ñáyu isràél ní xáhaⁿ-yu tñúhu Jèsús. ²¹ Te ní chindee ñaha-gá xii ñáyu càháⁿ tñúhu-gá, te vãi-gá-yu

ní sándáa iní-yu-gá chi ní tuhá-yu ichi-gá.

²² Te ñáyu ndècu ñúú Jerusàlén ñáyu ní sándáa iní tñúhu Jèsús ní níhí-yu tñúhu nàcuáa ní cuu, núu xíãⁿ ní tendàhá-yu té Bèé cuáháⁿ-dè ñúú Antiòquiá. ²³ Te òré ní quexio té Bèé, te ní xiní-dé nàcuáa ní quide ñaha-gã xii-yu sá ñí naníhí tãhú-yu, núu xíãⁿ ío ní cudíí iní-dé. Te ní dácáhu iní ñáhá-dè, te ní xáhaⁿ-dè:

—Ío nducu ndèe-ndo cada-ndo nchaa sá càchí Yá Ndiöxí cada-ndo —càchí-dé xáhaⁿ-dè xii-yu.

²⁴ Te té Bèé cúú-dè ìⁿ tée váha iní-xi, te ndècu ndihí-dé Espíritú Yá Ndiöxí, te ío sándáa iní-dé tñúhu Jèsús. Te vãi vihi ñáyu ní tuhá-yu ichi-gá.

²⁵ Te dàtnùní cuáháⁿ té Bèé ñúú Tarsú cuánúndúcú-dè té Sàulú. ²⁶ Te òré ní naníhí ñáhá-dè, te ndèca ñaha-dé cuáháⁿ ñúú Antiòquiá, te yàcáⁿ ní xindecu-güedé ìⁿ cuía ndihí ñáyu ní sándáa iní tñúhu Jèsús, te vãi-yu ní dácúhá ñaha-güedé tñúhu-gá. Te diu-ni ñúú Antiòquiá ní dánání ñáhá-yu Cristiànú xii nchaa ñáyu sándáa iní tñúhu Jèsús.

²⁷ Te ndéé dàvá-áⁿ ñí quee ìⁿ ùú cue tée càháⁿ tñúhu Yá Ndiöxí ñúú Jerusàlén cuáháⁿ-güedé ñúú Antiòquiá. ²⁸ Te ìⁿ-dè nání-dè Àgabú, te ní chindee ñaha Espíritú Yá Ndiöxí xii-dé, te ní sáháⁿ-dè núu nchaa ñáyu sándáa iní tñúhu-gá, te ní xáhaⁿ-dè xii-yu sá quíxí ìⁿ tnamá nihí ñuyíú. Te ducaⁿ ñí cuu sátá ñí ngúnutnii té Claudiú tée yindaha cuèhé nacióⁿ. ²⁹ Núu xíãⁿ nchaa ñáyu sándáa iní tñúhu Jèsús ñúú Antiòquiá ní ndatnúhu-yu sá chindèé-yu nchaa ñáyu sándáa iní tñúhu-gá ndécú distritú Júdeá cuèndá vã ndóhó vihí-yu docó. Te nàcuáa ní níhí-yu, te ducaⁿ ñí sacáⁿ tnahá-yu. ³⁰ Te ní tacá díhú-ãⁿ, te nèhe té Bèé ndihí té Sàulú cuáháⁿ, cuáha-güedé cue tée yindaha ñáyu sándáa iní tñúhu-gá.

12

Sátá nǐ xǐhí té Jàcobó, te ní ngava té Pèlú vecaá

¹ Te ndéé dàvâ-áⁿ nǐ ngüíta té Hèrodés téé yǐndaha ñaha xii ñáyiú isràél ní quide úhú-dé ìⁿ úú ñáyiú sàndáá iní tnúhu Yá Ndiòxí. ² Te ní táuchíúⁿ-dè ní tñi-güedé té Jàcobó ñani té Juáá, te ní sahní ñaha-güedé ndihi machiti. ³ Te ío ní cudíí iní dava ñáyiú isràél cuendá sá nǐ sahní ñaha-güedé xii té Jàcobó, núu xiáⁿ ní tendaha tucu té Hèrodés sandàdú-dé ní sáháⁿ tñi tucu-güedé té Pèlú. Te ducaⁿ nǐ quide-dé cútnáhá ní xóo vico ní xexí-yu pàá sá ñà túú yìhi levadurá. ⁴ Te ní naníhí-güedé té Pèlú, te ní tñi ñaha-güedé ndécá ñaha-güedé cuáháⁿ vecaá. Te té Hèrodés ní táuchíúⁿ-dè cuáháⁿ sáhúⁿ ìⁿ sandàdú cundeé-güedé té Pèlú. Te ní xáhaⁿ-dè:

—Cundeé-ndó ndì cúmí ndì cúmí-ndó tēe-ǎⁿ—càchí-dé xáhaⁿ-dè xii-güedé.

Te té Hèrodés ní sani iní-dé queñuhu-dé té Pèlú vecaá òrè ná yáha vico cuendá cahni ñaha-güedé cáhán-dè ní cùu. ⁵ Te ní xǐhí-ni té Pèlú vecaá, te ní xindeé cuaa ñaha sàndadú xii-dé. Te cue ñáyiú sàndáá iní tnúhu Yá Ndiòxí ío ní xicáⁿ tǎhú-yu núú-gá cuendá sá ñà túú nǎ cada ñaha-güedé xii-dé.

Yá Ndiòxí ní dácăcu-gá té Pèlú vecaá

⁶ Ìⁿ niú-gá quíhi té Pèlú vecaá ní cùu, te nduu tnéé tauchiúⁿ té Hèrodés quíhíⁿ sandàdú queñuhu ñaha-güedé xii-dé vecaá cuendá quini nchaa ñáyiú nása cada ñaha-güedé ní cùu. Te té Pèlú cáá-dè xidí-dé xití vecaá, te ndi ndúú dúcúⁿ ndáhá-dé ndútú càdená, te xio xio dǐñi-dé ndécú sandadú, te dava-gá sandàdú xindeé-güedé yèhe vecaá. ⁷ Te ní quexio ìⁿ espíritú xínú cuèchi núú Yá Ndiòxí xití vecaá núú cáá té Pèlú xidí-dé, te uuⁿ ní dáyehé-xi

xití vecaá, te ní danguǐhi ñaha-xi xii-dé, te xáhaⁿ-xi xii-dé:

—Yáchí, ndàcáo —càchí-xi xáhaⁿ-xi xii-dé.

Te ní ndacáo-dé, te nchaa cadená ndútú dúcúⁿ ndáhá-dé ní nandáxí. ⁸ Te ní xáhaⁿ tucu espíritú-áⁿ xii-dé:

—Yáchí, nucuǐhnu dóó-n, te ndíhu-n chàu-n —càchí-xi xáhaⁿ-xi xii-dé.

Te ní ndíhu nuu-dé dóó-dé, te ní xáhaⁿ tucu espíritú-áⁿ:

—Candixi dóó-n, te na quíhíⁿ-ó —càchí-xi xáhaⁿ-xi xii-dé.

⁹ Te té Pèlú ní chinchícúⁿ-dé espíritú-áⁿ, te ñá ní cùtnuní iní-dé núu ndáá ìⁿ espíritú xínú cuèchi núú Yá Ndiòxí ducaⁿ quide àdi ñáhá, te dàcoto ñaha-xi xii-dé ní sani iní-dé. ¹⁰ Te ndèndaha-ni-dé espíritú-áⁿ cuáháⁿ

ní yáha-dé nàcuáa xǐnutnǐ sandàdú, te ta yáha-gá-dé núú ndécú dàva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáháⁿ ndéé xití ñuu, te ní nacaáⁿ mée yèhe-áⁿ, te ní quee-dé cuáháⁿ-dè ndihi espíritú-áⁿ. Te ní tnahá-dé ìⁿ tnuú, te yàcáⁿ ní dándóo ñaha espíritú-áⁿ xii-dé. ¹¹ Te dàtnuní ní nene yáha sani núú-dé, te ní cutnùní iní-dé, te ní cachí-dé:

—Ndáá sá Yá Ndiòxí ní tendaha-gá espíritú-áⁿ ní quixi-xi ní dácăcu ñaha-xi xii-í cuendá sá và cáhni ñaha té Hèrodés. Te dava ñáyiú isràél ío ní cudíí iní-yu cuendá sá nǐ cuini té Hèrodés cahni ñaha-dé xii-í —duha ní cachí-dé sátá nǐ cutnùní iní-dé.

¹² Te sátá nǐ cutnùní iní-dé sá nǐ cácu-dé, te cuáháⁿ-dè vehe ìⁿ ñaha nàni Mariá náná té Juáá, àdi Mácú chí úú dǐu-dé, te xiáⁿ ndécú vai-yu càhán ndihí-yu Yá Ndiòxí. ¹³ Te té Pèlú ní quexio-dé ndéé yuyèhe ní dácásáⁿ-dè, te ní quixi ìⁿ xíchí nání Ròdè ní quixi ndehe-xi nǎ cúú ñáyiú dàcăsaⁿ. ¹⁴ Te ní nucuǐhuⁿ ndudú-xi sá díú té Pèlú, te ní cudíí víhí iní-xi, dico ñá ní nàcaáⁿ-xí yuyèhe. Te ní quene cunu-xi cuáháⁿ ngüñaha-xi

xii-yu sá nútn̄hí té Pèlú yuyèhe ndaa quehé. ¹⁵ Te ñá ní sàndáá iní-yu tnúhu ní cáháⁿ-xi, te xáháⁿ-yu xii-xi:

—¡Ná tnúhu vihi cáháⁿ-õⁿ xíchi lúcú! —càchí-yu xáháⁿ-yu.

Te xáhaⁿ-xi sá ndàá nútn̄hí-dé, te xáháⁿ-yu:

—Ñá díú tē Pèlú chi espíritú sá xító ñaha xii-dé cúú sá cáháⁿ —càchí-yu xáháⁿ-yu xii-xi.

¹⁶ Te òré ducaⁿ xitnàhá-yu, te té Pèlú ní dácásáⁿ tùcu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tē Pèlú, te ní cuñúhu vihi-yu. ¹⁷ Te ní quide-dé ndaha-dé núu-yu cuèndá cadí-yu yuhú-yu. Te ní ngúita-dé ní cani-dé cuèndú nàcuáa ní quide ñaha Yá Ndiõxí xii-dé sá ní dácäcu ñaha ñⁿ espíritú xínú cuèchi núu-gã xii-dé vecaá, te ní xáhaⁿ-dē xii-yu:

—Cúu-ndo tē Jácobó ndihi dava-gá ñáyiú sàndáá iní tnúhu Jèsús nàcuáa ní quide ñaha Yá Ndiõxí xii-í —càchí-dé xáhaⁿ-dē xii-yu.

Te sátá dúcáⁿ ní xáhaⁿ-dē, te ní quee-dé cuáháⁿ-dē ingá xíchi.

¹⁸ Te sátá ní tundaá, te ní ngúita nchaa sandàdú cáháⁿ ñⁿ cáháⁿ ñⁿ-güedé, te xitnàha-güedé:

—Ñá túú-gã té Pèlú yíhi vècaá, ¿te nása cada-o-í? —càchí-güedé xitnàha-güedé.

¹⁹ Te té Hèrodés ní tendaha-dē titn̄í sandàdú cuáháⁿ-güedé cuánúndúcú ñaha-güedé, te ñá ní nánihí ñáhá-güedé xii-dé. Te dàtn̄n̄í ní cana-dé sandàdú cue tée ní xindeé ñáhá xii té Pèlú, te ní tenáá ñáhá-dē xii-güedé, te ní xáhaⁿ-dē xii dava-gá cue sandàdú-dé:

—Cahni-ndo cuè tée-ãⁿ —càchí té Hèrodés xáhaⁿ-dē.

Te dàtn̄n̄í ní quee té Hèrodés distritú Júdeá cuáháⁿ-dē ñuú Cèsareá, yacáⁿ ní ngúndecu-dé.

Ní xíhi té Hèrodés

²⁰ Té Hèrodés ní cudééⁿ-dē núú ñáyiú ñuú Tirú ndihi núú ñáyiú ñuú

Sidón. Te xíãⁿ ní ndatnúhu-yu ní cuu ñⁿnuu tnúhu-yu, te ní xicá-yu cuáháⁿ-yu cuáháⁿ ndatnúhu ndihi ñáhá-yu xii-dé, te ní ndatnúhu ndihí-yu té Blástú. Te tée-áⁿ cúú-dē chùⁿ quide-dé núú tē Hèrodés, te ní chindee tnúhu ñaha-dē xii-yu, chi ní cáháⁿ ndàhú-yu núú tē Hèrodés sá vã cádá ùhú ñáhá-dē xii-yu. Te ducaⁿ ní quide-yu cuèndá ñuú té Hèrodés-áⁿ queé sá xéxi-yu. ²¹ Te ní xáhaⁿ tē Hèrodés ná nduu quíñⁿ-yu ndatnúhu ndihi ñaha-dē xii-yu, te nduu-ãⁿ ní quíunuu-dé ñⁿ dóó váha, ñⁿ sá sácuñhu tée tàxi tnuní. Te ní ngóo-dé núú xilé váha, xilé sá sácõ nchihi tée tàxi tnuní, te ní ngúita-dé ní cáháⁿ sàhú-dé dóho-yu. ²² Te uuⁿni ní cuáá-yu te càchí-yu:

—¡Tée-a cáháⁿ-dē dico ñá díú tē ñuyíú-a cúú-dé chi ndiõxí cúú-dé! —càchí-yu xitnàhá-yu.

²³ Te ñuú-ñi òré-áⁿ ní yáha ñⁿ espíritú xínú cuèchi núú Yá Ndiõxí, te ní sáñaha-xi cuéhé xii té Hèrodés. Te ducaⁿ ní tnahá-dé chi mee-dé ñá ní xáhaⁿ-dē sá ñáyiú cúú-dé, te ní cáháⁿ-yu sá ndiõxí cúú-dé. Te nchìto-gá-dé ní sanú ñáhá tìndácú xii-dé, te dàtn̄n̄í ní xíhí-dé.

²⁴ Te ío titn̄í xíchi ní sáháⁿ ñáyiú sàndáá iní tnúhu Yá Ndiõxí ní cáháⁿ-yu tnúhu-gá, te ío chitú-yu ní sàndáá iní-yu tnúhu-gá.

²⁵ Te té Bèé ndihi té Sàulú ní ndihi chùⁿ-güedé, te ní ndee-güedé ñuú Jerusalén cuáháⁿ-güedé ndihi té Juáá, àdi Mácú chi úú ñuú-dé.

13

Té Bèé ndihi té Sàulú cuáháⁿ-güedé dácuaⁿha-güedé ñáyiú tnúhu Yá Ndiõxí nchaa ñuú xicá

¹ Te ñuú Antiòquia ndécú ñⁿ úú cue tée cáháⁿ tnúhu Yá Ndiõxí núú nchaa ñáyiú ní sàndáá iní-xi tnúhu-gá. Te ndècu tucu ñⁿ úú cue tée cúu mestrú dácuaⁿha ñaha-güedé xii-yu tnúhu-gá. ñⁿ-dē nání-dē Bèé, te ñⁿ-dē nání-dē Xímú, te té

Xímú-áⁿ xáhaⁿ-güedě Nęgrú chi tnuu-dě. Te ingá-dé nání-dě Lúciú, te té-áⁿ cúú-dě téé űúú Cirené. Te ingá-dé nání-dě Sàulú, te ingá tucu-dé nání-dě Manàen. Te té Manàen-áⁿ ndihí té Hērōdés téé cūu gobiernú Galileá ío váha ní xóo cáháⁿ ndihí tnàha-güedé cútnàhá ní cuu lĩhli-güedé. ² Te ĩⁿ nduu űá túú nà ní xèxi űáyiú ní sándáá ínı tnúhu Yá Ndióxi cuendá mee-ni-gã ní cáháⁿ ndihı-yu, te ní xáhaⁿ Espiritú Yá Ndióxi xii-yu:

—Tendaḡa-ndo tē Bèè ndihı té Sàulú quihıⁿ-güedé dava-gá űúú cada-güedé chiúⁿ tahu-ı, chi ducaⁿ cuinı-ı cunduu —càchı Espiritú-gá xáhaⁿ-xi xii-yu.

³ Te ní cáháⁿ ndihı tucú-yu Yá Ndióxi, te űá túú tnàhı ná ní xèxi tucú-yu, te ní sacáⁿ ndodo-güedé ndaha-güedé díquí tē Bèè ndihı té Sàulú. Te sátá dúcáⁿ nı quide-güedé, te ní quide ndee ínı űáhá-yu xii-güedé.

Té Bèè ndihı té Sàulú cuáháⁿ-güedé distritú Chıpré cáháⁿ-güedé tnúhu Yá Ndióxi

⁴ Te té Bèè ndihı té Sàulú ní quee-güedé cuáháⁿ-güedé cuendá ducaⁿ cuinı Espiritú Yá Ndióxi cunduu sá cacá cūu-güedé dava-gá űúú, te ní quexıo-güedé űúú Selèuciá, te yàcáⁿ ní quee-güedé bàrcú cuáháⁿ-güedé distritú Chıpré. Te űúú-áⁿ cáá xitı lámár chi ndècu űuhu yichı xitı ndute. ⁵ Te ní quexıo-güedé mei űúú Saláminá, te ní quene-güedé bàrcú, te ní xica-güedé cuáháⁿ-güedé nchaa veñúhu űáyiú isràel cáháⁿ-güedé tnúhu Yá Ndióxi. Te cuáháⁿ ndihı-güedé té Juáá cuendá chindee űàha-dé xii-güedé. ⁶ Te ní tñı-güedé ichi cuáháⁿ-güedé űúú Páfós cáá ndàa ingá xio Chıpré, te yàcáⁿ ní nanıhı tnàhá-güedé ndihı ĩⁿ téé isràel nání-dě Barjèsús, te té-áⁿ xını-dé cada ndúu-dé, te càchı-dé sá cáháⁿ-dé tnúhu Yá Ndióxi dico űá ndáá. ⁷ Te té-áⁿ

quidé chiúⁿ-dé ndihı té Sęrgiú, àdi Páblú chi úú ñıu-dé, te cūu-dé gobiernú Chıpré, te ío túha-dé. Te ní cana-dé té Bèè ndihı té Sàulú, chi cuinı-dé cundedóho-dé tnúhu Yá Ndióxi. ⁸ Te téé quide nduu-áⁿ űá ní dàña-dé cáháⁿ-güedé tnúhu-gá, chi űá ní cuinı-dé sá téé cūu gobiernú-áⁿ tuha-dé ichi Yá Ndióxi. Te ducaⁿ nı quide té Barjèsús, téé xáhaⁿ-güedé Èlimás. ⁹ Te tnàhá tucu té Sàulú ndécú úú ñıu-dé chi xáhaⁿ tucu-güedé Páblú, te ndècu ndihı-dé Espiritú Yá Ndióxi. Te ní xındéhé űıı űáhá-dé xii téé quide nduu-áⁿ. ¹⁰ Te ní xáhaⁿ-dē:

—Yòhó, chi dàtná quidé yùcu űávàha quide-n chi mee-ni dándahú-n űáyiú. Yòhó cúú-n dēhe sácúfná, chi nchaa tnúhu váha cuinı Yá Ndióxi cáháⁿ-yu, te yòhó űá dáñá-n. ¹¹ Te vitna quini-n nàcuáa cunduu, chi taxi Yá Ndióxi ĩⁿ castıú xii-n chi vá cútnunı-gá núu-n càca cuu-n ĩⁿ úú nduu —càchı-dé xáhaⁿ-dē xii téé quide nduu-áⁿ.

Te òré ducaⁿ nı xáhaⁿ tē Páblú xii-dé, te òré-nı ní cuaa-dé, te űá túú ní cùtnunı tnàhı-gá núu-dé, te ní xóo nducu-ná-dé űáyiú ní xóo cuita nehe űàha xii-dé. ¹² Te téé cūu gobiernú ní xını-dé nàcuáa ní quide té Páblú, te ío ní cuñúhu-dé. Te ní tnàhá ínı-dé tnúhu Jèsús, núu xıáⁿ ní sándáá ínı-dé.

Té Páblú ndihı té Bèè ndécú-güedé űúú Antióquia Pısidıá

¹³ Te té Páblú ndihı dava-gá cue téé xıca cuu ndihı-dé ní quee-güedé bàrcú, te ní quee-güedé űúú Páfós cuáháⁿ-güedé űúú Pęrgé, te űúú-áⁿ yındèhu-xi distritú Pánfiliá. Te té Juáá ní nacuico-dé ní dándóo űàha-dé xii-güedé cuánuhú-dé űúú Jerusalén. ¹⁴ Te dava-gá-güedé ní quee-güedé űúú Pęrgé cuáháⁿ-güedé űúú Antióquia, te Pısidıá yındàha-xi űúú-áⁿ. Te nduu xındetatú-yu, te ní sáháⁿ-güedé veñúhu űáyiú isràel, te ní ngóo-güedé xitı veñúhu. ¹⁵ Te cue

tée ndècu veñúhu ní queheⁿ-güedé tutú yódó tnùní nchaa tnúhu sá ní chídó tnùní ndíi Moisés ndihí tutú yódó tnùní nchaa tnúhu sá ní chídó tnùní dava-gá cue tée ní xóo cáháⁿ tnúhu Yá Ndiòxí ndéé sanaha, te ní dácuhá-güedé ní xíndedóho cue ñáiyu, te dàtnùní cue tée yíndaha veñúhu-áⁿ ní xáhaⁿ-güedé xii té Páblú ndihí dava-gá-güedé:

—Nchòhó cue tée cùu ñaní tnáhá-ndí, te núu cuíní-ndó cáháⁿ-ndó tnúhu Yá Ndiòxí, te cuu cáháⁿ-ndó tnàvíí cuèndá cutúha-yu —càchí-güedé xáhaⁿ-güedé.

¹⁶ Te té Páblú ní ndacuíñí-dé, te ní ndacani-dé ndaha-dé cuèndá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dè:

—Te nchòhó ñáiyu quide nchaa nacuaá cáháⁿ Yá Ndiòxí ndihí nchaa nchòhó ñáiyu isràél, cundedóho-ndo ncháa-ndo ñⁿ tnúhu na cáháⁿ-í-a. ¹⁷ Te cuèí ndéé sanduu te cuèí vitna chindee ñaha-ní Yá Ndiòxí xii nchaa ñáiyu isràél, te ní nacáxi ñaha-gá xií-yu te ní chindee ñaha-gá cuèndá cáyá-yu, chi cuíní-gá sá cúu vai-yu, te ducaⁿ ní quide-gá cútnáhá ní xíndecú-yu nacióⁿ Ègiptú. Te dàtnùní ní dácacu ñaha-gá xií-yu ñuu-áⁿ, chi mee-gá nchaa ndàcu-gá quidé-gá. ¹⁸ Te ní xíndecú-yu ñⁿ xichi núu ñà túú tnáhí sàcúndecu ñáiyu údico cuíá, te xití údico cuíá-áⁿ ní cundee ìní-gá nchaa sá ní quidé-yu. ¹⁹ Te Yá Ndiòxí ní chindee ñaha-gá xii ñáiyu isràél, te ní dánáá-yu úsá nacióⁿ, chi cuèndá ní cuíní-gá cuu cuèndá-yu ñuhú-áⁿ. ²⁰ Te dàtnùní ní cachí Yá Ndiòxí sá díú-ní cue tée cùchuuⁿ taxi tnuni-güedé nchaa ñáiyu, te ducaⁿ ní quide-güedé dàtná cùmí cièndú dava cuíá. Te sáta xǎⁿ, te ní xíndecu té Sàmuél tée ní cáháⁿ tnúhu Yá Ndiòxí. ²¹ Te dàvá-áⁿ ní cuíní ñáiyu isràél sá cùndècu ñⁿ tée quíndaha ñaha-dé xií-yu, te Yá Ndiòxí ní cachí-gá sá té Sàúl quíndaha-dé-yu, te tée-áⁿ ní cuu-dé déhe té Cís, te té Benjámin tée ní xíndecu ndéé

sanaha-gá ní cuu ñaní tnáhá-dé. Te té Sàúl ní xíndaha-dé ñáiyu údico cuíá. ²² Te Yá Ndiòxí ñá ní cuíní-gá cundecu-ni-dé quíndaha-dé ñáiyu, chi ní cuíní-gá sá té Dàvíí ndíhu ndaha-dé cue ñáiyu isràél, te ní cachí-gá: “Ío váha ní tnahá iní-í nàcuáa quide té Dàvíí déhe tée Isàí, te cada-dé nchaa nàcuáa cùñaha-í xii-dé”, duha ní cachí Yá Ndiòxí —càchí té Páblú xáhaⁿ-dè xií-yu.

²³ Te ní xáhaⁿ tucu té Páblú:

—Díu-ni ñaní tnáhá té Dàvíí cúu Jèsús. Te Yá Ndiòxí ní tendaha-gá Jèsús ní quixi-gá ñuyíú-a cuèndá nchaa ñáiyu isràél ná quíndáá iní ñáhá xii Jèsús naníhí tàhú-yu, chi ducaⁿ ní cachí Yá Ndiòxí cunduu. ²⁴ Te cútnáhá vátá ngùíta-gá Jèsús cáháⁿ-gá tnúhu Yá Ndiòxí, te ní cáháⁿ té Juáá núu ñáiyu isràél sá xíní ñùhu-xi dañá-yu nchaa sá cuèhé sá dúhá, te cuanduté-yu. ²⁵ Te sa ta cùyatni-ni-gá cuú-dé, te ní xáhaⁿ-dè xií-yu: “Nchòhó càchí-ndó sá yùhú cùu-í Cristú Yáá ndétú-ndó dico ñáhá, chi ñá díú yùhú cùu-í Cristú, chi davitna quixi Cristú Yáá tendaha Yá Ndiòxí quixi ñuyíú-a. Te yùhú cùu-í ñⁿ tée duuⁿ duuⁿ ñá túú tau nandaxi cuèdicó cháú-gá dico quide-í chiurⁿ-gá”, duha ní cáháⁿ te Juáá —càchí té Páblú xáhaⁿ-dè xií-yu.

²⁶ Te ní xáhaⁿ tucu té Páblú:

—Cundedóho tucu-ndo ìngá tnúhu na cáháⁿ-í. Nchòhó tnáhá-ndó cùu-ndo ñaní tnáhá ndíi Abrahám, te xíní-ndó sá Yá Ndiòxí cùnùu-gá. Te díu-ni-gá cuíní-gá sá ncháá-ndó cundedóho-ndo tnúhu-gá, chi cùu-xi tnúhu sá cáháⁿ nàcuáa naníhí tàhú-ndó. ²⁷ Te nchaa ñáiyu ndècu ñuu Jerusàlén ndihí nchaa cue tée cùnuu ñá ní cùtnuní iní-yu ndihí-güedé sá Yá Ndiòxí ní tendaha-gá Jèsús ní quixi-gá ñuyíú-a. Te ñá ní sàha-yu cuèndá sá díú Jèsús ní cacunehe cue tée ní cáháⁿ tnúhu Yá Ndiòxí ndéé sanaha cuèí ní dácuhá-yu

tnúhu-gá veñúhu-yu ndi tnahá úná nduu, nduu ndetátú-yu. Te ní cachí-yu sá ndècuéchi Jèsús, te ní xáháⁿ-yu sá cáhni ñaha-güedé xii-gá. Te xíaⁿ sa náha cue téé ní xóo cáháⁿ tnúhu-gá ndéé sanaha sá dúcáⁿ cãháⁿ-yu. ²⁸ Te cuéi ñá túú nã ní quide-gá te ní xáhãⁿ-yu xii té Pilatú téé cùu gobiernú sá táúchìuⁿ-dé cahni ñaha-güedé xii-gá. ²⁹ Te xíaⁿ núu ní sata caa ñaha-güedé xii-gá núú cùrúxí. Te ní quide-güedé nchaa nãcuáa ní chídó tnùnì cue téé ní cáháⁿ tnúhu Yá Ndiòxí ndéé sanaha. Te sátá nì xihí-gá, te ní nunehe ñaha-güedé xii-gá núú cùrúxí, te nchìdo ñaha-güedé cuáhãⁿ, te ní chihì ñaha-güedé ìⁿ xití yaú. ³⁰ Te Yá Ndiòxí ní dándótó-gã Jèsús. ³¹ Te titní xito ní sáhãⁿ Jèsús núú ndécú ñáyiu ní xica cuu ndihì-gá, ñáyiu ní quee distrítu Galileá ní sáhãⁿ-yu ndihì-gá ñuú Jerusálén. Te vitna nchaa ñáyiu-áⁿ xáhãⁿ-yu xii dava-gá ñáyiu isràél nãcuáa ní cuu ní ndoto-gá.

³² Te nchúhú cãháⁿ-ndí nãcuáa cada-ndo naníhí tãhú-ndó, chí Yá Ndiòxí ní xáhãⁿ-gã xii cue ñani tñáhã-ó nì xindecu ndéé sanaha sã téndãha-gã Déhe-gã Jèsús quixi-gã ñuyú-a. ³³ Te ní quixi-gá ní xihí-gá, te ní dándótó ñaha Yá Ndiòxí xii-gá, te núu xíaⁿ naníhí tãhú-ó núu na quindáa iní-ó-gã. Te ìⁿ téé ní cáháⁿ tnúhu Yá Ndiòxí ndéé sanaha ní chídó tnùnì-dé núú sãlmú cúú úú nãcuáa ní cáháⁿ Yá Ndiòxí ní xáhãⁿ-gã xii Déhe-gá, te duha ní xáhãⁿ-gã: “Yòhó cúú-n Dèhe-í, te vitna cutnùnì iní ñáyiu sá yùhú cúú-í Tãtã-n”, duha ní xáhãⁿ-gã xii Jèsús. Te ñiu-ni ducaⁿ nì chídó tnùnì téé ní cáháⁿ tnúhu-gá ndéé sanaha. ³⁴ Te ingá xichì tucu núú tütú-gá ní chídó tnùnì ìⁿ téé ní xindecu ndéé sanaha nãcuáa ní xáhãⁿ-gã xii Déhe-gá, te duha ní xáhãⁿ-gã: “Mee-nì sã vãha cada ñaha-í dàtná ní xí-í té Dàvíí”, duha

ní xáhãⁿ-gã. Te ducaⁿ nì chídó tnùnì téé ní xindecu ndéé sanaha nãcuáa ní cáháⁿ Yá Ndiòxí, chí òré ní xihí Jèsús te ní dándótó ñaha-gã cuendá sã vã tíú yiqui cuñú-gã. ³⁵ Te núu xíaⁿ duha ní chídó tnùnì ìⁿ téé ní xindecu ndéé sanaha núú librú Sãlmú nãcuáa ní xáhãⁿ-dè xii-gã: “Vã dáñã-n sã tíú yiqui cuñú Déhe-n chí ío vãha quide-gã”, duha ní chídó tnùnì téé ní xindecu ndéé sanaha — cáhí té Pãblú xáhãⁿ-dè xii-yu.

³⁶ Te xáhãⁿ tucu-dé:

—Te té Dàvíí ní quide-dé nchaa chiúⁿ ní tãhú Yá Ndiòxí cada-dé, te dàtnùnì ní xihí-dé. Te ní chindúxi ñaha-güedé xii-dé yatni nãcuáa yindúxi cue ñani tñáhã-dè ndéé sanaha-gã, te xíaⁿ nì téhyú yiqui cuñú-dé. ³⁷ Te Jèsús chí ñá ní téhyú yiqui cuñú-gã, chí ní dándótó ñaha Yá Ndiòxí xii-gã. ³⁸ Te cuiní-í cachí tnúhu-í xii-ndo cuendá cutnùnì iní-ndo nchaa-ndo sã cadá càhnu iní Yá Ndiòxí nchaa cuéchi-o, chí ní xihí Jèsús cuendá naníhí tãhú-ó.

³⁹ Te nchaa ñáyiu na quindáa iní ñáhã xii Jèsús te cada càhnu iní-gã nchaa sã ñã túú vãha ní quide-yu, chí núu mee-ni tnúhu ní chídó tnùnì ndí Moisés ná quindáa iní-yu te vã naníhí tãhú-yu. ⁴⁰⁻⁴¹ Te ío coto-ndo mèe-ndo cuendá sã vã yãha-ndo dàtná ní cachí Yá Ndiòxí yãha cue ñáyiu ñã túú ní quide vãha ní xindecu ndéé sanaha. Te nãcuáa ní cáháⁿ-gã ní chídó tnùnì ìⁿ téé ní cáháⁿ tnúhu-gã ndéé sanaha, te duha ní xáhãⁿ-gã xii-yu dàvã-áⁿ:

Cundedóho nchaa nchòhó ñáyiu cuèhé yuhu-xi na cáháⁿ-í ìⁿ tnúhu te quiní-ndó nã cuñúhu-ndo,

yúhú quidè-í vãi núú sã ío vãha vitna ndècu-ndo ñuyú-a, te cuéi na còo ñáyiu cachí tnúhu xii-ndo nãcuáa ndúu nchaa sã vãha-áⁿ, dico nchòhó vã quindáa iní-ndó,

te sã dúcãⁿ càda-ndo vã quindáa iní-ndó, te dàcuíta ni-hnu-ndo mèe-ndo.

Duha ní xáhaⁿ-gã xii-yu te ducaⁿ ní chídó tnúni téé ní cáháⁿ tnúhu-gá ndéé sanaha —càchí té Páblú xáhaⁿ-dë xii-yu.

⁴² Te òré ní ndee té Páblú veñúhu ñáiyu isràél ndihí cue téé xica cuu ndihí-dé, te ní cáháⁿ ndàhú ñáiyu yihí veñúhu núú-dë sá quihíⁿ-dé núú ùná nduu, te ñu-ni tnúhu ní cáháⁿ-dé cáháⁿ tucu-dé òré quexio-dé. ⁴³ Te sáta ní túhú veñúhu-yu, te vai ñáiyu isràél ndihí ñáiyu ní chitnahá ñáhá xii-yu nchícúⁿ nihnu quide nacuaá quide-yu càháⁿ ndihí-yu Yá Ndiòxí cuáháⁿ ndihí-yu té Páblú ndihí té Bèé. Te ní xáhaⁿ-güedë xii-yu sá vã dáñá ndéé-yu canchicúⁿ nihnú-yu tnúhu sá càháⁿ nàcuáa quide Yá Ndiòxí sá cúú-xi-yu.

⁴⁴ Te núú ùná nduu, nduu ndetátú-yu ní quexio vai vihi ñáiyu, chi nihí ñuú ní quexio ndedóho-yu tnúhu Yá Ndiòxí. ⁴⁵ Te cuendá sá ño vai ñáiyu ní quexio, núú xiáⁿ ní cuu cuédú íní ñáhá ñáiyu isràél xii té Páblú, te ní xícuèhé ñáhá-yu xii-dé. Te ní xáháⁿ-yu xii-dé sá dándàhú ñáhá-dë xii-yu ndihí tnúhu càháⁿ-dé. ⁴⁶ Te té Páblú ndihí té Bèé ñá túú ní yùhú ñáhá-güedë xii-yu. Te ní xáhaⁿ-güedë:

—Xini ñuhu-xi díhna-gá nchòhó ñáiyu isràél cáháⁿ ndihí-ndí tnúhu Yá Ndiòxí, te mee-ndo ñã cuíni-ndó cündedóho-ndo. Te sá dúcáⁿ quide-ndo, te vã nánihí tàhú-ndó, te ni vã càháⁿ-gá-ndí tnúhu Yá Ndiòxí núú-ndó, dico cáháⁿ-ndí núú dàva-gá ñáiyu cuèi ñá díú ñáiyu isràél cúú-yu, ⁴⁷ chi ducaⁿ ní táuchíúⁿ Yá Ndiòxí cada-ndí. Te ní cachí-gá:

Cuini-í cundecu-ndo dàtná ñiⁿ téé yòtnuú ñuhú cundecu-ndo càháⁿ-ndó tnúhu-í núú nchàa ñáiyu ñá túú cündihí-ndo ñáiyu ndècu nihí ñuyúú, te naníhí tàhú-yu, duha ní cáháⁿ-gá —càchí té Páblú ndihí té Bèé xáhaⁿ-güedë xii-yu.

⁴⁸ Te ñáiyu ñá túú cùu ñáiyu isràél ño ní cudíí íni-yu sá dúcáⁿ ní cáháⁿ-güedë, te ní xitnàhá-yu sá ño váha cuáháⁿ tnúhu Yá Ndiòxí. Te mee Yá Ndiòxí sa nàha-gá nándi cùu ñáiyu naníhí tàhú, te ñu-ni ñáiyu-áⁿ ní sándáá íni-yu. ⁴⁹ Te nchaa xichi xiáⁿ ní sáháⁿ-yu ní cáháⁿ-yu tnúhu-gá. ⁵⁰ Te cue téé isràél ní ndatnúhu-güedë ndihí cue téé cùnuu, ndihí cue ñáiyu ñihí cùnùu, te ñáiyu ñihí-áⁿ ñã túú tnàhí cùmáñi-yu veñúhu. Te ní xáhaⁿ-güedë sá cadá ùhú-yu té Páblú ndihí té Bèé, te dàtnúni cuícúⁿ ñáhá-yu xii-güedë, te ducaⁿ ní quide-yu. ⁵¹ Te ní casaⁿ ñuhu té Páblú ndihí té Bèé sáhá-güedë ní naquidi-güedë tíca chúhmá ní tñi sáhá-güedë. Te ducaⁿ ní quide-güedë cuendá cutnùni íni-yu sá ñã túú ní quide váha-yu. Te dàtnúni ní quee-güedë cuáháⁿ-güedë ñuú Ìconiú. ⁵² Te ñáiyu ní sándáá íni-xi tnúhu Jèsús ño váha ní cuu íni-yu cuendá sá ní naníhí tàhú-yu, te nchaa-yu sa ndècu ndihí-yu Espiritú Yá Ndiòxí.

14

Té Páblú ndihí té Bèé ndécú-güedë ñuú Ìconiú

¹ Te ní quexio té Páblú ndihí té Bèé ñuú Ìconiú. Te ní sáháⁿ-güedë veñúhu ñáiyu isràél, te ño váha ní cáháⁿ-güedë tnúhu Yá Ndiòxí, te vai ñáiyu isràél ndihí ñáiyu ñá túú cùu ñáiyu isràél ní sándáá íni-yu tnúhu-gá. ² Te dava ñáiyu isràél ñã ní sándáá íni-yu, te ní cáháⁿ cuèhé-yu cuendá té Páblú ndihí té Bèé cuendá sá vã quindáá íni ñáiyu ñá túú cùu ñáiyu isràél. ³ Te ní xindecu-güedë titní nduu, te ñã túú tnàhí ní yùhú-güedë ní dácúáhá-güedë ñáiyu tnúhu Yá Ndiòxí. Te mee-gá ní chindee ñàha-gá ní quide-güedë titní núú sã vã yòo tnàhí ndàcu cada, te

ío ní cuñúhu-yu. Te ducaⁿ ní quide-gá cuendá cutnùnì iní-yu sá ndáá càháⁿ-güedé sá méé-gá ío cùu iní ñáhá-gá xii-yu, te naníhí tãhú-yu núu na quindáá iní-yu tnúhu-gá. ⁴ Te ní quee dava ñáiyu ñúú Ìconiú, davá-yu cùndihí-yu ñáiyu isràél ñáiyu ñá túú sãndáá iní tnúhu Jèsús. Te davá-yu cùndihí-yu cue tée ní táuchíúⁿ Jèsús càháⁿ tnúhu-gá. ⁵ Te ñáiyu isràél ndihì dava-gá ñáiyu ñá túú sãndáá iní-xi ní cuu ìⁿñúú-yu ndihì cue tée cùnúu sá cáni-yu-güedé, te cuáha yúú ñáhã-yu xii-güedé. ⁶ Te té Pãblú ndihì té Bèé ní níhí-güedé tnúhu sá cuiní-yu canihá-yu, núu xíáⁿ dayuhu ní quee-güedé cuáhãⁿ-güedé ñúú Lìstrá ndihì ñúú Dèrbè. Te ndi ndúú ñúú-áⁿ yíndèhu-xi Licaoniá. Te ní sáhãⁿ-güedé dava-gá ñúú líhli càa yatni xíáⁿ. ⁷ Te nchaa ñúú-áⁿ ní càháⁿ-güedé tnúhu Jèsús.

Ñúú Lìstrá ní sãha yúú ñáhã-yu xii té Pãblú

⁸ Te ñúú Lìstrá ndécú ìⁿ tée yacua, mee-ni núcóo-dé chi ducaⁿ tnàhí càa-dé ní cacu-dé. ⁹ Te ndédóho-dé tnúhu càháⁿ té Pãblú, te ní cutnùnì iní té Pãblú sá ío sãndáá iní tée yacua-ãⁿ sã Yã Ndiòxí cada tátna ñaha-gã xii-dé, núu xíáⁿ ní xíndéhé ñaha váha té Pãblú xii-dé. ¹⁰ Te té Pãblú ní càháⁿ níhi-dé, te ní xáhaⁿ-dè:

—Ndacuñí cunutnì váha-n — cãchí-dé xáhaⁿ-dè.

Te ní ndacuñí cunu-dé te ní xica-ni-dé. ¹¹ Te òré ní xiní-yu sá té Pãblú ní quide tátna-dé tée yacua-ãⁿ, te ncháa-yu ní càháⁿ-yu tnúhu méé-yu tnúhu Licàoniá. Te ní càháⁿ níhi-yu, te xítnáhã-yu:

—Cue tée-ãⁿ sãnuu sá ñáiyu cùu-güedé dico ñáhã, chi ndiòxí cùu-güedé te ní quexìo-güedé ñuyú-a — cãchí-yu xítnáhã-yu.

¹² Te ní cachí-yu sá té Bèé cùu-dè ndiòxí dánàni-yu Jüpitér, te té Pãblú cùu-dè ndiòxí dánàni-yu

Mèrcuriú, chi cuendá tée-áⁿ cùu-dè tée càháⁿ. ¹³ Te càa ìⁿ veñúhu yuhu ñúú-áⁿ núú quidé càhnú-yu ndiòxí sá dánàni-yu Jüpitér. Te dútú yíndãha veñúhu-áⁿ ndécã-dè ìⁿ úú ndicutu cuáhãⁿ quehé veñúhu, te ñùhu itá dúcúⁿ-güedi. Te cue quiti-áⁿ cahni-dé cada càhnú-dé ndihí-yu té Bèé ndihì té Pãblú ní cùu, chi ducaⁿ quidé-yu quide càhnú-yu ndiòxí-yu. ¹⁴ Te té Bèé ndihì té Pãblú ní níhí-güedé tnúhu nãcuáa sãni iní-yu cadã-yu, te ní ndátã-güedé dóo-güedé cuendá cutnùnì iní-yu sá ñã tnáhã iní-güedé nãcuáa sãni iní-yu cadã-yu. Te xinu-güedé cuanguihu-güedé tnuu-yu, te níhi ní càháⁿ-güedé, te xáhaⁿ-güedé:

¹⁵ —¿Nã cuendá ducaⁿ cuiní-ndó càda-ndo? Te ñu-ni tnãha ñáiyu-ndo cùu-ndí, dicó-ni tnúhu Yã Ndiòxí véxi-ndí dacuãha ñaha-ndí xii-ndo cuendá sã vã cadã-gã-ndó nãcuáa quide-ndo, te quindáá iní-ndó Yã Ndiòxí, chi ìⁿdii-ni Yã Ndiòxí ndécú. Te ñu-gã ní cadúha-gã andíu ndihì ñuyú-a ndihì lámãr ndihì ncháandi túhú sá ío ñuyú-a. ¹⁶ Te ndéé sanaha ní dáñã Yã Ndiòxí ní quidé-yu nãcuáa cuáhãⁿ iní méé-yu. ¹⁷ Te ní xóo cada-gã sã váha cuendá cutnùnì iní-yu sá ío váha iní-gã. Te ñu-gã dácuuⁿ-gã dáú, te tàxi-gã sã nchító-ó chi xito-gã nchaa tátã xítú-ó, te xíáⁿ cúdì iní-ó ndècu-o ñuyú-a — cãchí té Pãblú ndihì té Bèé xáhaⁿ-güedé xii-yu.

¹⁸ Te cué ducaⁿ ní xáhaⁿ-güedé nchaa tnúhu-áⁿ, dico ío úhú ní sãndáá iní-yu ñá ní sãhní-yu ndicutu-áⁿ chi cuendá ducaⁿ tnàhí quidé-yu sãhní-yu ndicutu òré quidé càhnú-yu ndiòxí-yu.

¹⁹ Te ñúú Antiòquiã ndihì ñúú Ìconiú xíndecu dava ñáiyu isràél, te ní quee-yu cuáhãⁿ-yu ñúú Lìstrá núú ndécú té Pãblú. Te xíáⁿ ní quexìo-yu te ní xáháⁿ-yu xii ñáiyu dii ñúú xíáⁿ sã càhní-yu té

Päblú. Te ní sáha yúú ñáhã-yu xii-dé, te ní cáhãⁿ-yu sá ñí xihí-dé, te ní tñi ñaha-güedé xii-dé, te tãñuhu ñaha-güedé xii-dé cuáhãⁿ ñⁿ xio yuhu ñúú ní sá dáquéné ñaha-güedé. ²⁰ Te ní quexio cue ñáyiú sándáá iní tñuhu Jèsús núú cáttu-dé-áⁿ, te ní nadúcúⁿ ndéé ñáhã-yu xii-dé, te ñini xñutñiⁿ-yu-áⁿ ñí ndacóo-dé cuánuhú ndihí ñaha tucu-dé xiⁿ-yu xití ñúú. Te nduu tñéé-áⁿ ñí ndee-dé ndihí té Bèé cuáhãⁿ-güedé ñúú Dèrbé.

²¹ Te ní cáhãⁿ-güedé tñuhu Yá Ndiöxí ñúú-áⁿ, te ío vãi ñáyiú ní sándáá iní-yu tñuhu-gá. Te dàtnùní ní quee-güedé cuáhãⁿ tucu-güedé ñúú Listrá, ndihí ñúú Ìconiú, ndihí ñúú Antiòquia. ²² Te ní xáhaⁿ-güedé xiⁿ-yu sá vã dáñá ñihnú-yu tñuhu Jèsús. Te sá dúcáⁿ ñí cáhãⁿ-güedé, te vñhi-gá ní cudíⁿ iní-yu cadá-yu nàcuáa cuíni Yá Ndiöxí cadá-yu, te ní xáhaⁿ-güedé:

—Dacuití cùndecu-o ñuyíú-a ndoho-o, te dàtnùní ducaⁿ te nacuaca ñaha Yá Ndiöxí xii-o —cachí-güedé xáhaⁿ-güedé xiⁿ-yu.

²³ Te ní sáhãⁿ-güedé ndi tnahá ñⁿ ñⁿ xichí núú ndécú ñáyiú dàcuaha tñuhu Yá Ndiöxí, te ní taxi ndecu-güedé cue téé quindaha ñaha xiⁿ-yu, te ní cáhãⁿ ndihí-güedé Yá Ndiöxí, te ñá túú tñáhí ná ní xèxi-güedé cuèndá sá ñí cáhãⁿ ndihí-güedé-gá. Te ní xáhaⁿ-güedé sá Yá Ndiöxí coto ñaha-gã xiⁿ-yu chí ñiⁿ-ni-gá ní sándáá iní-yu.

Té Päblú ndihí té Bèé cuáhãⁿ tucu-güedé ñúú Antiòquia Siria

²⁴⁻²⁵ Te dàtnùní ní quee té Päblú ndihí té Bèé cuáhãⁿ-güedé, ní yáha-güedé distritú Pisidiá. Te ní quexio-güedé ñúú Pèrgé, xiáⁿ ñí cáhãⁿ-güedé tñuhu Jèsús. Te ñúú-áⁿ yíndèhu-xi Panfliá. Te dàtnùní cuáhãⁿ-güedé ñúú Àtaliá. ²⁶ Te yàcáⁿ ní quee-güedé bàrcú cuánuhú tucu-güedé ñúú

Antiòquia. Te ñúú-áⁿ cúu-xí ñúú núú ñí xicáⁿ tãhú-yu núú Yá Ndiöxí cuèndá sá chñdèe ñaha-gá xii-güedé chiⁿ quide-güedé. Te cuèndá sá ñí ndihí chiⁿ-güedé nchaa ñúú núú ñí sáhãⁿ-güedé, núú xiáⁿ cuánuhú-na-güedé. ²⁷ Te ní ndexio-güedé ñúú-áⁿ, te ní cana-güedé nchaa ñáyiú sándáá iní tñuhu-gá, te ní cani-güedé cuèndú núú-yu nchaa nàcuáa ní cuu núú ñí sáhãⁿ-güedé, te xáhaⁿ-güedé: “Yá Ndiöxí ío ní chindee ñaha-gá xii-ndí ní cáhãⁿ-ndí tñuhu-gá núú ñí sáhãⁿ-ndí, te mee-gã ní quide sá tñahá ñáyiú ñá túú cuu ñáyiú isràél ní xíndedóho-yu tñuhu-gá cuèndá quíndáá iní-yu”, cachí-güedé xáhaⁿ-güedé xiⁿ-yu. ²⁸ Te vãi nduu ní xíndecu-güedé ñúú Antiòquia ndihí nchaa ñáyiú ní sándáá iní tñuhu Jèsús.

15

Ní natacá ñáyiú sándáá iní tñuhu Jèsús ñúú Jerusalén

¹ Te ní quee ñⁿ úú cue téé distritú Jùdeá cuáhãⁿ-güedé ñúú Antiòquia, te ní sáá-güedé, te ní xáhaⁿ-güedé xii ñáyiú sándáá iní tñuhu Jèsús sá núú vã cuáha-güedé señá ñiⁿ nchaa cue téé dàtná ní cachí ndí Moisés, te vã nánihí tãhú-güedé. ² Te sá dúcáⁿ ñí cáhãⁿ cue téé-áⁿ, te ní ngüíta té Päblú ndihí té Bèé ní tenàá-güedé cue téé-áⁿ, chí dandàhú ñáhã-güedé cuíni-güedé ní cuu. Te nchaa ñáyiú sándáá iní tñuhu-gá ní cachí-yu sá quíhíⁿ té Päblú ndihí té Bèé ndihí ñⁿ úú-gá-güedé ñúú Jerusalén. Te yàcáⁿ cada-güedé ñⁿ jùndá ndihí mee-ni cuè téé ní táuchíúⁿ Jèsús cáhãⁿ tñuhu-gá, ndihí cue téé yíndaha ñáyiú sándáá iní tñuhu-gá ñúú-áⁿ, te jùndá-áⁿ cada ndáá-güedé tñuhu ní cáhãⁿ cue téé ní sáá ñúú Antiòquia.

³ Te nchaa ñáyiú sándáá iní tñuhu-gá ní quide ndee iní ñáhã-yu

xii-güedé, te ní tñi-güedé ichi cuáhán-güedé. Te ní yáha-güedé distritú Fènicíá ndihi distritú Sámariá, te yàcáⁿ ní cani-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiòxí, te ní cudíí víhí iní nchaa ñáyiú ní xíndedóho-áⁿ.

⁴ Te té Páblú ndihi té Bèé ní ndexìo-güedé ñuú Jerusálén, te ío ní cudíí iní-yu sá ní ndexìo váha-güedé. Te ndècu dava-gá cue téé ní táuchíúⁿ Jèsús dacuàha ñaha xii-yu tnúhu-gá, ndihi cue téé yìndaha ñaha xii-yu, ndihi dava-gá ñáyiú sàndáá iní tnúhu-gá, te ní cani-güedé cuèndú núu-yu nàcuáa ní quide Yá Ndiòxí ní chindee ñaha-gá xii-güedé ní quide-güedé chiuⁿ-gá. ⁵ Te ndècu ñⁿ úú cue téé ní tuha ichi Yá Ndiòxí, te cue téé-áⁿ cúu-güedé cue téé fariséu, te ní ndacuíní-güedé, te ní xáhaⁿ-güedé:

—Dacuitíí xini ñuhu-xí sá cuàha-güedé sèñá ñiⁿ cue téé cùmání cue téé ñá túú cùu ñáyiú isràél, te cùñaha-ndo sá ná cadá-güedé nchaa nàcuáa ní chídó tnùnì ndíi Moisés —càchí cue téé cùu fariséu-áⁿ xáhaⁿ-güedé xii-güedé.

⁶ Te cue téé ní táuchíúⁿ Jèsús dacuàha ñaha xii ñáyiú tnúhu-gá, ndihi cue téé yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. ⁷ Te vài vihi tnúhu ní cáháⁿ-güedé. Te té Pèlú ní ndacuíní-dé, te ní xáhaⁿ-dè xii-güedé:

—Nchòhó cue téé ndècu ndihi-í ichi Xítóhó Jesucristú, chí cùndedóho ñⁿ tnúhu na càháⁿ-í-a. Sa nàha-ndo sá ní cachí Yá Ndiòxí sá díu-í cáháⁿ-í tnúhu Jèsús núu ñáyiú ñá túú cùu ñáyiú isràél cuèndá sá quìndáá iní-yu, te naníhí tàhú-yu. ⁸ Dico Yá Ndiòxí sa nàha-gá nása càa iní ñⁿ ñáyiú. Te cùtnunì iní-ó sá cúu iní ñáhá-gá xii cue ñáyiú ñá túú cùu ñáyiú isràél, chí ní sáñaha-gá Espiritú-gá ndécú ndihí-yu dàtná

cuíní-ndó ní taxi-gá ndécú ndihi nchoo. ⁹ Chi Yá Ndiòxí ñⁿ nuu-ni cùu iní ñáhá-gá xii-o nchàa-o ndihi cue ñáyiú ñá túú cùu ñáyiú isràél, chí tnàhá-yu ní xócání-gá nchaa sá cuèhé sá dúhá ní xóo cadá-yu ndéé òré ní sàndáá iní-yu Jèsús. ¹⁰ ¿Te ná cuèndá nchòhó cuíní-ndó càda ñáyiú ní sàndáá iní tnúhu-gá ñⁿ sá ñá tnàhá iní-gá sá cadá-yu? Te cuíní-ndó dàndoho-ndó-yu. Te nì nchòo te nì cue ñanì tnàhá-ó ní xindecu ndéé sanaha ñá ní ndàcú-yu cadá-yu nchaa xiáⁿ.

¹¹ Te vá dúcáⁿ cáháⁿ-ndó, chí sa nàha-ndo sá Yá Ndiòxí ní cundahú iní ñáhá-gá xii-o, te diò ducaⁿ ní quide-gá sá naníhí tàhú-ó nchàa-o. Te diu-ni ducaⁿ ní quide-gá ñáyiú ñá túú cùu ñáyiú isràél, te ní naníhí tàhú-yu —càchí té Pèlú xáhaⁿ-dè xii-güedé.

¹² Te dàtnunì té Bèé ndihi té Páblú ní ngúita-güedé ní cáháⁿ-güedé, te ní xíndedóho-yu nchaa tnúhu ní cáháⁿ-güedé. Te ní xáhaⁿ-güedé xii-yu nàcuáa ní chindee ñaha Yá Ndiòxí xii-güedé, te ní quide-güedé vài núu sá vā yòo tnàhí ndàcu cada, te ducaⁿ te ní cutnùnì iní ñáyiú ñá túú cùu ñáyiú isràél sá ndáá cáháⁿ-güedé. ¹³ Te òré ní ndihi cuèndú ní cáháⁿ-güedé, te té Jàcobó ní xáhaⁿ-dè:

—Nchòhó cue téé ndècu ndihi-í ichi Xítóhó Jesucristú, chí cùndedóho ñⁿ tnúhu na càháⁿ-í-a. ¹⁴ Té Xímú, àdi Pelú chí úú diu-dé, ní cani-dé cuèndú nàcuáa ní quide Yá Ndiòxí ndéé díhna ní dáquéé díⁿ-gá ñáyiú ñá túú cùu ñáyiú isràél tnuú nchaa ñáyiú ñá túú ndècu ichi-gá, cuèndá cuíní-gá chiñuhu ñáhá-yu xii-gá. ¹⁵ Te dàtnunì ní cáháⁿ-dé nàcuáa ní cáháⁿ Yá Ndiòxí ndéé sanaha. Te duha ní chídó tnùnì cue téé ní xóo cáháⁿ tnúhu-gá ndéé sanaha nàcuáa ní cáháⁿ-gá, te duha ní cachí-gá:

¹⁶ Dàtná cuíní-ndó cùu ñⁿ vehe ní sáá te ní ngoyo te dàndaa-güedé xito cùu úú,

ducaⁿ sãtnahá-xi cada-xi ìⁿ
nduu,
chi ñaní tnáhá ndíi Dàvíí ní xóo
cáháⁿ ndíhi ñáhá-yu xii-í
ní cùu, te ní dáñá ndèè-yu
ichi-í,

te na quixi-í te natuha ñaha tùcú-yu.

17 Te ducaⁿ te vãi ñáyiu ñá túú
cùu ñáyiu isràèl nandùcú-yu
ichi-í te cáháⁿ ndíhi ñáhá-yu.

18 Duha ní cáháⁿ Yã Ndiòxí, te ducaⁿ
ní chídó tnùní cue téé ní xóo cáháⁿ
tnúhu-gá ndéé sanaha —càchí té
Jàcobó xãhaⁿ-dè xii-güedé.

19 Te xãhaⁿ tùcu-dé:

—Yúhú càchí iní-í sá vã cúú
dàsatu-ó iní nchaa ñáyiu ta sãndáá
iní-xi tnúhu Yã Ndiòxí, ñáyiu ñá
túú cùu ñáyiu isràèl, te ìⁿ úú-ni
tnúhu cúñaha-o nàcuáa cada-yu.

20 Dico xini ñuhu-xi daquihíⁿ-ó tùtú
cúñaha-o sã vã cáxi-gã-yu nchaa
sá nchító-ó ndùu táhú nchaa sá
càchí-yu cùu ndiòxí-yu. Te cúñaha-o
sã vã cáháⁿ ndíhi cue téé ñadíhí te
núu ñá díú ñadíhí-güedé cùu-yu, te
ni cuè ñáyiu díhí vã cáháⁿ ndíhí-yu
téé te núu ñá díú yí-yu cùu-güedé, te
vã cáxi-yu cuñú quití cuèhné, te vã
cáxi-yu níñí. 21 Te ducaⁿ cúñaha-o,
chi ndi tnahá ñuú núu ndécú-yu,
te xĩndecu ñáyiu isràèl dácuahá-yu
tnúhu ní chídó tnùní ndíi Moisés,
te ndi tnahá nduu ndètátú-yu
dàcuahá-yu tnúhu ndíi veñúhu-yu
—càchí té Jàcobó xãhaⁿ-dè xii-güedé.

22 Te dàtnùní cue téé ní táuchíúⁿ
Jèsús dácuahá ñaha xii-yu tnúhu-gá,
ndíhi cue téé yĩndaha ñáyiu sãndáá
iní tnúhu-gá ní cachí-güedé sá
ndúcú-güedé ìⁿ úú-gá cue téé quíhíⁿ
ndíhi té Pãblú ndíhi té Bèé ñuú
Antiòquiá, te diu-ni ducaⁿ ní cáháⁿ
dava-gá ñáyiu ndècu ichi-gá. Te
úú cue téé ní ndúcú-güedé, ìⁿ-dé
nání-dè Silás, te ìⁿ-dé nání-dè Jüdás,
àdi Barsabás chi úú diu-dé, te
cùnuu-güedé ndi ndùú-güedé. 23 Te
ní cadúha nchaa cue téé cùnuu
tutú canehe-güedé quíhíⁿ, te duha
cáháⁿ-xi:

“Cóvãha díi-ndó nchaa-ndo.
Nchúhú cue téé ní táuchíúⁿ Jèsús
cáháⁿ-ndí tnúhu-gá, ndíhi cue
téé yĩndaha cue ñáyiu sãndáá
iní tnúhu-gá quide ndee iní
ñáhá-ndí xii nchòhó cue ñáyiu
ndècu ndíhi-ndí ichi-gá cuèi ñá díú
ñáyiu isràèl cúu-ndó. Te nchòhó
ñáyiu xĩndecu ñuú Antiòquiá, ndíhi
nchòhó ñáyiu ndècu distritú Siriá,
ndíhi nchòhó ñáyiu ndècu distritú
Ciliciá, càchí tnúhu-ndí xii-ndo
sã 24 ní níhí-ndí tnúhu sá ìⁿ úú
cue téé ndècu iha ní quixi-güedé
núu ndécú-ndó, te ñá túú chiúⁿ
ni tahu-ndí quixi-güedé. Te
sá ìⁿ tnúhu ní cáháⁿ-güedé ní
xãhaⁿ-güedé xii-ndo sã ngĩndecu
sèñá ñii-ndo, te canchicúⁿ ni-
hnu-ndo nchaa nacúaá ní chídó
tnùní ndíi Moisés, te xiãⁿ ní sani
ìⁿ ní sani úú iní-ndó, chi ñá
túú xini-ndó nõu ndáá tnúhu
cáháⁿ-güedé àdi ñá ndáá. 25 Te ní
ndatnúhu-ndí nàcuáa cunduu sá
tèndàha-ndí úú cue téé quixi-güedé
ndíhi té Bèé ndíhi té Pãblú, cue
téé ío cùu iní-ndí, te cue téé-án
cáháⁿ-güedé nàcuáa cáháⁿ-ndí-a.
26 Te diu-ni té Bèé ndíhi té Pãblú ní
sáháⁿ-güedé ní cáháⁿ-güedé tnúhu
Xítóhó Jesucristú nchaa xichi. Te
ndi tnahá cuáháⁿ-güedé cuini-yu
cahni ñáhá-yu xii-güedé. 27 Te
tendaha-ndí té Jüdás ndíhi té Silás
quixi-güedé tnahá-güedé cachí
tnúhu váha-güedé nàcuáa cuáháⁿ
tnúhu cáháⁿ-ndí. 28 Te diu-ni
ducaⁿ cáháⁿ-ndí càchí tnúhu-ndí
nàcuáa cáháⁿ Espiritú Yã Ndiòxí
cada-ndo, chi nchúhú vã cáháⁿ-ndí
sá cadá-ndó nchaa sã ní cáháⁿ
ndíi Moisés cada ñáyiu, chi ío
úhú, te vã yõo ndacu cada. Te
vĩtna na cáháⁿ-ndí ìⁿ úú-ni tnúhu
nàcuáa cada-ndo. 29 Vã cáxi-ndó sã
nchító-ó ndùu táhú nchaa sá càchí
ñáyiu cùu ndiòxí-yu, te vã cáxi-ndó
níñí, te vã cáxi-ndó cuñú quití
cuèhné, te vã cáháⁿ ndíhi cue téé

ñadhí te núu ñá díú ñadhí-güedé cúu-yu, te ni cué ñáyiú dhíí vá cáhán ndihí-yu téé te núu ñá díú yíi-yu cùu-güedé. Te núu na càda-ndo nchaa nacuaá cáhán-ndí-a, te cada váha-ndo. Te vitna ío cada ndee ñí-ndó nchaa-ndo-na.” Duha ní chídó tnúni-güedé núú tütú ní tendaha-güedé cuáhán.

³⁰ Te ní quide ndee ñí-yu cue téé quíhí ñúú Antiòquia, te ducaⁿ te ní xica-güedé cuáhán-güedé. Te òré ní quexío-güedé ñúú-án, te ní cana-güedé nchaa ñáyiú sándáá ñí tnúhu Jèsús, te ní sáñaha-güedé tütú xií-yu. ³¹ Te ní dácuáhá-yu tütú ní sáñaha-güedé-án, te ní cudíí víhí ñí-yu chí ío váha cáhán tütú-án. ³² Te té Jüdás ndihí té Silás tnáhá-güedé ní nduu táhú-güedé cáhán-güedé tnúhu sá dácàhu ñí ñáhá Yá Ndiòxí. Te ní xáhaⁿ-güedé vai tnúhu nàcuáa cadá-yu, te víhi-gá ní cudíí ñí-yu cadá-yu nàcuáa cáhán Yá Ndiòxí cadá-yu. ³³ Te ní xíndecu-güedé ñí ùú nduu ndihí-yu, te dátñúni ní quide ndee ñí ñáhá-yu xii-güedé cuendá sá nùhú-güedé núú vèxi-güedé, te mee-ní té Jüdás cuánuhú-dé. ³⁴ Te té Silás ní xáhaⁿ-dè sá vá nùhú-ní-dé, ³⁵ Te té Páblú ndihí té Bèé ní ndóo-güedé ní cáhán-güedé tnúhu Yá Ndiòxí ñúú Antiòquia, te vai-gá tucu ñáyiú Antiòquia ní cáhán-yu tnúhu-gá.

Xito cùu uú cuáhán té Páblú cáhán-dé tnúhu Yá Ndiòxí núú ñáyiú

³⁶ Te sátá ní cuu cuéhé nduu, te ní xáhaⁿ té Páblú xii té Bèé:

—Na quíhíⁿ-ó nchaa ñúú núú ní sáhán-ó ní cáhán-ó tnúhu Yá Ndiòxí cáhán ndihí-o nchaa ñáyiú ní tuha ichi-gá cuendá quini-ó nùu ndècu váha-yu —càchí-dé xáhaⁿ-dè.

³⁷ Te té Bèé ní xáhaⁿ-dè sá quíhíⁿ ndihí-güedé té Juáá, àdi Mácú chí úú díu-dé. ³⁸ Díço té Páblú ñá ní dāña-gá-dé quíhíⁿ té Juáá, chí ní dándó ñaha-dé xii-güedé

cútnáhá ní xíndecu-güedé Pànfiliá, te ní nacuico-dé cuánuhú-dé, te ñá tütú-gá ní sáhán ndihí ñaha-dé xii-güedé. ³⁹ Xíáⁿ ní cuu ní tenáá tnáhá té Bèé ndihí té Páblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáhán-güedé Chìpré. ⁴⁰ Te té Páblú ní xáhaⁿ-dè xii té Silás sá quíhíⁿ ndihí ñaha-dè, te ñáyiú sándáá ñí-xi tnúhu Jèsús ní cáhán ndihí-yu Yá Ndiòxí sá chíndèe ñaha-gá xii-güedé. ⁴¹ Te ní xica-güedé cuáhán-güedé te ní yáha-güedé ñihí distritú Síría ndihí distritú Ciliciá. Te ní cáhán-güedé tnúhu Jèsús núú nchaa ñáyiú ní sándáá ñí tnúhu-gá, núu xíáⁿ ío-gá ní cudíí ñí-yu cadá-yu nàcuáa cáhán Yá Ndiòxí.

16

Tnáhá té Timùteú cuáhán ndihí-dé té Páblú ndihí té Silás

¹ Te té Páblú ndihí té Silás cuáhán-güedé ñúú Dèrbé ndihí ñúú Lìstrá, te ñúú Lìstrá yacáⁿ ndécú ñí téé nani Timuteú. Te téé-án sándáá ñí-dé tnúhu Jèsús, te tnáhá náná-dè sándáá ñí-aⁿ tnúhu-gá, te ñaha isràél cúu-án, te téé grìégú cúu tātá-dè.

² Te nchaa ñáyiú ní sándáá ñí tnúhu-gá ñáyiú ndècu ñúú Lìstrá, ndihí ñáyiú ñúú Iconiú, nchaa ñáyiú-án cudíí ñí-yu nàcuáa quide-dé. ³ Te ní cuini té Páblú sá tnáhá té Timùteú quíhíⁿ ndihí-dé dava-gá ñúú, núu xíáⁿ díhna-gá seña ní sáha té Páblú ñíí té Timùteú, chí ñá ní tnáhá ñíí té Páblú sá cáhán cuéhé ñáyiú isràél cuendá té Timuteú. Te nchaa ñáyiú isràél ndécú ñúú-án xini-yu sá téé grìégú cúu tātá-dè, te ñá díú téé isràél cúu-dé, te xíáⁿ ní sáha té Páblú seña ñíí té Timùteú. ⁴ Te ndi tnáhá ñúú ndi tnáhá ñúú cuáhán-güedé cáhán ndihí-güedé nchaa ñáyiú ní sándáá ñí tnúhu Jèsús. Te ní xáhaⁿ-güedé nàcuáa cáhán tütú ní cadúha cue téé ní táuchíúⁿ Jèsús dacuàha ñaha

xii-yu tnúhu-gá, ndihí cue tée yíndaha ñáyiú sándáá iní tnúhu-gá ñúú Jerusalén. ⁵ Te cuendá ducaⁿ ní sáháⁿ-güedé nchaa ñúú núú ndécú ñáyiú sándáá iní tnúhu-gá ní dácuáhá ñaha-güedé xii-yu, núú xíáⁿ tá cùu túha-gá-yu tnúhu Yá Ndiöxí, te vai-gá-yu ní tuhá-yu ichi-gá.

Ní dácótó ñaha-xi xii té Páblú sá ní xiní-dé ñⁿ té distritú Macèdoniá

⁶ Te ñá ní daña Espiritú Yá Ndiöxí quíhíⁿ-güedé cáháⁿ-güedé tnúhu-gá distritú Àsiá, núú ní sáháⁿ-güedé distritú Frigiá ndihí distritú Gàlaciá cáháⁿ-güedé tnúhu-gá. ⁷ Te ní sáá-güedé yuhu distritú Misiá. Te quíhíⁿ-güedé distritú Bitiniá ní cùu, dico ñá ní dàña Espiritú Yá Ndiöxí quíhíⁿ-güedé yàcáⁿ. ⁸ Te ní yáha-güedé Misiá, te ní quexio-güedé ñúú Tròás, te yàcáⁿ ní nanínáháⁿ-ndí ndihí-dé. ⁹ Te ñⁿ niú ní dácótó-xi núú té Páblú sá ní xiní-dé ñⁿ té distritú Macèdoniá nútñí-dé, te ní xáhaⁿ tée-áⁿ xii té Páblú: “Cada ndee iní-n quíhíⁿ-n Mácèdoniá chí dacuàha ñaha-n nchaa sá xiní-n”, cächí-dé xáhaⁿ-dë, ní dácótó ñaha-xi xii té Páblú. ¹⁰ Te cuendá sá dúcáⁿ ní dácótó ñaha-xi xii té Páblú núú ní ndatnúhu-ndí quíhíⁿ-ndí Macèdoniá, chí ní cutnúni iní-ndí sá cáná ñaha Yá Ndiöxí quíhíⁿ-ndí cáháⁿ-ndí tnúhu-gá núú ñáyiú yàcáⁿ.

Té Páblú ndihí té Silás ndécú-güedé ñúú Filipú

¹¹ Te ní quée-ndí bàrcú ñúú Tròás, te cuáháⁿ ndáá-ndí ñúú Samòtraciá, te yàcáⁿ ní quexio-ndí, te ní yáha-ni-ndí cuáháⁿ-ndí. Te nduu tnéé ní quexio-ndí ñúú Nèápolís. ¹² Te yàcáⁿ ní quene-ndí bàrcú, te xíca-na-ndí cuáháⁿ-ndí ñúú Filipú te ñúú-áⁿ yíndèhu-xi distritú Macèdoniá. Te yàcáⁿ ní cudíi-ndí ní xíndecu tnaa-ndí. Te ñúú Filipú-áⁿ ío cùnuu-xi, chí ío

chitu ñáyiú ròamá ní ngóo-yu. ¹³ Te nduu ndetátú-yu ní quee-ndí ñúú cuáháⁿ-ndí ñⁿ xio yuhu yúte, chí yàcáⁿ sáháⁿ-yu càháⁿ ndihí-yu Yá Ndiöxí. Te òré ní quexio-ndí, te ní naníhí tnáháⁿ-ndí ndihí mee-ni ñáyiú dñí, te ní cáháⁿ-ndí tnúhu Yá Ndiöxí ní xíndedóho-yu. ¹⁴ Te ndècu ñⁿ ñaha nani Lidiá ní xíndedóho-aⁿ nàcuáa ní cáháⁿ-ndí, te ñaha ñúú Tiàtirá cùu-áⁿ, te dico-aⁿ dóo murádú, te ío càháⁿ ndihí-aⁿ Yá Ndiöxí. Te ñⁿ-ni mee Yá Ndiöxí ní chindee ñaha-gá ní sándáá iní-aⁿ tnúhu ní cáháⁿ té Páblú. ¹⁵ Te ní sandute-aⁿ ndihí landú-aⁿ, ndihí nchaa ñáyiú xínu cuechi núu-aⁿ, te ní cachí-aⁿ xii-ndí:

—Te núú ní cutnúni iní-ndó sá ní sándáá ndisa iní-í tnúhu Jèsús, te cundecu tnaa-ndo vehe-í —cächí-aⁿ xii-ndí.

Te ní quide yica-aⁿ ní xíndecu-ndí vehe-aⁿ.

¹⁶ Te ñⁿ nduu ñúhu-ndí ichi cuáháⁿ-ndí núú càháⁿ ndihí-yu Yá Ndiöxí, te ní naníhí-ndí ñⁿ xíchí ñúhú ichi, te yíhí ñaha espíritu cúndihí yucu ñávaha xii-xi. Te xíáⁿ ní quide ní cáháⁿ-xi nchaa sá vã yóo tnáhí cùtnuní iní-xi núú nchaa ñáyiú ní sángándihí ñaha xii-xi. Te ñáyiú dii vehe-xi xínu cuechi-xi ío vai díhúⁿ ní níhí-yu chí ní cháhu nchaa ñáyiú ní sángándihí ñaha xii-xi. ¹⁷ Te xíchí-áⁿ ní chinchícúⁿ ñáhá-xí xii-ndí ndihí té Páblú ndëndaha ñaha-xi cuáháⁿ, te ní cáháⁿ níhí-xi xáhaⁿ-xi xii dava-gá ñáyiú:

—Cue tée-a xínu cuechi-güedé núú Yá Ndiöxí, chí ío càhnu cuu-gá, te cächí tnúhu-güedé nása cada-ndo naníhí tàhú-ndó —cächí-xi xáhaⁿ-xi xii-yu.

¹⁸ Te títní xito ní yáha-ndí ducaⁿ-ni ní cáháⁿ-xi. Te ñá ní cùndee-gá iní té Páblú sá dúcáⁿ càháⁿ-xi, núú ní nanchocuíhu-dé núú nútñí-xi, te ní xáhaⁿ-dë xii

espíritú cúndìhi yucu ñávaha yìhi ñaha xii-xi:

—Ío càhnu cuu Xítohó Jesucrístú, núu xíáⁿ cächí-í sá xócuñí-n vâ quíhí-gá-n yiquí cuñú xíchí-a — cächí-dé xâhaⁿ-dê.

Te òré-ni ní quee espíritú cúndìhi yucu ñávaha-áⁿ yiquí cùñú-xi.

19-20 Te ñáyiú dii vèhe-xi xinu cuechi-xi-áⁿ ní cutnùní iní-yu sá vâ ñhí-gá-yu díhúⁿ cuendá tnúhu càháⁿ-xi, núu ní tñí-yu té Páblú ndihi té Silás ndécá ñàhá-yu cuáhⁿ núú cuè tée cùchiuⁿ Romá, te xáhⁿ-yu xii-güedé:

—Cue tée-a cùu-güedé cue tée isráel, te ío dusaⁿ xíquide-güedé ñuú-ó. 21 Te cuñí-güedé cada-o nàcuáa quide-güedé, te vâ cúu dùcaⁿ cada-o chí ñáyiú nacióⁿ Rómá cúu-ó —cächí-yu xáhⁿ-yu xii cue tée cùchiuⁿ.

22 Te uuⁿi ní cáháⁿ nchaá-yu, te xáhⁿ-yu sá ñá túú quide vâha té Páblú ndihi té Silás. Te cue tée cùchiuⁿ ní cãndeé-güedé dóo té Páblú ndihi dóo té Silás ní ndátá-güedé, te ní táuchíuⁿ-güedé caniha-güedé ndihi tñudí xii-güedé. 23 Te ní caniha-güedé, te dãtnùní ní chihi ñaha-güedé vecaá. Te ní xâhaⁿ-güedé xii tée ndënchito vecaá sá cáda cuèdadú víhí-dê cuendá ná canú-güedé vecaá. 24 Te cuendá sá dúcáⁿ ní cáháⁿ-güedé, núu tée ndënchito vecaá ní dáyâha ñaha-dê ingá cuártú ndécú xítí vecaá, te ní chihi-dé sáhá-güedé yaú nduhu, te ní quide tñí-dé.

25 Te dava niú ní cáháⁿ ndihi té Páblú ndihi té Silás Yá Ndióxí, te ní xita-güedé ndudú ní quide càhnu ñaha-güedé xii-gá. Te dava-gá cue tée yìhi vecaá ní xíndedóho-güedé nàcuáa ní xita-güedé. 26 Te uuⁿi níhi víhi ní tnáa ní quidi-xi ndéé cimièntú vecaá, te ní nacaáⁿ nchaa yèhe vecaá, te ní ndihi cadená ndútú cuè tée yìhi vecaá ní nandáxí. 27 Te ní ndiquíú cúnú iní tée ndënchito vecaá, te ní quide

cuendá-dé nchíi nchaa yèhe vecaá. Te ní tava-dé machítí-dé cahni-dé méé-dé ní cùu, chí ní cáháⁿ-dê sá ní ndihi cue tée yìhi vecaá ní xinu ní cùu. 28 Te té Páblú ní cáháⁿ níhi-dé, te xâhaⁿ-dê xii tée ndënchito vecaá:

—Vâ dúcáⁿ càda-n cahni-n mee-n, chí nchaa-ni-ndí yíhí — cächí-dé xâhaⁿ-dê xii tée ndënchito vecaá.

29 Te dãtnùní ní xícáⁿ tée ndënchito vecaá ñuhú, te xinu-dé cuánguihu xítí vecaá núú yíhí té Páblú ndihi té Silás, te quidi ñaha-ná-xi xii-dé ní quexílo-dé ní ngüíñí xítí-dê núú-güedé. 30 Te dãtnùní ndécá ñàhá-dé xii-güedé ní ndee vecaá, te ní xícáⁿ tnúhú-dê núú-güedé, te xâhaⁿ-dê:

—Nchòhó cachí tnúhu-ndo ñasa cada-í naníhí tãhú-í —cächí-dé xâhaⁿ-dê.

31 Te ní xâhaⁿ-güedé:

—Quindáá iní-n ndihi ñadihí-n, ndihi landú-n, ndihi nchaa ñáyiú xinu cuechi núu-n tnúhu càháⁿ Xítohó Jesucrístú, te naníhí tãhú-ndo —cächí-güedé xâhaⁿ-güedé.

32 Te ní dácuáhá ñaha-güedé xii tée ndënchito vecaá ndihi nchaa ñáyiú ndècu vehe-dé tnúhu Yá Ndióxí. 33 Te ñiu-ni òré-áⁿ ní naquete-dé sátá-güedé núú ní ñáni, te dãtnùní ní sandute-dé ndihí-yu.

34 Te ndèca ñaha-dé cuáhⁿ vehe-dé ní sãñaha-dê sá ní xexi-güedé, te ní cudíí víhí iní tée ndënchito vecaá ndihi nchaa-dé vehe-dé sá ní tuhá-yu ichi Yá Ndióxí. Te cuándihu tucu té Páblú ndihi té Silás vecaá.

35 Te nduu tnèé ní xâhaⁿ cuè tée cùchiuⁿ xii poleciá cuáhⁿ-güedé cúu-güedé tée ndënchito vecaá queñuhu-dé úu cue tée cuánguihu ndedí nduu ícu núhú-güedé. 36 Te tée ndënchito vecaá ní xâhaⁿ-dê xii té Páblú ndihi té Silás:

—Cue tée cùchiuⁿ ní cachí-güedé sá queé-ndó ñuhú-ndo, chí ñá túú-gã ná cada-güedé, chí sa ní yâha cuendá-ndo —cächí tée ndënchito vecaá xâhaⁿ-dê xii-güedé.

³⁷ Te té Páblú ní xáhaⁿ-dě xii cue tée cùu poleciá:

—Tée ròma cúu-ndí, te vá cúu òucaⁿ-ni cunduu, chi ní caniha-güedē tnudii xii-ndí, te ní xiní-yu nchaá-yu. Te ñá túú tnàhí ní xicáⁿ tnúhú-güedē nūu ndáá ndècuéchi-ndí àdi ñáhá, chi cuendá-ni ní chihí ñaha-güedē vecaá xii-ndí. Te vitna cuiní-güedé dacăcu ñaha-güedē núhú-ndí cuendá sá vā yōo quini ñáhá nūhú-ndí cáháⁿ-güedē, dico vá cúu òucaⁿ cada ñaha-güedé xii-ndí. Chí cuáháⁿ cúñaha-ndo na quixi mee-güedé queñuhu ñaha-güedē —càchí té Páblú xi-dé cue poleciá.

³⁸ Te cue tée cùu poleciá cuánuhú-güedé núu ndécú cuè tée cùchiuⁿ, te ní xáhaⁿ-güedē nàcuáa ní cáháⁿ té Páblú. Te sá òucáⁿ ñí xáhaⁿ poleciá sá tée ròma cúu-güedē, xiáⁿ ní yùhú-güedé. ³⁹ Te ní sáháⁿ cue tée cùchiuⁿ yehe vecaá, te ní xáhaⁿ-güedē sá cáda càhnu iní-güedé sá ñí chihí ñaha-güedé vecaá, te ní ndeñuhu ñaha-güedé vecaá. Te ní cáháⁿ ndàhú-güedé núu cuè tée ní xihí vecaá sá ndéé-güedé ñuú-áⁿ nūhú-güedé. ⁴⁰ Te ní ndee-güedé vecaá, te cuáháⁿ-güedé vehe tá Lidiá, te ní ndatnúhu-güedé ndihí nchaa ñáyiú ní sándáá iní-xi tnúhu Jèsús, te ní xáhaⁿ-güedé xií-yu nàcuáa cadá-yu, te ío ní cudí iní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiú ñuú Tesalónica

¹ Te ní yáha-güedé ñuú Anfipolís ndihí ñuú Apoloniá, te ní quexiò-güedé ñuú Tesalónica, te yacáⁿ cáá ñí veñúhu ñáyiú isràél. ² Te ní sáháⁿ té Páblú veñúhu-áⁿ, chí ducaⁿ tnàhí quide-dé, te ndi tnàhá nduu ndetatú-yu ní sáháⁿ-dé veñúhu-áⁿ ùní xito. Te ní ndatnúhu

ndihí ñaha-dē xií-yu nàcuáa ní chidó tnúni cue tée ní xóo cáháⁿ tnúhu Yá Ndióxi ndéé sanaha. ³ Te ní xitnúhu ñaha-dē nàcuáa ní cáháⁿ cue tée-áⁿ sá Cristú Yá tendaha Yá Ndióxi quixi ñuyú-a ndoho vihi-gá, te cuú-gá, te ndoto-gá, te xáhaⁿ-dē:

—Te òu Jèsús cúu Cristú Yá ní tendaha Yá Ndióxi ní quixi ñuyú-a, núu xiáⁿ càchí tnúhu-í vitna —càchí té Páblú xáhaⁿ-dē xií-yu.

⁴ Te dava ñáyiú isràél ní sándáá iní-yu tnúhu ní cáháⁿ té Páblú, te ní níhí tnáhá-yu ndihí-dé, ndihí té Silás. Te vāi ñáyiú griégú ñáyiú cáháⁿ ndihí Yá Ndióxi ní sándáá iní-yu tnúhu Jèsús. Te ndecu titní ñáyiú ñíhí ñáyiú cūnuu, te ñáyiú-áⁿ tnàhá-yu ní sándáá iní-yu tnúhu-gá.

⁵ Te dava ñáyiú isràél ñá túú ní cùu váha iní-yu núu tē Páblú nūu ní ndúcū-yu cue tée cuihna iní-xi tuhío-güedé cada chiⁿ-güedé, chí ndi cuihnu ndi cuihnu-ni-güedé, te nchaá-yu ndihí cue tée-áⁿ ndi coyo ndi coyó-yu xicuáa-yu. Te sátá ñí tecú dóho dava-gá-yu, te ní sáháⁿ tuhá-yu, te ío ní quide òusáⁿ-yu. Te nísáháⁿ-yu vehe té Jàsón, te ní quide yicá-yu ní quíhu-yu vehe-dé nándúcú-yu té Páblú ndihí té Silás cuendá queñuhu ñàhá-yu núu nchaa ñáyiú. ⁶ Te ñá ní nàníhí ñáhá-yu xii-güedé, núu xiáⁿ ní tní-yu té Jàsón ndihí ñí ùú-gá cue tée sándáá iní tnúhu Jèsús, te tañuhu ñàhá-yu xii-güedé cuáháⁿ núu cuè tée cùchiuⁿ. Te òré ní quexiò-yu núu ndécú cuè tée cùchiuⁿ, te ní ngüita-yu ní cuáa-yu, te xáháⁿ-yu xii-güedé:

—Ní quexiò cue tée-áⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú núu xicá cùu-güedé. ⁷ Te té Jàsón-áⁿ ní xáhaⁿ-dē sá cúu cūndecu-güedé vehe-dé, te ñá túú sándáá iní-güedé nàcuáa cáháⁿ té Cèsár té yindaha cuéhé nacióⁿ, te càchí-güedé sá ndécú ñngá té cūnuu-gá tucu

nàni-dé Jèsús —càchí-yu xǎhǎⁿ-yu xii cue tée cùchiuⁿ.

⁸ Te sáta dúcáⁿ nǐ cáháⁿ-yu, te ní cudééⁿ víhí cuè tée cùchiuⁿ ndihí dává-gá ñáyiú ndèdóho. ⁹ Te vǎi díhúⁿ nǐ xícáⁿ cue tée cùchiuⁿ núú té Jásón ndihí dává-gá cue tée cuáháⁿ ndihí-dé cuendá té Pǎblú ndihí té Silás, te núu na ndèe-güedé nùhú-güedé, te nacuañaha cue tée cùchiuⁿ díhúⁿ-güedé.

Té Pǎblú ndihí té Silás ndécú-güedé ñuú Bèréá

¹⁰ Te òré ní cundiquiⁿ, te ní quide ndee iní ñáhá ñáyiú sándáá iní tnúhu Jèsús xii té Pǎblú ndihí té Silás, te ní xica-güedé cuáháⁿ-güedé ñuú Bèréá. Te ñuú-ndé ñuú nǐ sáa-güedé yàcáⁿ ní sáháⁿ-güedé veñúhu ñáyiú isràél. ¹¹ Te váha-gá iní ñáyiú ñuú Bèréá dàcúxí ñáyiú ñuú Tesalónica, chi ío ní cudéé iní-yu ní xíndedóho-yu tnúhu Jèsús, te ñuú nduu ñuú nduu ní dácuahá-yu tnúhu ní chídó tnúni cue tée ní xóo cáháⁿ tnúhu Yá Ndióxi ndéé sanaha cuendá cuiní-yu quini-yu núu ndáá cáháⁿ té Pǎblú ndihí té Silás. ¹² Te titní ñáyiú isràél ní sándáá iní-yu tnúhu-gá ndihí titní cue tée griégú ndihí ñáyiú díhí ñáyiú cùnuu ní sándáá iní-yu. ¹³ Te dává ñáyiú isràél ndécú-yu ñuú Tesalónica, te ñáyiú-áⁿ nǐ níhí-yu tnúhu sá ndécú té Pǎblú ndihí té Silás ñuú Bèréá cáháⁿ-güedé tnúhu Yá Ndióxi, núu xǎhǎⁿ ní sáháⁿ-yu ñuú Bèréá ní dácuañahé-yu núu ncháa ñáyiú vátá dácuaà-gá. Te ñáyiú-áⁿ nǐ sándáá iní-yu tnúhu ndehnde te ní cudééⁿ víhí-yu núu-güedé. ¹⁴ Te òré-áⁿ nǐ xáhaⁿ ñáyiú sándáá iní tnúhu-gá xii té Pǎblú sá quihíⁿ-dé yuhu lámár, te ní xica-dé cuáháⁿ-dé, te té Silás ndihí té Timùteú ní quendóo-güedé ñuú Bèréá. ¹⁵ Te ñuú ñuú-güedé cuáháⁿ ndihí-güedé té Pǎblú, te ndèca ñaha-güedé cuáháⁿ ndéé ñuú Àtenás, te ní xáhaⁿ té Pǎblú xii-güedé:

—Núu na nùhú-ndó, te cúu-ndo té Silás ndihí té Timùteú ná quixí ndihí-ni-güedé nanítnáhá-ndí iha —càchí-dé xáhaⁿ-dè.

Te ní xica-güedé cuánuhú-güedé.

Té Pǎblú ndécú-dé ñuú Àtenás

¹⁶ Te ñuú Àtenás ndétú té Pǎblú quihíⁿ té Silás ndihí té Timùteú. Te yàcáⁿ ní xiní-dé sá ío cuéhé sá càchí-yu cùu ndiòxi-yu ndècu te ñá ndáá sá díú ndiòxi cúu-xí, te xǎhǎⁿ ñá túu ní cùu váha iní-dé, chi ñá tnàhá iní-dé nàcuáa quidè-yu. ¹⁷ Te ní sáháⁿ-dé veñúhu ní cáháⁿ ndihí-dé ñáyiú isràél ndihí dává-gá ñáyiú cáháⁿ ndihí Yá Ndióxi. Te ñuú nduu ñuú nduu sáháⁿ-dé xití ñuú cáháⁿ-dé tnúhu-gá ndihí ncháa ñáyiú xica cuu yacáⁿ. ¹⁸ Te cue tée cùu epicureú ndihí cue tée cùu estoicú, cue tée-áⁿ nǐ ndatnúhu-güedé ndihí té Pǎblú, te dává-güedé xitnàha-güedé:

—¡Ná tnúhu vñi cáháⁿ tée lùcú-áⁿ! —càchí-güedé xitnàha-güedé.

Te dává-güedé xitnàha-güedé:

—Sàni iní-ndí sá cáháⁿ-dé cuendá ndiòxi sá vátá quini-gá-ó —càchí-güedé xitnàha-güedé.

Te ducaⁿ xitnàha-güedé, chi cáháⁿ té Pǎblú tnúhu Jèsús, te ní cáháⁿ-dé nàcuáa ní dándótó ñaha Yá Ndióxi xii-gá, xǎhǎⁿ núu ducaⁿ xitnàha-güedé. ¹⁹ Te ndèca ñaha-güedé xii té Pǎblú cuáháⁿ ñuú xichi núu nání Àreopagú, te ní xáhaⁿ-güedé xii-dé:

—Cachí tnúhu ndáá-n nása cuáháⁿ tnúhu cáháⁿ-n, chi na cùtnuní ndáá iní-ndí, ²⁰ chi ducaⁿ-ni cáháⁿ-n tnúhu sá ñá túu sácúndedóho-ndí, te cuiní-ndí cachí tnúhu ndáá-n nása nduu tnúhu-áⁿ cuendá cutnúní váha iní-ndí —càchí-güedé xáhaⁿ-güedé xii-dé.

²¹ Te ncháa ñáyiú ñuú Àtenás ndihí ñáyiú dává-gá ñuú, mee-ni tnúhu saa cuiní-yu cáháⁿ-yu, ncháa sá vátá cùndedóho-gá-yu cuiní-yu cundedóho-yu.

²² Te té Pǎblú ní ngúnutnii-dé núu xixúcu-yu ncháa-yu, te xáhaⁿ-dè:

—Nchòhó cue ñáyiú ñuú Àtenás, cundedóho-ndo nchàa tnúhu na càháⁿ-í-a. Ío quide cahnu nchohó sá càchí-ndó cùu ndiòxí-ndó. ²³ Te vitna ní quexio-í ñuú-ndó, te ní xiní-í sá yàyacáⁿ ndécú nchàa sá càchí-ndó cùu ndiòxí-ndó càháⁿ ndihí-ndo. Te ní xiní-í ìⁿ xichi núu ndéé tñuní quidé càhnu-ndo Yá Ndiòxí Yaá ñá túú xiní-ndó, te ñu-ñi ducaⁿ càháⁿ lètrá ndéé tñuní xiáⁿ, te càchí-xi: “Iha quide cahnu-ndí Ndiòxí sá ñá túú xiní-ndí”, duha càháⁿ lètrá-áⁿ. Te quide cahnu-ndo Yá Ndiòxí càháⁿ-ndó, dico ñá túú xiní-ndó nãsa càa-gá, te yúhú xiní ndáá-í nàcuáa càa Yá Ndiòxí, chi ñu-ñi Yá Ndiòxí càháⁿ ndihí-í, te ñu tnúhu-gá càháⁿ-í vitna.

²⁴ Te ñu Yá Ndiòxí ní cadúha-gá ñuyú-a ndihí nchaa sá ío, nú ñu-ñi-gá cúu Xitohó ñuyú-a ndihí andiú. Te ñá túú xiní ñuhu-gá vehe dàcaa ñáyiú ñuyú-a cundecu-gá. ²⁵ Te ñá túú xiní ñuhu-gá ñáyiú chindee ñàhá-yu xii-gá, chi mee-gá quidé-gá nchító-ó ndècu-o te tàxi-gá yócó tàchí-ó ndihí nchaa sá xiní ñuhu-o.

²⁶ Te ndéé sanaha ñí cadúha-gá ìⁿ ñu-ñi-té, te ñu-ñi ñí-í-dé cúu ñáyiú ndècu nicaxico ñuyú. Te ñu-ñi mee Yá Ndiòxí ní xáhaⁿ-gá nchaa núu cundécú-yu, te mee-gá ní càháⁿ-gá ná daha cuíá cudíi nchaa nacióⁿ ndihí mèé-yu. ²⁷ Te cuíni-gá sá nchàá ñáyiú nanducu ñàhá-yu càháⁿ ndihí ñàhá-yu xii-gá, te mee-gá ndécú túha-gá sá càháⁿ ndihí ñàha-gá xii-yu ìⁿ ñu-ñi. ²⁸ Te ñu-ñi Yá Ndiòxí xitó ñàha-gá xii-yu núu cùdíi-yu ndécú-yu te càndá-yu. Te duha ní càháⁿ ìⁿ ñaní tnàhá-ndó, té ní cutnùnì iní-xi ní xindecu ndéé sanaha, te ní xáhaⁿ-dé xii-yu: “Nchaa-o cùu-o déhe Yá Ndiòxí”, duha ní xáhaⁿ-dé xii-yu. ²⁹ Te núu déhe Yá Ndiòxí cùu-yu nchaa-yu, te vá cúu càháⁿ-yu sá Yá Ndiòxí cúu sá ñí cadúha-yu ndahá-yu. Te

sá ñí cadúha-yu cùu ndiòxí-yu-áⁿ, dava cùu-xi díhúⁿ cuááⁿ, dava cùu-xi díhúⁿ cuíxíⁿ, dava cùu-xi yúú. Te mèé-yu ní cahu iní-yu nàcuáa cunduu sá cúu ndiòxí-yu. ³⁰ Te cùtnàhá ñá túú ní cùtnuní iní-yu sá nèhé ní quidé-yu ní cadúha-yu nchaa xiáⁿ, te ñá túú ní quide cuendá Yá Ndiòxí sá dúcáⁿ ñí quidé-yu. Te vitna càchí Yá Ndiòxí sá dáñá nchàa ndi túhú-yu nchaa sá cuèhé sá dúhá quidé-yu. ³¹ Te Yá Ndiòxí nàhá-gá ná nduu cundecu nchaa ñáyiú núu-gá, te mee-gá sa nàha-gá ndèndida càa ñáyiú ní quide váha, te ndèndida càa ñáyiú ñá túú ní quide váha. Te mee-gá ní xáhaⁿ-gá xii Déhe-gá Yaá nání Jèsús cùñaha-gá xii-yu núu ndèndida càa-yu ní quide váha te ndèndida càa-yu ñá túú ní quide váha. Te mee Jèsús càháⁿ ndáa cuíti-gá, te sa nàha-o sá nchàá xiáⁿ cada Jèsús, chi ñu cuendá-áⁿ ñí dándótó ñàha Yá Ndiòxí xii-gá —càchí té Páblú xáhaⁿ-dé xii-yu.

³² Te òré ní càháⁿ té Páblú sá ñí ndoto Jèsús, te dava ñáyiú ñá ní tnàhá iní-xi tnúhu ní càháⁿ-dé ní càháⁿ yíchí-yu. Te davá-yu ní xáhaⁿ-yu xii-dé:

—Te ingá xito quixi-n, te càháⁿ tucu-n tnúhu ní càháⁿ-n vitna —cachí-yu xáhaⁿ-yu xii-dé.

³³ Te ní xica-dé cuáháⁿ-dé. ³⁴ Te dava ñáyiú ní xíndedóho tnúhu ní càháⁿ té Páblú ní sándáá iní-yu Jèsús, te ní chindee tnúhu ñàhá-yu xii-dé. Te ìⁿ té cùchiuⁿ Areópagú nání-dé Níxú ndihí ìⁿ ñadihí nání-áⁿ Damarís, tnàhá-yu ní sándáá iní-yu tnúhu-gá ndihí dava-gá-yu.

18

Té Páblú ndécú-dé ñuú Còrintú

¹ Te té Páblú ní quee-dé ñuú Àtenás cuáháⁿ-dé ñuú Còrintú. ² Te yàcáⁿ ní naníhí tnàhá-dé ndihí ìⁿ té isràél nání-dé Àquilú, te té-áⁿ cúu-dé té distritú Póntó, te ní xíndecu-dé ndihí ñadihí-dé

tá Priscilá ñuú Rómá. Te té Cèsár téé yindaha cuéhé nacióⁿ, téé nàni Claudiu ní xáhaⁿ-dè sá vâ cúú-gâ cundecu ñáyiú isràél ñuú Rómá, te xiáⁿ núú ní ndee té Àquilú ndihí ñadhí-dé cuáháⁿ-yu ñuú Còrintú. Te sácú-ni nduu ní cuu sá ní quexiò-yu ñuú-áⁿ, te ní sáháⁿ té Páblú ní ndatnúhu ndihí ñaha-dé xii-yu vehé-yu. ³ Te ní xáháⁿ-yu sá cundècu-dé cada chiúⁿ ndihí ñahá-yu, chi ñⁿ-ni chiúⁿ quide-dé ndihí-yu, te ní xóo dacáá-yu vehe dóó. Te núú xiáⁿ ní xindecu ndihí ñaha té Páblú ní quide chiúⁿ ndihí ñaha-dé xii-yu. ⁴ Te núú ùná núú ùná nduu, nduu ndètatú-yu, ní xóo quíhíⁿ-dé veñúhu ñáyiú isràél. Te ní ndatnúhu-dé ndihí ñáyiú isràél ndihí ñáyiú ñá túú cùu ñáyiú isràél, te ní xáhaⁿ-dè sá quindáá iní-yu tnúhu Jèsús.

⁵ Te té Silás ndihí té Timùteú ní quee-güedé distritú Macèdoniá cuáháⁿ-güedé núú ndécú té Páblú. Te óré ní quexiò-güedé, te ní cáháⁿ-ni té Páblú tnúhu Yá Ndióxi núú ñáyiú isràél, te xáhaⁿ-dè xii-yu sá Jèsús cúú-gâ Crístú Yaá ní tendaha Yá Ndióxi ní quixi ñuyú-a. ⁶ Te sá dúcáⁿ ní cáháⁿ-dè núú ní nàá ndihí ñahá-yu xii-dé, te ní cáháⁿ cuéhé-yu cuendá-dé, núú xiáⁿ ní naquidi-dé dóó-dé. Te ducaⁿ ní quide-dé cuendá sá cútñni iní-yu sá ñá ní tnàhá iní-dé ñacuáa ní cáháⁿ-yu, te ní xáhaⁿ-dè xii-yu:

—Yúhú ñá túú cuèchi-í, te núú ní xíta nihnu-ndo, xiáⁿ quèndóo cuèchi mee-nã-ndó. Te vitna quíhíⁿ-í cáháⁿ ndihí-í ñáyiú ñá túú cùu ñáyiú isràél, te vâ nándücu-gá-í nchòhó ñáyiú isràél cáháⁿ ndihí ñaha-í xii-ndo —càchí-dé xáhaⁿ-dè xii-yu.

⁷ Te ní xica-dé cuáháⁿ-dè vehe ñⁿ téé nàni Justú, te téé-áⁿ ndécú yàtni-dé núú cáá veñúhu, te tnàhá-dé cáháⁿ ndihí-dé Yá Ndióxi. ⁸ Te té Crispú téé yindaha veñúhu-áⁿ ní sándáá iní-dé Jèsús ndihí ñadhí-dé ndihí landú-dé. Te vâi

ñáyiú ñuú Còrintú ní sáháⁿ-yu ní xindedóho-yu tnúhu-gá, te ní sándáá iní ñahá-yu xii-gá, te ní sandute-yu. ⁹ Te ñⁿ niú ní cáháⁿ saní té Páblú sá ní xáhaⁿ Yá Ndióxi xii-dé:

—Cáháⁿ-ni-n tnúhu-í, te vâ yúhú-n nchàa tnúhu cuéhé tnúhu duha càháⁿ ñáyiú, ¹⁰ chi yúhú chindee ñaha-í xii-n, te vâ yóo ñⁿ cada úhú ñahá xii-n, te vâi-gá ñáyiú ñuú-áⁿ quindáá iní-yu tnúhu-í —càchí-gá xáhaⁿ-gã núú saní-dé.

¹¹ Te ñuú Còrintú ní xindecu té Páblú ñⁿ cuía dava, te mee-ni tnúhu Yá Ndióxi ní xóo dacuàha-dé ñáyiú.

¹² Te ndècu-gá-dé ñuú-áⁿ ní ngóo té Galióⁿ chiúⁿ taxi tnuní-dé distritú Acáyá. Te dàvá-áⁿ ní cudééⁿ ñáyiú isràél núú té Páblú, te ní tñí ñahá-yu xii-dé ndécá ñahá-yu cuáháⁿ núú cuè téé cùchiuⁿ. ¹³ Te ní xáháⁿ-yu xii té Galióⁿ téé cùu gobiernú:

—Té-a ní quexiò-dé ñuú-ó xica cuu-dé te cuní-dé dandàhú ñahá-dé chitnahá-ndí-dé cada-ndí ñacuáa quide-dé quidé càmu-dé Ndióxi-dé, te dañá-ndí vâ cáda-gã-ndí ñacuáa càháⁿ tnúhu sá sanú ichi ñaha xii-o ñacuáa cundecu-o cuini-dé —càchí-yu xáháⁿ-yu xii téé cùu gobiernú.

¹⁴ Te té Páblú cuini-dé cani-dé cuendú ní cùu, te ní ngúita té Galióⁿ càháⁿ-dè, te xáhaⁿ-dè xii-yu:

—Nchòhó ñáyiú isràél, cundedóho-ndo tnúhu na càháⁿ-í-a, Te núú ndècu núú ñⁿ cuèchi ní quide-dé àdi ní sahní-dé ñⁿ ndiyi, te cuu cundáá-xi iha, te cáháⁿ-ndó núú nándi cùu sá ní quide-dé, ¹⁵ àdi dico-ni sá ñⁿ tnúhu ní cáháⁿ-dè, te yáchí-gá chí cuáháⁿ yàcáⁿ ndatnúhu-ndo núú méé-ndó, chi mee-ni sã ñá túú quide-dé ñacuáa càháⁿ tnúhu sá sanú ichi ñaha xii-ndo cáháⁿ-ndó, te yúhú ñá túú tnàhá iní-í cada ndáá-í nchaa xiáⁿ —càchí-dé xáhaⁿ-dè.

¹⁶ Te ní cudééⁿ-dè, te ní ndeñuhu ñaha-dé xii-yu vechüⁿ. ¹⁷ Te ñáyiú ñá túú cùu ñáyiú isràél ní tñí-yu té

Sostenés té yindaha veñúhu ñáiyu israél, te ndéhe té Gàlìón tée cùu gobiernú ní canihá-yu xii-dé, dico ñá túú tñàhí ná tnúhu ní cáháⁿ-dé taunihnu-dé tée ní caní-yu-áⁿ.

Té Păblú cuáháⁿ tucu-dé ñuú Antiòquiá, te yacáⁿ ní xica tucu-dé cuáháⁿ-dé dava-gá ñuú cáháⁿ-dé tnúhu Yá Ndiòxí

¹⁸ Te titní-gá nduu ní xindecu té Păblú ñuú Còrintú, te ní quide ndee iní-dé nchaa ñáiyu ní sándáá iní-xi tnúhu Jèsús, te ní tñi-dé ichi cuáháⁿ-dé distritú Siríá ndihí té Àquilú ndihí ñadihí té Àquilú-áⁿ tá Priscilá, te ní quexió-yu ñuú Cèncreá. Te cùmání-gă tñi-yu ichi quihíⁿ-yu ñuú Éfesú, te ní deté díquí tē Păblú, chi ducaⁿ ní xáhaⁿ-dē xii Yá Ndiòxí sá ndéé xínu ñiⁿ chiuⁿ ní sani iní-dé cada-dé cuendá-gá, te dătnúni deté-dé. Te ní quee-yu bārcú cuáháⁿ-yu. ¹⁹ Te ní quexió-yu ñuú Éfesú, te yacáⁿ ní xáhaⁿ tē Păblú sá cundecu té Àquilú ndihí ñadihí-dé, te mee-dé quihíⁿ-dé dava-gá ñuú. Te cùmání-gă caca-dé quihíⁿ-dé, te ní sáháⁿ-dé veñúhu ñáiyu israél ní ndatnúhu ndihí ñaha-dē xií-yu. ²⁰ Te ní xáhăⁿ-yu sá cundecu-dé titní nduu, te ñá ní cuiñí-dé cundecu-dé. ²¹ Te ní xáhaⁿ-dē:

—Núhú-í chi dacuitíi xini ñuhu-xi cundecu-í vico coo ñuú Jerusálén, te quixi tucu-í te núu Ndiòxí ná cāchí-gá, te vitna chí cādá ndèe iní —cāchí-dé xáhaⁿ-dē xií-yu.

Te ní quee-dé bārcú cuáháⁿ-dé. ²² Te ní quexio-dé ñuú Cēsareá, te ní quene-dé bārcú, te ní xica-dé cuánuhú-dé ñuú Jerusálén, te ní ndexio-dé, te ní dándácōo váha-dé ñáiyu ndècu ichi Yá Ndiòxí, te dătnúni ní xica-dé cuáháⁿ-dé ñuú Antiòquiá. ²³ Te yacáⁿ ní xindecu-dé titní nduu, te dătnúni ní tñi-dé ichi cuáháⁿ-dé. Te ní sáháⁿ-dé ndihí distritú Gàlaciá ndihí distritú Frigiá. Te ndi tnahá ñuú ní sáháⁿ-dé ní cáháⁿ-dé ndihí ñáiyu sándáá

iní tnúhu Yá Ndiòxí, te ní ndúcú ndéé-gă-yu ní quidé-yu nchaa nācuáa ní xáhaⁿ-dē cadá-yu.

Té Àpolós cáháⁿ-dé tnúhu Yá Ndiòxí ñuú Éfesú

²⁴ Te dāvā-áⁿ ñi quèxio ñiⁿ tée israél ñuú Éfesú, te nāni-dé Àpolós, te cùu-dé tée ñuú Alejāndriá, te ío váha túha-dé tnúhu Yá Ndiòxí, te ío váha ñuhu díquí-dē nācuáa cáháⁿ-dé, ²⁵ chi sa xini-dé nācuáa ní xóo cáháⁿ ndi Juáa cūtnáhá ní xóo dacuāndute ndi ñáiyu. Te ío ní cudíi iní-dé ní cáháⁿ-dé nchaa nācuáa ní cuu cuendá Jèsús, dico vātá dācuāha-gá-dé nchaa tnúhu ní cáháⁿ mēé Jèsús. ²⁶ Te ní sáháⁿ-dé veñúhu ñáiyu israél, te yacáⁿ ní cáháⁿ-dé ni yùhu ni iní-dé. Te ndècu té Àquilú ndihí ñadihí-dé tá Priscilá ndedóho-yu tnúhu ní cáháⁿ-dé, te ní xáhăⁿ-yu sá quihíⁿ-dé vehé-yu, te ní sáháⁿ-dé, te ní xitnúhu ñahá-yu xii-dé dava-gá tnúhu Yá Ndiòxí sá ñá túú xini-dé. ²⁷ Te ní cachí té Àpolós sá quihíⁿ-dé distritú Acăyá, núu xiáⁿ ní cadúha ñáiyu ñuú Éfesú ñiⁿ tutú canehe-dé quihíⁿ ndaha ñáiyu sándáá iní tnúhu-gá xindecu Acăyá. Te xáhăⁿ-yu núu tütú-yu: “Cáháⁿ váha-ndo ndihí té Àpolós núu ní quexio-dé”, cāchí-yu xáhăⁿ-yu núu tütú-yu. Te ní xica-dé cuáháⁿ-dé, te ní quexio-dé Acăyá. Te nchaa ñáiyu sándáá iní tnúhu-gá yacáⁿ, diu-ni mee Yá Ndiòxí ní chindee ñaha-gá ní sándáá iní ñahă-yu xii-gá. Te té Àpolós ío váha ní cáháⁿ-dé tnúhu Yá Ndiòxí núu-yu, te xiáⁿ ío ní ndúcú ndéé-gă-yu ní quidé-yu chiuⁿ-gá. ²⁸ Te té Àpolós ní ndatnúhu-dé ndihí ñáiyu israél, te ní xindedóho dava-gá-yu. Te ío váha ní caní-dé cuendú nchaa nācuáa ní xóo cáháⁿ cue tée ndéé sanaha sá quixí Cristú ñuyíu-a. Te ní cáháⁿ ndáá-dé ní xáhaⁿ-dē sá diú-ní Jèsús cúu-gă Cristú Yaá ní tendaha Yá Ndiòxí ní quixí ñuyíu-a. Te ñáiyu

israél xĩndatnúhu-yu sá ñã ndàá nàcuáa càháⁿ-dé, dico ñá ní nihĩ-yu tnúhu cúñahá-yu xii-dé, chi ío váha ñũhu díquí-dé tnúhu càháⁿ-dé.

19

Té Páblú ndécú-dé ñuú Éfesú

¹ Te cútnahá ndécú-gã té Àpolós ñuú Còrintú, te ní xica té Páblú cuáháⁿ-dé tá yãha-dé mee-ni xití yucu cuáháⁿ, te ní sáá-dé ndéé ñuú Éfesú. Te ñuú-áⁿ nĩ nanihí tnáhá-dé ndihĩ cue tée sàndáá iní tnúhu Jèsús. ² Te ní xicáⁿ tnúhú-dé núu-güedé, te xãhaⁿ-dè:

—¿Sa ní quexìo Espíritú Yã Ndiöxí ní ngúndecu ndihĩ-ndo ndéé òré ní sàndáá iní-ndó Jèsús-ãⁿ? —càchí-dé xãhaⁿ-dè xii-güedé.

Te ní xãhaⁿ-güedé:

—Ñá túu xìní-ndí sá ío Espíritú Yã Ndiöxí —càchí-güedé xãhaⁿ-güedé xii-dé.

³ Te ní xãhaⁿ tùcu-dé:

—¿Nása ní càháⁿ tée ní dácúándute ñaha xii-ndo-i? —càchí-dé xãhaⁿ-dè xii-güedé.

Te ní xãhaⁿ-güedé:

—Ní càháⁿ-dé nàcuáa ní xóo càháⁿ ndíi Juáá —càchí-güedé xãhaⁿ-güedé xii-dé.

⁴ Te ní xãhaⁿ tè Páblú:

—Ndíi Juáá ní dácúándute ñaha ndíi xii ñáiyu, chi ní cuiní-yu sá dáñã-yu nchaa sá cuèhé sá dúhá quidé-yu. Te ní xãhaⁿ ndíi xii-yu: “Quindáá iní-ndó tnũhu Jèsús chi dacuití quixi-gá ñⁿ nduu”, duha ní xãhaⁿ ndíi Juáá xii-yu —càchí té Páblú xãhaⁿ-dè xii-güedé.

⁵ Te sá dúcáⁿ nĩ càháⁿ té Páblú xãhaⁿ-dè xii-güedé, núu xiáⁿ ní sandute-güedé nàcuáa ní dándõo tnúhu Jèsús. ⁶ Te ní sacáⁿ ndodo té Páblú ndahá-dé díquí-güedé, te òré-ni ní quexìo Espíritú Yã Ndiöxí ní ngúndecu ndihĩ-güedé, te ní ngúita-güedé ní càháⁿ-güedé tnúhu sá dácãhu iní ñáhá Espíritú-gá, tnúhu sá ñã túu xìní-güedé

càháⁿ-güedé, te ní càháⁿ-güedé tnúhu Yã Ndiöxí nàcuáa ní dácáhú iní ñáhá Espíritú-gá xii-güedé. ⁷ Te cùu datná úxúú tnàhá-güedé.

⁸ Te té Páblú ní sáháⁿ-dé veñũhu ñáiyu israél ní càháⁿ ndihĩ-dé-yu, te úní yóó nĩ xínu ní xica cuu-dé veñũhu-yu. Te ío váha ñũhu

díquí-dé tnúhu càháⁿ-dé, núu xiáⁿ ní cuyĩ-dé ní càháⁿ-dé, te ní xãhaⁿ-dè sá quindáá iní-yu tnúhu Jèsús, te ducaⁿ te ndíhu ndaha ñaha Yã Ndiöxí xii-yu. ⁹ Te davá-yu ío sáá iní-yu ñá ní cuiní-yu quindáá iní-yu, te ío ní càháⁿ cuèhé-yu

cuèndá Jèsús xití veñũhu núu dàva-gá-yu. Te té Páblú ní ndee-dé veñũhu cuáháⁿ-dé ndihĩ ñáiyu sàndáá iní tnúhu Jèsús. Te ñⁿ nduu ñⁿ nduu ní sáháⁿ-dé scuèlá té Tiranú ní dácúahá ñaha-dé xii-yu. ¹⁰ Te úu cuíá ducaⁿ nĩ sáháⁿ-dé scuèlá ní dácúahá-dé ñáiyu. Te nchaa ñáiyu

israél ñáiyu ndècu nihíi distrítú Àsiá ndihĩ nchaa ñáiyu ñá túu cùu ñáiyu

israél ní xindedóho-yu tnúhu Jèsús. ¹¹ Te té Páblú ío ní chindee ñaha Yã Ndiöxí xii-dé ní quide-dé vai núu sã vã yõo tnàhí ndàcu cada. ¹² Te

pàñú díquí-dé ndihĩ dóo cándèé núu yíquí-dé ní xicáⁿ-yu nèhé-yu ní sáháⁿ núu ndécú ñáiyu cùhú, te xiáⁿ ní tnĩ ñáiyu cùhú ndihĩ ñáiyu yihĩ ñaha espíritú cùndihĩ yucu ñávãha, te ní ndúha-yu.

¹³ Te ñuú Israél véxi cue tée tatna xica cuu-güedé quidé tátna-güedé ñáiyu yihĩ ñaha espíritú cùndihĩ yucu ñávãha. Te ní ngúita-güedé ní cacu nèhe-güedé Jèsús cuèndá quee espíritú-ãⁿ yíquí cùñú-yu, te ní xãhaⁿ-güedé:

—Xocuiñĩ-n, chi càchí Jèsús sã vã cùndècu ndihĩ-gá-n tée-a. Te ñiu-ni Jèsús cacú nèhe té Páblú òré càháⁿ-dè tnúhu-gá —càchí-güedé xãhaⁿ-güedé xii-espíritú-ãⁿ.

¹⁴ Te úsá tnàhá-güedé ducaⁿ nĩ xóo cada-güedé. Te tátá-güedé ní xínani-dè Èsevã, te tée-ãⁿ nĩ cuu-dé

dútú cúnú. ¹⁵ Te sá dúcáⁿ nĩ cáháⁿ-güedé, te ní xáhaⁿ espíritú cúndihí yucu ñávaha-áⁿ xii-güedé:

—¿Te ná cúú nchòhó nùu dayúhú ñáhá-ndó? Te xìní-í Jèsús, te xìní-í yoo cùu té Pàblú, te nchòhó ñá túú xìní ñáhà-í xii-ndo —càchí espíritú-áⁿ xáhaⁿ-xi xii-güedé.

¹⁶ Te téé yìhí ñaha espíritú cúndihí yucu ñávaha-áⁿ nĩ ndanchita-dé ní tñi-dé cue téé quide tátna-áⁿ, te ní ndihí dóó-güedé ní ndátá-dé, te ní dánicuehé ñáhá-dé xii-güedé, te ní xinu-güedé cuáháⁿ-güedé. ¹⁷ Te nchaa ñáyiú israhél ndécú ñúú Éfesú ndihí dava-gá ñáyiú ndècu ñu-ñi ñúú-áⁿ nĩ níhí-yu tñúhu nàcuáa ní cuu, te ío ní yúhú-yu, te vài-yu ní cachí sá ío càhnu cuu Xítohó Jesu-crístú.

¹⁸ Te dava ñáyiú ní sándáa iní-xi tñúhu Jèsús ní sáháⁿ-yu núú ndécú tē Pàblú, ndihí núú ndécú nchaa ñáyiú ní sándáa iní tñúhu-gá ní náhmá-yu nàcuáa ní xóo cada-yu.

¹⁹ Te titní ñáyiú ní xóo cada ndùu nehé-yu tutú-yu ní sáháⁿ núú ndécú nchaa ñáyiú sándáa iní-xi tñúhu-gá, te yacáⁿ ní ndada cuendá-yu sá ío yahu ní sáha-yu tutú-yu, chi ndéé údico úxí mĩ díhúⁿ cuixíⁿ ní sáha-yu núú ncháa. Te ncháa-yu ní sahmí-yu tutú-yu. ²⁰ Te sátá nĩ cáyú nchaa tutú-áⁿ, te vài-gá ñáyiú ní tuhá-yu ichi Yá Ndiöxí, te ní sáha-yu cuendá sá ío xini ñuhu tñúhu Yá Ndiöxí.

²¹ Te ní cachí té Pàblú sá quíhíⁿ-dé distritú Macèdoniá ndihí distritú Acáyá, te dátñúni núhú-dé ñúú Jerusálén, te ducaⁿ te dátñúni quíhíⁿ-dé ñúú Rómá. ²² Te ndècu ndihí-dé té Timùteú ndihí té Èrastú cue téé chindee ñaha xii-dé. Te té Pàblú ní xáhaⁿ-dé xii-güedé sá códo nùu-güedé quíhíⁿ Macèdoniá, te ní xica-güedé cuáháⁿ-güedé, te mee-dé ní quendóo-dé.

Ñáyiú Éfesú ío dusaⁿ quidè-yu ñúú-yu

²³ Te dàvá-áⁿ ío ní cudéⁿ-yu núú nchaa ñáyiú ní tuha ichi Yá Ndiöxí. ²⁴ Te ñⁿ téé ñúú Éfesú nání-dé Demètriú. Te téé-áⁿ ní xóo canehé chiuⁿ-dé mee-ni díhúⁿ cuixíⁿ ní xóo cadúha-dé veñúhu líhli, dátna cuini-ndó caa veñúhu Diáná sá cúú ndiöxí-yu. Te vài díhúⁿ nĩ xóo níhí-dé ndihí cue téé ní xóo cada chiúⁿ ndihí-dé. ²⁵ Te ní cana-dé cue téé quide chiuⁿ ndihí-dé, ndihí nchaa cue téé quide chiuⁿ ndihí díhúⁿ cuixíⁿ, te ní xáhaⁿ-dē xii-güedé:

—Nàha-ndo sá ío váha níhí-ó díhúⁿ cuendá chiúⁿ quide-o. ²⁶ Te nàha-ndo sá càchí tē Pàblú sá ñá díú ndiöxí cúú sá nĩ cadúha ñáyiú ñuyú-a. Te ducaⁿ cáháⁿ-dé ñúú-ó, te ducaⁿ-ni cáháⁿ-dé níhí distritú Asiá, te ío-gá vài ñáyiú sándáa iní tñúhu cáháⁿ-dé. ²⁷ Te ío úhú nùu na cuita chiúⁿ quide-o, vá yóo-gá cuaaⁿ sá cadúha-o. Te ngúita-yu cáháⁿ-yu sá veñúhu Diáná ñá túú càváha, te vá cada càhnu-gá-yu sàndú-ó. Te nàha-ndo sá ío càhnu cuu Dianá, chi nchaa ñáyiú distritú Asiá quidé càhnu ñahá-yu ndihí ñáyiú xindecu ní caa xico ñuyú —càchí té Demètriú xáhaⁿ-dē xii-güedé.

²⁸ Te sá dúcáⁿ nĩ cáháⁿ té Demètriú, xiáⁿ ní cudéⁿ-güedé núú tē Pàblú, te uuⁿ ní cuáá-güedé te càchí-güedé:

—Ío càhnu cuu Dianá sàndú ñáyiú Éfesú! —càchí-güedé.

²⁹ Te nchaa ñáyiú ñúú Éfesú ndí coyo ndi coyó-yu xicáháⁿ-yu. Te tñahá úú cue téé distritú Macèdoniá xicá cùu-güedé ndihí té Pàblú, ñⁿ-dé nání-dé Gáyú, te ñⁿ-dé nání-dé Aristarcú. Te ní tñi-güedé úú cue téé-áⁿ, te cuánguihu coyo ndihí ñaha-güedé vehe núú quidé-güedé jundá. ³⁰ Te té Pàblú cuini-dé quíhu-dé tñahá-dé vehe-áⁿ cáháⁿ ndihí ñaha-dē ní cùu, te ñá ní dàña cue téé ní sándáa iní tñúhu-gá. ³¹ Te ñⁿ úú cue téé cùnno distritú Asiá ní cáháⁿ váha-güedé cuendá té Pàblú, te ní xáhaⁿ-güedé xii ñⁿ téé xinu

cuechi núú-güedé ní sáháⁿ-dé ní xáhaⁿ-dë xii té Páblú sá vǎ quǎhu-dé vehe núú quidé-güedé jündá. ³² Te uuⁿni ní cuáá-yu nchaá-yu, te ñá ñⁿ-ní tnúhu ní cǎháⁿ-yu, chi ndi dííⁿ tnúhu ní cǎháⁿ-yu ñⁿ ñⁿ-yu. Te chitu-gǎ ñáyiú ñá ní cùtnuní iní-yu ná cuendá ní dátacá ñáhá-güedé xití vehe-áⁿ, chi ñá ñⁿ-ní tnúhu ní cǎháⁿ-yu. ³³ Te davá-yu ní cǎháⁿ-yu sá cuéchi té Lijandrú cúú-xí, chi ní xáhaⁿ ñáyiú isrâél xii-dé sá cǎháⁿ-dé yuhú-yu chindee tnúhu ñaha-dë xii-yu. Te ní quide-dé ndaha-dé núú-yu sá cündedóho-yu tnúhu cǎháⁿ-dé chindee tnúhu ñaha-dë xii-yu yòtnúhu. ³⁴ Te ní cutnùní iní-yu sá tée isrâél cúú-dë, te uuⁿni ní cuáá tucú-yu, ñá ní dǎñá-yu cǎháⁿ-dé, te cǎchí-yu:

—¡Ío cùnuu Dianá sàndú ñuú Éfesú! —cǎchí-yu. Te dátaná úú òré ñⁿ-ni tnúhu ní cǎháⁿ-yu.

³⁵ Te tée cùu secretariú-ni-gá ní cǎháⁿ-dé, te dǎtnùní cuèé cuèé ní sadí-yu yuhú-yu. Te ní xáhaⁿ-dë xii-yu:

—Ncha-ndo cùndedóho-ndo ñⁿ tnúhu na cǎháⁿ-í-a. Ío cùnuu Dianá, te nchaandi túhú ñáyiú sa nàhá-yu sá ncháá-ó ío nêhe cuendá-ó veñúhu-ǎⁿ. Te nàhá-yu sá néhé cuendá-ó sàndú-áⁿ, chi véxi cuuⁿ-gá andiú. ³⁶ Te vǎ yǒ ñⁿ cǎchí sá ñǎ ndáá. Te coto-ndo mée-ndo, te vǎ cuídó-ndó cǎháⁿ-ndó, te vǎ cuídó-ndó cǎháⁿ-ndó. ³⁷ Te ná cuendá ndécá-ndó cuè tée-áⁿ véxi, te ñá túú nǎ ní quide-güedé, te ñá túú nǎ ní dùhu-güedé veñúhu, te ñá túú cǎháⁿ cuèhé-güedé cuendá Diáná. ³⁸ Te núu ío yoo nàá ndihi ñaha xii té Demètriú ndihi cue tée quide chiuⁿ ndihi-dé, te quíhíⁿ-güedé cacáⁿ cuéchi-güedé núú cuè tée cùchiuⁿ. Te cue tée cùchiuⁿ na cundoho-güedé núu quehndé-güedé cuéchi-yu àdi ñáhá. ³⁹ Àdi ío-gá ná cuendú ñúhú iní-ndó, te cǎháⁿ-ndó òré ná cóó jündá.

⁴⁰ Te ío úhú núu na ñihí tée tàxi tnuní ñáhá xii-o tnúhu sá dúhá ío quide dusaⁿ-o, te cǎchí-dé sá ndècuéchi-o chi ñá túú sàndáá iní-ó-dé quesaha-dé. Te ñá túú tnàhí ndúu váha-xi sá dúhá càda-o ní cuu, te vitna duha ní quide-o, te ñá cùtnùní iní-ó nǎsa cùñaha-o xii tée tàxi tnuní ñáhá xii-o núu na càna ñaha-dé —cǎchí tée cùu secretariú xáhaⁿ-dë xii-yu.

⁴¹ Te ní xáhaⁿ-dë sá nùhú-yu te ní ndihí-yu cuánuhú.

20

Té Páblú cuáháⁿ-dé distritú Macèdoniá ndihi distritú Grèciá

¹ Te òré ñá túú-gǎ ní quide dusáⁿ-yu, te ní cana ñaha tǎ Páblú xii nchaa ñáyiú sàndáá iní tnúhu Jèsús ní cǎháⁿ-dé dóho-yu nàcuáa cadá-yu. Te ní quide ndee iní ñáhá-dë xii-yu, te ní tnú-dé ichi cuáháⁿ-dé distritú Macèdoniá. ² Te tayáha-dé cuáháⁿ ñⁿ ñⁿ ñuú yíndèhu Macèdoniá. Te cǎháⁿ-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudíí iní-yu cadá-yu nàcuáa cǎháⁿ Yǎ Ndióxi cadá-yu sá dúcáⁿ ní cǎháⁿ-dé dóho-yu. Té ní quexìo-dé distritú Grèciá. ³ Te xiáⁿ ní xíndecu-dé úní yóó. Te xiáⁿ quèe-dé bàrcú quíhíⁿ-dé distritú Siriá ní cùu, te ní níhí-dé tnúhu sá ndétú ñaha ñⁿ úú cue tée isrâél cahni ñaha-güedé xii-dé ní cùu, núu xiáⁿ ní tnú-dé ichi cuáháⁿ-dé ní yáha-dé ichi distritú Macèdoniá. ⁴ Te cuáháⁿ ndihi-dé té Sopàtér tée ñuú Bèrea, ndihi té Arístarcú, ndihi ñⁿ tée nàni Segundú. Te ndi ndúú cue tée-áⁿ cúú-güedé cue tée ñuú Tesalònicá. Te tnàhá té Gáyú tée ñuú Dèrbé, ndihi té Timùteú cuáháⁿ ndihi-dé, te tnàhá té Tiquicú ndihi té Trófimú cuáháⁿ ndihi-dé, te úú cue tée-áⁿ cúú-güedé cue tée distritú Asiá. Te nchaa cue tée-áⁿ cuáháⁿ ndihi-güedé té Páblú. ⁵⁻⁶ Te ní quexìo-güedé ñuú Filipú, te yàcáⁿ ní naníhí ñáhá-güedé xii-ndí. Te té Páblú ní tendaha-dë

cue té ndihí-dé cuáháⁿ-güedé ñúú Tróás, te ní xáhaⁿ-dè sá díú-ní yàcáⁿ cundetu ñaha-güedé xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhì levadurá. Te sátá ñí yáha vico, te ní quée-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexìo-ndí ñúú-áⁿ. Te yàcáⁿ ní naníhí tnáhá-ndí ndihí cue té yòdo nuu cuáháⁿ ní xíndecu-ndí úsá nduu.

Té Páblú cuáháⁿ ngándihí-dé ñáyíu ñúú Tróás

⁷ Te ñⁿ nduu ndumìngú ní naníhí tnáhá-ndí ndihí nchaa ñáyíu ní sándáá iní-xi tnúhu Jèsús ní xexi-ndí pàá ndihí-yu. Te ducaⁿ ñí quide-ndí, chi ní cachí Jèsús sá dúcáⁿ càda-o cuendá sá vâ nâcuânaa-o sá ñí xíhí-gá cuendá naníhí tàhú-ó. Te té Páblú ní ngúita-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tundaá ingá nduu-áⁿ, te caca-dé quihíⁿ-dé ingá xichi. ⁸ Te ndécú-yu vehe yòdo tnaha, te yìhí-yu ndéé cuartú cúú ùní núú ñínu, te càyú víhí ñùhú xítí cuartú-áⁿ. ⁹ Te ñⁿ tée sa ta cùu sacuéhé luha nàni-dé Eùticú núcòo-dé yèhe ventaná, cuiní-dé cúdú-dé, chi ní cunaha vìhì caháⁿ té Páblú, te ní tní ñaha sàni xii-dé ní xidí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñàhá-yu, te sa ní xíhí-dé, chi ío dúcúⁿ ní ngava-dé. ¹⁰ Te tnàhá té Páblú nchícúⁿ-dé ní nuu. Te ní quexìo cunu-dé núú càtùu tée ní xíhí-áⁿ, te ní numi ñaha-ni-dé, te ní xáhaⁿ-dè xii-yu:

—Vá ndihú iní-ndó, chi ní ndoto-dé —càhí-dé xáhaⁿ-dè xii-yu.

¹¹ Te dàtnùní cuándaa ndihí ñaha tucu-dé xii-yu cuartú núú yìhí-yu ni cùu, te yàcáⁿ ní xexi ndihí ñaha-dè xii-yu, dàtnùní ní ngúita-dé vâi-gá tnúhu ní càháⁿ-dé, te càháⁿ-ni-dé

ní tundaá, te dàtnùní ní xica-dé cuáháⁿ-dè. ¹² Te tée ní ngava-áⁿ ní sánúndeca ñàhá-yu xii-dé ndéé vehe-dé, te ío ní cudí iní-yu sá ñí ndoto-dé.

Ní quée-güedé ñúú Tróás cuáháⁿ-güedé ñúú Miletú

¹³ Te té Páblú ní cachí-dé sá quihíⁿ-ndí ndihí bàrcú ndéé ñúú Àsón, te mee-dé caca saha-dé, te yàcáⁿ naníhí tnáhá-ndí ndihí-dé te quée-dé bàrcú, te ní quée-ndí bàrcú cuáháⁿ-ndí. ¹⁴ Te ní naníhí tnáhá-ndí ndihí-dé ñúú Àsón, te yàcáⁿ ní quée-dé bàrcú tnàhá-dé cuáháⁿ-ndí ñúú Mitilené. ¹⁵ Te ní quexìo-ndí ndéé ingá nduu yatni ñúú Quiú, te ndéé nduu tnéé ní quexìo-ndí ñúú Sámú te yàcáⁿ ní yáha-ndí, te ní quexìo-ndí ñúú Trògiliú. Te ndéé nduu idá ní quexìo-ndí ñúú Miletú. ¹⁶ Te té Páblú ñá ní cuiní-dé yáha-ndí ñúú Éfesú, chi ñá túú ní tnàhá iní-dé cuyaa-dé ichi, chi ío ndíhì iní-dé cuendá cuiní-dé quini-dé núu vá ndácú-dé ndexìo-dé ñúú Jerusalén cundecu-dé vico Pentecòstés.

Té Páblú càháⁿ ndihí-dé cue tée yíndaha ñaha xii ñáyíu sándáá iní tnúhu Jèsús ñúú Éfesú

¹⁷ Te òré ndécú té Páblú ñúú Miletú, te ní cana-dé cue tée yíndaha ñaha xii ñáyíu sándáá iní tnúhu Jèsús ñúú Éfesú sá quihíⁿ-güedé núú ndécú-dé. ¹⁸ Te sátá ñí quexìo-güedé, te ní xáhaⁿ-dè xii-güedé:

—Nàha-ndo nacuaá ní quide-í ndéé cùtnàhá ní quexìo-í distritú Àsiá. ¹⁹ Chi ní quide-í nâcuáa ní càháⁿ Yâ Ndiòxí cada-í, ñá túú ní tühío-í, te ñá túú ní quide cahnu-í mée-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá títí xito ní cuiní ñáyíu isràél cahni ñàhá-yu xii-í ní cùu, te ío ní ndoho-í ní cácu-í. ²⁰ Te

sa naha-ndo sá ncháándì túhu sá ní cachí tnúhu-í nàcuáa cada-ndo cuendá sá chindèe ñaha Yá Ndiöxí xii-ndo. Te ní cáháⁿ-í tnúhu-gá núú-ndó ncháa-ndo, te ñu-ni ducaⁿ nǐ quixi-í ndi tnahá vehe-ndo nǐ cáháⁿ-í tnúhu-gá núú-ndó. ²¹ Te ní xáhaⁿ-í xii ñáyiú isràél ndihí ñáyiú ñá túú cùu ñáyiú isràél sá dǎñá-yu nchaa sá cuèhé sá dúhá quidé-yu te quindáá iní-yu tnúhu Xítóhó Jesucristú. ²² Te dacuití quihíⁿ-í ñuú Jerusàlén, chi Espiritú Yá Ndiöxí ní cachí-xi sá dáí quihíⁿ-í, te ñá túú xiní-í nándi cada ñaha-güedé xii-í yacáⁿ te núu na quèxio-í. ²³ Te ñⁿ ñⁿ ñuú núú sàháⁿ-í cächí tnúhu Espiritú-gá sá chíhí ñaha-güedé vecaá, te cada úhú ñáhá-güedé. ²⁴ Dico ñá túú tnàhí ná cuu cuèj na cáhni ñaha-güedé xii-í, dico cuñí-í sá díí iní dandihí-í nchaa sá ní cachí Xítóhó Jesucristú cada-í. Te ní cachí Yá Ndiöxí sá cáháⁿ-í núú ñáyiú sá ïo cùu iní ñáhá-gá xii-yu, te naníhí tàhú-yu núu na quindáá iní-yu tnúhu-gá.

²⁵ Te sa ní cachí tnúhu-í xii-ndo ncháa-ndo sá núu na quindáá iní-ndó Yá Ndiöxí, te ndíhu ndaha ñaha-gá xii-ndo. Te na cächí tnúhu-í sá nǐ ñⁿ nduu-gá vá quini ñáhá-ndó xii-í ñuyíú-a. ²⁶⁻²⁷ Te yúhú ñá túú cuèchi-í núu ïó ñáyiú vá naníhí tàhú, chi sa ní cachí tnúhu-í nchaa sá nǐ cáháⁿ mée Yá Ndiöxí cada-ndo. ²⁸ Te coto-ndo mée-ndo, te coto-ndo tnàhá ñáyiú sàndáá iní tnúhu-gá, chi Espiritú-gá ní cachí-xi sá cúnù-ndo núú-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu ducaⁿ cada-ndo cuendá, chi nàha-ndo sá Jèsús ní sati níñí-gá, te ní xihí-gá cuendá naníhí tàhú-ó ndihí-yu. ²⁹ Te yúhú sa cùtnuní iní-í sá òré ñá túú-gá-í ndécú, te quixi ñáyiú dandáhú ñáhá xii-ndo cuendá daña-ndo tnúhu Yá Ndiöxí, te cada ñáhá-yu

xii-ndo dàtná quidé ñáñá òré tníí-dí mbéé. ³⁰ Te ñu-ni ñⁿ úú cue téé ndècu ndihí-ndo, cue téé-áⁿ dacuàndehnde-güedé, te cudana davá-yu quindáá iní-yu chítnáhá ñáhá-yu xii-güedé. ³¹ Te xáhaⁿ núu cächí tnúhu-í sá ïo quihí iní-ndó cùndecu-ndo ndihí nchaa ñáyiú sàndáá iní tnúhu-gá. Te naha-ndo sá yúhú ní xíndecu-í úní cuía nǐ cáháⁿ-í tnúhu Jèsús núú ñáyiú cuèi nduu cuèi niú. Te áma ní xóo ndáhyú-í, chi ñá ní cuñí-yu quindáá iní-yu ncháa-yu tnúhu ní cáháⁿ-í —cächí té Páblú xáhaⁿ-dè xii-güedé.

³² Te xáhaⁿ tùcu-dé:

—Nchòhó cue téé ndècu ndihí-í ichi Xítóhó Jesucristú, ïo cuñí-í sá mée Yá Ndiöxí chindèe ñaha-gá xii-ndo. Te mee-gá ní cáháⁿ-gá sá ïo cùdíí iní ñáhá-gá xii-ndo. Te naníhí tàhú-ndó ndihí nchaa ñáyiú cùu cuendá-gá, te chindèe ñaha-gá xii-ndo cuendá cada-ndo ncháa sá cáháⁿ-gá. ³³ Te òré ní xíndecu ndihí ñaha-í xii-ndo, te ní díhúⁿ ní dóó ñá túú ní cùdíí iní-í. ³⁴ Te mee-ndo sá naha-ndo sá yúhú ní quide chiúⁿ-í, te ní níhí-í nchaa sá nǐ nandihí-í ndihí cue téé xica cuu ndihí-í. ³⁵ Te sa ní xiní-ndó nàcuáa ní quide-í ní quide chiúⁿ-í, te ñu-ni ducaⁿ cada chiúⁿ-ndo cuendá chindèe-ndo ncháa ñáyiú ndáhú, chi sa naha-ndo nacuáa ní cachí Xítóhó Jesucristú, te duha ní cachí-gá: “Cùdíí-gá iní-ó cuàha-o ñáyiú ndáhú sá xiní ñùhú-yu dàcúxí sǎ táxi-yu xii mee-o”, duha ní cachí-gá —cächí té Páblú xáhaⁿ-dè xii-güedé.

³⁶ Te sátá dúcáⁿ nǐ cáháⁿ-dé, te ní ngüñí xiti-dé ndihí dava-gá-güedé, te ní cáháⁿ ndihí-dé Yá Ndiöxí. ³⁷ Te sátá nǐ túhú tnúhu ní cáháⁿ-dé ndihí Yá Ndiöxí, te ní ndáhyú víhí-güedé sá quihíⁿ-dé, te ní numi ñaha-güedé, te ní teyuhu ñaha-güedé. ³⁸ Te ní ndíhú víhí iní-güedé, chi ní xáhaⁿ tē Páblú sá nǐ ñⁿ nduu-gá vá naníhí tnáhá-güedé cáháⁿ ndihí

tnàha-güedé. Te cuáháⁿ ndihí ñaha-güedé xii-dé núú ndécú bàrcú.

21

Té Páblú cuáháⁿ-dé ñúú Jerusalén

1 Te ní quide ndee iní-ndí nchaa cue tée cùnuu. Te ní quée-ndí bàrcú cuáháⁿ ndáá ichi-ndí ñúú Còs. Te nduu tnée ní sáháⁿ-ndí ñúú Ròdás, te ní yáha-ndí cuáháⁿ-ndí ñúú Pàtará. 2 Te yàcáⁿ ní naníhí-ndí ñⁿ bàrcú ñúhú ichi-xi quíhíⁿ-xi distritú Fènicía, xiáⁿ ní quée-ndí cuáháⁿ-ndí. 3 Te ichi cuáháⁿ-ndí ní xiní-ndí distritú Chìpré cáá cuådava xití làmár, te ní yáha-ndí, te ní quendóo ñúú-áⁿ xio dàtni-ndí. Te cuáháⁿ-ndí ñúú Tìrú ñⁿ ñúú yíndèhu distritú Siríá cuèndá yàcáⁿ tava-güedé nchaa sá nchídó bàrcú. 4 Te yàcáⁿ ní naníhí tnáhá-ndí ndihí ñáyíu ní sàndáá iní tnúhu Jèsús, te ní xíndecu-ndí úsá nduu ndihí-yu. Te ní xáháⁿ-yu sá vǎ quíhíⁿ té Páblú ñúú Jerusalén, chí Espíritú Yǎ Ndiòxí ní xáhaⁿ-xi xii-yu sá ndóhó vǐhi-dé nǔu na quíhíⁿ-dé. 5 Te sátá ñǐ yáha nduu úsá, te ní quée-ndí cuáháⁿ-ndí yuhu làmár. Te ní quee nchaa ñáyíu ní sàndáá iní tnúhu-gǎ, té, ñadìhí, nchaa landú, ncháá-yu ní sàndeca ñáhá-yu yuhu làmár, te òré ní quexìo-ndí, te ní ngúíñí xití-ndí ní cáháⁿ ndihí-ndí Yǎ Ndiòxí. 6 Te ní quide ndee iní tnáhá-ndí ndihí-yu, te dàtnùnì ní quée-ndí bàrcú, te ní naquehéⁿ-yu ichi cuánuhú-yu vehé-yu.

7 Te ní xica bàrcú ñúhú-ndí ní quee-xi ñúú Tìrú cuáháⁿ-ndí ndihí-xi ñúú Tolèmaidá. Te xiáⁿ ñǐ sáa-xi te ní quene-ndí, te ní sáháⁿ-ndí ní cáháⁿ ndihí-ndí nchaa ñáyíu sàndáá iní-xi tnúhu Jèsús, te ní xíndecu-ndí ndihí-yu ñⁿ nduu. 8 Te nduu tnée ní ndée tucu-ndí bàrcú cuáháⁿ-ndí ñúú

Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lipé cundecu-ndí ndihí-dé. Te téé-áⁿ ñǐ xóo cada chiúⁿ ndihí-dé íñú-gǎ cue téé ní chindee ñaha xii ñáyíu sàndáá iní tnúhu-gǎ ñúú Jerusalén ní xóo cuáñaha-güedé sá ñǐ xóo caxí-yu. Te dàtnùnì mee-nǎ tnúhu Yǎ Ndiòxí càháⁿ-dé xicá cùu-dé. 9 Te té Lipé-áⁿ ndècu cùmí déhe dǐhí-dé, te ní ñⁿ-yu vátá ndúcú ñaha-gǎ téé xií-yu, te ncháá-yu càháⁿ-yu tnúhu Yǎ Ndiòxí tnúhu sá dácàhu iní ñáhá mèe-gǎ. 10 Te xiáⁿ ñǐ cuu titní nduu ndècu-ndí, te ní quexìo ñⁿ téé nàni Agabú ñúú-áⁿ, véxi-dé distritú Jùdeá, te téé-áⁿ tnáhá-dé càháⁿ-dé tnúhu Yǎ Ndiòxí. 11 Te ní níhí-dé tnúhu núú ndécú-ndí nǔu ní quixi-dé ní cáháⁿ ndihí ñaha-dé xii-ndí. Te ní xicáⁿ-dé cínchú té Páblú, te ní ngóo-dé, te ní ngúíta-dé ní dácútú-dé sáhá-dé ndihí ndaha-dé, te ní cachí-dé xii-ndí:

—Espíritú Yǎ Ndiòxí ní cachí-xi sá tée dǐi cínchú-xi-a tñǐ ñaha cuè téé isràèl ñúú Jerusalén, te duha dacùtu ñaha-güedé xii-dé, te cuáha cuèndá ñáhá-güedé xii-dé núú cuè téé ñúú Ròmá. Duha ní cáháⁿ Espíritú-gǎ —càchí té Agabú.

12 Te sá dúcáⁿ ñǐ cáháⁿ-dé, te ní xáhaⁿ-ndí nchaa-ndí sá vǎ quíhíⁿ té Páblú ñúú Jerusalén. 13 Te té Páblú ní cachí-dé:

—¿Ná cuèndá ndée dúcáⁿ ndàhyú-ndó dǎndìhú iní ñáhá-ndó xii-í-í? Te ñǎ túú nǎ cuu cuèi na dácutu ñaha-güedé, àdi cuèi na càhni ñaha-güedé xii-í cuèndá sá càháⁿ ndihí-í Jèsús, chí sa ndècu túha-í sá cùú-í —càchí-dé.

14 Te ñǎ túú ní sàndáá iní-dé sá dúcáⁿ xáhaⁿ-ndí, núu xiáⁿ ñǎ túú-gǎ ná ní xáhaⁿ-ndí xii-dé sá vǎ quíhíⁿ-dé, te ní xitnàha-ndí:

—Mee-ni-gǎ Yǎ Ndiòxí ná cùnaha-gǎ nása sàni iní-gǎ cada-gǎ —xitnàha-na-ndí.

15 Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñúú Jerusalén. 16 Te cuáháⁿ ndihi-ndí ñúú cue té Cèsareá, cue té ní sándáá iní tnúhu Jèsús. Te ndèca ñaha-güedé xii-ndí cuáháⁿ vehe té Mnàsón, te té-áⁿ cúú-dě té distritú Chìpré, te ndècu-dé ñúú Jerusalén, te sa ní cuu vài nduu ní sándáá ini-dé tnúhu-gá, te vehe té-áⁿ ní xíndecu-ndí.

Té Páblú ndátnúhu-dé ndihi té Jacobó

17 Te òré ní quexio-ndí ñúú Jerusalén, te nchaa ñáyiú ní sándáá iní tnúhu Jèsús ní quixí-yu ní dándácõo váha ñahá-yu, chi ní cudíí víhí iní-yu sá ñí quexio-ndí. 18 Te nduu tnèé cuáháⁿ ndihi-ndí té Páblú cuendá cáháⁿ ndihi-ndí té Jacobó, te òré ní quexio-ndí núú ndécú-dě, te ndècu ndihi-dé nchaa cue té yíndaha ñaha xii ñáyiú sándáá iní tnúhu Jèsús. 19 Te té Páblú ní dándácõo váha ñaha-dě xii-güedé, te ní xáhaⁿ-dè nacuáa ní quide Yá Ndiõxí ní chindee ñaha-gá xii-dé ní cáháⁿ-dé tnúhu-gá núú ñáyiú ñá túú cùu ñáyiú isràél. 20 Te sátá ñí yáha ní cáháⁿ-dè, te ní ndácáⁿ táhú-yu núú Yá Ndiõxí cuendá nchaa sá ñí quide-gá. Te dàtnúni ní xáhaⁿ-güedé xii té Páblú:

—Yòhó sa ñaha-n sá ñí cuu titní míl ñáyiú isràél ní sándáá iní-yu tnúhu Jèsús, te cächí-yu sá ño xìni ñuhu-xi cadá-yu nchaa nacuáa cáháⁿ tnúhu sá ñí chídó tnúni ndíi Moisés. 21 Te ní níhí-yu tnúhu sá dácuaha-n ñáyiú isràél ñáyiú ndècu ñúú xíca cuendá sá vâ cadá-gá-yu nacuáa ní cachí ndíi Moisés cadá-yu. Te xáhaⁿ-n xii-yu sá vâ cuáha-gá-yu seña ñí landú-yu, te vâ cadá-gá-yu dàtná ní xóo cada ñáyiú ndéé sanaha, duha dàcuaha-n ñáyiú ní níhí-yu tnúhu. 22 Te na níhí-yu tnúhu sá ndécú-n ñha, te tnávíí ngúíta-yu cáháⁿ cuèhé-yu cuendá-n.

23 Te na cächí tnúhu-ndí nacuáa cada-n. Ndècu cúmi cue téé vátá cadá-gá-güedé nacuáa ní cáháⁿ méé-güedé sá cadá-güedé cuendá nduu vétú iní Yá Ndiõxí. 24 Te quíhíⁿ-n ndihi-güedé te cada-n nchaa nacuáa ní xóo cada ñáyiú ndéé sanaha cuendá nduu vétú iní Yá Ndiõxí. Te tava-n díhúⁿ cuu núú-güedé cháhu-güedé veñúhu, te ducaⁿ te dàtnúni ndacu dèté díquí-güedé. Nchaa xíáⁿ cada-n, te quíni ñáyiú sá ñá ndáá tnúhu cáháⁿ nchaa ñáyiú cáháⁿ cuèhé cuendá-n. Te na cùtnuní iní-yu sá tnáhá-n quide-n nchaa nacuáa ní chídó tnúni ndíi Moisés cadá-yu. 25 Te sa ní quide ndáá-ndí cuendá nchaa ñáyiú ñúú xíca, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyiú-áⁿ sá vâ cáxi-yu nchaa sá nchító-ó ndúú táhú nchaa sá cächí-yu cùu ndiõxí ní cadúha cue ñáyiú ñuyíú-a. Te ní xáhaⁿ-ndí sá vâ cáxi-yu níñí, te vâ cáxi-yu cuñú nchaa quiti cuèhné. Te vâ cáháⁿ ndihi cue téé ñadíhí te núu ñá díú ñadíhí-güedé cúú-yu, te ní cuè ñáyiú díhí vâ cáháⁿ ndihí-yu téé te núu ñá díú yí-yu cùu-güedé. Duha ní tee-ndí núú tütú cuáháⁿ —cächí-güedé xáhaⁿ-güedé xii té Páblú.

Ní tñi-güedé té Páblú xiti veñúhu ñáyiú isràél

26 Te nduu tnèé cuáháⁿ té Páblú ndihi cúmi cue téé veñúhu càhnu sá ño cùnuu núú ñáyiú isràél cada-güedé nacuáa ní xóo cada ñáyiú ndéé sanaha cuendá nduu vétú iní Yá Ndiõxí. Te ní quíhu-dé veñúhu càhnu sá ño cùnuu-áⁿ ñí xáhaⁿ-dè ná daga-gá nduu cùmání dandíhí-güedé nacuáa ní xóo cada ñáyiú ndéé sanaha, te dàtnúni cànehe-güedé sá ndúú táhú Yá Ndiõxí quíhíⁿ veñúhu.

27 Te cùmání-gá cuu úsá nduu sá ñí sáháⁿ-güedé veñúhu càhnu sá ño

cùnuu, te sa ndècu tucu té Pàblú veñúhu. Te cue tée isràèl véxi distritú Asiá ní xini-güedé té Pàblú yíhí-dě veñúhu, te ní tñi ñaha-güedé xii-dé, te ío ní cáháⁿ cuèhé-güedé cuendá-dé núú dáva-gá ñáyiú yíhi veñúhu cuendá sá cúdeèⁿ-yu núú tē Pàblú. ²⁸ Te níhi ní cáháⁿ-güedé, te xáhaⁿ-güedé xii-yu:

—¡Nchòhó ñáyiú isràèl, yáchí-ndó chì cuànùndaha ñaha-ndo! Chì tée-a yayacáⁿ cuaháⁿ-dé cáháⁿ-dé sá ñà túú nàndíhi-o, te cáháⁿ-dé sá vǎ cǎdǎ-ó nchǎa nacuáa cáháⁿ tñúhu sá ní chídó tñuní ndíi Moisés, te cǎchí-dé sá ñà túú nàndíhi veñúhu-a. Te ñà díú-ní xiǎⁿ chí sa ní quíhu-dé veñúhu-a ndíhi cue tée ñà túú cùu ñáyiú isràèl, te sá dúcáⁿ ní quide-dé, te ñà túú-gǎ ní cǎnehe íi-dě xití veñúhu. Te veñúhu-a cùu-xi vehe Yá Ndióxi — cǎchí-güedé xáhaⁿ-güedé xii-yu.

²⁹ Te ducaⁿ ní cáháⁿ-güedé chí ní sani iní-güedé sá ní quíhu ndíhi-dé té Trófimú veñúhu-güedé, chí ní xini-güedé xicá cùu ndíhi ñaha-dé xití ñúú. Te tée-áⁿ cúú-dě tée ñúú Efesú, te ñà díú tée isràèl cúú-dě.

³⁰ Te chitu ñáyiú ñúú-áⁿ ní tacá-yu ní tñi-yu té Pàblú táñúhu ñahá-yu ní ndee veñúhu cǎnu sá ío cùnuu, te òré-ni ní nacadí-güedé yèhe veñúhu-áⁿ. ³¹ Te sa cǎhni-yu té Pàblú ní cùu, te ní sáháⁿ ñⁿ úú-güedé núú ndécú tée cùu capitáⁿ cùnuu-gá, te ní xáhaⁿ-güedé xii-dé sá ncháá ñáyiú ñúú Jerusalén xínáá-yu. ³² Te òré-áⁿ cuaháⁿ tée cùu capitáⁿ cùnuu-gá ndíhi dava-gá cue tée nchícúⁿ-gá ndíhi sandádú-dé. Te òré ní xini-yu ní quexio coyo-güedé núú xixúcu-yu, te ní yuhú-yu ñà túú-gǎ ní cǎní-yu té Pàblú. ³³ Te tée cùu capitáⁿ ní sátuha-dé té Pàblú, te ní xáhaⁿ-dě xii cue sandádú-dé sá tñi ñaha-güedé dacùtu ñaha-güedé úú cadená. Te dátñuní ní xicáⁿ tñuhú-dě núú-yu, te xáhaⁿ-dě:

—¿Ná cúú tée-a? ¿Ná ní

quide-dé? —cǎchí-dé xáhaⁿ-dě xii-yu.

³⁴ Te tée cùu capitáⁿ-áⁿ ñǎ ní cùtñuní iní-dé ñúú ná cúú sǎ ní quide té Pàblú, chí uuⁿ ní ní cuáá-yu. Te tucu cáháⁿ ñⁿ, tucu cáháⁿ ñⁿ-yu, núú xiǎⁿ ní xáhaⁿ-dě cue sandádú-dé sá cándèca ñaha-güedé xii-dé quíhiⁿ cuártél núú ndécú-güedé. ³⁵⁻³⁶ Te nchícúⁿ ñáhǎ-yu cuaháⁿ ní quexio ndéé nàcuáa cǎa nchio cùni-yu cǎhni ñahá-yu xii-dé ní cùu. Te níhi ní cáháⁿ-yu xǎhǎ-yu sá cǎhni ñaha-güedé, te xiǎⁿ ní ndacani ñaha-güedé ndécá ñaha-güedé cuásaá nchio-ǎⁿ.

Té Pàblú xáhaⁿ-dě xii-güedé sá ñà túú cuèchi-dé

³⁷ Te cuánguihu-güedé cuártél ndíhi té Pàblú ní cùu, te ní xáhaⁿ-dě xii tée cùu capitáⁿ cùnuu-gá:

—Cáháⁿ ndàhú-í núú-n cùndetu-n na cùñaha-í ñⁿ úú tñúhu xii-yu — cǎchí-dé xáhaⁿ-dě.

Te tée tàxi tñuní-áⁿ ní xáhaⁿ-dě:

—¿Náa tñahá yòhò cáháⁿ-n tñúhu griégú? ³⁸ Te ní cáhǎⁿ-í sá tée ègíptú cúú-n, chí diu-n ní ndúcú-n cuè tée ní nàá ndíhi tée cùchiuⁿ Césár ní cáhǎⁿ-í, chí diu ñⁿ tée yacáⁿ ní ndúcú-dé cúmí mǐl cue tée ní sahni ndíyi. Te ndèca tñaha-güedé ní sáháⁿ xití yucu ní xíhi váha-güedé — cǎchí-dé xáhaⁿ-dě xii té Pàblú.

³⁹ Te té Pàblú ní xáhaⁿ-dě:

—Ñà díú tée ègíptú cùu-í, chí tée isràèl cùu-í, chí diu-ni tée isràèl cúú tǎtǎ-í, te dicó-ni sá ní cacu-í ñúú Tàrsú ñúú cǎhni, te ñúú-áⁿ yíndèhu-xi distritú Ciliciá. Te cùni-í cada ndee iní-n dàña-n na cáháⁿ ndíhi-í-yu — cǎchí-dé xáhaⁿ-dě.

⁴⁰ Te ní xáhaⁿ tée cùu capitáⁿ cùnuu-gá sá cúú cáháⁿ té Pàblú, núú ní ngúnutñi-dé núú nchio, te ní quide-dé ndaha-dé sá cùndédóho-yu. Te ní sadí-yu yuhú-yu, te ní cáháⁿ-dé tñúhu ñáyiú isràèl, te xáhaⁿ-dě xii-yu:

22

1—Chí cádá càhnu iní nchòhó cue tée sa cuéhé ndìhì nchòhó cue tée cuechi, na càháⁿ-í ìⁿ tnúhu cundedóho-ndo sá ñà túú cuèchi-í, chí ñà túú nã ní quide-í, te ni ñà túú nã tnúhu càháⁿ-í —càchí-dé xàhaⁿ-dë xii-güedé.

2 Te cuëndá sá dúcáⁿ nĩ càháⁿ-dë tnúhu mèé-yu núu tnàvíí-nã ní sadí-yu yuhú-yu ní xíndedóho-yu ní càháⁿ-dë, te xàhaⁿ-dë:

3 —Yúhú cùu-í tée isràél, te ní cacu-í ñuú Tàrsú, te ñuú-áⁿ yíndèhu-xi Ciliciá. Te davitna lìhli-í cùtnàhá ní quexìo-í ñuú Jerusàlén ní dácúáhá ñàha té Gamaliél. Te ní dácúáháⁿ nchaa tnúhu ní chídó tnùnì nchaa cue tée ndéé sanaha nàcuáa cada ñáyiu. Te yúhú ní cahu iní-í ní quide-í titní núú chiúⁿ nacuáa cuu váha iní Yã Ndiòxí ní càháⁿ-í, te ñuú-ndi-í ducaⁿ quide nchohó tucu. 4 Te ní sánú ndúcù-í nchaa ñáyiu sàndáá iní-xi tnúhu Jèsús, cuèi tée, cuèi ñáyiu ñhì ní dácùtù-í-yu, te ní chihi-í-yu vecaá, te ní níhì-í tnúhu ndee iní sá càhni-ndí-yu. 5 Te dútú cúnù-gá ndìhì cue tée cànùu núu-ndó nàha-güedé sá ndáá càháⁿ-í chí mee-güedé ní taxi-güedé tutú cuáñaha-í xii ñáyiu isràél ñáyiu ndècu ñuú Dàmascú cuëndá cutnùnì iní-yu ná chíúⁿ cuáháⁿ-í ní cùu. Te ñùhu-í ichi cuáháⁿ-í ñuú-áⁿ cuànùndúcù-í ñáyiu ní sàndáá iní-xi tnúhu Jèsús cuëndá dacùtu-í-yu te candeca-í-yu ndixi, te iha cada úhú ñàhá-güedé xii-yu ni cùu.

Te Páblú xàhaⁿ-dë xii ñáyiu nàcuáa ní cuu ní tuha-dé ichi Jèsús (Hch. 9:1-19; 26:12-18)

6 'Te ta cùyatni-í ñuú Dàmascú cuáháⁿ-í, te cùu-xi datná òré cauxúu nduu, te uuⁿni ní quee ñuhú andiu, te ní dáyèhé-xi ndéé núú nútñí-í. 7 Te ní quide nee-xi núu-í, xíáⁿ ní nduá-í ndéé ñuhu. Te ní tecú dóho-í càháⁿ ìⁿ sá càháⁿ andiu, te càchí-xi: “Yòhó té Sàulú,

¿ná cuëndá cùu ùhú iní ñàhá-n dándoho ñaha-n xii-í?” càchí sá càháⁿ-áⁿ. 8 Te ní xàhaⁿ-í: “¿Ná cùu yòhó sá càháⁿ-áiⁿ?” xàhaⁿ-í. Te ní càháⁿ tucu ingá xito te càchí-xi: “Yúhú cùu-í Jèsús tée ní xíndecu ñuú Nazàrét, te ducaⁿ ò dándoho ñaha-n xii-í”, càchí sá càháⁿ-áⁿ. Te xíáⁿ ní cutnùnì iní-í sá díú Jèsús càháⁿ. 9 Te nchaa cue tée ndìhì-í ní xiní-güedé ní dáyèhé ñuhú, te ní yùhú-güedé, dico ñà túú ní tècú dóho-güedé òré ní càháⁿ-gá. 10 Te ní xàhaⁿ-í xii-gá: “Yòhó Xítóhó Jesucristú, ¿ná cùnì-n càda-í?” xàhaⁿ-í xii-gá. Te ní cachí-gá: “Ndacóo, te quíhìⁿ-n ñuú Dàmascú, yàcáⁿ tecú tnúhu-n nchàa nacuáa cùnì Yã Ndiòxí cada-n”, càchí-gá —càchí té Páblú xàhaⁿ-dë xii-yu.

11 Te ní xàhaⁿ tucu té Páblú:

—Te cuëndá sá ní dácúáá ñàha ñuhú xii-í ñuú ní tnì cue tée ndìhì-í ndaha-í ndécá ñàha-güedé cuáháⁿ ndéé ñuú Dàmascú.

12 'Te yàcáⁿ ndécú ìⁿ tée nani Ananiás, te ò vài sá ní chídó tnùnì ndí Moisés cada-yu quide-dé. Te nchaa ñáyiu ñuú Dàmascú ò váha càháⁿ ndìhì ñàhá-yu xii-dé. 13 Te ní quexìo-dé núú ndécù-í, te ní cachí-dé: “Yòhó té Sàulú, tée ndècu ndìhì-í ichi Xítóhó Jesucristú, ndúha núu-n”, càchí-dé. Te òré-ni ní nacaáⁿ núu-í te ní xiní-í-dé. 14 Te dátñùnì ní cachí-dé: “Yã Ndiòxí ní càháⁿ ndìhì-gá ñani tnàhá-ó ní xíndecu ndéé sanaha. Te ñuú-gá ní cáxi ñaha-gã xii-n cuëndá quini-n nchàa sá váha cùnì-gá cada-n. Te quini-n Jèsús Yaá ñà túú cuèchi-xi, te ñuú-ni mee-gã càháⁿ ndìhì ñaha-gã xii-n. 15 Te càháⁿ-n tnúhu Jèsús núu nchàa ñáyiu, te càháⁿ-n nchàa sá ní xiní-n ndìhì nchaa sá ní xíndedóho-n. 16 Tnàvíí, te quíhìⁿ-n cuàndute-n, te càháⁿ ndìhì-n Yã Ndiòxí cuëndá cada càhnu iní-gá nchaa sá cuéhé sá dúhá ní quide-n”, duha ní cachí té Ananiás xii-í —càchí té Páblú xàhaⁿ-dë xii-yu.

Té Páblú ní caní-dé cuèndú nàcuáa ní xáhaⁿ Jèsús cada-dé quíhíⁿ-dé ñúú núú xíndecu ñáyiú ñá túú cùu ñáyiú isràél

¹⁷ Te ní xáhaⁿ túcu té Páblú:

—Te ní ndee-í cuándixi-í ñúú Jerusalén. Te ní sáháⁿ-í veñúhu càhnu sá ïo cùnunu ní cáháⁿ ndíhi-í Yá Ndiòxí, te ní dácótó núú ñáhá-xí sá méé Jèsús ní xini-í xití veñúhu, ¹⁸ te ní cachí-gá: “Yáchí, quee-n ñúú Jerusalén, chí ñáyiú-a vá quíndáá iní-yu nàcuáa ní cachí-í cuñaha-n xii-yu cuèndá-í”, duha ní cachí-gá xii-í. ¹⁹ Te ní xáhaⁿ-í xii-gá: “Yóhó Xítohó Jesucrístú, sa xini-n sá ncháá ñáyiú nàhá-yu sá ní sáháⁿ-í ndí tnahá ñⁿ ndí tnahá ñⁿ veñúhu nànducu-í ñáyiú sandáá iní tñúhu-n, te ní tñú-í-yu, ní chihi-í-yu vecaá, te ní táuchíuⁿ-í ní caniha-güedé xii-yu. ²⁰ Te cútnàhá ní sahní-güedé ndí Tévá téé ní xóo cáháⁿ tñúhu-n, te tñáhá-í ndécú òré-áⁿ te ní xindeé-í dóó cue téé ní sahní ñaha xii ndí. Te yúhú ní cáháⁿ-í sá ní quide váha-güedé sá dúcáⁿ ní quide-güedé”, duha ní xáhaⁿ-í xii-gá. ²¹ Te ní cachí tñúhu-gá xii-í: “Cuàháⁿ chí cuíni-í quíhíⁿ-n ncháa ñúú xicá núú xíndecu cue ñáyiú ñá túú cùu ñáyiú isràél cáháⁿ-n tñúhu-í”, càchí-gá —càchí té Páblú xáhaⁿ-dé xii-yu.

Te Páblú ndíhi téé tàxi tñuní ñáhá xii cue sandadú

²² Te sá dúcáⁿ ní cáháⁿ-dé, te ñá ní tñáhá-gá iní-yu cundedóho-yu tñúhu cáháⁿ-dé. Te ñⁿ-ní ní cuú-yu ncháá-yu, te ní cuáá-yu, te xáháⁿ-yu:

—¡Chí cáhni-dé! ¡Ñá díú sá cündecu-dé ñuyíú-a! —càchí-yu xáháⁿ-yu.

²³ Te meí òré ducaⁿ ní cáháⁿ-yu, te ní ndátá-yu dóó-yu, te ní dáquènè-yu núú ñnu sá sàtú iní-yu. Te ní quéhnu-yu ñuhu, te ní dácácòyó-yu núú ñnu sá ïo sàtú iní-yu. ²⁴ Te téé cùu

capitáⁿ cùnùu-gá ní xáhaⁿ-dé xii cue sandadú-dé:

—Chí ditá-dé ná quíhu-dé ndéé xití vehe, te caní-ndo-dé ñí, chí na quène yuhu-dé ná tñúhu ní cáháⁿ-dé núu ndéé dúcáⁿ cùdèéⁿ-yu núú-dé —càchí-dé xáhaⁿ-dé xii-güedé.

²⁵ Te sáta ní dácútú ñàha-güedé xii té Páblú sá caní ñàha-güedé ní cùu, te ní xáhaⁿ-dé xii téé cùu capitáⁿ ndécú-áⁿ:

—Te na cachí tñúhu-í sá vā cúú càniha-güedé ñí, chí téé ròma cúú-í, te vátá quíni ndáá-gá-ndó núu ndécuéchi-í àdi ñáhá —càchí-dé xáhaⁿ-dé xii téé cùu capitáⁿ.

²⁶ Te sá dúcáⁿ ní cáháⁿ-dé, te ní sáháⁿ téé cùu capitáⁿ núú téé cùnunu-gá, te ní xáhaⁿ-dé:

—Vá cúú càni-o téé-áⁿ, chí téé ròma cúú-dé —càchí-dé xáhaⁿ-dé.

²⁷ Te ní sáháⁿ téé cùu capitáⁿ cùnùu-gá ndéé núú tē Páblú, te ní xáhaⁿ-dé:

—Cáháⁿ ndáá-n núu ndisa téé ròma cúú-n —càchí-dé xáhaⁿ-dé.

Te ní xáhaⁿ tē Páblú:

—Ndáá sá téé ròma cúú-í —càchí té Páblú xáhaⁿ-dé xii téé cùnunu-áⁿ.

²⁸ Te ní xáhaⁿ téé cùnunu-áⁿ:

—Yúhú tñáhá-í cúú-í téé ròma, chí vāi díhúⁿ ní cháhu-í —càchí-dé xáhaⁿ-dé.

Te té Páblú ní xáhaⁿ-dé:

—Tñáhá-í cúú-í téé yacáⁿ tucu, chí tātá-í cúú-dé téé ròma —càchí té Páblú xáhaⁿ-dé xii téé cùu capitáⁿ cùnùu-gá.

²⁹ Te uuⁿ ní nacaca sata cuè téé cuáháⁿ caniha xii-dé ní cuu. Te ní yúhú téé tàxi tñuní sá dúcáⁿ ní xáhaⁿ tē Páblú sá téé ròma cúú-dé, chí ní xáhaⁿ-dé ní dácútú ñàha-güedé xii-dé, núu xíáⁿ ní yuhu-dé.

Té Páblú ní cáháⁿ ndíhi-dé cue téé cùnunu òré ní quide-güedé jundá

³⁰ Te téé tàxi tñuní sandadú ñá ní xini-dé ná cuéchi ní dácáá ñáyiú isràél díquí tē Páblú, núu xíáⁿ nduu tñéé ní cana-dé cue dútú cùnùu, ndíhi cue téé cùchiuⁿ, ndíhi cue téé cùu sacuéhé, te ní xáhaⁿ-dé sá cáda-güedé jundá cuèndá nducu

tn̄hu-güedé núú tē Pāblú ná cuéchi ní dácáá-yu díquí-dē. Te ní xáhaⁿ-dē xii cue sandādú sá nándaxi ñaha-güedé cadená ndútú-dē, te candeca ñaha-güedé quíhíⁿ núú cádá-güedé jündá. Te ní sáháⁿ-güedé ní nandaxi ñaha-güedé xii-dé ndécá ñaha-güedé cuáháⁿ jündá, te ní quexìo-güedé, te ní ngúnutn̄í-dé núú cuè tée cùchiuⁿ.

23

¹ Te yacáⁿ ní xindéhé vaha té Pāblú núú ncháa-güedé, te ní xáhaⁿ-dē:

—Cada càhnu iní nchòhó cue tée cùchiuⁿ, te ducaⁿ nchòhó cue tée cùu sacuéhé, véxi-í cächí tn̄hu-í sá ñà túú cuèchi-í, chi mee Yā Ndiòxí náhá-gá nása ndècu-í ñuyú-a, te ñà túú cùcahaⁿ núú-í núú-gá —cächí té Pāblú xáhaⁿ-dē xii-güedé.

² Te té Anàniás tée cùu dútú cúnúu-gá ní xáhaⁿ-dē xii cue tée nùtn̄í yatni ññi té Pāblú sá cáni-güedé déhndé yuhu-dé. ³ Te té Pāblú ní xáhaⁿ-dē xii dútú-áⁿ:

—Yòhó, chi úhú tnàhí iní-n, chi ní ndúcú-n tée ní caniha xii-í, te ñà túú cuèchi-í, dico quini-n ná cada ñaha Yā Ndiòxí xii-n. Te yòhó ní cana ñaha-n ndècu tn̄hu-n núu quide-í nchaa nàcuáa càháⁿ tn̄hu sá ní chidó tn̄mí ndí Moisés cada-o. Te mee-n ní ndúcú-n tée ní caniha, te ñà túú ducaⁿ ní càháⁿ ndí cada-o —cächí té Pāblú xáhaⁿ-dē xii dútú cúnúu-gá-áⁿ.

⁴ Te cue tée x̄nutn̄í ññi té Pāblú ní xáhaⁿ-güedé xii-dé:

—Nèhé ní quide-n chi ní xicuéhé-n dútú cúnúu-gá tée x̄nu cuechi núú Yā Ndiòxí —cächí-güedé xáhaⁿ-güedé xii té Pāblú.

⁵ Te té Pāblú ní xáhaⁿ-dē xii-güedé:

—Cada càhnu iní-ndó chi ñà túú x̄mí-í sá dútú cúnúu-gá cùú-dé, chi núú tütú Yā Ndiòxí cächí-xi sá vā cùú càháⁿ cuèhé-ó cuendá ññi tée cúnúu ñuú-ó yòtn̄hu. Te yúhú ñà túú x̄mí-í sá tée cúnúu cuu-dé núu ní sácóo-í ní càháⁿ-í —cächí té Pāblú xáhaⁿ-dē xii-güedé.

⁶ Te òrè-áⁿ ní cutn̄nì iní té Pāblú sá dáva-güedé cündihí-güedé cue tée cùu saducéú, te dava-güedé cündihí-güedé cue tée cùu fariséú, te ñhi ní càháⁿ-dē ní xáhaⁿ-dē xii-güedé:

—Yúhú cùu-í tée fariséú, te tnàhá tātà-í ndihí x̄mí-í cùú-güedé cue tée fariséú tucu. Te tnàhá yúhú sàndáá iní-í sá ndótó ncháa ñayiu ní x̄hí, te núu x̄lãⁿ cuini-ndó nducu tn̄hu-ndo núú-í cáná ñaha-ndo —cächí-dé xáhaⁿ-dē xii-güedé.

⁷ Te sá dúcáⁿ ní càháⁿ-dē x̄lãⁿ ní nàá ndihí tnàha cue tée cùu fariséú ndihí cue tée cùu saducéú, chi ñà ññi-ní tn̄hu ní càháⁿ-güedé, chi ní ndi queheⁿ ndi queheⁿ-güedé sá ní càháⁿ-güedé. ⁸ Te cue tée cùu saducéú cächí-güedé sá vā ndótó cuè ñayiu ní x̄hí, te cue tée cùu fariséú cächí-güedé sá ndótó-yu. Te cue tée cùu saducéú cächí-güedé sá ñà túú espíritú x̄nú cuèchi núú Yā Ndiòxí, te cue tée cùu fariséú cächí-güedé sá ió espíritú x̄nú cuèchi núú-gá. ⁹ Te ta cùdèéⁿ-güedé cuáháⁿ, te ñhi-gá cùú iní-güedé càháⁿ-güedé, te ññi úú cue tée cùu fariséú cue tée dàcuaha ñaha xii ñayiu nchaa tn̄hu ní chidó tn̄mí ndí Moisés ní càháⁿ ñhi-güedé, te xáhaⁿ-güedé:

—Ñà túú cuèchi-dé, te cudana te ní càháⁿ ndihí-dé ññi espíritú x̄nú cuèchi núú Yā Ndiòxí te vā ngõo vā cùú vaha iní-ó núú-gá —cächí cue tée cùu fariséú xáhaⁿ-güedé xii-güedé.

¹⁰ Te cuendá sá ió x̄nàá-güedé, x̄lãⁿ ní yúhú tée cùu capitáⁿ cúnúu-gá sá càhni-güedé té Pāblú, núu x̄lãⁿ ní xáhaⁿ-dē sá quíhíⁿ-güedé cúnúcuaca ñaha-güedé candeca ñaha-güedé núhú cuártel.

¹¹ Te ndéé niú cùú úú ní quexìo Xitohó Jesucristú núú ndécú té Pāblú, te ní xáhaⁿ-gá:

—Ññi cunduu-n, vā yúhú-n, chi nàcuáa ní càháⁿ-n ní cacunehe ñaha-n x̄mí-í iha, te ñu-ni ducaⁿ càháⁿ-n càcunehe ñaha-n xii-í

quihíⁿ-n ñùú Rómá —càchí-gá xáhaⁿ-gã xii-dé.

Cahni-güedé té Páblú ní cùu

¹²⁻¹³ Te nduu tnée ní natacá vîhi-gá údico cue téé isrâél ní ndatnúhu-güedé sá cáhni-güedé té Páblú, te ní xítñaha-güedé:

—Ní dítá vã cáxí-ó te ni ndüte vá cóhó-ó ndéé ndacu-o cáhni-o té Páblú, te dátnùní caxi-o dítá, te coho-o ndüte, chi sa ní sani iní-ó sã cádá-ó, te cuu cuéchi xii-o ñúú vá cádá-ó —càchí-güedé xítñaha-güedé.

¹⁴ Te ní sáhán-güedé núú ndécú nchàa dútú cúnúu ndihî nchaa cue téé cùu sacuéhé, te ní xáhaⁿ-güedé:

—Ní cachí-ndí sá ni dítá vã cáxí-ndí ndéé ñúú ní ndacu-ndí ní sahani-ndí té Páblú, chi sa ní sani iní-ndí sá cádá-ndí, te cuu cuéchi núú vá cádá-ndí. ¹⁵ Te duha cada-ndo ndihî dava-gá cue téé cùnúu, chi cùñaha-ndo xii téé cùu capitáⁿ cúnúu-gá: “Quixi ndihî-n tẽ Páblú núú ndécú-ndí cuendá ndatnúhu ndihî-ndí-dé, chi cuíní-ndí nducu tnúhu váha-gá-ndí ná cúú sã ñí quide-dé”, duha cùñaha-ndo xii téé tàxi tñuní sandádú. Te ducaⁿ-ni cùñaha-ndo dándahú-ndó-güedé cuendá quixi ndihî-güedé té Páblú, te nchúhú sa cundetú-ndí-güedé ichi, chi quini té Páblú ná cahni-ndí-dé —càchí-güedé xáhaⁿ-güedé xii cue téé cùchiuⁿ.

¹⁶ Te déhe cúha té Páblú ní níhí-dé tnúhu nàcuáa cada-güedé ditó-dé. Te ní sáhán-dé cuártel, te ní xáhaⁿ-dẽ xii ditó-dé nàcuáa càháⁿ-güedé cada ñaha-güedé. ¹⁷ Te ní cana té Páblú ñⁿ téé cùu capitáⁿ, te ní xáhaⁿ-dẽ:

—Vá cündèe iní-n, quihíⁿ ndihî-n tẽe-a na càháⁿ ndihî-dé téé cùnúu-gá, chi ndécú ñⁿ cuendú cùñaha-dé cuíní-í —càchí té Páblú xáhaⁿ-dẽ xii téé cùu capitáⁿ.

¹⁸ Te dátnùní ní xica téé cùu capitáⁿ ndécá-dé dáxíⁿ té Páblú cuáháⁿ núú ndécú tẽe cùnúu-gá, te

òré ní quexìo-güedé núú-dé, te ní xáhaⁿ tẽe cùu capitáⁿ xii-dé:

—Té Páblú téé yìhi vecaá ní cana ñaha-dẽ xii-í, te ní cachí-dé véxi-í ndihî tẽe-a cuendá cachí tnúhu-dé ñⁿ cuendú cuíní-dé —càchí-dé xáhaⁿ-dẽ xii téé cùnúu-gá.

¹⁹ Te téé cùnúu-áⁿ ñí tñii-dé ndaha dáxíⁿ tẽ Páblú, te tànehe ñaha-dé cuáháⁿ ñⁿ xio, te ní xicáⁿ tnúhú-dé núú-dé, te xáhaⁿ-dẽ:

—¿Ná cuendú cuíní-n càháⁿ-n? —càchí-dé xáhaⁿ-dẽ xii dáxíⁿ tẽ Páblú.

²⁰ Te ní xáhaⁿ-dẽ xii téé cùnúu-áⁿ:

—Cue téé isrâél ní ndatnúhu ndáa-güedé sá quixí-güedé tneé càháⁿ ndáhú-güedé núú-n càndeca-n té Páblú quihíⁿ jundá, te yàcáⁿ cácáⁿ tnúhú ndáa-güedé núú-dé ná cúú sã ñí quide-dé, càchí-güedé xítñaha-güedé. ²¹ Te

vã quìndáá iní-n chi dícó dandáhú ñáhá-güedé, chi vîhi-gá údico-güedé ndátnúhu-güedé cundedí-güedé ichi cahni ñaha-güedé. Te xítñaha-güedé sá ni dítá vã cáxí-güedé, te ni ndüte vá cóhó-güedé ndéé ñúú ní ndacu-güedé ní sahani ñaha-güedé, te dátnùní caxi-güedé dítá, te coho-güedé ndüte, chi sa ní sani iní-güedé sá cádá-güedé, te cuu cuéchi núú vá cádá-güedé, càchí-güedé xítñaha-güedé. Te cundecu túha-ná-güedé cundetú ñaha-güedé tneé, te núú na quìndáá iní-n càndeca-n-dé quihíⁿ jundá —càchí-dé xáhaⁿ-dẽ xii téé cùnúu-áⁿ.

²² Te téé cùnúu-áⁿ ñí xáhaⁿ-dẽ: —Cuanùhú, te vá yóo tñahí cùñaha-n sã ñí quixi-n ñí cachí tnúhu-n nàcuáa càháⁿ-güedé cada-güedé té Páblú —càchí-dé xáhaⁿ-dẽ.

Ndèca-güedé té Páblú cuáháⁿ núú tẽ Juéllí téé cùu gobiernú

²³ Te téé cùnúu-gá ní cana-dé úú cue téé cùu capitáⁿ, te xáhaⁿ-dẽ: —Tava-ndo úú ciendú sandádú cue téé xica saha, ndihî únídico úxí sandádú cue téé yòdo cuayú, ndihî

úú cièndú sandàdú mee-ni cuè téé xînehe lánzá. Te cada túha-ndo chi caca-ndo òré caá ííⁿ niú quíhíⁿ-ndó ñúú Cèsareá ndíhi té Páblú. ²⁴ Te nducu-ndo cuèdicó ííⁿ úú cuàyú codo-dé ndíhi cue téé ndèé ñáhá xî-dé. Te cada cuèdádú-ndó-dé ichi, te candeca-ndo-dé quíhíⁿ quíndeca-ndo-dé núú téé cùu gobiernú —càchí téé cùnuu-áⁿ xáhaⁿ-dé xii cue téé cùu capitáⁿ.

²⁵ Te téé cùnuu-áⁿ ñí cadúha-dé tutú cuèndá quíhíⁿ ndaha té Juélí téé cùu gobiernú. Te duha ní chídó tnùní-dé núú tutú cuáháⁿ:

²⁶ “Cóvaha díí-n, tātá gobernàdór. Ío cada càhnu iní, yúhú nání-í Claudiú Lisiás. Yúhú ní tendaha-í ííⁿ tutú véxi ndaha-n cuèndá quíni tnùní-n nàcuáa ní cuu iha. ²⁷ Cue téé israél ní tñí-güedé ííⁿ téé nàni Páblú cuíni-güedé cahni ñaha-güedé ní cùu, te ní níhí-í tnúhu sá téé rómá cùú-dé núu ní sáhá-í ndíhi sandàdú-í ní dácäcu-ndí-dé. ²⁸ Te ní cuíni-í quíni-í ná cuèndá téé ñaha-güedé cuéchi xii-dé, núu xíáⁿ ndécá-í-dé ní sáháⁿ núú ñí quide cue téé cùchiuⁿ israél jundá. ²⁹ Te yacáⁿ ní níhí-í tnúhu sá ñà túú ñà cuéchi ni quide-dé, chi cuèndá-ni sá ñí níhí-güedé tnúhu sá ñà túú sandáá iní-dé cada-dé nchaa sá ñí xóo cada ñáyu ní xíndecu ndéé sanaha nchícúⁿ nihnu-güedé quide-güedé, xíáⁿ ní cudééⁿ-güedé núú-dé. Te ñá túú cuéchi càhnu ni quide-dé núu quíhíⁿ-dé vecaa àdi cahni-í-dé. ³⁰ Te ní níhí-í tnúhu sá cuè téé israél ndúcú-güedé nàcuáa cada-güedé cahni ñaha-güedé xii-dé, xíáⁿ ní xáhaⁿ-í xii sandàdú-í sá cándeca ñaha-güedé quixi xíáⁿ. Te ní xáhaⁿ-í xii cue téé tètè ñaha cuéchi sá quíxi-güedé ndéé xíáⁿ cáháⁿ-güedé núu ná cuéchi ní quide-dé. Te cada càhnu iní-n chi duha-ni ndùu tnúhu cáháⁿ-í, te cundee iní-n quèheⁿ cuèndá-n-dé”, duha ní chídó tnùní téé ní cadúha tutú cuáháⁿ ndaha té Juélí.

³¹ Te cue sandàdú ní quide-güedé

nàcuáa ní xáhaⁿ tètè tàxi tnùní ñáhá xii-güedé chí ní xica-güedé ndíhi té Páblú òré caá ííⁿ niú, te ñíu-ni niú-áⁿ ñí quexio-güedé ñúú Antipatrís. ³² Te sáta ní túndaá, te ní nacuico cuè téé xînehe lánzá ndíhi dava-gá sandàdú xíca sàha cuánuhú-güedé cuàrtél, te mee-ñà sandàdú cue téé yòdo cuayú cuáháⁿ ndíhi té Páblú. ³³ Te òré ní quexio-güedé ñúú Cèsareá, te ní sàha-güedé téé cùu gobiernú tutú néhé-güedé cuáháⁿ. Te ní quèheⁿ cuèndá-dé té Páblú. ³⁴ Te sáta ñí dácúháⁿ tètè cùu gobiernú-áⁿ tutú-áⁿ te ní xícaⁿ tnúhú-dé núú tètè Páblú, te xáhaⁿ-dè:

—¿Ndéé téé cùu-n? —cachí-dé xáhaⁿ-dè.

Te ní xáhaⁿ tètè Páblú:

—Téé Ciliaciá cùú-í —càchí-dé xáhaⁿ-dè.

³⁵ Te ní xáhaⁿ téé cùu gobiernú-áⁿ:

—Òré quexio cue téé tètè ñaha cuéchi xii-n, te cáháⁿ-n nàsa ní cuu, chí níhí-í nàcuáa cada ndáá-í cuèndá-n —càchí-dé xáhaⁿ-dè xii té Páblú.

Te ní xáhaⁿ-dè xii sandàdú sá cùndèé-güedé té Páblú vehe càhnu té Hèrodés.

24

Té Páblú xáhaⁿ-dè xii té Juélí sá ñà túú cuéchi-dé

¹ Te sáta ñí cuu úhúⁿ nduu, te té Ananiás dútu cùnùu-gá cuáháⁿ-dé ñúú Cèsareá ndíhi cue téé cùu sacuéhé ndíhi ííⁿ téé nàni Tértulú téé cáháⁿ yuhu-güedé. Te cuáháⁿ-güedé núú tètè cùu gobiernú cuáháⁿ dácúándèhnde-güedé núú-dé sá ndècuéchi té Páblú. ² Te ní sànguaca-güedé té Páblú. Te òré ní quexio-dé núú-güedé, te ní ngúita té Tértulú xáhaⁿ-dè xii té Juélí nàcuáa càa cuéchi tètè-güedé té Páblú:

—Ío càhnu cada iní tātá gobernàdór. Duha ndùu chiuⁿ ndéé iní ñáhá-ndí xii-n véxi-ndí, núu nàsa cachí-n cùnduu. Táxahu xii-n, chí ío váha ndècu nchaa ñáyu, te ñá túú nàá-yu chí ío váha quide-n. ³ Te ío cùdíí iní-yu chí

nchaa-ni nduu xĩndecu váha-yu nchaa-yu, te ío táxáhu Ndiõxí xii-n sã dúcãⁿ quide-n. ⁴ Te cada càhnu iní, cuiñí-í ndatnúhu-o ñⁿ úú-ni cuendú cuendá sã vã cùyãa-o dacuíta-í chiuⁿ-n. ⁵ Te ñⁿ téé iha ío dásatú iní ñáhã-dẽ, chi ndëni ní cuu cuáhãⁿ-dẽ ndatnúhu-dẽ ndihí ñáyiú isràél dánãã-dẽ-yu. Te nèhẽ quidé-dẽ chi cuáhãⁿ-dẽ dácãháⁿ-dẽ nchaa ñáyiú cuendá quĩndã iní-yu tnúhu téé ní xĩndecu ñúú Nazàrèt. ⁶ Chi ducaⁿ càháⁿ cue téé iha sã ní sáhãⁿ-dẽ veñúhu càhnu sã ío cùnuu, te cuiñí-dẽ daquèe tíhú-dẽ veñúhu cuendá cuiñí-dẽ xocãni-dẽ sã íi ndécú, núu xĩãⁿ ní tñii ñaha-güedẽ ndécã ñaha-güedẽ cuáhãⁿ núu cuè téè cùchiuⁿ cuendá cácaⁿ tnúhú-güedẽ núu-dẽ núu ná cuendá ducaⁿ cuiñí-dẽ cada-dẽ, chi ducaⁿ càa leí ndécú ndihí-güedẽ sã cáda ndãã-güedẽ núu ná ñⁿ sã cúú. ⁷ Te té Lisíú téé cùu capitãⁿ cúnùu-gã ní quexio-dẽ ndihí sandàdú, te ní dácúnú-güedẽ nchaa cue téé nùtnii ndihí té Pãblú, te dàtnùní ní tñii ñaha-güedẽ xii-dẽ ndécã ñaha-güedẽ cuáhãⁿ. ⁸ Te sátã xĩãⁿ, te ní xáhaⁿ-dẽ sã quixí-güedẽ ndéé ndíha cundãã cuèchi-dẽ. Te yòhó cundee iní-n càcãⁿ tnúhú-n núu-dẽ, te núu ndãã ducaⁿ ñi quide-dẽ àdi ñáhã —càchí té Tèrtulú xáhaⁿ-dẽ xii té Juèlí téé cùu gobiernú.

⁹ Te dava-gã cue téé isràél xĩnutnii xĩãⁿ ñi càháⁿ-güedẽ sã ndãã càháⁿ té Tèrtulú. ¹⁰ Te téé cùu gobiernú ní quide-dẽ ndaha-dẽ núu té Pãblú cuendá càháⁿ-dẽ, te té Pãblú ní xáhaⁿ-dẽ:

—Yòhó sa ní cuu titní cuiã ndécú-n iha xehndé-n cuèchi nchaa ñáyiú xĩnãã, núu xĩãⁿ ío cùdii iní-í sã ndíha téhndé cuèchi tèè ñaha-güedẽ xii-í. Te cundee iní-n cãndedóho-n na càni-í cuendú nãcuãã ní cuu. ¹¹ Te nducu tnúhu-n te quini-n ná càháⁿ ndãã-í, chi sa ní cuu úxúú nduu sã ñi sáhãⁿ-í veñúhu càhnu sã ío cùnuu ñúú Jerusalén ní càháⁿ ndihí-í Yã Ndiõxí. ¹² Te ni ñã túú

ní nãã-í ndihí ñáyiú xití veñúhu, te ñã túú ní xáhaⁿ-í nãã-yu ni ñⁿ xichi, te ni ñⁿ veñúhu líhli ní sáhãⁿ-í ñã túú nã ní xáhaⁿ-í cadã-yu. ¹³ Te ni ñã túú quèñuhu-güedé cue téé càháⁿ ndãã te núu ndãã ducaⁿ ñi quide-í. ¹⁴ Te yúhú càháⁿ ndãã-í sã càháⁿ ndihí-í Yã Ndiõxí, chi ñi-yu-ni Yã Ndiõxí ní xóo càháⁿ ndihí ñáyiú ndéé sanaha, núu xĩãⁿ ní tuha-í ichi-gã. Te cue téé-a càchí-güedé sã ñã díú ñⁿ ichi váha ni tuha-í. Te yúhú sandãã iní-í nchaa sã ní chidó tnùní ndíi Moisés ndihí dava-gã cue téé ní xóo càháⁿ tnúhu Yã Ndiõxí ndéé sanaha. ¹⁵ Te sandãã tucu iní-í sã ndótó nchãã ñáyiú ní xihí, cuèi ñáyiú váha iní-xi, te cuèi ñáyiú úhú iní-xi, dico ndotó-yu. Te ducaⁿ ñi xóo quĩndãã iní nchaa ñáyiú ní xĩndecu ndéé sanaha. ¹⁶ Te yúhú ío ndücu ndee-í quidé-í nchaa sã càháⁿ Yã Ndiõxí cuendá sã vã cúú càhaⁿ núu-í núu-gã ndihí núu ñáyiú ñuyíú-a.

¹⁷ Te sa ní cuu titní cuiã sã ñã túú-gã sáhãⁿ-í ñúú Jerusalén, te ní sáhãⁿ tucu-í nèhè-í díhúⁿ ñi taxi ñáyiú ñúú xicã cuendá cuãñaha-í xii ñáyiú ñúú Jerusalén. Te ní ndúcú-í sã cuãha táhú-í Yã Ndiõxí. ¹⁸ Te ní xĩndecu-í veñúhu càhnu sã ío cùnuu ní quide-í nchaa nãcuãã ní xóo cada ñáyiú ní xĩndecu ndéé sanaha cuendá nduu vétú iní Yã Ndiõxí. Te ñã túú chitú-yu ni sáhãⁿ, te ni ñã túú nã ní cùu, te ní naníhí ñáhã ñⁿ úú cue téé isràél xii-í, cue téé véxi distritú Asiã. ¹⁹ Te quixi mee-güedẽ iha càháⁿ-güedẽ, te núu sã ndãã ní xini-güedé sã yúhú ndècuèchi-í ní cùu, ²⁰ àdi ñáhã. Dico càchí tnúhu cue téé-ãⁿ nãsa ní cuu òrè ní xĩndecu-í jündã-güedé núu ndècuèchi-í àdi ñã túú ndècuèchi-í. ²¹ Dico ñã túú cuèchi-í chi ñⁿ ñi-ni tnúhu ní càháⁿ-í ní xáhaⁿ-í xii-güedé sã sandãã iní-í sã ndótó nchãã ñáyiú ní xihí, te ñi-yu-ni núu xĩãⁿ càchí-güedé sã ndècuèchi-í —càchí té Pãblú xáhaⁿ-dẽ xii té Juèlí.

²² Te té Juèlí sa xĩní váha-dé

nàcuáa cuáháⁿ tnúhu Jèsús, núu xíáⁿ ñá ní cuíní-gá-dé ndatnúhu-dé ndihí té Páblú, te ní xáhaⁿ-dë:

—Sa ní cuu, cundetu-n na quèxio té Lìsiú té cùu capitáⁿ cúnúu-gá, te òré-áⁿ cundáá cuèndá-n —càchí té Juélí xáhaⁿ-dë.

²³ Te ní xáhaⁿ-dë xii té cùu capitáⁿ:

—Cundeé-n tē Páblú-áⁿ, te núu nása càchí-dé cada-n, te dañá-n na càháⁿ ndihí-dé cue téé xíní tnáhá ndihí-dé núu cuáñaha-güedē nchaá sá xíní ñúhu-dé àdi nása cada-güedé —càchí té Juélí xáhaⁿ-dë xii té cùu capitáⁿ.

²⁴ Te ní cuu titní nduu, te ní sáháⁿ té Juélí vechiúⁿ ndihí ñadihí-dé, te ñaha-áⁿ nání-áⁿ Drüsílá, te ñaha is-ràél cùú-áⁿ. Te ní xáhaⁿ-dë sá quíngueñuhu-güedé té Páblú, te òré ní quexió-dé vechiúⁿ, te ní cáháⁿ-dë núu-yu nchaá-yu sá quíndáá iní-yu tnúhu Xítohó Jesucristú. ²⁵ Te ní xáhaⁿ-dë:

—Mee-ni sã vãha cada-ndo. Te coto-ndo mēe-ndo, te vã cadá-ndó ñí ñíⁿ sá cuèhé sá dúhá, chi ñíⁿ nduu cáháⁿ Yã Ndióxi ndédacãa ñáyiu váha iní-xi, te ndédacãa ñáyiu úhú iní-xi —càchí té Páblú xáhaⁿ-dë.

Te sá dúcáⁿ ní xáhaⁿ-dë, te ní yùhú té Juélí, te ní xáhaⁿ-dë:

—Vá càháⁿ-gá-ó tnáví, cuáháⁿ, te òré cùyáchí-í, te cana ñaha-í xii-n —càchí-dé xáhaⁿ-dë.

²⁶ Te té Juélí ní quide-dé cuèndá sá cuáñaha tē Páblú díhúⁿ te vã ndíhu-gá-dé vecaá ní cùu, núu xíáⁿ titní xito ní cana-dé té Páblú vechiúⁿ ní ndatnúhu ndihí tnáha-güedé, dico ñá túú ní chãhu-dé. ²⁷ Te úú cuíá ducaⁿ ñí quide-güedé, te dàtnúni ní xínu té Juélí chiúⁿ-dé, te ní ngúnutñí té Pòrsiú Fèstú. Te òré ní xínu té Juélí chiúⁿ-dé, te ní dándõ-dé té Páblú yíhí-ni-dë vecaá. Te ducaⁿ ñí quide-dé cuèndá ní cuíní-dé cudíu-dé núu cuè téé is-ràél.

25

Té Páblú càháⁿ ndihí-dé té Fèstú

¹ Te ní cuu úní nduu sá ñí quexio té Fèstú ñúú Cèsareá ní queheⁿ-dé chiúⁿ, te ní quee-dé cuáháⁿ-dé ñúú Jerusálén. ² Te yàcáⁿ ní naníhí tnáhá-dé ndihí nchaá dútú cúnúu ndihí nchaá cue téé tàxi tñuní ñáhá xii ñáyiu is-ràél, te xáhaⁿ-güedé xii té Fèstú sá ndáá ndècuéchi té Páblú. ³ Te ní cáháⁿ ndáhú-güedé núú-dë sá téndàha-dé sandàdú-dé quíngueñuhu ñaha-güedé vecaá xii-dé ndéé ñúú Cèsareá te candeca ñaha-güedé quíhíⁿ. Te ducaⁿ ñí cáháⁿ-güedé, chi ní ndatnúhu-güedé sá cáhmi ñaha-güedé xii té Páblú ichi ní cùu. ⁴ Te té Fèstú ní xáhaⁿ-dë:

—Vá cúu quíxi-dé ndéé ndíha. Na cundetu-dé ñúú Cèsareá chi sacú-ni nduu cuyaa-í iha te dàtnúni núhú-í yàcáⁿ. ⁵ Te yáchí-gá quíhíⁿ ndihí-í cue téé cúnúu-gá, te yàcáⁿ cuu cáháⁿ-ndó núu ndáá ndècuéchi-dé àdi cáháⁿ mée-dë núu ndáá ndècuéchi-dé àdi ñáhá, te cutnúni iní-ndó —càchí-dé xáhaⁿ-dë.

⁶ Te ní xíndecu té Fèstú úná úxí nduu ñúú Jerusálén, te dàtnúni cuánuhú-dé ñúú Cèsareá. Te nduu tñé cuáháⁿ-dë vechiúⁿ, te òré ní quexió-dé, te ní xáhaⁿ-dë xii cue sandàdú xínú cuèchi sá quíhíⁿ-güedé queñuhu-güedé té Páblú vecaá te candeca ñaha-güedé quíhíⁿ vechiúⁿ. ⁷ Te òré ní quexio té Páblú vechiúⁿ, te sa ndècu cue téé is-ràél cue téé ní quee ñúú Jerusálén, te cuánguihu-güedé ndéé díñí té Páblú ní ngúnutñí-güedé, te xáhaⁿ-güedé xii cue téé cùchiúⁿ sá ndècuéchi víhi-dé, dico ñá túú ní cundee tnúhu-güedé. ⁸ Te té Páblú ní xáhaⁿ-dë xii té Fèstú:

—Ñá túú ndècuéchi-í, ñá túú ñá ní quide-í, chi ñá túú tnáhá iní-í cada-í ñíⁿ sá càchí lèi sá vã cúu càda-o. Te ní xiti veñúhu càhnu sá ño cúnúu ñá túú ñá quidè-í, te ní té Cèsár téé yíndaha cuèhé nàcióⁿ ñá túú càháⁿ cuèhé-í cuèndá-dé —càchí té Páblú xáhaⁿ-dë xii-dé.

⁹ Te té Fèstú ní cuiní-dé cada-dé nàcuáa cudíu-dé núu cuè téé israhél ní cùu, núu xǎⁿ ní xáhaⁿ-dé xii té Páblú:

—¿Cundee iní-n quíhíⁿ-n ñúú Jerusalén-áⁿ? Te yàcáⁿ cundáá cuéchi sá sàá díquí-n —càchí té Fèstú xáhaⁿ-dé xii té Páblú.

¹⁰ Te xáhaⁿ tē Páblú:

—Díu-ni ñⁿ vechiⁿ tēe cùchiuⁿ Cèsár ndécù-í iha, te díu-ni iha cada ndáá-n ñúu cuiní-n ní cùu. ¿Te ná cuendá candeca ñaha-n quíhíⁿ ingá xichi? Yòhó tñàhá-n xini-n sǎ ñà túú nǎ quidè-í ñáyiú israhél. ¹¹ Chi núu dícó yúhú ní quide-í ñⁿ cuéchi càhnu, te ñà túú nǎ cada-xi cuèi na càhni ñaha-ndo xii-í ní cùu. Te sa ní cutnùni iní-n sǎ ñà ndáá, chi mee-ni tñùhu ndehnde xícáháⁿ-güedé, te ñà túú ndùu váha-xi ducaⁿ càda-n cúñaha-n sǎ quíhíⁿ-í ndihi-güedé ingá xichi. Te xǎⁿ cuiní-í quíhíⁿ-í núú tē Cèsár tēe yindaha cuéhé nacióⁿ, te yàcáⁿ cáháⁿ méé-dé ñúu ndáá ndécuechi-í —càchí té Páblú xáhaⁿ-dé xii té Fèstú.

¹² Te ní ndatnúhu té Fèstú ndihi cue tēe chindee tñùhu ñaha xii-dé, te dàtnùni ní xáhaⁿ-dé xii té Páblú:

—Te sa ní cáháⁿ-n sǎ quíhíⁿ-n quítnahá-n tē Cèsár te díu-ni quíhíⁿ-n, te quiní-n nǎsa cáháⁿ tēe-áⁿ yàcáⁿ —càchí-dé xáhaⁿ-dé xii té Páblú.

Té Páblú càháⁿ ndihi-dé té Àgripá tēe yindaha nacióⁿ Israhél

¹³ Te sáta ñí cuu cuéhé nduu, te ní quee té Àgripá tēe yindaha nacióⁿ Israhél cuáháⁿ-dé ñúú Cèsareá ndihi ñadhi-dé, te ñaha-áⁿ nání-áⁿ Berènicé te òré ní quexió-yu, te ní cáháⁿ ndihí-yu té Fèstú. ¹⁴ Te sáta ñí cuu titní nduu, te ní cáháⁿ té Fèstú cuendá té Páblú ní xii-dé té Àgripá:

—Ndècu ñⁿ tēe ní dándóo té Juéllí vecaá nání-dé Páblú. ¹⁵ Te cútnàhá ní sáháⁿ-í ñúú Jerusalén ní nanítnàhá-í ndihi cue dútú cúnùu ndihi cue tēe cùu sacuéhé núú ñáyiú israhél. Te ní dácáá

díquí-güedé té Páblú cuéchi, te ní cachí-güedé sá táuchiuⁿ-í cahni ñaha-güedé xii-dé ní cùu. ¹⁶ Te ní xáhaⁿ-í xii-güedé sá vǎ cùú, chi ñà túú ducaⁿ quide nchúhú cue tēe ròrá cùtexínu cada castiú-ndí ñáyiú, chi díhna-gá ndúcú tñùhu-ndí núú ñáyiú sàá cuéchi díquí-xi cuendá quiní-ndí ñúu nǎsa cáháⁿ méé-yu ndihi ñáyiú sàcáⁿ cuéchi cuendá-yu, te òré-áⁿ cútnùni iní-ndí ñúu ndáá ndécuechi-yu àdi ñáhá, te ducaⁿ te ñihí-ndí nàcuáa quide ndáá-ndí cuendá-yu, duha ní xáhaⁿ-í xii-güedé —càchí té Fèstú xáhaⁿ-dé xii té Àgripá.

¹⁷ Te ní xáhaⁿ tūcu té Fèstú:

—Te sáta ñí quexió-güedé ndéé ndíha, te nduu tñéé ní sáháⁿ-ñi-ndí vechiⁿ. Te ní xáhaⁿ-í sá quingueñuhu-güedé té Páblú candeca ñaha-güedé quixi, te òré ní quexió-dé, ¹⁸ te ní ngüita-güedé xáhaⁿ-güedé sá ndécuechi-dé. Te ní saní iní-í sá ñⁿ cuéchi càhnu tee ñaha-güedé dico ñáhá, chi dícó-ni sá ñⁿ tñùhu ní cáháⁿ-dé, xǎⁿ ducaⁿ ñí quide-güedé. ¹⁹ Te ní tenáá ñáhá-güedé xii-dé, chi càchí-güedé sá ñà túú càháⁿ váha-dé cuendá ndiòxí-güedé. Te tñàhá-ni cuendá ñⁿ tēe nàni Jesús càháⁿ-dé, chi càchí-dé sá ñí xihí tēe-áⁿ te ní ndoto-dé càchí-dé xáhaⁿ-dé xii-güedé, càchí-güedé. ²⁰ Te ñà ní cutnùni iní-í nǎsa cúñaha-í xii-güedé cuendá téhndé cuéchi-dé. Te xǎⁿ ní xicáⁿ tñùhu-í núú tē Páblú ñúu cundee iní-dé quíhíⁿ-dé ñúú Jerusalén, te ndéé ndiácaⁿ cada ndáá-ndí cuendá-dé, te núu ndáá ndécuechi-dé nàcuáa càháⁿ-güedé àdi ñáhá ní cùu. ²¹ Te dàtnùni té Páblú ní cachí-dé sá cùndècu tnaa-dé vecaá te dàtnùni quíhíⁿ-dé núú tē Cèsár, te tēe-áⁿ cada ndáá-dé cuendá-dé. Te cuendá sá dúcáⁿ ñí cáháⁿ té Páblú, xǎⁿ núu ní xáhaⁿ-í sá cùndéé ñáhá cuè sandadu xii-dé, nini na còto-í nǎsa cada-í quíhíⁿ-dé

núú tĕ Cēsár, duha ní xáhaⁿ-ĩ xii-güedé —cächí tĕ Fĕstú xáhaⁿ-dĕ xii tĕ Àgripá.

²² Te tĕ Àgripá ní xáhaⁿ-dĕ xii tĕ Fĕstú:

—Te tnàhá yúhú ío cudíí ìní-í cundedóho-í tnúhu càháⁿ-dé —cächí-dé xáhaⁿ-dĕ.

Te ní xáhaⁿ tĕ Fĕstú:

—Tnĕe cana-í-dé te cundedóho-n nása cáháⁿ-dé —cächí-dé xáhaⁿ-dĕ.

²³ Te nduu tnĕé ní quexio tĕ Àgripá ndihi ñadhí-dé tá Berĕnicé vechi^u, te ío ní quide càhnu ñaha-güedé xii-yu. Te cuánguihú-yu vechi^u ndihi cue tĕe cùu capitáⁿ cúnù-gá ndihi cue tĕe cùnùu ñúú Cēsareá. Te tĕ Fĕstú ní xáhaⁿ-dĕ sá quingueñuhu-güedé tĕ Pāblú vecaá, te òrĕ ní quexio-dé, ²⁴ te ní xáhaⁿ tĕ Fĕstú xii tĕ Àgripá ndihi nchaa ñáyi^u xĩndecu-áⁿ:

—Chí cündĕhe tĕe iha chi tĕe-a cächí cue tĕe isràél sá ndĕcuéchi-dé, te cúnàhá ní xĩndecu-í ñúú Jerusalén ní cachí-güedé sá ndáá ndĕcuéchi-dé, te ñu-ni ducaⁿ càháⁿ-güedé iha. Te nchaa-güedé ní cuáá-güedé te cächí-güedé sá táuchi^u-í cahni ñaha-güedé xii-dé ní cùu. ²⁵ Te sáta ní ndihi cuëndú ní cáháⁿ-güedé, te ní cutnùní ìní-í sá ñà túú ñì ĩⁿ cuéchi càhnu ñi quide-dé, núu ñà túú ní tàuchi^u-í cahni ñaha-güedé xii-dé. Te mee-dĕ ní cachí-dé sá quihíⁿ-dé núú tĕ Cēsár tĕe yĩndaha cuéhé nacióⁿ, te ní xáhaⁿ-ĩ sá cúú quihíⁿ-dé. ²⁶ Te ñà túú ní xini váha-í nása ní quide-dé, núu xĩáⁿ ñà ní ñhì-í nàcuáa cadúha-í tutú quihíⁿ ndaha tĕ Cēsár, te xĩáⁿ ní cana-í-dé véxi-dé iha cuëndá nchaa-ndo cáháⁿ ndihi-ndo-dĕ. Te ducaⁿ cànuu cadíhna-gá yòhó tātá Àgripá cácáⁿ tnúhú-n núú-dĕ núu nása cáháⁿ-dé, te òrĕ-áⁿ cutnùní ìní-í nása cada-í cadúha-í tutú quihíⁿ ndaha tĕ Cēsár. ²⁷ Chi sàni ìní-í sá ñà túú ndùu váha-xi sá quihíⁿ ĩⁿ tĕe tàú cuéchi te núu vá códó tnùní núú ĩⁿ tutú nàcuáa càa cuéchi tàú-dĕ —cächí tĕ Fĕstú xáhaⁿ-dĕ xii-güedé.

26

Te Pāblú càháⁿ ndihi-dé tĕ Àgripá

¹ Te dàtnùní ní xáhaⁿ tĕ Àgripá tĕe yĩndaha nacióⁿ isràél xii tĕ Pāblú:

—Te vitna cáháⁿ-n núu nása ní cuu cuëndá-n —cächí-dé xáhaⁿ-dĕ.

Te tĕ Pāblú ní ndacani-dé ndaha-dé sá cündĕdóho-güedé, te ní xáhaⁿ-dĕ xii tĕ Àgripá tĕe yĩndaha nacióⁿ isràél:

²⁻³ —Tātá Àgripá, ío cudíí ìní-í sá ñi naníhí tnàhá-ó vitna, chi yòhó ío váha xini-n nchàa nacuáa quide ñáyi^u isràél quidé càhnú-yu Yá Ndiòxí, te ío váha xini-n nchàa tnúhu xitnàhá-yu. Te vitna cundee ìní-n cündĕdóho-n ĩⁿ úú tnúhu na càháⁿ-í. Na cächí tnúhu-í sá ñà ndáá ní quide-í nchaa sá cáháⁿ cue tĕe isràél.

Tĕ Pāblú càháⁿ-dé nàcuáa ñi quide-dé cúnàhá vátá túhá-gā-dé ichi Yá Ndiòxí

⁴ Te sa naha nchaa cue tĕe cùnùu núú ñáyi^u isràél nàcuáa ní quide-í ñúú-í ndihi ñúú Jerusalén cúnàhá ní cuu landú-í. ⁵ Te mee-güedé náhá-güedé sá ndĕé lĩhli-í ní chitnahá-í cue tĕe cùu fariséú. Te núu cuini-güedé cáháⁿ-güedé sá tĕe fariséú cùu-í àdi ñáhá dico nchaa-güedé sa naha-güedé sá cué tĕe-áⁿ ñi chitnahá-í. Te cue tĕe cùu fariséú-áⁿ ío cuini-güedé cada-güedé nchaa nàcuáa nchicúⁿ nihnu ñáyi^u quidé-yu. Te yúhú nchaa sá nchicúⁿ nihnú-yu quidé-yu-áⁿ ñi quide-í. ⁶ Te vitna ndĕcu-í iha, te cáháⁿ-n núu váha-ñi quide-í àdi ñáhá, chi cue tĕe-áⁿ tĕe ñaha-güedé cuéchi xii-í cuëndá sá sàndáá ìní-í sá ndótó nchàa ñáyi^u ní xihí. Te ñu-ni ducaⁿ ñi xáhaⁿ Yá Ndiòxí xii nchaa ñani tnàhá-ó ñi xĩndecu ndĕé sanaha. ⁷ Te nchaa ñáyi^u-áⁿ xĩndetú-yu nduu ndòto ñáyi^u ní xihí ní cùu. Te ñu-ni ducaⁿ ndĕtu nchaa ñani tnàhá-ó ndĕcu ñuyú-a ndĕé vitna, te xĩáⁿ núu cuĕi nduu cuĕi niú cáháⁿ ndihi-yu Yá Ndiòxí. Te sá sàndáá ìní-í núu xĩáⁿ ní cáháⁿ-í, te tĕe ñaha cue tĕe isràél

cuéchi xii-í. ⁸ ¿Te ná cuendá nchòhò cue téé isràèl ñá túú cuiní-ndó quindáá iní-ndó sá dándòto Yá Ndiòxí nchaa ñáiyu ní xíhí? —càchí té Páblú xáhaⁿ-dè.

Té Páblú caní-dè cuendú sá nǐ xóo chihi-dé ñáiyu sàndáá iní tñuhu Jèsús vecaá

⁹ Te ní xáhaⁿ tùcu té Páblú:

—Ndéé dàvá-áⁿ nǐ quide úhú-í ñáiyu sàndáá iní-xi tñuhu Jèsús Yáá ní quee ñuu Nazàrèt, te ní càháⁿ-í sá vâha-ní ní quide-í sá dúcáⁿ nǐ quide-í. ¹⁰ Te ñu-ni ducaⁿ nǐ quide-í ñuu Jerusàlén. Te cue dútú cùnù ní taxi-güedé ñⁿ tutú cuendá tñi-í ñáiyu ní sàndáá iní tñuhu Jèsús, te vâi-yu ní chihi-í vecaá. Te òré ní càháⁿ-güedé sá càhni-güedé ñáiyu-áⁿ, te tñàhá-í ní càháⁿ-í sá cúú càhni ñaha-güedé xií-yu. ¹¹ Te titní xito ní sáháⁿ-í nchaa veñúhu ñáiyu isràèl, te ní caní-í-yu te ní xáhaⁿ-í sá dáñá-yu ichi Jèsús. Te cuendá ío ní cudéèⁿ-í núú-yu, xiáⁿ ní sáháⁿ-í nchaa ñuu xíca nǐ sánúndúcù-í dava-gá ñáiyu sàndáá iní tñuhu-gá cuendá dandòho ñaha-güedé xií-yu.

Té Páblú càháⁿ tucu-dé nása ní cuu ní tuha-dé ichi Yá Ndiòxí
(Hch. 9:1-19; 22:6-16)

¹² Te cuendá xiáⁿ ní xíca tucu-í cuáháⁿ-í ñuu Dámascú, néhè-í tutú ní taxi cue dútú cùnù cuáháⁿ, cuendá sá ndácù-í tñi-í nchaa ñáiyu sàndáá iní tñuhu Jèsús ní cùu. ¹³ Te òré caúxúú nduu ñuhu-í ichi cuáháⁿ-í, te uuⁿni ní quee ñuhú andiú nǐ dáyèhé-xi ndéé núú núnñi-í ndihi cue téé ndèca tñaha ndihi-í, te níhi-gá ní dáyèhé-xi dàcúxí nchicanhii. ¹⁴ Te nchaa-ndí ní nduá-ndí ndéé ñuhu, te ní tecú dóho-í càháⁿ ñⁿ sá càháⁿ tñuhu ñáiyu isràèl, te càchí-xi: “Yòhó Sàulú, ¿Ná cuendá cúú úhú iní ñáhá-n xii-í dándòho ñaha-n? Te ío dándòho-n mee-n, chi dàtná cuiní-n quide ndicutu quide-n chi quiti-áⁿ òré cùxi-güedé-di pùya te sáha-di patadá núú-xi, te sá dúcáⁿ quide-di te quide úhú-di mee-di. Te

ducaⁿ sàtnahá-xi cùu yohó chi ñá túú sàndáá iní ñáhá-n xii-í”, càchí sá ní càháⁿ-áⁿ. ¹⁵ Te ní xáhaⁿ-í: “¿Ná cúú yòhó sá ní càháⁿ-áⁿ?” xáhaⁿ-í. Te càchí sá càháⁿ-áⁿ: “Yúhú cùu-í Jèsús Yáá cúú úhú iní-n”, duha ní cachí sá càháⁿ-áⁿ. Te xiáⁿ ní cutnùní iní-í sá Jèsús càháⁿ.

¹⁶ Te ní cachí-gá: “Ndacuíñi-n chi yúhú càháⁿ-í chi cuiní-í quíhíⁿ-n càda-n chiuⁿ-í, chi quíhíⁿ-n càháⁿ-n núú ñáiyu nàcuáa ní cuu ní xiní ñáhá-n xii-í vitna, te quixi tucu-í càháⁿ ndihi ñaha-í xii-n, te cùñaha-n xii-yu nàcuáa càháⁿ-í. ¹⁷ Chi cuiní-í quíhíⁿ-n càháⁿ-n tñuhu-í núú ñáiyu isràèl ndihi núú ñáiyu ñá túú cùu ñáiyu isràèl, te coto ñaha-í xii-n cuendá vá càhni ñáhá-yu xii-n. ¹⁸ Te cuiní-í quíhíⁿ-n cùñaha-n xii-yu sá dáñá-yu nchaa ichi cuèhé ichi duha ndècú-yu, te tuhá-yu ichi váha cuendá vá quindáá iní-yu cadá-yu sá càháⁿ yucu ñávâha, te quindáá iní-yu cadá-yu nchaa nàcuáa càháⁿ Yá Ndiòxí. Te núu na quindáá iní-yu tñuhu càháⁿ-í, te cada càhnu iní-í nchaa cuéchi-yu, te naníhí tàhú-yu ndihi dava-gá ñáiyu sa ní xócuñi nchaa sá cuèhé sá dúhá nǐ xíndecu iní-yu”, duha ní cachí-gá xii-í —càchí té Páblú xáhaⁿ-dè xii té Agripá téé yíndaha nacióⁿ Isràèl.

Té Páblú quidé-dé nchaa nàcuáa ní xáhaⁿ Jèsús cada-dé

¹⁹ Te ní xáhaⁿ tùcu té Páblú xii té Àgripá:

—Ñá túú dàña ndeé-í quidé-í nchaa nàcuáa ní càháⁿ Jèsús òré ní càháⁿ-gá andiú. ²⁰ Te díhna-gá ñáiyu ñuu Dámascú ní càháⁿ-í tñuhu-gá núú-yu, te ní xáhaⁿ-í xii-yu sá dáñá-yu nchaa sá cuèhé sá dúhá quidé-yu, te càháⁿ ndihi-yu Yá Ndiòxí, te cadá-yu mee-ni sá vâha cuendá cutnùní iní dava-gá-yu sá ní dáñá-yu nchaa sá ñá túú vâha ní xóo cadá-yu. Te ducaⁿ-ni ní xáhaⁿ-í xii ñáiyu ñuu Jerusàlén

ndihí ñáyiú ñihí ñacióⁿ Isràél ndihí nchaa ñáyiú ñá túú cùu ñáyiú isràél. ²¹ Te cuendá sá dúcáⁿ ní cáháⁿ-í ñúu ní tñi ñaha cùe téé isràél xii-í cùtnàhá ní sáháⁿ-í veñúhu cáhnu sá lo cùnuu cahni ñaha-güedé ní cùu. ²² Te ñiu-ni mee Yá Ndióxi ní chindee ñaha-gá xii-í ñúu ndècu-í iha tñaví cáháⁿ-í tñúhu-gá, te mee-ni tñúhu-gá cáháⁿ ndihí-í nchaá-yu, cuéi ñáyiú cuica, te cuéi ñáyiú ndàhú. Te ndíi Moisés ndihí dava-gá cue téé ní xóo cáháⁿ tñúhu Yá Ndióxi ndéé sanaha ní cáháⁿ-güedé ñacuáa cada-xi vitna, te ñiu-ni ducaⁿ cáháⁿ-í nchaa-ni nduu. ²³ Te cue téé-áⁿ ní cachí-güedé sá Crístú Yaa tendaha Yá Ndióxi quixi ñuyíú-a ndoho tnahá-gá, te cuú-gá, te dàtnùni ndoto-gá. Te ducaⁿ cada-xi nchaa ñáyiú ní xihí ndotó-yu núu na sáa nduu chi ducaⁿ cada-xi ní cachí mée Yá Ndióxi. Te cuendá sá dúcáⁿ ní ndoto-gá, xiáⁿ cùtnùni sá cúu ñànhí tàhú ñáyiú, cuéi ñáyiú isràél, te cuéi ñáyiú ñá túú cùu ñáyiú isràél. Te dàtná-ni nduu tñúhu ní cáháⁿ cue téé ní xóo cáháⁿ tñúhu-gá ndéé sanaha-áⁿ, te ñiu-ni ducaⁿ cáháⁿ yúhú tucu —cachí té Páblú xáhaⁿ-dè.

Té Páblú xáhaⁿ-dè xii té Àgripá sá quindáa iní-dé tñúhu Jèsús

²⁴ Te sá dúcáⁿ ní cáháⁿ té Páblú, te ní cáháⁿ ñihí té Fèstú, te xáhaⁿ-dè:

—Páblú, jóo lùcú cáháⁿ-n! Cuendá ío vai ní dácuahá-n, núu xiáⁿ ndádá lùcú ñahá-xí xii-n —cachí-dé xáhaⁿ-dè.

²⁵ Te ní xáhaⁿ té Páblú:

—Ñahá, vá dúcáⁿ cáháⁿ-n chi ñá díú sá lùcú-í duha cáháⁿ-í, chi tñúhu ndáa cáháⁿ-í. ²⁶ Te té Àgripá-a sa ñaha-dé ndihí nchaa ñáyiú isràél ñacuáa ní cuu, chi sa ní ñihí-dè tñúhu ndihí dava-gá-yu ñacuáa ní cáháⁿ-í, núu xiáⁿ cùyi-í cáháⁿ ndihí-í-dé —cachí-dé xáhaⁿ-dè xii té Fèstú.

²⁷ Te ní xáhaⁿ-dè xii té Àgripá:

—Yúhú sa xini-í sá sandáa iní-n tñúhu ní chidó tñùni cue téé ní xóo

cáháⁿ tñúhu Yá Ndióxi ndéé sanaha —cachí-dé xáhaⁿ-dè.

²⁸ Te ní xáhaⁿ té Àgripá:

—¿Quède-n cuendá sá ñiⁿ úú tñúhu ní cáháⁿ-n te quindáa iní-í tñúhu Jèsús cáháⁿ-n-áⁿ? —cachí-dé xáhaⁿ-dè.

²⁹ Te ní xáhaⁿ tucu té Páblú:

—Cuéi vitna te cuéi ndéé cuéé-gá dico cuini-í sá dácuitíi sá quindáa iní-n tñúhu Jèsús. Te ñiu-ni ducaⁿ xicáⁿ tàhú-í núu Yá Ndióxi sá ncháa ñáyiú ndècu ndihí-o iha quindáa iní-yu tñúhu-gá dàtná cuini-n ní quide yúhú, ducaⁿ cada-yu. Dico-ni sá ñúu vá quihíⁿ-ni-yu vecaá dàtná cuini-n ndòho yúhú —cachí-dé xáhaⁿ-dè xii té Àgripá.

³⁰ Te sáta dúcáⁿ ní cáháⁿ-dé, te ní ngúnutñi té Àgripá téé yindaha nacióⁿ Isràél, ndihí té Fèstú téé cùu gobiernú, ndihí tá Berenicé ndihí dava-gá ñáyiú xñucóo yatni. ³¹ Te ní tnahá-yu ndèca tnahá-yu cuaháⁿ ñiⁿ xio. Te ní xitnahá-yu:

—Téé-áⁿ ñá túú ñá cuéchi ni quide-dé ñúu chihí ñaha-güedé vecaá àdi cahni ñaha-güedé —cachí-yu xitnahá-yu.

³² Te té Àgripá ní xáhaⁿ-dè xii té Fèstú:

—Cuéchi mee-dè chi ní cachí-dé sá quitnahá-dé té Cèsár, xiáⁿ ñúu ndihu tucu-dé vecaá, te núu ñá túú ducaⁿ ní cáháⁿ-dé, te cacu-dé ní cùu —cachí-dé xáhaⁿ-dè xii té Fèstú.

27

Té Páblú cuaháⁿ-dé ñúu Rómá

¹⁻² Te ní ndatnúhu-güedé sá quihíⁿ té Páblú ndihí bàrcú nacióⁿ Itàliá, te tñahá yúhú quihíⁿ-í ndihí-dé. Te tñahá ñiⁿ téé ñàni Aristarcú cuini-dé quihíⁿ ndihí-ndí-dé, te cùu-dé téé ñúu Tesalónicá, te ñúu-áⁿ yindèhu-xi distritú Macèdoniá. Te ní sáha cuendá-güedé té Páblú ndihí ñiⁿ úú-gá cue téé xixihí vecaá ní queheⁿ cuendá ñahá té Jülüú téé

cùu capitán, tée yíndaha nchaa sandadú nání Augustú, te ní quée-ndí nchaa-ndí bàrcú ñúú Adràmitíú. Te ní xica bàrcú-án cuáhán-ndí ndihí-xi te cuíta yáha-ndí ñúú ñúú yíndèhu distritú Àsiá quíhíⁿ. ³ Te nduu tnée ní quexìo-ndí ñúú Sìdón. Te ío váha ní quide té Jülüú, chí ní dáñá-dé ní quene té Páblú ní sáhán-dé ní cáháⁿ ndihí-dé cue téé ío váha tñahá tñúhu ndihí-dé ñúu cudana cundáhú iní ñáhá-güedé cuñaha-güedé nchaa sá xíní ñúhu-dé. ⁴ Te dàtnùní ní ndée tucu-dé bàrcú cuáhán-ndí. Te ío níhi táchí te ñá ní dáña-xi caca ndáá bàrcú, te ní sáhán bàrcú ndée yatni yuhu distritú Chìpré, te distritú-án cáá cuádava xití làmár, te xíaⁿ ñá túú cuéhé táchí ní yáha-ndí. ⁵ Te ta yáha-ndí cuáhán, te ní yáha-ndí ñúú xio yuhu distritú Cìliciá ndihí yuhu distritú Pànfilíá, te ní sáá-ndí ndée ñúú Mírá ñúú ñúú yíndèhu distritú Lìciá.

⁶ Te ní quene téé cùu capitán cuándúcú-dé ingá bàrcú, te ní níhí-dé ñúú bàrcú téé ñúú Alejándriá, ñúhú ichi-xi quíhíⁿ-xi nacióⁿ Itáliá. Te ní ndicuaca ñaha-dé xii-ndí cuáhán-ndí ní quée-ndí bàrcú-án, te ní xica-xi cuáhán-xi. ⁷ Te ío cuée cuáhán bàrcú-án, cuéhé nduu ní xúhuⁿ-xi ichi, te yica-ni ní quexìo-ndí yuhu ñúú Nidú, te ñá ní dáña-gá táchí quíhíⁿ ndáá bàrcú ñúu ní xícó ndúú-xi. Te ní yáha-ndí ñúú xio yuhu distritú Crétá núú ñá túú quene vihi táchí, te ñúu-ni cuádava tucu làmár cáá distritú-án. Te ní yáha-ndí yuhu ñúú Sàlmón, te ñúu-ni Crétá yíndaha-xi ñúú-án. ⁸ Te ní yáha-ndí cuáhán-ndí mee-ná núú ràyá distritú Crétá, te ío ní ndoho-ndí ní sáá-ndí ñúú xichi núú nání Puértú Váha, yatni víi-ni-gá ñúú Làseá.

⁹ Te ní cuyaa vihi-ndí ichi, ducaⁿ-ni cùu-ndí ní tñahá yóó cúúⁿ dáu táchí, te ío úhú yáha bàrcú ñúu

na quíhíⁿ-ni-xi. ¹⁰ Te ní xáhaⁿ té Páblú xii-güedé:

—Nchaa-ndo cùndedóho-ndo tñúhu na cáháⁿ-í-a. Ío úhú núú na cáda yica-o quíhíⁿ-ó ndihí barcú chí cuíta càrgá te cuíta bàrcú, te cuu-ni iní-xi tñahá-ni mee-o cùú-ó chí cáhá-ó núu na ngàunihnu-o xití ndute —càchí-dé xáhaⁿ-dè xii-güedé.

¹¹ Te téé cùu capitán ñá ní sàndáá iní-dé tñúhu ní cáháⁿ té Páblú. Dico tñúhu ní cáháⁿ téé dàcaca barcú ndihí xitohó-xi chí ní sàndáá iní-dé. ¹² Te ñá ní tñahá iní-güedé Puértú Váha cuèndá sá ní tñahá yóó cúúⁿ dáu táchí, te ñá túú dāhu váha táchí xíaⁿ, núu vai-güedé ní cuiní-güedé yáha-güedé quíhíⁿ-güedé sáá-güedé ndée ñúú Fènicé ní cùu. Te yácáⁿ cundecu-güedé yóó cúúⁿ dáu táchí cuèi ñá túú càváha vihi, chí nchíi nàcuáa yáha bàrcú, te yácáⁿ quíhu táchí, dico dāhu-gá. Núu xíaⁿ ndée ndiáçáⁿ nátacá bàrcú yóó cúúⁿ dáu táchí, te ñúu-ni Crétá yíndaha-xi ñúú-án.

Nitùhú làmár cúúⁿ dáu táchí

¹³ Te duha ní quene nuu luha táchí, xíaⁿ ní sani iní-güedé sá ndácú-güedé quíhíⁿ-güedé, núu ní natava-güedé caá ndètní ndée bàrcú, te ní xica-xi cuáhán-xi ní yáha-ndí yatni víi yuhu distritú Crétá. ¹⁴ Te tñaa-ni ní cuu sá ní xica bàrcú, te duha ní cunuu dáu táchí ñúú xio yuhu ñúú-án ¹⁵ te nchita ichi cuáhán bàrcú. Te ñá ní ndàcu-gá-xi quíhíⁿ ndáá-xi nàcuáa cuáhán-xi ní cùu, núu ní dáñá-ndí cuáhán méé-ná bàrcú. ¹⁶ Te ní yáha-ndí ñúú ñúú nání Clàudá, te ñúú-án cáá cuádava xití làmár. Te ñúú xio yuhu ñúú núú ñá túú quene vihi táchí ní yáha-ndí, te bàrcú líhli sá nchicúⁿ sáta bàrcú cáhnú, chí ní ndacu-ndí ní taxúha-ndí xití bàrcú cáhnú. ¹⁷ Te sáta ní ndacu-ndí ní taxúha-ndí bàrcú líhli, te ní ducuⁿ nuu-güedé yóó bàrcú cáhnú. Te ío ní yùhú-güedé

sá yáha bàrcú ndéé núú ñúhú cùchí yuhu ñúú Sírte, núu xíáⁿ ní ndihí dóó nchítá dǐquí bàrcú ní nuu nehe-güedé, chí dóó-ánⁿ ío níhi chindaha táchí, núu xíáⁿ cuáháⁿ bàrcú ìⁿ xio. Te ní dáñá-güedé ñá túú-gǎ ní dàcaca-güedé, núu cuáháⁿ méé-nǎ-xi ta chindaha táchí cuáháⁿ.¹⁸ Te ío níhi dáú táchí, te ñá ní cuíni tñahí-xi yáha. Te nduu úú sá dúcáⁿ ñá túú-gǎ ní dàcaca-güedé bàrcú te ní ngüíta-güedé ní dǎngöyo-güedé sá nchídó-xí cuendá cuíni-güedé nduu ñamá-xi.¹⁹ Te nduu úni ní dǎngoyo-güedé nchaa ndachíuⁿ cánehe chíuⁿ-güedé xítí bàrcú.²⁰ Te cuéhé nduu ñá túú ní xíní-ndí ní chòdíní ní nchíanchii, chí ío níhi ní cuuⁿ dáú táchí, núu ní cáháⁿ-ndí sá vǎ cácu-ndí, chí ndihí-ndí cáhá ní cáháⁿ-ndí.

²¹ Te ní cuu titní nduu ñá túú-gǎ xéxí-ndí, núu xíáⁿ ní ngúnutníⁿ té Pǎblú núú-güedé, te xáhaⁿ-dǎ:

—Quindáá iní-ndó tñuhu ní cáháⁿ-í, te cundecu nahi-o Crétá ní cùu. Te núu ní tñi-ndo tñuhu-í, te vǎ dácuíta-o cárgá ndihí dava-gǎ ndáchíuⁿ ní cuu.²² Te vǎ yùhú-ndó chí vǎ cùú ní ìⁿ-ndo dico bàrcú chí cuíta.²³ Te nàha-ndo sá yùhú càháⁿ ndihí-í Yǎ Ndiòxí te quide-í nàcuáa càháⁿ-gǎ. Te ñu-ni mee-gǎ ní techíuⁿ-gǎ ìⁿ espíritú xínú cuèchi núú-gǎ ní quixi,²⁴ te ní cachí-xi xii-í: “Vǎ yùhú-n chí vǎ cùú-n, dico dacuití quíhíⁿ-n cáháⁿ ndihí-n té Césár. Te ní ìⁿ té ndihí-n vǎ cùú, chí ío cùdí iní ñáhá Yǎ Ndiòxí xii-n”, duha ní cáháⁿ espíritú xínú cuèchi núú-gǎ ní cachí tñuhu-xi xii-í.²⁵ Núu xíáⁿ cachí tñuhu-í sá vǎ yùhú-ndó, chí sa cùtnuní iní-í sá cádá Yǎ Ndiòxí nàcuáa ní cáháⁿ espíritú xínú cuèchi núú-gǎ.²⁶ Te mee táchí chindaha-xi bàrcú daquíhíⁿ-xi ndéé yuhu ndute — cachí té Pǎblú xáhaⁿ-dǎ xii-güedé.

²⁷ Te sa ní cuu sáhúⁿ nduu sáhúⁿ niú sá ní ngüíta-xi cùú dáú táchí, te ñá túú-gǎ dáca-güedé bàrcú, chí

mee-nǎ táchí tá chindaha-xi bàrcú cuáháⁿ núu ndute lámár Adriá. Te sáta ní cuu dava niú, te ní quide cuendá cue tée dàcaca bàrcú sá tá cüyatni-güedé ñuhu yichí.²⁸ Te ní chícuáhá-güedé ná daha-gǎ mètrú néhé-xí sá cùnú xítí ndute cuendá cutnùní iní-güedé sá tá cüyatni-xi ndéé yuhu lámár, te nehe-xi ócò sáhúⁿ ìⁿ-ni-gǎ mètrú. Te ní xica tucu bàrcú luha-gǎ, te dàtnuní ní chícuáhá tucu-güedé, te xíáⁿ néhé-xí ócò úsá-ni-gǎ mètrú.²⁹ Te ní yùhú-güedé sá candaundeé-xi cava, te ní queheⁿ-güedé cúmí caá nahnú sá nchícúⁿ yoho, te ní dáquèe-güedé xítí ndute ndaa sáta bàrcú, te dàtnuní ní ngüíhí-xi ñá ní xica-gǎ-xi, te ní cuíni-güedé sá òré-ni túndaá ní cùu.³⁰ Te cue tée dàcaca bàrcú ní natava-güedé bàrcú líhli dándée-güedé núu ndute ní cùu, te ní cachí-güedé sá quíhíⁿ-güedé ndaa núu bàrcú dàquée-güedé úú-gǎ caá cuendá cuita candeé-xi bàrcú cáhnú cuendá sá vǎ cáca-xí. Te cuíni-güedé dandáhú-güedé dava-gǎ nchúhú cue tée ñuhu ndihí-güedé bàrcú, chí ní ndatnúhu-güedé sá cùnú-güedé ní cùu.³¹ Te té Pǎblú ní xáhaⁿ-dǎ xii tée cùu capitáⁿ ndihí dava-gǎ sandàdú:

—Te núu na dándóo ñaha cuè tée dàcaca bàrcú cunu-güedé, te vǎ cácu-o —càchí-dé xáhaⁿ-dǎ.

³² Te sá dúcáⁿ ní xáhaⁿ-dǎ nñu ní sáháⁿ sandàdú ní xehndé-güedé yoho nchícúⁿ bàrcú líhli dǎngáuníhnu-güedé xítí ndute cuáháⁿ-xi.

³³ Te váha váha-ni ta túndaá cuáháⁿ, te ní xáhaⁿ té Pǎblú:

—Sa ní cuu sáhúⁿ nduu ñá túú tñahí xèxi-ndo sá ndihú iní-ndó.³⁴ Te vitna yáchí-ndó, chí caxi-ndo cuendá naníhí ndéé-ndó, te vǎ yùhú-ndó chí ñá túú nǎ tñahá ní ìⁿ-ndo —cachí-dé xáhaⁿ-dǎ xii-güedé.

³⁵ Te sáta dúcáⁿ ní cáháⁿ-dé, te ní queheⁿ-dé ìⁿ pàa, te ní

ndacáⁿ táhú-dě núú Yă Ndiôxí, te núú-güedě nchaa-güedé ducaⁿ ní quide-dé, te dătnúni ní táhú-dě luha ní xexi-dé. ³⁶ Te ducaⁿ te dătnúni ní cuyi-güedé ní xexi-güedé nchaa-güedé. ³⁷ Te úú ciendú únídico sáhúⁿ iⁿ-ndí ñúhú bàrcú núú tnàhá té Păblú, te nchaa-ndí ní xexi ndihi-ndí-dé. ³⁸ Te ní xexi-ndí ní ndahá xití-ndí, Te dătnúni ní nguíta-güedé ní tava-güedé nchaa ngohnchi triú ní dăngoyo-güedé xití ndute cuendá nduu ñamá-gá bàrcú.

Ní dáhu bàrcú xití làmár

³⁹ Te sáta ní túndaá, te ñá ní cùtnúni-gá iní-güedé ndéé cúú-xí nùú ní sáá-güedé, te ní xiní-güedé iⁿ xichi núú ní xícó ndúú luha yuhu làmár, te vâi vihi cúchí dándáá-xí yùhu ndute, te xíaⁿ ñá túú dăcandá víhí táchí ndute. Te ní ndatnúhu-güedé sá ndácú-güedé dacàca-güedé bàrcú quíhíⁿ-xi ndéé núú ñúhú cúchí. ⁴⁰ Te xiáⁿ nùú ní sáháⁿ-güedé ní xehndé-güedé nchaa yoho nchícúⁿ caá tácandéé bàrcú ní ndóo xití làmár, te ní nadatáyá-güedé vítú sá dăculco-xi bàrcú, te ní nacata caa-güedé iⁿ dóo díquí bàrcú, te ta chindaha táchí cuáháⁿ yuhu làmár tá cùyatni-xi ñuhu yichí cuáháⁿ. ⁴¹ Te ndècu iⁿ xichi ní natacá víhí cúchí xití ndute, te xíaⁿ ní nguíndúxi nihnu bàrcú-güedé, te ní cutii-xi xití cúchí, te ñá ní ñihí-gă-güedé năcuáa cada-güedé nene-xi. Te ío níhi ní dăcandá táchí ndute, te ní chúcú ndéé-xi ndàa sáta bàrcú, te ní ndihi ní táhú-xí. ⁴² Te cue sandádú ní xítñaha-güedé sá cáhni-güedé nchaa cue téé ní xíhi vecaá cuendá sá vâ quíhíⁿ-güedé núú ndute te cunu-güedé. ⁴³ Te téé cùu capitáⁿ ñá ní dăña-dé cahni-güedé cue téé ní xíhi vecaá, chí ñá ní cùndee iní-dé cahni-güedé tnàhá té Păblú. Te ní xáhaⁿ-dě xii-güedé sá cuè téé xícuu cada

quíhíⁿ núú ndute te na yăha-güedé ndute quene-güedé yuhu làmár. ⁴⁴ Te dava cue téé ñá cúú cada, ní xáhaⁿ-dě nanducu-güedé vítú ní ñá vítú ní táhú sá ní xíhi bàrcú, te núú xiáⁿ caundodo-güedé yăha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

28

Té Păblú ndécú-dě ñuu Măltá cáa cuádava làmár

¹ Te sáta ní cácu-ndí ní nene-ndí ñuhu yichí, te ní níhi-ndí tnúhu năcuáa nani ñuu núú ní sáá-ndí, te ñuu-áⁿ nání-xí Măltá, te caa-xi cuádava làmár. ² Te ío quide víxiⁿ-xi cuendá ío cùuⁿ dáú. Te ñáyiú ñuu-áⁿ ní cundáhú iní ñáhă-yu xii-ndí, ní dătnàhá-yu ñuhú te ní cana ñáhă-yu ní sáháⁿ-ndí ní nacuídí-ndí. ³ Te té Păblú dátacá-dé nducú, te tnàhá-ni iⁿ cóo dēéⁿ ní tnă nihnu-dé-di, te òré cuáháⁿ ndaha-dé chucu-dé núú ñúhú, te ní ñani-di cahni, te ní ndee-di xití nducú ní sándúú-dé ndaha-dé, te ní xexihaⁿ-di xii-dé. ⁴ Te nchaa ñáyiú ndèhé-yu sá tácandéé-di ndaha-dé, te ní nguíta-yu ní xítñahă-yu:

—Váa ndíyi ní sahani téé-a, te ñá ní xíhí-dé làmár, te dacuitíi sá cùú-dé vitna, chí sa nàha Yă Ndiôxí ná ní quide-dé ñuyíú-a —càchí-yu xítñahă-yu.

⁵ Te té Păblú ní quidi-dé ndaha-dé ní ngaunihnu-di núú ñúhú, te ñá túú tnàhí ná ní cùu núú ní xexi-di. ⁶ Te ñáyiú ñuu-áⁿ xíndéhé-yu núu daquíhíⁿ-xi chúhúⁿ ñá nduá-dé cuú-dé. Te naha ní xíndéhé ñáhă-yu núu nása cada ñaha-xi xii-dé, te ñá túú tnàhí ná ní quide ñaha-xi, te ní xítñahă-yu:

—Váa ndiôxí cúú tēe-a núu dăcáⁿ ñá túú tnàhí ná ní quide-xi ndaha-dé núú ní xexi cóo —càchí-yu xítñahă-yu.

⁷ Te yatni núú dúcáⁿ ní xexihaⁿ cóo-ăⁿ cáa ñuhu xitu téé nani

Publiú, te téé-án táxi tnùní-dé nìhí ñúú cáá cuádava xití lámár núú ndécú-ndí nduu-án. Te ío váha iní-dé chí ní cana ñaha-dé ní sáhán-ndí ní xíndecu-ndí úní nduu vehe-dé. ⁸ Te tátá tē Pùbliú-án cáá-dé cùhú-dé ñhú-dé cahni, te tnàhá-dé daxi. Te té Pàblú ní sáhán-dé núú cáá-dé, te ní cáháⁿ ndihí-dé Yá Ndiöxí, te ní sacáⁿ ndodo-dé ndaha-dé díquí tēe cùhú-án, te ducaⁿ-ni ní quide-dé, te ní ndúha tēe cùhú-án. ⁹ Te sátá dúcáⁿ ní quide té Pàblú, te ní quixi nchaa ñáyiú cùhú núú ndécú-ndí, te ní quide tátna ñaha tē Pàblú xii-yu te ní ndúha-yu. ¹⁰ Te òré ndécú-ndí xíaⁿ, te vài sá ní taxi táhú-güedé, te òré ní xica-ndí ní taxi tucu-güedé nchaa sá xíní ñuhu-ndí ichi.

Té Pàblú ní quexio-dé ñúú Rómá

¹¹ Te yacáⁿ ní xíndecu-ndí úní yóó, te sa ndècu ñⁿ barcú tēe ñúú Alejandriá òré ní quexio-ndí, te ní xíndecu-xi nìhí yóó cúúⁿ dáu táchí. Te núú-xi càndodo sandú sá dánàni-güedé Cástór ndihí sàndú sá dánàni-güedé Pólúx, te xití bàrcú-án ní queé-ndí cuáhán-ndí. ¹² Te ní quexio-ndí ñúú Siràcusá, te yacáⁿ ní xíndecu-ndí úní nduu. ¹³ Te ní xica tucu bàrcú cuáhán-xi, te ní quexio-ndí ñúú Règiú. Te nduu tnéé duha ní quene nuu táchí. Te ní xica bàrcú cuáhán-xi, te ndéé nduu úú ní quexio-ndí ñúú Pùteolí. ¹⁴ Te yacáⁿ ní naníhí tnàhá-ndí ndihí ñáyiú sàndáá iní tnúhu Jèsús, te ní cachí-yu sá cùndècu-ndí úná nduu, núú xíaⁿ ní xíndecu-ndí úná nduu ndihí-yu. Te ní xica tucu bàrcú cuáhán-xi, te ní quexio-ndí ñúú Rómá. ¹⁵ Te ñáyiú rómá ñáyiú sàndáá iní tnúhu Jèsús, ní nìhí-yu tnúhu sá cuáhán-ndí, te ní quixí-yu ní quixi tnahá ñáhà-yu ichi. Te davá-yu ní naníhí-ndí ñúú Fòrú Àpiú, te davá-yu ní naníhí-ndí ñúú

Úní Tàbernás. Te òré ní xíní té Pàblú nchaa ñáyiú véxi tnahá ñáhá xii-ndí, te ndee ndéé ní cuu iní-dé, te ní ndacáⁿ táhú-dé núú Yá Ndiöxí sá dúcáⁿ ní quidé-yu. ¹⁶ Te sátá ní quexio-ndí ñúú Rómá, te cue tēe cùchiuⁿ ní xáhaⁿ-güedé xii té Pàblú sá cùndècu ñⁿ-dè, te ní xíndéé ñáhá cuàa sandadú xii-dé.

Té Pàblú càháⁿ-dé tnúhu Yá Ndiöxí ñúú Rómá

¹⁷ Nduu úní sá ní quexio té Pàblú, te ní cana-dé cue tēe cùnuu núú ñáyiú isràél ndécú ñúú Rómá, te ní sáhán-güedé núú ndécú-dé, te ní xáhaⁿ-dè:

—Nchòhó cue tēe isràél, càchí tnúhu-í sá ñà túú nã ní quide-í ní ñⁿ ñáyiú cùtnàhá ní xíndecu-í ñúú Jerusalén. Te ñá túú ní cáháⁿ cuèhé-í sá quidé-yu nchaa nàcuáa ní xóo cada cue ñaní tnàhá-ó ní xíndecu ndéé sanaha, te ñá túú nã ní quide-í te ní tnii ñaha-güedé ní sáha cuèndá ñáhá-güedé xii-í núú cuè tēe rómá, cue tēe ndècu yacáⁿ. ¹⁸ Te cue tēé-án ní ndúcú tnúhu-güedé nùu ndáá ndècuèchi-í, te ní cutnùní iní-güedé sá ñã túú nã ní quide-í, te xíaⁿ cuìní-güedé queñuhu ñaha-güedé xii-í vecaá ní cùu. ¹⁹ Te ñⁿ-ni cue tēe isràél ñã ní dàña-güedé cácu-í, chí cuìní-güedé sá cáhni ñaha cue tēe rómá, cue tēe xíndecu yacáⁿ xii-í ní cùu, te xíaⁿ nùu ní xáhaⁿ-í sá quixí-í cáháⁿ ndihí-í té Cèsar cuèndá iha cada ndáá méé-dé cuèndá-í, te vã yóo ñⁿ tee-í cuèchi. ²⁰ Núú xíaⁿ ní cana ñaha-í xii-ndo cuèndá cunaha-ndo nàcuáa ní cuu, Te ní xáhaⁿ-í sá sàndáá iní-í sá ndóto ñáyiú ní xihí, te ñⁿ-ni ducaⁿ cáháⁿ dava-gá ñáyiú isràél, te sá dúcáⁿ ní cáháⁿ-í, te ní chihí ñaha-güedé vecaá, te xíndéé ñáhá-güedé ndéé vitna —càchí té Pàblú xáhaⁿ-dè xii-güedé.

²¹ Te ní xáhaⁿ-güedé xii-dé:

—Ñá túú tnàhí tutú ní tèndaha cue tēe distritú Jùdeá quixi cuèndá-n. Te ní cuè tēe isràél ñã túú ní quixi-güedé cáháⁿ cuèhé-güedé cuèndá-n. ²² Te

cuini-ndí cundedóho-ndí nása cunduu tnúhu cáháⁿ-n, chi sa ní níhí-ndí tnúhu sá ncháá xichi ío xicáháⁿ cuèhé-yu cuèndá nchaa ñáyiú sàndáá iní tnúhu Jèsús — càchí-güedé xáhaⁿ-güedé xii té Páblú.

²³ Te ní xáhaⁿ-güedé nduu cüyáchí-güedé te quixi-güedé cundedóho-güedé dava-gá cuèndú cáháⁿ té Páblú. Te ní tnahá nduu ní ndatnúhu-güedé quíhíⁿ-güedé núú quidé vehe-dé, te vai-yu ní sáháⁿ-yu ní xindedóho-yu tnúhu ní cáháⁿ-dé, te ncháca nchaa ní cáháⁿ ndíhi-dé-yu. Te ní xáhaⁿ-dè xii-yu sá ndí Moisés ndíhi dava-gá cue téé ní xóo cáháⁿ tnúhu Yá Ndióxi ndéé sanaha ní chídó tnùní-güedé núú tütú-güedé sá díú-gá tendaha-gá Crístú quixi-gá ñuyíú-a. Te ní chídó tnùní-güedé nchaa nàcuáa cada-gá, te ñu-ni nàcuáa cáháⁿ tutú-güedé cada Crístú, te ducaⁿ ní quíde-gá cúnahá ní xica cuu-gá ñuyíú-a, núú xíáⁿ ní cutnùní sá díú Jèsús cúu-gá Crístú Yáá ní tendaha Yá Ndióxi ní quixi ñuyíú-a. Te núú quindáá iní-yu, te ndíhu ndaha ñaha Yá Ndióxi xii-yu. ²⁴ Te davá-yu ní sàndáá iní-yu tnúhu ní cáháⁿ-dé, te davá-yu ñá túú ní sàndáá iní-yu.

²⁵ Te cuèndá sá ñá ííⁿ-ní tnúhu ní cáháⁿ-yu, núú xíáⁿ cuini-yu núhú-yu ní cùu. Te ní xáhaⁿ té Páblú sá cündètu tnaá-yu cáháⁿ-dé ingá tnúhu, te xáhaⁿ-dè:

—Ní xáhaⁿ Espíritú Yá Ndióxi xii ndí Chàíá nàcuáa cáháⁿ ndí núú ncháa ñani tnahá-ó ní xíndecu ndéé sanaha. Te ní cáháⁿ Espíritú-gá ííⁿ sá ndáá ní xáhaⁿ-xi xii ndí, te duha ní xáhaⁿ-xi:

²⁶ Quíhíⁿ-n te cúñaha-n xii ñáyiú:

Nchòhó mee-ni cundedóho-ndo tnúhu cáháⁿ Yá Ndióxi, dico ní và tècú tnùní-ndó.

Te cada-gá titní núú sá và yóo tnahí ndàcu cada, dico ní và cútñùní iní-ndó nàcuáa ndùu sá cádá-gá,

²⁷ chi cuèndá sá ío sàá iní-ndó,

xíáⁿ ducaⁿ ñá túú sáha-ndo cuèndá nása cuáháⁿ tnúhu cáháⁿ-gá, chi ñá cuini-ndó cundedóho-ndo, te ní ñá sàndáá iní-ndó.

Te ní ñá cuini-ndó dàña-ndo nchaa sá cuèhé sá dúhá quíde-ndo cuèndá xocàni-gá nchaa xíáⁿ iní-ndó,

duha cúñaha-n xii-yu.

Càchí Espíritú-gá xáhaⁿ-xi xii ndí.

²⁸ Te na càchí tnúhu-í sá quíhíⁿ cue téé cáháⁿ tnúhu Yá Ndióxi cáháⁿ-güedé tnúhu-gá núú ñáyiú ñá túú cùu ñáyiú isràél, chi ñáyiú isràél ñá túú cuini-yu cundedóho-yu. Dico ñáyiú ñá túú cùu ñáyiú isràél chi cùdí iní-yu cundedóho-yu, núú xíáⁿ naníhí tàhú-yu —càchí té Páblú xáhaⁿ-dè xii-yu.

²⁹ Te sáta ní ndíhi cuèndú ní xáhaⁿ-dè, te ní ndéé-yu cuánuhú-yu ta ndàtnúhu-yu cuáháⁿ.

³⁰ Te úú cuíá ní xínu ní xíndecu té Páblú ííⁿ vehe ní cháhu-dé. Te ní xóo cáháⁿ váha-dé ndíhi nchaa ñáyiú ní xóo quíhíⁿ vehe-dé. ³¹ Te ní xáhaⁿ-dè sá ndíhu ndaha ñaha Yá Ndióxi xii-yu núú quindáá iní-yu tnúhu-gá, te và yóo ííⁿ ní sádí yuhu-dé. Te mee-ni tnúhu Xítóhó Jesucristú ní cáháⁿ-dè núú-yu.

TUTÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ RÒMÁ

Té Pāblú cādúha-dé tutú quíhíⁿ ndaha ñáyiú xĩndecu ichi Xítoho Jesucristú ndécú ñúú Ròmá

¹ Yúhú té Pāblú xínú cuèchi-í núú Xítoho Jesucristú, chi mee Yá Ndiòxí ní cachí-gá sá cùu-í ñⁿ tée cáhⁿ tnúhu-gá núú ñáyiú, te tnúhu-gá cúu-xí tnúhu sá cáhⁿ nàcuáa naníhí tǎhú-ó, núu ñiú-gá ní tendaha ñaha-gá xii-í xicá cùu-í cáhⁿ-í tnúhu-gá.

² Te ndéé sanaha ñí cachí Yá Ndiòxí sá dàcuiítí sáá nduu ngũndecu ndíhi ñáyiú tnúhu-gá. Te ducaⁿ ñí xáhaⁿ-gá xii cue tée ní cáhⁿ tnúhu-gá dāvá-áⁿ ñí chídó tnúní-güedé núú tütú-gá. ³ Te tnúhu-gá sá cáhⁿ-í-a cáhⁿ-xi ñiú-ñi cuendá Xítoho Jesucristú Yaá cúu Dèhe-gá. Te Dèhe-gá-áⁿ cúu-gá ñⁿ ñáyiú, te cùu-gá ñani tnáhá ndíi Dàvíí. ⁴ Te cùu-gá Yaá ñá túú tnáhí cuèchi-xi. Te ní xihí-gá te ní ndoto-gá, te xĩⁿ cútnúní iní-ó sá cúu-gá Dèhe Yá Ndiòxí, te ío càhnu cuu-gá. ⁵ Te ñiú-ñi Xítoho Jesucristú ní quide-gá ní nduu tǎhú-í núú Yá Ndiòxí sá cáhⁿ-í tnúhu-gá núú cué ñáyiú ñuyíú-a cuendá quíndáá iní-yu tnúhu-gá te canchicúⁿ nihnú-yu cadá-yu nchaa nàcuáa cáhⁿ-xi, te ducaⁿ ío cuu càhnu-gá. ⁶ Te tnáhá nchòhó cúu-ndó ñáyiú sa nchicúⁿ nihnu quide-ndo nchaa nacuáa cáhⁿ tnúhu-áⁿ, chi ní cachí Yá Ndiòxí sá nchòhó tnáhá tnúhu-ndo ndíhi Xítoho Jesucristú. ⁷ Te nchòhó ñáyiú xĩndecu ñúú Ròmá, ñáyiú ío cùu iní ñáhá Yá Ndiòxí, cādúha-í tutú-a daquixi-í ndaha-ndo. Te ñiú-ñi nchòhó cúu-ndó cué ñáyiú

ní cachí Yá Ndiòxí cada ndáá cundecu-ndo núu-gá. Te xicáⁿ tǎhú-í núú Tǎtá-ó Dütú Ndiòxí ndíhi núú Xítoho Jesucristú sá ío na chindee chitúu ñaha-gá xii-ndo, te ducaⁿ ndí nduú-gá ná càda te ío váha cuu iní-ndó cundecu-ndo.

Té Pāblú cuíni-dé quíhíⁿ ngoto-dé cue ñáyiú xĩndecu ichi Xítoho Jesucristú ndécú ñúú Ròmá

⁸ Te díhna nuu-gá càchí tnúhu-í xii-ndo sá ío ndácáⁿ tǎhú-í núú Yá Ndiòxí cuendá sá ío sàndáá iní-ndó-gá, te nchaa ñáyiú nihí-yu tnúhu sá dúcáⁿ quide-ndo. Te Xítoho Jesucristú dáyaha-gá nchaa tnúhu cáhⁿ-í núú Yá Ndiòxí. ⁹ Te ndí tnáhá òré cáhⁿ ndíhi-í Yá Ndiòxí ducaⁿ-ñi xicáⁿ tǎhú-í núu-gá cuendá-ndó, te mee-gá náhá-gá sá cáhⁿ ndáá-í, te ñiú-ñi núu-gá xínú cuèchi-í ñi yúhu ñi iní-í, chi cáhⁿ-í nàcuáa ní quide Dèhe-gá Xítoho Jesucristú cuendá naníhí tǎhú-ó. ¹⁰ Te xicáⁿ tǎhú-í núú Yá Ndiòxí sá núu mee-gá ná càchí te sáá ñⁿ nduu quixi coto ñaha-í xii-ndo. ¹¹ Chi ío cuíni-í cundecu ndíhi ñaha-í xii-ndo dànehé ñáhá-í ñⁿ úú tnúhu nàcuáa ío-gá chindee ñaha Espiritú Yá Ndiòxí xii-ndo, te ducaⁿ ío-gá cuita nducu ndèe-ndo cada-ndo nchaa nacuáa cuíni-gá. ¹² Te ío chí ná cuáha tnàha-o tnúhu ndee iní cundecu-o íchi-gá, chi nchòhó ndíhi yúhú ío sàndáá iní-ó-gá.

¹³ Te nchòhó ñáyiú ndècu ndíhi-í ichi Xítoho Jesucristú na càchí tnúhu-í xii-ndo sá dúcáⁿ-ñi ío sàni iní-í quixi coto ñaha-í xii-ndo. Te cuíni-í sá òré quixi coto ñaha-í xii-ndo, te vá cuíta chiúⁿ quixi-í dàtná quidè-í òré sǎngoto-í nchaa ñáyiú dāva-gá ñúú ñá túú xĩta chiúⁿ-í chi ío váha sàhúuⁿ-yu tnúhu cáhⁿ-í, dico ñá ndácú-í quixi-í quixi coto ñaha-í xii-ndo. ¹⁴ Te yúhú yídiquí-í cáhⁿ-í tnúhu Xítoho Jesucristú núú nchàa ñáyiú cáhⁿ tnúhu griégú, ndíhi núú nchàa ñáyiú cáhⁿ dāva-gá núú tnúhu, ndíhi núú nchàa ñáyiú túha, ndíhi

núú nchaa ñáiyu ñá túú túha. ¹⁵ Te cuendá sá dúhá yìdíquí-í cáháⁿ-í tnúhu-gá, xiáⁿ ío cuini-í danèhé ñáhà-í xii nchaa nchòhò ñáiyu ñuú Ròmá nàcuáa ndùu tnúhu sá cáháⁿ nàcuáa naníhí tàhú-ó.

Ío cùnuu tnúhu Xítohó Jesucristú

¹⁶ Te yúhú ñá túú tnàhí cùcahaⁿ núú-í cáháⁿ-í tnúhu Xítohó Jesucristú, chí cùu-xi tnúhu ío cùnuu, chí Yá Ndióxi ní cachí-gá sá ncháá ñáiyu na quindáá iní-xi tnúhu-áⁿ te naníhí tàhú-yu. Te ní cachí-gá sá díhnanuu-gã ñáiyu isràèl ngúndecu ndihí-yu tnúhu-áⁿ te dàtnùní ngúndecu ndihí ñáiyu ñá túú cùu ñáiyu isràèl. ¹⁷ Te tnúhu-áⁿ dánèhé ñáhá-xí xii-o sá cúdiu-o núú Yá Ndióxi te núu mee-ni sá quindáá iní-ó-gã dàtná cáháⁿ-xi núú tùtú-gá núú cachí-xi: “Nchaa ñáiyu sàndáá iní ñáhá xii Yá Ndióxi cúdiu-yu núú-gã, te ndècu ndihí ñahá-yu xii-gã”, duha càchí-xi núú tùtú-gã.

Nchaa ñáiyu ndècu ñuyú ndècuéchi-yu

¹⁸ Te ndéé andiù tèndaha Yá Ndióxi sá ùhú quixi sá cúú-xi nchaa ñáiyu ñá túú quide ndáá núú-gã, ñáiyu quide nchaa sá cuèhé sá dúhá. Te cuendá nchaa sá quidè-yu-áⁿ xiáⁿ ñá túú cuini-yu tnií-yu tnúhu ndáá tnúhu Yá Ndióxi cuendá cuu-xi ìⁿ sá vaha sá cúú-xi-yu. ¹⁹ Te cuèi ducaⁿ quidè-yu dico cùtnuní ndáá iní-yu nàcuáa ndùu sá sání iní Yá Ndióxi ndihí nàcuáa ndùu sá quidè-gã dàtná cùtnuní iní nchaa dava-gá-yu, chí diu-gã dánèhé ñáhá-gã xii-yu. ²⁰ Te ni vã ndácú-ó quini núú-ó nãsa càa-gã, te ni vã ndácú-ó quini-ó nãsa càa iní-gã, te ni vã ndácú-ó quini-ó nãsa quide-gã táxi tnùnì-gã nchaa nduu nchaa quíú. Te cuèi ducaⁿ dico ndéé cùtnàhá ní ngáva ñuyú ní ngúita nchaa ñáiyu tècú tnùnì váha-yu nàcuáa ndùu sá sání iní-gã ndihí nàcuáa ndùu sá quidè-gã te ducaⁿ

tècú tnùnì-yu cuendá nchaa sá ñí cadúha-gã ndéhè-yu ío ñuyú-a, núu xiáⁿ vã càchí-yu sá ñá túú cuèchi-yu. ²¹ Te cuèi ducaⁿ ñí cutnùnì iní-yu cuendá Yá Ndióxi dico ñá túú cuini-yu canehé-yu sá yíñùhu núú-gã nàcuáa tàu-xi cunduu. Te ni ñá túú cuini-yu ndacáⁿ táhù-yu núú-gã cuendá nchaa sá vaha quide ñaha-gã xii-yu, chí mee-ni nchaa sá ñá túú vèdana nàndíhí ñuhu iní-yu. Te quidè-yu dàtná quidè ìⁿ ñáiyu ñá túú ndècu ndihí nchaa sá xini tnùnì-xi. Te uuⁿ-gã uuⁿ-gã tá quidè-yu cuáháⁿ. ²² Te càchí-yu sá cúú-yu ñáiyu ío váha sàá sá xini tnùnì-xi dico ñá ndáá, chí cùu-yu ñáiyu ío ñí díquí-xi. ²³ Te ñá túú cuini-yu cáháⁿ-yu sá ío càhnu cuu Yá Ndióxi Yaá ndécú nchaa nduu nchaa quíú, chí da nchaa sá ñí cadúha mèé-yu quide cahnú-yu. Te ní cadúha-yu nchaa sá nahá ñáiyu ñá túú cùdí ndècu ñuyú-a. Te ní cadúha-yu sá nahá quiti ndáva, ndihí sá nahá quiti sàcuíta ñuhu mee-xi, ndihí sá nahá nchaa dava-gã quiti, nchaa xiáⁿ quidè cahnú-yu.

²⁴ Te xiáⁿ núu ní dáñá Yá Ndióxi quidè-yu nchaa sá cuèhé sá dúhá sàni iní-yu. Te xiáⁿ ío quide ndihí tnahá-yu sá cuèhé sá dúhá sàcúú-xi yìqui cuñú-yu. ²⁵ Te ducaⁿ quidè-yu chí ñá túú sàndáá iní-yu tnúhu ndáá tnúhu Yá Ndióxi. Te mee-ni tnúhu ndehnde sàndáá iní-yu, te nèhé-yu sá yíñùhu núú dáva sá ñí cadúha-gã ío ñuyú-a ndihí dava sá ndéé andiù te quide cahnú-yu, te ñá túú càchí-yu sá mèé-gã ío càhnu cuu-gã, dico mee-gã xini ñuhu-xi cáháⁿ-yu sá ío càhnu cuu-gã ni caa ni quíhíⁿ. Te ndáá ndisa sá ío càhnu cuu-gã.

²⁶ Te sá dúcáⁿ ñá túú quide váha-yu núu xiáⁿ ní dáñá-ñá Yá Ndióxi quidè-yu nchaa sá cuèhé sá dúhá sàni iní mèé-yu. Te dava ñáiyu òhí càháⁿ ndihí tnahá-yu ndi mèe

dihí-yu te ñá túú quidé-yu nàcuáa ní nduu táhũ-yu cada-yu. ²⁷ Te ñu-ni ducaⁿ xiquide dava cue tée chi sàni cuehé sání dùha iní-güedé sá cúu-xí yìqù cuñú-güedé ndi mèe tnaha tée-güedé, chi càháⁿ ndihí tnàha ndi mee-güedé te ñá túú quide-güedé nàcuáa ní nduu táhũ-güedé cada-güedé, te sá dúcáⁿ quide-güedé te ñá túú tnàhí cùu váha iní-güedé ndécú-güedé, te ducaⁿ tnàhí tàu-xi ndoho-güedé cundecu-güedé.

²⁸ Te ñá túú tnàhí ñũhu iní-yu Yá Ndiòxí nõu xíáⁿ duuⁿ duuⁿ ní dáñá ñĩnu ñaha-gá xii-yu sàni cuehé sání dùha iní-yu, te quidé-yu nchaa sá ñà túú tàu-yu cada-yu. ²⁹ Te nchaa núú sá cuehé sá dúhá cùnũu quidé-yu. Te cue tée càháⁿ ndihí-güedé ñáiyu dihí te ñá díú ñàdihí-güedé cúu-yu. Te ñu-ni ducaⁿ xiquide cue ñáiyu dihí chi càháⁿ ndihí-yu cue tée te ñá díú yĩ-yu cùu-güedé. Te mee-ni sá ñà túú váha quidé-yu sá cúu-xí tnàha ñáiyú-yu, te xihó-yu cundecu ndihí-yu sá ndécú ndihí dava-gá tnàha ñáiyú-yu, te ío sàni cuehé sání dùha iní-yu sá cúu-xí tnàha ñáiyú-yu, te ío cuédú iní-yu, te sàhni tnahá-yu, te ío plètú-yu, te dándahú tnáhá-yu, te cùu úhú iní-yu cue tnàha ñáiyú-yu, te ío yiti yùhú-yu. ³⁰ Te càháⁿ cuehé-yu cuendá nchaa dava-gá tnàha ñáiyú-yu, te cùu úhú iní-yu Yá Ndiòxí, te xio xio cuñí-yu cunuu tnũhu-yu, te mee-ni sàni iní-yu sá ío váha cunduú-yu, te ío quide cahnú-yu mèe-yu, te ío sàni iní-yu sá cádá úhú-yu tnàha ñáiyú-yu, te ñá túú sàndáá iní-yu ni tãtä-yu ni nãñã-yu. ³¹ Te ñá túú tècú tnúni-yu sá váha, te ñá túú quidé-yu ñⁿ sá càháⁿ-yu, te ñá túú cùu iní-yu ñi ñáiyu cùu ndi meé-yu, te ni dàva-gá tnàha ñáiyú-yu, te ñá túú quide cahnu iní-yu ñⁿ sá cúmãní nõú tnáhã-yu, te ni ñà túú cùndahú

iní-yu tnàha ñáiyú-yu. ³² Te Yá Ndiòxí ní cachí-gá sá ncháá ñáiyu ducaⁿ xiquide quihíⁿ-yu núú úhú núú ndàhú. Te xini-yu sá Yá Ndiòxí daquihíⁿ ñáhá-gã xii-yu núú úhú núú ndàhú sá dúcáⁿ quidé-yu, dico uuⁿ-gá quidé-yu chi váha-gá cúu iní-yu cue ñáiyu quide datná quidé mèe-yu.

2

Yá Ndiòxí cada ndáá-gá cuéchi nchaa ñáiyu ndècu ñuyúú

¹ Te nchòhó ñáiyu càchí sá ío ndècu cuéchi dava-gá ñáiyu tnàhá-ndó ío ndècu cuéchi-ndo cuèj nágá ñáiyu cùu-ndo, chi tnàhá-ndó quide-ni-ndo nchaa nacuáa quide dava-gá ñáiyu càchí-ndó ndècu cuéchi-xi, te sá dúcáⁿ càháⁿ-ndó sá ndécú cuéchi ñáiyu-án te dàcaa-ndo cuéchi díquí-ndó chi tnàhá-ndó quide-ndo datná quidé-yu. ² Te nchoo xini-ó sá Yá Ndiòxí ío váha cùtnuní iní-gá nàcuáa cada ndáá-gá cuéchi ñⁿ ñⁿ nchoo ñáiyu ndècu ñuyúú-a, chi daquihíⁿ-gá nchaa ñáiyu quide nacuáa ní càháⁿ-í núú úhú núú ndàhú. ³ Te nchòhó ñáiyu ñⁿ-ni quide ndihí ñáiyu càchí méé-ndó sá ndécú cuéchi-xi dacutíí sá ná chãhu-ndo nõú Yá Ndiòxí sá dúcáⁿ quide-ndo. ⁴ Te ñá túú cùu váha iní-ndó sá Yá Ndiòxí cùndahú iní ñáhá-gã xii-ndo, te ni ñà túú cùu váha iní-ndó sá ío cuñí-gá cada càhnu iní-gá nchaa sá ñà túú váha quide-ndo, te ni ñà túú quide cuendá-ndó sá Yá Ndiòxí quidé váha ñaha-gã xii-ndo cuendá cuñí-gá sá nchòhó ndixi túu iní-ndó sá ñà túú quide váha-ndo ndècu-ndo. ⁵ Te nchòhó cúu-ndó ñáiyu ío sáa iní-xi, chi ñá túú cuñí-ndó ndixi túu iní-ndó sá ñà túú quide váha-ndo ndècu-ndo, te xíáⁿ nõu ío-gá tá cùu vai tnúndòho sá cúu-xí-ndó. Te na sáa nduu tnũhu ndòho tnũhu ndàhú te ío ndoho-ndo, chi Yá Ndiòxí cada ndáá-gá nacuáa nõu cuéchi-ndo.

⁶ Te dàvâ-áⁿ cada ndáá Yá Ndiöxí nchaa nâcuáa nduu nchaa sá ní quide ìⁿ ìⁿ ñáyiú ndècu ñuyíú-a.

⁷ Te nchaa ñáyiú nchicúⁿ nihnu-ni quide mee-ni sá vâha, ñáyiú-áⁿ nduu tâhũ-yu cundecú-yu ndihí Yá Ndiöxí ni caa ni quíhíⁿ, te ducaⁿ quide váha-yu chi cuíní-yu sá Yá Ndiöxí cuu váha iní ñáhá-gã xii-yu, te cuíní tucú-yu nduu tâhũ-yu núú ïo váha càa ndecu Yá Ndiöxí cundecú-yu ni caa ni quíhíⁿ. ⁸ Te ïo cùdééⁿ-gã núú nchaa ñáyiú ñuhu iní mee-ni sá cúu-xí mèe-xi, te ñá túú sândáá iní-yu tnúhu ndáá chi mee-ni sá cuèhé sá dúhá quide-yu. ⁹ Te nchaa ñáyiú ducaⁿ xiquide ïo ndíhú iní-yu. Te díhna-gá ñáyiú isràél ngüita-xi ndohó-yu, te dàtnùnì ngüita-xi ndoho nchaa ñáyiú ñá túú cùu ñáyiú isràél. ¹⁰ Te nchaa ñáyiú ní quide váha, te Yá Ndiöxí cada-gá te ngúndecú-yu núú ïo váha càa ndecu-gá, te cachí-gá sá ní quide váha-yu, te ïo váha cuu iní-yu cundecú-yu. Te díhna-gá ñáyiú isràél ñáyiú ní quide váha ducaⁿ càda ñaha-gá xii-yu, te dàtnùnì ducaⁿ càda ñaha-gá xii ñáyiú ñá túú cùu ñáyiú isràél ñáyiú ní quide váha.

¹¹ Te ñá túú quide cuendá-gá cuèi náí ñáyiú cùu-yu. ¹² Te nchaa ñáyiú ndècu ndihí nchaa tnúhu ní chídó tnùnì ndíi Moisés, Yá Ndiöxí cada ndáá-gá cuèchi-yu nâcuáa càháⁿ nchaa tnúhu-áⁿ. Te nchaa ñáyiú ñá túú ndècu ndihí tnúhu ní chídó tnùnì ndíi-áⁿ, Yá Ndiöxí vá cáda ndáá-gá cuèchi-yu nâcuáa càháⁿ nchaa tnúhu-áⁿ. Dico nchaa ñáyiú quide nándi sá cuèhé sá dúhá dàcuítí cuíta nihnú-yu cuèi ndècu ndihí-yu tnúhu ní chídó tnùnì ndíi Moisés àdi ñá túú ndècu ndihí-yu. ¹³ Te nchaa ñáyiú dicó-ni sâcúndedóho nchaa tnúhu ní càháⁿ ndíi Moisés te ñá túú tñi-yu, ñáyiú-áⁿ ñà túú cùdúú-yu núú Yá Ndiöxí, dico nchaa ñáyiú tñi nchaa tnúhu ní càháⁿ ndíi, ñáyiú-áⁿ càchí

Yá Ndiöxí sá cùdúú-yu núú-gã, chi ñá túú-gã cuèchi-yu ndècu núú-gã. ¹⁴ Te nchaa ñáyiú ñá túú ndècu ndihí tnúhu ní chídó tnùnì ndíi Moisés, te núú quidé-yu nchaa nâcuáa ní càháⁿ ndíi te cùu-xi ìⁿ sá sání tñahí iní mèe-yu cada-yu, te sá sání iní-yu-áⁿ cúu-xí ìⁿ tnúhu váha sá sánú ichi ñaha xii-yu nâcuáa cada váha-yu cundecú-yu. ¹⁵ Te sá dúcáⁿ quidé-yu xiáⁿ cùtnùnì sá sání iní-yu dàtná càháⁿ tnúhu ní chídó tnùnì ndíi Moisés cada ñáyiú isràél, te ïo váha cùtnunì iní-yu nchaa nâcuáa quidé-yu chi ndixi túu iní-yu òré ñá túú quide váha-yu. ¹⁶ Te sáá nduu te Yá Ndiöxí cùñaha-gã xii Xítoho Jesucristú cada ndáá-gá nchaa cuèchi ñáyiú, nchaa sá sání iní mèe-yu nduu yuhu, te cada-gá dàtná càháⁿ tnúhu sá sánú ichi ñaha xii-o nâcuáa naníhí tâhũ-ó, tnúhu sá dánèhé ñáhà-í xii-ndo.

Cuendá ñáyiú isràél ndihí cuendá nchaa tnúhu ní chídó tnùnì ndíi Moisés

¹⁷ Te nchòhó ñáyiú isràél nchaa-ndo cùu-ndo ndi mee-í, te càchí-ndó sá nchicúⁿ nihnu-ndo quide-ndo nchaa tnúhu ní càháⁿ ndíi Moisés nũu xiáⁿ ndécú váha-ndo, te càchí-ndó sá ïo càhnu cuu-ndo sá ndécú ndihí-ndo Yá Ndiöxí. ¹⁸ Te cùtnunì iní-ndó nchaa nâcuáa cuíní Yá Ndiöxí cada-ndo, te sá dúcáⁿ nchicúⁿ nihnu-ndo quide-ndo nâcuáa càháⁿ tnúhu-áⁿ xiáⁿ cùtnùnì iní-ndó nchaa sá ïo-gá váha xini ñuhu-xi cada-ndo. ¹⁹ Te càchí-ndó sá ïo váha xini-ndó cànuichi-ndo nchaa ñáyiú ñá túú cùtnunì iní-xi, te càchí tucu-ndo sá ïo váha xini-ndó nà canu ichi-ndo nchaa ñáyiú ndècu ichi cuèhé ichi duha. ²⁰ Te sànu ichi-ndo nchaa ñáyiú ïo nñi díquí-xi, ndihí nchaa ñáyiú vitna ta tècú tnùnì nchaa sá vâha, te ducaⁿ quide-ndo chi ndècu ndihí-ndo nchaa tnúhu ní chídó tnùnì ndíi Moisés, te tnúhu-áⁿ cúu-xí tnúhu ndáá, chi sànu ichi ñaha-xi xii-ndo nâcuáa cada-ndo. ²¹ Te nchòhó

dàcuaha-ndo ñáiyu nàcuáa cada-yu, te mee-ndo ñà túú dàcuaha-ndo cada-ndo nchaa nacuáa tãú-xi cunduu, te xãhaⁿ-ndo xií-yu sá vã cúú dùhú-yu te mee-ndo dùhu-ndo. ²² Te dàcuaha-ndó-yu sá cuè téé vã cúú cãháⁿ ndihí-güedé ñáiyu dihí te núu ñá díú ñãdihí-güedé cúú-yu, te ducaⁿ-ni cuè ñáiyu dihí, vã cúú cãháⁿ ndihí-yu téé te núu ñá díú yï-yu cùu-güedé. Te nchaa sá xãhaⁿ-ndo vã cúú càda ñáiyu te mee-ndo quide-ni-ndo, te xãhaⁿ-ndo xií-yu sá vã cãnehé-yu sá yíñùhu núú nchaa sá cãchí-yu cùu ndiõxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. ²³ Te cãchí-ndó sã ïo cùnuu nchaa tnúhu ní chídó tnùní ndíi Moisés, te ñá túú quide-ndo nchaa nacuáa ní cãháⁿ ndíi, te sá dúcãⁿ quide-ndo-áⁿ te dàquee tihú-ndó Yã Ndiõxí. ²⁴ Te quèe ndáá-xi nacuáa cãháⁿ-xi núú tütú Yã Ndiõxí nacuáa quide-ndo-áⁿ núú cãchí-xi sá ncháá ñáiyu ñá túú cùu ñáiyu isràél cãháⁿ cuèhé-yu cuendá Yã Ndiõxí sá cuendá-ndó.

²⁵ Te nchòhó ñáiyu isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñii-ndo, te váha-ni sá dúcãⁿ te núu quide-ndo nchaa nacuáa ní cãháⁿ ndíi Moisés. Dico núu ñá túú quide-ndo nchaa nacuáa ní cãháⁿ ndíi ña, te ñá túú nãndihí-xi sá cúú-ndó ñáiyu isràél cuèi ndècu seña ñii-ndo. ²⁶ Te nchaa ñáiyu ñá túú ndècu ndihí seña ñii-xi, te núu quidé-yu nchaa nacuáa ní cãháⁿ ndíi Moisés, te cùu-yu dàtná cue ñáiyu ndècu ndihí seña ñii-xi, chi quidé-yu nchaa nacuáa ní cãháⁿ ndíi. ²⁷ Te ñáiyu ñá túú ndècu ndihí seña ñii-xi, te núu na càda-yu nchaa nacuáa ní cãháⁿ ndíi Moisés, te ñáiyu-áⁿ cachí-yu sá ñà túú quide ndáá nchaa nchòhó ñáiyu ndècu ndihí seña ñii-xi, chi ndècu ndihí-ndo nchaa tnúhu ní chídó tnùní ndíi te ñá túú quide-ndo nacuáa cãháⁿ tnúhu-áⁿ. ²⁸ Te

nchòhó ñáiyu isràél, ñáiyu nchicúⁿ nihnu-ni quide nchaa nacuáa ta quide tnahi-ndo véxi, ñá túú quide-ndo sá cúú-ndó ñáiyu isràél, te mee-ndo ndècu seña ñii-ndo dico ñá túú quide-ndo nacuáa tãú-xi cada nchaa ñáiyu ndècu seña ñii-xi, te mee-ni seña-áⁿ sãha-ndo ñii-ndo te ñá túú quide-ndo nacuáa cuñí Yã Ndiõxí cada-ndo. ²⁹ Te nchaa ñáiyu sãndáá ndisa iní-xi Yã Ndiõxí, ñáiyu-áⁿ cúú ndisá-yu ñáiyu isràél, te sa ní nduu ndoo ní nduu nine iní-yu chi Espiritú Yã Ndiõxí ducaⁿ ní quide-xi, dico ñá díú sã sãha-yu seña ñii-yu dàtná ní cachí ndíi Moisés. Te ñáiyu-áⁿ cúú váha iní ñãhá Yã Ndiõxí xií-yu cuèi ñá túú cãháⁿ váha tnàha ñáiyu-yu cuendá-yu.

3

¹ Te sá dúhá cãháⁿ-í te ïo dava ñáiyu quesàhá-yu sá ñii-ní cùu ñáiyu ñá túú cùu ñáiyu isràél ndihí nchoo ñáiyu isràél, te quesaha tucú-yu sá ñii-ní quide tucu-xi cuèi na cuãha àdi vã cuãha seña ñii-yu. ² Dico yúhú cãchí-í sá ncháá ñáiyu isràél ïo-gá cùnùú-yu, chi ïo titní núú sã váha ní quide ñaha Yã Ndiõxí xií-yu, chi ní sãñaha-gã tnúhu-gá ndécú ndihí-yu. ³ Te davá-yu ñá túú cuñi-yu cada ndáá-yu, dico ñá díú sã xïãⁿ te cùyica iní Yã Ndiõxí ñá túú quide ndáá-gã. ⁴ Dico ñãhá chi xini ñuhu-xi sã ncháá ñáiyu cada cuendá-yu sã Yã Ndiõxí cúú-gã Yaá quidé ndáá cuiti, te cuèi ncháá-yu na cãchí-yu sã ñà túú quide ndáá-gã, dico mee-gã chi quide ndáá-ni-gã. Te núú tütú-gã cãháⁿ-xi nacuáa ní xãhaⁿ ñiiⁿ téé ní xíndecu ndéé sanaha xii-gã, te duha ní xãhaⁿ-dè:

Yòhó Dútú Ndiõxí, cùnnumí iní ñáiyu sá ïo ndáá cãháⁿ-n, te cùnuu nahi-ni tnúhu-n cuèi òré cãchí ñáiyu sá ñà túú cãháⁿ ndáá-n.

Duha ní xáhaⁿ tée ndéé sanaha-ãⁿ xii-gá cächí-xi núú tütú-gá.

⁵ Te cuendá nchaa sá cuèhé sá dúhá quide ñáyiú, xiãⁿ cùtnùní iní-yu sá Yã Ndiõxí cúú-gã Yaá ío váha quide ndáá, chi mee-gã ñá túú dùcaⁿ quide-gá. Te cuèi ducaⁿ dico vá cání iní-yu sá Yã Ndiõxí ñá túú quide ndáá-gá sá dándòho ñaha-gá xii-yu na sàá nduu, te núú ducaⁿ na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. ⁶ Te vá dúcáⁿ càni iní-yu, chi núú Yã Ndiõxí ñá túú quide ndáá-gá ñá, te vá cúú càda ndáá-gá nchaa cuèchi cue ñáyiú ñuyúú-a te núú ducaⁿ.

⁷ Te núú yúhú ná càni iní-í cãháⁿ-í ñⁿ tnúhu ndehnde, te sá tnúhu-áⁿ te caní tucu iní-í sá quidé cãnu-gá-í tnúhu ndáá tnúhu Yã Ndiõxí, te sá dúcáⁿ ná cãháⁿ-í te caní tucu iní-í sá vá cúú cãháⁿ Yã Ndiõxí sá ndécú cuèchi-í. ⁸ Te núú na càni tucu iní-í sá váha-gá cada-í nchaa sá cuèhé sá dúhá cuendá Yã Ndiõxí cada-gá sá váha, dico ñá ndáá. Te ío ñáyiú cãháⁿ cuèhé cuendá-í te cächí-yu sá díú-ní dùcaⁿ dacuaha-í ñáyiú dico ñá ndáá sá dúcáⁿ dànehé-í-yu, te ñáyiú-áⁿ nacháhu-yu tnúhu cãháⁿ-yu, chi ducaⁿ tàú-xi cunduu.

Nchaa ñáyiú ñuyúú-a ndècuèchi-yu

⁹ Te vitna cächí dava ñáyiú sá ïo-gá cúnùu nchoo cue ñáyiú isràél dàcúxí dàva-gá ñáyiú, dico yúhú cächí-í sá ñãhá, te sa ní cächí tnúhu ndáá-í xii-ndo sá nchaa ñáyiú ndècuèchi-yu cuèi ñáyiú isràél te cuèi ñáyiú ñá túú cùu ñáyiú isràél.

¹⁰ Te núú tütú Yã Ndiõxí cächí-xi: Vá yõo ñⁿ quide ndáá,

¹¹ te ni vá yõo ñⁿ tècú tnùní tnúhu váha,

te ni vá yõo ñⁿ nànducu nihnu Yã Ndiõxí.

¹² Chi nchaa-yu ñá túú nchìcúⁿ nihnú-yu ichi váha, te nchaa-yu cùu-yu ñáyiú xĩndecu neñùú sá cúú-xí Yã Ndiõxí.

Te ni ñⁿ-yu ñá túú quidé-yu ñⁿ sá váha.

¹³ Te cada iní-ndó sã yúhú-yu cùu-xi datná cúú ñⁿ yaú núú yíndüxi ndíyí núú ïo ndehe sãháⁿ,

te ducaⁿ sãtnahá-xi cùu yuhú-yu, chi ío cãháⁿ cuèhé-yu, te mee-ni dándahú-yu nchaa tnàha ñáyiú-yu.

Te cada iní-ndó sã vènenú cóo yíhí yúhú-yu chi mee-ni cãháⁿ úhú-yu cuendá tnàha ñáyiú-yu.

¹⁴ Te ío iní-yu cãháⁿ úhú tnáhã-yu.

¹⁵ Te àúⁿ nã cuu àúⁿ nã xiãⁿ xĩsahni tnáhã-yu.

¹⁶ Te nchaa núú xicá cùu-yu quide úhú iní-yu nchaa tnàha ñáyiú-yu nàcuáa ndìhú iní ñáyiú-áⁿ.

¹⁷ Te ñá túú cuìní-yu cundecu ndìhi tnàha váha-yu.

¹⁸ Te ñá túú sàni iní-yu canehé-yu sá yíñùhu núú Yã Ndiõxí.

Duha quidé-yu cächí-xi núú tütú-gá.

¹⁹ Te cùtnùní iní-ó sã nchaa tnúhu ní chídó tnùní ndíi Moisés cúú-xi cuendá nchaa ñáyiú nchìcúⁿ nihnu nchaa tnúhu-áⁿ. Te tnúhu-áⁿ cúú-xi cuendá sá vá yõo tnàhí cächí sá ñá túú cuèchi-xi, te ducaⁿ te nchaandi túhú ñáyiú cutnùní iní-yu sá ná chãhu-yu nchaa sá quidé-yu núú Yã Ndiõxí. ²⁰ Te ducaⁿ càda-xi chi ni ñⁿ ñáyiú vá cächí-ó sã vá cùndècu cuèchi-yu núú Yã Ndiõxí cuendá-ni sá nchìcúⁿ nihnú-yu nchaa tnúhu sá ní chídó tnùní ndíi Moisés, te tnúhu-áⁿ cächí tnúhu-xi cuendá-ni sá cùtnùní iní-ó sã ndécú-ó ichi cuèhé ichi duha.

Te núú na quindáá iní-ó Xĩtoho Jesucristú te naníhí tàhú-ó

²¹ Te vitna ní cutnùní iní-ó sã ñá díú sã cadá-ó nchaa nacuáa ní cãháⁿ ndíi Moisés cudíu-o núú Yã Ndiõxí, chi mee-gã quidé cudíu-o núú-gã. Te núú tütú ndíi Moisés ndìhi núú tütú tée ní xóo

cáháⁿ tnúhu Yá Ndiöxí ndéé sanaha cáháⁿ-xi nàcuáa cada ñaha-gã xii-o vitna. ²² Te ducaⁿ cùdiu-o núú Yá Ndiöxí te núu na quindáá iní-ó Xítohó Jesucristú. Te ñu-ni ducaⁿ cùdiu nchaa ñáyiú ñuyíú te núu na quindáá iní ñáhã-yu xii-gá, chi ñⁿ-ni cùu-o nchaa-o sá cúu-xí Yá Ndiöxí. ²³ Chi nchaá-yu ndècu cuéchi-yu, chi ñá ñⁿ-yu quidé-yu nàcuáa cáháⁿ Yá Ndiöxí sá cúu-yu ñáyiú quide váha. ²⁴ Dico Yá Ndiöxí ío váha iní-gá chi ní quide ñaha-gã xii-o ñⁿ sá váha, chi dicó-ni ducaⁿ ñí quide-gá nàcuáa vá cùndècu-gá cuéchi-o núú-gã, chi Xítohó Jesucristú ní sati ñíñi-gã te ní xíhí-gá, te ducaⁿ ñí yáha-gá cuendá sá vá cùndècu-gá cuéchi-o. ²⁵ Te Yá Ndiöxí ní taxi ndecu-gá Xítohó Jesucristú núú ñáyiú ñuyíú-a, te ní xíhí-gá sá cuendá nchaa yíca cuéchi-yu, te ducaⁿ ñí cuu cuendá sá ncháá ñáyiú na quindáá iní ñáhã xii-gá te vá náchãhu-yu cuéchi-yu núú Yá Ndiöxí. Te Yá Ndiöxí ní quide ndee iní-gá nchaa sá cuéhé sá dúhá ñí quide cue ñáyiú ní xíndecu ndéé sanaha. Te xíãⁿ ní xíhí Xítohó Jesucristú cuendá cutnùni iní-ó sá Yá Ndiöxí cúu-gã Yáá ío váha quide ndáá cuéi ducaⁿ ñí quide ndee iní-gá nchaa sá ñí quide cue ñáyiú-áⁿ. ²⁶ Núu xíãⁿ vitna ní cutnùni ndisa iní-ó sá quidé ndáá-gá, te quide-gá sá cué ñáyiú vá cùndècu-gá cuéchi-yu núú-gã, te núu na quindáá iní-yu Xítohó Jesucristú.

²⁷ Te vitna vá càchí-ó sã ío càhnu cuu-o cuendá sá ñà túú-gã cuéchi-o ndècu núú Yá Ndiöxí, te ducaⁿ ñà túú-gã cuéchi-o ndècu núú-gã cuendá sá sàndáá iní-ó Xítohó Jesucristú, te ñá díú sã cuendá nchaa tnúhu ní cáháⁿ ndíj Moisés. ²⁸ Te cùtnuní iní-ó sã ndéda-ni càa ñáyiú vá cùndècu-gá cuéchi-yu núú Yá Ndiöxí te núu na quindáá iní-yu Xítohó Jesucristú cuéi ní quidé-yu

nchaa nàcuáa ní cáháⁿ ndíj Moisés àdi ñà túú ní quidé-yu.

²⁹ Te cùtnuní iní-ó sã Yá Ndiöxí cúu-gã Ndiöxí nchaandi túhú ñáyiú, te ñá díú mèe-ni Ndiöxí ñáyiú isràél cúu-gã. ³⁰ Te ñⁿdi díí-gã cúu-gã Ndiöxí, te nchaa ñáyiú sàndáá iní ñáhã xii Xítohó Jesucristú te vá cùndècu-gá cuéchi-yu núú Yá Ndiöxí cuéi cúu-yu ñáyiú isràél àdi ñà túú cúu-yu. ³¹ Te ñá díú sã sàndáá iní-ó Xítohó Jesucristú te cachí-ó sã ñà túú nàndíhí nchaa tnúhu sá sánú ichi ñaha xii-o nàcuáa cada-o, te ñáhã chi sá dúhá sàndáá iní-ó-gã te xíãⁿ nchicúⁿ nihnu-o quide-o nàcuáa càháⁿ tnúhu-áⁿ.

4

Cuendá ndíj Àbrahám

¹ Te vitna na càchí tnúhu-í xii-ndo cuendá ndíj Àbrahám tée ní cuu ñani tnáhã-ó ñí xíndecu ndéé sanaha. ² Te ndíj-áⁿ ñà túú ní xíndecu cuéchi ndíj núú Yá Ndiöxí, dico ñá díú cuendá ñⁿ chiúⁿ ní quide ndíj ducaⁿ ñà túú ní xíndecu cuéchi ndíj núú-gã. Chi núu cuendá ñⁿ chiúⁿ ní quide ndíj ducaⁿ ñà túú ní xíndecu cuéchi ndíj núú Yá Ndiöxí ñá, te cada càhnu ndíj mee ndíj ní cùu, dico ñá díú núú Yá Ndiöxí cada càhnu ndíj mee ndíj te núu ducaⁿ ñí quide ndíj. ³ Te chí dándacu iní nàcuáa càháⁿ-xi núú tùtú Yá Ndiöxí núú càchí-xi: “Té Àbrahám ní sàndáá iní-dé Yá Ndiöxí, te xíãⁿ ní cachí-gá sá cúdiu-dé núú-gã”, duha càchí-xi núú tùtú-gã. ⁴ Te sá cúhúⁿ yáhu ñⁿ tée quide chiúⁿ, te vá càchí-ó sã xíãⁿ cúu-xí ñⁿ táhú sã cúu-xí-dé chi yáhu tnáhí-dé cúu-xí. ⁵ Te vá yóo ñⁿ ndàcu cada ñⁿ chiúⁿ nàcuáa cùdiu-xi núú Yá Ndiöxí. Te ñà túú ñà chiúⁿ xini ñuhu-xi cada ñáyiú te cudíu-yu núú-gã, chi xini ñuhu-ni-xi sá quindáá-ni iní-yu-gã. Te ñu-gá càchí-gá sá ñáyiú ndècu ichi cuéhé ichi duha vá cùndècu-gá cuéchi-yu núú-gã, te núu na quindáá iní ñáhã-yu xii-gã. ⁶ Te ñu-ni ducaⁿ

nĩ cáháⁿ ndíi Dàvíi, chi ní cachí ndíi sá ìo váha táhú nchaa ñáyiú ní cachí Yá Ndiöxí cudíu núú-gă, dico ñá díú cuendá ìⁿ chiuⁿ quidé-yu cudíu-yu núú-gă. ⁷ Te duha ní cachí ndíi:

Váha táhú nchaa ñáyiú quide cahnu iní Yá Ndiöxí nchaa cuéchi-xi,
te ñá túú-gă quidé cuendá-gă nchaa sá cuéhé sá dúhá ní quidé-yu.

⁸ Váha táhú-yu chi Yá Ndiöxí cachí-gă sá ñà túú-gă cuéchi-yu.

Duha ní cachí ndíi Dàvíi.

⁹ Te ñá díú mèe-ni ñáyiú ngündecu señá ñi-xi ducaⁿ váha táhú-yu, chi tnáhá ñáyiú ñá túú ngündecu señá ñi-xi ducaⁿ váha táhú-yu. Te sa nàha-o sá Yá Ndiöxí ní cachí-gă sá cudíu ndíi Àbrahám núú-gă cuendá sá ñi sándáá iní ñáhá ndíi xii-gă. ¹⁰ Te cunaha-ndo sá dīhna-gă ní cachí Yá Ndiöxí sá cudíu ndíi Àbrahám núú-gă te dàtnùní ngündecu señá ñi ndíi. ¹¹ Te ní ngündecu señá ñi ndíi cuendá xíáⁿ cuu-xi ìⁿ señá sá cudíu ndíi núú Yá Ndiöxí. Te ndéé cútñahá vátá ngündecu-gă señá ñi ndíi, te sa cudíu ndíi núú-gă chi ní sándáá iní ñáhá ndíi xii-gă. Te sá dúcáⁿ ñà túú ndécu señá ñi ndíi cútñahá ní sándáá iní ndíi Yá Ndiöxí xíáⁿ ní cuu ndíi dàtná ìⁿ dīhí dūtú nchaa ñáyiú sándáá iní ñáhá xii-gă, ñáyiú ñá túú ní ngündecu señá ñi-xi, te cudíu-yu núú-gă. ¹² Te ndíi Àbrahám ní cuu tucu ndíi dàtná ìⁿ dīhí dūtú nchaa ñáyiú ní ngündecu señá ñi-xi, dico ñá díú cuendá-ni sá ñi ngündecu señá ñi-yu cùu ndíi dīhí dūtú-yu, chi cuendá sá sándáá iní-yu Yá Ndiöxí nchicúⁿ nihnú-yu nàcuáa ní quide ndíi ní sándáá iní ñáhá ndíi xii-gă ndéé cútñahá vátá ngündecu-gă señá ñi ndíi.

Yá Ndiöxí cada-gă nchaa nàcuáa ní cachí-gă te núu na quindáá iní-ó-gă

¹³ Te Yá Ndiöxí ní xáhaⁿ-gă xii ndíi Àbrahám sá ndúú táhú ndíi cunuu ndíi ñuyíú, ndihí cue déhe ndíi, ndihí nchaa dava-gă cue ñaní tnáhá ndíi vitna cacu túu. Te ducaⁿ ní xáhaⁿ Yá Ndiöxí xii ndíi ndihí cue ñaní tnáhá ndíi, chi ní sándáá iní ñáhá ndíi xii-gă núu xíáⁿ ní cudíu ndíi núú-gă. Te ducaⁿ ní xáhaⁿ-gă xii ndíi dico ñá díú cuendá sá ñi quide ndíi nàcuáa ní xáhaⁿ Yá Ndiöxí xii ndíi Moisés cada ñáyiú ndéé cuéé-gă. ¹⁴ Te núu mee-ni ñáyiú nchicúⁿ nihnu quide nàcuáa ní cáháⁿ ndíi Moisés ní ndúu táhú-yu cunúu-yu ñuyíú-a ní cùu ña, te ñá túú xini ñuhu-xi quindáá iní-ó Yá Ndiöxí, te ñá túú nandíhí tnúhu ní xáhaⁿ Yá Ndiöxí xii ndíi Àbrahám ní cùu te núu ducaⁿ. ¹⁵ Te núu ìⁿ ñáyiú ñá túú quide nàcuáa cáháⁿ tnúhu sá sánú ìchi ñaha xii-o nàcuáa cada-o te nacháhu-yu sá dúcáⁿ quidé-yu. Te núu ñá túú tnúhu sá sánú ìchi ñaha-xi xii-o nàcuáa cada-o ní cùu ña, te ñá túú cuéchi-o ní cùu.

¹⁶ Te ducaⁿ ní xáhaⁿ Yá Ndiöxí xii ndíi Àbrahám nàcuáa cada-gă, chi cuendá sá ñi sándáá iní ñáhá ndíi xii-gă. Te ducaⁿ ní quide-gă chi ìo váha iní-gă, dico ñá díú sá ìⁿ chiuⁿ ní quide ndíi ducaⁿ ní xáhaⁿ-gă. Te sá dúcáⁿ ní cuu te cùu-xi ìⁿ tnúhu ndáá sá cúú-xi nchaa ñaní tnáhá ndíi, ñáyiú sándáá iní ñáhá xii-gă dàtná ní sándáá iní ñáhá mèe ndíi xii-gă, te ñá díú mèe-ni cuendá nchaa ñaní tnáhá ndíi nchicúⁿ nihnu nchaa nàcuáa ní cáháⁿ ndíi Moisés, chi ndíi Àbrahám-áⁿ ní cuu ndíi dàtná ìⁿ dīhí dūtú cue ñáyiú sándáá iní ñáhá xii Yá Ndiöxí. ¹⁷ Te núú túú Yá Ndiöxí cáháⁿ-xi nàcuáa ní xáhaⁿ-gă xii ndíi, te duha ní xáhaⁿ-gă: “Yòhó té Àbrahám ní quide ñaha-ì xii-n dàtná ìⁿ dīhí dūtú cue ñáyiú xīndecu nihí ñuyíú.” Duha ní xáhaⁿ Yá Ndiöxí xii ndíi, càchí-xi núú túú-gă. Te Yá Ndiöxí náhá ndáá-gă sá cadá-xi nàcuáa ní xáhaⁿ-gă xii ndíi Àbrahám, te

d̄iu-ni-gá cúú Yáá ní sándáá iní ndíi, te d̄iu-ni-gá dándòto-gá ñáyiú ní xíhí, te d̄iu-ni-gá quidé tá ngündecu nchaa sá vátá cùndècu-gá ñuyúú-a.

18 Te Yá Ndiòxí ní xáhaⁿ-gá xii ndíi Àbrahám sá ïo cuéhé dèhe ndíi coo, te ïo ní sándáá iní ndíi nàcuáa ní xáhaⁿ-gá dico ñá túú ní cùtnuní iní ndíi nasa cada-gá, chi ïo ní sahnu ndíi. Te cuendá sá dúcáⁿ ïo ní sándáá iní ndíi tnúhu ní xáhaⁿ-gá nũu xiáⁿ ní cuu ndíi d̄ihí d̄útú vai ñáyiú x̄ndecu ñihí ñuyúú. 19 Te ndíi Àbrahám ñũhu ndíi ñⁿ ciendú cuíá cùtnàhá ducaⁿ ní xáhaⁿ Yá Ndiòxí xii ndíi, te ní cutnùní iní ndíi sá ñà túú t̄ahú ndíi sá cóó dèhe ndíi ndihí ñad̄ihí ndíi ndíi Sárá, chi ndi ndúú-yu sa ní sahnu vihí-yu, te cuéi ducaⁿ dico ní sándáá-ni iní ndíi nàcuáa ní xáhaⁿ Yá Ndiòxí. 20 Te ñá túú ní s̄ani ñⁿ saní úú iní ndíi nàcuáa ní xáhaⁿ Yá Ndiòxí cada-gá sá cúú-xí ndíi, chi da uuⁿ-gá váha ní sándáá iní ndíi nàcuáa ní xáhaⁿ-gá, te ní cachí ndíi sá ïo càhnu cuu-gá. 21 Te ní cutnùní ndáá iní ndíi sá Yá Ndiòxí ndácú-gá quidé-gá nchaa sá càháⁿ-gá. 22 Te sá ní sándáá iní ndíi nàcuáa ní càháⁿ Yá Ndiòxí, núu xiáⁿ ní cachí-gá sá cúú ndíi ñⁿ tée ñá túú cuéchi-xi núú-gá.

23 Te ní ngódó tnùní núú t̄útú Yá Ndiòxí cuendá ndíi Àbrahám sá ní cachí-gá sá ñà túú cuéchi ndíi núú-gá, te ñá díú-ní cuendá méé ndíi ní ngódó tnùní núú t̄útú-gá. 24 Chi tnàhá cuendá-ó nchàa-ó ní ngódó tnùní núú t̄útú-gá. Te càchí-gá sá ñà túú cuéchi-o nũú-gá chi sándáá iní-ó-gá, te d̄iu-gá cúú-gá Yáá ní dándótó ñàha xii Xítohó Jesucristú Yáá cúú Xítohó-ó. 25 Te Yá Ndiòxí ní cachí-gá sá díú Xítohó Jesucristú cuú-gá cuendá nacháhu-gá nchaa cuéchi-o. Te ní xíhí-gá te ní ndoto-gá cuendá nchaa-ó v̄a cùndècu-gá cuéchi-o nũú Yá Ndiòxí te núu na quindáá iní-ó-gá.

5

Ío váha tnàhá ñáyiú càchí Yá Ndiòxí sá ñà túú cuéchi-xi

1 Te vitna, ñà túú-gá cuéchi-o ndècu núú Yá Ndiòxí chi sándáá iní-ó Xítohó Jesucristú, te ïo váha ndècu ndihí-o Yá Ndiòxí vitna sá cuendá Xítohó Jesucristú. 2 Te cuendá sá ní sándáá iní-ó Xítohó Jesucristú xiáⁿ d̄iu-gá ní quide ní ngündecu váha-o nũú Yá Ndiòxí, te ducaⁿ-ni cùndecu-o, te ïo cùd̄í iní-ó chi ndècu ndihí-o tnúhu ndee ñí sá s̄aa nduu ngündecu-o nũú ïo váha càa ndecu Yá Ndiòxí. 3 Te ñá díú-ní sá cuendá sá ndúú t̄ahú-ó cùndecu-o núú ndécú-gá cúdí ñí-ó, chi cùd̄í iní-ó ndòho-o cuendá-gá, chi cùtnuní iní-ó sá nũu na ndòho-o cuendá-gá te cunduu càhnu-gá iní-ó, 4 te núu cùu-o ñáyiú ta quide cahnu-gá iní-xi te cùtnuní sá cúú-ó ñáyiú quide váha, te núu cùu-o ñáyiú quide váha te uuⁿ-gá tá ngündecu ndihí-o tnúhu ndee ñí cuáháⁿ sá cáda váha ñaha Yá Ndiòxí xii-o. 5 Te núu ducaⁿ te vá ñⁿ nduu ndixi cuéchi iní-ó sá ndécú ndihí-o tnúhu ndee ñí ngündecu váha-o. Te Espíritú sá ní taxi Yá Ndiòxí ndécú ndihí-o xiáⁿ quidé-xi cùtnuní iní-ó sá ïo cùu iní ñàhá Yá Ndiòxí xii-o.

6 Te nchoo ñà túú v̄edana ná ní ndàcu-o cada-o cuendá d̄acácu ñhnu-o mèe-o, dico Xítohó Jesucristú ní xíhí-gá cuendá-ó, ndihí cuendá nchaa dava-gá ñáyiú ñà túú tnàhá tnúhu ndihí Yá Ndiòxí, te ní xíhí-gá mei nduu taú-xi cuú-gá. 7 Te cud-ana-ni núu xihí ñⁿ ñáyiú sá cuendá ñⁿ ñáyiú quide ndáá, te áma xihí tucu ñⁿ-yu sá cuendá ñáyiú quide váha tnàhá ñáyiú-xi. 8 Te Yá Ndiòxí ní quide-gá sá nchóó cùtnuní iní-ó sá ïo cùu iní ñàhá-gá xii-o, chi cùtnàhá ndécú-ó ichi cuéhé ichi duha te ní tendaha-gá Xítohó Jesucristú ní quixi-gá ñuyúú-a ní xíhí-gá cuendá-ó. 9 Te sá cuendá sá ní xíhí Xítohó Jesucristú xiáⁿ ñà túú-gá cuéchi-o ndècu núú Yá Ndiòxí, te vitna ní cutnùní ndáá

iní-ó sǎ vǎ dáquihíⁿ ñáhá-gǎ Yǎ Ndiöxí xii-o núú ùhú núú ndàhú sǎ cuèndá Xítohó Jesucristú. ¹⁰ Te cútnàhá ñá túú tnàhá tnúhu-o ndíhi Yǎ Ndiöxí ní cùu ní xíhí Xítohó Jesucristú Yaa cúú Dèhe-gá cuèndá cuu váha iní ñáhá-gǎ xii-o, te ducaⁿ te nduu táhú-ó cùndecu-o ndíhi-gá ní caa ní quíhíⁿ cuèndá sǎ ní ndoto Xítohó Jesucristú. ¹¹ Te ndètu-o sáá nduu ngùndecu-o ndíhi-gá ní caa ní quíhíⁿ, te ñá díú-ní xǎⁿ quidé-ó chí tnàhá cúdíí iní-ó Yǎ Ndiöxí, chí Xítohó Jesucristú ní quide-gá ducaⁿ cùdíí iní-ó-gǎ, te díu-ni Xítohó Jesucristú ní quide-gá ní nucúndecu váha-o ndíhi Yǎ Ndiöxí.

Nàcuáa ní quide ndíi Àdán ndíhi nàcuáa ní quide Xítohó Jesucristú

¹² Te ndíi Àdán ñá túú ní quide ndáá ndíi núú Yǎ Ndiöxí núu xǎⁿ ní ngùndecu nchaa sǎ cuèhé sǎ dúhá ñuyíú-a, te sǎ cuèndá nchaa sǎ cuèhé sǎ dúhá quide ñáyíu xǎⁿ xíhí-yu, te nchaá-yu xíhí-yu chí nchaá-yu quidé-yu nchaa sǎ cuèhé sǎ dúhá. ¹³ Te sa quide-gá-yu nchaa sǎ cuèhé sǎ dúhá te dàtnùní ní ngùndecu nchaa tnúhu sǎ ní chídó tnùní ndíi Moisés nàcuáa ní xáhaⁿ Yǎ Ndiöxí cada ñáyíu, te nchoo cùtnuní iní-ó sǎ núu ñá túú tnúhu sǎ sǎnú íchí ñaha xii-o nacuáa cada-o, te ñá túú cuèchi-o sǎnuu. ¹⁴ Te ndéé cútnàhá ní xíndecu ndíi Àdán ní quesaha-xí xíhí ñáyíu, te ducaⁿ-ní xíhí-yu ndéé ní sáá nduu ní xíndecu ndíi Moisés. Te ducaⁿ ní xíhí-yu chí ní quidé-yu nchaa sǎ cuèhé sǎ dúhá cuèi ñá túú ní quidé-yu nàcuáa ní quide ndíi Àdán, chí ndíi-áⁿ ñà túú ní sàndáá iní ndíi nàcuáa ní xáhaⁿ Yǎ Ndiöxí cada ndíi. Te ndíi Àdán ní cuu ndíi ñⁿ téé cùu cahnu ní xíndecu ñuyíú-a, te sǎtá dúcáⁿ te ní quixí Xítohó Jesucristú te Yaa-áⁿ ïo-gǎ càhnu cuu-gǎ.

¹⁵ Te sǎ ní quide ndíi Àdán te vǎ càchí-ó sǎ ñⁿ-ní cùu-xí ndíhi sǎ ní cachí Yǎ Ndiöxí nduu táhú-ó vitna. Te sǎ ñà túú ní quide ndáá ndíi xǎⁿ

nchaa ñáyíu xíhí-yu, dico Yǎ Ndiöxí ío váha iní-gǎ chí ío váha ní quide-gá sǎ cúú-xí nchaa nchoo ñáyíu ndècu ñuyíú-a, chí dicó ducaⁿ ní cachí-gá sǎ nánihí tàhú-ó, te ñⁿndíi-ni téé tnàhá-dé ío váha ní quide-dé sǎ cúú-xí-ó, te téé-áⁿ cúú-dé Xítohó Jesucristú. ¹⁶ Te sǎ ní quide ñⁿndíi-ni ndíi Àdán ñá túú ñⁿ-ní cùu-xí ndíhi sǎ ní quide Yǎ Ndiöxí sǎ cúú-xí-ó, chí ndíi-áⁿ ñà túú ní quide ndáá ndíi núú-gǎ. Te sǎ dúcáⁿ ní quide ndíi te xǎⁿ ní cuu-xí cuèchi díhna nuu ní quide ndíi, núu xǎⁿ ní cachí Yǎ Ndiöxí sǎ cuè ñáyíu quíhíⁿ-yu núú ùhú núú ndàhú nacháhu-yu nchaa sǎ cuèhé sǎ dúhá quidé-yu. Dico mee-gǎ ní quide sǎ cuè ñáyíu naníhí tàhú-yu dicó-ni ducaⁿ, te ducaⁿ te vǎ cùndècu-gá cuèchi-yu núú-gǎ cuèi ío vǎi cuèchi-yu. ¹⁷ Te sǎ dúcáⁿ ñà túú ní quide ndáá ñⁿndíi-ni ndíi Àdán-áⁿ núú Yǎ Ndiöxí, xǎⁿ ní quide-xí xíhí nchaa ñáyíu. Te sǎ cuèndá sǎ ní quide ñⁿndíi-ni Xítohó Jesucristú xǎⁿ ío váha ní quide ñaha Yǎ Ndiöxí xii ñáyíu, chí dicó-ni ducaⁿ ní nduu táhú-yu cùdíú-yu núú-gǎ. Te nchaa ñáyíu ducaⁿ cùdíu núú-gǎ nduu táhú-yu cunúú-yu ndíhi Xítohó Jesucristú cuèndá sǎ ní quide-gá sǎ vǎha sǎ cúú-xí-yu.

¹⁸ Te sǎ dúcáⁿ ní quide ndíi Àdán ñá túú ní quide ndíi nàcuáa ní xáhaⁿ Yǎ Ndiöxí xii ndíi ñⁿ xito, núu xǎⁿ ní cachí-gá sǎ ncháá ñáyíu tàú-yu nacháhu-yu nchaa cuèchi-yu, dico Xítohó Jesucristú ní quide-gá ñⁿ sǎ vǎha cuèndá nchaa ñáyíu vǎ cùndècu-gá cuèchi-yu núú Yǎ Ndiöxí te núu na quíndáá iní ñáhǎ-yu xii-gǎ, te ducaⁿ te cundecú-yu ndíhi-gá ní caa ní quíhíⁿ. ¹⁹ Te sǎ ñà túú ní sàndáá iní ñⁿndíi-ni ndíi Àdán nàcuáa ní xáhaⁿ Yǎ Ndiöxí xii ndíi, xǎⁿ ní nguínchicúⁿ nihnu nchaa ñáyíu quidé-yu nchaa sǎ cuèhé sǎ dúhá. Te ducaⁿ ñⁿndíi-ni Xítohó Jesucristú ní quide-gá

nàcuáa ní xáhaⁿ Yá Ndiöxí cuëndá sá Yá Ndiöxí cachí-gá sá cúú-yu núú-gã.

²⁰ Te Yá Ndiöxí ní xáhaⁿ-gã xii ndíi Moisés nàcuáa cada ñáiyu, te sá cuëndá tnúhu-áⁿ uuⁿ-gá ní ngúíta nchaa ñáiyu quidé-yu nchaa sá cuèhé sá dúhá, te Yá Ndiöxí uuⁿ-gá cundáhú iní ñáhá-gã xii-yu tucu. ²¹ Te sá cuëndá nchaa cuéchi ñáiyu xiáⁿ xihí-yu, dico Yá Ndiöxí ío váha iní-gá chi ñu-gá ní cachí-gá sá ncháá ñáiyu na tnàhá tnúhu ndihí ñaha xii-gá cudú-yu núú-gã, te cundecú-yu ndihí-gá ní caa ní quíhíⁿ, te ducaⁿ chi Xítohá Jesucristú ní quide-gá sá váha sá cúú-xí-yu.

6

Ñáiyu ñá túú-gã ndécú ichi cuehé ichi duha ndécú-yu cuëndá Xítohá Jesucristú

¹ Te sá dúcáⁿ quide Yá Ndiöxí, te vá cáni iní-ó cànchicúⁿ nihnu-ni-o ichi cuehé ichi duha, chi ñá díú sá cànchicúⁿ nihnu-o ìchi-áⁿ te ngóo càni iní-ó sá ío-gá cundáhú iní ñáhá-gã xii-o. ² Te vá cúú cànchicúⁿ nihnu-o ìchi cuehé ichi duha, chi nchoo cùu-o datná cue ñáiyu sa ní xihí, núu xiáⁿ vá cúú-gã canchicúⁿ nihnu-o ìchi-áⁿ. ³ Te sa nàha-o sá cuëndá sá ní sandute-o quèe-xi sá tnàhá tnúhu-o ndihí Xítohá Jesucristú. Te sá ní sandute-o quèe tucu-xi sá cúú-ó datná ñáiyu ní xihí ndihí-gá. ⁴ Te ñá díú-ní sá ní xihí-ó ndihí-gá chi quèe tucu-xi sá ní nguíndüxi-o ndihí-gá te ní ndoto-o datná ní ndoto mee-gã ní dándótó ñaha Dútú Ndiöxí Yaa ío càhnu cuu, te ducaⁿ ní cuu cuëndá sá vá cundècu-gá-ó datná ní xíndecu-o.

⁵ Te núu ñⁿ-ni cùu-o ndihí Xítohá Jesucristú cuëndá sá cúú-ó datná ñáiyu ní xihí ndihí-gá, te ndáá sá cúú-ó datná ñáiyu ní ndoto ní ngúndecu váha datná ní ndoto mee-gã ní nucúndecu váha-gá. ⁶ Te

nchoo nàha-o sá cúú-ó ñáiyu ío ndècu cuéchi-xi ní cùu, dico sátá ní cuu-o datná ñáiyu ní xihí datná ní xihí Xítohá Jesucristú núu cùrúxí, te ndéé dàvá-áⁿ ní dáñá-ó nchaa ichi cuehé ichi duha ndècu-o ní cuu, te ñá túú-gã cùnùu sá cuèhé sá dúhá iní-ó. ⁷ Chi nchaa ñáiyu ní xihí ñá túú-gã ndécú-yu ichi cuehé ichi duha. ⁸ Te núu cùu-o datná ñáiyu ní xihí datná ní xihí Xítohá Jesucristú ñá, te cùtnuní ndáá iní-ó sá cundècu-o ndihí-gá ní caa ní quíhíⁿ. ⁹ Te sa nàha-o sá Xítohá Jesucristú ní xihí-gá te ní ndoto-gá te vá ñⁿ ndùu ñⁿ quíú-gã te cuú-gá, chi ñá túú nãgá sá cáda cùú-gá. ¹⁰ Te Xítohá Jesucristú ní xihí-gá ñⁿ xito-ní sá cuëndá nchaa cuéchi nchoo ñáiyu ñuyíú, te vá ñⁿ ndùu-gá cuú-gá, te ndècu-ni-gá sá cúú-xí Yá Ndiöxí. ¹¹ Núu xiáⁿ nchòhó cada iní-ndó sá datná sá ní xihí-ndó vá cundècu-gá-ndó sá cúú-xí ìchi cuehé ichi duha, chi ndècu-ná-ndó sá cúú-xí Yá Ndiöxí, chi ní tnàhá tnúhu-ndo ndihí Xítohá Jesucristú Yaa cúú Xítohá-ó.

¹² Te núu xiáⁿ vá dáñá-gã-ndó cùnùu ní ñⁿ sá cuèhé sá dúhá iní-ndó cuëndá sá vá cáda-gã-ndó ní ñⁿ sá cuèhé sá dúhá sàni iní-ndó. ¹³ Te vá dáñá-ndó tàxi tñuní ñáhá ní ñⁿ sá cuèhé sá dúhá-áⁿ xii-ndo cuëndá sá vá cáda-gã-ndó, te chí dáñá ná tàxi tñuní ñáhá Yá Ndiöxí xii-ndo, te chí dáñá ná chindee ñaha-gá cada-ndo mèe-ní sá váha, te ducaⁿ te cada iní-ndó sá cúú-ndó datná ñáiyu ní xihí te ní ndoto ndècu. ¹⁴ Te ducaⁿ càda-ndo chi vá ndácú-gã ní ñⁿ sá cuèhé sá dúhá tàxi tñuní ñáhá-xi xii-ndo, chi Yá Ndiöxí cundáhú iní ñáhá-gá chindee ñaha-gá xii-ndo. Te ducaⁿ chi ñá túú-gã cùnùu nchaa tnúhu sá ní chídó tñuní ndíi Moisés cada ñáiyu.

Ñáiyu nchicúⁿ nihnu sá váha

¹⁵ Te ñá díú sá cundáhú iní ñáhá Yá Ndiöxí xii-o chindee ñaha-gá ndihí sá ñá túú-gã cùnùu nchaa tnúhu ní chídó tñuní ndíi Moisés,

te cachí-ó sã cúu-ní cùndecu-o ichi cuehé ichi duha. ¹⁶ Te nchoo xini-ó sã núu na cuãha-o tnũhu cunu cuechi-o núú ìⁿ ñáyiú cuini cunu cuechi-o núú-xi, te cùu-ná-ó ñáyiú xinu cuechi núú-yu te quide-o nchaa chiuⁿ tahu-yu. Te ducaⁿ sãtnahá-xi cùu nchaa ñáyiú quide nchaa sã cuehé sã dúhá chí tàxi tnuni ñáhá-ná-xi xii-yu, te ñu nchaa xiãⁿ dácũta nihnu ñaha-xi xii-yu, te ñu-ni ducaⁿ sãtnahá-xi cùu nchaa ñáyiú sãndáá ini ñáhá xii Yá Ndiõxí chí tàxi tnuni ñáhá-gã xii-yu, te quidé-yu nchaa sã vãha nãcuáa cuini mée-gã cada-yu. ¹⁷ Te nchõhõ ducaⁿ ni xõo cada-ndo nchaa sã cuehé sã dúhá ní cùu, dico táxãhu xii Yá Ndiõxí chí vitna ni yũhu ni ini-ndó quide-ndo nchaa nacuaá càháⁿ tnũhu-gã sã ni ngũndecu ndihi-ndo. ¹⁸ Te vitna ñã túú-gã táxi tnuni ñáhá ni ìⁿ sã cuehé sã dúhá xii-ndo, te quide-ná-ndó nchaa sã vãha tãuchiúⁿ Yá Ndiõxí cada-ndo. ¹⁹ Te duha càháⁿ-í cuendá cue ñáyiú xinu cuechi cuendá sã nchõhõ tecú tnuni-ndó nãcuáa ndũu tnũhu càháⁿ-í. Te nchõhõ ní dãñá-ndó ní taxi tnuni ñáhá nchaa sã cuehé sã dúhá xii-ndo, te ñã túú ní quide-ndo nacuaá ní càháⁿ Yá Ndiõxí cada-ndo chí da vihi-gã ní quide-ndo, te ñu-ni ducaⁿ chí dãñá ná tàxi tnuni ñáhá Yá Ndiõxí xii-ndo vitna cuendá cada-ndo mée-ni sã vãha nãcuáa cuini mée-gã cada-ndo, te ducaⁿ te cuu-ndo ñáyiú quide ndáá cundecu núú-gã.

²⁰ Te nchoo cũtnahá ní xõo cada-ndo nchaa sã cuehé sã dúhá ñã túú ní xõo cada-ndo ni ìⁿ sã vãha cuini Yá Ndiõxí cada-ndo. ²¹ Te dicó sácãⁿ núú sãñaha nchaa sã cuehé sã dúhá-ãⁿ te núu na càda-o, te ni ìⁿ sã vãha vá nihí-ó te núu na càda-o nchaa xiãⁿ, te ñu nchaa xiãⁿ dácũta nihnu ñaha-xi xii-o. ²² Te vitna ñã túú-gã cúu-ó ñáyiú ndècu ichi cuehé ichi duha, chí cùu-ná-ó ñáyiú quide nchaa nacuaá càháⁿ Yá Ndiõxí. Te sã dúhá quide-o cuu ndisa-xi ìⁿ sã vãha sã cúu-xí-ó, te cùu-o ñáyiú

quide ndáá ndécú-ó núú-gã vitna, te sãá nduu cùndecu-o ndihi-gã ni caa ni quihíⁿ. ²³ Te nchaa sã cuehé sã dúhá dicó dácũta nihnu ñaha-xi xii-o, dico Yá Ndiõxí ní quide-gã sã dicó-ni ducaⁿ ndũu táhú-ó cùndecu-o ndihi-gã ni caa ni quihíⁿ, chí ní tnahá tnũhu-o ndihi Xitohó Jesucristú Yáá cúu Xitohó-ó.

7

Cuendá ñáyiú tnãndaha

¹ Te nchaa nchõhõ ñáyiú ndècu ndihi-í ichi Xitohó Jesucristú sa ñaha-ndo nacuaá càháⁿ tnũhu sã dãnehé ñáhá xii-o nacuaá cada-o cùndecu-o, chí tnũhu-ãⁿ càháⁿ-xi dóho nchaa ñáyiú xĩndecu vĩvú ñuyiú-a. ² Te nchaa ñáyiú ñã ní sa ndècu yĩ-xi, te ñu tnũhu-ãⁿ dãnehé ñáhá-xi xii-yu sã vã dãñã-yu yĩ-yu, dico núu na cúu yĩ-yu te ñã túú-gã ná càháⁿ tnũhu-ãⁿ cuendá-yu. ³ Dico núu vátá cúu-gã yĩ-yu te ñã túú ndũu vãha-xi naquehéⁿ-yu ingá téé, dico núu na cúu yĩ-yu te quendõo mée-yu, te ñã túú nãgã càháⁿ tnũhu sã dãnehé ñáhá xii-yu nacuaá cada-yu te ducaⁿ te cuu naquehéⁿ-yu ingá téé, te ñã túú cùu-xi ìⁿ cuéchi.

⁴ Te nchõhõ cue ñáyiú ndècu ndihi-í ichi Xitohó Jesucristú cúu-ndó dãtná ñáyiú ní xihí dãtná ní xihí-gã. Te xiãⁿ ñã túú-gã táxi tnuni ñáhá nchaa tnũhu ní chído tnuni ndii Moisés xii-ndo. Te ducaⁿ ni cuu cuendá nchõhõ ngũndecu-ndo ndihi Xitohó Jesucristú Yáá ní xihí ní cùu te ní ndoto-gã. Te ducaⁿ ni cuu cuendá nchaa nchoo ñáyiú ndècu ichi-gã cada-o nchaa nacuaá càháⁿ Yá Ndiõxí. ⁵ Te nchoo ni xĩndecu-o ichi cuehé ichi duha, te tnũhu sã sãnú ichi ñaha xii-o nacuaá cada-o cùndecu-o cachí-xi sã ñã túú vãha cundecu-o ichi-ãⁿ, te nchoo dã uuⁿ-gã ní quide-o nchaa sã cuehé sã dúhá sã dúcãⁿ càháⁿ tnũhu-ãⁿ, te sã dúcãⁿ ní quide-o te ta xita

nihnu-o cuáháⁿ ní cùu. ⁶ Te vitna cada iní-ó sá cúú-ó datná ñáyiú ní xíhí sá cúú-xí tñuhu sá dánèhé ñáhá xii-o nacuaá cada-o cùndecu-o, chí ñá túú-gã cùnùu-xí, te vitna mee-nã Espiritú Yã Ndiõxí chindèe ñaha-xi xii-o xinu cuechi-o núú-gã, te ñá díú cuèndá nchaa tñuhu sá ñí ngúndéé ndéé díhna cada ñáyiú xinu cuechi-o núú-gã vitna.

Nchaa sá cuèhé sá dúhá ñuhu iní-í

⁷ Te cuèj duhá càháⁿ-í dico vá cúú tñahí càháⁿ-ó sá tñuhu sá sánú ichi ñaha xii-o nacuaá cada-o cùndecu-o ñá díú tñuhu váha cùu-xi. Te yúhú ñá túú cùtnuní iní-í ná cúú nchaa sá cuèhé sá dúhá ní cùu te núu ñá túú tñuhu-áⁿ ní càchí tñuhu-xi xii-í, te ní ñá túú cùtnuní tucu iní-í núu váha àdi ñá túú váha sá nchídó ìní-í sá ndécú ndíhi tñaha ñáyiú-o ní cùu te núu ñá túú tñuhu-áⁿ ní càchí-xi sá vã cúú cùu iní-í sá ndécú ndíhi-yu. ⁸ Te tñuhu-áⁿ ní dánèhé ñáhá-xí xii-í sá vã cúú càda-í ní ìⁿ sá cuèhé sá dúhá, dico sá cuèndá tñuhu-áⁿ uuⁿ-gã ducaⁿ ní sani iní-í ní quide-í. Te núu ñá túú tñuhu sá sánú ichi ñaha xii-o nacuaá cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. ⁹ Te cùtnahá vátá nihí-gá-í tñuhu-áⁿ te ñá túú tñahí ná sání ìní-í ndécú-í ní cùu, dico sátá ní nihí-í tñuhu-áⁿ te ní cutnùní iní-í sá ndécú cuèchi-í, te ta xita nihnu-í cuáháⁿ ní cùu. ¹⁰ Te núu ní quide-í nchaa nacuaá càháⁿ tñuhu-áⁿ te sa ndéé ama-gã naníhí tãhú-í ní cùu, dico ñá túú ní quide-í núu ní cutnùní iní-í sá tá xita nihnu-í cuáháⁿ ní cùu. ¹¹ Te sá xíí tñuhu-áⁿ xiáⁿ uuⁿ-gã ní cunuu nchaa sá cuèhé sá dúhá ní dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáháⁿ ní cùu.

¹² Te tñuhu sá sánú ichi ñaha xii-o nacuaá cada-o cùndecu-o cuu-xí tñuhu ío yíñuhu ní taxi Yã Ndiõxí, te ìⁿ ìⁿ tñuhu-áⁿ cúú-xí mée-ni tñuhu váha, te ní ìⁿ tñuhu cuèhé tñuhu duhá ñá túú ñuhu tñahá. ¹³ Te vá cúú càchí-í sá tñuhu váha-áⁿ ní quide-xi ta xita nihnu-í cuáháⁿ ní

cùu, chí nchaa sá cuèhé sá dúhá ní quide-í, xiáⁿ tá dàcuíta nihnu ñaha-xi xii-í cuáháⁿ ní cùu, te sá cuèndá tñuhu váha-áⁿ ñí cutnùní iní-í sá quidè-í nchaa sá cuèhé sá dúhá, te xiáⁿ tá xita nihnu-í cuáháⁿ ní cùu. Te sá cuèndá nchaa nacuaá càháⁿ tñuhu sá sánú ichi ñaha xii-o nacuaá cada-o cùndecu-o ní cutnùní iní-í sá xidó ndécú cuèchi-í ní cùu.

¹⁴ Te tñuhu-áⁿ ní taxi Espiritú

Yã Ndiõxí ndécú ndíhi-o cachí tñuhu-xi nacuaá cada váha-o. Te nchoo cùu-o mee-ni ñáyiú yicá cuèchi, te tàxi tñuni ñáhá nchaa sá cuèhé sá dúhá xii-o ní cùu. ¹⁵ Dico nchoo tñahá iní-ó càda-o nchaa sá váha dico ñá túú quide-o, te da nchaa sá ñá túú tñahá iní-ó càda-o quide-o, te ñá túú cùtnuní iní-ó ná cuèndá ducaⁿ quide-o. ¹⁶ Te sá dúcáⁿ quide-o nchaa sá ñá túú tñahá iní-ó, te xiáⁿ ndíxí tñu iní-ó sá tñuhu sá dúcáⁿ sànu ichi ñaha xii-o nacuaá cada-o cùndecu-o cuu-xí tñuhu ío váha. ¹⁷ Te cùtnuní iní-ó sá nchaa sá cuèhé sá dúhá ñuhu iní-ó, xiáⁿ quidè-xí dùcaⁿ quide-o sá ñá túú váha, te ñá díú sá cáhú ìní mée-ó dùcaⁿ quide-o. ¹⁸ Te cùu-o cue ñáyiú sàni cuehé sání dùha iní-xi, te cùní-ó càda-o nchaa sá váha dico ñá túú nihí ndéé-ó càda-o. ¹⁹ Te cùní-ó càda-o nchaa sá váha dico ñá ndácú-ó, te ñá túú cùní-ó càda-o datná quidè nchaa ñáyiú ndécú ichi cuehé ichi duhá, chí ñáyiú-áⁿ mee-ni nchaa sá cuèhé sá dúhá quidè-yu, dico díu-ni nchaa xiáⁿ quidè-ó tñahá-ó. ²⁰ Te sá dúcáⁿ quide-o nchaa sá ñá túú tñahá iní-ó càda-o te ñá díú mée-o ducaⁿ cahu iní-ó quide-o, chí nchaa sá cuèhé sá dúhá ñuhu iní-ó xiáⁿ quidè-xí dùcaⁿ quide-o.

²¹ Te ducaⁿ tñahí yáha-o òré cùní-ó càda-o sá váha, chí da mee-ni nchaa sá cuèhé sá dúhá quide-o. ²² Te ío cùdíí ìní-ó càda-o nchaa nacuaá càháⁿ Yã Ndiõxí, ²³ te dicó-ni sá ncháá sá cuèhé sá dúhá ñuhu iní-ó, xiáⁿ quidè-xí ngani ñaha-xi xii-o ñá túú quide-o sá váha sàni iní-ó càda-o, te ducaⁿ yáha-o chí

nchaa sá cuèhé sá dúhá-ǎⁿ cúnùu-xi taxi tñuní ñáhá-xí xii-o.

²⁴ ¡Te ndàhú ní cuu nchoo! Chi vá yõo ñⁿ ni ndàcu cada nacuaá vá táxi tñuní ñáhá-gǎ nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu. ²⁵ Te táxáhu xii Yá Ndiõxí sá Xitohó Jesucristú ní quide-gá cuendá sá vá táxi tñuní ñáhá-gǎ ni ñⁿ sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sàni iní-ó cada-o nchaa nacuaá càháⁿ Yá Ndiõxí, dico núu nchaa sá cuèhé sá dúhá ná cúnùu-xi taxi tñuní ñáhá-xí xii-o, te ñⁿ ni nchaa xiǎⁿ cada-o.

8

*Ñáyiú quide nchaa nacuaá càháⁿ
Espiritú Yá Ndiõxí*

¹ Te vitna nchaa nchoo ñáyiú tñàhá tñúhu ndihi Xitohó Jesucristú vá cuíta nihnu-gá-ó, chi ñá túú-gǎ ndécú-ó ìchi cuehé ìchi duha, chi mee-nǎ nchaa nàcuáa càháⁿ Espiritú Yá Ndiõxí quidé-ó. ² Te Espiritú Yá Ndiõxí-ǎⁿ táxi tñuní ñáhá-xí xii-o, te ducaⁿ chi ndècu ndihi-o Xitohó Jesucristú, te sá dúcáⁿ tàxi tñuní ñáhá Espiritú-gá xii-o núu xiǎⁿ ñá túú-gǎ táxi tñuní ñáhá ni ñⁿ-gǎ sá cuèhé sá dúhá xii-o, te ducaⁿ quide Espiritú-gá cuendá sá vá cuíta nihnu-o, te ñⁿ ni Espiritú-gá quidé-xí cuendá sá nchóó ndècu táhú-ó cùndecu-o ndihi-gǎ ni caa ni quíhíⁿ. ³ Te nchoo ñá ní ndàcu-o cada-o nchaa nacuaá càháⁿ tñúhu sá sánú ìchi ñaha xii-o nacuaá cada-o cùndecu-o, núu xiǎⁿ tñúhu-ǎⁿ ñá túú ní ñíhí ndéé-xí càda-xi cuendá sá nchóó vá cuíta nihnu-o. Dico Yá Ndiõxí ní tendaha-gǎ Déhe mee-gǎ ní quixi ñuyúú-a, te Yaá-ǎⁿ cúú-gǎ ñⁿ ñáyiú, te càa-gǎ dàtná cáá ñáyiú ndècu cuéchi-xi xíndecu ñuyúú-a, te sá cuendá nchaa cuéchi nchaa nchoo ñáyiú xíndecu ñuyúú-a ní quixi-gǎ, te ndéé dàvá-ǎⁿ ní quide-gá cuendá sá vá táxi tñuní ñáhá-gǎ ni ñⁿ sá cuèhé sá dúhá xii-o. ⁴ Te ducaⁿ ní quide-gá cuendá nchoo nchícúⁿ nihnu-o

quide-o nacuaá càháⁿ tñúhu sá sánú ìchi ñaha xii-o nacuaá cada-o, chi ñá túú-gǎ cúnùu ni ñⁿ sá cuèhé sá dúhá iní-ó, chi Espiritú Yá Ndiõxí-nǎ táxi tñuní ñáhá-xí xii-o.

⁵ Te nchaa ñáyiú cúnùu nchaa sá cuèhé sá dúhá iní-xi mee-ni xiǎⁿ ñúhú iní-yu te quidé-yu. Dico nchoo ñáyiú quide nchaa nacuaá cùni Espiritú Yá Ndiõxí ñúhú iní-ó mèe-ni nacuaá càháⁿ Espiritú-gá-ǎⁿ te quide-o. ⁶ Te núu mee-ni nchaa sá cuèhé sá dúhá cúnùu iní-ó, te cuíta nihnu-o, dico núu mee-ni nchaa tñúhu càháⁿ Espiritú Yá Ndiõxí cúnùu iní-ó, te ío váha cuu iní-ó cùndecu-o ndihi-gǎ ni caa ni quíhíⁿ. ⁷ Te nchaa ñáyiú ñúhu iní mee-ni sá cuèhé sá dúhá cùu úhú iní-yu Yá Ndiõxí, te ñá túú cùni-yu cadá-yu nàcuáa càháⁿ-gǎ, te ni ñá ndácú-yu cadá-yu. ⁸ Te nchaa ñáyiú ducaⁿ cúnùu nchaa sá cuèhé sá dúhá iní-xi-ǎⁿ ñá túú cùdiú-yu núu Yá Ndiõxí.

⁹ Te nchòhó chi ñá túú-gǎ cúnùu sá cuèhé sá dúhá iní-ndó, chi mee-nǎ nàcuáa càháⁿ Espiritú Yá Ndiõxí quidé-ndó, te ducaⁿ quide-ndo chi ndècu ndihi-ndo Espiritú-gá, te ñⁿ ni Espiritú-gá-ǎⁿ ní tendaha Xitohó Jesucristú véxi ndècu ndihi-o, te nchaa ñáyiú ñá túú ndècu ndihi Espiritú sá ní tendaha Xitohó Jesucristú véxi ndècu ndihi-o ñá túú ndècu ndihi ñáhá-yu xii-gǎ. ¹⁰ Te núu ndècu ndihi-ndo Xitohó Jesucristú, te cuéi na cùu yiqui cùñú-ndó sá cuendá nchaa sá cuèhé sá dúhá ío ñuyúú-a, dico iní-ndó chi cùndecu ndihi-xi Yá Ndiõxí chi ñá túú-gǎ cuéchi-ndo ndècu núú-gǎ. ¹¹ Te núu ndècu ndihi-ndo Espiritú Yá Ndiõxí Yaá ní dándótó ñaha xii Xitohó Jesucristú, te ñⁿ ni-gǎ cada te ndoto yiqui cùñú-ndó sá tá xita nihnu cuáháⁿ núu na cúú-xi, te ducaⁿ chi ndècu ndihi-ndo Espiritú-gá.

¹² Te nchòhó ñáyiú ndècu ndihi-í ìchi Xitohó Jesucristú, ñá túú-gǎ tàú-ndó cúnùu ni ñⁿ sá

cuèhé sá dúhá iní-ndó nàcuáa vá cùndècu-gá-ndó ichi cuehé ichi duha. ¹³ Chi núu na cùnūu sá cuèhé sá dúhá iní-ndó te cuíta nihnu-ndo, chi quíhíⁿ-ndó núú ùhú núú ndàhú. Dico núu daña-ndo mèe-ndo chindee ñaha Espiritú Yá Ndiòxí xii-ndo cuendá sá vá cùnūu-gá sá cuèhé sá dúhá iní-ndó ñá, te nduu táhú-ndó cùndècu-ndo ndíhi-gá ni caa ni quíhíⁿ te núu ducaⁿ na càda-ndo.

¹⁴ Chi nchaa ñáyiū quide nchaa nacuaa sànu ichi ñaha Espiritú Yá Ndiòxí cúū-yu déhe-gá. ¹⁵ Te Espiritú sá ní taxi Yá Ndiòxí ndécú ndíhi-o ñá túú quide-xi sá nchóó yùhú-ó cùnū cuechi-o núú-gá, chi Espiritú-áⁿ quidé-xí sá nchóó cùu-o déhe-gá, te ñi-ni Espiritú-áⁿ quidé xáhaⁿ-o xii Yá Ndiòxí: “¡Yòhó Dútú Ndiòxí cúú-n Tátá méé-ndí!” duha xáhaⁿ-o xii-gá. ¹⁶ Te ñi-ni Espiritú-gá-áⁿ tñahá tñuhu-xi ndíhi iní-ó, te càháⁿ ndáá-xi sá nchóó cùu-o déhe-gá. ¹⁷ Te sá dúcáⁿ cùu-o déhe Yá Ndiòxí xiáⁿ ní cachí-gá sá tñahá-ó nduu táhú-ó sá ní nduu táhú Xítóhó Jesucristú, te ducaⁿ nduu táhú-ó te núu na càda ndee iní-ó ndòho-o datná ní ndòho Xítóhó Jesucristú, te núu ducaⁿ te ío cuu càhnu-o ndíhi-gá ni caa ni quíhíⁿ.

¹⁸ Te yùhú càchí-í sá ñà túú nà cada-xi cuèi ndòho-o cuendá-gá ndécú-ó ñuyíú-a, chi ío váha càa núú ndúú táhú-ó cùndècu-o na saá nduu. ¹⁹ Te nchaandi túhú sá ní cadúha Yá Ndiòxí ní taxi ndècu-gá ñuyíú-a ndètu cahnu-ná-xi sáá nduu càchí-gá sá ío càhnu cuu nchaa déhe-gá. ²⁰ Te nchaa sá ní cadúha Yá Ndiòxí ní taxi ndècu-gá ñuyíú-a ní sáá nduu ñà túú-gá cúú-xí sá vâha sá cúú-xí-gá. Te ñá díú mèe sá ní taxi ndècu Yá Ndiòxí ñuyíú-a ducaⁿ ní sàni iní-xi cunduu, chi mee-gá ducaⁿ tñahí ní cachí-gá cunduu sá sáá nduu vá cúú-xí sá vâha sá cúú-xí-gá, dico sáá tucu nduu te nchaa xiáⁿ cuu

tucu-xi sá vâha sá cúú-xí-gá. ²¹ Te nchaa sá ní taxi ndècu-gá ñuyíú-a vá cùndècu-gá-xi datná cáá-xí vitna te ni vá dánàa-gá, chi nduu saa-xi te ngúndècu váha-xi datná ngúndècu váha nchaa cue déhe-gá. ²² Te nàha-o sá ncháandi túhú sá nchító ní cadúha Yá Ndiòxí ndécú ñuyíú-a ndòho-xi vitna datná ndóhó ñⁿ ñadihí sa ní tñahá òré cacu déhe-xi. ²³ Te ñá díú-ní nchaa sá dúcáⁿ ní cadúha-gá-áⁿ ducaⁿ ndòho-xi, chi tñahá nchoo dúcáⁿ ndòho-o ndècu-o ñuyíú-a tucu, te nchoo sá ní nduu táhú-ó Espiritú Yá Ndiòxí Espiritú sá ní cachí méé-gá nduu táhú-ó dñhanuu. Te ío ndòho tñahá-ó ndècu-o ñuyíú-a te ndètu cahnu-ná-ó sáá nduu ndàda saa-gá yiqui cùú-ó, te càháⁿ-gá sá cúú-ó déhe-gá. ²⁴ Te Yá Ndiòxí ní quide-gá ní naníhí táhú-ó núu xiáⁿ ní ngúndècu ndíhi-o tñuhu ndee iní ndétú-ó sáá nduu càda-gá nàcuáa ní cachí-gá, te núu sa ndècu ndíhi-o sá ndúú táhú-ó te vá cúú càháⁿ-ó sá cùndètu-o sá ndúú táhú-ó chi sa ndècu ndíhi-o. ²⁵ Dico sá ndétú-ó nduu táhú-ó cùu-xi sá vâta cùndècu ndíhi-gá-ó, te xini ñuhu-ni-xi cada ndee-ni iní-ó cùndètu-o ndéé sáá nduu nduu táhú-ó sá dúcáⁿ ní cachí Yá Ndiòxí nduu táhú-ó.

²⁶ Te Espiritú-gá chindee ñaha-xi xii-o nacuaa níhí ndéé-ó cùndècu-o, te nchoo ñà túú xini-ó càháⁿ ndíhi-o Yá Ndiòxí nàcuáa tàú-xi cunduu dico Espiritú-gá càháⁿ ndàhú-xi núú-gá cuendá-ó cuèi òré ñá nihí-ó tñuhu càháⁿ-ó cuendá nchaa sá ío cùini-ó càcáⁿ-ó núú-gá. ²⁷ Te Yá Ndiòxí sa nàha ndáá-gá nchaa nàcuáa sàni iní-ó, te ducaⁿ sá nàha ndáá-gá nchaa nàcuáa sàni iní Espiritú-gá. Te Espiritú-gá càháⁿ ndàhú-xi núú-gá cuendá nchoo ñáyiū yindahá-gá, te càháⁿ ndàhú-xi núú-gá nàcuáa cùini méé-gá cunduu.

Nchaa sá ná càda ñaha ñáyiū te vá ndácú-yu nadatùhú-yu iní-ó chi

ndacu nahi-ni-o yãha-o nchàa sá ná cáda ñàhá-yu

²⁸ Te sa ñaha-o sá Yã Ndiõxí quidé-gã sá ncháá sã yãha-o ndècu-o ñuyíú-a cùu-xi sá vãha sá cúu-xí nchòo cue ñáyíu cùu iní ñáhá xii-gã, chi cùu-o ñáyíu ní cáháⁿ-gã cundecu ndihí-gã dàtná ní cachí iní mée-gã. ²⁹ Te ndée cùtnàhá vátá ngãva-gã ñuyíú, te Yã Ndiõxí sa ñaha-gã nándi cùu ñáyíu cundecu ndihí-gã, te ñu-ni ndée dàvã-áⁿ ní cachí-gã sá ñáyíu-áⁿ cunduu váha iní-yu dàtná váha iní Déhe mee-gã, te ducaⁿ ní cachí-gã cuendá sá Déhe mee-gã-áⁿ cunuu-gã núu nchàa ñáyíu cundecu ndihí-gã. ³⁰ Te nchaa ñáyíu ducaⁿ ní cachí-gã cundecu ndihí-gã ndée cùtnàhá vátá ngãva-gã ñuyíú cáháⁿ ñáhá-gã xii-yu vitna, te nchaa ñáyíu ducaⁿ cáháⁿ-gã càchí-gã sá ñà túú-gã cuéchi-yu ndècu núú-gã, te ñu-ni ñáyíu-áⁿ cachí-gã sá ïo càhnu cuú-yu.

³¹ Te vitna ní cutnùni iní-ó, te ñà túú nãgã caní iní-ó, chi Yã Ndiõxí ndécú ndihí ñaha-gã xii-o, te vá yõo ñⁿ-gã ndacu quehndé nihnu cuendá sá vã chindèe ñaha-gã xii-o. ³² Te Yã Ndiõxí ñà túú ní cùdí iní-gã Déhe-gã sá cùú-gã cuendá nchaa nchoo ñáyíu xindecu ñuyíú-a, te sá dúcáⁿ ndée Déhe-gã ñà túú ní cùdí iní-gã xíãⁿ cùtnùni iní-ó sã táxí-gã nchaandi túhú sá xíní ñùhu-o. ³³ Te vá yõo ñⁿ ndacu cacáⁿ cuéchi núú Yã Ndiõxí cuendá nchaa ñáyíu ní cachí-gã cundecu ndihí-gã te núu ná cúu cuéchi-yu ndècu. Chi mee-gã càchí-gã sá ñà túú ndècu cuéchi-yu núú-gã. ³⁴ Te vá yõo ñⁿ ndacu daquihíⁿ ñáhá xii-o núú ùhú núú ndàhú, chi Xítohó Jesucristú ní xíhí-gã te ní ndoto-gã, te cuánda-gã núú ndécú Dütú Ndiõxí núcõo-gã xio cùha-gã, te ducaⁿ ïo cunuu-gã, te yàcáⁿ cáháⁿ ndàhú-gã núú Dütú Ndiõxí cuendá-ó. ³⁵ Te vá yõo ñⁿ ndacu cada ñaha xii-o ñⁿ sá ñà túú vãha cuendá sá vã cúu

iní ñáhá-gã Xítohó Jesucristú xii-o, te ni tnúndòho tnúhu ndàhú, te ni sá ndihú iní-ó ñã cùtnùni iní-ó nãsa cada-o càcu nihnu-o ñⁿ sá ná yãha-o, te ni nchàa sá cáda ñaha ñáyíu sá cuendá-gã, te cuéi-ni sá vã ñihí-ó sá cóhó sá cáxí-ó, te cuéi-ni sá vã ñihí-ó dõó cuihnu-o, te cuéi ndècu-ná-ó sá yãha-o ñⁿ sá yãha-o, te cuéi sa ndècu-ná-ó sá cáhni ñáhá-yu, dico Xítohó Jesucristú vá dáñá ndée-gã sá cúu iní ñáhá-gã xii-o. ³⁶ Te quee ndáá-xi nãcuáa ní cáháⁿ ñⁿ téé ní xóo cáháⁿ tnúhu Yã Ndiõxí ndée sanaha ní ngódó tnùni núú tütú-gã núú càchí-xi:

Yòhó Dütú Ndiõxí nchaa-ni nduu nchaa-ni òré cùni ñáyíu cahni ñáhá-yu xii-ndí sá cuendá-n,

te càchí-yu sá cúu-ndí dàtná cue mbée cue quití sa ndècu túha-ná cahni-yu.

Duha ní cachí téé ní xóo cáháⁿ tnúhu-gã-áⁿ, te ducaⁿ ní ngódó tnùni núú tütú-gã. ³⁷ Te cuéi ducaⁿ nándi sá ná càda ñáhá-yu xii-o, dico vá ndácú-yu nadatùhú-yu iní-ó chi ndacu nahi-ni-o yãha-o nchàa sá dúcáⁿ ná càda ñáhá-yu xii-o, te ducaⁿ chi Xítohó Jesucristú Yaá ïo cùu iní ñáhá xii-o ndecu ndihí ñaha-gã chindèe ñaha-gã. ³⁸⁻³⁹ Te yúhú cùtnùni ndáá iní-í sá ñⁿ sá ïó ñuyíú-a vá ndácú-xí càda-xi cuendá sá vã cúu iní ñáhá-gã Yã Ndiõxí xii-o, te ni sá cùú-ó, te ni sá cùndècu-o ñuyíú-a, te ni ñⁿ espíritú sá ïo cunuu cundihí yucu ñávãha te ni ñⁿ dava-gã cue espíritú cùndihí-xi vá ndácú-xí càda-xi cuendá sá vã cúu iní ñáhá Yã Ndiõxí xii-o. Te ni sá cúu ñuyíú-a vitna, te ni sá cúu ndée cuée-gã, te ni ñⁿ sá ndécú àndíu, te ni ñⁿ sá ndécú ñuyíú-a, te ni ñⁿ sá ní cadúha mee Yã Ndiõxí, ni ñⁿ xíãⁿ vá ndácú-xí càda-xi cuendá sá vã cúu iní ñáhá-gã xii-o chi ndècu ndihí-o Xítohó Jesucristú Yaá cúu Xítohó-ó.

9

*Yá Ndiõxí ní cachí-gá sá ñáyiú is-
ràél cuú-yu ñáyiú canchicú" nihnu
ñaha xii-gá*

¹ Te yúhú càháⁿ ndáá-í chi cùu-í ìⁿ tée ndècu ndihì Xítóhó Jesucristú, te ndècu ndihì-í Espíritú Yá Ndiõxí nùu xiáⁿ cùtnùnì iní-í sá càháⁿ ndáá-í. ² Te nchaa-ni nduu nchaa-ni òré ío ndìhú iní-í, te ducaⁿ-ni ío quide úhú-xi iní-í ³ sá cuendá nchaa ñáyiú cùu ndi mee-í. Te núu dícó cúu-xí ìⁿ sá chindèe ñaha xii-yu nucúndecu váha-yu núu Yá Ndiõxí ñá, te dàña-í meé-í dācuíta nihnu ñaha Xítóhó Jesucristú núu dícó sá cúu. ⁴ Te nchaa ñáyiú cùu ndi mee-í-áⁿ cúu-yu ñáyiú isràél, te Yá Ndiõxí ní cachí-gá sá cúu-yu déhe-gá, te ní quide-gá nācuáa ní cutnùnì iní-yu sá ío càhnu cuu-gá, te ní càháⁿ ndáá-gá nùu-yu nācuáa cada ñaha-gã xii-yu, te ní xáhaⁿ-gã xii ndii Moisés ní chídó tñunì ndii nācuáa cada-yu cundecú-yu. Te ní xáhaⁿ-gã xii-yu nācuáa cada-yu cada càhnu ñahá-yu xii-gá, te ní xáhaⁿ tūcu-gá xii-yu nchaa nācuáa cada-gá ndéé cuèé-gá. ⁵ Te nchaa ñáyiú-áⁿ cúu-yu ñanì tñáhá nchaa cue tée ní cunūu ní xindecu ndéé sanaha, te diu-ni ñanì tñáhá-yu cùu Xítóhó Jesucristú Yaá ní tendaha Dütú Ndiõxí ní quixi ñuyú-a, te tñáhá-gá cúu-gã Ndiõxí te ío cūnuu-gá, te nchaa nduu nchaa quíú ío càhnu cuu-gá. Te ducaⁿ na cūnduu.

⁶ Te vá càchí-ó sã Yá Ndiõxí ñá túú ní quide-gá nchaa nācuáa ní cachí-gá cada-gá cuendá sá ña túú sàndáa iní ñáhá dàva ñáyiú isràél xii-gá. Te sá dúcáⁿ xiquide davá-yu te ña túú quidé-yu nācuáa tàú-xi cada-yu sá cúu-yu ñáyiú isràél. Te ñáyiú ducaⁿ xiquide-áⁿ cúu-yu ñáyiú ñá túú cùu cuendá ñáhá Yá Ndiõxí. ⁷ Te cuèi nchaa-yu cùu-yu ñanì tñáhá ndii Àbrahám dico ña túú quidé-yu nchaa nācuáa

tàú-xi cunduu cada-yu sá cúu-yu ñanì tñáhá ndii. Te Yá Ndiõxí ní xáhaⁿ-gã xii ndii Àbrahám: “Nchaa cue ñanì tñáhá tē Isàac tēe cùu déhe ducuⁿ-n, mee-ni cuè ñáyiú-áⁿ cuu ñanì tñáhá-n”, duha ní xáhaⁿ-gã xii ndii Àbrahám. ⁸ Te xiáⁿ cùtnùnì iní-ó sã ña nchaa ñáyiú cùu ñanì tñáhá ndii Àbrahám cúu-yu ñáyiú cùu cuendá Yá Ndiõxí, chi mee-ni ñáyiú sàndáa iní nācuáa ní càháⁿ-gá cada-gá, ñáyiú-áⁿ cúu cuendá-gá. ⁹ Te duha nduu tñuhu ní xáhaⁿ Yá Ndiõxí xii ndii Àbrahám: “Sáa nduu te yúhú cada-í te coo ìⁿ déhe-n ndihì ñadihì-n tã Sàrá”, duha ní xáhaⁿ-gã xii ndii.

¹⁰ Te ña díu-ni xiáⁿ ní quide Yá Ndiõxí, chi tñáhá ní ndatnúhu-gá ndihì ndii Rèbecá cùtnáhá vitna ñuhu úú déhe ndii ndihì ndii Isàac tēe ní cuu ñanì tñáhá-ó ní xindecu ndéé sanaha. ¹¹⁻¹³ Te cùtnáhá vitna ñuhu-gá déhe ndii Rèbecá, cùtnáhá vátá cada-gã-güexi ní ìⁿ sá cuèhé sá dúhá, te ní ìⁿ sá vāha, ní xáhaⁿ Yá Ndiõxí xii ndii: “Déhe-n tēe díhna na càcu te tēe-áⁿ tñi-dé nchaa tñuhu càháⁿ déhe-n tēe cùu úú ná càcu”, duha ní xáhaⁿ-gã xii ndii Rèbecá. Te ní quee ndáá-xi nācuáa ní càháⁿ Yá Ndiõxí núu tütú-gá núu càchí-xi: “Té Jácób ní cuu váha iní-í núu-dē, te té Esàú ña túú ní cùu váha iní-í núu-dē”, duha càchí-gá núu tütú-gá. Te ducaⁿ ní cuu chi ducaⁿ ní cachí meé-gã cunduu sá càháⁿ-gá nchaa ñáyiú cuinì meé-gã, te ña díu cuendá ìⁿ chiūⁿ quidé-yu càháⁿ ñahá-gã xii-yu.

¹⁴ Te vá cúu tñáhá càháⁿ-ó sã Yá Ndiõxí ña túú quide váha-gá sá dúcáⁿ quide-gá chi mee-gã ío ndáa quidé-gã! ¹⁵ Te mee-gã ní xáhaⁿ-gã xii ndii Moisés: “Cundàhú iní-í chindee-í mee-ni cuè ñáyiú càchí iní-í”, duha ní xáhaⁿ-gã xii ndii. ¹⁶ Te xiáⁿ cùtnùnì iní-ó sã cūndàhú iní-gá ñáyiú chi ducaⁿ cuinì meé-gã cunduu, dico ña túú cūndahú iní ñáhá-gã xii-yu cuendá sá dúcáⁿ cuinì-yu cada-gá, te ní ña túú

cùndahú iní ñáhá-gã xií-yu cuèndá sá ïo ndùcu ndeé-yu quidé-yu ìⁿ sá quidè-yu. ¹⁷ Te núú tütú Yá Ndiöxí cãháⁿ-xi nàcuáa ní xáhaⁿ-gã xii téé ní cuu Faràón téé ní xíndaha nàcióⁿ Ègiptú, te duha ní xáhaⁿ-gã: “Yúhú ní quide-í yíndàha-n ñáiyu cuèndá cada-í titní núú sá cáda-í núú-n cuèndá cutnùní iní-n sá ïo càhnu cuu-í, te ducaⁿ nchaa ñáiyu ñuyúú cutnùní iní-yu sá yúhú cúú-í Ndiöxí”, duha ní xáhaⁿ-gã xii téé ní cuu Faràón. ¹⁸ Te xíⁿ cutnùní iní-ó sá Yá Ndiöxí cùndahú iní-gã mee-ni cuè ñáiyu cãchí iní mée-gã, te ducaⁿ ndàda dí-gã iní nchaa ñáiyu cãchí iní mée-gã ducaⁿ càda-gã.

¹⁹ Te sá dúhá càháⁿ-í te dava-ndo quèsaha-ndo: “Ná cuèndá Yá Ndiöxí dácàa-gã cuèchi díquí ñáiyu núu ni ìⁿ-yu ñá ndácú-yu quehndé ni-hnú-yu cuèndá sá vã cáda Yá Ndiöxí nàcuáa cuèní-gã”, quèsaha-ndo. ²⁰ Te chí cuãha cuèndá sá dícò ñáiyu ñuyúú-a cùu-ndo te ñá túú ndùu váha-xi sá nchòhó càháⁿ-ndó ìⁿ tnúhu sá ñá túú ndùu váha sá cúú-xí Yá Ndiöxí. Te duha na càháⁿ-í núú-ndó nàcuáa tecú tnùní-gã-ndó nàcuáa ndùu tnúhu càháⁿ-í. Te ñá túú xìní-ó sá ìⁿ quídí ñuhu cùñaha-xi xii ñáiyu ní cadúha ñaha xii-xi: “Ná cuèndá duha ní cadúha ñaha-n xii-í”, cùñaha-xi. ²¹ Chí ñáiyu cadúha nchaa quídí-áⁿ cuu-ni cadúha-yu ndíhi ñuhu cuèi nása na cùnduu quídí cadúha-yu canehe chiúⁿ-yu, chí ìⁿ-ni ñuhu cadúha-yu quídí cãnehe chiúⁿ-yu ndi tnahá nduu sácóo-yu vico ndíhi quídí sá cãnehe chiúⁿ-yu nduu cùtexínu.

²² Te diu-ni ducaⁿ quide Yá Ndiöxí, chí cuèní-gã dandòho-gã ñáiyu ñá túú quide nchaa nacúaa nduu vétú iní-gã, te cada-gã nàcuáa cutnùní iní-yu sá ïo càhnu cuu-gã. Te sa ndécu túha-ná-yu sá quíhíⁿ-yu núú ùhú núú ndàhú, te cuèi ducaⁿ dico ïo ta quide cahnu iní-gã cuáháⁿ. ²³ Te ducaⁿ

quide-gã cuèndá cutnùní iní nchaa ñáiyu ñuyúú sá ïo váha quide-gã sá cúú-xí nchaa nchoo ñáiyu cùndahú iní-gã, chí ní cachí-gã sá nchóó cuè ñáiyu cùndahú iní-gã nduu táhú-ó cùndecu-o ndíhi-gã núú ïo váha càa ndecu-gã. ²⁴ Te dava nchoo ñáiyu ní càháⁿ Yá Ndiöxí cúú-ó ñáiyu isràél, te dava-o cùu-o ñáiyu ñá túú cùu ñáiyu isràél. ²⁵ Te ní quee ndáá-xi nàcuáa ní xáhaⁿ Yá Ndiöxí xii ndíi Òseás téé ní xóo càháⁿ tnúhu-gã ndéé sanaha ñí chídó tnùní ndíi núú tütú-gã núú cãchí-xi:

Ñáiyu ñá túú cùu cuèndá-í ní cùu te nduu cuèndá-í-yu,

te diu-ni ñáiyu-áⁿ ñá túú cùu váha iní-í núú-yu ní cùu, dico vitna cùu váha iní-í núú-yu.

²⁶ Te diu-ni ñuú núú dúcáⁿ ñí cachí-í sá ñá túú ñáiyu cùu cuèndá-í diu-ni ñuú-áⁿ coo ñáiyu cuu déhe yúhú Dútú Ndiöxí Yá ndécú túu andíu.

Duha ní xáhaⁿ Yá Ndiöxí xii ndíi Òseás ní chídó tnùní ndíi núú tütú-gã. ²⁷ Te ndíi Chàíá téé ní xóo càháⁿ tucu tnúhu Yá Ndiöxí ndéé sanaha ñí càháⁿ ndíi cuèndá ñáiyu isràél, te duha ní cachí ndíi: “Cuèi cuéhé víhí ñáiyu isràél dàtná cuéhé ñuhu cùchí lámár dico sacú-ni-yu vá quèní-yu tnúndòho tnúhu ndàhú. ²⁸ Te Yá Ndiöxí ïo ndíhi cada-gã nchaa nàcuáa càháⁿ-gã ñuyúú”, duha ní cachí ndíi. ²⁹ Te ní càháⁿ tucu ndíi nàcuáa cada-xi ndéé cuèe-gã, te ní cachí ndíi:

Yá Ndiöxí Yá táxí tnùní nchaandi túhú sá ïo andíu ndíhi ñuyúú ñá túú ní dànaa-gã nchaa ñáiyu isràél, chí núu ní ndíhi-yu danàa ñaha-gã,

te nchoo cùu-o datná ní cuu nchaa ñáiyu ní xíndecu ñuú Sodomá ndíhi nchaa ñáiyu ní xíndecu ñuú Gòmorrá, te ndíhi-o nàa datná ní naa nchaa ñáiyu-áⁿ ní cùu.

Duha ní cachí ndíi.

Ñáyiú isràèl ñá túú sàndáá iní-yu tnúhu Xítohó Jesucristú

³⁰ Te sá cuèndá xiáⁿ nũ vitna càchí tnúhu-í xii-ndo sá cuè ñáyiú ñá túú cùu ñáyiú isràèl ñá túú ní nànducu nihnú-yu nàcuáa cadá-yu cudíu-yu núú Yá Ndiöxí, dico vitna cudíu-yu núú-gã chi ní sàndáá iní-yu Xítohó Jesucristú. ³¹ Te ñáyiú isràèl nchìcúⁿ nihnú-yu tnúhu sá dánèhé ñáhá xii-yu nàcuáa cadá-yu cudíu-yu núú Yá Ndiöxí dico ñá túú cudíu-yu núú-gã chi ñá ndácú-yu cadá-yu nchaa nàcuáa càháⁿ-xi. ³² Te ducaⁿ ñá túú cudíu-yu núú Yá Ndiöxí chi ñá túú sàndáá iní-yu Xítohó Jesucristú, te sàni iní-yu sá sá cuèndá mee-ni nchaa sá quidé mèe-yu cudíu-yu núú-gã, te sá dúcáⁿ quidé-yu te cùu-yu dàtná ìⁿ ñáyiú nguñenu ìⁿ yúú te ndúá-yu. Te ducaⁿ sàtnahá-xi cùu-yu chi ñá túú cùu váha iní-yu núú Xítohó Jesucristú. ³³ Te quèe ndáá-xi nàcuáa ní càháⁿ Yá Ndiöxí ìⁿ xichi núú tütú-gã núú càchí-xi:

Yúhú táxi ndècu-í ìⁿ tée ñuú Siòn,
te cuu-dé dàtná ìⁿ yúú, te
yúú-ãⁿ nguñenu ñáyiú te
nduá-yu,

te nchaa ñáyiú na quíndáá iní ñáhá
xii-dé, te vá ndíxí cuèchi
iní-yu sá dúcáⁿ ñí sàndáá iní
ñáhá-yu xii-dé.

Duha càchí-gã núú tütú-gã.

10

¹ Te nchòhó ñáyiú ndècu ndìhi-í ichi Xítohó Jesucristú càchí tnúhu-í xii-ndo sá càháⁿ ndìhi-í Yá Ndiöxí cuèndá ñáyiú isràèl, chi ío cuíní-í sá nànihí tàhú-yu. ² Te na càháⁿ ndáá-í cuèndá-yu sá ío ndùcu ndeé-yu xinu cuechí-yu núú Yá Ndiöxí, te dicó-ni sá ñá túú quidé-yu nàcuáa cuíní mèe-gã cadá-yu. ³ Chi ñá túú quide cuèndá-yu nàcuáa cuíní Yá Ndiöxí cada ñaha-gã xii-yu nàcuáa cudíu-yu núú-gã, te quide-ni-yu nàcuáa sàni iní mèe-yu cudíu-yu

núú-gã te ñá túú cuíní-yu tñí-yu tnúhu càháⁿ-gã nàcuáa cudíu-yu núú-gã. ⁴ Te Xítohó Jesucristú ní quide-gã cuèndá sá vã cùnù-gã nchaa tnúhu ní chidó tñini ndíi Moisés, te nchaa ñáyiú na quíndáá iní ñáhá xii-gã te ði-u-gã cada te cudíu-yu núú Yá Ndiöxí.

⁵ Te ndíi Moisés càháⁿ ndíi núú tütú ndíi cuèndá ñáyiú cuíní cudíu núú Yá Ndiöxí cuèndá sá nchìcúⁿ nihnú-yu nchaa nàcuáa ní càháⁿ ndíi. Te ní cachí ndíi sá ncháá ñáyiú na càda nchaa nàcuáa ní xáhaⁿ Yá Ndiöxí xii ndíi ní chidó tñini ndíi te nanihí tàhú-yu, te núu dicó ndacú-yu cadá-yu nchaa nàcuáa ní càháⁿ ndíi. ⁶ Dico vitna núu na quíndáá iní-ó Xítohó Jesucristú, te cudíu-o núú Yá Ndiöxí. Te duha càchí tnúhu ní chidó tñini ndíi núú tütú-gã: “Vá caní ìni-ndó sá xini ñùhu-xi cada-ndo ìⁿ sá vã yòo tñahí ndàcu cada sá cáá tñu-ndo àndi te cùñaha-ndo xii Cristú cuuⁿ-ndo ndìhi-gã núú ñuyúú-a. ⁷ Te ni vã caní tucu iní-ndó sá quìhíⁿ tñu-ndo núú xíndecu nchaa ñáyiú ní xihí te cada-ndo sá Cristú ndoto-gã”, duha càchí tnúhu-áⁿ sá vã dúcáⁿ caní iní-ó. ⁸ Te càchí tucu tnúhu-áⁿ: “Tnúhu Yá Ndiöxí sá ndécú ndìhi ñaha-xi xii-ndo chi sàni iní-ndó cuèndá tnúhu-áⁿ te càháⁿ-ndó”, duha càchí tnúhu-áⁿ. Te tnúhu sá ndécú ndìhi-ndo-áⁿ cúu-xi tñuhu càháⁿ-ndí núú ñáyiú, te xini ñuhu-xi sá quíndáá iní-yu tnúhu-áⁿ. ⁹ Te núu na nñuu-ndo càháⁿ-ndó sá Xítohó Jesucristú cúu-gã Xítohó-ndó, te quíndáá iní-ndó ñi yuhu ñi iní-ndó sá Yá Ndiöxí ní dándótó-gã Xítohó Jesucristú, te nanihí tàhú-ndó te núu ducaⁿ na càda-ndo. ¹⁰ Te nchaa ñáyiú ducaⁿ sàndáá iní te càháⁿ-yu sá Xítohó Jesucristú cúu-gã Xítohó-yu, ñáyiú-áⁿ cudíu-yu núú Yá Ndiöxí te nanihí tàhú-yu.

¹¹ Te núú tütú Yá Ndiöxí càchí-xi sá ñi ìⁿ ñáyiú sàndáá iní ñáhá xii Xítohó Jesucristú vã ndíxí cuèchi iní-yu sá dúcáⁿ sàndáá iní ñáhá-yu

xii-gá. ¹² Te sá cúú-xí Xítohó Jesucristú chi #ⁿ-ni cùu ñáiyu israél ndihi ñáiyu ñá túú cùu ñáiyu israél, chi diu-gá cúú-gá Yáá cùnùu taxi tñuní-gá nchaa ñáiyu, te ío váha quide-gá sá cúú-xí nchaa ñáiyu càháⁿ ndihi ñaha xii-gá. ¹³ Te quèe ndáá-xi nàcuáa càháⁿ-xi núú tütú Yá Ndióxi núú cächí-xi: “Nchaa ñáiyu na càháⁿ ndàhú núú Xítohó Jesucristú sá dácäcu nihnu ñaha-gá xii-yu, te ñáiyu-áⁿ naníhi tãhú-yu”, duha cächí-xi núú tütú-gá. ¹⁴ Te ñáiyu-áⁿ vã nihí-yu nàcuáa càháⁿ ndàhú-yu núú-gá te núu ñá túú sàndáá iní ñáhã-yu xii-gá, te ni vã nihí-yu nàcuáa cadã-yu quindáá iní ñáhã-yu xii-gá te núu vátã cündédóho-gã-yu tñuhu-gã, te ni vã nihí-yu tñuhu-gã te núu vá yõ quíhíⁿ cútñuhu ñaha xii-yu. ¹⁵ Te ni vã yõ quíhíⁿ ducaⁿ cútñuhu ñaha xii-yu tñuhu-gã te núu Yá Ndióxi vá téndãha-gã ñáiyu quíhíⁿ cútñuhu ñaha xii-yu. Te núú tütú Yá Ndióxi cächí-xi: “Ío vii ío váha cùu iní-ó vëxi ñáiyu dãnehé ñáhã xii-o nacuáa ndùu tñuhu sã càháⁿ nàcuáa naníhi tãhú-ó”, duha càháⁿ-xi núú tütú-gã.

¹⁶ Te ñã ncháã-yu cuiní-yu quindáá iní-yu tñuhu-áⁿ. Te ní quee ndáá-xi nàcuáa ní xãhaⁿ ndíi Chàia xii Yá Ndióxi te duha ní xãhaⁿ ndíi xii-gã: “Yõhó Dútú Ndióxi na nãcãni tñuhu-í núú-n sã ío sacú-ni ñáiyu sàndáá iní-yu tñuhu càháⁿ-ndí”, duha ní xãhaⁿ ndíi xii-gã. ¹⁷ Te xini ñuhu-xi sã dñhã-gã cundedóho-yu tñuhu-áⁿ cuendã ducaⁿ te quindáá iní-yu, te tñuhu-áⁿ cúú-xí tñuhu Xítohó Jesucristú.

¹⁸ Te vá cúú càháⁿ-ó sã ñã túú ní nihí ñáiyu israél tñuhu-gã, chi ncháã-yu ní nihí-yu tñuhu-gã, chi núú tütú Yá Ndióxi cächí-xi:

Cue tée ní càháⁿ tñuhu Yá Ndióxi ní càháⁿ-güedé tñuhu-gã núú ñáiyu,

te tñuhu-áⁿ ní xité nuu-xi nihí ñuyú.

Duha cächí-xi núú tütú-gã. ¹⁹ Te ni vã càháⁿ-ó sã ñáiyu israél ñã túú ní cùu tñuní iní-yu nàcuáa ndùu tñuhu-gã chi ní tecu tñuní-yu. Te ndéé sanaha ní chídó tñuní ndíi Moisés nàcuáa ní xãhaⁿ Yá Ndióxi xii ñáiyu israél, te duha ní xãhaⁿ-gã xii-yu:

Yúhú cada váha-í nchaa ñáiyu ñã túú cùu ñáiyu israél, ñáiyu ñã túú cütñuní iní-xi nàcuáa cada váha cundecu núú-í, te nchòhó cudééⁿ-ndó nüü-yu te cuu cuédú ímí-ndõ-yu.

Duha ní xãhaⁿ Yá Ndióxi xii-yu te ducaⁿ ní chídó tñuní ndíi Moisés. ²⁰ Te ndíi Chàia ñã túú tñáhí ni yùhú ndíi ní quide ndíi núú Yá Ndióxi ní càháⁿ ndíi tñuhu-gã, te ní cachí ndíi: Ñáiyu ñã túú nãnducu ñaha xii-í ní cùu ní naníhi ñáhã-yu xii-í, te ni ñã túú ndùcu tñuhu ñáhã-yu xii-í ní cùu te ní xini ñáhã-yu.

Duha ní cachí ndíi Chàia ní càháⁿ ndíi tñuhu Yá Ndióxi. ²¹ Te ní quide tucu ndíi núú Yá Ndióxi ní càháⁿ ndíi tñuhu-gã cuendã ñáiyu israél, te ní cachí ndíi: “Nchaa-ni nduu yihi-í càháⁿ-í ñáiyu israél te ñã túú cuiní-yu quindáá iní-yu chi ío sã iní-yu”, duha ní cachí ndíi Chàia ní càháⁿ ndíi tñuhu Yá Ndióxi.

11

Cuendã ñáiyu israél ñáiyu naníhi tãhú

¹ Te cuéi ducaⁿ dico vá càháⁿ-ó sã Yá Ndióxi dáquèe tíhú-gã ñáiyu israél chi diu-ni ñáiyu-áⁿ cúú cuendã-gã, chi yúhú tñáhã-í cúú-í mei tãe israél, te ñãní tñáhã-í ní cuu ndíi Abrahám tée ní xíndecu ndéé sanaha vihi-gã, te diu-ni ñãní tñáhã-í ní cuu tucu ndíi Benjamín. ² Te ndéé sanaha dùcaⁿ ní cachí Yá Ndióxi sã nchùhú ñáiyu israél cúú-ndí ñáiyu cùu cuendã-gã, te ñã túú dàquèe tíhú ñáhã-gã xii-ndí, te nchòhó sa xini-ndó nàcuáa càháⁿ-xi núú tütú Yá Ndióxi núú cächí-xi nàcuáa ní quide té Eliás ní ndacãⁿ cuéchi-dé núú-gã

cuendá ñáyiú isràél. ³ Te duha ní xáhaⁿ-dë xii-gá: “Yòhó Dútú Ndiöxí, ná nàcani tnúhu-í núú-n sá ñi sahní-yu cue tée càháⁿ tnúhu-n, te ní dátànú-yu núú xihí quiti ndùu táhú-n, te yúhú-ná ní cácu-í ndécù-í dico nànducu ñahá-yu chi tnàhá-í cuini-yu cahni ñahá-yu xii-í”, duha ní xáhaⁿ-dë xii Yá Ndiöxí. ⁴ Te Yá Ndiöxí ní xáhaⁿ-gã xii-dé: “Sa ní dáqueé ðiiⁿ-í úsá mìl cue tée cùu cuendá-í, te ñá túú nèhe-güedé sá yíññhu núú Bàál sá càchí-yu cùu ndiöxí-yu te ñá ndáá sá ndiöxí cúú-xí”, duha ní xáhaⁿ-gã xii té Èliás. ⁵ Te ducaⁿ sátnahá-xi cùu vitna chi xindecu ñáyiú ní cáháⁿ-gã ní chitnahá ñáhá xii-gá, te ducaⁿ ñi quide-gá chi ní cundàhú iní ñáhá-gã xii-yu. ⁶ Te ducaⁿ ñi cáháⁿ ñáhá-gã xii-yu sá cundàhú iní ñáhá-gã, te ñá díú cuendá ðiiⁿ chiúⁿ quidé-yu ducaⁿ ñi cáháⁿ ñáhá-gã xii-yu, chi núu dicó cuendá ðiiⁿ chiúⁿ quidé-yu ducaⁿ ñi cáháⁿ ñáhá-gã xii-yu ña, te ñá díú-gã sá cúú iní mée-gã ducaⁿ ñi cáháⁿ ñáhá-gã xii-yu te núu ducaⁿ.

⁷ Te na càchí tnúhu-í xii-ndo nàcuáa cùu vitna sá ñáyiú isràél cuini-yu cudíu-yu núú Yá Ndiöxí dico ñá ndácù-yu, dico dava ñáyiú ní cáháⁿ-gã ñáyiú-áⁿ cudíu-yu núú-gã, te ñáyiú ducaⁿ ña túú cùdiu núú-gã-áⁿ ïo ní cuu sáá iní-yu núú-gã. ⁸ Te ní quee ndáá-xi nàcuáa càháⁿ-xi núú tütú Yá Ndiöxí núú càchí-xi: “Yá Ndiöxí ní càchí-gá sá cúu-yu ñáyiú ïo ñi ðiquí-xi, chi cuèi ndèhé-yu nàcuáa càháⁿ tnúhu-gá dico ñá cútnùní iní-yu nàcuáa càháⁿ-xi, te cuèi ndèdóho-yu dico ñá túú quèe díquí-yu, te ducaⁿ-ni quidé-yu ndéé vitna”, duha càchí-xi núú tütú-gã. ⁹ Te ndíi Dàvíí ní cachí ndíi:

Ñáyiú ïo váha ndècu te cùdíí iní-yu quidé-yu vico,
dico yáha-yu dàtná yáha ðiiⁿ quiti ngáva trampá àdi ðiiⁿ quiti ñá

cútnùní iní-xi quée xití ñnuu,
chi cuíta nihnú-yu te nacháhu-yu nchaa sá quidé-yu.

¹⁰ Te cúu-yu ñáyiú ñá túú vèdana tècù tnùní, te cùu tucú-yu dàtná ðiiⁿ ñáyiú ïo ndòho nchido ðiiⁿ sá vèe.
Duha ní cachí ndíi Dàvíí.

Ñáyiú ñá túú cùu ñáyiú isràél naníhí táhú-yu

¹¹ Te cuèi ducaⁿ dico vá càchí-ó sá sá dúcáⁿ ña túú ní quide ndáá ñáyiú isràél te ní xíta nihnu duúⁿ-yu, te ñáhá chi sá dúcáⁿ ñi quidé-yu te ní ngúndecu ndihi dava-gá ñáyiú tnúhu sá càháⁿ nàcuáa naníhí táhú-yu, te ñáyiú isràél quini-yu nàcuáa naníhí táhú ñáyiú ña túú cùu ñáyiú isràél, te tnàhá-yu cudíí iní-yu naníhí táhú-yu. ¹² Te sá dúcáⁿ ñi quide sáá iní-yu ña túú ní quide ndáá-yu núú Yá Ndiöxí, te xiáⁿ ní cuu-xi ðiiⁿ sá vaha sá cúú-xi ñáyiú nihíi ñuyúú, dico sáá nduu te cada ñáyiú isràél nchaa nàcuáa càháⁿ Yá Ndiöxí, te dàvá-áⁿ ïo-gá váha cuu xii nchaa ñáyiú nihíi ñuyúú.

¹³ Te nchòhó ñáyiú ña túú cùu ñáyiú isràél càchí tnúhu-í xii-ndo sá Yá Ndiöxí ní cachí-gá sá càháⁿ-í tnúhu-gá núú-ndó, te yúhú càchí-í sá ïo càhnu cuu chiúⁿ quide-í. ¹⁴ Te duha càháⁿ-í cuendá sá núu cudana ïo dava ñáyiú cùu ndi mee-í cudíí iní-yu cada váha ñaha Yá Ndiöxí xii-yu dàtná quidé vaha ñaha-gã xii-ndo, te naníhí táhú-yu. ¹⁵ Te sá cuendá sá ñi quee tíhú ñáyiú isràél ní nacáháⁿ cáhnu iní tnáhá ñáyiú nihíi ñuyúú ndihi Yá Ndiöxí, dico na sáá nduu núcúndecu váha ñáyiú isràél ndihi Yá Ndiöxí, te ïo-gá váha tnahá ñáyiú nihíi ñuyúú, te ñáyiú-áⁿ cada iní-ó sá cúu-yu dàtná ñáyiú ní xihí, dico dàvá-áⁿ cada tucu iní-ó sá cúu-yu dàtná ñáyiú ní ndoto chi nucúndecu váha-yu ndihi-gá. ¹⁶ Te núu sá lúhá-ní ðiiⁿ tílúlu yusaⁿ càváha te ðiu-ni ducaⁿ càváha nihíi. Te núu càváha yóho

ɨ̃n yutnu te ðiu-ni ducaⁿ càváha-xi n̄híí-xi. Te ðiu-ni ducaⁿ s̄atnahá-xi cùu ñáyiú isràél, chí ñani tñahá-yu ní xíndecu ndéé sanaha n̄i cuú-yu ñáyiú ní cuu cuendá ñáhá Yá Ndiöxí, te ðiu-ni ducaⁿ cùu cuendá ñáhá-gã xii mèe-yu ndéé vitna.

¹⁷ Te ío ɨ̃n yutnu váha nani olívú, te dava dité yutnu-áⁿ n̄i téhndé te ní nucódó dité yutnu òlívú cùtexínu, te mee-nã yutnu òlívú váha-áⁿ ío váha quíde-xi nchito dité yutnu òlívú cùtexínu-áⁿ. Te dité nchaa yutnu òlívú váha-áⁿ cuú-xí ðatná ñáyiú isràél, te nchaa dité-xi sá n̄i téhndé-áⁿ cuú-xí ðiu-ni ñáyiú isràél ñáyiú ñá túú tñahá tnúhu ndihí Yá Ndiöxí. Te dité yutnu òlívú cùtexínu sá n̄i nucódó tñahá-áⁿ cuú-xí ðatná ñáyiú ñá túú cùu ñáyiú isràél tñahá tnúhu ndihí Yá Ndiöxí. ¹⁸ Te vá cání iní-ndó sá sá dúcáⁿ ndéu váha-ndo ndihí Yá Ndiöxí te ío cùnuu-ndo dacúúxí ñáyiú isràél, te vá dúcáⁿ càni iní-ndó chí sá cuendá nchaa ñani tñahá ñáyiú isràél ní xíndecu ndéé sanaha ducaⁿ ndéu váha-ndo ndihí Yá Ndiöxí vitna, te ñá díú sá cuendá nchòhó ndécú ndihí váha ñáyiú-áⁿ Yá Ndiöxí vitna.

¹⁹ Te cudana sàni iní-ndó te càchí-ndó sá ñáyiú isràél ní quee tihú-yu cuendá sá nchòhó nucuíní-ndó nũ-yu nucúndecu váha-ndo ndihí Yá Ndiöxí. ²⁰ Te ndáá sá n̄i quee tihú-yu chí ñá túú ní sàndáá iní ñáhã-yu xii-gá, te nchòhó ío váha cùu ndecu-ndo ndihí-gá chí ní sàndáá iní-ndó-gã, dico vá càchí-ndó sá ío càhnu cuu-ndo, te ío váha chí cuãha cuendá nàcuáa cundecu-ndo. ²¹ Te cue ñáyiú isràél cuú-yu ñáyiú cùu cuendá-gá ní cùu te ní dáqueé tihú ñáhã-gã xii-yu cuendá sá ñá túú ní sàndáá iní ñáhã-yu xii-gá, te tñahá nchòhó daquèe tihú ñáhã-gã xii-ndo te núu na càda-ndo ðatná ní quíde ñáyiú-áⁿ. ²² Te chí cáda cuendá sá Yá Ndiöxí ío váha iní-gá, dico cùdééⁿ-gã núú nchaa ñáyiú

ñá túú sàndáá iní ñáhã xii-gá, dico sá cuú-xí nchòhó cue ñáyiú sàndáá iní ñáhã xii-gá chí ío váha iní-gá. Te ducaⁿ-ni cùnduu váha iní-gá sá cuú-xí-ndó te núu vá dáñá ndéé-ndó càda-ndo nacuáa càháⁿ-gã cuendá sá ío váha iní-gá, te núu ñáhã te tñahá nchòhó quee tihú-ndó ðatná ní quee tihú ñáyiú isràél, ñáyiú ñá túú ní sàndáá iní ñáhã xii-gá. ²³ Dico núu ñáyiú isràél ñáyiú ní dáqueé tihú ñáhã Yá Ndiöxí quíndáá iní ñáhã-yu xii-gá te nduu cuendá ñáhã tucu-gá xii-yu, te ñáyiú-áⁿ cuú-yu ðatná dava dité yutnu òlívú sá n̄i téhndé te ní nucódó tñahá tucu. Te ducaⁿ s̄atnahá-xi cuú-yu te núu na quíndáá iní ñáhã-yu xii-gá. ²⁴ Te nchòhó cuú-ndó ðatná nchaa dité yutnu òlívú cùtexínu, chí ñá díú ñáyiú isràél cuú-ndó, te dité nchaa yutnu òlívú cùtexínu-áⁿ n̄i nucódó-xi núú dité yutnu òlívú váha-áⁿ. Te yáchí-gã nucúndecu váha ñáyiú isràél ndihí Yá Ndiöxí, chí cuú-yu ðatná nchaa dité yutnu òlívú váha sá n̄i téhndé te ní nucódó tñahá tucu. Te ducaⁿ s̄atnahá-xi cuú-yu te núu na quíndáá iní ñáhã-yu xii-gá.

Sáa nduu te naníhí tãhú ñáyiú isràél

²⁵ Te nchòhó ñáyiú ndéu ndihí-í ichi Xítohó Jesucristú, na càchí tnúhu-í xii-ndo ɨ̃n tnúhu nduu yuhu ni cuu, cuendá sá vã cání iní-ndó sá ío-gá váha sáa díquí-ndó dacúúxí ñáyiú isràél, chí dava ñáyiú isràél cuú sáa iní-yu núú Yá Ndiöxí nini na ndihí ñáyiú ní cachí Yá Ndiöxí ngúndecu váha ndihí ñáhã-yu xii-gá, ñáyiú ñá túú cùu ñáyiú isràél. ²⁶ Te nduu na ndihí ñáyiú-áⁿ ngúndecu váha-yu ndihí Yá Ndiöxí, te ðavá-áⁿ naníhí tãhú ñáyiú isràél chí quee ndáá-xi nàcuáa càháⁿ Yá Ndiöxí núú tütú-gá núú càchí-xi: Ndàa ñuu Síon quixi Yaá cada naníhí tãhú nchaa ñáyiú,

te ðiu-ni Yaá-áⁿ cada-gá cuendá sá dañá nchaa ñáyiú isráel ichi cuèhé ichi duha.

²⁷ Te yúhú cada càhnu iní-í nchaa cuèchi ñáyiú isráel, chi cada-í dàtná ní cachí-í ndéé sanaha.

Duha càchí Yá Ndiòxí núú tütú-gá.

²⁸ Te sá cuendá tnúhu sá càháⁿ nàcuáa naníhí tãhú-ó xíáⁿ cúú úhú iní ñáyiú isráel Yá Ndiòxí, te sá dúcáⁿ quidé-yu xíáⁿ nchòhó ní níhí-ndó tnúhu sá càháⁿ nàcuáa naníhí tãhú-ndó. Te ní cachí Yá Ndiòxí sá ñáyiú isráel cuu cuendá-gá, te cùu iní ñáhá-ní-gá xií-yu, te ducaⁿ quide-gá chi ducaⁿ ní xáhaⁿ-gá xii cue ñaní tnáhã-yu ní xíndecu ndéé sanaha. ²⁹ Te Yá Ndiòxí ñá túú ndúu úhú iní-gá ðⁿ sá táxi-gá, te ni ñá túú ndixi cuèchi iní-gá sá càháⁿ ñáhá-gá xii-o. ³⁰ Te nchòhó chi ñá túú sãndáá iní-ndó Yá Ndiòxí ní cùu, dico vitna ñini ñá túú sãndáá iní ñáhá ñáyiú isráel xii-gá, te ní cundàhú iní ñáhá-gá ní dácãcu nihnu ñaha-gá xii-ndo núú ùhú núú ndàhú. ³¹ Te vitna quidé-yu dàtná ní xóo cada nchòhó cútñáhá ñá túú ní xóo quindáá iní-ndó-gá. Dico sáá nduu te natuha ñáhá-yu xii-gá te dácãcu nihnu ñaha-gá xií-yu sá cundàhú iní ñáhá-gá dàtná ní quide ñaha-gá xii nchòhó. ³² Te Yá Ndiòxí ní dañá-gá sá dúcáⁿ cùnduu saá iní nchaa ñáyiú cuendá cuíní-gá cundàhú iní ñáhá-gá xií-yu.

³³ Te súúni vãha quide ñaha Yá Ndiòxí xii-o, te ío vãha xini-gá nchaa cuéi sá ío andiú te cuéi sá ío ñuyíú-a, te ducaⁿ ío vãha saá nchaa sá xini tnùnigá. Te ñá ndácú-ó cùtnuní iní-ó nã cúú nchaa sá sãni iní-gá cada-gá, te ni ñá ndácú-ó cùtnuní iní-ó nãcuáa ndúu cuendá nchaa sá quide-gá. ³⁴ Te núú tütú-gá càchí-xi: “Vá yóo ðⁿ cùtnuní iní-xi nãcuáa sãni iní Yá Ndiòxí, te ni vá yóo ðⁿ ndacu dacahu iní ñáhá xii-gá nãcuáa càháⁿ-gá. ³⁵ Te Yá Ndiòxí ñá túú quide yica iní-gá cada-gá sá vãha sá cúú-xi

ñáyiú cuendá ðⁿ sá sãñáhã-yu xii-gá chi ñá túú dúcáⁿ quide-gá”, duha càchí-xi núú tütú-gá. ³⁶ Te ducaⁿ chi mee Yá Ndiòxí ní taxi ndecu-gá nchaandi tühú sá ío ñuyíú, te ðiu-ni mee-gã táxi tnùnigá nchaa sá ní taxi ndecu-gá, te nchaa cùu-xi cuendá-gá. Te vitna chí ná càchí-ó sã ío càhnu cuu-gá ni caa ni quíhíⁿ. Te ducaⁿ na cùnduu.

12

Cada-o nãcuáa nduu vétú iní Yá Ndiòxí

¹ Te vitna nchòhó ñáyiú ndècu ndíhí-í ichi Xítóhó Jesucristú càchí tnúhu-í xii-ndo sã Yá Ndiòxí cundàhú iní ñáhá-gá xii-o chindee ñaha-gá, núú xíáⁿ càháⁿ ndàhú-í núú-ndó sã dañá-ndó mée-ndo núú ndáhã-gá, te cada iní-ndó sá cúú-ndó dàtná ðⁿ tãhú sã nchító-ó ní nduu tãhú-gá. Te cuu-ndo ñáyiú vãha ñáyiú cada nchaa nãcuáa nduu vétú iní Yá Ndiòxí chi ducaⁿ tãu-ndó càda-ndo sá cúú-xi-gá.

² Te vá cãchicúⁿ nihnu-gã-ndó càda-ndo datná xiquide nchaa ñáyiú ndècu ichi cuèhé ichi duha ndècu ñuyíú-a, te vá cúhúⁿ-gã iní-ndó ichi cuèhé ichi duha-áⁿ, chi mee-nã sã vãha cuhuⁿ iní-ndó, te ducaⁿ te cùtnuní iní-ndó nchaa nãcuáa cuíní Yá Ndiòxí cada-ndo, te nchaa sá cuíní-gá cada-ndo cùu-xi mee-ni sã vãha, sã ío vãha ndúu vétú iní-gá, te cùu-xi nchaa sá xini ñúhu-xi cada-ndo núú-gá.

³ Te sá cuendá chiúⁿ ní cundàhú iní ñáhá Yá Ndiòxí ní taxi-gá xii-í xíáⁿ núu na càháⁿ-í dóho-ndo vitna: Vã cáni iní-ndó ðⁿ sã ñá túú tãu-ndó çani iní-ndó te cucahaⁿ-ndo sã ío càhnu cuu-ndo. Te nchòhó ní sãndáá iní-ndó Yá Ndiòxí núu chindee ñaha-gá xii-ndo, te vitna chí cuãha cuendá núu ná daha núú chiúⁿ-gã ndacu-ndo càda-ndo. ⁴ Te nchoo títí xichí cùu yiqui cuñú-ó, te ndí ðíⁿ ndí ðíⁿ chiúⁿ quide-xi ðⁿ ðⁿ-xi. ⁵ Te ducaⁿ sãtnahã tucu-xi cùu nchoo ñáyiú ndècu ndíhí Xítóhó Jesucristú chí cuéi ná daha tnáhã-ó

dico ñⁿ-ni cùu-o ndìhì-gá, te ducaⁿ mée-o tucu ñⁿ-ni cùu-o.

⁶ Te mee Yá Ndiòxí ní cundàhú iní ñáhá-gá xii-o ní taxi-gá chiⁿ taú-ó càda-o ñⁿ ñⁿ-o te chindee ñaha-gá xii-o, te xini ñuhu-xi cada-o nacuaá nduu chiuⁿ ní taxi-gá cada-o. Te núu ní nduu táhú-ó núú-gá sá càháⁿ-ó tnúhu sá dácàhu iní ñáhá mée-gá xii-o te càháⁿ-ó nàcuáa sàndáá iní-ó chindee ñaha-gá xii-o, ⁷ àdi ní nduu táhú-ó núú-gá sá ïo váha chindee-o tnàha ñáyi-u-o te ñi-u-ni ducaⁿ càda-o, àdi ní nduu táhú-ó dānehé-ó ñáyi-u tnúhu-gá te ñi-u-ni ducaⁿ càda-o, ⁸ àdi ní nduu táhú-ó núú-gá sá dácàháⁿ-ó ñáyi-u canchicúⁿ nihnú-yu ichi-gá te ñi-u-ni ducaⁿ càda-o, àdi ní nduu táhú-ó núú-gá sá cuañaha-o xii tnaha ñáyi-u-o sá nihí-ó ndècu ndìhì-o te ñi-u-ni ducaⁿ càda-o, dico ní yùhu ní iní-ó cuañaha-o xii-yu, àdi ní nduu táhú-ó núú-gá taxi tnúni-ó te ñi-u-ni ducaⁿ càda-o, te ní yùhu ní iní-ó càda-o, àdi ní nduu táhú-ó núú-gá chindee-o cuè ñáyi-u ndècu ndìhì tnúndòho tnúhu ndàhú te ñi-u-ni ducaⁿ càda-o, te ïo cudíí iní-ó càda-o chiuⁿ-áⁿ.

Nchaa nàcuáa tàu-xi cada nchaa ñáyi-u ndècu ichi Xitohó Jesucristú

⁹ Te cuu iní tnáhá ndisa-ndo ñⁿ ñⁿ-ndo, te dañā-ndo nchāa sá cuèhé sá dúhá te cada-ndo mée-ni sá váha. ¹⁰ Te ïo cuu iní tnáhá-ndó, te cada-ndo cuèndá sá ñⁿ-ní ñáyi-u cùu-ndo, te ñⁿ ñⁿ-ndo càni-gá iní-ndó cànehe yíñuhu núu tnáhá-ndó.

¹¹ Te nducu ndèe-ndo cada-ndo nchaa chiuⁿ tahu Xitohó Jesucristú vá túhio-ndo, te cada-ndo ní yuhu ní iní-ndó sá cúu-xí-gá.

¹² Te ïo cudíí iní-ndó cùndecu-ndo chi ní ngùndecu ndìhì-ndo tnúhu ndee iní sá cùndècu ndìhì-ndo Xitohó Jesucristú, te cada càhu iní-ndó cuèi nāndi na càda ñaha ñáyi-u xii-ndo sá cuèndá-gá, te vá dañā ndèe-ndó càháⁿ ndìhì-ndo Yá Ndiòxí.

¹³ Te chindee tnàha-ndo te núu ïo dava nchòhó ñáyi-u ndècu ichi-gá ïo ñⁿ sá cúmāní xii-ndo, te ïo váha cuu iní-ndó còto-ndo ñáyi-u véxi vehe-ndo.

¹⁴ Te cācāⁿ táhú-ndó núú Yá Ndiòxí cuèndá nchaa ñáyi-u nāndi quide ñaha xii-ndo, te cācāⁿ táhú-ndó núú-gá sá ná chindee ñaha-gá xii-yu te ñā díú dà cācāⁿ táhú-ndó núú-gá sá ná dàcuíta nihnu ñaha-gá xii-yu.

¹⁵ Te núu ïo ñáyi-u cùdíí iní-xi te cudíí iní-ndó ndìhì-yu, te núu ïo ñáyi-u ndìhú iní-xi te ndìhú iní-ndó ndìhì-yu.

¹⁶ Te cuu ñⁿnuu-ndo cùndecu-ndo, te vá cādā càhu-ndo mee-ndo, te tnahá tnúhu-ndo ndìhì nchaa ñáyi-u ndàhú iní-xi, te vá cāní iní-ndó sá ïo-gá túha-ndo.

¹⁷ Te vá nānchòcāva-ndo nāchinaa-ndo ñⁿ sá quidé ñaha ñáyi-u xii-ndo, te ïo nducu ndèe-ndo cada-ndo mee-ni sá váha nàcuáa cuu váha iní ñáyi-u. ¹⁸ Te ïo nducu ndèe-ndo cada-ndo sá ndácú-ndó cùndecu váha-ndo ndìhì nchaa ñáyi-u. ¹⁹ Te nchòhó ñáyi-u ïo cùu iní-í, vá cāní iní-ndó nāchinaa-ndo ñⁿ sá cādā ñaha ñáyi-u xii-ndo, chi cundetu-ndo sá mée Yá Ndiòxí ná nāchinaa-gá sá quidé ñáhā-yu xii-ndo, chi quee ndāá-xi nàcuáa càháⁿ Yá Ndiòxí núu tütú-gá núu cāchí-xi: “Yúhú dandòho-í-yu chi nāchinaa-í nchaa sá quidé-yu”, duha cāchí-gá núu tütú-gá. ²⁰ Te xini ñuhu tucu-xi cada-ndo nacuaá càháⁿ tucu-xi ingá xichi núu tütú-gá núu cāchí-xi: “Te núu ñáyi-u cùu úhú iní ñáhā xii-ndo ñā túú sá cóhó sá cāxí-yu te cuañaha-ndo xii-yu, te núu ducaⁿ na càda-ndo te ïo cucahaⁿ núu-yu”, duha cāchí-xi núu tütú-gá. ²¹ Te núu ïo ñⁿ sá quidé ñaha tnaha ñáyi-u-ndo xii-ndo te vá nānchòcāva-ndo nāchinaa-ndo sá quidé ñáhā-yu xii-ndo, chi cada-ndo sá váha sá cúu-xí-yu, te ducaⁿ te vá cādā-ndó sá ñā túú

tàù-ndó càda-ndo núú Yá Ndiöxí dätná quidé-yu.

13

¹ Te nchaa ñáyiú tàù-yu quindáá iní-yu nchaa cue téé cùchiuⁿ, chi Yá Ndiöxí ní cachí-gá sá cùndècu téé cùchiuⁿ ñuyíú-a, núú xíáⁿ xíndecu-güedé vitna. ² Te nchaa ñáyiú ñá túú sàndáá iní ñáhá xii cue téé cùchiuⁿ ñá túú tnàhá iní Yá Ndiöxí sá dúcáⁿ quidé-yu, chi mee-gá ní cachí-gá sá cùndècu-güedé. Te nchaa ñáyiú ducaⁿ ñá túú sàndáá iní ñáhá xii cue téé cùchiuⁿ nacháhu-yu sá dúcáⁿ quidé-yu. ³ Te nchaa ñáyiú quide váha ñá túú yùhú-yu cue téé cùchiuⁿ chi quide váha-yu, dico nchaa ñáyiú ñá túú quide váha chi xiyùhú-yu cue téé cùchiuⁿ. Te vitna núú nchòhó cuení-ndó sá vá yùhú-ndó cuè téé cùchiuⁿ te chí cádá váha, te ducaⁿ te cáháⁿ váha-güedé cuendá-ndó. ⁴ Te Yá Ndiöxí ducaⁿ ní cachí-gá cundecu-güedé cuendá cada-güedé sá ñá túú nã cuu cundecu-ndo, te núú ñá túú quide váha-ndo ndècu-ndo te quiyùhú iní-ndó núú-güedé, chi ñá túú àúⁿ nã cuu ndècu ndihí-güedé tnúhu ndee iní dandòho-güedé nchaa ñáyiú ñá túú quide váha, chi Yá Ndiöxí ducaⁿ ní cachí-gá cundecu-güedé sá dúcáⁿ càda-güedé dandòho-güedé nchaa ñáyiú ñá túú quide váha. ⁵ Núú xíáⁿ ío xìni ñuhu-xi sá quindáá iní-ndó nchàa cue téé cùchiuⁿ, te ñá díú sá yùhú-ndó dandòho ñaha-güedé xii-ndo, chi cada-ndo sá cùtnùní iní-ndó sá cúú-xí ñⁿ sá váha. ⁶ Chi díu cuendá xíáⁿ sàcáⁿ-ndó díhúⁿ núú cuè téé cùchiuⁿ, te ducaⁿ chi Yá Ndiöxí ducaⁿ ní cachí-gá cundecu-güedé te díu-ná chiuⁿ ndeé-güedé ñùhú iní-güedé.

⁷ Te nacháhu-ndo nchàa sá tàù-ndó núú nchàa ñáyiú tàù-ndó núú-xi, te cuèi díhúⁿ tàù-ndó cuendá ñuhu-ndo núú cuè téé cùchiuⁿ àdi nágá díhúⁿ tàù-ndó núú-güedé te nacháhu-ndo

núú-güedé. Te ío-gá canehe-ndo sá yíñùhu núú nchàa ñáyiú cùnuu, te cáháⁿ váha-ndo ndihí-yu. ⁸ Te vá dácùidó-ndó ndùu nacháhu-ndo sá tàù-ndó núú tnàha ñáyiú-ndo, te cuu iní tnàhá-ndó ñⁿ ñⁿ-ndo. Te núú ducaⁿ quide-ndo ndecu-ndo ña, te quide-ndo nchaa nacuaá cáháⁿ tnúhu sá sánú ìchi ñaha xii-o nacuaá cada-o cùndecu-o. ⁹ Te duha ndùu tnúhu cáháⁿ Yá Ndiöxí cuendá nchaa sá vá cúú càda-o: “Nchaa nchòhó cue téé vá cáháⁿ ndihí-ndo ñáyiú dihi te núú ñá díú ñàdihí-ndó cùú-yu, te ducaⁿ-ni nchàa nchòhó cue ñáyiú dihi tucu vá cáháⁿ ndihí-ndo téé te núú ñá díú yí-ndo cuu-güedé, te vá cahní-ndó tnàha ñáyiú-ndo, te vá dúhú-ndó sá ndécú ndihí-yu, te vá dácàcu-ndo cuèchi neñúú, te vá xíhó-ndó sá ndécú ndihí tnaha ñáyiú-ndo”, nchaa xéhé cachí Yá Ndiöxí sá vá cúú càda-o. Te tnúhu-a quide-o ndihí nchaa dava-gá tnúhu sá sánú ìchi ñaha xii-o nacuaá cada-o cùndecu-o, te núú quide-o ingá tnúhu sá cächí-xi: “Cuu iní-ndó nchàa tnaha ñáyiú-ndo dätná cúú iní-ndó mèe-ndo”, duha cáháⁿ tnúhu-áⁿ. Te nchaa dava-gá quidé-ó te núú quide-o nacuaá cáháⁿ tnúhu-a. ¹⁰ Te nchaa ñáyiú cùu iní tnàha ñáyiú-xi te ñá túú quide úhú iní-yu tnàha ñáyiú-yu, te núú ducaⁿ cùu iní-yu tnàha ñáyiú-yu te quidé-yu nàcuáa cáháⁿ tnúhu sá sánú ìchi ñaha xii-o nacuaá cada-o cùndecu-o.

¹¹ Te ducaⁿ xìni ñuhu-xi cada-ndo chi sa ní cutnùní iní-ndó nàcuáa ta xica nduu cuáháⁿ ñuyíú-a, te ní sáá nduu sá ío xìni ñuhu-xi ndixi túu iní-ó càda-o nchaa nacuaá cáháⁿ Yá Ndiöxí, chi vitna sa ní cuyatni-gá nduu nàcuaca ñaha Xítóhó Jesucristú xii-o dácúúxí ndeé cùtnàhá ní sàndáá iní-ó tnúhu-gá. ¹² Te cada iní-ndó sá dätná ñⁿ niú sá sà ta cuyatni túndaá, ducaⁿ sàtnahá-xi cùu ñuyíú yíca cuèchi-a chi sa ta cuyatni nduu quixi tucu Xítóhó Jesucristú, te núú xíáⁿ xíní ñuhu-xi

daña-o nchaa sá cuèhé sá dúhá te cada-o mée-ni sá vâha, te ducaⁿ te ni ìⁿ sá cuèhé sá dúhá vâ cúnùu-xi taxi tñuní ñáhá-xí xii-o, te ducaⁿ te vâ cúú-gá-ó dàtná ñáiyu ndècu núú néé chi cuu-ná-ó dàtná ñáiyu ndècu núú ditó. ¹³ Te cada-o nchàa nacuaá tau-xi cunduu cundecu-o dàtná tau-xi cada ñáiyu ndècu ichi Xítóhó Jesucristú, te vâ quihíⁿ-ó vico cuehé vico duha, te vâ cúú-ó ñáiyu quihu, te ni vâ cáháⁿ ndihí-o ñáiyu dihi te núú ñá díú ñàdihí-ó cùú-yu, te ducaⁿ-ni cuè ñáiyu dihi tucu vâ cáháⁿ ndihí-yu téé te núú ñá díú yíⁿ-yu cùu-güedé, te ni vâ cündècu-o ichi díí iní, te ni vâ nàá-ó ndihí tñaha ñáiyu-o, te ni vâ cúú-ó ñáiyu cuédú iní. ¹⁴ Te vitna nchòhó daña-ndo mée-ndo sá Xítóhó Jesucristú ná chindee ñaha-gá xii-ndo càda váha-ndo cündecu-ndo datná quidé mée-gá ndécú-gã, te vâ cání-gã iní-ndó càda-ndo datná ní xóo cada-ndo cütñahá ní cunuu nchàa sá cuèhé sá dúhá iní-ndó.

14

Vá cuatnùhu tñaha-o nacuaá ndècu-o ichi Xítóhó Jesucristú

¹ Te núú ìⁿ ñáiyu ndècu ichi Xítóhó Jesucristú ñá túú tècú tñuní váha-yu nàcuáa cuiní Yá Ndióxi cadá-yu, te queheⁿ cuendá-ni-ndó-yu te vâ ténàá tñahá-ndó ndihí-yu. ² Chi íó ñáiyu sàni iní sá cúú váha iní Yá Ndióxi sá cúú càxi-yu nàni nihí-yu, te dava ñáiyu ñá túú cütñuní váha iní-yu nàcuáa cáháⁿ Yá Ndióxi te mee-ni yúcu xéxi-yu. ³ Te ñáiyu xèxi nchaa núú sá nihí-yu te vâ dáquèe tíhü-yu ñáiyu ñá túú xèxi, te ducaⁿ-ni ñáiyu ducaⁿ ñá túú xèxi-áⁿ vâ cuatnùhü-yu nchaa ñáiyu ducaⁿ xèxi nchaa núú sá nihí-xi-áⁿ, chi tñahá ñáiyu ducaⁿ xèxi nchaa núú sá nihí-xi-áⁿ quèhéⁿ cuendá ñáhá Yá Ndióxi xii-yu. ⁴ Te ñá túú ndècu ndihí-o tñuhu ndee iní cuatnùhu-o

ñáiyu xinu cuechi, chi mee ñáiyu cùu patródⁿ-yu tau-yu cáháⁿ-yu te núu cündáá ñáiyu xinu cuechi núú-yu àdi ñá túú cündáá-yu. Te ducaⁿ sätñahá-xi cùu ñáiyu xinu cuechi núú Yá Ndióxi, chi mee-gã cáháⁿ-gã te núu nása quidé-yu, te diu-ni mee-gã cada te cündáá-yu cundecú-yu núú-gã.

⁵ Te na càchí tñuhu tucu-í xii-ndo sá íó ñáiyu càchí sá íó dava nduu ío càhnu cuu-xi, te íó tucu dava ñáiyu càchí-yu sá ìⁿ-ni cuu-xi nchaa-ni nduu, te xini ñuhu-xi sá cütñuní ndáá iní-yu sá ndáá cúú-xí nàcuáa cáháⁿ-yu ìⁿ ìⁿ-yu. ⁶ Te ñáiyu cánehe íí dava nduu quidé-yu sá nehè-yu sá yíñuhu núú Yá Ndióxi, te ñáiyu càchí sá ìⁿ-ní cùu-xi nchaa-ni nduu quidé-yu sá nehè-yu sá yíñuhu núú Yá Ndióxi tñahá-yu. Te diu-ni ducaⁿ sätñahá-xi cùu nchaa ñáiyu xèxi nchaa nàni nihí-yu, chi quidé-yu sá nehè-yu sá yíñuhu núú Yá Ndióxi, chi ndacáⁿ táhü-yu núú-gã cuendá nchaa sá nihí-yu. Te diu-ni ducaⁿ sätñahá-xi cùu nchaa ñáiyu ñá túú xèxi nchaa núú sá nchító-ó chi quidé-yu sá nehè-yu sá yíñuhu núú Yá Ndióxi, te ndacáⁿ táhü-yu núú-gã cuendá nchaa sá nihí-yu.

⁷ Te nchoo cuèi vitna ndècu vívú-ó àdi cuèi na cùú-ó dico ñá díú cuendá mée-ó cùú-ó. ⁸ Chi vitna ndècu vívú-ó te ndècu-o sá cúú-xí Xítóhó Jesucristú àdi cuèi na cùú-ó dico cuú-ó diu-ni sá cúú-xí-gã, núu xíáⁿ cuèi vitna ndècu vívú-ó àdi cuèi na cùú-ó dico diu-ni Xítóhó Jesucristú cúu cuendá ñáhá-gã xii-o. ⁹ Chi Xítóhó Jesucristú ní xihí-gã te ní ndoto-gã, te vitna cùu-gã Xítóhó nchaa ñáiyu, cuèi ñáiyu xíndecu vívú te cuèi ñáiyu ní xihí.

¹⁰ Te nchòhó, ñá túú nduu váha-xi cuatnùhu tñaha-ndo nacuaá ndècu-ndo ichi Xítóhó Jesucristú, te ni ñá túú nduu váha-xi daquèe tíhü tñahá-ndó, chi nchaa-o sáá nduu cündecu-o núú Xítóhó Jesucristú,

te mee-gã cachí-gá te núu ní quide ndáá-ó àdi ñá túú ní quide ndáá-ó. ¹¹ Te Yá Ndiöxí cächí-gá núu tütú-gá:

Yúhú Yá Ndiöxí ndécù-í cächí tnúhu ndáá-í xii-ndõ sã nchàa ñáyiu ngüñí xití-yu núu-í, te nchaá-yu cáháⁿ-yu sá yúhú cùu-í Ndiöxí.

Duha cächí Yá Ndiöxí núu tütú-gá.

¹² Núu xiãⁿ nchaa-o ndí díiⁿ nàcanj tnúhu-o núu Yá Ndiöxí nchaa sá ní quide-o.

Vá dácuita nihnu tnàha-o

¹³ Núu xiãⁿ vá cuátnúhu tnaha-gá-ndó, te cada yica-ndo càda-ndo mee-ni sá vâha, te vá cáda-ndó ñⁿ sá ñà túú tàu-ndó càda-ndo cuendá sá vã cuíta nihnu dava ñáyiu ndècu ndihí-ndo ichi Xítohó Jesucristú. ¹⁴ Te yúhú ndécú ndihí-í Xítohó Jesucristú te cùtnuní ndáá iní-í sá ncháá núú sã cúú cãxi-o cuu-ni caxi-o te vá cúú cuèchi. Te ñáyiu sàni iní sá vá cúú cãxi-yu te núu na cãxi-yu te cuu cuèchi xií-yu. ¹⁵ Te nchòhó, te núu cuendá sá xéxi-ndó nchàa núú sã cúú cãxi-ndo, cuendá xiãⁿ ñá túú-gã cúú vâha iní nchaa ñáyiu ndècu ndihí-ndo ichi Xítohó Jesucristú, te ñá túú-gã quidé-ndó sã cúú ìní ndisa-ndõ-yu te núu ducaⁿ na càda-ndo, te núu ñⁿ sá sání iní-ndó cãxi-ndo te cùtnuní iní-ndó sã xiãⁿ cada-xi cuíta nihnu ñáyiu ndècu ndihí-ndo ichi Xítohó Jesucristú te vá cãxi-ndó xiãⁿ te núu ducaⁿ, chi Xítohó Jesucristú ní xíhí-gá cuendá-yu. ¹⁶ Te núu ñⁿ sá quidé-ndó sàni iní-ndó sã cúú-xí ñⁿ sá vâha, te ñáyiu cächí-yu sá ñà túú vâha te vá cáda-ndó cuendá sá vã cáháⁿ cuèhé-yu cuendá-ndó.

¹⁷ Te sá yíndàha ñaha Yá Ndiöxí xii-o xiãⁿ ío xini ñuhu-xi cada ndáá-ó cùndecu-o, te cùndecu vâha ndihí tnàha-o, te cudíí ìní-ó cùndecu-o chi Espíritú-gá ndécú ndihí ñaha-xi xii-o, te nchaa xéhé ïo-gá cùnùu dacúxí sã cóhó sã cãxi-ó. ¹⁸ Te nchaa ñáyiu ducaⁿ quide nchaa sá

ïo-gá xini ñuhu-xi, xinu cuechí-yu núu Xítohó Jesucristú, te sá dúcáⁿ quidé-yu te ndùu vétú ìní Yá Ndiöxí, te cùdíu-yu núu ñáyiu.

¹⁹ Te nchoo chí ná ndùcu-o nacuaá cada-o cùndecu ndihí vâha tnàha-o, te nducu tùcu-o nacuaá cada-o chìndee tnúhu tnàha-o nacuaá cuíta cundáá-gá-ó núú Xítohó Jesucristú quíhíⁿ. ²⁰ Te ñá díú sã cuendá ñⁿ núú sã xéxi-ó, te dàquee tíhú-ó sã vâha ní quide ñaha Yá Ndiöxí xii tnàha ñáyiu-o. Te na cächí tnúhu ndáá-í xii-ndo sã ncháá-ni núú sã cúú cãxi-o, te dícó-ni sá ñà túú ndùu vâha-xi núú sã cuendá-ni sã cãxi-ó ñⁿ núú sã cúú cãxi-o cuíta nihnu ñⁿ tnàha ñáyiu-o.

²¹ Te vâha-gá sá vã cãxi-ó cùñú te vá cóhó ndídí, te ni ñà túú nãgá cada-o te núu xito-o sã xiãⁿ cada te ngüíta tnàha ñáyiu-o càda-yu sá ñà túú vâha, àdi xito-o sã xiãⁿ cada te ngüíta-yu caní ñⁿ caní úú iní-yu cundecú-yu ichi Xítohó Jesucristú, te vá cùndáá-gá-yu núú-gã te núu ducaⁿ na càda-o. ²² Te núu ñⁿ sá vâha sàni iní-ó càda-o, te vá dátúu-o núú ñáyiu chi mee-ni núú Yá Ndiöxí dátúu-o. Te nchoo cùu-o ñáyiu ío vâha táhú-xi te núu cùtnuní ndáá iní-ó sã quidé ndáá-ó núu nãndí cùu sá quidé-ó, te cùtnuní iní-ó sã ñà díú ñⁿ cuèchi cùu-xi sá quidé-ó. ²³ Te núu nchoo sàni iní-ó sã quidé vâha-o àdi ñá túú quide vâha-o òré xéxi-ó ñⁿ núú sã xéxi-ó, te cuu cuèchi xii-o te núu ducaⁿ na càda-o. Te ducaⁿ cùu cuèchi xii-o chí ñà túú ñⁿ-ni sá sání iní-ó, chí nchaa núú sã quidé-ó sàni ñⁿ sàni úú iní-ó núu vâha-ni àdi ñá túú vâha-ni, te cuu cuèchi xii-o sã dúcáⁿ quide-o.

15

Cada-o sã vâha sá cúú-xí tnàha ñáyiu-o

¹ Te nchoo ñáyiu ío vâha sàndáá iní ñáhá xii Xítohó Jesucristú, xini ñuhu-xi cuáñaha-o tnúhu ndee ìní xii ñáyiu ñà túú nihí ndéé cùndecu ichi-gá, te vá cáda-ó mèe-ni sá

cúu-xí mée-o. ² Te cada-o sá vaha nàcuáa cuu vaha iní tñaha ñáyi-u cuendá cuu-xi sá vaha sá cúu-xí-yu, te ducaⁿ cuíta níhí ndée-gá-yu quindáá iní-yu Xítoho Jesucristú. ³ Te Xítoho Jesucristú ñá túu ní quide-gá mee-ní sá cúu vaha iní mée-gá, te ní quee ndáá-xi nàcuáa càháⁿ-xi núu tütú Yá Ndióxi nàcuáa ní xáhaⁿ Xítoho Jesucristú xii-gá, te càchí-xi: “Nchaa ñáyi-u cùu úhú iní ñáhá xii-n ní xícuèhé ní xíduha ñáhá-yu xii-í”, duha càháⁿ-xi núu tütú Yá Ndióxi nàcuáa ní xáhaⁿ Xítoho Jesucristú xii-gá. ⁴ Te ndée sanaha ní ngúndé nchaa tnúhu Yá Ndióxi núu tütú-gá, te ducaⁿ ní ngúndé cuendá dacuàha-o, te tnúhu-áⁿ dánèhé ñáhá-xí cùnduu cahnu iní-ó cuèi nándi nà yáha-o cùndecu-o ichi-gá, te sá xii tnúhu-áⁿ te vá ndihú-gá iní-ó cùndecu-o, te diu-ni sá xii tnúhu-áⁿ cùndecu ndihí-o tnúhu ndee iní. ⁵ Te Yá Ndióxi quidé-gá ndécú ndihí-o tnúhu càhnu iní, te diu-ni-gá quidé-gá ñá túu ndihú iní-ó ndècu-o. Te xicáⁿ táhù-í núu-gá sá díú-gá ná cáda te cuu ñⁿnuu-ndo cùndecu-ndo datná ní quide mee Xítoho Jesucristú cùtnáhá ní xíndecu-gá ñuyú-a. ⁶ Te ducaⁿ nchaa-ndo cuu ñⁿnuu-ndo, te danihí tnáhá-ndó yócó táchí-ndó te cachí-ndó sá ño càhnu cuu Yá Ndióxi Yáa cúu Tàtá Xítoho Jesucristú.

Ñáyi-u ñá túu cùu ñáyi-u israél ní nihí-yu tnúhu Xítoho Jesucristú

⁷ Te núu xiáⁿ chí quéhéⁿ cuendá tnáhá datná ní quide Xítoho Jesucristú ní queheⁿ cuendá ñáhá-gá xii-o, te núu ducaⁿ na càda-ndo te ño cuu càhnu Yá Ndióxi. ⁸ Te na càchí tnúhu-í xii-ndo sá Xítoho Jesucristú ní quixi-gá ní quide-gá sá vaha sá cúu-xí ñáyi-u israél, te sá dúcáⁿ ní quide-gá xiáⁿ cùtnùní ndáá iní-ó sá Yá Ndióxi quidé-gá ñⁿ sá càháⁿ-gá, chí Xítoho Jesucristú ní quide-gá nchaa nàcuáa ní xáhaⁿ Yá Ndióxi xii cue ñani tnáhá-ó ní xíndecu ndée sanaha. ⁹ Te ducaⁿ ní quide Xítoho

Jesucristú sá vaha sá cúu-xí ñáyi-u israél cuendá nchaa ñáyi-u ñá túu cùu ñáyi-u israél cachí-yu sá ño càhnu cuu Yá Ndióxi, te ducaⁿ quèsahá-yu chí ño cùndahú iní ñáhá-gá chindèe ñaha-gá xii-yu, te quee ndáá-xi nàcuáa càháⁿ-xi núu tütú Yá Ndióxi núu càchí-xi:

Yúhú cachí-í sá ño càhnu cuu-n núu nchaa ñáyi-u ñá túu cùu ñáyi-u israél,

te cata-í ndudú chiñuhu ñaha-í xii-n. Duha càchí-xi núu tütú-gá ¹⁰ Te càchí tucu-xi núu tütú-gá:

Te nchòhó ñáyi-u ñá túu cùu ñáyi-u israél ño chí cúdí iní ndihí ñáyi-u israél ñáyi-u ndècu ndihí-í.

Duha càchí-xi núu tütú-gá. ¹¹ Te càchí tucu-xi ingá xichi núu tütú-gá:

Nchaa nchòhó ñáyi-u ñá túu cùu ñáyi-u israél chí càháⁿ sá ño càhnu cuu Yá Ndióxi,

te nchaa ñáyi-u na càháⁿ-yu sá ño càhnu cuu-gá.

Duha càchí-xi núu tütú-gá. ¹² Te ndí Chàia càchí tucu ndí núu tütú Yá Ndióxi:

Coo ñⁿ ñani tnáhá ndí Isái téé ní xíndecu ndée sanaha,

te téé-áⁿ taxi tnùní-dé cue ñáyi-u ñá túu cùu ñáyi-u israél,

te ñáyi-u-áⁿ cundee cùu cahnu iní ñáhá-yu xii-dé.

Duha ní càháⁿ ndí Chàia càchí-xi núu tütú-gá.

¹³ Te xicáⁿ táhù-í núu Yá Ndióxi Yáa ní taxi tnúhu ndee iní ndécú ndihí-o sá mée-gá ná càda ño cudí iní-ndó cùndecu-ndo, te ducaⁿ ño vaha cundecu iní-ndó núu-gá chí sàndáá iní-ndó-gá, te ducaⁿ Espiritú-gá ná càda te uuⁿ-gá uuⁿ-gá cuíta ngúndecu ndihí-ndo tnúhu ndee iní quíhíⁿ sá cáda vaha ñaha-gá xii-ndo.

¹⁴ Te nchòhó ñáyi-u ndècu ndihí-í ichi Xítoho Jesucristú cùtnuní ndáá iní-í sá nchòhó ño vaha iní-ndó, te ducaⁿ ño vaha cùtnuní iní-ndó nchaa tnúhu vaha, te ducaⁿ ño dásahú tnáhá-ndó nàcuáa cundecu-ndo.

15 Te dawa tnúhu ní chídó tnùn-í nùú tütú-a cùu-xi tnúhu sá ò cáháⁿ-í dóho-ndo, te ducaⁿ ní tee-í cuendá sá nchòhó dandacu iní-ndó tnúhu-áⁿ, te ní tee-í chi Yá Ndiòxí ní cundàhú iní ñáhá-gã xii-í ní taxi-gá chùuⁿ quide-í ¹⁶ xínú cuèchi-í nùú Xítóhó Jesucristú cáháⁿ-í tnúhu-gá nùú ñáyiú ñá túú cùu ñáyiú isràél. Te tnúhu-áⁿ cúu-xi tnúhu sá sánú ichi ñaha xii-o nacúaa naníhí tãhú-ó, te ducaⁿ dānehé-í ñáyiú ñá túú cùu ñáyiú isràél tnúhu Yá Ndiòxí cuendá cuú-yu dàtná ¹⁷ sá ndúú tãhú-gã, te Espiritú-gá quidé-xi cúu-yu ñáyiú cùdiu nùú-gã, te cùu váha iní ñáhá-gã xii-yu.

¹⁷ Te ò váha cùu iní-í cuendá nchaa chùuⁿ quide-í sá cúu-xi Yá Ndiòxí, chi Xítóhó Jesucristú ndécú ndihí ñaha-gá xii-í. ¹⁸ Te mee-ni nàcuáa quide Xítóhó Jesucristú chindèe ñaha-gá xii-í xíãⁿ-ni cáháⁿ-í, te sá dúcáⁿ quide-gá xíãⁿ ní sándáá iní cue ñáyiú ñá túú cùu ñáyiú isràél tnúhu-gá. Te ducaⁿ chi ní chindee ñáhá-gá xii-í ní cáháⁿ-í tnúhu-gá te ducaⁿ-ni ní chindee ñáhá-gá xii-í ní quide-í titní nùú sã ní quide-í nùú-yu ní xiní-yu. ¹⁹ Te Espiritú Yá Ndiòxí ní quide-xi ní quide-í titní nùú sã vã yò tñahí ndàcu cada ní xiní-yu te ò ní cuñúhu-yu. Te nchaa ñuú ní sáháⁿ-í ní cáháⁿ-í tnúhu Xítóhó Jesucristú nùú ñáyiú cuèi ndéé ñuú Jerusàlén, te cuèi ndéé distritú Ilíricú, nùu nchaa ñuú-áⁿ ní sáháⁿ-í ní cáháⁿ-í nùú-yu tnúhu sá cáháⁿ nàcuáa naníhí tãhú-ó. ²⁰ Te ducaⁿ ò ndùcu ndee-í cáháⁿ-í tnúhu sá cáháⁿ nàcuáa naníhí tãhú-ó nùú vátá nihí-gá-yu tnúhu cuendá Xítóhó Jesucristú, te ducaⁿ quide-í chi ñá túú cuèni-í quíhíⁿ-í cáháⁿ-í tnúhu-gá nùú sá xíndecu ñáyiú cáháⁿ tnúhu-gá. ²¹ Te quide-í nàcuáa cáháⁿ-xi nùú tütú Yá Ndiòxí nùú cãchí-xi:

Ñáyiú vátá nihí-gá tnúhu cuendá
Yáa quixi ñuyú te nihí-yu,
te ducaⁿ təcú tnùn-í-yu tnúhu-gá.

Duha cãchí-xi nùú tütú-gá.

Té Pãblú cuèni-dé quíhíⁿ-dé ñuú Ròmá

²² Te sá dúcáⁿ cáháⁿ-í tnúhu-gá nùu xíãⁿ ñá túú ní ndàcu-í quixi-í quixi coto ñaha-í xii-ndo cuèi ducaⁿ-ni sàni iní-í quixi coto ñaha-í. ²³ Te ní cuu titní cuiá ducaⁿ-ni sàni iní-í quixi coto ñaha-í xii-ndo, te vitna ní ndihí-í nchaa iha ní cáháⁿ-í tnúhu Xítóhó Jesucristú nùú nchaa ñáyiú. ²⁴ Nùu xíãⁿ sání iní-í sá ndùu na quíhíⁿ-í nacióⁿ Èspaña te yáha cáháⁿ-í quini-í nása ndècu-ndo, te dāvá-áⁿ ò cudí iní-ó cùndecu tnaa-o, te ducaⁿ te òrè nucúhuⁿ tucu-í ichi te cada ndee iní-ndó chindèe ñaha-ndo xii-í. ²⁵ Te vitna quíhíⁿ-í ñuú Jerusàlén quínehe-í sá ndúú tãhú ñáyiú ndècu ichi Xítóhó Jesucristú xíndecu yácáⁿ. ²⁶ Te ñáyiú xíndecu ichi Xítóhó Jesucristú ndécú distritú Macèdoniá, ndihí distritú Acáyá ní cuu ²⁷ ñuú-yu ní sacáⁿ tñahã-yu sá ndúú tãhú ñáyiú ndàhú xíndecu ichi-gá ndécú ñuú Jerusàlén. Te ducaⁿ tñahí ní cudí iní-yu cadá-yu, te ducaⁿ tñahí tàu-yu cadá-yu chindèe-yu ñáyiú xíndecu ñuú Jerusàlén. Te ñáyiú Macèdoniá ndihí ñáyiú Acáyá-áⁿ ñá túú cúu-yu ñáyiú isràél. Te ñáyiú xíndecu ñuú Jerusàlén cúu-yu mee-ni ñáyiú isràél, te ducaⁿ tàu-yu cadá-yu chi sá cuendá ñáyiú isràél-áⁿ ní nihí-yu tnúhu sá cáháⁿ nàcuáa naníhí tãhú-yu, nùu xíãⁿ tàu-yu chindee ñáhá-yu ndihí nchaa sá nihí-yu. ²⁸ Te sátá ná yáha quínguáha cuendá-í-yu sá ndúú tãhú-yu, te ducaⁿ te dàtnùni quee-í quíhíⁿ-í nacióⁿ Èspaña, te ichi yáha-í yáha cáháⁿ-í nùú ndécú-ndó. ²⁹ Te cùtnuní ndáá iní-í sá òrè ná quèxio-í nùú ndécú-ndó, te Xítóhó Jesucristú ò chindee ñáhá-gá xii-í cáháⁿ-í tnúhu-gá nùú-ndó nàcuáa ò váha cùndecu-ndo ichi-gá.

³⁰ Te nchòhó ñáyiú ndècu ndihí-í ichi Xítóhó Jesucristú cáháⁿ ndàhú-í

núú-ndó sǎ ǎo chindee ñaha-ndo xii-í cáháⁿ ndihi-o Yá Ndióxi cuendá-í, te ducaⁿ càda-ndo chi ndècu ndihi-ndo Xítohó Jesucristú. Te Espíritú Yá Ndióxi quidé-xí cùu iní tnàhá-ó ìⁿ ìⁿ-o. ³¹ Te ǎo chí cǎcǎⁿ táhú núú Yá Ndióxi sǎ ná còto ñaha-gǎ xii-í, te ñá túú ná cada ñaha nchaa ñáyiú ñá túú sándáá iní ñáhá xii-gǎ xindecu distritú Jùdeá. Te cǎcǎⁿ táhú tùcu-ndo núú-gǎ sǎ ncháá sǎ cánèhe-í quíhíⁿ nduu táhú ñáyiú ndècu ichi-gǎ ndécú ñúú Jerusálén ǎo váha cuu iní-yu queheⁿ cuendá-yu. ³² Te ducaⁿ càda-ndo cuendá sǎ núú Yá Ndióxi ná cǎchí-gǎ te ǎo cudí iní-í òré quexìo-í núú ndécú-ndó, te ǎo váha cuu iní-í cundecu ndihi ñaha tnàí xii-ndo. ³³ Te vitna xicǎⁿ táhù-í núú Yá Ndióxi Yaá quidé ǎo váha cùu iní-ó ndècu-o sǎ ná chindee chitúu ñaha-gǎ xii-ndo nchaa-ndo. Te ducaⁿ na cùnduu.

16

Té Pǎblú quidé ndèe iní-dé ñáyiú ndècu ñúú Rómá

¹ Te yúhú tendaha-í tá Fèbè quixi-xi núú ndécú-ndó, te tnàhá-xi ndècu-xi ichi Xítohó Jesucristú, te quíde-xi chiuⁿ Yá Ndióxi sǎ cúú-xí ñáyiú ndècu ichi Xítohó Jesucristú xindecu ñúú Céncreá. ² Te cui-í sǎ ǎo váha cuu iní-ndó queheⁿ cuendá-ndó-xí, chi ndècu ndihi-xi Xítohó Jesucristú, te cada-ndo nàcuáa tàú-xi cunduu dàtná tàú-xi cada ñáyiú ndècu ichi-gǎ, te ǎo chindee-ndo-xi te núú ná cúú sǎ xini ñúhu-xi, chi tnàhá-xi ǎo chindee-xi cue ñáyiú ndècu ichi Xítohó Jesucristú, te tnàhá yúhú ducaⁿ ǎo chindee-xi.

³ Te cúñaha-ndo ǎo na càda ndee iní té Àquilú ndihi ñadihí-dé tá Priscilá, chi ñáyiú-áⁿ ní quíde chiúⁿ-í ndihi-yu ní quíde-ndí chiúⁿ Xítohó Jesucristú. ⁴ Chi mèe-yu ní cǎcu cuú-yu sǎ cuendá sǎ ní dǎcǎcu ñàhá-yu xii-í sǎ ní yáha-í, núú xíáⁿ ǎo ndácáⁿ táhù-í núú-yu, te ñá

díú-ní yúhú ducaⁿ ǎo ndácáⁿ táhù-í núú-yu chi tnàhá nchaa ñáyiú ñá túú cùu ñáyiú israhèl xindecu ichi-gǎ xindecu nchaa xichi ducaⁿ ǎo ndácáⁿ táhù-yu núú té Àquilú ndihi núú ñadihí-dé tá Priscilá. ⁵ Te cúñaha tùcu-ndo sǎ ǎo na càda ndee iní nchaa ñáyiú xindecu ichi Xítohó Jesucristú tàcǎ vehe té Àquilú ndihi tá Priscilá dǎcuàhá-yu tnúhu-gǎ, te cúñaha tùcu-ndo sǎ ǎo na càda ndee iní té Epènetú chi tnàhá-dé ǎo ñúhu iní-í-dé, chi té-áⁿ cúú-dé téé díhna nuu ní sándáá iní tnúhu Xítohó Jesucristú distritú Acáyá. ⁶ Te cúñaha tùcu-ndo sǎ ǎo na càda ndee iní tá Màriá xíchí ndécú ndihi-ndo, xíchí ǎo ndècu ndee xinu cuechi núú Xítohó Jesucristú. ⁷ Te cúñaha tùcu-ndo sǎ ǎo na càda ndee iní cue téé cùu ndi mee-í té Àndrónicú ndihi té Jùniás, chi tnàhá-güedé ní xíhi ndihi ñaha-güedé xii-í vecaá, te ǎo cùdiu-güedé núú nchaa cue téé ní táúchiúⁿ Jèsús cáháⁿ tnúhu-gǎ. Te díhna-gǎ-güedé ní sándáá iní-güedé tnúhu Xítohó Jesucristú dǎcúúxí yúhú.

⁸ Te cúñaha-ndo sǎ ná càda ndee iní té Àmpliás chi tnàhá-dé ǎo ñúhu iní-í-dé, te ndècu-dé tnàhá-dé ichi Xítohó Jesucristú. ⁹ Te cúñaha tùcu-ndo xii té Bǎnú téé cùndihi ñaha xii-o quíde-o chiuⁿ Xítohó Jesucristú sǎ ná càda ndee iní-dé, te cúñaha tùcu-ndo xii té Èstaquis sǎ ná càda ndee iní-dé chi tnàhá-dé ǎo ñúhu iní-í-dé. ¹⁰ Te cúñaha tùcu-ndo xii té Àpelés sǎ ǎo na càda ndee iní-dé, chi té-áⁿ ǎo váha cùndáá-dé núú Xítohó Jesucristú, te cúñaha tùcu-ndo xii ñáyiú xindecu vehe té Àristóbulú sǎ ǎo na càda ndee iní-yu. ¹¹ Te cúñaha-ndo xii té Heròdiòn téé cùu ndi mee-í sǎ ǎo na càda ndee iní-dé, te cúñaha-ndo xii ñáyiú ndècu ichi Xítohó Jesucristú xindecu vehe té Nàrcisú sǎ ǎo na càda ndee iní-yu. ¹² Te cúñaha-ndo xii tnàhá tá Trifená ndihi tá Trifosá sǎ ǎo na càda ndee iní-yu, chi tnàhá-yu quíde-yu chiúⁿ Xítohó Jesucristú. Te tnàhá tá Pèrsidá

xíchí ndécú ndìhi-o ichi Xítohó Jesucristú cúñaha-ndo xii-xi sá ò na càda ndee iní-xi, chi tnàhá-xi ò ndècu ndee-xi quide-xi chiuⁿ Xítohó Jesucristú. ¹³ Te cúñaha-ndo tnàhá té Rűfú tée ò váha sàndáá iní tnúhu Xítohó Jesucristú sá ò na càda ndee iní-dé ndìhi náná-dě, chi ñaha-áⁿ quidé iní-í sá cúú-áⁿ dàtná náná-í. ¹⁴ Te cúñaha-ndo sá ò na càda ndee iní té Asincritú, ndìhi té Flègonté, ndìhi té Hěrmás, ndìhi té Pàtrobás, ndìhi té Hěrmés, ndìhi nchaa dava-gá cue ñáyi ndècu ndìhi-o ichi Xítohó Jesucristú xíndecu ndìhi-güedé. ¹⁵ Te cúñaha tucu-ndo sá ò na càda ndee iní té Filólogó, ndìhi tá Jüliá, ndìhi té Nèrèu, ndìhi cúha té Nèrèu, ndìhi tá Òlimpás, ndìhi nchaa dava-gá ñáyi sàndáá iní tnúhu Xítohó Jesucristú xíndecu ndìhi-yu.

¹⁶ Te ò yíñùhu cada ndee iní tnàhá-ndó ñⁿ ñⁿ-ndo. Te nchaa ñáyi taca nchaa iha dàcuaha tnúhu Xítohó Jesucristú quidé ndèe iní ñáhà-yu xii-ndo.

¹⁷ Te nchòhó ñáyi ndècu ndìhi-í ichi Xítohó Jesucristú càháⁿ-í dòho-ndo sá cadá cuendá-ndó núu ò ñáyi quide nacuaá vá cúú ñⁿnuu-ndo cundecu-ndo, chi ñáyi-áⁿ sánú ichi ñahá-yu ñⁿ ichi ñá túú vaha, chi ñá túú ñⁿ-ni cuu-xi tnúhu càháⁿ-yu ndìhi tnúhu sá ñí ñíhí-ndó ndècu ndìhi-ndo, te ñáyi ducaⁿ xíquide vá ñíhí tnàhá-gá-ndó ndìhi-yu. ¹⁸ Chi ñáyi-áⁿ ñá túú quidé-yu chiⁿ sá cúú-xí Xítohó Jesucristú, chi mee-ni sá cúú-xí mée-yu quidé-yu, te mee-ni nchaa tnúhu sá ò vii ò váha cuháⁿ càháⁿ-yu òrè cuháⁿ-yu dándahú-yu nchaa ñáyi ò yáchí sàndáá iní-xi ñⁿ tnúhu. ¹⁹ Te nchaa ñáyi ñíhí-yu tnúhu sá nchòhó sàndáá iní-ndó tnúhu Xítohó Jesucristú, núu xíⁿ ò cùdí iní-í. Te cuiní-í sá nchòhó ò váha cutnúni iní-ndó nacuaá cada-ndo mée-ni sá váha, te vá cání iní-ndó càda-ndo datná xíquide

nchaa ñáyi ndècu ichi cuehé ichi duha. ²⁰ Te Yá Ndióxi Yáá quidé ò váha cùu iní-ó ndècu-o ò ndìhi cada-gá cuendá sá sàcúlmá ñá túú-gá ná cada ñaha-xi xii-ndo, te xicáⁿ táhù-í núu Xítohó Jesucristú sá ò na chindee chitúu ñaha-gá xii-ndo.

²¹ Te té Timúteú tée quide ndìhi-í chiⁿ Xítohó Jesucristú iha quide ndee iní ñáhá-dě xii-ndo, te tnàhá té Lúciú, ndìhi té Jàsón, ndìhi té Sosipàtér cue tée cùu ndi mee-í quidé ndèe iní ñáhá-güedé xii-ndo.

²² Te tnàhá yúhú té Tèrciú tée càdúha tutú-a cuendá té Páblú quidé ndèe iní ñáhà-í xii-ndo, chi ñⁿ-ni cùu-o ndìhi Xítohó Jesucristú.

²³ Te tnàhá té Gáyú tée dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi núu-dé vehe taca ñáyi dàcuahá-yu tnúhu Xítohó Jesucristú. Te tnàhá té Èrastú tée yíndaha díhúⁿ núu quidé ndèe iní ñáhá-dě xii-ndo, te tnàhá té Cuártú tée ndècu ndìhi-o ichi Xítohó Jesucristú quidé ndèe iní ñáhá-dě xii-ndo.

²⁴ Te xicáⁿ táhù-í núu Xítohó Jesucristú sá ò na chindee chitúu ñaha-gá xii-ndo nchaa-ndo. Te ducaⁿ na cùnduu.

Cáháⁿ-ó sá ò càhnu cuu Yá Ndióxi

²⁵ Te vitna chí ná càhí-ó sá ò càhnu cuu Yá Ndióxi, chi mee-gá cada te ò-gá cuita ñíhí ndéé-gá-ndó cùndecu-ndo ichi Xítohó Jesucristú dàtná càhí tnúhu sá càháⁿ nacuaá naníhí táhú-ó, tnúhu sá dánèhé-í ñáyi cuendá Xítohó Jesucristú, te nchaa tnúhu-a ñⁿ-ni cùu-xi ndìhi nchaa tnúhu sá ñí cachí Yá Ndióxi cuu yuhu ndèe cùtnàhá ní ngáva ñuyú, te vitna ní quee túu-xi,

²⁶ chi mee Yá Ndióxi ní dátúu-gá núu-ó vitna, te càháⁿ-ndí nacuaá ní chídó tnúni cue tée ní xóo càháⁿ tnúhu Yá Ndióxi ndéé sanaha. Te ducaⁿ tnúhu sá ndúu yuhu ni cuu ta xité nuu-xi ñíhí ñuyú cuháⁿ, chi ducaⁿ ñí cachí Yá Ndióxi Yáá ndécú nchaa nduu nchaa quíú

cunduu cuèndá sá quíndáá iní ñáhá
ñăyiu xii-gá, te tñí-yu nchaa tñúhu
càháⁿ-gá.

²⁷ ¡Te ñⁿdii-ni Yá Ndiõxí cúú-gă
Yaá ío sàá sá xini tñùní-xi! ¡Te
nchaa-o chì ná càchí-ó sã ío càhnu
cúu-gá, chí ndècu ndihi-o Xitohó Je-
sucristú, te ducaⁿ-ni càda-o ni caa ni
quíhíⁿ! Te ducaⁿ na cùnduu. Te ío
chí cáda ndèe iní-nă vitna.

TUTÚ DÍHNA NUU NĪ CADÚHA TĒ PĀBLÚ QUÍHⁿ NDAHA ÑÁYIU ÑÚÚ CÒRINTÚ

*Té Pāblú cādúha-dé tutú quíhⁿ
ndaha ñáyiú x̄ndecu ichi Xítoho Jesu-
crístú ndécú ñúú Còrintú*

¹ Yúhú té Pāblú ní cáháⁿ ñáhá Yá Ndióxi xii-í cuendá sá cáháⁿ-í tnúhu Xítoho Jesucristú núu ñáyiú, chi ducaⁿ nĩ cachí Yá Ndióxi cunduu. Te cādúha-í tutú-a ndihí té Sōstenés tēe ndēcu ndihí-o ichi Xítoho Jesucristú ² cuendá daquixi-í ndaha nchòhó ñáyiú x̄ndecu ichi Yá Ndióxi ndécú ñúú Còrintú, chi nchòhó cúu-ndo ñáyiú cūu cuendá Yá Ndióxi cuendá sá ndécú ndihí-ndo Xítoho Jesucristú. Te diu-ni-ndo cūu-ndo ñáyiú ní cáháⁿ ñáhá Yá Ndióxi cuendá cundecu yĩññuhu-ndo núu-gá, ndihí nchaa dava-gá ñáyiú ndēcu nchaa xichi, ñáyiú cāchí sá ío cāhnu cuu Xítoho Jesucristú. Te Yaá-áⁿ cúu-gá Xítoho-yu, te diu-ni-gá cúu-gá Xítoho nchoo tucu. ³ Te x̄icáⁿ táhù-í núú Tātá-ó Dútú Ndióxi ndihí núú Xítoho Jesucristú sá ndi nduú-gá ío na chindee chitúu ñaha-gá xii-ndo, te ío váha cuu iní-ndó cūndecu-ndo.

*Yá Ndióxi ío chindee ñaha-gá xii-o
cuendá sá ndécú-ó ndihí Xítoho Jesu-
crístú*

⁴ Te ducaⁿ-ni ío ndácáⁿ táhù-í núú Yá Ndióxi cuendá-ndó, chi mee-gá ío chindee chitúu ñaha-gá xii-ndo sá cuendá Xítoho Jesucristú. ⁵ Te cuendá sá ndécú-ndo ndihí Xítoho Jesucristú, núu x̄iáⁿ Yá Ndióxi ío chindee ñaha-gá xii-ndo sáa díquí-ndó nācuáa cáháⁿ-ndó, ndihí nācuáa cūtnuní iní-ndó, ⁶ chi tnúhu sá ni ñihí-ndó cuendá Xítoho Jesucristú ní quée-xi iní-ndó. ⁷ Te x̄iáⁿ núu nchaa sá váha ñá túú tñahí cūmání xii-ndo chi Yá Ndióxi ío chindee ñaha-gá. Te ducaⁿ

quide-gá ñini nchòhó ni yúhu ni iní-ndó ndētu-ndo sáa nduu quixi tucu Xítoho Jesucristú. ⁸ Te Yá Ndióxi ducaⁿ-ni ío chindee ñaha-gá xii-ndo cuendá sá vā yō teñaha cuēchi nduu na quixi tucu Xítoho Jesucristú. ⁹ Te nchaa sá cáháⁿ Yá Ndióxi dacuití quide-gá, te diu-gá cúu-gá Yaá ní cáháⁿ ñáhá xii-ndo cuendá cuu ñⁿnuu-ndo ndihí Déhe-gá Xítoho Jesucristú Yaá cúu Xítoho-ó.

*Ñá túú cūu ñⁿnuu ñáyiú ndēcu ichi
Xítoho Jesucristú*

¹⁰ Te nchòhó ñáyiú ndēcu ndihí-í ichi Xítoho Jesucristú cáháⁿ-í dóho-ndo sá vā ndi dííⁿ cāni iní-ndó, te ío cuu ñⁿnuu-ndo cūndecu-ndo, te ñⁿ-ni cāni iní-ndó, te ñⁿ-ni cáda-ndo chi ducaⁿ cūnī-gá cunduu. ¹¹ Te duha cáháⁿ-í dóho nchòhó ñáyiú ndēcu ndihí-í ichi Xítoho Jesucristú, chi cue ñáyiú vehe té Clóé ní cachí tnúhu-yu xii-í sá ñā túú cūu ñⁿnuu-ndo ndecu-ndo. ¹² Te duha ndūu tnúhu ní ñihí-í nācuáa cūu ndecu-ndo, chi dava-ndo cāchí-ndó: “Yúhú cúu-í cuendá té Pāblú.” Te dava-ndo cāchí-ndó: “Yúhú cúu-í cuendá té Apolós.” Te dava-ndo cāchí-ndó: “Yúhú cúu-í cuendá té Pélú.” Te dava tucu-ndo cāchí-ndó: “Yúhú cúu-í cuendá Xítoho Jesucristú”, duha cāchí-ndó. ¹³ Te vá dúcáⁿ cáháⁿ-ndó chi ñā túú nā dāha Xítoho Jesucristú ndécú chi ñⁿdi-ni-gá. Te ñā díú yúhú té Pāblú ní x̄ihí-í núú cūrúxi sá cuendá-ndó, te ni ñā túú ní s̄andute-ndo cuendá sá yúhú cuu cuendá ñáhá-í xii-ndo. ¹⁴ Te táxāhu xii Yá Ndióxi chi ñā díú nchāa-ndo ni dacuandute-í, chi té Crispú-ni ndihí té Gáyú-ni ní dacuándute-í-güedé. ¹⁵ Te x̄iáⁿ núu vá cúu tñahí cáháⁿ-ndó sá ni sandute-ndo sá cúu cuendá ñáhá-í xii-ndo. ¹⁶ Te ní ndacu tucu iní-í sá tñahá tucu ñáyiú cūu ndi mee té Estēfanás ní dacuándute-í, te diu-ná ñáyiú-áⁿ te s̄annu sá ñā túú-gá nágá ñáyiú ni dacuandute-í. ¹⁷ Te Xítoho Jesucristú ñā túú ní

tëndaha ñaha-gá xii-í sá dácuañdute-í ñáiyu, chi ní tendaha ñaha-gá xii-í sá cãháⁿ-í tnúhu-gá nũ-yu, tnúhu sá cãháⁿ-í ñacuáa naníhí tãhú-ó. Te ñá túú cãháⁿ-í dàtná cãháⁿ ñáiyu túha. Te ducaⁿ quide-í cuendá sá nchòhó quíndáá váha iní-ndó tnúhu sá cãháⁿ ñacuáa ní xihí Xítóhó Jesucristú núú cùrúxí. Chi núu na cãháⁿ-í dàtná cãháⁿ ñáiyu túha te nchòhó vá quíndáá iní-ndó tnúhu-áⁿ ñacuáa tàú-xi cunduu.

Sá cuendá Xítóhó Jesucristú cùtnùní iní-ó sã ïo càhnu cuu Yá Ndióxi

¹⁸ Te nchaa ñáiyu ta xíta nihnu cuáháⁿ càchí-yu sá ñà túú nándíhi tnúhu sá cãháⁿ ñacuáa ní xihí Xítóhó Jesucristú núú cùrúxí, dico sá cúú-xí nchò ñáiyu sa ní naníhí tãhú, chi tnúhu-áⁿ cúú-xí ìⁿ tnúhu sá ñí taxi Yá Ndióxi ndécú ndíhi-o cuendá ndacu-gá cada-gá nchaa ñacuáa cuení-gá iní-ó, ¹⁹ te quèe ndáá-xi ñacuáa cãháⁿ-gá núú tütú-gá núú càchí-xi:

Yúhú cada-í te nchaa ñáiyu túha vá nándíhi-gá nchaa sá xini tnùní-yu,

te nchaa ñáiyu ío váha sàá díquí-xi vá nándíhi-gá nchaa ñacuáa sàni iní-yu.

Duha càchí Yá Ndióxi núú tütú-gá.

²⁰ Te xíãⁿ cùtnùní iní-ó sã ncháá ñáiyu sàni iní-xi sá ïo túha ndècu ñuyúú-a, ndíhi nchaa cue tée dàcuaha ñaha xií-yu nchaa tnúhu ní chídó tnùní ndíi Moisés, ndíhi nchaa ñáiyu ío váha sàá díquí-xi cãháⁿ cuendá nchaa sá ío ñuyúú-a, te nchaa ñáiyu-áⁿ càchí Yá Ndióxi sá ñà túú nándíhi nchaa sá xini tnùní-yu sá cúú-xí-gá. ²¹ Te Yá Ndióxi ío váha cùtnùní iní-gá ñacuáa quide-gá, chi ñá túú dàña-gá cundecu ndíhi ñàhá-yu xii-gá sá cuendá nchaa sá ñí sáá díquí méé-yu, te ducaⁿ quide-gá chi cuení-gá sá cùndèdóho-yu tnúhu sá sání iní-yu ñá túú nándíhi. Te sá

cuendá tnúhu-áⁿ te naníhí tãhú-yu te núu na quíndáá iní ñàhá-yu xii-gá.

²² Te cue ñáiyu isràél cuení-yu quini-yu sá vã yõo tnàhí ndàcu cada, te cue ñáiyu grìégú nchicúⁿ nihnú-yu nchaa sá dácuaaha ñáiyu ío túha. ²³ Dico nchoo yìhi-o cãháⁿ-ó nũ ñáiyu sá Xítóhó Jesucristú ní xihí-gá núú cùrúxí. Te cue ñáiyu isràél ñá túú tnàhí tnàhá iní-yu cundèdóho-yu tnúhu-áⁿ. Te cue ñáiyu ñá túú cùu ñáiyu isràél càchí-yu sá ñà túú vèdana nándíhi tnúhu-áⁿ. ²⁴ Dico sá cúú-xí nchaa ñáiyu ní cãháⁿ ñàhá Yá Ndióxi chi cuéi cùú-yu ñáiyu isràél àdi ñá túú cùú-yu, dico ñáiyu-áⁿ càchí-yu sá sã cuendá Xítóhó Jesucristú cùtnùní iní-yu sá ïo càhnu cuu Yá Ndióxi te ndècu ndíhi-gá nchaa sá xini tnùní-gá. ²⁵ Te sá quidé Yá Ndióxi càchí ñáiyu ñuyúú-a sá ñà túú nándíhi, dico xíãⁿ ío-gá nándíhi dàcúúxí sá sání iní méé-yu. Te sá ñí xihí Xítóhó Jesucristú núú cùrúxí, xíãⁿ càchí ñáiyu sá ñà túú ní ñíhi ndéé Yá Ndióxi cada-gá sá ñí sani iní-gá cada-gá. Dico sá dúcáⁿ ñí quide Yá Ndióxi, xíãⁿ cúú-xí sã ío-gá ní ñíhi ndéé-gã ní quide-gá ìⁿ sá ñí sani iní-gá dàcúúxí sã sání iní méé ñáiyu ñuyúú-a. ²⁶ Te nchòhó ñáiyu ndècu ndíhi-í ichi Xítóhó Jesucristú, chí dándàcu iní ñacuáa ndècu-ndo cùtnàhá ní cãháⁿ ñàhá Yá Ndióxi xii-ndo, chí sacú-ni-ndo túha dàcúúxí ñáiyu ñá túú ndècu ichi-gá. Te ducaⁿ sácú-ni-ndo tàxi tnuní-ndó, te diu-ni ducaⁿ sácú-ndó nèhe ñáiyu sá yíñùhu núú-ndó. ²⁷ Te ñáiyu ñá túú ndècu ichi Yá Ndióxi càchí-yu sá ñà túú tnàhí túha dava-gá tnàha ñáiyú-yu, dico dava ñáiyu ñá túú túha-áⁿ cãháⁿ ñàhá Yá Ndióxi xií-yu cundecú-yu ichi-gá, te cundecu ndíhi ñaha-gá xií-yu, te ducaⁿ dándó canúú-yu nchaa ñáiyu càchí sá ïo túha. Te cãháⁿ tucu-gá ñáiyu

càchí dawa-gá ñáyiú sá ñà túú tñàhí tàú cunuú cundecú-yu ichi-gá, te ducaⁿ cundecu ndihí ñaha-gá xii-yu, te dándóo canúú-yu nchaa ñáyiú càchí sá táxí tñuní. ²⁸ Te ducaⁿ Yá Ndióxi càháⁿ-gá ñáyiú ñà túú tñàhí cunuú cundecu ndihí-gá, ndihí ñáyiú quèe tíhú núú dawa-gá tñàha ñáyiú-xi, ndihí ñáyiú càchí-yu sá ñà túú vèdana nándíhi, nchaa ñáyiú-áⁿ càháⁿ-gá cundecu ndihí-gá, te ducaⁿ quide-gá cuendá dándóo canúú-yu nchaa ñáyiú càchí sá ïo cunuú. ²⁹ Te núú xiáⁿ ni ñáyiú vá cúú càchí-yu sá ïo càhnu cuú-yu núú Yá Ndióxi. ³⁰ Dico nchòhó chi mee Yá Ndióxi ní quide-gá ndécú-ndó ndihí Xítohó Jesucristú, te Xítohó Jesucristú ní quide-gá ní cutnùní iní-ó sá Yá Ndióxi cúú-gá Yaá ndécú ndihí nchaa sá xíní tñuní-gá. Te ñu-ni Xítohó Jesucristú ní quide-gá cuendá sá nchóó vǎ cundècu-gá cuéchi-o núú Yá Ndióxi, te ducaⁿ cundecu yíñuhu-o núú-gá, te nduu táhú-ó cundecu-o ndihí-gá ni caa ni quíhíⁿ. ³¹ Te sá dúcáⁿ quide-gá núú xiáⁿ xíní ñuhu-xi cada-o nacuaá càháⁿ-xi núú tütú Yá Ndióxi núú càchí-xi: “Vá càchí-ndó sá mée-ndó ïo càhnu cuu-ndo, chi càchí-ndó sá Yaá cúú Xítohó-ndó ïo càhnu cuu-gá”, duha càchí-xi núú tütú-gá.

2

Tnúhu sá càháⁿ nàcuáa ní cuu ní xíhí Xítohó Jesucristú núú cùrúxí

¹ Te nchòhó ñáyiú ndècu ndihí-í ichi Xítohó Jesucristú sa nàha-ndo sá cùtnàhá ní quixí-í ní càháⁿ-í tnúhu Yá Ndióxi núú-ndó, te ñà túú ní càháⁿ-í dàtná càháⁿ ñáyiú ío váha sàá díquí-xi, àdi datná càháⁿ ñáyiú ío túha. ² Chi cùtnàhá ní xíndecu ndihí ñaha-í xii-ndo chi ní sani iní-í sá mée-ní cuendá Xítohó Jesucristú càháⁿ-í núú-ndó ndihí nacuaá ní cuu ní xíhí-gá, te ñu ducaⁿ ní quide-í. ³ Te cùtnàhá ní quexìo-í núú ndécú-ndó te ni ñà cùtnùní iní-í nása cada-í ní cùu,

te ío ní quiyùhú iní-í ní càháⁿ-í tnúhu-gá núú-ndó. ⁴ Te cùtnàhá ní càháⁿ-í nàcuáa ndùu tnúhu Xítohó Jesucristú núú-ndó, te nàha-ndo sá Espiritú Yá Ndióxi ní chindee ñàha-xi xii-í ní càháⁿ-í tnúhu-gá núú-ndó, te tnúhu-áⁿ ní quèe-xi iní-ndó. Te ñà túú ní càháⁿ-í ñáyiú tnúhu càhnu núú-ndó tñùhu sá càháⁿ cue ñáyiú ío váha sàá díquí-xi. ⁵ Te ducaⁿ ní cuu cuendá sá nchòhó quíndáá iní-ndó tnúhu Yá Ndióxi chi ní quide-gá sá vǎha sá cúú-xí iní-ndó, te ñà díú sá cuendá tnúhu sá càháⁿ ñáyiú càchí sá ïo túha ducaⁿ ní sándáá iní-ndó tñùhu-gá.

Espiritú Yá Ndióxi quidé-xí cùtnuní iní-ó nàcuáa sàni iní-gá

⁶ Te nchoo càháⁿ-ó tñùhu càhnu núú ñáyiú sa ní níhí ndéé ndècu ichi Xítohó Jesucristú. Te tnúhu-áⁿ ñà túú càháⁿ ñáyiú ñà túú ndècu ichi-gá, te ni cuè téé yíndaha ñaha xii-yu ñà túú càháⁿ-güedé tnúhu-áⁿ chi cue téé-áⁿ naa-güedé. ⁷ Te tnúhu càhnu-áⁿ cúú-xí tnúhu Yá Ndióxi, te mee-gá ní càchí-gá ndéé cùtnàhá vátá ngáva-gá ñuyúú sá ncháá ñáyiú na quíndáá iní tnúhu-áⁿ te nduu táhú-yu cundecu-yu ndihí-gá núú ío váha caa ndecu-gá ni caa ni quíhíⁿ. Te tnúhu-áⁿ ndúú yùhu-xi ní cuu. ⁸ Te ni ñáyiú cue téé yíndaha cue ñáyiú ñuyúú-a ñà túú tècú tñuní-güedé tnúhu-áⁿ, chi núú dícó tècú tñuní-güedé tnúhu-áⁿ te vá catá càa-güedé Xítohó Jesucristú núú cùrúxí cahni ñaha-güedé xii-gá ní cùu. Te ñu-ni Yaá-áⁿ ío càhnu cuu-gá. ⁹ Dico ducaⁿ ní cuu chi ní quee ndáá-xi nàcuáa càháⁿ-xi núú tütú Yá Ndióxi núú càchí-xi:

Yá Ndióxi sa ní sani iní-gá nchaa nàcuáa cada-gá sá cúú-xí cuendá nchaa ñáyiú cùu iní ñàhá xii-gá.

Te sá ní sani iní-gá cada-gá cúú-xí sá vátá quíní-gá ñáyiú te ni vátá cùndédóho-gá-yu,

te ni ñà túú tnàhí cùtnuní iní-yu nása cada-gá.

Duha cächí-xi núú tütú-gá. ¹⁰ Te mee Yá Ndiöxí ní cachí-gá sá Espíritú-gá cada-xi te nchoo cùtnuní iní-ó nchàa nacuáa sàni iní-gá cada-gá, núu xiáⁿ ducaⁿ tècú tnùní-ó vitna, chi Espíritú-gá xiní-xi nchaandi túhú nacuáa sàni iní-gá cada-gá.

¹¹ Te ñá ñⁿ ñáyiu xiní ndáá-yu nacuáa sàni iní ingá ñáyiu, chi mee ñáyiu-án xiní ndáá-yu nchaa nacuáa sàni iní-yu. Te ducaⁿ sätnahá-xi cùu Yá Ndiöxí chi medi-ni Espíritú-gá xiní-xi nchaa nacuáa sàni iní-gá. ¹² Te nchoo chi Yá Ndiöxí ní taxi-gá Espíritú-gá ndécú ndìhi-o, te ñá díú ñùyú-a ducaⁿ ni quèe espíritú ní ngúndecu ndìhi-o. Te ducaⁿ ní taxi-gá Espíritú-gá ndécú ndìhi-o cuendá ducaⁿ cùtnuní iní-ó nacuáa ndùu nchaa sá vâha sá dicó ducaⁿ ní taxi-gá ndécú ndìhi-o. ¹³ Te cuendá nchaa sá vâha-án cáháⁿ-ndí, te cáháⁿ-ndí nacuáa dàcahu iní ñáhá Espíritú Yá Ndiöxí xii-ndo, te ñá túú cáháⁿ-ndí nacuáa càhu iní ñáyiu ñùyú-a cáháⁿ-yu, te diu-ni nchaa tnúhu dàcahu iní ñáhá Espíritú-gá xii-ndí cáháⁿ-ndí, diu-ni nchaa xiáⁿ dánèhé-ndí nchaa ñáyiu ndècu ndìhi tucu Espíritú-gá.

¹⁴ Te ñáyiu ñá túú ndècu ndìhi Espíritú Yá Ndiöxí ñá túú tnàhá iní-yu nacuáa ndùu tnúhu dàtecú tnúhu ñaha Espíritú-gá xií-yu, te ni ñá túú tècú tnùní-yu, te cächí-yu sá ñá túú nàndìhi-xi. Te ducaⁿ chi mee-ni nchàa ñáyiu ndècu ndìhi Espíritú-gá tècú tnùní-yu nacuáa ndùu tnúhu-án. ¹⁵ Te cue ñáyiu ducaⁿ ndècu ndìhi Espíritú Yá Ndiöxí cùtnuní ndáá iní-yu ná cúú nchàa sá vâha, te vá yôo ñⁿ xiní nchaa nacuáa sàni iní-yu. ¹⁶ Te núú tütú Yá Ndiöxí cächí-xi: “Vá yôo ñⁿ xiní nacuáa sàni iní Yá Ndiöxí, núu xiáⁿ vá yôo ñⁿ ndacu ná danèhé

ñáhá xii-gá”, duha cächí-xi núú tütú-gá. Te nchoo chi ñⁿ-ni sàni iní-ó ndìhi Xítóhó Jesucristú.

3

Cue téé xíquide chiúⁿ Yá Ndiöxí

¹ Te nchòhó ñáyiu ndècu ndìhi-í ichi Xítóhó Jesucristú cächí tnúhu-í xii-ndo sá ñá ní ñìhí-í nacuáa cada-í cáháⁿ-í tnúhu-gá núú-ndó dàtná cáháⁿ-í núú nchàa ñáyiu quide nchaa nacuáa cáháⁿ Espíritú Yá Ndiöxí, chi ní cáháⁿ-í núú-ndó dàtná cáháⁿ-í núú nchàa ñáyiu cùnuu nchaa sá cuèhé sá dúhá iní-xi, te ní quide ñaha-í xii-ndo dàtná cue ñáyiu íchí ní sándáá iní tnúhu Xítóhó Jesucristú, núu xiáⁿ ducaⁿ ní cáháⁿ-í núú-ndó. ² Te ní quide ñaha-í xii-ndo dàtná ñⁿ déhe yiquíⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ñⁿ sá ñá túú tnàhí úhú tecú tnùní-ndó, te ñá túú ní dànèhé ñáhà-í xii-ndo ñⁿ sá xító-í sá vâ tècú tnùní-ndó. Te quide cuendá-í sá díú-ní dùcaⁿ vá tècú tnùní-ndó ndèé vitna te núu na dànèhé ñáhà-í xii-ndo nchàa dava-gá tnúhu. ³ Te ducaⁿ chi quide-ni-ndo nacuáa sàni iní mée-ndó, chi ndècu-ni-ndo ichi cuédú iní, te nàá ndìhi tnàha-ni-ndo, te ñá túú tnàhí cùu ñⁿ-nuu-ndo ndecu-ndo. Te xiáⁿ cùtnuní sá mée-ní nchàa nacuáa sàni iní mée-ndó quide-ndo, te xíquide-ndo dàtná quidé nchàa ñáyiu ñá túú ndècu ichi Xítóhó Jesucristú. ⁴ Te dava-ndo cächí-ndó: “Yúhú cúú-í cuendá té Páblú.” Te dava-ndo cächí-ndó: “Yúhú cúú-í cuendá té Àpolós”, duha cächí-ndó. Te sá dúcáⁿ cáháⁿ-ndó xiáⁿ cùtnuní sá quidé-ní-ndó mée-ni nchaa nacuáa sàni iní mée-ndó.

⁵ Te yúhú té Páblú cächí tnúhu-í xii-ndo sá ñá túú cùnuu-í, te ni té Àpolós ñá túú cùnuu-dé chi dicó cue téé xinu cuechi núú Yá Ndiöxí cúú-ndí, te ní cáháⁿ-ndí

tnúhu-gá núú-ndó, núu xiǎⁿ ní sándáá iní-ndó. Te ndi díiⁿ ndi díiⁿ nduu chiuⁿ ní táhú Yá Ndióxi cada-ndí. ⁶ Te yúhú cúu-í datná ìiⁿ téé chihí tatá chí dàcaháⁿ ñàhà-í xii-ndo tùha-ndo ichi Yá Ndióxi. Te té Àpolós cúu-dé datná ìiⁿ téé nàcuhñu chí téé-áⁿ ndécú-dé dánèhé ñáhà-dé xii-ndo tnúhu-gá. Te Yá Ndióxi cúu-gá Yaá quidé sàhnu tatá ní chihí-í-áⁿ, te duha càháⁿ-í chí diu-gá quidé-gá tá nihí ndéé-ndó ndècu-ndo ichi-gá. ⁷ Te núu xiǎⁿ ni téé chihí tatá te ní téé nàcuhñu ñá túú cùnuu-güedé, dico Yá Ndióxi ío cùnuu-gá chí diu-gá quidé-gá xñu tatá-áⁿ te sàhnu-xi. ⁸ Te ìiⁿ-ni cùu téé chihí tatá ndihí téé nàcuhñu. Te ducaⁿ sàtnahá-xi cùu nchúhú cue téé xiquide chiúⁿ Yá Ndióxi, te nàcuáa nduu chiuⁿ ní quide-ndí te ducaⁿ cunduu táhú taxi Yá Ndióxi nduu táhú-ndí. ⁹ Te nchòhó cúu-ndó datná ìiⁿ xichi núú ní quée tatá, te nchúhú cúu ìiⁿnuu-ndí quidé chiúⁿ-ndí xiáⁿ. Te ducaⁿ sàtnahá-xi cùu-ndo chí cùu cuendá ñáhà Yá Ndióxi xii-ndo, te nchúhú cúu ìiⁿnuu-ndí quidé-ndí chiúⁿ-gá.

Te cùu tucu-ndo datná ìiⁿ vehe sá vítná sáá, te ducaⁿ sàtnahá-xi cùu-ndo chí Yá Ndióxi quidé-gá tá sàhnu nihnu-ndo ichi-gá cuáhàⁿ. ¹⁰ Te yúhú cúu-í datná ìiⁿ téé cùnuu dacao vehe te ní tava-í cimièntú-xi, te díiⁿ cue téé véxi dàcaa-güedé ndóho, te ìiⁿ ìiⁿ cue téé-áⁿ ìo xñi ñuhu-xi cada cuendá-güedé nàcuáa dacàa-güedé. Núu ducaⁿ sàtnahá-xi cùu yúhú chí Yá Ndióxi ní taxi-gá chiúⁿ quide-í te chindee ñaha-gá, chí díhna-gá-í ní quixi-í ní càháⁿ-í tnúhu Xítohó Jesucristú núú-ndó, te díiⁿ cue téé véxi dàcuaha ñaha-ná xii-ndo tnúhu-gá, te ìiⁿ ìiⁿ cue téé-áⁿ ìo xñi ñuhu-xi cada cuendá-güedé nàcuáa dacuàhà ñaha-güedé xii-ndo tnúhu-gá. ¹¹ Te cimièntú vehe-áⁿ cada iní-ó sá cúu-xí mèe Xítohó Jesucristú, te ducaⁿ chí yúhú ní dánèhé ñàhà-í xii-ndo ní ngúndecu

ndihí-ndo Xítohó Jesucristú, te vá yòo-gá cundecu ndihí-ndo chí ìiⁿdii díi-ni-gá ndécú. ¹² Te dava cue téé dàcaa-güedé vehe váha te chihí-güedé díhúⁿ cuáaⁿ, ndihí díhúⁿ cuixíⁿ, ndihí yúú sá ìo vii càa. Te dava-güedé dacàa-güedé vehe vítú, te dava-güedé dacàa-güedé vehe ité, te dava-güedé dacàa-güedé vehe tnuvixiⁿ. ¹³ Te sáá nduu te nchaa vehe-áⁿ càyú-xi, te vehe vítú-áⁿ ndihí vehe ité-áⁿ ndihí vehe tnuvixiⁿ-áⁿ ndoo ndoo càyú, te nchaa vehe váha-áⁿ vǎ càyú-xi cuèi na yàha ñuhú. Te nchaa cue téé ní dácáá vèhe váha-áⁿ cada iní-ó sá cúu-güedé ñáyiu ío váha quide chiúⁿ Yá Ndióxi. Te nchaa cue téé ní dácáá vèhe vítú, ndihí cue téé ní dácáá vèhe ité, ndihí cue téé ní dácáá vèhe tnuvixiⁿ cada iní-ó sá cúu-güedé ñáyiu ñá túú cuini cada chiúⁿ Yá Ndióxi nàcuáa tàú-xi cunduu. Te sáá nduu te cutnùni nàcuáa nduu chiúⁿ ní quide ìiⁿ ìiⁿ ñáyiu, chí Yá Ndióxi càháⁿ-gá nàcuáa nduu chiúⁿ ní quide ìiⁿ ìiⁿ ñáyiu ní quide chiúⁿ-gá. ¹⁴ Te cue ñáyiu ío váha xiquide chiúⁿ Yá Ndióxi te cùdí chiúⁿ quidé-yu, te ñáyiu-áⁿ nihí-yu sá ndúú tǎhù-yu. ¹⁵ Te cue ñáyiu ñá túú quide chiúⁿ Yá Ndióxi nàcuáa tàú-xi cunduu, te vá cùdí chiúⁿ ní quidé-yu chí cuíta te ndóo-ná-yu duha, dico mèe-yu chí naníhí tǎhù-yu.

¹⁶ Te yúhú càháⁿ-í dóho-ndo dándacu-í iní-ndó sá cúu-ndó datná vehe Yá Ndióxi, chí Espíritú-gá ndécú ndihí ñaha-xi xii-ndo. ¹⁷ Te núu yoo na dànaa ñaha xii nchòhó ñáyiu cùu veñúhu-gá, te Yá Ndióxi danàa ñaha-gá xii ñáyiu-áⁿ, te ducaⁿ càda-gá chí nchòhó cúu-ndó ñáyiu cùu cuendá-gá.

¹⁸ Te vá dándàhú-ndó mèe-ndo sá ìo tùha-ndo. Te núu ío dava-ndo sàni iní-ndó sá tùha-ndo datná sání ìni cue ñáyiu ñá túú ndècu ichi Yá Ndióxi, te cada-ndo sá cúu-ndó datná ñáyiu ñá túú tnàhí tùha, te ducaⁿ te cuu ndisa-ndo ñáyiu

túha sá cúu-xí Yá Ndiöxí. 19 Te nchaa sá xini tnüni nchaa ñáyiú cächí sá ïo túha ñá túú ndècu ichi Yá Ndiöxí ñá túú nändíhi-xi sá cúu-xí-gá. Te cächí-xi núú tütú-gá: “Nchaa ñáyiú cächí sá ïo túha te Yá Ndiöxí dandöo canúú ñáhá-gá xií-yu núú nchàa sá quidè-yu”, duha cächí-xi núú tütú-gá. 20 Te cächí tucu-xi ingá xichi: “Yá Ndiöxí cütüni iní-gá nchaa nàcuáa sàni iní ñáyiú cächí sá ïo túha. Te nchaa nàcuáa sàni iní-yu-áⁿ cächí-gá sá ñà túú vèdana nändíhi-xi”, duha cächí-xi núú tütú-gá. 21 Núú xiáⁿ càháⁿ-í dóho-ndo sá vã cächí-ndó sá nchúhú cue téè dānehé ñáhá xì-ndo tnúhu-gá ïo càhnu cuu-ndí. Te nchaa sá ïo ñuyú-a cùu-xi sá vãha sá cúu-xí-ndó. 22 Te cuèi yúhú ndíhi té Àpolós ndíhi té Pelú ndécú-ndí sá cúu-xí-ndó, te cuèi nchaa sá ïo ñuyú-a te cuèi nchaa nduu ndècu-ndo te cuèi sá cùu-ndó dīco nchaa cùu-xi sá vãha sá cúu-xí-ndó. Te cuèi nchaa sá ndécú tnáví, te cuèi nchaa sá cóo ndèé cuèé-gá nchaa cùu-xi sá vãha sá cúu-xí-ndó. 23 Te mee-ndo ndècu-ndo sá cúu-xí Xitohó Jesucristú, te mee Xitohó Jesucristú ndécú-gá sá cúu-xí Yá Ndiöxí.

4

Nàcuáa ndiú chiúⁿ quide cue téè ní táuchúúⁿ Xitohó Jesucristú càháⁿ tnúhu-gá

1 Te cada cuendá-ndó sá nchúhú dīcó-ni cue téè xīnu cuechí núú Xitohó Jesucristú cúu-ndí, te chiúⁿ-ánⁿ ní taxi Yá Ndiöxí quidè-ndí càháⁿ-ndí tnúhu sá ní cachí-gá yiyùhu ni cuu. 2 Te xini ñuhu-xi sá ncháá ñáyiú ducaⁿ ní sáñaha Yá Ndiöxí chiúⁿ quidè-yu cada ndáá-yu cadá-yu chiúⁿ-ánⁿ. 3 Te yúhú ñá túú quide cuendá-í núú nása ndúu tnúhu càháⁿ-ndó cuendá-í núú cùu-í téè váha àdi ñá túú cùu-í. Te diu-ni ducaⁿ ñà túú quide cuendá-í núú nása-gá càháⁿ nchaa dāva-gá

ñáyiú cuendá-í. Te ni mèe-í ñá túú càháⁿ-í núú cùu-í téè váha àdi ñá túú cùu-í. 4 Te sànuu ini-í sá ñà túú nã cümāni-í núú Yá Ndiöxí, dīco ñá dīú sá xiáⁿ te cächí-í sá ñà túú cuèchi-í ndécú núu-gá, chí mee-gá nãhá ndáá-gá te núú nása quide-í ndécú-í. 5 Te nchòhó vá càháⁿ-gá-ndó sá ñà túú cündáá ñáyiú núú Yá Ndiöxí, chí vátá sàá-gá nduu cündáá cuèchi-yu. Te na sàá nduu quixi tucu Xitohó Jesucristú te dāvā-áⁿ dātúu-gá nchaa sá quidè-yu, nchaa sá ñà túú xini-ó quidè-yu vitna, te ducaⁿ dātúu-gá nchaa nàcuáa sàni iní-yu. Te Yá Ndiöxí càháⁿ váha-gá cuendá nchaa ñáyiú ní quide váha.

6 Te nchòhó ñáyiú ndècu ndíhi-í ichi Xitohó Jesucristú, càcunehe-í té Àpolós ndíhi yúhú núu-ndó dānehé ñáhá-í xii-ndo nàcuáa cada-ndo cuendá ducaⁿ cùu-xi ñⁿ sá vãha sá cúu-xí-ndó, ndíhi cuendá sá nchòhó canchicúⁿ nihnu-ndo càda-ndo mee-ni nchaa nàcuáa yòdo tnuní núú tütú Yá Ndiöxí. Te ducaⁿ te vá cächí-ndó sá ñⁿ téè càháⁿ tnúhu Yá Ndiöxí ïo-gá càhnu cuu-dé dācúxí ingá-dé. 7 Te nchòhó vá cächí-ndó sá ïo-gá cúnúu-ndo dācúxí dāva-gá ñáyiú chí Yá Ndiöxí ní quide-gá ní ngündecu ndíhi-ndo nchaa sá xini tnüni-ndó. Te mee-gá ducaⁿ ní quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mēé-ndó ní quide-ndo dūcaⁿ ní ngündecu ndíhi-ndo nchaa sá xini tnüni-ndó.

8 Te nchòhó quidè-ndó sá ñà túú tnàhí-gá ná cümāni-ndó núú Yá Ndiöxí, te quide-ndo sá ní ñihí-ndó nchaa sá cuini-ndó núu-gá ndécú ndíhi-ndo, te sànuu sá cúu-nã-ndó datná cue téè yindaha ñáyiú, te nchúhú ñá túú cùu ñⁿnuu ndíhi ñaha-ndí xii-ndo quindaha ndíhi ñaha-ndí xii-ndo ñáyiú, jte váha-ni te núú dīcó ndisa sá yindaha-ndo ñáyiú chí tnàhá nchúhú ní tnàhá ndíhi ñaha-ndí

xii-ndo quindaha-ó-yu te núu dícó cúú-xí ìⁿ sá ndàá dico ñáhá! ⁹ Te yúhú quidé cuèndá-í sá nchúhú cue téé ní táúchíúⁿ Xítóhó Jesucristú cáháⁿ tnúhu-gá núú ñáiyu ní cachí Yá Ndióxí sá cúú-ndí cue téé ñá túú nàndíhí sá cúú-xí dàva-gá ñáiyu. Te ní cachí tucu-gá sá cúú-ndí dàtná cue ñáiyu sa ní tnahá òré cuú-xi quíhíⁿ nacháhu cuéchi-xi, te nchaá ñáiyu cùñúhu ñáhá-yu xii-ndí sá dúcáⁿ ndòho-ndí, te tnahá nchaá espíritú cùñúhu ñaha-xi xii-ndí. ¹⁰ Te cuèndá sá xínú cuèchi-ndí núú Xítóhó Jesucristú, xiáⁿ cúú-ndí dàtná cue téé ñá túú vèdana nàndíhí sá cúú-xí ñáiyu. Te nchòhó quidé-ndó sá cúú-ndó ñáiyu ío túha ndècu ndíhí Xítóhó Jesucristú. Te ñáiyu càchí-yu sá nchúhú cúú-ndí cue téé ñá túú ndàcu cada ìⁿ sá cádá sá cúú-xí Yá Ndióxí. Te nchòhó quidé-ndó sá cúú-ndó ñáiyu ío vâha ndàcu quide ìⁿ sá sání iní-ndó sá cúú-xí-gá. Te cue ñáiyu dàquee tíhú ñáhâ-yu xii-ndí, te nchòhó néhè-yu sá yíñúhu núú-ndó. ¹¹ Te nchúhú chí nchaá-ni nduu ío ndòho-ndí, chí xihí-ndí docó, yíchí-ndí ndute, te ñá túú dǒo-ndí, te nchaá ñáiyu quide úhú ñáhâ-yu xii-ndí, te ní vèhe-ndí ñá túú ndèé cáá cùndecu-ndí. ¹² Te ío ndòho-ndí quidé chiúⁿ-ndí nihí-ndí sá xéxi-ndí. Te cue ñáiyu xícuehé ñáhâ-yu xii-ndí dico xicáⁿ táhú-ndí núú Yá Ndióxí cuèndá-yu, te ñá cúú tnahí quini ndeé ñáhâ-yu xii-ndí dico quide cahnu iní-ndí nchaá sá quidé ñáhâ-yu. ¹³ Te mee-ni tnúhu cuèhé tnúhu duha càháⁿ-yu cuèndá-ndí dico sàcahnu iní-ndí te dāsahú-ndí-yu mee-ni tnúhu váha. Te càchí-yu sá cúú-ndí dàtná ìⁿ sá ñá túú-gá vèdana nàndíhí, te nchaá-ni nduu ducaⁿ càháⁿ-yu xáhâⁿ-yu xii-ndí.

¹⁴ Te yúhú duha càháⁿ-í núú tütú-a dāsahú ñáhâ-í xii-ndo, dico

ñá díú tnúhu sá cúú càháⁿ núú-ndó càháⁿ-í. Te duha càháⁿ-í dóho-ndo chí quide iní-í sá sùúni dàtná déhe mee-í cúú-ndó chí ío cùu iní ñáhâ-í xii-ndo. ¹⁵ Te nchaá-o ndècu-o ichi Xítóhó Jesucristú vitna, dico yúhú cúú-í téé díhna nuu ní dánèhé ñáhâ xii-ndo nacuaá ndùu tnúhu sá càháⁿ nàcuáa naníhí táhú-ó, núu xiáⁿ cúú-í dàtná tātá-ndó. Te cuèi vâi vihi cue téé na quixi-güedé danèhé ñáhâ-güedé xii-ndo tnúhu-gá dico ìⁿ di-ni yúhú cúú-í téé díhna nuu-gá ní dánèhé ñáhâ xii-ndo tnúhu-gá. ¹⁶ Núu xiáⁿ càháⁿ-í dóho-ndo sá cànchícúⁿ nihnu-ndo càda-ndo nchaá nacuaá quide-í.

¹⁷ Te xiáⁿ núu sa ní tendaha-í té Timutéu véxi coto ñaha-dé xii-ndo, te téé-áⁿ ío cùu iní-í-dé te quide ndáá-dé, te cùu-dé dàtná déhe-í chí yúhú ní sanu ichi-í-dé ichi Xítóhó Jesucristú, te téé-áⁿ cachí tnúhu-dé xii-ndo nchàa nacuaá quide-í ndécú-í ichi-gá. Te diu-ni nàcuáa na càchí tnúhu-dé-áⁿ diu-ni ducaⁿ quide-í nchaá xichi núu tàcá ñáiyu dàcuaha tnúhu Xítóhó Jesucristú. ¹⁸ Te dava nchòhó ío quide cahnu-ndo mee-ndo chí sání iní-ndó sá vâ quixí-gá-í quixi coto ñaha-í xii-ndo. ¹⁹ Dico núu mee Yá Ndióxí ná càchí-gá te ío ndíhí quixi coto ñaha-í xii-ndo, te dàvâ-áⁿ quini-í te núu nása quide nchaá ñáiyu ducaⁿ ío xiquide cahnu mee-xi-áⁿ ndécú-yu ichi Xítóhó Jesucristú. Te vá cádá cuèndá-í tnúhu càháⁿ-yu chí chiúⁿ quidé-yu cada cuèndá-í. ²⁰ Te vitna yindaha ñaha Yá Ndióxí xii-o, te chindee ñaha-gá xii-o quide-o nchaá sá vâha sání iní-ó quide-o te ñá díú mèe-ni sá càháⁿ-ó. ²¹ Te ío chí cání iní núu ndèdacáa sá vâha-gá cada-í òré ná quéxió-í núú ndécú-ndó, núu sá ténàá ñáhâ-í xii-ndo àdi sá càháⁿ ndíhí ñaha-í xii-ndo ndíhí tnúhu vii tnúhu váha nàcuáa cutnùni iní-ndó sá cúú iní ñáhâ-í xii-ndo.

5

Èⁿ cuéchi càhnu vihi

1 Te yúhu sa ní níhí ndǎá-í tnúhu nàcuáa cùu ndecu-ndo, chí ìⁿ té ndècu ndìhi-ndo ndeca-dé nǎná chàhá-dé. Te xǎⁿ cúú-xí ìⁿ cuèchi càhnu vihi, chí ndéé nchaa ñáiyu ñá túú ndècu ichi Yá Ndióxi càchí-yu sá vǎ cúú tnàhí ducaⁿ càda-o. 2 ¡Te nchòhó ío quide cahnu-ni-ndo mee-ndo xindecu-ndo! ¡Te tàú-ndó sǎ cùndiyí-ndó ndìxi cuèchi iní-ndó sǎ dúcáⁿ cùu ndecu-ndo ni cuu! Te té ducaⁿ quide-áⁿ xini ñuhu-xi sá vǎ dǎná-gǎ-ndó nihí tnáhá ndìhi ñaha-dé xii-ndo ni cùu dico ñá túú dùcaⁿ quide-ndo. 3 Te yúhú ñá túú ndècu ndìhi ñaha-í xii-ndo dico datná tnúhu sá ndécú ndìhi ñaha-í xii-ndo chí ducaⁿ-ni ío ñuhu iní ñáhà-í xii-ndo. Te yúhú càchí-í sá náchǎhu té-áⁿ cuèchi-dé sá dúcáⁿ quide-dé, te ñiu-ni ducaⁿ càháⁿ-í núú-ndó te núu dicó ndécú ndìhi ñaha-í xii-ndo. 4 Te òré nǎtácá-ndó càháⁿ ndìhi-ndo Yá Ndióxi te ñiu-ni Xítóhó Jesucristú ñá túú dǎna ndéé-gǎ chindèe ñaha-gǎ xii-ndo, te òré-áⁿ cada-ndo nàcuáa cuini Xítóhó Jesucristú cada-ndo, te cada iní-ndó sǎ tnáhá-í ndécú ndìhi ñaha-í xii-ndo. 5 Chí tàú-xi sá té ducaⁿ quide-áⁿ daquèe tǎhú-ndó-dé, te ducaⁿ te sácuihná dandòho ñaha-xi xii-dé cuèi na cúú-dé, dico na sǎá nduu te nduu tǎhú-dé cundecu-dé ndìhi Xítóhó Jesucristú.

6 Te nchòhó ñá túú ndùu váha-xi sǎ càchí-ndó sǎ ío càhnu cuu-ndo. Te xini-ndó sǎ cuèi luha-ni levadurá ná quǎhu yuchi cuáha pǎá dándaa-xi cuèi luha-ni nà quǎhu te nihí-ni yuchi sǎháⁿ ndoho-xi. Te ducaⁿ sǎtnáhá-xi cùu nchohó chí núu ndècu ndìhi-ndo ìⁿ ñáiyu quide sǎ ñá túú vǎha te nchaa-ndo ñá túú-gǎ cúú vǎha iní-ndó ndècu-ndo. 7 Te xini ñuhu-xi sǎ cadá-ndó datná quidé cuè ñáiyu quide vico pascuá, chí ñá túú chíhi-yu levadurá yuchi cuáha pǎá xéxi-yu nduu quidé-yu vico-áⁿ. Te sǎ quǎhu pǎá-áⁿ cada iní-ó sǎ cúú-xí nchàa sǎ cuèhé sǎ dúhá ñí xóo cada-ndo. Te vǎ cadá-gǎ-ndó ñí ìⁿ sǎ cuèhé sǎ dúhá,

te ducaⁿ te cuu-ndo ñáiyu váha chí sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-áⁿ cada iní-ó sǎ cúú-güedi datná Xítóhó Jesucristú nàcuáa ní xihí-gǎ núú cùrúxi. 8 Te núu xǎⁿ xini ñuhu-xi sǎ vǎ cadá-gǎ-ndó ñí ìⁿ sǎ cuèhé sǎ dúhá sǎ ñí xóo cada-ndo, te ni vǎ cúhúⁿ-gǎ iní-ndó te ni vǎ cadá-gǎ-ndó, te ni yùhu ñí iní-ná-ndó càda-ndo mee-ni sǎ vǎha.

9 Te tutú sǎ sà ní dáquixi-í ndaha-ndo ñí cachí-í sǎ vǎ nihí tnáhá-ndó ndìhi cue ñáiyu ndècu ichi díí iní. 10 Te sǎ dúcáⁿ càháⁿ-í núú tütú ní dáquixi-í ndaha-ndo te vǎ cáni iní-ndó sǎ yúhú càchí-í sǎ vǎ cúú-gǎ tnáhá tnúhu-ndo ndìhi cue ñáiyu ndècu ichi cuehé ichi duha, ndìhi ñáiyu ndècu ichi díí iní, ndìhi ñáiyu xiho nchaa sǎ ío ñuyíú, ndìhi ñáiyu dùhu sǎ ndécú ndìhi tnaha ñáiyu-xi, ndìhi ñáiyu quide cahnu sǎ càchí-yu cùu ndióxi te ñá ndǎá sǎ ndiòxi cúú-xí chí dicó cue té ñuyíú-a ní cadúha nchaa xǎⁿ, chí núu ducaⁿ na càda-ndo vǎ tnáhá tnúhu-gǎ-ndó ndìhi-yu te xini ñuhu-xi sǎ vǎ cùndècu-gǎ-ndó núú ndécú-yu. 11 Te ñá túú dùcaⁿ quee-xi nacuáa càháⁿ-í núú tütú-í, chí yúhú càchí-í sǎ vǎ cúú tnáhá tnúhu-ndo ndìhi ñáiyu càchí sǎ ndécú ichi Xítóhó Jesucristú te ñá ndǎá sǎ ndécú-yu ichi-gǎ. Te núu cùu-yu ñáiyu ndècu ichi díí iní, àdi cuú-yu ñáiyu xiho nchaa sǎ ío ñuyíú-a, àdi cuú-yu ñáiyu quide cahnu nchaa sǎ càchí-yu cùu ndióxi te ñá ndǎá chí dicó cue té ñuyíú-a ní cadúha nchaa xǎⁿ, àdi cuú-yu ñáiyu yiti yùhu-xi, àdi cuú-yu ñáiyu quǎhu, àdi cuú-yu ñáiyu dùhu sǎ ndécú ndìhi tnaha ñáiyu-xi, te nchaa ñáiyu ducaⁿ càchí sǎ ndécú ichi-gǎ te ñá ndǎá te ducaⁿ xǎiquidé-yu, te ni vǎ cúú nihí tnáhá-ndó ndìhi-yu caxi-ndo

ndihí-yu. ¹²⁻¹³ Te ñá díú yǔhú cùú-í téé cáháⁿ cuendá nchaa ñáiyu ñá túú ndècu ichi Xítohó Jesucristú nũ quide ndáá-yu àdi ñá túú quide ndáá-yu ndècú-yu, chi mee Yá Ndiòxí cáháⁿ-gá te núu nása quidé-yu ndècú-yu. Dico nchòhó chi tàú-ndó càda cuendá-ndó nũ nása quide cue ñáiyu ndècu ndihí-ndo ichi Xítohó Jesucristú. Núu xǐáⁿ xíní ñũhu-xi daquee tíhú-ndó tée ducaⁿ ñá túú quide váha ndècu ndihí-ndo-áⁿ, te vá dáñá-gá-ndó nihí tnáhá ndihí ñaha-dé xii-ndo.

6

Nàcuáa tàú-xi cada ñáiyu ndècu ichi Xítohó Jesucristú te núu ñá túú ndècu ndihí váha tnáhá-yu

¹ Te dava nchòhó òré ñá túú ndècu ndihí váha tnáha-ndo te cùyi-ndo cuáháⁿ-ndó nũ cuè téé cùchiuⁿ ñá túú ndècu ichi Xítohó Jesucristú sàcáⁿ cuéchi-ndo, te ñá túú dùcaⁿ taú-xi cada-ndo chi núú cuè téé ndècu ichi-gá ducaⁿ tàú-ndó quihíⁿ-ndó càcáⁿ cuéchi-ndo. ² Te nchòhó sa ñaha-ndo sá ncháá ñáiyu cùu cuendá Yá Ndiòxí sáá nduu cáháⁿ-yu te núu ní quide ndáá nchaa dava-gá ñáiyu àdi ñá túú ní quide ndáá-yu, te nchòhó tnáhá-ndó cùu-ndo ñáiyu ducaⁿ cáháⁿ, te núu ducaⁿ te cutnùní iní-ndó sá ndácú-ndó càda ndáá-ndó ncháa cuéchi sá ñá túú úhú cundáá vitna ndècu-ndo ñuyíú-a. ³ Te nchòhó sa ñaha-ndo sá ncháá ndéé cue espíritú xínú cuéchi núú Yá Ndiòxí sáá nduu cáháⁿ-ó te núu nása quide-xi ndècu-xi. ¡Núu xǐáⁿ cùtnùní iní-ó sá úúⁿ-gá ndacu-o càda ndáá-ó ncháa cuéchi sá íó ñuyíú-a! ⁴ Te núu íó dava-ndo íó nása cùu ndècu-ndo te xínáá-ndó, te vá quihíⁿ-ndó càcáⁿ cuéchi-ndo nũ cuè téé ndèhe-ndo sá ñá túú ndècu-güedé ichi Yá Ndiòxí, dico nchòhó chi da núú cuè téé-áⁿ cuáháⁿ-ndó sàcáⁿ cuéchi-ndo. ⁵ Te duha cáháⁿ-í cuendá cuahaⁿ núú-ndó chi ñá túú quide váha-ndo

sá dúcáⁿ quide-ndo. ¿Te náa dícó-ñá ñá túú tnáhi ìⁿ téé cùtnùní iní-xi nàcuáa cada ndáá cuéchi-ndo ndècu ndihí-ndo ichi Xítohó Jesucristú-áⁿ?

⁶ Te nchòhó, ñá túú quide váha-ndo, chi dava-ndo cuáháⁿ-ndó nũ cuè téé ñá túú ndècu ichi Xítohó Jesucristú sàcáⁿ cuéchi-ndo cuendá dava-gá cue ñáiyu ndècu ndihí-ndo ichi-gá.

⁷ Te ñá túú quide váha-ndo sá dúcáⁿ náa ndihí tnáha-ndo te cuáháⁿ-ndó sàcáⁿ cuéchi-ndo, te váha-gá sá cadá càhnu iní-ndó cuèi nándi na càda ñaha tnaha ñáiyu-ndo xii-ndo cuèi dùhú-yu sá ndécú ndihí-ndo dico cada càhnu-ni iní-ndó. ⁸ Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xi tnáha ñáiyu-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítohó Jesucristú ducaⁿ quide tnaha-ndo.

⁹ Te nchòhó sa ñaha-ndo sá ncháá ñáiyu ndècu ichi cuehé ichi duha vá ndúú tǎhũ-yu cundecú-yu núú ndécú Yá Ndiòxí táxi tnùní-gá, núu xǐáⁿ vá cání iní-ndó sá ñáiyu-áⁿ nduu tǎhũ-yu cundecú-yu ndihí-gá. Te ni cuè ñáiyu ndècu ichi díí iní, te ni cuè ñáiyu quide cahnu nchaa sá càchí-yu cùu ndiòxí te ñá ndáa chi dícó cue téé ñuyíú-a ní cadúha nchaa xǐáⁿ, te ni cuè téé cáháⁿ ndihí ñadìhí te ñá díú ñàdihí-güedé cùú-yu, te ni cuè ñáiyu dìhí cáháⁿ ndihí téé te ñá díú yǐ-yu cùu-güedé, te ni cuè téé cáháⁿ ndihí tnáha téé-xi, ¹⁰ te ni cuè ñáiyu dùhu, te ni cuè ñáiyu xìho sá ndécú ndihí tnaha ñáiyu-xi, te ni cuè ñáiyu quihu, te ni cuè ñáiyu cáháⁿ úhú, te ni cuè ñáiyu dànícuehé tnáha ñáiyu-xi te dùhu ñahá-yu, te ni ìⁿ cue ñáiyu duha xǐquide vá ndúú tǎhũ-yu cundecú-yu núú ndécú Yá Ndiòxí táxi tnùní-gá. ¹¹ Te dava nchòhó ducaⁿ ní xóo cada-ndo ni cùu, te vitna ní cuu-ndo ñáiyu sa ní nduu ndoo ní nduu nine iní-xi, te ní cuu-ndo

ñāyiu cūu cuendá Yá Ndiǒxí, te ní cuu tucu-ndo ñāyiu ñá túú-gá cuéchi-xi ndècu núú-gá. Te ducaⁿ ní quide ñaha Yá Ndiǒxí xii-ndo sá vāha sá cuendá Xítohó Jesucristú, te ní ngúndecu ndihi-ndo Espíritú Yá Ndiǒxí.

Nàcuáa ndiūu cuendá yiqui cūñú-ó

¹² Te cāchí ñāyiu sá ncháá sá sání iní-ó cuu cada-o, te ndáá cāháⁿ-yu dīc-ó-ni sá ñā ncháá cūu-xi sá vāha sá cúú-xi-ó. Te núu cūñi nchaa sá sání iní-ó-áⁿ taxi tñuni ñáhá-xi te vā cādá-ó. ¹³ Te nchòhó sa xini-ndó sá ncháá sá xéxi-ó cuānguee-xi xiti-ó, te xiti-ó ní cuāha tñahí-xi sá cūhúⁿ nchaa sá caxi-ó, dico xiti-ó ndihi nchaa sá xéxi-ó chi naa-xi. Te Xítohó Jesucristú néhé cuendá-gá yiqui cūñú-ó, te ducaⁿ yiqui cūñú-ó cūu-xi cuendá-gá, te ñá túú ní cuāha yiqui cūñú-ó sá cūndècu-xi ichi díí iní. ¹⁴ Te datná ní quide Yá Ndiǒxí ní dándótó-gá Xítohó Jesucristú ducaⁿ cāda ñaha-gá xii nchoo tūcu chi dandòto ñaha-gá xii-o núu na cūú-ó, chi ndācu-gá quidé-gá nchaa sá vāha.

¹⁵ Te nchòhó sa ñaha-ndo sá yiqui cūñú-ó cūu-xi cuendá Xítohó Jesucristú chi ñⁿ-ni cūu-o ndihi-gá, núu xiǎⁿ ñá túú tñahí ndūu vāha-xi cāháⁿ ndihi-o ñāyiu ndècu ichi díí iní, chi yiqui cūñú-ó cūu-xi cuendá Xítohó Jesucristú, te núu ducaⁿ na cāda-o te cada iní-ó sá cuendá-nā ñāyiu-áⁿ cúú yiqui cūñú-ó, núu xiǎⁿ ñá túú tñahí ndūu vāha-xi ducaⁿ cāda-o. ¹⁶ Te sa xini-ndó sá núu ñⁿ tée na cāháⁿ ndihi-dé ñⁿ ñadihí ndécú ichi díí iní te cada iní-ó sá ñⁿ-nā yiqui cūñú cūu-yu. Te ducaⁿ cāháⁿ-xi núu tūtú Yá Ndiǒxí núu cāchí-xi: “¹ ñⁿ tée na cāháⁿ ndihi-dé ñⁿ ñadihí te ñⁿ-nā yiqui cūñú cūu-yu”, duha cāchí-xi. ¹⁷ Te ducaⁿ sātñahá-xi cūu nchaa ñāyiu tñahá tñuhu ndihi Xítohó Jesucristú, chi ñⁿ-nā cúu-yu ndihi-gá.

¹⁸ Te núu xiǎⁿ cāháⁿ-í dóho-ndo sá vā cūndècu-ndo ichi díí iní, chi núu ducaⁿ na cāda-ndo te

ñá túú tñahí sá vāha cūu-xi sá cúú-xi yiqui cūñú-ndó chi ío dàcuíta nihnu-xi yiqui cūñú-ndó. Te nchaa dava-gá sá cuéhé sá dúhá ñá túú quide-xi yiqui cūñú-ndó datná quidé xiǎⁿ. ¹⁹ Te nchòhó sa cūtnuní iní-ndó sá yiqui cūñú-ndó cūu-xi datná ñⁿ vehe núú ndécú Espíritú Yá Ndiǒxí. Te ducaⁿ sātñahá-xi cūu yiqui cūñú-ndó chi ndècu-ndo ndihi Espíritú-gá. Te mee-gá ní taxi-gá Espíritú-gá ndécú ndihi-ndo, te ñá díú mèe-ndo cuu cuendá-ndó mèe-ndo chi Yá Ndiǒxí cúú cuendá ñáhá-gá xii-ndo. ²⁰ Te ducaⁿ cūu-ndo ñāyiu cūu cuendá Yá Ndiǒxí chi Xítohó Jesucristú ní nachāhu-gá nchaa yíca cuéchi-ndo. Te núu xiǎⁿ xini ñūhu-xi sá ñihí ní ndúú-ndó cāda-ndo nacuāa cuu cāhnu Yá Ndiǒxí, te ducaⁿ tūu-xi cada-ndo chi espíritú-ndó ndihi yiqui cūñú-ndó cūu-xi cuendá-gá.

7

Sáhu sá cúú-xi ñāyiu ní tñándaha

¹ Te ní quexiò tutú sá ní dáquixi-ndó ndāha-í, te vitna na cāchí tñuhu-í xii-ndo cuendá tñuhu cāháⁿ-ndó núu tūtú-ndó. Te vāha cada-xi te núu vā cāndèca tée ñadihí, te ducaⁿ-ni vāha cada-xi te núu ñāyiu ñihí vā cāndècá-yu tée. ² Te dīc-ó-ni sá núu ducaⁿ na cāda-ndo te dava-ndo cāni iní-ndó cūndecu-ndo ichi díí iní. Núu xiǎⁿ xini ñūhu-xi sá ncháá cué tée ndi dííⁿ cūndecu ñadihí-güedé, te ducaⁿ-ni tūcu nchaa cue ñāyiu ñihí ndi dííⁿ cūndecu yí-yu. ³ Te cāchí tñuhu-í xii-ndo sá ncháá cué tée vā cúú cāchí-güedé sá vā cúú cāháⁿ ndihi-güedé ñadihí-güedé, te ñⁿ-ni ducaⁿ cué ñāyiu ñihí tucu, vā cúú cāchí-yu sá vā cúú cāháⁿ ndihi-yu yí-yu. ⁴ Te nchaa cue ñāyiu ñihí chi ñá díú mèe-ni-yu cūu cuendá-yu yiqui cūñú-yu chi tñahá cúú cuendá yí-yu, te ducaⁿ-ni nchaa cue tée tucu chi ñá díú-ni mèe-güedé cúú

cuendá-güedé yiqui cùñú-güedé chi tnàhá cúú cuendá cue ñadìhí-güedé. ⁵Te cue téé vá cúú càchí-güedé sá vá cúú cáháⁿ ndihí-güedé ñadìhí-güedé. Te ni cue ñáyiú dìhí vá cúú càchí-yu sá vá cúú cáháⁿ ndihí-yu yíi-yu. Àdi te núú ní ndatnúhu-yu sá vá dúcáⁿ càdá-yu ìⁿ úú nduu cuendá sá cuiní-yu ío cáháⁿ ndihí-yu Yá Ndiöxí, dico nà yáha núú ná daha nduu ducaⁿ ñí ndatnúhu-yu sá vá dúcáⁿ càdá-yu te naníhí tnàhá tùcú-yu, chi núú ñáhá te cudana te vá cuacàhnu iní-yu te sácuihná dacàháⁿ ñáhá-xí xii-yu cadá-yu sá ñà túú tàú-yu cadá-yu.

⁶ Te tnúhu càháⁿ-í-a quèe-xi sá tée ndihí ñadìhí cuu candeca tnàhá-yu dico ñà túú quide yica-í sá dúcáⁿ càdá-yu. ⁷ Te yúhú sání iní-í sá ñúú dìcò sá cúú te nchaa-ndo cùndecu-ndo datná ndécú-í, dico ñáhá chi mee Yá Ndiöxí ní cachí-gá nàcuáa nduu táhú-ó ìⁿ ìⁿ-o cundecu-o, chi dava-o ñí cutáhú-ó núú-gá sá cùndecu ñadìhí-ó te dava-o ñáhá. ⁸Te càchí tnúhu-í xii nchòhó cue téé vátá ñihí-gá ñadìhí-xi sá vâha-gá sá ñúú vá cùndecu ñadìhí-ndó datná yúhú. Te ducaⁿ-ni nchòhó cue ñáyiú dìhí ñáyiú vátá ñihí-gá yíi-xi sá vâha-gá sá ñúú vá cùndecu yíi-ndo. Te ñiu-ni duha càháⁿ-í sá cúú-xí nchàa nchòhó ñáyiú dìhí ní quendóo quèé sá vâha-gá sá ñúú vá càndeca-gá-ndó tée. ⁹ Te càchí tnúhu-í xii nchaa-ndo sá ñúú xito-ndo sá vá cùndéé iní-ndó cùndecu mee-ndo te vâha-gá sá ñúú tnándaha-ndo, te ñà díú sá mée-ní càni cuehé cani duha iní-ndó cùndecu-ndo.

¹⁰ Te nchaa nchòhó ñáyiú sa ní tnándaha càháⁿ-í dóho-ndo, te ñà díú mèe-í duha càhu iní-í càháⁿ-í dóho-ndo chi Xítohó Jesucristú ducaⁿ dàcahu iní ñáhá-gá xii-í, chi mee-gá cuiní-gá cada-ndo nàcuáa na càháⁿ-í-a. Te nchaa nchòhó cue

ñáyiú dìhí càháⁿ-í dóho-ndo sá vá dáñá-ndó yíi-ndo. ¹¹ Te núú ío dava-ndo sá ní dáñá-ndó yíi-ndo, te xini ñuhu-xi sá vá càndeca-gá-ndó tée, chi cundecu mee-ñá-ndó àdi núú ñáhá te naqueheⁿ tucu-ndo tée ní cuu yíi-ndo. Te nchaa nchòhó cue téé ndècu ñadìhí-xi càháⁿ-í dóho-ndo sá vá dáñá-ndó ñáyiú cuu ñadìhí-ndó.

¹² Te tnúhu na càháⁿ-í-a cùu-xi sá ñí sani iní mèe-í te ñà díú tnúhu sá ñí cachí Xítohó Jesucristú cáháⁿ-í cúú-xí. Te núú dava nchòhó cue téé ndècu ichi Xítohó Jesucristú ndécá-ndó ñáyiú dìhí ñáyiú ñà túú ndècu ichi-gá, te vá dáñá-ndó-yu te núú cùu vâha iní-yu ndèca ñáhá-yu xii-ndo. ¹³ Te núú dava nchòhó cue ñáyiú dìhí ñáyiú ndècu ichi Xítohó Jesucristú ndécá-ndó cue téé ñà túú ndècu ichi-gá te vá dáñá-ndó-güedé te núú cùu vâha iní-güedé ndécá ñàha-güedé xii-ndo. ¹⁴ Te núú ìⁿ tée ñà túú sàndáá iní-dé Xítohó Jesucristú te ñadìhí-dé sàndáá iní ñáhá-áⁿ xii-gá, te tée-áⁿ ñí cuu-dé ìⁿ tée sa ní cuyatni tnàhá tnúhu ndihí ñaha xii-gá sá cuendá ñadìhí-dé. Te ducaⁿ sãtnahá-xi cùu tucu ñadìhí ñà túú sàndáá iní ñáhá xii Xítohó Jesucristú te yíi-aⁿ sàndáá iní ñáhá-dé xii-gá, te ñaha-áⁿ sa ní cuyatni tnàhá tnúhu-aⁿ ndihí-gá sá cuendá yíi-aⁿ, te ñiu-ni ducaⁿ sãtnahá-xi cùu cue landú-yu chi sa ní cuyatni tnàhá tnúhu-güexi ndihí-gá. Te núú vá dúcáⁿ cùu te cue landú-yu-áⁿ ío xica cùndecu-güexi núú-gá. ¹⁵ Te núú ìⁿ tée ñà túú sàndáá iní ñáhá xii Xítohó Jesucristú cuiní-dé dañá tnàha-dé ndihí ñadìhí-dé ñaha sàndáá iní ñáhá xii Xítohó Jesucristú, te ñiu-ni na càda-dé nàcuáa sàni iní-dé. Te ñiu-ni ducaⁿ tùcú te núú ñadìhí ñaha ñà túú sàndáá iní ñáhá xii Xítohó Jesucristú cuiní-aⁿ dañá-aⁿ tée sàndáá iní ñáhá xii-gá, tée cùu yíi-aⁿ te ñiu-ni na càda-aⁿ nàcuáa sàni iní-aⁿ. Chi tée sàndáá iní ñáhá

xii Xítoho Jesucristú ñá túú tàú-dé cada yica-dé ñadihí-dé cundecu ndihi ñaha-aⁿ xii-dé te núu ñá túú cuini-aⁿ. Te ñu ni ducaⁿ ñadihí ñaha sandáá iní ñáhá xii-gá ñá túú tàú-aⁿ cada yica-aⁿ cundecu ndihi ñaha yíi-aⁿ xii-aⁿ te núu ñá túú cuini-dé cundecu ndihi ñaha-dé xii-aⁿ, chi Yá Ndióxi cuini-gá sá ncháá nchòo ñáyiú ndècu ichi-gá cundecu váha-o vǎ nǎa-ó. ¹⁶ Chi cue téé sandáá iní tnúhu Xítoho Jesucristú ñá túú cùnuni iní-güedé te núu ndacu-güedé canu ichi-güedé ñadihí-güedé ichi-gá àdi ñáhá te núu ñá túú sandáá iní ñáhǎ-yu xii-gá, te ducaⁿ-ni cué ñáyiú ñadihí sandáá iní tnúhu Xítoho Jesucristú ñá túú cùnuni iní-yu te núu ndacú-yu canu ichi-yu yíi-yu ichi-gá àdi ñáhá te núu ñá túú sandáá iní ñáhá-güedé xii-gá.

¹⁷ Te duha na cǎchí tnúhu-í xii-ndo, nchaa chiúⁿ ní nduu táhu-ndó núú Yá Ndióxi quidé-ndó ndéé cúnahá ní cáháⁿ ñáhá-gǎ xii-ndo ní natuha-ndo ichi-gá te ñu ni chiúⁿ-án cada-ndo cundecu-ndo. Te nchaa xichi núú táca ñáyiú dácuaha tnúhu-gá ñu ni duha cáháⁿ-í dóho-yu. ¹⁸ Te nchaa cue téé ndècu seña ñi-xi dátá ní cachi ndíi Moisés, cue téé ní cáháⁿ Yá Ndióxi ndécú ichi-gá, te ñu ni ducaⁿ cundu-güedé cundecu-güedé, te nchaa cue téé ñá túú ndècu seña ñi-xi ní cáháⁿ-gá cundecu ichi-gá, ñu ni ducaⁿ cundu-güedé cundecu-güedé vá cuáha-güedé seña ñi-güedé. ¹⁹ Te ñi-ni cùu-xi cuéi na cuáha-o seña ñi-o àdi vá cuáha-o. Te sá io-gá xini ñúhu-xi cada-o xǎⁿ cúu-xi sá cádá-ó ncháa nacúaa cuini Yá Ndióxi. ²⁰ Chi xini ñúhu-xi sá cundecu-ni-o dátá ndécú-ó cúnahá ní cáháⁿ ñáhá Yá Ndióxi xii-o ní ngundecu-o ichi-gá. ²¹ Te núu cùu-ndo ñáyiú ñá túú tnàhí dàná quee núú chiúⁿ patróoⁿ-xi cúnahá ní cáháⁿ ñáhá Yá Ndióxi xii-ndo, te ñá túú ná cani iní-ndó, dico núu dàna

ñaha patróoⁿ-ndó quee-ndo núú chiúⁿ-ndó te váha-ni quee-ndo núú chiúⁿ-ndó. ²² Te sáta ní cáháⁿ ñáhá Xítoho Jesucristú xii nchòho ñáyiú ducaⁿ ñá túú tnàhí dàná quee núú chiúⁿ patróoⁿ-xi-án, te ní cuu-ndo dátá ñáyiú dàná quee núú chiúⁿ patróoⁿ-xi sá cúu-xi-gǎ, te ducaⁿ chi ñá túú-gǎ ndécú-ndó ichi cuehé ichi duha. Te nchòho ñáyiú dàná quee núú chiúⁿ patróoⁿ-xi cùu-ndo dátá ñáyiú ñá túú tnàhí dàná quee núú chiúⁿ patróoⁿ-xi sá cúu-xi Xítoho Jesucristú, te ducaⁿ chi xinu cuechi-ná-ndó núú-gǎ. ²³ Te Yá Ndióxi ní nduu cuendá ñáhá-gǎ xii-o chi Xítoho Jesucristú ní nacháhu-gá nchaa yicá cuéchi-o sá ndécú núú Yá Ndióxi ní cùu, te vá dàná-ndó sǎ tnàha ñáyiú-ndo nàdatuhú iní ñáhǎ-yu xii-ndo vá cúnú cuéchi-ndo núú Xítoho Jesucristú nàcuáa tàú-xi cunduu. ²⁴ Te núu xǎⁿ cǎchí tnúhu-í xii nchaa nchòho ñáyiú ndècu ndihi-í ichi Xítoho Jesucristú sá cundecu-ni-ndo dátá-ni ndècu-ndo ndéé cúnahá ní cáháⁿ ñáhá-gǎ xii-ndo, te ñu ni ducaⁿ cundecu-ndo ichi-gá.

²⁵ Te cǎchí tnúhu tucu-í xii-ndo sǎ Xítoho Jesucristú ñá túú cǎchí tnúhu-gá xii-í núu nása cáháⁿ-í cuendá nchaa ñáyiú vátá tnándaha-gá. Te duha sàni iní-í cáháⁿ-í cuendá-yu, te nchòho cuu quíndáá iní-ndó tnúhu cáháⁿ-í chi Xítoho Jesucristú chindèe chítúu ñaha-gǎ xii-í. ²⁶ Te yúhú cǎchí-í sá sá cuendá nchaa tnúndòho tnúhu ndáhú ió ñuyúú-a vitna, te váha-gá sá ncháá ñáyiú te núu nása xǎndecú-yu te ducaⁿ-ni na cundecú-yu. ²⁷ Te nchaa cue téé ndècu ñadihí-xi te ducaⁿ-ni na cundecu-güedé ndihi-yu, te nchaa cue téé ñá túú ñadihí-xi te ducaⁿ-ni na cundu-güedé vá ndúcú-güedé ñadihí-güedé. ²⁸ Dico nchaa cue téé na nducu ñadihí-xi te ñá díú ñiⁿ cuéchi cùu-xi sá dúcáⁿ ná nducu-güedé ñadihí-güedé, te

d̄u-ni ducaⁿ c̄u tucu cue ñáyi u d̄ihí te núu na ñihí-yu yí-yu chi ñá d̄iú ñⁿ cuéchi c̄u-xi sá dúcáⁿ ñihí-yu yí-yu. Te núu cue tée na ñihí-güedé ñadihí-güedé te nándi ndohó-yu cundecú-yu ñuyíú-a, te núu xiáⁿ duha càháⁿ-í cuendá sá v̄a ndúcú-güedé ñadihí-güedé cuendá sá v̄a ndóhō-yu.

²⁹ Te nchaa nchòhó ñáyi u ndècu ndihí-í ichi Xítohó Jesucristú na càchí tnúhu-í xii-ndo sã ñã túú-gã v̄ai nduu cumání te quixi tucu Xítohó Jesucristú, núu xiáⁿ xíní ñùhu-xi sá ndèé vitna ngúita nchaa cue tée ndècu ñadihí-xi cada-güedé chiⁿ Xítohó Jesucristú, te cada-güedé dàtná sá ñã túú ñadihí-güedé. ³⁰ Te nchaa ñáyi u ndihú iní-xi te na càda-ní-yu sá ñã túú ndihú iní-yu cadá-yu chiⁿ Yá Ndiòxí. Te nchaa ñáyi u cùd̄í iní-xi te na càda-ní-yu sá ñã túú cùd̄í iní-yu cadá-yu chiⁿ-gá, te nchaa ñáyi u ndècu ndihí nándi sá ndécú ndihí te na càda-ní-yu sá ñã túú ñã ndécú ndihí-yu cadá-yu chiⁿ-gá. ³¹ Te nchaa ñáyi u nèhe chiⁿ nchaa sá ío ñuyíú-a te na càda-ní-yu cuendá sá ñã túú ñã néhé chiⁿ-yu cadá-yu chiⁿ Yá Ndiòxí, chi nchaa sá ío ñuyíú-a sa ñùhu-xi ichi cuáháⁿ-xi núu ndihí ñhnu-xi.

³² Te cuní-í sá v̄a cùhúⁿ iní-ndó nándi sá ío ñuyíú-a, te ni ñã túú tnáhí ná caní iní-ndó cundecu-ndo, chi nchaa cue tée ndècu ichi Xítohó Jesucristú x̄ndecu mee ío ñùhu iní-güedé cada-güedé chiⁿ-gá nàcuáa cud̄i-güedé núú-gã. ³³ Te nchaa cue tée sa ndècu ñadihí-xi cue tée ndècu ichi-gá ñùhu iní-güedé nàcuáa cada-güedé cundecu-güedé ñuyíú-a cuendá ducaⁿ cùdi-güedé núú ñadihí-güedé. ³⁴ Te diu-ni ducaⁿ c̄u tucu cue ñáyi u d̄ihí chi ñã túú ñⁿ-ni cuu ñáyi u sa ndècu yí-xi ndihí ñáyi u vátá cundècu-gá yí-xi, chi

ñáyi u ndècu ichi Xítohó Jesucristú ñã túú ndèca tée ío ñùhu iní-yu cadá-yu chiⁿ-gá nàcuáa ñihí ní ndúy-yu cundecu yíñuhú-yu núú Yá Ndiòxí, dico cue ñáyi u d̄ihí ndécá tée ndècu ichi-gá ío ñùhu iní-yu nàcuáa cundecú-yu ñuyíú-a cuendá cud̄i-yu núú yí-yu.

³⁵ Te duha càháⁿ-í cuendá cúú-xí ñⁿ sá v̄aha xii-ndo, te cud̄i núú tnáhá-ndó, te cuu-ndo ñáyi u cada ndáá núú Xítohó Jesucristú, te mee-ni-gã cuhuⁿ iní-ndó. Te ñã d̄iú sá d̄uhá càháⁿ-í te quide yica-í sá cadá-ndó nàcuáa càháⁿ-í.

³⁶ Te núu ío dava-ndo s̄ani iní-ndó sã ñã túú nduu váha-xi sá ío cuu sacuéhé d̄ehe yoco-ndo cundecú-yu ñã, te núu s̄ani iní-ndó sã v̄aha-gá candecá-yu tée te cada-ndo nàcuáa s̄ani iní-ndó, chi ñã d̄iú ñⁿ cuéchi c̄u-xi. ³⁷ Te núu dava-ndo ndècu d̄ehe yoco-ndo, te v̄a ȳo ñⁿ cada yica ñaha xii-ndo sá cándecá-yu tée. Te núu mee-ndo s̄ani váha iní-ndó nàcuáa cada-ndo, te núu v̄a dásáⁿ-ndó d̄ehe yoco-ndo càndeca ñaha tée te quide váha-ndo sã dúcáⁿ quide-ndo. ³⁸ Te nchaa ñáyi u dásaⁿ d̄ehe yoco-xi càndeca ñaha tée te váha-ni quidè-yu, te nchaa ñáyi u ñã túú dásaⁿ d̄ehe yoco-xi càndeca ñaha tée te váha-gá tucu quidè-yu sá dúcáⁿ quidè-yu.

³⁹ Te nchaa ñáyi u d̄ihí ndécú yí-xi xini ñuhu-xi sá cundècu-ní-yu ndihí yí-yu nini ndècu vívú-güedé chi ducaⁿ càháⁿ tnúhu sá dánèhé ñáhá xii-o nàcuáa cada-o cundecu-o, dico núu na cùú-güedé te cuu naquehéⁿ-yu ingá tée candecá-yu d̄icó-ni sá d̄iú-ni tée ndècu ichi Xítohó Jesucristú. ⁴⁰ Te yúhú s̄aní iní-í sá ío-gá váha cundecú-yu te núu v̄a nánducú-yu ingá tée candecá-yu, te duha càháⁿ-í chi Espiritú Yá Ndiòxí ducaⁿ dàcahu iní ñáhá-xi xii-í càháⁿ-í.

8

Cuendá nchaa sá nchító-ó sãñaha

ñáyiú ndùu táhú nchaa sá cächí-yu cùu ndiòxí

¹ Te vitna na cãháⁿ-í cuendá nchaa sá nchító-ó sãñaha ñáyiú ndùu táhú nchaa sá cächí-yu cùu ndiòxí te ñã ndàá chi dicó ndaha cue tee ñuyíú-a ní cuáha nchaa xiãⁿ. Te nchoo sa cùtnuní váha iní-ó cuendá nchaa xiãⁿ, dicó-ni sá cuendá nchaa sá cùtnuní váha iní-ó xiãⁿ quidé cãhnu-o mee-o, dico núu cùu iní-ó tnàha ñáyiú-o te canu ichi-ò-yu ichi váha. ² Te núu dava-ndo sãni iní-ndó sã túha-ndo dico cùu-ndo ñáyiú vátá cútúha-gá nãcuáa táu-xí cunduu. ³ Te núu nchòhó cùú iní-ndó Yã Ndiòxí te mee-gã cáháⁿ-gá sá cùú-ndó ñáyiú cùu cuendá-gá.

⁴ Te vitna na cächí tnúhu-í xii-ndo nãcuáa ndùu cuendá nchaa sá nchító-ó sãñaha ñáyiú ndùu táhú nchaa sá cächí-yu cùu ndiòxí te ñã ndàá chi dicó ndaha cue téé ñuyíú-a ní cuáha nchaa xiãⁿ. Te nchoo cùtnuní iní-ó sã ncháá sã cächí ñáyiú cùu ndiòxí cadúha-yu ñuyíú-a ñã túú cùu-xí ndiòxí, chi ñⁿdii díí-ni Yã Ndiòxí ndécú. ⁵ Te cue ñáyiú ñuyíú-a cächí-yu sá cuéi andiú te cuéi ñuyíú-a ndècu titní ndiòxí. Te ndàá sá ndèni ní cuu ndècu espíritú sá cächí ñáyiú cùu ndiòxí te ñã ndàá sá ndiòxí cùú-xí, te nchaa xiãⁿ táxi tnùnì ñáhá-xí xií-yu. ⁶ Te nchoo cùtnuní ndáá iní-ó sã ñⁿdii díí-ni Yã Ndiòxí ndécú te ñⁿ-gã cùú-gã Tãtá-ó, te nchoo cùu-o ñáyiú cùu cuendá-gá. Te ñⁿ-ni mee-gã ní táuchíúⁿ-gã ní cuáha nchaa sá ió ñuyíú-a, te cùtnuní tucu iní-ó sã ñⁿdii díí-ni Xítóhó Jesucristú ndécú, te Yaá-áⁿ ñí quide-gá nchaa chiúⁿ ní táhú Dütú Ndiòxí ní cadúha-gá nchaandi túhú sá ió ñuyíú. Te ñⁿ-ni mee Xítóhó Jesucristú quidé ndècu-o ichi-gá vitna.

⁷ Te ñã ncháá nchòhó ñáyiú ndècu ichi Xítóhó Jesucristú cùtnuní iní-ndó nãcuáa ndùu tnúhu cãháⁿ-í. Chi sa ní cáaⁿ-ndo quide cãhnu-ndo nchaa sá cächí-yu cùu ndiòxí ní cùu.

Te cuendá xiãⁿ núu nãqueheⁿ-ni-ndo nchaa sá nchító-ó ndùu táhú nchaa sá cächí-yu cùu ndiòxí-áⁿ xéxi-ndó, te sãni-ni iní-ndó sã quidé cãhnu-ndo nchaa sá cächí-yu cùu ndiòxí-áⁿ te ñã ndàá sá ndiòxí cùú-xí. Te núu sãni iní-ndó sã ñã túú váha caxi-ndo sã dúcáⁿ ndùu táhú-xi-áⁿ te xéxi-ndo te xiãⁿ ñã túú cùu váha iní-ndó cuendá sá dúcáⁿ quide-ndo. ⁸ Te ñã díú nchaa sá xéxi-ó quide-xi cudíu-o núú Yã Ndiòxí, chi ñⁿ-ni quide-xi cuéi na cãxi-o àdi vá cãxí-ó chi ni ñⁿ sá cãxí-ó vã chindèe ñaha-xi cudíu-o núú Yã Ndiòxí. Te cuéi vá cãxí-ó dico ñã díú xiãⁿ cada sá vã cudíu-o núú-gã. ⁹ Te cuu-ni caxi-ndo nchaa nãni ñihí-ndó. Te dicó-ni sá càda cuendá-ndó sã ñã díú cuendá sá xéxi-ndó-áⁿ cuíta nihnu dava ñáyiú ndècu ndihí-ndo ichi Xítóhó Jesucristú cada-yu nãndi sá cadá-yu nãcuáa vá cùú váha iní Yã Ndiòxí chi ñáyiú-áⁿ ñã túú cùtnuní iní-yu. ¹⁰ Te nchòhó ñáyiú xini váha cuendá nchaa sá cächí-yu cùu ndiòxí, te núu na quihíⁿ-ndó núu ndécú nchaa xiãⁿ te ngóo-ndo cãxi-ndo nchaa sá ñí cutáhú-xi, te quini ñáyiú ndècu ndihí-ndo ichi Xítóhó Jesucristú, ñáyiú vátá cùtnuní-gá iní-xi nãcuáa ndùu cuendá nchaa sá dúcáⁿ cächí-yu cùu ndiòxí-áⁿ, te cuéi sãni iní-yu sã ñã túú quide váha-ndo sã dúcáⁿ quide-ndo te cudana te cada yicá-yu caxí-yu tnàhá-yu nchaa sá dúcáⁿ ñí nduu táhú nchaa sá cächí-yu cùu ndiòxí-áⁿ te ñã ndàá sá ndiòxí cùú-xí. ¹¹ Te núu ducaⁿ cùtnuní iní-ndó nãcuáa ndùu cuendá nchaa xiãⁿ te ducaⁿ quide-ndo, te sá dúcáⁿ quide-ndo-áⁿ te dàcuíta nihnu-ndo dàva-gá ñáyiú ndècu ndihí-ndo ichi Xítóhó Jesucristú, ñáyiú vátá cùtnuní-gá iní-xi nãcuáa ndùu cuendá nchaa xiãⁿ, te ñⁿ-ni cuendá tnàhá ñáyiú-áⁿ ñí xihí Xítóhó Jesucristú. ¹² Te sá dúcáⁿ quide-ndo-áⁿ cùú-xí ñⁿ cuéchi núú Xítóhó Jesucristú, chi quide-ndo nãcuáa xínu iní-yu cada-yu ñⁿ sá sãni iní-yu ñã túú váha, núu xiãⁿ ñã

túu quide váha-ndo sã cúu-xí-yu. 13 Te núu yúhú cùtnùní iní-í sã sã cuendá ìñ sã cáxi-í te ngóo ìñ ñáyiú ndècu ndìhi-í ichi Xítohó Jesucristú cadá-yu ìñ sã vã cúu vãha iní Yã Ndiòxí, te váha-gá sã vã cáxi-gã-í xíã cuendá sã vã cadã-yu ìñ sã vã cúu vãha iní-gá.

9

Nchaa sã cúu cada cue téé ní táuchúú Xítohó Jesucristú cáhá tnúhu-gá

1 Te yúhú chi cuu cada-í nchaa sã sání iní-í, chi tnàhá-í ní táuchúú Xítohó Jesucristú cáhá-í tnúhu-gá núu ñáyiú. Te yúhú ní xiní núu-í Xítohó Jesucristú Yaá cúu Xítohó-ó te nchòhó cúu-ndó ñáyiú ní sándáá iní tnúhu-gá sã càhá-í te ducaⁿ chi ndècu ndìhi-í-gá. 2 Te ió dava ñáyiú ñã túu sándáá iní-yu sã Xítohó Jesucristú ní táuchúú-gá cáhá-í tnúhu-gá, dico nchòhó chi cùtnùní ndáá iní-ndó sã díú-gã ní tendaha ñaha-gá xii-í xícá cùu-í càhá-í tnúhu-gá, te ducaⁿ chi yúhú ní cáhá-í tnúhu-gá núu-ndó te ní sándáá iní-ndó-gã te xíã cùtnùní sã díú-gã ní tendaha ñaha-gá xii-í xícá cùu-í càhá-í tnúhu-gá núu ñáyiú.

3 Te duha ndùu tnúhu càhá-í cuendá cundedóho nchaa ñáyiú sàtnuhu ñaha xii-í. 4 Chi yúhú cuu-ni caxi-í nchaa núu sã cúu cáxi-o na taxi ñáyiú. 5 Te cuu-ni cundecu ñadìhí-í te caca ndeca-í-yu nchaa núu xícá cùu-í càhá-í tnúhu Yã Ndiòxí dàtná quidé dâva-gá cue téé càháⁿ tnúhu-gá, ndìhi cue téé cùu ñaní Xítohó Jesucristú, ndìhi té Pèlú. 6 Te tnàhá yúhú ndìhi té Bèé cuu dañá-ndí chùuⁿ quide-ndí te cada-ndí dàtná xíquide dâva-gá-güedé càháⁿ-güedé tnúhu Xítohó Jesucristú. 7 Te nchoo xini-ó sã ncháá cuè sandadú dacuitíí sã ñúhu yãhu-güedé xínu cuèchi-güedé, te ñã túu dicó ducaⁿ xínu cuechi-güedé. Te ducaⁿ

sàtnahá-xi cùu tucu ñáyiú xítu ìñ sã xítú chi dacuitíí ñihí-yu ìñ sã xítú-yu xéxi-yu, te ñã díú dicó ducaⁿ xítú-yu. Te ducaⁿ cùu tucu cue téé cùu toli chi quìhni-güedé dícu quiti xito-güedé xihí-güedé te ñã túu dicó ducaⁿ xito-güedé-di. 8 Te vá caní iní-ndó sã sã dúhá càhá-í te càhu iní mée-i duha càhá-í, chi tnúhu càhá-í-a ìñ-ni quèe-xi ndìhi tnúhu ní cáháⁿ ndí Moisés. 9 Chi ndí-án ní chídó tnùní ndí núu tütú ndí nàcuáa ní xáhaⁿ Yã Ndiòxí xii ndí, te cãchí-xi: “Vã chíhí-ndó ñunu yuhu ndicutu oré danchihí-di triú”, duha cãchí-xi núu tütú ndí. Te ñã díú sã dúcáⁿ ní cáháⁿ Yã Ndiòxí te càháⁿ-gá mee-ni cuendá ndicutu-án. 10 Chi ní cáháⁿ-gá cuendá nchoo cuè ñáyiú ndècu ichi-gá, te ndáá sã díú cuendá-ó dùcaⁿ ní cáháⁿ-gá. Te nchaa cue téé xítu chihi tatá sàni iní-güedé sã díú tatá chíhí-güedé-án cuu sã cáxi-güedé, te ñu-ni ducaⁿ cùu tucu cue téé xicaní triú chi cãni-güedé cuendá quee caxi-güedé. 11 Te ducaⁿ sàtnahá-xi cùu nchúhú cue téé càháⁿ tnúhu Xítohó Jesucristú, chi dānehé ñahá-ndí xii-ndo cuendá nchaa sã váha quide ñaha Yã Ndiòxí xii-o, núu xíã dai tau-xi sã nchòhó chindee ñaha-ndo xii-ndí núu ná cúu sã xiní ñúhu-ndí. 12 Te núu dava cue téé càháⁿ tnúhu Yã Ndiòxí chindèe-ndo-güedé, te uuⁿ-gá ducaⁿ tau-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tau ndisa-ndo sã chindèe ñaha-ndo xii-ndí dico ñã túu dùcaⁿ càháⁿ-ndí núu-ndó cada-ndo, te quide cahnu iní-ndí cuèi nándi sã tá yãha-ndí véxi. Te ducaⁿ quide-ndí cuendá sã ñã túu ñã caní iní ñáyiú cuendá-ndí te ducaⁿ cuíta cuténuu-gá tnúhu sã càháⁿ nàcuáa naníhí tàhú-ó quíhíⁿ. 13 Te nchòhó xini-ndó sã ncháá cuè téé xínu cuechi veñúhu ñu-ni xíãⁿ ñihí-güedé xéxi-güedé, te ñu-ni cue téé-án xínu cuechi-güedé núu xihí

quiti nduu táhú Yá Ndióxi, te diu-ni xiáⁿ nihí tucu-güedé sá xéxi-güedé. ¹⁴ Te diu-ni ducaⁿ sátnahá-xi cùu nchúhu cue téé cáháⁿ tnúhu sá cáháⁿ nàcuáa nanihí tãhú-ó, chi Xítohó Jesucristú ní cachí-gá sá díu-ní cuendá chiuⁿ quide-ndí níhí-ndí caxi-ndí. ¹⁵ Te ñá ííⁿ nduu cáháⁿ-í núú-ndó cada-ndo nacuáa tãu-xi cunduu sá cúu-xi-í, te vá caní iní-ndó sá sá dúhá cáháⁿ-í te ííⁿ sá xicáⁿ-í núú-ndó. ¡Chi cuéi na cúu-í sá ndóhò-í te ñá díú sá cáháⁿ ñáyiú sá sá cuendá sá cáháⁿ-í tnúhu Xítohó Jesucristú nihí-í xéxi-í!

¹⁶ Te yúhú ñá túú quide cahnú-í mée-í sá cáháⁿ-í tnúhu sá cáháⁿ nàcuáa nanihí tãhú-ó, chi táu tnàhá-í sá cáda-í chi ducaⁿ ní cachí Yá Ndióxi cada-í. ¡Te ndàhú ní cuu yúhú te núu vá cáháⁿ-í tnúhu-áⁿ! ¹⁷ Te ñá túú cáháⁿ-í tnúhu-gá sá cúu iní mée-í chi mee-gã ní táuchíúⁿ-gã cáháⁿ-í tnúhu-gá. Te núu cáháⁿ-í tnúhu-gá sá cúu iní mée-í te tãu-í níhí-í sá ndúú tãhú-í ní cùu. ¹⁸ Dico sá sá ní nduu tãhú-í cúu-xi sá ío cùdí iní-í sá dicó ducaⁿ cáháⁿ-í tnúhu sá cáháⁿ nàcuáa nanihí tãhú-ó. Te cuéi tãu-í queheⁿ-í sá táxi-ndó nduu tãhú-í sá cuendá sá cáháⁿ-í tnúhu Xítohó Jesucristú, dico ñá túú dùcaⁿ quide-í. ¹⁹ Te sá dúcáⁿ dicó ducaⁿ cáháⁿ-í tnúhu sá cáháⁿ nàcuáa nanihí tãhú-ó, xiáⁿ ní ííⁿ ñáyiú ñuyíú-a vá cúu cãchí-yu sá táxi tnúni ñáhã-yu xii-í, te cuéi ducaⁿ dico mee-í ní sani iní-í sá cúu-í dàtná ííⁿ téé xinu cuechi núú nchaa ñáyiú cuendá ducaⁿ cuíta cuu vai-yu tuhá-yu ichi Xítohó Jesucristú quíhíⁿ. ²⁰ Te òré ñúhú tnàhí tnuú cue ñáyiú isràél te quide-í sá ííⁿ-ní cùu-í ndihí-yu cuéi ñá túú nchícúⁿ nihnu-í tnúhu ní cáháⁿ ndíi Moisés, te ducaⁿ quide-í cuendá sá ñáyiú-áⁿ quindáá iní-yu tnúhu cáháⁿ-í te tuhá-yu ichi Xítohó Jesucristú. ²¹ Te òré ñúhú tnàhí tnuú nchaa ñáyiú ñá túú nchícúⁿ nihnu tnúhu ní cáháⁿ ndíi Moisés, te quide-ni-í sá quidè-í dàtná quidè mée-yu cuendá

quindáá iní-yu tnúhu cáháⁿ-í, te tuhá-yu ichi Xítohó Jesucristú. Te cuéi ducaⁿ quide-í dico ñá túú dàña ndeé-í quidè-í nchaa nàcuáa cùni Yá Ndióxi cada-o, te ducaⁿ chi nchícúⁿ nihnu-í quidè-í nchaa nàcuáa cáháⁿ Xítohó Jesucristú. ²² Te òré ndecú-í ndihí nchaa ñáyiú ñá túú cùtnuní váha iní-xi nàcuáa cundecu ichi Xítohó Jesucristú, te tnàhá-í quidè-í dàtná quidè-yu cuendá sá ná tedóho-yu nchaa tnúhu cáháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyiú quide-í sá ííⁿ-ni cuu-í ndihí-yu cuendá ducaⁿ níhí-í nàcuáa cada-í te cundecúho-yu tnúhu cáháⁿ-í te tnií-yu ichi Xítohó Jesucristú te nanihí tãhú-yu. ²³ Te duha quide-í cuendá sá cuíta quindáá iní-yu tnúhu sá cáháⁿ nàcuáa nanihí tãhú-ó quíhíⁿ, te ducaⁿ te tnàhá yúhú ío váha cundecu-í dàtná cáháⁿ tnúhu-áⁿ.

²⁴ Te nchòhó sa xini-ndó sá ncháá cué téé xinu quíhu màrcúhyú nchaa-güedé xínú-güedé, dico ííⁿ-ni-dé cúu téé ndacu ngodó núú tẽ téé-áⁿ cúu tẽe nihí sá ndúú tãhú-xi, te ducaⁿ xini ñuhu-xi cada nchóhó tucu chi cada-ndo nchaa nacuáa cùni Yá Ndióxi cada-ndo cuendá ducaⁿ nihí-ndó sá ndúú tãhú-ndó. ²⁵ Te nchaa cue téé xini dadiqui te váha váha quide cuendá-güedé núu ná cúu sá cáda tnèñu te xòcani-güedé cuendá sá ñá díú xiáⁿ cada te cuíta-güedé òré dadiqui-güedé. Te ducaⁿ quide-güedé cuendá cùni-güedé níhí-güedé sá ndúú tãhú-güedé, te sá ndúú tãhú-güedé-áⁿ cúu-xi ííⁿ sá ndíhí nihnu ñuyíú-a. Dico nchoo nducu ndee-o quide-o nacuáa níhí-ó sá ndúú tãhú-ó, te xiáⁿ cudí-xi cundecu ndihí-o ní caa ní quíhíⁿ. ²⁶ Te yúhú quidè-í dàtná quidè cué téé xinu, chi cue téé-áⁿ xini-güedé núú quéxiò-güedé, te quide tucu-í dàtná xiquide cue téé sa ní cutúha nàá, te ñá túú quide-í

dàtná quidé cuè téé vitna dàcuaha naá. Te ducaⁿ chi yúhú quidé-í nchaa nàcuáa cuñí Yá Ndióxi cunduu. ²⁷ Te yúhú ñá túú dàña-í taxi tñuní ñáhá nì ñⁿ sá cuèhé sá dúhá xii-í chi yòtnii-í mee-í. Te ducaⁿ quide-í chi yúhú càháⁿ-í tñúhu Xítóhó Jesucristú núú ñáyi, te cuñí-í sá vā cuíta sá ñ cachí Yá Ndióxi nduu táhù-í.

10

Cuendá nchaa sá ñ cadúha cue téé ñuyú-a quide cahnu ñáyi

¹ Te nchòhó ñáyi ndècu ndihi-í ichi Xítóhó Jesucristú na càchí tñúhu-í xii-ndo cuendá nchaa ñaní tnáhá-ndí ñáyi israhél ní xindecu ndéé sanaha, chi vitna tnàhá nchòhó cúú-ndó dàtná cue ñaní tnáhá nchaa ñáyi-áⁿ chi ndècu-ndo ichi-gá. Te nchaa ñáyi-áⁿ ñí taxi ndecu Yá Ndióxi ñⁿ vicó ñí dánèhé ñáhá-xí xii-yu ichi quíhíⁿ-yu, te ní quee dava ndute lámár nání Mǎr Tícuèhé te nchaá-yu ní yáha-yu. ² Te sá dúcáⁿ ñí cuu te nchaá-yu ñⁿ-ná ní cuú-yu ndihí ndíi Moisés, te ní xíhi ndaha ñàha ndíi xii-yu. ³ Te nchaá-yu ní xexí-yu sá ñí sáñaha Yá Ndióxi xii-yu. ⁴ Te ducaⁿ nchaa tucú-yu ní xihí-yu ndute sá ñí sáñaha-gá xii-yu, ndute sá ñí quee yiqui nàha cava. Te cava-áⁿ cada iní-ó sá cúú-xí dàtná Xítóhó Jesucristú te ducaⁿ chi ndihí ñaha-gá xii-yu ichi cuáháⁿ-yu dàvá-áⁿ. ⁵ Dico ío vǎi-yu ñá túú ní quidé-yu nàcuáa càháⁿ Yá Ndióxi, te xiáⁿ ñá túú ní cùu váha iní ñáhá-gá xii-yu. Te sá dúcáⁿ ñí quidé-yu núu xiáⁿ óré ñúhú-yu ichi cuáháⁿ-yu xití yucu ío vǎi-yu ní xihí.

⁶ Te ducaⁿ ñí cuu cuendá nchoo vǎ cǎnchícúⁿ nihnu-o càda-o nacuáa ní quidé-yu, chi ñáyi-áⁿ mee-ni nchaa sá cuèhé sá dúhá ñí saní iní-yu ní quidé-yu. Te nchoo xini ñuhu-xi sá vǎ dúcáⁿ càda-o. ⁷ Te yúhú càháⁿ-í dóho-ndo sá vǎ quindáá iní-ndó te ní vǎ cáda càhnu-ndo ni ñⁿ sá càchí-yu cùu

ndióxi ní cadúha cue téé ñuyú-a dàtná ní quide cue ñaní tnáhá-ndí ní xindecu ndéé sanaha. Chi ñáyi-áⁿ ñí quidé-yu dàtná càháⁿ-xi núú tütú Yá Ndióxi núú càchí-xi: “Nchaa ñáyi ní xexí-yu ní xihí-yu ní quidé-yu vico, ní quide càhnu-yu sá càchí-yu cùu ndióxi ní cadúha-yu te ñá ndáá sá ndióxi cúú-xí”, duha càchí-xi núú tütú-gá. ⁸ Te ni vǎ cundècu-ndo ichi dǎí iní dàtná ní quide dava ñáyi-áⁿ, chi sá dúcáⁿ ñí quidé-yu te ní xihí ócò úní mǎl-yu ñⁿ-ni nduu. ⁹ Te vǎ cǎní iní-ndó sǎ sǎ cǎhnu iní Yá Ndióxi te nǎndí sá cuèhé sá dúhá càda-ndo cuendá cuñí-ndó quini-ndó núu nása cada ñaha-gá xii-ndo, chi ñáyi ní xindecu ndéé sanaha-áⁿ ducaⁿ ñí xoo cada-yu, te ní xihí-yu ní xexihaⁿ còó. ¹⁰ Te ni vǎ càháⁿ cuèhé-ndó cuendá Yá Ndióxi, chi dava ñáyi ní xindecu ndéé sanaha-áⁿ ducaⁿ ñí quidé-yu ní càháⁿ cuèhé-yu cuendá-gá te ní quixi espíritu xínú cuèchi núú-gá ní sahní ñaha-xi xii-yu.

¹¹ Te ducaⁿ ñí cuu te ducaⁿ ñí ngúndéé núú tütú Yá Ndióxi cuendá dacuàha-o vitna te cuyatni nduu naa ñuyú-a. Te nchaa tñúhu sá ñí ngódó tñuní-áⁿ càháⁿ dóho ñaha-xi xii-o cuendá sá vǎ cáda-ó dàtná ní quide ñáyi-áⁿ. ¹² Te xiáⁿ núu nchaa nchòhó ñáyi sǎni iní sá ío váha cundáá ndécú ichi Xítóhó Jesucristú cada cuendá-ndó sǎ dúcáⁿ-ní cundáá-ndó núú-gá, te vǎ dáná cuendá-ndó càda-ndo sǎ ñá túú cùu váha iní Yá Ndióxi. ¹³ Te ñu-ñí dàtná quidé sǎcuíhǎ dácaháⁿ-xi iní nchaa dava-gá ñáyi nǎndí quidé-yu, te ñu-ñí ducaⁿ quide ñaha-xi xii-ndo. Dico mee Yá Ndióxi cúú-gá Yá quide ndáá xii quide-gá nchaa sá càháⁿ-gá, te ñá dáñá-gá sá súñí cuídó sǎcuíhǎ coto ndéé ñáhá-xí xii-ndo, chi neni-ni nàcuáa cundee iní-ndó dàña-gá ducaⁿ quide ñaha-xi xii-ndo. Te ñu-ñí-gá chindee ñaha-gá xii-ndo cundee iní-ndó vǎ cáda-ndó cuèi nǎndí sá ná dàcahu iní ñáhá-xi xii-ndo.

14 Te xiáⁿ núu cãháⁿ-í dóho nchòhó ñáyu ío cùu iní-í sã vã quindáá iní-ndó nì ìⁿ sã càchí-yu cùu ndiòxí te ñã ndàá chi dícó ndaha cue téé ñuyú-a ní cuáha nchaa xiáⁿ, te ni vã cáda cãhnu-ndo. 15 Te duha cãháⁿ-í chi cùu-ndo ñáyu tècú tñúni, te mee-ndo ïo vãha cuáha-ndo cuendá te núu vãha-ni cãháⁿ-í ãdi ñã túu vãha-ni. 16 Te nchoo ndácáⁿ táhú-ó núu Yã Ndiòxí cuendá ndudí ndéhé yoho yàha stilé sã xihí-ó, te sã dúcáⁿ xihí-ó ndudí ndéhé yoho yàha stilé-áⁿ, te xiáⁿ ndácú iní-ó sã ìⁿ-ní cùu-o ndihí Xítohó Jesucristú cuendá sã ñi sati ñiñí-gã ní xihí-gá núu cùrúxí, te ãu-ni ducaⁿ sãtnahá tucu-xi cùu paá sã xéxi-ó òré xihí-ó ndudí ndéhé yoho yàha stilé-áⁿ, chi sã dúcáⁿ xéxi-o paá-áⁿ xiáⁿ ndácú iní-ó sã ìⁿ-ní cùu-o ndihí Xítohó Jesucristú sã cuendá yiqui cùñú-gá. 17 Te cuéi vãi vihi-o dícó ìⁿdi-ni paá xéxi-ó, te sã dúcáⁿ ìⁿdi-ni paá xéxi-ó xiáⁿ ndácú iní-ó sã ìⁿ-ní cùu-o ndihí Xítohó Jesucristú.

18 Te cada cuendá-ndó nãcuáa quide ñáyu israél, chi ñáyu-áⁿ xéxi-yu sã ndúú táhú Yã Ndiòxí. Te sã dúcáⁿ quidé-yu-áⁿ cùtnùni iní-ó sã tnàhá tñuhu-yu ndihí-gá. 19 Te vã caní iní-ndó sã sã dúhá cãháⁿ-í te cãchí-ndó sã cùnuu nchaa sã càchí-yu cùu ndiòxí ní cadúha cue téé ñuyú-a chi ñã túú ná cùú nì ìⁿ nchaa xiáⁿ. Te ãu-ni ducaⁿ cùu tucu nchaa sã sãñaha ñáyu ndùu táhú-xi chi ñã túú cùnuu-xi, chi ìⁿ-ní cùu-xi ndihí nchaa dava-gá sã xéxi-ó. 20 Te yúhú càchí-í sã sã dúcáⁿ quide nchaa ñáyu ñã túú tnàhá tñuhu ndihí Yã Ndiòxí, te dícó nchaa espíritú cùndihí yucu ñávãha sãñahá-yu sã ndúú táhú-xi sã dúcáⁿ quidé-yu. Te ñã díú Yã Ndiòxí sãñahá-yu sã ndúú táhú-gã. Te yúhú cuñí-í sã vã tnàhá tñuhu-ndo ndihí cue espíritú cùndihí yucu ñávãha. 21 Te ducaⁿ chi vã cùú tnàhá tñuhu-o ndihí cue espíritú cùndihí yucu ñávãha te tnahá

tñuhu-o ndihí Xítohó Jesucristú, te ñã túú ndùu vãha-xi ngóo càxi-o coho-o sã ndúú táhú cue espíritú cùndihí yucu ñávãha-áⁿ, te ngóo càda-o nacúaa ní dándõ tñuhu Xítohó Jesucristú coho-o ndudí ndéhé yoho yàha stilé, te caxi-o paá cada-o sã ndácú iní-ó sã ñi xihí-gá núu cùrúxí. 22 Te vã caní iní-ó ãucaⁿ cada-o cuendá sã vã cùdéeⁿ Yã Ndiòxí, chi ñã túú ná cãhnu cuu-o núu cada-o nãni véxi iní meé-ó, chi mee-gã ío cãhnu cuu-gã.

Cada-o nchaa nacúaa cuu cãhnu Yã Ndiòxí

23 Te ndáá sã ncháá sã cuñí-ó càda-o te cuu cada-o dícó ñã ncháá cùu-xi sã vãha sã cùú-xi-ó, te ni ñã ncháá-xi chindee ñaha-xi nacúaa ñihí ndée-gã-ó cùndecu-o ichi Xítohó Jesucristú. 24 Te xini ñuhu-xi sã cáda-ó sã vãha sã cùú-xi tnàha ñáyu-o te ñã díú mée-ni sã cùú-xi mée-o cada-o.

25 Te nchòhó cuu caxi-ndo nchaa cuñú sã cùyãhu cuñú sã xini caxi-ndo, te vã ndúcú tñuhu-ndo te núu cùu-xi cuñú sã ñi nduu táhú sã càchí-yu cùu ndiòxí. Te ñã túú ná caní iní-ndó càxi-ndo, 26 chi ñuyú-a ndihí nchaa sã ío cùú-xi cuendá Yã Ndiòxí.

27 Te núu ìⁿ ñáyu ñã túú ndècu ichi Xítohó Jesucristú cãháⁿ ñãhá-yu xii-ndo quíhíⁿ-ndó càxi-ndo díta vehé-yu, te núu sãni iní-ndó sã quíhíⁿ-ndó te cuu quíhíⁿ-ndó te caxi-ndo cuéi ná cùu sã táxi-yu dícó vã càcáⁿ tñuhú-ndó nũ-yu núu ndée ní ñihí-yu, te ducaⁿ te cuu vãha iní-ndó càxi-ndo. 28 Te núu ìⁿ ñáyu càchí-yu sã xiáⁿ cùú-xi sã ñi nduu táhú sã càchí-yu cùu ndiòxí te vã cãxi-ndó cuendá sã ñáyu ducaⁿ cãháⁿ-áⁿ cuu vãha iní-yu te ñã túú tnàhí ná caní iní-yu. 29 Te yúhú cãháⁿ-í cuendá nãcuáa sãni iní meé ñáyu ducaⁿ cãháⁿ-áⁿ te ñã díú sã nãcuáa sãni iní meé-ndó quide-ndo.

Te dava-ndo càchí-ndó: “Cuu-ni cada-o nchaa nacúaa sãni iní meé-ó cuéi dava-gã ñáyu sãni iní-yu

sá ñà túú ndùu váha-xi sá dúcáⁿ càda-o”, duha càchí-ndó. ³⁰ Te càchí tucu-ndo: “Ñá túú tàú-xi cáháⁿ cuèhé ñáyiú cuèndá-ó sá cuèndá nchaa sá xéxi-ó chi ndàcáⁿ táhú-ó núú Yá Ndiòxí òré xéxi-ó”, duha càchí-ndó. ³¹ Te cuèi nándi sá xini caxi-ndo nihí-ndó xéxi-ndo àdi quide-ndo, te cada-ndo nàcuáa cáháⁿ váha ñáyiú cuèndá Yá Ndiòxí. ³² Te vá cadá-ndó sá ñà túú tàú-ndó càda-ndo cuèndá sá vá cadá ñáyiú ñⁿ sá ñà túú cùu váha iní Yá Ndiòxí. Te ni sá cúu-xí cuè ñáyiú isràél, te ni sá cúu-xí cuè ñáyiú ndècu ichi-gá vá dúcáⁿ càda-ndo sá cúu-xí-yu. ³³ Te yúhú ío ndùcu ndee-í quidè-í nàcuáa cudùu-í núú nchaa ñáyiú, te quide-í sá váha sá cúu-xí-yu, te ñá túú quide-í mee-ni sá cúu-xí mée-í. Te ducaⁿ quide-í cuèndá quíndáá iní-yu tnúhu Xítóhó Jesucristú te naníhí táhú-yu.

11

¹ Te chí cànchìcúⁿ nihnu cada-ndo nchaa nacuáa quide-í nchìcúⁿ nihnu-í nchaa nàcuáa quide Xítóhó Jesucristú.

Nàcuáa tàú-xi cada nchaa ñáyiú dìhí núú tàcá-yu dàcuahá-yu tnúhu Yá Ndiòxí

² Te nchòhó ñáyiú ndècu ndihí-í ichi Xítóhó Jesucristú càchí tnúhu-í xii-ndo sá ío cùdí iní-í, chi ndàcu iní ñáhá-ndó xii-í, te quide-ndo nchaa nacuáa ní dánhèhé ñáhà-í xii-ndo. ³ Te cùiní-í sá nchòhó cutnùnì iní-ndó sá ñⁿdi-í-ni Yá Ndiòxí cúu-gá Yá cùnùu taxi tnunì ñáhá xii Xítóhó Jesucristú, te ducaⁿ Xítóhó Jesucristú ñⁿdi-í-ni-gá cùnùu taxi tnunì-gá nchaa cue téé, te nchaa cue téé ñⁿni mee-güedé cùnùu-güedé táxi tnùnì-güedé ñadìhí-güedé. ⁴ Te núu nchoo cuè téé na dàdàhu-o díquì-ó òré càháⁿ-ó núú ñáyiú tnúhu sá dácàhu iní ñáhá Yá Ndiòxí xii-o àdi òré càháⁿ ndihí-o-gá, te ñⁿ sácáⁿnúú

cúu-xí te núu ducaⁿ na càda-o dadàhu-o díquì-ó. ⁵ Dico núu ñáyiú dìhí vá dàdàhu-yu díquì-yu òré càháⁿ ndihí-yu Yá Ndiòxí, àdi òré càháⁿ-yu tnúhu sá dácàhu iní ñáhá-gá xii-yu núú tnàhá ñáyiú-yu, te sácáⁿnúú cúu-xí te núu vá dàdàhu-yu díquì-yu, chi ñⁿ-ni cùu-xi te núu na dèté ndihí-yu díquì-yu. ⁶ Te núu ñá túú cùinì cue ñáyiú dìhí dàdàhu-yu díquì-yu te váha-gá sá ná dèté ndihí-yu díquì-yu. Te núu cùcahaⁿ núu-yu sá dèté díquì-yu te váha-gá sá ná dàdàhu-yu díquì-yu. ⁷ Te nchoo cuè téé vá cúu dàdàhu-o díquì-ó òré càháⁿ ndihí-o Yá Ndiòxí ní òré càháⁿ-ó tnúhu sá dácàhu iní ñáhá-gá xii-o núú ñáyiú chí dìhna-gá-ó ní cadúha ñaha Yá Ndiòxí xii-o, te ní taxi ndecu-gá nchaa sá xini tnùnì-ó dàtná ndécú nchaa sá xini tnùnì mée-gá. Te ducaⁿ ní quide-gá chí cùinì-gá sá nchóó càda-o nacuáa cáháⁿ nchaa dava-gá ñáyiú sá ío càhnu cuu-gá, te cue ñáyiú dìhí quidè-yu nàcuáa cunuu nchòo cue téé. ⁸ Te Yá Ndiòxí ní cadúha-gá téé, dico ñá díú yiqui naha ñadìhí ní quènehe-gá ní cadúha-gá téé chí yiqui naha téé ní quènehe-gá ní cadúha-gá ñadìhí. ⁹ Te sá cuèndá téé ducaⁿ ní cadúha-gá ñadìhí-áⁿ te ñá díú sá cuèndá ñadìhí ní cadúha-gá téé. ¹⁰ Núu xíáⁿ tàú-xi sá ncháá ñáyiú dìhí dàdàhu-yu díquì-yu cuèndá ducaⁿ cùtnunì sá ñà túú cùnùu-yu dàtná cùnùu nchoo cue téé. Te ducaⁿ xini ñuhu-xi cadá-yu sá cuèndá nchaa espíritú xínú cuèchi núú Yá Ndiòxí. ¹¹ Te vitna nchoo ñáyiú ndècu ichi Xítóhó Jesucristú, vá càchí-ó sá cuè téé ñá túú xini ñuhu-güedé cue ñáyiú dìhí chindee ñáhá-yu, te ni vá càchí-ó sá cuè ñáyiú dìhí ñá túú xini ñuhú-yu cue téé chindee ñàha-güedé xii-yu. ¹² Te ñⁿ yiqui naha téé ní queñuhu Yá Ndiòxí ní cadúha-gá ñadìhí, dico

vitna chi ñáyiú ðíhí dácàcú-yu téé. Te téé, ñadíhí ní cadúha Yá Ndiõxí, te ðiu-ni ducaⁿ ní cadúha-gá nchaa dava-gá sá íó.

¹³ Te mee-ndo càda cuendá-ndó te núu ndùu váha-xi sá vǎ dádáhu cue ñáyiú ðíhí díquí-yu òré càháⁿ ndíhí-yu Yá Ndiõxí àdi ñáhá. ¹⁴ Te nchaa ñáyiú càháⁿ-yu sá ñà túú ndùu váha-xi sá cuè téé cunduu nàni idi díquí-güedé, chi ìⁿ sácáⁿnúú cúú-xí càchí-yu. ¹⁵ Te nchaa ñáyiú ðíhí ñáyiú nàni idi díquí-xi càchí ñáyiú sá ìⁿ sá vǎha cùu-xi sá cúú-xí-yu sá dúcáⁿ nàni idi díquí-yu. Te ducaⁿ chi Yá Ndiõxí ní cachí-gá sá dúcáⁿ cunduu-yu cuendá quidáhu-xi díquí-yu. ¹⁶ Te núu íó ñáyiú cuení dacáá cuendú cuendá sá ñí càháⁿ-í-a, te na cùnahá-yu sá ncháá nchúhú cue téé càháⁿ tnúhu Xítohó Jesucristú ðiu-ni ducaⁿ sàni iní-ndí cada nchaa ñáyiú ðíhí. Te ðiu-ni ducaⁿ sàni iní nchaa ñáyiú ndècu ichi-gá.

Cuendá ñáyiú ñà túú quide datná ní quide Xítohó Jesucristú cùtnàhá ní cudìni-gá ndíhi cue téé ní xica cuu ndíhi-gá

¹⁷ Te nchòhó ñà túú quide váha-ndo ndècu-ndo núu xǎⁿ ðuha na càháⁿ-í dóho-ndo, chi nchòhó òré tàcá-ndó ñà túú quide váha-ndo chi ñà túú chindee tnaha-ndo cada-ndo sá vǎha, chi da nàdatuhú iní tnáhá-ndó nàcuáa ndècu-ndo. ¹⁸ Te díhna-gá na càchí tnúhu-í xii-ndo sǎ ñíhí-í tnúhu sá òré tàcá-ndó quide-ndo nacuáa ní càháⁿ Xítohó Jesucristú, te ñà túú cùu ìⁿnuu-ndo òré ducaⁿ quide-ndo nacuáa ní càháⁿ-gá. Te dava sá càháⁿ ñáyiú sàndáa iní-í te dava ñáhá. ¹⁹ Te ndáa sá dúcáⁿ tnàhí cada-xi vǎ cúú ìⁿnuu-ndo cuendá ducaⁿ cùtnuní nùu ndèdaçaa-ndo sandáa ndisa iní-ndó tnúhu Xítohó Jesucristú te ndèdaçaa-ndo ñáhá! ²⁰ Te ndí tnahá òré tàcá-ndó quide-ndo datná ní quide Xítohó Jesucristú cùtnàhá ní cudìni-gá ndíhi cue téé

ní xica cuu ndíhi-gá, te ñà túú quide-ndo nacuáa taù-xi cunduu chi cùtexínu-ni quide-ndo. ²¹ Chi òré tàcá-ndó quide-ndo nacuáa ní cachí Xítohó Jesucristú, te dava-ndo ngödó núú-ndó díhna-gá-ndó xèxi-ndo sá néhé-ndó te ñà túú sá cùndètu tnaha-ndo, te ñà túú càháⁿ tnáhá-ndó nùu xǎⁿ dava-ndo ñà túú xèxi-ndo ndahá xití-ndó, te dava-ndo xidó-ndó quide-ndo chi xini-ndo. ²² Te vǎ dúcáⁿ càda-ndo chi càa vehe-ndo núú dúcáⁿ càxi-ndo coho-ndo cada-ndo ndéé ndahá xití-ndó, chi sá dúcáⁿ quide-ndo te dàquee tihú-ndó nchaa dava-gá ñáyiú ndècu ndíhi-ndo ichi Yá Ndiõxí, te dándõ canúú-ndó nchaa ñáyiú ndáhú sá dúcáⁿ quide-ndo. ¡Núu xǎⁿ vǎ cúú càchí-í sá cúú-ndó ñáyiú quide váha chi ñà túú quide váha-ndo sǎ dúcáⁿ quide-ndo ndecu-ndo!

Xítohó Jesucristú ní dándõ tnúhu-gá sá cóhó-ó ndùdí ndéhé yoho yàha stilé te caxi-o pàa cuendá ndacu iní-ó sǎ ñí xíhí-gá

(Mt. 26:26-29; Mr. 14:22-25; Lc. 22:14-20)

²³ Te datná-ni ní dánèhé ñáhá Xítohó Jesucristú xii-í te ðiu-ni ducaⁿ ñí dánèhé ñáhá-í xii-ndo, chi ðiu-ni niú cùtnàhá ní sáha cuendá ñáhá ndíi Jüdás Iscarioté xii-gá núú cuè téé cùu úhú iní ñáhá ñí queheⁿ-gá pàa, ²⁴ te ní ndacáⁿ táhú-gǎ núú Yá Ndiõxí, te ní táhú cuèchi-gá, te ní xáhaⁿ-gǎ xii cue téé xica cuu ndíhi-gá: “Chí quéhéⁿ pàa-a caxi-ndo te cada iní-ndó sǎ cúú-xí datná yiqui cùñú-í, chi yúhú cuú-í sácüendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, càchí-gá xǎhaⁿ-gǎ xii-güedé. ²⁵ Te sátá ñí yàha ní xexi-güedé pàa sá ñí sǎñaha-gǎ, te ní queheⁿ-gá tàsáⁿ ñúhú ndùdí ndéhé yoho yàha stilé, te ní ndacáⁿ táhú tucu-gá núú Yá Ndiõxí. Te ní xáhaⁿ-gǎ xii cue téé xica cuu ndíhi-gá: “Chí cóhó ndùdí ndéhé yoho yàha stilé-a, te

cada iní-ndó sã cúú-xí dàtná níñí-í, te cuèndá níñí-í sã cáti òrè cuú-í cutnùni ndáá sã Yá Ndiòxí cada-gá ingá núú sã vâha sã cúú-xí ñâyiu. Te ndi tnahá òrè coho-ndo ndùdí ndéhé yoho yâha stilé-án te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xâhaⁿ-gã xii-güedé. ²⁶ Te ndi tnahá òrè xéxi-ndó pàá te xihí-ndo ndudí ndéhé yoho yâha stilé, te xiáⁿ dátúu-ndo núú ñâyiu sã Xítohó Jesucristú ní xihí-gá cuèndá-yu, te ducaⁿ-ni càda-ndo cundecu-ndo ndéé ná sãá nduu quixi tucu Xítohó Jesucristú.

Nàcuáa cada-o òrè caxi-o pàá ndihí òrè coho-o ndudí ndéhé yoho yâha stilé dàtná ní cachí Xítohó Jesucristú

²⁷ Te dava-ndo ñã túú quide-ndo nacuaa cuini Yá Ndiòxí cada-ndo òrè xéxi-ndó pàá ndihí òrè xihí-ndó ndudí ndéhé yoho yâha stilé, te sã dúcáⁿ quide-ndo-án te cucuéchi xii-ndo chi ñá túú nèhe-ndo sã yíñùhu sã cúú-xí yiqui cuñú Xítohó Jesucristú, te ni ñã túú nèhe-ndo sã yíñùhu sã cúú-xí níñí-gã. ²⁸ Te ío váha cada cuèndá-ndó te núú ndècu váha iní-ndó núú Xítohó Jesucristú òrè cúmãní-gã caxi-ndo pàá ndihí òrè cúmãní-gã coho-ndo ndudí ndéhé yoho yâha stilé. Te núú ndècu váha iní-ndó núú-gã te caxi-ndo te coho-ndo. ²⁹ Te dava nchòhó ñã túú sãni váha iní-ndó cuèndá yiqui cuñú Xítohó Jesucristú te xèxi-ndo paá te xihí-ndo ndudí ndéhé yoho yâha stilé, te nacháhu-ndo sã dúcáⁿ ñã túú sãni váha iní-ndó. ³⁰ Te ñuu sã dúcáⁿ quide-ndo núú xiáⁿ vâi-ndo cuhú, te ío ndàhú ndécú-ndó, te dava ñâyiu ndècu ndihí-ndo sa ní xihí-yu. ³¹ Dico núú ío váha sãha-o cuèndá nãcuáa ndècu-o núú Yá Ndiòxí, te vá dúcáⁿ dândoho ñaha-gá xii-o. ³² Te òrè ndéhé Yá Ndiòxí sã ñã túú quide ndáá-ó ndècu-o te dândoho ñaha-gá xii-o. Te ducaⁿ quide-gá cuèndá sã vâ

cuíta nihnu-o, chi núú ñáhá te cuíta nihnu-o ndihí nchaa ñâyiu ndècu ichi cuehé ichi duha.

³³ Te núú xiáⁿ càháⁿ-í dóho nchaa nchòhó ñâyiu ndècu ndihí-í ichi Xítohó Jesucristú sã òrè tacá-ndó càda-ndo nacuaa ní quide Xítohó Jesucristú cutnàhá ní cudini-gá ndihí cue téé ní xica cuu ndihí-gá, te cundetú tñaha-ndo nduu nchaa-ndo te dàtnùni ducaⁿ càda-ndo. ³⁴ Te núú dava-ndo xihí-ndó dòcò te caxi duuⁿ-ndo vèhe-ndo te dàtnùni nat-acá-ndó, cuèndá òrè natacá-ndó te vá cádá-ndó ñã sã ñã túú tàù-ndó càda-ndo cuèndá sã vâ dândoho ñaha Yá Ndiòxí xii-ndo. Te òrè quixi coto ñaha-í xii-ndo te dàvã-án cachí tñuhu-í xii-ndo nchaa dava-gá sã cúmãní.

12

Nàcuáa chindee ñaha Espiritú Yá Ndiòxí cada-o ñã ñã-ó

¹ Te nchòhó ñâyiu ndècu ndihí-í ichi Xítohó Jesucristú cuini-í cachí tñuhu-í xii-ndo nãcuáa chindee ñaha Espiritú Yá Ndiòxí xii-o ñã ñã-ó cuèndá cutnùni iní-ndó.

² Te nchòhó sa nãha-ndo sã cutnàhá vátá cundècu-gá-ndó ichi Xítohó Jesucristú ní xóo dandàhú ñáhá yùcu ñávãha xii-ndo, te ní xóo quíndáá iní-ndó nchaa sã ní cadúha cue ñâyiu ñuyúú-a nchaa sã càchí-yu cùu ndiòxí te ñã ndáá sã ndiòxí cúú-xí, te nchaa xiáⁿ ñã túú càháⁿ-xi. ³ Te cuini-í sã nchòhó cutnùni iní-ndó sã Espiritú Yá Ndiòxí ñã túú chindee-xi ní ñã ñâyiu cuèndá sã càháⁿ úhú-yu Xítohó Jesucristú. Te ni ñã ñâyiu ñã túú càhu iní-yu càháⁿ-yu sã Xítohó Jesucristú cúú-gã Xítohó-yu te núú ñã túú Espiritú Yá Ndiòxí dácahu iní ñáhá-xí xii-yu.

⁴ Te ndi ñã ñã ñã ndi ñã ñã nduu chiuⁿ ní cachí Espiritú Yá Ndiòxí cada-o, te ñuu-ni ñã ñã-ni Espiritú-gá ndécú.

⁵ Te ndi ñã ñã nduu chiuⁿ quide-o xinu cuechi-o núú ñã ñã-ni Xítohó Jesucristú. ⁶ Te ndi ñã ñã ndi ñã ñã

chindee ñaha Yá Ndiõxí xii-o nàcuáa cada-o chiuⁿ-gá, te ñiu-ni ñⁿ ñii-gá ndécú chindee-gá nchaa ñáyiu. ⁷ Te Espiritú Yá Ndiõxí quidé-xí sá nchóó càda-o sá vãha, te ducaⁿ chindee-o cue ñáyiu ndècu ndihi-o ichi Xitohó Jesucristú. ⁸ Te dava-o ñi nduu táhú-ó núú Yá Ndiõxí sá Espiritú-gá cada te ndacu-o cãháⁿ-ó tnũhu sá ño càhnu cuu ñiu-ni tnũhu mee Yá Ndiõxí, te dava tucu-o ñi nduu táhú-ó cùtnuní iní-ó nàcuáa cãháⁿ tnũhu-gá te cãháⁿ-ó nàcuáa cuíní Espiritú-gá. ⁹ Te dava tucu-o ñi nduu táhú-ó sã ño quíndáa iní-ó Xitohó Jesucristú cuendá cada-gá ñⁿ sá cuíní-ó, te ducaⁿ chi Espiritú Yá Ndiõxí chindee ñaha-xi xii-o. Te dava tucu-o ñi nduu táhú-ó sã cãcãⁿ táhú-ní-ó núú Xitohó Jesucristú cuendá ñáyiu cùhú te ndúha-yu. ¹⁰ Te dava tucu-o ñi nduu táhú-ó sã ndácú-ó càda-o nchaa sá vã yõ tnàhí ndàcu cada, te dava tucu-o ñi nduu táhú-ó núú Yá Ndiõxí sã cãháⁿ-ó tnũhu sã dácàhu iní ñãhá-gã xii-o, te dava tucu-o ñi nduu táhú-ó sã cùtnuní iní-ó núú ñiu Espiritú Yá Ndiõxí chindee ñaha-xi xii ñáyiu òré cãháⁿ-yu tnũhu-gá àdi cue espíritú cùndihi yucu ñávãha. Te dava tucu-o ñi nduu táhú-ó cãháⁿ-ó tnũhu sã dácàhu iní ñãhá Espiritú Yá Ndiõxí xii-o tnũhu sã ñà túú xini-ó, te dava tucu-o ñi nduu táhú-ó cãháⁿ-ó nàcuáa quèe-xi nchaa tnũhu-áⁿ. ¹¹ Te ñⁿ ñii díí-ni Espiritú Yá Ndiõxí ducaⁿ chindee ñaha-xi, te ñiu-ni Espiritú-gá dácãhũ ñaha-xi xii-o ñi ñⁿ núú chiuⁿ sá cuíní mée-xí càda-o.

Nchaa-o ñⁿ-ni cuu-o ndihi Xitohó Jesucristú

¹² Te nchoo ñáyiu ndècu ñuyúú-a titní xichi cùu yiqui cuñú-ó dico ñⁿ-ni cùu-xi, te ñiu-ni ducaⁿ sãtnahá-xi cùu-o vitna ndecu-o ichi Xitohó Jesucristú chi ñⁿ-ni cùu-o ndihi-gá. ¹³ Te dava-o cùu-o ñáyiu isràél, te dava-o ñà túú cùu-o ñáyiu isràél, te dava-o cùu-o ñáyiu ñà

túú tnàhí dàñá quee núú chiúⁿ patróoⁿ-xi, te dava-o cùu-o ñáyiu dàñá quèe núú chiúⁿ patróoⁿ-xi. Te mee Espiritú Yá Ndiõxí ñi quide-xi sã nchãá-ó ñⁿ-ná cùú-ó ndècu-o ndihi Xitohó Jesucristú. Te Yá Ndiõxí ñi cachí-gá sã nchãá-ó cùndecu ndihi-o Espiritú-gá.

¹⁴ Te nchòhó xini-ndó sã titní xichi cùu yiqui cuñú-ó te ñà díú ñⁿ-ni xichi cuu-xi. ¹⁵ Te cuèi sãhá-ó ndihi ndaha-o ñà túú ñⁿ-ni cuu-xi dico vã cùú cãchí-ó sã sãhá-ó ñà túú cùu-xi yiqui cuñú-ó. ¹⁶ Te cuèi lóho-o ndihi tinuu-o ñà túú ñⁿ-ni cuu-xi dico vã cãchí-ó sã lóho-o ñà túú cùu-xi yiqui cuñú-ó. ¹⁷ Te núu ñihí ñi ndúú yiqui cuñú-ó ní xindee mee-ni tinuu-o, te ñà túú ndéè cundeé lóho-o cùndedóho ñi cùu te núu ducaⁿ, àdi núu ñihí yiqui cuñú-ó ní xindee mee-ni lóho-o te ñà túú ndéè cundeé dítní-ó ñi cùu te núu ducaⁿ. ¹⁸ Dico mee Yá Ndiõxí ñi taxi ndecu-gá ñⁿ ñⁿ xichi yiqui cuñú-ó nàcuáa ñi cachí iní mée-gã. ¹⁹ Te núu ñⁿ-ni sã ñi xindee ñihí yiqui cuñú-ó, te vã cùnduu-xi nacuáa tàú-xi cunduu ñi cùu te núu ducaⁿ. ²⁰ Dico titní xichi cùu yiqui cuñú-ó, te ñⁿ-ni cùu-xi ñihí-xi.

²¹ Te sa ñaha-o sã vã cùú cãchí-ó sã tinuu-o ñà túú xini ñuhu-xi ndaha-o, àdi díquí-ó ñà túú xini ñuhu-xi sãhá-ó. ²² Te nchoo sã ñaha-o sã dáva xichi yiqui cuñú-ó sã cãchí-ó sã ñà túú cùnuu ío-gá xini ñuhu-xi. ²³ Te dava xichi yiqui cuñú-ó sã ñà túú quide cuendá cãvíhí-ó nchaa xíãⁿ sã quidáhu dóo sãcuñhnu-o, te dava xichi yiqui cuñú-ó ñà cùú cùtúu chi dacuití sã quidáhu. ²⁴ Te nchaa xichi yiqui cuñú-ó sã cùú cùtúu ñà túú xini ñuhu-xi quidáhu. Te Yá Ndiõxí ñi taxi ndecu-gá nchaa xichi yiqui cuñú-ó nàcuáa tàú-xi cunduu. Te ñi cachí-gá sã dáva-gã xichi yiqui cuñú-ó núú vã cùú cùtúu quidáhu. ²⁵ Te ducaⁿ ñi quide-gá cuendá sã ñⁿ-ní cùu yiqui cuñú-ó. Te ducaⁿ ñi tnahá ñⁿ ñⁿ xichi yiqui

cũñú-ó chindee tnaha-xi. Te ducaⁿ sãtnahá-xi cùu nchoo vitna ndecu-o ichi Xítohó Jesucristú chi chindee tnaha-o. ²⁶ Te núu ìⁿ xichi yiqui cùñú-ó ná tnàhúhú te ñihí-ó quide úhú-xi, te núu ìⁿ xichi yiqui cùñú-ó ïo váha ndecu-xi te ducaⁿ ñihí yiqui cùñú-ó cúu váha-xi. Te ducaⁿ sãtnahá-xi cùu-o vitna ndecu-o ichi Xítohó Jesucristú.

²⁷ Te nchoo ndecu ndihi-o, Xítohó Jesucristú, te cùu-o datná yiqui cùñú-gá te ìⁿ ìⁿ-o cùu-o datná ìⁿ ìⁿ xichi yiqui cùñú-gá. ²⁸ Te ducaⁿ sãtnahá-xi cùu-o chi Yá Ndióxi ní taxi-gá ndí ðíⁿ ndí ðíⁿ chiuⁿ quide-o sá cúu-xí nchaa ñáyiú ndècu ichi-gá. Te díhna-gá cue téé caca cuu cáháⁿ tnúhu-gá núu ñáyiú ní taxi ndecu-gá, te dátñuní ní taxi ndecu-gá cue téé cáháⁿ tnúhu-gá nacuáa dácàhu iní ñáhá mée-gá, te dátñuní ní taxi ndecu-gá cue téé dènehé ñáhá xii ñáyiú tnúhu-gá núu tàcá-yu, te dátñuní ní taxi ndecu tucu-gá cue téé ndàcu quide sá vã yõo tnàhí ndàcu cada. Te ní taxi ndecu tucu-gá cue téé xicáⁿ táhú-ní núu Xítohó Jesucristú cuèndá ñáyiú cùhú te ndúha-yu. Te ní taxi ndecu tucu-gá cue téé chindee cue ñáyiú ndècu ichi-gá. Te ní taxi ndecu tucu-gá cue téé yìndaha ñaha xii ñáyiú ndècu ichi-gá, te ní taxi ndecu tucu-gá cue téé cáháⁿ tnúhu sá dácàhu iní ñáhá Espiritú-gá tnúhu sá ñà túú xini-güedé. ²⁹ Te ñà ncháá-ó cùu-o cue téé ní táuchíúⁿ Xítohó Jesucristú cáháⁿ tnúhu-gá núu ñáyiú, te ñà ncháá-ó cùu-o cue téé cáháⁿ tnúhu sá dácàhu iní ñáhá Yá Ndióxi xii-o. Te ñà ncháá-ó cùu-o cue téé dácuaa ñaha xii-yu. Te ñà ncháá-ó cùu-o cue téé quide sá vã yõo tnàhí ndàcu cada. ³⁰ Te ñà ncháá-ó cùu-o cue téé ðicó-ni cacáⁿ táhú núu Xítohó Jesucristú cuèndá ñáyiú cùhú te ndúha-yu. Te ñà ncháá-ó cùu-o cue téé cáháⁿ tnúhu sá dácàhu iní ñaha Espiritú Yá Ndióxi tnúhu sá ñà túú xini-ó, te ñà ncháá-ó cùu-o cue téé cùtnuní iní-xi

cáháⁿ nacuáa ndùu tnúhu-áⁿ. ³¹ Te ïo nducu ndèe-ndo cada-ndo nacuáa nduu táhú-ndó núu Yá Ndióxi nchaa sá ïo-gá cùnùu cada-ndo. Te vitna na dènehé ñáhá tucu-í xii-ndo nacuáa cada-ndo, dico sá dènehé ñáhá-í-a ïo-gá cùnùu-xi.

13

Cuu iní-ó tnàha ñáyiú-o

¹ Te núu nchoo xini-ó cáháⁿ-ó tnúhu sá ïo vii ïo váha cuáháⁿ cáháⁿ ñáyiú ñuyúú-a, àdi xini-ó cáháⁿ-ó tnúhu sá ïo vii ïo váha cuáháⁿ cáháⁿ cue espíritú xínú cuèchi núu Yá Ndióxi, te núu xini-ó cáháⁿ-ó nchaa tnúhu-áⁿ te ñà túú cùu iní-ó cuè tnaha ñáyiú-o ña, te ñà túú nàndíhi-xi sá xini-ó cáháⁿ-ó tnúhu-áⁿ te cùu-o datná daca caá sá ïo dusaⁿ quide. ² Te núu cùu-o ñáyiú cáháⁿ tnúhu sá dácàhu iní ñáhá Yá Ndióxi, àdi cuu-o ñáyiú cùtnuní iní-xi nacuáa cuáháⁿ nchaa tnúhu ndùu yuhu ni cuu, àdi cuu-o ñáyiú ïo váha cùtnuní iní-xi nchaa nacuáa quide Yá Ndióxi, àdi cuu-o ñáyiú ïo váha sàndáá iní ñáhá xii Yá Ndióxi nacuáa ndacu-o cùu-o ìⁿ yucu xocuiñi-xi núu ndécú-xí, te núu nchaa xíáⁿ xini-ó càda-o te ñà túú cùu iní-ó cuè tnaha ñáyiú-o ña, te ñà túú vèdana nàndíhi-xi te núu vá cúu iní-ó tnàha ñáyiú-o cuèi na càda-o nchaa xíáⁿ. ³ Te cuèi nchaa sá ndécú ndihi-o na dácáhñu-o, te cuèi na cuáha cuèndá-ó mée-o cáyú-ó sá cúu-xí Yá Ndióxi, dico ñà túú vèdana chindee ñaha-xi xii-o sá ðucáⁿ càda-o te núu ñà túú cùu iní-ó cuè tnaha ñáyiú-o.

⁴ Dico núu cùu iní-ó cuè tnaha ñáyiú-o, te cànhu iní-ó, te quide váha-o, te ñà túú cùu-o ñáyiú cuédú iní, te ni ñà túú cáháⁿ-ó núu cùu cahnu-o, te ni ñà túú sàni iní-ó càda cahnu-o mee-o, ⁵ te ni ñà túú ñùhu cuehé iní-ó, te ni ñà túú ndecu-o mee-ni sá cúu-xí mée-o, te ni ñà túú-gá cùdèèⁿ-ó cuèndá ìⁿ sá cúu, te ni ñà túú-gá sá cùhuⁿ iní-ó sá quide ñaha tnaha ñáyiú-o xii-o. ⁶ Te ni ñà túú-gá cùdèè iní-ó nchaa sá ñà

túu vâha quide ñáyi, chi mee-nã cuendá nchaa sã vâha cùdí ìní-ó. ⁷ Te nchaa sã yâha-o sãcahnu ìní-ó, te sàni vâha ìní-ó cuendá nchaa ñáyi, te sàni ìní-ó sã díú-ní nchaa sã vâha cuu xii nchaa tnâha ñáyi-o ndeé cuèé-gá, te ío quide cahnu ìní-ó cuèi nãndi sã yâha-o, te nchaa xiãⁿ quidé-ó te núu cùu ìní-ó cuè tnaha ñáyi-o.

⁸ Te ni caa ni quíhíⁿ duha-ni cuu ìní-ó cuè tnaha ñáyi-o. Dico sáá nduu te vá cóo-gã ñáyi cáháⁿ tnúhu sã dácàhu ìní ñáhá Yã Ndiõxí, te ni vã cóo-gã ñáyi cáháⁿ tnúhu sã dácàhu ìní ñáhá Espiritú Yã Ndiõxí tnúhu sã ñã túú xini-yu, te ni vã cóo-gã ñáyi túha dàtná túha ñáyi vitna. ⁹ Te vitna ñã túú cùtnuní ìní-ó nchaa nacuaá sàni ìní Yã Ndiõxí chi sacú-ni cùtnuní ìní-ó, te ducaⁿ sãcú-ni cáháⁿ-ó nãcuáa nduu tnúhu-gá, dico cáháⁿ-ó tnúhu-gá nãcuáa dácàhu ìní ñáhá-gã xii-o. ¹⁰ Te na sáá nduu càda Yã Ndiõxí nchaa nãcuáa tàù-xi cunduu, te dàvá-áⁿ te nchaa sã càchí-gã ñã túú ndeçu-xi nacuaá tàù-xi cunduu vá dúcá-gã cundecu-xi.

¹¹ Te yúhú cùtnàhá ní cuu landú-í ní xóo cada-í sã cùu-í landú, ní xóo cáháⁿ-í, ní xóo cani ìní-í, te ní xóo tecú tnùn-í dàtná quidé cuè landú xindecu vitna, dico sãtã ní cuu-í ìⁿ tée cùu sacuéhé te ñã túú-gã quidè-í dàtná ní xóo cada-í cùtnàhá ní cuu landú-í. ¹² Te ducaⁿ sãtnahá-xi cùu-o vitna ndecu-o ichi Xítóhó Jesucristú, chi ñã túú cùtnuní vâha ìní-ó nãcuáa cùu cuendá Yã Ndiõxí, te cùu-o datná ñáyi ndèhe ìⁿ núu yùtátá sã ñã túú túu vâha núu-xi, te ducaⁿ sãtnahá-xi cùu-o chi ñã túú cùtnuní vâha ìní-ó nãsa cùu cuendá-gã, dico sáá nduu quini núu-ó-gã. Te nchoo sãcú-ni cùtnuní ìní-ó nãcuáa nduu-gã vitna dico na sáá nduu te quini ndáá-ó nãcuáa càa nacuaá nduu-gã dàtná xini ñáhá mèe-gã xii-o. ¹³ Te ni caa ni quíhíⁿ ducaⁿ-ni quindáá ìní-ó Yã Ndiõxí, te ducaⁿ-ni cùndecu ndihi-o tnúhu

ndee ìní cundecu-o ndìhi-gá, te ducaⁿ-ni ío cuu ìní-ó-gã ndìhi tnâha ñáyi-o. Te sã cùu ìní-ó Yã Ndiõxí ndihi sã cùu ìní-ó tnâha ñáyi-o xiãⁿ ío-gá cùnùu-xi dácúxí dàva-gá.

14

Ñáyi cáháⁿ tnúhu sã dácàhu ìní ñáhá Espiritú Yã Ndiõxí

¹ Te vá dáñá ndeé-ndó cùu ìní-ndó tnâha ñáyi-ndo, te cuhuⁿ ìní-ndó sã nduu táhú-ndó núu Yã Ndiõxí titni núu chiúⁿ cada-ndo nacuaá chindee ñãha Espiritú-gã xii-ndo, te ío cuhuⁿ ìní-ndó sã ndúú táhú-ndó cáháⁿ-ndó tnúhu sã dácàhu ìní ñáhá Yã Ndiõxí xii-ndo. ² Te cue ñáyi cáháⁿ tnúhu sã dácàhu ìní ñáhá Espiritú Yã Ndiõxí tnúhu sã ñã túú xini-yu, te tnúhu cáháⁿ-yu-áⁿ cúu-xí sã cúu-xí Yã Ndiõxí te ñã díú sã cúu-xí ñáyi chi ñã túú tècú tnùn-í-yu, te mee Espiritú Yã Ndiõxí quidé-xí dùcaⁿ cáháⁿ-yu tnúhu yiyuhu. ³ Te cue ñáyi ní nduu táhú núu Yã Ndiõxí cáháⁿ tnúhu sã dácàhu ìní ñáhá-gã xii-yu, te ñáyi-áⁿ dácàháⁿ-yu ñáyi nãcuáa cuita níhí ndeé-gã-yu cundecú-yu ichi-gá, te ducaⁿ cuãñáhá-yu tnúhu ndee ìní xii-yu òrè ndìhú ìní-yu. ⁴ Te ñáyi cáháⁿ tnúhu sã dácàhu ìní ñáhá Espiritú Yã Ndiõxí xii-yu tnúhu sã ñã túú xini-yu-áⁿ, ñáyi-áⁿ mee-ni-yu níhí ndeé-yu ndeçu-yu ichi-gá. Dico ñáyi cáháⁿ tnúhu sã dácàhu ìní ñáhá-gã xii-yu, cáháⁿ-yu tnúhu-áⁿ nãcuáa níhí ndeé dàva-gã ñáyi nchicúⁿ nihnu ichi-gá.

⁵ Te yúhú ío cudíⁿ ìní-í te núu nchaa-ndo cáháⁿ-ndó tnúhu sã dácàhu ìní ñáhá Espiritú Yã Ndiõxí xii-ndo tnúhu sã ñã túú xini-ndó. Dico ío-gá cudíⁿ ìní-í te núu nchaa-ndo cáháⁿ-ndó tnúhu sã dácàhu ìní ñáhá-gã, chi ío-gá xini ñúhu-xi sã cáháⁿ-ndó tnúhu-áⁿ dácúxí sã cáháⁿ-ndó tnúhu sã dácàhu ìní ñáhá Espiritú-gã cáháⁿ-ndó tnúhu sã ñã túú xini-ndó. Dico ìⁿ-ni nùtnahá-xi quide-ndo te núu nchòhò ñáyi cáháⁿ tnúhu

sá dácàhu iní ñáhá Espiritú-gá cáháⁿ-ndó nàcuáa quèe-xi tnúhu-áⁿ. Te ducaⁿ te nchaa ñáyiu ndècu ichi Yá Ndiòxí cuita níhí ndéé-gá-yu quíhíⁿ cundecú-yu ichi-gá. ⁶ Te núu yúhú quexio-í núu ndécú nchòhó ñáyiu ndècu ndihí-í ichi Xítóhó Jesucristú, te ngüita-í cáháⁿ-í mee-ni tnúhu sá dácàhu iní ñáhá Espiritú Yá Ndiòxí xii-í tnúhu sá ñà túú xini-í, te ñà túú nã sá vãha cuu-xi sá cúu-xi-ndó. Dico cuu-xi sá vãha xii-ndo te núu na cáháⁿ-í núu-ndó nchaa tnúhu sá dánèhé ñáhá Yá Ndiòxí xii-í tnúhu sá vátá dácúahá-gá-í, ndihí nchaa tnúhu sá sá xini-í, ndihí nchaa tnúhu sá dácàhu iní ñáhá-gá xii-í cáháⁿ-í, ndihí nchaa dava-gá tnúhu-gá.

⁷ Te na càda-o cuendá sá núu ìⁿ tée tiú-dé vílu àdi cani-dé àrpá te núu ñà túú sàhnú-dé ndihí-xi ìⁿ yaá, te ñà cùtnùní iní-ó nã yaá caní-dé àdi ná yaá tiú-dé te núu ducaⁿ na càda-dé. ⁸ Te ñiu-ni ducaⁿ sãtnahá-xi cùu tucu tée cùu sandadú tiú cútú, chi núu vá tiú vãha-dé nàcuáa tàú-xi cunduu òré quíhíⁿ-güedé nãá-güedé, te vá ngündecu túha dava-gá cue sandadú te núu ducaⁿ na càda-dé vá tiú vãha-dé. ⁹ Te ducaⁿ sãtnahá-xi cùu nchohó te núu vá cáháⁿ-ndó ìⁿ tnúhu nàcuáa tàú-xi cunduu núu ñáyiu te vá tècú tnùnì-yu tnúhu cáháⁿ-ndó. ¡Chi àúⁿ nã cuu cáháⁿ-ndó te núu ducaⁿ na càda-ndo! ¹⁰ Te ío titnì núu tnúhu ío ñuyíú, te ìⁿ ìⁿ núu tnúhu-áⁿ cùtnùní iní ñáyiu nàcuáa quèe-xi. ¹¹ Te núu nchoo ñà tècú tnùnì-ó ìⁿ tnúhu cáháⁿ ìⁿ ñáyiu, te quide-ó-yu ñáyiu ñúú xicá chi ñà túú cáháⁿ-yu tnúhu cáháⁿ-ó, te ñiu-ni ducaⁿ quide ñahá-yu xii nchoo túcu. ¹² Te xiãⁿ núu càchí tnúhu-í xii nchaa nchòhó ñáyiu ío cuìní nduu táhú núu Yá Ndiòxí sá Espiritú-gá chindee ñaha-xi xii-ndo cada-ndo ná daha núu chiúⁿ, te ío nducu ndèe-ndo cada-ndo chiúⁿ sá ní nduu táhú-ndó nàcuáa cuita níhí ndéé-gá ñáyiu ndècu ichi-gá quíhíⁿ.

¹³ Te núu cáháⁿ-ndó tnúhu sá ñà túú xini-ndó, tnúhu sá dácàhu iní ñáhá Espiritú Yá Ndiòxí xii-ndo, te xini ñuhu-xi sá càcáⁿ táhú-ndó núu Yá Ndiòxí cuendá sá ná chindee ñaha-gá xii-ndo cáháⁿ-ndó núu ñáyiu núu nása quèe-xi tnúhu-áⁿ. ¹⁴ Chi núu nchoo na cáháⁿ ndihí-o Yá Ndiòxí ndihí tnúhu sá ñà túú xini-ó, te ñi yúhu ñi iní-ó cáháⁿ ndihí-o-gá dicó-ni sá ñà tècú tnùnì-ó nàcuáa nduu tnúhu cáháⁿ-ó. ¹⁵ Te xiãⁿ núu xini ñuhu-xi cáháⁿ ndihí-o Yá Ndiòxí ñi yúhu ñi iní-ó nàcuáa chindee ñaha Espiritú-gá xii-o te cáháⁿ-ó nàcuáa tecú tnùnì-ó, te ñiu-ni ducaⁿ càda-o oré xitá yúhu-o chiñuhu-o Yá Ndiòxí, chi ñi yúhu ñi iní-ó ñucaⁿ cada-o nàcuáa chindee ñaha Espiritú-gá xii-o, te cùtnuní iní-ó nàcuáa cuáháⁿ nchaa tnúhu cáháⁿ-ó xita-o. ¹⁶ Chi núu nchoo na ndacáⁿ táhú-ó núu Yá Ndiòxí ndihí mee-ni tnúhu sá ñà túú xini-ó tnúhu sá dácàhu iní ñáhá Espiritú-gá xii-o, te ñáyiu ñà túú ní nduu táhú cáháⁿ tnúhu cáháⁿ-ó ndèdóho ñahá-yu xii-o, te ñáyiu-áⁿ vã ndácú-yu cáháⁿ-yu tnúhu cáháⁿ-ó ndacáⁿ táhú-ó ndihí-yu núu Yá Ndiòxí chi ñà túú tècú tnùnì-yu tnúhu cáháⁿ-ó. ¹⁷ Te vãha-ni quide-o sá dúcáⁿ cáháⁿ-ó ndacáⁿ táhú-ó núu Yá Ndiòxí, te dicó-ni sá tnúhu-áⁿ ñà túú chindee-xi ñáyiu nàcuáa cuita níhí ndéé-gá-yu cundecú-yu ichi-gá. ¹⁸ Te yúhú ío ndacáⁿ táhú-í núu Yá Ndiòxí chi cáháⁿ-í tnúhu sá ñà túú xini-í tnúhu sá dácàhu iní ñáhá Espiritú-gá xii-í, te cáháⁿ-gá-í dácúúxí nchaa nchohó. ¹⁹ Te òré tàcá ñáyiu ndècu ichi Yá Ndiòxí dácúahá-yu tnúhu-gá, te cáháⁿ-í tnúhu-gá núu-yu sá sá ní cùtnuní iní mée-í nàcuáa ducaⁿ cùtnuní iní-yu nàcuáa nduu tnúhu cáháⁿ-í. Te tnahá-gá iní-í cáháⁿ-í úhúⁿ-ni tnúhu-áⁿ núu-yu dácúúxí sã cáháⁿ-í úxí mĩ tnúhu sá ñà túú xini-í, tnúhu sá dácàhu iní ñáhá Espiritú Yá Ndiòxí xii-í cáháⁿ-í.

²⁰ Te nchòhó ñáyiu ndècu ndihí-í ichi Xítóhó Jesucristú, vá caní iní-ndó dàtná sání iní cue landú,

chi cani iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú líhli vá cundècu-ndo ichi cuehé ichi duha, chi cue landú-án ñà túú ndècu-güexi ichi-án.²¹ Te núú tütú Yá Ndiöxí cáháⁿ-xi nàcuáa ní cáháⁿ-gá, te cächí-xi: “Cue téé ñúú xicá cáháⁿ ndí dñíⁿ núú tnúhu quiñⁿ-güedé cáháⁿ-güedé tnúhu-í núú ñáyiú isráel cada-güedé núú-í, te cuéi ducaⁿ dico vá quíndáá iní-yu tnúhu-í”, duha ní cachí Yá Ndiöxí te ducaⁿ ní ngúndéé núú tütú-gá.²² Te tnúhu sá dácàhu iní ñáhá Espiritú Yá Ndiöxí xii-o tnúhu sá ñà túú xini-ó, xíáⁿ cúú-xí cuéndá sá cútnùní iní cue ñáyiú ñà túú sàndáá iní tnúhu Yá Ndiöxí sá ñà túú cùu váha iní ñáhá-gá xii-yu. Dico sá cúú-xí cué ñáyiú sàndáá iní tnúhu-gá ñà túú nã quidé-xí sá cúú-xí-yu. Te tnúhu sá dácàhu iní ñáhá Yá Ndiöxí xii-o, xíáⁿ cúú-xí cuéndá sá cútnùní iní cue ñáyiú sàndáá iní tnúhu-gá sá ndécú ndíhi ñaha-gá xii-yu, dico ñà túú ducaⁿ sani iní cue ñáyiú ñà túú sàndáá iní tnúhu-gá.²³ Te núú ní tacá nchaa nchòhó ñáyiú ndècu ichi Yá Ndiöxí, te nchaa-ndo ní ngüíta-ndo cáháⁿ-ndó tnúhu sá dácàhu iní ñáhá Espiritú Yá Ndiöxí xii-ndo tnúhu sá ñà túú xini-ndó, te mei òré-án quexio cue ñáyiú ñà túú sàndáá iní tnúhu-gá, ndíhi cue ñáyiú vátá quini dana-gá tnúhu-gá núú ndécú-ndó, te ñáyiú-án quesáhá-yu sá lúcú-ndó te núú ducaⁿ cáháⁿ-ndó tnúhu sá dácàhu iní ñáhá Espiritú-gá xii-ndo òré quexio-yu.²⁴ Dico núú nchaa-ndo cáháⁿ-ndó tnúhu sá dácàhu iní ñáhá Yá Ndiöxí xii-ndo, te mei òré-án quexio cue ñáyiú ducaⁿ ñà túú sàndáá iní-xi tnúhu-gá, ndíhi cue ñáyiú ducaⁿ ñà túú xini dana tnúhu-gá-án, te ñáyiú-án cutnùní iní-yu sá ndécú cuéchi-yu núú-gá, te ngüíta-yu cuáha-yu cuéndá sá ñà túú quide váha-yu ndécú-yu cuéndá sá cáháⁿ-ndó tnúhu-gá ndédóho-yu.

²⁵ Te nchaa sá cuèhé sá dúhá ní quidé-yu sàni iní-yu yiyuhu ndacu iní-yu, te ngüíta-yu náhmá-yu nchaa sá ñà túú váha ní quidé-yu núú Yá Ndiöxí, te cachí-yu sá ìo càhnu cuu-gá, te cachí tucú-yu sá ndàá ndécú ndíhi-ndo-gá.

Cada-o nàcuáa tàú-xi cunduu

²⁶ Te vitna nchòhó ñáyiú ndècu ndíhi-í ichi Xítóhó Jesucristú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yá Ndiöxí, te dava-ndo dásahú-ndó ñáyiú tnúhu-gá, te dava-ndo cáháⁿ-ndó nàcuáa dàquixi túu Yá Ndiöxí iní-ndó, te dava-ndo cáháⁿ-ndó tnúhu sá dácàhu iní ñáhá Espiritú Yá Ndiöxí xii-ndo tnúhu sá ñà túú xini-ndó, te dava-ndo cáháⁿ-ndó nàcuáa quèe-xi tnúhu-án. Te nchaa sá quidé-ndó ná cùu-xi nacuáa chindee-xi ñáyiú nàcuáa cuita níhi ndéé-gá-yu cundecú-yu ichi-gá.²⁷ Te òré cáháⁿ-ndó tnúhu sá dácàhu iní ñáhá Espiritú Yá Ndiöxí xii-ndo tnúhu sá ñà túú xini-ndó, te úú-ni-ndo àdi úní-ni tnáhá-ndó cáháⁿ-ndó tnúhu-án te vá úúⁿ ní cáháⁿ-ndó chi ndéé ndíhi ñⁿ-ndo te dàtnùní ngüíta ingá-ndó cáháⁿ-ndó. Te xini ñuhu-xi sá ñⁿ ñáyiú cáháⁿ-yu nàcuáa quèe-xi tnúhu cáháⁿ-ndó-án.²⁸ Te núú ñà túú ñáyiú tècú tnùní nàcuáa quèe-xi tnúhu cáháⁿ-ndó-án, te núú méé núú ñⁿ-ní-ndó cáháⁿ-ndó tnúhu-án cáháⁿ ndíhi-ndo Yá Ndiöxí te vá cáháⁿ-ndó núú ñáyiú.²⁹ Te òré cáháⁿ-ndó tnúhu sá dácàhu iní ñáhá Yá Ndiöxí xii-ndo te úú-ni-ndo àdi úní-ni tucu-ndo cáháⁿ, te dava-gá-ndó cundédóho-ndo tnúhu-án te cáháⁿ-ndó núu váha-ni cáháⁿ-güedé àdi ñà túú váha-ni.³⁰ Te núú ñⁿ-ndo ní dácáhú iní ñáhá Yá Ndiöxí xii-ndo ñⁿ tnúhu cáháⁿ-ndó, te núú ñⁿ-ndo sá cáháⁿ-ndó te ngüíñí-ndó te quihu tucu ingá-ndó cáháⁿ-ndó nàcuáa ní dácáhú iní ñáhá Yá Ndiöxí xii-ndo.³¹ Te nchaa nchòhó ñáyiú ní nduu táhú cáháⁿ tnúhu sá dácàhu iní ñáhá

Yá Ndióxi, te vá úúⁿ-ní cǎháⁿ-ndó chí díhna-gá ìⁿ-ndo cǎháⁿ te dàtnùní cǎháⁿ tucu ingá-ndó. Te ducaⁿ càda-ndo cuendá nchaa-ndo tècú tnùnì-ndó nàcuáa ndùu tnúhu cǎháⁿ ìⁿ ìⁿ-ndo, te ducaⁿ te cudì-ⁿgǎ iní-ndó cǎnchicúⁿ nihnu-ndo ìchi-gá. ³² Te nchaa ñáyiú cǎháⁿ tnúhu Yá Ndióxi sá nàha-ná mèe-yu nàcuáa quidé-yu cǎháⁿ-yu tnúhu-gá nàcuáa ñá túú quide cutexínu-yu. ³³ Te Yá Ndióxi cúú-gǎ Yaá quidé ò váha cùu ìⁿ-nuu-ndo ndecu-ndo, te ñá túú dàticá nuu ñaha-gǎ xii-ndo.

Te na cǎchí tnúhu-í xii-ndo nàcuáa cǎháⁿ-í nchaa núú tàcá cue ñáyiú ndècu ndìhi-o ichi Xitohó Jesucristú. ³⁴ Te yúhú cǎchí-í sá vǎ cúú cǎháⁿ cue ñáyiú díhí òré tàcá-ndó dàcuaha-ndo tnúhu-gá, chí ñá túú dùcaⁿ cuiní-gá cadá-yu, te quíndáa-ni iní-yu cadá-yu nàcuáa táu-xi cunduu. ³⁵ Te núú ìⁿ sá cuiní-yu nducu tnúhu-yu te ndéé òré nasáa-yu vehé-yu te nducu tnúhu-yu núú yí-yu, chí ñá túú ndùu váha-xi sá cǎháⁿ-yu núú tàcá nchaa ñáyiú dàcuáha ndìhi-yu tnúhu-gá.

³⁶ Te chí dándàcu iní sá ñà díú nchòhó cúú-ndó ñáyiú ní ngúndecu ndìhi tnúhu Yá Ndióxi díhna nuu nàcuáa datècú tnúhu-ndo dàva-gá ñáyiú, te ní ñà díú mèe-ni nchohó sa ní ngúndecu ndìhi-ndo tnúhu Yá Ndióxi vitna, núú xiǎⁿ vá cǎchí-ndó sǎ ò cùnuu-ndo. ³⁷ Te núú dàva nchòhó sǎní iní-ndó sǎ cǎháⁿ-ndó nàcuáa dàcahu iní ñáhá Yá Ndióxi xii-ndo àdi sǎní iní-ndó sǎ quidé-ndó nàcuáa chìndee ñaha Espiritú-gá xii-ndo, te cuáha váha-ndo cuendá sǎ ncháá tnúhu cǎháⁿ-í-a cùu-xi tnúhu sá ní cǎchí tnúhu mee Xitohó Jesucristú cada-o. ³⁸ Te ndéda-ni cǎa ñáyiú ndècu ndìhi-ndo te núú ñá túú sǎndáa iní-yu tnúhu cǎháⁿ-í, te vá cadá cuendá-ndó tnúhu cǎháⁿ-yu.

³⁹ Te vitna nchòhó ñáyiú ndècu ndìhi-í ichi Xitohó Jesucristú, ò cani iní-ndó cǎháⁿ-ndó tnúhu sá

dácàhu iní ñáhá Yá Ndióxi núú ñáyiú, te dañà-ndo na cǎháⁿ cue ñáyiú ní nduu táhú núú Yá Ndióxi sá cǎháⁿ-yu tnúhu sá dácàhu iní ñáhá Espiritú-gá xii-yu tnúhu sá ñà túú xini-yu. ⁴⁰ Te cada-ndo nchaa nàcuáa táu-xi cunduu nàcuáa ñá túú nà cuu cundecu-ndo.

15

Ní ndoto Xitohó Jesucristú

¹ Te vitna nchòhó ñáyiú ndècu ndìhi-í ichi Xitohó Jesucristú cuiní-í sá dándàcu iní-ndó nàcuáa ní dánèhé ñáhà-í xii-ndo tnúhu sá cǎháⁿ nàcuáa naníhí tàhú-ò, chí díu tnúhu-áⁿ ní sǎndáa iní-ndó te nchicúⁿ nihnu-ndo. ² Te sá xii tnúhu-áⁿ níhnu-ndó ìchi cuáháⁿ-ndó núú ndúú táhú-ndó cundecu-ndo ndìhi Yá Ndióxi ní caa ní quíhíⁿ, te ducaⁿ ndùu táhú-ndó núú cundècu-ndo ní caa ní quíhíⁿ ndìhi Yá Ndióxi te núú nchicúⁿ nihnu-ndo nàcuáa ní dánèhé ñáhà-í xii-ndo, te núú ñá túú nchicúⁿ nihnu-ndo te ñá túú ní sǎndáa iní-ndó nàcuáa táu-xi cunduu.

³ Te yúhú sa ní cǎchí tnúhu-í xii-ndo ìⁿ tnúhu sá ò cùnuu ní níhí-í, chí ní cǎchí tnúhu-í xii-ndo sǎ Xitohó Jesucristú ní xihí-gá cuendá nchaa yicá cuèchi-o, te ducaⁿ ní cuu chí ducaⁿ cǎháⁿ-xi núú tùtú Yá Ndióxi sá dúcáⁿ yáha-gá. ⁴ Te ní chindúxi ñaha-güedé xii-gá te nduu úní ní dándótó ñaha Yá Ndióxi xii-gá, te ducaⁿ ní cuu chí ducaⁿ cǎháⁿ-xi núú tùtú Yá Ndióxi. ⁵ Te sǎtá ní ndoto-gá te ní quee túu-gá núú tè Pèlú, te dàtnùní ní quee túu-gá núú dàva-gá cue téé ní táuchíúⁿ-gǎ cǎháⁿ tnúhu-gá. ⁶ Te sǎtá dúcáⁿ te dàtnùní ní quee túu-gá núú ùhúⁿ cièndú cue ñáyiú ndècu ichi-gá, te vai-yu xíndecu-ni-yu vitna chí sacú-ni-yu ní xihí. ⁷ Te dàtnùní ní quee túu-gá núú tè Jàcobó, te sǎtá dúcáⁿ te dàtnùní ní quee túu-gá núú nchaa cue téé ní táuchíúⁿ-gǎ cǎháⁿ tnúhu-gá.

⁸ Te ndéé núú ní ndìhi-ná te ní quee túu-gá núú mèe-í, te òré ní

quee túu-gá núu-í te cùu-í dàtná ìíⁿ déhe yiquìⁿ vátá sàá-gá nduu càcu chi cùu-í ìíⁿ téé ñá túú sàni váha iní-xi cuendá-gá ní cùu. ⁹ Te yúhú ñá túú cùnuu-í dàtná cúnùu cue téé ní táuchíúⁿ Xítóhó Jesucristú cáháⁿ tnúhu-gá. Te cùu-í ìíⁿ téé ní táuchíúⁿ-gá cáháⁿ tnúhu-gá, cuéi ñá túú táu-í sá cáháⁿ-í tnúhu-gá, chi ní xóo cuu úhú iní-í cue ñáyiú ndècu ichi Yá Ndiòxí. ¹⁰ Dico Yá Ndiòxí ío váha iní-gá chi ní quide ñaha-gá xii-í ìíⁿ téé váha, chi ñá túú-gá quidè-í dàtná ní xóo cada-í. Te ío cùndahú iní ñáhá-gá chindèe ñaha-gá xii-í dico ñá túú àúⁿ nã cuu chindee ñaha-gá, chi ío-gá vâi chiuⁿ-gá ní cuu sa ta quide-í cuáháⁿ dâcúúxí dâva-gá cue téé ní táuchíúⁿ-gá cáháⁿ tnúhu-gá te ñá díú mèe-í ducaⁿ quide-í chi mee Yá Ndiòxí ío cùndahú iní ñáhá-gá chindèe ñaha-gá xii-í quidè-í chiúⁿ-gá. ¹¹ Te ñá túú nã cada-xi cuéi dâva-gá-güedé sa ní cuu vâi-gá chiúⁿ-gá quidè-güedé àdi yúhú, chi ìíⁿ-ni tnúhu cáháⁿ-ndí te tnúhu-áⁿ cúú tnúhu ní sândáá iní-ndó.

Cue ñáyiú ní xihí ndotó-yu

¹² Te nchúhú cue téé cáháⁿ tnúhu Xítóhó Jesucristú cáháⁿ-ndí sá ní xihí-gá te ní ndoto-gá, ¿te ná cuendá dâva nchòhó càchí-ndó sã vã ndótó cuè ñáyiú ní xihí? ¹³ Te núu ducaⁿ sàni iní-ndó sã vã ndótó cuè ñáyiú ní xihí te ní Xítóhó Jesucristú ñá túú ní ndòto-gá te núu ducaⁿ. ¹⁴ Te núu dicó Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñá túú nândíhi-xi te núu ducaⁿ, te àúⁿ nã cuu sândáá iní-ndó-gá te núu ducaⁿ. ¹⁵ Te núu dicó cúú-xí ìíⁿ sá ndáá tnúhu sàni iní dâva-ndo ñá, te dâcuandehnde-ndí sá cáháⁿ-ndí tnúhu Yá Ndiòxí núú-ndó te núu ducaⁿ, te ñá túú cáháⁿ ndáá-ndí núú-ndó sã Yá Ndiòxí ní dándótó-gá Xítóhó Jesucristú, te núu ndáá nâcuáa sàni iní dâva-ndo sã vã

ndótó cuè ñáyiú ní xihí, dico ñá ndáá nâcuáa sàni iní-ndó. ¹⁶ Te núu vã ndótó cuè ñáyiú ní xihí te ní Xítóhó Jesucristú ñá túú ní ndòto-gá. ¹⁷ Te núu Xítóhó Jesucristú ñá túú ní ndòto-gá ñá, te àúⁿ nã cuu sândáá iní-ndó-gá te núu ducaⁿ, te ndècu-ni cuèchi-ndo núú Yá Ndiòxí te núu ducaⁿ. ¹⁸ Te núu ndáá nâcuáa sàni iní-ndó ñá te cue ñáyiú ní sândáá iní ñáhá xii Xítóhó Jesucristú ñáyiú ní xihí ní xíta nihnú-yu te núu ducaⁿ. ¹⁹ Te núu nchòo ndècu ndíhi-o tnúhu ndee iní núú Xítóhó Jesucristú cuendá-ni sá cùndècu-o ñuyúú-a ñá, te cùu-o ñáyiú ío-gá duuⁿ duuⁿ ndàhú sá cúú-xí dâva-gá ñáyiú te núu ducaⁿ.

²⁰ Dico ndáá sá Xítóhó Jesucristú ní xihí-gá te ní ndoto-gá núu xíáⁿ cùtnùní iní dâva-o sã ndótó cuè ñáyiú ní xihí ñáyiú ní sândáá iní tnúhu-gá. ²¹ Te sá cuèchi ìíⁿ-dí-ni téé ní xíndecu ñuyúú-a xíáⁿ xihí ñáyiú, te sá cuendá ìíⁿ-dí-ni tucu ingá téé te ndoto cue ñáyiú ní xihí. ²² Te nchaa ñáyiú xihí-yu sá cuèchi ìíⁿ téé, te téé-áⁿ cúú-dé ndíi Àdán téé díhna nuu ní cuu ñani tnáhá cuè ñáyiú ñuyúú. Te díu-ni ducaⁿ sá cuendá ìíⁿ-dí-ni téé te ndoto cue ñáyiú ní xihí, te téé-áⁿ cúú-dé Xítóhó Jesucristú chi nchaa ñáyiú ndècu ndíhi-gá ndotó-yu. ²³ Te díhna-gá Xítóhó Jesucristú ní ndoto-gá xíáⁿ cùtnùní iní dâva-o sã ndùu na quixi tucu-gá ñuyúú-a te dâvâ-áⁿ ndoto nchaa ñáyiú ní xihí ñáyiú ní sândáá iní tnúhu-gá. ²⁴ Te dàtnùní ducaⁿ te sáá nduu nâa nchaa sá ío ñuyúú, te Xítóhó Jesucristú danâa-gá nchaa ndi túhú sá cúnùu ío ñuyúú-a, chi danâa-gá nchaa ñáyiú ío cùnuu, ndíhi yucu ñávâha, ndíhi nchaa espíritú xínú cuèchi núú-xi. Te ducaⁿ te cùñaha-gá xii Tâtá-ó Dütú Ndiòxí taxi tnùní-gá. ²⁵ Chi Xítóhó Jesucristú dacuití tãxi tñuní-gá ndéé ná sãá nduu dânaa-gá nchaa sá cúú úhú iní ñáhá xii-gá. ²⁶ Te ndéé núú ní ndíhi-ná te danâa-gá

sá quidé xihí ñáiyu. ²⁷ Te ducaⁿ chi càháⁿ-xi núú tútú Yá Ndiöxí sá mée-gá ní nachihí-gá nchaa sá ío ndaha Xítohó Jesucristú cuendá sá mée Xítohó Jesucristú taxi tnùní-gá, te vá yõ ìⁿ tàxi tnuní ñáhá xii Yá Ndiöxí, chi mee Yá Ndiöxí cúú-gá Yaá ní nachihí-gá nchaa sá ío ndaha Xítohó Jesucristú. ²⁸ Te díhna-gá ní xáhaⁿ Yá Ndiöxí xii Xítohó Jesucristú Yaá cúú Dêhe-gá sá quíndàha-gá nchaa sá ío, te òré ná quíndaha Xítohó Jesucristú nchaa sá ío, te cúñaha-gá xii Yá Ndiöxí taxi tnùní ñáhá-gá xii-gá, te ducaⁿ te mee-ná Yá Ndiöxí taxi tnùní-gá nchaandi tühú sá ío.

²⁹ Te núú ñá túú ndáá càháⁿ-í, ¿te ná cuendá dava ñáiyu sànduté-yu cuendá ñáiyu ní xihí núú ñá túú ndáá sá ndótó ñáiyu ní xihí?

³⁰ Te nchúhú ducaⁿ-ni sàni iní ñáiyu cahni ñáhá-yu xii-ndí, te núú vá ndótó ñáiyu ní xihí te àúⁿ ná cuu ducaⁿ quide cahnu iní-ndí ducaⁿ cuiní-yu cahni ñáhá-yu xii-ndí te núú ducaⁿ. ³¹ Te nchòhó ñáiyu ndècu ndihí-í ichi Xítohó Jesucristú ío váha sàni iní-í cuendá-ndó, chi ndècu-o ichi-gá. Te na càchí tnúhu ndáá-í xii-ndo sá ìⁿ nduu ìⁿ nduu ndeé iní ñáhá ñáiyu cahni ñáhá-yu xii-í. ³² Te núú òíó ndáá sá vá ndótó ñáiyu ní xihí dàtná càchí dava ñáiyu, te àúⁿ ná cuu ní xíndecu-í ñuú Éfesú ní cuu úhú iní ñáhá ñáiyu xii-í te núú ducaⁿ, chi ñáiyu-áⁿ ní quidé-yu dàtná quidé ìⁿ quiti dééⁿ sá cúú-xi-í. Te núú ndáá sá vá ndótó ñáiyu ní xihí ñá, te váha-gá núú cachí-ó dàtná càchí ñáiyu: “Vitna na còho-o te na càxi-o chi tneé idá cuú-ó”, duha càchí-yu.

³³ Te vá dáñá-ndó mée-ndo dan-dahú ñáhá ñáiyu ndècu ichi cuehé ichi duha xii-ndo, te ngüita-ndo càni iní-ndó dàtná sání iní-yu. Chi quée ndáá-xi nàcuáa càháⁿ tucu dava-gá ñáiyu, chi càchí-yu sá núú ñáiyu quide váha na nihí tnáhá-yu

ndihí ñáiyu ndècu ichi cuehé ichi duha, te ngüita ñáiyu quide váha-áⁿ cadá-yu tnáhá-yu nchaa sá cuèhé sá dúhá dàtná quidé ñáiyu-áⁿ. ³⁴ Te ío váha cuáha-ndo cuendá nàcuáa cundecu-ndo, te vá cadá-gá-ndó dàtná quidé cuè ñáiyu ndècu ichi cuehé ichi duha. Te dava-ndo quide-ndo datná quidé cuè ñáiyu ndècu ichi cuehé ichi duha chi ñá túú sàndáá iní-ndó Yá Ndiöxí. Te duha càháⁿ-í cuendá sá cúcàhaⁿ núú-ndó cuendá nchaa sá ñá túú váha quide-ndo.

Nàcuáa ndoto ñáiyu ní xihí

³⁵ Te cudana dava-ndo ndècu tnúhu-ndo núú nása ndoto ñáiyu ní xihí, te nása cunduu yiqui cùñú-yu òré ndotó-yu. ³⁶ Te nchòhó ñáiyu ducaⁿ càháⁿ cúú-ndó ñáiyu ñá túú tnáhí cùnuni iní-xi, te duha na càháⁿ-í nàcuáa tecú tnùní-ndó. Te núú ìⁿ tatá ná chíhí-ó te tēhyú mée-xí te xínu déhe-xi. ³⁷ Dico ñá díú sá sá ní xínu ta sàhnu cuáháⁿ ní cùxi-o, te òiu-ni ducaⁿ quide-o cuéi trùú ndihí nchaa dava-gá tatá xítú-ó. ³⁸ Te Yá Ndiöxí quidé-gá sá cùnduu tatá xínu-áⁿ dàtná cuiní mée-gá cunduu. Te ndēda-ni cāa tatá te òiu-ni-gá quidé-gá sá cùnduu-xi nàcuáa tàú-xi cunduu. ³⁹ Te ndi díñⁿ ndáa nchaa yiqui cùñú, chi tucu cāa yiqui cùñú nchoo cuè ñáiyu, te tucu cāa yiqui cùñú nchaa quiti xica núú ñúhú, te tucu cāa yiqui cùñú nchaa quiti ndāva, te tucu cāa yiqui cùñú nchaa chácá. ⁴⁰ Te ducaⁿ ñá túú ìⁿ-ni cāa nchaa yiqui cùñú sá ío andiu ndihí nchaa yiqui cùñú ñáiyu ío ñuyú-a, te ducaⁿ ñá túú ìⁿ-ni ndáa vii nchaa sá ío andiu ndihí ñuyú-a. ⁴¹ Te ducaⁿ cūu tucu-xi nchíanchii chi tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñá túú ìⁿ-ni dayehé nchaa chódíní. ⁴² Te ducaⁿ sàtnahá-xi cūu ñáiyu ní xihí te ndoto, chi tucu cāa yiqui cùñú-yu sá nguíndūxi te tucu cunduu yiqui cùñú-yu òré ndotó-yu, te yiqui cùñú sá ndótó

ndíhí-yu-án vǎ ndíhí nihnu-gá-xi. 43 Te yiqui cùñú ñáyiú xihí ñá túú nàndíhí-xi, dico yiqui cùñú sá ndótó ndíhí-yu te ío váha cunduu. Te nchaa yiqui cùñú ñáyiú xihí ñá túú tnàhí-gá ndee-xi, dico yiqui cùñú ndoto ndíhí-yu xǎá ío cunduu ndee-xi. 44 Te yiqui cùñú nchaa ñáyiú xihí cúú-xí cuèndá ñuyíú-a, dico yiqui cùñú sá ndótó ndíhí-yu xǎá cundecu-ná-xi cuèndá Espíritú Yá Ndióxi. Te dàtná ío yiqui cùñú sá cúú-xí cuèndá ñuyíú-a, te ducaⁿ ío yiqui cùñú sá cúú-xí cuèndá mee-nǎ Espíritú Yá Ndióxi.

45 Te núú tütú Yá Ndióxi càchí-xi: “Ndíi Ádán ndíi ní xíndecu ndéé díhna ní chíhí Yá Ndióxi íní ndíi”, duha càchí-xi núú tütú-gá. Te ingá tucu téé cùu-dé dàtná ndíi Ádán te téé-áⁿ cúú-dé Xítoho Jesucristú, te Yaá-áⁿ quidé-gá sá mée-nǎ Espíritú Yá Ndióxi quidé-xí ndècu-o ichi-gá vitna. 46 Te díhna-gá yiqui cùñú cuèndá ñuyíú-a ní ngúndecu, te dàtnúni ngúndecu yiqui cùñú cundecu ndíhí mee-nǎ Espíritú Yá Ndióxi. 47 Te téé díhna nuu ní xíndecu ñuyíú-a chí ñuhu ní cadúha ñaha Yá Ndióxi xii-dé, te téé-áⁿ cúú-dé ndíi Ádán, te ingá tucu téé ní cuuⁿ-dé andíu te téé-áⁿ cúú-dé Xítoho Jesucristú. 48 Te nchaa ñáyiú cǎa yiqui cuñú-yu dàtná cǎá yiqui cuñú téé Ádán téé ducaⁿ ní cuáha ñuhu-áⁿ, te nchaa ñáyiú ní nduu táhú cundecu ndíhí téé ducaⁿ vèxi cuuⁿ andíu-áⁿ, ñáyiú-áⁿ nduu yiqui cùñú-yu dàtná cǎá yiqui cuñú ní nduu táhú-dé ndécú ndíhí-dé vitna, te téé-áⁿ cúú-dé Xítoho Jesucristú. 49 Te nchaa ñáyiú ñuyíú-a cǎa-yu dàtná-ni cǎa datná-ni ndúu téé ducaⁿ ní cuáha ñuhu-áⁿ. Te nchaa nchoo ñáyiú ní nduu táhú cundecu ndíhí téé ducaⁿ vèxi cuuⁿ andíu-áⁿ nduu-o dàtná-ni cǎa datná-ni ndúu téé-áⁿ tucu.

50 Te nchóho ñáyiú ndècu ndíhí-í ichi Xítoho Jesucristú càchí tnúhu-í xii-ndo sǎ ncháá nàcuáa cǎa yiqui

cuñú ñáyiú xíndecu vitna vá sǎa-xi cundecu-xi núú ndécú Yá Ndióxi táxi tnúni-gá, chí ñuyíú-a ndíhí nihnu-xi. Dico sá tàu-xi sǎá núú ndécú-gá táxi tnúni-gá xini ñuhu-xi cuu-xi sá cudíi cundecu. 51 Te na cǎchí tnúhu-í xii-ndo ñⁿ tnúhu sá yíyùhu ní cuu: Dava-o cùú-ó te dava-o cundecu-ni-o, dico nchaa-o nàdáma yiqui cuñú-ó. 52 Te uuⁿni ducaⁿ nàdáma yiqui cuñú-ó òré cǎháⁿ ñⁿ cútú, te cútú-áⁿ cǎháⁿ-xi òré sa ta cùyatni naa ñuyíú. Te òré cǎháⁿ cútú-áⁿ te ndoto nchaa ñáyiú ní xihí ñáyiú ní xíndecu ichi Xítoho Jesucristú, te ducaⁿ te vá ñⁿ ndúu ñⁿ quíú-gǎ cuú-yu. Te nchaa ñáyiú ndècu vivú te nàdáma yiqui cuñú-yu tnàhá-yu. 53 Te nchaa yiqui cùñú ndécú ndíhí nchaa ñáyiú ndècu ñuyíú-a vitna ñá túú cudíi-xi chí xihí-xi, dico yiqui cùñú nduu táhú nchoo ñáyiú ndècu ichi Xítoho Jesucristú chí cudíi-xi ní cǎa ní quíhíⁿ chí vá cùú-gá-xi. 54 Te òré ná ndúu táhú-ó yiqui cuñú sá dúcáⁿ cudíi ní cǎa ní quíhíⁿ-áⁿ, te vá cundècu ndíhí-gá-ó yiqui cuñú sá ñá túú cudíi. Te dàvá-áⁿ te quee ndáá-xi nàcuáa cǎháⁿ-xi núú tütú Yá Ndióxi núú càchí-xi: “Vitna ñá túú-gǎ xihí ñáyiú chí mee-nǎ Yá Ndióxi cúnúu-gá táxi tnúni ñáhá-gǎ xii-yu. 55 Te ñá túú tnàhí-gá ná ndoho ñáyiú sá cuèndá tnúhu xihí, chí vá cóo-gǎ tnúhu xihí”, duha càchí-xi núú tütú Yá Ndióxi. 56 Te cue ñáyiú ndècu ndíhí-yu tnúhu sá sánú ichi ñaha xii-yu nàcuáa cadá-yu cundecu-yu dico uuⁿ-gá quidé-gá yiqui nchaa sá cuèhé sá dúhá. Te sá cuèndá nchaa sá cuèhé sá dúhá quidé-yu-áⁿ, te xǎá ní ngúndecu tnúhu xihí dándòho ñaha-xi xii-yu. 57 Dico táxǎhu xii Yá Ndióxi chí ní taxi-gá tnúhu ndee íní ndécú ndíhí-o sá sǎá nduu te vá quíni-gá-ó tnúhu xihí, te ducaⁿ chí ndècu ndíhí-o Xítoho Jesucristú.

58 Te xǎáⁿ núu cǎháⁿ-í dóho nchóho cue ñáyiú ndècu ndíhí-í ichi Xítoho

Jesucristú chi ío cùu iní ñàhà-í xii-ndo, te càháⁿ-í dóho-ndo sá cànchícúⁿ nihnu-ni-ndo ichi Xítohó Jesucristú cuèi nándi na càda ñaha ñáyiú xii-ndo sá cuendá-gá, te ío nducu ndèe-ni-ndo cada-ndo chiuⁿ-gá, chi sa ñaha-ndo sá ncháá chiuⁿ quide-o cuendá-gá ñá túú àuⁿ nã cuu quide-o.

16

Nàcuáa sàcáⁿ tnáhá ñáyiú díhúⁿ

¹ Te na càchí tnúhu-í xii-ndo cuendá díhúⁿ sá sàcáⁿ tnáhá-ndó sá cúu-xí ñáyiú ñúú Jerusálén, chi díu-ni duha ní dánèhé-í cue ñáyiú xíndecu ichi Xítohó Jesucristú ndécú ìⁿ ìⁿ xichi distritú Gâlaciá. ² Te duha cada-ndo ndi tnáhá nduu ndumíngú, te ìⁿ ìⁿ-ndo dàquee díⁿ-ndo sacú díhúⁿ nàcuáa chindee ñaha Yá Ndióxi xii-ndo ñhí-ndó cuendá òré quexío-í te sa cundecu túha díhúⁿ-ãⁿ. ³ Te òré quexío-í te mee-ndo cãxi-ndó-yu núu ndédacàa-yu sàni iní-ndó càda ndáá canehe díhúⁿ-ãⁿ quíhíⁿ ndaha ñáyiú xíndecu ichi Xítohó Jesucristú ndécú ñúú Jerusálén. Te cadúha-í ìⁿ úú tutú canehe-yu quíhíⁿ cuendá cutnùní iní ñáyiú ñúú Jerusálén nàcuáa ndùu chiuⁿ cuáháⁿ-yu. ⁴ Te núu xini ñuhu-xi sá quíhíⁿ-í te candeca-í-yu quíhíⁿ.

Té Páblú sání iní-dé quíngoto-dé cue ñáyiú ndècu ichi Xítohó Jesucristú

⁵ Te yúhú sání iní-í yáha-í ìⁿ úú ñúú cáá dístrítú Macèdoniá, te dātñùní ducaⁿ te sáá-í núú ndécú-ndó. ⁶ Te òré quexío-í te cudana cundecu ndihí ñaha-í xii-ndo vài nduu, àdi cudana te cundecu ndihí ñaha-í xii-ndo ndèé yáha nchaa yóo quidé víxiⁿ-xi. Te sátá dúcáⁿ te cada ndee iní-ndó chindee ñaha-ndo xii-í òré nuçúhuⁿ ichi-í te núu ndèé ichi na quíhíⁿ-í. ⁷ Te duha càháⁿ-í chi núu Yá Ndióxi ná càchí-gá te cundecu ndihí ñaha tnàa-í xii-ndo òré quexío-í te ñá díú dícó-ni ichi yáha-í. ⁸ Te

cundecu-ni-í ñúú Éfesú-a ndèé tnahá vico Pentecostés. ⁹ Te ducaⁿ chi iha ío tédóho ñáyiú tnúhu Xítohó Jesucristú sá càháⁿ-í núú-yu. Núu xíãⁿ ío váha quèe cuendá cada-í chiuⁿ-gá cuèi ío vài ñáyiú ñá túú tnáhá iní-yu sá càháⁿ-í tnúhu-gá.

¹⁰ Te núu na quíxi coto ñaha té Timùteú xii-ndo, te ío váha cuu iní-ndó càháⁿ ndihí-ndo-dé cuendá ducaⁿ ñá túú nã caní iní-dé cundecu ndihí ñaha-dé xii-ndo, chi tnáhá-dé cúu-dé tée quide chiuⁿ Xítohó Jesucristú dàtná quidè-í. ¹¹ Te cuíní-í sá ní ìⁿ-ndo vá caní cuèhé iní-ndó cuendá dé, te chindee-ndo-dé nàcuáa cuu váha iní-dé òré quíxi-dé quíxi coto ñaha-dé xii-í, chi yúhú ndihí dava-gá ñáyiú ndècu ichi Xítohó Jesucristú ndétú-ndí-dé quexío-dé.

¹² Te ío ní càháⁿ ndáhú-í núú tè Àpolós tée ndècu ndihí-o ichi Xítohó Jesucristú cuendá quíxi-dé ndihí dava-gá cue tée ndècu ndihí-o ichi-gá quíxi coto ñaha-güedé xii-ndo dico ñá túú ní cuíní-dé quíxi-dé vitna, dico quíxi-dé ndèé cuèé-gá.

Tnúhu ndèé núú ní ndihí-ná

¹³ Te ío quíhí iní-ndó cundecu-ndo ichi Xítohó Jesucristú, te vá dáña ndèé-ndó quíndáá iní-ndó-gã, te ío yíi cünduu iní-ndó cundecu-ndo ichi-gá, te ío nducu ndèe-ndo canchícúⁿ nihnu-ndo ichi-gá. ¹⁴ Te ío váha cuu iní tnáhá-ndó, te ducaⁿ ío váha cada tnàha-ndo te núu nándi cùu sá váha sàni iní-ndó càda-ndo.

¹⁵ Te nchòhó ñáyiú ndècu ndihí-í ichi Xítohó Jesucristú sa ñaha-ndo sá díhnanuu cuè ñáyiú cùu ndi mee té Èstéfanás ndécú dístrítú Acáyá ní sándáá iní-yu tnúhu Xítohó Jesucristú. Te vitna ñá túú dàña ndèé-yu quidé-yu sá váha sá cúu-xí dàva-gá ñáyiú sándáá iní tnúhu-gá. ¹⁶ Te càháⁿ ndáhú-í núú-ndó sá quíndáá iní-ndó nchaa ñáyiú ducaⁿ xíquide, ndihí nchaa dava-gá ñáyiú ío nducu ndee quide chiuⁿ ndihí-ndo cuendá Xítohó

Jesucristú. ¹⁷ Te ío cùdíí iní-í sá nĩ quexìo té Èstéfanás, ndihì té Fortunatú, ndihì té Acàicú, chí cue téé-áⁿ nĩ quide-güedé núú-ndó nĩ quide-güedé nchaa sá ñà túú ndàcu-ndo cada-ndo cuendá-í ní cùu. ¹⁸ Te ío tàxi-güedé tnúhu ndee iní xii-í, te diu-ni ducaⁿ tàxi-güedé tnúhu ndee iní xii nchòhó tucu, te núu xíãⁿ xíní ñùhu-xi sá cánèhe-ndo sá yíñùhu núú nchaa cue téé duha xiquide váha.

¹⁹ Te nchaa ñáyiú xĩndecu ichi Xítohó Jesucristú ndécú distritú Àsiá quide ndee iní ñáhã-yu xii-ndo, te ío cada ndee iní-ndó càchí té Àquilú ndihì ñadìhí-dé tá Priscilá, te ducaⁿ quide ndee iní ñáhá tucu nchaa ñáyiú tàcá dácuàha tnúhu Yá Ndiõxí vehé-yu xii nchaa nchòhó ñáyiú ndècu ichi-gá. ²⁰ Te cada ndee iní tucu-ndo càchí cue dava-gá ñáyiú ndècu ndihì-o ichi Xítohó Jesucristú. Te nĩ yùhu nĩ iní-ndó càda ndee iní tnáhá-ndó ìⁿ ìⁿ-ndo.

²¹ Te vitna ndaha mee yùhú té Páblú téè-í tnúhu-a quide ndee iní ñáhà-í xii-ndo.

²² Te ñáyiú ñá túú cùu váha iní-xi núú Xítohó Jesucristú te na cuíta nihnú-yu. Te vitna nchaa-o chí ná càchí-ó sã Xítohó Jesucristú quixi tucu-gá.

²³ Te xicáⁿ táhù-í núú Xítohó Jesucristú sá ná chĩndee chitúu ñaha-gã xii-ndo. ²⁴ Te ío cùu iní ñáhà-í xii-ndo ñacuáa ndècu-o ichi Xítohó Jesucristú, te ducaⁿ na cùnduu, te ío chí cadá ndèe iní-nã vitna.

TUTÚ CÚÚ ÛÚ NÍ CADÚHA TÊ PĀBLŪ QUÍHÍⁿ NDAHĀ ÑÁYIU ÑUÚ CÒRINTÚ

Té Pāblū cādūha-dé tutú quíhíⁿ ndaha ñáyiū xīndecu ichi Xítohó Jesucristú ndécú ñuú Còrintú

¹ Yúhú té Pāblū càháⁿ-í tnúhu Xítohó Jesucristú chi ducaⁿ ní cachí Yá Ndióxi cunduu. Te cādúha-í tutú-a ndíhi té Timùteú tée ndecu ndíhi-o ichi-gá cuendá daquixi-í ndaha nchòhó ñáyiū xīndecu ichi Yá Ndióxi ndécú ñuú Còrintú, te tutú-a cuu-xi tnàhá cuendá nchaa ñáyiū cūu cuendá Yá Ndióxi xīndecu nchaa ñuú yīndèhu distritú Acāyá. ² Te xicáⁿ táhù-í núú Tātá-ó Dútú Ndióxi ndíhi núú Xítohó Jesucristú sá io na chīndee chitúu ñaha-gá xii-ndo, te diu-ni ndi nduú-gá ná càda te io váha cuu iní-ndó cūndecu-ndo.

Té Pāblū càháⁿ-dé nchaa nàcuáa ndòho-dé

³ Te chí ná càchí-ó sá io váha iní Dútú Ndióxi Yáá cúú Tātá Xítohó Jesucristú, te diu-ni Dútú Ndióxi cúú-gá Yáá io cūndahú iní ñáhá xii-o, te diu-ni-gá cúú-gá Yáá táxi tnúhu ndee iní. ⁴ Te cuéi nāndi ndòho-o ndecu-o dīco diu-ni Dútú Ndióxi táxi-gá tnúhu ndee iní xii-o, te ducaⁿ quide-gá cuendá sá nchóó cuāñaha-o tnúhu ndee iní xii nchaa ñáyiū nāndi ndòho ndecu, te diu-ni nchaa tnúhu ndee iní táxi-gá xii-o diu-ni nchaa tnúhu ndee iní-áⁿ cuāñaha-o xii-yu. ⁵ Te Xítohó Jesucristú io ní ndoho-gá, te ducaⁿ nchòo tucu io ndòho-o, te ducaⁿ io vai tnúhu ndee iní ñihí-ó ndecu ndíhi-o chi ndecu-o ndíhi Xítohó Jesucristú. ⁶ Te nchúhú nāndi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndíhi-ndo te naníhí tǎhú-ndó. Te Yá Ndióxi táxi-gá tnúhu ndee iní xii-ndí, te

ducaⁿ quide-gá cuendá sá nchòhó tnàhá-ndó ñihí-ndó tnúhu ndee iní-áⁿ te naníhí tǎhú-ndó, te ducaⁿ càda ndee cada cahnu iní-ndó ndòho-ndo datná ndóhó nchúhú. ⁷ Te nchúhú io váha sàni ndáá iní-ndí cuendá-ndó chi ndòho-ndo datná ndóhó-ndí, te ducaⁿ táxi Yá Ndióxi tnúhu ndee iní xii-ndo datná táxi-gá xii-ndí.

⁸ Te nchòhó ñáyiū ndecu ndíhi-ndí ichi Xítohó Jesucristú cuiní-ndí cachí tnúhu-ndí xii-ndo nàcuáa ní yáha-ndí cūtnàhá ní xīndecu-ndí distritú Àsiá chi dàvá-áⁿ io ní ndoho-ndí, te luha-ná te vá cūndèe iní-ndí yáha-ndí nchaa tnúndòho-áⁿ ní cūu chi ní xehndé iní-ndí sá vǎ cǎcu-ndí. ⁹ Chi ní sàni iní-ndí sá ndíyi-ná cuu-ndí ní cūu, te ducaⁿ ní yáha-ndí cuendá sá io-gá quíndáá iní-ndí Yá Ndióxi sá díú-gá taunihnu ñaha-gá xii-ndí, te ñá díú mèe-ndí taunihnu-ndí mée-ndí, te diu-gá cúú-gá Yáá dándòto cuéi ñáyiū sa ní xíhí. ¹⁰ Te diu-ni-gá ní taunihnu ñaha-gá ñá túú ní sàhni ñaha ñáyiū xii-ndí, te diu-ni-gá táúnihnu ñaha-gá xii-ndí cuéi vitna, te cūtnuní ndáá iní-ndí sá díú-ni-gá taunihnu ñaha-gá xii-ndí núú cuaháⁿ núú vèxi te vá cáhni ñaha ñáyiū. ¹¹ Te nchòhó tnàhá-ndó chīndee ñaha-ndo xii-ndí chi càháⁿ ndíhi-ndo Yá Ndióxi cuendá-ndí, te io vai ñáyiū càháⁿ ndíhi ñáhá-yu xii-gá cuendá-ndí, te ducaⁿ io vai ñáyiū ndàcáⁿ táhú-yu núú-gá cuendá nchaa sá vǎha quide ñaha-gá xii-ndí.

Té Pāblū càháⁿ-dé ná cuendá ñá túú ní nàyáha-dé ñuú Còrintú

¹² Te io váha cūu iní-ndí chi cūtnuní iní-ndí sá cúú-ndí cue tée cūu ndáá datná cuiní Yá Ndióxi cunduu ndecu-ndí ñuyúú-a, te diu-ni ducaⁿ quide-ndí sá cúú-xi-ndó chi mee-gá cūndahú iní ñáhá-gá xii-ndí chīndèe ñaha-gá, te ñá túú

quide-ndí dàtná sání iní cue ñáyiú ñuyíú-a. ¹³⁻¹⁴ Nchaa nàcuáa ndùu tñuhu chido tñuni-ndí dáquixi-ndí ndaha-ndo cùu-xi mee-ni tñuhu sá ñá túú ùhú tecú tñuni-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuíní-ndí sá ìo-gá váha tecú tñuni-ndó cuendá sá òré ná quíxi tucu Xítohó Jesucristú, te dàvá-án ìo cada nínu ñaha-ndo xii-ndí dàtná cada nínu ñaha-ndí xii-ndo. ¹⁵ Te cuendá xiáⁿ núu ní sani iní-í yáha cáháⁿ-í úú xito núú ndécú-ndó cuendá ío cudíí ìní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha cáháⁿ-í núú ndécú-ndó, te òré ndixi tucu-í te nayáha cáháⁿ tucu-í, te òré nayáha cáháⁿ-í te taxi-ndo sá cúú ìchi-í cuendá quíhíⁿ-í distritú Jùdeá, duha ní sani iní-í ní cùu. ¹⁷ Te sá dúcáⁿ ñá túú ní quíxi coto ñaha-í xii-ndo te cudana sàni iní-ndó sá yùhú ñá túú ní sáha váha-í cuendá nàcuáa ní sani iní-í cada-í, àdi cudana ñáyiú ndècu ìchi cuehé ìchi duha, chi cue ñáyiú-án tnaa càchí-yu sá cúú cadá-yu [#] sá sání iní-yu cadá-yu te tnaa càchí-yu sá ñáhá. ¹⁸ Dico Yá Ndióxi Yáá ío váha quide ndáa nàha ndáa nàhá càxi-gá sá nchùhú ñá túú dàma-ndí sá càháⁿ-ndí. ¹⁹ Te yùhú ndíhi té Silvanú ndíhi té Timùteú dánèhé ñáhá-ndí xii-ndo cuendá Xítohó Jesucristú Yáá cúú Dèhe Yá Ndióxi, te Xítohó Jesucristú cúú-gá Yáá ñá túú dàma-gá tñuhu càháⁿ-gá, chi cùu-gá Yáá càháⁿ mee-ni tñuhu ndáa tñuhu cuití. ²⁰ Te diu-ni Xítohó Jesucristú cúú-gá Yáá quidé nchàa nacuáa ní cachí Yá Ndióxi. Te sá cuendá sá dúcáⁿ quide Xítohó Jesucristú xiáⁿ càchí-ó sá ío càhnu cuu Yá Ndióxi. Te nchaa-o na càchí-ó sá díú-ní dùcaⁿ na cada-gá. ²¹ Te mee Yá Ndióxi quidé-gá ndécú-ní-ó ìchi Xítohó Jesucristú. Te diu-ni mee-gá ní cáháⁿ ñáhá-gá xii-o cuendá cunu cuechi-o núú-gá. ²² Te Yá Ndióxi ní quide-gá sá nchóó cùu-o ñáyiú cùu

cuendá-gá, te ní taxi-gá Espiritú-gá ní ngúndecu ndíhi-o cuendá cutnùní iní-ó sá ndàa cada ñaha-gá xii-o nàcuáa ní cachí-gá cada-gá.

²³ Te Yá Ndióxi nàhá-gá sá yùhú càháⁿ ndáá-í ná cuendá vátá quíxi-gá-í quixi coto ñaha-í xii-ndo, te vátá quíxi-gá-í chi ñá túú cuíní-í dandíhú-í iní-ndó. ²⁴ Te nchùhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yá Ndióxi, chi sa sàndáá váha iní-ndó-gá, chi nchùhú cuíní-ndí chindee tñuhu ñaha-ndí xii-ndo nàcuáa ío-gá cudíí ìní-ndó cùndecu-ndo.

2

¹ Te ní sani ndáa iní-í sá vā quíxi ndíhi-ni-í quixi coto ñaha-í xii-ndo cuendá sá vā dándíhú-í iní-ndó. ² Te nchòhó cúú-ndó ñáyiú tàxi tñuhu ndee ìní xii-í cudíí ìní-í ndécú-í, te xiáⁿ núu ñá túú cuíní-í dandíhú-í iní-ndó, chi núu ducaⁿ na càda-í te vā cùndecu váha-gá iní-ndó nàcuáa taxi-ndo tñuhu ndee ìní xii-í. ³ Te xiáⁿ núu ní tendaha-í tutú véxi ndaha-ndo cuendá sá òré quixi coto ñaha-í xii-ndo, te dàvá-án quini-í sá quidé-ndó nàcuáa cudíí ìní-í te ñá díú dà dandíhú-ndó ìní-í òré quexì-í, chi nchòhó tàú-ndó càda-ndo sá yùhú cudíí ìní-í. Te cùtnuní ndáa iní-í sá núu yùhú cudíí ìní-í te tñáhá nchòhó cudíí ìní-ndó cuendá sá dúcáⁿ cudíí ìní-í. ⁴ Te ndàhyú-í sá ndíhú ìní-í òré ní cadúha-í tutú ní dáquixì-í ndaha-ndo, chi ío cuehé sá sání ìní-í, te ñá túú ní dàquixi-í tutú-án ndaha-ndo cuendá sá dándíhú ìní ñáhà-í xii-ndo, chi ní dáquixì-í cuendá sá nchòhó cutnùní iní-ndó sá ío cùu ìní ñáhà-í xii-ndo.

Nàcuáa tàú ñáyiú ñuú Còrintú cadá-yu cuendá [#] ñáyiú ñá túú quide ndáa

⁵ Te na càchí tñuhu-í xii-ndo cuendá [#] téé ní quide [#] sá ñá túú tàú-dé cada-dé ndécú ndíhi-ndo, te

ní quide ndàhú-xi luha iní-í cuèndá sá nǐ quide-dé-áⁿ dico nchòhó tñàhá-ndó nǐ dándìhú-dé luha iní-ndó, te duha cǎchí-í sá lúhá-ní nǐ dándìhú-dé iní-ndó cuèndá sá vǎ cuídó-gá-í ná tñúhu cǎháⁿ-í. ⁶ Te nàcuáa ní ndatnúhu-ndo nǐ quide ndáá-ndó cuèchi téé-áⁿ te sa ndóí-gá cuu nàcuáa ní quide-ndo-dé. ⁷ Te vitna tàú-ndó càda cahnu iní-ndó sá nǐ quide-dé, te cuǎñaha-ndo tñúhu ndee iní xii-dé chi núu ñáhá te vǎ nihí ndéé-gǎ-dé cada-dé sá vǎha cuèndá sá ndìhú iní-dé. ⁸ Te xiǎⁿ núu cǎháⁿ ndàhú-í núu-ndó sá càdá tucu-ndo sá cúú iní-ndó-dé. ⁹ Te ñú-ní cuèndá iha cǎháⁿ-í ñúú núu tutú sá sá ní dàquixi-í ndaha-ndo, te ducaⁿ nǐ quide-í xító ndéé ñáhà-í xii-ndo núu ndisa cuiní-ndó càda-ndo nchaa nacúáa cǎháⁿ-í. ¹⁰ Te ndéda-ní càa ñáyiu na càda cahnu iní-ndó ñúú sá quidě-yu, te tñàhá yúhú cada cǎhnu iní-í sá quidě-yu tucu. Te núu ò ñúú sá xini ñúhu-xi cada cahnu iní-í te quide cahnu iní-í, te mee Xítóhó Jesucristú náhá-gǎ sá dúcáⁿ quide-í, te ducaⁿ quide-í cuèndá sá nchòhó cuu-xi sá vǎha xii-ndo. ¹¹ Te ducaⁿ te sácúlná vǎ nihí-xi ná càda ñaha-xi xii-o, chi nchoo sá xini-ó nàcuáa quide-xi.

Té Páblú ndìhú iní-dé ndécú-dé ñúú Tròás

¹² Te ní xica-í cuáháⁿ-í ñúú Tròás cuèndá yàcáⁿ cǎháⁿ-í tñúhu sá cǎháⁿ nacúáa naníhí tǎhú-ó tñúhu Xítóhó Jesucristú, te òrè ní quexio-í te ní níhí-í ñúú ichi cǎhnu cǎháⁿ-í tñúhu-gá. ¹³ Dico ñá túú ní cùu vǎha iní-í chi ñá túú ní naníhí-í té Titú téé ndècu ndìhí-o ichi Xítóhó Jesucristú, núu xiǎⁿ ní quide ndee òrè tñáhà-í ndìhí cue ñáyiu ñúú-áⁿ, te ní xica-í cuáháⁿ-í distritú Macèdoniá.

Dàquetìhú-ó yucu ñávǎha chi ndècu ndìhí-o Xítóhó Jesucristú

¹⁴ Te táxǎhu xii Yá Ndiòxí chi ducaⁿ-ni sànu ichi ñaha-gǎ xii-ndí nàcuáa cunuu-ndí núu yucu ñávǎha

chi ndècu ndìhí-ndí Xítóhó Jesucristú, te mee Yá Ndiòxí sǎchìuⁿ ñaha-gǎ xii-ndí cǎháⁿ-ndí tñúhu-gá. Te cada iní-ó sá tñúhu-gá-áⁿ cúú-xi dàtná ñúú yúcú sǎ ò vǎha sǎháⁿ te ta xítenuu dicó-xi ndèni ní cuu cuáháⁿ. Te ducaⁿ sǎtnahá-xi cùu tñúhu-gá chi nchúhú quidé-ndí nàcuáa ta xítenuu ndèni ní cuu cuáháⁿ. ¹⁵ Te cùu-ndí dàtná dicó ñúú yúcú sǎ ò vǎha sǎháⁿ, te nàceni cuèndá Xítóhó Jesucristú núu Yá Ndiòxí, te dicó yúcú-áⁿ nchítá cuèi núu xǐndecu cue ñáyiu sa ní naníhí tǎhú, te cuèi núu xǐndecu cue ñáyiu ta xita nihnu cuáháⁿ. ¹⁶ Te sá cúú-xi cuè ñáyiu ta xita nihnu cuáháⁿ-áⁿ, dicó yúcú-áⁿ cúú-xi dàtná ñúú sá sǎhni ñàha xií-yu, dico sá cúú-xi cuè ñáyiu sa ní naníhí tǎhú, dicó yúcú-áⁿ cúú-xi dàtná ñúú sá ndécá òrè-yu, ducaⁿ sǎtnahá-xi cùu nchúhú. Te vitna chí cuǎha cuèndá núu ná cúú ñáyiu sàni iní-ndó ndàcu cada nacúáa ndùu tñúhu cǎháⁿ-í-a. ¹⁷ Chi nchúhú cǎháⁿ-ndí tñúhu Yá Ndiòxí dico ñá túú ndǎhú quidé-ndí ndìhí tñúhu-gá dàtná xǐquide dava-gǎ-güedé, chi quide ndáá-ndí cǎháⁿ-ndí tñúhu-gá, te mee-gǎ ní cachí-gǎ sá dúcáⁿ càda-ndí te ndèhe-gǎ sá nchúhú quidé-ndí nàcuáa ní cachí-gǎ, chi ndècu ndìhí-ndí Xítóhó Jesucristú.

3

Cuèndá ñgá núú sǎ vǎha ní cachí Yá Ndiòxí cada-gǎ ñáyiu

¹ Te cuèi duha cǎháⁿ-ndí núu-ndó dico ñá túú xini ñúhu-xi sá cǎñaha-ndí xii-ndo sá cúú-ndí cue téé quide vǎha, te ní ñá túú xini ñúhu-xi cacanehe-ndí ñúú tutú núu cǎháⁿ-xi sá cúú-ndí cue téé vǎha danèhé ñáhà xii-ndo dàtná xǐquide dava-gǎ-güedé, te ní ñá túú xini ñúhu-xi sá nchòhó taxi-ndo ñúú tutú núu cǎháⁿ-ndó sá nchúhú cúú-ndí cue téé quide vǎha. ² Te ñá túú xini ñúhu-xi ducaⁿ cada-ndí. Te cùtnuní ndáá iní-ndí sá nchòhó cúú-ndó dàtná ñúú tutú sá ò vǎha

càháⁿ cuèndá-ndí. Te ducaⁿ sãtnahá-xi cùu-ndo chi nchaa ñáyiú nìhí-yu tnúhu nàcuáa quide-ndo ndecu-ndo, te xiáⁿ cùtnùní iní-yu sá nchúhú cúú-ndí cue tée quide váha. ³ Te nchòhó cúú-ndó cuèndá Xítohó Jesucristú, te cùu-ndo datná tutú-gá te tutú-áⁿ nì táuchíúⁿ-gã xii-ndí ní cadúha-ndí, te mee-ni ndíhi Espíritú Yã Ndiõxí ní ngúndeé tnúhu-áⁿ te ñã díú ndíhi tindá ní ngúndeé. Te ñã díú ìⁿ núú yúú ní ngúndeé chi iní-ndó cùu-xi núú dúcáⁿ nì ngúndeé tnúhu-áⁿ te ducaⁿ sãtnahá-xi cùu-ndo.

⁴ Te duha càháⁿ-ndí chi cùtnuní ndáá iní-ndí sá Yã Ndiõxí quidé vãha ñaha-gã xii-ndí, chi ndècu ndíhi-ndí Xítohó Jesucristú. ⁵ Te nchúhú chi ndàcu-ndí quidé-ndí sá vãha dico ñã díú mèe-ndí ducaⁿ ndàcu-ndí quidé-ndí, chi mee Yã Ndiõxí chindèe ñaha-gã xii-ndí nõu ndàcu-ndí quidé-ndí sá vãha. ⁶ Te mee Yã Ndiõxí ní quide-gá sá nchúhú ndacu-ndí cunu cuechi-ndí núú-gã càháⁿ-ndí núú ñáyiú cuèndá ingá núú sã vãha ní cachí-gá cada ñaha-gã xii-yu. Te sá vãha ní cachí-gá cada ñaha-gã xií-yu-áⁿ ñã túú ìⁿ-ni cuu-xi ndíhi nchaa tnúhu sá nì xáhaⁿ-gã xii ndíú Moisés ní chídó tnùní ndí, te ducaⁿ chi espíritú Yã Ndiõxí néhé chùuⁿ-xi nchaa tnúhu sá càháⁿ cuèndá nchaa sã vãha-áⁿ. Te nchaa tnúhu ní chídó tnùní ndí Moisés, dándixi túu-xi iní nchaa ñáyiú ndècu ndíhi tnúhu-áⁿ sã cuíta nihnú-yu cuèndá nchaa cuéchi-yu, dico cue ñáyiú ndècu ndíhi Espíritú Yã Ndiõxí ñáyiú-áⁿ ndécú ndíhi-yu tnúhu ndee ìní sá cãcu nihnú-yu.

⁷ Te tnúhu sá nì càháⁿ Yã Ndiõxí ndéé díhna nàcuáa cada ñáyiú ní ngúndeé-xi ìⁿ núú yúú quèhéⁿ. Te òré ní dátúu ndí Moisés nàcuáa càháⁿ tnúhu sá nì càháⁿ Yã Ndiõxí ndéé núú yúú-áⁿ núú cue ñáyiú isràél, te súúní nì tásaⁿ núú ndí te

ñã túú-gã ní cùu cundehé-yu núú ndí, te ducaⁿ-gã ducaⁿ-gã quidé-xí datásaⁿ-xi núú ndí ni cùu ñã túú-gã ducaⁿ nì quide-xi. Te tnúhu ndéé núú yúú-áⁿ dándixi túu-xi iní cue ñáyiú sá cuíta nihnú-yu sá cuèndá nchaa cuéchi-yu, te ío váha ní quide-xi cùtnàhá ní ngúndecu ndíhi cue ñáyiú isràél tnúhu-áⁿ. ⁸ Te sá dúcáⁿ nì quide-xi xiáⁿ cùtnùní sá tnúhu càháⁿ Espíritú Yã Ndiõxí vitna uuⁿ-gã ducaⁿ ìo-gã váha quide-xi. ⁹ Te núu ducaⁿ ìo váha ní quide-xi cùtnàhá ní ngúndecu ndíhi cue ñáyiú isràél tnúhu sá dándixi túu iní-yu sá cuíta nihnú-yu sá cuèndá nchaa cuéchi-yu, te uuⁿ-gã ducaⁿ vãha quide-xi vitna ní ngúndecu ndíhi-o tnúhu sá càháⁿ nàcuáa quide Yã Ndiõxí cuèndá sá vã cùndècu-gã cuéchi ñáyiú núú-gã. ¹⁰ Te vã càchí-ó sã cùtnàhá ní ngúndecu ndíhi cue ñáyiú isràél tnúhu ndéé núú yúú-áⁿ ìo-gã váha ní quide-xi, te ñáhá chi uuⁿ-gã váha quide-xi vitna cuendá tnúhu sá càháⁿ nàcuáa quide Yã Ndiõxí. ¹¹ Te núu ducaⁿ ìo váha ní quide-xi cùtnàhá ní ngúndecu ndíhi ñáyiú isràél tnúhu sá ñã túú ní cùdí, te uuⁿ-gã ducaⁿ ìo váha quide-xi vitna ní ngúndecu ndíhi-o tnúhu sá vã ndíhí nihnu tnahí-gã.

¹² Te cùtnuní iní-ndí sá vã ndíhí nihnu sá dúcáⁿ ìo váha quide-xi, núú xiáⁿ ío víi ío váha cùu iní-ndí càháⁿ-ndí tnúhu sá nì ngúndecu ndíhi-o. ¹³ Te ñã túú quide-ndí datná ní xóo cada ndí Moisés, chi ndí-áⁿ nì xóo dàdãhu ndí núú ndí òré datásaⁿ-xi núú ndí cuèndá sá vã quíni cue ñáyiú isràél òré ñã túú-gã datásaⁿ-xi núú ndí. ¹⁴ Te cue ñáyiú isràél ñã túú ní tècú tnùní váha-yu nàcuáa ní xóo danèhé ñáhá ndí Moisés xii-yu, te cuéi ndéé vitna ñã túú tècú tnùní-yu òré dácuahá-yu tnúhu sá nì càháⁿ Yã Ndiõxí ndéé díhna nàcuáa cada-gã, te cada iní-ó sã datná sá nì xidáhu núú ndí Moisés yidáhu núú-yu cuèndá sá vã cùtnuní núú-yu cundehé-yu

te tecú tnùnì-yu, dico núu tnahá tnúhu-yu ndihí Xítohó Jesucristú te tecú tnùnì-yu. ¹⁵ Te cuèi ndéé vitna òré dácuaá-há-yu nchaa tnúhu sá ñí chídó tnùnì ndíi Moisés nchaa núu tütú ndíi, te cada iní-ó sá dàtná sá ñí xídáhu núu ndíi yídáhu núu-yu chi ñá túú tècú tnùnì-yu. ¹⁶ Dico cue ñáiyu na tũha ñaha xii Xítohó Jesucristú te tècú tnùnì-yu tnúhu-gá. ¹⁷ Te Xítohó Jesucristú ìⁿ-ni cùu-gá ndihí Espiritú Yá Ndiòxí, te nchaa ñáiyu ndècu ndihí Espiritú-gá ñá túú-gá táxi tnùnì ñáhá ñí ìⁿ sá ñá túú vaha xii-yu. ¹⁸ Te dàtná cúú ìⁿ yutatá sá dánèhé núu ñáhá-xí xii ñáiyu ìⁿ sá vaha, ducaⁿ sãtnahá-xi cùu-o chi quide-o nacuaá cáháⁿ ñáiyu sá ìo càhnu cuu Xítohó Jesucristú, te ducaⁿ ùuⁿ-gá uuⁿ-gá tá cùndáá-ó ndècu-o ichi-gá dàtná quidé mèe-gá quidé ndáá-gá. Te Espiritú-gá quidé-xí dùcaⁿ ta cundáá-ó núu-gá cuáháⁿ.

4

¹ Te mee Yá Ndiòxí ní cundàhú iní ñáhá-gá xii-ndí ní taxi-gá chiuⁿ quide-ndí càháⁿ-ndí tnúhu-gá, núu xíáⁿ ñá túú tnàhí nàtúhú iní-ndí cáháⁿ-ndí tnúhu-gá. ² Te nchúhú dàquee tíhú-ndí nchaandi túhú sá ñá túú vaha quide dayuhu ñáiyu, chi nchaa xíáⁿ cúú-xí ìⁿ sácáⁿ-núú sá cúú-xí-yu, te nchúhú ñá túú sàni iní-ndí dandàhú-ndí ñáiyu te ni ñá túú sàni iní-ndí dama-ndí nàcuáa càháⁿ tnúhu Yá Ndiòxí, chi càháⁿ ndáá-ndí nàcuáa tàù-xi cáháⁿ-ndí, te mee Yá Ndiòxí ñáhá-gá nàcuáa ndùu tnúhu càháⁿ-ndí núu ñáiyu, te ñáiyu-áⁿ cùnùnì iní-yu sá nchúhú càháⁿ vaha-ndí. ³ Te cue ñáiyu ñá túú tècú tnùnì nàcuáa ndùu tnúhu sá càháⁿ nàcuáa naníhí tàhú-ó càháⁿ-ndí núu-yu, ñáiyu-áⁿ cúú-yu ñáiyu ta xita nihnu cuáháⁿ. ⁴ Te cue ñáiyu-áⁿ cúú-yu ñáiyu ío sàá iní-xi chi ñá túú cùnì-yu quíndáá iní-yu tnúhu Xítohó Jesucristú,

te xíáⁿ núu sácuihná cùnùu-xi núu-yu te nihí-xi nàcuáa quide-xi dadáhu ndodo iní ñáhá-xí xii-yu cuendá sá vã tècú tnùnì-yu tnúhu sá càháⁿ nàcuáa naníhí tàhú-yu, te tnúhu-áⁿ cúú-xí tnúhu sá ìo vaha chi càháⁿ-xi sá ìo càhnu cuu Xítohó Jesucristú, te cùu-gá dàtná mée Tãtã-gã Dútú Ndiòxí. ⁵ Te nchúhú ñá túú càháⁿ-ndí cuendá sá cúú-xí mèe-ndí núu-ndó chi càháⁿ-ndí cuendá Xítohó Jesucristú, te càhí-ndí xii-ndo sã díú-gã cúú-gã Yaá ío cùnùu, te càhí-ndí xii-ndo sã mée-ndí cúú-ndí dícó-ni cue tée xinu cuechi sá cúú-xi-ndó, te ducaⁿ quide-ndí nàcuáa cuu vii cuu vaha iní Xítohó Jesucristú. ⁶ Te Yá Ndiòxí Yaá ní dáyèhé ndéé cùnàhá nee ñuyúí ní cùu, Yaá-áⁿ ní cachí-gá sá Xítohó Jesucristú cada-gá nàcuáa tecú tnùnì-ó sã ìo càhnu cuu mee Yá Ndiòxí. Te sá dúcáⁿ ní quide-gá te cada iní-ó sã dàtná tnúhu sá ñí dáyèhé-gá iní-ó.

Ío quíndáá iní-ó Yá Ndiòxí

⁷ Te nchúhú ndécú ndihí-ndí tnúhu Xítohó Jesucristú, te tnúhu-gá cúú-xí dàtná ìⁿ sá ìo vaha ñũhu ìⁿ xití quídi ñuhu, te nchúhú cúú-ndí dàtná quídi-áⁿ. Te ducaⁿ sãtnahá-xi cùu-ndí chi tnúhu-gá ío càhnu cuu-xi te mee-ndí ñáhá, te ducaⁿ cùu nacuaá cutnùnì sá mée Yá Ndiòxí quidé-gã nchaa sá vaha te ñá díú mèe-ndí. ⁸ Te cuèi ío ndòho-ndí ndécú-ndí dico nihí-ndí nàcuáa quide-ndí tá yãha-ndí nchaa tnúndòho-áⁿ cuáháⁿ, cuèi áma sa ndètu víi-nã quehndé iní-ndí sá vã ndácú-ndí yãha-ndí nchaa tnúndòho-áⁿ, dico ndàcu-ndí yãha-ndí. ⁹ Te cuèi nànducu ñaha ñáiyu cuìní-yu ná cada ñáhá-yu xii-ndí dico ñá túú dàña ñaha Yá Ndiòxí xii-ndí, te cuèi cànihá-yu xii-ndí dico càcu-ndí ñá túú sãhni ñahá-yu. ¹⁰ Te ndèni ní cuu cuáháⁿ-ndí xíca cùu-ndí, te càcu

căcu cahni ñahá-yu xii-ndí dàtná ní quidé-yu Xítohó Jesucristú, te ducaⁿ yăha-ndí cuendá cutnùní sá ndécú tũu Xítohó Jesucristú andiu te chĩndee ñaha-gá xii-ndí. ¹¹ Te nchúhú nini ndècu-ndí ñuyíú-a te nchaa-ni nduu căcu căcu cahni ñaha ñăyiu xii-ndí sá cuendá Xítohó Jesucristú, te ducaⁿ yăha-ndí ndécú-ndí cuendá cutnùní sá Xítohó Jesucristú ndécú ndihĩ ñaha-gá xii-ndí cuêi vá cúdei yiqui cùñú-ndí cundecu-xi. ¹² Te sá dúcáⁿ căcu căcu cahni ñaha ñăyiu xii-ndí xiăⁿ nchòhó uuⁿ-gá tá ñihĩ ndéé-ndó cuăháⁿ ndécú-ndó ichi Xítohó Jesucristú.

¹³ Te ñⁿ tée ní xĩndecu ndéé sanaha ñi chídó tñuní-dé núú tütú Yá Ndióxí núú cächí-xi: “Yúhú ní sándáá iní-í Yá Ndióxí núu xiăⁿ ní cáháⁿ-í”, duha ní cächí tée-áⁿ. Te dàtná-ni ní sani iní tée-áⁿ ñi cáháⁿ-dé te diu-ni ducaⁿ sãni iní nchúhú tucu núu xiăⁿ cächí-ndí: “Sándáá iní-ndí Yá Ndióxí núu xiăⁿ cáháⁿ-ndí”, duha cächí-ndí. ¹⁴ Te cùtnuní iní-ndí sá nũu na cùú-ndí te Yá Ndióxí dandòto ñaha-gá xii-ndí dàtná ní dándótó-gă Xítohó Jesucristú, te tñahá nchòhó ducaⁿ căda ñaha-gá xii-ndo, te dāvá-áⁿ candeca ñaha-gă xii-o quĩhĩⁿ nucúndecu-o núú-gă. ¹⁵ Te nchúhú nándi cùu sá tá yăha-ndí véxi cuendá nchòhó ngúndecu váha-ndo, te ducaⁿ cuíta cáyá-gă ñăyiu ngúndecu váha sá xíi Yá Ndióxí, te diu-ni ducaⁿ cuíta cuu vai-gă ñăyiu ndacáⁿ táhũ-yu núú-gă te cachí-yu sá ño cãhnu cuu-gă.

¹⁶ Te xiăⁿ núu nchúhú ñá túú tñahĩ nãtúhú iní-ndí ndécú-ndí ichi Xítohó Jesucristú, te cuêi yiqui cùñú-ndí tá xau-xi cuáháⁿ dico iní-ndí chi uuⁿ-gá uuⁿ-gá tá ñihĩ ndéé-xí cuăháⁿ. ¹⁷ Te nchaa sá ndòhó-ndí ñuyíú-a ñá túú cächí-ndí sá cùú-xí ñⁿ tñúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yá Ndióxí ío

váha cada ñaha-gă xii-ndí nduu na sãá-ndí núú ndécú-gă, te diu-ni ducaⁿ căda ñaha-gă xii-ndí ñi caa ñi quĩhĩⁿ. ¹⁸ Te nchúhú ñá túú nchícúⁿ nihnu-ndí sá tũu ndèhe-ndí ío ñuyíú-a, chi nchícúⁿ nihnu-ndí sá vátá quĩnĩ-gă-ndí ndécú àndiu, te ducaⁿ quide-ndí chi nchaa sá tũu ndèhe-ndí ío ñuyíú-a vá cúdei-xi cundecu-xi, te nchaa sá ñá túú tũu ndècu andiu xiăⁿ cudíi-xi cundecu-xi ñi caa ñi quĩhĩⁿ.

5

¹ Te yiqui cùñú-ó cùu-xi datná ñⁿ vehe, te vehe-áⁿ ñá túú cudíi-xi, te ducaⁿ sãtnahá-xi cùu yiqui cuñú-ó chi vá cúdei-xi, te na sãá nduu vã cùndècu-gă-ó ndihĩ yiqui cuñú-ó, te Yá Ndióxí taxi-gă ñⁿ yiqui cùñú sáá sá cùú-xí-ó, te xiăⁿ cùú-xí dàtná ñⁿ vehe sá ñá túú ní cãdúha cue ñăyiu ñuyíú-a, chi mee Yá Ndióxí ní cadúha-gă vehe-áⁿ te vehe-áⁿ cudíi-xi cundecu-xi ñi caa ñi quĩhĩⁿ andiu. Te ducaⁿ sãtnahá-xi cùu yiqui cuñú sá táxi Yá Ndióxí xii-o chi cudíi-xi cundecu-xi ñi caa ñi quĩhĩⁿ. ² Te nchúhú ndècu ndihĩ-gă-ndí yiqui cùñú-ndí sá ndécú ndihĩ-ndí vitna te sama cuĩnĩ-ndí sá ío ndihĩ taxi Yá Ndióxí yiqui cùñú sáá cùndecu ndihĩ-ndí. ³ Chi mee-gă vá dáñá-gă sá dúcáⁿ-ní cùnduu-ndí cundecu-ndí, chi dai taxi-gă yiqui cùñú sáá-ãⁿ xii-ndí. ⁴ Te nini ndècu-ndí ndihĩ yiqui cùñú-ndí vitna ío sãni iní-ndí te ndihú iní-ndí, dico ñá díú sá dúhá quide-ndí te ñá túú-gă tñahá iní-ndí cundecu-ndí ndihĩ yiqui cùñú-ndí, chi cuĩnĩ-ndí sá Yá Ndióxí ío ndihĩ taxi-gă yiqui cùñú sáá nduu táhú-ndí, chi xiăⁿ cudíi-xi ñi caa ñi quĩhĩⁿ te yiqui cùñú-ndí sá tá ndihĩ nihnu cuáháⁿ-a vá cúdei-xi cundecu-xi. ⁵ Te ducaⁿ tñahĩ ní cachí Yá Ndióxí cunduu sá dúcáⁿ nduu táhú-ó yiqui cuñú sáá-ãⁿ, te

ní taxi-gá Espíritú-gá ní ngúndecu ndìhi-o cuèndá cutnùní iní-ó sá ndáá taxi-gá yiqui cùñú sáá-áⁿ nduu táhú-ó.

⁶ Te xíáⁿ nùu nchúhú ñìhí ndéé-ndí ndécú-ndí, te cùtnuní iní-ndí sá ñìni ndecu-ndí ndìhi yiqui cùñú-ndí sá ndécú ndìhi-ndí vitna te vátá sàá-gá-ndí cundecu-ndí mei nùu ndécú Xìtohó Jesucristú.

⁷ Te ducaⁿ cùtnuní iní-ndí chí sàndáá iní-ndí Yá Ndiòxí ndécú-ndí ñuyíú-a cuèi ñá túú xìní-ndí-gá.

⁸ Te ío váha cùu iní-ndí ndécú-ndí, te sàni iní-ndí sá váha-gá sá nùu vá cùndecu-gá-ndí ndìhi yiqui cùñú-ndí sá ndécú ndìhi-ndí vitna. Te ducaⁿ sàni iní-ndí chí váha-gá cundecu-ndí mei nùu ndécú Xìtohó Jesucristú.

⁹ Te ío ndècu ndee-ndí quidé-ndí nàcuáa cuu víi cuu váha iní Xìtohó Jesucristú vitna ndècu-ndí ñuyíú-a, te òu-ni ducaⁿ càda-ndí cuèi òré vá cùndecu-gá-ndí.

¹⁰ Te dacuítí sá ncháá-ó cùndecu-o nùu Xìtohó Jesucristú ìⁿ nduu, te dàvá-áⁿ mee-gá cáháⁿ-gá te nùu nása ndùu chiuⁿ ní quide-o ìⁿ ìⁿ-o, nùu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxí-gá nduu táhú-ó.

Nàcuáa ní cuu ní ngúndecu váha-o ndìhi Yá Ndiòxí

¹¹ Te nchúhú quíyùhú iní-ndí nàcuáa cada Xìtohó Jesucristú, nùu xíáⁿ càháⁿ-ndí tnúhu-gá nùu ñáyiú cuèndá xínu iní-yu tuha ñàhá-yu xii-gá. Te mee Yá Ndiòxí sa nàha-gá nàcuáa quide-ndí

ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí. ¹² Te sá òhà cáháⁿ-ndí te vá cání iní-ndó sá nchúhú càháⁿ váha-ndí cuèndá-ndí nàcuáa nchòhó cuu váha iní ñàhá-gá-ndó xii-ndí te ñàhá, chí duha càháⁿ-ndí cuèndá sá nchòhó ñìhi-ndó tnúhu

cáháⁿ váha-gá-ndó cuèndá-ndí nùu ñáyiú. Te ducaⁿ ñìhi-ndó tnúhu cùñaha-ndo xii cue ñáyiú quide nínu mee-xi, chí cue ñáyiú-áⁿ ñà túú quide cuèndá-yu nása ndècu iní-yu.

¹³ Te nùu nchòhó sání iní-ndó sá lùcú-ndí cuèndá nàcuáa quide-ndí ndécú-ndí te cùu-xi cuèndá Yá Ndiòxí, àdi nùu sàni iní-ndó sá ñà túú lùcú-ndí cuèndá nàcuáa quide-ndí ndécú-ndí te cùu-xi sá

váha sá cúú-xí-ndó. ¹⁴ Te quide-ndí nàcuáa cuìní Xìtohó Jesucristú chí cùtnuní iní-ndí sá ío cùu iní-gá nchaa ñáyiú, te ducaⁿ xìní ndáá-ndí sá ní xíhí-gá cuèndá nchaa-yu, te xíáⁿ nùu cada iní-ó sá dàtná tnúhu sá ncháá ñáyiú ní xíhí-yu ndìhi-gá.

¹⁵ Te ducaⁿ ní xíhí Xìtohó Jesucristú cuèndá nchaa ñáyiú chí cuìní-gá sá ncháá-yu cundecú-yu cada-yu nàcuáa cuìní méé-gá te vá cada-yu nàcuáa cuìní méé-yu, chí mee-gá ní xíhí-gá te ní ndoto-gá cuèndá cuu-xi sá váha sá cúú-xí-yu. ¹⁶ Te xíáⁿ nùu nchúhú ñá túú-gá ná sání iní-ndí cuèndá tnàha ñáyiú-ndí nùu

nàndìhi-yu àdi ñá túú nàndìhi-yu dàtná ní xóo caní iní-ndí cùtnàhá ní xíndecu-ndí ichi cuèhé ichi duha, te dàvá-áⁿ ní xóo caní iní-ndí cuèndá Xìtohó Jesucristú dàtná sání iní cue ñáyiú ndècu ichi cuèhé ichi duha vitna. ¹⁷ Te nchaa nchoo ñáyiú ní

tnàhá tnúhu ndìhi Xìtohó Jesucristú ní nduu-o dàtná ìⁿ ñáyiú saa, te ducaⁿ chí ñá túú-gá quidé-ó dàtná ní xóo cada-o cùtnàhá ní xíndecu-o ichi cuèhé ichi duha, chí ní ngúita-o quide-o mee-ná sá váha te nchaa xíáⁿ cúú-xí sá sáá sá cúú-xí-ó chí vátá quìní-gá-ó càda-o.

¹⁸ Te ducaⁿ quide-o ndecu-o chí mee Yá Ndiòxí quidé-gá sá dúcáⁿ càda-o cundecu-o. Te Xìtohó Jesucristú ní quide-gá ní ngúndecu váha-o ndìhi Yá Ndiòxí vitna, te ducaⁿ chí mee Yá Ndiòxí ducaⁿ tnàhí ní cachí-gá cunduu, te òu-ni mee Yá Ndiòxí ní taxi-gá

chìuⁿ quide-ndí càháⁿ-ndí tnúhu-gá nàcuáa ngúndecu váha cue ñáyi ndihí-gá. ¹⁹ Te ducaⁿ chi mee-gá ní cachí-gá sá Xítohó Jesucristú cada-gá nàcuáa núcúndecu váha nchaa nchoo cuè ñáyi ndècu ñuyú-a ndihí Yá Ndiòxí. Te nchaa ñáyi ní tuha ñaha xii-gá ñá túú-gá sání iní-gá sá ñáyi-áⁿ nacháhu-yu cuèchi-yu núú-gá. Te mee Yá Ndiòxí ní taxi-gá chìuⁿ quide-ndí càháⁿ-ndí tnúhu-gá núú ñáyi nàcuáa ngúndecu ndihí ñaha váha-yu xii-gá. ²⁰ Te Xítohó Jesucristú ní cachí-gá sá nchúhú càháⁿ-ndí tnúhu-gá núú nchaa ñáyi, te sá dúhá quide-ndí càháⁿ-ndí tnúhu-gá te quide-ndí núú Yá Ndiòxí càháⁿ-ndí yuhu-gá, te xíáⁿ núú càháⁿ ndàhú-ndí núú-ndó sá tnàhá tnúhu-ndo ndihí Yá Ndiòxí cuèndá cundecu váha-ndo ndihí-gá, te duha càháⁿ-ndí chi ducaⁿ càhí Xítohó Jesucristú cada-ndí. ²¹ Te Xítohó Jesucristú cúú-gá Yaá ñá túú tnàhí cuèchi-xi, dico Yá Ndiòxí ní quide ñaha-gá xii-gá dàtná ñⁿ ñáyi ndècu cuèchi-xi, te ducaⁿ chi Xítohó Jesucristú ní xido-gá cuèchi nchaa nchoo ñáyi ñuyú-a, te ducaⁿ ní xido Xítohó Jesucristú nchaa cuèchi-o cuèndá sá núú na tnàhá tnúhu-o ndihí-gá te cudíu-o núú Yá Ndiòxí, te ducaⁿ ní cuu chi mee Yá Ndiòxí ducaⁿ ní cachí-gá cunduu.

6

¹ Te nchoo ñⁿ-ni cùu-o quide chìuⁿ-o cuèndá Yá Ndiòxí núú xíáⁿ càháⁿ ndàhú-ndí núú-ndó sá vǎ dícó-ni ducaⁿ cùndedóho-ndo tnúhu Yá Ndiòxí, chi cada-ndo nàcuáa na chindee ñaha-ni-gá. ² Chi mee-gá càhí-gá ñⁿ xichí núú tütú-gá núú càhí-xi: Sáa nduu te cundàhú iní ñàhà-í xii-ndo chindee ñaha-í cuèndá naníhí tǎhú-ndó, te ní sǎa nduu tǎu-xi sá cundàhú iní ñàhà-í xii-ndo chindee ñaha-í

cuèndá naníhí tǎhú-ndó, núú xíáⁿ ní xíndedóho-í tnúhu ní càháⁿ-ndó te ní chindee ñaha-í xii-ndo nàcuáa naníhí tǎhú-ndó.

Duha càhí-gá núú tütú-gá. Te vitna cùu-xi nduu cundàhú iní ñàhà Yá Ndiòxí chindee ñaha-gá, te cùu-xi nduu naníhí tǎhú-ó.

³ Te nchúhú ñá túú quide-ndí ñⁿ sá ñá túú tǎu-ndí cada-ndí sá cúú-xí ñáyi, chi cùnín-ndí sá vǎ càháⁿ cuèhé-yu cuèndá chìuⁿ quide-ndí. ⁴ Te nchaa sá quidé-ndí cúú-xí nàcuáa cutnùní iní cue ñáyi sá nchúhú xínú cuèchi-ndí núú Yá Ndiòxí, te ío quide cahnu iní-ndí cuèndá nchaa sá ndóhó-ndí, chi nándí quide ñaha ñáyi xii-ndí, te ducaⁿ-ni ta quide cahnu iní-ndí cuèi nándí-gá nchaa sá tá yǎha-ndí véxi. ⁵ Te duha ta yǎha-ndí véxi, núú cánha ñáyi xii-ndí, núú chíhí ñàhà-yu vecaá, núú cuáá ndeé ñàhà ñáyi xii-ndí xícuèhé ñàhà-yu, te ío ndòho-ndí quidé-ndí chìuⁿ Yá Ndiòxí, te áma xidí-ndí te áma ñá túú xidí-ndí, te áma nihí-ndí sá xéxi-ndí te áma ñá túú nihí-ndí. ⁶ Te quide ndáá-ndí ndécú-ndí, te cùtnuní váha iní-ndí nàcuáa càháⁿ tnúhu Yá Ndiòxí, te quide cahnu iní-ndí cuèi nándí quide ñaha ñáyi xii-ndí, te cundàhú iní-ndí tnàha ñáyi-ndí, te quide-ndí nchaa sá váha nàcuáa chindee ñaha Espiritú Yá Ndiòxí xii-ndí, te ío ndisa iní-ndí cúú iní-ndí cue tnàha ñáyi-ndí. ⁷ Te dànehé-ndí ñáyi mee-ni tnúhu ndáá, te nchaa chìuⁿ quide-ndí te quide-ndí nàcuáa chindee ñaha Yá Ndiòxí xii-ndí, te cuèndá sá quidé ndáá-ndí ndécú-ndí núú xíáⁿ nihí ndeé-ndí dáquèe tǎhú-ndí nchaa sá cuèhé sá dúhá. ⁸ Te dava ñáyi quide nínu ñàhà-yu xii-ndí, te davá-yu tnúhu cuèhé tnúhu duha càháⁿ-yu xǎhǎ-yu

xii-ndí, te davá-yu xícáháⁿ váha-yu cuendá-ndí te davá-yu xícáháⁿ cuèhé-yu, te davá-yu càchí-yu sá dándàhú-ndí ñáiyu dico ñá ndáá chi càháⁿ ndáá-ndí. ⁹ Te davá-yu càchí-yu sá ñà túú xìní-yu ná ñáiyu cùu-ndí, te davá-yu càchí-yu sá xìní-yu yoo cùu-ndí, te davá-yu cuíní-yu cahni ñàhá-yu xii-ndí dico vátá cáhni ñàhá-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiòxí, te cuèi ndòho-ndí dico ñá túú cùu-xi sá cùu-ndí. ¹⁰ Te cuèi ndihú iní-ndí dico ñá túú ãña ndeé-ndí sá cùdí iní-ndí, te cùu-ndí cue téé ndàhú dico sànu ichi-ndí vai ñáiyu ichi Yá Ndiòxí cuendá ngúndecu váha-yu sá cuendá-gá, te cuèi ñá túú ñá ndécú ndihí-ndí dico ñá túú ñá cùmāni xii-ndí.

¹¹ Te nchòhó ñáiyu ndècu ndihí-í ichi Xítohó Jesucristú ndécú ñúú Còrintú ío cùu iní ñàhá-ndí xii-ndo, te ni yùhu ni iní-ndí càháⁿ-ndí nchaa tnúhu càháⁿ-ndí sá cùu-xí-ndó. ¹² Te nchúhú chi ni yùhu ni iní-ndí cùu iní ñàhá-ndí xii-ndo, dico nchòhó chi ñá túú dùcaⁿ quide-ndo sá cùu-xí-ndí. ¹³ Te yúhú càháⁿ ndàhú-í núu-ndó dàtná quidé ìⁿ téé cùu tátá òré càháⁿ ndihí-dé cue déhe-dé sá ni yùhu ni iní-ndó cùu iní ñàhá-ndó xii-ndí dàtná quidé mèe-ndí cùu iní ñàhá-ndí xii-ndo.

Nchoo cùu-o datná ìⁿ vehe Yá Ndiòxí

¹⁴ Te cue ñáiyu ñá túú sàndáá iní tnúhu Xítohó Jesucristú, te vá cùu ìⁿnuu-ndo ndihí-yu cada-ndo dàtná xíquidè-yu, chi ðìⁿ cuu nchaa sá vāha te ðìⁿ cuu nchaa sá cuèhé sá dùhá, te ñúmí nchícanhii ndihí niú chi ñá túú ìⁿ-ni cuu-xi. Te ducaⁿ sàtnahá-xi cùu nchaa sá vāha ndihí nchaa sá cuèhé sá dùhá chi ñá túú ìⁿ-ni cuu-xi. ¹⁵ Te ðiu-ni

ducaⁿ ñà túú ìⁿ-ni cuu Xítohó Jesucristú ndihí sácúlná, te ðiu-ni ducaⁿ ñá túú ìⁿ-ni cuu ñáiyu sàndáá iní ñàhá xii Xítohó Jesucristú ndihí ñáiyu ñá túú sàndáá iní ñàhá xii-gá. ¹⁶ Te ðiu-ni ducaⁿ sàtnahá tucu-xi cùu vehe Yá Ndiòxí ndihí nchaa sá càchí ñáiyu cùu ndiòxí ní cadúha cue téé ñuyú-a, chi vá cùu quíhi ni ìⁿ xíáⁿ xití vehe-gá. Te nchoo cùu-o datná vehe Yá Ndiòxí Yáá ndécú túu andiu, chi mee-gá càchí-gá núu tütú-gá núu càchí-xi:

Yúhú vá cùmāni cundecu-í ndihí-yu ndèni ní cuu na cùndecú-yu, te ðiu-ni yúhú cuu-í Ndiòxí-yu, te mèe-yu cuu-yu ñáiyu cùu cuendá-í.

Duha càchí-gá núu tütú-gá. ¹⁷ Te xíáⁿ núu càchí tucu-gá ingá xichi núu tütú-gá núu càchí-xi:

Chí tá quèe tnuú nchaa ñáiyu ñá túú sàndáá iní ñàhá xii-í, te vá cání iní-ndó cada-ndo ni ìⁿ sá cuèhé sá dùhá,

te ducaⁿ te queheⁿ cuendá ñàhá-í xii-ndo,

¹⁸ te yúhú cuu-í Tātá-ndó, te nchòhó cuu-ndo cue déhe ducuⁿ-í, ndihí cue déhe yoco-í,

duha càháⁿ yúhú Yáá ío càhnu cuu. Duha càchí-gá núu tütú-gá.

7

¹ Te sá dúcáⁿ ío váha càháⁿ Yá Ndiòxí sá cùu-xí-ó núu xíáⁿ càháⁿ-í dóho nchòhó ñáiyu ío cùu iní-í sá dùuⁿ duuⁿ ãña-o nchaa sá cuèhé sá dùhá, chi nchaa xíáⁿ ñá túú cùu-xi sá vāha sá cùu-xí iní-ó ndihí yiqui cuñú-ó, te cada-o nàcuáa taú-xi cunduu nàcuáa cundáá-ó núu Yá Ndiòxí, te cada-o sá néhé-ó sá yíñúhu núu-gá.

Cue ñáiyu ñúú Còrintú quidé vāha-yu

² Te ni yùhu ni iní-ndó chì cùu iní ñàhá xii-ndí, chi nchúhú vá yóo ìⁿ quide úhú iní-ndí, te ni vā yóo ìⁿ dàcuíta nihnu-ndí, te

ni vǎ yǎo ɨⁿ dāndahú-ndí. ³ Te sá dúhá cáháⁿ-í te vǎ cání iní-ndó sǎ ɨⁿ cuéchi dācaá-í díqui-ndó, chi dǎtná sa ní cachí-í xii-ndo sǎ yǔhú ío cùu iní ñáhà-í xii-ndo, te cuéi vitna ndècu-gá-ó ñùyíú-a àdi cuéi na cùú-ó dico diu-ni ducaⁿ cùu iní ñáhà-í xii-ndo. ⁴ Te yǔhú ío váha sàni iní-í cuendá-ndó, te ducaⁿ ío váha cáháⁿ-í cuendá-ndó, te ío ndècu ndìhi-í tnúhu ndee iní cuendá-ndó, te ío cùdíí iní-í sǎ cuendá-ndó cuéi nándi ndòho-í ndìhi dava-gá-güedé ndécú-ndí.

⁵ Te nchúhú cǔtnàhá ní sáháⁿ-ndí distritú Macèdoniá, te ñá túú tnàhí ní ndètátú-ndí cuendá nchaa sǎ ní yáhandi chi ío ní ndoho-ndí cuendá nchaa sǎ ní quidé-yu, chi ío ní cuándéé ñáhà-yu xii-ndí, te ío ní sani iní-ndí nùu nása-gá yáha-ndí ní cùu. ⁶ Dico Yá Ndiòxí ní taxi-gá tnúhu ndee iní xii-ndí òré ní quexìo té Titú núú ndécú-ndí, te diu-ni Yaá-áⁿ cùú-gǎ Yaá sǎñaha-gǎ tnúhu ndee iní xii cue ñáyüu ndìhú iní-xi. ⁷ Te ducaⁿ ní taxi Yá Ndiòxí tnúhu ndee iní xii-ndí cuendá sǎ ní quexìo té Titú núú ndécú-ndí, te ñá díú-ní sǎ cuendá ní quexìo-dé chi ní níhí tucu-ndí tnúhu ndee iní cuendá ní caní-dé cuendú núú-ndí sǎ nchòhó ní sǎñaha-ndo tnúhu ndee iní xii-dé, te ní cachí tnúhu-dé xii-ndí sǎ nchòhó ío cuíní-ndó cáháⁿ ndìhi ñaha-ndo xii-ndí, te ní cachí tnúhu tucu-dé xii-ndí sǎ nchòhó ío ndìhú iní-ndó cuendá nàcuáa cùu ndecu-ndo ni cuu, ndìhi cuendá sǎ ío sàni iní-ndó cuendá-í, te sǎ dúcáⁿ ndùu cuendú ní caní-dé núú-ndí nùu xǎⁿ ío ní cudíí iní-í.

⁸ Te nchòhó ní ndìhú iní-ndó cuendá tnúhu cáháⁿ-í núú tutú sǎ ní dáquixi-í ndaha-ndo, te òré ní níhí-í tnúhu sǎ ndìhú iní-ndó te tṇaa-ni ní ndixi cuéchi iní-í sǎ dúcáⁿ ní quide-í te dǎtnúni ñá túú-gǎ ní ndixi cuéchi iní-í. ⁹ Te vitna ní ndìhú iní-ndó, te xǎⁿ ní quide-xi ní ndixi cuéchi iní-ndó sǎ ñá túú quide váha-ndo

ndècu-ndo ni cuu, te ní cudíí iní-í dico ñá díú cuendá sǎ ní ndìhú iní-ndó ní cudíí iní-í chi cuendá sǎ ní ndixi cuéchi iní-ndó, te ní ndìhú iní-ndó nàcuáa ní cuu váha iní Yá Ndiòxí, te xǎⁿ nùu ní cuu-xi ɨⁿ sǎ váha sǎ cùú-xí-ndó cuendá tnúhu ní cáháⁿ-í te ñá túú ní cùu-xi ɨⁿ sǎ cuéhé sǎ cùú-xi-ndó. ¹⁰ Te nchoo nùu na ndìhú iní-ó nàcuáa cuu váha iní Yá Ndiòxí, te ndixi cuéchi iní-ó te nùu ñá túú quide váha-o ndècu-o, te sǎ dúcáⁿ quide-o te nàníhí tàhú-ó, te vá ndìhú iní-ó sǎ dúcáⁿ ní quide-o, te dava ñáyüu xǎndecu ichi cuéhé ichi duha ndìhú iní-yu dico ñá túú ndixi cuéchi iní-yu cuendá nchaa sǎ ñá túú váha quidé-yu, te sǎ dúcáⁿ quidé-yu te cuíta nihnú-yu. ¹¹ Te sǎ dúcáⁿ ní ndìhú iní-ndó nàcuáa ní cuu váha iní Yá Ndiòxí, te xǎⁿ nùu ndècu ndee-ndo quide-ndo nchaa nacuáa tàú-xi cunduu, te vitna ní yǔhu ní iní-ndó cáháⁿ-ndó sǎ quidé váha-ndo, te ío cùdèéⁿ-ndó nùú méé-ndó sǎ ñá túú quide váha-ndo ndècu-ndo ni cuu, te yǔhú-ndó ndècu-ndo cuendá sǎ ñá túú quide váha-ndo ni cùu, te ío ní xúhuⁿ iní ñáhà-ndó xii-í, te ní ndúcú ndéé-ndó ní quide ndáá-ndó cuendá téé ndècuéchi ndècu ndìhi-ndo, te sǎ dúcáⁿ ní quide-ndo te xǎⁿ ní cutnùni sǎ méé-ndó ñá túú cuéchi-ndo. ¹² Te ní cadúha-í tutú ní dáquixi-í ndaha-ndo, te ní quide-ndo nàcuáa ní cáháⁿ-í, te sǎ dúcáⁿ ní quide-ndo xǎⁿ ní cutnùni iní-ndó sǎ ío cùu iní ñáhà-ndó xii-í. Te Yá Ndiòxí náhá-gǎ sǎ díú cuendá xǎⁿ ní dáquixi-í tutú ndaha-ndo, te ñá díú-ní cuendá sǎ sání iní-í cuendá téé ndècuéchi ndècu ndìhi-ndo, te ní ñá díú-ní cuendá ñáyüu ní dándìhú téé ndècuéchi-áⁿ iní-xi ní càdúha-í tutú ní dáquixi-í ndaha-ndo. ¹³ Te cuendá sǎ quidé váha-ndo ndècu-ndo xǎⁿ cùú-xí tnúhu ndee iní ndécú ndìhi-ndí.

Dico ñá díú-ní xǎⁿ chi tnàhá ío cùdíí iní-ndí cuendá sǎ ío cùdíí

iní té Titú, te ducaⁿ cùdíí iní-dé chi nchòhó ní sãñaha-ndo tnúhu ndee iní xii-dé. ¹⁴ Te yúhú ñá túú cùcahaⁿ núú-í sá nì cáháⁿ váha-í cuendá-ndó núú tẽ Titú cùtnáhá vátá quíxí-gã-dé núú ndécú-ndó, chi ní cutnùní iní-dé sá ndáá càháⁿ váha-í nàcuáa quide-ndo datná cúú-xí sã ndáá nchaa tnúhu dàcuaha ñaha-í xii-ndo. ¹⁵ Te vitna ío-gã váha cùu iní té Titú cuendá-ndó, chi ndàcu iní-dé sá ncháá-ndó ío váha ní tnú-ndo nchaa tnúhu ní cáháⁿ-dẽ núú-ndó, te ndàcu tucu iní-dé sá nì queheⁿ cuendá váha-ndo-dẽ, te ní dátũ-ndo núú-dẽ sá ío ní quiyùhú iní-ndó sã vã ndácú-ndó càda-ndo nchaa nacuáa tàú-xi cunduu. ¹⁶ Te ío cùdíí iní-í cuendá-ndó chi cùtnuní ndáá iní-í sá ñá túú dàña ndeé-ndó quide-ndo nchaa nacuáa tàú-xi cunduu.

8

Ío váha cuu iní-ó chindee tnaha-o

¹ Te nchòhó ñáyíu ndècu ndihí-ndí ichi Xítohó Jesucristú càchí tnúhu-ndí xii-ndo nàcuáa quide ñaha Yá Ndiõxí xii cue ñáyíu xĩndecu ichi-gã ndécú dìstrítú Macèdoniá, chi ío chindee ñaha-gã xii-yu cuendá sá quidé váha-yu ndécú-yu. ² Te cuéi ndòho vihí-yu ndécú-yu dico ío-ni cùdíí iní-yu, te cuendá xíãⁿ núu nì yùhu nì iní-yu ní sacáⁿ tnáhã-yu díhúⁿ sã cúú-xí tnàha ñáyíu-yu, te ñá túú tnàhí nì xĩnduu díi-yu cuéi ío ndàhú-yu. ³ Te ñá díú-ní nàcuáa ní sani iní-yu ndacú-yu cacáⁿ tnáhã-yu, chi ní quide yica iní-yu ní sacáⁿ tnáhã-gã-yu, te yúhú càchí tnúhu ndáá-í xii-ndo sã nì yuhu nì iní-yu ducaⁿ nì quidé-yu. ⁴ Te ío ní cáháⁿ ndàhú-yu núú-ndí cuendá sá cuãha-ndí tnúhu sã tnáhã-yu chindeé-yu dava-gã cue ñáyíu cùu cuendá Yá Ndiõxí. ⁵ Te ñá díú-ní nàcuáa ní sani iní-ndí ní quidé-yu, chi ní xídó-gã-yu ní quide váha-yu, te ducaⁿ chi mée-yu ní sani iní-yu sã cádá-yu nchaa

nàcuáa cuení Yá Ndiõxí, te dãtnùní ducaⁿ te ní cachí-yu sá cúú càdá-yu nchaa nàcuáa na cũñaha-ndí xii-yu. Te ducaⁿ nì quidé-yu chi ducaⁿ nì cuení mée Yá Ndiõxí cunduu. ⁶ Te sá dúcáⁿ nì quide ñáyíu-áⁿ núu xíãⁿ càháⁿ ndàhú-ndí núú tẽ Titú sá quíxí tucu-dé núú ndécú-ndó cuendá dàxínu cava-dé chiúⁿ sá sã ní nguíta-dé quidé-dẽ dátacá-dé díhúⁿ sã sã ní nguíta-ndo sacáⁿ tnáhã-ndó, te ducaⁿ quide-ndo chi cundahú iní-ndó tnàha ñáyíu-ndo. ⁷ Te nchòhó cúú-ndó ñáyíu ío ngòdónúú quide nchaa sã váha, te ío váha sàndáá iní-ndó Xítohó Jesucristú, te ío váha cùtnuní iní-ndó nàcuáa càháⁿ tnúhu-gã, te ío váha dàcuaha-ndo ñáyíu tnúhu-gã, te ío ndùcu ndee-ndo quide-ndo mee-ni sã váha, te ducaⁿ ío cùu iní ñáhã-ndó xii-ndí, te sá dúcáⁿ quide-ndo núu xíãⁿ càháⁿ ndàhú-í núú-ndó sã ngòdó núú-gã-ndó càda-ndo sã cúú-xí tnàha ñáyíu-ndo.

⁸ Dico yúhú ñá túú tàuchiuⁿ-í sá dúcáⁿ càda-ndo, chi cuendá-ni sã càchí tnúhu-í xii-ndo nàcuáa quide dava-gã cue ñáyíu ndècu ichi Xítohó Jesucristú, chi cue ñáyíu-áⁿ nì yùhu nì iní-yu quidé-yu sã váha sã cúú-xí tnàha ñáyíu-yu, te càchí tnúhu-í xii-ndo nàcuáa quide-yu cuendá cutnùní núu nãsa càda-ndo núu ndisa sã cúú iní-ndó cuè tnaha ñáyíu-ndo. ⁹ Te nchòhó sa xini-ndó sã Xítohó Jesucristú ío cundahú iní ñáhã-gã xii-o, te ío váha ndècu-gã ní cùu te ní quixi-gã ñuyíu-a ní quide váha ñaha-gã xii-o, te ñuyíu-a ñá túú ní xĩndecu váha-gã, te ducaⁿ nì quixi-gã ñuyíu-a cuéi ñá túú ní xĩndecu váha-gã cuendá sã nchóó ngũndecu váha-o núú ndécú-gã.

¹⁰ Te na càchí tnúhu-í xii-ndo nàcuáa sàni iní-í. Chiúⁿ sã nì yuhu nì iní-ndó nì nguíta-ndo quide-ndo cuíá nì yáha chi cùu-xi sã váha sã cúú-xí-ndó núu na dàxínu cava-ndo. ¹¹ Te dàtná-ni nì yuhu nì iní-ndó nì tausaha-ndo chiúⁿ-áⁿ te ducaⁿ-ni nì yuhu nì

iní-ndó dàxínu cava-ndo, te cacáⁿ tnáhá-ndó sá ndécú ndíhi-ndo nacuaá xito mee-ndo ndacu-ndo. ¹² Te núu nchòhó ní yùhu ní iní-ndó cacáⁿ tnáhá-ndó sá xító mée-ndo ndacu-ndo ña, te cùu váha iní Yá Ndiòxí, chi mee-gá sa nàha-gá nása ndècu-o te ndùu vétú-ni iní-gá.

¹³ Te sá dúhá ndùu tnúhu càháⁿ-í te vá cání iní-ndó sá yùhú cuíní-í sá nchòhó ndoho-ndo cùndecu-ndo te dava-gá-yu ngùndecu váha-yu sá cuèndá-ndó. ¹⁴ Te vitna ndècu ndee iní-ndó nàcuáa ndacu-ndo chindee-ndo cue ñáyiú xini ñuhu, te nduu ñà túú ndècu ndee iní-ndó te cue ñáyiú-áⁿ chindee ñáhá-yu xii-ndo te núu ndècu ndee iní-yu, te ducaⁿ te ní nchòhó ñà túú nà cumání xii-ndo te ní cuè ñáyiú-áⁿ ñà túú nà cumání xií-yu. ¹⁵ Te ducaⁿ te quee ndáá-xi nàcuáa càháⁿ-xi núú tütú Yá Ndiòxí núú cächí-xi: “Cue ñáyiú ío vèi sá ní níhí ñà túú ní cùu sobrá xii-yu, te cue ñáyiú sacú ní níhí ñà túú ní cumání xií-yu”, duha cächí-xi núú tütú-gá.

Té Titú ndíhi cue té cùndíhi-dé

¹⁶ Te ndàcáⁿ tãhú-í núú Yá Ndiòxí chi mee-gá ní quide sá tè Titú ío ñuhu iní ñáhá-dé xii-ndo dàtná ñùhú iní ñáhá-í xii-ndo. ¹⁷ Te yùhú ní xáhaⁿ-í xii-dé sá quixí còto ñaha-dé xii-ndo te ní sáha-dé tnúhu, te ñà díú mée-ni sá dúcáⁿ ní xáhaⁿ-í xii-dé quixi coto ñaha-dé xii-ndo, chi mee-dé cúdíí tnàhí iní-dé quixi coto ñaha-dé xii-ndo.

¹⁸ Te tendaha-ndí ìⁿ té ndècu ndíhi-o ichi Xítóhó Jesucristú quixi-dé ndíhi té Titú, te té quixi ndíhi té Titú-áⁿ cúu-dé ìⁿ té ío váha càháⁿ cue ñáyiú xíndecu ichi Xítóhó Jesucristú cuèndá-dé cuèndá sá ío váha quide-dé chiúⁿ Xítóhó Jesucristú càháⁿ-dé tnúhu-gá tnúhu sá càháⁿ nàcuáa naníhí tãhú-ó. ¹⁹ Te cue ñáyiú xíndecu ichi Xítóhó Jesucristú ñà díú-ní sá càháⁿ váha-yu cuèndá-dé, chi tnáhá ní cáxi ñáhá-yu xii-dé cuèndá sá cacá cùu ndíhi ñaha-dé xii-ndí chindee ñaha-dé tacá sá cúu-xí ñáyiú ndàhú,

te quide-ndí chiúⁿ-a cuendá ío cuu càhnu Yá Ndiòxí, te cue ñáyiú cutnùní iní-yu sá nchòhó ní yùhu ní iní-ndó quide-ndo nchaa sá váha sá cúu-xí cuè tnaha ñáyiú-ndo.

²⁰ Te cuíní-ndí sá vã càháⁿ cuèhé ñáyiú cuèndá nàcuáa quide-ndí ndíhi sá ngäutnàha sá cúu-xí cuè tnaha ñáyiú-o, te ío vèi cuu-xi.

²¹ Chi ndècu ndee-ndí quidé-ndí nàcuáa càháⁿ váha Xítóhó Jesucristú cuèndá-ndí, te quide tucu-ndí nàcuáa càháⁿ váha ñáyiú sá quidé vãha-ndí.

²² Te tendaha tucu-ndí ingá tucu té ndècu ndíhi-o ichi Xítóhó Jesucristú quixi-dé ndíhi cue té uú quixi coto ñaha xii-ndo, te té quixi ndíhi-güedé-áⁿ ní cuu vèi xito quide-dé nàcuáa cutnùní iní-ndí sá ío ndècu ndee-dé quidé-dé sá váha, te vitna ío-gá cuíní-dé cada-dé sá váha vitna quixi-dé núú ndécú-ndó, chi cùtnuní ndáa iní-dé sá cúu-ndó cuè ñáyiú quide váha. ²³ Te cächí tnúhu-í xii-ndo sá tè Titú cúu-dé ìⁿ té cùndíhi-í quidé-ndí chiúⁿ Xítóhó Jesucristú, te tnáhá-dé cúu-dé ìⁿ té xínu cuechi núú-ndó càháⁿ-dé tnúhu-gá. Te cächí tnúhu tucu-í xii-ndo cuèndá cue té uú quixi ndíhi-dé, chi cue té-áⁿ cúu-güedé cue té tendaha cuè ñáyiú xíndecu ichi Xítóhó Jesucristú quixi coto ñaha xii-ndo. Te cue té-áⁿ quidé-güedé nàcuáa cachí ñáyiú sá ío càhnu cuu Xítóhó Jesucristú. ²⁴ Te chí cadá sá cúu iní ndisa-ndo-güedé cuèndá ducaⁿ na cùtnuní iní nchaa dava-gá ñáyiú xíndecu ichi Xítóhó Jesucristú sá ndáa ndisa ducaⁿ quide-ndo, te ducaⁿ cùtnuní iní-yu sá ndáa ndisa quide váha-ndo dàtná càháⁿ-ndí cuèndá-ndó sá quidé vãha-ndo.

9

Cuèndá sá ngäutnàha sá cúu-xí cuè ñáyiú xíndecu ichi Xítóhó Jesucristú

1 Te cuendá sá ngäutnáha sá cúú-xí cuè ñáyiú ndècu ichi Xítohó Jesucristú ñá túú-gã xíní ñùhu-xi cachí tnúhu-í xii-ndo núú tütú-a nàcuáa cada-ndo, 2 chi sa cùtnuní iní-í sá ío cuiní-ndó chindee-ndó-yu. Te ducaⁿ-ni ío váha càháⁿ-í cuendá-ndó núú ñáyiú xíndecu ichi Xítohó Jesucristú ndécú dístítú Macèdoniá, te xáhaⁿ-í xii-yu sá nchòhó ñáyiú xíndecu ichi Xítohó Jesucristú ndécú dístítú Acáyá sa ní cuu ñⁿ cuíá ducaⁿ cuiní-ndó càcáⁿ tnáhá-ndó sá cúú-xí cuè ñáyiú ndàhú ndécú ichi-gã. Te vai cue ñáyiú dístítú Macèdoniá cuiní-yu cacáⁿ tnáhá-yu sá cúú-xí cuè ñáyiú ndàhú ndécú ichi Xítohó Jesucristú cuendá sá ñí ñíhi-yu tnúhu sá nchòhó ío cuiní-ndó dùcaⁿ cada-ndo. 3 Te cuendá sá sání iní-ndó càda-ndo xiáⁿ tendaha-í cue téé ndècu ndíhi-o ichi Xítohó Jesucristú quixi-güedé núú ndécú-ndó cuendá dàtúha ñaha-güedé xii-ndo, cuendá sá vã quée ndèhnde-í núú ñáyiú sá ñí càháⁿ váha-í cuendá-ndó, te ducaⁿ cùndecu túha ndisa-ndo dàtná sa ní càháⁿ-í núú-yu. 4 Chi na cuáháⁿ ndèé quixi-í ndíhi ñⁿ úú cue ñáyiú dístítú Macèdoniá núú ndécú-ndó te quiní-yu sá ñà túú ndècu túha-ndo, te cucahaⁿ núú-í núú-yu sá ñí càháⁿ váha-í cuendá-ndó te núú ñà túú ndècu túha-ndo, te tnáhá-ndó cùcahaⁿ núú-ndó. 5 Te xiáⁿ núú ní sani iní-í sá váha-gã codonuu cue téé ndècu ndíhi-o ichi Xítohó Jesucristú quixi coto ñaha-güedé xii-ndo cuendá chindee ñaha-güedé tacá sá ñí sani iní-ndó càcáⁿ tnáhá-ndó cuendá sá cùndècu túha-xi, te cuu-xi dàtná ñⁿ táhú sá ñí quene cuu iní méé-ndó càcáⁿ tnáhá-ndó sá cúú-xí cuè tnaha ñáyiú-ndo. Te ducaⁿ te vã yõ cani iní-xi quesàhá-yu sá nchùhú ní quide yica-ndí ducaⁿ ñí sacáⁿ tnáhá-ndó.

6 Te nchòhó sa xíní-ndó sá ñáyiú na chìhi vai tatá te vai ñíhi-yu cùu, te cue ñáyiú na chìhi sacú tatá te

sacú ñíhi-yu cùu. Ducaⁿ sãtnahá-xi cùu ñáyiú sacáⁿ tnáhá sá cúú-xí tnàha ñáyiú-yu. 7 Te ñⁿ ñⁿ-ndo càcáⁿ tnáhá-ndó nàcuáa quene cuu iní méé-ndó, te ío váha cuu iní-ndó dùcaⁿ cada-ndo te vã cadá-ndó cuendá-ni sá quidé yica ñaha ñáyiú xii-ndo, chi Yá Ndiõxí cúú váha iní-gã núú nchàa ñáyiú cùdí iní sacáⁿ tnáhá sá cúú-xí cuè tnaha ñáyiú-xi. 8 Te Yá Ndiõxí ndacu-gã chindee ñaha-gã xii-ndo nàcuáa cundecu váha-ndo, chi diu-gã cada te ñíhi-ndó nchàa núú sá xíní ñùhu-ndo cundecu ndíhi-ndo, te ñà túú tnàhi-gã ná cumání xii-ndo, te mee-gã chindee ñaha-gã xii-ndo ñíhi-ndó ío vai cundecu ndíhi-ndo cuendá ducaⁿ chindee-ndo cue tnaha ñáyiú-ndo. 9 Te núú tütú Yá Ndiõxí càchí-xi ñⁿ xichi:

Ñⁿ ñáyiú ío vai sá ñí sãñàhá-yu xii ñáyiú ndàhú,

te sá ñí quide ñáyiú-áⁿ ñí cuu-xi sá váha sá vã yõ cùnaa.

Duha càchí-xi núú tütú-gã. 10 Te mee Yá Ndiõxí táxi-gã nchaa sá cúú tàtá nchaa nchòhó ñáyiú xítu nãndí sá xítú cuendá cuu sá cúú nchito-ndo, te diu-gã cada te ío vai sá ñíhi-ndó cùndecu ndíhi-ndo, te ducaⁿ ío-gã vai sá váha cada-ndo sá cúú-xí cuè tnaha ñáyiú-ndo. 11 Te Yá Ndiõxí taxi-gã vai núú sá cùndècu ndíhi-ndo cuendá ducaⁿ ñí yuhu ñí iní-ndó vai cuáñaha-ndo sá cúú-xí tnàha ñáyiú-ndo. Te cuendá nchaa sá sacáⁿ tnáhá-ndó quèheⁿ cuendá-ndí cuu xii tnàha ñáyiú-ndo, te cue ñáyiú-áⁿ ío ndacáⁿ táhú-yu núú Yá Ndiõxí cuendá sá dúcáⁿ sacáⁿ tnáhá-ndó sá cúú-xí-yu. 12 Te sá dúcáⁿ quide-ndo sacáⁿ tnáhá-ndó sá cúú-xí cuè ñáyiú cùu cuendá Yá Ndiõxí, te ñáyiú-áⁿ ñà túú-gã ná cumání xii-yu, te ío ndacáⁿ táhú-yu núú Yá Ndiõxí sá dúcáⁿ quide-ndo. 13 Te ñáyiú-áⁿ cutnùní iní-yu sá nchòhó quidé-ndó sá sãndáá ndisa iní-ndó tnúhu Xítohó Jesucristú, te cuendá xiáⁿ te ñáyiú-áⁿ

chiñuhú-yu Yá Ndiöxí, te cuendá sá dúcáⁿ nì yuhu nì iní-ndó sácáⁿ tnáhá-ndó sá cúu-xí-yu ndihí sá cúu-xí ncháa dava-gá ñáyiú, te cachi-yu sá ïo cãhnu cuu Yá Ndiöxí. ¹⁴ Te ñáyiú-áⁿ cãháⁿ ndihí-yu Yá Ndiöxí cuendá-ndó, te ïo cuu váha iní ñáhá-yu xii-ndo cuendá sá Yá Ndiöxí chindèe ñaha-gá xii-ndo quide-ndo sá váha sá cúu-xí-yu ndihí dava-gá ñáyiú. ¹⁵ Te ïo ndácáⁿ táhú-ó núú Yá Ndiöxí cuendá sá nì taxi-gá sá ïo váha ndècu ndihí-o, te ni ñá cùnùnì iní-ó nãsa cunduu tnúhu cãháⁿ-ó cuendá sá váha ní taxi-gá.

10

Té Pãblú ndécú ndihí-dé tnúhu ndee iní sá cãháⁿ-dé tnúhu Xítohó Jesucristú

¹ Te Xítohó Jesucristú ïo cãhnu iní-gá, te cundahú iní ñáhá-gá xii-o chindèe ñaha-gá, núu xiãⁿ yúhú té Pãblú ducaⁿ quide-í cãháⁿ ndàhú-í núú-ndó nãcuáa cada-ndo. Te dava-ndo cãchí-ndó sá yúhú ïo ndàhú iní-í òré ndécú ndihí ñaha-í xii-ndo, te òré ñá túú ndècu ndihí ñaha-í xii-ndo te ïo ñã cáa-í. ² Te cãháⁿ ndàhú-í núú-ndó sá cáda-ndó nãcuáa vá cãháⁿ ñã-í núú-ndó òré quixí-í quixí coto ñaha-í xii-ndo. Te cuiní-í sá ndihí tnúhu ñã iní-xi cãháⁿ ndihí-í cue ñáyiú cãchí sá ñã-ni cuu-í ndihí cue ñáyiú ñá túú sãndáa iní tnúhu Xítohó Jesucristú. ³ Te nchúhú cùu-ndí cue tée ñuyú-a, dico ndècu ndee-ndí quidé-ndí nãcuáa ndàcu-ndí dáquèe tíhú-ndí nchaa sá cuèhé sá dúhá, dico ñá díú mèe-ndí ducaⁿ ndàcu-ndí quidé-ndí, ⁴ te ni ñã sá ïo ñuyú-a ñá túú chindèe ñaha-xi, chi mee Yá Ndiöxí chindèe ñaha-gá xii-ndí dáquèe tíhú duuⁿ-ndí nchaa núú sá cuèhé sá dúhá. ⁵ Te xiãⁿ núu nihí-ndí tnúhu cãháⁿ-ndí sadí-ndí yuhu cue ñáyiú cãháⁿ tnúhu sá ñã túú cùu váha iní Yá Ndiöxí, ñáyiú xiquide nínu mee-xi cãchí sá ñã

túú nãndíhi tnúhu-gá. Te quide-ndí sá ñáyiú-áⁿ quindáa iní-yu tnúhu Xítohó Jesucristú. ⁶ Te nchúhú sa ndècu túha-ndí sá dáquèetíhú-ndí cue ñáyiú ñá túú cuiní cada nãcuáa cuiní Xítohó Jesucristú, dico díhna-gá xíní ñùhu-xi sá ncháa nchòhó ñáyiú cuiní cada nãcuáa cuiní-gá cundáa-ndó.

⁷ Te nchòhó nãcuáa ndùu sá ndéhé-ndó te ducaⁿ sãni iní-ndó, dico vá dúcáⁿ cãni iní-ndó cuendá-ndí. Chi núu cùnùnì ndáa iní-ndó sá cúu-ndó cuendá Xítohó Jesucristú, te ñu-ni ducaⁿ táu-ndó cãni iní-ndó cuendá-ndí tucu. ⁸ Te Xítohó Jesucristú ní taxi-gá tnúhu ndee iní ndécú ndihí-ndí sá dánèhé ñáhá-ndí xii-ndo nãcuáa cuita cuehnu nihnu-ndo ìchi-gá quíhíⁿ, te ñá díú sá dánèhé ñáhá-ndí xii-ndo nãcuáa cuita nihnu-ndo, te cuèi na chido-gá-í cãháⁿ-í cada nínu-í mèe-í cuendá tnúhu ndee iní ní taxi Xítohó Jesucristú ndécú ndihí-ndí, dico vá cãcuáa núu-í chi cãháⁿ ndáa-í. ⁹ Te ñá túú cuiní-í sá nchòhó caní iní-ndó sá yúhú dáyùhú ñáhá-í xii-ndo nãcuáa ndùu tnúhu cãháⁿ-í núú tütú-í. ¹⁰ Te dava-ndo cãchí-ndó sá ténã ñáhá-í xii-ndo núú tütú-í, te mee-ni tnúhu cãhnu sá ïo cùnnu cuu-xi, te cãchí tucu-ndo sá òré ndécú ndihí ñaha-í xii-ndo te ñá túú cáa-í sá cúu-í ñã tée cùu váha cùu dico iní-ndó, te cãchí tucu-ndo sá ñã túú tnáhá iní-ndó nãcuáa quide-í òré dácuáa ñaha-í xii-ndo. ¹¹ Te nchòhó ñáyiú ducaⁿ cãháⁿ cada cuendá váha-ndo sá dàtná-ni cãháⁿ-ndí núú tütú-ndí ñu-ni ducaⁿ quide-ndí òré ndécú ndihí ñaha-ndí xii-ndo.

¹² Te nchúhú, vá cúu tnàhí cãháⁿ-ndí sá ñã-ni cuu-ndí ndihí cue ñáyiú cãháⁿ váha cuendá mèe-xi, chi ñáyiú-áⁿ sãni iní-yu ná cúu sá váha te quidé-yu te xiãⁿ cãchí-yu sá ïo váha quidé-yu, te cãchí-yu sá quidé váha-gá-yu dàcúxí tnàha ñáyiú-yu, te sá dúcáⁿ cãháⁿ-yu te quidé-yu dàtná quidé cuè ñáyiú ñá túú tnàhí

cùtnuní iní-xi. ¹³ Te dico nchúhú ñá túú xidó-ndí cáháⁿ váha-ndí cuendá-ndí, chí cáháⁿ váha-ndí cuendá-ndí dico nàcuáa ndùu chiuⁿ ní taxi Yá Ndióxi cáháⁿ-ndí, chí mee-gã ní cachí-gá ndéé není sáá-ndí cáháⁿ-ndí tnúhu-gá, te ní sáá-ndí ndéé ñuú-ndó cáháⁿ-ndí tnúhu-gá. ¹⁴ Te vitna ndècu ndihí-ndí tnúhu ndee iní sá tnàhá nchòhó cuu cáháⁿ ndihí ñaha-ndí xii-ndo, chí díhna-gá nchúhú ní quixi-ndí ní cáháⁿ-ndí tnúhu Xítohó Jesucristú ñuú-ndó, tnúhu sá cáháⁿ nàcuáa naníhí tãhú-ó. ¹⁵ Te nchúhú ñá túú quide cahnu-ndí méé-ndí cuendá chiuⁿ quide dava-gá-güedé quesaha-ndí sá chíúⁿ mée-ndí cúú-xí. Te cuiní-ndí sá nchòhó cuita quindáa-gá iní-ndó Xítohó Jesucristú, te ducaⁿ te níhí-gã-ndí nàcuáa cada-ndí chiuⁿ-gá nchaa dava-gá xichi núú ní cachí-gá cada-ndí chiuⁿ-gá. ¹⁶ Chí cáháⁿ-ndí tnúhu-gá tnúhu sá cáháⁿ nàcuáa naníhí tãhú-ó, te yáha-gá-ndí ñuú-ndó quíhí-ndí nchaa dava-gá xichi cáháⁿ-ndí, te vá cádá càhnu-ndí méé-ndí cuendá chiuⁿ sá sá ní quide dava-gá-güedé.

¹⁷ Te cue ñáyiú cuiní cada càhnu mee-xi te vá dúcáⁿ cadá-yu, chí mee Xítohó Jesucristú ná cada cahnú-yu-gá. ¹⁸ Te nchaa ñáyiú na cáháⁿ váha Xítohó Jesucristú cuendá-yu, ñáyiú-áⁿ cúdiú-yu núú-gã, te ñá túú cúdiú-yu núú-gã cuendá sá cáháⁿ váha-yu cuendá méé-yu.

11

Cuendá té Pãblú ndihí cuendá cue téé cachí sá cáháⁿ tnúhu Yá Ndióxi te ñá ndáá

¹ Te cuiní-í sá nchòhó cada ndee iní-ndó cundedóho-ndo tnúhu na cáháⁿ-í, chí cáháⁿ-í dàtná cáháⁿ cue ñáyiú ñá túú cùtnuní iní-xi, te cuéi nása-gá ná cùnduu tnúhu cáháⁿ-í dico chí cádá ndéé iní

cundedóho-ndo. ² Chí yúhú ío ñùhu iní ñáhà-í xii-ndo dàtná ñùhú iní ñáhà mée Yá Ndióxi xii-o, te ní cáháⁿ-í tnúhu Xítohó Jesucristú núú-ndó ñuu xiáⁿ ní tnahá tnúhu-ndo ndihí-gá vitna, te sá dúcáⁿ ní quide-í te cada iní-ndó sá yúhú cúú-í dàtná ñⁿ téé xica ndáhú te nchòhó cúú-ndó dàtná ñⁿ xíchí cuéchí, te Xítohó Jesucristú cúú-gá dàtná ñⁿ téé nándaha ndihí xíchí cuéchí-ãⁿ. Te ducaⁿ cada iní-ndó chí na sáá nduu te yúhú na càni cuendá ñáhà-í xii-ndo núú Xítohó Jesucristú, te cuu-ndo ñáyiú vá cùndècu tnahí-gá cuéchi-xi. ³ Te yúhú-í sá sàculháⁿ dandàhú ñáhà-xí xii-ndo vá cání-gã iní-ndó càncicúⁿ nihnu-ndo ní yuhu ní iní-ndó íchi Xítohó Jesucristú dàtná nchicúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chí sàculháⁿ ní nduu-xi cóó ní dandàhú ñáhà-xí xii-xi, chí sàculháⁿ-ãⁿ ío váha ní xito-xi nàcuáa ní quide-xi ní dandàhú-xi tá Èvá-áⁿ. ⁴ Te nchòhó, quidé ndéé iní-ndó sàcundedóho-ndo nchaa tnúhu cáháⁿ cue téé cáháⁿ ingá núú tnúhu cuendá Jesús tnúhu sá ñá túú dānehé ñáhà-ndí xii-ndo, te quide ndee tucu iní-ndó ndedóho-ndo dānehé ñáhà-güedé xii-ndo cuendá ingá espíritú, te ñá díú cuendá Espíritú Yá Ndióxi sá ní ngúndecu ndihí-ndo dānehé ñáhà-güedé xii-ndo, te quide ndee tucu iní-ndó ndedóho-ndo dānehé ñáhà-güedé xii-ndo ingá núú tnúhu sá càchí-güedé cáháⁿ nàcuáa naníhí tãhú-ndó, te ñá díú nàcuáa ndùu tnúhu sá ní sàndáá iní-ndó cuendá naníhí tãhú-ndó cáháⁿ-güedé. ⁵ Te cue téé ducaⁿ cáháⁿ-áⁿ càchí-güedé sá Yá Ndióxi ní tendaha ñaha-gá xii-güedé xicá cùu-güedé cáháⁿ-güedé tnúhu-gá te ío cùnuu-güedé, dico ñá ndáá sá cáháⁿ-güedé tnúhu-gá. Te yúhú cùtnuní iní-í sá cué téé-ãⁿ ñá túú cùnuu-güedé dàtná cùnuu yúhú. ⁶ Te cuéi ñá túú cáháⁿ-í dàtná cáháⁿ

cue tée ío váha sàà díquí-xi dico ío váha cùtnuní iní-í cuèndá nchaa sá dácuaáha-í, te yúhú sa quide-í nàcuáa cutnùní iní-ndó sá ío váha cùtnuní iní-í nàcuáa ndùu nchaa tnúhu càháⁿ-í.

⁷ Te cudana te sàni iní-ndó sá yúhú ñá túú ní quide váha-í sá ní quide-í mée-í dàtná ìⁿ tée ío ndáhú iní-xi, chi ñá túú ní xicáⁿ-í yáhu-í núú-ndó cuèndá sá ní cáháⁿ-í tnúhu Yá Ndiòxí tnúhu sá càháⁿ nàcuáa naníhí tãhú-ó núú-ndó. ⁸ Te ní queheⁿ-í díhúⁿ ní taxi dava-gá cue ñáyiú ndècu ichi Xítohó Jesucristú, te díhúⁿ-ãⁿ ní dándóñúhu-í ní saaⁿ-í nchaa sá ní xini ñúhu-í cùtnàhá ní cáháⁿ-í tnúhu Xítohó Jesucristú núú-ndó.

⁹ Te cùtnàhá ní xíndecu ndíhi ñaha-í xii-ndo te áma ní xóo cumání sá xini ñúhu-í, te ñá túú ná ní xicáⁿ-í núú ní ìⁿ-ndo. Chi cue ñáyiú xíndecu ichi Xítohó Jesucristú ndécú dístítú Macèdoniá ní quixí-yu ní taxi-yu sá cumání xii-í, te ñá túú tnàhí ní dásatú iní ñàhá-í xii-ndo cãcãⁿ-í núú-ndó núu ná cúú sá xini ñúhu-í, te ñu-ni ducaⁿ càda-í. ¹⁰ Te ñu-ni duha càháⁿ váha-í cuèndá-í te ní ìⁿ cue ñáyiú dístítú Acãyá vá ñihí-yu tnúhu cùñàhá-yu xii-í cuèndá cadí-yu yuhu-í. Te mee Xítohó Jesucristú nàhá-gã sá ndàá càháⁿ-í dàtná càháⁿ ndàá mée-gã. ¹¹ Te cudana te sàni iní-ndó sá sá dúhá càháⁿ-í te ñá túú cùu iní ñàhá-í xii-ndo, dico ñàhá chi mee Yá Ndiòxí nàhá-gã sá yúhú ío cùu iní ñàhá-í xii-ndo.

¹² Te nàcuáa-ni ta quide-í véxi te ñu-ni ducaⁿ càda-í cuèndá sá cuè tée cùní cada níu mee-xi càchí sá ìⁿ-ni cuu ndíhi ñaha-güedé xii-í vá ñihí-güedé tnúhu càháⁿ-güedé cachí-güedé sá ìⁿ-ni chiuⁿ quide ndíhi ñaha-güedé xii-í. ¹³ Te cue tée-áⁿ càchí-güedé sá Yá Ndiòxí ní tendaha ñàhá-gã xii-güedé xicá cùu-güedé càháⁿ-güedé tnúhu-gã dico ñá ndàá, chi mee-ni dándahú-güedé ñáyiú ndíhi tnúhu càháⁿ-güedé, te quide-güedé dàtná

quidé cuè tée càháⁿ tnúhu Xítohó Jesucristú dico ñá ndàá sá cúu-güedé cue tée càháⁿ tnúhu-gã. ¹⁴ Te vá cùñúhu-o sá dúcãⁿ quide cue tée-áⁿ, chi mee sàcúihná quidé-xí sá cúu-xí dàtná ìⁿ espíritú xínú cuèchi núú ío váha càa ndecu Yá Ndiòxí dico ñá ndàá sá xínú cuèchi-xí xíãⁿ. ¹⁵ Te xíãⁿ vá cùñúhu-o sá cuè tée xínu cuechi núú-xí quide-güedé sá cúu-güedé cue tée quide váha chi ñá ndàá sá quidé váha-güedé chi dándahú-güedé ñáyiú. Te nàcuáa ndùu nchaa sá quidé-güedé te ducaⁿ nàcháhu-güedé núú Yá Ndiòxí.

Té Pãblú ío ndòho-dé cuèndá sá cúu-dé tée càháⁿ tnúhu Xítohó Jesucristú

¹⁶ Te yúhú càháⁿ tucu-í dóho-ndo sá vá cání iní-ndó sá yúhú cùu-í ìⁿ tée càháⁿ lùcú càháⁿ duha, te núu daya-ndo dúcãⁿ sani iní-ndó dico chí cadá ndèe iní cundèdóho-ndo tnúhu na càháⁿ-í cuèndá ducaⁿ tnàhá-í cada níu-í mée-í. ¹⁷ Te vitna na càháⁿ-í dàtná càháⁿ ìⁿ tée ñá túú cùtnuní iní-xi, chi tnúhu càháⁿ-í ñá túú ìⁿ-ni cuu-xi ndíhi tnúhu Xítohó Jesucristú, chí vitna càháⁿ-í nàcuáa cada níu-í mée-í. ¹⁸ Te ío cuèhé ñáyiú quide níu mee-xi cuèndá nchaa sá ío ñuyú-a te xíãⁿ núu tnàhá-í cùní-í cada níu-í mée-í. ¹⁹ Chi cùtnuní sá nchòhó quidé ndèe iní-ndó sàcúndedóho-ndo nchaa tnúhu càháⁿ cue tée càháⁿ lùcú càháⁿ duha, te ducaⁿ quide ndee iní-ndó sàcúndedóho-ndo tnúhu càháⁿ-güedé chí càchí-ndó sá ío túha-ndo. ²⁰ Te nchòhó, quide ndee iní-ndó tní-ndo nchaa tnúhu càháⁿ cue tée quide yica ñaha xii-ndo sá cùnú cuèchi-ndo núu-güedé, te xicáⁿ-güedé nándí sá xicáⁿ-güedé núú-ndó, te taxi tnuní ñàhá-güedé xii-ndo, te quide-güedé sá ío cùnuu-güedé ndécú ndíhi ñaha-güedé xii-ndo, te càniha-güedé xii-ndo, te cuèí nchaa xíãⁿ quidé ñaha-güedé xii-ndo dico quide ndee-ni iní-ndó. ²¹ Te nchòhó

càhí-ndó sá cúú-ndí cue téé ñá túú ní cùyi cada nándi sá cádá, te ndáá chi ñá túú ñi cuu-ndí ndihi cue téé ducaⁿ xíquide.

Dico núu cue téé-áⁿ cùyi-güedé quidé ñinu-güedé méé-güedé, te tnàhá-í cùyi-í ducaⁿ càda-í. Te sá dúhá càháⁿ-í te càháⁿ-í dàtná ñiⁿ téé ñá túú cùtnuni iní-xi.²² Te núu quide cahnu-güedé méé-güedé cuendá sá càháⁿ-güedé tnúhu hèbreú, te yúhú tucu ñi-ni téé càháⁿ tnúhu hèbreú cùú-í, àdi quide cahnu-güedé méé-güedé cuendá sá cúú-güedé cue téé israhél, te yúhú tucu tnàhá-í cùú-í téé israhél, àdi quide cahnu-güedé méé-güedé cuendá sá cúú-güedé ñani tnàhá ndí Abrahám, te tnàhá yúhú cùú-í ñani tnàhá ndí Abrahám tucu.²³ Àdi quide cahnu-güedé méé-güedé cuendá sá sání iní-güedé sá díú núú Xítohó Jesucristú xínú cuèchi-güedé, dico yúhú ío-gá xínú cuèchi ndisa-í núú-gá. Te sá dúhá quide cahnu-í méé-í te càháⁿ-í dàtná ñiⁿ téé ñá túú cùtnuni iní-xi, te yúhú cùú-í ñiⁿ téé ío-gá quidé chiúⁿ-gá dàcúxí cué téé-áⁿ, te vai xito ní cuu caniha ñáyiú xii-í, te vai xito ní cuu cãcu cãcu cahni ñaha ñáyiú xii-í.²⁴ Te cue ñáyiú israhél ní canihá-yu xii-í úhúⁿ xito, te ndi tnàhá ñiⁿ ñiⁿ xito ní canihá-yu ní dáquée-yu ócó sáhúⁿ cúmí ñiⁿ sátà-í.²⁵ Te úní xito ní caniha tucu ñáyiú xii-í ndihi carrutí, te ñiⁿ xito ní sáha yúú ñáhã-yu xii-í, te ní cuu úní xito quée naa bàrcú xití ndute òré sácũhu-í, te ñiⁿ xito ío ní ndoho-í ní xíndecu-í ñiⁿ nduu ñiⁿ núú ndute làmár.²⁶ Te ío titní xichi ní cuu xica cuu-í, te dava xichi ní cãcu cuido ñaha ndute ñuhu xii-í, te dava xichi ní cãcu duhu ñadúhú nchaa ndachiúⁿ-í, te dava xichi ní cãcu cada ñaha cué ñáyiú cùu ndi mee-í ñiⁿ sá cádá ñáhã-yu xii-í, te ñi-ni ducaⁿ ní cãcu cada ñaha tucu cue ñáyiú ñá túú cùu ndi mee-í ñiⁿ sá cádá ñáhã-yu xii-í ní cùu, te cuéi xití

ñuú te cuéi xití yucu cãcu cãcu cada ñaha ñáyiú xii-í ñiⁿ sá cádá ñáhã-yu, te ñi-ni ducaⁿ cãcu cãcu quini-í tnúndòho òré ñúhú-í bàrcú cuáhãⁿ núú ndute làmár. Te cue ñáyiú càhí sá ndécú ichi Xítohó Jesucristú te ñá ndáá cãcu cãcu cada ñáhã-yu xii-í ñiⁿ sá cádá ñáhã-yu.²⁷ Te ío ndòho-í cuendá chiúⁿ quide-í chi ío xàu-í, te ní cuu vai xito ñá túú xidí-í, te titní xito ní cuu xihí víhi-í docó, te titní xito ní cuu yìchí-í ndute, te titní xito ní cuu ñá túú tnàhí ná xéxi-í cuendá chiúⁿ quide-í, te titní xito ní cuu ndòho-í sá víxiⁿ, te titní xito ní cuu ñá túú nihí-í dóo cuihnu-í.

²⁸ Te ñá díú-ní xããⁿ chi ñiⁿ nduu ñiⁿ nduu ío sání iní-í cuendá nchaa ñáyiú ndecu ichi Xítohó Jesucristú xíndecu nchaa xichi.²⁹ Te ndéda-ni cãa ñáyiú ñá túú nihí ndéé cùndecu ichi Xítohó Jesucristú, te ío cùndahú iní-í chi sãnuu sá tnàhá-í ñá túú nihí ndéé-í cundecu-í ichi-gá sá dúcãⁿ quidé-yu. Te núu ñiⁿ ñáyiú quidé-yu sá ñiⁿ nchòhó ñáyiú ndecu ichi Xítohó Jesucristú quidé-ndó ñiⁿ sá ñá túú tau-ndó càda-ndo te vá cúú vãha iní-í chi cudééⁿ-í.³⁰ Te núu xini ñuhu-xi sá cádá cãhnu-í méé-í, te cuu ducaⁿ càda-í te càháⁿ-í mee-ñi cuendá nchaa sá quidé nãcuãa ñá túú nihí ndéé yiqui cuñú-í.³¹ Te Dútú Ndíoxí Yaa cúú Tãtã Xítohó Jesucristú ñáhã-gã sá yúhú càháⁿ ndáá-í núú-ndó, te ñi-ni gá tau-gá cachí-ó sá ío cãhnu cuu-gá ñiⁿ caa ñiⁿ quíhⁿ.³² Te cùtnàhá ní xíndecu-í ñuú Dãmascú te téé cùu gobiernú téé cùndihi téé yindaha ñáyiú nani Aretás ní taxi ndecu-dé cue téé ní xíndedí yuyèhe sá ñúhú dòco ñuú cuendá òré quée-í te tñi ñaha-güedé xii-í ní cùu.³³ Dico yúhú ní quée-í ñiⁿ xití tídihi, te cue ñáyiú cùndihi ñaha xii-í ní queñuhu ñáhã-yu ndaa ventaná nchí yiqui naha sá ñúhú dòco ñuú-áⁿ, te ducaⁿ te ní cãcu-í ñá túú ní ndacu-güedé tñi ñaha-güedé xii-í.

12

Té Páblú càháⁿ-dé sá ò vii càa sá nǐ dǎnehé núú ñáhá Xítóhó Jesucristú xii-dé

¹ Te ñá túú ndéè nándǐhi-xi sá càháⁿ váha-o cuendá méé-ó, dico vitna xini ñuhu-xi ducaⁿ cada-í chi càháⁿ-í nàcuáa ní quide ñaha Xítóhó Jesucristú xii-í, chi ní quide-gá sá nǐ cutnùnǐ iní-í nàcuáa ndúu tnúhu-gá, te vai núú sá nǐ dǎnehé núú ñáhá-gǎ xii-í. ² Te yúhú xini-í ñⁿ téé sǎndáá iní ñáhá xii Xítóhó Jesucristú, te sa ní cuu úxícúmí cuiá sá tée-áⁿ nǐ sáá-dé ndéé andiu cùu uni, te ñá túú xini-í te núu ndihi yiqui cùñú-dé ní sáá-dé àdi ñáhá, chi ñⁿdií díí-nǐ Yá Ndióxi ñáhá-gá te núu nása càa-dé ní sáá-dé. ³ Te yúhú càháⁿ ndáá-í cuendá téé-áⁿ, dico dàtná ní cachí-í sá ñá túú xini-í te núu ndihi yiqui cùñú-dé ní sáá-dé andiu àdi ñáhá, chi mee Yá Ndióxi ñáhá-gá te núu nása càa-dé ní sáá-dé. ⁴ Te téé-áⁿ nǐ sáá-dé ñⁿ xichi núú ò váha càa andiu, te yacáⁿ ní xindedóho-dé tnúhu mee-ni sá cùú-xí cuendá méé-dé, te tnúhu-áⁿ vǎ cùú tnàhí càháⁿ-dé núú ñⁿ ñáyiu. ⁵ Te yúhú quidé ñinu-í téé-áⁿ, dico mee-í ñá túú càháⁿ váha-í cuendá-í cuendá cada ñinu-í méé-í, chi càháⁿ-ni mee-ni cuendá nchaa sá quidé nàcuáa ñá túú ñihí ndéé yiqui cuñú-í. ⁶ Te núu dicó yúhú cuini-í te cuu càháⁿ váha-í cuendá-í cuendá cada ñinu-í méé-í, te núu ducaⁿ na càháⁿ-í te ñá túú cùu-xi ñⁿ tnúhu neñúu càháⁿ-í, chi cùu-xi ñⁿ sá càháⁿ ndáá-í te núu na càháⁿ-í. Dico vǎ dúcáⁿ càda-í chi cuini-í sá nchòhó cada cuendá-ndó nàcuáa ndúu tnúhu càháⁿ-í ndihi nàcuáa quide-í, te ducaⁿ mée-ndo càháⁿ-ndó te núu ná téé cùu-í, te ñá díú sá yúhú càháⁿ váha-í cuendá méé-í cuendá nchòhó cachí-ndó sá ò cùnuu-í.

⁷ Te sá nǐ dǎnehé núú ñáhá Xítóhó Jesucristú xii-í cùu-xí sá xidó ò váha, te cuendá sá vǎ càdá càhnu-í méé-í núu xiáⁿ Xítóhó Jesucristú ní quide-gá duha ndòho yiqui cuñú-í vitna. Te sá dúcáⁿ quide ñaha-gá

xii-í te xiáⁿ sáculháⁿ nǐ ñihí-xi ichi càhnu dandoho ñaha-xi xii-í. ⁸ Te ní cuu úní xito càháⁿ ndàhú-í núú Xítóhó Jesucristú sá ná càdá-gá nàcuáa vǎ ndòhó-gǎ yiqui cùñú-í. ⁹ Dico mee-gǎ cachí-gá xii-í: “Yúhú ò cùndahú iní ñáhà-í xii-ñ chindee ñaha-í, te ñá túú ná cùmǎni xii-n, te cùtnuní sá ò-gá chindèe-í cue ñáyiu ñá túú ñihí ndéé cùndecu”, duha ní cachí-gá xii-í. Te xiáⁿ núu yúhú ò cùdǐ iní-í sá ñá túú ñihí ndéé-í ndécù-í, chi ñⁿ cuendá xiáⁿ Xítóhó Jesucristú ñá túú dàña nihnu ñaha-gá xii-í chindèe ñaha-gá. ¹⁰ Te xiáⁿ núu cùdǐ iní-í sá dúhá ñá túú ñihí ndéé-í ndécù-í, te cùdǐ tucu iní-í cuendá nchaa tnúhu cuèhé tnúhu duha càháⁿ ñáyiu cuendá-í, te cùdǐ iní-í cuendá nchaa sá ndòhó-í, te cùdǐ tucu iní-í cuendá sá quidé ñaha ñáyiu xii-í, te cùdǐ tucu iní-í cuendá nchaa dáva-gá sá ndòhó-í cuendá Xítóhó Jesucristú. Te òré ñá túú ñihí ndéé-í te Xítóhó Jesucristú chindèe ñaha-gá xii-í ñihí ndéé-í.

Té Páblú ò sàni iní-dé cuendá cue ñáyiu xindecu ichi Xítóhó Jesucristú ndécù ñúu Còrintú

¹¹ Te cùu-í dàtná ñⁿ téé ñá túú cùtnuní iní-xi sá dúhá càháⁿ váha-í cuendá-í, te ducaⁿ quide-í chi mee-ndo quide-ndo sá dúcáⁿ càháⁿ-í, dico mee-ndo tàu-ndó càháⁿ váha-ndo cuendá-í ní cùu. Te dáva cue téé ò quide càhnu-güedé méé-güedé, te cachí-güedé sá Xítóhó Jesucristú ní táuchíuⁿ-gǎ sá càháⁿ-güedé tnúhu-gá, dico yúhú cùnuu-gá-í dàcúxí cue téé-áⁿ cuèí ñá túú vèdana ná cùu-í ndécù-í ñuyíú-a. ¹² Te cùtnàhá ní xindecu ndihi ñaha-í xii-ndo ò ní quide càhnu iní-í nándǐ sá nǐ yáha-í ní quide-í chiúⁿ Xítóhó Jesucristú sá cùu-xí-ndó. Te ní chindee ñaha-gá xii-í ní quide-í titní núú sá vǎ yòo tnàhí ndàcu cada te ní cuñúhu-ndo, te sá dúcáⁿ nǐ chindee ñaha-gá xii-í ní cutnùnǐ iní-ndó sá yúhú cùu ndisa-í ñⁿ téé ní cachí Xítóhó Jesucristú sá càháⁿ-í tnúhu-gá.

13 Te yúhú ñⁿ-ni quide ndihí ñaha-í xii-ndo ndihí nchaa dava-gá cue ñáyiú ndècu ichi Xítohó Jesucristú, te dicó-ni sá yúhú ñá túú ní cuíní-í taxi-ndo sá xíní ñùhu-í dàtná ní quide-í dava-gá-yu. Te núu ñá túú ní quide váha-í sá dúcáⁿ ñí quide-í ñá túú ní cuíní-í chindee ñaha-ndo te chí cáda cãhnu iní ñáhá xii-í.

14 Te vitna sa ndècu túha-í sá quixi-í núu ndécú-ndó, te sá quixi còto ñaha tucu-í xii-ndo cùu-xi xito cuu úní sá quixi-í, te cuíní-í sá vã dándihú-ndó iní-ndó ndècu-ndo sá táxi-ndó cùu xii-í, chí ñá díú xiãⁿ ndèé iní-í chí mee-ndo ndèé iní-í quixi-í. Te duha cãháⁿ-í chí nchòhó xíní-ndó sá cuè téé cùu tátá sãñaha-güedé sá cúu-xi cuè déhe-güedé te ñá díú cuè déhe-güedé sãñaha-güedé sá cúu-xi mèe-güedé. 15 Te yúhú ío váha cùu iní-í dandòñuhu-í sá ndécú ndihí-í nãcuáa ndacu-í chindee ñaha-í xii-ndo cùndecu váha-ndo sá cúu-xi Yá Ndiõxí chí ío cùdí iní-í, te cuèi na cùu-í sá cuendá-ndó, chí ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sãnuu sá nchòhó ñá túú cùu iní ñáhá cãvihi-ndo xii-í.

16 Te ñaha-ndo sá ñá túú ní dándihú-í iní-ndó ná taxi-ndo cùu xii-í, dico dava-ndo cãchí-ndó sá ío váha ní xito-í nãcuáa ní quide-í nãcuáa ní dándahú ñáhà-í xii-ndo, 17 Te chí cãháⁿ te núu yúhú ní dándahú ñáhà-í xii-ndo ndihí cue téé ní tendaha-í ní quixi coto ñaha xii-ndo. 18 Te ní cãháⁿ ndáhú-í núú téé Titú ndihí núú ingá tucu téé ndècu ndihí-o ichi Xítohó Jesucristú ní quixi coto ñaha-güedé xii-ndo. Te nchòhó cùtnùní iní-ndó sá tẽ Titú ñá túú ní dándahú ñáhá-dé xii-ndo, te ducaⁿ chí ñⁿ-ni sãni iní-ndí te ñⁿ-ni quide-ndí.

19 Te cudana te sãni iní-ndó sá sá dúhá cãháⁿ-ndí te tàunihnu-ndí mée-ndí, dico ñá díú dùcaⁿ quee-xi tnúhu cãháⁿ-ndí, chí cãháⁿ-ndí nãcuáa tàu-xi cãháⁿ-ndí chí ndècu ndihí-ndí Xítohó Jesucristú, te mee Yá Ndiõxí náhá ndáá-gá nãcuáa

ndùu tnúhu cãháⁿ-ndí, te nchaa sá cãháⁿ-ndí cúu-xi cuendá nchòhó cue ñáyiú ío cùu iní-ndí, te cãháⁿ-ndí nãcuáa cundecu váha-ndo ichi Xítohó Jesucristú. 20 Te ío sãni iní-í cuendá-ndó chí na cuáháⁿ te òré quixi-í quixi coto ñaha-í xii-ndo, te ñá túú quide-ndo nãcuáa cuu váha iní-í, te sá dúcáⁿ te yúhú cãháⁿ-í nãcuáa vá cúu váha iní-ndó, te ducaⁿ ío sãni iní-í cuendá-ndó chí na cuáháⁿ òré quexiò-í te nãá-ndó, àdi ndecu-ndo ichi cuédú iní, àdi cudééⁿ núú tnáhá-ndó, àdi ñá túú cùu ñⁿnuu-ndo ndecu-ndo, àdi cãháⁿ cuèhé-ndó cuendá tnàha ñáyiú-ndo núú chítú núú tãcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo. 21 Te ío sãni iní-í cuendá-ndó chí na cuáháⁿ òré quixi-í, te Yá Ndiõxí cada-gá te cucahaⁿ núu-í sá cuendá-ndó, te ío ndihí iní-í cuendá-ndó te núu vátá dáñá-gã-ndó nchaa sá cuèhé sá dúhá ñí ngüíta-ndo quide-ndo ndéé sanduu, te vãi-ndo ní ngüíta-ndo dùcaⁿ quide-ndo, chí ndècu-ndo ichi díú iní te nándi-gá nchaa sá cuèhé sá dúhá quide-ndo, te ducaⁿ ío ndihí iní-í te núu vátá dáñá-gã-ndó nchaa xiãⁿ.

13

Tnúhu ndéé núú ñí ndihí-ná

1 Te sá quixi-í vitna núú ndécú-ndó cùu-xi xito cuu úní sá quixi còto ñaha-í xii-ndo. Te cãchí tnúhu-í xii-ndo sá òré cundáa cuèchi-ndo te canehe núú úú àdi úní ñáyiú cãháⁿ ndáa nãcuáa ndùu cuèchi-ndo. 2 Te yúhú sa ní cãháⁿ-í dóho-ndo cùtnáhá ní quixi-í ní quixi coto ñaha-í xii-ndo xito cuu úú, te díu-ni ducaⁿ cãháⁿ tucu-í dóho-ndo vitna vátá quixi tucu-gá-í quixi coto ñaha-í xii-ndo. Te nchòhó ñáyiú ní cunduu ñí ngüíta quide nchaa sá cuèhé sá dúhá, tenáa ñáhà-í xii-ndo òré quexiò-í te núu vátá dáñá-gã-ndó nchaa sá cuèhé sá dúhá quide-ndo te tnàhá

nchaa dava-gá-ndó tēnaá ñáhà-í xii-ndo. ³ Te nchòhó cuiní-ndó quini-ndó nūu ndáá sá quidé-í nūu Xítohó Jesucristú càhá-í yuhu-gá, dico dàvá-án cutnūnì ndáá iní-ndó. Te Xítohó Jesucristú quidé-gá nàcuáa cutnūnì iní-ndó sã ïo càhnu cuu-gá te ñá túú quide-gá dàtná quidé ìñ ñáyiú ñá túú nihí ndéé cūndecu. ⁴ Te Xítohó Jesucristú ní ndoho-gá dàtná ìñ ñáyiú ñá túú nihí ndéé cūndecu, chi ní sahnì ñaha-güedé xii-gá nūú cùrúxí dico mee Yã Ndiòxí ní quide-gá ní nihí ndéé Xítohó Jesucristú ní ndoto-gá ndécú-gã vitna, te tnàhá nchúhú tucu ducaⁿ yãha-ndí ñá túú nihí ndéé-ndí cūndecu-ndí, dico mee Yã Ndiòxí chindèe ñaha-gá xii-ndí nihí ndéé-ndí ndécú-ndí cuendá sá ndécú ndihí-ndí Xítohó Jesucristú, te xĩãⁿ nūu ndàcu-ndí quidé-ndí nàcuáa tàù-xi cunduu sá cúú-xí-ndó.

⁵ Te chí cádá cuendá váha te nūu ndisa sá sàndáá iní-ndó tnúhu Xítohó Jesucristú, te nūu ndáá sá ndécú-ndó ichi-gá te cūtnunì iní-ndó sã ndécú-ndó ndihí-gá.

⁶ Te cuiní-ndí sá nchòhó cutnūnì ndáá iní-ndó sã nchúhú ndécú ndihí ndisa-ndí Xítohó Jesucristú.

⁷ Te nchúhú càháⁿ ndihí-ndí Yã Ndiòxí cuendá-ndó cuendá sá vã cádá-ndó ñi ìñ sá cuèhé sá dúhá, te vã cánì iní-ndó sã sã dúcáⁿ càháⁿ ndihí-ndí-gá cuendá-ndó, te cuiní-ndí sá nchòhó cutnūnì iní-ndó sã nchúhú ïo ndècu yiñuhu-ndí nūú-gã, te ñáhá chi càháⁿ ndihí-ndí-gá cuendá-ndó chi cuiní-ndí sá nchòhó cada váha-ndo cūndecu-ndo cuèi sàni iní-ndó sã nchúhú cúú-ndí cue tée ñá túú ndècu yiñuhu nūú-gã. ⁸ Te nchúhú

mee-ni càháⁿ váha-ndí cuendá tnúhu ndáá tnúhu Yã Ndiòxí, te ñá túú càháⁿ-ndí ìñ tnúhu sá ñà túú tàù-xi càháⁿ-ndí cuendá tnúhu-án. ⁹ Te cùdíí iní-ndí sá ñà túú-gã xínì ñuhu-xi cada-ndí nàcuáa nihí

ndéé-ndí tenáá ñáhá-ndí xii-ndo càháⁿ-ndí dóho-ndo, chi nchòhó sa ní nihí ndéé-ndó ndècu-ndo ichi-gá. Te nchúhú càháⁿ ndihí-ndí Yã Ndiòxí cuendá-ndó cuendá sá nchòhó cundáá-ndó cūndecu-ndo ñá túú-gã ná cumánì-ndó nūú-gã. ¹⁰ Te xĩãⁿ nūu duha ndūu nchaa tnúhu tēe-í nūú tütú-a daquixi-í ndaha-ndo vitna ñá túú ndècu ndihí ñaha-í xii-ndo, cuendá sá òré ná cūndecu ndihí ñaha-í xii-ndo te vã ïo nihí càháⁿ-í dóho-ndo nàcuáa ndūu tnúhu ndee ñi ní taxi Xítohó Jesucristú ndécú ndihí-í, chi ní taxi-gá tnúhu ndee ñi xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cánùichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiú ndècu ndihí-ndí ichi Xítohó Jesucristú ïo quide ndee ñi ñáhá-ndí xii-ndo, te ïo chí ndúcú nàcuáa cada-ndo cundáá-ndó nūú Yã Ndiòxí cuendá sá ñà túú tnàhí-gá ná cūmánì-ndó nūú-gã, te ndee ndèe cada iní-ndó cūndecu-ndo, te chí cúú ìñⁿnuu cūndecu ndihí tnaha, te ducaⁿ te Yã Ndiòxí cūndecu ndihí ñaha-gã xii-ndo chí ïo cūu ñi ñáhá-gã xii-o, te ñu-gá quidé-gã ïo váha cūu iní-ó ndècu-o. ¹² Te ndihí tnúhu yiñuhu chí cádá ndèe ñi tnáhá. ¹³ Te nchaa ñáyiú cūu cuendá Yã Ndiòxí ndécú ña quide ndee ñi ñáhá-yu xii-ndo.

¹⁴ Te xicáⁿ táhú-ndí nūú Xítohó Jesucristú sá ïo na chindèe chítúu ñaha-gã xii-ndo. Te mee Yã Ndiòxí ná cádá-gã nàcuáa cutnūnì iní-ndó sã ïo cūu ñi ñáhá-gã xii-ndo, te Espiritú-gá cūndee cūu cahnu iní-ndó cūndecu-ndo. Te ducaⁿ na cūnduu. Te ïo chí cádá ndèe ñi-ñá vitna.

TUTÚ NÍ CADÚHA TÉ PÁBLÚ QUIHIⁿ NDAHA ÑÁYIU DISTRITÚ GÁLACIÁ

Té Páblú cádúha-dé tutú quíhiⁿ ndaha nchaa ñáyiú sàndáá iní ñáhá xii Xítohó Jesucristú ndécú distritú Gálaciá

¹ Te yúhú té Páblú ní tendaha ñaha Xítohó Jesucristú, ndihi Dútú Ndiöxí véxi-í cãháⁿ-í tnúhu-gá. Te ðiu Yá Ndiöxí ní dándótó-gã Xítohó Jesucristú Yáá ní xíhi ní cùu. Te cãchí tnúhu-í xii-ndo sã ñã díú ñáyiú ñuyúú-a ni tëndaha ñaha xii-í véxi-í, te ni Yá Ndiöxí te ni Xítohó Jesucristú ñã túú ní xãháⁿ-gã xii ⁱⁱ ñáyiú quixí-yu cachí tnúhu-yu nãcuáa cada-í. ² Te yúhú té Páblú cádúha-í tutú-a ndihi nchaa dava-gã ñáyiú ndècu ichi Yá Ndiöxí ndécú ndihi-í iha cuëndá daquixi-í ndaha nchòhó ñáyiú sàndáá iní ñáhá xii Xítohó Jesucristú ndécú distritú Gálaciá. ³ Te xicáⁿ tãhù-í núú Dútú Ndiöxí, ndihi núú Xítohó Jesucristú sã ïo na chindee chitúu ñaha-gã xii-ndo, te ducaⁿ ndi nduú-gã ná cádá te ïo váha cuu iní-ndó cùndecu-ndo. ⁴ Te Xítohó Jesucristú ní xíhi-gã sã cuëndá nchaa cuèchi nchoo cuè ñáyiú ndècu ñuyúú-a. Te ducaⁿ ñi quide-gã, chi cuini-gã sã vã cùndècu-o ichi cuehé ichi duha. Te ducaⁿ ñi cuu, chi Dútú Ndiöxí ducaⁿ ñi cuini-gã cunduu. ⁵ Te ïo chí ná ndãcáⁿ tãhù-ó núú Yá Ndiöxí cuëndá sã ïo cãhnu cuu-gã, te ðiu-ñi ducaⁿ càda-o ni caa ni quíhiⁿ! Te ducaⁿ na cùnduu.

Mee-ni tnúhu Xítohó Jesucristú cúu-xí tnúhu sã cãháⁿ nãcuáa naníhi tãhù-ó

⁶ Te ïo cùnúhu-í cúu chi ïo ndíhi ní dãnã-ndó ichi Yá Ndiöxí. Te Yáá-áⁿ ñi cãháⁿ ñáhã-gã xii-ndo, chi Xítohó Jesucristú ïo ní cundãhú

iní ñáhã-gã ní quide váha ñaha-gã xii-ndo, te vitna dàcuaha tucu-ndo ingá tnúhu, te cãchí-ndó sã xiãⁿ dácãcu nihnu ñaha-xi xii-ndo núú ùhú núú ndãhú. ⁷ Dico ñáhã, chi ñã túú-gã tnúhu sã dácãcu nihnu ñaha xii-o núú ùhú núú ndãhú. Te dicó-ni sã ïo ñáyiú véxi daticá nuu ñáhã-yu xii-ndo dãnehé ñáhã-yu tnúhu sã dãcuíta nihnu ñaha xii-ndo, chi tnúhu-áⁿ ñã túú cùu-xi tnúhu Xítohó Jesucristú. ⁸ Te yúhú cãháⁿ-í tnúhu Xítohó Jesucristú, dico núú ïo ñáyiú véxi dãnehé ñáhã xii-ndo ingá tnúhu sã ñã túú ní dãnehé ñáhã-í xii-ndo, te nchòhó cachí-ndó sã ñáyiú-áⁿ nachãhu-yu núú Yá Ndiöxí sã dúcãⁿ quidé-yu. Te cuèi yúhú, te núu na dãmã-í tnúhu danèhé ñáhã-í xii-ndo, te ðiu-ni ducaⁿ cãháⁿ-ndó sã nãchãhu-í núú-gã te núu ducaⁿ na càda-í. Àdi te núu ⁱⁱ espíritú xínú cuèchi núú-gã véxi-xi cãháⁿ-xi ingá tnúhu sã ñã túú ní dãnehé ñáhã-í xii-ndo nãcuáa naníhi tãhù-ndó ñã, te ðiu-ni ducaⁿ cãháⁿ-ndó sã nãchãhu-xi núú Yá Ndiöxí te núu ducaⁿ na càda-xi. ⁹ Te ðiu-ni duha sa ní dãnèhé ñáhã-í xii-ndo sã núu véxi ñáyiú dãnehé ñáhã ingá tnúhu sã ñã túú ní dãnehé ñáhã-í xii-ndo nãcuáa naníhi tãhù-ndó ñã, te cachí-ndó sã ñáyiú-áⁿ nachãhu-yu núú Yá Ndiöxí sã dúcãⁿ quidé-yu, duha ní cachí-í xii-ndo.

¹⁰ Te duha ndúu tnúhu cãháⁿ-í chi nchòhó sa xini-ndó sã yúhú cuini-í sã Yá Ndiöxí cãháⁿ-gã sã quidé vãha-í ndécù-í, te ñã díú sã ñáyiú ñuyúú-a cachí-yu sã quidé vãha-í, àdi sã ïo cùdíí ñi-yu nchaa nãcuáa quide-í ndécù-í. Te núu na càni iní-í cudíu-í núú ñáyiú ñuyúú-a, te ñã túú cùu-í tée xinu cuechí núú Xítohó Jesucristú te núu ducaⁿ na càda-í.

Nãcuáa ní cuu ní ngúíta té Páblú cãháⁿ-dé tnúhu Yá Ndiöxí

¹¹⁻¹² Te nchòhó ñáyiú ndècu ndihi-í ichi Xítohó Jesucristú cãchí tnúhu-í xii-ndo sã tnúhu sã dãnèhé ñáhã-í xii-ndo nãcuáa naníhi

tàhú-ndó cùu-xi tnúhu sá nǐ cachí tnúhu mee Xítóhó Jesucristú xii-í, te ñá díú ññáiyu ñuyúí-a ni càhu iní-yu tnúhu-án, àdi danehé ñáhã-yu xii-í, chi mee Xítóhó Jesucristú ní dánèhé ñáhã-gã.

13 Te nchòhó sa nihí-ndó tnúhu nàcuáa ní xóo cada-í cùtnàhá nchicúⁿ nihnu-í nchaa nàcuáa dàcuaha ñáiyu cùu ndi mee-í ñáiyu isràèl ní cùu. Te dàvã-án ïo ní xóo cuu úhú iní-í nchaa ñáiyu ndècu ichi Yá Ndiòxí, te nándi sá nǐ xóo cada-í-yu, te ní cuini-í danàa-í-yu ni cùu. 14 Te yúhú ío-gá ní xóo quene cáva-í ní xóo dacuàha-í nchaa sá dácuaaha ñáiyu cùu ndi mee-í dácúxí ñáiyu ññ-ni cuà-í ndihí-yu ni cùu, te ío-gá ní xóo cuini-í cada ndáa-í canchicúⁿ nihnu-í nchaa nàcuáa ní dánèhé ñáhã cuè ñaní tnáhã-í ní xíndecu ndéé sanaha ni cùu. 15 Te ndéé cùtnàhá vátã cácu-gã-í Yá Ndiòxí sa nèhe váha ñaha-gã xii-í cuendá sá càháⁿ-í tnúhu-gã, núu xíãⁿ ní càháⁿ ñáhã-gã xii-í quidè-í chiúⁿ-gã vitna, te sá ducáⁿ nǐ quide-gã te ío váha ní quide ñaha-gã xii-í. 16 Te òré ní càháⁿ ñáhã Yá Ndiòxí xii-í te ní cachí tnúhu-gã cuendá Déhe-gã Xítóhó Jesucristú. Te ducaⁿ nǐ quide Yá Ndiòxí cuendá sá cuini-gã sá cùñaha-í xii ñáiyu ñá túú cùu ñáiyu isràèl cuendá Yaá cúú Dèhe-gã. Te cùtnàhá ní càháⁿ ñáhã Yá Ndiòxí xii-í, te vá yóo ññ díi núu-xi ni ndùcu tnúhu-í nàcuáa cada-í. 17 Te ní ñá túú ní sáhãⁿ-í ñnuú Jerusalén nducu tnúhu-í núú cuè téé díhna nuu nǐ tendaha Xítóhó Jesucristú càháⁿ tnúhu-gã núu nása cada-í, chi ndihí-ni ní sáhãⁿ-í distritú Àrabíá ní xíndecu tnaa-í te dàtnùní cuánuhú tucu-í ñnuú Dàmascú.

18 Te núú ùní cuíã sã nǐ càháⁿ ñáhã Yá Ndiòxí xii-í, te ní sáhãⁿ tucu-í ñnuú Jerusalén ní càháⁿ ndihí-í té Pèlú, te ní xíndecu-í ndihí-dé sáhúⁿ nduu. 19 Te tnàhá té Jàcobó ñaní Xítóhó Jesucristú ní càháⁿ ndihí-í. Te ñá túú ní xini-í dava-gã cue téé ní tendaha Xítóhó

Jesucristú càháⁿ tnúhu-gã. 20 Te Yá Ndiòxí ndéhé ndiⁿ ndehe caxi-gã sá ncháã tnúhu tèe-í núú tùtú-a sá cúú-xí-ndó cùu-xi ññ sá ndàã.

21 Te sátã nǐ sáhãⁿ-í ñnuú Jerusalén, te dàtnùní ní sáhãⁿ-í distritú Síríã, ndihí distritú Ciliciã. 22 Te nchaa ñáiyu xíndecu ichi Xítóhó Jesucristú ndécú distritú Jùdeã ñá túú xini ñáhã-yu xii-í ní cùu. 23 Dico ní xóo nihí-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhã xii nchaa nchoo ñáiyu ndècu ichi Xítóhó Jesucristú càháⁿ-dé tnúhu-gã núú ñáiyu cuendá quíndáã iní ñáhã-yu xii-gã, te diu-dé nándi sá quidè ñaha-dé, te cuini-dé danàa ñaha-dé cuendá sá vã cóo-gã ñáiyu quíndáã iní ñáhã xii-gã ní cùu”, duha ní cachí-yu cuendá-í. 24 Te ní ngúita-yu ní cachí-yu sá ïo càhu cuu Yá Ndiòxí cuendá sá ñá túú-gã quidè-í dàtnã ní xóo cada-í.

2

Té Pãblú ní nihí tnáhã-dé ndihí dava-gã cue téé càháⁿ tnúhu Yá Ndiòxí

1 Te ní nútnahã úxícúmi cuíã sã nǐ sáhãⁿ-í ñnuú Jerusalén ní càháⁿ ndihí-í té Pèlú, te dàtnùní ndécã-í té Bèé ní sáhãⁿ, te tnàhá té Titú ní sáhãⁿ ndihí-ndi-dé. 2 Te ní sáhãⁿ-í chi mee Yá Ndiòxí ní cachí-gã sá quihíⁿ-í. Te yacáⁿ ní tacá mee-ni cuè téé cùnuu. Te ní xáhaⁿ-í xii-güedé nàcuáa ndùu tnúhu dānehé-í ñáiyu ñá túú cùu ñáiyu isràèl cuendá naníhí tàhú-yu. Te ducaⁿ nǐ quide-í cuendá cuini-í quini-güedé nàcuáa ndùu chiúⁿ quide-í, chi nacuahãⁿ cachí-güedé sá ñá túú nàndihí-xi. 3 Te té Titú téé ndècu ndihí-í chi ñá díú téé isràèl cúú-dé, dico ñá túú ní quide yica-güedé cuáha-güedé señã ññ-dé. 4 Te ñáiyu càchí sá ndécú ichi Xítóhó Jesucristú te ñá ndàã sá ndécú-yu ichi-gã, ñáiyu-án nǐ chitnahã ñáhã-yu xii-ndí cuendá cuini-yu quini-yu nása quide-ndí

ndécú-ndí ichi Xítóhó Jesucristú. Te ducaⁿ ní quidé-yu cuendá sá nchühú sa ní cácu nihnu-ndí ñá túú-gá quidé-ndí nchaa nacuáa ní cáháⁿ ndíi Moisés. Te cuíní-yu sá núcuíta saa tucu-ndí cada-ndí nchaa nacuáa ní cáháⁿ ndíi nucúndecu-ndí datná ní xíndecu-ndí cútnáhá vátá cácu nihnu-gá-ndí núú tnúhu-áⁿ ní cùu. ⁵ Te nchühú ñá túú tnàhí ní dàña-ndí méé-ndí dandàhú ñáhá-yu xii-ndí. Te ducaⁿ ní quide-ndí, chi cuíní-ndí sá ñá túú nǎgá tnúhu dácánuu ndíhi tnúhu sá cáháⁿ nacuáa naníhí tǎhú-ó ndècu ndíhi-ndo.

⁶ Te ni ñⁿ tnúhu sá vǎtá quíní-gá-í ñá túú ní cǎchí tnúhu cue téé cùnūu núú ñǎyiu cada-í. Dico yúhú chi ñá túú ní quide cuendá-í nūu cùnūu-güedé àdi ñá túú cùnūu-güedé, chi núú Yá Ndióxi ñⁿ-ní cùu-o nchaa-o. ⁷ Te ní cutnùní iní-güedé sá Yá Ndióxi ní cachí-gá xii-í sá cáháⁿ-í tnúhu-gá núú ñǎyiu ñá túú cùu ñǎyiu isràél datná ní quide-gá té Pèlú ní xáhaⁿ-gá cáháⁿ-dé tnúhu-gá núú ñǎyiu isràél. ⁸ Te ducaⁿ ní cutnùní iní-güedé, chi ñⁿ-ni Yá Ndióxi Yaá chíndèe ñaha xii té Pèlú cáháⁿ-dé tnúhu-gá núú ñǎyiu isràél, ñⁿ-ni Yaá-áⁿ chíndèe ñaha-gá xii-í cáháⁿ-í tnúhu-gá núú ñǎyiu ñá túú cùu ñǎyiu isràél.

⁹ Te té Jàcobó, ndíhi té Pèlú, ndíhi té Juáá, cue téé ío cùnūu-gá ní cutnùní iní-güedé sá Yá Ndióxi ío chíndee ñaha-gá xii-í quidè-í chiuⁿ-gá. Te ío váha ní cáháⁿ ndíhi ñaha-güedé xii-í, ndíhi té Bèé, te ní cuu ñⁿ-nuu-ndí sá nchühú quíhíⁿ-ndí cáháⁿ-ndí tnúhu Yá Ndióxi núú nchàa ñǎyiu ñá túú cùu ñǎyiu isràél, te mee-güedé cáháⁿ-güedé tnúhu-gá núú ñǎyiu isràél. ¹⁰ Te ñⁿ-ni tnúhu ní cáháⁿ-güedé dóho-ndí te ní cachí-güedé xii-ndí sá chíndèe-ndí cue ñǎyiu ndàhú, te sa ducaⁿ tnàhí sàni iní-ndí cada-ndí.

Té Pǎblú cáháⁿ-dé dóho té Pèlú ñúú Antióquia

¹¹ Te cútnáhá ní sáháⁿ té Pèlú ñúú Antióquia yá cáⁿ ní cáháⁿ-í dóho-dé, chi quide-dé ñⁿ sá ñá túú tǎu-dé cada-dé ní cùu. ¹² Te quide váha-dé ní cùu chi xèxi-dé ndíhi ñǎyiu ñá túú cùu ñǎyiu isràél, dico òré ní sáá ñⁿ úú ñǎyiu cùndíhi té Jàcobó, te òré-áⁿ ñá túú-gǎ ní cuíní-dé caxi-dé ndíhi ñǎyiu-áⁿ. Te ducaⁿ ní quide-dé chi ní yúhú-dé cue ñǎyiu nchicúⁿ nihnu quide nchaa nacuáa ní cáháⁿ ndíi Moisés sá vǎ cáháⁿ váha-yu cuendá-dé. ¹³ Te tnàhá dava-gá ñǎyiu isràél xíndecu ichi Yá Ndióxi ñá túú quide váha-yu, chi quidé-yu datná quidé té Pèlú ní cùu, te ndéé tnàhá té Bèé ní ngüíta-dé ducaⁿ quide-dé ní cùu. ¹⁴ Te òré ní xiní-í sá ñá túú quide-güedé ndíhi-yu nacuáa cáháⁿ tnúhu Yá Ndióxi, te núú nchàa ñǎyiu ndècu ichi Yá Ndióxi ní xáhaⁿ-í xii té Pèlú: “Yóhó cúu-n téé isràél, te ñá túú quide-n nchaa nacuáa quide ñǎyiu isràél, chi quide-ni-n datná quidé nchàa ñǎyiu ñá túú cùu ñǎyiu isràél. Te núu ducaⁿ quide-n, ¿te ná cuendá dánèhè-n ñǎyiu ñá túú cùu ñǎyiu isràél sá cadǎ-yu nchaa nacuáa quide ñǎyiu isràél?”, duha ní xáhaⁿ-í xii té Pèlú.

Ñⁿ-ni naníhí tǎhú-ó ndíhi ñǎyiu isràél nūu na quíndáá iní-ó Xítóhó Jesucristú ndíhi-yu

¹⁵ Te yúhú ndíhi té Pèlú cúu-ndí ñani tnàhá ñǎyiu isràél, te ñá túú ndècu-ndí ichi cuèhé ichi duha datná ndécú nchàa ñǎyiu ñá túú cùu ñǎyiu isràél. ¹⁶ Te xíní-ó sǎ vǎ cùndècu-gá cuèchi-o nūú Yá Ndióxi te núu na quíndáá iní-ó Xítóhó Jesucristú, te ñá díú sǎ cǎnchicúⁿ nihnu-o càda-o nchaa nacuáa ní cáháⁿ ndíi Moisés. Te tnàhá dava nchühú ñǎyiu isràél sàndáá iní-ndí Xítóhó Jesucristú, te xíǎⁿ cutnùní iní-ndí sá ñá túú-gǎ cuèchi-ndí

ndécú nũú-gã, dico ñá díú sã ní cãncicúⁿ nihnu-ndí ní quide-ndí nãcuáa ní cáháⁿ ndíi Moisés, chi cuendá sã sãndáá iní-ndí Xítohó Jesucristú. Te vã yõo ñⁿ cachí-ó sã ñã túú ndècu cuéchi-xi núú Yã Ndiõxí cuendá sã nchicúⁿ nihnú-yu nchaa nãcuáa ní cáháⁿ ndíi Moisés.

¹⁷ Te núú cuñí-ó sã vã cundècu cuéchi-o núú Yã Ndiõxí cuendá sã sãndáá iní-ó Xítohó Jesucristú, te xíáⁿ cútnùní iní-ó sã ñã túú quide váha-o. ¡Te vã cúú tnàhí cani iní-ó sã Xítohó Jesucristú dánèhé ñáhã-gã xii-o sã vã cãdá váha-o cundecu-o! ¹⁸ Te yúhú cãchí-í sã vã cãncicúⁿ nihnu-gã-ó nchãa nãcuáa ní cáháⁿ ndíi Moisés, dico núú vitna cãchí-í sã xíní ñũhu-xi cada-o nchaa nãcuáa ní cáháⁿ ndíi Moisés nũu xíáⁿ ní dãñã-í ñã túú-gã nchicúⁿ nihnu-í nchaa nãcuáa ní cáháⁿ ndíi cuendá sã cuñí-í cundecu-í sã cúú-xí Yã Ndiõxí. ²⁰ Te Xítohó Jesucristú ní xíhí-gã cuendá-í, dico dàtnã tnũhu sã tnãhá-í ní xíhí ndíhi-gã, chi ñã cúú-gã cada-í nchaa nãcuáa sãni iní mèè-í, chi Xítohó Jesucristú-nã ndécú ndíhi ñaha-gã xii-í táxí tnùní ñáhã-gã. Te vitna ndècu-í ñuyíú-a, te ío sãndáá iní-í Xítohó Jesucristú Déhe Yã Ndiõxí, te chindee ñaha-gã xii-í. Te ñũu-ni Xítohó Jesucristú ío cùu iní ñáhã-gã xii-í nũu ní xíhí-gã núú cùrúxí sã cuendá-í. ²¹ Te vitna ñã túú dàquee tíhù-í sã váha ní quide ñaha Yã Ndiõxí xii-í, chi núú ní ndàcu-o vã cundècu cuéchi-o núú Yã Ndiõxí cuendá sã nchicúⁿ nihnu-o quide-o nchaa nãcuáa ní cáháⁿ ndíi Moisés ní cùu ñã, te áúⁿ nã cuu ní xíhí Xítohó Jesucristú ní cùu te núú ducaⁿ.

3

Vã dãñã ndèé-ó quindáá iní-ó tnũhu Xítohó Jesucristú

¹ Te nchòhó ñãyiu distritú Gálaciá, ñãyiu sa xĩndecu ichi Xítohó Jesucristú, ¿ná cuendá ío ñĩ iní-ndó ñã cuñí-ndó tnũ-ndo nchaa tnũhu cáháⁿ-gã?, ¿te yoo ní dádãhu ndodo iní ñáhã xii-ndo núú ducaⁿ quide-ndo? Te nãha-ndo sã ío váha ní dánèhé ñáhã-ndí xii-ndo nãcuáa ní cuu ní xíhí Xítohó Jesucristú. ² Te vitna cáháⁿ-ndó nũu sã nchicúⁿ nihnu-ndo nchãa nãcuáa ní cáháⁿ ndíi Moisés ní níhí-ndó Espiritú Yã Ndiõxí ndécú ndíhi-ndo, àdi sã ní sãndáá iní-ndó tnũhu Xítohó Jesucristú sã ní dánèhé ñáhã-ndí xii-ndo ní níhí-ndó Espiritú-gã ndécú ndíhi-ndo. ³ Te nchòhó ío ñĩ díquí-ndó chi Espiritú Yã Ndiõxí tá quide váha ñaha-xi xii-ndo cuáhãⁿ ní cùu. ¿Te nãa vitna mee-nã-ndó cuñí-ndó càda-ndo nãcuáa ta quide ñaha Espiritú-gã cuáhãⁿ xii-ndo ní cùu-án? ⁴ Te sãni ñⁿ sãni úú iní-í cuendá-ndó sã áúⁿ nã cuu nãndi yãha-ndo ndècu-ndo ichi Yã Ndiõxí. ⁵ Te xíní-ndó sã Yã Ndiõxí ní taxi-gã Espiritú-gã ní ngũndecu ndíhi-ndo, te ní quide-gã sã vã yõo tnàhí ndàcu cada núú-ndó ní xíní-ndó. Te ducaⁿ ní quide-gã, dico ñã chí ní sãndáá iní-ndó-gã, dico ñã díú cuendá nchaa nãcuáa ní cachí ndíi Moisés cada ñãyiu ducaⁿ ní quide-gã.

⁶ Te ndíi Àbrahã ducaⁿ ío ní sãndáá iní ndíi Yã Ndiõxí, núú xíáⁿ ní cachí-gã sã ní cudíu ndíi núú-gã sã dúcãⁿ ní quide ndíi. ⁷ Te cãchí tnũhu ndãá-í xii-ndo sã nchãá ñãyiu sãndáá iní ñáhã xii Yã Ndiõxí dàtnã ní sãndáá iní ñáhã ndíi Àbrahã xii-gã, ñãyiu-án ñⁿ-ní cùú-yu ndíhi ndíi núú-gã. ⁸ Te núú tütú Yã Ndiõxí ní ngódó tnùní tnũhu váha, tnũhu sã ní xãháⁿ Yã Ndiõxí xii ndíi Àbrahã, te ñũu ní xãháⁿ-gã xii ndíi: “Nchaa ñãyiu nihí ñuyíú cada váha-í-yu sã cuendá-n”, ñũu ní xãháⁿ-gã xii ndíi. Te sã dúcãⁿ ní ngódó tnùní núú tütú Yã Ndiõxí ndéé dàvã-án, te xíáⁿ cútnùní sã sãá nduu, te cue ñãyiu ñã túú cùu ñãyiu isràél

vá cùndècu-gá cuéchi-yu núú-gă te núu na quìndáá iní ñáhá-yu xii-gá. ⁹ Te xíáⁿ núu nchaa ñáyiú sàndáá iní ñáhá xii Yá Ndiòxí cada váha ñaha-gá xii-yu dàtná ní quide váha-gá ndíi Àbrahám, chi ndíi-áⁿ ducaⁿ ní sàndáá iní ñáhá ndíi xii-gá.

¹⁰ Te nchaa ñáyiú cuiní cada nchaa nàcuáa ní cáháⁿ ndíi Moisés cuendá sá cuiní-yu sá vâ cùndècu-gá cuéchi-yu núú Yá Ndiòxí, ñáyiú-áⁿ daña nihnu ñaha-gá xii-yu, chi vá ndácũ-yu cadá-yu nàcuáa sàni iní-yu, te ducaⁿ càda-gá chi quèe ndáá-xi nàcuáa càháⁿ-xi núú tûtú-gá núú càchí-xi sá ncháá ñáyiú ñá túú quide nchaandi túhú nàcuáa ní cáháⁿ ndíi Moisés te daña nihnu ñaha-gá xii-yu. ¹¹ Te núu na càncicúⁿ nihnu-ni-o càda-o nàcuáa ní cáháⁿ ndíi Moisés, te ñá túú vèdana chindee ñaha-xi xii-o ñacuáa vá cùndècu-gá cuéchi-o núú Yá Ndiòxí. Te ndáá chi núú tûtú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gă cuéchi-xi ndècu ío váha ndècú-yu núú-gă. ¹² Te núu dicó ío ñáyiú quide nchaandi túhú nàcuáa ní cáháⁿ ndíi Moisés ñá, te ñá túú xìni ñuhu-xi quìndáá iní-yu tnúhu Xítohó Jesucristú, chi núú tûtú Yá Ndiòxí càchí-xi sá núu dicó ío ñáyiú ndacu cada nchaa nàcuáa ní cáháⁿ ndíi Moisés ñá, te cundecu váha-yu núú Yá Ndiòxí.

¹³ Te tnúhu ní chídó tnùní ndíi Moisés càchí-xi sá ío ndècu cuéchi-o núú Yá Ndiòxí cuendá sá ñá ndácú-ó càda-o nchaa nàcuáa ní cáháⁿ ndíi, te cuendá xíáⁿ tá daña nihnu ñaha-gá xii-o cuáháⁿ. Dico Xítohó Jesucristú ní xido-gá nchaa cuéchi-o cuendá sá vâ dáña nihnu ñaha-gá Yá Ndiòxí xii-o. Te càchí-xi núú tûtú Yá Ndiòxí: “Íⁿ tée na càta caa-güedé ñⁿ yutnu, te tée-áⁿ cúú-dé tée daña nihnu ñaha Yá Ndiòxí”, duha càchí-xi núú tûtú-gá. ¹⁴ Te ducaⁿ ní yáha Xítohó Jesucristú, chi cuiní Yá Ndiòxí sá ndùu táhú nchaa ñáyiú ñá túú cùu ñáyiú israél cundecu váha-yu dàtná ní nduu

táhú ndíi Àbrahám ndécú váha ndíi. Te ducaⁿ ní yáha-gá cuendá nchaa nchoo ñáyiú sàndáá iní ñáhá xii-gá ngúndecu ndíhi-o Espíritú Yá Ndiòxí sá ní cachí mée-gă taxi-gá.

Nàcuáa ní cachí Yá Ndiòxí cada-gá

¹⁵ Te nchòhó cue ñáyiú ndècu ndíhi-í ichi Yá Ndiòxí na càchí tnúhu-í xii-ndo nàcuáa quide cue ñáyiú ñuyíú-a cuendá tecú tnùní-gá-ndó nàcuáa quide Yá Ndiòxí. Chi ñáyiú-áⁿ òré cuiní-yu cadá-yu ñⁿ sá cadá-yu, te díhna-gá ndátnúhu-yu te òré cúú ñⁿnuú-yu, te sáha firmá-yu ñⁿ tutú te tutú-áⁿ vâ yõo ñⁿ ndacu cáháⁿ sá vâ nándíhi-gá-xi, te ni vâ yõo-gá ndacu nágá tnúhu chido tnùní núú-xí.

¹⁶ Te ducaⁿ ní quide Yá Ndiòxí ndíhi ndíi Àbrahám, chi ní xáhaⁿ-gă xii ndíi nàcuáa cada-gá, te tnúhu-áⁿ cúú-xí cuendá mée ndíi ndíhi cuendá ñⁿ ñani tnáhá ndíi cundecu ñuyíú-a ndéé cuèé-gá. Te núú tûtú-gá càchí-xi sá tnúhu-áⁿ cúú-xí cuendá ñⁿ-ní ñani tnáhá ndíi te ñá díú cuendá ncháá-yu. Te ñani tnáhá ndíi tée cùu cuendá tnúhu-áⁿ cúú Xítohó Jesucristú. ¹⁷ Te na càchí tnúhu-í xii-ndo sá Yá Ndiòxí ní quide ndáá duuⁿ-gá ndíhi ndíi Àbrahám nàcuáa cada-gá. Te sa ní cuu cúmí ciendú ócú úxí cuíá sá dúcáⁿ ní xáhaⁿ Yá Ndiòxí xii ndíi Àbrahám, te dàtnùní ní xáhaⁿ-gă xii ndíi Moisés chido tnùní ndíi nàcuáa cada ñáyiú, te nchaa tnúhu ní chídó tnùní ndíi Moisés ñá túú dàquee tihú-xi tnúhu sá ní xáhaⁿ Yá Ndiòxí xii ndíi Àbrahám nàcuáa cada-gá. ¹⁸ Te núu dicó cuendá nchaa tnúhu sá ní chídó tnùní ndíi Moisés ní náníhí tàhú-ó ñá, te ñá túú-gă xíni ñuhu-xi cada cuendá-ó tnúhu ní xáhaⁿ Yá Ndiòxí xii ndíi Àbrahám cada-gá ní cùu te núu ducaⁿ. Te ndíi-áⁿ ní náníhí tàhú ndíi chi ducaⁿ ní cachí Yá Ndiòxí cada ñaha-gá xii ndíi.

¹⁹ Te nchaa tnúhu ní cáháⁿ ndíi Moisés ní ngódó núú-xí nchicúⁿ

nihnu ñáyiú cuèndá ducaⁿ cùtnuní iní-yu sá ndécú cuèchi-yu, te nchicúⁿ nihnu-ní-yu ndéé ní sáá nduu ní quexio Yaá cúú ñani tnáhá ndíi Àbrahám, chi Yaá-áⁿ ducaⁿ ní xáhaⁿ Yá Ndiöxí quixi-gá cada váha-gá nchaa ñáyiú. Te nchaa tnúhu ní chídó tnùní ndíi Moisés, chi Yá Ndiöxí ní tendaha-gá cue espiritú xínú cuèchi núú-gá ní sáháⁿ-xí ní xitnúhu ñaha-xí xii ndíi nàcuáa danèhé ndíi ñáyiú. ²⁰ Te Yá Ndiöxí ñá túú ní cáháⁿ-gá núú méé ñáyiú, chi ndíi Moisés ní cáháⁿ ndíi yúhu-gá núú-yu, dico cùtnàhá ní cáháⁿ ndíi-gá ndíi Àbrahám chi núú méé núú ñⁿ ndíi ndíi-gá ní xáhaⁿ-gá xii ndíi nàcuáa cada-gá.

Nàcuáa ndíi nchaa tnúhu ní chídó tnùní ndíi Moisés

²¹ Te nchaa nàcuáa ní chídó tnùní ndíi Moisés, ndíi nchaa nàcuáa ní xáhaⁿ Yá Ndiöxí xii ndíi Àbrahám cada-gá, ñá túú dàquee tihú tnáhá-xí. Te núú dicó nánihí tãhú ñáyiú nchicúⁿ nihnu nchaa nàcuáa ní cáháⁿ ndíi Moisés ñá te cudíú-yu núú-gá cuèndá-ni sá nchicúⁿ nihnú-yu nchaa nàcuáa ní cáháⁿ ndíi ni cùu. ²² Te núú tütú Yá Ndiöxí cãchí-xi: “Nchaa nchòhó ñáyiú ndècu ñuyíú ndécú cuèchi-ndo”, duha cãchí-xi. Te ducaⁿ càháⁿ-xí cuèndá quindáá iní-ó Xitohó Jesucristú, te naníhí tãhú-ó chi ducaⁿ ní cachí Yá Ndiöxí cada-gá.

²³ Te cùtnàhá vátá cùndècu ndíi-gá-ó tnúhu Xitohó Jesucristú, te nchicúⁿ nihnu-o nchaa nàcuáa ní cáháⁿ ndíi Moisés, te ní cùtnuní iní-ó sá io ndècu cuèchi-o ní cùu. Te ducaⁿ-ni nchicúⁿ nihnu-o ndéé ní sáá nduu ní quexio Xitohó Jesucristú ñuyíú-a, te ní sándáá iní-ó-gã. ²⁴ Te nchaa tnúhu sá ní chídó tnùní ndíi Moisés ní sanu ichi ñaha-xi xii-o nàcuáa cada-o cùndècu-o, te ducaⁿ-ni sanu ichi ñaha-xi xii-o ndéé ní sáá nduu ní quexio Xitohó Jesucristú ñuyíú-a. Te ducaⁿ ní cuu cuèndá quindáá

iní-ó-gã, te vátá cùndècu-gá cuèchi-o núú Yá Ndiöxí. ²⁵ Te vitna ní ngùndècu ndíi-o tnúhu Xitohó Jesucristú, te ñá túú-gã xíní ñúhu-xi canu ichi ñaha nchaa tnúhu ní chídó tnùní ndíi Moisés.

²⁶ Te vitna tnáhá nchaa nchòhó cúú-ndo ðèhe Yá Ndiöxí, chi ní sándáá iní-ndo Xitohó Jesucristú.

²⁷ Te nchòhó ní sandute-ndo dàtná cãchí-gá, te ndècu-ndo ndíi-gá, te quide-ndo nchaa nàcuáa ní cáháⁿ-gá ndécú-ndo, te io ndècu yíñuhu-ndo núú Yá Ndiöxí dàtná ndécú yíñuhu mee Xitohó Jesucristú. ²⁸ Te vitna ñⁿ-ni cùu-o nchaa-o ndècu-o ndíi Xitohó Jesucristú cuèi cùu-o ñáyiú isràél àdi ñá túú cùu-o, te cuèi cùu-o ñáyiú ñá túú tnáhi dàñá quee núú chíúⁿ pàtróoⁿ-xí àdi cuu-o ñáyiú dàñá queé núú chíúⁿ pàtróoⁿ-xí,

te cuèi téé te cuèi ñadíhí ñⁿ-ni cùu-o nchaa-o ndècu-o ndíi Xitohó Jesucristú. ²⁹ Te nchòhó ndécú ndíi-ndo Xitohó Jesucristú, te cùu-ndo dàtná cue ñani tnáhá ndíi Àbrahám, chi ní nduu tãhú-ndo cùndècu váha-ndo núú Yá Ndiöxí dàtná ní nduu tãhú ndíi-áⁿ ndécú váha ndíi núú-gã, te ducaⁿ chi mee-gã ducaⁿ ní cachí-gá cunduu.

4

¹ Te nchòhó xíní-ndo sã ñⁿ té líhli chi vátá nãgã cuãñaha tãtã-dé cuu cuèndá-dé chi líhli-dé, te ñⁿ-ni cùu-dé ndíi téé xínu cuechi, dico na sáá nduu cuèhnu-dé, te nduu tãhú-dé nchaa sã ndécú ndíi tãtã-dé. ² Te xitó-yu té líhli-áⁿ sãhnú-dé ndéé sáá nduu ní cachí tãtã-dé sã cuãñaha-dé sã ndúú tãhú-dé. ³ Te ducaⁿ sãtnhá-xi cùu nchoo, chi nchicúⁿ nihnu-o nchaa nàcuáa ní cáháⁿ cue téé ní xíndècu ndéé sanaha ni cùu. ⁴ Te ní sáá nduu ní quide Yá Ndiöxí dàtná ní cachí-gá, te ní tendaha-gã Déhe-gá Xitohó Jesucristú ní quixi-gá ñuyíú-a, ní dácácú ñaha ñⁿ ñadíhí te ní cuu-gá ñáyiú, te ní quide-gá nchaa nàcuáa ní cáháⁿ ndíi Moisés. ⁵ Te ducaⁿ ní tendaha Yá Ndiöxí

Déhe-gá cuendá sá vǎ cǎnchícúⁿ nihnu-gá-ó nchǎa nacuáa ní chídó tnúni ndíi Moisés cuendá ducaⁿ te cuu-o déhe Yá Ndióxi.

⁶ Te Yá Ndióxi ní taxi-gá Espíritú Déhe-gá Xítoho Jesucristú ndécú ndíhi-ndo chí cùu-ndo déhe-gá, te Espíritú-áⁿ chindèe ñaha-xi xii-ndo te cǎchí-ndó: “Yòhó Dútú Ndióxi cúu-n Tǎtǎ méé-ndí”, duha cǎchí-ndó. ⁷ Te xǎn cútnúni iní-ndó sǎ cúú-ndó déhe Yá Ndióxi vitna, te ñǎ túú-gǎ cúú-ndó dàtnǎ cue ñáyiú ñǎ túú tnǎhí dàñǎ quee núú chíúⁿ pǎtróoⁿ-xi. Te sǎ dúcǎⁿ cùu-ndo déhe-gá, te Xítoho Jesucristú taxi-gǎ nchǎa sǎ vǎha ní cachí Yá Ndióxi nduu táhú-ndó.

Té Pǎblú ío sǎni iní-dé cuendá nchǎa ñáyiú ndécú ichi Xítoho Jesucristú

⁸ Te cútnǎhá vátǎ quindǎá-gǎ iní-ndó tnúhu Yá Ndióxi ní xinu cuechi-ndo núú nchǎa sǎ cǎchí-yu cùu ndiόxí te ñǎ ndǎá sǎ ndiόxí cúú-xí. ⁹ Te vitna nchòhó cǎháⁿ ndíhi-ndo Yá Ndióxi, te mee-gǎ xǎni ñǎhá-gǎ xii-ndo, te ñǎ túú nduu váha-xi nanchòcǎva iní-ndó càda tucu-ndo nacuáa ní xóo càda-ndo díhna, chí nchǎa xǎáⁿ ñǎ túú védana nǎndíhi-xi. ¹⁰ Te nchòhó cǎnehe íi-ni-ndo nduu cachí-ndó íi, te díu-ní ducaⁿ quide-ndo dava yoó ndíhi dava cuíá, te ndi tnǎhá nduu sácóo vico díu-ni ducaⁿ quide-ndo cǎnehe íi-ndó nduu-áⁿ. ¹¹ Te ío sǎni iní-í cuendá-ndó, chí na cuáhǎⁿ áúⁿ nǎ cuu ní dǎnèhé ñǎhá-í xii-ndo tnúhu Yá Ndióxi.

¹² Te cǎháⁿ ndàhú-í núú nchòhó ñáyiú ndécú ndíhi-í ichi Xítoho Jesucristú sǎ cadǎ-ndó dàtnǎ quidé-í ñǎ túú nchícúⁿ nihnu-í nchǎa tnúhu ní cǎháⁿ ndíi Moisés, chí yúhu quidé-í vitna dàtnǎ ní quide nchòhó ñǎ túú ní cǎnchícúⁿ nihnu-ndo nǎcuáa ní cǎháⁿ ndíi. Te cútnǎhá ní xindecu ndíhi ñaha-í xii-ndo ní quide váha ñaha-ndo xii-í. ¹³ Te sa nǎha-ndo sǎ cútnǎhá ní cǎháⁿ-í tnúhu Xítoho Jesucristú núú-ndó ndéé díhna ní cuhú-í, núú xǎáⁿ ní xindecu ndíhi ñaha-í xii-ndo

ní cǎháⁿ-í tnúhu-gǎ núú-ndó. ¹⁴ Te cuéhé sǎ ní tnǎhá-í-áⁿ cúú-xí ñⁿ cuéhé sǎ vǎ yoó tnǎhí cundee íni-xi cundecu ndíhi ñaha xii-í ní cùu, dico nchòhó chí ío váha ní cǎháⁿ ndíhi ñaha-ndo xii-í, te ñǎ túú ní sǎni cuéhé ní sǎni duha iní-ndó cuendá-í, te ní cǎháⁿ ndíhi ñaha-ndo xii-í dàtnǎ tnúhu sǎ yúhú cùu-í ñⁿ espíritú xínú cuèchi núú Yá Ndióxi àdi datná méé Xítoho Jesucristú. ¹⁵ ¿Te ná ní tnǎhá-ndó núú ñǎ túú-gǎ sǎni váha iní-ndó cuendá-í dàtnǎ ní xóo càda-ndo ndéé díhna ío váha ní xóo caní iní-ndó cuendá-í? Te na cǎchí tnúhu ndǎá-í xii-ndo sǎ ío ní cuu iní ñǎhá-ndó xii-í cútnǎhá ní xindecu ndíhi ñaha-í xii-ndo, te nǎndi sǎ ndécú ndíhi-ndo taxi-ndo xii-í ní cùu, te núú dicó sǎ cúú te ndéé tinúu-ndo tava-ndo te taxi-ndo xii-í ní cùu. ¹⁶ ¿Te nǎa cùu úhú iní ñǎhá-ndó xii-í vitna cuendá sǎ cǎháⁿ-í tnúhu ndǎá tnúhu Yá Ndióxi núú-ndó-áⁿ?

¹⁷ Te ío ñáyiú ío váha cǎháⁿ ndíhi ñaha xii-ndo, dico ñáyiú-áⁿ ñúhú cuéhé iní-yu, chí cuini-yu sǎ vǎ cúú-gǎ cǎháⁿ ndíhi tnǎha-o, chí mee-nǎ-yu cundecu ndíhi-ndo cuini-yu. ¹⁸ Te váha quide ñáyiú cǎháⁿ ndíhi ñaha xii-ndo ndíhi tnúhu yǎñúhu, te núú cuini-yu cadǎ-yu ñⁿ sǎ váha sǎ cúú-xí-ndó. Te ducaⁿ-ni na cadǎ-yu cuéi óré ñǎ túú ndécú ndíhi ñaha-í xii-ndo. ¹⁹ Te nchòhó ñáyiú ní sanu ichi-í ichi Xítoho Jesucristú cǎchí tnúhu-í xii-ndo sǎ quidé-xí íni-í dàtnǎ quidé-xí íni ñⁿ ñadíhi ñaha sa ní tnǎhá óré cacu déhe-xi, te ducaⁿ quide-xi iní-í, chí ío vai sǎni iní-í cuendá-ndó dàtnǎ ní xóo càda-í ndéé díhna, te ducaⁿ-ni càda-í ndéé ná sǎá nduu càda-ndo nchǎa nacuáa cǎháⁿ Xítoho Jesucristú. ²⁰ ¿Te ío váha cada-xi te núú dicó tnáví sa ndécú ndíhi ñaha-í xii-ndo cuendá cǎháⁿ-í núú-ndó nǎcuáa cada-ndo, te ñǎ cútnúni iní-í nǎsa cada-í cuendá-ndó!

Cuendá ndíi Àgár ndíhi ndíi Sǎrǎ

21 Te nchòhó ñáiyu cuení canchicúⁿ nihnu nchaa tnúhu ní cáháⁿ ndíi Moisés, ¿náa ñá túú təcú tnùní-ndó nàcuáa càháⁿ-xi tnúhu ní chídó tnùní ndíi? 22 Chi cächí tnúhu ní chídó tnùní ndíi-áⁿ sá ndíi Abrahám ní xindecu úú déhe ducuⁿ ndíi, te ñⁿ-dé ní cuu déhe ndíi ndíhi ñadíhi méé ndíi ndíi Sără, te ingá-dé ní cuu-dé déhe ndíi ndíhi ñⁿ ndíi ní xinu cuechi nũ-yu ní xínani Àgár. 23 Te sá dúcáⁿ ñi cacu déhe ndíi Sără, chi mee Yá Ndiòxí ní cundáhú iní ñáhá-gá xii-aⁿ, chi ducaⁿ ñi cachí-gá cada-gá. Dico ndíi ní xinu cuechi-áⁿ chi ducaⁿ tnàhí ní nduu táhú ndíi-áⁿ sá cóó déhe ndíi. 24 Te na cächí tnúhu-í xii-ndo ná cúú sá nánèhé ndi ndúú cue ndíi ñíhi-áⁿ. Te úú xito ní cáháⁿ Yá Ndiòxí nàcuáa cada-gá, te ñⁿ ndíi-áⁿ nánèhé ndíi nàcuáa ní cáháⁿ Yá Ndiòxí xito díhna nuu, te ingá tucu ndíi-áⁿ nánèhé ndíi nàcuáa ní cáháⁿ tucu-gá xito cùu uú. Te ndíi Àgár-áⁿ nánèhé ndíi nàcuáa ní xáhaⁿ Yá Ndiòxí xii ndíi Moisés yucu Sinái cada ñáiyu, te nchaa ñáiyu nchicúⁿ nihnu nchaa tnúhu-áⁿ cúú-yu dàtná déhe ndíi Àgár téé ní xinu cuechi, chi téé-áⁿ ñá túú tnàhí ní dàñá-dé quee-dé núú chíúⁿ pàtróóⁿ-dè, te ducaⁿ sàtnahá-xi cúú-yu chi nchicúⁿ nihnú-yu nchaa nàcuáa ní xáhaⁿ Yá Ndiòxí xii ndíi Moisés. 25 Te tnúhu Àgár queé-xi: Yucu Sinái, te yucu-áⁿ yíndèhu-xi nacióⁿ Àrabiá. Te ndíi Àgár-áⁿ nánèhé tucu ndíi cue ñáiyu ndècu ñúú Jerusálén, chi ñáiyu-áⁿ ndécú-ñi-yu dàtná ní xindecu ndíi Àgár ndíhi déhe ndíi, chi cue ndíi-áⁿ ñi cuu cue ndíi ñáiyu ñá túú tnàhí ní dàñá quee núú chíúⁿ pàtróóⁿ-xi, te ducaⁿ sàtnahá-xi cùu ñáiyu-áⁿ chi nchicúⁿ nihnu-ñi-yu nchaa nàcuáa ní cáháⁿ ndíi Moisés. 26 Dico nchoo ñi nduu táhú-ó cunde-cu-ó ñúú Jerusálén sáa núú ndécú Yá Ndiòxí, te vitna chi ñá túú-gá nchicúⁿ nihnu-o nchàa nàcuáa ní cáháⁿ ndíi Moisés. 27 Te duha càháⁿ-í, chi núú tütú Yá

Ndiòxí cächí-xi:

Yòhó ñaha ní nduu táhú vǎ cóó déhe-xi ní cùu, vitna cana saa-n sǎ cùdǎ ñí-n cuèi vátá quini-gá-n nǎsa càcu ñⁿ landú.

Te cuèi ní cuu táhú-n sǎ vǎ cóó déhe-n ní cùu dico ío-gá titní déhe-n còo dacúúxí xíchí ñi cuu táhú tnàhí sǎ cóó déhe-xi.

Duha cächí-xi núú tütú-gá. 28 Te nchoo cuè ñáiyu ndècu ichi Xítóhó Jesucristú vitna cùu-o datná ndíi Isàác, chi ndíi-áⁿ ñi cacu ndíi, chi mee Yá Ndiòxí ní cachí-gá sǎ cǎcú ndíi. Te ducaⁿ sàtnahá-xi cùu nchoo chi ní nduu-o déhe-gá vitna chi ducaⁿ ñi cachí tucu-gá cunduu.

29 Te déhe ndíi Àgár ní nduu táhú tnàhí ndíi sǎ cǎcú ndíi ñuyíú-a, te ndíi-áⁿ ñi cuu úhú iní ndíi ndíi Isàác, te ndíi Isàác-áⁿ chi Espíritú Yá Ndiòxí ní quide ní cacu ndíi. Te ducaⁿ sàtnahá-xi cùu vitna, chi nchaa nchoo ñáiyu ndècu ndíhi Espíritú Yá Ndiòxí cúú úhú iní ñáhá ñáiyu xii-o. 30 Te núú tütú Yá Ndiòxí cächí-xi: “Chí nàcuícuⁿ xíchí xínú cuèchi ndíhi déhe-xi na nùhú-yu, chi déhe xíchí xínú cuèchi-áⁿ ñá túú ná ñíhi-dé nduu táhú-dé, chi mee-ni déhe ñaha ndècu vehe-xi nduu táhú-dé sǎ cuañaha tǎtá-dé”, duha cächí-xi núú tütú-gá. 31 Te nchoo cuè ñáiyu ndècu ichi Xítóhó Jesucristú ñá túú-gǎ cúú-ó dàtná cúú déhe ndíi ní xinu cuechi-áⁿ, chi ní cuu-o vitna datná cúú ndíi ní nduu táhú nchaa sǎ ñi sǎñaha tǎtá-xi-áⁿ. Te ducaⁿ ñi cuu, chi Yá Ndiòxí ní dáçcu ñaha-gǎ xii-o cuèndá sǎ vǎ cǎnchicúⁿ nihnu-gá-ó nchàa nàcuáa ní cáháⁿ ndíi Moisés.

5

Canchicúⁿ nihnu-ñi-o ichi Xítóhó Jesucristú

1 Te Xítóhó Jesucristú ní quide-gá nàcuáa vǎ cǎni ñí-ó sǎ nánihí tǎhú-ó te núu na cǎnchicúⁿ nihnu-o nàcuáa ní cáháⁿ ndíi Moisés, te ñi-ñi ducaⁿ cǎni ñí-ó cunde-cu-ó te vǎ ngòo cǎni ñí-ó sǎ nánihí tǎhú-ó te núu na

cànchicúⁿ nihnu-o càda-o nacuaá ní cáháⁿ ndíi, chí núu ducaⁿ na càda-o te ío dandòho-o mee-o datná ní xóo ndoho-o cùtnàhá vátá cùndècu-gá-ó ichi-a.

² Te yúhú té Pàblú cuíní-í sá cùndedóho-ndo ìiⁿ tnúhu na càháⁿ-í-a. Te núu nchòhó cuáha-ndo seña ñii-ndo cuendá sá sàndáá iní-ndó nàcuáa ní cachí ndíi Moisés cada-ndo, te núu ducaⁿ na càda-ndo ña, te àuⁿ nã cuu ndècu-ndo ichi Xítohó Jesucristú te núu ducaⁿ. ³ Te datná ní cachí-í xii-ndo, te ñu-ní ducaⁿ càháⁿ tucu-í vitna sá núu ndèda-ni càa ìiⁿ téa na cuáha-dé seña ñii-dé, te xini ñuhu-xi sá dácuití tãú-dé cada-dé nchaa nacuaá ní cáháⁿ ndíi Moisés. ⁴ Te nchaa nchòhó ñáiyu sàni iní sá ñã túú-gã cuéchi-xi ndècu núú Yã Ndiòxí cuendá sá nchìcúⁿ nihnu-ndo nchaa nacuaá ní cáháⁿ ndíi Moisés, ñã túú-gã ndécú-ndó ndíi Xítohó Jesucristú, te ni Yã Ndiòxí ñã túú-gã cùndàhú iní ñáhã-gã xii-ndo càda váha ñaha-gã. ⁵ Dico nchaa nchoo ñáiyu sàndáá iní ñáhã xii-gã cùdiu-o núú-gã, chí chindee ñaha Espiritú-gã xii-o, te ndètu cahnu-ná-ó sãã nduu cñaha núú Yã Ndiòxí xii-o sã cùdiu-o núú-gã. ⁶ Te nchoo cuè ñáiyu ndècu ndíi Xítohó Jesucristú ìiⁿ-ni quide-xi cuéi na cuáha-o seña ñii-o àdi vá cuáha-o, chí ñã túú chindee ñaha-xi xii-o nacuaá cundecu váha-o ndíi-gã. Te ìiⁿ-dii díi-ni sá xini ñuhu-xi quindáá iní-ó Xítohó Jesucristú, te núu ducaⁿ na càda-o te cuu iní-ó cuè tñaha ñáiyu-o.

⁷ Te nchòhó ío váha quide-ndo ndecu-ndo ichi Yã Ndiòxí ní cùu, te vitna cùñúhu-í sá ñã túú-gã sàndáá váha iní-ndó tnúhu-gã, te ducaⁿ quide-ndo chí ndècu ñáiyu sànu ichi ñaha xii-ndo ingá ichi. ⁸ Te ñã díú Yã Ndiòxí Yã ní cáháⁿ ñáhã xii-ndo ducaⁿ ni cachí-gã cada-ndo sã vã quindáá-gã iní-ndó tnúhu-gã. ⁹ Te nchòhó xini-ndó sã núu luha lev-adurá ná quíhu yuchi te dàndaa-xi.

Ducaⁿ sãtnahã-xi cùu ñáiyu dandahú ñáhã xii-ndo, chí cuíní-yu dácuita nihnu ñáhã-yu xii-ndo nchaa-ndo. ¹⁰ Te yúhú cùtnùni ndáá iní-í sá Xítohó Jesucristú chindee ñaha-gã xii-ndo cuendá sá ñã túú nãgã tnúhu quindáá iní-ndó, dico nchaa ñáiyu ducaⁿ dandahú ñáhã xii-ndo nacháhu-yu núú Yã Ndiòxí nchaa sá quidè-yu cuéi nã-gã ñáiyu cùu-yu.

¹¹ Te càchí tnúhu-í xii nchòhó ñáiyu ndècu ndíi-í ichi Yã Ndiòxí sá núu dicó dānehé-ni-í ñáiyu sá cuáha-yu seña ñii-yu datná ní cachí ndíi Moisés ñã, te vá yóo cuu úhú iní ñáhã xii-í ní cùu, te ni vã túu úhú iní-yu cuendá sá ñi xihí Xítohó Jesucristú núú cùrúxí ní cùu. ¹² Te nchaa ñáiyu dàsatú iní ñáhã xii-ndo sã cuáha-ndo seña ñii-ndo, te váha-gã sã nã càdã-yu mèe-yu ìiⁿ tnúndòho, te ñã díú sã dúcãⁿ cànuichi ñahã-yu xii-ndo cùndecu-ndo.

¹³ Te nchòhó ñáiyu ndècu ndíi-í ichi Xítohó Jesucristú ñu-gã ní taunihnu ñaha-gã xii-ndo cuendá sã vã cànchicúⁿ nihnu-gã-ndó nchaa nacuaá ní cáháⁿ ndíi Moisés, dico vá cãní iní-ndó sã sã dúcãⁿ ñi taunihnu ñaha-gã xii-ndo, te cuu-ni cada-ndo nãndi sã cuèhé sã dúhá vèxi iní-ndó, dico cuu iní tnáhã-ndó ìiⁿ ìiⁿ-ndo te chindee tñaha-ndo. ¹⁴ Chí ducaⁿ càháⁿ Yã Ndiòxí sá cúú iní-ó cuè tñaha ñáiyu datná cúú iní-ó mèe-o. Te núu ducaⁿ na càda-o, te quide-o nchaa nacuaá tãú-xi cada-o datná càháⁿ nchaa tnúhu ní chídó tnùni ndíi Moisés. ¹⁵ Te núu nchòhó cúú úhú iní tnáhã-ndó ndècu-ndo, te ñã túú quide váha-ndo te núu ducaⁿ quide-ndo, dico yúhú càchí-í sã vã dúcãⁿ-gã cada-ndo cùndecu-ndo cuendá sã vã dácuita nihnu tñaha-ndo.

Nàcuáa sàni iní ñáiyu ndècu ichi cuèhé ichi duha ndíi nàcuáa sàni iní ñáiyu ndècu ndíi Espiritú Yã Ndiòxí

¹⁶ Te na càchí tnúhu-í xii-ndo sã càdã-ndó nchaa nacuaá culní

mée Espiritú Yă Ndiöxí cada-ndo, te ducaⁿ te vá cání-gă iní-ndó càda-ndo nándi nchaa sá cuèhé sá dúhá sàni iní mée-ndó. ¹⁷ Chi nchaa xǎⁿ ñá túú tñhá tñuhu-xí ndihi Espiritú Yă Ndiöxí. Te ñu-ni ducaⁿ quide Espiritú Yă Ndiöxí, chi ñá túú tñhá iní-xi nchaa sá cuèhé sá dúhá sàni iní-ndó. Te sá dúcáⁿ ñá túú tñhá tñuhu tñaha-xi xǎⁿ ñá túú ñihí ndéé-ndó càda-ndo ñⁿ sá vâha sàni iní-ndó càda-ndo. ¹⁸ Te núu quide-ndo nchaa nacuaá sànu ichi ñaha Espiritú Yă Ndiöxí, te ñá túú-gă táxi tñùní ñáhá nchaa tñuhu ní chídó tñùní ndíi Moisés xii-ndo.

¹⁹ Te nchaa ñáyiu xini-yu nchaa nacuaá quide ñáyiu quide cuehé quidé dũha. Te duha quidé-yu: Cue téé cãháⁿ ndihi-güedé ñáyiu ñihí te ñá díú ñàdihí-güedé cű-yu, te ñu-ni ducaⁿ xiquide cue ñáyiu ñihí, te nándi-gă nchaa sá cuèhé sá dúhá cuáháⁿ véxi-yu quidé-yu. ²⁰ Te quide cahnú-yu nchaa sá cãchí-yu cű ndiöxí te ñá ndáá sá ndiöxí cű-xí, te quide nduu tñhá-yu, te cű úhú iní tñáhă-yu, te nãá-yu, te cű cuiñú tñáhă-yu, te ío yáchí cűdêéⁿ-yu, te ndúcú-yu mee-ni sá cű-xí mée-yu, te ñá túú cű ñⁿnuú-yu cundecú-yu, te quide ñⁿ tñhá-yu. ²¹ Te cű cuedú iní-yu nchaa sá ndécú ndihi dava-gă-yu, te sãhni tñhá-yu, te ío quihú-yu, te ndi cuu ndi cuú-yu quidé-yu nchaa sá cuèhé sá dúhá, te nándi-gă nchaa sá cuèhé sá dúhá quidé-yu. Te sa cãchí tñuhu-í xii-ndo sá nchãá ñáyiu ducaⁿ xiquide vá ndúú tãhú-yu cundecú-yu núu ndécú Yă Ndiöxí táxi tñùní-gă.

²² Dico Espiritú Yă Ndiöxí chindèe ñaha-xi xii-o cuu iní tñhá-ó, te cű ñⁿ iní-ó ndècu-o, te ío váha cű iní-ó, te cãhnu iní-ó, te váha iní-ó, te cundahú iní tñhá-ó, te quide ndáá-ó ndècu-o. ²³ Te ndáhú iní-ó, te quide-o nchaa nacuaá tàú-ó càda-o, te nchaa xǎⁿ chindèe ñaha Espiritú Yă Ndiöxí quidé-ó, te núu ducaⁿ quide-o, te vá yõ ñⁿ-gă cãháⁿ

sá ñá túú quide váha-o ndècu-o. ²⁴ Te nchoo cű ñáyiu ndècu ndihi Xitohó Jesucristú, sa naha-o sá ñi xihí-gă núu cürúxí sá cuendá-ó, núu xǎⁿ duuⁿ duuⁿ ní dáñá-ó nchaa ichi cuehé ichi duha, te ñá túú-gă táxi tñùní ñáhá ñⁿ sá cuèhé sá dúhá sá ñi xõo caní iní-ó ní cű. ²⁵ Te vitna ní ngündecu ndihi-o Espiritú Yă Ndiöxí chindèe ñaha-xi, te xini ñuhu-xi sá cãdá-ó nacuaá sànu ichi ñaha Espiritú-gă cada-o.

²⁶ Te vá cãdá cãhnu-o mee-o, te vá ndúcú-ó plètú, te ñi vá cű cuedú iní-ó sá ndécú ndihi tñaha ñáyiu-o.

6

Chindee tñaha-o ñⁿ ñⁿ-o

¹ Te nchòhó ñáyiu ndècu ndihi-í ichi Xitohó Jesucristú cãchí tñuhu-í xii-ndo sã núu ñⁿ ñáyiu ndècu ndihi-ndo ichi-gă ní quidé-yu ñⁿ sá ñá túú tàú-yu cadá-yu núú-gă, te nchòhó ñáyiu quide váha ndècu ndihi Espiritú Yă Ndiöxí cãháⁿ-ndó dõho cue ñáyiu ducaⁿ xiquide-áⁿ cuendá nucúnu ichí-yu, te vii vii cãháⁿ ndihi-ndõ-yu, te ío coto-ndo mée-ndo cuendá sá vã cãdá-ndó ñⁿ sá ñá túú tàú-ndó càda-ndo núú-gă. ² Te ío chindee tñaha-ndo, te cuáha tñaha-ndo tñuhu ndee iní cundecu-ndo cuendá nchaa sá yãha-ndo. Te núu ducaⁿ na càda-ndo, te quide-ndo nchaa nacuaá ní cãháⁿ Xitohó Jesucristú cada-o.

³ Te núu ío ñⁿ-ndo cãchí-ndó sá ío váha quide-ndo ndècu-ndo ichi Yă Ndiöxí te ñá ndáá ñá, te dícó dándàhú-ndó mée-ndo sá dúcáⁿ quide-ndo. ⁴ Te ndi ñⁿ ndi ñⁿ càda cuendá-ndó núu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cű ñⁿ iní-ndó sá cű-xí mée-ndo, te vá cání iní-ndó sá quidé vãha-gă-ndó dácúxí dava-gă-yu. ⁵ Chi tàú-ó sá ndi ñⁿ ndi ñⁿ càda cuendá-ó sá nacuaá ndècu-o.

6 Te nchaa nchòhò ñáyiù dàcuaha tnúhu Yá Ndiòxí chindee-ndo cuè téé dàcuaha ñaha xii-ndo tnúhu-gá cuañaha-ndo nāndi sá xíní ñùhu-güedé.

7 Te vá dándàhú-ndó mēe-ndo cundecu-ndo, chi vá cúú cùdiqui ndeé-ó Yá Ndiòxí, chi nchòhò xíní-ndó sá ñù na càda váha-o cundecu-o, te cùu-xi ñⁿ sá váha sá cúú-xí-ó, dico núu vá cáda váha-o ña, te ío ndoho-o te núu ducaⁿ na càda-o. 8 Te núu quide-o nchaa sá cuèhé sá dúhá sàni iní-ó, te ñiu-ni xíáⁿ dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espiritú Yá Ndiòxí xii-o, te cundecu ndihí-o Yá Ndiòxí ni caa ni quíhíⁿ. 9 Te xini ñuhu-xi vá dáñá ndeé-ó càda váha-o cundecu-o, te ducaⁿ te sáá nduu càda váha ñaha Yá Ndiòxí xii-o, te núu vá ná tùhú iní-ó càda váha-o cundecu-o. 10 Te cada-o sá váha sá cúú-xi nchaa tnaha ñáyiù-o vitna ndecu-o ñuyú-a, te ío-gá tàú-ó chindee-o cue ñáyiù ndècu ndihí-o ichi Xítohó Jesucristú.

Tnúhu ndeé núú nǐ ndihí-ná

11 Te cundehe-ndo sá ndāa ndāa lètrá téé-í núú tütú-a sá cúú-xí-ndó. 12 Te nchaa ñáyiù quide yicá sá cuāha-ndo sēñá ññ-ndo dàtná ní cachí ndíi Moisés, ñáyiù-áⁿ cúú-yu ñáyiù cuíní cudíu núú tnaha ñáyiù-xi. Te ducaⁿ quidé-yu cuendá sá vā ndóhō-yu cuendá nchaa tnúhu sá dánèhé ñáhá sá ñí xíhí Xítohó Jesucristú núú cùrúxí. 13 Te ni ñáyiù sa ní ngúndecu ndihí sēñá ññ-xi ñá túú quidé-yu nchaa nàcuáa ní cáháⁿ ndíi Moisés, dico mēe-yu cuíní-yu sá cuāha-ndo sēñá ññ-ndo. Te ducaⁿ quidé-yu chi quide cahnú-yu mēe-yu núú nchaa ñava-gá ñáyiù. 14 Te yúhú chi ñá túú quide cahnú-í mēe-í cuendá nchaa sá quídè-í, chi mee-ni sá ño cùu váha iní-í sá Xítohó Jesucristú ní xíhí-gá núú cùrúxí cuendá-ó. Te ñiu cuendá sá ñí xíhí-gá ñá túú-gā ndécù-í ichi cuèhé ichi duha, te ni ñá túú-gā táxi

tnùnì ñáhá nì ññ sá cuèhé sá dúhá xii-í. 15 Te ñá túú ná chindee ñaha-xi xii-o cuéi na cuāha-o sēñá ññ-o àdi vá cuāha-o, chi ndècu ndihí-o Xítohó Jesucristú, te ní nduu-o dàtná ññ ñáyiù saa, te xíáⁿ cúú-xí sá ño-gá xíní ñùhu-xi. 16 Te xicáⁿ táhù-í núú Yá Ndiòxí sá nchāá nchòhó ñáyiù quide nchaa nacuáa càháⁿ-í-a cundecu nahi-ndo, nchòhó ñáyiù cùu cuendá Yá Ndiòxí dàtná ñáyiù isràél chi ñáyiù-áⁿ ñí cachí-gá sá cúú cuendá-gá. Te mee-gā ío cundàhú iní ñáhá-gā xii-ndo chindee ñaha-gā.

17 Te není vitna cuíní-í sá vā yōo ññ-gā chidácá nihnu ñaha xii-í cuendá chiùⁿ quide-í, chi yayacáⁿ sa ní nduu tìlòhó ññ-í cuendá sá ndóhō-í cuendá Xítohó Jesucristú.

18 Te nchòhó ñáyiù ndècu ndihí-í ichi Xítohó Jesucristú xicáⁿ táhù-í núú-gā sá ño na chindee ñaha-gā xii-ndo nchāa-ndo. Te ducaⁿ na cunduu. Te ío chí cáda ndèe iní-ná vitna.

TUTÚ NÍ CADÚHA TÉ PÁBLÚ QUIHIⁿ NDAHA ÑÁYIU ÑUÚ ÉFESÚ

*Té Páblú cáduha-dé tutú quihiⁿ
ndaha ñáyiú xĩndecu ichi Xítohó Jesu-
crístú ndécú ñúú Éfesú*

¹ Yúhú té Páblú ní tendaha ñaha Yá Ndiöxí cáháⁿ-í tnúhu Xítohó Jesucristú núú ñáyiú, chi ducaⁿ ní cachí Yá Ndiöxí cunduu, te vitna cadúha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndiöxí xĩndecu ñúú Éfesú, te diu-ni nchòhó cúú-ndó ñáyiú sándáá iní ñáhá xii Xítohó Jesucristú.

² Te xicáⁿ táhú-í núú Dütú Ndiöxí Yaá cúú Tátá-ó, ndihi núú Xítohó Jesucristú sá ná chĩndee chitúu ñaha-gá xii-ndo, te ducaⁿ ndi nduú-gá ná cádá te ío váha cuu iní-ndó cundecu-ndo.

*Espíritú Yá Ndiöxí chĩndèe ñaha-xi
xii-o chi ndècu ndihi-o Xítohó Jesu-
crístú*

³ Te cachí-ó sá ïo càhnu cuu Yá Ndiöxí Yaá cúú Tátá Xítohó Jesucristú, te ndéé andiú quide Yá Ndiöxí nchaa sá váha sá cúú-xi-ó cuendá sá ndécú ndihi-o Espíritú-gá, te ducaⁿ quide-gá chi ndècu ndihi-o Xítohó Jesucristú.

⁴ Te ndéé cútñahá vátá ngáva-gá ñuyúú ní cachí Yá Ndiöxí sá nchóó cùu-o ñáyiú cùu cuendá-gá, te ducaⁿ ní cachí-gá sá cuendá Xítohó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gá, te ducaⁿ te vá cundècu cuèchi-o. ⁵ Te Yá Ndiöxí ío cùu iní ñáhá-gá xii-o núú xiáⁿ ducaⁿ ní cachí-gá ndéé cútñahá vátá ngáva-gá ñuyúú sá nchóó nduu-o déhe-gá. Te sá cuendá nchaa sá cádá Xítohó Jesucristú sá cúú-xi-ó, xiáⁿ ducaⁿ ní cachí Yá Ndiöxí, te

ducaⁿ ní cachí-gá chi ducaⁿ tnàhí ní sani iní-gá cunduu. ⁶ Te xiáⁿ núú xini ñuhu-xi sá nchóó càchí-ó sá ïo càhnu cuu Yá Ndiöxí, chi ío cundahú iní ñáhá-gá chĩndèe ñaha-gá xii-o. Te ducaⁿ quide-gá chi ndècu ndihi-o Xítohó Jesucristú Yaá ío cùu iní-gá. ⁷ Te Yá Ndiöxí ío cùu iní ñáhá-gá xii-o núú xiáⁿ Xítohó Jesucristú ní

sati níñi-gá te ní xihí-gá cuendá dacácu nihnu ñaha-gá xii-o núú ùhú núú ndàhú, te ducaⁿ càda cahnu iní-gá nchaa yicá cuèchi-o.

⁸ Te Yá Ndiöxí ío cundahú iní ñáhá-gá chĩndèe ñaha-gá xii-o, nàcuáa ngúndecu ndihi-o nchaa sá xini tnùni-ó te ducaⁿ te cuu-o ñáyiú tècú tnùni. ⁹ Te Yá Ndiöxí ní dánèhé ñáhá-gá xii-o nchaa sá ndúú yùhu, nchaa sá ní sani iní-gá cada-gá. Te ducaⁿ ní quide-gá chi ducaⁿ ní sani iní-gá cunduu. ¹⁰ Te sá ní sani iní-gá cada-gá te dacuitíí sá cádá-gá ná sáa nduu, te na sáa nduu-áⁿ te mee-gá cada sá Xítohó Jesucristú quindaha-gá nchaa sá ío andiú, ndihi nchaa sá ío ñuyúú-a.

¹¹ Te nchóo ní nduu táhú-ó ní nduu-o ñáyiú cùu cuendá Yá Ndiöxí chi ndècu ndihi-o Xítohó Jesucristú. Te ducaⁿ ní cuu chi ducaⁿ tnàhí ní sani iní Yá Ndiöxí cunduu. Te nchaandiú túhú sá quide-gá, quide-gá nàcuáa sáni iní méé-gá cunduu. ¹² Te ducaⁿ ní cuu cuendá sá nchùhú ñáyiú díhna nuu ní sándáá iní tnúhu Xítohó Jesucristú cáháⁿ-ndí sá ïo càhnu cuu mee Yá Ndiöxí cuendá nchaa sá váha quide-gá. ¹³ Te nchòhó tucu cútñahá ní xĩndedóho-ndo tnúhu ndáá tnúhu sá cáháⁿ nàcuáa naníhí táhú-ó ní cuu ñnuu-ndo ndihi Xítohó Jesucristú chi ní sándáá iní-ndó-gá. Te xiáⁿ cútñuni sá nchòhó ní nduu-ndo ñáyiú cùu cuendá Yá Ndiöxí, chi ní ngúndecu ndihi-ndo Espíritú-gá sá ní cachí-gá taxi-gá. ¹⁴ Te sá ndécú ndihi-o Espíritú Yá Ndiöxí xiáⁿ cútñuni sá ndáa nduu táhú-ó cundecu-o ndihi-gá ná sáa nduu nàcuaca

ñaha-gá xii nchaa nchoo ñáyiú cùu cuendá-gá, te sá dúcáⁿ càda-gá nùu xiáⁿ tàú-ó cächí-ó sá ïo càhnu cuu-gá.

Té Páblú xicáⁿ táhú-dě núú Yá Ndiöxí cuendá cue ñáyiú ndècu ichi-gá

¹⁵ Te yúhú ñihí-í tnúhu sá nchòhó ïo váha sàndáá iní-ndó Xítohó Jesucristú, te nchaa ñáyiú cùu cuendá Yá Ndiöxí ïo cùu iní-ndó-yu.

¹⁶ Te xiáⁿ nùu ñá túú dàña ndeé-í ndácáⁿ táhú-í núú-gá cuendá-ndó, te ïo xicáⁿ táhú-í ¹⁷ núú Yá Ndiöxí Yáá cùú Tàtá Xítohó Jesucristú cuendá-ndó. Te ñu-ni Yá Ndiöxí cùú-gá Yáá ïo càhnu cuu. Te xicáⁿ táhú-í núú Yá Ndiöxí sá mée-gá ná cáda sá Espiritú-gá chindee ñaha-xi xii-ndo cuendá cuu-ndo ñáyiú tecú tnùni, te na càda-xi sá cùtnùni iní-ndó nàcuáa sàni iní Yá Ndiöxí. ¹⁸ Te ducaⁿ xicáⁿ táhú-í núú Yá Ndiöxí cuendá-ndó, cuendá sá nchòhó tecú tnùni-ndó nàcuáa ndùu tnúhu ndee iní ní taxi-gá ní ngúndecu ndihi-ndo cùtnhá ná cáháⁿ ñáhá-gá xii-ndo. Te ducaⁿ cùtnùni tucu iní-ndó sá ncháá sá ní cachí-gá taxi-gá nduu táhú nchoo cué ñáyiú cùu cuendá-gá cùú-xi mée cuí-ni sá ïo-gá váha. ¹⁹ Te cùtnùni tucu iní-ndó sá Yá Ndiöxí ïo càhnu cuu-gá quidé-gá nchaa núú sá váha sá cùú-xi nchòo ñáyiú sàndáá iní ñáhá xii-gá, chi quide-gá sá vǎ yǎo tnáhi ndàcu cada sá cùú-xi-ó dàtná ní quide-gá ²⁰ ní dándótó-gá Xítohó Jesucristú cùtnhá ná ní xihí-gá. Te ní taxinucóo-gá Xítohó Jesucristú xio cùha-gá táxi tnùni-gá. ²¹ Te Xítohó Jesucristú ïo-gá cùnúu-gá dàcúxí nchàa núú cué espíritu, ndihi dàcúxí nchàa cue téé yìndaha ñáyiú, ndihi dàcúxí nchàa dava-gá cue téé cùnuu. Te cuéi vitna te cuéi ndéé núú cuáháⁿ núú vǎxi ducaⁿ-ni ïo cunu-gá taxi tnùni-gá. ²² Te mee Yá Ndiöxí ní quide-gá sá Xítohó Jesucristú taxi tnùni-gá nchaandi túhú sá ïo, te ñu-ni mee Yá Ndiöxí ní cachí-gá sá ncháá ñáyiú cùu

cuendá-gá quìndaha ñaha Xítohó Jesucristú. ²³ Te cada iní-ó sá ncháá ñáyiú cùu cuendá Yá Ndiöxí cùú-yu yiqui cùñú Xítohó Jesucristú, chi ñⁿ-ni cùú-yu ndihi-gá, te mee-gá táxi tnùni-gá nchaandi túhú sá ïo.

2

Yá Ndiöxí ïo cùndahú iní ñáhá-gá xii-o nùu xiáⁿ ní dàcácu nihnu ñaha-gá

¹ Te nchòhó cùú-ndó dàtná ñáyiú ní xihí cuendá nchaa sá cuèhé sá dúhá quide-ndo ní cuu, dico vitna cada iní-ndó sá dàtná ní ndoto-ndo chi ní nduu táhú-ndó cùndecu-ndo ndihi Yá Ndiöxí ní caa ní quíhíⁿ.

² Te ducaⁿ ní xíndecu-ndo ichi cuèhé ichi duha, chi ní cànchicúⁿ nihnu-ndo nchàa sá cuèhé sá dúhá ïo ñuyú-a, te ní xóo cada-ndo nchàa nacuáa càháⁿ sácúihná, te ñu-ni sácúihná-áⁿ táxi tnùni-xi nchaa dava-gá espíritu cùndihi-xi, te ñu-ni-xi ndècu ndihi-xi nchaa ñáyiú ñá túú cuíni tnúhu càháⁿ Yá Ndiöxí, te dàcáháⁿ ñáhá-xi xii-yu cuendá cùndecu-ni-yu ichi cuèhé ichi duha. ³ Te nchaa-o dùcaⁿ ní xóo cada-o dàtná quidé cué ñáyiú-áⁿ, chi ní xóo cada-o nchàa sá cuèhé sá dúhá ní xóo caní iní-ó, te nándi-gá nchaa sá cuèhé sá dúhá ní xóo cahu iní-ó ní xóo cada-o, núu xiáⁿ tàú-ó sá dándòho ñaha Yá Ndiöxí xii-o ní cùu datná tàú-xi dándòho-gá nchaa ñáyiú ducaⁿ ndècu ichi cuèhé ichi duha-áⁿ. ⁴ Te Yá Ndiöxí ïo cùu iní ñáhá-gá xii-o núu xiáⁿ ní cùndahú iní ñáhá-gá xii-o ⁵ cuéi cùu-o datná ñáyiú ní xihí sá cuendá nchaa sá cuèhé sá dúhá quide-o ní cuu. Te ducaⁿ ní quide-gá ní cùndahú iní ñáhá-gá xii-o cuendá cùndecu-o ndihi Xítohó Jesucristú vitna, te cuu ñⁿnuu-o ndihi-gá. Te sá cuendá-ni sá cùndahú iní ñáhá Yá Ndiöxí xii-o xiáⁿ ní quide-gá nàcuáa nchoo nànihí tàhú-ó. ⁶ Te cada iní-ó sá dàtná ní quide Yá Ndiöxí cùtnhá ní dándótó-gá Xítohó Jesucristú cùtnhá ná ní xihí-gá ducaⁿ ní quide ñaha-gá xii-o chi ndècu-o ndihi-gá

vitna. Te Xítohó Jesucristú sa ndècu-gá andïu nõu ndécú Yá Ndiõxí. Te cada iní-ó sá Yá Ndiõxí sa ní quide-gá sá nchóó ní ngúndecu túu-o ndïhi Xítohó Jesucristú, chi ío váha ndècu-o vitna. ⁷ Te Yá Ndiõxí quidé váha ñaha-gã xii-o vitna cuendá sá ná sàá nduu, te ñiu-ni mee-gã cada te cutnùní iní nchaa ñáyiú sá ío cùu iní ñáhá-gã xii-o, te ducaⁿ ío chìndee chitúu ñaha-gã xii-o cuendá sá ndécú ndïhi-o Xítohó Jesucristú. ⁸ Te Yá Ndiõxí ío cùndahú iní ñáhá-gã xii-ndo nõu xíáⁿ ní quide-gá sá nchòhó naníhí tàhú-ndó. Te ducaⁿ ní quide-gá chi ní sándáá iní-ndó-gã. Te ñá ñíú sá cuendá ìⁿ chiuⁿ ni quide-ndo ducaⁿ ní naníhí tàhú-ndó, chi mee Yá Ndiõxí ní cuiní-gá sá dicó-ni ducaⁿ naníhí tàhú-ndó. ⁹ Te mee Yá Ndiõxí ní cachí-gá sá ñá ñíú cuendá ìⁿ chiuⁿ quide-o naníhí tàhú-ó, te ducaⁿ ní cachí-gá cuendá sá vã cáda càhnu-o mee-o. ¹⁰ Te Yá Ndiõxí ní quide ñaha-gã xii-o datná ìⁿ ñáyiú saa cuendá sá ní tnahá tnúhu-o ndïhi Xítohó Jesucristú, te ducaⁿ ní quide-gá cuendá sá cáda-ó mèe-ni sá váha. Te Yá Ndiõxí ducaⁿ tnàhí ní sani iní-gá cunduu sá nchóó cùu-o ñáyiú cada mee-ni sá váha.

Xítohó Jesucristú quidé-gã ío váha cùu iní-ó ndècu-o

¹¹ Te nchòhó chí dándacu iní nàcuáa ní xíndecu-ndo ní cùu, chí ñá túú cùu-ndo ñáyiú isràél, te ni ñá túú quide-ndo datná quidé ñáyiú-áⁿ, chí ñáyiú-áⁿ sãha-yu señá ñí-ⁿyu, te dàquee tíhũ-yu nchaa ñáyiú ñá túú ndècu señá ñí-xi. ¹² Te chí dándacu iní nàcuáa ní xíndecu-ndo, chí dàvá-áⁿ ñá túú ní xíndecu-ndo ndïhi Xítohó Jesucristú, te ni ñá túú ní xòo cuu tnahá tnúhu-ndo ndïhi ñáyiú isràél, te ni ñá túú ní xíní tnùní-ndó nàcuáa ndùu tnúhu sá ní cáháⁿ ndáá Yá Ndiõxí nàcuáa cada váha-gã ñáyiú, te ni ñá túú ní cùu-ndo ñáyiú quíndaha-gã, te ni ñá túú ní xòo níhí-ndó tnúhu ndee iní sá cùndecu-ndo ndïhi-gã.

¹³ Te cuèi ní cuu-ndo ñáyiú ñá túú tnàhá tnúhu ndïhi Yá Ndiõxí ní cùu, dico vitna ní tnahá tnúhu-ndo ndïhi-gã chí cùu ìⁿ nuu-ndo ndïhi Xítohó Jesucristú, cuendá sá ní sati níñí-gã te ní xíhí-gã te xíáⁿ ducaⁿ tnàhá tnúhu-ndo ndïhi Yá Ndiõxí vitna. ¹⁴ Te Xítohó Jesucristú ní quide-gá sá nchóó ío váha cuu iní-ó cùndecu-o, te ñiu-ni-gá ní quide cuendá sá vã dáquèe tíhú ñáhá ñáyiú isràél xii ñáyiú ñá túú cùu ñáyiú isràél, te ducaⁿ ìⁿ-ná cuú-yu cundecú-yu. ¹⁵ Te sá ní xíhí Xítohó Jesucristú, xíáⁿ ñá túú-gã cùnuu nchaa tnúhu sá sánú ìchi ñaha xii ñáyiú nàcuáa cada-yu cundecú-yu ní cùu. Te ducaⁿ ní xíhí Xítohó Jesucristú cuendá sá cuè ñáyiú isràél ndïhi cue ñáyiú ñá túú cùu ñáyiú isràél ìⁿ-ná cuú-yu cundecú-yu ichi-gã, te ducaⁿ te vã dáquèe tíhú tnáhá-gã-yu, te ío váha cundecu ndïhi tnàhá-yu. ¹⁶ Te ducaⁿ ní quide Xítohó Jesucristú ní xíhí-gã núú cùrúxí cuendá sá cuè ñáyiú cùu ñáyiú isràél ndïhi cue ñáyiú ñá túú cùu ñáyiú isràél vã dáquèe tíhú tnáhá-gã-yu. Te ducaⁿ ní xíhí-gã cuendá ìⁿ-ná cuú-yu tnahá tnúhu-yu ndïhi Yá Ndiõxí nàcuáa cuu váha iní ñáhá-gã xíi-yu.

¹⁷ Te cuèi cùu-ndo ñáyiú ñá túú tnàhí xíní ndáá cuendá Yá Ndiõxí ní cùu, dico Xítohó Jesucristú ní quixi-gã ñuyíú-a ní cáháⁿ-gã tnúhu váha nàcuáa ío váha cuu iní-ndó cùndecu-ndo ndïhi Yá Ndiõxí. Te ñiu-ni ducaⁿ ní quide-gá sá cùu-xi nchaa ñáyiú sa xíní cuendá Yá Ndiõxí, ñiu-ni ñáyiú isràél. ¹⁸ Te cuèi cùu-o ñáyiú isràél àdi ñá túú cùu-o dico ñiu-ni mee Xítohó Jesucristú ní quide-gá sá ncháá-ó tnàhá tnúhu-o ndïhi Dútú Ndiõxí Yaa cúú Tãtã-ó. Te ducaⁿ ní tnahá tnúhu-o ndïhi Yá Ndiõxí chí ní ngúndecu ndïhi-o Espíritú-gã. ¹⁹ Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnàhá tnúhu ndïhi Yá Ndiõxí ní cùu, dico vitna

chi ñá-nǎ ní cuu-ndo ndíhi nchaa dava-gá ñáyiú cùu cuendá-gá chi cùu-ndo déhe-gá. ²⁰ Te cada iní-ó sǎ cuè téé ní táuchíúⁿ Xítóhó Jesucristú cáháⁿ tnúhu-gá, ndíhi cue téé ní xóo cáháⁿ tnúhu Yá Ndióxi ndéé sanaha cùu-güedé dátá cimiéntú ñáⁿ vehe, te nchòhó cúu-ndó dátá ndóho sǎ sǎá vehe-áⁿ, te cada tucu iní-ó sǎ Xítóhó Jesucristú cúu-gǎ ñáⁿ yúú cúnúu cuu cimiéntú vehe-áⁿ. ²¹ Te ducaⁿ ño váha cùu ñáⁿnuu nchaa ndóho-áⁿ ndíhi yúú cúnúu-áⁿ, te ducaⁿ tucu ño váha ta quée tnàha nchaa ndóho-áⁿ cuáaá. Te xǎⁿ cada iní-ó sǎ cúu-xí vehe Yá Ndióxi, vehe sǎ ño ní cuu íí. Te ducaⁿ sǎtnahá-xí cùu nchaa ñáyiú ndècu ichi Xítóhó Jesucristú chí ní tnahá tnúhu-yu ndíhi-gá, te ñáⁿ nduu ñáⁿ nduu ta cùu víi cuu váha-gá-yu núú Yá Ndióxi cuáháⁿ. ²² Te tnàhá nchòhó ducaⁿ sǎtnahá-xí cùu-ndo chí ní ngúndecu ndíhi-ndo Xítóhó Jesucristú, te ducaⁿ ta cùu víi cuu váha tucu-ndo núú Yá Ndióxi cuáháⁿ, te cùu-ndo dátá vehe Yá Ndióxi chí ndècu ndíhi-ndo Espíritú-gá.

3

Té Páblú yíhi díqui-dé cáháⁿ-dé tnúhu Xítóhó Jesucristú núú ñáyiú ñá túú cùu ñáyiú isráel

¹ Te yúhú té Páblú yíhi-í vecaá sǎ cuendá sǎ cáháⁿ-í tnúhu Xítóhó Jesucristú núú nchòhó ñáyiú ñá túú cùu ñáyiú isráel, núú xǎⁿ díu cuendá-gá duha yíhi-í vecaá vitna. ² Te nchòhó sa nàha-ndo sǎ Yá Ndióxi ní cundáhu iní ñáhá-gǎ xii-í, te ní cachí-gǎ sǎ yúhú quíhi díqui-í cáháⁿ-í tnúhu Xítóhó Jesucristú núú-ndó, te cuendá sǎ cáháⁿ-í tnúhu-gǎ núú-ndó te cuu-xí sǎ váha sǎ cúu-xí-ndó. ³ Te yúhú sa ní cachí tnúhu-í xii-ndo lùha nacuaá ndùu tnúhu ndùu yuhu ní cuu, sǎ ní cachí tnúhu Yá Ndióxi xii-í. ⁴ Te òré dàcuaha-ndo tnúhu ndùu yuhu-áⁿ ní cùu te quini-ndó sǎ yúhú tècú tnúni-í nàcuáa ndùu tnúhu-áⁿ, te

tnúhu-áⁿ cáháⁿ-xi cuendá Xítóhó Jesucristú. ⁵ Te tnúhu-áⁿ cúu-xí tnúhu sǎ vǎ yóo tnàhi xini ní cùu, dico cue téé ní táuchíúⁿ Xítóhó Jesucristú cáháⁿ tnúhu-gá, ndíhi cue téé cáháⁿ nàcuáa dàcahu iní ñáhá Yá Ndióxi ní níhi-güedé tnúhu ndùu yuhu-áⁿ, chi Espíritú Yá Ndióxi ní xáhaⁿ-xi xii-güedé. ⁶ Te duha cáháⁿ tnúhu ndùu yuhu-áⁿ ní cùu: “Cuéi ñáyiú ñá túú cùu ñáyiú isráel te cuéi ñáyiú cùu ñáyiú isráel dico ñáⁿ-ni ndùu táhü-yu sǎ váha núú Yá Ndióxi, te núu na quíndáá iní-yu tnúhu sǎ cáháⁿ nàcuáa naníhi tǎhü-yu, te ñáⁿ-ná cúu-yu cundecú-yu, te ducaⁿ ñáⁿ-ni cada váha ñaha Yá Ndióxi xii-yu te núu na cundecu ndíhi-yu Xítóhó Jesucristú”, duha ndùu tnúhu ndùu yuhu-áⁿ ní cùu.

⁷ Te Yá Ndióxi ní cundáhu iní ñáhá-gǎ xii-í ní taxi-gǎ chíuⁿ quide-í cáháⁿ-í tnúhu-gǎ, te mee-gǎ quidé-gǎ sǎ yúhú ndacu-í cáháⁿ-í tnúhu-gǎ. ⁸ Te nchaa ñáyiú cùu cuendá Yá Ndióxi cúu-yu ñáyiú ío-gǎ cúnúu cadá-yu chíuⁿ-gǎ dàcúúxí yúhú, te cuéi ducaⁿ dico Yá Ndióxi ní cundáhu iní ñáhá-gǎ xii-í ní taxi-gǎ chíuⁿ quide-í cáháⁿ-í tnúhu-gǎ núú cue ñáyiú ñá túú cùu ñáyiú isráel. Te tnúhu-gǎ-áⁿ cáháⁿ-xi sǎ súúni ño váha cada ñaha Xítóhó Jesucristú xii-o. ⁹ Te ducaⁿ ní cachí Yá Ndióxi sǎ cáháⁿ-í tnúhu-gǎ cuendá danèhé-í nchaa ñáyiú. Te sǎ dánèhé-í-yu-áⁿ cúu-xí tnúhu ndùu yuhu sǎ ní sani iní-gǎ ndéé sanaha nàcuáa cada váha-gǎ cue ñáyiú. Te ndéé dává-áⁿ ní quesaha ndùu yuhu tnúhu-áⁿ ní cùu. Te díu-ni-gǎ cúu-gǎ Yaá ní cadúha nchaandi túhü sǎ ño. ¹⁰ Te ducaⁿ ndùu yuhu tnúhu-áⁿ ní cùu cuendá sǎ ncháá espíritú cúnúu ndecu andiú quini-xí vitna nàcuáa quide nchaa ñáyiú ní tuha ñaha xii Yá Ndióxi cuendá ducaⁿ cùtnuní iní-xí sǎ ño váha cùtnuní iní-gǎ nàcuáa cada-gǎ. ¹¹ Te Yá Ndióxi

ní sani iní-gá ndéé sanaha nàcuáa ní cuini-gá cada Xítohó Jesucristú, te ní saá nduu ní quide Xítohó Jesucristú nàcuáa ní cuini Yá Ndiöxí cada-gá. ¹² Te vitna cùyii-o cáháⁿ ndihí-o Yá Ndiöxí cuendá sá ndécú ndihí-o Xítohó Jesucristú, te sandáá iní-ó-gá. ¹³ Te núu xíáⁿ cáháⁿ-í dóho-ndo sá cuéi duha ndòho-í vitna dico vá ná tühú iní-ndo cànchicúⁿ nihnu-ndo ichi Xítohó Jesucristú. Te sá dúhá ndòho-í te cùu-xi sá vaha sá cúu-xí-ndó, chi cuu-ndo ñáyiú cùu cahnu núu Yá Ndiöxí.

Xítohó Jesucristú ío cùu iní ñáhá-gá xii-o

¹⁴ Te sá cuendá nchaa sá ní sani iní Dütú Ndiöxí quidé-gá xíáⁿ yúhú ngüñí xiti-í núu-gá cáháⁿ ndihí-í-gá, te diu-ni-gá cúu Yáa cúu Tátá Xítohó Jesucristú. ¹⁵ Te mee Yá Ndiöxí ní cachí-gá sá ncháá espíritú ndécú àndiu cunduu-xi datná ní cachí méé-gá cunduu-xi. Te ní cachí tucu-gá sá nchóó cùu-o ñáyiú, te cunduu-o datná cuini méé-gá cunduu-o. ¹⁶ Te xicáⁿ táhù-í núu Dütú Ndiöxí sá Espíritú-gá ná cadá nàcuáa cuita nihí ndéé-gá-ndó quíhíⁿ cundecu-ndo ichi-gá, te ducaⁿ xicáⁿ táhù-í núu-gá cada Espíritú-gá chi ío cànnu cuu-gá. ¹⁷ Te xicáⁿ táhù-í núu Yá Ndiöxí sá Xítohó Jesucristú ná cundecu ndihí ñaha-ni-gá xii-ndo chi sandáá iní-ndó-gá, te ducaⁿ te vá dáña ndéé-ndó ío cuu iní tnáhá-ndó. ¹⁸ Te xicáⁿ táhù-í núu Yá Ndiöxí cuendá-ndó ndihí cuendá dava-gá ñáyiú cùu cuendá-gá, cuendá sá cùnüní iní-ndó sá sùní cùu iní ñáhá Xítohó Jesucristú xii-o. ¹⁹ Te duha xicáⁿ táhù-í núu Yá Ndiöxí chi cuini-í sá ncháá-ndó tècú tnùní-ndó sá ío cùu iní ñáhá Xítohó Jesucristú xii-o cuéi vá ndácú cava-o quini-ó nàcuáa cùu iní ñáhá-gá xii-o. Te xicáⁿ táhù-í núu Yá Ndiöxí sá ío na cundecu ndihí ñaha-gá xii-ndo, te ducaⁿ cànchicúⁿ nihnu-ndo

càda-ndo nchaa nacuáa quide mee-gá.

²⁰ Te Yá Ndiöxí ío-gá vài sá ndácú-gá táxi-gá dàcúxí sá xicáⁿ-ó núu-gá, te cuéi ndéé nchaa sá ñà túú sàni iní-ó nihí-ó te táxi-gá, te ducaⁿ chi mee-gá ndécú ndihí ñaha-gá xii-o, te ndàcu-gá quidé-gá nándi sá vaha sá cúu-xí-ó. ²¹ Te vitna nchaa nchoo ñáyiú ndècu ichi Xítohó Jesucristú chí ná cànchí-ó sá ío cànnu cuu Yá Ndiöxí, te ducaⁿ-ni cáháⁿ-ó sá ío cànnu cuu-gá ní caa ní quíhíⁿ chi ndècu ndihí-o Xítohó Jesucristú. Te ducaⁿ na cùnduu.

4

Espíritú Yá Ndiöxí quidé-xí cùu ñnuu-o ndecu-o

¹ Te yúhú té Páblú yíhí-í vecaá sá cuendá Xítohó Jesucristú, te cáháⁿ ndáhú-í núu-ndó sá cadá vaha-ndo cundecu-ndo datná tau-xi cada cue ñáyiú ní cáháⁿ Yá Ndiöxí cundecu ndihí-gá. Te nchòhó tnáhá-ndó cùu-ndo ñáyiú ní cáháⁿ ñáhá Yá Ndiöxí cundecu ndihí-gá. ² Te vá cadá cànnu-ndo mee-ndo, cunduu vaha iní-ndó, cunduu cànnu iní-ndó, te cuu iní tnáhá-ndó nàcuáa ducaⁿ cundee iní-ndó núu ná cúu sá cùmáni núu tnáhá-ndó. ³ Te ío nducu ndèe-ndo cuu ñnuu-ndo cundecu-ndo, chi Espíritú Yá Ndiöxí chindee ñaha-xi xii-ndo, te ducaⁿ ío vaha cuu iní-ndó cundecu-ndo chí cùu ñnuu-ndo. ⁴ Te nchoo ñáyiú ndècu ichi Xítohó Jesucristú ñnuu-ni cùu-o, te ducaⁿ ñnuu-ni Espíritú Yá Ndiöxí ndécú, te diu-ni ducaⁿ ñnuu-ni tnúhu ndee iní ní ngúndecu ndihí-o cùnñáhá ní cáháⁿ ñáhá Yá Ndiöxí xii-o. ⁵ Te ñnuu-ni Xítohó Jesucristú ndécú táxi tnuní ñáhá-gá xii-o, te ñnuu-ni cùu-o sandáá iní-ó tnúhu-gá, te ñnuu-ni ní sandute-o. ⁶ Te ñnuu-ni Dütú Ndiöxí cúu Yáa cúu Tátá-ó ncháa-o, te diu-gá cùnnu-gá yíndàha ñaha-gá xii-o ncháa-o. Te Yá Ndiöxí dácáháⁿ-gá iní-ó quide-o chiúⁿ-gá,

te ducaⁿ ndècu ndihi ñaha-gá xii-o nchàa-o.

⁷ Te nchoo ndì dǐⁿ ndì dǐⁿ chindee ñaha Yá Ndiöxí xii-o quide-o nacuaa ndüu chiuⁿ ní cachí Xítoho Jesucristú cada-o. ⁸ Te quèe ndáá-xi nàcuáa càháⁿ-xi núu tütú Yá Ndiöxí núu cächí-xi:

Xítoho Jesucristú cuánda-gá andiu te ío cùnuu-gá,

chi nchaa cue espíritu cúu ùhú iní ñáhá xii-gá ñá túu ní ndàcu-xi naá ndihi ñaha-xi xii-gá,

te mee-gá ní cachí-gá nàcuáa ndüu chiuⁿ nduu táhú ìⁿ ìⁿ ñáyiú cadá-yu.

Duha cächí-xi núu tütú-gá.

⁹ Te sá dúcáⁿ càháⁿ-xi sá cuánda-gá andiu xiáⁿ cútnuní iní-ó sǎ ní cuuⁿ-gá ñuyíú-a. ¹⁰ Te Xítoho Jesucristú ní cuuⁿ-gá ñuyíú-a, te ñu-ni-gá cuánda-gá andiu cuendá ío cunuu-gá taxi tnùní-gá nchaandi túhú sá ío. ¹¹ Te ní dácãhñu-gá cue tée xínu cuechi núu-gá ìⁿ ìⁿ núu chiⁿ cada-güedé. Te ní cachí-gá sá ñàva-güedé càháⁿ-güedé tnúhu-gá, te ñàva-güedé ní cachí-gá sá càháⁿ-güedé nàcuáa dàcahu iní ñáhá Yá Ndiöxí xii-güedé. Te ñàva-güedé ní cachí-gá sá cúu-güedé cue tée datècú tnúhu cue ñáyiú nàcuáa cadá-yu naníhí tàhú-yu. Te ñàva-güedé ní cachí-gá sá cúu-güedé cue tée quindaha ñaha xii ñáyiú dacuàha ñaha-güedé xii-yu tnúhu-gá. ¹² Te ducaⁿ ní cachí-gá cada cue tée-áⁿ cuendá canu ichi-güedé cue ñáyiú cùu cuendá Yá Ndiöxí cuendá ducaⁿ ñáyiú-áⁿ ñihí-yu nàcuáa cadá-yu chiⁿ-gá, te ducaⁿ cuita níhí ndéé-gá-yu cundecú-yu ichi Xítoho Jesucristú. ¹³ Te ducaⁿ ní cachí Xítoho Jesucristú cunduu ndéé sáá nduu cùu ìⁿnuu-o quíndáá iní-ó tnúhu-gá, te ducaⁿ cùu ìⁿnuu-o tecú tnùní-ó nàcuáa ndüu cuendá-gá chi ñu-ni-gá cúu-gá Déhe Yá Ndiöxí, te cuu-o ñáyiú ío quide ndáá

dàtná quidé mèe Xítoho Jesucristú. Te ducaⁿ te ñá túu tnàhí-gá ná cùmání-ó núu Yá Ndiöxí. ¹⁴ Te ducaⁿ te vá cúu-gá-ó dàtná cue landú vátá cútnuní váha-gá iní-xi, te ní vá cadá-gá-ó dàtná quidé ndüte lamár, chi ndute-áⁿ òré quéné tàchí te cuáháⁿ-xi duha cuáháⁿ-xi dàcáⁿ, te ducaⁿ chi vá quíndáá-gá iní-ó tnúhu càháⁿ nchaa ñáyiú dándahú ñáhá xii-o, chi ñáyiú-áⁿ ío váha xitò-yu nàcuáa dándahú ñáhá-yu xii-o chi cächí-yu sá càháⁿ-yu tnúhu Yá Ndiöxí dico ñá ndáá. ¹⁵ Te nchoo ío cuu iní tnáhá-ó, te vá dándahú tnáhá-ó, chi càháⁿ-ó mèe-ni sá ndáá. Te xini ñuhu-xi sá ìⁿ nduu ìⁿ nduu cuita cada ndáá-gá-ó quíhíⁿ dàtná quidé ndáá mèe-gá, te ñu-ni-gá cúu-gá Yaá cùnüu cuu díhna tàxi tnuní ñáhá-gá xii-o. ¹⁶ Te ñu-ni Xítoho Jesucristú quidé ñaha-gá xii nchaa nchoo ñáyiú ndècu ichi-gá dàtná yiqui cùñú mèe-gá, chi ìⁿ yiqui cùñú ío váha ní quèe tnàha ìⁿ ìⁿ xichi, te ducaⁿ yìhi túchi yiqui cùñú-áⁿ yótnì-xi nchaa nàcuáa ní quèe tnàha. Te ducaⁿ sàtnahá-xi cùu nchoo chi ìⁿ-ni cùu-o ndecu-o ichi Xítoho Jesucristú tàxi tnùní ñáhá-gá xii-o. Te núu nchoo quide-o nchaa nàcuáa tàu-xi cunduu te cùu iní tnáhá-ó, te ducaⁿ ta níhí ndéé-gá-ó cuáháⁿ ndécú-ó ichi-gá.

Vá cadá-gá-ó dàtná ní xóo cada-o cùtnàhá ní xíndecu-o ichi cuehé ichi duha

¹⁷ Te vitna yúhú càháⁿ-í dóho-ndo quide-í núu Xítoho Jesucristú sá vá cùndecu-gá-ndó dàtná xíndecu ñáyiú ñá túu sàndáá iní ñáhá xii Yá Ndiöxí, chi nchaa ñáyiú-áⁿ ñà túu vèdana nàndíhí nchaa sá sání iní-yu. ¹⁸ Te ní ñà túu vèdana cùtnuní iní-yu nàcuáa ndüu tnúhu ndáá tnúhu Yá Ndiöxí. Te ñáyiú-áⁿ ñà túu ndüu tàhú-yu cundecú-yu nàcuáa cùní Yá Ndiöxí, chi ñá túu vèdana tècú tnùní-yu te ducaⁿ chí ío sáá iní-yu. ¹⁹ Te ñá túu tnàhí-gá ná

sání iní-yu ndécú-yu ichi cuèhé ichi duha, te ío cùdí iní-yu ndécú-yu ichi díí iní, te ñá díú-ní xǎn chi nándi-gá nchaa sá cuèhé sá dúhá quidé-yu ndécú-yu. ²⁰ Dico tnúhu Xítóhó Jesucristú sá ní sándáá iní-ndó chi ñá túú ducaⁿ sanu ichi ñaha-xi xii-ndo cada-ndo. ²¹ Te nchòhó ní cutnùní iní-ndó nàcuáa ndúu cuendá Xítóhó Jesucristú, te dàcuaha-ndo tnúhu ndáá diu-ni tnúhu-gá nàcuáa ndécú-ndo ichi-gá. ²² Te vitna vá cáni-gǎ iní-ndó cada-ndo datná ní xóo cada-ndo cùtnáhá ní xíndecu-ndo ichi cuehé ichi duha, chi núu nchaa-ni sá cuèhé sá dúhá-ǎⁿ ná cùhuⁿ-ni iní-ndó cada-ndo, te uuⁿ-gá uuⁿ-gá cuita dacuítá nihnu ñaha-xi xii-ndo quíhíⁿ, chi núu nchaa-ni sá cuèhé sá dúhá-ǎⁿ ná cùhuⁿ-ni iní-ndó te dàticá nuu ñaha-xi xii-ndo. ²³ Te nchòhó, xini ñuhu-xi sá vá dúcáⁿ-gá caní iní-ndó cada-ndo te tàú-ndó ndúu-ndo datná íⁿ ñáiyu ní cacu túu saa. ²⁴ Te nduu iní-ndó dàtná cuíni méé Yá Ndióxi cunduu, chi nduu-xi nàcuáa càa iní méé-gǎ, te ducaⁿ te cuu-ndo ñáiyu ío váha cada ndáá, te cuu ndisa-ndo ñáiyu ñá túú tnáhí ná cumání cundecu núu-gǎ.

²⁵ Te cuendá xǎn núu cáháⁿ-í dóho-ndo sá nchòhó vá dácuàndehnde-gáⁿ ndó dàtná ní xóo cada-ndo, te mee-nǎ sá ndáá cáháⁿ ndíhi tnàha-ndo, chi íⁿ-ni cùu-o ndecu-o ichi Xítóhó Jesucristú.

²⁶ Te núu cùdéeⁿ-ndó te cada cuendá-ndó sǎ vá cadá-ndó íⁿ cuéchi sá dúcáⁿ cùdéeⁿ-ndó, te vá dúcáⁿ-ní cùhuⁿ iní-ndó tnúhu sàtú iní-ǎⁿ. ²⁷ Te vá dáñá-ndó mée-ndo dandahú ñáhá sàcuíhná xii-ndo.

²⁸ Te núu dava-ndo cùu-ndo ñadúhú te vá dúcáⁿ-gǎ cada-ndo, chi nducu-nǎ-ndó íⁿ chiuⁿ váha cada-ndo nàcuáa ducaⁿ ñíhí-ndó sá chíndèe-ndo cue ñáiyu ndáhú ñáiyu ñá túú nǎ ndécú ndíhi.

²⁹ Te vá cáháⁿ-gǎ-ndó ní íⁿ tnúhu cuèhé, chi mee-nǎ tnúhu vii tnúhu váha cáháⁿ-ndó nàcuáa ducaⁿ ngúnu ichi cue ñáiyu ndédóho ñaha xii-ndo, te núu ducaⁿ na cada-ndo

te cuu-xi sá váha sá cúu-xí ñáiyu ducaⁿ ndédóho ñaha xii-ndo-ǎⁿ. ³⁰ Te vá cadá-gǎ-ndó ní íⁿ sá ñá túú tàú-ndó cada-ndo cuendá sá vá dándihú-ndó iní Espíritú Yá Ndióxi, chi diu Espíritú-gǎ ndécú ndíhi-ndo, te xǎn cùtnùní iní-ndó sá sáá nduu nàcuaca ñaha-gǎ xii-ndo cùndecu-ndo ndíhi-gǎ ní caa ní quíhíⁿ.

³¹ Te vá dásátú-gǎ-ndó iní tnàha ñáiyu-ndo, te ní vá cùhúⁿ iní-ndó tnúhu sàtú iní, te ní vá cùdéeⁿ-gǎ-ndó, te cuéi núu chítú núu tàcá vá cáháⁿ cana-ndo cùcuèhé-ndó tnàha ñáiyu-ndo, te ní vá cuátnúhu-ndo tnaha ñáiyu-ndo, te ní vá cáni cuèhé caní duha iní-ndó cuendá tnàha ñáiyu-ndo. ³² Te cundahú iní tnáhá-ndó, te cada tnàha-ndo sá váha, te cada càhnu iní tnáhá-ndó núu ná cúu sá cúmání núu tnáhá-ndó dàtná ní quide Yá Ndióxi ní quide càhnu iní-gǎ nchaa yíca cuéchi-ndo sá cuendá Xítóhó Jesucristú.

5

Nàcuáa tàu-xi cundecu nchaa ñáiyu cùu déhe Yá Ndióxi

¹ Te nchòhó cúu-ndó ñáiyu ío cùu sá ñáhá Yá Ndióxi, te diu déhe-gǎ cúu-ndó núu xǎn xíni ñuhu-xi can-chicúⁿ nihnu-ndo cada-ndo datná quidé mée-gǎ. ² Te ío cuu iní tnáhá-ndó cùndecu-ndo datná cúu iní ñáhá Xítóhó Jesucristú xii-ndo, chi diu-gǎ ní cachí-gǎ sá cúu-gǎ cuendá nchaa cuéchi-o te ní xíhí-gǎ, te sá dúcáⁿ ní xíhí-gǎ te ní cuu-gǎ dàtná íⁿ táhú sá cúu-xí Yá Ndióxi, te ío váha ní cuu iní Yá Ndióxi sá dúcáⁿ ní quide-gǎ.

³ Te sá cuendá sá nchòhó cúu-ndó ñáiyu cùu cuendá Yá Ndióxi núu xǎn nchaa nchòhó cue téé vá cáháⁿ ndíhi-ndo ñáiyu díhí te núu ñá díú ñàdihí-ndó cùu-yu, te ducaⁿ-ni nchaa nchòhó cue ñáiyu díhí tucu vá cáháⁿ ndíhi-ndo cue téé te núu ñá díú yíi-ndo cuu-güedé, te ní vá cáni tnáhí iní-ndó cùndecu-ndo ichi díí

iní, te ni vǎ xǐhó-ndó nì ìⁿ sá ndécú ndìhì tnaha ñáyiú-ndo, te ni ìⁿ nchaa xǐáⁿ vǎ cǎní iní-ndó cada-ndo, te ni vǎ cǎcú nèhe-ndo. ⁴ Te ni vǎ cǎháⁿ-ndó ìⁿ tnúhu sá ni vǎ cúú cùndedóho ñáyiú, te ni vǎ cǎháⁿ-ndó ìⁿ tnúhu cùtexínu, te ni dǎva-gǎ nchaa tnúhu sá ñà túú vèdana nàndìhì vǎ cǎháⁿ-ndó, chi nchaa tnúhu-áⁿ ñà túú tàù-xì cǎháⁿ-ndó, te xìni ñuhu-xì sá vǎha-gǎ sá ndàcǎⁿ tǎhù-ndó núú Yǎ Ndióxi cuèndá nchaa sá vǎha quide-gǎ. ⁵ Te nchòhó sa xìní ndáá-ndó sǎ ncháá cuè téé cǎháⁿ ndìhì ñáyiú dǐhì te ñá díú ñàdìhì-güedé cúú-yu, ndìhì cue ñáyiú dǐhì cǎháⁿ ndìhì cue téé te ñá díú yǐ-yu cùu-güedé, nchaa ñáyiú-áⁿ vǎ ndúú tǎhù-yu cundecú-yu núú ndécú Yǎ Ndióxi ndìhì Xítóhó Jesucristú táxi tnùnì-gǎ. Te ni cuè ñáyiú xǐndecu ichi díí iní, te ni cuè ñáyiú xǐho nchaa sá ndécú ndìhì tnaha ñáyiú-xì vǎ ndúú tǎhù-yu cundecú-yu ndìhì-gǎ núú ndécú-gǎ táxi tnùnì-gǎ. Te tnúhu sá cǎchì-ó xǐho-o nchaa sá ndécú ndìhì tnaha ñáyiú-o, ìⁿ-ni cùu-xì ndìhì tnúhu sá cǎchì ñáyiú quide cahnú-yu nchaa sá cǎchì-yu cùu ndióxi te ñá ndáá sá ndióxi cúú-xì. ⁶ Te vǎ quǐndáá iní-ndó nì ìⁿ tnúhu sá ñà túú nàndìhì cǎháⁿ ñáyiú, chi ñáyiú-áⁿ ò dandòho ñaha Yǎ Ndióxi xǐ-yu cuèndá nchaa sá cuèhé sá dúhá quide-yu chi ñá túú sàndáá iní ñáhǎ-yu xii-gǎ. ⁷ Núú xǐáⁿ cǎháⁿ-í dóho-ndo sǎ vǎ ñihì tnáhá-ndó ndìhì cue ñáyiú-áⁿ.

⁸ Te nchòhó ní cuu-ndo dàtná cue ñáyiú ní xǐndecu núú néé chi ní xǐndecu-ndo ichi cuehé ichi duha, dico vitna ní ngúndecu-ndo ichi Xítóhó Jesucristú, te ñá túú-gǎ ndécú-ndó núú néé dàtná ní xǐndecu-ndo ní cùu. Te vitna cada-ndo ncháa nacúáa tàù-xì cunduu chi ndècu-ndo ichi-gǎ. ⁹ Te sá cuèndá sá ndécú-ndó ichi-gǎ núú xǐáⁿ cúú-ndó ñáyiú váha, te quide ndáá-ndó ndècu-ndo, te ñá túú

dàcuandehnde-ndo chi cǎháⁿ-ndó mèe-nì sá ndáá. ¹⁰ Te ío váha cada cuèndá-ndó ncháa sá cúú váha iní Xítóhó Jesucristú, te xǐáⁿ cada-ndo. ¹¹ Te vǎ cǎnchícúⁿ ñihu-ndo tnáhá-ndó cada-ndo datná quide cue ñáyiú ndècu ichi cuehé ichi duha, chi nchòhó tàù-ndó cǎháⁿ-ndó dóho nchaa ñáyiú ducaⁿ ndècu ichi cuehé ichi duha-áⁿ cuèndá nchaa sá quide-yu. ¹² Te cucahaⁿ núú-ndó vǎ cǎháⁿ-ndó cuèndá ni ìⁿ sá cuèhé sá dúhá quide dayuhu nchaa ñáyiú-áⁿ. ¹³ Dico óré dándìxi túu tnúhu Yǎ Ndióxi iní-yu nàcuáa quide-yu te cùtnunì iní-yu sá ñǎ túú quide váha-yu, te ducaⁿ ndìxi cuèchi iní-yu cuèndá nchaa sá cuèhé sá dúhá quide-yu. ¹⁴ Te núú tütú Yǎ Ndióxi cǎchì-xì:

Nchòhó cúú-ndó dàtná ñáyiú xidí, te vitna ndiquíú iní-ndó,

te cùu tucu-ndo datná ñáyiú ní xǐhì, te vitna ndoto-ndo,

te Xítóhó Jesucristú chindee ñàha-gǎ xii-ndo nàcuáa vǎ cùndècu-gǎ-ndó ichi cuehé ichi duha.

Duha cǎháⁿ-xì núú tütú-gǎ.

¹⁵ Te ío váha cada cuèndá-ndó nàcuáa cada-ndo cùndècu-ndo, te vǎ cǎdá-ndó dàtná xǐquide cue ñáyiú ñá túú tècú tnùnì, chi cada-ndo dàtná xǐquide ñáyiú ío váha sáá díquí-xì. ¹⁶ Te ìⁿ nduu ìⁿ nduu cǎní iní-ndó cada-ndo nchaa nacúáa tàù-xì cunduu, chi vitna ío cùnuu nchaa sá cuèhé sá dúhá. ¹⁷ Te cuu-ndo ñáyiú tècú tnùnì cuèndá ducaⁿ cùtnunì iní-ndó nàcuáa cùní Yǎ Ndióxi cada-ndo, te vǎ cǎdá-ndó dàtná xǐquide cue ñáyiú ñá túú tnáhì cùtnunì iní-xì nàcuáa cùní Yǎ Ndióxi cǎdá-yu. ¹⁸ Te vǎ cúú-ndó ñáyiú quihu chi núú ducaⁿ na cada-ndo te dàcuíta ñihu-ndo mèe-ndo, te dàña-ndo mèe-ndo sá Espiritú Yǎ Ndióxi ná tàxi tnunì ñáhǎ-xì xii-ndo. ¹⁹ Te cǎháⁿ-ndó nàcuáa-nì cuáháⁿ ndudú sá ní xóo cata nchaa cue ñáyiú ndéé sanaha ní xóo chiñuhú-yu Yǎ Ndióxi. Te cǎháⁿ-ndó nàcuáa

cuaháⁿ ndudú sá chíñuhu-ndo Yá Ndióxi, te cata-ndo. Te cuéi nchaa dava-gá ndudú diu-ni ducaⁿ cáháⁿ-ndó te cata-ndo. Te ni yùhu ni iní-ndó càta-ndo nchaa ndudú-áⁿ chíñuhu-ndo Yá Ndióxi. ²⁰ Te vá dáñá ndèé-ndó ndacáⁿ táhú-ndó núú Tàtá-ó Dütú Ndióxi cuéi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndihí-ndo Xítohó Jesucristú.

Tàù-xi sá quindáá iní tnáhá cuè ñáyiu ndècu ichi Xítohó Jesucristú

²¹ Te nchòhó ñáyiu ndècu ichi Xítohó Jesucristú tàù-xi sá quindáá iní tnáhá-ndó, te ducaⁿ càda-ndo chi nèhe-ndo sá yíñuhu núú Yá Ndióxi.

²² Te nchaa nchòhó ñáyiu dìhí ndécú yí-xi, xìni ñuhu-xi sá quindáá iní-ndó yí-ndo datná sàndáá iní-ndó Xítohó Jesucristú. ²³ Chi yí-ndo tàxi tnuní ñáhá-güedé xii-ndo dàtná quidé Xítohó Jesucristú táxi tnuní ñáhá-gá xii nchoo cuè ñáyiu ndècu ichi-gá. Te diu-gá cúu-gá Yaá ní dácácu nihnu ñaha xì-o núú ùhú núú ndàhú, te cùu-o datná yiqui cùñú-gá. ²⁴ Te dàtná quidé nchòhó ñáyiu ndècu ichi Xítohó Jesucristú sàndáá iní-ó tnè-o nchaa tnúhu càháⁿ-gá, ducaⁿ tàù-xi cada nchaa nchòhó ñáyiu dìhí quindáá iní-ndó tnè-ndo nchaa tnúhu càháⁿ yí-ndo.

²⁵ Te tnàhá nchaa nchòhó cue téé tucu tàù-xi sá ío cuu iní-ndó ñàdihí-ndó dàtná quidé Xítohó Jesucristú cúu iní ñáhá-gá xii nchaa nchoo ñáyiu ndècu ichi-gá, chi mee-gá ní xíhí-gá sá cuèndá-ó sá cúu iní ñáhá-gá xii-o. ²⁶ Te ducaⁿ ní quide-gá cuèndá sá ncháá ñáyiu vitna ngündecu ichi-gá cuu yíñuhú-yu núú Yá Ndióxi, te ducaⁿ ndàda ndoo ndada nine-gá iní-yu sá cuèndá sá quindáá iní-yu tnúhu Yá Ndióxi, te cuanduté-yu. ²⁷ Te ducaⁿ ní quide-gá cuèndá sá ncháá ñáyiu na ngündecu ichi-gá

íó váha cundecú-yu núú-gá, te ducaⁿ vǎ cündècu-gá ní ñⁿ cuéchi-yu núú-gá, te ní ñⁿ-gá sá ñà túú-gá ná cumání-yu núú-gá chi ío cundecu yíñuhú-yu. ²⁸ Te sá dúcáⁿ quide Xítohó Jesucristú sá cúu-xí cuè ñáyiu ndècu ichi-gá, xíⁿ tàù-xi sá nchòhó cue téé xíndecu ñàdihí-xi cuu iní-ndó ñàdihí-ndó, te coto-ndó-yu dàtná xító-ndó yiqui cùñú méé-ndó, te cada iní-ndó sǎ ncháá cuè téé ío cùu iní ñàdihí-xi cùu iní-güedé méé-güedé chi ñⁿ-ná cúu-yu. ²⁹ Te nchoo sǎ naha-o sǎ ní ñⁿ ñáyiu ñá túú dàquee tíhú-yu yiqui cùñú-yu, chi da uuⁿ-gá chíndéé-yu te xító-yu. Te diu-ni ducaⁿ quide Xítohó Jesucristú ndihí nchaa ñáyiu ndècu ichi-gá, ³⁰ chi cùu-o datná yiqui cùñú méé-gá, te ducaⁿ chí ñⁿ-ni cùu-o ndihí-gá. ³¹ Te tnúhu Yá Ndióxi càchí-xi: “Sǎ cuèndá xíⁿ núu nchaa cue téé na níhí ñàdihí-xi te dñⁿ-ná cada-güedé tátá-güedé ndihí náná-güedé, te ñàdihí-nǎ-güedé cuu cuu ndihí-güedé, te ducaⁿ ñⁿ-ná cuu-güedé ndihí-yu”, duha càchí-xi. ³² Te tnúhu-a cùu-xi ñⁿ tnúhu càhnu vihi, te ducaⁿ sǎ tnàhá-xi cùu Xítohó Jesucristú ndihí cue ñáyiu ndècu ichi-gá. ³³ Te càháⁿ-ni tucu-í dóho nchaa nchòhó cue téé xíndecu ñàdihí-xi sǎ ío cuu iní-ndó ñàdihí-ndó te coto-ndó-yu dàtná xító-ndó mèe-ndo, te ducaⁿ-ni ncháa nchòhó ñáyiu dìhí tucu canehe-ndo sǎ yíñuhu núú yí-ndo.

6

¹ Te nchaa nchòhó cue landú, quindáá iní-ndó tátá-ndó ndihí náná-ndó chí ducaⁿ cuíní Yá Ndióxi cunduu, te diu ducaⁿ tnàhí tàù-xi cada-ndo. ² Te Yá Ndióxi ní cachí-gá sǎ cánèhe-ndo sǎ yíñuhu núú tátá-ndó ndihí núú náná-ndó. Te tnúhu-áⁿ cúu-xí tnúhu cùnuu ní càháⁿ-gá cada cue ñáyiu cuèndá cada váha ñaha-gǎ xíi-yu. ³ Te ní cachí-gá sǎ núu ducaⁿ na càda-ndo

te ío váha cundecu-ndo, te ducaⁿ ío náha cùdíi-ndo cùndecu-ndo ñuyíú-a.

⁴ Te nchaa nchòhó cue tée cùu tátá, vá dásátú-ndó ínì cue déhe-ndo chí canu ichi-ndo-güèxi nacuaá tàú-xi cunduu, te dacuàha-ndo-güèxi nchaa tnúhu váha nàcuáa cuínì Yá Ndiòxí cunduu.

⁵ Te nchaa nchòhó cue ñáyiú xínu cuechi, quindáá ínì-ndó cuè ñáyiú dii chiúⁿ-xi quide-ndo, te canehe-ndo sá yíñùhu núú-yu, te ío váha cuu ínì-ndó càda-ndo chiúⁿ-yu, te ducaⁿ nì yuhu nì ínì-ndó càda-ndo. Te cada ínì-ndó sá dàtná tnúhu sá chiúⁿ Xítóhó Jesucristú quidé-ndó. ⁶ Te dava ñáyiú xínu cuechi, mee-ni òré ndéhé ñáyiú dii chiúⁿ-xi quidé-yu ío ndùcu ndeé-yu quide chiúⁿ váha-yu cuèndá cuínì-yu cudíú-yu. Dico nchòhó vá dúcáⁿ càda-ndo, chí cuèi ndècu ñáyiú dii chiúⁿ-xi quide-ndo àdi ñá túú-yu dico cada chiúⁿ váha-ni-ndo, te cada ínì-ndó sá dàtná tnúhu sá chiúⁿ Xítóhó Jesucristú quidé-ndó, te cada-ndo nì yuhu nì ínì-ndó nàcuáa cuínì Yá Ndiòxí cunduu. ⁷ Te ío váha cuu ínì-ndó càda-ndo chiúⁿ-áⁿ, chí cada ínì-ndó sá dàtná tnúhu sá chiúⁿ Xítóhó Jesucristú quidé-ndó te ñá díú chiúⁿ cue ñáyiú ñuyíú-a. ⁸ Te nchòhó sa cùtnunì ínì-ndó sá nàcuáa ndúu chiúⁿ váha nì quide-ndo ñⁿ ñⁿ-ndo, te ducaⁿ cùnduu sá táxí Xítóhó Jesucristú nduu táhú-ndó cuèi cùu-ndo ñáyiú dàñá queé núú chiúⁿ patróóⁿ-xi àdi cuu-ndo ñáyiú ñá túú tnàhí dàñá quee núú chiúⁿ patróóⁿ-xi.

⁹ Te nchaa nchòhó ñáyiú xíndecu ndihí ñáyiú xínu cuechi, tnàhá-ndó tàú-ndó càda váha-ndo sá cúú-xí cuè ñáyiú xínu cuechi núú-ndó, te vá cùnduu nínu ínì-ndó núú-yu, te chí cuàha cuèndá sá díú-ní Xítóhó Jesucristú Yaa ndécú àndiu taxi tnunì ñáhá-gá xii-ndo ndihí-yu, te sá cúú-xí mée-gá chí ñⁿ-ni cùu-ndo

núú-gá, te ñⁿ-ni càda ñaha-gá xii-ndo.

Yá Ndiòxí chindè-gá cue ñáyiú ndècu ichi-gá cuèndá sá vá ndácú sàculhá nàá ndihí ñaha-xi xii-yu

¹⁰ Te vitna nchaa nchòhó ñáyiú ndècu ndihí-í ichi Xítóhó Jesucristú càchí tnúhu-í xii-ndo sá ío nducu-ndo nàcuáa cada-ndo níhí ndéé-ndó cùu ñⁿnuu-ndo ndihí Xítóhó Jesucristú, chí mee-gá ío càhnu cuu-gá, te chindee ñaha-gá xii-ndo. ¹¹ Te diu-ni nchaa sá ní nduu táhú-ndó núú Yá Ndiòxí diu-ni nchaa xiáⁿ cuhuⁿ ínì-ndó, chí xiáⁿ chindee ñaha-xi xii-ndo níhí ndéé-ndó cùndecu-ndo cuèndá sá vá dándáhu ñáhá sàculhá xii-ndo. ¹² Chí nchoo ñá díú cuè ñáyiú ñuyíú-a nàá ndihí-o, chí ndihí cue espíritú cùndihí yucu ñávàha, te diu-ni nchaa espíritú-áⁿ cùnuu-xi cuèi núú nínu quide-xi nchaa sá cuèhé sá dúhá, te diu-ni-xi cùnuu-xi ñuyíú-a sànu ichi-xi cue ñáyiú quidé-yu nchaa sá cuèhé sá dúhá. ¹³ Te ío cuhuⁿ ínì-ndó nchaa sá ní nduu táhú-ndó núú Yá Ndiòxí cuèndá ducaⁿ níhí ndéé-ndó cùndecu-ndo, te vá ndácú yùcu ñávàha ná cada ñaha-xi xii-ndo òré cuínì-xi coto ndeé ñáhá-xí. Te sátá ná dàquee tíhú-ndó yùcu ñávàha te ñⁿ-ni cunduu-ndo cùndecu-ndo ichi Yá Ndiòxí. ¹⁴ Te ducaⁿ cùndecu-ni-ndo ichi Yá Ndiòxí cada-ndo dàtná xiquide cue sandàdú, chí cue téé-áⁿ ío ñⁿ xíndáa-güedé. Te cáháⁿ-ndó mée-ni tnúhu ndáá tnúhu Yá Ndiòxí, te cuu-ndo dàtná cue sandàdú cue téé ndàda tí xiti-xi òré quihíⁿ-güedé nàá-güedé. Te ducaⁿ sàtnahá-xi cuu-ndo te núu na càháⁿ-ndó mée-ni tnúhu ndáá tnúhu Yá Ndiòxí. Te cada ndáá-ndó cùndecu-ndo ichi-gá, te cuu-ndo dàtná cue sandàdú cue téé xixíhnu sá yídáhu ñaha xii-güedé òré nàá-güedé cuèndá sá vá nícuèhé-güedé. Te ducaⁿ sàtnahá-xi cuu-ndo te núu na càda ndáá-ndó cùndecu-ndo ichi-gá. ¹⁵ Te cundecu túha-ndo

cáháⁿ-ndó tnúhu Xítoho Jesucristú, tnúhu sá cáháⁿ nàcuáa cuu váha iní ñáyi cuundecu-yu, te cuu-ndo dàtná cue sandàdú cue téé ndíhu zapátú-xi quíhíⁿ-güedé nàá-güedé. Te ducaⁿ sátnahá-xi cuu-ndo te núu na cùndecu túha-ndo cáháⁿ-ndó tnúhu Xítoho Jesucristú núu ñáyi.

¹⁶ Te cächí tnúhu tucu-í xii-ndo sá ío quindáá iní-ndó Yá Ndióxi cuendá sá vǎ ndácú sàcúhná nǎ cada ñaha-xi xii-ndo, te ducaⁿ te cuu-ndo dàtná cue sandàdú cue téé xínehe vítú chínèe-güedé sáquidáhu ñaha-xi xii-güedé cuendá sá vǎ cuicúⁿ-güedé sá nchicúⁿ ñuhú téé ñaha cue téé nàá ndíhi-güedé. Te ducaⁿ sátnahá-xi cuu-ndo te núu na quindáá iní-ndó Yá Ndióxi.

¹⁷ Te ío cuhuⁿ iní-ndó sǎ ní naníhí tǎhú-ndó, te cuu-ndo dàtná cue sandàdú cue téé ñúhu mbelú cáxíⁿ. Te ducaⁿ sátnahá-xi cuu-ndo te núu na cùhuⁿ iní-ndó sǎ ní naníhí tǎhú-ndó. Te ío cuhuⁿ iní-ndó tnúhu Yá Ndióxi, chí tnúhu-áⁿ ní taxi Espíritú-gǎ ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machití cuaháⁿ-güedé nàá-güedé. Te ducaⁿ sátnahá-xi cuu-ndo te núu na cùhuⁿ iní-ndó tnúhu Yá Ndióxi.

¹⁸ Te vǎ dáñá ndèe-ndó cáháⁿ ndíhi-ndo Yá Ndióxi nàcuáa chindee ñaha Espíritú-gǎ xii-ndo, te cácáⁿ tǎhú-ndó núú-gǎ núu ná cuíní-ndó, te ío cundecu túha-ndo cáháⁿ ndíhi-ndo-gǎ, te vǎ nátùhú iní-ndó cácáⁿ tǎhú-ndó núú-gǎ cuendá nchaa dava-gǎ cue ñáyi cùu cuendá-gǎ.

¹⁹ Te tnàhá cuendá-í cácáⁿ tǎhú-ndó núú Yá Ndióxi cuendá sǎ ná chindee ñaha-gǎ xii-í níhí-í tnúhu cáháⁿ-í òré cáháⁿ-í tnúhu-gǎ, te ducaⁿ vǎ yùhú-í cáháⁿ-í nàcuáa ndùu tnúhu sá cáháⁿ nàcuáa naníhí tǎhú-ó núú ñáyi tnúhu sǎ vǎtá cùndedóho-gǎ-yu.

²⁰ Te Yá Ndióxi ní cachí-gǎ sǎ yùhú cuu-í ñⁿ téé cada-í núú-gǎ cáháⁿ-í tnúhu-gǎ núú ñáyi, te ñi cuendá tnúhu-áⁿ yíhí-í vecá vitna. Te ío cácáⁿ tǎhú-ndó núú Yá Ndióxi cuendá-í cuendá sǎ yùhú cuyí-í ní yùhu ní

iní-í cáháⁿ-í tnúhu-gǎ núú ñáyi nàcuáa tàú-xi cunduu.

Tnúhu ndée núú ní ndíhi-ná

²¹ Te té Tiquicú téé ío cùu iní-í ndécú ndíhi-o ichi Xítoho Jesucristú cúú-dé ñⁿ téé ío váha quide ndáá xínú cuèchi-dé núú Xítoho Jesucristú, téé-áⁿ cachí tnúhu-dé xii-ndo nàcuáa cùu ndecu-í ndíhi nchaa nàcuáa quide-í cuendá ducaⁿ cùtnuní iní-ndó.

²² Te cuendá xiǎⁿ núu cuíní-í tendaha-í-dé quixi-dé núú ndécú-ndó cuendá cachí tnúhu-dé xii-ndo nchaa nàcuáa cùu ndecu-ndí iha, te ducaⁿ tàxi-gǎ-dé tnúhu ndee iní cundecu ndíhi-ndo.

²³ Te xicáⁿ tǎhú-í núú Tǎtá-ó Dütú Ndióxi ndíhi núú Xítoho Jesucristú sǎ ncháá nchòhó ñáyi ndècu ndíhi-í ichi-gǎ sǎ ñiú-gǎ ná cádá te ío váha cuu iní-ndó cùndecu-ndo, te ducaⁿ ío cuu iní tnáhá-ndó, te ío quindáá iní-ndó-gǎ.

²⁴ Te nchòhó ío cùu iní-ndó Xítoho Jesucristú, te ñǎ túú dàña ndèe-ndó cùu iní-ndó-gǎ. Te mee Yá Ndióxi ío na chindee chitúu ñaha-gǎ xii-ndo. Te ducaⁿ na cunduu. Te ío chí cádá ndèe iní-nǎ vitna.

TUTÚ NÍ CADÚHA TÉ PÁBLÚ QUIHIⁿ NDAHA ÑÁYIU ÑUÚ FÌLIPÚ

Té Páblú cáduha-dé tutú quíhíⁿ ndaha ñáyiú quide ndáá xĩndecu ichi Xítóhó Jesucristú ndécú ñuú Filipú

¹ Yúhú té Páblú ndíhí té Timúteú cúú-ndí cue téé xĩnu cuechi núú Xítóhó Jesucristú, te tëndaha-ndí tutú-a véxi ndaha nchòhó cue téé yĩndaha nchaa ñáyiú ndècu ichi Xítóhó Jesucristú, ndíhí cue téé chĩndee ñaha xii-ndo, ndíhí nchaa dava-gá ñáyiú xĩquide ndáá ndécú ichi-gá ñuú Filipú. ² Te xicáⁿ táhù-í núú Tátá-ó Dütú Ndióxí ndíhí núú Xítóhó Jesucristú sá ná chĩndee chitúu ñaha-gá xii-ndo, te ducaⁿ ndí nduú-gá ná cáda te ío váha cuu iní-ndó cùndecu-ndo.

Té Páblú càháⁿ ndíhí-dé Yá Ndióxí cuendá nchaa ñáyiú ndècu ichi-gá

³ Te ndí tnahá òré ndácú iní ñáhà-í xii-ndo, te ndácáⁿ táhù-í núú Tátá-ó Dütú Ndióxí sá ndécú-ndó ichi-gá. ⁴ Te ndí tnahá òré ducaⁿ quide-í te ío cùdíí iní-í càháⁿ ndíhí-í-gá cuendá-ndó. ⁵ Chi ndéé cùtnáhá ní sándáá iní-ndó-gá ní ngúíta-ndo tnahá-ndó quide váha-ndo ndècu-ndo cuendá sá quĩndáá iní ñáyiú tnúhu Xítóhó Jesucristú. ⁶ Te yúhú sàni ndáá iní-í sá Yá Ndióxí Yaá ní quesaha chĩndee ñaha xii-ndo quide váha-ndo ndècu-ndo, te diu-ni-gá chĩndee ñaha-gá xii-ndo càda váha-ndo cùndecu-ndo ndéé ná sàá nduu quixi tucu Xítóhó Jesucristú. ⁷ Te ducaⁿ tnahí tàù-xi caní iní-í sá cúú-xi-ndó, chi ío cùu iní ñáhà-í xii-ndo. Te tnahá-ndó ío chĩndee chitúu ñaha Yá Ndióxí xii-ndo ndècu-ndo, te diu-ni ducaⁿ chĩndee ñaha-gá xii-ndo tnahá-ndó cuéi vitna yìhí-í vecaá, te diu-ni

ducaⁿ chĩndee ñaha-gá xii-í cuéi òré cuáháⁿ-í núú cué ñáyiú ñá túú tnahá iní tnúhu-gá, chi nihí-í tnúhu nàdanhocáva-í núu ná tnúhu càháⁿ-yu cuendá-gá, te nchaa ñáyiú xáhaⁿ-í xii-yu sá tnúhu-gá cúú-xi tnúhu ndáá cuiti. ⁸ Te mee Yá Ndióxí náhá ndáá-gá sá yùhú ío cùu iní ñáhà-í xii-ndo dàtná cúú iní ñáhá mee Xítóhó Jesucristú xii-o. ⁹ Te xicáⁿ táhù-í núú Yá Ndióxí sá díú-gá ná chĩndee ñaha-gá xii-ndo te uuⁿ-gá cuita cuu iní tnahá-gá-ndó quíhíⁿ, te ducaⁿ ío váha cuita cutnùnì iní-ndó nchaa nacuaá sàni iní-gá cada-ndo, te ducaⁿ ío váha cuita cutnùnì tucu iní-ndó nàcuáa cundecu-ndo. ¹⁰ Te ducaⁿ cùtnunì tucu iní-ndó nchaa sá ío-gá váha xini ñuhu-xi cada-ndo, te ducaⁿ te cuu-ndo ñáyiú cada mee-ni sá váha, te ducaⁿ ñà túú tnahí ná cùmánì-ndó núú Yá Ndióxí ndéé ná sàá nduu quixi tucu Xítóhó Jesucristú. ¹¹ Te diu-ni Xítóhó Jesucristú chĩndee ñaha-gá xii-ndo càda-ni-ndo nchaa núú sá váha nàcuáa cuinì Yá Ndióxí. Te sá ducáⁿ ná càda-ndo te ío cada càhu-ndo-gá, te nchaa dava-gá ñáyiú càháⁿ váha-yu cuendá-gá.

Xítóhó Jesucristú ío cùnuu-gá ndécú ndíhí-gá té Páblú

¹² Te nchaa nchòhó ñáyiú ndècu ndíhí-í ichi Xítóhó Jesucristú na càhí tnúhu-í xii-ndo sá úúⁿ-gá tá xité nuu tnúhu-gá vitna yìhí-í vecaá. ¹³ Te nchaa cue téé cùu sandadú xĩndecu vechiúⁿ núú ndécú téé cùnuu xiní-güedé sá sá cuendá sá càháⁿ-í tnúhu Xítóhó Jesucristú duha yìhí-í vecaá, te diu-ni ducaⁿ sá xinì nchaa dava-gá ñáyiú sá sá càháⁿ-í tnúhu-gá duha yìhí-í vecaá. ¹⁴ Te cuendá sá dúhá yìhí-í vecaá xĩáⁿ ío-gá vèi ñáyiú ndècu ichi Yá Ndióxí ta cùtnunì-gá iní-yu sá cúú-gá ñⁿ Yaá ío quide ndáá, te uuⁿ-gá tá cùyí-yu càháⁿ-yu tnúhu-gá, te ñá túú tnahí-gá yùhú-yu càháⁿ-yu.

15 Te na càchí-í tnúhu ndáá-í xii-ndo sá dáva ñáyiú càháⁿ-yu tnúhu Xítoho Jesucristú cuendá-ni sá cúú cuèdú iní ñáhã-yu xii-í sá ïo chindee ñaha-gá xii-í càháⁿ-í tnúhu-gá. Te ducaⁿ quidé-yu chi cuíní-yu nàà ndihí ñáhã-yu xii-í, dico davá-yu chi ïo váha sàni iní-yu càháⁿ-yu tnúhu-gá. 16-17 Te ñáyiú-án càháⁿ-yu tnúhu-gá chi cùu iní ñáhã-yu xii-í, te sa nàhá-yu sá sá cuendá sá càháⁿ váhá-í cuendá tnúhu-gá núú ñáyiú ñã túú tnàhá iní tnúhu-gá, cuendá xíãⁿ yíhi-í vecaá. Te dava-gá-yu càháⁿ-yu tnúhu Xítoho Jesucristú cuendá-ni sá cuíní-yu cuu sá váha xii mèe-yu, te ñã díú sá càháⁿ-yu cuendá sá sání váha iní-yu. Te ducaⁿ quidé-yu chi cuendá cuíní-yu sá nãndi-gá cada ñaha-güedé xii-í. 18 Dico ïo cudíí iní-í sá càháⁿ-yu tnúhu Xítoho Jesucristú cuèi cùu váha iní-yu àdi ñã túú cùu váha iní-yu càháⁿ-yu.

Te ñu-ni ducaⁿ cudíí iní-í núú cuaháⁿ núú véxi. 19 Te cùtnuní iní-í sá sá cuendá nchaa sá quidé ñaha-güedé xii-í, cuendá xíãⁿ cada váha ñaha Yã Ndiöxí xii-í, chi nchòhó ïo càháⁿ ndihí-ndo-gã cuendá-í, te Espíritú ní taxi Xítoho Jesucristú ndécú ndihí-o ïo chindee ñaha-xi xii-í. 20 Te cuíní-í sá ñã túú tnàhá ná cumání-í núú Yã Ndiöxí cuendá sá vã cúú càháⁿ núú-í, te cùtnuní iní-í sá díú-gã chindee ñaha-gá xii-í. Te cuíní tucu-í sá ïo cuyí-í càháⁿ-í tnúhu-gá vitna dàtná tá quide-í véxi, te ducaⁿ ïo cada nínu-í Xítoho Jesucristú cuèi vitna ñini ndècu-í ñuyúú-a te cuèi na cùú-í ducaⁿ-ni càda nínu-í-gá. 21 Te ñini ndècu-í ñuyúú-a te Xítoho Jesucristú ïo cùnno-gá ndécú ndihí ñaha-gá xii-í, te na sàà nduu cùú-í te ïo-gá váha tnàhá-í chi nucúndecu-í ndihí-gá. 22 Te núu na cùndecu-gá-í ñuyúú-a te cada-gá-í chiuⁿ sá cúú-xí Yã Ndiöxí, te ñã cùtnuní iní-í nása cada-í núú sá cùndecu-í àdi sá cùú-í. 23 Te ïo vai saní iní-í te cuíní-í

cuú-í chi ïo-gá váha cundecu-í núú ndécú Xítoho Jesucristú. 24 Dico sá cúú-xí nchòhó chi ïo xini ñuhu-xi cundecu-í. 25 Te cùtnuní ndáá iní-í sá ñⁿ tnúhu ndáá càháⁿ-í, te cùtnuní tucu iní-í sá cùndecu-ni-í cundecu ndihí ñaha-í xii-ndo nchaa-ndo cuendá chindee ñaha-í xii-ndo cuíta quindáá-gá iní-ndo Xítoho Jesucristú quíhíⁿ, te ducaⁿ ïo cudíí iní-ndo cùndecu-ndo. 26 Te ducaⁿ te uuⁿ-gá cachí-ndo sá ïo càhnu cuu Xítoho Jesucristú cuendá sá ñí dácãcu ñaha-gã xii-í ndécú ndihí ñaha-í xii-ndo.

27 Te xini ñuhu-xi cada-ndo nchaa naçuáa càháⁿ tnúhu Xítoho Jesucristú. Te núu ní ndacu-í véxi coto ñaha-í xii-ndo, te davá-án quini ndáá-í sá ndécú-ní-ndo ïchi Xítoho Jesucristú. Dico núu ñã túú ní ndacu-í quixi coto ñaha-í xii-ndo ñã, te ñu-ni níhi-í tnúhu sá ndécú-ní-ndo ïchi-gá, te níhi tucu-í tnúhu sá ñⁿ-ní cùu-ndo ndecu-ndo, te níhi tucu-í tnúhu sá ñⁿnuu nducu ndee-ndo caháⁿ-ndo tnúhu Yã Ndiöxí núú ñáyiú, tnúhu sá sàndáá iní-ndo. 28 Te ñã túú yùhú-ndo nchaa sá quidé ñaha ñáyiú cùu úhú iní ñáhã xii-ndo, te sá dúcãⁿ quide-ndo ñã túú yùhú-ndo nchaa sá quidé ñáhã-yu xii-ndo, te ndixi túu iní-yu sá nchòhó ndécú-ndo ñⁿ ïchi núú nánihí tàhú-ndo, te ñáyiú-án cuíta nihnú-yu, chi ducaⁿ ñí cachí Yã Ndiöxí cunduu. 29 Te mee Yã Ndiöxí ní taxi-gá tnúhu ndee ñini sá quindáá iní-ó Xítoho Jesucristú, te ñã díú-ni sá quindáá iní-ó-gã chi tnàhá ndoho-ó cuendá-gá. 30 Te tnàhá nchòhó ndóhó-ndo cuendá-gá vitna, te nchòhó ní xini núú-ndo nàçuáa ní ndoho-í, te vitna níhi-ndo tnúhu nchaa nàçuáa ndòho tucu-í.

2

Xítoho Jesucristú ñã túú ní quide nínu-gá mèe-gã dico Yã Ndiöxí ní quide nínu ñaha xii-gá

1 Te Xítohó Jesucristú dácàhu iní ñáhá-gă xii-ndo nàcuáa cundecu-ndo, te cùu iní ñáhá-gă xii-ndo nàcuáa cuu vâha iní-ndó cundecu-ndo, te ndècu ndîhi-ndo Espiritú Yă Ndiôxí, te ío cùndahú iní tnáhá-ndó. 2 Te xiăⁿ nũu cãháⁿ-í dóho-ndo sã ío cuu ñⁿnuu-ni-ndo cundecu-ndo nacuáa ío-gă cudîí ñí-í, te ñⁿ-ni cùu iní tnáhá-ndó, te ñⁿ-ni cãni iní-ndó, te ñⁿ-ni càda-ndo. 3 Te vã cáda ññu-ndo mēe-ndo nducu-ndo mee-ni sã cùú-xí mēe-ndo, chi cunduu ndàhú iní-ndó, te caní iní-ndó sã tnàha ñâyiu-ndo ío-gă cùnũu-yu dácúúxí mēe-ndo. 4 Te ni vã cãní iní-ndó ndùcu-ndo mee-ni sã vâha sã cùú-xí mēe-ndo, chi nducu-ndo sã cùú-xí tnàhá cuendá tnàha ñâyiu-ndo.

5 Te ío vâha caní iní-ndó nàcuáa cundecu-ndo dàtná quidé mēe Xítohó Jesucristú. 6 Te ñⁿ-ni cùu Xítohó Jesucristú ndîhi Yă Ndiôxí. Te cuēi ducaⁿ dico mee Xítohó Jesucristú ní sani iní-gă sã ñà túú cùyica cundecu-gă taxi tnùní-gă ndîhi Yă Ndiôxí. 7 Te ní dáñá-gă sã cùnũu-gă andiū te ní quixi-gă ñuyú-a ní cuu-gă ñⁿ ñâyiu, te ní quide-gă dàtná quidé ñⁿ tēe xñnu cuechi. 8 Te ní cuu-gă ñⁿ tēe dàtná ndãa cue tēe xñndecu ñuyú-a, te ní cuu-gă ñⁿ tēe ío ndàhú iní-xi chi ñà túú ní quide nínu-gă mēe-gă, te ní sãndáá iní-gă ní quide-gă nchaa nàcuáa ní xáhaⁿ Yă Ndiôxí xii-gă cùtnàhá ní quixi-gă ñuyú-a. Te sã dúcáⁿ ñ sãndáá iní-gă xiăⁿ ní xíhí-gă núú cùrúxí. 9 Te xiăⁿ ío ní quide nínu ñaha Yă Ndiôxí xii Xítohó Jesucristú cuendá ío cunuu-gă. Te ní xáhaⁿ Yă Ndiôxí xii Xítohó Jesucristú sã cùú-gă Xítohó nchaa ñâyiu ndècu ñuyú-a. 10 Te ducaⁿ ñ quide Yă Ndiôxí cuendá nchaa Espiritú ndécú andiū, ndîhi nchaa ñâyiu ndècu ñuyú-a, ndîhi nchaa ñâyiu ní xíhí ngũñí xít-yu ndîhi nchaa espíritú-án te cachí-yu ndîhi-xi sã ío cãhnu cuu Xítohó Jesucristú. 11 Te ncháa-yu cachí-yu

sã Xítohó Jesucristú cùú-gă Yaá táxí tnùní. Te sã dúcáⁿ càdã-yu, te quide cahnú-yu Dútú Ndiôxí.

Ñâyiu ndècu ichi Xítohó Jesucristú cùú-yu dàtná ñⁿ ñuhú

12 Te xiăⁿ nũu nchaa nchòhó ñâyiu ío cùu iní-í cuiní-í sã quindáá iní ñáhá-ndó xii-í dàtná ní quide-ndo cùtnàhá ní xñndecu ndîhi ñaha-í xii-ndo, chi dává-án ñà túú tnàhí ní dáña ndeé-ndó ní sãndáá iní ñáhá-ndó xii-í. Te cuiní-í sã úúⁿ-gă quindáá iní ñáhá-ndó xii-í vitna ñà túú ndècu ndîhi ñaha-í xii-ndo. Te ío nducu ndèe-ndo cada-ndo nchaa nacuáa tãu-xi cunduu ndeé ná sãá nduu ndũu tãhú-ndó cundecu-ndo ndîhi Xítohó Jesucristú, te ío canehe-ndo sã yíñũhu núú-gă. 13 Te Yă Ndiôxí ío vâha dácãhu iní ñáhá-gă xii-ndo càda-ndo nchaa nacuáa cuiní mēe-gă, te diū-ni mee-gă chindēe ñaha-gă xii-ndo dũcaⁿ quide-ndo.

14 Te vã cãní iní-ndó nã tnũhu cãháⁿ-ndó cuendá ñâyiu, te ní ñà túú nãndi tnũhu cùtnàha-ndo ndîhi-yu, 15 te ducaⁿ te cuu-ndo ñâyiu ñà túú cuēchi-xi núú Yă Ndiôxí. Te nchòhó ñâyiu cùu déhe Yă Ndiôxí, ñà túú tnàhí-gă ná cumání-ndó núú-gă níni ndècu-ndo tnuú nchaa ñâyiu ndècu ichi cuehé ichi duha ñuyú-a, ñâyiu cuihna iní-xi. Te cuu-ndo dàtná chódíní sã dáyehé niú nee, 16 te ducaⁿ chi dãcuaha-ndo ñâyiu tnũhu Yă Ndiôxí tnũhu sã cãháⁿ nàcuáa naníhí tãhú-yu. Te nũu ducaⁿ-ni na càda-ndo te òrè ná sãá nduu càda ndáá Xítohó Jesucristú nchaa yíca cuēchi ñâyiu, te dává-án vã cùú cãháⁿ núú-í, chi ñà túú dió ducaⁿ ní sãhni iní-í cada-í nchaa chiúⁿ ní tãhú-gă. 17 Te nchòhó ío vâha quide-ndo ndecu-ndo ichi Yă Ndiôxí chi sãndáá iní-ndó-gă, te yúhú cahni ñaha-güedé xii-í cuendá nchaa sã vâha quide-ó. Te xiăⁿ ío cùdîí iní-í te cùdîí tucu iní-í dàtná cùdîí iní-ndó cuendá nchaa sã vâha quide-ndo. 18 Te diū-ni ducaⁿ ío chí

cudíí iní dàtná cudíí iní mée-í cuendá nchaa sá yáha-í ndécú-í.

Té Timùteú ndihi té Epafròditú

19 Te núu Xítohó Jesucristú ná cächí-gá te ndíhi-ni tendaha-í té Timùteú quixi-dé quixi coto ñaha-dé xii-ndo nàcuáa cudíí iní-ndó. Te òré ndixi-dé canaha-dé tnúhu ndixi núu nása cùu ndecu-ndo, te tnàhá yúhú ío cudíí iní-í tucu. 20 Te núu ncháá cuè téé ndècu ndíhi-í te ìⁿdi-í té Timùteú-a cùu-dé téé ío váha sàni iní-xi dàtná sàni iní-í, chí diu tnàhi-ni-dé ío sàni iní-dé núu nása ndècu-ndo. 21 Chí dava-gá-güedé mee-ni sá cùú-xí mée-güedé ío sàni iní-güedé, te ñá túú sàni iní-güedé cada-güedé chiuⁿ tahu Xítohó Jesucristú. 22 Te nchòhó sa xini-ndó sá tè Timùteú-a cùu-dé ìⁿ téé quide váha chí nándi sá tá yáha-dé véxi te quide ndee iní-dé. Te cùu-dé dàtná ìⁿ déhe-í ndécú ndíhi ñaha-dé xii-í xínú cuèchi-ndí núú Xítohó Jesucristú càháⁿ-ndí tnúhu-gá núú ñáiyu. 23 Te òré ná cùtnuní núu nása cada ñaha-güedé xii-í te ndíhi-ni tendaha-í-dé quixi coto ñaha-dé xii-ndo. 24 Te sàni iní-í sá Xítohó Jesucristú cada-gá te tnàhá mée-í ío ndíhi quixi coto ñaha-í xii-ndo.

25 Te tnàhá sàni iní-í sá ío xini ñuhu-xi tendaha-í té Epafròditú téé ndècu ndíhi-o ichi Xítohó Jesucristú ndixi coto ñaha-dé xii-ndo, chí tnàhá-dé quidé-dé chiuⁿ-gá te quide ndee iní-dé tnàhá-dé nándi yáha-dé sá cuendá-gá, te diu mee-ndo ní tendaha-ndo-dé véxi-dé cuendá coto ñaha-dé xii-í. 26 Te ducaⁿ cuíní-í tendaha-í-dé ndixi-dé chí mee-dé ío sàni iní-dé ndixi càháⁿ ndíhi ñaha-dé xii-ndo, te ío ndíhú iní-dé sá ní ñíhí-ndó tnúhu sá cùhú-dé ní cùu. 27 Te ndáá sá ní cuhú-dé chí luha ndiquiⁿ-ná cuú-dé ní cùu, dico Yá Ndiòxí ní cundáhú iní ñáhá-gá xii-dé ní quide tátna ñaha-gá te ní ndúha-dé. Te ñá díú-ní mée-dé ducaⁿ ní cundahú iní ñáhá-gá xii-dé chí tnàhá yúhú ío ní cundáhú

iní ñáhá-gá xii-í, chí núu ní xíhí-dé te ío-gá ndíhú iní-í ní cùu. 28 Te xíáⁿ ío ndíhi cuíní-í tendaha-í-dé ndixi-dé cuendá òré nasáá-dé núu-ndó te ío cudíí iní-ndó, te ducaⁿ yúhú ñá túú-gá ná cani iní-í. 29 Te òré nasáá-dé te ío cudíí iní-ndó nàqueheⁿ cuendá-ndó-dé, te ducaⁿ ío ndacáⁿ táhú-ndó núú Xítohó Jesucristú cuendá-dé. Te ío canehe-ndo sá yíñuhu núu nchàa cue téé quide datná quidé-dé. 30 Chí téé-a sa luha ndiquiⁿ-ná cuú-dé ní cùu sá xínú cuèchi-dé núú Xítohó Jesucristú, te ní sàni iní-dé sá ñá túú ná cada-xi cuèi na cùú-dé ní quide-dé nchaa chiuⁿ sá cùmāni cada-ndo cuendá-í ní cùu.

3

Ñáiyu cundáá núú Yá Ndiòxí

1 Te vitna nchaa nchòhó ñáiyu ndècu ndíhi-í ichi Xítohó Jesucristú càháⁿ ndáhú-í núú-ndó sá ío cudíí iní-ndó sá yíndàha ñaha-gá xii-ndo. Te yúhú ñá túú cùu dusaⁿ-í tee tucu-í nchaa tnúhu sá sá ní dánèhé ñáhá-í xii-ndo, chí cùu-xi tnúhu sá ío chíndee ñaha-xi xii-ndo. 2 Te ío quíhi iní-ndó vā cadá cuendá-ndó ní ìⁿ tnúhu càháⁿ cue téé ío cuihna iní-xi ñá túú tnàhi cuíní cada sá váha, chí cue téé-áⁿ néhé-güedé iní iná chí cächí-güedé sá ncháá cuè téé xini ñuhu-xi cuáha-güedé seña ñíi-güedé cuendá ducaⁿ cùdiu-güedé núú Yá Ndiòxí. 3 Dico nchoo chí cùdiu-o núú Yá Ndiòxí cuèi dava-o sá ní ngúndecu seña ñíi-o te dava-o ñáhá, chí Espíritú-gá chíndèe ñaha-xi xii-o quide-o nchaa nacuáa tàu-xi cunduu cuendá cuu càhnu-gá. Te ío cudíí iní-ó cächí-ó sá ío càhnu cuu Xítohó Jesucristú, te ñá túú sàni iní-ó sá sá cuendá nchaa sá váha quide-o cùdiu-o núú Yá Ndiòxí. 4 Te núu dicó cuendá nchaa sá váha quide-o cùdiu-o núú Yá Ndiòxí, te yúhú sa ama-gá cùdiu-í núú-gá cuendá nchaa sá ní quide-í ní cùu te núu dicó ducaⁿ. Te ío cue téé cächí-güedé sá cùdiu-güedé

núú Yá Ndiöxí cuendá nchaa sá váha quide-güedé. Te yúhú uuⁿ-gá ducaⁿ cáháⁿ-í núu dícó sá cúú chí yúhú ní xídó-gá-í ní quide-í dàcúúxí dáva-gá-güedé. ⁵ Te núú úná-ni nduu sá ní cacu-í te ní sáha-güedé sèñá ñi-í, te yúhú cù-í téé isràèl, te mei ñàní tnàhá ndíi Benjàmín téé ní xíndecu ndéé sanaha cùu-í. Te cáháⁿ-í tnúhu hèbreú tnúhu cáháⁿ tātá-í ndíhi nánà-í, te ní cundihi-í nchaa cue téé cùu fariséú, te ní cànchicúⁿ nihnu-í nchaa nàcuáa ní cáháⁿ ndíi Moisés dàtná xíquide mee-güedé. ⁶ Te yúhú ní sani iní-í sá ñⁿ ichi ndáá ndécú-í ní cùu, te ío ní cuini-í cunu cuechi-í núú Yá Ndiöxí, núu xiáⁿ nándi sá ní quide-í nchaa ñáyiú ndècu ichi Xítohó Jesucristú, te vá yòo ñⁿ ní xóo cúñaha ñⁿ tnúhu xii-í cachí-yu sá ñà túú quide-í nàcuáa ní cáháⁿ ndíi Moisés ní cùu. ⁷ Te nchaa sá sání iní-í sá ío nándíhi nchicúⁿ nihnu-í ní cùu, ní cutnùní iní-í sá ñà túú tnàhí chindee ñaha-xi nacuáa cundáá-í núú Yá Ndiöxí, núu xiáⁿ duuⁿ duuⁿ ní xehndé iní-í sá vá chindèe ñaha-xi cuendá sá ní cuini-í cundecu ndíhi-í Xítohó Jesucristú. ⁸ Te nchaa sá càchí ñáyiú chindee ñaha cundáá-ó núú Yá Ndiöxí ní cutnùní iní-í sá ñà túú chindee ñaha-xi. Te yúhú ní cutnùní iní-í sá ío-gá váha tnahá tnúhu-o ndíhi Xítohó Jesucristú. Te nchaa sá sání iní-í chindèe ñaha xii-í ní cùu, ñà túú-gá sàndáá iní-í sá chindèe ñaha-xi vitna chi ní cutnùní iní-í sá ñà túú nándíhi-xi. Te ducaⁿ quide-í ñà túú-gá sàndáá iní-í nchaa xiáⁿ sá chindèe ñaha-xi, chí cuini-í sá úúⁿ-gá cuita tnahá tnúhu-í ndíhi Xítohó Jesucristú quíhíⁿ, ⁹ te cuu ñⁿ-nuu-í ndíhi-gá, te ducaⁿ-ni cundáá-í núú Yá Ndiöxí dàtná cundáá-í vitna, dico ñà díú cuendá sá nchicúⁿ nihnu-í nàcuáa ní cáháⁿ ndíi Moisés ní cùu, chí cuendá sá sàndáá iní-í Xítohó Jesucristú. Te Yá Ndiöxí ní quide-gá cundáá-í núú-gá, te ducaⁿ chí ní sàndáá iní-í Xítohó Jesucristú. ¹⁰ Te cuini-í

cutnùní iní-í nchaa nàcuáa sání iní Xítohó Jesucristú, te cuini-í sá ío chindee ñaha-gá, te diu-ni-gá cúú-gá Yaá ní xíhí te ní ndoto-gá, te ducaⁿ cuini-í cada-gá cuendá cada-í nchaa nàcuáa cuini-gá. Te cuini-í tnàhá-í ndoho-í dàtná ní ndoho-gá. Te yúhú cuini-í sá vá cáda-í ní ñⁿ sá ñà túú tnàhá iní Yá Ndiöxí, chí diu cuendá-áⁿ ní xíhí Xítohó Jesucristú. ¹¹ Te cuini-í sá Yá Ndiöxí cachí-gá te tnàhá-í ndoto na sáa nduu ndòto nchaa ñáyiú sa ní xíhí ní xíndecu ichi-gá.

Cada-o nchaa nacuáa tau-xi cunduu cuendá níhí-ó sá ndúú tãhú-ó

¹² Te cùmání-gá cada-í nchaa nàcuáa cáháⁿ-í-a, te cumání-gá cada-í nchaa nàcuáa cáháⁿ Yá Ndiöxí cuendá sá ñà túú-gá ná cumání-í núú-gá. Te ío ndùcu ndee-í nchicúⁿ nihnu-í quidè-í nàcuáa ducaⁿ ñà túú-gá ná cumání-í núú-gá, chí diu cuendá-áⁿ ní cáháⁿ ñáhá Xítohó Jesucristú xii-í. ¹³ Te nchaa nchòhó ñáyiú ndècu ndíhi-í ichi Xítohó Jesucristú càchí tnúhu-í xii-ndo sá cùtnùní ndáá iní-í sá vitná cùmání-gá cada-í nchaa nàcuáa ñà túú-gá ná cumání-í núú-gá. Te ní níhí-í ñⁿ sá ío xìni ñuhu-xi cada-í te xiáⁿ quidè-í, te ñà túú-gá quidé cuendá-í nchaa sá ní xóo cada-í, te ío ndùcu ndee-í quidè-í nchaa nàcuáa cáháⁿ Yá Ndiöxí. ¹⁴ Te ndùcu ndee vihi-í nchicúⁿ nihnu-í quidè-í nchaa nàcuáa cáháⁿ-gá, te diu-ni ducaⁿ càda-í ndéé ná sáa nduu sáá-í núú ndécú-gá taxi-gá sá ndúú tãhú-í. Te ducaⁿ tnàhí sa ní cáháⁿ ñáhá-gá xii-o cundecu-o ndíhi-gá, te ducaⁿ ní cáháⁿ ñáhá-gá xii-o sá cuendá Xítohó Jesucristú chí tnàhá tnúhu-o ndíhi-gá.

¹⁵ Te nchaa nchòhó ñáyiú quide váha ndècu ichi Yá Ndiöxí xìni ñuhu-xi caní iní-ndó dàtná sání iní-í-a, àdi núu dava-ndo ñà túú sání iní-ndó dàtná sání iní-í-a, dico mee Yá Ndiöxí dandixi túú-gá iní-ndó te cutnùní iní-ndó nàcuáa cada-ndo.

16 Te xini ñuhu-ni-xi cada-o nchaa nacuaa ta quide-o véxi.

17 Te nchaa nchòhó ñáyiú ndècu ndihí-í ichi Xítohó Jesucristú càháⁿ-í dóho-ndo sã cáncñícúⁿ nihnu-ndo càda-ndo datná quidé-í. Te cundehe-ndo nàcuáa quide nchaa ñáyiú sa nchícúⁿ nihnu nchaa nàcuáa dānehé ñāhā-í xii-ndo cuendá ducaⁿ càda-ndo tnahā-ndó. 18 Te sa ní cuu vāi xito cachí tñúhu-í xii-ndo sã íó ñáyiú ñā túú tñāhí cuu vāha iní-xi sã ní xihí Xítohó Jesucristú núú cùrúxí cuendá sã nānihí tǎhú-ó, Te ndihí ndute núú-í dāndācu iní ñāhā-í xii-ndo cuendá-yu. 19 Te sáá nduu te nchaa ñáyiú ducaⁿ xīquide-áⁿ cuíta nihnú-yu, chi mee-ni nchāa sã cuèhé sã dúhá ñūhu iní-yu te diu-ni nchaa xǎⁿ cúnūu quidé-yu, te cucahaⁿ núú-yu cuendá nchaa sã quidé-yu núú dicó sã cúú, dico ñāhá chi da quide cahnú-yu mēe-yu cuendá nchaa xǎⁿ. Te mee-ni nchāa sã íó ñuyúú-a ñūhu iní-yu. 20 Dico nchoo chi andiú ndècu núú cúú ñūú-ó, te ndètu cahnu-o sáá nduu quixi tucu Xítohó Jesucristú nacuaca ñaha-gǎ xii-o. Te diu-ni-gá cúú-gǎ Yaá ní dácācu nihnu ñaha xii-o núú úhú núú ndāhú. 21 Te yiqui cūñú-ó chi vá cúdí-xi cundecu-xi dátñá cáá-xí vitna, dico mee Xítohó Jesucristú nadama-gá yiqui cūñú-ó te ndada-gá dátñá ní nduu yiqui cūñú mēe-gǎ cútñahá ní ndoto-gá. Te ducaⁿ càda-gá chi ndācu-gá quidé-gǎ nchaa sã vāha càchí iní-gá, te ducaⁿ tàxi tñuní-gá nchaandi túhú sã íó.

4

Ío cudíí iní-ó sã ndécú-ó ichi Xítohó Jesucristú

1 Te nchaa nchòhó ñáyiú ío cūu iní-í ndécú ndihí-í ichi Xítohó Jesucristú ío culní-í cáháⁿ ndihí ñaha-í xii-ndo. Te ío cudíí iní-í cuendá nchaa sã vāha quide-ndo chi ñā túú ní xīta chiúⁿ Yá Ndióxi ní quide-í sã cúú-xí-ndó, te diu-ni nchòhó ñáyiú ío cūu iní-í càháⁿ-í dóho-ndo sã

cáncñícúⁿ nihnu-ni-ndo ichi Xítohó Jesucristú.

2 Te yòhó tá Vòdiá ndihí yòhó tá Síntiqué càháⁿ ndāhú-í núú-ndó sã cúú ñⁿnuu-ndo cundecu-ndo ichi Xítohó Jesucristú. 3 Te yòhó téé cūndihí-í quide ndáá quidé nchāa chiúⁿ quide-í, càháⁿ ndāhú-í núú-n sã chindēe tñúhu-n úú ñáyiú dihí-áⁿ cuendá sã ná cūu ñⁿnuú-yu cundecú-yu, chi cútñahá ní xīndecu ndihí ñāhá-yu xii-í ío ní chindee ñāhá-yu xii-í, ndihí té Clémenté, ndihí nchaa dava-gá-yu ní quide-ndí chiúⁿ Xítohó Jesucristú, te nchaa ñáyiú-áⁿ sa yòdo tñuní-yu núú tūtú Yá Ndióxi sã ndúú tǎhū-yu cundecú-yu ndihí-gá ni caa ni quíhíⁿ.

4 Te nchaa-ni nduu ío cudíí iní-ndó sã ndécú-ndó ichi Xítohó Jesucristú. 5 Te càháⁿ-ni tucu-í dóho-ndo sã cudíí ndiṣa iní-ndó! 5 Te ío vāha cuu iní-ndó càháⁿ ndihí-ndo ñáyiú cuendá ná cútñuní iní-yu sã cúú-ndó ñáyiú vāha iní-xi, chi sa ta cūyatni nduu quixi tucu Xítohó Jesucristú.

6 Te ñā túú tñāhí ná cani iní-ndó te núu nása cūu ndecu-ndo, chi cáháⁿ ndihí-ndo Yá Ndióxi cuendá sã ná chindee ñaha-gá xii-ndo. Te ío ndacáⁿ tǎhú-ndó núú-gǎ. 7 Te núu ducaⁿ na càda-ndo te Yá Ndióxi cada-gá te ío vāha cuu iní-ndó cūndecu-ndo. Te nchoo ñáyiú ñā túú cūtñuní iní-ó nása quide-gá ndéé ducaⁿ ío vāha cūu iní-ó, te ducaⁿ ío vāha cūu iní-ó chi cūu ñⁿnuu-o ndihí Xítohó Jesucristú.

Mee-ni sã vāha cuhuⁿ iní-ó

8 Te càháⁿ ndāhú tucu-í núú nchāa nchòhó ñáyiú ndècu ndihí-í ichi Xítohó Jesucristú sã mēe-ní sã vāha cuhuⁿ iní-ndó. Te xini ñuhu-xi cuhuⁿ iní-ndó mēe-ni nchaa tñúhu ndáá, ndihí nchaa tñúhu yíñūhu, ndihí nchaa tñúhu sã ío cudíí iní-ó, ndihí nchaa tñúhu sã ío vii ío vāha cuáháⁿ, ndihí nchaa tñúhu sã ñā túú ñūhu tnahá tñúhu cuèhé, ndihí nchaa tñúhu sã càchí ñáyiú vāha,

ndihi nchaa dava-gá tnúhu sá sání iní mée-ndó sá ïo váha te ðiu-ni nchaa xiãⁿ cuhuⁿ iní-ndó.

⁹ Te cútnàhá ní xindecu ndihi ñaha-í xii-ndo ní ðànèhé ñàhá-í nàcuáa cada-ndo te ní sándáá iní-ndó. Te xiãⁿ càháⁿ-í dóho-ndo sá vâ dáñá ndéè-ndó càda-ndo, te ðiu-ni ducaⁿ vâ dáñá ndéè-ndó càda-ndo nchaa nacuáa ní quide-í ní xiní-ndó. Te núu ducaⁿ na càda-ndo te Yá Ndiòxí Yáá quidé ïo váha cùu iní-ó ndècu-o cundecu ndihi ñaha-gá xii-ndo.

Ñáyiú ñuú Filipú ndécú ichi Xítóhó Jesucristú sãñàhá-yu sá ndúú tãhú tã Pãblú

¹⁰ Te cùdíí víhí iní-í ndacáⁿ tãhù-í núú Xítóhó Jesucristú sá nĩ ndacu iní ñàhá-ndó xii-í, dico ñã díú sã ñã túú ñùhu iní ñàhá-ndó xii-í chí ðicó sã ñã nihi-ndó nàcuáa cada-ndo chindee ñaha-ndo xii-í ní cùu. ¹¹ Te ñã díú sã dúhá càháⁿ-í te cani iní-ndó sã càchí tnúhu-í xii-ndo sã ïo ñⁿ sá cùmání xii-í, chí yúhú cùu váha-ni iní-í nũ ïó xii-í àdi ñã túú ïó. ¹² Te xini-í cunduu ndàhù-í, te xini-í cunduu cuica-í, te xini-í caxi-í ndahá xiti-í, te xini-í cuú-í docó, te xini-í nàcuáa quide-xi oré ñã túú vèdana ná ndécú ndihi-o, te xini-í nàcuáa quide-xi oré xidó ndécú ndihi-o. Te ducaⁿ nĩ cutúha-í quidè-í cuendá nchaa nàcuáa ta yãha-í véxi. ¹³ Te nchaa ndacu-í quidè-í chí Xítóhó Jesucristú chindee ñaha-gá xii-í. ¹⁴ Te nchòhó ïo váha ní quide-ndo nĩ cundàhú iní ñàhá-ndó xii-í ní chindee ñaha-ndo vitna ndecu ndihi-í tnúndòho.

¹⁵ Te nchòhó cue ñáyiú ñuú Filipú sa nàha-ndo nacuáa ní cuu cútnàhá ní ngúíta-í càháⁿ-í tnúhu Xítóhó Jesucristú ðistrítú Macèdoniá, te cútnàhá ní ndee-í ðistrítú-áⁿ te ðiu tnàhí-ni nchòhó ní taxi-ndo sã ndúú tãhù-í, te nchaa ñáyiú ndècu ichi Xítóhó Jesucristú dava-gá xichi ñã túú tnàhí ní chindee ñàhá-yu xii-í. ¹⁶ Te cuèi cútnàhá ní xindecu-í ñuú Tesàlónicá titní xito ní tendaha-ndo sã ndúú tãhù-í

sá nĩ cutnùnì iní mée-ndó nĩ xiní ñùhu-í. ¹⁷ Te vâ cani iní-ndó sã sã dúhá càháⁿ-í te cuini-í nãndi-gá taxi tãhù-ndó, te duha càháⁿ-í chí Yá Ndiòxí ïo-gá vâi sã váha cada ñaha-gá xii-ndo sã dúcáⁿ quide-ndo. ¹⁸ Te ní xidó vâi nchaa sá xini ñùhu-í ndécú ndihi-í vitna, te ducaⁿ ïo vâi sã ndécú ndihi-í ní cuu chí ní tendaha tucu-ndo sã ndúú tãhù-í véxi ndihi té Epafròditú. Te tãhù-a cùu-xi datná ñⁿ tãhú sã nĩ sãha-ndo mee Yá Ndiòxí, te cùu vii cuu váha iní-gá sã dúcáⁿ nĩ quide-ndo. ¹⁹ Te núu ná cùú sã xini ñùhu-ndo, te mee Yá Ndiòxí ïo vâi taxi-gá chí ïo vâi sã ndécú ndihi-gá, te ducaⁿ càda-gá chí ndecu ndihi-o Xítóhó Jesucristú. ²⁰ Te vitna nchaa-o chí ná càchí-ó sã ïo càhnu cuu Tátá-ó Dütú Ndiòxí nĩ caa nĩ quíhíⁿ. Te ducaⁿ na cunduu.

Tnúhu ndéé núú nĩ ndihi-ná

²¹ Te cúñaha-ndo sã ïo na càda ndee iní nchaa ñáyiú ndècu ichi Xítóhó Jesucristú, ñáyiú cùu cuendá Yá Ndiòxí. Te tnàhá nchaa ñáyiú xindecu ichi Xítóhó Jesucristú ndécú ndihi-í quidé ndèe iní ñàhá-yu xii-ndo. ²² Te nchaa ñáyiú cùu cuendá Yá Ndiòxí xínú cuèchi vehe té Cèsár tée yindaha cuéhé nacióⁿ quidé ndèe iní ñàhá-yu xii-ndo, ndihi nchaa dava-gá ñáyiú cùu cuendá-gá.

²³ Te Xítóhó Jesucristú ïo na chindee chítuu ñaha-gá xii-ndo nchaa-ndo. Te ducaⁿ na cunduu. Te ïo chí càdá ndèe iní-nã vitna.

TUTÚ NÍ CADÚHA TÉ PÁBLÚ QUIHIⁿ NDAHA ÑÁYIU ÑUÚ CÒLOSÁ

*Té Páblú cadúha-dé tutú quíhiⁿ
ndaha ñáyiú xĩndecu ichi Xĩtohó Jesu-
crístú ndécú ñuú Còlosá*

¹ Yúhú té Páblú ní tendaha ñaha Yá Ndióxi càháⁿ-í tnúhu Xĩtohó Jesucristú núú ñáyiú chi ducaⁿ cuini méé Yá Ndióxi cunduu, te cadúha-í tutú-a ndihi té Timúteú ² cuendá daquixi-í ndaha nchòhó ñáyiú ñuú Còlosá, ñáyiú cùu cuendá Yá Ndióxi, ñáyiú quide ndáá ndécú ichi Xĩtohó Jesucristú, te xicáⁿ táhù-í núú Tátá-ó Dütú Ndióxi sá ïo na chĩndee chitúu ñaha-gá xii-ndo, te ducaⁿ ndí nduú-gá ná cadá te ïo váha cuu iní-ndó cundecu-ndo.

*Té Páblú càháⁿ ndihi-dé Yá Ndióxi
cuendá ñáyiú sãndáá iní ñháá xii
Xĩtohó Jesucristú*

³ Te ducaⁿ-ni càháⁿ ndihi-ndí Yá Ndióxi Yaá cúú Tátá Xĩtohó Jesucristú ndacáⁿ táhú-ndí núú-gá cuendá nchaa nacuaá quide-ndo ndecu-ndo, ⁴ chi níhí-ndí tnúhu sá ïo sãndáá iní-ndó Xĩtohó Jesucristú, te ducaⁿ ïo cùu iní-ndó nchaa ñáyiú cùu cuendá Yá Ndióxi. ⁵ Te ducaⁿ quide-ndo chi sãndáá iní-ndó sã ndúú táhú-ndó cundecu-ndo núú ndécú Xĩtohó Jesucristú, te tnúhu-áⁿ ní níhí-ndó cutnàhá ní xĩndedóho-ndo tnúhu ndáá tnúhu Xĩtohó Jesucristú. ⁶ Te tnúhu Xĩtohó Jesucristú tá xité nuu-xi níhí ñuyú cuáháⁿ. Te vai ñáyiú ta sãndáá iní-yu cuáháⁿ, te ta quide-yu mee-ni sã váha cuáháⁿ ndécú-yu ichi-gá. Te nchòhó chi ndéé cutnàhá ní tecú dóho-ndo tnúhu-gá ní quesaha-xi ta cùu vai ñáyiú ñuú-ndó tá quide ndáá-yu núú-gá cuáháⁿ. Te dává-áⁿ ní cutnùní ndáá ndisa iní-ndó sã Yá Ndióxi

ïo chĩndee chitúu ñaha-gá xii-ndo. ⁷ Te ducaⁿ ní dánèhé ñháá tẽ Ępafrás tée ïo cùu iní-ndí, chi tnàhá-dé ïo quide ndáá-dé xínú cuèchi-dé núú Xĩtohó Jesucristú quide-dě núú-ndí dáciuha ñaha-dé xii-ndo tnúhu-gá. ⁸ Te càhí tnúhu-dé xii-ndí sá ïo cùu iní ñháá-ndó xii-ndí, te ducaⁿ quide-ndo chi Espiritú Yá Ndióxi chĩndee ñaha-xi xii-ndo.

⁹ Te ndéé cutnàhá ní níhí-ndí tnúhu nacuaá quide-ndo ndecu-ndo ndéé dává-áⁿ ní ngúita-ndí ñá túú dàña ndee-ndí xicáⁿ táhú-ndí núú Yá Ndióxi cuendá-ndó sã Espiritú-gá ná tàxi-xi nchaa-gá sá cùmání quini tnùní-ndó, te ducaⁿ te cutnùní váha-gá iní-ndó nacuaá cuini Yá Ndióxi cada-ndo. ¹⁰ Te sá dúcáⁿ te ndacu-ndo cada-ndo mee-ni sá váha dàtná cuini Xĩtohó Jesucristú cada nchaa ñáyiú ndecu ichi-gá. Te ducaⁿ ïo nduu vétú iní-gá te núu na cada-ndo nchaa núú sã váha. Te ducaⁿ ïo-gá cuita cutnùní iní-ndó nchaa nacuaá cuini Yá Ndióxi cada-ndo. ¹¹ Te mee-gá cúú-gá Yaá ïo cùnuu, te diu-gá ïo chĩndee ñaha-gá xii-ndo, te cudíí iní-ndó cuèi nãndi na càda ñaha ñáyiú xii-ndo sã cuendá-gá, te ducaⁿ ïo cunduu càhny iní-ndó. ¹² Te ndacáⁿ táhú-ó núú Dütú Ndióxi chi ní quide túha ñaha-gá xii-o cuendá nduu táhú-ó cundecu-o ndihi nchaa dava-gá ñáyiú yĩndaha-gá xĩndecu núú càndòo canine ñá túú tnàhí-gá ni ñⁿ cuèchi ïó. ¹³ Te diu-gá ní quide ní dàñá-ó nchaa ichi cuèhé ichi duha núú tàxi tnùní yucu ñávãha, te ní nachihí ñaha-gá xii-o ndãha Déhe-gá Yaá ïo cùu iní-gá. ¹⁴ Te Déhe-gá ní xihí-gá cuendá sã nchóó cãcu nihnu-o núú ùhú núú ndàhú, te ní quide càhnu iní-gá nchaa sã cuèhé sã dúhá ní quide-o.

*Ñáyiú cùu ñⁿnuu ndihi Yá Ndióxi
cuendá sã ní xihí Xĩtohó Jesucristú*

¹⁵ Te Yá Ndióxi cúú-gá Yaá vá cúú quini-ó dico Xĩtohó Jesucristú chi ní quixi túu-gá ñuyú-a, te

ní quide-gá nchaa nàcuáa sàni iní-gá. Te dàtná-ni sàni iní-gá te ducaⁿ sàni iní Yá Ndiòxí, te Yaa-áⁿ ducaⁿ-ni ndècu-gá ndéé cútñahá vátá ngáva-gá ñuyúú. ¹⁶ Te Xítohó Jesucristú ní quide-gá núú Yá Ndiòxí ní cadúha-gá nchaa sá ió andiú ndihi nchaa sá ió ñuyúú-a, te ní cadúha-gá nchaa sá cúú quíni núú-ó cùndehe-o, ndihi nchaa sá vǎ quíni tñahí-o, ndihi nchaa espíritú cùnùu vihi xinu cuechi núú Yá Ndiòxí, ndihi nchaa dava-gá espíritú xinú cuèchi. Te nchaa ní cadúha Xítohó Jesucristú chi ducaⁿ ní cachí Yá Ndiòxí cunduu. Te ducaⁿ ní cachí Yá Ndiòxí cunduu cuendá nchaa cuu-xi mee-ni sá vǎha sá cúú-xi Xítohó Jesucristú. ¹⁷ Te Xítohó Jesucristú ducaⁿ-ni ndècu-gá ndéé cútñahá vátá ngáva-gá ñuyúú-a, te ñiú núú ndáhá-gǎ cándòdo ñuyúú-a, ndihi andiú, ndihi nchaandi túhú sá ió. ¹⁸ Te ñiú Xítohó Jesucristú cùnùu-gá yíndàha ñaha-gá xii nchaa nchoo ñáyiú ndècu ichi-gá, te ñiú-gá quidé-gǎ ndécú vǎha-o núú-gǎ. Te núú ncháá ñáyiú ndoto ñiú-gá cúú-gǎ Yaa ío càhnu cuu sa ní ndoto, te sá dúcáⁿ ní ndoto-gá te xíáⁿ cúú-gǎ Yaa ío tàxi tnuni nchaandi túhú sá ió ñuyúú-a ndihi andiú. ¹⁹ Te ducaⁿ ío cùnùu-gá táxi tñuní-gá chi ndáá sá ñiⁿ-ni cuu-gá ndihi Yá Ndiòxí. ²⁰ Te Xítohó Jesucristú ní xihí-gá núú cùrúxí, chi ducaⁿ ní cuíni Yá Ndiòxí cunduu cuendá sá vǎ yóo ñiⁿ-gá cuu úhú iní ñáhá xii-gá cuéi ñáyiú xíndecu ñuyúú-a, te cuéi cue espíritú ndécú àndiú.

²¹ Te nchòhó cútñahá vátá cùndècu-gá-ndó ichi Xítohó Jesucristú ñá túú tñahí ni xóo cáháⁿ ndihi-ndo-gǎ, chi mee-ni ní xóo cuu úhú iní-ndó-gǎ, te mee-ni ncháa sá cuèhé sá dúhá ní xóo cunuu ní xóo cada-ndo ní cuu, dico Xítohó Jesucristú ní quide-gá ní tñahá tñuhu-ndo ndihi Yá Ndiòxí vitna. ²² Chi ñiú cuendá-áⁿ ní xihí Xítohó Jesucristú núú cùrúxí cuendá sá

nchóo ndùu ndoo nduu nine iní-ó ngúndecu-o núú Yá Ndiòxí, te ducaⁿ te ñá túú tñahí-gá ná cumání-ó núú-gǎ, te vǎ yóo ñiⁿ-gá cachí sá nchóo ndècu cuéchi-o. ²³ Te núú vǎ dáñá ndéé-ndó quíndáá iní-ndó Xítohó Jesucristú, te cundecu-ni-ndo ichi-gá, te vǎ cáni iní-ndó dáña-ndo tñuhu ndee iní ní taxi-gá ndécú ndihi-o. Te nchaa tñuhu-gá-áⁿ tá xité nuu-xi ñihi ñuyúú cuáháⁿ, te ñiú-ni tñuhu-áⁿ cáháⁿ yúhú té Páblú dánèhé-í ñáyiú.

Te Páblú yíhi ñiⁿ-de cáháⁿ-de tñuhu Xítohó Jesucristú núú ñáyiú ndècu ichi-gá

²⁴ Te vitna ío cùdíi iní-í ndòhò-í cuendá-ndó, chi Xítohó Jesucristú ío ní ndoho-gá cuendá-ó, te tñahá yúhú ndòhò-í cuendá nchaa ñáyiú ndècu ichi-gá, dico vitna cùmání-gǎ ndoho-í cuendá-yu. ²⁵ Te Yá Ndiòxí ní cachí-gá sá yúhú quíhi díquí ñáhà-í xii nchaa nchòhó ñáyiú ndècu ichi-gá cuendá danèhé ñáhá vǎha-í xii-ndo tñuhu-gá cuendá cuu-xi sá vǎha sá cúú-xi-ndó. ²⁶ Te nchaa tñuhu sá dánèhé ñáhà-í xii-ndo ñá túú ní təcú dóho nchaa ñáyiú ní xíndecu ndéé sanaha, te mee-gá ní cuíni-gá sá ncháá nchòo ñáyiú yíndaha-gá vitna cundecu ndihi-o tñuhu-áⁿ. ²⁷ Te mee-gá ní cachí-gá sá dátúu-gá nchaa tñuhu sá ío vii ío vǎha cuáháⁿ núú ncháa ñáyiú yíndaha-gá. Te tñuhu-áⁿ cúú-xi cuendá tñahá nchaa nchòhó ñáyiú ñá túú cuu ñáyiú isráel. Te tñuhu-áⁿ dánèhé ñáhá-xi xii-ndo sá Xítohó Jesucristú ndécú ndihi ñaha-gá xii-ndo. Te cuendá xíáⁿ ní ngúndecu ndihi-ndo tñuhu ndee iní cundecu-ndo ndihi-gá ní caa ní quíhiⁿ.

²⁸ Te nchúhú mee-ni cuendá Xítohó Jesucristú cáháⁿ vǎha-ndí, te dàsahú-ndí ñáyiú nàcuáa cadá-yu. Te vǎha vihi danèhé-ndí nchaa ñáyiú nàcuáa tecú tñuní-yu tñuhu-gá, te ducaⁿ dánèhé-ndí-yu

nàcuáa cundáá-yu núú Yá Ndiöxí, te ducaⁿ chi tnàhá tnúhu-yu ndihi Xítohó Jesucristú. ²⁹ Te cuendá xíáⁿ ío ndücu ndee-í quidé-í chiúⁿ Xítohó Jesucristú, te mee-gã ío chindee ñaha-gã xii-í núu xíáⁿ ndácù-í quidé-í chiúⁿ-gã.

2

¹ Te cuiní-í sá nchòhó cutnùni iní-ndó sã ío sàni iní-í cuendá-ndó, ndihi cuendá nchaa ñáiyu ndècu ñuú Laodiceá, ñáiyu xindecu ichi Xítohó Jesucristú. Te ducaⁿ-ni ío sàni iní-í cuendá nchaa ñáiyu vátá quini ñáhá-gã xii-í. ² Te cuiní-í sá nchòhó ndihi nchaa ñáiyu-áⁿ ío ndücu ndèe-ndo canchicúⁿ nihnu-ndo ichi Xítohó Jesucristú, te ío cuu iní tnàhá-ndó, te ducaⁿ cùu ìⁿnuu-ndo cundecu-ndo. Te cuiní-í sá nchòhó ndihi dava-gã ñáiyu-áⁿ ío váha sáá sá xini tnùn-ndó cuendá tecú tnùn-ndó nchaa nacúáa ndüu cuendá Xítohó Jesucristú chi ío ndüu yuhu ni cuu, dico vitna ní dátüu-gã núú-ó. ³ Te Xítohó Jesucristú néhé váha-gã nchaa tnúhu sá ío xini ñuhu-xi tecú tnùn-ó. ⁴ Te duha càháⁿ-í chi cuiní-í sá vã quindáá iní-ndó ni ìⁿ tnúhu càháⁿ nchaa ñáiyu cuiní dandàhú ñáhá xii-ndo cuéi ío váha càháⁿ-yu. ⁵ Te cuéi ñá túú ndècu ndihi ñaha-í xii-ndo dico ducaⁿ-ni ío ñuhu iní ñáhà-í, te ío cùdí iní-í chi nihí-í tnúhu sá ío cùu ìⁿnuu-ndo ndecu-ndo, te ñá túú dàña ndeé-ndó sàndáá iní-ndó Xítohó Jesucristú.

⁶ Te dátna-ni ní sàndáá iní-ndó Xítohó Jesucristú, te ducaⁿ-ni quindáá iní-ndó-gã canchicúⁿ nihnu-ndo ichi-gã. ⁷ Te ni yùhu ni iní-ndó canchicúⁿ nihnu-ndo ichi-gã, te ducaⁿ cuita cutnuni-gã iní-ndó nchaa nacúáa càháⁿ-gã quihíⁿ. Te vá dáña ndèe tnàhí-ndo quindáá iní-ndó nchaa tnúhu sá ní dánèhé ñáhá cuè téé càháⁿ tnúhu-gã xii-ndo. Te xini ñuhu-xi ndacáⁿ táhú vihi-ndo núú Yá Ndiöxí cuendá nchaa tnúhu-áⁿ.

Ñáiyu ío váha tnàhá tnúhu ndihi Xítohó Jesucristú

⁸ Te ío quihí iní-ndó cùndecu-ndo chi xica cuu ñáiyu cuiní dandàhú ñáhá xii-ndo, te ñáiyu-áⁿ càháⁿ-yu mee-ni nchaa tnúhu ní cahu iní nchaa cue téé ñuyü-a, te nchaa tnúhu-áⁿ ñá túú vèdana nandíhi-xi. Te ducaⁿ quidé-yu chi nchicúⁿ nihnu-ní-yu nchaa nàcuáa ní xóo cada ñáiyu ní xindecu ndéé sanaha. Te càháⁿ-yu nàcuáa sàni iní yucu ñávaha, te ñá túú càháⁿ-yu nàcuáa cuiní mée Xítohó Jesucristú.

⁹ Te Xítohó Jesucristú cúu-gã ìⁿ ñáiyu dico ìⁿ-ni cùu-gã ndihi Dútú Ndiöxí. ¹⁰ Te nchòhó chi ñá túú tnàhí-gã ná cúmàni-ndó núú-gã chi ndècu ndihi-ndo Xítohó Jesucristú. Te ío cùnuu-gã te tàxi tnuni-gã nchaa núú cuè espíritü cùnuu. ¹¹ Te mee-gã ní ndada ndoo ní ndada nine-gã iní-ndó chi ní ngúndecu ndihi-ndo-gã te ducaⁿ ña túú-gã ndécú-ndó ichi cuehé ichi duha, te cada iní-ndó sã ní ngúndecu ndihi-ndo ìⁿ seña, chi ní ndada ndoo ní ndada nine-gã iní-ndó, dico ñá díú ìⁿ-ni cuu-xi ndihi seña sã sãha cue téé israhél ñi-güedé. ¹² Te nchòhó sa ní sandute-ndo te cada iní-ndó sã dátna tnúhu sá ní xihí-ndó ndihi Xítohó Jesucristú, te ní nguindüxi-ndo ndihi-gã, te ní ndoto-ndo ndihi-gã, te ducaⁿ càda iní-ndó chi ñá túú-gã ndécú-ndó ichi cuehé ichi duha. Te ducaⁿ chi sàndáá iní-ndó nchaa nacúáa quide Yá Ndiöxí, te diu-gã ní dándótó-gã Xítohó Jesucristú. ¹³ Te nchòhó cùtnàhá ndécú-ndó ichi cuehé ichi duha cùu-ndo dátna ñáiyu ní xihí, chi ñá túú tnàhá tnúhu-ndo ndihi Yá Ndiöxí ní cùu, te ni ñá díú ñáiyu israhél cúu-ndó. Te Yá Ndiöxí ní cachí-gã sã nchóó ío váha tnàhá tnúhu-o ndihi Xítohó Jesucristú vitna. Te ducaⁿ ní quide-gã chi sa ní quide càhnu iní-gã nchaa sã cuèhé sá dúhá ní xóo cada-o. ¹⁴ Te vitna duuⁿ duuⁿ ñá túú-gã cuéchi-o ndècu

núú-gă. Te nchoo ña túú cuíní-ó cada-o nacuaá cãháⁿ-gă, te cuendá xíãⁿ ío ndècuéchi-o, te vãi nacháhu-o núú-gă ní cùu. Te vitna ña túú-gă ni ìⁿ cuéchi-o ndècu núú-gă, chi ñu cuendá-áⁿ ñi xíhí Xítóhó Jesucristú núú cùrúxí. ¹⁵ Te sá dúcáⁿ ñi xíhí Xítóhó Jesucristú núú cùrúxí, te duuⁿ duuⁿ ní dáquée tíhú-gă sácúíhná ndihí nchaa espíritú cúndíhí-xi, te ní quendóo canúú-xi, te mee-gă ío cùnuu-gă táxí tnùnì-gă.

Nanducu nihnu-o mee-ni sá vãha cãchí Xítóhó Jesucristú

¹⁶ Te núu dava ñáyíu xícuehé ñáhã-yu xii-ndo cuendá sá ña túú xèxi-ndo xihí-ndo datná quidé mée-yu te vá cádá cuendá-ndó, te ñi vã cádá cuendá-ndó te núu xícuehé ñáhã-yu xii-ndo cuendá sá ña túú cãnehe íí-ndó vico quide meé-yu núu cuiá núu cuiá, ndihí vico quidé-yu ndi tnahá yóó, ndihí cuendá sá ña túú cãnehe íí-ndó ndúu ndetatú-yu. ¹⁷ Te nãcuáa quidé-yu ndi tnahá òré quidé-yu nchaa vico-áⁿ, ndihí nãcuáa quidé-yu ndi tnahá nchaa nduu cãnehe íí-yu-áⁿ, te cada iní-ó sã sã quidé-yu-áⁿ dánèhé núú ñáhã-xí nãcuáa cada Xítóhó Jesucristú núu cuaháⁿ núú vèxi. ¹⁸ Te vá quindáa iní-ndó ñi ìⁿ tnúhu cãháⁿ ñáyíu cãchí sá cuíta nihnu-ndo cuendá sá ña túú tnì-ndo tnúhu cãháⁿ-yu, chi cãchí-yu sá ío xini ñuhu-xi cada cahnu-o nchaa cue espíritú xínú cuèchi núú Yá Ndiòxí, te ñi yùhu ñi iní-ó cãnehe-o sá yíñùhu núú-xi. Te ñáyíu-áⁿ cãchí-yu sá ndáa cãháⁿ-yu chí dácoto ñaha saní-yu nãcuáa cãháⁿ-yu, te ío quide cahnú-yu mée-yu cuendá nchaa sá sání iní mée-yu quidé-yu, te ña túú vèdana nàndíhí nchaa sá quidé-yu. ¹⁹ Te nchaa ñáyíu ducaⁿ xíquide-áⁿ ña túú tnahá tnúhu-yu ndihí Xítóhó Jesucristú. Te mee-gă cúú-gă Yá cúnúu taxí tnunì ñáhã-gă xii nchaa nchoo ñáyíu ndècu ichi-gă,

te chindee ñaha-gă xii-o ndècu-o ichi-gă, te mee-gă quidé-gă cúú ìⁿnuu-o ndècu-o, te ta quide-o nchaa nacuaá cuíní Yá Ndiòxí cuaháⁿ.

²⁰ Te nchòhó cúú-ndó dàtná ñáyíu ní xíhí ndihí Xítóhó Jesucristú cuendá sá vã cãchícúⁿ nihnu-gă-ndó nãcuáa cãháⁿ ñáyíu ña túú ndècu ichi-gă. Te núu ducaⁿ ña, ¿te ná cuendá tnì-ní-ndó tnúhu cãháⁿ ñáyíu-áⁿ te quide-ni-ndo datná quidé-yu? ²¹ Chi ñáyíu-áⁿ cãchí-yu sá ío sá ñi vã cúú tèe ndaha-o, te dava ñi vã cúú cãxi-o, te dava ñi vã cúú tnì-o. ²² Te nchaa xíãⁿ, núú néhé chiuⁿ-ni-o ndihí nihnu-xi. Te nchaa sá dúcáⁿ cãháⁿ-yu-áⁿ cúú-xí mée-ni sã ñi cahu iní mée nchaa ñáyíu ñuyíú-a nãcuáa cada-yu cundecú-yu. ²³ Te nchaa tnúhu cãháⁿ-yu-áⁿ sánúu sá cúú-xí ìⁿ tnúhu cãháⁿ ìⁿ téé ío váha sãa díquí-xi, chi cãchí-yu sá cádá cahnu-o Yá Ndiòxí nãcuáa vèxi iní mée-ó, te cunduu ndáhú iní-ó dico ña túú dãnèhé ñáhã-yu nãcuáa tàú-xi cunduu. Te cãchí tucú-yu sá cádá ùhú-ó mée-o, chi ducaⁿ cuíní Yá Ndiòxí cada-o cãchí-yu. Te nchaa xíãⁿ ña túú vèdana chindee ñaha-xi xii-o cuendá sá vã táxí tnùnì ñáhã ñi ìⁿ sã cuèhé sã dúhá sání iní-ó.

3

¹ Te nchòhó cada iní-ndó sã ñi xíhí-ndó ndihí Xítóhó Jesucristú te ní ndoto-ndo ndihí-gă, núu xíãⁿ tàú-ndó cada-ndo nchaa sã vãha dàtná cuíní mée-gă chí mee-gă núcòo-gă xio cùha Dútú Ndiòxí chí tnahá-gă ío cùnuu-gă. ² Te ío cuhuⁿ iní-ndó nchaa sã vãha cãchí Xítóhó Jesucristú nduu táhú-ndó cundecu ndihí-ndo, te vá cúhúⁿ iní-ndó mée-ni nchaa sá ío ñuyíú-a. ³ Te ducaⁿ cada-ndo chí cùu-ndo datná ñáyíu ní xíhí ndihí Xítóhó Jesucristú, chí ña túú-gă ndécú-ndó ichi cuehé ichi duha. Te Yá Ndiòxí néhé cuendá ñáhã-gă xii-ndo chí tnahá tnúhu-ndo ndihí Xítóhó Jesucristú.

4 Te Xítohó Jesucristú cúú-gã Yáa ndécú ndìhi ñaha xii-o vitna, te sáá nduu quèe túu ndìhi ñaha-gã xii-o àndiu, te tnàhá-ó ïo cunu-u-o ndìhi-gã.

Duuⁿ duuⁿ daña-o nchàa sá cuèhé sá dúhá ñùhu iní-ó te cada-o mèe-ni sá vâha

5 Te duuⁿ duuⁿ daña-ndo nchàa sá cuèhé sá dúhá ñùhu iní-ndó. Te nchaa nchòhó cue téé vá càháⁿ ndìhi-ndo ñáyiú dìhí te núu ñá díú ñàdihí-ndó cùú-yu, te ducaⁿ-ni nchàa nchohó cue ñáyiú dìhí tucu vá càháⁿ ndìhi-ndo cuè téé te núu ñá díú yì-ndo cuu-güedé, te nchaa-ndo vá cání-gã iní-ndó càda-ndo ni ìⁿ sá cuèhé sá dúhá ndìhi tnaha ñáyiú-ndo. Te vá cání cuèhé cani duha-gã iní-ndó sã cúú-xí-ndó ndìhí-yu, te vá cání-gã iní-ndó ni ìⁿ sá cuèhé sá dúhá, te ni vá xihó-ndó ìⁿ sá ndécú ndìhi tnaha ñáyiú-ndo, chi núu ducaⁿ na càda-ndo xiho-ndo sá ndécú ndìhí-yu te ìⁿ-ni cùu-ndo ndìhi ñáyiú chìnùhu nchaa sá càchí-yu cùu ndiòxí te ñá ndáá sá ndiòxí cúú nchàa xíáⁿ. 6 Te nchaa ñáyiú ducaⁿ xíquide ío dandòho ñaha Yá Ndiòxí xií-yu na sáá nduu tnúndòho tnúhu ndàhú, chi ñá túú sàndáá iní ñáhã-yu xii-gã. 7 Te nchòhó cútñahá ní xíndecu-ndo ìchi cuehé ìchi duha, te tnàhá-ndó nĩ xóo cada-ndo dàtná quidé nchàa ñáyiú-áⁿ. 8 Te vitna duuⁿ duuⁿ daña-ndo nchàa sá ná càchí tnúhu-í-a: Vá cúdeéⁿ-gã-ndó, te ni vá cùndùu líhli-gã iní-ndó, te ni vá cúú ùhú-gã iní-ndó tnàha ñáyiú-ndo, te ni vá cùcuèhé-gã-ndó-yu, te ni ìⁿ-gã tnúhu cuèhé vá càháⁿ-ndó. 9 Te ni vá dácùandehnde-gã-ndó, chi nchòhó sa ní dáñá-ndó nchàa ìchi cuehé ìchi duha, te ñá túú-gã sání cuèhé sání dùha iní-ndó ná cada-ndo vitna datná ní xóo cada-ndo. 10 Te vitna nchòhó ní nduu-ndo ñáyiú váha, te uuⁿ-gã tá cùtnuní iní-ndó nchàa nacuaá cuní Yá Ndiòxí cada-ndo, te ducaⁿ

ta ndùcu ndee-ndo quide-ndo mee-ni sá vâha dàtná quidé mèe-gã. 11 Te vitna ní ngúndecu ndìhi-ndo Xítohó Jesucristú, te vá cáda cuèndá-gã-ndó núu cùu-ndo ñáyiú isràél àdi ñá túú cùu-ndo, te ni vá cáda cuèndá-ndó núu cùu-ndo ñáyiú ní ngúndecu seña ñi-xi àdi ñáhá, te ni vá cáda cuèndá-ndó núu cùu-ndo ñáyiú véxi ñuú xicá, te ni vá cáda cuèndá-ndó núu cùu-ndo ñáyiú cùu neñuú, te ni vá cáda cuèndá-ndó núu cùu-ndo ñáyiú ñá túú tnàhí dàñá quee núú chíúⁿ pàtróóⁿ-xi, te ni vá cáda cuèndá-ndó núu cùu-ndo ñáyiú dàñá queé núú chíúⁿ pàtróóⁿ-xi, chi Xítohó Jesucristú cùnùu-gã ndécú ndìhi ñaha-gã xii-o nchàa-o.

12 Te Yá Ndiòxí ní dáquée ìⁿ ñaha-gã xii-ndo cuèndá cundecu-ndo ndìhi-gã, te vitna cùu-ndo ñáyiú quide ndáá ndécú ìchi-gã. Te mee-gã ío cùu iní ñáhã-gã xii-ndo núu xíáⁿ tàú-ndó cùndahú iní tnàhá-ndó, te ío váha cuu iní-ndó chindee tnaha-ndo, te cuu-ndo ñáyiú ndàhú iní-xi, te ío vii ío váha cuu iní-ndó cùndecu ndìhi tnaha-ndo, te ío càhnu cunduu iní-ndó cuèndá nchaa sá quidé ñaha ñáyiú xii-ndo. 13 Te ducaⁿ cànehe-ndo tnúhu càhnu iní núú ndi mèe-ndo nacuaá ndècu-ndo ìchi-gã, te cada càhnu tucu iní-ndó núu ná cúú sã cùmání núú tnàhá-ndó. Te dàtná ní quide càhnu iní Xítohó Jesucristú nchaa sá ñá túú vâha ní xóo cada-ndo ducaⁿ càda-ndo cada càhnu iní-ndó nchàa sã cùmání núú tnàhá-ndó ndècu-ndo. 14 Te Xíni ñùhu vihi-xi sá ío cuu iní tnàhá-ndó cùndecu-ndo, chi núu ducaⁿ na càda-ndo, te quide-ndo nchaa dava-gã sã càháⁿ-í, te ñá túú tnàhí-gã ná cùmání-ndó. 15 Te daña-ndo sã Yá Ndiòxí ná chindee ñaha-gã nàcuáa ío váha cuu iní-ndó cùndecu-ndo, chi ñiú cuèndá-áⁿ nĩ càháⁿ ñáhá Yá Ndiòxí xii-ndo cuèndá cuu ìⁿnuu-ndo ndìhi nchaa dava-gã ñáyiú ndècu ìchi-gã, te ducaⁿ-ni ío ndacáⁿ táhú-ndó

núú-gă.

16 Te ío cuhuⁿ iní-ndó tnúhu Xítóhó Jesucristú, te ío váha cuáha-ndo cuendá nàcuáa cáháⁿ tnúhu-gá te ducaⁿ dānehé tnáhá-ndó. Te ío cáháⁿ dóho tnàha-ndo nacuáa cada-ndo cānchicúⁿ nihnu-ndo cāda-ndo nchaa nacuáa cáháⁿ tnúhu-gá, te cata-ndo ndùdú ndèé núú tūtú Yă Ndióxi, ndihi nchaa dava-gá ndudú sá xini méé-ndó xita-ndo te nchaa xǎⁿ cata-ndo chihuhu-ndo Yă Ndióxi. Te óré xitá-ndó te ni yúhu ni iní-ndó ndacáⁿ táhú-ndó núú-gă. 17 Te cuhuⁿ iní-ndó Xítóhó Jesucristú óré sání iní-ndó cāda-ndo ìⁿ chiuⁿ àdi ná tnúhu cuini-ndó cáháⁿ-ndó, te ñu-ni-gá cuhuⁿ iní-ndó. Te xini ñuhu-xi ndacáⁿ táhú-ndó núú Yă Ndióxi, te ñu-ni Xítóhó Jesucristú chindee ñàha-gá xii-ndo ndacáⁿ táhú-ndó núú Tátá-ó Dütú Ndióxi.

Nàcuáa tàù ñáyiu ndècu ichi Xítóhó Jesucristú cadá-yu sá cúú-xi ndi meé-yu

18 Te nchaa nchòhó ñáyiu ñíhi ñáyiu ndècu yì-xi quindáá iní-ndó yì-ndo, chi ducaⁿ tàù-xi cada nchaa ñáyiu ñíhi ndécú ñichi Xítóhó Jesucristú. 19 Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cūcuèhé-ndó-yu. 20 Te nchaa nchòhó ñáyiu ndècu tátá-xi ndihi náná-xi quindáá iní-ndó-yu, chi núú ducaⁿ na cāda-ndo te ndùu vétú iní Yă Ndióxi. 21 Te nchaa nchòhó ñáyiu cūu tátá ndihi náná vá dāsátú-ndó ñi cue déhe-ndo, chi núú ducaⁿ na cāda-ndo te ni vǎ quixí-gǎ iní-güxi cada-güxi sá vǎha. 22 Te nchaa nchòhó ñáyiu xinu cuechi quindáá iní-ndó nchaa ñáyiu cūu patróoⁿ-ndó, te ni yúhu ni iní-ndó cāda-ndo nchaa chiuⁿ tahú-yu cuèi óré ndécú-yu àdi óré ñá túú-yu, te ñá díú óré-ni ndèhé-yu cada-ndo cuendá-ni sá cuini-ndó cūdiu-ndo núú-yu, chi cada-ndo sǎ néhé-ndó sǎ yíñuhu núú Xítóhó

Jesucristú. 23 Te nchaa chiúⁿ sani iní-ndó cāda-ndo te cada-ndo ni yuhu ni iní-ndó, te sá dúcáⁿ cāda-ndo-áⁿ te cada-ndo cuendá sá xinu cuèchi-ndo núú Xítóhó Jesucristú te ñá díú núú ñáyiu ñuyíú-a xinu cuechi-ndo. 24 Te nchòhó sa ñàha-ndo sá Xítóhó Jesucristú taxi-gǎ sǎ ndúú táhú-ndó te núú ducaⁿ na cāda-ndo, chi cūu-ndo ñáyiu xinu cuechi núú-gă. 25 Te nchaa ñáyiu quide nchaa sá cuèhé sá dúhá nàchahu-yu núú Yă Ndióxi cuendá nchaa sá quidè-yu, te mee-gǎ vá cadá cuendá-gǎ cuèi ná ñáyiu cūu-yu, chi nchaa-yu nachahu-yu nchaa sǎ ñá túú vǎha quidè-yu núú-gă.

4

1 Te nchaa nchòhó ñáyiu cūu patróoⁿ cuu-ndo ñáyiu váha, te cada-ndo nchaa nacuáa tàù-xi cunduu ndihi nchaa ñáyiu xinu cuechi núú-ndó, te cunaha-ndo sǎ àndiu ndecu Yaá cúú Xítóhó-ndó tàxi tnuni ñáhá-gǎ xii-ndo.

2 Te nchaa nchòhó ñáyiu ndècu ichi Xítóhó Jesucristú, vá dáñá ndèé-ndó cáháⁿ ndihi-ndo Yă Ndióxi, te ío cuhuⁿ iní-ndó-gǎ óré cáháⁿ ndihi-ndo-gǎ, te óré-áⁿ ío ndacáⁿ táhú-ndó núú-gă. 3 Te cǎcáⁿ táhú-ndó tnáhá cuendá-ndí núú-gǎ cuendá sá díú-gǎ ná cadá te ndacu-ndí cáháⁿ-ndí tnúhu-gǎ núú nchaa dava-gǎ ñáyiu, te ducaⁿ cáháⁿ-ndí tnúhu Xítóhó Jesucristú sǎ ñá túú ní xīndecu ndihi nchaa ñáyiu ní xīndecu ndéé sanaha, te ñu cuendá tnúhu-áⁿ yíhí-í vecaá vitna. 4 Te cáháⁿ ndihi-ndo Yă Ndióxi cuendá cáháⁿ-í nàcuáa tàù-xi cunduu te tecú tnúni-yu.

5 Te cada-ndo nchaa nacuáa tàù-xi cunduu sǎ cúú-xi nchaa ñáyiu ñá túú ndècu ichi-gǎ, te ducaⁿ-ni ío nducu ndèe-ndo cada-ndo nchaa nacuáa tàù-xi cunduu. 6 Te cada cuendá-ndó sǎ ío vii ío váha cunduu tnúhu cáháⁿ ndihi-ndó-yu, te cáháⁿ-ndó ñⁿ tnúhu nàcuáa cuu váha iní-yu, te ío váha

cundehe-ndo nàcuáa cunduu tnúhu cúñaha-ndo xii ìⁿ ìⁿ-yu.

Tnúhu ndéé núú nǐ ndihi-ná

⁷ Te té Tiquicú téé ío cùu iní-ó ndècu ndihi-o ichi Xítóhó Jesucristú, téé-áⁿ cachí tnúhu-dé nchaa nàcuáa cùu ndecu-í. Te tnàhá-dé xínu cuèchi-dé núú Xítóhó Jesucristú te ío váha quide ndáá-dé. ⁸ Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee iní cundecu ndihi-ndo. ⁹ Te tnàhá tucu té Ónésimú téé ío cùu iní-ó ndècu ndihi-o ichi Xítóhó Jesucristú quixi ndihi-dé, te ñu-ndó cùu-dé te tnàhá-dé ío váha quide ndáá-dé. Te ndi ndúú-güedé cachí tnúhu-güedé nchaa nàcuáa cùu iha.

¹⁰ Te té Arístarcú téé yíhi ndihi-í vecaá quidé ndèe iní ñáhá-dě xii-ndo ndihi té Măcú ñaní pǐmú tǐ Bèé. Te sa nàha-ndo nchaa nacuáa ní cáháⁿ-í cada-ndo quèheⁿ cuendá-ndó tǐ Măcú, te núu na quixi-dé quixi coto ñaha-dě xii-ndo, te ío váha cuu iní-ndó quèheⁿ cuendá-ndó-dě. ¹¹ Te tnàhá téé nàni Jesús, àdi Bustú chí úú ñu-ndó, quidé ndèe iní ñáhá-dě xii-ndo. Te cue téé-a cùu-güedé cue téé isráel ní chitnahá ñáhá-güedě xii-í càháⁿ-ndí núú ñáyiú nàcuáa ndíhu ndaha ñaha Yá Ndióxi xii-yu, te ni ìⁿ-gá ñáyiú isráel ñá túú quide datná quidé-güedě. Te ío váha tàxi-güedé tnúhu ndee iní xii-í. ¹² Te tnàhá téé ñu-ndó tǐ Ēpafrás quidé ndèe iní ñáhá-dě xii-ndo, te cùu-dé tnàhá-dé téé xínu cuechi núú Xítóhó Jesucristú. Te ducaⁿ-ni nǐ yuhu ni iní-dé xicáⁿ táhú-dě núú Yá Ndióxi cuendá-ndó cuendá sá cànchicúⁿ nihnu-ni-ndo ichi-gá, te ducaⁿ te ío váha tecú tnùní-ndó nchaa nacuáa cùiní Yá Ndióxi cada-ndo, te ñu-ndó ducaⁿ cànchicúⁿ nihnu-ndo cada-ndo. ¹³ Te yúhú cächí tnúhu ndáá-í xii-ndo sá súúni sàni iní-dé sá méé-ní sá váha cuu xii-ndo cundecu-ndo ndihi nchaa ñáyiú xíndecu ichi Xítóhó Jesucristú ndécú

ñúú Laodiceá, ndihi nchaa ñáyiú xíndecu tucu ichi-gá ndécú ñúú Hièrápólís. ¹⁴ Te tnàhá té Lúca téé xini nchaa núú yúcu sá quidé tátna quide ndee iní ñáhá-dě xii-ndo téé ío cùu iní-ó, te tnàhá tucu té Dëmás quidé ndèe iní ñáhá-dě xii-ndo.

¹⁵ Te cúñaha-ndo na càda ndee iní nchaa ñáyiú ndècu ndihi-o ichi Xítóhó Jesucristú ndécú ñúú Laodiceá, ndihi tá Mínfás, ndihi nchaa ñáyiú ndècu ichi-gá tàcá vehe-xi dàcuahá-yu tnúhu-gá. ¹⁶ Te tutú cádúha-í-a tendaha-í quixi ndaha-ndo, te òré ná ndíhi dàcuaha-ndo te tendaha-ndo quíhíⁿ ndaha ñáyiú xíndecu ichi-gá ndécú ñúú Laodiceá cuendá dacuàhá-yu tnàhá-yu. Te ñu-ndó ducaⁿ dàcuaha-ndo tutú tendaha-í quíhíⁿ ndaha ñáyiú ñúú Laodiceá òré ná dándixi-yu ndaha-ndo. ¹⁷ Te na cächí tnúhu-í xii-ndo nàcuáa cúñaha-ndo xii té Ārquipú, te ñu-ndó cúñaha-ndo xii-dé: “Yá Ndióxi ní taxi-gá chíu” quide-n, te ío váha cada cuendá-n càda-n nchaa nacuáa ní cachí-gá”, duha cúñaha-ndo xii-dé. ¹⁸ Te yúhú té Păblú ndihi ndaha mee-í téé-í ìⁿ úú tnúhu-a quide ndee iní ñáhá-í xii-ndo, te cunaha-ndo sá yúhú yíhi-í vecaá. Te Yá Ndióxi ío na chindee chitúu ñaha-gá xii-ndo. Te ducaⁿ na cunduu. Te ío chí cádá ndèe iní-ná vitna.

**TUTÚ DÍHNA NUU NĪ
CADÚHA TĒ PĀBLÚ
QUIHĪⁿ NDAHA
ÑÁYIU ÑUÚ
TESĀLÓNICÁ**

Té Pāblú ndihi cue tēe cūndihi-dé cādūha-güedé tutú quihĪⁿ ndaha ñáyiū xīndecu ichi Xítoho Jesucristú ndécú ñuú Tesālónicá

¹ Yúhú té Pāblú cādūha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiū ndècu ndihi-ndí ichi Xítoho Jesucristú ndécú ñuú Tesālónicá, chi cūu ñnuu-ndo ndihi Tātá-ó Dütú Ndiòxí, ndihi Xítoho Jesucristú. Te xicáⁿ táhù-í núú Dütú Ndiòxí, ndihi núú Xítoho Jesucristú sá ìo na chindee chitúu ñaha-gă xii-ndo, te ducaⁿ ndí nduú-gá ná càda te ìo váha cuu iní-ndó cūndecu-ndo.

Ñáyiū ñuú Tesālónicá ìo váha sàndáá iní-yu Yá Ndiòxí

² Te ndi tnahá òré cāháⁿ ndihi-ndí Yá Ndiòxí ndácáⁿ táhù-ndí núú-gă sá ìo quide váha-ndo ndècu-ndo, te ducaⁿ xicáⁿ táhù-ndí núú-gă sá ná còto ñaha-gă xii-ndo. ³ Te ìo ndácáⁿ táhù-ndí núú Tātá-ó Dütú Ndiòxí sá ñi yuhu ñi iní-ndó sàndáá iní-ndó-gă, te xīnu cuechi-ndo núú-gă, te cūu iní tnahá-ndó nàcuáa ndècu-ndo ichi-gă ñu xíáⁿ ìo xīto tnahá-ndo. Te cūtnuní ndáá iní-ndó sá quixí tūcu Xítoho Jesucristú ñu xíáⁿ ñá túú dàña ndeé-ndó ndètu-ndo-gă. ⁴ Te

nchòhó ñáyiū ndècu ndihi-ndí ichi Xítoho Jesucristú sa nàha-ndí sá Yá Ndiòxí ìo cūu iní ñáhá-gă xii-ndo, te ñu-gá ní cāháⁿ ñáhá-gă xii-ndo cuendá cūndecu-ndo ìchi-gă. ⁵ Te cūtnàhá ní dānehé ñáhá-ndí xii-ndo tñuhu-gă, chi ñá díú sá cúú ìní mēé-ndí ducaⁿ ñi dānehé ñáhá-ndí

xii-ndo, chi mee Espiritú Yá Ndiòxí ní chindee ñàha-xi ní cāháⁿ-ndí ñi yuhu ñi iní-ndí tñuhu-gă núú-ndó. Te nàha-ndo sá cūtnàhá ní xīndecu ndihi ñaha-ndí xii-ndo ñi quide-ndí nàcuáa cāháⁿ Yá Ndiòxí cuendá sá cúú-xí sá váha sá cúú-xí-ndó.

⁶ Te nchòhó nchicúⁿ ñihnu-ndo quide-ndo vitna datná quidé-ndí, chi quide váha-ndo dàtná quidé mēe Xítoho Jesucristú, te díí ìní ní tñi-ndo ìchi-gă cuéi ní ndoho ní tnahá-ndó, chi mee Espiritú-gá ní chindee ñàha-xi xii-ndo. ⁷ Te sá dūcáⁿ quide váha-ndo núú Yá Ndiòxí, xíáⁿ yínchicúⁿ ñihnu ñáyiū distritú Macèdoniá, ndihi ñáyiū distritú Acáyá xīquide váha-yu tnahá-yu, ñáyiū xīndecu ichi-gă.

⁸ Te ñu-ndo ñi sanu ichi-ndo ñáyiū distritú Macèdoniá, ndihi ñáyiū distritú Acáyá, te ñá díú-ní ñáyiū nchaa ñuú-áⁿ chi nchaa ñáyiū dava-gă ñuú ñihí-yu tñuhu sá ìo sàndáá iní-ndó Yá Ndiòxí, Te ñá túú-gă ná tñuhu cāháⁿ-ndí cuendá-ndó, chi nchaa-yu sa ñihí-yu tñuhu sá ìo váha quide-ndo ndecu-ndo. ⁹ Te mēe-yu xīcāháⁿ váha-yu cuendá-ndó sá ìo váha ní queheⁿ cuendá ñáhá-ndó xī-ndí cūtnàhá ní quixi-ndí díhna nuu. Te ní dáña-ndó nchaa sá càchí-ndó cūu ndiòxí-ndó chi ñá díú ndiòxí cúú-xí, te ní tñi-ndo ìchi Yá Ndiòxí Yaá ndécú tūu andiū chi ñu-gă cúú-gă Ndiòxí ndisa, te xīnu cuechi-ndo núú-gă vitna, ¹⁰ te ndètu-ndo quixi tucu Xítoho Jesucristú Déhe Yá Ndiòxí Yaá ndécú andiū, chi ñu-ni-gă ní quixi-gă ñuyíú-a ní xíhí-gă, te ní ndoto-gá ní dándótó ñàha Yá Ndiòxí xii-gă. Te ñu-ni Xítoho Jesucristú dácacu ñihnu ñaha-gă xii-o núú ùhú núú ndàhú, chi sàndáá iní-ò-gă.

2

Nàcuáa ndiū chiuⁿ ní quide té Pāblú ñuú Tesālónicá

1 Te nchòhó ñáiyu ndècu ndihí-ndí ichi Xítohó Jesucristú ñaha-ndo sá ñà díú àúⁿ nã cuu ni quixi coto ñaha-ndí xii-ndo, chi ní sándáá iní-ndó tnúhu Yá Ndiòxí. 2 Te ñaha-ndo sá cùtnàhá ní xíndecu-ndí ñuú Filipú ío ní xúhuⁿ tnúhu cuèhé tnúhu duha núú-ndí, te ní caniha-güedě xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáháⁿ-ndí tnúhu Yá Ndiòxí núú-ndó, chi mee-gã ní chindee ñaha-gá xii-ndí cuèi ío chitu ñáiyu ní cuu úhú iní ñáhá xii-ndí. 3 Te ñá túú ní dándahú ñáhá-ndí xii-ndo chi mee-ni tnúhu ndáá ní cáháⁿ-ndí núú-ndó, te ní ñà túú ní ñⁿ tnúhu cuèhé ñúhú iní-ndí ní cáháⁿ-ndí tnúhu-gá núú-ndó chi sa ní nduu ndoo ní nduu nine iní-ndí. 4 Te mee Yá Ndiòxí ní cachí-gá sá cáháⁿ-ndí tnúhu-gá, te cáháⁿ-ndí nàcuáa cùu iní mée-gã, chi sa ñaha-gá nàcuáa càa iní-ndí, te ñá túú cáháⁿ-ndí nàcuáa cùu iní ñáiyu. 5 Te ñaha-ndo sá ñà díú ñⁿ tnúhu cudí iní-ndó cùndecu-ndo ichi ñuyú ní cáháⁿ-ndí núú-ndó cuendá taxi-ndo díhúⁿ. Te Yá Ndiòxí sa ñaha-gá sá cáháⁿ ndáá-ndí. 6 Te ñá ñⁿ ndùu ni quide-ndí ñⁿ sá cádá-ndí cuendá-ni sá cádá càhnu ñaha-ndo xii-ndí, àdi cada cahnu ñaha dava-gá ñáiyu, te cuèi tàú ndisa-ndí sá cádá càhnu ñaha-ndo xii-ndí ní cùu, chi chiúⁿ Xítohó Jesucristú quidé-ndí, te dicó-ni sá nchùhú ñá túú ní cuíní-ndí sá dúcáⁿ càda-ndo. 7 Te ío vii ío váha ní cáháⁿ-ndí núú-ndó, dàtná quidé ñⁿ ñaha cuu náná vii vii cáháⁿ ndihí cue déhe-aⁿ dácuehnu ñaha-aⁿ xii-güexi. 8 Te ducaⁿ ío cùu iní ñáhá-ndí xii-ndo, dico ñá díú-ni sá ní cáháⁿ-ndí tnúhu Yá Ndiòxí núú-ndó, chi ndéé iní-ndí taxi-ndí ní dácótó ñaha-xi, te núu dicó ní cùu-xi sá cúú, cuendá sá ío cùu iní ñáhá-ndí xii-ndo. 9 Te nchòhó

ñáiyu ndècu ndihí-ndí ichi Xítohó Jesucristú ñaha-ndo sá ío ní quide chiúⁿ-ndí cuendá ní níhí-ndí sá ní xexi-ndí. Te cuèi nduu cuèi níu ní quide chiúⁿ-ndí ní níhí-ndí sá ní xexi-ndí ní cáháⁿ-ndí tnúhu Yá Ndiòxí núú-ndó cuendá sá ñà túú ní cuíní-ndí chichíuⁿ ñaha-ndí xii-ndo.

10 Te nchòhó ñáiyu sándáá iní tnúhu Yá Ndiòxí xini ndáá-ndó sá cúú-ndí cue téé váha te ducaⁿ sá naha Yá Ndiòxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te ñu-ni ducaⁿ quide-ndí vitna. Te vá yòo ñⁿ cáháⁿ sá ñà túú quide ndáá-ndí ndécú-ndí. 11 Te ñaha tucu-ndo sá ní dácáháⁿ ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidé ñⁿ tátá ndihí cue déhe-dé ní quide-ndí. 12 Te ní çachí-ndí xii-ndo sá cádá ndáá-ndó cùndecu-ndo nàcuáa tàú-xi cada nchaa ñáiyu tnàhá tnúhu ndihí Yá Ndiòxí, chi mee-gã ní cáháⁿ ñáhá-gá xii-o cuendá nduu táhú-ó cùndecu-o ndihí-gá núú ío váha càa ndecu-gá táxi tnùní-gá.

13 Te xiáⁿ ío ndacáⁿ táhú-ndí núú Yá Ndiòxí sá nchòhó òré ní tedóho-ndo tnúhu-gá ní cáháⁿ-ndí, te ní sándáá iní-ndó chi ní cutnùní iní-ndó sá díú tnúhu Yá Ndiòxí cúú-xí, te ñá díú tnúhu ñáiyu ñuyú-a cùu-xi. Te ndáá sá cúú-xí ñⁿ sá ío váha sá cúú-xí nchòo cue ñáiyu ní sándáá iní tnúhu-gá. 14 Te nchòhó ñáiyu ndècu ndihí-í ichi Xítohó Jesucristú, ío ní ndoho ní tnahá-ndó sá ní quide ñaha ñáiyu ñuú-ndó. Te nchòhó ní ndoho-ndo dàtná ní ndoho nchaa ñáiyu tàcá dácuaⁿha tnúhu Xítohó Jesucristú ndécú dístítú Jùdeá, chi tnàhá-yu ío ní dándóhó ñaha ñáiyu ñuú-yu. 15 Te ñu-ni ñáiyu dístítú Jùdeá-án ní sahní-yu cue téé ní xóo cáháⁿ tnúhu Yá Ndiòxí ndéé sanaha. Te ñu-ni ñani tnàhá-yu cùu cue ñáiyu ní sahní ñaha xii Xítohó Jesucristú, te sátá xiáⁿ te ní ngüíta-yu ní cuu

úhú iní ñáhă-yu xii-ndí, núu xíăⁿ ñá túú tnàhá iní Yă Ndiôxí nchaa sá quidé-yu, te ndéé nchaa dava-gă ñani tnáhă-yu cùu úhú iní-yu. ¹⁶ Te ío chidácá nihnu ñàhá-yu xii-ndí òré càháⁿ-ndí tnúhu Yă Ndiôxí núu ñăyiu ñá túú cùu ñăyiu isràél, te ducaⁿ quide ñăyiu-áⁿ cuendá cuiní-yu sá vă càháⁿ-ndí tnúhu-gă, sá cádá cuendá naníhí tǎhú ñăyiu ñá túú cùu ñăyiu isràél-áⁿ, te sá dúcáⁿ quidé-yu te ío ta cùu vai-gă cuéchi-yu cuáháⁿ. Te Yă Ndiôxí ío cùdéeⁿ-gă núu-yu, te tendaha-gă ìⁿ tnúndôho quixi sá cúu-xí-yu te ío ndohó-yu.

Té Păblú cuiní-dé quíngoto-dé ñăyiu xîndecu ichi Xítóhó Jesucristú ndécú ñúú Tesalónicá

¹⁷ Te nchòhó ñăyiu ndècu ndihí-ndí ichi Xítóhó Jesucristú ní quee-ndí núu-ndó, te cuéi ní cuxica-ndí dico ducaⁿ-ni ñúhu iní ñáhă-ndí xii-ndo, te ío ñúhu iní-ndí sá quíxí còto ñaha tucu-ndí xii-ndo. ¹⁸ Te yúhú té Păblú ducaⁿ-ni ñúhu iní-í sá cuédicó mée-í quixi-í, quixi coto ñaha-í xii-ndo, dico yucu ñávăha chidácá nihnu ñaha-xi xii-í. ¹⁹ Te nchoo ñăyiu ndècu ichi Xítóhó Jesucristú ndètu-ni-gă-ó quèxio-gă candeca ñaha-gă xii-o ndăa andiu cundecu-o ndihí-gă. Te cùdîí víhí ìní-ndí sá cuendá-gă chi ní chindee ñaha-gă ní sanu ichi ñaha-ndí xii-ndo ìchi-gă, te ío vâi ñăyiu cáháⁿ váha-yu cuendá-ndí ná sâá nduu quixi tucu-gă. ²⁰ Te ducaⁿ ío vâi ñăyiu cáháⁿ váha-yu cuendá-ndí cuendá sá ñí sanu ichi ñaha-ndí xii-ndo ìchi-gă, te quide váha-ndo. Te xíăⁿ ío cùdîí ìní-ndí.

3

¹⁻² Te sa ní cunduu ñá túú-gă càháⁿ ndihí tnàha-o, núu xíăⁿ ñá ní cùndee-gă iní-ndí ní tendaha-ndí té Timúteú ní quixi coto ñaha-dě xii-ndo, te nchúhú ní quendóo-ndí

ñúu Atenás, chi tnàhá-dé xínú cuéchi-dé núu Yă Ndiôxí, ndihí núu Xítóhó Jesucristú càháⁿ-dé tnúhu-gă núu ñăyiu. Te ní quixi-dé ní taxi-dé tnúhu ndee ìní xii-ndo cuendá sá ío quindáá-ni iní-ndó Xítóhó Jesucristú, te canchicúⁿ nihnu-ni-ndo ñí yuhu ni iní-ndó ìchi-gă. ³ Te vâ nátúhú iní-ndó canchicúⁿ nihnu-ndo ìchi-gă sá dúhá cùu úhú iní ñáhă ñăyiu xii-o, te nchòhó sa nàha-ndo sá dăcuití să ndóhó víhi-o cuendá-gă. ⁴ Te ndéé cùtnáhă ndécú ndihí ñaha-gă-ndí xii-ndo ñí cachí tnúhu ndáá-ndí sá ío ndoho-o, te ducaⁿ ndisa quide-xi. ⁵ Te xíăⁿ núu ñá ní cùu váha-gă iní-í chi cuendá ñá túú-gă ní ñihí-í tnúhu năcuăa cùu ndecu-ndo núu ní tendaha-í té Timúteú ní quixi-dé ní ndúcú tnúhu-dé núu-ndó núu ndècu-ni-ndo ichi Xítóhó Jesucristú, chi ní saní ìⁿ ní saní úú iní-í sá cúu-xí-ndó, chi ná ndéé chidácá nihnu ñaha yùcu ñávăha xii-ndo te cuíta chiuⁿ ní quide-ndí sá cúu-xí-ndó ñí cáháⁿ-í.

⁶ Te ñáhă, chi ní ndexìo té Timúteú sá ñí quixi-dé ñúu-ndó, te nàha-dé tnúhu ní nasáá sá ñí yuhu ni iní-ni-ndo sândáá iní-ndó Yă Ndiôxí, te cùu iní-ndó cué tnaha ñăyiu-ndo. Te càchí-dé sá ío ñúhu iní ñáhă-ndó xii-ndí, te ío cuiní-ndó cáháⁿ ndihí ñaha-ndo, te diu-ni ducaⁿ ío cuiní nchúhú cáháⁿ ndihí ñaha-ndí xii-ndo tùcu. ⁷ Te ío ndòho-ndí chi ío cùu úhú iní ñáhă ñăyiu xii-ndí, dico sá ñí ñihí-ndí tnúhu sá nchòhó ñăyiu ndècu ndihí-ndí ichi Xítóhó Jesucristú ñá túú dàña ndéé-ndó sândáá iní-ndó Yă Ndiôxí, te xíăⁿ cúu-xí ìⁿ tnúhu càhnu iní ní ñihí-ndí chi ní naníhí ndéé-ndí. ⁸ Te ní nduu vétú iní-ndí sá ñí ñihí-ndí tnúhu ndècu-ni-ndo ìchi-gă. ⁹ Te òré càháⁿ ndihí-ndí Yă Ndiôxí, te ío ndàcáⁿ tǎhú-ndí núu-gă cuendá sá ñà túú dàña nihnu-ndo ìchi-gă, núu xíăⁿ ío cùdîí ìní-ndí. ¹⁰ Te cuéi nduu cuéi níú

xicáⁿ táhú-ndí núú Yá Ndiöxí sá mée-gá ná càda te sáá ìⁿ nduu nàníhí tnáhá-ó cuèndá danèhé ñáhá vâha-gá-ndí tnúhu-gá sá cúmání-gã xii-ndo.

¹¹ Te mee Tâtá-ó Dütú Ndiöxí, ndihí Xítohó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. ¹² Te mee Xítohó Jesucristú ná chindee ñaha-gá xii-ndo, te ío-gá cuita cuu iní tnáhá-gá-ndó nàcuáa ndècu-ndo ichi-gá ndihí nchaa dava-gá ñáyíu dàtná cúú iní ñáhá-ndí xii-ndo. ¹³ Te xicáⁿ táhú tùcu-ndí núú Tâtá-ó Dütú Ndiöxí sá nì yuhu nì iní-ndó càncicúⁿ nihnu-ni-ndo ìchi-gá, te ducaⁿ te cundáá-ndó núú-gã, te ñá túú-gã ná cumání-ndó òré ná sàá nduu quixi tucu Xítohó Jesucristú ndihí nchaa ñáyíu sa ndècu ndihí-gã.

4

Nàcuáa cuíni Yá Ndiöxí cada-o

¹ Te nchòhó ñáyíu ndècu ndihí-í ichi Xítohó Jesucristú càháⁿ ndàhú-í núú-ndó sá cùndèdòho-ndo na càháⁿ-í nàcuáa cuu tnúhu càháⁿ Xítohó Jesucristú, chi mee-gã cuíni-gá sá càdá-ndó nàcuáa ní dánèhé ñáhá-ndí xii-ndo cuèndá cuu váha iní Yá Ndiöxí núú-ndó, te ducaⁿ-ni càda-ndo ndéé núú cuaháⁿ núú vèxi.

² Te nchòhó sa nàha-ndo nàcuáa ní càháⁿ-ndí núú-ndó, chi ní càháⁿ-ndí nàcuáa ní táuchíúⁿ Xítohó Jesucristú te ní cachí-gá sá ³ Yá Ndiöxí cuíni-gá sá càdá ndáá-ó cùndecu-o ichi-gá. Te nchoo cuè téé vá càháⁿ ndihí-o ñáyíu dîhí te núú ñá díú ñàdihí-ó cùú-yu, te ni cuè ñáyíu dîhí vá càháⁿ ndihí-yu téé núú ñá díú yíi-yu cùu-güedé.

⁴ Te núú xíáⁿ nchaa nchòhó tnàha téé-í ndí díiⁿ cùndecu ñadihí-ndó, te díu-ni ducaⁿ nchòhó cue ñáyíu dîhí tucu ndí díiⁿ cùndecu yíi-ndo, te mee-ni tnúhu yíiúhu càháⁿ ndihí tnàha-ndo. ⁵ Te vá cání cuèhé

cáni duha iní-ndó dàtná quidé cuè ñáyíu ñá túú sàndáá iní tnúhu Yá Ndiöxí. ⁶ Te ni ìⁿ-ndo vá cání iní-ndó dandahú-ndó tnàha téé-ndo càháⁿ ndihí-ndo ñadihí-güedé. Te ducaⁿ-ni nchòhó cue ñáyíu dîhí tucu vá cání iní-ndó dandahú-ndó tnàha dîhí-ndó càháⁿ ndihí-ndo yíi-yu. Chi núú ducaⁿ na càda-ndo, te Yá Ndiöxí ío dandòho ñaha-gá xii-ndo dàtná ní cachí-ndí ndéé díhna. ⁷ Chi Yá Ndiöxí ní càháⁿ ñáhá-gã xii-o cuèndá sá càdá-ó mée-ni sá váha, te ñá díú sá cuèhé sá dúhá. ⁸ Te nchaa ñáyíu na càda sáá iní-xi tnúhu càháⁿ-ndí, te quide sáá iní-yu núú Yá Ndiöxí, chi ñá díú tnúhu téé ñuyíú-a cùu-xi, chi tnúhu Yá Ndiöxí, Yaá ní taxi Espiritú-gá ndécú ndihí-o cuu-xi.

⁹ Te nchòhó ñáyíu ndècu ndihí-í ichi Xítohó Jesucristú, ñá túú-gã xíní ñúhu-xi cachí tnúhu-í xii-ndo sá cúú iní tnáhá-ndó, chi Yá Ndiöxí sa ní dánèhé ñáhá-gã xii-ndo nàcuáa cuu iní tnáhá-ndó, ndihí nàcuáa cuu iní-ndó dàva-gá tnàha ñáyíu-ndo. ¹⁰ Te ducaⁿ xiquide-ndo ndihí nchaa ñáyíu ndècu ndihí-ndo ichi Xítohó Jesucristú ndécú dístrítú Macèdoniá. Te càháⁿ ndàhú-ndí núú-ndó sá càdá ndáá-gá-ndó, te cuita cuu iní-gá-ndó cuè tnàha ñáyíu-ndo quíhíⁿ. ¹¹ Te cada ndee iní-ndó cùndecu ñucaxi iní-ndó, te cuhuⁿ iní-ndó chiuⁿ mee-ndo, te xíáⁿ cada-ndo dàtná ní dánèhé ñáhá-ndí xii-ndo. ¹² Te ducaⁿ te tnàhá nchaa ñáyíu ñá túú sàndáá iní tnúhu Yá Ndiöxí càháⁿ váha-yu cuèndá-ndó, te ducaⁿ te ñá túú tnàhí-gá ná cúmání xii-ndo.

Nàcuáa cada-xi òré quixi tucu Xítohó Jesucristú

¹³ Te vitna na càhí tnúhu-ndí xii nchòhó ñáyíu ndècu ndihí-ndí ichi Xítohó Jesucristú cuèndá nchaa ñáyíu sa ní xíhí, ñáyíu ní sàndáá iní tnúhu Yá Ndiöxí cuèndá sá vá ndihú iní-ndó cuèndá-yu dàtná

xĩquide nchaa ñáyiú ñá túú yìhi iní-xi sá quixí tucu Xítohó Jesucristú ñuyíú-a. ¹⁴ Te nchoo sàndáá iní-ó sá nĩ xíhí Xítohó Jesucristú te ní ndoto-gá ní dándótó ñaha Yá Ndiöxí, te sàndáá tucu iní-ó sá dàtná ní dándótó Yá Ndiöxí Xítohó Jesucristú, ducaⁿ dándoto-gá nchaa ñáyiú ní xíhí ñáyiú ní sàndáá iní ñáhá xii-gá.

¹⁵ Te na cächí tnúhu tucu-ndí ingá tnúhu nàcuáa ní cáháⁿ Xítohó Jesucristú, chi ní cachí-gá sá ná sáá nduu quixí tucu-gá te nchaa ñáyiú sàndáá iní tnúhu-gá ndécú vívú ñuyíú-a vá códó nùu-yu núú ñáyiú ní xíhí ndaa andíu, chi jùndú candeca ñaha-gá xii-yu ndaa. ¹⁶ Chi Xítohó Jesucristú quee túu-gá andíu, te cana-gá nchaa ñáyiú ní sàndáá iní tnúhu-gá, te òré-áⁿ Yá Ndiöxí cada-gá te òré-áⁿ, cáháⁿ ìⁿ cútú te òré-ni-áⁿ ndoto nchaa ñáyiú ní xíhí, ñáyiú ní sàndáá iní tnúhu-gá. ¹⁷ Te dàtnùnĩ nchaa nchoo ñáyiú xĩndecu vívú ñuyíú-a naníhí tnáhá-ó ndíhí-yu, te ndanchita-o ndíhu-o xití vícò naníhí tnáhá-ó ndíhí Xítohó Jesucristú, te candeca ñaha-gá xii-o ndaa andíu candecu ndíhí-o-gá ni caa ni quíhíⁿ. ¹⁸ Núu xiáⁿ chí cuáha tnaha tnúhu ndee iní, te vá ndíhú iní-ndó chi naníhí tàhú-ndó núú-gá.

5

¹ Te nchòhó ñáyiú ndècu ndíhí-í ichi Xítohó Jesucristú ñá túú-gá xíní ñúhu-xi sá cächí tnúhu-í xii-ndo sá quixí tucu-gá, te ní ñá túú-gá xíní ñúhu-xi sá cächí tnúhu-í xii-ndo nása cada-xi òré quixi-gá. ² Chi nchòhó sa nàha ndáá-ndó sá Xítohó Jesucristú quixi-gá nduu ñá túú yìhi iní-ó, chi dàtná quidé ìⁿ ñadúhú cada-gá òré quixi-gá, chi nduu ñá túú nã yíhí iní-ó quixi tucu-gá. ³ Te sáá nduu te cachí nchaa ñáyiú ndècu ichi cuehé ichi duha: “Vitna ío váha cùu iní-ó ndècu-o, te ñá túú-gá ná cúmání xii-o”, duha

quesàhá-yu. Te ñáyiú-áⁿ òré ñá túú nã yíhí iní-yu, te quèxio tnúndòho tnúhu ndàhú sá cúú-xi-yu. Chi cada-xi dàtná quidé-xi ìⁿ ñáyiú dèhí ní tnahá òré cacu déhe-xi, chi na iní-yu ní dàtnùhú ñáhá-xi te vá cãcu-yu núú tnúndòhó-yu, te ducaⁿ sá tnáhá-xi yáha nchaa ñáyiú ñá túú ndècu ichi-gá, chi na iní-yu quexio tnúndòho sá cúú-xi-yu te vá cãcu-yu núú tnúndòho-áⁿ. ⁴ Te nchòhó ñáyiú ndècu ndíhí-í ichi Xítohó Jesucristú, ñá túú-gá ndécú-ndó ichi cuehé ichi duha, núu xiáⁿ sa yìhi-ná iní-ndó nduu quixi-gá te vá yáha-ndo dàtná yáha nchaa ñáyiú ñá túú ndècu ichi-gá, chi ñáyiú-áⁿ ñá túú nã yíhí iní-yu sá quixí-gá. Te na iní-yu quexio-gá dàtná quidé ñadúhú na iní-ó quíhu-güedé vehe-o dùhu-güedé ducaⁿ càda-gá òré quixi-gá. ⁵ Te nchoo ñá túú-gá ndécú-ó ichi cuehé ichi duha, te ichi-áⁿ cúú-xi dàtná ìⁿ ichi nee ndècu-o ni cuu, te vitna sa ní ngúndecu-o ichi váha, te ducaⁿ chi Yá Ndiöxí ní dándíxí túu-gá iní-ó cuendá cutnùnĩ iní-ó nàcuáa nduu cuendá-gá. ⁶ Te xini ñuhu-xi dandixi túu-o iní-ó, te cada váha-o cùndecu-o ichi-gá, te vá cáda-ó dàtná quidé nchaa ñáyiú ñá túú sàndáá iní ñáhá xii-gá, chi ñáyiú-áⁿ ñá túú-gá quidé cuendá-yu te núu quide váha-yu àdi ñá túú quide váha-yu ndécú-yu. ⁷ Te nchaa ñáyiú quide cuehé quidé dùha cúú-yu dàtná ìⁿ ñáyiú xidí àdi xíni, chi ñá túú quide cuendá-yu nàcuáa cada-yu ìⁿ sá váha dàtná cùnĩ Yá Ndiöxí. ⁸ Te nchòhó ñáyiú sa ní cutnùnĩ iní-xi nàcuáa nduu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yá Ndiöxí, te cuu iní-ndó cuè tnaha ñáyiú-ndo te ducaⁿ te vá táxi tnùnĩ ñáhá nì ìⁿ sá cuehé sá dúhá xii-ndo. Te ío cuhuⁿ iní-ndó sá cùndècu-ndo ndíhí-gá ni caa ni quíhíⁿ. ⁹ Chi Yá Ndiöxí ní cachí-gá sá vã quíhíⁿ-ó núú ùhú núú ndàhú,

chi mee-gă nacuaca ñaha-gă xii-o cunde-cu-o ndihi-gá, chi ní sándáá iní-ó Xítohó Jesucristú. ¹⁰ Te mee Xítohó Jesucristú ní xihí-gá sá cuendá nchaa yíca cuéchi-o, te ní ndoto-gá cuendá nduu táhú-ó cunde-cu-o ndihi-gá andiu na sáá nduu cuéi sa ní xihí-ó, àdi vátá cùú-gá-ó. ¹¹ Núu xiáⁿ chí cuãha tnàha tnúhu ndee iní, te chindee tnàha-ndo cunde-cu-ndo ichi-gá dàtná tá quide-ndo véxi.

Té Páblú dáquini sàhú-dé ñáyiú ndècu ichi Xítohó Jesucristú

¹² Te nchòhó ñáyiú ndècu ndihi-ndí ichi Xítohó Jesucristú, càháⁿ ndàhú-ndí núú-ndó sá cànèhe-ndo sá yíñùhu núú cuè téé cùnùu xinu cuechi núú Yá Ndiòxi, cue téé dànehé ñáhá xii-ndo nacuáa cunde-cu-ndo ichi-gá. ¹³ Te càháⁿ váha-ndo ndihi-güedé, te cuu iní-ndó-güedé, chi nàha-ndo sá chíúⁿ Yá Ndiòxi quidé-güedé. Te cunde-cu ndihi váha tnàha-ndo nchaa-ndo.

¹⁴ Te càháⁿ ndàhú tucu-ndí núú-ndó sá càháⁿ-ndó dòho nchaa ñáyiú ñá tuú cuini cada chiúⁿ, te ducaⁿ cuãñaha-ndo tnúhu ndee iní xii nchaa ñáyiú quiyuhu iní-xi canchicúⁿ nihnu ichi-gá, te chindee tucu-ndo nchaa ñáyiú vátá ngünu ichi váha-gá, te cunduu càhnu iní-ndó núú-yu nchaa-yu.

¹⁵ Te cada ndee iní-ndó te núú ndècu tnaha ñáyiú-ndo cùu úhú iní ñáhá-yu xii-ndo, te vá tnàhá-ni-ndo cùu úhú iní-ndó-yu. Te mee-ni sá váha cada-ndo sá cúú-xí nchaa tnaha ñáyiú-ndo.

¹⁶ Te nchaa nduu ío cudíí iní-ndó cunde-cu-ndo. ¹⁷ Te ñⁿ nduu ñⁿ nduu càháⁿ ndihi-ndo Yá Ndiòxi. ¹⁸ Te ndacáⁿ táhú-ndó núú-gá te núú nándi cùu sá yãha-ndo ndècu-ndo, chi ducaⁿ cuini-gá cada-o, te diu ducaⁿ ndùu tnúhu càháⁿ Xítohó Jesucristú.

¹⁹ Te vá quèhndé nihnu-ndo chiúⁿ quide Espiritú Yá Ndiòxi iní-ndó.

²⁰ Te vá cadá sáá iní-ndó núú cuè téé càháⁿ tnúhu Yá Ndiòxi nacuáa dàcahu iní ñáhá-gá xii-güedé. ²¹ Te cada cuendá váha-ndo nacuáa càháⁿ-güedé, te tñi-ndo nchaa tnúhu váha càháⁿ-güedé. ²² Te dañ-ndo nchaa ichi cuehé ichi duha.

²³ Te mee Yá Ndiòxi quidé-gá ío váha cùu iní-ó ndècu-o ichi-gá. Te xicáⁿ táhú-í núú-gá sá ná cada íí ñáhá-gá xii-ndo, te na còto ñaha-gá xii-ndo ndihi iní-ndó cuendá sá vá cadá-gá-ndó ní ñⁿ sá cuèhé sá dúhá, te diu-ni ducaⁿ na cada-gá sá cúú-xí-ndó ndéé ná sáá nduu quixi tucu Xítohó Jesucristú ñuyíú-a. ²⁴ Chi Yá Ndiòxi Yaá ní càháⁿ ñáhá xii-o cada-gá nacuáa ní càháⁿ-gá, te chindee ñaha-gá xii-ndo.

Té Páblú quidé ndèe iní-dé ñáyiú xñdecu ichi Xítohó Jesucristú ndécú ñúú Tesalónica

²⁵ Te nchòhó ñáyiú ndècu ndihi-í ichi Xítohó Jesucristú, cácaⁿ táhú-ndó núú Yá Ndiòxi sá ná chindee ñaha-gá xii-ndí.

²⁶ Te cùñaha-ndo xii nchaa ñáyiú ndècu ndihi-o ichi Xítohó Jesucristú sá ní yuhu ní iní-ndí quidé ndèe iní ñáhá-ndí xii-ndo ndihi-yu.

²⁷ Te vitna mee Yá Ndiòxi ndéhé-gá sá càháⁿ ndàhú-í núú-ndó sá dácua-ndo tutú-a núú nchaa ñáyiú ndècu ndihi-o ichi-gá.

²⁸ Te Xítohó Jesucristú ío na chindee chítúu ñaha-gá xii-ndo núú cuaháⁿ núú véxi. Te ducaⁿ na cunduu. Te ío chí cadá ndèe iní-ná vitna.

**TUTÚ CÚÚ ÒÚ NÍ
CADÚHA TĒ PĀBLÚ
QUÍHÍⁿ NDAHA
ÑÁYIU ÑUÚ
TESĀLÓNICÁ**

Té Pāblú ndihi cue té cùndihi-dé cādūha-güedé tutú quíhíⁿ ndaha ñáyiú xindecu ichi Xítóhó Jesucristú ndécú ñúú Tesalónicá

¹ Yúhú té Pāblú cādūha-í tutú-a ndihi té Silvanú, ndihi té Timúteú cuendá daquixi-í ndaha nchòhó ñáyiú ndècu ndihi-ndí ichi Xítóhó Jesucristú ndécú ñúú Tesalónicá, chi tnàhá tnúhu-ndo ndihi Tátá-ó Dütú Ndiòxí, ndihi Xítóhó Jesucristú. ² Te xicáⁿ táhú-ndí núú Dütú Ndiòxí, ndihi núú Xítóhó Jesucristú sá ná chindee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

Yá Ndiòxí cada ndáá-gá cuéchi nchaa ñáyiú ndècu ichi cuehé ichi duha na sàá nduu quixi tucu Xítóhó Jesucristú

³ Te nchòhó ñáyiú ndècu ndihi-ndí ichi Xítóhó Jesucristú, càhí tnúhu-í xii-ndo sá cùnàha-ndo sá ñà túú dàña ndee-ndí ndàcáⁿ táhú-ndí núú Yá Ndiòxí cuendá-ndó, chi dacuití dūcaⁿ taú-xi cūduu chi ío-gá tá sàndáá iní-ndó-gá cuáháⁿ, te ducaⁿ ùuⁿ-gá tá cūu iní tnàhá-ndó nàcuáa ndècu-ndo ichi Yá Ndiòxí. ⁴ Núu xiáⁿ nchúhú ío váha càháⁿ-ndí cuendá-ndó núú nchàa ñáyiú sàndáá iní tnúhu Yá Ndiòxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gá, te ñà túú dàña ndeé-ndó nchícúⁿ nihnu-ndo ichi-gá, te quide cahnu-ni iní-ndó cuéi nándi sá yàha-ndo ndècu-ndo ichi-gá. ⁵ Te sá dúcáⁿ quide váha-ndo ndècu-ndo xiáⁿ cùtnùní nàcuáa cada ñaha Yá Ndiòxí xii-ndo na sàá nduu, chi nduu táhú-ndó cùndecu-ndo núú táxi tnùní-gá, te

ducaⁿ càda-gá chi cūu-gá Yá quidé ndáá cuiti. Te vitna ndòho-ndo nacuáa ndihu ndaha-gá dava-gá ñáyiú.

⁶ Te Yá Ndiòxí ío váha ndáá quidé-gá, chi mee-gá nachinaa-gá nchaa sá quidé ñaha ñáyiú cūu úhú iní ñáhá xii-ndo, ⁷ te nchoo ñáyiú ndòho cuendá Xítóhó Jesucristú nucúndecu váha-o na sàá nduu núu túu-gá andiu, te tnàhá cue espíritú xínú cuéchi núú Yá Ndiòxí cuuⁿ ndihi-gá, te cue espíritú-án quidé-xi nchàa núú chiuⁿ tahu-gá. Te òré nuu túu-gá andiu ndihi cue espíritú-án, te ío dátásaⁿ-xi andiu. ⁸ Te dandòho-gá nchaa ñáyiú ñà túú tnàhá tnúhu ndihi Yá Ndiòxí, ñáyiú ñà túú sàndáá iní tnúhu Xítóhó Jesucristú tnúhu sá càháⁿ nàcuáa naníhí tàhú-yu. ⁹ Te nchaa ñáyiú-án ío dandòho ñaha-gá xií-yu, chi ndohó-yu ni caa ni quíhíⁿ, te vá cùndécú-yu núú ío váha càa ndecu-gá táxi tnùní-gá. ¹⁰ Te ducaⁿ càda ñaha-gá xií-yu na sàá nduu, te dàvá-án ío cada càhnu ñaha nchaa ñáyiú sàndáá iní ñáhá xii-gá. Te tnàhá nchaa nchòhó ñáyiú ní sàndáá iní tnúhu ní càháⁿ-ndí ducaⁿ càda-ndo, te nchaa-o ío cuñúhu-o-gá dàvá-án.

¹¹ Te cuendá xiáⁿ núu ío xicáⁿ táhú-ndí núú Dütú Ndiòxí sá ná chindee ñaha-gá xii-ndo cùndecu váha-ndo ichi-gá dàtna cuini méé-gá cundecu nchaa ñáyiú ní càháⁿ-gá cundecu ndihi-gá. Te xicáⁿ táhú tūcu-ndí núu-gá sá ío na chindee ñaha-gá xii-ndo càda-ndo nchaa sá váha sàni iní-ndó, ndihi cuendá chiuⁿ quide-ndo cuendá-gá, te ducaⁿ chi sàndáá iní-ndó-gá. ¹² Te núu ducaⁿ na càda-ndo, te càháⁿ váha ñáyiú cuendá Xítóhó Jesucristú, te tnàhá-ni nchòhó càháⁿ váha-yu cuendá-ndó, chi mee Yá Ndiòxí ndihi Xítóhó Jesucristú cùndáhu iní ñáhá-gá chindee ñaha-gá xii-ndo.

2

Tée quixi dandàhú ñáyiu

1 Te nchòhó ñáyiu ndècu ndihí-ndí ichi Xítohó Jesucristú cächí tnúhu-ndí xii-ndo nàcuáa cada-xi nduu na quíxi tucu-gá, chí quixi-gá nacuaca ñaha-gã xii-o, núu xíⁿ càháⁿ-ndí dóho-ndo. 2 Te ñá díú sã íⁿ tnúhu tecu dóho-ndo te ngúita-ndo càni íⁿ caní úú iní-ndó, te ní vã yùhú-ndó te núu véxi íⁿ tée cächí-dé sã càháⁿ-dé tnúhu Yá Ndiòxí, te cächí-dé sã sã véxi Xítohó Jesucristú, te vã quíndáá iní-ndó tnúhu càháⁿ-dé chí ñá ndáá, àdi véxi íⁿ tée nèhe íⁿ tutú núú-ndó te cächí-dé sã yùhú ní tendaha-í véxi, te núu tütú-án càháⁿ-xi sã sã véxi Xítohó Jesucristú, te diu-ni vã quíndáá iní-ndó nàcuáa càháⁿ-xi, te ndèda-ni càa ñáyiu càháⁿ-yu dàvã-án sã sã véxi-gá dico vã quíndáá tnàhí iní-ndó. 3 Núu xíⁿ dátüha ñaha-í xii-ndo cuèndá sã vã dáña tnàhí-ndo mèe-ndo dandahú ñáhã ñáyiu. Chí cùmání-gã sãá nduu quíxi tucu Xítohó Jesucristú, te ngúita nchaa ñáyiu cuu úhú iní-yu Yá Ndiòxí, te dàvã-án quini-yu íⁿ tée xidó quidé nchaa sã cuèhé sã dúhá, te tée-án quíhíⁿ-dé núu ùhú núu ndàhú ní caa ní quíhíⁿ. 4 Te diu-ni tée-án vã ndèe iní-dé nchaa sã cächí ñáyiu cùu ndiòxí-yu ndihí nchaa dava-gá sã quidé càhnú-yu, te cächí-dé sã ío cùnuu-dé, te quíhu-dé ndéé xití veñúhu núu ndécú cuè ñáyiu chíñuhu ñaha xii Yá Ndiòxí coo-dé, te cùñaha-dě xii-yu sã cúu-dé Yá Ndiòxí.

5 Te dandacu iní-ndó chí nchaa tnúhu-a sa ní cachí tnúhu-í xii-ndo cùtnàhá ní xíndecu ndihí ñaha-í. 6 Te nchòhó sa cùtnuní iní-ndó nã cúú sã ngání ñaha xii tée-án núu ñá túú-dé vitna, dico na sãá nduu tàú-xi quee-dé caca cuu-dé te dàvã-án quini ñáhã nchaa ñáyiu. 7 Te ío titní núú sã cuèhé sã dúhá quidé yucu ñávaha dicó-ni sã vátã quíni-gã ñáyiu, dico ndècu íⁿ sã ñá

dáña càda-xi nchaandi túhú nàcuáa cächí iní-xi, dico sãá nduu xòcuíñí sã ñá dáña-án te dàvã-án cada-xi nchaa nàcuáa cächí iní-xi. 8 Te sãá nduu quini-yu tée quide nchaa sã cuèhé sã dúhá-án ñuyiú-a. Te òré ná quixi túu Xítohó Jesucristú, te mee-ni sã dátãsaⁿ-xi, ndihí yóco yuhu-gá cuú tée-án. 9 Te sácuihnã tendaha-xi tée-án quixi-dé, te cuáñaha-xi tnúhu ndee iní cada-dé nándi sã cadã-dé. Te cada-dé sã ñá túú tnàhí ndacu ní íⁿ ñáyiu ñuyiú-a cadã-yu, dico mee-ni dandahú ñáhã-dě xii-yu caca cuu-dé. 10 Te nchaa núu sã cuèhé sã dúhá càda-dé dandahú-dé nchaa ñáyiu sa ñúhu ichi cuáhãⁿ núú ùhú núú ndàhú, chí ñá túú ní cuíni-yu quíndáá iní-yu tnúhu ndáá tnúhu Yá Ndiòxí cuèndá nanhí tãhú-yu. 11 Te sã dúcãⁿ ñá túú ní cuíni-yu quíndáá iní-yu tnúhu ndáá, núu xíⁿ daña Yá Ndiòxí dacáhãⁿ yucu ñávaha iní-yu quíndáá iní-yu nchaa tnúhu ndehnde 12 cuèndá cuíta nihnú-yu, te ducaⁿ yãha-yu chí ñá túú sãndáá iní-yu tnúhu ndáá càháⁿ Yá Ndiòxí, chí mee-ni nchaa sã cuèhé sã dúhá cùdãⁿ iní-yu quidé-yu, te cuíta nihnú-yu chí ducaⁿ ní cachí Yá Ndiòxí cunduu.

Ñáyiu ní cachí Yá Ndiòxí nanhí tãhú

13 Te nchòhó ñáyiu ndècu ndihí-ndí ichi Xítohó Jesucristú, ñáyiu ío cùu iní-gã cächí tnúhu-ndí xii-ndo sã ñá túú dàña ndee-ndí ndàcãⁿ tãhú-ndí núú Yá Ndiòxí cuèndá-ndó, chí ducaⁿ tàú-xi cunduu, chí Yá Ndiòxí ní cachí-gã ndéé cùtnàhá vátã ngãva-gã ñuyiú sã nanhí tãhú-ndó, te diu Espiritú-gã dácáhãⁿ-xi iní-ndó ndècu yíñuhu-ndo núú-gã, te sãndáá iní-ndó tnúhu ndáá càháⁿ-gã núu xíⁿ ní nanhí tãhú-ndó. 14 Chí cuèndá tnàhí-a ní càháⁿ ñáhã Yá Ndiòxí xii-ndo, te ducaⁿ ní nanhí tãhú-ndó chí ní sãndáá iní-ndó tnúhu Xítohó Jesucristú ní càháⁿ-ndí núú-ndó,

te sáá nduu te cundecu-ndo tñahá-ndó núú ío váha càa ní nduu táhú Xítóhó Jesucristú ndécú-gá.

¹⁵ Núu xiáⁿ nchòhó ñáyiú ndècu ndihí-ndí ichi Xítóhó Jesucristú ío càháⁿ-ndí dóho-ndo sá và dáñá nihnu-ndo ichi-gá, te ní và nácuànaa-ndo nchaa tnúhu ní càháⁿ-ndí núú-ndó cùtnàhá ní xíndecu ndihí ñaha-ndí xii-ndo, te ñu-ni ducaⁿ càda-ndo nchaa tnúhu tëndaha-ndí véxi. ¹⁶⁻¹⁷ Te xicáⁿ táhú-ndí núú-gá sá ná dàcàháⁿ-gá iní-ndó cundecu-ni-ndo ichi-gá, te ducaⁿ ío na chindee ñaha-gá xii-ndo càháⁿ-ndó mée-ni tnúhu váha, te cada váha-ndo cundecu-ndo nacúaⁿ cuu váha iní-gá, chí mee Dütú Ndiöxí ío cùu iní ñáhá-gá xii-o, te ñu-gá ní taxi-gá tnúhu ndee iní cundecu ndihí-o ní caa ní quíhíⁿ, te ní cachí tnúhu tucu-gá ingá tnúhu váha sá cùndètu-o Xítóhó Jesucristú.

3

Cáháⁿ ndihí-ndo Yá Ndiöxí cuèndá-ndí

¹ Te nchòhó ñáyiú ndècu ndihí-ndí ichi Xítóhó Jesucristú, ndéé núú ndihí-ná càchí tnúhu-í xii-ndo sá càháⁿ ndihí-ndo Yá Ndiöxí cuèndá-ndí cuèndá sá ná chindee ñaha-gá xii-ndí, te ducaⁿ ndihí-ni cuténuu tnúhu Xítóhó Jesucristú nchaa xichi, te cudíí iní-yu tnúhu-gá dàtná quidé nchòhó. ² Te càháⁿ ndihí tucu-ndo Yá Ndiöxí cuèndá sá ná còto ñaha-gá xii-ndí, te ñá túú nã cada ñaha ñáyiú cuihna iní-xi ndècu ichi cuehé ichi duha xii-ndí, chí ñá ncháá-yu sàndáá iní-yu tnúhu-gá. ³ Dico Xítóhó Jesucristú quidé-gá nchaa sá càháⁿ-gá, te ñu-gá cada te nchòhó cundecu-ni-ndo ichi-gá, te coto ñaha-gá xii-ndo cuèndá sá ñá túú nã cada ñaha yùcu ñávàha. ⁴ Te Xítóhó Jesucristú quidé-gá cùtnúni iní-ndí sá nchòhó quidé-ndó nchaa nacúaⁿ ní dánèhé ñáhá-ndí xii-ndo, te ñu-ni ducaⁿ càda-ndo cundecu-ndo. ⁵ Te

xicáⁿ táhú-ndí núú Yá Ndiöxí sá ná chindee ñaha-gá xii-ndo cùu iní-ndó-gá, te ñu-ni-gá ná chindee ñaha-gá xii-ndo cùnduu cahnu iní-ndó, chí Xítóhó Jesucristú ducaⁿ ío cahnu iní-gá.

Tàú-ó càda chiúⁿ-o

⁶ Te nchòhó ñáyiú ndècu ndihí-í ichi Xítóhó Jesucristú, càháⁿ-í dóho-ndo sá mée-gá cuiní-gá sá và nihí tñahá-gá-ndó ndihí ndéda-ni càa ñáyiú càchí sá sàndáá iní tnúhu-gá, ñáyiú ñá túú cuiní cada chiúⁿ, chí ñáyiú ducaⁿ xíquide ñá túú cuiní-yu tní-yu tnúhu sá ní dánèhé ñáhá-ndí xii-ndo. ⁷ Te nchòhó sa xini-ndó nacúaⁿ cada-ndo cundecu-ndo canchicúⁿ nihnu-ndo nacúaⁿ quide-ndí. Te cùtnàhá ní xíndecu ndihí ñaha-ndí xii-ndo chí ní ñá nduu ñá túú ní tñhío-ndí. ⁸ Te ní ñá túú dico ducaⁿ ní quèheⁿ-ndí sá ndécú ndihí ñáyiú caxi-ndí àdi canehe-ndí, chí cuèi nduu cuèi niú ío ní quide chiúⁿ-ndí ní nihí-ndí díhúⁿ ní saaⁿ-ndí nchaa sá ní nàndihí-ndí cuèndá sá ñá túú ní cuiní-ndí chichiuⁿ ñaha-ndí xii-ndo. ⁹ Te cuèi tàú ndisa-ndí cachí tnúhu-ndí xii-ndo sá chindèe ñaha-ndo xii-ndí ní cùu, dico ní quide chiúⁿ-ndí cuèndá ní cuiní-ndí dánèhé ñáhá-ndí xii-ndo nacúaⁿ cada-ndo cundecu-ndo. ¹⁰ Te cùtnàhá ní xíndecu ndihí ñaha-ndí xii-ndo ní cachí-ndí sá ncháá ñáyiú ñá túú cuiní cada chiúⁿ te vá cuàha-ndó-yu sá caxí-yu. ¹¹ Te vitna nihí-ndí tnúhu sá ío dava nchòhó ñá túú tñahí quide chiúⁿ-ndo, chí àuⁿ nã cuu ndí cuu ndí cuu-ni-ndo núú ndécú dàva-gá tñaha ñáyiú-ndo. ¹² Te yúhú càháⁿ-í dóho nchaa nchòhó ñáyiú ducaⁿ ñá túú cuiní cada chiúⁿ sá càdá chiúⁿ-ndo cuèndá nihí-ndó ncháá sá cóhó sá caxí-ndó, te duha càháⁿ-í dóho-ndo, chí ducaⁿ cuiní Xítóhó Jesucristú Yá táxí tnúni ñáhá xii-o cada-ndo, te óré cada chiúⁿ-ndo te vá ío cada dusaⁿ-ndo.

13 Te nchòhó ñáiyu ndècu ndihí-í ichi Xítohó Jesucristú, vá dáñá ndéé-ndó cada-ndo mee-ni sá vâha. 14 Te núu ìíⁿ ñáiyu ndècu ndihí-ndo ñá túú cuíní-yu tnáí-yu tnúhu càháⁿ-ndí núú tütú-a, te cundehe-ni-ndo núu ndéda càá-yu, te vá nihí tnáhá-gă-ndó ndihí-yu cuendá sá ná cùcahaⁿ núú-yu, 15 dico vá cúú ũhú iní-ndô-yu, chi cáháⁿ-ndó dôho-yu cada-ndo sá ndécú-ndó ichi Xítohó Jesucristú ndihí-yu.

Tnúhu ndéé núú ñí ndihí-ná

16 Te mee Xítohó Jesucristú ío váha cùu iní-gá ndécú-gă, te xicáⁿ táhù-í núú-gă sá mée-gă ná cáda te ío váha cuu iní-ndó tnáhá-ndó cùndecu-ndo cuéi nása-gă ná cùndecu-ndo. Te mee-gă ná cùndecu ndihí ñaha-gă xii-ndo nchâa-ndo.

17 Te vitna yúhú té Păblú tée-í tnúhu-a quide ndee iní ñáhà-í xii-ndo, te diu-ni duha càa nchaa letrá-í nchaa núú tütú cáđŭha-í. 18 Te xicáⁿ táhù-í núú Xítohó Jesucristú sá ío na chindee chitúu ñaha-gă xii-ndo nchâa-ndo. Te ducaⁿ na cùnduu. Te ío chí cáda ndèe iní-nă vitna.

TUTÚ DÍHNA NUU NĪ CADÚHA TÉ PÁBLÚ QUIHĪⁿ NDAHA TÉ TIMÛTEÚ

*Té Páblú cádúha-dé tutú quíhĪⁿ
ndaha té Timùteú*

¹ Yúhú té Páblú ní tendaha ñàha Yá Ndiòxí cáháⁿ-í tnúhu Xítohó Jesucristú núú ñáyiú chi ducaⁿ ní cachí Yá Ndiòxí cunduu, te ñu-gá cúú-gá Yaá ní dácácu nihnu ñaha xii-o núú úhú núú ndáhú. Te tnàhá Xítohó Jesucristú ducaⁿ ní cachí-gá sá cáháⁿ-í tnúhu-gá, te ñu-gá ní taxi-gá tnúhu ndee iní xii-o sá cùndècu-o ndihĪ-gá ni caa ni quíhĪⁿ. ² Te yòhò té Timùteú cúú-n ĩⁿ téé ní sanu ichi ndisa-í ichi Xítohó Jesucristú chi ío váha ní sándáá iní-n-gá. Te cádúha-í ĩⁿ tutú daquixi-í ndaha-n. Te xicáⁿ táhù-í núú Tátá-ó Dútú Ndiòxí ndihĪ núú Xítohó Jesucristú sá ío na chindee chitúu ñaha-gá xii-n, te ducaⁿ ndĪ nduú-gá ná cáda te ío váha cuu iní-n cùndecu-n.

*Cuèndá nchaa ñáyiú dándahú
tnàha ñáyiú-xi*

³ Te nàha-n nacuaá ní cáháⁿ-í cùtnàhá ní quee-í ñuú Éfesú véxi-í distritú Macèdoniá, chi ní cachí-í sá quéndò-n ñuú-áⁿ cáháⁿ-n dõho nchaa ñáyiú dándahú ñáhá càchí sá cáháⁿ tnúhu Yá Ndiòxí te ñá ndáá sá cáháⁿ-yu tnúhu-gá, te ñu-ni ducaⁿ cáháⁿ-í vitna cada-n cùndecu-n. ⁴ Te cùñaha-n xii-yu sá vā cáda cuèndá-yu nchaa cuèndú nihĪ-yu nàcuáa ní xóo cada ñáyiú ní xindecu ndéé sanaha, te nchaa cuèndú-áⁿ dicó chináá ñáhá-xí chi ñá túú vèdana nándihĪ-xi, te ni ñà túú chindee ñaha-xi cada-o nacuaá cuiní Yá Ndiòxí, chi mee-ni sá quindáá iní-ó-gá quidé-xí quide-o nchaa nacuaá cuiní-gá.

⁵ Te duha cáháⁿ-í cùñaha-n xii-yu cuèndá sá ná cùu iní-yu tnàha

ñáyiú-yu, te xini ñuhu-xi nduu ndoo nduu nine iní-yu, te cunduu váha iní-yu, te quindáá iní-yu Yá Ndiòxí, te vá cání ĩⁿ cani úú iní-yu, te núu ducaⁿ na cádá-yu te cuu iní ndisá-yu nchaa tnàha ñáyiú-yu. ⁶ Chi dava ñáyiú ñá túú-gá quidé-yu nchaa nàcuáa cáháⁿ-í-a, chi mee-ná nchaa cuèndá sá ñá túú vèdana nándihĪ xicáháⁿ-yu. ⁷ Te cuiní-yu cáháⁿ-yu nchaa tnúhu ní cáháⁿ ndií Moisés dico ñá ndácũ-yu, chi cuèi ni yùhu ni iní-yu cáháⁿ-yu dico ñá tècú tnùnĪ-yu nàcuáa ní cáháⁿ ndií, te ni tnúhu cáháⁿ mée-yu ñá cùtnùnĪ iní-yu nàcuáa nduu-xi.

⁸ Te sa nàha-o sá ncháá tnúhu ní cáháⁿ ndií Moisés váha, te núu na tècú tnùnĪ-ó nā cuèndá ducaⁿ ní ngùndecu nchaa tnúhu-áⁿ.

⁹ Te cùtnùnĪ iní-ó sá ñà díú sá cúú-xí ncháa ñáyiú quide váha ndècu ñuyúú-a ni ngùndecu nchaa tnúhu-áⁿ, chi ní ngùndecu-xí sá cúú-xí ncháa ñáyiú ñá túú quide váha, ndihĪ cuèndá nchaa ñáyiú ío sáa iní-xi, ndihĪ cuèndá nchaa ñáyiú quide cuehé quidé dùha, ndihĪ cuèndá nchaa ñáyiú ío ndècu cuechi-xi, ndihĪ cuèndá nchaa ñáyiú ñá túú nèhe vèdana sá yíñuhu núú Yá Ndiòxí, ndihĪ cuèndá nchaa ñáyiú ñá túú cáháⁿ váha cuèndá ichi Yá Ndiòxí, ndihĪ cuèndá nchaa ñáyiú sàhni tátá-xi ndihĪ náná-xi, ndihĪ cuèndá nchaa dava-gá ñáyiú sàhni tnaha, ¹⁰ ndihĪ cuèndá nchaa cue téé cáháⁿ ndihĪ ñáyiú ñá túú ñá díú ñándihĪ-güedé cúú-yu, ndihĪ cuèndá tucu nchaa ñáyiú ñá túú cáháⁿ ndihĪ cue téé te ñá díú yĪ-yu cùu-güedé, ndihĪ cuèndá nchaa cue téé cáháⁿ ndihĪ tnàha ndi mee téé-xi, ndihĪ cuèndá nchaa ñáyiú chiváha tnàha ñáyiú-xi cuèndá sá cuiní-yu nihĪ-yu díhúⁿ, ndihĪ cuèndá nchaa ñáyiú ndehnde, ndihĪ cuèndá nchaa ñáyiú càcunehhe ndéé Yá Ndiòxí cuèndá cuiní-yu cùtnùnĪ iní tnàha ñáyiú-yu sá cáháⁿ ndáá-yu, te

ñá ndáá sá càháⁿ ndáá-yu, ndihi cuendá nchaa ñáyiú quide nchaa dava-gá sá ñá túú tàuchiuⁿ Yá Ndióxi cadá-yu. Cuendá nchaa ñáyiú ducaⁿ xiquide ní ngúndecu nchaa tnúhu-áⁿ. ¹¹ Te nchaa tnúhu-áⁿ ñⁿ-ni cùu-xi ndihi nchaa tnúhu sá ñí cachí Yá Ndióxi cáháⁿ-í, te tnúhu-áⁿ cúu-xí tnúhu váha vihi, chi mee-gá ío váha iní-gá.

Té Páblú ndàcáⁿ táhú-dě núú Yá Ndióxi sá ñí cundáhú iní ñáhá-gá xii-dé

¹² Te Xítoho Jesucristú ní cutnùní iní-gá sá cadá ndáá-í cada-í nchaa chiúⁿ tahu-gá. Te ndàcáⁿ táhú-í núú-gá sá ñí taxi-gá chiúⁿ-gá quidè-í, te ío chindee ñaha-gá xii-í. ¹³ Te ní taxi-gá chiúⁿ-gá quidè-í cuèi ní xóo cáháⁿ cuèhé-í cuendá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nándi-gá sá ñí xóo cada-í-yu dico ní cundáhú iní ñáhá Yá Ndióxi xii-í, chi vátá quindáá-gá iní-í Xítoho Jesucristú cutnàhá ducaⁿ ní xóo cada-í, te ní ñá cutnùní iní-í nchaa sá quidè-í ní cùu, te cuèi ducaⁿ ñí xóo cada-í, ¹⁴ dico Yá Ndióxi ío ní cundáhú iní ñáhá-gá xii-í te chindee ñaha-gá. Te mee Xítoho Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

¹⁵ Te ñihí-ó tnúhu sá Xítoho Jesucristú ní quixi-gá ñuyíú-a cuendá sá dácău nihnu-gá nchaa ñáyiú ndècu ichi cuèhé ichi duha. Te tnúhu-áⁿ cúu-xí ñⁿ tnúhu ndáá, te xini ñuhu-xi quindáá iní nchaa nchoo ñáyiú ndècu ñuyíú-a. Te yúhú cúu-í téé ío-gá ndécú cuèchi-xi núú Yá Ndióxi ní cùu. ¹⁶ Te Yá Ndióxi ní cundáhú iní ñáhá-gá ní dácău nihnu ñaha-gá xii yúhú téé xidó ndécú cuèchi-xi ní cùu, cuendá cutnùní iní nchaa ñáyiú sá Xítoho Jesucristú ío cànhu iní-gá. Te sá dúcáⁿ ñí quide ñaha-gá xii-í, te xíáⁿ cutnùní iní-yu sá núu na quindáá iní ñáhá-yu xii-gá te cundecú-yu ndihi-gá ñí caa ñí quíhíⁿ. ¹⁷ Te

nchaa-o chí ná càchí-ó sá ío cànhu cuu Yá Ndióxi, te canehe-o sá yíñùhu núú-gá ñí caa ñí quíhíⁿ, chi mee-gá cúu-gá Yá táxi tnùní nchaa nduu nchaa quíú. Te cùu-gá ñⁿ Yá ñá túú xini núú-ó, te ñⁿ dídí ní-gá ío ndècu ndihi-gá nchaa sá xini tnùní-gá.

¹⁸ Te yòhó té Timùteú téé cùu datná ñⁿ déhe mee-í sa ñaha-n nacuaá ní cáháⁿ dava-gá cue téé càháⁿ tnúhu Yá Ndióxi cuendá-n, te diu-ni ducaⁿ càháⁿ-ú tucu, te cada-n nchaa nacuaá càháⁿ tnúhu-áⁿ chi diu nchaa tnúhu-áⁿ canu ichi ñaha-xi xii-n cada-n nchaa nacuaá cùini Yá Ndióxi. ¹⁹ Te ío quindáá iní-n Xítoho Jesucristú, te cada váha-n cùndecu-n nacuaá cundecu váha iní-n, chi dava ñáyiú ñá túú-gá ducaⁿ quidè-yu núu xíáⁿ ñá túú-gá sàndáá iní-yu nacuáa càháⁿ tnúhu-gá. ²⁰ Te diu-ni ducaⁿ ñí quide té Himèneú ndihi té Ljandrú ní dáñá ndèe-güedé ñá túú-gá sàndáá iní-güedé nacuáa càháⁿ tnúhu Xítoho Jesucristú, te ní xáhaⁿ-í xii-güedé sá ná cùndoho-ná-güedé núu nása cada ñaha sàcùíhna xii-güedé, te ducaⁿ ñí xáhaⁿ-í cuendá sá vâ càháⁿ cuèhé-gá-güedé cuendá Yá Ndióxi.

2

Nacuáa cáháⁿ ndihi-o Yá Ndióxi

¹ Te na càchí tnúhu-í xii-n nchaa nacuaá cada-n. Te díhna-gá càchí tnúhu-í sá cáháⁿ ndihi-n Yá Ndióxi cuendá nchaa ñáyiú te núu nása cùu xíndecú-yu, te cácáⁿ táhú-n núú-gá cuendá-yu, te ducaⁿ ío ndacáⁿ táhú-n núú-gá cuendá nchaa sá váha quide ñaha-gá xii-yu. ² Te ducaⁿ cáháⁿ ndihi-n Yá Ndióxi cuendá nchaa cue téé cùnuu ndihi cuendá nchaa dava-gá cue téé cùchiuⁿ cuendá cada váha-güedé, te ducaⁿ nchòo ñá túú ñá cuu cundecu-o, te ñá túú tnàhí ná caní iní-ó cùndecu-o, te ío cundecu yíñùhu-o núú Yá Ndióxi, te cada-o nchaa nacuaá tàù-xi cunduu. ³ Te núu ducaⁿ na càda-o cáháⁿ ndihi-o

Yá Ndiöxí cuendá nchaa ñáyi te quide váha-o, te ndúu vétú iní Yá Ndiöxí Yaá ní dácâcu nihnu ñaha xii-o núu ùhú núu ndàhú. ⁴ Te mee-gá cuñí-gá sá ncháá ñáyi tecú tnúni-yu nchaa tnúhu càháⁿ-gá, chi cuñí-gá sá nánihí tàhú-yu. ⁵ Te ñⁿ-ni Dútú Ndiöxí ndécú, te ñⁿ-ni Xítohó Jesucristú, te medi-ni Xítohó Jesucristú quidé-gá tnàhá tnúhu-o ndihí Yá Ndiöxí. ⁶ Te Xítohó Jesucristú ní dāñá-gá mēé-gá ní sahani ñaha-güedē xii-gá cuendá sá cuñí-gá sá cācu nihnu nchaa ñáyi ndēcu ñuyú núu ùhú núu ndàhú. Te Yá Ndiöxí cuñí-gá sá ncháá ñáyi ñuyú ndécú vitna níhí-yu tnúhu nacuáa ní cuu ní xihí Xítohó Jesucristú. ⁷ Te Yá Ndiöxí ní cachí-gá sá càháⁿ-í tnúhu-áⁿ ndēni ní cuu núu xīndecu ñáyi ñá túú cū ñáyi israhēl, te mee-ni tnúhu ndáá dānehé-í-yu nacuáa quindáá iní ñáhā-yu xii-gá, te yúhú càháⁿ ndáá-í sá Yá Ndiöxí ní cachí-gá sá càháⁿ-í tnúhu-gá chi ndēcu ndihí-í Xítohó Jesucristú, te ñá túú dāndahú ñáhā-í xii-n.

⁸ Te yúhú cuñí-í sá ncháá xīchi càháⁿ ndihí cue tēe Yá Ndiöxí, te na cūnduu ndoo cūnduu nine iní-güedē òrē ndonehe-güedē ndaha-güedē càháⁿ ndihí ñaha-güedē xii-gá, chi vá cúú cūdééⁿ-güedē cuendá nchaa sá quidé ñaha ñáyi xii-güedē, te ni vá cání iní-güedē cúcuēhé tnáhā-güedē ndihí-yu. ⁹ Te càchí tnúhu-í xii-n sá ncháá ñáyi ñá ní ná cūnduu díoyu nacuáa tàú-xi cūnduu, te vá cūnduu cuehé cūnduu duha dàtná cáá díoyu nchaa ñáyi ndēcu ichi cuehé ichi duha, te na ndádá-yu díquí-yu nacuáa tàú-xi cūnduu, te vá ndádá cuēhé ndada duhá-yu, te vá cání iní-yu cūnduu víi-yu ndihí sá ío ndèyáhu, te ni vá cání iní-yu cuñhú-yu dóo sá ío ndèyáhu. ¹⁰ Te mee-ni sá váha cadá-yu, chi ducaⁿ tàú-xi cada nchaa ñáyi ñá ní ndécú ichi Yá Ndiöxí. ¹¹ Te òrē tàcá-yu núu

dácuahá-yu tnúhu Yá Ndiöxí, te cue ñáyi ñá ní dācuahá-yu tnúhu-gá, te cadá-yu nchaa nacuáa càháⁿ cue tēe dācuaha ñaha xii-yu tnúhu-gá. ¹² Te yúhú càchí-í sá vá cúú dācuaha ñáyi ñá ní cue tēe, te ni vá cúú tàxi tnuní ñáhā-yu xii-güedē chi cūnduu tnáví-ni yuhú-yu cūndedóho-yu. ¹³ Te ducaⁿ xini ñuhu-xi cadá-yu, chi Yá Ndiöxí ní cadúha-gá díhna-gá té Àdán te dàtnúni ní cadúha-gá tá Èvá. ¹⁴ Te ñá díú mēe té Àdán ní dāndahú ñáhā sācuñhá xii-dé, chi tá Èvá ní dāndahú-xi, te ñá túú ní quide váha-xi núu Yá Ndiöxí sá dúcáⁿ ní sāndáá iní-xi tnúhu ní càháⁿ sācuñhá-áⁿ. ¹⁵ Dico ñáyi ñá ní nduu tàhú-yu sá cóo dēhe-yu, te naníhí tàhú-yu te núu vá dáñá ndēe-yu canchicúⁿ nihnú-yu ichi Yá Ndiöxí, te cūndecu yíñuhú-yu núu-gá, te cuu iní-yu nchaa tnàha ñáyi-yu, te cadá-yu nchaa nacuáa tàú-xi cūnduu cūndecú-yu.

3

Nacuáa tàú cue tēe yindaha ñaha xii ñáyi ndēcu ichi Yá Ndiöxí cada-güedē

¹ Te ío ñⁿ tnúhu càháⁿ ñáyi sá núu ñⁿ tēe cuñí quindaha ñaha xii ñáyi ndēcu ichi Yá Ndiöxí, te ñⁿ sá váha cuñí-dé cada-dé càchí-yu, te ndáá quēé-xi tnúhu càháⁿ-yu. ² Te yúhú càchí-í sá cuē tēe ducaⁿ na quindaha ñaha xii ñáyi te xini ñuhu-xi cuu-güedē cue tēe quide ndáá cuendá sá vá càháⁿ ñáyi cuendá-güedē sá ñá túú quide ndáá-güedē. Te na cū-güedē cue tēe ndēca ñⁿ caa-ni ñadihí, te na cū-güedē cue tēe ñá túú quide cutexinu ndēcu, te na cū-güedē cue tēe quide nchaa nacuáa tàú-xi cūnduu, te na cū-güedē cue tēe sñaha núu vehe ndetátú nchaa ñáyi ñuhu ichi, te na cū-güedē cue tēe dānehé

ñáhá vâha xii ñâyiu tnúhu Yá Ndiöxí. ³ Te vá cúú-güedé cue téé quihu, te ni vá cúú-güedé cue téé ndücu pletú, te ni vá cúú-güedé cue téé dicó-ni ducaⁿ nihí díhúⁿ, te ni vá cúú-güedé cue téé sàni iní nàá, te ni vá cúú-güedé cue téé ñuhu iní mee-ni díhúⁿ. Chi na cùu-güedé cue téé vâha iní-xi te cunduu càhnu iní-güedé. ⁴ Te na cùu-güedé cue téé ío vâha sànu ichi ñadihí-xi ndihí landú-xi, te na cùu-güedé cue téé quide nacuaá sàndáá iní ñáhá làndú-xi cuendá caneh-güexi sá yíñuhu núú-güedé. ⁵ Chi núu cùu-güedé cue téé ñá ndácú cànuichi ñadihí-xi ndihí landú-xi, te vá ndácú-güedé quindaha-güedé cue ñâyiu ndècu ichi Yá Ndiöxí. ⁶ Te vá cúú-güedé cue téé íchí ni sàndáá iní-xi tnúhu Yá Ndiöxí, chi na cuáháⁿ te cada nínu-güedé méé-güedé te cuíta nihnu-güedé dàtná ní xíta nihnu sácuihná. ⁷ Te xini ñuhu-xi cuu-güedé cue téé càháⁿ vâha ñâyiu cuendá-xi, cuéi ñá díú ñâyiu ndècu ichi Yá Ndiöxí cuendá sá vâ cuátnùhu ñaha ñâyiu xii-güedé, chi núu ñáhá te cudana te sácuihná quesaha-xi tàxi tñuni ñáhá-xí xii-güedé.

Cue téé chindee ñaha xii cue téé yindaha ñaha xii ñâyiu ndècu ichi Yá Ndiöxí

⁸ Te tnàhá cue téé chindee ñaha xii cue téé yindaha ñaha xii ñâyiu ndècu ichi Yá Ndiöxí xini ñuhu-xi cuu-güedé cue téé quide nchaa nacuaá tàú-xi cunduu, te vá cúú-güedé cue téé càchí sá càháⁿ ndáá te ñá ndáá, te ni vá cúú-güedé cue téé quihu, te ni vá cúú-güedé cue téé sàni iní-xi dicó-ni ducaⁿ nihí díhúⁿ. ⁹ Te xini ñuhu-xi cuu-güedé cue téé ñá túú dàña ndeé sàndáá iní tnúhu Yá Ndiöxí, te na cùu-güedé cue téé ío vâha cùu iní-xi cuendá nchaa sá vâha quide-güedé. ¹⁰ Te xini ñuhu-xi coto ndeé ñáhá xii-güedé te núu cùu-güedé cue téé quide vâha, te núu cùu-güedé cue téé

quide vâha ña te cuu chindee-güedé cue téé yindaha ñaha xii ñâyiu ndècu ichi Yá Ndiöxí. ¹¹ Te tnàhá tucu nchaa ñâyiu díhí ná càdá-yu nchaa nàcuáa tàú-xi cunduu, te vá cùnduu yiti yuhú-yu, te ni vá cúú-yu ñâyiu quide cutexínu ndècu, te na cùu-yu ñâyiu ío vâha quide ndáá. ¹² Te nchaa cue téé chindee ñaha xii cue téé yindaha ñaha xii ñâyiu ndècu ichi Yá Ndiöxí, xini ñuhu-xi cuu-güedé cue téé ndècu ñⁿ caa-ni ñadihí-xi, te na cùu-güedé cue téé sànu ichi vâha ñadihí-xi ndihí landú-xi. ¹³ Te núu na càda ndáá-güedé chindee-güedé cue téé yindaha ñaha xii ñâyiu ndècu ichi Yá Ndiöxí, te canehé-yu sá yíñuhu núú-güedé, te ducaⁿ te vá cúú càháⁿ núú-güedé càháⁿ-güedé núú ñâyiu tnúhu Xítóhó Jesucristú sá sàndáá iní-güedé.

Ío càhnu cuu tnúhu càháⁿ Yá Ndiöxí

¹⁴ Te cuení-í ndíhi-ni quixi coto ñaha-í xii-n dico díhna-gá càdúha-í tutú-a daquixi-í ndaha-n ¹⁵ chi na cuáháⁿ cuyaa-í. Te xíáⁿ núu càdúha-í tutú-a daquixi-í ndaha-n cuendá cutnùní iní-n ñasa cada-n cùndecu-n ndihí nchaa ñâyiu ndècu ichi Yá Ndiöxí. Te ñâyiu-áⁿ cúu-yu dàtná ñⁿ vehe cùu cuendá Yá Ndiöxí Yaá ndécú nchaa nduu nchaa quiú, chi ndècu ndihí ñaha-gá xií-yu, te cúu-yu ñâyiu càháⁿ vâha cuendá tnúhu-gá. ¹⁶ Te cùtnumí ndáá iní-ó sá ío càhnu cuu tnúhu càháⁿ Xítóhó Jesucristú, tnúhu sá càháⁿ nàcuáa ndùu ichi ndecu-o, te duha càháⁿ tnúhu-áⁿ:

Te ní quixi Yá cúú Ndiöxí ñuyú-a ní cuu-gá ñⁿ ñâyiu,

te Espíritú Yá Ndiöxí ní càháⁿ ndáá-xi sá cúú-gá ñⁿ Yaá ío vâha quide ndáá,

te cue espíritú xínú cuèchi núú Yá Ndiöxí ní xini ndáá-xi nchaa nàcuáa ní quide Yaá ní quixi ñuyú-a.

Te ní xíté nuu tnúhu-gá nihíi ñuyíú-a,
te ndéni ní cuu ní nguíta-yu sàndáá
iní ñáhá-yu xii-gá,
te mee-gã cuánda-gá andiu.
Duha càchí tnúhu-án.

4

*Ñáyiu daña nihnu vá quíndaá-gá
iní-yu Yá Ndióxi*

¹ Te Espíritú Yá Ndióxi càháⁿ ndáá-xi sá sàá nduu daña nihnu dava ñáyiu ndècu ichi-gá vá quíndaá inú ñáhá-gã-yu xii-gá, te ducaⁿ chi cue espíritú cùndihi yucu ñávãha dandahú ñáhá-xí xii-yu, te mee-nã nchaa tnúhu càháⁿ nchaa ñáyiu cùndihi nchaa espíritú-ánⁿ cuhuⁿ inú-yu. ² Te nchaa ñáyiu ducaⁿ cùndihi cue espíritú cùndihi yucu ñávãha-ánⁿ cúu-yu ñáyiu ío dandahú méé-xí chi càchí-yu sá càháⁿ ndáá-yu te ñá ndáá, te ñá túú tnàhi-gá ná quidé-xí inú-yu cuendá nchaa sá cuèhé sá dúhá quidé-yu. ³ Te ñáyiu-ánⁿ quesàhá-yu sá vã cúú càndeca tnaha ñáyiu, te ní vã cúú càxi-yu dava núú sã xini-yu caxi-yu, dico Yá Ndióxi ní cadúha-gã nchaa sá nchító-ó cuendá caxi-o, te cuini-gá sá ncháá nchò ñáyiu sàndáá inú tnúhu-gá ndacáⁿ táhú-ó núú-gã òré caxi-o. ⁴ Te nchaa sá ní cadúha Yá Ndióxi cúú-xí sã vãha te vá dàquèe tíhú-ó, te xini ñuhu-xi ndacáⁿ táhú-ó núú-gã cuendá nchaa xiãⁿ. ⁵ Te Yá Ndióxi càchí-gá sá méé-gã quidé-gã cúú-xí sã vãha sá cúú-xí-ó te núu na ndacáⁿ táhú-ó núú-gã.

*Tée quide ndáá xínú cuèchi núú
Xítóhó Jesucristú*

⁶ Te núu na dàcuaha-n ñáyiu ndècu ndihi-o ichi Xítóhó Jesucristú nchaa nàcuáa càháⁿ-í-a ña, te cuu-n ñⁿ tée quide ndáá xínú cuèchi núú-gã, te nducu ndèe-ni-n dacuaha-n tnúhu Yá Ndióxi sã sàndáá inú-n, te canchicúⁿ nihnu-ni-n càda-n nchaa nàcuáa càháⁿ-gã, te núu ducaⁿ nà cada-n, te níhí ndéé-n cùndecu-n

ichi-gá. ⁷ Te vá cáda cuendá-n nchaa cuendú cuèhé cuendú duha càháⁿ ñáyiu, ndihi nchaa dava-gã cuendú sá ña túú nàndihi cuendá sá ña túú nã cumání-n cùndecu-n núú Yá Ndióxi. ⁸ Te núu ñⁿ chiuⁿ cada-o te nàcaá luha yiqui-o te nàndihi-xi luha, dico ío-gá nàndihi-xi te núu cada-o sã cùndecu yíñuhu-o núú Yá Ndióxi. Te núu ducaⁿ na càda-o te cùu-xi ñⁿ sã vãha sá cúú-xí-ó vitna, te ní caa ní quíhíⁿ ducaⁿ cùu-xi ñⁿ sã vãha sá cúú-xí-ó. ⁹ Te xini ñuhu-xi sá ncháá-ndó quíndaá inú-ndó nchaa tnúhu càháⁿ-í-a chi cùu-xi tnúhu ndáá. ¹⁰ Te vitna ío nducu ndee-o quide-o chiuⁿ Yá Ndióxi Yaá ndécú nchaa nduu nchaa quíú te quide ndee inú-ó cuendá nchaa sá quidé ñaha ñáyiu xii-o, chi sàndáá inú-ó sã díú-gã chindee ñaha-gã xii-o. Te nchaa ñáyiu cùndahú inú ñáhá-gã te chindee ñaha-gã xii-yu, dico ñáyiu sàndáá inú ñáhá xì-gá ío-gá cúnúú-yu chindee ñaha-gã xii-yu, chi dàcácu nihnu ñaha-gã núú ùhú núú ndàhú.

¹¹ Te nchaa tnúhu-ánⁿ cũñaha-n xii-yu, te càháⁿ-n dôho-yu sá ná càdá-yu nchaa nàcuáa càháⁿ-xi. ¹² Te ío cada váha-n cùndecu-n cuendá sã vã yõo daquèe tíhú ñáhá xii-n cuendá sã cúú-n tée cuechi, te ío váha càda-n nchaa sã táu-n càda-n cuendá ducaⁿ canchicúⁿ nihnu nchaa ñáyiu ndècu ichi Yá Ndióxi, te vii vii càháⁿ ndihí-n-yu, te cuu inú-n-yu, te ío quíndaá inú-n Yá Ndióxi, te mee-ni sã vãha cani inú-n, te ducaⁿ càda-n cuendá canchicúⁿ nihnú-yu. ¹³ Te nini cùyaa-í quixi-í, te ío nducu ndèe-n càháⁿ ndodo-n tnúhu Yá Ndióxi núú-yu, te dacuàhá-n-yu nàcuáa càháⁿ tnúhu-gã, te càháⁿ-n dôho-yu nàcuáa cuu vii cuu váha inú-yu cundecú-yu ichi Yá Ndióxi. ¹⁴ Te vá dáñá ndéé-n càda-n nàcuáa nduu táhú ní taxi Yá Ndióxi ní ngùndecu ndihi-n cùtnàhá ní sacáⁿ ndodo cue tée yindaha ñaha xii ñáyiu ndècu ichi Yá Ndióxi ndaha-güedé díquí-n,

te ní cachí tnúhu-güedé sá dúcáⁿ ní cuiní Yá Ndióxi cunduú.

¹⁵ Te ní yúhu ní iní-n càda-n nchaa nacuaá càháⁿ-í-a cuendá sá ná quini ñáyiú sá ío-gá váha ta quide-n cuaháⁿ. ¹⁶ Te ío váha cundehe-n nchaa nacuaá quide-n, ndihi nchaa nacuáa dānehé-n-yu, te vá dáña ndéé-n dùcaⁿ cada-n. Te núu ducaⁿ na càda-n te nduu táhú-n cūndecu váha-n núú Yá Ndióxi ní caa ní quihíⁿ ndihi nchaa ñáyiú na tédóho nchaa tnúhu càháⁿ-n.

5

Nacuáa tàú-xi cada-o cūndecu-ó ndihi ñáyiú sàndáá iní tnúhu Yá Ndióxi

¹ Te vá ténàá-n nchaa cue téé cūu sacuéhé chí vii vii càháⁿ-n dōho-güedé, te cada iní-n sá dàtná tátá-n cūu-güedé, te diu-ni ducaⁿ vii vii càháⁿ-n dōho nchaa cue téé cuechi, te cada iní-n sá dàtná cue ñani-n cūu-güedé. ² Te diu-ni ducaⁿ vii vii càháⁿ tucu-n dōho nchaa ñáyiú dihi ñáyiú cūu sacuéhé, te cada iní-n sá dàtná ñaná-n cūu-yu, te diu-ni ducaⁿ vii vii càháⁿ tucu-n dōho nchaa ñáyiú dihi ñáyiú cuechi, te cada iní-n sá dàtná cue cūha-n cūu-yu, te ío cuu váha iní-n óré ducaⁿ càháⁿ-n dōho nchaa ñáyiú cuechi-áⁿ.

³ Te canehe-n sá yíñùhu núú ñáyiú dihi ní quendóo quée, te chindéé-n-yu núu ndàhú-yu. ⁴ Te núu ñⁿ ñaha quée ndécú cuè déhe-aⁿ àdi cue déhe ñani-aⁿ, te ío xini ñuhu-xi cada-güexi nchaa nacuaá tàú-xi cunduú núu-aⁿ chí ducaⁿ cuini Yá Ndióxi cada-güexi. Te núu ducaⁿ na càda-güexi te nānchocáva-güexi quide-güexi sá váha sá cúu-xi ñáyiú ní dācuéhnú ñaha xii-güexi. Te núu ducaⁿ na càda-güexi te quide váha-güexi te ío nduu vétú iní Yá Ndióxi. ⁵ Te ñáyiú quée ñáyiú ndàhú ndécú ichi Yá Ndióxi sàndáá iní-yu sá díú-gã chindéé ñaha-gá xií-yu, te cuéi nduu cuéi niú ñá túú dàña ndéé-yu càháⁿ ndihi ñahá-yu xii-gã.

⁶ Te nchaa ñáyiú quée cúdí iní quidé nchaa sá cuéhé sá dúhá cūu-yu dàtná ñáyiú ní xihí cuéi ndécú vívú-yu. ⁷ Te cúñaha-n xii nchaa ñáyiú sá ná cáda-yu nchaa tnúhu càháⁿ-í-a cuendá sá ñá túú ná cumáni-yu cundecú-yu, te ducaⁿ vá yóo càháⁿ cuéhé cuendá-yu. ⁸ Te ío xini ñuhu-xi chindeé-yu cue tnaha ñáyiú-yu, dico ío-gá xini ñuhu-xi chindeé-yu cue ñáyiú cūu ndi meé-yu ndécú ndihí-yu, te núu vá dúcáⁿ càda-yu te ñá túú-gã sàndáá iní-yu cadá-yu nacuaá càháⁿ Yá Ndióxi. Te sá dúcáⁿ ná cadá-yu te vihi-gá quidé-yu dācúxi ñáyiú ndécú ichi cuehé ichi duha.

⁹ Te chido tnúni-n mēe-ni ñáyiú quée ñáyiú sa ndécú únidico cuía-xi àdi vihi-gá cuendá ñáyiú-áⁿ cadá-yu nchaa nacuaá cuini Yá Ndióxi núu nchaa ñáyiú ndécú ichi-gá, te ñáyiú-áⁿ xini ñuhu-xi cuú-yu mee-ni ñáyiú ní quide ndáá ní xīndecu ndihi yí-xi. ¹⁰ Te na cūu-yu ñáyiú quée quidé váha cūdiú núu nchaa ñáyiú, te na cūu-yu ñáyiú quée xini canu ichi váha cue landú-xi, te na cūu-yu ñáyiú sáñaha núu vehe ndetátú cue ñáyiú ñuhu ichi, te na cūu-yu ñáyiú ndécú túha quide nani chūuⁿ cuendá cue ñáyiú ndécú ichi Yá Ndióxi, te na cūu-yu ñáyiú chindee nchaa ñáyiú ndécú ndihi tnúndóho tnúhu ndàhú, te na cūu-yu ñáyiú ñá túú dàña ndéé quidé nchaa núu sá váha.

¹¹ Te vá chidó tnúni-n ñáyiú quée ñáyiú ñá túú ndécú únidico cuía-xi cada chūuⁿ Yá Ndióxi, chí núu cuechi-gã-yu ña, te vá cūndáá-yu cadá-yu chūuⁿ-gã, chí quesahá-yu natnāndaha tucú-yu. ¹² Te sá cuendá xiáⁿ te nacháhu-yu núu Yá Ndióxi, chí vá cáda-gã-yu nacuaá ní cuu tnúhu cadá-yu ní cūu. ¹³ Te ngüita-yu cani iní-yu quihíⁿ-yu ndi vehe ndi vehe caca nihni-yu, te nchaa ñáyiú ducaⁿ quide ío cūu cuhndú-yu, te cūyiti yuhú-yu, te ndēni ní cuu cuaháⁿ-yu chinee

díquí-yu vehe tnàha ñáiyú-yu ndèhé-yu núu nása ndècú-yu, te ñá túú tàú-yu ducaⁿ càdá-yu, te càháⁿ-yu mee-ni tnúhu sá ñá túú nàndíhi. ¹⁴ Núu xǎⁿ cuíní-í sá ncháá ñáiyu quèé ñáiyu cuechi na nàtnándaha tucú-yu cuendá cuú-yu náná, te ducaⁿ càdá-yu nchaa sá xíní ñúhu-xi cadá-yu vehé-yu, te núu ducaⁿ na càdá-yu, te nchaa ñáiyu cùu úhú iní ñáhá xì-o vâ nihí-gá-yu tnúhu càháⁿ cuèhé-yu cuendá tnúhu Yá Ndiòxí. ¹⁵ Te dava ñáiyu quèé ndècú ichi Yá Ndiòxí ní cùu ní dáñá-yu te ní tnií-yu tnúhu càháⁿ sácúíhná.

¹⁶ Te núu dava ñáiyu ndècu ichi Yá Ndiòxí ndècú ndíhi-yu ìⁿ ñaha quèé cúu ndí meé-yu ña, te tàú-yu chindee ñáhá-yu xii-aⁿ cuendá sá vâ ío chí chiuⁿ-aⁿ nchaa ñáiyu ndècu ichi Yá Ndiòxí, te ducaⁿ te nchaa ñáiyu ndècu ichi-gá-áⁿ ñíhi ndéé-gá-yu chindèé-yu dava-gá ñáiyu quèé ñá túú vèdana ndècu ndíhi.

¹⁷ Te nchaa cue téé ío váha quide yíndaha ñaha xii ñáiyu ndècu ichi Yá Ndiòxí ío xíní ñúhu-xi canehe sá yíhi ñúhu núú-güedé, te chindee ñaha xii-güedé. Te uuⁿ-gá tàú ñáiyu ducaⁿ càdá-yu sá cúu-xí ncháa cue téé ní yúhu ní iní càháⁿ tnúhu-gá. ¹⁸ Te núu tütú Yá Ndiòxí càchí-xi: “Vá chíhi-ndó ñunu yuhu ndícutu oré dánchezí-dí triú”, duha càchí-xi. Te càchí tucu-xi ingá xichi: “Íⁿ téé quide chiuⁿ dacuítíí tàú-xi sá cúhúⁿ yáhu-dé”, duha càchí-xi núú tütú-gá.

¹⁹ Te núu ío ñáiyu véxi sácáⁿ cuéchi núú-n cuendá ìⁿ téé yíndaha ñaha xii ñáiyu ndècu ichi Yá Ndiòxí ñá, te cada cuendá-n tnúhu càháⁿ-yu te núu véxi-yu ndíhi úú àdi úní ñáiyu càháⁿ ndáá nàcuáa ní cuu, áⁿ núu ñáhá te vâ cadá cuendá-n tnúhu càháⁿ-yu. ²⁰ Te núu cue téé yíndaha ñaha xii ñáiyu-áⁿ ndècú cuéchi-güedé, te càháⁿ-n dóho-güedé

núu ncháa ñáiyu ndècu ichi-gá cuendá sá dává-gá-yu vâ cúyíⁿ-yu ducaⁿ càdá-yu. ²¹ Te Yá Ndiòxí ndíhi Xítóhó Jesucrístú náhá-gá ndíhi cue espíritú xínú cuéchi núú-gá sá yúhú càháⁿ-í dóho-n sá cadá-n ncháa nacuáa càháⁿ-í-a, te ìⁿ-ni càháⁿ ndíhi-n cuè téé xíní tnáhá ndíhi-n, ndíhi cue téé ñá túú xíní tnáhá ndíhi-n. ²² Te vâ ío cundihi iní-n taxi ndecu-n ìⁿ téé quíndaha ñaha xii ñáiyu, chí díhna-gá cada cuendá-n te núu cùu-dé ìⁿ téé quide ndáá, chí núu cuendá-ni na taxi ndecu-n-dé te vâ cadá ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ío coto-n mèe-n vâ cadá-n ní ìⁿ sá cuèhé sá dúhá.

²³ Te ducaⁿ ío mee-ni cùhú xití-n te vâ cóhó-n mèe-ni ndute, chí tnàhá luha vínú ndéhé yoho yàha stilé coho-n cuendá cada tátna-xi.

²⁴ Te dava ñáiyu cùtnuní nchaa sá cuèhé sá dúhá quide-yu, te cùtnuní tucu sá nácháhu-yu na sáá nduu, te dava tucú-yu chí ñá túú cùtnuní nchaa sá cuèhé sá dúhá quide-yu, dico na sáá nduu cundáa cuéchi-yu te dává-áⁿ cùtnuní. ²⁵ Te ducaⁿ sátnahá-xi cùu nchaa sá váha quide dává-yu chí cùtnuní, te cuéi ñá túú cùtnuní òré-ni dico dacuítíí sá sáá nduu cùtnuní.

6

¹ Te nchaa ñáiyu ndècu tnuú quidé chiuⁿ ndíhi ìⁿ patróóⁿ xíní ñúhu-xi ío canehé-yu sá yíñúhu núú-dé cuendá sá vâ càháⁿ cuèhé ñáiyu cuendá Yá Ndiòxí, te ní vâ càháⁿ cuèhé-yu cuendá tnúhu-gá.

² Te núu patróóⁿ cue ñáiyu xínu cuechi-áⁿ sàndáá iní-dé Yá Ndiòxí, te ñá díú sá dúcáⁿ sàndáá iní-dé Yá Ndiòxí te vâ canehé-yu sá yíñúhu núú-dé, chí uuⁿ-gá tàú-yu cada váha-yu cunu cuéchi-yu núú-dé, te ducaⁿ na càdá-yu chí xínu cuechi-yu núú tée sàndáá iní ndíhi-yu tnúhu Yá Ndiòxí. Te vâ dáñá ndèé-n dànehé-n-yu nchaa

nàcuáa càháⁿ-í-a, te cùñaha-n xii-yu sá ná càdá-yu.

Nduu vétú iní-ó cùndecu-o

³ Te ío cue téé ñá túú tñi-güedé nàcuáa càháⁿ tnúhu Xítóhó Jesucristú, te cue téé-áⁿ càchí-güedé sá càháⁿ ndáá-güedé dico ñá ndáá, chi ñá túú càháⁿ-güedé nàcuáa cuáháⁿ tnúhu-gá. Te nchaa tnúhu Xítóhó Jesucristú cúu-xí mée-ni tnúhu ndáá, te chindee ñaha-xi cada ndáá-ó cùndecu-o ichi-gá. ⁴ Te nchaa cue téé ducaⁿ xiquide quide cahnu-güedé mée-güedé dico ñá túú vèdana xini-güedé, te cue téé-áⁿ ñá túú ndècu váha iní-güedé chi nándi tnúhu sá ñá túú nándihi cuini-güedé cùtnàha-güedé. Te ngüita-güedé cúu cuèdú iní tnáhá-güedé, te nàá ndihi tnáhá-güedé, te xicuèhé tnáhá-güedé, te ñá túú-gá cúu váha iní núu tnáhá-güedé. ⁵ Te cue téé-áⁿ mee-ni nàá-güedé chi ñá túú sàni váha iní-güedé, te ni ñá túú xini-güedé nàcuáa cuáháⁿ tnúhu ndáá tnúhu Yá Ndióxi, te càchí-güedé sá ìo váha cundecu-güedé ichi-gá chi sàni iní-güedé sá ìo vèi díhúⁿ nihí-güedé cundecu ndihi-güedé. Te yúhú càháⁿ-í dóho-n sá vè nihí tnáhá-n ndihi nchaa cue téé ducaⁿ xiquide. ⁶ Te ndáá sá ichi Yá Ndióxi cúu-xí ìiⁿ ichi sá ìo váha cundecu-o, dico xini ñuhu-xi nduu vétú iní-ó nàcuáa ndècu-o ñuyíu-a. ⁷ Te nchoo cuè ñáyiu chi ñá túú vèdana nèhe-o ní quexìo ñuyíu-a, te diu-ni ducaⁿ ñá túú vèdana canehe-o quíhíⁿ òré ná cùú-ó. ⁸ Te ío xini ñuhu-xi nduu vétú iní-ó te núu ndècu-ni sá cùnchìto-o ndihi dóo cuíhnu-o. ⁹ Te ío ñáyiu ío cuini-yu cuu cuicá-yu, te ñáyiu-áⁿ dácàhu iní ñáhá yùcu ñávàha xii-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidè-yu, te nchaa sá quidè-yu-áⁿ ñá túú vèdana nándihi-xi chi uuⁿ-gá ndádá ndàhú ñáhá-xí xii-yu, te dàcuíta nihnu

ñaha-xi. ¹⁰ Chi nchaa ñáyiu ñuhu iní mee-ni díhúⁿ, te xíáⁿ quidè-xí ngüita-yu sàni iní-yu cadá-yu nándi sá cuèhé sá dúhá. Te ío ñáyiu ndècu ichi Yá Ndióxi te sá tnúhu ducaⁿ ñuhu iní mee-ni díhúⁿ ní dáñá-yu ñá túú-gá sàndáá iní ñáhá-yu xii-gá, te vitna ñá túú tnàhí-gá ndécú váha iní-yu.

Cahni iní-ó càda-o nchaa nacuáa càháⁿ Yá Ndióxi chi sàndáá iní-ó-gá

¹¹ Te yòhó téé quide chiuⁿ Yá Ndióxi xini ñuhu-xi vá cadá-n dàtná quidè nchaa ñáyiu ní cachí-í sá ñá túú quide ndáá, te vá dáñá ndèe-n càda ndáá-n cùndecu-n, te cada-n nàcuáa nduu vétú iní Yá Ndióxi, te ío quindáá iní-n-gá, te cuu iní-n nchaa tnaha ñáyiu-n, te cada cahnu iní-n nchaa sá ná yàha-n cùndecu-n ichi-gá, te cunduu ndàhú iní-n. ¹² Te cahni iní-n càda-n nchaa nacuáa cuini Yá Ndióxi chi sàndáá iní-n-gá, te ío cuhuⁿ iní-n sá cùndècu-n ndihi Yá Ndióxi ní caa ní quíhíⁿ, chi diu cuèdá tnàhí-áⁿ ní càháⁿ ñáhá-gá xii-n, te ní càháⁿ ndáá-n núu vèi ñáyiu sá ìo váha sàndáá iní-n-gá. ¹³ Te Yá Ndióxi Yaá quidè nchìto nchaandi túhú sá ìo ñuyíu nàha-gá sá càháⁿ-í dóho-n vitna, te diu-ni ducaⁿ nàha tucu Xítóhó Jesucristú Yaá ní càháⁿ tnúhu ndáá núu tè Pilatú ¹⁴ sá quindáá iní-n càda-n nchaa nacuáa càháⁿ Yá Ndióxi, te nchaa tnúhu càháⁿ-gá cada-n nàcuáa vá dáquèe tíhú ñáhá ñáyiu xii-n, te ducaⁿ-ni càda-n ndéé ná sàá nduu quixi tucu Xítóhó Jesucristú. ¹⁵ Te quixi tucu-gá chi ducaⁿ ní cachí Yá Ndióxi cunduu, te mee Yá Ndióxi nàhá-gá ná nduu quixi tucu Xítóhó Jesucristú. Te Yá Ndióxi ío váha cùu iní-gá te ìiⁿ dii díi-ni-gá ío-gá cùnúu-gá dàcúúxí cuè téé tàxi tnuní ìiⁿ ìiⁿ nacióⁿ ndihi nchaa dava-gá cue téé cùnuu, chi tàxi tnuní ñáhá-gá xii-güedé, te nchaa ñáyiu ndècu ñuyíu-a tàxi tnuní-gá. ¹⁶ Te diu-gá cúu-gá Yaá ndécú nchaa nduu

nchaa quíú, te ío càhnu cuu-gá chi dàtná dáyèhé nchícanhii dáyehé-xi núú ndécú-gă, te vâ yôo ìⁿ cùyii dayatni núú ndécú-gă, te ni ñã túú nì ìⁿ ñáyiu xìní ñáhã xii-gá te ni vâ ndácũ-yu quiní ñáhã-yu xii-gá. Te ío na cànehe nchaa ñáyiu sá yíñùhu núú-gă ni caa ni quíhíⁿ, te ducaⁿ ìo na tàxi tnuní-gá ni caa ni quíhíⁿ. Te ducaⁿ na cùnduu.

¹⁷ Te cáháⁿ-n dôho nchaa ñáyiu cuica ndècu ndihí nchaa sá ìo ñuyíú-a cuendá sá vâ cadá càhnú-yu mée-yu, te duuⁿ duuⁿ vâ cùndéé iní-yu ni ìⁿ sá ndécú ndihí-yu chi vâ cúdí-xi, te cáháⁿ-n dôho-yu sá ná cùndéé iní-yu Yá Ndiõxí chi ðiu-gá cúú-gă Yaa ndécú nchaa nduu nchaa quíú, te chitu nũú ndáhã tàxi-gá nchaa sá xíní ñùhu-o, chi cuiní-gá sá ìo cuu váha iní-ó cùndecu-o. ¹⁸ Te cáháⁿ tucu-n dôho-yu sá ná cadá-yu mee-ni sá váha, te cuendá nchaa sá váha cadá-yu-áⁿ te cuú-yu ìⁿ ñáyiu cuica sá cúú-xí Yá Ndiõxí, te na cùndecu túha-yu chindéé-yu cue ñáyiu ndáhú cuañáhã-yu sá xíní ñùhú-yu. ¹⁹ Te núu ducaⁿ na cadá-yu te Yá Ndiõxí cuañaha-gă sá ndúú tãhũ-yu na sàá nduu, te ngùndecu váha-yu ndihí-gá ni caa ni quíhíⁿ.

Tnúhu ndéé núú nĩ ndihí-ná

²⁰ Te yôhó té Timùteú cáháⁿ-í dôho-n sá ìo cada cuendá-n vâ dăma tnúhu ní taxi Yá Ndiõxí danèhé-n ñáyiu, te vâ cadá cuendá-n nchaa cuendú cuèhé cuendú duha ìo ñuyíú-a chi ñã túú nândíhi-xi, te nì vâ cadá cuendá-n nchaa tnúhu xitnáha ñáyiu cãchí sá xícá naha tnúhu cue tée túha chi ñã díú ìⁿ tnúhu ndáá cúú-xí. ²¹ Te ìo ñáyiu ñã túú-gă sàndáá iní-yu tnúhu Yá Ndiõxí, chi ní quide cuendá-yu nchaa tnúhu xica naha ñáyiu-áⁿ.

Te Yá Ndiõxí ná chindee chitúu ñaha-gă xii-n. Te ducaⁿ na cùnduu. Te ío cada ndee iní-nã vitna.

TUTÚ CÚÚ ÛÚ NÍ CADÚHA TÉ PÄBLŪ QUIHⁿ NDAHA TÉ TIMŪTEÚ

*Té Päblū cādūha-dé tutú quíhⁿ
ndaha té Timūteú*

¹ Yúhú té Päblū ní tendaha ñaha Yá Ndióxi cáháⁿ-í tnúhu Xítohó Jesucristú núú ñäyiu, chi ducaⁿ ní cachí Yá Ndióxi cunduu. Te cáháⁿ-í dàtná ní cachí Yá Ndióxi sá ncháá nchòo ñäyiu ndècu ndihí Xítohó Jesucristú naníhí tàhú-ó. ² Te yúhú té Päblū cādūha-í tutú-a daquixi-í ndaha yòhó té Timūteú chi ío cùu iní ñàhá-í xii-n, te ñu-í ní sanu ichi ñaha-í xii-n ichi Xítohó Jesucristú, te xicáⁿ táhù-í núú Dütú Ndióxi ndihí núú Xítohó Jesucristú sá ío na chindee chítúu ñaha-gã xii-n, te cundàhú iní ñàhá-gã, te ducaⁿ ndi nduú-gá ná cádá te ío váha cuu iní-n cūndecu-n.

Cáháⁿ váha-o cuendá Xítohó Jesucristú

³ Te cuéi nduu cuéi niú ducaⁿ-ni cáháⁿ ndihí-í Yá Ndióxi cuendá-n, te ndácáⁿ táhù-í núú-gã, te xinu cuechi-í núú-gã dàtná ní quide cue ñani tnàhá-í ní xīndecu ndéé san-duu, te cūtnuní iní-í sá quidé ndáá-í núú-gã dàtná ní xóo cada-güedé. ⁴ Te ío sàni iní-í naníhí tnàhá-ó cuendá ío cudí iní-í, chi ndàcu iní-í sá ío ní ndáhyú-n sá ndihú iní-n cūtnàhá ní quide ndee iní-í tnàhá-ó. ⁵ Te nàha-í sá sàndáá ndisa iní-n Yá Ndióxi dàtná ní ngúita díhna-gá xítá-n tà Lòidá ndihí náná-n tà Èunicé quidé-yu, te cūtnuní ndáá iní-í sá díú tnàhá-n ío váha sàndáá iní-n-gã.

⁶ Te xiáⁿ dándàcu iní ñàhá-í xii-n cuendá sá ío-gá nducu ndèe-n cada-n chiúⁿ ní nduu táhú-n núú Yá Ndióxi cada-n, chi ní taxi-gá tnúhu ndee iní ní ngúndecu ndihí-n

cūtnàhá ní sacáⁿ ndodo-í ndaha-í díquí-n sá díú chiúⁿ-gá cada-n. ⁷ Te Espiritú sá ní taxi Yá Ndióxi ndécú ndihí-o ñá túú cūu-xi ñⁿ Espiritú sá cádá nàcuáa yùhú-ó, chi cūu-xi ñⁿ Espiritú sá táxi tnúhu ndee iní cada-o chiúⁿ-gá, te ñu-xi quide cuu iní tnàhá-ó ñⁿ ñⁿ-o, te ñu-ni tucu-xi quide cutnuní iní-ó nàcuáa cada-o cūndecu-o. ⁸ Te xiáⁿ núú vá cūcàhaⁿ núú-n cáháⁿ váha-n cuendá Xítohó Jesucristú, te ní vá cūcàhaⁿ núú-n sá dúhá yihí-í vecaá sá cuendá-gá, te xini ñuhu-xi sá tnàhá-n ndòho-n sá cuendá tnúhu-gá, te cundee iní-n ndòho-n, chi Yá Ndióxi chindee ñaha-gã xii-n. ⁹ Te Yá Ndióxi ní dácácu nihnu ñaha-gã xii-o núú ùhú núú ndàhú, te ní cachí-gá sá cádá-ó ncháa nacuáa cūníní mée-gã cunduu, te ducaⁿ ní quide-gá chi ducaⁿ ní sani iní mée-gã cunduu sá cádá váha ñaha-gã xii-o, te ñá díú sá ío váha quide-o ndecu-o ducaⁿ ní quide-gá. Te ndéé cūtnàhá vátá ngáva-gá ñuyúú ní cachí-gá sá cádá váha ñaha-gã xii nchaa nchoo ñäyiu ní ngúndecu ndihí Xítohó Jesucristú vitna. ¹⁰ Te vitna cūtnuní iní-ó sá ío váha quide ñaha-gã xii-o, chi ní quixi Xítohó Jesucristú ñuyúú-a ní dácácu nihnu ñaha-gã xii-o núú ùhú núú ndàhú, te Yaá-án ní quide-gá cuendá sá vá cūú-gá-ó cūú dúcáⁿ-ó, chi ní cachí-gá sá cūndecu-o ní caa ní quíhⁿ te núu na quíndáá iní-ó tnúhu-gá.

¹¹ Te ní cachí-gá sá cáháⁿ-í tnúhu-gá núú ñäyiu ñá túú cūu ñäyiu isráel te dacuáha váha-iyu tnúhu-gá, te cuéi ndèni ní cuu ndécú-yu te quíhⁿ-í cáháⁿ-í tnúhu-gá núú-yu chi ducaⁿ ní cachí-gá cunduu. ¹² Te cuendá xiáⁿ nándi sá ndòhò-í vitna cuendá-gá, dico ñá túú cūcàhaⁿ núú-í chi cūtnuní váha iní-í nàcuáa sàni iní Xítohó Jesucristú Yaá sàndáá iní-í, te yúhú ní dàñá-í mée-í núú ndàhá-gã, te cūtnuní ndáá iní-í sá cótó ñaha-gã xii-í ndéé ná sàá nduu

nàcuaca ñaha-gá.

13 Te vá dáña ndèe-n càda-n nchaa nacuáa càháⁿ tnúhu váha ní dánèhé ñàhá-í xii-n, te ío quindáá iní-n Yá Ndióxi, te nchaa-o nàcuáa ndècu-o ndihi Xítoho Jesucristú ío cuu iní tnáhá-ó ìⁿ ìⁿ-o. 14 Te cada cuendá váha-n sã vá dãma tnúhu Yá Ndióxi sã ní taxi-gá ndécú ndihi-n, te Espíritú-gá sã ní taxi-gá ndécú ndihi-o chindee ñaha-xi xii-n.

15 Te yòhó sa xini-n sã nchaa ñáyiu ndècu distritú Àsiá, ñáyiu ní sándáá iní tnúhu Xítoho Jesucristú ní dáña ñàhá-yu xii-í, te tnàhá té Fígeló ndihi té Hèrmógenés ní dáña ñaha-güedé xii-í. 16 Te xicáⁿ táhù-í núú Xítoho Jesucristú sã ná chindee-gá cue ñáyiu cùu ndi mee té Onèsiforó, chí diu-dé ío vãi xito ní quixi-dé ní quide cuendá ñàhá-dě xii-í, te ní taxi-dé tnúhu ndee iní, te ñã túú ní cucahaⁿ núú-dě sã yíhi-í vecaá. 17 Te cùtnàhá ní xíndecu-dé ñúú Rómá ducaⁿ-ni ní xóo nanducu ñàhá-dé xii-í ndèe ndéé naníhi ñàhá-dě. 18 Te xicáⁿ táhù túcu-í núú Xítoho Jesucristú sã ná cùndahú iní ñàhá-gã xii-dé nduu na sãá cundáá cuéchi nchaa ñáyiu. Te yòhó sa xini ndáá-n sã ío ní chindee ñàhá-dé xii-o cùtnàhá ní xíndecu-o ñúú Éfesú.

2

Tée quide ndáá xínú cuèchi núú Xítoho Jesucristú

1 Te yòhó téé cùu datná ìⁿ déhe mee-í ío nducu ndèe-n cada-n nacuáa níhi ndéé-gã-n cùndecu-n ichi Xítoho Jesucristú chí diu-gá chindee ñàhá-gã xii-n. 2 Te nchaa tnúhu sã ní dánèhé ñàhá-í xii-n ndihi nchaa dava-gá ñáyiu, xíãⁿ danèhé-n dàva-gá cue téé quide ndáá cuendá danèhé-güedé dava-gá ñáyiu.

3 Te cahni iní-n ndòho-n cunu cuechi-n núú Xítoho Jesucristú dàtná cuiní-n ndòho ìⁿ sandadú sãhni iní-dé xínú cuèchi-dé. 4 Chí ní ìⁿ sandadú ñã túú nãgá sáni

iní-dé cada-dé òré xínú cuèchi-dé cuendá cudíu-dé núú téé tàxi tnuní ñàhá. 5 Te diu-ni ducaⁿ sãtnahá-xi cùu tucu ìⁿ téé dàdiqui, chí núú vá dàdiqui-dé nàcuáa tàú-xi cunduu te vá níhi-dé sã ndúú táhù-dě. 6 Te núú ìⁿ téé xínú cuechi ío ndècu ndee-dé quidé chiúⁿ-dé chíhi-dé tatá, te diu-dé tàú-dé díhna-gá-dé níhi-dé sã cúhúⁿ yãhu-dé. 7 Te cani iní-n nchaa tnúhu càháⁿ-í-a, te Xítoho Jesucristú chindee ñaha-gã xii-n te tecú tnuní-n nchaa.

8 Te ndacu iní-n sã Xítoho Jesucristú ní cuu-gã ñani tnáhá ndii Dàvíí, te ní xíhi-gá te ní ndoto-gá, te diu ducaⁿ nduu tnúhu dànehé-í ñáyiu. 9 Te ío dàndoho ñaha ñáyiu xii-í cuendá sã càháⁿ-í tnúhu-gá, te quide ñàhá-yu xii-í dàtná quidé-yu ìⁿ téé ní quide ìⁿ cuéchi càhnu, chí ní chíhi ñàhá-yu vecaá xii-í, dico tnúhu Yá Ndióxi chí vá ndácú-yu nganí-yu. 10 Te xíãⁿ nũu cuéi nãndi cùu nchaa sã quidé ñàhá-yu xii-í, dico quide cahnu iní-í cuendá sã naníhi táhù tnàhá nchaa dava-gá ñáyiu cuiní Yá Ndióxi cundecu ndihi-gá, chí nchaa ñáyiu na tnàhá tnúhu ndihi Xítoho Jesucristú nduu táhù-yu cundécú-yu ndihi-gá núú ío váha càa ndecu-gá ní caa ní quíhíⁿ.

11 Te xéhé cúú-xí ìⁿ tnúhu ndáá cuiti:

Nchoo cùu-o datná ñáyiu ní xíhi ndihi Xítoho Jesucristú chí ñã túú-gã ndécú-ó ìchi cuehé ichi duha,

te xíãⁿ nũu cuéi na sãá nduu cúú-ó ñúyíú-a, dico diu-ni cundecu-o ndihi-gá.

12 Te núú na cùndee iní-ó ndòho-o nãndi sã ndòhó-ó sã cuendá-gá, te sãá nduu te cunuu-o ndihi-gá.

Te núú na càháⁿ-ó sã ñã túú xini-ó-gã, te diu-ni ducaⁿ cùñaha-gã xii-o sã ñã túú xini ñàhá-gã ná sãá nduu càda ndáá-gá cuéchi nchaa ñáyiu.

13 Te núu nchoo ñà túú quide ndáá-ó ndècu-o núú-gã ñá, dico mee-gã chi ío ndáá quidé-gã, chi Yá Ndiõxí nchaa sá sání iní-gã quidé-gã.

Tée quide nacuáa ndüu vétú iní Yá Ndiõxí

14 Te dandacu iní-n nchaa ñáyiú ndècu ndihí-o ichi Xítohó Jesucristú nchaa tnúhu càháⁿ-í-a, te cúñaha-n xii-yu sá Xítohó Jesucristú cuíní-gá sá ñà túú-gã nándi tnúhu cútnáhá-yu, chi nchaa tnúhu càháⁿ-yu-áⁿ dácuíta nihnu-xi ñáyiú ndèdóho ñaha xii-yu, chi ñá túú vèdana nándihí nchaa tnúhu-áⁿ. 15 Te ío nducu ndèe-n cada ndáá-n cùndecu-n núú Yá Ndiõxí, te cada-n chiúⁿ-gá nàcuáa nduu vétú iní-gá, te cáháⁿ ndáá-n tnúhu-gá, cuendá sá vã cucáhaⁿ núú-n núú-gã. 16 Te vã cáda cuendá-n nchaa tnúhu sá ñà túú vèdana nándihí càháⁿ ñáyiú cuendá Yá Ndiõxí, chi nchaa ñáyiú càháⁿ tnúhu-áⁿ ndihí nchaa ñáyiú sácúndedóho ñaha xii-yu uuⁿ-gá quidé-yu nchaa sá cuèhé sá dúhá. 17 Te nchaa tnúhu-áⁿ cútènuu-xi dàtná quidé ñⁿ cuèhé sã ññá ñaha xii ñáyiú xité nuu-xi nihí yiqui cúnú-yu. Te tnáhá té Himèneú ndihí té Ñletú càháⁿ-güedé tnúhu-áⁿ quidé-güedé dàtná quidé ñáyiú-áⁿ. 18 Te cue téé-áⁿ ñà túú-gã càháⁿ ndáá-güedé dàtná càháⁿ tnúhu Yá Ndiõxí, chi càchí-güedé sá ncháá nchòo ñáyiú ndècu ichi Yá Ndiõxí cúú-ó dàtná cue ñáyiú sa ní ndoto, dico na cúú ndisa-o te vã ndótó-gá-ó càchí-güedé. Te dava ñáyiú ní dáñá-yu sá sàndáá iní-yu tnúhu Yá Ndiõxí sá dúcáⁿ càháⁿ-güedé. 19 Te cuèi ducaⁿ quide davá-yu, dico Yá Ndiõxí ní taxi ndecu-gá cue ñáyiú ni yùhu ni iní ndécú ichi-gá, te cùtnuní sá ndécú ndihí ñaha-gá xii-yu, chi ñⁿ xichi núú tütú-gá càchí-xi sá méé-gã xíní-gá cue ñáyiú cùu cuendá-gá. Te

ingá tucu xichi núú tütú-gá càchí-xi sá ncháá ñáyiú sàndáá iní ñáhá xii Xítohó Jesucristú xíní ñùhu-xi sá vã cùndecu-gá-yu ichi cuèhé ichi duha.

20 Te ñáyiú cuica chi ndècu ndihí-yu vehé-yu cóho sã ní cuáha mee-ni dñúⁿ cuááⁿ, ndihí cóho sã ní cuáha mee-ni dñúⁿ cuixíⁿ, te nchaa cóhó-áⁿ cúú-xi dàtná cue ñáyiú ñà túú nã cúmání núú Yá Ndiõxí. Te ndècu ndihí tucú-yu cóho sã ní cuáha mee-ni ñùhu, ndihí cóho sã ní cuáha mee-ni yùtnu, te nchaa cóhó-áⁿ cúú-xi dàtná cue ñáyiú ñà túú quide ndáá núú Yá Ndiõxí. 21 Te nchaa ñáyiú ío ndècu yiñuhu núú Yá Ndiõxí cúú-yu ñáyiú ñà túú nihí tnáhá ndihí cue ñáyiú ñà túú quide ndáá núú-gã, te cue ñáyiú ndècu yiñuhu núú-gã-áⁿ ñà túú tnáhí quée cáva-yu quidé-yu nchaa chiúⁿ tahu-gá.

22 Te ío cada cuendá-n vã cáda-n nàcuáa quide cue téé cuechi ndècu ichi cuèhé ichi duha, te cada-n nàcuáa cundáá-n cùndecu-n ichi Yá Ndiõxí, te quindáá iní-n-gá, te cuu iní-n nchaa tnaha ñáyiú-n, te cundecu nahi-n, chi ducaⁿ tauú-xi cada-n ndihí nchaa dava-gá ñáyiú sa ní nduu ndoo ní nduu ñine iní-xi ñáyiú càháⁿ ndihí ñaha xii Yá Ndiõxí. 23 Te vã cáda cuendá-n ñⁿ tnúhu xitnáha ñáyiú chi ñà túú vèdana nándihí-xi, chi núu na càda cuendá-ó te dicó dánáá ñáhá-xí. 24 Chi nchaa cue téé xinu cuechi núú Yá Ndiõxí xíní ñùhu-xi càháⁿ váha-güedé ndihí nchaa ñáyiú, te danèhé ñáhá váha-güedé tnúhu-gá, te cunduu càhu iní-güedé te vã nàá-güedé. 25 Te vii vii cáháⁿ-güedé dóho nchaa ñáyiú sáá iní-xi, ñáyiú ñà túú tnáhá iní tnúhu ndáá tnúhu Yá Ndiõxí, te ducaⁿ te cudana Yá Ndiõxí cada-gá te ndixi túu iní-yu sá ñà túú quide váha-yu ndécú-yu te quindáá iní-yu tnúhu-gá. 26 Te ducaⁿ te cutnúní iní-yu sá sàcúíhná cúnúu-xi taxi tnuní ñáhá-xi xii-yu, chi dàcahu iní ñáhá-xi xii-yu quidé-yu nchaa nàcuáa cùu iní-xi

ni cùu.

3

Nàcuáa cada ñáiyu òré sa ta cùyatni sáa nduu quixi tucu Xítóhó Jesucrístú

¹ Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáa nduu quixi tucu Xítóhó Jesucrístú, chi dàvá-áⁿ ïo cada úhú-xi. ² Chi ngüíta ñáiyu cuhuⁿ iní-yu mee-ni sá cúu-xí mèé-yu, te cuhuⁿ iní-yu mee-ni ðíhúⁿ, te ío cada càhnú-yu mèé-yu, te cunduu yíchí iní-yu, te cáháⁿ cuèhé-yu cuendá Yá Ndiöxí, te vá quindáá-gá iní-yu ni tãtä-yu ni nãñá-yu, te ni vã ndácáⁿ táhú núú tnãhá-yu cuendá nchaa sá vãha cada tnãhá-yu, te cadá-yu mee-ni sá ñã túú tnãhá iní Yá Ndiöxí. ³ Te vá cúú iní tnãhá ndí meé-yu, te nãa-yu te vá cuánãá-yu, te tee tnãhá-yu cuéchi neñúú, te vá cuánãá-yu cadá-yu nchaa sá cuèhé sá dúhá sàni iní-yu, te ío cunduu cuihna iní-yu, te vá tnãhá iní-yu nchaa sá vãha. ⁴ Te dayuhu cuãha cuendá tnãhá-yu núú cuè téé cùchiuⁿ, te ío cunduu yí iní-yu cadá-yu nãndi sá ñã túú vãha, te ío cada nínu-yu mèé-yu, te mee-ni nchãa sá cúdí iní-yu cadá-yu, te vá cúdí iní-yu nanducu nihnú-yu Yá Ndiöxí. ⁵ Te quesãhá-yu sá tnãhá-yu ndécú-yu ichi Yá Ndiöxí dico vá cadã-yu nchaa nàcuáa cáháⁿ-gá.

Te yúhú càchí tnúhu-í xii-n sã vã nihí tnãhá-n ndíhi nchaa ñáiyu ducaⁿ quide. ⁶ Te dava ñáiyu-áⁿ quíhíⁿ-yu dava vehe núú xíndecu ñáiyu, te ngüíta-yu dandãhú-yu ñáiyu ðíhí ñã túú xini dana cuendá Yá Ndiöxí, te ñáiyu ðíhí-áⁿ cúu-yu ñáiyu ndècu vihí cuéchi-xi, chi ío cùdí iní-yu quidé-yu nchaa náni sá cuèhé sá dúhá sàni iní-yu. ⁷ Te cuèi ío dàcuahá-yu, dico ñã túú cùtnuní iní-yu nása cuáháⁿ tnúhu

ndáá tnúhu Yá Ndiöxí. ⁸ Te ñáiyu ducaⁿ dandãhú ñãhá xii cue ñáiyu ðíhí-áⁿ ñã túú cáháⁿ váha-yu cuendá tnúhu Yá Ndiöxí, chi quidé-yu dàtnã ní quide ndí Jánés ndíhi ndí Jãmbrés chi cue ndí-áⁿ ñã túú ní cùu váha iní cue ndí núú ndí Moisés cuendá tnúhu ní cáháⁿ ndí, Te ñáiyu-áⁿ cúu-yu ñáiyu sàni iní mee nìne-ni nchaa sá cuèhé sá dúhá, te cuèi càchí-yu sá sãndáá iní-yu Yá Ndiöxí dico ñã ndáá sá sãndáá iní ñãhá-yu xii-gá. ⁹ Dico vá ndácú-gã-yu dandãhú-yu vãi ñáiyu, chi nchaa ñáiyu cutnùní iní-yu sá ïo nñi ðiquí-yu, te ñã túú cáháⁿ ndáá-yu dàtnã ní quide cue téé úú ñã túú ní tnãhá iní tnúhu ní cáháⁿ ndí Moisés.

Té Pãblú dásãhú-dé té Timùteú

¹⁰ Te yòhó quidé-n nchãa nacuáa ní dãnèhé ñãhá-í xii-n, te ní xini-n nchãa nacuáa quide-í ndécú-í, te cùtnuní iní-n nàcuáa sàni iní-í ndécú-í ñuyíú-a, te xini-n sã ïo sãndáá iní-í Yá Ndiöxí, te ío càhnu iní-í, te cùu iní-í nchaa ñáiyu, te xini tucu-n sã ïo quide cahnu iní-í cuèi nãndi sá yãha-í ndécú-í dico ñã túú dàña ndeé-í ichi-gá. ¹¹ Te ío vãi sá quidé ñãha ñáiyu xii-í dãndòho ñãhá-yu sá ndécú-í ichi Xítóhó Jesucrístú, te sa nãha tucu-n datná ní quide ñãhá-yu xii-í cùtnãhá ní xíndecu-í ñuú Antiòquiá, ndíhi ñuú Ìconiú, ndíhi ñuú Listrá, chi ío ní dãndòhó ñãhá-yu xii-í sá cuendá-gá. Dico Xítóhó Jesucrístú ío ní xito ñãha-gã xii-í te ní chindee ñãha-gã cuèi nãndi cùu sá ñi yãha-í. ¹² Te na càchí tnúhu ndáá-í xii-n sã ïo vãi sã ñã túú vãha cada ñãha ñáiyu xii nchaa ñáiyu cuini sá ñã túú nã cumání núú Yá Ndiöxí cuendá sá ndécú ndíhi-yu Xítóhó Jesucrístú. ¹³ Dico dava ñáiyu càchí-yu sá cáháⁿ-yu tnúhu Yá Ndiöxí te ñã ndáá sá cáháⁿ-yu tnúhu-gá, ñáiyu-áⁿ uuⁿ-gá cuita cada-gá-yu nchaa sá cuèhé sá dúhá quíhíⁿ, te ducaⁿ-ni ïo dandãhú tnãhá-yu.

14 Te yòhó chi ío váha ní sándáá iní-n tnúhu Yá Ndiòxí sá dácuaàha-n, te vitna càháⁿ-í dõho-n sã vã dáñã ndèe-n quindáá iní-n tnúhu-áⁿ, te yòhó sa nàha-n ná cúú ñáyiú ní dánèhé ñáhá xii-n tnúhu-gã. 15 Te yòhó chi ndéé cútnáhã cúú lãndú-n ní ngüíta-n dácuaaha-n tnúhu ndèé núú tütú Yã Ndiòxí, te ðiu-ni nchaa tnúhu-gã canu ichi ñaha-xi xii-n te nanihí tãhú-n, chi sãndáá iní-n Xítohó Jesucristú. 16 Te nchaa cue tée ní tee tnúhu Yá Ndiòxí, chi ðiu-ni mee-gã ní dácáhú iní ñáhã-gã xii-güedé nãcuáa tee-güedé, te tnúhu-gã ío váha dácuaàha-o nchaa dava-gã ñáyiú, te càháⁿ-xi dõho-o sã vã cündecu-gã-ó ichi cuehé ichi duha, te núú ñã túú quide ndáá-ó ndècu-o te nãcanu ichi ñaha-xi, te dãnèhé ñáhã-xi nãcuáa cada-o cundáá-ó núú Yã Ndiòxí. 17 Te ðiu-ni tnúhu-gã dátũha ñaha vãha-xi xii nchoo cuè ñáyiú ndècu ndihigã cuendã cada-o nchãa núú sã vãha.

4

1 Te Xítohó Jesucristú quixigã taxi tnúni-gã ñuyíú-a, te cada ndáá-gã cuèchi nchaa ñáyiú sa ní xíhí, ndihí cuèchi nchaa ñáyiú xĩdecu vívú. Te mee-gã ndihí Yá Ndiòxí náhá-gã sã ío càháⁿ-í dõho-n vitna 2 sã ío dácuaàha-n ñáyiú tnúhu-gã, te vã dáñã ndèe-n dácuahá-n-yu ndèda-ni cãa oré cuèi ñã túú cuiní-yu cundedõho-yu, te nchaa ñáyiú ñã túú cuiní cada ndáá cúñaha ndáá-n nchãa nãcuáa quidè-yu. Te cúñaha tũcu-n xii-yu sã vã dúcãⁿ-gã cadã-yu, te càháⁿ-n dõho-yu cuendã cada ndáá-yu cundecú-yu. Te ío cunduu càhnu iní-n òré càháⁿ-n dõho-yu, te ío dácuaàhá-n-yu tnúhu-gã. 3 Chi sãá nduu te vã càchí-gã-yu cund-edõho-yu nchaa tnúhu sã sãnú ichi ñaha cundecu váha-o núú Yã Ndiòxí, chi mee-nã nchaa sã cúdíí iní mée-yu cundedõho-yu, te nducú-yu cue tée dánèhé ñáhã xii-yu nchaa tnúhu cùu iní-yu-áⁿ.

4 Te vã cadã cuendã tnãhí-gã-yu tnúhu ndáá tnúhu Yá Ndiòxí, chi mee-nã tnúhu sã ñã túú nãndíhi cada cuendã-yu. 5 Dico yòhó ío quihí iní-n cundecu-n, te cahni iní-n cuèi nãndi na ndõho-n, te dácuaàha-ni-n ñáyiú tnúhu Yá Ndiòxí, ñáyiú vátã quindáá iní ñáhã-gã xii-gã, te cada-ni-n nchãa chiuⁿ ní tãhú-gã cada-n.

6 Te yúhú sa ñũhu ichi-nã-í quihíⁿ-í núú ndécú Yã Ndiòxí cundecu-í, chi sa ní cuyatni cahni ñaha-güedé xii-í cuendã sã xínú cuèchi-í núú-gã. 7 Te ní quide-í nchaa chiuⁿ ní tãhú Yã Ndiòxí cada-í te vitna ní xínú cava nchaa chiuⁿ ní tãhú-gã-ãⁿ ní quide-í, te ñã túú ní dàña ndèe-í ní sãndáá iní-í-gã, te ducaⁿ-ni sãndáá iní-í-gã ndéé vitna. 8 Te vitna sa ndècu túha-nã sã ndúú tãhú-í cuendã sã quidè ndáá-í núú Yã Ndiòxí, te Xítohó Jesucristú taxi-gã tãhú-ãⁿ nduu tãhú-í ná sãá nduu, chi cùu-gã ìⁿ Yaá quidè ndáá cuiti, te ñã díú-ní yúhú taxi-gã tãhú-ãⁿ cuu cuendã-í, chi tnãhá nchaa ñáyiú ndètu cahnu-nã sãá nduu quixi tucu-gã ñuyíú-a cuãñaha-gã tãhú-ãⁿ nduu tãhú-yu.

Chiuⁿ tahu té Pãblú cada té Timùteú

9 Te cuiní-í sã ío ndíhi quixi-n quixi coto ñaha-n xii-í. 10 Chi té Dëmás ñã túú-gã quidè cuendã ñáhã-dé xii-í, chi mee-nã nchaa sã ío ñuyíú-a ío cùdíí iní-dé. Te ní dãndõ ñaha-dé cuáhã-dé ñuu Tesalónica, te té Crèscnté cuáhãⁿ-dé cundecu-dé distritú Gãlaciã, te té Titú cuáhãⁿ-dé cundecu-dé distritú Dãlmaciã. 11 Te ìⁿdi-í-nã té Lúçã ndécú ndihí ñaha-dé xii-í, te cúñaha-n xii té Mãcú quixi-n ndihí-dé, chi tée-ãⁿ ndacu-dé cada-dé ìⁿ chiuⁿ-í. 12 Te té Tiquicú ní tendaha-í-dé cuáhãⁿ-dé ñuu Éfesú. 13 Te òré quixi-n te yãha-n vèhe té Càrpú cáá ñuu Trõás canehe-n ìⁿ dóó tĩcachi ní dãndõ-í

vehe-dé quixi, ndihi nchaa librú-í, te tnàhá nchaa dava-gá tutú-í ndécú vèhe-dé canehe-n quixi chi xiáⁿ ío-gá xiní ñuhu-í. ¹⁴ Te té Ljandrú té cùu rerú ío vài sá ñà túú vâha ní cuu quide ñaha-dé xii-í, dico mee Yă Ndiöxí nâhá-gă nása cada ñaha-gă xii-dé cuendá sá dúcáⁿ quide-dé. ¹⁵ Te vá ñihí tnâhá-n ndihi-dé chi ío càháⁿ cuèhé-dé cuendá nchaa tnúhu càháⁿ-ó.

¹⁶ Te cùtnâhá ndécá ñaha-güedé xii-í ní sâháⁿ núú cuè té cùchiuⁿ xito díhna nuu, chi mee ñii ní sâháⁿ te ñá túú ní sâháⁿ ni ñⁿ cue té cùndihi-í, chi nchaa-güedé ní dándõo ñaha-güedé xii-í, te yúhú xicáⁿ táhù-í núú Yă Ndiöxí sá vâ cadá cuendá-gá sá dúcáⁿ ñi quide-güedé. ¹⁷ Dico Xítoho Jesucristú ní chindee ñaha-gá xii-í, chi ní taxi-gá tnúhu ndee ñí ní càháⁿ-í tnúhu-gá nâcuâa tàú-xi cunduu núú cuè té-áⁿ ndihi núú nchâa ñáyiú, dico ñá ñíú ñáyiú isrâél cúú-yu, te ñiu-gá ní dâcâcu nihnu ñaha-gă xii-í ñá túú ní sâhni ñaha-güedé. ¹⁸ Te mee Xítoho Jesucristú coto ñaha-gá xii-í te ñá túú ñá cuu cuèi nândi sá ná cadá ñaha ñáyiú xii-í te ñiu-ni-gá coto ñaha-gă xii-í ndéé ná sâa nduu sâá-í andiu núú ndécú-gá táxi tnúni-gá. Te nchaa-o chí ná càchí-ó sâ ío càhnu cuu-gá ni caa ni quihíⁿ. Te ducaⁿ na cunduu.

Tnúhu ndéé núú ñi ndihi-ná

¹⁹ Te ío cùñaha-n na càda ndee ñí tá Priscá, ndihi té Àquilú, ndihi cue ñáyiú cùu ñi mee té Onésiforó.

²⁰ Te té Èrastú ní quendóo-dé ñuú Còrintú, te té Trófimú ní dándõo-í-dé ñuú Miletú chi cùhú-dé. ²¹ Te ío cundihí ñí-n quixi-n oré vátá sâá-gá yóó quidé víxiⁿ-xi. Te ío cada ndee ñí-n càchí té Èúbulú, ndihi té Pudenté, ndihi té Línú, ndihi tá Claudiá, ndihi nchaa dava-gá ñáyiú sândáá ñí tnúhu Xítoho Jesucristú.

²² Te xicáⁿ táhù-í núú Xítoho Jesucristú sá ná cùndecu ndihi ñaha-gá

xii-n ndihi nchaa dava-gá-yu. Te ducaⁿ ío na chindee chitúu ñaha-gă xii-ndo nchâa-ndo. Te ducaⁿ na cunduu. Te ío chí cadá ndèe ñí-ñá vitna.

TUTÚ NÍ CADÚHA TÉ PÁBLÚ QUIHIⁿ NDAHA TÉ TÌTÚ

*Té Páblú cádúha-dé tutú quíhíⁿ
ndaha té Títú*

¹ Yúhú té Páblú xínú cuèchi-í núú Yá Ndióxi, te diu-gá ní tendaha ñaha-gá xii-í cáháⁿ-í tnúhu Xítóhó Jesucristú núú ñáyiú cuèndá quíndáá iní nchaa ñáyiú ní cachí Yá Ndióxi naníhí tàhú, ndíhi cuèndá sá tècú tnùní váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá. ² Te yúhú dácúaha-í-yu tnúhu-gá cuèndá cundecu ndíhí-yu tnúhu ndee iní sá cündècu ndíhí-yu Yá Ndióxi ní caa ní quíhíⁿ, chí ndéé cútñahá vátá ngáva-gá ñuyíú-a ní cachí-gá sá cündècu ndíhi ñaha-gá xii-yu, te ñá túú dándahú ñáhá-gá, chí quíde-gá ñⁿ sá cáháⁿ-gá. ³ Te ní sáá nduu ní cachí-gá sá ñíhí-yu tnúhu nàcuáa cuáháⁿ tnúhu-gá, te diu-ni tnúhu-áⁿ ní cachí Yá Ndióxi Yaá dácácu ñíhnu ñaha xii-o núú ùhú núú ndáhú sá dácúaha-í ñáyiú. ⁴ Te tutú-a cádúha-í cuèndá daquixi-í ndaha yòhó té Títú, téé ní sanu ichi ndisa-í ichi Xítóhó Jesucristú, chí ñⁿ-ni tnúhu sàndáá iní-ó. Te xicáⁿ táhú-í núú Tátá-ó Dútú Ndióxi sá ío na chindee chitúú ñaha-gá xii-n, te diu-ni-gá ná càda te ío váha cuu iní-ñ cündecu-n. Te xicáⁿ táhú tucu-í núú Xítóhó Jesucristú Yaá dácácu ñíhnu ñaha xii-o núú ùhú núú ndáhú sá díú-ní dùcaⁿ na cada ñaha-gá xii-n.

Chiuⁿ quide té Títú distritú Crétá

⁵ Te yúhú ní dándöo ñaha-í xii-n distritú Crétá, chí cuíní-í cada-n nchaa chiuⁿ cumání, te cuíní-í taxi ndecu-n cuè téé quíndaha ñaha xii cue ñáyiú sàndáá iní tnúhu Yá Ndióxi xíndecu ñⁿ ñⁿ ñúú yíndèhu

distritú-áⁿ, te cada-n nàcuáa ní cachí-í cada-n. ⁶ Te cue téé cada chiuⁿ-áⁿ xíní ñúhu-xi cuu-güedé mee-ni cuè téé ío váha quíde ndáá nàcuáa vá yóo cáháⁿ dóho-güedé, te na cùu-güedé cue téé ndècu ñⁿ dii-ni ñadíhí-xi. Te ducaⁿ nchaa landú-güedé ná cùu-güexi landú sàndáá iní ñáhá xii Yá Ndióxi cuèndá sá vá yóo cuatnuñaha xii-güexi quesahá-yu sá ío sáá iní-güexi te quíde-güexi nándi sá ñá túú tàú-güexi cada-güexi. ⁷ Chí xíní ñúhu-xi sá nchaa cuè téé quíndaha ñaha xii ñáyiú sàndáá iní tnúhu Yá Ndióxi ío cundecu yíñúhu-güedé, chí ducaⁿ tàú-xi cada nchaa cue téé quíde chiuⁿ Yá Ndióxi, te xíní ñúhu tucu-xi sá vá cúu-güedé cue téé ñí iní-xi, te ní vá cúu-güedé cue téé líhli iní-xi, te ní vá cúu-güedé cue téé quíhu, te ní vá cúu-güedé cue téé plètú, te ní vá cúu-güedé cue téé dícó-ni ducaⁿ ñíhí díhúⁿ. ⁸ Te xíní ñúhu-xi cuu-güedé cue téé sáñaha nùu vehe ndetatú cue ñáyiú ñúhu ichi, cue téé quíde váha sá cúu-xí tnàha ñáyiú-xi, cue téé ío váha cútñuní iní-xi nàcuáa cada cundecu ñuyíú-a, cue téé quíde ndáá xíndecu, cue téé quíde nchaa nàcuáa ndùu vétú iní Yá Ndióxi, cue téé xító mee-xi ñá túú quíde cutexínu. ⁹ Te na cùu-güedé cue téé ío váha sàndáá iní tnúhu váha tnúhu Yá Ndióxi sá ní dánèhé ñahá-í xii-ndo cuèndá ducaⁿ te cue téé-áⁿ ndacu-güedé cáháⁿ-güedé dóho ñáyiú cuèndá càdà-yu nchaa nàcuáa cáháⁿ Yá Ndióxi, te níhí-güedé tnúhu cáháⁿ váha-güedé núú nchaa ñáyiú dàquee tíhú tnúhu Yá Ndióxi, te mee-ni cuè téé ducaⁿ quíde váha taxi ndecu-n quíndaha-güedé ñáyiú sàndáá iní tnúhu-gá.

¹⁰ Te na càchí tnúhu-í xii-n sá váí ñáyiú sáá iní-xi ío, te cáháⁿ-yu mee-ni tnúhu sá ñá túú nándíhi, te dándahú-yu tnàhá ñáyiú-yu, te ñáyiú isràél ío-gá vài-yu ducaⁿ xíquide. ¹¹ Te nchaa ñáyiú ducaⁿ

xĩquide xini ñuhu-xi nducu-o tnúhu cúñaha-o xii-yu cuendá cadí-yu yuhú-yu, chi dānehé-yu dava-gá ñáiyu ñⁿ sá ñā túú tau-yu dacuahá-yu, te ducaⁿ quidé-yu cuendá-ni sá nihí-yu díhúⁿ, te ío titní xichi ní cuu dāndahú-yu nchaa ñáiyu xĩndecu ñⁿ-ni vèhe.

¹² Te ní cachí ñⁿ téé ío váha sáá díquí-xi ndècu mei ñuú distritú Crétá sá ncháá ñáiyu ñuú-dé-áⁿ ío ndèhndé-yu, te ío cuihna iní-yu, te ío vai xexí-yu, te cūhndú-yu.

¹³ Te ndáá ní cáháⁿ-dé chi ducaⁿ quidé-yu, te xĩáⁿ ío cáháⁿ-n dōho-yu cuendá sá ná quindáá váha iní-yu tnúhu Yá Ndióxi. ¹⁴ Te cúñaha-n xii-yu sá vā cáda cuendá-yu nchaa tnúhu ndehnde cáháⁿ ñáiyu isràél, te ni vā cáda cuendá-yu nchaa tnúhu cáháⁿ ñáiyu ñā túú cuini quindáá iní tnúhu Yá Ndióxi.

¹⁵ Te nchaa sá ñi cadúha Yá Ndióxi ío ñuyú-a cūu-xi mee nine-ni sá váha sá cúu-xi nchaa ñáiyu sa ní nduu ndoo ní nduu nine iní-xi ndècu ichi Yá Ndióxi. Dico nchaa sá ñi cadúha-gá ñā túú cūu-xi sá váha sá cúu-xi nchaa ñáiyu ndècu ichi cuehé ichi duha, chi ñā túú sàndáá iní-yu tnúhu-gá, chi mee-ni sá cuehé sá dúhá ñuhu iní-yu, te ñā túú quide cuendá-yu núu quide váha-yu ádi ñā túú quide váha-yu ndècu-yu. ¹⁶ Te cachí-yu sá sàndáá iní-yu Yá Ndióxi, dico nchaa sá quidé-yu-áⁿ cāchí tnúni-xi sá ñā ndáá. Te Yá Ndióxi chi duuⁿ duuⁿ ñā túú tnáhá iní-gá nchaa nācuáa quidé-yu, chi ío sáá iní-yu, te ñā túú quidé-yu ni ñⁿ sá váha.

2

Tnúhu váha tnúhu Yá Ndióxi

¹ Te yòhó òré dānehé-n ñáiyu, te danèhé-n-yu mee-ni nācuáa cáháⁿ tnúhu váha tnúhu Yá Ndióxi. ² Te nchaa cue téé cūu sacuéhé ná cáda cuendá-güedé vá cáda cūtexínu-güedé cundecu-güedé, te na cūndecu yiñuhu-güedé,

na cuáha váha-güedé cuendá nācuáa cada-güedé cundecu-güedé, te na quindáá váha iní-güedé Yá Ndióxi, te na cūu iní-güedé tnàha ñáiyu-güedé, te na cūnduu cahnu iní-güedé cuéi nāndi sá ná yāha-güedé. ³ Te vitna cáháⁿ tucu-í sá cúu-xi nchaa ñáiyu díhí ñáiyu cūu sacuéhé sá ná cūndecu yiñuhú-yu, te vá cúu-yu ñáiyu yiti yūhu-xi, te ni vā cúu-yu ñáiyu quihu, te na dānehé-yu nchaa dava-gá ñáiyu cada váha-yu. ⁴ Te na dāsahú-yu nchaa ñáiyu díhí ñáiyu cuechi cuendá ná cūu iní-yu yíi-yu, ndihi cue landú-yu, ⁵ ndihi cuendá sá ná cāni váha iní-yu nācuáa cundecú-yu, ndihi cuendá sá vā cāni iní-yu cadá-yu ni ñⁿ sá cuehé sá dúhá, ndihi cuendá sá ná cáda-yu nchaa chūuⁿ ñuhu vehé-yu, ndihi cuendá sá cáda váha-yu nchaa tnàha ñáiyú-yu, ndihi cuendá sá ná cáda-yu nchaa nācuáa cáháⁿ yíi-yu, te ducaⁿ xini ñuhu-xi cadá-yu cuendá sá vā yōo cáháⁿ cuehé cuendá tnúhu Yá Ndióxi. Duha cúñaha-n xii cue ñáiyu díhí ñáiyu cūu sacuéhé cuendá ducaⁿ dāsahú-yu nchaa ñáiyu díhí ñáiyu cuechi.

⁶ Te yòhó cáháⁿ-n dōho nchaa cue téé cuechi cuendá sá ná cāni váha iní-güedé nācuáa cundecu-güedé, ⁷ te cada-n mēe-ni sá váha cuendá ducaⁿ cānchicúⁿ nihnu-güedé cada-güedé, te òré danèhé-n-güedé te ío váha cuu iní-n dānehé-n-güedé, te ndihi tnúhu yiñuhu cáháⁿ ndihi-n-güedé. ⁸ Te cáháⁿ-n mēe-ni tnúhu váha, te ducaⁿ te vá yōo ñⁿ cáháⁿ cuehé cuendá tnúhu cáháⁿ-n, te nchaa ñáiyu cūu úhú iní ñáhá xii-o cucahaⁿ núu-yu, te vá nihí-yu tnúhu cáháⁿ cuehé-yu cuendá-ó.

⁹ Te ío cáháⁿ-n dōho nchaa cue téé xinu cuechi sá ná quindáá iní-güedé cada-güedé nchaa chūuⁿ tahu patróoⁿ-güedé nācuáa cūdiu-güedé

núú cuè téé-áⁿ, te vá càháⁿ sàá iní-güedé. ¹⁰ Te vá cání iní-güedé duhu-güedé, te cada ndáá-güedé cuendá sá ñà túú nã caní iní ñáhá cuè patróóⁿ-güedé, te ducaⁿ te cutnúní iní ñáyiú sá tnúhu Yá Ndióxi ío váha dānehé ñáhá-xí nācuáa cada-o cūndecu-o, te ñu-gá cúú-gá Yá dácācu ñihnu ñaha xii-o núú ùhú núú ndàhú.

¹¹ Te nchoo ñi cutnúní iní-ó sá Yá Ndióxi ío cūndahú iní-gá nchaa nchoo ñáyiú ndēcu ñuyúú-a, te ní taxi-gá tnúhu ndee iní sá nánihí tǎhú nchaandi túhú ñáyiú te núú na quindáá iní ñáhá-yu xii-gá.

¹² Te ní cachí-gá sá dáñá-ó nchaa ichi cuehé ichi duha chi ñá tnàhá iní-gá cūndecu-o ichi-áⁿ, te vá ío cuhuⁿ iní-ó nchaa sá ío ñuyúú-a, te ní cachí tucu-gá sá ío caní iní-ó nācuáa cūndecu-o vitna ndecu-o ñuyúú-a te cada ndáá-ó cūndecu-o cuendá nduu vétú iní-gá. ¹³ Te cūndetu-o sáá nduu càhnu vihi, nduu quixi tucu Xítoho Jesucristú Yá cúú Ndióxi-ó, te ñu-gá ní dácācu ñihnu ñaha-gá xii-o núú ùhú núú ndàhú. Te nduu-áⁿ ío cudíí iní-ó. ¹⁴ Te mee-gá ní xihí-gá chi ducaⁿ ñi cuiní-gá cūnduu, te ducaⁿ ñi quide-gá cuendá nchoo vá cūndēcu-gá-ó ichi cuehé ichi duha, te nduu ndoo nduu nine iní-ó, te ducaⁿ te cuu-o cuè ñáyiú quindaha-gá, te ñi yùhu ñi iní-ó cada-o mee-ñi sá váha.

¹⁵ Te nchaa tnúhu-áⁿ danèhé-n-yu te cúñaha-n xii-yu nācuáa cadá-yu, te cáháⁿ-n dōho-yu te núú ñá túú quide ndáá-yu. Te cada-n sá cúú-n ñiⁿ téé xinu cuechi núú Yá Ndióxi, te vá dáñá-n mēe-n daquee tíhú ñáhá ñáyiú xii-n.

3

Nchaa sá tauú ñáyiú ndēcu ichi Yá Ndióxi cadá-yu

¹ Te cúñaha-n xii-yu sá ná quindáá iní-yu cadá-yu nchaa nācuáa càháⁿ nchaa cue téé

cúchiuⁿ, te tauú-yu chindee ñáhá-yu xii-güedé nchaa chiúⁿ váha quide-güedé. ² Te vá càháⁿ cuèhé-yu cuendá ñáyiú, te vá cūnduu pletú-yu, te na cúú-yu ñáyiú ndàhú iní-xi, te na cūndahú iní-yu nchaa tnàha ñáyiú-yu.

³ Te tnàhá-ó ñi xóo cada-o dàtná quidé ñáyiú-áⁿ vitna, chi ío ñi ñi quí-ó chi ñá tēcú tnúni-ó nācuáa càháⁿ tnúhu Yá Ndióxi ní cūu, te ío ní xīnduu sáá iní-ó núú-gá, te ní xīndecu-o ñiⁿ ichi sá ñà túú tauú-ó cūndecu-o ñi cūu, te nāndi sá cuèhé sá dúhá ío ñuyúú-a ní xóo cudíí iní-ó ñi xóo cada-o chi ní xóo taxi tnúni ñáhá-xí xii-o, te ní xóo cada cuèhé ní xóo cada duha-o ñi cūu, te ní xīndecu-o ichi cuedú iní, te cuendá nchaa sá ñi xóo cada-o-áⁿ xíáⁿ ío ní xóo cuu ùhú iní ñáhá ñáyiú xii-o, te ducaⁿ-ñi nchōo tucu ní xóo cuu ùhú iní-ó-yu. ⁴ Te Yá Ndióxi Yá ní dácācu ñihnu ñaha xii-o núú ùhú núú ndàhú ní dāndíxi túu-gá iní-ó nācuáa cutnúní iní-ó sá ío váha iní-gá, te cūu iní ñáhá-gá xii nchaa nchoo ñáyiú ndēcu ñuyúú-a. ⁵ Te Yá Ndióxi ní dácācu ñihnu ñaha-gá xii-o núú ùhú núú ndàhú, dico ñá díú cuendá ñiⁿ sá váha quide-o ndecu-o ñuyúú-a ducaⁿ ñi quide-gá, chi mee-gá ducaⁿ tnàhí ní cūndahú iní ñáhá-gá xii-o. Te ní nduu ndoo ní nduu nine iní-ó, te ní cuu-o dàtná ñiⁿ ñáyiú saa, chi Espiritú Yá Ndióxi ducaⁿ ñi quide ñaha-xi xii-o. ⁶ Te Espiritú-gá ní taxi-gá ñi yùhu ñi iní-gá ndécú ndíhi-o, te ducaⁿ ñi quide-gá chi ní sándáá iní-ó Xítoho Jesucristú Yá ní dácācu ñihnu ñaha xii-o núú ùhú núú ndàhú. ⁷ Te ío cūndahú iní ñáhá-gá xii-o ñu sa ní quide ndáá-gá cuéchi-o te ní cuu-o dēhe-gá, núú xíáⁿ vitna ndētu-ná-ó sáá nduu nduu tǎhú-ó cūndecu-o ndíhi-gá ñi caa ñi quííⁿ.

⁸ Te tnúhu ní cáháⁿ-í-a cūu-xi tnúhu ndáá cuiti, te cuiní-í sá ñi yuhu ñi iní-n cáháⁿ-n tnúhu-gá núú-yu cuendá sá ncháá ñáyiú sándáá iní ñáhá xii Yá Ndióxi nducu

ndèe-yu cadá-yu mee-ni sá vâha, te tnúhu-áⁿ cúu-xí mée-ni tnúhu vâha, te ío vâha sá cúu-xí-yu. ⁹ Te vá cadá cuëndá-n nchaa tnúhu sá ñà túú nàndíhi xítnàha ñáiyu, te vá cadá cuëndá-n ñáiyu nándi cãháⁿ cuëndá nchaa sá ñí xóo cada cue ñáiyu ní xíndecu ndée sanaha, te vá cadá cuëndá-n nchaa tnúhu xítnàha ñáiyu xícuéhé tnáhã cuëndá tnúhu ní chídó tnùní ndíi Moisés, chi nchaa tnúhu xítnáhã-yu-áⁿ ñà túú tnàhí nandíhi-xi, te dàcuíta ñaha-xi xí-o.

¹⁰ Te núu ío ñáiyu ní ngüíta-yu nándi tnúhu cãháⁿ-yu cuëndá sá vã cúu ñⁿnuu cue ñáiyu ndècu ichi Yá Ndiöxí ñá, te ñáiyu-áⁿ cãháⁿ sàhú-n dôho-yu ñⁿ úú xito, te núu vá tníⁿ-yu tnúhu cãháⁿ-n ñá, te vá ñíhí tnáhã-gã-n ndíhí-yu. ¹¹ Te ducaⁿ càda-n, chi ñáiyu-áⁿ duuⁿ duuⁿ ñá túú-gã cuìní-yu cadá-yu sá vâha, chi mee-nã sá cuéhé sá dúhá tnáhã ínì-yu cadá-yu, te cùtnuní ínì méè-yu sá ñà túú quíde ndáá-yu, te sáá nduu te nacháhu-yu nchaa sá quídè-yu.

Nàcuáa cada té Titú

¹² Te cuìní-í tendaha-í té Àrtemás quixi-dé núu ndécú-n àdi té Tiquicú, te òré ná quèxio ndéda-ni càa ñⁿ cue téa-a núu ndécú-n, te ío nducu ndèe-n quíhíⁿ-n ñúú Nicópolis núu quíhíⁿ-í cundecu-í, chi yàcáⁿ cuìní-í quíhíⁿ-í cundecu-í yóo quídé vîxiⁿ-xi. ¹³ Te ío cuáñaha-n nchaa sá xíní ñùhu té Zénás téé ío vâha xíní nchaa nàcuáa cãháⁿ lèí, ndíhi té Àpolós cuëndá sá ñà túú nã cumání xii-güedé ichi. ¹⁴ Te cuìní-í sá ncháá ñáiyu ndècu ndíhi-o ichi Yá Ndiöxí cada váha-yu, te cuáñáhã-yu ñⁿ sá xíní ñùhu ñáiyu, te ío vâha chùⁿ cadá-yu te núu ducaⁿ na càdá-yu.

Tnúhu ndée núu ñí ndíhi-ná

¹⁵ Te vitna ío cada ndee ínì-n càchí nchaa ñáiyu ndècu ndíhi-í íha, te cúñaha-n sá ío na càda ndee ínì nchaa ñáiyu cùu ínì ñáhã xí-o,

ñáiyu sàndáá ínì ñáhã xíi Yá Ndiöxí. Te Yá Ndiöxí ío na chindee chitúu ñaha-gã xii-ndo nchaa-ndo. Te ducaⁿ na cùnduu. Te ío chí cadá ndèe ínì-nã vitna.

TUTÚ NÍ CADÚHA TÉ PÁBLÚ QUIHIⁿ NDAHA TÉ FILEMÓN

*Té Páblú cádúha-dé tutú quíhíⁿ
ndaha té Filemón*

¹ Te yúhú té Páblú téee yíhi veacaá sá cuendá Xítohó Jesucristú cádúha-í ìⁿ tutú ndíhi té Timùteú cuendá daquixi-í ndaha yòhó té Filemón, te ío cùu iní ñàhà-í xii-n chi tnàhá-n quide-n chiuⁿ Yá Ndiòxí. Te tutú-a tëndaha-í quixi ndaha-n ² ndíhi ndaha ñaha nàni Apiá ñaha ndècu ndíhi-o ichi Xítohó Jesucristú, ndíhi ndaha té Àrquipú, chi tnàhá-dé quidé-dé chiuⁿ Yá Ndiòxí, ndíhi ndaha nchaa ñáyiú tàcá vehe-n dàcuahá-yu tnúhu-gá. ³ Te xicáⁿ táhù-í núú Tátá-ó Dütú Ndiòxí ndíhi núú Xítohó Jesucristú sá ío na chindee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cündecu-ndo.

*Té Filemón ío sàndáá iní-dé
Xítohó Jesucristú te cùu iní-dé tnàha
ñáyiú-dé*

⁴ Te ndí tnàhá òré càháⁿ ndíhi-í Yá Ndiòxí cuendá-n ndàcáⁿ táhù-í núú-gá. ⁵ Chi ñíhí-í tnúhu sá ío sàndáá iní-n Xítohó Jesucristú, te cùu iní-n cuè ñáyiú ndècu ichi-gá. ⁶ Te xicáⁿ táhù-í núú Yá Ndiòxí sá dàtná-ni sàndáá iní-n-gá ducaⁿ-ni dànehé-n ñáyiú cuendá ducaⁿ ngñu ichi-yu tnàhá-yu, te cutnùní iní-yu nàcuáa ndùu nchaa sá vâha tàxi Xítohó Jesucristú xii-o, te tnàhá-yu nduu táhù-yu nchaa sá vâha-áⁿ. ⁷ Te yòhó té Filemón cúú-n tée ndècu ndíhi-í ichi Xítohó Jesucristú càchí tnúhu-í xii-n sá ío cùdí iní-í cuendá sá ío váha quide-n ndecu-n, chi cùu iní-n nchaa ñáyiú ndècu ichi Yá Ndiòxí, te uuⁿ-gá ñíhí ndèé-í sá dúcáⁿ quide-n, te ñiú-n ío sáhã-n-yu tnúhu ndee iní ndécú ndíhi-yu.

*Té Páblú chindèe tnúhu-dé té
Ònésimú*

⁸ Te yúhú té Páblú ní taxi Xítohó Jesucristú tnúhu ndee iní ndécú ndíhi-í sá táxi tnùní ñàhà-í xii-n te tahu-í chiuⁿ cada-n, dico vá táxi tnùní ñàhà-í xii-n, ⁹ chi váha-gá sá càháⁿ ndàhú-í núú-n sá cádá-n nchaa nacuáa càháⁿ-í chi ío cùu iní ñàhà-í xii-n. Chi yúhú sa ta yíi-í cuáhãⁿ, te yíhi-í veacaá cuendá sá càháⁿ-í tnúhu Xítohó Jesucristú. ¹⁰ Te càháⁿ ndàhú-í núú-n sá ñà túú nã cani iní-n cuendá té Ònésimú, chi ní cuu-dé vitna dàtná ìⁿ déhe-í, chi ní sàndáá iní-dé tnúhu Yá Ndiòxí ní xáhaⁿ-í xii-dé vitna yíhi-í veacaá.

¹¹ Te nàha-n sá cütñahá ní xíndecu ndíhi-n-dé ñá túú ní quide ndáá-dé, dico vitna ío váha quide-dé ndécú ndíhi-í-dé, te ñiú-ni ducaⁿ càda-dé òré cundecu ndíhi tucu-n-dé. ¹² Te vitna tendaha-í-dé ndixi-dé cundecu tucu-n ndíhi-dé, te òré queheⁿ cuendá-n-dé, te cada iní-n sá yúhú ní queheⁿ cuendá-n.

¹³ Te vitna yíhi-í veacaá sá cuendá tnúhu Xítohó Jesucristú, te cuiní-í ngani-í-dé cunu cuechi-dé núú-í cuendá cada-dé núú-n ní cùu. ¹⁴ Dico ñá túú ní ngani-í-dé, chi vátá ndátnúhu ndíhi ñaha-gá-í xii-n núu nása cachí-n cünduu. Te ñá cündèe iní-í cada yica-í cada-n ìⁿ sá váha sá cúú-xi-í, chi cuiní-í sá mée-n càni iní-ñ núu cuu àdi sá vá cúú. ¹⁵ Te ní cunduu ní quee

té Ònésimú vehe-n, te cudana te mee Yá Ndiòxí ducaⁿ ní cachí-gá cunduu cuendá dacuàha-dé cada váha-dé. Te ndixi tuçu-dé cundecu ndíhi ducaⁿ-ná-n-dé. ¹⁶ Te vá cúú-gá-dé dàtná ìⁿ tée xinu cuechi chi ní cuu-dé dàtná ìⁿ ñani-ó chi ní sàndáá iní-dé Yá Ndiòxí, te yúhú ío cùu iní-í-dé, dico yòhó uuⁿ-gá cuu iní-n-dé, chi cùu-dé ìⁿ tnàha ñáyiú-o, te ndècu-dé ichi Yá Ndiòxí.

¹⁷ Te ìⁿ-ni cùu-o ndecu-o ichi Yá Ndiòxí núu xíãⁿ càháⁿ ndàhú-í núú-n sá quéhéⁿ cuendá-n-dé dàtná quéhéⁿ cuendá-n yúhú òré quéxi-í vehe-n. ¹⁸ Te núu ío ìⁿ

sá nǐ cumání-dě núú-n ñà túú ní quide ndáá-dé cùtnàhá ní xindecu-n ndìhi-dé, àdi ío ìíⁿ sá tàú-dé te vá ndàcáⁿ cuèndá-n núú-dě, chi yúhú ndacáⁿ cuèndá-n núú-í. ¹⁹ Te ndaha mee yúhú té Páblú cádúha-í tutú-a càchí tnúhu-í xii-n sá ná chǎhu-í nchaa sá nǐ quide-dé. Dico dandacu saú iní-n sǎ yúhú ní sanu ichi ñaha-í xii-n ichi Xítohó Jesucristú. ²⁰ Dico yòhó té ndècu ndìhi-í ichi Xítohó Jesucristú cada ndee ìní-n càda-n tnúhu ndàhú càháⁿ-í núú-n chi ndècu-o ichi-gá. Te ducaⁿ càda-n nacuaa cuu-xi dàtná ìíⁿ tnúhu ndee ìní sá cúú-xi-í, chi ndì ndùú-ó ndècu-o ichi-gá.

²¹ Te cùtnuní ìní-í sá cadá-n nchàa nacuaa càháⁿ-í, te cùtnuní tucu ìní-í sá ìo-gá vǎi sá vǎha cada-n dàcúúxí tnúhu ndàhú càháⁿ-í núú-n, núu xiáⁿ tëndaha-í tutú-a véxi ndaha-n. ²² Te vitna cuìní-í cada túha-n ìíⁿ vehe cundecu-í, chi sǎni ìní-í sá quíxí còto ñaha-í xii-ndo, te ndètu-í sáá nduu-ǎⁿ chi nchòhó xìcáⁿ táhú-ndó núú Yá Ndiòxí cuèndá-í.

Tnúhu ndéé núú nǐ ndìhi-ná

²³ Te ío cada ndee ìní-n càchí té Ēpafrás té yìhi ndìhi-í vecaá sá cuèndá tnúhu Xítohó Jesucristú.

²⁴ Te ío cada ndee ìní tucu-n càchí té Mácú, ndìhi té Arìstarcú, ndìhi té Dêmás, ndìhi té Lùcá, chi tnàhá cue té-ǎⁿ quide-güedé chiuⁿ Xítohó Jesucristú.

²⁵ Te Xítohó Jesucristú ío na chìndee chitúu ñaha-gǎ xii-ndo nchàa-ndo. Te ducaⁿ na cùnduu. Te ío chí cadá ndèe ìní-nǎ vitna.

TUTÚ QUIHIⁿ NDAHA CUE ÑÁYIU HÈBREÚ

Dútú Ndiöxí ní cachí-gá sá Dêhe-gá cada núú-gă

¹ Te ndéé sanaha, Yá Ndiöxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú nchâa ñani tnáhá-ó ní xíndecu ndéé dàvá-áⁿ te diu ducaⁿ nĩ quide-güedé. Te titní xito ducaⁿ nĩ xáhaⁿ-gă xii-güedé ní cáháⁿ-güedé tnúhu-gá. Te ndi dííⁿ ndi dííⁿ nĩ xítñúhu ñaha-gă xii-güedé nâcuáa cáháⁿ-güedé tnúhu-gá núú-yu. ² Te sátá ní cuu vai nduu ta yáha cuáháⁿ, te ní sáá nduu nĩ cachí Yá Ndiöxí sá Dêhe-gá cada núú-gă cáháⁿ tnúhu-gá núú-ó. Te diu-ni mee-gă ní táúchíúⁿ ní cadúha Dêhe-gá ñuyíú ndihí nchaa sá íó, te ní cachí-gá sá ncháá cùu-xi cuendá Dêhe-gá. ³ Te Dêhe Yá Ndiöxí ío càhnu cuu-gă dàtná càhnu cuu mee-gă, te dàtná-ni sàni iní méé-gă diu-ni ducaⁿ sàni iní Dêhe-gá chi tnàhá-gă cúú-gă Ndiöxí, te sá cuendá tnúhu càháⁿ Dêhe-gá xíáⁿ ndécú-ní nchâa sá íó ñuyíú, te ducaⁿ chi ío càhnu cuu Dêhe-gá, te diu-ni Dêhe-gá ní quide nâcuáa vá cùndecu-gă cuèchi-o. Te sátá dúcáⁿ te ní ngóo-gă xio cùha Tátá-gă Dútú Ndiöxí Yáá ío cùnnu ndecu andiu.

Dêhe Dútú Ndiöxí ío-gă cùnùu-gă dàcúúxí cuè espíritú xínú cuèchi núú-gă

⁴ Te Dêhe Yá Ndiöxí ío-gă cùnùu-gă dàcúúxí cuè espíritú xínú cuèchi núú-gă, te ducaⁿ chi ní nduu táhú-gă núú Tátá-gă Dútú Ndiöxí sá ío-gă cunuu-gă dàcúúxí cuè espíritú-áⁿ. ⁵ Chi Yá Ndiöxí ñá túú ní xáhaⁿ-gă xii ní ñⁿ cue espíritú xínú cuèchi núú-gă dàtná ní xáhaⁿ-gă xii Dêhe-gá, te duha ní xáhaⁿ-gă: Yòhó cúú-n Dêhe mee-í,

te ducaⁿ-ni cùndecu-n núú ndécú-í. Duha ní xáhaⁿ-gă. Te ní cachí tucu Yá Ndiöxí:

Yúhú cúú-í Tátá Yáá-áⁿ,
te mee-gă cúú-gă Dêhe-í.

Duha ní cachí-gă. ⁶ Te cùtnàhá ní tendaha-gă Dêhe-gá Yáá ío cùnnu ní quixi-gă ñuyíú-a, te ní cachí-gă:

Tàú-xi sá ncháá cuè espíritú xínú cuèchi núú-í chiñuhu-xi Dêhe-í.

Duha ní cachí-gă. ⁷ Te Yá Ndiöxí ní cáháⁿ-gă cuendá cue espíritú xínú cuèchi núú-gă, te ní cachí-gă:

Yúhú quidè-í sá ncháá cuè espíritú xínú cuèchi núú-í cúú-xí dàtná táchí,

te diu-ni cue espíritú-áⁿ quidè-í sá cúú-xí dàtná itá ñuhú.

Duha càchí-gă. ⁸ Dico Dêhe-gă chi ñá túú dùcaⁿ ní xáhaⁿ-gă, chi duha ní xáhaⁿ-gă:

Yòhó tnàhá-n cùu-n Ndiöxí dàtná cúú yúhú Yáá cúú Tátá-n,

te ducaⁿ-ni tàxi tnuní-n ní caa ní quíhíⁿ,

te ío váha ndáá quidè-n tàxi tnuní-n.

⁹ Te dàquee tihú-n nchâa sá cuèhé sá dúhá, te cùu iní-n nchâa sá váha,

núu xíáⁿ yúhú Yáá cúú Tátá-n ní quide-í sá ío-gă vii ío-gă váha cuu iní-n,

dàcúúxí nchâa dava-gă ñá yiu ndècu ndihí-n.

Duha ní xáhaⁿ-gă xii Dêhe-gă. ¹⁰ Te ní xáhaⁿ tucu Yá Ndiöxí xii Dêhe-gă:

Yòhó cúú-n Yáá ío cùnnu, chi ndéé cùtnàhá ñá túú vèdana ná íó te ní cadúha-n ñuyíú ndihí andiu.

¹¹ Te andiu ndihí ñuyíú chi naa-xi, dico yòhó chi cundecu-ni-n ní caa ní quíhíⁿ.

Te andiu ndihí ñuyíú chi ndihí-xi dàtná ndíhí ñⁿ dóó,

¹² te dàtná cuíni-n quide ñá yiu ndihí ñⁿ dóó òré ndácáⁿ tnáhnú-yu tàxi ndecú-yu ñⁿ xio, ducaⁿ càda-n ñuyíú ndihí andiu,

te dàtná nádâma dóó ñâyiu ducaⁿ càda tucu-n ñuyíú ndìhi andiu.

Te yòhó dàtná-ni càa-n ndecu-n vitna ducaⁿ-ni cùnduu-n cundecu-n ni caa ni quíhⁿ, chi vá yíí tnhá-n.

Duha ní xáhaⁿ Yá Ndiöxí xii Déhe-gá. ¹³ Te Yá Ndiöxí ñá túú ní xáhaⁿ-gá xii ni ìⁿ cue espíritú xínú cuèchi núú-gá dàtná ní xáhaⁿ-gá xii Déhe-gá, te duha ní xáhaⁿ tùcu-gá:

Ngóo xio cùha-í taxi tñùní-n, te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.

Duha ní xáhaⁿ-gá xii Déhe-gá. ¹⁴ Te nchaa espíritú xínú cuèchi núú Yá Ndiöxí mee-ni chùuⁿ-gá quidé-xí, chi tëndaha-gá cue espíritú-áⁿ cuáháⁿ-xi nchaa núú ndécú cuè ñâyiu ní nduu táhú cundecu ndìhi-gá chindee ñàha-xi xii-yu.

2

Vá dàñá ndèè-ó tñùhu sá càháⁿ nàcuáa naníhí tàhú-ó

¹ Te sá cuendá sá ïo cùnuu Xítohó Jesucristú, núu xiáⁿ ío xíni ñuhu-xi cada cuendá-ó nchaa tñùhu càháⁿ-gá sá sá ní xíndedóho-o cuendá sá vâ dàñá nihnu-o. ² Te cue espíritú xínú cuèchi núú Yá Ndiöxí ní càháⁿ-xi tñùhu-gá ndéé sanaha, te tñùhu ní càháⁿ cue espíritú-áⁿ cúú-xí sá ndáá cuíti. Te nchaa ñâyiu ñá túú ní cuíni tñii nchaa tñùhu ní càháⁿ cue espíritú-áⁿ, te ni ñà túú ní cuíni-yu cundedóho-yu, nchaa ñâyiu-áⁿ ñí nacháhu-yu nàcuáa ndùu nchaa cuèchi ní quidé-yu ìⁿ ìⁿ-yu. ³ Te sá dúcáⁿ ñí yáha cue ñâyiu-áⁿ, xiáⁿ cùtnùní ndáá iní-ó sá vâ càcu nihnu-o te núu na dàña nihnu-o tñùhu sá càháⁿ nàcuáa naníhí tàhú-ó, tñùhu sá ïo cùnuu, chi nacháhu-o te núu ducaⁿ na càda-o. Te díhna-gá Xítohó Jesucristú ní càháⁿ-gá tñùhu-áⁿ te nchaa ñâyiu ní xíndedóho nchaa nàcuáa ndùu tñùhu-áⁿ ñí càháⁿ ndáá-yu tñùhu-áⁿ núú-ó. ⁴ Te tnhá Yá Ndiöxí

cúndìhi-gá nchaa ñâyiu-áⁿ quidé-gá nàcuáa cùtnùní iní-ó sá tñùhu-áⁿ cúú-xí tñùhu ndáá, chi quíde-gá titní núú sá vâ yòo tnhá ndacu cada te ío cùñúhu-o. Te Espíritú Yá Ndiöxí quidé-xí nàcuáa nduu táhú-ó ndì dííⁿ núú chiuⁿ cada-o nàcuáa cuíni méé-gá. Te sá dúcáⁿ quíde Yá Ndiöxí nchaa xiáⁿ, xiáⁿ cùtnùní iní-ó sá tnhá-gá càháⁿ-gá sá tñùhu-áⁿ cúú-xí tñùhu ndáá.

Xítohó Jesucristú ní xínduu yiqui cùñú-gá dàtná cáa yìquì cuñú nchoo cuè ñâyiu ñuyíú-a

⁵ Te Yá Ndiöxí vá táxi ndècu-gá cue espíritú xínú cuèchi núú-gá taxi tñùní-xi ñuyíú sáá sá vátá quíni-gá-ó, te díu cuendá xiáⁿ càháⁿ-í. ⁶ Te núú tütú Yá Ndiöxí càchí-xi:

Yòhó Dútú Ndiöxí ñá túú ñá cúú cuè ñâyiu ñuyíú núu ndacu iní-n-yu, àdi chindee-n-yu.

⁷ Te yòhó ní cachí-n sá nchaa ñâyiu ñuyíú-a vá cùnùu-yu dàtná cùnùu cue espíritú xínú cuèchi núú-n,

dico ní cachí-n sá sáá nduu te ío cùnùu-yu tnhá-yu, te mee-n càháⁿ-n sá ïo càhnu cuú-yu,

te ní cachí tucu-n sá táxi tñùní-yu nchaa sá ñí cadúha-n.

⁸ Te ducaⁿ nchàandi túhú sá ïó quíndáhá-yu.

Duha càchí-xi núú tütú-gá. Te sá dúcáⁿ ñí cachí Yá Ndiöxí sá quíndàha ñâyiu ñuyíú nchaa sá ïó, xiáⁿ cùtnùní sá ncháandì túhú sá ïó taxi tñùní-yu, dico vátá sáá-gá nduu dùcaⁿ quíni-ó càda-xi. ⁹ Te nchoo sa nàha-o sá tñáá-ní ñí quíde Yá Ndiöxí cuendá sá vâ cùnùu Xítohó Jesucristú dàtná cùnùu cue espíritú xínú cuèchi núú-gá. Te ducaⁿ ñí quíde Yá Ndiöxí chi ní cundàhú iní-gá nchaa ñâyiu ñuyíú-a, chi ní cachí-gá sá Dèhe-gá cuú cuendá nchaa-yu, te Xítohó Jesucristú ío ní ndoho-gá òré ní xíhí-gá, núu xiáⁿ ní nduu táhú-gá cùnùu vihi-gá vitna. Te mee Yá

Ndiöxí cächí-gá sá ïo càhnu cuu Déhe-gá.

10 Te Yá Ndiöxí ní cadúha-gá nchaandí túhú sá ío nàcuáa ní cächí iní mée-gá, te sá dúcáⁿ ní quide-gá núu xiáⁿ váha-ní sá ní cächí-gá sá Xítohá Jesucristú nándi ndoho-gá te cuú-gá cuendá ducaⁿ ñà túú tnàhí-gá ná cùmání-gã núú Yã Ndiöxí. Te sá dúcáⁿ ní cuu núu xiáⁿ ní níhí Yã Ndiöxí nàcuáa cada-gá càndeca-gá nchaa ñáyiú cuu déhe-gá quihíⁿ núú ïo váha càa cundecú-yu ndihí-gá ni caa ni quihíⁿ. Te Xítohá Jesucristú cúú-gã Yáá ní quide nàcuáa nduu táhú cue ñáyiú cundecú-yu ndihí Yá Ndiöxí.

11 Te Xítohá Jesucristú cúú-gã Yáá quidé ndècu yiñuhu ñáyiú núú Yã Ndiöxí ñáyiú sàndáá iní ñáhá xii-gá, te Xítohá Jesucristú ndihí cue ñáyiú-áⁿ ìⁿ-ni Yáá cúú Tãtã-yu ndihí-gá, núu xiáⁿ Xítohá Jesucristú Yáá cúú Déhe Dútú Ndiöxí ñà túú cùcahaⁿ núú-gã càháⁿ-gá sá ñàní-gá ndihí cúha-gá cúú nchàa ñáyiú-áⁿ. 12 Te quèe ndáá-xi nàcuáa càháⁿ-xi núú tütú Yã Ndiöxí núú cächí-xi nàcuáa ní xáhaⁿ Xítohá Jesucristú xii Tãtã-gã Dútú Ndiöxí, te duha ní xáhaⁿ-gã:

Cáháⁿ váha-í cuendá-n núú nchàa cue tée cuu datná ñàní-í ndihí núú nchàa cue ñáyiú ðihí cúú datná cúha-í,

te cata-í ndudú chiñuhu ñaha-í xii-n núú tàcá-yu.

Duha yòdo tnuní núú tütú-gá nàcuáa ní xáhaⁿ Déhe-gá xii-gá. 13 Te ingá tucu xichi núú tütú Yã Ndiöxí càháⁿ-xi nàcuáa ní cáháⁿ Xítohá Jesucristú cuendá-gá, te duha ní cächí-gá:

Yúhú nchaa-ni nduu quindáá iní-í Tãtã-í Dútú Ndiöxí.

Duha cächí-xi núú tütú Yã Ndiöxí nàcuáa ní cáháⁿ Xítohá Jesucristú. Te ingá tucu xichi núú tütú Yã Ndiöxí càháⁿ-xi nàcuáa ní cáháⁿ tucu Xítohá Jesucristú, te duha ní cächí-gá:

Iha ndècu ndihí-í nchaa ñáyiú cuu déhe Tãtã-í Dútú Ndiöxí, te ðiu-ni ñáyiú-áⁿ ní taxi cuendá Tãtã-í cuu cuendá-í.

Duha cächí-xi núú tütú-gá nàcuáa ní cáháⁿ Xítohá Jesucristú.

14 Te sá cuendá nchaa ñáyiú cuu déhe Yá Ndiöxí cúú-yu yiqui cùñú, núu xiáⁿ ducaⁿ tnàhá Xítohá Jesucristú ní cuu-gá yiqui cùñú, te ducaⁿ ní cuu-gá yiqui cùñú cuendá cuú-gá, te sá dúcáⁿ cúú-gá te ndacu-gá daquèe tíhú-gã sàcuíhná, te ðiu sàcuíhná-ãⁿ quidé-xi xihí ñáyiú. 15 Te ducaⁿ ní quide-gá cuendá sá cue ñáyiú ñuyú-a vá yùhú-gá-yu sá cuú-yu, chi nchaa-ni nduu yùhú-yu sá cuú-yu. 16 Te na cächí tnúhu ndáá-í sá Xítohá Jesucristú ní quixi-gá cuendá chindee-gã cue ñáyiú cuu ñaní tnàhá ndii Àbrahám, te ñà ðíú cuendá sá chindèe-gá cue espíritu xínú cuèchi núú Yã Ndiöxí. 17 Te cuendá xiáⁿ núu ðai ní xini ñuhu-xi sá cúú-gã ñáyiú cuendá yãha-gá nándi sá yãha-gá datná yãha cue ñáyiú cuu ndi mee-gá cuendá ducaⁿ cuu-gá dútú ïo cùnuu te cuu ndáá-gá núú Yã Ndiöxí, te cundàhú iní-gá nchaa ñáyiú te cuú-gá cuendá sá vã cùndècu-gá cuèchi-yu núú Yã Ndiöxí. 18 Te mei òré ndóhó Xítohá Jesucristú ní xito ndéé ñáhá sàcuíhná xii-gá te núu ndisa sá vã cadá-gã ní ìⁿ sá ñà túú tàú-gá cada-gá, te sá dúcáⁿ ní ndoho-gá xiáⁿ núu ndácú-gã chindèe-gá nchaa ñáyiú ducaⁿ yãha.

3

Xítohá Jesucristú ío-gá cùnuu-gá dàcúúxi ndii Moisés

1 Te nchòhó cúú-ndó ñáyiú ndècu ndihí-í ichi Xítohá Jesucristú ñáyiú cuu cuendá Yã Ndiöxí, te tnàhá-ndó cuu-ndo ñáyiú ní cáháⁿ ñáhá-gã cuendá cundecu-ndo ndihí-gá. Te yúhú cächí tnúhu-í xii-ndo sá ïo váha cada cuendá-ndó nàcuáa nduu cuendá Xítohá Jesucristú, chi

diu-gá cúu-gă Yaá ní tendaha ñàha Dútú Ndiöxí ní quixi-gă ñuyú-a, te diu-gá cúu-gă Dútú ío cùnuu chi quide-gă núú Yă Ndiöxí. Te diu-ni cuendá Xítohó Jesucristú càháⁿ tnúhu sá ni sàndáá iní-ó. ² Te mee Yă Ndiöxí ní sáha chiúⁿ-gă Xítohó Jesucristú, te ío ndáá quidé-gă chiúⁿ-áⁿ sã cúu-xí Yă Ndiöxí, te diu-ni ducaⁿ nĩ quide ndíi Moisés ní quide ndíi chiúⁿ ní táhú Yă Ndiöxí, te ío ndáá ní quide ndíi chiúⁿ-gă sá cúu-xí nchàa ñáyíu cùu cuendá-gă, te cue ñáyíu-áⁿ cùú-yu dàtná vehe mee-gă. ³ Te ìⁿ téé dàcaa ìⁿ vehe váha ío càhnu-gă cúu-dě dàcúúxí vehe dacao-dé. Te ducaⁿ sãtnahá-xi cùu Xítohó Jesucristú chi ío-gă càhnu cuu-gă dàcúúxí ndíi Moisés. ⁴ Te nchoo sã naha-o sá ncháá vehe dacuítí ndècu cue téé ní dácáá, dico sa naha tucu-o sá Yă Ndiöxí quidé-gă ndécú nchàa sá ío ñuyú-a. ⁵ Te ndíi Moisés-áⁿ ío ndáá ní quide ndíi chiúⁿ ní táhú Yă Ndiöxí ní quide ndíi sá cúu-xí nchàa ñáyíu cùu cuendá-gă. Te sá dúcáⁿ nĩ quide ndíi xíãⁿ ní cuu ndíi ìⁿ téé ní xinu cuechi núú Yă Ndiöxí. Te ní xáhaⁿ ndíi xii nchaa ñáyíu cùu cuendá-gă nàcuáa càháⁿ-gă ndéé cuèé-gă. ⁶ Dico Xítohó Jesucristú cúu-gă Déhe mee Yă Ndiöxí, te cùu-gă Yaá ío quide ndáá yíndàha-gă nchaa ñáyíu cùu cuendá Yă Ndiöxí. Te tnáhá-ó cùu-o ñáyíu cùu cuendá-gă, te diu-ni ducaⁿ cùu cuendá ñáhá-gă xii-o te núu na cànchicúⁿ ñhnu-ni-o càni ndáá iní-ó cuendá-gă ndéé ná sáá nduu ngündecu-o ndíhi-gă.

Cue ñáyíu cùu cuendá Yă Ndiöxí ío váha cùu iní-yu ndécú-yu ndíhi-gă

⁷ Te núú tütú Yă Ndiöxí yódó tnùní nàcuáa ní càháⁿ Espíritú-gă, te duha ní cachí-xi:

Te núu nchòhó ndèdóho-ndo nchàa tnúhu càháⁿ Yă Ndiöxí vitna,

⁸ te vá cùndùu sáá iní-ndó dàtná ní xínduu sáá iní ñáyíu ní dáquéé tìhú tnúhu Yă Ndiöxí, ñáyíu ní xíndecu xití yucu,

chi ñáyíu-áⁿ nĩ xito ndeé-yu Yă Ndiöxí núu nása cada ñaha-gă xii-yu.

Duha ní cachí Espíritú-gă. ⁹ Te càchí tucu Espíritú Yă Ndiöxí nàcuáa ní càháⁿ mée-gă, te duha ní cachí-gă:

Xití yucu ní xito ndéé ñáhá cuè ñani tnáhá-ndó nĩ xíndecu ndéé sanaha xii-í,

te ducaⁿ nĩ quide ñáhá-yu cuèi ní xini-yu nchaa sá nĩ quide-í ndí ùdico cuía nĩ xíndecú-yu xití yucu-áⁿ.

¹⁰ Te sá dúcáⁿ nĩ quidé-yu núu xíãⁿ ní cudéèⁿ-í núú-yu,

núu xíãⁿ ní càháⁿ-í cuendá-yu, te ní cachí-í:

“Ñáyíu-a quide-ní-yu nchaa sá ñà túú tàú-yu cadá-yu te ni ñà túú cuíní-yu cadá-yu nchaa nàcuáa sàni iní-í,

te ni ñà túú cuíní-yu cadá-yu nàcuáa càháⁿ-í”,

duha ní càháⁿ-í cuendá-yu.

¹¹ Te xíãⁿ núu ní cudéèⁿ-í núú-yu te ní xáhaⁿ ndáá-í xii-yu sá vã ndúú tãhú-yu cundecu váha-yu núú ndécú-í.

Duha ní cachí Yă Ndiöxí càchí Espíritú-gă.

¹² Te nchòhó ñáyíu ndècu ndíhi-í ichi Xítohó Jesucristú, càháⁿ-í dóho-ndo sã ío cada cuendá-ndó vã càni cuèhé iní-ndó te ngóo-ndo vã quíndáá-gă iní-ndó Yă Ndiöxí te dañá-ndo ìchi-gă, te diu-gă cúu-gă Yaá ndécú nchàa nduu nchaa quiú.

¹³ Te ìⁿ nduu ìⁿ nduu ío chí cuãha tnàha tnúhu ndee iní cundecu-ndo nini ndecu-ndo ñuyú-a cuendá sá vã xínu iní-ndó càda-ndo nándi sá cuèhé sá dúhá, te ducaⁿ te vá cúu sáá iní-ndó núú Yă Ndiöxí. ¹⁴ Te vã dañá ndèé-ó càni ndáá iní-ó nàcuáa cada ñaha Yă Ndiöxí xii-o, te dàtná-ni ní sani iní-ó ndéé cùtnáhá ní tuha-o ìchi Yă Ndiöxí, te diu-ni ducaⁿ càni iní-ó ndéé ná sáá nduu vã cùndècu-gă-ó ñuyú-a, te núu ducaⁿ na càda-o te cùu ìⁿnuu-o ndíhi Xítohó Jesucristú.

15 Te duha càháⁿ-xi #ⁿ xichi núú tütú Yă Ndiöxí:

Te núú nchòhó ndèdóho-ndo nàcuáa càháⁿ Yă Ndiöxí vitna,

te vá cündüu sáá iní-ndó dàtná ní xínduu sáá iní cue ñáyiú ní dáquée tíhú tnúhu-gá ndée sanaha.

Duha cächí-xi núú tütú-gá. 16 Te cue ñáyiú ducaⁿ ní xínduu sáá iní-xi cùú-yu ñáyiú ní ndeñuhu ndíi Moisés nàcióⁿ Ègiptú, te ñáyiú-áⁿ ní xíndedóho-yu tnúhu ní càháⁿ Yă Ndiöxí te ní quide sáá iní-yu ní dáquée tǎhǔ-yu tnúhu-gá. 17 Te ndi ùdico cuá ní xúhuⁿ-yu ichi ío ní cùdééⁿ Yă Ndiöxí núú-yu cuendá sá ní quide-yu nándi nchaa sá cuéhé sá dúhá, te ñáyiú-áⁿ ní xíhí-yu xití yucu. 18 Te nchaa ñáyiú-áⁿ ñà túú ní cuíní-yu tní-yu tnúhu ní càháⁿ Yă Ndiöxí núú xǎⁿ ní càháⁿ ndáá-gá sá vǎ ndúú tǎhǔ-yu cundecú-yu núú ío váha càa ndecu-gá. 19 Te xǎⁿ núú nchoo cùtnuní iní-ó sǎ nchaa ñáyiú-áⁿ ñà túú ní ndüu táhú-yu cundecu váha-yu núú ndécú-gǎ, chi ñà túú ní sàndáá iní-yu tnúhu ní càháⁿ-gá.

4

1 Te vitna ndècu ndíhi-gá-ó tnúhu Yă Ndiöxí tnúhu sá dánéhé ñáhá xii-o sá cúú cundecu váha-o núú ndécú-gǎ, te tàú-xi quiyuhú iní-ó chi na cuáháⁿ te vá ndúú tǎhǔ-ó cundecu váha-o núú ndécú-gǎ. 2 Te tnàhá nchoo ní ngúndecu ndíhi-o tnúhu sá càháⁿ nàcuáa naníhí tǎhǔ-ó dàtná ní xíndecu ndíhi cue ñáyiú ndée sanaha, dico ñáyiú-áⁿ chi ñà túú vèdana ni nàndíhi-xi cuèj ní xíndedóho-yu tnúhu-áⁿ chi ñà túú ní sàndáá iní ñáhǎ-yu xii-gá. 3 Dico nchoo cùu-o ñáyiú ní sàndáá iní tnúhu Yă Ndiöxí, núú xǎⁿ ndüu tǎhǔ-ó cundecu váha-o núú ndécú-gǎ, te ní quee ndáá-xi nàcuáa càháⁿ-gá núú tütú-gá núú cächí-xi: Yúhú ní cudèèⁿ-í núú-yu, te ní càháⁿ ndáá-í sá vǎ ndúú

tǎhǔ-yu cundecu váha-yu núú ndécú-í.

Duha ní cächí-gá. Te cuu nduu tǎhǔ-yu cundecu váha-yu núú ndécú Yă Ndiöxí ní cùu, chi sa ní xínu cava nchaa chiúⁿ ní quide-gá sá ní cadúha-gá ñuyíú. 4 Te núú tütú Yă Ndiöxí càháⁿ-xi nàcuáa ní quide-gá nduu úsá, te duha cächí-xi:

Yă Ndiöxí ní quide chiúⁿ-gá ínú nduu ní quide-gá nchaa chiúⁿ-gá te ní ndetatú-gá nduu úsá.

Duha cächí-xi núú tütú-gá. 5 Te cächí tucu-xi núú tütú Yă Ndiöxí nàcuáa ní càháⁿ-gá cuendá cue ñáyiú ndée sanaha, te duha ní cächí-gá:

Cue ñáyiú-a vá ndúú tǎhǔ-yu cundecu váha-yu núú ndécú-í ndétátú-í.

Duha ní cächí-gá. 6 Te ñáyiú ní xíndedóho tnúhu sá càháⁿ nàcuáa naníhí tǎhǔ-ó ndée sanaha, ñà túú ní ndüu tǎhǔ-yu cundecu váha-yu núú ndécú Yă Ndiöxí ndétátú-gá, te ducaⁿ chi ñà túú ní sàndáá iní ñáhǎ-yu xii-gá, dico ío-gá ñáyiú nduu tǎhǔ cundecu váha núú ndécú-gá ndétátú-gá. 7 Te ní xica cuéhé nduu sá dúcáⁿ ñà túú ní sàndáá iní ñáhǎ ñáyiú-áⁿ xii-gá, te dàtnuní ní càháⁿ ndíi Dàví yuhu-gá nàcuáa cada-gá vitna, te ñu-ni nàcuáa sa yòdo tnuní ñu-ni ducaⁿ chido tnuní tucu-í nàcuáa ní càháⁿ ndíi yuhu-gá, te duha ní cächí-gá:

Te núú nchòhó ndèdóho-ndo tnúhu càháⁿ-í te vá cadá sáá iní-ndó.

Duha ní cächí-gá. 8 Te ndíi Jòsué ní sanu ichi ndíi ñáyiú núú quihíⁿ-yu cundecu váha-yu, dico ñà díú cuendá xǎⁿ ní càháⁿ Yă Ndiöxí, chi cuendá nàcuáa cada-gá vitna ní càháⁿ-gá. 9 Núú xǎⁿ sáá nduu ndüu tǎhǔ nchaa ñáyiú cùu cuendá Yă Ndiöxí ngúndecu váha-yu núú ndécú-gǎ ndétátú-gá. 10 Te nchaa ñáyiú ducaⁿ na ndüu tǎhǔ cundecu váha núú ndécú Yă Ndiöxí ndétátú-gá, te tnàhá-yu ndetatú-yu

cuendá nchaa sá vâha ní quidé-yu datná ndétátú méé-gă. ¹¹ Te xini ñuhu-xi sá nchóó ïo nducu ndèe-o nducu-o nacuáa cada-o cuendá nduu tâhú-ó ngündecu váha-o núú ndécú Yá Ndióxi ndétátú-gă, chi na cuáháⁿ dava-ndo càda-ndo datná ní quide cue ñáyiú ñá túú ní sândáá iní ñáhá xii-gă, te vá ndúú tâhú-ndo cündecu váha-ndo núú ndécú-gă te núú ducaⁿ na càda-ndo.

¹² Te tnúhu Yá Ndióxi cúú-xi datná ìⁿ sá nchító-ó chi quide-xi nándi sá quidé-xi, te cùu-xi datná ìⁿ sá dèéⁿ víhí-gă dàcúúxi ìⁿ yuchi sá ndèé úú xio núú-xi. Te ducaⁿ sâtnahá-xi cùu tnúhu-gă chi quée-xi iní-ó, te dàndixi túu-xi nchaandi túhú sá sání iní-ó te núú quide váha-o àdi ñá túú quide váha-o ndècu-o. ¹³ Te ni ìⁿ sá ní cadúha Yá Ndióxi vá cání iní-ó sá ndácú-xi nguivâha-xi núú-gă, chi nchaandi túhú sá sání iní-ó ndècu túu-xi núú-gă, te diu núú Yáá-áⁿ na cání cuendá-ó nchaa sá quidé-ó.

Xítóhó Jesucristú cúú-gă Dútú ïo cùnnu

¹⁴ Te Xítóhó Jesucristú cúú-gă Dútú ïo cùnnu ndecu ndihi-o, te diu-gă cúú-gă Déhe Dútú Ndióxi, te Yáá-áⁿ cuândaa-gă andiu ni nucündecu-gă núú Yá Ndióxi, núú xiáⁿ tâú-xi sá cánchezúⁿ nihnu-ni-o quindáá iní-ó-gă. ¹⁵ Te mee Yáá-áⁿ ïo cùnnu-gă cúú-gă dútú-ó ndècu ndihi-o, te ïo na cündahú iní ñáhá-gă xii-o cuendá sá ñá nihí ndéé-ó cündecu-o. Te ducaⁿ càda-gă chi ní yâha-gă datná yâha mee-o, chi nchaa sá ní yâha-gă-áⁿ ní cuu-xi sá cáda-gă nándi nchaa sá cuèhé sá dúhá ní cùu dico ni ìⁿ ñá túú ní quide-gă. ¹⁶ Núú xiáⁿ tâú-ó sá nchóó ní yuhu ni iní-ó cáháⁿ ndihi-o Yá Ndióxi Yáá ïo cündahú iní ñáhá xii-o chindee ñaha-gă, te ducaⁿ càda-o te cundahú iní ñáhá-gă chindee ñaha-gă xii-o ndèda-ni càa oré xíni ñuhu-o-gă.

5

¹ Te nchaa cue dútú cùnnu núú ñáyiú isràél diu-ni ñáyiú cùu-güedé, te ducaⁿ ní ngündecu-güedé cuendá cada-güedé chùⁿ sá cúú-xi Yá Ndióxi cuendá-yu, chi diu cue téé-áⁿ ní xóo nacani cuendá-güedé núú-gă quiti ní xóo cahni-güedé ní xóo nduu tâhú-gă, te ducaⁿ ní xóo cada-güedé cuendá sá cáda càhnu iní Yá Ndióxi cuéchi-yu, te ducaⁿ ní xóo nacani cuendá tucu-güedé núú-gă nchaa dava-gă sá ní xóo nihí-güedé ní xóo nduu tâhú-gă. ² Te nchaa cue dútú-áⁿ ní xóo cundee iní-güedé nchaa sá ní xóo cada nchaa ñáyiú ñá túú ní quide ndáá ñáyiú ñá túú cùnuni iní-xi, te ducaⁿ ní xóo cada cue dútú-áⁿ chi tnáhá-güedé ñá túú ní xóo nihí ndéé-güedé cundecu-güedé cuendá nchaa sá ní xóo yâha-güedé. ³ Te sá cuendá sá dúcáⁿ ñá túú ní xóo nihí ndéé-güedé núú xiáⁿ dai ní xini ñuhu-xi sá tnáhá-güedé cuáha-güedé Yá Ndióxi sá ndúú tâhú-gă cuendá méé-güedé datná quidé-güedé cuendá ñáyiú.

⁴ Te ni ìⁿ téé vá ndácú-dě cuu-dé dútú cùnnu cuendá-ni sá càchi iní méé-dě te núú ñá diú mèe Yá Ndióxi ducaⁿ cuini-gă sá cúú-dě dútú cùnnu datná ní quide-gă ndíi Àron.

⁵ Te cuèi Xítóhó Jesucristú chi ñá diú mèe-gă ní quide-gă méé-gă ìⁿ dútú cùnnu nacuáa cada nínu-gă méé-gă, chi mee Tâtá-gă Dútú Ndióxi ducaⁿ ní cachí-gă sá cúú-gă Dútú cùnnu, te ducaⁿ chi Yá Ndióxi ní xáhaⁿ-gă:

Yòhó cúú-n Dèhe-í,

te cuini-í sá dúhá-ni cündecu-n núú ndécú-í.

Duha ní xáhaⁿ-gă xii Xítóhó Jesucristú. ⁶ Te núú tütú Yá Ndióxi yódo tnùni nacuáa ní xáhaⁿ tucu-gă xii Xítóhó Jesucristú, te duha ní xáhaⁿ-gă:

Yòhó cúú-n dútú cundecu ni caa ni quihíⁿ,

te cùn-n datná ní cuu ndíi Melquisédéc.

Duha ní xáhaⁿ-gã xii Xítohó Jesucristú. ⁷ Te cùtnàhá ní xíndecu Xítohó Jesucristú ñuyíú-a te níhi ní xóo cáháⁿ ndihi-gã Yã Ndiöxí te ní xóo cáháⁿ ndàhú-gã núú-gã, te ní xóo ndáhyú-gã òré ducaⁿ nĩ xóo cáháⁿ ndihi-gã Yã Ndiöxí, te ducaⁿ nĩ quide-gã chi nàha-gã sá Yã Ndiöxí cúú-gã Yaá ndacu dàcácu nihnu ñaha xii-gã cuendá sá vã cùu dúcáⁿ-gã. Te Yã Ndiöxí ní xíndedóho-gã nchaa tnúhu ní cáháⁿ Xítohó Jesucristú cuendá sá nĩ quide-gã nchaa nàcuáa ní xáhaⁿ Yã Ndiöxí cada-gã. ⁸ Te sá cuendá nchaa sá nĩ ndoho Xítohó Jesucristú xíáⁿ ní cutnùnì iní-gã cada-gã nchaa dava-gã sá vãha nàcuáa cuiní mée Yã Ndiöxí cada-gã. Te ducaⁿ nĩ cuu cuèi cùu-gã Déhe Yã Ndiöxí. ⁹ Te sá dúcáⁿ nĩ quide-gã nchaa nàcuáa cuiní mée Yã Ndiöxí, xíáⁿ nũu vitna cùu-gã Yaá dácácu nihnu nchaa ñáyiu sàndáa iní ñáhã xii-gã núú ùhú núú ndàhú. ¹⁰ Te mee Yã Ndiöxí ní cachí-gã sá Xítohó Jesucristú cúú-gã dútú cúnùu datná ní cunuu ndíi Melquisèdec cùtnàhá ní cuu ndíi dútú ñuyíú-a.

Cuendá ñáyiu cuiní daña nihnu ichi Yã Ndiöxí

¹¹ Te vai-gã tnúhu ndècu cáháⁿ-í nàcuáa ndùu cuendá Xítohó Jesucristú, ndihi ndíi Melquisèdec, te dicó-ni sá nchòhó ío cuèé tècú tnùnì-ndó, te yúhú ío ùhú níhi-í nàcuáa cáháⁿ-í nàcuáa tecú tnùnì-ndó.

¹² Te nchòhó sa ní cuu cuéhe nduu ndècu-ndo ichi Xítohó Jesucristú, te tàù-ndó dānehé-ndó cue ñáyiu ndècu ichi-gã tnúhu-gã nũu dicó sá cúú, dico xini ñuhu-ni-xi sá cùndècu ñáyiu danèhé ñáhã tnúhu-gã xii-ndo, tnúhu sá nĩ dácúáhã-ndó ndéé díhna sá ñà túú ùhú tecú tnùnì-ndó. Te sá dúcáⁿ quide-ndo núu xíáⁿ cúú-ndó dàtná cue landú vitna sàdi camá, landú vátá cúú-gã caxi dítá. ¹³ Chi nchaa ñáyiu cùu datná landú vitna sàdi, ñáyiu-áⁿ cúú nèñuú-yu ñã túú

cùtnunì iní-yu nàcuáa càháⁿ tnúhu sá càháⁿ nàcuáa cada ndáa-yu cundecú-yu. ¹⁴ Te nchaa sá vátá cúú-gã caxi cue landú yíquíⁿ xíáⁿ cúú-xi cuendá cue ñáyiu sacuéhé, te xíáⁿ cúú-xi dàtná tnúhu sá dácúàha ñáyiu sa ní níhi ndéé ndècu ichi-gã, ñáyiu sa ní cutnùnì váha iní-xi nándi cùu nchaa sá cuéhe sá dúhá, ndihi nándi cùu nchaa sá vãha.

6

¹ Te xíáⁿ nũu vitna xini ñuhu-xi dacuaha-o dava-gã tnúhu Yã Ndiöxí cuendá ducaⁿ te cuu-o ñáyiu tècú tnùnì nchaa tnúhu-gã. Te xini ñuhu-xi sá ncháa tnúhu Xítohó Jesucristú sá nĩ dácúáhã-ó ndéé díhna vã dácúàha-gã-ó dàtná ní dácúáhã-ó chi sa tècú tnùnì-o. Te ñã túú-gã xini ñuhu-xi dacuaha-o datná ní dácúáhã-ó ndéé díhna nàcuáa cada-o ndixi cuèchi iní-ó cuendá nchaa sá cuéhe sá dúhá quide-o, sá tá dácúita nihnu ñaha xii-o cuáhãⁿ ní cùu. Te ducaⁿ vã dácúàha-gã tucu-o dàtná ní dácúáhã-ó ndéé díhna nàcuáa cada-o quindáa iní-ó Yã Ndiöxí, ² ndihi cuendá nàcuáa ní dácúáhã-ó nàcuáa cuandute-o, ndihi cuendá nàcuáa cada-o càcáⁿ ndodo-o ndàha-o díquí ñáyiu ní sàndáa iní ñáhã xii-gã. Te ducaⁿ ñã túú-gã xini ñuhu tucu-xi dacuaha-o datná ní dácúáhã-ó ndéé díhna cuendá nàcuáa ndoto cue ñáyiu ní xíhi, ndihi cuendá nàcuáa ní dácúáhã-ó sá Yã Ndiöxí daquíhíⁿ-gã ñáyiu núú ùhú núú ndàhú ni caa ni quíhíⁿ. ³ Te núu Yã Ndiöxí ná càchí-gã, te cuita dacuàha-gã-ó nchaa dava-gã tnúhu sá cùmānì quíhíⁿ.

⁴ Te cue ñáyiu sa tècú tnùnì tnúhu Yã Ndiöxí, ñáyiu sa xini nchaa nàcuáa ndùu nchaa sá vãha quide ñaha Yã Ndiöxí xii-o ndihi-yu, ñáyiu sa chindee ñaha Espiritú Yã Ndiöxí, ⁵ ñáyiu sa cùtnunì iní-xi sá ío váha tnúhu Yã Ndiöxí, ñáyiu sa xini nàcuáa ta quide Yã Ndiöxí véxi nchaa sá vã yõo tnàhí ndàcu

cada, ⁶ te núu ñáyi-u-áⁿ ná ngüita tucú-yu daqueè tíhú duúⁿ-yu tnúhu Yá Ndióxi, te vá ndácú-gã-ó ná canu ichi-ó-yu nàcuáa ndixi cuéchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùú-yu dàtná cue téé ní sahní ñaha xii Xítohó Jesucristú Déhe Yá Ndióxi núu cùrúxi. Te sá dúcáⁿ ná càdá-yu te ngóo dava-gã ñáyi-u cáháⁿ cuèhé-yu cuèndá Xítohó Jesucristú. ⁷ Te nchaa ñáyi-u cùú-yu dàtná ñuhu, chi ñuhu-áⁿ ndi tnàhá òré cùúⁿ dàú te xihí-xi ndute, te dava ñuhu váha cùu sá xitú ñáyi-u, te sá cùú núú ñuhu-áⁿ ío nàndíhi-xi, te mee Yá Ndióxi quidé-gã cùú sá váha núú ñúhú-áⁿ. ⁸ Dico núu da ñu na ndaa núú ñuhu-áⁿ te ñá túú vèdana nàndíhi-xi te núu ducaⁿ, te Yá Ndióxi vá cùú váha iní-gã cuèndá ñuhu-áⁿ sá dúcáⁿ dà ñu ndaa núú-xi, te ñu-áⁿ ndíhi-xi cáyú. Te ducaⁿ sátnahá-xi cùu ñáyi-u dàquee tíhú tnúhu Yá Ndióxi chi ñá túú cùu váha iní-gã núú-yu.

Nihí-ó sã ndétú-ó ndúu táhú-ó

⁹ Te cuèi duha càháⁿ-í dico nchòhó cue ñáyi-u ío cùu iní-í, chi cùtnuní ndáá iní-í sá vã càdá-ndó dàtná xiquide dava-gã ñáyi-u, te mee-ni sá váha cuu xii-ndo chi cùu-ndo ñáyi-u sa ní naníhí táhú. ¹⁰ Te ducaⁿ chi Yá Ndióxi cùú-gã Yaá ío váha quide ndáá, te vá dáná ndòdo iní-gã nchaa sá váha quide-ndo, te ní vã dáná ndòdo iní-gã nàcuáa quide-ndo cuu iní-ndó-gã, te sá dúcáⁿ quide-ndo cuu iní-ndó-gã xiáⁿ chindèe-ndo cue ñáyi-u ndècu ndíhi-ndo ichi Xítohó Jesucristú, te ducaⁿ-ni ta quide-ndo véxi ndéé vitna. ¹¹ Te cuíní-í sá ñiⁿ ñiⁿ-ndo nducu ndee-ndo cada-ndo nàcuáa cuíní Yá Ndióxi dàtná tá quide-ndo véxi, te ñi-u-ni ducaⁿ càda-ndo ndéé ná sáá nduu ndúu táhú-ndó cùndecu-ndo ndíhi-gã núú ndécú-gã, te ducaⁿ te níhí-ndó nchàandi túhú sá ndétú-ndó ndúu táhú-ndó cùndecu ndíhi-ndo ní caa ní quíhíⁿ. ¹² Te

yúhú cuíní-í sá nchòhó vá tühío-ndo càda-ndo nchaa nàcuáa cuíní Yá Ndióxi, te cada-ndo dàtná quidé ñáyi-u sàndáá iní tnúhu-gã, ñáyi-u càhnu iní-xi. Te sá dúcáⁿ quidé-yu xiáⁿ nihí-yu nchaa sá ní cachí Yá Ndióxi nduu táhú-yu.

¹³ Te cùtnàhá ní xáhaⁿ Yá Ndióxi xii ndíi Àbrahám nàcuáa cada-gã, te ní cacunehe-gã mée-gã nàcuáa cutnùní iní ndíi sá ndáá cada-gã nàcuáa ní xáhaⁿ-gã xii ndíi, te vá yóo ñiⁿ ní càcunehe-gã cuèndá sá quíndáá iní ndíi tnúhu ní cáháⁿ-gã. Te ducaⁿ ní quide-gã chi ñiⁿ díi-ni mee-gã ío cùnuu-gã. ¹⁴ Te duha ní xáhaⁿ-gã xii ndíi Àbrahám: “Yóhó té Àbrahám na càchí tnúhu ndáá-í xii-n sá ío chindee ñàhá-í xii-n, te cáyá cuéhé víhí ñàmí tnàháⁿ”, duha ní xáhaⁿ-gã xii ndíi. ¹⁵ Te ndíi Àbrahám ío ní quide ndee iní ndíi ní xíndetu ndíi, te ducaⁿ te Yá Ndióxi ní quide-gã nàcuáa ní xáhaⁿ-gã cada-gã sá cùú-xi ndíi. ¹⁶ Te núu ñiⁿ ñáyi-u càháⁿ ñiⁿ tnúhu ndáá cuíti te càcu nehé-yu Yá Ndióxi cuèndá quíndáá iní tnàha ñáyi-u tnúhu càháⁿ-yu, te òré ducaⁿ na càháⁿ-yu te ñá túú-gã sá dácáá ñáyi-u càháⁿ ndíhi-yu cuèndú. ¹⁷ Te ducaⁿ ní quide Yá Ndióxi ní cáháⁿ ndáá-gã sá càdá-gã nàcuáa ní cachí-gã, te ducaⁿ ní cáháⁿ-gã cuèndá nchaa ñáyi-u ní cachí-gã nduu táhú sá càdá-gã nàcuáa cutnùní iní-yu sá quidé-gã ñiⁿ sá càháⁿ-gã, te ní ñá túú nàdáma-gã ñiⁿ sá càháⁿ-gã. ¹⁸ Te nchoo ní natuha-o Yá Ndióxi cuèndá dàcácu nihnu ñaha-gã xii-o núú úhú núú ndáhú, te ní níhí-ó tnúhu ndee iní ndécú ndíhi-o cuèndá sá vã dáñá ndéé-ó cùndetu-o sáá nduu ndúu táhú-ó cùndecu-o ndíhi-gã. Te ducaⁿ ní níhí-ó tnúhu ndee iní chi Yá Ndióxi ní cáháⁿ ndáá-gã sá càdá-gã nàcuáa ní cachí-gã, te ñá túú dándahú ñàhá-gã, te ní ñá túú nàdáma-gã ñiⁿ sá ní cachí-gã

cada-gá. ¹⁹ Te tnúhu ndee iní ndécú ndihí-o xíáⁿ quidé-xí cùtnuní ndáá iní-ó sá ndúú táhú-ó cùndecu-o ndihí Yá Ndiöxí núú ndécú-gá, te ducaⁿ cùtnuní ndáá ndisa iní-ó sá cuendá Xítohó Jesucristú Yá ndécú núú Yá Ndiöxí. ²⁰ Te ducaⁿ ní nucúndecu Xítohó Jesucristú núú Yá Ndiöxí cuendá ducaⁿ cànchicúⁿ nihnu-o càda-o, te ducaⁿ ní nucúndecu-gá núú Yá Ndiöxí chi cùu-gá dútú cúnù datná ní cunuu ndí Melquisèdec ñuyú-a, te ducaⁿ-ni cùu-gá dútú cúnù ni caa ni quihíⁿ.

7

Xítohó Jesucristú cúu-gá dútú datná ní cuu ndí Melquisèdec

¹ Te ndí Melquisèdec ní xíndaha ndí cue ñáyiú ñúú Sàlém, te ní cuu ndí dútú ní xinu cuechi ndí núú Dútú Ndiöxí Yáá ío cúnuu. Te ndí Melquisèdec-áⁿ ní xícáⁿ táhú ndí núú Yá Ndiöxí cuendá ndí Abrahám cùtnáhá ní sáháⁿ ndí Abrahám-áⁿ ní nàá ndí ndihí cue dava-gá cue téé yíndaha ñáyiú. Te cue téé-áⁿ ñà túú ní ndàcu-güedé nàa-güedé ndihí ndí Abrahám-áⁿ chi ní xíta-güedé. ² Te nchaa sá ní níhí ndí Abrahám-áⁿ núú ní nàá ndí, te ní quide ndí ùxí xichi te ñⁿ xichi núú ùxí-áⁿ ní sáñaha ndí xii ndí Melquisèdec. Te ñⁿ ndí Melquisèdec-áⁿ queé-xí: Téé ío váha quide ndáá yíndaha ñaha xii ñáyiú, ñaha quèe-xi. Te ní xóo danàni ñahá-yu xii ndí Téé yíndaha ñúú Sàlém, ñaha ní xóo danàni ñahá-yu. Te tnúhu Sàlém-áⁿ queé-xí: Ñúú ndécú ñahi, ñaha quèe-xi tnúhu-áⁿ. Núú xíáⁿ queé tucu-xi nacúáa ñani ndí Téé yíndaha ñúú ndécú ñahi, ñaha quèe tucu-xi ñⁿ ndí. ³ Te ñá túú tnúhu núú yoo cùu tátá ndí ndihí ñaná ndí, te ni ñà túú tnúhu núú yoo cùu xí ndí ndihí xítná ndí, te ni ñà túú tnúhu núú ñándí cùu ñáyiú ní cuu ñani tnáhá ndí ní

xíndecu ndéé sanaha-gá, te ni ñà túú tnúhu núú ná ama ní cacu ndí, te ni ñà túú tnúhu núú ná ama ní xíhí ndí. Te ndí-áⁿ ducaⁿ-ni ní cuu ndí dútú ní xíndecu ndí, te ducaⁿ sátnahá-xi cùu Xítohó Jesucristú déhe Yá Ndiöxí chi cuu-gá dútú ní caa ni quihíⁿ.

⁴ Te vitna chí cuáha váha cuendá sá ndí Melquisèdec ní cuu ndí ñⁿ téé ío ní cuu càhnu ní xíndecu ñuyú-a, chi ndí Abrahám téé ní cuu ñani tnáhá-ó ní xíndecu ndéé sanaha ní quide ndí ùxí xichi nchaa sá ní níhí ndí núú ní nàá ndí. Te ñⁿ xichi núú ùxí-áⁿ ní sáñaha ndí xii ndí Melquisèdec.

⁵ Te ndí Moisés ní chídó tnùní ndí nàcuáa cada nchaa dútú, cue téé ní cuu ñani tnáhá ndí Lèví sá cuè téé-áⁿ queheⁿ-güedé ñⁿ xichi núú ùxí xichi sá níhí cue ñáyiú isràél ñáyiú cùu ñani tnáhá-güedé cuu cuendá-güedé. Te ducaⁿ quide-güedé cuè ñani tnáhá-güedé ndihí-yu ní cuu ndí Abrahám. ⁶ Te cuè ñá díú ñani tnáhá ndí Melquisèdec cúu ndí Abrahám dico ní queheⁿ ndí Melquisèdec-áⁿ ñⁿ xichi núú ùxí xichi nchaa sá ní níhí ndí Abrahám. Te ndí Melquisèdec-áⁿ ní xícáⁿ táhú ndí núú Yá Ndiöxí cuendá ndí Abrahám. Te ñⁿ-ni ndí Abrahám-áⁿ ní xáhaⁿ Yá Ndiöxí xii ndí sá cadá váha ñaha-gá xii ndí. ⁷ Te sa cùtnuní iní-ó sá núú ñⁿ téé na càcáⁿ táhú-dé núú Yá Ndiöxí cuendá ñⁿ ñáyiú, te téé-áⁿ cúnù-gá-dé. ⁸ Te cue dútú ñáyiú isràél quéhéⁿ-güedé ñⁿ xichi núú ùxí xichi nchaa sá níhí-yu cùu cuendá-güedé, te cue téé-áⁿ cuu-güedé. Te núú tütú Yá Ndiöxí càchí-xi sá ndí Melquisèdec ndécú-ní ndí, te ducaⁿ càháⁿ-xi chí ñá túú tnúhu sá ní xíhí ndí. ⁹⁻¹⁰ Te sá dúcáⁿ ní sáñaha ndí Abrahám sá ní nduu táhú ndí Melquisèdec, te xíáⁿ cada iní-ó sá sá ndecu ndihí ndí Abrahám cue ñani tnáhá ndí Lèví cue téé cùu dútú, cue téé queheⁿ ñⁿ xichi núú ùxí xichi nchaa sá níhí ñáyiú isràél

cuëi vátá cácu-gã-güedé. Te cada iní-ó sã tnáhã-güedé ní sãha-güedé ndíi Melquisèdèc ìⁿ xichi núú ùxí xichi nchaa sã ní níhí ndíi Àbrahám núú ní nàà ndíi. Te ducaⁿ càda iní-ó chi cue téé-áⁿ cúú-güedé ñaní tnáhã ndíi Àbrahám cuëi vátá cácu-gã-güedé dàvã-áⁿ.

11 Te sã cuendã cue dútú cue téé cùu ñaní tnáhã ndíi Lèví ní ngúndecu ndíi cue ñáyiu isràél tnúhu sã sánú ìchi ñaha xii-yu nàcuáa cadã-yu cundecú-yu. Te ñaní tnáhã ndíi Àrón cúú cuè dútú-ãⁿ. Te núu dìcò cue dútú-ãⁿ ní ndàcu-güedé cada-güedé nàcuáa cudíu ñáyiu isràél núú Yã Ndiòxí, te ñã túú-gã xíní ñùhu-xi ngúndecu ingã dútú dàtnã ndíi Melquisèdèc ní cùu. Te dútú-ãⁿ ñã túú ní cùu-dé dàtnã ní cuu cue ñaní tnáhã ndíi Àrón. 12 Te núú cuè dútú cue téé cùu ñaní tnáhã ndíi Lèví-áⁿ ní ngúndecu ingã dútú. Te sã dúcãⁿ ní ngúndecu ingã dútú xiãⁿ dacuití ní xini ñùhu-xi sã dãmã nàcuáa ndùu tnúhu sã sánú ìchi ñaha xii-yu nàcuáa cadã-yu cundecú-yu. 13-14 Te ñu-ni cuendã dútú-ãⁿ sa níhí-ó tnùhu, te dútú-ãⁿ cúú Xítohó Jesucristú, te ñã díú ñaní tnáhã ndíi Àrón cúú-gã chi ñaní tnáhã ndíi Jüdã cúú-gã. Te nchaa-o tà xíní ndáá-ó sã ñaní tnáhã ndíi Jüdã cúú-gã, te ndíi Moisés ñã túú tnàhí ná ní càchí ndíi cuendã cue ñaní tnáhã ndíi Jüdã sã cúú-güedé dútú, chi ní ñⁿ-güedé ñã túú ní cùu-güedé dútú ní cùu.

15 Te vitna cùtnuní ndáá iní-ó nàcuáa ní cuu, chi Xítohó Jesucristú cúú-gã ingã dútú dàtnã ní cuu ndíi Melquisèdèc. 16 Te ñã díú cuendã tnúhu sã sánú ìchi ñaha xii ñáyiu nàcuáa cadã-yu cundecú-yu ducaⁿ ní cùu-gã dútú, chi ní cuu-gã dútú cuendã sã cúú-gã Yaa cundecu ní caa ní quíhíⁿ chi vá íⁿ ndùu te ndíi nihnu-gã. 17 Te duha ní xáhaⁿ Yã Ndiòxí xii-gã:

Yòhó cúú-n dútú dàtnã ní cuu ndíi Melquisèdèc,

te cundecu-n nchaa nduu nchaa quíú.

Duha ní xáhaⁿ Yã Ndiòxí xii-gã. 18 Te xiãⁿ núu nchaa tnúhu ndéé díhna, tnúhu sã ní xíndecu ndíi cue dútú ñã túú-gã cùnu-xi vitna chi ñã túú-gã xíní ñùhu-xi te ní ñã túú nã chíndèe ñaha-xi. 19 Te ñu-ni tnúhu-áⁿ cúú-xi tnúhu sã ní chidó tnúni ndíi Moisés canu ìchi ñaha xii ñáyiu nàcuáa cadã-yu cundecú-yu. Te tnúhu-áⁿ ñã túú vèdana ní quíde-xi nàcuáa chindee-xi ñáyiu cudíu-yu núú Yã Ndiòxí. Dico vitna ní ngúndecu ndíi-ò tnùhu ndee ñí sã ìo-gã váha dàcúúxí tnùhu ndéé díhna, chi ndècu ndíi-ò Xítohó Jesucristú Yaa cúú dútú-ó. Te Yaa-áⁿ quíde-gã tnáhã tnúhu-ò ndíi Yã Ndiòxí vitna.

20 Te Yã Ndiòxí ní cáhãⁿ ndáá cuiti-gã sã Xítohó Jesucristú cuu-gã dútú. 21 Dico ñã túú dúcãⁿ ní cáhãⁿ-gã cuendã cue ñaní tnáhã ndíi Lèví cue téé ní cuu dútú, cuëi mei òré ní chisaha-güedé ní cuu-güedé dútú. Te cùtnáhã ní chisaha Xítohó Jesucristú cúú-gã dútú, te Yã Ndiòxí ní xáhaⁿ ndáá cuiti-gã xii-gã, te duha ní xáhaⁿ-gã:

Yúhú Dútú Ndiòxí cáhãⁿ ndáá cuiti-í te vá dãmã-í tnúhu cáhãⁿ-í:
“Yòhó cúú-n dútú dàtnã ndíi Melquisèdèc,

te cundecu-n ní caa ní quíhíⁿ.”

Duha ní xáhaⁿ Yã Ndiòxí xii Xítohó Jesucristú. 22 Te Xítohó Jesucristú quíde-gã nàcuáa cutnúni ndáá iní-ó sã Yã Ndiòxí cada-gã ingã núú sã váha sã cúú-xí-ó dàtnã ní cachí-gã, te xiãⁿ cúú-xí sã ìo-gã váha dàcúúxí tnùhu ní cáhãⁿ-gã ndéé díhna. 23 Te ìo cuéhé cue ñaní tnáhã ndíi Lèví ní cuu-güedé dútú, te ducaⁿ cuendã sã ñã túú ní cùdí-güedé cundecu-güedé chi ní ndíi-güedé ní xíhí. 24 Dico Xítohó Jesucristú chi vá cùú-gã, chi cundecu-gã ní caa ní quíhíⁿ núu xiãⁿ ñu-ni-gã cuu-gã dútú, te vá yòo ñⁿ-gã cuu dútú cada núú-gã. 25 Te núu xiãⁿ Xítohó Jesucristú dàcãcu nihnu

ñaha-gã xii nchoo ñãyiu núú ùhú núú ndàhú, nchoo ñãyiu sàndáá iní ñáhá xii-gá, te ñiu-ní nchoo cùu-o ñãyiu tñàhá tnúhu ndíhi Yá Ndiöxí, te vá ñⁿ ndùu-gá te cuíta nihnu-o. Te ducaⁿ chi Xítohó Jesucristú ñá túú xòcuñí-gá núú Yá Ndiöxí càháⁿ ndàhú-gá cuèndá-ó.

²⁶ Te Xítohó Jesucristú cúu-gã Yaá cúu dütú cúnùu xini ñuhu-o cundecu ndíhi-o, te ñiu-gá cúu-gã Yaá chindèe chítúu ñaha xii-o, te cùu-gá Yaá ío quide ndáá núú Yá Ndiöxí, te cùu-gá Yaá cándòo canine chi ñá túú tñàhí cuéchi-gá. Te ñá túú tñàhí quide-gá dàtná quidé nchaa cue ñãyiu ndècu ichi cuehé ichi duha, te cùu-gá Yaá ní nucúndecu andíu núú ndécú Yá Ndiöxí te yàcáⁿ táxi tñùní-gá. ²⁷ Te ñá túú quide-gá dàtná ní quide cue dütú ní cunuú ní xíndecu, chi cue dütú-ãⁿ ñⁿ nduu ñⁿ nduu ní xóo cahni-güedé quiti ní xóo nduu táhú Yá Ndiöxí, te díhna-gá cuèndá nchaa cuéchi mee-güedé ducaⁿ ní xóo cada-güedé te dàtnùní ducaⁿ ní xóo cada tucu-güedé cuèndá nchaa cuéchi ñãyiu. Dico Xítohó Jesucristú chi ñⁿ xito-ni ní xíhí-gá sá cúu-xí nchaa ñãyiu chi ducaⁿ ní sani iní-gá, te vá ñⁿ ndùu-gá ducaⁿ càda tucu-gá. ²⁸ Te sá cuèndá nchaa tnúhu ní chídó tñùní ndíi Moisés xíãⁿ ní xíndecu cue téé ní cuu dütú cúnùu, te cue téé-áⁿ ní cuu-güedé cue téé yíca cuéchi-xi. Te sátá dúcáⁿ ní chídó tñùní ndíi Moisés nàcuáa cada ñãyiu, te ní xica cuehé víhí ndùu te dàtnùní ní càháⁿ ndáá cuíti Yá Ndiöxí sá Dèhe-gá cuu-gá dütú cúnùu. Te Yaá cúu Dèhe-gá-áⁿ ní quide-gá nchaa nàcuáa tau-xi cundu, te ñiu-ni ducaⁿ càda-gá ní caa ní quíhíⁿ.

8

Xítohó Jesucristú cúu-gã dütú cúnùu

¹ Te Xítohó Jesucristú Yaá cúu dütú cúnùu ndècu ndíhi-o

cuánda-gá andíu, te ní ngóo-gá xio cùha Dütú Ndiöxí Yaá ío cúnùu, te tñàhá-gá cúnùu-gá. Te ñiu cuèndá-o cùu-xi sá ío-gá cúnùu ta càháⁿ-ndí véxi. ² Te núú ndécú Yá Ndiöxí cúu-xí núú ìí víhí. Te cada iní-ó sã cúu-xí ñⁿ vehe te xíáⁿ ndécú Xítohó Jesucristú cúu-gá dütú, te vehe-áⁿ ní dácáá mèe Yá Ndiöxí te ñá díú cue téé ñuyúú-a. ³ Te sá cuèndá nchaa tnúhu ní chídó tñùní ndíi Moisés xíãⁿ ní xíndecu cue dütú cúnùu cuèndá sá càhni-güedé quiti nduu táhú Yá Ndiöxí, te nacani cuèndá-güedé núu-gã nchaa dava-gá sá ñíhí-güedé nduu táhú-gã. Te xíãⁿ núu dai ní xini ñuhu-xi sá tñàhá Xítohó Jesucristú cuañaha-gã ñⁿ sá ndúú táhú Yá Ndiöxí, te táhú-ãⁿ cúu-xí mèe-gá chi ní xíhí-gá ní cuu-gá dàtná ñⁿ táhú sã cúu-xí Yá Ndiöxí. ⁴ Te núu ní xíndecu-ni Xítohó Jesucristú ñuyúú-a te vá cúu-gá dütú ní cùu, chi sa ndècu cue dütú sãñaha nchaa sá ndúú táhú Yá Ndiöxí dàtná càháⁿ nchaa tnúhu ní chídó tñùní ndíi Moisés. ⁵ Te nchaa sá quidé cue dütú ñãyiu israhél nùtnahá-xi luha nchaa sá quidé Xítohó Jesucristú Yaá cúu dütú cúnùu ndècu andíu. Te quèe ndáá-xi nàcuáa ní xáhaⁿ Yá Ndiöxí xii ndíi Moisés cúnahá tá cüyatni ngúiat ndíi dácáa ndíi vehe-gá, te duha ní xáhaⁿ-gã: “Ío váha cada cuèndá-n nàcuáa dácáa-n vehe-í dàtná cáá sã ní dánèhé ñáhà-í xii-n xítí yucu”, duha ní xáhaⁿ-gã xii ndíi. ⁶ Dico vitna chi Xítohó Jesucristú cúu-gã dütú cúnùu, te ío-gá càhnu nduu chiuⁿ quide-gá dàcúúxí cue dütú cue ñãyiu israhél. Te ñiu Xítohó Jesucristú cúu-gá Yaá quidé tñàhá tnúhu-o ndíhi Yá Ndiöxí, te ducaⁿ chi Yá Ndiöxí ío-gá váha ndùu tnúhu ní càháⁿ-gá xito cùu uú dàcúúxí tnúhu ní càháⁿ-gá ndéé díhna, te ducaⁿ ío váha ndùu tnúhu ní càháⁿ-gá xito cùu uú chi ní cachí-gá sá ñngá núú sã ío-gá váha cada ñaha-gã xii-o vitna.

7 Te núu nàcuáa ní cachí Yá Ndióxi cada ñaha-gã xii-o ndéé díhna ni quide-xi nchaa nacuáa tàú-xi cunduu nàcuáa nduu táhú-ó cundecu váha-o núu-gã ñá, te ñá túú xini ñuhu-xi cáháⁿ tucu-gá sá cáda-gã ingá núú sã váha sá cúú-xí-ó vitna ni cuu. ⁸ Te Yá Ndióxi ñá túú ní cuu váha iní-gá núú ñáyiú isráel núu xiáⁿ ní cáháⁿ-gá cuendá-yu, te duha ní cachi-gá:

Yúhú cuú-í Dútú Ndióxi, te duha ndùu tnúhu na cáháⁿ-í; Sáá nduu te cada-í ingá núú sã váha sá cúú-xí cuè ñani tnáhá ñáyiú isráel, ndíhi cue ñani tnáhá ndíi Júdá ñu-ni ñáyiú isráel.

⁹ Te tnúhu sá cáháⁿ-í-a ñá túú ñⁿ-ni cuu-xi ndíhi tnúhu sá ní xáhaⁿ-í xii cue ñáyiú ní cuu ñani tnáhá-yu ní xindecu ndéé sanaha càda-í-yu,

te ñu-ni dàvá-áⁿ ní quide yica-í ní ndeñuhu-í-yu nacióⁿ Ègipútú,

te ñá túú ní cuíni-yu tñí-yu tnúhu ní xáhaⁿ-í xii-yu cuendá ducaⁿ càda váha-í-yu,

te xiáⁿ núu ní dáña ñihnu-í-yu ñá túú-gã ní quide cuendá-í-yu.

¹⁰ Te na sãá nduu te duha ndùu tucu ingá núú sã váha cada-í cue ñáyiú isráel.

Te yúhú cada-í nàcuáa cutnùni váha iní-yu nàcuáa cuíni-í cadá-yu,

te ducaⁿ ñi yuhu ni iní-yu cadá-yu.

Te yúhú Yá Ndióxi quindaha-í-yu, te mèe-yu cuú-yu ñáyiú cùu cuendá-í.

¹¹ Te dàvá-áⁿ chi ni ñáyiú cùu ndi meé-yu,

te ni cuè dava-gá ñáyiú vá cutnùhu tnáhá-yu sá nátùha ñahá-yu xii-í,

chi dàvá-áⁿ nchaa ñáyiú cundecu ndíhi ñahá-yu xii-í,

cuèi ñáyiú cùnuu te cuèi ñáyiú ñá túú cùnuu.

¹² Te dàvá-áⁿ cada càhnu iní-í nchaa sá cuèhé sá dúhá quide-yu,

te vá ñⁿ ndùu-gá ndacu iní-í nchaa sá quidé-yu.

Duha ní cachí Yá Ndióxi cuendá ñáyiú isráel. ¹³ Te sá dúcáⁿ ní cáháⁿ Yá Ndióxi sá cáda-gã ingá núú sã váha sá cúú-xí ñáyiú xiáⁿ cutnùni sá tnúhu sá ní cáháⁿ-gá díhna ñá túú-gã xini ñuhu-xi. Te cada iní-ó sã tnúhu-áⁿ cúú-xí ñⁿ sá ní cunaha ndècu te ñá túú-gã nándíhi-xi te cuíta-ná-xi, ducaⁿ sãtnahá-xi cùu tnúhu sá ní cáháⁿ-gá ndéé díhna.

9

Cuendá vehe Yá Ndióxi

¹ Te tnúhu sá ní cáháⁿ Yá Ndióxi ndéé díhna cùu-xi cuendá nàcuáa cada ñáyiú isráel chiñuhu ñahá-yu xii-gã, ndíhi cuendá vehe-gá caa ñuyú-a. ² Te ñáyiú isráel ní dácáá-yu vehe Yá Ndióxi, te vehe-áⁿ ní cuu-xi vehe dóo te ní xúhuⁿ nehu xití-xi. Te cuártú díhna ní xínani-xi cuártú ní cuu íi, te xiáⁿ ní xindecu ñⁿ sá ndéé dité-xi sá ní cándodó ñⁿ caa candíl núú dité-xi, te ní xínutñí ñⁿ mèsá ní xóo códo páá ní xóo nduu táhú Yá Ndióxi. ³ Te cuártú cúú úú ní xínani-xi cuártú ní cuu íi víhí-gã. ⁴ Te xití cuártú-áⁿ ní xínutñí ñⁿ sá ní cuáha mee-ni díhúⁿ cuááⁿ te núú xiáⁿ ní xóo cahmi-güedé dúsa sá sàháⁿ tnámí. Te ñu-ni xiáⁿ ní xindecu tucu ñⁿ càjá ní cuu mee-ni díhúⁿ cuááⁿ te xití càjá-áⁿ ní xúhuⁿ ñⁿ lítu ní cuáha mee-ni díhúⁿ cuááⁿ, te xití lítu-áⁿ ní xúhuⁿ mànáá sá ní xóo caxí-yu dàvá-áⁿ.

Te ñu-ni xití càjá-áⁿ ní xúhuⁿ tnudíi ndíi Àron sá ní saa itá-xi, ndíhi yúú sá ní xindeé tnúhu ní cáháⁿ Yá Ndióxi nàcuáa cada ñáyiú. Te duha ní xínani càjá-áⁿ: Càjá sá ñúhú tnúhu ní cáháⁿ Yá Ndióxi sá cúú-xí ñáyiú, duha ní xínani-xi. ⁵ Te núú càjá-áⁿ ní cándodó úú tnáhá sá ní cadúha-yu, te xiáⁿ cáá-xí dàtná cáá espíritú xínú cuèchi núú Yá Ndióxi. Te cuendá úú xiáⁿ ní cutnùni iní-yu sá ño càhnu cuu Yá Ndióxi, te sá ní cadúha-yu-áⁿ ndéé ndíxiⁿ-xi, te ndíxiⁿ-xi-áⁿ dàhu-xi xio xio núú

quidé càhnu iní Yă Ndiöxí nchaa yíca cuëchi ñáyiú, dico vá cúú-gă cáhá-í cuendá nchaa dava-gă xiăⁿ vitna.

⁶ Te nchaa xiăⁿ ní xindecu xiti vehe Yă Ndiöxí, te cue dútú nǐ xóo quíhu-güedé #ⁿ nduu #ⁿ nduu xiti cuártú díhna ní xóo cada-güedé năcuáa tàú-güedé cada-güedé sá cúú-xí Yă Ndiöxí. ⁷ Te cuártú cúú úú-áⁿ chi mee-ni dútú cúnúu ní xóo quíhu-dé #ⁿ xito-ni ndi tnahá cuíá. Te ndi tnahá òré ducaⁿ ní xóo quíhu dútú cúnúu-áⁿ te ní xóo canehe-dé níñi nǐ xóo quíhu ní xóo nduu táhú Yă Ndiöxí. Te ducaⁿ nǐ xóo cada dútú-áⁿ cuendá sá Yă Ndiöxí cada càhnu iní-gă nchaa yíca cuëchi mee-dě, ndihí nchaa yíca cuëchi ñáyiú. ⁸ Te sá dúcáⁿ mēe-ni dútú cúnúu ní xóo quíhu-dé xiti cuártú ní cuu í-gă-áⁿ, xiăⁿ Espíritú Yă Ndiöxí quidé-xi cùtnuní iní-ó sá nǐni ducaⁿ ní xindecu vehe-áⁿ nǐ xóo cada-yu năcuáa ní xóo cúnaha Yă Ndiöxí cada-yu. Te xiăⁿ cùtnuní sá vătă sàa-gă nduu cáháⁿ ndihí-yu Yă Ndiöxí năcuáa tàú-xi cunduu. ⁹ Te sá dúcáⁿ nǐ xindecu vehe-áⁿ, ndihí sá dúcáⁿ nǐ xóo cada nchaa cue dútú-áⁿ, xiăⁿ cùtnuní iní-ó năcuáa quide Yă Ndiöxí vitna, chi nchaa quití ní xóo cahni cue dútú-áⁿ nǐ xóo nduu táhú Yă Ndiöxí, ndihí nchaa dava-gă sá nǐ xóo nduu táhú-gă ñá túú ní quide-xi năcuáa nduu ndoo nduu nine iní cue ñáyiú năcuáa cutnúní iní-yu sá ñá túú-gă cuëchi-yu ndècu núú Yă Ndiöxí. ¹⁰ Te sá dúcáⁿ nǐ xóo cada nchaa dútú-áⁿ nǐ níhí tnahá-xi ndihí nchaa tnúhu sá dănêhé ñáhá xi ñáyiú ná cúú sá cáxi-yu ndihí ná cúú sá cúú còhó-yu ndihí năcuáa ndàhá-yu. Te tnúhu-áⁿ nǐ cuu-xi mee-ni sá nǐ sanu ichi ñaha xiú-yu năcuáa cundecú-yu ñuyíú-a. Te tnúhu-áⁿ nǐ nândihí-xi ndéé ní sáa nduu nǐ nadama Yă Ndiöxí tnúhu-áⁿ cuendá sá vá dúcáⁿ-gă cada-yu cundecú-yu.

¹¹ Te Xítóhó Jesucristú ní quixi-gă

ñuyíú-a, te diu-gă cúú-gă Yaá cúú dútú cúnúu, te xiăⁿ núu quide-gă nchaa sá vâha sá cúú-xi-ó. Te vitna ní nucúndecu-gă núú ío vii ío vâha càa, te núú ndécú-gă-áⁿ ñá túú cúu-xi #ⁿ vehe sá nǐ dăcáá cuè téé ñuyíú-a. ¹² Te cada iní-ó sá Xítóhó Jesucristú cuánguihu-gă xiti cuártú núú nǐ cuu íi víhí dàtná ní xóo cada dútú cúnúu ní xindecu ndéé sanaha, chi ní nucúndecu-gă núú ndécú Yă Ndiöxí. Dico ñá túú ní quide-gă dàtná ní xóo cada dútú cúnúu ní xindecu ndéé sanaha, chi dútú-áⁿ òré ní xóo quíhu-dé xiti cuártú ní cuu íi-gă-áⁿ, te ní xóo canehe-dé níñi chivá ndihí níñi chěhlu ní xóo quíhu. Dico Xítóhó Jesucristú chi níñi mēe-gă ní sati ní xihí-gă núú cùrúxi, te xiăⁿ duuⁿ duuⁿ cuáháⁿ-gă ní nucúndecu-gă núú ndécú Yă Ndiöxí. Te sá dúcáⁿ nǐ quide-gă xiăⁿ ní naníhí tàhú-ó. ¹³ Te nchaa ñáyiú ní xóo cada năcuáa vá cúú-gă-yu ñáyiú ní cuu íi, ñáyiú-áⁿ nǐ xóo códó ñáhá cuè dútú níñi ndicutu, ndihí níñi chivá, ndihí yáa cúnú chěhlu quiti sàhni-güedé cuendá nduu íi tucú-yu. ¹⁴ Dico níñi Xítóhó Jesucristú chi ío-gă nândihí-xi sá cúú-xi nchòo ñáyiú xindecu vitna! Te cuendá níñi-gă-áⁿ, chi Espíritú Yă Ndiöxí sá ndécú nchaa nduu nchaa quíú nǐ cuu #ⁿnuu-xi ndihí Xítóhó Jesucristú sá cúú cùú-gă cuendá cuu-gă dàtná #ⁿ táhú sá cúú-xí Yă Ndiöxí cuèi cùu-gă Yaá ñá túú tnahí cuëchi-xi, te ní sati níñi-gă te ní xihí-gă. Te cuendá xiăⁿ ní cutnúní iní-ó sá Yă Ndiöxí ní quide càhnu iní-gă nchaa sá ñá túú vâha ní quide-o, te ní nduu ndoo ní nduu nine iní-ó. Te ducaⁿ nǐ nduu ndoo ní nduu nine iní-ó cuendá sá ndécú-ó cunu cuechi-o núú Yă Ndiöxí Yaá ndécú nchaa nduu nchaa quíú.

¹⁵ Te Xítóhó Jesucristú ní quide ndáá-gă núú Yă Ndiöxí cuendá cue ñáyiú ndècu ñuyíú-a. Te cuendá xiăⁿ Yă Ndiöxí cada-gă ingá núú sá

vãha sá cúu-xí-yu dàtná ní cachí-gá, te ducaⁿ càda-gá sá cuendá nchaa ñáyiú ní cáháⁿ-gá cundecu ndihi-gá, chí ñáyiú-áⁿ nduu táhú-yu cundecu ndihi váha ñahá-yu xii-gá ni caa ni quíhíⁿ chi ducaⁿ ní cachí-gá, te ducaⁿ chi Xítohó Jesucristú ní xihí-gá núú cùrúxí cuendá sá Yá Ndiõxí cada càhnu iní-gá nchaa yíca cuèchi-yu, nchaa cuèchi sá ní quidé-yu cùtnàhá ní cunuu tnúhu sá ní cáháⁿ-gá díhna. ¹⁶ Te nchoo xini-ó sá núu ìⁿ téé na càdúha ìⁿ tutú nàcuáa cada ñáyiú dàcáhñu-yu nchaa sá ndécú ndihi-dé, te tutú-áⁿ xini ñuhu-xi ndéé ná yãha nduu cúu-dé. ¹⁷ Te ñá túú tàú-xi cada ñáyiú nàcuáa càháⁿ-xi núú tütú-áⁿ nini ndècu téé ní cadúha, dico sátá ná yãha cuú-dé te cadá-yu nàcuáa càháⁿ-xi. ¹⁸ Te cuèi tnúhu ní cáháⁿ Yá Ndiõxí ndéé díhna nàcuáa cada váha-gá ñáyiú, te ñu-ni ndihi níñi ní cundáá-xi chi ní sahani-güedé quiti te ní sati níñi-güedi. ¹⁹ Te ndii Moisés ní cáháⁿ ndodo ndii núú nchaa ñáyiú nàcuáa ní cachí Yá Ndiõxí cada-yu, te nàcuáa-ni nduu tnúhu ní chídó tnùni ndii núú tütú ndii ní cáháⁿ ndii, te ní dácá ndii ndute níñi chëhlu ndihi níñi chivá lihli, te ní queheⁿ ndii ìⁿ díte yutnu nani hisópó ndihi luha idi ticuèhé, te ní chindóyo ndii níñi-áⁿ. Te ní sódó ndii núú tütú ndéé tnúhu Yá Ndiõxí sá ní chídó tnùni ndii-áⁿ, te tnàhá cue ñáyiú xíndecu-áⁿ ní chucú ndii. ²⁰ Te ní xáhaⁿ ndii Moisés xii-yu: “Cuendá níñi-a ní cundáá sá Yá Ndiõxí cada ñaha-gã xii-ndo sã vãha chi ducaⁿ ní cachí-gá cada-gá sá cúu-xí-ndó”, duha ní xáhaⁿ ndii xii-yu. ²¹ Te ñu-ni ducaⁿ ní quide tucu ndii ní chucú ndii níñi vehe-gá ndihi nchaa sá nándihi-güedé òré chíñuhu-güedé Yá Ndiõxí ndécú xití vehe-gá-áⁿ. ²² Te tnúhu ní chídó tnùni ndii Moisés càchi-xi sá méé-ni níñi chucu-güedé nchaa sá cànehe chùu-güedé òré chíñuhu-güedé Yá Ndiõxí, te sacú-nã te ndihi ndoo

nchaa xíãⁿ chucu-güedé níñi ni cùu. Te dacuitíí ní xini ñuhu-xi sã cáti níñi cuendá ducaⁿ càda cahnu iní Yá Ndiõxí nchaa yíca cuèchi ñáyiú.

Xítohó Jesucristú ní xihí-gá núú cùrúxí cuendá sá vã cùndecu-gá cuèchi-o núú Yá Ndiõxí

²³ Te sá cuendá sá ní xihí Xítohó Jesucristú núú cùrúxí, xíãⁿ ñá túú-gá cuèchi-o ndècu núú Yá Ndiõxí. Te cuendá nchaa sá ní xihí xití vehe-gá sá ní dácáá ñáyiú isràél xíãⁿ cùtnùni iní-ó nàcuáa quide-xi núú ndécú-gã. Te dacuitíí ní xini ñuhu-xi sã càhni-güedé cue quiti ní cachí Yá Ndiõxí cuendá nduu íi nchaa sá ní xihí xití vehe-gá-áⁿ. Te cuèi ducaⁿ ní sahani-güedé cue quiti-áⁿ dico ñá túú ní quide-xi nàcuáa ngúndecu váha-o núú Yá Ndiõxí. Dico Xítohó Jesucristú ní xihí-gá, te sá ní xihí-gá xíãⁿ ní quide-gá nàcuáa ngúndecu váha-o núú Yá Ndiõxí. ²⁴ Te Xítohó Jesucristú cuándaa-gá andiu núú ndécú Yá Ndiõxí cáháⁿ ndàhú-gá cuendá-ó, te Xítohó Jesucristú chí ñá díú ìⁿ vehe ní dácáá cuè téé ñuyú-a cuánguihu-gá. Te vehe Yá Ndiõxí sá ní dácáá cuè ñáyiú isràél ñuyú-a ndéé sanaha, ndihi nchaa nàcuáa ní xóo cada-güedé xití vehe-gá-áⁿ xíãⁿ cùtnùni iní-ó nàcuáa quide-xi núú ndécú-gã. ²⁵ Te dútú cùnùu núú ñáyiú isràél ní xóo quíhu-dé núú cuá núú cuá xití cuártú ní cuu íi víhí-gã-áⁿ, te ní xóo canehe-dé níñi ní xóo quíhu xití cuártú-áⁿ dico ñá díú níñi méé-dé. Dico Xítohó Jesucristú chí ñá túú dùcaⁿ ni quide-gá chí ìⁿ xito-ni ní sati níñi-gã te ní xihí-gá. ²⁶ Chí núu ni xihí-gá nuu núu te ndéé cùtnàhá ní ngáva ñuyú ducaⁿ ngüíta-gá cada-gá ní cùu, te vitna ta ndihi nduu cuáháⁿ ní quixi-gá ñuyú-a ní xihí-gá ìⁿ xito-ni cuendá cuu-gá dàtná ìⁿ táhú sá cúu-xí Yá Ndiõxí, te ducaⁿ ní quide-gá

cuendá sá vǎ cǔndècu-gá cuéchi ñáyiú núú Yǎ Ndiǒxí. ²⁷ Te nchoo cuè ñáyiú ñuyíú-a chi ìⁿ xito-ni cuú-ó te dàtnùní ducaⁿ te cada ndáá Yǎ Ndiǒxí cuéchi-o. ²⁸ Te ducaⁿ sǎtnahá-xi cùu Xítóhó Jesucristú chi ìⁿ xito-ni ní xíhí-gá cuendá sá vǎ cǔndècu-gá cuéchi ñáyiú núú Yǎ Ndiǒxí, te ducaⁿ ñi cuu ní xíhí-gá chi mee-gǎ ducaⁿ ñi cachí-gá cunduu. Te quixi tucu Xítóhó Jesucristú ñuyíú-a dico ñá díú-gǎ sá cáda-gǎ cuendá sá vǎ cǔndècu-gá cuéchi ñáyiú núú Yǎ Ndiǒxí, chi quixi-gá nacuaca-gá nchaa ñáyiú ndètu ñaha xii-gá cuendá cundecú-yu ndihi-gá ñi caa ñi quíhíⁿ.

10

¹ Te nchaa tnúhu ní xáhaⁿ ndíi Moisés xii ñáyiú isráel cada-yu, nchaa tnúhu-áⁿ ñi quide-xi ní cutnùní luha iní-yu nàcuáa cada Yǎ Ndiǒxí cada váha ñaha-gǎ xii-o vitna. Dico ñá díú mèi nacuáa ní xáhaⁿ ndíi Moisés xii ñáyiú quide Yǎ Ndiǒxí vitna chi dáma quide-gá. Te nchaa tnúhu ní cáháⁿ ndíi Moisés ñá túú ní ndàcu-xi cada-xi nacuáa cundáa nchaa ñáyiú túha ñaha xii Yǎ Ndiǒxí cuèi ní xóo cahni-güedé quiti ní xóo nduu táhú-gǎ núú cuía núú cuía. ² Te núu dícò sá ñi xóo cahni-güedé quiti ní xóo nduu táhú Yǎ Ndiǒxí ní quide-xi nacuáa nduu ndoo nduu nine iní cue ñáyiú, te vá cáhni-gǎ-güedé cue quiti-áⁿ nduu táhú-gǎ ní cùu, te ducaⁿ te cutnùní iní-yu sá ñá túú-gǎ cuéchi-yu ndècu núú Yǎ Ndiǒxí ní cùu. ³ Te sá dúcáⁿ ñi xóo cahni-güedé quiti ní xóo nduu táhú Yǎ Ndiǒxí núú cuía núú cuía, xiǎⁿ ní xóo ndacu iní cue ñáyiú nchaa sá cuéhé sá dúhá ñi xóo cada-yu. ⁴ Te ducaⁿ chi níhí ndicutu-áⁿ ndihi níhí chivá-áⁿ ñá túú ní xóo ndacu-xi cada-xi nàcuáa vá cǔndècu cuéchi-yu núú Yǎ Ndiǒxí.

⁵ Te xiǎⁿ núu cǔtnàhá ní quexiò Xítóhó Jesucristú ñuyíú-a ní

xáhaⁿ-gǎ xii Yǎ Ndiǒxí:

Yòhó Tǎtà-í, ñá túú ndùu vétú váha iní-n sǎ sǎhni-güedé quiti ndùu táhú-n,

te ni ñá túú ndùu vétú váha tucu iní-n cuendá nchaa dava-gá sá táxi-güedé ndúú táhú-n,

núu xiǎⁿ ní quide túha-n yiqui cuñú-í cuendá yúhú cuú-í te nduu táhú ñáhá-n xi-í.

⁶ Te ni ñá túú ndùu vétú váha iní-n cuendá quiti sǎhmi-güedé ndúú táhú-n te ni ñá túú ndùu vétú váha iní-n cuendá nchaa dava-gá sá táxi-güedé ndúú táhú-n cuendá sá vǎ cǔndècu-gá cuéchi ñáyiú núú-n.

⁷ Núu xiǎⁿ yúhú ní cachí-í xii yòhó Tǎtà-í Dútú Ndiǒxí sá yúhú véxi-í ñuyíú-a cada-í nchaa sá cuini-n cáda-í dàtná yódó tnùní cuendá-í núú tütú-n.

Duha ní xáhaⁿ Xítóhó Jesucristú xii Tǎtà-gǎ Dútú Ndiǒxí. ⁸ Te Xítóhó Jesucristú díhna-gá ní xii-gá Yǎ Ndiǒxí Yaá cúu Tǎtà-gǎ: “Yòhó Tǎtà-í ñá túú ndùu vétú váha iní-n cuendá quiti sǎhni-güedé ndúú táhú-n, ndihi cuendá quiti sǎhmi-güedé ndúú táhú tucu-n cuendá sá vǎ cǔndècu-gá cuéchi ñáyiú núú-n, ndihi cuendá nchaa dava-gá táhú sǎ táxi-güedé xii-n ñá túú ndùu vétú váha iní-n cuendá nchaa xiǎⁿ”, duha ní xáhaⁿ Xítóhó Jesucristú xii Tǎtà-gǎ Dútú Ndiǒxí. Te ducaⁿ ñi xáhaⁿ-gǎ cuèi núú tütú ndíi Moisés yódó tnùní sá dúcáⁿ cáda-güedé. ⁹ Te sáta dúcáⁿ te ní xáhaⁿ tucu-gá xii Tǎtà-gǎ Dútú Ndiǒxí: “Yòhó Tǎtà-í Dútú Ndiǒxí, mee-í véxi-í ñuyíú-a cuendá cada-í nchaa nàcuáa cuini-n”, duha ní xáhaⁿ-gǎ xii Tǎtà-gǎ. Te sá dúcáⁿ ñi cáháⁿ Xítóhó Jesucristú xiǎⁿ ní cutnùní sá ñá túú-gǎ xini ñuhu-xi ducaⁿ cada-güedé cahni-güedé nchaa quiti-áⁿ, te ducaⁿ chi mee Xítóhó Jesucristú ní xíhí-gá ní cuu-gá dàtná ìⁿ táhú sá cúu-xí Yǎ Ndiǒxí, te ducaⁿ ñi cuu chi ducaⁿ

tnàhí ní cachí Yă Ndiôxí cunduu.
 10 Te Xítohó Jesucristú ní quide-gá
 nàcuáa ní cuiní Yă Ndiôxí cada-gá,
 chi ní xíhí-gá núú cùrúxí chi ducaⁿ
 nĩ cuiní méé-gă cunduu, te ìⁿ
 xito-ni ní xíhí-gá sá cuendá nchaa
 ñâyiu, te cuendá xiăⁿ nõu ndècu
 yiñuhu-o núú-gă vitna.

11 Te cue dútú ñâyiu israél chi ìⁿ
 nduu ìⁿ nduu ní xóo cahni-güedé
 quiti ní xóo nduu táhú-gă, te ñá
 túú ní dâma-güedé nàcuáa ní xóo
 cada-güedé. Te nchaa sá nĩ xóo
 cada-güedé-áⁿ ñá túú ní quide-xi
 nacuáa vá cündècu-gă cuéchi ñâyiu
 núú Yă Ndiôxí. 12 Dico Xítohó Je-
 sucristú ní cachí-gá sá cúú cùú-gă,
 te ní xíhí-gá núú cùrúxí cuendá
 nchaa yíca cuéchi nchaa nchoo
 ñâyiu ndècu ñuyúú-a. Te sátá dúcáⁿ
 te dâtnúní ní ngóo-gá xio cùha Dútú
 Ndiôxí táxi tnùní-gă, te vá ìⁿ ndùu
 ìⁿ quíú-gă te cuú-gă. 13 Te ñiu-ni
 xiăⁿ cundecu-gá cundetú-gă ndéé
 sáá nduu cànehe nchaa sá cúú ùhú
 iní ñáhá xii-gă sá yiñuhu núú-gă.
 14 Te cuendá sá nĩ xíhí Xítohó Je-
 sucristú ìⁿ xito-ni xiăⁿ ní cuu-gă
 dàtná ìⁿ táhú sá cúú-xí Yă Ndiôxí,
 xiăⁿ ní quide-xi sá ncháá ñâyiu cùu
 cuendá-gă ñá túú-gă ná cumání-yu
 núú-gă ni caa ni quíhíⁿ. 15 Te mee
 Espiritú Yă Ndiôxí càháⁿ ndáá-xi
 nàcuáa ní cáháⁿ-gă cuendá-ó, te
 duha ní cáháⁿ-gă:

16 Sáá nduu te cada-í nchaa ñâyiu
 nàcuáa na càháⁿ-í-a,
 te cada-í nàcuáa cutnúní iní-yu
 tnúhu sá dánèhé-í-yu tnúhu
 sá cánùichi ñaha xii-yu
 nàcuáa cadá-yu cundecú-yu,
 te cada tucu-í sá tnĩ-yu nchaa
 tnúhu-áⁿ.

Duha ní cachí-gă. 17 Te ní cachí
 tucu-gă:

Te vá ìⁿ ndùu ìⁿ quíú-gă ndacu iní-í
 sá quidé sáá iní-yu tnúhu-í,

te ni vá ìⁿ ndùu ìⁿ quíú-gă te ndacu
 iní-í nchaa sá cuèhé sá dúhá
 quidé-yu.

Duha ní cáháⁿ Yă Ndiôxí càchí
 Espiritú-gă. 18 Te sá dúcáⁿ quide
 cahnu iní Yă Ndiôxí nchaa cuéchi-o,
 núú xiăⁿ ñá túú-gă xini ñuhu-xi cuú
 quiti nduu táhú-gă cuendá nchaa sá
 cuèhé sá dúhá quide-o.

*Tàú-ó sã tnàhá tnúhu-o ndìhi Yá
 Ndiôxí*

19 Te cue dútú nĩ xóo cunuu
 nõu ñâyiu israél cue téé-áⁿ nĩ xóo
 quíhu-güedé xiti cuártú ní cuu íí
 víhí-gă. Dico nchoo cuè ñâyiu
 ndècu ichi Xítohó Jesucristú vitna
 tàú-ó sã nĩ yuhu ni iní-ó tnàhá
 tnúhu-o ndìhi Yá Ndiôxí. Te cuu
 tnahá tnúhu-o ndìhi-gă chi Xítohó
 Jesucristú ní sati ñíhí-gă te ní
 xíhí-gá núú cùrúxí. 20 Te cada iní-ó
 sã dõó sã nĩ xíndedí nàcuáa ní xóo
 quíhu-güedé xiti cuártú ní cuu íí
 víhí-gă-áⁿ nĩ xócuíhí, te ducaⁿ càda
 iní-ó chi Xítohó Jesucristú ní xíhí-gă
 cuendá nchoo ñíhí-ó nàcuáa cada-o
 ngündecu váha-o sã cúú-xí-gă. 21 Te
 ñiu-gă cúú-gă Yaá cúú dútú-ó, te
 ñiu-gă cúú-gă Dútú cùnùu ndecu-gă
 núú ndécú Yă Ndiôxí. 22 Núu xiăⁿ
 xini ñuhu-xi sá ño tnahá tnúhu-o
 ndìhi Yá Ndiôxí, te vá cáni ìⁿ cani
 úú iní-ó, te ño váha quindáá iní-ó-gă
 chi ñiu-gă ní ndada ndoo ní ndada
 nine-gă iní-ó cuendá nchoo cùtnuní
 iní-ó sã ñá túú-gă cuéchi-o ndècu
 núú-gă. Te ní sandute-o cuendá sá
 dúcáⁿ nĩ nduu ndoo ní nduu nine
 iní-ó. 23 Te nchoo càháⁿ ndáá-ó
 sã ndécú ndìhi-o tnúhu ndee iní
 sá ndúú táhú-ó cündecu ndìhi-o Yă
 Ndiôxí, te xini ñuhu-xi sá vá dáñá
 ndéé-ó cànchicúⁿ nihnu-o tnúhu
 ndee iní-áⁿ chi Yá Ndiôxí cada-gă
 nàcuáa ní cachí-gă sá cúú-xí-ó. 24 Te
 xini ñuhu-xi cuhuⁿ iní tnáhá-ó te
 çhindee tnàha-o nacuáa ducaⁿ cùu
 iní tnáhá-gă-ó, te cada-o mēe-ni
 sá váha. 25 Te nchoo vá dáñá
 ndéé-ó nàtaçá-ó nõu dácuàha-o
 tnúhu Yă Ndiôxí, te vá cadá-ó dàtná
 xiquide davá-yu ñá túú-gă cuiní-yu
 quixí-yu núú dácuàha-o tnúhu-gă.
 Chi xini ñuhu-xi sá cuàha tnàha-o
 tnúhu ndee iní canchicúⁿ nihnu-o

ìchi-gá, te uuⁿ-gá ducaⁿ tàú-xi cada-o vitna ta cuyatni nduu quixi tucu Xítohó Jesucristú ñuyíu-a.

²⁶ Te cue ñáyi sa ní tecú tnùni nàcuáa càháⁿ tnúhu Yá Ndiòxí te núu na nguíta-yu ñucúuⁿ cadá-yu nándi sá cuèhé sá dúhá, te áuⁿ nã cuu ní xíhí Xítohó Jesucristú cuendá-yu, te ni vã yõ ñⁿ-gá cuú cuendá sá vã cùndècu-gá cuèchi-yu núú Yá Ndiòxí. ²⁷ Te núu ducaⁿ na cadá-yu nándi sá cuèhé sá dúhá, te ío quiyùhú iní-yu nàcuáa cada ñaha Yá Ndiòxí xii-yu. Chi nchaa ñáyi cùu úhú iní ñáhá xii-gá daquihíⁿ ñáhá-gã xii-yu núú ñùhú núú càyú núú ío ndohó-yu. ²⁸ Te nchaa ñáyi ní xóo daquèe tihú tnúhu ní càháⁿ ndí Moisés, te núu ndècu úú àdi úní ñáyi càháⁿ ndáá sá dúcáⁿ ní dáquée tihú-yu tnúhu ní càháⁿ ndí, te vã yõ ní xóo cundàhú iní ñáhá xii nchaa ñáyi ducaⁿ ní xóo cada chi ní xóo cahni ñaha-güedè. ²⁹ Te núu ducaⁿ ní ndoho cue ñáyi ducaⁿ ní dáquée tihú tnúhu ní càháⁿ ndí Moisés-áⁿ, te uuⁿ-gá ndoho cue ñáyi dàquee tihú ñáhá xii Xítohó Jesucristú Yá cúu Déhe Yá Ndiòxí ñu-ni ñáyi cächí sá ñã túú nándihi níñí-gã. Te níñí-gã-áⁿ ní sati, te ní xíhí-gá, te ducaⁿ ní cuu cuendá cada Yá Ndiòxí ingá núú sã vãha sá cúu-xí nchòo ñáyi ndècu ñuyíu-a dàtná ní cachí-gá cada-gá. Te ñu-ni cuendá níñí-gã-áⁿ ní nduu ndoo ní nduu nine iní cue ñáyi-áⁿ ní cùu, te ñu-ni ñáyi-áⁿ càháⁿ úhú-yu Espíritú Yá Ndiòxí sá chindèe chítúu ñaha xii-o. ³⁰ Te nchoo sã naha-o sã Yá Ndiòxí cächí-gá ñⁿ xichi núú tütú-gá: “Yúhú cada-í te nacháhu ñáyi nchaa sá quidè-yu, te duha càháⁿ-í chi nachinaa-í cuendá nchaa sá quidè-yu-áⁿ”, duha cächí-gá. Te sa ñaha tucu-o nacuáa càháⁿ-xi núú tütú-gá núú cächí-xi: “Yá Ndiòxí cada ndáá-gá cuendá nchaa sá quidè ñáyi cùu cuendá-gá”, duha cächí-xi núú

tütú-gá. ³¹ Te ío ndàhú ndoho cue ñáyi na dándoho ñaha Yá Ndiòxí, te ñu-gá cúu-gá Yá cúu nchaa nduu nchaa quíu!

³² Te chí dándacu iní nàcuáa ní quide-ndo cùtnàhá vitna cuu saa ní tecú tnùni-ndó tnúhu Yá Ndiòxí, chi dàvá-áⁿ ní quide càhnu iní-ndó cuèi nándi sá ní yáha-ndo cuendá-gá. ³³ Te dava-ndo ní quide úhú ñáhá ñáyi xii-ndo núú chítú núú tàcá, te nándi tnúhu cuèhé tnúhu duha ní xáhãⁿ-yu xii-ndo. Te dava-ndo ní cuyí-ni-ndo ní xindecu ndihi tnàha-ndo cuèi nándi ní ndoho dava-gá-ndó. ³⁴ Te ní cundàhú iní-ndó cuè ñáyi yíhi vecaá, te cuèi ní quendèe ñáyi sá ndécú ndihi-ndo dico ñã túú ní ndíhú iní-ndó chi ní cudí-ni iní-ndó. Te ducaⁿ ní quide-ndo chi sa ñaha-ndo sá ndúú tãhú-ndó sã ío-gá váha, te xíãⁿ cundecu ndihi-ndo ní caa ní quíhíⁿ. ³⁵ Te xíãⁿ vã dáñá ndèe-ndó quindáá iní-ndó nàcuáa ní cachí Yá Ndiòxí cada ñaha-gá xii-ndo, chi sáá nduu te ío váha cada ñaha-gã xii-ndo. ³⁶ Te nchòhó xini ñùhu-xi ío cada ndee iní-ndó cada-ndo nchaa nacuáa càháⁿ Yá Ndiòxí, te ducaⁿ te nduu tãhú-ndó sã ní cachí-gá nduu tãhú-ndó cundecu ndihi-ndo ní caa ní quíhíⁿ. ³⁷ Te Yá Ndiòxí cächí-gá núú tütú-gá:

Te cuyatni víi-nã nduu quixi Yá quixi ñuyíu-a, te vã cuyáa-gá.

³⁸ Te nchaa ñáyi cundáá núu-í ñã túú dàña ndeé-yu sàndáá iní ñáhã-yu xii-í,

te cuendá xíãⁿ cundecu-ni-yu ichi-í, dico núu na dàñá-yu ichi-í te vã cúu vãha iní-í núu-yu.

Duha cächí Yá Ndiòxí núú tütú-gá.

³⁹ Dico nchoo chi ñã túú cùu-o ñáyi ducaⁿ xiquide dàñá-ó ichi Yá Ndiòxí, chi cùu-o ñáyi nchícúⁿ ni-hnu-ni sàndáá iní-ó-gã, te sá dúcáⁿ te nduu tãhú-ó cundecu-o ndihi-gá ní caa ní quíhíⁿ, te ñã túú cùu-o ñáyi dàña nihnu ichi-gá te xíta nihnú-yu.

11

Ñáyiú sàndáá iní ñáhá xii Yá Ndiòxí

¹ Te núu sàndáá ndisa iní-ó Yá Ndiòxí te ducaⁿ cùtnuní ndáá iní-ó sá ñihí-ó sá cuení-ó núú-gá. Te núu sàndáá iní-ó-gá te ducaⁿ cùtnuní ndáá tucu iní-ó sá càháⁿ ndáá-gá cuendá nchaa sá ñà túú xini-ó. ² Te ducaⁿ ñi quide ñáyiú ñi xindecu ndéé sanaha ío ní sàndáá iní-yu Yá Ndiòxí te xiáⁿ núu ío váha ní cuu iní ñáhá-gá xii-yu.

³ Te núu nchoo sàndáá ndisa iní-ó Yá Ndiòxí te cùtnuní ndáá iní-ó sá sá cuendá tñuhu ní càháⁿ-gá ní cuáha andiu ndíhi ñuyíú-a. Te cùtnuní iní-ó sá ñà díú sá cuendá ñiⁿ sá túu ndèhe-o ío ñuyíú-a ní cuáha andiu ndíhi ñuyíú-a.

⁴ Te ndíi Àbél ío ní sàndáá iní ndíi Yá Ndiòxí núu xiáⁿ ío-gá ní cuu iní-gá sá ñi sáñaha ndíi ní nduu táhú-gá dàcúúxí sá ñi sáñaha ndíi Cáin xii-gá ní nduu táhú-gá. Te ndíi Àbél-áⁿ ñi cutnùní iní ndíi sá ñi cudíu ndíi núú Yá Ndiòxí cuendá sá ñi queheⁿ cuendá-gá sá ñi sáñaha ndíi ní nduu táhú-gá. Te cuéi ñà túú-gá ndíi ndècu ñuyíú-a dico yodo tñuní sá ñi sàndáá iní ndíi Yá Ndiòxí cuendá ducaⁿ càda-o canchicúⁿ ni-hnu-o.

⁵ Te té Ènóc téé ní xindecu ndéé sanaha ñà túú ní xihí-dé chi ní nacuaca ñaha túu Yá Ndiòxí xii-dé cuendá sá ñi sàndáá iní ñáhá-dé xii-gá. Te vá yoo ñi nànihí ñáhá xii-dé chi mee-gá ní nacuaca ñaha-gá xii-dé. Te núu tütú Yá Ndiòxí càchí-xi sá cùtnàhá vátá nàcuaca ñaha-gá xii té Ènóc, te ní quide-dé mee-ni nàcuáa ní cuu váha iní ñáhá-gá xii-dé. ⁶ Te nchaa ñáyiú ñà túú sàndáá iní ñáhá xii Yá Ndiòxí ñà ndácú-yu cadá-yu nàcuáa cudíú-yu núú-gá, chi nchaa ñáyiú cuení tuha ñaha xii-gá xini ñùhu-xi sá quindáá iní-yu sá ndécú-gá, te quindáá iní-yu sá núu na nducunihnu ñahá-yu xii-gá te cuáñaha-gá xii-yu sá ndúú táhú-yu.

⁷ Te Yá Ndiòxí ní dátùha-gá ndíi Nöé nchaa nàcuáa cada-gá. Te ní quide ndíi nchaa nàcuáa ní xáhaⁿ Yá Ndiòxí cada ndíi, te ní cadúha ndíi ñiⁿ bàrcú cuendá xití bàrcú-áⁿ quée ndíi ndíhi nchaa ñáyiú vehe ndíi cuendá cácu nihnú-yu. Te ducaⁿ ñi quide ndíi chi ní sàndáá iní ndíi Yá Ndiòxí. Te sá dúcáⁿ ñi sàndáá iní ndíi-áⁿ Yá Ndiòxí xiáⁿ ní cutnùní sá ncháá ñáyiú ío ndècu cuéchi-yu, chi ñà túú ní cànchicúⁿ nihnú-yu cadá-yu nàcuáa ní quide ndíi. Te sá dúcáⁿ ñi quide ndíi ní sàndáá iní ndíi Yá Ndiòxí xiáⁿ ío ní cundáá ndíi núú-gá.

⁸ Te Yá Ndiòxí ní xáhaⁿ-gá xii ndíi Àbrahám sá quée ndíi ñuú núú ndécú ndíi quíhíⁿ ndíi ingá xichi cundecu ndíi. Te ní quide ndíi nàcuáa ní xáhaⁿ Yá Ndiòxí chi ní quee ndíi cuáháⁿ ndíi núú cuáñaha Yá Ndiòxí cundecu ndíi. Te òré ní quee ndíi núú ndécú ndíi te ñà túú ní cùtnuní iní ndíi ndéé cúu núú cuáháⁿ ndíi cundecu ndíi. Te ducaⁿ ñi quide ndíi chi ní sàndáá iní ndíi Yá Ndiòxí. ⁹ Te sá dúcáⁿ ñi sàndáá iní ndíi Yá Ndiòxí núu xiáⁿ ní xindecu ndíi núú ñi sáñaha-gá cundecu ndíi, te cuéi ducaⁿ dico ñà túú ní quide ñuú ndíi xiáⁿ. Te ní xoo cundecu ndíi vehe cùtexínu vehe dóó. Te díu-ni ducaⁿ ñi quide ndíi Isáac ndíhi ndíi Jàcób chi tñahá cue ndíi-áⁿ ñi cachí Yá Ndiòxí sá ndúú táhú cue ndíi xiáⁿ cundecu cue ndíi. ¹⁰ Te ducaⁿ ñi quide ndíi Àbrahám chi ní xindecu ndíi ndéé ní sáa nduu nduu táhú ndíi cundecu ndíi núú ndécú Yá Ndiòxí. Te núú ndécú-gá-áⁿ cúu-xi ñuú ní cadúha mee-gá, te ñuú-áⁿ cudíi-xi ní caa ní quíhíⁿ.

¹¹ Te ndíi Sàrá, sa ní xidó cuíá ndíi sá cóo dèhe ndíi chi sa ní sahnu vihi ndíi, dico Yá Ndiòxí ní quide-gá te ní xoo ñiⁿ dèhe ndíi. Te ducaⁿ chi ní sàndáá iní ndíi Yá Ndiòxí te ní cutnùní ndáá iní ndíi sá cadá-gá nàcuáa ní xáhaⁿ-gá xii ndíi. ¹² Te cuéi ío ní sahnu ndíi Àbrahám ndíhi ñadíhí ndíi, ndíi Sàrá dico dacutíi

ní nduu táhũ-yu ní xóo ìⁿ déhe-yu. Te xí^an nũu ío cuéhé ndĩquíⁿ yáwá ndíi Àbrahám ní cáyá dàtná cuéhé chòdíní ndèé andiũ, ndíhi dàtná cuéhé ñuhu cúchí lámár, chí ní vǎ yóo ìⁿ ndacu cahu ñaha xii-yu sá cuèhè-yu.

¹³ Te cue ndíi-áⁿ ducaⁿ-ni ní sándáá iní cue ndíi Yá Ndiòxí ndéé ní sáá nduu ní xíhí cue ndíi. Te cue ndíi-áⁿ ñà túú ní ndùu táhú cue ndíi quini cue ndíi nchaa nàcuáa ní cachí Yá Ndiòxí cada-gá, dico ní cutnùní ndáá iní cue ndíi-áⁿ nàcuáa cada-gá núú cuaháⁿ núú vèxi. Te ío ní cudíi iní cue ndíi, te ní cachí cue ndíi sá dícó-ni ichi yáha cue ndíi ñuyíú-a, chí ñá díú ñuyíú-a cundecu ducaⁿ cuè ndíi. ¹⁴ Te sá dúcáⁿ ndùu tñuhu ní cáháⁿ cue ndíi-áⁿ, xí^an ní cutnùní sá cùiní cue ndíi íngá xichi núú cùndècu cue ndíi. ¹⁵ Te ní ñà díú ñúú núú ní quee cue ndíi ní cùiní cue ndíi nùhú cue ndíi. Chí núu ducaⁿ ní sàni iní cue ndíi te nùhú cue ndíi ní cùu. ¹⁶ Dico ñáhá chí cùiní cue ndíi quíhíⁿ cue ndíi ìⁿ xichi núú vǎha-gá cáá cùndecu cue ndíi. Te núú dúcáⁿ ío-gá vǎha càa-áⁿ cúú-xí ñúú núú ndécú Yá Ndiòxí, te sá dúcáⁿ ní sani iní cue ndíi xí^an nũu ío vǎha cùu iní Yá Ndiòxí cǎchí-gá sá ñà túú cùcahaⁿ núú-gǎ cúú-gǎ Ndiòxí cue ndíi-áⁿ, te cùtnuní iní-ó sǎ ndáá sá dúcáⁿ càháⁿ-gá chí ní quide túha-gá ìⁿ xichi núú cùndècu cue ndíi-áⁿ.

¹⁷ Te ndíi Àbrahám ní xíndecu ìⁿdi-ni déhe ndíi ndíhi ñadihí ndíi, te cùtnáhá ní xito ndéé ñáhá Yá Ndiòxí xii ndíi ní xícáⁿ-gá déhe ndíi, ndíi Isàác cuèndá nduu táhú ñáhá-gǎ xii ndíi. Te ní xáhaⁿ ndíi sá cúú ndùu táhú-gǎ déhe ndíi, te ducaⁿ ní quide ndíi chí ní sándáá iní ñáhá ndíi xii-gǎ. Te sa ndècu túha ndíi sá cuǎñaha ndíi déhe ndíi xii-gǎ cuèi mee Yá Ndiòxí ní xáhaⁿ ndáá-gǎ xii ndíi ¹⁸ sá sǎ cuèndá ndíi Isàác te ngúndecu cue ñani tnahá ndíi. ¹⁹ Te ducaⁿ ní quide ndíi Àbrahám, chí ní cutnùní ndáá iní ndíi sá Yá Ndiòxí ndácú-gǎ

dándòto-gǎ cuèi ñáyiũ sa ní xíhí. Te sá dúcáⁿ ní xáhaⁿ ndíi xii Yá Ndiòxí sá cúú ndùu táhú-gǎ déhe ndíi, te xí^an cada iní-ó sǎ sá ní xíhí ndíi Isàác te ní ndoto tucu ndíi ní nucúndecu ndíi ndíhi tátá ndíi, ndíi Àbrahám.

²⁰ Te ndíi Isàác ní xícáⁿ táhú ndíi núú Yá Ndiòxí cuèndá sá cádá vǎha-gǎ cue déhe ndíi, ndíi Jácób ndíhi ndíi Esàú núú cuaháⁿ núú vèxi. Te ducaⁿ ní quide ndíi chí ní sándáá iní ndíi Yá Ndiòxí. ²¹ Te sa ta cùyatni-nǎ nduu cùú ndíi Jácób, te ní xícáⁿ táhú ndíi núú Yá Ndiòxí cuèndá cue déhe ñani ndíi déhe ndíi Chèé. Te yituu-ná ndíi tatnu ndíi ní chiñuhu ndíi Yá Ndiòxí. Te ducaⁿ ní quide ndíi chí ní sándáá iní ñáhá ndíi xii-gǎ. ²² Te cùtnáhá sa ta cùyatni vii-nǎ nduu cùú ndíi Chèé, te ní cachí ndíi sá cuè ñáyiũ isràèl sáá nduu quèé-yu núú xíndecú-yu-áⁿ. Te ní cáháⁿ tucu ndíi nàcuáa cada-yu yiqui cùñú ndíi na sáá nduu quèé-yu núú ndécú-yu-áⁿ. Te ducaⁿ ní quide ndíi chí ní sándáá iní ndíi Yá Ndiòxí.

²³ Te cùtnáhá ní cacu ndíi Moisés te ní chiváha ñaha nǎnǎ ndíi ndíhi tátá ndíi úní yóó. Te ducaⁿ ní quide cue ndíi-áⁿ chí ní sándáá iní cue ndíi Yá Ndiòxí. Te ní quide cuèndá cue ndíi-áⁿ sǎ ío vǎha càa ndíi Moisés déhe cue ndíi, te ñà túú ní yuhú cue ndíi nàcuáa ní cáháⁿ téé cùu Faraón sá cáhni-dè cue landú. ²⁴ Te sáta ní sahnu ndíi Moisés te duuⁿ duuⁿ ní cachí ndíi sá vǎ càháⁿ ñáyiũ sá déhe yoco téé cùu Faraón cúú nǎnǎ ndíi. Te ducaⁿ ní quide ndíi chí ní sándáá iní ndíi Yá Ndiòxí. ²⁵ Te ducaⁿ ní quide tucu ndíi chí ní tnahá-gǎ iní ndíi ndoho ndíi ndíhi nchaa ñáyiũ cùu cuèndá Yá Ndiòxí dàcúúxí sǎ cùdíi iní ndíi cundecu tnaa ndíi ichi cuéhé ichi duha. ²⁶ Chí ní sani iní ndíi sá vǎha-gǎ ndoho ndíi cúcuéhé ñáhá cuè ñáyiũ xii ndíi sá cuèndá Yá quixi ñuyíú-a dàcúúxí sǎ cùndècu ndíhi ndíi nchaa sá ío Ègiptú. Te ducaⁿ ní quide ndíi chí ní xúhuⁿ iní ndíi sá Yá Ndiòxí cuǎñaha-gǎ sá

ndúú tǎhú ndíi. ²⁷ Te ndíi Moisés ní quee ndíi nàcióⁿ Ègíptú te ñá túú ní quide cuendá ndíi sá ïo cùdéeⁿ tée cùu Faraón núú ndíi. Te ducaⁿ ñi quide ndíi chi ní sándáá iní ndíi Yá Ndiòxí. Te ní quide càhnu iní ndíi cuendá nchaa sá ñi yáha ndíi, te ní quide iní ndíi sá Yá Ndiòxí ndécú ndíi ñaha túu-gá xii ndíi cuèi ñá túú ní xini núú ñáhá ndíi xii-gá. Te ducaⁿ ñi sani iní ndíi chi Yá Ndiòxí ndécú ndíi ñaha-gá xii ndíi.

²⁸ Te ndíi Moisés cúú ndíi tée ní tausaha ñi quide vico pàscuá ndíi cue ñáyiú isràél, te dàvâ-áⁿ ñi táuchíúⁿ ndíi ní sahní-yu mbéé te ñííⁿ quiti-áⁿ ñi dácánúú-yu yuyèhé-yu. Te ducaⁿ ñi quide ndíi chi ní sándáá iní ndíi Yá Ndiòxí. Te ducaⁿ ñi quide tucu ndíi cuendá sá espíritú sá ñi tendaha Yá Ndiòxí cahni-xi mee-ni dèhe tée dèhe díhna cue ñáyiú Ègíptú, te vá cáhni-xí ñi ñⁿ dèhe cue ñáyiú isràél. ²⁹ Te ndute làmár sá nání Mǎr Tícuèhé ní queé dava-xi ní natúu ñuhu yìchí ní ñíí ñi yáha cue ñáyiú isràél. Te ducaⁿ ñi cuu chi ní sándáá iní-yu Yá Ndiòxí. Te cue tée Ègíptú tñahá-güedé nchíúⁿ-güedé cuaháⁿ dico ñá túú ní ndàcu-güedé yáha-güedé chi ní ndíi-güedé ní cáhá.

³⁰ Te cue ñáyiú isràél ní dúcúⁿ ndéé-yu úsá nduu ñuú Jericó te ní ngoyo nchaa sá ñúðoco. Te ducaⁿ ñi cuu chi ní sándáá iní-yu Yá Ndiòxí. ³¹ Te ñⁿ ñaha ní xíndecu ichi díí iní ní xínani-aⁿ Ràháb, ñaha-áⁿ ñà túú ní xíhí-aⁿ dàtná ní xíhí nchaa ñáyiú ío ní cuu sáá iní-xi núú Yá Ndiòxí, chi ní cuu váha iní-aⁿ núú cuè tée ní tendaha cuè ñáyiú isràél ní sángoto dayuhu ñúú-aⁿ. Te ducaⁿ ñi quide-aⁿ chi ní sándáá iní-aⁿ Yá Ndiòxí.

³² Te núu dícó sá cúú te cáháⁿ-í cuendá ndíi Gedéón, ndíi cuendá ndíi Bàràc, ndíi cuendá ndíi Sànsón, ndíi cuendá ndíi Jèté, ndíi cuendá ndíi Dàvíí, ndíi cuendá ndíi Sàmúél, ndíi cuendá

nchaa cue tée ní xóo cáháⁿ tñuhu Yá Ndiòxí ndéé sanaha, te nchaa cuendá cue tée-áⁿ cáháⁿ-í te núu dícó cùyáchí-í dico ñá túú cùyáchí-í. ³³ Te nchaa cue ndíi-áⁿ ñi sándáá iní cue ndíi Yá Ndiòxí núu xíáⁿ ní xóo ndacu cue ndíi ní xóo náá cue ndíi ndíi nchaa ñáyiú dava-gá ñuú. Te nchaa ñáyiú-áⁿ ñà túú ní xóo ndacú-yu nàá-yu ndíi cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiòxí xii cue ndíi dàtná ní cachí-gá cada ñaha-gá xii cue ndíi. Te cuèi nchaa cue quiti dééⁿ ñà túú ní ndàcu-güedé ná cada ñaha-güedé xii cue ndíi. ³⁴ Te ní xóo ndacu cue ndíi ní xóo ndahvá cue ndíi ñuhú sá vá yóo tñahí ndàcu ndahvá, te ní cácu cue ndíi vá yóo ní ndàcu cahni ñaha xii cue ndíi. Te cue ndíi-áⁿ ñà túú ñíhí ndéé cuè ndíi ní cùu, dico ní ñíhí ndéé cuè ndíi chi Yá Ndiòxí ní chindee ñaha-gá xii cue ndíi, te nchaa ndíi-áⁿ ïo ní ñíhí ndéé cuè ndíi ní nàá cue ndíi ndíi nchaa ñáyiú ní cuu úhú iní ñáhá xii cue ndíi, te nchaa ñáyiú ducaⁿ ñi xóo nàá ndíi cue ndíi-áⁿ ñà túú ní xóo ndacú-yu nàá ndíi ñáhá-yu xii cue ndíi chi ní xóo cunú-yu. Te ducaⁿ ñi cuu chi ní sándáá iní cue ndíi Yá Ndiòxí. ³⁵ Te dava ñáyiú díhí ní nduu tǎhú-yu ní ndoto cue ñáyiú ní xíndecu ndíi-yu ní nucúndecu ndíi ñaha tucú-yu.

Te dava ñáyiú ío ní dándóhó ñaha tñaha ñáyiú-yu te ní xíhí-yu, dico ñá túú ní dàñá-yu ichi váha nàcuáa cácu ñíhí-yu núú tñaha ñáyiú-yu, te ducaⁿ chi ní cuini-yu sá ndótó-yu ndéé cuèé-gá nàcuáa ngúndecu váha-yu núú ndécú Yá Ndiòxí. ³⁶ Te dava cue ndíi ío ní ndoho cue ndíi chi ío ní cudíquí ndéé ñáhá ñáyiú xii cue ndíi, te ní caníhá-yu xii cue ndíi, te dava cue ndíi ní dácútú ñáhá-yu, te ní chihi ñáhá-yu xii cue ndíi veçaá. ³⁷ Te dava cue ndíi ní sahní ñáhá-yu ndíi yúú. Te dava cue ndíi ní chidava ndáá ñáhá-yu ní xehndé ñáhá-yu ndíi sièrrá. Te dava cue ndíi ní xito ndéé

ñahá-yu te núu ndisa sá sándáá iní cue ndíi Yá Ndiöxí, te dava cue ndíi ní sahani ñahá-yu ndíhi machití. Te mee-ni ñíi mbéé ndíhi ñíi chivá, ní xóo cuu dóo cue ndíi. Te mee-ni ñíi cue quití-áⁿ ní xóo cuu dóo cue ndíi cuéi ndéni ní cuu ní xóo caça cuu cue ndíi. Te mee-ni cuéi tée ndàhú ní cuu cue ndíi. Te ío ní xóo dandihú-yu iní cue ndíi, te nándi sá ní xóo cada ñahá-yu xii cue ndíi ní xóo dandòho ñahá-yu. ³⁸ Te cue ndíi-áⁿ ïo-gá ní xínduu váha iní cue ndíi dàcúúxí nchàa dava-gá ñáyiu. Te nchaa cue ndíi-áⁿ ní xica cuu cue ndíi cuéi nchaa núu ñà túú vâ yôo tnàhí ndècu, te cuéi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndéni ní cuu nchíi yaú ní xóo cundecu cue ndíi. ³⁹ Te ío ní cudíu cue ndíi núú Yá Ndiöxí cuèndá sá ní sándáá iní ñahá cuè ndíi xii-gá. Te cuéi ducaⁿ ní quide cue ndíi dico ñà túú ní xini cue ndíi nchaa sá ní cachí Yá Ndiöxí cada-gá. ⁴⁰ Te ducaⁿ ní cuu chi ñⁿ sá ïo-gá váha ní cachí Yá Ndiöxí cada-gá. Te sá dúcáⁿ ïo-gá váha ní cachí-gá cada-gá cúu-xí cuèndá nchoo ndíhi cuèndá cue ndíi-áⁿ cuèndá sá ñà díú mèe-ni cue ndíi-áⁿ cundáá cue ndíi núú-gá, chi tnàhá nchoo cundáá-ó núú-gá.

12

Ío cuhuⁿ iní-ó Xitohó Jesucristú

¹ Te cue ñáyiu ní xíndecu ndéé sanaha ní quide-yu nàcuáa ní cutnúni sá ní sándáá iní-yu Yá Ndiöxí. Te cada iní-ó sá ncháá ñáyiu-áⁿ xíndéhé ñahá-yu xii-o vitna. Núu xiáⁿ xini ñuhu-xi sá vâ cáda-ó ní ñⁿ sá cuèhé sá dúhá chi diu nchaa xiáⁿ quide-xí ñà túú cundáá-ó núú Yá Ndiöxí. Te vâ cáda cuèndá-ó nchàa sá quidé tnèñu iní-ó nàcuáa ndacu-o càda-o nchaa nacuáa càháⁿ-gá. Te ío càhnu cunduu iní-ó càncicúⁿ nihnu-o càda-o nchaa nacuáa ní cachí-gá cada-o cundecu-o ñuyúú-a. ² Te ío cuhuⁿ iní-ó Xitohó Jesucristú, chi

diu-gá ní quide ní sándáá iní-ó Yá Ndiöxí, te diu-ni ducaⁿ quide-gá cuéi vitna te cuéi ndéé núu cuàháⁿ núú vèxi diu-ni ducaⁿ càda-gá sá quíndáá iní-ó Yá Ndiöxí. Te Xitohó Jesucristú ío ní quide ndee iní-gá ní ndoho-gá te ní xihí-gá núú cùrúxí, te ñà túú ní quide cuendá-gá cuéi ñⁿ sácáⁿ núú cúú-xí sá dúcáⁿ ní ndoho-gá. Te ducaⁿ ní quide-gá chi sa nàha-gá sá ná yàha sá dúcáⁿ ndòho-gá te ío cudíi iní-gá. Te vitna núcóo-gá xio cùha núú núcóo Yá Ndiöxí te tàxi tnuní-gá.

³ Te xini ñuhu-xi sá ïo cada cuèndá-ndó nàcuáa ní quide Xitohó Jesucristú chi Yaá-áⁿ ío ní quide càhnu iní-gá nchaa sá ní ndoho-gá ní quide ñaha nchàa ñáyiu ndècu ichi cuehé ichi duha xii-gá. Te ducaⁿ càda cuendá-ndó nàcuáa ní quide-gá cuèndá sá vâ túu dusaⁿ-ndo, te ni vâ nátùhú iní-ndó càda-ndo nchaa nacuáa càháⁿ-gá.

⁴ Te nchòhó dáquèe tihú-ndó nchàa sá cuèhé sá dúhá dico vátá càhni ñaha-gá-yu xii-ndo sá dúcáⁿ quide-ndo. ⁵ Te ndacu iní-ndó nàcuáa càháⁿ Tàtá-ó Dütú Ndiöxí dásàhú ñahá-gá xii nchoo cuè ñáyiu cùu déhe-gá. Te duha càchí-gá núú tütú-gá:

Nchòhó cue déhe mee-í, vâ cáni iní-ndó sá àuⁿ nâ cuu dândoho ñaha-í xii-ndo, te ni vâ nátùhú iní-ndó òré càháⁿ-í dòho-ndo nàcuáa cada-ndo cundecu-ndo.

⁶ Chi mee-í dándòho-í nchaa ñáyiu cùu iní-í cuèndá sá cundáá-yu núú-í, te quide úhú-í-yu, te diu-ni-yu cúu-yu ñáyiu càchí-í cúú déhe-í.

Duha càchí-gá núú tütú-gá. ⁷ Te ío cada ndee iní-ndó sá dúcáⁿ dândoho ñaha Yá Ndiöxí xii-ndo, chi quide-gá sá cúu-gá Tàtá-ó. Te ñà túú ní ñⁿ tée cùu tátá te cachí-ó sá ñà túú sànu ichi-dé cue déhe-dé nàcuáa tàú-xi cunduu. ⁸ Te núu Yá Ndiöxí ñà túú dândoho ñaha-gá xii-ndo dàtná dándòho-gá cue ñáyiu càchí-gá cúú

dêhe-gá, te ñá díú dêhe mee-gă cúu-ndó te núu ducaⁿ, chi cùu-ndo datná cue ñáyiú ñá túú cùtnuní yoo cùu tátá-xi. ⁹ Te nchoo sá naha-o sá cùtnàhá ní cuu landú-ó ní sanu ichi ñaha tátá-ó nàcuáa taú-xi cunduú, te ducaⁿ ní xóo canehe-o sá yíñùhu núú-güedě te diu-ni ducaⁿ nèhe-o sá yíñùhu núú-güedě vitna. Te núu ducaⁿ ní sándáa iní-ó tátá-ó, te ío-gá xíní ñùhu-xi quíndáa iní-ó Tátá-ó Dütú Ndiöxi cuendá ducaⁿ ndüu táhú-ó cùndecu-o ndihi-gá ni caa ni quíhíⁿ, chi diu-gá cúu-gă Yaá ní chihi iní-ó. ¹⁰ Te cùtnàhá ní cuu landú-ó, ñá túú títí ndüu ni càniha tátá-ó ní sanu ichi ñaha-güedě xii-o nàcuáa ní cuu iní méé-güedě. Te Yá Ndiöxi ducaⁿ dândoho ñaha-gá xii-o sànu ichi ñaha-gá cuendá cúu-xí sã vâha sá cúu-xí-ó, te ducaⁿ quide-gá cuendá nchoo cada ndáá-ó datná quidě mée-gá. ¹¹ Te òré véxi ìⁿ tnúndòho sá cúu-xí-ó te ñá túú cùdí iní-ó chi dândihú iní ñáhá-xí xii-o. Te nchaa ñáyiú ngúnu ichi sá cuendá nchaa tnúndòho-án te ngüíta-yu quide ndáa-yu, te ío vâha cùu iní-yu ndécú-yu.

Vá dáquèe tihú-ó tnùhu Yá Ndiöxi

¹² Te núu xíáⁿ ío chí ndúcú ndèe-gá canchicúⁿ nihnu-ndo ichi Xítohó Jesucristú, te vá dicó yica cùu iní-ndó càncicúⁿ nihnu-ndo ichi-gá. ¹³ Te cada vâha-ndo cùndecu-ndo ichi-gá cuendá nchaa ñáyiú sàni ìⁿ saní úú iní-xí níhí ndě-yu cundecú-yu ichi-gá te vá ná tñhú iní-yu canchicúⁿ nihnú-yu.

¹⁴ Te nducu-ndo nàcuáa cada-ndo cùndecu vâha-ndo ndihi cue tñaha ñáyiú-ndo, te ío cada vâha-ndo cùndecu-ndo nacuáa cundáa-ndó núú Yá Ndiöxi chí núu vá dúcáⁿ càda-ndo te vá ndúú táhú-ndó cùndecu-ndo ndihi-gá. ¹⁵ Te ío vâha cada cuendá-ndó nàcuáa cada-ndo cùndecu-ndo, chi núu ñáhá te vá chíndèe ñaha-gá Yá Ndiöxi xii-ndo. Te ío vâha cada cuendá tucu-ndo nàcuáa cùndecu-ndo vá cání cuèhé iní-ndó cuendá Yá Ndiöxi, chí núu ducaⁿ na càda-ndo te dava-gă ñáyiú

ndècu ndihi-ndo ichi-gá tñahá-yu ngüíta-yu ducaⁿ càda-yu, te vá cùndecu vâha-gá-ndó ndihí-yu ichi-gá. ¹⁶ Te cada cuendá tucu-ndo sã vã cùndecu-ndo ichi díí iní, te ní vã dáquèe tihú-ndó ní ìⁿ sá cúu cuendá Yá Ndiöxi datná ní quide ndíi Esàú, chí sá cuñaha tátá ndíi-án ndüu táhú ndíi ní cùu ní dama ndíi ìⁿ cóhó comidá. ¹⁷ Te nchòhó sa naha-ndo sá cùtnàhá ní cuíni ndíi Esàú cácáⁿ táhú tátá ndíi núú Yá Ndiöxi cuendá nchaa sá ndúú táhú ndíi ní cùu, te ñá túú ní xicáⁿ táhú tátá ndíi núú Yá Ndiöxi nàcuáa cuíni méé ndíi ní cùu. Te ní ndáhyú víhí ndíi, te cuèi ducaⁿ ní quide ndíi dico ñá túú ní ndàcu-gá ndíi nànhí ndíi táhú sã ní dama ndíi comidá.

¹⁸ Te cue ñáyiú isràel ní sátuhá-yu ìⁿ yucu núu càyú ñuhú, te nchòhó ñá túú ndèe ducaⁿ sàháⁿ tuha-ndo ìⁿ yucu núu càyú ñuhú datná ní quide cue ñáyiú-án. Te cùtnàhá ducaⁿ ní sátuhá-yu yucu-án te ní cunee víhi níhí yucu-án, te ní quene táchí níhi. ¹⁹ Te ní tecú dóho-yu ní cáháⁿ ìⁿ cútú, te ní tecú tucu dóho-yu ní cáháⁿ Yá Ndiöxi ní cáháⁿ ndihi ñaha-gă xii-yu. Te nchaa ñáyiú ní tecú dóho-xi ní cáháⁿ-gá te ní cuíni-yu sá vã cáháⁿ-gá. ²⁰ Te ducaⁿ ní quidè-yu chí ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ìⁿ quití nà yáha xití yucu-a, te cahni-ndo-di ndihi yúú àdi ndihi ìⁿ yutnu puyá”, duha ní cachí-gá. ²¹ Te sá dúcáⁿ ní quide-xi ní xíní-yu xíáⁿ ío ní dáyuhú ñáhá-xí xii-yu. Te tñahá té Moisés ní yùhú-dé, te ní cachí-dé: “Quídi ñaha-xi xii-í sá yùhú-í”, duha ní cachí-dé.

²² Te nchòhó, ñá túú quide-ndo datná ní quide cue ñáyiú-án ní sàháⁿ tuhá-yu yucu-án, dico cada iní-ndó sã sã ní tuha-ndo yucu Sión sá ndécú núú ndécú Yá Ndiöxi, ndihi ñuú-gá ñuú Jerusalén sá cáá àndüu te diu-gă cúu-gă Yaá ndécú nchaa

nduu nchaa quíú. Te ñiu-ni xiáⁿ xĩndecu cuéhé víhí cuè espíritú xínú cuèchi núú-gá²³ chíñùhu ñaha-xi xii-gá. Te nchòhó cúú-ndó cuè ñáiyu cùu cuendá Yá Ndióxi, te ní tnahá tnùhu-ndo ndìhi nchaa dava-gá ñáiyu cùu cuendá-gá, ñáiyu yòdo tnuní núú tütú-gá ndécú àndiu, te ñiu-ni ñáiyu-áⁿ cuáñaha-gá xii-yu sá ndúú tãhù-yu. Te nchòhó ní tuha-ndo Yá Ndióxi Yaá cada ndáá yicá cuèchi nchaa ñáiyu. Te cada iní-ndó sá ní tnahá tnùhu-ndo ndìhi cue ñáiyu ní quide ndáá ní xĩndecu ichi Yá Ndióxi ñuyiú-a. Te ñáiyu-áⁿ ñà túú tnahí-gá ná cúmãni-yu vitna ndécú-yu núú-gá.²⁴ Te ní tnahá tnùhu-ndo ndìhi Xitohó Jesucristú Yaá ní quide nàcuáa cada Yá Ndióxi ingá núú sá vãha sá cúú-xi nchaa nchoo ñáiyu ndècu ñuyiú-a, chi ní sati níñi-gá te ní xihí-gá núú cùrúxi. Te níñi Xitohó Jesucristú ñà túú ñⁿ-ni cuu-xi ndìhi níñi ndí Àbél, chi ñiu cuendá níñi-gá-áⁿ ní quide càhnu iní Yá Ndióxi nchaa cuèchi-o.

²⁵ Núú xiáⁿ ío cada cuendá-ndó vã dáquèe tihú-ndó tnùhu càháⁿ Yá Ndióxi, chi nchaa ñáiyu ní xĩndecu ndéé sanaha ñucaⁿ ní quidé-yu ní dáquéé tihù-yu tnùhu ní càháⁿ-gá ñuyiú-a sá cúú-xi-yu. Te ñà túú ní càcu-yu chi ní nacháhu-yu sá dúcáⁿ ní quidé-yu. Te uuⁿ-gá tucu nchoo chí vã càcu-o te núú ducaⁿ na dàquee tihú-ó tnùhu càháⁿ Yá Ndióxi ndéé àndiu sá cúú-xi-ó.²⁶ Te cùtnhá ní càháⁿ Yá Ndióxi ndéé sanaha te ní quidi-xi ñuyiú. Te vitna càchí-gá: “Yúhú quidi tucu-í ingá xito ñuyiú, te ñà díú mèe-ni ñuyiú ducaⁿ quidi-í chi tnahá àndiu quidi-í”, càchí-gá.²⁷ Te sá dúcáⁿ càháⁿ-gá sá ingá xito tucu ducaⁿ càda-gá xiáⁿ cùtnuní sá ncháàndi tihú sá tũu ndèhe-o danaa-gá. Te nchaa sá ñà túú ndèè tũu quiní-ó ñuyiú-a xiáⁿ vã quidi-xi te ní vã náá-xi.²⁸ Te núú ní cachí Yá

Ndióxi nduu tãhú-ó cùndecu-o chi mee-gá táxi tnuní-gá xiáⁿ, te ní vã quidi-xi te ní vã náá-xi. Te xiáⁿ ío xini ñuhu-xi ndacáⁿ tãhú-ó núú-gá, te yĩñùhu yĩñùhu cunu cuechi-o núú-gá nàcuáa cuu vãha iní-gá, te ducaⁿ cùhuⁿ iní-ó sã ío càhnu cuu-gá.²⁹ Te Tãtá-ó Dütú Ndióxi cúú-gá dàtná ñⁿ ñuhú chi danàa-gá nchaa sá ñà túú quide nacuáa cuu vãha iní-gá.

13

Nàcuáa tãu-xi cada-o cuendá cuu vãha iní Yá Ndióxi

¹ Te nchaa nchòhó ñáiyu ndècu ichi Xitohó Jesucristú, vã dáñá ndéé-ndó cùu iní tnahá-ndó nàcuáa ndècu-ndo ichi-gá.² Te cunaha-ndo sá nũu lò ñáiyu ñùhu ichi ní quexió-yu vehe-ndo te cuáñaha-ndo vèhe ndetatú-yu, te cuáñaha-ndo sá cáxi-yu. Chi dáva-yu ndéé espíritú xínú cuèchi núú Yá Ndióxi ní sáháⁿ vehé-yu ní queheⁿ cuendá-yu te ñà túú ní cùtnuní iní-yu sá díú espíritú xínú cuèchi núú-gá cúú-xi.

³ Te ndacu tucu iní-ndó cuè ñáiyu xixihi vecaá, te cada iní-ndó sá tnahá-ndó yihí-ndo vecaá ndihí-yu. Te ndacu tucu iní-ndó nchaa ñáiyu ío ndòho, te cada iní-ndó sá tnahá-ndó ndòho-ndo ndihí-yu.

⁴ Te nchaa ñáiyu na càchí-yu sá ñⁿ sá vãha cùu-xi sá ñⁿ téé ndìhi ñⁿ ñadihí ná nihí tnahá-yu candeca tnahá-yu. Te nchòhó cue téé vã cáni iní-ndó càháⁿ ndihí-ndo ñadihí te núú ñà díú ñadihí-ndó cúú-yu. Te ducaⁿ-ni nchòhó cue ñáiyu ñihí tucu vã cáni iní-ndó càháⁿ ndihí-ndo tée te núú ñà díú yihí-ndo cuu-güedé, chi Yá Ndióxi dandòho-gá nchaa ñáiyu ndècu ichi díú iní.

⁵ Te vã cùhúⁿ iní-ndó mèe-ni díhúⁿ. Te núú nãndi cùu nchaa sá ndécú ndihí-ndo te ñiu-ni nchaa xiáⁿ sa nduu vétu iní-ndó, chi Yá Ndióxi ní cachí-gá: “Ní ñⁿ nduu vã dáñá nihnu ñaha-í xii-ndo, chi

nchaa-ni nduu chindee ñàha-í", duha ní cachí-gá. ⁶ Te xiáⁿ nõu nchoo nì yuhu ni iní-ó cáháⁿ-ó ñⁿ ñⁿ-o, te cachí-ó:

Yá Ndiõxí cúú-gã Yaá chíndèe ñaha xii-í,
núu xiáⁿ ñá túú yùhú-í cuéi nándi cáháⁿ ñáyiú cada ñàhá-yu xii-í.

Duha cachí-ó.

⁷ Chíndácú iní cue téé ní sanu ichi ñaha xii-ndo ichi Xítoho Jesucristú cue téé ní cáháⁿ tnúhu Yá Ndiõxí núú-ndó, te ío váha chí nácuáha cuendá nácuáa ní quide nchaa cue téé-áⁿ ñí xíndecu-güedé ndéé ní sáá nduu ní xihí-güedé. Te ío quindáá iní-ndó Yá Ndiõxí dátá ní xóo cada cue téé-áⁿ.

⁸ Te dátá-ni ní quide Xítoho Jesucristú ndéé sanaha diu-ni ducaⁿ quide-gá vitna, te diu-ni ducaⁿ càda-gá ndéé núú cuáháⁿ núú vëxi. ⁹ Te vá dáñá-ndó mée-ndo dandahú ñáhá ñáyiú dacáháⁿ ñáhá xii-ndo natuha-ndo ingá ichi, ñáyiú dānehé tnàha ñáyiú-xi nándi sá ñí cutúha-yu, te nchaa xiáⁿ ñá túú ñⁿ-ni cáháⁿ-xi ndihi tnúhu sá ndécú ndihi-ndo. Te Yá Ndiõxí chíndèe ñaha-gá xii-o nácuáa níhí ndéé-ó cūndecu-o ichi-gá, te ducaⁿ te cuu-xi sá vāha sá cúú-xí-ó, te ñá díú cuendá ñⁿ sá xéxi-ó ñihí ndéé-ó ndecu-o ichi-gá. Te dava ñáyiú cachí-yu sá dává nõu comidá cuu caxi-o te dava ñáhá nácuáa níhí ndéé-ó cūndecu-o ichi-gá, dico ñá ndáá sá sá dúcáⁿ vā caxí-ó nchaa nõu comidá níhí ndéé-ó cūndecu-o ichi-gá.

¹⁰ Chi Xítoho Jesucristú ní xihí-gá cuendá-ó nõu cùrúxí, te nchaa ñáyiú nchìcúⁿ nihnu-ni quide nchaa nacuaa ní quide nchaa dútú ñí xinu cuechi nõú Yá Ndiõxí ndéé sanaha, ñáyiú-áⁿ vā cúú tnàhá tnúhu-yu ndihi Xítoho Jesucristú Yaá ní xihí núú cùrúxí sá dúcáⁿ quidé-yu. ¹¹ Chi dútú cúnúu-gá ní xíndecu ndihi cue ñáyiú israhél, téé-áⁿ ñí xóo canehe-dé níhí nchaa quiti ní xóo cahni-dé ní xóo quihu

ndéé xití cuartú ní cuu íí-gã. Te ducaⁿ ñí xóo cada dútú-áⁿ cuendá cada cahnu iní Yá Ndiõxí nchaa yicá cuéchi ñáyiú, te cuñú nchaa quiti-áⁿ ñí xóo cahmi-güedé ñⁿ xio yuhu nõú. ¹² Te ducaⁿ ñí yáha Xítoho Jesucristú chi ndéé ñⁿ xio yuhu nõú ní sahi ñaha-güedé xii-gá. Te cuendá níhí-gã sá ñí sati núú cùrúxí núú ñí xihí-gá, ní nduu ndoo ní nduu nine iní cue ñáyiú sándáá iní ñáhá xii-gá. ¹³ Te vitna chí ná túha-o Xítoho Jesucristú te cada ndee iní-ó ndòho-o dátá ní ndòho-gá. ¹⁴ Te ñuyú-a ni ñⁿ xichi ñá túú ndéé cáá ñⁿ nõú cudíi ni caa ni quihíⁿ cuendá cūndecu-o, dico ducaⁿ-ni nõú iní-ó ñⁿ xichi núú ndúú tãhú-ó cūndecu-o ni caa ni quihíⁿ.

¹⁵ Te núu xiáⁿ xini nõuhu-xi sá vá dáñá ndéé-ó chíñuhu-o Dútú Ndiõxí chí Xítoho Jesucristú ní quide-gá nácuáa ndacu-o tnàhá tnúhu-o ndihi Yá Ndiõxí, te òré cáháⁿ ndihi-o-gã te nuu núu ndacáⁿ tãhú-ó nõú-gã. Te nchaa tnúhu cáháⁿ-ó òré cáháⁿ ndihi-o-gã cúú-xi dátá ñⁿ tãhú sã cúú-xí-gã. ¹⁶ Te vá dáñá ndéé-ndó càda-ndo mee-ni sá váha cūndecu-ndo, te ducaⁿ chindee tnaha-ndo ñⁿ ñⁿ-ndo ndihi sá ndécú ndihi-ndo. Te núu ducaⁿ na càda-ndo te cani iní-ndó sá cúú-xi dátá ñⁿ tãhú sã ío váha cūu iní Yá Ndiõxí.

¹⁷ Te quindáá iní-ndó càda-ndo nchaa nacuaa cáháⁿ cue téé yindaha ñaha xii-ndo nacuaa ndecu-ndo ichi Xítoho Jesucristú, chí diu cue téé-áⁿ quidé cuendá ñáhá-güedé xii-ndo nácuáa cūndecu váha-ndo nõú-gã. Te sáá nduu nácani tnúhu-güedé nõú-gã nõu ní quide váha-güedé àdi ñá túú ní quide váha-güedé ní xíndecu ndihi ñaha-güedé xii-ndo. Te núu ducaⁿ na càda-ndo quindáá iní-ndó-güedé te cudíi iní-güedé cūndecu ndihi ñaha-güedé xii-ndo, te vá ndihú iní-güedé. Te núu vá dúcáⁿ càda-ndo te vá cúú-xi sã váha xii-ndo nchaa

sá quidé-güedé sá cúú-xí-ndó.

¹⁸ Te cãháⁿ ndàhú-í núú-ndó sã cãháⁿ ndihí-ndo Yã Ndiõxí cuendá-ndí. Te nchúhú cútnùní ndáá iní-ndí sã ñà túú nã cúmãní-ndí núú Yã Ndiõxí, te ducaⁿ chi ndücu-ndí nãcuáa quide-ndí cundáá-ndí núú-gã. ¹⁹ Te cãháⁿ ndàhú tucu-í núú-ndó sã ïo cãcãⁿ tãhú-ndó núú Yã Ndiõxí cuendá sã mée-gã ná cáda te ïo ndihí quixi coto ñaha tucu-í xii-ndo.

Tnúhu ndéé núú ní ndihí-ná

²⁰ Te Yã Ndiõxí Yaá quidé cùu váha iní-ó ndècu-o, Yaá-áⁿ ní dándótó-gã Xítóhó Jesucristú. Te Xítóhó Jesucristú-áⁿ cúú-gã dàtná ìⁿ toli ío-gã quéné cãva xito mbéé. Te ducaⁿ sãtnahá-xi cùu-gã cuendá sã ní sati níñi-gã te ní xihí-gã, te ducaⁿ ní cuu cuendá sã ní quide ndáá-gã ndihí Yã Ndiõxí sã cáda-gã ingá núú sã vãha sã cúú-xí nchòo cue ñáyiú ndècu ñuyú-a. Te nãcuáa ní quide ndáá-gã ndihí Yã Ndiõxí te ñiu-ni ducaⁿ càda-xi núú cuaháⁿ núú vèxi. ²¹ Te xicãⁿ tãhú-í núú Yã Ndiõxí sã mée-gã ná chindee ñaha-gã xii-ndo cuendá cada-ndo mēe-ni sã vãha nãcuáa cuñí mée-gã, te mee-gã ná cáda ñaha-gã xii-o nchàa sã vãha sã sání iní-gã. Te ñiu-ni ducaⁿ na tàchiuⁿ-gã cada Xítóhó Jesucristú sã cúú-xí-ó, duha xicãⁿ tãhú-í núú-gã. Te vitna nchaa-o chí ná cãchí-ó sã ïo cãhnu cuu Xítóhó Jesucristú ni caa ni quihíⁿ. Te ducaⁿ na cùnduu.

²² Te cãháⁿ ndàhú-í núú nchòhó ñáyiú ndècu ndihí-í ichi Xítóhó Jesucristú sã cáda cãhnu iní-ndó nãcuáa ndüu nchaa tnúhu cãháⁿ-í dásãhú ñãhá-í xii-ndo, chí ñã túú vai tnúhu chido tnuní-í núú tütú-a sã cúú-xí-ndó.

²³ Te cãchí tnúhu-í xii-ndo sã tē Timùteú tēe ndècu ndihí-o ichi Xítóhó Jesucristú ní cácu-dé ñã túú-gã yihí-dě vecaá. Te núu na quèxio ndihí-dé núú ndécù-í te quixi-í ndihí-dé núú ndécú-ndó quixi coto ñaha-ndí.

²⁴ Te cùñaha-ndo sã ïo na càda ndee iní nchaa cue tēe yindaha ñaha xii-ndo nacuéa ndècu-ndo ichi Yã Ndiõxí. Te ducaⁿ cùñaha tucu-ndo xii nchaa dava-gã ñáyiú cùu cuendá-gã sã ïo na càda ndee iní-yu. Te cue ñáyiú nacióⁿ Itàliá ñáyiú ndècu ndihí-o ichi-gã cãchí-yu sã ïo cada ndee iní-ndó. ²⁵ Te Yã Ndiõxí ïo na chindee chitúu ñaha-gã xii-ndo nchàa-ndo. Te ducaⁿ na cùnduu. Te ïo chí cáda ndèe iní-nã vitna.

TUTÚ NÍ CADÚHA TÉ SÀNTIAÚ

Té Sàntiaú cadúha-dé tutú quíhíⁿ ndaha ñáyiú isràèl nchíté nuu ñihí ñuyúú

¹ Yúhú té Sàntiaú xínú cuèchi-í núú Yá Ndióxi ndihí núú Xítóhó Jesucristú, te tée-í tnúhu-a quide ndee iní ñáhá-í xii nchòhó ñáyiú isràèl nchíté nuu ñihí ñuyúú-a.

Yá Ndióxi táxi-gã sá xini tnùní-ó

² Te nchòhó ñáyiú ndècu ndihí-í ichi Xítóhó Jesucristú, ío cudíí iní-ndó, cundecu-ndo cuéi náí cùu sá úhú vèxi cuèndá-ndó, ³ chi ducaⁿ te cutnùní iní-ndó sá sàndáá ndisa iní-ndó-gã, te cunduu càhnu iní-ndó cuéi náí ná yáha-ndo. ⁴ Te cunduu càhnu-ni iní-ndó te ducaⁿ te cuu-ndo ñáyiú váha, te cundáá-ndó núú Yá Ndióxi, te ducaⁿ te ñá túú-gã ná cumání-ndó núú-gã.

⁵ Te núu cùmání sá xini tnùní-ó, te cacaⁿ-ó núú Yá Ndióxi te mee-gã taxi-gã, chi ío váha iní-gã, te ñá túú cùnini iní-gã núú-ó. ⁶ Te ni yùhu ni iní-ó cacaⁿ-ó núú-gã, te quindáá ndisa iní-ó sá táxi-gã sá cúmání quiní tnùní-ó, te vá cání ñⁿ caní úú iní-ó. Chi nchaa ñáyiú sàni ñⁿ sàni úú iní-xi cùu-yu dàtná ndute làmár cuáháⁿ-xi duha cuáháⁿ-xi dàcáⁿ nàá-xi òré quéné táchí. ⁷ Te nchaa ñáyiú ducaⁿ sàni iní-xi, te vá cání iní-yu sá ñihí-yu sá xicáⁿ-yu núú-gã. ⁸ Chi nchaa ñáyiú sàni ñⁿ sàni úú iní-xi ñá cùtnùní iní-yu ndédacàa sá sání iní-yu cadá-yu.

⁹ Te nchaa ñáyiú ndàhú ñáyiú ndècu ichi-gã, xini ñuhu-xi ñá túú-gã ná caní iní-yu, mee-nã cudíí iní-yu, chi Yá Ndióxi chindèe ñaha-gã xíí-yu. ¹⁰ Te nchaa ñáyiú cuica xini ñuhu-xi cundecu váha iní-yu núú Yá Ndióxi cuéi náí ná yáha-yu. Chi ñáyiú-áⁿ cùu-yu dàtná itá nchaa cùhú sá ñá túú cùdíi

naha. ¹¹ Chi òré ní cuu níhi cahni nchicanchii, te ní dádií-ni-xi nchaa cùhú cuíí-áⁿ te ní cóyo-ni nchaa itá-xi, te ñá túú-gã cáá vìi. Te ducaⁿ sàtnahá-xi cùu ñáyiú cuica chi núú chíúⁿ-ni-yu xihí-yu.

Nchaa ñáyiú quide cahnu iní-xi nchaa sá yáha-yu

¹² Te váha táhú nchaa ñáyiú quide cahnu-ni iní-xi cuéi nándi sá yáha-yu ndécú-yu ichi Yá Ndióxi, chi òré ná ndihí nchaa xíáⁿ yáha-yu, te cuáñaha Yá Ndióxi ñⁿ coróná váha vìhi cundecu ndihí-yu, te ndáá chi ducaⁿ càháⁿ Yá Ndióxi sá táxi-gã xii nchaa nchoo ñáyiú ñuhu iní ñáhá xii-gã. ¹³ Te nchaa ñáyiú sàni iní-xi cada nándi sá cuèhé sá dúhá, te vá cání iní-yu sá Yá Ndióxi táuchiuⁿ-gã ducaⁿ cadá-yu, chi Yá Ndióxi ñá quíú te caní iní-gã cada-gã ñⁿ sá cuèhé sá dúhá, te ni ñá túú tàuchiuⁿ-gã sá dúcáⁿ cadá-yu. ¹⁴ Te cuíni-yu cadá-yu nchaa sá cuèhé sá dúhá chi ducaⁿ vèxi iní-yu. ¹⁵ Te nchaa ñáyiú ío ñuhu iní nchaa sá cuèhé sá dúhá te quidé-yu, te núu na càda-ní-yu te cuíta nihnú-yu.

¹⁶ Te nchòhó ñáyiú ío cùu iní-í ndécú ndihí-í ichi Xítóhó Jesucristú, vá dáñá-ndó mée-ndo dandahú ñáhá ñáyiú xii-ndo. ¹⁷ Chi nchaa sá váha vèxi-xi núú Yá Ndióxi Yaá ndécú àndiu, chi diu mee-gã ní cadúha-gã àndiu ndihí nchaa chódiní, ndihí yóó, ndihí nchicanchii. Te Yá Ndióxi ñá túú ndí queheⁿ ndí queheⁿ-gã sá cání iní-gã, te ni ñá túú cùu-gã dàtná ñⁿ cuándahú cuáháⁿ-xi duha cuáháⁿ-xi dàcáⁿ, chi ñⁿ-ni sá sání iní-gã. ¹⁸ Te Yá Ndióxi ní cuíni-gã sá cùú-ó dèhe-gã, te ndáá sá cùú-ó dèhe-gã chi sàndáá iní-ó tnúhu-gã. Te nchoo ñáyiú sàndáá iní-xi tnúhu-gã cùnùu-gã-ó chi ní nduu-o dèhe-gã.

Ichi ndáá cuíti

¹⁹ Te nchòhó ñáyiú ío cùu iní-í ndécú ndihí-í ichi Xítóhó Jesucristú, cundedóho-ndo ñⁿ tnúhu

na càháⁿ-í-a. Te cuini-í sá cùndecu túha-ndo cùndedóho-ndo tnúhu Yá Ndióxi, te cani váha iní-ndó nàcuáa cáháⁿ-ndó, te cunduu càhnu iní-ndó te vá cùdéeⁿ-ndó. ²⁰ Chi núu na cùdéeⁿ-ó te ñá túú quide váha-o núú Yá Ndióxi. ²¹ Te dañ-ndo nchàa sá cuèhé sá dúhá lò ñuyiú-a. Te quindáá iní-ndó tnúhu Yá Ndióxi ndécú ndìhi-ndo, te vá cùnduu sáá iní-ndó, te ducaⁿ te naníhí tàhú-ndó.

²² Te quindáá iní-ndó tnúhu-gá te vá cuendá-ni cùndedóho-ndo, chi núu na cùndedóho-ndo te vá tní-ndó ñá, te dicó-ni dandahú-ndó mèe-ndo te vá nánihí tàhú-ndó. ²³ Chi nchaa ñáyiú dicó-ni sàcùndedóho tnúhu-gá te ñá túú sàndáá iní-yu, ñáyiú-áⁿ cúu-yu dàtná ñáyiú sàcùndehé-ní núú-xi núú yütátá. ²⁴ Chi nini ndehé-yu ní xiní-yu núú-yu, te ní xócání-yu te ní nacuaana-ní-yu nàcuáa càa núú-yu. Te ducaⁿ sàtnahá-xi cùu ñáyiú sàcùndedóho tnúhu Yá Ndióxi, te ñá túú tní-yu. ²⁵ Te nchaa ñáyiú dàcuaha ndisa tnúhu ní dándöo Yá Ndióxi ñihnu-ní-yu ichi-gá, chi ñá díú ñá sá vèe cùu-xi. Te ñáyiú-áⁿ ñá túú dicó-ni sàcùndedóho-yu chi quide ndáá-yu núú-gã, te cùdí iní-yu xíndecú-yu.

²⁶ Te nchaa ñáyiú càchí sá ndécú ichi ndáá te cùtexínu-ni càháⁿ-yu, te xiãⁿ dicó-ni dandahú-yu mèe-yu sá ndécú-yu ichi ndáá. ²⁷ Te núu ndècu-o ichi ndáá cuiti ichi Dútú Ndióxi, te chindee-o nchàa ñáyiú ní ndóo ndàhú, ndihi ñáyiú quèe ndécú ndìhi tnúndòho tnúhu ndàhú, te vá cádá-ó nãndi sá cuèhé sá dúhá lò ñuyiú-a.

2

Ñánuu-ni cùu iní-ó nchàa tnaha ñáyiú-o

¹ Te nchòhó ñáyiú ndècu ndìhi-í ichi Xitohó Jesucristú Yaá cùnùu, ñánuu-ni càháⁿ ndìhi váha-ndo nchàa tnaha ñáyiú-ndo. ² Te núu núú nátacá-ndó chìñuhu-ndo

Yá Ndióxi ní sáá ñáⁿ téé ío váha càa dóo ñihnú-dè, te ní sáá tucu ñáⁿ téé ñihnu dóo ndàhú, ³ te núu téé ñihnu dóo vãha-ni-áⁿ nehé-ndó sá yíñùhu núú-dè, te taxinucóo-ndo-dè ñáⁿ núú xilé váha, te téé ndàhú-áⁿ daxòcòo-ndo-dè ñáⁿ xio àdi canucóo-ndo-dè núú ñúhú, ⁴ te núu ducaⁿ na càa-ndo te ñá túú quide váha-ndo. Chi ñáⁿ-ni-dé cúú iní-ndó, te ñáⁿ-dé ñá túú cùu iní-ndó.

⁵ Te nchòhó ñáyiú ío cùu iní-í ndécú ndìhi-í ichi Xitohó Jesucristú, chí cùndedóho tucu tnúhu na càháⁿ-í-a. Yá Ndióxi càháⁿ-gá vãi ñáyiú ndàhú cuendá tnahá tnúhu ndihi ñahá-yu xii-gá, te ndècu váha-gá-yu dàcúxí ñáyiú cuica ñáyiú ñá túú sàndáá iní tnúhu-gá, chi ní cachí-gá sá ncháá ñáyiú na cùu iní ñahá xii-gá nduu táhú-yu cundecú-yu ndihi-gá ni caa ni quíhíⁿ. ⁶ Te nchòhó, ñá túú nèhe-ndo sá yíñùhu núú ñáyiú ndàhú, chi núú ñáyiú cuica-ni nèhe-ndo sá yíñùhu. ¿Te náa ñá cùtnùní iní-ndó sá ñáyiú cuica dandoho ñaha-gá-yu xii-ndo, te càndeca ñahá-yu sàháⁿ núú cuè téé cùchiuⁿ-áⁿ? ⁷ Te ñánu-ní-yu ío càháⁿ cuèhé-yu cuendá Xitohó Jesucristú, te nchòhó sa ní nduu-ndo dèhe-gá.

⁸ Te ñáⁿ ndudú cùnùu-gá ní càháⁿ Yá Ndióxi ní ngódó tnùní núú tütú-gá càchí-xi sá cúú iní-ó tnaha ñáyiú-o dàtná cúú iní-ó mèe-o. Te núu ducaⁿ na càa-o te quide váha-o. ⁹ Dico núú ñá túú cùu iní ñánuu-o cuè tnaha ñáyiú-o, te cuu cuéchi xii-o chi ñá túú quide-o nacuaá càháⁿ Yá Ndióxi. ¹⁰ Te núu ñáⁿ ñáyiú ndàunihnu ñáⁿ sá càháⁿ Yá Ndióxi, te dava-ni quidé-yu ñá, te ñáyiú-áⁿ ñá túú quidé-yu nàcuáa càháⁿ ndudú Yá Ndióxi. ¹¹ Te Yá Ndióxi ní cachí-gá sá tée ndècu ñadìhi-xi vá càháⁿ ndìhi-dé ingá ñadìhí. Te ñánu-ni-gá ní cachí-gá sá vá cáhmí-ó tnaha ñáyiú-o. Te cuèí ñá túú càháⁿ ndìhi-o ingá ñadìhí, te núu sàhni-o tnaha ñáyiú-o te ñá túú quide-o

nacuáa cãháⁿ ndudú Yã Ndiõxí, ¹² Te nchoo xini ñuhu-xi cãháⁿ-ó tñuhu váha te cada ndáá-ó, chi ñá díú ñⁿ sá vëe cùu-xi sá ní cachí Yã Ndiõxí cada-o. Te mee-gã ní cachí-gã sá cáda ndáá-gã cuèchi-o na sàá nduu. ¹³ Te nchaa ñáyiú ñá túú cùndahú iní tnàha ñáyiú-xi, te vá cùndahú iní ñáhá-gã xií-yu na sàá nduu càda ndáá-gã cuèchi-yu. Te nchaa ñáyiú cùndahú iní tnàha ñáyiú-xi te Yã Ndiõxí cùndahú iní ñáhá-gã xií-yu na sàá nduu-ãⁿ.

Quindáá iní-ó Yã Ndiõxí te cada váha-o

¹⁴ Te nchòhó ñáyiú ndècu ndihí-í ichi Xítohó Jesucristú, te núu cãchí-ó sã sãndáá iní-ó Yã Ndiõxí te ñá túú quide-o sá vãha, te ñá túú ndèé nándihí-xi, chi vá nánihí tãhú-ó te núu ducaⁿ na càda-o. ¹⁵ Te núu ndèhe-o ñⁿ tnaha ñáyiú-o ñá túú dõõ-yu àdi ñá túú sá cùnchitò-yu, ¹⁶ te xãhaⁿ-o: “Núhú-n te nducu-n dõõ cuihu-n te nducu-n sã cáxi-n”, xãhaⁿ-o, te ñá túú nã sãñaha-o, te sá dúcáⁿ quide-o te ñá túú quide váha-o. ¹⁷ Te núu cãchí-ó sã sãndáá iní-ó Yã Ndiõxí te ñá túú quide váha-o ndècu-o, te vèdana nàndihí-xi.

¹⁸ Te íó ñáyiú cãchí-yu sá sãndáá iní-yu Yã Ndiõxí, te íó ñáyiú cãchí-yu sá méé-ní sã vãha quide-yu. Te yúhú cãchí-í sá nõu ñá túú quide-o sá vãha, te ñá túú sãndáá iní-ó Yã Ndiõxí. Te nchoo quide-o sá vãha núu xiãⁿ cùtnùní iní-ó sã sãndáá iní-ó-gã. ¹⁹ Te íó ñáyiú cãchí sá ñⁿdii-ni Yã Ndiõxí ndécú, te váha-ni cãháⁿ-yu. Te tnàhá yucu ñãvãha ndihí nchaa espíritú cùndihí-xi xiní-xi sá ndécú ñⁿdii-ni Yã Ndiõxí, te yúhú-xi dico ñá túú tnè-xi tñuhu-gã. ²⁰ Te íó ñⁿ díquí-ó te núu na cãchí-ó sã sãndáá iní-ó Yã Ndiõxí, te vá cáda-ó sã vãha. ²¹ Te ñaní tnáhá-ó ndii Àbrahám téé ní xíndecu ndéé sanaha ñí ngúndecu váha ndii núú Yã Ndiõxí, chi ní xito ndéé ñáhá-gã xii ndii núu ndisa sá

cãhni ndii déhe ndii té Isàác nduu tãhú-gã ní cùu, te dàvá-áⁿ ní cutnùní iní-gã sá ño sãndáá iní ñáhá ndii xii-gã, núu ñá ní dàña-gã cahni ndii déhe ndii. ²² Te nàha-o sá ndii Àbrahám ñá díú-ní sã méé-ní sã ní sãndáá iní ñáhá ndii xii-gã, chi ní tnè ndii tñuhu-gã. ²³ Te ducaⁿ ní quee ndáá-xi nacuáa cãháⁿ-xi núú tütú Yã Ndiõxí núú cãchí-xi: “Ndií Àbrahám ní sãndáá iní ndii ní quide ndii nchaa nacuáa ní xãhaⁿ Yã Ndiõxí, te ní ngúndecu váha ndii núú-gã, te ní cachí-gã sá cúú ndii ñⁿ téé ío váha tnàhá tñuhu ndihí-gã”, duha cãchí-xi núú tütú-gã.

²⁴ Te xiãⁿ cùtnùní iní-ó sã ñá díú mèe-ni sá quindáá iní-ó Yã Ndiõxí, chi núu na càda-o nacuáa cuu váha iní-gã te ngúndecu váha-o núú-gã ²⁵ dàtná ní quide-gã tá Ràháb ñⁿ ñadihí ní xíndecu ndéé sanaha, chi xíchí-ãⁿ ní xíndecu-xi ichi díú iní, dico ní tuha-xi ichi Yã Ndiõxí te ní ngúndecu váha-xi núú-gã, chi ní chindee-xi cuè téé israhél cue téé ní xica chiúⁿ-gã, te ní sanu ichi ñaha-xi xii-güedé ñⁿ ichi núú vã nánihí ñáhá cuè téé cùu úhú iní ñáhá xii-güedé. ²⁶ Te nchaa ñáyiú cãchí sá sãndáá iní Yã Ndiõxí, te ñá túú quide-yu nacuáa cãháⁿ-gã ñáyiú-áⁿ cúú-yu dàtná ñⁿ ñáyiú ní xihí. Chi ñá túú-gã ndixí tùu iní-yu nchaa sá cuèhé sá dúhá quide-yu. Duha sãtnahá-xi cùu nchaa ñáyiú ñá túú cuení tnè tñuhu cãháⁿ Yã Ndiõxí.

3

Nacuáa quide yaa-o

¹ Te nchòhó ñáyiú ndècu ndihí-í ichi Xítohó Jesucristú, vá nchãá-ndó càni iní-ndó cùu-ndo mestrú dacuàha-ndo ñáyiú tñuhu Yã Ndiõxí chi íí cáá-xí. Chi na quítnahá nduu nacuáha-o cuendá núú-gã, te núu ñá túú ní quide ndáá-ó ñá, te vá cúú vãha iní-gã núú-ó. ² Te nchaa-o ño cuèhé sã ñá túú vãha quide-o. Te nchaa ñáyiú ñá túú cãháⁿ tñuhu cuèhé tñuhu duha cúú-yu ñáyiú ñá túú

nã cúmãní chi ío ndáá quidě-yu. Te xini-yu cotnii-yu mée-yu, te quide váha-yu núú Yá Ndióxi. ³ Te dàtná cuini-ndó cùu ìn quiti te núu na chihi-o frenú yuhu-di, te ducaⁿ sãtnahá-xi cùu ñáyiú sãcótnei mee-xi, chi ñá túú càháⁿ-yu tnúhu cuèhé tnúhu duha. ⁴ Te dàtná cuini-ndó cùu barcú cuèi ñãhnu vihi-xi, dico òré quéné ñhi táchí te tũdaha-xi ìn xio, dico téé dàcaca ndacu-dé dáquihíⁿ-dé-xi ndihi ìn yutnu sã dánani-güedé tímú ndãa núú càchí iní-dé quihíⁿ-xi. ⁵ Te ducaⁿ cùu tucu yaa-o chi ío lĩhi-xi dico ío cuèhé tnúhu càháⁿ-ó ndihi-xi. Te ducaⁿ-ni sãtnahá-xi cùu tucu sã lúhá ñũhú chi sãhmi-xi ìn yucu. ⁶ Te ñiu-ni ducaⁿ sãtnahá-xi cùu yaa-o chi ío cuèhé tnúhu cuèhé tnúhu duha càháⁿ-ó ndihi-xi, te dàcuíta nihnu ñaha-xi xii-o. Te ío cuèhé cuèchi quide-o ndihi-xi cuendá sã ñuyúú-a ñũhu tnahá ñũhú tñi yucu ñãváha dàticã nihnu ñaha-xi. ⁷ Te ndacu-o càda masú-ó nchãa núú quiti ío ñuyúú cuèi quiti dééⁿ quiti xica núú ñũhú, te cuèi quiti ndãva, te cuèi cóó, te cuèi quiti ñũhu xití ndute làmár, chi ducaⁿ quide dava cue téé ñuyúú-a. ⁸ Dico yaa-o chi vá yõ ìn ndàcu cada masú ñãhá xii-xi nacuáa càháⁿ-ó mée-ni tnúhu váha ndihi-xi, chi mee-ni tnúhu cuèhé tnúhu duha cunuu-gã càháⁿ-ó ndihi-xi. Te cùu-xi datná ìn venènú chi dàti-u-xi iní-ó. ⁹ Te ñiu-ni ndihi yaa-o quide cahnu-o Dútú Ndióxi Yaá cúú Tãtã-ó, te ñiu-ni ndihi yaa-o caháⁿ úhú-ó cuè tnahã ñáyiú-o. Te xini ñũhu-xi vá dúcãⁿ càda-o, chi mee-gã ní chihi-gã sã xini tnùní-ó ndihi iní-ó, dàtná cáa mée-gã ñũhú iní-gã. ¹⁰ Te ñiu-ni yuhu-o quèe tnúhu váha càháⁿ-ó, te ñiu-ni yuhu-o quèe tnúhu cuèhé tnúhu duha. Te nchòhó ñáyiú ndècu ndihi-í ichi Xitohó Jesucristú cunaha-ndo sã ñã túú ndũu váha-xi ducaⁿ càda-o. ¹¹ Te ñã túú xini-ndó

sã ìn núú quèé ñihni ndute, te quèe ndute váha te quèe ndute úa-ãⁿ. ¹² Te nchòhó ñáyiú ndècu ndihi-í ichi Xitohó Jesucristú, te ñã túú xini-ndó sã ìn yutnu ngúxí, te cùuⁿ aceitúná, àdi xini-ndó sã ìn yoho yaha stilé te cùuⁿ ngúxí. Te ducaⁿ cuèi ìn núú quèé ñihni ndute, vá cúú quèe ndute váha te quee ndute úhá. Te ducaⁿ sãtnahá-xi cùu yuhu-o chi vá cúú càháⁿ-ó tnúhu váha te càháⁿ-ó tnúhu cuèhé tnúhu duha.

Nchaa sã váha xini tnùní-ó taxi Yá Ndióxi

¹³ Te núú ndècu ñáyiú túha tnuú-ndó ñáyiú cùnuni iní-xi, te xini ñũhu-xi mee-ni sã váha cadá-yu, ducaⁿ te cutnùní iní-ó sã túha ndisá-yu, te vá cadá càhnú-yu mée-yu. ¹⁴ Te núú nchoo cuèdú iní-ó te cuini-ó cunuu-o núú tnãha ñáyiú-o, te vá càchí-ó sã túha-o, chi ñã túú quide ndáá-ó te núú ducaⁿ ña càda-o. ¹⁵ Chi ñã díú xãⁿ ní dànehé ñãhá Yá Ndióxi, chi ñuyúú iha ní cacu nihnu-xi cuendá sã yùcu ñãváha dàcahu iní ñãhá-xi. ¹⁶ Te núú ndécú ñáyiú cuèdú iní ñáyiú cuní cunuu, te yacãⁿ mee-ni ndãhú nãã xĩndecú-yu, te ñã túú quide váha-yu, chi mee-ni nchãa sã cuèhé sã dúhá quidè-yu. ¹⁷ Te núú ní taxi Yá Ndióxi sã xini tnùní-ó, te cada váha-o, te càháⁿ ndihi váha-o nchãa tnahã ñáyiú-o, te tñi-o tnúhu váha càháⁿ-yu, te cundãhú iní-ó-güè-yu te chindee-õ-yu, te vá cání ìn cani úú iní-ó, te ío cunduu ndáá iní-ó. ¹⁸ Te núú cuini-ó ñã túú ñã cuu cundecu-o ñuyúú-a, te cada váha-o sã cúú-xi tnãha ñáyiú-o cuendá sã ñã túú ñã cuu cundecu-o ndihi-yu. Te ducaⁿ te nguĩnchicúⁿ dava-gã tnãha ñáyiú-o càda váha-yu.

4

Vá cúú cundecu-o ichi Yá Ndióxi te cada-o ñãndi sã cuèhé sã dúhá

¹ ¿Te xini-ndó ñã cuendá nãã ñáyiú te xĩsahni tnãhá-yu-ãⁿ? Te

nàá-yu sá tnũhu cuédú ínì, chi òu-ni xiáⁿ ñúhú ínì-yu, te ñá túú ndècu váha ínì-yu. ² Chi cuínì-yu cundecu ndìhì-yu ìⁿ sá ñà túú ndècu ndìhì-yu, te ñá túú nihì-yu núu xiáⁿ xĩcuu cuédú ínì tñahá-yu, te xĩcuèhé tñahá-yu, te càni tñahá-yu, te xĩsahni tñahá-yu. Te ñá túú nihì-yu sá cuínì-yu chi ñá túú xicáⁿ-yu núu Yá Ndiòxí. ³ Te cuèi xicáⁿ-yu ìⁿ sá cuínì-yu núu-gã te ñá túú sãñaha-gã, chi ñá túú xicáⁿ-yu ìⁿ sá cúú xii-yu sá váha, chi ìⁿ sá ná ndìhì-yu núu cádá-yu nchaa sá cuèhé sá dúhá xicáⁿ-yu, núu xiáⁿ ñá nihì-yu. ⁴ Te nchaa ñáyiu ducaⁿ xĩquide ío cùu sáá ínì-yu núu Yá Ndiòxí. Te nàha-ndo sá ncháá ñáyiu cùdíí ínì-xi cundecu ichi cuèhé ichi duha cùu úhú ínì-yu Yá Ndiòxí, chi vá cúú cùndecu-o ichi cuèhé ichi duha, te cundecu-o ìchi-gã. ⁵ Te ñá túú dìò ducaⁿ càháⁿ-xi núu tütú Yá Ndiòxí núu cãchì-xi: “Yá Ndiòxí ní taxi-gã Espiritú-gã ndécú ndìhì-o. Te Espiritú-gã-áⁿ cuínì-xi sá méé-ní-gã cuhuⁿ ínì-ó”, duha cãchì-xi núu tütú-gã. ⁶ Te Yá Ndiòxí ío chindee ñaha-gã cuèndá cada ndáá-ó núu-gã dàtná cãchì tucu-xi núu tütú-gã núu cãchì-xi: “Yá Ndiòxí ñá túú cùu váha ínì-gã núu nchàa ñáyiu quide cahnu mee-xi, dico chindee-gã cue ñáyiu ndàhú ínì-xi”, duha càháⁿ-xi núu tütú-gã. ⁷ Te cada-ndo nàcuáa càháⁿ Yá Ndiòxí. Te vá cádá-ndó nàcuáa cuínì yucu ñávãha, ducaⁿ te xóo cóo ndéé ñáhá-xi xii-ndo. ⁸ Te tñii-ndo tñũhu càháⁿ Yá Ndiòxí te cundecu ndìhì ñaha-gã xii-ndo. Te nchaa nchòhó ñáyiu ndècu ichi cuèhé ichi duha dañà-ndo ìchi-áⁿ te cada váha-ndo. Te nchaa nchòhó ñáyiu sàni ínì cunu cuechi núu Yá Ndiòxí te quide-ni-ndo nchaa sá cuèhé sá dúhá, te ñá túú quide váha-ndo núu ducaⁿ, chi xini ñũhu-xi sá càcãⁿ-ndó núu Yá Ndiòxí sá ná ndádá ndòo ndada nine-gã ínì-ndó. ⁹ Te ndixi cuèchi ínì-ndó nchàa sá quidé-ndó

ndéé ndáhyú ndisa-ndo sã ndìhú ínì-ndó, te ñá díú dà cudíí ínì-ndó. ¹⁰ Te náhmá-ndó núu Yá Ndiòxí nchaa sã ní quide-ndo, te ngùndecu váha-ndo núu-gã.

Vá càháⁿ-ó nchàa sá quidé tñaha ñáyiu-o

¹¹ Te nchòhó ñáyiu ndècu ndìhì-í ichi Xitohó Jesucristú, vá cuátñũhu tñaha-ndo, chi nchaa ñáyiu sàtnũhu tñaha dicó-ni ndàa nuú-yu ndèhe tñahá-yu, te ñá túú càháⁿ váha-yu cuèndá tñũhu Yá Ndiòxí sá sánú ichi ñaha xii-yu nàcuáa cundecú-yu, chi dàquee tíhũ-yu tñũhu-áⁿ. Te núu cãchì-ndó sá ñà túú càháⁿ váha tñũhu Yá Ndiòxí, te xiáⁿ queé-xi sá ñà túú sãndáá ínì-ndó tñũhu càháⁿ-gã, te cuínì-ndó cùnũu tñũhu-ndo núu tñũhu-gã. ¹² Te mee Yá Ndiòxí ní cachi-gã nàcuáa cada-o, te òu-ni mee-gã càháⁿ-gã te núu ní quide váha-o, àdi ñá túú ní quide váha-o. Te òu-ni mee-gã dàcãcu nihnu ñaha-gã xii-o núu úhú núu ndàhú, te òu-ni-gã daquihìⁿ ñáhá-gã xii-o núu úhú núu ndàhú-áⁿ te núu vá cádá váha-o. Te nchoo ñà túú nã cúú-ó, te núu mee-ni nchàa sá quidé tñaha ñáyiu-o cùndehe-o.

Ñá túú cùtnuni ínì-ó nãsa tũndaá-ó ìngã nduu

¹³ Te dava nchòhó cãchì-ndó sã vítná àdi tneé quihìⁿ-ndó ìⁿ ñúu, te yacáⁿ cundecu-ndo ìⁿ cuíá cada-ndo ìⁿ ndáhú te níhì-ndó díhúⁿ. ¹⁴ Te ní ñá xini-ndó nã cúú sã yãha-ndo vítna àdi tneé. Te nchoo cùu-o datná ìⁿ vícò núhú, chi vícò-áⁿ tñavíí ndéhé-ó te tna tnaa-gã sa ní ndóñũhú-xi. Ducaⁿ sãtnahá-xi cùu nchoo chi ìⁿ úú nduu duha vèxi-o ñuyíú-a te ndoñũhu-o. ¹⁵ Te núu sãndáá ínì-ó Yá Ndiòxí te duha càháⁿ-ó: “Te núu Ndiòxí ná cãchì-gã sá cùndecu tnaa-o ñuyíú-a te cada chiuⁿ-o”, duha cachi-ó. ¹⁶ Dico mee-ndo chi ío ñíí ínì-ndó cuínì-ndó cùnũu tñũhu-ndo núu Yá Ndiòxí, te ñá túú

ndùu váha-xi sá dúcáⁿ quide-ndo.
 17 Te núu xini-ó cada-o sá váha te
 ñá túú quide-o, te cùu-xi ìⁿ cuéchi
 núú-gã.

5

*Tnúhu sá dátũha ñaha xii nchaa
 ñáyiu cuica ña túú sãndáá ini tnúhu
 Yã Ndiõxí*

¹ Te nchòhó ñáyiu cuica ñáyiu
 cuihna ini-xi cundedóho-ndo tnúhu
 na càháⁿ-i-a. Vitna nguíta-ndo
 ndihú ini-ndó, te ndáhyú víhi-ndó,
 chi quixi ìⁿ tnúndòho cuendá-ndó
 te ndoho víhi-ndo. ² Te nchaa sá
 ndécú ndihi-ndo ndihi cuita tiu
 quihⁿ, te quee tíquidi dóó-ndó,
³ te díhúⁿ-ndó caxi cudi ñuhu.
 Te xiáⁿ cuita naquiní ndeé-ndó
 tnúndòho sá ña túú quide váha-ndo.
 Te ndihi-ndo ndihi díhúⁿ-ndó
 sá ñi taxúha-ndo, chi vitna
 sa ta cùyatni sáá nduu ndihi
 ñuyúⁿ-a. ⁴ Te nchaa cue téé
 ní quide chiuⁿ núú chíuⁿ-ndó
 ñi ndatnúhu-ndo ndihi-güedé
 nàcuáa cháhu-ndo-güedé ní cùu,
 te ña túú ní cháhu-ndo-güedé
 nàcuáa ní xáhaⁿ-ndo xii-güedé,
 núú xiáⁿ ío ndécucúchi-ndo. Te Yã
 Ndiõxí Yaa ndécú àndiu ní tecú
 dóho-gá nàcuáa càháⁿ-güedé sá ñi
 dándahú-ndó-güedé. ⁵ Te nchòhó
 ñáyiu cuica, sá ndécú váha-ni-ndo
 cundee ini-ndó, núu quide-ni-ndo
 nchaa sá vèxi ini-ndó. Te cùu-ndo
 datná ìⁿ quiti nùcuñhu mee-ni
 xèxi-di, te sáá nduu sàhni-güedé-di.
 Te ducaⁿ sãtnahá-xi cùu nchòhó
 chi ndècu váha-ndo vitna, te sáá
 ìⁿ nduu nàcháhu-ndo nchaa sá
 quidé-ndó núú Yã Ndiõxí te núu vá
 quindáá ini-ndó-gã. ⁶ Te quide úhú
 ini-ndó sàhni-ndo cue ñáyiu quide
 ndáá núú Yã Ndiõxí, te ña túú nã
 quidé-yu.

*Cunduu càhnu ini-ó te càháⁿ
 ndihi-o Yã Ndiõxí*

⁷ Te nchòhó ñáyiu ndècu ndihi-í
 ichi Xitohó Jesucristú, cada ndee-ni
 ini-ndó cùndetu-ndo ndéé ná quixi
 tucu-gã ñuyúⁿ-a, te cada-ndo datná

quidé nchaa ñáyiu chihí tata chi
 sácúndetú-yu ndéé cúúⁿ dáú te
 chihí-yu. Te cundee-ni ini-yu
 sácúndetú-yu ndéé cúúⁿ-gã dáú
 te cùu itú-yu, te ndùdíⁿ ini-yu.
⁸ Te ducaⁿ càda nchòhó tucu
 cada ndee ini-ndó cùndetu-ndo,
 chi sa ta cùyatni nduu quixi
 tucu Xitohó Jesucristú. ⁹ Te
 duha nduu tnúhu càháⁿ-í núú
 nchòhó ñáyiu ndècu ndihi-í ichi
 Xitohó Jesucristú, vá ndácáⁿ cuéchi
 núú tnáhá-ndó te núu nása cùu
 ndecu-ndo, chi ña cuéhé-gá nduu
 cùmání te quixi Cristú nacuaca
 ñaha-gã xii-ó cùndecu-o núú Yã
 Ndiõxí, te mee-gã cada ndáá-gã
 cuéchi-o. ¹⁰ Te nchòhó ñáyiu ndècu
 ndihi-í ichi Xitohó Jesucristú, ndacu
 ini-ndó nàcuáa ní quide nchaa
 cue téé ní xóo càháⁿ tnúhu Yã
 Ndiõxí ndéé sanaha sá ío càhnu
 ní xínduu ini-güedé cuéi nándi ní
 ndoho-güedé. ¹¹ Te cùtnuní ini-ó
 sá cúú-ó ñáyiu ío váha táhú-xi te
 núu na càda càhnu ini-ó nchaa sá
 ná yáha-o cuendá Yã Ndiõxí. Te
 ñaha-ndo sá ndíi Jòb ducaⁿ ñi quide
 ndíi, chi nándi sá ñi yáha ndíi te
 ní quide càhnu ini ndíi. Te sátá ñi
 yáha ní ndoho ndíi, te ío cuéhé sá
 ñi sãñaha Yã Ndiõxí xii ndíi. Chi
 ío váha ini-gá te ío cùndahú ini-gá
 nchaa ñáyiu ío càhnu ini-xi.

¹² Te nchòhó ñáyiu ndècu
 ndihi-í ichi Xitohó Jesucristú, chí
 cùndédóho tucu tnúhu na càháⁿ-i-a,
 chi ío xini ñuhu-xi. Vá cáciu
 nèhe-ndo Yã Ndiõxí óré cùini-ndó
 sá cùtnuní ini ñáyiu sá ndáá
 cada-ndo ìⁿ sá càháⁿ-ndó. Te ñi
 vá cáciu nèhe-ndo sá cãchí-yu cùu
 ndiõxí cãdũha cue téé ñuyúⁿ-a. Te
 núu ìⁿ sá xicáⁿ tnàha ñáyiu-ndo
 núú-ndó te cùñaha-ni-ndo te núu
 cuu àdi sá vá cúú. Te vá cáciu
 nèhe-ndo Yã Ndiõxí, ducaⁿ te vá
 dándòho ñaha-gã xii-ndo.

¹³ Te núu ndòho-ndo te càháⁿ
 ndihi-ndo Yã Ndiõxí, àdi te núu
 ndècu váha-ndo te cudíⁿ ini-ndó
 te chiñuhu-ndo-gã, ¹⁴ àdi núu
 cùhú-ndó te cana-ndo cué téé

yìndaha ñaha xii-ndo nacuaá ndècu-ndo ichi Yá Ndiòxí cuèndá tee-güedé acití díquí-ndó, te cacadá táhú-güedé núú-gã cuèndá-ndó dàtná ní cachí méé-gã cunduu. ¹⁵ Te núú quíndáá ndisa iní-ndó sã ndúha-ndo, te ndúha-ndo chi Yá Ndiòxí cada tátna ñaha-gã xii-ndo, àdi núú ní quide-ndo ìíⁿ sá ñà túú tàú-ndó càda-ndo núú-gã te cada càhnu iní-gã cuèchi-ndo. ¹⁶ Te xini ñuhu-xi cùtnùhu tnàha-ndo oré ñá túú cùndáá-ndó núú Yá Ndiòxí cuèndá chindee tnùhu tnàha-ndo cáháⁿ ndihi-ndo-gã te xocani-gã cuéhé-ndó, te cada càhnu iní-gã nchaa sá ñà túú vaha ní quide-ndo te núú cundecu váha iní-ndó. Te nchaa ñáyi ndècu váha iní-xi núú Yá Ndiòxí na càcáⁿ-yu ìíⁿ sá cuini-yu núú-gã te nihí-yu, chi sàá tnùhu-yu núú-gã. ¹⁷ Te té Eliás, téé ní xindecu ndéé sanaha ñí cáá-dé dàtná cáá nchò. Te ní cáháⁿ ndihi-dé Yá Ndiòxí ñí yuhu ñí iní-dé ní xáhaⁿ-dè xii-gã sá vã dácùⁿ-gã dáú, te ní tní-gã tnùhu ní cáháⁿ-dé, te ñá ní dácùⁿ-gã dáú ùní cuíá dava. ¹⁸ Te dātñùní ducaⁿ te ní cáháⁿ ndihi tucu té Eliás-áⁿ Yá Ndiòxí sá dácùⁿ-gã dáú te ní cuuⁿ, te ní cuu tucu nchaa sá ñí xitu-güedé.

¹⁹ Te nchòhó ñáyi ndècu ndihi-í ichi Xitohó Jesucristú, te núú dava-ndo sã ndecu-ndo ichi Yá Ndiòxí ní cùu te ní dáñá-ndó, te ndècu tucu dava-ndo nadaxinu iní tnáhá-ndó nùcùndecu tucu-ndo ìchi-gã, ²⁰ te núú ducaⁿ na càda-ndo te dácácu nihnu tnàha-ndo núú ùhú núú ndáhú, te mee Yá Ndiòxí cada càhnu iní ñáhá-gã xii-ndo cuèi ío cuéhé cuèchi ní quide-ndo.

TUTÚ DÍHNA NUU NĪ CADÚHA TÉ PÈLÚ

*Té Pèlú cadúha-dé tutú sá cúu-xí
cuè ñáyiú sàndáá iní ñáhá xii Yá
Ndiöxí*

¹ Yúhú té Pèlú ní tendaha ñàha Xítohó Jesucristú xicá cùu-i càháⁿ-í tñúhu-gá, te càdúha-í tutú-a sá cúu-xí nchòhó ñáyiú xinchíté nuu ndècu distritú Pònto, ndihí distritú Gálaciá, ndihí distritú Capadociá, ndihí distritú Àsiá, ndihí distritú Bitiniá. ² Chì Dútú Ndiöxí ní cachí-gá sá cúu-ndó dèhe-gá ndéé cútñahá vátá ngáva-gá ñuyúú, te Espiritú-gá ní quide-xi ndècu yíñuhu-ndo núú-gá vitna. Te ní cachí-gá sá cúu-ndó dèhe-gá cuendá tñü-ndo nchàa tñúhu càháⁿ Xítohó Jesucristú, ndihí cuendá nduu ndoo nduu nine iní-ndó, chi diu cuendá-áⁿ nĩ xihí Xítohó Jesucristú. Te xicáⁿ tãhù-í núú Yá Ndiöxí sá ïo na chindee chitúu ñaha-gã xii-ndo cuèi vitna te cuèi núú cuaháⁿ núú vèxi, te diu-ni-gá ná cáda te ïo váha cuu iní-ndó cùndecu-ndo.

*Tñúhu ndee iní sá ndécú ndihí
ñáyiú sàndáá iní ñáhá xii Yá Ndiöxí*

³ Te vitna chí ná càchí-ó sã ïo càhnu cuu Yá Ndiöxí Yaá cúú Tátá Xítohó Jesucristú, chí diu-gá ïo ní cundàhú iní ñáhá-gã xii-o nũu xíãⁿ ní quide-gá sá nchóó nĩ nduu-o dàtná ñⁿ ñáyiú saa vitna. Te ducaⁿ nĩ quide ñaha-gã xii-o cuendá sá Xítohó Jesucristú ní xihí-gá te ní ndoto-gá. Te cuendá sá ní nduu-o dàtná ñⁿ ñáyiú saa, xíãⁿ ní ngúndecu ndihí-o tñúhu ndee iní ⁴ sá cùndecu ndihí-o-gá nĩ caa nĩ quihíⁿ, chí ducaⁿ nĩ cachí-gá cunduu. Te yacáⁿ vá quini-gá-ó nĩ ñⁿ sá cuèhè sá dúhá, te ïo cudíⁿ iní-ó cùndecu-o ndihí-gá nĩ caa nĩ quihíⁿ. ⁵ Te sá sàndáá iní-ó Yá Ndiöxí, núú xíãⁿ coto ñaha-gã xii-o

ndéé ná sáa nduu nàqueheⁿ cuendá ñáhá-gã chí ïo càhnu cuu-gá.

⁶ Te xíãⁿ ïo cudíⁿ iní-ndó ndècu-ndo, te cuèi nándi ndòho-ndo ndècu-ndo dico sacú-ni nduu ducaⁿ ndòho-ndo. ⁷ Te òré ná cáda càhnu iní-ndó yãha-ndo nchàa sá ná càda ñaha ñáyiú xii-ndo, te ducaⁿ te cutnñí sàndáá ndisa iní-ndó Yá Ndiöxí, te sá dúcáⁿ sàndáá iní-ndó Yá Ndiöxí ïo-gá váha dàcúúxí dñhúⁿ cuàáⁿ chí xíãⁿ ñá túú cudí-xi. Te cuèi ducaⁿ dico xito ndéé nãhí-ní-güedé nũu ndisa cùu-xi dñhúⁿ cuàáⁿ. Te ducaⁿ sãtnahá-xi cùu nchòhó cuendá nchaa sá ndòhó-ndó, te na sáa nduu quixi tucu Xítohó Jesucristú te cúñaha-gã xii-ndo: “Ïo váha ní quide-ndo, te vitna ïo càhnu cuu-ndo, te tàú-ndó nùcùndecu váha-ndo”, duha cúñaha-gã xii-ndo.

⁸ Te vitna ïo cùu iní-ndó Xítohó Jesucristú cuèi vátá quini-gá-ndó-gã, te ducaⁿ ïo sàndáá iní-ndó-gã, te ïo cudíⁿ iní-ndó te súúni nĩ ñá cùtnñí iní-ndó nãsa cunduu tñúhu càháⁿ-ndó sã dúcáⁿ ïo cudíⁿ iní-ndó ⁹ cuendá sá nĩ naníhí tãhú-ndó, chí ní sàndáá iní-ndó-gã.

¹⁰ Te cue téé ní xóo càháⁿ tñúhu Yá Ndiöxí ndéé sanaha nĩ cachí-güedé nàcuáa cada-gá cundàhú iní ñáhá-gã xii-o vitna. Te cue téé-áⁿ ïo váha ní dácuahá-güedé nàcuáa cada Yá Ndiöxí dàcácu nihnu ñaha-gã xii-o vitna. ¹¹ Te Espiritú Xítohó Jesucristú ní ngúndecu ndihí cue téé-áⁿ nĩ xáhaⁿ-xi xii-güedé nàcuáa ndoho-gá, te ní xáhaⁿ tucu-xi xii-güedé sá sãtá ná yãha ndoho-gá te ïo cunuu-gã ndihí Yá Ndiöxí. Te ïo ní sani iní-güedé nũu ná nduu sáa ducaⁿ càda-xi, ndihí nchaa nándi-gá cúú sã cáda-xi. ¹² Te Yá Ndiöxí ní xáhaⁿ-gã xii-güedé sá ncháá tñúhu váha càháⁿ-güedé vá cúu-xí cuendá méé-güedé, chí cuendá nchoo cuè ñáyiú ndècu ñuyúú-a vitna cùu-xi. Te diu-ni tñúhu-áⁿ cúú tñúhu càháⁿ nchúhú cue téé càháⁿ tñúhu Yá Ndiöxí núú-ndó. Te Espiritú sá nĩ taxi Yá Ndiöxí ndécú ndihí-o

chindee ñaha-xi xii-ndí cãháⁿ-ndí tñuhu-gá. Te cue espíritú xínú cuèchi núú Yã Ndiõxí ío cuení-xi quini ndáá-xi nchaa nãcuáa cuáháⁿ tñuhu-áⁿ.

Yá Ndiõxí cãchí-gá sá cáda-ó mèe-ni sá vãha

¹³ Te sá dúcáⁿ ío váha ní quide ñaha Yã Ndiõxí xii-ndo xíáⁿ xíní ñuhu-xi ío váha cuáha-ndo cuendá nãcuáa cundecu-ndo te vá cãní iní-ndó cáda-ndo ni ñⁿ sá cuèhé sá dúhá, te ío quindáá iní-ndó sá Yã Ndiõxí cada váha ñaha-gã nduu na quixi tucu Xítohó Jesucristú. ¹⁴ Te ío tñⁿ-ndo nchãa tñuhu cãháⁿ Yã Ndiõxí, te vá cúhúⁿ-gã iní-ndó nãndí sá cuèhé sá dúhá sã ní xúhúⁿ iní-ndó cútñahá vátá cundecu-gã-ndó ìchi-gá te ni vá cáda-ndó. ¹⁵ Te cada-ndo mèe-ni sá vãha cundecu-ndo dátñá quidé mèe Yã Ndiõxí Yaá ní cãháⁿ ñáhá xii-o cundecu-o ndihí-gá. ¹⁶ Te cãchí-gá núú tütú-gá: “Cada-ndo mèe-ni sá vãha cundecu-ndo, chi ducaⁿ quide yúhú”, duha cãchí-gá núú tütú-gá.

¹⁷ Te Yã Ndiõxí cada ndáá-gá cuèchi nchaa ñáyiu, te vá cáda cuendá-gá cuèi náí ñáyiu cùu-yu, te nchòhó cãchí-ndó sã díú Tãtá-ndó cùu-gá te ndáá, núú xíáⁿ xíní ñuhu-xi canehe-ndo sá yíñuhu núú-gã ndí nchãa nduu cundecu-ndo ñuyú-a. ¹⁸ Te ñⁿ-gá ní dácãcu nihnu ñaha-gã xii-ndo ñⁿ ichi sá ñà túú nãndíhi ní sanu ichi ñaha cuè ñaní tñáhá-ndó ní xíndecu ndéé sanaha ni cùu, te nchòhó sa ñaha-ndo sá sã dúcáⁿ ní quide ñaha Yã Ndiõxí ní dácãcu nihnu ñaha-gã xii-ndo ìchi-áⁿ ñà túú ní chãhu-gá ni ñⁿ díhúⁿ cuááⁿ, te ni ñⁿ díhúⁿ cuixíⁿ sá ndíhí nihnu ñuyú-a cuendá-ndó. ¹⁹ Chi Xítohó Jesucristú ní quixi-gá ní sati níñí-gã, te ní xíhí-gá núú cùrúxí cuendá sá nchóó nãníhí tãhú-ó, te cùu-gá dátñá ñⁿ mbéé quiti ío váha iní-xi, quiti cãndoo canine. ²⁰ Te ducaⁿ ní ndoho Xítohó Jesucristú, chi ducaⁿ tñáhí ndéé tñuní ndoho-gá

ndéé cútñahá vátá ngãva-gá ñuyú. Te ducaⁿ ní yáha-gá cútñahá ní quixi-gá òré vitna cùmání sãá nduu nãa ñuyú-a cuendá nchoo cùu-xi sá vãha xii-o vitna. ²¹ Te nchòhó sa ñihí-ndó tñuhu nãcuáa ní yáha Xítohó Jesucristú cútñahá ní quixi-gá ñuyú-a, núú xíáⁿ sãndáá iní-ndó Yã Ndiõxí. Te Yã Ndiõxí ní dándótó-gã Xítohó Jesucristú, te sátá ní dándótó ñaha-gá te ní cãchí-gá sá ío cãhnu cuu Xítohó Jesucristú. Te sá dúcáⁿ ní cuu, xíáⁿ ío sãndáá iní-ndó Yã Ndiõxí, te ní taxi-gá tñuhu ndee iní ndécú ndihí-ndo sá sãá nduu cundecu-ndo ndihí-gá ni caa ni quíhíⁿ.

²² Te Espíritú Yã Ndiõxí ní quide-xi te ní sãndáá iní-ndó tñuhu-gá, te xíáⁿ ní nduu ndoo ní nduu nine iní-ndó, te cùu iní tñáhá ndisa-ndo nãcuáa ndecu-ndo ichi Yã Ndiõxí, te xini ñuhu ndisa-xi sá ío ni yùhu ni iní-ndó cùu iní tñáhá-ndó ñⁿ ñⁿ-ndo. ²³ Te nchòhó ní nduu-ndo dátñá ñⁿ ñáyiu saa sá cuendá tñuhu Yã Ndiõxí, te tñuhu-áⁿ candeca-xi iní-ndó ni caa ni quíhíⁿ, te vá ñⁿ nduu ndihí nihnu-xi, te ñá díú cuendá ñáyiu ñuyú-a ni nduu-ndo ñⁿ ñáyiu saa chi cuendá tñuhu-gá. ²⁴ Chi núú tütú Yã Ndiõxí cãchí-xi:

Nchaa ñáyiu ndecu ñuyú-a cùu-yu dátñá cúhú, chi cúhú-ãⁿ tnaa-ni cùdí-xi te xihí-xi, ducaⁿ sãtnahá-xi cùu-yu.

Te nchaa sá ndécú ndihí-yu cùu-xi datñá ñⁿ itá cúhú-ãⁿ, chi itá-áⁿ tnaa-ni tucu cùdí-xi te ndãhvã-xi, ducaⁿ sãtnahá-xi cùu nchaa sá ndécú ndihí-yu.

²⁵ Dico tñuhu Yã Ndiõxí chi vá náá tñáhí-xi, chi duha-ni ndecu-xi, te ñⁿ-ni duha cundecu-xi ni caa ni quíhíⁿ.

Duha cãchí-xi núú tütú-gá. Te ñⁿ tñuhu-áⁿ ní dánèhé ñáhá nchúhú cue téé cãháⁿ tñuhu Yã Ndiõxí xii-ndo.

2

¹ Te xíǎⁿ xíní ñúhu-xi dañá-ndo nchaa núú sá cuéhé sá dúhá, te dañá-ndo ichi tnúhu ndehnde, te dañá-ndo vǎ dándàhú-gá-ndó mèe-ndo sá quidé vǎha-ndo, te dañá-ndo ichi cuedú ínì, te dañá-ndo nchàa tnúhu yiti. ² Te cada-ndo cuèndá sá cúú-ndó dàtná cue landú yíquíⁿ vitna sadi camá, chi landú-áⁿ mee-ni sàdi-güexi te sǎhnu-güexi. Te cada iní-ndó sá dúcáⁿ càda-ndo chi xínì ñúhu-xi sá ïo cuhuⁿ iní-ndó dàcuaha-ndo tnúhu Yá Ndiöxí, chi xíǎⁿ cúú-xí mèe-ni tnúhu vǎha, te ducaⁿ te cuita cuehnu nihnu-ndo ichi-gá quíhíⁿ ndéé ná sàá nduu cùndecu-ndo núú ndécú-gá. ³ Te ducaⁿ xínì ñúhu-xi cada-ndo, chi nchòhó sá ní cutnùnì ndisa iní-ndó sá Yá Ndiöxí ïo vǎha iní-gá.

Xítohó Jesucristú cúú-gǎ dàtná ìⁿ yúú

⁴ Te ïo nanducu ñihnu-ni-ndo Xítohó Jesucristú Yáá quidé nàcuáa naníhí tǎhú-ó. Te ñú-gá ní cuu-gá dàtná ìⁿ yúú sǎ ñà túú nándihí sá cúú-xí ñǎyiu ñuyíú-a, chi ní dáquée tíhú ñáhǎ-yu xii-gá. Dico Yá Ndiöxí ní cachí-gá sá Xítohó Jesucristú cúú-gǎ dàtná ìⁿ yúú sǎ ïo-gá vǎha, chi ïo cùnuu-gá. ⁵ Te nchòhó sá ní naníhí tǎhú-ndó, te ïo-gá chí nánducu nihnu Yá Ndiöxí cuèndá cuu ìⁿnuu-ndo cùndecu-ndo ndihí Espíritú-gá. Te núú ducaⁿ na càda-ndo te cuu-ndo dàtná yúú vǎha dàcaa-güedé dava vehe, te cuu tucu-ndo dàtná cue dútú ní xinu cuechi núú Yá Ndiöxí ndéé sanaha, nàcuáá ñá túú nǎ cumánì-ndó núú-gǎ, chi nchaa cue téé-áⁿ ní xóo cuáha ñaha-güedé sá ní xóo nduu tǎhú-gá. Te nchòhó vitna tàú-ndó càda-ndo nchaa nàcuáa càháⁿ-gá, te nduu vétú iní-gá. Te ducaⁿ càda-ndo chi ndécú-ndo ndihí Xítohó Jesucristú. ⁶ Te Yá Ndiöxí càchí-gá núú tütú-gá:

Yúhú taxi ndecu-í ìⁿ Yáá ñúú Sión,

te cuu-gá dàtná ìⁿ yúú vǎha sá sánútnǎ-güedé xíquí cimientú ìⁿ vehe, chi yúhú ní cachí-í sá Yáá-áⁿ ïo cunuu-gá.

Te nchaa ñáyiu quíndáá iní ñáhá xii-gá vǎ ìⁿ ndúu ndixi cuéchi iní-yu sá dúcáⁿ sàndáá iní ñáhǎ-yu xii-gá.

Duha càchí-gá núú tütú-gá. ⁷ Te nchòhó ñáyiu sàndáá iní ñáhá xii Xítohó Jesucristú ïo cùu iní-ndó-gǎ, te nchaa ñáyiu ñá túú sàndáá iní ñáhá xii-gá quidé-yu dàtná càháⁿ-xi núú tütú Yá Ndiöxí núú càchí-xi:

Yúú sǎ ní dáquée tíhú cue téé dàcaa vehe, xíǎⁿ cúú-xí yúú sǎ ïo-gá nándihí vitna.

Duha càchí-xi núú tütú-gá. Te yúú-áⁿ cada iní-ó sǎ cúú-xí Xítohó Jesucristú, chi ní dáquée tíhú ñáhá-güedé xii-gá. ⁸ Te càchí tucu-xi ingá xichi núú tütú Yá Ndiöxí:

Yúú-áⁿ nguñenu ñáyiu te nduá-yu. Duha càchí-xi núú tütú-gá. Te tnúhu-áⁿ quée-xí sǎ ïo quide sáá iní ñáyiu núú-gǎ, chi ñá túú cuínì-yu tníⁿ-yu tnúhu càháⁿ-gá, te ducaⁿ tnàhí ndéé tnuní sá ncháá ñáyiu ñá túú cuínì tníⁿ tnúhu càháⁿ-gá, te ïo cùu sáá iní-yu núú-gǎ.

Ñáyiu ndécú ndihí Yá Ndiöxí

⁹ Te nchoo cùu-o ñáyiu sá ní dáquée ñíⁿ ñaha Yá Ndiöxí xii-o cuèndá cundecu-o ndihí-gá, te cùu-o dútú xínú cuéchi-o núú-gǎ, te mee-gǎ cúú-gǎ Yáá ïo cùnuu, te cùu-o ñáyiu quide ndáá xíndecu ichi-gá te cùu tucu-o ñáyiu yíndaha-gá. Te ducaⁿ ní quide ñaha-gǎ xii-o cuèndá sá cùñaha-o xii nchaa ñáyiu sá ïo càhnu cuu-gá, te ïo vai núú sǎ vǎha quide-gá, te ñú-gá ní quide ní dáñá-ó nchàa ichi cuehé ichi duha ndécú-o ní cuu, te ní sanu ichi ñaha-gǎ xii-o ìⁿ ichi vǎha, te vitna cutnùnì iní-ó sǎ ïo càhnu cuu-gá. ¹⁰ Te nchoo cùu-o ñáyiu ñá túú ndécú ndihí Yá Ndiöxí ní cùu, dico vitna ní nguñendu ndihí-o-gǎ,

te dává-án vátá saá-gá nduu càda vâha ñaha-gã xii-o, dico vitna sa ní saá nduu quide vâha ñaha-gã xii-o, chi ío cùndahú iní ñáhá-gã.

Cada vâha-o cùndecu-o cunu cuechi-o núú Yá Ndiõxí

¹¹ Te nchòhó ío cùu iní ñàhà-í xii-ndo, te cächí tnúhu-í xii-ndo sã nchóó cùu-o datná cue ñáyiú ndècu tnaduha ìⁿ ñúú, te ducaⁿ sãtnahá-xí cùu-o chi tnaa-ni ndècu-o ñuyú-a, te saá nduu ndùu táhú-ó cùndecu-o núú ndécú Yá Ndiõxí táxí tnùnì-gã, te xíãⁿ càháⁿ ndàhú-í núú-ndó sã vã cádá-ndó ní ìⁿ sã cuèhé sã dúhá sãni iní-ndó, chi nchaa xíãⁿ ñá túú cùu-xi sã vâha sã cúú-xi-ndó. ¹² Te cada vâha-ndo cùndecu-ndo núú nchàa ñáyiú ñá túú ndècu ichi Yá Ndiõxí, te cuèi na càháⁿ ñáyiú sã nchòhó nchicúⁿ ñihnu-ndo ichi cuehé ichi duha, dico quini-yu nchaa sã vâha quide-ndo, dico na saá nduu dândixi túú Yá Ndiõxí ini-yu sã ñá túú quide vâha-yu ndécú-yu, te dává-án cachí-yu sã quidé vâha-ndo ndècu-ndo, te cada càhnú-yu Yá Ndiõxí.

¹³ Te Xítohó Jesucristú cuini-gá sã nchòhó ío quindáá iní-ndó nchàa cue téé cùchiuⁿ taxi tnuní ñáhá xii-ndo, te ducaⁿ-ni quindáá iní-ndó cuèi mee téé cùnnu vihi-gá yíndaha ñaha xii ñáyiú. ¹⁴ Te ducaⁿ-ni quindáá iní-ndó nchàa dava-gã cue téé cùnnu, chi Yá Ndiõxí ducaⁿ ñí cachí-gã cunduu sã cuè téé-án cada ndáá-güedé nchaa cuèchi ñáyiú quide cuehé quidé dùha ndecu, te càháⁿ vâha-güedé cuendá nchaa ñáyiú xíquide vâha ndècu. ¹⁵ Te Yá Ndiõxí cuini-gá sã cádá vâha-ndo cùndecu-ndo cuendá nchaa ñáyiú ío ñí dîquí-xi càháⁿ cuèhé cuendá-ndó sã ndécú-ndó ichi Yá Ndiõxí vã ñihí-gã-yu tnúhu càháⁿ-yu.

¹⁶ Te nchòhó, Yá Ndiõxí ní quide-gã sã cúú-ndó ñáyiú cuu cada ñacuáa véxi iní mee-xí, dico ñá díú sã dúcáⁿ ñí quide ñaha-gã xii-ndo, te ngóo-ndo càni

iní-ndó càda-ndo nándi sã cuèhé sã dúhá, chi cada-ndo sã cúú-ndó ñáyiú xinu cuechi núú Yá Ndiõxí.

¹⁷ Te canehe-ndo sã yíñùhu núú nchàa ñáyiú, ndihí núú téé cùnnu vihi yíndaha ñaha xii-yu, te cuu iní tnáhá ndí mee-ndo nacuaá ndècu-ndo ichi Yá Ndiõxí, te ío canehe-ndo sã yíñùhu núú-gã.

Nchaa ñacuáa ndoho-o cùndecu-o ichi Xítohó Jesucristú

¹⁸ Te nchaa nchòhó ñáyiú xinu cuechi canehe-ndo sã yíñùhu núú cuè patróoⁿ-ndó, te quindáá iní-ndó càda-ndo nchaa chiuⁿ tahu-güedé. Te ìⁿ-ni càda-ndo núú cuè téé vâha iní-xi, ndihí núú cuè téé ío cuihna iní-xi. ¹⁹ Te núú nchòhó ná càda ndee iní-ndó ndòho-ndo nchaa sã ñá túú tàú-ndó ndòho-ndo cuendá sã cuini-ndó cùndáá-ndó núú Yá Ndiõxí ñá, te ío nduu vétú iní-gã. ²⁰ Te núú nchòhó ní quide-ndo ìⁿ cuèchi, te sãni iní-ndó dândoho ñaha ñáyiú xii-ndo, ¿te ná sã vâha cùu xíãⁿ-i? Dico núú nchòhó ná cádá ndèe iní-ndó ndòho-ndo nchaa sã cádá ñaha ñáyiú xii-ndo sã cuendá sã quidé-ndó sã vâha ña, te núú ducaⁿ na càda-ndo te cùu-xi ìⁿ sã vâha núú Yá Ndiõxí. ²¹ Te Yá Ndiõxí ní cachí-gã sã cádá ndèe iní-ó ndòho-o nándi ndoho-o sã cuendá sã quidé-ó sã vâha, chi ío ní ndoho Xítohó Jesucristú cuendá-ó, te ducaⁿ tàú-ó càchicúⁿ ñihnu-o càda ndee iní-ó ndòho-o nándi ndoho-o, chi ducaⁿ ñí quide-gã. ²² Te mee-gã ñá túú quide-gã ní ìⁿ sã cuèhé sã dúhá, te ní ìⁿ tnúhu ndehnde ñá túú càháⁿ-gã. ²³ Te òré ní xóo cúcuèhé ñáhá-güedé xii-gã, te ñá túú ní xóo danchòcáva-gã tnúhu cuèhé, te òré ní xóo dândòho ñaha-güedé xii-gã, te ñá túú ní xãháⁿ-gã xii-güedé sã ío ná cada ñaha-gã, chi núú ndáhá Yá Ndiõxí ní xóo nachihí-gã mee-gã, ndihí nchaa sã sání iní-güedé cada ñaha-güedé xii-gã. Te Yá Ndiõxí cúú-gã Yuá ío vâha cada ndáá cuèchi nchaa ñáyiú na saá nduu. ²⁴ Te

Xítohó Jesucrístú cúú-gǎ Yaa ní xíhí núú cùrúxí cuendá nchaa cuéchi nchoo ñáyiú ndècu ñuyíú-a. Te ducaⁿ ní xíhí-gǎ cuendá nchoo dùuⁿ duuⁿ dañá-o nchaa ichi cuéhé ichi duha, te cada ndáá-ó cùndecu-o ichi-gǎ. Te ní dánicuèhé ñáhá-güedě xii-gǎ, te sá dúcáⁿ ní ndoho-gǎ xíáⁿ ní ngúndecu váha nchoo vitna. ²⁵ Te nchoo cùu-o datná cue mbéé cue quití ní xíta ní cùu, dico vitna ní tuha-o Xítohó Jesucrístú, te Yaa-áⁿ cúú-gǎ dàtná ìⁿ toli xító ñaha-gǎ xii-o vitna cuendá sá vǎ cuíta nihnu-o.

3

Nàcuáa tàú ñáyiú tnǎndaha cadá-yu cundecú-yu

¹ Te nchaa nchòhó ñáyiú dìhí ní tñandaha ío quindáá iní-ndó yìⁿ-ndo cuendá sá núu ñá túú sàndáá iní-güedé tnúhu Yá Ndióxi te quindáá iní-güedé cuendá sá ndéhe-güedé quidé ndáá-ndó ndècu-ndo, te ni ñá túú xini ñuhu-xi cáháⁿ-ndó tnúhu-gǎ núú-güedě. ² Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yíñùhu núú Yá Ndióxi. ³ Te vǎ cání iní-ndó mèe-ni cunduu vii-ndo, te ndada-ndo ñiquí-ndó nàcuáa tàú-xi cunduu, te vǎ cání iní-ndó nǎndi canehe-ndo, te ni vǎ cání iní-ndó cuíhnu-ndo mee-ni dóó váha sǎ ío vii ndáa. ⁴ Chi iní-ndó xini ñuhu-xi cunduu vii cunduu váha-xi núú Yá Ndióxi cuéi vitna te cuéi núú cuáháⁿ núú vèxi, te cuu-ndo ñáyiú ío càhnu iní-xi, te núu ducaⁿ na càda-ndo te ío cuu váha iní Yá Ndióxi. ⁵ Te ducaⁿ ío vii ío váha ní xínduu iní nchaa ñáyiú dìhí ní xíndecu ndéé sanaha, te ñáyiú-áⁿ ío ní sàndáá iní-yu Yá Ndióxi te ní cudíú-yu núú-gǎ, te ní tñí-yu nchaa tnúhu ní cáháⁿ yíⁿ-yu. ⁶ Te ducaⁿ ní xóo cada ndíi Sǎrá ní xóo quindáá iní ndíi yíⁿ ndíi, ndíi Àbrahám, te ní cánehe ndíi dìhí-áⁿ sǎ yíñùhu núú yíⁿ ndíi. Te núu nchòhó quidé váha-ndo ndècu-ndo

te ñá túú yùhú-ndó nǎ cada ñaha tnàha ñáyiú-ndo xii-ndo, te núu ducaⁿ quide váha-ndo ndècu-ndo te quide-ndo datná ní quide ndíi Sǎrá.

⁷ Te nchòhó cue téé ndècu ñadihí-xi ío váha cuáha-ndo cuendá nàcuáa cundecu váha-ndo ndíhí-yu, te ío vii cáháⁿ ndíhí-ndó-yu, chi ñáyiú-áⁿ íí-gǎ-yu dàcúúxí nchòo cue téé, te ducaⁿ càda-ndo chi ndí ndúú-ndó ndúu táhú-ndó cundecu-ndo ndíhí Yá Ndióxi, te núu ducaⁿ na càda-ndo te óré cáháⁿ ndíhí-ndo Yá Ndióxi te tedóho ñaha-gǎ xii-ndo.

Ñáyiú quide sá váha ndòhó-yu

⁸ Te cǎchí tnúhu tuçu-í xii-ndo sǎ ío cuu ìⁿ-nuu-ndo cùndecu-ndo, te cundàhú iní tnáhá-ndó ìⁿ ìⁿ-ndo, te cuu iní tnáhá tùcu-ndo nàcuáa ndècu-ndo ichi Yá Ndióxi, te cuu-ndo ñáyiú ndàhú iní-xi. ⁹ Te núu ìⁿ sǎ ñá túú váha quide ñaha ñáyiú xii-ndo, te ñá díú-ní dùcaⁿ nanchocáva-ndo càda-ndó-yu, àdi xícuèhé ñáhǎ-yu xii-ndo, te vǎ ná dànhocáva-ndo dìu-ni tnúhu cuéhé, chi cǎcǎⁿ táhú-ndó núú Yá Ndióxi cuendá sǎ ná cádá váha ñaha-gǎ xii-yu, te ducaⁿ càda-ndo chi Yá Ndióxi ní cáháⁿ ñáhá-gǎ xii-ndo cuendá sǎ cádá váha ñaha-gǎ xii-ndo tnáhá-ndó. ¹⁰ Te núú tütú Yá Ndióxi cǎchí-xi:

Nchaa ñáyiú cuíni cundecu váha ndí nchàa nduu nini cundecú-yu ñuyíú-a,

xini ñuhu-xi sǎ vǎ càháⁿ-yu tnúhu cùtexínu, te ni vǎ dàcuàndehndé-yu.

¹¹ Te xini ñuhu-xi duuⁿ duuⁿ dañá-yu nchaa ichi cuéhé ichi duha, te cadá-yu mee-ni sǎ váha,

te ío ndúcú-yu nàcuáa cadá-yu cundecu váha-yu ndíhí tnàha ñáyiú-yu te dìu-ni ducaⁿ cànchicúⁿ nihnú-yu cadá-yu.

¹² Te Yá Ndióxi xító-gǎ nchaa ñáyiú quide ndáá núú-gǎ te tedóho-gǎ nchaa tnúhu càháⁿ-yu,

dico nchaa ñáyiú ñá túú cuíní cada ndáá, ñáyiú-áⁿ ñá túú cùu váha iní-gá núu-yu.

Duha cächí-xi núú tütú-gá.

¹³ Te vá yõ níhi ndéé cada ñaha xii-o ìⁿ sá ñá túú váha te núu mee-ni sá váha na càda-o cundecu-o. ¹⁴ Adi núu ná cúú sá ná cáda ñaha ñáyiú xii-o sá cuendá sá quidé váha-o ndècu-o ña, te sá dúcáⁿ ná cáda ñáhá-yu xii-o cùu-xi ìⁿ sá váha sá cúú-xí-ó núú Yá Ndiòxí. Te na cächí tnúhu-í xii-ndo sá vá yùhú-ndõ-yu, te ni vã cùndiyí-ndó cuendá nchaa sá ná càda ñahá-yu xii-ndo. ¹⁵ Te nèhe-ndo sá yíñùhu núú Xítohó Jesucristú. Te ío cundecu túha-ndo dànehé-ndó ñáyiú véxi ndùcu tnúhu núu-ndó nàcuáa ndùu tnúhu ndee iní ní taxi Xítohó Jesucristú ndécú ndìhi-ndo, te cuu vijí cuu váha iní-ndó cãháⁿ ndìhi-ndõ-yu, te cãháⁿ-ndó núu-yu mee-ni tnúhu yíñùhu nacuáa cùu váha iní Yá Ndiòxí. ¹⁶ Te ío cada váha-ndo cundecu-ndo cuendá sá vã cùndiyí-ndó, te núu ducaⁿ na càda-ndo, te nchaa ñáyiú xicuehé ñáhá xii-ndo cuendá sá quidé váha-ndo ndècu-ndo ichi Xítohó Jesucristú quendóo canúu-yu ndìhi nchaa tnúhu cãháⁿ-yu, chi nchòhó quidé váha-ndo ndècu-ndo. ¹⁷ Te váha-gá sá ndóhó-ó cuendá sá quidé-ó sá váha te núu mee Yá Ndiòxí ducaⁿ cuíní-gá cunduu, te ñá díú sá ndóhó-ó cuendá sá ñá túú quide-o sá váha.

¹⁸ Te Xítohó Jesucristú ní xíhí-gá sá cuendá nchaa cuéchi nchaa nchoo ñáyiú ndècu ñuyíú-a, te ìⁿ xito-ni ducaⁿ ñí xíhí-gá te ducaⁿ te vá cùu tnàhí-gá, te mee-gã cúú-gã Yáá ñá túú tnàhí cuéchi-xi, te ducaⁿ ñí ndoho-gá cuendá nchaa cuéchi ñáyiú ndècu ñuyíú-a ñáyiú ñá túú cuíní cada ndáá núú Yá Ndiòxí, te ducaⁿ ñí cuu cuendá sá núcundecu váha-yu núú Yá Ndiòxí te núu na quindáá iní ñáhá-yu xii-gá. Te mee-gá ní xíhí-gá dico Espiritú-gá chi ní xíndecu-ni-xi, ¹⁹ te Espiritú-gá

ní sáháⁿ-xi ní cãháⁿ-xi tnúhu Yá Ndiòxí núú nchaa espíritú ñáyiú ndècu núú ùhú núú ndàhú. ²⁰ Te ñáyiú-áⁿ cúú ñáyiú ní xíndecu ndéé sanaha cùtnàhá ní xíndecu ndíi Nõé, chi ñáyiú-áⁿ ío ní quide sáá iní-yu núú Yá Ndiòxí. Te Yá Ndiòxí ío váha iní-gá, chi ní dácacá-gá nduu ñí xíndecu ndíi Nõé ní cadúha ndíi bàrcú cuendá ndétú-gã ndixi cuéchi iní-yu sá ñá túú quide váha-yu ndècú-yu ni cùu. Te dàvá-áⁿ ñí ndaa ndute ñuyíú te ní cácu úná duha ná tnàhá ñáyiú, chi ní quée-yu xití bàrcú-áⁿ, te ñá túú ní cãhá-yu. ²¹ Te sá dúcáⁿ ñí cácu ñáyiú úná-áⁿ ñá túú ní cãhá-yu ndute ní ndaa ñuyíú dàvá-áⁿ. Te xíáⁿ quée-xí sá cuándute ñáyiú vitna, te naníhí tàhú-yu te núu na quindáá iní-yu tnúhu ndáá tnúhu Yá Ndiòxí. Te ñá díú sá cuándute-o te nduu ndoo nduu nine yiqui cùnú-ó te naníhí tàhú-ó, chi xini ñuhu-xi náhmá-ó núú Yá Ndiòxí nchaa yíca cuéchi-o, te nduu ndoo nduu nine iní-ó, te ducaⁿ te naníhí tàhú-ó, chi Xítohó Jesucristú ní xíhí-gá cuendá-ó te ní ndoto-gá. ²² Te Yáá-áⁿ cuándaa-gá andiú, te ní ngóo-gá xio cùha Yá Ndiòxí, te tàxi tnuni-gá nchaa Espiritú cùnùu ndìhi nchaa dava-gá cue espíritú xínú cuéchi.

4

Cada-o nàcuáa cuíní méé Yá Ndiòxí

¹ Te Xítohó Jesucristú ní ndoho-gá cùtnàhá ní xíndecu-gá ñuyíú-a, te vitna nchòhó cundecu túha-ndo ndòho-ndo cuendá-gá, chi nchaa ñáyiú ndòho nándi sá ndóhó cuendá-gá dàñá-yu nchaa sá cuéhé sá dúhá. ² Te ducaⁿ ñá túú-gã ndécú-yu ichi cuéhé ichi duha, chi mee-ná nàcuáa cãháⁿ Yá Ndiòxí quidé-yu ndècú-yu ñuyíú-a. ³ Te nchòhó sa ñàha-ndo sá ío cuéhé núú sá cuéhé sá dúhá ñí xóo cada-o cùtnàhá vátá cundècu-gá-ó ichi Yá Ndiòxí, chi ní xóo cada-o nchaa sá cuéhé sá dúhá cùdíí iní nchaa

ñáiyu ñá túú sàndáá iní tnúhu-gá, te dàvá-áⁿ ní xóo cada-o nchàa núú sá cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñáiyu quihu, te ní xóo cundecu-o víco núú ní xóo cada-o nchàa sá ñà túú vâha, te ní xóo níhí tnáhá-ó ndìhí nchaa tnaha quihu-o, te ní xóo chiñuhu-o nchàa sá càchí-yu cùu ndiòxí te ñá ndàá sá ndiòxí cúu nchàa xiáⁿ, te nándi-gá nchaa sá cuèhé sá dúhá ní xóo cada-o dàvá-áⁿ. ⁴ Te ñáiyu-áⁿ cùñuhu-yu vitna sá ñà túú-gã nihí tnáhá-ó ndìhí-yu cada-o nchàa sá cuèhé sá dúhá quidé-yu, te xiáⁿ càháⁿ cuèhé-yu cuendá-ó vitna. ⁵ Dico sáá nduu te ñáiyu-áⁿ nâhmá-yu nchaa sá quidé-yu núú Xítohó Jesucristú, chi ñi-gá sa ndècu túha-gá sá cáda ndáá-gá cuéchi nchaa ñáiyu sa ní xihí, ndìhí cuéchi nchaa ñáiyu xíndecu vívú. ⁶ Te cue ñáiyu sa ní xihí ní xíndedóho tnúhu Xítohó Jesucristú, te cuéi ní xihí-yu dátá xihí dava-gá ñáiyu, dico espíritú-yu chi ní nduu táhú-xi ndècu váha-xi dátá ndécú Yá Ndiòxí.

⁷ Te vitna ta cùyatni danaa Yá Ndiòxí ñuyú-a núu xiáⁿ ío váha cuáha-ndo cuendá nàcuáa cuñdecu-ndo, te càháⁿ ndìhí-ndo-gã. ⁸ Te xini ñuhu-xí sá ío cuu iní tnáhá-ndó ñiⁿ ñiⁿ-ndo, chi núu ducaⁿ na cùu iní tnáhá-ndó ñiⁿ ñiⁿ-ndo, te vá cáni-gã iní-ndó càda cuendá-ndó nchàa sá ñà túú vâha quide ñaha ñáiyu xii-ndo, ⁹ te nchòhó ñáiyu xíndecu vehe-xi cuáha nùu-ndo vehe xii cue ñáiyu ñuhu ichi na ndetátú-yu, te ío váha cuu iní-ndó dùcaⁿ cada-ndo. ¹⁰ Te Yá Ndiòxí ní taxi-gá ndí díñⁿ núú táhú ndécú ndìhí-ndo ñiⁿ ñiⁿ-ndo, te nàcuáa ndùu táhú ní nduu táhú-ndó ñiⁿ ñiⁿ-ndo te ducaⁿ chindee tnaha-ndo, te vá dáñá ndéé-ndó càda-ndo nchaa nacúáa tàuchiúⁿ Yá Ndiòxí cada-ndo, te chindee ñaha-gá xii-ndo. ¹¹ Te dava nchòhó ñáiyu càháⁿ tnúhu Yá Ndiòxí núú ñáiyu, xini ñuhu-xi

cáháⁿ-ndó nàcuáa ndùu tnúhu-gá núu-yu, te dava nchòhó ñáiyu quide nchaa núu chiúⁿ chindee tnaha ñáiyu-xi, xini ñuhu-xi cada-ndo sá Yá Ndiòxí chindèe ñaha-gá xii-ndo, te ducaⁿ càda-ndo nchaa núú sá vâha, chi Xítohó Jesucristú tnáhá-gá chindèe ñaha-gá xii-ndo, te ducaⁿ ío cuu càhnu Yá Ndiòxí. Te vitna tàú-ó càháⁿ-ó sá ío càhnu cuu Xítohó Jesucristú, chi ñi-gá cùnùu-gá nchaa nduu nchaa quiú, te ducaⁿ na cùnduu.

Ndoho tnáhá-ó cùndecu-o ichi Xítohó Jesucristú

¹² Te nchòhó ñáiyu ío cùu iní-í, vá cùñuhu-ndo sá ío ndòho-ndo ndecu-ndo ichi Xítohó Jesucristú, chi sá dúcáⁿ ndòho-ndo-áⁿ cùtnùní ndisa sá sàndáá iní-ndó-gã, te vá cáni iní-ndó nã cuendá ducaⁿ ndòho-ndo. ¹³ Chi da cudíí ñi-ndó te núu ndòho-ndo dátá ní ndoho Xítohó Jesucristú, te ducaⁿ súúní cùdíí ñi-ndó òré ná quixi tucu-gá ñuyú-a te dàvá-áⁿ quini-ndó sá ío càhnu cuu-gá. ¹⁴ Te núu xicuehé ñáhá ñáiyu ndècu ichi cuehé ichi duha xii-ndo cuendá sá ndécú-ndó ichi Xítohó Jesucristú, te xiáⁿ cúu-xí ñiⁿ sá vâha sá cúu-xí-ndó núú-gã, te ducaⁿ chi Espíritú Yá Ndiòxí sá ío cùnùu ndecu ndìhí ñaha-xi xii-ndo, te nchaa ñáiyu ndècu ichi cuehé ichi duha-áⁿ càháⁿ cuèhé-yu cuendá Xítohó Jesucristú, dico nchòhó càchí-ndó sá ío càhnu cuu-gá. ¹⁵⁻¹⁶ Te núu nchòhó dándòho ñaha ñáiyu xii-ndo sá cuendá sá ndécú-ndó ichi Xítohó Jesucristú ñá, te vá cúu càháⁿ núu-ndó, chi ndacáⁿ táhú-ndó núú Yá Ndiòxí cuendá sá ndécú-ndó ichi-gá. Te cuéi ndòho-ndo ndecu-ndo, dico ñá túú cùu-ndo ñáiyu sàhni ndíyí te ní ñà túú cùu-ndo ñáiyu dùhu, te ní ñà túú cùu-ndo ñáiyu quide cuehé quidé dùha, te ní ñà túú cùu-ndo ñáiyu chindee tnúhu tnaha ñáiyu-xi ñiⁿ sá ñà túú tàú-ndó càda-ndo.

¹⁷ Te vitna sa quèsaha Yá Ndiòxí cada ndáá-gá nchaa sá quidé nchò

ñáiyu ndècu ndìhi-gá, te núu ducaⁿ te ndéé-gá cada-gá nchaa ñáiyu ñá túú sàndáá iní ñáhá xii-gá òré ná sáá nduu dùcaⁿ cada ñaha-gá xii-yu. ¹⁸Te nchòhó xini-ndó sã ñáiyu quide váha ndècu ichi Xítohó Jesucristú ndòho tnahá-yu ndècú-yu, dico sáá nduu te nduu táhũ-yu cundecú-yu ndìhi-gá. Te núu ducaⁿ ndòho nchaa ñáiyu quide váha ña, ζte nása-gá yáha nchaa ñáiyu ndècu ichi cuehé ichi duha na sáá nduu càda ndáá Yá Ndiòxí cuechi-yu-i? ¹⁹Te nchaa nchòhó ñáiyu ndòho nacuáa cuini Yá Ndiòxí xini ñuhu-xi sá vã dáñá ndéé-ndó càda váha-ndo cundecu-ndo, te ío quindáá iní-ndó sã xító ñaha-gá xii-ndo. Te ñu-gá cúú-gã Yaá ni cadúha ñaha xii-o, te quide-gá ñⁿ sá càháⁿ-gá.

5

Nacuáa tàú-xi cada ñáiyu ndècu ichi Xítohó Jesucristú

¹ Te yúhú càháⁿ-í dóho nchaa nchòhó cue téé yíndaha nchaa dava-gá ñáiyu ndècu ichi Xítohó Jesucristú, chi tnahá yúhú yíndaha-í ñáiyu ndècu ichi-gá, te sàndáá iní-í tñuhu-gá, te ní xini-í nchaa nacuáa ní ndoho-gá, te sáá nduu te tnahá-í cunuu-í ndìhi-gá. ² Te ío canehe cuendá-ndó nchaa ñáiyu ndècu ichi Yá Ndiòxí yíndaha-ndo te cada-ndo dàtná quidé cuè toli, chi cue téé-áⁿ ío váha xito-güedé mbéé-güedé. Te canehe cuendá-ndó-yu sá cúú iní méé-ndó te ñá díú sã íó ñⁿ ñáiyu cada yica ñaha xii-ndo, te ni ñá díú sã cuini-ndó cùhuⁿ yáhu-ndo, chi ni yùhu ni iní-ndó còto-ndó-yu, chi ducaⁿ cuini Yá Ndiòxí cunduu. ³ Te vã cáda-ndó sã ío cunuu-ndo núú-yu, chi cada-ndo mée-ni sá váha cuendá ducaⁿ cànchicúⁿ nihnú-yu cadá-yu tnahá-yu. ⁴ Te òré ná quixí tùcu Xítohó Jesucristú Yaá néhé cuendá ñáhá xii-o nchaa-o ñuyú-a, te taxi-gá sã ío váha nduu

táhú-ó, te cunuu-o ndìhi-gá ni caa ni quíhⁿ.

⁵ Te nchòhó ñáiyu ndècu ichi Xítohó Jesucristú càháⁿ-í dóho-ndo sã ío quindáá iní-ndó cuè téé yíndaha ñaha xii-ndo nacuáa ndècu-ndo ichi-gá, te nchaa-ndo tàú-ndó quindáá iní tnahá-ndó ñⁿ ñⁿ-ndo, chi núú tùtú Yá Ndiòxí càchí-xi ñⁿ xichi:

Nchaa ñáiyu quide cahnu mee-xi ñá túú cùu váha iní Yá Ndiòxí núú-yu,

dico nchaa ñáiyu ndàhú iní-xi te chindee ñaha-gá xii-yu.

Duha càchí-xi núú tùtú-gá. ⁶ Te dañá-ndo mée-ndo núú ndáhá Yá Ndiòxí, chi mee-gã ío cunuu-gá. Te núu ducaⁿ na càda-ndo, te sáá nduu te cada nínu ñaha-gã xii-ndo. ⁷ Te nchaa sã yáha-ndo ndècu-ndo te nachihi-ndo ndàha Yá Ndiòxí, chi mee-gã xító ñaha-gá xii-ndo.

⁸ Te ío váha cuáha-ndo cuendá cundecu-ndo, te quíhi iní-ndó chi sácúhⁿá xicá cùu-xi cuini-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi dàtná ñⁿ quiti dééⁿ xicá ndùcu sá cáxi-xi. ⁹ Te ío quindáá iní-ndó Xítohó Jesucristú, te vã dáñá-ndó mée-ndo dandahú ñáhá sácúhⁿá xii-ndo càda-ndo nacuáa cuini-xi, chi nàha-ndo sá ncháá ñáiyu ndècu ichi Xítohó Jesucristú xíndecu nihí ñuyú ndòhó-yu dàtná ndòhó nchòo ndecu-o ichi-gá. ¹⁰ Dico sacú-ni nduu duha cundòho-o te dàtnúni ñá túú-gã ná cumání-ó cundecu-o núú Yá Ndiòxí, te dàvá-áⁿ vã cáni ñⁿ cani úú iní-ó cundecu-o ichi-gá. Te ío-gá ngúndecu ndìhi-o tñuhu ndee iní cada-o nchaa nacuáa càháⁿ-gá, te ducaⁿ càda-o chi mee Yá Ndiòxí ío chindee ñaha-gá xii-o, te ñu-ni Yaá-áⁿ ío cùu iní ñáhá-gã xii-o, chi ní càháⁿ ñáhá-gã xii-o cundecu-o núú ío váha cãa ndecu-gá cundecu-o ni caa ni quíhⁿ, te ducaⁿ ní quide-gá chi ní sàndáá iní-ó Xítohó Jesucristú. ¹¹ Te ío ndacáⁿ

táhú-ó núú Yă Ndiõxí chí ío càhnu
cuu-gá, te cùnuu-gá nchaa nduu
nchaa quíú. Te ducaⁿ na cùnduu.

Tnúhu ndéé núú nǐ ndihí-ná

¹² Te té Silvanú xini-í sá cúú-dě
#ⁿ tée quide ndáá ndécú ichi Xítóhó
Jesucristú, te diu-dé ní cáháⁿ
ndàhú-í núú-dě ní tee-dé #ⁿ ǔú
tnúhu sá nǐ xáhaⁿ-í xii-dé núú
tútú-a cuendá daquixi-í ndaha-ndo,
te núú tútú-a cǎchí tnúhu ndáá-í
xii-ndo sǎ Yă Ndiõxí ío cùu iní
ñáhá-gǎ, te chindee ñaha-gá xii-ndo
ndècu-ndo, te cǎchí tnúhu tucu-í
xii-ndo sǎ ío quindáá iní-ndó sǎ
ndáá ducaⁿ quide ñaha-gá xii-ndo.

¹³ Te cue ñáyiú ndècu ñnúú
Babiloniá, ñáyiú ndècu ichi Yá
Ndiõxí, diu-ni ñáyiú ní cachí Yă
Ndiõxí sá nánihí tǎhú datná cúú
nchòhó, ío quide ndee iní ñáhá-yu
xii-ndo, te tnáhá té Mǎcú tée cùu
datná #ⁿ déhe-í quidé ndèe iní
ñáhá-dě xii-ndo. ¹⁴ Te ndihí tnúhu
yiñùhu cada ndee iní tnáhá-ndó
#ⁿ #ⁿ-ndo, te xicáⁿ tǎhù-í núú Yă
Ndiõxí sá ío na cùndecu nahí nchaa
nchohó ñáyiú ndècu ndihí Xítóhó
Jesucristú. Te ducaⁿ na cùnduu. Te
íó chí cádá ndèe iní-nǎ vitna.

TUTÚ CÚU ÒÚ NÍ CADÚHA TÉ PÈLÚ

*Té Pèlú cádúha-dé tutú quíhíⁿ
ndaha ñáyiú sàndáá iní tnúhu Yá
Ndióxi*

¹ Yúhú té Xímú, àdi Pelú chi úú òú-í, xínú cuèchi núú Xítóhó Jesucristú, chi mee-gá ní tendaha ñáha-gá xii-í xicá cùu-í càháⁿ-í tnúhu-gá. Te cádúha-í tutú-a sá cùu-xí nchàa nchóhó ñáyiú sàndáá iní ñáhá xii-gá dàtná sàndáá iní-ndí-gá, te ducaⁿ chi Tátá-ó Dútú Ndióxi ní dácàháⁿ-gá iní-ó ní sàndáá iní-ó-gá, chi cùu-gá Yáá ío váha quide ndáá ndíhi Xítóhó Jesucristú Yáá dácàcu nihnu ñaha xii-o núú ùhú núú ndàhú. ² Te xicáⁿ táhù-í núú Yá Ndióxi sá ùuⁿ-gá uuⁿ-gá ná cuita chindee chitúu ñaha-gá xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gá chi ta cùtnuní-gá iní-ndó nàcuáa ndùu cuendá-gá, te ducaⁿ ta cùtnuní tucu iní-ndó nchàa nacuáa ndùu cuendá Xítóhó Jesucristú Yáá cùú Xítóhó-ó.

*Nàcuáa quide ñáyiú ndècu ichi
Xítóhó Jesucristú*

³ Te Yá Ndióxi ío càhnu cuu-gá chi chindee ñaha-gá xii-o quide ndáá-ó ndècu-o datná cuiní meé-gá, te ducaⁿ chi cùtnuní iní-ó nàcuáa sàni iní Xítóhó Jesucristú Yáá ní càháⁿ ñáhá xii-o. Te òré ní càháⁿ ñáhá-gá xii-o te ní cutnùní iní-ó sá ío càhnu cuu-gá te ío váha quide-gá. ⁴ Te ducaⁿ ní cutnùní tucu iní-ó nàcuáa ní càháⁿ-gá cada ñaha-gá xii-o, te tnúhu ní càháⁿ-gá-áⁿ ío càhnu cuu-xi te ío váha, te nchoo ní sàndáá iní-ó tnúhu-áⁿ núu xíáⁿ ñá túú-gá ndécú-ó ichi cuehé ichi duha te ní ñá túú-gá sání iní-ó càda-o nándi sá cuehé sá dúhá, te ní cuu vii ní cuu váha iní-ó vitna. ⁵ Te sá dúcáⁿ quide-gá te xíáⁿ ío nducu ndèe-ndo cada-ndo

nchaa nacuáa càháⁿ-í-a, te nchòhó sàndáá iní-ndó-gá dico ñá díú mèe-ni xíáⁿ chi tnàhá xíní ñúhu-xi cada ndáá-ndó cùndecu-ndo. Te núu quide ndáá-ndó ndècu-ndo te xíní ñúhu-xi tecú, tnùní-ndó tnúhu-gá. ⁶ Te núu tècú tnùní-ndó te cùu-ndo ñáyiú xíní cotnii mee-xi, te núu cùu-ndo ñáyiú sàcòo tnií mee-xi te xíní ñúhu-xi cunduu càhnu iní-ndó cuéi nándi sá ná yáha-ndo cùndecu-ndo, te núu càhnu iní-ndó te xíní ñúhu-xi cada ndáá-ndó cùndecu-ndo datná cuiní meé Yá Ndióxi cada-ndo. ⁷ Te núu quide ndáá-ndó ndècu-ndo, te xíní ñúhu-xi ío cuu iní tnáhá ndí mee-ndo nacuáa ndècu-ndo ichi-gá, te núu cùu iní tnáhá ndí mee-ndo te xíní ñúhu-xi cuu iní-ndó nchàa dava-gá tnàha ñáyiú-ndo.

⁸ Te núu sa ducaⁿ quide-ndo ndecu-ndo te uuⁿ-gá cuita ducaⁿ càda-ndo quíhíⁿ núú cuaháⁿ núú vèxi, te núu ducaⁿ quide-ndo te cùu-ndo cue ñáyiú ñá túú dàna iní-xi xíndecu, te cuita cutnùní-gá iní-ndó nchàa nacuáa sàni iní Xítóhó Jesucristú quíhíⁿ. ⁹ Te nchaa ñáyiú ñá túú cuiní ducaⁿ càda cuú-yu ñáyiú ñá túú tnáhi ndíxi túu iní-xi sá Yá Ndióxi sa ní ndada ndoo ní ndada nine-gá iní-yu cuendá nchaa sá cuehé sá dúhá ní xóo cadá-yu, te ñáyiú-áⁿ cùú-yu dàtná ñⁿ ñáyiú cuáá àdi datná ñⁿ ñáyiú ñá túú cùtnuní váha núú-xi, te ducaⁿ sàtnahá-xi cùú-yu cuendá sá dúcáⁿ quidé-yu. ¹⁰ Te xíáⁿ núu yúhú càháⁿ-í dóho nchaa nchòhó ñáyiú ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sá Yá Ndióxi ní càháⁿ ñáhá-gá xii-ndo, te ducaⁿ ní quide-gá chi ducaⁿ ní cachí-gá cada-gá. Te vá ñⁿ ndùu cani iní-ndó dàña-ndo ichi-gá, te núu vá dáña ndèé-ndó càda-ndo nchaa nacuáa càháⁿ-í-a. ¹¹ Te núu ducaⁿ na càda-ndo cundecu-ndo, te ío vii ío váha cada Yá Ndióxi queheⁿ cuendá ñáhá-gá xii-ndo òré ná sàà-ndó

núú ndécú Xítohá Jesucristú táxi tnùní-gá nchaa nduu nchaa quíú, te ñu-ni Yaá-áⁿ cúú Xítohá-ó te ní dácácu nihnu ñaha-gá xii-o núú úhú núú ndáhú.

¹² Te ducaⁿ-ni quíhi-í dandacu iní ñáhà-í xii-ndo nchàa tnúhu càháⁿ-í-a cuéi sa xini-ndó tnúhu-áⁿ, te cuéi sàndáá váha iní-ndó nchàa tnúhu ndáá dácuaàha-ndo. ¹³ Te yúhú quidé cuèndá-í sá ïo táú-xi càháⁿ-í dóho-ndo ñini ndecu-í ñuyúú-a cuèndá sá vǎ nácuaànaa-ndo nacuáa cada-ndo cundecu-ndo. ¹⁴ Chi Xítohá Jesucristú ní cachí-gá sá ñà túú-gǎ vǎi nduu cundecu-í ñuyúú-a te cuú-í. ¹⁵ Te ïo nducu ndèe-í nducu-í nácuaá cada-í cuèndá quendóo ndihi-ndo nchàa tnúhu càháⁿ-í-a, te cuéi na yǎha cuú-í dico vá nácuaànaa-ndo cada-ndo nchaa nacuáa càháⁿ tnúhu sá dánèhé ñáhà-í xii-ndo vitna.

Cue téé ní xini núú sǎ ïo càhnu cuu Xítohá Jesucristú

¹⁶ Te sa ní dánèhé ñáhà-ndí xii-ndo sǎ ïo càhnu cuu Xítohá Jesucristú. Te ní cachí tnúhu tucu-ndí nácuaá cada-gǎ òré quixi tucu-gǎ, te tnúhu-áⁿ cúú-xi tnúhu ndáá cuiti te ñá díú tnúhu sǎ ñi saní iní cue ñáyúú ñuyúú-a cùu-xi, chi nchúhú ní xini núú-ndí nácuaá ní quide-xi cùtnàhá ní cutnùni iní-ndí sǎ ïo càhnu cuu Xítohá Jesucristú. ¹⁷ Chi dàvǎ-áⁿ ïo váha ní quide Tǎtá-ó Dútú Ndióxi ní quide càhnu-gǎ Xítohá Jesucristú, te ñu-ni dàvǎ-áⁿ ñi càháⁿ Dútú Ndióxi ndéé andiú ñi xáhaⁿ-gǎ xii Xítohá Jesucristú: “Yòhó cúú-n Dèhe-í téé ïo cùu iní-í, te ïo cùdí iní ñáhà-í xii-n”, duha ní xáhaⁿ Yǎ Ndióxi xii Xítohá Jesucristú. ¹⁸ Te nchúhú ní tecú dóho-ndí ní càháⁿ Yǎ Ndióxi ndéé andiú cùtnàhá ducaⁿ ñi xáhaⁿ-gǎ xii Xítohá Jesucristú, chi tnàhá-ndí ndécú-ndí ndihi-gǎ yucu núú dúcáⁿ ñi quide càhnu ñaha Yǎ Ndióxi xii-gǎ.

¹⁹ Te ndécu ndihi-o nchaa tnúhu ní càháⁿ cue téé ní xóo càháⁿ tnúhu Yǎ Ndióxi ndéé sanaha te nchaa tnúhu-áⁿ càháⁿ-xi nchaa nácuaá cada-xi vitna, te cùtnuní iní-ó sǎ tnúhu ndáá cúú-xi, te xini ñuhu-xi cada cuèndá váha-ndo nchàa nacuáa càháⁿ tnúhu-áⁿ, chi tnúhu-áⁿ cúú-xi dàtná ñi ñuhú dáyèhé-xi ndéé òré véxi tundaá quéné chòdini càhnú dáyèhé-di. Te ducaⁿ sǎtnahǎ-xi cùu tnúhu-áⁿ chi quide-xi nácuaá cutnùni iní-ó cuèndá Xítohá Jesucristú. ²⁰ Te xini ñuhu-xi sǎ ïo-gǎ cada cuèndá-ndó sǎ ñà túú ñáyúú tecú tnùní ñi ñi tnúhu sǎ ñi chídó tnùní cue téé ní càháⁿ tnúhu Yǎ Ndióxi ndéé sanaha, te núu Yǎ Ndióxi vá cadǎ-gǎ nácuaá cutnùni iní-yu nácuaá càháⁿ nchaa tnúhu-áⁿ. ²¹ Te cue téé-áⁿ ïo ní xíndecu yíñuhu-güedé núú Yǎ Ndióxi, te nchaa tnúhu sǎ ñi càháⁿ-güedé-áⁿ ñà túú cùu-xi tnúhu sǎ ñi cahu iní mée-güedé, chi Espiritú Yǎ Ndióxi ní dácáhú iní ñáhà-xi xii-güedé nácuaá cunduu tnúhu càháⁿ-güedé.

2

Cue téé càhí sǎ càháⁿ tnúhu Yǎ Ndióxi te ñà ndáá

¹ Te ndéé sanduu chi ní xíndecu cue téé ní xóo dandáhú ñáhà xii ñáyúú isráel càhí sǎ càháⁿ tnúhu Yǎ Ndióxi te ñà ndáá sǎ càháⁿ-güedé tnúhu-gǎ, te ñu-ni ducaⁿ tucu cundecu cue téé dandáhú ñáhà xii-ndo vitna, chi cachí-güedé sǎ càháⁿ-güedé tnúhu Yǎ Ndióxi te ñà ndáá. Te cue téé-áⁿ ïo yidáhu càháⁿ-güedé, te nchaa tnúhu càháⁿ-güedé-áⁿ dacuita nihnu ñaha-xi xii-ndo te núu na tédóho-ndo, chi cue téé-áⁿ vǎ núnuu-güedé sǎ Xítohá Jesucristú ní xihí-gǎ cuèndá-güedé. Te sǎ dúcáⁿ cada-güedé ïo-gǎ ndihi dacuita nihnu-güedé mée-güedé. ² Te vǎi ñáyúú xínu iní-yu cadǎ-yu nándi sǎ cuèhé sǎ dúhá cuèndá sǎ dúcáⁿ cada cue téé-áⁿ, te cuèndá xíáⁿ ngóo ñáyúú càháⁿ úhú-yu cuèndá ichi Yǎ Ndióxi.

³ Te mee-ni tnũhu sá nĩ cahu iní cue ñáyiú ñuyiú-a danèhé ñáhá-güedé xii-ndo, te quesaha-güedé sá cúú-xí tnũhu ndáá te ñá ndáá cuendá-ni sá cuañaha-ndo dñhúⁿ xii-güedé, chi diu-ni xiáⁿ tnàhí cuhuⁿ iní-güedé, dico Yá Ndiöxí sa ní cunaha ndècu túha-gá cuendá cada ndáá-gá cuèchi-güedé, te na sàá nduu te cuíta nihnu duuⁿ-güedé, chi Yá Ndiöxí vá nácuaⁿaa-gá ñⁿ sá nĩ cachí-gá cada-gá.

⁴ Te Yá Ndiöxí ñá túú ní quide cahnu iní-gá sá nĩ quide cue espíritú ñá túú ní cuení cada ndáá xínú cuèchi núú-gá ní cùu, chi ní dáquihíⁿ ñáhá-gá xii-xi ñⁿ xichi núú io ndòho-xi ndecu-xi, te xíaⁿ cundedí nihnu-xi ndéé sáá nduu cuíta nihnu duuⁿ-ná-xi. ⁵ Te Yá Ndiöxí ñá túú ní quide cahnu tucu iní-gá nchaa sá nĩ quide ñáyiú ñuyiú dñhna, chi dàvá-áⁿ nĩ dándáá-gá ndute ñuyiú ní cáhá nchaa ñáyiú ndècu ichi cuehé ichi duha te ñⁿdii-ni té Nöé ndihí úsá-gá tucu cue ñáyiú cùu ndi mee-dé ní dácäcu nihnu-gá. Te té Nöé-áⁿ cúú-dé téé ní cáháⁿ dóho-yu nácuaá cada váha-yu cundecú-yu ni cùu te ñá túú ní cuení-yu. ⁶ Te Yá Ndiöxí ní dängává-gá ñuhú ní dánáá-gá ñáyiú ñuú Sodomá ndihí ñáyiú ñuú Gómorrá te mee-ná yáá nĩ nduu ñuú-áⁿ. Te sá dúcáⁿ nĩ cuu xiáⁿ cútñuní iní-ó nácuaá cada ñaha Yá Ndiöxí xii nchaa ñáyiú ñá túú quide váha. ⁷ Dico té Löt téé ní quide ndáá ní xíndecu ñⁿ ñuú-áⁿ dàvá-áⁿ chi ní dácäcu nihnu ñaha-gá xii-dé. Te nchaa ñáyiú ñuú núú nĩ xíndecu-dé-áⁿ io ní xínduu cuihna iní-yu, te mee-ni ichi díí iní ní xíndecú-yu, te sá dúcáⁿ nĩ xóo cadá-yu xiáⁿ io ní ndíhú iní té Löt. ⁸ Te ñⁿ nduu ñⁿ nduu ní xóo cada ndàhú-xi iní té Löt-áⁿ cuendá nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndihí cuendá nchaa sá cuèhé sá dúhá nĩ xóo cadá-yu ní xóo quení-dé, te mee-dé

ní cuu-dé ñⁿ téé ní xínduu vii ní xínduu váha iní-xi núú Yá Ndiöxí. ⁹ Te sá dúcáⁿ nĩ yáha té Nöé ndihí té Löt, xiáⁿ cútñuní iní-ó sá Yá Ndiöxí io chindee-gá cue ñáyiú quide ndáá ndécú ichi-gá cuendá sá vã cadá-yu nándi sá cuèhé sá dúhá cuèi nándi na ndòho-yu cundecú-yu. Te Yá Ndiöxí cächí-gá sá ncháá ñáyiú ndècu ichi cuehé ichi duha sa ndècu túha-yu sá quihíⁿ-yu núú ùhú núú ndàhú nduu nà yáha cundáá cuèchi-yu.

¹⁰ Te uuⁿ-gá cada ñaha Yá Ndiöxí xii nchaa cue téé ndècu ichi díí iní, te dàquee tíhú-güedé nchaa tnúhu sá sánú ichi ñaha xii-o nácuaá cada-o cundecu-o, te cùu-güedé cue téé ñí iní-xi, te yí iní-güedé, te ñá túú yùhú-güedé cáháⁿ úhú-güedé cuendá nchaa espíritú cúnúu. ¹¹ Te cue espíritú xínú cuèchi núú Yá Ndiöxí io cùnuu-xi dacúxí cuè téé-áⁿ, dico ñá túú cüyí-xi cáháⁿ-xi dàtná cáháⁿ cue téé-áⁿ òré ndàcáⁿ cuèchi-xi núú Yá Ndiöxí cuendá nchaa sá quidé cuè espíritú cündihí yucu ñávaha.

¹² Te nchaa cue téé dandàhú ñáhá xii-ndo-áⁿ cúú-güedé dàtná cue quiti, chi cue quiti-áⁿ ñá túú ndècu sá xini tnùnigüedi, chi cue quiti-áⁿ nĩ cacu-güedi sá tníí-ó-güedi te cahni-o-güedi. Te ducaⁿ sàtnahá-xi cùu nchaa cue téé-áⁿ, chi cáháⁿ cuèhé-güedé cuendá ndèdani càa espíritú cuèi ñá túú xini-güedé ná espíritú cúú-xí, te diu-ni mee-güedé dácuíta nihnu-güedé méé-güedé sá dúcáⁿ quide-güedé, ¹³ te sáá nduu te nacháhu-güedé nchaa sá quidé-güedé-áⁿ, te cuèi nduu cuèi niú cúdíí iní-güedé quidé-güedé nchaa núú sá cuèhé sá dúhá sàni iní-güedé. Te òré nàtacá-ndó càda-ndo ñⁿ vico chiñuhu-ndo Yá Ndiöxí te chitnahá ñáhá-güedé xii-ndo, te cada dusaⁿ-güedé sá cúdíí iní-güedé sá dándàhú ñáhá-güedé xii-ndo, te dícó sácáⁿnúú cuàha ñaha-güedé

xii-ndo dùcaⁿ na cada-güedé.

¹⁴ Te nchaa cue téé-áⁿ òré xíní-güedé ìⁿ ñáyiú díhí te ndíhí-ni sàni iní-güedé cáháⁿ ndíhí ñaha-güedé xii-yu, te ñá túú ndùu vétú iní-güedé cuèndá nchaa sá cuèhé sá dúhá quide-güedé chi uuⁿ-gá uuⁿ-gá sání iní-güedé cada-güedé. Te cuáháⁿ-güedé dándàhú-güedé nchaa ñáyiú ñá túú ñihí ndéé càda ndáá cuèndá canchicúⁿ nihnú-yu nchaa tnúhu cáháⁿ-güedé. Te mee-ni nchàa sá ndécú ndíhí tnaha ñáyiú-güedé cúú iní-güedé, te cue téé-áⁿ cúú-güedé cue téé duuⁿ duuⁿ sa ní xíta ñihnu núú Yá Ndióxi. ¹⁵ Chi cùu-güedé cue téé vá cání-gá iní-xi cada ndáá, te nchicúⁿ nihnu-ná-güedé quide-güedé nàcuáa ní xóo cada ndíi Balaám déhe ndíi Bèór, chi ndíi Balaám-áⁿ ñí xóo tnahá iní ndíi cada ndíi chiúⁿ cuehé nàcuáa ní xóo ñihí ndíi díhúⁿ. ¹⁶ Te Yá Ndióxi ní quide-gá ní cáháⁿ búrru ndíi ní tenàa ñáhá-dí xii ndíi cuèndá sá vǎ càdà ndíi ìⁿ cuèchi sàni iní ndíi cada ndíi ni cùu. Te sá dúcáⁿ ñí cuu xǎⁿ ní nguítuu ndíi ñá túú ní quide ndíi ìⁿ sá ñá túú nàndíhí sàni iní ndíi ni cùu.

¹⁷ Te nchaa cue téé ducaⁿ xíquide cùu-güedé dàtná ìⁿ doco yìchí, te cùu tucu-güedé dàtná ìⁿ vícò sǎ xídó tǎchí te ñá túú dǎu nchídó-xí, te sa ndècu túha ìⁿ xichi núú ìo nee quíhíⁿ-güedé cundecu-güedé ni caa ni quíhíⁿ. ¹⁸ Te cue téé-áⁿ cáháⁿ-güedé dàtná cáháⁿ ìⁿ téé ìo cùu cahnu dico ñá túú vèdana nàndíhí nchaa tnúhu cáháⁿ-güedé, te cue téé-áⁿ dándàhú-güedé nchaa ñáyiú íchí ñí dàña ìchi cuehé ìchi duha, te xǎhaⁿ-güedé xii-yu sá cúú-ní càdà-yu nchaa sá cuèhé sá dúhá quide nchaa ñáyiú ndècu ìchi díí iní, ¹⁹ te xǎhaⁿ tùcu-güedé sá cúú-ní càdà-yu nání véxi iní-yu cuèi sá vǎha te cuèi sá cuèhé, dico mee-güedé chi mee-ni sá cuèhé sá dúhá cùnuu quide-güedé. Te nchaa ñáyiú ñá ndácú dàña nándi

sá cuèhé sá dúhá cùu-yu dàtná ìⁿ ñáyiú xínu cuechi ñá túú tnàhí dàña quee núú chiúⁿ pàtróoⁿ-xi. Te ducaⁿ sàtnahá-xi cùu-yu chi ñá ndácú-yu dàña-yu nándi sá cuèhé sá dúhá quide-yu. ²⁰ Te núu ñáyiú sa ní dàña nchàa ìchi cuehé ìchi duha cuèndá sá ñí cutnùní iní-yu nàcuáa ndùu tnúhu Xitohó Jesucristú, Yáá ní dácácu nihnu ñaha xii-o núú ùhú núú ndàhú ná nànchocáva iní-yu cundecu tucú-yu ìchi cuèhé ìchi duha, te mee-nǎ sá cuèhé sá dúhá tàxi tnuní ñáhá-xí xii-yu, te núu ducaⁿ te vǎa-gá tucu cadá-yu dàcúúxí dàtná ní xóo cadá-yu cùtnàhá vátá cùtnùní-gá iní-yu nàcuáa ndùu tnúhu-gá. ²¹ Te vǎha-gá sá vǎ ngùnu ìchí-yu ìchi ndáá ní cùu te ñá díú sǎ sǎ ní ngùnu ìchí-yu te ní dàña-yu nchaa tnúhu-gá sá sǎ ní ñihí-yu ndècu ndíhí-yu sànu ìchi ñaha-xi nàcuáa cundecú-yu ni cùu. ²² Te ñáyiú ducaⁿ xíquide quèe ndáá-xi nàcuáa cuáháⁿ ìⁿ cuèndú sá càchí-xi: “Iná ní nacaxi-dí sá ñí ndusaⁿ-dí, te cùchí quiti íchí ñí xichi ndute càndoo cuáháⁿ-ni tucu-dí cuchi ñuhu-dí núú ndèhyú”, duha cuáháⁿ cuèndú-áⁿ.

3

Xitohó Jesucristú quixi tucu-gá

¹ Te nchaa nchòhó ñáyiú ìo cùu iní-í cùtnuní iní-í sá ìo vǎha sàni iní-ndó, te xéhé cùú-xí tùtú cúú úú càdúhá-í sá cúú-xí-ndó, te ìⁿ-ni cáháⁿ-í dándàcu iní ñáhá-í xii-ndo nchàa tnúhu sá sǎ ní xíndedóho-ndo. ² Chi cùní-í sá vǎ nàcuànaa-ndo nchaa tnúhu ní cáháⁿ nchaa cue téé ní xóo cáháⁿ tnúhu Yá Ndióxi ndéé sanaha, te ni vǎ nàcuànaa-ndo nchaa tnúhu ní cáháⁿ cue téé ní cáháⁿ tnúhu Xitohó Jesucristú Yáá ní dácácu nihnu ñaha xii-o núú ùhú núú ndàhú, chi díu nchaa tnúhu-áⁿ sánú ìchi ñaha-xi xii-o nàcuáa cada-o cundecu-o.

³ Te ìo-gá xíní ñuhu-xi cutnuní iní-ndó nàcuáa cada-xi òré vátá sǎá-gá nduu quixi tucu Xitohó Jesucristú ñuyú-a, te càchí tnúhu-í

xii-ndo sã cùndècu ñáyiu cuhuⁿ iní mee-ni nchàa sã cuèhé sã dúhá te mee-ni xiáⁿ cada-yu, te cãháⁿ cuèhé cãháⁿ duhá-yu cuendá tnúhu Yá Ndiõxí. ⁴ Te cachí-yu: “Ñá ndáá sã quíxí Xítohó Jesucristú ñuyíú-a, chi núu quixi-gá te sã ndéé ama-gá sa ní quexio-gá ní cùu. Te dàtná-ni quide-xi vitna ñiu-ni duha ní quesaha-xi quide-xi ndéé cùtnàhá ní ngáva ñuyíú, te ñiu-ni duha quide-xi ndéé cùtnàhá ní xindecu cue ñani tnàhá-ó ndéé sanaha, te ñiu-ni duha quide-xi ndéé ní sáá nduu ní xíhí-güedé, te ñiu-ni duha quide-xi ndéé vitna”, duha cãháⁿ-yu. ⁵ Te ñucùuⁿ cada-yu vá cáda cuendá-yu sã Yá Ndiõxí ní cãháⁿ-gá te ní ngúndecu andiu ndíhi ñuyíú-a, te ñiu-gá ní quide ní quene ñuhu yíchi xití ndute ní ngúndecu-xi ñⁿ xio. ⁶ Te ñⁿ xito ní dándáá Yá Ndiõxí ndute ñuyíú-a ní dãnáá-gã nchaa sã ió. ⁷ Te Yá Ndiõxí ní cachí-gá sã cùndècu-ni ñuyíú-a ndíhi andiu ndéé ná sáá nduu cáda-gá nchaa nãcuáa ní cãháⁿ-gá sã cúu-xí nchaa ñáyiu ndècu ichi cuehé ichi duha, te dàvá-áⁿ danàa-gá nchaa ñáyiu-áⁿ chi cáyú andiu ndíhi ñuyíú-a.

⁸ Te nchaa nchòhó ñáyiu ío cùu iní-í, ío cuhuⁿ iní-ndo tnúhu na cãháⁿ-í-a, chi Yá Ndiõxí ñá túú sàni iní-gá dàtná sání iní méé-ó, te ñⁿ nduu cùu-xi datná úxí cièndú cuíá, te úxí cièndú cuíá-áⁿ cúu-xí dàtná ñⁿ nduu sã cúu-xí-gã. ⁹ Te Yá Ndiõxí ñá túú dàna ndodo iní-gá vá cáda-gã ñⁿ sã cãháⁿ-gá dàtná cãchi cue ñáyiu sã dãná ndòdo iní-gá cada-gá ñⁿ sã cãháⁿ-gá, chi ñucùuⁿ tnahí dácaca-gá nduu cuendá sã ío cùndahú iní ñáhá-gã xii-o, te cuíní-gá sã ncháá ñáyiu ndixi túu iní-yu sã ñà túú quide váha-yu ndècú-yu te tuhá-yu ichi-gá, te ducaⁿ quide-gá chi cuíní-gá sã vá cuíta nihnu ni ñⁿ-yu.

¹⁰ Te dàtná quidé cue ñadúhu

quíhu-güedé ñⁿ vehe dùhu-güedé òré ñá túú yíhi iní xítohó vehe-án, te ducaⁿ cáda Xítohó Jesucristú chi nduu ñà túú yíhi iní ñáyiu ñuyíú-a quixi tucu-gá, te dàvá-áⁿ cada-xi andiu dàtná quidé-xí òré níhi víhi cãháⁿ ñúhu, te ñiu-ni òré-áⁿ ndoñuhu àndiu, te cáyú nchaa chódíní, te cáyú tucu tnàhá ñuyíú-a ndíhi nchaa sã ió.

¹¹ Te vitna nchòhó sa xini-ndo sã náá ñuyíú-a te xiáⁿ ío xini ñuhu-xi cáda váha-ndo cùndecu-ndo, te cada-ndo nãcuáa cuíní méé Yá Ndiõxí cunduu. ¹² Te ío nducu ndèe-ndo ducaⁿ cada-ndo cuendá ducaⁿ ndíhi-ni sáá nduu cáda-gá nchaa nãcuáa cãháⁿ-gá, te ducaⁿ nchòhó cundecu túha-ndo sáá nduu-áⁿ. Te ñiu-ni nduu-áⁿ ndoñuhu àndiu chi cáyú-xi, te ñiu-ni ducaⁿ ndoñuhu tucu nchaa chódíní chi ndíhi-di cáyú. ¹³ Te nchoo ndètu-o sáá nduu cùndecu-o ñⁿ ñuyíú sáá, te quíní-ó ñⁿ andiu saa datná ní cachí Yá Ndiõxí, te yacáⁿ chi mee-nã cue ñáyiu quide váha cundecu.

¹⁴ Te nchòhó ñáyiu ío cùu iní-í, níni ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sã váha cundecu-ndo ichi Yá Ndiõxí, te cundecu nahi-ndo, te cada-ndo nchaa nacúaa vá cùndècu cuéchi-ndo núú-gã. ¹⁵ Te ío cada cuendá-ndo sã dácaca-gá nduu dùcaⁿ cada-gá chi cuíní-gá sã ncháá ñáyiu naníhí tàhú-yu. Te té Pãblú téé ío cùu iní-ó ndècu ndíhi-o ichi Xítohó Jesucristú ñiu-ni nãcuáa cãháⁿ-í-a ñiu-ni ducaⁿ ní tee-dé ñⁿ núú tütú ní dáquixí-dé ndaha-ndo, te ní tee-dé nãcuáa ní dácáhu iní ñáhá Yá Ndiõxí xii-dé. ¹⁶ Te ñiu-ni ducaⁿ cãháⁿ-dé nchaa dava-gá núú tütú cáduha-dé, te dava tnúhu cãháⁿ-dé ío úhú tecú tnúni-ó, núu xiáⁿ ñáyiu ñá túú cùtnuní váha iní-xi, ñáyiu ío yáchi sãndáá iní-xi ñⁿ tnúhu, ñáyiu-áⁿ tècú tnúni dátñi-yu nchaa tnúhu ní chídó tnúni-dé, ndíhi nchaa dava-gá tnúhu yòdo tnuní núú tütú

Yă Ndiôxí, te sá dúcáⁿ quidé-yu te dacuíta nihnú-yu mée-yu.

¹⁷ Te nchòhó ñáyiu ío cùu iní-í, sa cùtnuní iní-ndó nàcuáa quide dava ñáyiu, núu xíⁿ ío xìni ñuhu-xi quíhi iní-ndó cùndecu-ndo cuendá ducaⁿ cùndecu-ni-ndo ichi-gá, te vá dáñá-ndó mée-ndo dandahú ñáhá nchàa cue tée ndècu ichi cuehé ichi duha, chí cue tée-áⁿ ñà túú sàni váha iní-güedé cuendá tnúhu Yá Ndiôxí. Te núu na dàña-ndo mee-ndo dandahú ñáhá-güedé xii-ndo te vá cùndècu váha-gá-ndó ichi-gá dàtná ndécú-ndó vitna.

¹⁸ Te nchòhó uuⁿ-gá uuⁿ-gá cuita cutnùní-gá iní-ndó quíhíⁿ nchaa nàcuáa ta chindee ñaha Xítóhó Jesucristú xii-ndo cuáháⁿ. Te ducaⁿ ío-gá cuita cutnùní iní-ndó nchàa nacuáa sàni iní-gá, te ñiu-gá cúú-gá Yaá ní dácácu nihnu ñaha xì-o núú ùhú núú ndàhú. Te chí ná cächí-ó sá ío càhnu cuu-gá cuéi vitna té cuéi ndée núú cuáháⁿ núú vèxi. Te ducaⁿ na cùnduu. Te ío chí cádá ndèe iní-ná vitna.

TUTÚ DÍHNA NÍ CADÚHA TÉ JUÁÁ

Tnúhu sá càháⁿ nàcuáa naníhí tǎhú-ó

¹ Te yúhú té Juáá cǎchí tnúhu-í xii-ndo cuendá Crístú Yáá càháⁿ nàcuáa cundecu ndihí-o Yá Ndióxi. Te Crístú-áⁿ sa ndècu-gá ndéé cútñahá ní ngáva ñuyúú. Te yúhú ní xiní núú-í ndihí cue téé ní xica cuu ndihí-í nàcuáa càa nacuáa ndùu-gá. Te ní xíndedóho-ndí tnúhu ní cáháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúu-gá. ² Te ní quixi túu-gá ñuyúú-a, te ní xiní-ndí-gá, te xiǎⁿ cǎchí tnúhu ndáá-ndí xii-ndo. Te cǎchí tnúhu tucu-ndí sá ndécú-gá ndihí Tǎtá-gá Dútú Ndióxi ní cùu, te ní quixi-gá ñuyúú-a ní xíndecu-ndí ndihí-gá. Te ní cachí tnúhu-gá xii-ndí sá ndúú tǎhú-ó cundecu ndihí-o Yá Ndióxi ní caa ní quíhíⁿ te núu na quíndáá iní-ó-gá. ³ Te xiǎⁿ dátúu-ndí núu-ndó nchàa sá ní xiní-ndí, ndihí nchaa sá ní xíndedóho-ndí cuendá cuu ñⁿnuu-o nchàa-o datná nchúhú cúú ñⁿnuu-ndí ndihí Tǎtá-ó Dútú Ndióxi, ndihí Déhe-gá Xítoho Jesucristú. ⁴ Te xiǎⁿ núu tèe-í nchaa tnúhu-a cuendá cudíí iní-ó nchàa-o.

Yá Ndióxi cúú-gá datná ñⁿ ñuhú

⁵ Te nchaa tnúhu ní dánèhé ñáhá Xítoho Jesucristú xii-ndí, xiǎⁿ dánèhé ñáhà-í xii-ndo. Te ní cachí-gá sá Yá Ndióxi cúú-gá datná ñⁿ ñuhú dáyèhé-gá iní-ó, te ducaⁿ sǎtnahá-xi cùu-gá chí ío váha quide-gá, te ñá túú quide-gá ní ñⁿ sá cuèhé sá dúhá. ⁶ Te núu cǎchí-ó sá ndécú-ó ichi Yá Ndióxi, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núú-gá. ⁷ Te núu na càda váha-o datná quidé mèe-gá, te cuu ñⁿnuu-o nchàa-o. Te ndada

ndoo ndada nine-gá iní-ó, chí cada càhnu iní-gá nchaa sá cuèhé sá dúhá quide-o, chí ñu cuendá-áⁿ ní xíhí Déhe-gá Xítoho Jesucristú núú cùrúxí.

⁸ Te núu cǎchí-ó sá ñá túú quide-o ní ñⁿ sá cuèhé sá dúhá, te dándahú-ó mèe-o, te ñá túú quide ndáá-ó núú Yá Ndióxi. ⁹ Te núu na ñàhmá-ó nchaa yíca cuèchi-o núú-gá, te mee-gá cada càhnu iní-gá, te ndada ndoo-gá iní-ó, cuendá cada ndáá-ó cundecu-o ichi-gá, chí mee-gá ío váha quide-gá te ío ndáá quidé-gá, ducaⁿ ní cáháⁿ-gá te ducaⁿ quide-gá. ¹⁰ Te núu na cǎchí-ó sá ñá túú quide-o ní ñⁿ sá cuèhé sá dúhá, te quide-o Yá Ndióxi ñⁿ ñándéhné, dico ñá túú ndèhné-gá. Te ñá túú ndècu tnúhu-gá iní-ó te núu ducaⁿ na càda-o.

2

Xítoho Jesucristú càháⁿ ndàhú-gá cuendá-ó

¹ Te nchòhó ñáyiu cùu datná déhe-í, chído tnuní-í nchaa tnúhu-a cuendá sá vǎ càdá-ndó ní ñⁿ sá cuèhé sá dúhá. Dico núu ñⁿ-ndo quide-ni-ndo nándi sá cuèhé sá dúhá, te ndècu ñⁿ Yáá càháⁿ ndàhú cuendá-ó núú Yá Ndióxi. Te Yáá-áⁿ cúú-gá Xítoho Jesucristú Yáá quidé ndáá. ² Te ní xíhí-gá sá cuendá nchaa yíca cuèchi-o cuendá ngúndecu váha-o núú-gá te núu na quíndáá iní-ó-gá. Te ñá díú-ní sá cuendá yíca cuèchi nchoo ní xíhí-gá, chí tñahá cuendá nchaa yíca cuèchi ñáyiu ní càa xico ñuyúú.

³ Te núu càda-o nchàa nacuáa càháⁿ Yá Ndióxi, te cutnùní iní-ó sá ndécú-ó ichi-gá. ⁴ Te núu cǎchí-ó sá ndécú-ó ichi-gá te ñá túú quide-o nacuáa càháⁿ-gá, te dàcuandehnde-o, te ñá túú quide ndáá-ó núú-gá. ⁵ Te núu sàndáá ndisa iní-ó tnúhu-gá, te quide-o nchaa nacuáa càháⁿ-gá, te ducaⁿ te cùu iní ndisa-o-gá, te cutnùní ndáá iní-ó sá ndécú-ó ichi-gá. ⁶ Te núu cǎchí-ó sá ndécú-ó ichi Yá Ndióxi, te

xini ñuhu-xi cada ndáá-ó cùndecu-o ñuyíú-a datná ní quide ndáá Xítohó Jesucristú cùtnàhá ní xíndecu-gá ñuyíú-a.

Ndudú sáá

⁷ Te nchòhó ñáyiú ndècu ndihi-í ichi Xítohó Jesucristú, ñá túú chido tnuní-í ìⁿ tnúhu saa sà cùú-xí-ndó, chi diu-ni tnúhu sá ní ngúndecu ndihi-ndo ndéé díhna, tnúhu ní xíndedóho-ndo ndéé cùtnàhá ní sàndáá ini-ndó-gá, xiáⁿ chidó tnùní-í. ⁸ Te tnúhu-a cùu-xi datná ìⁿ tnúhu saa tèe-í dándacu ini ñàhá-í xii-ndo nàcuáa ní quide Xítohó Jesucristú cùtnàhá ní quixi-gá ñuyíú-a ní quide váha-gá, te tnàhá nchòhó ní tnì-ndo tnúhu-gá te quide váha-ndo tnàhá-ndó. Te vitna ìⁿ nduu ìⁿ nduu ta cùu vai ñáyiú ta dàña nchaa sá cuèhé sá dúhá cuáháⁿ, chi Xítohó Jesucristú tá dándaxi túu-gá ini-yu cuèndá cutnùní ini-yu nàcuáa nduu cuèndá Yá Ndiòxí.

⁹ Te núu càchí-ó sá quidé váha-o, te cùu úhú ini-ó tnàhá ñáyiú-o, te xiáⁿ ñá túú quide ndáá-ó, chi ndècu-ni-o ichi cuèhé ichi duha sá dúcáⁿ quide-o. ¹⁰ Te núu na cùu ini-ó tnàhá ñáyiú-o datná cùú ini ñàhá mèe Yá Ndiòxí xii-o ña, te quide ndáá-ó núú-gá, te vá cánúichi-o tnaha ñáyiú-o ìⁿ ichi cuèhé ichi duha. ¹¹ Te núu cùu úhú ini-ó tnàhá ñáyiú-o, te ñá túú quide váha-o núú Yá Ndiòxí, chi ndècu-ni-o ichi cuèhé ichi duha, te ñá túú cùtnuní ini-ó sá quidé-ó. Chi cùu-o datná ìⁿ téé ndècu núú nées chi ñá cùtnùní núú-dé ndéé ichi quíhíⁿ-dé. Ducaⁿ sàtnahá-xi cùu nchoo chi ñá cùtnùní ini-ó ndéé ichi quíhíⁿ-ó te núu ducaⁿ na càda-o cuu úhú ini-ó tnàhá ñáyiú-o.

¹² Te nchòhó ñáyiú cùu datná déhe-í, yúhú chidó tnùní-í tnúhu-a ìⁿ núú tütú càchí tnúhu-í xii-ndo sá ní quide càhnu ini Yá Ndiòxí nchaa cuéchi-ndo, chi diu cuèndá-á ní xihí Xítohó Jesucristú. ¹³ Te nchòhó ñáyiú sacuéhé, yúhú tèe-í tnúhu-a

sá cùú-xí-ndó chi càháⁿ ndihi-ndo Jèsús, te Yaá-áⁿ sa ndècu-gá ndéé cùtnàhá ní ngáva ñuyíú. Te nchòhó ñáyiú nchicúⁿ-gá téé tucu-í tnúhu-a sá cùú-xí-ndó chi ñá túú sàndáá ini-ndó tnúhu càháⁿ yucu ñávàha.

Te nchaa nchòhó ñáyiú cùu datná déhe-í, tèe tucu-í tnúhu-a sá cùú-xí-ndó, chi sa càháⁿ ndihi-ndo Tàtá-ó Dütú Ndiòxí. ¹⁴ Te nchòhó ñáyiú ní sàhnu, yúhú chidó tnùní-í tnúhu-a ìⁿ núú tütú chi càháⁿ ndihi-ndo Jèsús, te Yaá-áⁿ sa ndècu-gá ndéé cùtnàhá ní ngáva ñuyíú. Te nchòhó ñáyiú nchicúⁿ-gá, yúhú chidó tnùní-í tnúhu-a chi ío nihí ndéé-ndó ndècu-ndo, chi tnì-ndo tnúhu càháⁿ Yá Ndiòxí. Te ñá túú sàndáá ini-ndó tnúhu càháⁿ yucu ñávàha.

¹⁵ Te vá cùhúⁿ ini-ndó ní ìⁿ sá cuèhé sá dúhá ío ñuyíú-a, te ní vá cání ini-ndó càda-ndo. Chi núu na cùhúⁿ ini-ó nchaa sá cuèhé sá dúhá ío ñuyíú-a ña, te ñá túú Tàtá-ó Dütú Ndiòxí ñúhú ini-ó te núu ducaⁿ na cání ini-ó. ¹⁶ Te nchaa ñáyiú ñuyíú-a quidé-yu nchaa sá cuèhé sá dúhá, chi diu nchaa xiáⁿ cúdíⁿ ini-yu cadá-yu. Te nchaa sá cuèhé sá dúhá sàni ini-yu, ndihi nchaa sá xini-yu quidé-yu. Te xíquide nínu-yu mèe-yu cuèndá nchaa sá ndécú ndihí-yu. Te nchaa sá ña túú vaha ní cacu nihnu-xi ñuyíú-a. ¹⁷ Te nchaa sá ña túú vaha ío ñuyíú-a, ndihi nchaa sá sání cuèhé sání dùha ini-yu cuita ndihi nihnu-xi quíhíⁿ. Te nchaa ñáyiú tnì tnúhu càháⁿ Yá Ndiòxí cundecú-yu ndihi-gá ní caa ní quíhíⁿ.

Tnúhu ndáá tnúhu Yá Ndiòxí ndihi tnúhu ndehnde

¹⁸ Te nchòhó ñáyiú cùu datná déhe-í, sa nihí-ndó tnúhu sá quíxí ìⁿ téé cunuu-gá-dé cuu úhú ini-dé Cristú. Te sa xíndecu-gá ñáyiú cùu úhú ini ñàhá xii-gá, núu xiáⁿ cùtnùní ini-ó sá sá ta cuyatni nduu naa ñuyíú-a. ¹⁹ Te ñáyiú-áⁿ ní xíndecu ndihi ñàhá-yu xii-o, te ní quéé-yu

cuáháⁿ-yu chi ñá túú ní cùu ìⁿnuu-o ndihí-yu. Chi núu dicó ní cùu ìⁿnuu-o ndihí-yu te cundecu ndihí ñáhá-yu xii-o ní cùu. Te duha ní cuu cuendá cutnùní ndáá iní-ó nchàa-o sá ñá túú cùu ìⁿnuu-o ndihí-yu, chi ñá túú sàndáá iní-yu Yá Ndióxi.

²⁰ Te Xítoho Jesucristú ní taxi-gá Espiritú Yá Ndióxi ndécú ndihí-o, núu xíáⁿ tècú tnùnì-ó tnùhu-gá.

²¹ Te cuendá sá xìnì-ndó tnùhu ndáá tnùhu Yá Ndióxi núu xíáⁿ tèé-í tnùhu-a, te ñá díú ìⁿ sá ñá cùtnùnì iní-ndó cùu-xi. Te sa nàha-ndo sá ñá ìⁿ tnùhu ndehnde ñá túú ñùtnahá-xi núu tnùhu Yá Ndióxi, chi mee ñine-ni tnùhu ndáá cúu-xí.

²² Te nchaa ñáyiú cächí sá ñá díú Jèsús cúu Cristú Yaá ní tendaha Yá Ndióxi ní quixi ñuyíú-a dàcuandehndé-yu, te cùu úhú iní-yu Jèsús. Te ñu-ní-yu cächí-yu sá ñá díú Dèhe Yá Ndióxi cúu Jèsús, te sá dúcáⁿ quidé-yu te cùu úhú iní-yu Yá Ndióxi ndihí Dèhe-gá Jèsús. ²³ Te nchaa ñáyiú ñá túú sàndáá iní sá Dèhe Yá Ndióxi cúu Jèsús, ñáyiú-áⁿ ñá túú ndécú-yu ichi Tátá-ó Dütú Ndióxi. Te nchaa ñáyiú càháⁿ sá Dèhe Yá Ndióxi cúu Jèsús, ñáyiú-áⁿ ndécü-yu ichi Tátá-ó Dütú Ndióxi.

²⁴ Te nchaa tnùhu Yá Ndióxi ní tecú dóho-ndo ndéé díhna, tnùhu-áⁿ cuhuⁿ iní-ndó. Te núu nchaa tnùhu-áⁿ ná cùhuⁿ-ní iní-ndó, te cundecu ndihí-ndo Yá Ndióxi ndihí Dèhe-gá cuéi vá cùndecu túu-ndo ndihí-gá ñuyíú-a. ²⁵ Te Jèsús ní cachí-gá sá ndúú tãhú-ó cùndecu ndihí-o-gá ñi caa ñi quíhⁿ andíu.

²⁶ Te cuendá nchaa ñáyiú dándahú ñáhá xii-ndo ní chídó tnùnì-í tnùhu-a, ²⁷ dico nchòhó chi ndécú ndihí-ndo Espiritú Yá Ndióxi sá ñi taxi Xítoho Jesucristú. Núu xíáⁿ ñá túú xìnì ñuhu-ndo ñáyiú danèhé ñáhá xii-ndo, chi mee Espiritú-gá dánèhé ñáhá-xí nchàa sá vãha. Te nchaa sá dánèhé ñáhá-xí xii-ndo cuu-xi sá ndáá, te ñá díú ìⁿ tnùhu ndehnde. Te vitna chí cãncñícúⁿ ñihnu-ni ichi Yá Ndióxi dàtná ní

sanu ichi ñaha mée Espiritú-gá xii-ndo.

²⁸ Te nchòhó ñáyiú cùu datná déhe-í, chí cãncñícúⁿ ñihnu-ni ichi Xítoho Jesucristú, chi cuendá òré ná quixí tucu-gá ñuyíú-a te vá yùhú-ndó te ñi vá cúu càhaⁿ núu-ndó núu-gá. ²⁹ Te nchòhó sa nàha-ndo sá mée-gã quidé ndáá-gá, te sa xìnì-ndó sá ncháá ñáyiú quide ndáá cúu-yu déhe Yá Ndióxi.

3

Ñáyiú cùu déhe Yá Ndióxi

¹ Te chí cuãha cuendá sá ño cùu iní ñáhá Tátá-ó Dütú Ndióxi xii-o cuendá sá cúu-ó déhe-gá, chí ducaⁿ ñi cachí-gá, te déhe ndisa-gá cúu-ó. Te núu xíáⁿ ñáyiú ndécú ichi cuéhé ichi duha ñá cúu quini ñáhá-yu xii-o, chí ñá túú xìnì-yu nàcuáa ndùu cuendá Yá Ndióxi.

² Te nchòhó ñáyiú ño cùu iní-í, vitna cùu-o déhe Yá Ndióxi, te vátá cùtnùnì váha-gá iní-ó ñasa cunduu-o ndéé núu cuáháⁿ núu vèxi. Dico sa cùtnùnì iní-ó sá òré ná quixí tucu Xítoho Jesucristú te nduu-o dàtná cáá mée-gá, chí quini-ó-gã nàcuáa-ni càa nacuáa-ni ndùu-gá. ³ Te nchaa ñáyiú sa ndètu ñaha xii-gá sa ta ngùndecu túha-yu cuáháⁿ, chí ta ndùu ndoo nduu ñine iní-yu cuáháⁿ dàtná cáá ndòo caa ñine mee-gá.

⁴ Te nchaa ñáyiú quide nándi sá cuéhé sá dúhá ñá túú quide váha-yu núu Yá Ndióxi, chí ní cachí-gá sá vá dúcáⁿ càda-o. ⁵ Te sa nàha-ndo sá ñi quixí túu Xítoho Jesucristú ñuyíú-a cuendá cada càhnu iní-gá nchaa sá cuéhé sá dúhá quide-o, chí mee-gã ñá túú quide-gá ñi ìⁿ sá cuéhé sá dúhá. ⁶ Te nchaa ñáyiú ndécú ichi Yá Ndióxi ñá túú ñùhú-yu ichi cuéhé ichi duha. Te nchaa ñáyiú ñùhu ichi cuéhé ichi duha ñá túú xìnì-yu nàcuáa ndùu cuendá Xítoho Jesucristú te ñi ñá túú xìnì-yu nàsa càa-gá. ⁷ Te nchòhó ñáyiú cùu datná déhe-í, vá dáñá-ndó mée-ndo

dandahú ñáhá ñáiyu ndècu ichi cuehé ichi duha, chi càchí-yu sá cúu cùndecu-o ichi Yá Ndiöxí te cada-o nãndi sá cuehé sá dúhá dico ñá ndáá. Te nchaa ñáiyu quide váha quide ndáá-yu dàtná quidé mèe Jesús. ⁸ Te nchaa ñáiyu ndècu ichi cuehé ichi duha ndècu ndihí-yu yucu ñávãha, chi ducaⁿ quide mee-xi ndéé cùtnáhá vátá ngáva-gá ñuyíú. Te xiãⁿ ní quixi Jesús Déhe Yá Ndiöxí ní dáquéé tihú-gã nchaa sá quidé yucu ñávãha.

⁹ Te nchaa ñáiyu ní natuha ichi Yá Ndiöxí ní nduú-yu déhe-gá, te ñá túú-gã quidé-yu nãndi sá cuehé sá dúhá chi ní ndada ndoo ní ndada nine-gá iní-yu. Núu xiãⁿ ñá túú-gã quidé-yu nãndi sá cuehé sá dúhá, chi ní ngúndecu ndihí ñaha-gã xii-yu. ¹⁰ Te cùtnuní iní-ó nãndi cùu ñáiyu cùu déhe Yá Ndiöxí, te cùtnuní iní-ó nãndi cùu ñáiyu cùu déhe yucu ñávãha. Te nchaa ñáiyu ñá túú quide ndáá, te cùu úhú iní-yu tnãha ñáiyú-yu, te ñáiyu-áⁿ ñá díú déhe Yá Ndiöxí cúu-yu.

Cuu iní tnáhá-ó ñⁿ ñⁿ-o

¹¹ Te ndéé òrè ní natuha-o ìchi Yá Ndiöxí ní tecú dóho-o sá cúu iní-ó tnãha ñáiyu-o. ¹² Te vá cùnduú úhú iní-ó dàtná ní quide ndíi Càin, chi ndíi-áⁿ ñí xíndecu ndíi ndihí yucu ñávãha núu xiãⁿ ní sahni ndíi ñaní ndíi. Te ducaⁿ ñí quide ndíi chi ní xíndecu ndíi ichi cuehé ichi duha, te ñaní ndíi ní xíndecu-dé ichi váha.

¹³ Te nchòhó ñáiyu ndècu ndihí-í ichi Xítohó Jesucristú, vá cáda cuèndá-ndó sá cúu úhú iní ñáhá nchaa ñáiyu ndècu ichi cuehé ichi duha xii-ndo. ¹⁴ Te cunaha-ndo na càchí tnúhu-í xii-ndo sá núu na cùu iní-ó tnãha ñáiyu-o, te cùtnuní iní-ó sá sá ní dáñá-ó ìchi sá tá dàcuíta nihnu ñaha xii-o cuáháⁿ ní cùu, te vitna ní tní-o ìchi váha. Te nchaa ñáiyu ñá túú cùu iní tnãha ñáiyu-xi ñúhu-ní-yu ichi cuáháⁿ-yu núu úhú núu ndàhú. ¹⁵ Te nchaa ñáiyu ñá cúu quini ndéé tnãha ñáiyu-xi cùu-yu dàtná ñⁿ ñáiyu sahni ndíyi.

Te nchòhó sa nãha-ndo sá ñí ñⁿ ñáiyu sahni ndíyi ñá túú ndècu ndihí-yu tnúhu ndee iní sá nãnihí tàhú-yu. ¹⁶ Te Xítohó Jesucristú ní xihí-gã cuèndá nchaa yicá cuèchi-o, núu xiãⁿ cùtnuní iní-ó sá ìo cùu iní ñáhá-gã xii-o. Te xiãⁿ cùtnuní iní-ó nãcuáa cada-o cùu iní-ó tnãha ñáiyu-o, te cuéi na cùu-ó cuèndá sá cúu-xi ñⁿ-yu, cuèndá-ñá sá ná dàcácu nihnu-ò-yu núu tnúndòho ndecú-yu. ¹⁷ Te núu ndècu ndihí-o sá cóhó sá cáxi-ó ndihí nchaa sá nãndihí-o, te ndècu ñáiyu ndàhú ñá túú vèdana ná ndécú ndihí, te ñá túú chindee-ó-yu, te ñá túú cùu iní-ó Yá Ndiöxí te núu ducaⁿ na càda-o. ¹⁸ Te nchòhó ñáiyu cùu datná déhe-í vá cuèndá-ni cùnãha cáhãⁿ-ndó sá cúu iní tnáhã-ndó, chi cuu iní tnáhã ndìsa-ndo te coto tnãha-ndo.

Vá yùhú-ó núú Yá Ndiöxí

¹⁹ Te núu ducaⁿ na càda-o, te cutnùní iní-ó sá ndécú-ó ìchi ndáá ichi Yá Ndiöxí, te ñá túú-gã ná quihí iní-ó núú-gã. ²⁰ Te núu ndíhú iní-ó cuèndá ñⁿ sá ñí quide-o, te sa nãha Yá Ndiöxí te núu ní quide váha-o àdi ní quide cuèhé-ó, chi sa nãha ndáá-gã nãcuáa càa iní-ó. ²¹ Te nchòhó ñáiyu ìo cùu iní-í, na càchí tnúhu-í xii-ndo, te núu ñá túú ñá sání iní-ó te ñá túú ñá quidé-ó, te vá yùhú-ó núú Yá Ndiöxí. ²² Te nchaa sá váha na càcãⁿ-ó núú Yá Ndiöxí, te mee-gã taxi-gã chi tní-o tnúhu càhãⁿ-gã, te quide-o nchaa nãcuáa cùu iní-gã. ²³ Te ní cachí Yá Ndiöxí sá quèndáá iní-ó Déhe-gã Xítohó Jesucristú, te cuu iní-ó tnãha ñáiyu-o dàtná ní cachí-gã. ²⁴ Te nchaa ñáiyu tní tnúhu-gã ndécú-yu ichi-gã, te ndècu ndihí ñaha-gã xii-yu. Te cùtnuní iní-ó sá ndécú-ó ndihí-gã chi ní taxi-gã Espiritú-gã ndécú ndihí-o.

4

Ñáiyu ndècu ndihí Espiritú Yá Ndiöxí ndihí ñáiyu cùu úhú iní ñáhá

xì Xítóhó Jesucrìstú

¹ Te nchòhó ñáiyu ío cùu iní-í, vá cùtexínu quíndáá iní-ndó tnúhu càháⁿ nchaa ñáiyu càchí sá ndécú ndìhì Espíritú Yá Ndiòxí. Chi díhna-gá cada cuendá váha-ndo te núu càháⁿ ndáá-yu nàcuáa càháⁿ tnúhu Yá Ndiòxí, chi ío vài ñáiyu ñuyú-a cachí-yu sá càháⁿ-yu tnúhu-gá dico ñá ndáá. ² Te duha cutnùnì iní-ó nãndì cùu ñáiyu ndècu ndìhì Espíritú Yá Ndiòxí. Nchaa ñáiyu càháⁿ ndáá sá Xítóhó Jesucrìstú ní quixi-gá ñuyú-a te ní cuu-gá ìⁿ yiqui cùñú, ñáiyu-áⁿ cùu-yu ñáiyu cùu cuendá Yá Ndiòxí. ³ Te nchaa ñáiyu ñá túú càháⁿ nàcuáa càa Jesús cùtnàhá ní quixi-gá ñuyú-a ñáiyu-áⁿ dándàhú ñáhã-yu, chi ñá túú cùu-yu ñáiyu cùu cuendá Yá Ndiòxí. Te ñu-ní-yu cùu úhú iní-yu Jèsús. Te nchòhó sa ñàha-ndo sá cùndècu ñáiyu cuu úhú iní ñáhá xii-gá, dico yúhú càchí tnúhu-í xii-ndo sá sà ndecú-yu.

⁴ Te nchòhó ñáiyu cùu datná déhe-í, ndècu ndìhì-ndo Yá Ndiòxí, te ñá dáñá-ndó dándahú ñáhã nchaa ñáiyu càchí sá càháⁿ tnúhu-gá te ñá ndáá. Te ñá túú sàndáá iní-ndó chi Yá Ndiòxí Yaá ndécú ndìhì-ndo taxi tnunì víhí-gã dácúxí yècu ñávãha ndècu ndìhì nchaa ñáiyu ñúhu ichi cuehé ichi duha. ⁵ Te nchaa ñáiyu dándahú ñáhã sá càháⁿ tnúhu Yá Ndiòxí ndécú-yu ichi cuehé ichi duha, te mee-ní cuendá nchaa sá ío ñuyú-a càháⁿ-yu. Te tédóho ñàha nchaa dává-gá ñáiyu ndècu ñu-ní ichi cuehé ichi duha. ⁶ Te nchao cùu-o ñáiyu cùu cuendá Yá Ndiòxí. Te nchaa ñáiyu xíndecu ichi-gá tní-yu tnúhu càháⁿ-ó, te nchaa ñáiyu ñá túú ndècu ichi-gá ñá túú tní-yu tnúhu càháⁿ-ó. Te duha te cùtnunì iní-ó nãndì cùu ñáiyu càháⁿ ndáá, te cùtnunì tucu iní-ó nãndì cùu ñáiyu dándahú ñáhã.

Cuu iní-ó tnàha ñáiyu-o dàtná cúú iní ñáhá mèe Yá Ndiòxí xii-o

⁷ Te nchòhó ñáiyu ío cùu iní-í, xini ñuhu-xi cuu iní tnáhá-ó dàtná cúú iní ñáhá mèe Yá Ndiòxí xii-o, chi mee-gã táxi-gã sá xini tnùnì-ó cuendá cuu iní-ó tnàha ñáiyu-o. Te nchaa ñáiyu cùu iní tnàha ñáiyu-xi cùu-yu déhe Yá Ndiòxí, te cùtnunì ndáá iní-yu sá ndécú ndìhì ñàha-gá xii-yu. ⁸ Te nchaa ñáiyu ñá túú cùu iní tnàha ñáiyu-xi ñá túú ndècu ndìhì-yu Yá Ndiòxí. Te nchaa ñáiyu ndècu ndìhì Yá Ndiòxí, ñáiyu-áⁿ sãñaha-gã sá xini tnùnì-yu cuendá cuu iní-yu tnàha ñáiyú-yu. ⁹ Te cùtnunì iní-ó sá cúú iní ñáhá Yá Ndiòxí xii-o nchaa-o, chi ní tendaha-gã ìⁿndì díi-ni Déhe-gá Xítóhó Jesucrìstú ní quixi-gá ñuyú-a cuendá sá díú-gã cada te naníhì tàhú-ó, te núu na quíndáá iní-ó tnúhu-gá. ¹⁰ Te ío cùu iní ñáhá Yá Ndiòxí xii-o nchaa-o. Te ñá díú sá mèe-ó cùu iní-ó-gã, chi díhna-gá mèe-gã sa cùu iní ñáhá tnàhí-gá xii-o, núu xíãⁿ ní tendaha-gã Déhe-gá ní quixi-gá ñuyú-a ní xihí-gá sá cuendá nchaa yíca cuèchi-o.

¹¹ Te nchòhó ñáiyu ío cùu iní-í, xini ñuhu-xi cuu iní tnáhá-ó, chi mee Yá Ndiòxí ío cùu iní ñáhá-gã xii-o. ¹² Te ní ìⁿ nchoo ñáiyu ndècu ñuyú-a ñá túú xini-ó nàcuáa càa Yá Ndiòxí, dico nchoo ñáiyu ní tuha ichi-gá chi cùtnunì iní-ó sá ndécú ndìhì ñàha-gá xii-o. Núu xíãⁿ cúú iní tnáhá-ó ìⁿ ìⁿ-o, te cùtnunì iní-ó sá cúú iní ndisa-o-gã. ¹³ Te cùtnunì iní-ó sá ndécú-ó ichi-gá, te ndècu ndìhì ñàha-gá xii-o, chi ní taxi-gá Espíritú-gá ndécú ndìhì-o. ¹⁴ Te yúhú ndìhì dává-gá cue téé ní xica cuu ndìhì-gá càháⁿ-ndí sá ní xini-ndí Jèsús Déhe Yá Ndiòxí ní quixi-gá ñuyú-a, chi Tátá-ó Dütú Ndiòxí ní tendaha ñàha xii-gá ní quixi-gá cuendá dácacu nihnu-gá nchaa nchoo ñáiyu ndècu ñuyú-a núu úhú núu ndàhú. ¹⁵ Te nchaa

ñáyiú cáháⁿ ní yùhu ní iní-xi sá Dêhe Yá Ndiöxí cúú Jèsús, ñáyiú-áⁿ ndécú-yu ichi-gá te ndècu ndihi ñaha-gá xii-yu.

¹⁶ Te sàndáá iní-ó ní yuhu ní iní-ó sá Yá Ndiöxí cúú iní ñáhá-gá xii-o, chi ducaⁿ iní-gá. Te nchaa ñáyiú cùu iní ñáhá xii Yá Ndiöxí ndécú ndihi ñaha-gá xii-yu. ¹⁷ Te núu ndisa cùu iní-ó Yá Ndiöxí te vá yùhú-ó òré ná sàá nduu tàudiiⁿ ñaha-gá xii-o tñúu nchaa ñáyiú ndècu ichi cuehé ichi duha, chi quide ndáá-ó ndècu-o núu-gá ñuyiú-a dàtná ní quide mee Jèsús. ¹⁸ Chi nchaa ñáyiú cùu iní ñáhá xii Yá Ndiöxí ñá túú-gá yùhú-yu, te núu cùu iní ndisá-yu-gá. Te núu yùhú-yu te xiáⁿ sa ndòhó-yu, chi ñùhú-yu ichi cuáháⁿ-yu núu ùhú núu ndàhú, chi nchaa ñáyiú yùhú ñá túú cùu iní ndisá-yu Yá Ndiöxí.

¹⁹ Te cuu iní-ó Yá Ndiöxí, chi mee-gá ndéé cùtnáhá vátá quìndáá-gá iní-ó tñùhu-gá sa cùu iní ñáhá-gá xii-o. ²⁰ Te nchaa ñáyiú càchí sá cúú iní-yu Yá Ndiöxí, te cùu ùhú iní-yu tñàha ñáyiú-yu, ñáyiú-áⁿ dácuaⁿndèhndé-yu. Te núu ñá túú cùu iní-yu tñàha ñáyiú-yu ndècu ñuyiú-a ña, te uuⁿ-gá quidè-yu Yá Ndiöxí Yaá ñá túú xini núu-yu. ²¹ Te càchí-gá núu tñùhu-gá sá ñáyiú na cùu iní ñáhá xii Yá Ndiöxí, te ducaⁿ-ni cùu iní-yu tñàha ñáyiú-yu.

5

Nchaa ñáyiú ní ndacu ní dáñá ichi cuehé ichi duha

¹ Te nchaa ñáyiú sàndáá iní sá Jèsús cúú-gá Cristú Yaá ní quixi ñuyiú-a, ñáyiú-áⁿ cúu-yu déhe Yá Ndiöxí. Te cùu iní-yu Tàtá-ó Dütú Ndiöxí, te cùu iní-yu Déhe-gá. ² Te núu cùu iní-ó Yá Ndiöxí te quide-o nacuaⁿ cáháⁿ-gá, te cùtnuní iní-ó sá cúú iní tñáhá ndisa-o nacuaⁿ ndècu-o ichi-gá. ³ Te núu cùu iní-ó Yá Ndiöxí te tñi-o tñùhu cáháⁿ-gá, chi cùtnuní iní-ó sá ñá díú ñiⁿ sá

ùhú cúú-xi dàtná càchí ñáyiú. ⁴ Te nchaa nchoo ñáyiú cùu déhe-gá sa ní dáñá-ó ichi cuehé ichi duha, chi ní sàndáá iní-ó Jèsús núu xiáⁿ ní ndacu-o ní dáñá-ó ichi-áⁿ. ⁵ Te nchaa ñáyiú sàndáá iní sá Dêhe Yá Ndiöxí cúú Jèsús ní ndacu-yu ní queé-yu ichi cuehé ichi duha.

Nàcuáa ní cáháⁿ Yá Ndiöxí cuèndá Jèsús

⁶ Te Xítoho Jesucristú ní quixi-gá ñuyiú-a, te ní sandute-gá. Te ñá díú-ní xiáⁿ, chi ní xihí-gá sá cuèndá nchaa yicá cuèchi-o. Te Espiritú Yá Ndiöxí cáháⁿ-xi mee-ni sá ndáá, chi cáháⁿ Espiritú-gá-áⁿ sá Jèsús cúú-gá Cristú Yaá ní quixi ñuyiú-a. ⁷ Te úní testiú ndécú àndiu, Tàtá-ó Dütú Ndiöxí, ndihi Déhe-gá Xítoho Jesucristú, ndihi Espiritú-gá. Te ñiⁿ-ni tñùhu cáháⁿ ndi nuni testiú-áⁿ. ⁸ Te ducaⁿ cùu-xi ñuyiú-a tucu, chi cáháⁿ Espiritú Yá Ndiöxí sá Jèsús cúú-gá Cristú. Te ní sandute-gá, te ní xihí-gá sá cuèndá nchaa yicá cuèchi-o. Te xiáⁿ cùtnuní ndáá iní-ó sá díú Jèsús cúú-gá Cristú. ⁹ Te núu tñi-o tñùhu váha cáháⁿ ñáyiú, te váha-gá tñi-o tñùhu cáháⁿ Yá Ndiöxí, chi cáháⁿ ndáá-gá sá Déhe-gá cúú Jèsús. ¹⁰ Te nchaa ñáyiú sàndáá iní sá Jèsús cúú-gá Déhe Yá Ndiöxí, ñáyiú-áⁿ cùtnuní iní-yu sá cúú-xi ñiⁿ sá ndáá. Te nchaa ñáyiú ñá túú sàndáá iní tñùhu cáháⁿ Yá Ndiöxí quidè-yu-gá ñiⁿ ñándèhndé, dico ñá túú ndèhndé-gá, chi mèe-yu ñá túú sàndáá iní-yu sá Déhe-gá cúú Jèsús dàtná càchí mèe-gá. ¹¹ Te Yá Ndiöxí càchí tñùhu ndáá-gá sá cùndècu-o ndihi-gá ni caa ni quihíⁿ. Te duha cáháⁿ-gá chi sàndáá iní-ó Déhe-gá. ¹² Te nchaa ñáyiú na quìndáá iní ñáhá xii Déhe-gá cundecú-yu ndihi-gá ni caa ni quihíⁿ. Te nchaa ñáyiú ñá túú sàndáá iní ñáhá xii Déhe-gá vá cùndècú-yu ndihi-gá.

Sáhú ndéé núu ní ndihi-ná

13 Te cuendá sá sàndáá iní-ndó Déhe Yá Ndiǒxí nǔu xǎáⁿ chídó tǔnǔnǐ-í tǔnǔhu-a cuendá cutnǔnǐ iní-ndó sá cùndècu ndìhi-o-gá ñi caa ñi quíhíⁿ.

14 Te ñá túú tǔnǔhu yùhú cáháⁿ ndìhi-o Yá Ndiǒxí, chi tedóho ñaha-gá xii-o nǔu ìⁿ-ná sá ná càcáⁿ-ó nǔú-gǎ dàtná cuíní méé-gá.

15 Te cùtnuní iní-ó sá táxí-gǎ sá xìcáⁿ-ó nǔú-gǎ, chi nàha-o sá tedóho ñaha-gá xii-o nǔu na càcáⁿ-ó nàcuáa cùu iní-gá.

16 Te nǔu xìní-ó ñǎyiu ndècu ichi Yá Ndiǒxí te quidé-yu sá ñà túú vǎha nǔú-gǎ, te ndèhe-o sá ñà túú ní xíta nihnu duúⁿ-yu, te cáháⁿ ndìhi-o Yá Ndiǒxí cuendá-yu, te dàcácu nihnu ñaha-gá xii-yu te nǔu na nùcúnu ichi váha-yu. Chi lò ñáyiu xídó quidé nǎndi sá ñà túú vǎha te xíta nihnu duúⁿ-yu, te vá càháⁿ ndìhi-gá-ó Yá Ndiǒxí cuendá-yu.

17 Te nchaa sá cuèhé sá dúhá cùu-xi yíca cuèchi, dico ñà ncháá-xi cùu-xi sá dácuíta nihnu ñaha dùuⁿ.

18 Te nàha-o sá nchóó ñǎyiu cùu déhe Yá Ndiǒxí ñá túú-gǎ sání iní-ó càda-o nǎndi sá cuèhé sá dúhá. Te ducaⁿ chi mee Jèsús déhe Yá Ndiǒxí xító ñàha-gá xii-o, nǔu xǎáⁿ ñá ndácú-gǎ yucu ñǎvǎha dàxínu iní ñáhá-xi xii-o cada-o sá ñà túú vǎha.

19 Te nchoo nàha-o sá ndécú ndìhi-o Yá Ndiǒxí. Te nchaa ñáyiu ndècu ichi cuèhé ichi duha tàxi tǔnǔnǐ ñáhá-ñǎ yucu ñǎvǎha xii-yu.

20 Te nàha tucu-o sá ñùyíú-a ní quixi Jèsús Déhe Yá Ndiǒxí ní taxi-gá sá xìní tǔnǔnǐ-ó cuendá cutnǔnǐ iní-ó sá méé-gǎ cúú-gǎ Ndiǒxí-ó. Te ndècu ndìhi-o mee-gá ndìhi Déhe-gá Jèsús, te ìⁿdii díi-ni mee-gǎ cúú-gǎ Yá Ndiǒxí, te ndècu dava-gá sá nácuàca ñaha-gá xii-o cùndècu-o ndìhi-gá ñi caa ñi quíhíⁿ.

21 Te nchòhó ñáyiu cùu dàtná déhe-í, vá quíndáá iní-ndó ncháa sá càchí-yu cùu ndiǒxí, chi dícó ndaha cue téé ñuyíú-a ní cuáha nchaa xǎáⁿ.

Te ducaⁿ na cùnduu. Te ío chí cádá ndèe iní-ná vitna.

TUTÚ CÚÚ ÒÚ NÍ CADÚHA TÉ JUÀÁ

Tnúhu Yá Ndiòxí ndihi nàcuáa cuu iní tnáhá-ó

¹ Te yúhú té Juàá tée yìndaha ñaha xii ñáiyu sàndáá iní tnúhu Jèsús, tée-í tnúhu-a ñú núú tütú daquìxi-í ndaha yòhó ñaha ní cáháⁿ ñáhá Yá Ndiòxí, te nchaa tnúhu-a cùu-xi tnahá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiòxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhá-ndí xii-ndo. ² Te cùu iní ñáhá-ndí xii-ndo chi ndècu ndihi-ndo tnúhu ndáá tnúhu Yá Ndiòxí, te ducaⁿ-ni cùndècu-o ndihi tnúhu-ánⁿ ni caa ni quíhíⁿ. ³ Te xicáⁿ táhù-í núú Tátá-ó Dütú Ndiòxí, ndihi núú Déhe-gá Xítóhó Jesucristú sá ná chindèe ñaha-gá xii-ndo, te coto ñaha-gã te ío váha cuu iní-ndó cùndècu-ndo. Te duha xicáⁿ táhù-í núú-gã chi ndècu ndihi-o tnúhu ndáá tnúhu Yá Ndiòxí, te cùu iní-ó-gã.

⁴ Te ío cùdíí iní-í, chi ní naníhì-í ñú òú déhe-n, te quidé-yu nàcuáa sànu ichi ñaha tnúhu ndáá dàtná ní táuchíúⁿ mèe Tátá-ó Dütú Ndiòxí. ⁵ Te vitna yòhó ñaha ní cáháⁿ ñáhá Yá Ndiòxí, cächí tnúhu-í xii-n sã xíní ñùhu-xi cuu iní-ó tnàha ñáiyu-o. Te ñá díú ñú tnúhu saa cùu-xi, chi ñu-ni tnúhu sá ñí ngúndècu ndihi-o ndéé cùtnáhá ní tuha-o ichi Yá Ndiòxí. ⁶ Te núu cùu iní-ó Yá Ndiòxí, te cùu iní-ó tnàha ñáiyu-o dàtná ní cachí mèe-gã, te tnúu-o nchaa tnúhu cáháⁿ-gá. Te ní cachí-gá sá cúú iní-ó-gã, te cuu iní-ó tnàha ñáiyu-o. Te tnúhu-a ní tecú dóho-o ndéé cùtnáhá ní tuha-o ichi-gã.

Cue tée dàndahú tnàha ñáiyu-xi

⁷ Te ío vai ñáiyu dàndahú ñáhá xica cuú-yu ñuyíú-a, te cächí-yu sá ñá ndàá sá Xítóhó Jesucristú ní

cuu-gá ñú ñáiyu ndisa. Te nchaa ñáiyu duha cáháⁿ dácuañdehndé-yu, te cùu úhú iní-yu Jèsús. ⁸ Te quíhí iní-ndó sá và dàndahú ñáhá ñáiyu-áⁿ xii-ndo cuèndá sá và cuíta chùuⁿ Yá Ndiòxí ní quide-o. Te òré ná quíxí tucu Jèsús ñuyíú-a te taxi-gã nchaa sá vàha cùu iní mèe-gã cundècu ndihi-o.

⁹ Te nchaa ñáiyu dàña tnúhu Xítóhó Jesucristú, te nàtní-yu ingá ichi, ñáiyu-ánⁿ ñà túú ndècu ndihi-yu Yá Ndiòxí. Te nchaa ñáiyu ñá túú dàña tnúhu Xítóhó Jesucristú ndècu ndihi-yu Yá Ndiòxí ndihi Déhe-gá Xítóhó Jesucristú. ¹⁰ Te núu véxi ñáiyu núú ndécú-ndó cächí-yu sá cáháⁿ-yu tnúhu Yá Ndiòxí te ñá ndàá, te vá cuãha-ndo tnúhu danèhé ñáhã-yu xii-ndo, te ni và cuãha-ndó-yu tnúhu ndee iní cuèndá chùuⁿ quidé-yu. ¹¹ Chi núu na cáháⁿ ndihi váha-ndó-yu, te dàtná tnúhu sá chindèe-ndó-yu quidé-yu nchaa sá cuèhé sá dúhá.

Tnúhu ndéé núú ní ndihi-ná

¹² Te ío vai-gã tnúhu cuñí-í cachí tnúhu-í xii-ndo, dico vá tée-gã-í chi cuñí-í quixi-í núú ndécú-ndó ndàtnúhu-o cuèndá cudíí víhí iní-ó nchãa-o.

¹³ Te nchaa cue déhe cúhú-n, ñáiyu ní cáháⁿ ñáhá Yá Ndiòxí quidé ndèe iní ñáhã-yu xii-n.

TUTÚ CÚÚ ÒNÍ NÍ CADÚHA TÉ JUÁÁ

Càháⁿ váha-yu cuèndá té Gǎyú

¹ Te yúhú té Juáá téé yìndaha ñaha xii ñáyiú sàndáá iní tnúhu Jèsús, chido tnuní-í tnúhu-a ñⁿ núú tútú sá cúú-xí yòhó té Gǎyú téé ío cùu iní-í, chi ndècu ndìhi-n tnúhu ndáá tnúhu Yá Ndiòxí.

² Te yòhó téé ío cùu iní-í, xìcáⁿ táhù-í núú Yá Ndiòxí sá cùndècu váha-n ñà túú nà cumání xii-n, te vá cùhù-n, chi sa nàha-í sá ndécú vǎha-n núú Yá Ndiòxí. ³ Te ío ní cudíí iní-í òré ní sáá ñáyiú ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá ði-u-ni tnúhu-gá te tní-n nchaa nacúáa càháⁿ tnúhu-án. ⁴ Te ío cùdíí iní-í ní nìhì-í tnúhu sá ncháá-ní ñáyiú ní sanu ichi-í ichi Yá Ndiòxí ndécú-ní-yu ichi-gá, te quide-ní-yu nchaa nàcuáa càháⁿ-gá.

⁵ Te yòhó téé ío cùu iní-í, ío váha quide-n núú Yá Ndiòxí, chi chindee-n nchaa ñáyiú véxi dava-gá ñúú xìcá, ñáyiú sàndáá iní tnúhu Yá Ndiòxí. ⁶ Te nchaa ñáyiú-án càháⁿ-yu núú tàcá ñáyiú càháⁿ ndìhi Yá Ndiòxí iha sá ío cùu iní-n nchaa tnahá ñáyiú-n dàtná càháⁿ Yá Ndiòxí. Te yúhú càháⁿ ndàhù-í núú-n sá cádá ndèe-ni iní-n chindee-n nchaa ñáyiú-án nchaa sá xíní ñùhù-yu ichi. Te núu ducaⁿ na càda-n te quide-n nacúáa cùu iní Yá Ndiòxí, te xìnu cuechi-n tnahá-n núú-gá. ⁷ Chi nchaa ñáyiú-án ní tní-yu ichi cuáháⁿ-yu càháⁿ-yu tnúhu Jèsús. Te ñà túú tní-yu ní ñⁿ sá sǎnhaha ñáyiú ñà túú ndècu ichi Yá Ndiòxí. ⁸ Te núu xíáⁿ nchoo xìni ñùhu-xi chindee-o nchaa ñáyiú xìnu cuechi núú-gá ñáyiú càháⁿ tnúhu-gá, te ducaⁿ te cutnùní iní-ó sá tnahá-ó xìnu cuechi-o ndìhí-yu núú-gá.

Ñà túú quide váha té Diótrefés

⁹ Te yúhú ní tendaha-í tutú cuáháⁿ núú tàcá ñáyiú chìñuhù-yu Yá Ndiòxí, dico ñⁿ téé ndècu-án nání-dě Diótrefés, te ñà sàndáá iní-dé nchaa tnúhu càháⁿ-í, chi cuíní-dé cunuu-dě núú-yu. ¹⁰ Te òré quixi-í te cada ndáá-ó nchaa tnúhu cuèhé tnúhu duha càháⁿ-dé cuèndá-í. Te ñà díú-ní xǎⁿ quide-dě, chi nchaa ñáyiú véxi ingá ñúú càháⁿ tnúhu Yá Ndiòxí ñà túú càháⁿ ñáhá-dě vehe-dé, te ní ñà dáñá-dě càháⁿ ndìhi ñaha dàva-gá ñáyiú xíi-yu. Te nchaa ñáyiú cuíní càháⁿ ndìhi ñaha xii-yu, te quèñuhu ñaha duuⁿ-ni-dé ñà dáñá-gá-dé níhí tnahá-yu ndìhi nchaa ñáyiú tàcá dácúaha tnúhu Yá Ndiòxí.

¹¹ Te yòhó téé ío cùu iní-í, vá cùndècu-n ichi cuehé ichi duha dàtná quide nchaa dava-gá ñáyiú, cada-n mèe-ni sá váha. Chi nchaa ñáyiú quide váha ndécú-yu ichi Yá Ndiòxí. Te nchaa ñáyiú quide nchaa sá cuèhé sá dúhá ñà túú ndécú-yu ichi Yá Ndiòxí.

Nchaa ñáyiú càháⁿ váha-yu cuèndá té Demètriú

¹² Te nchaa ñáyiú càháⁿ váha-yu cuèndá té Demètriú, chi quide ndáá-dé dàtná càháⁿ Yá Ndiòxí. Te tnahá yúhú càháⁿ-í cuèndá-dé sá ío váha quide-dé, te nchòhó sa nàha-ndo sá yúhú càháⁿ ndáá-í.

Tnúhu ndéé núú ní ndìhi-ná

¹³ Te vǎi-gá tnúhu cuíní-í cachí tnúhu-í xii-n ni cùu, dico ñà ní tèe-gá-í, ¹⁴ chi cuíní-í quixi ndìhi-í, te càháⁿ-ó núú núú-ó.

¹⁵ Te ío cada ndee iní, te xìcáⁿ táhù-í núú Yá Ndiòxí sá ná cùndècu váha-n ñà túú nà cuu cundècu-n. Te nchaa cue ñáyiú xíní tnahá ndìhi-o ndècu iha quide ndee iní ñáhá-yu xii-n. Te yòhó cúñaha-n nchaa ñáyiú xíní tnahá ndìhi-í ndécú xíáⁿ ná càda ndee iní-yu. Te ío cada ndee iní-nǎ vitna.

TUTÚ NÍ CADÚHA TÉ JUDÁS

*Té Jùdás càdũha-dé tutú quíhíⁿ
ndaha ñáyiú ní cachí Yă Ndiõxí nduu
cuendá-gá*

1 Yúhú té Jùdás ñani té Jàcobó xínú cuèchi-í núú Xítohó Jesucristú, te càdũha-í tutú-a sá cúú-xí nchòhó ñáyiú ní cachí Yă Ndiõxí Yaa cúú Tātá-ó nduu cuendá-gá, ñáyiú ío cùu iní-gá. Te dàtná-ni xító ñaha-gá xii-ndo vitna diu-ni ducaⁿ còto ñaha-gá xii-ndo ndèé ná sáa nduu quíxi tucu Xítohó Jesucristú ñuyúú-a. ² Te xicáⁿ táhù-í núú Yă Ndiõxí sá ïo-gá ná chindee chítúú ñaha-gá xii-ndo, te na cùtnuní-gá iní-ndó sá ïo cùu iní ñáhá-gá xii-ndo, te ducaⁿ ïo váha cuu iní-ndó cùndecu-ndo.

*Ñáyiú ñá túú càháⁿ tnúhu ndáá
tnúhu Yă Ndiõxí
(2 Pedro 2:1-17)*

³ Te nchòhó ñáyiú ío cùu iní-í, ducaⁿ-ní ïo sàni iní-í cadũha-í ìⁿ tutú sá cúú-xí-ndó cuendá danèhé ñáhá-í xii-ndo nàcuáa ní cuu ní naníhí táhú-ó dico ñá túú càdũha-í, dico vitna quide cuendá-í sá xíní ñũhu-gá-xi càháⁿ-í núú tütú-í sá nchòhó ío cundehe-ndo tnúhu càháⁿ-ndó ndíhi ñáyiú, te càháⁿ-ndó nàcuáa ndùu tnúhu sàndáá iní mée-ndó, chi diu-ni tnúhu-áⁿ ní càháⁿ Yă Ndiõxí sá cúú-xí nchàa ñáyiú ndècu ichi-gá. Te vitna ñá túú-gá ná tnúhu càháⁿ-gá sá cúú-xí-yu, chi sa ní càháⁿ duuⁿ-gá.

⁴ Te duha càháⁿ-í núú tütú-a sá cúú-xí-ndó, chi nihí-í tnúhu sá xicá cùu ñáyiú chítnahá ñáhá xii-ndo, te ní ñá túú xíní-ndó ná ñáyiú cùú-yu, te ñáyiú-áⁿ cúú-yu ñáyiú cùu úhú iní ñáhá xii Yă Ndiõxí. Te ìⁿ xichi núú tütú Yă Ndiõxí càchí-xi sá ñáyiú-áⁿ quíhíⁿ-yu núú úhú núú ndáhú, te diu-ni ñáyiú-áⁿ càchí-yu sá ïo váha iní Yă Ndiõxí núu xíáⁿ cuu-ni

cadá-yu nchaa sá cuèhé sá dúhá. Te dàquee tíhũ-yu Yă Ndiõxí Yaa ío cùnuu, ndíhi Xítohó Jesucristú.

⁵ Te nchòhó sa xíní váha-ndo nàcuáa ní quide Yă Ndiõxí ndéé sanaha dico dândacu iní ñáhá-í xii-ndo, chi dàvá-áⁿ ní queñuhu-gá ñáyiú isràél nacióⁿ Ègiptú, te dava ñáyiú-áⁿ ñà túú ní sàndáá iní ñáhá-yu xii-gá te ní dánáá ñaha-gá xii-yu. ⁶ Te nchaa espíritú ñá túú ní cuíní cada ndáá cunu cuechi núú Yă Ndiõxí ní quee-xi núú ndécú-xí, te mee-gá ní sadí nihnu ñaha-gá xii-xi ìⁿ xichi núú néé te vá cãcu-xi, chi sáa nduu te nayáha-xi cundecu-xi núú úhú núú ndàhú ní caa ní quíhíⁿ. ⁷ Te dândacu iní ñáhá tucu-í xii-ndo nàcuáa ní yáha ñáyiú ñuu Sòdomá, ndíhi ñáyiú ñuu Gòmorrá, ndíhi nchaa ñáyiú ñuu ní cáa yatni xíáⁿ, chi tnàhá-yu ñá túú ní quide váha-yu dàtná ní quide nchaa cue espíritú-áⁿ. Chi cue téé ní xóo càháⁿ ndíhi tnàha ndi mee-güedé, te diu-ni ducaⁿ ní xóo cada cue ñáyiú ìhí tucu. Te sá dúcáⁿ ní quidé-yu núú ní dángóyó Yă Ndiõxí ñuhú ñuu-yu ní dánáá ñaha-gá xii-yu. Te xíáⁿ cùtnuní iní-ó sá nchàa ñáyiú ñá túú cuíní cada váha núú-gá quíhíⁿ-yu núú úhú núú ndáhú ní caa ní quíhíⁿ.

⁸ Te diu-ni ducaⁿ quide ñáyiú chítnahá ñáhá xii-ndo cuíní-yu dandáhú ñáhá-yu, chi càchí-yu sá dácòto ñaha saní-yu nàcuáa cadá-yu, núu xíáⁿ nándi nchaa sá cuèhé sá dúhá quidé-yu sá cúú-xí yiqui cuñú-yu, te dàquee tíhũ-yu nchaa nàcuáa càháⁿ Yă Ndiõxí cada-o, te càháⁿ úhú-yu cuendá nchaa espíritú cùnùu. ⁹ Te mee espíritú cùnùu-gá xínú cuèchi núú Yă Ndiõxí nání Míguél ní nàa-xi ndíhi sácúíhná cuendá yiqui cùñú ndíi Moisés. Te espíritú-áⁿ ñá túú ní cùyi-xi càháⁿ úhú-xi sácúíhná-áⁿ, chi ní xáhaⁿ-ni-xi: “Mee Yă Ndiõxí ñáhá-gá te núu nása cada ñaha-gá

xii-n", duha ní xáhaⁿ-xi. ¹⁰ Te nchaa ñáiyu ducaⁿ dàndahú ñáhá xii-ndo-áⁿ càháⁿ cuèhé-yu cuèndá nchaa sá vátá cùtnùní-gá iní-yu nása ndùu, te quidé-yu dàtná quidé cuè quiti chi cue quiti-áⁿ quidé-güedi nání véxi iní-güedi, te ni ñà túú cùtnuní iní-güedi nchaa sá quidé-güedi. Te ducaⁿ sà tnahá-xi cùú-yu, chi nchaa sá cuèhé sá dúhá véxi iní-yu quidé-yu, te sá dúcáⁿ quidé-yu xiáⁿ tá xíta nihnú-yu cuáháⁿ.

¹¹ ¶ Te ndàhú ní cuú-yu chi ío ndohó-yu!, chi quidé-yu dàtná ní quide ndíi Càin. Te nándi sá quidé-yu cuèndá sá cuìní-yu díhúⁿ dàtná ní xóo cada ndíi Bàlaám. Te ío cùu sáá iní-yu núú Yá Ndióxi dàtná ní xóo cada ndíi Còré, núú xiáⁿ tá xíta nihnú-yu cuáháⁿ. ¹² Te òró sácáⁿ-núú sáha ñáhá-yu xii-ndo òré nátacá-ndo quide-ndo vico chiñuhu-ndo Yá Ndióxi. Te òré véxi ndíhi ñáhá-yu xii-ndo te mee-ni sá cùú-xí mèe-yu quide cuendá-yu, te ñà túú nèhé-yu sá yíñuhu núú Yá Ndióxi. Te cùú-yu dàtná ñⁿ vícò sá cuáháⁿ-xi duha cuáháⁿ-xi dàcáⁿ te ñà túú dǎu nchidó-xí, ducaⁿ sà tnahá-xi cùú-yu. Te cùu tucú-yu dàtná ñⁿ yutnu vídí sá ñà túú tnahí cùuⁿ sávídí-xi, te nchaa yutnu ducaⁿ ñà túú cùuⁿ sávídí-xi te tñuhu-güedé ndéé yóho-xi te xihí duuⁿ-xi. Te ducaⁿ sátnahá-xi cùú-yu, chi ñà túú quide váha-yu. ¹³ Te cùu tucú-yu dàtná ndute làmár, chi ndute-áⁿ òré càndá-xi te quecòo tíñú-xi ñⁿ xio. Te cùu tucú-yu dàtná ñⁿ chódíní cuáháⁿ-dì duha cuáháⁿ-dì dàcáⁿ. Te ducaⁿ sátnahá-xi cùú-yu, chi ñà túú cuìní-yu cada váha-yu. Te ñáiyu-áⁿ daquihíⁿ ñáhá Yá Ndióxi xií-yu ñⁿ xichí núú néé núú sá ndecu túha cundecú-yu ni caa ni quihíⁿ.

¹⁴ Te ndíquíⁿ yává ndíi Àdán téé cùu usá ní xínani Ènóc ní dàcáhú iní ñáhá Yá Ndióxi xii-dé ní càháⁿ-dé ñⁿ cuèndá nchaa ñáiyu-áⁿ. Te ní cachí-dé: "Na càchí tñuhu-í xii-ndo

sá Yá Ndióxi quixi-gá ndíhi cuèhé víhi espíritú xínú cuèchi núú-gǎ. ¹⁵ Te dàvá-áⁿ cada ndáá-gá cuèchi nchaa ñáiyu te daquihíⁿ-gá nchaa ñáiyu ndècu ichi cuèhé ichi duha núú ùhú núú ndàhú, te ducaⁿ cada ñaha-gá xií-yu, chi mee-ni sá cuèhé sá dúhá quidé-yu, te càháⁿ úhú ñáhá-yu xii-gǎ", duha ní cachí te Ènóc. ¹⁶ Te ñáiyu-áⁿ ío yica iní-yu chi ñà túú ndùu vétú iní-yu nàcuáa ndècú-yu ñuyíú-a, te sátnuhú-yu tñaha ñáiyú-yu te mee-ni sá cuèhé sá dúhá sàni iní-yu quidé-yu, te quide cahnú-yu mèe-yu, te mee-ni càháⁿ váha-yu núú tñaha ñáiyú-yu cuèndá cuìní-yu sá cadá váha ñaha ñáiyu-áⁿ xií-yu.

Té Jùdás càháⁿ-dé dóho ñáiyu ndècu ichi Yá Ndióxi

¹⁷ Te nchòhó ñáiyu ío cùu iní-í, càháⁿ ndàhú-í núú-ndó sá ío cuhuⁿ iní-ndó tñuhu sá sá ní dánèhé ñáhá cuè téé ní tendaha Xítohó Jesucristú càháⁿ tñuhu-gá núú ñáiyu. ¹⁸ Te sa ñaha-ndo sá ñi cachí-güedé sá cùmání-gǎ quixi tucu Xítohó Jesucristú ñuyíú-a, te coo ñáiyu càháⁿ cuèhé càháⁿ duha cuèndá tñuhu-gá. Te ñáiyu-áⁿ cadá-yu mee-ni sá cuèhé sá dúhá véxi iní mèe-yu. ¹⁹ Te ñáiyu-áⁿ cùú-yu ñáiyu càháⁿ nándi tñuhu sá ñà túú nándíhi cuèndá sá vǎ cùú ñⁿ nuu-ndo cundecu-ndo, te mee-ni sá cuèhé sá dúhá ñuhu iní-yu, te ñà túú ndècu ndíhi-yu Espíritú Yá Ndióxi.

²⁰ Te nchòhó ñáiyu ío cùu iní-í, ío dacuàha-ndo tñuhu Yá Ndióxi sá ñi sándáa iní-ndó cuèndá ducaⁿ cuíta cuehnu nihnu-ndo ichi-gá quihíⁿ, te càháⁿ ndíhi-ndo Yá Ndióxi nàcuáa dàcahu iní ñáhá Espíritú-gá xii-ndo. ²¹ Te ío coto-ndo mèe-ndo cundecu-ndo cuèndá cuu váha iní ñáhá Yá Ndióxi xii-ndo, te cundetu-ndo sáa nduu quixi Xítohó Jesucristú ñuyíú-a nacuaca ñaha-gǎ xii-ndo cundecu-ndo ndíhi-gá ni caa

ni quíhíⁿ, chi Yaá-áⁿ ïo cùndahú iní ñáhá-gă xii-o.

²² Te ñáyiú sàni ìⁿ sani úú iní-xi cùñaha-ndo xii-yu nàcuáa cadá-yu cundecú-yu ichi Yá Ndiöxí. ²³ Te nchaa ñáyiú ta xíta nihnu ñùhu ichi cuáháⁿ núú ùhú núú ndàhú, ïo cundihí iní-ndó cùñaha-ndo xii-yu tnúhu Yá Ndiöxí cuèndá sá ná cãcu nihnú-yu, te cundàhú iní-ndó-yu, te quíhí iní-ndó vã cadá-ndó tnàhá-ndó nàcuáa quidé-yu, chi daquèe tíhú-ndó nchàa sá cuèhé sá dúhá quidé-yu-áⁿ.

Nàcuáa ndacáⁿ táhú-ó núú Yá Ndiöxí

²⁴ Te Yá Ndiöxí chindee ñaha-gá xii-ndo cuèndá sá vã cùndècu-ndo ichi cuehé ichi duha, te cundu ndoo cunduu nine iní-ndó càndeca ñaha-gá xii-ndo quíhíⁿ cundecu-ndo núú ïo vâha càa ndecu-gá, te ïo cudíⁿ iní-ndó. ²⁵ Te Yá Ndiöxí ïo ndècu ndihí-gá nchaa sá xìní tnùní-gá te ðiu-gá ní dácãcu nihnu ñaha-gă xii-o núú ùhú núú ndàhú, te ducaⁿ ñí quide ñaha-gă xii-o chi ndècu ndihí-o Xítóhó Jesucristú. Te ïo ndacáⁿ táhú-ó núú Yá Ndiöxí, chi ïo càhnu cuu-gá ndécú-gă táxí tnùní-gá, te súúní vâha iní-gá, te ndàcu-gá quidé-gă nchaa sá vâha, te ducaⁿ-ni ïo càhnu cuu-gá ndéé cùtnàhá vátá ngãva-gá ñuyíú, te ducaⁿ-ni ïo càhnu cuu-gá ndéé vitna, te ðiu-ni ducaⁿ ïo càhnu cuu-gá ni caa ni quíhíⁿ, duha xìni ñuhu-xi ndacáⁿ táhú-ó núú-gă. Te ducaⁿ na cùnduu. Te ïo chí cadá ndèe iní-nã vitna.

NCHAA SÁ NĬ XINÍ TÉ JUÁÁ NDIHI NCHAA SÁ NĬ TECÚ DÓHO-DÉ

Xítohó Jesucristú xáhaⁿ-gã xii té Juáá nchaa nàcuáa cada-xi ñuyúú

¹ Te Yá Ndiöxí ní xáhaⁿ-gã xii Xítohó Jesucristú nchaa sá tá cùyatni vii-nã cada-xi ñuyúú-a cuèndá sá cùñaha-gã xii cue té xínu cuechi núú-gã, te Xítohó Jesucristú ní tendaha-gã ìⁿ espíritú xínu cuèchi núú-gã ní quixi-xi ní cachí tnúhu-xi nchaa tnúhu-áⁿ xii yúhú té Juáá té xínu cuechi núú-gã, te nchaa tnúhu-áⁿ ndéé núú tütú-a. ² Te yúhú cachí tnúhu ndáá-í xii-ndo nàcuáa ní cáháⁿ Yá Ndiöxí, te càháⁿ ndáá tucu-í cuèndá Xítohó Jesucristú, ndihi cuèndá nchaa sá ní xini-í.

³ Te váha táhú ñáyiu dàcuaha nchaa tnúhu ndéé núú tütú-a, te váha tucu táhú ñáyiu ndédóho, te váha tucu táhú nchaa ñáyiu tñi nacuáa càháⁿ-xi, chi sa ta cùyatni vii-nã nduu càda-xi nchaa nacuáa càháⁿ-xi.

Té Juáá cádüha-dé tutú quíhíⁿ ndaha ndi usá xichi cue ñáyiu ndècu ichi Yá Ndiöxí

⁴ Te yúhú té Juáá cádüha-í tutú daquixi-í ndi usá xichi núú ndécú nchòhó ñáyiu ndècu ichi Yá Ndiöxí ndécú distritú Àsiá. Te mee-gã ná chindee chitúú ñaha-gã xii-ndo, te ío váha cuu iní-ndó cùndecu-ndo. Te cuèi ndéé sanaha diu-ni-gá ndécú, te diu-ni-gá ndécú cuèi vitna, te ducaⁿ-ni cùndecu-gá cuèi ndéé núú cuaháⁿ núú vëxi, te diu-ni ducaⁿ ío na chindee chitúú ñaha ndi usá cue espíritú ndécú núú-gã xii-ndo, te ío váha cuu iní-ndó cùndecu-ndo. ⁵ Te diu-ni ducaⁿ na càda tucu Xítohó Jesucristú, te diu-gá cúú-gã Yá cáháⁿ ndáá, te diu-ni-gá ní xihí-gá te

díhna-gá ní ndoto, te dàtnùní ndéé cuèé-gá te ndoto cue ñáyiu ní xihí, te diu-ni-gá táxi tnùnigá nchaa cue té yindaha ñaha xii ñáyiu ndècu ñuyúú-a. Te ío cùu iní ñáhá-gã xii-o, te mee-gã ní sati níñi-gã te ní xihí-gá núú cùrúxí sá cuèndá nchaa sá cuèhé sá dúhá quide-o, te ní ndada ndoo ní ndada nine-gá iní-ó, ⁶ te vitna ní quide ñaha-gã xii-o dàtná cue té yindaha ñáyiu, te ní quide ñaha tucu-gá xii-o dàtná cue dútú xínu cuèchi-o núú Tátá-gã Dútú Ndiöxí. Te vitna nchaa-o chí ná càchi-ó sá ío càhnu cuu Xítohó Jesucristú, te ío cùnuu-gá, te ducaⁿ-ni na cùnuu-gá ni caa ni quíhíⁿ. Te ducaⁿ na cùnduu.

⁷ Te cundehe-ndo àndiu! Chi ichi xití vícò quixi Xítohó Jesucristú, te nchaa ñáyiu ndècu ñuyúú-a quini ñáhã-yu xii-gã, te tnàhá nchaa ñáyiu ìⁿ-ni cùu ndihi ñáyiu ní dánicuehé ñáhã xii-gá quini ñáhã-yu, te nchaa ñáyiu xindecu nihi ñuyúú, ñáyiu ñá túú cùu váha iní ñáhã xii-gá ndíhú iní-yu òré quini ñáhã-yu xii-gã, te ndáá sá dúcáⁿ càda-xi.

⁸ Te Yá Ndiöxí càchi-gá: “Yúhú ío cùnuu-í chi diu-í sa ndècu ndéé cùtnàhá ní ngáva ñuyúú, te diu-ni-í cundecu ndéé ná sàá nduu nàa-xi ndihi nchaa sá ío, chi yúhú cundecu-í ni caa ni quíhíⁿ”, duha càchi Yá Ndiöxí Yáá ndácú quide nchaandi tühú sá váha. Chi diu-ni-gá sa ndècu ndéé cùtnàhá ní ngáva ñuyúú, te diu-ni-gá ndécú-gã vitna, te ducaⁿ-ni cùndecu-gá ni caa ni quíhíⁿ.

Té Juáá ní xini-dé Xítohó Jesucristú Yáá ío cùnuu

⁹ Te yúhú té Juáá té ndècu ndihi-ndo ichi Xítohó Jesucristú, tnàhá-í ndóhó-í cuèndá-gá dàtná ndóhó-ndó, te tnàhá-í nduu táhú-í cundecu ndihi ñaha-í xii-ndo núú ndécú Yá Ndiöxí táxi tnùnigá. Te ío quide cahnu iní-ó cuèi nándi

yáha-o ndècu-o sá cuèndá Xítohó Jesucristú. Te yúhú ní ngava-í vecaá ìⁿ ñúú nání Pátmós, te ñúú-áⁿ cáá xití ndute lámár. Te ducaⁿ ñí cuu cuèndá sá cáháⁿ-í tñúhu Yá Ndiòxí, te cáháⁿ váha-í cuèndá Xítohó Jesucristú. ¹⁰ Te ìⁿ nduu ndumíngú nduu nàtacá-ó chìñuhu-o Yá Ndiòxí ní quide ñaha Espíritú-gá xii-í nàcuáa càchí iní-xi, te ní tecú dóho-í ñíhí ní cáháⁿ ìⁿ sá ní cáháⁿ ndàa sàtà-í te dàtná ñíhí cáháⁿ ìⁿ cútú ducaⁿ ñíhí ní cáháⁿ-xi. ¹¹ Te càchí sá cáháⁿ-áⁿ:

—Yúhú sa ndècu-í ndéé cútñàhá ní ngáva ñuyúú, te ñiu-ni-í cundecu-í ndéé ná sàà nduu nàa-xi ndihí nchaa sá ió, te chido tñùní-n ìⁿ núú tütú sá ná ðànehé núú ñàhà-í xii-n, te daquìhíⁿ-n tütú-áⁿ ndi úsá xichi núú xíndecu cue ñáyiú ndècu ichi Yá Ndiòxí xíndecu ðistrítú Asíá, ndaha ñáyiú ñúú Éfesú, ndaha ñáyiú ñúú Èsmirná, ndaha ñáyiú ñúú Pèrgamú, ndaha ñáyiú ñúú Tiàtirá, ndaha ñáyiú ñúú Sàrdís, ndaha ñáyiú ñúú Filàdelfiá, ndaha ñáyiú ñúú Laodiceá, nchaa ñáyiú ñúú-áⁿ daquìhíⁿ-n tütú-áⁿ ndahá-yu —càchí sá cáháⁿ-áⁿ.

¹² Te ní nchócuñhu-í ndéhè-í nñu ná cúú sá cáháⁿ-áⁿ, te ní xini-í xínutñí úsá tñàhá sá ñí cuáha mee-ni ðíhúⁿ cuááⁿ sá ndéé ðité-xi, te núú ðité-xi-áⁿ yíndòdo ìⁿ caa candíl. ¹³ Te cuádava tnuú nchaa xíáⁿ ní xini-í nútní Yaa cáá dàtná cáá nchàa nchoo ñáyiú ndècu ñuyúú-a, te ñíhnu-gá ìⁿ dóó cání càa-xi ndéé núú sàhá-gá, te yidúcuⁿnuu ìⁿ sìnhú ní cuáha mee-ni ðíhúⁿ cuááⁿ pèchú-gá. ¹⁴ Te idi ðíquí-gá cuixíⁿ quiyí dàtná cuixíⁿ idi dava mbéé, àdi yúhá sá quée òré quidé víxiⁿ-xi, te tinùu-gá quidé-xí dàtná quidé-xí òré sàà itá ñuhú. ¹⁵ Te sàhá-gá súúní dàtásaⁿ-xi dàtná dàtásaⁿ sá nání bróncé òré càyú-xi ducaⁿ dàtásaⁿ-xi sàhá-gá, te dónaha tñúhu càháⁿ-gá quidé-xí dàtná quidé-xí dónaha titní víhí yùte. ¹⁶ Te xio ndaha cùha-gá núndàha-gá

úsá tñàhá chódíní, te mei yùhu-gá quéné ìⁿ yuchi cáhnú ndéé úú xio núú-xi, te núú-gá quidé-xí dàtná quidé-xí núú nchìcanchii òré súúní ngòyo cahni.

¹⁷ Te sá ðúcáⁿ càa Yaa-áⁿ ñí xini-í nñu xíáⁿ ní yùhú-í ní nduá-í núú-gá, te ní cuu-í dàtná ìⁿ téé ní xihí sá ðúcáⁿ ò ní yùhú-í, ðico mee-gá ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñiu-ni yúhú sa ndècu-í ndéé cútñàhá ní ngáva ñuyúú, te ñiu-ni yúhú cundecu-í ndéé ná sàà nduu nàa-xi ndihí nchaa sá ió. ¹⁸ Te yúhú cúú-í Yaa ní xihí te ní ndoto-í, te vitna ndècu vívù-í, te ducaⁿ-ni cundecu-í ní caa ñí quíhíⁿ. Te yúhú cúnùu-í núú nchàa ñáyiú ní xihí te ñiu-ni-í cúnùu-í núú ndécù-yu. ¹⁹ Te chido tñùní-n nchàa sá ñí xini-n-áⁿ ìⁿ núú tütú, ndihí nchaa nàcuáa cùu vitna, ndihí nchaa sá cádá-xi ndéé núú cuáháⁿ núú vèxi-gá. ²⁰ Te na càchí tñúhu-í xii-n nàcuáa quèe-xi ndi úsá chódíní ñí xini-n yòtní-í xio ndaha cùha-í, ndihí nàcuáa quèe-xi ndi úsá sá ñí cuáha mee-ni ðíhúⁿ cuááⁿ, sá ndéé ðité-xi te yíndodo ìⁿ caa candíl núú ðité-xi-áⁿ. Te ndi úsá chódíní-áⁿ, xíáⁿ cúú-xí sá cútñúní ini-ó sá ndécú úsá cue téé xinu cuechi núú Yá Ndiòxí, te ndi úsá cue téé-áⁿ ndécú-güedé ndi úsá xichi núú ndécú ñáyiú ndècu ichi Yá Ndiòxí. Te cuèndá ndi úsá sá ndéé ðité-xi-áⁿ, xíáⁿ cúú-xí sá cútñúní ini-ó sá ndécú úsá xichi ñáyiú ndècu ichi Yá Ndiòxí —duha càchí Yaa cáháⁿ-áⁿ.

2

Tnúhu sá cúú-xí ñáyiú xíndecu ichi Yá Ndiòxí ndécú ñúú Éfesú

¹ Te ní cachí tuçu Yaa cáháⁿ-áⁿ xii-í sá chídó tñùní-í nchaa tñúhu sá vítná cáháⁿ-gá ìⁿ núú tütú, te tendaha-í quíhíⁿ ndaha téé xinu cuechi núú Yá Ndiòxí ndécú ñúú Éfesú sá cúú-xí cuè ñáyiú xíndecu ichi-gá ndécú ñúú-áⁿ, te duha ní

cachí-gá: “Yúhú cùu-í Yaá núndàha úsá chódíní xio ndaha cùha-í, te xica cuu-í núú ndécú ndí usá sá ní cuáha mee-ni díhúⁿ cuàáⁿ, sá ndéé dité-xi te yìndodo ìⁿ caa candíl núú dité-xi. ² Te yúhú xìní-í nchaa nàcuáa quide nchohó ñáyiú xìndecu ichi Yá Ndiòxí ndécú ñúú Èfésú, te xìní-í sá ìo ndùcu ndee-ndo quide chiuⁿ-ndo cuendá-gá, te ìo quide cahnu iní-ndó ndècu-ndo quide-ndo chiuⁿ-gá. Te xìní-í sá ñà túú tnàhí tnàhá iní-ndó nàcuáa quide nchaa ñáyiú ndècu ichi cuehé ichi duha. Te xìní tucu-í sá xító ndéé-ndó cuè téé càchí sá ní tendaha-í véxi càháⁿ tnúhu-í te ñà ndàá sá càháⁿ-güedé tnúhu-í, te ducaⁿ te cùtnuní iní-ndó sá ñà ndàá sá càháⁿ-güedé tnúhu-í. ³ Te xìní tucu-í sá ìo ndòho-ndo quide-ndo chiuⁿ cuendá-í, te ducaⁿ ìo quide cahnu iní-ndó cuèí nándi yáha-ndo, te ñà túú cùu dusaⁿ-ndo quide-ndo chiuⁿ-áⁿ. ⁴ Dico ñà túú cùu váha iní-í chi nchòhó ñà túú-gá quidé-ndó datná ní xóo cada-ndo cùtnàhá vitna cùu víi-ni ní sándáá iní ñàhá-ndó xii-í, chi vitna ñà túú-gá cùú iní ñàhá víhi-ndo datná ní xóo cada-ndo dàv-áⁿ. ⁵ Te chí dándacu iní nàcuáa ní xóo cada-ndo cùtnàhá vitna cùu saa ní sándáá iní ñàhá-ndó xii-í, te ndixi cuèchi iní-ndó sá ñà túú-gá quidé vâha-ndo ndècu-ndo vitna, te nucuíta saa tùcu-ndo cada-ndo datná ní xóo cada-ndo ndéé díhna. Te nchòhó cada iní-ndó sá ndécú ndìhi-ndo ìⁿ sá ní cuáha mee-ni díhúⁿ cuàáⁿ, sá ndéé dité-xi te yìndodo ìⁿ caa candíl núú dité-xi. Te núu vá ndíxí cuèchi iní-ndó nàcuáa quide-ndo ndecu-ndo ña, te quixi-í xocàni-í xiáⁿ, te ducaⁿ sàtnahá-xi cada ñaha-í xii-ndo te núu vá ndíxí cuèchi iní-ndó nàcuáa quide-ndo ndecu-ndo, te ducaⁿ te vá yó-gá nàtacá chiñuhu ñaha xii-í ñúú-ndó. ⁶ Dico quide váha-ndo ìⁿ xichi chi dàquee tíhú-ndó nchàa sá quidé cuè ñáyiú cùu nicolaitás, te yúhú tnàhá-í dàquèe tíhú-í nchaa

sá quidé ñáyiú-áⁿ. ⁷ Te nchòhó cada cuendá váha-ndo nàcuáa xáhaⁿ-í xii Espiritú Yá Ndiòxí xáhaⁿ-xii xii cue ñáyiú ndècu ichi-gá xìndecu nchaa xichi. Te duha ndùu tnúhu xáhaⁿ-í xii Espiritú-gá xáhaⁿ-xii xii-yu: Cúñaha-n xii nchaa ñáyiú sá núu na càda ndee iní-yu yáha-yu nándi sá ná yáha-yu sá cuendá-í, te yúhú cada-í te nduu táhú-yu cundecu váha-yu núú ndécú Yá Ndiòxí, duha xáhaⁿ-í xii Espiritú-gá cùu-xii ñáyiú”, duha càchí Yaá càháⁿ-áⁿ. Te nchaa tnúhu-áⁿ ní chídó tnùn-í-í sá cùú-xii ñáyiú xìndecu ichi Yá Ndiòxí ndécú ñúú Èfésú.

Tnúhu sá cùú-xii ñáyiú xìndecu ichi Yá Ndiòxí ndécú ñúú Èsmirná

⁸ Te ní cachí tucu Yaá càháⁿ-áⁿ xii-í sá chídó tnùn-í-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xinu cuechi núú Yá Ndiòxí ndécú ñúú Èsmirná sá cùú-xii cuè ñáyiú xìndecu ichi-gá ndécú ñúú-áⁿ, te duha càchí-gá: “Yúhú ndécú-í ndéé cùtnàhá ní ngáva ñuyú, te ñu-ni-í cundecu-í ndéé ná sáá nduu nàa-xii ndìhi nchaa sá ìo, te ñu-ni-í ní xihí te ní ndoto-í ndécú-í vitna. ⁹ Te yúhú xìní-í nchaa nàcuáa quide nchohó ñáyiú ndècu ichi Yá Ndiòxí ndécú ñúú Èsmirná. Te xìní-í sá ìo ndòho-ndo ndecu-ndo sá cuendá-í, te xini tucu-í sá ìo ndàhú-ndó dico cùu-ndo ñáyiú xìndecu váha núú Yá Ndiòxí. Te xini tucu-í sá ìo càháⁿ cuèhé ñáyiú israhél cuendá-ndó, dico ñà túú quidé-yu nàcuáa tàú-yu cada-yu sá cùú-yu ñáyiú israhél, chi cùú-yu ñáyiú xinu cuechi mee-ni núú sàcuíhna. ¹⁰ Dico nchòhó vá yúhú-ndó cuèí nándi cùu nchaa sá ná ndòho-ndo cuendá-í, chi sàcuíhna cada-xii te ngava dava-ndo vècaá, te ducaⁿ càda-xii chi cuíni-xii coto ndéé ñàhá-xii xii-ndo núu ndisa sá vá ná túhú iní-ndó sá nchicúⁿ nihnu-ndo ichi Yá Ndiòxí. Te ndòho-ndo ùxi nduu dico vá dáña ndéé-ndó càchicuⁿ nihnu-ni-ndo ichi-gá cuèí na cùu-ndó sá cuendá-gá,

te yúhú cada-í te nduu táhú-ndó cùndecu-ndo ndihí-gá ni caa ni quíhíⁿ. ¹¹ Te nchaa nchòhó cada cuèndá váha-ndo nàcuáa xáhaⁿ-í xii Espíritú Yá Ndiòxí xáhaⁿ-xí xii cue ñáyiú ndècu ichi-gá xĩndecu nchaa xichi, te duha ndùu tnúhu xáhaⁿ-í xii Espíritú-gá xáhaⁿ-xí xii-yu: Cúñaha-n xii nchaa ñáyiú sá nũu na cùndee iní-yu yáha-yu nándi sá ná yáha-yu sá cuèndá-í te vá cuíta nihnú-yu na sáá nduu cuíta nihnu nchaa dava-gá ñáyiú, duha xáhaⁿ-í xii Espíritú-gá cúu-xi ñáyiú”, duha ní cachí Yaá càháⁿ-áⁿ. Te nchaa tnúhu-áⁿ ní chídó tnùni-í sá cúu-xí ñáyiú xĩndecu ichi Yá Ndiòxí ndécú ñùú Èsmirná.

Tnúhu sá cúu-xí ñáyiú xĩndecu ichi Yá Ndiòxí ndécú ñùú Pèrgamú

¹² Te ní cachí tucu Yaá càháⁿ-áⁿ xii-í sá chídó tnùni-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha tée xĩnu cuechi núú Yá Ndiòxí ndécú ñùú Pèrgamú sá cúu-xí cuè ñáyiú xĩndecu ichi-gá ndécú ñùú-áⁿ, te duha càchí-gá: “Yúhú cúu-í Yaá néhé ìⁿ yuchí cáni te ndèé úú xio núu-xi. ¹³ Te yúhú xini-í nchaa nàcuáa quide nchohó cue ñáyiú xĩndecu ichi Yá Ndiòxí ndécú ñùú Pèrgamú, te xini tucu-í sá ndécú-ndó nũú ïo cùnuu yucu ñáváha, te ñá túú dàña ndeé-ndó nchicúⁿ nihnu-ndo ìchi-í, te ducaⁿ ïo sàndáa iní ñáhá-ní-ndó xii-í, te ñu-ñi ducaⁿ ní quide-ndo cùtnáhá ní sahani-güedé té Àntipás núú ndécú-ndó ñu-ñi núú dúcáⁿ ïo cùnuu yucu ñáváha. Te ndíi-áⁿ ní quide ndáá ndíi ní xĩndecu ndíi ichi-í chí ní càháⁿ váha ndíi cuèndá-í. ¹⁴ Dico ñá túú cúu váha iní-í cuèndá ìⁿ úú sá quide-ndó, chí ndècu ndihí-ndo ñáyiú nchicúⁿ nihnu-ni nchaa nàcuáa ní càháⁿ ndíi Bàlaám. Chí ndíi-áⁿ ñà túú ní quide váha ndíi chí ní dácáhú ñi ndíi ingá tée ní xĩnani Bálác nàcuáa cada-dé canu ichi-dé cue ñáyiú isaél ingá ichi sá ñà túú váha, chí ní xáhaⁿ tè Bálác-áⁿ xii-yu

sá caxí-yu nchaa sá ndúú táhú nchaa sá ní cadúha cue tée ñuyúú-a dānani ñáyiú ndiòxí te ñà ndáá sá ndiòxí cúu-xí, te ní dácáhú ñi ñáhá-dě xii-yu sá cùndécú-yu ichi dǐi ñi. ¹⁵ Te ndècu ndihí tucu-ndo ñáyiú nchicúⁿ nihnu sá dácúaha cue ñáyiú cúu nicolaitás. Te nchaa sá dácúaha ñáyiú-áⁿ dáquèe tíhù-í, ¹⁶ te nchòhó chí dāndixi cuèchi ñi sá ñà túú quide váha-ndo ndècu-ndo, chí núu ñáhá te quixi-í nàá-í ndihí cue ñáyiú-áⁿ ndihí yuchí cáni sá quéné yúhu-í. ¹⁷ Te nchaa nchòhó cada cuèndá váha-ndo nàcuáa xáhaⁿ-í xii Espíritú Yá Ndiòxí xáhaⁿ-xí xii cue ñáyiú ndècu ichi-gá xĩndecu nchaa xichi. Te duha ndùu tnúhu xáhaⁿ-í xii Espíritú-gá xáhaⁿ-xí xii-yu: Cúñaha-n xii nchaa ñáyiú sá nũu na càda ndee iní-yu yáha-yu nándi sá ná yáha-yu sá cuèndá-í, te yúhú cuáñaha-í sá ndúú yúhu xii-yu caxí-yu ìⁿ sá vátá quini-gá-yu caxí-yu. Te xíaⁿ cúu-xí mànáá sá ní xóo caxi cue ñáyiú ní xĩndecu ndéé sanaha, te cuáñaha tucu-í ìⁿ caa yúú cuixíⁿ xii-yu, te núú yúú-áⁿ cundeé ìⁿ ñu saa. Te ñu-áⁿ vǎ yóo tnáhí xini chí ìⁿ ñu ñi-ñi ñáyiú na quèheⁿ cuendá ñu-áⁿ quini-yu, duha xáhaⁿ-í xii Espíritú-gá cúu-xi ñáyiú”, duha càchí Yaá càháⁿ-áⁿ. Te nchaa tnúhu-áⁿ ní chídó tnùni-í sá cúu-xí ñáyiú xĩndecu ichi Yá Ndiòxí ndécú ñùú Pèrgamú.

Tnúhu sá cúu-xí cuè ñáyiú xĩndecu ichi Yá Ndiòxí ndécú ñùú Tiàtirá

¹⁸ Te ní cachí tucu Yaá càháⁿ-áⁿ xii-í sá chídó tnùni-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha tée xĩnu cuechi núú Yá Ndiòxí ndécú ñùú Tiàtirá sá cúu-xí cuè ñáyiú xĩndecu ichi-gá ndécú ñùú-áⁿ, te duha càchí-gá: “Yúhú cúu-í Déhe Yá Ndiòxí, te càa tinuu-í dàtná cáá itá ñuhú, te sáhà-í cáá dàtná cáá sá nání bròncé òrè ñuhú-xí núú ñuhú càyú-xi. ¹⁹ Te yúhú xini-í nchaa nàcuáa quide nchohó

ñáyiú xĩndecu ichi Yá Ndiöxí ndécú ñùú Tiàtirá. Te xini tucu-í sá ïo cùu iní-ndó Yá Ndiöxí te sãndáá iní-ndó-gá. Te xini tucu-í nãcuáa ndùu chiuⁿ quide-ndo sá cúú-xí-gá. Te xini tucu-í sá ïo quide cahnu iní-ndó cuëi nãndi cùu sá yãha-ndo ndècu-ndo. Te xini tucu-í sá ïo-gá ndúcú ndèe-ndo quide váha-ndo vitna dacúúxí cǔtnáhá vitna cùu saa ni sãndáá iní-ndó Yá Ndiöxí. ²⁰ Dico ñá túú cùu váha iní-í cuendá ìⁿ sá quidé-ndó, chi ñá túú tnãhi ná sãni iní-ndó ndècu ndihi-ni-ndo ñáyiú nchicúⁿ nihnu nchaa nãcuáa dãnehé ñáhá ñaha nani Jezabél. Te ñaha-án càchí-aⁿ sá càhá^{n-a} tnúhu Yá Ndiöxí dico ñá ndáá sá càhá^{n-a} tnúhu-gá, te cuáhá^{n-a} dãndahú-aⁿ nchaa ñáyiú xĩnu cuechi núu-í ndihi nchaa sá dãnèhé ñáhá-án cuendá cundecú-yu ichi ñá iní, te caxí-yu nchaa sá ndúú tãhú nchaa sá ni cadúha cue téé ñuyúú-a dãnani ñáyiú ndiöxí te ñá ndáá sá ndiöxí cúú nchaa xiãⁿ. ²¹ Te ní cuu vai nduu ta dacaca-í ndécú-án cuendá ndixi cuéchi iní-aⁿ sá ñá túú quide váha-aⁿ ndècu-aⁿ, te cuëi ducaⁿ quide-í dico ñá túú cuini-aⁿ daña-aⁿ ni ìⁿ sá cuèhé sá dúhá quide-aⁿ. ²² Te vitna yúhú ïo dandòho-í-aⁿ chi tni ñaha cuèhé xii-aⁿ, te ñu-ni ducaⁿ ïo dandòho-í nchaa ñáyiú quide datná quidé-án te núu vá ndíxí cuéchi iní-yu sá ñá túú quide váha-yu ndécú-yu, te daña-yu nchaa sá cuèhé sá dúhá quidé-yu. ²³ Te nchaa ñáyiú cundihí ñaha xii ñaha-án cahni-í-yu, te ducaⁿ te nchòhó ndihi dava-gá nchaa ñáyiú xĩndecu ichi Yá Ndiöxí ndécú nchaa xichi cutnuni iní-ndó ndihi-yu sá yúhú cúú-í Yaá xini ndáá nchaa nãcuáa sãni iní ñáyiú, ndihi nchaa nãcuáa quide-xi iní-yu. Te nchòhó nãcuáa ndùu sá quidé-ndó ìⁿ ìⁿ-ndo te ducaⁿ cunduu sá táxi-í nduu tãhú-ndó. ²⁴ Te dava nchòhó ñáyiú ndècu ñuu Tiàtirá, ñáyiú ñá túú nchicúⁿ nihnu nãcuáa dãnehé ñáhá ñaha nani Jezabél-án ñá túú xini-ndó ná cúú sá càchí ñáyiú ndùu yuhu dacahu

iní ñáhá yùcu ñávãha. Te nchòhó, ñá túú nãgá cachí tnúhu-í xii-ndo càda-ndo ²⁵ ñu-ná sá ïo nducu ndèe-ndo cada-ndo nchaa nãcuáa càháⁿ tnúhu sá ndécú ndihi-ndo, te ducaⁿ-ni càda-ndo ndéé òré quixi tucu-í. ²⁶ Te nchaa nchòhó ñáyiú na càda ndee iní yãha nãndi sá ná yãha sá cuendá-í, te núu na càda-ni-ndo nchaa nãcuáa cuini-í cada-ndo ndéé nduu vá cundècu-gá-ndó ñuyúú-a, te yúhú taxi-í tnúhu ndee iní xii-ndo sã táxi tnuni-ndó nchaa ñáyiú ñuyúú ²⁷ datná ní quide mee Tãtã-í Dútú Ndiöxí ní taxi-gá tnúhu ndee iní ndécú ndihi-í, te ducaⁿ càda ñaha-í xii-ndo tàxi-í tnúhu ndee iní xii-ndo cuendá ïo taxi tnuni-ndó, te cada iní-ndó sã càdá-ndó cué ñáyiú datná quidé-xí ìⁿ quidi òré tãhú-xi càchi duuⁿ-xi, te ducaⁿ chi nchòhó cada-ndo sá ncháá ñáyiú ñá túú quide váha cuita nihnú-yu. ²⁸ Te cada iní-ndó sã datná dáyhé chódini quiti quène oré sa ta tũndaá-nã cuáháⁿ ducaⁿ càda-xi oré ná sãá nduu ngũta-xi cada váha-xi, te ducaⁿ chi yúhú cada-í nãcuáa nduu tãhú-ndó cundecu ndihi ñaha-ndo xii-í núú ïo váha càa ndecu-í. ²⁹ Te nchaa nchòhó cada cuendá váha-ndo nãcuáa xãhaⁿ-í xii Espiritú Yá Ndiöxí xãhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-án. Te nchaa tnúhu-án ni chidó tnuni-í sá cúú-xí ñáyiú xĩndecu ichi Yá Ndiöxí ndécú ñùú Tiàtirá.

3

Tnúhu sá cúú-xí ñáyiú xĩndecu ichi Yá Ndiöxí ndécú ñùú Sãrdís

¹ Te ní cachí tucu Yaá càháⁿ-án xii-í sá chidó tnuni-í nchaa tnúhu sá vitná càháⁿ-gá ìⁿ núú tütú, te tendaha-í quihíⁿ ndaha téé xĩnu cuechi núú Yá Ndiöxí ndécú ñùú Sãrdís sá cúú-xí cué ñáyiú xĩndecu ichi-gá ndécú ñuu-án te duha càchí-gá: “Yúhú cúú-í Yaá ndécú ndihi ndi usá espíritú cúú cuendá Yá Ndiöxí, te ñu-ni-í cúú-í Yaá ndécú ndihi ndi usá chódini. Te yúhú xini-í

nchaa nàcuáa quide nchohó ñáiyu xĩndecu ichi Yá Ndióxi ndécú ñùú Sárdís, te xini-í sá cúu-ndó dàtná ñáiyu ní xihí cuéi càchí ñáiyu sá ñhá. ² Te chí cuáha cuendá nàcuáa quide-ndo ndecu-ndo vitna, te nducu ndèe-ndo cada-ndo ìⁿ úú-gá nchaa sá vaha nchicúⁿ nihnu-ndo vitna, chí sa ndètu vii-ná ñáha-ndo nchaa-ndi túhú sá vaha quide-ndo ni cuu, te quide cuendá-í sá ñá túú quide-ndo nchaa nacuáa cuini Yá Ndióxi cada-ndo. ³ Te chí dándacu iní nàcuáa càháⁿ tnúhu sá ní xĩndéohó-ndo cùtnàhá ní tuha-ndo ichi Yá Ndióxi, te canchicúⁿ nihnu-ndo càda-ndo nacuáa càháⁿ tnúhu-áⁿ, te ndixi cuéchi iní-ndó sá ñá túú quide váha-ndo ndècu-ndo, te núu vá nacuáha-ndo cuendá nàcuáa quide-ndo ndecu-ndo ña, te cada-í dàtná quidé ñàdúhú, chí òré ñá túú ñá yihí iní-ndó quèxio-í núú ndécú-ndó. ⁴ Dico ndècu ndihi-ndo ìⁿ úú ñáiyu càndoo caa nine iní-xi, chí ñáiyu-áⁿ ñi nduu táhú-yu cuihnú-yu dóó cuixiⁿ cuendá cundecu ndihi-í-yu, te ducaⁿ chí cùdiú-yu núu-í. ⁵ Te nchaa ñáiyu na càda ndee iní-xi yáha nándi sá ná yáha sá cuendá-í, te ñáiyu-áⁿ nduu táhú-yu cuihnú-yu dóó cuixiⁿ, te vá náquète-í diú-yu núú tütú núú yódó tnùni cue ñáiyu ní nduu táhú cundecu ndihi-í ñi caa ñi quihíⁿ, te cúñaha-í xii Tàtá-í Dútú Ndióxi ndihi cue espíritú xínú cuèchi núu-í sá ñáiyu-áⁿ cúu-yu ñáiyu cùu cuendá-í. ⁶ Te nchaa nchòhó cada cuendá váha-ndo nàcuáa xáhaⁿ-í xii Espíritú Yá Ndióxi xáhaⁿ-xi xii cue ñáiyu ndècu ichi-gá xĩndecu nchaa xichiⁿ, duha càchí Yaá càháⁿ-áⁿ. Te nchaa tnúhu-áⁿ ñi chidó tnùni-í sá cúu-xi ñáiyu xĩndecu ichi Yá Ndióxi ndécú ñùú Sárdís.

Tnúhu sá cúu-xi cué ñáiyu xĩndecu ichi Yá Ndióxi ndécú ñùú Filadelfiá

⁷ Te ní cachí tucu Yaá càháⁿ-áⁿ xii-í sá chidó tnùni-í nchaa tnúhu sá vitná càháⁿ-gá ìⁿ núú tütú, te tendaha-í quihíⁿ ndaha téé xinu cuechi

núú Yá Ndióxi ndécú ñùú Filadelfiá sá cúu-xi cué ñáiyu xĩndecu ichi-gá ndécú ñùú-áⁿ, te duha càchí-gá: “Yúhú cúu-í Yaá ío váha quide ndáá te ñá túú tnàhí cuéchi-í. Te díhna-gá ndii Dàvií ní taxi tnùni ndii ñáiyu, te vitna yúhú táxi tnùni-í-yu, te yúhú càháⁿ-í te núu ndèndida càa ñáiyu ndihu ndaha-í te ndèndida càa ñáiyu vá ndihu ndaha-í. ⁸ Te yúhú xini-í nchaa nàcuáa quide nchohó ñáiyu xĩndecu ichi Yá Ndióxi ndécú ñùú Filadelfiá, te yúhú ní quide-í nàcuáa ní níhi-ndó ìⁿ ichi cahnu quide-ndo chiun-í, te vá yóo ìⁿ cada nàcuáa vá nihí-gá-ndó nàcuáa cada-ndo chiun-í. Te cuéi ñá túú ío nihí ndéé-ndó cundecu-ndo ichi Yá Ndióxi dico tnii-ndo nchaa tnúhu càháⁿ-í, te ñi ìⁿ xito ñá túú càháⁿ-ndó sá ñá túú ndècu ndihi ñaha-ndo xii-í. ⁹ Te nchaa ñáiyu quide nchaa nacuáa cuini yucu ñávaha, ñáiyu-áⁿ cúu-yu ñáiyu isràél, te cuéi cùu-yu ñáiyu isràél dico ñá túú quidé-yu nàcuáa tàú-yu cada-yu, te yúhú cada-í sá ncháá ñáiyu-áⁿ canehé-yu sá yíñùhu núu-ndó, te cutnùni iní-yu sá yúhú ío cùu iní ñáhà-í xii-ndo. ¹⁰ Te ío quide ndee-ñi iní-ndó nchicúⁿ nihnu-ndo quide-ndo nchaa nacuáa ní càháⁿ-í, te xiáⁿ coto ñaha-í xii-ndo ñá túú ñá tnahá-ndó nduu na quixi nchaa tnúndòho tnúhu ndàhú ñuyiú-a. Te òré quexio nchaa tnúndòho-áⁿ ñuyiú-a te dàvâ-áⁿ cutnùni nàcuáa nduu sá quidé ìⁿ ìⁿ ñáiyu. ¹¹ Te ío ndihi quixi tucu-í. Te vá ñá ñá ndéé-ndó càda-ndo nchaa sá vaha nchicúⁿ nihnu-ndo quide-ndo cuendá sá vá cùta sá ñi cachí Yá Ndióxi nduu táhú-ndó. ¹² Te nchaa nchòhó ñáiyu na càda ndee iní yáha nándi sá ná yáha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tàtá-í Dútú Ndióxi, te vá ìⁿ nduu-gá xocuiñi-ndó núú ndécú-gá. Te cada iní-ndó sá dàtná sá chidó tnùni-í diú Tàtá-í Dútú Ndióxi ñii-ndo chí

ducaⁿ-ni cùndecu-ndo ndihì-gá, te cada tucu iní-ndó sá dàtná sá chídó tñuní-í nàcuáa nàni ñuú-gá ñii-ndo, chi ðiu ñuú-gá-án cundecu-ndo, te ñuú-án nání-xí Jèrusalén Sáa, duha nàni ñuú-gá. Te ñuú-án quee-xi andiu núú ndécú Yá Ndióxí Yáa cúú Tàtà-í quée-xi ñuyíú. Te cada tucu iní-ndó sá dàtná sá chídó tñuní-í ðiu mee-í ñii-ndo, te xiáⁿ cúú-xí ñii ðiu saa, te ducaⁿ càda iní-ndó chi cundecu ndihì ñaha-ndo xii-í. ¹³ Te nchaa nchòhó cada cuèndá váha-ndo nàcuáa xáhaⁿ-í xii Espiritú Yá Ndióxí xáhaⁿ-xi xii cue ñáyiu ndècu ichi-gá xíndecu nchaa xichi”, duha càchí Yáa càháⁿ-án. Te nchaa tñuhu-án nì chídó tñuní-í sá cúú-xí ñáyiu xíndecu ichi Yá Ndióxí ndécú ñúú Filàdelfiá.

Tnúhu sá cúú-xí ñáyiu xíndecu ichi Yá Ndióxí ndécú ñúú Laodiceá

¹⁴ Te càchí tucu Yáa càháⁿ-án xii-í sá chídó tñuní-í nchaa tñuhu sá vítná càháⁿ-gá ñii núú tütú, te tendaha-í quíhⁱ ndaha téé xinu cuechi núú Yá Ndióxí ndécú ñúú Laodiceá sá cúú-xí cue ñáyiu xíndecu ichi-gá ndécú ñúú-án, te duha càchí-gá: “Yúhú cúú-í Yáa quidé núú Yá Ndióxí, te cúú-í Yáa quidé ndáa chi càháⁿ ndáa cuiti-í nàcuáa càháⁿ Yá Ndióxí. Te yúhú cúú-í Yáa ní quide ní ngúndecu nchaa sá ñi cadúha Yá Ndióxí. ¹⁵ Te yúhú xini-í nchaa nàcuáa quide nchohó ñáyiu xíndecu ichi Yá Ndióxí ndécú ñúú Laodiceá, te xini-í sá ñà túú cuini-ndó càncicúⁿ nihnu-ndo nchaa nacuáa càháⁿ-í, te ni ñà túú cuini-ndó ðaña duuⁿ-ndo. Te váha-gá sá dúúⁿ duuⁿ cada-ndo nchaa nacuáa càháⁿ-í àdi núú ñáhá te duuⁿ duuⁿ ðaña-ndo. ¹⁶ Te sá dúcáⁿ quide-ndo ñà túú cuini-ndó dùuⁿ duuⁿ-ni cada-ndo nàcuáa càháⁿ-í, te ni ñà túú cuini-ndó dùuⁿ duuⁿ-ni ðaña-ndo te sáá nduu vã cùndèe-gá iní-í cuèndá nchaa sá quidé-ndó-ãⁿ, te daquèe tíhú ñáhà-í xii-ndo. ¹⁷ Te càchí-ndó sá cuicá-ndó, te ío váha ta yáha-ndo nchaa nduu cuáháⁿ, te ñà túú

tñahí ná cúmání xii-ndo, te ñà túú cùtnuní iní-ndó sá cúú-ndó dàtná cue ñáyiu ío ndàhú yáha, te cúu-ndo datná ñáyiu ndàhú, ñáyiu ío cùndahú iní ñáhá tñaha ñáyiu-xi, te cúu-ndo datná cue ñáyiu cuáa, te cúu tucu-ndo datná cue ñáyiu ndàhú ñà túú tñahí dóó-xi. ¹⁸ Te na càchí tñuhu-í xii-ndo sá cadá-ndó dàtná xiquide cue ñáyiu sàaⁿ ñii sá ñi cuáha mee-ni ðihúⁿ cuáaⁿ sá ío váha càa, te ducaⁿ quidé-yu te ío-gá cúú cuicá-yu. Te cada tucu-ndo dàtná xiquide cue ñáyiu sàaⁿ dóó cuixiⁿ sácuñnu-yu cuèndá sá vã cúú-yu dàtná ñáyiu ndàhú ñà túú dóó-xi, te cada tucu-ndo dàtná quidé cue ñáyiu sàaⁿ yúcu quée núú-xi nàcuáa cutnuni váha núu-yu, te duha càháⁿ-í xáhaⁿ-í xii-ndo chi cuini-í sá nàtuha ñaha-ndo xii-í, te ío váha cundecu-ndo sá cúú-xí Yá Ndióxí. ¹⁹ Te càháⁿ-í dóho nchaa ñáyiu cúu iní-í òre ñà túú quide ndáa-yu, te ðandoho-í-yu, núu xiáⁿ cuini-í sá nchòhó ndixi cuéchi iní-ndó sá ñà túú quide váha-ndo ndècu-ndo. ²⁰ Te na càchí tñuhu-í xii-ndo sá yúhú cúú-í dàtná ñii téé nùtnii yuyèhe ndaa quehe te càháⁿ-í ñáyiu yìhí xití vehe, te núu na càda cuèndá-yu sá càháⁿ-í te nacaáⁿ-yu yuyèhe te quíhu-í xití vehe cudini-í ndihí-yu, te duha càháⁿ-í chi cuini-í cundecu ndihì ñaha-í xii-ndo. ²¹ Te nchaa nchòhó ñáyiu na càda ndee iní-xi yáha nándí sá ná yáha sá cuèndá-í, te yúhú taxi-í xii-ndo ñii xichi núú ndécú-í cundecu-ndo te cunuu-ndo tñahá-ndó dàtná cùnùu-í, chi yúhú ducaⁿ ñi quide ndee iní-í ní yáha-í nándí sá ñi yáha-í te vitna ní nduu táhù-í ndécú-í núú ndécú Tàtà-í Dútú Ndióxí cùnùu-í. ²² Te nchaa nchòhó cada cuèndá váha-ndo nàcuáa càháⁿ Espiritú Yá Ndióxí xáhaⁿ-xi xii cue ñáyiu ndècu ichi-gá xíndecu nchaa xichi”, duha càchí Yáa càháⁿ-án. Te nchaa tñuhu-án nì chídó tñuní-í sá cúú-xí ñáyiu xíndecu ichi Yá Ndióxí ndécú ñúú Laodiceá.

4

Nàcuáa chiñuhu ñáyiú Yá Ndiõxi andiú

¹ Te sátá nǐ yáha ducaⁿ nǐ cuu te ní xiní-í nchí andiú, te ní cáháⁿ tucu Yaa ní cáháⁿ ndihi ñaha xii-í díhna, te Yaa-án nǐ cáháⁿ níhi-gá dátna cáháⁿ níhi ñⁿ cútú, te ní cachi-gá xii-í:

—Taquène iha te na dānehé ñàhà-í xii-n nchàa nacuáa cada-xi ndéé núú cuaháⁿ núú vèxi — cachi-gá.

² Te òré-ni-án nǐ quide ñaha tucu Espiritú Yá Ndiõxi xii-í nàcuáa cachi iní-xi, te diu-ni òré-án nǐ xiní-í nútñ^ñ ñⁿ xilé váha andiú te càa dátna cáa xilé sácõo nchihí cue ñáyiú ío cūnuu, te núú xilé váha-án núcõo Yaa táxi tñuní. ³ Te Yaa-án cáa-gá dátna cáa yúú chāhnchí yúú váha sá nání jǎspé, te càa tucu-gá dátna cáa yúú váha sá nání cõrnalíná, te ñuhu doco ñaha ñⁿ cóo yáhnchí xii-gá, te tásaⁿ-di dátna tásaⁿ ñⁿ yúú váha sá nání èsmeraldá. ⁴ Te ní xiní tucu-í nútñ^ñ ócõ cúmí xilé váha nǐ càndéé núú núcõo-gá, te núú xilé-án xīnucóo ócõ cúmí cue téé cūu sacuéhé te xixihnu-güedé mee-ni dõo cuixíⁿ, te ñⁿ caa coróná sá nǐ cuáha mee-ni díhúⁿ cuááⁿ xixúhuⁿ díqui-güedé. ⁵ Te núú núcõo Yaa táxi tñuní-án sáá nduté, te cáháⁿ ñuhu te xica chihí-xi dónaha, te càyú úsá iti núú núcõo-gá, te sá úsá iti-án xǎⁿ cūtnùní sá ndécú úsá espíritú cúú cuendá-gá. ⁶ Te ndècu ñⁿ sá ndécú ndàa núú-gá te xǎⁿ cáa dátna cáa lámár, te dátna cáa vidiú cáa ñihí.

Te nǐ càndéé dñi Yaa núcõo-án xīnutñ^ñ cúmí quiti te titñí víhí tīnuu-güedi ndéé ndàa sátá-güedi ndihi ndàa núú-güedi. ⁷ Te quiti díhna nuu càa-di dátna cáa ndìcaha, te quiti cūu uú cáa-dí dátna cáa ndìcutu, te quiti cūu uní nēhé-dí núú téé, te quiti cūu cumí cáa-dí dátna cáa yacolo oré cuaháⁿ-di núú tàchí. ⁸ Te ndi cūmí quiti-án ndéé íñú ndíxíⁿ-güedi ñⁿ ñⁿ-güedi, te ñihí

xití ndíxíⁿ-güedi ndihi ndàa sátá ndíxíⁿ-güedi ndéé tīnuu-güedi, te nduu núú chíñuhu-güedi Yá Ndiõxi, te xáhaⁿ-güedi xii-gá:

Yòhó Dútú Ndiõxi ducaⁿ-ni ta quide ndáá-n vèxi, te ducaⁿ-ni quide ndáá-n cuéi vitna, te diu-ni ducaⁿ càa ndáá-n núú cuaháⁿ núú vèxi,

te cūu-n Yaa quidé nchàa-ndi túhú sá váha,

te diu-ni-n sá ndecu-n ndéé cūtnáhá ní cuáha ñuyíú,

te diu-ni-n ndècu-n cuéi vitna, te diu-ni-n cūndecu-n cuéi ndéé núú cuaháⁿ núú vèxi.

Duha xáhaⁿ cuéi quiti-án xii Yaa núcõo núú xilé váha-án chíñuhu ñaha-güedi.

⁹ Te cue quiti-án ío ndácán táhú-güedi núú Yaa núcõo núú xilé váha-án cuendá nchaa sá quidé-gá. Te Yaa-án cúú-gá Yaa ndécú nchaa nduu nchaa quíú. Te cue quiti-án cachi-güedi sá ío càhnu cuu-gá te nèhe-güedi sá yíñuhu núú-gá. Te ndi tnahá òré ducaⁿ càháⁿ-güedi, ¹⁰ te ndi òcõ cúmí cue téé cūu sacuéhé xīnucóo-án ngüñí xití-güedé núú Yaa núcõo-án, chi diu-gá cúú-gá Yaa ndécú nchaa nduu nchaa quíú te chíñuhu ñaha-güedé xii-gá, te tàva-güedé coróná ñuhu díqui-güedé te tàxi ndecu-güedé núú-gá, te xáhaⁿ-güedé xii-gá:

¹¹ Yòhó cúú-n Dútú Ndiõxi Yaa cúú cuendá ñáhá xii-ndí,

te ío càhnu cuu-n, te ío váha quide-n,

te nèhe-ndí sá yíñuhu núú-n, chi ducaⁿ tau-xi cada-ndí,

chi yòhó cúú-n Yaa ní cadúha nchaandi túhú sá ío,

te ducaⁿ nǐ ngūndecu nchaa xǎⁿ chi mee-n dūcaⁿ ní sani iní-n càa-n.

5

Cuendá Yaa cáa dátna cáa ñⁿ mbéé quiti ní dānicuèhé-güedé ndihi cuendá ñⁿ tutú

¹ Te ní xiní tucu-í sá Yaa núcõo núú xilé váha-án nūndàha-gá ñⁿ tutú

ní nacaúnuu xio ndaha cùha-gá, te ndèé lètrá ndàa sáta-xi ndihi ndàa xítì-xì, te úsá tnàhá tutú líhli ñuhu seyú ndèé sáta tütú-áⁿ cuendá sá vǎ dáñá-xí nàcaá. ² Te ní xiní-í ìⁿ espíritú xínú cuèchi núú Yá Ndiòxí, te ndee víhi-xi te níhi càháⁿ-xi, te cǎchí-xi:

—¿Yoo tàù-xi xocàni nchaa tutú líhli ñuhu seyú ndèé sáta tütú-a te nadacàá-xi? —cǎchí espíritú-áⁿ.

³ Dico ni àndiù, te ni núú ñuyú-a, te ni ndàa xítì ñuhu ñá túú ìⁿ ñáyiu tàù-xi nadacàá tütú-áⁿ te cundèhé-yu. ⁴ Te yúhú ní ngúíta-í ndàhyú víhì-í cuendá sá ñà túú nì ìⁿ ñáyiu tàù-xi nadacàá tütú-áⁿ cundèhé-yu. ⁵ Te ìⁿ cue téé cùu sacuéhé xínucóo xíáⁿ nǐ cachí-güedé xii-í:

—Vá ndàhyú-gá-n, te cada cuendá-n chi Yaá ío cùnuu cuu ndi mee cue ñáyiu cùu ñani tnàhá ndíi Júdá, diu-ni Yaá cúu ñani tnàhá ndíi Dàví, Yaá-áⁿ cúu-gǎ Yaá ní ndacu ní yáha nchaa nǎndi sá nǐ yáha, núu xíáⁿ diu-gá tàù-gá xocàni-gá nchaa tutú líhli ñuhu seyú ndèé sáta tütú-áⁿ te nadacàá-gá —duha cǎchí téé cùu sacuéhé-áⁿ.

⁶ Te tnuú ndi ócò cùmí cue téé cùu sacuéhé xínucóo-áⁿ, ndihi tnuú ndi cùmí quiti xínutnì-áⁿ, ndihi núú núcò Yaá táxì tnùnì-áⁿ nǐ xiní-í nùtnì ìⁿ Yaá cáá dàtná cáá ìⁿ mbéé quiti ní dánícuèhé-güedé te ní xíhì-dì ni cùu te ní ndoto-dì, te ndèé úsá ndiqui-dì, te ndèé úsá tinùu-dì, te sá úsá tinùu-dì-áⁿ cùtnùnì sá ndécú úsá espíritú cúu cuendá Yá Ndiòxí, ducaⁿ càa Yaá-áⁿ ní xiní-í. Te cue espíritú-áⁿ nǐ tendaha-gǎ xíca cùu-xi ní caa xico ñuyú. ⁷ Te Yaá cáá dàtná cáá ìⁿ mbéé quiti ní dánícuèhé-güedé-áⁿ nǐ sáháⁿ-gá núú Yáá núcòo núú xilé váha-áⁿ. ⁸ Te òré ní queheⁿ-gá tutú-áⁿ te ndi cùmí quiti xínutnì xíáⁿ nǐ ngúíñì xítì-güedi núu-gǎ, te ducaⁿ nǐ ngúíñì xítì tùcu ndi ócò cùmí cue téé cùu sacuéhé xínucóo-áⁿ, te ndi

dííⁿ núú-güedé xínehe-güedé yaá sá nánì àrpá, te xínehe tucu-güedé ndí dííⁿ núú-güedé ìⁿ caa tǐcúú ní cuáha mee-ni díhúⁿ cuaáⁿ, te chitu dǔsa sá sáháⁿ tnámí. Te ñúhmá dǔsa sá sáháⁿ tnámí-áⁿ cúu-xí dàtná nchaa tnúhu càháⁿ nchaa ñáyiu ndècu íchi Yá Ndiòxí òré càháⁿ ndihi ñàhá-yu xii-gá. ⁹ Te xíta-güedé ìⁿ ndudú sáá ndihi cue quiti-áⁿ chíñuhu ñaha-güedé xii-gá, te cǎchí-güedé ndihi cue quiti-áⁿ:

Yòhó tàù-n queheⁿ-n tutú-a te xocàni-n nchaa tutú líhli ñuhu seyú ndèé sáta-xi,

chi yòhó ní sati níñì-n te ní xíhì-n, te cuendá xíáⁿ ní nduu cuendá Yá Ndiòxí cue ñáyiu ìⁿ ìⁿ nàcióⁿ, ndihi ñáyiu xíndecu ìⁿ ìⁿ ñuú, ndihi ñáyiu càháⁿ ndí dííⁿ ndí dííⁿ núú tnúhu, ndihi ñáyiu xíndecu ìⁿ ìⁿ xichi.

¹⁰ Te ní quidè-n-yu dàtná cue téé yíndaha ñáyiu, te ní quide túcú-n-yu dàtná cue dútú sá cúu-xí Yá Ndiòxí.

Te sáá nduu te taxi tnùnì-yu ñuyú-a.

Duha càháⁿ cue téé-áⁿ ndihi cue quiti-áⁿ chíñuhu-güedé ndihi-güedi Yáá-áⁿ.

¹¹ Te sáta dúcáⁿ te ní tecú dóho-í ní càháⁿ cuèhé víhì espíritú xínú cuèchi nǐ candéé núú núcò Yaá táxì tnùnì-áⁿ, ndihi núú xínutnì ndi cùmí cue quiti-áⁿ, ndihi núú xínucóo cue téé cùu sacuéhé-áⁿ, te ní xiní-í sá súñì cuèhé víhì espíritú-áⁿ xíndecu xíáⁿ, ¹² te níhi ní càháⁿ cue espíritú-áⁿ, te cǎchí-xi:

Yòhó Yaá cáá dàtná cáá ìⁿ mbéé quiti ní dánícuèhé-güedé te ní xíhì ní cùu te ní ndoto,

te yòhó ío càhu cuu-n, te ndècu ndihi-n nchaandi túhú,

te ío ndècu ndihi-n sá xínì tnùnì-n, te ndàcu-n quide-n nchaa sá cuínì-n,

te nèhe-ndí sá yíñuhu núu-n, te ío váha quide-n,

te chiñuhu ñaha-ndí xii-n, chi ducaⁿ
tàu-ndí cada-ndí chi ío càhnu
cuu-n.

Duha càchí nchaa cue espíritú-áⁿ
xáhaⁿ-xi xii-gá chíñuhu ñaha-xi.

13 Te ní tecú dóho-í ní cáháⁿ
nchaandi túhú sá ní cadúha Yá
Ndióxi ndécú àndiu, ndihi nchaa sá
ndécú ñuyú, ndihi nchaa sá ndécú
xítí ñuhu, ndihi nchaa sá ñúhú xítí
ndute lámár, te xícachí-xi:

Yòhó Yaá núcõo núú xilé
váha, ndihi yòhó Yaá cáá
dàtná cáá ñⁿ mbéé quití
ní dánicuèhé-güedé táxí
tnùní-ndó, te nèhe-ndí sá
yíñuhu núú-ndó,

te ducaⁿ ío ndàcáⁿ táhú-ndí
núú-ndó, chí ío váha
quide-ndo te ío cùnuu-ndo,

te diu-ni duha cáháⁿ váha-ndí
cuèndá-ndó ñi caa ní quíhíⁿ.

Duha càchí nchaa sá ní cadúha Yá
Ndióxi.

14 Te ndi cùmí cue quití xínutní-áⁿ
càchí-güedi:

—¡Ducaⁿ na cunduul! —
cachí-güedi.

Te ndi òcó cùmí cue tée cùu
sacuèhé xíndecu-áⁿ ñí ngüíñí
xítí-güedé chíñuhu-güedé Yaá
ndécú nchaa nduu nchaa quíú.

6

Cuèndá úsá tutú ñuhu seyú

1 Te sáta dúcáⁿ te ní xiní-í sá
Yàá cáá dàtná cáá ñⁿ mbéé quití
ní dánicuèhé-güedé-áⁿ ñí xócání-gã
ñⁿ tutú ñuhu ñuhu seyú ndéé sáta
tútú sá ní nadúcúⁿ nuu-áⁿ, te ní
tecú dóho-í ní cáháⁿ ñⁿ quití cùmí
xínutní-áⁿ, te níhi ní cáháⁿ-di dàtná
cáháⁿ ñúhu, te càchí-di:

—¡Taquixi cundehe-n! —cachí-di.

2 Te òré-ni-áⁿ ñí xiní-í ñⁿ cuáyú
cuéxíⁿ yódó ñaha ñⁿ sá yódó ñaha
xii-di, te sá yódó ñaha xii-di-áⁿ
néhé-xí ñⁿ arcú sá cúú tnúxí-xi, te
ní nduu táhú-xi ñⁿ coróná, te ní
ndacu-xi ní cunuu-xi te ducaⁿ-ni ta
cùnuu-xi cuáháⁿ.

3 Te òré ní xócání-gã tutú ñuhu
cùu uú ñúhú seyú ndéé sáta tutú
sá ní nadúcúⁿ nuu-áⁿ, te ní tecú
dóho-í ní cáháⁿ tucu ingá quití cùu
uú xínutní-áⁿ, te càchí-di:

—¡Taquixi cundehe-n! —cachí-di.

4 Te òré-ni-áⁿ ñí xiní tucu-í ñⁿ
cuáyú tícuèhé ní quee-di cuáháⁿ-di,
te yòdo ñaha ñⁿ sá yódó ñaha xii-di,
te sá yódó ñaha xii-di-áⁿ ní níhí-xi
tnúhu ndee íní sá dáticánuu-xi ñáyú
vá cùndecu ndihi tnaha váha-gá-yu,
te ngüíta ñáyú cahni tnàhá-yu, te ní
nduu táhú-xi ñⁿ yuchí cáhnu vñhi.

5 Te òré ní xócání tucu Yaá-áⁿ ingá
tutú ñuhu cùu uní ñúhú seyú ndéé
sáta tutú sá ní nadúcúⁿ nuu-áⁿ, te
ní tecú dóho-í ní cáháⁿ quití cùu uní
xínutní xíáⁿ, te càchí-di:

—¡Taquixi cundehe-n! —cachí-di.

Te òré-ni-áⁿ ñí xiní tucu-í ñⁿ
cuáyú tnúú te yòdo ñaha tucu ñⁿ sá
yódó ñaha xii-di, te sá yódó ñaha-áⁿ
núndaha-xi uú yaxiⁿ libré. 6 Te
ní tecú dóho-í ní cáháⁿ ñⁿ sá ñí
cáháⁿ tnuú cue quití xínutní-áⁿ, te
càchí-xi:

—Ñⁿ cuàrtú-nã triú níhí-ndó sã
ñⁿ díhúⁿ denariú, te uní cuàrtú-nã
cebàdá níhí-ndó sã ñⁿ tucu díhúⁿ
denariú, dico acítí ndihi ndudí
ndéhé yoho yaha stilé chí vá ndíhí
ñihu —duha càchí sá cáháⁿ-áⁿ.

7 Te òré ní xócání tucu Yaá-áⁿ tutú
ñuhu cùu cumí ñúhú seyú ndéé sáta
tútú sá ní nadúcúⁿ nuu-áⁿ, te ní tecú
tucu dóho-í ní cáháⁿ tucu ingá quití
cùu cumí xínutní-áⁿ, te càchí-di:

—¡Taquixi cundehe-n! —cachí-di.

8 Te òré-ni-áⁿ ñí xiní tucu-í ñⁿ
cuáyú yàhá, te yòdo ñaha tucu ñⁿ
sá yódó ñaha xii-di, te sá yódó
ñaha xii-di-áⁿ nání-xí Sã xihí, te xíáⁿ
sáhní-xí ñáyú, te sáta xíáⁿ nchícúⁿ
sá nèhé núú ndécú ñáyú ní xihí. Te
cùmí xichí cùu ñuyú, te sá sáhní
ñaha xii ñáyú-áⁿ ní níhí-xi tnúhu
ndee íní danàa-xi ñáyú ñⁿ xichí
ñuyú, te davá-yu cahni ñaha-xi
ndihi yuchí, te cada-xi sá cóo tnàmá
te cuú-yu, te cada tucu-xi sá cóo

cuèhé cahni-xi ñáyiú, te ñi-u-ni tucu-xi cada sá ncháá quiti dééⁿ cahni-di ñáyiú.

⁹ Te òré ní xócání tùcu Yaá-áⁿ tutú lìhli cùu uhúⁿ ñúhú sèyú ndéé sátá tütú sá ñí nadúcúⁿ nuu-áⁿ, te òré-áⁿ ñí xiní-í nútñí ñⁿ núú sácódó sá ndúú tǎhú Yá Ndiòxí, te ndàa caha xǎⁿ ní xiní-í xìndecu nchaa àlmá ñáyiú ní sahní-güedé núú ñuyíú sá cuendá tnúhu Yá Ndiòxí, ndihi sá cuendá sá ñí cáháⁿ váha-yu cuendá-gá. ¹⁰ Te nchaa àlmá-áⁿ ñíhi xícáháⁿ-xi, te xǎháⁿ-xi xìi Yá Ndiòxí:

—Yòhó Dütú Ndiòxí cúu-n Yàá ñá túú tnàhí cuèchi-xi, te ñá túú tnàhí quée cáva-n quide-n ñⁿ sá càháⁿ-n. ¿Te ná ndéé ama dandòho-n ñáyiú ndècu ñuyíú nachinaa-n cuendá sá ñí quide ñàhá-yu xii-ndí-i? —càchí cue àlmá-áⁿ xǎháⁿ-xi xìi-gá.

¹¹ Te sátá dúcáⁿ te nchaa cue àlmá ñáyiú-áⁿ ñí ñíhi-xi dóó cùixíⁿ ní quée cuíhnu-xi, te ní xítñúhu ñaha xii-xi sá ná ndètatú-xi te cundetú tnaa-xi ndéé ná xínu cava cuú ñáyiú nàcuáa ndéé tnuní dàtná ní xíhí cue ñáyiú dii àlmá-xi cùu-xi. Te ñáyiú sa ní xíhí-áⁿ ñⁿ-ni cúu-yu ndihi ñáyiú vitna cuú-áⁿ chi mee-ni chùuⁿ Xitohó Jesucristú quidè-yu, te ñi-u-ni ichi-gá ndécü-yu.

¹² Te òré ní xócání tùcu Yaá-áⁿ tutú lìhli cùu iñú ñúhú sèyú ndéé sátá tütú sá ñí nadúcúⁿ nuu-áⁿ, te ní xiní-í súuní ñíhi ní quidi-xi ñuyíú, te ní cutnuu ñíhí núú nchíanchii dàtná ñⁿ dóó tnúú, te ní cuu ticuèhé ñíhí ñíhí núú yóó. ¹³ Te ní xiní-í ní ngoyo chódíní ñuyíú-a dàtná ngóyó ngǔxí yíhí òré quéné tǎchí ñíhí. ¹⁴ Te ní xiní-í ní nadúcúⁿ nuu andíu dàtná nádúcúⁿ nuu ñⁿ tutú te ní ndóñúhú-xi, te nchaa tindúú ñí xica ndehe-xi núú ndécú-xí, te ducaⁿ ñí xica ndehe tucu nchaa tindúú yichí ndécú xiti ndute làmár.

¹⁵ Te nchaa cue téé yindaha ñáyiú ní nguíváha-güedé, ndihi nchaa dava-gá cue téé ío tàxi tnuní, ndihi nchaa ñáyiú cuica, ndihi nchaa cue téé tàxi tnuní sandádú, ndihi cue

sandádú cue téé ío váha sáa díquí-xi nàcuáa cada-güedé nàa-güedé, ndihi nchaa ñáyiú ñá túú tnàhí dàñá quee núú chùúⁿ patróón-xi, ndihi nchaa ñáyiú dàñá quée núú chùuⁿ patróón-xi. Te dava ñáyiú-áⁿ ñí nguíváha-yu xiti yaú, te davá-yu ní nguíváha-yu nchaa tnuú cava. ¹⁶ Te xǎháⁿ-yu nchaa tindúú ndihi nchaa cava:

—Chí tǎcùuⁿ chiváha ñaha-ndo xii-ndí cuendá sá vǎ quini ñáhá Yáá ío tàxi tnuní núcóó núú xilé váha, ndihi cuendá sá vǎ dándòho ñaha Yáá cáá dàtná cáá ñⁿ mbéé quiti ní dǎnicuèhé-güedé, chí Yáá-áⁿ ío cùdèéⁿ-gǎ núú-ndí —duha càchí nchaa ñáyiú-áⁿ xǎháⁿ-yu xii nchaa tindúú-áⁿ ndihi nchaa cava-áⁿ.

¹⁷ Te vitna ní sáa nduu ío cùu cahnu nduu tnúndòho tnúhu ndàhú, te vǎ yóó ñⁿ cundee ñí-xi yáha nchaa tnúndòho-a.

7

Ñáyiú israél ñáyiú naníhí tǎhú

¹ Te sátá xǎⁿ te ní xiní-í cúmí tnàhá espíritú xínú cuèchi núú Yá Ndiòxí xínutñí-xi ndí cúmí xio ñuyíú, te cue espíritú-áⁿ ní ngani-xi tǎchí cuendá sá vǎ cuícó-gǎ-xi ní làmár, te ní díquí yutnu, te ní ñⁿ xichi ñuyíú vǎ cuícó-gǎ-xi. ² Te cue espíritú-áⁿ ndécú ndihi-xi tnúhu ndee ñí danàa-xi sá ío làmár ndihi sá ío ñuhu yichí, te ní xiní tucu-í ingá espíritú xínú cuèchi núú Yá Ndiòxí ní quee nchita-xi ndàa nacuáa quène nchíanchii, te nundaha-xi seyú Yá Ndiòxí Yáá ndécú nchaa nduu nchaa quíú, te ñíhi ní cáháⁿ-xi xǎháⁿ-xi xìi ndí cúmí cue espíritú-áⁿ:

³ —Vǎ dǎnàa-ndo sá ío làmár, te ní vǎ dǎnàa-ndo yutnu, te ní ñⁿ sá ío ñuyíú vǎ dǎnàa-ndo, chí cundetú-ndo ndéé ná tàxi ndecu-ndí ñⁿ seña tneé nchaa ñáyiú xínu cuèchi núú Tǎtá-ó Dütú Ndiòxí —duha càchí espíritú-áⁿ xǎháⁿ-xi xìi ndí

cumí espíritú xĩnutnĩ ndi cumí xichi ñuyú.

⁴ Te ní tecú dóho-í ní cáháⁿ ñⁿ sá nĩ cáháⁿ, te ní cachí-xi sá núú ndi úxúú xichi cue ñáyiú israél te ní xínu ñⁿ cièndú údico cumí mĩl-yu ní ngúndecu sèhá tneé-yu. ⁵ Te núú ñⁿ cièndú údico cumí mĩl ñáyiú-áⁿ, te ní xínu úxúú mĩl cue ñani tnáhá ndi Jüdá ní ngúndecu sèhá tneé-yu, te úxúú mĩl cue ñani tnáhá ndi Rübén, te úxúú mĩl cue ñani tnáhá ndi Gäd, ⁶ te úxúú mĩl cue ñani tnáhá ndi Àsér, te úxúú mĩl cue ñani tnáhá ndi Nefçalí, te úxúú mĩl cue ñani tnáhá ndi Manàsés, ⁷ te úxúú mĩl cue ñani tnáhá ndi Mió, te úxúú mĩl cue ñani tnáhá ndi Lèví, te úxúú mĩl cue ñani tnáhá ndi Isàcár, ⁸ te úxúú mĩl cue ñani tnáhá ndi Zabùlón, te úxúú mĩl cue ñani tnáhá ndi Chèé, te úxúú mĩl cue ñani tnáhá ndi Benjámín, nchaandi túhú ñáyiú-áⁿ nĩ ngúndecu sèhá tneé-yu.

Cuèhé víhí ñáyiú ñihnu dóó cuixíⁿ

⁹ Te sátá xĩaⁿ te ní xini-í cuèhé víhí ñáyiú, ñáyiú ñⁿ ñⁿ nacióⁿ, ndihi ñáyiú ñⁿ ñⁿ ñuu, ndihi ñáyiú cáháⁿ ndi dííⁿ ndi dííⁿ núú tnũhu, ndihi ñáyiú ní xĩndecu ñⁿ ñⁿ xichi, te nchaa ñáyiú-áⁿ xĩnutnĩ-yu ndaa núú Yáá táxí tnùní núcõo núú xilé váha, ndihi núú Yáá cáá dàtná cáá ñⁿ mbéé quiti ní dánicuèhé-güedé, te vá yõ ñⁿ ndacu cahu ñaha xií-yu chi cuèhé víhí-yu, te nchaá-yu xĩxĩhnu-yu mee-ni dóó cuixíⁿ, te nũndahá-yu nchaá-yu ñⁿ caa ndaha yutnu ñúú. ¹⁰ Te nchaá-yu níhi xicáháⁿ-yu, te cächí-yu:

Yáá táxí tnùní núcõo núú xilé váha cùu-gá Ndiõxí-ó,
te diu-gá ndihi Yáá cáá dàtná cáá ñⁿ mbéé quiti ní dánicuèhé-güedé ní dácacu ñihnu ñaha-gá xii-o núú ùhú núú ndàhú.

Duha cächí nchaa ñáyiú-áⁿ. ¹¹ Te nchaa espíritú xínu cuèchi núú Yá Ndiõxí ní nadúcúⁿndèé-xi xĩnutnĩ-xi ní càndéé núú núcõo

Yáá núcõo núú xilé váha, ndihi núú xĩnucõo cue téé cùu sacuéhé, ndihi cue ndi cumí quiti xĩnutnĩ-áⁿ, te nchaa-xi ní ngüíñí xiti-xí te ní ngúnu ndeyi-xi núú Yáá núcõo núú xilé váha-áⁿ, te nchaa-xi ní ngüíta-xi chiñuhu ñaha-xi xii-gá, ¹² te cächí-xi: Na cáháⁿ ndáá-ndí núú yòhó Tátá-ndí Dútú Ndiõxí sá ío càhnu cuu-n, te ndacu-n quide-n nchaa sá váha cùnín-n, te ío váha quide-n, te ndècu ndihi-n nchaa sá xini tnùní-n,

te chiñuhu ñaha-ndí xii-n, te ducaⁿ ndácáⁿ táhú-ndí núú-n cuèndá nchaa sá quidé-n, te nèhe-ndí sá yĩñuhu núú-n, te tnúhu cáháⁿ-ndí-a cùu-xi tnúhu ndáá, te diu-ni duha cáháⁿ-ndí ndéé núú cuaháⁿ núú véxi.

Duha cächí nchaa cue espíritú-áⁿ xáhaⁿ-xi xii Yáá núcõo núú xilé váha-áⁿ.

¹³ Te ñⁿ cue téé cùu sacuéhé xĩndecu-áⁿ ní xicáⁿ tnúhú-dé núú-í, te cächí-dé:

—¿Yóndi cùu ñáyiú dàcáⁿ xĩxĩhnu dóó cuixíⁿ-áⁿ, te ndèé véxi-yu núú dàcáⁿ xĩndáá-yu-i? —cächí-dé.

¹⁴ Te yúhú ní xáhaⁿ-í:

—Tátá, ñá túú xini-í, dico mee-n xini-n —duha ní xáhaⁿ-í xii-dé.

Te dàtnùní ní cachí tnúhu-dé xii-í ná cúú ñáyiú-áⁿ, te cächí-dé:

—Nchaa ñáyiú-a cùu-yu ñáyiú ní quee núú ío víhí tnúhu ndòho tnúhu ndàhú sá vá cùndéé iní-ó te véxi-yu íha, te cùu-yu ñáyiú sa ní nduu ndoo ní nduu nine iní-xi cuèndá sá ní sati níñí Yáá cáá dàtná cáá ñⁿ mbéé quiti ní dánicuèhé-güedé, cuèndá xiáⁿ vitna ní ndihí-yu ní nduu cuixíⁿ dóó xĩxĩhnu-yu. ¹⁵ Te núú xiáⁿ vitna ní nduu táhũ-yu ndècú-yu núú ndécú Yá Ndiõxí Yáá táxí tnùní núcõo núú xilé váha, te cuèi nduu cuèi niú xínu cuèchí-yu núú-gá vitna, te diu-gá xító ñaha-gá xií-yu. ¹⁶ Te vitna ní sáá-yu núú-gá cundecú-yu te vá ndóhó-gá-yu

docó, te ni vǎ quíní-gá-yu ndohó-yu yíchí-yu ndute, te ni vǎ quíní-gá-yu ndohó-yu cahni nchíanchii, te ñá túú-gǎ ná cahni ndohó-yu. ¹⁷ Te ducaⁿ chi Yaá cáá dàtná cáá ìⁿ mbéé quiiti ní dánícuèhé-güedé ndécú-gǎ núú nútnǎi xilé váha núcóo Yá Ndióxi Yaá táxi tnùní, Yaá-áⁿ coto ñaha-gǎ xii-yu dàtná quidé ìⁿ toli oré xító-dě mbéé-dě, te candeca ñaha-gǎ xii-yu quíhíⁿ núú tǎo ndute, te ndute-áⁿ cúú-xí ndute candeca iní-yu, te Yá Ndióxi cada-gǎ sǎ vǎ quíní-gá-yu tnúhu ndàhyú —duha ní cachí tnúhu tée cùu sacuéhé-ǎⁿ xii-í.

8

Cuendá tíciúú sǎ ní cuáha mee-ni dǎhúⁿ cuááⁿ

¹ Te sǎtá dúcáⁿ te Yaá cáá dàtná cáá ìⁿ mbéé quiiti ní dánícuèhé-güedé ní xócání-gǎ tutú líhli cùu usá ñúhú sèyú ndéé sǎtá tütú sǎ ní nadúcúⁿnuu-áⁿ, te òré-áⁿ ní cunahi sùúní nàvii-nǎ ní cuu andiú dàtná cuádava òré. ² Te ní xini-í usá tnàhá espíritú xínú cuèchi núú Yá Ndióxi xǐnutnǎi-xi núú núcóo-gǎ, te ní níhí-xi ìⁿ caa cütú xǐnehe-xi. ³ Te dàtnùní ní xini tucu-í ingá espíritú xínú cuèchi núú-gǎ ní quexio-xi nehe-xi ìⁿ tíciúú ní cuáha mee-ni dǎhúⁿ cuááⁿ te ñúhu vai dúsa sǎ sàháⁿ tnámí, te ní ngúnutnǎi espíritú-áⁿ núú ndécú sǎ ní cuáha mee-ni dǎhúⁿ cuááⁿ núú sácódó sǎ ndúú tǎhú Yá Ndióxi, te xǐǎⁿ nútnǎi-xi ndàa núú-gǎ, te dúsa sǎ sàháⁿ tnámí-áⁿ cahmi espíritú-áⁿ núú sácódó sǎ ndúú tǎhú-gǎ-áⁿ cuendá ñúhmá dǔša-áⁿ cundihi-xi nchaa tnúhu càháⁿ ñáyiu càháⁿ ndihi ñaha xì-gǎ, nchaa ñáyiu cùu cuendá-gǎ. ⁴ Te nùndaha espíritú-áⁿ tíciúú ñúhú dǔša sǎ sàháⁿ tnámí càyú, te quène ñúhmá nútnǎi-xi núú Yá Ndióxi, te ñúhmá-ǎⁿ cundihí-xi nchaa tnúhu càháⁿ ñáyiu càháⁿ ndihi ñaha xì-gǎ, nchaa ñáyiu cùu cuendá-gǎ. ⁵ Te ní queheⁿ

espíritú-áⁿ tíciúú te ní dáchitú-xi ñúhú yódó núú sácódó sǎ ndúú tǎhú Yá Ndióxi, te ní xítenuu-xi ñuyúú, te òré ducaⁿ ní quide-xi te ní cáháⁿ víhí ñúhu, te ío dusaⁿ ní quide-xi ñuyúú, te ní sáá nduté, te níhi víhi ní tnáa.

Ndi úsá espíritú ní tiú-xi ìⁿ caa cütú xǐnehe-xi

⁶ Te ndi úsá cue espíritú xǐnehe ìⁿ caa cütú-ǎⁿ ní ngúndecu túha-xi cuendá tiú-xi.

⁷ Te espíritú díhna nuu ní tiú-xi cütú néhé-xí, te ñuyúú-a ní ngoyo ñíñí dácánuu-xi ndihi ñúhú ndihi níñí, te luha-ná te cuu dava ñuyúú ní cáyú, te luha-ná te cuu dava tucu nchaa yutnu ío ñuyúú ní cáyú, te luha-ná te cuu dava tucu nchaa cùhú ío ñuyúú ní cáyú.

⁸ Te espíritú cúú úú ní tiú-xi cütú néhé-xí, te dàtná cáá ìⁿ tǐndúú cáá ìⁿ sǎ ní ngava xití làmár te nchícúⁿ ñúhú, te luha-ná te cuu dava ndute làmár-áⁿ ní nduu-xi náñí. ⁹ Te luha-ná te cuu dava nchaa quiiti xǐxúhuⁿ xití làmár-áⁿ ní xíhí-güedi, te luha-ná te cuu dava nchaa bàrcú ní quée naa-xi xití ndute.

¹⁰ Te espíritú cúú ùní ní tiú-xi cütú néhé-xí, te ní ngava ìⁿ chódíní cáhnú ndéé andiú ñuyúú te nchícúⁿ ñúhú-di, te ñúhú-áⁿ cáá dàtná cáá ñúhú iti. Te luha-ná te cuu dava nchaa yúte ní ngava chódíní-áⁿ, te luha-ná te cuu dava tucu nchaa núú quènihni ndute ní ngava-di.

¹¹ Te chódíní-áⁿ nání-dí: Yúcú Úá. Te ndute xica nchaa yúte-áⁿ ndihi nchaa ndute quènihni-áⁿ ní cuu úá-xi dàtná yúcú úá, te ío cuéhé ñáyiu ní xíhí sǎ dúcáⁿ ní cuu úá ndute-áⁿ.

¹² Te espíritú cúú cùmí ní dácàháⁿ-xi cütú néhé-xí, te luha-ná te cuu dava nchíanchii ñá túú ní dàyehé-xi, te ducaⁿ lùha-ná tucu cuu dava yóo ñà túú ní dàyehé-di, te ducaⁿ lùha-ná te cuu dava tucu nchaa chódíní ñà túú ní dàyehé-güedi, te luha-ná te

cuu dava nduu ñà túú ní dàyehé nchíanchii, te ducaⁿ lùha-ná te cuu dava niú ñá túú ní dàyehé yóó ndihi nchaa chódíní.

¹³ Te sátá dúcáⁿ te ní xiní-í xícó ìⁿ espíritú xínú cuèchi núú Yá Ndióxi núú tàchí, te ní tecú dóho-í níhi càháⁿ-xi, te càchí-xi:

—Ío ndàhú ndoho nchaa ñáyiú xĩndecu ñuyíú òré ná dàcàháⁿ úní-gá cue espíritú cùmání cútú xĩnehe-xi, chi sa xĩndecu túha-ná-xi sá dácàháⁿ-xi! — duha càchí espíritú-áⁿ.

9

¹ Te espíritú cúú ùhúⁿ ní tiú-xi cútú néhé-xí, te òré-án ní xiní-í ní quee ìⁿ espíritú andiu te càa-xi datná cáá ìⁿ chódíní, te ní ngava-xi ñuyíú, te ní níhí-xi ìⁿ ndacaá néhé-xí cuendá nacaáⁿ-xi yuyèhe yaú cùnú víhí. ² Te ní nacaáⁿ-xi yaú-áⁿ te ní ngüíta-xi ní quene ñúhmá datná quéné ñúhmá ìⁿ xítnú cáhnú vihi, te ní quene táchí ní xíténuu-xi ñúhmá-áⁿ te ní sadí-xi núú nchíanchii, te ní cunee ñuyíú.

³ Te xití ñúhmá-áⁿ ní quene tíca làngóstá, te ní xíténuu-di ñuyíú, te dééⁿ-güedi datná dééⁿ nchacua. ⁴ Te ní ngündecu ndihi-güedi tnúhu ndee ìní cuendá sá dándòho-güedi mee-ni ñáyiú ñá túú ndéé señá Yá Ndióxi tneé-xi, te ñá túú ná cada-di nchaa yutnu ndihi nchaa cúhú. ⁵ Te ñá túú tnúhu ndee ìní ndécú ndihi-güedi sá cáhní-güedi ñáyiú, chi mee-ni sá dándòho ñaha-güedi xii-yu úhúⁿ yóó. Te òré ní ngüíta-güedi dándoho ñaha-güedi xii-yu te tàhú tnúhú núú dáquée-güedi iñu-güedi datná quidé-xí núú dáquée nchacua iñu-güedi. ⁶ Te ñáyiú-án xicáⁿ táhú-yu sá ndíhi cuú-yu cuendá sá ïo ndòhó-yu dàquée ñaha nchàa quití-án iñu-di xii-yu te ñá cuíní-xi cuú-yu, te ìⁿ nduu ìⁿ nduu sàni ìní-yu cuú-yu te ñá túú cuíní-xi cuú-yu chi ñá túú tnúhu xihí sá cúú-xí-yu.

⁷ Te nchaa tíca làngóstá-án xĩndáa-güedi datná ndáa nchaa cuáyú cue tée cuaháⁿ nàá, te díquí-güedi ñùhu ìⁿ sá cáá datná cáá còroná ní cuáha mee-ni dñhúⁿ cuááⁿ, te núú-güedi càa datná cáá núú cuè tée. ⁸ Te idi díquí-güedi càa datná cáá ìdi díquí ñáyiú dìhí, te núhu-güedi càa datná cáá nùhu ndicaha. ⁹ Te yidúcuⁿnuu-güedi ìⁿ sá cáá datná cáá càá, te ndíxiⁿ-güedi quide-xi datná quidé-xí núú vèxi cuéhé víhí càrretá sá táñùhu cuayú cuaháⁿ-güedé ndihi-güedi núú nàá-güedé. ¹⁰ Te ndéé iñu núú lùhmá-güedi datná ndéé iñu núú lùhmá nchacua, te iñu núú lùhmá-güedi-án dáquée-güedi ñáyiú dándoho ñaha-güedi xii-yu, te ducaⁿ-ni càda-güedi dándoho ñaha-güedi xii-yu ndéé xínu úhúⁿ yóó. ¹¹ Te nchaa tíca làngóstá-án táxí tnùní ñáhá espíritú sá táxí tnùní yaú cùnú víhí, te espíritú-án nání-xí Àbadón tnúhu hèbreú, te tnúhu griégú nání-xí Àpolión, te ndi ndúú tnúhu-án quéé-xí: Sá dánàa ñáyiú.

¹² Te tnúndòho-a cuu-xi tnúndòho díhna nuu, te vitna cùmání úú-gá.

¹³ Te espíritú cúú iñu ní tiú-xi cútú néhé-xí. Te núú Yá Ndióxi nútñi ìⁿ sá ní cuáha mee-ni dñhúⁿ cuááⁿ núú sácòdó sá ndúú táhú-gá, te ndi cùmí xíquí-xi xĩndecu ìⁿ caa ndíqui, te ní tecú dóho-í ní cáháⁿ ìⁿ sá ní cáháⁿ nihnu ndi cùmí ndíqui-áⁿ. ¹⁴ Te sá cáháⁿ nihnu ndíqui-án xáhaⁿ-xi xii espíritú cúú iñu sá ní tiú cútú-áⁿ:

—Cuaháⁿ nandaxi-n ndi cùmí espíritú ndútú ndècu yúte càhnu nani Eúfratés —càchí sá càháⁿ-án xáhaⁿ-xi xii espíritú-áⁿ.

¹⁵ Te sátá dúcáⁿ te ní nandáxi ndi cùmí cue espíritú-áⁿ cuendá cahni-xi cuéhé víhí ñáyiú, te sa yatni datná cuádava ñáyiú xĩndecu ñuyíú cahni-xi, te ducaⁿ chi sa ndècu túha tnàhí cue espíritú-án ndétú-xí sàà òré, àdi nduu, àdi yóó, àdi

cuía ducaⁿ càda-xi cahni-xi ñáyiu.
 16 Te ní xiní-í nchaa cue sandádú cúndíhi-xi xixódó-güedé cuàyú, te ní ñíhi-í tnúhu sá xínu úú cièndú millón-güedé.

17 Te duha xíndáa cue cuàyú-áⁿ ndíhi cue téé yòdo ñaha-áⁿ ní xiní-í: Te cue téé-áⁿ yídúcúⁿ nuu ñⁿ sá yídúcúⁿnuu pèchú-güedé, te luha ticuèhé te luha cuíi datná cuíi andíu, te luha cuááⁿ, te nchaa cuàyú-áⁿ cáá díquí-güedi datná cáá díquí ndicaha, te yuhu-güedi quène ñuhú ndíhi ñúhmá, ndíhi àzufré nchícúⁿ ñuhú. 18 Te ío cuèhé ñáyiu ñuyúú ní xíhí chi luha-ná te cud-avá-yu ní xíhí sá cuèndá ñuhú-áⁿ ndíhi ñúhmá-áⁿ ndíhi àzufré-áⁿ. 19 Te ndíhi núú lúhmá-güedi ndíhi yuhu-güedi dàndoho-güedi ñáyiu, te núú lúhmá-güedi nèhe-xi díquí cõó, te diu-ni datná cáá cõó cáá ñíhi lúhmá-güedi.

20 Te nchaa dava-gá ñáyiu ní cácu ñá túú ní xíhí núú ncháa tnúndóho-áⁿ ñà túú ní cuíni-yu dañá-yu ichi cuèhé ichi duha ndécü-yu, chi quide cahnu-ni-yu nchaa espíritú cúndíhi yucu ñáváha, ndíhi nchaa sá càchí-yu cùu ndióxí ní cadúha cue téé ñuyúú-a, te dava xíáⁿ ní cuáha mee-ni díhúⁿ cuááⁿ, te dava ní cuáha mee-ni díhúⁿ cuixíⁿ, te dava ní cuáha sá nání bròncé, te dava ní cuáha mee-ni yúu, te dava ní cuáha mee-ni yùtnu, te nchaa xíáⁿ ñá túú cùtnuní núú-xi, te ní ñà túú tècú dóho-xi, te ní ñã ndácú-xí càca-xi. 21 Te ní sá sáhní tnàhá-yu, te ní sá sáhní ndùu tnahá-yu, te ní sá ndécü-yu ichi díí ñí, te ní sá dúhú ndàchiuⁿ tnahá-yu ñá túú ní cuíni-yu dañá-yu.

10

Íⁿ espíritú xínú cuèchi núú Yá Ndiõxí néhé-xí ñⁿ libré

¹ Te sáta dúcáⁿ te ní xiní tucu-í ñⁿ espíritú cùnuu xinu cuechi núú Yá Ndiõxí ní quee-xi andíu, te

yíhi-xi xítí vícõ cuãguee-xi ñuyúú te ndàa díquí-xi ndécü ñⁿ cõó yáhnchí, te núú-xi súúni chàhnchí datná chàhnchí núú nchicanhíi, te ndí ndùú díhiⁿ-xi càa datná cáá itá ñuhú. ² Te nùndaha-xi ñⁿ libré líhli ní nandicá, te sáhá cùha-xi ní sani-xi núú ndute lámár, te sáhá datni-xi ní sani-xi núú ñuhu yìchí. ³ Te espíritú-áⁿ ñíhi víhi ní cáháⁿ-xi, te ní quide-xi datná quidé ñⁿ ndicaha oré cánásaa-dí, te òré ducaⁿ ñíhi víhi ní cáháⁿ-xi te úsá xito ní cáháⁿ ñuhú. ⁴ Te sáta ní yáha ní cáháⁿ ñuhú-áⁿ úsá xito, te chido tnùn-í ñⁿ núú tütú nàcuáa ní cáháⁿ-xi ní cùu, te meí òré-áⁿ ní tecú dóho-í ní cáháⁿ ñⁿ sá ní cáháⁿ andíu te càchí-xi:

—Vá chídó tnùn-í nàcuáa ní cáháⁿ ñuhú-áⁿ, ñí meé-ni-n ná cùhuⁿ —duha càchí sá ní cáháⁿ-áⁿ.

⁵ Te espíritú sá nútní ñⁿ xio sáhá-xi núú ndute lámár-áⁿ ndíhi ingá xio sáhá-xi núú ñuhu yìchí-áⁿ ní xiní-í ní ndonehe-xi ndaha cùha-xi, ⁶ te càchí-xi:

—Yá Ndiõxí Yáá ndécü ncháa nduu nchaa quíú Yáá ní cadúha ñuyúú, ndíhi andíu, ndíhi lámár, ndíhi nchaa sá ío, Yáá-áⁿ nánhá ndáá-gá sá yùhú càháⁿ ndáá-í, te vá cùyaa víhi ⁷ te cada-xi nchaa nàcuáa ndùu tnúhu ndùu yuhu ní cáháⁿ-gá, tnúhu ní xáhaⁿ-gá xii cue téé ní xinu cuechi núú-gá, cue téé ní xóo cáháⁿ tnúhu-gá ndéé sanaha, chi òré ná tíú espíritú cúú úsá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá ní xáhaⁿ-gá xii nchaa cue téé-áⁿ —duha càchí espíritú-áⁿ.

⁸ Te sáta dúcáⁿ te ní tecú tucu dóho-í ní cáháⁿ tucu sá ní cáháⁿ andíu-áⁿ, te càchí-xi xii-í:

—Cuáhán te queheⁿ-n libré líhli sá ní nandicá nùndaha espíritú-áⁿ, espíritú sá nútní ñⁿ xio sáhá-xi núú ndute lámár, te ñⁿ xio sáhá-xi núú ñuhu yìchí —duha càchí sá ní cáháⁿ-áⁿ.

⁹ Te yùhú ní sáhá-í núú ndécü espíritú-áⁿ xicáⁿ-í libré líhli nèhe-xi-áⁿ, te ní cachí-xi:

—Iha te caxi-n, te cuvídí yuhu-n dàtná cúvídí òré xíhí-n ndùdí ñùñú, dico xití-n chi cada úa-xi —càchí-xi.

¹⁰ Te ní quehe-í librú líhli nùndaha espíritú-án nǐ xexi-í, te yuhu-í ní quide vídí-xi dàtná vídí ndudí ñùñú, dico sátá nǐ ngava-xi xití-í te ní quide úa-xi. ¹¹ Te ní cachí tucu espíritú-án xii-í:

—Dacuití cǎháⁿ tucu-n nàcuáa cǎchí Yǎ Ndiǒxí cuèndá ñáyiú titní víhí nàcióⁿ, ndihí cuèndá ñáyiú titní víhí ñùú, ndihí cuèndá ñáyiú cǎháⁿ ndí dííⁿ ndí dííⁿ núú tñuhu, ndihí cuèndá cue téé yìndaha ñáyiú.

11

Cuèndá úú cue téé cǎháⁿ nàcuáa cǎchí Yǎ Ndiǒxí

¹ Te ní níhí-í ìíⁿ tnuyoo nàcuáa chicùhá-í ìíⁿ sá chicùhá-í, te ní cǎháⁿ ìíⁿ sá nǐ cǎháⁿ, te cǎchí-xi:

—Ndacuíní te chicùhá-n vèhe Yǎ Ndiǒxí, te chicùhá tucu-n núú sácódó sá ndúú tǎhú-gǎ, te cahu-n ná daha tñàhá ñáyiú chiñuhu ñaha xii-gǎ xìndecu. ² Dico vá chicùhá-n ndáa quehé vehe-gǎ, chi xíaⁿ nǐ nduu cuèndá cue ñáyiú ñá túú cùú ñáyiú isràél, te ñáyiú-án nduu nuu-nǎ-yu núú nǐ cuu ñuú-gǎ, te cadá-yu dàtná cǎchí iní mée-yu, te údico úú yóo ducaⁿ cadá-yu. ³ Te yúhú tendaha-í úú tñàhá cue téé cǎháⁿ yuhu-í nàcuáa cǎchí Yǎ Ndiǒxí, te úxúú cièndú únidico nduu ducaⁿ cǎháⁿ-güedé yuhu-í cada-güedé núú-í, te cuihnu-güedé dóó tñúú sǎ sácuihnu cue ñáyiú ndihú iní-xi —duha cǎchí sá cǎháⁿ-án.

⁴ Te ndí ndúú cue téé-án cúú-güedé dàtná úú yutnu òlívú sá xìnutnǐ núú Yǎ Ndiǒxí, ndihí dàtná úú sá ndèé dité-xi, sá yìndòdo ìíⁿ caa candíl núú dité-xi ndècu tucu núú-gǎ, te diu-gǎ cúú-gǎ Yáa yìndaha ñuyúú. ⁵ Te ñáyiú na càni iní-xi ná cada ñaha xii-güedé te yuhu-güedé quene ñuhú cahmi

ñaha-xi xii-yu, te ducaⁿ càda-güedé cahni-güedé nchaa ñáyiú na cùú úhú iní ñàhá xii-güedé. ⁶ Te ndí ndúú-güedé ndécú ndihí-güedé tñuhu ndee iní cada-güedé sá vǎ cúúⁿ dàú, te ducaⁿ càda-güedé nini cǎháⁿ-güedé nàcuáa cǎchí Yǎ Ndiǒxí, te ndacu-güedé nàdatiù-güedé ndute nduu-xi níñí, te ndacu-güedé dandòho-güedé nchaa ñáyiú titní núú tñuhu ndòho, te ducaⁿ càda-güedé ná daha xito cǎchí iní mée-güedé. ⁷ Te ná yáha sá cǎháⁿ-güedé nàcuáa ní cachí Yǎ Ndiǒxí, te dàvá-án quene ìíⁿ quití dééⁿ yàú cùnú víhí sǎ ò nèhé cáá, te quití-án ngüita-di nàa-di ndihí ndí ndúú cue téé-án te cahni ñaha-di xii-güedé. ⁸ Te yiqui cuñú cue téé-án cautuu-xi ìíⁿ tnuú ñuú cǎhnú núú ní sahní-güedé Xitohó Jesucristú núú cùrúxí, te diu Yáa-án cúú Xitohó-ó ndihí-güedé, te cǎchí ñáyiú sá ñuú-án cúú-xí dàtná ñuú Sòdomá ndihí nàcióⁿ Ègíptú. ⁹ Te úní nduu dava cautuu yiqui cuñú-güedé xíaⁿ, te ñáyiú nchaa nàcióⁿ, ndihí ñáyiú nchaa ñuú, ndihí ñáyiú cǎháⁿ ndí dííⁿ ndí dííⁿ núú tñuhu, ndihí ñáyiú xìndecu nchaa xichí quini-yu yiqui cuñú-güedé, te vá dàñá-yu nguíndüxi. ¹⁰ Te nchaa ñáyiú-án nduu vétú iní-yu sá dúcáⁿ cùú cue téé cǎháⁿ nàcuáa cǎchí Yǎ Ndiǒxí-án, te ò cudíí iní-yu, te nándí sá cuǎha tǎhú tñàhá-yu sá cùdíí iní-yu sá dúcáⁿ nǐ xíhí-güedé, te ducaⁿ chi diu-güedé ní quide ò ní ndohó-yu. ¹¹ Te sátá ná yáha úní nduu dava sá dúcáⁿ cùú-güedé te Yǎ Ndiǒxí dandòto ñaha-gǎ xii-güedé, te ndacóo-güedé, te nchaa ñáyiú na quini sá ndótó-güedé te yùhú víhí-yu. ¹² Te ndí ndúú cue téé-án tecú dóho-güedé cǎháⁿ ìíⁿ sá cǎháⁿ ndéé andiu, te cúñaha-xi xii-güedé:

—Chí táquene iha —duha cúñaha sǎ cǎháⁿ-án xii-güedé.

Te cue téé-án quíhu-güedé ìíⁿ xití vícò caa-güedé andiu, te nchaa

ñáyiú cùu úhú iní ñáhá xii-güedé quini ñáhá-yu xii-güedé caa-güedé andiu. ¹³ Te òré-án níhi víhi tnáa ñuyúú, te úxí xichi cùu-xi ñuú núú cündecu-güedé-án te ìⁿ xichi ñuú-án naa, te cuú úsá mĩ ñáyiú, te nchaa dava-gá ñáyiú cácu vá cuú yuhú víhi-yu, te cachí-yu sá ío càhnu cuu Yá Ndióxi Yaá ndécú àndiu.

¹⁴ Te tnúndòho-a cuu-xi tnúndòho cuu úú yáha, te vitna sa ndetu vii-ná tucu sáá tnúndòho cuu uní.

Espiritú cúú úsá tíú-xi cútú néhé-xí

¹⁵ Te espíritu cúú úsá ní tíú-xi cútú néhé-xí, te òré-án ní tecú níhi ní cáháⁿ titní sá ní cáháⁿ andiu, te cächí-xi:

Nchaa sá cúú cuendá nchaa ñáyiú ñuyúú táxi tnùnì-yu ni cùu ní nduu cuendá Tátá-ó Dütú Ndióxi táxi tnùnì-gá,

Te tnàhá Yaá ní tendaha-gá ní sáháⁿ ñuyúú táxi tnùnì-gá nchaa xíáⁿ,

te ñiu-gá taxi tnùnì-gá ni caa ni quíhíⁿ.

Duha ní cáháⁿ nchaa sá ní cáháⁿ-án. ¹⁶ Te ndi ócò cùmí cue téé sacuéhé xñucóo núú xilé váha ní ngúñí xítí-güedé núú Yá Ndióxi, te ní nuu núú-güedé ndàa núú ñúhú te ní ngúíta-güedé chíñùhu ñaha-güedé xii-gá, ¹⁷ te cächí-güedé:

Ío ndácáⁿ táhú-ndí núú yòhó Dütú Ndióxi,

Yaá ndácú quide nchaandi túhú sá vâha,

te ñiu-ni-n ndècu-n ndéé cùtnàhá ní ngáva ñuyúú, te ñiu-ni-n ndècu-n vitna, te ñiu-ni-n cùndecu-n ndéé núú cuaháⁿ núú vèxi,

te ío càhnu cuu-n te ní ngúíta-n ío-gá táxi tnùnì-n.

¹⁸ Te nchaa ñáyiú xñdecu ñuyúú xícudéⁿ-yu núú-n,

te vitna ní sáá nduu dàndohó-n-yu chí ñá túú cùu váha iní-n núú-yu,

te cada ndáá-n cuèchi nchaa ñáyiú sa ní xíhí,

te ní sáá tucu nduu cuñaha-n sá ndúú táhu nchaa ñáyiú ní xinu cuechi núú-n ní cáháⁿ-yu tnúhu-n, ndihí nchaa dava-gá ñáyiú cùu cuendá-n, chí ñáyiú-án néhè-yu sá yíñùhu núú-n,

te cuèi ñáyiú cùnuu ndihí ñáyiú ñá túú cùnuu cuñaha-n sá ndúú táhú-yu,

te ní sáá tucu nduu dànaa-n nchaa ñáyiú sàhni tnaha ñáyiú-xi.

Duha cächí ndi ócò cùmí cue téé sacuéhé-áⁿ xàhaⁿ-güedé xii Yá Ndióxi.

¹⁹ Te ní xiní-í ní nacaáⁿ yuyèhe vehe Yá Ndióxi andiu, te xítí vehe-gá-án ní xiní-í ndécú cájá ñúhú sá yódó tnùnì nàcuáa ní cundáa cada-gá sá cúú-xí ñáyiú, te òré-án ní xiní-í ní sáá nduté, te ní cáháⁿ ñúhu te ío dusaⁿ ní quide-xi, te níhi víhi ní tnáa, te súúni càhnu dáú ñíñí ní cuuⁿ.

12

Cuendá ìⁿ ñadìhí ndihí cuendá ìⁿ quiti déeⁿ nání dragón

¹ Te ío víhi ní quide-xi ìⁿ sá ní quide-xi andiu, te ní xiní-í ìⁿ ñadìhí te dóo níhnu-án quide-xi datná quidé-xí núú nchìcanchii, te ndàa núú sàhá-aⁿ quide-xi datná quidé-xí núú yòó, te ñúhu ìⁿ coroná díquí-aⁿ te ndéé úxúú chódíní. ² Te ñúhu déhe-aⁿ te càna saa-aⁿ sá quidé úhú ñáhá-xí xii-aⁿ chí sa ndetu vii-ná cacu déhe-aⁿ. ³ Te dátñuní ní quide tucu-xi sá ní quide-xi andiu, te ní xiní-í ìⁿ quiti càhnu quiti ticuehé, quiti déeⁿ nání dragón, te ndéé úsá díquí-di ndihí úxí ndiqui-di, te ìⁿ caa coroná ñúhú ìⁿ caa díquí-di-án.

⁴ Te quiti-án luha-ná te cuu dava nchaa chódíní dāngòyo-di ñuyúú ndihí lúhmá-di, te quiti-án ní ngunu tní-di núú ñaha ndetu vii-ná cacu déhe-xi-án cuendá caxi-di déhe-aⁿ òré cacu ni cùu. ⁵ Te ñaha-án ní cacu déhe-aⁿ te téé cùu-dé, te té líhli-án ío cunuu-dé taxi tnùnì-dé nchaa ñáyiú ñuyúú, te mee Yá Ndióxi

ní nacuaca ñaha-gã xii té lĩhli-áⁿ cuendá cundecu ndihĩ ñaha-dẽ xii-gã núú ndécú-gã táxi tnuni-gã.

⁶ Te ñadihĩ-áⁿ nĩ xinu-aⁿ cuáháⁿ-aⁿ xitĩ yucu núú nĩ quide túha Yá Ndiõxí cundecu-aⁿ cuendá xiáⁿ nihĩ-aⁿ caxi-aⁿ, te ducaⁿ nihĩ-aⁿ sá cáxi-áⁿ ùxúú ciendú únidico nduu chi ducaⁿ nduu cundecu-aⁿ xiáⁿ.

⁷ Te sátá dúcáⁿ te andiu nĩ xinĩ-í espíritú cúnúu xinu cuechi núú Yá Ndiõxí nání Miguél, ndihĩ nchaa dava-gã espíritú cundihĩ-xi, te nchaa espíritú-áⁿ nàá-xi ndihĩ quitĩ dééⁿ nání dragón ndihĩ nchaa espíritú cundihĩ-di. ⁸ Te quitĩ-áⁿ ñã túú ní ndácu-di ndihĩ nchaa espíritú cundihĩ-di, te ñã túú ní nihĩ-gã-di núú cundècu-di andiu ndihĩ nchaa espíritú cundihĩ-di-áⁿ. ⁹ Te cue espíritú xínú cuèchi núú Yá Ndiõxí-áⁿ nĩ dǎngává-xí quitĩ dééⁿ nání dragón-áⁿ ndihĩ nchaa espíritú cundihĩ-di ñuyúú, te quitĩ-áⁿ cúú-dĩ mèi sácúíhná àdi sá càchĩ-ó cùu yucu ñávãha, te diu xiáⁿ ní dándàhú-xi ñáyiu nihĩ ñuyúú, te diu-ni xiáⁿ ní nduu-xi cóo nĩ dándàhú-xi ñáyiu ndéé sanaha.

¹⁰ Te ní təcú dóho-í nihĩ ní cáháⁿ tucu ìⁿ sá nĩ cáháⁿ andiu, te càchĩ-xi:

—Vitna te Yá Ndiõxí ní quide-gã ní ngúndecu ñáyiu ndihĩ-gã, te ío càhnu cuu-gã, te ío tàxi tnuni-gã, te tnàhá Crìstú Yaá ní tendaha Yá Ndiõxí ní quixi ñuyúú-a ío tàxi tnuni-gã, te ducaⁿ chi sa ní xócuíhĩ sácúíhná sã sùúú nùnúu sacáⁿ cuèchi núú Tǎtá-ó Dütú Ndiõxí cuendá nchaa ñáyiu ndècu ndihĩ-o ichi-gã, te nduu niú ducaⁿ sacáⁿ cuèchi-xi núú-gã cuendá-yu ni cùu. ¹¹ Dico ní ndacú-yu ní cunúú-yu núú sácúíhná sã dúcáⁿ sacáⁿ cuèchi cuendá-yu-áⁿ ní cùu, te ducaⁿ nĩ cunúú-yu sá cuendá Yaá cáá dàtná cáá ìⁿ mbéé quitĩ ní dǎncuèhé-güedé, chi Yaá-áⁿ nĩ sati níhĩ-gã te ní xihĩ-gã sá cuendá-yu, te ducaⁿ nĩ cunuu tucú-yu sá cuendá

sá sàndáá iní ñáhã-yu xii Yaá-áⁿ, te ñã túú ní yuhú-yu cuú-yu sá cuendá-gã. ¹² Te vitna ío chí cúdí iní nchaa nchòhó espíritú xínú cuèchi núú Yá Ndiõxí, ndihĩ nchaa nchòhó ñáyiu ndècu andiu, dico ìndàhú ní cuu nchaa ñáyiu xĩndecu nihĩ ñuyúú! Chi sùúú cùdééⁿ sácúíhná nĩ ngava-xi te nándi cada ñaha-xi xii-yu, te ducaⁿ chi cùnuni iní-xi sá sácú duha-ná nduu cudĩ-xi cundecu-xi —duha càchĩ sá nĩ cáháⁿ andiu.

¹³ Te sátá nĩ quee quitĩ dééⁿ nání dragón-áⁿ andiu nĩ ngava-di ñuyúú quitĩ cùu mei sácúíhná-áⁿ, te quitĩ-áⁿ nĩ chinchícú-di ñadihĩ ñaha ní çacu déhe téé-xi-áⁿ. ¹⁴ Te ñadihĩ-áⁿ ní nduu táhú-aⁿ ní quene úú ndíxi-aⁿ, te càa datná cáá ndíxiⁿ ìⁿ yacòlo cahnu vihi cuendá ndava-aⁿ núhú-aⁿ yucu núú ní cachĩ Yá Ndiõxí cundecu-aⁿ, te yàcáⁿ cundecu-aⁿ úní cuíá dava cuendá sá vã nihĩ ñáhã quitĩ dééⁿ quitĩ nàni dragón-áⁿ te xiáⁿ nihĩ-aⁿ sá cáxi-áⁿ, te quitĩ-áⁿ cúú tucu-di datná ìⁿ cóo dééⁿ. ¹⁵ Te quitĩ-áⁿ nĩ quene cuéhé ndute yuhu-di, te ndute ní quene yuhu-di-áⁿ nĩ cuu-xi ìⁿ yúte, te ducaⁿ nĩ quide-di cuendá ndute-áⁿ cuido-xi ñadihĩ-áⁿ ní cùu. ¹⁶ Te ñuhu yìchĩ ní chindee-xi ñadihĩ-áⁿ, chi ní ndátá te ní quee naa-ni ndute ní quene yuhu quitĩ-áⁿ. ¹⁷ Te sátá dúcáⁿ nĩ quide-xi xiáⁿ ní cudééⁿ víhĩ quitĩ-áⁿ núú ñadihĩ-áⁿ, te ní xica-di cuáháⁿ-di núú xĩndecu nchaa dava-gã cue déhe ñadihĩ-áⁿ cuendá nàá ndihĩ ñaha-di, te ñáyiu-áⁿ cúú-yu ñáyiu tnì nchaa tnúhu càháⁿ Yá Ndiõxí, te nchícúⁿ nihnú-yu nchaa tnúhu sá càháⁿ váha cuendá Xitohó Jesucristú.

13

Cuendá úú quitĩ

¹ Te yuhú ní ngúnu tnì-í yuhu làmár, te ní xinĩ-í ní quene ìⁿ quitĩ te ndèé úsá díquí-di te úxí ndiqui-di, te

núú ìḡ ìḡ ndiqui-di-áⁿ ndécú ìḡ caa coroná. Te ìḡ ìḡ díquí-di-áⁿ ndéé tnúhu sá cãháⁿ úhú-xi cuendá Yá Ndióxi. ² Te quiti-áⁿ cáá-dí datná cáá cuñí, te sãhá-di cãa datná cáá sãhá óso, te yuhu-di cãa datná cáá yùhu ndicaha. Te quiti dééⁿ nání drágón ní sãñaha-di tnúhu ndee ìní xii quiti-áⁿ cuendá taxi tnùní víhí-dí, te drágón-áⁿ ñí sãñaha-di núú ndécú-dí tàxi tnuní-di xii quiti ní quene xití làmár-áⁿ, te ducaⁿ ñí quide-di cuendá sá ñihí ndéé quiti-áⁿ cunuu-di. ³ Te ìḡ díquí quiti ní quene xití làmár-áⁿ cãhú víhí cãa ní nícuèhé, te sa ndètu vií-nã cuú-di sãnuu dico ní ndúha-di, te ñihí ñuyú ní ñihí ñáyiu tnúhu sá dúcáⁿ ní cuu, te ío ní cuñúhu-yu te ní tuhá-yu quiti-áⁿ. ⁴ Te nchaa ñáyiu-áⁿ ñí cachí-yu sá ío cãhnu cuu quiti dééⁿ quiti nãni dragón-áⁿ cuendá sá ñí sãñaha-di tnúhu ndee ìní sá táxi tnuní quiti ní quene xití làmár-áⁿ, te ní ngúíta-yu ní chiñuhú-yu quiti ní quene xití làmár-áⁿ, te cãchí-yu:

—Vá yõo ìḡ nũtnahá ñáhá xii quiti-a, te ni vã yõo ìḡ ndacu nãa ndihi ñaha xii-di —cachí-yu.

⁵ Te ní ñihí-di tnúhu ndee ìní sá cãháⁿ úhú-di Yá Ndióxi, te cada cãhnu-di mee-di, te údico úú yóo ducaⁿ ñí ñihí-di tnúhu ndee ìní-áⁿ cunuu-di. ⁶ Te ducaⁿ ñí quide-di ní cáháⁿ úhú-di Yá Ndióxi ndihi cuendá nchaa sã quidé-gã, te ñu-ni ducaⁿ ñí cáháⁿ úhú-di núú ndécú-gã, te ní cáháⁿ úhú tucu-di nchaa ñáyiu ndècu ndihi-gã andíu. ⁷ Te ducaⁿ ñí ñihí-di tnúhu ndee ìní sá nãá-di ndihi nchaa ñáyiu cùu cuendá Yá Ndióxi, te ducaⁿ nãa ndihi ñaha-di xii-yu ndéé òré vá ndácú-gã-yu nãa ndihi ñáhã-yu xii-di, te tnãhá ní ngúndecu ndihi-di tnúhu ndee ìní sá táxi tnuní-di ñáyiu nchaa nãcióⁿ, ndihi ñáyiu nchaa ñuú, ndihi nchaa ñáyiu cãháⁿ ndí dííⁿ ndí dííⁿ núú tnúhu, ndihi ñáyiu

xĩndecu nchaa xichi. ⁸ Te cue ñáyiu ñihí ñuyú ní cachí-yu sá ío cãhnu cuu quiti-áⁿ, te ñáyiu-áⁿ cùu-yu ñáyiu ñã túú yòdo tnuní núú tütú Yá cáá datná cáá ìḡ mbéé quiti ní dánicuèhé-güedé Yá ní xihí ní cùu te ní ndoto. Te ndéé cùtnãhá ní ngáva ñuyú sa yòdo tnuní ñáyiu naníhí tãhú, dico ñáyiu cãchí sá ío cãhnu cuu quiti-áⁿ ñã túú yòdo tnuní-yu núú tütú-gã.

⁹ Te nchaa nchòhó ñáyiu xĩndedóho chí cündedóho váha nchaa nãcuãa cuáhãⁿ tnúhu-áⁿ. ¹⁰ Te nchaa ñáyiu na chihí tnaha ñáyiu-xi vecaá te sãa nduu te quihíⁿ-yu tnãhá-yu vecaá, te nchaa ñáyiu sãhni tnaha ñáyiu-xi ndihi yuchí te ñu-ni ndihi yuchí cuú-yu tnãhá-yu, te xiãⁿ núu ío xini ñuhu-xi sá ncháá ñáyiu cùu cuendá Yá Ndióxi cunduu cãhnu ìní-yu, te quindáá ìní ñáhã-yu xii-gã.

¹¹ Te ní xini tucu-í ingá quiti ní quene-di núú ñuhu yìchí, te ndéé úú ndiqui-di te cãa datná cáá ndiqui canerú, te cãháⁿ-di datná cãháⁿ quiti dééⁿ nání drágón. ¹² Te datná ndécú ndihi quiti ní quene xití làmár-áⁿ tnúhu ndee ìní sá táxi tnuní-di ducaⁿ ndècu ndihi quiti ní quene ñuhu yìchí-áⁿ tnúhu ndee ìní taxi tnuní-di cada-di núú quiti ní quene xití làmár-áⁿ, te quiti ní quene ñuhu yìchí-áⁿ ñí quide yica-di sã ncháá ñáyiu xĩndecu ñihí ñuyú chiñuhú-yu quiti ní quene xití làmár-áⁿ, quiti cãhú víhí ñí tnãhá ní nícuèhé te ní ndúha-di. ¹³ Te quiti ní quene xití ñuhu yìchí-áⁿ ñí quide-di titní núú sã vã yõo tnãhí ndãcu cada, te nchaa ñáyiu ní xini-yu sá ndéé andíu ñí dãngóyó-dí ñuhú ñuyú. ¹⁴ Te sá dúcáⁿ ñí ngúndecu ndihi-di tnúhu ndee ìní ní quide-di nchaa xiãⁿ ní quide-di núú quiti ní quene xití làmár-áⁿ, te sá dúcáⁿ ñí quide-di te xiãⁿ ní dándãhú-di nchaa ñáyiu xĩndecu ñihí ñuyú, te

ní xáhaⁿ-di xii-yu sá ndúcũ-yu ñⁿ sá cáduha-yu nàcuáa-ni càa nacuáa-ni ndùu quiti ní quene xití lámár-áⁿ, quiti cãhú víhí ñi tnahá ní nícuèhé díquí-xi-áⁿ ñi quée machiti te ñá túú ní xihí-di chi ní xíndecu-ni-di. ¹⁵ Te quiti ní quene xití ñuhu yichí ní ngúndecu ndihi tucu-di tnúhu ndee ñi sá chíhí-dí ñi sá ñi cadúha-yu-áⁿ, sá ñi natavá-yu dàtná cáá quiti ní quene xití lámár-áⁿ, te ducaⁿ ñi quide quiti-áⁿ cuendá cáháⁿ sá ñi cadúha-yu-áⁿ, te xíáⁿ cada-xi cuú nchaa ñáiyu ñá túú ní cuini chiñuhu ñaha xii-di. ¹⁶ Te quiti ní quene xití ñuhu-áⁿ quidé-dí sá ncháá ñáiyu ngúndéé ñⁿ tnuní ndaha cùhá-yu àdi tneé-yu, te ducaⁿ ñi quide-di cuèi ñáiyu cùnuu te cuèi ñáiyu ñá túú cùnuu, te cuèi ñáiyu cuíca te cuèi ñáiyu ndàhú, te cuèi ñáiyu ñá túú dàñá quee núú chíúⁿ pàtróóⁿ-xi, te cuèi nchaa ñáiyu dàñá quée núú chíúⁿ pàtróóⁿ-xi ncháá-yu ducaⁿ ñi ngúndéé tnuní ñíⁿ-yu. ¹⁷ Te ní quide-di sá ncháá ñáiyu ñá túú ndèe tnuní ñíⁿ-xi vá cúú cuááⁿ-yu sá cãchí iní-yu te ñi vá cúú dicó-yu ñⁿ sá cuíni-yu dicó-yu, te tnuní-áⁿ cúú-xi ñi quiti ní quene xití lámár-áⁿ àdi número-di. ¹⁸ Te xini ñuhu-xi sá ncháá ñáiyu ío váha cùtnuní iní-xi ío váha cuáha-yu cuendá nàcuáa quée-xi número quiti-áⁿ, te número-áⁿ cúú-xi ñi cuèndú únídico íñú, te cùu-xi cuendá ñⁿ ñáiyu ñuyú.

14

Cuendá ñⁿ ciendú údico cúmi ml ñáiyu

¹ Te sátá dúcáⁿ te ní xiní-í Yaa cáá dàtná cáá ñⁿ mbéé quiti ní dánicuèhé-güedé nútñí-gá ñⁿ yucu ñúú nání Sión ndécú àndi, te nutñí-gá ndihi ñⁿ ciendú údico cúmi ml ñáiyu, te tneé-yu ndèe ñi-gá ndihi ñi tátá-gã Dútú Ndióxi. ² Te ní tecú dóho-í ní quide-xi andi

dàtná quidé-xi núú xicá cuèhé víhí ndüte, te quide tucu-xi datná quidé-xi òré ñíhi víhi caháⁿ ñuhu, te quide tucu-xi datná quidé-xi òré cuèhé víhí ñáiyu càní-yu àrpá. ³ Te ní tecú dóho-í xixita yuhu sá xitá yùhu núú Yaa núcõo núú xilé váha, ndihi núú ndi cùmi cue quiti xínutñí-áⁿ, ndihi núú nchaa cue téé cùu sacuéhé xínucóo-áⁿ, te xixita-xi ñⁿ ndudú sáá. Te mee-ni cuè ñáiyu ñⁿ ciendú údico cúmi ml-áⁿ quée díquí-yu ndudú-áⁿ, te ñáiyu-áⁿ cúú-yu ñáiyu ní dácãcu nihnu ñaha Yaa cáá dàtná cáá ñⁿ mbéé quiti ní dánicuèhé-güedé núú ñáiyu ndècu ichi cuehé ichi duha xíndecu ñuyú, te vá yõo ñⁿ-gá quée díquí-xi ndudú sáá-áⁿ chi mee-ni ñáiyu ní cácu nihnu-áⁿ quée díquí-yu. ⁴ Te ñáiyu ní cácu nihnu-áⁿ cúú-yu ñáiyu ñá túú ní xíndecu ichi díí ñi, te cúu-yu ñáiyu cãndoo canine iní-xi, te ndéni ní cuu cuáháⁿ Yaa cáá dàtná cáá ñⁿ mbéé quiti ní nícuèhé-áⁿ, te ducaⁿ-ni ndëndaha ñáhá-yu xii-gá cuáháⁿ, te ñáiyu-áⁿ ñi cácu nihnú-yu núú nchaa ñáiyu ñuyú, ñáiyu ndècu ichi cuehé ichi duha, te ñáiyu ní cácu nihnu-áⁿ cúú-yu ñáiyu ñi hna nuu ñi nduu táhú Yã Ndióxi cuu cuendá-gá ndihi Yaa cáá dàtná cáá ñⁿ mbéé quiti ní dánicuèhé-güedé. ⁵ Te cúu-yu ñáiyu ñá túú caháⁿ ni ñⁿ tnúhu ndehnde, te cãndoo canine iní-yu ndècu-ñáiyu núú núcõo Yã Ndióxi táxi tnuní-gá.

Cuendá úní cue espíritu xínú cuèchi núú Yã Ndióxi

⁶ Te sátá dúcáⁿ te ní xiní-í ñⁿ espíritu xínú cuèchi núú Yã Ndióxi xicó-xi cuádava andi, te ndècu ndihi-xi tnúhu sá caháⁿ nàcuáa naníhi táhú-ó, tnúhu sá ñá túú tnáhi ndihi nihnu te tnúhu-áⁿ danèhé espíritu-aⁿ nchaa ñáiyu ndècu ñuyú, ñáiyu nchaa nacióⁿ, ndihi ñáiyu nchaa ñúú, ndihi nchaa ñáiyu caháⁿ ndí dííⁿ ndí dííⁿ núú tnúhu,

ndihi ñáyiú xĩndecu nchaa xichi.

⁷ Te níhi ní cáháⁿ-xi te cächí-xi:

—Nchaa nchòhó ñáyiú ndècu ñuyúú canehèndo sã yĩñuhu núú Yã Ndiòxí, te cächí-ndó sã ïo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gã chi ðiu-gá ní cadúha-gá andiu, ndihi ñuhu yìchí, ndihi làmár, ndihi nchaa ndóhyo — duha cächí espíritú-áⁿ.

⁸ Te nchicúⁿ tucu ingá espíritú xínú cuèchi núú Yã Ndiòxí, te cächí-xi:

—Vitna ní naa ñuú Babiloniá ñuú ïo cùnuu, te ducaⁿ ní naa chi cue ñáyiú ñuú-áⁿ ní quidé-yu ní xíta ni-hnu nchaa ñáyiú ñihí ñuyúú, chi ní sanu ichi ñàhá-yu ichi cuèhé ichi duha — duha cächí espíritú-áⁿ.

⁹ Te nchicúⁿ tucu ingá espíritú xínú cuèchi núú Yã Ndiòxí te níhi cáháⁿ-xi, te cächí-xi:

—Nchaa ñáyiú chiñuhu ñaha xii quiti ní quene xití làmár, ndihi sã ní natava ñàhá-yu nàcuáa càa-di-áⁿ, ñáyiú ní dáñá mèe-xi ní ngúndeé tñuní ndahá-yu àdi tneé-yu, ¹⁰ ñáyiú-áⁿ sùúni dándoho ñaha Yã Ndiòxí xii-yu chi ïo cùdèéⁿ-gã, te ducaⁿ ïo dandòho ñaha-gá xii-yu chi daquihíⁿ ñàhá-gã xii-yu núú ñùhú núú ñùhú àzufre càyú-xi, te núú cuè espíritú xínú cuèchi núú-gã ducaⁿ dándoho ñaha-gá xii-yu, ndihi núú Yáá cáá dàtná cáá ìⁿ mbéé quiti ní dánícuèhé-güedé. ¹¹ Te ni caa ni quihíⁿ quene ñùhmá núú dúcáⁿ cùndecú-yu ndohó-yu-áⁿ, te cuèi nduu cuèi niú ducaⁿ ndòhó-yu. Te ducaⁿ ndòho nchaa ñáyiú chiñuhu ñaha xii quiti ní quene xití làmár, ndihi sã ní natava ñàhá-yu nàcuáa càa-di-áⁿ, te ðiu-ni ñáyiú-áⁿ cúú-yu ñáyiú ní ngúndeé tñuní ndaha-xi àdi tneé-xi — duha cächí espíritú-áⁿ.

¹² Te xíáⁿ xíní ñùhu-xi sã ncháá ñáyiú cùu cuendá Yã Ndiòxí cunduu càhnu iní-yu, chi ðiu-ní-yu cùu-yu ñáyiú tñè nchaa tñuhu càháⁿ-gá,

te ni yùhu ni iní-yu sàndáá iní-yu Xítòhó Jesucristú.

¹³ Te sáta dúcáⁿ te ní tecú dóho-í ní cáháⁿ ìⁿ sã ní cáháⁿ andiu, te cächí-xi:

—Chido tñuní-n ìⁿ núú tütú nàcuáa na cáháⁿ-i-a. “Neni vitna ïo váha táhú nchaa ñáyiú sàndáá iní tñuhu Xítòhó Jesucristú te xihí-yu” — duha cächí sã ní cáháⁿ-áⁿ.

Te Espíritú Yã Ndiòxí ní cáháⁿ-xi, te cächí-xi:

—Ndáá, chi ndetatú-yu chi ñá túú-gã nágá chiúⁿ ndohó-yu cadá-yu, te Yã Ndiòxí sa nàha-gá nchaa nàcuáa ndùu chiúⁿ ní quidé-yu — duha cächí Espíritú-gá.

Nchaa sã cúú núú ñùhú

¹⁴ Te sáta dúcáⁿ te dàtnùni ní xini-í ìⁿ vícò cuixíⁿ, te núú vícò-áⁿ ní xini-í núcò ìⁿ Yáá, te càa-gá dàtná cáá ìⁿ téé ñuyúú, te díquí-gã ñùhú ìⁿ coroná ní cuáha mee-ni ðìhúⁿ cuááⁿ, te nùndaha-gá ìⁿ yuchí ndíquí te sùúni dèéⁿ. ¹⁵ Te ní xini-í ìⁿ espíritú xínú cuèchi núú Yã Ndiòxí ní quee-xi xití vehe-gá, te ñhi ní cáháⁿ-xi xàhaⁿ-xi xii Yáá núcò núú vícò-áⁿ:

—Sa ní cuu nàquehdé-n nchàa sã ní cuu ñuyúú ndihi yuchí ndíquí-n, chi sa ní cuu núcòo tñaha-xi — duha cächí espíritú-áⁿ xàhaⁿ-xi xii Yáá-áⁿ.

¹⁶ Te Yáá núcòo núú vícò-áⁿ ní dáyaña ndodo-gá yuchí ndíquí-gã núú ñuyúú ní nataxi tñaha-gá nchaa sã ní cuu.

¹⁷ Te ní xini tucu-í ingá espíritú xínú cuèchi núú Yã Ndiòxí ní quee-xi xití vehe-gá sã cáá àndiu, te nùndaha-xi tñahá-xi ìⁿ yuchí ndíquí dèéⁿ. ¹⁸ Te ní xini tucu-í ní quee tucu ingá espíritú xínú cuèchi núú Yã Ndiòxí núú nùtníⁿ núú sácòdò sã ndúú táhú-gã, te ndècu ndihi-xi tñuhu ndee iní táxí tñuní-xi ñùhú, te espíritú-áⁿ ñhi ní cáháⁿ-xi xàhaⁿ-xi xii espíritú néhé yùchí ndíquí dèéⁿ-áⁿ:

—Ngüita naquehdé-n ndihi yuchí ndíquí-n ndèhé yoho yàha

stilé sá ío ñuyíú chi sa ní cuu nàtehndé —duha càchí espíritú-áⁿ xáhaⁿ-xi xii espíritú néhé yùchí ndíquí-áⁿ.

¹⁹ Te espíritú néhé yùchí ndíquí-áⁿ ñí dáyáha ndodo-xi yuchí ndíquí-xí nũú ñuyíú ñí nàquehndé-xi nchaa ndéhé yoho yáha stilé, te ní chihi-xi ñí xichi núú ñí chihi-xi cuendá xiáⁿ quihni-xi quee ndudí-xi, te sá dúcáⁿ ñí quide-xi xíáⁿ cútnùní iní-ó sá ïo cùdééⁿ Yá Ndióxi núú ñáyíu ñuyíú.

²⁰ Te ndéhé yoho yáha stilé-áⁿ ñí quihni-xi ñí xio yuhu ñúú, te ndudí ndéhé yoho yáha stilé-áⁿ ñí nduu-xi ñíñí te ní quee-xi núú quíhni ñihnu espíritú-áⁿ. Te úní cièndú mìl mètrú ní xica ñíñí-áⁿ, te dàtná ñí mètrú dava ní sáá cuehnu ñíñí-áⁿ ñí xica-xi.

15

Úsá tnúndòho

¹ Te ío vîhi ní quide-xi ñí sá ñí quide-xi andíu te ní cuñuhu vîhi-í, te ní xiní-í úsá tnàhá espíritú xínú cuèchi núú Yá Ndióxi, te ñí ñí cue espíritú-áⁿ ndécú ndíhi-xi tnúhu ndee ñí dandòho-xi ñáyíu ñuyíú, te nà yáha nchaa tnúndòho-áⁿ, te vá cùdééⁿ-gá Yá Ndióxi núú-yu dándòho ñaha-gá xii-yu.

² Te ní xiní-í ñí làmár te ndute làmár-áⁿ cáá dàtná cáá vidriú, te dàcánuu-xi ndíhi ñuhú, te yuhu làmár-áⁿ xínutnî nchaa ñáyíu ní ndacu ní dáquéé tîhú ñáhá xii quiti ní quee xití làmár-áⁿ, te ducaⁿ ñí ndacú-yu ní dáquéé tîhú-yu sá ñí natava ñahá-yu nàcuáa càa-di-áⁿ, te ducaⁿ ñí ndacu tucú-yu ní dáquéé tîhú tucú-yu númerú-di sá cúú dàtná dîu-di, te nchaa ñáyíu-áⁿ ñí nduu táhú-yu núú Yá Ndióxi àrpá xínehé-yu cuendá caní-yu.

³ Te xíxitá-yu ndudú sá ñí xita ndíi Moisés ndíi ní xinú cuechi nũú Yá Ndióxi ndéé sanaha, te xita

tucú-yu ndudú Yá cáá dàtná cáá ñí mbéé quiti ní dánícuèhé-güedé, te càchí-yu:

Yòhó Dútú Ndióxi ío càhnu cuu-n, chi quide-n nchaa sá vâ yòo tnàhí ndàcu cada, te cùu-n Yáá ndácú quide nchaandi túhú sá vâha, te ío ndáá quidé-n te ío ndáá càháⁿ-n, te yíndaha-n nchaa ñáyíu ñíñí ñuyíú.

⁴ Te nchaa ñáyíu nèhé-yu sá yíñùhu núú-n, te nchaa-yu càchí-yu sá ïo càhnu cuu-n, chi ñí dîi dîi-ni yòhó cúú-n Yáá ío vâha quide ndáá, te nchaa ñáyíu ñíñí ñuyíú nat-acá-yu chíñuhu ñahá-yu xii-n, te ducaⁿ càdá-yu chi ndèhé-yu nchaa sá vâha quide-n.

Duha càchí ñáyíu-áⁿ xíxitá-yu.

⁵ Te sáta dúcáⁿ te ní xiní-í ní nacaáⁿ yuyèhe vehe Yá Ndióxi andíu, te xití vehe-gá-áⁿ ndécú sá ndéé tnúhu-gá.

⁶ Te xití vehe-gá-áⁿ ñí quee úsá tnàhá espíritú xínú cuèchi núú-gá, te ñí ñí-xi ndécu ndíhi-xi tnúhu ndee ñí dandòho-xi ñáyíu, te xíñuhu-xi mee-ni dóó vâha, te súúni vâha càndoo, te chàhnhí, te yídúcúⁿnuu cínchú ní cuáha mee-ni dîhúⁿ cuááⁿ pèchú ndi úsá cue espíritú-áⁿ.

⁷ Te ñí quiti cúmí xínutnî núú núnñí xilé vâha ní sáñaha-di ñí caa sá nàhá tícúú ní cuáha mee-ni dîhúⁿ cuááⁿ xii ñí ñí espíritú-áⁿ, te xití nchaa tícúú-áⁿ ñíhú ñí sá ñíhú te xiáⁿ cútnùní sá Yá Ndióxi dandòho-gá ñáyíu ñuyíú, te dîu-gá cúú-gá Yá ndécú nchaa nduu nchaa quíú.

⁸ Te xití vehe-gá-áⁿ ñí chítú ñíhí, te ducaⁿ ñí quide-gá cuendá cutnùní iní ñáyíu sá ïo càhnu cuu-gá táxí tnùní-gá, te vá yòo ñí cuu quíhu xití vehe-gá-áⁿ ndéé ndíhi ndi úsá tnúndòho cada ndi úsá cue espíritú-áⁿ ñuyíú.

16

Tnúndòho cada-xi ñuyúú

¹ Te sátá dúcáⁿ te ní tecú dóho-í níhi ní cáháⁿ ìⁿ sá ní cáháⁿ xítí vehe Yá Ndióxi, te xáhaⁿ-xi xii ndi usá cue espíritú-áⁿ:

—Chí cuàháⁿ coyo-ndo sá ñúhú xítí nchaa tícúú néhé-ndó-áⁿ núú ñuyúú, chí sá ñúhú-áⁿ cúú-xí tñúndòho tendaha Yá Ndióxi sá cúú-xí nchaa ñáyíu ñuyúú —duha càchí sá càháⁿ-áⁿ.

² Te espíritú díhna ní sáháⁿ-xi ní coyo-xi sá ñúhú xítí tícúú néhé-xí-áⁿ ñuyúú, te nchaa ñáyíu ñùhu tñuní quiti ní quene xítí làmár ñáyíu ní chiñuhu sá ní natava ñàhá-yu xii-di, nchaa ñáyíu-áⁿ ní quené-yu ndíhyi tèhyú te súúni dándòho ñaha-xi xii-yu.

³ Te espíritú cúú ùú ní coyo-xi sá ñúhú xítí tícúú néhé-xí núú làmár, te ndute làmár-áⁿ ní nduu-xi níñí te càa-xi datná cáá níñí ñáyíu sa ní xihí, te nchaa quiti ñùhu xítí làmár-áⁿ ní xihí-güedi.

⁴ Te espíritú cúú ùní ní coyo-xi sá ñúhú xítí tícúú néhé-xí nchaa yúte ndíhi nchaa núú quènihni ndute, te ndute nchaa yúte-áⁿ ndíhi nchaa ndute quènihni-áⁿ ní nduu-xi níñí.

⁵ Te sátá dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndióxi, espíritú yíndàha ndute, te xáhaⁿ-xi xii Yá Ndióxi:

—Yòhó Dútú Ndióxi cúú-n Yáá quidé ndáa cuiti núu duha quide-n tendaha-n tñúndòho-a, te diu-ni-n cùu-n Yaá ndécú ndéé cútnàhá ní ngáva ñuyúú, te diu-ni-n cùu-n Yaá ndécú vitna te ñá túú tñàhí cuèchi-n. ⁶ Chí cue ñáyíu ñuyúú ní dácácã-yu níñí nchaa ñáyíu ní cáháⁿ tñúhu-n ndíhi nchaa dava-gá ñáyíu cùu cuendá-n, te ní sahní-yu nchaa ñáyíu-áⁿ, te vitna ní dátíu-n ndute ní nduu-xi níñí te ducaⁿ-ni càa ndute-áⁿ xihí-yu, te ducaⁿ tàú-xi ndohó-yu cuendá sá ní sahní-yu

cue ñáyíu cùu cuendá-n —duha càchí espíritú-áⁿ xáhaⁿ-xi xii-gá.

⁷ Te ní tecú tucu dóho-í ní cáháⁿ ìⁿ sá ní cáháⁿ núú nùtníi núú sácódó sá ndúú tãhú Yá Ndióxi, te xáhaⁿ-xi xii-gá:

—Ndáá sá yòhó Dútú Ndióxi Yaá ndácú quide nchaandi túhú sá vâha dândòho-n ñáyíu nàcuáa tàú-xi cunduú —duha càchí sá càháⁿ-áⁿ xáhaⁿ-xi xii-gá.

⁸ Te espíritú cúú cùmí ní coyo-xi sá ñúhú xítí tícúú néhé-xí núú nchíanchii cuendá nchíanchii-áⁿ cahmí-xi nchaa ñáyíu ñuyúú. ⁹ Te nchaa-yu ní ndòho vîhí-yu ní cáyú-yu, te cuèi ducaⁿ ní ndohó-yu dico ñá túú ní cuini-yu ndixi cuèchi iní-yu cuendá nchaa sá ñà túú vâha quidé-yu, te ni ñà túú ní càchí-yu sá ìo càhnu cuu Yá Ndióxi chí da ní cáháⁿ úhú-yu cuendá-gá, te diu-gá cúú-gá Yaá ducaⁿ ní tendaha tñúndòho-áⁿ sá cúú-xi-yu.

¹⁰ Te espíritú cúú úhúⁿ ní coyo-xi sá ñúhú xítí tícúú néhé-xí núú ndécú quiti ní quene xítí làmár-áⁿ táxi tñúni-di, te nchaa núú táxi tñúni-di ní cuu nee, te nchaa ñáyíu ñuyúú ndéé yáa-ná-yu nàcaxi nihnú-yu sá ndóhó-yu. ¹¹ Dico ni ducaⁿ ñá túú ní cuini-yu dãñá-yu ní ìⁿ sá cuèhé sá dúhá quidé-yu, chí da ní cáháⁿ úhú-yu cuendá Yá Ndióxi Yaá ndécú àndiú sá cuendá sá dándòho ñaha ndíhyi tèhyú ndèe-yu-áⁿ ndíhi nchaa dava-gá sá yâha-yu.

¹² Te espíritú cúú ìñú ní coyo-xi sá ñúhú xítí tícúú néhé-xí xítí yúte càhnu nani Eúfratés, te ndute yúte-áⁿ ní yíchí cuendá yâha cue tée yíndaha ñáyíu xíndecu ndàa xio nacuáa quène nchíanchii.

¹³ Te ní xiní-í ní quee ìⁿ espíritú cùndíhi yucu ñávâha yuhu quiti dééⁿ nání dragón, te ní xiní tucu-í ní quee tucu ingá espíritú cùndíhi yucu ñávâha yuhu quiti ní quene xítí làmár, te ní xiní tucu-í ní quee

tucu ingá espíritú cúndihí yucu ñávaha yuhu téé dándahú ñáiyu cächí sá cáháⁿ tnúhu Yá Ndióxi te ñá ndáá, te ndi nùní espíritú-áⁿ xíndáa-xi dátá cáá làhvá. ¹⁴ Te ndi nùní espíritú-áⁿ quidé-xí sá vǎ yǒo tnàhí ndàcu cada, te xica datacá-xi nchaa cue téé yíndaha ñaha xii ñáiyu xíndecu nihí ñuyú cuendá nàá-güedé mei ndùu cachí Yá Ndióxi coo tnúndòho cahnu vihi-gá, te diu mee Yá Ndióxi cúu-gǎ Yaá ío càhnu cuu. ¹⁵ Te Yaá cúu Xitohó-ó ní cachí-gá: “Cunaha-ndo chi nduu ñá túú yihí iní-ndó quixi-í núú ndécú-ndó, te cada-í dátá quidé ñádúhú. Te váha táhú nchaa nchòhó ñáiyu xíndecu túha, chi cùu-ndo dátá cue ñáiyu xíndecu túha xixíhnu-ni dóo-xi cuendá sá vǎ cúcàhaⁿ núú-yu dátá cúcàhaⁿ núú cuè ñáiyu ñá túú nihnu dóo-xi, te duha cáháⁿ-í cuendá sá nchòhó cundecu túha-ndo òré quexìo-í”, duha cächí-gá. ¹⁶ Te ndi nùní cue espíritú cúndihí yucu ñávaha-áⁿ ní dátá-cá-xi nchaa cue téé yíndaha ñaha xii ñáiyu, te ní taxi ndecu ñaha-xi ñⁿ xichi núú nání Armagedón, duha nani xíaⁿ tnúhu hebreaú.

¹⁷ Te espíritú cúu úsá ní coyo-xi sá ñúhú xití ticúú néhé-xí núú tàchí, te ní tecú dóho-í níhi ní cáháⁿ Yaa núcòo núú xilé váha xití vehe-gá, te cächí-gá:

—Xéhé-ñǎ cúmǎní te xínu cava nchaa tnúndòho tnúhu ndáhú — duha cächí-gá.

¹⁸ Te sáta dúcáⁿ te ní sáá nduté te ní cáháⁿ ñúhu, te súúni dùsaⁿ ní quide-xi, te níhi vihi ní tnáa ñuyú, te ndéé cútnáhá ní ngúndecu ñáiyu ñuyú te vátá ñⁿ xito-gá níhi tnáa dátá ní quide-xi. ¹⁹ Te ñuú cáhnú ío cùnuu nani Babiloniá ní quée dava-xi ní cuu-xi úní xichi, te nchaa ñuú cáá nihí ñuyú ní ngoyo nchaa vehe, chi Yá Ndióxi ní ndacu iní-gá nchaa sá cuéhé sá dúhá quide nchaa ñáiyu ñuú Babiloniá-áⁿ, te

ducaⁿ ní quide ñaha-gǎ xii-yu chi ío cùdééⁿ-gǎ núú-yu. ²⁰ Te nchaa tindúú ní ndóñúhú-xi cuèi nchaa tindúú ñuhu yichí ndécú xití lámár. ²¹ Te ní xiní-í ní cuuⁿ ñiñi nàhnu vihi ní ngaundodo-xi cue ñáiyu ñuyú, te nchaa ñiñi-áⁿ vée-xi dátá údico kílu, te cue ñáiyu ñuyú ní cáháⁿ úhú-yu cuendá Yá Ndióxi sá dúcáⁿ ní dácúúⁿ-gǎ ñiñi nàhnu vihi-áⁿ, chi ní cuu-xi ñⁿ tnúndòho cahnu vihi sá cúu-xi-yu.

17

Ñadìhí ndécú ichi díí iní

¹ Te núú úsá espíritú néhé ticúú-áⁿ, te ñⁿ-xi ní quixi-xi núú ndécú-í, te cächí-xi xii-í:

—Néhe ná quihíⁿ-ó dānehé ñáhà-í xii-n nchaa tnúndòho sá ndóhó ñadìhí ñaha ndècu ichi díí iní, te ñaha-áⁿ cúnùu-aⁿ núcóo-aⁿ núú ñúhú vihi ndute. ² Te ñaha-áⁿ ndécú díí iní-aⁿ ndihí nchaa cue téé yíndaha ñaha xii ñáiyu xíndecu nihí ñuyú, te nchaa dava-gǎ ñáiyu ñuyú ío iní-yu nchicúⁿ nihnú-yu quidé-yu nchaa nàcuáa quide ñaha-áⁿ —duha cächí espíritú-áⁿ.

³ Te òré ducaⁿ quide ñaha Espíritú Yá Ndióxi xii-í nàcuáa cächí iní-xi, te ñⁿ espíritú xínú cuèchi núú-gǎ ndécá ñaha-xi xii-í cuáháⁿ ñⁿ xití yucu, te xití yucu-áⁿ ní xiní-í ñⁿ ñadìhí yódó-áⁿ ñⁿ quiti ticuehé, te ndéé úsá díquí-di te úxí ndiqui-di, te nihí-di ndéé tnuní-di mee-ni tnúhu sá cáháⁿ úhú cuendá Yá Ndióxi. ⁴ Te ñadìhí-áⁿ nihnú-áⁿ dóo muràdu ndihí dóo ticuehé, te mee-ni sá ní cuáha dñúⁿ cuááⁿ, ndihí yúú váha sá nání pèrlá, ndihí nchaa dava-gǎ núú yúú váha, mee-ni nchaa xíaⁿ ní cuáha sá yíhí lõho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndáhá-áⁿ, te nùndaha-aⁿ ñⁿ ticúú ní cuáha mee-ni dñúⁿ cuááⁿ te ñúhu mee-ni sá cuéhé sá dúhá, te xíaⁿ cútnùní iní-ó sá cúu-áⁿ ñⁿ ñadìhí ñaha ndècu ichi cuehé ichi duha. ⁵ Te tneé-aⁿ ndéé tnuní ñⁿ tnúhu,

te cächí-xi: “Ñuú Babiloniá ñuú ío cùnuu, cada iní-ndó sá cúú-xí mèi ñadihí-a, te ñuú ñadihí-a cùu-aⁿ ñaha sanu ichi ñaha xii nchaa ñáyiu ñíhí ñáyiu ndècu ichi ñíhí iní, te nándi-gá nchaa sá cuèhé sá dúhá sànu ichi-aⁿ nchaa ñáyiu cadá-yu”, duha càháⁿ tnúhu ndèé tnuní tneé ñadihí-áⁿ. Te vá yòo tècú tnuní ná cuendá ducaⁿ càháⁿ tnúhu-áⁿ.⁶ Te ní cutnùní iní-í sá ñíhí ñàhá-áⁿ ní dácá-cá-áⁿ ñíhí ñáyiu cùu cuendá Yá Ndióxi ní sahi ñaha-aⁿ xii-yu, te ñáyiu ní xíhí-áⁿ cúu-yu ñáyiu ní càháⁿ váha cuendá Xitohó Jesu-crístú, te sá dúcáⁿ ní quide-aⁿ te ní nduu-aⁿ dàtná ñíhí ñáyiu quíhu. Te ío ní cuñúhu-í sá dúcáⁿ ní cuu ní xini-í.⁷ Te sá tá dúcáⁿ te espíritu xínú cuèchi núú Yá Ndióxi-áⁿ cächí tucu-xi xii-í:

—Vá ndèé dúcáⁿ cùñúhu-n, chi vitna na cächí tnúhu-í xii-n ñacuáa quèe-xi cuendá quiti ndèé úsá díquí-xi ndíhi úxí ndiqui-xi-áⁿ, ndíhi ñacuáa quèe-xi cuendá ñadihí ñaha yòdo ñaha xii-di-áⁿ.⁸ Te quiti ní xini-n-áⁿ cúú-dí ñíhí quiti sa ní xíndecu te vitna ñá túú-gá-di ndècu, te sáá nduu te quene-di yaú cùnú víhí sá ío nèhé cáá, te dàtnuní sáá nduu te quíhíⁿ-di núú ùhú núú ndàhú ni caa ni quíhíⁿ, te cue ñáyiu xíndecu ñuyú cuñúhu víhí-yu quiti-áⁿ chi cùu-di ñíhí quiti sa ní xíndecu ní cùu te sáá nduu cùndecu tucu-di, te ñáyiu ducaⁿ cùñúhu ñaha xii-di-áⁿ ñá túú yòdo tnuní-yu núú tütú núú yódó tnuní cue ñáyiu naníhí tãhú, chi ndéé cùtnàhá vátá ngãva-gá ñuyú ducaⁿ sa yòdo tnuní cue ñáyiu naníhí tãhú.

⁹ Te nchaa ñáyiu tècú tnuní xini ñuhu-xi caní váha iní-yu cuendá tnúhu-a. Te ndí úsá díquí quiti-áⁿ cada iní-ó sá cúú-xí úsá tándúú núú núcõo ñadihí-áⁿ.¹⁰ Te ndí úsá díquí quiti-áⁿ cada iní-ó sá cúú-xí úsá tñàhá cue téé yíndaha ñaha xii ñáyiu, te úhúⁿ cue téé-áⁿ

ñá túú-gá cùnùu-güedé vitna, te ñíhí téé-áⁿ cùnùu-dé vitna te ingá-dé vátá sáá-gá nduu cùnùu-dé, te na sáá nduu ducaⁿ cùnùu-dé te sacú-ni nduu cùnùu-dé.¹¹ Te quiti ní xíndecu ní cùu te ñá túú-gá-di ndècu vitna, cùu-di datná téé cùu uná yíndaha ñaha xii ñáyiu, te ñíhí-ni cùu-di ndíhi cue téé úsá yíndaha ñáyiu-áⁿ, te quiti-áⁿ sáá nduu cuíta nihnu-di quíhíⁿ-di núú ùhú núú ndàhú ni caa ni quíhíⁿ.

¹² Te ndí úxí ndiqui quiti-áⁿ cada iní-n sá cúú-xí úxí tñàhá cue téé quíndaha ñaha xii ñáyiu, dico vátá sáá-gá nduu cùnùu-güedé quíndaha ñaha-güedé xii-yu. Te cue téé-áⁿ níhí-güedé tnúhu ndee iní taxi tnuní-güedé ndíhi quiti-áⁿ, dico tnaa-ni taxi tnuní-güedé ndíhi quiti-áⁿ.¹³ Te ndí úxí cue téé-áⁿ cuu ñíhí-güedé taxi tnuní-güedé, te chindee-güedé quiti-áⁿ cuendá cuu ñíhí-güedé ndíhi-di cuendá taxi tnuní-gá-di.¹⁴ Te cue téé-áⁿ nàá-güedé ndíhi Yaá cáá dàtná cáá ñíhí mbéé quiti ní dancuèhé-güedé dico vá ndácú-güedé nàá-güedé ndíhi-gá chi cuíta-güedé. Te ñíhí-gá cúú-gá Yaá ío cùnùu taxi tnuní cuèi nchaa téé yíndaha ñaha xii ñáyiu, te ducaⁿ-ni taxi tnuní-gá cuèi nchaa dava-gá-yu. Te mee Yá Ndióxi ní cachí-gá nándi cùu nchaa ñáyiu cundecu ndíhi Yaá cáá dàtná cáá ñíhí mbéé quiti ní dancuèhé-güedé-áⁿ, te ñíhí-ni ñáyiu-áⁿ cúu-yu ñáyiu ní càháⁿ-gá te cúu-yu ñáyiu quide ndáá ndécú ichi-gá —duha cächí espíritu xínú cuèchi núú-gá.

¹⁵ Te ní cachí tucu espíritu-áⁿ xii-í:

—Ndute ñuhu núú núcõo ñadihí ñaha ndècu ichi ñíhí iní-áⁿ, ndute-áⁿ cada iní-n sá cúú-xí ñáyiu nchaa nációnⁿ, ndíhi ñáyiu nchaa ñuú, ndíhi ñáyiu xíndecu nchaa xichi, ndíhi ñáyiu càháⁿ ndí ñíhíⁿ ndí ñíhíⁿ núú tnúhu.¹⁶ Te dàtná ní cachí-í sá ndí uxí ndiqui quiti ní

xiní-n-ǎⁿ cúu-xí ǔxí tñàhá cue téé quíndaha ñàha xii ñáyíu, te cue téé-áⁿ cuu úhú iní-güedé ñadihí ñaha ndècu ichi díí iní-áⁿ, te ni vǎ cáda cuèndá ñáhá-gǎ-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé. ¹⁷ Te mee Yǎ Ndiǒxí ducaⁿ dàcaháⁿ-gǎ iní cue téé-áⁿ cuèndá cada-güedé nàcuáa cuíní mée-gǎ, te xiǎⁿ núu cuu ìⁿnuu-güedé cuèndá cúñaha-güedé xii quiti-áⁿ cada-di núu-güedé taxi tñùní-di, te ducaⁿ-ni càda-di núu-güedé taxi tñùní-di ndéé ná sǎá nduu càda Yǎ Ndiǒxí nàcuáa ní cachí-gǎ. ¹⁸ Te ñadihí ñaha ní xiní-n-ǎⁿ cada iní-n sǎ cúu-áⁿ ñúú cáhnú ñúú ío cùnuu, te ñúú-áⁿ ndécú tée ío-gǎ cùnùu taxi tñuní nchaa cue téé yíndaha ñaha xii ñáyíu xíndecu ñuyíú —duha ní cachí espíritú xínú cuèchi núú Yǎ Ndiǒxí xii-í.

18

Ní naa ñúú Babiloniá

¹ Te ducaⁿ te dátñuní ní xiní tucu-í ingǎ espíritú xínú cuèchi núú Yǎ Ndiǒxí, te ndéé andíu nì dátǎsaⁿ-xi te ní dáyehe-xi ñuyíú, te espíritú-áⁿ ío cùnuu-xi. ² Te níhi ní cáháⁿ-xi, te cǎchí-xi:

—Ní sǎá nduu nàa ñúú cáhnú ñúú cùnùu nani Babiloniá, te xiǎⁿ-nǎ natacǎ nchaa núú espíritú cúndihí yucu ñávǎha cundecu-xi, te vǎ queé-gǎ-xi xiǎⁿ, te ðíu-ni xiǎⁿ natacǎ nchaa quiti ndáva núú tàchí nchaa quiti ndehe quide, quiti ñá túú tñàhá iní ñáyíu te xiǎⁿ-nǎ cundecu-güedi. ³ Te ducaⁿ chi ñáyíu ñúú-áⁿ sánú íchí-yu nchaa ñáyíu níhí ñuyíú ichi cuèhé ichi duha, te ducaⁿ-ni xínchícuⁿ nihnu nchaa ñáyíu ñuyíú xíquidé-yu, te nchaa cue téé cùnuu yíndaha ñaha xii ñáyíu, cue téé-áⁿ cúu ìⁿnuu-güedé ndihí nchaa ñáyíu ñúú-áⁿ quidé-güedé ndihí-yu nándi sǎ cuèhé sǎ dúhá. Te nchaa

ñáyíu ðico nándi sǎ díco queheⁿ ñáyíu ñúú-áⁿ ío cùu cuicá-yu, te ducaⁿ queheⁿ nchaa ñáyíu ñúú Babiloniá-áⁿ nchaa sǎ díco ñáyíu-áⁿ cuèndá xiǎⁿ cǎnehé-yu ndécú-yu ichi cuèhé ichi duha —duha cǎchí espíritú-áⁿ.

⁴ Te sǎtá dúcáⁿ te ní tecú dóho-í ní cáháⁿ ìⁿ sǎ ní cáháⁿ andíu, te cǎchí-xi:

—Nchaa nchòhó ñáyíu cùu cuendá-í quee-ndo ñúú Babiloniá cuèndá sǎ vǎ cúndècu-ndo tñahá-ndó ichi cuèhé ichi duha dátñá ndécú ñáyíu ñúú-áⁿ, te ducaⁿ te vǎ quíní-ndó tñúndòho tñúhu ndàhú sǎ quíxí cùu xii ñáyíu-áⁿ.

⁵ Chi ío cuèhé cuèchi-yu ní cuu ndècu núú Yǎ Ndiǒxí, te mee-gǎ nǎhá-gǎ nàcuáa ndùu nchaa sǎ quidé-yu. ⁶ Te nchòhó ñáyíu cùu cuendá-í, chí nánchòcáva dandòho-ndo ñáyíu-áⁿ dátñá quidé mée-yu dándohó-yu cue ñáyíu, te úú xito nanchòcáva-ndo dándohó-ndó-yu, te ducaⁿ càda-ndo cuendá ío-gǎ ndohó-yu. ⁷ Te

íó quide cahnú-yu mée-yu, te ío cùdíí iní-yu quidé-yu nchaa núú sǎ cuèhé sǎ dúhá, te sǎ dúcáⁿ xidó-yu quidé-yu nchaa sǎ cuèhé sǎ dúhá núu xiǎⁿ nchòhó ío dándohó-ndó-yu, te ducaⁿ chí ñáyíu ñúú-áⁿ sání iní-yu, te cǎchí-yu: “Nchúhú cúu-ndí dátñá ìⁿ ñadihí ñá túú queé, ñaha ío cùnuu yíndaha ñaha xii ñáyíu. Te ducaⁿ sǎtnahá-xi cùu-ndí chí nchaa-ni nduu ío váha cùu iní-ndí ndécú-ndí, te ni vǎ sǎá ìⁿ nduu te ndíhú iní-ndí”, duha cǎchí ñáyíu ñúú-áⁿ. ⁸ Te sǎ cuèndá nchaa sǎ quidé-yu-áⁿ núu xiǎⁿ ìⁿ-ni ndùu sǎá tñúndòho sǎ cúu-xí-yu, te ío ndohó-yu chí ñúú-yu coo tnamá, te coo cuèhé cahni ñaha-xi xii-yu, te ío ndíhú iní-yu, te cáyú ñúú-yu, te ducaⁿ ndohó-yu chí Dútú Ndiǒxí ío cùnuu-gǎ, te ðíu-gǎ ducaⁿ dándohó ñaha-gǎ xii-yu —duha cǎchí sǎ ní cáháⁿ andíu-áⁿ.

⁹ Te nchaa cue téé cùnuu yíndaha

ñaha xii ñáyiú ío ndáhyú-güedé sá ndìhú iní-güedé òré ná quíni-güedé quene ñúhmá cáyú ñuú cue ñáyiú Babiloniá, chi ñuú cue téé-áⁿ cúu-güedé cue téé cùu ñⁿnuu ndihí-yu quide-güedé nchaa núú sá cuèhé sá dúhá ndihí-yu, te ducaⁿ chi ío tnàhá iní-güedé cundecu-güedé ndihí-yu ichi ñⁿ iní. ¹⁰ Te cue téé-áⁿ xica-ná cundecu-güedé cundehe-güedé nàcuáa ndoho nchaa ñáyiú ñuú-áⁿ sá yùhú-güedé nchaa tnúndòho-áⁿ, te cachí-güedé:

—¡Ndàhú nchòhó ñáyiú ñuú cáhnú ñuú cùnùu nani Babiloniá! Chi uuⁿ ní ní sáá nchaa tnúndòho tnúhu ndàhú sá cúu-xí-ndó —duha cachí-güedé.

¹¹ Te nchaa ñáyiú dīco nchaa sá nándihí ñáyiú ñuú Babiloniá tnàhá-yu ío ndáhyú-yu sá ndìhú iní-yu chi vá yòo-gá cuaaⁿ nchaa sá dīcō-yu. ¹² Te dīcō-yu nchaa sá ní cuáha mee-ni dīhúⁿ cuáaⁿ, ndihí nchaa sá ní cuáha mee-ni dīhúⁿ cuixíⁿ, te dīco tucú-yu sá ní cuáha mee-ni yúú vāha yúú nání pèrlá, ndihí nchaa dava-gá sá ní cuáha dava-gá yúú vāha, te dīcō-yu tnàhá dóó sèdá, ndihí ingá núú dóó vāha sá nání līnú, ndihí dóó muràdú, ndihí dóó tícuèhé te mee-ni dóó vāha cùu-xi, te dīco tucú-yu tnàhá yutnu sá sàháⁿ tnámí, te dīco tucú-yu sá ní cuáha sá nání mārfil, te dīco tucú-yu sá ní cuáha mee-ni yùtnu vāha sá ío ndéyáhu, te dīco tucú-yu sá ní cuáha mee-ni cáá, ndihí sá ní cuáha mee-ni sá nání bròncé, ndihí sá ní cuáha mee-ni yúú vāha yúú nání mār-mól. ¹³ Te dīco tucú-yu canèlá, ndihí yúcu sá sàháⁿ tnámí, ndihí dúsa sá sàháⁿ tnámí, ndihí yúcu sá nání mīrrá, te dīco tucú-yu ingá núú dūsa sá sàháⁿ tnámí nani olivánú, te dīco tucú-yu ndudí ndéhé yoho yāha stilé, ndihí acití yutnu nani olívú, ndihí yuchi triú vāha, te dīco tucú-yu nchaa dava-gá núú triú, te

dīcō-yu tnàhá mbéé, ndihí cuàyu, ndihí nchaa dava-gá quití tatá, te dīco tucú-yu tnàhá carrèta, te dīco tucú-yu tnàhá ñáyiú xīnu cuechi, ñáyiú ñá túú tnàhí dàná quee núú chíúⁿ pàtróoⁿ-xi. ¹⁴ Te nchaa ñáyiú dīco-áⁿ cūñàhá-yu xii ñáyiú ñuú Babiloniá:

—¡Nchaa sá ío cùdíí iní-ndó cūndecu ndihí-ndo ní cuu vá ndácú-gā-ndó nihí-ndó vitna, te nchaa sá sání iní-ndó sá ío nchaa cāa ndecu ndihí-ndo ndihí nchaa dava-gá sá ndécú ndihí-ndo ní ndihí nihnu-xi vitna, te ní ñⁿ nduu-gá vá nihí-ndó ní ñⁿ xīáⁿ cundecu ndihí-ndo! —duha cúñaha ñáyiú-áⁿ xii-yu.

¹⁵ Te nchaa ñáyiú ní cuu cuica ní xóo dīco nándi nchaa sá ní xóo dīco ní queheⁿ cue ñáyiú ñuú Babiloniá, nchaa ñáyiú-áⁿ xica-ná cundecú-yu cundèhé-yu sá yùhú-yu cuèndá nchaa tnúndòho sá yāha cue ñáyiú ñuú-áⁿ, te ío ndáhyú-yu sá ndìhú iní-yu sá dúcáⁿ ndòho ñáyiú-áⁿ. ¹⁶ Te cúñaha tucú-yu:

—¡Ndàhú nchòhó ñáyiú xīndecu ñuú cáhnú ñuú nání Babiloniá! Chi nchòhó cúu-ndó dàtná ñⁿ ñadihí ñaha nihnu dóó vāha dóó muràdú, ndihí dóó tícuèhé, te mee-ni sá ní cuáha dīhúⁿ cuáaⁿ, ndihí mee-ni sá ní cuáha yúú vāha yúú nání pèrlá, ndihí sá ní cuáha dava-gá yúú vāha sá ío vii ndāa mee-ni nchāa xīáⁿ ní cuáha sá yīhí lōho-aⁿ, ndihí sá ñúhú dūcúⁿ-aⁿ, ndihí sá ñúhú dūcúⁿ ndàhá-áⁿ. ¹⁷ ¡Te uuⁿ ní ndihí nihnu nchaandi túhú sá ndécú ndihí ñadihí-áⁿ, te ducaⁿ sātñahá-xi cùu nchòhó ní cùu! —duha cúñaha-yu xii cue ñáyiú ñuú Babiloniá.

Te nchaa cue téé dàcaca barcú ndihí nchaa cue téé tàxi tnuní bàrcú-áⁿ, ndihí nchaa ñáyiú ñùhu xití bàrcú-áⁿ, ndihí nchaa dava-gá cue téé nándi chiúⁿ quide ndecu lamár, nchaa ñáyiú-áⁿ xica cūndecú-yu ¹⁸ te quíni-yu òré quene ñúhmá cáyú ñuú cue ñáyiú

Babiloniá, te níhi cáháⁿ-yu, te cachí-yu:

—Ni ñⁿ ñuú ñá túú nŭtnahá-xi ñuú Babiloniá —duha cáháⁿ-yu.

¹⁹ Te nchaa ñáyiⁿ-áⁿ chidó-yu ñuhu díquǐ-yu, te ngüíta-yu ndáhí-yu sá ndihú iní-yu, te níhi cáháⁿ-yu, te cachí tucú-yu:

—¡Ndàhú nchòhó ñáyiⁿ xĩndecu ñuú cáhnú ñuú nání Babiloniá! Chì ío cuica-ndo ní cùu, te diu-ndo ní quide ní cuu cuica nchaa ñáyiⁿ ndècu ndihí barcú, te vitna uuⁿni ní ñaa-ndo ndihí ñuú-ndó —duha cachí-yu.

²⁰ Te nchaa nchòhó ñáyiⁿ ndècu andiⁿ ío chí cúdǐ iní sá dúcáⁿ dándoho Yá Ndiòxí nchaa ñáyiⁿ ñuú Babiloniá-áⁿ, te diu-ni ducaⁿ chí cúdǐ iní nchaa nchòhó cue téé ní cachí Xítoho Jesucristú cáháⁿ tnúhu-gá, te diu-ni ducaⁿ chí cúdǐ iní nchaa nchòhó cue téé cáháⁿ tnúhu Yá Ndiòxí nàcuáa dàcahu iní ñáhá-gá xii-ndo, te diu-ni ducaⁿ chí cúdǐ iní nchaa dava-gá nchòhó ñáyiⁿ cùu cuendá-gá cuendá sá dúcáⁿ dándoho-gá nchaa ñáyiⁿ ñuú-áⁿ. Te ducaⁿ càda ñaha-gá xii cue ñáyiⁿ-áⁿ cuendá nchaa sá quidé ñáhá-yu xii-ndo.

²¹ Te sátá dúcáⁿ te ní xiní-í ñⁿ espíritú xinú cuèchi núú Yá Ndiòxí, te espíritú-áⁿ ño ndee-xi te ní queheⁿ-xi ñⁿ yúú cáhnú dàtná càhnu yódó te ní dáquèe-xi xití ndute làmár, te càchí-xi:

—Dàtná ní quide-í ní dáquèe-í yúú xití ndute ducaⁿ càda-xi ñuú cáhnú ñuú Babiloniá, chí ñáyiⁿ ñuú-áⁿ ño ndihí naá-yu ndihí ñuú-yu, te vá ñⁿ ndùu ñⁿ quíú-gá quini ñáhá ñáyiⁿ xii-yu. ²² Te ni ñⁿ-gá ñáyiⁿ càni arpá, te ni ñⁿ-gá ñáyiⁿ tiú vǐlu, te ni ñⁿ-gá ñáyiⁿ tiú cútú, te ni ñⁿ-gá yaá vá cóo ñuú-áⁿ, te ni ñⁿ-gá cue ñáyiⁿ xiní cada ñⁿ núú chiúⁿ vá cóo-gá, te ni vá yóo-gá canehe chiúⁿ yúú cúú yódó mullnú.

²³ Te ni ñⁿ-gá ñuhú vá cùndècu ñuú-áⁿ, te ni ñⁿ nduu-gá vá cóo víco tnándaha, te ñáyiⁿ ñuú-áⁿ ñáyiⁿ quide ndáhú cúu-yu ñáyiⁿ ío-gá cuicá-yu dàcúúxí ñáyiⁿ quide ndáhú xĩndecu nihí ñuyíú, dico nchaa-yu naá-yu chí quide nduú-yu te ío dándahú-yu cue ñáyiⁿ ñuyíú sá dúcáⁿ quidé-yu.

²⁴ Te diu-ni ñuú-áⁿ ní dácácá-yu níñí cue téé ní cáháⁿ tnúhu Yá Ndiòxí, te diu-ni ducaⁿ ní quidé-yu nchaa dava-gá cue ñáyiⁿ cùu cuendá-gá, te diu-ni-yu quide xísahni tnàha ñáyiⁿ ñuyíú —duha càchí espíritú-áⁿ.

19

¹ Te sátá dúcáⁿ te ní tecú dóho-í níhi ní cáháⁿ cuéhé víhí ñáyiⁿ andiⁿ, te càchí-yu:

¡Ío càhnu cuu Yá Ndiòxí!, chí diu-gá cúú-gá Yaá ní dácácu nihnu ñaha xii-o núú ùhú núú ndàhú, te ío cùnuu-gá, te mee-ni sá vǎha quide-gá,

² te mee-gá ío váha ndáá quidé-gá quidé ndáá-gá cuèchi nchaa ñáyiⁿ,

chí diu-gá ní dáquihíⁿ-gá ñadihí ñaha ndècu ichi dǐ iní núú ùhú núú ndàhú,

chí diu-aⁿ ní sanu ichi-aⁿ ñáyiⁿ ñuyíú ichi cuéhé ichi duha,

te ducaⁿ ní dáquihíⁿ ñáhá-gá xii-aⁿ núú ùhú núú ndàhú chí nàchinaa-gá sá ní sahní-aⁿ cue ñáyiⁿ ní xinú cuechi núú-gá.

Duha càchí-yu.

³ Te càchí tucú-yu:

—¡Ío càhnu cuu Yá Ndiòxí!, chí nchaa nduu nchaa quíú ducaⁿ-ni quène ñúhmá núú ñúhú ñaha-áⁿ càyú-aⁿ —duha càchí-yu.

⁴ Te ndí òcò cùmí cue téé cùu sacuéhé xĩndecu-áⁿ ní ngüíñí xití-güedè núú Yá Ndiòxí núú núcòo-gá táxí tnùní-gá, te tnàhá cue quití cùmí xĩnutnǐ-áⁿ ní ngüíñí

xítí-güedi núú-gă, te cue téé-án cächí-güedé ndihi cue quiti-án:

—Sá ndáa sá ío cànhu cuu Yá Ndiöxí —duha cächí-güedé ndihi cue quiti-án.

⁵ Te sátá dúcáⁿ te ní tecú dóho-í ní cáháⁿ ìⁿ sá ní cáháⁿ mei núú nútní xilé váha núcáo Yá Ndiöxí, te cächí sá cáháⁿ-án:

Nchaa nchòhó ñáyiú xínu cuechi núú Yá Ndiöxí, ñu-ni nchòhó ñáyiú nèhe sá yíñuhu núú-gă,

cáháⁿ-ndó sã ío cànhu cuu-gá cuèi cùnno-ndo àdi ñá túú cùnno-ndo.

Duha cächí sá cáháⁿ-án.

Èⁿ vico cùu datná vico tnãndaha

⁶ Te sátá dúcáⁿ te ní tecú dóho-í ní cáháⁿ cuéhé víhí ñáyiú andiú, te òré ducaⁿ ní cáháⁿ-yu te ní quide-xi dàtná quidé-xí núú xícá cuéhé víhí ndüte, te ní quide tucu-xi dàtná quidé-xí òré cáháⁿ níhi víhi ñúhu, te cächí-yu:

Ío cànhu cuu Dútú Ndiöxí Yaá cúú Tátá-ó! Te ío cùnno-gá táxi tnùnigá, te quide-gá nchaandi túhú sá váha.

⁷ Te ío chí ná cùdíí iní-ó, te chí ná cächí-ó sã ío cànhu cuu Yá Ndiöxí,

chi vitna ní sáá nduu càda Yaá cáá dàtná cáá ìⁿ mbéé quiti ní dánicuéhé-güedé ìⁿ vico, te cùu-xi datná vico tnãndaha.

Te nchaa ñáyiú cùu cuendá-gá sa ní ndihí-yu sa ndècu túha-yu cundecú-yu vico-án, te cada iní-ó sã ñáyiú-án cùú-yu dàtná ìⁿ ñadìhí xíchí tnãndaha ndihi-gá,

⁸ te ñáyiú-án ní nduu táhü-yu cuíhnú-yu dóó váha dóó chàhnchí sá ío váha càndoo.

Duha cächí-yu.

Te sátá dúcáⁿ ní nduu táhü ñáyiú cùu cuendá Yá Ndiöxí dóó váha ñíhnú-yu, xiáⁿ cùtnuní iní-ó sã cùú-yu ñáyiú quide ndáá núú-gă.

⁹ Te ìⁿ espíritú xínu cuèchi núú Yá Ndiöxí ní cächí tnúhu-xi xii-í, te cächí-xi:

—Chido tnùnín ìⁿ núú tùtú nàcuáa ña cáháⁿ-í-a: “Váha táhü nchaa ñáyiú ní cáháⁿ ñáhá Yaá cáá dàtná cáá ìⁿ mbéé quiti ní dánicuéhé-güedé cundecú-yu vico, te vico-án cúú-xi dàtná vico tnãndaha cada-gă”, te duha chido tnùnín chi tnúhu-a cùu-xi tnúhu ndáá tnúhu Yá Ndiöxí —duha cächí espíritú-án.

¹⁰ Te ní ngüíñí xítí-í núú espíritú-án cuendá chiñuhu-í-xi ni cùu, te ní cächí-xi:

—Vá dúcáⁿ càda-n, chi tnàhá-í dícó xínu cuèchi-í núú Yá Ndiöxí dàtná quidé-n xínu cuechi-n núú-gă ndihi nchaa dava-gá ñáyiú ndècu ndihí-n ichi-gá, ñáyiú nchicúⁿ ni hnu quide ni yuhu ni iní nchaa nàcuáa cáháⁿ Xitohó Jesucristú, te núú xiáⁿ cächí-í sá vá dúcáⁿ càda-n, chi mee Yá Ndiöxí chiñuhu-n —duha cächí espíritú-án.

Te nchaa cue téé cáháⁿ tnúhu Yá Ndiöxí cáháⁿ-güedé nàcuáa nduu tnúhu cáháⁿ Xitohó Jesucristú.

Cuendá Yaá yódó ìⁿ cuayú cuixíⁿ

¹¹ Te ní xiní-í nchi andiú, te ní xiní-í ní quee ìⁿ Yaá yódó-gă ìⁿ cuayú cuixíⁿ. Te Yaá-án nánigă Yaá quidé ndáá cuiti, duha nàni-gă. Te quide-gá nchaa sá cáháⁿ-gă, te ío váha quide ndáá-gă cuèchi nchaa ñáyiú, te nchaa ñáyiú nàa ndihi ñaha xii-gă ío váha xiní-gă nàcuáa cada ñaha-gă xii-yu chi ío ndáá quidé-gă. ¹² Te tinùu-gă dáyèhé-xi dàtná dáyèhé ñuhú, te titní coróná ñuhú díquí-gă, te nèhe-gă ìⁿ sá ndéé ñu-gă, te vá yóo ìⁿ cùtnuní iní-xi nása cuáháⁿ tnúhu-án, chi ìⁿ dii díi-ni mee-gă náhá-gă nàcuáa cáháⁿ-xi.

¹³ Te Yaá-án ñíhnú-gă ìⁿ dóó ní cuu mee-ni ñíñí, te Yaá-án cächí tnúhu-gă nchaa nàcuáa sàni iní Yá Ndiöxí, núú xiáⁿ nánigă Tnúhu Yá Ndiöxí. ¹⁴ Te sátá-gă nchicúⁿ nchaa

espíritu xínú cuèchi núú Yá Ndiòxí, te cue espíritu-áⁿ cúu-xí dàtná sandadú, te xíxihnu-xi dóó cuixíⁿ dóó vâha sá cãndò, te xíxódó-xi cuàyú cuixíⁿ. ¹⁵ Te yuhu Yaá yódónù-áⁿ quéné ìⁿ yuchí cáhnú, te ndihí yuchí-áⁿ dãnícuehè-gá nchaa ñáyiú xĩndecu ñuyú, te ío dandòho ñaha-gá xii-yu, te dàtná quidé tée quihni ndéhé yoho yâha stilé ducaⁿ sãtnahá-xi cada ñaha-gã xii-yu, chi ío dandòho ñaha-gã xii-yu cuëndá sá ío cùdéeⁿ-gã. Te mee-gã ío cùnuu-gá táxi tñuní-gá, te quide-gá nchaandi túhú sá vâha. ¹⁶ Te sátá dõó níhnú Yáá-áⁿ ndihí núú ticácáⁿ-gã yódó tñuní nãcuáa nãni-gá, te duha càháⁿ-xi: “Tée ío cùnuu taxi tñuní ñáhá xii nchaa cue tée yĩndaha ñaha xii ñáyiú ndihí nchaa dava-gá ñáyiú”, duha ndée tñuní sátá dõó-gã-áⁿ ndihí ticácáⁿ-gã-áⁿ.

¹⁷ Te dàtnúní ní xini-í ìⁿ espíritu xínú cuèchi núú Yá Ndiòxí nùtní-xi núú nchĩcanchii, te níhi ní càháⁿ-xi, te xãha-xi xii nchaa quiti ndava núú tãhí:

—Nchaa nchòhó quiti ndàva, chí táquixi chi caxi-ndo nchaa sá ñi quide túha Yá Ndiòxí, ¹⁸ chi caxi-ndo cùñú nchaa cue tée yĩndaha ñaha xii ñáyiú, ndihí cuñú nchaa cue tée tàxi tñuní ñáhá xii cue sandadú, ndihí cuñú nchaa cue tée ío ñí xĩndáa, ndihí cuñú nchaa cuàyú, ndihí cuñú nchaa cue tée ní xódó ñaha xii-güedi, ndihí cuñú nchaa dava-gá ñáyiú, ñáyiú ñá túú tñahí ni dàñá quee núú chíúⁿ pãtróóⁿ-xi, ndihí cuñú nchaa ñáyiú ní dàñá ñi quee núú chíúⁿ pãtróóⁿ-xi, ndihí cuñú nchaa ñáyiú cùnuu, ndihí cuñú nchaa ñáyiú ñá túú cùnuu, te nchaa cuñú-áⁿ caxi-ndo —càhí espíritu-áⁿ xãhaⁿ-xi xii nchaa quiti-áⁿ.

¹⁹ Te sátá dúcáⁿ te ní xini tucu-í quiti ní quene xití làmár, ndihí nchaa cue tée yĩndaha

ñaha xii ñáyiú, ndihí nchaa cue tée cùu sandadú-güedè ní naníhí tñahá-güedè ndihí quiti-áⁿ cuëndá cuu ìⁿnuu-güedè ndihí-di nãá-güedè ndihí Yaá yódó cuàyú-áⁿ, ndihí nchaa cue espíritu cúu sandadú ndihí-gá. ²⁰ Te cue espíritu cúu sandadú ndihí Yaá-áⁿ ñi tñi-xi quiti-áⁿ, ndihí tée ío dandahú ñáhá xii ñáyiú càhí sá càháⁿ tñúhu Yá Ndiòxí te ñá ndãá sá càháⁿ-dé tñuhu-gá, te ñi-ni tée-áⁿ ñi quide-dé titni núú sã vã yõo tñahí ndãcu cada núú quiti-áⁿ. Te sá dúcáⁿ ñi quide tée-áⁿ xiãⁿ ní dandahú-dé ñáyiú ní sãndáa iní-yu ní quée-yu tñuní quiti-áⁿ, te ní chiñùhú-yu sá ñi dãndácú ñahá-yu xii-di, te cue espíritu-áⁿ ní dáquée-xi quiti-áⁿ núú ñùhú núú ñùhú àzufré càyú-xi, ndihí tée ducaⁿ dandahú ñáhá xii ñáyiú-áⁿ, te xiãⁿ cuhuⁿ tée-áⁿ ndihí quiti-áⁿ, te ío ndoho-dé ndihí-di. ²¹ Te ndihí yuchí cáhnú sã quéné yùhu Yaá yódó cuàyú-áⁿ ñi sahni-gã nchaa dava-gá cue tée cùndihí quiti-áⁿ, te nchaa cue quiti ndàva ní chítú xití-güedi ní xexi-güedi cuñú nchaa cue tée-áⁿ.

20

Úxí ciendú cuía

¹ Te sátá dúcáⁿ te ní xini-í ìⁿ espíritu xínú cuèchi núú Yá Ndiòxí ní quee-xi andíu, te nùndaha-xi ndacaá nacaáⁿ-xi yèhe ìⁿ yaú cùnú víhí núú cùndècu sãcuíhná, te nùndaha tucu-xi ìⁿ cadená cáhnú. ² Te espíritu-áⁿ ñi tñi-xi quiti déeⁿ nãní drãgón, te ñi-ni quiti-áⁿ cúu-dí mèi yucu ñãvãha sã nãní sãcuíhná, te ñi xiãⁿ ní nduu-xi cóo ndée sanaha. Te espíritu-áⁿ ñi dácútú ñaha-xi xii-di, te ducaⁿ-ni cùndutu-di ndée xínu úxí ciendú cuía. ³ Te sátá ñi dácútú ñaha espíritu-áⁿ xii-di te ní dáquée ñaha-xi xii-di yaú-áⁿ chi ñi yaú-áⁿ tàú-di quée-di cundecu-di. Te ní nacadí-xi yuyèhe yaú-áⁿ, te ní tee-xi sèyú yuyèhe-áⁿ cuëndá sá vã

quéné-gã-di dandàhú-di cue ñáyi
ñuyú, te xiáⁿ cundedí nihnu-di
ndéé xínu úxí cièndú cuía. Te
sátá ná yáha úxí cièndú cuía-áⁿ te
nandáxi-di te quene-di yaú núú
ñúhú-dí-áⁿ caca cuu tnaa-di ñⁿ úú
nduu.

⁴ Te dàtnùní ní xiní-í xínutnì ùtí
xilé váha, te xiáⁿ xínucóo ncha
ñáyi ní ngúndecu ndihí tnúhu ndee
íní cada ndáá cuéchi ncha ñáyi, te
ní xiní-í xíndecu tnàhá cue ñáyi ní
xehndé-güedé dúcúⁿ-xi cuèndá sá
ní cáháⁿ-yu tnúhu Yá Ndióxi, ndihí
cuèndá sá ní cáháⁿ váha-yu cuèndá
Xítóhó Jesucristú. Te diu-ní ñáyi-áⁿ
cúu-yu ñáyi ñá túú ní chĩñuhú-yu
quiti ní quene xití lámár-áⁿ, te
ní ñà túú ní chĩñuhú-yu sá ní
dándácú ñáyi ní natava ñàhá-yu
xii-di, te ní ñà túú ní dàñá-yu
mèe-yu quée-yu tnuní quiti-áⁿ chi
ní tnéé-yu te ní ndàhá-yu ñá túú
ní dàñá-yu quée tnuní-di. Te ní
xiní-í ní ndoto cue ñáyi-áⁿ cuèndá
tnàhá-yu cunúú-yu taxi tnuní-yu
ndihí Xítóhó Jesucristú úxí cièndú
cuía. ⁵ Te dava ñáyi ní xihí ñá
túú ní ndótó-yu, chi ndéé yáha úxí
cièndú cuía te dàtnùní ndotó-yu. Te
ñáyi ní xiní-í ní ndoto-áⁿ cúu-yu
ñáyi ní ndoto díhna nuu. ⁶ Te
ío váha ní tnahá ncha ñáyi ní
nduu táhú ní ndoto díhna nuu,
chi cue ñáyi-áⁿ ío cùdiú-yu núú
Yá Ndióxi, te ncha ñáyi-áⁿ vã
quihíⁿ-yu núú ùhú núú ndàhú,
te ñáyi-áⁿ cúu-yu dutú ndécú-yu
núú Yá Ndióxi ndihí núú Xítóhó
Jesucristú, te ñáyi-áⁿ cunúú-yu
dàtná cunúú Xítóhó Jesucristú, te
cunuu ndihí ñàhá-yu xii-gá úxí
cièndú cuía.

⁷ Te sátá ná yáha úxí cièndú
cuía-áⁿ te sácúíhná quee-xi núú
yíndedí nihnu-xi-áⁿ, ⁸ te ngúíta
tucu-xi dandàhú-xi ncha ñáyi
xíndecu nihí ñuyú, te cuéi ñáyi
ñúú Góg, te cuéi ñáyi ñúú Màgóg
ducaⁿ quihíⁿ-xi dandàhú ñàhá-xi

xii-yu, te datácá-xi ncha ñáyi
cuèndá nàá-yu, te cuéhe víhí-yu
dàtná cuéhe ñuhu cúchí lámár.
⁹ Te ncha ñáyi-áⁿ tñi-yu ichi
quihíⁿ-yu ñⁿ ichi sá cuàháⁿ núú
cáá ñⁿ yodo cahnu vihi, te sáá-yu
núú xíndecu ñáyi cùu cuèndá
Yá Ndióxi, te ñáyi-áⁿ chidócó-yu
cue ñáyi cùu cuèndá-gá-áⁿ ndihí
ñúú-yu, te ñúú-áⁿ ío cùu iní-gá,
dico mee Yá Ndióxi dangoyo-gá
ñuhú cahmi-gá ncha ñáyi
ducaⁿ chidoco ñaha xii ñáyi cùu
cuèndá-gá-áⁿ, te ncha ñáyi-áⁿ
cuú. ¹⁰ Te sácúíhná sã dúcáⁿ
dandàhú ñàhá xii ñáyi chidoco
ñaha xii ñáyi cùu cuèndá Yá
Ndióxi-áⁿ dàquée ñaha-gã xii-xi núú
ñuhú núú ñuhú àzufre càyú-xi, te
diu-ni xiáⁿ sa ñuhu quiti ní quene
xití lámár, ndihí téé ní dandàhú
ñáyi ní xáhaⁿ-dè xii-yu sá cáháⁿ-dé
tnúhu Yá Ndióxi te ñá ndáá sá
cáháⁿ-dé tnúhu-gá, te xiáⁿ cuhuⁿ-xi
ndoho-xi ní caa ní quihíⁿ ndihí quiti
ní quene xití lámár, ndihí téé càchí
sá cáháⁿ tnúhu Yá Ndióxi te ñá ndáá
sá cáháⁿ-dé tnúhu-gá.

Cùndáá cuéchi ñáyi

¹¹ Te ní xiní-í nùtnì ñⁿ xilé váha
xilé cuixíⁿ, te núú xilé-áⁿ núcóo ñⁿ
Yaá. Te ndèhe Yaá-áⁿ ní ndóñuhú
àndiu ndihí ñuyú-a, te ducaⁿ ní
ndóñuhú-xi chi vá cùndecu-gá-xi.
¹² Te sátá dúcáⁿ te ní xiní-í ncha
ñáyi ní xihí ní cùu, ñáyi cunuu
ndihí ñáyi ñá túú cunuu xínutnì-yu
núú Yáá núcóo núú xilé váha-áⁿ, te
Yaá-áⁿ cúu-gã Yá Ndióxi, te óré-áⁿ ní
nandicá ncha tutú núú yódó tnuní
ncha nàcuáa nduu sá ní quide ñⁿ
ñáyi-áⁿ, te ní nandicá tucu ingá
tutú núú yódó tnuní ncha ñáyi ní
nanihí tàhú, te ncha ñáyi ní xihí
ní cùu xínutnì-yu núú Yá Ndióxi
cundáá cuéchi-yu, te ncha nàcuáa
nduu ncha cuéchi-yu yodo tnuní
núú nchaa tutú-áⁿ ducaⁿ cùndáá.
¹³ Te ncha ñáyi ní xihí xití ndute
lámár, ndihí ncha ñáyi ní xihí núú

ñuhu yìchí nchaa ñáyiú-áⁿ cundáá cuéchi-yu nàcuáa ní quidé-yu ìⁿ ìⁿ-yu. ¹⁴ Te vitna te vá cùú-gá ñáyiú chí ñá túú-gá tnúhu xihí, te nchaa ñáyiú ñuhu núú ñùhú núú càyú ñáyiú-áⁿ cùú-yu ñáyiú ní xíta nihnu ní caa ní quíhíⁿ. ¹⁵ Te ducaⁿ chí nchaa ñáyiú ñá túú yòdo tnuní núú tütú núú yódó tnùní nchaa ñáyiú naníhí tãhú ní dáquëe ñaha Yã Ndiõxí xii-yu núú ñùhú núú càyú.

21

Andiu sàa ndihi ñuyú sáa

¹ Te sátá dúcáⁿ te ní xiní-í andiu sàa ndihi ñuyú sáa, te andiu sà ndécú ðihna ndihi ñuyú sà ndécú ðihna ní ndóñuhú-xí, te tnàhá lámár ní ndóñuhú-xí. ² Te yúhú te Juáá ní xiní-í ñuú Jerusálén sáa ní quée-xi núú ndécú Yã Ndiõxí, te ñuú-áⁿ cùú-xí ñuú méé-gá, te ío vii càa chí càa datná cáa ìⁿ ñadìhí xíchí tnàndaha. ³ Te ní tecú dóho-í níhi ní cáháⁿ ìⁿ sá ní cáháⁿ andiu, te càchí-xi:

—Chí cùndèdóho ìⁿ tnúhu na càháⁿ-í-a: Yã Ndiõxí ndécú ndihi-gá cue ñáyiú vitna, te ducaⁿ-ná cundecu ndihi ñaha-gá xii-yu, te ðiu-yu cùú-yu ñáyiú cùu cuendá-gá, te vá ìⁿ ndùu ìⁿ quíú-gá te dañá ñaha-gá xii-yu. ⁴ Te mee Yã Ndiõxí cada-gá sá ñà túú tnàhí-gá ná caní iní-yu cundecú-yu, te ní vã quíní-gá-yu tnúhu xihí, te ní vã quíní-gá-yu tnúhu ndàhyú, te ní vã quíní-gá-yu tnúhu ndihú iní-xi, te ní vã quíní-gá-yu tnúhu cùhú, chí nchaa sá ní xiní-yu ñuyú ðihna vá quíní-gá-yu vitna —duha càchí sá ní cáháⁿ-áⁿ.

⁵ Te Yáa núcòo núú xilé váha-áⁿ ní cachí tnúhu-gá xii-í, te càchí-gá:

—Yúhú quídè-í nàcuáa nduu saa nchaa sá cùndècu vitna. Te vitna chido tnùní-n ìⁿ núú tütú nchaa tnúhu sá ní cáháⁿ-í-a, chí nchaa tnúhu-a cùu-xi tnúhu ndáa cuiti —duha càchí-gá.

⁶ Te dàtnùní ní cachí tnúhu tucu-gá xii-í:

—Sa ní xínu cava nchaa chiuⁿ ní sani iní-í cada-í, te ðiu-ni yúhú cùú-í Yáa sa ndècu ndéé cùtnàhá ní ngáva ñuyúú, te ðiu-ni-í cundecu-í ní caa ní quíhíⁿ. Te nchaa ñáyiú cùní tuha ñaha xii-í te cada iní-yu sá dàtná ndute cùu-xi sá cuãñaha tãhú-í xii-yu candeca-xi iní-yu ní caa ní quíhíⁿ. ⁷ Te nchaa ñáyiú na cùndee iní yáha nándi sá ná yáha-yu sá cuendá-í, te ñáyiú-áⁿ nduu tãhú-yu cundecu váha-yu, te yúhú cuu-í Ndiõxí-yu, te ducaⁿ méé-yu cuú-yu déhe-í. ⁸ Te nchaa ñáyiú na yúhú ndoho cuendá-í quíhíⁿ-yu núú ñùhú núú càyú ndihi ñáyiú ñá túú sàndáá iní ñáhá xii-í, ndihi ñáyiú quide nándi nchaa sá cuèhé sá dúhá, ndihi ñáyiú sàhni tnaha, ndihi ñáyiú ndècu ichi ðii òní, ndihi ñáyiú quide nduu, ndihi ñáyiú chíñuhu nchaa sá càchí-yu cùu ndiõxí ní cadúha cue tée ñuyúú-a, ndihi ñáyiú dàcuandehnde, nchaa ñáyiú ducaⁿ xiquide-áⁿ cuíta nihnú-yu chí quíhíⁿ-yu núú ñùhú núú ñùhú àzufré càyú-xi —duha ní cáháⁿ Yã Ndiõxí ní cachí tnúhu-gá xii-í.

Ñuú Jerusálén sáa

⁹ Te núú ùsá espíritú xínehe tícùú ñùhú tnúhu ndòho, te ìⁿ-xi ní quixi-xi te càchí-xi:

—Taquixi, te na dànehé ñàhá-í xii-n nchaa ñáyiú cùu cuendá Yáa cáa dàtná cáa ìⁿ mbéé quiti ní dánícuèhé-güedé, ñáyiú-áⁿ cada iní-n sá cùú-yu dàtná ìⁿ xíchí cuéchí vitna tnàndaha, te ducaⁿ càda iní-n sá cùú-yu chí cundecú-yu ndihi-gá —duha ní cachí tnúhu espíritú-áⁿ xii-í.

¹⁰ Te òré quídé ñaha espíritú Yã Ndiõxí xii-í nàcuáa càchí iní-xi, te espíritú néhé tícùú-áⁿ ndécá ñaha-xi xii-í cuásaá ìⁿ tìndúú dùcúⁿ, te xíaⁿ ní dànehé núú ñáhá-xi xii-í ñuú Jerusálén te ñuú-áⁿ ní quée-xi

núú ndécú Yá Ndiöxí, te ñúú-án cúú-xí ñúú méé-gá. ¹¹ Te ñúú-án ïo càhnu cuu-xi chi ducaⁿ ïo càhnu cuu mee-gá, te dátäsaⁿ-xi dátäná dátäsaⁿ yúú vâha sá nání jâspé yúú cáá dátäná cáá vidriú sá tûu ingá xio ndâa sátá-xi. ¹² Te ni càndéé yuhu ñúú-án sũúni ðúcúⁿ nchaa sá ñúhú ðoco, te nchií úxúú yuyèhe-xi, te ndi tnahá ìⁿ ìⁿ yuyèhe-án xîndecu ìⁿ caa espíritú xínú tuèchi núú Yá Ndiöxí. Te ndi tnahá ìⁿ ìⁿ yuyèhe-án yódó tnùnì ðiú ìⁿ caa xichi cue ñáyiú isrâél. ¹³ Te úní yuyèhe-xi nchií ndâa xio nacuaá quène nchíanchii, te úní tucu yuyèhe-xi nchií ndâa xio cuha nacuaá quène nchíanchii, te úní tucu yuyèhe-xi nchií ndâa xio datni nacuaá quène tucu nchíanchii. ¹⁴ Te sá ñúhú ðoco-án chi úxúú tnahá yúú cúú cìmentú-xi, te ndi tnahá ìⁿ ìⁿ yúú-án ndèé ìⁿ caa ðiú cue téé ní cáháⁿ tnúhu Yaá cáá dátäná cáá ìⁿ mbéé quiti ní dánicuehé-güedé, te ðiú mee-gá ní táuchíúⁿ-gá ní cáháⁿ-güedé tnúhu-gá.

¹⁵ Te espíritú sá càháⁿ ndihi ñaha xì-i-án néhé-xí ìⁿ sá cání nî cuáha mee-ni díhúⁿ cuááⁿ, te ndihi xíáⁿ chicùhá-xi ñúú-án, ndihi sá ñúhú ðoco ñúú-án, ndihi nchaa yuyèhe-xi. ¹⁶ Te ñúú-án ìⁿ-ni nèhe-xi cuendá quèhéⁿ-xi ndihi cuendá càni-xi, te espíritú-áⁿ ní chicùhá-xi ndihi sá néhé-xí-áⁿ ñúú-án, te nèhe-xi ócó úú ciëndú mîl mètrú sá cání te ðiú-ni ducaⁿ nèhe-xi cuendá quèhéⁿ-xi, te ðiú-ni ducaⁿ nèhe-xi sá ðúcúⁿ nchaa vehe caa ñúú-án. ¹⁷ Te dátñuní ní chicùhá-xi sá ñúhú ðoco ñúú-án, te xíáⁿ néhé-xí ùnídicó cúmí mètrú sá ðúcúⁿ, te ní chicùhá-xi dátäná chicùhá cue ñáyiú ñuyíú-a.

¹⁸ Te sá ñúhú ðoco-án nî cuáha mee-ni yúú vâha yúú sá nání jâspé, te ñihí ñúú-án cúú-xí mèè-ni díhúⁿ cuááⁿ, te càa datnä cáá vidriú sá ïo vâha càndoo te túu ndâa ingá xio. ¹⁹ Te ndi úxúú yúú cúú cìmentú

sá ñúhú ðoco-án ndèé ndí díⁿ núú yúú vii càa sátá-xi, te yúú díhna ndèé mee-ni yúú vâha sá nání jâspé sátá-xi, te yúú cúú ùú ndèé tucu ingá núú yúú vâha sá nání zàfirú sátá-xi, te yúú cúú ùní ndèé tucu ingá núú yúú vâha sá nání àgatá sátá-xi, te yúú cúú cùmí ndèé ingá núú yúú vâha sá nání èsmeraldá sátá-xi. ²⁰ Te yúú cúú ùhúⁿ ndèé tucu ingá núú yúú vâha sá nání ònicé sátá-xi, te yúú cúú ìñú ndèé tucu ingá núú yúú vâha sá nání còrnalíná sátá-xi, te yúú cúú ùsá ndèé tucu ingá núú yúú vâha sá nání crìsólítú sátá-xi, te yúú cúú ùná ndèé tucu ingá núú yúú vâha sá nání bèrilú sátá-xi, te yúú cúú ìⁿ ndèé tucu ingá núú yúú vâha sá nání tòpacíú sátá-xi, te yúú cúú ùxí ndèé tucu ingá núú yúú vâha sá nání crìsopásá sátá-xi, te yúú cúú ùxí ìⁿ ndèé tucu ingá núú yúú vâha sá nání jàcintú sátá-xi, te yúú cúú ùxúú ndèé tucu ingá núú yúú vâha sá nání àmatístá sátá-xi. ²¹ Te ndi úxúú yuyèhe sá ñúhú ðoco-án cúú-xí mèè-ni yúú vâha sá nání pèrlá, te ndùu nî yúú cúú ìⁿ ìⁿ yuyèhe-án. Te tnuú cáhnú ndècu xití ñúú-án cúú-xí mèè-ni díhúⁿ cuááⁿ, te càa-xi datnä cáá vidriú sá tûu ndâa ingá xio.

²² Te ní xiní-í sá ñâ túú vèhe núú chíñúhu ñáyiú Dútú Ndiöxí cáá ñúú-án, chi mee-nâ Dútú Ndiöxí Yaá quidé nchâa-ndi túhú sá vâha ndècu ñúú-án, ndihi Yaá cáá dátäná cáá ìⁿ mbéé quiti ní dánicuehé-güedé. ²³ Te ñúú-án ñâ túú-gá xíní ñúhu-xi nchíanchii dayèhé-xi, te ni yóó ñâ túú-gá xíní ñúhu-xi, chi mee-nâ Yá Ndiöxí dáyèhé-gá ñúú-án ndihi Yaá cáá dátäná cáá ìⁿ mbéé quiti ní dánicuehé-güedé. ²⁴ Te cue ñáyiú nchaa ñúú cáá ñùyíú, ñáyiú ní naníhí tàhú xîndecu ñúú-án dáyèhé-gá núú-yu, te nchaa cue téé yîndaha ñaha xíi-yu nèhe-güedé sá

yíñùhu sá cúú-xí ñúú-áⁿ, te guide cahnu ñaha-güedé xii-gá. ²⁵ Te yuyèhe ñúú-áⁿ ñà túú tnàhí nàndedí, te ñúú-áⁿ ñà túú tnàhí cùndiquíⁿ. ²⁶ Te nchaa ñáyiu nèhé-yu sá yíñùhu sá cúú-xí ñúú-áⁿ te guide cahnú-yu Yá Ndióxi. ²⁷ Te ñúú-áⁿ vâ cúú cùndecu ni ñá yiu ndècu ichi cuehé ichi duha, te ni ñá yiu ndehnde, te ni ñá yiu guide sá ñà túú cùu váha iní Yá Ndióxi vâ cúú cùndecu-yu ñúú-áⁿ, chi mee-ni ñáyiu naníhí tàhú ñáyiu yòdo tnuní núú tütú Yaá cáá dàtná cáá ñá mbéé quiti ní dánicuehé-güedé, mee-ni ñáyiu-áⁿ cundecú-yu ñúú-áⁿ.

22

¹ Te sá tá dúcáⁿ te ñúú-ni espíritu-áⁿ ní dánèhé núú ñáhá-xí xii-í yúte núú ñúhú ndùte candoo canine, te ndute-áⁿ candeca-xi iní ñáyiu ni caa ni quíhíⁿ, te ndute-áⁿ quée-xí mèi núú núcõo Yá Ndióxi ndihí Yaá cáá dàtná cáá ñá mbéé quiti ní dánicuehé-güedé. ² Te cuádava tnuú cáhnú yáha xiti ñúú-áⁿ cáá yúte-áⁿ, te xio xio yuhu yúte-áⁿ níhnú yùtnu cuuⁿ sávidí-xi, te sávidí nchaa yutnu-áⁿ cúú tucu-xi sá cándeca iní ñáyiu ni caa ni quíhíⁿ, te nchaa yutnu-áⁿ cúúⁿ sávidí-xi úxúú xito ñá cuía chi ndi tnahá yóó cúúⁿ sávidí-xi, te nchaa ndaha-xi cùu-xi tátna sá cúú-xí nchaa ñáyiu. ³ Te vâ yõo ñá-gá cada ñá sá ñà túú cùu váha iní Yá Ndióxi ñúú-áⁿ. Chi ñúú-áⁿ núcõo mee Yá Ndióxi ndihí Yaá cáá dàtná cáá ñá mbéé quiti ní dánicuehé-güedé xítaxi tnùní-gá, te nchaa ñáyiu xinu cuechi núú-gá cada càhnu ñáhá-yu xii-gá. ⁴ Te nchaa ñáyiu-áⁿ cundehe núú-yu Dútú Ndióxi, te tneé-yu cundee ñúú-gá. ⁵ Te ñúú-áⁿ vâ quíhí-gá-yu níú, te ni vâ cánèhe chiuⁿ-gá-yu ñúhú cutnùní núú-yu, te ni nchíanchii ñá túú-gá xíní ñúhu-xi dayehé ñúú-áⁿ chi mee Dútú Ndióxi dáyhé-gá, te ni caa

ni quíhíⁿ cunúú-yu cundecú-yu ñúú-áⁿ.

Sa ta cùyatni nduu quixi tucu Xítoho Jesucristú

⁶ Te sá tá dúcáⁿ te ní cachí tnúhu espíritu xínú cuèchi núú Yá Ndióxi-áⁿ xii-í:

—Nchaandi túhú tnúhu-a cùu-xi mee-ni tnúhu ndáá cuiti. Te Yá Ndióxi Yaá dácàhu iní nchaa cue téé càháⁿ tnúhu-gá nàcuáa cáháⁿ-güedé ní tendaha-gá ñá espíritu xínú cuèchi núú-gá ní quixi-xi ní dánèhé-xi nchaa ñáyiu xínu cuechi núú-gá nchaa nàcuáa cada-gá, te vâ cùyàa-gá ducaⁿ càda-gá —duha càchí espíritu-áⁿ.

⁷ Te ní cáháⁿ Xítoho Jesucristú, te càchí-gá:

—Ío ndíhi quixi tucu-í!

‘Te ío váha tnahá nchaa ñáyiu tnèi nchaa tnúhu càháⁿ Yá Ndióxi yódó tnùní núú tütú-a! —duha càchí-gá.

⁸ Te yúhú té Juáá ní tecú dóho-í nchaa nàcuáa ní ngódó tnùní núú tütú-a, te ní xíní núú-í nchaa nàcuáa cada-xi ndéé cueé-gá. Te sá tá dúcáⁿ ní cuu te ní ngüíhí xiti-í núú espíritu sá ní dánèhé núú ñáhá nchaa xíáⁿ cuendá chiñuhu-í-xi ní cùu. ⁹ Te ní cachí-xi:

—Vá dúcáⁿ càda-n, chi yúhú dícó xínú cuèchi-í núú Yá Ndióxi dàtná cúú yòhó ndihí nchaa dava-gá ñáyiu ndècu ndihí-n ichi-gá càháⁿ-ndó tnúhu-gá, ndihí nchaa ñáyiu tnèi nchaa tnúhu ndéé núú tütú-a, te xíáⁿ càchí-í sá vâ dúcáⁿ càda-n, chi mee Yá Ndióxi ducaⁿ chiñuhu-n-gá —càchí espíritu-áⁿ xii-í.

¹⁰ Te ní cachí tnúhu tucu-xi xii-í, te càchí-xi:

—Vá chídàhu-n ni ñá tnúhu Yá Ndióxi ndéé núú tütú-a, chi sa ní cuyatni cada-xi nchaa nàcuáa ndéé tnuní. ¹¹ Te dañá sá ncháá ñáyiu ndècu ichi cuehé ichi duha na cùndecu-ní-yu ichi-áⁿ, te ducaⁿ-ni dañá-n nchaa ñáyiu guide nándi-gá nchaa sá cuehé sá dúhá ná càda nahi-ní-yu nchaa sá cuehé sá

dúhá sàni iní-yu, te nchaa ñáyiú quide váha te ducaⁿ-ni na càda váha-yu cundecú-yu, te nchaa ñáyiú quide nchaa nacuáa cùu váha iní Yá Ndiòxí te ñu-ni ducaⁿ na càdà-yu cundecú-yu —duha càchí espíritú-áⁿ.

¹² Te ní cachí Xítohó Jesucristú:

—Cundedóho-n tnùhu na càháⁿ-í-a. Ío ndíhi quixi tucu-í, te canehé-í nchaa sá ndúú tǎhú ñáyiú quixi, te nacuáa ndúu chiúⁿ ní quide-yu ñⁿ ñⁿ-yu te ducaⁿ cùnduu sá cuǎñaha-í nduu tǎhú-yu. ¹³ Te yúhú cùu-í Yaá sa ndècu ndéé cùtnáhá ní ngáva ñuyúú, te ñu-ni-í cundecu-í ni caa ni quíhíⁿ —duha càchí-gá.

¹⁴ Te váha tǎhú nchaa ñáyiú sa ní nduu ndoo ní nduu nine iní-xi, chi ñáyiú-áⁿ ní nduu tǎhú-yu quíhu-yu xití ñuú-áⁿ, te caxí-yu sávidí yutnu nùtní-áⁿ te xǎⁿ candeca-xi iní-yu ni caa ni quíhíⁿ. ¹⁵ Te ñuú-áⁿ vǎ cùú quíhu ni ñⁿ ñáyiú ndècu ichi cuehé ichi duha, ni cuè ñáyiú quide nduu, te ni cuè ñáyiú ndècu ichi díí iní, te ni cuè ñáyiú sàhni tnaha ñáyiú-xi, te ni cuè ñáyiú chìñuhu nchaa sá ní cadúha cue téé ñuyúú-a càchí-yu cùu ndiòxí, te ni cuè ñáyiú tnáhá iní dacuàndehnde, te ni ñⁿ ñáyiú ducaⁿ xiquide vá ndúú tǎhú-yu quíhu-yu xití ñuú-áⁿ.

¹⁶ Te ní cáháⁿ tucu Xítohó Jesucristú, te càchí-gá:

—Yúhú Xítohó Jesucristú ní tendaha-í espíritú xínú cuèchi núú-í cuendá cachí tnúhu-xi xii-n nacuáa ndúu tnúhu cùñaha-n xii nchaa ñáyiú ndècu ndíhi-n ichi-í dacuáha tnúhu-í ñⁿ ñⁿ ñuú. Te yúhú cùu-í mei ñàní tnáhá ndíi Dàvíí, te cada iní-n sǎ cùu-í dàtná ñⁿ chodíní quiti quène datneé —duha càchí-gá.

¹⁷ Te nchaa ñáyiú cùu cuendá Xítohó Jesucristú Yaá cáá dàtná cáá

ñⁿ mbéé quiti ní dánicuèhé-güedé, ñu-ni ñáyiú-áⁿ cùú-yu ñáyiú cada iní-ó sǎ cùú-yu ñⁿ ñadíhí xíchí tnándaha ndíhi ñaha xii-gá, te ñáyiú-áⁿ ñⁿ-ni càháⁿ-yu ndíhi Espíritú Yá Ndiòxí, te xǎháⁿ-yu ndíhi Espíritú-gá xii nchaa dava-gá ñáyiú:

—Chí táquixi —cachí-yu xǎháⁿ-yu ndíhi Espíritú Yá Ndiòxí.

Te nchaa ñáyiú ducaⁿ ndédóho tnúhu-áⁿ vitna, te xini ñuhu-xi ducaⁿ cáháⁿ-yu tnáhá-yu cùñáhá-yu xii nchaa dava-gá ñáyiú-áⁿ, te nchaa ñáyiú cuení tuha ichi-gá te na quixí-yu, te dicó ducaⁿ cùu tǎhú-yu sǎ cándeca iní-yu ni caa ni quíhíⁿ.

¹⁸ Te nchaa nchòhó ñáyiú ndédóho nchaa nacuáa càháⁿ tnúhu Yá Ndiòxí ndéé núú tütú-a càháⁿ-í dóho-ndo. Te núú ñⁿ ñáyiú na còdo-gá tnúhu chido tnùní-yu núú tütú-a, te Yá Ndiòxí ío dandóho ñaha-gá xii-yu chi yáha-yu nchaa tnúndóho yodo tnuní núú tütú-a te núú ducaⁿ na càdà-yu. ¹⁹ Te núú ñⁿ ñáyiú na chidáhu dava tnúhu Yá Ndiòxí ndéé núú tütú-a te ñáyiú-áⁿ vǎ ndúú tǎhú-yu cundecú-yu ñuú-gá, te ni vǎ ndúú tǎhú-yu sǎ cándeca iní-yu ni caa ni quíhíⁿ dàtná yódó tnùní núú tütú-a.

²⁰ Te Xítohó Jesucristú Yaá càháⁿ sǎ ncháá tnúhu-a cùu-xi tnúhu ndáá ní cáháⁿ-gá ní tecú dóho-í, te càchí-gá:

—Ndáá sǎ ío ndíhi quixi tucu-í — duha càchí-gá.

Te yúhú ní xáhaⁿ-í xii-gá:

—Ducaⁿ na cùnduu, taquixi yohó Xítohó Jesucristú —duha ní xáhaⁿ-í xii-gá.

²¹ Te Xítohó Jesucristú ío na chindee chitúu ñaha-gǎ xii-ndo ncháa-ndo. Te ducaⁿ na cùnduu. Te ío chí cǎdá ndèe iní-nǎ vitna.